



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

**Tusi Kap wale
Úhinykõu
Ehac, ke
Úhinykõu ae
teb Únyi ...**

2234.122.9

Harvard College Library



GIFT OF THE
BRITISH AND FOREIGN
BIBLE SOCIETY
LONDON



TUSI KAP

Bible Society. (1901.)

WALE

ÛHIHINYKÖU EHAC,

KE

ÛHIHINYKÖU AE TEB ÛNYI

ADRE WIA KA HNYI

HWEN IAI.

London :

BRITISH AND FOREIGN BIBLE SOCIETY.

1901

224.122.9
3

Harvard College Library

Sept. 23, 1910

Gift of the

British & Foreign Bible Society

THE BIBLE IN THE IAIAN LANGUAGE SPOKEN IN UVEA
LOYALTY ISLANDS.

IEN JE TUSI HIA THITHÖ HNYI TUSI KAP.

ÛHIHINYKÖU EHAC.

Genese	5	At Khet	595
Esodo	52	Khumöng Hwanyi Solomona	602
Levitiko	91	Isaia	607
Numera	119	Jeremia	655
Deuteronomi	159	Je tenge anyi Jeremia	709
Josua	194	Ezekiela	715
Hnyat Owisa	217	Daniela	764
Rutha	240	Hosea	778
I. Samuela	244	Joela	785
II. Samuela	274	Amosa	788
I. Je Than	300	Obadia	794
II. Je Than	329	Jona	795
I. Man Ûlabainy je Than	357	Mika	797
II. Man Ûlabainy je Than	384	Nahuma	801
Ezera	416	Habakuka	803
Nehemia	425	Zefania	805
Esetera	439	Hagai	807
Jobu	446	Zakaria	809
Ta je Salamo	479	Malaki	817
Ta je Vejec	566		

ÛHIHINYKÖU AE TEB ÛNYI.

Mataio	823	I. Timoteo	1019
Mareko	854	II. Timoteo	1022
Luka	874	Tito	1025
Ioane	907	Filemona	1027
Ta je Huliwa	932	Heberu	1027
Roma	963	Iakobo	1038
I. Korinito	977	I. Peteru	1041
II. Korinito	990	II. Peteru	1045
Galatia	999	I. Ioane	1048
Efeso	1003	II. Ioane	1051
Filipi	1008	III. Ioane	1052
Kolose	1011	Juda	1053
I. Thesalonika	1014	Hna Omanená	1054
II. Thesalonika	1017		

GENESE

TUSI A BÂN ANYI MOSE.

HNYIMAKAN 1.

HABA hnyi can Khong ame op drany me hmeledrany. 2 Ke haba hmeledrany ame ba hwenöiny ke ba önyen ; ke ka e menekholom hon dok ae dit : k' ame nap Hanon Khong hon je köiö. 3 Ke Khong ame ha, ka habe, Lany jut : k'ame lany dö. 4 Ke Khong ame wá lany a únyi ae so : ke Khong ame sihnyigöulen lany me menekholom. 5 Ke Khong ame hwenyi ien lany, me, Bong, ke e ame hwenyi ien menekholom, me, Hnyinghet. Ke e hu sahac me e hu hnyomakatu, wale bong a khaca.

6 Ke Khong ame ha, ka habe, E so e me hu ke bwang hnyi wanben je köiö, me me bi hnyigöulen je köiö únyi hnyi ke je köiö. 7 Ke Khong ame ányá bwang, me sihnyigöulen je köiö eú hmelen bwang, únyi hnyi je köiö ethö hon bwang : ke e but e. 8 Ke Khong ame hwenyi ien bwang, me, Drany. Ke e hu sahac me e hu hnyomakatu, wale ke bong a loiny.

9 Haba Khong ame ha, ka habe, E so adre me úkhacakouá ta je köiö eú hmelen drany ka hnyi dok a khaca me me manen dut dok ae mada : ke e but e. 10 Ke Khong ame hwenyi ien dok ae mada, me, Káná ; ke haba ta je köiö adre úkhacakouá, e ame hwenyi ien, me, Köiö : haba Khong ame wá a e so. 11 Haba Khong ame ha, ka habe, E so káná ame he ka okúá hna önying, me úö ae ometu ame he ka hu önyen wan, me úö ae wa ame he ka hu wan, wale ae hu önyen hnyin, hoton bongon. 12 Ke haba káná ame okúá thö hna önying, ke úö ae ometu ame hu önyen wan hoton bongon e, me úö ame wa ae hu önyen hnyin, hoton bongon ; haba Khong ame wá a e so. 13 Ke e hu sahac me e hu hnyomakatu, wale ke bong a kuniny.

14 Haba Khong ame ha, ka habe, E so he

ka hu ta je melam hnyi bwanginy drany ethö, me me bi hnyigöulen lany me lit ; ke haba je únyi e me hnán ta je haten, me ta je úen, me ta je bong, me ta je huna : 15 ke wale minya e, a hnán ta je melam hnyin bwanginy drany ethö he ka omelamá hmeledrany : ke e but e. 16 Ke Khong ame ányá li melam a lo ae gan ; haba melam ae gan hmá, me hnán musó lany, ke haba melam ae úhnyúkong hnán musó lit : k' ame ányá minya ta je okhú. 17 Haba Khong ame ip ta je únyi e hnyi bwanginy drany ethö me me he ka omelamá hmeledrany, 18 me he ka musó lany me lit, me he ka bi hnyigöuleny lany me lit : ke Khong ame wá a e so. 19 Ke e hu sahac me e hu hnyomakatu, wale ke bong a vakiny.

20 Haba Khong ame ha, ka habe, E so ame he je köiö ka odedo ta je únyi ame bwebwet ae hu möt, ke so ame gá ethö hon káná je meno ame gá, hnyi bwanginy drany ethö. 21 Ke Khong ame op je wá ae gan hmá, me ta je únyi hia thithö ae möt ame bwebwet, waleji ame odedo hnen köiö, hoton je ve bongon, me ta je meno hia ae hu labenyin, hoton je bongon : ke Khong ame wá a e so. 22 Ke Khong ame hahnahici ödra, haingen, ka habe, Si but, me dudu but, me ounöngótá thö köiö, k' e so e me dudu but je meno ame gá hnyi hmeledrany. 23 Ke e hu sahac me e hu hnyomakatu, wale ke bong a thabúnginy.

24 Haba Khong ame ha, ka habe, E so káná ame öduduá ta je meno ame mená, hoton je ve bongon, wale je meno a vak cadra, me ta je únyi ame iyáú, me je menoiny hnyot, hoton je ve bongon : ke e but e. 25 Ke Khong ame ányá je menoiny hnyot, hoton je ve bongon e, me ta je meno a vak cadra, hoton ta je ve bongon, me ta je meno hia thithö adre me iyáú hon káná, hoton je ve bongon : ke Khong ame wá a e so. 26 Ke haba Khong ame ha, ka habe, E so ate me

op at hnyi wi öta, me tha úcú m'öta : ke hamödra he ka musó ta je wá eú hnyi köiö, me ta je meno ame gá ethö, me ta je meno a vak cadra, me hmeledrany hia thithö, me ta je meno ame iyáú wale adre me iyáú hmeledrany. 27 Ke Khong ame op at ae we e bi, ame op e me we Khong ; e ame up ödru бага me momo. 28 Ke Khong ame hahnahici ödru : ke haba Khong ame ha ködru, ka habe, Si but, me dudu but me ödedoá hmeledrany, me hom úhnyúkongo ; me musó thö ta je wá eú hnyi köiö, me ta je meno ame gá ethö, me ta je únyi hia ae möt ame iyáú hmeledrany. 29 Ke Khong ame ha, ka habe, Wá bi, oge hia but ham köbu ta je úö hia ae ometu ae hu önyen hnyin, a hnyi hon hmeledrany hia thithö, me ta je úö hia ae wa me hu önyen hnyin ; wale me hnân ö 'bu : 30 Ke haba ta je úö ae ometu ae hat, me, wale hnân an ta je menoiny hnyot hia, me ta je meno hia ame gá ethö, me ta je meno hia ame iyáú hmeledrany, a ta je únyi ame menâ : ke e but e. 31 Ke Khong ame wá ta je únyi hia thithö e ame ányá, ke wá bi, e so hmönyin. Ke e hu sahac me e hu hnyomakatu, wale bong a siksiny.

HNYIMAKAN 2.

KE ame umo thö drany me hmeledrany me ta je únyi hia thithö eú hnyin. 2 Ke haba hnyi bong a seveniny Khong ame oumo anyin ta je huliwa waleji e ame ányá. 3 Ke haba Khong ame hahnahici bong a seveniny, me okabá e : anyin a e ame mená hnyin, únyi hnyi anyin ta je huliwa hia thithö waleji Khong ame op me ányá. 4 Walang je bongon ioiny drany me hmeledrany, waleji hnyi úen adre op li únyi e, hnyi bong Iehova Khong ame ányá hmeledrany me drany. 5 Ke tiga ba hnyeuten hnyei hnyi káná, ke tiga ca kú thö khölakiny hnyei : anyin a Iehova Khong ame tiga ca ota we ka hnyi hon káná, ke tiga ba at he ka belöká káná ; 6 k' ame ölö thö hau únyi hnyi káná me okhubetá hia hon káná. 7 Ke haba Iehova Khong ame op at ge sesáiny káná, me mená ka hnyi li hnyingöiny homenáiny möt ; ke haba at ame wia me me hanu ae möt. 8 Ke Iehova Khong ame belöká ke hnyei hnyi ke keihen Edena e deiö ; k' ame ip eling at waleji a hia but op. 9 Ke Iehova Khong ame okúá únyi hnyi káná ta je úö hia thithö ae hmanenang at ka wá, me so hnân han ; me úöiny möt

minya hnyi wanben hnyei, me úöiny wá-hmakhmeto so me kong. 10 Ke ame hingölö úheny hnyi Edena wagewe hnân he ka hú hnyei belök ; k' ame vese but úheny e me me je vheiny a vak. 11 Haba ien at a bán, me, Pisona : wale at ame igigilö hia hnyei Havila, waleling ae hu gol ; 12 ke so but goliny hnyei e : e minya eling bedola me veto soama. 13 Ke haba ien wagewe a loiny, me, Gibona : wale at ame igigilö hnyei Kuza. 14 Ke haba ien wagewe a kuniny, me, Hidekela : wale ame he deiö Asuria ai. Ke Euferate wagewe a vakiny. 15 Ke haba Iehova Khong ame hom at, me ip ju e hnyi hnyei Edena he ka belöká me tuö. 16 Ke Iehova Khong ame húna ka at, ka habe, U me he ka han monu únyi hnyi ta je úö hia thithö hnyi hna belök : 17 ke haba úöiny wáhmakhmetoá so me kong, me, u me ca he ka han únyi hnyin : anyin a haba hnyi bong u me he ka han hnyin, e hnathu u me he ka mokcu.

18 Haba Iehova Khong ame ha, ka habe, E ca so e he ka hake laba at ; oge me he ka ányá hobi káu ke úhadru ae úcú káu. 19 Ke Iehova Khong ame op únyi hnyi káná ta je menoiny hnyot hia, me ta je meno hia ame gá ethö ; me hum ödra ka at me me wá ia ien e ame he ka hwenyi ödra : ke haba ien ta je meno ae möt hia ame hwenyi iödra at, wale ien bi. 20 Ke ame hwenyi ien ta je meno hia a vak can hnen at, me ta je meno ame gá ethö, me ta je menoiny hnyot hia ; ke adre tiga ca wá hobi káu at ke úhadru ae úcú káu. 21 Ke Iehova Khong ame kuná mokut hnying ka hnyi hon at, me e ame mokut ; me e ame hom but ke jeien hvaken, k' ame hlöng hmetu ju hwaban ge utiöiny : 22 ke haba jehvak wale Iehova Khong ame hia but hom únyi ge at, me ame op me me momo but, me su thö e ka at. 23 Ke haingen at, ka habe, Walang jö hanen je jeiök, me utiö hanen vik : adre me he ka hwenyi ien, me, Momo, anyin adre hom únyi ge бага. 24 Waleling me me he at ka hna kamen me hinyen, me kece ka áian ; k' ame he ka khaca thibi unyidru. 25 Ke ödru lo ödru me he thu, wale lia-máian, k' ödru me ca hmehma bi.

HNYIMAKAN 3.

KE e khana he ka bibihwakecin hnen on, hon ta je menoiny hnyot hia, hnö Iehova Khong hna op. Haba e ame ha ka momo ka habe. Hawa, a um dö ha

Khong, ka habe, Öbu ma ca he ka han únyi hnyi ta je úö hia thithö hnyi hnyeï? 2 Ke haingen momo ka on, ka habe, Adre hna köhmu he ka han wan ta je úö hnyi hnyeï: 3 ke so bi haba wan úö waleji hnyi wanben hnyeï, a hia but ha Khong, ka habe, Ca he öbu ka han wan, ke haba khaca, ca he öbu ka kálá, wá öbu nye mokcu. 4 Ke haba on ame ha ka momo, ka habe, Öbu me ca he ka wen mokcu: 5 anyin ae khana Khong a haba hnyi bong öbu ma han hnyin, wale ame he ka metá but li emaköbu, m'öbu me he ka helá but me Khong, ka wáhmakhmeto so me kong. 6 Ke a wá but momo úö, a e so hnân han, me hmanenang at ka wá, me úö ae únyi hnathu, me hnân ometá at, me haba momo ame tau wan, me han; k'ame ham minya ka áîân a tha e mē, me e ame munyi han. 7 Me ame metá but li emaködrü, me me khan' ödrü thö a ödrü me he thu; me ödrü me útibetkóuá ta je lan meta, me hnân hnamejidru. 8 Ke ödrü me löng hwo Iehova Khong ame ngeno hnyeï, hnyi ke hnyi ban bong ae menyik: ke haba Adamu me áîân ödrü me lubaduöng ge hnyimakö Iehova Khong hnyi ta je úö hnyi hnyeï. 9 Ke Iehova Khong ame hawo Adamu, me ha, ka habe, U a? 10 Ke haingen, ka habe, Oge löng ut hwâm hnyi hnyeï, ke oge ot, anyin oge me he thu; me inya oge me lubaduöng. 11 Me e ame ha, ka habe, Ia thumetu u m' u me he thu? Hawa, u je hia but han únyi hnyi úö waleji oge me húna köu, a u ma ca he ka han? 12 Haingö Adamu, ka habe, Haba momo u je hna könya me me tha e mönya, e ame ham könya únyi hnyi úö, me oge me hnyi han. 13 Haba Iehova Khong ame ha ka momo, ka habe, Ie únyi ang u je ányá? Haingen momo, ka habe, hnen on hna iyawö nya, m'oge me han. 14 Ke Iehova Khong ame ha ka on, ka habe, u je hnaúhangö but hon ta je meno a vak can hia thithö, me hon ta je menoiny hnyot hia thithö, anyin a u je ányá heláe; u ma he ka iyáúá hnyekom, me an sesáiny káná hnyi ta je bong hia bonginy ányám möt: 15 ke oge me he ka oiwahnaihmiönyi u me momo, me mátránám me mátrániny momo: e ame he ka kot bâm, ke u me he ka kot ohmáiny can. 16 Ke e ame ha ka momo, ka habe, Oge me he ka osehia ányám vec u ka erkin; u ma he ka hnokóá hnyi vec; ke u me he ka wem bi hmelen áîâm, ke e ame he ka musi u. 17 Ke e ame ha kö Adamu, ka habe, Anyin a u je hia

but löng hoton hwan áîâm, me han únyi hnyi úö waleji oge me nyibu u gan, me ha. ka habe, Ca he ka han únyi hnyin; awe hnaúhangö but káná únyi gam; ke u ma he ka han únyi hnyin hnyi vec hnyi ta je bonginy ányám möt hia; 18 k'ame he ka okúá köu ta je úö ae údedö me watetaföcö; ke u me he ka han je úö ae ometu hnyi ta hnyeï; 19 ke u me he ka han únyi ge khuniny hnyimákâm, ke ne o but ün u me he ka hmetu ka hnyi káná; anyin adre hum u únyi hnyin e; anyin a u sesáiny káná, ke u me he ka hmetu hmetu ka knyi sesáiny káná. 20 Haba Adamu ame hwenyi ien áîân, me, Eva; anyin a e hinyen tavat ae möt hia thithö. 21 Ke haba Iehova Khong ame ányá li úkhaú a unen meno hobi kö Adamu me áîân, me okhav' ödrü.

22 Haba Iehova Khong ame ha, ka habe, Wa bi, e úcü but at mötin, ame wáhma-khmeto so me kong; ke haba walang ang, wá e nye hinöbeny me hom minya únyi hnyi úö hnân melen, me han, me möt bi nyiele balua: 23 anyin a wale Iehova Khong ame obá but e únyi hnyi hnyeï Edena, me me belöká káná waleji adre hia but hom e únyi hnyin. 24 Waleling e ame obö Adamu but; ke e ame ip eiö hnyi hnyeï Edena ta je Kerubi, me bele vat ae ubáhlá ame wiwia ka hnyi je ke keihen hnyeï hia, me hnân tuö gethen ka hnyi úö hnân melen.

HNYIMAKAN 4.

KE Adamu ame khana áîân jia Eva; me ame erkin dut me hnöku Kaina, ke haingen, ka habe, Oge hia but kap at únyi ga Iehova. 2 Ke e ame hnokóá hmetu jia Abela a keiny. Haba Abela, me, at tuö mamoe, ke haba Kaina, me, at belöká káná. 3 Ke hwaban ke ta je bong, haba Kaina ame hom ke troban káná hnân hut kö Iehova. 4 Ke haba Abela, e ame hom únyi hnyi hna hat mamoe je lakon a bân me je meno ae pipikhenya. Ke Iehova ame oúnyihnathu Abela me anyin hut: 5 k'ame ca oúnyihnathu Kaina me anyin hut. Me Kaina ame hmönyin gan hmá, me khöt ut hnyimakan. 6 Haba Iehova ame ha kö Kaina, ka habe, Ieú gam u me hmönyám? k'ame khöt hnyimákâm geú? 7 U je ne ányá so, hawa adre me ca he ka köp u? ke u ka ca ányá so, awe, ame bate-tot hulö hnyi hwanuma: k'ame ke ka e hmélám weny, ke u ma he ka musö e.

8 Ke Kaina ame thumetu Abela a keiny. Ke tiga ödru hnyi ta hnyei haba Kaina ame tot kö Abela a keiny, me hlingâ. 9 Ke Iehova ame ha kö Kaina, ka habe, Ewa Abela a kem? Ke e amethu, ka habe, E ca khanö nya: hawa, inya at tuö keik? 10 Ke e ame ha, ka habe, Ieü e u je ânyâ? ame tenge konya ifucin dren kem ûnyi hnyi kânâ. 11 Ke walang ang u je hnaüha-ngö but ûnyi ge kânâ, waleji a memang ut me cem dren kem ûnyi hnyi hnyamâm; 12 u ka belökâ kânâ, ame ca he hmetu ka ohwenyingâ gânâ; ke u ma he bi u ka at baü, me at he monu eang hmeledrany. 13 Ke haingö Kaina ko Iehova, ka habe, E gan hmâ hwaban könya ke ca khanö nya he ka hok hnyokâ. 14 Wâ bi u je hia but obö nya hnyi bong ang ûnyi hnyi hon kânâ: ke oge me he ka iyong ut hnyimâ-kâm; ke oge me he bi nya ka at baü me he monu eang hmelen; wale m'adre me he ka hlingö nya hnen tavat hia adre me he ka ö nya. 15 Haba Iehova ame ha kâu, ka habe, Anyin a wale, haba at ame he ka hlingö Kaina, me, adre me he ka ibi oseven bi hwaban hmetu kâu, Ke haba Iehova ame bi hatö Kaina, wâ e nye hlingâ hnen ke at ame he ka wâ e.

16 Ke Kaina ame he but üheny hnyi hnyimakö Iehova, me laba hnyi hnyei Noda, Edena ke e deiö. 17 Ke Kaina ame khana thö äiân; me e ame erkin dut me hnöku Enoka: ke e ame otilâ ke taun, me hwenyi ien taun, hoton ien nokon, jia Enoka. 18 Ke Enoka ame hnöku Irada: ke Irada ame hnöku Mehujaela: ke Mehujaela ame hnöku Methusaela: ke Methusaela ame hnöku Lameka. 19 Haba Lameka ame hok lo momo; Ada ien ke at, ke Zila ien ke at. 20 Ke Ada ame hnöku Jabala: e kamen tavat adre laba hnyi je uma mano, me tren meno. 21 Haba ien keiny, me, Jubala: e kamen tavat hia adre khenen hom kitara me utköwi. 22 Ke haba Zila, me e ame hnöku Tubala-kaina, at ame op ta je ûnyi hia a bras me fao hnân subâ: ke haba Naama hani Tubala-kaina. 23 Ke haingö Lameka ka li äiân, ka habe, Ada me Zila lö, löng ju hok hofuc; Öbu laöiö Lameka lö, tevelöng ju ifucik: Anyin oge hia but hlingâ at, oge aatö gan, Ke hidröu, anyin a e ame okongu nya: 24 Adre ne he ka oseven bihwaban ga Kaina, Awe, sevente seven ga Lameka bi.

25 Ke Adamu ame khana hmetu äiân; me e ame hnokoâ da, me hwenyi ien Setha: anyin a haingen, A hia but Khong ham könya ke mätrân hwabö Abela; anyin a hia but Kaina hlingâ. 26 Ke haba Setha, adre hnokoâ nokon ke da; ke e ame hwenyi ien Enosa: wale ün ame bi hwân tavat he ka hawâ iö Iehova.

HNYIMAKAN 5.

WALANG tusiny je dö ûnyi ga Adamu. Haba hnyi bong Khong ame op at hnyin, e ame op e me we Khong; 2 e ame up ödru a бага me momo; ke e ame hahnahici ödru, me hwenyi iödru at, hnyi bong adre up ödru hnyin. 3 Haba Adamu ame möt hnyi khaca haded ke thöte ta je huna, me e ame hnokoâ ke da helâ me e bi, me we e; me hwenyi ien, me, Setha: 4 ke haba ta je bong bongu Adamu hwaban hnen hna hnöku Setha, me, eit haded ta je huna: ke e ame hnokoâ je da me in. 5 Ke haba ta je bong hia ame möt hnyin Adamu, me, nain haded ke thöte ta je huna: k' ame mokcu.

6 Haba Setha ame möt hnyi khaca haded ke thabûng ta je huna, me hnöku Enosa: 7 ke haba ta je hunainy möt anyi Setha hwaban hnen hna hnöku Enosa, me, eit haded ke seven, k' ame hnokoâ je da me in: 8 ke haba ta je bong hia bongu Setha, me, nain haded ke twelv ta je huna: ke ame mokcu.

9 Ke nainte ta je hunainy möt anyi Enosa, ke e ame hnöku Kainana: 10 ke eit haded ke fiftin ta je hunainy möt anyi Enosa hwaban hnen hna hnöku Kainana, ke e ame hnokoâ ta je da me in: 11 ke haba ta je bong hia bongu Enosa, me, nain haded ke thabûng ta je huna: ke ame mokcu.

12 Ke sevente ta je hunainy möt anyi Kainana, ke e ame hnöku Mahalaleel: 13 ke eit haded ke fâte ta je hunainy möt anyi Kainana, hwaban hnen hna hnöku Mahalaleel, ke ame hnokoâ ta je da me in: 14 ke haba je bong hia bongu Kainana, me, nain haded ke libenyita ta je huna: ke ame mokcu.

15 Ke sikste ke thabûng ta je hunainy möt anyi Mahalaleel, ke ame hnöku Jareda: 16 ke eit haded ke thöte ta je hunainy möt anyi Mahalaleel hwaban hnen hna hnöku Jareda, ke ame hnokoâ ta je da me in: 17 ke haba ta je bong hia bongu Ma-

halaleel, me, eit haded ke nainte faiv ta je huna : ke ame mokcu.

18 Ke khaca haded ke sikste tu ta je hunainy möt anyi Jareda, ke e ame hnöku Enoka : 19 ke eit haded ta je hunainy möt anyi Jareda hwaban hnen hna hnöku Enoka, ke ame hnokoá ta je da me in : 20 ke haba je bong hia bongu Jareda, me, nain haded ke sikste tu ta je huna : ke ame mokcu.

21 Ke sikste faiv ta je hunainy möt anyi Enoka, ke e ame hnöku Methusela : 22 ke Enoka ame labö tha he me Khong hnyi kun ta haded ta je huna hwaban hnen hna hnöku Methusela, ke ame hnokoá ta je da me in : 23 ke haba je bong hia bongu Enoka, me, kun ta haded ke sikste faiv ta je huna : 24 haba Enoka ame labö tha he me Khong : k' ame hia thiju ; anyin a Khong ame hom dö e.

25 Ke khaca haded ke eite seven ta je hunainy möt anyi Methusela, ke ame hnöku Lameka ; 26 ke seven haded ke eite tu ta je hunainy möt anyi Methusela hwaban hnen hna hnöku Lameka, ke ame hnokoá ta je da me in : 27 ke haba ta je bong hia bongu Methusela me nain haded ke sikste nain ta je huna : ke ame mokcu.

28 Ke khaca haded ke eite tu ta je hunainy möt anyi Lameka, k' ame hnoká da : 29 ke e ame hwenyi ien bi, me, Noa, ke haingen, Walang at ame he ka otubweli ötin ge anyitin huliwa, me vecin li hnyamöta únyi ge káná waleji a hangá Iehova. 30 Ke thabúng ta haded ke nainte faiv ta je hunainy möt anyi Lameka hwaban hnen hna hnöku Noa, ke ame hnokoá ta je da me in : 31 ke haba ta je bong hia bongu Lameka, me, seven haded ke sevente seven : ke ame mokcu. 32 Ke thabúng haded ta je hunainy Noa : ke Noa ame hnöku Sema, me Hama, me Jafeta.

HNYIMAKAN 6.

KE hnyi úien ame hwán ka hu tavat ae se hia eang hmeledrany, ke adre hnokoá lakudra je hlu, 2 ke haba je lakon Khong adre me wá je lakon tavat a je hlu a ödra hmanenang ; me adre me hom me laöïödra je hlu ae ve wedra. 3 Ke Iehova ame ha, ka habe, Ame ca he bala hanuk ha üö hwege me at, anyin a e thibi unyin : ke so bi haba bonginy je bong ame he ka khaca haded ke twente ta je huna. 4 Haba hnyi je bong eling e hu je Nefilim eang hmelen,

me hnyi je bong minya a biliny, waleji hnyi úien ame o but ta je lakon Khong ka lakon tavat a ta je hlu, ke adre me hnokoá lakudra : haba tavat eling waleji tavatae hwege ehac, me tavat ae lung. 5 Ke a wá but Iehova a e gan hmá but monuiny at eang hmeledrany, ke kong ut ta je hna únyküme hia eú hnyi hnyekudra hnyi ta ogo bong hia. 6 Ke Iehova ame ietra a g' ame hia but op at eang hmelen, ke e hmak ut hnyekon. 7 Ke Iehova ame ha, ka habe, Oge me he ka ohia at waleji oge hia but op, únyi hnyi káná ; wale at, me menoiny hnyot, me únyi ame iyáú, me meno ame gá ethö ; anyin a khenyi but hnyekuk ge hnök hna up ödra. 8 Ke haba Noa ame wá so hnyi hnyimakö Iehova.

9 Walang ta je dö anyi Noa. Haba Noa, at ae wisa, ke fáfá but hnyi anyin ta je dö : haba Noa ame tha he me Khong. 10 Ke Noa ame hnokoá ta lakon a kun, jia Sema, ma, Hama, me Jafeta. 11 Ke ikiki thö hmeledrany hnyi hnyimakon Khong ; k' ame unöngötö hmeledrany ge úkonguny. 12 Ke Khong ame wá hmeledrany, ke wá bi a ikiki thö ; anyin a hia but tavat hia oiki-kiá dedra eang hmelen.

13 Ke Khong ame ha kö Noa, ka habe, A o but hnyi hnyimakök obiny tavat hia thithö ; anyin a unöngötö hmeledrany hnen úkonguny únyi gadra ; ke wá bi oge me he ka tha ohí' ödra me hmeledrany. 14 Tibet ju hobi köu aka ge utö a gofa ; ke u me he ka ányá ta je hnyeule hnyin aka, ke u me he ka okecéá eiö hnyin me hoton ge ouge. 15 Ke walang hwakecin u ma tibet e, ka habe, kun ta haded kubit ibeúen aka, ke fite kubit úlauen, ke thöte kubit ibeúen gö-ranyai. 16 U ma he ka tuba aka ethö hon, ke u ma he ka oumo e ethö hnyi kubit a khaca ; ke u ma he ka bi hwanumen aka hnyi ke baten ; ke u ma he ha ányá kun ta deö dek, khaca hnyikánái, me ke at a loiny, me kuniny, eiö hnyin. 17 Ke wá bi, inya oge me he ka oúkhutukhavá hmeledrany ge uouú, me me he ka ohia unyin hia ae hu hnyin homenáiny möt únyi eang hmelen ; k' ame he ka mokcu ta je únyi hia thithö eang hmelen. 18 Ke oge me he ka otílá hmá anyik úhilihinyköu möu ; ke u ma he ka dit ka hnyi aka, u, me je lakom, me áíám, me láíán je lakom a tha ödrin möu. 19 Ke u ma he ka hom ka hnyin aka úsa lo li únyi hnyi ta je meno hia thithö, me me tha möt möu ; úsa khaca бага me momo. 20 A je meno ame gá, hoton bongudrin ; me ta je meno a

vak can, hoton bongudrin, me ta je únyi hia ame iyáúá káná, hoton bongudrin, ame he ka o kôu úsa lo gadra hia, m' adre me möt. 21 Ke u ma he ka hom kôu únyi ge ta je jeú hia thithö hnán han, me úkhöúná unyám; k' ame he ka ám, me ö 'drin minya. 22 Haba Noa ame ányá heláe; e ame ányá hoton ta je únyi hia Khong ame húna káu.

HNYIMAKAN 7.

HABA Iehova ame ha kö Noa, ka habe, Aiö u me ányám lap hia ka hnyin aka; anyin a oge hia but wá a u wisa hnyi hnyimakök hnyi dö ang. 2 U ma he bi ka hom unyám, únyi hnyi ta je meno a vak cadra ae bo so úsa seven, бага me momo; ke únyi hnyi ta je meno a vak cadra ae ca bo so, úsa lo, бага me momo; 3 ke únyi hnyi ta je meno ame gá ethö úsa seven, бага me momo: me me hu mátrán eang hmeledrany hia thithö. 4 Anyin a seven biju ta je bong me oge me he ka ota we ka hnyi hmeledrany hnyi fáte ta je lany ke fáte ta je lit; ke oge me he ka ohia eang hmeledrany ta je únyi hia ae möt waleji oge hia but op. 5 Haba Noa ame ányá helá me hna húna hnö Iehova káu.

6 Ke siks haded ta je hunai Noa, ke e but uou eang hmelen. 7 Me ame tha didrö Noa ka hnyin aka, me lakon, me áián, me láián je lakon, can köiö ame uou. 8 Haba ta je meno a vak can ae bo so, me je meno a ca bo so, me ta je meno ame gá, me ta je únyi hia thithö adre me iyáúá káná, 9 adre me dit úsa lo ka hnyin aka kö Noa, бага me momo, helá me hnen Khong hna húna kö Noa. 10 Ke hwaban je bong a seven, ame o but uou eang hmeledrany. 11 Haba hnyi hunai a siks hadediny möt anyi Noa, hnyi tehi a loiny, hnyi bong a seventininy tehi, haba hnyi bong eling ame patrutrua thö ta je pupuainy köiö ae gan hmá, k' adre khöng ut je mamalamainy drany. 12 K' ame ta we balua eang hmeledrany hnyi fáte ta je lany ke fáte ta je lit. 13 Haba hnyi bong eling a khaca ame tha didrö ka hnyin aka Noa, me Sema, me Hama, me Jafeta je laku Noa, me öiö Noa, me kun a láián je lakon; 14 ödrin, me ta je menoiny hnyot hia hoton je bongudrin, me ta je meno hia a vak can hoton je bongudrin, me ta je únyi ae iyáú, wale ame iyáúá káná hoton je bongudrin, me ta je meno

ame gá hoton je bongudrin, me ta je meno ae ve bongon hia. 15 Ke adre me didrö kö Noa ka hnyin aka, úsa lo únyi hnyi ta je unyin hia wale ae hu homenáiny möt eú hnyidra. 16 Ke haba tavat adre me dit hnyin, adre me didrö, бага me momo, a ta je unyin hia thithö, hoton hna húna hnen Khong káu: ke Iehova ame hlöng ut hwanumen. 17 Ke e bi uou hnyi hmeledrany fáte ta je bong; ke ame gan tot köiö, me ame matö göranyai aka hon hmeledrany. 18 Ke ame khibi but köiö, k' ame khibi tot hmönyin eang hmelen; me ame matö aka hon köiö. 19 Ke ame ti khibi gan hmá but köiö hon hmeledrany; me tube but ta je bucen hia ae beu hmá eang hmeledrany. 20 Ame khibi thö köiö fiftin kubit ibeúen göranyai; me ka iyong ut ta je bucen. 21 Ke ame moku ta je únyi hia ame bwewet eang hmelen, a ta je meno ame gá, me meno a vak can, me menoiny hnyot, me ta je únyi hia ame iyáú waleji adre iyáúá kápá, me tavat hia: 22 waleji a moku ta je únyi hia ae hu homenáiny möt hnyi je hnyingöidra, me ta je únyi hia hon hnyei. 23 Ke adre ohia but ta je únyi hia thithö ae möt eang hmelen, wale at, me meno a vak can, me únyi ame iyáú, me meno ame gá ethö; ke a hi' ödra but únyi eang hmelen; ke hake Noa thiju, me hnyat a tha e mä hnyin aka. 24 Ke e bi köiö eang hmelen khaca haded ke fite ta je bong.

HNYIMAKAN 8.

KE Khong ame únykúmi Noa, me ta je únyi ae möt, me ta je meno hia a vak can a tha e mä hnyin aka: me Khong ame kuná ang he ka túá hmeledrany me ame nunu but köiö; 2 adre hlöng ut minya ta je pupuainy köiö ae gan me je hlinginy drany, ka adre thawá ju we únyi hnyi drany; 3 ke ame hmetuhmetu tot köiö únyi hnyi hmeledrany: ke hwaban khaca haded ke fite ta je bong adre öúhnyúkongoá köiö. 4 Ke haba hnyi tehi a seveniny, hnyi bong a seventininy tehi ame laba thö aka hon bucen Ararata. 5 Ke ame úhnyúkong tot bala but köiö ke ne o but tehi a libenyitainy: haba hnyi tehi a libenyitainy, hnyi bong a bániny tehi, e manen dut ban ta je bucen. 6 Ke hwaban ta je bong a fáte, haba Noa ame khöng mamalama waleji e ame tibet hnyi aka: 7 ke e ame hna but ke oreba, k' ame gá monu

ke ne o but ame hme thö köiö hon hnyei. 8 Ke e ame hna ke biny únyi gan, me me khana thö ame ne hme thö köiö únyi hnyi káná; 9 ke haba biny ame ca wá ke ong dok he ka mená hnyin, k' ame hmetu hmetu káu ka hnyin aka, anyin a tiga e bala köiö hon hnyei hia: ke e ame iná but hnyamen me hom e, me odilá hmeto káu hnyin aka. 10 Ke e ame lubahingen hnyi ke je bong a seven minya; me e ame hna hmetu but biny úheny hnyin aka; 11 ke a o hmetu but biny káu hnyi sahac; ke, wá bi, e hnyi hnyimen lan elaiö adre hia but thu: waleling me me khana ju Noa a e hme but köiö hon hnyei. 12 Ke e ame halubahingen hmetu hnyi ke je bong a seven; me ame hna hmetu but biny; ke e ame ca o hmetu bala bi káu. 13 Ke hnyi huna a siks haded ke wan, hnyi tehi a bán, hnyi bong a bániny tehi, ame hme but köiö únyi hnyi hon hnyei: ke Noa ame hom dö tubiny aka, me hngele, ke wá bi a hme but hon káná. 14 Ke haba hnyi tehi a loiny, hnyi bong a twente seveniny tehi, ame hwahwacit dö káná.

15 Ke haba Khong ame ha kö Noa, me ha, ka habe, 16 Didrut úhem hnyin aka, u me áiam, me je lakom, me láian je lakom a tha ödrin möu. 17 Hom but ta je únyi hia ae möt a e unyám wale je meno hia, a je meno ame gá, me vak cadrin, me iyáú hia eang hmeledrany: m' adre me he ka si but eang hmelen, me se hia but, me dedo eang hmelen. 18 Me Noa ame didrut, me je lakom, me áiam, me láian je lakom a tha ödrin mē: 19 ame tha didrut úheny hnyi aka ta je menoiny hnyot hia, me ta je únyi ame iyáú hia, me ta je meno ame gá, me ta je únyi ame bwebwet eang hmelen, hoton anyidrin je ve lap. 20 Ke Noa ame otílá ke taben hnán bi hut kö Iehova; me hom únyi hnyi ta je meno hia a vak can ae bo so, me ta je meno hia ame gá ae bo so, me hudo ta je hut adre le hon taben hut. 21 Ke Iehova ame löng bunen ae so; ke haingö Iehova eú hnyi hnyekon, ka habe, Oge me ca he hmetu ka hangá káná can at, anyin ae kong weny hnyekon at hwán ke tiga wanakat; ke oge me ca he hmetu ka hlingá ta je únyi hia ae möt, heláji me hnök hna ányá. 22 Ke ka e bala bi hmeledrany, me ame ca he ka hia úen tā, me úen menu, me megic, me kahwa, me honivakeny, me hnyeun, me lany, me lit.

HNyimakan 9.

KE Khong ame hahnahici Noa, me je lakon, me ha ködrin ka habe, Si but, me dudu but, me dedo hmeledrany. 2 K' ame he ka ot gabun me hiny gabun ta je meno hia eang hmeledrany, me je meno ame gá ethö, me ta je únyi hia adre iyáúú monoá káná, me ta je wá hia eú hnyi köiö, adre hn' ödra but ka hnyi hnyamöbun. 3 Haba ta je únyi hia ame bwebwet ae möt ame he ka hnán ö 'bun; oge hia but ham köbun hia heláji me ta je úö ae ometu ae hat. 4 Ke öbun e ca he ka tha an utiö me melen, wale únyi a dren. 5 E hnathu oge me he ka bi hwaban dröbun, wale anyibun möt; oge me he ka bi hwaban e ka ta je meno hia: me tavat minya, oge me he ka bi hwaban melen at ka liamekeiny mē. 6 Haba at ame hingálá dren ke at, me ame he bi ka hingálá dren hnen ke at: anyin adre op at e me we Khong. 7 Ke haba öbun, si but, me dudu but; hnokoá gáná eang hmelen, me dedo hnyin.

8 Ke Khong ame ha kö Noa me je lakon unyin, ka habe, 9 Wá bi, inya oge me otílá anyik úhinhnyökou möbun, me je mátrán hwaböbun, 10 me ta je únyi hia ae möt unyibun, a je meno ame gá, me je meno a vak can, me je menoiny hnyot hia unyibun eang hmeledrany; a ta je meno hia 'a didrut úhedra hnyin aka, wale ta je meno hia eang hmeledrany. 11 Ke oge me he ka otílá anyik úhinhnyökou möbun; ke adre me ca he hmetu ka subá degecá ta je únyi hia ae möt ge köien uoú; ke haba khaca ame ca he hmetu uoú ka ohia hmeledrany. 12 Ke Khong ame ha, ka habe, Walang haten anyik úhinhnyökou möbun, me ta je meno ae möt hia unyibun, ke ne o but hnyi ta je dö nyiele balua: 13 ka habe, Oge me ip anyik wajeleufat hnyi úlá, me hnán haten anyik úhinhnyökou me hmeledrany. 14 Ke iny' ka he ka hom ke úlá ka hnyi hon hmeledrany, me, ame he ka manen wajeleufat hnyi úlá, 15 me oge me he ka únyküme anyik úhinhnyökou, wale möbun, me ta je únyi hia ae möt ae ve bongon; ke haba köio ame ca he hmetu ka uoú me ohia je únyi hia ae möt. 16 Ke ame he ka e wajeleufat hnyi úlá; ke oge me he ka wá e, me únyküme úhinhnyökou anyin Khong ame ca ba balua, me ta je únyi ae möt ae ve bongon eang hmeledrany. 17 Ke Khong ame ha kö Noa, ka habe, Wale haten úhi-

hinykôu oge hia but otilâ me ta je ûnyi hia ae môt eang hmelen.

18 Ke walang je laku Noa ödrin e didrut ûhedrin hnyin aka, jia Sema, me Hama, me Jafeta : haba Hama me kamö Kanana. 19 Haba ödrin kun ta laku Noa : ke ûnyi gadrin bi adre khavâ hmeledrany hia hnen at.

20 Ke Noa ame hwân ka belök, me e ame ta hneyi vine : 21 ke e ame ijem waina, me monu but ; ke e ame mokut thu eiö hnyin umen uma mano. 22 Ke haba Hama a kamö Kanana ame wâ kamen ame mokut thu, me thumeto li liamekeiny më eü hnyöu. 23 Ke haba Sema me Jafeta ödru me hom úkhaú, me lau hon li abenyidru, me he nulötudru, me okháúâ kamödrü ame mokut thu ; ke ödru me hnyimaködrü eü, m' ödru me ca wâ kamödrü ame mokut thu. 24 Ke a hmak dö Noa hwaban hna ic waina, me khana hna ányâ kâu hnen nokon a wakeiat. 25 Ke e ame ha, ka habe,

E ka mok Kanana ;

E ame he ka bi athnyabainy lathnyabainy je liamekeiny më.

26 Ke e ame ha, ka habe, Haisoi Iehova, Khongu Sema ; Me hamö Kanana ka bi athnyabainy.

27 E so Khong ame olawö Jafeta Me me he ka laba hnyi ta je uma mano umö Sema.

K' ame he Kanana ka bi athnyabainy.

28 Ke haba môt anyi Noa hwaban uouü, me, kun ta haded ke fifte ta je huna. 29 Ke haba ta je bong hia bongu Noa, me, nain haded ke fifte ta je huna : ke ame mokcu.

HNHYIMAKAN 10.

KE walang ta je dö anyin laku Noa, Sema, me Hama, me Jafeta : ke ödrin e hnokoâ lakudrin obaga hwaban dö uouü.

2 Haba je laku Jafeta ; Gomera, me Magog, me Madai, me Javana, me Tubala, me Meseka, me Tirasa. 3 Ke haba laku Gomera ; Asekenaza, me Rifatha, me Togarema. 4 Ke haba laku Javana ; Elisa, me Tasesa, me Kitim, me Dodanima. 5 Ünyi gadrin adre me khenâ ta je bomeneiny ta je dökhu hnyi idrin je hneyi, hoton je ve hwen hodra ; hoton anyidrin je lap, hnyi dökhdurin je dökhu.

6 Haba je laku Hama ; Kuza, me

Mizeraima, me Futa, me Kanana. 7 Ke haba je laku Kuza ; Saba, me Havila, me Sabetä, me Rama, me Sabeteka : ke haba li laku Rama ; Sheba, me Dedana. 8 Ke Kuza ame hnöku Nimeroda : e at ame hwân he ka hwege eang hmelen. 9 E at ae hwege he ka hnu ta je meno hnyi hnyimakö Iehova : waleling m' adre me ha, ka habe, Helä me Nimeroda at hwege he ka hnu ta je meno hnyi hnyimakö Iehova. 10 Ke haba hwâniny dokhon dökhu, me, Babela, me Ereka, me Akada, me Kalene, hnyi hneyi Sinara. 11 E ame he but úheny hnyi hneyi eling Asuria ai, me otilâ Nineve, me Rehoboth-Ir, me Kala, 12 me Resen hnyi wanben Nineve me Kala (wale tauri ae gan). 13 Ke Mizeraima ame hnöku Luda, me Anami, me Lehabi, me Nafetui, 14 me Patherusi, me Kaselui (ke ûnyi gan at Filisiti), me Kafetori.

15 Ke Kanana ame hnöku Zidona a atö, me Heth ; 16 me at Jebusi, me Amora, me Girigasa ; 17 me at Hivi, me Areki, me Sini ; 18 me at Arevadi, me Zimari, me Hamath, ke hwaban dö e, adre oveseâ je lap anyi Kanaba. 19 Ke haba hnyigöulen at Kanana, me, úheny Zidona, gethen ame he Gerara ai, ke ne o but Gaza : deny ka he Sodoma ai, me Gomora, me Adema, me Zeboim, ke ne o but Lasa. 20 Wale je laku Hama, hoton anyidrin je ve lap, me je hwen gadrin hnyi idrin je hneyi, me dökhdurin je dökhu.

21 Ke Sema ame hnokoâ lakon, haba e kamen laku Heberu hia, ke liamekeiny me Jafeta a atö. 22 Haba laku Sema ; Elama, me Asura, me Afasada, me Luda, me Arama. 23 Ke haba laku Arama ; Uza, me Huli, me Gethera, me Mase. 24 Ke Afasada ame hnöku Sala ; ke Sala ame hnöku Heberu. 25 Ke Heberu ame hnokoâ lakon li бага ; Pilege ien khaca ; anyin adre khenâ hmeledrany hnyi bonginy ta je bong ; ke Joketana ien liamekeiny më. 26 Ke Joketana ame hnöku Alemodada, me Salefa, me Hazamaveta, me Jara ; 27 me Hadorama, me Uzala, me Dikela ; 28 me Obala, me Abimaela, me Sheba ; 29 me Ofira, me Havila, me Jobad ; haba hnyat hia eling laku Joketana. 30 Ke haba je hnyabadrin, me, hwân hnyi Mesa, gethen ka he Sefera ai, wale bucen e deiö. 31 Wale ta je laku Sema, hoton anyidrin je lap, me je hwen hodrin, hnyi je gadrin, hoton dökhdurin je dökhu.

32 Wale ta je lap anyin je laku Noa,

hoton anyidrin je dö, hnyi dökhudrin je dökhu : ke únyi gadrin adre khenâ je dökhu hnyi hmeledrany hwaban dö uoú.

HNYIMAKAN 11.

KE khaca thibi hwan hmeledrany hia, me khaca thibi hofuc. 2 Ke adre me tiga hok töt deió, me adre me wâ ke dok ae thahon hnyi hnyeí Sinara ; ke adre me labâ e. 3 Ke adre me úhakouâ, ka habe, E so ate me op je veto kânâ, me le wia. Ke adre me hom veto kânâ me hnân veto, me hmudra hnân dröu. 4 Ke adre me ha, ka habe, E so ate me otílâ ke taun, me tap ae beú hmâ ban hnyi dranyai, m' ate me ölungâ iöta ; wâ adre nye ovesei öta hnyi hmeledrany hia. 5 Ke Iehova ame utut ka wâ taun me tap, ame otílâ lakon tavat. 6 Ke Iehova ame ha, ka habe, Wâ bi, khaca thibi hnyeí ödra, ke khaca thibi hwen hodra hia ; ke walang únyi adre me hwân he ka ányâ : ke haba walang ang, ame ca he ka hmak ködra ke únyi adre me beányâ. 7 E so ate me utut me omononâ hwen hodra, me me ca khana ke at hofuc hwan ke at. 8 Me Iehova ame ovesei ödra úheny e ka hnyi hmeledrany hia thithö : ke adre me hna ju he ka otílâ taun. 9 Anyin a wale, adre me hwenyi ien e, Babela ; anyin a Iehova ame omonôá eling hwan hmeledrany hia : ke Iehova ame ovesei odra úheny e ka hnyi hmeledrany hia.

10 Walang ta je dö anyi Sema, khaca haded hunai Sema, ke e ame knöku Afasada hnyi huna a loiny hwaban uoú : 11 ke haba möt anyi Sema, hwaban hna hnöku Afasada, me thabúng haded ta je huna, ke e ame hnokoá je lakon бага me hlu.

12 Ke thöte faiv ta je hunainy möt anyi Afasada, ke e ame hnöku Sala : 13 ke vak ta haded ke kun ta hunainy möt anyi Afasada hwaban hna hnöku Sala, ke e ame hnokoá lakon je бага me hlu.

14 Ke thöte ta je hunainy möt anyi Sala, ke e ame hnöku Heberu : 15 ke vak ta haded ke kun ta je hunainy möt anyi Sala, hwaban hna hnöku Heberu, ke e ame hnokoá ta je lakon бага me hlu.

16 Ke thöte foa ta je hunainy möt anyi Heberu, ke e ame hnöku Pelege : 17 ke vak ta haded ke thöte ta je hunainy möt anyi Heberu hwaban hna hnöku Pelege, ke e ame hnokoá lakon бага me hlu.

18 Ke thöte ta je hunainy möt anyi Pelege, ke e ame hnöku Reu : 19 ke lo li

haded ke nain ta je hunainy möt anyi Pelege hwaban hna hnöku Reu, ke e ame hnokoá lakon бага me hlu.

20 Ke thöte tu ta je hunainy möt anyi Reu, ke e ame hnöku Serugi : 21 ke lo li haded ke seven ta je hunainy möt anyi Reu hwaban hna hnöku Serugo, ke e ame hnokoá lakon бага me hlu.

22 Ke thöte ta je hunainy möt anyi Serugo, ke e ame hnöku Nahora : 23 ke lo li haded hunainy möt anyi Serugo hwaban hna hnöku Nahora, ke e ame hnokoá lakon бага me hlu.

24 Ke twente nain ta je hunainy möt anyi Nahora, ke e ame hnöku Tera : 25 ke khaca haded ke naintin ta je hunainy möt anyi Nahora hwaban hna hnöku Tera, ke e ame hnokoá lakon je бага me hlu.

26 Ke sevente ta je hunainy möt anyi Tera, ke e ame hnöku Aberama, me Nahora, me Harana.

27 Ke walang ta je dö anyi Tera. Haba Tera ame hnöku Aberama, me Nahora, me Harana ; ke Harana ame hnöku Lota. 28 Ke ame mokcu Harana hnyi hnyimakö Tera a kamen hnyi hnyeí adre hnokoá e hnyin, wale Ure hnyi Kaledaia. 29 Ke Aberama me Nahora ödru me ve hok áiân : haba ien öío Aberama, me, Sarai ; ke haba ien öío Nahora, me, Mileka nöku Harana wale kamö Milika me kamö Iseka. 30 Ke toúnyi Sarai, e ba nokon. 31 Haba Tera ame hom Aberama a nokon, me Lota nöku Harana, a öbiny, me Sarai a úngon, öío Aberama a nokon ; ke ödrin e tha he úhedrin Ure hnyi Kaledaia ka he ka hnyi hnyeí Kanana ; ke ödrin e o but Karan me labâ e. 32 Ke haba ta je bongu Tera tu haded ke faiv je huna : ke Tera ame mokcu hnyi Karan.

HNYIMAKAN 12.

KE haba Iehova ame ha kö Aberama, ka habe, He but úhem hnyi gam, me ányâm lap, me hnyaban kâmâm, ka hnyi hnyeí oge me he ka omanená köu : 2 ke oge me he ka wiö u me me dökhu ae gan, ke oge me he ka ohnahici u, me oganá iâm ; ke u ma he ka hnahic : 3 ke oge me he ka ohnahici ödra adre me ohnahici u, ke haba at ame hangö u oge me he ka hangâ : ke ame he ka hnahic ut únyi gam ta je hnyeí hia eang hmelen. 4 Me haba Aberama ame he but helâ me hna ha káu hnö Iehova ; ke Lota ame tha he më : me

Aberama ame he úheny Karan, ke sevente faiv ta je hunainy. 5 Haba Aberama ame hum Sarai a áiân, me Lota a nokon liamekeiny mē, me tang omjehedrin hia ödrin e hia but úkbôûna, me je hnyat ödrin e hia but hom unyidrin hnyi Karan ; ke ödrin e he but ka hnyi hnyei Kanana ; me ödrin e o but hnyi hnyei Kanana. 6 Ke Aberama ame vheno hnyei ke ne o but hnyi Sekema, hnyi iwajo anyi More. Ke ka e at Kanana hnyi hnyei. 7 Ke ame manen dut Iehova kö Aberama, ame ha, ka habe, Oge me he ka ham hnyei ang ka ta je mâtrânâm : me e ame otilâ eling taben hut kö Iehova at ame manen kâu. 8 Ke e ame he úheny e ka hnyi bucen, Bethela ke e deiö, me otilâ umen uma mano, ke e jio Bethela, ke e deiö Ai : ke e ame otilâ ke taben hut kö Iehova eling, me hawâ iö Iehova. 9 Ke Aberama ame hok tot ka hnyi Hwaiöu.

10 Ke e hu hmiâ hnyi hnyei : me Aberama ame he Aigupito ai he ka mē laba e ; anyin ae gan hmâ hmiâ hnyi hnyei. 11 Ke e hakekeny jut ka dit ka hnyi hnyei Aigupito, e ame ha kö Sarai a áiân, ka habe, Wâ bi, e khanö nya a u momo ae so hmains : 12 ke e ka ö u hnen at Aigupito, me, adre me he ka ha, ka habe, Wale áiân, me adre me he ka hlingö nya, k' adre me he biju ka omeli u. 13 Me ö u ha thö, ka habe, U hanik, m' inye so únyi gam, me me möt bi hanuk únyi gam. 14 Ke ame o but Aberama Aigupito, me at Aigupito adre me wâ momo ae so hmönyin hmains. 15 Ke a wâ but hnen je than unyi Farao, me ödrin e haisoâ e kö Farao : ke ödra adre me hom dö momo ka hnyi hnyaba Farao. 16 Ke e ame bi so kö Aberama kan mono : me e ame tren ta je mamoe, me kau, me asina бага, me je lathnyabainy бага, me je lathnyabainy momo, me je asina momo, me je kamela. 17 Ke Iehova ame oveci Farao me anyin lap ge ta je vec ae gan can Sarai öiö Aberama. 18 Ke Farao ame hawo Aberama, me ha, ka habe, Ieú ang u je ányâ könya ? Ieú gam u je ca thumetu nya a áiâm ang ? 19 Ieú can u je ha, ka habe, Hânâm ang ? Waleling me oge me hia but hom me öiök : ke walang ang wâ ju áiâm, hom dö, me he thö. 20 Ke Farao ame húna e ka je lakeiny : ke adre me hom e ka hnyi gethen, me áiân, me anyin ta je únyi hia.

HNYIMAKAN 13.

HABA Aberama ame he but úheny Aigupito, e, me áiân, me anyin ta je únyi hia, me Lota minya, ka hnyi Hwaiöu. 2 Ke Aberama ame tren omjeú ae gan hmâ wale je meno, me sileva, me gol. 3 Ke e ame hok tot úheny hnyi Hwaiöu ke ne o but Bethela, ka hnyi dok adre ip umen uma mano hnyin a bân, wanben Bethela me Ai ; 4 me ka hnyi dok e ame otilâ hnyin taben hut a bân : ke hnyi dok eling Aberama ame hawâ iö Iehova. 5 Ke e hu minya ga Lota, at ame tha he me Aberama, ta je mamoe, me kau, me je uma mano. 6 Ke ca úcü ödru hnyei ka tha laba : anyin ae gan hmâ omjehedru, me me ca khan' ödru ka tha laba. 7 Ke e hu iwatretra ge hnyat tuö meno hale Aberama, me hnyat tuö meno hale Lota : ke at Kanana me at Perizi adre me ka labâ hnyei. 8 Me haingö Aberama kö Lota, ka habe, E so e me ca hu iwatretra gatu, ke únyi ge hnyat tuö halek je meno, me hnyat tuö halem : anyin a ötu liamekeiny. 9 Hawa, e ca e hnyei hnyi hnyimákâm ? e so ötu na úsákâüö : u ka he but ka hnyi ke keihen a me, awe, oge ma he bi nya ka hnyi ke keihen a metâ ; ke u ka he ka hnyi ke keihen a metâ, awe, oge ma he bi nya ka hnyi ke keihen a me. 10 Haba Lota ame bwele me wâ dok ae thahon hia hnyi Joridano, a g' ame hu köiö hnyi je ke keihen hia, ke tiga ca ohia Sodoma me Gomora hnö Iehova, helâke hnyei i Iehova, helâke hnyei Aigupito, gethen Zoara ai. 11 Me haba Lota ame úca hobi kâu bi dok ae thahon hia hnyi Joridano : me Lota ame hok tot deiö, ke ödru me úsákâüö but. 12 Haba Aberama ame laba hnyi hnyei Kanana, ke Lota ame labâ je taun hnyi dok ae thahon, me sukhöünâ umen uma mano ke ne o but Sodoma. 13 Ke e kong at Sodoma, ke beönua anyidra monu hnyi hnyimákö Iehova. 14 Haba Iehova ame ha kö Aberama hwaban hna úsákâüö a e me Lota, ka habe, Bwele thö, me wâ eang dok u me tot hnyin ka hnyi hwadrö, me hwaiöu, me deiö, me jio : 15 anyin a haba hnyei hia u ma wâ, oga ma he ka ham köu, me je mâtrânâm nyiele balua. 16 Ke oge me he ka wia ta je mâtrânâm, me me helâ me sesâiny kânâ : waleling me a ne khana ke at he ka aú sesâiny kânâ, me adre me he

minya ka aú ta je mátránám. 17 Todró, vheno thö hnyeí hnyi íbeúen me úlaunen; anyin oge me he ka ham e köu. 18 Me Aberama ame oc umen uma mano, me o but me laba hnyi sawajo anyi Mamere, wale hnyi Heberona, k'ame otilá eling ke taben hut kö Iehova.

HNYIMAKAN 14.

KE haba hnyi je bong bongu Amerafela than Sinara, me Arioka than Elasara, me Kedalaoma than Elama, me Tidala than Goiim, 2 ödrin e vat me Bera than Sodoma, me Biresa than Gomora, me Sinaba than Adema, me Semeba than Zeboim, ke than Bela minya (wale Zoara). 3 Haba tavat hia eling adre me iouny dö hnyi Sidima hnyigöulen bucen (wale Nem ae Hiny). 4 Adre me bá kö Kedalaoma hnyi twelv ta je huna, ke hnyi huna a thötininy adre me behúgúná hmetu musi. 5 Ke haba hnyi huna fotininy ame o thö Kedalaoma, me ta je than a tha ödrin mé, me kot at Refai hnyi Aseteroha-karenaima, me at Zuzi hnyi Hama, me at Emi hnyi Save-kiriathaima, 6 me at Hori hnyi anyidra bucen a Seira, ke ne o but Eleparana hnyi baten hnyeubaba. 7 Ke ödrin e hmetuhmetu me o hnyi Eni-misepata (wale Kadesi), me kot hia hnyeí iny at Amaleka, me at Amora minya, tavat adre me labá Hazezo-tamara. 8 Me ame he but than Sodoma, me than Gomora, me than Adema, me than Zeboim, me than Bela (wale Zoara); me adre me tet metá he ka vat mödra hnyi Sidima hnyigöulen bucen; 9 wale Kedalaoma than Elama, me Tidala than Goiim, me Amerafela than Sinara, me Arioka than Elasara; wale vak ta than úcon thabúng. 10 Ke unöngöt Sidima hnyigöulen bucen ge ta je op hmudra; ke a kec ut li than Sodoma me Gomora, ke adre me ta ju eling, ke haba je kolon adre me kec ka hnyi bucen. 11 Ke adre me hügúná hia ta je omjeúiny Sodoma me Gomora, me anyidra ta je jeú hia, me he but. 12 Ke adre me hügúnö Lota nokon liamekeiny me Aberama, waleji ame laba hnyi Sodoma, me anyin ta je únyi, me he but. 13 Ke ame o but ke at a kec möt, me thumetu Aberama at Heberu: wale ame laba hnyi sawajo anyi Mamere at Amora, liamekeiny me Esekolo ke liamekeiny me Anere; wale hnyat ödrin e tha hien me Aberama. 14 Ke a löng ut Aberama

a g' adre hom bá thö keiny, me e ame oc dö vat adre hia but ná wia, waleji adre hnöku ödrin hnyi hnyaban, wale ödrin kun ta haded ke eitin, me hnu hotudra ke ne o but Dana. 15 Ke e ame kia but vat, e me je lathnyabainy hnyi hnyinghet, me kuc ödra, me hnu ödra ke ne o but Hoba, wale Damaseko, ke hwadrö. 16 Ke e ame hom hmeto ta je únyi hia, ke ame hom hmetu minya Lota a keiny, me anyin ta je únyi, me omomo, me tavat. 17 Ke ame he but than Sodoma he ka iouny mé, wale a tiga hmetu úheny hnyi hna kuc Kedalaoma me ta je than unyin, hnyi Save hnyigöulen bucen (wale hnyigöulen bucen anyin than). 18 Ke haba Melekisedeke than Salema ame hok areto me waina: ke e at bi hut ka Khong ae Beönua. 19 Me e ame hahnahicá, me ha, ka habe, E so e hnahic Aberama únyi ge Khong ae Beönua, at a gan drany me hmeledrany: 20 Ke so adre haisoá Khong ae Beönua waleji ame hua but je iwahnaihmiönny möu ka hnyi hnyamám. Ke e ame ham káu ke keihen a libenyitainy ta je únyi hia. 21 Ke haingen than Sodoma kö Aberama, ka habe, ham ju könnya tavat, ke hom dö ta je únyi me ányám. 22 Ke haingö Aberama ka than Sodoma, ka habe, Oge hia but hai hnyamök kö Iehova, Khong ae Beönua, at a gan drany me hmeledrany, 23 ka habe, Oge me ca he ka hom ke hnyiban tö, me ong wen taben hnyeúca me ke únyi bi a ányám, wá u nye ha thö, ka habe, Oge hia but otrehi Aberama ge omjeú: 24 e so thibi hnen wahidröu hna han, me únyi minya a jekhon ta je бага adre tha he mönya; jia Anere, me Esekolo, me Mamere, e so ödrin e he ka hom jekhóúdrin.

HNYIMAKAN 15.

HWABAN ta je únyi e ame o thö hofuc ho Iehova kö Aberama hnyi hna omanená, haingen, ka habe, Aberama lö, ca ot: inya ang becám, me troban hobi köu ae ti gan hmá. 2 Ke haingö Aberama, ka habe, Than Iehova lö, ie únyi u me he ka hna könnya, ke inya ang at ae ba nokon, ke haba at ame he ka hwö hwabök hnyi hnyabak, me, Eliezera at Damaseko? 3 Ke haingö Aberama, ka habe, Wá bi, u je ca hia but ham könnya ke mátránik: ke wá bi ame he ka hwabök ju at adre hnokóá hnyi hnyabak. 4 Ke wá bi, ame o thö hofuc ho Iehova káu, ka habe, ame ca he ka hwabám

at eling ; ke so bi ame he ka hwabâm hing nokom. 5 Me e ame su e kâ ú, me ha, ka habe, Bwele thö hnyidranayi, me at thö ta je ohkú, ame ne khandö u he ka aú e : me e ame ha kâu, ka habe, ame he ka helâe ta je mâtrânâm. 6 Ke e ame labageju kö Iehova ; ke e ame bi haten e kâu me hnân hwakecin ae wisa. 7 Me e ame ha kâu, ka habe, Inya Iehova, at ame su u úhem Ure hnyi Kaledaia, me me he ka ham köu hnyei ang hnân em. 8 Me e ame ha, ka habe, Than Iehova lö, iéú haten kõnya a oge me he ka tren e ? 9 Ke e ame ha kâu, ka habe, Hom dö kõnya kau a kun hunainy, me got momo a kun hunainy, me mamoe бага a kun hunainy, me ke biny, me ke nokon mekötä. 10 Me e ame hom ta je únyi hia e, me kia luâ bi hnyi wanben, me ip úótico je ve ec ke keihen : ke a ca hnyi kia luâ li meno ame gâ. 11 Ke ame utut ta je meno úkuc ame gâ ka hnyi hon unyin je meno, ke Aberama ame obâ hmetu. 12 Ke haba hnyi úen a dit seúnö, Aberama ame mokut hnying ; ke wâ bi, ame o but kâu ot me menekholom ae gan. 13 Ke e ame ha kö Aberama, ka habe, Wâhmakhmeto ju u, haba je mâtrânâm adre me he ka laba kanyua hnyi hnyei a ca idra, ke adre me he ka bi athnyaba ködra ; ke adre me he ka oveci ödra vak ta haded ta je hunä ; 14 ke oge me he ka owisa ka hnyei eling minya, adre me bi athnyabainy : ke hwaban dö e adre me he ka he hmetu me omjeú ae gan. 15 Ke u ma he ka hnyi he ka je lakâmâm hnyi hnahic ; adre me he ka kõnim u k' u hingat kong ut. 16 Ke haba hnyi dö ae vakiny adre me he ka hmetu jem : anyin ae tiga ca bekhöt ut konginy at Amora. 17 Ke a didrut seúnö, me lit ut, ke wâ bi wahnainyâ ame sâ, me okúnú ame ubâhlâ, k' ame he hnyi wanben ta je ec utiö. 18 Haba hnyi bong eling Iehova ame ha úhinhinykõu me Aberama, ka habe, Oge hia but ham hnyei ang ka ta je mâtrânâm, hwân hnyi wageweiny Aigupito keneo but wagewe ae gan, wale wagewe Euferate : 19 at Keni, me at Kenaza, me at Kademoni, 20 me at Heth, me at Perizi, me at Refai, 21 me at Amora, me at Kanana, me at Girigasa, me at Jebusi.

HNYIMAKAN 16.

HABA Sarai öiö Aberama ame ca hnoköa, ke e unyin ke athnyabainy a at Aigupito, Hagara ien. 2 Ke Sarai ame

ha kö Aberama, ka habe, Wâ ju, ame musö Iehova a oge me ca he ka hnoköa ; ö u he thö ka anyik hlu ; ame ne he ka hu lakuk únyi gan. Me Aberama ame löng hwan Sarai. 3 Ke a hia but Aberama laba libeniyita ta je hunä hnyi hnyei Kanana, ke Sarai öiö Aberama ame hum Hagara at Aigupito a anyin hlu, me ham e kö Aberama áiân, me me áiân bi. 4 Ke e ame hum Hagara, me e ame erkin dut : ka löng ut e a ga erkin dut, me e ame hûkötia momo at a musö e. 5 Ke haingö Sarai kö Aberama, ka habe, Únyi gam hna okongunya : oge ham köu anyik hlu, ke a löng ut a ga erkin dut, me e ame hûkötio nya : hamö Iehova he ka owisa kötu. 6 Ke haingö Aberama kö Sarai, ka habe, Wâ bi, e unyâm ányâm hlu, me ányâ kâu hoton wem. Ke Sarai ame ovecá e, me e ame kec ut gan. 7 Ke ame ö e hnen angela anyi Iehova hnyi an ame pupua hnyi hnyebuba, wale ame pupua hnyi gethen ka he Sura ai. 8 Ke e ame ha, ka habe, Hagara lö, hlu anyi Sarai, u je m' ua ! ke u me he kâ ? Me e ame ha, ka habe, oge me kec ga Sarai, momo ame musi nya. 9 Ke haingen angela anyi Iehova kâu, ka habe, Hmetu ju ka at ame musi u, me löng hoton. 10 Ke haingen angela anyi Iehova kâu, ka habe, Oge me he ka ti osehia mâtrânâm, ke ca hnân öú ödra, anyin a ödra se hia. 11 Ke haingen angela anyi Iehova kâu, ka habe, Wâ bi, u erkin dut, ke u ma he ka hnoköa da ; me hwenyi ien Isamaela, anyin a löng ut Iehova ányâm vec. 12 Ke e ame he ka tha úcú me asina ae hiny unyin tavat ; k' ame he hnyamen ka iwahnaihmiöny me tavat hia, k' ame he hnyamen tavat hia ka iwahnahmiöny më ; ke e ame he ka laba hnyi hnyimakan je liamekeiny më. 13 Haba momo ame hwenyi iö Iehova at ame fuc kâu, ka habe, U thibi Khongat ame wâ : anyin a haingen, ka habe, Hawa oge hap wâ ju ang at ame ö nya ? 14 Anyin a wale, adre hwenyi ien an ka habe, Bere-lahai-roi ; wâ bi, e hnyi wanben Kadesi me Bareda. 15 Ke Hagara ame hnoköa da nöku Aberama : ke Aberama ame hwenyi ien nokon, a hnoköa Hagara, me Isamaela. 16 Ke eite siks hunai Aberama hnyi hnö Hagara hna hnöku Isamaela nöku Aberama.

HNYIMAKAN 17.

KE nainte nain hunai Aberama, me ame manen dut Iehova kö Aberama,

me ha kân, ka habe, Inya ang Khong Ataekhanahia; u ma he hnyi hnyimakök, ke wisa but. 2 Me oge me he ka úhihinykôu möu, me oge me he ka ti osehia ta je mátránâm. 3 Ke Aberama ame ta hnyimakan hnyikánái: ke Khong ame ha hofuc káu, ka habe, 4 Wâ bi, e unyâm anyik úhihinykôu, ke u me he ka kamen ta je hnyei ae se. 5 Ke adre me ca he hmetu ka hwenyi iâm, me, Aberama, ke Aberahama bi iâm; anyin a oge hia but wiö u me kamen ta je hnyei ae se. 6 Ke oge me he ka ti ösi u, ke oge me he ka oâ ta je hnyei únyi gam, k' ame he ka o únyi gam ta je than. 7 Ke oge me he ka ohmâ anyik úhihinykôu möu me ta je mátránâm hwabâm hnyi anyidra ta je dö hnân úhihinykôu ae ca ba balua, me oge me he ka Khongom me ta je mátránâm hwabâm. 8 Me oge me he ka ham köu, me ta je mátránâm hwabâm, hnyei u me laba kanyua hnyin, a hnyei Kanana hia, hnân gam nyiele balua; ke oge me he ka Khongudrin. 9 Haba Khong ame ha kö Aberahama, ka habe, U ma he ka tuö anyik úhihinykôu, u, me ta je mátránâm hwabâm, hnyi anyidra ta je dö. 10 Walang anyik úhihinykôu möbun, wale öbun e he ka tuö, me ta je mátránâm a hwabâm, ka habe, Adre me he ka peritomonâ ta je бага hia unyibun. 11 Adre me he ka peritomonâ unen unyibun; ke wale haten anyik úhihinykôu möbun. 12 K' adre me he ka peritomonâ at unyibun a eit ut bonginy, a ta je бага hia hnyi anyibun ta je dö, at adre hnokoâ hnyi hnyabam, me at adre úco hnen mone unyin ta je atkanyua, a ca mátránâm bi. 13 E únyi hnathu he ka peritomonâ at adre hnokoâ hnyi hnyabâm, me hna úco hnen ányâm mone: k' ame he ka e bi hnyi je unyibun anyik úhihinykôu hnân úhihinykôu nyiele balua. 14 Ke adre me he ka subâ degecâ únyi hnyi iny hnyei at adre me ca peritomonâ unen unyin; e ame hanyúâ anyik úhihinykôu.

15 Haba Khong ame ha kö Aberahama, ka habe, Haba Sarai áiâm, u me ca he hmetu ka hawâ, Sarai, k' ama Sara bi ien. 16 Ke oge me he ka ohnahicâ e, ke haba khaca, oge me he ka ham köu nokom da únyi gam: eke, oge me he ka ohnahicâ e, k' ame he ka hinyen ta je hnyei; k' ame he ka o únyi gam je thaniny ta je hnyei. 17 Me Aberahama ame ta hnyikánái, me hluma, me ha eü hnyi hnyekon, ka habe, Hawa, ama he at a khaca haded hunainy

ka hnokoâ nokon? k' ame he Sara ka hnokoâ ke nainte but ta je hunainy? 18 Ke haingö Aberahama ka Khong, ka habe, Ama na möt Isamaela hnyi hnyimákâm! 19 Me Khong ame ha, ka habe, Ca me ha, ke ame he Sara áiâm ka hnokoâ nokom a бага; ke u me he ka hwenyi ien Isaaka: ke oge me he ka ohmâ anyik úhihinykôu mē, me ta je mátrániny hwaban hnân úhihinykôu nyiele balua. 20 Ke so bi oge hia but ling u ga Isamaela: wâ bi, oge hia but hahnahicâ, me oge me he ka ohâtâ e, me ösiâ gâná but e; e ame he ka hnokoâ ta jo taben a twelv, me oge me he ka wia e me me kamen ta je hnyei ae se hia. 21 Ke haba anyik úhihinykôu me, oge me he ka ohmâ e me Isaaka, at ame he Sara ka hnokoâ únyi gam hnyi úen eang hnyi huna ame he ka o. 22 Ke e ame um dö úhne-namö mē, me Khong ame ölö thö úheny unyi Aberahama. 23 Me Aberahama ame hum Isamaela a nokon, me ödrin adre hnokoâ hnyi hnyaban, me tavat hia adre úco ge anyin mone, a obaga hia hnyi hnyaba Aberahama, me peritomonâ unen unyidrin, hnyi bong eling a khaca, helâji me hnen Khong hna ha káu. 24 Ke nainte nain ta je hunai Aberahama hnyi hna peritomonâ unen unyin. 25 Ke thötin hunai Isamaela a nokon hnyi hna peritomonâ unen unyin. 26 Hnyi bong a khaca adre tha peritomoni Aberahama me Isamaela a nokon. 27 Ke adre tha peritomonâ mē ta je бага hia hnyi hnyaban, waleji adra hnokoâ hnyi hnyaban, me tavat adre úco ge mone unyin je atkanyua.

HNYIMAKAN 18.

KE Iehova ame manen dut káu hnyi sawajo anyi Mamere, k' ame laba hnyi hwanumen umen uma mano hnyi jebigö; 2 ke e ame bwele me wâ, ke wâ bi ta hnyat a kun ödrin e tot hnyi hnyimakan: ke e ame ö' drin me wadring dö he ka iouny mödrin úheny hnyi uma mano, me nom ju hnyikánái, 3 me ha, ka habe, Than lö, u ka na betenge gak, ca he but ka hnö nya a athnyabaem: 4 e so adre me sâú utköö, me ösiâ thö je cabun, ke me menâ ju hmelen úö: 5 ke oge ma hom ong areto, m' öbun e okahwa hnyekubun; hwaban dö e he th' öbun; anyin a öbun e hia but o ka athnyabaibun. Ke ödrin e ha, ka habe, He thö ka ányâ helâ me hnâm hna ha. 6 Ke Aberahama ame he mweimwei kö

Sara eiö hnyi uma mano, me habe, Logotö penapena falawa ae so ama kun ta tulut, op dö, me le je ong areto. 7 Ke Aberahama ame wadring ka hnyi hna hat meno, me hom nokon kau ae mounou me se, me ham ka athnyaba; ke e ame ie penapena e. 8 Ke e ame hom bata me debai, me nokon kau e ame penapena, me ip hnyi hnyimaködrin; ke e ame tot hakekenyi ödrin hnyi hmelen üö, ke ödrin e han. 9 Ke haingödrin kâu, ka habe, Ewa Sara áiâm? Haingen, ka habe, Walethö hnyi uma mano. 10 Ke e ame ha kâu, ka habe, Oge me he ka o hmetu köu e ka o but ün; ke, wâ bi, ame he Sara áiâm ka hnokoâ da. K' a löng ut Sara hnyi hwanumen uma mano hnyi hoton. 11 Ke li hingat ut Aberahama me Sara, ke se hia ta je hunaidru, ke ba hmetu ga Sara hwa-kecin omomo. 12 Ke Sara ame hluma eü knyi hnyekon, ka habe, Hê, oge me he ka hu hnân senyin, k' iny hingat ut, ke hingat minya but anyik than? 13 Ke Iehova ama ha kö Aberahama, ka habe, Ieü ga Sara ame hluma, me habe, Hawa e hnathu oge me he ka hnokoâ k' iny hingat ut? 14 Ewa ke ünyi ae hmak kö Iehova? Haba hnyi bong adre thu oge me he ka hmetu köu, e ka o but ün, k' ame he Sara ka hnokoâ nokon da. 15 Ke Sara ame ivinöâ, ka habe, Oge ca hluma; anyin a e ame ot. Ke haingen, Ohe, u je hluma.

16 Ke ame todrö hnyat me hnyimaködrin Sodoma ai: ke Aberahama ame tha he mödrin he ka ip ödrin hnyi gethen. 17 Ke Iehova ame ha, ka habe, Hawa, oge me he ka ikhâlâ ga Aberahama hnök hna he ka ânyâ; 18 anyin ame he Aberahama ka hnân hnyei æ gan me man, ke ame he ka hnahic ünyi gan ta je hnyei hia eang hmelen? 19 Anyin a oge hia but wâhmakhmetoâ e, me me hamen he ka hûna ka lakon me anyin lap hwaban e, m' adre me he ka tuö de Iehova, he ka ânyâ wisa me owisa; me me he Iehova ka ohmâ kö Aberahama hna ha bânâ gan. 20 Ke Iehova ame ha, ka habe, E hnathu e gan hmâ but tenge anyin Sodoma me Gomora, ke e hnathu e ti hmak ut anyidrin hulö; 21 anyin a wale oge ma utut walang aug, me ö 'drin, hawa ödrin e ne ânyâ hia helâji me hwa tenge ame o but kõnya; ke a ne ba ame he ka khanö nya. 22 Ke a saü thö hnyat üheny e, me he bala Sodoma ai: ke Aberahama ame tiga tot hnyi hnyimakö Iehova. 23 Ke Aberahama ame hakekenyâ, me ha, ka habe, Hawa, u me he ka tha ohia wawisa

me wamonu? 24 A ne hu fifte tavat ae wisa hnyi hnyei: hawa, u ma he ka ohia, me ca betenge ka hnyei can fifte tavat ae wisa hnyin e? 25 Ö u ca he ka ânyâ helâe, wale he ka tha omoko tavat ae wisa me tavat ae kong, me me tha ücü at ae wisa me at ae kong. Ö u ca he ka helâe: hawa ame ca he at owisa hmeledrany hia ka ânyâ wisa? 26 Ke Iehova ame ha, ka habe, Oge ne wâ e Sodoma fifte tavat ae wisa hnyin taun, me oge me he ka betenge ka hnyei hia ünyi gadrin. 27 Ke Aberahama ame thu me ha, ka habe, Wâ bi, anyin a iny hwege hnyok he ka fuc köu, Than, k' iny sesâiny kânâ me hnabadröu; 28 ke hawa, a ne hia thabúng ta hnyat hnyi fifte tavat ae wisa, u ma he ka ohia hnyei hia can ae hia thabúng? Me e ame ha, ka habe, Oge me ca he ka ohia e, iny ka wâ fâte faiv. 29 Ke e ame ha hmetu kâu, ka habe, Hawa, u je ne he ka wâ fâte? Ke e ame ha, ka habe, Oge me ca he ka ânyâ can tavat a fâte. 30 Ke haingen, ka habe, E na ca he Than ka hmönyin, m' oge me he ka fuc: hawa a ne hu tavat a thöte? Ke e ame ha, ka habe, Oge me ca he ka ânyâ oge ne wâ eling tavat a thöte. 31 Ke e ame ha, ka habe, Wâ ju, e hwege hnyekuk he ka fuc ka Than; ke hawa, a ne hu tavat a twente eling? Haingen, Oge me ca he ka ohia e can tavat a twente. 32 Ke e ame ha, ka habe, E na ca he Than ka hmönyin, m' iny okhaca biju fuc: hawa a ne hu tavat a libenyita? Me haingen, Oge me ca he ka ohia e can tavat a libenyita. 33 Ke a um dö ühnenamö Iehova me Aberahama, me ame he but: ke Aberahama ame hmetu ka hnyi hnyaban.

HNYIMAKAN 19.

KE haba li angela ödrü me o hnyi Sodoma hnyi sahac; ke Lota ame laba hnyi homagöuleny Sodoma: ke Lota ame ö 'dru, me e ame tot he ka iouny mödrü, ke e ame nom hnyikânâi; 2 ke e ame ha, ka habe, Li than lo, wâ bi, saü ju ka hnyi hnyaban athnyabaibu, me mokut me ösüâ li cabu, ke öbu me he ka vesâ me vheno debu. Ke haingödrü, ka habe, Ohe, öbmu me he ka mokut hnyi gethen eäu hnyinghet. 3 Ke e ame üjöngi ödrü hwege ödrü; me ödrü me saü kâu, me didrö ka hnyi umen uma: ke e ame bi jeü hobi ködrü, me le areto adre ca levenâ bi, ke ödrü me han. 4 Ke ödrü tiga ca mokut, me ame igigilö uma hnen aten hnyei, wale

aten Sodoma, hwân ge ta je hidröu ke ne o but ge wahingat, a tavat hia úhedra hnyi je ke keihen hia ; 5 ke adre me hawo Lota me ha, ka habe, Ewa li at eja ödre o köu sabac? Hum ödrü but köhmun e me úkhanöhmunköu thö. 6 Ke Lota ame didrut ködra eú hnyi hwanuma, k' ame hlöng hwanuma ka hnyi hoton. 7 Me haingen, ka habe, Hnyat me lakeiny lö, ca ányá únyi heláe ae kong. 8 Wá bi, e hu lakuk li hlu, a ödrü tiga ca tha laba me бага, hnö nya but he ka su ödrü köbun, ke he th' öbun ka ányá ködrü bi helá me webun : ke ca he ka ányá únyi ae kong ka li at ang ; anyin a ödre o but ka hnyi hmenon umök uma. 9 Ke haingödra, ka habe, Kec dö. Ke adre me ha, ka habe, Haba at ang a o but a atkanyua, ke beweny bi be ka at owisa : ke walang ang öhmun e he ka okongu u gan hmá hudru. Ke adre me úlüö káu, wale Lota, me hakekenyá he ka kia hlingeny hwanuma. 10 Ke haba li at ödrü me hinöbeny jut me hügünö Lota ködrü eiö hnyin uma, me hlöng ut hwanuma. 11 Ke ödrü me owardruá but tavat hnyi hwanumen uma, tavat ae úhnyúkong me tavat ae gan : ke adre me húkötö but khaüteta hwanuma. 12 Ke haingen li at kö Lota, ka habe, Hawa, e hu je waem eang? haba úngom бага, me je lakom бага, me hlu, me ányám tavat hia hnyi hnyei ; hum ödrin but úheny ang : 13 anyin a ohmu me he ka ohia dok ang, anyin ae gan hmá hwan anyidra tenge hnyi hnyimákö Iehova ; ke a kun' öhmü Iehova he ka ohia e. 14 Ke Lota ame didrut me úhnenamö me laúngon, hnyat ödrin e hom lakon je hlu, me haingen, ka babe, Todrö, kec dö ge dok ang, anyin ame he Iehova ka ohia hnyei. Ke laungon ödrin e únykúme a g' ame úhiö. 15 Ke ame o thö hnyomakatu, me haba li angela ödrü me sihwegiö Lota, ka habe, Todrö hom dö áiám, me lakom li hlu eang ; wá u nye hmunyi mokcu, at ka he ka bi hwaban ka hnyei. 16 Ke e ame bec ; me haba li at ödrü me lelö hnyamen, me hnyamen áián, me hnyamen lakon li hlu ; anyin a Iehova ame betenge gan : me ödrü me su e me ip hnyi hoton taun. 17 Ke ödre hia but su ödrin, me e ame ha káu, ka habe, Kec dö m' u me möt ; ca hwiö bi, ke ca tot hnyi dok ae thahon hia ; kec dö ka hnyi bucen, wá u nye mokcu. 18 Ke Lota ame ha ködrü, ka habe, Than lö, e na ca heláe : 19 me wá ju a hia but athnyabaem wá

ibetengiö baú hnyi hnyimákám, ke u je hia but ogáná ányám ibetengiö, wale u je omanená könya me me omeli nya but ; ke ca khañö nya he ka kec ka hnyi bucen, wá e nye hom tilö nya hnen kong, m' iny mokcu : 20 wale bi eú taun ae hakekeny ka kec káu, ke úhnyúkong thibi : iny na kec ut ká e, (hawa e ca úhnyúkong e?) m' inye möt. 21 Me e ame ha káu, ka habe, Wá bi oge hia but köp u hnen únyi ang minya, me oge me ca he ka ohia taun e u me ha. 22 Logotö, kec dö ká e, anyin ae ca khañö nya ka ányá ke únyi u ka tiga ca o e. Anyin a wale adre me hwenyi ien taun e, me Zoara. 23 Ame görany dö seúnö hon hnyei ke Lota ame o thö Zoara. 24 Ke Iehova ame ota we hon Sodoma me Gomora a teio me meic únyi hnyi drany ga Iehova ; 25 me e ame ohia li taun e, me dok ae thahon hia, me tavat hia adre me labá li taun e, me ta je únyi hia ame kú eú hnyi káná. 26 Ke haba áián ame hwiö hmetu, m' adre wia momo e me me sált ame tot wisa. 27 Ke Aberahama ame vesákong me he ka hnyi dok e ame labö tot hnyin hnyi hnyimákö Iehova : 28 ke e ame bwele Sodoma ai me Gomoroai me hnyei hia ae thahon, me wá, ke wá bi ame sá göranyai hainy hnyei heláke hainy inyá ji. 29 Ke e ka he Khong ka ohia li tauniny hnyei ae thahon, me Khong ame únykúmi Aberahama me kunö Lota únyi hnyi wamben úhiö, hnyi úen e ame ohia li taun ame laba hnyin Lota.

30 Ke Lota ame ölö thö úheny Zoara me laba hnyi bucen tha e me lakon li hlu ; anyin a e ot ka laba e Zoara : ke e ame laba hnyi op, tha e me lakon li hlu. 31 Ke haingen atö ka wakeiat, ka habe, A hingat ut cica, ke ba at ehe ang he ka hum ötu helá me bongon hmeledrany : 32 ötü ma he ka habeli cica ge waina, me ötu me he ka tha mokut mē, me me hu mátrán únyi ga cica. 33 Ke hnyi lit eling ödrü me habelen kamödrü ge waina : me ame he atö me tha mokut me kamen ; ke e ca khana úen e ame mokut me tot hmetu. 34 Ke nyi, haingen atö ka wakeiat, ka habe, Wá bi, et hnyinghet oge tha mokut me cica : ötu me he ka habelen hmetu áú ge waina hnyinghet ; me u me he ka tha mokut mē, me me hu mátránitu únyi ga cica. 35 Ke ödrü me habelen kamödrü ge waina hnyi lit minya eling : me wakeiat ame todrö me tha mokut mē ; ke e ca khana úen e ame mokut me tot hmetu. 36 Me

wale e erkin dut li laku Lota hnen kamödrü. 37 Ke atö ame hnokoâ da, me hwenyi ien Moaba : wale kamen at Moaba ke ne o but hnyi bong ang. 38 Ke wakaiat minya ame hnokoâ ke da, me hwenyi ien Ben-ami : wale kamen ta je laku Amoua ke ne o but hnyi bong ang.

HNYIMAKAN 20.

KE Aberahama ame hok tot úheny e ka hnyi hnyeí hnyi Whaióu, me laba wanben Kadesi me Sura, me e ame laba kanyua e Gerara. 2 Ke haingö Aberahama ga Sara a áíân, ka habe, Hanik at ang : me Abimeleke thaniny Gerara ame úkhúnöng ka hum Sara. 3 Ke Khong ame o but kö Abimeleke hnyi bwi hnyi hnyinghet, me ha káu, ka habe, Wá bi u me helâ me at ae mokuu can momo u je hom ; anyin a e áíân ke at. 4 Ke Abimeleke ame tiga ca úhakekenyi më : ke e ame ha, ka habe, Than lö, u je he bi ka hlingá hnyeí ae wisa ? 5 Hawa, a ca ha könya, ka habe, Hanik at e ? ke haba momo, e ame ha minya, ka habe, Hanik at ang : me oge hia but ányá únyi ang ge hnyekuk ae hnathu, me li hnyamök ae alai. 6 Me Khong ame ha káu hnyi bwi, ka habe, Eke, e khandö nya a u je ányá e hnyi hnyekom ae hnathu, me oge me hom behanö u, wá u nye kong könya : waleling m' oge me ca hnö u he ka kálá e. 7 Anyin a wale, he thö u ka hna hmetu momo ka áíân : anyin a e perofeta, k' ame he ka hic hobi köu, me u me he ka möt : ke u je ne ca he ka hna hmetu, wáhmakhmeto ju a u me he ka mokuu, u bi, me je waem hia. 8 Ke Abimeleke ame vesákong, me hawa je athnyabainy hia, me thumetu ödrin ge ta je únyi hia e : me ame ot gan hmâ tavat. 9 Me Abimeleke ame hawo Aberahama, me ha káu, ka habe, Ieú ang u je hia but ányá köhmun ? ke ieú anyik monu köu, wale me u je bi jónik gan hmâ me dökhuk dökhü ? u je hia but ányá könya ta je únyi a ca hnân ányá. 10 Me haingö Abimeleke kö Aberahama, ka habe, Ieú u je wá me u me ányá thö únyi e ? 11 Ke Aberahama ame ha, ka habe, Oge me únykúme bi nya, ka habe, e ba ot ka Khong hnyi dok ang ; me ödrin e he ka hlingö nya can öiök. 12 Ke haba khaca, e hnathu, hanik e, ke nöku cica, ke ve hinyöhmu bi ; k' ame wia me me öiök bi : 13 ke haba hnyi úen Khong ame ohei nya únyi hnyi hyaba cica, me oge me ha káu, ka habe, Walang ányâm

ibetengjö u me he ka ányá könya, a haba hnyi ta je hnyeí ötu me he ka o hnyin, u me he ka haiö nya, ka habe, Hanik ang. 14 Ke Abimeleke ame hom ta je mamoe me kau, me athnyaba бага me momo, me ham kö Aberahama, me hnö Sara áíân hmetu káu. 15 Ke Abimeleke ame ha, ka habe, Wá bi, ik hnyeí hnyi hnyimákâm : labá ju hnâm hna he ka weny. 16 Ke haingen kö Sara, ka habe, Wá bi, oge hia but ham ka hânâm ta je ong sileva a khaca thauzan : ke wá bi, haba únyi e me hnân tube hnyimákâm, m' ödrin hia a tha ödrin möu ; m' u me he ka wisa hnyi hnyimakan tavat hia. 17 Ke Aberahama ame hic ka Khong : ke Khong ame osoi Abimeleke, me áíân me lathnyabainy omomo ; me ödrin e hnokoâ bi. 18 Anyin a hia but Iehova otounyö omomo hia hnyi lap anyi Abimeleke ca Sara öiö Aberahama.

HNYIMAKAN 21.

KE haba Iehova ame senö Sara helâ me hnen hna ha, me Iehova ame ányá kö Sara helâ me hwan hofuc. 2 Ke ame erkin dut Sara, me ame hnokoâ nöku Aberahama бага ka hingat ut, hnyi hing úen Khong ame hia but ha káu. 3 Me Aberahama ame hwenyi ien nokon a hnokoâ Sara, Isaaka 4 Ke Aberahama ame peritomoni Isaaka a nokon ke eit ta bonginy, heláji me hnen Khong hna húna káu. 5 Ke khaca haded je hunai Aberahama hnyi hna hnöku Isaaka a nokon. 6 Ke haingö Sara, ka habe, Khong ame hia but ohlumö nya ; k' ame he ka tha hluma mönya tavat hia adre me löng. 7 Ke haingen momo, ka habe, Ia ame he ka ba ehac kö Aberahama, ka habe, Ame he Sara ka asen je wanakat ? anyin a oge hia but hnokoâ nokon da ke hingat ut. 8 Ke ame húhúö thö wanakat, k' adre hnebaiö but : ke Aberahama ame ányá bijeú ae gan hnyi bong adre hnebaiö Isaaka hnyin. 9 Ke Sara ame wá nöku Hagara, momo Aigupito, waleji nöku Aberahama, k' ame hiá. 10 Waleling me me ha ko Aberahama, ka habe, Tha obá but momó eang adre úco me nokon : anyin ame ca he nokon momo eang adre úco ka tha hu hwajekhon me Isaaka nöku. 11 Ke a vec gan hmâ Aberahama ge hofuc eling, can nokon. 12 Ke Khong ame ha kö Aberahama, ka habe, E so u me ca vec can da, me momo u je úco ; ke löng ju hia thithö hna ha köu hnö

Sara ; anyin adre me he ka ha mâtânâm únyi ga Isaaka. 13 Ke oge me he bi nya ka wa nokon momo adre úco me hnân hnyei, anyin a e mâtânâm. 14 Me Aberahama ame vesákong, me hok areto me kaia ae lup, me ham kö Hagara, me ip hon bajebyin, me wanakat minya, me kunâ but momo : k' ame he but me he monu hnyi hnyebuba Bere-seba. 15 Ke a hme thö kaia, me momo ame ip ju wanakat eú hmelen úó ae okhulit. 16 K' ame he momo me laba sákâú cicö e, helâke hna fana ka hnyin : anyin a haingen, ka habe, Iny na ca wâ imekiny wanakat. Ke momo ame laba cicö me tenge hwege goranyai. 17 Ke haba Khong ame löng hwan da ; me angela anyin Khong ame hongot hnyi drany kö Hagara, ka habe, Hagara lö, iéú gam ? ca ot bi, anyin a löng ut Khong hwan da hnyi hnen hna mokut. 18 Tôdro, kap dö göranyai da, me kap hnen hnyamâm ; anyin a oge me he ka wia e me me hnyei ae gan. 19 Ke Khong ame obwela li emakan, me e ame wâ an, me e ame he but me óunöngótâ kaia, me habelen da. 20 Ke tha e Khong me da, ke e ame húhúö thö ; ke e ame laba hnyi hnyebuba, me e at ame fana bi. 21 K' ame laba hnyi hnyebuba Parana : ke hinyen ame hok momo únyi hnyi hnyei Aigupito me áân.

22 Ke haba hnyi úen eling Abimeleke me Fikolo tuhan anyin je deó vat, ödrü me úhnenamö me Aberahama me ha, ka habe, E unyâm Khong hnyi ta je únyi hia u je ányá : 23 anyin a wale e so u na khemanyiná ien Khong könya eang, a u me ca he ka iyawö könya, me nokuk, me nokon nökek : me u me he ka ányá könya, me ka hnyei u me laba kanyua hnyin, helâ me hnök hna betenge köu. 24 Me haingö Aberahama, ka habe, Oge me he ka khemanyin. 25 Ke Aberahama ame ú Abimeleke can an adre kou, waleji ame húgúnâ hnen je athnyabai Abimeleke. 26 Me haingö Abimeleke ka habe, Eca khanö nya at a ányá únyi e : ke u je ca thumetu nya minya, ke oge me ca löng ke ne but hnyi bong ang. 27 Me Aberahama ame hom je mamoe me kau, me ham kö Abimeleke ; me ödrü me úhinhinyköu. 28 Ke Aberahama ame hake ip je nokon mamoe momo a seven únyi hnyi hnahát. 29 Ke haingö Abimeleke kö Aberahama, ka habe, Iéú bongon je nokon mamoe momo eang a seven u je ke ip ? 30 Me haingen, ka habe, U me he ka kap únyi gak je lakon mamoe

momo a seven, me me bi haten könya, a oge hia but kou an eang. 31 Anyin a wale e ame hwenyi ien dok e Bere-seba, anyin a ödre úkhemanyin eling. 32 Wale ödrü me úhinhinyköu e Bere-seba : ke ame todrö Abimeleke me Fikolo tuhan anyin je deó vat, me ödrü me hmetu ka hnyi hnyei iny at Filisite. 33 Ke Aberahama ame tá ke úó tarfa e Bere-seba, me háwá ö Iehova eling, Khong a Nyiele balua. 34 Ke se hia bongu Aberahama hnyi hnyei iny at Filisiti.

HNYIMAKAN 22.

KE hwaban ta je únyi e, haba Khong ame cubic Aberahama, me ha káu, ka habe, Aberahama lö ; me e ame thu, ka habe, Inya ang. 2 Ke e ame ha, ka habe, Hom dö nokom, a nokom a khaca, at u me betenge gan, já Isaaka, me he thö ka hnyi hnyei Moria ; me hudo thö e me hnân hut adre le, hon ke bucen oge me he ka ha köu. 3 Me Aberahama ame vesákong, me ip tap hon haleny asina, me hom ke li at únyi hnyi je hidróu unyin, me Isaaka a nokon ; ke e ame khe utö hnân le hut, me todrö me he ka hnyi dok Khong ame hia but ha káu. 4 Haba hnyi bong a kuniny, Aberahama ame bwele me wâ dok ae tiga sákâú. 5 Me Aberahama ame ha ka anyin li hidróu, ka habe, Me laba ju öbu eang me asina, ke oge me he bi nya me da ká 'le ; ke öhmu me he ka hmi me hmetu ju köbu. 6 Ke Aberahama ame hom thi ot hobi káu hut adre le, me ip hu Isaaka a nokon ; ke e ame hom hele me meic hnyi hnyamen ; ke ödrü me tha he. 7 Ke Isaaka ame ha kö Aberahama a kamen, ka habe, Cica lö, me haingen ka habe, Nökuk lö, inya ang. Ke haingen, ka habe, Wâ bi meic me thi ot : ke ewa nokon mamoe hnân hut adre le ? 8 Ke Aberahama ame thu, ka habe, Nökuk, hamen Khong he ka penapena hobi káu bi ke nokon mamoe hnân hut adre le : me ödrü me tha he. 9 Ke ödrü me o but ka hnyi dok Khong ame ha káu ; ke Aberahama ame otílâ eling taben hut, me khutâ inyá, me co Isaaka a nokon, me ip e hon útoiny taben hut. 10 Ke Aberahama ame inâ but hnyamen me hom hele he ka hlingâ nokon. 11 Ke haba angela anyi Iehova ame háwá e únyi hnyi drany me ha, ka habe, Aberahama, Aberahama lö : me haingen, ka habe, Inya ang. 12 Me e ame ha, ka habe, Ca ip hnyamâm hon da, ke ca ányá ke únyi káu : anyin a oge wâ

but walang ang a u me ouden Khong, anyin a u je ca behânâ gak nokom, wale nokom a khaca. 13 Me Aberahama ame bwele me wâ, ke wâ bi, e hnyi hoton ke mamoe бага, ame vhet li faoiny hnyi hnyot: ke Aberahama ame he me hom mamoe бага, me hudo biju hnân hut adre le, me hwaban nokon. 14 Ke Aberahama ame hwenyi ien dok e, ka habe, Iehova-irae: helâ me hnödra hna labö ha ke ne o but hnyi bong ang, ka habe, Adre me he ka penapena e hnyi bucen anyi Iehova. 15 Ke ame olo hongot angela anyi Iehova kö Aberahama únyi hnyi drany, 16 me ha, ka habe, Haingö Iehova, ka habe, Oge hia but khemanyin gak bi, anyin a u je hia but ânyâ únyi e, k' u je ca behânâ nokom, wale nokom a khaca: 17 anyin a wale oge me he ka ti ohnahici u, me ti osiâ je mâtrânâm, me me helâ me ta je okhúiny drany, me helâ me öny hnyi baten köiö; k' ame he mâtrânâm ha hu homagöuleiny ta je iwahnaimiöny më; 18 ke ame he ka hnahic únyi ge mâtrânâm ta je hnyei hia thithö eang hmelen; anyin a u je löng hoton hok hofuc. 19 Ke Aberahama ame he hmetu ka li hidröu a anyin, me ödrin e tot, me tha he Bere-seba ai; ke Aberahama ame labâ Bere-seba.

20 Ke hwaban ta je únyi e, adre me thumetu Aberahama, ka habe, Wâ bi, haba Mileka ame hia but hnokoâ nöku Nahora a liamekeiny möu; 21 jia Uza nokon a bân, me Buza liamekeiny më, me Kemuela kamö Arama; 22 me Kesed, me Khaso, me Piledasa, me Jidelafo, me Bethuela. 23 Ke Bethuela ame hnöku Rebeka: haba ödrin eit Mileka ame hnokoâ a je laku Nahora liamekeiny me Aberahama. 24 Ke haba anyin ke momo, Reuma ien, e ame hnokoâ minya Teba, me Gaama, me Takasa, me Maaka.

HNYIMAKAN 23.

KE khaca haded ke twente seven ta je hunai Sara: wale ta je hunainy anyin möt. 2 Ke a moku Sara hnyi Kiriath-areba (wale Heberona) hnyi hnyei Kanana: ke ame o but Aberahama he ka hnyamok me tenge ga Sara. 3 K' ame todrö Aberahama unyin kokiny komok, me ha ka je laku Heth, ka habe, 4 Iny atkanyua me at ame më laba unyibun: e so öbun e ham könya ke utkânâ hnân khön komok hnyi unyibun m' inye konâm

kokik m' iny ca wâ but. 5 Haba je laku Heth adre me thu kö Aberahama me ha kâu, ka habe, 6 Than lö, löng ju köhmun: u than ae gan hmâ hmönyin unyihmun: konâm ju kokâm hnyi anyihmun erkemok u je úca; ke ba at gahmun ame he ka behanö u ge anyin erkemok, m' u me he ka konâm kokâm. 7 Me ame todrö Aberahama, me nom ju ka aten hnyei, wale je laku Heth. 8 Ke e ame úhnenamö mödra, ka habe, A ne webun a oge me he ka konâm kokik m' iny ca wâ bi, löng ju könya me tengiö nya kö Eferona nöku Zohara, 9 me me ham könya op e Makepela, a obiny, hnyi baten iny hnyei; e so e ame he ka ham e könya hnan hwaban ae bekhöt hnyi wanböbun me me anyik dok hnân khön komok hnyin. 10 Ke haba Eferona ame hnyi laba unyin lakon Heth: me Eferona at Heth ame thu kö Aberahama, ke ame löng lakon Heth, wal' ödra hia adre me didrö ka hnyi homagöuleny taun, haingen, ka habe, 11 E ba than lö, ling nya ju: haba utkânâ inya oge me ham but köu, me op eü hnyin oge me ham köu; oge me hna but köu hnyi hnyimakan lakon aten ik hnyei: konâm ju kokâm. 12 Ke Aberahama ame nom ju hnyi hnyimakan aten hnyei. 13 Me e ame ha kö Eferona k' ame löng aten hnyei, haingen, ka habe, U je ne wem, u na löng ju könya: oge me he bi nya ka ham hwaban utkânâ; hom dö únyi gak, m' oge me he ka konâm eling kokik. 14 Ke Eferona ame thu kö Aberahama me ha kâu, ka habe, 15 Ling nya ju, than lö, haba ong utkana ae úcú hwaban me vak ta haded je sekeliny sileva, ke hnân eü e kötu? anyin a wale, konâm ju kokâm. 16 Ke Aberahama ame löng kö Eferona; me Aberahama ame tuluto kö Eferona ta je sileva, waleji e ame ha hnyi hnyimakan je lakon Heth, a vak ta haded je sekeliny sileva, mone adre labö úco ka at úcú. 17 Me haba utkânâ i Eferona, e Makepela, cicö Mamere, wale utkânâ me op eü hnyin, me ta je úö hia hnyi utkânâ hnyi ta je hounyin igigilö, adre me ohmä 18 kö Aberahama me gan hnyi hnyimakan je lakon Heth a tavat hia adre me didrö ka hnyi homagöuleny anyin taun. 19 Ke hwaban dö e Aberahama ame könim Sara áiân hnyi op hnyi utkânâ e Makepela cicö Mamere (wale Heberona), hnyi hnyei Kanana. 20 Ke haba utkânâ me op eü hnyin, adre ohmä kö Aberahama hnen je lakon Heth me anyin dok hnân khön komok hnyin.

HNYIMAKAN 24.

KE hingat ut Aberahama, me se hia je hunainy: ke Iehova ame hia but ohnahic Aberahama hnyi ta je únyi hia. 2 Ke Aberahama ame ha ka athnyabainy, a hingatiny hnyaba, at ame musö anyin ta je únyi hia, ka habe, Iná ju hnyamám hmelen jevak: 3 me oge me he ka ha köu he ka khemanyin kõnya hnyi hnyimako Iehova, Khongon drany. me Khongon hmeledrany, a u me ca he ka hok áian nõkuk unyin je hlu lakon at Kanana, wale oge me laba unyidra: 4 ke u ma he ka hnyi ik hnyei, me anyik lap, me hok áian nõkuk jia Isaaka. 5 Ke haingen athnyaba káu, ka habe, Ke so bi ame ne ca hmehmela hlu ka he hotuk ka hnyi hnyei eang: hawa, hamök he ka su nokom ka hnyi hnyei u je he but únyi hnyin? 6 Ke Aberahama ame ha káu, ka habe, Wá eáu, u nye he thö ka su hmetu nõkuk ká e. 7 Haba Iehova, Khongon drany, waleji at a hum nya úhek hnyi hnyaba cica, me únyi hnyi hnyei adre hnöku nya hnyin, at ame ha kõnya me khemanyin kõnya, ka habe, Oge me he ka ham hnyei eang ka ta je mátránám; haba at eling ame he ka kuná anyin angela hnyi hnyimákám, ke u me he ka hok únyi eling áian nõkuk. 8 Ke a ne ca hmehmela hlu ka he hotom, awe, me u gufa hnyi hnam hna khemanyin kõnya eang; ke so bi u ma ca he bi ju ka su nõkuk ká e. 9 Me haba athnyaba ame iná hnyamen hmelen jeva Aberahama a tuhan, me khemanyin káu hnyi únyi eling. 10 Ke haba athnyaba ame hom ke je kamela a libenyita hanen je kamela haleny tuhan, me he but; anyin a e ame musö ta je únyi hia anyin tuhan: ke e ame tot me he Mesopotamia ai, ka hnyi taun i Nahora. 11 Ke e ame ocibouca je kamela hoton taun hnyi an, hnyi sahac, hnyi úen ame he omomo ka se köö. 12 Me e ame ha, ka habe, Iehova lö, Khongu Aberahama a tuhök, ö u kuná so kõnya hnyi bong ang, me betenge ju kö Aberahama a tuhök. 13 Wá bi oge me tot hnyi an; k' ame he jem ta je hlu lakon aten taun he ka se köö: 14 ke so e heláng, a haba hlu oge me he ka ha káu, ka habe, Ö u sáú thö ányám kaia m' inye ic; me e ame he ka ha, ka habe, Ic dö, ke oge me he minya ka habelen halem je kamela: e so e e bi at e u je úca hobi kö Isaaka

athnyabaem; ke waleling oge me he ka wáhmakhmeto a u je omanená ibetengio ka tuhök. 15 Ke e ame tiga ha hofuc, me wá bi a o thö Rebeka nõku Bethuela a nõku Mileka, öio Nahora, liamekeiny me Aberahama, ke e hu kaia hon bajebenyin. 16 Ke ti so hmains hlu at ka wá, ke hlu hnathu ae tiga ca tha laba me бага; me e ame utut ka hnyi an me öunöngötá anyin kaia me ölö hmetu. 17 Ke ame wadring athnyaba ka úkhanö mē, me ha, ka habe, Ö u habelik ge ke ong utköö. 18 Ke haingen hlu, ka habe, Than lö, ic dö: me e ame ie hna but kaia ka hnyi hon hnyamen, me habelen. 19 Ke a hia but habelen, me e ame ha, ka habe, Oge me he minya ka se köö hobi káu halem ta je kamela ke ne o but ödrin e um dö ic. 20 Ke e ame ie hingálá but anyin kaia ka hnyi kumete, me wadring hmetu ka hnyi an ka sáú, k' ame se köö hobi káu je kamela hia. 21 Ke haba at ame wá hmá hlu, me laba hnyibú, me me khana a ne hia but Iehova ohnahicá hnen hna vheno, ame ne ba. 22 Ke a um dö ic je kamela, haba at ame hom otu gol haf sekel ihmakinny me li waen gol hobi káu li hnyamen a libenyita ta sekel ihmakinny; 23 me haingen, ka habe, U nõku ia? bethe thumetu nya. Hawa e hu hna mokut hobi köhmun hnyi hnyaban kámám? 24 Me haingen, ka habe, Inya nõku Bethuela, a nõku Mileka, waleji e ame hnokóá nõku Nahora. 25 Me haingen minya káu, ka habe, E hu thatúnyin hwit me an meno unyihmun, me hna mokut minya. 26 Ke haba at e ame nom ju me ogánö Iehova. 27 Ke haingen, ka habe, E so adre me haisoi Iehova, Khongu Aberahama a tuhök, at ame ca hota degecá anyin ibetengio me hnathu ka tuhök: ke haba inya, me a hia but Iehova su nya hnyi getheniny hnyaban liamekeiny me tuhök. 28 Ke haba hlu ame wadring me thumeto lap anyin hinyen ge ta je únyi e. 29 Ke e hu hani Rebeka, Labana ien: me Labana ame wadring ka at ka hnyi an. 30 Ke e ame wá otu, me li waen hnyi hnyamen haniny, k' ame löng ut ho Rebeka a haniny, ka habe, Ame ha heláe kõnya at; me e ame o ka at; ke wá bi e ame tot unyin je kamela hnyi an. 31 Me e ame ha, ka habe, Hna ohnahicá hnö Iehova lö, didró; ieú gam u me tot eú? anyin oge hia but ányáwia uma, me hna mokut hobi káu je kamela. 32 Me haba at, e ame didró ka hnyin uma, ke e ame thang je

töiny je kamela ; ke e ame ham thatúnyin öwit me an je kamela, me utköiö hnân ösúá li can me je li cadrin hanen anyin bunyen. 33 Ke adre me ip jeú hnyi hnyimakan : ke haingen káu, ka habe, Oge me ca he ka me han, ke oge me he ka me ha can hna kunö nya jem. Me haingen, ka habe, Ha thö. 34 Ke e ame ha, ka habe, Inya athnyabai Aberahama. 35 Ke a hia but Iehova ohnahicá gáná tuhök ; ke gan hmá e : ke e ame hia but ham káu ta je hnahat mamoe, me kau, me sileva, me gol, me je lathnyabainy obaga me omomo, me je kamela, me je asina. 36 Ke haba Sara áiân tuhök e ame hnokoá nokon tuhök a бага, ke somaca but : ke a hia but ham káu anyin ta je únyi hia. 37 Ke tuhök ame kunö nya ka khemanyin, ka habe, U me ca he ka hok áiân nökuk únyi hnyi je hlu lakon at Kanana, hnyeí oge me laba hnyin : 38 ke u ma he ka hnyi hnyabacica, me anyik lap, me hok áiân nökuk. 39 Ke oge me ha ka tuhök, ka habe, Ame ne ca hmehmela hlu ka he hotuk. 40 Me haingen könya, ka habe, Ame he Iehova, wale oge me he hnyi hnyimakan, ka kuná anyin angela ka tha e möu, me ohnahicá úhem ; ke u ma he ka hok áiân nökuk únyi hnyi anyik lap, me hnyabacica : 41 waleling m' u me he ka gufa hnyi hnám hna khemanyin könya, u ka o ka anyik lap ; ke ödrin e ne ca ham köu hlu, me u me he ka gufa hnyi hnám hna khemanyin könya. 42 Ke oge me o but eja ka hnyi an, me oge me ha, ka habe, Iehova lö, Khongu Aberahama a tuhök, u je ne he ka ohnahicá hnök hna vhenö : 43 wá bi, oge me he ka tot hnyi an ; ke so ame he ka e bi, a haba hlu ame he jem ka se köiö, at oge me he ka ha káu, ka habe, Ö u habelik ge ke ong utköiö ; 44 k' ame he ka ha könya, ka habe, Ic dö, ke oge me he minya ka se köiö hobi káu halem je kamela : e so e hlu ame úca Iehova hobi káu nokon tuhök. 45 Ke iny tiga ca um do ha hofuc e eú hnyi hnyekuk, wá bi, Rebeka ame o me kaia hon bajebenyin ; ke e ame utut ka hnyi an ka sáú : ke oge me ha káu, ka habe, Ö u habelik. 46 Me e ame logötö hna but kaia únyi hon bajebenyin, me ha, ka habe, Ic dö, ke oge ma he minya ka habelen halem je kamela : me oge me ic, ke e ame habelen minya je kamela. 47 Ke oge me hnö e, ka habe, Nöku ia u? Ke haingen, ka habe, Nöku Bethuela, a nöku Nahora, wale Mileka

ame hnokoá me nokon : me oge me ip otu hnyi hnyimakan, me li waen hnyi li hnyamen. 48 Me oge me nom ju, me khudrung kö Iehova, me oganö Iehova, Khongu Aberahama a tuhök, waleji at ame hum nya hnyi gethen ae wisa he ka hom hlu nokon liamekeiny me tuhök hobi káu nokon. 49 Ke walang ang, öbun e ne he ka betenge me hnathu ka tuhök, thumetu nya thö : ke a ne ba, thumetu nya thö ; me oge me he bi nya ka saú ka hnyi ke keiher metá, ame ne ke keihen me. 50 Me ame thu Labana me Bethuela, ka habe, Unyi ga Iehova únyi eang : e ca khan' öhmu he ka ha köu kong me so. 51 Wá bi, wale Rebeka hnyi hnyimákám, hom dö, me tha he thö mä, me e ame he ka áiân nokon tuhám, helá me hna ha hnö Iehova. 52 Ke a löng ut hodru hnen athnyabai Aberahama, me e ame nom ju hnyikánái kö Iehova. 53 Ke haba athnyaba ame hom ta je omjeú a sileva, me je omjeú a gol, me je úkhaú, me ham kö Rebeka : e ame ham minya ta je únyi ae únyi hnathu hmönyin ka haniny, me hinyen. 54 Me ödrin e han me ic, e me tavat unyin, me mokut eling ; ke ödrin e hmak dö hnyi hnyomakatu, me e ame ha, ka habe, Hnö nya but ka tuhök. 55 Ke haingen haniny me hinyen, ka habe, E so e me tha laba thibi möhmum hlu hnyi ke je bong, ame ne libenyita ; hwaban e, e ame he ka he. 56 Ke haingen ködru, ka habe, Ca ovheli nya, anyin a hia but Iehova ohnahicá anyik he ; hnö nya but m' inye he hmetu ka tuhök. 57 Ke haingödrü, ka habe, Öhmu me he ka hawá hlu me hnö weny. 58 Me ödru me hawo Rebeka, me ha káu, ka habe, Hawa, u me he ka tha he me at ang? Me haingen, ka habe, Oge ma hnyi he. 59 Me ödrin e hnö Rebeka but a hanidrin, me momo at a hat e, me athnyabai Aberahama, me tavat unyin. 60 Me ödrin e ha hnahici Rebeka, me ha káu, ka habe, Hanihmun lö, e so u ma he ka hinyen ta je thauzan me je libenyita ta je thauzan, ke so ame he je mátránám ka laba hnyi ta je homagöuleny tavat adre me húkoti ödra. 61 Ke ame todró Rebeka, me je hluiny a je hlu, ke ödrin e tabá je kamela, me he hoton at : k' ame hum Rebeka hnen athnyaba me he but. 62 Ke haba Isaaka ame he hnyi gethen úheny Bere-lahai-roi ; anyin a e ame laba hnyi hnyeí ka hnyi Whaiöu. 63 Ke Isaaka ame he but hnyi sahac ka hnyi utkáná

hnân he ka únykúme : ke e ame bwele me wá, ke wá bi ame he jem je kamela. 64 Ke Rebeka ame bwele me o Isaaka, me e ame utut únyi hon kamela. 65 Anyin a e ame ha ka athnyaba, ka habe, la at e ame he hnyi utkánâ he ka úkhanô mötin ? K' ame thu hnen athnyaba, ka habe, Tuhök 'ling : me e ame hom mano hnân tubi, me tube e bi. 66 Ke athnyaba ame aú gaga kö Isaaka ta je únyi hia e ame ányá. 67 Ke Isaaka ame su e ka hnyi uma mano umö Sara a hinyen, me hum Rebeka, me me áián; ke e ame betenge gan : ke Isaaka ame hnyibú ju hwaban imekiny hinyen.

HNYIMAKAN 25.

KE haba Aberahama ame hok áián hmetu Ketura ien. 2 Ke e ame hnokoá nokon jia Zimeran, me Jokesana, me Medana, me Midiana, me Iebak, me Sua. 3 Ke Jokesana ame hnöku Sheba, me Dedana. Ke walang je laku Dedana, jia Asurim, me Letusim, me Leumim. 4 Ke haba je laku Midiana, me Efa, me Efera, me Enoka, me Abida, me Eledaa. Jè laku Ketura ödrin hia. 5 Ke Aberahama ame ham kö Isaaka anyin ta je únyi hia. 6 Ke Aberahama ame ham ta je bwhilany ka lakon li momo anyi Aberahama ; me kun' ödrin ka hnyi hnyei e deiö, me me úsákáú me Isaaka a nokon, ke e tiga möt. 7 Ke walang je bongon ta je hunainy möt anyi Aberahama, khaca haded ke sevente faiv ta je huna. 8 Ke Aberahama ame khúö homená, me mokcu ke ti hingat ut, me se hia hunainy ; k' adre öukhacaköuá me lahanen. 9 Ke haba Isaaka me Isamaela ödru me konám e hnyi op e Makepela, hnyi utkánâ anyi Eferona nöku Zohara at Heth, cicö Mamere ; 10 waleji utkánâ a úco Aberahama unyin lakon Heth : adre könim Aberahama eling unyi Sara a áián. 11 Ke hwaban dö mok a Aberahama Khong ame ohnahici Isaaka a nokon ; ke Isaaka ame laba e Bere-lahai-roi.

12 Ke walang ta je dö anyi Isamaela nöku Aberahama, waleji ame hnokoá nöku Aberahama hnö Hagara momo Aigupito, blu anyi Sara : 13 ke walang ien je laku Isamaela, a je iödrin hoton anyidrin je dö : jia Nebaioth, nöku Isamaela a bán ; me Kedara, me Adebeela, me Mibesam, 14 me Misema, me Duma, me Masa ; 15 me Hadara, me Tema, me Jetura, me Nafiso, me Kedema : 16 wale je laku Isamaela, ke

wale je iödrin hoton anyidrin je ong taun, me anyidrin je hnabâ ; ödrin je than a twelv hoton idrin je hnyei. 17 Ke walang ta je hunainy möt anyi Isamaela, khaca haded ke thöte seven ta je hunainy ; ke e ame khúö homená me mokcu, k' adre öukhacaköuá me lahanen. 18 Ke ödrin e labâ hwán hnyi Havila ke ne o but hnyi Sura, cicö Aigupito, gethen ka he Suria ai : e ame laba hnyi hnyimakan je liamekeiny me hia thithö.

19 Ke walang je dö anyi Isaaka a nöku Aberahama : Aberahama ame hnöku Isaaka : 20 ke fáte ta je hunai Isaaka e ame hum Rebeka nöku Bethuel at Suria, a at Padana-rama, hani Labana at Suria, me me áián bi. 21 Ke Isaaka ame khawéá áián kö Iehova, anyin ae toúnyi e : ke Iehova ame löng káu, me ame erkin dut Rebeka a áián. 22 Ke ame ve hwiö lihúnye eú hnyi hnyekon ; ke haingen, ka habe, Ieú ang a oge me heláng ? Me e ame he but ka hnei Iehova. 23 Me Iehova ame ha káti, ka habe,

Lo li dökhú eú hnyi hnyekom,

Ke u me he ka hnokoá lo li hnyei :

K' ame he ke hnyei ka hwege hon ke hnyei ;

K' ame he atö ka bi athnyabainy wa-keiat.

24 Ke ame o but úen he ka hnokoá, me wá bi lihúnye eú hnyi hnyekon. 25 Ke haba at ame bán ka o ame dra, helá me úkhaú ae tot dinen hia thithö ; ke ödrin e hwenyi ien, me, Esau. 26 Ke hwaban dö e ame o but minya keiny, ke hnyamen ame kát ohmáiny ca Esau ; ke adre me hwenyi ien Jakob : ke sikste hunai Isaaka hnyi ioi 'dru. 27 Ke ame húhúö thö li da : ke ti metá but Esau he ka hnu meno, e aten hnyot ; ke haba Jakob, me, at ae menyik k' ame laba hnyi je uma mano. 28 Ke Isaaka ame betenge ga Esau, anyin a e ame han utiö gan : ke Rebeka ame betenge ga Jakob. 29 Ke Jakob ame öt an : ke Esau ame o but áheny hnyot, k' a sényin dut : 30 me haingö Esau kö Jakob, ka habe, Haök ge tap únyi e ae dra ; anyin a oge sényin dut : waleling m' adre me hwenyi ien Edoma. 31 Me haingö Jakob, ka habe, Awe, úco thö kónya hanyen atö hnyi bong ang. 32 Me haingö Esau, ka habe, Wá bi, oge me he but ang ka mok, ke hnân eú kónya hanyen atö ? 33 Ke haingö Jakob, ka habe, Khemanyin thö kónya hnyi bong ang ; me e ame khemanyin káu : me e ame

ico kö Jakob hanymen a atö. 34 Ke Jakob ame ham kö Esau areto me je lentil adre ölä; me e ame han me ic, me tot ka he but: ke waleling Esau ame hûkötîâ hanymen atö.

HNYIMAKAN 26.

HE hmiâ thö hnyei, ke ke hmiâ ehac hnyi bong bongu Aberahama. Ke Isaaka ame he Gerara ai kö Abimeleke thaniny at Filisiti. 2 Ke Iehova ame manen dut kâu, me ha, ka habe, Ca he Aigupito ai; laba ju hnyi hnyei oge me he ka ha köu: 3 u ma laba kanyua hnyi hnyei eling, ke oge me he ka tha e möu, me ohnahici u; anyin oge me he ka ham köu me ta je matrânâm ta je hnyei hia eang, me oge me he ka ohwâdâ hnök hna úhihinyköu kö Aberahama a kâmâm; 4 ke oge me he ka osiâ ta je matrânâm helâ me ta je okhúiny drany, me ham ta je hnyei hia thithö ang ka ta je matrânâm; ke adre me he ka ohnahicâ ta je hnyei hia eang hmelen únyi ge ta je matrânâm; 5 anyin a löng hoton hok hofuc Aberahama, me tuö hnök hna otilâ, me hna húna, me hna owisa, me anyik ta je hnanyibu. 6 Ke Isaaka ame laba hnyi Gerara: 7 ke haba aten hnyei adre me hnö e ge áîân; ke haingen, ka habe, Hanik at ang: anyin a e ot ka ha, ka habe, Öiök ang; haingen wâ e nye he aten hnyei ka hlingö nya but ca Rebeka, anyin ae so hmainy at ka wâ. 8 Ke e ame laba beú eling, me ame bwele únyi hnyi mamalama hnö Abimeleke thaniny at Filisiti me wâ, ke wâ bi, Isaaka ame walak me Rebeka a áîân. 9 Me Abimeleke ame haö Isaaka, me ha, ka habe, Wâ bi, e hnathu a áîâm at ang: ke ieu gam a u me ha, ka habe, Hanik at ang? Me Isaaka ame ha kâu, ka habe, Anyin a haingök, Wâ inye mokcu can e. 10 Ke Abimeleke ame ha, ka habe, Ieu e u je ányâ köhmun? A ne tha laba thö ke at me áîâm, me u je bi jönihmun. 11 Me Abimeleke ame húna ka tavat hia, ka habe, Haba at ame he ka kâlâ at eang me áîân, adre me he ka hlingâ e. 12 Ke Isaaka ame belök hnyi hnyei e, me meno a khaca haded troban hnyi huna e: ke Iehova ame ohnahicâ e. 13 Me ame lung tot at eling, me labö gan tot ke ne o but ame ti gan hma hmönyin: 14 ke e hu gan ta je hnahat mamoe, me ta je kau, me je lanyin a ödrin se hia: ke at Filisiti adre me hmönyidra kâu. 15 Ke haba at Filisiti

adre hia but hlöng me öunöngötâ ge kânâ ta je an hia a kou hnen lanyin kamen, hnyi üö Aberahama a kamen. 16 Ke Abimeleke ame ha kö Isaaka, ka habe, He thö gahmun, anyin a u gan hmâ hmönyin hhumun. 17 Me Isaaka ame he but úheny e, me laba hnyi hnyigöulen bucen Gerara, me labâ e. 18 Ke Isaaka ame ác hmeto ta je an adre kou hnyi üö Aberahama a kamen; anyin a hia but hlöng e hnen at Filisiti hwaban mok a Aberahama: ke e ame ve hwenyi ien hoton je ien hnen kamen hna hwenyi ien. 19 Ke haba je lanyin Isaaka adre me kou hnyi hnyigöulen bucen, me wâ eling köiö ame pupya. 20 Ke haba je hnyat tuö meno e Gerara ödrin e iwatretra me hnyat tuö meno hale Isaaka, me ha, ka habe, Anihmun an eü: me e ame hwenyi ien an e Esek; anyin a ödrin e iwatretra mē. 21 Ke ödrin e kou hmetu ke an, me ödrin e iwatretra hmetu e: me e ame hwenyi ien e Sitena. 22 Ke e ame hna but dok e, me kou ke an; ke ödrin e ca iwatretra e: me e ame hwenyi ien e Rehoboth; anyin a haingen, ka habe, A hia but Iehova bi hnötin walang ang, k' ötin e he ka si but hnyi hnyei. 23 Ke e ame he thö úheny e Bere-seba ai. 24 Ke Iehova ame manen dut kâu hnyi hnyinghet eling, me ha, ka habe, Inya Khongu Aberahama a kâmâm: ca ot, anyin a tha inya möu, ke oge me he ka ohnahici u, me osehia ta je matrânâm can athnyabaik a Aberahama. 25 Ke e ame otilâ eling ke taben hut, me hawâ iö Iehova, me otilâ eling umen uma mano: me je lanyin Isaaka ödrin e khú an hnyi dok eling. 26 Ke ame he but kâu úheny Gerara Abimeleke, me Ahuzatha a hanen, me Fikolo taben anyin je deö vat. 27 Ke Isaaka ame ha ködrin ka habe, Ieu can öbun e he but könya, anyin öbun e hûkötîö nya, k' öbun e hia but obö nya? 28 Ke haingödrin, ka habe, Öhmun e wâ wia thö a tha Iehova möu; me haingöhmun, ka habe, Ötin e he ka ve khemanyin, a öhmun möu, ke öhmun e he ka úhihinyköu möu; 29 ka habe, U ma ca he ka okongu öhmun, helâji me hnöhmun hna ca kalö u, ke so bi öhmun e hia but ányâ thibi so köu, me kunö u hnyi úsoköu: waleling m' u hnabic walang ang hnö Iehova. 30 Ke e ame ányâ bijeu hobi ködrin, me ödrin e tha han me ic. 31 Ke ödrin e vesákong me úkhemanyidrinköu: ke Isaaka ame kun' ödrin, me ödrin e he but úhedrin unyin hnyi úsoköu. 32 Ke hnyi bong eling ame o thö lanyin Isaaka,

me thumeto e ge an ödrin e kou, me ha k u, ka habe,  hmun e w  ju k i . 33 Me e ame hwenyi ien e Seba: waleling me me ien taun eling Bere-seba ke ne o but hnyi bong ang.

34 Ke f te hunai Esau, me e ame hum Juditha n ku Beeri at Heth, me Basemathi n ku Elona at Heth meli  ian: 35 me ame vec hnyeku Isaaka me Rebeka gadru.

HNYIMAKAN 27.

KE hingat ut Isaaka me hadedak li emakan, me me ca khana he ka w , me e ame hao Esau a nokon a at , me ha k u, ka habe, N kuk l : me haingen k u, ka habe, Inya ang. 2 Ke haingen, ka habe, W  bi, iny hingat ut, ke ca khan  nya bong oge me he ka mokcu hnyin. 3 Anyin a wale he th  walang ang ka hom  ny m ta je  nyi hn n hling  mena, a  ny m thi fana me cafana, ke he th  ka hnyi hnyot ka u   k mena; 4 ke  ny  th  hobi k nya uti  ae bo so hel  me wek, me hom but k nya, me oge me he ka han; me me he hanuk ka hahnahici u inye tiga ca mok. 5 Ke Rebeka ame l ng hna ha hn  Isaaka k  Esau a nokon. Ke Esau ame he but ka hnyi hnyot ka u  mena, me he ka hom. 6 Ke Rebeka ame ha k  Jakob a nokon, ka habe, W  bi, oge l ng ut hna ha hnen k m m k  Esau a tuh m, ka habe, 7 Ho jem mena k nya, ke any  th  hobi k nya uti  ae bo so, m' inye he ka han me hahnahici u hnyi hnyimak  Iehova, k' inye tiga ca mok. 8 Anyin a wale nokuk l , l ng ju hoton hok hofuc, hel  me hn k hna he ka h na k u. 9 He th  ka hnyi hnahat mena, me hom but jem lo li lakon got ae so; ke oge me he ka  ny  e hn n uti  ae bo so hobi k u k m m hel  me hnen hna weny: 10 ke u ma he ka hom e ka k m m, me me he ka han, me me he but ka hahnahici u e me tiga ca mokcu. 11 Ke Jakob ame ha k  Rebeka a hinyen, ka habe, W  bi, at ae k  le nen Esau, k' inya at khabala  unyik. 12 Ame ne he la cica ka ab  nya, me iny at ae thoi k u; waleling m' oge me he ka o  hna hang  k nya, ke ba bi hnahicik. 13 Ke haingen hinyen k u, ka habe, e so ame tak  nya bi hna hang  u n kuk: ke l ng ju hoton hok hofuc, ke he th  ka hom k nya. 14 Ke e ame he but ka hom, me hom ka hinyen: ke hinyen ame  ny  uti  ao bo so, hel  me weny k men. 15 Ke Rebeka ame hom je  kha 

ae so anyi Esau nokon a at , ei  hnyin uma, me okha  Jekob nokon a wakeiat: 16 ke e ame lan li hnyamen, me hon nyin ae khabala  hnen ke hnyiban unen li lakon got: 17 ke e ame ham uti  ae bo so, me areto e ame penapena ka hnyi li hnyam  Jekob a nokon. 18 Me e ame o ka k men, me ha, ka habe, Cica l : me haingen, ka habe, Iny ang n kuk, u ia? 19 Me haing  Jekob ka k men, ka habe, Inya Esau nokom a at ; oge hia but  ny  hel  me hn m hna h na k nya: h h i th , me laba th  he ka han hanik, m' u ma he ka hahnahici nya. 20 Ke haing  Isaaka ka nokon, ka habe, N kuk a hawa u je ie w ? Me haingen, ka habe, Anyin a hn  Iehova Khongom hna ohwegi nya. 21 Me haing  Isaaka k  Jekob, ka habe, N kuk l  me hok ju jem m' inye he ka ab  u, ame ne Esau u n kuk, ame ne ia. 22 Ke Jakob ame hakekeny d  k  Isaaka a k men, ke e ame aba ju e, me ha, ka habe, Haba hwan me ho Jakob, ke haba li hnyam, a li hnyam  Esau bi. 23 Ke ca manen e k u, anyin ae k  le nen li hnyamen, hel  me li hnyam  Esau a tuhan: me e ame hahnahic  e. 24 Ke e ame ha, ka habe, E hnathu u Esau a n kuk? Me haingen, ka habe, E. 25 Ke haingen, ka habe, H  jem k nya, m' inye he ka han hanem n kuk, m' inye he ka hahnahici u. Me e ame hom k u, me e ame han: ke e ame hom waina, me e ame ic. 26 Ke Isaaka a k men ame ha k u, ka habe, N kuk l , hok ju jem k nya, me  cimhnyimak m nya. 27 Me e ame hakekeny, me  cimhnyimak m : me e ame hnul  bunen  kha ten, me hahnahic  e, me ha, ka habe,

W  bi, haba bunen n kuk,

Me hel  me bunen utk n  hu  Iehova hna hahnahic :

28 Ke ame he Khong ka ham k u hau  nyi hnyi drany,

Me pipikhenyainy hmeledrany,

Me hwit me waina ae gan hm :

29 E so ame he tavat ka hulwa k u,

Me ta je hnye i he ka nom ju k u:

U me he ka thaniny je liamekeiny m u,

Ke ame he je lakon hiny m ka nom ju k u:

Ame he ka hang  but at ame hang  u,

K' ame he ka hnahic ut at ame hahna hici u.

30 Ke a hia but Isaaka hahnahici Jekob, ke Jakob ame hap didrut unyi Isaaka a

kamen, me waleling ame ie o but Esau a tuhan úheny hnyi hna uó meno. 31 Ke a hia but ányá utiö ae bo so minya, me hom e ka kamen ; me e ame ha ka kamen, ka habe, Cica lö, höhöi thö, me han hanik, me u ma he ka hahnahici nya. 32 Ke haingö Isaaka a kamen, ka habe, U ia? Me e ame ha, ka habe, Inya Esau nokom a bán. 33 Ke Isaaka ame öbubuny gan hmá but, me ha, ka habe, Ie at wale a hia but uó meno me oá kónya, ke oge hia but han ke tiga hiö u, me oge hia but hahnahicá e? eke, k'ame he balua but e ka hnahic. 34 Ke a löng ut Esau hofuc hwan kamen, me e ame tenge gan hmá hmönyin, me haingen ka kamen, ka habe, Cica lö, hahnahici nya minya thö walö nya eang. 35 Ke haingen, ka habe, A mwi ang kem ka iyawö, me a hia but hom ányám hnahic. 36 Ke haingen, ka habe, Hawa, e ca úcú hnödra hna hwenyi ien me Jakob? anyin a olo but obö nya : e ame bán ka húgúná anyik atö ; ke wá bi, walang ang a hia but húgúná hnahicik. Me e ame ha, ka habe, Hawa, e ba ke hnahic u je ip hobi kónya minya? 37 Ke Isaaka ame thu me ha kö Esau, ka habe, Wá bi, oge hia but otílá me hnán tuhám, me oge hia but ham káu je liamekeiny hia mé me lanyin ; ke oge hat e ge hwit me waina : ke ie únyi oge ma ányá kóu nöku? 38 Ke haingö Esau ka kamen, ka habe, Cica lö, hawa khaca thibi hnahic unyám? Hahnahici nya minya thö, walö nya ang. Ke Esau ame tenge hwege göranyai. 39 Me Isaaka a kamen ame thu káu, me ha, ka habe,

Wá bi, ame he ka e hnyabam hnyi káná ae pipikhenya,

Me hau únyi hnyi drany ethö ;

40 Ke u me he ka möt hnen ányám hele vat, ke u ma he ka bi athnyabainy kem ;

Ke haba hnyi úen u ka he ka hon,

Me u ma he ka hota degecá únyi hon nyem hnen hna ohmá.

41 Ke Esau ame húkötö ga Jakob, can hnahic a ham káu kamen : ke haingö Esau eú hnyi hnyekon, ka habe, E hakekeny jut úen ka hnyamoki Cica, me oge me he ka hlingö Jakob a keik. 42 Ke adre me thumetu Rebeka ge hofuc ho Esau nokon a bán ; me e ame úkhúnöng ka hao Jakob nokon a wakeiat, me haingen káu, ka habe, Wá bi, Esau a tuhám ame ip hnám he ka hlingö u. 43 Anyin a wale nöku lö, löng ju hoton hok hofuc, me todrö, kec dö Karan

ai kö Labana a hanik ; 44 me tha laba mé hnyi ke je bong, ke ne o but ame aú but hmönyin anyin tuham ; 45 ke ne o but ame hwiö but hna hmönyini u hnen tuhám, me ame hnying ut hnám hna ányá káu : ke hamök he ka úkhúnöng ka hao u úheny e : hnán eú ka tha hi' öbu gak hnyi bong u khaca?

46 Ke haingö Rebeka kö Isaaka, ka habe, E hmak ut hnyekuk can li momo Heth : a ne he Jakob ka hok áián únyi hnyi je lakon Heth a je hlu, helá mödru li momoiny hnyei, hnán eú hmetu möt kónya?

HNYIMAKAN 28.

KE Isaaka ame hao Jakob, me hahnahicá e, me húna káu, me ha káu, ka habe, U ma ca he ka hok momo únyi hnyi je hluiny hnyei Kanana. 2 Todrö, he thö Padanarama ai, ka hnyi hnyaba Bethuela, kamen hinyám ; me hok áiám ju únyi e unyin je laku Labana a je hlu, a mahinyám. 3 Ke e so ame he Khong Ataekhanahia he ka ohnahici u, me odedu u, me osi u, me me se hia em je hnyei ; 4 me ham kóu bna hahnahici Aberahama, kóu, me ka ta je mátránám ; m' u ma he ka hu bi hnyei u me laba kanyua hnyin, waleji hnen Khong hna ham kö Aberahama. 5 Ke Isaaka ame kunö Jakob : me e ame he Padanarama ai kö Labana, nöku Bethuela, at Suria, hani Rebeka, hinyö Jakob me Esau. 6 Ke ame wá Esau a ga um but Isaaka hahnahici Jakob, me kuná e Padanarama ai, he ka hok áián únyi e ; ke ame hahnahicá e, me húna káu, ka habe, U ma ca he ka hok momo únyi hnyi je hluiny hnyei Kanana ; 7 k' ame wá a g' ame löng hoton kamen me hinyen hnö Jakob, me he Padanarama ai : 8 ke a wá Esau a g' ame húkötíá hnö Isaaka a kamen ta je hluiny hnyei Kanana ; 9 me Esau ame he kö Isamaela, me hum Maalatha me hanen láián, wale hlu nöku Isamaela, a nöku Aberahama, hani Nebaioth, me me áián.

10 Ke Jakob ame hna but Bere-eeba, me he Karan ai. 11 Ke e ame o but hnyi ke dok, me e ame mokut ju eling, anyin a didrut seúnö ; ke e ame hom ke veto hnyi dok eling me hnán hunen, ke e ame mokut hnyi dok e. 12 Ke e ame bwi, me wá bi ke wacúat adre otílá hon káná, k' ame kálá thö ethö drany ke hnyiban e : ke wá bi ame ölö me utut hnyin ta je angela anyin

Khong. 13 Ke wâ bi, ame tot Iehova ethô hon e, me ha, ka habe, Inya Iehova, Khongu Abrahamama a kâmâm, me Khongu Isaaka : haba kânâ u me mokut hnyin, oge me he ka ham e kôu, me je mâtânâm ; 14 ke ame he ta je mâtânâm ka helâ me sesâiny kânâ, ke u ma he ka lau jio, me deiö, me hwadrö, me hwaiöu : k' ame he ka hnahic ta je hnyei hia eang hmeledrany únyi gam me únyi ge ta je mâtânâm. 15 Ke wâ bi, tha inya möu, ke oge me he ka tuö u hnyi je hnyei hia u je he ka hnyin, me ohmetu u ka hnyi hnyei eang : anyin oge ma ca he ka hnö u ke ne o but oge hia but ányâ hnök hna ha kôu. 16 Ke Jakob ame hmak dö úheny hnyi hna mokut, me e ame ha, ka habe, E hnathu Iehova hnyi dok ang ; ke ca khanö nya but. 17 Ke e ame ot, me ha, ka habe, Hnân outen dok eang, haba dok ang me wale thibi e uma umen Khong, me homagöuleny drany. 18 Ke Jakob ame vesâkong me hom veto e ame hunâ, me otilâ e hnân haten, me hú hon ge wakaco. 19 Ke e ame hwenyi ien dok e, me, Bethela : ke Luza ien hnyei e a bân. 20 Ke Jakob ame hip' khöbi, me ha, ka habe, Ame ne he Khong ka tha e mönya, me tuö nya hnyi gethen ang oge me vheno, me hák, me ha khauk, 21 m' oge me he ka o hmetu ka hnyi hnyaba cica hnyi hnahic, awe, Iehova but Khonguk, 22 ke haba veto eang, wale oge otilâ hnân haten, ame he ka hnen uma umen Khong : ke únyi hnyi ta je únyi hia u ma he ka ham kónya, e hnathu oge me he ka ham hmetu kôu je ke keihen a libenyitainy.

HNYIMAKAN 29.

KE Jakob ame vheno deny me o ka aten hnyei e deiö. 2 Ke e ame bwele me wâ bi ke hna khú an hnyi hnyei, ke wâ bi kun ta hnahat mamoe ame mokut eling ; anyin adre me labö habelen ta je mamoe hnyi an eling ; ke gan hmâ veto hlinginy an. 3 Ke adre me labö úkhacakôuâ kâ e ta je mamoe hia : ke adre me tetebulo veto únyi hnyi hnyimen an, me söü belen ta je mamoe, me hlöng hmeto an hnen veto. 4 Me haingö Jakob ködrin, ka habe, Hnyat me lakeiny mönya lö, öbun e mwi ua? Haingödrin, ka habe, Öhmun je aten hnyei Karan. 5 Me e ame ha ködrin, ka habe, Hawa, e khan' öbun Labana nöku Nahora? Haingödrin, E khan' öhmun. 6 Me e ame ha ködrin, ka habe, Hawa,

ame sot e? Haingödrin, ka habe, e ame sot : ke wâ bi Rakela nokon hlu ame he jem me ta je mamoe. 7 Me haingen, ka habe, Wâ bi, e tiga jebigö, ke tiga ca ñen he ka úkhacakôuâ ta je meno : he th' öbun ka söü belen ta je mamoe, me he thö ka hân. 8 Ke ödrin e ha, ka habe, E ca khan' öhmun, e so bân ka úkhacakôuâ ta je hnahat hia, m' adre me he ka tetebulo veto únyi hnyi hnyimen an, me waleling öhmun e he ka söü belen ta je mamoe. 9 Ke e ame tiga úhnenamö mödrin, me ame o thö Rakela me ta je mamoe haleny kamen ; anyin a e at ame tuö. 10 Ke hnyi ñen Jakob ame ö Rakela nöku Labana a mahinyen, me ta je mamoe hale Labana a mahinyen, me Jakob ame hakekeny me tetebulo veto únyi hnyi hnyimen an, me söü belen ta je mamoe hale Labana a mahinyen. 11 Ke Jakob ame úcimhnyimak me Rakela, me tenge hwege göranyai. 12 Ke Jakob ame thumetu Rakela a e utha ge kamen, ke nöku Rebeka e : ke ame wadring hlu me thumetöä kamen. 13 Ke e ka löng Labana úthumetu ga Jakob a nokon hannyin, me e ame wadring he ka iouny më, me e ame deltâ e, me úcimhnyimak më, me su e ka hnyi hnyaban. Ke e ame áú gaga kö Labana ta je únyi hia. 14 Ke haingö Labana kâu, ka habe, E hnathu u hanen jeiök, me hanen utiök. Ke khaca tehi ödru me tha laba hnyin. 15 Ke Labana ame ha kö Jakob, ka habe, Hawa, u ma huliwa gufa kónya anyin a ötu liamenakáúnyin? Ha thö kónya hwabâm. 16 Ke lo laku Labana li hlu : haba ien atö, me, Lea, ke Rakela ien wakeiat. 17 Ke vhihne li emakö Lea ; ke khula údren makö Rakela, me so hmainy. 18 Ke Jakob ame weny Rakela, ke haingen, ka habe, Oge me he ka huliwa kôu hnyi seven je huna hwabö Rakela nokom a wakeiat. 19 Ke haingö Labana, ka habe, E ti so kónya he ka ham e kôu hon hnök hna he ka ham ka ke at : tha laba ju mönya. 20 Me Jakob ame huliwa seven ta je huna hwabö Rakela ; ke helâke je bong ae wakhalet thibi kâu, can anyin betenge ka hlu. 21 Ke Jakob ame ha kö Labana, ka habe, Ham but kónya öiök, anyin a um dö ta je bonguk, m' inye he ka tha laba më. 22 Ke Labana ame úkhacakôuâ aten hnyei hia me bi jeú. 23 Ke haba hnyi hnyinghet e ame hum Lea bi a nokon, me su e kâu ; me ödru me tha laba. 24 Ke Labana ame ham Zilepa a athnyabainy kö Lea a nokon me hnân

anyin hlu. 25 Ke wá bi, hnyi hnyomakatu Lea bi eling : me e ame ha kö Labana, ka habe, Ieú e u je ányá kónya ? hawa, oge ca huliwa kô hwabô Rakela ? ieú gam u je iyawô nya. 26 Ke haingö Labana káu, ka habe, Ca hwakecin ihmun hnyei he ka ham báná wakeiat, ke biliny bi ató. 27 Oumo thô wikiny at ang, ke ôhmun e he ka ham minya kôu ke at, a hwaban huliwa u ma he ka ányá kónya hnyi seven hmetu ta je huna. 28 Me Jakob ame ányá heláe, me oumo anyin wik : me e ame ham Rakela a nokon me hnân áiân. 29 Ke Labana ame ham Bila a athnyabainy kö Rakela a nokon, me hnân anyin hlu. 30 Ke e ame tha laba me Rakela minya, ke e ame beten-ge ga Rakela hu Lea, me e ame huliwa káu hnyi seven hmetu ta je huna.

31 Ke Iehova ame wá a g' adre me höciö Lea, me e ame ohnoko e : ke toúnyi bi Rakela. 32 Ke Lea ame erkin dut me e ame hnokoá da, me hwenyi ien Reubena : ke haingen, ka habe, Anyin a wá but Iehova anyik vec ; k' ame he öiök ka betenge gak walang ang. 33 Ke e ame erkin hmetu, me e ame hnokoá da, ke haingen, ka habe, Anyin a Iehova ame löng hna höciö nya, me e ame ham minya kónya da eang : ke e ame hwenyi ien Simeona. 34 Ke e ame erkin hmetu, me e ame hnokoá da ; me haingen, ka habe, Ame ne úen dut ang ame he öiök ka tha hnyok mönya, anyin oge hia but hnokoá kun lakon ta бага : anyin a wale adre hwenyi ien Levi. 35 Ke e ame erkin hmetu, me e ame hnokoá da : ke haingen, ka habe, Walang ang oge me he ka ogânö Iehova : anyin a wale e ame kwenyi ien Juda ; ke e ame mwi thô.

HNHYIMAKAN 30.

KE a wá but Rakela a g' ame ca hnöku nöku Jakob, me Rakela ame hmönyin ka tuhan, me ha kö Jakob, ka habe, Ha nöku ut, wá inye mokcu. 2 Ke Jakob ame hmönyin kö Rakela, me haingen, ka habe, Hawa inya ang hnen Khong, waleji at ame behanö u ge ta je wanakat ? 3 Ke haingen, ka habe, Wá bi anyik hlu jia Bila, hom ju e, ke e ame he ka hnokoá hobi kónya, me me hu nöku minya únyi gan. 4 Me e ame ham káu anyin hlu wale Bila hnân áiân : ke Jakob ame hom e. 5 Me Bila ame erkin dut, me e ame hnokoá nöku Jakob a da. 6 Me haingö Rakela, ka habe, A hia but Khong owisa kónya,

me löng hok hofuc, me ham kónya nöku da : anyin a wale e ame hwenyi ien Dana. 7 Ke ame erkin hmetu Bila hlu anyi Rakela, me e ame hnokoá nöku Jakob da a loiny. 8 Me haingö Rakela, ka habe, E gan hmá but hnök hna úsúu me tuhök, ke oge hon dut : me e ame hwenyi ien Nafatali. 9 Ke a wá but Lea a ga mwi thô, me e ame hum Zilepa a anyin hlu, me ham kö Jakob hnân áiân. 10 Me Zilepa hlu anyi Lea ame hnokoá nöku Jakob a da. 11 Me haingö Lea, ka habe, A o but hnahic ! me e ame hwenyi ien Gada. 12 Ke Zilepa hlu anyi Lea ame hnokoá nöku Jakob ke da a loiny. 13 Ke haingö Lea, ka habe, Oge senyin dut, anyin ame he ka hawo nya me senyin hnen ta je hlu : ke e ame hwenyi ien e Asera. 14 Ke ame he Reubena hnyi úen meno hwit, k' ame wá ta je dudai hnyi utkâná, me e ame hom but e kö Lea a hinyen. Ke haingö Rakela kö Lea, ka habe, Ö u haök ge je dudai anyin nokom. 15 Me haingen káu, ha habe, Hawa, únyi ae úhnyúkong e, a u je hia but húgúná öiök ? ke u me he minya ju ka húgúná je dudai anyin nöku ? Ke haingö Rakela, ka habe, Anyin a wale e ame he ka tha e möu eáu hnyinghet hwaban je dudai anyin nokom. 16 Ke Jakob ame o but úheny hnyi hna belök hnyi sahac, k' ame he Lea ka iouny me, me ha, ka habe, U ma he ka tha e mönya ; anyin ae hnathu oge úcú u hwaban je dudai anyin nöku. Me e ame tha e me hnyi hnyinghet eling. 17 Ke Khong ame löng kö Lea, ke e ame erkin dut, me hnokoá nöku Jakob бага a thabúnginy. 18 Me haingö Lea, ka habe, A hia but Khong ham kónya hwabök, anyin a oge ham anyik hlu ka öiök : ke e ame hwenyi ien Isakara. 19 Ke ame erkin hmetu but Lea me hnokoá ke da a siksiny kö Jakob. 20 Ke haingö Lea, ka habe, Khong ame hia but ham kónya tang omjeú ae so ; ame he öiök ka laba so mönya walang ang, anyin oge hia but hnokoá lakon je бага a siks : ke e ame hwenyi ien e Zebulona. 21 Ke hwaban Dö e, e ame hnokoá in, me hwenyi ien Dina. 22 Ke Khong ame únykümi Rakela, me Khong ame löng káu me ohnokoá e. 23 Me e ame erkin dut, k' ame hnokoá da : me ha, ka habe, A hia but Khong hom hna haikongu nya : 24 ke e ame hwenyi ien Josefa, me ha, ka habe, E so Iehova ame ham minya ke da a nöku. 25 Ke a hia but Rakela hnöku Josefa, haba Jakob ame ha kö Labana, ka habe,

Hnö nya but, m' inye hmetu ka hnyi gak, me ik hnyei. 26 Hna but kõnya je laöiök me je lakuk, wale hwaban hnök hna huliwa köu, me hnö nya but : anyin ae khanö u huliwa waleji oge anyá köu. 27 Me haingö Labana káu, ka habe, A ne hu anyám ibetengió kõnya, me halubahingen ju, anyin a oge me wáhmakhmetoá a Iehova ame ohnahici nya gam. 28 Ke e ame ha, ka habe, Ha wia thö kõnya hwábám me oge me ke ka ham. 29 Me haingen káu, ka habe, E khanö u hnök hna huliwa köu, me troban hnök hna tuö halem ta je meno. 30 Anyin ae wakhalet thibi gam ehac ke tiga hiö nya, k' ame si gan dut walang ang ; ke a hia but Iehova ohnahici u hnyi je deny hia waleji oge wia káu : ke haba walang ang, oge me he ka penapena hobi káu anyik lap kehö ? 31 Me haingen, ka habe, Oge me he ka ham ieu köu ? Ke haingö Jakob, ka habe, E ba únyi u me he ka ham kõnya : ke khaca thibi únyi u me he ka anyá hobi kõnya, me oge me he hmetu ka hat me tuö anyám je hnahat mamoe. 32 Haba hnyi bong ang, oge me he ka he hnyi w-nben halem ta je hnahat meno hia thithö, he ka ve ip ta je meno hia ae údenöny me sisit, mé ta je meno ae hlit únyi hnyi ta je mamoe, me ta je údenöny me ta je sisit únyi hnyi ta je got : ke wale thibi e hwabök. 33 Ke ame he ka ohnathu nya nyiele hnen hwakecik ae wisa, u ka o but ka hnyi hwabök wale hnyi hnyimákám : haba ta je got hia ae ca údenyöny bi me sisit, me ta je mamoe ae ca hlit, adre wá unyik, wale oge hia but venáu. 34 Me haingö Labana, ka habe, E so e he ka e hnám hna ha. 35 Ke e ame ve ip hnyi bong eling ta je got бага adre sihnalimen me sisit, me ta je got momo hia ae údenöny me sisit, me ka hu hawen, me ta je mamoe ae hlit, me hn' ódrin ka je lakon бага ; 36 ke e ame úsá-kátö me Jakob hnyi kun ta bong ka he : ke Jakob ame hat ta je hnahat hale Labana a hnen bi ju. 37 Ke Jakob ame hom ta je ong utö ae hat, libene, me luza, me aremoni ; me e ame bi hnalimen me me manen dok ae hau hnyi je ong utö. 38 Ke e ame ip je ong utö adre bi hnalimen hnyin je kumete taben belen je meno hnyi hnyimakan ta je hnahat ; ke ódrin e erkin ódrin ka o ka ic. 39 Ke ame erkin dut ta je hnahat cicö ta je ong utö, me je hnahat adre me hnokoá but ta je meno ae hu hnalimen, me údenöny, me sisit. 40 Ke Jakob ame ve ip ta je lakon mamoe, me wia ta je

hnyimakan je hnahat ka hnyi ta je hnalimen, me ta je hlit hia hnyi hnahat hale Labana ; ke e ame ke ip haleny to je meno, k' ame ca tha hnen me ta je hnahat meno hale Labana. 41 Ke e ka he ka erkin ta je meno ae hwege, me Jakob ame ip ta je ong utö hnyi je kumete hnyi hnyimakan ta je hnahat, m' adre me he ka erkin hnyi ta je ong utö ; 42 ke ame ne mat ta je meno, e ame ca ip hmetu : waleling me me hale Labana je meno ae mat, ke hale Jakob bi je meno ae hwege. 43 Me ame ti tren gan hmá thatúnyi hnen at e, ke ti se hia haleny ta je meno, me je lathnyabainy omomo me obaga, me je kamela me asina.

HNYIMAKAN 31.

KE e ame löng ta je hofuc hwan laku Labana ta бага, ka habe, A hom hia thö Jakob ta je únyi anyi cica ; ke únyi hnyi ta je únyi anyi cica e ame hom hmanenang eang. 2 Ke a wá but Jakob hnyimakö Labana a ca helá hmetu ehac káu. 3 Ke Iehova ame ha kö Jakob, ka habe, He hmetu thö ka hnyi hnyei iny lakámám, me lahanám ; me ame he ka tha inya möu. 4 Ke Jakob ame úkhúnöng ka hao Rakela me Lea ka hnyi hnyei a e hnyin haleny ta je meno, 5 me haingen ködrü, ka habe, Oge wá but hnyimakan kamöbu a ca helá hmetu ehac kõnya ; ke so bi a hia but tha e mönya Khongu cica. 6 Ke khan' öbu a oge hia but huliwa ka kamöbu hnyi hwégiök hia. 7 Ke a iyawö nya hnen kamöbu, me olibenyita wia hwabök ; ke Khong ame ca hna but káu he ka okongu nya. 8 Ame ne ha, ka habe, Ame he ka hwábám ta je údenöny, me ame hnokoá but ta je údenöny hnen ta je meno hia : ke ame ne ha, ka habe, Ame he ka hwábám ta je meno ae hu hnalimen, me ame knoköa but ta je meno ae hu hnalimen hnen ta je meno hia. 9 Waleling Khong ame hia but húgúná ta je meno haleny kamöbu, me ham bi kõnya. 10 Ke hnyi úen erkin a je meno, inya oge me bwele me wá hnyi bwik, me wá bi, ta je got бага hia ame takou ta je meno ae hu hnalimen, me údenöny, me sisit. 11 Ke haba angela anyin Khong ame ha kõnya hnyi bwi, ka habe, Jakob lö : ke haingök, ka habe, Inya ang. 12 Ke e ame ha, ka habe, Bwele thö me wá, a haba ta je got бага hia adre me takou ta je meno ae hu hnalimen, me údenöny, me sisit : anyin a oge hia but wá

hia hna ányá köu hnö Labana. 13 Inya Khongon Bethela, waleji u je osúá haten hnyin, ke waleji u je bi khöbi kõnya hnyin : ke walang ang todrö me he úheny hnyi hnyei eang, ke hmetuhmetu thö ka hnyi hnyei adre hnöku u hnyin. 14 K' ame thu Rakela me Lea me ha, ka habe, Hawa e hu únyi hmetu me jekhöúhmu hnyi hnyaban kamöhmü? 15 Hawa, e ame ca únykümi öhmü a heláke li atkanyua káu? anyin a e ame hia but úcü öhmü, me odilá anyihmu mone. 16 Ke haba tang omjeú hia hnen Khong hna húgúná únyi ge kamöhmü, me wale anyihmu ta je únyi, me lakuhmu : ke walang ang ányá thö ta je únyi hia a ha köu hnen Khong. 17 Ke Jakob ame tot me ip je lakon me laáian hon je kamela ; 18 ke e ame hom but haleny ta je meno hia, me ta je onijeú hia ae hu gan, a ta je meno a huliwan, waleji e ame hu e Padan-arama, me me he kö Isaaka a kamen hnyi hnyei Kanana. 19 Ke Labana ame hia but he ka subá letnen haleny ta je mamoe : ke haba Rakela ame venáu thö ta je idola anyin kamen. 20 Ke Jakob ame kec duöng ga Labana at Suria, anyin a e ame ca thumetu a e ame he ka kec. 21 Waleling e ame kec me anyin ta je únyi hia ; ke e ame todrö me hanyáúá Wagewe, me hnyimakan ka hnyi bucen Gileada.

22 Ke hnyi bong a kuniny adre me thumetu Labana, ka habe, A kec ut Jakob. 23 Me e ame hom dö je liamekeiny mä, me wadring hotudrin seven je bong ; me e ame khöü ödrin hnyi bucen Gileada. 24 Ke Khong ame o but kö Labana at Suria hnyi bwi hnyi hnyinghet, me ha káu, ka habe, Wá eáu k' u he thö ka ha kö Jakob so me kong. 25 Ke Labana ame hom tilö Jakob. Ke a hia but Jakob otílá umen uma mano hon bucen : ke haba Labana me je liamekeiny mä ödrin e laba hnyi bucen Gileada. 26 Ke haingö Labana kö Jakob, ka habe, Ieú u je ányá, u je kácá duöngá gak lakuk li momo heláke adre húgúná ge hele vat? 27 Ieú gam u je kec duöng me iyawö nya ; me ca úhúne mönya, m' inye he ka kunö u me senyin me khumöng me binybet me kitara ; 28 ke u je ca hna kõnya he ka úcimhnyimak me je laöbik me lakuk? u monu u je ányá heláe. 29 E hu manik man he ka okongu öbun : ke a ha kõnya hnen Khongon kamöbun et hnyinghet, ka habe, Wá eáu, k' u he thö ka ha kö Jakob so me kong. 30 Ke walang ang e hwege

thö wem he ka he, anyin ae gan hmá wem ka hnyi hnyaban kámám, ke ieú gam u je venáu je khonguk? 31 Ke Jakob ame thu me ha kö Labana, ka habe, Anyin iny ot : me haingök, ka habe, Wa u nye húgúná hmeto thö gak lakom. 32 Ke haba at u me he ka wá unyin ányám ta je khong, ame ca he ka möt : wáhmakhmeto ju hnyi hnyimakan je liamekeiny mötu ányám ta je únyi unyik, ke hom hmeto thö. Anyin ae ca khanö Jakob a ga venáu Rakela je únyi e. 33 Me Labana ame didrö ka hnyin uma mano umö Jakob, me uma mano umö Lea, me uma mano umen li athnyaba a li momo : k' ame ca wá bi. Ke e ame didrut únyi hnyi uma mano umö Lea me didrö ka hnyi uma mano umö Rakela. 34 Ke haba Rakela ame hia but hom ta je idola me ikhálá hnyi je tap hnân tabá kamela, me e ame laba ju hon. Ke Labana ame elám igigilö hia hnyi uma mano, k' ame ca wá bi. 35 Ke haingen ka kamen, ka habe, Ca he tuhok ka hmönyám wale ae cu khanö nya köüö hnyi hnyimákám anyin a oge me hom bongon omomo. Ke e ame heletí, k' ame ca wá bala bi ta je idola. 36 Ke Jakob ame hmönyin me iwatretra me Labana : me haingö Jakob kö Labana, ka habe, Ieú hnök hna hanyáúá? ieú anyik monu m' u me wadring hotuk? 37 U je hia but elám igigilö anyik ta je únyi, hawa e hu omjehem u je wá? ip ut hnyi hnyimakan je liamekeiny mönya me je liamekeiny möu, ke hamödrin he ka owisa kötu. 38 Twente je hunaik unyám ; ke e ca köluhabú halem ke nokon mamoe me got, k' oge ca han je mamoe бага hnyi hnabat halem. 39 Ke oge ca hom köu at adre usu kia ; ke oge bi hwaban bi ; k' u je elám unyik hna venöu hnyi lany, me hna venöu hnyi lit. 40 Waleji hwakecik, haba hnyi je lany seúnö ame okongu nya, me megic hnyi hnyinghet ; k' oge me ca wen mokut. 41 Twente je hunaik hnyi hnyabam ; oge bi athnyaba köu fortin ta huna hwaban lakom li hlu, ke siks ta huna hwaban halem je meno : ke u je olibenyita wia hwabök. 42 Ame ne hia Khongu cica unyik, wale Khongu Aberabama, me hna outen hnö Isaaka, me e hnathu u je he ka kunö nya ke ba únyi. A wá but Khong anyik vec me huliwa anyin li hnyamök, me e ame thao u et hnyi lit. 43 Ke Labana ame thu me ha kö Jakob, ka habe, Haba li momo ödrü li lakuk, ke haba je wanakat ödrin je laöbik, ke halek ta je

hnabat, ke omjebek ta je únyi hia u me wá: ke ie únyi oge me he ka ányá hnyi bong ang ka je lakuk eang me je lakudru ödrin me hnokoá? 44 Aiö u walang ang m'ötu me úhinhinköu; ke wale hnân ohnatho kötu. 45 Ke Jakob ame hom veto me otílâ hnân haten. 46 Ke Jakob ame ha ka je liamekeiny mē, ka habe, Thigö veto thö; ke ödrin e hom je veto me khon; ke ödrin e han eling hnyi ve veto. 47 Ke Labana ame hwenyi ien Jegara-sadutha: ke Jakob ame hwenyi ien Galeed. 48 Ke Labana ame ha, ka habe, At hnân ohnatho kötu hna khon e hnyi bong ang. Anyin a wale adre hwenyi ien e Galeed: 49 me Mizepa minya, anyin a haingen, ka habe, E so e he Iehova ka labö hmákâ wanbötu, ötu ka úsákâüö. 50 U je ne he ka ovecá je lakuk, me momo minya hanen le lakuk, e ba at unyita: wá ju, Khong ame wá hnathu wanbötu. 51 Ke haingö Labana ki Jakob, ka habe, Wá bi hna khon veto eang, ke wá bi haten wale oge ip wanbötu. 52 Hnân ohnathoá hna khon veto eang, ke hnân ohnathoá minya haten eang, oge me ca he ka he hanyáúá hna khöü veto eangköu, me u me ca he ka he hanyáúá hna khöü veto eang, me haten eang könya, he ka úokonguny. 53 E so e he Khongu Aberahama me Khongu Nahora minya, a Khongon kamödrü ka owisa kötu. Ke Jakob ame khemanyin me ha Hna outen hnö Isaka a kamen. 54 Ke Jakob ame bi hulo ke hut hnyi bucen, me hawá je liamekeiny mē ka hnyi han areto: ke ödrin e han areto, me mokut hnyi bucen. 55 Ke Labana ame vesá hnyi haolany me úcimhnyimak me je laöbiny me je lakon me bahnahici ödrin: ke Labana ame he hmetu ka hnyi iny.

HNYIMAKAN 32.

KE Jakob ame he hnyi deny gethen, me e ame ukhanö me je angela anyin Khong. 2 Ke a ö'drin dut Jakob, me e ame ha, ka habe, Wale but ang utbarat anyin Khong: ke e ame hwenyi ien dok eling Mahanaima.

3 Ke Jakob ame kuná bánâ anyin je metá kö Esau a tuhan hnyi hnyi Seira, wale atkánâ hnyi Edoma. 4 Ke e ame húna ödrin, ka habe, Öbun e he ka ha helâng kö Esau a tuhök, ka habe, Walang hna a hnö Jakob a athnyabaem, haingen, ka habe, Oge laba kanyua unyi Labana, me

laba e ke ne o but walang ang: 5 ke e hu gak ta je kau, me asina, me je hnabat, me je athnyaba obaga, me je athnyaba omomo: ke inya oge me úkhünöng ka thumetu u tuhök, m' u ma betenge gak. 6 Ke ame hmetu ju kö Jakob ta je metá, me ha, ka habe, Öhmun e mwi but unyi Esau a tuhâm, ke wale but ang ame he ka iouny möu, ke e unyin tavat a vak ta haded. 7 Me Jakob ame ot gan hmâ me hmak hnyekon: me e ame khenâ luâ tavat unyin, me ta je mamoe, me kau, me kamela; 8 ke haingen, ka habe, A ne iouny Esau me ke bunyen me kuc' ödra, me ame he ka möt biju ke bunyen. 9 Ke Jakob ame ha, ka habe, Khongon kibik Aberahama lö, me Khongu cica Isaaka, Iehova lö, at ame ha könya, ka habe, He hmetu thö ka hnyi hnyi iny je lahanâm, m' oge me he ka ányá so köu: 10 e ca úcú nya at ae úhnyükong hnyi je ibetengiö hia, me hnathu hia, waleji u je omanená ka athnyabaem; anyin oge hanyá-úá Joridano eang me anyik uci; ke walang ang lo but anyik li bunyen. 11 Ö u, omeli nya únyi hnyi hnyamen tuhök Esau: anyin oge me outen e, wá e nye o but ka kuc nya, tha inya me ta momo me lakudrin. 12 Ke u je hia but ha könya, ka habe, E hnathu oge me he ka ányá so köu, ke oge me he ka osehia je mátrânâm me me helâ me önyin köiö, wale me me ca hnân aú anyin ae se hia. 13 Ke e ame mokut eling hnyi hnyinghet; me e ame hom únyi hnyi anyin ta je únyi hnân bwihlany hobi kö Esau a tuhan: 14 lo li haded ta je got momo, ke twente ta je got бага, me lo li haded ta je mamoe momo, ke twente ta je mamoe бага, 15 ke thöte ta je kamela adre me úasin me je lakudrin, ke fáte ta je kau, ke libenyita ta je bolok, ke twente ta je asina momo, ke libenyita ta lakon. 16 Ke e ame ve ham ta je hnabat ka ta je athnyabainy; k' ame ha ka je athnyabainy, ka habe, Böbun ka hanyáúá me ve bi hnyiöulen wanben ta je hnabat. 17 Ke e ame húna ka at ame bán, ka habe, E ka iouny möu Esau a tuhök, me hnei u, ka habe, U athnyaba ia? k' u ma he kâ? ke hale ia hnabat meno hnyi hnyimákâm? 18 M' u ma he ka ha, ka habe, Hale Jakob a athnyabaem; ke wale bwihlany adre kunú ka tuhök a Esau: ke wá ju a e but ang. 19 Ke helâe minya e ame húna ka at a loiny me kuniny, me tavat hia ödrin e alen ta je hnabat, ka habe, Öbun e he ka ha helâe kö Esau e ka iouny möbun; 20 ke öbun e he

ka ha minya, ka habe, Wâ ju e but ang Jekob a athnyabaem. Anyin a haingen, ka habe, Oge me he ka' omenyikâ e hnen bwihlany adre kunâ bânâ, ke hwaban e oge me he ka iohnyimak mē, ame ne he ka kōp nya. 21 Me a he bân but bwihlany : ke e bi ame mokut hnyi hnyinghet eling tha e mödrin.

22 Ke e ame todrö hnyi hnyinghet eling me hom li âiân, me li athnyabainy momo me je lakon a libenyita ke khaca, me hanyâ-ûâ wagewe Jaboka. 23 Ke e ame hum ödrin me kun' ödrin ka hanyâûâ wagewe, k' ame kunâ minya anyin ta je ûnyi. 24 Ke hake laba Jekob ; ke haba ke at ame úsôu mē ke ne o but hnyi haolany. 25 Ke a löng ut a e ca hwege hmetu hon, me e ame kâlâ jebalainon ; me ame nik dö jebalainou Jekob k' ame tiga úsôu mē. 26 Ke haingen, ka habe, hnö nya but, ke lany dö jimeyö ame o. Me haingen, ka habe, Oge me ca he ka hnö u, ke ne o but u je hahnahici nya. 27 Ke e ame ha kâu, ka habe, Ia iâm ? Haingen, ka habe ; Jekob. 28 Me e ame ha, ka habe, adre me ca he hmetu ka hao u Jekob, ke Isaraela bi : anyin a u je hia but nâ hwegiâm me Khong me tavat, ke ne u hwege. 29 Ke Jekob ame hnö, ka habe, Bethe ha thö könya iâm. Me haingen, ka habe, Ieü gam u me hnö iök ? me e ame hahnahicâ e eling. 30 Ke Jekob ame hwenyi ien dok e Peniela, haingen, anyin a oge iohnyimak me Khong, k' iny möt bi. 31 Ke ame o thö seúnö hon hnyi ûen e ame he hanyâûâ Penuela, ke e ame he hwali ge jevan. 32 Waleling me me ca han hnen lakon Isaraela ta je toiny fetrin hnyi jevan ke ne o but hnyi bong ang, anyin e ame kâlâ jebalainon ca Jekob huyi töiny fetriny.

HNYIMAKAN 33.

KE Jekob ame bwele me wâ, ke wâ bi, Esau ame he jem me tavat a vak ta haded. Me e ame khenâ but je wanakat kö Lea, me Rakela, me li athnyaba a li momo. 2 Ke e ame ip li athnyaba momo me je lakudru hnyi hnyimakan, ke hwabödrin jia Lea me je lakon, ke a bili Rakela me Josefa. 3 Ke e ame he bânâ, me oseven nom hnyikânâi ke ne o but ame hakekenyâ tuhan. 4 Ke Esau ame wadring me iouny mē, me delûâ e, me ta hon nyin, me úci-mhnyimak mē : k' ödru me útengiö. 5 Ke e ame bwele me wâ je momo me je wanakat ;

me haingen, ka habe, Ie hnyat ang unyâm ! Ke haingen, ka habe, wale je lakuk hnen Khong hna betenge gak a athnyabaem. 6 Ke ame o but li athnyaba momo, ödru me je lakudru me nom ju. 7 Ke ame o but minya Lea me je lakon me nom ju : ke hwaban e ame o but Josefa me Rakela me nom ju. 8 Ke e ame ha, ka habe, Hawa gam ge ta je hnahat hia oge úkhanö mē ? Me e ame ha, ka habe, Wale hnân elânu ibetengiö gam könya tuhök. 9 Ke Esau ame ha, ka habe, E gan hmâ anyik ta je ûnyi ; keik lö, ame ka hnen biju unyâm anyâm ta je ûnyi. 10 Ke haingö Jekob, ka habe, Ohe, e ba, ö u betenge gak me kap ju anyik bwihlany : anyin oge wâ hnyimâkâm, helâ me man at ame wâ hnyimakan Khong, k' u je kap soi nya. 11 Ö u kap ju anyik betenge adre hom köu ; anyin a hia but betenge gak Khong, anyin e gan hmâ anyik ta je ûnyi. K' ame újengö e, me e ame kap ju. 12 Ke e ame ha, ka habe, Aiö u ötin e he, ke ama bök. 13 Ke haingen kâu, ka habe, E khana tuhök a e sēnyin dut je wanakat, ke je hnahat mamoe me kau adre me úasin : ke adre me ne alen hwegiâ hnyi bong a khaca, me ame ne he ka mok hia ta je hnahat meno. 14 E so u ma he tuhök ka bâm, ke bilik biju athnyabaem : ke oge me he ka omise, helâ me tulutiny ûheny je meno hnyi hnyimakök, me helâ me ûheny je wanakat, ke ne o but oge me o unyâm tuhök e Seira. 15 Ke Esau ame ha, ka habe, E so oge me ip biju unyâm ke je athnyabaik. Ke haingen, ka habe, Hnân eü ? U ma he tuhök ka betenge gak. 16 Ke Esau ame he hmetu hnyi bong eling hnyi gethen Siera ai. 17 Ke Jekob ame he Sukotha ai, me otilâ umen uma, me ânyâ ta je uma baelelu hohi kâu haleny ta je meno : anyin a wale adre hwenyi ien dok eling Sukotha.

18 Ke Jekob ame o ka hnyi taun Sekema ke hnahic, wale hnyi hnyeï Kanana, ge ioiny ûheny Padan-arama ; me hunuma cicö taun. 19 Ke e ame úco utkânâ wale ame otilâ hnyin umen uma mano, ûnyi ge je laku Hamora, kamö Sekema, hwaban je mone a khaca haded. 20 Ke e ame otilâ taben hut, me hwenyi ien e El-eloe-Isaraela.

HNYIMAKAN 34.

KE ame he but Dina nöku Lea a blu, wale hnen hna hnokoâ nöku Jekob, he ka wâ ta je hluiny hnyeï. 2 Ke ame

wâ e hnö Sekema, nöku Hamora at Hivi, ke thaniny hnyei, me e ame hom e, me tha laba mē, me okongoā. 3 K' ame kece but hnyekon kö Dina nöku Jakob, ke e ame betenge ka hlu, me fuc menyik ka hlu. 4 Ke Sekema ame ha kö Hamora a kamen, ka habe, He thö ka hom hlu e me öök. 5 Ke Jakob ame löng a ga okongu Dina but a nokon hnen e; ke tiga e je lakon hnyi hnyei me meno; ke Jakob ame laba hnyibú ke ne o but ödrin e o. 6 Ke ame he but Hamora kamö Sekema kö Jakob me me úhnenamö me. 7 Ke ame o but ta je laku Jakob únyi hnyi hnyei hnyi úen ödrin e löng e: ke a vec ut hnyekudrin, ke gan hmâ anyidrin hmönyin anyin a e ame ányâ monu hnyi Isaraela, waleji ame tha laba me nöku Jakob; ke wale únyi ae kap he ka ányâ. 8 Ke Hamora ame úhnenamö mödrin, ka habe, Haba Sekema a nöku ame hnyok gan hmâ ka nökuibun hlu: ö u ham but e me áiân. 9 Ke so ötin e he ka ihok lakon, ham but köhmun lakubun je hlu, ke hom ju öbun lakuhmun je hlu. 10 Ke öbun e he ka tha laba möhmun: ke kinöbun kânâ hnyi hnyimaköbun; labâ ju me úcü hnyin, me me ve hu ibun eang. 11 Ke haingö Sekema ka kamen hlu me je lahaniny, ka habe, E so öbun e betenge gak, ke haba únyi öbun e he ka ha könya, oge me he ka ham. 12 Ha gánâ ju könya sániny me omjeü, k' oge me he ka ham helâ me hnöbun hna he ka ha könya: ke so öbun e ham but könya hlu me áiân. 13 Ke ame thu iyawöâ hnen je laku Jakob kö Sekema me Hamora a kamen, anyin a e ame okongu Dina a hanidrin, 14 ke haingödrin ködrü, ka habe, E ca khan' öhmun he ka ányâ únyi e, wale he ka ham hanihmun ka at adre ca peritomonâ; anyin a wale hnân haikongu öhmun: 15 walang öhmun e he ka og' öbun, ka habe, Hamöbun he ka helâ möhmun, wale he ka peritomonî öbun hia obaga; 16 me öhmun e he ka ham köbun lakuhmun a je hlu, k' öhmun e he bi ka hom lakubun je hlu, m' öhmun e he ka tha laba unyibun me me khaca itin bnyei. 17 Ke öbun e ne ca ling öhmun he ka hnyi peritomonâ, awe öhmun e he ka hom nökuhmun hlu me he but. 18 Ke so kö Hamora me Sekema nöku Hamora bodrin hofuc. 19 Ke ca bec bi hidröu he ka ányâ únyi e, anyin a e ame senyin ge nöku Jakob; k' adre oganá e hon lap hia anyin kamen. 20 Ke Hamora me Sekema a nokon, ödrü me he ka hnyi homagöuleny

taun, me úhnenamö me tavat aten idruhnyei, ka habe, 21 Ödra menyik köta tavat eang; anyin a wale e so adre me labâ hnyei me úcü hnyin; ke, wâ bi, e lau hnyei me úcü ödra; e so ate me hom lakudra je hlu me me laöiöta, k' ate me he ka ham bi ködra lakuta je hlu. 22 Ke walang ang ame he tavat ka og' öta he ka tha laba möta me me khaca hnyei, ka habe, adre me he ka peritomonî öta hia obaga helâ me hna peritomonî ödra. 23 Hawa, ame ca he anyidra ta je únyi, me tang omjehedra, me haledra ta je meno hia ka anyitin? E so ate me he ka og' ödra, k' adre me he ka tha laba möta. 24 Ke ame löng hotu Hamora me Sekema a nokon hnen tavat hia adre me didrut ka hnyi homagöuleny taun, k' adre me peritomonâ ta je бага hia, tavat adre me didrut ka hnyi homagöuleny taun. 25 Ke habe hnyi bong a kuniny, m' adre me tiga vec, haba ke li laku Jakob, jia Simeona me Levi, lahani Dina, ödrü me ve hom anyidru li hele vat, me utut ka hnyi hnyei, me hlingâ ta je бага hia. 26 Ke ödrü me blingö Hamora me Sekema a nokon hneu homakan hele vat, me hum Dina únyi hnyi hnyin uma umö Sekema, me he but. 27 K' ame o but laku Jakob ka ta je komok, me söh taun, can hnödra hna okongoâ hanidrin. 28 Ke ödrin e hügünâ haledra ta je mamoe, me haledra ta je kau, me haledra ta je asina, me ta je únyi hnyi taun, me ta je únyi hnyi hnyei; 29 me tung omjehedra hia, me lakudra ta je wana-kat hia, me je laöiödra, adre hom bá me hügünâ, me ta je únyi hia hnyi hnyaba. 30 Ke Jakob ame ha kö Simeona me Levi, ka habe, Öbe ohmaki nya, he ka obokongi nya ka aten hnyei, wale at Kanana me Perizi: ke ötin wakhalet, k' adre me he ka úkhacaköu könya me kuc nya; m' adre me he ka hiö nya me anyik lap. 31 Ke ödrü me thu, ka habe, Hawa, hamen he ka ányâ ka hanihmun helâ me momo hnyi gethen.

HNYIMAKAN 35.

KE Khong ame ha kö Jakob, ka habe, Todró, he thö Bethela ai, ke laba e: me otilâ e tabon hut ka Khong, at ame manen köu, waleji hnyi hnâm hna kec ga Esau a tuhâm. 2 Ke Jakob ame ha ka anyin lap, m' ödra hia a tha e mē, ka habe, Hna but ta je hnatheat kanyua unyibun, me obosoi öbun, me khaü ju öbun: 3 k' ate me tot me he thö Bethela ai; k'

oge me he ka otilâ taben hut eling ka Khong, at ame ling nya hnyi bong oge me vec hnyin, me tha e mönya eü hnyi gethen oge me he hnyin. 4 Ke ödrin e ham kö Jakob ta je hnatheat kanyua hia unyidra, me je wen ünyi hnyi ta je hnyikonyödrin; ke Jakob ame ikhâlâ je ünyi e hmelen iwajo hnyi baten Sekema. 5 K' adre me he but : ke e gan hmâ hna outen hnyi ta je hnyei igigili ödra, k' adre me ca hnu hoton je laku Jakob. 6 Ke Jakob ame o but hnyi Luza hnyi hnyei Kanana, (wale Bethela), e me tavat hia unyin. 7 Ke e ame otilâ taben hut e, me hwenyi ien dok eling Ele-bethela : anyin a Khong ame manen kâu e, hnyi üen e ame kec ge tuhan. 8 Ke a mokcu Debora at ame hat Rebeka, k' adre konâm hmelen Bethela, eü hmelen iwajo : k' adre hwenyi ien e Alona-bakota.

9 Ke Khong ame manen hmetu kö Jakob, hnyi üen e ame he üheny Padanarama, me hahnahica e. 10 Ke Khong ame ha kâu, ka habe, Jakob iâm : k' adre me ca he hmetu ka hao u Jakob, ke Isaraela bi iâm : ke e ame hwenyi ien e Isaraela. 11 Ke Khong ame ha kâu, ka habe, Inya Khong Aekhanahia : dudu but me si but ; ame he ka o unyâm ke hnyei me ta je hnyei, ke ame he ka o ünyi gam ta je than ; 12 ke haba hnyei waleji oge ham kö Aberahama me Isaaka oge me he ka ham köu, k' oge me he ka ham hnyei ka ta je mâtrânâm a hwâbâm. 13 Ke Khong ame ölö thö ünyi gan hnyi dok e ame fuc kâu hnyin. 14 Ke Jakob ame otilâ haten hnyi dok e ame fuc kâu hnyin, veto a haten : ke e ame hingâlâ hon e hudiny hic, me hingâlâ wakaco hon. 15 Ke Jakob ame hwenyi ien dok Khong ame fuc kâu hnyin, Bethela. 16 Ke adre me he ühedrin Bethela ; ke tiga ca sâkâü bi Eferatha : k' ame vec hnyeku Rakela ke vec hmönyin. 17 Ke e ame tiga vec hmönyin, me haingen kâu momo ame hok wanakat, ka habe, Ca ot ; anyin a u ma he ka hnokoâ ke da. 18 Ke ame tiga he ka he but banon (anyin a mokcu) me e ame hwenyi ien e Benoni : ke haba kamen ame hwenyi ien, me Beniamina. 19 Ke a mokcu Rakela, me adre me konâm hnyi gethen ka he Eferatha ai, wale (Bethelama). 20 Ke Jakob ame otilâ ke haten hon : wale haten hu Rakela ke ne o but hnyi bong ang. 21 Ke Isaraela ame he but, me e ame otilâ umen uma mano hnyi hoton tap ae beü göranyai hnyi Edera. 22

Ke ame tiga laba Isaraela hnyi hnyei eling, me haba Reubena ame tha mokut me Bila, ke momo anyin kamen : ke a löng ut Isaraela.

Ke ödrin twelv ta laku Jakob a бага ; 23 haba je laku Lea ; Reubena, nöku Jakob a bân, me Simeona, me Levi, me Juda, me Isakara, me Zebulona : 24 ke haba li laku Rakela ; Josefa, me Beniamina : 25 ke haba li laku Bila, a athnyabai Rakela ; Dana, me Nafatali : 26 ke haba li laku Zilepa, a athnyabai Lea ; Gada me Asera : wale je laku Jakob a hnokoâ e Padanarama. 27 Ke Jakob ame o kö Isaaka a kamen e Mamere, hnyi Kiriath-areba (wale Heberona), waleji hnö Aberahama me Isaaka hna laba kanyua hnyin. 28 Ke haba je bong bongu Isaaka, me khaca haded ke eite ta je luna. 29 Ke Isaaka ame khüö homenâ me mokcu, me e ame ük hacaköu me lakamen, a hingat ut ke se hia bongon je bong ; ke a konâm e hnö Esau me Jakob a li lakon.

HNIMAKAN 36.

KE walang je dö ünyi ga Esau (wale Edoma). 2 Haba Esau ame hok laâiân ünyi ge je lhu Kanana ; jia Ada nöku Elona at Heth, me Aholibama nöku Ana, nöku Zibeona at Hivi ; 3 me Basemathi nöku Isamaela, hani Nebaioth. 4 Ke Ada ame hnöku Elifaza nöku Esau ; ke Basemathi ame hnöku Reuela ; 5 ke Aholibama ame hnöku Jeuso, me Jalama, me Kora : wale je laku Esau a hnokoâ hnyi hnyei Kanana. 6 Ke Esau ame hom je laâiân, me je lakon obaga me wahlu, me aten hnyaban hia, me halen ta je meno, me halen ta je bolok hia, me je ünyi hia thithö e ame hu hnyi hnyei Kanana ; k' ame he but ka hnyi ke keihen hnyei üsâkâü me Jakob a keiny 7 Ke ca khan' ödru he ka tha laba anyin ae ve gan dut anyidru ta je ünyi ; ke ca ücü ödru hnyei ödru me laba kanyua hnyin, anyin ae ve se hia but ta je meno. 8 Ke Esau ame laba hnyi bucen Seira : haba Esau a Edoma. 9 Ke walang je dö ünyi ga Esau a kamen at Edoma hnyi bucen Seira : 10 walang je ien laku Esau a je бага ; jia Elifaza nöku Ada öiö Esau, me Reuela nöku Basemathi öiö Esau. 11 Ke haba je laku Elifaza, jia Temana, me Omar, me Zefo, me Galama, me Kenaza. 12 Ke Timena ke momo anyi Elifaza nöku Esau ; ke e ame hnöku Amaleka nöku Elifaza : wale ta je mâtrâni Ada öiö Esau. 13 Ke

walang minya ta je laku Reuela, jia Nakath, me Zera, me Sama, me Miza : wale je má-trini Basemathi öiö Esau. 14 Ke walang ta je laku Aholibama nöku Ana a nöku Zibeona öiö Esau : ke e ame hnöku Jeuso, me Jalama, me Kora, a je laku Esau. 15 Walang ta je taben a je laku Esau : haba ta je laku Elifaza nöku Esau a atö ; jia Temana taben, ke Omar taben, ke Zefo taben, ke Kenaza taben, 16 ke Kora taben, ke Gatama taben, ke Amaleka taben : wale je taben únyi ga Elifaza hnyi hnyei Edoma ; wale je laku Ada. 17 Ke walang ta je laku Reuela nöku Esau ; jia Nakath taben, me Zera taben, me Sama taben, me Miza taben : wale ta je taben únyi ga Reula hnyi hnyei Edoma ; wale je laku Basemathi öiö Esau. 18 Ke walang ta je laku Aholibama öiö Esau ; jia Jeuso taben, me Jalama taben, me Kora taben : wale ta je taben únyi ga Aholibama nöku Ana, öiö Esau. 19 Wale ta je laku Esau a Edoma, ke wale anyidrin ta je taben.

20 Walang je laku Seira at Hori a aten hnyei ; jia Lotana, me Sobala, me Zibeona, me Ana, 21 me Disona, me Ezera, me Disana : wale ta je taben anyin at Hori hnyi hnyei Edoma. 22 Ke haba je laku Lotana, jia Hori me Homama ; ke Timena hani Lotana. 23 Ke walang ta je laku Sobala ; jia Alevana, me Manakatha, me Ebala, me Sefo me Onama. 24 Ke walang li laku Zibeona ; jia Aia me Ana : wale Ana at ame wá je hna pupuainy köiö ae kahwa hnyi hnyebuba hnyi ün e ame tuö ta je asina hale Zibeona, a kamen. 25 Ke walang li laku Ana ; jia Disona me Aholibama a hlu nöku Ana. 26 Ke walang je laku Disona ; jia Hemedan, me Eseban, me Itheran, me Keran. 27 Ke walang je laku Ezera ; jia Bilehana, me Zaavana, me Akana. 28 Ke walang li laku Disana ; jia Uza, me Arana. 29 Walang ien ta je taben ame o únyi ge at Hori ; jia Lotana taben, me Sobala taben, me Zibeona taben, me Ana taben, 30 me Disona taben, me Ezera taben, me Disana taben : wale je taben ödrin e o únyi ge at Hori, hoton anyidrin ta je taben hnyi hnyei Seira.

31 Ke walang ta je than ödrin e musu hnyi hnyei Edoma, ke tiga ba than ame musö lakon Isaraela. 32 Ke haba Bela nöku Beora ame musu hnyi Edoma ; ke Dinaba ien anyin taun. 33 Ke ame mokcu Bela, ke haba hwaban, at ame musu, jia Jobab nöku Zera úheny Bozera. 34 Ke a

mokcu Jobab, ke haba hwaban, at ame musu, me Husama únyi hnyi hnyei Temana. 35 Ke a mokcu Husama, ke haba hwaban, at ame musu, me Hadada, nöku Bedada, wale at ame kuc Midiana hnyi hnyei Moaba : ke Avitha ien anyin taun. 36 Ke a mokcu Hadada, ke haba hwaban, at ame musu, me Samela úheny Masereka. 37 Ke a mokcu Samela, ke haba hwaban, at ame musu, me Saulo úheny Rehoboth hnyi baten wagewe. 38 Ke a mokcu Saulo, ke haba hwaban, at ame musu, me Baala-hanana, nöku Akebora. 39 Ke a mokcu Baala-hanana, nöku Akebora, ke haba hwaban, at ame musu, me Hadara : ke Pau ien anyin taun ; ke haba ien áiän me Mehetabela, nöku Matereda, nöku Mezahaba. 40 Ke walang ien ta je taben ame o únyi ga Esau, hoton anyidrin je lap, me idrin je hnyei, me je iödrin ; Timena taben, me Aleva taben, me Jethetha taben ; 41 me Aholibama taben, me Ela taben, me Pinono taben ; 42 me Kenaza taben, me Temana taben, me Mibezara taben ; 43 me Magediela taben, me Irama taben : wale ta je taben anyi Edoma hoton je hnyabadrin hnyi idrin je hnyei. Haba Esau wale kamen at Edoma.

HNYIMAKAN 37.

KE Jakob ame laba hnyi hnyei hnen kamen hna laba kanyua hnyin, wale hnyei Kanana. 2 Walang ta je dö anyi Jakob. Seventin ta je hunai Josefa, me e ame tha tuö me latuhan ta je hnahat meno ; ke e thöth unyin je laku Bila me Zilepa, la-áiän kamen : ke Josefa amethumetu ka kamödrin anyidrin monu. 3 Ke Isaraela ame betenge ga Josefa hon je lakon hia, anyin a e nokon hingat : ke e ame tibet ke tikot khauen ae ve hnalimen. 4 Ke a wá but je latuhan a g' ame betenge hnen kamödrin hon je latuhan hia ; m' ödrin e hukötiä e, me ca úhnenamö so më. 5 Ke Josefa ame bo ke bwi, me e ame thumeto latuhan ; me ödrin e húkotiä hmönyiná e. 6 Ke e ame ha ködrin, ka habe, Ó öbun, löng ju bwik oge bo : 7 wá bi ötin e ca je thi hwit hnyi utkáná, k' ame höhöi thö anyik thi hwit, me tot wisa minya ; ke wá bi, ame tot igigilö anyibun je thi hwit me nom ju ka anyik thi hwit. 8 Me haingen je latuhan kân, ka habe, Hee u me he ka than hhumun ? ke u me he ka musu öhmun ? Ke ödrin e húkotiä hmönyina e can je bwiny, ke hwan je hofuc. 9 Ke e ame bo hmetu

ke bwi, me ha e ka je latuhan, ka habe, Wâ bi, oge bo hmetu ke bwi; ke wâ bi, ame khudrung kõnya seünö me tehi me je okhû a libenyita me nua khaca. 10 Ke e ame ha e ka kamen me latuhan; ke kamen ame thawâ e, me ha kâu, ka habe, Ie bwi e u je bo? Hawa, oge me he me hinyâm me latuhâm ka nom hnyikânâi kôu? 11 Ke ame hmönyin kâu latuhan; ke haba kamen ame ip ûnyi e hnyi ûnykûmânen. 12 Ke je latuhan ödrin e he Sekema ai ka hân hnahat meno haleny kamödrin. 13 Ke haingö Isaraela kö Josefa, ka habe, Hawa ame ca hân hnahat meno hnen je latuhâm, hnyi Sekema? aiö u, oge me he ka kunö u ködrin. Ke haingen kâu, ka habe, Walönya eang. 14 Ke e ame ha kâu, ka habe, He thö ka wâ, hawa, e sot latuhâm, me hnahat meno; ke u hmetu thö ka thumetu nya. Wale e ame kunâ e úheny hnyi hnyigöulen bucen e Heberona, me e ame e but Sekema. 15 Ke a wâ but e hnen ke at, ke wâ bi e ame he baú hnyi hnye: ke ame hnö e hnen at, ka habe, Ieú u me elâm? 16 Ke haingen, ka habe, Inya oge me elâm latuhök: ö u ha thö kõnya dok ödrin e hân hnahat hnyin. 17 Me haingen at, ka habe, Ödrin dut hâng, anyin oge löng ut huödrin hna ha, ka habe, Ötin he Dothana ai. Ke Josefa ame he hoton je latuhan me e ame ö 'drin hnyi Dothana. 18 Ke ödrin e wâ but e ke tiga sâkâú, ke e tiga ca hakekeny ködrin, me ödrin e úhnenamö he ka hlingâ. 19 Ke ödrin e úhaköúâ, ka habe, e but ang at ame bo je bwi. 20 Ötin e he walang ang ka hlingâ me khûâ kâu ka hnyi ke monop, ke ötin e he ka ha, ka habe, A hia thö an e hnen ke meno ae kong: m' ötin e he ka wâ, hawa, ame he ka hwâdâ je bwiny. 21 Ke a löng ut Reubena, me e ame omelö e únyi hnyi hnyamödrin; ke haingen, ka habe, E so ötin e ca ohia anyin möt. 22 Ke Reubena ame ha minya ködrin, ka habe, Ötin e ca he ka hingâlâ dra, ke so bi he ka khûâ but e ka hnyi hmonop ang hnyi hnyebuba, ke ca hoibeny kâu: wale me me omelö e únyi hnyi je hnyamödrin, me hna hmetu e ka kamen. 23 Ke ame o but Josefa ka je latuhan, me ödrin e uny jut úkot anyi Josefa, wale anyin úkot ae ve hnalimen; 24 ke ödrin e hom e me khûâ e ka hnyi hmonop: ke ba önyen hmonop, e ba köiö hnyin e. 25 Ke ödrin e laba ju ka han, me ödrin e bwele, ke wâ bi ame he jem bunyen anyin at Isamaela úheny Gileada,

me haledrin je kamela ödrin e hok setura, me basama, me muro, ödrin e hok Aigupito ai. 26 Ke haingö Juda ka je liamekeiny mē, ka habe, Ieú troban ötin ka he ka hlingâ keitin, me ikhâlâ dren? 27 E so ötin e he ka úco e ka at Isamaela, ke ca he ötin ka hoibeny kâu; anyin a keitin, e tha unyin mötin. Me ame löng hoton hnen je liamekeiny mē. 28 Ke ame he ka gethen unyidrin at Midiana tavat úcú; me ödrin e öú Josefa úheny ú hnyi hmonop, me úcú Josefa ka at Isamaela hwaban je sileva a twente. Ke ödrin e hum Josefa Aigupito ai. 29 Ke Reubena ame hmetu ka hnyi hmonop, ke wâ bi, e hiö Josefa but eú hnyin hmonop; me e ame kia je úkhaúen. 30 Me e ame he ka je liamekeiny mē, me ha, ka habe, E hiö thö thöth; ke oge me he biju ka? 31 Ke ödrin e hom úkot anyi Josefa, me hlingâ nokon got a бага, me hneú úkot hnyi dra; 32 ke ödrin e úkhúnöng ka hom ukot ae ve hnalimen ka kamödrin; me ha, ka habe, Öhmun e wâ thiju ang: wâ ju, ame ne úkot ang anyin nokom, ame ne ba. 33 Ke e ame wâhmakhmetoâ, me ha, ka habe, Úkot ang anyin nökuk; a hia thö han e hnen meno ae kong; e hnathu a hia thö oloú usu kiö Josefa. 34 Ke Jakob ame kia anyin je úkhaú, me khavâ mano ae gan nân me tengen kan nokon, ae se hia je bong. 35 Ke ame todrö je lakon hia je бага me hlu he ka otubwelâ e; ke e höcö tubwet, ke haingen, ka habe, Oge me he ka tengen can nökuk ke ne o but ka hnyi erkemok. Wale hna tengiâ e hnen kamen. 36 Ke haba at Midiana adre me úco e Aigupito kö Potifara athnyabai Faro, taben hnyat tue.

HNYIMAKAN 38.

KE hnyi úen eling Juda ame he but únyi ge je liamekeiny mē, me saú ka ke at a at Adulama, Hira ien e. 2 Ke Juda ame wâ eling ke hlu nokon ke at Kanana, Sua ien; me e ame hom e me tha e mē. 3 K' ame erkin dut, me e ame hnokoâ da; ke e ame hwenyi ien Era. 4 K' ame erkin hmetu but me hnokoâ da, me hwenyi ien Onana. 5 Ke e ame hnokoâ hmetu ke da minya, me hwenyi ien Sela: ke Juda e Keziba hnyi hnen hna hnokoâ. 6 Ke Juda ame hok öiö Era nokon a bán, Tamara ien. 7 Ke at ae kong Era noku Juda hnyi hnyimakö Iehova; ke Iehova ame hlingâ. 8 Ke Juda ame ha kö Onana ka habe

Labu ju ka momo aiân tuhâm, me hom e me bi mâtrâniny tuhâm. 9 Ke a wâ but Onana a ga me ca he ka mâtrâniny bi; me e ame laba ka momo aiân tuhan, k' ame hingâlâ ka hnyi kânâ wâ e nye bi mâtrâniny tuhan. 10 Ke kong lnyy hnyimakö Iehova hnen hna ânyâ: me e ame hlingâ e minya. 11 Ke Juda ame ha kö Tamara a ûngon, ka habe, Laba safac ju hnyi hnyaban kâ-mâm, ke ne o but ame gan dut Sela a nökuk: anyin a haingen, Wâ e nye mok minya ju helâ me latuhan. K' ame he Tamara me laba hnyi hnyaban kamen. 12 Ke se hia je bong me ame mokcu nökü Sua öö Juda; ke ame hnyibi but Juda, me e ame he Timenatha ai ka tavat adre me subâ leünen haleny mamoe, tha e me hanen ju Hira at Adulama. 13 Ke adre me thumetu Tamara, ka habe, Wâ bi, ame he Timenatha ai ûngon ka subâ leünen haleny je mamoe. 14 Ke e ame uny jut je ûkha-uen safac, me tube e hnen mano hnân tubi hnyimak, me khaû, me e ame laba ju hnyi homagöule e Enaima hnyi gethen e Time-natha ai; anyin a e ame wâ a ga gan dut Sela, k' adre ca ham kâu me me aiân. 15 Ke a wâ but e Juda, me ame ûnyküme a e momo hnyi gethen, anyin a hia but tube hnyimakan. 16 Ke e ame saû kâu eû hnyi baten gethen, me ha, ka habe, Oge ma na he köu; anyin ae ca khana a ûngon e. Ke haingen, ka habe, Ieû ûnyi u me he ka ham könya, m' u me he ka he könya? 17 Ke haingen, ka habe, Oge me he ka kunâ köu ke nokon got hanen hnahat meno. Ke e ame ha kâu, ka habe, U me he ka ham könya haten ke ne o but u me he ka kunâ? 18 Ke haingen, ka habe, Ieû baten oge me he ka ham köu? Ke haingen, ka habe, Wale hnân ohmâ haten gam me nyi-ngen, me uci hnyi hnyamâm. Me e ame ham kâu, me he kâu, me ame erkin dut. 19 K' ame todrö momo, me he but, ke a hia but uny mano hnân tube hnyimakan, me e ame khavâ hmeto je ûkhaüen safac. 20 Ke Juda ame kunâ hanen at Adulama me nokon got, me me hom hmetu haten unyin momo: ke ame ca wâ. 21 Me e ame hnö tavat aten hnyei, ka habe, Ewa momo hnyi gethen hnyi Enaima waleji eû hnyi baten gethen? Ke haingödrin, ka habe, E ba momo hnyi gethen eang. 22 Me e ame hmetu kö Juda, me ha, ka habe, Oge me ca wâ e; ke walang hna ha hnen aten hnyei, ka habe, E ba momo hnyi gethen eang. 23 Ke Juda ame ha, ka habe,

Hnen ju unyin momo, wâ adre nye hlum' ötu: wâ bi oge hia but kunâ got ang, k' u je ca wâ momo. 24 Ke helâke kun ta tehi adre me thumetu Juda, ka habe, a hia but bi ûnyi monu Tamara a ûngom; ke wâ bi, a erkin dut hnyi hnen hna bi unyi monu. Ke haingö Juda, ka habe, Hom but, m' adre me he ka thong degecâ. 25 K' adre hia but hom momo, me e ame ûkhûnong ka ha ka ûngon, ka habe, Oge erkin hnen at a anyin ta je ûnyi eang: ke haingen minya, ka habe, Wâhmakhmeto ju u, anyi ia ta je ûnyi eang, wale ûnyi hnân bi haten, me nyingen, me uci. 26 Ke Juda ame wâhma-khmeto e, me ha, ka habe, E wisa at eang huk: anyin oge ca ham Sela a nökuk kâu. Ke ca tha e hmetu mē. 27 Ke wâ bi ame o but ûen ame he ka hnokoâ, li hûnye eû hnyi hnyekon. 28 K' ame he ka hnokoâ me haba ke at ame inâ but hnyamen, me haba momo at ame tuö erkin ame hom me hûkâlâ hnyi hnyamen hnyiban tö ae dra, me ha, ka habe, wale at ame bân. 29 Ke e ame thu hmetu hnyamen, me wâ bi ame o but liamekeiny mē: me haingen momo, ka habe, A hawa u je ûhanyöü ka ûnyi gam hna ânyâ? k' ame hwenyi ien e Farez. 30 Ke hwaban e ame o liamekeiny mē ae hu hna hûkâlâ hnyi hnyamen tö ae dra: k' adre hwenyi ien e Zera.

HNHYIMAKAN 39.

KE adre me hum Josefa Aigupito ai; k' ame üco e hnö Potifera at Aigupito athnyabai Farao, taben hnyat tue, ûnyi ge at Isamaela, hnyat ödrin e hom kâ e. 2 Ke tha Iehova me Josefa, ke e at ae sot; k' ame laba hnyi hnyaban at Aigupito a tuhan. 3 Ke a wâ but tuhan a tha Iehova mē, ke levoha ame ohnahicâ hia ta je ûnyi e ame ânyâ. 4 K' ame betenge ga Josefa, me huliwa kâu: me e ame otillâ e he ka musö hnyaban, me hna kâu anyin ta je ûnyi hia. 5 Ke hwân e ame otillâ e he ka musö hnyaban, me anyin ta je ûnyi hia, me Iehova ame ohnahicâ hnyaban at Aigupito ga Josefa; ke haba hnahic ûnyi ga Iehova ame ta hon anyin ta je ûnyi hia eiö hnyi uma, me eû hnyi utkânâ. 6 Me e ame hna biju anyin ta je ûnyi hia kö Josefa; ke ca khana e anyin ke ûnyi bi, ke so jeû e ame han. Ke so hmains unyi Josefa, ke hmanenang ka wâ. 7 Ke hwaban e ame hinou-tmhâkâ e hnen aiân tuhan; k' ame ha kâu momo, ka habe, Ötu he ka tha mokut.

8 Ke e ame h c , me ha ka  i n tuhan, ka habe, W  bi, E ca khana tuh k ta je  nyi unyik hnyi uma ; k' a hia but hna hia anyin ta je  nyi k nya ; 9 ke ba at ae be nua huk hnyi hnyaba eang ; ke e ame ca beh n  gak ke  nyi ke u thiju, anyin a u bi  i n : oge ma hawa ka  ny  monu e ae gan, ke kong ka Khong ? 10 Ke e ame fuc k  Josefa hnyi ta je bong hia, ke e ame ca l ng k u, he ka tha mokut m , me tha e m . 11 Ke hnyi ke bong eling e ame didr  ei  hnyin uma ka  ny  h dr n ; ke ba aten hnyaba ei  hnyin uma. 12 Ke momo ame k t  kha en, me ha, ka habe,  tu ma tha mokut : ke e ame hna degec  ju  kha en hnyi hnyamen me kec ut. 13 Ke a w  but a ga hia but hna degec   kba en ka hnyi hnyamen me kec ut, 14 me e ame haw  tavat aten hnyaban, me ha k drin, ka habe, W  bi, e ame hom k tin at Heberu he ka hlum'  tin, e a o k nya he ka tha mokut m nya me oge me hongot hwege : 15 ke e ame l ng hok hwakh u me hongot, me e ame hna degec  bi k nya  kha en, me kec ut. 16 Ke momo ame ip ju  kha en ke ne o but ame o tuhan ka hnyi hnyaban. 17 Ke momo ame ha k u ta je  nyi eling, ka habe, A o k nya athnyaba at Heberu u je hom k tin, me me he ka hlum  nya : 18 me oge me kh u me hongot, me e ame hna degec  bi unyik  kha en me kec ut. 19 Ke a l ng ut tuhan hofuc hwan  i n, wale a ha k u, ka habe, Ame  ny  hel e hnen athnyabaem : me gan hm  anyin hm nyin k u. 20 Ke haba tuh  Josefa ame hom e me ip ei  hnyin uma ceat unyin tavat adre ca  nyi ge than : ke e ame laba ei  hnyin uma ceat. 21 Ke tha Jehova me Josefa, k' ame betenge gan, me ok   he ka betenge gan hnen tuhan uma ceat. 22 Ke haba tuhan uma ceat ame hna k  Josefa tavat hia adre ca hnyin uma ceat ; ke haba ta je huliwa hia  drin e  ny  eling, me e at ame mus . 23 Ke ame ca w  tuhan uma ceat ke  nyi unyin, anyin a tha Jehova me, ke Jehova ame ohnahic  hnen hna  ny .

HNYIMAKAN 40.

KE hwaban ta je  nyi e haba at ame kh p utk i  belen than Aigupito, me at minya ame bi han, ame kong hwakecidru ka anyidru than, a than Aigupito. 2 Ke Farao ame hm nyin ka li athnyabainy, wale taben tavat kh p utk i  belen

than, me taben tavat adre me bi han. 3 Ke e ame hn'  dru m' adre me tu'  dru hnyi uma umen taben hnyat tue, hnyin uma ceat wale adre c  Josefa hnyin. 4 Ke haba taben tavat tue ame ip  dru unyi Josefa, me e ame huliwa k dru : k'  dru me laba hnyi ke je bong hnyi uma ceat. 5 Ke  dru me ve bwi hnyi hnyinghet a khaca, ke ve bongon li bwidru, wale at ame kh p utk i  belen than Aigupito, me at ame bi han, wale adre c'  dru hnyin uma ceat. 6 Ke ame didr  Josefa k dru hnyi hnyomakatu ka  'dru, ke w  bi,  dru me hl uhl u. 7 Me e ame hn  li athnyabai Farao unyin, adre me tu'  dru hnyin uma umen tuhan, ka habe, Ie  ame kh t gan li hnyimak bu hnyi bong ang ? 8 K'  dru me thu k u, ka habe,  hme bwi, ke ba at ae khana he ka ha bongon. Ke haing  Josefa k dru, ka habe, Hawa, ca hamen Khong he ka ha ta je bongon ? Bethe ha th  k nya. 9 Me haba taben hnyat kh p utk i  belen than ame a  gaga bwiny k  Josefa, haingen ka habe, Walang bwik, w  bi e hnyi hnyimak k e hu vine ; 10 ke kun ta vheiny vine ; ke hel ke ame vh ng me suou vongon ; me ame o  je de wan vine ta je wan ae mat : 11 ke e hnyi hnyam k kaia anyi Farao ; me oge me hom je wan vine me owa ka hnyi kaia anyi Farao, me hom kaia ka hnyi hnyam  Farao. 12 Ke haing  Josefa, ka habe, Walang bongon ; Haba je vheiny a kun, me wale kun ta bong ; 13 ke e tiga ca um kun ta bong, ama he Farao ka og r ny  b m, me ham hmetu k u h dr m : k' u ma he ka ham hmetu kaia anyi Farao ka hnyi hnyam m, hel  me hwakec m ehac, k' u me tiga kh p belen. 14 Ke so u ma  nyk mi nya minya e ka hu sot gam, ke o u na betenge gak, me haimemen  nya k  Farao, me me hum nya minya but  nyi hnyi uma eang : 15 anyin adre hia but ven u nya  nyi hnyi hnyeiny at Heberu : ke ba ke  nyi oge hia but  ny  eang m' adre me ip nya ju hnyi hmonop. 16 Ke a w  but taben tavat bi han, a e so hna ha bongon, me e ame ha k  Josefa, ka habe, Oge bwi minya, ke w  bi, kun ta tang areto ae hau hon b k : 17 ke haba hnyi hnyin tang eth  g rany e hu je  hia adre le hobi k  Farao ; k' ame han e hnen ta je meno ame g   nyi hnyi tangeru hon b k. 18 Ke Josefa ame thu, ka habe, Walang bongon : haba ta tang a kun, me wale kun ta bong ; 19 ke tiga ca um kun ta bong ame he Farao ka og r ny  b m  nyi hnyi uny m, me uhni u hnyi f  ; k'

ame he ka an unyâm hnen ta je menö ame gâ. 20 Ke haba hnyi bong a kuniny, wale bong ae gan adre hnöku Farao hnyin, ke e ame bi jeü hobi kâu lathnyabainy hia : ke e ame ogörânýá ban taben tavat khöp utköiö belen than, me me ban taben tavat bi han uuyin lathnyabainy. 21 Ke e ame ham hmetu hanymen ka taben tavat khöp utköiö belen than ; me ame ham hmetu kaia ka hnyi hnyamö Farao : 22 ke e ame uhno taben tavat bi han, helâ me hnö Josefa hna ha bongon ködrü. 23 Ke ame ca únykúmi Josefa bi hnen taben tavat khöp utköiö belen than, k' ame hnying ut e.

HNYIMAKAN 41.

KE hwaban lo li huna, Farao ame bwi : ke wâ bi, e ame tot hnyi baten wagewe. 2 Ke wâ bi ame o thö úheny ú hnyi wagewe je kau a seven ae so ka wâ me pipikhenya ; k' ödrin e han hnyi sâmun. 3 Ke wâ bi hwabödrin dö, ame o minya thö úheny ú hnyi wagewe ke je kau a seven ae kong ka wâ me delâ ; k' ödrin e tha tot me ke je kau hnyi baten wagewe. 4 Ke haba je kau ae kong ka wâ me delâ, ödrin e han je kau a seven ae so ka wâ me pipikhenya. Me a hmak dö Farao. 5 Ke e ame mokut hmetu me bwi : ke wâ bi seven ta je wan hwit ae wa se ke hlau ame kú hnyi vheny a khaca. 6 Ke wâ bi, hwaban e, ame kú thö seven je wan hwit ae kong me meleca hnen anghwei. 7 Ke haba je wan hwit ae kong ame han je wan hwit a seven ae wa se me hlau. Ke a hmak dö Farao, ke wâ bi, bwi bi. 8 Ke haba hnyi hnyomakatü me ame hmak hnyekon ; me e ame úkhünöng ka hawâ ta je magoi Aigupito hia me tavat ae metâ hia : ke Farao ame aú gaga ködrin bwiny ; ke ba at ae khana he ka ha bongon kö Farao. 9 Ke haba taben tavat adre me khöp utköiö belen than ame ha kö Farao, ka habe, Inya oge me únykúme hnyi bong ang anyik monu : 10 ka habe, Farao ame huönyin ka je lathnyabainy, me ame ip nya hnyi uma ceat hnyi uma umen taben tavat tue, tha inya me taben tavat bi han : 11 ke öhmu me bwi hnyi lit a khacâ, inya më ; ke öhmu me ve bwi me ve bongon bi li bwihmu. 12 Ke e bi unyihmu ke hidröu at Heberu, athnyabainy taben tavat tue ; me öhmu me aú gaga kâu, ke e ame ha köhmun bongon li bwihmu ; e ve bongon li bwihmu hnyi hnen hna ha. 13 K' ame hwâdâ thö helâ

me hnen hna ha bongon köhmu, ka habe, e ame hna hmetu könya hanymök, ke haba ke at bi adre ma uhno. 14 Ke haba Farao ame úkhünöng he ka hum Josefa, m' adre me hom logotâ but e únyi hnyi uma ceat eü hnyi kânâ : ke e ame gi me khavâ me he kö Farao. 15 Ke haingö Farao kö Josefa, ka habe, Oge bwi ke ba at ae khana he ka ha bongon : ke oge löng ut gam, ka habe, U je ne löng bwi e khatö u he ka ha bongon. 16 Ke Josefa ame thu kö Farao, ka habe, E ca khanö nya : ke ame he Khong ka thu kö Farao únyi ae so. 17 Ke haingö Farao kö Josefa, ka habe, Wâ bi hnyi bwik oge me tot hnyi baten wagewe : 18 ke wâ bi, ame o thö úheny u hnyi wagewe je kau a seven ae pipikhenya me so ka wâ ; k' ödrin e han hnyi sâmun : 19 ke wâ bi hwabödrin dö ame o thö ke je kau a seven ae sényin me ti kong ka wâ, me delâ, oge me ca wâ konginy helâe eang Aigupito : 20 ke haba je kau ae kong me delâ ödrin e han je kau a bân a seven ae pipikhenya : 21 ke ödrin ka hia but ön ödrin, me ca manen dö, ka habe, ödrin e hia but ön ödrin ; k' ödrin kong bala ka wâ helâ me eja. M' inya oge me hmak dö. 22 Ke oge me wâ hnyi ke bwik, me wâ bi, seven ta je wan hwit ae hlau me so ame kú hnyi vheny a khaca : 23 ke wâ bi, hwaban ame kú thö ke je wan hwit a seven ae meleca, me kong, me ba önyen hnen anghwei : 24 ke haba je wan hwit ae kong ame han je wan hwit a seven ae so : ke oge me omanená e ka je magoi ; ke ba at ae khana omanená bongon könya. 25 Ke Josefa ame ha kö Farao, ka habe, Khaca thibi hnö Farao hna bo : a hia but Khong omanená kö Farao únyi e ame he ka ányâ. 26 Haba je kau a seven ae so, me wale seven ta huna ; ke haba je wan hwit a seven ae, me wale seven ta huna : khaca thibi ang bwi. 27 Ke haba je kau ae dela me kong a seven ame o hwabödrin, me wale seven ta je huna, ke haba je wan hwit ae ba önyen ame ohü hnen anghwei ; me wale seven ta je hunainy hmiâ. 28 Wale únyi oge me ha kö Farao, ka habe, Khong ame hia but omanená kö Farao hnen hna he ka ányâ. 29 Wâ bi, ame he ka o ta huna a seven, ke gan hmâ widrany eang hnyi hnyeí Aigupito hia : 30 ke hwaban e ame he ka o ta hunainy hmiâ a seven ; k' adre me he ka hnying widran hnyi hnyeí Aigupito ; k' ame he ka aú but hnyeí hnen hmiâ. 31 K' ame ca he hmetu ka manen

widransy hnyi hnyeí anyin ae gan hmá hmiá hwaban e, anyin ame he ka ti gan hmá hmiá eling. 32 Ke Farao ame olo bo, waleling me me he Khong ka ohmá únyi e, k' ame ie he Khong ka ohwádá. 33 Anyin a wale e so e he Farao ka úca at ae hu oúnykúminy me metá, ke otilá e, hon hnyeí Aigupito. 34 Ke so e he Farao ka ányá ta je únyi eang, wale he ka otilá ta je homakan hon hnyeí me hlo ke keihen a thabúnginy jeú hnyi hnyeí Aigupito hnyi je hunainy widransy a seven. 35 Ke so adre me he ka úkhöúná je jeú hia thithö hnyi ta je huna eling ae so ame he ka o, me úkhöúná hwit me me musö hnö Farao, hnán jeú hnyi je taun, ke hamödrin he ka tuó e. 36 Ke wale thibi e jeú adre me he ka ip penapena hobi káu tavat hnyi je hunainy hmiá a seven ame he ka o ka hnyi hnyeí Aigupito; me me ca he ka hia tavat hnen hmiá. 37 Ke so hofuc eling kö Farao me lathnyabainy hia thithö. 38 Me haingö Farao ka lathnyabainy, ka habe, Hawa, ötin e he ka wá at ae úcú me at ang, ke e unyin Hanon Khong? 39 Ke Farao ame ha kö Josefa, ka habe, E ba at ae hu oúnykúminy me metá helá möu, anyin a hia but Khong omanená köu ta je únyi hia e : 40 u thibi at ame he ka hon hnyabak, k' u ma he ka musö ik hnyeí hoton hwám hofuc : ke theron thiju oge ma he ka beónua hom. 41 Me haingö Farao kö Josefa, ka habe, Wá bi, oge hia but otilö u hon hnyeí Aigupito hia. 42 Ke Farao ame uny wen banyen me iná ga Josefa, me okhavá e ge ta je úkhaú lino, me ovhekinyá e ge sa gol; 43 k' ame ip e hon anyin úkariota a loiny; k' adre me hongot hnyi hnyimakan, ka habe, Iáú ju öbun : k' ame otilá e hon hnyeí Aigupito hia. 44 Ke haingö Farao kö Josefa, ka habe, Inya Farao, ke u ka ca musi, e ba at ame he ka ogörányá hnyamen me can hnyi hnyeí Aigupito hia. 45 Ke Farao ame hwenyi iö Josefa, ka habe, Zafenathaprenea; k' ame ham káu Asenatha nöku Potifera at bihut hnyi Ona, hnán áian. Ke Josefa ame vheno hnyeí Aigupito hia. 46 Ke thöte ta je hunai Josefa, hnyi úen e ame tot hnyi hnyimakö Farao than Aigupito. Ke Josefa ame he úheny unyi Farao, me vheno hnyeí Aigupito hia. 47 K' ame wa gan hmá but káná hnyi je hunainy widransy a seven. 48 Ke e ame úkhöúná ta je jeú hia thithö hnyi je huna a seven hnyi hnyeí Aigupito, me ip hnyi ta je taun : waleji troban ta je utkáná igigilö ta je

taun, e ame ve ip hnyin. 49 Ke Josefa ame úkhöúná hwit helá me önyin köiö, e ti gan hmá, waleling me me ca aú hmetu e; anyin a ca hnán aú. 50 Ke ame hnokoá li laku Josefa a бага, ke tiga hia je hunainy hmiá, wale ame hnokoá huö Asenatha nöku Potifera at bihut hnyi Ona. 51 Ke Josefa ame hwenyi ien atö, Manase : haingen, ka habe, Anyin a hia but Khong okhöti nya hnyi anyik ta je vec hia, me hnyaba cica hia. 52 Ke e ame hwenyi ien wakeiat Eferaima : haingen, ka habe, Anyin a Khong ame osi nya hnyi hnyeí adre oveci nya hnyin. 53 Ke a um dö je hunainy widransy a seven hnyi hnyeí Aigupito. 54 Me ame hwán ka o je hunainy hmiá a seven, helá me hnö Josefa hna ha : ke e but hmiá hnyi te je hnyeí hia; ke e hu han bi hnyi hnyeí Aigupito hia. 55 Ke ame mekihnaném but hnyeí Aigupito hia, me haba tavat adre me tengiá kö Farao ba han : ke Farao ame ha ka at Aigupito hia, ka habe, He th' öbun kö Josefa; me ányá thö únyi ama he ka ha köbun. 56 Ke hmiá hia thö je hnyeí hia : ke Josefa ame khöng ut ta je uma jeú hia, me úcú ka at Aigupito; ke gan hmá but hmiá hnyi hnyeí Aigupito. 57 K' ame he Aigupito ai ta je hnyeí hia he ka úcú jeú unyi Josefa, anyin ae gan hmá hmiá hnyi ta je hnyeí hia.

HNYIMAKAN 42.

KE khanö Jakob but ae hu jeú Aigupito, me Jakob ame ha ka je lakon, ka habe, Ieú e gabun öbun e iwahmö thibi ? 2 Ke haingen, ka habe, Wá bi, oge löng ut a e hu jeú Aigupito : he th' öbun ká e ka úcú ö 'tin m' ötin e möt me ca mok. 3 Me ame he ta je latuhö Josefa a libenyita he ka úcú jeú hnyi Aigupito. 4 Ke Jakob ame ca kunö Beniamina kei Josefa tha e me je latuhan, anyin a haingen, ka habe, Wá e nye o but kong káu. 5 Ke ame o but je laku Isaraela he ka úcú jeú, unyin tavat adre me o eling : anyin ae hmiá but hnyeí Kanana. 6 Ke Josefa ame musi hnyi hnyeí, k' ame úcú jeú me tavat hia hnyi hnyeí : k' ame o but je latuhö Josefa me nom ju hnyikánái káu. 7 Ke a wá but Josefa je latuhan, me wáhmakhmetu ödrin, me e ame bi ke at ködrin, me fuc hwege, me ha ködrin, ka habe, Öbun e mwi ua ? K' ödrin e thu, ka habe, Öhmun e mwi hnyi hnyeí Kanana, öhmun e he ka úcú

jeú. 8 Ke Josefa ame wáhmakhmeto je latuhan, k' ödrin e ca wáhmakhmeto e bi. 9 Ke Josefa ame únykúme li bwi e ame bo gadrin, me e ame ha ködrin, ka habe, Öbun je hnyat ae kong; öbun e o but he ka ecmáká hnyei ae ba únyi. 10 K' ödrin e thu káu, ka habe, Than lö, e ba, k' ame o but lathnyabaem he ka úcú jeú. 11 Je lakon at a khaca öhmun hia; öhmun e hnathu, öhmun e ca he ka ecmáká hnyei, a öhmun lathnyabaem. 12 Ke haingen ködrin, ka habe, Ohe, öbun e o but he ka ecmáká hnyei ae ba únyi. 13 Ke haingödrin, ka habe Haba öhmun lathnyabaem je liamekeiny a twelv, lakon at a khaca, hnyi hnyei Kanana; ke haba wakeiat hmönyin tha e biju me kamöhmun walang ang, ke hia but khaca. 14 Ke Josefa ame ha ködrin, ka habe, Wale hnök hna ha köbun, ka habe, öbun je hnyat ame he ka ecmáká hnyei: 15 ke walang hnân ohnathu öbun, ka habe, Kia inya Farao a öbun e ca he ka he úheny ang e ka ca o minya eang keibun wakeiat hmönyin. 16 Kuná thö ke at gabun he ka hom keibun, k' adre me he ka c' öbun me cubec hobun hofuc, öbun e ne hnathu: ke ame ne ba, kia inya Farao a öbun je hnyat ame he ka ecmáká hnyei. 17 Ke e ame c' ödrin kun ta bong. 18 Ke haba hnyi bong a kuniny Josefa ame ha ködrin, ka habe, Ányá th' öbun únyi ang m' öbun e möt; anyin a iuy outen Khong: 19 öbun e ne hnathu, e so adre ca ke at gabun a je liamekeiny hnyi uma adre c' öbun hnyin; ke he th' öbun hom dö jeú ka anyibun je lap ae mekihnânem: 20 k' öbun hmeto thö könya keibun a wakeiat hmönyin; me me ohnathoá hobun hofuc, m' öbun e ca he ka mok. K' ödrin e ányá helâe. 21 Ke ödrin e tha úhnenamö, ka habe, E hnathu jönitin keitin anyin a ötin e wá thö vecin hnyekon e, waleji e ame khöü kötin k' ötin e ca löng bi; waleling me me o but kötin vec eang. 22 Ke haba Reubena ame thu ködrin, ka habe, Hawa, oge ca hia but ha köbun, ka habe, ca okongoá da; k' öbun e ca löng? Anyin a wale wá bi, adre me elâm hwaban dren. 23 Ke ca khaú ödrin a Josefa ame löng hmakhmeto, anyin a e ame úhnenamö mödrin deny at ame wia hwan hnyei. 24 Ke e ame he thö unyidrin, me tenge; ke e ame hmetu ködrin me úhnenamö mödrin, me hum Simeona unyidrin me ca e hnyi hnyimaködrin. 25 Ke Josefa ame huná he ka onöngötá tangödrin je tang

ge hwit, me ve hitangen anyidrin je mone hnyi tangödrin je tang, me ha kamijidrin hobi káu eú hnyi gethen: k' adre ányá helâe ködrin. 26 K' ödrin e ve ip ta je tang hwit hon haledrin je asina, me he but. 27 Ke haba ke at gadriu ame khöng tangen tang he ka hân haleuy asina hnyi omtabaga, k' ame wá anyin mone; ke wá bi e hnyi hnyimen tangen tang. 28 Ke e ame ha ka je liamekeiny mä, ka habe, Wale hmetu thö ang anyik je mone hnyi tangök tang: me ame gá udrin, k' ödrin e öbubuny me úhaköuá, ka habe, Ieú ang a ányá kötin Khong? 29 Ke ödrin e o but kö Jakob a kamödrin hnyi hnyei Kanana, me ödrin e thumeto e ge ta je únyi hia ame o but ködrin, ka habe, 30 Ame fuc hwege köhmun at, wale thaniny hnyei, me ha, öhmun e ecmáká hnyei. 31 Ke haingöhmun káu, ka habe, Öhmun e hnathu, öhmun e ca ecmáká hnyei: 32 öhmun je liamekeiny a twelv, ke khaca thibi kamöhmun; a hia but ke at, ke haba wakeiat hmönyin e unyin kamöhmun hnyi bong ang hnyi hnyei Kanana. 33 Ke ame ha köhmun at, wale thaniny hnyei, ka habe, Walang haten m' inye he ka wáhmakhmetoá a öbun e hnathu, hnen biju ang anyik ke at gabun je liamekeiny ke hok ö 'bun dö ka anyibun je lap ae mekihnânem, ke he th' öbun: 34 ke hom dö könya keibun wakeiat hmönyin: ke wale oge me he ka wáhuakhmetoá a öbun e ca he ka ecmáká hnyei, k' öbun je hnyat ae hnathu: ke oge me he ka ham hmetu köbun liamekeiny möbun, me öbun e he ka úcú hnyi hnyei. 35 Ke ödrin e vo hingálá önyen tangödrin je tang, ke wá bi, ve e bi hnyi tangödrin je tang anyidrin je tang mone; ke ödrin e wá me kamödrin anyidrin je tang mone, m' ödrin e ot. 36 K' ame ha ködrin Jakob a kamödrin, ka habe, Öbun hnyat öbun e ohia lakuk: a hiö Josefa but, ke hiö Simeona but, k' öbun e he minya ju ka hum Beniamina: hnân okongu uya ta je únyi hia thithö eling. 37 Ke haingö Reubena ka kamen, ka habe, U ma he ka hlingá lakuk li бага, iny ka ca hom hmetu e köu: hna but e ka hnyi hnyamök, ke oge me he ka hmeto e köu. 38 Ke e ame ha, ka habe, Ame ca he nökkuk ka tha he möbun; anyin a mokcu keiny, ke hake biju e: ke a ne o but kong káu eú hnyi gethen öbun e he, me öbun e he ka otengiö nya k' iny húen dut ke ne o but ka hnyi erkemok.

HNYIMAKAN 43.

KE gan hmâ but hmiâ hnyi hnyei. 2 Ke ödrin e hia but han hwit waleji ödrin e hom ûheny Aigupito, me ame ha ködrin kamödrin, ka habe, He hmetu th' öbun ka úcú ö 'tin. 3 Ke haingö Juda kâu, ka habe, A hûna hwegiâ köhmun hnen at, ka habe, Ca he hmetu öbun ka iohnyimak mönya e ka hia unyibun keibun. 4 U je ne he ka tha kunâ möhmun keihmun, m' öhmun e he ka he me úcú ám; 5 k' u je ne ca he ka hnyi kunâ e, m' öhmun e ca he ka he kâ e: anyin a haingen at köhmun, ka habe, Öbun e ca he ka iohnyimak mönya e ka hia minya unyibun keibun. 6 Ke Isaraela ame ha, ka habe, Ieú gabun öbun e okongu nya, me haimemenâ ka at a g' ame hu keibun biju ang? 7 Ke ödrin e thu, ka habe, A hnö win gahmun hnen at me je lahanöhmun, me ha, Hawa, e tiga möt kamöbun? ke e hu keibun biju eiö? m' öhmun e thu kâu hoton ta je únyi eling: anyin ae ca khanöhmun a g' ame he ka ha, ka habe, He th' öbun ka hom keibun? 8 Ke Juda ame ha kö Isaraela a kâmen, ka habe, Hna but kõnya da, k' öhmun e he ka tha he; m' ötin e möt, me ca mok, öhmun, möu, me je lakutin. 9 Oge me he ka bi singiny; k' u ma he ka elâm e unyik: iny ka ca he ka hom hmetu e kôu, me ip hnyi hnyimâkâm, e so e takú nya konginy nyiele balua: 10 anyin adre ne ca ovheli öhmun, m' öhmun e ne hmetu but ang aloiny. 11 K' ame ha ködrin hnö Isaraela a kamödrin, ka habe, Hawe, a ne helâe, walang hnöbun hna he ka ányâ, hom dö hnyi tangöbun je tang ta je wan ae únyi hnathu hnyi hnyei, ke hom dö ka at ta je bwihlany, wale tap basama, me tap hani, me setura, me muro, me je betuni, me je saked: 12 ke hom dö je tang mone a usa lo hnyi je hnyamöbun; ke haba je mone adre hitangen hnyi hnyimen tangöbun je tang, hom hmetu thö hnyi je hnyamöbun; wâ adre nye ányâ monoâ: 13 ke hom minya thö keibun, me todrö, me he hmetu th' öbun ka at: 14 ke so e he Khong Aekhanahia ka okúâ köbun betenge hnen at me me tha kunâ möbun liamekeiny möbun me Beniamina minya. K' adre ne ohia lakuk, hawe, iny kong ut.

15 Ke a hom je bwihlany eling hnen tavat, m' ödrin e hom je mone, úsa lo li tang hnyi je hnyamödrin, tha ödrin me Be-

niamina; k' ödrin e tot me he Aigupito ai, me tha tot hnyi hnyimakö Josefa. 16 Ke Josefa ame ö Beniamina unyidrin, me ame ha ka at ame tuö hnyaban, ka habe, Su thö tavat eang ka hnyi uma, me hlingö meno, me penapena; anyin ödrin e he ka tha han mönya eâu jebigöсах. 17 Me ame ányâ hnen at helâ me hna ha hnö Josefa; me hum ödrin ka hnyi uma umö Josefa. 18 K' ame ot je hnyat anyin adre me su ödrin ka hnyi hnyaba Josefa; k' ödrin e úhakou ka habe, Can je mone adre hitangen hnyi tangötin je tang hnyi úen a bân, m' adre me su ötin kâang; me me he ka heleú can gatin, me ut kötin, he ka hom hwenb' ötin, me haletin je asina. 19 K' ödrin e he ka at ame tuö hnyaba Josefa, me úhuenamö mē hnyi hwanumen uma, 20 me ha, ka habe, Than lö, öhmun e bân ka he jem ehac ka úcú jeú: 21 ke öhmun e o but ka hnyi omtabaga, me öhmun e khöng ut tangöhmun je tang, ke wâ bi, e ve e anyihmun je mone hnyi hnyimen tangöhmun je tang, wale anyihmun je mone ae bekhöt: k' öhmun e hom hmetu ang hnyi je hnyamöhmun. 22 Ke öhmun e hom walang ang ke je mone hnyi je hnyamöhmun he ka úcú jeú: e ca manen köhmun ie at ame hitangen hmetu anyihmun je mone hnyi tangöhmun je tang. 23 Ke haingen ködrin, ka habe, Öbun so, ca ot: hnen Khongubun, a Khongun kamöbun hna ham köbun tang omjeú hnyi tangöbun je tang: oge hia but kap anyibun moue. Ke e ame hum Simeona but ködrin. 24 Ke haba at ame hom je hnyat ka hnyi uma umö Josefa, me ham ködrin utköio m' ödrin e hneú je li cadrin; k' ame hân haledrin je asina. 25 Ke ödrin e penapena ta je bwihlany hobi kâu e ka o Josefa hnyi jebigö: anyin a ödrin e löng a ödrin e he ka hnyi han eling. 26 Ke a o but Josefa ka hnyi uma, m' ödrin e hom kâu eiö hnyi uma anyidrin je bwihlany, me ödrin e nom ju hnyikânâi kâu. 27 Ke eame hnei ödrin ge anyidrin sot, me ha, ka habe, Hawa, e hwege kamöbun, waleji hingat öbun e ha? hawa e möt balua e? 28 Ke ödrin e thu, ka habe, E hwege athnyabaem a kamöhmun, k' e möt balua. Ke ödrin e nom je bödrin me iâü. 29 Ke e ame bwele me ö Beniamina a keiny, a tha hinyen mē, me ha, ka habe, Wale keibun wakeiat hmönyin, waleji öbun e ha kõnya? Ke haingen, ka habe, Nokuk lö, e so Khong ame he ka betenge gam. 30 Ke Josefa ame he mweimwei; anyin a e gan hmâ anyin

ibetengiö ka keiny : k' ame heleü dok he ka tenge hnyin ; me e ame didrut ka hnyi hnyeulen me tenge eling. 31 Ke e ame osúa hnyimakan, me dit hmetu but me hokhnyok me ha, ka habe, Laulau but. 32 K' ödrin e ve laulau hobi káu, me hobi ködrin, me hobi káu hnyat Aigupito ödrin e tha han mē, anyin ae kap ka at Aigupito he ka tha han me at Heberu ; anyin ae ikiki ka at Aigupito únyi e. 33 K' ödrin elaba gaga hnyi hnyimakan, wale atö ke ne o but ka wakeiat hnyi je ve hnödrin bi : ke haba hnyat ödrin e uthmok. 34 Ke e ame kuná ködrin ta je tap jeü únyi gan : ke gan hmá hna haö Beniamina hudrin a othabúng. K' ödrin e ic me tha senyin mē.

HNYIMAKAN 44.

KE e ame húna ka at ame tuö hnyaban, ka habe, Ünöngötá ju ta je tang tangen je hnyat ge jeü, me me hmak ka hijen, ke ve hitangen ju anyidrin je mone hnyi hnyimen je tang. 2 Ke hitangen ju anyik kaia, wale kaia sileva hnyi hnyimen tang tangen wakeiat, me mone hwaban án tang jeü. K' ame ányá helá me hofuc ho Josefa. 3 Ke a lany jut, e ame kuná je hnyat, ödrin me haledrin je asina. 4 Ke ödrin e he but úhedrin hnyi taun, k' ödrin tiga ca sákáu, me Josefa ame ha ka at ame tuö hnyaban, ka habe, Todró, wadring dö hoton je hnyat, ke u ka hom til' ödrin, ha thö ködrin, ka kabe, Ieü gabun öbune bi hwaban so hnen kong? 5 Hawa, ca e únyi ic anyin anyik than, me anyin únyi hnán kikite? e kong hnöbun hna ányá. 6 Ke e ame hom til' ödrin me ha ködrin je hofuc eling. 7 Ke haingödrin káu, ka habe, Than ame ha hofuc eling geü? Ohe e ca khan' öhmun je athnyabaem he ka ányá únyi e. 8 Wá bi, haba je mone öhmun e wá hnyi hnyimen tangöhmun je tang, me öhmun e hom hmetu köu úheny hnyi hnye Kanana : hawe, öhmun a kámáu ka venáu sileva me gol únyi hnyi uma umen tuhám? 9 Ke adre ne wá unyin ke at gahmun a je lathnyabaem, me ame he ka mok, k' öhmun e he biju ka bi lathnyabainy than. 10 Ke haingen, ka habe, E so e he ka helá me hobun hofuc ; ka habe, E ka wá thö e unyin ke at, me ame he ka bi athnyabaik ; k' öbun e he biju ka wisa. 11 K' ödrin e ie hom but tangödrin ta je tang hnyikánái, me ve khöng tangödrin je tang. 12 Me e ame hwán ka elám unyin atö ke ne

o but ka wakeiat : k' adre wá ju kaia hnyi tang tangö Beniamina. 13 Me ödrin e kia anyidrin je úkhaü me ve ip hmetu je hok hnyi haledrin je asina, me hmetu ka hnyi taun. 14 K' ame o but Juda me je liamekeiny mē ka hnyi uma umö Josefa ; ke tiga e e : k' ödrin e ta ju hnyikánái hnyi hnyimakan. 15 Ke haingö Josefa ködrin, ka habe, Ie únyi ang öbun e ányá? e ca khan' öbun a inya ang at ae tren kikite? 16 Ke Juda ame ha ka habe, Than lö, öhmun e he ka thu ieü? ke ieü öhmun e he ka ha? k' öhmun e he ka kámáu hna haiwisai öhmun? A hia but Khong omanená konginy je lathnyabaem : wá bi öhmun je hwenbá anyin than, wal' öhmun ang, me at minya adre wá gan kaia. 17 Ke haingen, ka habe, Ohe, ame ca he ka heláe : ke haba at adre wá unyin kaia e ame he ka hwenbá unyik ; ke haba öbun, he th' öbun me hmanenang ka kamöbun.

18 Me haba Juda ame hakekeny káu, me ha, ka habe, Than lö, ö u hnö nya a athnyabaem he ka ha ong hofuc ka hnyi li hnyikönyen than, ke ca he ányam hmönyin ka palulu ka athnyabaem : anyin a u úcü me Farao. 19 Hnen than hna hnei öhmun je lathnyabaem, ka habe, Hawa, e hu kamöbun, me keibun? 20 Ke öhmun e thu ka than, ka habe, E hu kamöhmun, a hingat, me nokon hingat a e a wakeiat at ae úhnyúkong ; ke a moku tuhan, ke hake e biju nokon hinyen, k' ame betenge gan hnen kamen. 21 K' u je ha köhmun a je lathnyabaem, ka habe, Hom but könnya me inye he ka wá e. 22 K' öhmun e ha köu than, ka habe, E ca khana da he ka hna kamen : anyin a ne hna kamen ; me ame he ka mok. 23 Ke u je ha köhmun lathnyabaem, ka habe, A ne ca tha o möbun keibun a wakeiat, ca he hmetu öbun ka iohnyimak mönya. 24 Ke öhmun e o but ka kamöhmun a athnyabaem, me öhmun e thumeto e ge hwám hofuc, than. 25 Ke kamöhmun ame ha, ka habe, He hmetu th' öbun ka úcü ö 'tin. 26 Me haingöhmun, ka habe, E ca khan' öhmun he ka he : e ka he unyihmun keihmun a wakeiat, öhmun e he ka he : anyin ae ca khan' öhmun he ka iohnyimak me at eling, e ka hia bi unyihmun keihmun a wakeiat. 27 Ke haingö cica athnyabaem köhmun, ka habe, E khan' öbun a ga hnoká hnen öök lo lakuk li бага : 28 k' ame he but gak ke at, ke haingök, ka habe, A hia but oloú usu kia e ; k' oge me ca wá hmetu e : 29 ke öbun e ne hom minya at ang

unyik, k' ame ne o but káu kong, m' öbun e he ka otengiö nya, k' oge hüan dut, ke ne o but ka hnyi erkemok. 30 Ke walang ang iny ka o kö cica athnyabaem, ke hia biju gahmun da; anyin adre úhúkálákouá anyin möt me möt anyin da; 31 ke e ka wá but ae hia biju gahmun da, me e ame he ka mokcu: k' ame he je lathnyabaem ka otengiá athnyabaem a kamölmun ke hüan dut ke ne o but ka hnyi erkemok. 32 Ke haba inya athnyabaem singiny da hobi kö cica, ka habe, Oge ne ca he ka hom hmetu e káu, ame he bala ka jönik ga cica nyiele balua. 33 Ke walang ang than lö ö u hnö nya a athnyabaem ka laba biju, a bá, me hwaban da; ke so e tha he thö da me latuhan. 34 Anyin oge ma kámâu ka he kö cica ke hia biju unyik da? wá inye wá thö kong ame he ka o kö cica.

HNYIMAKAN 45.

KE ca khanö Josefa hmetu he ka hokhnyok hnyi hnyimaködrin hia adre me tot unyin; me ame hongot, ka habe, Kuná but unyik tavat hia. Ke Josefa ame omanená e bi ka je liamekeiny mē, ke ba ke at biju unyin. 2 Ke e ame tenge hwege göranyai: k' ame löng at Aigupito, k' ame löng minya lap anyi Faraó. 3 Ke haingö Josefa ka je liamekeiny mē, ka habe, Inya Josefa; hawa e möt cica? Ke ca khana je liamekeiny mē he ka thu káu, anyin ödrin e uthmok gan. 4 Ke Josefa ame ha ka je liamekeiny mē, ka habe, Hok ju jem öbun könya. M' ödrin e hakekenyá. Me ame ha, ka habe, Inya Josefa liamekeiny möbun, waleji at öbun e úco kâang Aigupito ai. 5 Ke walang ang ca hmak je hnyekubun, ke ca tenge can anyibun monu, hnyi hnöbun hna úcü nya kâang; anyin a Khong ame kunö nya bán inya hnân úhömeli. 6 Anyin a lo but li hunainy hmiá ang hnyi hnyei: ke thabúng biju ta huna ke ba hmetu trohnen me menu. 7 Ke Khong ame kuná bán inya he ka tu' öbun a kolon biju hnyi hnyei, me he ka omeli öbun hnen úhömeli ae gan. 8 Anyin öbun e ca kunö nya jem, ke hnen Khong: ke a hia but otilö nya hnân kamö Faraó, me thaniny hnyaban hia, me at musi hnyei Aigupito hia. 9 Ie he th' öbun kö cica, me ha káu, ka habe, Walang hna ha hnö Josefa a nokom, ka habe, A hia but Khong otilö nya hnân thaniny hnyei Aigupito hia thithö: he but jem könya, ca

bec: 10 ke u ma he ka labá hnyei Gosena, m' u ma hakekenyiny nya, u me je lakom, me je laöbem, me halem je hnabat mamoe, me halem je kau, me ányám ta je únyi hia thithö: 11 k' oge me he ka tuó u eling, anyin a thabúng biju je hunainy hmiá; wá u nye theduoc, me ányám lap, me ányám ta je únyi hia. 12 Ke wá bi, ame wá li emaköbun, me li emakö Beniamina a keik, a g' ame fuc köbun hnen hnyimök. 13 Ke öbun e he ka thumetu cica ge anyik hmanenang hia hnyi Aigupito, me ta je únyi hia öbun e wá: ke ie su cica but jem. 14 Ke e ame ta ju hon nyi Beniamina a keiny, me tenge, ke Beniamina ame tenge hon nyin. 15 Ke e ame úcimhnyimak me je liamekeiny mē hia, me tenge ködrin: ke hwaban e haba je liamekeiny mē ödrin e úhnenamö me.

16 Ke adre me löng hnyi hnyaba Faraó, ka habe, A o thö je liamekeiny me Josefa: ke haba Faraó me lathnyabainy ödrin e senyin. 17 Ke haingö Faraó, kö Josefa, ka habe, Ha thö ka je liamekeiny möu, ka habe, Walang únyi öbun e ha ka ányá, bi hoká ju hon halebun je meno, ke he th' öbun ka hnyi hnyei Kanana; 18 me hom dö kamöbun me anyibun je lap jem könya: ke oge me he ka ham köbun soiny hnyei Aigupito, k' öbun e he ka han pipikhenyainy hnyei. 19 Ke walang ang, oge me húna köu únyi öbun e he ka ányá; hom dö je úkat hnyi hnyei Aigupito hobi káu je lakubun ae úhnyúkong, me je laöböbun, ke hom but kamöbun me he jem. 20 Ke ca únykúme bi anyibun ta je únyi; anyin a hobi köbun soiny hnyei Aigupito hia. 21 K' ame ányá heláe hnen je laku Isaraela: ke Josefa ame ham ködrin ta je úkat hoton hna húna hnö Faraó, k' ame ha kamejidrin hobi káu gethen. 22 Ke e ame ham ködrin hia úsa lo je úkhaú; ke e ame ham kö Beniamina kun ta haded sileva, ke thabúng ta úkhaú. 23 Ke walang hnen hna kuná ka kamen, libenyita je asina, adre bi hoká ge ta je únyi ae so hnyi Aigupito, ke libenyita ta je asina momo adre bi hoká hnen hwit, me areto, me kamejin kamen eú hnyi gethen. 24 Ke e ame kuná je liamekeiny mē, m' ödrin e he but: ke haingen ködrin, ka habe, Ca he öbun ka ú eú hnyi gethen. 25 Ke ödrin e he but úheny Aigupito me o hnyi hnyei Kanana unyi Jakob a kamödrin. 26 Ke ödrin e thumeto e ka habe, E tiga möt Josefa, ke e at ame musö hnyei Aigupito

hia. K' ame hmak hnyekon, anyin a e ame ca köp ödrin. 27 Ke ödrin e thumeto e ge ta je únyi hia ame ha Josefa ködrin : ke e ame wá je úkat a kunâ Josefa hnân taben bi, me ame möt hmetu thö hnyeku Jakob a kamödrin : 28 ke haingö Isaraela, ka habe, E úcú, e tiga möt bi Josefa nökkuk : oge me he ka he me iouny me k' iny tiga ca mok.

HNYYIMAKAN 46.

KE Isaraela ame he me anyin lap hia, me o hnyi Bere-seba, me hudo eling je hut ka Khongu Isaaka a kamen. 2 Ke Khong ame ha kö Isaraela hnyi hna omanená hnyi hnyinghet, ka habe, Jakob, Jakob lö. Me e ame ha, ka habe, Inya ang. 3 Ke e ame ha, ka habe, Inya Khong, a Khongon kámám : ca ot he ka he Aigupito ai ; anyin oge me he ka wiö u eling me hnyei ae gan : 4 oge me he ka tha he möu Aigupito ai ; k' oge me he bi nya ka hum u hmetu úheny e : k' ame he Josefa ka hlec li emákám. 5 Ke Jakob ame he thö úheny Bere-seba : ke je laku Isaraela adre me hum Jakob a kamödrin, me lakudrin ae úhnyükong, me je laöiödrin hon je úkat ame kunâ hnö Farao me hnân tabödrin. 6 Ke ödrin e hom minya haledrin ta je hnahat, me tang omjehedrin waleji ae hu gadrin hnyi Kanana, me o Aigupito, wale Jakob me anyin lap hia a tha e me : 7 je lakon obaga, me laöbiny obaga, a tha e me, me je lakon wahu, me je laöbiny wahu, me mátrániny hia thithö ame tha he me Aigupito ai.

8 Ke walang je ien laku Isaraela ödrin e o Aigupito, a Jakob me lakon obaga : jia Reubena nöku Jakob a atö. 9 Ke haba je laku Reubena ; jia Enoka, me Palu, me Hezerona, me Karemi. 10 Ke haba je laku Simeona ; jia Jemuela, me Jamina, me Ohada, me Jakina, me Zohara, me Saulo nokon momo Kanana. 11 Ke haba je laku Levi ; jia Geresoma, me Kohatha, me Merari. 12 Ke haba je laku Juda ; jia Era, me Onana, me Sela, me Farez, me Zera : ke a mokcu Era me Onana hnyi hnyei Kanana. Ke lo li laku Farez, jia Hezerona me Hamula. 13 Ke haba je laku Isakara ; jia Tola, me Pua, me Jobu, me Simerona. 14 Ke haba je laku Zebulona ; jia Sereda, me Elona, me Jalela. 15 Wale je laku Jakob hnö Lea hna hnokoá hnyi Padanarama, me Dina a nokon hlu ;

ke haba hnyat hia thithö je lakon obaga me wahu, me, ödrin thöte theri. 16 Ke haba je laku Gada ; jia Zifiono, me Hagi, me Suni, me Ezebona, me Eri, me Aroda, me Areli. 17 Ke haba je laku Asera ; jia Iemina, me Ieseva, me Iesevi, me Beria, me Sera a hanidrin : ke lo laku Beria ; jia Heberu, me Malekiela. 18 Wale je laku Zilepa hnö Labana hna ham kö Lea a nokon, k' ame hnokoá me Jakob, ödrin sikstin. 19 Ke haba li laku Rakela öiö Jakob ; jia Josefa me Beniamina. 20 Ke adre hnokoá lo laku Josefa hnyi hnyei Aigupito, jia Manase me Eferaima, wale hnö Asenatha nöku Potifera, at bihut hnyi Ona. 21 Ke haba je laku Beniamina ; jia Bela, me Bekera, me Asebala, me Gera, me Naamana, me Eki, me Rosa, me Mupima, me Hupima, me Areda. 22 Wale je mátráni Jakob me Rakela, haba hnyat hia, me, fortin. 23 Ke haba nöku Dana ; jia Husima. 24 Ke haba je laku Nafatali ; jia Jazela, me Guni, me Jezera, me Silema. 25 Wale je laku Bila hnö Labana hna ham kö Rakela a nokon, k' ame hnöku ödrin je laku Jakob : ke haba hnyat hia, me, ödrin seven. 26 Haba tavat hia a tha he me Jakob Aigupito ai, wale a hnokoá, ke ca ha bi je laungú Jakob, me, ödrin sikste siks hia thithö ; 27 ke lo laku Josefa e ame hnokoá hnyi hnyei Aigupito : k' ödrin sevente tavat hia hnyi lap anyi Jakob, wale tavat ödrin e o hnyi hnyei Aigupito.

28 Ke e ame kunâ bánâ Juda kö Josefa me me he ka kú Gosena káu ; me ödrin e o but hnyi hnyei Gosena. 29 Ke Josefa ame penapena anyin kariota, me he Gosena ai he ka iouny me Isaraela a kamen ; ke ödru me iouny dö, me Josefa ame ta ju hon nyin, me he ka kú hmá hon nyin. 30 Ke haingö Isaraela kö Josefa ka habe, Hnö nya but walang ang he ka mok, anyin oge wá thö hnyimákám a u möt. 31 Ke Josefa ame ha ka je liamekeiny mē, me lap anyin kamen, ka habe, Oge me he ka thumetu Farao, me ha káu, ka habe, A o thö könya je liamekeiny mönya, me lap anyi cica úhedrin hnyi hnyei Kanana ; 32 k' ödrin je hnyat tuö mamoe, anyin a odrin hnyat tuö omeno ehac : k' ödrin e hia but hom je hnahat mamoe a haledrin, me je hnahat kau, me anyidrin ta je únyi hia. 33 Ke e ka he Farao ka haö 'bun, me hnei öbur, ka habe, Ieú huliwa a öbun khenen káu ? 34 me öbun e he ka ha, ka habe, Öhmun lathnyabaem hnyat tuö mero hwân hnyu

hidröu a öhmun ke ne o but walang ang öhmun me lakamöhmun : m' öbun e he ka laba hnyi hnyeï Gosena ; anyin a at Aigupito adre me ikikiä hnyat tnö mamoe.

HNYIMAKAN 47.

KE Josefa ame he me thumetu Farao, ka habe, A o thö cica me je liamekeiny mönya, me haledrin je hnahat mamoe me haledrin je hnahat kau, me anyidrin ta je ünji hia ünji hnyi hnyeï Kanana ; ke wä bi, ödrin dut hnyi hnyeï Gosena. 2 Ke e ame hom ke je liamekeiny më, a ödrin thabúng, me hum ödrin ka hnyi hnyimakö Farao. 3 Ke haingö Farao ka je liamekeiny më, ka habe, Ieü öbun e khenen kâu ? Ke haingödrin kö Farao, ka habe, Öhmun hnyat tuö mamoe a lathnyabainy, öhmun me lakamöhmun. 4 Ke haingödrin kö Farao, ka habe, Öhmun e o but he ka laba kanyua hnyi hnyeï ; anyin ae ba an je hnahat haleny lathnyabaem ; anyin ae gan hmä hmiä hnyi hnyeï Kanana : ke ö u he walang ang ka hn' öhmun a lathnyabaem ka laba hnyi hnyeï Gosena. 5 Ke Farao ame ha kö Josefa, ka habe, A o thö köu kâmâm me je liamekeiny möu : 6 waleü hnyeï Aigupito hnyi hnyimäkâm ; olabä ju kâmâm me je liamekeiny möu hnyi kânâ ae hoso ; e so ödrin e laba hnyi hnyeï Gosena : ke e ka kânö u ke je hnyat ae meta unyidrin, otill ödrin dö he ka musi hnyi ta je hnahat a halek. 7 Ke Josefa ame hum Jakob a kamen ka hnyi hnyimakö Farao : ke Jakob ame hahnahici Farao. 8 Ke haingö Farao kö Jakob, ka habe, Ve but ta je bonginy hunaiâm ? 9 Ke Jakob ame thu kö Farao, ka habe, Khaca haded me thöte ta je huna oge me he kanyua hnyin ; wakhalet thibi me kong ta je hunainy möt a inya, ke ca tha ücü me je bonginy hunainy möt anyin lakamök hnyi je bonginy hnödrin hna he kanyua hnyin. 10 Ke Jakob ame hahnahici Farao, me he üheny unyi Farao. 11 Ke Josefa, ame olabä kamen me je liamekeiny më, me ha gadrin hnyi hnyeï Aigupito, hnyi kânâ ae hoso, hnyi hnyeï Ramese, helä me hna huna hnö Farao. 12 Ke Josefa ame han kamen, me je liamekeiny më, me lap anyin kamen hia ge areto, hoton anyidrin je lap.

13 Ke ba areto hnyi hnyeï hia ; anyin ae gan hmä but hmiä ; ke mat ut hnyeï Aigupito me hnyeï Kanana nhen hmiä. 14 Ke Josefa ame ükacaköüä ta je mone

hia ünji hnyi hnyeï Aigupito me ünji hnyi hnyeï Kanana, hwaban je hwit adre me üco : ke Josefa ame hom ta je mone ka hnyi uma umö Farao. 15 Ke ba but mone hnyi hnyeï Aigupito me hnyeï Kanana, me ame he but at Aigupito hia kö Josefa me ha, ka habe, Ö u ha öhmun : anyin a ieü öhmun e he ka mok hnyi hnyimäkâm ? anyin ae ba but mone. 16 Ke haingö Josefa, ka habe, Hom but jem halebun ta je meno ; ke oge me he ka ha öbun hwaban halebun ta je meno e ka ba but mone. 17 Ke adre me hom kö Josefa haledrin ta je meno : ke Josefa ame ham ködra areto hwaban ta je hors, me je mamoe, me kau, me je asina : ke e ame ha ödra ge areto hnyi huna eling hwaban haledra je meno. 18 Ke a um dö hunä eling, me adre me o but kâu hnyi huna a loiny, me haingödra kâu, ka habe, Öhmun e ca he ka ikhâlâ gam than a e ba but anyihmun mone ; ke e but unyâm than halehmun ta je meno ; ke ba hmetu ke ünji a anyihmun hnyi hnyimäkâm than, ke so bi je unyihmun me ihmun je hnyeï : 19 ke anyin a ieü öhmun e he ka mok hnyi hnyimäkâm, öhmun me je ihmun ? ücü öhmun dö me je ihmun hwaban areto, ke haba öhmun me je ihmun ame he ka li athnyabai Farao : ke ha hanihmun me öhmun e he ka möt me ca mok, me me ca he ka iny wau kânâ. 20 Me Josefa ame üco ta hnyeï hia hnyi Aigupito hobi kö Farao ; anyin ame ve üco nhen at Aigupito ta je idrin, anyin ae gan hmä hmiä unyidra : me me i Farao but kânâ. 21 Ke e ame hom tavat ka hnyi je taun ünji hnyi ke hnyigöulen Aigupito ke ne o but ka hnyi ke hnyigöulen. 22 Ke e ame ca üco hnyeï iny tavat bi hut : anyin a hnö Farao hna khenä hwajekhon tavat bi hut, k' ödrin e han jekhöu Farao ame ham ködrin ; waleling m' adre me ca üco idrin. 23 Ke Josefa ame ha ka tavat, ka habe, Wä bi, oge hia but ücü öbun me jeibun hnyi bong ang hobi kö Farao : wä bi, walang ang ta je hanibun, he th' öbun ka belökä kânâ. 24 Ke e ka hwenying ut, öbun e he ka ham kö Farao je ke keihen a thabúnginy, ke haba vak ta ke keihen me hobi köbun, hnân haniny hnyeï, me hnân ö 'bun, me anyibun je lap, me an je wanakat unyibun. 25 Ke haingödrin, ka habe, U je hia but omeli öhmun ; ö u betenge gahmun than, k' öhmun e ka bi athnyabai Farao. 26 Ke Josefa ame otillä ünji eling hnân hnanyibu

hnyi hnyei Aigupito ke ne o but hnyi bong ang, ka habe, Hobi kö Farao ta je ke keihen a thabünginy ; ke ca helâe ta hnyei iny tavat bi hut, ca i Farao bi e. 27 Ke Isaraela ame labâ hnyei Goseña, hnyi hnyei Aigupito ; ke hu idrin eling, k' ödrin e hát me si gan hmâ.

28 Ke haba Jakob ame laba hnyi hnyei Aigupito seventin ta huna : ke haba je bongu Jakob, wale hunainy anyin möt hia, me, khaca haded ke fâte seven ta je huna. 29 Ke hakekeny jut ün ame he Isaraela ka mok ; ke e ame haö Josefa e nokon, me hûna kâu, ka habe, U je ne betenge gak, ö u inâ ju hnyamâm hmelen jevak, me ânyâ ünyi ae so me hnathu kõnya ; u na ca he ju ka kõnim nya eang Aigupito : 30 ke iny ka tha mokut me lakamök u ma he ka sam nya úheny ang Aigupito, me kõnim nya hnyi anyidrin hna khön komok. Ke e ame ha, ka habe, Oge me he ka ânyâ helâ me hwâm hofuc. 31 Me haingen, ka habe, Khemanyin dö kõnya : me e ame khemanyin kâu. Ke Isaraela ame nom dut hon hageny hna mokut.

HNHYIMAKAN 48.

HWABAN ta je ünyi e, adre me thumetu Josefa, ka habe, Wâ bi e hu mok anyin kânâm : me e ame hom li lakon Manase me Eferaima. 2 Ke adre me thumetu Jakob, ka habe, Wâ bi, ame he jem Josefa a nokom ; ke Isaraela ame ham hwegien me laba thö hon hna mokut. 3 Ke haingö Jakob kö Josefa, ka habe, A manen dut Khong Aekhanahia kõnya ehac hnyi Luza hnyi hnyei Kanana, me bahnahici nya, 4 me ha kõnya, ka habe, Wâ bi, oge me he ka ohâti u me osi u me wiö u, m' u ma je hnyei ae se, ke oge me he ka ham hnyei eang ka ta je mâtrânâm a hwâbâm me me em nyiele balua. 5 Ke walang ang haba li lakom jia Eferaima me Manase adre hnokoâ gam hnyi hnyei Aigupito, k' iny tiga ca o kôu eang Aigupito, me ödrü li lakuk bi, helâ me Reubena me Simeona. 6 Ke haba je lakom u ma he ka hnokoâ hwabödrü, me ka je lakom bi ; adre me he ka hwenyi iödrin hoton ien je liamekeiny mödrin hnyi je hwajekhöüdrin. 7 Ke haba úhek Padana, me a mokcu Rakela unyik hnyi hnyei Kanana eü hnyi gethen ke hakekeny Eferatha : k' oge me konâm e hnyi deny ka he Eferatha ai, (wale Bethелеema). 8 Ke Isaraela ame wâ

laku Josefa, me ha, ka habe, Li ia e? 9 Ke haingö Josefa ka kamen, ka habe, Ödrü li lakuk hnen Khong hna ham kõnya eang. Ke haingen, ka habe, Hum ödrü thö jem kö nya m' inye he ka hahnahici ödrü. 10 Ke wadröu but li emakö Isaraela, anyin ae hingat ut. Me e ame hum ödrü kâu ; ke e ame úcimhnyimak mödrü, me delüâ. 11 Ke haingö Isaraela kö Josefa, ka habe, Oge me ca ünyküme bi he ka wâ hmetu hnyimâkâm ; ke wâ bi hnen Khong hna omanená kõnya li lakom minya. 12 Ke Josefa ame hum ödrü ünyi hnyi wanben li boucan me nom ju hnyikânâi. 13 Ke Josefa ame hum ödrü lo, jia Eferaima hnyi hnyamen a metân ka hnyi hnyamen a me Isaraela, me Manase hnyi hnyamen a meny ka hnyi hnyamö a metö Isaraela, me lili ödrü kâu. 14 Ke Isaraela ame inâ hnyamen a metân me ip hon bö Eferaima a wakeiat, me hnyamen a meny hon bö Manase, k' ame ip metâ li hnyamen ; anyin a atö Manase. 15 Ke e ame bahnahici Josefa, me ha, ka habe, E so ame he Khong, wale hnen lakamök Aberahama me Isaaka hna he hnyi hnyimakan, a Khong waleji at ame ha ök hwân k' iny tiga wanakat ke ne o but hnyi bong ang, 16 waleji angela at ame omeli nya ünyi hnyi ta je kong hia, e so e ame ohnahica li thöth ; ke so adre ip hudru iök, me ien lakamök Aberahama, me Isaaka ; ke so ödrü me he ka ti si eang hmelen. 17 Ke Josefa ame wâ a kamen ame ip hnyamen a metân hon bö Eferaima, me ame vec hnyekon : me e ame kap göranyai hnyamen kamen he ka hai hon bö Eferaima ka hnyi bö Manase bi. 18 Ke haingö Josefa ka kamen, ka habe, Cica lö, ca helâe, anyin a atö at ang ; ip dö hnyamâm a metân hon ban. 19 Ke hücö kamen, me ha, ka habe, Nökuk lö, e khanö nya, e khanö nya ; ame he minya e ka bi hnyei, k' ame he minya ka gan : ke so bi ame he ka ti gan keiny hon, k' ame he ta je mâtrâniny ka bi hnyei ae se hia. 20 Ke e ame hahnahici ödrü hnyi bong eling me ha, ka habe, Ame he Isaraela ka bahnahicâ gam, me ha, ka habe, E so e he Khong ka wiö u helâ me Eferaima me Manase : ke e ame ip Eferaima me at a bân, ke Manase a biliny. 21 Ke haingö Isaraela kö Josefa, ka habe, Wâ bi, Oge me he but ang ka mok : ke ame he Khong ka tha e möbun, me hum öbun hmetu ka hnyi hnyei lakamöbun. 22 Ke inya oge hia but ham köu ke hwajekhön a khaca hon je liamekeiny möu, waleji

oge me hügûnâ ûnyi hnyi hnyamen at
Amora ge anyik hele vat me anyik fana.

HNYIMAKAN 49.

KE Jakob ame hawâ lakon, me ha, ka
habe : Úkhacakôu th' öbun, k' oge
ame me he ka omanenâ köbun ta je ûnyi
he ka o köbun hnyi ta je bong a biliny.

2 Úkhacakôu thö, me löng, öbun je laku
Jakob :

Ke löng ju kö Isaraela a kamöbun.

3 Reubena lö, u nökek a atö, me manik
man me hwâniny tang hwegiök ;
Beönuainy hmanenang, me beönuainy
man.

4 U me bwebwet helâ me köiö, k' u me
ca he ka beönua ;
Anyin a u je ölö ka hnyi hnamokut
hnen kâmâm ;
Me okongoâ : e ame he ka hnyi hnök
hnamokut.

5 Haba Simeona me Levi, ödrü liame-
keiny ;
Ke haba anyidru li hele vat me huân
úkonguny.

6 Hanuk lö, u ma ca he ka ûne gadru ;
Soik lö, ca bi hanen hnödrü hna úkha-
cakôu ;
Anyin ödre hlingâ at hnyi anyidru
hmönyin,
Me sö can bolok hnyi hnödrü hna bi
gan.

7 E so e mok anyidru hmönyin, anyin ae
hwege e ;
Me anyidru wathethot, anyin ae hwege
oveciny ;
Oge me he ka ve ip ödrü unyi Jakob,
Me ovesei ödrü but unyi Isaraela.

8 Juda lö, ame he je liamekeiny möu ka
oganö u :
Ame he hnyamâm ka e hnyi nyin je
iwahnaihmony möu ;
K' ame he lakon kamâm ka iâu gam.

9 Haba Juda me nokon liona ;
U me he, nökek, úhem hnyi hanem :
K' ame mokut me iâu helâ me liona,
Helâ me liona momo ; ia ame he ka
bwebwelâ e ?

10 Ame ca he ka hia unyi Juda uci musi,
Me at bi hnanyibu úheny hnyi wanben
li can,
Ke ne o but ame o Silo ;
K' ame he ta je hnye ka löng hoton.

11 Adre me he ka hûkâlâ haleny asina
hnyi vine,

Me nokon haleny asina hnyi vine ae so ;
E ame hneü je úkhaüen hnyi waina,
Me anyin imano hnyi dren ta je wan
vine.

12 Ame he ka dra li emakan ge waina,
K' ame he ka hau nyon hnen dân basin,

13 Ame he Zebulona ka laba hnyi wasafü :
K' ame he ka khöp unyin ta je hu ;
K' ame he ka o hnyigöulen hnyi Zi-
dona.

14 Asina ae hwege Isakara,
A mokut hnyi wanben li umen mamoe :

15 K' ame wâ dok ae so hnân menâ hnyin,
Me hnye ae hmanenang ;
K' ame ham bajebenin he ka hije hok
K' ame bi athnyaba hnyi hna khene
huliwa.

16 Ame he Dana ka owisa iny hnye,
Helâ me ke tribu hnyi Isaraela.

17 Ame he Dana ka on eü hnyi gethen,
Me vaipa hnyi hna cit gethen,
At ame oloú ohmâiny can ta je hos,
Me me kölu hoton at ame tabâ.

18 Iehova lö, oge hia but halubahingen
ányâm úhomeli.

19 Ame he ka takú Gada hnen utbavat,
K' ame he bi e ka hwege hwaban.

20 Únyi ga Asera an ae pipikhenya,
K' ame he ka hu gan hnân an than.

21 Nafatali, aila aibre hna :
E ame ha hofuc ae so.

22 Josefa, anginy úö ae wa,
Anginy úö ae wâ hnyi an ;
Ame iâu ta je anginy hon bak veto.

23 Adre ti ovecâ hnen tavat fana
Me fana kâu, me okongoâ :

24 Ke hwege balua anyin cafana,
K' adre ohwegiâ li hnyamen me li be-
nyin,

Únyi ge li hnyamen thani Jakob,
(Úheny e at tuö mamoe, wale veto anyi
Isaraela.)

25 Wale únyi ge Khongon kâmâm, at ame
hadruö u,

Ke únyi ge Ataekhanahia, at ame he ka
ohnahici u,
Hnen ta je soiny drany ethö,
Me soiny dok ae dit eü hnyikânâi,
Me soiny basin, me hnyekon at ame
hnokoâ.

26 Haba je hnabic hna ha hnen kâmâm,
me, gan hmâ

Hon je hna hahnabicâ hnen je lakamök
Ke ne o but ka hnyi hnyigöulen je
bucen nyiele balua :
Ame he ka ta hon bö Josefa,

Wanben ban at waleji adre óusakáfú me je liamekeiny më.
 27 Haba Beniamina, me, luko ame oloú usu kia :
 Hnyi hnyomakatu e ame he ka han haniny,
 K' ame he ka khená hna hûgúná hnyi sahac.

28 Wale je tribu anyi Isaraela hia a twelw ; ke wale hnen hna ha ködrin hnen kamödrin me hahnabici ödrin ; e ame hahnabici ödrin helâ me úcú ködrin. 29 Ke e ame húna ködrin, me ha ködrin, ka habe, Adre me he ka óukhacakóuö nya me lakanoök : e so öbun e könim nya anyin lakamök hnyi op hnyi utkâna anyi Eferona at Heth, 30 hnyi op hnyi utkânâ hnyi Makepela cicö Mamere, hnyi hnyei Kanana, waleji Aberahama ame úco tha e me utkânâ únyi ga Eferona at Heth, me me utkânâ khön komok ; 31 adre me könim Aberahama me Sara a áiân eling, k' adre konâm eling Isaaka me Rebeka, k' oge konim Lea e : 32 wale utkânâ me op eú hnyin adre úcú únyi ge je laku Heth. 33 Ke a um dö Jakob húna ka je lakon, me e ame hwetö li can hnyi hnamokut me hna but hanon, k' adre me ukhacakóuâ e me lakamen.

HNYIMAKAN 50.

ME Josefa ame ta hon hnyimakan kamen me tenge hon, me úcimhnyimak më. 2 Ke Josefa ame húna ka lathnyabainy a je hnyat tren bubun he ka onákâ kamen : k' ame onákâ Isaraela hnen je hnyat tren bubun. 3 K' adre um dö je bong a fâti hobi kâu e ; anyin a wale je bong adre me oumo hnyin hna onákâ : ke sevente ta je bong hnen at Aigupito hna tengiâ e.

4 Ke a um dö ta je bongon hna tengiâ e, me haba Josefa ame ha ka lap anyi Faraó, ka habe, Öbun e ne betenge gak, ha thö ka hnyi hnyikönyö Faraó, ka habe, 5 Cica ame kunö nya he ka khemanyin, ka habe, Wâ bi, oge me he but ang ka mok : ke haba erkemok oge hiny hobi könya bi hnyi hnyei Kanana, u ma he ka könim nya eling. Ke walang ang, ö u hnö nya but ka he me könim cica, m' iny hmetu ju. 6 Ke haingö Faraó, ka habe, He thö ka konâm kâmâm, helâ me hnen hna kunö u he ka khemanyin. 7 Ke Josefa ame he but he ka konâm kamen ; k' ame tha he më lathnyabai Faraó hia, a je hingating hnya-

ban, me wahingat hia hnyi hnyei Aigupito, 8 me lap anyi Josefa hia, me je liamekeiny më, me lap anyin kamen : ke adre hnen biju lakudrin ae úhnyúkong, me ta je mamoe, me haledrin ta je kau, hnyi hnyei Gosená. 9 K' ame tha he me ta je ukariota me tavat adre me tabö hos : ke gan hmâ bunyen. 10 K' ödrin e o but ka hnyi hnahuje hwit anyi Atada, wale hoton Joridano, me ödrin e hnyamok eling me tenge hwege : ke e ame otilâ je bongon hnyamoko kamen a seven. 11 Ke a wâ but tavat aten hnyei, wale at Kanana, a g' adre tenge hnyamok hnyi hnahuje hwit anyi Atada, me ödrin e ha, ka habe, Wale hnyamok ae gan hmâ anyin at Aigupito ; waleling adre me hwenyi ien e Abela-mizeraima, wale hoton Joridano. 12 Ke haba lakon ödrin e ányâ kâu helâ me hnen hna húna ködrin : 13 anyin a je lakon ödrin e hom e ka hnyi hnyei Kanana, me konâm hnyi op hnyi utkânâ hnyi Makepela, waleji a úco Aberahama tha e me utkânâ hnân khön komok hnyin, únyi ga Eferona at Heth, cicö Mamere.

14 Ke Josefa ame hmetu Aigupito ai, e me je liamekeiny më, me ödrin hia adre me tha he më ka hnyi konâm kamen, hwaban hna konâm kamen. 15 Ke a wâ but je liamekeiny me Josefa a ga mokcu kamödrin, me haingödrin, ka habe, Ame ne he ka he Josefa ka luköti' óta, me bi hwaban köta anyitin ta je monu waleji ötin e ányâ kâu. 16 Ke ödrin e úkhúnöng kö Josefa, me ha, ka habe, Hningen kâmâm ke tiga ca mok, ka habe, 17 Öbun e he ka ha helang kö Josefa, ka habe, Oge me sumató u he ka hna degecâ hulö anyin je liamekeiny möu me hwakecidrin ae kong, anyin a ödrin e ányâ kong köu : ke walang ang, ö u hna degecâ hulö anyin lathnyabainy Khongon kâmâm. Ke Josefa ame tenge hnyi úen ödrin e fuc kâu. 18 K' ame he minya je liamekeiny më me ta ju hnyi hnyimakan, me ha, ka habe, Wâ bi öhmun je athnyabaem. 19 Ke haingö Josefa ködrin, ka habe, Ca ot : hawa, hwaban Khong inya? 20 Ke haba öbun eja ke ne öbun e únykúme ehac he ka okongu nya, haba Khong ame únykúme he ka osoâ bi, me me hwâdâ helâ me hnyi bong ang, he ka omelö tavat ae se hia madre me möt. 21 Anyin a wale ca ot : oge me he ka hat öbun, me je lakubun ae úhnyúkong. Ke e ame otubweli ödrin, me fuc menyik ködrin.

ESODO 1, 2.

22 Ke Josefa ame laba hnyi Aigupito, e me lap anyin kamen: ke möt Josefa khaca haded ke libenyita ta je luna. 23 Ke Josefa ame wâ laku Eferaima ke ne o but ka hnyi dö a kuniny: me laku Makir minya nöku Manase adre hnokoâ me ip hnyi li jevö Josefa. 24 Ke haingö Josefa ka je liamekeiny mē, ka habe, Oge me he but ang ka mok: ke e hnathu ame he Khong ka sen' öbun, me hum öbun únyi

hnyi hnyei eang ka hnyi hnyei e ame khemanyinâ kö Aberahama, me Isaaka, me Jekob. 25 Ke Josefa ame kunâ je laku Isaraela he ka khemanyin, ka habe, E hnathu Khong ame he ka sen' öbun, ke öbun e he ka hom minya je jeiök úbeny ang. 26 Ke Josefa ame moku, ke haba hunainy me khaca haded ke libenyita je hunainy: ke ödrin e onâkâ e, me hitangen hnyi tang hnyi Aigupito.

ESODO

TUSI A LOINY ANYI MOSE.

HNyimakan 1.

WALANG ta je ien laku Isaraela, waleji ödrin e o Aigupito ai; ödrin hia me anyidrin je lap ödrin e tha o me Jekob. 2 Jia Reubena, me Simeona, me Levi, me Juda; 3 me Isakara, me Zebulona, me Beniamina; 4 me Dana, me Nafatali, me Gada, me Asera. 5 Haba je hnyat hia a je mâtrâni Jekob, me ödrin sevente: ke Josefa bi hnyi Aigupito. 6 Ke a moku Josefa me je liamekeiny mē hia, me dö hia eling. 7 Ke ame dudu me si but ta je lakon Isaraela, me se hia, k' adre me hwege tot; ke unöngötö hnyei gadra.

8 Ke a o thö ke thaniny Aigupito a teb únyi, at ae ca khana Josefa. 9 Ke haingen ka lakeiny, ka habe, Wâ bi, haba tavat únyi ge laku Isaraela, ödra se hia but me hwege huta: 10 ai öbun, ötin e he ka ányâ metâ ködra; wâ adre nye se but, ke ame ne o thö vat, me adre me he ka utut ka ta je iwahnaihmöny mötin, me tet metâ kôta, me kec únyi hnyi hnyei. 11 Anyin a wale, adre me otilâ hudrin ta je tuhan huliwa, hnân he ka oveci ödra ge anyidrin ta je huliwa ae hmak. Ke adre me otilâ li hnyaba hobi kö Farao, Pithoma me Ramese, hnân ip omjeü hnyin. 12 Ke e gan hna okongu ödra, ke gan minya údudui 'drin me si. Ke hmak je hnyekudrin can lakon Isaraela. 13 Ke haba at Aigupito adre me musö hwegiâ je lakon Isaraela: 14 k' adre me oveci ödra hnyi je bong ge ta je huliwa ae hmak, wale dröu me veto kânâ, me ta je huliwa hia ae ve man hnyi hnyei,

haba anyidrin ta je huliwa hia adre me musi ödra hwegiödra hnyin.

15 Ke haba thaniny Aigupito ame ha ka li at tuö erkin anyin at Heberu, Sifera ien ke at, ke Pua ien ke at: 16 ke haingen, ka habe, Öbu ka he ka tuö erkin anyin at Heberu, me ö 'drin adre me he ka hnokoâ; ke ame ne бага hlingâ but: k' ame ne hlu, me ame he ka möt. 17 Ke outen Khong li at tuö erkin, k' ödru me ca ányâ hna húna ködru hnen thaniny Aigupito, k' ödru me omelö je wainda. 18 Ke haba thaniny Aigupito, ame hawâ li at tuö erkin, me ha ködru, ka habe, Ieü öbe ányâ gan únyi e, me omelö je wainda? 19 Ke haba li at tuö erkin ödru me ha, ka habe, E ca tha úcú omomo Heberu me omomo Aigupito; anyin a ödrin hwege, me ie hnokoâ, ke tiga ca o but ködrin at tuö erkin. 20 Ke Khong ame ohnahicâ li at tuö erkin: k' ame dudu but tavat, me ti se hia hmönyin. 21 Ke haba li at tuö erkin ödru me outen Khong, me e ame otilâ anyidru li lap. 22 Ke Farao ame húna ka lakeiny hia, ka habe, Öbun e he ka khôû ka hnyi wagewe je wainda hia adre hnokoâ, ke omelö ju je waindusem hia.

HNyimakan 2.

EHU ke at hnyi lap anyi Levi ame hom ke hlu a at Levi. 2 K' ame erkin dut momo me hnokoâ da: k' ame wâ momo a e so, me e ame ikhâlâ but hnyi kun ta tehi. 3 Ke ca khana hmetu he ka ikhâlâ e hnen momo, me e ame hom tang

waje hobi kâu e, me botro ge hemara me bilit, me ip wanakat hnyin, me ip ju hnyi samun hnyi baten wagewe. 4 K' ame tot sâkâû haniny, me me wâ ûnyi ame he ka o kâû. 5 Ke ame o but hlu nôku Farao beka sou hnyi wagewe; k' ame vheno baten wagewe anyin wahu; ke ame wâ tang waje hnyi samun, me e ame kunâ ke hlu ka hom. 6 Ke e ame khöng e, me wâ wanakat, ke wâ bi ame tenge wanakat. Ke e ame betenge gan me ha, ka habe, Nokon at Heberu ang. 7 Ke haba haniny ame ha ka hlu nôku Farao, ka habe, Hawa, m' inye he ka hawâ köu ke sangadra ûnyi ge at Heberu he ka hat wanakat hobi köu? 8 Ke haba hlu nôku Farao ame thu kâû, ka habe, He thö. K' ame he but hlu me hawâ hinyen wanakat. 9 Ke haingen nôku Farao kâû, ka habe, Hom dö wanakat eang me hat hobi kõnya k' oge me he ka bi hwaban köu. Ke haba momo ame hom wanakat, me hat e. 10 Ke gan dut wanakat, me e ame hom e ka hlu nôku Farao, ke nokon dut e. Ke e ame hwenyi ien Mose, ke haingen, ka habe, Anyin a oge hom ûnyi hnyi köiö.

11 Ke haba hnyi je bong wale a gan dut hnyin Mose, me e ame he ka je liamekeiny mē, me wâ anyidra huliwa ae hmak: ke e ame wâ ke at Aigupito ame kot at Heberu a liamekeiny mē. 12 Ke e ame ngengele, ke a wâ but ae ba at, me ame kot moko at Aigupito me ikhâlâ hnyi öny. 13 Ke haba hnyi bong a loiny e ame he hnyöu ai, me wâ bi, li at Heberu ödru me û, ke haingen ka at ame ânyâ monu, ka habe, Can ieu u me kot hanâm? 14 Ke ame thu, ka habe, Ia otilö u hnân than me at owisa unyihun? u me ûnykûme he ka hlingö nya belâ me hnâm hna hlingâ at Aigupito? Ke Mose, ame ot, me habe, Ehnathu e manen dut ûnyi eling. 15 Ke e khañö Farao but ûnyi eling, me ame elâm he ka hlingö Mose. Ke Mose ame kec ga Farao, me laba hnyi hnye Midiana: ke e ame laba ju hon ke an. 16 Ke e hu ge at bi hut hnyi Midiana lakon ta hlu a seven: k' ödrin e o but he ka se köiö me ounöngötâ ta je kumete he ka habelen ta je hnahat mamoe haleny kamödrin. 17 K' ame o but hnyat tuö mamoe me ob' ödrin: k' ame todrö Mose me hadruo 'drin me habelen haledrin hnahat mamoe. 18 K' ödrin e o but kö Reuela a kamödrin, me haingen, ka habe, Ieu gabun öban e ie o hnyi bong ang? 19 Haingödrin, ka habe, Hnen ke at Aigupito hna

sing' öhmun ge hnyat tuö mamoe, ke ame se köiö minya bi, me habelen hnahat mamoe. 20 Ke ame ha ka lakon je hlu, ka habe, E but ua? ke ieu gabun öbun e hna but at e? He thö ka hawâ e me hnyi han. 21 Ke so kö Mose he ka tha laba me at e: ke ame ham Zipora a nokon hlu kö Mose. 22 K' ame hnokoa nokon бага, me ame hwenyi ien Geresoma: anyin a haingen, ka habe, Iny atkanyua hnyi ke hnye bi.

23 Ke hwaban ta je bong e ae se hia, a moku than Aigupito; k' ame mâng je lakon Isaraela can hna hwenb' ödra k' adre me hongot tenge, k' ame o but ka Khong anyidra hwatenge can hna hwenb' ödra. 24 Ke Khong ame löng anyidra mâng, k' ame ûnykûme Khong hnen hna ûhihi-nyköu me Aberahama, me Isaaka, me Jakob. 25 Ke Khong ame wâ je lakon Isaraela, me Khong ame wâhmakhmetu ödra.

HNYIMAKAN 3.

KE haba Mose ame tuö hnahat mamoe hale Jethero a ûngon, at bihut e Midiana; k' ame alen hnahat mamoe ka hnyi hoton hnyeububa, me o ka hnyi bucen anyin Khong, wale Horeba. 2 Ke ame manen kâû angela anyi Iehova hnyi bâhlân meic hnyi wanben üö ae üdedö: ke ame wâ, me wâ bi, ame hlâ meic hnyi üö, k' ame ca aû but üö. 3 Ke haingö Mose, ka habe, Oge me he walang ang ka saû, me wâ ûnyi ae gan eang, anyin ame ca aû but geü üö. 4 Ke a wâ but Iehova, a e ame saû ka wâ, me haba Khong ame hawâ e ûnyi hnyi üö ae üdedö, me ha, ka habe, Mose, Mose lö. Ke haingen, ka habe, Inya ang. 5 Ke ame thu, ka habe, Ca hakekeny bi kâang: uny jut taben li hnyeücam ûnyi hnyi li cam, anyin a haba dok e u me tot hnyin, me, wale kânâ ae kap. 6 Ke e ame ha minya ka habe, Inya ang Khongon kâmâm, me Khongu Aberahama, me Khongu Isaaka, me Khongu Jakob. Ke Mose ame tube hnyimakan; anyin a e ot ka wâ Khong. 7 Ke Iehova ame ha, ka habe, Inya oge hia but wâ hna okongoâ lakeik walödra hnyi hnye Aigupito, me löng anyidra tenge ûnyi ge je tuhan anyidra huliwa; anyin ae khañö nya anyidra vec; 8 k' oge me utut ang he ka hügün' ödra ûnyi hnyi hnyamen at Aigupito, me hum ödra ûnyi hnyi hnye eling ka hnyi ke hnye ae so me

au, a hnyei ame di hnyin debai me hane; a hnen at Kanana, me at Heth, me at Amora, me Perizi, me Hivi, me Jebusi. 9 Ke walang ang, wâ bi, ame o but kõnya hwatenge anyin lakon Isaraela: ke haba khaca, oge hia but wâ úokonguny hnen at Aigupito hna oveci ödra. 10 Anyin a wale aiö u, oge me he ka kunö u kö Faraö, m' u ma he ka hom lakeik a lakon Isaraela, únyi hnyi Aigupito. 11 Ke haba Mose ame ha ka Khong, ka habe, Iny ia, m' oge me he ka he kö Faraö me he ka hom lakon Isaraela únyi hnyi Aigupito. 12 Ke ame ha, ka habe, Inya oge me he ka tha e möu; ke walang haten köu hnyi hnök hna kunö u, ka habe, U ka um dö hom tavat únyi hnyi Aigupito, öbun e he ka bi athnyabainy Khong hnyi hon bucen eang. 13 Ke haingö Mose ka Khong, ka habe, Wâ bi, iny ka o ka je lakon Isaraela me ha ködra, ka habe, A kunö nya köbun Khongon lakamöbun; ke adre me he ka ha kõnya, ka habe, Ia ien? oge ma he ka thu ködra ieu? 14 Haba Khong ame ha kö Mose, ka habe, INYA ANG A E, KE KA INYA ANG: ke e ame ka, ka habe, U ma ha helang ka lakon Isaraela, ka habe, INYA ANG at a hia but kunö nya köbun. 15 Ke Khong ame ha minya kö Mose, ka habe, U ma he ka ha helang ka lakon Isaraela, ka habe, A hia but kunö nya köbun Iehova, Khongon, lakamöbun, a Khongu Aberahama, me Khongu Isaaka, me Khongu Jakob; wale iök nyiele balua, ke wale hnân únykümi nya hnyi ta je dö hia. 16 He thö u he ka úkhacaköuâ wahingatiny Isaraela, me ha ködra, ka habe, A manen dut kõnya Iehova, Khongon lakamöbun, Khongu Aberahama, me Khongu Isaaka, me Khongu Jakob, me ame ha, ka habe, Inya oge hia but sen' öbun, me wâ ta je únyi adre ányâ köbun e Aigupito: 17 k' oge hia but ha a oge me he ka hum öbun únyi hnyi ta je vec hnyi Aigupito ka hnyi hnyei iny at Kanana, me Heth, me Amora, me Perizi, me Hivi, me Jebusi, wale hnyei ame di hnyin debai me hani. 18 Ke adre me he ka löng hwâm: ke u ma he ka tha he me wahingatiny Isaraela ka than Aigupito, k' öbun e he ka ha kâu, ka habe, A hia but iouny möhmun Iehova Khongon at Heberu: ke walang ang, ö u hn' öhmun dut he ka he ka hnyi hnyebuba hnyi kun ta bong, he ka bi hut kö Iehova a Khonguhmun. 19 Ke manen kõnya a g' ame ca he than Aigupito ka hn' öbun, ke so bi hnen hnyamen ae hwege.

20 Ke oge me he ka hai hnyamök me kot Aigupito ge ta je únyi hnân láia, wale oge me he ka ányâ eling: ke hwabau dö e, e ame he ka hn' öbun. 21 K' oge me he ka okúâ ibetengiö ka tavat eang únyi ge at Aigupito: k' öbun ka he but, me öbun e ca he ka he me ba ta je omjeü: 22 k' ame he omomo hia ka ve sumâ:á unyin at ame laba hakekenyi ödra, me unyin tavat adre me tha laba hnyi umödra ta je uma, je hmanenanginy sileva, me je hmanenanginy gol, me je úkhaü: k' öbun e he ka otheibâ lakubun obaga me wahu; m' öbun e he ka öba omjeúiny hnyei Aigupito.

HNYIMAKAN 4.

KE haba Mose ame thu me habe, Wâ bi adre me ca he ka köp nya, me löng ifucik: anyin adre me he ka ha, ka habe, A ca manen köu Iehova. 2 Ke haba Iehova ame ha kâu, ka habe Ieu e hnyi hnyamâm? Ke ame ha, ka habe, Uci. 3 Me haingen, ka habe, Khúâ but hnyikânâi. K' ame khúâ but hnyikânâi, me ame on dut; ke Mose ame kec gun. 4 Ke Iehova ame ha kö Mose, ka habe, Inâ but hnyamâm ka hom obiny: (ke ame inâ but hnyamen me hom, k' ame uci hmetu but hnyi hnyamen:) 5 m' adre me he ka kap a ga manen köu Iehova, Khongon lakamödra, Khongu Aberahama, me Khongu Isaaka, me Khongu Jakob. 6 Ke Iehova ame ha minya kâu, ka habe, Inâ but hnyamâm ka hnyi úläiâm. Ke ame inâ hnyamen ka hnyi úlainy: me oc hmetu but, ke wâ bi, a lepera but hnyamen, ke hau helâ me kiona. 7 Ke ame ha, ka habe, Ina hmetu ju hnyamâm ka hnyi úläiâm. (K' ame inâ hmetu but hnyamen ka hnyi úlainy; ke ame oc hmetu but e únyi hnyi úlainy, me wâ bi, e sohmetu but helâ me unyin.) 8 Ke adre me ne ca köp u, me löng hoton haten a bân, adre me he ka löng hoton haten a bilany bi. 9 Ke adre me ne ca kap li haten eling, me ca löng minya ifucâm, me u ma he ka sâü únyi hnyi köien wagewe, ke hingâlâ ka hnyi hon kânâ ae mada: me haba köiö u ma he ka sâü únyi hnyi wagewe, me ame he ka dra hnyi dok ae mada. 10 Ke haba Mose ame ha kö Iehova, ka habe, Than lö, iny ca at khet, waleji ehac, me walang ang hwaban hnâm hna fuc kõnya a athnyaba me: anyin a teta ifucik, ke teta bohök. 11 Ke haba Iehova ame ha kâu, ka habe, Ia op hnyimen at? ke ia op hum, me wijiji, me bwela, me

wadrôu f hawa ca inya bi Iehova? 12 Ke walang ang he thö, me oge me he ka tha inya me hnyimâm, me nö u hofuc he ka ha. 13 Ke ame ha, ka habe, Than lö, bethe kunâ at u je wem he ka kunâ. 14 Ke ame ubâhlâ hmönyin anyi Iehova kö Mose, me haingen, ka habe, Hawa e ca tuhâm Arona, at Levi! E khañö nya e at ae khana he ka fuc so, Ke wâ minya bi, e ame he jem he ka ûkhanö möu : ke ka õ u, me ame he ka senyin hnyekon. 15 Ke u ma he ka ha hofuc kâu, me bi hofuc ka hnyi hnyimen : ke oge me he ka tha inya me hnyimâm me hnyimen, me ku köbu ûnyi õbu me he ka anyâ. 16 Ke ame he ka hwabâm he ka fuc ka tavat : ke ame he ka bi hnyimâm, me u me he ka helâ me Khong kâu. 17 Ke u ma he ka hom uci ang hnyi hnyamâm, me u me he ka anyâ ta je haten hnen e.

18 Ke haba Mose ame he hmetu kö Jethero a ûngon, me ha kâu, ka habe, Õ u hnö nya but he ka he hmetu Aigupito ai ka je liamekeiny mönya he ka wâ, hawa ödrin e ne. möt. Ke haingö Jethero kö Mose, ka habe, He thö me hnahic. 19 Ke haba Iehova ame ha kö Mose e Midiana, ka habe, He hmetu thö Aigupito ai : anyin a mokeu hnyat hia waleji ödrin e elâm he ka hlingö u. 20 Me haba Mose ame hom âân, me lakon, me ip ödrin hon asina, me he hmetu ka hnyi hnyei Aigupito : haba Mose ame hom uci anyin Khong hnyi hnyamen. 21 Ke Iehova ame ha kö Mose, ka habe, U ka he hmetu Aigupito ai, ûnyktûme ju he ka anyâ ta je ûnyi hnân lâiâ hia hnyi hnyimakö Farao, waleji oge ip hnyi hnyamâm : ke oge me he ka okhötâ hnyekon, me ame ca he ka hna tavat. 22 Ke u me he ka ha kö Farao, ka habe, Haba Isaraela nökek a atö : 23 ke oge hia but ha köu, ka habe, Hna but nökek me me he ka bi athnyaba könya ; ke u je hia but behânâ : wâ bi, oge me he bi nya ka hlingâ nokom a atö. 24 Ke Iehova ame iouny me eü hnyi gethen hnyi omtabaga, me elâm he ka hlingâ. 25 Ke haba Zipora ame hom veto a oüt me subâ degecâ unen unyin nokon, me khûâ ka hnyi li can ; haingen momo, ka habe, U бага at ame bi dra könya. 26 Waleling me me hna but e. Ke haingen momo, ka habe, U бага at ame bi dra, ûnyi hnyi hnaperitomon.

27 Ke Iehova ame ha kö Arona, ka habe, He thö u he ka ûkhanö me Mose hnyi hnyebuba. Ke ame he me ûkhanö

mê hnyi bucen anyin Khong, me ûcimhnyi-mak më. 28 Ke Mose ame thumetu Arona ge ta je hofuc hia ho Iehova waleji a kunâ, me ta je haten e ame hûna kâu. 29 K' ame he Mose me Arona me ûkchacaköüâ wahingatiny lakon Isaraela hia : 30 me Arona ame ha je hofuc hia waleji a ha Iehova kö Mose, ke ame anyâ ta je haten hnyi hnyimakan tavat. 31 Me ame kap e hnen tavat : ke ödrin e löng a ga um but Iehova senâ lakon Isaraela, me wâ hna okongu ödra, me ödrin e nom ju me khudrung.

HNYIMAKAN 5.

KE hwaban dö e haba Mose me Arona ödrin me he me ha kö Farao, ka habe, Walang hna ha hnö Iehova Khongu Isaraela, ka habe, Hna but lakeik m' adre me he ka bi jeü könya hnyi hnyebuba. 2 Ke Farao ame ha, ka habe, Ia Iehova m' inye he ka löng ifucin he ka hna but at Isaraela? E ca khañö nya Iehova, ke oge me ca he bi nya ka hna but at Isaraela, 3 Ke haingödrin, ka habe, A hia but iouny möhmun Khongon at Heberu : õ u hn' öhmun dut he ka he hnyi kun ta bong ka hnyi hnyebuba he ka bi hut kö Iehova Khonguhmun ; wâ e nye he ka kuc' öhmun ge mok ae cap, ame ne hele vat. 4 Ke haingen than Aigupito ködrin, ka habe, Ieü gabu Mose me Arona õbu me uny jut je hok ge tavat hnyi je haunyödra? He bi thö ka huliwa. 5 Ke haingö Farao, ka habe, Wâ bi e se hia tavat aten hnyei walang ang, k' õbu me omen 'ödra ge anyidra huliwa. 6 Ke haba hnyi bong eling Farao ame hûna ka je tuhan tavat huliwa me je homakan gadra, ka habe, 7 Ca he hmetu bi õbun ka ham thatûnyin hwit ka tavat hnân anyâ veto kânâ helâ me ehac : hamödra ka hlo thatûnyin hwit hobi ködra bi. 8 Ke haba üseiny je veto kânâ waleji adre anyâ ehac, õbun e he bala ka elâm gadra ; õbun e ca he ka õühnyûkongoâ : anyin a ödra wenhöcö ; anyin a wale adre me hongot, ka habe, Hn' öhmun dut he ka hudo ka Khonguhmun. 9 He thö ka ogânâ huliwa anyin tavat, m' adre me he ka huliwan ; m' adre me ca he ka löng je hofuc thoi. 10 Me ame he but ta je tuhan tavat huliwa me je homakan gadra, me ha ka tavat, ka habe, Walang hna ha hnö Farao, ka habe, Oge me ca he hmetu ka ham thatûnyin hwit köbun. 11 He

thö öbun ka hlo je thatúnyin hwit hnyi je dok öbun e me wá hnyin : ke adre me ca he ka öühnyúkongoá ke keihen auyibun huliwa. 12 Waleling me me vese but tavat hnyi hnyei Aigupito he ka hlo tiren hwaban thatúnyin hwit. 13 Ke haba je tuhan huliwa adre me ojati ödra, ka habe, Oumo thö je ve húdröbun hnyi ke bong me ke bong, helá me ehac ke tiga hu thatúnyin hwit. 14 Ke adre kot je homakan huliwa a je lakon Isaraela, wale hnen je tuhan huliwa anyi Farao hna otílá hudra, me hnei ödra, ka habe, Ieú gabun öbun e ca oumo ta je veto káná a húdröbun et, me enyi, helá me ehac? 15 Waleling me me he but ta je homakan huliwa a je lakon Isaraela me khöü kö Farao, ka habe, Ieú, gam u me ányá heláe köhmun a je lathnyabaem? 16 E ba thatúnyin hwit adre ham köhmun a je lathnyabaem, k' ödrin e ha köhmun, ka habe, Ányá thö ta je veto káná: ke wá bi, adre me kot je lathnyabaem; ke haba monu bi me únyi ge je lakem. 17 Ke ame ha, ka habe, Öbun je uthöcö, öbun je uthöcö: anyin a wale öbun e ha, ka habe, Hn' öhmun dut he ka hudo kö Iehova. 18 Ke walang ang he th' öbun ka huliwa; anyin adre me ca he hmetu ka ham thatúnyin hwit köbun, ke so bi öbun e he ka ham je veto káná helá me tulut. 19 Ke a wá but je homakan huliwa a je lakon Isaraela a ödrin e kong ut únyi hnyi hna ha, ka habe, Öbun e ca he ka owakhalétá je veto káná, waleji húdröbun hnyi je bong. 20 Ke ödrin e he but úheny unyi Farao, me ödrin e úkhanö me Mose me Arona ödru me tot eú hnyi gethen: 21 ke haingödrin ködru, ka habe, Hamö Iehova he ka ö 'bu me owisa, anyin a öbe obokongi öhmum kö Farao, me lathnyabainy, he ka ham hele vat ka hnyi hnyamödrin he ka hling' öhmun. 22 Ke haba Mose ame he hmetu kö Iehova, me ha, ka habe, Than lö, ieú gam u me ovecá tavat eang? ke ieú gam u je kunö nya? 23 Anyin a hwán hnyi úhek unyi Farao he ka fuc hnyi iâm, e ame okongoá tavat eang; ke u me ca omelö balua lakem.

HNHYIMAKAN 6.

KE Iehova ame ha kö Mose, ka habe, U ma he walang ang ka wá únyi oge me he ka ányá kö Farao: anyin a e ame he ka hn' ödra ge hnyam ae hwege, k'

ame he ka ob' ödra únyi hnyi iny hnyei ge hnyam ae hwege.

2 Ke Khong ame fuc kö Mose, me ha káu, ka habe, Inya IEHOVA: 3 ke oge manen dut kö Aberahama, me Isaaka, me Jakob, a inya Khong Aekbanabia, ke ca khan' ödrin bi ehac a haba iök me IEHOVA. 4 Ke oge hia but ohmä anyik úhihinýköu mödrin, he ka ham ködrin hnyei Kanana, waleji hnyei ödrin e labö he kanyua hnyin hnyi hnödrin hna he kanyua. 5 Ke haba khaca oge hia but löng mâng anyin lakon Isaraela, wale hnen at Aigupito hna hom hwenbödra; me inya oge me únyküme anyik úhihinýköu. 6 Anyin a wale, ha thö ka je lakon Isaraela, ka habe, Inya Iehova, me oge me he ka hum öbun únyi hnyi ta je huliwa ae hmak anyin at Aigupito, k' oge me he ka hügün 'öbun únyi hnyi hnödra hna hwenböbun, k' oge me he ka omeli öbun ge hnyam adre hai, me hna owisa ae gan hmá; 7 k' oge me he ka hum öbun me me lakeik, k' oge me he ka Khongubun: k' ame he ka khan' öbun a inya Iehova Khongubun, at ame hum öbun únyi hnyi hmelen ta je hok anyin at Aigupito. 8 Ke oge me he ka hum öbun ka hnyi hnyei waleji oge ogörányá hnyamök he ka ham kö Aberahama, me Isaaka, me Jakob; k' oge ma he ka ham köbun me hwajekhöubun: haba inya Iehova. 9 Ke Mose ame ha heláe ka je lakon Isaraela: k' adre me ca ling Mose can hnyekudra ae vec, me hwenbödra ae hmak.

10 Ke haba Iehova ame ha kö Mose, ka habe, 11 He thö me ha kö Farao than Aigupito he ka hna but je lakon Isaraela únyi hnyi iny hnyei. 12 Ke Mose ame hu hnyi hnyimakö Iehova, ka habe, Me wá, ame ca ling nya ge je lakon Isaraela; k' ama kámáu, Farao ka ling nya, at adre ca peritomoná esongodiny? 13 Ke haba Iehova ame fuc kö Mose me Arona me húna ködru ge je lakon Isaraela me ga Farao than Aigupito, m' ödru me he ka hom je lakon Isaraela únyi hnyi hnyei Aigupito.

14 Ke walang je tuhan je lap anyin je lakamödra: haba laku Reubena nöku Isaraela a bán; jia Enoka, me Falu, me Hezerona, me Karemi: wale je lap únyi ga Reubena. 15 Ke haba je laku Simeona: jia Jemuela, me Jamina, me Ohada, me Jakina, me Zohara, me Saulo nokon momo Kanana: wale je lap únyi ga Simeona. 16 Ke walang ien je laku Levi hoton anyidrin je dö; jia Geresoma, me Kohatha,

me Merari : ke haba je hunainy möt anyi Levi, me, wan haded ke thöte seven ta je huna. 17 Ke lo li laku Gerisoma ; jia Libeni me Simej, hoton anyidru li lap. 18 Ke je laku Kohatha ; jia Amerama, me Izara, me Heberona, me Uziela : ke haba ta je hunainy möt anyi Kohatha, me wan haded ke thöte theri ta je huna. 19 Ke lo li laku Merari ; jia Maheli, me Musi. Waleling je lap anyin je at Levi hoton anyidrin je lap. 20 Ke haba Amerama ame hum Jokebeda haniny kamen, me äiän, me ame hnöku Arona me Mose : ke haba je hunainy möt anyi Amerama, me wan haded ke thöte seven ta je huna. 21 Ke haba je laku Izara ; jia Kora, me Nefega, me Zikeri. 22 Ke haba je laku Uziela ; jia Misaela, me Elizafana, me Shilheri. 23 Ke Arona ame hum Eliseba nöku Aminadaba, hani Nasona, me äiän ; ke ame hnöku Nadaba, me Abiu, me Eleazara, me Ithamaza. 24 Ke haba je laku Kora ; jia Asiro, me Elekana, me Abiasafa ; wale je lap anyin at Kora. 25 Ke haba Eleazara nöku Arona ame hom ke hlu ünyi ge je laku Putiela, me äiän ; ke ame hnöku Fineasa a nokon. Wale je tuhan lakamen at Levi hoton anyidrin je lap. 26 Ke haba Arona me Mose, me, wale li at ame ha ködru Iehova, ka habe, Hom but je lakon Isaraela ünyi hnyi hnyeji Aigupito hoton anyidra je dö. 27 Ke wale li at ödru me ha kö Farao than Aigupito he ka hom lakon Isaraela ünyi hnyi hnyeji Aigupito : a Mose me Arona eling.

28 Ke haba hnyi bong Iehova ame fuc kö Mose hnyi hnyeji Aigupito, 29 me baingö Iehova kö Mose, ka habe, Inya Iehova : bethe ha kö Farao than Aigupito je hofuc hia thithö oge me ha köu. 30 Ke haba Mose ame ha hnyi hnyimakö Iehova, ka habe, Wä bi, adre ca peritomonä li esongodik, k' ama hawa Farao ka ling nya ?

HNYIMAKAN 7.

KE Iehova ame ha kö Mose, ka habe, Wä bi, oge hia but otölö u hnän khong kö Farao : k' ame he tuhäm jia Arona ka perofeta unyäm. 2 U ma he ka ha hia hnök hna huna köu : k' ame he Arona a tuham ka fuc kö Farao, me me be ka hna lakon Isaraela ünyi hnyi iny hnyeji. 3 Ke oge me he ka onäkä hnyeku Farao, me osehia anyik ta je haten me ta je ünyi hnän läiä, hnyi hnyeji Aigupito. 4

Ke so bi ame ca he Farao ka ling öbu, me, oge me he ka ip hnyamök hon Aigupito, me hom anyik köiö, wale lakeik a lakon Isaraela ünyi hnyi hnyeji Aigupito ge ta je hwaban ae gan hmä. 5 Ke ame he at Aigupito ka wä a Inya Iehova iny ka he ka hai hnyamök hon Aigupito, me hom lakon Isaraela ühedra. 6 Ke haba Mose me Arona ödru me änyä helä me Iehova ame ha ködru, ödru me änyä heläe. 7 Ke eite je hunai Mose, ke eite theri je hunai Arona hnyi ün ödru me fuc kö Farao.

8 Ke haba Iehova ame ha kö Mose me Arona, ka habe, 9 E ka ha köbu Farao, ka habe, Änyä thö anyibu haten : me u me he ka ha kö Arona, ka habe, Hom dö änyäm uci, me khüä hnyikänäi hnyi hnyimakö Farao, me me on dut. 10 K' ame didrö Mose me Arona kö Farao, me änyä helä me hna huna hnö Iehova ködru : ke Arona ame khüä but hnyikänäi anyin uci hnyi hnyimakö Farao me je lathnyabainy, k' ame on dut. 11 Me haba Farao ame havä tavat metä me tavat tren khong : me haba ödrin minya a je magoi hnyi Aigupito ödrin e änyä heläe ge anyidrin je bibihwakecin. 12 Ke ödrin hia ödrin e ve khüä hnyikänäi anyidrin je uci, me me je on dut ; ke haba uci anyi Arona ame olom but anyidrin je uci. 13 Ke ame näk ut hnyeku Farao, k'ame ca ling ödru, helä me hna ha hnö Iehova.

14 Haba Iehova ame ha kö Mose, ka habe, A khöt ut hnyeku Farao, k' ame höcö he ka hna tavat. 15 U ma he kö Farao hnyi hnyomakatu ; wä bi e ame he ka hnyi wagewe ; ke u me ha ka halubahingen hnyi baten wagewe ; ke hom dö hnyi hnyamäm änyäm uci waleji adre wia me on. 16 Ke u ma he ka ha köu, ka habe, A kunö nya Iehova, Khongon at Heberu, köu, he ka ha ka habe, Hna but lakeik m' adre me he ka biathnyabaik hnyi hnyebuba : ke wä bi u je ca löng könya hnyi je bong eji. 17 Walang hna ha hnö Iehova, ka habe, U ma he ka wähmakhmetöä a inya Iehova hnyi ünyi eang : wä bi, oge me he ka kot köiöiny wagewe ge uci hnyi hnyamök me me dra but. 18 Me ame he ka mokcu ta je wä hnyi wagewe, k' ame he ka bon wagewe : k' ame he at Aigupito ka ikiki ka ijem wagewe. 19 Ke Iehova ame ha kö Mose, ka habe, Ha thö kö Arona, ka habe, Hom dö änyäm uci, me hai hnyamäm hon ta je köiö hnyi Aigupito,

hon anyidra ta je di, me anyidra je wagewe, me belidra je an, me anyidra je koiö hia, me me dra but ; k' ame he ka hu dra hnyi hnyei Aigupito hia, hnyi ta je kaia utö me veto. 20 Ke haba Mose me Arona ödru me ányá eling, helâ me hna hûna hnö Iehova ; ke ame hai thö uci me kot koiö hnyi wagewe hnyi hnyimakö Farao me lathnyabainy, k' ame dra but dân wagewe hia. 21 Ke a moku ta je wâ hnyi wagewe ; k' ame bon dut wagewe, ka ca khana hmetu at Aigupito he ka ijem koiöiny wagewe ; k' ame hu dra hnyi hnyei Aigupito hia thithö. 22 Haba ta je magoi hnyi Aigupito ödrin e ányá helâe ge anyidrin ta je bibihwakecin : ke ame nák hnyeku Farao, me ca ling ödru, helâ me hna ha hnö Iehova. 23 Ke Farao ame hwiö me didrö ka hnyi umen uma, ka ame ca oúnyihnaothö únyi e eú hnyi hnyekon. 24 Ke haba at Aigupito adre me khú an hnyi baten wagewe hnân ic ; anyin ae ca khan' ödra ijem koiöiny wagewe. 25 K' ame hwadá but ta je bong a seven hwaban hna kot wagewe ga Iehova.

HNyimakan 8.

KE Iehova ame ha kö Mose, ka habe, Didrö kö Farao, me ha kâu, ka habe, Walang hna ha hnö Iehova, ka habe, Hna but lakeik m' adre me he ka bi athnyabaik. 2 Ke u je ne höcö hn' ödra, wâ bi, oge me he ka okongoá je ke keihen em hnyei ge ta je rana : 3 k' ame he ka únöngöt wagewe ge ta je rana, k' adre me he ka ölä me iyâú ka hnyi umâm uma, me hnyeule u je mokut hnyin, me hon hnâm, me hnyi je uma umen lathnyabaem, me je lakem, me je wahnainyâm ; me hnyi je kumete hnân up âm falawa : 4 k' ame he ta je rama ka tabü u me ta je lakem, me je lathnyabaem hia. 5 Ke Iehova ame ha kö Mose, ka habe, Ha thö kö Arona, ka habe, Hai thö hnyamâm me ányâm uci hon ta je wagewe me je di, me je an, me oâ ta je rana ka hnyi hnyei Aigupito. 6 Ke Arona ame hai thö hnyamen hon ta je koiö hnyi Aigupito, me ame o thö ta je rana, me khavâ hnyei Aigupito. 7 Ke ame ányá helâe ta je magoi ge anyidrin je bibihwakecin, me oâ ta je rana hon hnyei Aigupito. 8 Me haba Farao ame hao Mose me Arona, me habe, Khöú th' öbu kö Iehova, me me ohia ta je rana unyik, me unyin lakeik ; me oge me he ka hna but

tavat, m' adre me he ka hudo kö Iehova. 9 Ke haingö Mose kö Farao, ka habe, Hamâm he ka musi konyä : kehö oge me he ka khöú hobi köu, me lathnyabaem, me lakem, me me he ka hia but ta je rana unyâm, me hnyi umâm je uma, m' adre me laba thibi hnyi wagewe? 10 Ke haingen, ka habe, Bong nyi. Ke ame thu, ka habe, Ame he ka helâ me hnâm hna ha : me me he ka khanö u ae ba ke at ae úcü me Iehova Khonguhmun. 11 K' ame he ka hia ta je rana unyâm, me hnyi umâm uma, me unyin lathnyabaem, me je lakem, m' adre me he ka laba thibi hnyi wagewe. 12 Ke haba Mose me Arona ödru me he úheny unyi Farao : ke Mose ame tengiâ kö Iehova ge ta je rana waleji e ame oâ kö Farao. 13 Ke haba Iehova ame löng hoton hofuc ho Mose ; k' ame moku ta je rana, hnyi ta je uma, me ta je hnyaba, me je hna belök. 14 Ke adre me ve úkhöúnâ : ke bon dut hnyei. 15 Ke a wâ but Farao a ga menâ thö, me ame onâkâ hmetu but hnyekon, k' ame ca löng ködru ; helâji me hofuc ho Iehova.

16 Ke Iehova ame ha kö Mose, ka habe, Ha thö kö Arona, ka habe, Inâ but ányâm uci, me kot sesâiny kânâ, me ame he ka hu je uto hnyi hnyei Aigupito hia. 17 Ke ödru me ányá helâe ; ke Arona ame hai hnyamen me anyin uci, me kot sesâiny kânâ, me me hu uto hon at, me meno ; ke uto hia but kânâ hnyi hnyei Aigupito hia. 18 Ke haba ta je magoi adre me ányá helâe ge anyidrin je bibihwakecin m' ödrin e he ka oâ ta je uto : ke ca khan' ödrin : ke e but uto hon at me meno. 19 Me haingen ta je magoi kö Farao, ka habe, Wale but e banyen Khong : ke ame nák hnyeku Farao, k' ame ca löng ködru ; helâji me hna ha hnö Iehova.

20 Ke Iehova ame ha kö Mose, ka habe, U ma vesâkong me tot hnyi hnyimakö Farao ; wâ bi, e ame he ka hnyi koiö ; ke u ma he ka ha kâu, ka habe, Walang hna ha hnö Iehova, ka habe, Hna but lakeik he ka bi athnyabaik. 21 Ke u je ne ca he ka hna lakeik, wâ bi, oge me he ka kunâ ta je nöng köu ae se hia hmönyin, me lathnyabaem, me lakem, me eiö hnyin umâm ta je uma : k' ame he ka unöngöt ta je uma umen at Aigupito hnen ta je nöng, me kânâ minya adre me laba hon. 22 Ke haba hnyi bong eling oge me he ka ovebongonâ hnyei Gosena, wale ame labâ lakeik, k' ame ca he ka o kâ e ta je nöng ;

me me khandö u a inya Iehova eang hmelen. 23 Ke oge me he ka sihnyigöulen dut lakeik me lakem : ke haba nyi ame he ka hu haten ang. 24 Ke Iehova ame anyä ; me ame o but ta je nong ae se hia ka hnyi je uma umö Farao, me je uma umen lathnyabainy : ke haba hnyi hnyei Aigupito hia ame kong ut hnyei ge nong. 25 Ke haba Farao ame hao Mose me Arona, me ha, ka habe, He th' öbun ka bi hut ka Khongubun hnyi hnyei. 26 Ke haingö Mose, ka habe, E ca ücü he ka anyä heläe ; anyin a öhmun e he ka hudo kö Iehova Khonguhmun ünyi ae ikiki ka at Aigupito : hawa, öhmun e he ka hudo ünyi ae ikiki ka at Aigupito hnyi hnyimaködra, k' adre me ca he ka lü öhmun ge veto? 27 Öhmun e he ka he hnyi kun ta bong ka hnyi hnyebuba he ka bi hut kö Iehova Khonguhmun, hoton hnen hna hûna köhmun. 28 Ke haingö Farao, ka habe, Oge me he ka hn' öbun, m' öbun e he ka bi hut kö Iehova Khongubun hnyi hnyebuba ; ke so bi ca he öbun säkâü ai : khöu thö hobi könya. 29 Ke haingö Mose, ka habe, Wâ bi, oge me he but ang ühek unyâm, k' oge me he ka khöü kö Iehova me me hia but nyi ta je nong unyi Farao, me lathnyabainy, me lakeiny : ke so bi, ca he hmetu Farao ka iyawâ, wale he ka ca hna but tavat he ka bi hut kö Iehova. 30 Ke Mose ame he but ga Farao, me khöü kö Iehova. 31 Haba Iehova ame anyä helä me hofuc ho Mose, me ame ohia ta je nong ga Farao, me lathnyabainy, me lakeiny ; ke ba but kolon me khaca. 32 Ke Farao ame onâkâ hmetu but hnyekon hnyi üen minya e, k' ame ca hna bala tavat.

HNYIMAKAN 9.

ME haba Iehova ame ha kö Mose, ka habe, He thö kö Farao, me ha kâu, ka habe, Walang hna ha hnö Iehova Khongon at Heberu, ka habe, Hna but lakeik m' adre me he ka bi athnyabaik. 2 Anyin a u je ne hücö hn' ödra, me behan' ödra bala bi, 3 wâ bi, ame he hnyamö Iehova ka ta hon halem ta je meno hnyi je utkânâ, hon ta je hos, me asina, me kamela, me kau, me mamoe ; ame he ka gan hmâ mok. 4 K' ame he Iehova ka sihnyigöulen dut ta je meno haleny at Isaraela me ta je meno haleny at Aigupito : ke ba meno a khaca haleny at Isaraela ame he ka mok.

5 Ke haba Iehova ame thu üen, me ha, ka habe, Nyi ame he Iehova ka anyä ünyi e hnyi hnyei. 6 Ke haba nyi, Iehova ame anyä ünyi eling, k' ame mokcu ta je meno hia haleny at Aigupito : k' ame ca mokcu ke meno a khaca haleny lakon Isaraela. 7 Ke Farao ame ükhünöng, ke wâ bi, a ca mokcu ke meno haleny at Isaraela, e ba me khaca. K' ame khöt hnyeku Farao, k' ame ca hna but tavat.

8 Ke haba Iehova ame ha kö Mose me Arona, ka habe, E so öbu me he ka hom dröu ünyi hnyi wahnainyâ, ke hamö Mose he ka iâ göranyai hnyi hnyimakö Farao. 9 K' ame he ka sä hnyi hnyei Aigupito hia, k' ame he ka ohuc bi me hmouca me han, wale unyin at me meno hnyi hnyei Aigupito hia. 10 K' ödrü me hom dröu hnyi wahnainyâ me tot më hnyi hnyimakö Farao : ke Mose ame iâ göranyai ; me ame wia me ohuc ae hmouca me han unyin at me meno. 11 Ke ca khana ta je magoi he ka tot hnyi hnyimakö Mose, can je ohuc ; anyin a e bi hon ta je magoi me at Aigupito hia ta je ohuc. 12 Ke haba Iehova ame onâkâ hnyeku Farao, k' ame ca ling ödrü, helaji me hna ha hnö Iehova kö Mose.

13 Ke Iehova ame ha kö Mose, ka habe, Vesâkong ut, me tot knyi hnyimakö Farao, me ha kâu, ka habe, Walang hna ha hnö Iehova Khongon at Heberu, ka habe, Hna but lakeik m' adre me he ka bi athnyaba könya. 14 Anyin a haba hnyi üen ang oge me he ka kunâ anyik ta je kong hia ka hnyi hnyekom, me hon lathnyabaem, me lakem : me me khandö u ae ba at ae ücü mönya eang hmelen hia. 15 Anyin a oge ne hia but inâ hnyamök, me kuc u me lakem ge mok ae cap, me adre hia but ohio u ünyi bnyi hmeledrany : 16 ke so bi e hnathu oge hia but otölö u, hnân he ka omanenâ köu manik man, me me lung iök hnyi hmeledrany hia. 17 Hawa, u me tiga he bala ka ogöranyi u hon lakeik m' u me ca he ka hn' ödra but? 18 Wâ bi, haba nyi, helä me üen eang, oge me he ka öta we ae wahma me gan, e ba heläe hnyi Aigupito ehac hnyi can ke ne o but hnyi bong ang. 19 Ke walang ang ükhünöng dö he ka hom halem ta je meno, me anyâm ta je ünyi hia hnyi hnyei ; anyin a haba tavat hia me je meno hia adre me he ka wâ hnyi hnyei, k' adre ca hom ka hnyi uma, me ame he ka ta we ae wahma hudrin, m' adre me he ka mokcu. 20 Haba je hnyat unyin je lathnyabai Farao, a tavat

outen hna ha hnö Iehova, ödrin e kácá lathnyabaidrin me haledrin je meno ka hnyi je uma : 21 ke haba at ame ca oúnyi-hnathó hna ha hnö Iehova, e ame hna but lathnyabainy, me haleny je meno hnyi hnyi.

22 Haba Iehova ame ha kö Mose, ka habe, Hai thö hnyamám göranyai, me me ta but we ae wahma hnyi hnyi Aigupito hia, ka hnyi hon at, me omeno, me je úöiny hnyei hia, hnyi hnyi Aigupito hia. 23 Ke haba Mose ame iná thö göranyai anyin uci: ke haba Iehova ame kuná hendring, me we ae wahma, k' ame hingálá but meic hon káná; ke Iehova ame óta we ae wahma hon hnyi Aigupito. 24 Waleling me o but we ae wahma, me meic adre úthueniken me we ae wahma, ke hwege but, ke ba heláe hnyi hnyi Aigupito hwán hnyi hna ibi labá. 25 Ke haba we ae wahma ame kot ta je únyi hia hnyi hnyi, tavat, me omeno, hnyi hnyi Aigupito hia: k' ame kot ta je khólak hnen we ae wahma, me thu ta je úó hia hnyi hnyi. 26 Ke haba Gosena thibi, hnyei ame labá hnen lakon Isaraela, e ba we ae wahma eling. 27 Ke haba Farao ame úkhúnöng he ka hao Mose me Arona, me ha ködrü, ka habe, Oge hia but monu hnyi úen eang: e wisa Iehova, k' iny kong ut me lakeik. 28 Khóú thö kö Iehova; ö e soju hendring ang me we ae wahma; k' oge me he ka hn' öbun, ke öbun e ca he hmetu ka laba. 29 Ke Mose ame ha káu, ka habe, Iny ka he úhek ang hnyi taun oge me he ka hai li hnyamök kö Iehova; k' ame he ka hia hendring, k' ame he ka ba hmetu we ae wahma: me me khanö u, ka habe, anyi Iehova hmeledrany. 30 Ke haba u, me lathnyabaem, e khanö nya öbun e tiga ca he ka outö Iehova a Khong. 31 Ke adre kot lino me bali: anyin ame wa bali, me vhong ut lino. 32 Ke adre ca kot hwit me kesem anyin a tiga ca kú. 33 Ke Mose ame he úheny hnyi taun unyi Farao, me hai li hnyamen kö Iehova: me ame hia ju hendring, me we ae wahma, k' ame ca ta hmetu we ka hnyi káná. 34 Ke a wá but Farao ae ba but we, me we ae wahma, me hendring, me ame monu hmetu me onáká hnyekon, tha e me lathnyabainy. 35 Ke nák ut hnyeku Farao, k' ame ca hna but lakon Isaraela; heláji me hna ha hnö Iehova a deny Mose.

HNYIMAKAN 10.

KE haba Iehova ame ha kö Mose, ka habe, He thö kö Farao: anyin a oge hia but onáká hnyekon, me hnyekon lathnyabainy, m' inye he ka omanená hnyi hnyimaködrin ta je hatök eang: 2 m' u ma he ka ha hnyi li hnyikönyen nokom, me öbem, ta je únyi oge hia but ányá ka Aigupito, me ta je hatök oge hia but ányá huyi wanbödra; me me khan' öbun dö a inya Iehova. 3 Ke haba Mose me Arona ödrü me he kö Farao, me ha káu, ka habe, Walang hna ha hnö Iehova Khongon at Heberu, ka habe, Ke ne o but kehö u ma he ka höcö óúhnyúkongi u hnyi hnyimákök? hna but lakeik m' adre me he ka bi athnyaba kónya. 4 Ke u je ne höcö hna lakeik wá bi, haba nyi, oge me he ka kuná je wahamon ka hnyi em hnyei: 5 k' adre me he ka khavá káná, me me ca khana at he ka wá káná: k' adre me he ka an je kolon biju ae möt, wale ta je kolon unyibun, hwaban we ae wahma, k' adre me he ka an ta je úó hia ame kú hobi köbun hnyi hnyei: 6 k' ame he ka óünöngötá umám je uma, me je uma umen lathnyabaem, me je uma umen at Aigupito hia; ke ame ca wá heláe hnen je lakámám me je lakibám, hwán hnyi bong adre me laba eang hmelen ke ne o but hnyi bong ang. Ke ame hwiö me he úheny unyi Farao. 7 Ke haingen je lathnyabai Farao káu, ka habe, Ame he ka hnán knewe kóta at eang ke ne o but kehö? hna but tavat m' adre me he ka bi athnyabai Iehova Khongudrin: hawa e ca khatö u bala a ga kong ut Aigupito? 8 Ke adre me hao Mose me Arona hmetu kö Farao: me ame ha ködrü, ka habe, He th' öbun ka bi athnyabai Iehova Khongubun: ke ie je hnyat adre ma he? 9 Ke haingö Mose, ka habe, Öhmun e he ka tha he me je wanakat, me wahingatihmun, me je lakuhmun obaga, me wahu, me je hnahat mamoe, me halehmun je kau; anyin a hamöhmun he ka bi jeu kö Iehova. 10 Ke ame ha ködrü, ka habe, E so e he ka tha e m' öbun Iehova helá me hnök hna hn' öbun, me je lakubun ae úhnyúkong: ke wá eaú; anyin ae hu monu hnyi hnyimaköbun. 11 Ca he ka heláe: he so bi he th' öbun obaga he ka bi athnyabai Iehova; anyin a waleling webun. K' adre ob' ödrü úheny unyi Farao.

12 Ke haba Iehova ame ha kö Mose, ka

habe, Hai tho hnyamâm hon hnyei Aigupito, me me o thö je wahamon ka hnyi hnyei Aigupito, me an ta je khölak hia hnyi hnyei, a kolon biju hwaban we ae wahma. 13 Ke haba Mose ame inâ anyin uci hon hnyei Aigupito, ke Iehova ame oâ ang hwei ka hnyi hnyei hnyi bong eling ae bekhöt me lit ae bekhöt; ke hnyi hnyomakatu haba ang hwei ame hom je wahamon. 14 K' ame ölö je wahamon ka hnyi Aigupito hia, me tabâ je hnyigöulen hnyei Aigupito hia; e ti se hia hmönyin; e ba wahamon helâe ehac, k' ame ca he hmetu ka helâe. 15 K' adre khavâ hon kânâ hia, k' ame lit ut hnyei; k' adre me an ta je khölakiny hnyei, me je wan üö hia je kolon hwaban we ae wahma: ke ba hmetu lan hnyot, wale üö me khölakiny kânâ, hnyi hnyei Aigupito hia. 16 Me haba Farao ame ie hao Mose me Arona, me ha, ka habe, Oge hia but monu kö Iehova Khongubun, me köbu. 17 Ke walang ang ö u na okhaca thibi hna degecâ anyik monu, ke khöu th' öbu kö Iehova Khongubun, me me he ka hom ünyi gak mok eang. 18 Ke ame he üheny unyi Farao, me khöu kö Iehova. 19 Ke haba Iehova ame kunâ hwegiâ ang hnyi köiö, k' ame kap göranyai je wahamon me hom kâu ka hnyi Köiö ae Dra; me ba hmetu wâhamon me khaca hnyi hnyei Aigupito hia. 20 Ke Iehova ame onâkâ hnyeku Farao, k' ame ca hna bala lakon Israela.

21 Ka haba Iehova ame ha kö Mose, ka habe, Hai thö hnyamâm göranyai, me me menekholom but hnyei Aigupito, ke menekholom ae khöt. 22 Me haba Mose ame hai hnyamen göranyai, me menekholom ae khöt ut hnyei Aigupito hia hnyi kun ta bong; 23 adre me ca iodraköu, ke ba at ame höhöi hnyi hnen hnyi je bong a kun: ke so bi e hu lany hnyi je hnyaban lakon Israela hia. 24 Ke Farao ame hao Mose me ha kâu ka habe, He th' öbun ka bi athnyabai Iehova; ke hnen biju ta je hnahat mamoe, me halebun je kau: ke so ame tha he m' öbun je lakubun ae ühnyükong. 25 Ke haingö Mose, ka habe, Hâmâm he ka hna ka hnyi je hnyamöhmun je hut, me je hudiny leü, m' öhmun e he ka bi hut kö Iehova Khonguhmun. 26 Ke öhmun e he ka hom minya halehmun je hnahat: ame ca he ka hnen biju hotuhmun ai ke boujimen can a khaca; anyin öhmun e he ka hom keihen gadrin he ka bi athnyabai Iehova; ke ca khan' öhmun ünyi ae ücü

he ka bi athnyabai Iehova, öhmun ka tiga ca o eling. 27 Ke Iehova ame ouâkâ hnyeku Farao, me ame höcö he ka hn' ödra. 28 Ke haingö Farao kâu, ka habe, He thö ühem anyik, ke ö u âu, ca he hmetu ka wâ hnyimakök; anyin a u me he ka mok hnyi bong u me he hmetu ka wâ hnyimakök hnyin. 29 Ke Mose ame thu, ka habe, E so hnâm hna ha, oge me ca he hmetu bala ka wâ hnyimakâm.

HNYIMAKAN 11.

HABA Iehova ame ha kö Mose, ka habe, Khaca biju vec oge me he ka oâ kö Farao me Aigupito; hwaban eling e ame he ka hn' öbun üheny ang: ke ka he ka hn' öbun, me ame he ka ob' öbun üheny ang. 2 Ha thö walang ang ka hnyi je hnyikönyen tavat, me me he obaga me omomo ka ve sumâtâ unyin tavat adre me laba ühakekenyi m' ödra, ta je hmanenanginy gol me ta je hmanenanginy sileva. 3 Ke Iehova ame oküâ ibetengiö ka tavat hnyi hnyimakan at Aigupito. Ke haba khaca, Mose ame lung hnyi hnyei Aigupito, me unyin lathnyabai Farao, me unyin tavat.

4 Ke haingö Mose, ka habe, Walang hna ha hnö Iehova, ka habe, Hnyi wanbenset oge me he ka he hnyi wanben hnyei Aigupito: 5 k' ame he ka mokcu ta je atö hia hnyi hnyei Aigupito, hwân ge atö nöku Farao at ame tabâ anyin theron, ke ne o but ka atö nokon momo at ame khenyö whit; ke je atö minya lakon je meno hia. 6 K' ame he ka hu tenge ae gan hmâ hnyi hnyei Aigupito hia, e ba helâe ehac, k' ame ca he hmetu ka helâ. 7 Ke ame ca he ke kuli ka bwebwelâ bohmen ka lakon Israela hia, wale ka at me meno: me me khan' öbun thö a hnö Iehova hna ve obongonâ at Aigupito me at Israela. 8 K' ame he lathnyabaem hia eang ka he könya, me nom ju könya, me habe, He thö me tavat hia adre me hnu hotom: ke hwaban e oge me he ka he. Ke e ame he üheny unyi Farao me hmönyin ae gan hmâ.

9 Ke haba Iehova ame ha kö Mose, ka habe, Ame ca he Faroa ka lingöbu, m' adre me he ka osehia anyik ta je ünyi hnân läiâ hnyi hnyei Aigupito. 10 Ke Mose me Arona ödru me änyâ ta je ünyi hnân läiâ hnyi hnyimakö Farao: ke Iehova ame onâkâ hnyeku Farao, me ame ca hna lakon Israela ünyi hnyi iny hnyei.

HNYIMAKAN 12.

KE haba Iehova ame ha kö Mose me Arona hnyi hnyeí Aigupito, ka habe, 2 Haba tehi ang ame he ka hnyimakan ta je tehi köbun : k' ame he ka tehi a bán hnyi huna köbun. 3 Ha th' öbu ka tavat Isaraela hia adre úkhacaköu, ka habe, Haba hnyi bong a libenyitainy tehi ang, adre me he ka ve hom nokon mamoe hoton je lap anyin lakamödra, úsa khaca nokon mamoe hobi kâu ke lap me ke lap : 4 k' ame ne úhnyúkong ke lap ke ca úcú nokon mamoe, e ame he ka tha hom me at ame laba hakekenyá hoton úseiny tavat ; k' öbun e he ka aú tavat me me úcú ködrin nokon mamoe. 5 Haba nokon mamoe hobi köbun ame he ka ba kongon, ke бага a khaca hunainy : öbun e he ka hom únyi hnyi je mamoe, ame ne je got : 6 k' öbun e he ka ányá ke ne o but hnyi bong a fortininy tehi eling : k' ame he ka ve hlingá hnyi sahac hnen úkhacaköu anyin lakon Isaraela hia. 7 K' adre me he ka hom dra me bi hnalimen hnyi li uthwanuma, me hon hwanumen ta je uma adre me he ka han hnyin. 8 Ke haba utiö adre le hnyi meic, adre me he ka tha han hnyi lit eling, me areto adre ca levená bi ; k' adre me he ka han me bi uten ge ta je bö ae hiny. 9 Ca he öbun ka han hát, k' ame ne ölä hnyi köiö, ke so bi he ka le ge meic ; wale ban me je can me önyen hnyekon. 10 Ke ca he ka ip ke keihen ke ne o but hnyomakatu ; ke ka hu kolon bi hnyi hnyomakatu öbun e he ka le degecá hnyi meic. 11 Ke öbun e he ka han heláng, ka habe, öbun e he ka ca je hnyekubun, me bi taben je hnyeúcabun, me kát anyibun je uci : k' öbun e he ka han logot : wale paseka anyi Iehova. 12 Anyin oge me he ka vheno hnyeí Aigupito hnyi lit eling, me kot ta je atö hia hnyi hnyeí Aigupito, wale at me omeno ; ke oge me he ka bi hwaban ta je khong, hia hnyi Aigupito : iuya Iehova. 13 Ke haten köbun dra hnyi ta je uma öbun e laba hnyin : ke iny ka wá but dra, me oge me he ka hanyáú' öbun, k' ame ca he ka o köbun mok at ame ohnia, iny ka he ka kot hnyeí Aigupito. 14 Ke ame he bong ang ka óunykúmi öbun, m' öbun e he ka ányá hnyin bijeu kö Iehova : hnyi anyibun je dö hia öbun e he ka bijeu helá me hnanyibu nyiele balua. 15 Seven ta je bong öbun e he ka han areto hnyin adre ca leverá bi : haba hnyi bong a bán öbun e he

ka degec leven únyi hnyi umöbun ta je uma : anyin a haba at ame he ka han areto adre levená hwán hnyi bong a bán ke ne o but ka hnyi bong a seveniny, me adre me he ka subá degeca at e unyi Isaraela. 16 Ke haba hnyi bong a bán ame he ka hu unyibun úkhacaköu ae kap, ke hnyi bong a seveniny minya ame he ka hu úkhacaköu ae kap unyibun ; e ba huliwa adre me he ka ányá hnyi je bong eling, ke so thibi jeu an at, wale thibi únyi öbun e he ka ányá. 17 Ke öbun e he ka bijeuá areto adre ca levená bi ; anyin a haba hnyi bong eling, oge hia but hom köiöbun je köiö únyi hnyi hnyeí Aigupito : anyin a wale öbun e he ka tuö bong e helá me hnanyibu nyiele balua. 18 Hnyi tehi a bán, hnyi bong a fortininy tehi hnyi sahac, öbun e he ka han areto adre ca levená bi, ke ne o but hnyi sahaciny bong a twente waniny tehi. 19 Adre me ca he ka wá leven hnyi umöbun je uma hnyi je bong a seven : anyin a haba at ame he ka han areto adre levená, me adre me he ka subá degecá at eling únyi hnyi úkhacaköu anyin at Isaraela, ame ne atkanyua, ame ne at adre hnokoá hnyi hnyeí. 20 Öbun e ca he ka han únyi adre levená ; k' öbun e he ka han areto adre ca levená bi hnyi je hnyabibun hia. 21 Ke haba Mose ame hawá wahingatiny at Isaraela hia, me ha ködrin, ka habe, Ve úca thö me hom ta je nokon mamoe hobi kâu anyibun je lap, ke hlingá ju paseka. 22 Ke hom d' öbun ta je thi hisop, me hneu hnyi dra hnyi utkaia, me sa hon hwanuma me li uthwanuma ge dra únyi hnyi utkaia ; k' ame ca he ke at gabun ka dit ká ú únyi hnyi umen uma ke ne o but ka hnyi hnyomakatu. 23 Anyin ame he Iehova ka he hnyi wanben hnyeí me kot at Aigupito ; ke e ka wá but dra hnyi hon hwanuma me li uthwanuma, me ame he Iehova ka hanyáúú hwanuma, k' ame ca he ka hna at úhlingö he ka didró ka hnyi umöbun je uma he ka kuc öbun. 24 K' öbun e he ka tuö únyi e hnán hnanyibu hobi köu me je lakom nyiele balua. 25 Ke öbun ka o ka hnyi hnyeí ame he Iehova ka ham köbun helá me hnen hna ha báná, me öbun e ha ka tuö huliwa eang. 26 Ke e ka ha köbun lakubun, ka habe, Ieu bongon huliwa eang? 27 m' öbun e he ka thu, ka habe, Wale hut paseka kö Iehova, waleji at ame he hanyáúú ta je uma umen lakon Isaraela hnyi Aigupito hnyi hnen hna kot at Aigupito me omelö anyitim ta je lap. Ke haba tavat adre me nom ju me khudrung.

28 K' ame he but lakon Isaraela me ânyâ helâe; adre me ânyâ helâ me Iehova ame hunô Mose me Arona.

29 Ke haba hnyi wanbenset Iehova ame kot ta je atô hia thithô hnyi hnyei Aigupito, hwân ge atô nôku Farao a tabâ anyin theron, ke ne o but ka je atô lakon je bâ hnyi uma ceat; me je atô lakon je meno hia. 30 Ke haba Farao ame höhôi thô hnyi hnyinghet, e me lathnyabainy hia, me at Aigupito hia; ke e hu tenge ae gan hmâ hnyi Aigupito; anyin ae ba uma ae ba komok hnyin. 31 Ke e ame hao Mose me Arona hnyi hnyinghet, me ha, ka habe, Todrô, he but ge lakeik, öbu me lakon Isaraela; ke he th' öbun ka bi athnyaba Iehova helâ me hnöbu hna ha. 32 Ke hom minya thô ta je hnahat mamoe me halebun je kau, helâji me hnöbu hna ha, ke he thô; ke ha hnahici nya minya thô. 33 Ke at Aigupito adre me ûjengö hwegiâ tavat m' ödrin e ie hna but hnyei; anyin a haingödrin, ka habe, Ate me mok hia but. 34 Ke haba tavat adre me hom anyidra falawa adre op k' ödra tiga ca levenâ, ke anyidra je kumete hnân up falawa hnyin adre lan kâu ge anyidra je ûkhaú, me hijen. 35 Ke je lakon Isaraela adre me ânyâ helâ me hofuc ho Mose; me adre me sumâtâ at Aigupito ge ta je hmanenanginy sileva, me ta je hmanenanginy gol, me ta je ûkhaú: 36 ke Iehova ame okûâ ibetengiö anyin at Aigupito ka tavat, m' adre me hna but ta je únyi adre me sumâtâ. M' adre me öba ta únyi anyin at Aigupito.

37 Ke haba lakon Isaraela adre me he úhedra Ramase Sukotha ai, ame ne siks haded thauzan tavat adre he, k' adre ca áu bi ta je wanakat. 38 K' ame tha he mödra tavat ae se hia ae ve bongon bi, me ta je hnahat mamoe me kau, a omeno ae se hia hmönyin. 39 K' adre me le falawa adre op waleji adre hom únyi Aigupito, je ong areto adre ca levenâ bi, anyin adre ca levenâ: anyin adre ob' ödra únyi Aigupito, ke ca khan' ödra bi he ka halubahingen, k' adre me ca bi kamec. 40 Ke haba je hunainy laba a lakon Isaraela hnyi hnyei Aigupito, me foa haded ke thöte. 41 Ke haba hnyi obiny je huna a foa haded ke thöte, hnyi bong eling ame he but ta je köiö anyi Iehova hia úhedra hnyi hnyei Aigupito. 42 Ke walang hnyinghet hnân he ka únykúmi Iehova hnen lakon Isaraela hia hnyi anyidra ta je dö.

43 Ke Iehova ame ha kö Mose me Arona, ka habe, Walang hnanyibuiny paseka, ka habe, Ame ca he atkanyua ka hnyi an e: 44 ke haba athnyabainy tavat hia adre úco ge mone, u me he ka peritomonâ, me ame he ka hnyi han. 45 Ame ca he ka hnyi han hnen atkanyua me athnyaba ame kap hwaban. 46 Adre me he ka han e hnyi uma a khaca; ke u me ca he ka hom utiöiny hnyöu ai; ke ca he öbun ka thu ke jeien. 47 Ke ame he ka ânyâ e hnen úkhacaköu hia anyin at Isaraela. 48 Ke a ne hu atkanyua ame laba unyâm ame weny he ka hnyi hanen paseka kö Iehova, e so bán peretomonâ obaga hia anyin, me hwaban e ame he ka hakekeny ka hnyi hanen; k' ame he ka helâ me at adre hnokoâ hnyi hnyei: ke ame ca he at adre ca peretomonâ ka hnyi han. 49 Ame he ka khaca hnanyibu hobi kâu aten hnyei me atkanyua ame laba unyibun. 50 Ke haba lakon Isaraela hia, adre me ânyâ helâ me hnö Iehova hna hûna kö Mose me Arona, adre me ânyâ helâi. 51 Me haba hnyi bong heling, Iehova ame hom lakon Isaraela únyi hnyi hnyei Aigupito hoton anyidra je dö.

HNYIMAKAN 13.

KE Iehova ame ha kö Mose, ka habe. 2 Okâbâ thô könya ta je atô hia, a lakon Isaraela adre bán hna hnokoâ, at me meno: wale hobi könya.

3 Ke haba Mose ame ha ka tavat, ka habe, Únykúme ju öbun bong eang, bong öbun e he but úhebun Aigupito hnyin, únyi hnyi hnyaban at hwenbâ; anyin a únyi ge hwegien hnyamö Iehova, e ame hum öbun únyi hnyi dok e: adre me ca he ka han areto adre levenâ. 4 Hnyi bong ang öbun e he but, hnyi tehi Abiba. 5 Ke e ka he Iehova ka hum u ka hnyi hnyei Kanana, me Heth, me Amora, me Hivi, me Jebusi, waleji a khemanyin ka lakâmâm he ka ham köu, a hnyei ame di ge dân basin me hani, me u ma he ka ânyâ huliwa eang hnyi tehi eang. 6 Haba hnyi seven ta bong u ma he ka han areto adre ca levenâ bi, ke haba hnyi bong a seveniny adre me he ka bi jeú kö Iehova. 7 Adre me he ka han areto adre ca levenâ hnyi je bong hia a seven; k' ame ca he ka hu unyâm areto adre levenâ, k' ame câ he ka hu leven unyâm, hnyi em hnyei hia. 8 Ke u ma he ka thumeto nokom hnyi bong eling, ka habe, Adre

me ányá únyi ang can hna ányá hnö Iehova hobi kónya hnyi úhek Aigupito. 9 K'ame he ka bi haten köu únyi eling hnyi hnyamám, me hnân ónyúkúmeá hnyi wanben li emakám, me me he hnanyibu anyi Iehova ka hnen hnyi hnyimám : anyin a Iehova ame hum u úhem Aigupito hnen hnyamen ae hwege. 10 Anyin a wale u ma he ka vheno hnanyibu eang hnyi úen adre thu hnyi ke huna me ke huna.

11 Ke e ka he Iehova ka hum u ka hnyi hnyei iny at Kanana, helá me hnen hna khemanyin köu me lakámám me ham köu, 12 me u ma he ka ip hobi kö Iehova ta je atö hia, me ta je atö nokon meno unyám ; hobi kö Iehova obaga. 13 Ke haba je atö hia nokon asina, me u ma he ka hom nokon mamoe me hwaban ; ke u je ne ca he ka bi hwaban e, me u me he ka thu nyin : ke u ma he ka bi hwaban ta бага hia a bán a lakom. 14 Ke e ka he nokom nyiele ka hnei u, ka habe, Ieú e? U me he ka ha káu, ka habe, Iehova ame hum öhmun ge hnyamen ae hwege úhehmun Aigupito, únyi hnyi hnyaban at hwenbá : 15 ke e höcö Farao hn' öhmun, haba Iehova ame hlingá je atö hia hnyi hnyei Aigupito, a atö lakon at me atö lakon meno : anyin a wale inya oge me hudo ta je nokon a bán kö Iehova, a obaga ; ke oge me bi hwaban je atö a lakuk hia. 16 K'ame he ka bi haten köu únyi eling hnyi linyamám, me hnân wen bariny hnyi wanben li emakám : anyin a Iehova ame hum öhmun úheny Aigupito ge hnyamen ae hwege.

17 Ke a hia but Farao hna tavat, haba Khong ame ca su ödra hnyi hnyei iny at Filisiti, ae hakekeny ; anyin a haingen Khong, ka habe, Wá adre nye he ka ietra, ödra ka wá vat, m'adre me he hmetu Aigupito ai : 18 ke Khong ame su ödra hnyi getheniny hnyebuba baten Köiö ae Dra : k'ame he but lakon Isaraela únyi hnyi hnyei Aigupito me omjehen vat. 19 Haba Mose ame hom ta je jeiö Josefa : anyin a hia but khemanyin ka laku Isaraela, ka habe, E hnathu ame he Khong ka sen' öbun ; ke hamöbun he ka hom minya je jeiök únyi eang. 20 K'adre me he úhedra Sukotha, me hunuma e Ethama baten hnyebuba. 21 Ke haba Iehova ame he hnyi hnyimaködra hnyi lany hnyi úlá ame tot wisa, he ka humödra eú hnyi gethen, ke hnyi hnyinghet ge meic ama tot wisa, he ka omelami ödra ; m'adre me he ka he hnyi lany me lit :

22 k'adre me ca hom hmetu úlá ame tot wisa hnyi lany, me meic ame tot wisa hnyi lit, únyi hnyi hnyimakan tavat.

HNYIMAKAN 14.

KE haba Iehova ame ha kö Mose, ka habe, 2 Ha thö ka lakon Isaraela, m'adre me he ka saú hmetu me hunuma cicö Pihahiroth wanben Mighedola me köiö, cicö Baalazefona : öbun e he ka hunuma cicö e hnyi baten köiö. 3 K'ame he Farao ka ha ge lakon Isaraela, ka habe, Ödra adre me hnok dö hnyi hnyei, k'ame sing ödra hnen hnyebuba. 4 Ke oge me he bi nya ka onáká hnyeku Farao, k'ame he ka hnu hotudra ; k'ame he ka oganö nya ga Farao, me anyin je vat hia ; k'ame he ka khana hnen at Aigupito a inya Iehova. K'adre me ányá heláe. 5 Ke adre me thumeto than Aigupito a ga kec ut tavat : me ame wia thö hnyeku Farao me lathnyabainy ka tavat, me haingödrin, ka habe, Ieú hnötin hna ányá he ka hna at Isaraela adre me huliwa kötin? 6 Ke e ame penapena anyin kariota me tha he me lakeiny : 7 k'ame hom minya siks haded ta je kariota adre úca, me je kariota hia hnyi Aigupito, me latuhödra hia. 8 Ke haba Iehova ame onáká hnyeku Farao than Aigupito, k'ame hnu lakon Isaraela : anyin a haba lakon Isaraela adre me he me tang hwege. 9 K'ame hnu ödra hnen at Aigupito, je hos hia me je kariota anyi Farao, me tavat adre me tabá haleny je hos, me anyin vat, me homtil' ödra adre me hunuma hnyi köiö cicö Baalazefona, hakekeny Pihahiroth. 10 Ke Farao ame hakekenyá, me lakon Isaraela adre me wá, ke wá bi ame hnu hotudra at Aigupito ; k'adre me ot gan hmá : ke lakon Isaraela adre me tenge kö Iehova. 11 Ke haingödra kö Mose, Hawa, e ba je erkemok hnyi Aigupito, m' u me hum öhmun ka mok ang hnyi hnyebuba? Ieú ang u je ányá köhmun, ka hum öhmun úhehmun Aigupito? 12 Hawa, öhmun e ca hia but ha köu hnyi Aigupito, ka habe, Hn' öhmun dut m' öhmun e he ka bi athnyabainy at Aigupito? Anyin ae so köhmun he ka bi athnyabainy at Aigupito, ke kong köhmun he ka mokcu eang hnyi hnyebuba. 13 Ke haba Mose ame ha ka tavat, ka habe, Ca ot, tot ju, me wá úhömeli anyi Iehova, wale ame he ka ányá hobi köbun hnyi bong ang : anyin a haba at Aigupito öbun e wá hnyi

bong ang, me öbun e ca he ka wá hmetu nyiele balua. 14 Ame he Iehova ka vat sing öbun, k' öbun e he ha laba hayibú.

15 Ke haba Iehova ame ha kö Mose, ka habe, Ieú gam u me tenge könya? Ha thö ka lakon Isaraela m' adre me he thö. 16 Ke hai thö ányám uci, me iná but hnyamám hon köiö, me me khekhe lo but: k' ame he lakon Isaraela ka he wanben köiö hnyi dok ae mada. 17 Ke haba inya oge me he bi nya ka onáká hnyekon at Aigupito, k' adre me he ka hnu hotudra ka hnyin: k' oge me he ka oganö nya bi ga Faraó, me anyin je vat hia, me anyin je kariota, me anyin je hnyat tabö hos. 18 K' ame he ka khana hnen at Aigupito a inya Iehova, iny ka hia but oganö nya bi ga Faraó, me anyin je kariota, me anyin tavat tabö hos. 19 Ke haba angela anyin Khong, at ame bán hnyi hnyimakan at Isaraela, ame biliny jut hotudra; ke haba úlá at ame tot wisa hnyi hnyimaködra, e ame hwiö me tot hotudra: 20 ke ame he me tot hnyi wanben hunuma anyin at Aigupito me hunuma anyin at Isaraela; ke wale bi eling úlá me menekholom minya, ke so bi ame omelamá hnyinghet: k' ame ca hakekenyá ke at ka ke at hnyi lit hia. 21 Ke haba Mose ame iná hnyamen hon köiö; me Iehova ame okhuto köiö hnen ang hwei ae hwege hnyi lit ae bekhöt me omada e, ke haba köiö ame khekhe lo but. 22 Me ame he but lakon Isaraela hnyi wanben köiö hon káná ae mada: ke li hak ködra köiö hnyi ke keihen metödra me medra. 23 Ke haba at Aigupito adre me hnu ödra, me utut hotudra ka hnyi wanben köiö, a je hos hia hale Faraó, me anyin je kariota, me anyin tavat tabö hos. 24 Ke haba hnyi hmak hnyi hnyomakatu, Iehova ame seládrá hnyi meic ame tot wisa me úlá, me ame ovecá vat anyin at Aigupito. 25 Ke ame thang je waengen hnyi anyidra je kariota, me me hmak he ka lelö: waleling me me ha hnen at Aigupito, ka habe, E so ate me kec ge at Isaraela; anyin a Iehova ame bi hiödra, me iwahnaihmiöny me at Aigupito.

26 Ke haba Iehova ame ha kö Mose, ka habe, Iná but hnyamám hon köiö, me me he köiö ka hmetuhmetu but ka hnyi hon at Aigupito, hon anyidra je kariota me tavat adre me tabö hos. 27 Ke haba Mose ame iná hnyamen hon köiö, me ame khutu hmetu but köiö ka hnyi hnen, hnyi ioiny dö lany; ke haba at Aigupito adre me kec me úkhöu me: ke Iehova ame khúá at Aigu-

pito ka hnyi wanben köiö. 28 Ke ame khutu hmetu but köiö me húlúlúá je kariota me vat tabö hos, me utbavat hia anyi Faraó adre me ut hotudra ka hnyi köiö, me ba ju köluidra e ba me khaca. 29 Ke haba lakon Isaraela adre me vheno dok ae mada wanben köiö; ke li hak ködra köiö hnyi ke keihen metödra me medra. 30 Heláng Iehova ame omelö at Isaraela hnyi bong eling únyi hnyi hnyamen at Aigupito; ke haba at Isaraela adre me wá at Aigupito a mokcu hnyi hobat köiö. 31 Ke a wá but at Isaraela huliwa ae gan ame ányá Iehova hon at Aigupito, me me outö Iehova tavat: ke adre me labageju kö Iehova me Mose a athnyabainy.

HNYIMAKAN 15.

KE haba Mose me lakon Isaraela adre me tha khumöngö khumöng eang, ka habe,

Oge me he ka khumöng kö Iehova anyin a e ame ti hom dökhü:

A hia but khúá hos me at ame tabá ka hnyi köiö.

2 Ja, a tang hwegiök me anyik khumöng, Ke e thibi úhömelik:

Wale thibi e Khonguk, ke oge me he ka haisoá;

Khongu cica, k' oge me he ka ogöranýá.

3 Iehova thibi at vat: Iehova ien.

4 E ame hia but khúá ka hnyi köiö je kariota anyi Faraó, me anyin je vat; K' ame ú but eú hnyi Köiö ae Dra anyin je tuhan vat adre úca.

5 A húlúlú ödra hnen je dok ae dit; Adre me ú but ká ú helá me veto.

6 Iehova lö, e mec hnyamám a metám ae man;

Iehova lö, a hia but hnyamám a metám kot omomono iwahnaihmiöny.

7 Ke únyi hnyi úganiny ibeönuaiám u je hagut' ödra tavat adre me tot köu: U je kuná ányám hmönyin, m' adre me aú but helá me tiren.

8 Ame kakap göranyai köiö únyi ge homenáiny li hnyingoiám,

Ame tot wisa je di helá me khölöki;

Ame wahma thö köiö eú hnyi dok ae dit.

9 Haingen iwahnaihmiöny, ka habe,

Oge me he ka hnu, oge me he ka homtilá, oge me he ka khená hna hügüná:

Oge me he ka sekuk únyi gadra ;
Oge me he ka oc anyik hele vat, ame he
hnyamök ka ohí' ödra.

10 U je kunâ ányâm ang, me ame húlâlú
ödra hnen köiö :

Adre me ú but eú hnyi köiö ae man,
helâ me veten kua.

11 Iehova lö, ewa at ae tha úcú möu unyin
ta je khong?

Ia ae tha úcú möu, e hmanenang hwa-
kecâm ae kap,

Ke hnân outen, ödra ka ogânö u, at
ame ányâ ta je únyi hnân láia?

12 U je inâ hnyamâm a metâm,
Me ame ön ödra dut hnen kânâ.

13 Hnyi ányâm ibetengiö u je lelö tavat u
je hia but omelö :

U je lili ödra ge tang hwegiâm ka hnyi
hnyabam ae kap.

14 A löug ut ta je hnyei, adre me öbu-
buny :

Vec ae gan ame o ka tavat adre me
labâ Filisiti.

15 Ame uthmok ta je tuhan hnyei Edo-
ma ;

Ame öbubun tavat hwege hnyi Moaba :
K' ame aú tavat hia adre me laba Ka-
nana.

16 Ame o but ködra ot me öbubuny ;

Únyi ge ihwegeiny benyâm adre me
laba hmâ helâ me veto ;

Ke ne o but ame hanyâúâ lakem, Ieho-
va,

Ke ne o but ame he thö tavat u je hia
but úco.

17 U ma he ka hum ödra, me t' ödra hnyi
bucen, wale hwajekom,

Iehova lö, wale hnâm u je ányâ hnân
hnyabam,

Iehova lö, wale dok ae kap u je hia but
ohmâ hnen li hnyamâm.

18 Ame he Iehova ka musi nyiele nyiele
balua.

19 Anyin ame tha utut kâ ú ka hnyi
köiö je hos hale Farao me anyin je kariota
me tavat tabö hos, ke haba Iehova ame
okhuto hmetu köiö hudra ; ke haba lakon
Isaraela adre me he hnyi wanben li köiö
hnyi dok ae mada. 20 Ke Miriama perofeta
momo, hani Arona, ame hom bwinybet
hnyi hnyamen ; ke omomo hia ae ve hu
bwinybet ödrin e he hoton me bibiâ. 21
Ke haba Miriama ame thu me ha, ka
habe,

Khumöngö th' öbun kö Iehova, anyin a
e ame ti hom dökhu ;

A hia but khúâ hos me at ame tabâ ka
hnyi köiö.

22 Ke haba Mose ame hom dö at Isara-
ela únyi hnyi Köiö ae Dra, k' adre me o ka
hnyi hnyebuba e Sura ; ke kun bongudra
hnyi hnyebuba ke ba köiö adre me wâ.
23 K' adre me o but Mara, ke ca khan ödra
ijem an eling Mara, anyin ae hiny : wale-
ling m' adre me hwenyi ien e Mara. 24 Ke
haba tavat adre me etrö Mose, me habe,
öhmun e he ka ic ieú? 25 Me ame tenge
kö Iehova, ke Iehova ame omanená kâu ke
úö, me ame khúâ ka hnyi an, me ame hnan
but an. Ke waleling e ame otilâ hobi
ködra hnanyibu me hna owisa, k' ame
cubic ödra eling ; 26 ke haingen, ka habe,
U ka he ka löng wia hofuc ho Iehova a
Khongom, me ányâ únyi ae wisa hnyi
hnyimakan, me tevehlöng hnen hna húna,
me tuö anyin je hnanyibu hia, oge me ca
he ka kunâ köu ta je mok waleji oge kunâ
ka at Aigupito : anyin a inya Iehova at ame
osoi u.

27 K' adre me o hnyi Elima, ke eling je
an a twelv, me ta je úö pama a sevente :
k' adre me hunuma hnyi je an.

HNYIMAKAN 16.

KE adre me he úhedra Elima, ke ame
o but úkhacaköu hia anyin lakon
Isaraela ka hnyi hnyebuba Sina, wanben
Elima me Sinai hnyi bong a fiftininy tehi
a loiny hwaban úhedra hnyi Aigupito.
2 Ke haba úkhacaköu hia anyin lakon
Isaraela adre me etrö Mose me Arona hnyi
hnyebuba : 3 ke haingen lakon Isaraela
ködra, ka habe, Öhmun na mokcu hnen
hnyamö Iehova hnyi hnyei Aigupito waleji
öhmun e laba hnyi je hna öt meno, me han
areto me sekumhun ; anyin a öbe hum
öhmun ka hnyi hnyebuba eang he ka
hlingâ úkhacaköu ang hia ge mekihnanem.
4 Ke haba Iehova ame ha kö Mose, ka
habe, Wâ bi oge me he ka ota köbun jeú
helâ me we únyi hnyi drany ; k' ame he
tavat ka thigâ e hnyi je bong ae úcú ka
hnyi bong, m' inye he ka cubic ödra, adre
me ne he ka vheno anyik hnanyibu, ame
ne ba. 5 Ke haba hnyi bong a siksiny,
adre me he ka penapena hnödra hna hom,
k' ame he ka tha úcú me hnödra hna hom
hnyi li bong a lo. 6 Ke haingö Mose me
Arona ka lakon Isaraela hia, ka habe, Öbun

e he ka wáhmakhmeto eáu sahac a ga hum öbun Iehova úhebun hnyi hnyeí Aigupito : 7 ke haba hnyi hnyomakatu öbun e he ka wá soi Iehova ; anyin a e ame löng hna etró Iehova gabun : ke ie li at öhmu, m' öbun e he ka etr' öhmu? 8 Ke haingö Mose, ka habe, Eáu sahac ame he Iehova ka ha öbun ge meno, me jeú hnyi hnyomakatu me me sekubun ; anyin a löng ut Iehova hnöbun hna etra : ke ie li at öhmu? k' öbun e ca etr' öhmu, ke Iehova bi. 9 Haba Mose ame ha kö Arona, ka habe, Ha thö ka úhacaköu hia anyin lakon Isaraela, ka habe, Hakekeny dö ka hnyi hnyimakö Iehova : anyin a löng ut hnöbun hna etra. 10 Ke Arona ame tiga ha hofuc ka úhacaköu hia anyin lakon Isaraela, me adre me bwele hnyeubaba ai, ke wá bi, e manen soi Iehova hnyi úlá. 11 Ke Iehova ame ha kö Mose, ka habe, 12 Oge löng ut ietra anyin lakon Isaraela : ha thö ködra, ka habe, Eáu sahac öbun e he ka han meno, ke haba hnyi hnyomakatu ame he ka sekubun ge jeú ; k' öbun e he ka wáhmakhmeto a inya Iehova Khongubun. 13 Ke haba hnyi sahac ame ölö thö ta je jüö me khavá hnyeí : ke hnyi hnyomakatu ame ta hau igigilö je hnyaba. 14 Ke wá bi ame ölö göranyai hau, me e biju hnyi hnyeubaba ke únyi ae úhnyükong ae wathalaba, e úhnyükong helá me dán hau ae wahma hon káná. 15 Ke a wá but e hnen lakon Isaraela, adre me úhaköuá, ka habe, leú ang? Anyin ae ca khañ' ödra bongon. Ke Mose ame ha ködra, ka habe, Wale jeú Iehova ame ham köbun. 16 Walang hofuc a huna hnö Iehova, ka habe, Ve thigá öcú öbun dö ka han ; khaca omer hobi káu at a khaca hoton numerainy tavat ; he th' öbun ka ve hom hobi köbun ka hnyi umöbun je uma mano. 17 Ke haba lakon Isaraela adre me ányá heláe, ke haba keihen adre me thigá gáná, ke keihen ae úhnyükong. 18 Me adre me tuluto hnen omer, me haba at ame thigá gáná, me ba kolon, ke haba at ame thigá úhnyükong, e ba únyi a hia gan ; k' adre me thigá e ve úcú ödra ka han. 19 Ke haingö Mose ködra, ka habe, Ca he ke at ka hip kamec ke ne o but hnyomakatu. 20 K' adre me ca ling Mose ; ke haba ke je hnyat ödrin e hip kamec ke ne o but hnyomakatu me ame ahnyöng me meng : ke Mose ame hmönyin ködra. 21 K' adre me thigá hnyi je hnyomakatu e ve úcú ka han : ke kahwa hwan seúnö, me ame köiö but. 22 Ke

hnyi bong a siksiny adre me thigá jeú ae úco lo li bong, wale li omer hobi káu at a khaca : ke ame he but je taben úhacaköu hia me thumetu Mose. 23 Me e ame ha ködrin, ka habe, Walang hna ha hnö Iehova, ka habe, haba bong nyi me hnân mená ae únyi hnathu, sabath ae kap kö Iehova : haba hnöbun hna he ka thân, thân ju, ke haba hnöbun hna he ka ölä, ölä ju ; ke hip kamec ju kolon hobi köbun hnyi hnyomakatu. 24 K' adre me hip kamec ke ne o but hnyomakatu helá me hna huna hnö Mose : k' ame ca meng bi, ke ba minya ahnyöng hnyin. 25 Ke haingö Mose, ka habe, Han d' öbun e hnyi bong ang ; anyin a sabath anyi Iehova bong ang : öbun e ca he ka wá únyi e hnyi káná hnyi bong ang. 26 Ke hnyi siks ta bong öbun e he ka thigá e ; ke hnyi bong a seveniny, wale sabath, ame he ka ba but hnyin. 27 Ke haba hnyi bong a seveniny ame he ke je hnyat ka thigá, me ba. 28 Ke haba Iehova ame ha kö Mose, ka habe, Ke ne o but kehö öbun e he ka höcö ka tuö hnök hna huna me anyik je hnan-yibu? 29 Wá bi, Iehova ame ham köbun sabath, waleling me me ham köbun hnyi bong a siksiny jeú ae úco lo li bong ; ve laba ju öbun hnyi je hnöbun, ame ca he ka he ke at úheny hnyi hnen hnyi bong a seveniny. 30 Waleling me me mená ju tavat hnyi bong a seveniny. 31 Ke haba lap anyi Isaraela adre me hwenyi ien únyi eling, me, Mana : ke úcú e me önyen gada, ke hau ; ke úcú useneminy me je ong falawa adre úthueniken me hani. 32 Ke haingö Mose, ka habe, Walang hna ha hnö Iehova, ka habe, Ounöngötá ju omeriny me tuö hobi káu anyibun ta je dö, m' adre me he ka wá jeú oge ha öbun gan hnyi hnyeubaba hnyi hnök hna hum öbun úhebun hnyi hnyeí Aigupito. 33 Haba Mose ame ha kö Arona, ka habe, Hom dö kaia me bi önyen ju e ge mana a khaca omer me ip hnyi hnyimakö Iehova, m' adre me he ka tuö hobi káu anyibun je dö. 34 Me Arona ame ip e hnyi hnyimakan tang hnân ohnatho, m' adre me he ka tuö helá me Iehova ame ha kö Mose. 35 Ke haba lakon Isaraela adre me han mana hnyi je huna a fáte, ke ne o but adre me o ka hnyi hnyeí ae hu aten ; adre me han mana ke ne o but adre me o but ka hnyi je hnyigöulen hnyeí Kanana. 36 Haba omer me wale ke keihen a libenyitainy efa.

HNYIMAKAN 17.

KE haba úkchacakôu hia anyin lakon Isaraela, adre me he úhedra hnyi hnyebuba Sina, hoton je úhedra, helâ me hna hûna hnô Iehova, me hunuma hnyi Refidima: ke ba kôïö belen tavat. 2 Waleling me me he tavat ka ú Mose, me ha, ka habe, Habelihmun. Ke Mose ame ha ködra, ka habe, Ieú gabun öbun e ú nya? Ieú gabun öbun e cubic Iehova? 3 Ke haba tavat adre me beic eling; k' ame etrô Mose tavat me habe, Ieú gam u je hum öhmun úhehmun Aigupito he ka hling' öhmun me lakuhmun me halehmun je meno ge beic? 4 Ke haba Mose ame tenge kö Iehova, me habe, Ieú oge me he ka ányâ ka tavat eang? helâ ke adre me he but ang ka lúö nya ge veto. 5 Ke haba Iehova ame ha kö Mose, ka habe, He thö hnyi hnyimakan tavat ke hom dö ke je hingatiny at Isaraela, ke hom minya thö ányâm uci hnyi hnyamâm, waleji u je kot kâu wagewe, ke he thö. 6 Wâ bi oge me he ka tot hnyi hnyimákâm wale hon ban kic hnyi Horeba; ke u me he ka kot kic me me hingölö but kôïö únyi hnyin. Ke haba Mose ame ányâ e hnyi hnyimakan wahingatiny at Isaraela. 7 Ke e ame hwenyi ien dok eling Masa, me Meriba, can fuc a lakon Isaraela, me can hnödra hna cubic Iehova, me habe, Hawa, ka e Iehova unyita, ame ne ba?

8 Ke ame o but at Amaleka he ka vat me at Isaraela e Refidima. 9 Ke haingö Mose kö Josua, ka habe, Úca thö hobi kôta tavat, ke he thö ka vat me at Amaleka: haba nyi oge me he ka tot hnyi dok ae hut me uci anyin Khong hnyi hnyamök. 10 Haba Josua ame ányâ helâ me Mose ame ha kâu, me vat me at Amaleka: ke haba Mose me Arona me Huro ödrin e tha öliâ dok ae hut. 11 Ke Mose ame tiga höibeny, me hwege but at Isaraela; ke ame ne hna but hnyamen, me hwege at Amaleka. 12 Ke sényin dut li hnyamö Mose; m' ödrü me hom veto me bi taben, me ame laba hon: ke haba Arona me Huro ödrü me cö li hnyamen, ke at hnyi ke keihen ke ke at hnyi ke keihen; k' ame hmâ li hnyamen ke ne o but ame dit seúnö. 13 Ke Josua ame kot at Amaleka me tavat unyidra ge hele vat. 14 Ke Iehova ame ha kö Mose, ka habe, Sihnalimen ju hnyi tusi hnân oúnykúmiâ, ke nâ

thö aú kö Josua: a oge me he ka ti ohia at Amaleka m' adre me ca he ka únykúme hmetu gadra eang hmelen. 15 Ke Mose ame otílâ taben hut me hwenyi ien e Iehova-nisi: 16 ke haingen, ka habe, A hia but Iehova khemanyin, ka habe, Ame he Iehova ka vat me Amaleka hnyi ke dö me ke dö.

HNYIMAKAN 18.

KE a wâ but Jethero at bihut e Midiana, úngu Mose, ta je únyi hia Khong ame ányâ hobi kö Mose, me at Isaraela a lakeiny, waleji a Iehova ame hom at Isaraela úheny Aigupito. 2 Ke haba Jethero, úngu Mose, ame hum Zipora öïö Mose, hwaban dö hnen hna kunâ hmetu, 3 me lakon li бага; haba ien khaca Geresoma; anyin a haingen, ka habe, Oge hia but atkanyua hnyi ke hnyei bi: 4 ke haba ien khaca, me, Eliezera, anyin a haingen, ka habe, Khongon cica at ame hadruo nya, me omeli nya únyi hnyi hele vat anyi Farao: 5 ke haba Jethero, úngu Mose, ame hom li lakon me áiân kö Mose hnyi hnyebuba, hnyi dok e ame hunuma hnyin, hnyi bucen anyin Khong: 6 ke ame ha kö Mose, ka habe, Inya Jethero úngom oge me o köu me áiâm me lakom li бага a tha ödrü me. 7 Ke haba Mose ame he ka úkhanö me úngon, me nom kâu, me úcumbnyimak me; k' ödrü me úhnökouâ li ve bongudru, k' ödrü me didrö ka hnyin uma mano. 8 Ke Mose ame thumeto úngon ge ta je únyi hia a ányâ Iehova kö Farao me at Aigupito hobi kâu at Isaraela, me ta je vec hia a o ködra eú hnyi gethen, me hna omeli ödra ga Iehova. 9 Ke Jethero ame senyinâ je so hia a ányâ Iehova ka at Isaraela, waleji hna omeli ödra únyi hnyi hnyamen at Aigupito. 10 Ke haingö Jethero, ka habe, Ole kö Iehova at ame omeli öbun únyi hnyi hnyamen at Aigupito, me hnyamö Farao; at ame omelö tavat únyi hnyi hmelen hnyamen at Aigupito. 11 E khanö nya walang ang ae gan hmâ Iehova hon ta je khong hia: eke e beönua hudrin hnyi únyi ödrin e bi gánâ. 12 Ke Jethero, úngu Mose, ame hom hut adre le me je hut ka Khong: ke ame o Arona me wahingatiny Isaraela hia he ka tha han me úngu Mose hnyi hnyimakan Khong. 13 Ke nyi ame laba Mose he ka owisa tavat: ke ame tot tavat hnyi hnyimákö Mose hwân hnyomakatu ke ne o but

sahac. 14 Ke a wâ but ûngu Mose ta je ûnyi hia e ame ânyâ hobi kâu tavat, me e ame ha, ka habe, Ie ûnyi u me ânyâ ka tavat? Ieû gam u me hake laba, k' ame útítilen hnyi hnyimákâm tavat hia hwân hnyomakatu ke ne o but sahac? 15 Ke haba Mose ame thu ka ûngon, ka habe, Anyin ame labö he kõnya tavat he ka hnö Kkong: 16 a ne hu ke ûnyi gadra adre me he kõnya; ke inya oge me owisa ka ke at me ke at, ke inya oge me thumetu ödra ge ta je hna húna hnen Khong me anyin je hnanyibu. 17 Ke haingen ûngu Mose kâu, ka habe, E ca so hnâm hna ânyâ. 18 U ma he ka aú tot, u, me tavat eang unyâm; anyin ae hmak kôu ûnyi eang; e ca khandö u he ka hake ânyâ. 19 Löng ju walang ang hok, inya oge me nõ u, k' ame he Khong ka tha e möu: u ma tot hnyi hnyimakan Khong hobi kâu tavat, ke u ma he ka oâ ta je ûnyi ka Khong: 20 ke u ma he ka n' ödra ge ta je hna húna me ta je hnanyibu, me omanená ködra gethen adre me he ka he hnyin, me huliwa adre me he ka ânyâ. 21 Ke haba khaca u me he ka úca ûnyi ge tavat hia hnyat ae metâ, ödrin e outen Khong, a hnyat ae hnathu, ödrin e hûkötîâ troban thoi; ke otíl' ödrin hon tavat, hnân je taben thauzan, me je taben haded, me je taben sífte, me je taben libenyita: 22 ke so ödrin e he ka owisa tavat hnyi ta je úen hia: k' ödrin e he ka hom kôu ta je ûnyi ae gan, k' ödrin e he biju ka owisa ta je ûnyi ae ûhnyúkong hia: waleling me me háâ kôu, k' ödrin e hadruo u. 23 U je ne he ka ânyâ ûnyi e, me ame ne he Khong ka köp u hnyin, me u me he ka tethmâ, k' ame he tavat ang ka hnyi hnyabadra hnyi hnahic. 24 Ke haba Mose ame löng ifucin ûngon, me ânyâ hia hnen hna ha. 25 Ke Mose ame úca hnyat ae metâ unyin at Isaraela hia, me otíl' ödrin me je homakan tavat, a je taben thauzan, me je taben haded, me je taben sífte, me je taben libenyita. 26 K' ödrin e owisa ka tavat hnyi ta je úen hia: ke haba ta je ûnyi ae hmak ödrin e hom kö Mose, k' ödrin e owisa biju ta je ûnyi ae ûhnyúkong hia. 27 Ke haba Mose ame hna but ûngon; k' ame he ka hnyi iny hnye.

HNYIMAKAN 19.

HNYI tehi a kuniny hwaban úheny lakon Isaraela hnyi hnyeí Aigupito, hnyi bong eling adre me o but hnyi

hnyebuba Sinai. 2 K' adre me he úheny Refidima, me o hnyi hnyebuba Sinai, me adre me hunuma hnyi hnyebuba; ke haba at Isaraela adre me hunuma cicö bucen. 3 Ke haba Mose ame ölö thö ka Khong, ke haba Iehova ame hongot kâu ethö hon bucen me ha kâu, ka habe, Walang hofuc u me he ka ha ka lap anyi Jekob, me thumeto lakon Isaraela, ka habe; 4 Öbun e wâ but hnök hna ânyâ ka at Aigupito, a oge köp öbun hon labenyin aeto, me hum öbun kõnya. 5 Ke walang ang öbun e ne he ka löng hoton hok hofuc me vheno anyik uhihinykôu, m' öbun e he ka helâ me omjéú ae ûnyi hnathu hon ta je hnyeí hia: anyin a anyik hmeledrany hia: 6 k' öbun e he ka dökuk dökhu a je at bihut, me hnyeí ae kap kõnya. Wale hofuc u me he ka ha ka lakon Isaraela. 7 K' ame o but Mose me háwâ wahingating hnyeí, me haimemenâ ködra hofuc eling a húna Iehova kâu. 8 K' ame thu tavat hia me ha, ka habe, Öhmun e he ka ânyâ ta je ûnyi hia ame ha Iehova. Haba Mose ame thumetu Iehova hofuc hwan tavat. 9 Ke haingö Iehova kö Mose, ka habe, Wâ bi oge me o but kôu hnyi úlá ae khot, me me he tavat ka löng anyik úhnenamö möu, m' adre me labageju bala kôu. Haba Mose ame thumeta Iehova hofuc hwan tavat. 10 Ke Iehova ame ha kö Mose, ka habe, He thö ka tavat, me okabi ödra hnyi bong ang, me bong nyi, k' adre me he ka hneú anyidra je úkhaú: 11 m' adre me penapena hobi kâu bong a kuniny: anyin a haba hnyi bong a kuniny ame he Iehova ka utut hnyi hnyimakan tavat hia thithö hon bucen Sinai. 12 K' u me he ka si hnyigöulen hnyeí igigilö, me habe, Wâ eâu öbun ne he ka öliâ bucen, me kâlâ baten: haba at ama kâlâ bucen adre me he ka hlingâ: 13 e ba hnyamen ke at ame he ka kâlâ, ke so bi adre me he ka lûâ ge veto, ame ne daoâ; ame ca he ka möt, ame ne meno, ame ne at bi: ke ka fuc beú hmâ trutru, me adre me he ka öliâ bucen. 14 Haba Mose ame utut hon bucen ka tavat me okabi ödra; k' adre me hneú anyidra je úkhaú. 15 Ke haingen ka tavat, ka habe, Penapena th' öbun hnân bong a kuniny: ca he ka kâlâ momo. 16 Ke haba hnyi bong a kuniny hnyi hnyomakatu, e hu hendreng, me je hucuce, me úlá ae khöt, me hwan trutru ae gan hmönyin; k' ame öbubuny tavat hia hnyi hna hunuma. 17 Ke haba Mose ame

hom tavat úheny hnyi hna hunuma he ka úkhanö me Khong; k' adre me tot hmelen bucen. 18 K' ame sâ bucen Sinai hia, anyin a Iehova ame ut hnyin meic kâ e: k' ame ölö görany ai sán helâ me sán inyâ ji: k' ame úk hwege bucen hia. 19 Ke gan tot hwan trutru, me Mose ame fuc, ke Khong ame thu kâu hnyi hofuc. 20 K' ame utut Iehova ka hnyi bucen Sinai, ka hnyi ban bucen: ke Iehova ame hao Mose ka hnyi ban bucen: me Mose ame ölö thö. 21 Ke haingö Iehova kö Mose, ha habe, Utut, he ka thawâ tavat wâ adre nye hanyâúâ he ka ö Iehova, me me mokcu tavat ae se hia gadra. 22 Ke haba tavat bihut ödrin e hakekeny kö Iehova, e so ödrin e okabi ödrin bi, wâ enyi gâ but Iehova ködrin. 23 Ke haba Mose ame ha kö Iehova, ka habe, E ca khana tavat he ka öliâ bucen Sinai: anyin a u je húna köhmun, ka habe, Si hnyigöulen dö bucen, me okâbâ. 24 Ke Iehova ame ha kâu, ka habe, He thö, utut: ke u ma he hmetu me Arona ka ölö: ke ca hna tavat bihut me tavat he ka hanyâúâ he ka ölö kö Iehova wâ e nye he ka gâ ködra. 25 Ke haba Mose ame utut ka tavat me ha ködra.

HNYIMAKAN 20.

KE haba Khong ame ha ta je hofuc hia eang, ka habe,

2 Inya Iehova Khongom, at ame hum u úhem hnyi hnyei Aigupito, únyi hnyi hnyaban úthaluo.

3 U ma ca he ka hu ke je khong hnyi hnyimakök.

4 U ma ca he ka bi hnatheat hobi köu, me ouco ke únyi ethö hnyi drany me eang hmelen, me hnyi köiö hmelen hnyei: 5 u ca he ka khudrung ju ködra me bi athnyabaidra: anyin a inya Iehova Khongom, Khong ame ciâ, at ame bi hwaban monu anyin je kamen ka ta je matrân ke ne o but dö a kuniny me dö a vakiny adre me húkötio nya; 6 ke ame omanená tang ibetengiö ka ta je dö a thauzan tavat adre me hnyok kõnya, me tuö anyik je hnanyibu.

7 U ca he ka ha mono iö Iehova a Khongom: anyin ame ca he Iehova ka haisoâ tavat adre me haimono ien.

8 Únykúme ju bong sabath he ka okâbâ. 9 Siks ta bong u ma he ka huliwa hnyin, me ányâ je hudrâm hia: 10 ke haba bong a seveniny, wale sabath anyi Iehova a

Khongom: e ba huliwa u ma he ka ányâ hnyin, u, me nokom бага, me nokom blu, me athnyabaem бага, me momo, me halem meno, me atkanyua unyâm hnyi je homagöulem: 11 anyin a Iehova ame op hnyi siks ta bong drany me hmeledrany, me köiö me ta je únyi hia eú hnyin, k' amemenâ hnyi bong a seveniny: waleling me me hahnahicâ bong sabath hnö Iehova me o kbâ.

12 Ogânâ thö kâmâm me hinyâm me me se hia bongom je bong hnyi hnyei ame he Iehova a Khongom ka ham köu.

13 U ca he ka úhlingö.

14 U ca he ka bi únyi monu.

15 U ca he ka venöu.

16 U ca he ka bi fuco thoiâ ke at.

17 U ca he ka behnyekom uma umen ke at, u ca he ka behnyekom áiân ke at, me athnyabainy a бага, me momo, me haleny bolok, me haleny asina, me ta je únyi hia anyin ke at.

18 Ke haba tavat hia adre me wâ hendreng, me hucucu, me meainy trutru, me bucen ame sâ: ke a wâ but tavat me adre me öbubuny me tot sákâú. 19 K' adre me ha kö Mose, ka habe, Úhnenamö möhmun k' öhmun e he ka löng: ke ca he Khong ka fuc köhmun wâ öhmun nye mokcu. 20 Ke haba Mose ame ha ka tavat, ka habe, Ca ot bi: anyin a o but Khong me me cubic öbun, m' öbun e he ka outen e, m' öbun e ca he ka monu. 21 Ke ame tot sákâú tavat, ke Mose ame hakekenyâ menekholom ae khöt wale ame laba hnyin Khong.

22 Ke haba Iehova ame ha kö Mose, ka habe, Walang hofuc u ma he ka ha ka lakon Isaraela, ka habe, Öbun e wâ but a oge hia but úhnenamö möbun únyi hnyi drany. 23 Ca he öbun ka bi hanok ge khong, a je khong sileva me gol öbun e ca he ka mádrâ hobi köbun. 24 U me he ka ányâ hobi kõnya ke taben hut a kánâ, ke u me he ka hudo hon ányâm je hut adre le, me ányâm je hudiny úsoköu, me halem je mamoe, me halem je kau: haba hnyi je dok hia oge me he ka oúnykúmeâ iök hnyin oge me he ka o köu me ohnahici u. 25 Ke u je ne he ka otílâ taben hut a veto hobi kõnya, u ma ca he ka op e ge je veto adre delâ: anyin a u je ne inâ ányâm únyi huliwa hon, me u je he ka okongoâ. 26 Ke u ca he ka bi wacúat hnân ölö ka hnyi anyik taben hut, wâ e nye manen unyâm ethö hon.

HNYIMAKAN 21.

KE walang je hna owisa u ma he ka omanená ködra.

2 U je ne úco athnyabaem a at Heberu, e ame he ka huliwa hnyi siks ta huna : ke hnyi huna a seveniny e ame he ka he baúá, k' ame ca bi hwaban bi. 3 K' ame ne hake didró, me ame he minya ka hake didrut : k' ame ne hu áián, me ame he áián ka tha didrut me. 4 A ne hu áián a ham káu tuhan, k' ame ne hnokoá lakon бага me hlu ; haba momo me lakon me wale anyin tuhan, ke hake e ame he ka he kha. 5 Ke ame ne hu manená hnen athnyaba, ka habe, Inya oge me hnyoká tubök, me öiök, me lakuk ; oge me ca he ka he baú : 6 hawe, ame he tuhan ka hom e ka hnyat owisa, me hom e ka hnyi hlinginy hwanuma, ame ne ut hwanuma ; k' ame he tuhan ka kou hnyikonyen ge únyi hnán kou ; k' ame he ka bi athnyabainy nyiele balua.

7 Ke ame he ke at ka úco nokon hlu me me athnyaba momo, me ame ca he ka didrut hmetu helá me úheny je athnyaba бага. 8 Ke ame ne ca so momo ka tuhan, wale at ame hom, hamen he ka hna but ködra he ka úco e hmetu : ke ca khana he ka úco momo ka hnyi ke hnyei bi, anyin a e ame iyawá. 9 Ke ame ne ham hlu ka nokon бага, hamen he ka ányá káu helá me hnen hna ányá ka lakon je hlu. 10 Ke ame ne hom ke momo bi ; me ame ca he ka ouhnyúkongo an, me khaúen, me únyi ae úcú ka momo ae hu áián. 11 K' ame ne ca ányá káu ta únyi eling a kun, hawe e ame he ka he baú k' ame ca he ka ham mone.

12 Haba at ame kot moko at adre me he ka hlingá. 13 Ke ame ne ca ikhölö bi, ke ame ne hna ka hnyi hnyamen hnen Khong, me oge me he ka bi hnen hnáu he ka kec ka hnyin. 14 Ke ame ne he ke at ame sihnán ke at he ka hlingá hnen anyin tang iyawö, u ma he ka hom e únyi hnyi anyik taben hut me me mokcu.

15 Haba at ame kot kamen me hinyen, adre me he ka hlingá.

16 Haba at ame venáu at me úco hwaban mone, k' adre me ne wá e unyin, me, adre me he ka hlingá e.

17 Kaba at ame hangá kamen me hinyen adre me he ka hlingá e.

18 Ke a ne ú li at, me ame he ke at ka

lúá ke at hnen veto, ke ame ne kot ge hnyamen adre vhec, ke ame ca mokcu bi, k' ame mokut hon hna mokut : 19 ke ame ne tot hmetu thö, me he eú ame ci, me waleling ame he ka he baú at ame kot e : ke so bi e ame he ka bi hwaban ta je bong e ame úá hnyin, me ti osoá.

20 Ke a ne he ke at ka kot athnyabainy бага, ame ne momo, ge osö, me ame mokcu hnyi hmelen hnyamen : adre me he ka bi hwaban káu. 21 Ke a ne tiga möt hwaban khaca bong ame ne lo, me adre me ca he ka bi hwaban káu, anyin a anyin mone e.

22 Ke a ne ú li at me okongoá momo a erkin, me ame köluhabú nokon, ke so bi e ca kong momo, me adre me he ka bi hwaban káu hoton hna ha hnen áián ; k' ame he ka bi hwaban helá me hna ha hnen hnyat owisa. 23 Ke a ne kong ut hnyi obiny, me adre me he ka ham möt me hwaban möt, 24 ecmak hwaban ecmak, nyu hwaban nyu, hnyamen hwaban hnyamen, can hwaban can, 25 hna thong hwaban hna thong, aat hwaban aat, okhaca hna hwaban okhaca hna.

26 Ke a ne he at ka kot emakan athnyabainy бага, ame ne emakan athnyabainy a momo, me ohia e ; me adre me he ka hna baúá but e hnán hwaban emakan. 27 Ke a ne he ka kot hmetro nyona thnyabainy бага me momo, m' adre me he ka hna baúá but e me hnán hwaban nyon.

28 Ke a ne he kau ka dá at, a ne бага a ne momo, me me mokcu, me adre me he ka lúá ge veto, k' adre me ca he ka an utiöiny : k' adre me he ka hna baúá at ae tren kau. 29 Ke a ne hwakecin kau eling e hac he ka údö, k' adre hia but omanená e ka at ae tren kau, k' ame ca tuö e, me ame hlingá at, a ne бага a ne momo ; me adre me he ka lúá kau ge veto, k' adre me he minya ka hlingá at ae tren kau. 30 Ke adre ne ip hon hwaban, me ame he ka ham hwaban anyin möt, wale ta únyi hia adre ip hon. 31 Ke a ne dá бага nokon ke at, ke a ne momo, me adre me he ka ányá káu helá me hna owisa e. 32 Ke a ne he kau ka dá athnyaba бага ame ne momo ; me ame he at ae tren kau ka ham ka tuhan je sekel sileva a thöti, ke haba kau adre me he ka lúá ge veto.

33 Ke a ne he ke at ka jien thop, ame ne hiny thop, ke ame ca tube e, ke a ne kölu but kau, ame ne asina, 34 me ame he at ae tren thop ka bi hwaban e, me ham

mone ka at a haleny ; ke haba meno a mok ame he ka anyin biju.

35 Ke a ne kot moko kau haleny ke at hnen kau haleny ke at ; me ödrü me he ka üco kau ae möt, me khenâ tang mone ; k' ödrü me he minya ka khenâ meno a mok. 36 Ke a ne manen a g' ame labö üdü e hac kau eling, k' ame ca tuö e bi hnen at a haleny ; me e ame he ka ham ke kau hwaban ke kau, ke anyin biju meno ae mok.

HNYIMAKAN 22.

A NE he at ka venâu kau, ame ne mamoe, me hlingâ e, ame ne üco ; me ame he ka ham thabûng ta kau me hwaban ke kau, me je mamoe a vak me hwaban ke mamoe. 2 Adre ne kât at hnyi üen e ame tiga venöu, ke adre kot moko e, me ba dra hnân bi hwaban. 3 Ke a ne utö seünö hon, me ame he ka hu dra hwaban e ; ke hamen he ka bi hwaban ; ke a ne ba omjehen, me adre me he ka üco e me hwaban hnen hna venöu. 4 K' adre me ne wâ ünyi a venöu ae tiga möt hnyi hnyamen, ame ne kau, ame ne asina, ame ne mamoe ; e ame he ka ham lo me hwaban.

5 A ne he ke at ka okongoâ hna belök, ame ne hnyei vine, me hna haleny meno he ka an hnyei iny ke at ; me e ame he ka bi hwaban soâ ünyi hnyi iny hnyei, ame ne anyin hnyei vine.

6 A ne o thö meic me thong ta je üö ae üdedö, me le hwit ame ta, ame ne hwit ame tot, ame ne hnyei ; me ame he ka bi hwaban hnen at a blogon.

7 A ne ke at ame ip unyin ke at tang mone, ame ne ke ünyi he ka tuö, k' adre me ne venâu ünyi hnyi umen uma ; ke adre me ne wâ at venöu, me ame he ka bi hwaban ibi olo. 8 K' adre me ne ca wâ at venöu, me adre me he ka hom at a umen uma ka hnyat owisa, m' adre me wâ thö, hawa, ame ne hia but inâ hnyamen ka hnyi tang omjehen at. 9 Haba hnyi je hna hanyâûâ hia, ame ne kau, ame ne asina, ame ne mamoe, ame ne ükhaû, ame ne ke unyi bi ae hia, ke haingen ke at, ka habe, ka anyin, me adre me he ka hom hnödra hna ivinö ka hnyat owisa ; ke haba at hnen hnyat owisa hna aat, me hamen he ka ibi olo bi hwaban ka ke at bi.

10 A ne he ke at ka hna asina ka ke at he ka tuö, ame ne kau, ame ne mamoe, ame ne ke meno ; k' ame ne mokcu, k' adre

ne okongo, k' adre ne alen, ke ba at a wâ : 11 me ödrü me he ka khemanyin hnyi hnyimakö Iehova, a ga ca inâ hnyam ka hom ünyi anyin ke at ; k' ame he ka kap e hnen at a haleny ke ame ca he ka bi hwaban. 12 Ke adre ne venöu unyin, me ame he ka bi hwaban ka at a haleny. 13 K' ame ne kikia but, hamen he ka hom hnân ohnathoâ, k' ame ca he ka bi hwaban hna kia.

14 Ke a ne he ke at ka me hom ke ünyi anyin ke at, k' adre ne okongo, k' ame ne mok, ke tiga hia at a anyin, me e ame he ka bi hwaban. 15 Ke a ne tha e me at a anyin, e ame ca he ka bi hwaban : ke a ne ke ünyi adre me me hom hnân hwaban, me ame he ka hu hwaban.

16 A ne he ke at ka cubec ke hlu adre tiga ca kâcâ, k' ame tha mokut më, me ame he ka ham omjeû me me âiân. 17 Ke a ne hücö kamen he ka ham kâu, me e ame he ka ham mone ae ücü me hwaban hlu.

18 U ma ca he ka hna but momo ae tren khong he ka möt.

19 Adre me he ka hlingâ at ame tha mokut me meno.

20 Adre me he ka ti ohia at ame bi hut ka ke khong, ke ca kö Iehova. 21 U me ca he ka okongoâ atkanyua, me ovecâ : anyin a öbun je atkanyua hnyi hnyei Aigupito. 22 Ca he ka okongoâ safac me nakahme. 23 U je ne he ka okongu ödrin, ke odrin e he ka tenge könya, me oge me he ka löng anyidrin tenge ; 24 k' ame he ka ubâhlâ anyik hmönyin, ke oge me he ka hling' öbun ge hele vat ; k' ame he ka safac je laöiöbun, k' ame he biju ka nakahme je lakubun.

25 U je ne he ka me ham mone ka lakeik unyâm at ae ba ta ünyi, ca he ka helâ me at ame ham ge hwaban ; ke u ca he ka hnei hwaban gan. 26 U je ne he ka hom ükhaû anyin ke at hnân haten, me u ma he ka ham hmetu e kâu ke tiga ca dit seünö : 27 anyin a iny kubö a khaca, ke hnân khavâ unyin : k' ame he ka mokut hnyi ieu? ke e ka tenge könya oge me he ka löng, anyin a iny at betenge.

28 U ma ca he ka haikongoâ hnyat owisa, me hangâ at ame musö em hnyei. 29 U ca he ka becâ ham wan em hnyei, me dân wan halem je üö. Ke u me he ka ham könya watö a lakom бага. 30 Ke helâe u me he ka ânyâ ge halem ta je kau, me halem je mamoe : seven ta je bong ame he ka hnen unyin hinyen, ke hnyi bong a

eitiny u me he ka ham kõnya. 31 Ke öbun e he ka tavat ae kap hobi kõnya; anyin a wale öbun e ca he ka han utiö adre olou hnyi hnyot; k' öbun e he ka khûa ka ta je kuli.

HNYIMAKAN 23.

U CA he ka kap üthumetu ae thoi: ke ca hai hnyamâm tha u me at ae monu he ka ohnatho üokonguny. 2 U ca he ka hnu hoton tavat ae se he ka ânyâ monu; ke u ca he ka fuc hnyi ivinö he ka tha hien me tavat ae se hia adre me obnatho thoi; 3 ke u me ca he minya ka betenge ge at ae ba ta'ünyi, hnyi anyin ivinö.

4 U je ne he ka ükhanö me kau, ame ne asina haleny iwahnaihmiony möu, ame he monu, u ma he ka ohmeto e kâu. 5 U je ne wâ asina haleny at ame hûkötio u, ame mokut takoü hnen honen hok, wâ eâu u ne he ka hake hna kâu, u me he ka hom hadruâ.

6 U ca he ka ohwalö hna owisa ka liamewaeny möu ae ba ta ünyi, hnyi anyin ivinö. 7 Üsâkâüo u but me hofuc ae thoi; ke ca he ka kot at ae ba kongon, ke wisa hwakecin: anyin oge me ca he ka haiwisa at ae kong. 8 Ke u me ca he ka kap bwihlany: anyin a haba bwihlany ame omüko at ame wâ, me ohavâ hofuc hwan tavat ae wisa. 9 Ke u ca he ka okongoâ atkanyua: anyin ae khan' öbun hnyekon atkanyua, anyin je atkanyua öbun e hac hnyi hnyei Aigupito.

10 Ke siks ta je huna u me he ka belökâ kânâm kânâ, me meno je wan: 11 ke haba huna a seveniny u me he ka hna but ka me menâ, me me han hnen tavat unyâm ae ba ta ünyi: ke haba je kolon hwabödrin, ame he ka han hnen omeno. Ke u me he ka ânyâ helâe ka halem ta je vine me elaiö. 12 Hnyi ta bong a siks u ma he ka ânyâ je hudrâm, ke haba hnyi bong a seveniny u me he ka menâ: me me hnyi menâ halem bolok, me halem asina, me me he ka ohwegiâ hmeto nokon athnyabaem a momo, me atkanyua. 13 Ke hnyi ta je hofuc hia oge ba köbun, wâ eâu: ke ca he öbun ka ha ien ke ta je khong, k' adre me ca he ka löng e ünyi hnyi hnyimâm.

14 Kun ta üen u me he ka bijeu hnyi kõnya knyi huna. 15 U me he ka bijeuâ areto adre ca levenâ bi: seven ta bong u me he ka han areto adre ca levenâ, helâ

me hnök hna hûna köu, hnyi üen adre thu, hnyi tehi Abiba (anyin a u je he but ühem Aigupito hnyi tehi eling); ke ca he ke at ka manen hnyi hnyimakök ke ba ünyi: 16 me bijeuâ hna meno, ta je wan a bân hnyi ânyâm huliwa, wale u je ta hnyi hnyei: me bijeu adre meno hnyi obiny huna, üen u je um dö meno hnâm hna huliwan hnyi hnyei. 17 Haba obaga hia unyâm adre me he ka okun manen hnyi huna hnyi hnyimakan Than Iehova.

18 U ma ca he ka hudo kõnya dra tha e me areto adre levenâ; k' ame ca he ka laba ke ne o but hnyomakatu pipikhenyainy meno adre hudo kõnya. 19 U me he ka hom ka hnyi uma umö Iehova a Khongom ta je jeü a bân ünyi hnyi kânâm kânâ. Ke ca he ka ölä nokon got hnyi dân basin hinyen.

20 Wâ bi, inya oge me kunâ angela he ka bân hnyi hnyimâkâm he ka tuö u eü hnyi gethen, me hum u ka hnyi dok oge hia but penapena. 21 Wâ wia e bi, me löng hoton hwan hofuc: ca he ka ohmönyinâ: anyin a e ame ca he ka hna degecâ hnâm ta je hna hanyâüâ; anyin a eü hnyi hnyekon iök. 22 Ke u ka he ka löng hoton hwan hofuc, me ânyâ hia hnök hna ha; me oge me he ka iwahnaihmiony me je iwahnaihmiony möu, me ivinö me at ame ivinö möu. 23 Anyin ame he anyik angela ka hnyimakan ânyâm bunyen, me hum u ka at Amora, me Heth, me Perizi, me Kanana, me Hivi, me Jebusi: k' oge me he ka oh' ödra. 24 U ca he ka khudrung ka ta je khongundrin, me bi athnyaba ködrin, me ânyâ helâ me anyidrin huliwa: ke so bi u me he ka hagut' ödrin, me kot omomono anyidrin je veto ame tot. 25 K' öbun e he ka bi athnyabai Iehova Khongubun, me ame he ka hahnahicâ âm me belâm; ke oge me he ka hom mok ünyi gam. 26 E ba at ame he ka köluhabü nokon, ke ba ke at ame he ka safac hnyi em hnyei: ke oge me he ka ohwâdâ numerainy bongom ta je bong. 27 Oge me he ka kunâ hnân outö nya hnyi hnyimâkâm, me ovecâ ta je hnyei hia u me he ka o ka hnyin, k' oge me he ka kunâ ta je iwahnaihmiony hia möu he ka kec gam. 28 Ke oge me he ka kuna bânâ wahan-kânâ wale ame he ka obâ at Hivi, me Kanana, me Heth ünyi hnyi hnyimâkâm. 29 Oge me ca he ka ob' ödra hnyi huna a khaca, wâ e nye hnyotö kânâ, k' ame osehia but omenoiny hnyot köu. 30 Ke oge me he ka ob' ödra ühnyükong tot

hnyi hnyimâkâm ke ne o but u me se hia, me labâ hnyei. 31 Ke oge me he ka si hnyigöulâm hwân hnyi Köio ae Dra ke ne o but ka hnyi köien at Filisiti, ke hwân hnyi hnyebuba ke ne o but hnyi Wagewe : anyin oge me he ka hna ka hnyi hnyamöbun tavat adre me labâ hnyei ; k' u me he ka ob' ödra hnyi hnyimâkâm. 32 U me ca he ka úhibinykôu m' ödra me je khongudrin. 33 Adre me ca he ka laba hnyi em hnyei wâ odra nye bi jônâm kõnya : anyin a u je ne he ka bi athnyaba je khongudrin, wale thibi e hnân nuc u.

HNYIMAKAN 24.

KE e ame ha kö Mose, ka habe, Ölö thö kö Iehova, u, me Arona, me Nadaba, me Abiu, me wahingatiny Isaraela a sevente ; ke öbun e he ka khudrung sâkâú : 2 ke haba Mose ame he ka hake hakekeny kö Iehova ; ke ödrin e ca he ka hakekenyâ ; k' ame ca he tavat ka tha ölö me. 3 Ke Mose ame he me thumeto ta je hofuc ho Iehova, me ta je hna owisa hia ; ke ame thu hnen tavat hia hnyi hofuc a khaca, ka habe, Öhmun e he ka ânyâ ta je hofuc hia a ða hnö Iehova. 4 Ke haba Mose ame sihnalimen je hofuc ho Iehova, me vesâkong, me otilâ taben hut hmelen bucen, me je veto ame tot a twelv hoton je tribu a twelv anyin at Isaraela : 5 Ke e ame kunâ wahidrou a je lakon Isaraela, m' ödrin e hudo ta je hut adre le, me hudo kö Iehova je kau hnân hudiny úsoköu. 6 Haba Mose ame hom ke keihen dra, me hingâlâ ka hnyi je kaia ; ke haba kolon dra e ame dukâiâ kâu taben hut. 7 Ke e ame hom tusiny úhibinykôu, me aú, k' ame löng tavat : me haingödra, ka habe, Öhmun e he ka ânyâ hia hna ha hnö Iehova, me löng hoton. 8 Ke haba Mose ame hom dra me dukâiâ tavat, me ha, ka habe, Wâ bi dren úhibinykôu a ânyâ Iehova m' öbun hnyi je hofuc hia eang. 9 Ke haba Mose ame tha ölö me Arona, me Nadaba, me Abiu, me wahingatiny at Isaraela a sevonte : 10 ke ödrin e wa Khongon at Isaraela ; ke eú hnyi hmelen li can helâ me dek veto a safairo, ke helâ me drany ae alai. 11 Ke e ame ca ip hnyamen hon je thaniny lakon Isaraela : k' ödrin e wâ Khong me han me ic. 12 Ke Iehova ame ha kö Mose, ka habe, Ölö thö kõnya hon bucen, me laba eling : ke oge me he ka ham köu li veto ae lau, me hnanyibu me je hna hûna waleji

oge sihnalimen, m' u me he ka úne. 13 Ke Mose ame todrö me Josua athnyabainy : ke Mose ame öliâ bucen anyin Khong. 14 Ke haingen ka wahingat, ka habe, Halubahing öhmu ju öbun eang ke ne o but öhmu me hmetu köbun : ke wâ bi e unyibun Arona me Huro : ke a ne hu hna ivinö ge at, me ame he ka he ködrü. 15 Ke haba Mose ame öliâ bucen, k' ame khavâ bucen hnen úlâ. 16 Ke haba hmanenangi Iehova ame laba hon bucen Sinai, k' ame oiyongâ hnen úlâ hnyi siks ta bong : ke hnyi bong a seveniny e ame laba hnyin úlâ me hao Mose. 17 Ke haba hwakecin hmanenangi Iehova, me, helâ me meic ame han hnyi hon bucen hnyi hnyimakan lakon Isaraela. 18 Ke Mose ame dit ka hnyin úlâ me öliâ bucen : ke ethö Mose hon bucen fâte je lany ke fâte je lit.

HNYIMAKAN 25.

KE Iehova ame ha kö Mose, ka habe, 2 Ha thö ka lakon Isaraela m' adre me hom bwihlany hobi kõnya, öbun e he ka hom anyik bwihlany hoton weny je hnyekudra. 3 Ke walang bwihlany öbun e he ka kap únyi gadra, gol, me sileva, me bras ; 4 me je mano udruadrâ, me udruadrâ hlit, me dra vec, me lino ae úhnyúkong nân, me leünen got ; 5 me je unen mamoe бага adre wia me me dra, me je unen takasa, me je úö ohum ; 6 me wakaco hnân unumelam, me ta je únyi ae bo so hnân le ; 7 me je veto soama, me je veto hnân mokut hnyi iefoda, me tubiny úlainy. 8 K' adre me he ka ânyâ hobi kõnya dok ae kap ; m' inye he ka laba unyidra. 9 Öbun e he ka ânyâ helâ me ta je hofuc hia oge me omanenâ köu, tulutiny uma, me tulutiny omjehen, öbun e he ka ânyâ helâe. 10 K' adre me he ka tibet ke tang a utö ohum : ame he ka lo li kubit me haf ibeüen, ke khaca kubit me haf úlauen, ke khaca kubit me haf ibeüen göranyai. 11 Ke u me he ka tube hnyin me hoton ge gol ae so, ke u me he ka bi koronainy a gol. 12 Ke u me he ka le je otru gol a vak hobi kâu, me ohmâ hnyi je can a vak ; lo li otru hnyi ke keihen ; ke lo hnyi ke keihen. 13 Ke u me he ka ânyâ li utö ohum hnân venyâ, me tube ge gol. 14 Ke u me he ka in' li únyi e hnyi hnyin je otru hnyi li ke keihen tang, hnân vadren kâu tang. 15 Ame he ka mokut li venyâ hnyi hnyin je otruiny tang, ca he ka oc ut. 16 Ke

u me he ka hitangen hnyin tang únyi hnân ohnatho, wale oge me he ka ham kôu. 17 Ke u me he ka ányâ taben ibetengiö gol ae so: lo li kubit me haf ibeüen, ke khaca kubit me haf úlaunen. 18 Ke u me he ka ányâ li kerubi gol; u me he ka tibet me huliwan ge hama, hnyi li bahebetiny taben ibetengiö. 19 U ma tibet ke kerubi hnyi ke bahebet, me ke kerubi hnyi ke bahebet: öbun e he ka ip li kerubi me hanen taben ibetengiö hnyi li ke keihen. 20 K' ame he li kerubi ka lau göranyai li labenyidru, me me khavâ taben ibetengiö ge li labenyidru, ke ödru me he ka úhnyimakö-drukou; k' ame he li kerubi ka hnyimakö-dru ka hnyi taben ibetengiö. 21 Ke u me he ka ip taben ibetengiö ethö hon tang: ke u me he ka hitangen hnyin tang únyi hnân ohnatho oge me he ka ham kôu. 22 Ke oge me he ka iouny möu eling, me úhne-namö möu únyi ethö hon taben ibetengiö, únyi hnyi wanben li kerubi hon tang hnân ohnatho, hnyi ta je hofuc oge me he ka húna kôu hobi kâu lakon Isaraela.

23 Ke u me he ka tibet utö ohum hnân laulau: lo li kubit ibeüen, ke khaca kubit úlaunen, ke khaca kubit me haf ibeüen göranyai. 24 Ke u me he ka tube ge gol ae so, me bi koronainy gol hnyi je baten. 25 Ke u me he ka bi baten igigilö a khaca hnyam, me bi koronainy baten igigilö e ge gol. 26 Ke u me he ka tibet hobi kâu je otru gol a vak hnyi je baten a vak, wale hnyi je can a vak. 27 K' ame he ka úhakekenyi je otru me baten hnân hnen li venyâ, m' adre me vaden laulau. 28 Ke u me he ka ányâ li venyâ ge utö öhum, me tube ge gol, m' adre me vaden laulau kâu. 29 Ke u me he ka ányâ je utkaiainy, me je spuniny, me je jöginy, me je kaiainy, hnân hingála: u me he ka ányâ je únyi eling gol ae so. 30 Ke u me he ka ip bala hnyi hnyimakök hon laulau areto hnân omanená.

31 Ke u me he ka ányâ taben lamepa gol ae so: ke u me he ka ányâ taben lamepa me huliwan ge hama, wale can, me unyin; k' adre me he ka khacâ mē je kaiainy, me je oveijen, me je vongon: 32 ke ame he ka vhei siks ta vheiny únyi hnyi li ke keihen; kun ta vheiny taben lamepa hnyi ke keihen, ke kun ta vheiny taben lamepa hnyi ke keihen: 33 kun ta kaia helâ me vhonginy saked, me oveijen, me vongon, hnyi ke vheiny; ke kun ta kaia helâ me vhonginy saked hnyi ke vheiny, me oveijen, me

vongon: ame he ka helâe hnyi je vheiny a siks a vheivhei únyi hnyi taben lamepa: 34 ke vak ta kaia hnyi taben lamepa helâ me je vhonginy saked, me je oveijen, me je vongon: 35 ke ke oveijen hmelen li vheiny me khacâ mē, me ke oveijen hmelen ke li vheiny me khacâ mē, hnân je vheiny a siks ame vhei únyi hnyi taben lamepa. 36 Ke únyi hnyi únyi a khaca je oveijen me je vheiny eling: a khaca thibi hia thithö hna huliwan ge hama gol ae so. 37 Ke u me he ka ányâ je lamepainy me me seven: k' adre me he ka vác je lame-painy me me umumelam igigilö. 38 Ke ame he ka gol ae so li uthesiúniny, me taben hleúhleú. 39 Ke khaca talan gol ae so adre me he ka ányâ tha e me je taben hia eling. 40 Ke wâ bi, me u me he ka ányâ ta je únyi e helâ me tulut adre omanená kôu hon bucen.

HNHYIMAKAN 26.

KE u me he ka ányâ uma mano a ten je tubwiny; a mano lino ae úhnyükong nân adre seveny, me udrudrá, me udrudrá hlit, me dra vec, k' ame he hnyat buliwa ae metâ ka huliwan ge je kerubi. 2 Haba ibeüen je tubwiny, ame he ka twente eit je kubit, ke úsa vak kubit úlaunen je tubwiny: ame he ka khaca tulutiny ta je tubwiny hia. 3 Adre me he ka útibetkôuâ ta tubwiny a thabúng ke at me ke at; k' adre me he ka útibetkôuâ ke je tubwiny a thabúng ke at me ke at. 4 Ke u me he ka ányâ je hnyimen hnewe ae udrudrá hnyi baten tubwiny hnyi hna ohmâ; ke u me he ka ányâ helâe minya hnyi ke baten tubwiny, hnyi hna ohmâ khaca. 5 Fifte hnyimen je hnewe u me he ka ányâ hnyi ke baten tubwiny, ke fifte hnyimen je hnewe u me he ka ányâ hnyi baten tubwiny hnyi hna ohmâ a loiny, me me he hnyimen je hnewe ka tha úcü. 6 Ke u me he ka ányâ je bâlet gol a fifte, me úseú-kôuâ je tubwiny ge je bâlet: me me khaca uma mano. 7 Ke u me he ka ányâ je tubwiny unen got hnân khavâ uma mano: eleven je tubwiny u me he ka ányâ. 8 Ke baba ibeüen je tubwiny ame he ka úsa thöte je kubit, k' ame he ka úsa foa kubit úlaunen je tubwiny: k' ame he ka khaca tulut je tubwiny a eleven. 9 Ke u me he ka úobmâ-kôuâ je tubwiny a thabúng me me khaca, me je tubwiny a siks me me khaca, me u me he ka vhec tubwiny a siksiny hnyi hnyi-

makan uma. 10 Ke u me he ka ányá hnyimen je hnewe a fitte hnyi baten tubwiny hnyi hoton hnyi ohmáiny, ke fitte hnyimen je hnewe hnyi baten ke tubwiny hnyi hna ohmá a loiny hnyi hoton. 11 Ke u me he ka ányá je bálet bras a fitte, me odilá je bálet ka hnyi hnyimen je hnewe, me me úohmákouá uma me me khaca thibi. 12 Ke haba ke keihen kolon je tubwiny uma, wale kolon a hafiny tubwiny uma, ame he ka him hnyi hoton uma mano. 13 Ke haba kubit hnyi ke keihen a khaca, me kubit hnyi ke keihen a loiny, wale únyi hnyi kolon hnyi ibeúiny je tubwiny uma, ame he ka him hnyi li ke keihen uma mano hnyi ke baten me ke baten hnán khavá e. 14 Ke u me he ka ányá hnán tube uma je unen mamoe бага adre wia e me dra, me je unen takasa hna tube ban.

15 Ke u me he ka ányá je esö öhum adre me he ka otílá hnán uma mano. 16 Ame he ka úsa ten kubit ibeúen je esö, ke úsa khaca kubit me haf úlaunen je esö. 17 Ke ame he ka úsa lo can hnán dit hnyi je esö he ka tha hújákouá : ke u me he ka ányá heláe je esöiny hia uma mano. 18 Ke u me he ka ányá je esö a twente hobi káu uma mano hnyi ke keihen ka hnyi hwaiöu. 19 Ke fáte je taben sileva u me he ka ányá eú hmelen je esö a twente; lo li taben eú hmelen ke esö hobi káu li can, ke lo li taben hmelen ke esö hobi káu ke li can : 20 ke ame he ka twente je esö hobi káu ke keihen uma mano ka hnyi hwadrö : 21 k' ame he ka fáte je taben sileva ; lo li taben eú hmelen ke esö, me ke li taben eú hmelen ke esö. 22 Ke u me he ka ányá je esö a siks hobi káu hnyaumainy uma mano e jio. 23 Ke u me he ka ányá lo li esö hobi káu hnyaumainy uma mano hnyi li kop. 24 K' adre me he ka ányá me me úsa lo eú, ke adre me he ka úohmákouá ke ne o but ethö hnyi ke otru ; k' ame he ka heláe li at a lo hia ; wale hnán hobi káu li kop. 25 K' ame he ka hu eit je esö, me je taben, me je taben sileva a sikstin ; lo li taben hmelen ke esö, ke lo li taben hmelen ke esö. 26 Ke u me he ka ányá je venyá öhum ; thabúng hobi káu je esö hnyi ke keihen uma mano, 27 ke thabúng je venyá hobi káu je esö hnyi ke keihen uma mano, ke thabúng je venyá hobi káu je esö hnyi ke keihen uma mano, hobi káu hnyaumainy e jio. 28 Ke haba venyá hnyi wanben wale ame mokut hnyi wanben je esö, ame he ka hwán hnyi ke baten ke ne o but ka

hnyi ke baten. 29 Ke u me he ka khavá je esö ge gol, me ányá je otru gol hnán iná je venyá : ke u me he ka khavá je vhenyá ge gol. 30 Ke u me he ka otílá uma mano hoton tulutiny adre hia but omanená kóu hon bucen.

31 Ke u me he ka ányá singiny a mano ae udrudrá, me udrudrá hlit, me dra vec, me lino ae úhnyúkong nán adre seveny ; ka adre me he ka ányá hnyin je kerubi a huliwan hnyat ae metá : 32 ke u me he ka uhno e hnyi vak ta utö öhum ame tot adre khavá ge gol, me je bálet gol, hnyi je taben sileva a vak. 33 Ke u me he ka uhno singiny hmelen je bálet, me hom eiö tang hnán ohnatho ka hnyi hoton singiny : k' ame he singiny ka bi hnyigöulen köbun dok ae kap me dok ae ti kap. 34 Ke u me he ka ip taben ibetengiö ethö hon tang hnán ohnatho hnyi dok ae ti kap. 35 Ke u me he ka ip laulau hnyi ke keihen singiny hnyou ai, me taben lamepa cicö laulau hnyi ke keihen uma mano ka hnyi hwaiöu ; ke u me he ka ip laulau hnyi ke keihen ka hnyi hwadrö. 36 Ke u me he ka ányá hobi káu hwanumen uma hlinginy ae udrudrá, me udrudrá hlit, me dra vec, me lino ae úhnyúkong nán, a huliwan hnyat omecá mano. 37 Ke u me he ka ányá utö öhum ame tot a thabúng hobi káu hlinginy, me khavá ge gol ; me je bálet gol, me le je taben bras a thabúng hobi káu je utö.

HNHYIMAKAN 27.

KE u me he ka tibet taben bihut a utö öhum, faiv je kubit ibeúen, ke faiv kubit úlaunen ; ke khaca tulut vak ta baten taben bihut : ke kun ta kubit ibeúen göra-nyai. 2 Ke u me he ka ányá je baitoiny hnyi vak ta baten, haba je baitoiny me khaca me unyin : ke u me he ka khavá ge bras. 3 Ke u me he ka ányá je taben hnabadröiny, me je soi, me je kaiainy, me je báletiny hnán seú utiö, me je taben meic, u me he ka ányá je taben hia a bras. 4 Ke u me he ka ányá hobi káu echigic a bras helá me boert ; ke u me he ka anyá hon boert je otru bras a vak hnyi je baten a vak. 5 Ke u me he ka ip únyi e eú hmelen baten taben bihut hnyikánái, me me he ka uhni boert hnyi wanben taben bihut. 6 Ke u me he ka ányá ke li venyá hobi káu taben bihut, a li öhum, me khavá ge bras. 7 Ke adre me he ka iná li venyá hnyi hnyin je

otru, k' ame he ka hnen li venyâ hnyi li baten taben bihut, m' adre me vaden. 8 U me he ka tibet esöiny me olanyâ hnyin: adre me he ka ânyâ helâ me hna omanenâ köu hon bucen.

9 Ke u me he ka bi haginy uma mano; haba hnyi ke keihen ka hnyi hwaiöu adre me he ka uhno mano lino ae ûhnyükong nân adre seveny hnân hak, a khaca haded je kubit ibeüen hnyi ke keihen a khaca: 10 ke twente je khetepiny, me je taben bras a twente hobi kâu, k' ame he ka sileva je bâletiny je khetep, me je venyâ. 11 Ke helâe ibeüen hnyi ke keihen ka hnyi hwadrö, khaca haded kubit ibeüen mano adre uhno, k' ame he ka bras je khetepiny a twente, me je taben a twente; k' ame he ka sileva je bâletiny je khetep me je venyâ. 12 Ke adre me he ka uhno mano fiftin kubit hnyi ke keihen homagöule: k' ame he ka kun ta khetepiny, ke kun minya ta taben. 13 Ke haba hnyi ke keihen adre me he ka uhno mano fiftin kubit, ke kun ta khetep, ke kun ta taben. 14 Ke twente kubit mano ame he ka uhni hnân hlinginy homagöule, ame he ka udrudrá, me udrudrá hlit, me dra vec, me lino ae ûhnyükong nân adre seven, a huliwan ge hnyat omecâ mano: ke vak ta khetepiny, ke vak ta taben. 15 Ke adre me he ka vhenyâ je khetep hia igigilö hak ge je vhenyâ sileva; ke sileva je bâletiny, ke bras je taben. 16 Ke ame he ka khaca haded kubit ibeüen hak, ke fite kubit ûlauen, ke thabüng ta kubit ibeüen göranyai, a mano lino ae ûhnyükong nân adre seven, ke bras je taben. 17 Ame he ka bras hia je ûnyi hnyi uma mano, hnân hobi kâu je huliwa hia thithö, me je faoiny hia, me je faoiny hia hnyi hak.

18 Ke u me he ka hûna ka lakon Isaraela he ka hom köu wakaco elaiö ae alai adre kokot hnân umumelam, me me möt bala lamepa. 19 Ame he Arona me je lakon ka ânyâwia e hwân hnyi salac ke ne o but hnyomakatu, hnyi hnyimakö Iehova, hnyi uma ûkhacaköu, hnyi ke keihen deiö singiny ûnyi hnân ohnatho: ame he ka tot hnân hnanyibu ûnyi eling nyiele balua hnyi anyidra ta je dö hobi kâu lakon Isaraela.

KE hom dö köu Arona a tuhâm me je lakon a tha ödrin me, ûnyi hnyi lakon Isaraela, m' ödrin e he ka huliwa könya hnyi je hanyemen at bi hut; Arona, me Nadaba, me Abiu, me Eleazara, me Ithamara, a je laku Arona. 2 Ke u me he ka tibit je ûkhaû ae kap hobi kö Arona tuthâm, ûnyi ae mec me hmanenang. 3 Ke u me he ka ha ködrin hia hnyat ae metâ hnyok, wale hnyat oge hia but ounöngötâ ge metâ, m' ödrin e he ka tibet je ûkhaû Arona, m' adre me okhabâ me me at bihut könya. 4 Ke walang je ûkhaû adre me he ka tibet, ka habe, tubwiny ûlainy, me iefoda, me ûkhaû ae beü, me ûkot ae hu hnalimen, me hnabinybak, me wen hnyekon: adre me he ka tibet je ûkhaû ae kap hobi kö Arona tuhâm, me je lakon, me me at bihut könya. 5 K' adre me he ka hom gol, me mano ae udrudrá, me udrudrá hlit, me dra vec, me lino ae ûhnyükong nân.

6 K' adre me he ka tibet iefoda gol, me mano ae udrudrá, me udrudrá hlit, me dra vec, me lino ae ûhnyükong nân adre seveny a huliwan hnyat ae metâ. 7 Ame he ka hu ke mano hon li bajebenyin adre ûtibe-tköuâ hnyi li hnyiban; me me khaca thibi. 8 Ke haba wen iefoda adre hwâwâ metâ, hnân he ka okhavâ, adre me he ka huliwan a tha úcu me, me khacâ me; wale gol, me mano ae udrudrá, me udrudrá hlit, me dra vec, me lino ae ûhnyükong nân adre seveny. 9 Ke u me he ka hom li veto soama, me kave hon ien lakon Isaraela: 10 siks je iödrin hnyi ke veto, ke siks minya je ien hnyi ke veto, hoton je útangköu. 11 U me he ka kave hon li veto je ien lakon Isaraela, ge huliwa anyin at ame khavi veto, helâ me bongon kave ûnyi hnân bi haten: u me he ka ânyâ me ohmâ hnyi li gol hnân taben. 12 Ke u me he ka ohmâ li veto ka hnyi hon li bajebenyin iefoda, me me li veto hnân oünykúmeâ ka lakon Isaraela: k' ame he Arona ka hom je iödrin hyi hnyimakö Iehova hnyi hon li bajebenyin hnân oünykúmeâ.

13 Ke u me he ka ânyâ li gol hnân taben: 14 ke u me he ka ânyâ li cein gol ae so adra khenyö helâ me tö, me ohmâ li cein adre khenyö ka hnyi li taben. 15 Ke u me he ka ânyâ tubwiny ûlainy hnân owisa a huliwan hnyat ae metâ; u me he

ka ányá e helá me ihuliwainy iefoda ; u me he ka ányá e ge gol, me mano ae udrudrá, me udrudrá hlít, me dra vec, me lino ae úhnyúkong nân adre seveny. 16 Ame he ka khaca tulut je baten a vak, k' adre thu ; haba tulut, me, khaca hnyam ibeúen, ke khaca hnyam úlauen. 17 Ke u me he ka ip hnyin je deó veto, a vak ta deó veto : haba dö a bân, me, sadis, me topazio, me bereketh : 18 ke haba dö a loiny, me, semerado, me safairo, me aloma ; 19 ke haba dö a kuniny, me, lesema, me sevo, me amethusa ; 20 ke haba dö a vakiny, me, berulo, me sadonuki, me jasepi ; adre me he ka ve bi taben ta je únyi e hnyi gol. 21 Ke ame he ka hnen hnyi je veto je ien lakon Isaraela a twelv, hoton je iödrin, helá me hna kave únyi hnân bi haten, ame he ka ve hu ien hoton je tribu a twelv. 22 Ke u me he ka ányá hnyi tubwiny úlainy li cein gol ae so adre khenyö. 23 Ke u me he ka ányá hnyi tubwiny úlainy li otru gol, ke u me he ka ip li otru hnyi li hnyiban tubwiny úlainy. 24 Ke u me he ka iná li cein gol adre khenyö hnyin li otru hnyi li baten tubwiny úlainy. 25 Ke u me he ka ohmá li hnyiban li cein adre khenyö hnyi li taben, me ip li únyi e hon ke keihen bajebenyin iefoda hnyi hnyimakan. 26 Ke u me he ka ányá li otru gol, me ohmá hnyi li ke keihen khaúen úlainy hnyi baten hnyi ke keihen ban hnyin iefoda. 27 Ke u me he ka ányá ke li otru gol, me ohmá hnyi li hnyiban hon bajebenyin iefoda eú hnyi hnyimakan, hnyi hna úohmákouá ethö hon wen adre hwáwá metá. 28 Ke adre me he ka ca tubwiny úlainy ge li otru ka hnyi li otruiny iefoda ge telenu ae udrudrá me me he ka mokut hon wen iefoda adre hwáwá metá, me me ca he ka ok tubwiny úlainy hnyi iefoda. 29 Ke ame he Arona ka hom je ien lakon Isaraela hnyi tubwiny úlainy, a únyi hnân owisa, hon oúnykúminy bi, e ka didro ka hnyi dok ae kap hnân oúnykumeá bala hnyi hnyimakö Iehova. 30 Ke u me he ka ip hnyi tubwiny úlainy hna owisa Urim me Thumim ; k' ame he ka hnen li únyi e hon oúnykúmi Arona e ka didró ka hnyi hnyimakö Iehova : ke Arona ame he ka hom hna owisa hobi káu lakon Isaraela hon oúnykúminy bi hnyi hnyimakö Iehova bala.

31 Ke u me he ka tibet úkhaú ae beú hanen iefoda ge mano ae udrudrá hia. 32 Ke ame he ka hu hnyimen deny ban hnyi wanben ; k' adre me he ka tibet telenu adre

hwáwá igigilö hnyimen, helá me man úkhaúen vat me me ca he ka mou. 33 Ke u me he ka ányá hnyi obiny je wan rimona ae udrudrá, me udrudrá hlít, me dra vec, hnyi obiny úkhaú igigilö ; me je pate gol hnyi wanben ta je únyi e igigilö : 34 khaca pate gol me khaca wan rimona, me khaca pate gol me khaca wan rimona, hnyi obiny igigilö úkhaú. 35 Ke adre me he ka okhaúö Arona hnân huliwa ; k' adre me he ka löng úcuhainy e ka didró ka hnyi dok ae kap hnyi hnyimakö Iehova, me dit hmetu but, me me ca he ka mok.

36 Ke u me he ka ányá ke wahano a gol ae so, me kave hon helá me hna kave únyi hnân bi haten, ka habe, E KAP KÖ IEHOVA. 37 Ke u me he ka ohmá e ka hnyi telenu ae udrudrá, me me hnen hnyi hnabinybak ; ame he ka hnen hnyi hnyimakan hnabinybak. 38 K' ame he ka e hnyi bari Arona, me me he Arona ka hom monuiny ta je únyi ae kap, ame he ka okabá hnen lakon Isaraela hnyi anyidra ta je bwihlany hia ae kap ; ke ame he ka e bala hnyi bariny me me he ka kap soi ödra hnyi hnyimakö Iehova. 39 Ke u me he ka hwáwá úkot lino ae úhnyúkong nân ae sisit, ke u me he ka ányá hnabinybak lino ae úhnyúkong nân, me u me he ka ányá wen hnyekon, a huliwan at omecá mano. 40 Ke u me he ka tibet je úkot hobi káu je laku Arona, me u me he ka ányá hobi ködrin je wen hnyekudrin, ke u me he ka ányá hobi ködrin je hnabinybak, hnân mec me hmanenang. 41 Ke u me he ka okhaúö Arona tuhâm me je lakon unyin ge je úkhaú ; ke u me he ka hú' ödrin, me otill' ödrin, me okabi ödrin, m'ödrin e hnyat bihut kõnya. 42 Ke u me he ka tibet hobi ködrin je utrauzes me me khavá unyidrin hwân hnyi fetriny ke ne o but hnyi li jevan : 43 k' ame he Arona ka khavá e me je lakon, ödrin ka he ka didró ka hnyin umá úkhaçaköu, me hakekenyá taben hut he ka huliwa hnyi dok ae kap ; me me ca hu jöndirin m' ödrin e moku ; wale hnanyibu nyiele balua hobi káu me je mât rániny a hwaban.

HNHYIMAKAN 29.

KE walang únyi u me he ka ányá ködrin he ka okabi ödrin hnân he ka huliwa kõnya hnyi hanymen at bihut : hom dö nak bolok a khaca me lo li mamot бага ae ba hnyikongon, 2 me areto adre ca levená bi, me je ong areto adre ca levená

k' adre úthueniken me wakaco, me je ong aretoae halelôu adre ca levenâ k' adre khinô wakacoiny : u me he ka ânyâ ge falawainy hwit adre omomono wia. 3 Ke u me he ka tha hitangen, me hom hnyi tangen, me bolok me li mamoe бага. 4 Ke haba Arona me je lakon u me he ka hum ödrin ka hnyi hwanumen uma hnân úkhacaköu, ke u me he ka osu' ödrin ge köiö. 5 Ke u me he ka hom je úkhaú, me okhaúö Arona ge úkot me khaúen ae beú hanen iefoda, me iefoda, me tubwiny úlainy, ke u me he ka oweikâ e ge wen iefoda adre hwáwâ metâ : 6 ke u me he ka obicâ ge hnabinybak, me ip korona ae kap hon hnabinybak. 7 Me u me he ka hom wakaco hnân hú, me hingâlâ hon ban me hú. 8 Ke u me he ka hom je lakon me okhaú' ödrin ge je ukot. 9 Ke u me he ka oweik' ödrin ge wen hnyekon, wale Arona me je lakon, ke u me he ka obic' ödrin ge je hnabinybak ; m' ödrin e he ka hnyat bihut, wale hanymodrin hnyi hnanyibu nyiele balua : ke u me he ka okabi Arona me je lakon. 10 Ke u me he ka hom bolok ka hnyi hnyimakan uma hnân úkhacaköu : k' ame he Arona me je lakon ka ip je hnyamödrin hon ban bolok. 11 Ke u me he ka hlingâ bolok hnyi hnyimakö Iehova hnyi hwanumen uma hnân úkhacaköu. 12 Ke u me he ka hom ke keihen dren bolok me kina hon je baitoiny taben hut hnen banyâm ; ke u me he ka hingâlâ kolon dra hia hnyi hmelen taben hut. 13 Ke u me he ka hom hia pipikhenyainy wale ame lan tang tiny, me únyi ae lau hon akiny, me li wagien me pipikhenyainy, ke u me he ka le hon taben hut. 14 Ke haba utiöiny bolok, me unen, me ta tet, u me he ka le hnyi meic hoton hna hunuma ; wale hudiny bulö. 15 Ke u me he ka hom ke mamoe бага a khaca ; k' ame he Arona me je lakon ka ip je hnyamödrin hon ban mamoe бага. 16 Ke u me he ka hlingâ mamoe бага, me hom dren, me dukâiâ hon taben hut igigilö. 17 Ke u me he ka susubâ mamoe бага me hneú tang tiny, me je can, me tha ip ta je únyi e me je hnyiban, me ban. 18 Ke u me he ka tha le hia mamoe бага hon taben hut ; wale hut hnân le kö Iehova : wale hut ae bo so, me hut a le ge meic kö Iehova. 19 Ke u me he ka hom ke mamoe бага a khaca, k' ame he Arona me je lakon ka ip je hnyamödrin hon ban mamoe бага. 20 Ke u me he ka hlingâ mamoe бага me hom ke keihen dren me kina

hnyi bouólöloven hnyikönyö Arona a metân, me hnyi bouólöloven je hnyikönyen lakon Arona a metâ, me je bahnyökveto gadrin a metâ, me je bacan gadrin a metâ, me dukâiâ hon taben hut igigilö e ge dra. 21 Ke u me he ka hom ke keihen dra únyi hnyi hon taben hut, me wakaco hnân hú, me duköiö Arona, me je úkhaúen, me je lakon, me je khaúen lakon unyin : ke adre me he ka okabâ, me je úkhaúen me je úkhaúen lakon unyin. 22 Ke u me he ka hom pipikhenyainy mamoe бага, me obiny ae pipikhenya, me pipikhenya wale ame lan tang tiny, me únyi ae lau hon akiny, me li wagien me pipikhenyainy, me jevan a metâ ; anyin a wale mamoe бага hnân okabâ : 23 ke khaca areto, me khaca ong areto adre bi wakacoiny, ke khaca ong areto ae halelôu, únyi hnyi tang areto adre ca levenâ a e hnyi hnyimakö Iehova : 24 ke u me he ka ip hia hon li hnyamö Arona, me je hnyamen je lakon ; ke u me he ka hajijingâ e hnân hudiny adre hajijingâ hnyi hnyimakö Iehova. 25 Ke u me he ka hom je únyi e únyi hnyi je hnyamödrin, me le hon taben hut hnân hut adre le, e me bo so hnyi hnyimakö Iehova. 26 Ke u me he ka hom úlainy mamoe бага wale hnân okabâ anyi Arona, me hajijingâ hnân hut adre hajijingâ hnyi hnyimakö Iehova. 27 Ke u me he ka okabâ úlainy hut adre hajijingâ, me jevan wale hut adre kap goranyai, wale at adre hajijingâ me kap goranyai, wale ec mamoe бага hnân uhotilâ, wale hobi kö Arona me lakon : 28 ke wale jekhö Arona me lakon unyin lakon Isaraela nyiele balua : anyin a e hut adre kap goranyai : ke ame he ka hnân hut adre kap goranyai unyin lakon Isaraela únyi hnyi anyidrin je hudiny úsoköu, wale anyidra hut adre kap goranyai kö Iehova. 29 Ke haba je úkhaú ae kap anyi Arona ame he ka hnân hobi kâu biju lakon hwaban, hnân hú me otil' ödrin hnyin. 30 Ke hamen nokon wale at ame bihut a hwaban, he ka khavâ e huyi je bong a seven, e ka didrö ka hnyi uma hnân úkhacaköu he ka huliwa hnyi dok ae kap. 31 Ke u me he ka hom mamoe бага wale hnân uhotilâ, me ölä utiöiny hnyi ke dok ae kap. 32 K' ame he Arona me lakon ka an utiöiny mamoe бага, tha e me areto únyi hnyi tangen, hnyi hwanumen úma úkhacaköu. 33 K' ödrin e he ka han ta je únyi wale adre bi hwaban möt kâu, hnân uhotilâ me okabi ödrin : ke ame ca he atkanyua ka hnyi han, anyin ae kap.

34 Ke a ne hu kolon meno wale hnân uho-tilâ me areto hnyi hnyomakatu, u me he ka le kolon ge meic : adre me ca he ka an e, anyin ae kap. 35 Ke u me he ka ânyâ hia kö Arona me je lakon helâ me hnök hna hûna köu : seven ta je bong u me he ka otill' ödrin. 36 Ke u me he ka hudo bolok hnyi ke bong me ke bong hnân hudiny hwakecin ae monu me hwaban möt : ke u me he ka ânyâwia taben hut, u ka hia but bi hwaban möt hon ; ke u me he ka hû me okabâ. 37 Seven ta bong u me he ka bi hwaban möt hon taben hut, me okabâ : k' ame he ka ti kap taben hut ; k' ame he ka kap ta je ûnyi hia ame kâlâ taben hut.

38 Ke walang ûnyi u me he ka hudo hon taben hut, a lo li lakon mamoe a khaca hunainy hnyi ta ogo bong hia. 39 U me he ka hudo ke nokon mamoe hnyi hnyomakatu, ke u me he ka hudö ke nokon mamoe hnyi sa hac : 40 ke haba ke keihen a libenyitainy bath falawa adre ûhaniken me tap wakaco adre kokot a ke keihen a vakiny hin ; me tap waina minya a ke keihen a vakiny hin hnân hudiny ic, tha e me nokon mamoe. 41 Ke haba ke mamoe u me he ka hudo hnyi sa hac me ânyâ hobi kâu helâ me hudiny han hnyi hnyomakatu, me helâ me hudiny ic, me me bo so, wale hut a an hnen meic kö Iehova. 42 Haba hut adre le ame he ka e bala hnyi anyibun je dö hnyi hwanumen uma ûkhacaköu hnyi hnyimakö Iehova : ke oge me he ka iouny möbun eling, me fuc köu eling. 43 Ke oge me he ka iouny me lakon Isaraela eling ; k' ame he ka okabâ hnen soik. 44 Ke oge me he ka okabâ uma ûkhacaköu, me taben hut, ke oge me he ka okabi Arona me lakon, m' ödrin e hnyat bihut könya. 45 Ke oge me he ka laba hnyi wanben lakon Isaraela, m' oge me he ka Khongudrin. 46 K' ame he ka khan' ödra a inya Iehova Khongudrin, waleji ame hum ödra ûnyi hnyi hnyeï Aigupito, m' inye he ka laba wanbödra. Inya Iehova Khongudrin.

HNYIMAKAN 30.

KE u me he ka tibet tap hnân leû utö ae bo so hon : u me he ka tibet e ge utö öhum. 2 Khaca kubit ibeüen, me khaca kubit ülauen ; k' ame he ka tha ûcû je hwenöiny a vak : k' ame he ka lo li kubit ibeüen göranyai, k' ame he ka tha khacâ me je baitoiny. 3 Ke u me he ka

tube e ge gol ae so, wale hon, me hnyi je ke keihen igigilöâ, me je baitoiny ; ke u me he ka bi koronainy a gol igigilö e. 4 Ke u me he ka ânyâ vak ta otru gol ka hnyi hmelen baten, hnyi li vhaken, wale hnyi li ke keihen ; ke wale hnen li venyâ hnân vadren. 5 Ke u me he ka ânyâ li venyâ öhum, me tube ge gol. 6 Ke u me he ka ip e hnyi hnyimakan singiny cicö tang hnân ohnatho hnyi hnyimakan taben ibetengiö wale hon ûnyi hnân ohnatho, dok oge me he ka iouny möu hnyin. 7 Ke hamö Arona he ka le hon e je utö ae bo so : k' ame he ka le hnyi je hnyomakatu, e ka ânyâwia je lamepa. 8 Ke ka he Arona ka vac je lamepa hnyi je sa hac, me ame he ka le e, ke wale thibi e hnân bo so bala hnyi hnyimakö Iehova, huyi anyibun ta je dö hia. 9 Ca he öbun ka hudo hon ke je utö bi ae bo so, me je hut adre le, me je hut hnân han ; ke öbun e ca he ka hudo hudiny ic hon e. 10 Ke ame he Arona ka okhaca bi hwaban möt hon je baitoiny hnyi je huna : e ame he ka okhaca bi hwaban möt hon e hnyi je huna ge dra hnân hudiny hwakecin ae monu hnân bi hwaban möt hnyi anyibun ta je dö hia : e ti kap e kö Iehova.

11 Ke Iehova ame ha kö Mose, ka habe, 12 U ka he ka aû üseiny lakon Isaraela hoton numeraidra, haba hnyi ûen e adre me he ka ve bi hwaban anyidra möt kö Iehova, u ka öü ödra ; me me ca he ka hu mok anyidra u ka öü ödra. 13 Walang ûnyi adre me he ka ve ham, ödra ka hanyâ-ûâ hnyi hna öü ödra, üsa haf sekel, helâ me sekeliny dok ae kap : (haba sekel twente je gera :) haba hut kö Iehova, me, haf sekel. 14 Haba tavat hia adre me hanyâüâ ka hnyi tavat adre hia but aû, hwân ge tavat a twente huna me gan hon e, adre me he ka ve bi hut kö Iehova. 15 Ame ca he tavat tren omjeû ka ham gâná, k' ame ca he tavat ae ba ta ûnyi ka ham öuhnnyükongoâ, ke haf sekel cici thibi, hnyi ûen adre bi hut kö Iehova, hnân bi hwaban anyibun möt. 16 Ke u me he ka hom mone hwaban möt unyin lakon Isaraela, me ip hobi kâu huliwa hnyi uma ûkhacaköu ; me me hnân öunykûmeâ ka lakon Isaraela hnyi hnyimakö Iehova hnân bi hwaban anyibun möt.

17 Ke Iehova ame ha kö Mose, ka habe, 18 U me he minya ka ânyâ taben söu a bras, k' ame he ka bras je can, hnân söu : ke u me he ka ip e hnyi wanben uma

úkhacakôu me taben hut, ke u me he ka hingâlâ köiö hnyin. 19 K' ame he Arona me lakon ka hinyem hnyin me osúâ je cadrin: 20 ödrin ka didrö ka hnyi uma úkhacakôu ödrin e he ka sou ge köiö, wâ ödrin e mokcu; helâe minya, ödrin ka hakekenyâ taben bi hut he ka huliwa me le hut a an ge meic kö Iehova; 21 helâe ödrin e he ka hinyem me osúâ je cadrin, wâ ödrin e mokcu: ke wale hnanyibu ködrin nyiele balua, hobi kâu, me je mâtrânyiny hnyi anyidrin ta je dö hia.

22 Ke Iehova ame ha kö Mose, ka habe, 23 U me he ka hom je únyi ae bo so ae únyi hnathu, wale muro ae köiö a faiv haded je sekel, ke hafny e kinamo ae bo so, wale lo li haded ke fite, 24 me kasia a faiv haded je sekel, helâ me sekeliny dok ae kap, me tap wakaco elai a khaca hin: 25 ke u me he ka ányâ e me wakaco hnân hú ae kap, wakaco ae bo so adre úhaniken helâ me hna huliwan hnen at ame bi wakaco; ke wale wakaco hnân hú ae kap. 26 Ke u me he ka hú uma úkhacakôu hnen únyi e, me tang hnân ohnatho, 27 me laulau, me je omjehen, me taben lamepa me je omjehen, 28 me tap hnân leú únyi ae boso, me tap hnân leú hut me je omjehen, me taben sou me je can. 29 Ke u me he ka okabâ je únyi e, me me ti kap: ame he ka kap ta je únyi hia ame kâlâ. 30 Ke u me he ka hú Arona me lakon, me okabi ödrin, m' ödrin e hnyat bihut kõnya. 31 Ke u me he ka ha ka lakon Isaraela, ka habe, Wale thibi e wakaco ae kap hnân hú kõnya hnyi anyibun ta je dö hia. 32 Ca he ka hingâlâ e hon unyin at, ke ca he öbun ka ányâ únyi helâe, helâ me önyen: e kap, k' ame he ka kap köbun. 33 Ke haba at ame he ka úhaniken únyi helâe, me ip hanen hon ke atkanyua, me adre me he ka ohia at e únyi hnyi iny hnyei.

34 Ke Iehova ame ha kö Mose, ka habe, U me he ka hom je únyi ae bo so, wale natafa, me sekeletha, me kelibena; je únyi ae bo so tha e me libanu ae so: úsa khaca thibi ihmakiny; 35 ke u me he ka ányâ e hnân bo so adre le me úhaniken helâ me ihuliwainy at ame bi wakaco, adre únyakouâ ae so me kap: 36 ke u me he ka kot omomono ke keihen, me ip cicö únyi hnân ohnatho hnyi uma úkhacakôu, wale oge me he ka iouny möu hnyin: ame he ka ti kap e unyihun. 37 Ke haba únyi ae bo so u me he ka ányâ, ca he öbun ka ányâ hobi köbun helâ me önyen: ame he ka kap e

unyâmhobi kö Iehova. 38 Ke haba at ame he ka ányâ únyi helâe hnân hnulâ, me adre me he ka ohia e únyi hnyi iny hnyei.

HNYIMAKAN 31.

KE Iehova ame ha kö Mose, ka habe, 2 Wâ bi oge hia but hawâ iö Bezaleli a nõku Uri, nõku Huro, únyi hnyi tribu Juda: 3 ke oge hia but öunöngötâ e hnen hanon Khong hnyi metâ, me wâ únykúme, me tremang, me ta je huliwa hia, 4 me me he ka wâhmakhmeto ta je únyi ae iyong, he ka hulwan gol, me sileva, me bras, 5 me subö veto hnân ohmâ hnyi je taben, me subö utö, me he ka huliwan ta je huliwa hia. 6 Ke wâ bi, inya oge hia but kú Aholiaba nõku Ahisamaka me me tha e me, únyi hnyi tribu Dana; ke oge hia but ip metâ eú hnyi hnyekon hnyat ae metâ hia, m' ödrin e he ka ányâ hia hnök hna húna köu: 7 wale uma úkhacakôu, me tang hnân ohnatho, me taben ibetengiö hon e, me je omjehen uma; 8 me laulau me omjehen, me taben lamepa ae so me je omjehen hia, me tap hnân leú únyi ae bo so, 9 me taben leú hut me je omjehen hia, me taben sou me je can, 10 me ta je úkhaú adre tibet soâ, me je úkhaú ae kap hobi kö Arona at bihut, me je úkhaúen lakon hnân bi hanymen hnyat bihut; 11 me wakaco hnân hú, me je únyi ae bo so hnân le hobi kâu dok ae kap: adre me he ka ányâ hoton hnök hna húna köu hia thithö.

12 Ke Iehova ame ha kö Mose, ka habe, 13 U me he ka ha ka lakon Isaraela, ka habe, Öbun e he ka tuö anyik je sabath: anyin a wale haten kõnya m' öbun hnyi anyibun ta je dö hia: m' öbun e he ka wâ a inya Iehova at ame okabi öbun. 14 Anyin a wale öbun e he ka tuö sabath, anyin ae kap e unyibun: ke haba at ame he ka okongo e, adre me he ka hingâ: anyin a haba at ame he ka huliwa hnyin, me, adre me he ka ohia at eling únyi hnyi iny hnyei. 15 Siks je bong hnân huliwa; ke haba bong a seveniny, me, wale sabath hnân menâ, e kap hobi kö Iehova: ke haba at ame he ka bi huliwa hnyi bong sabath, me, adre me he ka hingâ. 16 Anyin a wale ame he ka tuö sabath hnen lakon Isaraela, me únykúme sabath hnyi anyidra ta je dö hia, hnân úhinhinköu nyiele balua. 17 Wale ke haten kõnya me lakon Isaraela nyiele balua: anyin a hnyi je bong a siks Iehova ame op drany me hmeledrany, ke

hnyi bong a seven e ame menâ, me me hunyin hmetu.

18 Ke e ame ham kö Mose li veto ae lau anyin únyi hnân ohnatho, li veto ae lau a sihnalimen ge hnyamen Khong, hnyi únen e ame um dô úhnenamö mē hon bucen Sinai.

HNHYIMAKAN 32.

KE a wâ but tavat a ga bec Mose he ka utut únyi hnyi hon bucen, me ame úkhacakôu tavat unyi Arona, me ha kâu, ka habe, Todrö ka ânyâ ke khong hnân hobi kôta me me hnyimakan anyita bunyen; ke haba Mose waleji at ame hum öta únyi hnyi hnyei Aigupito, me ca khan' öta únyi a o kâu. 2 Ke haingö Arona ködra, ka habe, Uny jut je anen hnyikönyen a gol hnyi je hnyikönyen laöiöbun me je lakubun бага me hlu, ke hö jem könya. 3 Ke haba tavat hia adre me uny jut je anen hnyikönyen gol hnyi ta je hnyikönyidra me hom kö Arona. 4 Ke e ame kap ta je únyi eling gadra, me trettrauâ ge sulâ, me ânyâ me me nokon kau adre oköiâ: ke adre me ha, ka habe, Isaraela lö, walang khongom at ame hum u únyi hnyi hnyei Aigupito. 5 Ke a wâ but e hnö Arona me e ame otillâ taben hut cicö e; ke haba Arona ame haimemenâ, ka habe, Haba bong nyi adre me he ka ânyâ bijeú kö Iehova. 6 Ke adre me vesâ hnyi hnyomakatu kong, me hudo je hut adre le, me hom je hudiny úsoköu; me ame laba ju tavat he ka han me ic, me adre me todrö he ka mat.

7 Ke Iehova ame ha kö Mose, ka habe, He thö, utut; anyin ae kong ut ânyâm tavat, waleji u je hom únyi hnyi hnyei Aigupito: 8 adre hia but ie saú únyi hnyi gethen waleji oge hûna ködra; k' adre hia but ânyâ hobi ködra nokon kau adre oköiâ, me khudrung kâu, me bi hut kâu, me ha, ka habe, Isaraela lö, walang khongom, at ame hum u únyi hnyi hnyei Aigupito. 9 Ke Iehova ame ha kö Mose, ka habe, Oge wâ but tavat eang, me wâ but, ödra tavat ae hwege nyin: 10 ke walang ang hnö nya but, me me ubâhlâ thö anyik hmönyin ködra, m' inye he ka ohí' ödra; k' oge me he ka wiö u bi hnân hnyei ae gan. 11 Ke Mose ame khöu kö Iehova a Khongon, me ha, ka habe, Iehova lö, geú ame he ka ubâhlâ gan ânyâm hmönyin ka je lakem waleji u je hom únyi hnyi hnyei Aigupito ge man ae gan me hnyam ae hwege? 12 Ieú ge at Aigupito tavat adre

me he ka ha, ka habe, E a hum ödra me me he ka hling' ödra hnyi je bucen, me ohí' ödra únyi hnyi hon kânâ? Ö u ikhâlâ ju hmönyininy hnyekom ame ubâhlâ, me ietra monu a o ka je lakem. 13 Únykúme ju kö Aberahama, me Isaaka, me Isaraela, a lathnyabaem, waleji hnyat u je khemanyn gam bi ködrin, me ha, ka habe, Oge me he ka osehia je mátrânibun helâ me je okhúiny drany, ke haba hnyei hia eang waleji oge ha köbun, oge me he ka ham ka je mátrânibun hnân idrin nyiele balua. 14 Ke haba Iehova ame ietra monu, wale e ame ha he ka ânyâ ka lakeiny.

15 Ke Mose ame hwiö me utut úheny hon bucen ke wale hnyi li hnyamen li veto ae lau hnân ohnatho, wale li veto ae lau adre sihnalimen hnyi li ve ke keihen: adre sihnalimen hnyi ke keihen me ke keihen. 16 Huliwa anyin Khong li veto ae lau, ke haba hna sihnalimen, me, a sihnalimen Khong, a kave hnyi li veto ae lau. 17 Ke a löng hnö Josua hwan imedien tavat adre me kuku, me e ame ha kö Mose, ka habe, Hwan vat únyi hnyi hna hunuma. 18 Ke haingen, ka habe, Ca hwan vat eling hwan tavat hwege, ke haba khaca, ca hwan tenge anyin tavat ae bá: ke so bi oge me löng hwan khumöng. 19 Ke ame hakekeny ka hnyi hna hunuma, me e ame wâ nokon kau me biâ, me ame ubâhlâ hmönyin anyi Mose, me e ame khuâ degecâ li veto ae lau únyi hnyi li hnyamen, me me hmouca but hmelen bucen. 20 Ke e ame hom nokon kau adre me ânyâ, me thong hnyi meic, me omomonoâ, me khúkhúâ ka hnyi hon köiö, me bi belen lakon Isaraela. 21 Ke haingö Mose kö Arona, ka habe, Ieú a anyâ köu tavat eang, m' u me okúâ ködra monu ae gan eang? 22 Haba Arona ame thu, ka habe, Than lö, ca he ka ubâhlâ ânyâm hmönyin tuhök: e kxanö u hwakecin tavat a ödra be monu. 23 Anyin a haingödra könya, ka habe, ânyâ thö hobi kôta ke khong, me me hnyimakan anyita bunyen anyin a haba Mose, waleji at ame hum öta únyi hnyi hnyei Aigupito, me, ca khan' öta únyi a o kâu. 24 Ke haingök ködra, ka habe, Ame he tavat tren gol ka uny jut; me adre me ham könya, me oge me khúâ ka hnyi meic, me a o but nokon kau eang. 25 Ke a wâ but Mose a ga monu monu but tavat; anyin Arona ame omonu ödra me me he ka hlum' ödra hnen je iwa-hnaihmöny m' ödra: 26 ke haba Mose ame tot hnyi homagöuleny hna hunuma, me ha,

ka habe, Ie at ame tha hien me Iehova? he but jem kõnya. Me ame úkhacakõu kàu je at Levi hia. 27 Ke haingen ködrin, ka habe, Walang hna ha hnõ Iehova Khongu Isaraela, ka habe, He th' õbun ka ve ca anyibun je hele vat hnyi je batõbun, me vhenõ hna hunuma hwân hnyi ke homagõule ke ne o but ka hnyi ke homagõuleny hna hunuma, me ve hlingâ je liamekeiny m' õbun, me je iate, me tavat adre me laba hakekeny kõbun. 28 Ke haba at Levi ödrin e ânyâ helâ me hofuc ho Mose: me a mokcu hnyi bong eling helâ me kun ta thauzan tavat aten hnyei. 29 Ke Mose ame ha, ka habe, Ve hn' õbun bi kõ Iehova hnyi bong ang, eke, e so at ame tot metâ ka nokon me liamekeiny më; me me he ka ohnahici õbun hnyi bong ang. 30 Ke haba nyi, Mose ame ha ka tavat, ka habe, E gan hmâ anyibun hulõ: ke walang ang oge me he ka olõ kõ Iehova; oge me ne he ka bi hwaban melen anyibun hulõ. 31 Ke Mose ame he hmetu kõ Iehova me ha, ka habe, E kõlõ, e ti gan hulõ ame ânyâ tavat ang, k' adre me bi khongudrin gol. 32 Ke walang ang, u je ne he ka ikhâlâ anyidra hulõ—; ke ame ne ba, õ u na he ka kot degeci nya ûnyi hnyi ânyâm tusi u je sihnalimen. 33 Ke Iehova ame ha kõ Mose, ka habe, Haba at ame monu kõnya oge me he ka kot degecâ ûnyi hnyi anyik tusi. 34 Ke he thõ walang ang me hom tavat ka hnyi dok waleji oge me ha kõu: wâ bi, ame he ka he anyik angela hnyi hnyimâkâm: ke so bi, haba hnyi bong oge me he ka senâ, me oge me he ka bi hwaban anyidra hulõ. 35 Ke Iehova ame kot tavat can hnõdra hna anyâ nokon kau, waleji a ânyâ Arona.

HNYIMAKAN 33.

KE Iehova ame ha kõ Mose, ka habe, Hna but dok ang, ke he thõ úhem ang me tavat waleji u je hom úhedra hnyi hnyei Aigupito, ka hnyi hnyei oge úhinhnykõuâ kõ Aberahama, me Isaaka, me Jakob, ka habe, Oge me he ka ham ka je matrânâm: 2 ke oge me he ka kunâ hnyi hnyimâkâm ke angela; ke oge me he ka obâ at Kanana, me Amora, me Heth, me Perizi, me Hivi, me Jëbusi: 3 ka hnyi hnyei ame di hnyin dân basin me hani: anyin a oge me ca he ka tha he möu; anyin a u hnyei ae hwege nyin: wâ oge te he ka ohio u eû hnyi gethen. 4 Ke a

lõng tavat uthumetu eling ae kong, me adre me útengiõ: ke ba at ame theip. 5 Ke Iehova ame ha kõ Mose, ka habe, Ha thõ ka lakon Isaraela, ka habe, U hnyei ae hwege nyin: oge ne he hnyi wanbâm hnyi thuthubademak, me, oge me he ka ohio u: anyin a wale u ma he walang ang ka uny jut je theibâm, me me khanõ nya ûnyi oge me he ka ânyâ kõu. 6 Ke haba lakon Isaraela adre me uny jut je theibidra hwân hnyi bucen Horeba.

7 Ke haba hwakeci Mose, me, e ame labõ hom uma úkhacakõu, me otilà hoton hna hunuma, e úsâkâúõ me hna hunuma, ke e ame hwenyi ien, ka habe, Uma mano hnân úkhacakõu. Ke haba tavat hia adre me elõm Iehova me adre me he but ka hnyi uma mano a uma úkhacakõu wale hoton hna hunuma. 8 Ke e ka he Mose ka hnyi Uma mano, me ame kõue thõ tavat hia adre me ve tot hnyi je hwanumen umõdra je uma mano, me õ Mose ke ne o but e ame didrõ ka hnyi uma mano. 9 Ke hnyi ûen Mose ame didrõ ka hnyi Uma mano, me ame utut úlâ ame tot wisa, me laba hnyi hwanumen Uma mano, ke Iehova ame úhnenamõ me Mose. 10 Ke a wâ but tavat hia úlâ ame tot wisa a g' ame tot hnyi hwanumen Uma mano: me haba tavat hia adre me kõue me ve khudrung hnyi hwanumen umõdra je uma mano. 11 Ke Iehova ame fuc kõ Mose ae úcú hnyem, helâ me at ame úhnenamõ me waeny. Ke e ame he hmetu ka hnyi hna hunuma; ke kaba athnyabainy jia Josua nõku Nuna, a hidrõn, me ame ca he bi úheny hnyin uma mano.

12 Ke haingõ Mose kõ Iehova, ka habe, Me wâ bi, u je ha kõnya, ka habe, He thõ ka hom tavat eang: ke u tiga ca omanenâ kõnya at u me he ka tha kunâ mõnya. Ke so bi u je ha, ka habe, E khanõ u inya me iâm, ke inya oge me betenge kõu. 13 Anyin a wale, u je ne betenge gak, õ u omanenâ kõnya dem gethen, me me khanõ nya u, me u me betenge gak: ke únykũme ju a haba hnyei ang me hing lakem. 14 Ke e ame ha, ka habe, Ötu tha he, ke oge me he ka omenõ u. 15 Ke haingen kàu, ka habe, Öte ne ca tha he, me u me ca he ka hum õhmun úhehmun ang. 16 K' ame he ka kamâu ka manen a u me betenge gak, walõnya me lakem ang? Hawa, ca hnyi ûnyi ang a ötin e tha he, me õhmun e he ka ve bongon me ta je hnyei hia eang hmelen, a inya me lakem?

17 Ke Iehova ame ha kö Mose, ka habe, Oge me he ka ányâ minya únyi eang u me ha : anyin a inya oge me betenge gam, ke e khanö nya u me iâm. 18 Me haingen, ka habe, U na he ju ka omanená kõnya ányâm hmanenang. 19 Me e ame ha, ka habe, Oge me he ka kunâ anyik so ka hnyi hnyimákâm, ke oge me he ka omanená iö Iehova hnyi hnyimákâm ; ke oge me he ka betenge ge at ae bewek ka betenge gan, ke oge me he ka kölu ge at ae bewek ka kölu gan. 20 Ke haingen, ka habe, e ca khanö u he ka wâ hnyimákök : anyin ae ca khana at ka o nya, me möt bi. 21 Ke haingö Iehova, ka habe, Wâ bi, walang ke ong dok anyik, ke u me he ka tot hon kic : 22 ke haba hnyi úen ame hanyáúâ anyik hmanenang, me oge me he ka ip u ka hnyi kic adre hia but tho, me tubi u ge hnyamök ke ne o but oge me umi dö hanyáúâ : 23 ke oge me he ka thu hmetu hnyamök, ke u me he ka wâ hotuk : k' adre me ca he bi ka wâ hnyimákök.

HNYIMAKAN 34.

KE Iehova ame ha kö Mose, ka habe, U me he ka delâ li veto ae lau helâ me li veto a bân, ke oge me he ka sihnalimen hon li veto ae lau ta je hofucin li veto ae lau a bân, waleji u je tho. 2 Ke laba penapena thö hnyi hnyomakatu, ke öliâ bucen Sinai, me tot eling hnyi hnyimákök hnyi hon ban bucen. 3 Ke ca he ke at ka tha ölö möu, ke ca he ke at ka manen hnyi bucen hia ; ke haba khaca, ca he je hnahat mamoe me kau ka han hnyi hnyimakan bucen eling. 4 Ke e ame delâ ke li veto ae lau helâ me li veto a bân ; ke Mose ame vesâ hnyi hnyomakatu, me öliâ bucen Sinai, helâ me hna húna kâu hnö Iehova, ke e ame hom tilâ hnyi hnyamen li veto ae lau. 5 Ke Iehova ame utut hnyi úlâ, me tha tot me eling me haimemenâ iö Iehova. 6 Ke haba Iehova ame he hnyi hnyimakan, me ha, ka habe, Iehova, Iehova, Khong a at ame kölu me betenge, at ame bec ka hmönyin ke gan hmâ anyin so me hnathu ; 7 at ame tuö ibetengiö hobi kâu ta je thauzan, me degecâ monu me hna hanyáúâ me hwakecin ae monu : k' ame ca he ka ha me ba hulö anyin tavat ae kong ; k' ame bi hwaban monu anyin je kamen ka lakon, me laöbiny, ke ne o but hnyi dö a kuniny me vakiny. 8 Ke haba Mose ame je nom ju hnyikánâi me khudrung. 9 Ke haingen,

ka habe, Than lö u je ne betenge gak, ö u he Than ka tha he möhmun ; anyin ae hwege nyin hnyei ang ; ke u ma thang degecâ anyihmun monu me hulö, me wi' öhmun do m' öhmun e em hnyei. 10 Ke e ame ha, ka habe, Wâ bi, oge ma ányâ úhihinykôu : ke oge me he ka ányâ hnyi hnyimakan tavat hia anyâm ta je únyi hnân láiâ, ke ba hna ányâ helâe eang hmelen hia, k' ame he tavat hia eang a tha ödra möu ka wâ huliwa anyi Iehova, anyin a únyi hnân outen oge me he ka ányâ köu. 11 Wâ wia hnök hna húna köu hnyi bong ang : wâ bi, oge me he ka obâ hnyi hnyimákâm at Amora, me Kanana, me Heth, me Perizi, me Hivi, me Jebusi. 12 Wâ wiö u bi, wâ u nye ányâ úhihinykôu me aten hnyei u me he ka hnyin, wâ e nye he ka nuc u helâ me hnewe unyâm : 13 ke so bi öbun e he ka tho anyidra je taben hut, me sa omomono anyidra je veto ame tot, me sö degecâ anyidra je Aseira : 14 anyin a u me ca he ka khudrung ka ke khong : anyin a Khong ame ciâ Iehova, Ciâ ien : 15 wâ u nye he ka úhihinykôu me tavat adre me labâ hnyei, k' adre me bi únyi monu me anyidra je khong, me bi hut ka anyidra je khong, k' ame ne he at ka hao u, me u me he ka hnyi an anyin hut ; 16 ke wâ u nye he ka hom lakudra je hlu hobi kâu lakom je бага, me ame he lakudra je hlu ka bi únyi monu me anyidra je khong, k' ame he minya lakom je бага ka bi únyi monu me anyidra je khong. 17 U ca he ka ányâ je khong adre oköiâ. 18 U me he ka tuö bijeúiny areto adre ca levenâ bi. Seven ta bong u me he ka han hnyin areto adre ca levenâ, hnyi tehi Abiba, helâ me hnök hna húna köu : Anyin a hnyi tehi Abiba u je he but úhem Agupito. 19 Hobi kõnya je lakon a bân hia ; me je lakon halem meno hia a бага, a je kau me je mamoe a bân. 20 Ke u me he ka bi hnen nokon asina ge nokon mamoe : ka u je ne ca bi hnen e, me u me he ka thu nyin. Haba lakom бага a bân hia me u me he ka bi hnen. Ke ca he ke at ka manen hnyi hnyimákök ke ba ta únyi. 21 Siksa ta bong u me he ka huliwa, ke hnyi bong a seveniny u me he ka menâ : u me he ka menâ hnyi úen trohnen me menu. 22 Ke u me he ka ányâ bijeú anyin je wik, wale je wan hwit a ban adre meno, me bijeúiny menu hnyi obiny huna. 23 Hamen obaga hia ka okun manen hnyi huna hnyi hnyimakan Than Iehova Khongu Isaraela. 24 Anyin

oge me he ka obâ ta je hnyei hnyi hnyimâkâm, me ogânâ je hnyegöulâm : ke ame ca he ke at ka behnyekon em hnyei, u ka he ka manen hnyi hnyimakö Iehova Khongom, hnyi kun ta ün hnyi huna. 25 U me ca he ka hudo kõnya dren ânyâm hut a tha e me areto adre levenâ, ke ca he ka ip hudiny bijeüniny paseka ke ne o but hnyomakatu. 26 U me he ka hom ka hnyi uma umö Iehova a Khongom, ta je jeüniny kânâm kânâ a bân. U me ca he ka ölä nokon got hnyi dân basiny hinyen. 27 Ke Iehova ame ha kö Mose, ka habe, Sihnalimen ju ta je ünyi ang : anyin a oge hia but ühinhnykôu möu me at Isaraela hoton je hofuc e. 28 Ke e ame laba eling tha e me Iehova fâte je lany ke fâte je lit; ke ame ca han, k' ame ca ic. Ke e ame sihnalimen hon li veto ae lau je hofucin ühinhnykôu, wale je hnanyibu a ten.

29 Ke Mose ame utut üheny hon bucen Sinai, ke e hnyi li hnyamö Mose li veto ae lau hnân ohnatho, k' ame utut üheny hon bucen, ke ca khanö Mose a g' ame hadröngöc unen hnyimakan hwaban hna ühnenamö me. 30 Ke Arona me lakon Isaraela hia adre me ö Mose, ke wâ bi, e hadröngoc unen hnyimakan; m' adre me ot he ka hakekenyâ. 31 Ke haba Mose ame hao' ödra; me a hmetu kâu Arona me je taban ükhacaköu hia; ke Mose ame ühnenamö m' ödrin. 32 Ke hwaban e me ame ükhacaköu thö lakon Isaraela hia : me e ame thumetu me hûna ködra ta je hofuc hia a ha kâu Iehova hon bucen Sinai. 33 Ke a hia but Mose thumetu ödra, me ame tube hnyimakan. 34 Ke hnyi ün Mose ame didrö kö Iehova he ka ühnenamö me, me ame uny jut tubwiny hnyimakan ke ne o but e ame dit hmetu but; ke e ame didrut me ha ka lakon Isaraela hofuc a hûna kâu; 35 ke a wâ but lakon Isaraela hnyimakö Mose, a ga hadröngöc dö unen hnyimakö Mose : me Mose ame tube hmetu hnyimakan ke ne o but e ame dit me ühnenamö me.

HNHYIMAKAN 35.

KE haba Mose ame ükhacaköuâ tavat hia lakon Isaraela, me ha ködra, ka habe, Walang je hofuc Iehova ame hûna, m' öbun e he ka ânyâ. 2 Siks je bong u me he ka huliwa hnyin, ke haba bong a seveniny ame he ka bong ae kap, a sabath hnân menâ kö Iehova : ke haba at ame he

ka bi huliwa hnyi bong eling adre me he ka hlingâ. 3 Ca he öbun ka hû meic hnyi je hnyababun hnyi bong sabath.

4 Ke haingö Mose ka ükhacaköu hia anyin at Isaraela, ka habe, Walang je hofuc a hûna Iehova, ka habe, 5 Öbun e he ka bi bwihlany unyibun hobi kö Iehova : haba tavat adre me hnyokâ me weny, me, hamödra he ka hom, wale bwihlany hobi kö Iehova; a gol, me sileva, me bras; 6 me mano ae udrudrâ, me udrudrâ hlit, me dra vec, me lino, me leünen got, 7 me je unen mamoe бага adre wia e me dra, me je unen takasa, me utö öhum, 8 me wakaco hnân umumelam, me je ünyi ae bo so hobi kâu wakaco hnân hû, me je ünyi ae bo so hnân le, 9 me je veto soama, me je veto adre ohmâ hnyi taben, hnân iefoda, me tubwiny ülainy. 10 Ke e so ame o but hnyat ae metâ unyibun, me ânyâ ta je ünyi hia a hûna Iehova; 11 waleji uma mano, a uma, me ban e, me je bâletiny, me je esöiny me je venyâyiny, me je khetepiny, me je taben; 12 me tang, me li venyâyiny, me taben ibetengio, me mano a singiny, 13 me laulau, me li venyâyiny, me je omjehen hia, me areto hnân omanenâ; 14 me taben lamepa hnân umumelam, me omjehen, me je lamepainy, me wakaco hnan umumelam; 15 me tap hnân leü ünyi ae bo so, me li venyâyiny, me wakaco hnân hû, me je ünyi ae bo so hnân le, me singiny hwanuma, wale hwanumen uma mano; 16 me taben leü hut, me echigic a bras, me li venyâyiny, me je omjehen hia, me taben soü, me je can e; 17 me mano he ka huno hnyi hak, me je khetepiny, me je taben, me singiny homagöuleny hak; 18 me je faoiny uma mano, me je faoiny, me je töiny; 19 me je ükhaü adre huliwa soâ, hobi kâu hnyat ae hu hanymen hnyi dok ae kap, a ta je ükhaü ae kap hobi kö Arona at bihut, me je ükhaüen lakon hnân hanymen bihut.

20 Ke haba ükhacaköu anyin lakon Isaraela hia adre me vese but ühedra unyi Mose. 21 Ke a o but tavat wale a üjöngi ödrin hnen je hnyekudrin, me tavat a ohmehmel' ödrin hnen hanudrin, m' ödrin e hom ta je bwihlany hobi kö Iehova, hnân hobi kâu huliwa huyi uma ükhacaköu, me hobi kâu je huliwainy hia, me hobi kâu je ükhaü ae kap. 22 K' adre o but, obaga me omomo, tavat hia adre me weny, me hom but ta je ohmâiny nyin ae mec, me je anen hnyikönyen, me je wen banyen

hnân bi haten, me je waen, wale ta je hmanenanginy gol hia; haba tavat hia adre me bi bwihlany, me adre me ham ta je únyi a gol kö Iehova. 23 Ke tavat ae tren mano ae udrudrá, me udrudrá hlit, me dra vec, me lino ae úhnyükong nân, me leúnen got, me je unen mamoe бага adre wia e me dra, me je unen takasa, ödra hia adre me ve hom. 24 Ke haba tavat hia adre me bi bwihlany sileva me bras, adre me ve hom hnân bwihlany hobi kö Iehova; ke tavat hia tren utö öhum, hnân hobi kâu je huliwa, adre me ve hom. 25 Ke omomo hia ae metâ hnyekudrin ödrin a hwâwâ mano ge je hnyamödra, me hom but hnödra hna hwâwâ, wale je mano ae udrudrá, me udrudrá hlit, me dra vec, me lino ae úhnyükong nân. 26 Ke omomo hia waleji a újôngi ödra hnen je hnyekudra ae metâ, adre me hwâwâ je leunen got. 27 Ke haba je taben, me adre me hom but je veto soama, me je veto hnân hnen hnyi iefoda me tubwiny úlainy; 28 me únyi ae bo so me wakaco; a hnân umumelam, me wakaco hnân hú, me je únyi ae bo so hnân le. 29 Haba lakon Isaraela adre hom bwihlany ibetengö kö Iehova; obaga me omomo a ohmehmel' ödra hnen je hnyekudra, adre me ve hom hnân ta je huliwa hia, waleji Iehova ame húna he ka ányâ, a deny Mose. 30 Ke haingö Mose ka lakon Isaraela, ka habe, Wâ bi a hia but Iehova hao Bezaleli nöku Uri, nöku Huro, únyi hnyi tribu Juda; 31 ke a hia but ounöngötâ e ge hanon Khong hnyi metâ, me wâ únyküme, me tremâng, me ta je ve huliwa hia, 32 me me he ka wâhmakhmeto ta je huliwa ae iyong, he ka huliwan gol me sileva me bras, 33 me he ka subö veto me bi hnen hobi kâu, me subö utö, me huliwan ta je huliwa hia ae iyong. 34 Ke e ame ip eú hnyi hnyekon bougon at úne, a e, me Aholiaba nöku Ahisamaka, únyi hnyi tribu Dana. 35 Ke e ame ounöngöti ödru ge hnyok ae metâ, he ka huliwan je ve huliwa anyin at ame khavi, me huliwa ae iyong, me huliwa anyin at omecâ mano ae udrudrá, me udrudrá hlit, me dra vec, me lino ae úhnyükong nân, me huliwa anyin at ame hwâwâ mano, me hnyat a ányâ ta je huliwa hia, me wâhmakhmetoâ ta je huliwa ae iyong.

HNYIMAKAN 36.

KE ame he Bezaleli, me Aholiaba, me tavat hia adre me hnyok metâ he ka

huliwa wale hnö Iehova hna ometâ me wâhmakhmeto, me okhana he ka ányâ ta je huliwa hia hnân hobi kâu dok ae kap, helâ me ta je únyi hia a húna Iehova.

2 Ke Mose ame hao Bezaleli, me Aholiaba, me tavat hia adre me hnyok metâ, waleji hnö Iehova hna ometâ hnyok, me ödra hia wale a újongi ödra hnen je hnyekudra he ka he ka hnyi huliwa he ka ányâ e; 3 ke ödrin e kap ta je bwihlany hia únyi ga Mose, waleji hnen lakon Isaraela hna hom hobi kâu huliwa hnyi dok ae kap, he ka huliwan. Ke adre me hom bala je bwihlany ibetengö hnyi je hnyomakatu. 4 Ke haba tavat ae metâ hia, wale hnyat a ányâ ta je huliwa hia hobi kâu dok ae kap, ödrin e o únyi hnyi anyidrin ta je huliwa wale ödrin e ve ányâ; 5 ke haingödrin kö Mose ka habe, E gan, ke a kölu ju ta je únyi a hom tavat hobi kâu huliwa a húna Iehova he ka ányâ. 6 Ke haba Mose ame húna k' adre omanenâ hnyi je ke keihen hna hunuma hia, ka habe, Ca he hmetu ke бага me momo ka bi huliwa hnân bwihlany hobi kâu dok ae kap. Me ame um ju tavat he ka hom. 7 Anyin ae úcú but ta je únyi hobi kâu huliwa he ka ányâ, ke hu kolon biju.

8 Ke haba tavat hia adre me hnyok metâ anyin tavat huliwa, ödrin e ányâ uma mano me ten tubwiny; wale lino ae úhnyükong nân adre seveny, me udrudrá, me udrudrá hlit, me dra vec, me je kerubi huliwanen at ae metâ, adre me ányâ. 9 Ke haba ibeúen je tubwiny, me úsa twente eit je kubit, ke úsa foa kubit úlaue je tubwiny; khaca tulutiny je tubwiny hia. 10 Ke e ame úohmákouâ je tubwiny a faiv, wale ke at me ke at: ke ome úohmákouâ ke je tubwiny a faiv. 11 Ke e ame ányâ hnyimen je hnewe ae udrudrá hnyi baten ke tubwiny hnyi hna ohmâ: ke ame ányâ helâe hnyi baten ke tubwiny ethö hon hnyi hna ohmâ ke at. 12 Fifte hnyimen je hnewe e ame ányâ hnyi ke tubwiny, ke fifte minya hnyimen je hnewe e ame ányâ hnyi baten ke tubwiny hnyi hna ohmâ tubwiny a loiny: me me he hnyimen je hnewe ka úcú. 13 Ke e ame ányâ je bálet gol a fifte, me úseükouâ je tubwiny hnen je bálet: me me khaca uma mano. 14 Ke e ame ányâ je tubwiny a leúnen got hnân tube hon uma mano: eleven je tubwiny e ame ányâ. 15 Ke haba ibeúen je tubwiny, usa thöte je kubit, ke usa vak kubit úlaue je tubwiny hia; ke khaca tulut hobi kâu je tubwiny a eleven. 16 Ke e ame úohmákouâ je

tubwiny a thabûng, me je tubwiny a siks. 17 Ke e ame ânyâ hnyimen je hnewe a fite hnyi baten ke tubwiny ethô hon, hnyi hna ohmâ, ke fite minya hnyimen je hnewe e ame ânyâ hnyi baten ke tubwiny, hnyi hna ohmâ tubwiny a loiny. 18 Ke e ame ânyâ fite ta je bâlet bras, me me ûohmâkôuâ uma me me khaca thibi. 19 Ke e ame ânyâ ke tubwiny uma ge unen mamoe бага adre wia e me dra, me ke tubwiny a unen takasa ethô hon.

20 Ke e ame ânyâ je esöiny uma mano a utô ôhum, wale ame tot wisa. 21 Ke úsa ten kubit ibeüen je esö, ke khaca kubit me haf úlauen je esö. 22 Ke úsa lo can je esö hnân dit, ke e ame ânyâ helâe hobi kâu je esöiny uma mano hia. 23 Ke e ame ânyâ je esö hobi kâu uma mano; twente je esö hnân ke keihen ka hnyi hwaiöu: 24 ke e ame ânyâ lo li esö hobi kâu sileva eü hmelen je esö a twente; lo li taben hmelen ke esö hobi kâu ke li can e, ke lo li taben minya hmelen ke esö hobi kâu li can e. 25 Ke twente je esö e ame ânyâ hobi kâu uma mano hnyi ke keihen ka hnyi hwadrö, 26 ke fâte je taben e a sileva; lo li taben hmelen ke esö, ke lo li taben minya hmelen ke esö. 27 Ke e ame ânyâ je esö a siks hobi kâu hnyaumainy uma mano e jio. 28 Ke e ame ânyâ lo li esö hobi kâu hnyaumainy uma mano hnyi li kopiny. 29 Ke adre me thu hwetö me me lo eü, ke adre me ûohmâkôuâ ethô hon ke otru, ke e ame ânyâ helâe ka li at a lo hnyi li kop. 30 Ke e hu eit je esö me je taben sileva a sikstin, úsa lo li taben hmelen je esö. 31 Ke e ame ânyâ je venyâ a utô ôhum: thabûng hobi kâu je esö hnyi ke keihen uma mano, 32 ke thabûng je venyâ minya hobi kâu je esö hnyi ke keihen uma mano, ke thabûng minya je venyâ hobi kâu je esö hnyi hnyaumainy uma mano e jio. 33 Ke e ame inâ je venyâ hnyi wanben je esö hwân hnyi ke keihen, ke ne o but ka hnyi ke keihen. 34 Ke e ame tube je esö ge gol, me e ame ânyâ je otruiny gol, hnân inâ hnyin je venyâ, ke e ame tube je venyâ ge gol.

35 Ke e ame ânyâ singiny ae udrudrá, me udrudrá hlit, me dre vec, me lino ae ûhnyûkong nân adre seveny: me e ame ânyâ hnyin e je kerubi a huliwan at ae metâ. 36 Ke e ame ânyâ hobi kâu e vak ta khetep a ôhum, me tube ge gol: me je bâletiny a gol: ke e ame le hobi kâu e vak ta taben sileva. 37 Ke e ame ânyâ ke singiny

ae udrudrá hobi kâu hwanumen uma, me udrudrá hlit, me dra vec, me me manlino ae ûhnyûkong nân adre seveny, a huliwan at omecâ mano; 38 me je khetepiny a faiv me je bâletiny a faiv: ke e ame tube je ban me je venyâ ge gol: ke bras je taben a thabûng.

HNYIMAKAN 37.

KE Bezaleli ame tibet tang a utô ôhum: lo li kubit me haf ibeüen, ke khaca kubit me haf úlauen, ke khaca kubit me haf ibeüen göranyai. 2 Ke e ame tube eü hnyin me hoton ge gol ae so, me bi koronainy gol ethô hon. 3 Ke e ame le je otru gol a vak hobi kâu vak ta can; lo li otru hnyi ke keihen, ke lo li otru minya hnyi ke keihen. 4 Ke e ame ânyâ li venyâiny a li ôhum, me tube ge gol. 5 Ke e ame inâ li venyâ hnyin je otru hnyi li ke keihen tang hnân vaden tang. 6 Ke e ame ânyâ taben ibetengiö gol ae so, lo li kubit me haf ibeüen, ke khaca hubit me haf úlauen. 7 Ke e ame ânyâ li kerubi gol; e ame ânyâ e a huliwan hnen hama hnyi li hnyiban; 8 a khaca kerubi hnyi ke hnyiban, ke khaca kerubi hnyi ke hnyiban; ke ame ânyâ li kerubi hnyi li hnyiban a khacâ me taben ibetengiö. 9 Ke haba li kerubi ödru me lau göranyai je labenyidru me tube taben ibetengiö ge je labenyidru, ke ödru me ûhnyimaködrukou: haba li kerubi ödru me hnyimaködru ka hnyi taben ibetengiö.

10 Ke e ame tibet laulau a utô ôhum, lo li kubit ibeüen, ke khaca kubit úlauen, ke khaca kubit me haf ibeüen göranyai: 11 ke e ame tube e ge gol ae so, me bi koronainy a gol. 12 Ke e ame bi baten igigilö e a khaca hnyam, k'ame bi koronainy igigilö e. 13 Ke e ame le hobi kâu e je otru gol a vak, me ohmâ je otru hnyi je ke keihen a vak hnyi vak ta can. 14 Ke ûhakekenyi je otru me baten, hnân hnen li venyâ, m' adre me vaden laulau. 15 Ke e ame ânyâ li venyâ ôhum me tube ge gol, m' adre me vaden laulau. 16 Ke e ame ânyâ je omjehen laulau, a je utkaiainy, me je spuniny, me je kaiainy, me je jöginy, hnân hingâlâ, gol ae so. 17 Ke e ame ânyâ taben lamepa gol ae so; e ame ânyâ taben lamepa adre huliwan hnen hama, wale can me unyin; ke haba je kaiainy, me je ovejien, me je vongon, adre me khacâ me: 18 Ke siks ta vheiny ame vheivhei únyai hnyi li ke keihen; kun ta vheiny taben lamepa hnyi ke keihen, ke

kun minya ta vheiny taben lamepa hnyi ke keihen. 19 Kun ta kaia helâ me je vñönginy saked, me ovejien, me vongon, hnyi ke vheiny, ke kun minya ta kaia helâ me je vñönginy saked, me ovejien, me vongon, hnyi ke keihen ; helâe hnyi je vheiny a siks ame vhei únyi hnyi taben lamepa. 20 Ke e hnyi taben lamepa vak ta kaia helâ me je vñönginy saked, me je ovejien, me je vongon : 21 haba ke ovejien hmelen ke li vheiny andre okhacâ me, me ke ovejien hmelen ke li vheiny andre okhacâ me, me ke ovejien hmelen ke li vheiny andre okhacâ me, hnân je vheiny a siks ame vheivhei únyi hnyin. 22 Haba je ovejien me je vheiny andre me khacâ me : ke gol ae so andre huliwan hnen hama hia thithö. 23 Ke e ame ányâ je lamepainy a seven, me uthesiúningy, me je taben hleúhleúiny gol ae so. 24 Khaca talan gol ae so hnân ányâ e, me je omjehen hia.

25 Ke e ame tibet tap utö öhum hnân leú únyi ae bo so ; khaca kubit ibeúen, ke khaca kubit úlaúen, ke tha úcú vak ta hwe-nöiny ; ke lo li kubit ibeúen göranyai ; k' ame tha khacâ me je baitoiny. 26 Ke e ame tube e ge gol ae so, waletö hon, me je ke keihen igigilö, me je baitoiny : ke e ame bi koronainy gol igigilö. 27 Ke e ame ányâ vak ta otru gol ka hnyin hmelen koronainy, hon li vhaken, wale hnyi li ke keihen, a hnen li venyâ hnân vadren e. 28 Ke e ame ányâ li venyâ öhum me tube ge gol. 29 Ke e ame ányâ wakaco hnân hú ae kap, me únyi ae únyi hnathu ae bo so hnân le, hoton ihuliwainy at ame bi wakaco.

HNHYIMAKAN 38.

KE e ame tibet taben hut hnân leú, a utö öhum : thabúnga ta kubit ibeúen, ke thabúnga kubit ulaúen, ke tha úcú je hwe-nöiny a vak ; ke kun ta kubit ibeúen göranyai. 2 Ke e ame ányâ vak ta baitoiny hnyi vak ta kopiny, k' andre khacâ me je baitoiny, ke e ame khavâ e ge bras. 3 Ke e ame ányâ je omjehen taben hut hia, a je ot, me je soi, me je kaia, me je bálet hnân seú utiö, me je taben meic ; e ame ányâ je omjehen hia ge bras. 4 Ke e ame ányâ hnân taben hut echigic a bras helâ me boert eú hmelen baten hnyikánâi, me me uhni hnyi wanben e. 5 Ke e ame le vak ta otru hobi káu vak ta hnyibanany echigic bras, hnân hnen li venyâ. 6 Ke e ame ányâ li venyâ a utö öhum, me tube ge bras. 7 Ke e ame inâ li

venyâ hnyin je otru hnyi li ke keihen taben hut hnân vadren e ; ke e ame tibet esöiny me olanyâ hnyin.

8 Ke e ame ányâ taben soú a bras, me can a bras, únyi hnyi je uselat anyin omomo andre úkhacaköu he ka bi athnyaba hnyi hwanumen uma úkhacaköu.

9 Ke e ame bi haginy : haba hnyi ke keihen ka hnyi hwaïöu andre uhno mano lin oae úhnyúkong nân andre seveny hnyi hak, a khaca haded je kubit : 10 ke twente je khetepiny, ke twente je taben a bras ; ke sileva je báletiny je khetep, me je venyâiny. 11 Ke khaca haded je kubit hobi káu ke keihen ka hnyi hwadró, ke twente je khetepiny, ke twente je taben a bras ; ke sileva je báletiny je khetep, me je venyâiny. 12 Ke hobi káu ke keihen e jio fifte je kubit mano andre uhno, ke ten je khetepiny, ke ten je taben, ke sileva je báletiny je khetep me je venyâiny. 13 Ke fifte kubit hobi káu ke keihen e deiö. 14 Ke andre uhno hnyi ke keihen homagöule fiftin kubit mano ; ke kun ta khetepiny, ke kun ta taben : 15 helâe minya hnyi ke keihen : wale hnyi li ke keihen homagöuleny hak andre ve uhni mano a fiftin je kubit ; ke kun ta khetepiny me kun ta taben. 16 Ke haba mano hia andre uhno igigilö hak, me mano lino ae úhnyúkong nân, andre seveny. 17 Ke bras je taben je khetepiny ; ke sileva ta je báletiny je khetepiny, me je venyâiny, ke andre tube ge sileva je ban hia ; ke andre venyâ ge sileva je khetepiny hak hia. 18 Ke haba mano andre uhno a hlinginy homagöule, me, huliwa anyin at omecâ mano, ae udrudrá, me udrudrá hlit, me dra vec, me lino ae úhnyúkong nân andre seveny : ke twente kubit ibeúen, ke haba ibeúen göranyai hnyi úlaúen, thabúnga ta kubit, helâ me hna uhni mano hni hak. 19 Ke vak ta khetepiny, ke vak ta taben bras ; ke sileva je báletiny, k' andre khavâ ge sileva je ban e me je venyâiny. 20 Ke bras je faoiny uma mano hia me hak a igigilö.

21 Ke walang úseiny je únyi hnyi uma mano, a uma mano hnân ohnatho, helâ me hnödra hna aú, hoton hna húna hnö Mose, hnân huliwa anyin at Levi, a aú ga Ithamara nöku Arona at bihut. 22 Ke haba Bezaleli, nöku Uri, nöku Huro, únyi hnyi tribu Juda, ame ányâ ta je únyi hia a húna Iehova kö Mose. 23 Ke e unyin Aholiaba, nöku Ahisamaka únyi hnyi tribu Dana, at khavi hnalimen, ke at huliwa ae metâ, ke at omecâ mano ge udrudrá, me udrudrá

hlit, me dra vec, me lino ae úhnyúkong nân.

24 Haba gol hia adre hom hobi káu ta je huliwa hia hnyi dok ae kap, wale gol únyi hnyi je bwihlany, me, twente nain je talan, me tu haded ke thöte je sekel, hoton sekeliny dok ae kap. 25 Ke haba sileva unyidrin tavat adre aú hnyi úkhacaköu, khaca haded je talan, ke khaca thauzan ke seven haded ke sevente faiv je sekel, hoton sekeliny dok ae kap: 26 úsa khaca beka ke at me ke at, wale haf sekel, hoton sekeliny dok ae kap. ödra úsa khaca hia adre hanyáúá ka hnyi hna öú ödra, hwán ge tavat a twente me gan hon e, ödra siks haded ke theri thauzan ke faiv haded ke fífte. 27 Ke adre me le je talan sileva a khaca haded hnân je taben khetepiny dok ae kap, me je taben singiny; adre me ányá je taben a khaca haded, únyi hnyi je talan a khaca haded, a khaca talan hobi káu ke taben a khaca. 28 Ke únyi ge khaca thauzan seven haded ke sevente faiv sekel e ame ányá je bálet hobi káu je khetep, me khavá je ban, me ányá je venyá hobi káu. 29 Ke haba bras únyi hnyi bwihlany, me, sevente je talan me lo li thauzan ke foa haded je sekel. 30 Ke e ame ányá únyi hnyin e je taben hobi káu hwanumen uma úkhacaköu, me taben hut a bras, me echigic bras, me je omjehen hia taben hut, 31 me je taben hak igigilö, me je taben homagöuleny hak, me ta je faoiny hia uma mano, me ta je faoiny hia hak igigilö.

HNYIMAKAN 39.

KE ödrin e tibet je mano ae udrudrá, me udrudrá hlit, me dra vec, hnân úkhaüen huliwa hnyi dok ae kap, ke ödrin e ányá je úkhaú ae kap hobi kö Arona: helá me hna húna hnö Iehova kö Mose.

2 Ke e ame tibet iefoda gol, me udrudrá, me udrudrá hlit, me dra vec, me lino ae úhnyúkong nân adre seveny. 3 Ke adre me kokot halelöúá gol me kave helá me tö, m' adre me hwáwá hnyi mano ae udrudrá, me udrudrá hlit, me dra vec, me hnyin lino ae úhnyúkong nân a huliwan hnyat ae metá. 4 Ke ödrin e tibet li hon bajebenyn hobi káu únyi e adre utibetköúá: ke adre me úohmáköúá hnyi li hnyiban. 5 Ke haba wen e, wale adre hwáwá metá, hnân ca e, adre khacá me, ke tha úcú me hna huliwan e; wale gol, me udrudrá, me udrudrá hlit, me dra vec, me lino ae úhnyúkong nân

adre seveny; helá me hna húna hnö Iehova kö Mose.

6 Ke ödrin e huliwan li veto soama, wale adre bi taben hnyi li ong gol, k' adre kave hnyin ien lakon Isaraela, helá me hna khavi hnalimen hnân bi haten. 7 Ke e ame ip li únyi e hon li bajebenyn iefoda, me me li veto hnân oúnykumeá ka lakon Isaraela; helá me hna húna hnö Iehova kö Mose.

8 Ke e ame ányá tubwiny úlainy a huliwan at metá, helá me hna huliwan iefoda; a gol, me udrudrá, me udrudrá hlit, me dra vec, me lino ae úhnyúkong nân adre seveny. 9 E hu vak ta baten ae tha úcú tulutiny; ke adre ányá tubwiny úlainy me thu e: khaca hnyam ibeüen, ke khaca hnyam úlaueu, k' adre hia but tbu. 10 Ke adre me ohmá hnyin e vak ta deö veto: haba ke dö, me sadio, me topazio, me bereketh, dö a bán eling. 11 Ke haba dö a loiny, me semerado, me safairo, me aloma. 12 Ke haba dö a kuniny, me lesema, me sevo, me amethusa. 13 Ke haba dö a vakiny, me berulo, me sadonuki, me jasepi: adre ve bi taben hnyin je ong gol. 14 Ke twelw je veto hoton je ien lakon Isaraela, helá me je iödrin; helá me hna khavi hnalimen hnân bi haten, e ve hu ien hoton je tribu a twelw. 15 Ke ödrin e ányá hnyi tubwiny úlainy li cein adre khenyö gol ae so. 16 Ke adre me ányá lo li ong taben a gol me li otru a gol; me ohmá li otru hnyi li baten tubwiny úlainy. 17 Ke ödrin e iná li cein gol adre khenyö ka hnyin li otru hnyi li hnyiban tubwiny úlainy. 18 Ke adre me ohmá li hnyiban li cen adre khenyö hnyi li ong taben, me ip li únyi e hnyi li bajebenyn iefoda hnyi hnyimakan e. 19 Ke ödrin a ányá li otru gol me ohmá hnyi li ke keihen tubwiny úlainy, hnyi baten hnyi ke keihen iefoda eú hmelen. 20 Ke ödrin e ányá ke li otru gol me ohmá hnyi li únyi hon bajebenyn iefoda eú hmelen ke hnyi hnyimakan, hnyi hna úohmáköúá hon wen iefoda. 21 Ke ödrin e ca tubwiny úlainy hnyi li otruiny, ka hnyi li otruiny iefoda, ge telenu ae udrudrá, me me mokut hon wen iefoda adre hwáwá metá, me me ca he tubwiny úlainy ka ok únyi hnyi iefoda; helá me hnö Iehova hna húna kö Mose.

22 Ke e ame tibet úkhaú ae beú hanen iefoda, adre hwáwá mano ae udrudrá hia; 23 ke hnyimen hnyi wanben úkhaú helá me hnyimen úkot hnân vat, me tibet igigilö hnyimen me me ca he ka mou. 24 Ke ödrin e ányá hnyi obiny úkhaú ae beú je

wan rimona ae udrudrá, me udrudrá hlit, me dra vec, me mano lino adre seveny. 25 K' adre me ányá je pate gol ae so, me ohmá je pate wanben je wan rimona hnyi obiny úkhaú igigilö wanben je rimona; 26 ke pate me wan ke rimona, me ke pate me wan ke rimona hnyi obiny úkhaú ae beú igigilö, hnân huliwa; helá me hnö Iehova hna húna kö Mose.

27 Ke ödrin e ányá je úkhaú mano lino adre hwáwá hobi kö Arona me hobi káu je lakon, 28 me hnabinybak mano lino, me je hnabinbak mano lino ae hmanenang, me je trauzes mano lino ae úhnyúkong nân adre seveny, 29 me weny hnyekon mano lino adre seveny, me udrudrá, me udrudrá hlit, me dra vec, a huliwan at omecá mano; helá me hnö Iehova hna húna kö Mose.

30 Ke ödrin e ányá ke wahano a gol ae so hobi káu korona ae kap, me sihnalimen hon, helá me hna khavi hnalimen hon únyi hnân bi haten, ka habe, E KAP KÖ IEHOVA. 31 Ke ödrin e húkálá hnyin ke telenu ae udrudrá hnân ohmá ethö hon hnabinybak; helá me hnö Iehova hana húna kö Mose.

32 Ke adre oumo heláe je huliwa hia hobi káu uma mano, me uma úkhaçaköu: haba lakon Isaraela adre me ányá ta je únyi hia, helá me hna húna hnö Iehova kö Mose.

33 Ke ödrin e hom but kö Mose uma úkhaçaköu, wale Uma Mano, me je omjehen hia, wale je báletiny, me je esöiny, me je venyáiny, me je khetepiny, me je taben; 34 me tubwiny a unen mamoe бага adre wia me me dra, me tubwiny a unen takasa, me mano hnân singiny; 35 me tang ohnatho, me li venyáiny, me taben ibetengjö; 36 me laulau, me je omjehen hia, me areto hnân omanená; 37 me taben lamepa gol ae so, me je lamepainy wale je lamepa adre ip gaga, me je omjehen hia, me wakaco hnân umumelam; 38 me taben hut a gol, me wakaco hnân hú, me únyi ae bo so hnân le, me mano singiny hwanuma; 39 me taben hut a bras, me echigic bras, me li venyáiny, me je omjehen hia, me taben soú, me can e; 40 me mano huân uhno hnyi kak, me je khetepiny, me je taben e, me mano hlinginy homagöuleny hak, me je töiny e, me je faoiny, me ta je únyi hnân huliwa hia hnyi uma mano, hobi káu uma úkhaçaköu; 41 me je úkhaúen huliwa adre tibet soá hnân huliwa hnyi dok ae kap, me je úkhaú ae kap hobi kö Arona at bihut,

me je úkhaúen lakon hnân hanyen bihut. 42 Haba lakon Isaraela adre me ányá ta je únyi hia thithö e, helá me Iehova ame húna kö Mose. 43 Ke haba Mose ame wá ta je huliwa hia thithö, ke wá bi, adre hia but ányá e; adre me ányá helá me hna húna hnö Iehova: ke haba Mose ame hahnahici ödra.

HNYIMAKAN 40.

HABA Iehova ame ha kö Mose, ka habe, 2 U ma he ka otílá uma mano hnân uma úkhaçaköu, hnyi bong a bâniny tehi a bân. 3 Ke u me he ka ip eiö hnyin tangen ohnatho, me söng tang ge mano adre uhno. 4 Ke u ma he ka hom laulau, me ip gaga ta je únyi hnân ip hon; ke u me he ka hom taben lamepa me vac je lamepainy. 5 Ke u me he ka ip hnyi hnyimakan tangen ohnatho taben gol hnân leú utö ae bo so, me uhno hlinginy hwanumen uma mano. 6 Ke u me he ka ip taben leú hut ciö hwanumen uma mano a uma úkhaçaköu. 7 Ke u me he ka ip taben soú wanben uma úkhaçaköu me taben hut, me hingálá köiö ka hnyin. 8 Ke u me he ka otílá hak igigilö me uhno hlinginy homagöuleny hak. 9 Ke u me he ka hom wakaco hnân hú, me hú uma mano. me ta je únyi hia eiö hnyin, ke u me he ka okabá, me je omjehen hia thithö: k' ame he bi ka kap. 10 Ke u me he ka hú taben leú hut me je omjehen hia me okabá taben hut: k' ame he ka ti kap taben bi hut. 11 Ke u me he ka hú taben soú me can e, me okabá e. 12 Ke u me he ka hum Arona me je lakon ka hnyi hwanumen uma úkhaçaköu me osú ödrin ge köiö. 13 Ke u me he ka khaúö Arona ge je úkhaú ae kap; me u me he ka hú e, me okabá, me me at bihut könya. 14 Ke u me he ka hom je lakon me okhaú ödrin ge je úkhaú: 15 ke u me he ka hú ödrin helá me hnâm hna hú kamödrin, m' ödrin e je at bihut könya: ke haba hna hú ödrin, me waleling me me hnyat bihut nyiele balua hnyi anyidrin ta je dö hia. 16 Haba Mose ame ányá heláe: hoton ta je hofuc hia a húna Iehova káu.

17 Ke haba hnyi tehi a bân hnyi huna a loiny, hnyi bong a bâniny tehi, adre me otílá uma mano. 18 Haba Mose ame otílá uma mano, me ohmá je taben, me otílá je esöiny, me iná je venyáiny, me otílá je khetepiny. 19 Ke e ame ulolo mano ethö hno uma, me ip tubwiny uma ethö hon e,

LEVITIKO 1.

helâ me hna hûna hnö Iehova kö Mose. 20 Ke e ame hom me hitangen únyi hnân ohnatho hnyin tang, me inâ li venyâ hnyi tang, me ip taben ibetengiö ethö hon tang: 21 ke e ame odilâ tang hnyin uma mano, me uhno mano a singiny me söng tang ohnatho, helâ me hnö Iehova hna hûna kö Mose. 22 Ke e ame ip laulau hnyin uma úkhacaköu, hnyi ke keihen uma mano ka hnyi hwadrö, hoton singiny. 23 Ke e ame ip gaga je areto hon e hnyi hnyimakö Iehova; helâ me Iehova ame hûna kö Mose. 24 Ke e ame ip taben lamepa hnyi uma úkhacaköu cicö laulau hnyi ke keihen ka hnyi hwaiöu hnyi uma mano. 25 Ke e ame vac je lamepa hnyi hnyimakö Iehova; helâ me Iehova ame hûna kö Mose. 26 Ke e ame ip taben hut a gol hnyi uma úkhacaköu hnyi hnyimakan singiny: 27 ke e ame le únyi ae bo so hon; helâ me Iehova ame hûna kö Mose. 28 Ke e ame uhno hlinginy hwanumen uma mano. 29 Ke e ame ip taben leú hut hnyi hwanumen uma mano a uma úkhacaköu, me hudo hon e je hut adre le, me hudiny han; helâ me Ieho-

va ame hûna kö Mose. 30 Ke e ame ip taben sou hnyi wanben uma úkhacaköu me taben hut, me hingölö köiö hnân sou. 31 Ke haba Mose me Arona me je lakon ödrin e hinyem me osûâ je cadrin eling; 32 ödrin ka didrö ka hnyi uma úkhacaköu, me hakekenyâ taben bihut, ödrin e me sou; helâ me hna hûna hnö Iehova kö Mose. 33 Ke e ame otilâ hak igigilö uma mano, me taben hut, me uhno hlinginy homagöule. Helâe Mose ame umo huliwa.

34 Me haba úlá ame tube uma úkhacaköu, ke haba hmanenangi Iehova ame ounöngötâ uma mano. 35 Ke ca hanö Mose he ka didrö ka hnyi uma úkhacaköu, anyin a laba úlá hon, k' ame ounöngötâ uma mano ge hmanenangi Iehova. 36 Ke adre me hom dö úlá úheny hon uma mano, me haba lakon Isaraela adre me he, hnyi anyidra je bunyen; 37 ke adre ne ca hom göranyai úlá, me ame ca he lakon Isaraela, ke ne o but adre me hom e göranyai. 38 Haba úlá anyi Iehova ame laba hon uma mano hnyi lany, ke meic hnyi lit, hnyi hnyimakan lap hia anyin at Isaraela, hnyi anyidra je bunyen hia.

LEVITIKO

TUSI A KUNINY ANYI MOSE.

HNYIMAKAN 1.

KE baba Iehova ame hao Mose me ha kâu únyi hnyi hnyin uma úkhacaköu, ka habe, 2 Ha thö ka lakon Isaraela, ka habe, E ka he ke at gabun ka bi hut kö Iehova, me öbun e he ka bi hut únyi hnyi je meno, wale je kau, me hnahat mamoe.

3 Ame ne hut adre le únyi hnyi hnahat kau anyin hut, hamen he ka hudo бага ae ba hnyikongon: e ame he ka hudo e hnyi hwanumen uma úkhacaköu, m' adre me kap soâ e hnyi hnyimakö Iehova. 4 Ke e ame he ka ip hnyamen hon ban hut adre le; k' adre me he ka kap soâ e hobi kâu, me me bi hwaban anyin möt. 5 Ke e ame he ka hlingâ bolok hnyi hnyimakö Iehova: ke hamen hnyat bihut, a je laku Arona, he ka hom dren, me dukâiâ igigilö ge dra wale hon taben hut a e hnyi hwanumen uma úkhacaköu. 6 Ke e ame he ka uja hut adre le, me susubâ. 7 Ke haba laku

Arona at bihut ödrin e he ka hú meic hon taben hut me hú meic: 8 k' ame he hnyat bihut a laku Arona ka ip je eckeihen wale ban, me pipikhenya, hon hna hú meic hnyi hon taben hut: 9 ke haba tang tiny me je can, e ame he ka hneú hnyi köiö: k' ame he at bihut ka tha le hia hon taben hut, me me hut adre le, hut a an hnen meic, únyi ae bo so kö Iehova.

10 Ke ame ne únyi hnyi je hnahat meno, ame ne mamoe, ame ne got, anyin hut, hnân hut adre le; me e ame he ka hudo бага ae ba hnyikongon. 11 Ke hamen he ka hlingâ e hnyi ke keihen taben hut ka hnyi hwadrö hnyi hnyimakö Iehova: ke hamen hnyat bihut a laku Arona, he ka dukâiâ igigilö ge dren hon taben hut. 12 Ke e ame he ka susubâ, me ban me pipikhenyainy: k' ame he at bihut ka ip gaga je uthmeno eling hon hna meic wale hon taben hut: 13 ke haba tang tiny me je can e ame he ka hneú hnyi köiö: k' ame

he at bihut ka hudo hia thithö, me le hon taben hut ; wale hut adre le, hut a an ge meic, únyi ae bo so kö Iehova.

14 Ke ame ne únyi hnyi je meno ame gá anyin hut adre le kö Iehova, me e ame he ka hudo je biny ame ne lakon meköta. 15 K' ame he at bihut ka hom e ka hnyi taben hut, me ken degecâ ban, me le hon taben hut ; k' adre me he ka owa dren ka hnyi ke keihen taben hut : 16 ke e ame he ka hom wahanen me anen, me khúâ ka hnyi ke keihen taben hut e deiö hnyi nhen hnabadröu : 17 ke e ame he ka kia e hnyi li bajebenyin, k' ame ca he ka kia luâ : k' ame he at bihut ka le hon taben hut, wale hon hna meic : haba e me hut adre le, hut a an hnen meic ae bo so kö Iehova.

HNyimakan 2.

KE a ne he ke at ka hudo hudiny han kö Iehova, ame he ka falawa ae so anyin hut ; k' ame he ka hú ge wakaco, me bi niken libanu ka hnyin : 2 ke e ame he ka hom e ka laku Arona a hnyat bihut : ke e ame he ka okhaca aoc falawa, me ke keihen wakacoiny, me libanuiny hia ; k' ame he at bihut ka le e hnân oúnykúmeâ hon taben hut, wale hut a an ge meic, ae bo so kö Iehova : 3 ke haba kolon hut hnân han : wale ae ti kap únyi hnyi je hut a an ge meic kö Iehova.

4 Ke u ka he ka hudo hudiny han adre thân, me so je ong areto falawa ae so adre ca levenâ bi, adre úthueniken me wakaco, k' ame ne je ong areto ae halelöu adre ca levenâ k' adre khinö wakacoiny. 5 Ke ame ne hudiny han hnyi öt ányâm hut, me so e falawa ae so adre ca levenâ bi, k' adre úthueniken me wakaco. 6 U ma he ka susubâ, me hú ge wakaco ; wale hudiny han. 7 Ke ame ne hudiny han hnyi fraingpan ányâm hut, m' adre me he ka bi falawa me wakaco. 8 Ke u me he ka hom hudiny han adre ányâ únyi hnyi je unyi eling kö Iehova : k' adre me he ka ham e ka at bihut, ke e ame he ka hom e ka hnyi taben hut. 9 K' ame he at bihut ka hom ke keihen hudiny han me hnân oúnykúmiâ, me le hon taben hut : wale hut a an hnen meic, ae bo so kö Iehova. 10 Ke haba kolon hudiny jeú me hobi kö Arona me lakon ; wale únyi ae ti kap únyi hnyi je hut a an hnen meic kö Iehova. 11 Adre me ca he ka bi leven ka hnyi ke hudiny han öbun e he ka hudo kö Iehova ; anyin a öbun e ca

he ka leú leven me hani hnyi hut a an ge moic kö Iehova. 12 Öbun e he ka hudo e hnân hudiny wan a bán kö Iehova, k' ame ca he ka ölö göranyai bunen ae so únyi hnyi hon taben hut. 13 Ke u me he ka sáltâ je hudiny ányâm han hia ; ke so ame ca ba balua sáltiny úhinhnykôu anyin Khongom hnyi ányâm hudiny han : u me he ka hudo ányâm je hut hia tha e me sált.

14 Ke u ka he ka hudo hudiny han, únyi hnyi je wan a bán kö Iehova, me u me he ka hudo hnân hudiny han je wan a bán hnyi em hnyei, je wan hwit adre le ge meic, me je hwit adre omomonoâ. 15 Ke u me he ka bi wakacoiny, me ip libanu hon : wale hudiny han. 16 K' ame he at bihut ka le önykúmiâ, a ke keihen hwit adre omomonoâ, me ke keihen wakacoiny, me libanuiny hia : wale hut a an ge meic kö Iehova.

HNyimakan 3.

KE ame ne hudiny ole anyin hut, ame ne he ka hudo únyi hnyi hnabat meno, ame ne бага, ame ne momo, me hamen he ka hudo at ae ba hnyikongon hnyi hnyimakö Iehova. 2 Ke e ame he ka ip hnyamen hon ban anyin hut me hlingâ hnyi hwanumen uma úkhacaköu : k' ame he laku Arona hnyat bihut ka dukâiâ dren igigilö hnyi hon taben hut. 3 Ke e ame he ka hudo kö Iehova hut a an ge meic únyi hnyi je hudiny ole ; haba pipikhenya at ame lan tang tiny, me pipikhenyainy tiny hia, 4 me li wagien, me pipikhenyainy cicö li jebalainon me únyi ae laú ethö hon akiny, e ame he ka tha hom me li wagien. 5 K' ame he laku Arona ka le únyi e hon taben bi hut, hon hut hnân le hnyi hna hú meic : wale hut a an hnen meic, ae bo so kö Iehova.

6 Ke ame ne únyi hnyi hnabat meno anyin hut hnâu hudiny ole, ame ne бага ame ne momo, me e ame he ka hudo at ae ba hnyikongon. 7 Ame ne hudo nokon mamoe hnân anyin hut, me e ame he ka hudo e hnyi hnyimakö Iehova : 8 ke e ame he ka ip hnyamen hon ban anyin hut me hlingâ e hnyi hnyimakan uma úkhacaköu, k' ame he laku Arona ka dukâiâ dra igigilö hon taben bi hut. 9 Ke e ame he ka hudo kö Iehova hut a an ge meic únyi hnyi je hudiny ole ; ke haba pipikhenyainy, me obiny ae bekhöt ae pipikhenya e ame he ka hom únyi hnyi jö tot ; ke haba pipi-

khenya at ame lan tang tiny, me pipikhenya hia hnyi tiny, 10 me li wagiën, me pipikhenyainy cicö li jebalainon, me únyi ae lau ethö hon akiny, e ame he ka tha hom e me li wagiën. 11 K' ame he at bihut ka le hon taben hut : wale jeúiny hut a an ge meic kö Iehova.

12 K' ame ne got anyin hut, e ame he ka hudo hnyi hnyimakö Iehova. 13 Ke e ame he ka ip hnyamen hon ban, me hlingá hnyi hnyimakan uma úkhacaköu : k' ame he laku Arona ka dukáái dren igigilö hon taben hut. 14 Ke e ame he ka hudo únyi hnyin je anyin hut, a hut a an ge meic kö Iehova ; ke haba pipikhenya at ame lan tany tiny, me pipikhenyainy hia tang tiny, 15 me li wagiën me pipikhenyainy, cicö li jebalainon, me únyi ae lau ethö hon akiny, e ame he ka tha hom me li wagiën. 16 K' ame he at bihut ka le ta je únyi e hon taben hut : wale jeúiny hut a an ge meic hnân bo so : hobi kö Iehova pipikhenya hia. 17 Ame he ka hnanyibu nyiele balua hnyi anyibun ta je dö, hnyi je hnyababun hia, ka habe, ca he öbun ka han pipikhenya me dra.

HNyimakan 4.

KE haba Iehova ame ha kö Mose, ka ka habe, 2 Ha thö ka lakon Isaraela, ka habe, A ne ke at ame hanyáúú ke hnanyibu anyi Iehova, ke ca khana, waleji hnyi je únyi a húna Iehova a g' adre me ca he ka ányá, ke ame ne he ka ányá ke únyi eling : 3 ame ne he at bihut adre hú ka hanyáúú, me hom hulö hon tavat ; me e ame he ka hudo, can monu e ame ányá, ke nak bolok ae ba hnyikongon, kö Iehova, hnân hudiny hulö. 4 Ke ame he ka hom bolok ka hnyi hwanumen uma úkhacaköu hnyi hnyimakö Iehova ; k' ame he ka ip hnyamen hon ban bolok, me hlingá bolok hnyi hnyimakö Iehova. 5 K' ame he at bihut adre hú ka hom únyi dren bolok, me hom ka hnyi uma úkhacaköu : 6 k' ame he at bihut ka hneú banyen hnyi dra, me oseven dukáái dren hnyi hnyimakö Iehova, cicö singiny dok ae kap. 7 Ke ame he at bihut ka kina dra eling hon je baitoiny taben leú únyi ae bo so hnyi hnyimakö Iehova, a e hnyin uma hnân úkhacaköu : ke e ame he ka hingálá hia dren bolok eú hmelen taben leú hut, wale hnyi hwanumen uma úkhacaköu. 8 Ke hamen he ka uja únyi hnyin e pipikhenyainy bolok hia

hnân hudiny hulö : haba pipikhenya at ame lan tang tiny, me pipikhenya hia hnyi tang tiny, 9 me li wagiën, me pipikhenyainy cicö li jebalainon, me únyi ae lau ethö hon akiny, e ame he ka tha hom me li wagiën, 10 helá me hna hom únyi hnyi bolok hnân hudiny ole : k' ame he at bihut ka le ta je únyi e hon taben leú hut. 11 Ke haba unen bolok, me utiöiny hia, me ban, me je can, me tang tiny, me ta tet, 12 wale bolok hia thithö e ame he ka hom hoton hnyaba ka hnyi dok ae so, wale adre labö hingölö dröu hnyin, ke adre me he ka le e ge meic : adre me he ka thong hnyi dok adre me labö hingölö dröu hnyin.

13 Ke ame ne hanyáúú tavat Isaraela hia, ke iyong únyi eling ka úkhacaköu, k' adre me ne ányá ke únyi a ha Iehova a g' adre me ca he ka ányá, m' adre me hulö but ; 14 ke e ka manen hulö adre me ányá, me hamen úkhacaköu he ka hudo nak bolok hudiny hulö, me hom e ka hnyi hnyimakan uma úkhacaköu. 15 Ke ame he wahingatinginy úkhacaköu ka ip je hnyamödrin hon ban bolok hnyi hnyimakö Iehova : ke adre me he ka hlingá bolok hnyi hnyimakö Iehova. 16 Ke ame he at bihut adre hú he ka hom dren bolok ka hnyi uma úkhacaköu : 17 k' ame he at bihut ka hneú banyen hnyi dra me oseven dukáái e hnyi hnyimakö Iehova, cicö singiny. 18 Ke e ame he ka kina ke ong dra hnyi je baitoiny taben hut hnyi hnyimakö Iehova, hnyi uma úkhacaköu, ke e ame he ka hingálá dra hia hmelen taben leú hut, wale hnyi hwanumen uma úkhacaköu. 19 Ke e ame he ka uja únyi hnyin e je pipikhenya hia me le hon taben hut. 20 Heláe e ame he ka ányá ka bolok ; helá me hnen hna ányá ka bolok hnân hudiny hulö, me e ame he ka ányá heláe ká áng : ke ame he at bihut ka bi hwaban anyidra möt, k' adre me he ka hn' ödra. 21 Ke e ame he ka hom bolok ka hnyi hoton hnyaba, me le, helá me hnen hna le bolok a bán : haba únyi e, me hudiny hulö hobi káu úkhacaköu.

22 A ne he ke than ka ányá hulö, ke ca khana, k' ame ne mádrá ke únyi a ba hnö Iehova Khongon a g' adre me ca he ka mádrá, k' ame ne hulö but ; 23 ke adre me ne omanená káu anyin monu, waleji e ame hulö hnyin, me e ame he ka hom hnân anyin hut got бага ae ba hnyikongon : 24 ke e ame he ka ip hnyamen hon ban got me hlingá e hnyi dok adre me labö hlingá hut adre le hnyi hnyimakö Iehova :

wale hudiny hulö. 25 Ke hamen at bi hut be ka hom ke ong dra dren hudiny hulö, ge banyen, me kina hnyi je baitoiny taben leü hut, k' ame he ka hingälâ dren hmelen taben leü hut. 26 Ke ame he ka le hia pipikhenyainy hon taben hut, helâ me pipikhenyainy hudiny ole ; ke ame he at bihut ka bi hwaban anyin möt anyin a e at hulö, k' adre me he ka hna but anyin monu.

27 Ke ame ne monu ke at aten hnyeï, ke ca khana, k' ame ne ânyâ ke ûnyi a ha hnö Iehova a g' adre me ca he ka ânyâ, k' ame hulö but ; 28 ke adre ne omanenâ kâu anyin monu, me e ame he ka hom hnân anyin hut, ke got momo ae ba hnyikongon, can monu e ame anyâ. 29 Ke e ame he ka ip hnyamen hon ban hudiny hulö, me hlingâ hudiny hulö hnyi dok adre le hnyin hudiny leü. 30 Ke ame he at bihut ka hom ge banyen ke ong dra, me kina hon je baitoiny taben leü but, me hingälâ dren hia hnyi hmelen taben hut. 31 Ke e ame he ka hom pipikhenyainy hia, helâ me hna hom pipikhenyainy hudiny ole ; k' ame he at bihut ka le e hon taben hut me me bo so kö Iehova ; ke ame he at bihut ka bi hwaban anyin möt, k' adre me he ka thang degecâ anyin hulö.

32 Ke ame ne hom nokon mamoe hnân anyin hut a hudiny hulö, hamen he ka hom momo ae ba hnyikongon. 33 Ke e ame he ka ip hnyamen hon ban hudiny hulö, me hlingâ e hnyi dok adre me labö hlingâ hnyin hudiny leü. 34 Ke ame he at bi hut ka hom ge banyen ke ong dra dren hudiny hulö, me kina e hon je baitoiny taben leü hut, me hingälâ dren hia hmelen taben hut : 35 ke e ame he ka hom hia pipikhenyainy, helâ me hna uja pipikhenyainy nokon mamoe hnân hudiny ole ; ke hamen at bihut he ka le ta je ûnyi e hon taben hut, helâ me je hut kö Iehova a an hnen meic ; ke ame he at bihut ka bi hwaban möt anyin a e at ae monu, k' adre me he ka thang degecâ anyin hulö.

HNYIMAKAN 5.

KE ame ne monu ke at a löng hnödra hna kunâ he ka khemanyin, ke e at ohnatho, a ne wâ, a ne khana, k' ame ne ca ha hofuc eling, me ame he ka takou e anyin hulö : 2 ke haba khaca, a ne he ke at ka kâlâ ûnyi ae bokong, ame ne unyin meno ae bokong a mokcu, ame ne meno a

vak can ae bokong a mokcu, ame ne meno ame iyâü ae bokong a mokcu, ke ame ne ca manen kâu, me e ame he minya ka bokong, k' ame hulö but : 3 ke ame ne kâlâ bokonginy at, a ta je ûnyi hia ae ikiki ame obokongoâ, ke iyong e kâu ; haba hnyi ûen a e khana e, me e at hulö : 4 ke ame ne he ke at ka ie khemanyin ge li esongodiny he ka ânyâ ûnyi ae kong, ame ne ûnyi ae so, haba ta je ûnyi hia e ame ie ha me khemanyin, ke iyong kâu, haba hnyi ûen ae khana me e at hulö hnyi ke ûnyi eling : 5 ke ame ne hulö but hnyi ke ûnyi eling, me e ame he ka haimemenâ a ga hulö but hnyin e : 6 ke e ame he ka hom kö Iehova hudiny anyin hulö, can hulö e ame ânyâ, a meno momo ûnyi hnyi hnahat mamoe, ame ne nokon mamoe, ame ne got, hnân hudiny hulö ; ke ame he at bihut ka bi hwaban anyin möt, anyin a e at hulö. 7 Ke ame ne ca khana he ka ham ke meno helâe can hulö e ame ânyâ, me hamen he ka hom hwaban kö Iehova, a lo li biny, ame ne li lakon meköta ; hnân hudiny hulö khaca, ke hnân hudiny leü khaca. 8 Ke e ame he ka hom li meno eling ka at bihut, k' ame he ka bân ka hudö hudiny hulö, me ken degecâ ban, ke ca he ka subâ luâ : 9 ke e ame he ka dukâiâ ke keihen taben hut ge dra dren hudiny hulö ; ke adre me he ka owa kolon dra hmelen taben hut : haba e me hudiny hulö. 10 Ke e ame he ka hudo at a loiny hnân hudiny leü hoton hnanyibu : ke ame he at bihut ka bi hwaban anyin möt ge monu e ame hia but ânyâ, k' adre me he ka hna e.

11 Ke ame ne ca khana he ka hom li biny, ame ne li lakon meköta, me hamen at a ânyâ hulö he ka hom hnân anyin hut, khaca omer falawa hnân hudiny hulö ; e ame ca he ka hü e ge wakaco, k' ame ca he ka ip libanu ka hnyi hon : anyin a e hudiny hulö. 12 Ke e ame he ka hom ka at bihut, k' ame he at bihut ka okhaca aoc ge hnyamen hnân oûnykûmeâ, me le hon taben hut, helâ me je hut a an ge meic kö Iehova : haba e hudiny hulö. 13 Ke ame he at bihut ka bi hwaban anyin möt can hulö e ame ânyâ hnyi ta je ûnyi eling, k' adre me he ka hna e ; ke hobi kâu at bihut kolon hnân hudiny han.

14 Ke Iehova ame ha kö Mose, ka habe, 15 A ne he ke at ka ânyâ monu, ke ca khana, hnyi ta je ûnyi ae kap ga Iehova ; me e ame he ka hom kö Iehova hudiny hulö, a mamoe бага ae ba hnyikongon ûnyi

hnyi hnahat mamoe, hoton hnâm hna tuluto kâu je sekel sileva, helâ me sekeliny dok ae kap, hnân hudiny hulö : 16 ke e ame he ka bi hwaban hulö e ame ânyâ hnyi ûnyî ae kap, ke e ame he ka bi hanen ka hnyin ke keihen a thabûnginy, me ham e ka at bihut : ke ame he at bihut ka bi hwaban anyin möt, ge mamoe бага hudiny hulö, k' adre me he ka hna e.

17 Ke ame ne ke at ame ânyâ hulö me ânyâ ke je ûnyî hnyi ta je ûnyî a hûna hnö Iehova a g' adre me ca he ka ânyâ ; k' ame ne ca khana e, me ame hulö but, k' ame he ka takou e anyin hulö. 18 Ke e ame he ka hom ka at bihut mamoe бага ae ba hnyikongon ûnyî hnyi hnahat mamoe, helâ me hnâm hna tuluto kâu, hnân hudiny monu : ke ame he at bihut ka bi hwaban anyin möt, can anyin monu, ke ca khana bi. k' adre me he ka hna e. 19 Wale hudiny monu : anyin ae hnathu e ame monu kö Iehova.

HNYIMAKAN 6.

KE Iehova ame ha kö Mose, ka habe, 2 A ne ke at ame ânyâ monu, me hanyâüa hnanyibu anyi Iehova, me iyawö ka at ame laba hakekenyâ ge ûnyî ame hna kâu he ha tuö, ame ne ge ûhîhinykôu, ame ne ûnyî adre hûgûnâ, ame ne ovecâ ke at ; 3 ame ne wâ ûnyî a hia anyin ke at, k' ame iyawâ hnyin, me khemanyin thoi ; haba hnyi ta je ûnyî hia eling a ânyâ ke at, me mädra hulö hnyin : 4 hawe, a ne monu, a ne hia but ânyâ hulö, hamen he ka ham hmetu ûnyî e ame hûgûnâ, ame ne ke ûnyî e ame hom hnyi hnen hna ovecâ at, ame ne ûnyî adre hna kâu he ka tuö, ame ne ûnyî a hia, wale ame blo, 5 ame ne ke ûnyî e ame khemanyin thoi hnyin ; hawe, hamen he ka ham hmetu hia thithö, me bi hanen ke keihen a libenyitainy : hamen he ka ham ka at a anyin hnyi bong a manen hnyin. 6 Ke e ame he ka hom kö Iehova hudiny anyin hulö, a mamoe бага ae ba hnyikongon ûnyî hnyi hnahat mamoe, helâ me hnâm hna tuluto hnân hudiny monu a deny at bihut : 7 ke ame he at bihut ka bi hwaban anyin möt hnyi hnyimakö Iehova, ke adre me he ka hna e ; wale hnyi ta je ûnyî hia e ame monu hnyin.

8 Ke Iehova ame ha kö Mose, ka habe, 9 Ha thö kö Arona me lakon, ka habe, Walang hnanyibuiny hudiny leü : wale hut

adre le, ame he ka mokut hon hna hû meic, hnyi hnyinghet hia ke ne o but hnyomakatu ; k' ame he ka möt meic hon taben hut. 10 Ke ame he at bihut he ka khavâ anyin ûkhaü lino, me khavâ unyin ge anyin útrauzes lino ; ke e ame he ka aoc hnabadröu ta an hut adre le hon taben hut, ke e ame he ka ip e hnyi ke keihen taben hut. 11 Ke e ame he ka uny anyin je ûkhaü, me khavâ ke je ûkhaü, me hom dröu ka hnyi hoton hnyaba ka hnyi dok ae so. 12 Ke ame he ka labö möt meic hon taben hut, k' ame ca he ka mok ; ke ame he at bihut he ka hû ütö hon hnyi je hnyomakatu hia : ke e ame he ka ip gaga hon e hut adre le, me e ame he ka le hon e pipikhenyainy je hudiny ole. 13 Ame he bala ka möt meic hon taben hut ; ame ca he ka mok.

14 Ke walang hnanyibuiny hudiny han : ame he laku Arona ka hudo e hnyi hnyimakö Iehova, cicö taben hut. 15 Ke e ame he ka okhaca aoc falawa a hudiny han, me wakacoiny, me libanu hia, hon hudiny han, ke e ame he ka le e hon taben hut me me bo so, hnân oûnyükümiâ kö Iehova. 16 Ke haba kolon, ame he Arona me lakon he ka an : ödrin e he ka han e, adre ca levenâ, hnyi ke dok ae kap ; ödrin e he ka han e hnyi hagny uma ûkhacaköu. 17 Adre me ca he ka le e adre levenâ. Oge hia but ham e hnân hwajekhöüdrin ûnyî hnyi je hut a an ge meic kõnya ; e ti kap e, helâ me hudiny hulö, me hudiny monu. 18 Ame he lakon бага a laku Arona hia ka hnyi han e, wale ke hwajekhon nyiele balua hnyi anyibun ta je dö, ûnyî hnyi je hut a an ge meic kö Iehova : ödrin e he ka kap hia tavat ödrin e kâlâ.

19 Ke Iehova ame ha kö Mose, ka habe, 20 Walang hut anyi Arona me je lakon ödrin e he ka hudo kö Iehova hnyi bong adre me he ka hû e ; khaca omer falawa hnân hudiny han nyiele balua, haf hnyi hnyomakatu, ke ke haf hnyi sahad. 21 Adre me he ka ânyâ e me wakaco hnyi öt ; at ka hia but le, me u me he ka odilâ : ke u me he ka hudo hudiny han hnân bo so kö Iehova wale je ong falawa. 22 Ke ame he ka hudo e hnen at bihut adre hû, a nokon wale at ame hwaban : haba hnanyibu nyiele balua ka habe, Adre me he ka tha le hia kö Iehova. 23 Ke adre me he ka le avâ je hudiny han hia anyin at bihut : adre me ca he ka an e.

24 Ke Iehova ame ha kö Mose, ka habe, 25 Ha thö kö Arona me lakon, ka habe

Walang hnanyibuiny hudiny hulö : haba dok adre me labö hlingâ je hudiny leü hnyin, me adre me he ka hlingâ minya hnyin hudiny hulö hnyi hnyimakö Iehova : wale ae ti kap. 26 Haba at bihut, wale at a hudo e hnân hulö, ame he ka han e : adre me he ka an e hnyi dok ae kap hnyi haginy uma ûkhacaköu. 27 Haba ûnyi ame kâlâ utiöiny me e kap e : ke ame ne ta thö dra hnyi ke ûkbaü, u ma he ka hneü dren eling hnyi ke dok ae kap. 28 Ke adre me he ka tho degecâ kaia kânâ adre ölä hnyin : ke adre ne ölä e hnyi kaia a bras, adre me he ka kot e me hneü ge köiö. 29 Ame he ka hnyi an e obaga hia hnyat bihut : wale ûnyi ae ti kap. 30 Ke haba ta je hudiny hulö hia, wale adre odilâ dren ka hnyi uma ûkhacaköu, hnân bi bwaban möt hnyi dok ae kap, me, adre me ca he ka an e : adre me he ka le degecâ ge meic.

HNYIMAKAN 7.

KE walang hnanyibuiny hudiny monu : wale ae ti kap. 2 Adre me he ka hlingâ hudiny monu hnyi dok adre me labö hlingâ hnyin hudiny leü : ke adre me he ka dukââ dren igirilö hon taben hut. 3 Ke e ame he ka hudo pipikhenyainy hia ; wale obiny ae pipikhenya, me pipikhenya at ame lan tang tiny, 4 me li wagien, me pipikhenyainy, cicö li jebalainon, me ûnyi ae lau ethö hon akiny, e ame he ka tha hom me li wagien : 5 ke ame he at bihut ka le ta je ûnyi e hon taben hut, me me hut a an ge meic kö Iehova : haba ûnyi e me hudiny monu. 6 Ame he obaga hia a hnyat bihut ka an e, adre me he ka an e hnyi dok ae kap ; wale ûnyi ae ti kap. 7 E ûcü thibi hudiny hulö me hudiny monu : khaca thibi hnanyibu hobi kâu li ûnyi e : haba at bihut ame bi hwaban möt kâu, me anyin bi e. 8 Ke haba at bihut, at ame hudo hudiny leü anyin ke at, me anyin bi unen hut adre le waleji e ame hudo. 9 Ke haba hudiny han hia adre thân, me ta je ûnyi hia adre ânyâ hnyi faraingpan me öt, me ame he ka an at ame hudo ûnyi eling. 10 Ke haba ta je hudiny han hia adre úthueniken me wakaco, ame ne mada, me wale anyin laku Arona hia, e ûcü ka ke at me ke at.

11 Ke walang hnanyibuiny hudiny ole, adre me he ka hudo kö Iehova. 12 Ame ne he ka hudo e hnân hudiny ole, me e ame he ka tha hudo me hudiny ole je ong areto adre ca levenâ bi adre úthueniken me wa-

kaco, me je ong areto ae halelöu adre ca levenâ bi adre khinö wakacoiny, me je ong areto adre úthueniken me wakaco, a falawa ae so adre le. 13 Fame he ka hudo hudiny hut tha e me ta je hudiny ole, me hnân ole, tha e me je ong areto adre ca levenâ bi. 14 Ke haba khaca hut hnyi je hut hia, me ame he ka hudo hnân hut adre kap göranyai kö Iehova : ke haba at bihut at ame dukââ dren je hudiny ole, me, anyin bi e. 15 Ke haba utiöiny hudiny ole hnân anyin ole, adre me he ka han hnyi bong adre hudo hnyin ; e ame ca he ka ip kolon ke ne o but hnyomakatu. 16 Ke ame ne khöbi, ame ne hudiny ibetengio anyin hut, me adre me he ka han e hnyi bong adre hudo hnyin anyin hut : ke bong nyi adre me he ka an kolon : 17 ke haba kolon utiöiny hut hnyi bong we, me adre me he ka le degecâ e ge meic. 18 Ke adre me ne he ka an ke keihen utiöiny hudiny ole hnyi bong we, waleji e ame hudo, me adre me ca he ka kap e, ke adre me ca he ka aü e ka at ame hudo : ûnyi ae ikiki, ke haba at ame he ka an, me ame he ka takoü e anyin hulö. 19 Ke adre me ca he ka an utiöiny ame kâlâ ge ûnyi ae bo kong : adre me he ka le degecâ e ge meic. Haba utiö ame he tavat thibi ae bo so ka hnyi han : 20 ke haba at ame han utiöiny hudiny ole wale a anyi Iehova, ke e at ae bo kong, me adre me he ka subâ degecâ at eling ûnyi hnyi iny hnyei. 21 Ke haba at ame kâlâ ûnyi ae bo kong, ame ne bo konginy at, ame ne bo konginy meno, ame ne ke ûnyi bi ae ikiki ae bo kong, me han utiöiny hudiny ole, wale a anyi Iehova, me adre me he ka subâ degecâ at eling ûnyi hnyi iny hnyei.

22 Ke Iehova ame ha kö Mose, ka habe, 23 Ha thö ka lakon Isaraela, ka habe, Ca he öbun ka han pipikhenyainy kau, me mamoe, me got. 24 Ke haba pipikhenyainy meno ame mok hwege, me pipikhenyainy meno adre oloü, me ûcü hobi kâu ke ta je huliwa : k' öbun e ca he bala ka an e. 25 Ke haba at ame he ka han pipikhenyainy meno, adre bödra ka hudo hnân hut a an ge meic kö Iehova, me adre me he ka subâ degecâ at a han, ûnyi hnyi iny hnyei. 26 Ca he öbun ka han dra hnyi je hnyababun hia, ame ne dren meno ame gâ, ame ne meno a vak can. 27 Haba at ame han dra, me adre me he ka subâ degecâ e ûnyi hnyi iny hnyei.

28 Ke Iehova ame ha kö Mose, ka habe,

29 Ha thö ka lakon Isaraela, ka habe, Haba at ame hudo anyin hudiny ole kö Iehova, me e ame he ka hom anyin hut kö Iehova únyi hnyi anyin hudiny ole : 30 e ame he ka hom ge li hnyamen je hut a an ge meic kö Iehova, a pipikhenyainy, me úlainy, e ame he ka hom, me me hajijinga úlainy hnân hudiny hajijingâ hnyi hnyimako Iehova. 31 Ke ame he at bihut he ka le pipikhenyainy hon taben hut: ke haba úlainy me ö Arona me lakon. 32 Ke öbun e he ka ham ka at bihut jevan a metâ hnân hudiny kap göranyai únyi hnyi anyibon je hut ole. 33 Haba ke nöku Arona at ame hudo dren je hudiny ole, me pipikhenyainy, me anyin bi jevan a metâ hnân an. 34 Anyin oge me kap únyi ge lakon Isaraela úlainy hajijingâ me jevan hnân kap göranyai únyi hnyi anyidra je hut ole, me ham únyi e kö Arona at bihut me lakon me me hwajekhöüdrin nyiele balua únyi ge lakon Isaraela.

35 Wale hwajekhöü Arona, me hwajekhon lakon, únyi hnyi je hut a an ge meic kö Iehova, hwân hnyi bong e ame otil' ödrin ka hnyi hanymen bi hut kö Iehova ; 36 waleji Iehova ame húna he ka ham ködrin únyi ge lakon Isaraela, hnyi bong e ame hú ödrin. Wale ke hwajekhöüdrin nyiele balua hnyi anyidrin ta je dö. 37 Wale hnanyibuiny hudiny leü, me hudiny ban, me hudiny hulö, me hudiny monu, me je hna otilâ, me je hudiny ole ; 38 waleji hnö Iehova hna húna kö Mose hon bucen Sinai, hnyi bong e ame húna ka lakon Isaraela he ka hudo anyidra je hut kö Iehova hnyi hnyebuba Sinai.

HNYIMAKAN 8.

KE haba Iehova ame ha kö Mose, ka habe, 2 Hum Arona thö tha e me lakon, me je úkhaú, me wakaco hnân hú, me bolok hnân hudiny hulö, me li mamoe бага, me tangen areto adre ka levenâ bi ; 3 ke hawâ úkhaçaköuâ thö tavat hia ka hnyi hwanumen ama úkhaçaköu. 4 Ke haba Mose ame ányâ helâ me hna húna hnö Iehova kâu ; ke adre hawâ úkhaçaköuâ tavat ka hnyi hwanumen ama úkhaçaköu. 5 Ke haingö Mose ka úkhaçaköu, ka habe, Walang únyi a ha Iehova he ka ányâ. 6 Ke haba Mose ame hum Arona me lakon me osu' ödrin ge köiö. 7 Ke e ame okhaúâ e ge úkhaú, me oweikâ e ge wen hnyekon, me okhaúâ e ge úkhaú ae beü me iefoda,

me oweikâ e ge wen iefoda adre hwâwâ metâ, me hukâlâ e hnyi fetriny únyi gan. 8 Ke e ame ovekinyâ e ge tubwiny úlainy : ke e ame ip hnyi tubwiny úlainy Urim me Thummim. 9 Ke e ame obicâ e ge hnabinybak, me ip hnyi hnyimakan hnabinybak wahano gol, korona ae kap : helâ me hna húna hnö Iehova kö Mose. 10 Haba Mose ame hom wakaco hnân hú me hú uma mano me ta je únyi hia eü hnyin, me okabâ ta je únyi e. 11 Ke e ame oseven dukâiâ hnen e taben hut, me hú taben hut, me je omjehen hia, me taben soü me can e, me me kap ta je únyi e. 12 Ke e ame hingâlâ wakaco hnân hú hon bö Arona, me hú e, me me okabâ. 13 Ke Mose ame hom laku Arona, me okhaú' ödrin ge je úkhaú, me oweikâ je hnyekudrin, me obic' ödrin ge je hnabinybak ; helâ me hna húna hnö Iehova kö Mose. 14 Ke e ame hom bolok hnân hudiny hulö : ke Arona me lakon ödrin e ip je hnyamödrin hon ban bolok a hudiny hulö. 15 Ke e ame hlingâ ; ke Mose ame hom dra me kina e hon je baitoiny taben hut igigilö ge banyen, me ányâ wia taben hut, me hingâlâ dra hmelen taben hut, me okabâ, me me bi hwaban möt. 16 Ke e ame hom pipikhenya hia hon tang tiny, me únyi ae lau ethö hon akiny, me li wagian, me pipikhenyainy, ke Mose ame le je únyi e hon taben hut. 17 Ke haba bolok, me unen, me utiöiny, me ta tetiny, e ame thong ge meic hnyi hoton hnyaba ; helâ me Iehova ame húna kö Mose. 18 Ke e ame hom mamoe бага a hudiny leü : ke Arona me lakon ödrin e ip je hnyamödrin hon ban mamoe бага. 19 Ke e ame hlingâ : ke Mose ame dukâiâ dren igigilö hon taben hut. 20 Ke e ame susubâ mamoe бага ; ke Mose ame le ban, me je ong hanen, me pipikhenya. 21 Ke e ame hneü tang tiny ge köiö, me je can ; ke Mose ame tha le hia mamoe бага hon taben hut, wale hut adre le hnân bo so, me hut a an hnen meic kö Iehova : helâ me Iehova ame húna kö Mose. 22 Ke e ame hom ke mamoe бага, wale mamoe бага hnân otilâ : ke Arona me lakon ödrin e ip hnyamödrin hon ban mamoe бага. 23 Ke e ame hlingâ ; ke Mose ame hom dren, me kina e hnyi boúlölöven metân hnyikönyö Arona, me hnyi bahnyökvetoiny a metân, me bacan a metân. 24 Ke e ame hom laku Arona, ke Mose ame kina dra hnyi boúlölöven metân je hnyikönyödrin, me je bahnyökvetoidrin a metâ, me je bacadrin a metâ :

ke Mose ame dukâiâ dra igigilö hon taben hut. 25 Ke e ame hom pipikhenya, me obiny, me pipikhenya hia hon tang tiny, me únyi ae lau ethö hon akiny, me li wagiën, me pipikhenyainy, me jevan a metâ: 26 ke e ame hom únyi hnyi tang areto adre ca levenâ bi a e hnyi hnyimakö Iehova, khaca ong areto adre bi wakacoiny, me khaca ong areto ae halelöü, me ip hon pipikhenya, me jevan a metâ; 27 k' ame ip ta je únyi hia e hon hnyamö Arona, me je hnyamen lakon, ke e ame hajjिंगá me me hudiny hajjिंग hnyi hnyimakö Iehova. 28 Ke Mose ame kap je únyi e únyi hnyi je hnyamödrin me le hon taben hut hon hudiny leü: wale hudiny otilâ a hnân bo so: wale hut a an ge meic kö Iehova. 29 Ke Mose ame hom úlainy, me hajjिंगá me me hudiny hajjिंग hnyi hnyimakö Iehova: wale ö Mose únyi hnyi mamoe бага a hudiny otilâ: helâ me Iehova ame húna kö Mose. 30 Ke Mose ame hom wakaco hnân hú, me dra a e hon taben hut, me duköiö Arona me anyin je úkhaü, me lakon, me je úkhaü anyin lakon; me okabi Arona, me je úkhaüen, me lakon, me je úkhaüen lakon unyin. 31 Ke haingö Mose kö Arona me lakon, ka habe, Ólá ju utiö hnyi hwanumen uma úkhacaköu; ke tha an ju e me areto únyi hnyi tang hnân otilâ, helâ me hnök hna húna, ka habe, Ame he Arona me lakon ka an e. 32 Ke haba kolon utiö me areto, hamöbun he ka thong hnyi meic. 33 Ke ca he öbun ka he úhebun hnyi hwanumen uma úkhacaköu hnyi je bong a seven, ke ne o but ame um dö je bonginy hna otíl' öbun: anyin ame he ka seven je bonginy hna otíl' öbun. 34 Helâ me hna ányâ hnyi bong ang, helâe Iehova ame hia but húna he ka ányâ, ka bi hwaban anyibun möt. 35 Hamöbun he ka laba hnyi hwanumen uma úkhacaköu seven ta bong hnyi lany me lit, me tuö hna húna hnö Iehova wâ öbun nye mokcu: anyin adre húna helâe könya. 36 Haba Arona me lakon ödrin e hnyi ányâ ta je únyi hia hnö Iehova hna húna a deny Mose.

HNYIMAKAN 9.

KE haba hnyi bong a eitiny, Mose ame hao Arona, me lakon, me wahinga-tiny at Isaraela; 2 ke haingen kö Arona, ka habe, Hom dö ke nak bolok hnân hudiny hulö, me mamoe бага ae ba hnyikongon,

hnân hudiny leü, me hudo li meno e hnyi hnyimakö Iehova. 3 Ke u ma he ka ha ka lakon Isaraela, ka habe, Hom d' öbun got бага me me hudiny hulö; me nokon kau, me nokon mamoe a khaca hunainy ae ba hnyikongon, me me hudiny leü; 4 me bolok, me mamoe бага hnân hudiny ole, he ka hudo hnyi hnyimakö Iehova; me hudiny jeu adre me úthueniken me wakaco, anyin a haba hnyi bong ang Iehova ame manen köbun. 5 Ke ödrin e hom únyi a ha Mose ka hnyi uma úkhacaköu: ke haba úkhacaköu hia adre me hakekeny, me útililen hnyi hnyimakö Iehova. 6 Ke haingö Mose, ka habe, Walang únyi a húna Iehova köbun he ka ányâ, k' ame he ka manen köbun hmanenangi Iehova. 7 Ke haingö Mose kö Arona, ka habe, He thö ka hnyi taben hut, me hudö thö hudiny ányâm hulö, me ányâm hut adre le, me bi hwaban ányâm möt, me melen tavat: ke hudo hut anyin tavat, me bi hwaban anyidra möt, helâ me hna húna hnö Iehova. 8 Me haba Arona ame he ka hnyi taben hut, me hlingá nokon kau hnân hudiny hulö, wale hobi kâu e bi. 9 Ke laku Arona ödrin e hom dren kâu: ke e ame hneü banyen hnyi dra, me kina hnyi je baitoiny taben hut, me hingälâ dra hmelen taben hut: 10 ke haba pipikhenya, me li wagiën, me únyi ae lau únyi hnyi hon akiny, a hudiny hulö, e ame le hon taben hut; helâ me hna húna hnö Iehova kö Mose. 11 Ke e ame le utiöiny me unen ge meic hoton hnyaba. 12 Ke e ame hlingá hudiny leü, ke haba laku Arona ödrin e ham kâu dren, me e ame dukâiâ igigilö hon taben hut. 13 Ke ödrin e ham kâu hudiny leü, wale je ec keihen, me ban: me e ame le hon taben hut. 14 Ke e ame hneü tang tiny, me je can, me le hon hudiny leü hon taben hut. 15 Ke e ame hudo hudiny tavat, me hom got бага a hudiny hulö anyin tavat, me adre me hlingá, me hudo e hnân hudiny hulö helâ me a bán. 16 Ke e ame hom hudiny leü, me hudo hoton hnanyibu. 17 Ke e ame hom hudiny han, me okhaca aoc ge hnyamen, me le hon taben hut, ka ke hut bi hudiny han hnyi hnyomakatü. 18 Ke e ame hlingá bolok me mamoe бага hnân hudiny ole hobi kâu tavat: ke laku Arona ödrin e ham kâu dren, me e ame dukâiâ e igigilö hon taben hut, 19 me pipikhenyainy bolok, me mamoe бага, me obiny, me hlanyin tang tiny, me li wagiën, me únyi ae lau ethö hon akiny: 20 ke

LEVITIKO 10, 11.

ödrin e ip pipikhenya hon ùlainy, ke e ame le pipikhenya hon taben hut : 21 ke haba ùlainy me jevan a metá, me Arona ame hajjिंगá hnân hudiny hajjिंग hnyi hnyimakö Iehova, helá me hna húna hnö Mose. 22 Ke haba Arona ame hai li hnyamen hon tavat, me hahnahici ödra; me e ame utut úheny hnyi hna hudo hudiny hulö, me hudiny leú, me je hudiny ole. 23 Ke Mose me Arona ödrü me tha didró ka hnyi uma úkhacaköu, me dit hmetu but, me hahnahicá tavat: me ame manen ka tavat hia hmanenangi Iehova. 24 Ke ame he but meic úheny únyi Iehova me le avá hudiny leú, me pipikhenya hon taben hut; ke a wá but e ge tavat hia, me adre me hongot, me ta ju hnyikánái.

HNYIMAKAN 10.

KE haba Nadaba me Abiu, li laku Arona, ödrü me ve hom anyidru li taben meic, me hú meic hnyin, me ip únyi ae bo so hon, me hudo meic ae ke bongon bi hnyi hnyimakö Iehova, waleji e ame ca húna ködrin. 2 Ke ame o but meic úheny únyi Iehova me li ödrü, me ödrü me mokcu hnyi hnyimakö Iehova. 3 Ke haingö Mose kö Arona, ka habe, haba únyi ang waleji ame ha Iehova, ka habe, Ame he ka okabi nya ge tavat adre me hakekeny kõnya, k' adre me he ka oganö nya hnyi hnyimakan tavat hia. Ke haba Arona ame ca fuc. 4 Ke haba Mose ame hao Misaela me Elizafana li laku Uziela a ke kamö Arona, me ha ködrü, ka habe, Hok cu jem, me hom dö liamekeiny m' öbu úhedrin hnyi hnyimakan dok ae kap ka hnyi hoton hnyaba. 5 Ke ödrü me he me hum ödrin hnyi je khaúidru ka hnyi hoton hnyaba; helá me hna ha hnö Mose. 6 Ke haingö Mose kö Arona, me Eleazara, me Ithamara, a li lakon, ka habe, Ca he ka úöhe je böbun, me khekke anyibun je úkhaú, wá öbun nye mokcu, ke wá e nye hmönyin ka tavat hia: ke ame he je liamekeiny m' öbun, a lap Isaraela hia he ka tengiá a g' adre thong únyi ga Iehova. 7 Ke ca he öbun ka he úhebutun hnyi hwanumen uma úkhacaköu, wá öbun nye mokcu: anyin ae but hubun wakaco hnân hú anyi Iehova. Ke ödrin e ányá helá me hofuc ho Mose.

8 Ke Iehova ame ha kö Arona, ka habe, 9 U me ca he ka ic waina me grág, a u me je lakom unyám, öbun ka didró ka hnyi

uma úkhacaköu, wá öbun nye mokcu: wale hnanyibu nyiele balua, hnyi anyibun ta je dö: 10 m' öbun e he ka ovebongoná únyi ae kap me únyi ae ca kap, a bo kong, me bo so; 11 m' öbun e he ka ná je lakon Isaraela ge je hnanyibu hia a ha Iehova ködra a deny Mose.

12 Ke Mose ame ha kö Arona, me Eleazara, me Ithamara, a li lakon, wale lo li kolon, ka habe, Hom dö hudiny han, kolon je hut a an ge meic kö Iehova, me an ju ke ba leven hnyi baten taben hut: anyin ae ti kap e: 13 ke hamöbun he ka han e hnyi ke dok ae kap, anyin a wale ám, me an li lakom, únyi hnyi je hut a an ge meic kö Iehova: anyin adre húna heláe kõnya. 14 Ke haba ùlainy adre hajjिंगá, me jevan adre kap göranyai, öbun e he ka han hnyi ke dok ae so; a u me lakom obaga me wahlu a tha ödrin möu: anyin adre ham e hnân ám, me an lakom, adre ham únyi hnyi hudiny ole únyi ge lakon Isaraela. 15 Hamödra he ka hom jevan adre ogö-ranyá, me ùlainy adre hajjिंगá tha e me pipikhenya wale hut a an hnen meic, he ka hajjिंगá hnân hudiny hajjिंग hnyi hnyimakö Iehova: a ám, me an li lakom a tha ödrü möu, me wale hnanyibu nyiele balua; helá me hna húna hnö Iehova.

16 Ke Mose ame hwege elám got hudiny hulö, ke wá bi, adre hia but le; me e ame hmönyin kö Eleazara, me Ithamara li laku Arona, a li kolon, me ha, ka habe, 17 leú öbun e ca an gan hudiny hulö hnyi dok ae kap, anyin ae ti kap e, ke e ame hia but ham köbun he ka hom hulö anyin úkhacaköu, me hnân bi hwaban anyidra möt hnyi hnyimakö Iehova? 18 Wá bi, adre ca hom dren ka hnyi dok ae kap: e ti úeú köbun he ka han e hnyi dok ae kap, helá me hnök hna húna. 19 Ke haingö Arona kö Mose, ka habe, Wá bi, hnyi bong ang ödre hudo hudiny anyidru hulö, me anyidru hut adre le hnyi hnyimakö Iehova; ke a o kõnya je únyi eang; ke hawa, oge ne hia but han hudiny hulö hnyi bong ang, ame ne he ka kap soá hnyi hnyimakö Iehova? 20 Ke haba Mose ame löng, me e ame kap soá.

HNYIMAKAN 11.

KE haba Iehova ame ha kö Mose me Arona, haingen ködrü, ka habe, 2 Ha thö ka lakon Isaraela, ka habe, Walang ta je meno öbun e he ka han únyi hnyi ta

je meno hia a vak can eang hmelen. 3 Haba ta je meno adre kia újimen can, me kia luá can, me omeno adre hoc hmeto hna han, me, wale ö 'bun. 4 Ke so bi walang omeno öbun e ca he ka an, wale adre hoc hmeto hna han, me je hna kia luá can : wale kamela, anyin a e ame hoc hmeto hna han, k' ame ca kia luá bi újimen can, wale ae bo kong köbun. 5 Me shefani, anyin a e ame hoc hmeto hna han, ke e ame ca kia luá bi újimen can, wale ae bo kong köbun. 6 Me arnebeth, anyin a e ame hoc hmeto hna han, k' ame ca kiá luá bi újimen can, wale ae bo kong köbun. 7 Me buaka, anyin a e ame kia luá újimen bacan, me can, k' ame ca hoc hmeto bi hna han, wale ae bo kong köbun. 8 Ca he öbun ka han utiödra, me kálá unyidra a mok ; wale je únyi ae bo kong köbun.

9 Walang je únyi öbun e he ka an únyi eú hnyi köiö, haba ta je únyi hia ae hu bohúnyon me unöiny hnyi je an, me köiö, me wagewe, wale öbun e he ka han. 10 Ke haba ta je únyi ae ba bohúnyon me unöiny, eú hnyi köiö, me wagewe, a ta je únyi hia ae möt hnyi köiö, me je únyi hia adre op me me möt eú hnyin je köiö, wale je únyi öbun e he ka ikikiá, 11 k' öbun e he ka ikiki ödra ; ca he öbun ka han utiödra, ke öbun e he ka ikikiá je unyidra ae mok. 12 Haba je únyi hia eú hnyi je köiö ae ba bohúnyon me unöiny, öbun e he ka ikiki ödra.

13 Ke walang je meno ame gá öbun e he ka ikiki ödrin ; a ca hnân han, anyin a ödra ikiki : wale aeto, me perese, me ozeni ; 14 me daa, me aia hoton je ve bongon ; 15 je oreba hia hoton je ve bongon ; 16 me iaena, me taemasa, me sahafe, me dring, hoton je ve bongon : 17 me mun, me salak, me ianesuf ; 18 me tinesemeth, me kati, me raama ; 19 me kasida, me anafa hoton je ve bongon, me dukifath, me bú.

20 Haba je únyi hia adre me iyâú me gá, adre me he ge vak can, öbun e he ka ikiki ödra. 21 Ke so bi walang je únyi öbun e he ka han, adre me iyâú me gá, adre me he ge vak can, wale je únyi ae úsa lo can ae beú hnân gá hon kâná ; 22 walang ö 'bun, a wahamon hoton je ve bongon, me solame hoton je ve bongon, me haregole hoton je ve bongon, me hagabe hoton je ve bongon. 23 Ke haba je únyi hia adre iyâú me gá, me vak can, öbun e he ka ikiki ödra.

24 Ke walang je únyi ame he ka obokongi öbun ; haba at ame he ka kálá je unyidra

ae mok, ame he ka bo kong ke ne o but sahac : 25 ke haba at ame kaptilá ke ong utiöiny je únyi e a mokcu, hamen he ka hneú anyin je úkhaú me laba bo kong ke ne o but sahac. 26 Haba ta je meno adre kia luá újimen bacan, k' adre ca kia luá bi újimen can, ke ame ca hoc hmeto hna han, ame he ka bo kong köbun : ke haba at ame kal' ödra, ame he ka bo kong. 27 Ke haba je meno adre me he ge je hnyeúcadra, a ta je meno adre me he ge vak can, adre me he ka bo kong köbun ; ke haba at ame he ka kálá unyin je meno e a mokcu, ame he ka bo kong ke ne o but sahac. 28 Ke hamen at ame kaptilá unyin je meno e a mokcu, he ka hneú anyin je úkhaú, me laba bo kong ke ne o but sahac : haba ta je únyi e ae bo kong köbun.

29 Ke walang je meno ae bo kong köbun, adre me iyâú eang hmelen, wale holed, me tip, me behölök, hoton je ve bongon, 30 me anaka, me koa, me letaah, me home-ta, me tinesemeth. 31 Wale ta je únyi adre bo kong köbun hnyi ta je meno adre me iyâú : haba at ame kálá je únyi e a mokcu, ame he ka bo kong ke ne o but sahac. 32 Ke ame ne he ke at gadra ae mokcu ka kölu takoú ke únyi, me ame he ka bo kong únyi eling ; ame ne kaia utö, ame ne úkhaú, ame ne unen ke meno, ame ne tang, ame ne ke utkaia adre me huliwa káu, me adre me he ka ip e hnyi köiö, k' ame he ka bo kong ke ne o but sahac ; me me he ka bo so. 33 Ke haba ke kaia kânâ ame kölu ke at gadra ka hnyin, me ame he ka bo kong önyen, hamöbun he ka tho degecá. 34 Ke haba ta je jeú hia adre me labö han ; ke ame ne ta hnyin köiö, me ame he ka bo kong : ke haba únyi hnân ijem, adre ijem únyi hnyi je kaia eling ame he ka bo kong. 35 Ke ame he ka bo kong ta je únyi hia ame kölu takoú ge ong ke keihen je unyidra ; ame ne wahainya, ame ne je öt, me adre me he ka tho degecá, anyin ae bo kong, k' ame he ka bo kong köbun. 36 Ke so bi ame he je pupuainy köiö, me je thopiny an ae gan hmá köiö hnyin, ka bo so : k' ame he ka bo kong ta je únyi ame kálá je unyidra ae mokcu. 37 Ke a ne kölu takoú je hatong adre ta, ge ke únyi a hanen unyin je únyi e a mokcu, me ame he ka bo so. 38 Ke adre me ne hú je hatong ge köiö, me ame kölu takoú ge ke únyi a hanen unyin je únyi e a mokcu, me ame he ka bo kong köbun.

39 Ke a ne mok hwege ke meno a vak

can adre han, haba at ame he ka kâlâ unyin a mokcu, me ame he ko bo kong ke ne o but sahac. 40 Ke haba at ame he ka han hanen unyin meno e a mokcu, me hamen he ka hneû anyin je ûkhaû, me bo kong ke ne o but sahac: ke haba at ame kaptilâ unyin únyi a mokcu, me hamen he ka hneû anyin je ûkhaû, me bo kong ke ne o but sahac.

41 Ke haba ta je únyi adre me iyâú eang hmelen, adre me he ka ikikiâ, k' adre me ca he ka han. 42 Haba ta je únyi hia adre me iyâú hnyekon, me je únyi ame he a vak can, me je únyi ae se hia can, me je únyi hia adre me iyâú eang hmelen, ca he öbun ka ön ödra, anyin a ödra ikiki. 43 Ca he öbun ka oikiki öbun bi ge ta je únyi ame iyâú, ke ca obokongi öbun bi gadra, wâ öbun nye bo kong únyi gadra. 44 Anyin a inya Iehova Khongubun: okabi öbun dö, m' öbun e he ka kap: anyin a iny kap: ke ca obokongi öbun bi ge ta je únyi ame iyâú eang hmelen. 45 Anyin a inya Iehova at ame hum öbun únyi hnyi hnyeí Aigupito, me me he ka Khongubun: anyin a wale öbun e he ka kap, anyin a iny kap.

46 Wale hnanyibu ge ta je meno a vak can, me je meno ame gâ, me je únyi hia ame iyâú ae möt hnyi je köiö, me ta je únyi hia ame iyâú eang hmelen: 47 me me he ka ve bongon bi bo kong me bo so, a meno hnân han, me meno a ca hnân han.

HNHYIMAKAN 12.

KE haba Iehova ame ha kö Mose, ka habe, 2 Ha thö ka lakon Isaraela, ka habe, Ame ne erkin ke momo, me ame hnokoâ da, me ame he ka bo kong hnyi je bong a seven; e ame he ka bo kong hoton ün omomo. 3 Ke haba hnyi bong a eitiny adre me he ka peritomonâ unen unyin. 4 Ke momo ame he ka laba hnyi dren hnân obosoâ hnyi je bong a thöti theri; k' ame ca he ka kâlâ ke únyi ae kap, k' ame ca he ka hnyi dit ka hnyi dok ae kap, ke ne o but ame um dö je bongon obosoâ. 5 Ke ame ne hnokoâ hlu, me ame he ka bo kong fotin ta bong hoton ün omomo: ke e ame he ka laba hnyi dren hnân obosoâ hnyi je bong a sikste siks. 6 Ke ka um dö je bongon obosoâ, ame ne da, ame ne hlu, me e ame he ka hom hnân hudiny leú nokon mamoe a khaca hunainy, me nokon meköta, ame ne biny, me me hudiny hulö ka hnyi hwanumen uma úkhacaköu, ka at bihut: 7 ke e ame he ka hudo e hnyi hnyimakö Iehova, me bi

hwaban anyin möt: k' ame he momo ka bo so únyi hnyi bongon bi. Wale hnanyibu hobi kâu omomo at ame hnokoâ da ame ne hlu. 8 Ke a ne ca khana momo he ka hom nokon mamoe, me so e ame hom lo li biny, ame ne li lakon meköta; khaca hnân hudiny leú, ke khaca hnân hudiny hulö; k' ame he at bihut ka bi hwaban anyin möt, me me bo so momo.

HNHYIMAKAN 13.

KE haba Iehova ame fuc kö Mose me Arona, ka habe, 2 Ame ne e hnyi unen unyin at ke dok ae khibi, ame ne dok ae han, ame ne dok ae hadröngöc, k' ame ne e hnyi unen unyin me me mok lepera bi, me adre me he ka hom e kö Arona at bihut, k' ame ne ke nokon at bihut. 3 Ke hamen at bihut he ka wâ mok hnyi unen unyin: ke ame ne hûen dut je leünen hnyi mok, ke a ne manen a ga dit mok eü hmelen unen unyin, me wale mok lepera: k' ame he at bihut ka wâ, me hai bokongoâ. 4 Ke ame ne hau but dok ae hadröngöc hnyi unen unyin, ke ca manen bi eü hmelen unen, ke ca hûen bi je leünen, me ame he at bihut ka hlöng hwanumen at ae mok hnyi je bong a seven: 5 ke hnyi bong a seveniny hamen at bihut he ka wâ: ke wâ bi, a ne e bala bi mok adre me wâ, k' ame ca hûhüö bi mok hnyi unyin, me ame he at bihut ka hlöng hwanumen hnyi je bong a seven hmetu: 6 ke hnyi bong a seveniny hmetu, hamen at bihut he ka wâ; ke wâ bi, ame ne hlit ut mok, k' ame ca hûhüö hmetu mok hnyi unen, me ame he at bihut ka hai bosoâ; a han e; ke e ame he ka hneû anyin je úkhaû, me me bo so but. 7 Ke ame ne hûhüö hwege dok ae han hnyi unen, hwaban hna wâ hnen at bihut, me me obosoâ, me hamen at bihut he ka wâ hmetu: 8 ke hamen at bihut he ka wâ, ke wâ bi, ame ne hûhüö dok ae han hnyi unen, me hamen at bihut he ka hai bokongoâ: lepera eling.

9 Ame ne takoû ke at hnen mok lepera, me adre me he ka hom e ka at bihut: 10 ke hamen at bihut he ka wâ, ke wâ bi, a ne hau dok ae khibi hnyi unen, ke hûen dut je leünen, ke ame ne hu utiö ae hát hnyi dok ae khibi, 11 wale lepera ae kueny hnyi unen unyin, ke hamen at bihut he ka hai bokongoâ: ke adre me ca he ka hlöng hwanumen, anyin ae bo kong ut. 12 Ke ame ne kü lepera hnyi unen, k'

ame ne okhötâ hia ge lepera unen at ame takou ge mok, hwân hnyi ban ke ne o but hnyi li can, wale a wâ hnen at bihut ; 13 me ame he at bihut ka wâ : ke wâ bi, a ne khöt hia but unyin ge lepera, me e ame he ka hai bosoâ at ae mok : ke hau hia but : ke bo so but e. 14 Ke a ne manen gan utiö ae hât, e ame he ka bo kong. 15 K' ume he at bihut ka wâ utiöiny ae hât, me hai bokongoâ : ame bo kong utiö ae hât : wale lepera. 16 Ke a ne wia hmetu utiö ae hât me me hau, me e ame he ka he ka at bihut, 17 k' ame he at bihut ka wâ ; ke wâ bi, ame ne wia mok me me hau, me ame he at bihut ka hai bosoâ : e bo so but.

18 Ke a ne hu ke okuc hnyi unen utiöiny, ke e metu but, 19 ke ame ne hwaban ohuc dok ae khibi, me hau, k' ame ne dok ae hadröngöc, ke hngihngidra, me adre me he ka omanenâ e ka at bihut ; 20 k' ame he at bihut ka wâ, ke wâ bi, ame ne manen kâu a ga dit ut hnyi unen, ke hûen dut je leûnen, me ame he at bihut ka hai bokongoâ : wale mok lepera, ame kû ûnyi hnyi ohuc. 21 Ke ame ne wâ hnen at bihut, ke wâ bi, e ba leûnen ae hûen hnyin, ke a ca dit hnyi unen, ke hlit ut, me hamen at bihut he ka hlöng hwanumen e hnyi je bong a seven : 22 k' ame ne hûhûö hwege hnyi unen, me ame he at bihut ka hai bokongoâ : wale ke mok. 23 Ke ame ne e bala bi dok ae hadröngöc hnyi hnen, k' ame ca hûhûö bi, me wale shala hnen okuc ; k' ame he at bihut ka hai bosoâ.

24 Ke a ne hu dok a hlâ ge meic hnyi unen utiö, ke e bi hnyi utiö ae hât hnyi hna hla dok ae hadröngöc, ame ne hngihngidra, ame ne hau ; 25 me hamen at bihut he ka wâ : ke wâ bi, ame ne hûen dut je leûnen hnyi dok ae hadröngöc, k' ame ne manen eû hmelen unen ; me wale lepera ame kû ûnyi hnyi dok ae hlâ : k' ame he at bihut ka hai bokongoâ : wale thibi mok lepera. 26 Ke ame ne wâ e hnen at bihut, ke wâ bi, e ba je leûnen ae hûen hnyi dok ae hadröngöc, k' ame ca dit hnyi unen, ke hlit thibi ; me hamen at bihut he ka hlöng hwanumen hnyi je bong a seven : 27 k' ame he at bihut ka wâ hnyi bong a seveniny ; k' ame ne hûhûö hwege hnyi unen, me ame he at bihut ka hai bokongoâ : wale thibi mok lepera. 28 Ke ame ne e bala bi dok ae hadröngöc hnyi hnen, k' ame ca hûhûö bi hnyi unen, ke hlit thibi ; me wale dok ae khibi ûnyi hnyi

dok ae hlâ, me ame he at bihut ka hai bosoâ : anyin a wale shalainy hlâ.

29 Ame ne hu ge baga ame ne momo ke mok hnyi ban, ame ne wainy, 30 hamen at bihut ka wâ mok, ke wâ bi, ame ne manen dut dok ae dit hnyi unen, k' ame ne hu hnyin je leûnen ae mat me tafü, ame he at bihut ka hai bokongoâ : wale ke wathu, a lepera hnyi ban, ame ne wainy. 31 Ke ame ne he at bihut ka wâ mok a wathu, ke wâ bi, ame ne ca manen bi dok ae dit hnyin unen, ke ba leûnen ae hlit hnyin, hamen at bihut he ka hlöng hwanumen at amo moko wathu hnyi seven ta bong : 32 ke hnyi bong a seveniny ame he at bihut ka wâ mok, ke wâ bi, ame ne ca hûhûö wathu, ke ba leûnen ae mat hnyin, ke manen bi a ga ca dit wathu hnyin unen, 33 me adre me he ka giâ, k' ame ca he ka giâ wathu, k' ame he at bihut ka hlöng hwanumen at ame moko wathu hnyi je bong hmetu a seven : 34 ke haba hnyi bong a seveniny ame he at bihut ka wâ wathu : ke wâ bi, ame ne ca hûhûö wathu hnyi unen, ke manen dut a ga ca dit hnyin unen ; me ame he at bihut ka hai bosoâ ; k' ame he at ka hneü anyin je ûkhaü me me bo so. 35 Ke ame ne hwege hûhûö wathu hnyi unen hwaban hna obosoâ ; 36 me ame he at bihut ka wâ : ke wâ bi, ame ne hûhûö but wathu hnyi unen, me ame ca he at bihut ka elâm leûnen ae mat ; e bo kong ut. 37 Ke ame ne manen kâu a e bala bi wathu, k' ame ne kû hnyin je leunen ae hlit ; a metu but wathu, ke bo so but : me ame he at bihut ka hai bosoâ.

38 Ke ame ne hu hnyi unen utiöiny ke baga ame ne momo je ong dok ae hadröngöc, wale je ong dok ae hadröngöc me hau ; 39 me ame he at bihut ka wâ : ke wâ bi, ame ne löhau je ong dok ae hadröngöc hnyi unen unyidrin ; wale thibi okhicö ame kû hnyi unen : e ame bo so.

40 Ke a ne kolu but leûnen ban ke at, k' ame hadreü ban ; e bo so but. 41 Ke a ne kolu but leûnen ûnyi hnyi hon bariny, ame hadreü bariny ; e bo so but. 42 Ke ame ne hu hnyi ban ae hadreü, ame ne hon bariny ae hadreü, ke mok ae hau me dra ; me wale lepera ame kû hnyi ban ae hadreü, ame ne hon bariny ae hadreü. 43 Me ame he at bihut ka wâ : ke wâ bi, ame ne hau me dra ûkhibiny mok hnyi ban ae hadreü, ame ne bariny ae hadreü, helâ me imaneniny lepera hnyi unen utiöiny ; 44 haba at e me lepera, k' ame bo kong

ut ; hamen at bihut he ka hai bokongoá ; haba anyin mok me wale hnyi ban.

45 Ke haba at ae tren lepera, wale a takou ge mok, adre me he ka kia anyin je úkhaú, ke ame he ka úöhe leúnen ban, me tube esongodiny ethö, me hongot, ka habe, Iny bo kong ut, iny bo kong ut. 46 E ame he ka bo kong hnyi je bong hia ae hu gan mok ; e bo kong ut : e ame he ka hake laba ; haba hnyaban, me, wale hoton je hnyaba.

47 Ke haba úkhaú ae hu mok lepera hnyin, ame ne úkhaú leúnen mamoe, ame ne úkhaú lino ; 48 ame ne hnyi töiny adre otílá, ame ne hnyi töiny adre omokulec, ame ne lino, ame ne leúnen mamoe ; ame ne unen meno, ame ne ke únyi adre tibet únyi ge unen meno ; 49 ke ame ne udru-drá löhau, ame ne dra mok hnyi úkhaú, ame ne unen meno, ame ne töiny adre otílá, ame ne töiny adre omokulec, ame ne ke únyi bi a unen meno ; wale mok lepera, k' adre me he ka omanená ka at bihut : 50 ke ame he at bihut ka wá mok, me hlöng hwanu-men únyi ae hu mok hnyin, hnyi je bong a seven : 51 ke e ame he ka wá mok hnyi bong a seveniny : ke ame ne ca húhúö mok hnyi úkhaú, ame ne hnyi tö adre otílá, ame ne hnyi tö adre omokulec, ame ne unen meno, ame ne ke únyi bi adre tibet únyi ge unen meno ; wale ke mok lepera ae han ; ame bo kong ut. 52 Ke e ame he ka thong úkhaú, ame ne tö adre otílá, ame ne tö adre omokulec, ame ne leúnen mamoe, ame ne lino, ame ne ke únyi bi a unen meno ae hu mok hnyin : anyin a wale ke lepera ae han ; k' adre me he ka thong degecá ge meic. 53 Ke ame ne he ka wá e hnen at bihut, ke wá bi ame ca húhúö mok hnyi úkhaú, ame ne tö adre otílá, ame ne tö adre omokulec, ame ne ke únyi bi a unen meno ; 54 me ame he at bihut ka kun' ödra he ka hneú únyi ae hu mok hnyin, ke e ame he ka hlöng hwanu-men e hnyi je bong hmetu a seven : 55 ke ame he at bihut ka wá únyi ae hu mok hnyin, hwaban hnödra hna hneú e ; ke wá bi, ame ne ca wia makan mok eling, ke ame ca húhúö mok, me, bo kong ut e ; m' u ma he ka thong degecá ge meic : ame han eú hnyin, ame ne hadreú hnyin ame ne hoton. 56 Ke ame ne he ka wá e hnen at bihut, ke wá bi ame ne hia töt ut mok hwaban hnödra hna hneú, me e ame he ka kia degecá e únyi hnyi úkhaú, ame ne unen meno, ame ne tö adre otílá, ame ne tö adre omokulec : 57 ke ame ne manen bala bi e hnyi úkhaú, ame ne tö adre otílá, ame ne

tö adre omokulec, ame ne ke únyi bi a unen meno ; me wale ke mok ame húhúö : m' u ma he ka thong degecá ge meic únyi ae hu mok hnyin. 58 Ke haba úkhaú, ame ne tö adre otílá, ame ne tö adre omokulec, ame ne ke únyi bi a unen meno, wale u me he ka hneú, k' ame ne hia but mok hnyin, me u ma he ka hneú hmetu, me ame he ka bo so but. 59 Wale hnanyibuiny mok lepera hnyi úkhaú, ame ne leúnen mamoe, ame ne lino, ame ne tö adre otílá, ame ne tö adre omokulec, ame ne ke únyi bi a unen meno, m' adre me he ka hai bosoá, m' adre me ne he ka hai bokongoá.

HNHYIMAKAN 14.

KE Iehova ame ha kö Mose, ka habe, 2 Walang hnanyibu ge lepera hnyi bong adre me he ka obosoá : adre me he ka hom e ka at bihut : 3 k' ame he at bihut ka he ka hnyi hoton hnyaba ; k' ame he at bihut ka wá, ke wá bi, ame ne metu but mekiný at lepera ; 4 me ame he at bihut ka úkhúnöng he ka hom lo li meno ame gá ae möt me bo so, me utö arasi, me leúnen mamoe ae dra, me thi boviný hisop, hobi káu at adre me he ka obosoá : 5 k' ame he at bihut ka úkhúnöng ka hlingá ke at hnyi li meno ame gá hnyi kaia kâná hon an ame hingölö : 6 ke haba meno ame gá ae tiga möt e ame he ka hom, tha e me utö arasi, me leúnen mamoe ae dra, me thi boviný hisop, ke e ame he ka tha hneú je únyi e me meno ame gá ae möt ka hnyi dren meno ame gá adre hlingá hon an ame hingölö : 7 ke e ame he ka oseven dukáia at adre obosoá únyi hnyi lepera, me hai bosoá, me hna meno ae möt ka hnyi hnyei. 8 Ke hamen at adre he ka obosoá he ka hneú anyin je úkhaú, me giá leúnen hia, me osúá ge köiö, me me bo so but : ke hwaban e, e ame he ka he ka hnyi hnyaba, k' ame he ka laba hoton umen uma mano hnyi je bong a seven. 9 Ke hnyi bong a seveniny e ame he ka giá hia leúnen ban, me wainy, me hon li bademakan, e ame he ka giá leúnen hia : ke e ame he ka hneú hia anyin je úkhaú, me osúá unyin ge köiö, ke e ame he ka bo so. 10 Ke haba hnyi bong a eitiny e ame he ka hom li nokon mamoe бага ae ba hnyikongon, ke khaca nokon mamoe momo a khaca hunainy ae ba hnyikongon, me kun ta omer falawa hnân hudiny han, adre ubaniken me wakaco, me khaca loga wakaco.

11 Ke hamen at bihut, a at ame obosoá, he ka ip at adre me he ka obosoá, tha e me ta je únyi eling, hnyi hnyimakö Iehova, hnyi hwanumen uma úkhacaköu : 12 ke ame he at bihut ka hom nokon mamoe бага a khaca, me hudo e hnân hudiny monu, me wakaco a khaca loga, me hajjिंगá hnân hudiny hajjिंग hnyi hnyimakö Iehova : 13 k' ame he ka hlingá nokon mamoe hnyi dok adre me labö hlingá hnyin hudiny hulö, me hudiny leú, wale hnyi dok ae kap : anyin a hobi kâu at bihut hudiny hulö, helâ me hudiny monu : únyi ae ti kap : 14 ke ame he at bihut ka hom dren hudiny monu, k' ame he at bihut ka kina e hnyi boúlölöven hnyikönyen at adre me he ka obosoá, me bahnyökvetoiny a metân, me bacan a metân : 15 k' ame he at bihut ka hom hanen wakaco a khaca loga, me hingálâ ka hnyi hnyamen a meny : 16 k' ame he at bihut ka hneú banyen a metân hnyi tap wakaco a e hnyi hnyamen a meny, k' ame he ka oseven dukâiâ wakaco ge banyen hnyi hnyimakö Iehova : 17 ke haba kolon wakaco hnyi hnyamen ame he at bihut ka kina hnyi boúlölöven hnyikönyen a metân at adre me he ka obosoá, me bahnyökvetoiny a metân, me bacan a metân, hon dren a hudiny monu : 18 ke haba kolon wakaco hnyi hnyamen at bihut, e ame he ka kina hnyi ban at adre me he ka obosoá : k' ame he at bihut ka bi hwaban anyin möt hnyi hnyimakö Iehova. 19 K' ame he at bihut ka hudo hudiny hulö, me bi hwaban möt anyin at adre me he ka obosoá únyi hnyi bo kong a e : ke hwaban e e ame he ka hlingá hudiny leú : 20 k' ame he at bihut ka hudo hudiny leú, me hudiny han hon taben hut : k' ame he at bihut ka bi hwaban anyin möt, me e ame he ka bo so.

21 Ke ame ne at ae ba ta únyi, ke ca úco e bi únyi eling, me e ame he ka hom nokon mamoe бага a khaca, hnân hudiny monu he ka hajjिंगá, me me bi hwaban anyin möt, ke khaca omer falawa adre úhaniken me wakaco hnân hudiny han, me khaca loga wakaco : 22 me lo li biny, ame ne li nokon meköta, helâ me úcú kâu ; haba khaca hnân hudiny hulö, ke hnân hudiny leú khaca. 23 E ame he ka hom ta je únyi eling ka at bihut hnyi bong a eitiny hnyi hwanumen uma ukhacaköu hnyi hnyimakö Iehova hnân obosoá e. 24 Ke ame he at bihut ka hom nokon mamoe hudiny monu, me loga wakaco, k' ame he at bihut ka hajjिंगá hnân hudiny hajjिंग hnyi hnyimakö

Iehova : 25 k' ame he ka hlingá nokon mamoe hnân hudiny monu, k' ame he at bihut ka hom hanen dren hudiny monu, me kina hnyi boúlölöven hnyikönyen a metân at adre me he ka obosoá, me bahnyökvetoiny a metân, me bacan a metân : 26 k' ame he at bihut ka hingálâ hanen wakaco ka hnyi hnyamen bi a meny : 27 k' ame he at bihut ka oseven dukâiâ hnyi hnyimakö Iehova ge banyen a metân hanen wakaco hnyi hnyamen a meny : 28 k' ame he at bihut ka kina ge wakaco hnyi hnyamen boúlölöven hnyikönyen a metân at adre me he ka obosoá, me bahnyökvetoiny a metân, me bacan a metân, hon dren hudiny monu : 29 ke haba kolon wakaco hnyi hnyamen at bihut, e ame he ka kina e hnyi ban at adre me he ka obosoá, he ka bi hwaban anyin möt hnyi hnyimakö Iehova. 30 Ke e ame he ka hudo ke at hnyi li biny, ame ne ke nokon meköta, helâ me úcú kâu : 31 wale únyi ae khana he ka hom, haba khaca hnân hudiny hulö, ke khaca hnân hudiny leú, tha e me hudiny han : k' ame he at bihut ka bi hwaban möt anyin at adre me he ka obosoá hnyi hnyimakö Iehova. 32 Wale hnanyibu hobi kâu at ame moko lepera, a ne ca khana he ka hom ta je únyi ae úcú hnân obosoá e.

33 Ke Iehova ame ha kö Mose me Arona, ka habe, 34 Öbun ka o hnyi hnyeie Kanana, wale oge me ham köbun huânibun, ke oge ne okúâ mok lepera hnyi ke uma hnyiibun hnyeie ; 35 hamen at treu uma ka thumeto at bihut, ka habe, Oge me wâ hnyi umök uma a helâ me mok : 36 k' ame he at bihut ka úkhúnöng m' adre me he ka hom ta je únyi a eiö hnyin uma, ke tiga ca dit bi at bihut he ka wâ mok, wâ e nye bo kong ta je únyi hia hnyin uma : 37 ke e ame he ka wâ mok, ke wâ bi, ame ne dit mok hnyi hnyeige uma, ame ne udrudrá löhau, ame ne hngihngidra, ae manen eú hnyi hnyeige uma ; 38 me ame he at bihut ka didrut kâu ka hnyi hwanuma, me hlöng hwanumen uma hnyi je bong a seven : 39 ke hnyi bong a seveniny ame he ka hmetu at bihut ka wâ ; ke wâ bi, ame ne húhúö but mok hnyi hnyeige uma ; 40 ame he at bihut ka kun' ödra ka tho degecá je veto ae hu mok hnyin k' adre me he ka degecá ka hnyi dok ae bo kong hoton hnyaba : 41 ke e ame he ka kun' ödra he ka khudreú hia eiö hnyin uma, k' adre me he ka hingálâ degecá taan hna khudreú ka hnyi dok ae bo kong hoton hnyaba : 42 k' adre me he ka hom ke je veto me op

LEVITIKO 15.

hwaban je veto eling; k' ame he ka hom ke dröu me botro hmetu uma. 43 Ke ame ne o hmetu mok, me kü hmetu but hnyi uma hwaban hna tho degecâ je veto, me hwaban hna khudreü uma, ke hwaban hna botro hmeto; 44 me hamen at bihut ka he hmetu ka wâ: ke wâ bi ame ne hühüö mok hnyi uma, wale thibi e lepera ae han hnyi uma: e bo kong ut. 45 Ke e ame he ka tho degecâ uma, a je veten, me je utöiny, me dröuiny hia uma; me hom tilâ ka hnyi dok ae bo kong hoton hnyaba. 46 Ke haba at ame didrö ka hnyi uma hnyi je bonginy hia hna hlöng hwanuma, me e ame he ka bo kong ke ne o but sahac. 47 Ke haba at ame mokut hnyin uma, me e ame he ka hneü anyin je úkhaú; ke haba at ame han hnyin uma, me e ame he ka hneü anyin je úkhaú. 48 Ke a ne didrö at bihut me wâ, ke wâ bi, ame ca hühüö but mok hnyi uma, hwaban hna botro uma: me ame he at bihut ka hai bosoâ uma, anyin a hia but mok. 49 Me e ame he ka hom lo li meno ame gâ, me utö arasi, me leünen mamoe ae dra, me thi bovinny hisop, me me obosoâ uma: 50 ke e ame he ka hlingâ khaca hnyi li meno ame gâ hnyi kaia kânâ hon an ame hingölö: 51 ke e ame he ka hom utö arasi, me thi bovinny hisop, me leünen mamoe ae dra, me meno ame gâ ae möt, me hneü hia hnyi dren meno waleji adre hlingâ, me hnyi an ame hingölö, me e ame he ka osewen dukáia uma: 52 ke e ame he ka obosoâ uma ge dren meno ame gâ, me au ame hingölö, me meno ame gâ ae möt, me utö arasi, me thi bovine hisop, me leunen mamoe ae dra: 53 ke e ame he bi ju ka hna meno ame gâ ae möt únyi hnyi taun ka hnyi hnyei, helâe e ame he ka bi hwaban melen uma: me bo so but.

54 Wale hnanyibuiny mok lepera hia, me wathu; 55 me lepera hnyi úkhaú, me uma; 56 me dok ae khibi, me dok ae han, me ong dok ae hadröngöc: 57 m' adre me he ka wâhmakhnêto at ame bo kong, me at ame bo so: wale hnanyibuiny lepera.

HNYIMAKAN 15.

KE Iehova ame ha kö Mose me Arona, ka habe, 2 Fuc dö ka lakon Isaraela, me ha ködra, ka habe, E ka hingölö dân unyin ke at, e ame he ka bo kong ge hna hingölö únyi gan. 3 Ke walang bongon

bo kong a e ge hna hingölö únyi gan: ame ne tiga hingölö dân unyin, ke ame ne um dö hingölö dân unyin, wale obokonginy. 4 E bo kong ut je hna mokut hia a moku- lec hnen at ame hingölö, k' ame bo kong je únyi hia e ame labâ. 5 Ke haba at ame kâlâ hnen hna mokut, hamen he ka hneü anyin je úkhaú, me sou hnyi köiö, me bo kong ke ne o but sahac. 6 Ke haba at ame hnyi labâ ke únyi a labâ hnen at ame hingölö, e ame he ka hneü anyin je úkhaú, me sou hnyi köiö, me bo kong ke ne o but sahac. 7 Ke haba at ame he ka kâlâ unyin at ame hingölö, e ame he ka hneü anyin je úkhaú, me sou hnyi köiö, me bo kong ke ne o but sahac. 8 Ke ame ne he at ame hingölö ka hangöjá at ae bo so, e ame he ka hneü anyin je úkhaú, me sou hnyi köiö, me bo kong ke ne o but sahac. 9 Ke haba je tap hnân tabâ meno, ame tabâ hnen at ame hingölö, ame he ka bo kong. 10 Ke haba at ame kâlâ ke únyi a mokut hmelen at eling, e ame he ka bo kong ke ne o but sahac: ke haba at ame vaden je únyi eling, e ame he ka hneü anyin je úkhaú, me sou hnyi köiö, me bo kong ke ne o but sahac. 11 Ke haba at ame kâlâ hnen at ame hingölö, k' ame ca hinyem hnyi köiö, e ame he ka hneü anyin je úkhaú, me sou hnyi köiö, me bo kong ke ne o but sahac. 12 Ke haba kaia kânâ ame kâlâ hnen at ame hingölö, adre me he ka tho degecâ: ke haba je kaia utö hia, adre me he ka hneü hnyi köiö. 13 Ke ödra ka he ka obosoâ at ame hingölö, únyi hnyi hna hingölö únyi gan; me hamen he ka áu hobi kâu e bi je bong a seven he ka obosoâ e, me hneü anyin je úkhaú, me súâ unyin hnyi köiö ame hingölö, ke ame he ka bo so. 14 Ke haba hnyi bong a eitiny e ame he ka hom li biny, ame ne li nokon meköta, me hom ka hnyi hwanumen uma úkhacaköu, hnyi hnyimakö Iehova, me ham ödru ka at bihut: 15 ke ame he at bihut ka hudi ödru, haba khaca hnân hudiny hulö, ke khaca hnân hudiny leü; k' ame he at bihut ka bi hwaban anyin möt hnyi hnyimakö Iehova, can hna hingölö únyi gan.

16 Ke ame ne hingölö sin unyin ke at, e ame he ka tha súâ hia unyin hnyi köiö, me bo kong ke ne o but sahac. 17 Ke haba je úkhaú hia, me je unen meno hia ae hu sin unyin hnyin, adre me he ka hneü hia hnyi köiö, me bo kong ke ne o but sahac. 18 Ke haba momo ame tha mokut

mē hnyi sin, me hamödrü he ka soú hia hnyi köiö, me bo kong ke ne o but sahac.

19 Ke ame ne ke momo ame hingölö, ke dra ame hingölö únyi gan, adre me he ka hake ip e hnyi je bong a seven: ke haba at ame kálá, ame he ka bo kong ke ne o but sahac. 20 Ke haba je únyi hia e ame mokulec, hnyi hna hake ip e, ame he ka bo kong: k' ame he ka bo kong minya ta je únyi e ame labā. 21 Ke haba at ame he ka kálá hnen hna mokut, e ame he ka hneú anyin je úkhaú, me soú hnyi köiö, me bo kong ke ne o but sahac. 22 Ke haba at ame he ka kálá ke únyi e ame labā, e ame he ka hneú anyin je úkhaú, me soú hnyi köiö me bo kong ke ne o but sahac. 23 K' ame ne hon hna mokut, ame ne hon ke únyi bi e ame labā, ame ne kálá hnen ke at, me e ame he ka bo kong ke ne o but sahac. 24 Ke ame ne ke бага ame tha mokut mē, ke e thö bongon omomo unyin, e ame he ka bo kong hnyi je bong a seven; k' ame he ka bo kong je hna mokut hia e ame mokulec.

25 Ke ame ne hingölö dra ge ke momo hnyi je bong ae se, ke tiga ca úen bongon omomo, k' ame ne tiga hingölö hwaban úen bongon omomo; me ame he ka tha úcú je bongon bo kong a e me je bongon adre hake ip hnyin: e ame he ka bo kong. 26 Ke haba je hna mokut hia e ame mokulec hnyi je bong hia e ame hingölö, ame he ka tha úcú me je hna mokut hnyi hna hake ip: ke haba je únyi hia e ame labā, ame he ka bo kong helá me úbokonginy hna hake ip. 27 Ke haba at ame he ka kálá je únyi eling, e ame he ka bo kong, me hneú anyin je úkhaú, me soú hnyi köiö, me bo kong ke ne o but sahac. 28 Ke ame ne bo so únyi hnyi hna hingölö únyi gan, e ame he ka aú hobi kau e bi seven ta bong, ke hwaban e, e ame he ka bo so. 29 Ke haba hnyi bong a eitiny e ame he ka hom li biny hobi káu, ame ne li nokon mekóta, me hum ödrü ka at bihut hnyi hwanumen uma úkhaacaköu. 30 Ke ame he at bihut ka hudo khaca hnân hudiny hulö, me khaca hnân hudiny leú; ke hamen at bihut ka bi hwaban anyin möt hnyi hnyimakö Iehova can hna hingölö únyi gan ae bo kong.

31 Heläe öbu me he ka hake ip lakon Isaraela únyi hnyi anyidra bo kong; wá ödra nye mokcu hnyi bokongidra; ödra ka he ka obokongoá umök uma mano a e hnyi wanbödra.

32 Wale hnanyibuiny at ame hingölö, me at ame hingölö sin, me ame bo kong hnyin: 33 me ke at ae hu bongon omomo, me at ame hingölö, бага me momo, me at ame tha mokut me momo ae bo kong.

HNYIMAKAN 16.

KE Iehova ame ha kö Mose, hwaban imekiny li laku Arona, hnyi hnödrü hna bi hut hnyi hnyimakö Iehova, me ödrü me mokcu; 2 ke Iehova ame ha kö Mose, ka habe, Ha thö kö Arona a tuhâm, a g' ame ca he ka dit monu hnyi je úen hia ka hnyi dok ae kap hoton singiny mano hnyi hnyimakan taben ibetengiö hon tang; wá e nye mokcu: anyin a oge me he ka manen hnyi úlá hon taben ibetengiö. 3 Ke walong hwakecin údili Arona ka hnyi dok ae kap: e ame he ka hom nak bolok hnân hudiny hulö, me mamoe бага hnân hudiny leú. 4 E ame he ka khavá úkhaú lino ae kap, k' ame he ka khavá unyin ge útrauzes lino, k' ame he ka weiká hnyekon ge wen lino, me obicá e ge hnabinybak lino: wale je úkhaú ae kap; k' ame he ka osúá unyin ge köiö, me khavá je únyi eling. 5 Ke e ame he ka hom únyi ge úkhaacaköu anyin lakon Isaraela lo li got бага hnân hudiny hulö, me mamoe бага a khaca hnân hudiny leú. 6 K' ame he Arona ka hudo bolok hnân hudiny hulö, wale hobi káu e bi, me me bi hwaban anyin möt me anyin lap. 7 Ke e ame he ka hom li got, me ip ödrü hnyi hnyimakö Iehova, hnyi hwanumen una hnân úkhaacaköu. 8 Ke hamö Arona he ka uglekóbá li got, hobi kö Iehova ke leköp, ke hobi kö Azazele ke leköp. 9 Ke ame he Arona ka hom got anyi Iehova, waleji a kú hnen leköp, me hudo e hnân hudiny hulö. 10 Ke haba got a kú hnen leköp anyi Azazela, adre me he ka ip melö e hnyi hnyimakö Iehova, me me bi hwaban möt hnen e, me kuná e kö Azazele hnyebuba ai. 11 Ke ame he Arona ka hom bolok hnân hudiny hulö, wale hobi káu e bi, me e ame he ka bi hwaban anyin möt me anyin lap, k' ame he ka hlingá bolok hnân hudiny anyin hulö: 12 ke e ame he ka ounöngötá taben meic ge je walep ae möt únyi hnyi taben hut hnyi hnyimakö Iehova, me olo aoc únyi ae bo so hnân leú adre kokot úhnyúkongo, me hom hoton singiny mano: 13 k' ame he ka auk únyi ae bo so hnân leú ka hnyi hon meic hnyi

LEVITIKO 17.

hnyimakö Iehova, me me he hai únyi hnyi únyi ae bo so ka oiyongá taben ibetengió hon únyi hnân ohnatho, wá e nye moku: 14 ke hamen he ka hom hanen dren bolok, me dukáia hnen banyen taben ibetengió e deiö; me hnyimakan taben ibetengió, e ame he ka oseveny dukáia dren hnen banyen. 15 Ke e ame he ka hlingá got hnân hudiny hulö hobi káu tavat, me hom dren ka hnyi hoton singiny mano, me ányá dren e helá me hnen hna ányá dren bolok, me dukáia e hon taben ibetengió me hnyi hnyimakan taben ibetengió: 16 ke hamen he ka bi hwaban melen dok ae kap can bo konginy lakon Isaraela, ke can hnödra hna hanyáúá, me anyidra je monu hia; k' ame he ka ányá heláe hobi káu uma úkhacaköu ame laba unyidra wanben anyidra hulö. 17 Ke ame he ka ba at hnyi uma úkhacaköu e ka didrö he ka bi hwaban möt hnyi dok ae kap, ke ne o but e ame dit hmetu, ke a hia but bi hwaban anyin möt, me anyin lap, me úkhacaköu hia anyin at Isaraela. 18 Ke e ame he ka didrut ka hnyi taben hut hnyi hnyimakö Iehova, me bi hwaban melen; ke e ame he ka hom hanen dren bolok, me hanen dren got бага, me kina hnyi je baitoiny taben hut igigilö. 19 Ke e ame he ka oseven dukáia e hnen dra ge banyen, me obosoá, me okabá únyi hnyi bo konginy lakon Isaraela. 20 Ke a hia but bi hwaban melen dok ae kap, me uma hnân ukhacaköu, me taben hut, me, e ame he ka hom got бага ae möt: 21 k' ame he Arona ka ip li hnyamen hon ban got ae möt, me ha manená hon e je hulö hia anyin lakon Isaraela, me hnödra hna hanyáúá, me anyidra je monu hia; k' ame he ka ip je únyi e hon ban got, me kuná e hnen at adre penapena hnyeububa ai; 22 k' ame he got ka vaden anyidra je hulö hia ka hnyi dok ae ba aten; ke e ame he ka hna got ka hnyi hnyeububa. 23 Ke ame he Arona ka didrö ka hnyi uma hnân úkhacaköu, me úny jut je úkhaú lino, waleji a khavá hnyi úen e ame dit ka hnyi dok ae kap, me e ame he ka hnen bi ju ling: 24 ke e ame he ka osúá unyin hnyi köiö hnyi ke dok ae kap, me khavá hmetu khaúen bi, me didrut, me hudo hudiny anyi. leú, me hudiny leú anyin tavat, k' ame he ka bi hwaban anyin möt, me tavat. 25 Ke haba pipikhenyainy hudiny hulö, e ame he ka le hon taben hut. 26 Ke hamen at a hna got hobi kö Azazele he ka hneú anyin je úkhaú, me osúá únyin

hnyi köiö, ke hwaban e e ame he ka he hmetu ka hnyi hnyaba. 27 Ke haba bolok hnân hudiny hulö, me got hnân hudiny hulö waleji adre hom drödra ka hnyi dok ae kap, me me bi hwaban möt, adre me he ka hom ka hnyi hoton hnyaba; ke adre me he ka le degecá ge meic li unödra me unyidru me tidru. 28 Ke hamen at a le degecá ta je únyi e he ka hneú anyin je úkhaú, me osúá unyin hnyi köiö, ke hwaban e e ame he ka hmetu ka hnyi hnyaba.

29 Ke wale hnanyibu hobi köbun nyiele balua: haba hnyi tahi a seveniny, hnyi bong a teniny tehi, öbun e he ka hom úhnyúkongoá je hnyekubun, me ca huliwa, ame ne ke at a aten hnyei, ame ne aten ke hnyei at ame laba kinyua nyibun: 30 anyin a hnyi bong eling adre me he ka bi hwaban anyibun möt h: ka obosoi öbun; únyi hnyi anyibun je hulö hia adre me he ka obosoi öbun hnyi hnyimakö Iehova. 31 Ke walang sabath hnân mená köbun, ke öbun e he ka hom úhnyúkongo je hnyekubun: wale thibi hnanyibu nyiele balua. 32 Ke haba at bihut adre hú me otílá me me at bihut hwaban kamen, hamen he ka bi hwaban möt, me khavá je úkhaú lino, a je úkhaú ae kap: 33 ke e ame he ka bi hwaban melen dok ae ti kap, k' ame he ka bi hwaban melen uma úkhacaköu me taben bi hut; me bi hwaban möt anyin hnyat bihut, me úkhacaköu hia. 34 Ke wale hnanyibu köbun nyiele balua, he ka bi hwaban möt anyin lakon Isaraela can anyidra je hulö, úsa khaca ányá hnyi huna. Me e ame ányá helá me Iehova ame húna kö Mose.

HNHYIMAKAN 17.

KE Iehova ame ha kö Mose, ka habe, 2 Ha thö kö Arona me lakon, me lakon Isaraela hia, me ha ködra ka habe; Walang únyi a húna Iehova, ka habe, 3 Haba at Isaraela hia ame hlingá bolok, ame ne nokon mamoe, ame ne got, hnyi hnyaba, k' ame ne hlingá hoton hnyaba, 4 k' ame ca hom e ka hnyi hwanumen uma úkhacaköu, he ka hudo e kö Iehova hnyi hnyimakan uma mano anyi Iehova: ame he ka joniny at eling dra; k' ame hingálá dra; k' adre me he ka subá degecá at eling únyi hnyi iny hnyei: 5 waleling me me he ka hom hnen lakon Isaraela haledra je meno hnân hudo, wale adre me labö hlingá

hnyi hnyei, ödra ka he ka hum ödrin kö Iehova hnyi hwanumen uma úkhacaköu, ka at bihut, me hling' ödrin hnân hudiny ole kö Iehova. 6 Ke hamen at bihut he ka dukâiâ, taben hut anyi Iehova ge dren, hnyi hwanumen uma úkhacaköu, me le pipikhenyainy hnân bo so kö Iehova. 7 Ke adre me ca he hmetu ka hudo anyidra je hut ka je khong waleji adre me bi únyi monu më. Wale hnanyibu nyiele balua ködra hnyi anyidra ta je dö.

8 Ke u me he ka ha ködra, ka habe, Haba at Isaraela hia, ame ne aten ke je hnyei ame laba kanyua unyibun, at ame hudo hudiny leú, ame ne ke hut, 9 k' ame ca he ka hnyi hwanumen uma úkhacaköu he ka hudo e kö Iehova, me adre me he ka subâ degeca at eling únyi hnyi iny hnyei.

10 Ke haba at Isaraela hia, ame ne aten ke hnyei ame laba kanyua unyibun, ame he ka han dra; me oge me he ka wâ hmâ at eling ame han dra, me subâ degecâ e únyi hnyi iny hnyei. 11 Anyin a e hnyi dra melen unyin: ke oge hia but ham e köbun hon taben hut, me me bi hwaban anyibun möt: anyin a haba dra, me, wale at ame bi hwaban möt, anyin ae hu möt hnyin. 12 Anyin a wale oge me ha ka lakon Isaraela, ka habe, E ba at unyibun ame he ka han dra, ke ca he ke at e aten ke hnyei ame laba kanyua unyibun he ka han dra.

13 Ke haba at Isaraela, ame ne aten ke hnyei ame laba kanyua unyibun, at ame hnu me kât menoiny hnyot, ame ne meno ame gâ, hnân han; me hamen he ka hingálâ dren, me konâm ge kânâ. 14 Anyin a wale melen je únyi hia; haba dren me wale möt: ke waleling me oge me ha ka lakon Isaraela, ka habe, Ca he öbun ka han dren omeno hia: anyin a haba dra, me, wale melen ta je únyi hia, ke haba at ame he ka an e, adre me he ka subâ degecâ. 15 Ke haba at ame he ka han meno a mok hwege, ame ne kiâ ge ke meno, a aten hnyei, me atkanyua, me, hamen he ka hneú anyin je úkhaú, me sou hnyi köiö, me bo kong ke ne o but sahac, me me bo so but. 16 Ke ame ne ca he ka hneú anyin je úkhaú, me súâ unyin, me ame he ka takou e anyin hulö.

HNYIMAKAN 18.

KE Iehova ame ha kö Mose, ka habe, 2 Ha thö ka lakon Isaraela, me ha, ka habe, Inya Iehova Khongubun. 3 Ca

he öbun ka ányâ hoton hwakecin hnyei Aigupito waleji öbun e laba hnyin; ke ca he öbun ka ányâ hoton hwakecin hnyei Kanana, wale oge me hum öbun ka hnyin: ke ca he öbun ka hnu hoton anyidra je hnanyibu. 4 Ke hamöbun he ka ányâ hnök je hna owisa, me tuö anyik je hnanyibu, me he hnyin: inya Iehova Khongubun. 5 Anyin a wale hamöbun he ka tuö anyik je hnanyibu, me hnök je hna owisa: anyin a haba at ame he ka ányâ e, me ame he ka möt hnyin: Inya Iehova.

6 Ca he ke at gabun ka hakekenyâ ke liamekeiny më, he ka hai hnamejin: Inya Iehova. 7 U me ca he ka hai hnamejin kâmâm, ma hnamejin hinyâm: e hinyâm; u me ca he ka hai hnamejin. 8 U me ca he ka hai hnamejin áiân kâmâm: anyin a wale hnamejin kâmâm. 9 U me ca he ka hai hnamejin mânyâm, nokon kâmâm a hlu, ame nokon hinyâm adre hnokoâ hnyi hnyaba, k' adre me ne hnokoâ hnyi ke hnyaba. 10 U me ca he ka hai hnamejin nokon hlu anyin nokom бага, ame ne nokon hlu anyin nokom momo; anyin a haba hnamejidru a hnamejâm bi. 11 U me ca he ka hai hnamejin nokon áiân kâmâm a hlu, a hnokoâ hnen kâmâm, hânâm e. 12 U me ca he ka hai hnamejin tehem a haniny kâmâm: haba e me hing liamekeiny me kâmâm. 13 U me ca he ka hai hnamejin liamekeiny me hinyâm: anyin a hing liamekeiny me hinyâm. 14 U me ca he ka hai hnamejin liamekeiny me kâmâm, ke u me ca he ka hakekenyâ áiân: ke hinyâm e. 15 U me ca he ka hai hnamejin áiân nokom бага; úngom momo e; u me ca he ka hai hnamejin. 16 U me ca he ka hai hnamejin áiân liamekeiny möu: wale hnamejin liamekeiny möu. 17 U me ca he ka hai hnamejin momo me nokon a hlu; ke u me ca he ka hok nokon hlu a nokon nokon бага, ame ne nokon hlu a nokon nokon momo, he ka hai hnamejin: ödrin je hing liamekeiny: hulö eling. 18 Ke u me ca he ka hok momo a liamekeiny me áiâm, he ka ovecâ, me hai hnamejin ke tiga möt at a bân. 19 Ke u me ca he ka hakekenyâ momo he ka hai hnamejin, hnyi hna hake ip can bo kong a e. 20 Ke u me ca he ka tha mokut me áiân ke at, he ka okongu u unyin. 21 Ke u me ca he ka hna lakom he ka he hnyi wanben meic kö Moleka, ke u me ca he ka okongoâ ien Khongom: Inya Iehova. 22 U me ca he ka tha mokut me ke бага, helâ me hwakecin tha mokut me

momo: wale thibi ikiki. 23 Ke u me ca he ka tha mokut me ke meno he ka okongu u mē: k' ame ca he momo ka tot hnyi hnyimakan ke meno me me tha mokut mē: wale hulö ae gan.

24 Ca he ka okongu öbun bi hnyi ta je ünyi eling; anyin a ta je ünyi hia e ame okongoâ je hnyei wala oge me he ka obâ hnyi hnyimaköbun: 25 k' ame kong ut hnyei; anyin a wale oge me he ka bi hwaban hulöiny, k' ame he hnyei ka hmita degecâ aten. 26 Anyin a wale hamöbun he ka tuö anyik je hnanyibu, me hnök je hna owisa, ke ca he öbun ka änyâ ke ünyi hnyi ta je ünyi eling ae ikiki, wale aten ibun hnyei, me aten ke je hnyei adre me laba kanyua unyibun: 27 (anyin a wale ta je ünyi hia ae ikiki eling a änyâ hnen aten hnyei a bân, me me kong ut hnyei;) 28 me me ca he ka hmita degeci öbun minya hnen hnyei öbun ka he ka okongoâ, helâ me hna hmita degecâ je hnyei a bân. 29 Anyin a haba at ame änyâ ke ünyi eling ae ikiki, me adre me he ka subâ degecâ tavat adre me änyâ e ünyi hnyi idrin hnyei. 30 Awe, öbun e he ka tuö hnök je hna hûna, me me ca änyâ bi ke hwakecin ae ikiki waleji adre änyâ ke tiga hi' öbun, me me ca he ka okongu öbun hnyin: Inya Iehova Khongubun.

HNyimakan 19.

KE Iehova ame ha kö Mose, ka habe, 2 Ha thö ka úkhacaköu hia anyin lakon Isaraela, me ha ködra, ka habe, Okabi öbun ju, anyin a inya Iehova Khongubun ae kap. 3 Öbun e he ka ve outen je lahi-nyöbun, me je lakamöbun, me tuö anyik je sabath: Inya Iehova Khongubun. 4 Ca saü öbun ka je idola, ke ca he ka bi khongubun adre oköiöâ: Inya Iehova Khongubun. 5 Ke öbun e ne he ka hudo hudiny ole kö Iehova, me hamöbun he ka hudo e me me he ka kap soi öbun. 6 Ke adre me he ka an e hnyi bong öbun e hudo hnyin, me bong nyi: ke ame ne hu kolon hnyi bong we, me adre me he ka le degecâ ge meic. 7 Adre me ne he ka an e we, wale ikiki; adre me ca he ka kap soâ: 8 ke haba at ame han e, me ame he ka takou e hnen anyin hulö, anyin a e ame okongoâ ünyi ae kap anyi Iehova; me adre me he ka subâ degecâ at eling ünyi hnyi iny hnyei.

9 Ke öbun ka he ka meno je ibun, me u

me ca he ka meno hia ke ne o but hnyi je hounyin em, ke u me ca he ka hlo kolon hnâm hna menu. 10 U me ca he ka hlo kolon halem je vine, ke u me ca he ka hlo hia je wan vine ame kökölö ünyi hnyi halem je vine; ke u me he ka hna bi ju hobi kâu at ae ba ta ünyi me atkanyua: Inya Iehova Khongubun. 11 Ca he öbun ka venöu; me ca bibiman bi, ke ca thoi ke at ka ke at. 12 Ke ca he öbun ka kheman-nyin thoi hnyi iök, anyin a u je okongoâ ien Khongom helâe: Inya Iehova. 13 U me ca he ka okongoâ at ame laba hakekenyi u, me hügünâ anyin ta je ünyi: haba hwaban athnyaba u je hawâ, ame ca he ka mokut unyâm hnyi hnyinghet ke ne o but hnyomakatu. 14 U me ca he hangâ at ae wejiji, ke ca ip ke ünyi hnân ohavâ hnyi hnyimakan wadröu, ke u me he ka outen Khongom: Inya Iehova. 15 Ca he öbun ka änyâ hwali hnyi owisa: u me ca he ka wâhmakhmetoâ at ae ba ta ünyi, me ogânâ at ae tren omjeû: ke hamâm he ka owisa at ame laba hakekenyi u hnyi wisa. 16 U me ca he ka ngeno em hnyei he ka úhaiö monu: ke u me ca he ka tot he ka thoi me me mok at ame laba hakekenyi u: Inya Iehova. 17 U me ca he ka hûkötîâ eü hnyi hnyekom liamekeiny möu: u ma he bala ka thawâ at ame laba hakekenyi u, ke ca he ka bi jônâm gan. 18 Ca he ka oúcoâ hulö, me ip hnân ka aten em hnyei, ke u me he ka betenge ka at ame laba hakekenyi u helâ me u bi: Inya Iehova. 19 Hamöbun he ka tuö anyik je hnanyibu. U me ca he ka hna halem je meno he ka hnokoâ meno ae ke bongou bi: u me ca he ka ta em hnyei ge je hatong ae ve bongon bi: ke u me ca he ka khavâ úkhaú adre úthüenenen ge li tö ae ve bongon. 20 Ame ne he ke at ka tha mokut me momo a athnyaba adre úco, k' adre ham ka ke бага, k' adre ca úco hmeto bi me hna baúâ; me adre me he ka bi hwaban; adre me ca he ka hling' ödra, anyin a e ame ca gufa bi. 21 Ke hamen бага he ka hom hudinyanyin monu bi kö Iehova, ka hnyi hwanumen uma úkhacaköu, a mamoe бага hnân hudiny monu. 22 Ke ame he at bihut ka bi hwaban anyin möt ge mamoe бага hnân hudiny monu hnyi hnyimakö Iehova, can hulö e ame änyâ: me adre me he ka hna hulö e ame änyâ. 23 Ke öbun ka o but ka hnyi hnyei, k' adre um dö tâ ta je ve úö ae hu wan hnân han; me öbun e he ka áú

je wan helâ me únyi adre ca peritomonâ : hnyi kun ta huna adre me he ka helâ me únyi adre ca peritomonâ köbun : öbun e ca he ka han. 24 Ke haba hnyi huna a vakiny ame he ka kap hia je wan, me hnân oganá Iehova. 25 Ke hnyi huna a thabúnginy öbun e he ka han je wan, me me hu troban köbun : Inya Iehova Khongubun. 26 Ca he öbun ka tha han menö me dren : ke u me ca he ka biobotkong, me bihihwakecin. 27 Ca he öbun ka giâ li halelöü hnyi böbun, me okongoâ baten waiâm. 28 Ca he öbun ka sei hon komok hnyi je unyibun, me thâ je unyibun : Inya Iehova. 29 Ca he ka okongoâ nokom hlu me me momo hnyi gethen bi ; wâ e nye labö bi únyi monu tavat, me me unöngötö hnyeï hnen hwakecin ae kong. 30 Hamöbun he ka tuö anyik je sabath, me okabâ dok a kabik : Inya Iehova. 31 Ca he öbun ka saü ka tavat tren hanu, me tavat bibi-hwakecin ; ca elöm ödrin, m' öbun e ca he ka kong : Inya Iehova Khongubun. 32 U me he ka köüö hnyi hnyimakan at ae hüen ban, me oganá hnyimakan hingat, me u me he ka outen Khongom : Inya Iekova. 33 Ke ame ne ke at a aten ke hnyeï ame laba kanyua unyibun hnyi ibun hnyeï, ca he öbun ka okongoa. 34 Ame he aten ke hnyeï ka laba unyibun helâ me aten ibun hnyeï, ke u me he ka betenge gan helâ me u bi ; anyin a je atkanyua öbun hnyi hnyeï Aigupito : Inya Iehova Khongubun. 35 Ca he öbun ka ányâ únyi ae hwali hnyi hna owisa, ge tulutiny ibethen, me tulutiny ihmakiny, me tulutiny dán. 36 Ame he ka hu unyibun tulut adre uhno ae wisa, me tulut ihmakiny ae wisa, me efa ae wisa, me hin ae wisa : Inya Iehova Khongubun, at ame hum öbun únyi hnyi hnyeï Aigupito. 37 Ke hamöbun he ka tu anyik je hnani-bu hia, me hnök je hna owisa hia, me ányâ ta je únyi e : Inya Iehova.

HNYIMAKAN 20.

KE Iehova ame ha kö Mose, ka habe, 2 U me he ka ha ka lakon Isaraela, ka habe, Haba at Isaraela, ame ne aten ke hnyeï ame laba kanyua unyi Isaraela, ame he ka ham nokon kö Moleka, me adre me he ka hlingâ at eling : hamen tavat a aten hnyeï he ka lúâ ge veto. 3 Oge me he ka wâ hmâ at eling me subâ degecâ e únyi hnyi iny hnyeï ; anyin a e ame ham nokon kö Moleka, me ame oikikiâ dok a kabik, me oko-

ngoa iök ae kap. 4 Ke ame ne he aten hnyeï ka omúko ge at ame ham nokon kö Moleka, k' ame ca hlingâ bi ; 5 me oge me he bi nya ka wâ hmâ at eling me anyin lap me subâ degecâ, me tavat hia ödrin e bi únyi monu hoton, he ka bi únyi monu me Moleka, únyi hnyi idrin hnyeï. 6 Ke haba at ame saü ka je hnyat tren hanu me tavat bibihwakecin, he ka bi únyi monu hotudrin, me oge me he ka wâ hmâ at eling me subâ degecâ únyi hnyi iny hnyeï. 7 Okabi öbun ju, m' öbun e kap : anyin a inya Iehova Khongubun. 8 Ke öbun e he ka tuö anyik je hnanyibu me ányâ : Inya Iehova at ame okabi öbun. 9 Ke haba at ame hangâ kâmen me hinyen, adre me he ka hlingâ e : e hia but hangâ kâmen ame ne hinyen ; ame he ka takoué e ge dren bi. 10 Haba at ame bi únyi monu me áiân ke at, me adre me he ka tha hlingâ бага me momo, a li at bi únyi monu. 11 Ke haba at ame he ka tha mokut me áiân kâmen, e ame hai hnamejin kâmen : me adre me he ka tha hling' ödru hia ; k' ame he ka takú ödru ge drödrü. 12 Ke ame ne he ke at ka tha mokut me áiân nokon бага, me adre me he ka tha hling' ödru hia : ödrü me ányâ únyi ae ti kong ; ame he ka taku ödrü ge drödrü. 13 Ke ame ne he ke бага ka tha mokut me ke бага helâ me hwakecin tha mokut me momo, ödrü me ányâ únyi ae ikiki : adre me he ka tha hling' ödrü ; k' ame he ka takú ödrü ge drödrü. 14 Ke ame ne he ke at ka tha hok momo me hinyen, wale hulö : k' adre me he ka tha thong degeci ödrü ge meic, me me ba hulö unyibun. 15 Ke ame ne he ke бага ka tha mokut me meno, me adre me he ka hlingâ at e : k' öbun e he ka hlingâ minya meno. 16 Ke ame ne he he momo ka hakekenyâ ke meno, me tha mokut mē, me u me he ka tha hlingâ momo me meno : adre me he ka tha hling' ödrü hia : ame he ka taku ödrü ge drödrü. 17 Ke ame ne he ke бага ka hok haniny, ame ne nokon kâmen, ame ne nokon hinyen, me ödrü me úwâköüâ úhethuidru ; me wale únyi ae ikiki ; ke adre me he ka tha subâ degeci ödrü hnyi hnyimakan aten idrin hnyeï : e a hia but hai hnamejin haniny ; ame he ka takoué e hnen anyin hulö. 18 Ke a ne he ke бага ka tha mokut me momo ae hu bongon omomo, me hai huamejin ; me e ame hia but ohethuâ pupua gan, k' ame hia but hai tubwiny pupainy dra gan bi : me adre me he ka tha subâ degeci ödrü únyi hnyi idru hnyeï. 19 Ke u me ca he

ka hai hnamejin liamekeiny me hinyâm, ame ne haniny kamâm; anyin a u me hai hnamejin hing liamekeiny môu: me ame he ka takû ödrin hnen anyidrin hulö. 20 Ke ame ne he ke at ka tha mokut me momo âiân liamekeiny me kamen; me e ame hai hnamejin liamekeiny me kamen bi: me ame he ka takû ödru ge anyidru hulö; ödru me he ka mok ke ba matrân. 21 Ke ame ne he ke at ka hok momo a âiân liamekeiny mē, wale únyi ae ikiki: k' ame hai hnameyin liamekeiny mē; ame he ka ba matrânidru.

22 Anyin a wale öbun e he ka tuö anyik je hnanyibu, me hnök je hna owisa hia, me ânyâ e: me ca he hnyei ka hmita degeci öbun, wale oge me hum öbun ka hnyin he ka labâ. 23 Ke ca he öbun ka he hoton hwakecin je hnyei oge me he ka obâ hnyi hnyimaköbun: anyin a ödra adre me ânyâ ta je únyi hia eling, anyin a wale oge me ikiki ödra. 24 Ke oge hia but ha köbun, ka habe, Ame he ka hu köbun idrin hnyei, ke oge me he ka ham e köbun he ka labâ, wale hnyei ame di hnyin debai me hani: Inya Iehova Khongubun, at ame uc' öbun únyi hnyi ta je hnyei. 25 Anyin a wale, öbun e he ka ovebongonâ omeno ae bo so, me omeno ae bo kong, me omeno ame gâ ae bo kong, me bo so: ke ca he öbun ka oikiki öbun bi hnen meno, me meno ame gâ; me ta je únyi adre iyâú hon kânâ, waleji oge ve khenâ unyibun ae bo kong. 26 M' öbun e he ka kap bi könya: anyin a inya Iehova ae kap, k' oge hia but uc' öbun únyi hnyi ta je hnyei hnân hobi könya.

27 Haba бага, ame ne momo, at tren hanu me at ame bibihwakecin, me adre me he ka hlingâ: adre me he ka lu' ödrin ge veto: ame he ka takû ödrin ge drödrin.

HNHYIMAKAN 21.

KE Iehova ame ha kö Mose, ka habe, Ha thö ka hnyat bihut a lahu Arona, me ha ködrin, ka habe, Ca he ke at ka obokongâ e can ta je komok hnyi iny hnyei. 2 Ke so thibi can je hing liamekeiny mē, wale hinyen, me kamen, me nokon бага me hlu, me liamekeiny mē; 3 me hing haniny hlu ae ba âiân: e so ka bo kong can e. 4 E ame ca he ka obokongâ e bi, me okongoâ, anyin a e at hnathuiny hnyei. 5 Ödrin e ca he ka ohadreúâ je bödrin, me giâ baten waidrin, me kave anyidrin. 6 Ödrin hnyat ae kap ka Khongudrin, ke ödrin e ca he ka

okongoâ ien Khongudrin: anyin a ödrin e hudo je hut a an hnen meic kö Iehova, a an Khongudrin: anyin a wale ödrin e he ka kap. 7 Ca he ödrin ka hok momo hnyi gethen, me hlu adre hia but okongoâ; k' adre me ca he ka hok momo a degec hnen âiân: anyin a ödrin hnyat ae kap ka Khongudrin. 8 Ke u me he ka okabi ödrin: anyin a ödrin hnyat hudo an Khongom: ödrin hnyat ae kap köu: anyin a inya Iehova ae kap at ame okabi öbun. 9 Ke e ka he nokon at bihut a hlu ka okongoâ e bi, ame bi únyi monu, me e ame okongoâ kamen: k' adre me he ka thong degecâ e ge meic.

10 Ke haba at bihut ae nua unyin je liamekeiny mē, wale adre hingâlâ wakaco hnân hú hon ban, k' adre otilâ he ka khavâ je úkhaú, me e ame ca he ka ouheâ ban, me kia anyin je úkhaú; 11 ke haba khaca e ame ca he ka hakekenyâ unyin at a mokcu, me obokongâ e bi can kamen me hinyen; 12 ke e ame ca he ka he únyi hnyi dok ae kap, me okongoâ dok a kapiny Khongon; anyin a e hon ban wakaco hnân hú anyin Khongon: Inya Iehova. 13 Ke e ame he ka hok âiân a hlu. 14 Ke e ame ca he ka hom safac, me momo adre degec, me hlu adre okongo, me momo hnyi gethen: ke e ame he ka hok âiân a hlu únyi hnyi iny hnyei. 15 Ke e ame ca he ka okongoâ lakon únyi hnyi iny hnyei: anyin a inya Iehova at ame okabâ e.

16 Ke haba Iehova ame ha kö Mose, ka habe, 17 Ha thö kö Arona, ka habe, Ame ne hu matrânâm hnyi anyidra je dö ae hu hnyikongon unyin, me e ame ca he ka hakekeny he ka hnyi hudo an Khongon. 18 Anyin a haba at ae hu hnyikongon unyin ame ca he ka hakekenyâ; wale wadröu, me at ame ci, me at ae lau hnyingöiny, me at ae hu ovejien, 19 me at ae hmetru bacan, me hmetru hnyamen, 20 me at ae hwali jö tot, me at ame aú, me hwiö emakan, me at ae huje unyin, me úhölö, me hna hmouca wakunyin; 21 e ba at hnyi je matrâni Arona at bihut, ame he ka hakekeny ka hudo je hut a an hnen meic kö Iehova a ne hu hnyikongon unyin: e at ae hu hnyikongon; e ame ca he ka hakekeny he ka hudo an Khongon. 22 E ame he ka hnyi han an Khongon, wale je únyi ae ti kap hmönyin, me je únyi ae kap. 23 Ke so bi e ame ca he ka dit ka hnyi hoton singiny, me hakekenyâ taben hut, anyin ae hu hnyikongon: me me ca he ka okongoâ je dok a

kapik : anyin a inya Iehova at ame okabi ödrin. 24 Me haba Mose ame ha helâe kö Arona, me lakon, me lakon Isaraela hia thithö.

HNYIMAKAN 22.

KE Iehova ame ha kö Mose, ka habe, 2 Ha thö kö Arona me lakon, a g' adre me he ka úsákâütö me je únyi ae kap anyin lakon Isaraela, wale adre me okabâ könya, m' ödrin e ca he ka okongoâ iök ae kap : Inya Iehova. 3 Ha thö ködrin, ka habe, Haba at hnyi mátrânibun hia hnyi anyibun ta je dö ame hakekenyâ ta je únyi ae kap, wale hnen lakon Isaraela hna okabâ kö Iehova, k' ame bo kong ut, me adre me he ka subâ degecâ at eling hnyi hnyimakök : Inya Iehova. 4 Ame ne lepera ke at hnyi mátrâni Arona, ame ne hingölö dán unyin ; me e ame ca he ka hnyi han je únyi ae kap, ke ne o but e ame bo so bi. Ke ame ne hu ke at ame kâlâ ke únyi ae bo kong hnen unyin ae mok, ke ame ne at ame hingölö sin unyin ; 5 ke ame ne ke at ame kâlâ únyi ame iyâüt, wale ame obokongoâ e, ke ame ne ke at ame obokongoâ e hnen ke únyi ae bo kong unyin ; 6 haba at ame kâlâ ta je únyi helâe, me e ame he ka bo kong ke ne o but sahac, k' ame ca he ka hnyi han ta je únyi ae kap, e ka tiga ca stâ unyin hnyi köiö. 7 Ke e ka didrut seúno, me e ame he ka bo so ; ke hwaban e, e ame he ka hnyi han je únyi ae kap, anyin a wale an. 8 Haba únyi a mok hwege, me hna kia hnen meno, e ame ca he ka hnyi han, wâ e nye bo kong hnen e. Inya Iehova. 9 Anyin a wale ödrin e he ka tuö hnök je hna hûna, me me ca takú ödrin hnen hulö, me mok can e, ödrin ka he ka okongoâ : Inya Iehova at ame okabi ödrin. 10 Ame ca he atkanyua ka hnyi han únyi ae kap : haba at ame tha laba me at bihut, me athnyabainy adre hawâ, ame ca he ka hnyi han únyi ae kap. 11 Ke ame ne he at bihut ka úco ke at ge mone, me e ame he ka hnyi han ; helâ minya hnyat adre hnokoâ hnyi hnyaban, ödrin e he ka hnyi han an. 12 Ke ame ne faipoipo me atkanyua nokon at bihut a hlu, e ame ca he ka hnyi han je únyi ae kap adre hudo hnân hudiny kap göranyai. 13 Ke ame ne safac nokon at bihut, ame ne thang faipoipo, me ba nokon, k' ame hmetu ka hnyi hnyaban kamen, helâ ke me tiga hlu bi, me e ame he ka hnyi han an kamen : ke ame ca he ka atkanyua ka

hnyi han. 14 Ke ame ne han monoâ hnen ke at únyi ae kap, me hamen he ka bi hwaban, me bi hanen ke keihen a thabúnginy me ham ka at bihut únyi ae kap. 15 Ke ca he ödrin ka okongoâ je únyi ae kap unyin lakon Isaraela wale ödrin e hudo kö Iehova ; 16 me takú ödrin hulöiny anyidra monu, ödrin ka he ka hnyi han anyidrin je únyi ae kap : anyin a inya Iehova at ame okabâ ta je únyi eling.

17 Ke Iehova ame ha kö Mose, ka habe, 18 Ha thö kö Arona, me lakon, me lakon Isaraela hia, me ha ködra, ka habe, E ka he ke at Isaraela, ame ne atkanyua unyin at Isaraela ka hudo anyin hut, ame ne hobi kâu anyidra ke je khöbi, ame ne hobi kâu anyidra hut ae betenge, wale adre me he ka hudo kö Iehova hnân hudiny leü : 19 hamöbun he ka hudo бага ae ba hnyikongon únyi hnyi je bolok, ame ne mamoe, ame ne got, me me he ka kap soi öbun. 20 Ke haba at ae hu hnyikongon, ca he öbun ka hudo : anyin a ca hnân kap soi öbun hnyin. 21 Ke e ka he ke at ka hudo hudiny úsoköu kö Iehova, me thamua khöbi, ame ne hut ae betenge, ame ne bolok, ame ne mamoe, me e so e ame bekhöt, m' adre me he ka kap soâ ; ame ca he ka hu hnyikongon. 22 Haba wadröu, me at ae hmetru jeien, me bâbu, me anyú, me at ae huje unyin, me úhölök, ca he öbun ka hudi ödrin ko Iehova, me ca hudi ödrin hnân hut a an ge meic hon taben hut kö Iehova. 23 Ame ne bolok, ame ne nokon mamoe ae hu ovejien, ame hia ke keihen unyin, me u me he ka hudi ödrin hnân hut betenge ; ke adre me ca he ka kap soâ hobi kâu khöbi. 24 Ca he öbun ka hudo kö Iehova únyi adre okongoâ wakunyin, ame ne hmouca, ame ne khekhe, ame ne kave ; ke ca he öbun ka ányâ helâe hnyi ibun hnyei. 25 Ke ca he öbun ka hudi ödrin hnân an Khongubun únyi ge aten ke hnyei bi ; anyin a e unyidrin hulö me hnyikongon : adre me ca he ka kap soi öbun hnyin.

26 Ke Iehova ame ha kö Mose, ka habe, 27 Adre me ne hnokoâ bolok, ame ne mamoe, ame ne got, me e ame he ka tha laba me hinyen hnyi je bong a seven : ke hwân hnyi bong a eitiny adre me he ka hap hnân hut a an ge meic kö Iehova. 28 Ke ame ne kau, ame ne mamoe, me öbun e ca he ka tha hlingâ e me nokon hnyi bong a khaca. 29 Ke öbun ka he ka hudo hudiny ole kö Iehova, hudo thö e me me kap soi öbun hnyin. 30 Hnyi bong a khaca adre me he

ka an e ; ca he öbun ka ip kolon ke ne o but nyi : Inya Iehova. 31 Anyin a wale hamöbun he ka tuö anyik je hnanyibu me änyä : Inya Iehova. 32 Ke ca he öbun ka okongoä iök ae kap ; ke adre me he ka okabi nya wanben lakon Isaraela : Inya Iehova at ame okabi öbun, 33 wale at ame hum öbun ünyi hnyi hnyei Aigupito, me me Khongubun : Inya Iehova.

HNyimakan 23.

HABA Iehova ame ha kö Mose, ka habe, 2 Ha thö ka lakon Isaraela me ha ködra, ka habe, Haba je üen a thu bongon hnö Iehova, wale öbun e he ka haimemenä me me je ükhacaköu ae kap, me wale thibi e je üen oge thu bongon. 3 Siks je bong adre me he ka huliwa, ke haba hnyi bong a seveniny, me wale sabath hnän menä, me ükhacaköu ae kap : ca he öbun ka änyä ke huliwa : wale sabath anyi Iehova hnyi je hnyababun hia.

4 Walang je üen a thu bongon hnö Iehova, je ükhacaköu ae kap, wale öbun e he ka omanenä hnyi je üen. 5 Haba hnyi bong a fortininy tehi a bán, hnyi sabac, me wale paseka anyi Iehova. 6 Ke hnyi bong a fiftininy tehi eling, me wale bongon han areto adre ca levena kö Iehova : öbun e he ka han areto adre ca levenä hnyi seven ta bong. 7 Hnyi bong a bán öbun e he ka hu ükhacaköu ae kap : übun e ca he ka änyä huliwa ae hmak. 8 Ke öbun e he ka hudo hut a an ge meic kö Iehova hnyi je bong a seven : ke hnyi bong a seveniny, me ame he ka hu ükhacaköu ae kap ; e ba huliwa ae hmak öbun e he ka änyä.

9 Ke Iehova ame ha kö Mose, ka habe, 10 Ha thö ka lakon Isaraela, me ha ködra, ka habe, Öbun ka o ka hnyi hnyei oge me he ka ham köbun, ke öbun ka meno jeüiny, me öbun e he ka hom je thi hwit a bán öbun e meno ka at bihut : 11 ke e ame he ka hajijingä thi hwit hnyi hnyimakö Iehova, me me kap soi öbun hnyin ; haba at bihut ame he ka hajijingä e bong nyi hwaban sabath. 12 Ke hnyi bong eling, öbun e hajijingä thi hwit hnyin, me öbun e he ka hudo mamoe бага a khaca hunainy ae ba hnyikongon hnän hudiny leü kö Iehova. 13 Ke haba hudiny han ame he ka lo li omer falawa adre üthueniken me wakaco hnän hut a an ge meic ae bo so kö Iehova : ke haba hudiny ic, ame he ka tap waina a vakiny hin. 14 Ke ca he öbun ka

han areto, me hwit adre lo, me je ihwit ae but, ke ne o but bong eling, öbun e he ka hom hut ka Khongubun hnyin : wale hnanyibu nyiele balua, hnyi anyibun ta je dö hnyi je hnyababun.

15 Ke öbun e he ka aü hobi köbun, hwän bong nyi hwaban sabath, hwän hnyi bong öbun e hom hnyin thi hwitiny hajijing ; ame he ka bekhöt je sabath a seven : 16 öbun e he ka aü je bong a fife ke ne o but nyi hwaban sabath a seveniny ; ke öbun e he ka hudo hudiny han a teb ünyi kö Iehova. 17 Me öbun e he ka hom ünyi hnyi je hnyababun lo li aretoiny hajijing, ke lo li omer falawa : adre me he ka le ge falawa ae so adre levenä, wale je wan a bán kö Iehova. 18 Ke öbun e he ka tha hudo me areto je mamoe a seven ae ba hnyikongon a khaca hunainy, me khaca nak bolok, me lo li mamoe бага, wale hnän hudiny leü kö Iehova, tha e me hudiny han, me hudiny ic, hut a an ge meic, ae bo so kö Iehova. 19 Ke öbun e he ka hudo ke got бага hnän hudiny hulö, me lo li mamoe бага a khaca hunainy hnän je huding üsoköu. 20 Ke ame he at bihut ka tha hajijingä ta je ünyi e me li areto a bán hnän hudiny hajijing hnyi hnyimakö Iehova, me li mamoe : e kap ta je ünyi e kö Iehova ke hobi käu at bihut. 21 Ke öbun e he ka haimemenä hnyi bong eling anyibun ükhacaköu ae kap : e ba huliwa ae hmak öbun e he ka änyä : wale hnanyibu nyiele balua hnyi je hnyababun hia hnyi anyibun ta je dö.

22 Ke öbun ka he ka meno je ibun, me u me ca he ka meno wia hnyi hounyin em, ke u me ca he ka hlo kolon hnäm hna meno : ke u me he ka hna but e hobi käu at ae ba ta ünyi me atkanyua : Inya Iehova Khongubun.

23 Ke Iehova ame ha kö Mose, ka habe, 24 Ha thö ka lakon Isaraela me ha, ka habe, Hnyi tehi a seveniny, hnyi bong a bániny tehi, ame he ka hu hna menä hobi köbun, hnän oünykúmeä hnen tuö trutru, ükhacaköu ae kap. 25 E ba huliwa ae hmak öbun e he ka änyä : ke öbun e he ka hudo hut a an ge meic kö Iehova.

26 Ke Iehova ame ha kö Mose, ka habe, 27 Haba hnyi bong a libenyitainy tehi eling a seveniny, ame he ka bong hnän bi hwaban möt : ke öbun e he ka hu ükhacaköu ae kap, k' öbun e he ka hom ühnyükongoä je hnyekubun ; me hudo hut a an ge meic kö Iehova. 28 Ke ca he öbun ka

ányá ke huliwa hnyi bong eling; anyin a wale bong hnân bi hwaban môt, m' adre me he ka bi hwaban anyibun môt hnyi hnyimakö Iehova Khongubun. 29 Ke haba at ame ca vec hnyekon hnyi bong eling, me adre me he ka subâ degecâ e únyi hnyi iny hnye. 30 Ke haba at ame bi huliwa hnyi bong eling, me oge me he ka obia hnyi iny hnye. 31 E ba ke huliwa öbun e he ka ányá: wale hnanyibu nyiele balua hnyi anyibun ta je dö hnyi je hnyababun. 32 Haba bong e me sabath hnân menâ köbun, k' öbun e he ka hom úhnyú-kongóá je hnyekubun: hnyi bong e naininy tehi, hnyi sahac, hwân hnyi ke sahac ke ne o but hnyi ke sahac öbun e he ka okabâ anyibun sabath.

33 Haba Iehova ame ha kö Mose, ka habe, 34 Ha thö ka lakon Isaraela, ka habe, hnyi bong a fiftininy tehi eling a seveniny ame he ka bong hnân bi jeúiny je uma hunuma kö Iehova hnyi je bong a seven. 35 Haba hnyi bong a bán ame he ka hu úkhacaköu ae kap: e ba huliwa ae hmak öbun e he ka ányá. 36 Hnyi je bong a seven öbun e he ka hudo je hut a an ge meic kö Iehova: ke hnyi bong a eitiny öbun e he ka hu úkhacaköu ae kap: ke öbun e he ka hudo hut a an ge meic kö Iehova: wale úkhacaköu ae únyi hnathu; e ba huliwa ae hmak öbun e he ka ánya.

37 Wale je úen anyi Iehova m' öbun e he ka haimemenâ a je úkhacaköu ae kap, he ka hudo hut a an ge meic kö Iehova, hudiny leú, me hudiny han, me hut, me huding ic, a je únyi hnyi je ve bong: 38 ke ca ha bi je sabath anyi Iehova, me anyibun je bwihlany, me anyibun je khöbi hia, me anyibun je hut betenge hia, wale öbun e he ka ham kö Iehova.

39 Ke hnyi bong a fiftininy tehi, öbun ka hia but ip je jeúiny hnye, me öbun e he ka bi jeú kö Iehova hnyi je bong a seven: hnyi bong a bán ame he ka hu hna menâ ae únyi hnathu, me hnyi bong a eitiny ame he ka hu hna menâ ae únyi hnathu. 40 Ke öbun e he ka hom hnyi bong a bán je wan úö ae so, me je lan pama, me je vheiny úö ae gan, me je are-beiny wagewe; ke öbun e he ka senyin hnyi hnyimakö Iehova Khongubun hnyi seven ta bong. 41 Ke öbun e he ka tuö e hnân bi jeú kö Iehova hnyi je bong a seven hnyi huna: wale hnanyibu nyiele balua hnyi anyibun ta je dö: öbun e he ka tuö e hnyi tehi a seveniny. 42 Öbun e he ka laba

hnyi je uma hunuma hnyi seven ta bong: ame he tavat a hing at Isaraela hia ka laba hnyi je uma hunuma: 43 me me khana hnen anyibun je dö a oge kunâ lakon Isaraela he ka laba hnyi je uma hunuma, hnyi úen oge me hum ödra únyi hnyi hnye Aigupito: Inya Iehova Khongubun. 44 Ke haba Mose ame omaneuâ ka lakon Isaraela je úen a thu hnö Iehova.

HNYIMAKAN 24.

KE Iehova ame ha kö Mose, ka habe, 2 Kunâ thö lakon Isaraela he ka hom köu wakaco elaiö ae alai adre kokot hnân umumelam, me me môt bala je lamepa. 3 Hamö Arona he ka tuö e bala hwân sabac ke ne o but hnyomakatu, baten singiny únyi hnân obnatho, hnyi uma hnân úkhacaköu hnyi hnyimakö Iehova: wale hnanyibu nyiele balua hnyi anyibun ta je dö. 4 E ame he bala ka tuö je lamepa hon taben lamepa gol ae so hnyi hnyimakö Iehova.

5 Ke u me he ka hok falawa ae so me le je areto a twelv: ame he ka úsa lo omer areto a khaca. 6 Ke u me he ka ip gaga je únyi e hon laulau gol ae so hnyi hnyimakö Iehova hnyi lo li gaö, usa siks hnyi li gaö. 7 Ke u me he ka ip hon li gaö libanu ae so, me me e bi hon je areto hnân oúnykúmeá, hnân hut a an ge meic kö Iehova. 8 E ame he ka ip gaga bala únyi e hnyi je sabath hnyi hnyimakö Iehova; haba e me únyi ge lakon Isaraela, a úhihi-nyköu nyiele balua. 9 Haba e me ö Arona me lakon; ke ödrin e he ka han e hnyi dok ae kap: anyin a ti kap e hobi káu, únyi hnyi je hut a an ge meic kö Iehova hoton hnanyibu nyiele balua.

10 Haba ke бага nokon momo Isaraela. ke at Aigupito kamen, ame he hnyi wanben lakon Isaraela: k' ame iwatretra hnyi je hnyaba nokon momo Isaraela, me ke at Isaraela; 11 ke haba nokon momo Isaraela ame haikongoá ien Khong, me úhangö: me adre me hom e kö Mose. Haba ien hinyen, me, Selomith, nöku Deberi, únyi hnyi tribu Dana. 12 Ke adre me ca at eling, me me he ka manen ködra we Iehova.

13 Ke Iehova ame ha kö Mose, ka habe, 14 Hom but at waleji a úhangö hoton hnyaba ai; ke hamödrin hnyat ödrin e löng he ka ip je hnyamödrin hon ban, k'

ame he úkhaçaköu hia ka lúá e ge veto. 15 Ke u me he ka ha ka lakon Isaraela, me ha, ka habe, haba at ame hangá Khongon, me ame he ka takóu e ge anyin huló. 16 Ke haba at ame hakongoá ió Iehova, me adre me he ka hlingá; k' ame he úkhaçaköu hia ka lúá e ge veto; ame ne atkanyua, ame ne aten hnyei, e ka haikongóá ió Iehova, me adre me he ka hlingá. 17 Ke haba at ame kot ke at me me mok, me adre me he ka hlingá e; 18 ke haba at ame kot meno me me mok, me e ame he ka bi hnen: ke möt hwaban ke möt. 19 Ke ame ne he ke at ka okongoá anyin ke at, me adre me he ka ányá káu helá me hnen hna ányá; 20 aat hwaban aat, ecmak hwaban ecmak, nyu hwaban nyu; adre me he ka ányá ka at helá me hnen hna okongoá anyin ke at. 21 Ke haba at ame hlingá meno, me e ame he ka bi hwaban e: ke haba at ame hlingá at, me adre me he ka blingá e bi. 22 Ame he ka hu khaca thibi hnanyibu hobi káu atkanyua me aten hnyei: anyin a inya Iehova Khongubun. 23 Ke haba Mose ame ha ka lakon Isaraela, m' adre me he ka hom hoton hnyaba ai at úhangó me lúá e ge veto. Ke haba lakon Isaraela adre me ányá hoton hna huna hnó Iehova kö Mose.

HNHYIMAKAN 25.

KE Iehova ame ha kö Mose hon bucen Sinai, ka habe, 2 Ha thó ka lakon Isaraela, me ha ködra, ka habe, Öbun ka o ka hnyi hnyei oge me he ka ham köbun, me ame he káná ka tuó sabbath kö Iehova. 3 Siks ta buna u ma he ka belöká em hnyei, ke siks ta huna u me he ka ányáwia halem je vine, me ip je wan: 4 ke hnyi huna a seveniny ame he ka sabbath ae únyi hnathu hnán mená, hobi káu káná, a sabbath kö Iehova: me u me ca he ka belöká em hnyei, me ányáwia halem je vine. 5 Haba únyi ame kü hwege hnyi úen menu a u, me u me ca he ka meno, me ca ip wan halem je vine adre ca ányáwia: waleling me me hunainy mená ae únyi hnathu hobi káu káná. 6 Ke haba jeúiny sabbathiny káná, ame he ka hnán ö 'bun; hnán hobi köu, me athnyabaem бага, me momo, me athnyabaem adre hawá, me atkanyua at ame tha laba möu; 7 me hobi káu halem je bolok, me je menoiny em hnyei, ame he ka hnán han je jeúiny hia.

8 Ke u me he ka áu hobi köu seven ta

sabbath a je huna; wale seven je seven je huna, ke haba kahmen seven je sabbath a je huna, me, fáte nain je huna. 9 Ke u me he ka túó trutru ae gan hwan hnyi bong a libenyitainy tehi a seveniny: öbun e he ka túó trutru hnyi ibun hnyei hnyi bong hnán bi hwaban möt. 10 Ke öbun e he ka okabá huna a fifteiny, me haimemená he ka thang aten hnyei a tavat adre me labá e: ame he ka jubeli hobi köbun; ke öbun e he ka ve hmetu ka hnyi je ibun, me ve hmetu ka anyibun je lap. 11 Ame he ka jubeli hobi köbun huna eling a fifteiny: öbun e ca he ka belök, me meno únyi ame kü hwege hnyin, me ip wan halem je vine adre ca ányáwia. 12 Anyin a wale jubeli; ame he ka kap köbun: öbun e he ka han jeúiny unyi hnyi hnyei. 13 Hnyi huna jubeli eling öbun e he ka ve hmetu ka hnyi je ibun. 14 Ke u je ne úúçüköu me at ame laba hakekenyi u, me ca he öbun ka úkongunyköu: 15 u me he ka úco me at ame laba hakekenyi u hoton numerainy je huna hwaban jubeli, ke e ame he ka úco möu hoton numerainy je hunainy belök. 16 U me he ka osehia hwaban hoton úsehiany je huna, ke u me he ka óhnyúkongo hwaban hoton úwakhaletiny je huna; anyin a e ame he ka úco möu hoton numerainy je úen wa. 17 Ca he öbun ka úkongunyköu; ke so bi u me he ka outen Khongom: anyin a inya Iehova Khongubun. 18 Anyin a wale hamöbun he ka ányá anyik je hnan-nyibu, me tuó hnök je hna owisa me ányá: m' öbun e he ka laba hnahic hnyi hnyei. 19 Ke ame he káná ka ham jeúiny, ke öbun e he ka han me sekon, me laba hnahic hnyin. 20 Ke öbun e ne he ka ha, ka habe; Ötin e he ka han ieú hnyi huna a seveniny? wá bi ötin e ca he ka belök, me ip jeú: 21 hawe, oge me he ka huna anyik hnahic köbun hnyi huna a seveniny, ke e ame he ka okúá jeú hobi káu je huna a kun. 22 Ke öbun e he ka belök hnyi huna a eitiny, me han jeú ehac; ke ne o but huna a naininy, ke ne o but ame o thó jeúiny, öbun e he ha han jeú únyi ehac. 23 Ke adre me ca he ka úco degeçá káná me me hia balua; anyin a ik káná: anyin a öbun je atkanyua, me tavat adre me laba ka bi athnyisi unyik. 24 Ke hnyi hnyei hia öbun e labá me öbun e he ka hna káná, m' adre me he ka úco hmeto.

25 A ne ba but ta únyi anyin liamekeiny möu, me ame úco ke keihen iny, me hamen ke hing liamekeiny më he ka o but me úco

hmetu únyi a úco hnen liamekeiny mē. 26 Ke amē ne ba at he ka úco hmetu, ke e ame hwán ka tren ta únyi hmetu me khana he ka úco hmetu; 27 awe, e ame he ka aú je hunainy hna úco e, me ham kolon ka at e ame úco mē; ke e ame he ka he hmetu ka hnyi gan. 28 Ke ame ne ca khana he ka hom hmetu e hobi káu e bi, awe, ame he ka hnen bi ju únyi adre úco unyin at ame úco ke ne o but hnyi huna jubeli: ke adre me he ka hna e hnyi jubeli, ke e ame he ka hmetu ka hnyi gan.

29 Ke ame ne he ke at ka úco uma hnyi taun adre op haginny, me e khana he ka úco hmetu e hnyi obiny huna e ame úco hnyin: wale úen ae úcú he ka úco hmetu hnyin. 30 Ke adre me ne ca úco hmetu e, e ka tiga ca bekhöt huna, awe, adre me he ka ohmá balua bi uma eling, hnyi taun adre op haginny, ka at ame úco e, hnyi anyin je dö: adre me ca he ka hna e hnyi jubeli. 31 Ke haba je uma hnyi je hnyaba, adre ca op haginny igigilö, me adre me he ka únykúme helá me je utkáná hnyi ta hnyei: e khan' ödra he ka úco hmetu, k' adre me he ka hna hmetu hnyi jubeli. 32 Ke so bi haba je taun anyin at Levi, wale je uma hnyi anyidrin je taun, me e khana at Levi ka úco hmetu hnyi je úen bala. 33 Ke e ka he ke at Levi ka úco hmetu, me adre me he ka hna uma adre úco me hnyabainy hnyi jubeli: anyin a haba je uma hnyi je hnyaban at Levi, me wale je idrin unyin lakon Isaraela. 34 Ke adre me ca he ka úco je utkáná igigilö je hnyabadrin; anyin a idrin eling nyiele balua.

35 Ke ame ne ba ta únyi anyin liamekeiny möu, ke mat bi hnyamen unyám; hámám he ka hom hadruá: k' ame he ka tha laba möu helá me atkanyua me aten ke hnyei bi. 36 U me ca he ka kap hwaban me troban únyi gan; ke u ma outen Khongom; me me tha laba möu liamekeiny möu. 37 U me ca he ka ham káu ányám mone ge hwaban, me ham káu ám ge troban. 38 Inya Iehova Khongubun, at ame hum öbun únyi hnyi hnyei Aigupito, me me ham köbun hnyei Kanana, me me Khongubun.

39 Ke ame ne ba ta únyi anyin liamekeiny möu unyám, me úco e bi köu; me u ma ca he ka kuná ka bi athnyaba köu helá me at adre úco: 40 ke e ame he ka tha e möu helá me athnyaba adre hawá, me at

ame bi athnyisi; ke e ame he ka bi athnyabaem ke ne o but hnyi huna jubeli: 41 me e ame he ka hmetu but úheny unyám, e me lakon, me me hmetu ka anyin lap, me hmetu ka hnyi hnyaban lakamen. 42 Anyin a lathnyabaik ödrin, waleji oge hum ödrin únyi hnyi hnyei Aigupito: adre me ca he ka úcú ödrin helá me hna úco athnyaba. 43 U me ca he ka musi ödrin hwege; ke u me he ka outen Khongom. 44 U ma he ka hom lathnyabaem obaga me omomo únyi ge aten ke je hnyei igigili öbun, öbun e he ka úcú ödrin me me lathnyaba obaga me omomo. 45 Ke habe khaca, öbun e he ka úco únyi ge lakon je atkanyua adre me tha laba möbun, me anyidrin je lap unyibun, waleji adre hia but hnokoá hnyi ibun hnyei: k' ödrin e he ka anyibun. 46 Ke öbun e he ka hn' ödrin hna hwajekhon lakubun hwaböbun, me me anyidra: öbun e he ka hom je lathnyaba únyi gadra nyiele balua; ke haba je liamekeiny möbun a lakon Isaraela, ca he ka musö hwegiá ke at hnen ke at.

47 Ke ame ne tren omjeú aten ke hnyei bi, ame ne at bi athnyisi unyám, ke ba ta únyi anyin liamekeiny möu unyin, k' ame úco e bi ka aten ke hnyei, ame ne at bi athnyisi unyám, ame ne hanen ke lap anyin aten ke hnyei bi: 48 awe, e khan' ödra he ka úco hmetu at eling hwaban hna úco; e khana ke liamekeiny mē he ka úco hmetu e: 49 e khana he ka úco e hmetu hnen ke kamen, ame ne nokon ke kamen, ame ne ke at bi a hanen anyin lap: ke ame ne tren hmetu ta únyi me e khana he ka úco e bi hmetu. 50 Ke e ame he ka aú ka at ame úco e, hwán hnyi huna hna úco e hnyin ke ne o but hnyi huna jubeli: ke haba mone a hwaban me ame he ka úcú me numerainy je huna; e ame he ka tha laba me helá me úen athnyaba adre hawá. 51 Ame ne tiga se hia je huna, me e ame he ka ham hmetu hwaban hnân úco e hmetu, hoton je huna, únyi hnyi mone adre bi hwaban káu. 52 Ke ame ne wakhalet bi ju je huna ke ne o but huna jubeli, me e ame he ka aú wia mē, me e ame he ka ham hmetu hwaban hna úco e, hoton je huna. 53 E ame he ka tha e me helá me athnyaba adre hawá hnyi ke huna me ke huna: e ame ca he ka musö hwegiá e hnyi hnyimákám. 54 Ke adre me ne ca úco e hmetu hnyi je deny eling, me e ame he ka he but hnyi huna jubeli, e me lakon. 55 Anyin a je lathnyabaik lakon Isaraela; lathnya-

baik ödra, waleji oge hom únyi hnyi hnyeí Aigupito : Inya Iehova Khongubun.

HNYIMAKAN 26.

CA he öbun ka bi idola, ke ca he ka otílá hobi köbun ke hnatheat, ame ne veto ame tot, k' öbun e ca he ka ip hnyiibun hnyeí ke veto adre kave he ka nom káu ; anyin a inya Iehova Khongubun. 2 Öbun e he ka tuó anyik je sabbath me okabá dok a kapik : Inya Iehova.

3 Öbun ka he ka vheno hnök je hna otílá, me tuó anyik je hnanyibu, me ányá ; 4 awe, oge me he bi nya ka ham köbun we hnyi úen e, k' ame he káná ka okúá jeúiny, ke ame he je úóiny ka wa. 5 Öbun e he ka uja hwit ke ne o but úen he ka ip je wan vine, me ip wan anyibun vine ke ne o but úen cekön : ke öbun e he ka han sekon me laba hnahic hnyiibun hnyeí. 6 Ke oge me he ka ham úsoköu köbun hnyi hnyeí, ke öbun e he ka mokut, ke ba at ame he ka oti öbun : ke oge me he ka ohia je menoiny hnyot ae kong hnyi hnyeí, k' ame ca he hele vat ka vhenoibun hnyeí. 7 Ke öbun e he ka hnu je iwahnaihmióny möbun, k' adre me he ka ta hnyi hnyimaköbun ge hele vat. 8 K' ame he thabúng gabun ka hnu khaca haded, k' ame he haded gabun ka hnu ten thauzan : k' ame he ka ta hnyi hnyimaköbun ta je iwahnaihmióny möbun ge hele vat. 9 Ke oge me he ka ogán' öbun me osiá me osehi' öbun ; me ohmä anyik úhinhinköu möbun. 10 Ke öbun e he ka han únyi ehac, me hom únyi ehac me me bi hnen únyi ae teb únyi. 11 Ke oge me he ka ip umök uma mano hnyi wanböbun, ke oge me ca he ka húkoti öbun. 12 Ke oge me he ka ngenuhnyi wanböbun, ke oge me he ka Khongubun, ke öbun e he ka lakeik. 13 Inya Iehova Khongubun, at ame hum öbun únyi hnyi hnyeí Aigupito, möbun e ca he ka bi athnyaba ködra ; ke oge thu hnödra hna húköl' öbun, me wi' öbun he ka tot wia.

14 Ke öbun e ne ca he ka ling nya, me ányá je hnanyibu hia eling ; 15 ke öbun e ne he ka degec hnök je hna húna, me húkotiá hnök je hua owisa, me me ca ányá hia anyik je hnanyibu, me hanyáúá anyik úhinhinköu möbun ; 16 me oge me he bi nya ka ányá köbun eang ; oge me he ka kuná köbun ot, me delá, me kahwa unyin,

me me dit je emaköbun, me aú but unyibun ; k' ame he ka únyi baú hnöbun hna cekön, anyin ame he ka han e hnen je iwahnaihmióny möbun. 17 Ke oge me he ka wá hm' öbun, k' adre me he ka hling' öbun hnyi hnyimakan je iwahnaihmióny möbun : k' ame he ka musí öbun tavat adre me húkoti öbun ; k' öbun e he ka kecke ba at ame hnu öbun. 18 Ke öbun e ne ca he bala ka ling nya can ta je únyi eling, me oge me he bi nya ka oseven kuc öbun can anyibun je hulö. 19 Ke oge me he ka thu biganiny manibun man, ke oge me he ka wia anyibun drany me me helá me fao, me könöbun káná me me helá me bras : 20 ke ame he ka ba troban hwegiöbun ; anyin ame ca he káná ka okúá jeúiny, k' ame ca he ka wa ta je úóiny hnyeí. 21 Ke öbun e ne he ka hna degeci nya, me höcö ling nya ; me oge me he ka oseven oá köbun je mok hoton anyibun je hulö. 22 Ke oge me he ka kuná köbun je menoiny hnyot he ka hügúná lakubun, me ohia halebun je meno, me owakhaleti öbun ; k' ame he ka ba at eú hnyi debun je gethen. 23 Ke öbun e ne ca wisa könya ge ta je únyi eling, k' öbun e he ka digic nya bi ; 24 me oge me he bi nya ka digic öbun ; ke oge me he ka oseven kuc öbun can anyibun je hulö. 25 Ke oge me he ka oá hele vat köbun at ame bi hwaban hna okongoá úhinhinköu : ke öbun e ne he ka úkhacaköu hnyi anyibun je taun me oge me he ka kuná mok ae cap hnyi wanböbun ; k' adre me he ka hn' öbun ka hnyi hnyamen ta je iwahnaihmióny. 26 Hnyi úen oge me thu uciny anyibun jeú, me ame he ten ta momo ka tha inyá ö 'bun hnyi wahna-inyá a khaca, k' ödrin e he ka ham hmetu ö bun hoton tulut : k' öbun e he ka han ke ca sekon bi.

27 Ke öbun e ne ca ling nya can ta je únyi hia eling, k' öbun e he ka hua degeci nya ; 28 me oge me he bi nya ka hna degeci öbun hnyi hmönyin : ke oge me he minya ka oseven kuc öbun can anyibun je hulö. 29 Ke öbun e he ka han lakubun je da, k' öbun e he ka han lakubun je waindusem. 30 Ke oge me he ka ohia anyibun je dok ae görany, me subá degecá hnöbun hna theati seúnö, me kbúá degecá je unyibun a mokcu ka hnyi hon anyibun je idola ae mok ; ke oge me he ka húkoti öbun. 31 Ke oge me he ka obu aten anyibun je taun, me ohia je dok a kabibun, ke oge me ca he ka hnulá bunen anyibun je únyi ae

bo so. 32 Ke oge me he ka oba aten ibun hnyeï : k' ame he je iwahnaihmïöny möbun tavat adre me laba hnyin he ka uthmâhmâ gan. 33 Ke oge me he ka ovesei öbun ka hnyi ta je hnyeï, me oc hele vat he ka hnu öbun : ke ame he ka ba kolon ibun hnyeï, k' ame he ka hnyot je hnyababun. 34 Haba hnyi üen eling ame he kânâ ka senyinâ je sabathiny hnyi je üen itremacat hia, ke öbun dut hnyi hnyeï iny je iwahnaihmïöny möbun ; wale ame he kânâ ka menâ me senyinâ je sabathiny. 35 Hnyi üen itremacat e hia, e ame he ka menâ ; anyin a e ame ca menâ hnyi anyibun je sabath, wal' öbun e labâ. 36 Ke haba je kolon gabun, me oge me he ka okûâ ot eü hnyi je hnyekudrin hnyi je hnyeï iny je iwahnaihmïöny mödrin : k' ame he hwan lan üö ka hnu ödrin ; k' ödrin e he ka kec helâ me at ame kec ge hele vat ; k' ödrin e he ka ta ke ba at ame hnu. 37 Ke ame he ke at ka ta hon ke at helâ me tavat kec ge hele vat, ke ba at ame hnu : ke ame he ka ba manibun man he ka tot hnyi hnyimakan je iwahnaihmïöny möbun. 38 Ke ame he ka hi' öbun unyin aten ke je hnyeï, k' ame he hnyeï iny je iwahnaihmïöny möbun ka ön öbun. 39 Ke ame he je kolon gabun ka aü hnyi anyidrin hulö hnyi je hnyeï iny je iwahnaihmïöny möbun, k' ödrin e he minya ka aü hnen je hulö anyin lakamödrin a tha e mödrin. 40 Ke ödrin e he ka ha manenâ hwakecidrin ae kong anyin je lakamödrin hnyi anyidrin monu adre monu könnya, ke can minya ödrin e hna degeci nya, 41 me inya oge me digic ödrin, me hum ödrin ka hnyi hnyeï iny je iwahnaihmïöny mödrin : ke ame ne he ka he je hnyekudrin adre ca peritomona ka hnyikânâ, k' ödrin e kap hwaban hwakecidrin ae kong ; 42 awe, oge me he ka únykúme hnök hna úhibinyköu me Jakob ; me hnök hna úhibinyköu me Isaaka ; ke oge me he ka únykúme hnök hna úhibinyköu me Aberahama ; ke oge me he ka únykúme ka hnyeï. 43 Ke ödrin e he ka he but me hnen bi ju hnyeï, k' ame he ka senyinâ je sabathiny, k' ame itremacat ke tiga hi' ödrin ke ödrin e he ka kap hwaban hwakecidrin ae kong : can, anyin a ödrin e degec hnök je hna owisa, me hûkötia anyik je hnanyibu. 44 Ke so bi eja ke ne a ne helâe, ke ka ödrin bi hnyi hnyeï iny je iwahnaihmïöny mödrin, me oge me ca he ka digic ödrin me hûkötî ödrin, me ti ohî' ödrin, me thu hnök hna úhibinyköu mödrin :

anyin a inya Iehova Khongudrin : 45 ke oge me he ka únykúme ködrin, cadrin bi, waleji hnök hna úhibinyköu me lakamödrin, tavat oge me hom únyi hnyi hnyeï Aigupito hnyi hnyimakan aten ke je hnyeï, m' inye he ka Khongudrin : Inya Iehova.

46 Wale je hna otîlâ, me je hna owisa, me je hnanyibu hnö Iehova hna ham hobi kâu lakon Isaraela hon bucen Sinai a deny Mose.

HNYIMAKAN 27.

KE haba Iehova ame ha kö Mose, ka me ha ködra, ka habe, E ka he ke at ka bi khöbi ae únyi hnathu, ame he ka hobi kö Iehova je hnyat hoton únyi ae úcú köu. 3 Ke haba hnâm hna tuluto kâu, wale hobi kâu бага hwân hnyi twente ta je hunainy ke ne o but hnyi sikste, me fite sekel sileva hoton sekeliny dok ae kap, wale únyi ae úcú köu. 4 Ke ame ne momo, me thöte je sekel únyi ae úcú köu. 5 Ke ame ne hwân hnyi thabúng hunainy ke ne o but hnyi twente hunainy, me twente sekel sileva hobi kâu бага, ke ten sekel hobi kâu momo, wale ae úcú köu. 6 Ke ame ne hwân hnyi khaca tehi ke ne o but thabúng ta hunainy, me thabúng ta sekel sileva hobi kâu бага, ke kun ta sekel sileva hobi kâu hlu, wale ae úcú köu. 7 Ke ame ne hwnâ hnyi sikste je hunainy, me gan hon e, ame ne бага, me fittin je sekel, ke ame ne momo, me ten je sekel, wale ae úcú köu. 8 Ke ame ne ba anyin únyi ae úcú köu, me adre me he ka hom e ka hnyi hnyimakan at bihut, ke ame he at bihut ka ha únyi ae úcú kâu, k' ame he at bihut he ka tuluto e hoton hna khana hnen at bi khöbi.

9 Ke ame ne meno adre me hudo kö Iehova, me e kap únyi eling hia adre ham kö Iehova. 10 Ke e ame ca he ka wia e, me bi hnen, wale únyi ae so hnen únyi ae kong, ame ne únyi ae kong hnen únyi ae so : ke so bi adre me ne bi hnen e, ke meno hnen ke meno, awe, ödru me he ka tha kap. 11 Ke ame ne ke meno ae bo kong, ke ca hnân hudo kö Iehova, me e ame he ka ip meno hnyi hnyimakan at bihut : 12 ke hamen at bihut he ka ha únyi ae úcú, ame ne so ame ne kong : helâ möu a at bihut ame tuluto, me ame he ka helâe. 13 Ke ame ne he ka úco hmetu e, me hamen he ka bi hanen ke keihen a thabúnginy ka hnyi únyi ae úcú köu.

NUMERA 1.

14 Ke ame ne he ke at ka okabá umen uma, me me kap kö Iehova, me hamen at bihut he ka ha únyi ae úcú, ame ne so, ame ne kong: haba hna ha hnen at bihut únyi ae úcú káu, me ame he ka heláe. 15 Ke ame ne he at a okabá uma ka úco hmetu e, me hamen he ka bi hanen ke keihen a thabúngin ta mone ae úcú kôu ka hnyin me me anyin dut.

16 Ke ame ne he ke at ka okabá kö Iehova ke keihen iny hnyei, me u me he ka tuluto e hoton hatungen: haba hwaban khaca homer bali adre ta, me fite je sekel sileva. 17 Ke ame ne he ka okabá iny hnyei hwán hnyi huna jubeli, me ame he ka helá me hnám hna tuluto. 18 Ke ame ne he ka okabá iny hnyei hwaban jubeli, me hamen at bihut he ka aú káu je mone hoton je kolon je huna ke ne o but ka hnyi huna jubeli, ke u me he ka homi úhnyú-kongoá hnám hna tuluto. 19 Ke ame ne he at ame okabá iny hnyei ka úco hmetu e, me hamen he ka bi hanen ke keihen a thabúnginy ka hnyin a mone ae úcú kôu, me me anyin dut. 20 Ke ame ne ca he ka úco hmetu hnyei, ke ame ne hia but úco ka ke at, me adre me ca he ka úco hmetu e: 21 ke ödra ka hna hnyei hnyi jubeli, me ame he ka kap kö Iehova, helá me hnyei adre nyibo; k' ame he ka iny at bihut. 22 Ke ame ne he ke at ka okabá kö Iehova ke hnyei e ame úco, ke ca hanen iny hnyei; 23 me hamen at bihut he ka aú káu hwaban ae úcú kôu ke ne o but ka hnyi huna jubeli: ke hnyi bong eling e ame he ka ham únyi ae úcú kôu, a wale únyi ae kap kö Iehova. 24 Haba hnyi huna jubeli ame he ka iny hmetu hnyei wale iny at adre úco gan, at a ka gan ehac.

25 Ke haba hnám je hna ha hwaban hia, me, ame he ka hnu hoton sekeliny dok ae kap: haba sekel, me twente je gera.

26 Ke haba lakon omeno a bán, wale nokon a bán adre ip hobi kö Iehova, me ca he ke at ka okabá; ame ne bolok, ame ne mamoe, anyi Iehova bi e. 27 Ke ame ne meno ae bo kong, me e ame he ka bi hnen únyi ae úcú kôu, me bi hanen ke keihen a thabúnginy ka hnyin: ke adre me ne ca úco hmetu, me adre me he ka úco e hoton únyi ae úcú kôu.

28 Ke so bi, haba únyi adre nyibo, a nyibo hnen ke at kö Iehova únyi hnyi anyin ta je únyi, ame ne at, ame ne meno, ame ne hnyei, me adre me ca he ka úco hmetu me bi hnen: e ti kap kö Iehova je únyi hia adre nyibo. 29 E ba únyi adre nyibo, a labö nyibo hnen at, adre me he ka úco hmetu; k' adre me he ka hlingá e.

30 Ke haba ke keihen a libenyitainy troban káná, ame ne hatonginy, ame ne wan úö, me, anyi Iehova e: e kap e kö Iehova. 31 Ke ame ne he ke at ka úco hmetu únyi hnyi ke keihen a libenyitainy, me hamen he ka bi hanen ke keihen a libenyitainy ka hnyin. 32 Ke haba ke keihen a libenyitainy omeno, ame ne bolok, ame ne mamoe, a ta je únyi hia adre me dit hmelen uci, me e kap kö Iehova ke keihen a libenyitainy. 33 E ame ca he ka elám, ame ne so, ame ne kong, k' ame ca he ka bi hnen e: ke so bi, ame ne he ka bi hnen e, awe, ame he ka tha kap únyi e me únyi a bi hnen e; k' adre me ca he ka úco hmetu.

34 Wale ta je hnanyibu a húna Iehova kö Mose hobi káu lakon Isaraela hnyi bucen Sinai.

NUMERA

TUSI A VAKINY ANYI MOSE.

HNYIMAKAN 1.

HABA Iehova ame ha kö Mose hnyi hnyebuba Sinai, hnyi uma úkhacaköu, hnyi bong a bániny tehi a loiny, hnyi huna a loiny hwaban hnödra hna he but úhedra hnyi hnyei Aigupito, ka habe, 2 Öbun e he ka aú úseiny úkhacaköu anyin

lakon Isaraela hia, hoton anyidra je lap, a je hnyaban lakamödra, tha e me numerainy je ien, k' adre me he ka ve aú obaga hia; 3 hwán ge tavat a twente hunaidra, me gan hon e, a at Isaraela hia, a tavat ae khan' ödra he ka hnyi vat, u me he me Arona ka öü ödra hoton anyidra je utbavat. 4 Ke ame he ka tha e möbu ke je hnyat, a

úsa khaca únyi hnyi je tribu ; a je taben je lap anyin je lakamödrin. 5 Ke walang ien je hnyat ödrin e he ka tha e möbu : Únyi ga Reubena ; Elizura, nöku Sedeura. 6 Únyi ga Simeona ; Selumiela nöku, Zuri-sadai. 7 Únyi ga Juda ; Nasona, nöku Aminadaba. 8 Únyi ga Isakara ; Nathaniela, nöku Zuara. 9 Únyi ga Zebulona ; Eliaba, nöku Helona. 10 Únyi ge laku Josefa ; a únyi ga Eferaima ; Elisama nöku Amihuda : únyi ga Manase ; Gamaliela, nöku Pedazura. 11 Únyi ga Beniamina ; Abidana, nöku Gideona. 12 Únyi ga Dana ; Ahiezera nöku Amisadai. 13 Únyi ga Asera, Pagiela, nöku Okerana. 14 Únyi ga Gada ; Eliasafa, nöku Deuela. 15 Únyi ga Nafatali ; Ahira, nöku Enan. 16 Wale hnyat adre hawá ge úkhacaköu, a je tuhan je tribuiny lakamödrin ; ödrin je homakan je thauzaniny at Isaraela. 17 Ke haba Mose me Arona ödrü me hom hnyat eling adre ha iödrin : 18 ke ödrin e ukhacaköuá tavat hia hnyi bong a bäniny tehi a loiny, me ödrin e ve omanená anyidrin je dö, hoton anyidrin je lap, a je hnyaban lakamödrin, wale numerainy je ien, a je ve at, hwán ge tavat a twente huna, me gan hon e. 19 Ke e ame öü ödrin hnyi hnyeubaba Sinai, hoton hnö Iehova hna huna kö Mose.

20 Haba laku Reubena, nöku Isaraela a bán, wale anyidra je dö, hoton anyidra je lap, a je hnyaban lakamödra, wale numerainy je ien, ke at me ke at, a je бага hia hwán ge tavat a twente huna me gan hon e, tavat hia ae khan' ödra he ka hnyi vat ; 21 haba tavat adre aú únyi hnyi tribu Reubena, me, ödra fâte siks thauzan ke faiv haded.

22 Haba laku Simeona, wale anyidra je dö, hoton anyidra je lap, a je hnyaban lakamödra, haba tavat adre me aú hoton numerainy je ien, ke at me ke at, a je бага hia hwán ge tavat a twente huna me gan hon e, tavat ae khana he ka hnyi vat ; 23 haba tavat adre aú únyi hnyi tribu Simeona, me ödra fíte nain thauzan ke theri haded.

24 Haba laku Gada, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 25 haba tavat adre aú únyi hnyi tribu Gada, me ödra fâte faiv thauzan ke siks haded ke fíte.

26 Haba laku Juda, wale anyidra je dö, hoton anyidra je lap, a je hnyaban laka-

mödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 27 haba tavat adre me aú únyi hnyi tribu Juda, me ödra sevente foa thauzan ke siks haded.

28 Haba laku Isaraela, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 29 haba tavat adre aú únyi hnyi tribu Isaraela, me ödra fíte foa thauzan ke foa haded.

30 Haba laku Zebulona, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 31 haba tavat adre aú únyi hnyi tribu Zebulona, me ödra fíte seven thauzan ke foa haded.

32 Haba laku Josefa, a laku Eferaima, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 33 haba tavat adre aú únyi hnyi tribu Eferaima, me ödra fâte thauzan ke faiv haded.

34 Haba laku Manase, wale anyidra je dö, hoton anyidra je lap, a je hnyaban lakamödra, wale je numerainy je ien, hwán ge tavat a twente huna me gan hon e, tavat ae khana he ka hnyi vat ; 35 haba tavat adre aú únyi hnyi tribu Manase, me ödra thöte tu thauzan ke tu haded.

36 Haba laku Beniamina, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 37 haba tavat adre aú únyi hnyi tribu Beniamina, me ödra thöte faiv thauzan ke foa haded.

38 Haba laku Dana, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 39 haba tavat adre aú únyi hnyi tribu Dana, me ödra siks te tu thauzan ke seven haded.

40 Haba laku Asera, wale anyidra je dö, hoton anyidra je lap, a je hnyaban lakamödra, wale numerainy je ien, hwán ge tavat a twente huna me gan hon e, tavat ae khana he ka hnyi vat ; 41 haba tavat adre aú únyi hnyi tribu Asera, me ödra fâte wan thauzan ke faiv haded.

42 Haba laku Nafatali, wale anyidra

NUMERA 2.

je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 43 haba tavat adre aú únyi hnyi tribu Nafatali, me ödra fifte theri thauzan ke foa haded.

44 Wale tavat adre aú, waleji a aú hnö Mose me Arona, me je tuhan Isaraela, a ödrin twelw: a úsa khaca hobi káu je hnyaban lakamödrin. 45 Me haba numerainy hia lakon Isaraela adre aú, hoton je hnyaban je lakamödra, hwân ge tavat a twente huna me gan hon e, a tavat Isaraela hia ae khana he ka hnyi vat; 46 wale tavat hia adre aú, me ödra siks haded ke theri thauzan ke faiv haded ke fifte.

47 Ke adre ca tha áu mödra at Levi hoton je tribuiny lakamödra. 48 Anyin a Iehova ame ha kö Mose, ka habe, 49 U me ca he minya ka aú tribu Levi, ke u me ca he ka tha aú úseidra me lakon Isaraela: 50 ke u me he ka otílá at Levi hnyi uma manoiny ohnatho, me hon omjehen hia, me ta je únyi hia a hanen: hamödra he ka sukhöüná uma mano, me je omjehen hia; ke hamödra he ka bi athnyaba hnyin, me laba igigilö uma mano. 51 Ke ödra ka he ka hom uma mano, me hamen at Levi he ka ái e: ke ödra ka he ka otílá uma mano, me hamen at Levi he ka otílá e: ke adre me he ka hlingá atkanua at ame hakekenyá e. 52 Ke ame he je lakon Isaraela ka ve otílá umödra je uma hnyi je hnyabadra, me hnyi je hatödra, hoton anyidra je utbavat. 53 Ke ame he at Levi ka ve otílá umödra je uma mano igigilö uma manoiny ohnatho, me me ca ta hmönyin ka hnyi hon úkhacaköu anyin lakon Isaraela: ke hamen at Levi he ka tuö uma manoiny ohnatho. 54 Ke haba lakon Isaraela, me adre me ányá hia helâ me hna húna hnö Iehova kö Mose, adre me ányá helâe.

HNYIMAKAN 2.

KE Iehova ame ha kö Mose me Arona, ka habe, 2 Ame he lakon Isaraela ka ve hunuma hnyi je hatödra, hnyi je haten hnyi je hnyaban lakamödra: adre me he ka hunuma cicö uma úkhacaköu igigilö. 3 Ke haba hnyi ke keihen e deö ame o hnyin seúnö, adre me he ka hunuma hnyi haten hnyaban at Juda, hoton anyidra köiö: ke ame he Nasona nöku Aminadaba ka thaniny lakon Juda.

4 Ke haba köien a tavat gadra adre aú, me ödra sevente foa thauzan ke siks haded. 5 Ke haba tavat adre me he ka hunuma útangköu më, me tribu Isakara: haba Nathaniela nöku Zuara ame he ka thaniny lakon Isakara: 6 ke haba köien a tavat adre aú, me ödra fifte foa thauzan ke foa haded: 7 ke tribu Zebulona: haba Eliaba nöku Helona ame he ka thaniny laku Zebulona: 8 Ke haba köien a tavat adre aú, me ödra fifte seven thauzan ke foa haded. 9 Haba tavat hia adre aú únyi hnyi lap anyi Juda, me ödra wan haded ke eite siks thauzan ke foa haded, hoton köiödra. Hamen tavat eling he ka bán.

10 Ke haba haten lap anyi Reubena ame he ka e hnyi ke keihen ka hnyi hwaiöu, hoton anyidra köiö: haba Elizura nöku Sedeura ame he ka thaniny lakon Reubena. 11 Ke haba köien a tavat adre aú, me ödra fâte siks thauzan ke faiv haded. 12 Ke haba tavat adre me he ka hunuma útangköu më, me tribu Simeona: haba Selumiela nöku Zurisadai ame he ka thaniny lakon Simeona: 13 ke haba köien a tavat adre aú, me ödra fifte nain thauzan ke theri haded: 14 ke tribu Gada: haba Eliasafa nöku Reuela ame he ka thaniny lakon Gada: 15 ke haba köien, a tavat adre aú, me fâte faiv thauzan ke siks haded ke fifte. 16 Haba tavat hia adre aú únyi hnyi lap anyi Reubena, me ödra wan haded ke fifte wan thauzan ke foa haded ke fifte, hoton köiödra. Walödra he a loiny.

17 Ke hwaban e ame he ka he uma úkhacaköu me lap anyin at Levi hnyi wanben je hnyaban; adre me he ka hwân ka he hoton hnödra hna hunuma, a ke at me ke at hnyi hnen bi, hoton je hatödra.

18 Ke haba haten lap anyi Eferaima ame he ka e bi hnyi ke keihen e jio, hoton köiödra: haba Elisama nöku Amihuda ame he ka thaniny lakon Eferaima. 19 Ke haba köien a tavat adre aú, me ödra fâte thauzan ke faiv haded. 20 Ke ame he ka útangköu më tribu Manase: haba Gama-liela nöku Pedazura ame he ka thaniny lakon Manase: 21 ke haba köien a tavat adre aú, me ödra thöte tu thauzan ke tu haded: 22 ke tribu Beniamina: haba Abidana nöku Gideona ame he ka thaniny lakon Beniamina: 23 ke haba köien a tavat adre me aú, me ödra thöte faiv thauzan ke foa haded. 24 Haba tavat hia adre aú únyi hnyi tribu Eferaima, me

NUMERA 3.

ödra wan haded ke eit thauzan ke wan haded, hoton köiödra. Ke walödra he a kuniny.

25 Ke haba haten lap anyi Dana ame he ka e bi hnyi ke keihen ka hnyi hwadrö, hoton köiödra : haba Ahiezera nöku Amisadai ame he ka thaniny lakon Dana. 26 Ke haba köien, a tavat adre aú, me ödra sikste tu thauzan ke seven haded. 27 Ke ame he tribu Asera ka hunuma útangköu mē : haba Pagiela nöku Okerana ame he ka thaniny lakon Asera : 28 ke haba köien a tavat adre aú, me ödra fâte wan thauzan ke faiv haded : 29 ke tribu Nafatali : haba Ahira nöku Enan ame he ka thaniny lakon Nafatali : 30 ke haba köien, a tavat adre aú, me ödra fifte theri thauzan ke foa haded. 31 Haba tavat hia adre aú hnyi hnyi lap anyi Dana, me ödra wan haded ke fifte seven thauzan ke siks haded. Hamödra he ka he biliny hoton anyidra je haten.

32 Wale tavat adre aú únyi hnyi lakon Isaraela hoton je hnyaban lakamödra : haba tavat hia thithö adre aú únyi hnyi je lap hoton köiödra, me ödra siks baded ke theri thauzan ke faiv haded ke fifte. 33 Ke adre me ca tha aú bi tavat Levi unyin lakon Isaraela ; helä me hna hûna hnö Iehova kö Mose. 34 Ke haba lakon Isaraela adre me ányá hia hoton hna hûna hnö Iehova kö Mose, ke adre me hunuma heläe unyin anyidra ta je haten, me adre me he heläe ke at me ke at hoton anyidra ta je lap, ke hoton je hnyaban lakamödra.

HNYIMAKAN 3.

KE walang je dö anyi Arona me Mose hnyi bong ame fuc Iehova kö Mose hon bucen Sinai. 2 Ke walang ien je laku Arona ; Nadaba a atö, me Abiu, me Eleazara, me Ithamara. 3 Wale je ien laku Arona, a hnyat bihut adre hú, waleji e ame otílá hnân bi hut. 4 Ke ame mokcu Nadaba me Abiu hnyi hnyimakö Iehova, hnyi hnödrü hna hudo meic ae ke bongon hnyi hnyimakö Iehova, hnyi hnyebuba Sinai, ke ba nöku drü : ke Eleazara me Ithamara ödrü me labö bi hut hnyi hnyimakan kamödrü.

5 Ke haba Iehova ame ha kö Mose, ka habe, 6 Hom but jem tribu Levi, me ip ödrin hnyi hnyimakö Arona at bihut, m' ödrin e he ka huliwa káu. 7 Ke ödrin e he ka vheno hna hûna káu, me hna hûna ka

úkhaçaköu hia hnyi hnyimakan uma úkhaçaköu, he ka ányá huliwainy uma mano. 8 Ke ödrin e he ka tuö omjehen uma úkhaçaköu hia, me hûna ka lakon Isaraela he ka ányá huliwa hnyi uma mano. 9 Ke u me he ka ham at Levi kö Arona me lakon : adre ham mu' ödrin káu úhedrin unyin lakon Isaraela. 10 Ke u me he ka otílö Arona me lakon, ke ödrin e he ka labö tuö hanymen at bihut : ke adre me he ka hlingá atkanyua at ame hakekenyá.

11 Ke Iehova ame ha kö Mose, ka habe, 12 Me wá bi, haba inya oge hia but hom at Levi úhedra unyin lakon Isaraela hnân bi hnen je atö wale a bödra lakon Isaraela ka hnokoá : me hobi könya at Levi : 13 anyin a hobi könya lakon hia a bán ; ke oge me okabá könya je atö hia ge lakon Isaraela, at me meno, hnyi bong oge me kot hnyin je atö hia hnyi hnyeí Aigupito : hobi könya ödrin ; Inya Iehova.

14 Ke Iehova ame ha kö Mose hnyi hnyebuba Sinai, ka habe, 15 U me he ka aú je laku Levi hoton je hnyaban lakamödrin, me anyidrin je lap : u me he ka aú obaga hia, hwân ge tavat a khaca tebi me gan hon e. 16 Ke haba Mose ame öü ödrin helä me hna ha hnö Iehova, hoton hna hûna káu. 17 Ke walang ien laku Levi ; Geresoma, me Kohatha, me Merari. 18 Ke walang ien li laku Geresoma hoton anyidru li lap ; Libeni me Simeí. 19 Ke haba laku Kohatha hoton anyidrin je lap ; me Amerama, me Izara, me Heberona, me Uziela. 20 Ke li laku Merari hoton anyidru li lap ; me Maheli me Musi. Wale je lap anyin at Levi hoton je hnyaban lakamödrin.

21 Haba lap anyin at Libeni, me lap anyin at Simeí, me únyi ga Geresoma : wale li lap anyin at Geresoma. 22 Haba tavat adre aú gadra, a úseiny obaga hia, hwân ge tavat a khaca tehi me gan hon e, wale adre aú gadra sevente thauzan ke faiv haded. 23 Haba lap anyin at Geresoma ame he ka hunuma hnyi hoton uma mano ke e jio. 24 Ke haba thaniny hnyaban lakamen at Geresoma, me Eliasafa, nöku Laela. 25 Ke haba hanymen laku Geresoma hnyi uma úkhaçaköu, me wale uma mano, me uma, me baniny, me singiny hwanumen uma úkhaçaköu, 26 me mano adre uhno hnân hak, me singiny homagouleny, hnyi uma mano, me hnyi taben hut igigilö, me je wen, hobi káu ta je huliwainy hia.

27 Haba lap anyin at Amerama, me lap

anyin at Izara, me lap anyin at Heberona, me lap anyin at Uziela, me únyi ga Kohatha. 28 Haba numerainy obaga hia, hwán ge tavat a khaca tehi me gan hon e, me ödra eit thauzan ke siks haded, tavat adre tuö hanymödra hnyi dok ae kap. 29 Ame he je lap anyin laku Kohatha ka hunuma hnyi ke keihen uma mano ka hnyi hwaïöu. 30 Ke haba thaniny hnyaban kamen je lap anyin at Kohatha, me Elizafana nöku Uziela. 31 Ke haba hanymödra, me wale tang, me laulau, me taben lamepa, me li taben hut, me je utkaiainy dok ae kap, wale adre huliwa káu, me mano hnán uhni, me ta je huliwainy hia. 32 Ke ame he Eleazara nöku Arona at bihut he ka tuhan je thaniny at Levi, me homakan tavat adre me huliwan dok ae kap.

33 Haba lap anyin at Maheli, me lap anyin at Musi, me únyi ga Merari: wale li lap anyin at Merari. 34 Ke haba tavat adre aú gadra, a numerainy obaga hia, hwán ge tavat a khaca tehi me gan hon e, me ödra siks thauzan ke tu haded. 35 Ke haba thaniny hnyaban kamen je lap anyi Merari, me Zuriela nöku Abihaila: adre me he ka hunuma hnyi ke keihen uma mano ka hnyi hwadrö. 36 Ke haba hanyen adre ham ka laku Merari, me esöiny uma mano, me je venyáiny, me je utöiny ame tot, me je taben, me je omjehen hia, me ta je huliwainy hia; 37 me je khetepiny hak igigilö, me je taben e, me je faoiny e, me je wen e. 38 Ke haba tavat adre me he ka hunuma e deïö hnyi hnyimakan uma úkhacaköu wale ame o seïnö hnyin, me Mose, me Arona, me je lakon, he ka tuö hanyen hnyi dok ae kap, a hanyen lakon Isaraela; ke adre me he ka hlingá atkanyua at ame hakekenyá e. 39 Haba tavat hia adre aú a at Levi, wale Mose me Arona ame aú helá me hna hña hnö Iehova, hoton anyidra je lap, a obaga hia, hwán ge tavat a khaca tehi me gan hon e, me ödra twente tu thauzan.

40 Ke Iehova ame ha kö Mose, ka habe, He thö ka aú obaga hia, a je atö unyin lakon Isaraela, hwán ge tavat a khaca tehi me gan hon e, me aú numerainy je iödra. 41 Ke u me he ka hom at Levi hobi könya, (Inya Iehova) hnán bi hwaban je atö hia unyin lakon Isaraela; me omeno haleny at Levi, hnán bi hwaban omeno hia a bán haleny lakon Isaraela. 42 Ke haba Mose ame aú je atö hia unyin lakon Isaraela, helá me Iehova ame hña káu. 43 Ke

haba numerainy je ien obaga a je atö hia, hwán ge tavat a khaca tehi me gan hon e, a tavat adre aú gadra, me ödra twente tu thauzan ke tu haded ke sevente theri.

44 Ke haba Iehova ame ha kö Mose, ka habe, 45 U me he ka hom at Levi hnán bi hwaban je atö hia unyin lakon Isaraela, me omeno haleny at Levi, hnán bi hwaban haledra omeno: k' ame he ka hobi könya at Levi; Inya Iehova. 46 Ke haba hnán bi hwaban möt anyin tavat a tu haded ke sevente theri a je atö unyin lakon Isaraela, wale tavat ae nua biju hon úseiny at Levi, 47 me u ma he ka kap úsa thabúng je sekel hwaban ke at me ke at; u ma he ka kap e hoton sekeliny dok ae kap (haba sekel, me twente je gera): 48 ke u ma he ka ham mone, wale hwaban tavat ae nua biju gadra, kö Arona me lakon. 49 Ke haba Mose ame kap mone adre ham hnán bi hwaban möt anyin tavat ae nua biju hon úseiny tavat a bi hwaban anyidra möt hnen at Levi: 50 ke e ame kap ta je mone únyi ge ta je atöiny lakon Isaraela; a wan thauzan ke theri haded ke sikste faiv je sekel, hoton sekeliny dok ae kap: 51 ke haba Mose ame ham mone eling, wale adre bi hwaban káu möt, kö Arona me lakon, helá me hna ha hnö Iehova, hoton hna ha hnö Iehova kö Mose.

HNYIMAKAN 4.

KE haba Iehova ame ha kö Mose me Arona, ka habe, 2 Aú úseiny laku Kohatha unyin laku Levi, hoton anyidra je lap, me je hnyaban lakamödra, 3 hwán ge tavat a thöte huna me gan hon e ke ne o but fite huna, tavat hia adre me hnyi vat, he ka ányá huliwa hnyi uma úkhacaköu. 4 Walang huliwa anyin laku Kohatha hnyi uma úkhacaköu, hnyi ta je únyi ae ti kap: 5 e ka hwán tavat ka he but, me hamö Arona me lakon he ka didrö, me ái mano a singiny, me tube tang ohnatho hnen e: 6 k' ame he ka ip hon e tubwiny unen takasa, me ulolo hon e imano ae udrudrá hia, me iná li venyáiny. 7 Ke adre me he ka ulolo imano ae udrudrá hon laulau areto hnán omanená, me ip hon e je mini, me je spun, me je utkaia, me je kaia hnán hingálá: ke ame he ka hnen hon e areto ae bala bi: 8 ke adre me he ka ulolo hon je únyi e imano ae dra vec, me tube je únyi e ge tubwiny a unen takasa, me iná li

venyáiny. 9 Ke adre me he ka hom mano ae udrudrá me tube taben lamepa hnân umumelam, me ta je lamepainy, me uthesi-úiny, me je taben wahléúhleúiny, me je kaia wakaco hia, wale adre me huliwa káu: 10 ke adre me he ka ip e me je omjehen hia hnyi hnyin tubwiny a unen takasa, me bi venyáiny. 11 Ke adre me he ka ulolo mano ae udrudrá hon taben hut a gol, me tube e hnen tubwiny a unen takasa, me iná li venyáiny: 12 ke adre me he ka hom je utkaia hiaadre huliwa káu, wale adre me huliwa káu hnyi dok ae kap, me ip hnyi hnyin mano ae udrudrá, me tube je únyi e hnen tubwiny a unen takasa, me bi venyáiny. 13 Ke adre me he ka aoc degecá hnabadröu únyi hnyi taben hut, me ulolo hon e imano ae udrudrá hlit: 14 ke adre me he ka ip hon e je utkaia hia, wale adre me huliwa káu, a je taben meic, me je báletiny hnân séú utiö, me je soi, me je kaia, a je omjehen taben hut hia; ke adre me he ka ulolo hon e tubwiny a unen takasa, me iná li venyáiny. 15 Ke e ka hia but tube dok ae kap hnö Arona me lakon, me omjehen dok ae kap hia, anyin ame he ka he but tavat; haba hnyi úen e me ame he ka o je laku Kohatha he ka sukhöüná: ke ca he ödra ka kálá ta je únyi ae kap, wá ödra nye mokcu. Wale hanymen laku Kohatha hnyi uma úkhacaköu. 16 Ke haba Eleazara nöku Arona at bihut ame he ka tuö wakaco hnân umumelam, me je unyi ae be so hnân le, me hudiny han a e bala bi, me wakaco hnân hû, me hanymen uma mano hia, me ta je únyi hia hnyin, me dok ae kap, me omjehen hia.

17 Ke Iehova ame ha kö Mose me Arona, ka habe, 18 Ca he öbu ka hna subâ tribuiny lap anyi Kohatha anyin at Levi: 19 ke walang únyi he ka únyá ködra m' adre me möt, me ca mok hnyi úen adre me hakekenyá je únyi ae ti kap: haba Arona me lakon ödrin e he ka didrö, me ve kú ködrin ta je hanymödrin, me hon ödrin je hok: 20 ke ödrin e ca he ka didrö he ka hamâ dok ae kap, hnyi thuthubademak wá ödrin nye mokcu.

21 Ke Iehova ame ha kö Mose, ka habe, 22 U me he ka áu minya laku Geresoma, hoton je hnyaban lakamödra, ke hoton anyidra je lap; 23 hwán ge tavat a thöte huna me gan hon e ke ne o but fifte huna u ma he ka öü ödrin; a ödra hia adre me didrö he ka hnyi huliwa me bi hanymen hnyi uma úkhacaköu. 24 Walang je ha-

nymen je lap anyi Geresoma he ka bi huliwa me hije hok: 25 adre me he ka sukhöüná je singiny uma mano, me uma úkhacaköu, me ban ethö, me tubwiny a unen takasa a e hon, me singiny hwanumen uma úkhacaköu; 26 me mano adre uhno hnyi hak, me tubwiny a hlinginy homagöuleny hak, wale hnyi uma mano me hnyi taben hut igigilö, me je wen e, me ta je omjehen huliwa hia, me ta je únyi hia adre ányá hobi káu ta je únyi e, adre me he ka bi hanymen hnyin. 27 Hamö Arona me lakon he ka musö ta je huliwa hia anyin laku Geresoma hnyi je hanymödra hia, me anyidra ta je huliwa hia: ke öbun e he ka ve khená ködra he ka ve tuö je hanymödra. 28 Walang hanymen je lap anyin laku Geresoma hnyi uma úkhacaköu: ke ame he ka musö hanymödra hnö Ithamara nöku Arona at bihut he ka ányá.

29 Ke haba laku Merari u me he ka öü ödra hoton anyidra je lap, hoton je hnyaban je lakamödra; 30 hwán ge tavat a thöte huna, u me he ka öü ödra, a ödrin hia adre me hnyi dit he ka hnyi huliwa, me ányá hanymen hnyi uma úkhacaköu. 31 Walang je únyi hamödra he ka sukhöüná hnyi anyidra je huliwa hia hnyi uma úkhacaköu; je esöiny uma mano, me je venyáiny, me je utöiny ame tot, me je taben e; 32 me je khetepiny hak igigilö, me je taben e, me je faoiny, me je wen e, tha e me je omjehen hia, me je huliwainy hia: ke öbun e he ka áu ien ta je únyi wale hanymödra he ka sukhöüná. 33 Wale hanymen je lap anyin je laku Merari, hoton anyidra je huliwa hnyi uma úkhacaköu, ame musö ga Ithamara nöku Arona at bihut.

34 Ke haba Mose me Arona me je taben úkhacaköu, ödrin e áu je laku Kohatha hoton anyidra je lap, me je hnyaban lakamödra, 35 hwán ge tavat a thöte huna me gan hon e ke ne o but tavat a fifte huna, ödra hia adre me hnyi huliwa me ányá hanymen hnyi uma úkhacaköu: 36 ke haba tavat adre me áu hoton anyidra je lap, me ödra tu thauzan ke seven haded ke fifte. 37 Wale tavat adre áu únyi hnyi lap anyin at Kohatha, ödra hia adre me huliwa hnyi uma úkhacaköu, wale hnö Mose me Arona hna áu hoton hna húna hnö Iehova a deny Mose.

38 Ke haba tavat adre áu únyi hnyi laku Geresoma hoton anyidra je lap, me je hnyaban lakamödra, 39 hwán ge tavat a thöte huna me gan hon e ke ne o but tavat a

fifte huna, ödra hia adre me hnyi huliwa, me änyâ hanymen hnyi uma úkchacaköu, 40 wale tavat adre aú hoton anyidra je lap, me je hnyaban lakamödra, me ödra tu thauzan ke siks haded ke thöte. 41 Wale tavat adre aú únyi hnyi je lap anyin laku Geresoma, ödra hia adre me hnyi huliwa hnyi uma úkchacaköu, wale hnö Mose me Arona hna aú hoton hna húna hnö Iehova.

42 Ke haba tavat adre me aú únyi hnyi je lap anyin je laku Merari hoton anyidra je lap me je hnyaban lakamödra, 43 hwân ge tavat a thöte huna me gan hon e ke ne o but tavat a fifte huna, ödra hia adre me hnyi huliwa me änyâ hanymen hnyi uma úkchacaköu, 44 wale tavat adre me aú hoton anyidra je lap, me ödra theri thauzan ke tu haded. 45 Wale tavat adre aú únyi hnyi je lap anyin laku Merari, wale hnö Mose me Arona hna aú hoton hna húna hnö Iehova a deny Mose.

46 Ke haba tavat hia adre aú a at Levi, wale hnö Mose me Arona me je taben at Isaraela hna aú, hoton anyidra je lap, me je hnyaban lakamödra, 47 hwân ge tavat a thöte huna me gan hon e ke ne o but tavat a fifte huna, ödra hia adre me didró he ka hnyi huliwa, me hijen je hok hnyi uma úkchacaköu ; 48 wale tavat adre me aú, me ödra eit thauzan ke faiv haded ke eite. 49 Adre me öú ödra hoton hna húna hnö Iehova a deny Mose, a ke at me ke at hoton anyin huliwa, me hok : adre öú ödra helâe hoton hna húna hnö Iehova kö Mose.

HNYIMAKAN 5.

KE haba Iehova ome ha kö Mose, ka habe, 2 Húna ju ka lakon Isaraela m' adre me he ka kunâ ka hnyi hoton je hnyaba ta je lepera hia thithö, me tavat hia ame hingölö, me tavat adre me bo kong únyi ge komok : 3 öbun e he ka kunâ obaga me omomo, hamöbun he ka kun' ödrin ka hnyi hoton je hnyaba ; wâ ödra nye obokongu' öbun, a hnyeí oge me laba hnyin. 4 Ke haba lakon Isaraela adre me änyâ helâe, me kun' ödrin ka hnyi hoton je hnyaba : ke a änyâ lakon Isaraela hoton hna húna hnö Iehova kö Mose.

5 Ke Iehova ame ha kö Mose, ka habe, 6 Ha thö ka lakon Isaraela, ka habe, E ka he бага ame ne momo ka änyâ ke hwakecin ae kong, k' ame monu hnyi hnyimakö Iehova, ke hulö but at eling ; 7 me hamödra he ka omanená anyidra hulö waleji adre me änyâ :

k' adre me he ka bi hwaban bekhötâ anyidra hulö, me bi hanen ke keihen a thabúnginy ka hnyin, me ham ka at waleji e ame monu kâu. 8 Ke ame ne ba ke liamekeiny më at he ka ham hwaban monu kâu, me haba hwaban hulö adre bi hwaban kö Iehova ame he ka hobi kâu at bihut ; ke ca ha bi mamoe бага hnân úcú möt, wale hnân úco anyin möt. 9 Ke haba je hudiny kap göranyai únyi hnyi je únyi ae kap hia anyin at Isaraela, wale adre labö hom ka at bihut, me wale hnân hobi kâu e. 10 Ke hobi kâu e ta je únyi a kapiny tavat : haba ta je únyi ame he ka ham hnen ke at ka at bihut, me wale hobi kâu.

11 Ke Iehova ame ha kö Mose, ka habe, 12 Ha thö ka lakon Isaraela, me ha ködra, ka habe, A ne monu áiân ke бага, me ame änyâ hulö kâu, 13 k' ame tha mokut me ke бага, k' ame ikhâlâ e ge áiân, me iyong, k' ame kong ut momo, ke ba at ame wâ hnân ohnathoá, k' adre ca lelö e hnyi hnen hna änyâ ; 14 ke ame ciâ бага hnyi hnyekon, k' ameciâ ge áiân a momo, k' ame kongut momo : ke haba khaca, ame ne o ciâ hnyi hnyekon, ame ciâ ge áiân a momo, k' adre ca okongoá : 15 me hamen бага he ka hom áiân ka at bihut, k' ame he ka hom anyin hut hobi kâu e, a tap falawa bali a khaca omer ; k' ame ca he ka hú e ge wakaco ; k' ame ca he ka bi libanu ka hnyin ; anyin a hudiny ciâ eling me hudiny önyükúmeá, hnân önyükúmeá hulö. 16 Ke hamen at bihut he ka hom momo hakekeny, me ip e hnyi hnyimakö Iehova : 17 k' ame he at bihut ka hom köiö ae kap hnyi kaia kânâ ; k' ame he at bihut ka aoc sesâ hnyi kânâ eiö hnyi uma mano, me khûâ ka hnyi utköiö : 18 ke hamen at bihut he ka otílâ momo hnyi hnyimakö Iehova, me hna but leünen ban momo, me ip hnyi hnyamen hudiny önyükúmeá, a wale hudiny ciâ : ke e hnyi hnyamen at bihut köiö ae hiny at ame ohnaúhangöá : 19 k' ame he at bihut ka kunâ momo he ka khemanyin, me ha kâu, ka habe, U je ne ca tha mokut me ke бага, a ca áiâm bi, ke u je ne ca saú ka hnyi únyi ae ikiki, awe, u me he ka gufa ge utköiö ae hiny eang, at ame ohnaúhangöá : 20 ke u je ne hia but monu me ke at a ca áiâm, k' adre okongu u, ke a ne hia but tha mokut möu ke at ke ca áiâm bi : 21 me hamen at bihut he ka kunâ momo he ka khemanyin a khemanyin hnân ohnaúhangöá, k' ame he at bihut ka ha ka momo, ka kabe, Ame he Iehova ka wiö u hnân hangâ me khemanyin hnyi wanben em

hnyei, e ka he Iehova ka oavâ jevam me okhibô hnyekom; 22 ke haba utköiö eang at ame ohnaûhangöâ ame ke ka dit ka hnyi hnyekom, me okhibô hnyekom, me oavâ jevam: ke ame he momo ka ha, Amen, Amen. 23 Ke hamen at bihut he ka sihna-limen je ûhangö eling hnyi ke tusi, me hneü degecâ hmetu hnyi utköiö ae hiny: 24 ke e ame he ka habelen momo ge utköiö ae hiny at ame ohnaûhangöâ: k' ame he köiö at ame ohnaûhangöâ ka dit ka hnyi hnyekon me me hiny jut. 25 Ke ame he at bihut he ka hom hudiny ciâ ûnyi hnyi hnyamen momo, me hajjingâ hut eling hnyi hnyimakö Iehova, me hom ka hnyi taben hut: 26 ke hamen at bihut he ka okhaca aoc hudiny falawa ge hnyamen, hnân oûnykûmeâ, me le hon taben hut, ke hwaban e, e ame he ka habelen momo ge utköiö. 27 Ke e ka hia but habelen momo ge utköiö, ke ame ne monu but momo, k' ame ne hia but ânyâ hulö ka âiân, me ame he utköiö at ame ohnaûhangöâ ka dit eü hnyi hnyekon, me me hiny jut, me ame he ka khibi hnyekon, me oavâ jevan: ke ame he ka hnaûhangö momo hnyi wanben iny hnyei. 28 Ke adre me ne ca hia but okongoâ momo, k' ame ne bo so; awe, ame ke ka he bâu bi momo, k' ame he ka erkin bi. 29 Wale hnanyibuiny ciâ, e ka monu but momo me ke at, a ca âiân bi, me me kong ut: 30 ke ame ne hwân hnyekon бага he ka cia, k' ame ciâ âiân momo; me ame he бага ka ip âiân momo hnyi hnyimakö Iehova, me ame he at bihut ka ânyâ kâu hnanyibu eang hia. 31 Ke ame he ka he baú bi бага ge hulö, k' ame he momo ka hom takou anyin hulö.

HNYIMAKAN 6.

KE Iehova ame ha kö Mose, ka habe, 2 Ha thö ka lakon Isaraela me ha ködra, ka habe, Ame ne he ke бага ame ne momo ka hûkâlâ khöbi ae ûnyi hnathu, wale khöbi anyin at Nazeri, he ka okabâ e bi kö Iehova: 3 me e ame he ka úsákâüö me waina me grâg; k' ame ca he ka ic vinegainy waina, me vinegainy grâg; k' ame ca he ka ijem dân je wan vine, k' ame ca he ka han je wan vine ae lup me meleca. 4 Haba hnyi je bong hia adre okabâ e hnyin, me e ame ca he ka han ke ûnyi adre ânyâ ge vine, hwân ge önyen ke ne o but ka hnyi unen. 5 Hnyi je bong hia adre okabâ e ge khöbi, adre me ca he ka kâlâ ban ge hele-

ûgi: ke e ame he ka kap ke ne o but ame bekhöt ut je bong e ame okabâ e kö Iehova hnyin, k' ame he ka hna ban. 6 E ame ca he ka hakekenyâ komok hnyi je bong hia e ame okabâ e kö Iehova. 7 E ame ca he ka obokono e bi ge kamen, me hinyen, me lia-mekeiny mē, me haniny, ödrin ka mokcu: anyin a e bi hon ban hanen hna okabâ e bi ka Khong. 8 E kap kö Iehova hnyi je bong hia adre okabâ e hnyin. 9 Ke ame ne ie mok hwege ke at unyin, me me bo kong ut ban e ame okabâ; me e ame he ka giâ ban hnyi bong adre obosoâ e hnyin, k' ame he ka giâ hnyi bong a seven. 10 Ke haba hnyi bong a eitiny, me e ame ke ka hom li biny, ame ne li nokon meköta, ka at bihut, ka hnyi hwanumen uma úkhacaköu: 11 k' ame he at bihut ka hudo khaca hnân hudiny hulö, ke khaca hnân hudiny leú, me me bi hwaban anyin möt, anyin a kong ut ge ûnyi ae mok, k' adre me he ka okabâ hmeto ban hnyi bong eling. 12 Ke e ame he ka okabâ kö Iehova je bong e ame okabâ e hnyin, me hom nokon mamoe бага a khaca hunainy hnân hudiny monu: ke ame he ka ûnyi baú je bong a bân anyin ae kong ut hnen hna okabâ e.

13 Ke walang hnanyibuiny at Nazari, e ka bekhöt ut je bong e ame okabâ e hnyin; adre me he ka hom e ka hnyi hwanumen uma úkhacaköu: 14 ke e ame he ka hudo anyin hut kö Iehova, a nokon mamoe бага a khaca ae ba hnyikongon, a khaca hunainy, me hnân hudiny leú, ke khaca nokon mamoe momo ae ba hnyikongon, a khaca hunainy, me hnân hudiny hulö, ke khaca mamoe бага ae ba hnyikongon hnân hudiny ole, 15 me tang areto adre ca levenâ, je ong areto adre úthüeniken me wakaco, me je areto ae halelou adre ca levenâ k' adre khino wakacoiny, me hudiny han, me hudiny ic. 16 Ke ame he at bihut ha hom ta je ûnyi e ka hnyi hnyimakö Iehova, me hudo hudiny anyin hulö, me hudiny leú: 17 ke e ame he ka hudo mamoe бага hnân hudiny ole kö Iehova, tha e me tang areto adre ca levenâ: k' ame he at bihut ka hudo hudiny han, me hudiny ic. 18 Ke ame he at Nazeri ka giâ baniny hna okabâ e hnyi hwanumen uma úkhacaköu, me hom leünen baniny han okabâ e, me khûâ ka hnyi meic eü hmelen hudiny ole. 19 Ke ame he at bihut ka hom benyin mamoe бага ae mesök, me khaca ong areto adre ca levenâ ûnyi hnyi tangen, me khaca areto ae halelou adre ca levenâ, me ip ta je ûnyi

e hon li hnyamen at Nazeri e ka hia but già ge hna okabá : 20 ke ame he at bihut ka hajijingá je únyi e hnán hudiny hajijing hnyi hnyimakô Iehova ; wale únyi ae kap hobi káu at bihut, tha e me úlainy hajijing, me benyin hnán kap göranyai : ke hwaban e, e khana at Nazeri he ka ic waina. 21 Wale hnanyibuiny at Nazeri at ame ip khöbi, me anyin hut kö Iehova hnyi hnen hna okabá e, me ke je únyi ame ne hu gan : e ame he ka ányá hoton hnanyibuiny hnen hna okabá, helá me anyin khöbi wale hnyi hnen hna bi khöbi.

22 Ke Iehova ame ha kö Mose, ka habe, 23 Ha thö kö Arona me lakon, ka habe, Walang hwakecin he ka hahnahicá lakon Isaraela : öbun e he ka ha ködra, ka habe,

24 Ame he Iehova ka ohnahici u, me tuö u :

25 Ame he Iehova ka omelamá hnyimakan hom, me betenge gam :

26 Ame he Iehova ka ogöranyá hnyimakan hom, me ham köu úsoköu.

27 Ke adre me he ka ip iök hon lakon Isaraela heláe ; ke oge me he ka ohnahici ödra bi.

HNYIMAKAN 7.

KE hnyi bong a um dö Mose otílá uma mano, me hú me okabá e, me je omjehen e hia, me taben hut me je utkaia- iny hia, me hú me okabá ta je únyi e ; 2 waleji a ham hnen je tuhan at Isaraela, a taben je lap anyin lakamödra ; a je thainy je tribu, waleji adre otílá hon tavat adre áú : 3 ke adre me hom anyidra je bwihlany kö Iehova, a siks je kat adre tube hon, ke twelv je bolok ; úsa khaca kat ge lo li than, ke úsa khaca bolok, ke adre me hom ta je únyi e ka hnyi hnyimakan uma mano. 4 Ke Iehova ame ha kö Mose, ka habe, 5 Hom je únyi e únyi gadra me me hobi káu huliwa hnyi uma úkhacaköu ; ke u me he ka ham ka at Levi, hoton je ve huliwa. 6 Ke haba Mose ame hom je kat me je bolok me ham ka at Levi. 7 Ke e ame ham ha laku Geresoma lo li kat me vak ta bolok, hoton anyidra huliwa : 8 ke e ame ham ka laku Merari vak ta kat me eit ta bolok, hoton anyidra huliwa, k' ame he Ithamara nöku Arona at bihut he ka muso. 9 Ke e ame ca ham bi ka laku Kohatha : anyin adre me huliwa eiö hnyi dok ae kap ; k' adre me vadren hon je bajibenyidra. 10 Ke haba je than ödrin e ham bwihlany hnán okabá

taben hut hnyi bong adre me hú e hnyin, haba je than ödrin e hudo anyidrin hut hnyi hnyimakan taben hut. 11 Ke Iehova ame ha kö Mose, ka habe, Ame he je than ka ve hudo anyidrin je hut hnyi anyidrin bi je bong, hnán okábá taben hut.

12 Ke haba at ame hudo anyin hut hnyi bong a bán, me Nasona, nöku Aminadaba, únyi hnyi tribu Juda : 13 ke haba anyin hut, me khaca mini sileva, a wan haded ke thöte je sekel ihmakiny, ke khaca kaia sileva a sevente je sekel, hoton sekeliny dok ae kap : a unöngöt li unyi e ge falawa ae so adre úhaniken me wakaco, hnán hudiny han ; 14 ke khaca spun gol a ten je sekel, ae unöngöt ge únyi ae bo so hnán le ; 15 ke khaca nak bolok, ke khaca mamoe бага, ke khaca nokon mamoe бага a khaca hunainy hnán hudiny leú ; 16 ke khaca got бага hnán hudiny hulö ; 17 ke hnán hudiny ole lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy. Wale hut anyi Nasona, nöku Aminadaba.

18 Ke hnyi bong a loiny, haba Nathaniela, nöku Zuara, thaniny at Isakara, ame hudo : 19 ke e ame hudo anyin hut a khaca mini sileva a wan haded ke thote je sekel ihmakiny, ke khaca kaia sileva a sevente je sekel, hoton sekeliny dok ae kap ; a unöngöt li únyi e ge falawa ae so adre úhaniken me wakaco, hnán hudiny han ; 20 ke khaca spun gol a ten je sekel, ae unöngöt ge únyi ae bo so hnán le ; 21 ke khaca nak bolok, ke khaca mamoe бага, ke khaca nokon mamoe бага a khaca hunainy, hnán hudiny leú ; 22 ke khaca got бага, hnán hudiny hulö ; 23 ke hnán hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Nathaniela, nöku Zuara.

24 Ke haba hnyi bong a kuniny, Eliaba, nöku Helona, thaniny je laku Zebulona : 25 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel hoton sekeliny dok ae kap ; a unöngöt li únyi e ge falawa ae so adre úhaniken me wakaco, hnán hudiny han ; 26 ke khaca spun gol a ten sekel, ae unöngöt ge únyi ae bo so hnán le ; 27 ke khaca nak bolok, ke khaca mamoe бага, ke khaca nokon mamoe бага, a khaca hunainy, hnán hudiny leú ; 28 ke khaca got бага, hnán hudiny hulö ; 29 ke hnán hudiny ole, lo li bolok, ke

thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy: wale hut anyi Eliaba nöku Helona.

30 Ke haba hnyi bong a vakiny, Elizura, nöku Sedeura, thaniny laku Reubena: 31 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva, a sevente je sekel, hoton sekeliny dok ae kap; a unöngöt li únyi e ge falawa ae so adre úhaniken me wakaco, hnân hudiny han; 32 ke khaca spun gol a ten je sekel ae unöngöt ge únyi ae bo so hnân le; 33 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú; 34 ke khaca got бага, hnân hudiny hulö; 35 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy: wale hut anyi Elizura, nöku Sedeura.

36 Ke haba hnyi bong a thabúng, Selumiela nöku Zurisadai, thaniny je laku Simeona: 37 ke haba anyin hut, me khaca mini sileva, a wan haded ke thöte je sekel ihmakiny, ke khaca kaia sileva a sevente je sekel, hoton sekeliny dok ae kap; a unöngöt li únyi e ge falawa ae so adre úhaniken me wakaco, hnân hudiny han; 38 ke khaca spun gol a ten je sekel ae unöngöt ge únyi ae bo so hnân le; 39 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú; 40 ke khaca got бага hnân hudiny hulö; 41 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy: wale hut anyi Selumiela, nöku Zurisadai.

42 Ke haba hnyi bong a siksiny, Elisafa, nöku Deuela, thaniny je laku Gada: 43 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel hoton sekeliny dok ae kap; a unöngöt li únyi e ge falawa ae so adre úhaniken me wakaco, hnân hudiny han; 44 ke khaca spun gol a ten je sekel ae unöngöt ge únyi ae bo so hnân le; 45 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú; 46 ke khaca got бага hnân hudiny hulö; 47 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca

hunainy: wale hut anyi Eliasafa, nöku Deuela.

48 Ke haba hnyi bong a seveniny Elisama, nöku Amihuda, thaniny je laku Eferaima: 49 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel hoton sekeliny dok ae kap, a unöngöt li únyi e ge falawa ae so adre me úhaniken me wakaco, hnân hudiny han; 50 ke khaca spun gol a ten sekel, ae unöngöt ge únyi ae bo so hnân le; 51 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú; 52 ke khaca got бага, hnân hudiny hulö; 53 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy: wale hut anyi Elisama, nöku Amihuda.

54 Ke haba hnyi bong e eitiny, Gamaliela, noku Pedazura, thaniny je laku Manase; 55 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel, hoton sekeliny dok ae kap, a unöngöt' li únyi e ge falawa ae so adre úhaniken me wakaco hnân hudiny han; 56 ke khaca spun gol a ten sekel, ae unöngöt ge únyi ae bo so hnân le; 57 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú; 58 ke khaca got бага hnân hudiny hulö; 59 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy; wale hut anyi Gamaliela, noku Pedazura.

60 Ke haba hnyi bong a naininy, Abidana, nöku Gideona, thaniny je laku Beniamina: 61 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han; 62 ke khaca spun gol a ten sekel ae unöngöt ge únyi ae bo so hnân le; 63 ke khaca nak bolok, ke khaca mamoe бага, ke khaca nokon mamoe бага a khaca hunainy hnân hudiny leu; 64 ke khaca got бага hnân hudiny hulö; 65 ke hnân hudiny ole, lo bi bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy: wale hut anyi Abidana, nöku Gideona.

NUMERA 8.

66 Ke haba hnyi bong a teniny, Ahiezera, nöku Amisadai, thaniny je laku Dana : 67 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han ; 68 ke khaca spun gol a ten sekel, ae unöngöt ge únyi ae bo so hnân le ; 69 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 70 ke khaca got бага hnân hudiny hulö ; 71 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Ahiezera, nöku Amisadai.

72 Ke haba hnyi bong a eleveniny, Pagiela, nöku Okerana, thaniny je laku Asera : 73 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel, hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han ; 74 ke khaca spun gol a ten sekel, ae unöngöt ge únyi ae bo so hnân le ; 75 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 76 ke khaca got бага hnân hudiny hulö ; 77 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Pagiela, nöku Okerana.

78 Ke haba hnyi bong a twelviny, Ahira, nöku Enan, thaniny je laku Nafatali : 79 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han ; 80 ke khaca spun gol a ten sekel, ae unöngöt ge únyi ae bo so hnân le ; 81 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 82 ke khaca got бага hnân hudiny hulö ; 83 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Ahira nöku Enan.

84 Wale hnân okabá taben hut, hnyi bong thaniny at Isaraela ame hú e hnyin : a twelv je mini sileva, ke twelv je kaia

sileva, ke twelv je spun gol : 85 úsa wan haded ke thöte je sekel ihmakiny je mini sileva, ke úsa sevente sekel je kaia : haba ihmakiny silevainy je kaia hia, me tu thauzan ke foa haded je sekel, hoton sekeliny dok ae kap ; 86 ke twelv je spun gol ae unöngöt ge únyi ae bo so hnân le, a úsa ten sekel ihmakiny, hoton sekeliny dok ae kap : haba goliny hia je spun, me wan haded ke twente je sekel : 87 ke haba je bolok hia hnân hudiny leú, me twelv je bolok, ke twelv je mamoe бага, ke twelv je nokon mamoe бага, a khaca hunainy, me je hudiny han : ke je got бага a twelv hnân hudiny hulö : 88 ke haba je bolok hia hnân hudiny ole, me twente foa je bolok, ke sikste je mamoe бага, ke sikste je got бага, ke sikste je nokon mamoe бага a khaca hunainy. Wale hnân okabá taben hut hnyi hna hú e. 89 Ke hnyi úen ame didró Mose ka hnyi uma úkchacaköu he ka úhnenamö më, me e ame löng Hwan ame fuc káu úheny thö hon taben ibetengiö wale hon tang ohnatho, úheny hnyi wanben li kerubi : ke e ame fuc káu.

HNYIMAKAN 8.

KE haba Iehova ame ha kö Mose, ka habe, 2 Ha thö kö Arona, ka habe, U ka he ka vác je lamepa, ame he je lamepa a seven ka umumelam hnyi hnyimakan taben lamepa. 3 Me Arona ame ányá eling ; k' ame vác je lamepa hnyi hnyimakan taben lamepa, helá me Iehova ame ha kö Mose. 4 Ke walang hna huliwan taben lamepa, a gol adre huliwan ge hama ; wale taben ke ne o but je vongon adre huliwan ge hama : e ame ányá taben lamepa hoton tulut a omanená Iehova kö Mose.

5 Ke Iehova ame ha kö Mose, ka habe, 6 Hom dö tavat Levi únyi hnyi wanben lakon Isaraela, me obosoi ödra. 7 Ke walang hnâm hna he ka ányá ködra, m' adre me he ka bo so : u ma duköi' ödra ge köien obosóá, k' adre me he ka giá je unyidra hia, me hneú anyidra je úkhaú, me obosoi ödra. 8 Ke adre me he ka hom nak bolok, me hudiny han, a falawa ae so adre úhaniken me wakaco, ke u me he ka hom ke nak bolok hnân hudiny hulö. 9 Ke u me he ka hom at Levi ka hnyi uma úkchacaköu : ke u me he ka úkchacaköuá tavat, a lokon Isaraela hia : 10 ke u me he ka hom tavat Levi ka hnyi hnyimakö Iehova : ke hamen lakon Isaraela he ka ip

je hnyamödra hon je at Levi; 11 k' ame he Arona ka hajjिंगá tavat Levi hnyi hnyimakö Iehova hnân hudiny hajjिंग únyi ge lakon Isaraela, m' adre me he ka hnân hobi kâu huliwa anyi Iehova. 12 Ke hamen tavat Levi he ka ip je hnyamödra hon ban li bolok: ke u me he ka hudo khaca hnân hudiny hulö, me khaca hnân hudiny leü, kö Iehova, me me bi hwaban möt anyin tavat Levi. 13 Ke u me he ka otilá je at Levi hnyi hnyimakö Arona me lakon, me hajjिंगi ödra hnân hudiny hajjिंग kö Iehova. 14 Ke u me he ka ke ip tavat Levi helâe únyi hnyi wanben lakon Isaraela: ke hnân hobi kõnya tavat Levi. 15 Ke hwaban dö e ame he tavat Levi ka didrö he ka huliwa hnyi uma úkhacaköu: ke u me he ka obosoi ödra, me hajjिंगi ödra hnân hudiny hajjिंग. 16 Anyin adre ham mu' ödra kõnya únyi hnyi wanben lakon Isaraela; oge me hum ödra hobi kõnya, hnyi hnen je nokon a bán hia, a je atö hia hnyi lakon Isaraela. 17 Anyin a hobi kõnya je atö hia anyin lakon Isaraela, a tavat me omeno: oge me okabi ödra hobi kõnya hnyi bong waleji oge me kot hnyin je nokon a bán hia hnyi hnyeí Aigupito. 18 Ke oge me hom tavat Levi hnân bi hnen je nokon hia a bán anyin lakon Isaraela. 19 Oge me ham muá tavat Levi kö Arona me lakon, únyi hnyi wanben lakon Isaraela, he ka ányá huliwa anyin lakon Isaraela hnyi uma úkhacaköu, me bi hwaban möt anyin lakon Isaraela: me me ca he ka mok lakon Isaraela, e ka hakekeny lakon Isaraela ka hnyi dok ae kap. 20 Ke haba Mose, me Arona, me úkhacaköu hia anyin lakon Isaraela, me adre me ányá helâe ka tavat Levi: hoton hna hûna hnö Iehova kö Mose ge tavat Levi: ame ányá ködra helâe hnen lakon Isaraela. 21 Ke haba tavat Levi adre me obosoi ödra bi únyi hnyi hulö, me hneú anyidra je úkhaú; ke haba Arona ame hajjिंगi ödra hnân hudiny hajjिंग hnyi hnyimakö Iehova; ke Arona ame bi hwaban anyidra möt me obosoi ödra. 22 Ke hwaban e, haba tavat Levi adre me didrö ka hnyin uma úkhacaköu he ka hnyi huliwa hnyi hnyimakö Arona me lakon: hoton hna ha hnö Iehova kö Mose ge at Levi, ödra adre me ányá helâe ködra.

23 Ke Iehova amé ha kö Mose, ka habe, 24 Walang bongon tavat Levi: haba hwân hnyi twente faiv je hunaidra me gan hon e adre me he ka didrö he ka labö huliwa

hnyi uma úkhacaköu: 25 ke e ka fite je hunaidra me adre me he ka bi obiny anyidra huliwa, k' adre me ca he hmetu ka hnyi huliwa; 26 ke adre me he ka labö huliwa tha ödra me je liamekeiny mödra hnyi uma úkhacaköu, he ka tuö je hanymen, k' adre me ca he ka hnyi ányá huliwa. U ma he ka ányá helâe ka at Levi ge je hanymödra.

HNYIMAKAN 9.

KE Iehova ame ha kö Mose hnyi hnye-buba Sinai, hnyi tehi a bán hnyi huna a loiny, hwaban hnödra hna he but únyi hnyi hnyeí Aigupito, ka habe, 2 Hamen lakon Isaraela he ka ányá paseka hnyi úen adre thu. 3 Hnyi bong a fortininy tehi eang, hnyi sahac, öbun e he ka tuö e hnyi úen adre thu: hoton je hnan-yibuiny hia me je bongon hia öbun e he ka ányá e. 4 Ke haba Mose ame ha ka lakon Isaraela, m' adre me he ka ányá paseka. 5 Me adre me ányá paseka hnyi tehi a bán, hnyi bong a fortininy hnyi sahac hnyi hnye-buba Sinai: haba lakon Isaraela adre me ányá hoton hna hûna hnö Iehova kö Mose. 6 Ke wale ke je hnyat ödrin e bo kong únyi ge komok, ke ca ücü ködrin he ka hnyi hanen paseka hnyi bong eling: me ödrin e he kö Mose me Arona hnyi bong eling: 7 ke haba hnyat eling ödrin e ha kâu, ka habe, öhmun e bo kong ut únyi ge komok: iéü gadra adre me ovheli öhmun, m' öhmun e ca he ka hnyi hudo hut kö Iehova hnyi úen adre thu, tha öhmun me lakon Isaraela; 8 Ke haingö Mose ködrin, ka habe, Me tot u öbun, m' inye he ka löng hofuc ho Iehova gabun.

9 Me haba Iehova ame ha kö Mose, ka habe, 10 Ha thö ka lakon Isaraela, ka habe, Ame ne he ke at gabun, me je mátránibun nyiele, ame bo kong únyi ge komok, k' ame ne he but ka hnyi ke dok ae sákâu, me, hamen he ka hnyi ányá paseka kö Iehova: 11 adre me he ka tuö e hnyi tehi a loiny hnyi bong a fortininy hnyi sahac; k' adre me he ka tha han e me areto adre ca levenâ, me je khölak ae hiny: 12 ke adre me ca he ka ip hanen ke ne o but hnyi hnyomakatu, k' adre me ca he ka thu jeien: adre me he ka ányá paseka hoton je hnan-yibuiny hia. 13 Ke haba at ae bo so, k' ame ca hnyi he but, k' ame ca hnyi hanen paseka, me adre me he ka subâ degeca at eling únyi hnyi iny hnyeí: anyin a e ame ca hom hut kö

Iehova hnyi úen adre thu, k' ame he ka takou at eling hnen anyin hulö. 14 Ke ame ne tha laba möbun ke atkanyua, k' ame hnyi behanen paseka kö Iehova; me e ame he ka ányá hoton hnanyibuiny paseka me hwakecin: khaca thibi hnanyibu köbun ge atkanyua me aten hnyei.

15 Ke haba hnyi bong adre me otílá uma mano hnyin, me ame tube uma mano hnen úlá, wale uma ohnatho: ke haba hnyi sahac e ame mokut hon uma mano helá me meic ke ne o but hnyomakatu. 16 K' ame heláe bala: haba úlá ame tube e hnyi lany, ke helá me meic hnyi lit. 17 Ke adre me ne kap göranyai úlá únyi hnyi hon uma, me hwaban e haba lakon Isaraela adre me he: ke haba dok ame tot hnyin úlá, wale dok ame hunuma hnyin lakon Isaraela. 18 Haba lakon Isaraela adre me he hnyi úen Iehova ame húna, k' adre me hunuma hnyi úen e ame húna: haba hnyi ta je bong hia wale úlá ame laba hon uma mano, me adre me laba. 19 Ke ame ne laba úlá hon uma mano hnyi je bong ae se, me haba lakon Isaraela adre me tuö hna otílá hnö Iehova, k' adre me ca he bi. 20 Ke haba hnyi ke je úen, me ame laba úlá hon uma mano hnyi je bong ae wakhalet; me ödra adre me hunuma bala hoton hna húna hnö Iehova, k' adre me he hoton hna húna hnö Iehova. 21 Ke haba hnyi ke je bong me ame laba úlá hwán hnyi sahac ke ne o but hnyomakatu; ke ödra ka kap göranyai úlá hnyi hnyomakatu, me adre me he: k' ame ne lany, k' ame ne lit, hnyi úen adre me hom göranyai úlá, me adre me he. 22 Ame ne lo thibi li bong, ame ne khaca tehi, ame ne khaca huna, k' ame ne e bi úlá hon uma mano, me labö e, me haba lakon Isaraela adre me laba, me ca he bi: ke hnyi úen adre me kap göranyai e, me adre me he. 23 Hnyi musi anyi Iehova adre me laba, ke hnyi musi anyi Iehova adre me he: k' adre me tuö hna otílá hnö Iehova, hoton musi anyi Iehova a deny Mose.

HNYIMAKAN 10.

KE Iehova ame ha kö Mose, ka habe, 2 U me he ka tibet li trutru sileva; u me he ka huliwan ge hama: ke wale li únyi hnán havá úkhacaköu, me hnán he je bunyen. 3 Ke ödra ka he ka tuá, me ame he ka úkhacaköu köu tavat hia hnyi hwa-numen uma úkhacaköu. 4 Ke ödra ka he

ka okhaca tuá, me ame he ka úkhacaköu köu ta je than, a je taben je thauzan anyin at Isaraela. 5 Ke öbun ka tuá hnahna, me ame he ka he tavat adre me hunuma hnyi ke keihen e deiö. 6 Ke öbun ka olo tuá hnahna, me ame he ka he tavat adre me hunuma hnyi ke keihen ka hnyi hwa-iöu: ödra ka ke ka tuá hnahna me hnán ohei ödra. 7 Ke ödra ka he ka úkhacaköuá tavat, me adre me he ka tuá thibi, k' adre me ca he ka tuá hnahna. 8 Ke hamen laku Arona hnyat bihut he ka tuö trutru, wale hnán hnanyibu köbun nyiele balua hnyi anyibun je dö. 9 Ke öbun ka he ka vat hnyi ibun hnyei me je iwahnaihmiöny möbun, tavat adre me okongu öbun, me öbun e he ka tuá hnahna wale li trutru; me adre me he ka únykümi öbun hnyi hnyimakö Iehova Khongubun, k' adre me he ka omeli öbun únyi ge je iwahnaihmiöny möbun. 10 Ke haba hnyi je bong öbun e senyin hnyin, me hnyi anyibun je bijeu adre thu, me hnyi hnyimakan je tehi, adre me he ka tuá li trutru hon anyibun je hudiny leü, me anyibun je hudiny ole; m' adre me he ka únykümi öbun hnyi hnyimakan Khongubun: Inya Iehova Khongubun.

11 Ke haba hnyi huna a loiny, hnyi tehi a loiny, hnyi bong a twenteiny, me adre me hom göranyai ulá únyi hnyi hon uma mano uma ohnatho. 12 Ke haba lakon Isaraela adre me he but úheny hnyi hnyebuba Sinai; me ame tot u úlá hnyi hnyebuba Parana. 13 Ke adre me bán ka he únyi hnyi musi anyi Iehova, a deny Mose. 14 Ke ame he bán haten lap anyin laku Juda, hoton anyidra je utbavat: ke haba at ame musö anyin vat, me, Nasona, nöku Aminadaba. 15 Ke haba at ame musö vat anyin tribuiny laku Isakara, me, Nathaniela, nöku Zuara. 16 Ke haba at ame musö vat anyin tribuiny laku Zebulona, me, Eliaba, nöku Helona. 17 Ke adre me ai uma mano, k' ame hwán laku Geresoma me laku Merari hnyat sukhöüná uma mano ka he. 18 Ke ame hwán ka he haten lap anyi Reubena, hoton anyidra je utbavat: ke haba at ame musö anyin vat, me, Elizura, nöku Sedeura. 19 Ke haba at ame musö vat anyin tribuiny laku Simeona, me, Selumiela, nöku Zurisadai. 20 Ke haba at ame musö vat anyin tribuiny laku Gada, me, Eliasafa, nöku Deuela. 21 Ke ame hwán at Kohatha ka he, ödrin e kap tilá únyi ae kap: ke haba keihen ödrin e

otilá uma mano hobi káu ödrin ka o thö. 22 Ke ame hwân haten lap anyin laku Eferaima ka he, hoton anyidra je utbavat, ke haba at ame musö anyin vat, me Elisama, nöku Amihuda. 23 Ke haba at ame musö vat anyin tribuiny laku Manase, me, Gama-liela, nöku Pedazura. 24 Ke haba at ame musö vat anyin tribuiny laku Beniamina, me Abidana, nöku Gideona. 25 Ke ame hwân haten lap anyi Dana ka he, wale obiny je lap hia, hoton anyidra je utbavat, ke haba at ame musö anyin vat, me Ahiezera, nöku Amisadai. 26 Ke haba at ame musö vat anyin tribuiny laku Asera, me, Pagiela, nöku Okerana. 27 Ke haba at ame musö vat anyin tribuiny laku Nafatali, me Ahira, nöku Enan. 28 Wale hwakecin úheny lakon Isaraela hoton anyidra je utbavat; k' adre me hwân ka he.

29 Ke haba Mose ame ha hö Hobaba, nöku Reuela, at Midiana, a úngu Mose, ka habe, Öhmun e he ka hnyi hnyei waleji Iehova ame ha, ka habe, Oge me he ka ham köbun; aiö u ötin e tha he, ke öhmun e he ka ányá so köu, anyin a hia but Iehova ha so kö Isaraela. 30 Ke e ame thu káu, ka habe, Oge me ca he ka hnyi he, ke oge me he bi nya ka hnyi ik hnyei me anyik lap. 31 Ke haingen ka habe, Ö u ca he bi ka hn' öhmun; anyin a khañö u a öhmun e he ka hunuma hnyi hnyebuba, ke u me he ka emaköhmun. 32 Ke u je ne tha he möhmun, me haba so ame he Iehova ka ányá köhmun, me öhmun e he minya ka ányá heláe köu.

33 Ke adre me he but úhedra hnyi bucen anyi Iehova hnyi kun ta bong; ke haba tangen úhihinyköu ame he bán hnyi kun ta bong, he ka elám hna mená hobi ködra. 34 Ke ethö bi hudrin úlá anyi Iehova hnyi lany, hnyi úen adre me he úhedra hnyi hnödra hna hunuma hnyin.

35 Ke haba hnyi úen ame hwân tang ka he, haba Mose ame ha, ka habe, Iehova lö, todrö, me me ve se but je iwahnaihmöny möu; me kec gam tavat adre me hukötio u. 36 Ke hnyi úen ame mená, me e ame ha, ka habe, Iehova lö, hmetuhmetu ju ka ta je thauzaniny aten Isaraela.

HNYIMAKAN 11.

KE haba tavat heláke adre me úhaiö, ke e kong e kö Iehova; ke Iehova ame löng, me gan hmá anyin hmönyin; me ame ubáhlá hmönyin anyi Iehova unyidra, me

an ke ne o but ka hnyi obiny hna hunuma 2 Ke haba tavat adre me tengiá kö Mose; me Mose ame khawe kö Iehova, me ame mok hnetu ju meic. 3 Ke adre hwenyi ien dok eling Tabera: anyin ame ubáhlá meic anyi Iehova unyidra.

4 Ke haba tavat ae ve bongon unyidra adre me hwân ka behnyekon: k' ame tenge hmetu lakon Isaraela me ha, ka habe, Ia ame he ka ha ötin ge meno? 5 Ötin e únyküme je wá waleji ötin e an baúá hnyi hnyei Aigupito; me ta je kokuma, me je wajem, me je liki, me je önyen, me je galika: 6 ke meleca thö walang je unyitin; e ba but ta je únyi hia; ke ba ke únyi ötin e wá ke mana thibi. 7 Haba mana me wale ke únyi helá me onyen gada, ke haba bongon, at ka wá, me helá me bedola. 8 Ke haba tavat adre me ngenu me aoc, me oamamá hnyi li veto, ame ne kokot e hnyin kumete, k' adre me thán hnyi öt, me up aretoiny, ke haba bunen me helá me wakaco ae teb únyi, at ka drem. 9 Ke ame ta hau hon je hnyaba hnyi lit, me ame ta minya mana. 10 Ke Mose ame löng hwan tavat adre me tenge hnyi je hwanumen umödra je uma mano: me ame ubáhlá hmönyin anyi Iehova, ke e kong ut minya kö Mose. 11 Ke haba Mose ame ha kö Iehova, ka habe, Ieú gam u me okongo athnyabaem? ke ieú gam u me ca betenge gak, ke u je ip huk hmakiny tavat eang? 12 Hawa oge erkiná tavat hia eang? hawa oge hnöku ödra, m' u me he ka ha könya, ka habe, Köp ödra ka hnyi úláiam, helá me kamen wale at ame tuö wanakat adre asen, ka hnyi hnyei u je khemanyin ka lakamödra? 13 Únyi ua utiö, m' inye he ka ham ka je hnyat hia eang? anyin adre me tenge könya, me ha, ka habe, Ha öhmun ge utiö. 14 E ca khañö nya he ka hake kap tavat eang, anyin ae ti hmak könya. 15 Ke u je ne ányá heláe könya, me ö u hlingö nya but u je ne betenge gak; m' oge me ca he ka wá anyik hlöuhlöu.

16 Haba Iehova ame ha kö Mose, ka habe, Úhacaköúá thö könya je hnyat a sevente, a wahingatiny at Isaraela, wale u me wáhmakhmeto a wahingatiny hnyei, me homakan hnyei; ke hum ödrin ka hnyi uma ukhacaköu, m' ödrin e he ka tha tot möu eling. 17 Ke oge me he ka utut me únhenamö eling möu: ke oge me he ka hom ke keihen hanu unyám me ip hudrin; m' ödrin e he ka tha vadren möu tavat a únyi ae hmak, me u me ca he ka hake

vadren. 18 Ke u me he ka ha ka tavat, ka habe, Okabi öbun dö hobi kâu nyi, m' öbun e he ka han utiö: anyin a öbun e hia but tenge ka hnyi li hnyikönyö Iehova, me ha, ka habe, Ia ame he ka ha öhmun ge utiö? anyin ae so köhmun ehac hnyi hnyer Aigupito: waleling me me he Iehova ka ha öbun ge utiö. 19 Öbun e he ka han utiö, ca hnyi khaca thibi bong, ke ca lo li bong, ke ca thabúng ta bong, ke ca libe-nyita ta bong, ke ca twente ta bong; 20 ke so bi ama kbaca tehi, ke ne o but e ka o but e hnyi je hnyingöibun, ke öbun e he ka ikikiá e: anyin a öbun e húkötio Iehova at ame tha e möbun, me tenge hnyi hnyimakan, ka habe, Ötin e he jem geü úheta Aigupito? 21 Ke Mose ame ha, ka habe, Haba tavat unyik ödra siks haded thauzan tavat vat; ke u je ha, ka habe, Öge me he ka ha ödra ge utiö, m' adre me he ka han hnyi khaca tehi. 22 Hawa, adre me he ka hlingá hobi ködra je hnahat mamoe me kau, me me sekudra? ke adre me ne he ka úkhacakouá ta je wá hia eü hnyi köio hobi ködra, me me sekudra?

23 Ke Iehova ame ha kö Mose, ka habe, Hawa, ame hwán ka okhulit hnyamö Iehova? u me he ka wá walang ang, ame ne he ka át, ame ne ca he ka át hok hofuc. 24 Ke Mose ame didrut me ha ka tavat hofuc ho Iehova: me e ame úkhacakouá wahingatiny hnye a sevente me otíl' ödrin igigilö Uma. 25 Ke ame utut Iehova hnyin úlá, me fuc kâu, me hom ke keihen hanu unyin me ip hon wahingat a sevente: ke a mokut hanu hudrin, me ödrin e perofeta, ke ödrin e ca ányá hmetu heláe. 26 Ke ame laba hnyi hna hunuma ke li at, Eledada ien ke at, ke Medada ien ke at: ke ame mokut hudru banu; haba ödru ke li at adre sihnalimidru, k' ödre ca hnyi he ka hnyi Uma: ke ödru me perofeta hnyi hna hunuma. 27 Ke ame wadring ke hidróda me thumetu Mose, ka habe, Haba Eledada me Medada ödru me perofeta hnyi hna hunuma. 28 Ke haba Josua nöku Nuna athnyabai Mose, a hanen hnyat e ame úca, ame thu me ha, ka habe, Than Mose lö, thaw' ödru ju, 29 Ke Mose ame ha kâu, ka habe, U me vec gak? e na je perofeta hia je lakei Iehova, me me he Iehova ka ip hanon hudrin! 30 Ke Mose me wahingatiny Isaraela ödrin e he ka hnyi hna hunuma. 31 Ke ame o thö ang únyi ga Iehova, me ame oá je júö únyi hnyi köio, me ota but hnyi hna hunuma, ame ne helá me khaca bong ka he ka hnyi ke kei-

hen, k' ame ne helá me khaca bong ka he ka hnyi ke keihen, igigilö hnyaba; ke ame ne lo li kubit göranyai hon káná. 32 Me ame todrö tavat hnyi bong eling hia me lit hia, me bong nyi hia, me hlo ta je júö: ke haba at ame hlo úhnyúkongo, ame hlo ten je homer; ke adre me ve ip monoá hobi ködra igigilö hna hunuma. 33 Ke tiga e bi utiö hnyi wanben je nyudra, k' adre tiga ca um hoc, me ame ubáhlá thö hmönyin anyi Iehova ka tavat, ke Iehova ame kot tavat ge mok ae gan hmá. 34 Ke adre me hwenyi ien dok eling, me Kiberoth-atava; anyin adre konám eling tavat behnyekon. 35 Ke haba tavat adre me he Hazeroth ai, úhedra Kiberoth-atava, me laba hnyi Hazeroth.

HNYIMAKAN 12.

KE haba Miriama me Arona ödru me haikongo Mose can momo Kuza e ame hom, anyin a e ame hom mome a at Kuza. 2 Ke haingödra, ka habe, Hawa, ame hake fuc Iehova kö Mose? a ca hnyi ha minya köhmu? Ke Iehova ame löng e. 3 Haba Mose, me wale at ae ti menyik hon tavat hia eang hmelen. 4 Ke Iehova ame ie ha kö Mose me Arona me Miriama, ka habe, Ai öbun kun ka hnyi uma úkhacakou. Me ödrin kun ödrin e he. 5 Me Iehova ame utut hnyi úlá ame tot wisa, me tot hnyi hwanumen uma úkhacakou, me hawo Arona me Miriama: ke ödru me o thö. 6 Ke e ame ha, ka habe, Löng ju hok hofuc: a ne hu perofeta unyibun, me haba Inya Iehova oge me he ka omanenö nya kâu hnyi hna omanená, me fuc kâu hnyi bwi. 7 Ke haba athnyabaik Mose, me ca heláe; e bi at ae hnathu hnyi hnyabak hia: 8 me oge me he ka úcú hnyem mē me ha manená, ke ca hnyi je hofuc ae lit; ke e ame he ka wá unyu Iehova: ke ieu gabu a öbu ca ot he ka fuc ga Mose a athnyabaik? 9 Ke ame ubáhlá thö hmo-nyin anyi Iehova ködru; ke e ame he but. 10 Me ame he but úlá únyi hnyi hon Uma; ke wá bi, e lepera but Miriama helá me kiona: ke Arona ame ö Miriama, ke wá bi e lepera. 11 Ke Arona ame ha kö Mose, ka habe, Ekölö than lö, ö u ca he ka ip köhmu hulö, can öhme ányá monu, me can öhme ányá hulö. 12 Ö e ca he ka helá me komok, ke helá me at ame o únyi hnyi hnyekon hinyen, k' ame aü but unyin. 13 Ke Mose ame tenge kö Iehova, me ha, ka habe,

Khong lö, ö u omelö thö momo walang ang. 14 Ke Iehova ame ha kö Mose, ka habe, Hawa, a ne hangöjâ hnyimakan, ge kamen ame ca he ka hmehma seven ta bong? e so adre me tuö e hoton hnyaba hnyi seven ta bong, ke hwaban e adre me he ka hom hmetu e. 15 Me adre me tue Miriama hoton hnyaba hnyi seven ta bong: ke ame ca he tavat ke ne o but adre hum Miriama hmetu thö. 16 Ke hwaban e ame he tavat ûhedra Hazeroth, me hunuma hnyi hnyebuba Parana.

HNYIMAKAN 13.

KE Iehova ame ha kö Mose, ka habe, 2 Kunâ ke je hnyat he ka ecmâkâ hnyei Kanana, wale oge ham ka lakon, Isaraela: öbun a he ka kunâ ûsa khaca ûnyi hnyi je tribu hia anyin lakamödrin, a je than hia. 3 Ke Mose ame kun' ödrin ûnyi hnyi hnyebuba Parana, helâ me Iehova ame ha: haba ödrin hia ödrin je taben lakon Isaraela. 4 Ke walang je iödrin; Samua, nöku Zakuri, ûnyi hnyi tribu Reubena. 5 Ke haba ûnyi hnyi tribu Simeona, Safata nöku Hori. 6 Ke ûnyi hnyi tribu Juda, Kaleba, nöku Jefune. 7 Ke ûnyi hnyi tribu Isakara, Igala, nöku Josefa. 8 Ke ûnyi hnyi tribu Eferaima, Hosea, nöku Nuna. 9 Ke ûnyi hnyi tribu Beniamina, Paleti nöku Rafu. 10 Ke ûnyi hnyi tribu Zebulona, Gadiela, nöku Sodi. 11 Ke ûnyi hnyi tribu Josefa, a wale tribu Manase, Gadi, nöku Susi. 12 Ke ûnyi hnyi tribu Dana, Amiela, nöku Gemali. 13 Ke ûnyi hnyi tribu Asera, Setura, nöku Mikaela. 14 Ke ûnyi hnyi tribu Nafatali, Nahebi, nöku Vofesi. 15 Ke ûnyi hnyi tribu Gada, Geuela, nöku Maki. 16 Wale ien hnyat Mose ame kunâ he ka ecmâkâ hnyei. Ke Mose ame hwenyi iö Hosea, a nöku Nuna, me, Josua. 17 Ke Mose ame kun' ödrin he ka ecmâkâ hnyei Kanana, me ha ködrin, ka habe, Öbun e he ka ölö hnyi Hwaiöu, ke öliâ thö je bucen: 18 me wâ hnyei habe ehö; ke tavat adre labâ, hawa ödra tavat ae hwege, ame ne tavat ae ngâ, ame ne tavat ae se hia ame ne wakhalet thibi; 19 ke ehö hnyei adre me labâ, ame ne so, ame ne kong; ke ehö je taun adre me labâ, ame ne je hna hunuma, k' ame ne je hñabâ ae hwege; 20 ke ehö kânâ, ame ne pipikhenya ame ne delâ, ame ne hu je úö, ame ne ba. Ke hwege th' öbun, ke

öbun e he ka hom jem hanen jeüny kânâ. Haba ien eling, me ien wan vine a bân. 21 Ke ödrin e ölö thö me ecmâkâ hnyei hwân hnyi hnyebuba Zine ke ne o but Rehoba, ke ne o but hnyi gethen ûheny Hamath. 22 Ke ödrin e ölö hnyi Hwaiöu, me o hnyi Heberona; wale Ahiman, me Sesai, me Talemai, a laku Anaka. (Ke haba Heberona, me adre bödra ka op e ehac seven ta huna e tiga ca op Zoana hnyi Aigupito.) 23 Ke ödrin e o but hnyi Esekolo a hnyigöulen bucen, me sö but eling ke vheiny me thi wan vine a khaca, me vaden hnyi venyâ hnen li at a lo; ke ödrin e hom minya je wan rimona, me je wau ometa. 24 Ke adre hwenyi ien dok eling Esekolo hnyi hnyigöulen bucen, can thi vine a sö lakon Isaraela eling. 25 Ke ödrin e hmetu ûhedrin hnyi hna ecmâkâ hnyei hwaban je bong a fâte. 26 Ke ödrin e hmetu but me o kö Mose me Arona, me ûkhacaköu hia anyin lakon Isaraela, ka hnyi hnyebuba Parana, wale Kadesi; me oâ úthûmetu ködru, me ûkhacaköu hia anyin lakon Isaraela, me omanenâ ködra waniny kânâ. 27 Ke ödrin e thumeto e, ka habe, Öhmun e o but ka hnyi hnyei u je kun' öhmun ka hnyin, ke e hnathu ame di ge debai me hani; ke walang waniny. 28 Ke so bi e hwege tavat a idra hnyei, ke adre up haginy je taun, ke e ti gan: ka öhmun e wâ eling je laku Anaka. 29 K' ame laba Amaleka hnyi ke keihen ka hnyi Hwaiöu: ke haba hnyi je bucen ame laba hnyat Heth, me Jebusi, me Amora: k' ame laba at Kanana hnyi hobat köiö me hnyi baten Joridano. 30 Me haba Kaleba ame thawâ tavat hnyi hnyimakö Mose, me ha, ka habe, E so ötin e ie he me hûgônâ; anyin ae khan' ötin he ka hwege hon. 31 Ke haingen tavat ödrin e tha ölö mä, ka habe, E ca khan' öta he ka ölö thö ka tavat eling, anyin a ödra hwege huta. 32 Ke ödrin e haikongoâ hnyei ödrin e ecmâkâ ka lakon Isaraela, me ha, ka habe, Haba hnyei öhmun e vheno me ecmâkâ, me hnyei ame ohia aten, ke haba tavat hia öhmun e wâ eling, me tavat ae beú. 33 Ke öhmun e wâ eling ta je hmai ae beú hmâ, a je laku Anaka, a mâtrâniny je hmai ae beú, ke öhmun helâ me je wahamon hnyi hnyimakköhmun, ke helâe minya hnyi hnyimakködrin.

HNYIMAKAN 14.

KE ame tenge hwege úkhacaköu hia, k' ame tenge thungaú tavat hnyi lit eling. 2 Ke ame haiö Mose me Árona hnen lakon Isaraela hia : ke ame ha ködru hnen úkhacaköu hia, ka habe, Öhmun na moku hnyi hnyei Aigupito! ke öhmun na moku hnyi hnyebuba eang! 3 Ke ieú e ga Iehova a hum öhmun ka hnyi hnyei eang he ka mok ge hele vat? Adre me he ka hügúnâ laööhmun me lakuhmun je wanakat : hawa e ca so kohmun he ka hmetu Aigupito ai? 4 Ke adre me uhaköuâ, ka habe, E so ötin e úca at me me than, k' ate me he ka hmetu Aigupito ai. 5 Me haba Mose me Arona ödru me ta ju hnyimaködru hnyikánâi hnyi hnyimakan tavat hia, wale úkhacaköu anyin lakon Isaraela. 6 Ke haba Josua nöku Nuna, me Kaleba nöku Jefuna, ödre hnyi ecmákâ hnyei, me, ödru me kia but anyidra je úkhaú : 7 ke ödre ha ka úkhacaköu hia anyin lakon Isaraela, ka habe, Haba hnyei öhmun e vheno me ecmákâ me hnyei ae so hmönyin. 8 Ame ne senyin köta Iehova, me e ame he ka hum öta ka hnyi hnyei, me ham köta ; a hnyei ame di hnyin debai me hani. 9 Ke so bi ca he öbun ke ivinö me Iehova, ke ca he öbun ka outen tavat a idra hnyei ; anyin a ödra areto bi hobi köhmun : k' adre hia but hom unyidra únyi hnân tu' ödra bi, ke e unyita Iehova : ca out' ödra. 10 Ke haba úkhacaköu hia adre me ha he ka lu' ödru ge veto. Me ame manen hmanenangi Iehova hnyi uma úkhacaköu ka lakon Isaraela hia.

11 Ke Iehova ame ha kö Mose, ka habe, Ame he tavat eang ka húkötio nya ke ne o but kehö? adre me ca he ka labageju könya ke ne o but kehö, ge ta je úöman hia waleji oge ányâ unyidra? 12 Oge me he ka kuc ödra ge mok me ohia hwajaköüdra, ke oge me he ka wiö u hnân hnyei ae gan me man hudra. 13 Ke haba Mose ame ha kö Iehova, ka habe, Me ame he ka löng hnen at Aigupito ; anyin a u je hom tavat eang únyi gadra ge manâm man ; 14 ke adre me he ka thumeto tavat a gadra hnyei ang : ke adre löng a u Iehova anyin tavat eang ; anyin a u Iehova u me úhnyimaköu mödra, ke ame tot hudra ányâm úlá, ke haba u hnyimakan anyidra bunyen, hnyi úlá ame tot wisa hnyi lany, me meic ame tot wisa hnyi lit. 15 Ke walang ang u ka hlingá tavat eang helá me at a khaca, awe, ame he

ka ha hnen je hnyei adre me löng ányam lung, ka habe, 16 Anyin ae ca khanö Iehova he ka hom tavat eang ka hnyi hnyei e ame khemanyin ködra, me wale e ame hling' ödra hnyi hnyebuba. 17 Ke walang ang, ö e gan dut man manin Than, hoton hnâm hna kú, ka habe, 18 At ae bec he ka hmönyin Iehova, ke gan hmâ anyin ibetengio, k' ame degecâ hulö, me monu, k' ame ca he ka ha ae ba kongon at ae kong ; ke e ame bi hwaban monu anyin je kamen ka je lakon, ke ne o but ka hnyi dö a kuniny me vakiny. 19 Ö u degec ut konginy tavat eang hoton úganiny ányâm ibetengio, ke hoton hnâm hna thang monu anyin tavat eang, waleji hwân hnyi Aigupito ke ne o but hnyi bong ang. 20 Me haba Iehova ame thu, ka habe, Awe oge me hna degecâ hoton hwâm hofuc. 21 Ke kia inya inya a g ame he ka unöngöt hmeledrany hia ge hmanengi Iehova ; 22 ke can anyin a olibenyita cubic nya hnen tavat hia eang adre me wâ hmanenangik me anyik je úöman, waleji oge ányâ hnyi Aigupito, me hnyi hnyebuba, k' adre ca löng hok hofuc ; 23 awe, adre me ca he ka wâ hnyei waleji oge khemanyin ka lakamödra, k' ame ca he ka wâ e hnen tavat adre me húkötio nya : 24 ke haba athnyabaik a Kaleba, anyin a e at ae ke hnyekon, ke e ame tha löng hotuk, awe oge me he ka hom e ka hnyi hnyei wale a mwi hnyin ; k' ame he je mátrániny ka hu e. 25 Haba at Amaleka me Kanana adre me laba hnyi hnyigöulen bucen : ke haba nyi öbun e he ka hwiö me he ka hnyi hnyebuba, gethen ka hnyi Köio ae Dra.

26 Ke Iehova ame ha kö Mose me Arona, ka habe, 27 Oge me he ka hokhnyoká ke ne o but kehö úkhacaköu eang ae kong, tavat adre me ulidri nya? oge löng ut ulit anyin lakon Isaraela wale adre me ulidri nya. 28 Ha thö ködra, ka habe, Haingö Iehova, kia inya inya oge me he ka ányâ köbun helá me hnöbun hna ha hnyi li hnyikönyök : 29 k' ame he ka mok ta je unyibun hnyi hnyebuba eang ; ke öbun hia wale tavat adre aú, hoton hna sihnalimbun hia, hwân ge tavat a twente huna me gan hon e, a tavat adre ulidri nya, 30 e hnathu öbun e ca he ka o ka hnyi hnyei waleji oge hai hnyamök he ka olab' öbun hnyin, ke so thibi Kaleba nöku Jefuna, me Josua nöku Nuna. 31 Ke haba lakubun je wanakat wale öbun e ha a g' ame he ka hügúnâ hnen vat, me oge me he ka hum ödrin bi, ke adre me he ka wâ hnyei öbun e

hükötiä. 32 Ke haba öbun, me ame he ka mok je unyibun hnyi hnyebuba eang. 33 K' ame he lakubun- ka he monumonu hnyi hnyebuba hnyi je huna a fâte, k' ödrin e he ka hijen tilâ hnöbun je hna bi ünüi monu, ke ne o but ame aü degecâ je unyibun hnyi hnyebuba. 34 Helâ he üseiny je bong öbun e ecmâkâ hnyin hnyei, a fâte je bong, me haba khaca bong ame he ka khaca huna, k' öbun e he ka hijen tilâ anyibun hulö, hnyi je huna a fâte, ke öbun e he ka wâhmakhmetoâ hnök hna hwio. 35 Inya Iehova oge me fuc, k' oge me he ka ânyâ eling ka ûkhacaköu hia ae kong eang, adre tot meta kõnya: adre me he ka ohi' ödra hnyi hnyebuba eang, k' adre me he ka mok eling. 36 Ke haba tavat a kunâ Mose he ka ecmâkâ hnyei, wale hnyat ödrin e hmetu me oâ ulidro ûkhacaköu hia gan, ke ödrin e haikongoâ hnyei, 37 haba hnyat eling ödrin e hom ûthumeto ae kong ge hnyei, me ödrin e mok hia hnyi hnyimakö Iehova hnen mok ae gan. 38 Ke haba Josua nöku Nuna, me Kaleba nöku Jefune a li at ödre hnyi ecmâkâ hnyei, me ödre möt biju. 39 Ke Mose ame thumetu lakon Isaraela hofuc eling: me ame tenge hwege tavat. 40 Ke adre me vesâkong, me öliâ bucen, me ha, ka habe, Wal' öhmun ang, ke öhmun e he ka he ka hnyi hnyei ame ha Iehova, anyin ae kong hwakecihmun. 41 Ke Mose ame ha, ka habe, Ieü gabun öbun e hanyâûâ hnanyibu anyi Iehova, k' ame ca he bi ka hwâdâ? 42 Ca öl' öbun, anyin a ca e unyibun Iehova, wâ e nye kuc öbun hnen je iwahnaihmiony möbun. 43 Ke wala at Amaleka me at Kanana hnyi hnyimaköbun, k' öbun e he ka ta ge hele vat; anyin a öbun e hmetu ünüi ga Iehova, me waleling ame ca he Iehova ka tha e möbun. 44 Ke hwege hnyimaködra he ka öliâ bucen: ke so bi ame ca he ünüi hnyi hna hunuma tangen ûhinyökö anyi Iehova, me Mose. 45 Ke ame utut at Amaleka me at Kanana, a wale tavat adre me laba hnyi bucen eling, me adre me kuc ödra me hnu ödra hmetu ke ne o but Horema.

HNHYIMAKAN 15.

KE Iehova ame ha kö Mose, ka habe, 2 Ha thö ka lakon Isaraela, me ha ködra ka habe, Öbun ka o ka hnyi hnyei öbun e he ka labâ wale oge ham köbun, 3 ke öbun ka he ka bi hut a an ge meic kö

Iehova, ame ne hudiny leü, ame ne hudiny thamüö khöbi, ame ne hudiny ibetengiö, ame ne hnyi anyibun je bijeü adre thu, me me bo so kö Iehova, ame ne kau, ame ne unamoe: 4 awe, hamen at a hom hut kö Iehova he ka hom hudiny han a khaca omer falawa adre ûhaniken me wakaco a ke keihen hin a vakiny: 5 me tap waina hnân hudiny ic a ke keihen a vakiny hin u me he ka tha penapena me hudiny leü, ame ne ke hut bi, me wale hobi kâu je ve lakon mamoe. 6 Ame ne mamoe бага, me u me he ka penapena hnân hudiny han lo li omer falawa adre ûhaniken me wakaco wale ke keihen a kuniny hin: 7 ke u me he ka hudo tap waina wale ke keihen a kuniny hin hnân hudiny ic ae bo so kö Iehova. 8 Ke u ka he ka penapena bolok hnân hudiny leü, ame ne hudiny thamüö khöbi, ame ne hudiny ole kö Iehova: 9 me e ame he ka tha hom me bolok hudiny han a kun ta omer falawa adre ûhaniken me wakaco a hafiny hin. 10 Ke u me he ka hom tap waina a hafiny hin, hnân hudiny ic, a hut a an ge meic ae bo so kö Iehova. 11 Adre me he ka ânyâ helâe hobi kâu je ve bolok, ame ne je ve mamoe бага, ame ne nokon mamoe бага, ame ne nokon got. 12 Öbun e he ka penapena hoton üseiny je hut, ke helâe öbun e he ka ve ânyâ hoton üseiny. 13 Ame he je aten hnyei hia ka ânyâ helâe, ödra ka he ka hudo hut a an ge meic ae bo so kö Iehova. 14 Ke ame ne laba unyibun atkanyua, ame ne ke at bi unyibun hnyi anyibun je dö, ke e ka he ka hudo hut a an ge meic ae bo so kö Iehova; me e ame he ka ânyâ helâ me hnöbun hna ânyâ. 15 Khaca thibi hnanyibu köbun, a wale ûkhacaköu me atkanyua ame laba unyibun, wale hnanyibu nyiele balua hnyi anyibun ta je dö: haba öbun me tha ücü me atkanyua hnyi hnyimakö Iehova. 16 Khaca hnanyibu, ke khaca tulut hobi köbun me hobi kâu atkanyua ame laba unyibun.

17 Ke Iehova ame ha kö Mose, ka habe, 18 Ha thö ka lakon Isaraela, me ha ködra, ka habe, Öbun ka o ka hnyi hnyei oge me ham öbun ka hnyin, 19 ke öbun ka he ka han jeünny hnyei, me öbun e he ka hudo hudiny kap göranyai kö Iehova. 20 Öbun e he ka hudo ke ong areto ünüi hnyi anyibuu falawa a bân hnân hudiny kap göranyai: öbun e he ka kap e göranyai helâ me hno- bun hna kap göranyai hut ünüi hnyi hna uja hwit. 21 Öbun e he ka ham kö Iehova

hudiny kap göranyai únyi hnyi anyibun falawa a bán hnyi anyibun ta je dö.

22 Ke öbun e ne haú, me ca ányâ bi je hnanyibu hia eang wale a ha Iehova kö Mose, 23 a ta je únyi hia waleji ame húna hnö Iehova köbun a deny Mose, hwân hnyi bong Iehova ame húna hnyin ke ne o but nyiele hnyi anyibun ta je dö: 24 haba hnyi úen e, adre me ne ányâ haúâ, ke ca khana bi hnen úkhacaköu, me hamen úkhacaköu hia he ka hudo ke nak bolok hnân hudiny leú ae bo so kö Iehova, tha e me hudiny han, me hudiny ic, hoton tulut, me nokon minya got a khaca hnân hudiny hulö. 25 Ke hamen at bihut he ka bi hwaban möt anyin úkhacaköu hia anyin lakon Isaraela, k' adre me he ka hn' ödra; anyin adre haú, k' adre hia but hom anyidra hut, wale hut a an ge meic kö Iehova, me hudiny anyidra hulö hnyi hnyimakö Iehova, can hnödra hna haú; 26 k' adre me he ka hna úkhacaköu hia anyin lakon Isaraela, me atkanyua ame laba unyidra; anyin adre ányâ haúâ hnyi hnyimakan tavat hia. 27 Ke ame ne ányâ hulö ke at a khaca ke ca khana, me e ame he ka hom got momo a khaca hunainy hnân hudiny hulö. 28 Ke ame he at bihut ka bi hwaban möt anyin at a ányâ ke ca khana, k' ame ányâ haúâ hulö, hnyi hnyimakö Iehova, me me bi hwaban anyin möt: ke adre me he ka hna e. 29 Ame he ka hu gabun hnanyibu a khaca hobi káu at ame haú ame ne aten hnyei unyin lakon Isaraela, ame ne atkanyua ame tha laba unyidra. 30 Ke haba at ame ányâ sheshamöká ke únyi, ame ne aten hnyei ame ne atkanyua, me wale at ame bi gan kö Iehova; ke adre me he ka subâ degecâ at eling únyi hnyi iny hnyei. 31 Anyin a e ame höciâ hofuc ho Iehova, me hanyáúâ anyin hnanyibu; k' adre me he ka ti suba degecâ at eling, k' ame he ka takoú e ge anyin hulö.

32 Ke hnyi úen lakon Isaraela adre me he hnyi hnyebuba, me adre me lelö ke at ame hlu utö hnyi bong sabath. 33 Ke haba hnyat ödrin e wâ at ame tiga hlu utö hnyi bong sabath, me ödrin e lelö e kö Mose me Arona me úkhacaköu hia. 34 Ke adre me hna e ka tavat tue, anyin ae tiga ca manen únyi adre me he ka ányâ káu. 35 Ke haba Iehova ame ha kö Mose, ka habe, Adre me he ka hlingâ at: ke hamen úkhacaköu hia ka lúâ e ge veto hnyi hoton hna hunuma. 36 Me haba úkhacaköu hia adre me hom e ka hnyi hoton je hnyaba,

me lúâ ge veto, me ame mokcu; helâ me Iehova ame húna kö Mose.

37 Ke Iehova ame ha kö Mose, ka habe, 38 Ha thö ka lakon Isaraela, me ha ködra, ka habe, Adre me he ka bi bábuén baten je khaúdra hnyi anyidra je dö, ke adre me he ka ip telenu ae udrudrá hon baten bábuén: 39 ke wale bábuén köbun, m' öbun e he ka wâ e me únykúme ta je hnanyibu anyi Iehova hia, me vheno; m' öbun e ca he monu hoton je hnyekubun me je li emaköbun, waleji öbun e labö bi únyi monu hoton: 40 m' öbun e he ka únykúme me ányâ hoton anyik je hnanyibu hia, m' öbun e at ae kap ka Khongubun. 41 Inya Iehova Khongubun, waleji at ame hum öbun únyi hnyi hnyei Aigupito, me me Khongubun: Inya Iehova Khongubun.

HNYIMAKAN 16.

KE haba Kora nöku Izara, a nöku Kohatha, a nöku Levi, tha e me Dathana me Abirama a li laku Eliaba, ke Ona nöku Peleth, a kun ta laku Reubena, ödrin e hokhien: 2 ke ödrin e todrö kö Mose, ke tha e mödrin ke je lakon Isaraela, a ödrin tu haded ke fite je tuhan úkhacaköu, tavat adre úca hnyi úkhacaköu, tavat ae lung: 3 ke ödrin e úkhacaköu kö Mose me Arona, me ha ködra, ka habe, Öbu me bi gan, anyin ae tha kap úkhacaköu hia a ke at me ke at, ke e unyidra Iehova: anyin a wale iéú gabu öbu me ogöranyi öbu bi hon úkhacaköu hia anyi Iehova? 4 Ke a löng ut Mose, me e ame ta ju hnyimakan hnyikânâi: 5 ke e ame ha kö Kora mödrin hia a tha e mē, ka habe, Nyi ame he Iehova ka omanenâ lahien, me tavat ae kap, me ohakekenyâ káu: eke, haba at e ame úca me e ame he ka ohakekenyâ káu. 6 Ányâ thö ang; e so Kora me lahien hia ame hom je taben meic; 7 me ip meic hnyin, me aoc je únyi ae bo so ka hnyin hnyi hnyimakö Iehova nyi: ke haba at a úca hnö Iehova, me wale at ae kap: ke öbun e bi gan, öbun laku Levi. 8 Ke Mose ame ha kö Kora, ka habe, Öbun na löng ju öbun laku Levi: 9 hawa, únyi ae úhnyúkong köbun a g' ame hake ip öbun únyi hnyi úkhacaköu anyin at Isaraela nhen Khongon at Isaraela, me ohakekenyi öbun káu he ka ányâ huliwa hnyi uma mano anyi Iehova, me tot hnyi hnyimakan úkhacaköu he ka huliwa ködra; 10 ke e ame hia but ohakekenyi u me je liamekeiny

möu a je laku Levi? ke öbun e behom minya hanymen at bihut? 11 Anyin a wale haba u me je lahiâm, öbun e tot kö Iehova: ke ie Arona m' öbun e ulidró? 12 Me haba Mose ame úkhûnöng he ka hao Dathana me Abirama, a li laku Eliaba; ke haingödrü, ka habe, Öhmu me ca he ka he: 13 hawa únyi a úhnyükong a u je hum öhmun jem únyi hnyi hnyeí ame di hnyin debai me hani, he ka hling' öhmun hnyi hnyeubaba, ke u je wem minya he ka bi than humun? 14 Ke haba khaca, u je ca hia but hum öhmun ka hnyi hnyeí ame di hnyin debai me hani, k' u me ca ham köhmun hwajekon a ihmun me ihmun hnyeí vine: hawa, u me he ka owadruá tavat eang? awe öhmu me ca he ka he. 15 Me ame ubáhlá hmönyin anyi Mose, me e ame ha kö Iehova, ka habe, U me ca he ka wá anyidrin hut: ke ba haledrin asina oge hom, ke oge ca okongo ke at a khaca gadrin. 16 Ke haingö Mose kö Kora, ka habe, He but nyi me je lahiâm hnyi hnyimakö Iehova, a u, mödrin, me Arona: 17 ke öbun e he ka ve hom anyibun je taben meic, me auk únyi ae bo so ka hnyin, ke öbun e he ka ve hom jem hnyi hnyimakö Iehova anyibun je taben meic, a tu haded ke fite je taben meic; haba u me Arona öbu me he ka ve hom anyibu li taben meic. 18 Ke ödrin e ve hom anyidrin je taben meic, me ip meic hnyin, me auk únyi ae bo so ka hnyin, me útitilen hnyi hwanumen uma úkhacaköu, a tha ödrin me Mose me Arona. 19 Ke haba Kora ame hawá úkhacaköu hia úcúdrü ka hnyi hwanumen uma úkhacaköu: ke ame manen dut hmanenangi Iehova ka úkhacaköu hia.

20 Ke Iehova ame ha kö Mose me Arona, ka habe, 21 Úsákáúö but öbun me úkhacaköu eang, m' inya he ka obi' ödrin hnyi thuthubademak. 22 Ke ödrü me ta ju hnyikánái, me ha, ka habe, Khong lö, Khongon hanon tavat hia, ame ne kong hwakecin at a khaca, me hawa u me he ka hmönyin ka úkhacaköu hia? 23 Ke Iehova ame ha kö Mose, ka habe, 24 Ha thö ka úkhacaköu, ka habe, Ve kec ut únyi hnyi uma umö Kora, me Dathana, me Abirama. 25 Ke Mose ame köüö thö, me he kö Dathana me Abirama; k' ame he hoton wahingatiny at Isaraela. 26 Ke e ame ha ka úkhacaköu, ka habe, Öbun na vese but únyi hnyi je uma mano umen hnyat eang ae kong, ke ca kálá ke únyi gadrin, wá öbun nye tha mok ge anyidrin je hulö.

27 Me adre me kec me vese but únyi hnyi uma mano umö Kora, me Dathana, me Abirama, hnyi je ke keihen hia: me haba Dathana, me Abirama ödrü me didrut me tot hnyi hwanumen umödrü li uma mano, tha ödrü me laöiödrü me lakudrü obaga, me lakudrü ae úhnyükong. 28 Ke Mose ame ha, ka habe, Walang haten m' öbun e he ka wáhmakhmeto a g' ame kunö nya Iehova he ka ányá ta je huliwa hia eang; anyin a ca únyi gak. 29 Ame ne he ka mokcu tavat eang helá me man imekiny tavat hia, k' ame ne he ka o ke únyi ka tavat eang helá me ioiny ka tavat hia; awe a ca kunö nya Iehova. 30 Ke ame ne he Iehova ka ányá ke únyi a teb únyi, k' ame ne memang ut káná me ut' ödrin, me ta je únyi hia unyidrin, ke ödrin e ne dit ke möt hedis ai; awe, öbun e he ka wáhmakhmeto a g' ame húkötüö Iehova hnen hnyat eang. 31 Ke e ame um dö ha ta je hofuc hia eling, me ame khekke but káná hmelidrin: 32 me ame memang ut káná me ut' ödrin me umödrin je uma, me tavat hia a tha ödrin me Kora, me anyidrin ta je únyi hia. 33 Ke haba ödrin me tavat unyidrin hia ödrin e tha dit ke tiga möt bi hedis ai; ke ame buhlum hmetu ju káná hudrin, me hi' ödrin únyi hnyi úkhacaköu. 34 Ke haba at Isaraela hia ödrin e útitilen, me, ödrin e kec ge hwatenge a ödrin: anyin a haingödrin, Wá e nye ut' ötin minya but ge káná. 35 Ke ame o but meic únyi ga Iehova me le degeci ödrin a tu haded ke fite, hnyat ödrin e hudo únyi ae bo so.

36 Ke Iehova ame ha kö Mose, ka habe, 37 Ha thö kö Eliazara nöku Arona at bihut, me me hom je taben meic únyi hnyi hna hlá, k' u ma he ka kot degecá meic e helé; anyin a wale únyi ae kap; 38 a je taben meic anyin hnyat ae hulö ang ödrin e bi jöning anyidrin möt: ke e so adre me kot lauá ta je únyi e ge hama, me hnán tube taben hut: anyin a ödrin e hudo hnyi ta je únyi e hnyi hnyimakö Iehova, anyin a wale e kap: me me hnán haten ka lakon Isaraela. 39 Me haba Eleazara at bihut ame hom je taben meic bras wale a hudo hnyin tavat adre thong degecá; me adre me olauá ta je únyi e hnán tube taben hut: 40 me hnán oúnykúmeá ka lakon Isaraela, me me ca he ka hakekenyá ge atkanyua a ca hanen je mátráni Arona, he ka hudo únyi ae bo so kö Iehova; me me ca he ka helá me Kora me lahien, hoton hofuc ho Iehova káu a deny Mose.

41 Ke haba nyi ame ulidri Mose me Arona hnen úkhacaköu hia, me habe, Óbe hlingá je atö Iehova. 42 Ke hnyi úen ame úkhacaköu tavat úcü Mose me Arona, me adre me bwele ka hnyi uma úkhacaköu: ke wá bi úlá ame tube e, ke ame manen dut hmanenangi Iehova. 43 Ke haba Mose me Arona ödrü me he ka hnyi hnyimakan uma úkhacaköu. 44 Ke haba Iehova ame ha kö Mose, ka habe, 45 He th'öbu únyi hnyi úkhacaköu eang, m' inye he ka ohí' ödra hnyi thuthubademak. Me ödrü me ta ju hnyimaködrü hnyikânái. 46 Ke haba Mose ame ha kö Arona, ka habe, Hom dö ányám taben meic únyi hnyi bon taben hut, me auk únyi ae bo so, me ie wadring dö ka úkhacaköu, me bi hwaban anyidra möt: anyin ame o hmönyin únyi ga Iehova; ke ame hwán dö mok ae gan. 47 Ke haba Arona ame hom helá me hnö Mose hna ha, me ame wadringá ka hnyi wanben úkhacaköu; ke wá bi ame hia but kú thö mok ae gan unyin tavat: me e ame bi únyi ae bo so ka hnyin, me bi hwaban möt anyin tavat. 48 Ke e ame tot hnyi ke dok a wanben tavat ae mok me tavat ae möt; k' ame so ju mok ae gan. 49 Ke haba tavat a mokcu hnen mok ae gan me ödra fotin thauzan ke seven haded, ke ca ha bi tavat a mok can bongu Kora. 50 Ke Arona ame hmetu kö Mose hnyi hwanumen uma úkhacaköu: ke hia but mok ae gan.

HNYIMAKAN 17.

KE Iehova ame ha kö Mose, ka habe, 2 Ha thö ka lakon Isaraela, me hom únyi gadra je uci a úsa khaca hoton je hnyaban lakamödra, únyi ge anyidra je than hia hoton je hnyaban lakamödra, a twelw je uci: ke u me he ka ve sihnalimen je iödrin hnyi anyidrin je uci. 3 Ke u me he ka sihnalimen iö Arona hon uci anyi Levi: k' ame he ka úsa khaca uci hobi káu je ve taben lap anyin lakamödrin. 4 Ke u me he ka ip je uci hnyi uma úkhacaköu cicö tangen ohnatho, dok oge me labö iony möbun hnyin. 5 Ke haba at oge me he ka úca, me ame he ka vhong anyin uci: me oge me he ka bi obiny gak je hna ulidri nya ge lakon Isaraela, wale adre me ulidri öbu. 6 Ke Mose ame fuc ka lakon Isaraela me anyidra je than hia, m' ödrin e ve ham káu je uci, a úsa khaca uci anyin ke than me ke than hoton je hnyaban lakamödrin, a twelw je uci. 7 Ke haba Mose

ame ip je uci hnyi hnyimakö Iehova hnyi uma ohnatho. 8 Ke nyi Mose ame didrö ka hnyi uma ohnatho; ke wá bi a vhong ut uci anyi Arona hobi káu hnyaban at Levi, ke a hlau but, ke vhong je vhongon, me wa but a je wan saked. 9 Ke haba Mose ame hom je uci hia únyi hnyi hnyimakö Iehova ka lakon Isaraela: m' adre me wá, me ve hom anyidrin uci. 10 Ke Iehova ame ha kö Mose, ka habe, Ip hmetu ju uci anyi Arona ka hnyi cicö tangen ohnatho, m' adre me tuö me hnân haten ka tavat bi tot; m' u me he ka bi obiny hnödra hna ulidri nya, m' adre me ca he ka mok bi. 11 Ke Mose ame ányá helá me Iehova ame huna káu, wale hnen hna ányá.

12 Ke haba lakon Isaraela adre me ha kö Mose, ka habe, Wá bi, öhmun e he but ang ka mok, me hia, me hia hia. 13 Haba tavat hia adre me he hakekenyá, wale adre me hakekenyá uma mano umö Iehova, adre me mok: ke hawa adre me he ka hling' öhmun hia thithö?

HNYIMAKAN 18.

KE Iehova ame ha kö Arona, ka habe, Hámám me lakom, me hnyaban lakamám a tha e möu he ka vaden hulöiny dok ae kap: ke hámám me lakom a tha ödrin möu he ka vaden hulöiny hanymen bi hut. 2 Ke u me he ka tha öuhakekenyá je liamekeiny möu, a tribu Levi, a tribuiny lakamám, me the a bala möu, me huliwa köu: ke hámám me lakom a tha ödrin möu he ka huliwa cicö uma ohnatho. 3 Ke ödrin e he ka tuö hanymám, me hanymen hia hnyi Uma: ke so bi adre me ca he ka hakekenyá je utkaiainy dok ae kap, me taben hut, m' adre me ca mok, m' öbun minya. 4 Ke adre me he ka tha ödra möu, me tuö hanymen hnyi uma úkhacaköu, hobi káu huliwainy Uma: k' ame ca he atkanyua ka hakekenyi öbun. 5 Ke öbun e he ka tuö hanymen hnyi dok ae kap, me hanymen hnyi taben hut: me me ba hmetu bi hmönyin ka lakon Isaraela. 6 Ke wá bi, inya oge hia but hom je liamekeiny möu a at Levi únyi hnyi wanben lakon Isaraela; adre ham ödra hnân bwihlany kö Iehova hnyi hnyimaköbun, he ka ányá huliwa hnyi uma úkhacaköu. 7 Ke u ma he me lakom a tha ödrin möu ka tuö hanymen a hnöbun hna bi hut ta je únyi hia hnyi taben hut, me ta je únyi eiö hnyin singiny; ke öbun e he ka huliwa: Inya öge me ham

köbun hanymen at bihut helâ me huliwa adre ham : k' adre me he ka hlingâ atkanyua at ame hakekenyâ.

8 Ke Iehova ame ha kö Arona, ka habe, Wâ bi, inya oge hia but ham köu hanymen hudiny kap göranyai könya, a wale je únyi ae kap hia ge lakon Isaraela, oge hia but ham köu ta je únyi e can hnödra hna hû, me hobi kâu lakom hnân hwajekhon nyiele balua. 9 Walang ânyâm únyi hnyi ta je únyi ae kap hmönyin, únyi hnyi meic : a anyidra je hut hia, me je hudiny hia anyidra han, me je budiny hia anyidra hulö, me je hudiny hia anyidra monu, adre me he ka ham könya, wale ae ti kap hobi köu me lakom. 10 U me he ka an je únyi e helâ me ta je únyi ae ti kap ; ame he obaga hia ka an je únyi e ; e kap e hobi köu. 11 Ke walang ânyâm ; a hudiny kap göranyai adre ham, wale je hudiny hajijing hia anyin lakon Isaraela : oge hia but ham ta je únyi e köu me lakom obaga me wahu a tha ödrin möu, hnân hwajekhoú nyiele balua : haba tavat hia ae bo so hnyi hnyabam adre me he ka an je únyi e. 12 Haba soiny wakaco hia, me soiny waina hia me hwit, a je wan a bân adre me ham kö Iehova, haba ta je únyi e oge me ham köu. 13 Haba je wan hia a bân ae mat hnyi hnyei adre me ham kö Iehova, me wale âm ; k' ame he tavat hia ae bo so hnyi hnyabam ka an je únyi e. 14 Haba ta je únyi hia adre okâbâ hnyi Isaraela me wale hnân hobi köu. 15 Haba ta je únyi adre hnokoâ a bân, a ta je únyi hia adre ham kö Iehova, ame ne at ame ne meno, me wale hobi köu : ke so bi u me he ka bi hnen je wanakat a bân, ke u me he ka bi hnen je nokon meno a bân ae bo kong. 16 Ke haba ta je únyi adre me he ka bi hnen, hwân ge at a khaca tehi, me u me he ka bi hnen hoton únyi ae úcú köu, a thabúng ta sekel, hoton sekeliny dok ae kap, (wale twente je gera). 17 Ke haba nokon kau a bân, me nokan mamoe a bân, me nokon got a bân, me u me he ka bi hnen ; ödra kap : ke u me he ka dukâiâ taben hut ge drödrin, me le pipikhenyaidrin hnân hut a an ge meic, me hnân bo so kö Iehova. 18 Ke haba utiödrin me ânyâm, helâ me úlainy hajijing, me helâ me jevan a metâ, a hnân hobi köu. 19 Haba je hut hia adre kap göranyai únyi hnyi ta je únyi ae kap ame he lakon Isaraela ka hudo kö Iehova, me wale oge me ham köu, me lakom obaga me wahu unyâm, helâ me hwaje-

khôu nyiele balua : ke wale úhihinyköuiny sâlt nyiele balua hnyi hnyimakö Iehova, hnân hobi köu, me je mâtânâm unyâm. 20 Ke Iehova ame ha kö Arona, ka habe, U me ca he ka hu em hnyi idra hnyei, ke u me ca he ka hu hwajekhom unyidra : inya bi a hwajekhom me em unyin lakon Isaraela.

21 Ke wâ bi oge me ham ka laku Levi ke keihen a libenyitainy ta je únyi hia hnyi Isaraela hnân idra, me hwaban anyidrin huliwa ödrin e ânyâ, wale huliwainy uma úkhacaköu. 22 Ke hwân ang me ame ca he bala lakon Isaraela ka hakekenyâ uma úkhacaköu, wâ e nye takú ödra ge hulö, m' adre me mokcu. 23 Ke ame he at Levi ka ânyâ huliwa hnyi uma úkhacaköu, k' ödrin e he ka vaden anyidrin hulö : wale hnanyibu nyiele balua hnyi anyibun ta je dö, k' ödrin e ca he ka hu idrin unyin lakon Isaraela. 24 Anyin a haba ta je ke keihen a libenyitainy únyi ge lakon Isaraela, wale ödrin e hudo kö Iehova hnân hudiny kap göranyai, me wale hnök hna ham ka at Levi hnân hwajekhöüdrin : waleling m' oge me hia but ha ködrin, ka habe, Ame ca he ka hu hwajekhöüdrin unyin lakon Isaraela.

25 Ke Iehova ame ha kö Mose, ka habe, 26 U me he ka ha ka at Levi, me ha ködrin, ka habe, Öbun ka he ka hom únyi ge lakon Isaraela ke keihen e libenyitainy wale oge ham köbun únyi gadra hnân hwajekhoú, me öbun e he ka hudo únyi gan hudiny kap göranyai kö Iehova, wale ke keihen a libenyitainy únyi hnyi libenyitainy. 27 Ke adre me he ka únykúme köbun hudiny anyibun kap göranyai, me me tha úcú me hwit únyi hnyi hna huje hwit, ke helâ me hna hlec wan vine ae únöngöt. 28 Ke helâe öbun e he ka hudo hudiny kap göranyai kö Iehova, únyi hnyi anyibun je ke keihen a libenyitainy hia, wale öbun e kap únyi ge lakon Isaraela ; me ham únyi gan kö Arona at bihut hnân hudiny kap göranyai kö Iehova. 29 Öbun e he ka hudo kö Iehova je hudiny kap göranyai únyi hnyi je bwihlany hia, a unyi hnyi soiny hia, wale hanen ae kap. 30 Anyin a wale u me he ka ha ködra, ka habe, Öbun ka kap göranyai soiny únyi gan, me adre me he ka únykúme e ka at Levi helâ me trobaniny hna huje hwit, ke helâ me trobaniny hna hlec wan vine. 31 Ke öbun e he ka han e hnyi ta je dok hia, a öbun me anyibun je lap : anyin a wale me hnân bi hwaban

anyibun huliwa hnyi uma úkhacaköu. 32 Ke ame ca he ka takú öbun hnen hulö can e, öbun ka hia but kap göranyai soiny: ke ca he öbun ka ökongoâ je únyi ae kap anyin lakon Isaraela, wâ öbun nye mokcu.

HNYIMAKAN 19.

KE Iehova ame ha kö Mose me Arona, ka habe, 2 Walang bongon hnanyibu a huna Iehova, ka habe, Ha thö ka lakon Isaraela, m' adre me he ka hom köu ke kau ae dra hia me ba hnyikongon, at adre tiga ca ip hom únyi hnân úhúkalaköuâ: 3 ke öbun e he ka ham e kö Eleazara at bihut, me hamen he ka lelö e ka hnyi hoton hnyaba, ke hamen ke at he ka hlingâ e hnyi hnyimakan: 4 ke hamö Eleazara at bihut he ka hom únyi hnyi dren ge banyen, me oseven dukâiâ ge dren hnyi hnyimakan uma úkhacaköu: 5 ke ame he ke at ka thong kau eling hnyi hnyimakan, adre me he ka thong unen, me utiöiny, me dren, me tiny: 6 ke ame he at bihut ka hom utö arasi, me thi hisop, me únyi ae dra, me khúa ka hnyi hna thong kau. 7 Me ame he at bihut ka hneú anyin je úkhaú, me osúa unyin hnyi köiö, ke hwaban e ame he ka he ka hnyi hnyaba, k' ame he at bihut ka bo kong ke ne o but sahac. 8 Ke ame he at a thong e ka hneú anyin je úkhaú hnyi köiö, me osúa unyin hnyi köiö, k' ame he ka bo kong ke ne o but sahac. 9 Ke hamen ke at ae bo so he ka aoc hnabadröiny kau, me ip hoton hnyaba hnyi dok ae so, k' adre me he ka tuö únyi eling hnân hobi kâu úkhacaköu anyin lakon Isaraela me hnân köien okabâ: wale hudiny hulö. 10 Ke haba at a aoc hnabadröiny kau ame he ka hneú anyin je úkhaú, ke e ame he ka bo kong ke ne o but sahac: ke wale hnanyibu nyiele balua ka lakon Isaraela, me atkanyua ame tha laba unyidra. 11 Habâ at ame kâlâ komok, me e ame he ka bo kong hnyi seven ta bong: 12 ke ame he at eling ka obosoâ e hnyi bong a kuniny ge únyi e, ke e ame he ka bo so hnyi bong a seveniny: ke ame ne ca obosoâ e bi hnyi bong a kuniny, me e ame ca he ka bo so hnyi bong a seveniny. 13 Ke haba at ame kâlâ komok, k' ame ca obosoâ e bi, me e ame okongoâ uma mano umö Iehova; k' adre me he ka subâ degecâ at eling unyin at Isaraela: anyin adre ca dukâiâ e hnen köien okabâ, e bo kong ut e; ke e bi unyin anyin bo kong. 14 Ke walang hnanyibu e

ka mokcu ke at eiö hnyin ke uma mano: haba hnyat hia ödrin e dit ka hnyin uma, me hnyat hia eiö hnyin uma, me ödrin e he ka bo kong hnyi seven ta bong. 15 Ke haba ta je utkaia ae memang, k' adre ca ohmâ ge hlinginy, me ame bo kong ut. 16 Ke haba at hnyöuai ame kâlâ at adre hlingâ ge hele vat, ke ame ne ke komok, k' ame ne jeien at, k' ame ne erkemok, me e ame he ka bo kong hnyi seven ta bong. 17 Ke adre me he ka hom hobi kâu at ae bo kong, únyi hnyi dröiny adre thong a hudiny hulö, me hú e ge köiö ame hingölö hnyi hnyin utkaia: 18 k' ame he ke at ae bo so ka hom thi hisop, me hneú hnyi köiö eling, me dukâiâ uma, me je utkaia hia, me hnyat hia eiö hnyin, me at minya a kâlâ jeien at, ame ne at adre hlingâ, ame ne komok, ame ne erkemok: 19 ke ame he at ae bo so ka dukâiâ at ae bo kong hnyi bong a kuniny me bong a seveniny: k' ame he ka obosoâ e hnyi bong a seveniny: ke e ame he ka hneú anyin je úkhaú, me soú hnyi köiö, k' ame he ka bo so hnyi sahac. 20 Ke haba at ae bo kong, k' ame ca he ka obosoâ e bi, me adre me he ka subâ degecâ at eling únyi hnyi úkhacaköu, anyin a e ame hia but okongoâ dok a kabi Iehova: ke adre ca hia but dukâiâ e ge köien okabâ; e bo kong ut e. 21 Ke wale hnân hnanyibu ködra nyiele: ke haba at ame dukâiâ köien okabâ ame he ka hneú anyin je úkhaú; ke haba at ame kâlâ köien okabâ, me, ame he ka bo kong ke ne o but sahac. 22 Ke ame he ka bo kong ta je únyi hia a kâlâ hnen at ae bo kong; ke haba at ame kâlâ ta je únyi e, me e ame he ka bo kong ke ne o but sahac.

HNYIMAKAN 20.

KE ame o but lakon Isaraela, wale úkhacaköu hia, ka hnyi hnyebuba Zin, hnyi tehi a bân; k' ame labâ Kadesi hnen tavat; ke ame mokcu eling Miriama, m' adre me konâm e. 2 Ke ba köiö hobi kâu tavat, m' adre me úkhacaköu me tot kö Mose me Arona. 3 Me ame ivinö tavat me Mose, me ha, ka habe, Öhmun na tha mokcu ehac me je liamekeiny möhmun hnyi hnyimakö Iehova! 4 Ieú gabu obe hom úkhacaköu anyi Iehova ka hnyi hnyebuba eang, m' öhmun e he ka mok e, me je halehmun? 5 Ke ieú gabu obe hum öhmun úhehmun Aigupito, he ka hum öhmun ka hnyi dok eang ae kong? haba dok ang me

dok ae ba hatungen, me wan ometa, me vine, me rimona, ke ba köio hnân ic. 6 Ke haba Mose me Arona ödru me he úhedru unyin úkhacaköu ka hnyi hwanumen uma úkhacaköu, me ta ju hnyikânâi : me ame manen dut hmanenangi Iehova ködru. 7 Ke Iehova ame ha kö Mose, ka habe, 8 Hom dö uci, ke úkhacaköuâ tavat, a u, me Arona liamekeiny möu, ke öbu me he ka fuc ka kic hnyi hnyimaködra, me ame he ka ham köien ; ke u me he ka oâ köiö únyi hnyi kic hobi ködra : ke u me he ka habelen úkhacaköu, me haledra omeno. 9 Ke Mose ame hom uci únyi hnyi hnyimakö Iehova, hoton hnen hna húna. 10 Ke haba Mose me Arona ödru me úkhacaköuâ tavat cicö kic, me ha ködra, ka habe, Löng ju, öbun tavat bi tot ; öhmu me he ka oâ köiö köbun únyi hnyi kic eang? 11 Ke Mose ame inâ hnyamen göranyai, me olo kot kic ge uci : k' ame patrutrua köiö ae gan, me ame ic úkhacaköu me haledra omeno. 12 Ke Iehova ame ha kö Mose me Arona, ka habe, Anyin a öbu me ca labageju kõnya he ka okabi nya hnyi hnyimakan lakon Isaraela, awe, öbu me ca he ka hom úkhacaköu eang ka hnyi hnyei oge hia but ham ködra. 13 Haba köiö ang me an Meriba : anyin ame ivinö lakon Isaraela me Iehova, ke adre okabâ e gan.

14 Ke haba Mose ame kunâ je úthümetu úheny Kadesi ka thaniny Edoma, he ka ha, ka habe, Walang hofuc ho Isaraela a liamekeiny möu, ka habe, E khandö u ta je vec a o köhmun : 15 a g' ame he Aigupito ai lakamöhmun : 16 ke öhmun e tenge kö Iehova, me ame löng hohmun, me kunâ angela, me hum öhmun úheny Aigupito : ke wâ bi öhmun ang hnyi Kadesi, a taun hnyi obiny em hnyei : 17 ö u hn' öhmun he ka he hnyi wanben em : k' öhmun e ca he ka he hnyi ta hnyei, me hnyei vine, k' öhmun e ca he ka ijem köiö únyi hnyi je an : öhmun e he ka he thibi hnyi cit gethen anyin than, k' öhmun e ca he ka saü ka hnyi ke keihen metâ me me, ke ne o but öhmun e he ka hna but hnyigöulem. 18 Ke Edoma ame thu kâu, ka habe, U me ca he ka gethen eang unyik, wâ oge nye oâ köu hele vat. 19 Ke ame ha kâu lakon Isaraela, ka habe, Öhmun e he ka he hnyi hna cit gethen : ke öhmun ka ijem me halehmun köiö a belem, me oge me he ka bi hwaban : u na hnö nya he ka he, ke ba ke únyi oge me he ka ányâ. 20 Ke e ame thu, ka habe, U me ca he ka gethen eang. Me Edoma ame hawâ

tavat ae se hia he ka vat mē, me hnyam ae hwege. 21 Ke höcö Edoma he ka hna Isaraela ka he hnyi iny : me me saü thö Isaraela gan.

22 Ke adre me hna Kadesi ; k' ame o hnyi bucen Hora lakon Isaraela, a úkhacaköu hia. 23 Ke Iehova ame ha kö Mose me Arona hnyi bucen Hora, hnyi baten hnyei Edoma, ka habe, 24 Adre me he ka hum Arona ka lakamen : ke e ame ca he ka hnyi he ka hnyi hnyei waleji oge ham ka lakon Isaraela, can hnöbu hna hanyâúâ hok hofuc hnyi an Meriba. 25 Hum Arona me nokon a Eleazara, me hum ödru ka hnyi bucen Hora : 26 me uny jut úkhaü Arona me okhauö Eleazara a nokon : k' adre me he ka hum Arona ka lakamen, k' ame he ka mokcu eling. 27 Ke Mose ame ányâ helâ me Iehova ame húna : ke ödrin e öliâ bucen Hora hnyi hnyimakan úkhacaköu hia. 28 Ke Mose ame uny jut je úkhaü Arona, me okhauö Eleazara a nokon ; me ame mokcu Arona eling hon bucen : ke ame utut hmetu Mose me Eleazara úhedru hon bucen. 29 Ke ekhana but úkhacaköu hia a ga mok Arona, me haba lap Isaraela hia adre me tenge thungaü thöte ta je bong, ca Arona.

HNYIMAKAN 21.

KE haba thaniny Arada at Kanana, at ame laba hnyi Hwaiöu, ame löng a g' ame o but at Isaraela a gethen deny Atharima, me e ame vat me at Isaraela, me hom hwenbâ keihen gadra. 2 Me haba at Isaraela adre me húkälö khöbi kö Iehova, me ha, ka habe, U me ne he ka hna tavat ang ka hnyi hnyamök, me oge me he ka tha ohia anyidra ta je taun. 3 Ke Iehova ame löng hwan at Isaraela, me hna but at Kanana ködra ; me adre me tha obi ödra me anyidra ta je taun : ke adre me hwenyi ien dok eling Horema.

4 Ke adre me he úhedra hnyi bucen Hora, getheniny Köiö ae Dra, igigilö hnyei Edoma : ke ame vec bnyekon tavat can gethen. 5 Me haba tavat adre me fuc hwege ka Khong me Mose, me ha, ka habe, Ieü gabu öbe hum öhmun úhehmun Aigupito he ka mokcu hnyi hnyebuba? anyin ae ba han, ke ba köiö ; k' öhmun höcö han eang ae baha. 6 Ke Iehova ame kunâ je on meic unyin tavat, m' adre me olou tavat, me a mokcu at Isaraela ae se hia. 7 Me ame he tavat kö Mose, me ha, ka habe, Öhmun

e hia but ányá hulö, anyin a öhmun e fuc hwege kö Iehova, m' u: ö u hic dö kö Iehova, me me he ka obia je on unyihmun. Ke Mose ame hic hobi káu tavat. 8 Ke Iehova ame ha kö Mose, ka habe, U me he ka op ke on meic, me ip hon ke uci; ke e ka wá e hnen tavat adre olou, me ödrin e he ka möt. 9 Ke Mose ame op ke on a bras, me ip hon uci: ke ame ne wá on bras hnen at a olou ge on, me e ame möt. 10 Haba lakon Isaraela adre me he, k' adre hunuma hnyi Oboth. 11 Ke adre me he úhedra Oboth me hunuma hnyi Ie-abarima hnyi hnye-buba cicö Moaba, hnyi hna o hnyin sefünö. 12 Ke úhedra e me adre me hunuma hnyi hnyigöulen bucen e Zareda. 13 Ke úhedra e me adre me hunuma hoton Arenona, wale hnyi hnye-buba gethen ame o únyi hnyi hnyeiny at Amora: anyin a Arenona me hnyigöulen Moaba, wanben Moaba me hnye Amora. 14 Anyin a wale ame ha hnyitansiny Je vat anyi Iehova, ka habe,

Vaeba hnyi Sufa

Me je hnyigöulen bucen e Arenona,
15 Me hwatapkoluiny je bucen,

Ame hwali ka hnyi hnyaban Aro
K' ame ci hon hnyigöulen Moaba.

16 Ke úhedra e me adre me he Bere ai: an eling, waleji Iehova ame ha kö Mose, ka habe. Úkhacaköuá thö kónya tavat m' oge me he ka habelidra.

17 Me haba at Isaraela adre me khumongö khumong eang, ka habe,

An lö pupua thö; khumong dö káu:

18 An a kou hnen je than,

A ac hnen je tuhan tavat

Ge anyidrin je haten musi, me anyidrin je uci.

Ke úhedra hnyi hnye-buba, me adre me he Matana ai: 19 ke úhedra Matana me adre me he Nahaliela ai: ke úhedra Nahaliela ai me adre me he Bamoth ai: 20 ke úhedra Bamoth me adre me o ka hnyi hnyigöulen bucen a e hnyi hnye Moaba, ka hnyi ban Pisega, walethö hon hnye-buba.

21 Haba Isaraela ame kuná je úthúmetu kö Sihona thaniny at Amora, me ha, ka habe. 22 Iny be he hnyi wanben em hnye: öhmun e ca he ka saú ka hnyi ta hnye, me je hnye vine; öhmun e ca he ka ijem je an adre kou, k' öhmun e he ka he hnyi hna eit gethen anyin than, ke ne o but öhmun e hna but je hnyigöulen. 23 Ke haba Sihona ame ca hna at Isaraela ka he hnyi wanben iny hnye: ke so bi Sihona ame

úkhacaköuá lakeiny hia, k' ame he hnye-buba ai he ka tet metá ka at Isaraela, k' ame o hnyi Jahaza, me ame vat me at Isaraela. 24 Ke Isaraela ame kot e ge hele vat, me hügüná iny hnye hwán Arenona ke ne o but Jaboka, a ke ne o but je laku Amona: anyin ae hwege hnyigöulen je laku Amona. 25 Ke haba at Isaraela adre me hügüná ta je taun eling: ke Isaraela ame labá je taun anyin at Amora, hnyi Hesebona, me ta je tauniny hia. 26 Anyin a Hesebona, me, wale taun anyi Sihona thaniny at Amora, waleji at ame vat me ke than Moaba elac, me hügüná iny hnye hia, ke ne o but Arenona. 27 Anyin a wale, haba hnyat vejecá, ödrin e ha, ka habe,

Ai öbun Hesebona ai

E so adre me op me otílá taun Sihona:

28 Anyin a he but meic úheny Hesebona,

A báhlán meic únyi hnyi taun Sihona:

K' ame an Aro hnyi Moaba,

Je thaniny je dok ae görany hnyi Arenona.

29 Ekölö gam, Moaba!

Hnye Kemosá lö, adre okongu u:

E ame hna lakon baga m' ödrin e kec möt,

Ke lakon je hlu m' ödrin e hwenbá,

Kö Sihona tuhan at Amora.

30 Ötin e fan' ödra; a kong ut Hesebona ke ne o but Dibona,

K ötin e hia but hügün' ödra ke ne o but Nofa,

Wale ke ne o but Medeba.

31 Me haba Isaraela ame labá hnyeiny at Amora. 32 Ke Mose ame úkhúnong he ka ecmáká Jazera, me adre me hügüná je tauniny me obá at Amora eling. 33 Ke adre me hwiö me he hnyi gethen Basana:

me ame o but Oga than Basana ködra, a e me lakeiny hia, me me vat hnyi Ederi.

34 Ke Iehova ame ha kö Mose, ka habe, U me ca he ka outen e: anyin a oge me hna e ka hnyi hnyamám, me lakeiny hia me iny hnye; ke u me he ka ányá káu helá me hnam hna ányá kö Sihona tuhan at Amora, waleji ame laba hnyi Hesebona.

35 Me adre me kot e, me lakon, me lakeiny hna, ke ba kolon gadra: ke adre me labá iny hnye.

HNyimakan 22.

KE ame he lakon Isaraela, me hunuma hnyi dok ae tha hon hnyi Moaba, hoton Joridano cicö Jeriko.

2 Ke haba Balaka nöku Zipora ame wá : 17 anyin a oge me he ka ti oganö u, ke oge ta je únyi hia a ányá Isaraela ka at Amora. me he ka ányá ta je únyi hia u me he ka ha könya : anyin a wale ö u he but jem. 3 Ke ame ot gan hmá at Moaba ge tawat anyin a ödra se hia : ke ame hlohlo at me hangá tawat eang hobi könya. 18 Ke Moaba ge lakon Isaraela. 4 Ke haingö Balaama ame thu, me ha ka lathnyabai Balaka, ka habe, Ame ne he Balaka ka ham könya umen uma ae unöngöt ge sileva me gol, e ca khañö nya he ka hanyátú hofuc ho Iehova a Khonguk, he ka ányá úhnyú-kong me gan. 19 Anyin a wale mē mokut ju öbun eang, m' inye he ka vehlóng hofuc ame he Iehova ka ha hmetu könya. 20 Ke haba Khong ame o but kö Balaama hnyi hnyinghet, me ha káu, ka habe, Ame ne o tawat ka hawo u, me todrö, me tha he mödrin : ke so bi, haba thibi únyi oge me he ka ha köu, me wale únyi u ma he ka ányá. 21 Me haba Balaama ame vesá, me húkálá taben hon haleny asina, me tha he me je thaniny Moaba. 22 Ke ame ubáhlá hmönyin anyi Iehova can e ame he : ke haba angela anyi Iehova ame tet metá káu öu hnyi gethen he ka ovhelá e. Ke e ame tabá haleny asina me he, ke tha e me li athnyabainy. 23 Ke haba asina ame wá angela anyi Iehova ame tot eü hnyi gethen, ke e hnyi hnyamen hele vat adre oc : me haba asina ame saü but úheny hnyi gethen, me he ka hnyi hnyot : me Balaama ame kot asina he ka ohmeto e ka hnyi gethen. 24 Me haba angela anyi Iehova ame tot hnyi thopiny gethen hnyi wanben je hnyei vine, ke e hu hak hnyi ke keihen e, me ke hak hnyi ke keihen ang. 25 Ke haba asina ame wá angela anyi Iehova me ame hakekenyá hak veto, me me hlec ca Balaama hnyi hak veto : me e ame kot hmetu. 26 Ke haba angela anyi Iehova ame he e helé, me tot hnyi dok ae hnek, ke ba gethen he ka saü ka hnyin hnyi ke keihen metá me me. 27 Ke a wá but asina hnen angela anyi Iehova, me e ame ta but me Balaama : me ame ubáhlá thö hmönyin anyi Balaama me e ame kot asina ge anyin uci. 28 Ke Iehova ame khöng hnyimen asina me ame fuc kö Balaama, me ha, ka habe, Ieü oge ányá köu, m' u me okun ku' nya? 29 Me Balaama ame thu ka asina, ka habe, Can hnám hna hlumö nya : e na hu anyik hele vat, me oge me he bi nya ka hlingö u. 30 Me asina ame ha kö Balaama, ka habe, Ca halem asina inya, at u je labú tabá hnyi bongom ta je bong hia ke ne o but ang? hawa, hwakecik he ka ányá heláe ehac köu? Me e ame thu, ka habe, E ba. 31 Me Iehova ame obwela li emakö Balaama, me e

ame wâ angela anyi Iehova ame tot hnyi gethen ke e hnyi hnyamen hele vat adre oc: me e ame nom me ta ju hnyikânâi. 32 Ke haba angela anyi Iehova ame ha kâu ka habe, Ieú gam u me okun kot halem asina? wâ bi, oge me he jem he ka orheli u, anyin æ kong kõnya úhem: 33 ke ame õ nya asina, me ame okun saú gak, ke ame ne ca saú gak, me oge me hia but blingö u, me omelö e bi. 34 Haba Balaama ame ha ka angela anyi Iehova, ka habe, E kong hwacelik, anyin a oge me ca wâ a u me tot eú hnyi gothen he ka ovheli nya: ke haba walang ang ame ne kong köu únyi ang me oge me he ka hmetu. 35 Ke haba angela anyi Iehova ame ha kö Balaama, ka habe, He thö u me tavat: ke so bi u me be ka ha thibi je únyi oge me he ka ha köu. Me Balaama ame tha he me je than úhedrin unyi Balaka. 36 Ke a löng ut Balaka a e but ang Balaama, me e ame he ka úkhanö mē hnyi taun Moaba, hnyi hnyigöulen Arenona, wale hnyi obiny hnyigot. 37 Ke Balaka ame ha kö Balaama, ka habe, Hawa, oge ca úkhúnöng újengöâ he ka bao u? Ieú gam u je ca he jem kõnya? hawa e ca hnathu ang æ khanö nya he ka oganö u? 38 Ke Balaama ame thu kö Balaka, ka habe, Wâ bi oge o but köu: hawa, e khanö nya he ka ha ke hofuc? ke haba hofuc ame he Khong ka ip hnyi hnyimök, me oge me he ka ha eling. 39 Ke Balaama ame tha he me Balaka, me o Kiriathazoth. 40 Ke Balaka ame hudo je bolok me je mamoe, me hawo Balaama me je than unyin. 41 Ke haba nyi Balaka ame hum Balaama, me hom e ka hnyi je dok æ görany anyi Baala, ke e ame wâ úheny e tavat ke ne o but obiny je bunyen.

HNYIMAKAN 23.

KE Balaama ame ha kö Balaka, ka habe, Anyá thö je taben hut a seven eang, ke penapena thö eang seven ta bolok, ke seven ta mamoe бага. 2 Me Balaka ame anyá helâ me hna ha hnö Balaama; ke haba Balaka me Balaama ödru me hudo hon je taben hut a úsa khaca bolok me úsa khaca mamoe бага. 3 Ke haba Balaama ame ha kö Balaka, ka habe, U me he ka tot hnyi anyám hut, ke oge me he ka he but; me ame ne he la Iehova he ka úkhanö mönya: ke haba hofuc e ame he ka omanená kõnya me oge me he bi nya ka thumetu u. Ke e ame he ka hnyi dok æ

görany. 4 Ke Khong ame úkhanö me Balaama, me e ame ha kâu, ka habe, Oge hia but penapena je taben hut a seven, me ve hudo hon je taben úsa khaca bolok me khaca mamoe бага. 5 Ke Iehova ame bi hofuc ka hnyi hnyimö Balaama, me ha, ka habe, Hmetu thö kö Balaka, ke u me he ka ha kâu helâe. 6 Ke e ame hmetu kâu, ke wâ bi, e ame tot hnyi anyin hut, e me je thaniny Moaba hia. 7 Me e ame ha anyin úhöúcú, ka habe,

Balaka ame hum nya úhek Arama,
Wale than Moaba únyi hnyi je bucen e Deö:

Aiö u, hangö Jakob hobi kõnya,
Ke aiö u, me ú Isaraela.

8 Oge ma kâmâu ka hangâ at a ca hangâ hnen Khong?

Ke oge ma kâmâu ka ou at a ca ou hnö Iehova?

9 Oge me wâ e únyi hnyi hon kic,
Oge bwele kâu únyi hnyi dok æ görany:
Wâ bi, wale tavat adre me he ka hake laba,

K' adre me ca he ka tha ou ödra me ta je hnye.

10 Ia æ khana he ka aú sesâi Jakob,
Me ha úseiny ke keihen a vakiny Isaraela?

E na he ju mekik ka helâ me mekiny at æ wisa,

Me obiny melik helâ me obiny melen.

11 Ke Balaka ame ha kö Balaama, ka habe, Ieú e u je anyá kõnya? oge hawo u he ka hangâ je iwahnaihmiöny mönya, ke wâ bi, u je hia but hahnahici ödra bi.

12 Ke e ame thu, ka habe, Hawa, oge me ca he ka wâ wia he ka ha hofuc Iehova ame ip hnyi hnyimök?

13 Ke Balaka ame ha kâu, ka habe, Ö u me tha he mönya ka hnyi ke dok, m' u me he ka õ ödra hnyin; u me he ka wâ ke keihen tavat thibi, ke u me ca he ka wâ hia: ke u me he ka hangâ ling hobi kõnya. 14 Me e ame hom e ka hnyi utkânâ iny Zofim, hnyi ban Pisega, k' ame otillâ je taben hut a seven, me ame hudo hon je taben úsa khaca bolok ke khaca mamoe бага. 15 Ke e ame ha kö Balaka, ka habe, U me he ka tot eang hnyi anyám hut, ke oge me he ka úkhanö me Iehova e helâ. 16 Ke Iehova ame úkhanö me Balaama, me bi hofuc ka hnyi hnyimen, ka habe, Hmetu thö kö Balaka me ha je hofuc eling. 17 Me e ame o but, ke wâ bi, e ame tot hnyi anyin hut, ke tha e me je thaniny Moaba. Ke

Balaka ame ha kâu, ka habe, Ieû a ha Iehova? 18 Me e ame ha anyin ûhõucû, ka habe,

Hõhõi thõ, Balaka, me löng ju ;
Tevehlöng ju kõnya u nõku Zìpora :

19 Haba Khong me ca at bi, me me he ka thoi ;

Ke ca nokon at bi, me me he ka ietra :
Hawa e ame fuc k' ame ca he ka ânyâ ?
Ame ha hofuc, k' adre me ca he ka owhâdâ ?

20 Wâ bi, adre kunõ nya he ka hahnahicâ :
Ke e ame hia but ohnahicâ, ke e ca khanõ nya he ka wia e.

21 E ame ca wâ hulõ unyi Jakob,
K' ame ca wâ monu ga Isaraela :
E unyin Iehova a Khongon,
Ke e hnyi wanbõdra ûhongõtiny than.

22 Khong ame hum õdra ûhedra Aigupito ;
Ke e hu but gan helâke tang hwegeiny bolok ae hiny.

23 E hnathu, e ba bibihwakecin kö Jakob,
Ke ba biobotkong kö Isaraela :
Ke adre me he ka ha ga Jakob me Isaraela, ka habe,
Ieû a ânyâ Khong!

24 Wa bi, ame tot tavat helâ me liona momo,
K' ame hõihõi thõ helâ me liona бага :
K' ame ca he ka mokut ke ne o but e ame an haniny,
Me ijem dren at adre hlingâ.

25 Me Balaka ame ha kö Balaama, ka habe, Ca he ka hang' õdra, ke ca he ka hahnahici õdra. 26 Ke haba Balaama ame thu me ha kö Balaka, ka habe, Oge me ca ha kôu, ka habe, Hamök he ka ânyâ ta je ûnyi bia ame he Iehova ka ha kõnya? 27 Ke Balaka ame ha kö Balaama, ka habe, Aiõ u, m' inye he ka hum u ka hnyi ke dok ; k' ame ne so ka Khong, me u ma he ka hang' õdra eling hobi kõnya. 28 Me Balaka ame hum Balaama ka hnyi hon Peora, wale cicõ hnyeuba. 29 Ke haingõ Balaama ka habe, Otilâ thõ je taben hut eang a seven, ke penapena thõ eang seven ta bolok, ke seven ta mamoe бага. 30 Ke Balaka ame ânyâ hoton hna ha hnõ Balaama, me hudo hon je taben hut ùsa khaca bolok, me khaca mamoe бага.

HNyimakan 24.

KE e manen dut kö Balaama ae so kö Iehova he ka ohnahicî Isaraela, me e ame ca he but he ka heleû bibihwakecin,

helâji me ke je ûen, ke e ame hnyimakan hnyeuba ai. 2 Ke Balaama ame bwele me wâ at Isaraela adre me ve laba hoton anyidra je tribu ; me ame o but kâu hanon Khong. 3 Me e ame ha anyin ûhõucû, ka habe,

Ame ha Balaama nõku Beora,
Waleji at a mok li emakan ame ha :

4 Haingen at ame löng je hofuc hwan Khong

K' ame wâ hna omanenâ ge Ataekha-nahia,

Ke e ame ta hnyikânâi, me bwela bi li emakan :

5 Jakob lö, e so umâm je uma mano,
Ke je hnyabam Isaraela !

6 Adre avi õdra helâ me je hwatapkolu,
Helâ me je hna belök hnyi baten wawewe,

Helâ me je aloe a ta hnõ Iehova,
Helâ me je üõ arasi hnyi baten je an.

7 Ame he ka hingâlâ köiõ ûnyi hnyi anyin li buket,

K' ame he ka hu je mãtrâniny hnyi je köiõ ae se,

K' ame he ka gan hmâ thaniny hu Agaga,

K' adre me he ka oganâ dokhon dökhu.

8 Haba Khong ame hom e ûheny Aigupito
E hwege helâ me bolok ae hiny :
E ame he ka an je hnyei, a je iwahnai-hmiõny mē,

Me thu omomonou je jeiõdra
Me fan' õdra ge anyin je fana.

9 E ame cibouca, helâ me man liona,
Ke helâ me liona momo ; ie at ame he ka bwebwelâ ?

Ame he ka hnahic at ame hahnahici u,
K' adre me he ka hangâ at ame hangõ u.

10 Me ame ubâhlâ hmõnyin anyi Balaka kö Balaama, me e ame khâukhâu li hnyamen : ke Balaka ame ha kö Balaama, ka habe, Oge hawo u he ka hangâ je iwahnaihmiõny mõnya, ke wâ bi u je okun hahnahici õdra.

11 Ke walang ang kec dö ka hnyi em hnyei : oge me ûnykûme he ka oganõ u, ke wâ bi, Iehova ame behânâ gam hna ogânâ. 12 Ke Balaama ame ha kö Balaka, ka habe, Hawa, oge me ca ha ka ânyâm je ùthûmetu waleji u je kunâ kõnya, me ha, ka habe, 13 Ame ne he Balaka ka ham kõnya umen uma ae unõngõt ge sileva me gol, me ca khanõ nya bi he ka onua hofuc ho Iehova, he ka ânyâ so me kong hoton wek ; ke haka hofuc ame ha Iehova, me wale hofuc oge me he ka ha? 14 Ke

walang ang oge me he but ka hnyi ik hnyi, ke aiô u me oge me he ka ha kôu ke je únyi ame he tavat eang ka ányá ka lakem hnyi je bong a biliny. 15 Me e ame ha anyin úhóúú, ka habe,

Ame ha Balaama nöku Beora,

Waleji at a mok li emakan ame ha :

16 Haingen at ame löng je hofuc hwan Khong,

At ae khana metá anyin Beónua,

At ame wá hna omanená anyin Atae-khanahia,

At ame ta hnyikánái, me bwele bi li emakan :

17 Oge me wá e, ke ca walang ang :

Oge me wá e, ke ca hakekeny bi :

Ame he ka o okhú úheny unyi Jakob, K' ame he ka kú haten musi úheny unyi Isaraela,

K' ame he ka kot je ke keihen Moaba Me okongoá je laku Setha.

18 Haba Edoma me hwajekhon

K' ame he Seira minya ka hwajekhon, waleji iwahnaihmióny mē ;

K' ame he Isaraela ka ton.

19 Ame he ka o úheny unyi Jakob ke at musi,

Ke e ame he ka ohia kolon únyi hnyi taun.

20 Ke e ame bwele ka wá Amaleka me e ame ha anyin úhóúú, ka habe,

E beónua Amaleka ehac hnyi je hnyei ; Ke haba obiny káu me e ame he ka hia but.

21 Ke e ame bwele ka wá at Keni, me e ame ha anyin úhóúú, ka habe,

E hwege hnyabam

K' adre ip ányám háüen hnyi kie.

22 Ke so bi adre me he ka oaiá at Keni, Ke ne o bú Asura ame hum u ka hnyi bá

23 Ke e ame ha anyin úhóúú, ka habe, Ekölö, ie at ame he ka möt e ka ányá e hnen Khong ?

24 Ke ame he ka khöp je hu úheny Kitim, Me adre me he ka oveci Asura, me oveci Heberu,

K' adre me he ka ohia e bi hnyi obiny

25 Ke ame todrö Balaama me he hmetu ka hnyi hnyaban ; k' ame he but minya Balaka.

HNYIMAKAN 25.

KE haba at Isaraela adre me labā Sitima, ke ame hwán tavat he ka bi únyi monu me omomoiny Moaba : 2 anyin

adre hawâ tavat he ka hnyi bi hut ka anyidra je khong ; ke haba tavat adre me hnyi han me khudrung ka anyidra je khong.

3 Ke haba at Isaraela adre me úkhacaköu unyi Baala-peora : me ame ubáhlá thö

hmönyin anyi Iehova ka at Isaraela. 4 Ke haba Iehova ame ha kö Mose, ka habe,

Hom dö je taben tavat hia, me uhno döi ödrin hnyi hnyimakö Iehova, me me hmetu

je hmönyin ae gan anyi Iehova úheny unyi at Isaraela. 5 Ke haba Mose ame ha

ka tavat owisa unyin at Isaraela, ka habe, He th' öbun ka ve hlingá tavat unyibun

adre me tha ödra me Baala-peora. 6 Ke wa bi, haba ke at Isaraela ame hom ke

momo Midiana ka je liamekeiny mē, hnyi hnyimakö Mose, me hnyi hnyimakan úkha-

caköu anyin lakon Isaraela hia, ödra adre me tenge hnyi hwanumen uma úkhacaköu.

7 Ke a wá e hnö Fineasa, nöku Eleazara, a nöku Arona at bihut, me e ame todrö

hnyi úkhacaköu, me hom ö hnyi hnyamen ; 8 me e ame he hoton at Isaraela eling ka

hnyi hak, me dáoa li hnyekudru, wale at Isaraela me momo. Me ame todru mok ae

cap unyin lakon Isaraela. 9 Ke haba tavat a moku ge mok ae cap, me ödra twente

foa thauzan.

10 Ke Iehova ame ha kö Mose, ka habe, 11 Haba Fineasa nöku Eleazara a nöku

Arona at bihut ame hia but wia anyik hmönyin úheny unyin lakon Isaraela, hnyi

hnen hna ciá gak hnyi wanbödra, m' oge me ca ohia lakon Isaraela hnyi hnök hna

ciá. 12 Anyin a wale ha thö, ka habe, Wá bi, inya oge me ham anyik úhihi-

nykóuiny úsoköu : 13 k' ame he ka e bi unyin, me je mátrániny a hwaban, me me

úhihinykóu he ka at bihut nyiele balua ; anyin a e ame ciá ge Khongon, me bi

hwaban möt anyin lakon Isaraela. 14 Ke haba ien at Isaraela adre hlingá, wale at

adre tha hlingá me momo Midiana, me Zimeri, a nöku Salu, thaniny lap anyin ke

kamen unyin at Simeona. 15 Ke haba ien momo Midiana adre hlingá, me Kozebi,

nöku Zura ; ke haba бага eling, me taben ke lap anyin ke kamen hnyi hnyei Midiana.

16 Ke Iehova ame ha kö Mose, ka habe, 17 Ovecá at Midiana, me kuc ödra : 18 anyin

adre me oveci öbun hnyi hnödra hna bi jöniny, waleji adre bi jönibun hnyi únyi

anyi Peora me únyi anyi Kozebi, a nokon thaniny Midiana, a hanidra, waleji adre

hlingá hnyi bong bongon mok ae cap can únyi anyi Peora.

HNYIMAKAN 26.

KE hwaban mok ae cap, haba Iehova ame ha kö Mose me Eleazara, nöku Arona at bihut, ka habe, 2 He thö ka aü úseiny úkhaçaköu anyin lakon Isaraela hia, hwân ge tavat a twente huna me gan hon e, hoton je lap anyin lakamödra, tavat hia ae khana hnyi vat unyi Isaraela. 3 Me haba Mose me Eleazara at bihut ödrü me úhnenamö mödra hnyi dok ae tha hon hnyi Moaba hnyi Joridano, wale Jeriko, ka habe, 4 He thö ka öü ödra, hwân ge tavat a twente huna ke gan hon e; hoton hna huna hnö Iehova kö Mose me lakon Isaraela, waleji tavat adre hom úhedra hnyi hnyei Aigupito.

5 Haba Reubena, nöku Isaraela a bán: haba laku Reubena; Enoka me lap anyin at Enoka: Palu me lap anyin at Palu: 6 Ezerona me lap anyin at Hezerona: Karemi me lap anyin at Karemi. 7 Wale je lap anyin at Reubena: ke haba úseidra a tavat adre aü me ödra fáte theri thauzan ke seven haded ke thöte. 8 Ke haba nöku Palu; Eliaba. 9 Ke haba laku Eliaba; me Nemuela, me Dathana, me Abirama. Waleling Dathana me Abirama a li at adre hawâ hnyi úkhaçaköu, waleji ödre iwatretra me Mose me Arona hnyi je lahio Kora hnyi hnödra hna iwatretra me Iehova: 10 k' ame memang ut hnyimen kânâ k' ame tha ut ödrü me Kora hnyi imekiny lahien eling; k' ame ön ödrin tu haded ke fifte ge meic, m' ödrin e haten bi. 11 Ke so bi a ca moku laku Kora.

12 Ke haba laku Simeona hoton anyidra je lap: únyi ga Nemuela, me, lap anyin at Nemuela: únyi ga Jamina, me, lap anyin at Jamina: únyi ga Jakina, me, lap anyin at Jakina: 13 únyi ga Zera, me, lap anyin at Zera: únyi ga Saulo, me, lap anyin at Saulo. 14 Wale je lap anyin at Simeona, ke ödra twente tu thauzan ke tu haded.

15 Haba laku Gada hoton anyidra je lap: únyi ga Zifono, me, lap anyin at Zifono: únyi ga Hagi, me, lap anyin at Hagi: únyi ga Suni, me, lap anyin at Suni: 16 únyi ga Ozeni, me, lap anyin at Ozeni: únyi ga Eri, me, lap anyin at Eri: 17 únyi ga Aroda, me, lap anyin at Aroda: únyi ga Areli, me, lap anyin at Areli. 18 Wale je lap anyin laku Gada hoton hna öü ödra, ke ödra fáte thauzan ke faiv haded.

19 Ke haba laku Juda, me, Era me

Onana: ke a moku Era me Onana hnyi hnyei Kanana. 20 Ke haba laku Juda hoton anyidra je lap; únyi ga Sela, me, lap anyin at Sela: únyi ga Farez, me, lap anyin at Farez: únyi ga Zera, me, lap anyin at Zera. 21 Ke haba laku Farez: únyi ga Hezerona, me, lap anyin at Hezerona: únyi ga Hamula, me, lap anyin at Hamula. 22 Wale je lap anyi Juda hoton hna öü ödra, ke ödra sevente siks thauzan ke faiv haded.

23 Ke haba laku Isakara hoton anyidra je lap: únyi ga Tola, me, lap anyin at Tola: únyi ga Pua, me, lap anyin at Pua: 24 únyi ga Jasuba, me, lap anyin at Jasuba: únyi ga Simerona, me, lap anyin at Simerona. 25 Wale je lap anyi Isakara hoton je hna öü ödra, ke ödra sikste foa thauzan ke theri haded.

26 Ke haba laku Zebulona hoton anyidra je lap: únyi ga Sereda, me, je lap anyin at Sereda: únyi ga Elona, me, je lap anyin at Elona: únyi ga Jalela, me, je lap anyin at Jalela. 27 Wale je lap anyin at Zebulona hoton hna öü ödra, ke ödra sikste thauzan ke faiv haded.

28 Ke haba laku Josefa hoton anyidra je lap: Manase me Eferaima. 29 Haba laku Manase: únyi ga Makir, me, je lap anyin at Makir: ke Makir ame hnöku Gileada: únyi ga Gileada, me, lap anyin at Gileada. 30 Ke walang je laku Gileada: únyi ga Iezera, me, lap anyin at Iezera: únyi ga Heleka, me, lap anyin at Heleka: 31 ke únyi ga Aseriela, me, lap anyin at Aseriela: ke únyi ga Sekema, me, lap anyin at Sekema: 32 ke únyi ga Semida, me, lap anyin at Semida: ke únyi ga Hefera, me, lap anyin at Hefera. 33 Ke haba Zelo-feada nöku Hefera, me ba nokon бага, ke wahlu thibi: ke haba ien wahlu a laku Zelo-feada, me, Mala, me Noa, me Hogela, me Mileka, me Tireza. 34 Wale je lap anyin at Manase ke haba tavat adre aü gadra, me fifte tu thauzan ke seven haded.

35 Walang laku Eferaima, hoton anyidra je lap: únyi ga Suthela, me, lap anyin at Suthela: ke únyi ga Bekera, me, lap anyin at Bekera: ke únyi ga Thana, me, lap anyin at Thana. 36 Ke walang laku Suthela: únyi ga Erana, me, lap anyin at Erana. 37 Wale je lap anyin laku Eferaima hoton hna öü ödra, ke ödra thöte tu thauzan ke faiv haded. Wale li laku Josefa hoton je lap únyi gadru.

38 Ke haba laku Beniamina me anyidra

je lap : únyi ga Bela, me, lap anyin at Bela : ke únyi ga Asebala, me, lap anyin at Asebala : ke únyi ga Ahirama, me, lap anyin at Ahirama : 39 ke únyi ga Supima, me, lap anyin at Supima : ke únyi ga Hupima, me, lap anyin at Hupima. 40 Ke haba li laku Bela, me, Areda, me Naamana : ke únyi ga Areda, me, lap anyin at Areda : ke únyi ga Naamana, me, lap anyin at Naamana. 41 Wale laku Beniamina hoton anyidra je lap : ke haba tavat gadra adre me aú, me fâte faiv thauzan ke siks haded.

42 Walang laku Dana hoton anyidra je lap : únyi ga Suhama, me, lap anyin at Suhama. Wale je lap anyi Dana hoton anyidra je lap. 43 Haba je lap hia anyin at Suhama, hoton tavat adre me aú, me ödra sikste foa thauzan ke foa haded.

44 Haba laku Asera hoton anyidra je lap : únyi ga Iemina, me, lap anyin at Iemina : únyi ga Iesevi, me, lap anyin at Iesevi : únyi ga Beria, me, lap anyin at Beria. 45 Ke únyi ge laku Beria : haba únyi ga Heberu, me, lap anyin at Heberu : ke únyi ga Malekiela, me, lap anyin at Malekiela. 46 Ke Sara ien hlu nöku Asera. 47 Wale je lap anyin laku Asera hoton tavat adre áu gadra a fíte theri thausan ke foa haded.

48 Haba laku Nafatali hoton anyidra je lap : únyi ga Jazela, me, lap, anyin at Jazela : únyi ga Guni, me, lap anyin at Guni : 49 ke únyi ga Jazera, me, lap anyin at Jazera : ke únyi ga Silema, me, lap anyin at Silema. 50 Wale je lap anyin at Nafatali hoton anyidra je lap : ke haba tavat gadra adre aú, me, fâte faiv thauzan ke foa haded.

51 Wale tavat adre me aú unyin lakon Isaraela, a ödra siks haded ke wan thauzan ke seven haded ke thöte.

52 Ke Iehova ame ha kö Mose, ka habe, 53 Adre me he ka khenâ hneyei ka tavat eling hoton úseiny je ien. 54 Haba tavat ae se, me u me he ka ham gánâ hneyei ködra, ke haba tavat ae wakhalet, me u me he ka ham hneyei ae úhnyukong : adre me he ka ve ham ködra hneyei hoton úseidra adre me aú. 55 Ke so bi adre me he ka khenâ hneyei ge uglekôb : adre me he ka hu hneyei hoton ien je tribu anyin lakamödra. 56 Adre me he ka khenâ me idra hoton uglekôb ge tavat ae se me tavat ae wakhalet.

57 Ke walang at Levi adre aú hoton anyidra je lap : únyi ga Geresoma, me, lap

anyin at Geresoma : únyi ga Kohatha, me lap anyin at Kohatha : únyi ga Merari, me lap anyin at Merari. 58 Wale je lap anyin at Levi : a lap anyin at Libeni, me lap anyin at Heberona, me lap anyin at Maheli, me lap anyin at Musi, me lap anyin at Kora. Ke Kohatha ame hnokoâ Amerama. 59 Ke haba ien öio Amerama, me, Jokebeda, a nöku Levi, waleji a hnokoâ hnyi Aigupito : ke e ame hnöku Arona, me Mose, me Miriama, a hanidru, ga Amerama. 60 Ke haba laku Arona, me, Nadaba, me Abihu, me Eleazara, me Ithamara. 61 Ke a mokcu Nadaba me Abihu hnyi hnödru hna hudo meic ae ke bongon bi hnyi hnyimákö Iehova. 62 Ke je hnyat gadra adre aú, me, ödra twente theri thauzan, obaga hia hwân ge tavat a khaca tehi me gan hon e : anyin adre ca tha öü ödra me lakon Isaraela, anyin adre ca ha gadra unyin lakon Isaraela.

63 Wale tavat a aú hnö Mose me Eleazara at bihut : wale li at ödre aú lakon Isaraela, hnyi dok ae tha hon hnyi Moaba, hnyi Joridano, hnyi Jeriko. 64 Ke haba hnyidra hia me ba ke at a aú hnö Mose me Arona ehac, waleji hnyi hnödru hna aú lakon Isaraela hnyi hnyebuba Sinai. 65 Anyin a hia but Iehova ha gadra, ka habe, Adre me he ka mokcu hnyi hnyebuba. Me ba köluidra, ke so bi Kaleba nöku Jefune, me Josua nöku Nuna.

HNYIMAKAN 27.

KE ame o but je hlu laku Zelofeada, nöku Hefera, nöku Gileada, nöku Makir, nöku Manase, a je lap anyi Manase nöku Josefa : ke walang ien lakon je hlu, jia Mala, me Noa, me Hogela, me Mileka, me Tireza. 2 Ke ödrin e tot hnyi hnyimákö Mose me Eleazara at bihut, me hnyi hnyimakan je than me úkhacaköu hia hnyi hwanumen uma úkhacaköu, me ha, ka habe, 3 A mokcu kamöhmun hnyi hnyebuba, ke e ame ca tha tot me tavat adre me bi tot kö Iehova unyin lahiö Kora : ke so bi e ame moko anyin hulö bi, ke ba nokon бага. 4 Geü adre me he ka ohia ien kamöhmun hnyi wanben anyin lap, anyin ae ba nokon бага? Ha ihmun bi unyin je liamekeiny me cica. 5 Ke Mose ame hom hodrin hofuc kö Iehova. 6 Ke Iehova ame ha kö Mose, ka habe, 7 E wisa hofuc hwan je hlu laku Zelofeada : e

hnathu u me he ka ha idrin unyin je liamekeiny me kamödrin; ke u me he ka hna ködrin iny kamödrin. 8 Ke u me he ka ha ka lakon Isaraela, ka habe, A ne mokcu ke at ke ba nokon бага, me öbun e he ka hna iny ka nokon hlu. 9 Ke ame ne ba nokon hlu, me öbun e he ka ham iny hnyei ka je liamekeiny mē. 10 Ke ame ne ba liamekeiny mē, me öbun e he ka ham iny linyei ka je liamekeiny me kamen. 11 Ke ame ne ba liamekeiny me kamen, me öbun e he ka ham iny hnyei ka je útangköu mē, a iny biju: ke wale hnanyibu adre owisa hobi kâu lakon Isaraela, hoton hna hûna hnö Iehova kö Mose.

12 Ke Iehova ame ha kö Mose, ka habe, Öliä thö bucen eang a Abarima, me u me wâ hnyei waleji oge ham ka lakon Isaraela. 13 Ke u ka hia but wâ e, me u me he ka he minya ka tha mokut me lakâmâm, helâ me Arona a tuhâm: 14 anyin a obe hanyâûâ hok hofuc hnyi hnyebuba Zin, waleji hnyi hna iwatretra hnen úkhacaköu, he ka okabi nya hnyi an hnyi hnyimaködra. (Wale an Meriba e Kadesi, hnyi hnyebuba Zin.) 15 Ke Mose ame ha kö Iehova, ka habe, 16 E na he Iehova Khongon je hanon tavat hia, ka otilâ ke at hon úkhacaköu, 17 me me didrut hnyi hnyimaködra me dit hmetu hnyi hnyimaködra, me lili ödra e helê, me ohmetu ödra, me me ca he úkhacaköu anyi Iehova ka helâ me hnahat mamoe ae ba at ame tuö. 18 Ke Iehova ame ha kö Mose, ka habe, U me he ka hum Josua noku Nuna, at ae so hanon, ke ip hnyamâm hon; 19 me otilâ e hnyi hnyimakö Eleazara at bihut, me úkhacaköu hia; me hûna kâu hnyi hnyimaködra. 20 Ke u me he ka ip hon e hanen ânyâm hmanenang, me me löng hoton hnen úkhacaköu hia a lakon Isaraela. 21 Ke e ame he ka tot hnyi hnyimakö Eleazara at bihut, ke hamen he ka hnö hobi kâu hnyi hna owisa hnen Urim hnyi hnyimakö Iehova: ke adre me he ka he hoton hnen hna ha, k' adre me he ka hmetu hoton hnen hna ha, e me lakon Isaraela hia a tha ödra mē, wale úkhacaköu hia. 22 Ke Mose ame ânyâ helâ me hna hûna hnö Iehova; me e ame hum Josua me otilâ e hnyi hnyimakö Eleazara at bihut me úkhacaköu hia: 23 me e ame ip li hnyamen hon, me hûna kâu, helâ ma hna ha hnö Iehova a deny Mose.

HNYIMAKAN 28.

KE haba Iehova ame ha kö Mose, ka habe, 2 Hûna thö ka lakon Isaraela me ha ködra, ka habe, Haba hut könya, wale jeû hobi kâu je hut a an hnen meic me me bo so könya, me wale únyi öbun e he ka tuö he ka hudo könya hnyi je úen adre thu. 3 Ke u me he ka ha ködra, ka habe, Walang hut a an ge meic öbun e he ka hudo kö Iehova; a je lakon mamoe бага a khaca hunainy ae ba hnyikongon, úse lo hnyi ke bong me ke bong, hnân hudiny leû hnyi ta ogo bong hia. 4 U me he ka hudo ke nokon mamoe hnyi hnyomakatu, ke u me he ka hudo ke nokon mamoe hnyi sahac; 5 ke khaca omer falawa adre úhaniken me wakaco adre kokot a ke keihen a vakiny hin, me hnân hudiny han. 6 Wale hudiny leû hnyi ta ogo bong hia, waleji adre hûna hnyi bucen Sinai me me bo so, a hut a an ge meic kö Iehova. 7 Ke haba hudiny ic, me ke keihen a vakiny hin hnân bi hanen nokon mamoe a khaca: u me he ka hingâlâ but waina ae hwege kö Iehova hnyi dok ae kap hnân hudiny ic. 8 Ke haba nokon mamoe a loiny me u me he ka hudo hnyi sahac: helâ me hudiny han hnyi hnyomakatu u me he ka hudo e, ke helâe hudiny ic, me hut a an ge meic ae bo so kö Iehova.

9 Ke haba hnyi bong sabbath, me lo li nokon mamoe бага ae ba hnyikongon a khaca hunainy, ke lo li omer falawa hnân hudiny han adre úhaniken me wakaco, me hudiny ic a hanen: 10 haba únyi e me hudiny leû hnyi ta je sabbath hia, ke ca ha bi hudiny leû hnyi ta ogo bong, ke hudiny ic a hanen.

11 Ke haba hnyi hnyimakan anyibun je tehi me öbun e he ka hudo hudiny leû kö Iehova: a lo li nak bolok, ke khaca mamoe бага, ke seven ta lakon mamoe бага ae ba hnyikongon, a khaca hunainy; 12 ke kun ta omer falawa adre úhaniken me wakaco hnân hudiny han hnân bi hanen ke bolok me ke bolok; ke lo li omer falawa adre úhaniken me wakaco hnân hudiny han, a hanen nokon mamoe a khaca; 13 ke khaca omer falawa adre úhaniken me wakaco hnân hudiny han, a hanen nokon mamoe a khaca; hnân hudiny leû ae bo so, hut a an ge meic kö Iehova. 14 Ke haba je hudiny ic gadra, me hafny hin waina hnân bi hanen ke bolok, ke ke keihen a kuniny hin hnân bi hanen mamoe бага, ke

ke keihen a vakiny hin hnân bi hanen mamoe : wale hudiny leû hnyi je tehi hnyi huna. 15 Ke khaca got бага hnân hudiny hulö, he ka hudo kö Iehova ; ke ca ha bi hudiny leû adre hudo bala, me hudiny ic a hanen e.

16 Ke haba hnyi tehi a bân hnyi bong a fortininy, me adre me he ka ânyâ paseka kö Iehova. 17 Ke hnyi bong a fiftininy tehi eling, me adre me he ka bijeu : adre me he ka han areto adre ca levenâ hnyi je bong a seven. 18 Ke haba hnyi bong a bân, me ame he ka hu ûkhacaköu ae kap ; k' öbun e ca he ka ânyâ huliwa ae hmak : 19 ke öbun e he ka hudo hut a an ge meic, a hudiny leû kö Iehova ; wale lo li nak bolok, ke khaca mamoe бага, ke seven je lakon mamoe a khaca hunainy : a je meno ae ba hnyikongudrin : 20 ke haba je hudiny han a hanen, me, falawa adre ûhaniken me wakaco : öbun e he ka hudo kun ta omer hnân bi hanen ke bolok, ke lo li omer hnân mamoe бага ; 21 u me he ka hudo úsa khaca omer he ka ve bi hanen je lakon mamoe a seven ; 22 ke khaca got бага hnân hudiny hulö, me me bi hwaban anyibun möt. 23 Öbun e he ka hudo e, a tha e me hudiny leû adre hudo hnyi hnyomakatu a hudiny leû ae hmâ bala. 24 Ke öbun e he ka hudo helâe hnyi je bong a seven, wale han he ka bi hanen hut a an ge meic k' ame bo so kö Iehova : adre me he ka hudo e a tha e me hudiny leû ae hmâ, me hudiny ic a hanen. 25 Ke haba hnyi bong a seveniny öbun e he ka hu ûkhacaköu ae kap ; ke öbun e ca he ka ânyâ huliwa ae hmak.

26 Helâe minya hnyi bong bongon je wan a bân, öbun ka he ka hudo hudiny han ae teb únyi kö Iehova, hnyi anyibun bijeuâ je wik, me öbun e he ka hu ûkhacaköu ae kap ; k' öbun e ca he ka ânyâ huliwa ae hmak : 27 ke öbun e he ka hudo hudiny leû ae bo so kö Iehova ; a lo li nak bolok, ke khaca mamoe бага, ke seven lakon mamoe бага a khaca hunainy ; 28 me hudiny han a hanen e, wale falawa adre ûhaniken me wakaco, kun ta omer hanen bolok a khaca, ke lo li omer hanen mamoe бага a khaca, 29 a úsa khaca omer he ka ve bi hanen lakon mamoe a seven ; 30 ke khaca got бага, hnân bi hwaban anyibun möt. 31 Öbun e he ka hudo e a tha e me hudiny leû ae hmâ, me hudiny han a hanen (a je meno ae ba hnyikongon) tha e me je hudiny ic a hanen e.

HNHYIMAKAN 29.

KE haba hnyi tehi a seveniny hnyi bong a baniny tehi, me öbun e he ka hu ûkhacaköu ae kap ; k' öbun e ca he ka ânyâ ke huliwa ae hmak : wale bong öbun e he ka tûö je trutru hnyin. 2 Ke öbun e he ka hudo hudiny leû ae bo so kö Iehova ; a khaca nak bolok, ke khaca mamoe бага, ke seven lakon mamoe бага ae ba hnyikongon a khaca hunainy : 3 ke haba hudiny han a hanen e, me falawa adre me ûhaniken me wakaco, a kun ta omer hnân bolok, ke lo li omer hnân mamoe бага, 4 ke úsa khaca omer he ka ve bi hanen lakon mamoe a seven : 5 ke khaca got бага hnân hudiny hulö, me me bi hwaban anyibun möt : 6 ke adre me he ka ânyâ minya hudiny leû hnyi úen ae manen je tehi, me hudiny han a hanen e, me hudiny leû ae hmâ, ke hudiny han a hanen, tha e me je hudiny ic, hoton hna hûna, hnân bo so, a hut a an ge meic kö Iehova.

7 Ke haba hnyi bong a teniny tehi a seveniny öbun e he ka hu ûkhacaköu ae kap : me öbun e he ka hom úhnyúkongo ta je hnyekubun ; k' öbun e ca he ka huliwa : 8 ke öbun e he ka hudo hudiny leû kö Iehova me me bo so : a khaca nak bolok, ke khaca mamoe бага, ke seven lakon mamoe бага a khaca hunainy : a je meno ae ba hnyikongon : 9 me hudiny han a hanen e ; wale falawa adre ûhaniken me wakaco, kun ta omer hnân bolok, ke lo li omer hnân mamoe бага a khaca, 10 úsa khaca omer he ka ve bi hanen lakon mamoe a seven : 11 ke khaca got бага hnân hudiny hulö ; ke ca ha bi hudiny hulö hnân bi hwaban möt, me hudiny leû ae hmâ, me hudiny han a haniny, a tha e me je hudiny ic.

12 Ke haba hnyi bong a fiftininy tehi a seveniny, me öbun e he ka hu ûkhacaköu ae kap ; ke ca he öbun ka ânyâ huliwa ae hmak, k' öbun e he ka bijeuâ kö Iehova seven ta bong : 13 ke öbun e he ka hudo hudiny leû, hut a an ge meic ae bo so kö Iehova ; a thötin je nak bolok, ke lo li mamoe бага, ke fortin lakon mamoe бага a khaca hunainy ; a je meno ae ba hnyikongon : 14 ke je hudiny han a hanen, wale falawa adre ûhaniken me wakaco, a úsa kun omer he ka ve bi hanen je bolok a thötin, ke úsa lo li omer he ka ve bi hanen li mamoe бага, 15 ke usa khaca omer he

ka ve bi hanen lakon mamoe a fortin : 16 ke khaca got baga hnân hudiny hulö ; ke ca ha bi hudiny leû ae hmâ, me hanen a hudiny han, me hudiny ic.

17 Ke haba hnyi bong a loiny, me öbun e he ka hudo twelw je nak bolok, ke lo li mamoe baga, ke fortin lakon mamoe baga ae ba hnyikongon a khaca hunainy : 18 ke hudiny han me hudiny ic he ka ve bi hanen je bolok, me li mamoe baga, me lakon mamoe, hoton úseidrin, helâ me hna hûna : 19 he khaca got baga hnân hudiny hulö : ke ca ha bi hudiny leû ae hmâ, me hanen e ; a hudiny han, me hudiny ic.

20 Ke haba hnyi bong a kuniny, me eleven ta bolok, ke lo li mamoe baga, ke fortin lakon mamoe baga ae ba hnyikongon, a khaca hunainy ; 21 ke hudiny han, me hudiny ic, a hanen je bolok, me li mamoe baga, me lakon mamoe, hoton úseidrin, helâ me hna hûna : 22 ke khaca got baga hnân hudiny hulö ; ke ca ha bi hudiny leû ae hmâ, me hanen a hudiny han me hudiny ic.

23 Ke haba hnyi bong a vakiny, me ten ta bolok, ke lo li mamoe baga, ke fortin lakon mamoe baga ae ba hnyikongon, a khaca hunainy : 24 ke haba je hudiny han me je hudiny ic, ame he ka ve bi hanen je bolok, me li mamoe baga, me lakon mamoe, hoton je úseidrin, helâ me hna hûna : 25 ke khaca got baga hnân hudiny hulö : ke ca ha bi hudiny leû ae hmâ, ke hanen a hudiny han, me hudiny ic.

26 Ke haba hnyi bong a thabûnginy nain je bolok, ke lo li mamoe baga, ke fortin je lakon mamoe baga, ae ba hnyikongon, a khaca hunainy : 27 me je hudiny han, me je hudiny ic a hanen, ame he ka ve bi hanen je bolok, me li mamoe baga, me lakon mamoe hoton úseidrin, helâ me hna hûna : 28 ke khaca got baga hnân hudiny hulö ; ke ca ha bi hudiny leû ae hmâ, ke hudiny han, me hudiny ic a hanen.

29 Ke haba hnyi bong a siksiny, eit ta bolok, ke lo li mamoe baga, ke fortin lakon mamoe baga ae ba hnyikongon, a khaca hunainy : 30 ke je hudiny han, me je hudiny ic a hanen, he ka ve bi hanen je bolok, me li mamoe baga, me lakon mamoe, hoton úseidrin, helâ me hna huna : 31 ke khaca got baga hnân hudiny hulö ; ke ca ha bi hudiny leû ae hmâ, ke hudiny han, me hudiny ic a hanen.

32 Ke haba hnyi bong a seveniny, seven ta bolok, ke lo li mamoe baga, ke fortin

lakon mamoe baga ae ba hnyikongon, a khaca hunainy : 33 me je hudiny han, me je hudiny ic a hanen, he ka ve bi hanen je bolok, me li mamoe baga, me lakon mamoe, hoton úseidrin, helâ me hna hûna : 34 ke khaca got baga hnân hudiny hulö, ke ca ha bi hudiny leû ae hmâ, me hudiny han, me hudiny ic a hanen.

35 Ke haba hnyi bong a eitiny, me öbun e he ka hu úkhacaköu ae únyi hnathu, öbun e ca he ka ânyâ ke huliwa ae hmak : 36 ke öbun e he ka hudo hudiny leû, hut a an ge meic ae bo so kö Iehova : a khaca bolok, ke khaca mamoe baga, ke seven lakon mamoe baga ae ba hnyikongon, a khaca hunainy : 37 me hudiny han, me hudiny ic a hanen he ka ve bi hanen bolok, me mamoe baga, me lakon mamoe, hoton úseidrin, helâ me hna hûna : 38 ke khaca got baga hnân hudiny hulö, ke ca ha bi hudiny leû ae hmâ, me hudiny han, me hudiny ic a hanen.

39 Öbun e he ka hudo eling kö Iehova hnyi anyibun je bijeû adre thu, ke ca ha bi anyibun je khöbi, me je hut ae betenge hnân je hudiny leû, me je hudiny han, me je hudiny ic, me je hudiny ole öbun e labö hudo. 40 Ke haba Mose ame omanená ka lakon Isaraela hoton hna hûna hnö Iehova kö Mose.

HNYIMAKAN 30.

KE haba Mose ame ha ka je taben je tribuiny lakon Isaraela, ka habe, Walang únyi a hûna Iehova. 2 Ame ne he ke at ka bi khöbi kö Iehova, ame ne khemanyin he ka ca hnyekon ge hwan hofuc, me e ame ca he ka hanyâûa hnen hna ha ; ke e ame he ka ânyâ hia hoton hna he but úyui hnyi hnyimen. 3 Helâe minya ke momo ame ne bi khöbi kö Iehova, me ca hnyekon ge hwan hofuc, ke tiga e bi hnyi hnyaban kamen, ke tiga ca at hnathu ; 4 ke ame ne löng anyin khöbi hnen kamen, me hofuc ame ca hnyekon kâu, k' ame ne laba hnyibi kamen ; awe ame he ka tethmâ hia anyin khöbi, ke haba khaca ame he ka tethmâ hofuc hia ame ca hnyekon kâu. 5 Ke ame ne thawâ e hnen kamen, hnyi bong e ame löng hwan hnyin ; awe, ame ca he ka tethmâ anyin khöbi, me hofuc a ca kâu hnyekon ; k' ame he Iehova ka hna e, anyin a thawâ e hnen kamen. 6 Ke ame ne hu âân, ke ka e bi anyin khöbi, ame ne ke hofuc ae úhlöhlök ame he únyi hnyi li eso-

ngodiny, wale ame hia but ca hnyekon kâu; 7 ke e ka löng ut e hnen áiän бага, k'ame ca fuc kâu hnyi bong e ame löng hnyin; awe, ame he ka tethmä anyin khöbi, me hofuc e ame ha, waleji a ca hnyekon kâu. 8 Ke ame ne thawá momo hnen áiän hnyi bong e ame löng hnyin; awe, e ame he ka oúnyibáúá anyin khöbi, me hofuc ae úhlöhlök únyi hnyi li esongodiny, waleji e ame ca hnyekon gan : ke Iehova ame he ka hna but e. 9 Ke haba khöbiny safac, ame ne momo adre degec, me ame he ka tethmä hia unyin hofuc hia e ame ca e gan. 10 Ke ame bi khöbi hnyi uma amen áiän a бага, k'ame ne ca hnyekon ge hofuc adre khemanyin, 11 ke a löng ut hnen áiän, k'ame ne laba hnyibi, k'ame ca thawá, awe, ame he ka tethmä hia anyin je khöbi hia, k'ame he ka tethmä hofuc hia waleji e ame ca hnyekon kâu. 12 Ke ame ne hia but oúnyibáúá hnen áiän a бага hnyi bong e ame löng hnyin, awe, ame ca he ka tethmä je hofuc únyi hnyi li esongodiny hnyi anyin je khöbi, me hofuc ame ca hnyekon gan : anyin a hia but oúnyibáúá je únyi e hnen бага; ke ame he Iehova ka hna e bi. 13 E khana áiän a бага he ka ohmä, ke e khana áiän a бага he ka oúnyibáúá je khöbi hia me je hna khemanyin hia a hnän ca hnyok. 14 Ke ame ne ba hofuc hwan бага ka momo a áiän hnyi ke bong me ke bong; awe, e ame ohmä ta je khöbi hia anyin áiän a momo, me hofuc hia e ame ca hnyekon gan : haba e ame otílá hmá e, anyin ae ba hnen hna ha kâu hnyi bong e ame löng hnyin. 15 Ke ame ne he бага ka oúnyibáúá, hnyi úen e ame löng, awe, ame he ka takou e hulö anyin momo. 16 Wale je hnanyibu a húna Iehova kö Mose ge бага me áiän, me kamen me nokon hlu e ka tiga ca at hnathu bi hnyi hnyaban kamen.

HNYIMAKAN 31.

KE Iehova ame ha kö Mose, ka habe, 2 U me he ka bi hwaban at Midiana can lakon Isaraela : ke hwaban e, me adre me he ka tha hum u ka lakámám. 3 Ke haba Mose ame ha ka tavat, ka habe, He th' öbun ka penapena keihen gabun he ka vat, m' adre me he ka vat at Midiana he ka bi hwaban at Midiana hobi kö Iehova. 4 Ke öbun e he ka kuná úsa khaca thauzan únyi hnyi je tribu Isaraela hia he ka vat. 5 Me adre me ham únyi hnyi je

thauzaniny Isaraela, úsa khaca thauzan únyi hnyi je tribu, a twelv thauzan adre penapena hnän vat. 6 Ke Mose ame kun' ödra, a úsa khaca thauzan únyi hnyi je tribu, he ka vat, walödra me Fineasa, a nöku Eleazara at bihut he ka hnyi vat, tha e me je únyi únyi hnyi dok ae kap, ke lo li trutru hnyi hnyamen he ka túá. 7 Me adre me vat me at Midiana helá me Iehova ame húna kö Mose; ke adre me hlingá obaga hia. 8 Ke adre me hlingá je thaniny Midiana tha ödrin me tavat adre hlingá; wale Evi, ke Rekek, ke Zura, ke Huro, ke Reba, ödrin je thaniny Midiana a thabúng : ke adre me hlingö Balaama nöku Beora ge hele vat. 9 Ke haba lakon Isaraela adre me hom hwenbá omomoiny Midiana, me ta je úhnyúkongidra; me hügúná hia haledra je hnahat kau me mamoe, me je omjehedra 10 Ke adre me thong degecá ge meic anyidra je taun hnyi je dok adre me laba hnyin. 11 Ke adre me söh, me hügúna ta je únyi hia, a at me meno. 12 Ke adre me hom je bá, me omeno, me hnödra hna hügúná, kö Mose, me Eleazara at bihut, me úkhacaköu anyin lakon Isaraela, ka hnyi hna hunuma hnyi je dok ae tha hon hnyi Moaba, wale baten Joridano hnyi Jeriko.

13 Ke haba Mose, me Eleazara at bihut, thaödru me je thaniny úkhacaköu, ödrin e he he ka úkhanö mödra hoton hna hunuma. 14 Ke Mose ame hmönyin ka tavat musö vat, a je taben thauzan, me je taben haded, a je hnyat ödrin e hmetu úhedrin hnyi vat. 15 Ke Mose ame ha ködrin, ka habe, Hawa, öbun e omelö hia omomo? 16 Wá bi walödrin e hnyat ödrin e bijoniny lakon Isaraela, me me hna degeci Iehova hnyi únyi eji anyi Peora, hnen úne anyi Balaama, me me o mok ae cap ka hnyi úkhacaköu anyi Iehova. 17 Anyin a wale hlingá but wainda hia unyin je wanakat, ke hlingá but watamomo hia, tavat adre hia but tha mokut me бага. 18 Ke omelö ju hobi köbun bi wahu a ca tha mokut me бага. 19 Ke öbun e he ka hunuma hoton hna hunuma hnyi seven ta bong; a je hnyat unyibun adre hia but hlingá at, me hnyat unyibun adre hia but kálá komok, me obosoi öbun bi me anyibun je bá hnyi bong a kuniny me bong a seveniny. 20 Ke haba je úkhaú hia, me ta je únyi hia adre tibet únyi hnyi unen meno, me leünen got, me utö, me öbun e he ka obosoi öbun can ta je únyi eling. 21 Ke haba Eleazara at bihut ame ha ka tavat adre hnyi vat, ka habe, Wa-

lang hna owisa hnen hnanyibu waleji hnö Iehova hna hûna kö Mose; 22 haba gol, me sileva, me bras, me fao, me tin, me led, 23 a ta je únyi hia a ca an ge meic, me öbun e he ka inâ ta je únyi e hnyin meic, me me bo so but; ke so bi adre me he ka obosoâ minya ge köien hake ip. 24 Ke öbun e he ka hneú anyibun je úkhaú hnyi bong a seveniny, m' öbun e bo so, ke hwaban e me öbun e he ka dit ka hnyi hna hunuma.

25 Ke Iehova ame ha kö Mose, ka habe, 26 U me he ka aú úseiny ta je únyi adre hügúnâ, wale at me meno, hamâm, me Eleazara at bihut, me lakamen ae beönua hnyi úkhacaköu: 27 me khenâ luâ but ta je hna hügúnâ ka tavat vat ae metâ úhedra hnyi vat, me ka úkhacaköu hia: 28 ke u me he ka hûna he ka bi fat kö Iehova hnen tavat adre hnyi vat: a úsa khaca únyi hnyi je faiv haded, ame ne tavat, ame ne bolok, ame ne asina, ame ne mamoe: 29 hom dö e únyi hnyi jekhoudra me ham kö Eleazara at bihut, hnân hudiny hajijing kö Iehova. 30 Ke u me he ka hom únyi hnyi jekhon lakon Isaraela, úsa khaca únyi hnyi je fifte, a tavat, me bolok, me asina, me mamoe, me omeno hia, me ham hia ka at Levi, tavat adre me ányâ hanymen hnyi uma mano umö Iehova. 31 Me haba Mose me Eleazara at bihut ödru me ányâ hoton hna hûna hnö Iehova kö Mose. 32 Ke haba ta je meno adre söh, ke ca ha ge ta je únyi adre hügúnâ hnen aten vat, me siks haded ke sevente faiv thauzan ta je mamoe, 33 ke sevente tu thauzan ta je bolok, 34 ke sikste wan thauzan ta je asina, 35 ke haba tavat hia, me, thöte tu thauzan a je hlu adre tiga ca tha mokut me baga. 36 Ke haba ke haf, wale jekhon tavat adre hnyi vat, haba numerainy me theri haded ke thöte seven thauzan ke faiv haded je mamoe: 37 ke haba fat kö Iehova únyi hnyi je mamoe, me, siks haded ke sevente faiv. 38 Ke thöte siks thauzan je bolok, ke haba fatiny hobi kö Iehova, me, sevente tu. 39 Ke thöte thauzan ke faiv haded je asina; ke haba fatiny hobi kö Iehova me sikste wan. 40 Ke sikstin thauzan tavat; ke haba fat kö Iehova, me ödrin thöte tu. 41 Ke haba Mose ame ham fat, wale hudiny kap göranyai kö Iehova, kö Eleazara at bihut, hoton hna hûna hnö Iehova kö Mose. 42 Ke haba jekhon lakon Isaraela, wale hnö Mose hna khenâ únyi hnyi hna hügúnâ hnen aten vat, 43 (haba jekhon úkhaca-

köu me, theri haded ke thöte seven thauzan ke faiv haded je mamoe, 44 ke thöte siks thauzan je bolok, 45 ke thöte thauzan ke faiv haded je asina, 46 ke sikstin thauzan tavat:) 47 ke Mose ame hom únyi hnyi jekhon lakon Isaraela úsa khaca únyi hnyi je fifte, a tavat me omeno, me ham ka at Levi, tavat adre me ányâ hanymen hnyi uma mano umö Iehova; hoton hna hûna hnö Iehova kö Mose. 48 Ke ame o but kö Mose je taben thauzaniny je utbavat, a je taben je thauzan, me je taben je haded: 49 ke ödrin e ha kö Mose, ka habe, öhmun je lathnyabaem, öhmun e aú úseiny tavat vat unyihmun, me ca hia ke at gahmun. 50 Ke öhmun e hom jem hut kö Iehova, a je únyi öhmun e ve hügúnâ, je hmanenanginy gol, je wen can, me je wen benyin, me je wen banyen, me je anen hnyikonyen, me ta je waen, hnân he ka bi hwaban anyihmun möt hnyi hnyimakö Iehova. 51 Ke haba Mose me Eleazara at bihut, ödru me hom ta je gol únyi gadrin, wale je hmanenanginy hia thithö adre huliwan. 52 Ke haba gol hia thithö wale hudiny kap göranyai ödrin e hudo kö Iehova, a únyi ge je taben je thauzan, me je taben je haded, me, sikstin thauzan ke seven haded ke fifte ta je sekel. 53 (Anyin a haba aten vat, me adre me hia but ve hügúnâ ta je únyi, wale ke at me ke at gadra.) 54 Ke haba Mose me Eleazara at bihut ödru me hom gol únyi ge je taben je thauzan, me je taben je haded, me hom ka hnyi uma úkhacaköu, hnân oúnykúmeá ka lakon Isaraela hnyi hnyimakö Iehova.

HNYIMAKAN 32.

KE haba laku Reubena, me laku Gada ödrin e tren omeno ae se hia: ke ödra adre me wâ hnyei Jazera, me hnyei Gileada, me wâ bi, hnyei ae so hobi kâu ta je meno; 2 me ame he laku Gada me laku Reubena, me ha kö Mose me Eleazara at bihut, me je tuhan úkhacaköu, ka habe, 3 Haba hnyei Atarotha, me Dibona, me Jazera, me Nimera, me Hesebona, me Eleala, me Sebama, me Nebo, me Beona, 4 wale hnyei Iehova ame kot hnyi hnyimakan úkhacaköu anyin at Isaraela, me, wale hnyei ae úcú hobi kâu omeno, ke öhmun tavat tren omeno a lathnyabaem. 5 Ke ödrin e ha, ka habe, U je ne betenge gahmun, ö u hna hnyei eling köhmun a lathnyabaem, me ihmun; ke ca

hum öhmun bi he ka hanyâûâ Joridano. 6 Ke Mose ame thu ka laku Gada me laku Reubena, ka habe, Hawa, ame he je liamekeiny möbun ka vat e helê, ke öbun e he biju ka laba eang? 7 Ke iêú gabun öbun e ohluhlûá hnyekon lakon Isaraela, m' adre me ca he ka hanyâûâ ka hnyi hnyei waleji a ham ködra Iehova? 8 Ame ânyâ helâe lakamöbun waleji hnyi hnök hna kun' ödrin úheny Kadesi-banea he ka ecmakâ hnyei. 9 Anyin a ödrin e he but ka hnyi hnyigöulen bucen Esekolo, me wâ hnyei, me ödrin e ohluhlûá hnyekon lakon Isaraela, m' adre me ca he ka hnyi hnyei waleji a ham ködra Iehova. 10 Ke ame ubâhlâ thö hmönyin anyi Iehova hnyi bong eling, me e ame khemanyin, ka habe, 11 Haba tavat adre he jem úhedra Aigupito, hwân ge tavat a twente huna me gan hon e, me adre me ca he ka hnyi wâ hnyei waleji oge khemanyin kö Aberahama me Isaaka, me Jakob; anyin adre me ca hnu hotuk hnyi ta je únyi hia: 12 ke ca ha bi Kaleba nöku Jefune at Kenaza, me Josua nöku Nuna: anyin a ödre hnu hotu Iehova hnyi ta je únyi hia. 13 Ke ame ubâhlâ thö hmönyin anyi Iehova ka at Isaraela, me e ame ohei ödra hnyi hnyebuba fáte je huna ke ne o but ame hia but tavat adre me ânyâ hulö hnyi hnyimakö Iehova. 14 Ke wâ bi, öbun e o biju hwaban lakamöbun, a hanen tavat ae kong, he ka ogânâ hmönyin me gan anyi Iehova kö Isaraela. 15 Anyin a öbun e ne hmetu úhebun unyin, me e ame he hmetu ka hna degeci öbun hnyi hnyebuba; ke öbun e he ka ohia tavat eang hia thithö. 16 Me ödrin e hakekeny kâu me ha, ka habe, Öhmun e he ka si hagin halehmun je meno eang, me bi hnyaban lakuhmun, can aten hnyei: 17 ke öhmun e he ka penapena me hnyimakan lakon Isaraela, ke ne o but öhmun e hum ödra ka hnyi idra: k' ame he lakuhmun bi ka labâ je taun adre up hagin, can aten hnyei. 18 Öhmun e ca he ka hmetu ka hnyi umöhmun je uma ke ne o but ame ve hu iny lakon Isaraela hia. 19 Anyin a öhmun e ca he bi ka tha tren hnyei mödra hnyi ke keihen Joridano ke e jio, anyin adre kú köhmun ihmun hnyi ke keihen e deiö Joridano. 20 Ke haba Mose ame thu ködrin, ka habe, Öbun e ne he ka ânyâ únyi e; wale öbun e ne he ka penapena he ka he hnyi hnyimakö Iehova he ka hnyi vat e helê, 21 k' ame ne he tavat penapena hia unyibun ka hanyâûâ Joridano hnyi

hnyimakö Iehova, ke ne o but e ame obâ je iwahnaihmissiony më hnyi hnyimakan, 22 me hom úhnyûkongo hnyei hnyi hnyimakö Iehova: awe, öbun e he ka hmetu hwaban e, k' ame he ka ba hulö gabun hnyi hnyimakö Iehova, me hnyi hnyimakan at Isaraela; ke haba hnyei eang, meibun bi hnyei hnyi hnyimakö Iehova. 23 Ke öbun e ne ca ânyâ e, me wâ bi, öbun tavat hulö kö Iehova: ke wâhmakhmeto ju öbun, a g' ame he ka omanen' öbun ge anyibun hulö. 24 Otilâ ju je taun hobi kâu je lakubun, me bi hagin, halebmun je mamoe; ke he th' öbun ka ânyâ únyi ame o únyi hnyi je hnyimöbun. 25 Me ame ha laku Gada me laku Reubena kö Mose, ka habe, Öhmun e he a lathnyabaem ka ânyâ helâ me than ame ha. 26 Ame he lakuhmun me laöiöhmun, me halehmun je hnahat mamoe, me halehmun je meno hia ka laba hnyi je taun e Gileada: 27 k' ame he lathnyabaem ka hanyâûâ, a tavat gahmun hia adre me hom omjehen vat hnyi hnyimakö Iehova he ka hnyi vat, hoton hna ha hnen than.

28 Me haba Mose ame hûn ödra kö Eleazara at bihut, me kö Josua nöku Nuna, me ka je taben ae beönua hnyi je tribuiny lakon Isaraela. 29 Ke Mose ame ha ködra, ka habe, Ame ne tha he möbun laku Gada me laku Reubena ka hanyâûâ Joridano, a je hnyat hia adre hom omjehen vat, hnyi hnyimakö Iehova, me hom úhnyûkongoâ hnyei hnyi hnyimaköbun; awe, öbun e he ka ham ködra hnyei Gileada me me idra bi: 30 ke adre me ne ca hom omjehen vat me tha hanyâûâ unyibun, awe, adre me he ka tha hnyei unyibun hnyi hnyei Kanana. 31 Ke haba laku Gada me laku Reubena adre me thu, ka habe, Öhmun e he ka ânyâ helâ me Iehova ame ha köhmun a lathnyabaem. 32 Öhmun e he ka hom omjehen vat me hanyâûâ hnyi hnyimakö Iehova ka hnyi hnyei Kanana, me me he ka hu ihmun hnyei hnyi ke keihen e deiö Joridano. 33 Me haba Mose ame ham ködra, a laku Gada, me laku Reubena, me hafiny tribu Manase a nöku Josefa, dökhü dökhü Sihona thaniny at Amora, me dökhü dökhü Oga thaniny Basana, wale hnyei me je tauniny, a je tauniny hngei igigilö. 34 Ke haba laku Gada, adre me otilâ Dibona, me Atarotha, me Aroera; 35 me Aterotha-sofana, me Jazera, me Jogebea, 36 me Bethe-nimera. me Bethe-harana: a je taun adre up hagin, me je hagin, mamoe. 37 Ke haba laku

Reubena, me adre me otilâ Hesebona, me Eleala, me Kiriathaima; 38 me Nebo, me Baala-meon (k' adre wia li ien,) me Sibema: ke adre me ve hwenyi ien je taun adre otilâ. 39 Ke haba laku Makir nöku Manase, me, adre me he Gileada ai, me hûgûnâ, me obâ at Amora ûnyi hnyin. 40 Ke Mose ame ham Gileada kö Makir nöku Manase; m' adre me labâ e. 41 Ke haba Jaira, nöku Manase, ame he me hûgûnâ je tauniny, me hwenyi ien Havoth-jaira. 42 Ke haba Noba ame he me hûgûnâ Kenatha me je tauniny, ae ûhnyûkong, me hwenyi ien e Noba hoton ien bi.

HNyimakan 33.

WALANG ûheny lakon Isaraela, hnyi hnödra hna he but ûhedra hnyi hnyeï Aigupito, a je köïödra, k' ame musi ödra hnö Mose me Arona. 2 Ke haba Mose ame sihnalimen bongon ûhedra hoton hna huna hnö Iehova: ke walang bongon ûhedra. 3 Adre me he ûheny Ramese hnyi tehi a bân hnyi bong a fittininy tehi a bân: haba bong nyi hwaban paseka ame he but lakon Isaraela ge hnyam ae hwege hnyi hnyimakan at Aigupito hia, 4 k' ame tiga konâm lakudra a bân hia hnen at Aigupito, waleji a hlingâ Iehova unyidra: ke Iehova ame bi hwaban minya anyidra je khong. 5 Ke ame he lakon Isaraela ûheny Ramese me hunuma Sukotha. 6 Ke ûhedra Sukotha, me adre me hunuma Ethama hnyi baten hnyeububa. 7 Ke ûhedra Ethama me adre me hmetu Pihahiroth ai, cicö Baalazefona; me hunuma cicö Migedola. 8 Ke ûhedra cicö Hahiroth, me adre me he hnyi wanben köïö ka hnyi hnyeububa: ke adre me he hnyi kun ta bong hnyi hnyeububa. Ethama, k' adre me hunuma Mara. 9 Ke ûhedra Mara, me adre me o Elima: ke eling Elima je pupuainy köïö a twelve ke sevente je pama; me adre me hunuma eling. 10 Ke ûhedra Elima, me adre me hunuma hnyi Köïö ae Dra. 11 Ke ûhedra hnyi Köïö ae Dra, me adre me hunuma hnyi hnyeububa Sina. 12 Ke ûhedra hnyi hnyeububa Sina, me adre me hunuma Dofeka. 13 Ke ûhedra Dofeka, me adre me hunuma Alusa. 14 Ke ûhedra Alusa, me adre me hunuma Refidima, ke ba köïö eling hnân habelen tavat. 15 Ke ûhedra Refidima, me adre me hunuma hnyi hnyeububa Sinai. 16 Ke ûhedra hnyi hnyeububa Sinai, me adre me hunuma

Kiberoth-atava. 17 Ke ûhedra Kiberoth-atava, me adre me hunuma Hazeroth. 18 Ke ûhedra Hazeroth, me adre me hunuma Rithema. 19 Ke ûhedra Rithema, me adre me hunuma Rimona-farez. 20 Ke ûhedra Rimona-farez, me adre me hunuma Libena. 21 Ke ûhedra Libena, me adre me hunuma Risa. 22 Ke ûhedra Risa, me adre me hunuma Kehelatba. 23 Ke ûhedra Kehelatha, me adre me hunuma hnyi bucen Safera. 24 Ke ûhedra hnyi bucen Safera, me adre me hunuma Harada. 25 Ke ûhedra Harada, me adre me hunuma Makeloth. 26 Ke ûhedra Makeloth, me adre me hunuma Tahath. 27 Ke ûhedra Tahath, me adre me hunuma Tara. 28 Ke ûhedra Tara, me adre me hunuma Mitheka. 29 Ke ûhedra Mitheka, me adre me hunuma Hasemona. 30 Ke ûhedra Hasemona, me adre me hunuma Moseroth. 31 Ke ûhedra Moseroth, me adre me hunuma Bene-jakana. 32 Ke ûhedra Bene-jakana, me adre me hunuma Horohagidegad. 33 Ke ûhedra Horohagidegad, me adre me hunuma Jotebath. 34 Ke ûhedra Jotebath, me adre me hunuma Aberona. 35 Ke ûhedra Aberona, me adre me hunuma Eziona-gebera. 36 Ke ûhedra Eziona-gebera, me adre me hunuma hnyi hnyeububa Zin (wale Kadesi). 37 Ke ûhedra Kadesi, me adre me hunuma hnyi bucen Hora, hnyi baten hnyeï Edoma. 38 Ke Arona at bihut ame öliâ bucen Hora hoton musi anyi Iehova, me ame mokcu eling hnyi huna a fâteiny hwaban hna he lakon Isaraela ûheny Aigupito, hnyi bong a bâniny tehi a thabûnginy. 39 Ke haba je hunai Arona me wan haded ke twente theri, me e ame mokcu hnyi hon bucen Hora. 40 Ke a löng ut thaniny Arada, at Kanana, at ame laba hnyi Hwaiöu hnyi hnei Kanana, a e but ang lakon Isaraela. 41 Ke ûhedra hnyi bucen Hora, me adre me hunuma Zalemona. 42 Ke ûhedra Zalemona, me adre me hunuma Punona. 43 Ke ûhedra Punona, me adre me hunuma Oboth. 44 Ke ûhedra Oboth, me adre me hunuma Ieabarima, hnyi hnyegöulen Moaba. 45 Ke ûhedra Iima, me adre me hunuma Dibonagada. 46 Ke ûhedra Dibonagada, me adre me hunuma Alemona-debelathaima. 47 Ke ûhedra Alemona-debelathaima, me adre me hunuma hnyi je bucen Abarima, cicö Nebo. 48 Ke ûhedra hnyi je bucen Abarima, me adre me hunuma hnyi dok ae tha hon hnyi Moaba baten Joridano, wale Jeriko. 49 Ke

adre me hunuma hnyi Joridano, hwân Beth-jesimoth ke ne o but Abela-sitima hnyi dok ae tha hon hnyi Moaba.

50 Ke haba Iehova ame ha kö Mose, hnyi dok ae tha hon hnyi Moaba hnyi Joridano, wale Jeriko, ka habe, 51 Ha thö ka lakon Isaraela, ka habe, Öbun ka hia but hanyâû Joridano ka hnyi hnyei Kanana, 52 me öbun e he ka obâ aten hnyei hia hnyi hnyimaköbun, me ohia anyidra je hnatheat hia, me ohia anyidra je idola hia adre oköiâ, me tho degecâ hia anyidra je dok ae görany : 53 ke öbun e he ka obâ tavat a aten hnyei me labâ bi : anyin a oge hia but ham köbun hnyei hnân ibun. 54 Ke öbun e he ka khenâ hnyei hnân ibun nhen leköb, hoton anyibun je lap ; öbun e he ka khenâ gâná ka tavat ae se hia, ke khenâ ühnyükongo ka tavat ae wakhalet : ame he ka ve hu gadra helâ me hna kû nhen leköb : öbun e he ka hu hoton je tribuiny lakamöbun. 55 Ke öbun e ne ca obâ aten hnyei hni hnyimaköbun, awe, ame he je kolon gadra ka helâ me wajua hnyi je emaköbun, ke helâ me únyi hnân údö je vhaköbun, ke adre me he ka oveci öbun hnyi hnyei öbun e he ka labâ. 56 Me haba ta je únyi waleji oge me únyküme he ka ányâ ködra, me wale oge me he ka ányâ köbun bi.

HNYIMAKAN 34.

KE Iehova ame ha kö Mose, ka habe, 2 Húna thö ka lakon Isaraela, ka habe, Öbun ka o but ka hnyi hnyei Kanana, (wale hnyei adre me he ka ham köbun me ibun, a hnyei Kanana hoton je hnyigöulen,) 3 me haba ibun ka hnyi hwaiöu ame he ka hwân hnyi hnyebuba Zin, hnyi baten Edoma, ke haba hnyigöulöbun ka hnyi hwaiöu, ame he ka hwân hnyi obiny Köiö ae Hiny ke ne o but e deiö : 4 ke ame he ka khenyi hnyigöulöbun ka hnyi hwaiöu anyi gethen úheny Akerabima ke ne o but Zin : ke adre me he ka umo hnyi hwaiöu, wale Kadesi-banea ; ke ame he ka he ke ne o but Hazarader, ke ne o but Azemona : 5 ke ame he ka khenyi hnyigöulen úheny Azemona ke ne o but hnyi wageweiny Aigupito, k' ame he ka umo hnyi köiö. 6 Ke haba hnyigöulen e jiö, me köiö ae gan, wale hnyigöulöbun, a hnyigöulöbun e jiö. 7 Ke walang hnyigöulöbun ka hnyi hwa-drö : haba hwân hnyi köiö ae gan öbun e he ka bi haten ke ne o but hnyi bucen Hora : 8 ke úheny hnyi bucen Hora me

öbun e he ka bi haten ke ne o but hnyi gethen úheny Hamath ; k' adre me he ka umo hnyi hnyigöulen Zedada : 9 ke e bala bi hnyigöulen ke ne o but Zifona, k' ame he ka umo e Hazar-enana : wale hnyigöulöbun ka hnyi hwadrö. 10 Ke öbun e he ka bi haten hnyigöulöbun e deiö, hwân Hazar-enana ke ne o but Sefama : 11 ke e bi hnyigöulen úheny Sefama ke ne o but Ribela, hnyi ke keihen Aina ke e deiö ; ke e bi hnyigöulen ke ne o but ke keihen baten köiö Kinereth ke e deiö : 12 ke e bi hnyigöulen ke ne o but Joridano, k' ame he ka umo hnyi Köiö ae Hiny : wale ibun hnyei hoton je hnyigöulen igigilö. 13 Ke haba Mose ame húna ka lakon Isaraela, ka habe, Wale hnyei ame he ka hu gabun ge ukleköb, waleji hnö Iehova hn. húna he ka ham ka je tribu a nain ke hafiny tribu : 14 anyin a haba tribuiny laku Reubena, hoton je lap anyin lakamödra, me tribuiny laku Gada hoton je lap anyin lakamödra, me hafiny tribu anyi Manase, haba ödra adre me hia but ve kap idra : 15 haba li tribu ke hafiny tribu, me adre me ve kap idra hnyi ke keihen hoton Joridano hnyi Jeriko ke e deiö, cicö hna o nhen seúnö.

16 Ke Iehova ame ha kö Mose, ka habe, 17 Walang ien je hnyat ödrin e he ka khenâ köbun hnyei : haba Eleazara at bihut, me Josua nöku Nuna. 18 Ke öbun e he ka hom úsa khaca than únyi hnyi je tribu hia he ka hnyi khenâ hnyei hnân ibun. 19 Ke walang ien je hnyat : haba únyi hnyi tribu Juda, me, Kaleba nöku Jefune. 20 Ke únyi hnyi tribu anyin laku Simeona, me, Semuela nöku Amihuda. 21 Únyi hnyi tribu Beniamina, me Eli-dada, nöku Kiselona. 22 Ke ke than únyi hnyi tribu anyin laku Dana, wale Buki nöku Jogeli. 23 Ke únyi hnyi tribu anyin laku Josefa : haba únyi hnyi tribuiny laku Manase ke than, wale Haniela nöku Efoda : 24 ke únyi hnyi tribuiny laku Eferaima ke than, wale Kemuela nöku Sifetan. 25 Ke únyi hnyi tribuiny laku Zebulona ke than, wale Elizafana (nöku Parenaka. 26 Ke únyi hnyi tribuiny laku Isakara ke than, wale Paletielä nöku Azana. 27 Ke únyi hnyi tribuiny laku Asera ke than, wale Ahiuda nöku Selomi. 28 Ke únyi hnyi tribuiny laku Nafatali ke than, wale Pedaelä nöku Amihuda. 29 Wale hnyat Iehova ame kunâ he ka khenâ hnyei ka lakon Isaraela hnyi hnyei Kanana.

HNYIMAKAN 35.

KE haba Iehova ame ha kö Mose hnyi dok ae tha hon hnyi Moaba hnyi haten Joridano wale Jeriko, ka habe, 2 Huna thö ka lakon Isaraela, m' adre me he ka ham ünyi hnyi idra je taun he ka labä, ka at Levi; k' öbun e he ka ham minya ka at Levi je utkânâ igigilö je taun. 3 Me me he ka hu je taun gadra he ka labä; ke haba je utkânâ igigilö je taun, me hnân hobi kâu haledra je kau, me anyidra ta je omjeü, me haledra je meno hia. 4 Ke haba utkânâ igigilö je taun, wale öbun e he ka ham ka at Levi, me ame he ka hwân hnyi hna up hagin vetoiny taun ke ne o but ka hnyi khaca thauzan kubit igigilö. 5 Ke öbun e he ka tuluto hoton je taun, tu thauzan je kubit e deiö, ke tu thauzan je kubit ka hnyi hwaiöu, ke tu thauzan je kubit e jio, ke tu thauzan je kubit ka hnyi hwadrö, k' ame he ka mokut taun hnyi wanben. Wale je utkânâ hobi ködra igigilö je taun. 6 Ke haba je taun öbun e he ka ham ka at Levi, me wale je taun a siks hnân lubaduöng, wale öbun e he ka ip hobi kâu at ühlingö hnân he ka kec ka hnyin: ke öbun e he ka ham minya ködra fâte tu ta je taun. 7 Ke haba je taun hia öbun e he ka ham ka at Levi, me üsa fâte eit ta je taun: öbun e he ka ham e me utkânâ igigilö e. 8 Ke öbun e he ka ham je taun ünyi hnyi hnyeiy iny lakon Isaraela, k' öbun e he ka hom gânâ ünyi hnyi hnyeiy ae gan; k' öbun e he ka hom ühnyükongo ünyi hnyi hnyeiy ae ühnyükong: adre me he ka ve ham je taun ka at Levi hoton je idra ae hu gadra.

9 Ke Iehova ame ha kö Mose, ka habe, 10 Ha thö ka lakon Isaraela, ka habe, Öbun ka he ka hanyâü Joridano ka hnyi hnyeiy Kanana, 11 me öbun e he ka kû ke je taun hnân je tauniny lubaduöng hobi köbun; me me he ka kec ka hnyin at ühlingö wale at ame hlingâ at a utöteta. 12 Haba je taun eling me hnân kec ka hnyin can at ame he ka bi hwaban; me me ca he ka mok at ühlingö k' adre tiga ca lelö e ka hnyi hnyimakan ükhacaköu he ka owisa e. 13 Ke haba je taun eling öbun e he ka ham, me wale siks ta tauniny lubaduöng hobi köbun. 14 Öbun e he ka ham kun ta taun hnyi hoton Joridano, ke öbun e he ka ham minya kun ta taun hnyi hnyeiy Kanana; wale je tauniny

lubaduöng. 15 Ke hnân hobi kâu lakon Isaraela, me atkanyua, me tavat adre me tha laba mödra, je taun eling a siks hnân lubaduöng hnyin; me me he ka kec ka hnyin tavat hia adre me hlingâ at a utöteta. 16 Ke ame ne hia but kot moko e ge ut fao, awe, at ühlingö e; ke adre me he ka hlingâ at ühlingö. 17 Ke ame ne kot moko e ge veto hnyi hnyamen, a ünyi hnân hlingâ at, k' ame ne mokcu, awe, at ühlingö e: ke adre me he ka hlingâ at ühlingö. 18 Ke ame ne kot e ge utö hnyi hnyamen, a ünyi hnân hlingâ at, me ame mokcu, awe, at ühlingö e; ke adre me he ka hlingâ at ühlingö. 19 Ke hamen at bi hwaban komok he ka hlingâ at ühlingö: e ka ükhanö mē e ame he ka hlingâ. 20 Ke ame ne dâ e hnyi hnen hna hükötiä, k' ame ne mokut iyâüâ me lûâ, me me mokcu; 21 k' ame ne kot e ge hnyamen hnyi hmönyin, me me mokcu: me adre he bi ka hlingâ at a ükhulup; at ühlingö e: k' ame he at a bi hwaban komok ka hlingâ at ühlingö, e ka ükhanö mē. 22 Ke ame ne ie dâ e ke ca hmönyin bi, k' ame ne lûâ ke a ca mokut iyâüâ, 23 ame ne ge veto, a ne ünyi hnân hlingâ at, ke a ca wâ bi e, k' ame khûâ me aat dö, k' ame mokcu at, ke ca iwahnaihmiony mē ehac, k' ame ca elâm he ka okongoâ: 24 awe, ame he ükhacaköu ka owisa gadru, a at hlingâ at, me at ame bi hwaban komok, hoton je hna owisa eang: 25 ke ame he ükhacaköu ka omelö at ame hlingâ at ünyi hnyi hnyamen at ame bi hwaban komok, ke ame he ükhacaköu he ka ohmeto e ka hnyi tauniny lubaduöng, waleji e ame kec ka hnyin: ke e ame he ka laba eling ke ne o but ame mokcu at bihut ae beönua, at adre hû ge wakaco ae kap. 26 Ke ame ne he at ame hlingâ at ka dit hanyâü hnyigöulen tauniny lubaduöng, waleji e ame kec kâu; 27 k' ame ne wâ e hnen at ame bi hwaban komok hnyi hoton hnyigöulen tauniny lubaduöng, k' ame ne hlingâ at ühlingö hnen at ame bi hwaban komok, awe, e ame ca he ka hulö ge dren: 28 anyin ae ücü kâu he ka laba hmâ hnyi tauniny lubaduöng, ke ne o but ame mokcu at bihut ae beönua: ke hwaban imekiny at bihut ae beönua, me ame he at ühlingö ka hmetu ka hnyi iny hnyeiy. 29 Haba ta je ünyi e me wale hnanyibuiny owisa köbun hnyi anyibun ta je dö hnyi je hnyababun hia. 30 Haba at ame hlingâ at, me adre me he ka hlingâ thibi at ühlingö ge hofuc

DEUTERONOMI 1.

hwan hnyat ohnatho: k' ame ca he at a khaca ka ohnatho ge ke at m' adre me he ha hlingâ e. 31 Ke haba khaca, öbun e ca he ka kap hwaban möt anyin at ühlingö ae ücü he ha mok: e hnathu adre me he ka hlingâ. 32 Ke ca he öbun ka kap hwaban möt anyin at ame kec ka hnyi tauniny lubaduöng, me me laba hmetu bi hnyi iny hnyei, ke ne o but imekiny at bihut. 33 Waleling m' öbun e ca he ka okongoâ hnyei öbun e labâ: anyin a haba dra, me, wale ünyi ame okongoâ hnyei: ke e ca khan' ödra he ka bi hwaban melen hnyi ünyi hnyi dra adre hingölö hnyin, ke so bi ünyi ge dren at ame hingälâ. 34 Ke ca he öbun ka okongoâ hnyei öbun e laba hnyin, ke inya oge me laba hnyin: anyin a inya Iehova oge me laba hnyi wanben lakon Isaraela.

HNYIMAKAN 36.

KE ame he je taben ae beönuu ünyi hnyi lap anyin laku Gileada, nöku Makir, nöku Manase, ünyi hnyi je lap anyin laku Josefa, me fuc kö Mose, me je than, a je taben ae beönuu unyin lakon Isaraela; 2 me ödrin e ba, ka habe, Hnö Iehova hna huna köu than he ka ham hnyei me me iny lakon Isaraela, ünyi ge ugleköb: ke Iehova ame huna köu than he ka ha i Zelofeada liamekeiny möhmun ka lakon je hlu. 3 Ke ödrin e ne läiän je bagainy ke tribuiny lakon Isaraela, me adre me he ka hom hmetu idrin ünyi hnyi iny lakamöhmun, me me tha e bi me iny tribu wale ödrin e läiän hnyin: me adre me he ka hom but e ünyi hnyi ihmun,

wale a hwajekhöühmun. 4 Ke ame ne o thö jubeli anyin lakon Isaraela, me ame he ka khaca ihmun me iny tribu waleji ödrin e tha ödrin mē: me adre me he ka hom iny tribuiny lakamöhmun. 5 Ke haba Mose ame huna ka lakon Isaraela, hoton hofuc ho Iehova, ka habe, E hnathu hna ha hnen tribuiny laku Josefa. 6 Walang hofuc a huna Iehova ge je hlu laku Zelofeada, ka habe, Ödrin e he ka läiän hnödrin je hna weny, ke so bi ödrin e he ka läiän je lapiny tribu anyin kamödrin. 7 Me helâe adre me ca he ka ühomköüâ je iny lakon Isaraela ünyi hnyi ke tribu ka hnyi ke tribu; anyin ame he lakon Isaraela ka ve kece hmâ ka hnyi je iny je tribu anyin lakamödrin. 8 Ke haba wahlu hia a ödrin tren hnyei hnyi je tribu anyin lakon Isaraela, me ödrin e he ka läiän tavat a hanen lap anyin tribuiny lakamödrin, me me he bala bi lakon Isaraela ka ve labâ iny lakamödra. 9 Ke ca he bi ka ühomköüâ je hnyei ünyi hnyi ke tribu ka hnyi ke tribu; anyin ame he je tribuiny lakon Isaraela ka ve kece hmâ ka hnyi je idra. 10 Ke haba je hlu a laku Zelofeada, me ödrin e änyâ helâ me hna huna hnö Iehova kö Mose: 11 me haba Mala, me Tirezsa, me Hogela, me Mileka, me Noa, a je hlu laku Zelofeada, me ödrin e läiän je hidróuinny lakon je liamekeiny me kamödrin. 12 Ke ödrin e läiän je lap anyin je laku Manase, nöku Josefa, ke e bala bi idrin hnyei tribuiny lap anyin kamödrin.

13 Wale je hna huna me je hna owisa, waleji Iehova ame ha ka lakon Isaraela a deny Mose, hnyi dok ae tha hon hnyi Moaba wale baten Joridano hnyi Jeriko.

DEUTERONOMI

TUSI A THABÛNGINY ANYI MOSE.

HNYIMAKAN 1.

WALANG ta je hofuc a ha Mose ka lakon Isaraela hia hnyi hoton Joridano, hnyi hnyebuba, hnyi Arabah cicö Sufe, hnyi wanben Parana me Tofel, me Labana, me Hazeroth me Dizahab. 2 Eleven ta je bong ka he üheny Horeba gethen hnyi bucen Seira ke ne o but Kadesi-banea. 3

Ke haba hnyi huna a fâte, hnyi tehi a eieveniny, hnyi bong a bâniny tehi, me haba Mose ame ha ka lakon Isaraela ta je ünyi hia hoton hna huna hnö Iehova kâu gadra; 4 hwaban hnen hna kuc Sihona thaniny at Amora, at ame laba Hesebona, me Oga thaniny Basana, at ame laba Asaterotha hnyi Ederei: 5 hoton Joridano, hnyi hnyei Moaba, me ame hwân Mose ka omanená

hnanyibu eang, ka habe, 6 Haba Iehova Khonguta ame ha kôta e Horeba, ka habe, Soju hnöbun hna laba hnyi bucen eang : 7 hwiö th' öbun me he ka hnyi bucen anyin at Amora, me je dok ae hakekeny kâ e, hnyi Arabah, hnyei ae hu je bucen hnyin, me hnyei ae hnyikânâ, me hnyi ke keihen ka hnyi Hwaiöu, me hobatköio, a hnyei iny at Kanana, me Lebanona, ke ne o but hnyi wagewe ae gan, a wagewe Euferate. 8 Wâ bi, oge hia but ip hnyei hnyi hnyimaköbun : he th' öbun me labâ hnyei waleji ame khemanyn ka lakamöbun, a Aberahama, me Isaaka, me Jakob, he ka ham ködrin, me je matrânidrin hwabödrin. 9 Ke oge me ha köbun hnyi üen eling, ka haba, E pason könya a iny' khaca he ka tu' öbun : 10 hnö Iehova Khongubun hna osehi' öbun, ke wâ bi, helâ me je okhüiny drany üsehiai-bun hnyi bong ang. 11 E na he ju Iehova Khongon lakamöbun ka osehi' öbun a je thauzaniny, me ohnahici öbun hoton hnen hna ha köbun ! 12 Oge me he ka kâmâu hna hake vadren hmakibun, me honöbun je hok, me anyibun je iwatretra ? 13 Üca th' öbun hobi köbun tavat ae metâ, tavat wâ tremângâ, a tavat adre wâhmakhmeto, hoton anyibun je tribu, ke oge me he ka ot'il' ödrin me hnân je taben köbun. 14 Ke öbun e thu könya me ha, ka habe, E so he ka ânyâ hofuc u me ha. 15 Waleling me oge me hom ta je taben anyibun je tribu, tavat ae metâ, adre wâhmakhmeto, me ot'il' ödrin hnân je homakan köbun, a je taben thauzan, me je taben haded, me je taben fifte, me je taben ten, me tavat musi, hoton anyibun je tribu. 16 Ke oge me hûna ka tavat owisa hnyi üen eling, ka habe, Öbun e he ka löng je iwatretra anyin je liamekeiny möbun, me owisa wia ka at me liamekeiny mē, me atkanyua unyin. 17 Ca he öbun ka wâhmakhmetoâ hnyi ühnei ; e so öbun e löng wia hofuc hwan at ae gan me at ae ühnyükong ; ca he öbun ka ot hnyi hnyimakân at ; anyin a ünyi ge Khong hna owisa : ke haba ünyi ae hmak köbun, öbun e he ka hom könya m' inye löng dö. 18 Ke oge me hûna köbun hnyi üen eling ge ta je ünyi hia öbun e he ka ânyâ.

19 Ke üheta Horeba me ötin e vheno hnyebuba ae gan me hnân outen, waleji öbun e wâ, hnyi gethen üheny hnyi bucen iny at Amora, hoton hnö Iehova Khonguta hna hûna kôta, m' ate me o but Kadesi-banea. 20 Ke oge me ha köbun, ka habe, Öbun e o but walang ang ka hnyi bucen at Amora,

wale hnö Iehova Khonguta hna ham kôta. 21 Wâ bi, hnö Iehova Khongom hna ip hnyei hnyi hnyimâkâm : ölö thö me labâ, helâ me Iehova Khongon lakâmâm ame ha köu ; ca ot bi me öbubuny. 22 Me öbun hia öbun e hakekeny könya, me ha, ka habe, E so ate me kunâ bânâ ke je hnyat, ke ödrin e he ka ecmâkâ hnyei hobi kôta, me hmetuhmetu he ka thumetu öta ge deta gethen he ka ölö, me je taun ate me he ka o ka hnyin. 23 Ke so könya hobun hofuc : me oge me hom üheny unyibun je hnyat a twelv, a usa khaca ünyi hnyi je tribu : 24 ke ödrin e he me öliâ bucen, me o hnyi hnyigöulen bucen e Esekolo, me ecmâkâ e. 25 Ke ödrin e hom hnyi je hnyamödrin jeüiny hnyei, me hom kôta, me thumetu öta, ka habe, E so hnyei a ham kôta Iehova Khonguta. 26 Ke so bi öbun e höcö ölö, ke öbun e hanyâtâ hofuc ho Iehova Khongubun : 27 ke öbun e ulidro hnyi umöbun je uma, ka habe, Anyin a Iehova ame hûkoti öta, me e ame hum öta üheta hnyi hnyei Aigupito he ka hn' öta ka hnyi je hnyamen at Amora he ka ohi' öta. 28 Ate me ölö ua ? haba je liamekeiny möta ödrin e oköiâ je hnyekuta, haingödrin, ka habe, E gan hmâ tavat me beü huta ; ke gan hmâ je taun adre up hagny ke ne o but ka hnyi drany ; ke haba khaca öhmun e wâ eling je laku Anaka. 29 Waleling me inye ha köbun, ka habe, Ca öbubun bi ke ca ot bi gadra. 30 Haba Iehova Khongubun at ame he hnyi hnyimaköbun me e ame he ka vat hobi köbun, helâ me hnen hna ânyâ hobi köbun hnyi hnyei Aigupito hnyi hnyimaköbun : 31 me hnyi hnyebuba, waleji u je wâ a g' ame köp u tilö u Iehova Khongom, helâ me at ame delüâ nokon, hnyi je gethen hia öbun e he hnyin ke ne o but öbun e o but eang. 32 Ke haba hnyi ünyi eling öbun e ca labageju kö Iehova Khongubun, 33 at ame hnyimaköbun hnyi gethen, he ka heleü dok hnân ot'ilâ umöbun je uma mano hnyin, a meic hnyi lit, he ka omanenâ köbun gethen öbun e he ka he hnyin, ke ulâ hnyi lany. 34 Ke Iehova ame löng hobun je hofuc, me e ame hmönyin me khemanyn, ka habe, 35 Haba hnyi dö eang ae kong, me ba at a khaca ame he ka wâ hnyei ae so, waleji oge me khemanyn he ka ham ka lakamöbun, 36 ke so thibi Kaleba nöku Jefune, e ame he ka wâ e ; ke oge me he ka ham kâu hnyei waleji a mwi hnyin me je matrâninyn : anyin a e ame löng bekhötâ hotu Iehova.

37 Ke haba Iehova ame hmönyin minya kõnya cabun, me ha, ka habe, U me ca he ka hnyi he kâ e : 38 k' ame he Josua nõku Nuna at ame tot hnyi hnyimákâm ka munyi he kâ e : u ma sihwegîá ; anyin a e ame he ka ohuâ hnyei ka at Isaraela. 39 Ke haba je úhnyúkongibun, waleji õbun e ha a g' adre me he ka húgûná, ke lakubun ae ca khan' õdra únyi ae so me unyi ae kong hnyi bong e, me adre me he ka munyi he kâ e, ke oge me he ka ham e kõdra, m' adre me he ka hu e. 40 Ke haba õbun bi, hwiõ th' õbun me he ka hnyi hnyebuba gethen úheny hnyi Kõiõ ae Dra. 41 Ke õbun e thu me ha kõnya, ka habe, E kong hwakecihmun hnyi hnyimakõ Iehova, õhmun e he ka he me vat helâ me Iehova Khonguta ame ha kõhmun. Me õbun e ve weikâ ta je únyi hnân vat, k' õbun hwege he ka õliâ bucen. 42 Ke haba Iehova ame ha kõnya, ka habe, Ha thõ kõdra, ka habe, Ca he õbun ka õlö, ke ca he õbun ka vat ; anyin a ca tha inya möbun ; wâ e nye kuc õbun hnen iwahnaihmiony möbun. 43 Me oge me fuc kõbun ke õbun e ca lõng bi ; ke so bi õbun e hanyâúá musi anyi Iehova, me hwege hnyimakõbun he ka õliâ bucen. 44 Me ame o but at Amora, tawat adre me labâ bucen eling, he ka vat möbun, me hnu õbun, helâ me je bi adre me úhnúhnú, me kuc õbun ke ne o but hnyi Seira, me he ke ne o but Horema. 45 Ke õbun e hmetu me tenge hnyi hnyimakõ Iehova, ke Iehova ame ca lõng hobun, k' ame ca tevehling õbun. 46 Me õbun e laba ju Kedesi hnyi je bong ae se hia, hoton je bong õbun e labâ e.

HNYIMAKAN 2.

KE ate me hwiõ me he ka hnyi hnyebuba gethen ka he ka hnyi Kõiõ ae Dra, hoton hna huna hnõ Iehova kõnya : ke se hia je bong ate me laba igigilõ bucen Seira. 2 Ke Iehova ame ha kõnya, ka habe, 3 Soju hnõbun hna laba igigilõ bucen eang : hwiõ th' õbun ka hnyi hwadrõ. 4 Ke ha thõ ka tawat, ka habe, Õbun e he ka hanyâúá hnyigõulen hnyei iny je liamekeiny möbun a lakon Esau, tawat adre me labâ Seira ; ke adre me he ka out' õbun : anyin a wale wâ wî' õbun bi : 5 ca he õbun ka ivinõ mödra ; anyin oge me ca he ka ham kõbun únyi hnyi idra, e ba dok ae úhnyúkong hmönyin helâ me hnyeuca : anyin oge hia but ham bucen Seira kõ Esau hnân iny. 6 Õbun e

he ka úcú jeú hwaban mone unyidra, me hnân han ; k' õbun e he minya ka úcú kõiõ unyidra hwaban mone hnân ic. 7 Anyin a Iehova Khongom ame hia but ohnabici u hnyi ta je huliwa hia anyin li hnyamâm : e ame wâhmakhmeto hnâm hna vheno hnyebuba eang ae gan : k' ame tha e möu Iehova Khongom hnyi ta je huna a fâte ; ke ba ke únyi a hia gam. 8 Waleling m' ate me he úheny unyin je liamekeiny möta a laku Esau, tawat adre me labâ Seira gethen hnyi Arabah úheny Elath, ke úheny Eziona-gebera.

Ke ate me khenyi, me he hnyi gethen úheny hnyi hnyebuba Moaba. 9 Ke haba Iehova ame ha kõnya, ka habe, Ca he ka okongoá at Moaba, me vat mödra : anyin oge me ca he ka ham únyi hnyi idra hnyei me me em bi ; anyin oge hia but ham Aro ka laku Lota me me idra. 10 (Ame labâ eling ehac at Emi, tawat ae gan, ke õdra se hia, ke beú helâ me at Anaka : 11 adre haw' õdra me at Refai, helâ me at Anaka ; ke haba at Moaba adre me hwenyi iõdra, me, at Emi. 12 Ke haba at Hori adre me labâ Seira ehac, k' ame hwõhwabõdra hnen laku Esau ; a ohî' õdra hnyi hnyimakõdra me labâ bi hwabõdra : helâ me hna ányâ hnen at Isaraela hnyi hnyei a idra, waleji Iehova ame ham kõdra.) 13 Ke todr' õbun me hanyâúá wagewe Zareda. Me ate me he hanyâúá wagewe Zareda. 14 Ke haba úseiny je bong ate me he úheny Kadesi-banea, ke ne but ate me hanyâúá wagewe Zareda, me thõte eit je huna ; ke ne o but ame ba hia döiny aten vat hnyi hnyei, helâ me Iehova ame khemanyin kõdra. 15 Ke haba khaca ame mokut hnyamõ Iehova hudrin, he ka ohî' õdra úheny unyin tawat, ke ne o but adre ohî' õdra hia thithõ.

16 Ke haba hnyi úen adre hia but ohia aten vat hia hnyi hnyei, k' adre mokcu, 17 me Iehova ame ha kõnya, ka habe, 18 Haba hnyi bong ang u me he ka hanyâúá Aro, a hnyigõulen Moaba : 19 ke u ka hakekenyâ laku Amona, ca he ka okongu õdra, ke ca ivinõ mödra : anyin oge me ca he ka ham kõiõ únyi hnyi hnyei iny laku Amona me me em : anyin oge hia but ham e me me iny laku Lota me me idra. 20 (Adre me hawâ hnyei eling minya me hnyei iny at Refai : k' ame laba eling at Refai ehac ; ke ame hwenyi iõdra hnen at Amona, me, at Zamezumi ; 21 õdra tawat ae gan, me se hia, me beú helâ me at Anaka ; k'

ame ohi' ödra hnö Iehova hnyi hnyimaködra; k' adre me hwöhwbödra, me laba hnyi hnödra: 22 helä me hnen hna änyä hobi käu laku Esau, tavat adre me labä Seira, waleji hnyi hnen hna ohia at Hori hnyi hnyimaködra; k' adre me hwöhwbödra me laba hnyi hnödra ke ne o but hnyi bong ang: 23 ke haba at Avi tavat adre me laba hnyi je ong taun ke ne o but Gaza, a at Kafetori, a tavat adre o üheny Kafetori, adre me ohi' ödra me laba hnyi hnödra.) 24 Köüö th' öbun me he, ke hanyäüä hnyigöulen bucen e Arenona: wä bi, oge hia but ham ka hnyi hnyamäm Sihona at Amona, thaniny Hesebona, me iny hnyei: hwän dö he ka hügünä, ke tet metä käu hnyi vat. 25 Ke oge me he ka hwän hnyi bong ang he ka oküä outö u, me me he ka öbubuny gam hnen ta je hnyei hia eang hmeledrany, a tavat adre me löng änyäm lung, k' adre me he ka öbubuny, me hleuhleu gam.

26 Ke oge me kunä je metu üheny hnyi hnyebuba e Kademotha kö Sihona than Hesebona, me ta je üthumetu hnän üsoköu, ka habe, 27 Iny be wek he ka he hnyi wanben em hnyei: ke oge me he ka he hnyi hna cit gethen, k' oge me ca he ka säu ka hnyi ke keihen metä me me. 28 U me he ka ham könya jeü hwaban mone me inye he ka han; me habelik hwaban mone m' inye he ka ic: hnö nya thibi he ka he hnyi hon kânä; 29 helä me hna änyä könya hnen laku Esau adre me labä Seira, me at Moaba adre me labä Aro; me inye he ka hanyäüä Joridano ka hnyi hnyei waleji a ham köhmun hnö Iehova Khonguhmun. 30 Ke e höcö Sihona than Hesebona he ka hn' öta ka gethen anyin: anyin a Iehova Khongom ame okhötä hnyekon, me ohwegiä hnyekon, me me he ka hna e ka hnyi hnyamäm, a heläe hnyi bong ang. 31 Ke Iehova ame ha könya, ka habe, Wä bi oge me hwän ang ka hnö Sihona, me iny hnyei köu hnyi hnyimäkäm: hwän dö he ka hom, m' u me he ka labä. 32 Ke ame o thö Sihona ücüta, a tha e me lakeiny hia me vat e Jahaza. 33 Ke haba Iehova Khonguta ame hna e köta; m' ate me kot e, me lakon, me lakeiny hia. 34 Me ate me hügünä anyin ta je taun hia hnyi üen eling, me ti ohia je taun adre labä, tha e me je momo me tavat ae ühnyükong; ke ba kolon: 35 ke so bi ate me hügünä omeno me haleta, tha e me omjeü ünyi hnyi taun waleji ate me hügünä. 36

E ba ke taun ae hwege huta, hwän hnyi Aroera hnyi baten hnyigöulen bucen e Arenona, me taun a e hnyi hnyigöulen bucen, ke ne o but Gileada: Iehova Khonguta ame hna but hia köta hnyi hnyimäköta: 37 ke so bi u je ca o ka hnyi hnyei iny laku Amona; me baten hia wagewe Jaöoka, me je tauniny bucen, me ta je dok hia ame nyibu öta hnyin Iehova.

HNYIMAKAN 3.

ME ate me khenyi me he hnyi gethen üheny Basana: me ame o but Oga than Basana ücüta, a e me lakeiny he ka vat hnyi Ederei. 2 Ke Iehova ame ha könya, ka habe, U me ca he ka outen e, anyin a oge me hna e, me lakeiny hia, me iny hnyei ka hnyi hnyamäm; ke u me he ka änyä käu heläji me hnäm hna änyä kö Sihona thaniny at Amora at ame laba e Hesebona. 3 Ke Iehova Khonguta ame hnö Oga minya thaniny Basana me lakeiny hia ka hnyi hnyamöta, m' ate me kuc ödra, ke ne o but ame ba kolon. 4 Ke ate me hügünä anyin ta je taun hia hnyi üen eling; ke ba taun ate me ca hügünä ünyi gadra; a sikste je taun, wale hnyei hia hnyi Aregoba, dökhü dökhü Oga e Basana. 5 Haba je taun hia eling, adre si haginý göranyai igigilö, k' ame hu je homagöuleny, me je venyänny; ke ca ha bi je taun ae se hia ae ba haginý. 6 Ke ate me ohi' ödra helä me hnöta hna änyä kö Sihona thaniny Hesebona, me ti ohia je taun hia adre labä. tha e me omomo me tavat ae ühnyükong, 7 Ke ate me hügünä hobi köta bi omeno hia, me ta je ünyi hnyi je taun. 8 Ke haba hnyi üen eling ate me hügünä hnyei ünyi ge li thaniny at Amora, hoton Joridano, hwän hnyi hnyigöulen bucen e Arenona ke ne o but hnyi bucen Heremona; 9 (haba at Zidona adre me hwenyi ien Heremona eling, me Siriona, ke haba at Amora adre me hwenyi ien, me Senira;) 10 a ta je taun hia hnyi dok ae tha hon, me Gileada hia, me Basana hia, ke ne o but Saleka, me Ederei, a je tauniny dökhü dökhü Oga hnyi Basana. 11 (Anyin a haba Oga thaniny Basana, me hake e thibi kolon at Refai; wä bi, haba hnen hna mokut, me fao; hawa ca e hnyi Raba taun anyin laku Amona? haba ibeüen e me nain ta kubit, ke foa kubit ülauen, hoton kubitiny at.) 12 Ke ate me labä hnyei e hnyi üen eling: hwän Aroera hnyi hnyigöulen bucen

e Arenona, me hafny hnyei hnyi bucen Gileada, me je tauniny, me waleji oge ham ka at Reubena me Gada : 13 ke haba kolon Gileada me Basana hia, a dökhu dökhu Oga, me waleji oge ham ka hafny tribu Manase ; wale hnyei hia hnyi Aregoba, a Basana hia. (Adre me hwenyi ien hnyei e, me, hnyei anyin at Refai. 14 Haba Jaira nöku Manase ame hügünâ hnyei hia e Aregoba, ke ne o but hnyi hnyigöulen at Gesuri me at Maaka ; ke e ame hwenyi ien, a wale Basana, hoton ien bi, me Havoth-jaira, ke ne o but hnyi bong ang.) 15 Ke oge me ham Gileada kö Makir. 16 Ke oge me ham ka at Reubena me Gada, hwân Gileada ke ne o but hnyi hnyigöulen bucen e Arenona, a hnyi wanben e, me baten : ke ne o but hnyi wagewe Jaboka, wale hnyigöulen laku Amona : 17 ke Araba minya, me Joridano, me baten e, hwân Kinereth, ke ne o but hnyi köien Araba, wale Köiö ae Hiny hmelen hwatapkoluiny Pisega, ke e deiö.

18 Ke oge me hûna köbun hnyi üen eling, ka habe, Haba Iehova Khongubun ame ham köbun hnyei eang he ka labâ : ke öbun e he ka penapena ünyi hnân vat me hanyâüâ hnyi hnyimakan je liamekeiny möbun a lakon Isaraela, tavat hia ae hwege. 19 Ke haba laöiöbun, me je ühnyü-kongibun, me halebun omeno, (e khandö nra ae se hia halebun omeno) adre me he ka laba biju hnyi anyibun je taun wale oge ham köbun ; 20 ke ne o but Iehova ame he ka omenâ je liamekeiny möbun, helâ möbun, me hu gadra hnyei waleji Iehova Khongubun ame ham ködra hnyi ke keihen Joridano : me öbun e he ka ve hmetu ka hnyi je gabun wale oge ham köbun. 21 Ke oge me hûna kö Josua hnyi üen eling, ka habe, A wâ but li emâkâm ünyi a ânyâ Iehova ka li than eling : awe, ame he Iehova ka ânyâ helâe ka je dökhu u me he ka o ka hnyin. 22 Ca he öbun ka out' ödra : anyin a haba Iehova Khongubun, me wale at ame vat hobi köbun.

23 Ke oge me khöü kö Iehova hnyi üen eling, me ha, ka habe, 24 Iehova lö, u je hwân ka omanenâ ügânâm ka athnyabaem, me hnyamâm ae hwege ; anyin a ie khong ethö hnyi drany me eang hmelen ae khana he ka ânyâ helâ me ânyâm ta je huliwa, me belâ me hnâm hna ânyâ ae man ? 25 Iny na he ju ka hnyi hamâ hnyei ae so hnyi ke keihen Joridano, wale bucen ae so, me Lebanona. 26 Ke Iehova ame hmönyin könya cabun, me ame ca ling nya bi ; ke

Iehova ame ha könya, ka habe, Soju ang, ca he hmetu ka ha könya hofuc e. 27 Ölö thö ka hnyi hon Pisega, me bwele jio, me ka hnyi hwadrö, me hwaiöu, me deiö, me wâ ge li emakâm ; anyin a u me ca he ka hnyi hanyâüâ Joridano eang. 28 Ke hûna thö kö Josua, me nâ, me sihwegiâ e : anyin a e ame he ka hnyimakan tavat eang, ke e ame he ka olab' ödra hnyi hnyei wale u me wâ. 29 Me ate me laba hnyi hnyigöulen bucen a e cicö Bethe-peora.

HNyimakan 4.

ISARAELA lö, löng ju u walang ang je hnanyibu me je hna owisa, oge me n' öbun he ka ânyâ ; m' öbun e he ka möt, me he but me labâ hnyei a ham köbun Iehova Khongon lakamöbun. 2 Ca he öbun ka bi hanen ka hnyi hofuc oge me hûna köbun, ke ca ohia ke hanen, m' öbun e he ka löng hoton je hna hûna hnö Iehova Khongubun wale oge me hûna köbun. 3 Öbun e hia but wâ ge je emaköbun ünyi a ânyâ Iehova can Baala-peora : anyin a haba tavat hia adre me hnu hoton Baal-peora, me Iehova Khongom ame hia but obi' ödra unyâm. 4 Ke haba tavat hia gabun adre kece hmâ kö Iehova Khongubun, me öbun e möt hia hnyi bong ang. 5 Wâ bi, oge hia but üne köbun je hnanyibu me je hna owisa, helâ me Iehova Khonguk ame hûna könya, m' öbun e he ka ânyâ helâe hnyi hnyei öbun e he ka hnyin he ka labâ. 6 He th' öbun ka tuö me ânyâ ; ke waleling anyibun metâ me anyibun wâhmakhmeto hnyi hnyimakan ta je hnyei, a tavat adre me he ka wâ je hnanyibu eang, me ha, ka habe, E hnathu hnyei ae metâ, me hnyei wâhmakhmeto hnyei eang ae gan. 7 Anyin a ewa hnyei ae gan ae hu khongon ame hakekeny ködra, helâ me Iehova Khonguta ame ânyâ hnyi je üen hia ate me hongot kâu ? 8 Ke ewa hnyei ae gan ae hu je hnanyibu me je hna owisa ae so, helâ me je hnanyibu hia eang oge me ip hnyi hnyimaköbun hnyi bong ang ? 9 Ke so bi o u âu, me tuö u wia, wâ u nye hnying ta je ünyi u je wâ, ke wâ e nye hia ta je ünyi e hnyi hnyekom, hnyi ta je bongon ânyâm möt ; ke u me he ka ünö e ka lakom me laöbem ; 10 waleji hnyi bong u je tot hnyi hnyimakö Iehova Khongom hnyi Horeba, k' ame ha könya Iehova, ka habe, Ükhacaköu thö könya tavat, m' adre me he ka löng hok je hofuc, me me khan' ödra he

ka outö nya hnyi ta ogo bong bongon anyi-
dra möt hnyi hnyei, m' adre me he ka ünö
ka lakudra. 11 Ke öbun e hakekenyâ me
utitilen hmelen bucen; ke haba bucen ame
hlâ ge meic ke ne o but ka hnyi drany, ke
menekholom, me ulâ, me lit æ gan. 12 Ke
Iehova ame ha köbun únyi hnyin meic;
öbun e löng hwan k' öbun e ca wâ bi unyin;
ke hwan hofuc thibi. 13 Ke e ame omanenâ
köbun anyin úhinhnyköu, waleji e ame
hûna köbun he ka ányâ, a libenyita je hna-
nyibu, ke e ame sihnalimen hnyi li veto æ
lau. 14 Ke Iehova ame hûna kõnya hnyi
ûen eling he ka n' öbun ge je hnanyibu me
hna owisa, m' öbun e he ka tuö hnyi hnyei
öbun e he ka hnyin he ka labâ. 15 Ke wâ
eâu ju öbun; anyin æ ba unyin öbun e wâ
hnyi bong ame fuc köbun Iehova e Horeba
hnyi meic: 16 wâ öbun nye okongu öbun,
me bihnatheat hobi köbun adre oúco ke únyi,
ame ne baga, ame ne momo, 17 ame ne helâ
me meno ame he eang hmelen, ame ne helâ
me meno æ hu labenyin at ame gâ ethö, 18
ame ne helâ me me meno at ame iyâú eú hnyi
kânâ, ame ne helâ me ke wâ eú hnyi köö
hmelen hnyei: 19 ke wâ u nye bwele thö
hnyi drany ai, ke u je wâ seúnö, me tehi,
me je okhû, a je únyi æ se hia hnyi drany,
k' adre me hum u he ka khudrang me bi
athnyabainy ta je únyi e, waleji Iehova ame
ip hobi kâu ta je hnyei hia eang hmeledrany.
20 Ke a hia but Iehova hum öbun, me su
öbun úheny hnyi hnyin inyâ fao, a úheny
Aigupito, m' öbun e lakeiny æ hu hwaje-
khon, helâ me hnyi bong ang. 21 Ke
haba khaca, Iehova ame hmönyin kõnya ca
'bun, me ame khemanyin a oge me ca he ka
hnyi he hanyâúâ Joridano, me hnyi he ka
hnyi hnyei æ so, wale a ham Iehova Khongom
hnân em; 22 ke so bi oge me he ka
mokcu hnyi hnyei eang, k' oge me ca he ka
he hanyâúâ Joridano: ke öbun e he biju
ka he hanyâúâ, me hu hnyei æ so eling.
23 Wâ eâu, wâ öbun nye hnying úhinhnyköu
any Iehova Khongubun, waleji e ame úhi-
hnyköu möbun, k' öbun e bi hnathheat hobi
köbun he ka oúco ke únyi a thawâ köu
hnö Iehova Khongom. 24 Anyin a meic
æ han Iehova Khongom, Khong amc ciâ.

25 Ke e ka hu lakom me laöbem, ke beú
ulabaibun hnyi hnyei, k' öbun ka okongu
öbun bi, me bi hnathheat, he ka oúco ke
únyi, me ányâ únyi æ kong hnyi hnyimakö
Iehova Khongom, me ohmönyinâ: 26 awe,
oge me hawâ drany me hmeledrany he ka
ohnathoâ gabun hnyi bong ang, a g' adre

me he ka ie ohi' öbun únyi hnyi hnyei wale
öbun e hanyâúâ Joridano he ka hu gabun;
k' ame ca he ka se hia bongubun je bong
hnyin, k' adre me he ka ti ohi' öbun. 27 Ke
ame he Iehova ka ovesei öbun ka hnyi ta
je hnyei, k' ame he ka wakhalet biju kolon
gabun unyin ta je hnyei ame he Iehova ka
lili öbun ka hnyin. 28 Ke öbun e he ka
bi athnyabainy eling je khong, wale a ányâ
ge hnyamen at, utö me veto, a ta je únyi
ame ca wâ, me ca löng, me ca han, me ca
bubune. 29 Ke so bi öbun ka he eling ka
elöm Iehova Khongom, me u me he ka wâ,
u je ne elâm ge hnyekom æ bekhöt, me
hanom æ bekhöt. 30 Ke ka o kôu vec,
k' ame ne aat kôu ta je únyi hia eling, me u
me he ka hmetu kö Iehova Khongom hnyi
je bong a biliny, me löng hoton hwan hofuc;
31 anyin a haba Iehova Khongom me
Khong ame betenge; e ame ca he ka hna
degeci u, me ohiö u, me hnying anyin úhi-
hnyköu me lakâmâm, waleji e ame khe-
manyin ködrin, 32 Ke he thö u ka elâm je
bong ehac, ke tiga hiö u, hwân hnyi bong
waleji Khong ame op at eang hmelen hnyin,
ke hwân hnyi ke keihen drany ke ne o but
ka hnyi ke keihen, hawa e hu únyi æ gan
helâng, k' adre me ne löng helâ me únyi ang?
33 Hawa, e hu ke hnyei ame löng hofuc
hwan Khong ame fuc hnyin meic, helâ me
hnâm hna löng, ke möt bi? 34 Ke hawa,
hwakecin Khong he ka he me hom hnyei
hnân hobi kâu únyi hnyi ke hnyei, ge je
úcúbic, me je haten, me je únyi hnân láiâ,
me vat, me hnyam æ hwege, me benyin
adre hai, me je únyi æ gan hnân outen,
hoton ta je únyi hia waleji a ányâ Iehova
Khongubun hobi köbun hnyi hnyimaköbun
hnyi Aigupito? 35 Adre me omanenâ
únyi eling köu, me me khanö u thö a
Iehova Khong; hake e ke ba ke at. 36 E
ame hna köu he ka löng hwan hofuc únyi
ethö hnyi drany, me me nö u: ke e ame
omanenâ köu eang hmelen anyin meic æ
gan; ke u je löng hwan je hofuc únyi hnyin
meic. 37 Ke can anyin e ame betenge ge
lakâmâm, waleling me e ame úca je mátrâ-
nidrin hwabödrin, me hum u úheny Aigu-
pito ge maniny man æ hwege, k' ame tot
unyâm; 38 he ka obâ hnyi hnyimákâm je
hnyei æ gan me hwege hom, me hum u he
ka ham bi köu idra hnyei me me em, helâ
me hnyi bong ang. 39 Ke khanö u thö
hnyi bong ang, ke ip hmâ eú hnyi hnyekom
a haba Iehova me Khong ethö hnyi drany
me eang hmelen; hake e ke ba ke at. 40 Ke

u me he ka tuö anyin je hnanyibu, me hnen je hna hûna, wale oge me hûna köu hnyi bong ang, m' u me so, me lakom hwabâm, me me se hia bongom je bong hnyi hnyeï a ham köu Iehova Khongom nyiele balua.

41 Ke haba Moso ame kü je taun a kun hnyi ke keihen Joridano a o hnyin seünö ; 42 me me kec ka hnyin at ame hlingâ at, wale at ame hlingâ at ame laba hakekeny kâu a utöteta kâu, k' ame ca hûkötîâ ehac ; me me he ka müt e ka kec ka hnyi ke taun eling : 43 hobi kâu at Reubena, e ame ip Bezeri hnyi hnyebuba, hnyi hnyeï a tha hon ; me Ramotha hnyi Gileada, hobi kâu at Gada ; me Golana hnyi Basana, hobi kâu at Manase.

44 Ke walang hnanyibu ame ip Mose hnyi hnyimakan lakon Isaraela : 45 ke walang je ohnathoâ, me je hna otîlä, me je hna owisa hnö Mose hna omanenâ ka lakon Isaraela, ödra ka o but üheny Aigupito ; 46 hnyi hoton Joridano, hnyi hnyigöulen bucen cicö Bethe-peora, hnyi hnyeï i Sihona thaniny at Amora, at ame laba e Hesebona, waleji ame kot hnö Mose me lakon Isaraela, ödra ka o but üheny Aigupito : 47 ke adre me labâ iny hnyeï, me hnyeï i Oga thaniny Basana, a li tuhan at Amora, a wal' ödru hnyi hoton Joridano hnyi hna o hnen seünö ; 48 hwân Aroera hnyi baten hnyigöulen bucen e Arenona ke ne o but hnyi bucen Siona (wale Heremona), 49 me hnyeï ae tha hon hia hoton Joridano e deiö, ke ne o but hnyi köien je hnyeï ae tha hon hmelen hwatapkoluiny Pisega.

HNYIMAKAN 5.

KE haba Mose ame hawâ lakon Isaraela hia, me ha ködra, ka habe, Isaraela lö, löng ju je hnanyibu, me je hna owisa oge me haimemenâ ka hnyi je hnyikönyöbun hnyi bong ang, me me khan'öbun e, me tuö, me anyâ. 2 Haba Iehova Khonguta ame ühinhnyköu möta hnyi Horeba. 3 Iehova ame ca anyâ ühinhnyköu eang me lakamöta, ke möta bi, öta hia tavat ae müt hnyi bong ang. 4 Iehova ame fuc ühnyimaköu möbun hon bucen hnyi meic, 5 (ke oge me tot hnyi wanbö Iehova möbun hnyi ün eling, me thumetu öbun ge hofuc ho Iehova : anyin a öbun ot ge meic, k' öbun e ca öliâ bucen:) k' ame ha, ka habe,

6 Inya Iehova Khongom, at ame hum u üheny hnyi hnyeï Aigupito, ke üheny hnyi hnyaban úthaluo.

7 U me ca he ka anyâ ke khong hnyi hnyimakök.

8 U me ca he ka bi hnatheat hobi köu bi, me öuco ke ünyi ethö hnyi druny, me eang hmelen, me hnyi köiö hmelen hnyeï : 9 u me ca he ka kbudrung me bi athnyabainy ta je ünyi e : anyin a inya Iehova Khongom, Khong ame ciâ, at ame bi hwaban monu anyin je kamen ka je mâtrânidrin ke ne o but ka hnyi dö a kuniny me dö a vakiny a tavat adre hûkötîö nya : 10 k' oge me omanenâ ibetengîö ka ta je dö a thauzaniny tavat adre me hnyok könya, me vheno anyik je hnanyibu.

11 U me ca he ka ha bâüâ iö Iehova Khongom : anyin ame ca he Iehova ka ha ae ba kongon at ame ha mono ien.

12 U ma tuö bong sabath he ka okabâ e, helâ me Iehova Khongom ame hûna köu. 13 Siks ta bong u me he ka huliwa hnyin, me anyâ anyâm ta je huliwa hia : 14 ke haba bong a seveniny, me, wale sabath anyi Iehova Khongom : ke ba huliwa u me he ka anyâ hnyin, a u, me nokom бага, me nokom hlu, me athnyabaem a бага, me momo, me halem bolok, me halem asina, me halem je meno hia, me atkanyua anyâm hnyi je homagöülem ; me me tha menâ möu athnyabaem a бага, me momo. 15 Ke u me he ka ünyküme a g' adre thaluö u hnyi hnyeï Aigupito, ke haba Iehova Khongom ame hum u üheny e ge hnyam ae hwege me benyin adre hai : anyin a wale Iehova Khongom ame hûna köu he ka tuö bong sabath.

16 Ogânâ thö kâmâm me hinyâm, helâ me Iehova Khongom ame hûna köu, me me se hia je bongom, m' u me so hnyi hnyeï Iehova ame hani köu.

17 U ca he ka ühlingö.

18 U ca he ka bi ünyi monu.

19 U ca he ka venöu.

20 U ca he ka thoiâ ke at.

21 U ca he ka behnyekom äiân ke at ; k' u me ca he ka beweny uma umen ke at, me iny hnyeï, me athnyabainy a бага, me athnyabainy a momo, me halem bolok, me haleny asina, me ta je ünyi hia anyin ke at.

22 Wale je hofuc a ha Iehova ka anyibun ükhacaköu hia hon bucen ünyi hnyi wanben meic, me ûlä, me menekholom ae gan, ke gan hmâ hwan : ke e ame ca bi hanen. Ke e ame sihnalimen e hnyi li veto ae lau, me ham könya. 23 Ke haba

hnyi úen öbun e löng hwan únyi hnyi wanben menekholom, ke tiga hlâ thö bucen ge meic, me öbun e he kõnya, a je taben hia anyibun je tribu me wahingatibun; 24 ke öbun e ha, ka habe, Wâ bi, Iehova Khonguta ame omanená kôta hmanenanginy me úganiny, k' ate me hia but löng hwan ame fuc únyi hnyi wanben meic : ate me wâhmakmeto but hnyi bong ang a Iehova ame úhnenamö me at, k' ame möt bi. 25 Anyin a wale geú ate me he but ka mok? anyin ame he meic eang ae gun he ka thung öta: ate me ne löng hmetu hofuc ho Iehova Khonguta, me ate me he ka mokcu. 26 Anyin a ewa at unyin tavat hia ame löng hwan Khong ae möt ame fuc hnyin meic helâ me hnöhmun hna löng, k' ame möt bi? 27 U ma hakekenyâ me löng hofuc hia ame he Iehova Khonguta ka ha: ke u me he biju ka omanená köhmun hofuc hia ame he Iehova Khonguta ka ha köu: k' öhmun e he ka löng me ányâ. 28 Me haba Iehova ame löng hobun hofuc, waleji öbun e ha kõnya; ke Iehova ame ha kõnya, ka haba, Oge löng ut-ifucin tavat eang, wale adre me ha köu: ke so hia hnödra hna ha. 29 E na hu ju gadra hnyok ae úcú m' adre me outö nya, me löng bala hnök ta je hna húna hia, m' adre me so me je mátránidra nyiele balua! 30 He thö ka ha ködra, ka habe, Hmetu ju öbun ka hnyi umöbun je uma mano. 31 Ke u me he bi u ka tot eang unyik, ke oge me he ka omanená hia köu ta je hnanyibu, me hna húna, me je hna owisa, wale u me he ka n' ödra, m' adre me he ka ányâ hnyi hnyei oge me he ka ham ködra me me idra. 32 Ke wâ wia ju öbun he ka ányâ helâ me Iehova Khongubun ame húna köbun: ca he öbun ka saú ka hnyi ke keihen metâ me me. 33 Öbun e he ka vbeno hia gethen wale Iehova Khongubun ame húna köbun, m' öbun e möt, me so, me se hia bongubun je bong hnyi hnyei öbun e he ka hu.

HNYIMAKAN 6.

KE walang hna húna, me je hnanyibu, me je hna owisa, waleji a húna Iehova Khongubun he ka n' öbun, m' öbun e he ka ányâ hnyi hnyei öbun e he ka hnyin me me hu: 2 m' u me he ka outö Iehova Khongom he ka vbeno anyin ta je hnanyibu hia, me hnen je hna húna, wale oge me húna köu, u, me nokom, me öbem

hnyi ta je bong bongon ányâm möt hia, me me se hia bongom. 3 Isaraela lö, löng ju, me tuö he ka ányâ: m' ume so, me öbun e he ka ti se hia, helâ me hna ha bánâ köu hnö Iehova Khongon lakámâm hnyi hnyei ame di hnyin debai me hani.

4 Isaraela lö, löng ju: haba Iehova Khonguta, me Iehova a khaca; 5 ke hamâm he ka hnyok kö Iehova Khongom ge hnyekom ae bekhöt, me hanom ae bekhöt, me tang hwegiâm ae bekhöt. 6 Ke haba ta je hofuc eang oge me húna köu hnyi bong ang, me ame he ka e bi hnyi hnyekom: 7 ke u me he ka labö ná e ka lakom, me úhnenamö gan u ka laba hnyin umâm uma, me he eu hnyi gethen, me u ka mokut, me u ka köüö hmetu. 8 Ke u me he ka ca hofuc eling hnân haten hnyi hnyamâm, ke wale minya hnân wen bariny wanben li emakâm. 9 Ke u me he ka sihnalimen ta je hofuc e hnyi je ut hwanumen umâm uma, me hnyi je homagöulem.

10 Ke ka hum u hnö Iehova Khongom ka hnyi hnyei waleji e ame khemanyin ka lakámâm, a Aberahama, me Isaaka me Jekob, he ka ham köu, a je taun ae gun me so wale u je ca op, 11 me je uma ae únöngöt ge ta je únyi hia ae so, wale u je ca ounöngötâ, me je hna khú an, wale u je ca kou, je hnyei vine me je hnyei elaiö, wale u je ca ta, ke u me he ka han sekon; 12 awe, wâ eáu, wâ u nye hnying Iehova at ame hum u úheny hnyi hnyei Aigupito, únyi hnyi hnyaba ae úthaluo. 13 U me he ka outö Iehova Khongom; me bi athnyabainy, me khemanyin hnyi ien. 14 Ca he öbun ka hnu hoton je khong a je khongon tavat igigili öbun; 15 anyin a haba Iehova Khongom unyâm, me, Khong ame ciâ; wâ e nye ubâhlâ hmönyin anyi Iehova Khongom köu, ke e ame ohio u but únyi hnyi hon kânâ.

16 Ca he öbun ka cubic Iehova Khongubun, helâ me hnöbun hna cubic e hnyi Masa. 17 Öbun e he ka tuö wia je hna húna hnö Iehova Khongubun, me hnen je hna ohnatho, me anyin je hnanyibu, wale e ame húna köu. 18 Ke u me he ka ányâ únyi ae wisa me so hnyi hnyimákö Iehova; m' u me so, m' u me he me hu gam hnyei ae so waleji Iehova ame khemanyin ka lakámâm, 19 a g' ame he ka obâ je iwahnaihmiöny möu hia hnyi hnyimákâm, hoton hna ha hnö Iehova.

20 Ke e ka he nokom ka hnei u nyiele,

ka habe, Ieü bongon je hna ohnatho, me je hnanyibu, me je hna owisa, waleji Iehova Khonguta ame hûna köbun? 21 awe u me he ka ha ka nokom, ka habe, Haba öhmun lathnyabai Farao hnyi Aigupito ehac; me Iehova ame hum öhmun üheny Aigupito ge hnyam ae hwege: 22 ke Iehova ame omanená je haten, me je únyi hnân láia ae gan me kong ka at Aigupito, me kö Farao, me hnyaban hia hnyi hnyimaköhmun: 23 ke e ame hum öhmun üheny e, me me hum öhmun ka hnyin me ham köta hnyei waleji e ame khemanyin ka lakamöta. 24 Ke Iehova ame hûna köhmun he ka anýa ta je hnanyibu eang, he ka outö Iehova Khonguta, m' ate me so bala, me e ame omeli öta, helâ me hnyi bong ang. 25 Ke ame he ka hnân hwakecita ae wisa ate me ne wâ wia he ka ányâ hna hûna eang ae bekhüt hnyi hnyimakö Iehova Khonguta, hoton hnen hna hûna köta.

HNHYIMAKAN 7.

E KA hia but Iehova Khongom hum u ka hnyi hnyei wale u me he ka hnyin he ka hu e, ke e ka hia but oc degecá je hnyei ae se hia hnyi hnyimákâm, a at Heth, me Girigasa, me Amora, me Kanana, me Perizi, me Hivi, me Jebusi, wale seven je hnyei ae gan me hwege hom; 2 ke e ka he Iehova Khongom ka hn' ödra hnyi hnyimákâm; awe, u me he ka kuc ödra me ti ohí' ödra hia; u me ca he ka úhíhinykôu mödra, me betenge gadra: 3 ke haba khaca u me ca he ka úhok ta momo mödra; u me ca he ka ham nokom hlu ka nokon бага, ke u me ca he ka hom nokon hlu hobi káu nokom бага. 4 Anyin a e ame he ka oká nokom unyik, me me he ka bi athnyabainy ke je khong: me ame he ka ubáhlá hmönyin anyi Iehova köbun, ke e ame he ka ie ohio u. 5 Ke walang únyi öbun e ha ka ányâ ködra; öbun e he ka kia anyidra je taben hut, me tho amamá anyidra je veto ame tot, me sö degecá anyidra je Aseira, me thong degecá anyidra je hnatheat ge meic. 6 Anyin a u hnyei ae kap kö Iehova Khongom: ke Iehova Khongom ame úcö u, me me iny hnyei ae ke bongon ae nua bon ta je hnyei hia hnyi hon kánâ. 7 Haba Iehova ame ca betenge köbun, me uc' öbun can öbun se hia hon je hnyei hia: anyin a öbun tavat ae úhnyükong hmönyin ehac: 8 ke so bi únyi hnyi ibetengiö anyi Iehova köbun, ke hnyi weny he ka önyihnathö.

hnen hna khemanyin ka lakamöbun, waleling me me hum öbun hnö Iehova ge hnyam ae hwege, me omeli öbun únyi hnyi hnyaba ae úthaluo, a üheny hnyi hnyamö Farao than Aigupito. 9 Khanö u thö a Iehova Khongom, e thibi Khong; Khong ae lnathu, at ame tuö úhíhinykôu me ibetengiö ka tavat adre me hnyok káu, me tuö anyin je hna hûna ka ta je dö a thauzan; 10 ke ame bi hwaban manená ka tavat adre me húkotiá e he ka ohí' ödra: e ame ca he ka bec ka at ame húkotiá e, k' ame he ka bi hwaban manená káu. 11 Anyin a wale u me he ka tuö hna hûna, me je hnanyibu, me je hna owisa, wale oge me hûna köu hnyi bong ang, he ka ányâ.

12 Ke ame he ka e bi, a u je ne löng je hna owisa eang, me tuö, me anyâ, a g' ame he Iehova Khongom ka tuö möu úhíhinykôu me ibetengiö waleji e ame khemanyin ka lakámâm: 13 me e ame he ka hnyok köu, me ohnahici u, me osehiö u: k' ame he minya ka ohnahicâ je wan hnyekom, me wan kánâm kánâ, wale ányâm hwit, me ányâm waina, me ányâm wakaco, me lakon halem je kau, me je hnabat halem je mamoe, hnyi hnyei e ame khemanyin ka lakámâm he ka ham köu. 14 Ame he ka beönuu ányâm hnahic hon ta je hnyei hia: k' ame ca he ka toúnyi ke бага me momo unyibun, me halem omeno. 15 Ke ame he Iehova ka ohia unyâm ta je mok hia, ke e ame ca he ka ip hom ke mekiny Aigupito ae kong, wale ae khanö u, k' ame he ka ip e hon hudrin hia a tavat adre me húkotiö u. 16 Ke u me he ka ohia ta je hnyei hia ame he Iehova ka hna köu; k' ame ca he emakâm ka betenge gadra: ke u ma ca bi athnyabainy anyidra je khong; anyin a wale hnân nuc u. 17 U je ne ha hnyi hnyekom, ka habe, E gan je hnyei eling huk, k' oge ma kámâu ka he ka hnyi hnödra? 18 awe, u me ca he ka out' ödra: ke u ma he ka únykúme wia ta je únyi waleji a ányâ Iehova Khongom kö Farao me at Aigupito hia; 19 a ta je úcúbic ae gan a wâ li emakâm, me je haten, me je únyi hnân láia, me hnyamen ae hwege, me benyin adre hai, waleji hnö Iehova Khongom hna hum u káu: k' ame he Iehova Khongom ka ányâ helâe ka ta je hnyei hia wale u me ouden. 20 Ke haba khaca, ame he Iehova Khongom ka kunâ wahankánâ ködra, ke ne o but ame hia but je kolon tavat adre me lubaluöng gam. 21 U ma ca he ka out' ödra, anyin a e bi

unyâm Iehova Khongom, Khong ae gan me hnân ouden. 22 Ke ame he Iehova Khongom ka obâ úsa úhnyúkong je hnyei eling hnyi hnyimákâm : u me ca he ka okhaca ob' ödra, wâ ödra nye se hia but hom omenoiny hnyot. 23 Ke ame he Iehova Khongom ka hn' ödra köu, me okongu ödra ge hna okongó ae gan, ke ne o but adre ohí' ödra. 24 Ke e ame he ka hna anyidra je than ka hnyi hnyamâm, ke u ma he ka ohia je iödrin eang hmeledrany : e ba at ae khana he ka tot hnyi hnyimákâm, ke ne o but u je hia but ohí' ödra. 25 Ke öbun e he ka thong degecá ge meic ta je hnatheatiny anyidra je khong : ke u me ca he bi ka behnyekon sileva me gol wale adre tube káu, me hom e me ányâm bi, wâ e nye nuc u hnen únyi eling : anyin a haba únyi e me únyi ae ikiki kö Iehova Khongom : 26 ke u me ca he ka hom únyi ae ikiki ka hnyi umâm uma, wâ adre nye obnaúhangö u helâ me ; ke u ma he ka ti ikikiâ e, me ti hûkötia, anyin a e únyi adre ohnaúhangö.

HNYIMAKAN 8.

HABA ta je hna húna hia wale oge me húna köu hnyi bong ang, me, öbun e he ka wâ wia he ka ányâ, m' öbun e möt, me se bia, me he, me hu hnyei waleji Iehova ame khemanyin ka lakamöbun. 2 Ke u ma he ka únykúme gethen hia waleji a hum u hnyin Iehova Khongom, hnyi je huna a fâte hnyi hnyebuba, me me oúhnyúkongi u, he ka cubic u, me me wâhmakhmetoá únyi eú hnyi hnyekom, hawa, u me ne he ka tuö hnen je hna húna, k' u je ne höcö bi. 3 Ke e ame oúhnyúkongi u, me omekihnânemi u, me hám ge mana, wale únyi ae ca khanö u, ke ca khana minya lakâmâm ; me me khanö u thö a g' ame ca möt at hnen thibi areto, k' ame möt bi at hnen ta je únyi hia ame o únyi hnyi hnyimö Iehova. 4 Ame ca bobot ányâm je úkhaú waleji u me khavá, k' ame ca khibi cam hnyi ta je huna eling a fâte. 5 Ke u me he ka únykúme eú hnyi hnyekom a g' ame kuc u hnö Iehova Khongom helâ me at ame kot nokon. 6 Ke u me he ka tuö je hna húna hnö Iehova Khongom, he ka vheno deny je gethen me ouden e. 7 Anyin a Iehova Khongom ame hum u ka hnyi hnyei ae so, a hnyei ae hu je wagewe hnyin, a je hna pupua me je köiö ae dit, k' ame ve pupua hnyi je hnyi-

göulen bucen me hnyi je bucen ; 8 a hnyei ae hu hwit, me bali, me vine, me ometa, me rimona ; a hnyeiiny wakaco me elaiö me hani ; 9 a hnyei u me he ka han hnyin, ke ba hmiâ, ke ba ke únyi ae hia hnyin e unyâm ; a hnyei ae hu fao hnyi hnen vetoiny, ke u me he ka hiny bras hnyi je buceniny. 10 Ke u me he ka han sekon, me u me he ka hasoi Iehova Khongom ge hnyei ae so e ame ham köu. 11 Ke wâ eâu, wâ u nye hnying Iehova Khongom, me ca tuö bi hnen hna húna, me anyin je hna owisa, me anyin je hnanyibu, wale oge me huna köu hnyi bong ang : 12 wâ u nye he bi ka han sekon, me bi uma ae so, me labâ ; 13 ke e ka se hia but halem je kau me halem je mamoe, ke e ka gan dut ányâm sileva me gol, ke ka se hia but ányâm je únyi hia ; 14 me wale ame bi gan hnyekom, me u me hnying Iehova Khongom at ame hum u úheny hnyi hnyei Aigupito, únyi hnyi hnyaba ae úthaluo : 15 at ame lili u tilö u hnyi wanben hnyebuba ae gan me hnân ouden, dok ae hu on hnyin ae kahwa, me je sekopio, dok ae mada me ba köien ; at ame oâ köu köiö únyi hnyi kie a out ; 16 at ame hám ge mana hnyi hnyebuba únyi a ca wâ hnen lakâmâm ; me me oúhnyúkongi u, me cubic u, he ka ohnahici u hnyi obiny : 17 ke u je ne he ka ha eú hnyi hnyekom, ka habe, A o könya omjeú eang únyi ge manik man me tang hwegien hnyamök. 18 Ke so u ma únykúme kö Iehova Khongom, anyin a e at ame ham köu tang hwege he ka hu tang omjeú ; me me ohmâ anyin úhibinyköu waleji e ame khemanyin ka je lakâmâm, helâ me hnyi bong ang. 19 Ke u je ne hnying Iehova Khongom, me hnu hoton je khong bi, me bi athnyabaidrin, me khudrung ködrin, awe, inya oge me ha wia köbun hnyi bong ang a g' adre me he ka ohí' öbun. 20 Adre me he ka ohí' öbun helâ me je hnyei ame he Iehova ka ohia hnyi hnyimáköbun ; anyin a öbun e höcö löng hoton hofuc ho Iehova Khongobun.

HNYIMAKAN 9.

ISARAE LA lö, löng ju : u me he ka he hanyáúá Joridano hnyi bong ang, he ka he me húgúnâ je hnyei ae gan me hwege hom, je taun ae gan k' adre up baginy ke ne o but ka hnyi drany, 2 a tavat ae gan me beú, je laku Anaka, tavat ae khanö u, k' u je löng hnödra hna ha

gada, ka habe, Ie at ame he ka tot hnyi hnyimakan je laku Anaka? 3 Ke ame he ka khañö u hnyi bong ang a Iehova Khongom ame hnyimakan anyám bunyen, e meic ae ban; ke e ame he ka ohí' ödra, me öuhnyükongu ödra: ke u me he ka ob' ödra, me ie ohí' ödra, helâ me Iehova ame ha köu. 4 Ke e ka hia but Iehova Khongom ob' ödra hnyi hnyimákâm, me u me ca he ka ha eü hnyi hnyekom, ka habe, Ca hwakecik ae wisa, Iehova ame hum nya me inye he ka hu hnyei ang: ke so bi can hwakecin ae kong anyin tavat eling, Iehova ame ob' ödra hnyi hnyimákâm. 5 Ca únyi ge hwakecâm ae wisa, me wisainy hnyekom, wale me u me he me húgúnâ idra hnyei: ke so bi can hwakecin ae kong anyin tavat eling Iehova Khongom ame ob' ödra hnyi hnyimákâm, me me hwádâ hofuc waleji a khemanyin Iehova ka lakámâm, a Aberuhama, me Isaaka, me Jakob. 6 Anyin a wale, u ma wáhmakhmetoâ a ca únyi ge wisainy hwakecâm me ame ham köu hnyei eang ae so hnö Iehova Khongom me me em; anyin a haba u me hnyei ae hwege nyin. 7 Únykúme ju, me ca he ka hnying bi ge hnâm hna ohmönyini Iehova Khongom hnyi hnyebuba: hwân hnyi bong u je hna but hnyin hnyei Aigupito, ke ne o but öbun ang, me öbun e labö úkhin fuc me Iehova. 8 Ke öbun e ohmönyini Iehova hnyi Horeba, me Iehova ame hmönyin köbun k' ame he ka ohí' öbun. 9 Hnyi üen oge me öliâ bucen he ka kap li veto ae lau, a li vetoiny úhihinyköu waleji a ányâ Iehova möbun, ke oge me laba hnyi bucen fáte je lany ke fáte je lit; k' oge me ca han me ic. 10 Ke Iehova ame ham könya li veto ae lau a sihnalimen ge banyen Khong; k' adre sihnalimen hnyi li únyi eling hofuc waleji a ha köbun Iehova hon bucen hnyin meic, hnyi bong adre úkhacaköu hnyin. 11 Ke a um dö je lany a fáte me je lit a fáte me haba Iehova ame ham könya li veto ae lau, a li vetoiny úhihinyköu. 12 Ke Iehova ame ha könya, ka habe, Todrö, ie utut úhem ang; anyin ae kong ut anyám tavat wale u je hom úheny Aigupito; adre me saü logot únyi hnyi gethen waleji oge hûna ködra; k' adre ányâ hobi ködra hnatheat adre oköiâ. 13 Ke haba khaca Iehova ame ha könya, ka habe, Oge wâ but tavat ang, ke wâ bi, ödra tavat ae hwege nyin: 14 Ca thao nya me oge me he bi nya ka ohí' ödra, me kot degecâ ödra úheny eang hmelen, ke oge me he bi

nya ka wiö u me me hnyei ae gan me man hudra. 15 Waleling me oge me hwiö me utut úhek hon bucen, ke ame hlâ thö bucen ge meic: ke e bi hnyi li hnyamök li vetoiny úhihinyköu. 16 Me oge me bwele, ke wâ bi e kong hwakecibun kö Iehova Khongubun; k' öbun e ányâ nokon kau adre oköiâ hobi köbun; k' öbun e logot saü únyi hnyi gethen waleji a hûna köbun Iehova. 17 Me oge me kât li veto, me khûâ degecâ únyi hnyi li hnyamök me thu hnyi hnyimaköbun. 18 Ke oge me ta ju hnyi hnyimakö Iehova helâ me a bán, fáte je lany, ke fáte je lit; k' oge me ca han me ic; can anyibun ta je hulö hia, waleji öbun e ányâ hwakecibun ae kong hnyi hnyimakö Iehova me ohmönyinâ. 19 Anyin oge me outen hmönyin me hwahwacit waleji ame hmönyin köbun Iehova he ka ohí' öbun. Ke so bi Iehova ame löng könya minya hnyi üen eling. 20 Ke Iehova ame hmönyin gan hmâ kö Arona he ka ohia e; ke so bi oge me khawei Arona minya hnyi üen eling. 21 Ke oge me hom anyibun hulö, wale nokon kau öbun e ányâ, me thong ge meic, me kokot e, me oamamá ke ne o but ame sesâ but: ke oge me khûâ sesáiny ka hnyi wagewe ame di únyi hnyi bucen. 22 Ke öbun e ohmönyini Iehova hnyi Tabera, me Masa, me Kiberöth-atava. 23 Ke hnyi üen Iehova ame kun' öbun úheny Kadesi-banea, k' ame ha, ka habe, Ölö th' öbun, me hom hnyei oge me ham köbun; me öbun e hanyâtâ musí anyi Iehova Khongubun ke öbun e ca labageju kâu, me löng hwan hofuc. 24 Öbun e hia but úkhin fuc me Iehova hwân hnyi bong oge ibi iouny möbun hnyin. 25 Me waleling oge me ta ju hnyi hnyimakö Iehova hnyi ta je lany a fáte ke je lit a fáte waleji oge ta hnyin; anyin a Iehova ame ha he ka ohí' öbun. 26 Me oge me hic kö Iehova me ha, ka habe, Than Iehova lö, u me ca he ka ohia lakem me hwajekhom, waleji u je omelö ge manám man, me hom úheny Aigupito ge hnyam ae hwege. 27 Únykúme ju lathnyabaem, Aberahama, me Isaaka, me Jakob; e so u me ca wâ hwakecin ae újüng anyin tavat eang, me hwakecidra ae kong, me anyidra hulö: 28 wâ e nye ha hnen hnyei wale u je hum öhmün úheny hnyin, ka habe, E ca khañö Iehova he ka hum ödra ka hnyi hnyei waleji e ame ha bánâ ködra, ke e ame húkoti ödra, waleling me e ame hum ödra he ka hling' ödra hnyi hnyebuba. 29 Ke so bi em

hnyei ödra, ke hwajekhom, waleji u je hom ge manâm man ae gan, me benyâm adre hai.

HNYIMAKAN 10.

KE haba hnyi úen eling Iehova ame ha kõnya ka habe, U me he ka delá li veto ae lau helâ me a bân, ke öliâ thö bucen kõnya, ke u me he ka tibet ke tang ütö. 2 Ke oge me he ka sihnalimen hnyi li veto ae lau ta je hofuc hnyi li veto ae lau a bân waleji u je thu, ke u me he ka hitangen li únyi e hnyin tang. 3 Me oge me tibet tang ütö ohum, me delá li veto ae lau, helâ me li at a bân, me öliâ ka hnyi hon bucen, me li veto ae lau hnyi hnyamök. 4 Ke e ame sihnalimen hnyi li veto ae lau helâ me hna sihnalimen a bân, wale je hnanyibu a ten, a ha Iehova kõbun hon bucen únyi hnyi wanben meic hnyi je bong bongon úkhaçaköu : me Iehova ame ham li únyi e kõnya. 5 Ke oge me hwiö me he úheny hon bucen, me oge me hitangen li veto hnyin tang oge tibet ; ke wale bala ling, helâ me Iehova ame hûna kõnya. 6 (Ke haba lakon Isaraela adre me he úheny Berotha Bene-jakana, Mosera ai : ke a mokuç Arona eling, k' adre konâm e eling ; ke haba Eleazara a nokon ame ányâ hany-men at bihut hwaban. 7 Ke adre me he úheny e Gudagoda ai, ke úhedra Gudagoda, me adre me he Jotebath ai, hnyei ae hu je wagewe hnyin. 8 Haba hnyi úen eling Iehova ame hake ip tribu anyin at Levi, he ka vadren tangen úbihinykõu anyi Iehova, he ka tot hnyi hnyimakö Iehova, me huliwa káu, me hahnahicâ hnyi ien, ke ne o but hnyi bong ang. 9 Anyin a wale e ba hwajekhöu Levi me iny unyin je liamekeiny më ; haba Iehova, me iny hnyei, helâ me Iehova Khongom ame ha káu.) 10 Ke oge laba hon bucen fáte je lany ke fáte je lit, helâ me úen eji a bân : ke Iehova ame löng minya kõnya hayi úen eling ; ke ca we Iehova he ka ohö u. 11 Ke Iehova ame ha kõnya, ka habe, Todró u me hnyimakan tavat ; me adre me he ka he me hu hnyei, waleji oge khemanyin ka lakamödra he ka ham ködra.

12 Ke haba walang ang Isaraela lö, iéu we Iehova Khongom únyi gam, ke wale thibi ang, he ka outö Iehova Khongom, he ka vhenö deny je gethen hia, me hnyok káu, me athnyabai Iehova Khongom ge hnyekom ae bekhöt, me hanom ae bekhöt,

13 he ka tuö je hna hûna hnö Iehova, me anyin je hnanyibu, wale oge me hûna kõi hnyi bong ang, m' u me so bi? 14 Wâ bi únyi anyi Iehova Khongom drany me draniny je drany, me hmeledrany, me ta je únyi hia thithö hnyin. 15 Ke so bi Iehova ame senyin ka lakámám me hnyok ködrin, me e ame úca je mátránidrin hwa-bodrin, wa' öbun e, únyi hnyi je hnyei hia, helâ me hnyi bong ang. 16 Anyin a wale peritomonâ unen je hnyekubun, ke ca he hmetu bi öbun ka hwege nyin. 17 Anyin a haba Iehova Khongubun, me Khongon je khong, me Thaniny je than, e Khong ae gan, me man, me hnân outen, k' ame ca wâhmakhmetoâ at, k' ame ca kap hwaban. 18 E ame owisa hobi káu nakahme, me safac, k' ame betenge ge atkanyua, me hân, me okhavâ. 19 Anyin a wale betenge ju öbun ge atkanyua ; anyin a je atkanyua öbun hnyi hnyei Aigupito ehac. 20 U me he ka outö Iehova Khongom ; u me he ka bi athnyabainy, me keçe káu, me khe-manyin hnyi ien. 21 E thibi at u me he ka ogânâ, ke e thibi Khongom, at ame ányâ ta je únyi ae gan me hnân outen hobi kõi, waleji ame wâ li emakâm. 22 Ame he lakámám Aigupito ai ehac a ödrin sevente tavat ; ke walang ang Iehova Khongom ame wiö u m' u me helâ me je okhuiny drany ae se hia.

HNYIMAKAN 11.

ANYIN a wale u me he ka hnyok kö Iehova Khongom, ke u me he bala ka tuö hnen hna otilâ, me anyin je hna-nyibu, me hnen je hna owisa, me hnen je hna hûna. 2 Khan' öbun ju hnyi bong ang : anyin a oge me ca fuc ka lakubun, tavat ae ca khana ke ca hnyi wâ hna bi hwaban únyi ga Iehova Khongubun, ge úganiny, me hnyamen ae hwege, me benyin adre hai, 3 me anyin je úöman, me anyin je huliwa, waleji e ame ányâ kö Farao than Aigupito hnyi Aigupito, me lakeiny hia ; 4 me hnen hna ányâ ka tavat avat hnyi Aigupito, ka haledra je hors, me anyidra je kariota ; waleji hnyi hnen hna khutukhavâ but Köiö ae Dra, waleji hnyi hnödra hna hnu öbun ; me hnö Iehova hna ohí' ödra ke ne o but hnyi bong ang ; 5 me hnen hna ányâ kõbun hnyi hnyebuba ke ne o but öbun e o eang ; 6 me hnen hna ányâ kö Dathana me Abirama li laku Eliaba nõku Reubena ; waleji hnyi hna memang hnyi-

men kâna me ut ödrin me anyidrin je lap, me umödrin je uma mano, me tavat ae möt hia ödrin e hnu hotudrin, hnyi hnyimakan at Isaraela hia : 7 ke so bi öbun e hia but wâ ge je emaköbun ta je hulwiwa ae gan hia anyi Iehova, waleji e ame ânyâ. 8 Anyin a wale hamöbun he ka tuö je hnanyibu hia oge me hûna köbun hnyi bong ang, m' öbun e hwege, me he, me hu hnyei öbun e he kâu, m' öbun e he ka hu ; 9 me me se hia bongubun je bong hnyi hnyei ame khemanyin Iehova ka lakamöbun he ka ham ködrin me mâtrânidrin, a hnyei ame di hnen debai me hani. 10 Anyin a haba hnyei u me he ka he kâu m' u me he ka hu e, me ca helâ me hnyei Aigupito waleji u me o but úheny hnyin, ke u je ta hatungâm je hatong, me bi deny köiö ge cam helâ me hna belökâ je khölak : 11 ke haba hnyei öbun e he ka hnyin me me he ka hu e, me wale hnyei ae hu je bucen me je hnyigöulen bucen, k' ame ijem dân we únyi hnyi drany : 12 e hnyei ame tuö hnö Iehova Khongom ; ke e bala bi hon e li emakö Iehova Khongom, hwân hnyi hnyimakan hna ke ne o but hnyi obiny.

13 Ke öbun e ne he ka ti löng hoton anyik je hnanyibu oge me hûna köbun hnyi bong ang, he ka hnyok kö Iehova Khongubun, me bi athnyabainy ge je hnyekubun ae bekhöt, me hanubun ae bekhöt, 14 me oge me he ka ham we hobi kâu ibun hnyei hnyi úen e, wale we a bân, me we a biliny, me u me he ka ip ânyâm je whit, me ânyâm waina, me ânyam wakaco. 15 Ke oge me he ka ham hna önying ka hnyi em hnyei, hobi kâu halem omeno, ke u me he ka han me sekem. 16 Wâ wia öbun, wâ e nye iyawâ je hnyekubun, m' öbun e saü bi, me bi athnyabainy je khong me khudrung ködrin ; 17 me ame he ka ubâhlâ hmönyin anyi Iehova köbun, me e ame he ka hlöng drany, me me ba we, k' ame ca he kâna ka okúâ waniny ; me ame he ka ie hi öbun únyi hnyi hnyei ae so Iehova ame ham köbun. 18 Anyin a wale e so öbun e ohmâ hok hofuc eang eü hnyi je hnyekubun, me je hanubun ; ke öbun e he ka ca ju e hnân haten hon je hnyamöbun, k' ame he ka hnân wen bariny hnyi wanben li emaköbun. 19 Ke öbun e he ka ná hofuc e ka lakubun, me úhnenamö gan, u ka laba hnyin umâm uma, me he eü hnyi gethen, ke u ka he ka mokut me köüö hmetu bi. 20 Ke u me he ka sihnalimen e hnyi je uthwanumen

umâm uma, me hnyi je homagöulem : 21 me me se hia bongubun je bong me bongon lakubun hnyi hnyei waleji a khemanyin hnö Iehova ka lakamöbun he ka ham ködrin, helâ me ta je bong bongon drany walethö hon hmeledrany. 22 Anyin a öbun e ne labö tuö je hnanyibu eang wale oge me hûna köbun he ka ânyâ, he ka hnyok kö Iehova Khongubun, he ka vheno deny je gethen hia, me kece kâu ; 23 awe, ame he Iehova ka obâ je hnyei hia eang únyi hnyi hnyimaköbun, ke öbun e he ka bu je hnyei ae gan me hwege hubun. 24 Ame he ka ibun je dok hia ame he ka uto ge je hnyeücabun : hwân hnyi hnyebuba, me Lebanona, hwân hnyi wagewe, a wagewe Euferate, ke ne o but hnyi köiö e jio, me wale hnyigöulöbun. 25 E ba at ame he ka tot hnyi hnyimaköbun : k' ame he Iehova Khongubun ka ootâ me öbunâ je hnyei gabun wale öbun e he ka uto, helâ me hnen hna ha köbun.

26 Wâ bi, inya oge me ip hnyi hnyimaköbun hnyi bong ang hnahic me hnaúhangö : 27 wale hnahic, öbun e ne löng hoton je hnanyibu anyi Iehova Khongubun, walang oge me hûna köbun hnyi bong ang ; 28 ke hnaúhangö, öbun e ne ca löng hoton je hnanyibu anyi Iehova Khongubun, me saü bi únyi hnyi gethen oge me hûna köbun hnyi bong ang, he ka hnu hoton je khong monu, ae ca khan' öbun.

29 Ke ka hia but Iehova Khongom lili u ka hnyi hnyei u me he ka he ka hnyin me me gam, me u me he ka ip hnahic hon bucen Girizim, ke hnaúhangö hon bucen Ebalâ. 30 Hawa ca hoton Joridano li dok e, cicö hna dit hnen seünö, hnyi hnyei ing at Kanana tavat adre me laba hnyi Araba cicö Gilegala hakekeny sawaja anyi More? 31 Anyin a hamöbun he ka hanyâúâ Joridano, me he he ka hu hnyei wale a ham köbun Iehova Khongubun, ke öbun e he ka hu e me labâ. 32 Ke hamöbun he ka tuö me ânyâ je hnanyibu hia, me je hna owisa wale oge me ip hnyi hnyimaköbun hnyi bong ang.

HNYIMAKAN 12.

WALANG je hnanyibu me je hna owisa öbun e he ka tuö he ka ânyâ hnyi hnyei a ham köu hnö Iehova Khongon lakâmâm he ka hu e hnyi ta je bong bongon anyibun möt hia eang hmelen. 2 Öbun e he ka ti ohia ta je dok hia adre

me bi athnyabainy hnyin je khongudrin hnyi je hnyei öbun e he ka hu, wal' ethö hon je bucen ae beü, me je dok ae görany, me hmelen je üö hia ae hat: 3 ke öbun e he ka kia anyidra je taben hut, me khüa oamemâ anyidra je veto ame tot, me thong degecâ anyidra je Aseira ge meic; ke öbun e he ka sö degecâ je hnatheatiny anyidra je khong; ke öbun e he ka ohia je iödra únyi hnyi dok eling. 4 Öbun e ca he ka ányâ helâe kö Iehova Khongubun. 5 Ke haba dok ame he Iehova Khongubun ka úca únyi hnyi anyibun je tribu hia me me ip eling ien bi, awe öbun e he ka elâm e wale hnyaban me he kâ e: 6 ke öbun e he ka hom kâ e anyibun je hudiny leú, me anyibun je hut, me anyibun je ke keihen a libenyitainy, me je hudiny kap göranyai hnyi hnyamöbun, me anyibun je khöbi, me anyibun je hudiny ibetengjö, me je nokon a bán hnyi halehun je kau me mamoe: 7 ke öbun e he ka han e hnyi hnyimakö Iehova Khongubun, me öbun e he ka senyinâ ta je únyi hia öbun e ányâ, öbun me anyibun je lap, wale ame ohnahici u hnyin Iehova Khongom. 8 Ca he öbun ka ányâ hoton ta je únyi hia ate me ányâ eang hnyi bong ang, wale ae ve so hnyi li emakan ke at me ke at: 9 anyin a öbun e tiga ca o ka hnyi hna menâ me hwajekon ame ham köu Iehova Khongubun. 10 Ke öbun ka he ka hanyâüâ Joridano, me labâ hnyei a ham Iehova Khongubun me ibun, ke e ame omen' öbun ge je iwahnaihmiöny hia möbun igenilö, me öbun e laba hnahic; 11 awe, haba dok ame he Iehova Khongubun ka úca hnân umen ien bi; me öbun e he ka hom kâ e ta je únyi oge hûna köbun; wale je hudiny leú, me anyibun je hut, me anyibun je ke keihen a libenyitainy, me je hudiny kap göranyai hnyi hnyamöbun, me anyibun ta je khöbi hia ae únyi hnathu kö Iehova: 12 ke öbun e he ka senyin hnyi hnyimakö Iehova Khongubun, öbun, me lakubun obaga, me lakubun wahlu, me lathnyabaibun obaga me omomo, me at Levi hnyi anyibun je lap, anyin ae ba hwajekhon, ke ba iny bi unyibun. 13 Wâ wia u nye he ka hudo ányâm je hudiny leú hnyi je dok hia u me wâ: 14 ke so thibi hnyi dok ame he Iehova ka úca hnyi ányâm ke tribu, ke u me he ka hudo eling ányâm je hudiny leú, me ányâ eling ta je únyi hia oge hûna köu. 15 Ke so bi e khatö u he ka hlingâ me han utiöiny hnyi ányâm je lap, hoton je weny hnyekom hia, me hoton

hnahic únyi ga Iehova Khongom, wale e ame ham köu: k' ame he ka hnyi han hnen tavat ae bo kong me tavat ae bo so, helâ me zebi, me aila. 16 Ke so bi öbun e ca he ka han dren: k' öbun e he ka hingâlâ e hon kânâ helâ me köiö. 17 U me ca he ka han hnyi ányâm je lap je ke keihen a libenyitainy ányâm hwit, me ányâm waina, me ányâm wakaco, me nokon halem kau a bán, me mamoe, me ányâm je khöbi wale u je bi khöbi, me ányâm je hudiny ibetengjö, me hudiny kap göranyai hnyi hnyamâm: 18 ke u me he ka han ta je únyi e hnyi hnyimakö Iehova Khongom, hnyi dok ame he Iehova Khongom ka úca, u, me nokom бага, me nokom hlu, me athnyabaem бага me momo, me at Levi hnyi ányâm je lap: ke u me he ka senyinâ hnyi hnyimakö Iehova Khongom ta je únyi hia u me he ka ányâ. 19 Wâ eâu u nye he ka hna degecâ at Levi hnyi bongom ta je bong hia hnyi em hnyei.

20 Ke e ka he Iehova Khongom ka ogânâ je hnyigöulem, helâji me hnen hna ha köu, ke u je ne he ka ha, ka habe, Oge me he ka han meno, anyin a iny behan meno; awe, u me he ka han hoton wem. 21 Ke ame ne ti sâkâu gam dok ame he Iehova Khongom ka úca me me ip ien hnyin, awe, u me he ka hlingâ halem ke je kau me mamoe, a ham köu Iehova, helâ me hnök hna hûna köu, ke u me he ka han hnyi ányâm je lap, hoton je weny hnyekom hia. 22 U me he ka han e helâ me hnödra hna han zebi, me aila: k' ame he at ae bo kong me bo so he ka hnyi han. 23 Ke so bi, wâ eâu, me ca he ka han dra: anyin a haba dra, me, wale möt; ke u me ca he ka tha han möt me utiöiny. 24 U me ca he ka han e, ke u me he ka hingâlâ e hon kânâ helâ me köiö. 25 U me ca he ka han e; m' u me so bi, me lakom hwabâm, u ka ányâ wisa hnyi hnyimakö Iehova. 26 Ke haba ányâm je únyi ae kap, me ányâm je khöbi, me u me he ka hom me he ka hnyi dok ame he Iehova ka úca: 27 ke u me he ka hudo ányâm je hudiny leú, a utiö me dra hon taben hut kö Iehova Khongom; ke adre me he ka hingâlâ dren ányâm je hut hon taben hut anyi Iehova Khongom, ke u me he ka han utiöiny. 28 Wâ wia me löng hoton ta je hofuc eang, wale oge me hûna köu, m' u me so, me lakom hwa-bâm nyiele balua, u ka ányâ únyi ae so me wisa hnyi hnyimakö Iehova Khongom. 29 Ke ka he Iehova Khongom ka subâ

degecâ je hnyeî hnyi hnyimâkâm, wale u me he ka hnyin me he ka hu, ke u ka tren, me labâ idra; 30 me wâ eâu, wâ e nye nuc u, u ka he ka he hotudra, e ka hia but ob' ödra hnyi hnyimâkâm; ke wâ u nye hnei ge anyidra je khong, me ha, ka habe, Adre me kâmâu je hnyeî eang ka bi athnyaba anyidra je khong? ke oge me he bi nya ka ânyâ helâe. 31 U me ca he ka ânyâ helâe kö Iehova Khongom: anyin adre hia but ânyâ ka anyidra je khong ta je ûnyi ae ikikiâ Iehova, wale e ame hûkötîâ; anyin adre me labö le ge meic lakudra obaga me wahu ka anyidra je khong.

32 Haba ta je ûnyi hia oge me hûna köbun, me öbun e he ka tuö me ânyâ: u me ca he ka bi hanen ka hnyin, me ohia hanen.

HNYIMAKAN 13.

ANE o ûnyi gam ke perofeta, ame ne at bwi, ke e ame ham köu ke haten, ame ne ûnyi hnân lâiâ, 2 ke e ka hwâdâ thö haten, ame ne ûnyi hnan lâiâ, waleji e ame ha köu, ame ha, ka habe, Ötin e he ka hnu hoton ke je khong ae ca khanö u, me bi athnyabaidrin: 3 awe, u me ca he ka löng hofuc hwan at eling, ame ne perofeta, k' ame ne at bwi: anyin a Iehova Khongubun ame cubic öbun he ka wâ öbun e ne hnyok kö Iehova Khongubun ge hnyekuhun ae bekhöt, me hanubun ae bekhöt. 4 Öbun e he ka hnu hotu Iehova Khongubun, me outen, me tuö anyin je hnanyibu, me löng ifucin, k' öbun e he ka bi athnyabainy, me kece kâu. 5 Ke haba at eji, ame ne perofeta, k' ame ne at bwi, me adre me he ka hlingâ; anyin a e ame hia but ûkhin fuc kö Iehova Khongubun at ame hum öbun ûheny hnyi hnyeî Aigupito, me ûcû u ûnyi hnyi hnyaba ae úthaluo, he ka lili u ûnyi hnyi gethen waleji Iehova Khongom ame hûna köu he ka vhenö. Me u ma he ka ohia helâe hulö unyâm.

6 Ame ne alecûâ duöngi u hnen liamekeiny möu a nokon hinyâm, k' ame ne nokom бага me hlu, k' ame ne âiâm, k' ame ne waem at u me hnyokâ, ke haingen, ka habe, E so ötu me he ka bi athnyabainy ke je khong ae ca khanö u me lakâmâm; 7 a je khongon ta je hnyeî igigili öbun, ame ne hakekeny ame ne úsákâü möu, hwân hnyi ke can hmeledrany ke ne o but ka hnyi ke can; 8 u me ca he ka ogâ kâu,

me löng kâu; ke haba khaca, u me ca he ka betenge gan, me hna, ke u me ca he ka ikhâlâ: 9 ke u me he bi ka hlingâ; u ma bâm ka ip hnyamâm hon he ka hlingâ, ke biliny bi je hnyamen tavat hia. 10 Ke u me he ka lûâ e ge veto, me me mokcu; can e ame heleû deny he ka thöng u ûnyi ga Iehova Khongom, at ame hum u ûheny hnyi hnyeî Aigupito, ûnyi hnyi hnyaba ae úthaluo. 11 K' ame he at Isaraela hia ka löng, me ot, k' adre me ca he hmetu ka ânyâ ûnyi eling unyâm a ûnyi ae kong.

12 Ke u je ne löng hnyi ke taun a ham köu Iehova Khongom he ka labâ, ka habe, 13 A he but ke je hnyat ae kong ûheny unyâm, ke ödrin e hia but thang aten anyidrin taun, me ha, ka habe, E so ötin e he ka bi athnyabainy ke je khong ae ca khan' öbun; 14 awe, u me he ka hnei, me elâm, me hnö wia; ke ame ne hnathu, me manen a g' adre hia but ânyâ ûnyi eling ae ikiki unyâm: 15 me u me he ka ti kot tavat aten taun eling ge hele vat, me ti ohia, me ta je ûnyi hia hnyin e, me omenoiny hia, ge hele vat. 16 Ke u me he ka khon ta je ûnyi hia adre hûgûna ka hnyi wanben gethen, me le degecâ taun ge meic, me ta je ûnyi hia adre hûgûnâ, hobi kö Iehova Khongom: k' ame he ka hna digic thatûnyi nyiele balua, k' adre me ca he hmetu ka op e. 17 Ke e so ame ca he ka kece ka hnyi hnyamâm ûnyi adre ohnaubangoâ: me me he Iehova ka degec úbâhlâiny hmönyin, k' ame he ka betenge gam, me hnyok köu, me osehio u, helâ me hnen hna kheimanyin ka lakâmâm; 18 u ka he ka löng hoton hofuc ho Iehova Khongom, he ka tuö anyin je hnanyibu, wale oge me hûna köu hnyi bong ang, he ka ânyâ ûnyi ae wisa hnyi hnyimakö Iehova Khongom.

HNYIMAKAN 14.

ÖBUN je laku Iehova Khongubun: ca he öbun ka kavi öbun bi, ke ca he öbun ka obadreûâ bademaköbun hnyi wanben li emaköbun adre ânyâ can komok. 2 Anyin a u hnyeî ae kap kö Iehova Khongom, ke haba Iehova ame ücö u hnân iny hnyeî ae ke bongon kâu, ûnyi hnyi je hnyeî hia thithö eang hmelen.

3 U me ca he ka han ke meno ae ikiki. 4 Walang je meno öbun e he ka han: a je kau, me mamoe, me got, 5 me aila, me zebi, me imura, me got ae hiny, me disona, me teo, me zamera. 6 Ke haba ta je meno

hia adre kia luâ újimen can, me kia luâ bacan, me hoc hmeto hna han, unyin omeno, me wale ö 'bun. 7 Ke so bi walang je meno öbun e ca he ka han únyi gadra, a je meno adre me hoc hmeto hna han, me kia luâ újimen can : a kamela, me anebeth, me shefani, anyin a ödrin e hoc hmeto hna han, ke adre ca kia luâ újimen can, ödrin bo kong köbun : 8 me buaka, anyin a e ame kia luâ can, k' ame ca hoc hmeto bi hna han, wale ae bo kong köbun : ca he öbun ka han utiöidra, me kälâ unyidra ae mok.

9 Walang ta je únyi öbun e he ka han únyi hnyi köiö ; haba ta je wâ hia ae hu bohúnyon me unöiny, me öbun e he ka han : 10 ke haba je únyi hia ae ba bohúnyon me unöiny, me öbun e ca he ka han ; wale ae bo kong köbun.

11 Öbun e he ka han omeno hia ame gâ ae bo so. 12 Ke walang je at öbun e ca he ka han, a aeto, me perese, me ozeni ; 13 me rae, me aia, me daa hoton bongudrin ; 14 me ta je oreba hoton bongudrin ; 15 me iaena, me taemasa, me sahafe, me dring hoton bongudrin ; 16 me mun, me ianesuf, me tinesemeth, 17 me kati, me raama, me salak ; 18 me kasida, me anafa hoton bongudrin, me dukifath, me bú. 19 Ke haba je únyi hia ame iyâú me gâ, me bo kong köbun : k' adre me ca he ka han. 20 Ke öbun e he ka han je meno ame gâ hia ae bo so.

21 Öbun e ca he ka han meno ame mok hwege : ke e khatö u he ka ham ka atkanyua hnyi hnyabam me me he ka han ; ke e khatö u minya ka úco e ka aten ke hnyei ; anyin a u hnyei ae kap kö Iehova Khongom. U me ca he ka ölä nokon got hnyi dân basin hinyen.

22 U me he ka ham ke keihen a libenyitainy troban hnyei hnyi ke huna me ke huna. 23 Ke u me he ka han ke keihen a libenyitainy ányâm hwit, me ányâm waina, me ányâm wakaco, me je nokon halem je kau a bán, me halem je mamoe, hnyi hnyimakö Iehova Khongom, hnyi dok e ame he ka úca me me laba hnyin ien ; m' u me he ka ná ka outö Iehova Khongom hnyi ta ogo bong hia. 24 Ke ame ne ti sákâú gethen, me ca kxanö u he ka hom tilâ ta je únyi e, can anyin ae sákâú dok ame he Iehova Khongom ka úca me me laba hnyin ien, e ka he Iehova Khongom ka ohnahici u ; 25 awe, u me he ka úco e hwaban mone, me lan mone hnyi hnyamâm,

me he ka hnyi dok ame he Iehova Khongom ka úca : 26 ke u me he ka úco ge mone eling ja únyi u me wem, ame ne kau, ame ne mamoe, ame ne waina, ame ne grág, k' ame ne ke únyi u me wem hobi köu : ke u me he ka han eling hnyi hnyimakö Iehova Khongom, me senyin, a u me ányâm lap : 27 ke u me ca he ka hna degecá at Levi a e unyâm : anyin ae ba hwajekhon me iny unyâm.

28 Ke haba hnyi obiny huna a kuniny me u me he ka hom ke keihen a libenyitainy troban em hnyei hnyi huna eling, me ip hnyi je hnyabam, 29 k' ame he ka hnyi han unyam at Levi, anyin ae ba hwajekhon me iny unyâm, me atkanyua, me nakahme, me safac, a tavat hnyi je hnyabam me me sekudrin ; me me he Iehova Khongom ka ohnahici u hnyi ta je huliwa anyin hnyamâm u me ányâ.

HNYIMAKAN 15.

KE haba hnyi obiny huna a seven, me u me he ka hna baúâ. 2 Ke walang hwakecin hnâm hna he ka hna : haba tavat adre hia but ham gufa ka ke at, ame ne liamekeiny, me adre me he ka hna baúâ ; anyin adre hia but hajmema hna hna baúâ hnö Iehova. 3 Ame ne aten ke hnyei, me khatö u he ka hom hmetu e : ke haba ányâm ta je únyi a e unyin liamekeiny möu, me ame he hnyamâm he ka hom hmetu e. 4 Ke so e ba at unyâm ae ba ta únyi ; (anyin ame he Iehova ka ti ohnahici u hnyi hnyei ame he Iehova Khongom ka ham köu huân em, m' u me tren e ;) 5 wale u je ne löng wia hofuc ho Iehova Khongom, me tuö me ányâ je hnanyibu eang wale oge me huna köu hnyi bong ang. 6 Anyin a Iehova Khongom ame he ka ohnahici u helâ me hnen hna ha köu ; ke u me he ka me ham ta je únyi ka ta je hnyei ae se hia, ke u me ca he ka me sumat ; ke u me he ka musö je hnyei ae se, k' adre me ca he bi ka musi u.

7 Ame ne hu ke at unyâm ae ba ta únyi, a liamekeiny möu, hnyi ke hnyaba hnyi em hnyei, wale a ham köu Iehova Khongom, me, u me ca he ka okhötâ hnyekom, me thu hnyamâm ka liamekeiny möu a at ae theducoc : 8 ke u me he ka lau hnyamâm kâu, me u me he ka me ham gâná kâu únyi ae úcü ka hnyi weny. 9 Wâ eâu, wâ e nye hu únyküme ae kong eú hnyi hnyekom, me ha, ka habe, E hakekeny jut

huna a seveniny, a hunainy hna baúá ; me ame kong emakám ka liamekeiny möu ae theduoc, me ca ham únyi bi káu ; ke e ame he ka tenge kö Iehova gam, m' u me hulö but. 10 E so u ma ham káu, k' ame ca he bi hnyekom ka hmak he ka ham káu : anyin a can únyi eling ame he Iehova Khongom ka ohnahici u hnyi anyám ta je huliwa hia, me ta je únyi hia u ma he ka ip hnyamám ka hnyin. 11 Anyin ame ca he ka ba at ae theduoc hnyi hnyei : anyin a wale inya oge me húna kôu, ka habe, U me he ka lau hnyamám ka liamekeiny möu, wale hnyat unyám ae theduoc, me hnyat ae ba ta únyi hnyi em hnyei.

12 Ke adre ne úco kôu ke at Heberu a liamekeiny möu, ame ne бага, ame ne momo, k' ame ne bi athnyabaem hnyi je huna a siks ; me hamám he ka hna baúá e úheny unyám hnyi huna a seveniny. 13 Ke u ka hna baúá e úheny unyám, me u me ca he ka kuná ke ba ta únyi ; 14 u me he ka ohuá e me ca beháná únyi hnyi halem je mamoe, ke únyi hnyi hna uja ányám hwit, me hna hlec ányám vine : ke u me he ka ham káu helá me Iehova Khongom ame ohnahici u. 15 Ke u me he ka únykúme a g' adre thaluö u hnyi hnyei Aigupito, ke Iehova Khongom ame omeli u ; anyin a wale, inya oge me húna kôu hofuc e hnyi bong ang. 16 Ke ame ne he ka ha kôu, ka habe, Oge me ca he ka he gam ; anyin a e ame hnyok kôu me ányám lap, anyin ae so e unyám ; 17 awe, u me he ka hom únyi hnán kou, me kou hnyikönyen ka hnyi hlinginy hwanuma, ke e ame he ka bi athnyabaem nyiele balua. Ke u me he ka ányá heláe minya ka athnyabaem a momo. 18 Ke u ka hna baúá ke at úheny unyám e so e ca he ka hmak hnyekom ; anyin a haba anyin huliwa me úcü me huliwa anyin lo li at adre hawá, hnyi je huna a siks e ame bi athnyabaem : k' ame he Iehova Khongom ka ohnahici u hnyi ta je únyi hia u me he ka ányá.

19 Haba je lakon a bán ka hnoká ge halem je kau, me mamoe, a je бага hia, me u me he ka okabá kö Iehova Khongom : u me ca he ka kuná nokon halem kau a bán he ka huliwa, me subá leúnen nokon halem mamoe a bán. 20 Ke u me he me ányám lap he ka han e hnyi hnyimakö Iehova Khongom, hnyi je huna hia thibut, hnyi dok ame he Iehova ka úca. 21 Ke ame ne hu hnyikongon, ame ne kong can, ame ne wadrú, ame ne ke hnyikongon ae

kong, me u me ca he ka hudo e kö Iehova Khongom. 22 U me he ka han e hnyi je hnyabam ; k' ame he ka hnyi han tavat ae bo kong me bo so, helá me hnödra hna han zebi me aila. 23 Ke so bi u me ca he ka han dren : ke u me he ka húngalá e hon káná helá me köiö.

HNYIMAKAN 16.

HAMÂM he ka tuö tehi Abiba, me ányá paseka kö Iehova Khongom : anyin a haba hnyi tehi Abiba Iehova Khongom ame hum u úheny Aigupito hnyi hnyinghet. 2 Ke u me he ka hudo paseka kö Iehova Khongom, únyi hnyi je mamoe, me kau, hnyi dok ame he Iehova ka úca hnán umen ien bi. 3 U me ca he ka tha han e me leven, u me he ka han e me areto adre ca levená hnyi je bong a seven, a aretoiny vec eling ; anyin a u je he mweimwei úhem hnyi hnyei Aigupito : m' u me he ka únykúme hnyi bongom ta je bong hia, ge bong u me he úhem hnyi hnyei Aigupito. 4 Ke adre me ca he ka wá leven unyám hnyi seven ta bong hnyi em hnyei ; k' adre me ca he ka ip ke ne o but hnyi hnyomakatu ke keihen utmENO u je hudo hnyi bong a bán hnyi sahac. 5 U me ca he ka hudo paseka hnyi je hnyabam a ham kôu Iehova Khongom : 6 ke so bi hnyi dok ame he Iehova Khongom ka úca hnán umen ien bi, ke u me he ka hudo eling paseka hnyi sahac e ka dit seúno, ciöú ün u je he úheny Aigupito. 7 Ke u me he ka thán e me han hnyi dok ame he Iehova Khongom ka úca : ke u me he ka hwiö hnyi hnyomakatu me he ka hnyi umám je uma mano. 8 Siks je bong u me he ka han areto adre ca levená : ke haba hnyi bong a seveniny ame he ka hu úkbacaköu ae únyi hnathu kö Iehova Khongom ; k' u me ca he ka huliwa.

9 U me he ka áú je wik a seven ; ke u me he ka hwán ka áú je wik hnyi hna ibi hwán subá hwit ame tot. 10 Ke u me he ka tuö bijeúiny je wik kö Iehova Khongom me bwihlany a hudiny ibetengiö únyi hnyi hnyamám, ke u me he ka ham e hoton hnö Iehova Khongom hna ohnahici u : 11 ke u me he ka senyin hnyi hnyimakö Iehova Khongom, u, me nokom бага, me hlu, me athnyabaem a бага, me momo, me at Levi hnyi je hnyabam, me atkanyua, me naka-hme, me safac unyám, hnyi dok ame he Iehova ka úca hnán umen ien. 12 Ke u

me he ka únykúme hna thaluö u hnyi Aigupito: ke u me he ka wâ wia me ányâ je hnanyibu e.

13 Ke u me he ka ányâ bijeúiny je uma hunuma, hnyi je bong a seven, hwaban hnâm hna ip únyi hnyi uma hnân uja ányâm hwit, me únyi hnyi hna hlec ányâm vine: 14 ke u me he ka senyiná ányâm bijeú, u, me nokom baga, me hlu, me athnyabaem baga, me momo, me at Levi, me atkanyua, me nakahme, me safac hnyi ta je hnyabam. 15 Seven je bong u me he ka ányâ bijeú kö Iehova Khongom hnyi dok ame he Iehova ka úca: anyin ame he Iehova Khongom ka ohnahici u hnyi troban em hnyeí hia, me ta je huliwa hia anyin li hnyamâm, ke u me he ka ti senyin. 16 Ke ame he obaga hia ka okun o hnyi hnyimakö Iehova Khongom hnyi hunu hnyi dok e ame he ka úca: hnyi bijeúiny areto adre ca levenâ, me bijeúiny je wik, me bijeúiny je uma hunuma: ke adre me ca he ka manen hnyi hnyimakö Iehova ke ba ta únyi: 17 adre me he ka ve ham hoton hnödra hna khana, ke hoton hnahic únyi ga Iehova Khongom wale e ame ham köu.

18 Ke u me he ka otílâ hnyat owisa, me je taben hnyi em hnyeí hia a ham köu hnö Iehova, hnyi ányâm je tribu: ke ödrin e he ka owisa tavat ge hna owisa ae wisa. 19 U me ca he ka ohwalö hna owisa; ke u me ca he ka wâhmakhmetoâ at bi: ke u me ca he ka kap bwihlany; anyin a haba bwihlany, me wale at ame omúko tavat ae metâ, me ohavâ hofuc hwan tavat ae wisa. 20 U me he ka hnu hoton hwakecin ae ti wisa, m' u me möt bi me hu hnyeí wale a ham köu Iehova Khongom.

21 U me ca he ka ta ke úö hnân bi Aseira hobi köu, hakekenyâ taben hut anyi Iehova Khongom wale u me he ka ányâ hobi köu bi. 22 Ke u me ca he ka otílâ hobi köu ke veto ame tot; wale únyi ame hûkötia Iehova Khongom.

HNYIMAKAN 17.

U ME ca he ka hudo kö Iehova Khongom ke bolok me mamoe ae hu hnyikongon, k' ame ne ca so: anyin a wale hûkötianö Iehova Khongom.

2 Adre me ne wâ unyâm, hnyi je hnyabam a ham köu Iehova Khongom, ke at, ame ne baga, ame ne momo, ame ányâ hulö hnyi hnyimakö Iehova Khongom, k' ame

hanyâúâ anyin úhilihinyköu, 3 k' ame he me bi athnyabainy ke je khong me khudrung ködrin, ame ne seúnö, ame ne tehi, ame ne ke únyi hnyi drany, wale oge ca húna; 4 ke adre thumetu u, ke u je löng ut e, me hamâm he ka elâm wia, ke, wâ bi, ame ne hnathu, ke manen dut a g' adre ányâ hnyi Isaraela únyi eling ae ikiki: 5 awe, u me he ka hom at eling ka hnyi homagöulem, ame ne baga, ame ne momo, at ame ányâ únyi eling ae kong; ke u me he ka lu' ödrin ge veto, ame ne baga ame ne momo, me me mokcu. 6 Adre me he ka hlingâ at ae úcú ka hnyi mok, ge ifucin hnyat ohnatho a lo li at, ame ne kun; k' adre me ca he ka hlingâ ge ifucin at ohnatho a khaca. 7 Ke ame he ka bán je hnyamen hnyat ohnatho hon he ka hlingâ, ke biliny bi je hnyamen tavat hia. Me waleling u me he ka ohia ta je únyi ae kong unyâm.

8 Ame ne hmak köu ke únyi he ka owisa, hnyi ke dra me ke dra, ame ne ke úhnei me ke úhnei, ame ne ke ukuc me ke ukuc, a ta je únyi hnân iwatretra hnyi je homagöulem: awe, u me he ka tot me he ka hnyi dok ame he Iehova Khongom ka úca; 9 ke u me he ka he ka hnyat bihut a at Levi, me at owisa hnyi úen e: ke u me he ka hnei; me ödrin e he ka thumetu u ge obiny hna owisa: 10 ke u ma he ka ányâ hoton hofuc ödrin e he ka thumetu u hnyi dok eling ame he Iehova ka úca; ke u me he ka wâ wia me ányâ hoton ta je hofuc ödrin e he ka nö u hnyin; 11 u me he ka ányâ hoton hna ha hnen hnanyibu ödrin e nö u, me hoton hna owisa ödrin e he ka ha köu: ke u me ca he ka saú ge hofuc ödrin e he ka thumetu u, ka hnyi ke keihen a metâ, me me. 12 Ke haba at ame he ka sheshamökâ, k' ame ca löng hoton at bihut a at ame labö huliwa eling hnyi hnyimakö Iehova Khongom, ame ne at owisa, me ame he ka mok at eling: me u me he ka ohia hulö unyi Isaraela. 13 Ke ame he tavat hia ka löng me ot, k' adre me ca he hmetu ka ányâ sheshamök.

14 U ka o ka hnyi hnyeí a ham Iehova Khongom köu, k' ame he ka hu gam, me labâ; ke u me he ka ha, ka habe, Oge me he ka otílâ than huk, helâ me je knyeyi igigili nya; 15 awe, u me he ka otílâ than a at ame he Iehova Khongom ka úca: ke u me he ka otílâ ányâm than únyi hnyi je liamekeiny möu: k' u me ca he ka otílâ atkanyua hom, a ca liamekeiny möu. 16

Ke so bi e ca so e ame osehia je hors hobi kâu, me ohmeto tavat Aigupito ai, me me he ka osehia haleny je hors: anyin a hia but ha Iehova köbun, ka habe, Öbun e ca he ka hmetu hnyi gethen eling. 17 Ke e ame ca he ka osehia je laâiân, wâ e nye saû hnyekon: ke ca so e ame úkhöünâ sileva me gol hnân hobi kâu bi. 18 Ke ka laba hon theroniny dokhon dökhü, me e ame he ka uny je hnanyibu eang hobi kâu, ka hnyi ke tusi hnyi hnyimakan tavat bihut a at Levi: 19 k'ame he ka e bi unyin, me e ame he ka aú e hnyi je bong bongon anyin möt hia: me me ná he ka outö Iehova Khongon, he ka vheno ta je hofucin hia hnanyibu eang, me je hna húna eang, me ányâ: 20 me me ca he ka bi gan hnyekon hon je liamekeiny mē, me saû únyi hnyi hnanyibu ha hnyi ke keihen metâ, me me: waleling me me he ka obeutâ je bongon hnyi dokhon dökhü, e me je lakon, hnyi Isaraela.

HNYIMAKAN 18.

AME ca he tavat bihut a at Levi unyi Isaraela, a tribu Levi hia ka hu jekhon me hnyei: ke ödrin e he ka han je hut a an ge meic kö Iehova, a jekhon. 2 Ke ödrin e ca he ka hu hwajeköudrin unyin je liamekeiny mödrin: haba Iehova hwajeköudrin, helâ me hnen hna ha ködrin. 3 Ke walang jekhon tavat bihut únyi hnyi hnyei, a únyi ge tavat adre me hudo je hut, ame ne bolok, ame ne mamoe, me adre me he ka ham ka at bihut bajebenyin me li wahicen, me tangen han. 4 U me he ka ham kâu ge ányâm hwit a bán, me ányâm waina, me ányâm wakaco, me ányâm leúnen mamoe adre subâ a bán. 5 Anyin a Iehova Khongom ame hia but úcü e únyi hnyi ányâm je tribu hia, he ka labö huliwa hnyi iö Iehova, a e, me lakon je бага nyiele balua.

6 Ke ame ne o ke at Levi únyi hnyi je homagöülem hnyi Isaraela hia, a dok e ame me laba hnyin, k'ame o me weny hnyekon ae bekhöt ka hnyi dok ame he Iehova ka úca; 7 awe, e ame he ka huliwa hnyi iö Iehova Khongon helâ me je liamekeiny mē a at Levi, tavat ödrin e tot eling hnyi hnyimakö Iehova. 8 K' ödrin e he ka hu jekhon ae úcü unyin keihen, ke ca ha bi hna úco hobi ködrin je únyi hnyi iny lakamen.

9 U ka o but ka hnyi hnyei ame ham köu Iehova Khongom, me u me ca he ka

nâ he ka ányâ hoton hwakecin ae ikiki anyin tavat eling. 10 E so adre me ca he ka wâ unyâm ke at ame kunâ nokon бага me nokon hlu he ka he hnyi wanben meic, me at bi khong, me at ame bibihwakecin, me at ae tren khong, 11 me at ame úhne-namö me je hanu, me at ame biobotkong, me perofeta thoi, me at ame úhnenamö me hanon je komok. 12 Anyin a Iehova ame ikikiâ tavat adre me ányâ ta je únyi e: ke haba can ta je únyi eling ae ikiki, me Iehova Khongom ame ob' ödra hnyi hnyimákâm. 13 U me he ka ti wisa kö Iehova Khongom. 14 Anyin a haba je hnyei eling u me he ka hu, me, adre me löng hoton tavat bibihwakecin, me tavat bi khong: ke haba u, me Iehova Khongom ame ca hnö u he ka helâe. 15 Ke ame he Iehova Khongom ka oâ köu perofeta ae úcü mönya úheny unyâm a únyi ge je liamekeiny möu; m' öbun e he ka löng kâu; 16 a helâ me wem hia únyi ga Iehova Khongom hnyi Horeba, waleji hnyi bong adre úkhaçaköu hnyin, ka habe, Ö iny ca he hmetu ka löng ifuci Iehova Khonguk, me wâ hmetu meic ae gan eling, m' inye ca he ka mokcu. 17 Ke haba Iehova ame ha könya, ka habe, E so huödrin hna ha. 18 Me oge me he ka oâ hobi ködra ke perofeta únyi ge je liamekeiny mödra; me oge me he ka ip hok je hofuc hnyi hnyimen, me e ame he ka ha ködra ta je únyi hia oge me he ka ha kâu. 19 Ke haba at ame ca he bi ka löng hok je kofuc wale e ame he ka ha hnyi iök, me oge me he ka hnö e gan. 20 Ke haba perofeta ame he ka ha sheshamökâ ke hofuc hnyi iök, waleji oge me ca húna kâu he ka ha; k' ame ne fuc hnyi ien ke je khong, awe, ame he ka mok perofeta eling. 21 Ke u je ne he ka ha eu hnyi hnyekom, ka habe, Öhmun e he ka kâmâu hna wâhmakhmeto hofuc a ca ha Iehova? 22 Haba, e ka he perofeta ka ha hofuc hnyi iö Iehova, k' ame ca o bi únyi, k' ame ca hwâdâ bi, awe, wale hofuc ame ca ha Iehova: ke ame hia but ha e shesha-mökâ hnen perofeta, m' u me ca he ka outen at e.

HNYIMAKAN 19.

EKA he Iehova Khongom ka subâ degecâ je hnyei wale a ham köu idra Iehova Khongom, ke u je hwöhwabödra, me labâ anyidra je taun me umödra je uma; 2 me u me he ka kia hobi köu bi kun ta

taun hnyi wanben em hnyei wale Iehova Khongom ame he ka ham kôu me me em. 3 Ke u me he ka thu gethen, me khenâ je hnyigöulen em hnyei, a ohuâ kôu Iehova Khongom, me me kun, me hnân kec ka hnyin ge tavat hia adre me hlingâ at. 4 Ke walang hwakecin at ame hlingâ at, a at ame he ka kec kâ e me me möt: haba at ame hlingâ ke at, ke ca únykúme he ka ányâ, k' ame ca húkötíâ ehac; 5 helâke at ame tha he me ke at ka hnyi hnyot he ka si utö, k' ame hna gö ge hnyamen he ka sö utö, ke ame ok ut ban gö únyi hnyi taben me hwádâ ge ke at, me ame mokcu; awe, e ame he ka kec ka hnyi ke taun eling me me möt bi: 6 wâ e nye hnu at ame hlingâ at ge at ame bi hwaban komok, e ka tiga hmönyin hnyekon, me kât e, anyin ae sâkâú gethen, me ame kot moko e; ke ca úcú kâu he ka mok, anyin a e ame ca húkötíâ ehac. 7 Anyin a wale oge me húna kôu, ka habe, U ma he ka ke ip kun ta taun hobi kôu bi. 8 Ke ame ne he Iehova Khongom ka olauâ em hnyei, helâji me hnen hna khemanyin ka lakâmâm, me ham kôu hnyei hia waleji e ame ha bánâ he ka ham ka lakâmâm; 9 ke u je ne tuö je hna húna hia eang he ka ányâ, wale oge me húna kôu hnyi bong ang, he ka hnyok kö Iehova Khongom, me vheno bala deny je gethen; me u me he ka bi hanen ke je taun a kun minya hnân hobi kôu, ke ca ha bi kun eling: 10 m' adre me ca he ka hingâlâ dra ae ba hulöiny hnyi em hnyei a ham kôu Iehova Khongom me me em, me ame taku u ge dra. 11 Ke ame ne ke at ame húkötíâ ke at, k' ame mokut iyawâ, k' ame kôúö thö kâu, me kot e me me mokcu; ke e ame kec ka hnyi ke taun eling: 12 awe, ame he wahingatiny anyin taun ka úkhúnöng he ka hom e úheny e, me hna e ka at ame bi hwaban komok, me me mokcu. 13 Ca he emakâm ka betenge gan, ke u me he ka ohia dra ae ba hulöiny únyi hnyi Isaraela, m' u me so bi.

14 U me ca he ka uny haten hnyigöulen ke at, waleji adre ip kâú ehac, hnyi em hnyei u me he ka labâ, wale hnyei a ham kôu Iehova Khongom, me em.

15 Ame ca he bi at a khaca ka tot me ohnathö ge at hnyi anyin monu, ame ne ke hulö, hnyi ke hulö e ame ányâ; ke adre me he he ka ohmâ ke únyi ge ifucin li at ohnatho, ame ne kun. 16 Ame ne tot ke at ohnatho ae ca wisa ka ke at he ka hai-kongoá; 17 me hamödrü a li at ivinö lie

ka tha tot hnyi hnyimakö Iehova, hnyi hnyimakan hnyat bihut, me hnyat owisa hnyi úen eling; 18 ke hamen hnyat owisa he ka úhnö wia; ke wâ bi, ame ne at thoi at ohnatho, k' ame hia but hathoiâ liame-keiny mē; 19 awe, hamöbun he ka ányâ kâu helâ me hnen hna únykúme he ka ányâ ka liamekeiny mē: helâe u me he ka ohia hulö unyâm. 20 Me me löng me ot ge kolon tavat, me ca ányâ hmetu balua únyi helâe ae kong unyâm. 21 Ca he emakâm ka betenge; ke haba möt me hwaban möt, ke ecmak hwaban ecmak, ke nyu hwaban nyu, ke hnyam hwaban hnyam, ke can hwaban can.

HNYIMAKAN 20.

U KA he ka vat me je iwahnaihmiöny möu, me wâ je hors, me je kariota, me tavat ae se hia hom, me u me ca he ka out' ödra: anyin a e unyâm Iehova Khongom, a at ame hum u úheny hnyi hnyei Aigupito. 2 Ke öbun ka he ka úhakekenyi he ka vat, me hamen at bihut he ka tot me fuc ka tavat, 3 me ha ködra, ka habe, Isaraela lö, long ju, öbun e he ka vat hnyi bong ang me je iwahnaihmiöny möbun; ca hlohlo bi je hnyekubun; ca ot me öbubuny, ke ca he öbun ka ot gadra; 4 anyin a Iehova Khongubun ame tha he möbun he ka omeli öbun. 5 Ke hamen je taben he ka ha ka tavat, ka habe, Ewa at up uma a teb únyi ke tiga ca hia but delec? e so ame he at eling ka hmetuhmetu ka hnyi umen uma, wâ e nye mokcu hnen vat, me delec biju hnen ke at. 6 Ke ewa at ame belökâ hnyei vine ke tiga ca hia but ijem wan únyi hnyin? e so e ame he me hmetu ka hnyi umen uma, wâ e nye mokcu hnen vat, me ijem biju hnen ke at. 7 Ke ewa at ame úkocö me hlu, ke tiga ca hia but hom? e so e ame he me hmetu ka hnyi umen uma, wâ e nye mokcu hnen vat, ke hom biju hnen ke at. 8 Ke hamen je taben he ka ha hmetu ka tavat, me ha, ka habe, Ewa at ame ot me hlohlo hnyekon? e so e ame he me hmetu ka hnyi umen uma, wâ e nye oköü hnyekon je liamekeiny mē helâ me hnyekon. 9 Ke ka hia but fuc je taben ka tavat, me ödrin e he ka otilâ je tuhan vat, me me homakan tavat.

10 Ke u ka hakekenyâ ke taun he ka vat, me u ma bâm ka ha úsoköu mödra. 11 Ke adre me ne thu úsoköu hmetu kôu, me khöng kôu, me hamen tavat hia adre wâ eú hnyin he ka bi fat kôu, me bi athnya-

baem. 12 Ke ödrin e ne ca úsoköu, ke ödrin e bevat bi möu, me u me he ka igigilö taun ge vat : 13 ke e ka hna e köu Iehova Khongom ; me u me he ka kot ta je бага hia ge hele vat : 14 ke haba omomo, me tavat ae úhnyúkong, me omeno, me ta je únyi hia hnyin taun, a ta je únyi hia hnân hügünâ, me u me he ka hom hnân hobi köu ; ke u me he ka han ta je únyi anyin je iwahnaihmiöny möu a ham köu Iehova Khongom. 15 Ú me he ka ányâ helâe ka ta je taun hia ae úsákátü möu, ke ca tavat adre me labâ hnyei eang. 16 Ke haba aten je taun ang a ham köu Iehova Khongom hnân em, me u me ca he ka omelö ke únyi ae hu homenáiny : 17 ke u me he ka ti ohí' ödra ; wale at Heth, me Amora, me Kanana, me Perizi, me Hivi, me Jebusi ; helâ me Iehova Khongom ame húna köu : 18 m' adre me ca he ka n' öbun he ka ányâ hoton hwakecidra ae ikiki, wale adre me ányâ ka anyidra je khöng ; m' öbun e kong kö Iehova Khongubun.

19 U je ne he ka igigilö ke taun hnyi je bong ae se hia he ka vat mē, me hom e, me u me ca he ka ohia je úöiny, me sö degecâ ge gö ; anyin a u me he ka an wan, ke u me ca he ka sö ; hawa, úöiny hnyei helâ me at, m' u me ka igigilö e ge vat ? 20 Ke so bi, бага je úö u me wâhmakhmeto a ca je úö hnan han, me u me he ka ohia me sö ; ke u me he ka otílâ hak cicö taun ame vat möu, ke ne o but ame ngâ but.

HNYIMAKAN 21.

ADRE me ne wâ komok hnyi hnyei ame ham köu Iehova Khongom me me em, k' ame mokut hnyi utkânâ ke ca manen bi at a hlingâ : 2 me ame he wahingátâm me hnyat owisa unyâm, ke ödrin e he ka tuluto únyi hnyi hnen komok ka hnyi je taun igigilö : 3 ke бага taun ae hakekeny ka hnen komok, me hamen wahingátiny taun eling ka hom ke kau a ca huliwa ehac, ke tiga ca hlihli únyi ge únyi hnân úhúkálâköuâ ; 4 ke hamen wahingátiny taun eling ka hom kau ka hnyi hnyigöulen bucen ame hingölö hnyin köö, k' adre ca tronenâ me belökâ, me ödrin e he ka thu nyin kau hnyi dok e : 5 ke ame he ka úhakekenyi ge tavat bihut a laku Levi ; anyin a hia but Iehova Khongom uc' ödrin he ka huliwa kâu, me he ka hahnahicâ hnyi iö Iehova ; ke adre me he ka owisa hoton hnödrin hna ha hnyi je ivinö hia me

je úkúc hia : 6 k' ame he wahingátiny taun eling hia a ödrin hakekenyâ komok he ka hinyem hnyi hon kau adre thu nyin hnyi hnyigöulen bucen : 7 ke ödrin e he ka ha, ka habe, A ca hingâlâ dra e ge je hnyamöhmun, ke бага khaca a ca wâ bi ge li emaköhmun. 8 Iehova lö, thang monu anyin em hnyei Isaraela waleji u je omelö, ke u me ca he ka ip dra ae ba hulöiny he ka laba hnyi em hnyei a at Isaraela. Me adre me he ka hn' ödrin dut ge dra. 9 Ke u me he ka ohia unyâm dra ae ba hulöiny, u ka ányâ únyi ae wisa hnyi hnyimakö Iehova.

10 U ka he ka vat me je iwahnaihmiöny möu, ke Iehova Khongom ame ham ödra ka hnyi hnyamâm, ke ödrin e bâ but gam, 11 ke u je wâ momo ae so hmáiny unyin je bâ, ke u je bewem, k' u je behom e me me áiam ; 12 awe, u me he ka hom e ke hnyi umâm uma ; ke e ame he ka giâ ban, me suba je újimen banyen ; 13 ke e ame he ka uny jut je úkhaúiny bá, me laba hnyi umâm uma me tenge ge kamen me hinyen hnyi khaca tehi ae bekhöt : ke hwaban dö e me u me he ka tha laba me, m' öbu me liamáian. 14 Ke u je ne ca wem momo, me u me he ka hna but e ka hnyi weny bi ; ke u me ca he ka úco e hwaban mone, u me ca he ka thaluâ, anyin a u je hia but okongoâ.

15 Ame ne lo li momo a li áian бага khaca, ke e ame betenge ge khaca, ke húkotiâ khaca, ke ödru me hia but hnokoâ kâu, a momo e ame betenge gan me momo e ame wâ kongo ; ke бага atö, me wale nokon momo adre wâ kongo ; 16 ke бага hnyi bong e ame he ka khenyâ omjehen ka lakon бага, me e ame ca he ka hwiö me me atö nokon wale, at e ame betenge gan hon nokon wale e ame wâ kongo, a atö, 17 ke e ame he ka oúnyihnathoâ atö, a nokon momo e ame húkotiâ, ge li jekhóu e ame he ka ham, únyi hnyi anyin ta je únyi hia ; anyin a nokon hidróu a e ; ke e bi gan hanyen atö.

18 Ame ne ke at ae hu nokon бага ae újông me úkhin fuc, k' ame höcö löng hwan kamen me hinyen, ke ne ödre hia but kot e, ke e ame ca ling ödru bala bi : 19 me ame he ka kât e ge kamen me hinyen me hom e ka wahingátiny anyin taun, hnyi homagöuleny dok e ame labâ ; 20 me ödru me he ka ha ka wahingátiny anyin taun, ka habe, Walang hnökummu at ame újông me úkhin hofuc, k' ame ca löng hohmu ; e

at ae hwenhmiâ me monu ge grâg. 21 Ke ame he tavat hia hnyi anyin taun ka luâ e ge veto me me mokcu : helâe u me he ka ohia hulö unyâm ; k' ame he at Isaraela hia ka löng me ot.

22 Ke ame ne he ke at ka ânyâ hulö ae úcú he ka mok gan, ke adre me hlingâ, me u me he ka uhno e hon úö : 23 k' ame ca he ka hnen unyin hon úö hnyi hnyinghet, ke u me he ka konâm e hnyi bong eling ; anyin a hnaúhangö ka Khong at adre uhno ; me u me ca he ka okongoâ kânâm kânâ hnö Iehova Khongom hna ham köu me em.

HNYIMAKAN 22.

U KA wâ bolok haleny liamekeiny möu ame ne haleny mamoe ame he monu, me u me ca he ka kec hota : ke u me he ka ohmetuhmeto ka liamekeiny möu. 2 Ke ame ne ca úhakekenyi möu liamekeiny möu, ke ca khañö u e, me u me he ka hom e ka hnyi umâm uma, me me tha e möu ke ne o but liamekeiny möu ame elâm, me u me he ka hna hmetu kâu. 3 Ke u me he ka ânyâ helâe ka haleny asina ; me u me he ka ânyâ helâe ka anyin úkhañ ; me u me he ka ânyâ helâe ka ta je únyi hia a hia anyin liamekeiny möu, wale ame hia gan, ke u je hlo, u me ca he ka laba duöng.

4 U me ca he ka wâ asina haleny liamekeiny möu, ame ne bolok ame ta eü hnyi gethen, me u me oiyongi u bi gadrin : ke u me he ka hadruâ he ka otílâ hmetu.

5 Ame ca he momo ka khavâ khaüen бага, k' ame ca he бага ka khavâ khaüen momo ; anyin a húkötianö Iehova Khongom ödra hia adre me ânyâ helâe.

6 Ame ne e bi hnyi hnyimákâm eü hnyi gethen ke háüen meno ame gâ, hnyi úö, ame ne hon kânâ, ae hu lakon a tho, k' ame ne ca tho bi, ke ame mokulec lakon ge hinyen, me u me ca he ka tha hom lakon me hinyen : 7 ke u me he ka hna but hinyen, ke e khatö u he ka hom lakon nobi köu bi ; me u me so, me se hia bongom je bong.

8 U je ne up uma a teb únyi, me u me he ka bi haginy ethö hnyi ban umâm uma igigilö, wâ e nye takou umâm uma ge dra, ame ne kölu at úheny thö. 9 U me ca he ka ta hatong a lo li bongon hnyi em hneyi vine : wâ e nye hia but wan hia, wale je hatong u je ta, me wan em hneyi vine.

10 U me ca he ka wia kânâ ge bolok a tha e me asina. 11 U me ca he ka khavâ mano adre hwâwâ únyi hnyi li únyi a lo, wale leünen mamoe me lino.

12 U me he ka bi bâbuen hnyi je baten úkhañam a vak, wale u je khañö u kâu.

13 Ame ne hom momo hnen ke at me áiân, ke e ame tha laba mē, me húkötia.

14 me haikongoâ e ge ta je únyi hnân ohmehma, me oâ kâu ien ae kong, me ha, ka habe, Oge hom momo eang, ke iny ka úhakekenyi mē, me oge me ca wâ haten hlu ; 15 awe, ame he kamen me hinyen hlu ka hom haten anyin hlu, me hom ka wahingatiny taun hnyi homagöule : 16 ke ame he kamen hlu ka ha ka wahingat, ka habe, Oge ham nökkuk ka at ang me áiân,

ke e ame húkötia ; 17 ke wâ bi e ame hia but hathoiâ e ge ta je únyi hnân ohmehma, k' ame ha, ka habe, Oge ca wâ ju haten hlu ge nokom ; ke walang haten hlu anyin nökkuk. Ke ödrü me he ka ulolo úkhañ hnyi hnyimakan wahingatiny taun.

18 Ke hamen wahingatiny taun eling ka hom at e me kot. 19 Ke ödrin e he minya ka ha hwaban kâu a khaca haded ta je sileva, me ham ka kamen hlu, can e ame oâ ien ae kong hon hlu Isaraela : ke ame he bala ka áiân ; ke e ame ca he bala ka degec.

20 Ke so bi ame ne hnathu hofuc eling, k' adre ca wâ haten anyin hlu ; 21 me ödrin e he ka hom hlu kâ ú ka hnyi hwanumen uma umen kamen, ke ame he aten anyin taun ka luâ e ge veto, me me mokcu :

anyin a e ame ânyâ monu hnyi Isaraela, k' ame bi únyi monu hnyi hnyaban kamen : ke helâe u me he ka ohia hulö unyâm.

22 Adre me ne wâ ke at ame tha mokut me momo a áiân ke бага, me ödrü me he ka mok, wale бага at ame tha mokut me momo, ke momo minya : helâe u me he ka ohia hulö unyi Isaraela.

23 A ne hu ke hlu bañ a at úkocö me бага ; ke a wâ ge ke бага bi hnyi taun, k' ame tha mokut mē ; 24 awe, öbun e he ka hum ödrü ka hnyi homagöuleny taun eling, me öbun e he ka lu' ödrü ge veto m' ödrü me mokcu : haba hlu, me can e ame ca kuku ke e hnyi taun ; ke haba бага, me can e ame okongo momo anyin ke at : helâe u me he ka ohia hulö únyi gam.

25 Ke ame ne ke бага ame wâ hnyi ta hneyi hlu ae hmehmela ke бага, k' ame kât e me tha mokut mē ; me ame he ka hake mok бага at a tha mokut mē : 26 ke u me ca he ka ânyâ ke únyi ka hlu ; ke ba

monu anyin hlu me me moko : anyin a haba únyi eang me helá me at ame todrö ka at ae hakekeny káu me hlingá ; 27 anyin a e ame wá e hnyi hnyei ; k' ame kuku hnen hlu a hmehmela ke at, ke ba at he ka hadruá.

28 Ame ne ke baga ame wá hlu baú a at ame ca hmehmela ke at, k' ame kát e, ke tha mokut mē, ke. adre ö 'dru ; 29 me hamen baga at ame tha mokut mē ka ham ka kamen hlu je sileva a fite, me ame he ka áián bi anyin a e ame okongoá ; e ame ca he ka degec e hnyi bongon ta je bong hia.

30 Ame ca he ke at ka hom áián kamen, ke e ame ca he ka hai huamejin kamen.

HNYIMAKAN 23.

A ME ca he ka hnyi hanen úkhaçaköu anyi Iehova at ae aat wakunyin, k' adre subá degecá anyin baga.

2 Ame ca he nokon gethen ka hnyi hanen úkhaçaköu anyi Iehova ; ke ame ca he bala ka hnyi hanen úkhaçaköu anyi Iehova ke ne o but hnyi dö a libenyitainy : 4 anyin a ödra me ca úkha-nöá möbun jeú me köiö eú hnyi gethen waleji hnyi úhebun úheny Aigupito ; ke can adre me bi omjeú kö Balaama nöku Beora úheny Pethora hnyi Mesopotamia, he ka hangö u. 5 Ke so bi haba Iehova Khongom ame ca ling Balaama, ke Iehova Khongom ame wia hnaúhangö eling me me hnahic bi, anyin a Iehova Khongom ame hnyok köu. 6 U me ca he ka hadruá anyidra úsoköu me anyidra hnahic hnyi bongom ta je bong hia nyiele balua.

7 U me ca he ka húkotiá at Edoma, anyin a e liamekeiny möu : u me ca he ka húkotiá at Aigupito anyin a u je laba ka-nyua hnyi iny hnyei. 8 Haba ta je mátrá-nidra, me adre me he ka hnyi hanen úkha-çaköu anyi Iehova hnyi dö a kuniny.

9 U ka he hnyi vat he ka vat me je iwahnaihmiöny möu, me u me he ka naúá ta je únyi hia ae kong. 10 A ne hu ke at unyám ame ca bo so can únyi a o káu hnyi hnyinghet, me hamen he ka he ka hnyi hoton hna hunuma, k' ame ca he ka hmetu ka hnyi hna hunuma : 11 ke haba hnyi sahac, me e ame he ka sóu hnyi köiö : ke ka

didrut seúnö, me e ame he ka hmetu ka hnyi hna hunuma. 12 U me he ka hu dok hnyi hoton hna hunuma hnán he ka he ka hnyin : 13 ke u me he ka hom ke utsoi a hanen je omjehem vat ; ke u ka he hnyot ai e hele, me u me he ka hiny káu, me hwiö he ka konám hna he únyi gam : 14 anyin a Iehova Khongom ame he hnyi wanben hnám hna hunuma, he ka omeli u, me hna je iwahnaihmiöny möu hnyi hnyimákám ; anyin a wale ame he ka kap bi hnám hna hunuma : me me ca he ka wá unyám ke únyi ae kong, me me hna degeci u.

15 U me ca he ka hna athnyaba ka tuhan, a at ame kec köu únyi ge tuhan : 16 ke e ame he ka tha laba möu, wale unyám, hnyi dok e ame he ka úca hnyi anyám je tauu, hoton weny bi : ke u me ca he ka okongoá.

17 Ame ca he ka hu momo hnyi gethen a at Isaraela, k' ame ca he ka hu at hwen Sodoma unyin obagainy Isaraela. 18 U me ca he ka hom ka hnyi uma umö Iehova hwaban momo hnyi gethen, ke hwaban kuli hnán bi khöbi : anyin a wale li únyi a ikikiá Iehova Khongom.

19 U me ca he ka me ham ke únyi ge hwaban ka liamekekeiny möu ; wale ge hwaban mone, me hwaban jeú, me hwaban ke únyi adre labö ham ge hwaban : 20 ke e khatö u he ka me ham únyi ge hwaban ka atkanyua ; ke u me ca he ka me ham únyi ge hwaban ka liamekekeiny möu : me me he Iehova Khongom ka ohnahici u hnyi ta je únyi hia u me he ka ip li hnyamám káu, hnyi hnyei u me he ka hnyin he ka labá.

21 U ka bi khöbi kö Iehova Khongom, me u me ca he ka bec he ka thamúa : anyin ame he Iehova Khongom ka hnö e gam ; me wale hulö köu. 22 Ke u je ne ca bi khöbi, me ba monu gam. 23 Haba hofuc ame he úheny hnyi li esongodám, me u me wá wia he ka ányá ; hoton hnám hna bi khöbi kö Iehova Khongom he ka hudo hut ibetengió, a únyi u je ha báná ge hnyimám.

24 U je ne o hnyi hnyei vine iny at ame laba hakekenyi u, me e khatö u he ka ijem je wan vine me me sekom, ke u me ca he ka hitangen hnyi tángám tang.

25 U je ne o hnyi je hwit anyin at ame laba hakekenyi u, me e khatö u he ka thu je hwit ge hnyamám ; ke u me ca he ka iná ányám hele hnán subá hwit ka hnyi hwit ame tot anyin at ae hakekeny köu.

HNYIMAKAN 24.

AME ne ke baga ame hom momo me faipoipo me, ke e ame ca betenge bi gan, anyin a e ame wâ ke únyi ae ca so anyin, me e ame he ka sihnalimen hobi kâu tusiny degec momo, me ham ka hnyi hnyamen, me obâ únyi hnyi umen uma. 2 Ke e ka hia but didrut, me e khana he ka âiân ke baga bi. 3 Ke ame ne hûkôtiâ e ge baga a biliny, k' ame ne sihnalimen hobi kâu tusiny degec momo, ke ham ka hnyi hnyamen, me obâ únyi hnyi umen uma; ke ame ne mokcu baga a biliny at ame hom e me âiân; 4 awe, ame ca he baga a bân waleji a obâ ka hom hmetu, k' adre hia but okongoâ; anyin a wale únyi ae ikiki hnyi hnyimakö Iehova: ke u me ca he ka bi jöning hnyei a ham köu Iehova Khongom me me em.

5 Ame ne ke baga ame hap hoktamomo, me e ame ca he ka tha he me vat, k' adre me ca he ka khene hanyamen: ke e ame he ka at baú hnyi hnyaban hnyi huna a khaca, me osenyinâ âiân a momo e ame hom. 6 Ca he ke at ka hom únyi hnân oamamá, k' ame ne vetoiny ethö görany, me me haten bi: anyin a e ame hom melen at me me haten.

7 Adre me ne wâ ke at ame venâu liamekeiny mē a at Isaraela, ke ame ányâ kâu helá me ka at adre úco, me úco bi; awe ame he ka mokcu at venâu eling: helâe u me he ka ohia hulö unyâm.

8 Ó u áu ge mok lepera he ka ti wâ wia, me ányâ helá me at Levi a tavat bihut ame n' öbun: öbun e he ka wâ wia ka ányâ hoton hnök hna húna ködra. 9 Únykúme thö únyi a ányâ Iehova Khongom kö Miriama eú hnyi gethen waleji hnyi úhebun Aigupito.

10 U je ne mē ham ke únyi ka liamekeiny möu, me u me ca he ka dit ka hnyi umen uma he ka hom haten. 11 Ke u me he ka tot eú hnyi hwanuma, ke hamen at waleji u je mē ham únyi kâu he ka hom haten köu eú hnyi hwanuma. 12 Ke ame ne at ae theduoc, me u me ca he ka tha mokut me haten bi. 13 Ke u me he ka ham hmetu kâu haten e ka didrut seúnö, me me he ka tha mokut me khaúen bi me hahnahici u: ke wale hwakecâm ae wisa hnyi hnyimakö Iehova Khongom.

14 U me ca he ka ovecâ at u me hawâ he ka huliwa, a at ae theduoc ke ba ta

únyi gan, ame ne liamekeiny möu, ame ne atkanyua hnyi em hnyei hnyi ányâm je taun: 15 u me he ka bi hwaban hnyi bong bi, k' ame ca he ka dit seúnö hon; anyin a e theduoc, k' ame oúnyihnthoâ hwaban: ke wâ e nye tenge kö Iehova gam, ke wale hulö bi köu.

16 Adre me ca he ka hlingâ je kamen can je nokon, k' adre me ca he ka hlingâ je nokon can je kamen: k' adre me he ka ve hlingâ at can anyin hulö bi.

17 U me ca he ka ohwalö hna owisa ka atkanyua me nakahme; me hom úkhaúen safac hnân haten: 18 ke u me he ka únykúme hna thaluö u hnyi Aigupito, ke Iehova Khongom ame omeli u úheny: anyin a wale inya oge me húna köu he ka ányâ únyi e.

19 U ka subâ ányâm hwit hnyi em hnyei, ke u me hnying ke thi hwit hnyi hnyei, me u me ca he ka hmetu ka hom e: ke hobi kâu biju atkanyua, me nakahme, me safac: me me he Iehova Khongom ka ohnahici u hnyi ta je huliwainy li hnyamâm hia.

20 U ka tau halem úö elaiö, me u me ca he hmetu ka elâm hnyi je vheiny: ke hobi kâu biju atkanyua, me nakahme, me safac. 21 U ka tau wan halem hnyei vine, me u me ca he hmetu ka hlo hia: ke hobi kâu biju atkanyua, me nakahme, me safac. 22 Ke u me he ka únykúme hna thaluö u hnyi hnyei Aigupito: anyin a wale me oge me húna köu he ka ányâ únyi eling.

HNYIMAKAN 25.

ANE hu ivinö anyin tavat, k' ödrin e hom ka hnyi hna owisa, k' adre me owisa ködrin; me adre me he ka haisoâ at ae wisa, me hangâ at ae kong; 2 ke ame ne úcú he ka osöâ at ae kong, me ame he at owisa ka ha m' adre me omokulec e, me osöâ bi hnyi hnyimakan, e úcú me anyin hulö hoton numerainy. 3 E khana he ka ofâte kot ke ca onuâ bi: wâ e nye bi hanen. ke osehia kot, me ame he ka kong bi liamekeiny möu hnyi hnyimákâm.

4 U me ca he ka ca hnyimen bolok k' ame ututo hwit.

5 Ame ne tha laba je liamekeiny, ke ame mokcu ke at gadrin ke ba nokon, me ame ca he momo a âiân at ae mokcu ka he hnyöu ai me me âiân ke atkanyua bi: ke ame he liamekeiny me âiân ka hom e me

áiân bi, me ányá káu hanymen liamekeiny me áíân. 6 Ke haba nokon a bán e ame he ka hnokôá hnen momo, me adre me he ka wenyö ien liamekeiny me бага at eji a mok, me me ca he ka hia ien hnyi Isaraela. 7 Ke ame ne ca weny бага he ka hom safaciny liamekeiny me, me hamen safaciny liamekeiny me ka he ka hnyi homagöüle ka wahingat me ha, ka habe, E höcö liamekeiny me öök he ka okúá hnyi Isaraela ien liamekeiny mē, e höcö he ka ányá hanymen liamekeiny mē könya. 8 Me ame he wahingatinginy anyin taun ka hawa бага, me fuc káu : ke ame ne tot бага, me ha, ka habe ; E ca wek he ka hom momo e ; 9 awe, ame he momo a áíân liamekeiny mē ka he káu hnyi hnyimakan wahingat, me uny dut taben hnyeúcan бага, me hangöcá hnyimakan, me ha, ka habe, Adre me he ka ányá heláe ka at ame ca otílá lap anyin liamekeiny mē. 10 Ke adre me he ka hwenyi ien hnyi Isaraela, ka habe, Lap anyin at adre uny taben hnyeuca.

11 Ame ne ú ke li at, ke ame o momo he ka omelö áíân únyi ge at ame kot, k' ame he momo ka iná hnyamen me kát e únyi hnyi unyin : 12 awe, u me he ka subá degecá hnyamen momo, ca he emakám ka betenge gan.

13 Ame ca he ka hu hnyi tangám tang je tulut ae ve bongon, at ae gan me úhnyukong. 14 Ame ca he ka hu hnyi umám uma efa ae ve bongon, at ae gan me úhnyúkong. 15 Ke u me he ka hu tulut ae bekhöt me wisa ; efa ae bekhöt me wisa u me he ka hu : me me se hia bongom je bong hnyi hnyei a ham köu Iehova Khongom. 16 Anyin a húkötianö Iehova Khongom tavat hia adre me ányá heláe, a tavat adre me ányá hwakecin ae ca wisa.

17 Únykúme ju únyi a ányá Amaleka köu eú hnyi gethen, waleji u me he jem úheny Aigupito : 18 a g' ame úkhanö möu eú hnyi gethen, k' ame kot tavat a biliny, tavat ae sényin adre me biliny, ke u sényin me vec ; ke e ame ca outen Khong. 19 Anyin a wale e ka hia but Iehova Khongom omenö u ge je iwahnaihmiöny hia möu igigilö, hnyi hnyei a ham köu Iehova Khongom me me em hnân labā, me u me he ka kot degecá hna únykúme at Amaleka únyi eang hmeledrany ; u me ca he ka hnying.

HNYIMAKAN 26.

KE u ka o ka hnyi hnyei ame ham köu Iehova me em, ke u je hom me labā : 2 awe, u me he ka hom je wan káná hia a bán, wale u me he ka hom únyi hnyi em a ham köu Iehova Khongom : ke u me he ka hitangen, me hom e ka hnyi dok ame he Iehova Khongom ka úca me me umen ien bi. 3 Ke u me he ka he ka at ame bi hut hnyi ün eling, me ha káu, ka habe, Inya oge me omanená kö Iehova Khongom hnyi bong ang, a iny o but ka hnyi hnyei a khe-manyin Iehova lakamöta he ka ham köta. 4 Ke ame he at bihut ka kap tang únyi gam, me ip hnyi hnyimakan taben hut anyi Iehova Khongom. 5 Ke u me he ka thu me ha hnyi hnyimakö Iehova Khongom, ka habe, Haba kamök, me, at Suria ame he but ka mok, ke e ame he Aigupito ai, k' ame laba atkanyua eling, ke e wakhalet thibi ; me e ame wia ka hnyei ae gan, ke hwege, ke se hia : 6 ke ame okongu öta at Aigupito, me oveci öta, me kun' öta ka hnyi huliwa ae hmak : 7 ke ötin e tenge kö Iehova Khongon lakamöta, me Iehova ame löng hota hwatenge, ke e ame wá anyita vec, me anyita huliwa, me hnödra hna oveci öta : 8 me Iehova ame hum öta úheny Aigupito ge hnyam ae hwege, me benyin adre hai, me je únyi hnân outen, me je haten, me je únyi hnân láia : 9 ke e ame hia but hum öta ka hnyi dok ang, me ham köta hnyei ang, hnyei ame di hnen debai me hani. 10 Ke wá ju, walang ang, Iehova lö, inya oge me hom köu je wan káná a bán wale u je hia but ham könya. Ke u me he ka ip e hnyi hnyimakö Iehova Khongom, me khudrung ju hnyi hnyimakö Iehova Khongom : 11 ke u me he ka senyiná ta je so hia a ham köu Iehova Khongom, me ka ányám lap, me at Levi, me atkanyuaa unyám.

12 Ke u ka hia but ham je ke keihen a libenyitainy jeúiny huna a kuniny, wale huna adre ham je ke keihen a libenyitainy, me u me he ka ham e ka at Levi, me atkanyua, me nakahme, me safac, m' ödrin e he ka han sekon hnyi ányám je lap ; 13 ke u me he ka ha hnyi hnyimakö Iehova Khongom, ka habe, Oge hia but hom ta je únyi ae kap úheny hnyi umök uma, ke oge hia but ham e ka at Levi, me atkanyua, me nakahme, me safac, hoton je hna húna hia, u me húna könya : oge me ca hanyáúú.

ányâm je hnanyibu hia, ke oge ca hnying e : 14 oge me ca hia but han únyi hnyin hnyi úen oge me tenge, me hom únyi hnyin iny ka bo kong, me ham únyi hnyin hobi kâu je komok : oge hia but löng hoton hofuc ho Iehova Khonguk, oge hia but ányâ hia hoton hnâm hna húna könya. 15 Wâ ju eú hnyi hnyabam ae kap únyi hnyi drany ethö, me ohnahicá em hnyei Isaraela, me kúnâ u je ham köhmun, helâji me hnâm hna khe-manyin ka lakamöhmun, a hnyei ame di hnen dân basin me hani.

16 Haba hnyi bong ang Iehova Khongom ame húna kôu he ka vheno je hnanyibu eang, me je hna owisa, ke u me he ka tuö me ányâ ge hnyekom ae bekhöt, me hanom ae bekhöt. 17 U je hia but ha muâ hnyi bong ang a haba Iehova me e Khongom, ke úcú kôu he ka vheno deny je gethen, me tuö hnen je hna húna, me anyin je hnanyibu, me hnen je hna owisa, me löng hoton hwan hofuc : 18 ke a hia but Iehova ha muâ hnyi bong ang a u hnyei ae ke bongon bi kâu, helâ me hnen hna ha bánâ kôu, me u me he ka tuö hnen je hna húna hia ; 19 k' ame he ka obeönuai u hon je hnyei hia e ame op, hnân haisoá, me hnân ien bi, me hnân ogânâ ; m' u me he ka hnyei ae kap hobi kö Iehova Khongom hoton hofuc waleji e ame ha.

HNYIMAKAN 27.

KE haba Mose me wahingatiny at Isaraela ödrin e húna ka tavat, me ha ka habe, Tuö ju ta je hnanyibu hia oge me húna köbun hnyi bong ang. 2 Ke haba hnyi bong öbun e he ka hanyâúâ Joridano ka hnyi hnyei a ham köu Iehova Khongom, me u me he ka khon je veto ae gan, me botru dröüiny : 3 ke u me he ka sihnalimen hon ta je hofuciny hia hnanyibu eang, u ka hia but he hanyâúâ ; m' u me he ka he ka hnyi hnyei a ham köu Iehova Khongom, a hnyei ame di hnen debai me hani, helâ me Iehova Khongon lakâmâm ame hia but ha bánâ kôu. 4 Ke öbun ka hia but hanyâúâ Joridano, me öbun e he ka khon je veto eling, wale oge me huna köbun hnyi bong ang, hnyi bucen Ebela, me up dröüiny. 5 Ke u me he ka otílâ taben but eling kö Iehova Khongom a tap veto : u me ca he ka inâ ke ut fao ethö ka hnyi hon. 6 U me he ka otílâ taben hut kö Iehova Khongom ge je veto ae bekhöt, ke u me he ka hudo hon je hudiny

leú kö Iehova Khongom : 7 ke u me he ka hudo je hudiny úsokôu, me han eling ; ke u me he ka senyin hnyi hnyimakö Iehova Khongom. 8 Ke u me he ka sihnalimen manená hon je vetoiny ta je hofuciny hia hnanyibu eang.

9 Ke haba Mose me tavat bihut a at Levi ödrin e ha ka at Isaraela hia, ka habe At Isaraela lö, ca mede bi, ke löng ju, haba hnyi bong ang me u hnyei i Iehova Khongom. 10 Anyin a wale u me he ka löng hofuc ho Iehova Khongom, me ányâ anyin je hnanyibu, me hnen hna húna, me hnen je hna owisa, walang oge me húna kôu hnyi bong ang.

11 Ke haba Mose ame húna ka tavat hnyi bong eling, me ha, ka habe, 12 Ame he hnyat eang ka tot hon bucen Gerizim he ka hahmahicá hnyei, öbun ka hia but hanyâúâ Joridano ; jia Simeona, ke Levi, ke Juda, ke Isakara, ke Josefa, ke Beniamina : 13 ke walang hnyat ödrin e he ka tot hon bucen Ebala he ka hangá ; jia Reubena, ke Gada, ke Asera, ke Zebulona, ke Dana, ke Nafatali. 14 Ke ame he at Levi ka thu me ha ka at Isaraela hia ge hwan ae hwege, ka habe,

15 Hnaúhangö at ame bi hnatheat adre só adre me ne okóíá, k' ame otílâ duóngá, e húkötianö Iehova huliwainy hnyamen at tretrau. Ke ame he tavat hia ka thu me ha, ka habe, Amen.

16 Hnaúhangö at ame ca ounyihnatho kamen me hinyen. K' ame he tavat hia ka ha, ka habe, Amen.

17 Hnaúhangö at ame oc hnyigöulen ke at. Ke ame he tavat hia ka ha, ka habe, Amen.

18 Hnaúhangö at ame omono wadröu eú hnyi gethen. K' ame he tavat hia ka ha, ka habe, Amen.

19 Hnaúhangö at ame ohwalö hna owisa ka atkanyua, me nakahme, me safac. K' ame he tavat hia ka ha, ka habe, Amen.

20 Hnaúhangö at ame tha mokut me áín kamen, anyin a e ame hai hnamejin kamen. K' ame he tavat hia ka ha, ka habe, Amen.

21 Hnaúhangö at ame tha mokut me meno. K' ame he tavat hia ka ha, ka habe, Amen.

22 Hnaúhangö at ame tha mokut me haniny, ame ne nokon kamen a hlu, k' ame ne nokon hinyen. Ke ame he tavat hia ka ha, ka habe, Amen.

23 Hnaúhangö at ame tha mokut me

hinyen áián. K' ame he tavat hia ka ha, ka habe, Amen.

24 Hnaúhangö at ame kot ikhálá ke at. K' ame he tavat hia ka ha, ka habe, Amen.

25 Hnaúhangö at ame kap hwaban me me hlingá at ae ca úcú ka mok. K' ame he tavat hia ka ha, ka habe, Amen.

26 Hnaúhangö at ame ca hnyi ohwáá hofuciny hnanyibu eang he ka ányá. K' ame he tavat hia, ka habe, Amen.

HNYIMAKAN 28.

KE u je ne he ka ti löng hoton hofuc ho Iehova Khongom he ka wá wia me ányá hnen je hna húna, wale oge me húna kóu hnyi bong ang, me ame he Iehova Khongom ka obeúnai u hon ta je hnyeí hia eang hmelen : 2 k' ame he ka o kóu ta je hnahic hia eang, me hom tiló u, u ka löng hoton hofuc ho Iehova Khongom. 3 Ke u me he ka hnahic hnyi ta hnyeí. 4 Ame he ka hnahic wan hnyekom, me wan kánám káná, me wan halem omeno, me úsahiainy je kau me lakon mamoe. 5 Ame he ka hnahic tangám. tang, me taben bi ányám falawa hnyin. 6 U me he ka hnahic u ka didró, ke u me he ka hnahic u ka didrut. 7 Ame he Iehova ka hna je iwahnaihmióny möu, tavat adre tot kóu ka mok hnyi hnyimákám adre me he ka o kóu hnyi ke gethen, me ve kec gam hnyi je gethen a seven. 8 Ame he Iehova ka ohnahici u hnyi je uma u me ip ányám jeú hnyin, me hnyi ta je únyi u me he ka ip hnyamám káu ; k' ame he ka ohnahici u hnyi hnyeí a ham kóu Iehova Khongom. 9 Ame he Iehova ka ohmó u m' u hnyeí ae kap hobi káu e bi, helá me e ame khemanyin kóu ; u je ne he ka tuó je hnanyibu anyi Iehova Khongom, me vheno deny je gethen. 10 Ke ame he je hnyeí hia eang hmelen ka wá a g' adre ip ió Iehova hom ; m' adre me he ka outó u. 11 Ke ame he Iehova ka osehia hobi kóu ta je únyi ae so, a wan hnyekom, me wan halem je meno, me wan kánám káná, hnyeí a khemanyin Iehova ka lakámán he ka ham kóu. 12 Ke ame he Iehova ka khóng kóu tang omjehen ae so, wale drany he ka ota we hnyi úen bi hnyi kánám káná, me ohnahicá huliwa hia anyin li hnyamám : ke u me he ka me ham omjeú ka ta je hnyeí ae se, k' u me ca he bi ka me sumatá. 13 Ke ame he Iehova ka wió u hnán ban, ke ca hmokunen bi ; ke u me he bi ka

hon, ke ca hnyikáná bi ; u je ne löng hoton je hnanyibu anyi Iehova Khongom, wale oge me húna kóu hnyi bong ang he ka wá wia me ányá ; 14 ke ca saú ka hnyi ke keihen metá, me ke keihen me, a únyi hnyi je hofuc oge me húna kóu hnyi bong ang, he ka hnu hoton ke je khong me bi athnya-baidrin.

15 Ke u je ca löng hofuc ho Iehova Khongom he ka wá wia me ányá anyin je hnanyibu hia, me hnen je hna húna, wale oge me húna kóu hnyi bong ang ; me ame he ka o kóu me hom tiló u ta je hnaúhangö hia eang. 16 Ke u me he ka hnaúhangö hnyi taun, ke u me he ka hnaúhangö hnyi ta hnyeí. 17 Ame he ka hnaúhangö tangám tang, me taben u me bi ányám falawa hnyin. 18 Ame he ka hnaúhangö wan hnyekom, me wan kánám káná, me úsehiainy halem je kau me lakon halem je mamoe. 19 U me he ka hnaúhangö u ka didró, ke u me he ka hnaúhangö u ka didrut. 20 Ame he Iehova ka kuná kóu hnaúhangö, me vec, me ú, hnyi ta je únyi u me ip huyamám káu he ka ányá ke ne o but u me mok me ke ne o but u me ie hia but ; can hulóiny ányám je huliwa u me digic nya hnyin. 21 Ame he Iehova ka okeceá kóu mok ae cap, ke ne o but e ame ohío u únyi hnyi hnyeí, wale u me he ka hnyin he ka hu e. 22 Ame he Iehova ka kuc u ge delá, me kahwa unyin, me hngihngidra, me kahwainy meic, me hele vat, me meleca, me om ; k' adre me he ka hnu u ke ne o but u me mokcu. 23 Ke haba drany ethó hon bám, me, ame he ka helá me bras, k' ame he ka helá me fao bi káná eú hmelám. 24 Ame he Iehova ka wia ányám we me me káná me sesáiny káná, k' ame he ka ta únyi hnyi drany ka hnyi hom, ke ne o but adre ohío u. 25 Ame he Iehova ka hnó u me me kuc u ge je iwahnaihmióny möu : u me he ka he kódra hnyi ke gethen, ke u me he ka kec hnyi hnyimakódra hnyi je gethen a seven : ke adre me he ka úkhúkhúu u unyin je dókhu hia eang hmelen. 26 Ke haba unyám bi me an omeno hia ame gá ethó, me omenoiny hnyot, ke ba at ame he ka alen. 27 Ame he Iehova ka kuc u ge ohuciny Aigupito, me vec tiny, me anyú, me hólök, wale ae ca khana bi he ka metu. 28 Ame he Iehova ka kuc u m' u me monu, me wadróu, me uthmáhmá hnyekon : 29 ke u me he ka khaúteta hnyi jebigó, helá me at ae wadróu ame khaúteta hnyi lit, k' u me ca he ka hnahic hnyi dem je gethen,

ke adre me he ka okongu u me hûgûná ányâm ta je únyi hnyi je bong hia, ke ba at ame he ka omeli u. 30 U me he ka kácá momo, k' ame he bi ke at ka tha mokut mē : u me he ka op uma, k' u me ca he bi ka labā : u me he ka belöká vine, k' u me ca he bi ka ijem wan. 31 Adre me he ka hlingâ halem bolok hnyi hnyimákâm, ke u me ca he bi ka hnyi han : adre me he ka hûgûná halem asina hnyi hnyimákâm, k' adre me ca he ka hom hmetu e kôu : adre me he ka ham halem je mamoe ka je iwahnaihmïöny möu, ke ba at ame he ka omeli u. 32 Adre me he ka ham lakom бага me hlu ka hnyi ke hnyei, ke u me he ka elâm ge li emakâm, me senyin halubahing 'ödrin hnyi je bong hia thibut : ke ba maniny hnyam m. 33 Haba wan kânâm kânâ, me ányâm ta je huliwa hia, me ame he hnyei kanyua he ka han hia thibut ; k' adre me he thibi ka okongu u, me hlic u balua : 34 me me omonu u ge ta je únyi u me he ka wâ ge li emakâm. 35 Ame he Iehova ka kot li boucam me li cam ge ohuc ae vec, a at ae ca khana he ka metu, hwân hnyi hnyeúcam ke ne o but ka hnyi wanben bâm. 36 Ame he Iehova ka tha hum u, me tuhâm a at u me otílâ hom, ka hnyi hnyei ae ca khañö u, a u me lakâmâm ; ke u me he ka bi athnyabainy eling ke je khong a utö me veto. 37 Ke u me he ka hnân láia, me vejec, me hofuc hluhluma hnyi je hnyei hia ame he Iehova ka lili u ka hnyin. 38 E gan hmâ je hatong u me he ka hom ka hnyi em hnyei, ke úhnyúkong bi u me he ka ip ; anyin ame he ka han linen ta je wahamon. 39 U me he ka ta je hnyei vine me belöká, ke u me ca he ka ijem wainainy, ke u me ca he bi ka tau wan ; anyin ame he ka han hia é ge je oúnyi. 40 Ame he ka hu halem je úö elaiö hnyi em hnyei hia, ke u me ca he ka süö u ge wakacoiny ; anyin ame he ka kölu wan ke tiga but. 41 U me he ka hnoköa je бага me momo, k' ödrin e ca he ka lakom bi ; anyin adre me he ka hum ödrin ka hnyi hwenbâ. 42 Haba halem je úö me wan kânâm kânâ, me ame he je wahamon ka han. 43 Ame he atkanyua unyâm ka labö kú tot me me nua hom ; ke u me he ka hnyikânâ tot hmönyin. 44 E ame he ka me ham köu, ke u me ca he ka me ham kâu ; e ame he ka ban, ke u me he bi ka hmokunen. 45 Ke ame he ka o ta je hnaúhangö eling hia köu, me hnu u, me hom tilö u, ke ne o but ame hiö u but ; anyin a u je ca löng hofuc

hó Iehova Khongom he ka tuö anyin je hnanyibu me hnen je hna otílâ waleji e ame hûna köu : 46 k' ame he ka e bi unyâm hnân haten me hnân láia me unyin mâtrânâm nyiele balua : 47 anyin a u je ca bi athnyabaí Iehova Khongom me senyin me hobâ hnyi hnyekom can úgâniny ta je únyi hia : 48 anyin a wale u me he ka bi athnyabainy je iwahnaihmïöny möu tavat ame he Iehova ka kunâ köu, k' u mekihnâ-nem, me beic, me he thu, me weny ta je únyi hia : k' ame he ka ip únyi hnân úhukálákouâ a fao hon nyem, ke ne o but e ame ohïö u. 49 Ke ame he Iehova ka oâ köu vat, a hnyei únyi hnyi dok ae sákâú úheny hnyi can hmeledrany, helâ me ugâiny aeto ; hnyei ae ca khañö u he ka löng hwan ; 50 hnyei ae hwege hnyimakan, k' adre me ca ogânâ wahingat, me betenge ge tavat ae úhnyúkong : 51 ke e ame he ka han wan halem je meno, me wan kânâm kânâ, ke ne o but ame hiö u but : ke e ame ca he ka bi kolon köu hwit, me waina, me wakaco, me úsheiainy halem je kau, me lakon halem je mamoe, ke ne o but e ame ohïö u. 52 Ke e ame he ka igigili u hnen vat hnyi ányâm je taun hia, ke ne o but ame u ta je hak veto u me op göranyai waleji u me geju kâu hnyi em hnyei hia : ke e ame he ka igigili u hnyi ányâm je taun hia hnyi em hnyei waleji a ham köu Iehova Khongom. 53 Ke u me he ka han wan hnyekom a utiöiny lakom бага me hlu a ham köu Iehova Khongom ; hnyi hia igigilö me thelöng, wale ame he je iwahnaihmïöny möu ka oveci u gan. 54 Haba бага at ae menyik unyâm me ti mita, me e ame he ka okongo emakan ka liamekeiny mē, me áian ae betenge gan, me kolon je lakon adre tiga ca hûgûná ; 55 me e ame ca he ka ham ka ke at gadrin ong utiöiny lakon e ame he ka han anyin ae ba but ta únyi gan ; a hnyi úen igigilö me thelöng, wale ame he je iwahnaihmïöny möu ka oveci u hnyi ányâm je taun hia. 56 Haba momo ae menyik me ti mita unyâm, at ame ca hnyi kâlâ kânâ ge hnyeúcan can mitainy me menyikiny, me e ame he ka okongo li emakan ka áian ae betenge gan, me nokon бага, me nokon hlu ; 57 me at ae úhnyúkong ame o wanben li can, me lakon e ame he ka hnoköa ; ke ame he momo e ka han duöngi ödrin anyin ae ba han ; hnyi hna igigilö me thelöng, wale ame he je iwahnaihmïöny möu ka oveci u gan, hnyi ányâm ta je taun hia. 58 U je ne ca he ka wâ wia he ka ányâ ta je

hofucin hia hnanyibu wale adre sihnalimen hnyi tusi ang, me u me outen ien ae hmanenang me hnân outen, wale IEHOVA KHONGOM; 59 k' ame he Iehova ka olungâ ânyâm ta je mok, me je mok anyin je mâtrânâm, a je mok ae gan hmâ, me tet hmâ, me je mekiny ae vec, me tet hmâ. 60 Ke e ame he ka oâ kôu je mekiny Aigupitohia, wale u me outen; k' ame he ka kece kôu. 61 Ke ta je mok hia minya me je ûnyi ae kong hia adre ca set hnyi tusiny hnanyibu eang, ame he Iehova ka oâ kôu, ke ne o but ame hiô u. 62 Ke öbun e he ka wakhalet biju, waleji a helâ me je okhüiny drany üseibun; anyin a u je ca löng hoton hofuc ho Iehova Khongom. 63 Ke wâ bi, helaji me Iehova ame senyin köbun he ka osoi öbun, me osehi' öbun, me helâe e ame he ka senyin köbun he ka obi' öbun, me oumi öbun; ke adre me he ka oc degeci öbun ûnyi hnyi hnyei u me he ka hnyin m' u me hu. 64 Ke ame he Iehova ka ovesei u ka hnyi je hnyei hia, hwân hnyi ke can hmeledrany ke ne o but ka hnyi obiny hmeledrany; ke u me he ka huliwa ka je khong ae ca kxanö u, u, me lakâmâm, a utö me veto. 65 Ke u me ca he ka laba wia hnyi je hnyei hia eling, k' ame ca he ka menâ hnyeücäm: ke ame he Iehova ka ham eling kôu hnyok ae öbubuny, me li ecmak ae dit, me hanu ae höcö: 66 ke u me he ka labö loloâ ânyâm möt; ke u me he ka labö ot hnyi hnyinghet me lany, ke u me ca he ka sekunâ ânyâm möt: 67 hnyi hnyomakatu u me he ka ha, ka habe, E na sahac ut! ke e sahac me u me he ka ha, ka habe, E na hnyomakatu but! anyin ae ot hnyekom, ke can ta je ûnyi u me wâ ge li emakâm. 68 Ke ame he Iehova ka ohmetu u Aigupito ai hnyi je hu, k' u me he ka gethen waleji oge ha kôu, ka habe, U me ca he hmetu ka wâ e balua: ke öbun e he bi eling ka beücü öbun ka je iwahnaihmiöny möbun m' öbun e bi athnyaba k dra obaga me omomo, ke ba at ame he ka üco.

HNHYIMAKAN 29.

WALANG je hofuciny ûhilihinykôu, waleji Iehova ame hûna kö Mose he ka ânyâ me lakon Isaraela hnyi hnyei Moaba, ke ca ha bi hna ûhilihinykôu mödra hnyi Horeba.

2 Ke haba Mose ame hawâ at Isaraela hia thithö, me ha ködra, ka habe, Öbun e wâ ta je ûnyi hia a ânyâ Iehova kö Farao

hnyi hnyimaköbun hnyi hnyei Aigupito, me lathnyabainy, me iny hnyei hia: 3 a ta je ücûbic ae gan waleji a wâ je emaköbun, me je haten, me je ûnyi hnân lâiâ gan eling: 4 ke a ca ham bi köbun Iehova hnyok ae wâhmakhmeto, me li emakan ae bwela, me li hnyikönyen ame löng, ke ne o but hnyi bong ang. 5 Ke oge hia but hum öbun hnyi hnyeubua fâte je huna: e ca bobot anyibun je ûkhaü, k' ame ca bobot je tangingen hnyeücabun hnyi je cabun. 6 Öbun e ca han areto, me ijem waina me grâg: me me khan' öbun a inya Iehova Khongubun. 7 Ke öbun e o but ka hnyi dok ang, me ame tot metâ köta Sihona tuhan Hesebona, me Oga than Basana he ka vat, me ötin e kuc ödra: 8 me otin e hügnâ idru hnyei me ham e me iny at Reubena, me Gadla, me hafiny tribu Manase. 9 Anyin a wale tuö ju ta je hofuciny ûhilihinykôu eang, me ânyâ, m' öbun e hnahic hnyi ta je ûnyi hia öbun e ânyâ.

10 Öbun e tha tot hnyi bong ang, a öbun hia hnyi hnyimakö Iehova Khongubun; a anyibun je taben, me je tribu, me wahingat, me je homakan, a tavat hia aten Isaraela, 11 lakubun, me laöiöbun, me atkanyaua unyâm hnyi hnâm je hna hunuma, hwân ge at ame höcö hlogom ke ne o but at ame söü belâm köiö: 12 me u me he ka tot hnyi ûhilihinykôu anyi Iehova Khongom me hnen hna khemanyin wale ame khemanyin köu Iehova Khongom hnyi bong ang: 13 me e ame he ka ohmö u hnyi bong ang m' u me he bi ka iny hnyei, me e ame he ka Khongom, hoton hofuc e ame ha kôu, ke hoton hofuc e ame khemanyin ka lakâmâm, a Aberahama, me Isaaka, me Jekob. 14 Ke oge me ca hake ânyâ ûhilihinykôu ang möbun me khefmanyin köbun; 15 ke so bi hobi ködra adre me tha tot möta eang hnyi hnyimakö Iehova Khonguta hnyi bong ang, me tavat minya ae hia unyita hnyi bong ang: 16 (anyin e khan' öbun a ötin e laba hnyi hnyei Aigupito, me he but hnyi wanken je hnyei waleji öbun e he hanyâüâ; 17 ke öbun e hia but wâ je ûnyi ae ikiki gadra, me anyidra je idola, a utö, me veto, me sileva, me gol, waleji unyidra:) 18 wâ e nye hu at gabun, ame ne бага, ame ne momo, ame ne lap, ame ne tribu, at ame hwiö hnyekon hnyi bong ang ûnyi ga Iehova Khonguta he ka he me bi athnyabainy je khongon je hnyei eling; wâ e nye hu unyibun wân ame oküâ ûnyi hnân mekiny, ame ne üthâ; 19 ke e ka löng hofucin ûhangö

eang, me e ame he ka hahnahicá e bi hnyi hnyekon me ha, ka habe, Eja ke ne oge ne vheno weny hnyekuk, he ka bi hnen únyi ae kukuba ge únyi ae mada, me oge me he ka so but : 20 ke ame ca he Iehova ka hna e, ke so bi, ame he ka sâ hmönyin anyi Iehova me anyin ciâ ka at eling, k' ame he bi ka ta hon hnaúhangö hia adre sihnalimen hnyi tusi ang, ke ame he Iehova ka kot degecá ien únyi eang hmeledrany. 21 K' ame he Iehova ka ke ip e ka hnyi ke únyi ae kong hnyi ta je tribu anyin at Isaræla hia, hoton ta je hnaúhangöiny úhinhnykôu, wale adre sihnalimen hnyi tusiny hnanyibu eang. 22 Ke ame he ka ha hnen dö a biliny, a je lakubun adre me he ka o hwaböbun, me atkanyua at ame he ka o úheny hnyi dok ae sákâú, ödra ka wâ je mekiny hnyei eling, me je mok a kunâ Iehova ; 23 me haba hnyei hia me teio, me alase, me ame hlâ, k' adre ca belökâ, k' ame ca wa, ke ba hnaonying ame kû hnyin, helâ me hna ohia Sodoma, me Gomora, me Adema, me Zeboidim, waleji Iehova ame ohia ge anyin hmönyin me anyin ú : 24 ke ame he je hnyei hia ka ha, ka habe, Can ieu Iehova ame ányâ helang ka hnyei ang? can ieu hmönyin ae gan eling? 25 Ke adre me he ka thu, ka habe, Can adre degecá úhinhnykôu anyi Iehova Khongon lakamödra waleji e ame ányâ mödra, hnyi úen e ame hum ödra úheny hnyi hnyei Aigupito ; 26 ke adre me he me bi athnyabainy ke je khong, me khudrung kâu, a je khong ae ca khan' ödra, ke e ame ca ham ködra : 27 anyin a wale ame ubâhlâ hmönyin anyi Iehova ka hnyei ang, he ka oâ kâu hnaúhangö hia adre sihnalimen hnyi tusi eang : 28 ke Iehova ame oc degeci ödra hnyi könödra kânâ hnyi hmönyin me hnyi ú, me hmönyin ae gan, k' ame ob' ödra ka hnyi ke hnyei bi, helâ me hnyi bong ang. 29 E unyi Iehova Khonguta ta je únyi ae iyong : ke haba ta je únyi ae manen, me e unyita me lakuta nyiele balua, m' ate me he ka ányâ ta je hofucin hia hnanyibu ang.

HNYIMAKAN 30.

KE e ka o köu ta je únyi hia eling, wale hnahic me hnaúhangö oge hia but ip hnyi hnyimákâm, ke u me he ka únykúme gan hnyi je hnyei hia wale Iehova ame obö u ka hnyin, 2 ke u me he ka hmetu kö Iehova Khongom, me löng hoton hwan hofuc helâ me ta je únyi hia oge me húna

köu hnyi bong ang, a u me lakom, tha e me hnyekom ae bekhöt, me hanom ae bekhöt : 3 awe, ame he Iehova ka ohmetu u únyi hnyi hna bâ, me betenge gam, me he hmetu ka úkhacaköü u únyi hnyi ta je hnyei hia wale Iehova ame hia but oveseiö u ka hnyin. 4 Eja ke ne adre ne obâ keihen ka hnyi obiny drany, me ame he Iehova Khongom ka úkhacaköü u úheny, me hum u úheny : 5 ke ame he Iehova ka hum u ka hnyi hnyei a labâ lakâmâm m' u me he ka labâ, ke e ame he ka osoi u, me osehiö u hon je lakâmâm. 6 Ke ame he Iehova Khongom ka peritonionâ hnyekom, me hnyekom je mátránâm, m' u me we Iehova Khongom ge hnyekom ae bekhöt me hanom ae bekhöt, m' u me möt bi. 7 Ke ame he Iehova Khongom ka ip je hnaúhangö hia eling hon je iwahnaihmiöny möu, me tavat adre me hükötiö u adre oveci u. 8 Ke u me he ka hmetu me löng hoton hofuc ho Iehova me ányâ anyin je hnanyibu wale oge me húna köu hnyi bong ang. 9 Ke ame he Iehova ka osehiö u hnyi ányâm ta je huliwa hia, hnyi wan hnyekom me wan halem je meno, me wan kânâm kânâ, me me so bi ; anyin ame he hmetu Iehova ka senyin gam hnyi so, helâ me e ame senyin ka lakâmâm : 10 u je ne he ka löng hoton hofuc ho Iehova Khongom, he ka tuö anyin je hnanyibu me huen je hna otílâ wale adre sihnalimen hnyi tusiny hnanyibu ang : ke u je ne hmetu kö Iehova Khongom me hnyekom ae bekhöt, me hanom ae bekhöt.

11 Anyin a haba hnanyibu ang wale oge me húna köu hnyi bong ang, me e ca hmak köu, ke ca sákâú. 12 Ca e bi hnyi drany, m' u me he ka ha, ka habe, Ie at ame he ka ölö hnyi drany ai hobi köta, me me hom e köta, m' ate me löng me ányâ? 13 Ke haba khaca, ca e bi hnyi hoton köiö, m' u me he ka ha, ka habe, Ie at ame he ka kácá köiö hobi köta, me hom e köta, m' ate me löng me ányâ? 14 Ke so bi e hakekeny hmönyin hofuc köu, a hnyi hnyimâm me hnyi hnyekom, m' u me he ka ányâ.

15 Wâ bi oge hia but ip hnyi hnyimákâm hnyi bong ang möt me hnahic, ke mok me hulö ; 16 anyin a inya oge me húna köu hnyi bong ang, he ka hnyok kö Iehova Khongom me vheno deny je gethen, me tuö anyin je hnanyibu, me hnen je hna otílâ, me hnen je hna owisa, m' u me möt me osehia, me ame he Iehova Khongom ka ohnahici u hnyi hnyei u me he ka hnyin he ka labâ.

17 Ke e ka hwiö hnyekom, ke u me ca löng bi, ke adre me ne lili u, he ka khudrung ka ke je khong me bi athnyabaidrin; 18 awe, inya oge me ha hwegiä köbun hnyi bong ang a öbun e he ka mok; k' öbun e ca he bi ka laba beü hnyi hnyei öbun e he ka hanyätüä Joridano me he ka hnyin he ka labä. 19 Inya oge me hawä drany me hmeledrany hnyi bong ang he ka ohnatho köbun, a oge hia but ip hnyi hnyimäkäm möt me mok, ke hnahic me hnaühangö: anyin a wale üca thö möt m' u me möt a u me je mätränäm: 20 me hnyok ju kö Iehova Khongom, me löng hoton hwan hofuc, me kece kâu; jin a e melâm, ke at ame osehia bongom je bong: m' u me he ka labä hnyei Iehova ame khemanyin ka lakämâm, jia Aberahama, me Isaaka, me Jakob, he ka ham ködrin.

HNYIMAKAN 31.

KE haba Mose ame he me ha ta je hofuc eang ka at Isaraela hia. 2 Haingen ködra, ka habe, Wan haded ke twente but je hunaik hnyi bong ang; ke ca khandö nya hmetu he ka didrut me didrö: ke Iehova ame hia but ha könya, ka habe, U me ca he ka hanyätüä Joridano eang. 3 Ke haba Iehova Khongom me e ame he ka bán ka hanyätüä hnyi hnyimäkäm; ke e ame he ka ohia je hnyei eang hnyi hnyimäkäm, me me em biju: haba Josua me e ame he ka hanyätüä hnyi hnyimäkäm, helaji me Iehova ame ha. 4 Ke ame he Iehova ka anyä ködra helä me e ame anyä kö Sihona me Oga, a li thaninyat Amora, me lakeidru; waleji e ame ohia. 5 K' ame he Iehova ka hn' ödra hnyi hnyimäköbun, m' öbun e he ka anyä ködra hoton je hna huna hia oge hia but huna köbun. 6 Hwege th' öbun me hnyok бага but, ca ot bi, ke ca öbubuny bi gadra: anyin a Iehova Khongom me e at ame tha he möu; e ame ca he ka hia unyâm, me hna degeci u. 7 Ke Mose ame hawo Josua me ha kâu hnyi hnyimakan at Isaraela hia, ka habe, Hwege thö, me hnyok бага but, anyin a u me he ka hom tavat eang ka hnyi hnyei waleji a khemanyin Iehova ka lakamödra, he ka ham ködra; ke u me he ka ohuä e ködra. 8 Ke haba Iehova me wale at ame he hnyi hnyimäkäm; ke e ame he ka tha e bi möu, e ame ca he ka hia unyâm, me hna degeci u: ca ot ke ca öbubuny bi.

9 Ke haba Mose ame sihnalimen hnanyi-

bu eang me ham e ka hnyat bihut a laku Levi, tavat adre me vaden tangen ühihi-nykôu anyi Iehova, me wahingatiny at Isaraela hia. 10 Ke Mose ame huna ködra, ka habe, Hnyi obiny je huna a seven, hnyi üen adre thu, a cicö hunainy hna baüä, hnyi bijeuiny je uma hunuma, 11 e ka o at Isaraela hia he ka manen hnyi hnyimakö Iehova Khongom, hnyi dok e ame he ka üca, me u me he ka aü hnanyibu eang hnyi hnyimakan at Isaraela hia, ke hnyi je hnyikönyidra. 12 Ükhacaköüä tavat, obaga me omomo me tavat ae ühnyükong, me atkanyua unyâm hnyi anyâm je lap, m' adre me löng, me nä, me outö Iehova Khongubun, me wä wia he ka anyä ta je hofucin hia hnanyibu eang; 13 me me löng hnen lakudra a hnyat adre tiga ca löng, me nä he ka outö Iehova Khongubun, hnyi je bong hia öbun e laba hnyi hnyei öbun e he ka hanyätüä Joridano ka hnyin he ka hu e.

14 Ke Iehova ame ha kö Mose, ka habe, Wä bi, e hakekeny jut bong u me he ka mok hnyin: hawo Josua, m' öbu me he ka tha tot hnyi uma hnän ükhacaköu, me oge me he ka huna kâu. Me haba Mose me Josua, me, ödru me tha he me tot hnyi uma hnän ükhacaköu. 15 Ke Iehova ame manen dut hnyi uma hnyi ülä ame tot wisa: ke haba ülä ame mokut hnyi hwanumen uma. 16 Ke haba Iehova ame ha kö Mose, ka habe, Wä bi u me he ka mokut unyin lakämâm; k' ame he tavat ang ka köüö me bi ünyi monu me ke je khongon hnyei adre me he ka hnyin he ka tha laba mödra, k' adre me he ka hna degeci nya, me öünyibätüä hnök hna ühihi-nykôu mödra. 17 Ke ame he ka ubählä anyik hmönyin ködra hnyi bong eling, ke oge me he ka hna degeci ödra, me ikhälä hnyimäkök gadra, k' adre me he ka ön ödra, ke ame he ka o ködra je hulö me vec ae se; m' adre me he ka ha hnyi bong eling, ka habe, Hawa, ame ca o köta je hulö ang can Khong a ca tha e möta? 18 Ke oge me he ka ikhälä hnyimäkök hnyi bong eling, can ta je hulö hia adre me he ka anyä, anyin a hnyimäködra bi ka ta je khong. 19 Ke walang ang sihnalimen ju khumöng ang hobi köbun, me nä e ka lakon Isaraela: ip ju hnyi je hnyimödra, me me ohnathu nya khumöng ang ka lakon Isaraela. 20 Ke iny ka hia but hum ödra ka hnyi hnyei waleji oge khemanyin ka lakamödra, ame di ge debai me hani; ke ödra ka hia but han sekon me

pipikhenya; me adre me he ka hnyimakodra ka ke je khong, me bi athnyabaidrin, me hōciō nya, me oūnyibāūā hnōk hna ūhihi-nykōu. 21 Ke ka o kōdra je hulō me je vec ae se, me ame he khumōng ang ka ohnatho kōdra; anyin a e ame ca he ka hia hnyi hnyimen je mâtânidra: anyin ae khanō nya ūnykūmenōdra adre me he ka ānyā, a walang ang, k' iny tiga ca hia but hum ōdra ka hnyi lnyei waleji oge khemanyinā. 22 Ke haba Mose ame sihnalimen khumōng eang hnyi bong eling me nā e ka lakon Isaraela. 23 Ke e ame hūna kō Josua nōku Nuna, ka habe, Hwege thō ke hnyok бага thō; anyin a u me he ka hom lakon Isaraela ka hnyi hnyei oge khemanyin kōdra: me oge me he ka tha inya mōu.

24 Ke Mose ame umo sihnalimen ta je hofucin hnanyibu eang hnyi tusi, ke ne o but ame um dō, 25 me haba Mose ame hūna ka at Levi, a tavat adre me vaden tangeŋ ūhihinykōu anyi Iehova, ka habe, 26 Hom dō tusiny hnanyibu eang, me ip e hnyi tangen ūhihinykōu anyi Iehova Khongubun, k' ame he ka hnen ling hnān ohnatho gam. 27 Anyin a oge wā but hnām hna ūkhin fuc, ke hwege nyem: wā bi, iny tiga mōt unyibun hnyi bong ang, me ōbun e hia but ūkhin fuc me Iehova; ke hawa bi iny ka mokcu? 28 Ūkhacakōu thō kōnya wahingatiny hia anyibun je tribu, me je homakan gabun, m' oge me he ka ha ta je hofuc eang ka hnyi je hnyikonyōdra, me hawā drany me hmeledrany he ka ohnathoā kōdra. 29 Anyin ae khanō nya a iny ka mokcu, me ōbun e he biju ka oikiki ōbun, me sāt ūnyi hnyi gethen waleji oge hūna kōbun; ke ame he ka o kong kōbun hnyi ta je bong a biliny; anyin a ōbun e he ka ānyā ūnyi ae kong hnyi hnyimakō Iehova, he ka ohmōnyinā e ge je hul-wa ae kong anyin li hnyamōbun.

30 Ke Mose ame ha hnyi je hnyikōnyen ūkhacakōu hia anyin at Isaraela, hofucin khumōng ang, ke ne o but ame um dō.

HNYIMAKAN 32.

DRANY lö, tevehlōng ju, ke oge me he ka fuc;

Ke so hmeledrany ame löng ifucin hnyimök;

2 Ame he ka khula bongon ūneik helā me we,

Ame he ka ta ifucik helā me hau; Helā me we ae menyik hon je bö ae mita,

Ke helā me khukhula hon sa khōlak:

3 Anyin oge me he ka omanenā iō Iehova; He th' ōbun ka ogānā Khonguta.

4 E Kic, ke bekhōt anyin huliwa; Anyin a je deny hia, me hna owisa: E Khong ae hnathu, ke ba hnyikongon E wisa ke fāfā.

5 Adre hia but iyawā, ōdra ca lakon, ke wale hnyikongudrin;

Dō ae hwen hōcō, ke hwali hwakecidra.

6 Hawa, ōbun e bi hwaban kō Iehova helāe,

Hnyei ae monu, ke ba metā?

Hawa, ca kāmām bi at ame ūcū u?

E ame up u, me otilō u.

7 Ūnykūme ju je bong ehac, Wāhmakhmeto je hunainy ta je dō ae se:

Hnō thō kāmām, me e ame he ka thumetu u;

Wahingatām minya, ke ōdrin e he ka ha kōu.

8 Hnyi ūen waleji Beōnua ame ha idrin ka ta je hnyei hnyin,

K' ame oveseā lakon tavat, Me wale e ame kia je hnyigōulen tavat, Hoton ūganiny lakon Isaraela.

9 Anyin a haba jekhōū Iehova, me iny hnyei bi,

Ke Jakob iny hnyei adre tuluto.

10 E ame wā e hnyi hnyebuba, Ke hnyi dok ae hnyot ke ba aten, ke je meno thibi adre me kuku; Me e ame igigilōā, me nā e, K' ame tuō e helā me wan li emakan.

11 Helā me man aeto ame ānyāwia hāuen, Ke ame gā igigilō hon lakon, Me helāe e ame ulolo li labenyin, Me kaptil' ōdrin hon li labenyin:

12 Iehova thibi at ame lelō e

Ke ba ke khong atkanyua unyin.

13 E ame otabā e hon je dok ae gōrany eang hmelen,

K' ame han je troban hnyei, Ke e ame habelen e ge hani ūnyi hnyikic,

Me wakaco ūnyi hnyi oūt;

14 Bata ūnyi ge kau, ke dān basin mamoe, Tha e me pipikenyainy lakon mamoe

Me je mamoe бага ūheny Basana, me je got,

Tha e me pipikhenyainy wan hwit;

Ke u je ijem waina a dren wan vine.

- 15 Ke haba Jesuruna ame-pipikhenya bi,
k' ame nyikâ can :
U pipikhenya but, me gan unyâm, me habubut :
Waleling me me degec Khong at a op e,
Me oûnyibâûâ Kic at a omelö e.
- 16 Adre me okûâ anyin ciâ ûnyi ge je khong atkanyua,
K' adre ohmönyinâ ge anyidra ta je ûnyi ae ikiki.
- 17 Adre me hudo ka ta je demoni, ke ca Khong bi,
A je khong ae ca khan' ödra,
Ae teb ûnyi k' ödrin e teb o,
K' ame ca outen ge lakamöbun.
- 18 U je hnying ge Kic, at ame hnöku u,
Me ca ûnykûme hmetu ge Khong at ame up u.
- 19 Iehova ame wâ me höci ödra,
Can hna ohmönyinâ e ge lakon baga me hlu.
- 20 Me e ame ha, ka habe, Oge me he ka ikhâlâ hnyimakök gadra,
Oge me he ka wâ iéú obiny ködra :
Anyin a ödra me dö ae újông,
Je wanakat ae ba labageju.
- 21 Adre hia but okûâ anyik ciâ can ûnyi a ca Khong bi ;
Adre hia but ohmönyini nya ge anyidra ta je ûnyi baû :
Me oge me he ka okûâ anyidra ciâ ge je hnyat a ca hnyei bi ;
Oge me he ka ohmönyini ödra ge hnyei ae monu.
- 22 Anyin adre hú meic hnyi anyik hmönyin,
Ke ame thong ke ne o but dok ae dit hmönyin,
Me an hmeledrany me troban,
Me thong ta je taben je bucen.
- 23 Oge me he ka úkhöúnâ hudra je ûnyi ae kong,
Oge me he ka khûâ ködra anyik je fana hia :
- 24 Adre me he ka delâ ge mekihñanem, me aú ge kahwainy anyidra,
Me mok ae hiny ;
Ke oge me he ka kunâ ködra je meno ae úhúlú,
Me je oniny kánâ adre me mekiny.
- 25 Ame he hele vat ka otengiâ eú hnyöu,
Ke ot eiö hnyin uma ;
Ame he ka hlingâ hidröu me hlu baú,
Mendreng me at ae húen.
- 26 Oge ha, ka habe, Oge me he ka ovesei ödra,
Oge me he ka bi obiny hna ûnykûmi ödra ge tavat :
- 27 Ke so bi oge me outen hmönyin anyin iwahnaihmiöny,
Wâ e nye ca wâhmakhmeto iwahnaihmiöny mödra,
Wâ adre nye ha, ka habe, Adre hia but hai hnyamöhmun,
Ke Iehova ame ca ányâ ta je ûnyi hia ang.
- 28 Anyin a ödra hnyei ae ba úne,
Ke ba metâ anyidra.
- 29 Ödra na metâ ju, me wâhmakhmeto ûnyi eang,
M' adre me he ka ûnykûme obiny ködra !
- 30 Ama kamâu at a khaca he ka hnu thauzan,
Me okecâ ten thauzan ge li at a lo,
Ame ne ca bân anyidra Kic ka úco degeci ödra,
Me hna degeci ödra hnö Iehova ?
- 31 Anyin ae ca tha úcú anyidra kic me anyita Kic,
K' ame he ta je iwahnaihmiöny möta ka ohnathâ.
- 32 Anyin a haba anyidra vine, me ûnyi hnyi vineiny Sodoma,
Me ûnyi hnyi ta hnyeiny Gomora :
Wan vine anyin úö hnân mekiny je wan anyidra vine,
Ke hiny anyidra je thi vine.
- 33 Haba anyidra waina me mekiny tanimo,
Me dán údöiny asip a at ovecâ.
- 34 Hawa, adre ca ip unyik ûnyi eang,
Me okeceâ hmâ hnyi tang omjehek ?
- 35 Hamök he ka ip hwaban monu, me bi hwaban,
Hnyi úen ame he ka haú je cadra :
Anyin ae hakekeny jut bonginy anyidra vec,
K' ame he ka logot ta je ûnyi ame he ka o ködra.
- 36 Anyin ame he Iehova ka owisa lakeiny,
Me ietra can lathnyabainy ;
E ka wâ ae ba manidrin man,
Ke ba kolon, a hnyat adre ca, ke hnyat adre hna.
- 37 Ke e ame he ka ha, ka habe, Ewa je khongudrin,
A kic waleji ödrin e labageju kâu ;
- 38 At ame an pipikhenyainy anyidrin je hut,
Me ijem wainainy je hudiny anyidrin ic ?
E so ödrin e köüö me hadru' öbun,
Me bi hnabâ hnân hobi köbun.

DEUTERONOMI 33.

- 39 Wá bi walang ang, a inya but ang,
Ke ba ke khong unyik :
Oge me hlingá, ke oge me omelö ;
Oge hia but oätá, ke oge me ometo :
Ke ba at ae khana he ka hügüná únyi
hnyi hnyamök.
- 40 Anyin a oge me ogöranyá hnyamök ka
hnyi drany,
Me ha, ka habe, Inya oge me möt balua,
- 41 Ke oge ne khet anyik hele vat ae ha-
drongöc,
Me hom hna owisa ge hnyamök ;
Awe, oge me he ka ip hna okongoá ka
je iwahnaihmiöny mönya,
Me bi hwaban tavat adre me hükötö
nya.
- 42 Oge me he ka habelen anyik je fana ge
dra me me monu,
K' ame he anyik hele vat ka han utiö :
Me dren tavat adre hlingá, me je bá,
Hwân ge ban je taben iwahnaihmiöny.
- 43 Ta je hnyei lö, tha senyin me lakeiny :
Anyin a e ame he ka bi hwaban dren
lathnyabainy,
Me ip hna okongoá ka je iwahnaihmiöny
më,
Me ohia hwaban hulöiny iny hnyei,
hobi káu lakeiny.
- 44 Ke haba Mose ame he but me ha ta
je khumong ang ka hnyi hnyikönyen tavat,
a e me Hoshea nöku Nuna. 45 Ke Mose
ame um dö ha ta je hofuc eang ka at Isara-
ela hia : 46 me haingen ködra, ka habe, E
so öbun e kong hnyekuná ta je hofuc eang
hia oge me ha köbun hnyi bong ang ; wale
m' öbun e he ka ha ka je lakubun he ka wá
wia me ányá ta je hofucin hia hnanyibu ang.
- 47 Anyin a ca únyi bi e ae háhâ köbun :
anyin a e melibun, ke haba únyi ge únyi
eling me öbun e he ka osehia bongubun
je bong hnyi hnyei öbun e he ka hanyáúá
Joridano ka hnyin m' öbun e labá.
- 48 Ke Iehova ame ha kö Mose hnyi bong
eling, ka habe, 49 Öliá thö bucen eang a
Abarima, ka hnyi bucen Nebo, wale hnyi
hnyei Moaba, cicö Jeriko ; me wá hnyei
Kanana, wale oge me ham ka lakon Isara-
ela me me idrin : 50 me u me he ka mokcu
hnyi hon bucen e u me he ka öliá, me tha
laba me lakámâm ; helá me Arona tuhâm
ame mok hnyi hon bucen Hora, ke e ame
tha laba me lakamen : 51 anyin a öbu monu
könya hnyi wanben lakon Isaraela, hnyi an
Meriba hnyi Kadesi, hnyi hnyebuba Zin :
can obe ca okabi nya unyin lakon Isaraela.
- 52 Ke u me he ka wá hnyei hnyi hnyimá-

- kâm ; ke so bí u me ca he ka hnyi hnyei,
wale oge me ham ka lakon Isaraela.
- HNYIMAKAN 33.
- K**E walang hnahic waleji hnö Mose hna
hahnahicá lakon Isaraela ke tiga ca
mok. 2 Ke e ame ha, ka habe,
A o thö Iehova úheny Sinai,
Me köö ködra úheny Seira ;
E ame umumelam but úheny hon bucen
Parana,
Ke e ame o úheny je ten thauzan tavat
ae kap :
Ke e hnyi hnnyamen a metân hnnyibu
ae meic hobi ködra.
- 3 Eke, e ame betenge ge je tribu ;
E hnyi hnnyamâm laten ae kap hia.
Ke adre me laba ju hmelen lí cam ;
Adre me he ka ve kap hwâm je hófuc.
- 4 Mose ame huna köta hnnyibu,
A jekhon úkhacaköu anyi Jakob.
- 5 E than hnyi Jesuruna.
Hnyi úkhacaköuiny je taben hnyei,
A je tribu Isaraela hia thithö.
- 6 E so e he Reubena ka möt, ke ca mok
bi ;
Ke so e wakhalet ut lakeiny.
- 7 Ke walang hna hahnahici Juda : k' ame
ha, ka habe,
Iehova lö, löng ju ifuci Juda,
Me hom e ka hnyi iny hnyei :
E ame ka vat hobi káu ge li hnnyamen :
Ke u me he ka hadruá can je iwahnai-
hmiöny më.
- 8 Ke e ame ha ga Levi, ka habe,
E bi unyin ányâm at ae kap ányâm
Thumim me Ürim,
At eji u je cubic hnyi Masa,
At u je ivinö më hnyi an Meriba ;
- 9 At ame ha ge kamen me hinyen, ka
habe, Oge ca wá e ;
K' anie ca wáhmakhmeto je liamekeiny
më,
Ke ca khana je hing lakon :
Anyin adre me hia but wá wia hwâm
hofuc,
Me tuö úhinhnyköu möu.
- 10 Adre me he ka nö Jakob hnyi ányâm je
hna owisa,
Me nö Isaraela hnyi ányâm hnnyibu :
Ödrin e he ka ip utö ae bo so hnyi hnyi-
mákâm,
Me hudiny le adre ca subá hon ányâm
taben hut,
- 11 Iehova lö, ohnahicá tang omjehen,

- Ke kap huliwa anyin li hnyamen bi ;
Kot oâ ju je hnyin tavat adre me tot
metâ kâu,
Me tavat adre me hûkotiâ, m' adre me
ca tot hmetu.
- 12 Ke e ame ha ga Beniamina, ka habe,
Ame he ka laba khôtikic unyin hnyat a
betenge ködrin Iehova ;
E ame tube e hnyi bong hia,
K' ame laba hnyi wanben li bajebenyin,
- 13 Ke e ame ha ga Josefa, ka habe,
E so e hnahic bi iny hnyei ga Iehova ;
Ge ta je únyi hnathuiny drany, ke únyi
ge hau,
Medok minya ae dit ame mokut eú,
- 14 Me ta je únyi hnathu a waniny seúnö,
Me ta je únyi hnathu a kú ge je tehi,
- 15 Me ta je únyi ae beónua hnyi je bucen
kâú ehac,
Me ta je únyi hnathu hnyi je dok ae hut
nyiele balua,
- 16 Me ta je únyi ae únyi hnathuiny kânâ,
me unöngötiny,
Me ibetengiö anyin at waleji ame laba
hnyi úö ae údedö :
E so e o hnahic ka hnyi hon bö Josefa,
Ke hon wanben ban at waleji adre úsâ-
kâúöâ me je liamekeiny më.
- 17 E hmanenang nokon haleny bolok a bân ;
Ke haba li faoiny, me wale faoiny bolok
ae hiny :
Ge li únyi e e ame he ka hukâ je hnyei
hia ke ne o but je obiny hmeledrany :
Ke haba ödra, me, je ten thauzan anyi
Eferaima,
Ke ödra je thauzan anyi Manasi.
- 18 Ke e ame ha ga Zebulona, ka habe,
Zebuloua lö, senyin dö hnyi hnâm hna
didrut ;
Ke u Isakara, hnyi umâm je uma mano.
- 19 Ödru me he ka hawâ tavat ka hnyi
bucen ;
K' adre me he ka hudo eling je hudiny
hwakecin ae wisa :
Anyin a ödru me he ka hu tang omjeú
únyi eú hnyi köiö,
Me ta je omjeú adre ikhâlâ hnyi öny.
- 20 Ke e ame ha ga Gada, ka habe,
Hnahic hnen at ame okhulelaú Gada :
E ame laba helâ me liona momo,
Eat ame oloú usukia benyin, me wanben
ban.
- 21 Ke e ame ip ke keihen a bân hobi kâú
e bi,
Anyin adre ip eling jekhon at me at ham
hnanyibu ;

- Ke e ame tha o me je taben hnyei,
K' ame ányâ hna owisa hnö Iehova,
Me hnen je hna owisa kö Isaraela.
- 22 Ke e ame ha ga Dana, ka habe,
Haba Dana, me, nokon liona
At ame gâ úheny Basana.
- 23 Ke e ame ha ga Nafatali, ka habe,
Nafatali lö, u sekom ge ibetengiö
Me unöngötö ge hnahic únyi ga Iehova :
U me he ka tren ke keihen e jio me
hwaïöu.
- 24 Ke e ame ha ga Asera, ka habe,
E so e hnahic Asera ge lakon ;
E so ame kap soâ e hnen je liamekeiny
më,
Ke so e ame hneú can hnyin wakaco.
- 25 Ame he ka fao me bras ányâm je venyâ :
Ke haba bongom je bong me ame he ka
tha úcú me tang hwegiâm.
- 26 Jesuruna lö, e ba at ae úcú me Khong.
At ame tabâ drany me me hadruö u
Ke hon je úlâ hnyi anyin hmanenang.
- 27 Haba hnyabam, me, Khong a nyiele
balua ;
Ke eú hmelâm li benyin a nyiele balua ;
E ame obâ iwahnaihmiöny hnyi hnyi-
mâkâm,
Ke haingen, ka habe, Ohia but.
- 28 Ke Isaraela ame laba khôtikic,
Hake e pupuainy Jakob,
Hnyi hnyei ae hu whit me waina ;
Eke, ame ta hau únyi hnyi anyin drany.
- 29 Isaraela lö, u hnahic ;
Ewa at ae tha úcú möu, a hnyei Iehova
ame omelö ;
E beciny úhadruö u,
Ke wale hele vatiny ányâm so !
K' ame he je iwahnaihmiöny möu ka
nom ju köu ;
Ke u me he ka uto anyidra je dok ae
görany.

HNYIMAKAN 34.

KE haba Mose ame ölö úheny hnyi dok ae
tha hon hnyi Moaba, ka hnyi hon
bucen Nebo, ka hnyi ban Pisega, cicö Jeriko.
Ke Iehova ame omanená kâu hnyei Gileada
hia ke ne o but Dana ; 2 me Nafatali hia, me
hnyei Eferaima me Manase me hnyei Juda
hia, ke ne o but köiö e jio ; 3 me Hwaïöu,
me Dok ae tha hon hnyi hnyigöulen bucen
e Jeriko, tauniny je úö pama, ke ne o but
Zoara. 4 Ke Iehova ame ha kâu, ka habe,
Walang hnyei oge me khemanyin kö Abe-
rahama, me Isaaka, me Jakob, me ha, ka

habe, Oge me he ka ham e ka ta je matrâ-nâm: oge hia but omanenâ e ka hnyi li emâkâm, ke u me ca hnyi he bi ka hnyin. 5 Me haba Mose, a athnyabai Iehova ame mokcu eling, hnyi hnyei Moaba, hoton hofuc ho Iehova. 6 Ke adre me konâm e hnyi hnyigöulen bucen hnyi hnyei Moab cicö Beth-peora; ke ba at ae khana hnen hon ke ne o but hnyi bong ang. 7 Ke haba ta je hunai Mose hnyi üen e ame mokcu, me, wan haded ke twente: ke ca hadedak li emakan, ke ca hia tang hwegeien. 8 Ke haba lakon Isaraela, me adre me tengiö Mose hnyi je dok ae tha hon hnyi Moaba, hnyi je bong a thöte: me adre me um dö je bong bonginy hnyamoki Mose.

9 Ke ame unöngötö Josua nöku Nunâ ge hanu ae metâ; anyin a hia but Mose ip li hnyamen hon: ke haba lakon Isaraela me adre me löng kâu, me ânyâ helâ me Iehova ame hûna kö Mose. 10 Ke ba ke perofeta bala helâ me Mose ame o hmetu hnyi Isaraela, wale hnö Iehova hna iohnyimak më; 11 wale hnyi ta je haten me ta je üöman hia, waleji Iehova ame kunâ he ka ânyâ hnyi hnyei Aigupito, kö Faraö, me lathnyabainy hia, me iny hnyei hia thithö; 12 ke ünyi hnyi hwegien hnyamen hia, me hnyi ünyi hia hnân outen ae gan hmâ, waleji a ânyâ Mose hnyi hnyimakan at Isaraela hia thithö.

TUSI ANYI JOSUA.

HNYIMAKAN 1.

HWABAN mok a Mose athnyabai Iehova, me haba Iehova ame ha kö Josua nöku Nuna, athnyabai Mose, ka habe, 2 A mokcu Mose athnyabaik; ke walang ang todrö, he thö ka hanyâüâ Joridano eang, a u, me tavat eang hia thithö, ka hnyi hnyei oge me ham ködra, wale ka lakon Isaraela. 3 Haba ta je dok hia thithö ame he ka uto ge li hnyeücabun, me wale oge me ham köbun, helâji me hnök hna ha kö Mose. 4 Hwân hnyi hnyeubua, me Lebanona eang, ke ne o but ka hnyi wagewe ae gan, a wagewe Euferate, a hnyei hia iny at Heth, ke ne o but hnyi köiö ae gan cicö hna dit hnen seünö, wale hnye-göulöbun. 5 E ba at ame he ka khana ka tot hnyi hnyimâkâm hnyi je bong bongon ânyâm möt; oge me he ka tha inya möu helaji me hnök hna tha e me Mose: ame ca he ka hiö nya unyâm me hna degeci u. 6 Hwege thö, ke hnyok бага but: anyin a hamâm he ka ohuâ hnyei ka tavat eang, waleji oge me khemanyin he ka ham ka lakamödra. 7 Ke so bi, hwege thö, me ti hnyok бага, m' u me he ka wâ wia me ânyâ hia hnanyibu a hûna köu Mose a athnyabaik: ca saü thö üheny e ka hnyi

ke keihen metâ, me me, m' u me he ka hu hnahic hnyi je dok hia u me he ka hnyin. 8 Haba tusiny hnanyibu eang, me ame ca he ka hia ünyi hnyi hnyimâm, ke u me he ka ünykûme e hnyi lany me lit, me tuö me ânyâ hia helâ me hna sihnalimen hnyin: m' u me he ka so hnyi dem je gethen, m' u me he ka hnahic. 9 Hawa, oge ca hûna köu? Hwege thö, ke hnyok бага but; ca ot, ke ca öbubuny bi, anyin a e bi unyâm Iehova Khongom hnyi je dok u me he ka hnyin.

10 Ke haba Josua ame hûna ka je homakan ge tavat, ka habe. 11 He th' öbun ka hnyi wanben je hna hunuma, me ha ka tavat ka habe, Bi kamejibun ju; anyin a kun biju ta bong, me öbun e he ka hanyâüâ Joridano eang, me e jio he ka hou hnyei Iehova Khongubun ame ham köbun hnân ibun.

12 Ke haba Josua ame ha ka at Reubena, me Gada, me hafiny tribu Manase, ka habe, 13 Ünykûme thö hofuc waleji Mose athnyabai Iehova ame hûna köbun, ka habe, ame he Iehova Khongubun ka omen' öbun, me ame he ka ham köbun hnyei ang. 14 Ame he je laüiöbun, me je lakubun ae ühnyükong, me halebun je meno, ka laba biju hnyi hnyei Mose ame ham köbun hoton

Joridano; ke so bi, öbun e ne ka he me ta je únyi hnân vat hnyi hnyimakan je liamekeiny möbun, je hnyat hia ae hwege he ka vat, me hadru' ödrin, 15 ke ne o but a hia but Iehova omenâ je liamekeiny möbun, helâ möbun, me ödrin e hia but hom hnyei Iehova Khongubun ame ham ködrin; ke hnyi üen e, öbun e he ka hmetu ka hnyi ibun, me labâ e, wale Mose athnyabai Iehova ame ham köbun hoton Joridano, cicö hna o hnen seünö. 16 Ke ödrin e thu kö Josua, ka habe, öhmun e ha ka tha änyâ hia hnâm hna hûna köhmun, me he ka hnyi dok u me kun' öhmun kâu. 17 Öhmun e he ka ling u helâ me hnöhmun hna ling Mose hnyi ta je únyi hia thithö: ke e na tha e ju möu Iehova Khongom, helâ me hnen hna tha e me Mose. 18 Ke haba at ame he ka úkhin fuc ge änyâm huanyibu, me ca löng hwâm hofuc hnyi ta je únyi hia u me he ka hûna kâu, me adre me he ka hlingâ e: ke so bi hwege thö, me hnyok hga but.

HNYIMAKAN 2.

KE haba Josua nöku Nuna ame kunâ duöngâ üheny Sitima li at he ka ecmak, me ha, ka habe, He thö ka wâ hnyei, me Jeriko. Me ödrü me he me o ka hnyi uma umen momo hnyi gethen, Rahaba ien, me mokut eling. 2 Me adre me thumeto thaniny Jeriko, ka habe, Wâ bi, ame he jem li at eja hnyinghet üheny unyin lakon Israela, he ka ecmâkâ hnyei. 3 Me haba thaniny Jeriko ame úkhünöng kö Rahaba, me ha, ka habe, Hom but jem li at a o köu, wale ödrü dit ka hnyin umâm uma; anyin a ödre o he ka ecmâkâ hnyei. 4 Ke haba momo ame hom li at me ikhöl' ödrü; me haingen, ka habe, E hnathu a o könya li at, ke ca khanö nya dok ödre mwi hnyin: 5 ke haba hnyi üen adre me he ka hlöng homagöule hnyi lit, me ame didrut li at, ke ca khanö nya dok ödre me he ka hnyin: tiga wadring hotudru anyin a öbun e he ka köt ödrü. 6 Ke a hia but momo hum ödrü ka hnyi hon ban uma, me tubi ödrü ge je thi lino wale e ame ip gaga ethö hnyi hon ban uma. 7 Ke haba tavat ödrin e wadring hotudru hnyi gethen deny Joridano, ke ne o but hnyi je dok ae cocö: ke adre me ie hlöng homagöule hwaban hna didrut tavat he ka hnu hotudru. 8 Ke ödrü tiga ca mokut, me momo ame ölö thö ködrü ka hnyi hon ban uma; 9 ke e ame ha ka li at,

ka habe, E khanö nya a Iehova ame ham köbun hnyei, ke a o but köhmun ot gabun, k' ame aü but aten hnyei hia thithö hnyi hnyimaköbun. 10 Ke öhmun e hia but löng a Iehova ame öhmö köien Köio ae Dra hobi köbun, hnyi üen öbun e he jem üheny Aigupito; ke hnöbun minya hna änyâ ka li than Amora hnyi hoton Joridano, a Sihona, me Oga, waleji öbun e ohia. 11 Ke öhmun e löng e, me ame köio but je hnyekuhmun, ke ba hmetu tang hwege eü hnyi hnyekon ke at, cabun: anyin a Iehova Khongubun me e thibi Khong ethö hnyi drany, me eang hmelen. 12 Ke walang ang ö öbu khemanyin könya hnyi iö Iehova, a öbu me he ka betenge ge lap anyi cica helâ me oge me betenge gabu, ke ham könya haten ae hnathu: 13 ke omeli cica, me bai, me lahanik, me je liamekeiny mönya, me ta je únyi hia unyidrin, ke omeli öhmun, m' öhmun e ca he bi ka mok. 14 Ke ame thu ka momo hnen li at, ka habe, Öhmu me he ka mok hwaböbun, öbun e ne ca he ka omanená ühemmu eang; ke e ka ät bi a g' ame he Iehova ka ham köhmun hnyei; me öhmun e he ka änyâ hwakecin ae betenge me, hnathu köu. 15 Me e ame öü ödrü ge tö üheny hnyi mamalama: anyin a umen uma, me ethö hon haginy taun adre up, ke e ame laba hnyi hon hna up haginy. 16 Ke e ame ha ködrü ka habe, Kec d' öbu ka hnyi bucen, wâ e nye úkhanö möbu tavat úhnúhnú; me öbu me lubaduöng eling hnyi kun ta bong, ke ne o but ame hmetu tavat úhnúhnú: ke hwaban e, m' öbu he thö. 17 Me ame ha kâu li at, ka habe, öhmu me he ka gufa hnyi hna khemanyin eang u me kun' öhmun hnyin. 18 Wâ bi, öhmun ka e hnyi hnyei eang, hamâm he ka hûkâlâ tö ae dra eang hnyi mamalama u je hn' öhmu hnyin: ke u me he ka úkhacaköüâ unyâm e hnyi hnyabam eang kâmâm me hnyâm, me je liamekeiny möu, me lap hia anyin kâmâm. 19 Ke haba at ame he ka dit kâu ka hnyi gethen únyi hnyi lwanumen umâm uma, me ame he ka takou ban ge dren bi, ke öhmu me he biju ka gufa: ke haba tavat a tha e möu hnyin uma, ame he ka takou böhmu ge drödrin, e ka hu at ame he ka hinöbeny ködrin. 20 Ke so bi, u je ne omanená ühehmu eang; me öhmu me he ka gufa hnyi hna khemanyin u je kun' öhmu hnyin. 21 Me haingen, ka habe, Ame he ka helâ me hnöbu hna ha. Ke e ame kun' ödrü, me ödrü me he: me

e ame húkálá tö ae dra hnyi mamalama. 22 Ke ödrü me he but me o ka hnyi bucen me laba eling hnyi kun ta bong, ke ne o but ame hmetu tavat úhnúhnú: ke adre elöm ödrü hnyi gethen hia ge tavat úhnúhnú, me ödrin e ca wá bi. 23 Ke ame hmetu li at, me utut úheny hon bucen, me hanyáúá me o unyi Josua nöku Nuna; me ödrü me thumeto e ge ta je únyi hia a o ködrü, 24 Ke ödrü me ha kö Josua, ka habe, E hnathu a hia but Iehova hna kötín hnyeí hia; he haba khaca ame köiö hnyekon tavat hia thithö a aten idra hnyeí, únyi gata.

HNYIMAKAN 3.

KE Josua ame vesákong, k' adre me he úheny Sitima me he hnyi Joridano, a e me lakon Isaraela hia thithö; ke adre me mokut eling k' ödra tiga ca hanyáúá. 2 Ke hwaban kun ta bong haba ta je homakan ödrin e he hnyi wanben je hna hunuma; 3 ke ödrin e húna ka tavat, ka habe, Öbun ka wá tangen úhíhínykôu anyi Iehova Khongubun, k' ame vadren e tavat bihut, a at Levi, me öbun e he ka köüö úheny hnyi hnöbun, me lnu hoton. 4 Ke so ama lu hnyigöulöbun mä, haba tulut me helá me lo li thauzan kubit: k' öbun e ca he ka hakekenyá, m' öbun e he ka wá gethen öbun e he ka vheno; anyin a öbun e tiga ca he hnyi gethen eling ehac. 5 Ke haba Josua ame ha ka tavat, ka habe, Okabi öbun dö, anyin a haba bong nyi me Iehova ame he ka ányá unyibun ta je únyi hnán láíá. 6 Ke Josua ame ha ka tavat bihut, ka habe, Vadren dö tangen úhíhínykôu, me hanyáúá hnyi lnyimakan tavat. Me ödrin e hom tangen úhíhínykôu, me bödrin hnyi hnyimakan tavat. 7 Ke haba Iehova ame ha kö Josua, ka habe, Oge me he ka hwán hnyi bong ang ka oganö u hnyi hnyimakan at Isaraela hia thithö, me me khan' ödra a tha inya möu, heláji me tha inya me Mose. 8 Ke u me he ka húna ka at bihut, tavat ödrin e vadren tangen úhíhínykôu, ka habe, Öbun ka o ka hnyi baten köien Joridano me öbun e he ka todru hnyi Joridano.

9 Ke Josua ame ha ka lakon Isaraela, ka habe, Ai öbun, me löng je hofuc ho Iehova Khongubun. 10 Ke haingö Josua, ka habe, Walang haten m' öbun e he ka wá a e bi unyibun Khong ae möt, k' ame he ka ti obá hnyi hnyimaköbun at Kanana, me

Heth, me Hivi, me Perizi, me Girigasa, me Amora, me Jebusi. 11 Wá bi ame bán ka hanyáúá hnyi hnyimaköbun ka hnyi Joridano, tangen úhíhínykôu anyin Thaniny hmeledrany hia. 12 Anyin a wale öbun e he ka úca tavat a twelw únyi hnyi je tribu anyin at Isaraela, úsa khaca únyi hnyi je tribu. 13 Ke e ka tot hnyi Joridano hnyeúcan je hnyat ödrin e vadren tang anyi Iehova, Thaniny hmeledrany hia, me ame he ka subá luá but köien Joridano, wale únyi hnyi köiö ame di úheny hnyi hwadrö; ke ame he ka tot helá me khölöki: 14 Ke e ka he but tavat úheny hnyi umödrin je uma mano he ka hanyáúá Joridano, ke ame vadren tangen úhíhínykôu hnen tavat bihut hnyi hnyimakan tavat; 15 ke ödrin ka o hnyi Joridano tavat ödrin e vadren tang, ke ka kálá baten köiö hnen li can tavat bihut, hnyat ödrin e vadren tang, (ke Joridano ame öliá je baten hia hnyi úen menu hia,) 16 me ame todru köiö úheny hnyi hwadrö ame görany dö helá me khölöki úsákátúö, hwán Adamu, wale taun cicö Zaretana: ke ame hme köiö ame di ka hnyi köien dok ae tha hon, wale Köiö ae Hiny, ame subá but: me ame he hanyáúá ge tavat cicö Jeriko. 17 Ke ame tot me ca bwebwet tavat bihut, hnyat ödrin e vadren tangen úhíhínykôu anyi Iehova, hnyi dok ae maála, wanben Joridano, ke adre me he hanyáúá hnyi dok ae mada a at Isaraela hia thithö ke ne o but ame hanyáúá Joridano haen tavat hia.

HNYIMAKAN 4.

KE adre hia but hanyáúá Joridano hnen tavat hia thithö, haba Iehova ame ha kö Josua, ka habe, 2 U me he ka úca únyi hnyi tavat je hnyat a twelw, úsa khaca únyi hnyi je tribu, 3 ke húna thö ködrin, ka habe, Öbun e he ka hom únyi hnyi wanben Joridano, únyi hnyi dok ame tot hnyin ke ca bwebwet li can hnyat bihut, je veto a twelw, k' öbun e he ka tha hom möbun jio, me ip hnyi dok öbun e he ka mokut hnyin eáu hnyinghet. 4 Ke Josua ame hawá je hnyat a twelw, wale a penape-na únyi hnyi lakon Isaraela, úsa khaca únyi hnyi je tribu: 5 ke Josua ame ha ködrin, ka habe, Hanyáúá thö hnyi hnyimakan tang anyi Iehova Khongubun, ka hnyi wanben Joridano, me hom dö úsa khaca veto hon je bajebenyibun, hoton úseiny je tribuiny lakon Isaraela: 6 me me hnán

haten eling unyibuny, e ka he lakubun ka hnö nyiele, ka habe, Hnân eü je veto ang? 7 Me öbun e he ka thu ködra, ka habe, Anyin adre subâ luâ köien Joridano hnyi hnyimakan tangen ühinhnykôu anyi Iehova: haba hnyi ün e ame hanyâüâ Joridano, me adre subâ luâ köien Joridano: ke haba je veto ang me hnân oünykûmeâ lakon Isaraela nyiele balua. 8 Ke haba lakon Isaraela adre me ânyâ helâ me Josua ame hûna, me ödrin e hom je veto a twelv ünyi hnyi wanben Joridano, helâ me Iehova ame ha kö Josua, ke hoton üseiny je tribuiny lakon Isaraela: ke ödrin e tha hom je veto ka hnyi dok adre me he ka mokut hnyin, me ip eling. 9 Ke haba Josua ame hwa je veto a twelv eü hnyi wanben Joridano, hnyi dok ame tot hnyin li can hnyat bihut, hnyat ödrin e vадren tangen ühinhnykôu: ke ka eling ke ne o but hnyi bong ang. 10 Anyin a haba hnyat bihut, wale hnyat vадren tang, me ödrin e tot hnyi wanben Joridano, ke ne o but adre umo hia waleji a hûna Iehova kö Josua he ka ha ka tavat, helâ me Mose ame hûna kö Josua: ke haba tavat adre me mweimwei me hanyâüâ. 11 Ke a hia but tavat hia hanyâüâ, me ame hanyâüâ tang anyi Iehova, me tavat bihut minya unyin tavat. 12 Ke ame tha he me je omjehen vat hnyi hnyimakan lakon Isaraela laku Reubena, me laku Gada, me hafny tribu anyi Manase, helâji me Mose ame ha ködra: 13 Ame ne fâte thauzan adre hia but penapena hnân vat adre me hanyâüâ hnyi hnyimakö Iehova, he ka vat, ka hnyi je dok ae tha hon hnyi Jeriko. 14 Ke haba hnyi bong eling Iehova ame oganö Josua hnyi hnyimakan at Isaraela hia thithö; m' adre me ouden e helâ me hnödrin hna outö Mose hnyi ta je bonginy hia anyin möt. 15 Ke Iehova ame ha kö Josua, ka habe, 16 Hunâ thö ka tavat bihut, hnyat ödrin e vадren tangen ohnatho, he ka ölö thö üheny Joridano. 17 Anyin a wale Josua ame hûna ka tavat bihut, ka habe, ölö thö üheny hnyi Joridano. 18 Ke e ka ölö thö tavat bihut hnyat ödrin e vадren tangen ühinhnykôu anyi Iehova ünyi hnyi wanben Joridano, ke ame uto dok ae mada hnen hnyeücan hnyat bihut, me ame khutu hmetu but köien Joridano ka hnyi hnen, me öliâ je baten helâ me et. 19 Ke ame ölö tavat üheny hnyi Joridano hnyi bong a teniny tehi a bân, me hunuma hnyi Gilegala hnyi ke keihen e deiöiny Jeriko. 20

Ke haba je veto a twelv wale ödrin e hom ünyi hnyi Joridano, Josua ame khon hnyi Gilegala. 21 Ke e ame ha ka lakon Isaraela, ka habe, E ka he lakubun ka hnö je lakamödrin nyiele, ka habe, Hnân eü je veto ang? 22 me öbun e he ka omanená ka lakubun, ka habe, Adre hanyâüâ jem Joridano eang hnen at Isaraela hnyi kânâ ae mada. 23 Anyin a Iehova Khongubun ame ohmö köien Joridano hnyi hnyimaköbun, ke ne e but öbun e hia but hanyâüâ, helâ me Iehova Khongubun ame ânyâ ka hnyi Köiö ae Dra, waleji e ame ohmö hnyi hnyimakötin ke ne o but ötin e hia but he hanyâüâ; 24 me me khana hnen tavat hia thithö eang hmelen ge hnyamö Iehova, ae hwege; m' adre, me he ka outö Iehova Khongubun nyiele balua.

HNYIMAKAN 5.

KE haba je tuhan hia at Amora a ödrin hoton Joridano ke e jio, me je tuhan hia at Kanana hnyi hobat köiö, me ödrin e löng a Iehova ame hia but ohmö köien Joridano hnyi hnyimakan lakon Isaraela ke ne o but ate me hanyâüâ, me ame gâ udrin, ke ba hmetu hwege eü hnyi je hnyekudrin ge lakon Isaraela.

2 Ke Iehova ame ha kö Josua hnyi ün eling, ka habe, Änyâ thö je watagi out m' adre me he ka olo peritomonâ lakon Isaraela. 3 Ke Josua ame ânyâ je watagi out me peritomonâ lakon Isaraela hnyi Gibeaaalota. 4 Ke walang can Josua ame peritomonâ: Haba tavat hia adre me o üheny Aigupito, a obaga hia adre me hnyi vat, me adre me mokcu hnyi hnyebuba eü hnyi gethen, hnyi ühedra Aigupito. 5 Anyin adre peritomonâ tavat hia ühedra Aigupito: ke so bi adre tiga ca peritomonâ tavat hia waleji adre hnokoâ hnyi hnyebuba eü hnyi gethen hnyi ühedra Aigupito. 6 Anyin a haba lakon Isaraela adre me vheno hnyebuba fâte je huna, ke ne o but ame hia tavat adre hnyi vat ühedra Aigupito, anyin adre me ca löng hoton hofuc ho Iehova: me Iehova ame khemanyin ködra a g' ame ca he ka omanená ködra hnyei, waleji a khemanyin Iehova ka lakamödra he ka ham köta, wale hnyei ame di ge debai me hani. 7 Ke haba Josua ame peritomonâ lakudra wale tavat adre hnokoâ me hwabödra: anyin adre tiga ca hia but peritomonâ ödra, anyin adre ca peritomonâ ödra eü hnyi gethen. 8 Ke a hia but peritomonâ tavat

hia thithö, me adre me laba hnyi je hnödra hnyi je hna hunuma ke ne o but ame metu but. 9 Ke haba Iehova ame ha kö Josua, ka habe, Oge hia but ohia hnyi bong ang únyi hnân ohmehma unyibun úheny Aigupito. Anyin a wale adre me hwenyi ien dok eling Gilegala ke ne o but hnyi bong ang

10 Ke ame hunuma hnyi Gilegala lakon Isaraela; ke ödrin e ányâ paseka hnyi bong a fortininy tehi hnyi sahad, hnyi dok ae tha hon hnyi Jeriko. 11 Ke haba nyi ödrin e han jeúiny kânâ hwaban paseka, je ong areto adre ca levenâ bi, me hwit adre le, hnyi bong a ka e. 12 Ke nyi, e ba hmetu mana hwaban hnödrin hna han jeúiny hnyei; ke ba hmetu bi mana ka lakon Isaraela; ke ödrin e han wan hnyei Kanana hnyi huna eling.

13 Ke e Josua hnyi Jeriko, me e ame bwele me wâ, ke wâ bi, ame tot cicö e at ame tot me hele vat adre oc hnyi hnyamen: ke haba Josua ame he kâu me ha kâu, ka habe, U me tha hiâm möhmun, hawa, me je iwahnaihmióny möhmun? 14 Ke e ame thu, ka habe, E ba, anyin a oge o hnân taben je utbavat anyi Iehova. Ke Josua ame ta ju hnyikânâi, me nom ju, me ha kâu, ka habe, Ieú hofuc hwan tuhök ka athnyabainy? 15 Ke haba taben je utbavat anyi Iehova, ame ha kö Josua, ka habe, Uny jut tangen hnyeúcam únyi hnyi li cam, anyin ae kap utkânâ e u me tot hnyin. Ke Josua ame ányâ helâe.

HNYIMAKAM 6.

(**K**E ame ti thelöng hwegiâ Jeriko can lakon Isaraela: e ba at ame didrut, ke ba at ame didrö.) 2 Ke Iehova ame ha kö Josua, ka habe, Wâ bi, oge hia but ham ka hnyi hnyamâm Jeriko, me thaininy, me je taben tavat ae hwege. 3 Ke öbun e he, tavat a hnyi vat hia, ka igigilö taun, me okhaca he igigilö taun. U me he ka ányâ helâe hnyi je bong a siks. 4 Ke ame he tavat bihut a seven ka hom tilâ je trutruiny jubeli hnyi hnyimakan tang: ke haba hnyi bong a seveniny, hamöbun he ka oseven he igigilö taun, ke ame he tavat bihut ka tûâ tilâ je trutru. 5 Ke eka beú but hnatûâ trutruiny jubeli, ke öbun ka löng ut ifuciny trutru me ame he tavat ka kuku hwege: me ame he ka ü but haginy taun adre up veten, me me ve ölö thö tavat hia thithö hnyi hnyimaködra. 6 Ke haba Josua nöku

Nuna ame hawâ tavat bihut, me ha ködra, ka habe, Hom dö tangen úhihinyköu, ke hamen hnyat bihut a seven ka hom tilâ je trutruiny jubeli a seven hnyi hnyimakan tang anyi Iehova. 7 Ke e ame ha ka tavat, ka habe, He th' öbun me igigilö taun, ke bân hnyat adre hom omjehen vat, hnyi hnyimakan tang anyi Iehova. 8 Ke a hia but Josua ha ka tavat, me ame he hnyat bihut a seven ke ödrin e hom tilâ je trutruiny jubeli a seven hnyi hnyimakö Iehova, me tûö trutru tot: k' ame he hotudrin tangen úhihinyköu anyi Iehova. 9 Ke ame bân tavat adre me hom omjehen vat hnyi hnyimakan hnyat bihut ödrin e tûâ je trutru, ke ame he hoton tang obiny bunyen, ke adre me tûö trutru tot. 10 Ke Josua ame ha ka tavat, ka habe, Ca he öbun ka hongot, k' adre me ca he ka löng ifucibun, ke so ame ca o ke ong hofuc únyi hnyi hnyimöbun, ke ne o but bong oge me he ka kun' öbun ka kuku: me waleling öbun e he ka kuku. 11 Me e ame kunâ he ka igigilö taun ge tang anyi Iehova, k' adre me okhaca igigilö; me adre me hmetu ka hnyi hna hunuma, me mokut eling.

12 Ke Josua ame vesâ hnyi hnyomakatu, kehnyat bihut ödrin e hom tang anyi Iehova. 13 Ke haba hnyat bihut a seven, me ödrin e hom tilâ je trutruiny jubeli a seven hnyi hnyimakan tang anyi Iehova, ödrin e he bala me tûö trutru tot, k' ame bân tavat adre hom omjehen vat; k' ame he hoton tang anyi Iehova obiny bunyen, me tûö trutru tot. 14 Ke hnyi bong a loiny ödrin e okaca he igigilö taun, me hmetu ka hnyi hna hunuma: ke adre me ányâ helâe hnyi je bong a siks. 15 Ke haba hnyi bong a seveniny me adre me vesâ hnyi okubelit me he igigilö taun helâ me hwakecin úhedra, ke ne o but oseveniny: ke haba hnyi bong thibi eling me adre me oseven he igigilö taun. 16 Ke haba hnyi úen a seveniny, k' ame tûö trutru hnyat bihut, me haba Josua ame ha ka hnyat bihut, ka habe, Kuku thö; anyin a hia but Iehova ham köbun taun. 17 K' adre me he ka ke ip taun, me ta je únyi hia eú hnyin hobi kö Iehova: ke Rahaba thiju momo hnyi gethen a g' ame he ka möt, e me hnyat hia thithö unyin hnyi uma, anyin a e ame ikhâlâ li metâ ötin e kunâ. 18 Ke öbun e he ka tu' öbun bi ge ta je omjeú ae kap; wâ öbun nye hia but ke ip, me hom únyi adre ke ip; me ham hnaúhangö ka lap anyin at Isaraela hia, me okongoâ e. 19 Ke

haba je sileva hia me gol, me je kaia bras me fao, adre me okabâ kö Iehova : adre me he ka oâ ka hnyi tang omjehe Iehova. 20 Ke ame kuku tavat, me adre tûâ je trutru : ke ame löng hnen tavat ifucin trutru, me ame kuku hwege tavat göranyai, me ame ü but hna up veto, me ame ve ölö thö tavat ka hnyi taun cici ödrin, me ödrin e hügünâ taun. 21 Me ödrin e ti ohia ta je únyi hia hnyi taun, je бага me momo, me wanakat, me hingat, me bolok, me mamoe, me asina, ge hele vat. 22 Ke Josua ame ha ka li at ödre ecmâkâ hnyei, ka habe, He th' öbu ka hnyi uma umen momo hnyi gethen, me hom but momo mödrin hia thithö a tha ödrin më, helâ me hnöbu hna khemanyin kâu. 23 Me ame didrö li hidröu li at ecmak, me hum Rahaba kâû, me kamen me hinyen, me je liamekeiny më, mödrin hia a tha ödrin më, ke ödrü me hom kâû anyin lap hia ; me hn' ödrin ka hnyi hoton hna hunuma anyin at Isaraela. 24 Ke ödrin e thong taun ge meic, me ta je únyi hia eü hnyin : ke haba sileva me gol, me bras, me fao, ödrin e ip hnyi tang omjeü hnyi uma umö Iehova. 25 Ke Josua ame omeli Rahaba momo hnyi gethen, me lap anyin kamen, mödrin hia a tha ödrin më ; ke e ame laba hnyi Isaraela ke ne o but hnyi bong ang ; anyin a e ame ikhâlâ li metâ waleji Josua ame kunâ he ka ecmâkâ Jeriko. 26 Ke haba Josua ame ha hwegiâ ködra hnyi úen eling. ka habe, Hnaúhangö hnyi hnyimakö Iehova at ame he ka tot me op hmeto taun eang Jeriko : e ame he ka bi taben e ge imekeiny nokon a atö, me otílâ je homagöuleny ge imekeiny nokon a wakeiat hmönyin. 27 Ke tha Iehova me Josua, me ame lung hnyi hnyei hia.

HNYIMAKAN 7.

KE kong hwakecin lakon Isaraela hnyi únyi adre nyiboâ : anyin a haba Akana nöku Karemi, nöku Zabedi, nöku Zera, únyi hnyi tribu Juda, ame hom ke je únyi adre nyiboâ ; me ame ubâhlâ hmo-nyin anyi Iehova ka lakon Isaraela.

2 Ke haba Josua ame kunâ ke je hnyat úheny Jeriko Ai ai, wale ae hakekeny Bethaven, hnyi ke keihen Beth-ela ke deiö, me ha ködra, ka habe, He th' öbun me ecmâkâ hnyei. Me ame he je hnyat me ecmâkâ Ai. 3 Ke ödrin e hmetu kö Josua me ha kâu, ka habe, U ma ca kunâ tavat hia thithö he ka he, ke so ame ne lo li thauzan tavat, ame ne

kun ta thauzan he ka kot Ai ; ke ca he ka ohuliwan tavat hia thithö, anyin a ödrin wakhalet. 4 Waleling me ame he kâ e helâ me kun ta thauzan tavat : ke ödrin e kec ge at Ai. 5 Ke haba at Ai ödrin e kot thöte siks ta hnyat gadrin : ke ödrin e hnu ödrin hwân hnyi homagöule ke ne o but ka hnyi Sebarima me kuc ödrin hnyi hna utut : me ame oköö je hnyekon tavat me me helâ me köiö. 6 Ke haba Josua ame kia anyin je úkhaü, me ta but hnyikânâi hnyi huyimakan tang anyi Iehova ke ne o but sahac, a e me wahingatiny Isaraela ; ke ödrin e ip dröu hon je bödrin. 7 Ke Josua ame ha, ka habe, Ekölö Than Iehova, ieu gam u je hom tavat eang he ka hanyâtâ Joridano, m' u me he ka hn' öhmun ka hnyi hnyamen at Amora, he ka ohí' öhmun? e na sekuhmun he ka laba hnyi ke kheihe Joridano e deiö! 8 Than lö oge me he ka ha ieu, anyin a hia but lakon Isaraela wia judrin ka ta je iwahnaihmiöny mödrin! 9 Anyin ame he at Kanana ka löng, me ödrin hia tavat adre me labâ hnyei, m' adre me he ka igigili öhmun me subâ degecâ iöhmun únyi eang hmelen : ke ieu u me he ka ányâ hobi kâu iâm ae gan? 10 Ke Iehova ame ha kö Josua, ka habe, Höhöi thö ; ieu gam u me mokut hnyimâm hnyikânâi belâe? 11 E kong hwakecin at Isaraela ; anyin a ödrin e hia but hanyâtâ anyik úhinhnyköu waleji oge húna ködrin : ke ödrin e hia but hom únyi adre nyiboâ me venöu me iyawö minya, me ödrin e hia but ip e me je omjedehrin. 12 Anyin a wale e ca khana lakon Isaraela he ka tot hnyi hnyimakan je iwahnaihmiöny mödrin, ödrin e wia je judrin ka je iwahnaihmiöny mödrin, anyin a ödrin e hnaúhangö but : ke oge me ca he hmetu ka tha e möbun, öbun e ne ca degec únyi adre hake ip unyibun. 13 Höhöi thö me okabâ thö tavat, me ha, ka habe, Okabi öbun dö hobi kâu nyi : anyin a walang ame ha Iehova Khongu Isaraela, ka habe, Isaraela lö, e hu únyi adre nyiboâ unyâm : ke ca khanö u he ka tot hnyi hnyimakan je iwahnaihmiöny möu, ke ne o but öbun e hom degecâ únyi adre hake ip unyibun. 14 Ke adre me he ka hum öbun nyi, hoton anyibun je tribu ; ke haba tribu ame he Iehova ka kú ame he ka he jem hoton je lap ; ke haba lap ame he Iehova ka kú, me ame he ka he jem hoton je uma, ke haba uma ame he Iehova ka kú me ame he ka he jem ke at me ke at. 15 Ke haba at adre me hom ke e unyin

únyi adre hake ip, me adre me he ka thong degecá e ge meic, e me anyin ta je únyi hia: anyin a e ame hia but hanyátú úhihi-nykú anyi Iehova, ke can e ame hwen monu hnyi Isaraela.

16 Ke haba Josua ame vesá hnyi hnyomakatu, me hom hakekenyá at Isaraela hoton anyidrin je tribu; me adre me kú tribu anyi Juda: 17 ke e ame hom lap anyi Juda; me e ame hom lap anyin at Zera; me e ame hom lap anyin at Zera ke at me ke at; ke adre me kú Zabedi; 18 ke e ame hom umen uma ke at me ke at; me ame kú Akana nöku Karemi, nöku Zabedi, nöku Zera, únyi hnyi tribu Juda. 19 Ke haba Josua ame ha kö Akana, ka habe, Nökuk lö, ö u na he ka oganö Iehova Khongon at Isaraela, me haimemená káu; ke ha könja walang ang únyi u je hia but ányá; ca he ka ikhálá gak. 20 Ke haba Akana ame thu kö Josua, ka habe, E hnathu e kong hwakecik hnyi hnyimakö Iehova Khongon at Isaraela, ke oge hia but ányá heláng me heláng: 21 haba hnyi úen oge me wá únyi hnyi je únyi adre húgúná ke úkhatúny Sinara ae so, ke lo li haded je sekel sileva, ke ong gol a fite je sekel, me oge me behnyekon me hom ta je únyi e; ke wá bi adre ikhálá hnyi wanben umök uma mano hnyi káná, ke eú hmelen e je sileva. 22 Ke Josua ame kuná tavat, ke ödrin e wadring ka hnyi uma mano; ke wá bi adre hia but ikhálá hnyi umen uma mano, ke eú hnyi hmelen e je sileva. 23 Ke ödrin e hom ta je ányi e únyi hnyi uma mano, me hom kö Josua, me lakon Isaraela hia; ke ödrin e ip hnyikánái hnyi hnyimakö Iehova. 24 Ke haba Josua me lakon Isaraela hia, adre me hum Akana, nöku Zera, me sileva, me úkhaú, me ong gol, me lakon бага me hlu, me haleny je bolok, me haleny je mamoe, me umen uma mano, me anyin ta je únyi hia thithö, ke adre me hum odrin ka hnyi hnyigöulen bucen Akora. 25 Ke haba Josua ame ha, ka habe, Ieú gam u me oveci öbmun? ame he Iehova ka oveci u hnyi bong ang. Me haba at Isaraela hia adre me lúá e ge veto; ke ödrin e thong degeci ödrin ge meic, me lu' ödrin ge veto. 26 Me adre me khon gáná je veto ethö hon, a wale bi e ke ne o but hnyi bong ang; me haba Iehova ame hwiö únyi hnyi anyin hmönyin ae hwege. Anyin a wale adre me hwenyi ien dok eling, me, Hnyigöulen bucen Akora ke ne o but hnyi bong ang.

HNYIMAKAN 8.

KE haba Iehova ame ha kö Josua, ka habe, Ca ot bi me öbubuny: ke tha hom dö tavat vat hia thithö möu, ke höhöi thö me he Ai ai: wá bi oge hia but ham ka hnyi hnyamám thaniny Ai, me lakeiny, me anyin taun, me iny hnyei: 2 ke u me he ka ányá ka Ai me thaniny, helá me hnám hna ányá ka Jeriko me thaniny: ke so je omjeúny me je menoiny öbun e he ka hom hobi köbun bi: u me he ka ip mokut ke je aten vat hoton e. 3 Me ame höhöi thö Josua me tavat vat hia thithö, he ka he Ai ai: ke Josua ame úca thöte thauzan tavat, je hnyat ae hwege vat, me kun' ödrin hnyi hnyinghet. 4 Ke e ame húna ködrin, ka habe, Wá bi, öbun e he ka khöu mokut hnyi taun, wale hoton taun: ca úsá-kátü me taun, ke öbun e he hia thithö ka laba penapena: 5 ke haba inya, me tavat hia thithö unyik ame he ka he hakekenyá taun: ke ödrin ka he ka didrut köhmun he ka vat helá me a bán, öhmun e he ka kácá anyidrin vat: 6 ke ödrin e he ka hnu hotu-hmun ke ne o but öhmun e hia but lili ödrin úheny hnyi taun; anyin ödrin e he ka ha, ka habe, Ödrin e kec gatin, helá me vat a bán; me öhmun e he ka kec hnyi hnyimaködrin: 7 ke öbun e he ka utut únyi hnyi hna khöu mokut, me húgúná taun: anyin ame he Iehova Khongubun ka hna e ka hnyi hnyamöbun. 8 Ke öbun ka hia but húgúná taun, öbun e he ka thöng degecá e ge meic; öbun e he ka ányá hoton hofuc ho Iehova: wá bi, oge hia but húna köbun. 9 Ke Josua ame kun' ödrin: ke ödrin e he ka hnyi dok hnán khöu mokut hnyin, me laba wanben Bethela me Ai, hnyi ke keihen e jio Ai: ke Josua ame mokut hnyi lit eling unyin tavat.

10 Ke Josua ame vesá hnyi hnyomakatu, me úkhaacaköuá tavat, me he hnyi hnyimakan tavat Ai ai e me je hingatiny at Isaraela. 11 Ke ame he tavat hia thithö wale vat unyin ka hakekenyá, me o hnyi hnyimakan taun, me hunuma hnyi ke keiben Ai ka hnyi hwadrö: ke e hu hnyigöulen bucen hnyi wanbödrin me Ai. 12 Ke e ame hom helá me faiv thauzan tavat me ip duóngi ödrin hnyi wanben Bethela me Ai, hnyi ke keihen taun ke e jio. 13 Waleling, adre me ip tavat, a utbat hia hnyi ke keihen taun ka hnyi hwadrö, ke haba tavat adre me ip duóngá me ödrin e laba hnyi ke

keihen taun ke e jio : ke haba Josua ame he hnyi hnyigöulen bucen hnyi lit eling. 14 Ke a wâ e than Ai, me ödrin e mwei-mwei me vesâ, ke ame utut aten taun ka at Isaraela he ka vat, a e me lakeiny hia, hnyi üen adre thu, ka hnyi ke dok cicö hnyebuba ; ke ca khana a g' ame hu tavat adre me mokut düong kâu hnyi hoton taun. 15 Ke haba Josua me at Isaraela hia thithö me adre me kec iyawö hnyi hnyimäködrin, ke adre me kec hnyi gethen üheny hnyi hnyebuba. 16 Ke adre me hawâ tavat hia thithö hnyi taun he ka hnu ödra ; ke adre me hnu Josua, me adre me ok ut üheny hnyi taun. 17 Ke ba at biju hnyi Ai me Bethela a ca hnyi he hoton at Isaraela ; ke adre me hna taun adre khöng, me hnu at Isaraela. 18 Ke Iehova ame ha kö Josua, ka habe, Inâ but ö hnyi hnyamâm hon Ai ; anyin a oge me he ka hain e köu. Me Josua ame inâ ö hnyi hnyamen hon taun. 19 Me ame ie köüö mokut ünyi hnyi hnödrin hnyi üen e ame inâ hnyamen, k' odrin e wadring me dit ka hnyi taun, me hügünâ ; ke ödrin e logot he ka thong taun ge meic. 20 Ke ame hwiö at Ai me wâ, k' adre me bwele, me wâ bi, ame sâ hnyi drany ai hainy taun, ke ba man gadra he ka kec ka hnyi ke keihen e me ke keihen ang : k' ame hmetu tavat kec hnyebuba ai ka tavat ühnüñü. 21 Ke haba hnyi üen Josua ame wâ me at Isaraela hia a g' ame hia but hügünâ taun hnen mokut, ke ame sâ göranyai hainy taun, me adre me hmetu me kot at Ai. 22 Ke haba ke keihen tavat ödrin e didrut ködrin üheny hnyi taun ; me ödrin bi hnyi wanben at Isaraela, keihen hnyi ke keihen, ke keihen hnyi ke keihen : ke ödrin e kuc ödrin me ame ba but thelidrin me at ame kec möt. 23 Ke ödrin e hom melö thaniny Ai, me hom e kö Josua. 24 Ke a hia but at Isaraela kot at Ai hnyi hnyei, hnyi hnyebuba wale adre me hnu ödra hnyin, ke adre me ta hia ge hele vat, me oh' ödra, me ame hmetu Ai ai at Isaraela hia thithö, me kot e ge hele vat. 25 Ke ödra, twelv thauzan tavat hia obaga me omomo a're ta hnyi bong eling, wale aten Ai hia thithö. 26 Anyin a Josua ame ca thu benyin ge hna inâ ö, ke ne o but adre hia but ohia at Ai hia thithö. 27 Ke so bi haba at Isaraela adre me hom hobi ködra bi je meno me tang omjeüiny hnyei eling, helâ me hofuc ho Iehova e ame hûna kö Josua. 28 Me Josua ame thong degecâ Ai, me wia e hnân

ve ta ünyi nyiele balua ; me oba wan ke ne o but hnyi bong ang. 29 Ke e ame uhno thaniny Ai hon üö ke ne o but hnyi sahaç : ke hnyi üen ame didrut seünö Josua ame ükhünöng he ka hom but huyikânâi unyin ünyi hnyi üö, me khûâ e hnyi homagöuleny taun, me khon veten hon e ae gan hmâ, ke ne o but hnyi bong ang.

30 Ke haba Josua ame otillâ taben hut kö Iehova, Khongon at Isaraela, hnyi bucen Ebala, 31 helâji me Mose athnyabai Iehova ame hûna ka at Isaraela, helâ me hna sihnalimen hnyi tusiny hnanyibu anyi Mose, ka habe, Taben hut je veto ae bekhöt, adre ca inâ göranyai utfao hon : ke ödrin e hudo hon e je hudiny leü kö Iehova, me hudo je hudiny úsoköu. 32 Ke e ame sihnalimen hon je veto eling hna oc hnanyibu anyi Mose, waleji e ame sihnalimen hnyi hnyimakan lakon Isaraela. 33 Ke haba at Isaraela hia, me wahingtidrin, me anyidrin je taben, me anyidrin je hnyat owisa, ödrin e üttilen hnyi li baten tang hnyi hnyimakan hnyat bihut a at Levi, wale hnyat ödrin e vadren tangen ühihi-nyköu anyi Iehova, a je atkanyua tha ödrin me tavat adre hnokoâ hnyi hnyei ; haba ke keihen a hafiny adre me tot cicö bucen Gerizim, ke ke hafiny cicö bucen Ebala ; helâji me Mose a athnyabai Iehova ame hûna, m' adre me he ka bödrin ka ha hnahicâ hnyei Isaraela. 34 Ke hwaban e me e ame aü hofuciny hnanyibu hia, wale hnahic me hnaühangö, helâ ma hna sihnalimen hia hnyi tusiny hnanyibu. 35 E ba ke ong hofuc a hûna Mose a ga ca aü bi Josua hnyi hnyimakan ükhacaköu anyin at Isaraela hia thithö, a tha ödra me omomo, me tavat ae ühnyükong, me je atkanyua hnyat adre imetenyimwi mödra.

HNYIMAKAN 9.

KE haba je than hia ödrin e löng, wal' ödrin hnyi ke keihen Joridano e jio hnyi je bucen me hnyei ae ca hut, me hnyi hobat köien köiö ae gan hia cicö Iebanona, wale at Heth, me Amora, me Kanana, me Perizi, me Hivi, me Jebusi ; 2 me ödrin e ükhacaköu he ka tot metâ kö Josua me at Isaraela hnyi hnyok a khaca.

3 Ke a löng at Gibeona ünyi a ânyâ Josua ka Jeriko me Ai, 4 me ödrin e huliwa iyawö, k' ödrin e úcúcúbongoâ hnyat metâ, me hom je tang ae bobot hon haledrin je asina, me je tangen waina ae bobot ut,

ke khekke, ke adre ca ; 5 ke bobot ut me hna tibet hmetu je tangen hnyeúcadrin, k' ödrin e khavâ je úkhaú ae bobot ut ; ke meleca but me om but jeúiny kamejdrin hia. 6 Me ödrin e he kö Josua hnyi hna hunuma e Gilegala, k' ödrin e ha kâu, me at Isaraela, ha habe, Çhehmun hnyi hnyeí ae sâkâú : ke walang ang e so öbun e ânyâ úhíhínykôu möhmun. 7 Ke haba at Isaraela adre me ha ka at Hivi, ka habe, Hawa la, öbun e ne tha laba unyihmun, ke öhmun e he ka kâmâu ka úhíhínykôu möbun? 8 Me ödrin e ha kö Josua, ka habe, Öhmun lathnyabaem. Ke haingö Josua ködrin, ka habe, Öbun ie je hnyat? k' öbun je hnyat ua? 9 Me ödrin e ha kâu, ka habe, Çhehmun hnyi hnyeí ae ti sâkâú lathnyabaem can iö Iehova Khongom : anyin a öhmun e hia but löng úlunginy, me hnen hna ânyâ hia hnyi Aigupito, 10 me je únyi hia e ame ânyâ ka li thaniny at Amora, wale hoton Joridano, kö Sihona than Hesebona, me Oga than Basana hnyi Aseterota. 11 Ke ame ha köhmun wahingatihmun, mödrin hia aten ihmun, ka habe, Bi kamejibun hobi kâu he, me he thö me úkhanö mödra, me ha ködra, ka habe, Öhmun lathnyabai-bun : ke walang ang e so öbun e ânyâ úhíhínykôu möhmun. 12 Waleú kamejihmun öhmun e hom ke tiga kabwa únyi hnyi umöhmun je uma hnyi bong öhmun e to-drö hnyin he ka he köbun ; ke walang ang, wâ bi, e meleca thö me om but : 13 me je tangen waina eang a teb únyi öhmun e ounöngötâ ; ke wâ bi, e khekke but : ke bobot ut je khaúhmun eang me je tangen hnyeúcahmun únyi hnyi gethen ae sâkâú. 14 Me ame köp ödrin hnen tavat ge je kamejdrin, ke ödrin e ca hnö unyi Iehova. 15 Ke haba Josua ame ânyâ úsoköu mödrin, me úhíhínykôu mödrin, me ödrin e möt : me ame khemanyin ködrin hnen je taben úkhaçaköu. 16 Ke hnyi kun ta bong hwaban hna úhíhínykôu mödrin, ödrin e löng a tavat ae hakekeny ködrin, me tavat adre me laba unyidrin. 17 Ke haba lakon Isaraela ödrin e he me o hnyi anyidrin je taun hnyi bong a kuniny. Ke waleú anyidrin je taun, me Gibeona, me Kefira, me Berota, me Kiriatha-jarim. 18 Ke a ca kuc ödrin hnen lakon Isaraela, anyin a hia but khemanyin ködrin hnen je taben úkhaçaköu, me haiö Iehova Khongu Isaraela. Ke ame ulidró je taben hnen úkhaçaköu hia. 19 Ke ame ha hnen je taben hia ka úkhaçaköu hia, ka habe, Öhmun e hia but

khemanyin ködrin me haiö Iehova Khongu Isaraela : anyin a wale, e ca khan' öhmun he ka kal' ödrin. 20 Walang únyi ötin e he ka ânyâ ködrin, me omeli ödrin ; wâ e nye takú öta ge hmönyin, can hnöta hna khemanyin ködrin. 21 Me ame ha ködra je taben, ka habe, Hn' ödrin ju he ka möt, m' ödrin e bi hnyat höcö me hnyat söú köiö hobi kâu úkhaçaköu hia, helâ me je taben ame ha ködrin. 22 Me Josua ame haw' ödrin, me ha ködrin, ka habe, Ieú gabun öbun e iyaw' öhmun, ke ha, ka habe, Öhmun úsâkâúö hmönyin möbun ; ke öbun e tha laba bi möhmun? 23 Ke walang ang e hu gabun úhangö, ke ba ke at gabun adre me ca he ka thaluâ he ka höcö, me söú köiö hobi kâu uma umen Khonguk. 24 Ke ödrin e thu kö Josua, ka habe, Adre me ha hnathoâ ka lathnyabaem a Iehova Khongom ame hûna kö Mose a athnyabainy he ka ham köbun hnyeí hia thithö, me he ka ohia aten hnyeí hnyi hnyimaköbun, anyin a wale öhmun e ot gan hmâ me bemöt gabun, waleling m' öhmun e ânyâ únyi e. 25 Ke haba walang ang wâ bi öhmun ang hnyi hnyâmâm : ânyâ thö köhmun helâ me u je únyküme so me wisa he ka ânyâ. 26 Me e ame ânyâ helâe ködrin, me omeli ödrin únyi hnyi hnyamen lakon Isaraela, m' adre me ca hling' ödrin. 27 Ke haba Josua ame wi' ödrin hnyi bong eling mödrin e he ka tavat höcö me seköiö hobi kâu úkhaçaköu, me hobi kâu taben lut kö Iehova, ke ne o but hnyi bong ang, hnyi dok e ame ke ka úca.

HNYIMAKAN 10.

KE Adoni-zedeka thaniny Jerusalema ame löng a ga hia but Josua húgúnâ Ai, ke ohia e ; ke ame ânya ka Ai me thaniny helâji me hnen hna ânyâ ka Jeriko me thaniny ; ke a hia but tavat aten Gibeona úsoköu me at Isaraela m' ödrin e tha laba unyidra ; 2 me ödrin e ot gan hmâ, anyin a haba Gibeona me wale taun ae gan hmâ, helâ me ke taun ame labâ than, ke beönu e hon Ai, ke e hwege obagainy hia thithö. 3 Anyin a wale Adoni-zedeka than Jerusalema ame úkhúnöng kö Hoham thaniny Heberona, me Pirama thaniny Jamuth, me Jafia thaniny Lakisa, me Debira thaniny Egelona, he ka ha, ka habe, 4 Ai öbun könya, me hadruö nya, me ötin e he ka kot Gibeona : anyin a e ame hia but úsoköu me Josua me lakon Isaraela.

5 Anyin a wale ame úkacakôu thö je thaniny Amora a faiv, wale thaniny Jerusalema, me thaniny Heberona, me thaniny Jamuth, me thaniny Lakisa, me thaniny Egelona, me he thö, ödra me anyidra je utavat hia thithö, me hunuma cicö Gibeona, me vat më. 6 Ke haba at Gibeona ödrin e úkhünöng kö Josua hnyi hna hunuma Gilegala, me ha, ka habe, Ca he ka hn' öhmun lathnyabaem; ie he thö jem köhmun, me omeli öhmun, me hadru' öhmun: anyin a hia but úkacakôu köhmun je thaniny hia thithö at Amora, tavat ödrin e laba hnyi je bucen. 7 Me Josua ame he úheny Gilegala, e me je aten vat hia thithö, me je taben tavat ae hwege hia. 8 Ke haba Iehova ame ha kö Josua, ka habe, Ca ot gadra: anyin oge hia but hn' ödra ka hnyi li hnyamâm; ke ame ca he ke at gadra ka tot hnyi hnyimákân. 9 Anyin a wale, Josua ame o outhmoki ödra; e ame he úheny Gilegala hnyi lit ae bekhöt. 10 Ke haba Iehova ame ohmaki ödra hnyi hnyimakan at Isaraela, me kuc ödra, ke gan hmâ hna kuc ödra hnyi Gibeona, me hnu ödra til' ödra hnyi gethen ame ölö Bethe-horona ai, me kuc ödra ke ne o but Azeka, me Makeda. 11 Ke adre ödrin me kec ge at Isaraela ke adre me tiga he hnyi hna utut Bethe-horona, me Iehova ame khûâ hudrin je veto ae gan únyi hnyi drany ke ne o but Azeka, me adre me mokcu: ke se hia tavat a mokcu ge je veto, wale we ae wahma, ke wakhalet thibi haniny lakon Isaraela ge hele vat. 12 Ke Josua ame ha hufoc kö Iehova hnyi bong Iehova ame hna at Amora hnyi hnyimakan lakon Isaraela; ke e ame ha hnyi hnyimakan at Isaraela, ka habe, Seünö lö, todru u hon Gibeona; Me u Tehi hnyi hnyigöulen bucen Aijalona. 13 Me ame todru seünö, ke ame todru tehi, Kene o but hnye ame bi hwaban ka ta je iwahnaihmiony. Hawa, adre ca sihnalimen e hnyi tusi Jasera? Haba seünö ame tot hnyi wanben drany, k' ame ca logot bi he ka dit helâke bong ae bekhöt. 14 Ke ba ke bong helâe ehac ke hwaban e, wale Iehova ame löng ifucin at Iehova a Iehova ame vat hobi kân at Isaraela. 15 Ke haba Josua me at Isaraela hia adre me tha hmetu ka hnyi hna hunuma Gilegala.

16 Ke ame kec je than eling a thabúng me lubaduöng hnyi op e Makeda. 17 Ke adre me thumetu Josua, ka habe, Adre wâ je than a thabúng ödrin e lubaduöng hnyi op e Makeda. 18 Ke Josua ame ha, ka habe, Tetebugo je veto ae gan ka hnyi hnyimen op, ke kunâ tavat he ka tu' ödrin: 19 ke ca bec öbun; hnu je iwahnaihmiony möbun, me kot tavat wale a bilidra; ca hn' ödra bi he ka dit ka hnyi anyidra je taun: anyin a Iehova Khóngubun ame hn' ödra köbun. 20 Ke a um dö kuc ödra Josua me lakon Isaraela, ke gan hmâ hna kuc ödra ke ne o but ame ba but, ke haba kolon ödrin e dit ka hnyi je taun adre up hagin, 21 me ame hmetu tavat hia ka hnyi hna hunuma kö Josua hnyi Makeda, hnyi hnalic: ke ame ca bwebwet bohmen ke at ka lakon Isaraela. 22 Ke Josua ame ha, ka habe, Khöng ut hnyimen op, ke hom jem könya je than eling a thabúng únyi hnyi op. 23 Me adre me ányâ helâe me hom kâu je than eling a thabúng, únyi hnyi op, a than Jerusalema, me than Heberona, me than Jamuth, me than Lakisa, me than Egelona. 24 Ke ödrin e hia but hom kö Josua je than eling a thabúng, me haba Josua ame hawâ at Isaraela hia thithö, me ha ka je taben vat a tha he më, ka habe, Ai öbun jem me uto ju nyin je than eang. Me ödrin e he me uto je nyidrin. 25 Ke haingö Josua ködra, ka habe, Ca ot bi, ke ca öbubuny; hwege thö me hnyok бага but öbun; anyin ame he Iehova ka ányâ helâe ka je iwahnaihmiony hia thithö möbun tavat öbun e vat mödrin. 26 Ke hwaban e Josua ame kuc ödrin me hling' ödrin, me uhni ödrin hon je úö a thabúng: me ödrin e uhni hon je úö ke ne o but sahac. 27 Ke ame he bi seünö ka dit, me haba Josua ame húna, m' adre me hum ödrin hnyikânâi únyi hnyi je úö, me khu' ödrin ka hnyi op, wale ödrin e lubaduöng hnyin, me ip je veto ae gan ka hnyi hnyimen op ke ne o but hnyi bong ang. 28 Ke Josua ame húgúnâ Makeda hnyi bong eling, me kot e ge hele vat, me thaniny e; e ame ti ohí' ödrin me tavat hia thithö hnyin, e ame ca hna bi ke kolon a khaca: ke e ame ányâ ka thaniny Makeda helâ me hnen hna ányâ ka thaniny Jeriko. 29 Ke Josua ame tha he me at Isaraela hia thithö, úheny Makeda, Libena ai, me vat me at Libena: 30 ke Iehova ame hna minya e me thaniny e ka hnyi hnyamen at Isaraela; ke e ame kot e ge hele

vat, me tavat hia thithö hnyin; me ba kolon biju; ke e ame ányâ ka thaniny e, helâ me hnen hna ányâ ka thaniny Jeriko.

31 Ke Josua ame tha he me at Isaraela hia thithö úheny Libena, Lakisa ai, me hunuma cicö e, me vat më: 32 ke Iehova ame hna Lakisa ka hnyi hnyamen at Isaraela, me e ame hügúnâ e hnyi bong a loiny, me kot e ge hele vat, me tavat hia thithö hnyin, helâ me hnen hna ányâ ka Libena.

33 Me ame he but Horema thaniny Gezera he ka hadruâ at Lakisa; ke haba Josua ame kot e me lakeiny ke ne o but ame ba but kolon.

34 Ke Josua ame tha he me at Isaraela hia úheny Lakisa, Egelona ai; me hunuma cicö e, me vat më: 35 ke ödrin e hügúnâ e hnyi bong eling, me kot e ge hele vat, ke e ame ohia tavat hia thithö hnyin hnyi bong eling helâji me hnen hna ányâ hia ka Lakisa.

36 Ke Josua ame tha he me at Isaraela hia thithö úheny Egelona, Heberona ai, me vat më: 37 ke ödrin e hügúnâ e, me kot ge hele vat, me thaniny, me je tauniny hia, me tavat hia hnyin; e ame ca hna but kolon, helâji me hnen hna ányâ hia ka Egelona: ke e ame ti ohia e me tavat hia thithö hnyin.

38 Ke haba Josua ame tha hmetu me at Isaraela hia Debira ai; me vat më: 39 ke e ame hügúnâ e, me thaniny, me je tauniny hia thithö; ke adre me kuc ödrin ge hele vat, me ti ohia tavat hia thithö hnyin; e ame ca hna but ke kolon: helâji me hnen hna ányâ ka Heberona, helâe minya e ame ányâ ka Debira me thaniny; ke helâji me hnen hna ányâ ka Libena me thaniny.

40 Me haba Josua ame kot hnyei hia ae hu buceniny, me hnyi Hwaiöu, me hnyei ae ca hut, me je hwatapkölu, me je thaniny hia thithö; e ba kolon e ame hna: ke e ame ohia ta je únyi hia ae hu homená, helâji me Iehova Khongon at Isaraela ame húna. 41 Ke haba Josua ame kuc ödra hwân Kadesi-banea ke ne o but Gaza, me hnyei hia hnyi Gosena ke ne o Gibeona. 42 Ke haba Josua ame hügúnâ je than eling hia me idrin je hnyei hnyi khaca thibi úen, anyin a Iehova Khongon Isaraela ame vat hobi kâu at Isaraela. 43 Ke haba Josua ame tha hmetu me at Isaraela hia, ka hnyi hna hunuma e Gilegala.

HNYIMAKAM 11.

KE a löng ut Jabin thaniny Hazora, me e ame úkhünöng kö Jobab thaniny Madon, me thaniny Simerona, me thaniny Akesafa, 2 me ka je thaniny hnyi hwadrö, wale hnyei ae hut, me dok ae tha hon hnyi Kinereth ke e hwaiöu, me hnyi hnyei ae ca hut, me je dok ae göranyiny Dora e jio, 3 me tavat Kanana e deiö me jio, me at Amora, me Heth, me Perizi, me at Jebusi hnyi je bucen, me at Hivi hmelen Heremona hnyi hnyei Mizepa. 4 Me adre me he but, ödra me anyidrin je utbavat hia thithö, e se hia tavat, helâ me önyin hobat köiö úseiny, me je hos, me je kariota ae se hia. 5 Ke ame úkbcacöu je than hia thithö eling, me adre me he but me tha hunuma cicö an Meroma, he ka vat me at Isaraela. 6 Ke Iehova ame ha kö Josua, ka habe, Ca he ka out ödra; anyin a nyi hnyi úen a helâng, oge me he ka hn' ödra hia thithö adre hling' ödra, hnyi hnyimakan at Isaraela: u me he ka sö can haledrin je hos, me le anyidrin je kariota ge meic. 7 Ke haba Josua me tavat hia thithö adre me tha o outhmoki ödra hnyi an Meroma, me utut ködra. 8 Ke Iehova ame hn' ödra ka at Isaraela, me adre me kuc ödra, me hnu ödra ke ne o but Zidona ae gan, ke ne o but Miserefo-maim, me hnyigöulen bucen Mizepa e deiö; me adre me kuc ödra ke ne o but ame ba but kolon. 9 Ke Josua ame ányâ ködra helâ me Iehova ame ha kâu: e ame sö can haledrin je hos, me le anyidrin je kariota ge meic.

10 Ke haba Josua ame hmetu hnyi úen eling me hügúnâ Hazora, me hlingâ thaniny ge hele vat: anyin a Hazora me wale ban je dökhü eling hia thithö ehac. 11 Ke adre me kot tavat hia thithö hnyin ge hele vat, adre me tha ohí' ödra: ke ba kolon ame menâ: ke e ame le degecâ Hazora ge meic, 12 Ke haba Josua ame hügúnâ je tauniny je than eling hia thithö, me je thaniny hia, me hling ödrin ge hele vat, me ti ohí' ödra; helâji me Mose athnyabai Iehova ame húna. 13 Ke haba je taun ame tot ethö hon anyidra je utkánâ ae görany, me at Isaraela adre me ca thong degecâ; ke Hazora thibi; Josua ame thong degecâ e. 14 Ke haba ta je omjeú hia hnyi je taun eling me omeno, me lakon Isaraela adre me hom hobi ködrin bi; ke so bi adre me hlingâ tavat hia thithö ge hele vat ke ne o

but ame hi' ödra, ke ba but kolon ame menâ. 15 Helâji me Iehova ame hûna kö Mose a athnyabainy, ke helâe Mose ame hûna kö Josua : me Josua ame ânyâ helâe : e ame ca degec ke únyi hnyi ta je únyi hia a hûna Iehova kö Mose.

16 Ke Josua ame hom hnyei hia eling, a je hnyei ae hut, me je ke keihen ka hnyi hwaiöu hia, me hnyei Gosena hia, me hnyei ae ca hut, me je dok ae tha hon, me hnyei ae hut hnyi Isaraela, me ke keihen e ae ca hut ; 17 hwân hnyi bucen Halaka gethen úheny Seira ke ne o but Baala-gada hnyi hnyigöulen bucen e Lebanona, wale hmelen bucen Heremona : ke e ame hom je than hia me kuc ödrin, me hling' ödrin. 18 Ke Josua ame vat me je than eling hnyi je bong ae se. 19 E ba ke taun ame úsoköu me lakon Isaraela, ke at Hivi thibi adre labâ Gibeona : adre me hûgûnâ hia hnyi vat. 20 Anyin a únyi ga Iehova he ka okhötâ je hnyekudra, m' adre me he ka vat me at Isaraela, me e ame he ka ti ohî' ödra, m' adre me ca he ka betenge gadra, ke so bi m' adre me he ka ohî' ödra, helâji me Iehova ame ha kö Mose.

21 Ke ame o Josua hnyi úen eling, me subâ degecâ at Anaka wal' ödrin hnyi hnyei ae hut, hwân Heberona, me Debira, me Anabi, me hnyei ae hut hia hnyi Juda, me hnyei minya ae hut hia hnyi Isaraela : haba Josua ame ti ohî' ödra me anyidrin je taun. 22 E ba but je at Anaka hnyi hnyei iny lakon Isaraela : ke hake hu kolon thiju bi hnyi Gaza, me Gatha, me Asedoda. 23 Ke helâe Josua ame hom hnyei hia thithö helâ me je hofuc hia thithö a ha Iehova kö Mose ; ke Josua ame ham e ka at Isaraela me idrin, hoton hna khenâ ködrin hnyi anyidrin je tribu. Me ame menâ ju tavat úhedrin hnyi hna vat.

HNyimakan 12.

WALANG li thaniny hnyei a kot ge lakon Isaraela, me hom idrin hnyei hnyi ke keihen Joridano hnyi hna o hnen seúnö, hwân hnyi hnyigöulen bucen e Arenona ke ne o but hnyi bucen Heremona, me dok ae tha hon hia e deiö : 2 Sihona thaniny at Amora, at ame laba Hesebona, at musî hwân Aoera hnyi baten hnyigöulen bucen e Arenona, me taun hnyi wanben e, me ke keihen Gileada a hafiny, ke ne o but hnyi wagewe Jaboka, hnyigöulen je laku Amona ; 3 ke hwân hnyi dok ae tha hon,

ke ne o but hnyi köiö Kinereth, e deiö, ke ne o but hnyi köien dok ae tha hon, wale Köiö ae Hiny, e deiö, gethen úheny Bethjesimoth ; me hnyi hwaiöu hmelen je hwa-tapköluiny Pisega : 4 me hnyigöülö Oga than Basana, hanen kolon tavat ae befî, at ame laba hnyi Aseterötha, me Ederei, 5 me musî hnyi bucen Heremona, me hnyi Saleka, me Basana hia, ke ne o but hnyi hnyigöulen at Gesuri, me at Maaka, me ke keihen a hafiny Gileada, hnyigöülö Sihona thaniny Hesebona. 6 A kuc ödra Mose athnyabai Iehova me je lakon Isaraela : ke haba Mose athnyabai Iehova ame ham e hnân iny at Reubena, me at Gada, me hafiny tribu Manase.

7 Walang je thaniny hnyei a kot Josua me lakon Isaraela hnyi ke keihen Joridano ke e jio, hwân Baala-gada hnyi thopiny Lebanona, ke ne o but hnyi bucen Halaka, gethen ame ölö Seira ai ; ke Josua ame ham e ka je tribuiny at Isaraela hnân idrin hoton hna khenâ ködrin ; 8 hnyi hnyei ae hut, me hnyei ae ca hut me je dok ae tha hon, me je hwatapkölu, me hnyebuba, me hnyi Hwaiöu ; a at Heth, me Amora, me Kanana, me Perizi, me Hivi, me Jebusi : 9 than Jeriko, khaca ; thaniny Ai, wale hakekeny Beth-ela, khaca ; 10 than Jerusalem, khaca ; than Heberona, khaca ; 11 than Jamuth, khaca ; than Lakisa, khaca ; 12 than Egelona, khaca ; than Gezera, khaca ; 13 than Debira, khaca ; than Gederä, khaca ; 14 than Horema, khaca ; than Arada, khaca ; 15 than Libena, khaca ; than Adulama, khaca ; 16 than Makeda, khaca ; than Beth-ela, khaca ; 17 than Tapua, khaca ; than Hefera, khaca ; 18 than Áfeka, khaca ; than Lasarona, khaca ; 19 than Madon, khaca ; than Hazora, khaca ; 20 than Simerona-merona, khaca ; than Akesafa, khaca ; 21 than Tanaka, khaca ; than Megido, khaca ; 22 than Kadesi, khaca ; than Jokeneama hnyi Karamela, khaca ; 23 than Dora hnyi bucen Dora, khaca ; than Goim hnyi Gilegala, khaca ; 24 than Tireza, khaca ; habi je than hia thithö, me ödrin thote wan.

HNyimakan 13.

KE a hingat ut Josua, ke se hia but hunainy ; ke haba Iehova ame ha kâu, ka habe, U je hingat ut, ke se hia hunaiâm, ke se hia biju je hnyei öbun e tiga ca hûgûnâ. 2 Ke walang je hnyei

biju : a hnyei hia iny at Filisiti, me at Gesuri hia ; 3 hwân hnyi Sihora cicö Aigupito, ke ne o but hnyigöulen Ekerona ka hnyi hwadrö, k' adre me aü e, me hnyei iny at Kanana : ödrin thabúng je thaniny at Filisiti ; ke at Gaza me at Asedoda, me at Asekelona, me at Giti, me at Ekerona, 4 me at Avi minya, wale hnyi hwaiöu : hnyei hia iny at Kanana, me Meara hnyei iny at Zidona, ke ne o but Afeka, ke ne o but hnyi hnyigöulen at Amora : 5 me hnyei iny at Gebali, me Lebanona hia, hnyi hna o hnen seünö, hwân hnyi Baala-gada hmelen bucen Heremona ke ne o but hnyi gethen ame didrö ka hnyi Hamath : 6 je aten hia adre me laba hnyi je bucen, hwân Lebanona ke ne o but Miserefa-maim, me at Zidona hia ; oge me he ka ob' ödra hnyi hnyimakan lakon Isaraela : ke so bi hamâm he ka khenâ e hnen uglekôb hnân iny at Isaraela, helâ me hnök hna hûna köu. 7 Ke walang ang u me he ka khenâ hnyei ang ka je tribu a nain, me hafiny tribu Manase me idrin : 8 ke haba e, a tha e me at Reubena me Gada ödrin e hia but kap idrin, wale a ham ködrin Mose hnyi hoton Joridano e deiö, helâji me a ham ködrin Mose athnyabai Iehova ; 9 hwân Aroera, hnyi baten hnyigöulen bucen e Arenona, me taun hnyi wanben e, me hnyei hia ae tha hon hnyi Medeba, ke ne o but Dibona ; 10 me je taun hia anyi Sihona than Amora, at ame musi hnyi Hesebona, ke ne o but hnyigöulen je laku Amona ; 11 me Gileada, me hnyigöulen at Gesuri, me at Maaka, me bucen Heremona hia, me Basana hia ke ne o but Saleka ; 12 me dökhu hia dökhu Oga hnyi Basana, at ame musi hnyi Aseterotha, me Ederei (wale ke je kolon tavat ae beü) ; anyin a Mose ame kuc ödrin me ob' ödrin dut. 13 Ke haba lakon Isaraela adre me ca obâ at Gesuri me Maaka : ke so bi at Gesuri me Maaka ödrin e tha laba me at Isaraela ke ne o but hnyi bong ang. 14 Ke hake tribu Levi thiju adre ca khene iny ; haba je hut a an hnen meic kö Iehova Khongon at Isaraela, me wale iny, helâ me hnen hna ha ködrin.

15 Ke haba Mose ame khenâ ka tribuiny laku Reubena hoton anyidrin je lap. 16 Ke haba hnyigöulödrin, hwân Aroera hnyi baten hnyigöulen bucen e Arenona, me taun hnyi wanben e, me hnyei hia ae tha hon hnyi Medeba ; 17 Hesebona me je tauniny hia thithö hnyi dok ae tha hon ; Dibona me Bamotha-baala me Bethe-baala-

meon ; 18 me Jahaza, me Kedemotha, me Mefat ; 19 me Kiriathaima, me Sibema, me Zereth-sahar hnyi bucen a e hnyi hnyigöulen bucen ; 20 me Bethe-peora, me Ase-doda-pisega, me Bethe-jesimoth ; 21 me je taun hia thithö hnyi dok ae tha hon, me dökhu hia dökhu Sihona than at Amora, at ame musi Hesebona, a hlingâ Mose tha e me je than at Midiana, jia Evi, me Rekem, me Zura, me Huro, me Reba, a je taben unyi Sihona, hnyat labâ hnyei. 22 Balaama minya nöku Beora, at ame bi khong, ame mokut unyin je komok a hlingâ hnen lakon Isaraela ge hele vat. 23 Ke haba hnyigöulen laku Reubena, me Joridano me baten. Me wale iny laku Reubena hoton anyidrin je lap, me je tauniny, me je tauniny ae ûhnyükong.

24 Ke Mose ame khenâ ka tribu Gada, a je laku Gada, hoton anyidrin je lap. 25 Ke haba hnyigöulödrin me Jazera me je taun hia hnyi Gileada, me hafiny hnyei iny laku Amona, ke ne o but Aroera cicö Raba ; 26 ke hwân Hesebona, ke ne o but Ramatha-mizepa, me Betonim ; ke hwân Mahanaima ke ne o but hnyigöulen Debira ; 27 ke haba hnyi hnyegöuleny bucen, me Beth-arama, me Bethe-nimera, me Sukotha, me Zafon, kolon dökhu dökhu Sihona than Hesebona, ke haba hnyigöuleny me Joridano, ke ne o but hnyi obiny köien Kinereth, hnyi ke keihen e deiö Joridano. 28 Ke wale hnyei iny laku Gada hoton anyidrin je lap, me je tauniny, me je tauniny ae ûhnyükong.

29 Ke Mose ame khenâ ka hafiny tribu Manase : a wale hobi kâu hafiny tribu Manase, hoton anyidrin je lap. 30 Ke haba hnyigöulödrin, me hwân hnyi Mahanaima, Basana hia, a je dökhu hia dökhu Oga than Basana, me je taun hia anyi Jaira, wale hnyi Basana, je taun a sikste : 31 me hafiny Gileada, me Aseterotha, me Ederei, a je tauniny dökhu dökhu Oga hnyi Basana, hnân hobi kâu je laku Makir nöku Manase, hobi kâu ke hafiny laku Makir hoton anyidrin je lap.

32 Wale je hnyei a khenâ Mose hnyi dok ae tha hon hnyi Moaba, hnyi ke keihen Joridano, Jeriko ke e deiö, 33 Ke Mose ame ca khene iny tribu Levi : Iehova, Khongu Isaraela idrin, helâ me hnen hna ha ködrin.

HNHYIMAKAN 14.

KE walang je hnyeï ame hom hnen lakon Isaraela hnyi hnyeï Kanana, wale ame khenâ Eleazara at bihut, me Josua nõku Nuna, me je ban a je kamen je tribuiny lakon Isaraela hnân idrin, 2 adre khene idrin ge uglekõp, helâ me Iehova ame hûna deny Mose, hobi kâu je tribu a nain, me hafiny tribu. 3 Anyin a Mose ame hia but ham iny lo li tribu me hafiny tribu hnyi ke keihen e deiõ Joridano: ke e ame ca khene iny at Levi unyidrin. 4 Anyin a haba lo li tribu, li laku Josefa, jia Manase me Eferaima; ke õdrin e ca ham ka at Levi ke keihen hnyeï; ke so bi je taun hnân me labâ, me utkânâ igigilõ e hobi kâu haledrin je meno me anyidrin je ûnyi. 5 Ke haba lakon Isaraela õdrin e anyâ helâ me Iehova ame hûna kõ Mose, me õdrin e khenâ hnyeï.

6 Ke ame he laku Juda kõ Josua hnyi Gilegala; me ame ha kâu Kaleba nõku Jefune at Kenaza, ka habe, E khatõ u ûnyi a ha Iehova kõ Mose aten Khong gat u hnyi Kadesi-banea. 7 Fâte but je hunaik hnyi ûen ame kunõ nya Mose athnyabai Iehova, ûheny Kadesi-banea he ka ecmâkâ hnyeï; ke oge me hmetoâ je hofuc ae eû hnyi hnyekuk. 8 Ke so bi haba je liamekeiny mõnya, adre tha he mõnya, õdrin e okõia hnyekon tavat: ke oge me tha hnu hotu Iehova Khonguk. 9 Ke Mose ame khemanyin hnyi bong eling, me ha, ka habe, E hnathu hnân em me je matrânâm nyiele balua hnyeï e u je uto, anyin a u je hia but tha hnu hotu Iehova Khonguk. 10 Ke walang ang, wâ bi, Iehova ame omeli nya tilõ nya hnyi ta je hûna eang a fâte faiv helâji me hnen hna ha, hwân hnyi ûen Iehova ame ha hofuc eling kõ Mose, k' ame tiga he Isaraela hnyi hnyeubaba: ke walang ang, wâ bi, eite faiv je hunaik. 11 Iny tiga hwege bala bi hnyi bong ang, helâji me bong a kunõ nya hnyin Mose; haba tang hwegiõk walang me helâji me tang hwegiõk ehac, hnân vat, ke hnân didrut me didrõ. 12 Anyin a wale ham kõnya bucen eang, wale Iehova ame ha gan hnyi bong eling; anyin a u je lõng hnyi bong eling a ka eling at Anaka, me je taun ae gan adre up hagny: me ame ne he la Iehova ka tha e mõnya, me oge me he ka ob' õdrin helâ me Iehova ame ha. 13 Ke haba

Josua ame hahnahicâ e, me ham Heberona kõ Kaleba nõku Jefune, me me iny. 14 Anyin a wale haba Heberona me i Kaleba nõku Jefuue at Kenaza ke ne o but hnyi bong ang; anyin a e ame tha hnu hotu Iehova Khongon at Isaraela. 15 Ke haba ien Heberona ehac me Kiriath-areba; haba Areba eling me wale at ae beõnua unyin at Anaka. K' ame menâ hnyeï ke ba vat.

HNHYIMAKAN 15.

KE haba jekhon tribuiny laku Juda hoton anyidrin je lap, me wale ke ne o but hnyigõulõ Edoma, ke ne o but hnyeubaba Zin hnyi hwaiõu, wale obiny hnyeï ae hwaiõu hmõnyin. 2 Ke haba hnyigõulen hnyi hwaiõu, me, hwân hnyi baten Kõio a Hiny, a hwân hnyi bwedua ame hnyimakan ka hnyi hwaiõu: 3 k' ame he ka hnyi hwaiõu ke ne o but hnyi gethen ame he Akerabima ai, k' ame he bala Zin ai me he ka hnyi hwaiõuiny Kadesi-banea, me he Hezerona ai, me Adara ai, k' ame khenyi ke ne o but Kareka: 4 k' ame he Azemona ai, me o ka hnyi wageweiny Aigupito; k' ame um ju hnyigõulen eling hnyi kõio: me wale hnyigõulõbun ka hnyi hwaiõu. 5 Ke haba hnyigõulen e deiõ, me, Kõio ae Hiny ke ne o but ka hnyi hnyimen Joridano. Ke haba hnyigõulen ka hnyi hwadrõ hwân hnyi bwedua hnyi kõio wale hnyi hnyimen Joridano: 6 ke ame he bala bi hnyigõulen Bath-ogela ai, ke ame he bala bi ka hnyi hwadrõ iny Beth-araba; ke ame he hnyigõulen ke ne o but ka veto anyi Bohan nõku Reubena: 7 k' ame he bala bi hnyigõulen Debira ai, hwân hnyi hnyigõulen bucen Akora, ke helâe ka hnyi hwadrõ cicõ Gilegala, wale cicõ gethen ame he Adummim ai, wale hnyi baten kõio ka hnyi hwaiõu: ke ame he bala hnyigõulen ka hnyi kõio Eni-semes, me ame um ju hnyi Eni-rogel: 8 ke ame he bala hnyigõulen hnyi hnyigõulen bucen anyin nõku Hinom ke ne o but hnyi baten at Jebusi hnyi hwaiõu (wale Jerusalema): ke ame he bala hnyigõulen ka hnyi hon bucen cicõ jio hnyigõulen bucen anyi Hinom, wale obiny hnyigõulen bucen anyin tavat ae beû hnyi hwadrõ: 9 ke adre tuluto hnyigõulen ûnyi hnyi ban bucen ke ne o but hnyi kõio ame pupua anyi Nefetõa, ke ame he ke ne o but je taun hnyi bucen Eferona; ke adre tuluto hnyigõulen hnyi Baala (wale Kiriatha-jarim): 10 ke ame

khenyi hnyigöulen e jio úheny Baala ka hnyi bucen Seira, ke ame he bala bi ke ne o but hnyi baten bucen Jarim hnyi hwadrö (wale Kesalon), ke ame he bala bi Bethesemes ai me he hnyi gethen deny Timena : 11 me ame um ju hnyigöulen hnyi ke keihen Ekerona ka hnyi hwadrö : ke adre tuluto hnyigöulen ka hnyi Sikerona, me ame he bala bi ka hnyi bucen Baala ke ne e but Jabanel ; ke adre me umo je hnyigöulen hnyi köiö. 12 Ke haba hnyigöulen e jio, köiö ae gan me hobat köiöiny. Wale hnyigöulen laku Juda igigilö hoton anyidrin je lap.

13 Ke e ame ham kö Kaleba nöku Jefune jekhon unyin laku Juda, helâ me hnö Iehova hna húna kö Josua wale Kiriath-Areba, haba Areba kamö Anaka (wale Heberona). 14 Ke haba Kaleba ame obâ je laku Anaka a kun úheny e, jia Sesai, me Ahiman, me Talemai, a laku Anaka. 15 Ke e ame he úheny e he ka tet metâ ka tavat adre me labâ taun Debira : ke haba ien Debira ehac, me, Kiriatha-sefer. 16 Ke haingö Kaleba, ka habe, Haba at ame he ka kot Kiriatha sefer, me hügúnâ, me oge me he ka ham kâu nöku hlu jia Akesa me áiân. 17 Ke ame hügúnâ e Otheniela nöku Kenaza, liamekeiny me Kaleba : me e ame ham Akesa a nokon me áiân. 18 K' ame o kâu hlu, me haba hlu ame kunâ áiân he ka sumâtâ utkânâ ge kamen : ke ame utut hlu úheny hon asina, ke Kaleba ame ha kâu, ka habe, Ieú ae wem? 19 Me e ame ha, ka habe, ham dö konya hnahic ; anyin a u je hia but ham konya utkânâ ka hnyi Hwaiöu, ke ham minya thö konya je an ae pupua. Me e ame ham kâu je an ae pupua wal' ethö me eú hnyikânâi.

20 Walang jekhon tribuiny laku Juda hoton anyidrin je lap.

21 Haba je taun ae sâkâu ka hnyi Hwaiöu anyin tribuiny laku Juda, wale hnyi hnyigöülö Edoma, me Kabezeela, me Eder, me Jagur ; 22 me Kina, me Demona, me Adada ; 23 me Kadesi, me Hazora, me Ithenan ; 24 me Zif, me Telem, me Bealoth ; 25 me Hazora-hadata, me Keriotha-hezerona (wale Hazora) ; 26 me Amam, me Sema, me Molada ; 27 me Hazara-gada, me Hesemon, me Bethé-palet ; 28 me Hazara-sual, me Bere-seba, me Biziothia ; 29 me Baala, me Iima, me Azem ; 30 me Eletolad, me Kesil, me Horema ; 31 me Zikelak, me Mademan, me Sanesana ; 32 me Lebaoth, me Silehim,

me Aina, me Rimona : haba je taun hia thithö me twente nain, me je tauniny ae úhnyükong.

33 Ke haba hnyi hnyei ae ca hut, me Esetaol, me Zorea, me Asena ; 34 me Zanoa, me Eni-ganim, me Tapua, me Enaima ; 35 me Jamuth, me Adulama, me Soko, me Azeka ; 36 me Saraim, me Adithaim, me Gedera, me Gederothaim ; wale je taun a fortin, me je tauniny ae úhnyükong.

37 Ke Zenan, me Hadasa, me Migedolagada ; 38 me Dilean, me Mizepa, me Joketheela ; 39 me Lakisa, me Bozekath, me Egelona ; 40 me Kabona, me Lamam, me Kithelis ; 41 me Gederoth, me Bethedagona, me Naama, me Makeda ; wale sikstin je taun me je tauniny ae úhnyükong.

42 Libena, me Ethera, me Asan : 43 me Ifetha, me Asena, me Nezib, 44 me Keila, me Akeziba, me Maresa ; nain je taun me je tauniny ae úhnyükong.

45 Ekerona, me je taun, me je tauniny ae úhnyükong : 46 hwân Ekerona ke ne o but hnyi köiö, me je dok ae hakekeuyâ Asedoda, me je taun ae úhnyükong.

47 Asedoda me je tauniny me je tauniny ae úhnyükong ; Gaza me je tauniny e me je tauniny ae úhnyükong ; ke ne o but hnyi wageweiny Aigupito, me köiö ae gan me hobatköiny.

48 Ke haba hnyi hnyei ae hut, Samira, me Jatira, me Soko ; 49 me Dana, me Kiriatha-sana (wale Debira) ; 50 me Anabi, me Esetemo, me Anim ; 51 me Gosena, me Holon, me Gilo ; eleven je taun me je tauniny ae úhnyükong.

52 Araba, me Duma, me Esean ; 53 me Janum, me Bethé-tapua, me Afeka ; 54 me Humeta, me Kiriatha-areba (wale Heberona), me Ziora ; nain je taun, me je tauniny ae úhnyükong.

55 Maon, me Karemela, me Zif, me Juta ; 56 me Jezerela, me Jokedeam, me Zanoa ; 57 me Kaina, me Gibeá, me Timena ; ten je taun me je tauniny ae úhnyükong.

58 Halehul, me Bethé-zur, me Gedor ; 59 me Maarath, me Bethé-anoth, me Eletekon ; siks je taun me je tauniny ae úhnyükong.

60 Kiriatha-baala (wale Kiriatha-jarim), me Raba ; li taun me je tauniny ae úhnyükong.

61 Hnyi hnyebuba, Beth-araba, me Midin, me Sekaka ; 62 me Nibesan, me Tauniny Sâlt, me Eni-gedi ; siks je taun me je tauniny ae úhnyükong.

63 Ke haba at Jebusi, ödrin e labâ Jerusalema, me ca khana laku Juda he ka ob' ödrin : k' ame tha laba at Jebusi me je laku Juda hnyi Jerusalema ke ne o but hnyi bong ang.

HNYIMAKAN 16.

KE haba jekhon laku Josefa me hwân hnyi Joridano e Jeriko wale hnyi köien Jeriko e deiö, ke ne o but hnyi hnye-buba, gethen úheny Jeriko hnyi wanben hnyi ae hut ke ne o but Beth-ela ; 2 k' ame he úheny Beth-ela Luza ai, k' ame he bala ke ne o but hnyigöulen at Areki ke ne o but Atarotha ; 3 k' ame he bala bi jio ka hnyi hnyigöulen at Jafelet, ke ne o but hnyigöulen Bethe-horona eú, ke ne o but Gezera : k' ame umo hnyi köiö. 4 Ke haba li laku Josefa, jia Manase me Eferaima, me ödru me labâ idru. 5 Ke haba hnyigöulen laku Eferaima hoton anyidrin je lap, haba hnyigöulen jeköúdrin e deiö, me, Ataroth-adara ke ne o but hnyi Bethe-horona ethö ; 6 ke ame he bala hnyigöulen e jio Mikematha ai ka hnyi hwadrö : ke ame khenyi deiö hnyigöulen, ke ne o but Tanatha-silo, k' ame he hanyáúá ke ne o but Janoa ke e deiö : 7 k' ame he úheny Janoa Atarotha ai, me Naratha, k' ame o hnyi Jeriko, me umo ju hnyi Joridano. 8 Ke ame he hnyigöulen hnyi Tapua me he e jio ke ne o but hnyi wagewe Kana ; k' ame um ju hnyi köiö. Wale jekhon tribuiny laku Eferaima hoton anyidrin je lap ; 9 ke ca ha bi je taun adre hake ip hobi káu je laku Eferaima wale hnyi wanben jekhon laku Manase, a ta je taun hia thithö me ta je tauniny ae úhnyúkong. 10 Ke haba at Kanana a tavat adre me laba hnyi Gezera, me adre me ca ob' odrin dut : me haba at Kanana ödrin e laba unyin at Eferaima ke ne o but hnyi bong ang, me bi athnyabaidrin me ányá anyidrin je huliwa.

HNYIMAKAN 17.

KE walang jekhon tribu anyi Manase ; anyin a e nöku Josefa a bán. Hobi kö Makir nöku Manase a bán, kamö Gileada, anyin a e at vat, me adre me ham me iny Gileada me Basana. 2 Ke haba jekhon eling hobi káu ke keihen laku Manase hoton anyidrin je lap ; hobi káu laku Abiezera, me laku Heleka, me laku Aseriela, me laku Sekema, me laku Hefera, me laku

Semida : wale je бага nöku Manase nöku Josefa hoton anyidrin je lap. 3 Ke haba Zelofeada nöku Hefera, nöku Gileada, nöku Makir, nöku Manase, me ba nokon бага, ke so bi a je hlu : ke walang ien lakon je hlu, Mala, me Noa, me Hogela, me Mileka, me Tirezä. 4 Me ödrin e he kö Eleazara at bihut, me Josua nöku Nuna, me je than, me ha ka habe, Iehova ame húna kö Mose he ka ha' ihmun unyin je liamekeiny möhmun : anyin a wale e ame ha' idrin unyin je liamekeiny me kamödrin, helâ me hna ha hnö Iehova. 5 Ke adre khenâ kö Manase libenyita je ke keihen, ke ca ha bi hnyi Gileada me Basana, wale hoton Joridano ; 6 anyin ae hu iny je hlu laku Manase unyin lakon je бага : ke haba ke je laku Manase, ödrin e hu hnyi Gileada. 7 Ke haba hnyigöülö Manase, me, hwân Asera ke ne o but Mikematha cicö Sekema ; ke ame he bala hnyigöulen hnyi ke keihen metâ ke ne o but unyin tavat adre me laba Eni-tapua. 8 Ke i Manase hnyi Tapua : ke haba Tapua hnyi hnyigöülö Manase, me wale iny laku Eferaima. 9 Ke ame he hnyigöulen ka hnyi wagewe Kana hnyi hwaiöuininy wagewe : haba je taun eling anyi Eferaima, e hnyi wanben je taun anyi Manase : ke haba hnyigöülö Manase hnyi ke keihen hwadröiny wagewe, ke ame umo e hnyi köiö : 10 ke i Manase ka hnyi hwaiöu, ke i Eferaima ka hnyi hwadrö, ke haba hnyigöulen, me, köiö ; k' ame he ke ne o but Asera hnyi hwadrö, me Isakara e deiö. 11 Ke e hu ga Manase hnyi Isakara me Asera, Betheseana me je tauniny, me Ibeleama me je tauniny, me aten Dora me je tauniny, me aten En-dora me je tauniny, me aten Tanaka me je tauniny, me aten Megido me je tauniny, wale je dok ae hut. 12 Keca khana bi laku Manase he ka obâ aten je taun eling ; anyin ame belaba at Kanana hnyi hnyi eling. 13 Ke hnyi úen ame hwege but lakon Isaraela me ödrin e kunâ at Kanana he ka huliwa hnyi je hna khenâ huliwa, k' adre ca ti ob' ödrin.

14 Ke haba laku Josefa ödrin eha kö Josua, ka habe, Ieú gam u je ham könya jekhöú a khaca, me ke keihen a khaca, anyin a haba inya, me, hnyi ae gan, ke Iehova ame hia but ohnahici nya hwân ehac ke ne o but hnyi bong ang? 15 Ke Josua ame ha kodrin, ka habe, U je ne hnyi ae gan, me e so u ma he ka hnyi hnyot me khutu eling hobi köu bi hnyi hnyi iny at Perizi me tavat ae beú ; anyin ae hnek köu bucen Eferaima.

16 Me ame ha je laku Josefa, ka habe, E ca úcú köhmun bucen : ke haba at Kanana adre me laba hnyi hnyigöulen bucen me ödrin e tren je kariota fao, wale tavat hnyi Betheseama me je tauniny, me tavat minya hnyi hnyigöulen bucen e Jezerela. 17 Ke Josua ame ha ka lap anyi Josefa, jia Eferaima, me Manase, ka habe, U hnyei aegan me tren man aegan : ke u me ca he ka jekhom a khaca thibi ; 18 k' ame he ka em hnyei bi bucen ; k' ame ne hnyot, me u ma he ka khutu, ke hobi köu bi obiny : anyin a u me he ka obâ at Kanana, eja ke ne a ne hu je kariota fao, ke eja ke ne ödrin e hwege.

HNYIMAKAN 18.

KE ame úkhacaköu tavat a lakon Isaraela hia hnyi Silo, ke adre me otilâ eling uma mano a uma úkhacaköu : ke ame ngâ but hnyei hnyi hnyimaködrin. 2 Ke seven biju je tribuiny lakon Isaraela a ödrin tiga ka khenâ jekhöüdrin. 3 Ke Josua ame ha ka lakon Isaraela, ka habe, Ieú gabun öbun e bec he ka he me hügúnâ hnyei wale a ham köbun Iehova Khongon lakamöbun ? 4 Uca thö unyibun ke je hnyat úsa kun hobi kâu je tribu : me oge me he ka kun' ödrin, ke ödrin e he ka todrö me vheno hnyei, me omanenâ e hoton je jekhöüdrin ; me ödrin e he ka he jem könya. 5 Ke ödrin e he ka kia sevenâ : ame he Juda ka laba hnyi hnyigöulen ka hnyi hwaiöu, ke ame he lap anyi Josefa ka laba hnyi hnyigöülödrin ka hnyi hwadrö. 6 Ke öbun e he ka omanenâ hnyei me me seven, me hom jem könya hna omanenâ eling : me oge me he ka uglekôbâ hobi köbun eang hnyi hnyimakö Iehova Khongutin. 7 Anyin aeba iny at Levi unyibun ; anyin a haba hanymen tavat bihut kö Iehova, wale jekhöüdrin : ke haba Gada, me Reubena, me hafiny tribu Manase, ödrin e hia but kap jekhöüdrin hnyi ke keihen e deió Joridano, wale a ham ködrin Mose athnyabai Iehova. 8 Me ame todrö tavat me he : ke Josua ame hûna ködrin wale hnyat ödrin e he he ka omanenâ hnyei, ka habe, he thö, me vheno hnyei, me omanenâ e, ke hmetu ju könya, me oge me he ka uglekôbâ eang hobi köbun hnyi hnyimakö Iehova hnyi Silo. 9 Me ame he tavat me vheno hnyei, me omanenâ e hnyi tusi hoton je taun me me seven, me ödrin e o kö Josua hnyi hna hunuma hnyi Silo. 10 Ke Josua ame

uglekôbâ hobi ködrin hnyi Silo hnyi hnyimakö Iehova : ke Josua ame khenâ eling hnyei ka lakon Isaraela hoton je jekhöüdrin.

11 Ke ame at dö ge leköy tribu anyin laku Beniamina hoton anyidrin je lap : ke ame hnyigöulen jekhöüdrin hnyi wanben laku Juda, me laku Josefa. 12 Ke haba hnyigöülödrin ka hnyi hwadrö, hwân hnyi Joridano ; ke ame he hnyigöulen ka hnyi ke keihen hwadröiny Jeriko, me he ka hnyi hnyei ae hut e jio ; k' ame umo hnyi hnyebuba Bethaven. 13 Ke ame he bala hnyigöulen úheny e Luza ai, ka hnyi ke keihen Luza (wale Beth-ela) ka hnyi hwaiöu ; ke ame he bala hnyigöulen Ateroth-adara ai ka hnyi bucen hnyi hwaiöu hnyi Bethehorona eú. 14 Ke adre me tuluto hnyigot me khenyi hnyi ke keihen e jio ka hnyi hwaiöu, hwân hnyi bucen cicö Bethehorona hnyi hwaiöu ; ke adre me umo e hnyi Kiriatha-baala (wale Kiriatha-jarim), ke tauniny laku Juda : wale ke keihen e jio. 15 Ke haba ke keihen ka hnyi hwaiöu ame hwân hnyi obiny Kiriatha-jarim, ke ame he hnyigöulen e jio, me umo hnyi je an ame pupua e Nefetöa : 16 ke ame o hnyigot ka hnyi obiny bucen cicö hnyigöulen bucen anyi nöku Hinom, wale hnyi hnyigöulen bucen anyin tavat ae beú ka hnyi hwadrö ; ke ame he ka hnyi hnyigöulen bucen anyi Hinom ka hnyi ke keihen at Jebusi ka hnyi hwaiöu, me he Eni-rogel ai ; 17 ke adre me tuluto hnyi hwadrö me umo hnyi Eni-semes, me he Geliloth ai, wale cicö gethen ame ölö Adumim ai ; k' ame he ka hnyi veto anyi Bohan nöku Reubena ; 18 ke ame he bala ka hnyi ke keihen cicö Araba hnyi hwadrö me he Araba ai : 19 ke ame he bala bi hnyigot ka hnyi ke keihen Bethogela hnyi hwadrö : ke adre me umo hnyigot hnyi bweduainy Köiö ae Hiny ka hnyi hwadrö, hnyi obiny Joridano ka hnyi hwaiöu : wale hnyigöulen ka hnyi hwaiöu. 20 Ke haba hnyigöulen e hnyi ke keihen e deió, me, Joridano. Wale jekhon laku Beniamina hoton je hnyigöülödrin igigilö ; hoton anyidrin je lap. 21 Ke walang je taun anyin je tribuiny laku Beniamina hoton anyidrin je lap, Jeriko, me Bethogela, me Emeka-Keziz ; 22 me Betharaba, me Zemari, me Beth-ela ; 23 me Avi, me Para, me Ofera ; 24 me Kefara-hamonai, me Ofeni, me Geba ; a twelw ta je taun me je tauniny ae úhnyükong ; 25 Gibeona, me Rama, me Berotha ; 26 me Mizepa, me Kefira, me Moza ; 27 me Rekem, me Irepel,

me Tarala ; 28 me Zela, me Elef, me Jebusi (wale Jerusalema), me Gibeaa, me Kiriatha ; fortin je taun me je tauniny ae úhnyúkong. Wale jekhon je laku Beniamina hoton anyidrin je lap.

HNYIMAKAN 19.

KE ame át dö kö Simeona ge leköp a loiny, hobi káu tribuiny laku Simeona, hoton anyidrin je lap : ke haba jekhóúdrin, me, hnyi wanben jekhon laku Juda. 2 Ke e hu gadrin hnän hwajekhóúdrin Bere-seba, me Seba, me Molada ; 3 me Hazara-sual, me Bala, me Azem ; 4 me Eletolad, me Bethuela, me Horema ; 5 me Zikelag, me Bethe-marekaboth, me Hazarasusa ; 6 me Bethe-lebaoth, me Saruen ; thótin je taun me je tauniny ae úhnyúkong : 7 Aina, me Rimona, me Ethera, me Asau ; foa je taun me je tauniny ae úhnyúkong : 8 me je taun hia ae úhnyúkong igigilö je taun eling, ke ne o but Balatha-bere, wale Ramath ka hnyi hwaiöu. Wale jekhon tribu anyin laku Simeona hoton anyidrin je lap. 9 Únyi hnyi jekhon laku Juda jekhon je laku Simeona : anyin a haba hna khená ka laku Juda e ti gan ködrin : anyin a wale laku Simeona ame hu idrin hnyi wanben jekhóúdrin.

10 Ke ame át dö ge leköp a kuniny ka laku Zebulona hoton anyidrin je lap : ke haba hnyigöulen jekhóúdrin ame o but Saridi ; 11 ke ame he hnyigöülödrin jio ke ne o but Marala, me he ke ne o but Dabaseth ; me he bala ke ne o but hnyi wagewe cicö Jokeneama ; 12 ke ame khenyi úheny Siridi me he deiö hnyi hna o hnen seúnö, ke ne o but hnyi hnyigöulen Kiselotha-tabor ; me ame he Daberath ai me he ke ne o but Jafia ; 13 ke ame he bala deiö úheny e Gita-hefera ai, me Ita-kazin ai ; ke ame umö hnyi Rimona wale ame hújá me Nea ; 14 ke ame khenyi hnyigöulen igigilö e hnyi hwadrö ke ne o but Hanathon ; ke ame um dö hnyi hnyigöulen bucen e Ifeta-ela ; 15 me Kata, me Nahalol, me Simerona, me Idala, me Bethe-leema : twelv je taun me je tauniny ae úhnyúkong. 16 Wale jekhon laku Zebulona hoton anyidrin je lap, a je taun eling me je taun ae úhnyúkong.

17 Ke ame hwádá thö kö Isakara ge leköp a vakiny hobi káu je laku Isakara hoton anyidrin je lap. 18 Ke haba hnyigöülödrin, me, Jezerela, me Kesulath, me Sunema ; 19 me Haferaim, me Sihon, me

Anaharath ; 20 me Rabith, me Kiseon, me Abes ; 21 me Remeth, me Eniganim, me Enada, me Bethe-pazes ; 22 ke ame o but hnyigot ka hnyi Tabora, me Sakazima, me Bethe-semes ; ke adre umö hnyigöülödrin hnyi Joridano : sikstin je taun me je tauniny ae úhnyúkong. 23 Wale jekhon tribuiny laku Isakara, hoton anyidrin je lap, a je taun me je tauniny ae úhnyúkong.

24 Ke ame hwádá thö ge leköp a thabúnginy ka tribuiny laku Asera hoton anyidrin je lap. 25 Ke walang hnyigöülödrin, me, Helekath, me Hali, me Beten, me Akesafa ; 26 me Alamelek, me Amad, me Miseal ; ke ame o ka hnyi Karemela e jio, me Sihora-libenath ; 27 k' ame khenyi ka hnyi hna o hnen seúnö Bethe-dagona ai, me o ka hnyi Zebulona, me hnyigöulen bucen e Ifeta-ela ka hnyi hwadrö, ke ne o but Bethemek me Neiel ; k' ame umö hnyi Kabul hnyi ke keihen hnyam a me, 28 me Heberona, me Rehoba, me Hamona, me Kana, ke ne o but Zidona ae gan ; 29 ke ame khenyi hnyigot Rama ai ke ne o but Turo wale taun ae hwege ; ke ame khenyi hnyigot Hosa ai ; ke adre umö e hnyi köiö hnyi ke keihen hnyei Akeziba : 30 me Uma, me Afeka, me Rehoba : a twente tu je taun me je tauniny ae úhnyúkong. 31 Ke wale jekhon tribuiny laku Asera hoton anyidrin je lap, je taun eling me je tauniny ae úhnyúkong.

32 Ke ame hwádá thö ge leköp a siksiny ka laku Nafatali, hobi káu laku Nafatali hoton anyidrin je lap. 33 Ke ame hwán dö hnyigöülödrin hnyi Helef, me iwajo hnyi Zanim, me Adami-nekel, me Jabenel, ke ne o but Lakom ; me adre me umö e hnyi Joridano : 34 ke ame khenyi hnyigot e jio Azenotha-tabora ai, ke ame he úheny e Hukok ai ; ke ame o ka hnyi Zebulona hnyi hwaiöu, me he Asera ai e jio, me Juda hnyi Joridano, hnyi hna o hnen seúnö. 35 Ke haba je taun adre up hagin, Zidim, me Zeri, me Hamath, me Rakatha, me Kinereth ; 36 me Adama, me Rama, me Hazora ; 37 me Kadesi, me Ederei, me Enihazora ; 38 me Irona, me Migedal-el, me Horema, me Beth-anath, me Bethe-semes ; naintin je taun me je tauniny ae úhnyúkong. 39 Wale jekhon tribuiny laku Nafatali, hoton anyidrin je lap, je taun me je tauniny ae úhnyúkong.

40 Ke ame hwádá thö ge leköp a seveniny ka tribuiny laku Dana hoton anyidrin je lap. 41 Ke haba hnyigöulen jekhóúdrin,

Zorea, me Esetaol, me Ira-semes ; 42 me Salabin, me Ajalona, me Iethela ; 43 me Elona, me Timenatha, me Ekerona ; 44 me Eletek, me Gibethon, me Baalath ; 45 me Jehud, me Bene-berak, me Gatha-rimona ; 46 me Ma-jarekon, me Rakon, tha e me hnyigot cicö Jopa. 47 Me adre me umo hnyigöulen laku Dana e hotudrin : anyin a haba laku Dana ödrin e ha me vat me Lesem, me hügünâ e, me kot e ge hele vat, me hom e, me labâ e, me hwenyi ien Lesem, me Dana, hoton iö Dana a kamödrin. 48 Wale jekhon tribuinylaku Dana hoton anyidrin je lap, je taun eling me je tauniny ae ühnyükong.

49 Ke ödrin e umo khenâ hnyei hnân hwajekhon hoton je hnyigöulen e ; ke haba lakon Isaraela ödrin e ham kö Josua nöku Nuna ke jekhöü anyidrin : 50 hoton hofuc ho Iehova me adre me ham kâu taun e ame ha, wale Timena-sera, hnyi hnyei ae hut hnyi Eferaima : me e ame otillâ taun me labâ.

51 Wale je hwajekhon a khene idrin ga Eleazara at bihut, me Josua nöku Nuna, me je kamen je tribuinylakon Isaraela, ge ugleköp hnyi Silo, hnyi hnyimakö Iehova, hnyi hwanumen uma ukhacaköu. Ke adre me umo thö khenâ hnyei.

HNYIMAKAN 20.

KE Iehova ame ha kö Josua, ka kabe, 2 Ha thö ka lakon Isaraela, ka habe, Kü thö je taun hnân lubaduöng hnyin, wale-ji oge ha köbun a deny Mose : 3 me me kec ka hnyin at ame blingâ at, wale a hlingâ at k' ame utöteta ke ca khana : ke haba je dok e me hnân lubaduöng hnyin hobi köbun ünyi ge at ame bi hwaban komok. 4 Me e ame he ka kec ka hnyi ke taun eling, me tot hnyi homagöuleny taun, me haimemenâ hwan hofuc ka wahingatinylaku taun eling ; ke ödrin e he ka kap e ka hnyi taun eling anyidrin, k' ödrin e he ka ham kâu ke dok, ke e ame he ka tha laba mödrin. 5 Ke ame ne hnu hoton e ge at ame bi hwaban komok, me ödrin e ca he ka hna kâu at ame hlingâ at ; anyin a e ame kot ke at ke ca khana bi, k' ame ca hükötiâ ehac. 6 Ke e ame he ka laba hnyi taun eling ke ne o but e ame tot hnyi hnyimakan ükhacaköu m' adre owisa, ke ne o but ame mokcu at bihut ae beönua hnyi üen eling : me waleling ame he ka he hmetu at ame hlingâ at ka hnyi anyin

taun me umen uma, wale taun e ame kec ünyi hnyin ehac. 7 Me ödrin e kü Kadese hnyi Galelaia hnyi bucen Nafatali, me Sekema hnyi hnyei ae hut hnyi Eferaima, me Kiriatha-areba (wale Heberona), hnyi hnyei ae hut hnyi Juda. 8 Ke hnyi hoton Joridano e Jeriko ke e deiö, me ödrin e kü Bezeri hnyi hnyebuba hnyi dok ae tha hon ünyi hnyi tribu Reubena, me Ramotha hnyi Gileada ünyi hnyi tribu Gada, me Golana hnyi Basana ünyi hnyi tribu Manase. 9 Wale je taun adre kü hobi kâu je lakon Isaraela hia thithö, me je atkanyua adre me laba anyidrin, me me kec ka hnyin tavat hia adre me hlingâ at a utöteta, me me ca mok ge hnyamen at ame bi hwaban komok, ke ne o but e ame tot hnyi hnyimakan ükhacaköu.

HNYIMAKAN 21.

KE haba je ban lakamen at Levi, ödrin e he kö Eleazara at bihut, me Josua nöku Nuna, me je ban je tribuinylakon Isaraela ; 2 ke ödrin e fuc ködrin e Silo hnyi hnyei Kanana, ka habe, Iehova ame hûna a deny Mose he ka ham köbmun je taun hnân labâ, me je utkânâ igigilö e hobi kâu halehmun je meno. 3 Ke haba lakon Isaraela ödrin e ham ka at Levi ünyi hnyi jekhöüdrin je taun eang me je utkânâ igigilö e, helâ me hna ha hnö Iehova.

4 Ke ame hwädâ thö ge leköp je taun hobi kâu at Kohatha : ke ame lu thö ge ugleköp ka laku Arona at bihut, a at Levi, ünyi hnyi tribu Juda, me tribu Simeona, me tribu Beniamina, je taun a thötin.

5 Ke ame lu thö ge ugleköp ka ke je laku Kohatha ünyi hnyi je lap anyin tribu Eferaima, me tribu Dana, me hafiny tribu Manase, ten je taun.

6 Ke ame hu thö ge ugleköp ka laku Geresoma ünyi hnyi je lap anyin tribu Isakara, me tribu Asera, me tribu Nafatali, me hafiny tribu Manase hnyi Basana, thötin je taun.

7 Ke ame hu thö ka laku Merari hoton anyidrin je lap ünyi hnyi tribu Reubena, me tribu Gada, me tribu Zebulona, twelw je taun.

8 Ke haba lakon Isaraela ödrin e ham ka at Levi ge ukleköp je taun eling me je utkânâ igigilö e, helâ me hna hûna ga Iehova a deny Mose. 9 Ke ödrin e ham ünyi hnyi tribuinylaku Juda, me tribuinylaku Simeona, je taun eling wale adre me

ha ien : 10 ke wale me hnân hobi kâu laku Arona, a je lap anyin at Kohatha, a laku Levi : anyin a haba leköp a bân, me, anyidrin. 11 Ke adre me ham ködrin Kiriatha-areba, haba Areba me kamö Anaka (wale Heberona), hnyi hnyeï ae hut hnyi Juda, me je utkânâ igigilö e. 12 Ke haba ta hnyeiny taun, me je tauniny ae ûhnyûkong, me, adre me ham kö Kaleba, nõku Jefune me me iny.

13 Ke adre me ham ka laku Arona at bihut Heberona me je utkânâ igigilo, wale taun hnân lubaduöng hnyin at ame hlingâ at, me Libena me je utkânâiny; 14 me Jatira me je utkânâiny, me Esetemoa me je utkânâiny; 15 me Holon me je utkânâiny, me Debira me je utkânâiny; 16 me Aina me je utkânâiny, me Juta me je utkânâiny, me Bethesemes, me je utkânâiny; a nain je taun ûnyi hnyi li tribu eling. 17 Ke ûnyi hnyi tribu Beniamina, me, Gibeona me je utkânâiny, me Geba me je utkânâiny; 18 me Anathoth me je utkânâiny, me Alemon me je utkânâiny; vak ta taun. 19 Haba je taun hia anyin laku Arona hnyat bihut, me, thötin, me je utkânâ igigilö.

20 Ke haba je lap anyin laku Kohatha a hnyat Levi, wale ke je laku Kohatha, me ödrin e hu je tauniny hwajekhöudrin, ûnyi hnyi tribu anyi Eferaima. 21 Ke adre me ham ködrin Sekema me je utkânâiny wale hnyi hnyeï ae hut hnyi Eferaima, a taun hnân lubaduöng hnyin ge at ame hlingâ at, me Gezera me je utkânâiny; 22 me Kibezam me je utkânâiny, me Bethes-horona me je utkânâiny; vak ta taun. 23 Ke ûnyi hnyi tribu Dana, me, Eletek me je utkânâiny, me Gibethon me je utkânâiny; 24 me Ajalona me je utkânâiny, me Gatha-rimona me je utkânâiny; vak ta taun. 25 Ke ûnyi hnyi hafiny tribu Manase, me, Tanaka, me je utkânâiny, me Gatha-rimon me je utkânâiny; lo li taun. 26 Haba je taun hia thithö hobi kâu je lap anyin ke je laku Kohatha, me ten, me je utkânâ igigilö.

27 Ke hobi kâu laku Geresoma, a henen je lap anyin at Levi, adre ham ûnyi hnyi hafiny tribu Manase, Golona hnyi Basana, me je utkânâiny, wale taun hnân lubaduöng hnyin at ame hlingâ at; me Besetera me je utkânâiny; lo li taun. 28 Ke ûnyi hnyi tribu anyi Isakara, Kiseon, me je utkânâiny me Daberath me je utkânâiny; 29 Jaremuth me je utkânâiny,

me Eni-ganim me je utkânâiny; vak ta taun. 30 Ke ûnyi hnyi tribu Asera, Miseal me je utkânâiny, me Abedon me je utkânâiny; 31 Halekath me je utkânâiny, me Rehoba me je utkânâiny; vak ta taun. 32 Ke ûnyi hnyi tribu Nafatali, Kadesi hnyi Galeleia, wale taun hnân lubaduöng hnyin ge at ame hlingâ at, me je utkânâiny, me Hamathe-doro me je utkânâiny, me Karantan, me je utkânâiny; kun ta taun. 33 Ke haba je taun hia thithö anyin at Geresoma hoton anyidrin je lap, thötin je taun me je utkânâ igigilö.

34 Ke hobi kâu je lap anyin je laku Merari, wale kolon je at Levi, adre ham ûnyi hnyi tribu Zebulona, Jokeneama me je utkânâiny, me Kareto me je utkânâiny, 35 me Dimena me je utkânâiny, me Nahalol me je utkânâiny; vak ta taun. 36 Ke ûnyi hnyi tribu anyi Reubena, Bezeri me je utkânâiny, me Jahaza me je utkânâiny, 37 me Kademotha me je utkânâiny, me Mefath, me je utkânâiny; vak ta taun. 38 Ke ûnyi hnyi tribu Gada, Ramoth hnyi Gileada, taun hnân lubaduöng hnyin ge at ame hlingâ at, me je utkânâiny, me Mahanaima me je utkânâiny; 39 me Hesebona me je utkânâiny, me Jasera me je utkânâiny; vak ta taun. 40 Haba je taun hia e eling hobi kâu je laku Merari, hoton anyidrin je lap, a je kolon je lap anyin at Levi, twelv ta taun hwajeköüdrin.

41 Haba je lap hia thithö anyin at Levi hnyi wanben je hnyeï iny lakon Isaraela, me, fâte eit je taun, me je utkânâ igigilö. 42 Haba je taun eling me ve hu je utkânâ igigilö: ke heläe je taun hia thithö eling.

43 Me Iehova ame ham ka at Isaraela hnyeï hia waleji e ame khemanyin he ka ham ka lakamödra; ke adre me tren e me labâ. 44 Ke Iehova ame omen' ödra igigilö, hoton hofuc hia e ame khemanyin ka lakamödra: ke ba ke iwahnaihmiöny mödra ame tot hnyi hnyimaködra; ke Iehova ame hna ta je iwahnaihmiöny mödra hia ka hnyi je hnyamödra. 45 Ke ame ca haü ke hofuc hnyi ta je hofuc ae so ame ha Iehova ka lap anyin at Isaraela; k' ame hwädâ hia.

HNYIMAKAN 22.

ME haba Josua ame hâwâ at Reubena, me Gada, me hafiny tribu Manase, 2 me ha ködrin, ka habe, Öbun e hia but vheno ta je ûnyi hia a hüna köbun. Mose,

athnyabai Iehova, me löng ifucik hnyi ta je únyi hia waleji oge kun' öbun káu : 3 öbun e ca hna degecâ je liamekeiny möbun hnyi ta je bong ae se hia ke ne o but hnyi bong ang, ke öbun e hia but vheno únyi a húna Iehova Khongubun. 4 Ke walang ang Iehova Khongubun ame omenâ je liamekeiny möbun, helâji me hnen hna ha ködra, anyin a wale hmetu th' öbun, me he ka hnyi umöbun je uma, ka hnyi je ibun, waleji a ham köbun Mose athnyabai Iehova hoton Joridano. 5 Ke wá wia ju öbun he ka ányâ hna húna me hnanyibu, waleji a húna köbun Mose athnyabai Iehova, wale he ka hnyok kö Iehova Khongubun me vheno je gethen hia thithö únyi gan, me tuö anyin je hna húna, me kece káu, me huliwa káu ge je hnyekubun ae bekhöt me ta je hanubun ae bekhöt. 6 Me Josua ame hahnahici ödrin me kun' ödrin, me ödrin e vese but ka hnyi umödrin je uma.

7 Ke a hia but Mose kbene jekhoú hnyi Basana ka hafiny tribu Manase : ke haba ka ke haf, Josua ame khenâ unyin je liamekeiny mödrin hoton Joridano ke e jio. Ke haba khaca, hnyi úen e ame kun' ödrin ka hnyi umödrin je uma, me Josua ame hahnahici ödrin, 8 me ha ködrin, ka habe, He hmetu thö ka hnyi umöbun je uma me tang omjeú ae gan, me je menö ae se hia hmönyin, me sileva, me gol, me bras, me fao, me je úkhaú ae ti se hia : öbun e he ka tha khenâ me je liamekeiny möbun je únyi adre hügúnâ únyi ge je iwahanaihmöny möbun.

9 Me ame he hmetu je laku Reubena, me je laku Gada, me hafiny tribu Manase ge lakon Isaraela úheny Silo hnyi hnyei Kanana, he ka he ka hnyi hnyei Gileada, ka hnyi idrin hnyei, wale ae hu gadrin, helâji me hna ha hnö Iehova a deny Mose. 10 Ke ödrin e o hnyi baten Joridano hnyi hnyei Kanana, me haba je laku Reubena, me je laku Gada, me hafiny tribu Manase ödrin e otilâ taben hut hnyi Joridano, tap ae gan hnân wâ. 11 Ke haba lakon Isaraela ödrin e löng adre me ha, ka habe, Wâ bi, a hia but otilâ taben hut hnen je laku Reubena, me je laku Gada, me hafiny tribu Manase, cicö hnyei Kanana, hnyi baten Joridano, hnyi ke keihen iny lakon Isaraela. 12 Ke a löng ut lakon Isaraela, me ame úkacaköu tavat hia a je lakon Isaraela hnyi Silo, he ka vat mödrin.

13 Ke haba lakon Isaraela adre me kunö Fineasa nöku Eleazara at bihut ka laku Reubena me laku Gada, me hafiny tribu Manase, ka hnyi hnyei Gileada ; 14 ke tha e me je than a ten, úsa khaca than anyin je kamen je lap hia thithö anyin je tribu Isaraela ; ke haba ödrin hia, me ödrin je ban je lap anyin lakamödrin unyin je thauzaniny at Isaraela. 15 Ke ödrin e o but ka laku Reubena, me laku Gada, me hafiny tribu Manase hnyi hnyei Gileada, me ha ködrin ka habe, 16 Walang hofuc hwan úkacaköu hia anyi Iehova, ka habe, Ie únyi ang ae kong öbun e ányâ ka Khongon at Isaraela, möbun e hna hota but Iehova, wale öbun e otilâ taben hut hobi köbun, me khikhin ga Iehova hnyi bong ang? 17 Hawa, e ti úhnyükong köta hulö hnyi Peora, wale ate me tiga ca obosoi öta hnyin ke ne o but hnyi bong ang, eja ke ne a ne hia but o mok ae cap ka hnyi hon úkacaköu anyi Iehova, 18 m' öbun e hna hota but Iehova hnyi bong ang? ke haba hnyi bong ang öbun e khikhin ga Iehova, me haba nyi e ame he ka hmönyin ka úkacaköu hia thithö anyin at Isaraela. 19 Ke so bi ame ne bo kong hnyei ae hu ibun hnyin, awe, hanyáúâ thö ka hnyi i Iehova adre otilâ hnyin uma mano umö Iehova, m' öbun e hu hnyei unyihmun : ke ca he ka khikhin ga Iehova, me úkkin fuc möhmun, wale möbun e otilâ taben anyibun hut kö Iehova Khonguhmun. 20 Hawa, e ca ányâ hwakecin ae kong Akana nöku Zera hnyi únyi adre okabâ, me ame o hmönyin ka úkacaköu hia anyin at Isaraela? ke ame ca hake mok at eling hnyi anyin hulö.

21 Me haba laku Reubena, me laku Gada, me hafiny tribu Manase, ödrin e thu me ha ka je ban je thauzaniny at Isaraela, ka habe, 22 Haba Iehova Khongon ta je khong, Iehova Khongon ta je khong, me e at ame wâhmakhmetoâ, ke ame he at Isaraela ka wâhmakhmetoâ bi ; a g' adre ne ányâ únyi hnyi khikhin, ke ame ne únyi hnyi hwakecin ae kong kö Iehova, (ca he ka omeli öhmun hnyi bong ang.) 23 wale ge hnöhmun hna otilâ taben anyihmun hut, me hna degeci Iehova ; ke ame ne hnân he ka hudo je hudiny leú, me hudiny han, ke ame ne hnân hudo je hudiny úsoköu hon e, hamö Iehova he ka elâm ; 24 ke öhmun e ne ca ányâ únyi e hnyi hnyok ae hmäk, me únyi ge hna únyküme, ke haingöhmun, ka habe, ame ne

he lakubun nyiele ka ha ka lakuhmun, ka habe, Ieú anyibun únyi unyi Iehova Khongon at Isaraela? 25 anyin a hia but Iehova bi hnyigöulen Joridano wanböhmun möbun laku Reubena, me laku Gada; e ba hwajekhöubun unyi Iehova: ke ame he lakubun ka ohia ot kö Iehova unyin je lakuhmun. 26 Anyin a wale haingöhmun, ka habe, Ötin a hwân walang ang he ka otilâ taben hut, a ca hnân leú hut me bi hut hon e: 27 ke so bi hnân haten e wanböhmun möbun, me anyitin je dö hwa-bötin, m' öhmun he ka ányâ huliwa anyi Iehova hnyi hnyimakan hnyi je hudiny leú, me je hut, me je hudiny úsoköu; me me ca he lakubun ka ha nyiele ka lakuhmun, ka habe, E ba jekhöúibun unyi Iehova. 28 Anyin a wale öhmun e ha, ka habe, Ödrin ka he ka ha helâe köhmun me anyihmun je dö nyiele, öhmun e he ka ha bi, ka habe, Wâ bi tulut taben hut kö Iehova a ányâ lakamöhmun, a ca hnân leú hut me bi hut hon e; ke so bi hnân ohnathoâ köhmun möbun. 29 Öhmun na ca he ju ka khikhin ga Iehova, me hmetu ga Iehova hnyi bong ang, he ka otilâ taben hut hnân leú, me hudiny han, me ke hut, hnân he ka hanen taben hut kö Iehova Khongutin cicö umen uma mano.

30 Ke löng ut Fineasa at bihut, me je thaniny úkhacaköu, wale je ban je thauzaniny at Isaraela unyin, ta je hofuc ame ha laku Reubena, me laku Gada, me laku Manase, me ame so ködrin. 31 Ke haba Fineasa nöku Eleazara at bihut ame ha ka laku Reubena, me laku Gada, me laku Manase, ka habe, E khan' ötin dut hnyi bong ang a e unyita Iehova, anyin a öbun e ca ányâ monu ang kö Iehova: walang öbun e omelö lakon Isaraela únyi hnyi hnyamö Iehova. 32 Me ame hmetu Fineasa nöku Eleazara at bihut, me je than, úheny unyin laku Reubena, me laku Gada, únyi hnyi hnyei Gileada, ka hnyi hnyei Kanana, ka lakon Isaraela, me thumetu ödra. 33 Ke so hofuc eling ka lakon Isaraela; me haba lakon Isaraela adre me ogânâ Khong, m' adre me ca ha hmetu he ka vat mödrin, he ka okongoâ hnyei ame laba hnyin laku Reubena, me laku Gada. 34 Ke haba laku Reubena, me laku Gada, me ödrin e hwenyi ien taben hut, me At ohnatho, anyin a hnân ohnathoâ köta a Khonguta Iehova.

HNYIMAKAN 23.

KE hwaban je bong ae se, ke Iehova ame hia but omenâ at Isaraela únyi ge je iwahnaihmiöny mödra igigilö, ke hingat ut Josua ke se hia hunainy; 2 me haba Josua ame hawâ at Isaraela hia thithö, me wahingatidra, me anyidra je ban, me tavat owisa ködra, me je homakan gadra, me ha ködra, ka habe, Iny hingat ut, ke se hia je hunaik: 3 öbun e hia but wâ ta je únyi a ányâ Iehova Khongubun ka je hnyei hia eang cabun: anyin a Iehova Khongubun, me wale at ame vat hobi köbun. 4 Wâ bi, oge hia but khenâ köbun je kolon je hnyei ang, me hwajekhon anyibun je tribu, hwân hnyi Joridano, me je hnyei oge hia but ohia, ke ne o but ka hnyi köiö ae gan cicö hna dit hnen seúnö. 5 Ke ame he Iehova Khongubun ka ob' ödrin hnyi hnyimaköbun, me ohí' ödrin unyibun; ke ame he bi ka hwajekhöubun idrin hnyei helâji me Iehova Khongubun ame ha köbun. 6 Anyin a wale hwege th' öbun he ka tuö me ányâ ta je únyi hia adre sihnalimen hnyi tusi hnanyibu anyi Mose, me ca saú bi ka hnyi ke keihen metâ me me; 7 m' öbun e ca he bi ka laba unyin je hnyei eling, wale je kolon unyibun, me ca ha ien anyidrin je khong, me khemanyinâ, me huliwa ködrin, me khudrung ködrin: 8 ke so bi öbun e he ka kece kö Iehova Khongubun, helâ me hnöbun hna ányâ ke ne o but hnyi bong ang. 9 Anyin a hia but Iehova obâ hnyi hnyimaköbun je hnyei ae gan me hwege: ke haba öbun, me ba at ame tot hnyi hnyimaköbun ke ne o but hnyi bong ang. 10 Ame he at a khaca gabun ka hnu thauzan: anyin a Iehova Khongubun ame vat hobi köbun, helâ me hnen hna ha köbun. 11 Anyin a wale wâ wia bi öbun he ka hnyok kö Iehova Khongubun. 12 Ke öbun e ne hmetu ju, me kece ka je kolon je hnyei eling, wale je kolon unyibun, me faipoipo mödrin, me he ködrin, ke ödrin, ödrin e he köbun: 13 awe, wâhmakhmeto ju öbun a g' ame ca he hmetu bi Iehova Khongubun ka obâ je hnyei eling hnyi hnyimaköbun; ke ödrin e he ka hnân je hnewe me je ofic köbun, me je osö hnyi je vhaköbun, me údö hnyi je li emaköbun, ke ne o but ame hí' öbun únyi hnyi hnyei ae so a ham köbun Iehova Khongubun. 14 Ke wâ bi, oge me he ka vhenö hnyi

bong ang gethen deny aten hmeledrany hia: ke e khan' öbun dut hnyi ta je hnyok me je hanubun, ae ca haü ke únyi hnyi ta je únyi hia ae so a ha Iehova Khongubun gabun; e hwádâ hia köbun, he ca haü bi ke únyi a khaca. 15 Ke e hwádâ köbun ta je únyi hia ae so a ha köbun Iehova Khongubun, awe, helâe ame he Iehova ka oatâ köbun ta je únyi hia ae kong, ke ne o but e ame hi' öbun hia but únyi hnyi hnyei eang ae so a ham köbun Iehova Khongubun. 16 Öbun ka he ka hanyâüâ úhihinykôu anyi Iehova Khongubun, wale e ame hûna köbun, me he ka bi athnyaba ke je khong bi me khudrung ködrin: awe, ame he ka ubâhlâ hmönyin anyi Iehova köbun, ke ame he ka logot hi' öbun únyi hnyi hnyei ae so wale e ame hia but ham köbun.

HNYIMAKAN 24.

KE haba Josua ame úkhacakôuâ je tribu Isaraela hia hnyi Sekema, me hawâ wahingatiny at Isaraela, me je ban, me je hnyat owisa, me je homakan gadra; me adre me o hnyi hnyimakan Khong. 2 Ke Josua ame ha ka tavat hia thithö, ka habe, Walang hofuc ame ha Iehova, Khongon at Isaraela, ka habe, Haba kâü adrem ame laba lakamöbun hnyi hoton Wagewe, wale Tera kamö Aberahama, me kamö Nahora: k' odrin e bi athnyabainy ke je khong. 3 Ke oge me hom kamöbun Aberahama únyi hnyi ke keihen Wagewe, me lelö e he ka vheno huyei Kanana hia thithö, me osehüa je mátrániny, me ham kâü Isaaka. 4 Ke oge me ham Jekob me Esau kö Isaaka; ke oge me ham bucen Seira kö Esau me me iny; ke Jekob ame he me lakon Aigupito ai. 5 Ke oge me kunö Mose me Arona, me oge me kot Aigupito, helâji me hnök hna ányâ unyidra: ke hwaban e me oge me hum öbun bi. 6 Ke oge me hom lakamöbun úheny Aigupito: me öbun e o ka hnyi köiö: ke haba at Aigupito adre me hnu lakamöbun me je kariota me tavat tabö hors ke ne o but ka hnyi Köiö ae Dra. 7 Ke adre me tenge kö Iehova, me e ame ip menekholom wanböbun me at Aigupito, me okhuto hudrin köiö me húlülü ödra; ke a wâ but je emaköbun únyi oge me ányâ hnyi Aigupito: ke öbun e laba hnyi hnyebaba hnyi je bong ae se. 8 Me oge me hum öbun ka hnyi hnyei iny at

Amora, tavat adre me laba hoton Joridano; ke ödrin e vat möbun; me oge me hn' ödrin ka hnyi hnyamöbun, me öbun e hom idrin hnyei; ke oge me obi' ödrin hnyi hnyimaköbun. 9 Ke ame todrö Balaka nöku Zipora, than Moaba, me vat me Isaraela; me e ame úkhünöng he ka hum Balaama nöku Beora he ka hang' öbun: 10 ke haba inya oge me höcö he ka ling Balaama; anyin a wale e ame ha hnahici öbun bi; me oge me omeli öbun unyi hnyi hnyamen. 11 Ke öbun e he hanyâüâ Joridano, me o hnyi Jeriko: ke ame vat möbun at Jeriko, me at Amora, me Perizi, me Kanana, me Heth, me Girigasa, me Hivi, me Jebusi; ke oge me hn' ödrin ka hnyi hny amöbun. 12 Ke oge me kunâ bánâ je wahankânâ, me ame ob' ödrin hnyi hnyimaköbun, wale li than Amora; ca hnen ányâm hele vat, me ányâm fana. 13 Ke oge ham köbun ke hnyei a öbun e ca huliwan, me je taun a öbun e ca otillâ, me öbun e labâ; öbun e han únyi hnyi je hnyei vine, me je hnyei elaiö a öbun e ca belökâ. 14 Ke walang any ot ju kö Iehova, me bi athnyabainy ge hnyok me hnathu minya: ke degec ut je khong wale a athnyabainy lakamöbun hoton Wagewe me e Aigupito; ke bi athnyabai Iehova. 15 Ke ame ne kong köbun he ka bi athnyabai Iehova, úca th' öbun hnyi bong ang at öbun e he ka bi athnyabainy; ame ne je khong waleji a bi athnyabainy lakamöbun hoton Wagewe, ame ne je khong khongon at Amora, hnyi hnyei öbun e labâ: ke haba inya me anyik lap, öhmun e he ka bi athnyabai Iehova. 16 Ke haba tavat ödrin e thu me ha, ka habe, Öhmun na ca he ka hna degeci Iehova me bi athnyabainy ke je khong; 17 anyin a Iehova Khongutin wale at ame hum ötin me lakamötin únyi hnyi hnyei Aigupito, únyi hnyi hnyaba ae úthaluö, me ányâ je haten ae gan hnyi hnyimaköta, me tu' öta eü hnyi gethen hia waleji ötin e vheno, wanben tavat waleji ötin e he wanbödrin: 18 ke Iehova ame obâ tavat bia thithö hnyi hnyimakötin, wale at Amora tavat adre me labâ hnyei: anyin a wale öhmun e he minya ka bi athnyabai Iehova; anyin a e Khongutin. 19 Ke Josua ame ha ka tavat, ka habe, E ca khan' öbun he ka bi athnyabai Iehova; anyin a e Khong ae kap; me Khong ame ciâ; e ame ca he ka hna anyibun hulö me anyibun je monu. 20 Ke öbun ka he ka hna degeci Iehova, me bi

athnyahabainy je khong kanyua, awe, e ame he ka hwiö me okongu öbun, me ohi öbun, hwaban ta je ünyi ae so e ame änyä köbun. 21 Me ame ha tavat kö Josua, ka habe, Ohe, öhmun e he bi ka bi athnyabai Iehova. 22. Ke Josua ame ha ka tavat, ka habe, Öbun tavat ohnathu öbun bi, a öbun e ücö Iehova hobi köbun he ka bi athnyabainy. Me haingödra, ka habe, Öhmun tavat ohnatho. 23 Anyin a wale he th' öbun walang ang ka hna degecä but je kong kanyua unyöbun, me hna je hnye-kubunkö Iehova, Khongu Isaraela. 24 Me ame ha tavat kö Josua, ka habe, Öhmun e he ka bi athnyabai Iehova Khonguta, me löng hwan hofuc 25 Me haba Josua ame ühibinyköu me tavat hnyi bong eling, me otilä hobi ködra hnanyibu me hna owisa hnyi Sekema.

26 Ke Josua ame sihnalimen ta je hofuc ang hnyi tusiny hnanyibu anyin Khong; ke e ame hom ke veto ae gan me otilä eü hmelen iwajo hnyi baten dok ae kap anyi Iehova. 27 Ke Josua ame ha ka tavat hia thithö, ka habe, Wä bi, haba veto ang, me, hnän ohnatho köta, anyin a e at ame

löng hia je hofuc a lia köta Iehova: anyin a wale hnän ohnatho köbun, wä öbun nye he ka ivinoä Khongubun. 28 Me haba Josua ame kunä tavat hia ka hnyi je jekhöüdra.

29 Ke hwaban ta je ünyi e, me ame mokcu Josua, nöku Nuna, athnyabai Iehova, ke wan haded ke ten je hunainy. 30 Me adre me konäm e hnyi iny hnyei, wale Timena-sera, hnyi hnyei ae hut hnyi Eferaima, hnyi bucen Gasa ka hnyi hwa-drö. 31 Ke haba at Isaraela adre me bi athnyabai Iehova hnyi je bong hia bongu Josua, me je bong bongon wahingat a ütangköu me Josua, hnyat adre hnyi wä je huliwa hia anyi Iehova hobi käu at Isaraela. 32 Ke haba je jeiö Josefa waleji a hom lakon Isaraela üheny Aigupito adre me konäm hnyi Sekema, hnyi utkänä a ücö Jakob ünyi ge laku Hamora kamö Sekema hwaban je mone a khaca haded: ke wale hwajekhon laku Josefa. 33 Ke ame mokcu Eleazara, nöku Arona, me ödrin e konäm e hnyi dok ae hut ga Fineasa a nokon, wale adre ham käu hnyi hnyei ae hut hnyi Eferaima.

TUSI ANYIN HNYAT OWISA.

HNYIMAKAN 1.

HWABAN imeki Josua haba lakon Isaraela adre me hnö ünyi Iehova, ka habe, la ame he ka bän ka he hobi köhmun ka at Kanana me vat mödrin? 2 Ke haingö Iehova, ka habe, Bän at Juda: wä bi öge hia but hna ködrin hnyei. 3 Ke Juda ame ha kö Simeona liamekeiny më, ka habe, Aiö u ka hnyi jekhök me ötu me tha he ka vat me at Kanana; ke oge me he ka tha he möu ka hnyi jekhom. Ke haba Simeona ame tha he më. 4 Me Juda ame he; je Iehova ame hna at Kanana me Perizi ködrin: ke hnyi Bezek ödrin e kot ten thauzan tavat. 5 Ke ödrin e ö Adoni-bezek hnyi Bezek, me ödrin e vat më, me ödrin e kot at Kanana, me at

Perizi. 6 Ke ame kec dö Adoni-bezek; me ödrin e hnu e, me kät e, me ödrin e subä but li bahnyök veto me li bacan ae gan. 7 Ke Adoni-bezek ame ha, ka habe, Ödrin sevente je than adre subä je bahnyök veto me li bacan ae gan gadrin, ödrin e blo je atmen hmelen anyik laulau: ke haba Khong ame bi hwaban könya helä me hnök hna änyä. Ke ödrin e hom e Jerusalema ai, me e ame mokcu eling.

8 Ke haba laku Juda ödrin e vat me Jerusalema, me hügünä e, me kot ge hele vat, me thong taun ge meic. 9 Ke hwaban e laku Juda ödrin e he me vat me at Kanana tavat adre me laba hnyi hnyei ae hut, me hnyi Whaiöu, me hnyi hnyei ae ca hut. 10 Ke Juda ame he ka at Kanana adre me laba hnyi Heberona: (ke haba ien Heberona ehac me Kiriath-areba:) me

ödrin e kot Sesai, me Ahiman, me Talemai. 11 Ke úheny e ödrin e he ka tavat adre me labā Debira. (Ke haba ien Debira ehac me Kiriatha-sefer.) 12 Ke haba Kaleba ame ha, ka habe, Haba at ame he ka kot Kiriatha-sefer, me hūgúnā e, me oge me he ka ham káu nökuk hlu jia Akesa. 13 Ke ame hūgúnā e Otheniela, nökü Kenaza kei Kaleba: me e ame ham Akesa a nokon káu me me áiän. 14 Ke ame o but káu hlu eling, me ha ka áiän he ka sumátá utkáná ge kamen: he ame utut hlu úheny hon asina; me Kaleba ame ha káu, ka habe, Ieú ae wem? 15 Ke haingen, ka habe, Ham but könya hnahic, u je hia but ham könya hnyeí ka hnyi Hwaiüu, anyin a wale ö u ham könya je an ame pupua. Me Kaleba ame ham káu je an ame pupua walethö me eú.

16 Ke haba lakon at Keni a úngú Mose, ödrin e tha he me laku Juda úheny hnyi tauniny je úö pama ka hnyi hnyeububa anyi Juda, hnyi ke keihen Arada ka hnyi hwaiüü; ke ödrin e he me tha laba me tavat. 17 Ke Juda ame tha he me Simeona a liamekeiny mä, me ödrin e kot at Kanana hnyat adre me labā Zefath me obia e. Ke haba ien taun, me, Horema. 18 Ke Juda ame hūgúnā minya Gaza me baten e, me Asekelona me baten e, me Ekerona me baten e. 19 Ke o bi Iehova unyi Juda; me e ame obā tavat ödrin e laba hnyi hnyeí ae hut; ke ca khana bi he ka obā tavat ödrin e laba hnyi hnyigöulen bucen, anyin ae hu gadrin je kariota fao. 20 Ke adre me ham Heberona kö Kaleba, heláji me Mose ame ha: ke e ame obā úheny e laku Anaka a kun. 21 Ke haba laku Beniamina, ödrin o ca obā at Jebusi, wale tavat adre me labā Jerusalema: ke haba at Jebusi ödrin e tha laba me laku Beniamina hnyi Jerusalema ke ne o but hnyi bong ang.

22 Ke haba lap anyi Josefa, me ödrin e he ka vat me tavat Beth-ela: ke e bi Iehova unyidrin. 23 Ke haba lap anyi Josefa ödrin e úkhúnöng ka ecmáká Beth-ela. (Ke Luza ien taun ehac.) 24 Ke tavat ecmak ödrin e wá et ame dit úheny hnyi taun, me ödrin e ha káu, ka habe, Ó u omanená thö köhmun homagöuleny taun, ke öhmun e he ka betenge gam. 25 Me e ame omanená ködrin homagöuleny taun, me ödrin e kot taun ge hele vat; ke ödrin e hna but at me anyin lap hia. 26 Me ame he at ka hnyi hnyeí iny at Heth, me otílá taun me

hwenyi ien Luza, wale ien ke ne o but hnyi bong ang.

27 Ke haba at Manase ödrin e ca obā tavat adre me laba hnyi Bethe-seana me je tauniny, me Tanaka me je tauniny, me tavat adre me labā Dora me je tauniny, me tavat adre me labā Ibeleama me je tauniny, me tavat adre me labā Megido me je tauniny: ke hwege at Kanana he ka laba bala bi hnyi hnyeí eling. 28 Ke ame hwege bi at Isaraela, me ödrin e kuná at Kanana he ka bi athnyaba, k'adre ca ti ob' ödrin.

29 Ke haba at Eferaima ödrin e ca obā at Kanana tavat adre me laba hnyi Gezera; ke at Kanana ame laba hnyi Gezera unyi drin.

30 Ke haba at Zebulona, ödrin e ca obā tavat adre me laba hnyi Kiterona, me tavat adre me laba hnyi Nahalol; ke ame tha laba mödrin at Kanana, me bi fat ködrin.

31 Ke haba at Asera, ödrin e ca obā tavat adre me laba hnyi Ako, me tavat adre me laba hnyi Zidona, me Alab, me Akeziba, me Heleba, me Afeka, me Rehoba: 32 ke haba at Asera ödrin e tha laba me at Kanana, wale tavat a aten hnyeí: anyin a ödrin e ca ob' ödrin.

33 Ke haba at Nafatali, ödrin e ca obā tavat adre me laba hnyi Bethe-emes, me tavat adre me laba hnyi Beth-anath: ke ödrin e tha laba me tavat Kanana, tavat adre me labā hnyeí: ke so bi haba tavat adre me laba hnyi Bethe-emes, me Beth-anath ödrin e bi fat ködrin.

34 Ke haba at Amora, ödrin e khöbwe at Dana ka hnyi hnyeí ae hut: k'adre ca hn' ödrin he ka utut ka hnyi hnyigöulen bucen: 35 ke hwege at Amora he ka laba bala bi hnyi bucen Heres, hnyi Ajalona, me Salebim: ke hwege bi hnyamen lap anyi Josefa, me ödrin e bi fat bi. 36 Ke haba hnyigöulen at Amora, me, hwán hnyi gethen ame ölö Akerabima ai, hwán hnyi kic me ethö görany.

HNYIMAKAN 2.

KE ame o hnyi Bokim úbeny Gelegala angela anyi Iehova. Me e ame ha. ka habe, Oge me kun' öbun úheny Aigupito, me hum öbun ka hnyi hnyeí waleji oge khemanyin ka lakamöbun; ke oge me ha, ka habe, Oge me ca he balua ka ounyibáúú anyik úhinhnyköu möbun: 2 ke

haba öbun m' öbun e ca he bi ka úhi-hinykôu me aten hnyei ang ; k' öbun e he ka kia anyidrin je taben hut : ke so bi öbun e ca löng hok hofuc : ieu gabun m' öbun e anyâ helâe? 3 Anyin a wale oge me ha, ka habe, Oge me ca he ka ob' ödrin hnyi hnyimaköbun ; k' ödrin e he ka helâ me je údö hnyi je vhaköbun, ke haba je khongudrin, me, hnân hnewe köbun. 4 Ke angela anyi Iehova ame ha ta je hofuc eling, me haba tavat adre me tenge gan hmâ. 5 Me adre me hwenyi ien dok eling, me, Bokim : ke ödrin e bi hut eling kö Iehova.

6 Ke Josua ame kunâ tavat, me haba lakon Isaraela ödrin e ve he ka hnyi je idrin he ka labâ hnyei. 7 Ke ame bi athnyabai Iehova tavat hnyi je bong bongu Josua hia, me hnyi je bong hia thithö bongon je hingat ae utangköu me Josua, tavat adre hia but hnyi wâ ta je huliwa hia thithö ae gan hmâ anyi Iehova, waleji e ame anyâ hobi kâu at Isaraela. 8 Ke a mokcu Josua nöku Nuna, athnyabai Iehova, ke wan haded me ten je hunainy. 9 Me ödrin e konâm e hnyi baten iny hnyi Timena-sera, hnyi hnyei ae hut hnyi Eferaima, hnyi ke keihen hwadröiny Gaza. 10 Ke ame úkhacaköu dö eling hia me lakamödrin : ke ame kü ke dö hwabödrin ae ca khan' ödrin Iehova, me je huliwa e ame anyâ hobi kâu at Isaraela.

11 Ke haba lakon Isaraela ödrin e anyâ únyi ae kong hnyi hnyimakö Iehova, me bi athnyabainy je Baala : 12 Ke ödrin e hna degeci Iehova Khongon lakamödrin, at a hum ödrin úheny hnyi hnyei Aigupito, me hnu hoton ke je khong, je khongon je hnyei igigili ödrin, me khudrung ködrin : ke ödrin e okuâ hmönyin anyi Iehova. 13 Ke ödrin e hna degeci Iehova, me bi athnyaba ka Baala, me Aseira. 14 Me ame ubâhlâ thö hmönyin anyi Iehova ka at Isaraela, me e ame hn' ödrin ka hnyi hnyamen hnyat sei me sei ödrin, me e ame úcü ödrin me je iwahnaihmiöny mödrin igigilö, me me ca khan' ödrin hmetu bi he ka tot hnyi hnyimakan je iwahnaihmiöny mödrin. 15 Ödrin e he ka hnyi ke je dok hia, me ame kong hnyamö Iehova ködrin, helâji me Iehova ame ha, me helâ me hna khemanyin ködrin ga Iehova : me ödrin e vec gan hmâ. 16 Ke haba Iehova ame oâ je at owisa, wale adre omeli ödrin únyi hnyi hnyamen je hnyat sei ödrin. 17 Ke ödrin e ca löng ka tavat owisa kö

drin, ke ödrin e bi únyi monu me je khong monu, me khudrung ködrin : ödrin logot saú únyi hnyi gethen a vheno lakamödrin waleji adre löng hnanyibu anyi Iehova ; ke ödrin e ca anyâ bi helâe. 18 Ke Iehova ame ham ködrin tavat owisa, me Iehova ame tha e me at owisa, me omeli ödrin únyi hnyi hnyamen je iwahnaihmiöny mödrin hnyi ta je bong hia bongon at owisa : anyin a Iehova ame ietra can anyidrin mokhon ge tavat adre me sed ödrin me oveci odrin, 19 Ke a mokcu at owisa, me ödrin e hmetu me okongu ödrin bi hon hwakecin lakamödra me hnu hoton je khong me bi athnyabaidrin me khudrung ködrin ; ke adre me ca degec anyidrin je huliwa me hwakecidrin ae újöng. 20 Me ame ubâhlâ thö hmönyin anyi Iehova ka at Isaraela ; me e ame ha, ka habe, anyin a hia but tavat eang hanyâúâ anyik úhi-hinykôu, waleji oge me húna ka lakamödrin, me ca löng hok hofuc ; 21 awe, oge me ca he hmetu ka obâ je hnyei hobi ködrin a je kolon hnyi úen mok a Josua : 22 m' oge me he ka cubec at Isaraela únyi gadrin, hawa, adre me he ka tuö gethen de Iehova he ka vheno e, helâji me lakamödra ame anyâ, ame ne ba. 23 Me Iehova ame onuâ je hnyei eling, me ca ie ob' ödrin ; ke e ame ca hn' ödrin ka hnyi hnyamö Josua.

HNYIMAKAN 3.

KE walang je hnyei Iehova ame onuâ m' ödrin e he ka cubic at Isaraela, a tavat adre ca hnyi wâ je vat hia hnyi Kanana : 2 waleling me me khana je dö anyin lakon Isaraela he ka úne vat ködrin, a tavat ödrin e ca hnyi wâ ebac : 3 walang faiv ta than Filisiti, me at Kanana hia, me at Sidona, me at Hivi adre me labâ bucen Lebanona, hwân hnyi bucen Baala-heremona ke ne o but hnyi gethen ame didrö ka hnyi Hamath. 4 Ke haba tavat eling me hnân cubic at Isaraela me me he ka wâ hawa, ödrin e ne he ka hnu hoton je hnanyibu anyi Iehova, waleji a húna ka lakamödra a deny Mose. 5 Me ame laba lakon Isaraela unyin at Kanana, me at Heth, me at Amora, me at Perizi, me at Hivi, me at Jebusi : 6 ke adre me hom lakudrin je hlu me me laöiödra, me ham lakudra bi je hlu ka lakudra obaga, me bi athnyabainy je khongudrin.

7 Ke haba lakon Isaraela adre me anyâ hulö hnyi hnyimakö Iehova, me hnying

Iehova Khongudrin, me bi athnyabainy je Baala me je Aseira. 8 Anyin a wale ame ubáhlá hmönyin anyi Iehova ka at Isaraela, me e ame úcú ödrin kö Kusani-risathaima than Mesopotamia : me lakon Isaraela adre me bi athnyabai Kusani-risathaima eit ta huna. 9 Ke ame tenge lakon Isaraela kö Iehova, me Iehova ame oá ka lakon Isaraela at hnân omelö, ke e ame omeli ödrin, jia Otheniela nöku Kenaza kei Kaleba. 10 Ke ame mokut hon at e hanu Iehova, ke e ame owisa ka at Isaraela ; ke e ame he ka vat, me haba Iehova ame hnö Kusani-risathaima than Mesopotamia ka hnyi hnyamen : ke e hwege hnyamen hu Kusani-risathaima. 11 Ke ame mená hnyi hnyi fáte je huna. Ke ame moku Otheniela nöku Kenaza.

12 Ke ame ányá hmetu bi únyi ae kong hnyi huyimakö Iehova lakon Isaraela : ke Iehova ame siwhégiö Egelona than Moaba ka at Isaraela, can ödrin e ányá únyi ae kong hnyi hnyimakö Iehova. 13 Me e ame úkhacaköüá bi káu laku Amona me Amabeka ; me e ame he me kot Isaraela, me hügüná tauniny je úö pama. 14 Ke lakon Isaraela ödrin e athnyabai Egelona eitín je huna. 15 Ke ame tenge kö Iehova lakon Isaraela, me Iehova ame oá ködrin at hnân omelö, jia Ehuda nöku Gera, at Beniamina, e at ae me benyin : ke haba lakon Isaraela ödrin e kuná e me bwihlany kö Egelona than Moaba. 16 Ke Ehuda ame tibet hobi káu e bi hele vat a lo li homakan, khaca kubít ibeüen ; me e ame weiká e eü hmelen anyin úkhaú hnyi jevan a metán. 17 Ke e ame hom bwihlany kö Egelona than Moaba : ke at ae tí pipikhenya Egelona. 18 Ke a hia but ham bwihlany e ame kuná hmetu tavat adre vaden bwihlany. 19 Ke habe e bi, e ame hmetu hmetu cicö je hnatheat hnyi Gilegala, me ha, ka habe, Than lö, e hu gak hofuc ae iyong köu. Ke haingen, ka habe, Laba hnyibú ju. Me ame he but hnyöu ai tavat ödrin e tot unyin. 20 Ke ame hok dö Ehuda káu : ke e ame laba hnyi hnyeule ethö dok ae hu ang, ke e ame hake lap. Me haba Ehuda ame ha, ka habe, E hu gak hofuc hwan Khong köu. Me e ame todrö úheny hon taben lap. 21 Me Ehuda ame iná but hnyamen a me me oc ut hele vat únyi hnyi jevan a metán, me dá hnye-kon bi : 22 k' ame dit hele vat ke ne o but hnyi can ; me ame khöt ju pipikhenya hon hele vat, anyin a e ame ca oc hmeto hele vat únyi hnyi hnye-kon ; k' ame o but ka

hnyi hoton. 23 Me ame didrut Ehuda ka hnyi poretikö, me hlöng li hwanumen hnyeule ethö káu, me kiá. 24 Ke e ame he but, me ame o lathnyabainy ; me ödrin e wá, ke wá bi, adre hia but kiá li hwanumen hnyeule ethö ; ke haingödrin, ka habe, Ame ne tube li can la hnyi anyin hnyeule ethö. 25 Ke ödrin e halubahingen ke ne o but ödrin e hmehma but : ke wá bi e ame ca khöng li hlinginy hwanumen hnyeule ethö ; me ödrin e hom ki me khöng : me wá bi, a ta but anyidrin than káu a ga moku. 26 Ke ödrin e tiga halubahingen, me haba Ehuda ame kec, me he but hnyi hoton je hnatheat, me kec Seirath ai. 27 Ke e ame he but me túá trutru hnyi hnyi ae hut hnyi Eferaima, me ame tha utut lakon Isaraela më úheny hon hnyi ae hut, ke e ame bán. 28 Me e ame ha ködrin, ka habe, Hnu hotuk : anyin Iehova ame hna at Moaba je iwahnaihmiöny ka hnyi hnyamöbun. Ke ödrin e utut më, me tuö je dok ae cöcö hnyi Joridano úcon at Moaba, ke adre me ca hna ke at a khaca ame he hanyáúá. 29 Ke ödrin e kot at Moaba hnyi ün eling heláke ten thauzan tavat, tavat hia ae hunyín, ke tavat hia ae hwege ; e ba at ame kec möt. 30 Ke adre hom úhnyúkongu Moab hnyi bong eling hmelen hnyamen at Isaraela. Ke ame mená hnyi eite je huna.

31 Ke hwaban e bi, me Samegara nöku Anath, haba at eling ame kot at Filisiti a siks haded ge osö hnân alin bolok : me e ame omelö minya at Isaraela.

HNYIMAKAN 4.

KE haba lakon Isaraela adre me ányá hmetoá únyi ae kong hnyi hnyimakö Iehova, ke a moku Ehuda. 2 Ke haba Iehova ame úcú ödrin ka hnyi hnyamö Jabin than Kanana, at ame musi hnyi Hazora ; ke Sisera taben anyin vat, at ame laba hnyi Haroseth hnyi je hnyi. 3 Haba lakon Isaraela ödrin e tenge kö Iehova : anyin ae hu gan nain haded je kariota fao ; ke twente je huna e ame hom úhnyúkongu hwégiá lakon Isaraela.

4 Ke haba Debora perofeta momo, öiö Lapidoth, e at owisa ka at Isaraela hnyi ün e. 5 Ke e ame laba hmelen pama anyi Debora wanben Rama me Beth-ela hnyi hnyi ae hut hnyi Eferaima : ke lakon Isaraela adre me he káu ka owisa. 6 Ke e ame úkhúnöng ka hawo Baraka nöku

Abinoam úheny Kadesi-nafatali, me ha káu, ka habe, Hawa, a ca ha Iehova Khongu Isaraela, ka habe, He thö, hok dö ka hnyi bucen Tabora, ke tha hom möu ten thauzan laku Nafatali, me laku Zekulona? 7 Ke oge me he ka lelö-köu ka hnyi wagewe Kisona, Sisera, taben vat anyi Jabin, me anyin je kariota, me anyin je utbavat; me oge me he ka hna e ka hnyi hnyamân. 8 Ke haingö Baraka, ka habe, U je ne he ka tha he mönya oge me he ka he; ke u je ne ca he ka tha he mönya, me oge me ca he ka he. 9 Haingen, ka habe, Oge ma hnyi he möu: ke so bi, ca hnân oganö u úhem; anyin ame he Iehova ka hnö Sisera ka hnyi hnyamen momo. Ke ame todrö Debora me tha he me Baraka Kadesi ai. 10 Ke haba Baraka ame hawâ at Zebulona me Nafatali Kadesi ai; ke ödrin ten thauzan tavat adre tha he mē: ke Debora ame tha he mē. 11 Ke haba Heberu at Keni ame úsákáúö me at Keni ehac, wale laku Hobaba úngu Mose, ke e ame otilá umen uma mano hnyi iwajo hnyi Zananim, hnyi baten Kadesi. 12 Ke ödrin e thumetu Sisera, ka habe, E but Baraka nöku Abinoam ka hnyi bucen Tabora. 13 Me haba Sisera ame úkhacákouâ anyin ta je kariota hia, nain haded je kariota fao, me tavat hia anyin, úheny Haroseth hnyi je hnyei, ka hnyi wagewe Kisona. 14 Ke Debora ame ha kö Baraka, ka habe, Todrö, anyin a walang bong ame he Iehova ka hnö Sisera ka hnyi hnyamâm: hawa, ame ca bö Iehova hnyi hnyimakâm? Ke Baraka ame utut úheny hnyi bucen Tabora ke ten thauzan tavat adre me hnu hoton. 15 Ke haba Iehova ame ohmöiöngi Sisera, me anyin ta je kariota hia, me anyin ta je utbavat hia, ge hele vat hnyi hnyimakö Baraka; ke Sisera ame utut úheny hon anyin kariota, me kec hon kânâ. 16 Ke Baraka ame hnu je kariota me je utbavat, ke ne o but Haroseth hnyi je hnyei: ke ame ta but je utbavat hia thithö anyi Sisera ge hele vat, ke ba but kolon. 17 Ke so bi haba Sisera ame kec hon kânâ ka hnyi uma mano umö Jaela öiö Heberu at Keni: anyin ame laba so Jabin than Hazora, me lap anyi Heberu at Keni. 18 Ke haba Jaela ame he me úkbanö me Sisera, me ha káu, ka habe, Than lö saú ju, saú ju könya, ca ot bi. Me e ame saú káu ka hnyi uma maoo, ke e ame tube e ge kubö. 19 Ke haingen káu, ka habe, Ö u habelik ge köiö; anyin a iny beic. Ke e

ame oc hlinginy kaia a dân basin, me habelen e, me tube e. 20 Ke haingen káu, ka habe, U me he ka tot hnyi hwanuma, ke ame ne o thö ke at me hnei u, ka habe, E hu at ethö? u me he ka ha ka habe, E ba. 21 Ke haba Jaela öiö Heberu ame hom faoiny uma mano, me hom hama hnyi hnyamen, me he hmecik káu, me tho fao hnyi halelöüiny, me ame dá oâ ka hnyi kânâ; anyin a e ame mokut hnying me sēnyin; me e ame mokcu. 22 Ke wâ bi, Baraka ame tiga hnu Sisera, me ame didrut Jaela he ka úkhanö mē, me ha káu, ka habe, He thö jem, me oge me he ka omanenâ köu at u me elâm. Ke e ame o but káu, me wâ bi, ame mokut Sisera a mokcu, ke ka e faoiny uma mano hnyi li halelöüiny. 23 Ke Khong ame oúhnyúkongu Jabin than Kanana hnyi bong eling hnyi hnyimakan lakon Isaraela. 24 Ke haba hnyamen lakon Isaraela ame musi hmetu hu Jabin than Kanana, ke ne o but adre ohio Jabin than Kanana.

HNYIMAKAN 5.

ME haba Debora me Baraka nöku Abinoam, ödrü me khumöng hnyi bong eling, ka habe,

2 Anyin ame homakan je taben hnyi Isaraela,

Ke haba tavat adre ka ve ham ödra bi me ca höcö

Awe, Oganö Iehova.

3 Löng ju öbun je than; tivehlöng ju öbun je taben;

Me oge me he bi nya ka khumöng kö Iehova;

Oge me he ka khumöngö olungâ kö Iehova, Khongon at Isaraela.

4 Iehova lö, u me he úheny Seira,

U me he úheny hnyi utkânâiny Edoma, Me ame öbubuny hmeledrany, k' ame ta but drany,

Me ta but köiö únyi hnyi je úlá.

5 Ame o Iehova me ame bahihingölö je bucen,

Wale Sinai, ke ame o Iehova Khongu Isaraela.

6 Hnyi úö Samegara nöku Anath,

Hnyi úö Jaela, ke ba at hnyi je hna cit gethen,

Ke ame he tavat hnyi je ong gethen.

7 Ame ba but je at musi hnyi Isaraela, e hi' ödrin,

Ke ne o but oge me tot, a inya Debora,

- Me oge me tot, a ke linyen hnyi Isaraela.
- 8 Ke adre me úca je khong kanyua ;
Me ame o vat ka hnyi je homagöule :
Hawa, e hu bec ame ne ö adre wâ
Unyin je fáte thauzan hnyi Isaraela ?
- 9 E bi hnyekuk unyin je taben hnyi hnyei Isaraela,
Hnyat ödrin e ham ödrin bi me ca hócö :
Oganö Iehova thö.
- 10 Ha manená e, öbun tavat tabâ je asina ae hau,
Öbun tavat a laba hon je kubö ae mec,
Me öbun tavat vheno gethen.
- 11 Hnyi dok adre ca löng medien tavat fana, hnyi je hna seköio,
Adre me he ka aú gaga eling je huliwa ae wisa anyi Iehova,
A ta je huliwa ae wisa hnyi hnen hna musi hnyi Isaraela,
Me ame he je aten Khong ka hnyi je homagöule,
- 12 Debora lö, hmak dö, hmak dö ;
Hmak dö, hmak dö, hai thö khumöng :
Baraka lö, nöku Abinoam todrö, me lelö bâ ányám je bâ.
- 13 Me ame ok ke kolon je taben, me tavat ;
Ke ame o könya Iehova, úcon tavat ae hwege.
- 14 Úhedrin hnyi Eferaima ke anyidra wân úheny Amaleka ;
K' ame he hotom Beniamina, aten em hnyei ;
Ke ame ok je taben úheny Makir,
Ke úheny Zebulona tavat hok uciny at musö vat,
- 15 Ke e bi unyi Debora je than Isakara ;
Haba Isakara, me tha úcú e me Baraka ;
Ödrin e wadring ka hnyi hnyigöulen bucen hnyi li can.
Ke haba hnyi je deny je wagewe anyi Reubena,
Me adre me ve sihwegiá je hnyekudrin eling.
- 16 Ieú gam u me laba hnyi je haginý mamoe,
He ka löng hwan at ame hawâ je hnabat meno ?
Haba hnyi je deny wagewe anyi Reubena,
Me waleling adre ti elám je hnyok.
- 17 Gileada ame laba hnyi hoton Joridano :
Ke ieú ga Dana, me e ame laba bala hon je hu ?
- Ke ame laba baú Asera hnyi hobat köio
Me laba hnyi anyin je bwedua
- 18 Haba Zebulona me wale at ame hna anyin möt ka hnyi deny mok.
Me Nafatali, hnyi je dok ae görany hnyi vat.
- 19 Ame o but je than me vat ;
Me ame vat je thaniny Kanana,
Hnyi Tanaka hnyi je an hnyi Megido :
Ödrin e ca hok mone me hwaban.
- 20 Ödrin e vat úheny hnyi drany
A vat me Sisera je okhú hnyi je deny.
- 21 A hom degeci ödrin hnen wagewe Kisona,
Hnen wagewe ehac, wale wagewe Kisona.
Hanuk lö u je hia but uto ju at ae hwege.
- 22 Me ame uto but boujimen can je hors Anyin a bibiá hwege, a hwege bibiá hnyat ae hwege gadrin
- 23 Haingen angela anyi Iehova, ka habe, Hangö Meroza but,
Hangá hwegiá but tavat adre me labá e ;
Anyin ödrin e ca o he ka hadruo Iehova,
He ka hadruo Iehova unyin tavat ae hwege.
- 24 Hnahic ut Jaela hon ta je momo,
Wale öio Heberu at Keni,
E ame he ka hnahic hon ta je momo hnyi uma mano.
- 25 E ame sumátá köio, me e ame ham bi dán basin ;
E ame hom dán basin ae wahma hnyi kaia anyin than,
- 26 E ame iná hnyamen ka hnyi fao,
Me hnyamen a metán ka hnyi hama anyin at huliwa ;
E ame kuc Sisera ge hama, e ame kot dá oá ban,
E ame dá me kot dá oá halelöúiny.
- 27 Hnyi li can e ame nom, me ta, me mokut ;
Hnyi li can e ame nom, me ta,
Hnyi hnen hna nom, wale e ame ta a mokcu.
- 28 Ke ame selat momo hnyi mamalama me hongot,
Wale hinyö Sisera, hnyi hna pewaná mamalama, ka habe,
Ieú a bec gan he ka o anyin kariota ?
Ieú a bec gan je wil anyin anyin ta je kariota ?

29 Me ame thu kâu anyin je momo ae metá,
 Ke e ame thu bi kâu, ka habe,
 30 Hawa, e ba wáhnodrin, adre tiga ca khená je hna húgúná?
 Ame ne úsa khaca hlu ka ke at me ke at, ame ne úsa lo li hlu;
 Ke hnán hobi kö Sisera je khauen adre sei ae ve makan,
 Ae ve makan hna tibet omecin hnyi li hwenöiny, únyi hnyi nyin je hna sei?
 31 Iehova lö, e so e he ka mok je iwahnai-hmiöny möu hia beláe:
 Ke ame he tavát adre me hanyok kâu ka helá me seúnö ame he hnyi hwegien.
 Me ame mená but hnyei ke ne o but fáte je huna.

HNyimakan 6.

KE haba lakon Isaraela adre me ányá únyi ae kong hnyi hnyimákö Iehova: me Iehova ame hn' ödra ka hnyi hnyamen at Midiana hnyi je huna a seven. 2 Ke hwege at Midiana hon at Isaraela: ke can at Midiana, haba lakon Isaraela adre me ányá hobi ködra bi je thop hnyi bucen, me je op, me je hna bá. 3 Ke a hia but belöká hnyei at Isaraela, me ame o at Midiana, me Amaleka, me tavat e deiö; adre me o but he ka vat mödra; 4 me adre me hunuma cici ödra, me okongóá jeúny káná ke ne o but Gaza, ke ba hmetu omelen at Isaraela, ame ne mamoe, me kau, me asina. 5 Anyin a adre me tha o me haledrin omeno, me umödra je uma mano, ke adre me o helá me úseiny hamon; ke ca hnán öü ödra me haledra je kamela: ke adre me o ka hnyi hnyei he ka ohíá e. 6 Ke gan hmá ba ta únyi anyin at Isaraela can at Midiana; me haba lakon Isaraela adre me tenge kö Iehova.

7 Ke ame tenge kö Iehova lakon Isaraela can at Midiana, 8 me Iehova ame kuná perofeta ka lakon Isaraela; me e ame ha ködra, ka habe, Walang hofuc ho Iehova Khongon at Isaraela, ka habe, Oge me lili öbun úheny Aigupito, me hum öbun únyi hnyi hnyaba ae uthaluö; 9 ke oge me omeli öbun únyi hnyi hnyamen at Aigupito, me únyi hnyi hnyamen tavat hia adre me bom úhnyúkongu öbun, me ob' ödrin hnyi hnyimáköbun me ham bi köbun idrin hnyei; 10 ke oge me ha köbun, ka habe, Inya Iehova Khongubun; ca he öbun ka

outen je khong khongon at Amora, wale hnyei öbun e labá: ke öbun e ca löng hok hofuc.

11 Ke ame o but angela anyi Iehova, me laba hmelen iwajo anyi Joasa at Abiezera hnyi Ofera: ke haba Gideona a nokon ame kokot hwit hnyi hna hlec vine, he ka ikhálá e ge at Midiana. 12 Ke ame manen dut kâu angela anyi Iehova, me ha kâu, ka habe, E bi unyám Iehova, u baga ae hwege. 13 Ke haba Gideona ame ha kâu, ka habe, Tuhök lö, ame ne e but Iehova unyihmun, iéú can ame o köhmun ta je únyi hia eang? ke ewa anyin je úöman hia wale a thumetu öhmun hnen lakamöhmun, ka habe, A ca hum öhmun Iehova úheny Aigupito? ke walang ang a hia but Iehova digic öhmun bi, me hn' öhmun ka hnyi hnyamen at Midiana. 14 Ke haba Iehova ame wá e, me ha, ka habe, He thö me tang hwegiám eang me omelö at Isaraela únyi hnyi hnyamö Midiana: hawa, oge me ca kunö u? 15 Ke e ame ha kâu, ka habe, Tuhök lö, oge me he ka omelö at Isaraela hnen iéú? wá bi, haba anyik lap wale ae únyi baú hmönyin hnyi Manase, ke iny úhnyúkong hmönyin hnyi hnyaba cica. 16 Haba Iehova ame ha kâu ka habe, Oge me he ka tha e möu, ke u me he ka kot at Midiana helá me at a khaca. 17 Ke haingen kâu, ka habe, Oge ne hia but kap betenge baú hnyi hnyimákám, u me he ka ányá könya haten, a u at ame úhnenamö mönya. 18 Ó u ca he ka he úhem ang, iny me o hmetu but köu, me hom anyik bwihlany, me ip e hnyi hnyimákám. Me e ame ha, ka habe, Oge me he ka laba úhalubahing ke ne o but u me hmetu. 19 Ke Gideona ame didrö, me penapena nokon got, me areto adre ca levená ge tap falawa a khaca efa: ke e ame ip utiö hnyi tangen, me hingálá dân meno ka hnyi öt, me hom kâu eú hnyi hmelen iwajo, me ham. 20 Me angela anyin Khong ame ha kâu, ka habe, Hom dö utiö me areto adre ca levená, me ip hon kic ang, ke hingálá but tap meno. Me e ame ányá heláe. 21 Me haba angela anyi Iehova ame iná but hnyiban uci hnyi hnyamen, me kálá meno me areto adre ca levená; me ame o thö meic únyi hnyi kic, me thong degecá meno me areto adre ca levená; me ame he but angela anyi Iehova, k' ame ca wá bi. 22 Ke Gideona ame wá a angela anyi Iehova; me haingö Gideona, ka habe, Ekölö Iehova Khong! anyin oge

iohnyimak me angela anyi Iehova. 23 Me Iehova ame ha kâu, ka habe, E so e hu gam hnahic; ca ot bi: u me ca he ka mok. 24 Me haba Gideona ame otilâ taben hut eling kö Iehova, me hwenyi ien e Iehova-salom: ke ka e bi hnyi Ofera anyin at Abiezera, ke ne o but hnyi bong ang.

25 Ke haba hnyi lit eling Iehova ame ha kâu, ka habe, Hom dö bolok haleny kâmâm, a bolok a loiny wale at a seven hunainy, me kia but taben hut kö Baala anyin kâmâm, me subâ degecâ but Aseira walethö hon e: 26 ke u me he ka otilâ taben hut kö Iehova Khongom hnyi hon ban hnabâ ae hwege eling, ge huliwa ae úcú, me hom dö bolok a loiny me me hudo hudiny leú hon utöiny Aseira u me he ka sö degecâ. 27 Ke Gideona ame hom hnyat a ten únyi hnyi lathnyabainy, me ányâ helâ me Iehova ame ha kâu: ke e ame outen lap anyin kamen, me tavat a aten taun, me me ca khana he ka ányâ e hnyi lany, ke e ame ányâ bi hnyi lit. 28 Ke a hmak dö tavat aten taun hnyi hnyomakatu, me wâ bi, adre hia but kia taben hut kö Baala, me sö degecâ Aseira walethö hon, me hudo bolok a loiny hon taben hut adre otilâ. 29 Ke ame úhnenamoköuâ tavat, ka habe, Ia ame ányâ e? Ke ödrin e hia but úhnö, me hnö, me haingödrin, ka habe, Gideona nöku Joasa ame ányâ únyi ang. 30 Ke haingen aten taun kö Joasa, ka habe, Hom but nokom m' adre me hlingâ: anyin a e ame kia taben hut kö Baala, me sö degecâ Aseira walethö hon. 31 Haba Joasa ame ha ködrin hia tavat ödrin e tot kâu, ka habe, Óbun e he ka tengiö Baala? Óbun e he ka omelö e? Haba at ame he ka tengiö Baala me adre me he ka hlingâ ke tiga hnyomakatu bi: ame ne ke khong bi e, hamen he ka tengiâ e bi, can ame hia but kia taben hut kâu. 32 Anyin a wale e ame hwenyi ien e hnyi bong eling Jerubaala, ame ha, ka habe, Hamö Baala he ka tengiâ e bi, can hna kia taben hut kâu.

33 Me ame úkbacaköu at Midiana hia me at Amaleka, me aten e deiö; me ödrin e he me laba hnyi hnyigöulen bucen anyin Jezerela. 34 Ke ame ta hu Gideona hanu Iehova; me e ame túâ trutru; me ame úkbacaköu hoton e at Abiezera 35 Me e ame úkhúnöng ka at Manase hia; me ödrin e úkbacaköu hoton e: ke e ame úkhúnöng ka at Asera hia, me Zebulona, me Nafatali; me ödrin e he he ka úkhanö

mödrin. 36 Ke Gideona ame ha ka Khong, ka habe, U je ne he ka omelö at Isaraela ge hnyamök helâ me hna ha gam, 37 wâ bi, o ge me he ka ip leúnen mamoe hnyi hna huje hwit; ke ame ne hu khubet hon leúnen mamoe thibi, ke mada bi kânâ, awe, oge me he ka wâhmakhmeto a u me he ka omelö at Isaraela ge hnyamök helâ me hna ha gam. 38 Ke ame helâe: anyin a e ame vesâ hnyi hnyomakatu, me hlec leúnen mamoe, me owa khubet únyi hnyi leúnen mamoe, ke ame unöngötö kaia ge köiö. 39 Ke haba Gideona ame ha ka Khong, ka habe, ca he ka ubâhlâ ányâm hmönyin könya, ke oge me he ka okhaca biju fuc: ö iny me he ka okhaca hmetu cubec ge leúnen mamoe; e so e he bi leúnen mamoe ka mada, ke ame he ka hu khubet bi hnyi kânâ hia. 40 Me haba Khong ame ányâ helâe hnyi lit eling: anyin ame mada thibi leúnen mamoe, ke khubet bi kânâ hia.

HNyimakan 7.

KE haba Jerubaala, wale Gideona ame vesâ hnyi hnyomakatu, me tavat hia thithö unyin me laba hnyi an ame pupua anyi Harod: ke e hnyi hwadrö vat anyin at Midiana hnyi baten ong bucen More hnyi hnyigöulen bucen.

2 Ke haba Iehova ame ha kö Gideona, ka habe, E se hia hmönyin tavat unyâm, me oge me ca he ka ham at Midiana ka hnyi hnyamödra, wâ e nye bi gan at Isaraela könya, me ha, ka habe, Iny möt ge hing hnyamök. 3 Ke walang ang, ha thö ka tavat, ka habe, Haba tavat ae ot me öbubuny, e so ödrin e he hmetu, me ie he úheny hnyi bucen Gileada. Me haba tavat a twente tu thauzan adre me hmetu hmetu, ke ten biju thauzan.

4 Ke Iehova ame ha kö Gideona, ka habe, E tiga se hia hmönyin tavat; hum ödrin dö ka hnyi an, me oge me he ka cubic ödrin eling hobi köu: ke haba at oge me he ka ha köu a g' ame he ka tha he möu, me wale at ame he ka tha he möu; ke haba at oge me he ka ha köu, a g' ame ca he ka tha he möu, me ame ca he ka he. 5 Me e ame hom tavat ka hnyi an: ke haba Iehova ame ha kö Gideona, ka habe. Haba hnyat hia ödrin e drem an helâ me uicin kuli, me u me he ka hake ip ödrin; ke helâe minya hnyat hia ödrin e cibouca me ic. 6 Ke haba úseiny tavat adre me drem, wale hnyat ödrin e kap hnyamödrin

ka hnyi je hnyimödrin, me ödrin theri baded: ke haba ke keihen tavat bi ae ae hia, me ödrin e cibouca me ic. 7 Ke Iehova ame ha kö Gideona, ka habe, Oge me he ka omeli öbun ge tavat a theri haded, a hnyat ödrin e drem, me hna at Midiana ka hnyi hnyamâm: ke he thö tavat hia thithö ka hnyi je hnyabadrin bi. 8 Haba tavat ödrin e hok kamec ge je hnyamödrin me anyidrin je trutru: ke e ame kunâ at Isaraela hia ka hnyi umödrin je uma mano; ke e ame hom behânâ bi tavat a theri haded: ke e hnyi hmelen e, hnyi hnyigöulen bucen, vat anyin at Midiana.

9 Ke haba hnyi lit eling, Iehova ame ha kâu, ka habe, Todrö, me utut ka hnyi hna hunuma; anyin a oge hia but hna e ka hnyi hnyamâm. 10 Ke u je ne ot ka ut, me u ma tha he me Fura athnyabaem ka hnyi hna hunuma: 11 ke u me he ka löng üfucidrin; ke hwaban e adre me he ka ha hwegien li hnyamâm he ka utut ka hnyi hna hunuma. Me e ame tha he me Fura athnyabainy, ke ne o but ka hnyi hoton tavat adre me hom omjehen vat hnyi hna hunuma. 12 Ke haba at Midiana, me Amaleka, me aten e deiö, adre me laba hnyi hnyigöuleny bucen helâ me üseiny hamon; ke haba üseiny haledrin je kamela helâ önyin köiö, ca hnân bi au. 13 Ke ame o but Gideona, me wâ bi, ke at ame thumeto hanen ge bwi, haingen, ka habe, Wâ bi, oge bwi, ke e hu ke areto bali adre me khûâ ka hnyi hna hunuma anyin at Midiana, me ame ât ka hnyi uma mano, me kot e, me ame kölu but me hwiö hnyimen hnyikânâi, me ame ta but uma mano. 14 Me ame thu hnen hanen, ka habe, Wale hele vat anyi Gideona, nöku Joasa, a at Isaraela: a hia but Khong hna at Midiana, me anyidrin utbavat hia ka hnyi hnyamen.

15 Ke a löng ut Gideona hna ha bwi ke bongon e, me ame khudrung; me e ame hme-tu ka hnyi hna hunuma anyin at Isaraela, me ha, ka habe, Todrö, anyin a hia but Iehova hna vat anyin at Midiana ka hnyi hnyamöbun. 16 Me e ame khenâ kun ta haded me me kun ta bunyen me ve ham ka hnyi je hnyamödrin hia je trutru, me je kaia ae ba önyen me je okúnû eü hnyi hnyin je kaia. 17 Ke e ame ha ködrin, ka habe, Wâ hwakecik, me ânyâ helâe: ke wâ bi, iny ka o, but ka hnyi hoton hna hunuma, me öbun e he ka ânyâ helâ me oge me ânyâ. 18 Ke iny ka he ka tüö trutru, a inya me tavat hia

a tha laba unyik, awe, öbun e he minya ka tha tüö trutru igigilö hna hunuma hia, me ha hwegiâ, ka habe, Hobi kö Iehova me Gideona.

19 Me haba Gideona me haded unyin, ödrin e o ka hnyi hoton hna hunuma hnyi hwân hmak a wanben, k' adre hap ibi hmak: me ödrin e tûâ je trutru, me ohmouca je kaia hnyi je hnyamödrin. 20 Ke ame tüö trutru je bunyen a kun, me thu je kaia, me ve kât je okúnû ge je hnyamödrin a me, me je trutru ge je hnyamödrin a metâ me me tûâ; ke ödrin e hongot hwege, ka habe, Hele vat anyi Iehova me Gideona. 21 Ke ödrin e ve tot hnyi je hnödrin bi igigilö hna hunuma; me ame wadring je vat hia thithö; ke ödrin e hongot me ob'ödra. 22 Ke ödrin e tûâ je trutru a kun ta haded, ke Iehova ama iwiaköuâ hele vat anyin ke at me ke at ka ke at a hanen, ke ücon vat hia thithö: ke ame kec vat ke ne o but hnyi Bethe-sita hnyi ke keihen Zererath, ke ne o but hnyi hnyigöulen Abela-mehola hnyi Tabath. 23 Me ame ükhacaköu at Isaraela üheny Nafatali, me Asera, me Manase hia, me hnu at Midiana. 24 Me haba Gideona ame kunâ je metâ ka hnyi hnyeï ae hut hnyi Eferaima hia, me ha, ka habe, Utut öbun ücon at Midiana me hügünâ bânâ wagewe ke ne o but hnyi Bethe-bara, wale Joridano. Me ame ükhacaköu at Eferaima hia me hügünâ wagewe ke ne o but ka hnyi Bethe-bara, wale Joridano. 25 Ke adre me kât li tuhan at Midiana jia Oreba me Zeba; me adre me hlingö Oreba hnyi hon kic Oreba, ke adre me hlingö Zeba hnyi hna hlec vine anyi Zeba, me hnu at Midiana: ke ödrin e hom li bö Oreba me Zeba kö Gideona hoton Joridano.

HNYIMAKAN 8.

KE haingen at Eferaima kâu, ka habe, Ieü e u je ânyâ köhmun, a u je ca hum öhmun minya wale m' u he ka vat me at Midiana? Me ödrin e ti ou e. 2 Ke e ame ha ködrin, ka habe, Ieü oge ânyâ walang ae nua hon hnöbun hna ânyâ? Hawa, e ca beönua bi hna hlo je wan vine anyi Eferaima hon je wan vine adre ip anyi Abiezera? 3 Haba Khong ame hna ka hnyi je hnyamöbun li thaniny Midiana, jia Oreba me Zeba: ke ieü ae khanö nya he ka ânyâ helâ möbun? Me ame hia anyidrin hmönyin kâu, hnyi üen e ame ha e. 4 Ke ame o but Gideona hnyi Joridano,

me he hanyáúá, e me tavat a kun ta haded unyin, a sēnyin dut, k' ame tiga hnuhnu bala bi. 5 Ke e ame ha ka at Sukotha, ka habe, Ö öbun ham je falawa ka tavat adre me he hotuk ; anyin a ödrin sēnyin, ke inya oge me hnu Zeba me Zalemuna, li thaniny at Midiana. 6 Ke haingen je thaniny Sukotha, ka kabe, Hawa, e bi hnyi li hnyamám li hnyamö Zeba me Zalemuna, m' öhmun e he ka ham areto ka je lahiám? 7 Haba Gideona ame ha, ka habe, Awe, e ka hia but Iehova hnö Zeba me Zalemuna ka hnyi hnyamök, oge me he ka kia je unyibun ge je únyi ae údö hnyi hnyebuba me je iwatetaföcö. 8 Ke e ame he úheny e Penuela ai, me ha heläe ködrin : me ame thu káu at Penuela helä me hna thu ge at Sukotha. 9 Ke e ame ha minya ka at Penuela, ka habe, Iny ka hmetu me hñabic, oge me he ka kia hñabâ eang.

10 Ke e hnyi Karekora Zeba me Zalemuna, tha e mödru anyidru je utbavat helä me fitin thauzan, je kolon je utbavat hia aten e deiö : anyin a kölu but khaca haded me twente thauzan tavat hok hele vat. 11 Ke haba Gideona ame ölö thö hnyi gethen deny tavat adre me laba hnyi je uma mano hnyi ke keihen e deiö Noba me Jogebe, me hlingâ je utbavat ; anyin ame laba hmâ vat eling. 12 Ke ame kec ut Zeba me Zalemuna ; me e ame hnu ödru ; me e ame kât li thaniny at Midiana, Zeba me Zalemuna, me ohmöiöngâ utbavat hia. 13 Ke haba Gideona nöku Joasa ame hmetu úheny hnyi hna vat hnyi gethen úheny thö Heres. 14 Ke e ame kât ke hidröu at Sukotha me hnö e : me e ame ha bongon je than Sukotha, me je hingat a sevente seven. 15 Me e ame o but ka at Sukotha me ha, ka habe, Wâ hm' öbun ju Zeba me Zalemuna, wale öbun e ú nya cadru, me ha, ka habe, Hawa, e bi hnyi hnyamám li hnyamö Zeba me Zalemuna, m' öhmun e he ka ham areto ka tavat unyám ae sēnyin? 16 Me e ame hom wahingatingy taun, me je únyi ae údö únyi hnyi hnyebuba me watetaföcö me osöâ káu. 17 Ke e ame kiâ hñabâ hnyi Penuela, me hlingâ aten taun. 18 Ke e ame ha kö Zeba me Zalemuna, ka habe, Ehö tavat öbe hlingâ hnyi Tabora? Me haingödru, ka habe, Ödrin e tha úcú möu ; haba ödrin hia me ve úcú me lakon than. 19 Me e ame ha, ka habe, Je liamekeiny mönya ödrin, a tha hinyöhmun ; kia inya Iehova,

öbe ne omeli ödrin, me oge me ca he bi nga ka hling' öbu. 20 Me e ame ha kö Jethró a nokon a atö, ka habe, Todrö, hling' ödru but. Ke haba hidröu ame ca oc hele vat, anyin ae ot, k' ame tiga thoth. 21 Ke haba Zeba me Zalemuna ödru me ha, ka habe, Todrö me kuc öhmu ; anyin ae úcú at me tang hwegien. Me ame todrö Gideona me hlingö Zeba me Zalemuna, me hom je hmanenanginy nyin haledru li kamela.

22 Ke haba at Isaraela adre me ha kö Gideona, ka habe, U me he ka musí öhmun, a u, me nokom, me öbem : anyin a u je hia but omeli öhmun únyi hnyi hnyamen at Midiana. 23 Ke haingö Gideona ködra, ka habe, Oge me ca he ka musí öbun, k' ame ca he bi nökkuk ka musí öbun : hamö Iehova he ka musí öbun bi. 24 Ke haba Gideona ame ha ködra, ka habe, Inya oge me sumat öbun, m' öbun e he ka ve ham bi könya je anen hnyikönyen a gol öbun e hügünâ. (Anyin ae hu gadrin je anen hnyikönyen a gol, anyin a at Isamaela ödrin.) 25 Ke haingödrin, ka habe, Öhmun e he ka ham senyiná e. Me ödrin e ulolo imano me ve khúâ ka hnyin je anen hnyikönyen, ödrin e hügünâ. 26 Ke haba ihmakiny je anen hnyikönyen a gol, wale e ame sumatâ, me wan thauzan ke seven haded je sekel gol ; ke ca ha bi je hmanenanginy, me je sawakiny, me je úkhaú ae udrudrâ a khaúen li than Midiana, ke ca ha bi je sacein hon nyin je kamela. 27 Ke haba Gideona ame ányâ iefoda únyi hnyi je únyi e, me ip e hnyi anyin taun wale Ofera : ke haba at Isaraela hia thithö ödrin e bi únyi monu me únyi eling : ke wale hñewe kö Gideona me anyin lap. 28 Ke ame ngâ at Midiana hnyi hnyimakan lakon Isaraela, ke ca görany hmetu bi je bödrin. Ke ame menâ ju hñeyi ke ne o but fáte je huna hnyi je bongongu Gideona.

29 Me ame he Jerubaala nöku Joasa, me laba hnyi umen uma bi. 30 Ke sevente je бага laku Gideona, a je hing lakon : anyin ae se hia laáian. 31 Ke haba anyin momo hnyi Sekema, me ame hñokoâ nokon бага me e ame hwenyi ien Ábimelek. 32 Ke ame mokcu Gideona nöku Joasa ke ti hingat ut, me adre me konâm e hnyi hu Joasa a kamen hnyi Ofera iny at Abiezera.

33 Ke ame mokcu Gideona, me ame hmetu lakon Isaraela, me bi únyi monu me je Baala, me wiö Baala-berith me me

khongudrin. 34 Ke haba lakon Isaraela ödrin e ca únykúme Iehova Khongudrin, at ame omeli ödrin únyi ge je iwahnaih-miöny mödrin hia thithö igigilö: 35 ke khaca ödrin e ca betenge ge hnyaba Jerubaala, wale Gideona, hoton ta je so hia e ame anyâ hobi kâu at Isaraela.

HNYIMAKAN 9.

KE haba Abimelek nöku Jerubaala ame he Sekema ai ka je liamekeiny me hinyen, me úhnenamö mödrin, me lap hia anyin kamen hinyen, me ha, ka habe, 2 Ö öbun e ha ka hnyi hnyikönyen tavat hia hnyi Sekema, ka habe, Hawa e so köbun ame he bi laku Jerubaala hia a sevente ka musi öbun, ke hawa, ame ne so at a khaca he ka musi öbun? Ke únykú-me ju öbun a jeiöbun me utiöbun inya. 3 Me ame úhnenamö gan je liamekeiny me hinyen ka hnyi hnyikönyen at Sekema hia je hofuc hia eling: ke ame hmehmela je hnyekudrin he ka he hotu Abimelek, anyin a haingödrin, ka habe, Liamekeiny e mötin. 4 Ke ödrin e ham kâu je mone a sevente únyi hnyi uma umö Baala-berith, me Abimelek ame úco je hnyat ae monu me hop, k' ödrin e hnu hoton. 5 Me e ame he ka hnyi uma umen kamen hnyi Ofera, me hlingâ je liamekeiny më a laku Jerubaala a sevente, hon veto a khaca: ke kolon thiju Jotham noku Jerubaala a wakiat; anyin a e ame lubaduöng.

6 Ke ame úkhacaköu at Sekema hia, me lap anyi Milo hia, me he me otilö Abimelek me me than, hnyi iwajo baten veto ame tot hnyi Sekema. 7 Ke adre me thumetu Jotham, me e ame he me tot hon bucen Gerezim, me fuc göranyai me hongot me ta ködrin, ka habe, Ling nya ju öbun at Sekema, me me ling öbun bi Khong. 8 Haba ta je úö hnyi ke bong ehac adre me he ka hú ke than hobi ködra bi; me adre me ha ka úö elaiö, ka habe, U me he ka musi öhmun bi. 9 Ke haingen úö elaiö kodra, ka habe, Hawa, oge me he ka hna degecâ anyik pipikhenya wale adre ogânâ Khong me at únyi gak, me he ka hnyi-hnyikö háâng me jem hon ta je úö? 10 Me ame ha je úö ka imeta, ka habe, Aiö u, u ma he ka musi öhmun. 11 Ke haingen imeta ködra, ka habe, Hawa, oge me he ka hna degecâ hnebwiak, me je wan gak ae so, me he he ka hnyihnyikö háâng me jem hon je úö? 12 Ke haba je úö adre

me ha ka vine, ka habe, Aiö u, he ka musi öhmun. 13 Ke haingen vine ködra, ka habe, Hawa, oge me he ka hna degecâ anyik waina, at ame osenyinâ Khong me at, me he he ka hnyihnyikö hon ta je úö? 14 Ke haba je úö hia thithö adre me ha ka iwataföcö, ka habe, Aiö u, he ka musi öhmun. 15 Ke haingen iwataföcö ka je úö, ka habe, Öbun e ne hú nya hnathu nya me me anyibun than, he thö jem me laba hnahic hmelen anyik dok ae hwaelu: ke ame ne ba, e so e he but meic únyi hnyi iwataföcö me thong degecâ je arasiny Lebanona. 16 Ke walang ang ame ne hnathu me wisa wale hnöbun hna anyâ, öbun e otilö Abimelek me than, ke ame ne so hnöbun hna anyâ kö Jerubaala me anyin lap, ke öbun e ne bi hwaban kâu helâ me anyin huliwa; 17 (anyin a vat cica hobi köbun, me ip anyin möt hnyi hnyimakan, me omeli öbun únyi hnyi hnyamen at Midiana: 18 ke hnyi bong ang öbun e tot ka lap anyi cica, me hia but hlingâ lakon a sevente hon veto a khaca, me otilö Abimelek, wale nokon ke momo a athnyabainy, me me thaniny at Sekema, anyin a liamekeiny e möbun;) 19 ke ame ne hnathu me wisa hnöbun hna anyâ kö Jerubaala me anyin lap hnyi bong ang, Awe, senyini Abimelek dö öbun, ke e ame he ka senyin köbun: 20 ke ame ne ba, e so e me he but jem meic únyi ga Abimelek, me an at Sekema, me únyi hnyi lap anyi Milo: e so e me he but meic únyi ge at Sekema me laba hnyi Milo, me ön Abimelek. 21 Ke Jotham ame wadring dö me kec, me he Bere ai me laba eling, ame outö Abimelek a liamekeiny më.

22 Ke ame than hon at Isaraela Abimelek hnyi kun ta huna. 23 Ke haba Khong ame kunâ hanu ae kong kö Abimelek me at Sekema; ke haba at Sekema ödrin e iyawö Abimelek: 24 me me hwádâ thö hna okongoá laku Jerubaala a sevente, ke ame takú Abimelek dren liamekeiny mödrin, at a hling' ödrin, me at Sekema, hnyat ödrin e hadruâ he ka hlingâ je liamekeiny më. 25 Ke haba at Sekema ödrin e ip tavat he ka mokut iyâwâ hon je bucen, ke ödrin e hügünâ omjehen tavat adre me gethen unyidrin: ke adre me thumetu Abimelek.

26 Ke ame o but Gaala nöku Ebed me je liamekeiny më, me he Sekema ai: ke ame labageju kâu at Sekema. 27 Ke ödrin e he ka hnyi ta hnyei, me tau wan haledrin

je vine, me ututo je wan vine, me senyin, me didrö ka hnyi uma umen khongudrin, me han, me ic, me hangö Abimelek. 28 Ke Gaala nöku Ebed ame ha, ka habe, Ia Abimelek, ke ia Sekema, m' ötin e he ka bi athnyabainy? Hawa, ca nöku Jerubaala? ke Zebul althnyabainy? e so öbun e bi athnyabainy hnyat Hamora, kamö Sekema: ke hnän eü ötin e he ka bi athnyabainy at e. 29 E na e ju unyik tavat eang! m' inye he ka hum Abimelek. Me e ame ha kö Abimelek, ha habe, Bi hanen ju änyâm vat, me he thö jem. 30 Ke haba Zebul tuhan taun ame löng hofuc. ho Gaala nöku Ebed, me ame ubâhla anyin hmönyin. 31 Me e ame kunâ duöngâ je metâ kö Abimelek, ka habe, Wâ bi, a o but hnyi Sekema Gaala nöku Ebed me je liamekeiny mē; ke wâ bi, ödrin e okongô taun gam. 32 Ke walang ang todrö hnyi lit, u me tavat unyâm, me mokut duöng hnyi ta hnye; 33 ke hnyi hnyomakatu e ka o thö seünö, me u me he ka vesâ, me utut ka hnyi taun: ke wâ bi, e ka he me lahien he ka tet metâ köu, me u me he ka änyâ ködrin helâ me imaneniny köu.

34 Me ame todrö hnyi lit Abimelek, me lahien hia, me mokut iyawö Sekema a ödrin je bunyen a vak. 35 Ke ame didrut Gaala nöku Ebed me tot hnyi homagöuleny taun; ke ame todrö Abimelek me tavat unyin ünyi hnyi hna mokut. 36 Ke haba Gaala ame wâ tavat, me e ame ha kö Zebul, ka habe, Wâ bi ame utut tavat üheny hon je bucen. Ke haingö Zebul kâu, ka habe, Haba ünyi u je wâ, me, hmenon je bucen helâ me tavat. 37 Ke ame ha hmetu Gaala ka habe, Wâ bi, ame utut tavat ethö hnyi wanben hnye; ke ame o ke bunyen hnyi gethen ame he ka hnyi iwajo anyi Meoneni. 38 Me Zebul ame ha kâu, ka habe, Ewa hnyimâm wale at ame ha, ka habe, Ia Abimelek m' adre me he ka bi athnyabainy? hawa, ca wale hnye u me hûkötîâ? ö u he thö walang ang me vat mödrin. 39 Me ame he but Gaala hnyi hnyimakan at Sekema, me vat me Abimelek. 40 Ke haba Abimelek ame hnu e me e ame kec gan, ke se hia a ta me ât ke ne o but hnyi homagöule. 41 Ke Abimelek ame laba hnyi Aruma: ke haba Zebul ame obö Gaala me je liamekeiny mē, me ödrin e ca he ka laba hnyi Sekema. 42 Ke nyi ame he tavat ka hnyi hnye; me adre me thumetu Abimeleke. 43 Me e ame hom tavat me khenâ me me kun ta bunyen me khöu mokut hnyi

hnye; me wâ, ke wâ bi, ame he but tavat ühedrin hnyi taun; me e ame utut ködrin, me kec ödrin. 44 Ke ame wâdring Abimelek, me je vat unyin, me tot hnyi homagöuleny taun: ke haba ke li bunyen, ödrin e wâdring ködrin hia hnyi hnye me kec ödrin. 45 Ke haba Abimelek ame vat me taun hnyi bong hia eling; ke e ame hügünâ taun, me hlingâ je aten: ke e ame kot taun, me ave ge sält.

46 Ke a löng ut tavat hia hnyi hhabâ hnyi Sekema, me ödrin e didrö ka hnyi thop hnyi uma umen khong Berith. 47 Me adre me thumetu Abimelek a g' ame ükacaköu tavat hia thithö aten hhabâ hnyi Sekema. 48 Ke haba Abimelek me tavat hia thithö unyin, ödrin e ölö ka hnyi bucen Zalemon; ke haba Abimelek ame hom gö hnyi hnyamen, me subâ but ke vheiny úö, me hom me ip hon bajibenyin: ke haingen ka tavat unyin, ka habe, Haba hnök hna änyâ wale öbun e wâ, logotö me öbun a änyâ heläng. 49 Me ame ve sö but tavat hia je vheiny minya, me he hotu Abimelek, me ip hnyi thop, me thong thop hudrin; me ame mok tavat hia aten hhabâ hnyi Sekema minya, helâ me wan thauzan obaga me omomo.

50 Haba Abimelek ame he Thebez ai, me ip vat cicö Thebez, me kot e. 51 Ke e hu hhabâ ae hwege hnyi wanben taun, me ame kec kâ e obaga me omomo, me tavat hia thithö hnyi taun, me hlöng hwanumödrin, me olo ka hnyi hon hhabâ. 52 Ke ame o Abimelek ka hnyi hhabâ me vat mē, ke e ame hakekenyâ hwanumen hhabâ he ka thong e ge meic. 53 Me haba ke momo ethö görany ame khûâ veto hnän omomono hwit ka hnyi hon bö Abimelek, me ame hmouca but ibokomokiny. 54 Me e ame ie hongot ka hidröu at ame hom tilâ anyin je ünyi vat, me ha kâu, ka habe, Oc ut änyâm hele vat me hlingö nya, wâ adre ne haö nya, ka habe, Haniny momo. Me ame dá oâ e hnen hidröu me e ame mokcu. 55 Ke a wâ but at Isaraela a ga mokcu Abimelek, me adre me vese ka hnyi je hnyabadra. 56 Ke helâe Khong ame bi hwaban monu anyi Abimelek, waleji e ame änyâ ka kamen, a hlingâ je liamekeiny mē a sevente: 57 ke haba ta je hulö hia thithö anyin tavat Sekema, me, Khong ame bi hwaban ka hnyi je bödrin: me ame hwädâ ködrin hnaühangö hnö Jotham nöku Jerubaala.

HNYIMAKAN 10.

KE hwabö Abimelek me ame o Tola nöku Pua, nöku Dodo, at Isakara, he ka omelö at Isaraela ; ke e amelaba hnyi Samira hnyi hnyeí ae hut hnyi Eferaima. 2 Ke e ame owisa ka at Isaraela hnyi je huna a twente theri, ke e ame mokcu, me adre me konám e hnyi Samira.

3 Ke hwaban e me ame o Jaira at Gileada, ke e ame owisa ka at Isaraela hnyi je huna a twente tu. 4 Ke e hu lakon бага a thöte, ödrin e tabá je asina a thöte, ke e hu gadrin je taun a thöte, ke adre me hwenyi iödrin Havoth-jaira ke ne o but hnyi bong ang, wale je taun hnyi hnyeí Gileada. 5 Ke ame mokcu Jaira, me adre me konám e hnyi Kamon.

6 Ke haba lakon Isaraela adre me ányá hmeto bi únyi ae kong hnyi hnyimakö Iehova, me bi athnyaba ka je Baala, me Aseira, me je khongon Suria, me je khongon Zidona, me je khongon Moaba, me je khongon laku Amona, me je khongon at Filisiti ; ke adre me digic Iehova me ca bi athnyabainy. 7 Me ame ubáblá hmönyin anyi Iehova ka at Isaraela, me e ame úcü ödrin ka hnyi hnyamen at Filisiti, me laku Amona. 8 Ke ödrin e ovecá me seda lokon Isaraela hnyi huna eling : eitn ta je huna adre hom úhnyúkongo lakon Isaraela hia wale hoton Joridano hnyi hnyeí iny at Amora, hnyi Gileada. 9 Me ame he hanyáúá Joridano laku Amona he ka vat minya me at Juda, me Beniamina, me lap anyi Eferaima ; ke e hmak gan hmá at Isaraela. 10 Haba lakon Isaraela ödrin e tenge kö Iehova, me ha, ka habe, Öhmun e hia but ányá hulö köu, wale öhmun e hna degecá Khonguhmun, me bi athnyaba bi ka je Baala. 11 Ke haba Iehova ame ha ka lakon Isaraela, ka habe, Hawa, oge ca omeli öbun únyi ge at Aigupito, me at Amora, me laku Amona, me at Filisiti ? 12 Ke haba at Zidona, me Amaleka, me Maon, ödrin e okongu öbun ; me öbun e tenge könya, me oge me omeli öbun únyi hnyi je hnyamödrin. 13 Ke öbun e digic nya bi, me bi athnyaba ka je khong : anyin a wale oge me ca he hmetu ka omeli öbun. 14 He th' öbun ka tenge ka je khong öbun e úca ; hamödrin he ke omeli öbun hnyi úen hna sed' öbun. 15 Haba lakon Isaraela ödrin e ha kö Iehova, ka habe, Öhmun e ányá hwakecin ae kong, hamám he ka ányá hia

köhmun únyi ae so köu ; ke so bi ö u omeli öhmun thibi hnyi bong ang. 16 Me adre me degec je khong kanyua unyidrin, me bi athnyaba kö Iehova, ke e ame tenge ge vec anyin at Isaraela.

17 Ke ame úkhacaköu laku Amona, me hunuma hnyi Gileada. Ke ame úkhacaköu lakon Isaraela me hunuma hnyi Mizepa. 18 Haba tavat, a je thaniny Gileada, ödrin e úhaköuá, ka habe, Ie at ame he ka bán he ka vat me laku Amona ? me e ame he ka taben at Gileada hia thithö.

HNYIMAKAN 11.

ME haba Jefetha at Gileada me at ae hwege, ke e nokon momo hnyi gethen ; ke Gileada ame hnöku Jefetha. 2 Ke haba öü Gileada ame hnoká lakon obaga ; ke a gan dut obaga lakon áian, me ödrin e obö Jefetha, me ha káu, ka habe, U me ca he ka hnyi hu jekhöu hnyi hnyaban kamöhmun, anyin a u nokon ke momo. 3 Me Jefetha ame kec ge liamekeiny më, me laba hnyi hnyeí Tob : ke ame the he me Jefetha tavat ae monu, k' ödrin e tha he ehele më.

4 Ke hnyi ke úen bi, haba laku Amona, ödrin e vat me at Isaraela. 5 Ke haba hnyi úen ame he laku Amona ka vat me at Isaraela, me ame he wahingatiny Gileada he ka hum Jefetha únyi hnyi hnyeí Tob : 6 me ödrin e ha kö Jefetha, ka habe, He thö jem he ka ci öhmun, m' ate me he ka vat me laku Amona. 7 Me Jefetha ame ha ka wahingatiny Gileada, ka habe, Hawa, öbun e ca húkotiö nya me obö nya únyi hnyi hnyaba cica ? ke ieu gabun öbun e he jem könya walang ang, k' ame o but köbun únyi ae kong ? 8 Me haba wahingatiny Gileada ödrin e thu kö Jefetha, ka habe, Waleling öhmun e o köu walang ang, m' u me he ka tha he möhmun me vat me laku Amona, m' u me he ka taben at Gileada hia. 9 Me haba Jefetha ame ha ka wahingatiny at Gileada, ka habe, Öbun e ne he ka hum nya ka hnyi ik he ka vat me laku Amona, k' ame ne he Iehova ka hn' ödrin könya, hawa, oge me he ka ban köbun ? 10 Me haba wahingatiny Gileada ödrin e thu kö Jefetha, ka habe, Hamö Iehova ka wá hnathu ötin ; a öhmun e he ka ányá helá me hwám hofuc. 11 Me haba Jefetha ame tha he me wahingatiny Gileada, me haba tavat adre me otilá me me taben me ban hudrin : ke haba Jefetha

ame ha hwan ta je hofuc hia hnyi hnyi-makö Iehova hnyi Mizepa.

12 Ke haba Jefetha ame kunâ je metâ ka thaniny laku Amona, ka habe, Ieú gam kõnya, anyin a u je he jem ka vat me ik hnyei? 13 Haba thaniny laku Amona ame thu ka je metâ anyi Jefetha, ka habe, Anyin a at Isaraela ödrin e hûgûná ik hnyei, hnyi úhedrin jem úheny Aigupito, hwân hnyi Arerona ke ne o but Jaboka, me Joridano: ke walang ang ham hmetu thö e hnyi úsoköu. 14 Ke haba Jefetha ame kunâ hmetu ke je metâ ka thaniny laku Amona: 15 me ha kâu, ka habe, Wálang hofuc ho Jefetha, ka habe; A ca hom at Isaraela hnyei Moaba me hnyei iny laku Amona: 16 ke ame he jem at Isaraela úheny Aigupito, me ödrin e vheno hnyebuba ke ne o but hnyi Kõiö ae Dra, me o hnyi Kadesi; 17 me ame kunâ je metâ at Isaraela ka thaniny Edoma, ka habe, Ö u hnö nya but he ka vheno em hnyei: ke ame ca löng bi than Edoma. Ke helâe minya adre me úkhúnöng ka than Moaba: me e ame hócö bi: ke Isaraela ame laba hnyi Kadesi. 18 Ke e ame vheno hnyebuba, me igigilö hnyei Eloma, me hnyei Moaba, me he hnyi ke keihen e deiö hnyei Moaba, me hunuma hnyi ke keihen Arenona; ke ödrin e ca o hnyi hnyigöulen Moaba, anyin a Arenona hnyigot me Moaba ehac. 19 Ke haba Isaraela ame úkhúnöng kö Sihona than Amora, than Hesebona; ke Isaraela ame ha kâu, ka habe, Ö u hn' öhmun he ka vheno hnyi em hnyei, me he ka hnyi ik. 20 Ke haba Sihona ame ca kap ho Isaraela he ka vheno hnyi iny hnyei: ke Sihona ame úkhacaköu lakeiny hia, me hunuma hnyi Jahaza, me vat me Isaraela. 21 Ke haba Iehova Khongu Isaraela ame hnö Sihona me lakeiny hia thithö ka hnyi hnyamö Isaraela, me adre me kuc ödrin: me Isaraela ame hom hnyei hia iny at Amora, tavat a idrin hnyei eling. 22 Ke adre me hom hnyigöulen hia at Amora hwân hnyi Arenona ke ne o but hnyi Jaboka, ke hwân hnyi hnyebuba, ke ne o but Joridano. 23 Ke walang ang, haba Iehova Khongu Isaraela ame obâ at Amora hnyi hnyimakan lakeiny a at Isaraela, ke u me he biju u ka labâ e? 24 Hawa, u me ca he ka labâ hnyei a ham köu he ka labâ ga Kemosa a khongoma? Me haba öhmun, me öhmun e he ka hom iny tavat hia waleji a obâ Iehova Khonguhmun hnyi hnyimaköhmun. 25 Ke

hawa, u beónua hu Balaka nöku Zipora than Moaba? hawa, ame tot at eling kö Isaraela me vat mödra? 26 Ke ame tiga laba Isaraela ehac hnyi Hesebona me je tauniny, me Aroera me je tauniny, me ta je taun hia thithö hnyi hnyigöulen Arenona hnyi je hunu a theri haded; me ieú gabun öbun e ca hûgûná e hnyi úen eling? 27 Anyin a wale oge me ca okongu u, ke u me ányâ kõnya únyi ae kong he ka vat mönya: hamö Iehova, At Owisa, he ka owisa ka lakon Isaraela me laku Amona hnyi bong eang. 28 Ke haba thaniny laku Amona ame ca löng hofuc ho Jefetha wale e ame úkhúnöng kâu.

29 Me ame ta but hu Jefetha hanu Iehova, me e ame he hanyâúú hnyei Gileada, me Manase, me vheno Mizepa hnyi Gileada, ke úheny Mizepa hnyi Gileada me e ame he ka laku Amona. 30 Ke haba Jefetha ame bi khöbi kö Iehova, ka habe, U je ne he ka hna laku Amona ka huyi hnyamök, 31 ke iny ka o hmetu hnyi hnahic úheny unyin laku Amona, me laba únyi ame he ka didrut úheny hnyi hwanumen umök uma he ka úkhanö mönya, me wale hobi kö Iehova, me oge me he ka hudo e me hudiny leú. 32 Me haba Jefetha ame he ka laku Amona he ka vat mödrin; ke Iehova ame hn' ödrin ka hnyi hnyamen. 33 Ke e ame kuc ödrin hwân Aroera ke ne o but hnyi Minith, a je taun a twente, ke ne o but Ábela-ceramim, ke ti gan hna kuc ödrin. Ke adre me hom úhnyükongu laku Amona hnyi hnyimakan lakon Isaraela.

34 Ke ame o thö Jefetha hnyi Mizepa ka hnyi hnyaban, me wâ bi, ame o thö nokon hlu he ka ukhanö mä, me je bwinybet me bibiâ: ke ha hake e thibi nokou, ke ba hmetu nokon baga me hlu. 35 Ke e ame wâ e, me e ame kia anyin úkhaú, me ha, ka habe, Ekölö ge nöku! u je hia but ohmakâ hnyekuk, ke iny vec ut gam: anyin a oge hia but fuc kö Iehova, ke ca khanö nya bi he ka hmetu. 36 Me e ame ha kâu, ka habe, Cica, u je hia but fuc kö Iehova; ányâ thö kõnya helâ me hofuc ame o but únyi hnyi hnyimâm; anyin a Iehova ame bi hwaban ka je wahnahmiöny möu, a laku Amona. 37 Ke haingen ka kamen, ka habe, Ányâ thö kõnya únyi eang, wale he ka hnö nya but hnyi lo li tehi, me inye he ka he monu hon je bucen tha e me je lahanök, me tenge can anyin a iny hlu baú but. 38 Me haingen dö, He

thö. Ke e ame hna e hnyi lo li tehi, me e ame tha he me je lahanen, me tenge hon je bucen can anyin a e hlu baú but. 39 Ke hwaban lo li tebi e ame hmetu ka kamen, me e ame ányá káu helá me hnen hna bi khöbi: ke a ca hia but tha mwi me ke бага. Ke wale hwakecin hnyi Isaraela, 40 a g' ame he je hlu lakon at Isaraela hnyi je huna he ka tengiá hlu nöku Jefetha at Gileada vak ta bong hnyi je huna.

HNYIMAKAN 12.

KE haba at Eferaima adre me úkhaca-köu me he ka hnyi hwadrö: me ödrin e ha kö Jefetha, ka habe, Ieú gam u je he ka vat me laku Amona, ke u je ca haw' öhmun he ka tha he möu? öhmun e he ka thong umám uma ka hom ge meic. 2 Haba Jefetha ame ha ködrin, ka habe, haba inya me atök öhmun e úö hwege me laku Amona; ke o ge haw' öbun, ke öbun e ca omeli nya únyi hnyi hnyamödrin. 3 Ke o ge me wá a öbun e ca omeli nya, me oge me öünyibáúú anyik möt, me he ka vat me laku Amona, ke Iehova ame hn' ödrin ka hnyi hnyamök: can ieú öbun e he jem könya hnyi bong ang he ka vat mönya? 4 Ke haba Jefetha ame úkhaca-köúú tavat hia hnyi Gileada, me vat me Eferaima; ke haba at Gileada ödrin e kot at Eferaima, anyin a ödrin e ha, ka hábe, Je bá öbun at Gileada úheny Eferaima hnyi wanben at Eferaima me Manase. 5 Ke haba at Gileada ödrin e khaletá je dok ae cöcö hnyi Joridano, ke tiga bec at Eferaima: ke ame ne ha at Eferaima, tavat adre me kec, ka habe, Hne dek dö he ka hanyáúú, me haba at Gileada ödrin e ha káu, ka habe, U at Eferaima? Ke ame ne ha, e ba, 6 me haingödrin káu, ka habe, Bethe ha, ka habe, Shibolet; me haingen bi, ka habe Siboleth; ke ca khana he ka ha wisa, me ödrin e kát me hlingá hnyi je dok ae cöcö hnyi Joridano: ke ame ta hnyi üen eling fáte tu thauzan at Eferaima.

7 Ke Jefetha ame owisa ka at Isaraela hnyi je huna a siks. Me ame mokuu Jefetha at Gileada, me adre me konám e hnyi ke taun hnyi Gileada.

8 Ke hwaban e me ame owisa ka at Isaraela Ibezán at Bethe-leema. 9 Ke thöte lakon obaga, ke thöte lakon wahlu e ame ve hna háang, ke e ame hom wahlu a thöte úheny hele hobi káu lakon obaga. Ke e ame owisa ka at Isaraela hnyi

je huna a seven. 10 Ke ame mokuu Ibezán, me adre me konám e hnyi Bethe-leema.

11 Ke hwaban e me ame owisa ka at Isaraela Elona at Zebulona; ke e ame owisa ka at Isaraela hnyi je huna a ten. 12 Ke ame mokuu Elona at Zebulona, me adre me konám e hnyi Ajalona hnyi Zebulona.

13 Ke hwaban e, me, Abedon nöku Hilel, at Pirathon, ame owisa ka at Isaraela. 14 Ke e hu lakon obaga a fáte, ke thöte laöbiny, ödrin e tabá je asina a sevente; ke a ame owisa ka at Isaraela hnyi je huna a eit. 15 Ke ame mokuu Abedon nöku Hilel, at Pirathon, me adre me konám e hnyi Pirathon hnyi hnyei Eferaima, hnyi hnyei ae hut anyin at Amaleka.

HNYIMAKAN 13.

KE haba lakon Isaraela adre me ányá hmetu hwakecin ae kong hnyi hnyimakö Iehova; me Iehova ame hn' ödra ka hnyi hnyamen at Filisiti hnyi je huna a fáte.

2 Ke wale ke at at Zorea hanen lap anyin at Dana, Manoa ien; ke toúnyi áián, k' ame ca hnokoá bi. 3 Ke ame manen dut angela anyi Iehova ka momo, me ha káu, ka habe, Wá bi, u toúnyi walang ang, me ca hnokoá bi; ke so bi u me he ka erkin, me hnokoá da. 4 Ke walang ang, e so u me wá wia bi, u me ca he ka ic waina me grág, ke u me ca he bi ka han únyi ae kap: 5 ke wá bi, u me he ka erkin, me hnokoá da, ke adre me ca he ka ip heleúgi hon ban, anyin ame he ka Nazeri ka Khong wanakat únyi hnyi hnyok: ke e ame he ka hwán he ka omelö at Isaraela únyi ge at Filisiti. 6 Ke ame he but momo me thumeto áián, ka habe, A o könya ka aten Khong, ke helá hnyimakan me hnyimakan angela anyin Khong hnán outen; ke oge ca hnö dok a mwi hnyin, ke e ame ca ha minya könya ien: 7 ke e ame ha könya, ka habe, Wá bi, u me he ka erkin, me hnokoá da; ke walang ang u me ca he ka ic waina me grág, ke ca he bi ka han únyi ae kap: anyin ame he ka Nazeri ka Khong wanakat únyi hnyi hnyok, ke ne o but bong e ame mokuu. 8 Ke haba Manoa ame sumató Iehova, ka habe, Tuhök lö, ö e o hmetu köhmu aten Khong u je kuná, me me n' öhmu ge

únyi óhmu me he ka ányá ka wanakat ame he ka hnokoá. 9 Ke Khong ame löng hofuc ho Manoa; me ame o hmetu angela anyin Khong ka áíán ame laba hnyi hnyei: ke hió Manoa a áíán unyin. 10 Me ame ie wadring momo, me thumeto áíán, me ha káu, ka habe, Wá bi, ame manen hmetu kónya ateji ame o kónya hnyi ke bong. 11 Me ame todrö Manoa me he hoton áíán, me o unyin at, me ha káu, ka habe, U at waleji u je úhnenamö me momo? Haingen, Inya e. 12 Ke haingö Manoa, ka habe, E na át ju hwám hofuc: ke ame he ka helá ua wanakat? ke ieú hudrán. 13 Me ame ha angela anyi Iehova kö Manoa, ka habe, Haba hnök hna ha hia ka momo, hamen he ka wá wia. 14 E ame ca he ka an ke únyi únyi hnyi vine, ke e ame ca he ka ic waina me grág, me han ke únyi ae kap; ke e ame he ka tuó ta je únyi hia oge me ha káu. 15 Me haba Manoa ame ha ka angela anyi Iehova, ka habe, Me laba ju unyihmu m' óhmu me he ka penapena hobi köu nokon got. 16 Me angela anyi Iehova ame ha kö Manoa, ka habe, Eja ke ne u je ne thawo nya, me oge me ca he ka han ányám areto: ke u je ne he ka penapena hudiny leú, me u me he ka hudo e kö Iehova. Anyin ame ca wá Manoa a e angela anyi Iehova. 17 Me Manoa ame ha kö angela anyi Iehova, ka habe, Ia íám, m' óhmun e he ka oganö u e ka át dö hwám hofuc? 18 Me ame ha angela anyi Iehova, ka habe, Anyin a iéu u me hnö iök, anyin a e me hnán láíá gan? 19 Ke Manoa ame hom nokon got me hudiny han, me hudo kö Iehova hon kic: ke hnán láíá bi hna ányá ge angela, ke Manoa me áíán ödrü me tot ka wá. 20 Ke ame o thö báhlán ka hnyidranayi úheny hon tap, me ame ölö thö angela anyi Iehova hnyi báhlán taben hut: ke a wá but Manoa me áíán; me ödrü me ta ju hnyikánái. 21 Ke ca manen hmetu bi angela anyi Iehova kö Manoa me áíán. Me Manoa ame wáhmakhmetoá a e angela anyi Iehova. 22 Me Manoa ame ha ka áíán, ka habe, Ötu me he but ka mok anyin a öte hia but wá Khong. 23 Ke haingen áíán káu, ka habe, Ame ne behling' ötu Iehova, me ame ca he ka kap hudiny leú me hudiny han únyi gatu, ke e ame ca he minya ka omanená kötu ta je únyi hia eling, me thumetu ötu ge ta je únyi a helang hnyi úen eang. 24 Ke haba momo ame hnokoá da me hwenyi ien

Samasona: ke ame gan tot wanakat, ke haba Iehova ame ohnahicá e. 25 Ke ame hwán hanu Iehova he ka huliwan hnyekon hnyi lap anyi Dana, hnyi wanben Zorea me Esetaol.

HNYIMAKAN 14.

KE Samasona ame he Timenatha ai, me ame wá hnyi Timenatha ke hlu nokon at Filisiti. 2 Ke a ame o me thumeto kamen me hinyen, ka habe, Oge wá hnyi Timenatha ke hlu nokon at Filisiti: ke walang ang he thö ka hom me öiök. 3 Haba kamen me hinyen ödrü me ha káu, ka habe, Hawa, e ba momo nokon je liamekeiny möu, me ik hnyei hia, m' u me he ka hok áíám unyin at Filisiti adre ca peritomoná bi? Ke haingö Samasona ka kamen, ka habe, He thö ka hom e hobi kónya anyin ae so e kónya. 4 Ke ca khana kamen me hinyen a únyi ga Iehova e; anyin a e ame heleú can unyin at Filisiti. Ke haba at Filisiti ame musö at Isaraela hnyi úen eling.

5 Ke ame tha he Samasona me kamen me hinyen Timenatha ai, me o but hnyi je hnyei vine hnyi Timenatha: ke wá bi ame kuku káu nokon liona. 6 Me ame o hwegiá káu hanu Iehova, me e ame wahai e helá me hna wahai nokon got, ke ba únyi hnyi hnyamen: ke e ame ca thumeto kamen me hinyen ge hnen hna ányá. 7 Ke e ame o me úhnenamö me hlu, ke e so hmönyin kö Samasona. 8 Ke hnyi ke úen e ame hmetu he ka hom e, me e ame saú he ka wá unyin liona: ke wá bi, e hu je bi me hani hnyi unyin liona. 9 Ke e ame hom hanen hnyi li hnyamen me han tot me o unyin kamen me hinyen, me ha ödrü, me ödrü me hnyi han, ke e ame ca thumetu ödrü a g' ame hom hani únyi hnyi unyin liona. 10 Ke ame he but kamen ka momo; ke haba Samasona ame ányá ke bijeú eling; anyin ame labö ányá heláe ta je hidróu. 11 Ke ödrin e wá but e, me ödrin e hom laúen a ödrin thöte mödrin e tha e mē. 12 Ke haba Samasona ame ha ködrin, ka habe, oge me he ka ha walang ang anyik húkehmuen köbun: ke öbun e ne omanená bongon kónya hnyi je bong a seveniny bijeú, me wá e, me oge me he ka ham köbun thöte je úkhaú lino, me thöte je úkot: 13 ke ame ne ca kham' öbun bi he ka omanená kónya bongon, awe, öbun e he bi ka ham kónya thöte je

úkháú lino ke thöte je úkot. Ke haingödrin, ka habe, Omanená thö ányám húkehmen, m' óhmun e löng. 14 Me e ame ha ködrin, ka habe,

Ame o but jeú únyi hnyi hnyin at amehan,

K' ame o but únyi a hnebwia únyi hnyi hnyin at ae hwege.

Ke ca khan' ödrin he ka omanená húkehmen hnyi kun ta bong. 15 Ke haba hnyi bong a seveniny, me ödrin e ha ka öio Samasona, ka habe, U ma he ka újengö áiam me me he ka omanená köhmun húkehmen, wá adre nye he ka thung u me uma umen kámám ge meic : hawa, öbun e haw' óhmun me me hom anyihmun ta únyi ? e ba? 16 Me öio Samasona ame tenge káu me ha, ka habe, U me húkötio nya, me ca betenge gak : u je ha húkehmen ta tavat aten ik hnyeí, ke u je ca omanená kónya bongon. Ke haingen káu, ka habe, Wá bi oge me ca omanená bongon kö cica me bai, me oge ma hawa ka omanená köu? 17 Me e ame tenge káu hnyi je bong a seveniny hnyi anyidrin bijeu : ke haba hnyi bong a seveniny, me e ame omanená káu bongon, anyin a e ame újengoá : me e ame he bi me omanená bongon húkehmen ka aten iny hnyeí. 18 Ke haba hnyi bong a seveniny me ame ha káu aten taun, ke tiga ca dit seúnö, ka habe, Ieú únyi ae hnebwia hon hani ? ke ieú ae hwege hon liona ? Me e ame ha ködrin, ka habe,

Öbun e ne ca wia káná ge halek kau,

Me ca khan' öbun he ka wá bongon anyik húkehmen,

19 Me ame ut hwege hanu Iehova ka hnyi hon, me e ame he Asekelona ai, me kot eling hnyat a thöte me sei ödrin, me ham ka hnyat ödrin e omanená húkehmen je bwiny khaú. Ke ame ubáhlá thö anyin hmönyin me e ame he ka hnyi hnyaban kamen. 20 Ke adre ham bi áian ka hanen, wale at a lihum mē.

HNYIMAKAN 15.

KE haba hnyi ke bong, hnyi úen meno hwit, haba Samasona ame o ka áian me nokon got : ke haingen, ka habe, Oge me he ka he ka áiök eú hnyi hnyeule, ke ame ca hna e kamen he ka didró. 2 Ke haingen kamen, ka habe, Oge me únykúme a u me ikiki gan ; me oge me ham e ka hánám : hawa e ca so hmáiny keiny hon ? ö u hom dö e me hwaban. 3 Ke

haba Samasona ame ha ködrin, ka habe, E ba kongik walang ang, iny ka he ka okongó at Filisiti. 4 Ke Samasona ame he me kát kun ta hadel je alope, me hom je okúnú, me úobinyákóuá úsa lo, me ve ip je okúnú wanben li obiny. 5 Ke ame hia but vác je okúnú ge meic, me e ame hn' ödrin ka hnyi hwit ame tot anyin at Filisiti, me ame hlá hwit adre khon, me hwit ame tot, me je hnyeí elaió minya. 6 Ke haingen at Filisiti, ka habe, Ia ame ányá e ? Me ödrin e thu, ka habe, Hnö Samasona úngon at Timinatha, anyin a e ame hom áian, me ham ka hanen. Haba at Filisiti ödrin e he me thong hlu me kamen ge meic. 7 Ke haingö Samasona ködrin, ka habe, öbun e ne ányá heláe, e hnathu oge me he ka bi hwaban, ke ka um dö e soju. 8 Me e ame kuc ödrin je can me jevan, e gan hmá hna kuc ödrin, me e ame he me laba hnyi khekheiny kic hnyi Etama.

9 Me ame ölö thö at Filisiti me hunuma hnyi Juda, me avá Lehi. 10 Ke ame ha at Juda, ka habe, Öbun e o but köhmun eang geú ? Haingödrin, ka habe, Öhmun e o he ka co Samasona, he ka ányá káu helá me hnen hna ányá köhmun. 11 Me ame he at Juda a ödrin theri thauzan ka hnyi khekheiny kic hnyi Etama, me ha kö Samasona, ka habe, U ma ca wá a at Filisiti ödrin e musi ötin ? ieú e u je ányá köhmun ? Ke haingen, ka habe, Ogo ányá ködrin helá me hnödrin hna ányá kónya. 12 Ke haingödrin káu, ka habe, Öhmun e o he ka cö u me me hnö u ka at Filisiti. Me Samasona ame ha ködrin, ka habe, Khemanyin dö kónya a öbun e ca he ka okongu nya bi. 13 Ke haingödrin, ka habe, E ba ; ke öhmun e he thibi ka cö u, me hnö u ka hnyi hnyamödrin : ke so bi e hnathu a öhmun e ca he ka hlingö u. Me ödrin e ca e ge li tö ae teb únyi, me hom e únyi hnyi kic. 14 Ke e ame o ka hnyi Lehi, me haba at Filisiti ödrin e iouny mē me kuku káu : ke ame utut ka hnyi hon hanu Iehova, ke haba li tö hnyi li benyin me helá me wakunenu adre le ge meic, ke ame ok ut hna ca hnyi li benyin. 15 Me e ame wá jeien wainy asina a teb únyi, me e ame iná benyin me hom, me kot tavat a khaca thauzan. 16 Ke haingö Samasona, ka habe,

Hnen jeien wainy asina, je hna khon hon je hna khon,

Oge hlingá tavat a khaca thauzan ge jeien wainy asina.

17 E ame ha hofuc eling me khûâ jeien wainy únyi hnyi hnyamen, me adre me hwenyi ien hnyeí eling me Rama-lehi. 18 Ke gan hmâ beic kâu me e ame tenge Iehova, me ha, ka habe, U je hna ka athnyabaem hna omelö eang ae gan, ke walang any oge me he but ka mok ge beic, me ta ka hnyi hnyamen tavat adre ca peritomônâ bi. 19 Me haba Khong ame kia thop a e hnyi Lehi, me ame o köö únyi hnyin: ke e ame ic me ame o hmetu hanon me me möt bi: anyin a wale adre hwenyi ien e me Eni-hakore, ke e hnyi Lehi ke ne o but hnyi bong ang. 20 Ke e ame owisa ka at Ísaraela hnyi úen at Filisiti twente je huna.

HNYIMAKAN 16.

KE Samasona ame he Gaza ai, me e ame wâ eling momo hnyi gethen, ke e ame didrö kâu. 2 Ke adre me thumeto at Gaza, ka habe, E but ang Samasona. Me ödrin e igigilöâ, me mokulic e hnyi lit hia hnyi homagöuleny taun, me ca mede hnyi lit hia, ke haingödrin, ka habe, Ötin e he ka hlingâ e hnyi haolauy. 3 Ke haba Samasona ame mokut ke ne o but wanbenset, me ame todrö hnyi wanbenset, me kât li hlinginy homagöuleny taun, me li uthomagöulen me tha hom e me li venyainy, me vadren e hon li bajebenyin, me öliâ ka hnyi bucen ciö Heberona.

4 Ke hwaban e e ame betenge ge ke momo hnyi hnyigöulen bucen Sorek, Delila ien. 5 Me ame he ka momo je thaniny at Filisiti, me ha kâu, ka habe, U me he ka újengö e, me me khan' ötin can anyin hwege ae gan, me öhmun e he ka kâmâu he ka hwege hon, me me khan' öhmun he ka ca e me hom úhnyúkongoâ: ke öhmun e he ka ve ham köu je silva a eleven haded. 6 Me haba Delila ame ha kö Samasona, ka habe, Ö u me ha thö kõnya ewa dok ame laba hnyin ányâm hwege ae gan, me adre me he ka cö u hnen ieü m' adre me hom úhnyúkongu u. 7 Ke haingö Samasona kâu, ka habe, Ödrin e ne he ka cö nya ge je tö a seven ae hat a ga ca mok bi, me oge me he ka sényin me helâ me ke at. 8 Haba je thaniny at Filisiti ödrin e hom ka momo je tö a seven ae hat a ga ca mok bi, ke e ame ca e ge je tö. 9 Ke e hu tavat mokulec e únyi hnyi ke hnyeule. Ke e ame ha kâu ka habe, Samasona, at Filisiti but ang. Me e ame thamua je tö, helâ me hna

thamua wakunenu ame kâlâ meic. Ke ca khan' ödrin anyin hwege. 10 Ke haingö Delila kö Samasona, ka habe, Wâ bi, u je iyawö nya, me thoi kõnya: ö u ha thö kõnya únyi hnân cö u. 11 Ke e ame ha kâu, ka habe, Ödrin e ne cö nya ge je tö ae teb únyi, ke ödra tiga ca huliwan, me oge me he ka sényin me helâ me ke at. 12 Haba Delila ame hom je tö ae teb únyi, me ca e, me ha kâu, ka habe, Samasona at Filisiti but ang. Ke wale je at mokulec, ödrin e laba eü hnyi hnyeule. Me e ame thamua je tö únyi hnyi li benyin, helâ me ütö. 13 Ke haba Delila ame ha kö Samasona, ka habe, U je iyawö nya ke ne o but walang ang, ke u je thoi kõnya: ha thö kõnya únyi hnân cö u. Me e ame ha kâu, ka habe, U je ne he ka tha hwâmâ je ohmuök a seven me je tö ame tot. 14 Me e ame ohmâ e ge ong fao, me ha kâu, ka habe, Samasona, at Filisiti but ang. Ke e ame hmak dö úheny hnyi hna mokut, me oc ut únyi hnân hwâwâ mano me je tö ame tot. 15 Me e ame ha kâu, ka habe. Ieü gam u me ha, ka habe, Oge me betenge gam, ke ca tha hnyekom bi mönya? u je okun dut iyawö nya me ca ha kõnya can ányâm hwege. 16 Ke e ame labö újengö hnyi je bong ge hwan hofuc, me huliwa gan, me e ame mok ge hna újengö. 17 Me e ame ha ka momo hnyekon hia, me ha kâu, ka habe, Adre tiga ca ip heleúge ka hnyi hon bök; anyin adre Onazeri nya ka Khong únyi hnyi hnyeku bai: ke adre ne giâ bök me ame he ka hia unyik tang hwegiök, me oge me he ka sényin, helâ me ke at bi. 18 Ke a wâ but Delila a ga hia but ha kâu hnyekon hia, me e ame úkhúnöng he ka hom je thaniny Filisiti, me ha ködrin, ka habe, Ai öbun walang ang, anyin a e ame ha kõnya hnyekon hia. Me ame o kâu je than Filisiti, ke ödrin e hom mone hnyi je hnyamödrin. 19 Me momo ame hawâ e ka mokut me ban hon jevan; me e ame hawâ ke at he ka subâ je ohmuen ban a seven, me e ame hwân he ka hom úhnyúkongoâ, me ame he but tang hwegien únyi gan. 20 Ke e ame ha, ka habe, Samasona at Filisiti but ang. Me e ame hmak dö úheny hnyi hna mokut, me ha, ka habe, Oge me he ka didrut helâ me je úen ehac, me inye hlöhlöu but, Ke ca khana a ga hiö Iehova but unyin. 21 Me ame kât e at Filisiti me úa li emakan; me ödrin e hom a Gaza ai, me ca e ge je tö a bras; ke haba hanymen hnyi kalebus me

he ka khenyo ta je únyi. 22 Ke ame hwân he ka kú hmetu leúnen ban hwaban hna subâ.

23 Ke haba je tuhan at Filisiti ödrin e úkhacaköu he ka hudo hut ae gan kö Dagona a khongudrin, me he ka senyin: anyin a haingödrin, ka habe, a hia but khongutin hnö Samasona a iwahnaihmiöny mötin ka hnyi hnyamötin. 24 Ke ame wâ hnen tavat me ödrin e oganá khongudrin: anyin a haingödrin, ka habe, Hnen khongutin hna hna iwahnaihmiöny mötin ka hnyi hnyamötin a at ame okongo itin hnyei, me hlingâ tavat aese hia gatin. 25 Ke ame senyin dut je hnyekudrin, me ödrin e ha, ka habe, Hawö Samasona me me úhiö kötin. Me ödrin e hum Samasona únyi hnyi kalebus; me e ame úhiö ködrin: ke ödrin e otilâ e hnyi wanben je hmolom. 26 Haba Samasona ame ha ka hidröu at ame kât hnyamen, ka habe, Me hnö nya but he ka kâlâ je hmolominy uma, me inye he ka tot inyifâlâ. 27 Ke unöngötö uma ge obaga me omomo; ke wale je tuhan at Filisiti hia; ke theri thauzan obaga me omomo ethö hnyi hon uma, ödrin e ö Samasona ame úhiö. 28 Haba Samasona ame haö Iehova, ka habe, Iehova Khong lö, ö u únyküme könya, me okhaca hmetu bi owhegiö nya, Khong lö, me inye he ka bi hwaban li emakök ka at Filisiti. 29 Ke haba Samasona ame kât li hmolom eü hnyi wanben uma, wale ame kap uma, me tot inyifâlâ, khaca ge benyin a metâ, ke khaca ge benyin a me. 30 Ke haingö Samasona, ka habe, Oge me he ka tha mok me at Filisiti. Ke e ame nom hnyikânâi me hwegien hia; me ame ü but uma, me takou je than me tavat hia. Ke haba je komok e ame hlingâ hnyi anyin mok me beönua hon je hna hlingâ ke tiga möt. 31 Me ame he je liamekeiny me me lap anyin kamen hia, me hom e, me vaden, me konâm wanben Zorea me Esetaol hnyi hu Manoa a kamen. Ke e ame owisa ka at Isaraela twente je huna.

HNYIMAKAN 17.

KE e hu ke at aten hnyei ae hut hnyi Eferaima, Mika ien. 2 Ke e ame ha ka hinyen, ka habe, Haba je sileva a eleven haded adre hom unyâm, wale u je úhangö gan, me fuc gan hnyi li hnyekönyök, wâ bi, e unyik; oge hom. Me ame ha hinyen, ka habe, E hnahic ut nökkuk únyi ga Iehova. 3 Ke e ame ham hmetu je

mone a eleven haded ka hinyen, me hinyen ame ha, ka habe, Oge me okabâ je mone kö Iehova únyi hnyi hnyamök hobi kâu nökkuk, m' adre me ányâ hnatheat adre tretrao me hnatheat adre oköiâ: ke walang ang oge me he ka ham köu. 4 Ke e ame ham je mone ka hinyen, me hinyen ame hom lo li haded je sileva me ham ka at ame huliwan fao, me e ame ányâ hnatheat adre tretrao, me hnatheat adre oköiâ: ke ka e hnyi uma umö Mika. 5 Haba Mika, me ame tren uma umen je khong, ke e ame ányâ iefoda, me je idola, me okabâ ke nokon me me at bihut unyin. 6 Haba hnyi úen e, me ba than hnyi Isaraela: ke adre me ve ányâ únyi ae wisa ködrin.

7 Ke wale ke hidröu úheny Bêthe-leema-juda, hanen lap anyi Juda, ke e at Levi bi, ke e ame laba kanyua eling. 8 Ke ame he at úheny hnyi taun Bêthe-leema-juda he ka elâm ke dok he ka laba kanyua hnyin; ke e ame o thö ka hnyi hnyei ae hut hnyi Eferaima, me he ka hnyi uma umö Mika. 9 Ke Mika ame ha kâu, ka habe, U je mua? Me e ame ha, ka habe, Iny at Levi, úhek Bêthe-leema-juda, ke oge me he ka laba kanyua hnyi ke dok oge me he ka wâ. 10 Me haba Mika ame ha kâu, ka habe, Tha laba ju mönya he ka bi kamök me at bihut unyik; me oge me he ka ham köu ten je sileva hnyi ke huna me ke huna, me khaca bwiny khaü, me jetü. Me haba at Levi ame didrö. 11 Me so bi ka at Levi he ka tha laba me; me haba hidröu me helâ me ke nokon bi. 12 Ke haba Mika ame otilâ at Levi, me me anyin at bihut hidröu eling, k' ame laba eiö hnyi uma umö Mika. 13 Ke haingö Mika, ka habe, E khandö nya walang ang a ga me he Iehova ka ányâ únyi ae so könya, anyin ae hu unyik at Levi hnân at bihut.

HNYIMAKAN 18.

KE hnyi úen eling me ba than hnyi Isaraela: ke hnyi je bong eling haba tribu Dana ödrin e eleü idrin he ka labâ; anyin adre tiga ca khenâ ködrin idrin unyin at Isaraela ke ne o but bong eling. 2 Ke haba laku Dana, ödrin e kunâ je hnyat únyi hnyi anyidrin lap a ödrin faiv, únyi hnyi úseidrin hia, a je hnyat ae hwege, úheny Zorea, me Esetaol, he ka ecmâkâ hnyei, me elâm e; ke ödrin e ha ködrin, ka habe, He thö ka elâm hnyei: ke ödrin e o but ka hnyi hnyei ae hut hnyi Eferaima,

hnyi uma umö Mika, me ödrin e mokut eling. 3 Ke tiga ödrin hnyi baten uma umö Mika, ödrin e löngmakhmetoâ ifucin hidröu at Levi; me ödrin e saú kâ e, me ha kâu, ka habe, Ia hum u jem? ke ieu hudrâm eang? ke ieu ânyâm eang? 4 Ke haingen, ka habe, Helâng me helâe ame ânyâ kõnya Mika, ke e ame he ka bi hwa-bök, ke inya ang anyin at bihut. 5 Me ödrin e ha kâu, ka habe, Ö u elâm dö unyin Khong me me khan' öhmun dö ame ne he ka hnahic úhehmun. 6 Ke ame ha ködrin at bihut, ka habe, He thö me hnahic: e hnyi hnyimakö Iehova debun gethen öbun e he ka vhenö.

7 Me ame he but hnyat a ödrin faiv, me o hnyi Laisi, me wâ tavat hnyin e a ödrin e laba so helâ me at Zidona, a hnahic ut me khötkic; anyin ae ba at musi hnyi hnyei me me thawâ ta je únyi, he ka oh-mehm' ödrin hnyi ta je únyi; ke ödrin e úsákâúö me at Zidona, ke ba únyi anyin ke at ka ke at. 8 Ke ödrin e o but ka je liamekeiny mödrin hnyi Zorea me Esetaol; me ame ha ködrin je liamekeiny mödrin, ka habe, Hawa gabun? 9 Ke haingödrin, ka habe, Todró, me ötin e he ködrin, anyin a öhmun e wâ hnyei, ke wâ bi, e ti so; ke ieu gabun öhun e laba ju? ca bec bi he ka he, me he thö ka hu hnyei. 10 Öbun ka he, öbun e he ka o ka tavat adre laba khötkic, ke lau but hnyei; anyin a Khong ame ham e köbun; hnyei ae ba ke únyi ae hia hnyin eang hmeledrany.

11 Ke ame he úheny e únyi hnyi lap anyi Dana, a úheny Zorea, me Esetaol, ödrin hnyat a siks haded ae ve hu omjehen vat. 12 Ke ödrin e he me hunuma hnyi Kiriathajarim hnyi Juda: anyin a wale adre me hwenyi ien dok eling me Mahane-dana ke ne o but hnyi bong ang: wâ bi e hnyi hoton Kiriathajarim. 13 Ke ödrin e he úheny e ka hnyi hnyei ae hut hnyi Eferaima, me o hnyi uma umö Mika. 14 Me ame fuc tavat a thabûng hnyat ödrin e ecmâkâ hnyei Laisi, me ha ka je liamekeiny mödrin, ka habe, Hawa, e khan' öbun a g' ame hu iefoda hnyi je uma eang, me je idola, me hnatheat adre tretrao, me hnatheat adre oköiâ? Ke walang ang wâhmakhmeto ju öbun únyi he ka ânyâ. 15 Me ödrin e saú thö kâ e, me o ka hnyi uma umen hidröu a at Levi, wale uma umö Mika, me iouny me. 16 Ke haba tavat a siks haded ae ve hu omjehen vat, a laku Dana, ödrin e tot hnyi homagöule. 17 Me ame he hnyat a thabûng a

hnyat ecmâkâ hnyei, me didró, me hom hnatheat adre tretrao, me iefoda, me je idola, me hnatheat adre oköiâ: ke ame tha tot at bihut hnyi homagöule me tavat a siks haded ae hu omjehen vat. 18 Ke ame didró hnyat eling ka hnyi uma umö Mika, me hom hnatheat adre tretrao, me iefoda, me je idola, me hnatheat adre oköiâ, me haingen at bihut ködrin, ka habe, Ieu öbun e ânyâ? 19 Me haingödrin kâu, ka habe, Ca mede, ip ju hnyamâm ka hnyi hon hnyimâm, me tha he möhmun, me u ma he ka bi kamöhmun me ânyâ hanymen at bihut unyihmun: hawa, e so köu he ka ânyâ hanymen at bihut hnyi lap anyin at a khaca, ke hawa, he ka bi hut ka tribu me lap anyi Isaraela? 20 Me ame senyin hnyekon at bihut, me e ame hom iefoda, me je idola, me hnatheat adre tretrao, me he hnyi wamben tavat. 21 Me ödrin e hwiö me he, me ip tavat ae úhnyükong, me je meno, me ta je únyi hnyi hnyimaködrin. 22 Ke ödrin e sákâú but úheny hnyi uma umö Mika, haba tavat hnyi je uma hakekenyâ uma umö Mika, ödrin e úkhacaköu, me khöü laku Dana. 23 Ke ödrin e hongot ka laku Dana. Ke ödrin e hwiö me ha kö Mika, ka habe, Ieu gam u me tha he me bunyen helâe? 24 Ke haingen, ka habe, Öbun e hia but hom anyik je khong wale oge ânyâ, me anyik at bihut, me öbun e he, ke ieu biju kõnya? ke ieu e öbun e ha kõnya, ka habe, Ieu gam? 25 Me ame ha kâu laku Dana, ka habe, E so adre me ca löng hwâm hofuc unyihmun wâ e nye kuc u thö tavat ae hmönyin, me u me he ka mok me ânyâm lap. 26 Me ame he balua bi laku Dana: ke a wâ but Mika a ödrin hwege hon, me e ame hwiö thö me hmetu ka hnyi hnyaban. 27 Ke ödrin e hom je únyi a ânyâ Mika, me anyin at bihut, me o but Laisi, ka tavat adre me laba so me khötkic, me kuc ödrin ge hele vat; ke ödrin e thong taun ge meic. 28 Ke ba at úhömeli, anyin ae úsákâúö e me Zidona, ke ba hna iouny me ke at; ke e hnyi hnyigöulen bucen e. Bethe-rehob. Ke ödrin e otilâ taun me labâ e. 29 Ke ödrin e hwenyi ien taun Dana, hoton ien kamödrin Dana, wale a hnöku nöku Isaraela: ke so bi Laisi ien taun ehac. 30 Ke haba laku Dana ödrin e otilâ hobi ködrin hnatheat adre tretrao: ke haba Jonathana, nöku Geresoma, nöku Mose, e me lakon a hnyat bihut anyin tribu Dana ke ne o but bong adre hom hwenbâ hnyei. 31 Ke ödrin e otilâ hobi ködrin hnatheat adre

tretrao anyi Mika, wale e ame ânyâ, hnyi ta je bong hia wale a e bi hnyi Silo uma umen Khong.

HNYIMAKAN 19.

KE haba hnyi je bong eling ae ba than hnyi Isaraela, me hu ke at Levi ame laba kanyua hnyi ke keihen hoton hnyei ae hut hnyi Eferaima, at ame hom anyin momo únyi hnyi Bethe-leema-juda. 2 Ke ame bi únyi monu anyin momo, me kec gan ka hnyi hnyaban kamen hnyi Bethe-leema-juda, me e ame laba eling vak ta tehi. 3 Me ame todrö áiân бага me he hoton he ka úhnenamö wia mē me hom hmetu bi, ke e unyin athnyabainy me li asina : ke haba momo ame hom e ka hnyi uma umen kamen ke a wâ e kamen momo, me e ame senyin he ka iouny mē. 4 Me úngon ame thawâ e, wale kamen momo ; me e ame tha laba mē hnyi kun ta bong : me ödrin e tha han, me ic, me mokut eling. 5 Ke haba hnyi bong a vakiny ödrin e vesâkong, me e ame todrö he ka he : ke ame ha kâu úngon a kamen momo, ka habe, Me okahwa hnyekom ge jeû, ke hwaban thö e he th' öbun. 6 Me ödrü me laba me tha han me tha ic : ke haba kamen momo ame ha ka at, ka habe, Ö u me laba ju me mokut, me me he ka senyin hnyekom. 7 Ke haba at ame todrö he ka he, me úngon ame újengöâ, me e ame mokut hmetu eling. 8 Ke e ame vesâ hnyi hnyomakatu hnyi bong a thabúnginy he ka he ; me ame ha kamen momo, ka habe, Ö u me okahwa thö hnyekom, me laba ju ke ne o but sahac ; me ödrü me tha han. 9 Me ame todrö at he ka he me anyin momo me athnyabainy, me ame ha kâu úngon a kamen momo, ka habe, Wâ bi ame he but ang ka dit seúnö, ö u mokut hmetu ju : wâ bi a he but ka lit ut, mokut ju eang, me me he hnyekom ka senyin ; ke öbun e he ka vesâkong me he me o ka hnyi hnyabam. 10 Ke höcö bi бага he ka mokut hmetu, me e ame tot me he, me e ame o hnyi hnyei cicö Jebusi (wale Jerusalema) : ke e unyin li asina adre hûkâlâ li taben hudru ; me anyin minya momo. 11 Ke ödrin e o hnyi Jebusi hnyi hauhaotreng ; ke haingen athnyaba ka tuhan, ka habe, Ö ötin saú ka hnyi taun ang anyin at Jebusi me mokut eling. 12 Me ame ha kâu tuhan, ka habe, Ötin e ca he ka saú ka hnyi taun kanyua, a ca hanen laku Isaraela, ke ötin e he ka he Gibea ai. 13 Ke haingen ka athnyabainy, ka habe, Ötin e he

ka saú ka hnyi ke dok eang ; ke ötin e he ka mokut hnyi Gibea, ame ne Rama. 14 Ke ödrin e he bala bi ; ke ame dit ködrin seúnö hnyi Gibea hnyi Beniamina. 15 Ke ödrin e saú kâ e, he ka mokut hnyi Gibea : ke e ame didrö me laba hnyi getheniny taun : anyin ae ba at ame haw ödrin ka hnyi umen uma he ka mokut. 16 Ke wâ bi, wale ke hingat ame o úheny hnyi anyin huliwa hnyi ta hnyei hnyi sahac ; haba at eling aten hnyei ae hut hnyi Eferaima, ke ame laba kanyua hnyi Gibea : ke so bi at Beniamina, je aten taun. 17 Ke e ame bwele me wâ hnyi getheniny taun at úheny hnyi hna he ; ke haingen hingat, ka habe, u me he kâ? ke úbem ua? 18 Ke haingen kâu, ka habe, Úhehmun Bethe-leema-juda, ke öhmun e he ka hnyi ke keihen hnyei ae hut hnyi Eferaima ; úhek e, me oge me he Bethe-leema-juda ai : ke oge me he but ka hnyi uma umö Iehova ; ke ba at ame hawo nya ka hnyi umen uma. 19 Ke so bi e hu thatúnyin hwit me an asina minya, ke hu areto me waina hobi kónya, me athnyabaem a momo, me hidröu unyihmu a li athnyabaem : e ba únyi ae hia. 20 Ke ame ha hingat, ka habe, E so u me hnahic ; ke hamök he ka ö u ; ke so bi ca mokut bi eú hnyi gethen. 21 Ke e ame hom e ka hnyi umen uma, me hân li asina : ke ödrin e hneú je li cadrin, me han, me ic. 22 Ke ödrin e tiga osenyinâ je hnyekudrin, wâ bi, je aten taun, a je atö Belial, ödrin e tot igigilö uma, me tot hwanuma ; me ha ka at ae tren uma, wale hingat, ka habe, Hom but jem at a he ka hnyi umâm uma, me me úkhanöhmun köu thö. 23 Ke ame didrut ködrin at, wale ae tren uma, me ha ködrin, ka habe, Ohe, je liamekeiny mönya, ö öbun ca ânyâ bi únyi ae kong eling ; anyin a o but at ang ka hnyi umök uma, ca he ka ânyâ únyi eang ae kong. 24 Walang nö-kuk ae tiga hlu, me momo anyin бага oge me he ka hum ödrü köbun, m' öbun e okongu ödrü, me ânyâ ködrü webun : ke ca ânyâ bi ka at ang únyi e ae ikiki. 25 Ke höcö bi tavat he ka löng kâu : ke haba at, me e ame kât anyin momo, me hom e ködrin eú ; ke ödrin e tha mē, me okongöâ hnyi lit ke ne o but hnyomakatu ; me ödrin e hna but hnyi haolany. 26 Ke ame o thö momo hnyi haolany, me ta ju hnyi hwanuma umen at a e hnyin áiân, ke ne o but ame lany dö. 27 Ke ame todrö áiân hnyi hnyomakatu, me khöng ut je hlinginy hwanumen, me didrut he ka he ; ke wâ bi a ta

but momo, a anyin momo, eú hnyi hwanuma, me li hnyamen hon hwanuma. 28 Ke haingen káu, ka habe, Todró, m' ótin e he; me ame ca thu bi: me e ame kát momo me ip hon asina; ke ame todró at me he ka hnyi hnyaban. 29 Ke e ame o but ka hnyi umen uma, me e ame hom hele, me kát anyin momo, me susuba e me je jeien, me me twelw je uthat, me kuná ka hnyi je ke keihen Isaraela hia. 30 Me haingódra hia thithó tavat adre me wá, ka habe, E ba únyi heláe adre ányá me wá, hwán hnyi bong ame he jem lakon Isaraela úheny Aigupito ke ne o but hnyi bong ang: únykúme ju, me úbanyinyá ju, me ba ju.

HNYIMAKAN 20.

ME haba lakon Isaraela hia thithó adre me he, me ame úkhacakóu tavat helá me at a khaca, hwán hnyi Dana ke ne o but hnyi Bere-seba, a tha ódra me hnyi Gileada, unyi Iehova hnyi Mizepa. 2 Ke e manen hnyi úkhacakóu anyin aten Khong je taben tavat hia thithó wale hnyi je tribuiny lakon Isaraela hia, a foa haded thauzan tavat adre me he hon káná me hok hele vat. 3 (Ke haba laku Beniamina ódrin e lóng a g' ame he Mizepa ai lakon Isaraela.) Me haba lakon Isaraela adre me úhakóuá, ka habe, Mě thumetu óhmun, adre me kámâu únyi eang ae kong. 4 Me ame thu at Levi, a áián momo adre hlingá, ka habe, Oge o but hnyi Gibeá anyi Beniamina he ka mokut, inya me anyik momo. 5 Ke ame todró kónya obagainy Gibeá, me tot igigili nya hnyi uma hnyi hnyinghet; ke ódrin e únykúme he ka hlingó nya, me ódrin e okongo anyik momo, me ame mokcu. 6 Me oge me hom anyik momo, me susuba, me kuná e ka hnyi je hnyi hia iny at Isaraela: anyin a ódrin e ányá únyi ae ikiki me monu hnyi Isaraela. 7 Wá bi, óbun hia lakon Isaraela, úhanyinyá ju me oá but hobun hofuc. 8 Ke haba tavat hia thithó ódrin e tha tot helá me at a khaca, me ha, ka habe, Ame ca he ke at gatin ka hnyi umen uma mano, ke ame ca he ke at gatin ka hmetu ka hnyi hnyaban. 9 Ke walang únyi ótin e he ka ányá ka Gibeá; adre me he ka he úcon hoton lekóp; 10 ke ótin e he ka hom tavat a ten únyi hnyi haded hnyi je tribu hia anyin at Isaraela, me khaca haded únyi hnyi thauzan, ke khaca thauzan únyi hnyi je ten thauzan, he ka hok kamejin tavat, me adre me he ka ányá

helá me anyidrin monu ódrin e ányá hnyi Isaraela, ódrin ka o but hnyi Gibeá hnyi Beniamina. 11 Me ame úkhacakóu at Isaraela hia cicó taun, k' adre tha hnyok helá me at a khaca.

12 Ke haba je tribu anyin at Isaraela ódrin e kuná tavat ka hnyi wanben tribu anyi Beniamina hia, he ka ha, ka habe, Ie únyi e ae kong adre ányá unyibun? 13 Ke walang ang, hom but jem je ató Belial hnyi Gibeá, m' óhmun e he ka hling' ódrin, me ohia huló hnyi Isaraela. Ke hócó laku Beniamina he ka lóng hofuc hwan je liamekeiny módrin a lakon Isaraela. 14 Ke haba laku Beniamina ódrin e úkhacakóu hnyi Gibeá únyi hnyi je taun, he ka vat me lakon Isaraela. 15 Ke adre aú laku Beniaminá hnyi bong eling únyi hnyi je taun, ódrin twente siks thauzan tavat adre me hok hele vat, ke ca ha bi at Gibeá haba úseidrin ódrin seven haded tavat adre úca. 16 Ke e unyin tavat hia eling me hu tavat a seven haded adre úca, a hnyat ae me benyidrin; ke khan' ódrin he ka kúlúá je veto ka hnyi leúnen ban me ca onua bi.

17 Ke adre aú at Isaraela, ke ca ha bi at Beniamina, me, foa haded thauzan tavat hok hele vat, a tavat vat hia. 18 Ke ame todró lakon Isaraela, me he Beth-ela ai, me elám unyin Khong, me ha, ka habe, Hamó ia he ka bán me vat me laku Beniamina? Me Iehova ame ha, ka habe, Bán at Juda. 19 Me ame vesákong lakon Isaraela me hunuma cicó Gibeá. 20 Me ame he lakon Isaraela me vat me at Beniamina; ke ame tot metá ködrin at Isaraela hnyi Gibeá. 21 Me ame didrut laku Beniamina úheny hnyi Gibeá, me kot hnyikánái hnyi bong eling twente tu thauzan at Isaraela. 22 Ke haba tavat a lakon Isaraela ódrin e sihwégiódrinkóuódrin, me tot metá hmetu he ka vat hnyi dok ódrin e tot metá hnyin hnyi bong a bán. 23 (Ke ame he lakon Isaraela me tenge hnyi hnyimákó Iehova ke ne o but hnyi sahac; ke ódrin e hnei Iehova me ha, ka habe, Hawa, oge me he hmetu he ka vat me laku Beniamina je liamekeiny mónya? Ke Iehova ame ha, ka habe, He thó ködrin.)

24 Me haba lakon Isaraela ódrin e hakekenyá laku Beniamina hnyi bong a loiny. 25 Me ame he Beniamina ködrin úheny Gibeá hnyi bong eling a loiny, me kot hnyikánái eitín thauzan minya lakon Isaraela, a hnyat hok hele vat hia. 26 Me ame he lakon Isaraela hia me tavat hia,

me o hnyi Beth-ela, me tenge, me laba e hnyi hnyimakö Iehova, me ca han hnyi bong e ke ne o but sabac; me ödrin e hudo je hudiny leü, me je hudiny úsoköu hnyi hnyimakö Iehova. 27 Ke haba lakon Isaraela ödrin e elâm unyi Iehova (anyin a eling tangen úhinhnyköu anyin Khong hnyi je bong eling, 28 ke haba Fineasa nöku Eleazara, nöku Arona at ame tot hnyi hnyimakan hnyi úen e,) me ha, ka habe, Hawa, oge me he ka he hmetu he ka vat me laku Beniamina je liamekeiny mönya, hawa, ame ne hna ju? Ke haingö Iehova, ka habe, He thö, anyin oge me he ka hn' ödrin nyi ka hnyi hnyamâm. 29 Ke haba at Isaraela ödrin e kunâ tavat he ka mokulec igigilö Gibeaa.

30 Ke haba lakon Isaraela ödrin e he ka úcon laku Beniamina hnyi bong a kuniny, me tot metâ me at Gibeaa, helâ me li úen a bân. 31 Ke ame didrut laku Beniamina ka tavat, ke adre lili ödrin úheny hnyi taun; me ödrin e hwân he ka kot tavat, me hlingâ helâ me li bong a bân, hnyi li gethen, khaca úheny Beth-ela, ke khaca úheny Gibeaa, hnyi hnyei, helâ me thöte at Isaraela. 32 Ke haingen laku Beniamina, ka habe, adre kuc ödrin hnyi hnyimakötin helâ me a bân. Ke haingen lakon Isaraela, ka habe, Ötin e he ka kec me köc ödrin únyi hnyi taun, ka hnyi je gethen. 33 Ke ame todrö at Isaraela hia thithö, únyi hnyi je hnödrin, me tot metâ hnyi Baala-tamara: ke ame utut tavat mokut anyin at Isaraela únyi hnyi je hnödrin, wale hnyi Maare-gibeaa. 34 Ke ame he ka tet metâ me Gibeaa ödrin ten thauzan je hna úca a labanen at Isaraela hia, ke gan hmâ hna vat, ke ca khan' ödrin ae hakekenyi ödrin dut únyi ae kong. 35 Ke haba Iehova ame kot at Beniamina hnyi hnyimakan at Isaraela; ke haba lakon Isaraela ödrin e ota hnyi bong eling at Beniamina, ödrin twente faiv thauzan ke wan haded: tavat hok hele vat hia.

36 Ke a wâ but laku Beniamina a g' adre kuc ödrin dut: anyin a at Isaraela ödrin e kâcâ vat anyin at Beniamina, anyin a ödrin e labageju ka je mokut, wale adre ip cicö Gibeaa. 37 Ke logot je mokut, me utut Gibeaa ai; ke haba je mokut ödrin e iyâwâ hon kânâ, me kot hia taun ge hele vat. 38 Ke e hu haten ka at Isaraela, me je mokut, a ödrin e he ka oâ hainy mec helâ me úlâ ae gan únyi hnyi taun. 39 Ke haba at Isaraela ödrin e kâcâ vat, me ame

hwân at Beniamina ka kot me hlingâ at Isaraela helâke thöte je hnyat: anyin a haingödrin, ka habe, E hnathu adre kuc ödrin hnyi hnyimakötin helâ me vat a bân. 40 Ke ame hwân he ka ölö úlâ únyi hnyi taun, wale hai ame tot, haba at Beniamina ödrin e hngele hotudrin ai, ke wâ bi, haba taun hia ame ölö hnyidranyai ge hai. 41 Ke haba at Isaraela ödrin e hwjö me ame gâ ön at Beniamina: anyin ödrin e wâ a ga o but ködrin únyi ae kong. 42 Anyin a wale ödrin e kec ge at Isaraela hnyi gethen úheny hnyebuba; k' ame hnu ödrin bi vat; ke haba tavat úheny hnyi taun, me adre me hling' ödrin hnyi wanben. 43 Me adre me thelöng at Beniamina, me hnu ödrin, me uti ödrin ju hnyi anyidrin dok hnân menâ, ke ne o but cicö Gibeaa cicö hna o hnen seünö. 44 Ke ame ta but at Beniamina a ödra eitn thauzan tavat; a je hnyat ae hwege hia. 45 Ke ödrin e saü me kec hnyebuba ai ka hnyi kic Rimona: ke adre me hlu ödrin eü hnyi je gethen a ödrin faiv thauzan; ke ödrin e hnu ödrin ke ne o but Gidom, me kot lo li thauzan gadrin. 46 Ke a ta hnyi bong eling a at Beniamina hia, ödrin twente faiv thauzan tavat hok hele vat; ödrin hia tavat ae hwege. 47 Ke ame saü me kec hnyebuba ai ka hnyi kic Rimona tavat a siks haded, me laba hnyi kic Rimona vak ta tehi. 48 Me ame hmetu at Isaraela ka laku Beniamina, me kuc ödrin ge hele vat, wale taun hia thithö, me omeno, me ta je únyi hia ödrin e wâ: ke ödrin e thong minya ge meic je taun hia ödrin e wâ.

HNYIMAKAN 21.

KE haba at Isaraela ödrin e hia but khemanyin hnyi Mizepa, me ha, ka habe, Ame ca he ke at gatin ka ham nokon hlu ka at Beniamina me áiân. 2 Ke ame o but tavat hnyi Beth-ela, me laba eling ke ne o but sabac hnyi hnyimakan Khong, ke ödrin e tenge thungau gan hmâ. 3 Ke ödrin e ha, ka habe, Iehova lö, Khongu Isaraela, anyin a ieu ame o únyi eang hnyi Isaraela, a g' ame hia but hnyi Isaraela ke tribu hnyi bong ang! 4 Ke nyi hnyomakatu, ame vesâkong tavat, me otillâ eling taben hut, me hudo je hudiny leü, me hudiny úsoköu. 5 Ke haingen lakon Isaraela, ka habe, Ia hnyi je tribu anyi Isaraela hia ae tiga ca hnyi he ka hnyi úkhacaköu kö Iehova,

anyin a ödrin e hia but khemanyin hwege gan ae tiga ca hnyi he Mizepa ai kö Iehova, ka habe, Adre me he ka hlingá e. 6 Ke haba lakon Isaraela ödrin e ietra ga Beniamina liamekeiny mödrin, me ha, ka habe, Khaca tribu adre subâ degecá hnyi bong ang unyi Isaraela. 7 Ieú ötin e he ka ányá hobi ködrin je kolon, me me hu laöiödrin, anyin ötin e hia but khemanyin hnyi iö Iehova a ötin e ca he ka ham ködrin lakutin je hlu me me laöiödrin? 8 Ke haingödrin ka habe, Ie tribu unyin je tribu Isaraela a ca hnyi he Mizepa ai kö Iehova? Ke wá bi, ame ca o ke at ka hnyi hna hunuma úheny Jabese-gileada ka hnyi úkhacaköu. 9 Anyin adre aú tavat, me wá bi, e ba at eling aten Jabese-gileada. 10 Ke haba úkhacaköu ödrin e kuná ká e twelv thauzan tavat ae ti hwege, me húna ködrin, ka habe, He th' öbun, me kot at Jabese-gileada tha e me je momo me wanakat ge hele vat. 11 Ke walang únyi öbun e he ka ányá; öbun e he ka ohia obaga hia, me omomo hia a tha mwi me бага. 12 Ke ödrin e wá unyin at Jabese-gileada foa haded je hlu a ödrin tiga ca tha mwi me бага: ke ödrin e hum ödrin Silo ai ka hnyi hna hunuma hnyi hnyei Kanana.

13 Ke haba úkhacaköu hia ödrin e úkhúnöng he ka úhnenamö me laku Beniamina, hnyi kic Rimona, me ha úsököu mödrin. 14 Ke ame hmetu Beniamina hnyi úen eling; ke adre me ham ködrin je momo wale ödrin e omelö únyi ge omomoiny Jabese-gileada: ke ca úcú úseidrin bi. 15 Ke ame ietra tavat ga Beniamina, anyin a Iehova ame kia je tribu Isaraela.

16 Ke ame ha wahingatiny úkhacaköu,

ka habe, Ötin e he ka hö me me hu laáián je kolon, anyi adre ohia omomo únyi hnyi Beniamina? 17 Ke haingödra, ka habe, E so e hu jekhöu hobi káu tavat kec möt hnyi Beniamina, me me ca he bi ke tribu ka hia hnyi Isaraela. 18 Ke ca khan' öhmun he ka ham ködrin lakuhmun je hlu me laöiödrin: anyin a hia but khemanyin lakon Isaraela, ka habe, Hnauhangö at ame he ka ham momo kö Beniamina. 19 Me ödrin e ha, ka habe, Wá bi, e hu bijeú anyi Iehova hnyi Silo hnyi je huna. wale hnyi ke keihen Beth-ela, ke keihen e deió gethen ame he Sekema ai úheny Beth-ela, ke keihen Lebona ka hnyi hwai-öuinny. 20 Ke adre me ha ka laku Beniamina, ka habe, He th' öbun, me mokut hnyi je hnyei vine: 21 ke wá bi, ame ne didrut je hluiny Silo he ka bibiá, me öbun e he ka o únyi hnyi je hnyei vine, me ve khöt áián je hluiny Silo, me he ka hnyi hnyei Beniamina. 22 Ke ame ne o je kamen me je hanidrin he ka hai' öbun köhmun, me öhmun e he ka ha ködrin, ka habe, Me betenge köhmun gadrin; anyin a öhmun e ca ve hok áián hobi ködrin hnyi vat: ke haba khaca öbun e ca ham bi ködrin; anyin a wale e ba jönbun. 23 Me haba laku Beniamina ödrin e ányá heláe me hom je momo hoton úseidrin únyi ge tavat adre bibiá, ke ödrin e hum ödrin: me ödrin e he me hmetu ka hnyi idrin, me op taun, me labá e. 24 Ke ame vese úheny e lakon Isaraela hnyi úen eling ka hnyi je tribu me je hnyabadrin; ke ödrin e vese úheny e ka hnyi je idrin. 25 Ke haba hnyi úen eling me ba than hnyi Isaraela: ke a ve ányá tavat hia únyi ae wisa ködrin bi.

TUSI ANYI RUTHA.

HNYIMAKAN 1.

HNYI úen musi anyin hnyat owisa, ame o but hmiá hnyi hnyei. Ke ame he ke at Bethe-leema-juda he ka laba kanyua hnyi hnyei Moaba, e, me áián, me

lakon li бага. 2 Ke Elimelek ien at, ke Naomi ien áián, ke Malona, me Kiliona ien li lakon, je hnyat Eferatha úheny Bethe-leema-juda. Ke ödrin e o but hnyi hnyei Moaba, me laba eling. 3 Ke ame mokcu Elimelek öiö Naomi, ke e biju me

li lakon. 4 Ke ödrü me ve bok öiödrü unyin je momo Moaba; Orepa ien ke at, ke Rutha ien ke at: ke ödrin e laba eling helâ me ten je huna. 5 Ke ame tha mokcu Malona, me Kiliona; ke ödrin e mok degecâ monu hnen aiân me lakon li бага. 6 Me e ame todrö me laüngon, me hmetu üheny hnyi hnyeï Moaba: anyin a löng ut hnyi hnyeï Moaba a Iehova ame senâ lakeiny me me ha ödrin. 7 Ke e ame he üheny hnyi dok e ame laba hnyin, ke tha he me laüngon; ke ödrin e vheno gethen he ka hmetu ka hnyi hnyeï Juda. 8 Haba Naomi ame ha ka laüngon, ka habe, E, ve hmetu ju öbu ka hnyi li uma umen lahinyöbu: ke so ame he Iehova ka betenge gabu, helâ me hnöbu hna ânyâ ka li komok, mönya minya. 9 E so ame he Iehova he ka omen' öbu hnyi hnyaban laöiöbu. Me e ame ücimhnyimak mödrü, me tenge gan hmâ. 10 Ke ödrü me thu bi kâu, ka habe, öhmu me he ka tha he möu ka je lahanâm. 11 Haba Naomi ame ha, ka habe, Hmetu ju öbu laünguk: öbu me he ka tha he mönya geü? hawa, e hu je lakuk hmetu bi бага eü hnyi hnyekuk me me li öiöbu? 12 Hmetu ju öbu laünguk, ke he thö; anyin oge somaca but, ke ame ca he hmetu ka hu öiök. Oge ne ha, ka habe, E hu hnageju gak, oge ne he ka hu öiök eâu hayinghet, me hnokoâ je бага: 13 hawa öbu me he ka laba ke ne o but ödrin e gan dut? hawa, öbu me he ka bec me ca hu aiân? Ohe laünguk: anyin ae gan hmâ anyik vec gabu, anyin a Iehova ame ip hnyamen huk. 14 Me ödrin e ütengiö, me tenge hmetu: ke haba Orepa ame ücimhnyimak me üngon; ke Rutha ame kece hmâ bi kâu. 15 Me haingen momo, ka habe, Wâ bi, a hmetu but liamekeiny möu ka ta je lahanen, me khongon: bethe hmetu minya ju hoton liamekeiny möu. 16 Me Rutha ame ha, ka habe, Ca üjôngi nya bi he ka hna degeci u, me hmetu gam; anyin a haba dok u ma he ka hnyin me oge me he bi nya ka he kâu: ke haba dok u ma he ka labâ, me oge me he bi nya ka labâ: me haba lahanân ame he ka lahanök bi, me Khongom ama Khonguk bi: 17 haba dok u me he ka mokcu hnyin me oge me he bi nya ka mokcu eling, m' adre me he ka könim nya hnyin: e so ame he Iehova ka ânyâ helâe kõnya me bi hanen bi, ame ne he ke ünyi ka ovesei ötu, ke so bi mok thibi. 18 Ke a wâ hnen momo a ga hwege hnyekon kâu he ka tha

he mē, me e ame ca ha hmetu bi hofuc kâu. 19 Ke ödrü me tha he ke ne o but hnyi Bethe-leema. Ke ödrü me o hnyi Bethe-leema, me ame bwewbet hia taun gadru, ke adre me ha, ka habe, Ame ne Naomi la eang? 20 Ke haingen ködin, ka habe, Ca ha iök bi, me, Naomi, ke ha iök bi, me, Mara: anyin a haba hwakecin Aekhanahia me gan hmâ hiny kõnya. 21 Oge me he thö k' iny unöngötö, ke Iehova ame ohmetu nya ke ba ta ünyi gak: ieü gabun öbun e ha iök me Naomi, anyin a Iehova ame owisa kongo kõnya, ke haba Aekhanahia ame oveci nya? 22 Me ame tha hmetu Naomi me Rutha a üngon, wale at Moaba, at a hmetu üheny hnyi hnyeï iny at Moaba: ke ödrü me o but hnyi Bethe-leema hnyi üen adre hwân he ka meno bali.

HNYIMAKAN 2.

KE e hu waeny öiö Naomi, at tren omjeü ae gan, hanen lap anyi Eli-melek; Boaza ien. 2 Ke Rutha at Moaba ame ha kö Naomi, ka habe, Hnö nya but ka hnyi ta hnyeï he ka hlo je wan hwit hnyi hoton at ame he ka betenge gak. Haingen, ka habe, He thö ünguk. 3 Me e ame he, me o, me hlo hnyi hnyeï hoton tavat subö bali; ke wâ bi adre oâ e ka hnyi ke keihen i Boaza hanen lap anyi Eli-melek. 4 Ke wâ bi, ame o but Boaza üheny Bethe-leema, me ha ka hnyat subâ, ka habe, E so e unyibun Iehova. Ke ödrin e thu, ka habe, E so Iehova ame ohnahici u. 5 Haba Boaza ame ha ka athnyabainy, at ame tuö tavat subâ, ka habe, Hlu e anyi ia? 6 Me haba athnyaba a homakan tavat subö bali, ame thu, ka habe, Wale hlu Moaba a tha o me Naomi üheny Moaba: 7 ke ame ha, hlu ka habe, Ö iny na he ka hlo me thigâ hoton tavat subö bali wanben je thi bali: ke e ame o but me laba eang, but eja hnyomakatu ke ne o but walang ang, ke so bi hnyi ke ong üen e ame me laba hnyi uma. 8 Haba Boaza ame fuc kö Rutha, ka habe, U me löng, nökek? U me ca he ka hlo hnyi ke hnyeï, ke ca he üheny ang, ke laba hmâ ju eang unyin lathnyabaika je hlu. 9 Ke u me he ka wâ utkânâ ödrin e he ka subâ baliny, me he hotudrin: hawa, oge ca hia but hûna ke je hidröu he ka ca kalö u? ke u ka beic dö, he thö ka hnyi je kaia ka ic

RUTHA 3.

wale a sâu je hidröu. 10 Me e ame ta ju me nom hnyikânâi, me ha kâu, ka habe, Anyin a iëu u me betenge gak, me ûnykûme könya, ke iny atkanyua bi? 11 Ke Boaza ame thu me ha kâu, ka habe, Adre hia but thumetu nya ge hnâm hna ânyâ ka ûngom hwaban mok a âiâm : ke u je hna degecâ kâmâm me hinyâm, me hnyei adre hnök' u hnyin, me he jem ka tavat u je ca wâ ehac. 12 E so Iehova ame bi hwaban ânyâm huliwa, me e so ame he Iehova Khongu Isaraela he ka ti bi hwaban köu, wale at a u je he jem he ka laba hmelen li labenyin. 13 Me e ame ha, ka habe, Me betenge ju gak, tuhök ; anyin a u je otubweli nya, me ha könya a athnyabaem hofuc ae so, eja ke ne ca ûcû me lathnyabaem omomo inya. 14 Ke haba hnyi ûen han, me haba Boaza ame ha kâu, ka habe, He thö jem he ka hnyi han areto me hneû âm hnyi vinega. Me e ame tha laba me tavat subâ : ke adre me inâ kâu je hwit adre le, me e ame han me sekon ke hu kolon bi. 15 Ke e ame tot hmetu he ka hlo, me Boaza ame ha ka anyin je hidröu, ka habe, E so e ame he ka hlo hnyi wanben je thi bali, ke ca oû bi. 16 Ke oc minya but keihen ûnyi hnyi je thi bali, me hna biju, me me he ka hlo, ke ca thawâ bi. 17 Me e ame hlo hnyi hnyei ke ne o but sahac ; me e ame kokot ûnyi e ame hlo, ke helâ me khaca efa tap bali. 18 Ke e ame hijen me he ka hnyi taun : ke a wâ but ûngon ûnyi e ame hlo : ke e ame hom me ham kâu kolon hnen hna han. 19 Me ame ha kâu ûngon, ka habe, Ewa dok u je hlo hnyin hnyi bong ang? ke u je huliwa ua? E so e hnahic bi at ame ûnykûmi u. Ke e ame omanenâ ka ûngon at e ame huliwa unyin, me ha, ka habe, haba ien at oge me huluwa unyin hnyi bong ang, me, Boaza. 20 Me Naomi ame ha ka ûngon, ka habe, E so e he Iehova ka ohnahicâ at ame ca degec anyin betenge ka hnyat ae möt me hnyat ae mok. Ke Naomi ame ha kâu, ka habe, E hakekeny at e kötîn, ke e at a ti hanen anyitin lap. 21 Ke haingö Rutha at Moaba, ka habe, E ame ha minya könya, ka habe, U me he ka laba hmâ me anyik je hidröu, ke ne o but ödrin e meno ik je nnyei hia. 22 Me haingö Naomi kö Rutha a ûngon, ka habe, E so u ma he unguke ka tha he me lathnyabainy a je hlu, m' ödrin e ca he ka iouny möu hnyi ke utkânâ bi. 23 Me e ame laba hmâ me je hlu anyi Boaza he ka hlo, ke ne o but obiny hna

meno bali me hna meno hwit : ke e ame tha laba me ûngon.

HNYIMAKAN 3.

KE ame ha kâu Naomi a ûngon, ka habe, Unguk, hawa, oge me ca he ka beleû hna menâ hobi köu m' u me so? 2 Hawa, ka hanötin Boaza wale u me tha he me anyin je hlu? Wâ bi, e ame he ka huje bali eâu huyinghet hnyi hna huje hwit. 3 He thö ka sou, me suö wakaco, me khavâ ânyâm je ûkhaû, ke he thö ka hnyi hna huje hwit : ke u me ca he ka omanenö u bi ka at, ke ne o but e ame um dö han me ic. 4 Ke e ka he bi ka mokut, me hamâm he ka wâhmakhmetoâ dok e ame he ka mokut hnyin, ke u me he ka he me hai kubö hnyi li can, me mokut ju ; ke e ame he ka ha köu hanymâm he ka ânyâ. 5 Haingen kâu, ka habe, Oge me he ka ânyâ hia hnâm hna ha könya. 6 Me e ame he ka hnyi hna huje hwit, me ânyâ hia hna hûna kâu ge ûngon. 7 Ke a hia but Boaza han me ic, ke ame senyin hnyekon, me e ame he ka mokut hnyi baten hna khon bali : me momo ame he hmecik. me hai kubö hnyi li can, me mokut ju. 8 Ke hnyi wanbenset ame ot at me hwiö ; ke wâ bi wale momo ame mokut hnyi li can. 9 Ke haingen, ka habe, U ia? Haingen, Inya Rutha athnyabaem, u me he ka khavö nya a athnyabaem ge baten ânyâm imano, anyin a u at a ti hanen anyitin lap. 10 Me e ame ha, ka habe, E so u hnahic nökek ga Iehova : e beönua ânyâm betenge walang ang hnyi obiny, hon ehac hnyi hwân, anyin a u je ca hnu hoton je hidröu, ame me ca tren omjeu, k' ame ne tren ta ûnyi. 11 Ke walang nökek u ma ca ot ; oge me he ka ânyâ hobi köu helâ me hna ha gam, anyin a wâ but taun hia anyin labanök a u momo ae so hwa-kecin. 12 Ke e hnathu oge me ti hanen köu, ke so bi e hu ke at ae hakekeny hmönyin köu hnyi lap. 13 Me mokut ju hnyi lit ang, ke hnyi hnyomakatu, ame ne he ka ânyâ köu hanymen at ame bi hanen lap, me e so ; e hamen he ka ânyâ : ke ame ne höcö he ka ânyâ köu hanymen at ame bi hanen anyitin lap, awe, hamök bi he ka ânyâ köu hanymen at ame hakekeny köu, kia inya Iehova : mokut ju, ke ne o but ame lany dö. 14 Ke e ame mokut hnyi li can ke ne o but hnyi haolany, k' ame köüö hnyi okubelit. Anyin a haingen

at, ka habe, Ca he ka ha a ga mwi ang momo hnyi hna huje hwit. 15 Ke ame ha bi at, ka habe, Hö jem anyâm úkot, me kât; ke e ame kât, me at ame tuluto je tap bali a siks me ip hon úkot; ke e ame he ka hnyi taun. 16 Ke e ame o but unyin úngon, ke haingen, ka habe, U ia nokuk? Me e ame thumeto hia ge hna anyâ kâu hnen at. 17 Haingen, ka habe, E ame ham kõnya tap bali eang a siks je tulut; anyin a haingen, U ma ca he ka úngom ke ba únyi. 18 Ke haingen momo, ka habe, Me laba ju únguk, me wâ únyi ame he ka o: anyin ame ca he at ka menâ, k' ame he hnyi bong ang ka umo únyi ang.

HNYIMAKAN 4.

KE haba Boaza ame he ka hnyi homagöule me laba ju eling: ke wâ bi, ame he at a hanen anyidrin lap, wale at a ha ga Boaza; me e ame ha kâu, ka habe, E, ketha lö! aiö u, laba ju eang. Me a ame saú thö me laba ju. 2 Me e ame hom je hnyat a ten únyi hnyi wahingatinginy taun, me ha, ka habe, Laba ju eang, me ödrin e laba. 3 Me e ame ha ka at a ti hanen anyidrin lap, ka habe, Haba Naomi wale momo a o hmetu úheny hnyi hnyeï Moaba, ame úco utkânâ wale iny liamekeiny mötin jia Elimelek: 4 ke oge me únykúme he ka omanenâ kâu, me ha, ka habe, Hamâm he ka úco e hnyi hnyimakan je hnyat ödrin e laba eang, me hnyi hnyimakan wahingatinginy lahanök. Ke u me ne he ka úco, awe, úco thö: ke u je ne ca he ka úco, me ha thö kõnya, me me kxanö nya thö: anyin ae ba hmetu ke at ame he ka úco, ke u thibi; ke inyã thibi útangköu möu. Me haingen, Oge me he ka úco. 5 Haba Boaza ame ha ka habe, Hnyi bong u me he ka úco hnyin únyi ga Naomi u me he ka úco minya únyi ga Rutha at Moaba, aiân at a mokcu, he ka oâ ien at a mok hon iny bi. 6 Ke haingen at a ti hanen lap, ka habe, E ca kxanö nya he ka úco hobi kõnya bi, wâ e nye kong ut ik: u me he ka úco húdrök, anyin ae ca kxanö nya he ka úco e. 7 Ke walang bongon hnyi Isaraela ehac ge bi hwaban me úcú, me me ohmâ ta je únyi hia thithö; a g' ame he at ka uny jut tangen hnyeúcan me ham ka at ame laba hakeken

kâu: ke wale hnân ohnatho hnyi Isaraela. 8 Anyin a wale haingen at a ti hanen anyidrin lap kö Boaza, ka habe, Úco thö hobi köu bi. Me e ame uny jut tangen hnyeúcan. 9 Ke Boaza ame ha ka je hingat me tavat hia thithö, ka habe, Öbun e ohnathoâ hnyi bong ang a oge úco ta je únyi hia anyi Elimelek, me ta je únyi hia anyi Kiliona me Malona únyi ga Naomi. 10 Ke khaca oge úcú Rutha at Moaba aiö Malona, me öiök, me inya oâ ien at a mok hon iny, me me ca hia ien at a mokcu unyin je liamekeiny me, me únyi hnyi homagöuleny anyin taun: öbun e tavat ohnatho hnyi bong ang. 11 Me ame ha tavat hia thithö hnyi homagöule me je hingat, ka habe, Öhmun tavat ohnatho. Hamö Iehova he ka wia momo ame he ka o ka hnyi umâm uma me me helâ me Rakela me Lea, li at ödre otilâ lap anyi Isaraela: ke e so u me tren únyi ae úcú hnyi Eferatha, me lung hnyi Beth-eleema: 12 ke e so anyâm lap he ka helâ me lap anyi Farez, wale a hnököâ Tamara ga Juda, únyi ge mátrân ame he Iehova ka ham köu únyi ge momo ang. 13 Me Boaza ame hum Rutha, ke aiân dö e, me e ame didrö kâu, ke e ame erkin dut, ge musi anyi Iehova, me e ame hnököâ da. 14 Ke haba omomo ödrin e ha kö Naomi, ka habe, Ole kö Iehova, wale at ame ca hnö u he ka ba at ae hakekeny köu hnyi anyâm lap hnyi bong ang, ke so e me lung bi ien hnyi Isaraela. 15 Ke e ame he ka otubweli u, me hat u hnyi somaca a u, anyin ame hnököâ nokon ge úngom at ame betenge gam, ke beönua anyin ibetengio köu hon lakom je бага a seven. 16 Me Naomi ame hom wanakat, me kât e ka hnyi úlainy; ke e ame hat e. 17 Ke haba omomo ödrin e hwenyi ien, ke haingödrin, A hia but hnököâ da öbi Naomi; ke ödrin e hwenyi ien me Obed: haba e kamö Jese, kamö Davita.

18 Ke walang je dö anyi Farez: haba Farez ame hnöku Hezerona; 19 ke Hezerona ame hnöku Ram, ke Ram ame hnöku Aminadaba; 20 ke Aminadaba ame knöku Nasona, ke Nasona ame hnöku Salemona; 21 ke Salemona ame hnöku Boaza, ke Boaza ame hnöku Obed; 22 ke Obed ame hnöku Jese, ke Jese ame hnöku Davita.

TUSI A BAN ANYI SAMUELA.

HNYIMAKAN 1.

E HU ke at úheny Ramathaima-sofma únyi hnyi hnyeí ae hut hnyi Eferaima, Elekana ien, nöku Jerohama, nöku Elihu, nöku Tohu, nöku Zuf a at Eferaima: 2 ke lo láíân; haba ien khaca me Hana, ke Penina ien khaca: ke e lu laku Penina ke ba nöku Hana. 3 Ke haba at eling ame labö he hnyi je huna úheny hnyi hnyaban he ka hnyi hmi me bi hut kö Iehova tuhan sabaoth hnyi Silo. Ke haba eling li laku Eli, jia Hofeni me Fineasa, a li at bihut kö Iehova. 4 Ke ame o but úen ame he Elekana ka bi hut hnyin, me e ame ve ham jekhöü kö Penina áíân, me lakon obaga me wahu: 5 ke e ame ham kö Hana lo li jekhöü; anyin a e ame betenge ga Hana, ke Iehova ame otoúnyö e. 6 Ke haba momo a iwahnaihmiöny me ame ovecá hwegiá e, he ka otengiá e, anyin a Iehova ame otoúnyö e. 7 Ke e ame labö ányá heláe hnyi je huna hnyi úen e ame he ka hnyi uma umö Iehova, me ovecá e; anyin a wale e ame tenge me ca hnyi han. 8 Haba Elekana áíân ame ha káu, ka habe, Hana, iéú u me tenge gan? me iéú gam u je ca me han? ke iéú ame vec gan hnyekom? hawa, iny ca beónua köu hon lakuk obaga a ten? 9 Me ame todrö Hana hwabab ödrin e hia but han me ic hnyi Silo. Ke haba Eli at bihut ame laba hon tap hmelen uthwanuma hnyi uma umö Iehova. 10 Ke e vec hnyekon momo, me e ame hic kö Iehova me tenge. 11 Ke e ame bi khöbi me ha, ka habe, Iehova tuhan sabaoth lö, u je ne he ka wá vec anyin athnyabaem a momo, me únykúme könya, me ca hnying bi athnyabaem a momo, ke u je ne he ka ham könya a athnyabaem ke da, me oge me he ka ham e kö Iehova hnyi ta je bonginy hia thithö, ke ame ca he ka o heleúgi ka hnyi hon ban. 12 Ke e ame tiga hic bala bi hnyi hnyimakö Iehova, me haba Eli ame wáhmakhmeto hnyimen. 13 Ke haba Hana ame fuc hnyi hnyekon; k' ame bwebwet thibi li esongodiny, ke adre me ca löng ifucin: anyin a wale Eli ame únykúme a g' ame monu ge grág. 14 Ke Eli ame ha káu ka habe, U me he ka monu

ke ne o but kehö? degec ut waina unyám. 15 Haingö Hana ame thu, ka habe, Eba, than lö, inya momo ae vec hnyekon, ke oge ca ic waina bi me grág, ke so bi oge me hingálá hnyekuk hnyi hnyimakö Iehova. 16 U me ca he ka únykúme a atö Belial inya athnyabaem a momo: anyin oge me fuc ke ne o but walang ang únyi hnyi úganiny hmakiny hnyekuk me hna oveci nya. 17 Haba Eli ame thu me ha, ka habe, He thö me hnahic: ke e so ame he Khongu Isaraela ka ham köu únyi u je sumátá gan. 18 Ke haingen, ka habe, Ö u betenge gak a athnyabaem. Me ame he but momo, me han, ke haba hnyimakan e ca hmak hmetu bi. 19 Ke ödrin e vesákong me hic hnyi hnyimakö Iehova, me hmetu, me o hnyi hnyabadrin hnyi Rama: ke Elekana ame khandö Hana a áíân, me Iehova ame únykúme káu. 20 Ke a hwadá thö úen me ame erkin dut Hana, me e ame hnökoá da, me hwenyi ien Samuela, ame ha, ka habe, anyin oge sumátá ga Iehova. 21 Ke ame he at, jia Elekana me anyin lap hia he ka hudo kö Iehova hut helá hnyi je huna, me anyin khöbi. 22 Ke a ca hnyi he bi Hana: anyin a e ame ha ka áíân, ka habe, Me hnebaiö but wanakat, me oge me he ka hom e me me manen hnyi hnyimakö Iehova, me laba balua but eling. 23 Haba Elekana a áíân ame ha káu, ka habe, ányá thö so köu; laba ju ke ne o but u me hnebaiö e; ke so e he Iehova ka ohmä hwan hofuc. Me ame laba momo, me asen nokon ke ne o but e ame hnebaiö. 24 Ka hia but hnebaiö e, e ame hom e me je bolok minya a kun, ke khaca efa falawa, me tap waina, me hom e ka hnyi uma umö Iehova hnyi Silo: ke tiga úhnyúkong wanakat. 25 Ke ödrin e hlingá bolok, me hom wanakat kö Eli. 26 Ke haingen momo, ka habe, Than lö, u möt tuhök, he inya ang momo waleji at ame tot unyám eang me hic kö Iehova. 27 Oge sumátá wanakat ang; ke Iehova ame ham könya hnök hna sumátá gan: 28 Anyin a wale oge hia but hna minya e kö Iehova; adre hna kö Iehova hnyi ta je bonginy hia anyin möt. Me e ame khudrung kö Iehova eling.

HNHYIMAKAN 2.

- K**E haba Hana ame hic me ba, ka habe,
Ame senyin hnyekuk ga Iehova,
Ame ogöranyâ anyik faoiny meno unyi
Iehova ;
Adre ogânâ hnyimök hon je iwahnai-
hmiony mönya ;
Anyin a oge hobâ ühömeli ünyi gam.
- 2 E ba at ae kap helâ me Iehova ;
Anyin ae ba at bi ke hake thibi u
Ke ba kic helâ me Khonguta.
- 3 Ca he hmetu bi ka ha hofuc ae bi gan ;
Ke so ame ca gâ hofuc bi gan ünyi hnyi
je hnyimöbun ;
Anyin a Iehova, me e Khongon metâ,
Ke e ame tuluto je hna ânyâ.
- 4 A hmetru thö je cafana anyin tavat ae
hwege,
Ke adre oweikâ tavat ame haü ge tang
hwege.
- 5 Haba tavat ae sekoni me ödrin e hn'
ödrin bi he ka huliwa hnân jeü ;
Ke ame menâ but tavat ae mekihnâ-
nem ;
Ke ame hnokoâ seven hnen at ae
tounyi ;
Ke ame sēnyin dut at ae hu lakon
ae se.
- 6 Iehova ame hlingâ, ke e ame omelö :
E ame hagutâ hedis ai me ogöranyâ
hmeto.
- 7 Iehova ame otheduocâ, me otreu omjeuâ :
E ame kot hnyikânâi, me ogöranyâ.
- 8 E ame ogöranyâ at ae theduoc ünyi
hnyi sesâ,
Me ogöranyâ at ae ba ta ünyi hnyi hna
digic thatünyi,
He ka tha olab' ödrin me je than,
Me tabâ theron ae hmanenang :
Anyin a e unyi Iehova je hmolominy
hmeledrany,
Ke e ame otilâ hmeledrany hon e.
- 9 E ame he ka tuö je li can tavat ae kap,
Ke e ame he ka ohnyibö hnyat ae ca
wisa hnyi menekholom ;
Anyin ame ca he at ka ton ünyi ge
tang hwegien.
- 10 Adre me he ka camamá tavat adre me
vat me Iehova ;
E ame he ka kunâ hendreng ködra
üheny hnyi drany :
Ame he Iehova ka owisa je can hmele-
drany ;
Ke e ame he ka ham tang hwege ka
than a aten,

Me ogöranyâ faoiny meno anyin at e
ame osüâ.

11 Me haba Elekana ame he Rama ai ka
hnyi hnyaban. Me wanakat ame bi athnya-
ba Iehova hnyi hnyimakö Eli at bihut.

12 Ke haba li laku Eli me li laku Relial ;
ke ca khan' ödru Iehova. 13 Ke haba
hwakecin tavat bihut ka tavat, hnyi üen
ame he at ka hudo hut, me haba athnya-
bainy at bihut ame o, k' ame tiga ölä utiö,
ke eü hnyi hnyamen bälet a kun ta vheiny ;
14 ke e ame seü hnyin öt, ame ne ketel,
ame ne ot ae gan, ame ne kaia ; me haba
ünyi hia ame kât at bihut ge bälet me wale
hnân hobi kâu. Ke ödrin e ânyâ helâe
hnyi Silo ka at Isaraela hia adre me he kâ
e. 15 Eke, ödrin e tiga ca le pipikhenya,
me ame he athnyabainy at bihut me ha ka
at ae tren hut, ka habe, Hö jem utiö
m' adre me le hobi kâu at bihut ; anyin a e
ame ca he ka kap gam utiö ae mesök, ke so
thibi ünyi ae hât. 16 Ke ame ne thu kâu
hnen at, ka habe, ödrin e he eäu ka le pipi-
khenya, me waleing e khandu u he ka hom
hoton wem bi ; awe, e ame he ka ha, ka
habe, Ohe, ke u me he ka ham walang ang :
k' ame ne ba me oge me he ka hügünâ e.
17 Ke e ti gan ükonginy li hidröu hnyi
hnyimakö Iehova ; me haba tavat adre me
hükötiâ bwihlany kö Iehova.

18 Ke Samuela ame bi athnyaba hnyi
hnyimakö Iehova, ke e tiga wanakat, k' ame
weikâ iefoda lino. 19 Ka hinyen ame
tibet ükhaü ae ühnyükong hobi kâu me
hom kâu hnyi ke huna me ke huna, hnyi
üen e ame tha he me äiân he ka bi hut
hnyi je huna. 20 Ke haba Eli ame hahna-
hici Elekana me äiân, me e ame ha, ka
habe, E so Iehova ame ham köu wan ünyi
ge momo eang, can bwihlany e ame me ham
kö Iehova. Ke ödru me he hmetu ka
hnyi hnyabadru. 21 Ke haba Iehova ame
senö Hana, me e ame erkin, me hu lakon a
kun ta da me lo li in. Ke ame gan tot
wanakat jia Samuela hnyi hnyimakö
Iehova.

22 Ke haba Eli, me, ti hingat ut ; ke e
ame löng ta je ünyi hia a ânyâ li lakon ka
at Isaraela hia, me hnödrü hna tha mokut
me je momo adre hnyi huliwa hnyi hwanu-
men uma ükhacaköu. 23 Me e ame ha
ködru, ka habe, Ieü gabu öbu me ânyâ je
ünyi helâe? anyin oge löng ünyi ge tavat
hia eang hwakecibu ae kong. 24 Ohe,
lakuk ; e ca so üthümetu oge löng : öbu me
omono tavat anyi Iehova. 25 Ame ne

kong ke at ka ke at, Khong ame he ka owisa kâu : ke ame ne kong at kö Iehova ie at ame he ka khöü hobi kâu ? Ke so bi ödru me ca long hofuc hwan kamödrü, anyin ae be he Iehova ka hling'ödru. 26 Ke ame gan tot wanakat Samuela, ke ame betenge gan Iehova, me tavat minya

27 Ke ame o ke aten Khong kö Eli, me ha kâu, ka habe, Walang hofuc ho Iehova, ka habe, Hawa, oge manen dut ka lap anyin lakâmâm, ke tiga ödrin bi Aigupito, hnyi hnyaba Farao ? 28 Me oge úca e únyi hnyi je tribu hia anyin at Isaraela me me at bihut könya, he ka hudo hon taben hut könya, he ka leú ütö ae bo so, he ka khavá iefoda hnyi hnyimakök ? ke hawa, oge ham ka lap anyin lakâmâm ta je hut a an hnen meic únyi ge lakon Isaraela ? 29 Anyin a wale can ieu öbun e uto hut me bwihlany könya, wale oge huna ka hnyi hnyabak ; me oganá lakom huk he ka opipikenyai öbun ge je hut hia ae únyi hnathu anyin at Isaraela a lakeik ? 30 Anyin a wale ame ha Iehova Khongon at Isaraela, ka habe, Oge ha a g' ame he ányâm lap me lap anyin lakâmâm ka he hnyi hnyimakök nyiele balua : ke walang ang haingö Iehova, Hükötianök ; anyin oge me he ka ogan' ödrin hnyat ödrin e oganö nya, ke oge me he ka hmebma gadrin hnyat ödrin e hükötio nya. 31 Wá bi, ame he ka o ta je bong, me oge me he ka subá benyâm, me benyin lakâmâm, me me ha hingatiny ányâm lap. 32 Ke u me he ka wá hna okongoá hnyi hnyabak, hnyi ta je omjeú hia Khong ame he ka ham ka at Isaraela : ke ame he ka ha hingatiny ányâm lap nyiele balua. 33 Ke haba atâm oge me ca he ka subá degecá únyi hnyi anyik taben hut, ame he ka hnán odilá li emákâm me otengiá hnyekom : ke haba je wan hia thithö ányâm lap, me adre me he ka mok k' ödra tiga hmai. 34 Ke walang haten köu, a únyi ame he ka o ka li lakom, jia Hofeni me Fineasa ; ödru me he ka tha mok hnyi bong a khaca. 35 Ke oge me he ka oá hobi könya ke at bihut ae hnathu, me e ame he ka ányá hoton hnyekom me oúnykúmânök : ke oge me he ka otílá hobi kâu lap ae tethmá : ke e ame he ka bi hanymen hnyi hnyimakan hnyat oge me hú nyiele balua. 36 Ke haba je kolon hnyi ányâm lap, me adre me he ka o kâu me nom kâu hnán ong sileva, me ujeú, me ha, ka habe, Ö u ha hanymök a hanymen at bihut, m' inye hnyi han ong jeú.

KE haba Samuela a da ame athnyabai Iehova hnyi hnyimakö Eli. Ke ca khenen hofuc ho Iehova hnyi je úen eling ; ke ba hna omanená ame o. 2 Ke hnyi úen eling k' ame mokut Eli hnyi hnen, (ke hadedak ut li emakan, ke ca khana bi bwele,) 3 ke tiga ca mok lamepa anyin Khong, ke Samuela ame mokut hnyi uma umö Iehova wale hnen tangen Khong ; 4 me waleling haba Iehova ame hawo Samuela : ke haingen, ka habe, Inya ang. 5 Me e ame wadring kö Eli, me ha, ka habe, Inya ang ; anyin a u je hawo nya. Me haingen, ka habe, Oge ca hawo u ; he hmetu thö ka mokut. Me e ame he me mokut. 6 Ke haba Iehova ame hongot hmetu, ka habe, Samuela lö. Me Samuela ame todrö me he kö Eli, me ha, ka habe, Inya ang ; anyin a u je hawo nya. Me haingen, ka habe, Oge ca hawo u nökek ; he hmetu thö ka mokut. 7 Ke tiga ca khañö Iehova bi ga Samuela, k' adre tiga ca hia but omanená kâu hofuc ho Iehova. 8 Ke haba Iehova ame okun hmetu hawo Samuela. Me e ame todrö me he kö Eli, me ha, ka habe, Inya ang ; anyin a u je hawo nya. Me Eli ame wáhmakhmeto a Iehova ame hawá wanakat. 9 Anyin a wale ame ha Eli kö Samuela, ka habe, He thö ka mokut, ke ame ne he ka hawo u, me u me he ka ha, ka habe, Iehova lö, ha thö, anyin a löng ut athnyabaem. Haba Samuela ame he me mokut hnyi hnen. 10 Ke ame o but Iehova, me tot, me hongot helá me eja, ka habe, Samuela, Samuela lö. Ke haingö Samuela, ka habe, Ha thö, anyin a löng ut athnyabaem. 11 Haba Iehova ame ha kö Samuela, ka habe, Wá bi, oge me he ka ányá ke únyi hnyi Isaraela, ke ame he ka mea hnyi li hnyikönyen tavat hia adre me löng. 12 Hnyi bong eling oge me he ka ányá kö Eli ta je únyi hia wale oge hia but ha ge anyin lap, hwán hnyi can, ke ne o but obiny. 13 Ke oge hia but ha kâu a oge me he ka owisa anyin lap nyiele balua, can monu e ame wá, anyin a lakon ödru me oá hnaúhangö ködru bi, ke e ame ca thaw ödru. 14 Anyin a wale oge hia but khemanyin ka lap anyi Eli, a oge me ca he ka ohia hulöiny lap anyi Eli ge hut me bwihlany nyiele balua. 15 Ke Samuela ame mokut ke ne o but ame lany, me khöng ut je hwanumen uma umö Iehova. Ke Samuela ame ot he ka thume-

I. SAMUELA 4.

tu Eli ge hna omanená. 16 Ke haba Eli ame hawo Samuela, me ha, ka habe, Samuela, nöökuk. Haingen, ka habe, Inya ang. 17 Ke haingen, ka habe, Ieü únyi adre hia but ha köu? Ö u ca he ka ikhálâ gak: e so ame he khong ka ányá helâe köu, me bi hanen u je ne ikhálâ ke únyi wale a ha köu. 18 Ke Samuela ame thumeto ge ta je únyi hia, ke ame ca ikhálâ gan khaca. Ke haingen, ka habe, E bi Iehova, hamen he ka ányá únyi ae so hnyi hnyimakan. 19 Ke ame gan tot Samuela, ke tha Iehova mē, ke e ame ca hna he ka kölu ka hnyi kânâ khaca hnyi hwan je hofuc. 20 Ke e khana but at Isaraela hia thithö hwân Dana ke ne o but Bere-seba a g' adre otílö Samuela thö me perofeta anyi Iehova. 21 Ke Iehova ame manen hmetu hnyi Silo: anyin a Iehova ame omanená e bi kö Samuela hnyi Silo únyi hnyi hofuc ho Iehova.

HNYIMAKAN 4.

KE ame o thö hofuc ho Samuela ka at Isaraela hia.

Me ame he at Isaraela he ka vat me at Filisiti, me adre me hunuma hnyi Eben-eza: ke ame hunuma at Filisiti hnyi Afeka. 2 Me at Filisiti adre me tot metâ ka at Isaraela: ke adre me hwân vat, ke Isaraela ame ngâ ge at Filisiti: ke adre me hlingâ tavat va a helâ me foa thauzan. 3 Ke ame o tavat ka hnyi hna hunuma, me haba wahingatiny at Isaraela ödrin e ha ka habe, Can ieü Iehova ame kuc öta hnyi hnyimakan at Filisiti hnyi bong ang? E so ate me hom úheny Silo tangen úhinhinköu, me me e bi unyita, me omeli öta únyi ge je iwahnaihmiöny möta. 4 Me ame úkhünöng tavat Silo ai he ka hom úheny e tangen úhinhinköu anyi Iehova tuhan sabaoth, at ame laba wanben li kerubi: ke li laku Eli eling, jia Hofeni me Fineasa, unyin tangen úhinhinköu anyin Khong. 5 Ke adre me hom tangen úhinhinköu anyi Iehova ka hnyi hna hunuma me ame kuku gan hmâ at Isaraela hia me ame umet hnye. 6 Ke a löng ut at Filisiti medien kuku, me haingödra, ka habe, Ieü hwan kuku ae gan hnyi lap anyin at Heberu? Me adre me wâhmakhmetoâ a g' ame o thö tang tangö Iehova hnyi hna hunuma. 7 Ke haba at Filisiti adre me ot, ke adre me ha, ka habe, A o thö Khong ka hnyi hna hunuma. Ke haingödra, ka habe, Ekölö

gata! E ba únyi a helâe ehac. 8 Ekölö gata! ia ame he ka hügün' öta únyi hnyi je hnyamen ta je khong eling ae hwege? wale ta je khong eji hnyat a kot at Aigupito ge ke je mok ae cap hnyi hnyeubaba. 9 E, öbun at Filisiti lö, hwege th' öbun, hnyok бага thö, wâ adre nye thalu' öbun ge at Heberu, helâ me hnöbun hna thalu' ödrin: hnyok bagâ th' öbun, me vat. 10 Me haba at Filisiti adre me vat bi, ke ame ngâ but at Isaraela, me adre me ve kec ka hnyi umödra je uma mano: ke ti gan hmâ hna hling' ödra; anyin ameta but thöte thauzan at Isaraela tavat he hon kânâ. 11 Ke adre hügünâ tang tangen Khong; ke adre hlingâ li laku Eli, jia Hofeni me Fineasa. 12 Ke ame wadring ke at Beniamina úheny hnyi hna vat, me o hnyi Silo hnyi bong eling, ke khekhe but anyin úkhaú, ke e hu kânâ hon ban. 13 Ke e ame o but, me wâ bi Eli ame laba hon taben tap eü hnyi gethen ame selâdrâ: anyin ae öbubuny hnyekon can tang tangen Khong. Ke o but at hnyi taun, me úthumetu, me ame útengiö taun hia. 14 Ke a löng Eli hwan útengiö, me e ame hnö, ka habe, Ieü imedien úmonumouny eling? Me ame ie he at, me thumetu Eli. 15 Ke nainte eit ut je hunai Eli; ke wadröu but li emakan, ke ca khana bwele. 16 Ke haingen at kö Eli, ka habe, Iny' at úhek hnyi vat, ke oge kec eja jem únyi hnyi hna vat. Ke haingen, ka habe, Nökuk, ieü bongon? 17 Me ame thu at hom úthumetu, ka habe, a kec dö at Isaraela ge at Filisiti, ke e gan hmâ hna hlingâ unyin tavat, ke a mok minya thö lakom, jia Hofeni me Fineasa, ke adre hia thö hügünâ tang tangen Khong. 18 Ke hnyi úen e ame háiâ tang tangen Khong, me e ame ta me hnyimen göranyai únyi hnyi taben tap hnyi baten homagöule, me ame hmetru but nyin me mokcu; anyin ae hingat ut me hmak. Ke e ame hia but owisa ka at Isaraela fáte je huna. 19 Ke haba úngon a öiö Fineasa, e erkin ame ne úen he ka o, ke e a löng ut úthumetu a g' adre hia thö hügünâ tang tangen Khong, ke a mokcu úngon me áiân, me e ame iyáú he ka hno-koá, anyin ame o káu vec hnyekon. 20 Ke hnyi úen anyin mok ame ha káu je momo adre tha e mē, ka habe, Ca he ka ot, anyin a u je hia but hnokoá da. Ke e ame ca thu bi, ke ame ca löng minya bi. 21 Ke e ame hwenyi ien wanakat Ikaboda, haingen, ka habe, A hia but hmanenang unyin at

I. SAMUELA 5, 6.

Isaraela: anyin adre hùgúnâ thö tang tangen Khong, me únyi ge úngon me àiân. 22 Ke e ame ha, ka habe, A hia thö hmanenang anyin at Isaraela; anyin adre hùgúnâ thö tang tangen Khong.

HNYIMAKAN 5.

WALELING a hom tang tangen Khong hnen at Filisiti, ke adre me hom e Asedoda ai úheny Eben-eza. 2 Ke at Filisiti adre me hom tang tangen Khong me vaden ka hnyi uma umö Dagona, me ip e unyi Dagona. 3 Ke a todrö at Asedoda hnyi hnyomakatu, me wâ bi, ame ta but Dagona hnyikânâi cicö tang tangö Iehova. Me ödrin e köp Dagona me otilà hmetu hnyi hnen. 4 Ke ödrin e tot hmetu nyi hnyomakatu, me wâ bi, a ta but hnyikânâi Dagona cicö tang tangö Iehova; ke haba bö Dagona, me li hnyamen ame mokut hnyi hwanuma a mou but, ke e bi unyi Dagona thiju. 5 Anyin a wale adre me ca uto hwanumen umö Dagona e Asedoda ke ne o but hnyi bong at, wale ge tavat bihut kö Dagona, me tavat minya adre me dit ka hnyi umö Dagona.

6 Ke hmak ut hnyamö Iehova hon at Asedoda, me eame ohi'ödrin me kuc ödrin je je okuc, wale hnyi Asedoda me je hnyigöulen. 7 Ke a wâ but e at Asedoda, me ödrin e ha, ka habe, Ame ca he bi tang tangen Khongon at Isaraela ka hnen unyitin, anyin ae hwege hnyamen hutin, me hon khongutin a Dagona. 8 Me ödrin e úkhünöng he ka úkhacaköuâ nödrin je thaniny at Filisiti hia, me ödrin e ha, ka habe, Ötin e he ka hawa ka tang tangen Khongon at Isaraela? Me ödrin e thu, ka habe, E so adre me hom tilâ tang tangen Khongon at Isaraela Gatha ai. Me ödrin e hom tilâ tang tangen Khongon at Isaraela. 9 Ke ödrin e hia but hom tilâ e, me haba hnyamö Iehova. ame iwahnaihmiöny me taun k' ame ti okongoâ: me ame kot obagainy taun a tavat ae úhnyúkong me tavat ae gan, k' ame tab' ödrin ohuc. 10 Me ödrin e úkhünöng me tang tangen Khong Ekerona ai. Ke ame o but tang tangen Khong hnyi Ekerona, me haba at Ekerona ödrin e kuku me ha, ka habe, Ödrin e hom kötin tang tangen Khongon at Isaraela, me me hling' ötin me itin hnye. 11 Me ödrin e úkhünöng he ka úkhacaköuâ je thaniny hia at Filisiti, me ha, ka habe, Kunâ but tang tangen Khongon at Isaraela me me

hmetu ka hnyi hnen, me me ca hling' öhmun me ihmun hnye: anyin ae gan hmâ hna okongoâ hnân meking hnyi taun hia; e hmak gan hmâ eling hnyamen Khong. 12 Ke haba tavat a ca mokcu, a tab' ödra ohuc: ke ame he thö hnyi dranyai hwan utengien taun.

HNYIMAKAN 6.

KE e bi tang tangö Iehova hnyi hnyeiny at Filisiti seven je tebi. 2 Haba at Filisiti ödrin e hawâ tavat bihut me tavat bi khong, me ha ködrin, ka habe, Öhmun e he ka hawa ka tang tangö Iehova? bethe omanenâ thö köhmun dok öhmun e he ka kunâ e ka hnyin. 3 Me haingödrin, ka habe, Öbun e ne he ka kunâ tang tangen Khongon at Isaraela, ca kunâ bi ke ba únyi; ke so bi öbun e he ka hom kâu hudiny hulö: m' öbun e menyik ut, me ame he ka khañ' öbun can hna ca hom hnyamen únyi gabun. 4 Ke haingödrin, ka habe, Ieú hudiny hulö öhmun e he ka hom kâu? Haingödrin, ka habe, Thabúng ta ohuc gol, me thabúng ta tep gol, oúco je thaniny at Filisiti: anyin a khaca thibi anyibun mok hia me je tuhöbun. 5 Anyin a wale öbun e he ka theatâ anyibun je ohuc, me halebun je tep, hnyat okongoâ hnye; ke öbun e he bi ka ogânâ Khongon at Isaraela; me ame ne he ka ohâhâ hnyamen hubun, me hon je khongubun me ibun hnye. 6 Ke anyin a ieú öbun e ohwegiâ je hnyekubun, helâ me at Aigupito me Farao ödrin e ohwegiâ je hnyekudrin? ke e a hia but huliwa hnân láia unyidrin, me hawa, ödrin e ca hna but tavat, me ödrin e he but? 7 Awe, e so öbun e hom me penapena ke kat ae teb únyi, me hom li kau a li sangadra, ke adre tiga ca ip hudru únyi hnân úhúkáláköuâ, me ohmâ li kau ka hnyi kat, me hom únyi gadru li nokon ka hnyi hnyaba: 8 ke hom dö tang tangö Iehova, me ip hon kat; ke hitangen ju je omjeú gol wale öbun e he ka hom kâu hnân hudiny hulö hnyi ong tang me tha ip mē; me kunâ e me me he but. 9 Ke wâhmakhmeto ju ame ne he ka gethen hnyi hing hnyigöulen, Bethesemes ai, awe, e ame hia but ányâ kötin ta je hna okongo eang ae gan: ke ame ne ca helae, awe, ame he ka khañ' öta a ga ca kuc ötin ge hnyamen; ke ame ka o baú bi kötin. 10 Me ame ányâ helâe tavat; me ödrin e hom li kau a li sangadra, me ohm' ödrü ka hnyi

kat, me hlöng hwanumödru hnyi hnyaba :
 11 ke ödrin e ip tang tangö Iehova hon
 kat, me ong tang me je tep gol me je hna-
 theatä anyidrin je ohuc. 12 Ke ame he
 wisa eü hnyi gethen li kau hnyi gethen
 üheny Bethe-theses ; k' ame vheno hna cit
 gethen, ke ame kuku tot, ke ame ca saü ka
 hnyi ke keihen metä me me ; ke haba je
 than Filisiti ödrin e he hotudru ke ne o but
 hnyi hnyigöulen Bethe-theses. 13 Ke haba
 at Bethe-theses, ödrin e subä anyidrin hwit
 eü hnyi hnyigöulen bucen : ke ödrin e bwele
 me wä tang, me ödrin e senyin he ka wä.
 14 Ke ame o thö kat hnyi utkänä i Josua
 at Bethe-theses, me ame todru eling hnyi
 veto ae gan : me ödrin e kia utöiny kat me
 hudo li kau hnän hudiny leü kö Iehova.
 15 Ke haba at Levi ödrin e hom tang
 tangö Iehova, me ong tang unyin, a tangen
 je omjeü gol, me ip hon veto ae gan : ke
 haba at Bethe-theses ödrin e hudo je hudiny
 leü me hudo je hut kö Iehova hnyi bong
 eling. 16 Ke a wä e je than Filisiti a tha-
 büng, me ödrin e hmetu Ekerona ai hnyi
 bong eling.

17 Ke walang je ohuc gol a ham at
 Filisiti hnän hudiny hulö kö Iehova ; khaca
 ünyi ge Asedoda, khaca ünyi ge Gaza, khaca
 ünyi ge Asekelona, khaca ünyi ge Gatha,
 khaca ünyi ge Ekerona ; 18 me je tep gol
 ocoo je tauniny at Filisiti hia anyin je than
 a thabüng, a je taun adre up baginy, me je
 taun ae ühnyükong hnyi ta hnye : ke ne o
 but hnyi veto ae gan wale ödrin e ip tang
 tangö Iehova hnyi hon, ka eling ke ne o
 but hnyi bong ang hnyi utkänä i Josua at
 Bethe-theses. 19 Ke e ame kot tawat hnyi
 Bethe-theses, can ödrin e selädrä hnyin tang
 tangö Iehova, e ame kot tawat a sevente,
 me fite thauzan tawat : me ame tenge
 tawat anyin a Iehova ame kot tawat, ke e
 gan hmä hna hling' ödrin. 20 Me ame ha
 at Bethe-theses, ka habe, Ie at ae khana he
 ka töt hnyi hnyimakö Iehova, Khong ae
 kapeang ? Ke e ame he ka ölö kö ia gatin ?
 21 Me ödrin e kunä je üthümetu ka tawat
 adre me laba hnyi Kiriatha-jarim, ka habe,
 Haba at Filisiti ödrin e hia but hom hmetu
 jem tang tangö Iehova ; ok ut öbun ka hom
 e köbun.

HNHYIMAKAN 7.

ME ame he at Kiriatha-jarim, me hom
 tang tangö Iehova, me hom e ka
 hnyi uma umö Abinadab hnyi dok ae hut,

me okabi Eleazara a nokon he ka tuö tang
 tangö Iehova.

2 Ke adre ip kuenyâ tang hnyi Kiriatha-
 jarim ; wale tuente je huna : ke ame tenge
 hotu Iehova lap anyin at Isaraela hia. 3 Ke
 Samuela ame ha ka lap anyin at Isaraela
 hia, ka habe, Öbun e ne hmetu kö Iehova
 me hnyekubun a khaca, awe, degec ut je
 khong kanyua me Aseira unyibun, me
 penapena je hnyekubun kö Iehova, me bi
 athnyaba thibi käu : ke e ame he ka omeli
 öbun ünyi hnyi hnyamen at Filisiti. 4
 Me haba lakon Isaraela ödrin e degec je
 Baala me Aseira, me bi athnyaba thibi kö
 Iehova.

5 Haba Samuela ame ha, ka habe, Ükha-
 caköüä thö at Isaraela hia hnyi Mizepa, ke
 oge me he ka hic hobi köbun kö Iehova.
 6 Me ödrin e ükhacaköu hnyi Mizepa, me
 seköü, me hingälä hnyi hnyimakö Iehova,
 me ca han hnyi bong eling, me ha eling, ka
 habe, Öhmun e hia but änyä hulö kö Iehova.
 Ke Samuela ame owisa ka lakon Isaraela
 hnyi Mizepa. 7 Ke a löng ut at Filisiti a
 g' ame ükhacaköu lakon Isaraela hnyi
 Mizepa, me ame he je thaniny at Filisiti ka
 tot ka at Isaraela. Ke a löng ut at Isaraela
 me ödrin e outen at Filisiti. 8 Ke haba
 lakon Isaraela adre me ha kö Samuela, ka
 habe, U me ca he ka menä khöü' öhmun kö
 Iehova Khongutin, me me omeli öta ünyi
 ge at Filisiti. 9 Haba Samuela ame hom
 ke nokon mamoe ame tiga i, me hudo hnän
 hudiny leü ae bekhöt kö Iehova : me Sa-
 muela ame tengiä at Isaraela kö Iehova :
 me Iehova ame löng. 10 Ke Samuela ame
 hudo hudiny leü, me haba at Filisiti adre
 ma hakekenyâ he ka vat me at Isaraela :
 ke Iehova ame bi hwan than ae gan hnyi
 bong e hon at Filisiti me ohmöiöngi ödra ;
 me Isaraela ame kuc ödra. 11 K' ame he
 at Isaraela üheny Mizepa me hnu at Filisiti,
 me kuc ödra ke ne o but hmeli Bethe-ka.
 12 Ke Samuela ame hom ke veto, me otilä
 wanben Mizepa me Seni, me hwenyi ien
 Eben-eza, haingen, ka habe, Iehova ame
 hadru' öta ke ne o but eang. 13 Ke adre
 me hom ühnyükongo at Filisiti, me adre
 me ca he hmetu bi ka hnyi hnyigöulen at
 Isaraela : ke iwahnaihmiöny hnyamö Ieho-
 va ka at Filisiti hnyi ta je bong bongu
 Samuela. 14 Ke adre ham hmetu ka at
 Isaraela je taun waleji a hügnä at Filisiti
 ünyi ge at Isaraela, hwän hnyi Ekerona, ke
 ne o but Gatha ; ke haba at Isaraela adre
 me hügnä hmeto je hnyigöulen ge at

Filisiti. Ke úsokou but at Isaraela me at Amora. 15 Ke Samuela ame owisa ka at Isaraela hnyi ta je bonginy anyin möt. 16 Ke e ame labö vheno gaga Beth-ela, me Gilegala, me Mizepa, hnyi ke huna me ke huna; me e ame owisa ka at Isaraela hnyi ta je dok hia eling. 17 Ke e ame labö hmetu Rama ai, anyin a waleling umen uma; ke e ame owisa eling ka at Isaraela: ke e ame otílá eling ke taben hut kö Iehova.

HNYIMAKAN 8.

KE hingat ut Samuela me e ame otílá li lakon he ka owisa ka at Isaraela. 2 Joela ien nokon a atö, ke Abia ien loiny, li at owisa hnyi Bere-seba. 3 Ke haba li lakon ödrü me ca vheno deny gethen, ke ödrü me saú ka omjeú me khöp hwaban, me ohwalö hna owisa.

4 Ke ame úkhacakou je hingatiny at Isaraela hia me o kö Samuela hnyi Rama: 5 me ödrin e ha káu, ka habe, Wá bi, u hingat ut, ke ame ca vheno dem gethen li lakom: ke walang ang u me he ka otílá thanilmun he ka owisa köhmün helá me je hnyeí hia. 6 Ke e kong kö Samuela huödrin hna ha, ka habe, Ham dö köhmün than he ka owisa köhmün. Ke Samuela ame hic dö kö Iehova. 7 Ke Iehova ame ha kö Samuela, ka habe, Löng ju hofuc hwan tavat, wale adre me ha hia köu: anyin a ödrin e ca hna degeci u, ke ödrin e hna degeci nya bi, me inye ca thanidrin. 8 Helá me hnödra hna ányá hia, hwán hnyi bong waleji oge hum ödra hnyin úheny Aigupito ke ne o but hnyi bong ang, ke adre me digic nya me bi athnyaba ka ke je khöng, me ödrin e ányá minya e köu. 9 Ke löng ju walang ang hwodrin: ke so bi, u me he ka ha hwegiá ködra me thumetu ödra ge bongon than ame he ka musi ödra.

10 Ke Samuela ame ha ta je hofuc ho Iehova hia ka tavat ödrin e sumató than unyin. 11 Ke e ame ha, ka habe, Walang bongon than ame he ka musi öbun: e ame he ka hom lakubun obaga, me otíl' ödrin hobi káu anyin je kariota, me anyin tavat tabö hors; ke ödrin e he ka wadring hnyi hnyimakan anyin je kariota; 12 ke e ame he ka otíl' ödrin hobi káu je taben thauzan, me je taben je fite; me he ka wia kánáin káná, me subá anyin hwit, me he ka tibet anyin je únyi hnán vat, me je únyi hōbi

káu anyin je kariota. 13 Ke e ame he ka hom lakubun je hlu hnán úhaniken ta je únyi ae hnebwia, me bi han, me beka. 14 Ke e ame he ka hom je ibun, me je hnyeí vine, me je hnyeí elaió únyi gabun me ham ka lathnyabainy. 15 Ke e ame he ka hom ke keihen a libenyitainy hatungubun je hatong, me ibun je hnyeí vine, me ham bi ka je taben unyin me lathnyabainy. 16 Ke e ame he ka hom lathnyabaibun obaga me omomo, me je hidróu gabun ae so, me halebun je asina, me kun' ödrin bi ka hnyi anyin huliwa. 17 E ame he ka hom ke keihen a libenyitainy halebun je mamoe: ke öbun e he ka bi athnyabainy. 18 Ke öbun e he ka tenge hnyi bong eling can tuhöbun at öbun e he ka úca; k' ame ca he bi Iehova ka thu köbun hnyi bong eling. 19 Ke so bi haba tavat adre me höcö löng hofuc ho Samuela; ke haingödra, ka habe, Obe, öhmün e he ka hu tuhöhmün; 20 m' öhmün e he ka helá me je hnyeí hia; k' ame he tuhöhmün ka owisa köhmün, me hnyimakan anyihmun bunyen, me vat hobi köhmün. 21 Haba Samuela ame löng ta je hofuc hia hwan tavat, me e ame ha kö Iehova. 22 Ke haba Iehova ame ha kö Samuela, ka habe, Löng ju hodra, me otílá tuhödra. Me Samuela ame ha ka at Isaraela, ka habe, Vese but öbun ka hnyi anyibun je taun.

HNYIMAKAN 9.

HABA e hu ke at Beniamina, Kiso ien, nöku Abiela, nöku Zero, nöku Bekorath, nöku Afia, a nokon ke at Beniamina, at ae únyi hnathu hmönyin. 2 Ke e hu nokon бага, Saulo ien, hidróu ae hmanenang; ke ba at unyin lakon Isaraela ae so hon: ke haba úbeúen e hon tavat hia, me bongödra hnyi li abenyin. 3 Ke a hia je asina hale Kiso kamö Saulo. Me haba Kiso ame ha kö Saulo a nokon, ka habe, Bethe hawá ke athnyaba me todrö me he thö ka elám je asina. 4 Ke e ame vheno hnyeí ae hut hnyi Eferaima, me vheno hnyeí Salisa k' ame ca ö' drin; ke ödrü me vheno hnyeí Salim, ke hia bala bi eling: ke ödrü me vheno hnyeí Beniamina, ke ödrü me ca wá bala bi. 5 Ke ödrü me o but hnyi hnyeí Zuf, me Saulo ame ha ka athnyaba unyin, ka habe, Ötu me he ka hmetu, wá e nye ca únykúme hmetu bi cica ge asina, ke hmak biju hnyekon gatü. 6 Ke haingen káu, ka habe, Wá bi, e hu

I. SAMUELA 10.

ke aten Khong hnyi taun eang, at ae lung so; ame hwadâ hia hnen je hna ha : ötu le kâ e; ame ne he ka omanenâ kötu la ge hnötu hna vheno. 7 Ke haingö Saulo ka athnyabainy, ka habe, Ke wâ bi, öte ne he, me ötu me he ka hok ieu ka at? anyin a um dö anyitu je areto hnyi tangen, ke ba ke bwihlany he ka hom ka aten Khong : ieu honötu? 8 Me ame thu hmetu athnyaba kö Saulo, ka habe, Wâ bi, e hu gak ke keihen a vakiny sekel sileva : oge me he ka ham e ka aten Khong he ka omanenâ kötu detu. 9 (Haba ehac hnyi Isaraela, e ka he at ka hnö unyin Khong, e ame ha, ka habe, Ötin e he ka he ka at ame wâ : anyin a haba perofeta walang ang, adre hwenyi ien ehac, ka habe, At ame Wâ.) 10 Me Saulo ame ha ka athnyabainy, ka habe, E so hofuc e; ötu he. Me ödru me he ka hnyi taun wale a e aten Khong hnyin. 11 Ödru me tiga öliâ hwatapköluiny taun, me ödru me wâ je hlu ödrin e he ka seköio, ke ödru me ha ködrin, ka habe, Hawa, e ang at ame wâ? 12 Me ödrin e thu ködrin, ka habe, e, wâ bi hnyi hnyimâkam : hele th' öbu, anyin a o thö eja hnyi taun; anyin ae hu but anyin tavat eâu hnyi dok ae görany : 13 öbu ka o hnyi taun öbu me he ka wâ, ke tiga ca ölö bi ka hnyi dok ae görany ka han : anyin ame ca he tavat ka han, k' ame tiga ca o, anyin a hamen he ka hmö hut; hwaban e, ame hnyi han tavat adre hawâ. Ke ölö th' öbu walang ang; anyin öbu me he ka wâ hnyi üen ang. 14 Me ödru me he ka hnyi taun; ke ödru me o hnyi hnyin taun, wâ bi Samuela ame he jem cici ödru, he ka öliâ dok ae görany.

15 Ke a hia but Iehova omanenâ kö Samuela et ke tiga ca o bi Saulo, ka habe, 16 haba nnyi hnyi üen helang, oge me he ka kunâ köu ke at ünyi hnyi hnye Beniamina, ke u me he ka hü e, me me taben lakeik at Isaraela, me e ame he ka omelö lakeik ünyi hnyi hnyamen at Filisiti : anyin a oge hia but wâ lakeik, k' ame o but könya anyidra mâng. 17 Ke Samuela ame ö Saulo me Iehova ame ha kâu, ka habe, Wâ bi at waleji oge ha köu! a at ame he ka musö lakeik. 18 Ke haba Saulo ame hakekeny Samuela hnyi homagoule, me ha, ka habe, Ö u kú thö könya uma umen at ame wâ. 19 Me Samuela ame thu kö Saulo, ka habe, Inya ang at ame wâ; böbu thö ka ölö ka hnyi dok ae görany, anyin a öbu me he ka tha han

mönya eâu : ke oge me he nyi ka kunö u, me omanenâ hnyekom. 20 Ke haba je asina wale a hia hnyi kun ta bong ca hmak bi hnyekom gadrin : anyin adre ö 'drin ju. Ke hobi kö ia ünyi adre weny hia hnyi Isaraela? Hawa, ca hobi köu bi, me lap hia anyin kâmâm? 21 Me Saulo ame thu, ka habe, Hawa, ca at Beniamina bi nya, wale ae ühnyükong hnyi je tribu hia anyin at Isaraela? ke ühnyükong hmönyin anyik lap hnyi je lap hia hnyi tribu Beniamina? ieu gam u me ha helâe könya? 22 Ke Samuela ame hum Saulo me athnyabainy, me hum ödru ka hnyi hnyeule, me olab' ödru hnyi li tap ae beönua unyin tavat adre hawâ, helâke thöte tavat. 23 Ke Samuela ame ha ka at ame bi han, ka habe, Hom but jem uthmeno waleji oge ham köu me ha köu, ka habe, Ip ju e. 24 Me haba at ame bi han ame hom but jevan, me ünyi hon e, me ip hnyi hnyimâkö Saulo. Ke haingö Samuela, ka habe, Wâ bi ünyi adre ip! ip ju hnyi hnyimâkam, am; anyin adre tuö e hnân hobi köu hwân hnyi üen adre thu, anyin oge me ha, ka habe, Oge me he ka hawâ tavat. Ke haba Saulo ame tha han me Samuela hnyi bong eling. 25 Ke ödrin e utut ka hnyi taun ünyi hnyi dok ae görany, me haba Samuela ame ühnenamö me Saulo hon uma. 26 Ke ödrin e vesâ kong : ke haba hnyi haolany, me Samuela ame hongot kö Saulo hon ban uma me ha, ka habe, Todrö, m' inye he ka kunö u. Me ame todrö Saulo, ke ödru me tha he hâang a e me Samuela. 27 Ke ödrin e tiga utut ka hnyi obiny taun, me haba Samuela ame ha kö Saulo, ka habe, Ha thö ka athnyabaem he ka mē ban (me e ame he), ke mē todru u, m' inye he ka omanenâ köu hofuc hwan Khong.

HNYIMAKAN 10.

ME wale Samuela ame hom tap wakaco me hingälâ hon ban, me ücimhnyimâk mē, me ha, ka habe, Hawa, ca anyin a Iehova ame hü u me hnân taben jekhon? 2 U ka he but eâu üheny ang unyik, u me he ka wâ li at hnyi hu Rakela hnyi hnyigöulö Beniamina hnyi Zeleza; ke ödru me he ka ha köu, ka habe, Adre wâ ju asina, wale u me elâm : ke wâ bi ame ca ünykûme hmetu je asina kâmâm, ke e hmak ut hnyekon gabu, ame ha, ka habe, Hawa la nökek? 3 Ke u me he ka he ühem e, me u je he ka o hnyi iwajo anyi

Tabora, me ame he ka úkhanö möu eling kun ta hnyat, ödrin e he Beth-ela ai ka Khong, ke at ame hom tilâ kun ta nokon got, ke ke at ame hom tilâ kun ta areto, ke ke at ame hom tilâ tap waina : 4 ke ödrin e he ka iouny möu, me ham köu lo li areto'; ke u me he ka kap gadrin. 5 Ke hwaban e, u me he ka o ka hnyi dok ae hut anyin Khong, wale lap tue anyin at Filisiti : ke u ka hia but o ka hnyi taun, u me he ka úkhanö me deö perofeta ödrin e utut úheny 'thö, ke e hnyi hnyimaködrin nabeli, me bwinybet, me utköwi, me kitara ; ke ödrin e he ka hnyi perofeta : 6 ke ame he ka o hwege hom hanu Iehova, me u me he ka tha perofeta mödrin, ke adre me he ka wiö u helâ me ke at bi. 7 Ke e ka át dö köu je haten eling, u me he ka ányâ hnâm hna wáhmakhmeto ; anyin a e unyâm Khong. 8 Ke bâm dö Gilegala ai, ke ama bilik ; ke wâ bi, oge me he ka utut köu he ka hudo je hudiny leú, me hudo je hudiny úsököu : seven je bong u me he ka hulubahingen ke ne o but oge me o köu, me omanená köu únyi u me he ka ányâ. 9 Ke e ame hwiö thö me he ga Samuela, me Khong ame ham kâu hnyekon ae ke hwakecin bi, ke ame hwadá thö je haten hia eling hnyi bong eling.

10 Ke ödru me o eling hnyi dok ae hut, me wâ bi, ame ukhanö mödru deö perofeta ; me ame o hwege hon hanon Khong, me e ame tha perofeta unyidrin. 11 Ke a wâ but tavat hia, a hnyat wáhmakhmeto e ehac, ke wâ bi e ame hnyi perofeta me je perofeta, me adre me úhaköuâ ka habe, Ieú e a o ka nöku Kiso ? Hawa, Saulo ame laba unyin je perofeta ? 12 Ke ame thu ke at a aten eling, ka habe, Ke ia kamödrin ? Anyin a wale, adre wejêâ, ka habe. Hawa, Saulo ame laba unyin je perofeta ? 13 Ke e ame um dö perofeta me he ka hnyi dok ae görany.

14 Ke haba ke kamö Saulo ame ha kâu me athnyabainy, ka habe, Úhebu ua ? Haingen, ka habe, Öhme elâm je asina : ke öhme wâ but ae hia bala me öhmu me he kö Samuela. 15 Me ame ha ke kamö Saulo, ka habe, Me omanená könya hofuc ho Samuela köbu. 16 Me Saulo ame ha ka ke kamen, ka habe, E ame ha manená köhmu a g' adre wâ ju je asina. Ke e ame ca omanená kâu ge dökhü, waleji a ha Samuela.

17 Ke Samuela ame úkacaköuâ tavat kö Iehova hnyi Mizepa ; 18 me e ame ha

ka lakon Isaraela, ka habe, Walang hofuc ho Iehova, Khongu Isaraela, ka habe, Oge me hom at Isaraela úheny Aigupito, me oge me omeli öbun únyi hnyi hnyamen at Aigupito, me únyi hnyi hnyamen je dökhü hia waleji a oveci öbun : 19 ke öbun e hia but degec Khongubun hnyi úen ang, at a omeli öbun únyi ge anyibun je hna okongoâ me hna ovecâ ; ke öbun e ha kâu, ka habe, Otilâ thanihmun dö. Awe, omanen' öbun dö walang ang hnyi hnyimakö Iehova hoton anyibun je tribu me je thauzan gabun. 20 Me Samuela ame hakekenyâ je tribu hia anyin at Isaraela, me adre me kü tribu Beniamina. 21 Ke e ame hakekenyâ tribu Beniamina hoton anyidrin je lap, me adre kü lap anyi Mater : ke adre kü Saulo noku Kiso ; ke ödrin e elâm e, k' adre me ca wâ. 22 Anyin a wale adre me elâm hmetu unyi Iehova, hawa, e tiga hu ke at biju ame he ka he jem ? Me Iehova ame thu, ka habe, Wâ bi, e ame lubaduöng hnyi je thatúnyi. 23 Me adre me wadring me hom e úheny e ; ke e ame tha tot me tavat, me e beú hon tavat hia, bongödra ju' hnyi li abenyin. 24 Ke haba Samuela ame ha ka tavat hia, ka habe, Wâ ju e, wale a úca Iehova, anyin ae ba at helâ më unyin tavat hia thithö. Me ame hongot tavat hia, me tha ha, ka habe, Khong lö omelö than.

25 Ke haba Samuela ame thumeto tavat ge bongon dökhü, me sihnalimen e hnyi tusi, me ip hnyi hnyimakö Iehova. Ke Samuela ame kunâ tavat ka hnyi je hnyabadra. 26 Ke Saulo ame he minya ka hnyi hnyaban hnyi Gibeá ; ke ame tha he më tavat a kâlâ Khong je hnyekudrin. 27 Ke ame ha ke je laku Belial, ka habe, Ame he ka kâmâu hna omeli ötin at eji ? Me ödrin e hûkötîâ e, ke ödrin e ca hom kâu je bwihlany. Ke e bi ame laba hnyibú.

HNYIMAKAN 11.

KE ame o but Nahasa at Amona me hunuma cicö Jabese-gileada : ke ame ha at Jabese hia kö Nahasa, ka habe, U me he ka úhihaköu möbmun, me öhmun e he ka bi athnyabaem. 2 Haba Nahasa at Amona, ame thu ködrin, ka habe, Walang oge me he ka úhihaköu möbun a g' ame he ka bán ka oc ut je emaköbun hia a metâ ; ke oge me he ka ip únyi e hnân haikongoâ at Isaraela hia. 3 Me ame ha kâu wahingat hnyi Jabese,

ka habe, Me hn' öhmun hnyi seven ta bong, me öhmun e he ka kunâ je úthumetu ka hnyi je hnyigöulen at Isaraela : ke ame ne ba at ame he ka omeli öhmun, awe öhmun e he ka he köu. 4 Me ame o je metâ hnyi Gibea i Saulo me thumeto tavat ge ta je hofuc eling : me ame tenge gan hmâ tavat hia. 5 Ke wâ bi, ame o but Saulo e ame alen je kau úheny hnyi hnyei ; ke Saulo ame ha, ka habe, Ieú ame tenge gan tavat ; Me ödrin e thumeto ge hofuc hwan at Jabese. 6 Ke ame o hwege hanon Khong ka hnyi hu Saulo, hnyi úen e ame löng hofuc eling, me ame ubâhlâ gan hmâ anyin hmönyin. 7 Me e ame hom li bolok, me susub' ödrü, me kunâ me je metâ ka hnyi je ke keihen hia anyi Isaraela, me ha, ka habe, Adre me he ka ânyâ helâng ka je bolok haleny tavat adre me ca he ka he hotu Saulo me Samuela. Me ame o ot ka tavat únyi ga Iehova, ke ödrin e ok helâ me at a khaca. 8 Ke e ame öü ödrin hnyi Bezek ; ke haba lakon Isaraela ödra theri haded thauzan, ke thöte thauzan at Juda. 9 Me adre me ha ka je metâ ödrin e o, ka habe, Öbun e he ka ha ka at Jabese-gileada, ka habe, Haba nyi e ka vec ut hwan seúnö, me adre me he ka hn' öbun. Me ame he je metâ me thumeto at Jabese, me ödrin e senyin. 10 Waleling me me ha at Jabese, ka habe, Öhmun e he nyi ka didrut köbun, me hamöbun he ka ânyâ hia köhmun webun. 11 Ke haba nyi Saulo ame khenâ tavat me me kun ta bunyen : ke ödrin e o hnyi wanden hna hunuma hnyi hna hmak hnyi hnyomakatu, me kot at Amona ke ne o but ame vec hwan seúnö : ke adre oveseâ bi je kolon, me me ca tha laba li at a lo. 12 Ke ame ha tavat kö Samuela, ka habe, Ie at a ha, ka habe, Hawa, ame he Saulo ka musi öta! Hom but jem tavat m' öhmun e he ka hling' ödrin. 13 Haba Saulo ame ha, ka habe, Adre me ca he ka hlingâ ke at hnyi bong ang : anyin a Iehova ame ham möt hnyi bong ang hobi kâu at Isaraela. 14 Me Samuela ame ha ka tavat, ka habe, Ötin he Gilegala ai, he ka ohâtâ dökhu eling. 15 Me ame he tavat hia Gilegala ai ; me adre me otillö Saulo eling ka than hnyi hnyimakö Iehova hnyi Gilegala ; ke adre me hudo eling je hudiny ole hnyi hnyimakö Iehova ; me ame tha senyin gan hmâ eling Saulo me at Isaraela hia.

KE Samuela ame ha ka at Isaraela hia, ka habe, Wâ bi, oge hia but löng hia hoton hobun hofuc waleji öbun e ha könya, me otillâ tuhöbun. 2 Ke haba walang ang, me ame ngeny tuhöbun hnyi hnyimaköbun : ke iny' hingat ut, me huen dut ; ke wâ bi e unyibun li lakuk : ke oge hia but ngeny hnyi hnyimaköbun hwân k' iny tiga thöth ke ne o but hnyi bong ang. 3 Iny' ang : ohnathu nya thö hnyi hnyimakö Iehova, me hnen hna hú : ia oge hom haleny bolok? ke hale ia asina oge hom? ke oge iyawö ia? ke oge oveci ia? ke oge kap hwaban únyi hnyi hnyamö ia he ka omükâ li emakök can e? m' oge me he ka ham hmetu köbun. 4 Ke haingödra, ka habe, U je ca iyaw' öhmun, me oveci öhmun, ke ba únyi u je hom únyi ge ke at. 5 Me e ame ha ködra, ka habe, Iehova at ame ohnathoâ köbun, ke ame ohnathoâ aten adre hú minya, hnyi bong ang, a öbun e ca wâ ke únyi hnyi hnyâmök. Haingödra, ka habe, E but at ohnathoâ. 6 Haba Samuela ame ha ka tavat, ka habe, E bi Iehova, at ame otillö Mose me Arona, me hom je lakamöbun únyi hnyi hnyei Aigupito. 7 Anyin a wale todr' öbun walang ang, me inye he ka n' öbun hnyi hnyimakö Iehova hnyi ta je hwakecin hia thithö ae wisa anyi Iehova, wale e ame ânyâ köbun, me ta je lakamöbun. 8 Haba hnyi úen ame o Jekob hnyi Aigupito, me ame tenge lakamöbun kö Iehova, me haba Iehova ame kunö Mose me Arona, ödre hom lakamöbun úheny Aigupito, me olab' ödrin hnyi dok eang. 9 Ke ödrin e hnying Iehova Khongudrin, me e ame úcü ödrin ka hnyi hnyamö Sisera, taben utbavat anyi Hazora, me ka hnyi hnyamen at Filisiti, me ka hnyi hnyamen than Moaba, me ödrin e vat mödrin. 10 Ke ödrin e tenge kö Iehova me ha, ka habe, Öhmun e bia but monu, anyin a öhmun e hia but hna degeci Iehova, me bi athnyaba ka je Baala, me Aseira : ke u me he walang ang ka omeli öhmun únyi hnyi hnyamen je iwahnaihmiöny möhmun, m' öhmun e he ka bi athnyabaem. 11 Me haba Iehova ame-kunö Jerubaala me Bedan, me Jefetha, me Samuela he ka omeli öbun únyi hnyi hnyamen je iwahnaihmiöny möbun igigilö, ke öbun e laba hnaih tt. 12 Ke öbun e wâ a ga o but köbun Nahasa, thaniny laku

Amona, me öbun e ha könya, ka habe, Ohe, e so e hu than he ka musi köhmun : ke so bi Iehova me anyibun than. 13 Ke walang ang, wá bi than öbun e úca, me sumátá : ke wá bi Iehova ame hia but otílá tuhöbun. 14 Öbun e ne he ka outö Iehova, me bi athnyabainy, me löng hwan hofuc, me ca úkhin fucá hnanyibu anyi Iehova, ke öbun e ne he bala bi me than minya a musi köbun ka hnu hotu Iehova Khongubun, awe, e so eling : 15 ke öbun e ne ca löng hoton hofuc ho Iehova, k' öbun e ne hanyáúá hnanyibu anyi Iehova, awe, ame he ka iwahnaihmióny möbun hnyamö Iehova, heláji me ka je lakamöbun. 16 Ke tot ju öbun walang ang me wá únyi ang ae gan ame he ka ányá Iehova hnyi hnyimaköbun. 17 Hawa, ca úen ang he ka meno hwit? Oge me he ka hongot kö Iehova, me e ame he ka kuná hendreng me we ; me me khan' öbun me wáhma-khmetoá a e ti kong hwakecibun öbun e ányá hnyi hnyimakö Iehova, a ga sumató tuhöbun. 18 Me Samuela ame hongot kö Iehova ; me Iehova ame kuná hendreng me we hnyi bong eling : me ame ot gan hmá tavat hia thithö kö Iehova me Samuela. 19 Ke ame ha tavat hia kö Samuela, ka habe, Betha hie hobi köhmun a lathnyabaem kö Iehova Khongom, m' öhmun e ca he ka mokcu : anyin a öhmun e hia but bi hanen ka anyihmun ta je hulö hia únyi eang ae kong, he ka sumató tuhömun. 20 Haingö Samuela ka tavat, ka habe, Ca ot öbun : e hnathu öbun e hia but ányá ta je hulö eang : ke so bi ca he öbun ka saú ga Iehova, ke bi athnyaba Iehova ge je hnye-kubun ae bekhöt ; 21 ke ca he öbun ka saú : ke heláe öbun e he ka he hoton ta je únyi baú ae ca khana he ka bi troban me möt, anyin ae ba önyen. 22 Anyin ame ca he Iehova ka hna degecá lakeiny, únyi ge ien ae gan hmá : anyin ae we Iehova he ka wi' öbun me hnán hing lakeiny. 23 Ke haba inya bi, ö iny ca he ka monu kö Iehova, he ka degec hiji öbun : ke oge me he ka n' öbun ge gethen ae so me wisa. 24 Ke hamöbun bi he ka outö Iehova, me bi athnyabainy hnyi hnathu me hnye-kubun ae bekhöt : ke me únykúme th' öbun ta je únyi ae gan e ame hia but ányá hobi köbun. 25 Ke öbun e ne he bala ka-ányá hwakecin ae kong, awe, adre me he ka tha ohí' öbun me tuhöbun.

HNYIMAKAN 13.

KE haba Saulo ame hwán he ka musi ke (thöte) je hunainy ; ke e ame musi hnyi Isaraela hnyi lo li huna. 2 Ke haba Saulo ame úca hobi káu kun ta thauzan at Isaraela ; haba lo li thauzan ka e bi unyi Saulo hnyi Mikemas me hnyi bucen Beth-ela, ke haba khaca thauzan ka e unyi Jonathana hnyi Gibeá hnyi Beniamina : ke haba kolon tavat e ame ve kun' ödrin ka hnyi umödrin je uma mano. 3 Ke haba Jonathana ame kot lap tue anyin at Filisiti hnyi Geba, ke a löng ut at Filisiti. Ke haba Saulo ame tuá trutru hnyi hnyei hia thithö, me ha, ka habe, Löng ju öbun, at Heberu. 4 Ke a löng ut at Isaraela hia, ka habe, A hia but Saulo kot lap tue anyin at Filisiti, ke e bon dut at Isaraela minya ka at Filisiti. Me ame úkhacaköu tavat kö Saulo hnyi Gilegala.

5 Haba at Filisiti adre me úkhacaköu he ka vat me at Isaraela, thöte thauzan je kariota, ke siks thauzan tavat tabö hors. me tavat helá me önyin köiö úseidra : ke adre me he me hunuma hnyi Mikemas, Beth-aven ke e deiö. 6 Ke a wá but at Isaraela a g' adre vhet ut (anyin ame gá on tavat,) haba tavat adre me ve lubaduöng hnyi je hmonop, me hnyot, me kic, me op. me hna hiny. 7 Ke haba keihen at Heberu ödrin e hia but he hanyáúá Joridano ka hnyi hnyei Gada me Gileada ; ke haba Saulo me tiga e bi hnyi Gilegala, ke ame he hoton tavat hia thithö, me öbubuny.

8 Ke e ame halubahingen seven je bong, helá me hna thu úen ga Samuela : ke ame ca o bi Samuela hnyi Gilegala ke ame vese thö tavat unyin. 9 Ke haba Saulo ame ha, ka habe, Hom but jem könya hudiny leú, me je hudiny ole. Me e ame hudo hudiny leú. 10 Ke e tiga um dö hudö hudiny leú, wá bi, ame o thö Samuela ; ke Saulo ame he ka úkhanö më me me iouny më. 11 Ke haingö Samuela, ka habe, leú u je hia but ányá? Haingö Saulo, ka habe, Oge wá a ga vese thö tavat gak, ke u tiga ca o waleji hnyi úen, me haba at Filisiti adre me úkhacaköu hnyi Mikemas ; 12 anyin a wale oge me ha, ka habe, Ame he ka utut walang ang at Filisiti könya hnyi Gilegala, k' iny tiga ca hia but sumátá ibetengió anyi Iehova : can e oge me ohwegiá hnyekuk me hudo hudiny leú. 13 Me Samuela ame ha kö Saulo, ka habe, E monu

ányi u je ányá : u je ca tuó hnanyibu anyi Iehova Khongom, waleji e ame húna kôu : ame we Iehova ka ohmâ dokhom dôkhu hnyi Isaraela nyiele balua. 14 Ke walang ang ame ca he ka tet hmâ dokhom dôkhu : ke Iehova ame hia but elâm at ae úcú me hnyekon bi, ke Iehova ame hia but úca at eling me me tuhan lakeiny, anyin a u je ca tuó únyi waleji Iehova ame húna kôu.

15 Ke Samuela ame tot me he Gibeai hnyi Beniamina úheny Gilegala. Ke Saulo ame aú tavat unyin, ke helâke siks haded. 16 Ke ame laba Saulo me Jonathana a nokon me tavat unyidru hnyi Geba hnyi Beniamina : ke haba at Filisiti adre me hunuma hnyi Mikemas. 17 Ke haba tavat húgúnâ, me ödrin e he úheny hnyi hna hunuma anyin at Filisiti a kun ta bunyen : haba ke bunyen ame hnyi gethen úheny Ótera me he hnyi hnyei Sual : 18 ke ke bunyen ame saú hnyi gethen úheny Betheloronâ : ke ke bunyen bi ame saú ka hnyi getheniny hnyigot cicö hnyigöulen bucen Zeboim hnyi hnyebuba.

19 Ke ba at leú fao hnyi hnyei Isaraela hia : anyin a haingen at Filisiti, ka habe, Wâ e nye he at Heberu ka bi hele vat me : 20 ke haba at Isaraela hia adre me labö he ka at Filisiti he ka khet je únyi hnân wia kânâ, me utetebelök, me je giwa, me je pik ; 21 ke so bi e hu gadra je fail hobi kâu je pik, me je utetebelök, me je fao ae vheivhei, me je giwa ; me hnân khet je osöiny bolok. 22 Me haba hnyi ün vat, me ba hele vat me ö adre me wâ anyin tavat hia thithö ödrin e tha e me Saulo me Jonathana : ke so bi adre me hake wâ unyi Saulo me Jonathana a nokon. 23 Ke e bi lap tue anyin at Filisiti ke ne o but hnyi gethen úheny Mikemas.

HNYIMAKAN 14.

KE haba hnyi ke bong me Jonathana nöku Saulo ame ha ka hidröu, at ame hom tilâ anyin ta je únyi hnân vat, ka habe, Ötu he ka lap tue anyin at Filisiti hnyi ke keihen eji. Ke e ame ca thumeto kamen. 2 Ke Saulo ame laba hnyi obiny Gibeai hnyi hmelen úö rimona hnyi Migeron : ke helâ me siks haded tavat unyin ; 3 me Ahia a nöku Ahituba, liamekeiny me Ikaboda, nöku Fineasa, nöku Eli, at bihut kö Iehova hnyi Silo, e ame khavâ íefoda. Ke ca khana bi tavat a ga he but Jonathana. 4 Ke hnyi wanben li gethen

Jonathana ame elâm deny hnyin he ka he ka hnyi lap tue anyin at Filisiti, ke wale ke kic ae beú me újejong hnyi ke keihen, me ke kic ae beú me újejong hnyi ke ke keihen : ke Bozez ien khaca, ke Sene ien khaca. 5 Ame tot khaca kic ka hnyi hwadrö cicö Mikemas, ke haba khaca ka hnyi hwaiöu cicö Geba. 6 Haba Jonathana ame ha ka hidröu, at ame hom tilâ omjehen vat, ka habe, Ötu he ka hanyâúâ ka hnyi lap tue anyin tavat eang adre ca peritomonâ : ame ne he Iehova ka huliwa hobi kötin : anyin a e ba at ame musi kö Iehova he ka omelö, ame ne únyi ge tavat ae se, ame ne únyi ge tavat ae wakhalet. 7 Me ame thu kâu at ame hom tilâ omjehen vat, ka habe, Ányâ hia thö únyi hnyi hnyekom : hwiö thö, wâ bi iny' ang unyâm hoton weny hnyekom. 8 Haba Jonathana ame ha, ka habe, Wâ bi ötu me he ka hanyâúâ ka tavat, me omanen' ötu bi ködrin. 9 Ödrin e ne ha helâng kötu, ka habe, Todru, m' öhmun e me he köbu, awe, ötu me he ka tot balu, me ca he bi ködrin. 10 Ke ödrin e ne ha helâng, ka habe, Ölö th' öbu köhmun ; awe, ötu me he ka ölö thö ; anyin a hia but Iehova hn' ödrin kötu : ke walang haten kötu. 11 Ke ödrü me omanen' ödrü bi ka lap tue anyin at Filisiti : ke haingen at Filisiti, ka habe, Wâ bi, ame o but at Heberu úheny hnyi jê op wale ödrin e lubaduöng hnyin. 12 Me ame thu aten lap tue kö Jonathana me at ame hom tilâ omjehen vat, ka habe, Ölö th' öbu köhmun, me öhmun e he ka omanenâ köbu ke únyi. Haba Jonathana ame ha ka at hom tilâ omjehen vat, ka habe, Ölö thö hotuk : anyin a hia but Iehova hu' ödrin ka hnyi hnyamen at Isaraela. 13 Ke Jonathana ame iyâw ge li benyen me li can, ke ame he hoton at hom tilâ omjehen vat : me ödrin e ta hnyi hnyimakö Jonathana ; ke haba at hom tilâ omjehen vat ame hling' ödrin hnyi hoton. 14 Ke haba hnyi hna hlingâ eling a bân, wale Jonathana me at hom tilâ omjehen vat ame ányâ me ame ne twente tavat, hnyi utkânâ ae úhnyúkong helâ me hafiny wadeny únyi hnân wia kânâ. 15 Ke e hu öbubuny hnyi hna hunuma, me hnyei, me unyin tavat hia ; haba lap tue me hnyat húgúnâ ödrin e öbubuny minya : ke ame úk hmele-dran ; me gan hmâ hmönyin öbubuny. 16 Ke haba hnyat hmákâ hnyi Saulo hnyi Gibeai hnyi Beniamina ödrin e wâ ; ke wâ bi ame aú but tavat, ke adre me kec monu ehele.

17 Ke haba Saulo ame ha ka tavat unyin, ka habe, Aú thö tavat, me wá ie at a hia gatin. Ke ödrin e aú, me wá bi, e hiö Jonathana me at a hom tilá omjehen vat. 18 Me haba Saulo ame ha kö Ahia, ka habe, Hom but jem tang tangen Khong. Anyin a e unyin lakon Isaraela tang tangen Khong hnyi ün e. 19 Ke Saulo ame tiga úhnenamö me at bihut, me ame tiga hu mede hnyi hna hunuma anyin at Filisiti, me ame gan tot: me Saulo ame ha ka at bihut, ka habe, Me tot ju. 20 Ke Saulo me tavat hia unyin adre me úkhacaköu me he ka hnyi vat: ke wá bi, ödrin e úkotkóuá lahiödrin, ke ti gan hmá imonumonuny. 21 Ke haba at Heberu tavat ödrin e tha he unyin at Filisiti ehac, a tavat adre me tha he mödrin ka hnyi hna hunuma únyi hnyi hnyeí igigilö; me haba hnyat eling ödrin e hwiö he ka tha ödra me at Isaraela unyi Saulo me Jonathana. 22 Heláe minya hnyat Isaraela hia a hnyat adre lubaduöng hnyi hnyeí ae hut hnyi Eferaima, k' ödrin e löng a ga kec ut at Filisiti, me ödrin e hnyi hnu ödrin hwegi-ödrin hnyi vat. 23 Me haba Iehova ame omelö at Isaraela hnyi bong eling: ke adre me vat ke ne o but ka hnyi Beth-aven. 24 Ke a vec ut Isaraela hnyi bong eling: ke haba Saulo ame thawá hwegiá tavat, me ha, ka habe, Hnaúhangö a ame he ka han ke ne o but sa hac, me inye me hia thö bi hwaban ka je iwahnaihmiöny mönya. Ke ame ca han bi tavat hia. 25 Ke ame o but tavat hia hnyi hnyot, ke wale hani eú hon káná. 26 Ke a o but tavat hnyi hnyot, me wá bi, ame khula hani: ke so bi e ba at ame iná hnyamen ka hnyi hnyimen; anyin a tavat ödrin e outen hnaúhangö. 27 Ke haba Jonathana ame ca löng bi hnen kamen hna khemanyin ka tavat: ke e ame iná hnyiban uci wale hnyi hnyamen, me hneú e hnyi hani, me hai hnyamen ka hnyi hnyimen; me ame metá li emakan. 28 Me ame ha ke at, ka habe, Haba kámám ame khemanyin hwege ka tavat, me ha, ka habe, Hnaúhangö at ame he ka han hnyi bong ang. Ke e sényin dut tavat. 29 Haba Jonathana ame ha, ka habe, Cica ame oveca hnyeí: wá bi e metá but li emakök únyi hnyi hnök hna drem ke ong hani eang. 30 Hawa, a ne han ganá tavat eja je únyi ödrin e hügúná ge je iwahnaihmiöny mödrin wale adre me hlo? ke ame ca se hia hanitin ge at Filisiti walang ang. 31

Ke ödrin e kot at Filisiti hnyi bong eling hwán Mikemas ke ne o but hnyi Ajalona: ke ame sényin gan hmá but tavat. 32 Ke ame gá but tavat ka sei, me hom je mamoe, me je bolok, me je nokon kau, me hlingá eú hnyi káná: ke tavat ödrin e tha han je meno me dren. 33 Ke adre me thumetu Saulo, ka habe, Wá bi, ame monu tavat kö Iehova, ödrin e han meno me dren. Me e ame ha, ka habe, Öbun e hia but iyawö; tetebulo thö eáu kónya ke veto ae gan. 34 Ke haba Saulo ame ha, ka habe, Vese thö ka tavat me ha ködra, ka habe, Ve hom but kónya halebun je bolok, me je mamoe, me hlingá eang, me han; ke ca ányá hulö kö Iehova he ka tha han me dra. Ke haba tavat hia ödrin e ve hom haledrin je bolok hnyi lit e, me hlingá eling. 35 Ke Saulo ame otílá taben hut kö Iehova: wale taben hut a bán e ame otílá kö Iehova.

36 Ke haba Saulo ame ha, ka habe, Ötin he ka at Filisiti hnyi hnyinghet, me kuc ödrin ke ne o but hnyi haolany me me ba köluidrin. Me haingödrin, ka habe, E so u me ányá weny hnyekom. Ke haingen at bihut, ka habe, Ötin a me he ka hakekeny ka Khong. 37 Haba Saulo ame elám unyin Khong, ka habe, Hawe, oge me he ka he úcon at Filisiti? hawa, u me he ka hn' ödra ka hnyi hnyamen at Isaraela? Ke e ame ca thu káu hnyi bong eling. 38 Me haingö Saulo, ka habe, Ai öbun öbun je taben tavat, me me khan' ötin me wáhmakhmeto únyi ua monu eang hnyi bong ang. 39 Anyin a kia inya Iehova at omelö at Isaraela, me ame ne e unyi Jonathana a nö kuk me hamen he ka mok. Ke ame ca thu káu ke at unyin tavat hia. 40 Me e ame ha ka at Isaraela hia, ka habe, Hamöbun he ka tot hnyi ke keihen, ke inya me Jonathana a nö kuk hnyi ke keihen. Me haingen tavat kö Saulo, ka habe, Hamám. 41 Me Saulo ame ha kö Iehova Khongu Isaraela, ka habe, Omanená thö at ae wisa. Ke ame kú Saulo me Jonathana ge uglekób, ke gufa bi tavat. 42 Me haingö Saulo, ka habe, Uglekóbi nya thö me Jonathana nö kuk. Me ame kú Jonathana. 43 Me haba Saulo ame ha kö Jonathana, ka habe, Ha thö kónya únyi u je ányá. Me Jonathana ame ha káu, ka habe, Oge drem thibi hani hnyi obiny uci hnyi hnyamök; ke wá bi hamök he ka mok. 44 Ke haingö Saulo, ka habe, Ame he Khong ka ányá heláe me bi hanen.

ke e hnathu u me he ka mok, Jonathana. 45 Me ame ha tavat kö Saulo, ka habe, Hawa, ame he ka mokcu Jonathana at ame omelö gänä at Isaraela? Ohe, kia öhmun Iehova, ame ca he ka kölu ke leúnen ban; anyin a e ame hia but tha huliwa me Khong hnyi bong ang. Me haba tavat adre me omeli Jonathana, me ame ca mok bi. 46 Ke Saulo ame hmetu úheny hnyi hna hnu at Filisiti: k' ame vese at Filisiti ka hnyi hnödra bi.

47 Ke hnyi ün Saulo ame kap dökhua Isaraela, me e ame vat me je iwahnaihmiöny më hia igigilö, a at Moaba, me laku Amoua, me at Edoma, me je thaniny Zoba, me at Filisiti: ke hwege hudrin hia e ame he úcon. 48 E ti hwege me kot at Amaleka, me omelö at Isaraela únyi hnyi hnyamen tavat adre me hügün' ödra.

49 Ke walang laku Saulo, Jonathana, me Ishivi, me Maleki-sua: ke walang ien lakon li hlu; jia Meraba wale atö, ke Mikala ien wakeiat: 50 ke Ahinoam ien öö Saulo, e nöku Ahimaza: ke haba ien taben anyin vat jia Abinera, nöku Neri, wale ke kamö Saulo. 51 Ke Kiso kamö Saulo; ke haba Neri kamö Abinera, wale noku Abiela.

52 Ke e hwege vat me at Filisiti hnyi je bong hia bongu Saulo: ke ame ne wä but Saulo ke je hnyat ae hwege, me tavat ae ba ot, me e ame hom bi käu.

HNYIMAKAN 15.

KE haba Samuela ame ha kö Saulo, ka habe, Iehova ame kunö nya he ka hú u me thaniny lakeiny a at Isaraela: ke löng ju walang ang hofuc ho Iehova. 2 Walang hna ha hnö Iehova tuhan sabaoth, ka habe, Oge hia but bi haten hna ányä hnö Amaleka kö Isaraela, waleji e ame tot käu eú hnyi gethen, e ka ölö e úheny Aigupito. 3 Ke he thö walang ang, me kuc Amaleka, me tha ohia anyidrin ta je únyi hia, ke ca he ka betenge gadrin: ke so bi kot hia thö obaga me omomo, je mendreng me at ame i, je bolok me mamoe, je kamela me asina.

4 Ke haba Saulo ame úkchacakouä tavat, me öü ödrin hnyi Telaim, ödrin tu haded thauzan tavat he hon kánä, me ten thauzan at Juda. 5 Ke ame o but Saulo ka hnyi taun anyi Amaleka, me khöu mokut hnyi hnyigöulen bucen. 6 Ke haba Saulo ame ha ka at Keni, ka habe, E, kec dö öbun,

utut ge at Amaleka, wä oge ne he ka tha ohí' öbun mödrin: anyin a öbun e betenge ge lakon Isaraela hia waleji hnyi úhedrin jem úheny Aigupito. Me ame he but at Keni ge at Amaleka. 7 Ke Saulo ame kot at Amaleka hwán hnyi Havila wale gethen ame he Sura ai, cicö Aigupito. 8 Ke e ame hom meli Agaga thaniny at Amaleka, ke adre me tha ohia tavat hia ge hele vat. 9 Ke Saulo me tavat ödrin e omeli Agaga, me je mamoe ae so, me bolok, me je meno ae pipikenyä, me je nokon mamoe, me ta je únyi hia ae so, ke ca wedrin he ka tha ohia ta je únyi e: ke haba ta je únyi hia ae kong me únyi baú adre me tha ohia.

10 Me ame o hofuc ho Iehova kö Samuela, ka habe, 11 Inya oge me ietra hnök hna otílö Saulo me than: anyin a e ame hmetu but únyi hnyi nhen hna he hotuk, ke e ame ca ányä hnök je hna húna. Me ame hmönyi Samuela; me tenge kö Iehova hnyi hnyinghet hia. 12 Ke ame vesákong Samuela he ka úkhanö me Saulo hnyi hnyomakatu: ke adre me thumetu Samuela, ka habe, A o thö Saulo hnyi Karemela, ke wä bi e ame otílá haten hobi käu, k' ame hwiö thö, me he but, me utut Gilegala ai. 13 Ke ame o but Samuela kö Saulo: ke Saulo ame ha käu, ka habe, E so u hnahic ga Iehova: ke oge hia but ányä únyi a húna ga Iehova. 14 Ke haingö Samuela, ka habe, Ieú bongon je mamoe ame tenge hnyi li hnyikönyök, me je bolok ame kuku k', inya oge me löng? 15 Me Saulo ame ha, ka habe, Adre me hom únyi ge at Amaleka: anyin a haba tavat adre me omelö je mamoe me je bolok ae so hnân hut kö Iehova Khongom; ke öhmun e hia but ti ohia je kolon. 16 Me haba Samuela ame ha kö Saulo, ka habe, Me todru, me oge me he ka thumetu u ga hofuc a ha kónya Iehova eja hnyinghet. Me haingen, ka habe, ha thö. 17 Haba Samuela ame ha, ka habe, Eja ke ne u je ne at ae úhnyúkong ehac, hawa, adre ca hum u hnân homakan je tribu Isaraela? Me Iehova ame hú u m' u me thaniny at Isaraela; 18 ke Iehova ame kunö u he ka vheno ke keihen hnyeí, me ha köu, ka habe, He thö, me ti ohia but tavat ae kong a at Amaleka, me vat ju mödra ke ne o but ame hí' ödra. 19 Ke ieú gam a u je ca löng hofuc ho Iehova, ke u je gä he ka hom ta je hna hügünä, me ányä únyi ae kong huyi hnyimakö Iehova? 20 Ke Saulo ame ha kö Samuela,

ka habe, Ohe, oge hia but löng hofuc ho Iehova, ke oge me vheno gethen wale a kunö nya hnyin Iehova, ke oge hia but hum Agaga thaniny at Amaleka, ke oge me hia but ti ohia at Ameleka. 21 Ke haba tavat, me, ödrin e hom ta je hna hûgûná, a ta je mamoe, me ta je bolok, je únyi ae únyi hnathu hnân hake ip, he ka bi hut kö Iehova Khongom hnyi Gilegala. 22 Haba Samuela ame ha, ka habe, Hawa, e hu senyin kö Iehova ge je hudiny leû me je hut, helâ me hna löng hoton hofuc ho Iehova? Wâ bi, e beönua hna löng hon hut, me beönua, hna hnu hoton, hon pipikhenyainy je mamoe бага. 23 Anyin a haba hanyâûâ, me helâ me ûkongon bi khong, ke haba ûjông, me helâ me ûkongon hmi ka hnatheat, me je idola. Anyin a u je hia but hna degecâ hofuc ho Iehova, awe, e ame hia but hna degeci u, me u me ca than dut. 24 Ke Saulo ame ha kö Samuela, ka habe, Oge hia but ânyâ hulö: anyin oge hia but hanyâûâ hna hûna hnö Iehova, me hwâm hofuc: anyin oge ouden tavat, me löng hodrin. 25 Ö u hna but walang ang anyik hulö, me tha hmetu mönya, me inye he ka khudrung kö Iehova. 26 Haingö Samuela kö Saulo, ka habe, Oge me ca he ka tha hmetu möu: anyin a u je hia but hna degecâ hofuc ho Iehova, ke Iehova ame digic u, me u me ca he ka than ka at Isaraela. 27 Ke Samuela ame hwiö he ka he but, me e ame kâ baten khaüen, me ame khekhe but. 28 Ke haba Samuela ame ha kâu, ka habe, Iehova ane hia but kia dökhua Isaraela hnyi bong ang únyi gam, me ham e ka ke at ame laba hakekenyi u, ae so hom. 29 Ke haba khaca, ame ca he ka thoi me ietra Man mani Isaraela: anyin a ca at, me me ietra. 30 Ke e ame ha, ka habe, Oge hia but ânyâ hulö: ke so bi ö u ogânö nya walang ang hnyi hnyimakan wahingatiny lakeik, me hnyimakan at Isaraela, ke u me he ka tha hmetu mönya me inye he ka khudrung kö Iehova Khongom. 31 Me Samuela ame hmetu hotu Saulo; ke Saulo ame khudrung kö Iehova. 32 Me ame ha Samuela, ka habe, Hum Agaga thö jem kõnya, thaniny at Amaleka. Ke Agaga ame he hmecik kâu. Ke haingö Agaga E hnathu e hia but hinyin mok. 33 Ke Samuela ame ha, ka habe, Hnen ânyâm hele vat hna öba nokon je momo, helâe adre me he ka öba nokon binyâm unyin je momo. Ke Samuela ame susubö Agaga hnyi hnyimakö Iehova hnyi Gilegala.

34 Ke Samuela ame he Rama ai; ke Saulo ame ölö ka hnyi hnyaban hnyi Gibea anyi Saulo. 35 Ke ame ca o hmetu Samuela kö Saulo ke ne o but hnyi bong e ame mokcu hnyin: ke Samuela ame tengiö Saulo; ke Iehova ame ietra hna otilö Saulo ka thaniny at Isaraela.

HNYIMAKAN 16.

HABA Iehova ame ha kö Samuela, ka habe, U me he ka tengiö Saulo ke ne o but kehö anyin oge me degecâ me me ca musö at Isaraela? Öunöngötâ thö ânyâm faoiny meno ge wakaco, ke he thö, me oge me he ka kunö u kö Jese at Bethel-leema: anyin a oge hia but penapena ke than hobi kõnya unyin lakon. 2 Ke haingö Samuela, ka habe, Oge me he ka hawa? ame he Saulo ka hlingö nya ame ne löng bi. Haba Iehova ame ha, ka habe, U me he ka tha hom möu ke nokon kau, me ha, ka habe, Oge me o he ka hudo kö Iehova. 3 Ke u me he ka hawo Jese he ka hnyi hanen hut, ke oge me he ka omanenâ köu únyi u me he ka ânyâ: ke u me he ka hû hobi kõnya at oge me he ka ha köu. 4 Me Samuela ame ânyâ únyi ame ha Iehova, me o hnyi Bethel-leema. Ke haba wahingatiny taun ödrin e ûkhanö me, me öbubuny, me ha, ka habe, U me o hnyi úsoköu? 5 Me haingen, ka habe, Oge me o hnyi úsoköu he ka bi hut kö Iehova: okabi öbun dö, me tha he thö mönya ka hnyi bi hut. Ke e ame okabi Jese me lakon, me haw' ödrin he ka hnyi hanen hut. 6 Ke ödrin e o but, me e ame ö Eliaba me ha, ka habe, E hnathu wale at adre hû kö Iehova hnyi hnyimakan. 7 Ke Iehova ame ha kö Samuela, ka habe, Ca wâ hnyimakan bi, me ibeüen; anyin ae ca wek bi at e: anyin ame ca wâ ga Iehova helâ me at; anyin a haba at ame wâ únyi ae manen, ke Iehova ame wâ hnyök. 8 Me Jese ame hawo Aminadab, me kunâ ka hnyi hnyimakö Samuela. Ke e ame ha, ka habe, Iehova ame ca úca at ang. 9 Me Jese ame kunö Sama he ka he. Ke haingen, ka habe, Iehova ame ca úca minya at ang. 10 Ke Jese ame ve kunâ lakon a seven he ka he hnyi hnyimakö Samuela. Me Samuela ame ha kö Jese, ka habe, Iehova ame ca úca hnyat eang. 11 Me haingö Samuela kö Jese, ka habe, Hawa, e ba minya lakom? Me haingen, ka habe, Khaca biju, wale wakeiat hmönyin ke, wâ bi, e ame tuö je mamoe. Ke haingö Samuela kö Jese, ka

habe, Ûkhünöng dö he ka hom : anyin a ötin e ca he ka laba ju ke ne o but e ame o thö. 12 Ke e ame ùkhünöng, me hom e. Kee dra makan, me hmanenang hnyimakan, me so ka wâ. Haba Iehova ame ha, ka habe, Todró, hú but e : anyin ae at e. 13 Ke haba Samuela ame hom faoiny wakaco, me hú e hnyi wanben je liamekeiny mē : me ame o hwege hanu Iehova hu Davita hwân hnyi bong eling. Me Samuela ame tot me he Rama ai.

14 Me ame hia but he digic Saulo hnen hanu Iehova, me ame ohmakâ e hnen hanu ae kong únyi ga Iehova. 15 Ke haba lathnyabai Saulo ödrin e ha kâu, ka habe, Wâ bi, ame ohmaki u walang ang hanu ae kong únyi ge Khong. 16 E so u me he, tuhömun, ka kun' öhmun a lathnyabaem hnyi hnyimákâm he ka elâm at ae khana he ka kokot kitara : ke e ka o but köu hanu ae kong únyi ge Khong, me e ame he ka ânyâ gehnyamen, me u me he ka so but. 17 Ke haingö Saulo ka lathnyabainy, ka habe, He thö ka elâm walang ang at ae khana wia ânyâ únyi khumöng, me hom jem könya. 18 Me ame thu ke hidróu me ha, ka habe, Wâ bi, oge hia but wâ ke at nöku Jese, at Bethe-leema, ae khana ânyâ únyi khumöng, ke e at ae hwege hmönyin, me at vat, me metâ hnyi hwan je hofuc, ke e at ae hmanenang, ke e unyin Iehova. 19 Anyin a wale habe Saulo ame kunâ je úthumetu kö Jese me ha, ka habe, Kunö Davita thö a nokom könya, wale a tha laba me je mamoe. 20 Haba Jese ame hom asina ame hijen hok areto, me tap waina me ke nokon got, me kunâ a deny Davita a nokon kö Saulo. 21 Ke Davita ame o but kö Saulo, me tot hnyi hnyimakan : kee gan hmâ hnen hna hnyok kâu ; ke e at hom tilâ anyin ta je omjehen vat. 22 Ke haba Saulo ame ùkhünöng kö Jese, he ka ha, ka habe, Ama me tot Davita hnyi hnyimákök, anyin oge me betenge gan. 23 Ke hnyi üen ame o but kö Saulo hanu ae kong únyi ge Khong, me haba Davita ame hom kitara me ânyâ ge hnyamen : me ame menâ Saulo, me so, me ame hia unyin hanu ae kong.

HNYIMAKAN 17.

KE haba at Filisiti adre me ùkhacaköuâ anyidra je utbavat he ka vat, ke adre me ùkhacaköu hnyi Soko, iJuda, me hunuma hnyi wanben Soko meAzeka hnyi Efesidamim. 2 Ke Saulo me at Isaraela adre

me ùkhacaköu me hunuma hnyi hnyigöulen bucen e Ela, me tot metâ he ka vat me at Filisiti. 3 Ke haba at Filisiti adre me tot hon bucen hnyi ke keihen, k'ame tot at Isaraela hon bucen hnyi ke keihen ; ke e bi thop hnyi wanbödra. 4 Ke ame he but at ae nua hwegien únyi hnyi hna hunuma anyin at Filisiti, adre hwenyi ien Goliatha, at Gatha, haba ibeüen me siks je kubit ke khaca hnyam. 5 Ke e ame bicâ hnabinybak bras, me khavâ ùkhaüen vat a fao ; ke faiv thauzan je sekel bras ihmakiny ùkhaüen. 6 Ke e hu li unen bras hnyi li can, me ke unen bras hnyi wanben li bajebenyin. 7 Ke haba taben anyin ö, me helâ me utöiny únyi hnân hwâwâ mano ; ke haba homakan anyin ö, me, siks haded je sekel fao ihmakiny : k'ame he hnyi hnyimakan, at ame hom tilâ anyin bec. 8 Ke e ame tot me hongot ka je utbavat anyin at Isaraela, me ha, ködra, ka habe, Ieü gabun öbun e ok he ka tot metâ hnyi vat? hawa, ca at Filisiti bi nya, ke öbun lathnyabai Saulo? Uca thö ke at gabun, me hamen he ka utut könya. 9 Ame ne khana he ka vat mönya me hlingö nya, awe, öhmun e he ka bi athnyaba köbun : ke oge ne tuk me hlingâ, awe, öbun e he ka bi athnyaba köhmun me huliwa köhmun. 10 Haingen at Filisiti, ka habe, Inya oge me humbasö je utbavat anyi Isaraela hnyi bong ang ; kunâ jem könya ke at m' öhmu me he ka ùküc. 11 Ke haba Saulo me at Isaraela hia adre me löng ta je hofuc hwan Filisiti, me ödrin e öbubuny me ödrin e gan hmâ ot.

12 Ke haba Davita, me nokon at Eferatha, adre hwenyi ien Jese, at Bethe-leemajuda ; ke eit lakon obaga : ke e at ae hingat ut hnyi je bong bongu Saulo, ke e hingat ae hnathu unyidra. 13 Ke ame tha he hotu Saulo ka hnyi vat kun ta laku Jese a lakon ae gan : Ke haba ien ta lakon a kun ödrin e hnyi vat, me jia Eliaba a atö, me Aminadab a ütangköu mē, me Sama a kuniny. 14 Ke Davita a wakeiat : ke ame he hotu Saulo ta hnyat a kun ae gan. 15 Ke Davita ame labö he üheny unyi Saulo he ka tuö je mamoe haleny kamen hnyi Bethe-leema. 16 Ke ame labö hakekeny at Filisiti hnyi je hnyomakatu me sahaç, me omanenâ e bi hnyi fâte je bong.

17 Ke haba Jese ame ha kö Davita a nokon, ka habe, Hom dö walang ang ka latuhâm a kun, khaca efa hwiç eang adre le, me je areto eang a ten, me hom mweimweiâ ka hnyi hna hunuma ka latuhâm a

kun: 18 me hom je fromage a ten ka taben anyidrin je thauzan, me wâ hawa ge latuhâm a kun, me kap anyidrin haten. 19 Ke Saulo, mödrin, me at Isaraela hia thithö ödrin e labö vat me at Filisiti hnyi hnyigöulen bucen Ela. 20 Ke Davita ame vesâkong, me hna je mamoe ka at ame tuö, me hom je únyi me he, helâ me Jese ame hûna kâu; ke a ame o but hnyi nhen je kat k' ame tiga he ka hnyi vat je utbavat ke ödrin e tiga sue. 21 Ke haba at Isaraela me at Filisiti ödrin e ve tot metâ, ke vat cicö ke vat. 22 Ke Davita ame hna anyin ta je únyi ka at ame tuö ta je únyi, me wadring ka hnyi hna vat, me he me iouny me latuhan. 23 Ke e ame tiga úhnenamö mödrin, me wâ bi, ame o but at ae beönua hwegien, at Filisiti úheny Gatha, Goliatha ien, únyi hnyi je vat anyin at Filisiti, me fuc helâ me hna labö ha: ke a löng ut Davita. 24 Ke haba at Isaraela hia ödrin e wâ at, me ödrin e kec gan, me ot gan hmâ. 25 Me ame ha at Isaraela, ka habe, Öbun e wâ at eang ame o? ame o he ka humbasö at Isaraela: ke haba at ame he ka hlingâ, me ame he than ka otenâ gan hmâ omjeú, me ham kâu nokon hlu, ke andre me he ka hna gufa lap anyin kamen hnyi Isaraela. 26 Haba Davita ame ha ka tavat andre me tha tot mē, ka habe, Ieú andre me he ka ânyâ ka at, at ame he ka hlingâ at Filisiti e, me ohia hmehma únyi ge at Isaraela? anyin a ia at Filisiti ang andre ca peretomonâ, me e ame he ka humbasö je vat anyin Khong ae möt? 27 Ke ame thu kâu tavat helâe ge ta je únyi, ka habe, Helâe andre me he ka ânyâ ka at ame he ka hlingâ. 28 Ke haba Eliaba a tuhan ame löng hnyi üen e ame úhnenamö me tavat; k' ame ubâhlâ hmönyin anyi Eliaba kö Davita me e ame ha, ka habe, U je o eang kâ ieu? me u je hna kö ia je ong mamoe hnyi hnyeuba? Oge me wâ bi gan gam, me hnyekom ae monu; anyin a u je he jem he ka hnyi wâ vat. 29 Ke haingö Davita, ka habe, Ieú oge ânyâ walang ang? Hawa, e ba can? 30 Ke e ame hwiö únyi gan, me ha helâe ka ke at: k' ame thu hmetu bi kâu tavat helâ me hofuc a bân. 31 Ke a löng ut tavat hofuc ho Davita, me ödrin e thumetu Saulo; me e ame hawâ. 32 Ke Davita ame ha kö Saulo, ka habe, Ca he ke at ka ot gan; haba inya athnyabaem oge me he ka vat me at Filisiti ang. 33 Ke haingö Saulo kö Davita, ka habe, E ca khanö u he

ka he úcon at Filisiti eling me vat mē: anyin a u thöth ke e at vat hwân e tiga thöth ke ne o but ang. 34 Me Davita ame ha kö Saulo, ka habe, Inya athnyabaem oge me tuö je mamoe hale cica; k' ame ne o but liona ame ne bea, me hom ong mamoe únyi hnyi hnahat meno, 35 me oge me hnu, me kot, me omelö únyi hnyi hnyimen: ke e ame tot könya me oge me kât wainy, me kot, me hlingâ. 36 Inya athnyabaem oge me kot liona me bea; k' ame he at Filisiti ang andre ca peritomonâ ka helâ me ke at gadru, anyin a e ame humbasö je vat anyin Khong ae möt. 37 Ke ame ha Davita, ka habe, haba Iehova at ame omeli nya únyi hnyi benyin liona me bea, me e ame he ka omeli nya únyi hnyi hnyamen at Filisiti eling. Ke haingö Saulo, ka habe, he thö, k' ame he Iehova ka tha e möu. 38 Me haba Saulo ame okhavö Davita ge anyin úkhaú, me obicâ e ge hnabinybak bras, ke e ame okhavâ e ge úkhaüen vat. 39 Ke Davita ame hûkálâ anyin hele vat hon úkhaüen, me e ame hwân he ka he; k' ame tiga ca hia but ná únyi e. Me haingö Davita kö Saulo, ka habe, E ca khanö nya he ka he me ta je únyi eang; anyin oge me tiga ca ná. Me Davita ame any hmetu but. 40 Ke e ame hom anyin uci hnyi hnyamen, k' ame úca je veto a thabúng ae baúhaú únyi hnyi wagewe, me hitangen hnyi tangen tang, a tangen at tuö mamoe; me koloú hnyi hnyamen: ke e ame hakekeny ka at Filisiti. 41 Ke ame he at Filisiti, me hakekeny kö Davita; ke ame bân at ame hom tilâ bec. 42 Ke ame bwele at Filisiti me ö Davita, me e ame oúnyibâúâ e; anyin a e tiga thöth, ke hngihngidra, me hmanenang hnyimakan. 43 Ke ame ha kö Davita at Filisiti, ka habe, Iny kuli, me u me o könya me je uci? Me haba at Filisiti ame hangö Davita ge je khongon. 44 Ke haingen at Filisiti kö Davita, ka habe, Aiö u könya, me oge me he ka ham unyâm ka omeno ame gâ, me omenoiny hnyot. 45 Ke haingö Davita ka at Filisiti, ka habe, U me o könya me hele vat, me ö, me ö a telat; ke inya oge me o köu hnyi iö Iehova tuhan sabacoth, Khongon je utbavat anyi Isaraela, wale u je hia but humbasö. 46 Ame he Iehova ka hnö u ka hnyi hnyamök hnyi bong ang; ke oge me he ka kuc u me subâ degecâ bâm; ke oge me he ka ham unyin je utbavat anyin at Filisiti ka omeno ame gâ, me omeno a

I. SAMUELA 18.

hinyin hmeledrany hnyi bong ang ; me me he hmeledrany hia ka wáhmakhmeto a e bi Khong unyin at Isaraela : 47 me me he minya úkbacakôu eang ka wábmakhmeto a Iehova ame ca úhómeli ge hele vat me ö : anyin a haba vat anyi Iehova, me e ame he ka hn' öbun ka hnyi hnyamöhmun. 48 Ke ame todrö at Filisiti, me he me hakekeny he ka úkhanö me Davita, me haba Davita ame wadring logot ka hnyi vat he ka úkhanö me at Filisiti. 49 Ke Davita ame iná hnyamen ka hnyi tang, me hom únyi hnyin ke veto, me kúlúa, me ame hwadá hnyi bariny at Filisiti ; me ame didrut veto hnyi bariny, me e ame ta but hnyimakan hnyikánái. 50 Me e hwege Davita hon at Filisiti ge koloú me veto, me kot at Filisiti me hlingá e ; ke ba hele vat hnyi hnyamö Davita. 51 Ke Davita ame wadring me tot hon at Filisiti, me kát anyin hele vat, me oc ut únyi hnyi tangen, me hlingá, me subá degecá ban. Ke a wá but at Filisiti a ga mokcu anyidrin at ae beónua hwegien, me ödrin e kec. 52 Me ame todrö at Isaraela me at Juda me sue, me hnu at Filisiti ke ne o but hnyi Gai, me je homagöuleny Ekerona. Ke ame ta tot tavat adre át dö a at Filisiti eú hnyi gethen ame he Saraim ai, ke ne o but hnyi Gatha, me Ekerona. 53 Ke a hmetu lakon Isaraela úhedra hnyi hna hnu at Filisiti, me ödra adre me sö anyidra ta je únyi. 54 Ke Davita ame hom ban at Filisiti, me hom e Jerusalema ai ; k' ame ip omjehen vat eiö hnyi umen uma mano.

55 Ke hnyi úen Saulo ame ö Davita ame he ka úkhanö me at Filisiti, me e ame ha kö Abinera taben anyin vat, ka habe, Abinera lö, nöku ia hidröu e? Haingö Abinera, ka habe, Kia inya than ae ca khanö nya. 56 Ke haingen than, ka habe, Hnö thö, nöku ia thöth e. 57 Ke Davita ame hmetu úheny hnyi hna kot at Filisiti, me Abinera ame hom e, me hom kö Saulo, ke e hnyi hnyamen ban at Filisiti. 58 Ke haingö Saulo káu, ka habe, Hidröu lö, u nöku ia? Me Davita ame thu, ka habe, Inya nöku Jese a athnyabaem at Bethleema.

HNYIMAKAN 18.

KE haba hnyi úen e ame umö fuc kö Saulo, me haba hnyeku Jonathana ame hwege hnyok kö Davita, ka ame betenge

káu Jonathana helá me e ame ka hnyoká hing hanon bi. 2 Ke haba Saulo ame hom beháná hnyi bong eling, k' ame ca hna he ka hmetu ka hnyi hnyaban kamen. 3 Me haba Jonathana me Davita ödru me úhi-hnyköu, anyin a e ame betenge gan helá me e ame betenge káu bi. 4 Me Jonathana ame uny jut anyin úkot wale e ame khavá, me ham kö Davita me me khaüen bi, me anyin minya hele vat, me kafana, me wen minya hnyekon. 5 Ke Davita ame labö he ka hnyi je hna kuná káu hnö Saulo, me metá hwakecin : ke Saulo ame otilá e hon aten vat, k' ame so ka tavat hia, me lathnyabai Saulo.

6 Ke hnyi úen adre me o, wale Davita ame hmetu úheny hnyi hna kot at Filisiti, me ame he omomo únyi hnyi ta je taun hia hnyi Isaraela, k' ödrin e khumöng me bibiá he ka úkhanö me Saulo, me je bwi-nybet, me senyin, me je únyi khumöng. 7 Ke je momo ödrin e sithwanán hnyi bibiá, ha habe,

Saulo ame hia but kot haniny je thauzan, Ke Davita bi, haniny je ten thauzan, 8 Ke Saulo ame hmönyin gan hmá, ke kong káu hofuc eling ; ke haingen, ka habe, Ödrin e hna je ten thauzen kö Davita, ke ödrin e hna könnya je thauzan thibi : awe, ieú hmetu bi, ama hobi káu but dökhü? 9 Ke Saulo ame ecmakö Davita hwán hnyi bong eling.

10 Ke nyi ame o but kö Saulo hanu ae kong únyi ge Kkong, ke e ame perofeta hnyi wanben umen uma : ke Davita ame kokot ge hnyamen helá me ta je bong : ke e hnyi hnyamö Saulo ö. 11 Ke haba Saulo ame khúa ö ; anyin a haingen, ka habe, Oge me he ka dá fineci Davita ka hnyi hnyeige uma. Ke Davita ame olo nauá anyin ö. 12 Ke haba Saulo ame outö Davita anyin a e bi Iehova unyin, ke e hia but unyi Saulo. 13 Ke Saulo ame úsákáúö mē, me otilá e hnán taben thauzan ; ke e ame didrut me didrö hnyi hnyimakan tavat. 14 Ke Davita ame ányá metá hnyi ta je hwakecin ; ke e bi Iehova unyin. 15 Ke a wá but Saulo a e ame ányá metá me e ame outen. 16 Ke ame betenge Isaraela hia me Juda hia ga Davita ; anyin a e ame didrut me didrö hnyi hnyimaködrin.

17 Ke Saulo ame ha kö Davita, ka habe, Wá bi nöku hlu a atö jia Meraba, oge me he ka ham köu me áiam : ke so bi u me he ka hwege bi singik, me vátá je vat anyi

Iehova. Anyin a haingö Saulo, ka habe, E so e me ca kot e ge hnyamök, ke so bi hamen hnyamen at Filisiti he ka kot. 18 Ke haingö Davita kö Saulo, ka habe, Iny ia? ke ieu soik, me lap anyi cica hnyi Isaraela, me inye he ka úngon than? 19 Ke hnyi úen adre me he ka ham Meraba hlu nöku Saulo kö Davita, me adre me ham bi kö Aderiela at Mehola me áián. 20 Ke haba Mikala hlu nöku Saulo ame betenge ga Davita: me ödrin e thumetu Saulo, ke e so káu. 21 Ke ame ha Saulo, ka habe, Oge me he ka ham e káu, me me hai hnyamen at Filisiti káu. Anyin a wale Saulo ame ha kö Davita, ka habe, U me he ka únguk hnyi bong ang hnyi úen a loiny. 22 Ke Saulo ame húna ka lathnyabainy, ka habe, Únhenamö duöng ju me Davita, me ha, ka habe, Wá bi, than ame weny u, k'ame betenge gam lathnyabainy hia: ke u me he ka úngon than walang ang. 23 Me haba lathnyabai Saulo ödrin e ha je hofuc eling hnyi hnyikönyö Davita. Ke haingö Davita, Hawa, öbun e únykúme e háhá he ka úngon than, ke inya at ae ba ta únyi k'iny únyibaú? 24 Ke haba lathnyabai Saulo ödrin e thumeto e, ka habe, Davita ame ha ta je hofuc heláe. 25 Me haingö Saulo, ka habe, Öbun e he ka ha heláng kö Davita, ha habe, E ca weny bi than sániny hlu, ke so bi, khaca haded je unen unyin at Filisiti, me me bi hwaban je iwahnaihmiöny me than. Anyin a haba Saulo ame únykúme he ka kuc Davita ge hnyamen at Filisiti. 26 Ke haba lathnyabainy, ödrin e thumetu Davita ge ta je hofuc eling, me ame so kö Davita he ka ungon than. Ke tiga ca um bi je bong; 27 me haba Davita ame tot me he, a e me anyin vat me kot at Filisiti a tu haded; ke Davita ame hom je unen unyidrin a ka e ka than, me me he ka úngon than. Me Saulo ame ham Mikala a nokon hlu káu me áián. 28 Ke a wá but Saulo, me wáhmakhmeto a e bi Iehova unyi Davita; ke haba Mikala hlu nöku Saulo ame betenge káu. 29 Ke ame ot tot Saulo ga Davita; ke iwahnaihmiöny bala Saulo me Davita. 30 Ke ame he but je thaniny at Filisiti: ke hwán hnyi úen ödrin e he but, me Davita ame ányá metá hon lathnyabai Saulo; me ame lung gan hmá ien.

HNYIMAKAN 19.

KE haba Saulo ame ha kö Jonathana a nokon, me lathnyabainy hia, m'ödrin e he ka hlingö Davita. 2 Ke so bi Jonathana ame hnyok kö Davita. Me Jonathana ame thumetu Davita, ka habe, Cica Saulo ame elám he ka hlingö u: anyin a wale ö u wá wia nyi, ke me laba hnyi dok ae iyong, me ikhölö: 3 ke oge me he ka he me tha tot me cica hnyi utkáná u me he ka ikhölö hnyin, ke oge me he ka únhenamö me cica gam; me oge me he ka thumetu u ge hnök hna he ka wá. 4 Ke Jonathana ame ha soi Davita kö Saulo a kamen, me ha káu, ka habe, ca he than ka kong hwakecám kö Davita athnyabaem; anyin ae ca kong hwakacin köu, ke e ti so hmönyin anyin je huliwa köu: 5 ke e ame ip anyin möt hnyi hnyamen, me hlingá at Filisiti, me Iehova ame omelö gan hmá Isaraela hia thithö: u je wá e, me senyin: ke anyin a ieu u me he ka kong ka dra ae ba hnyikongon, he ka hlingö Davita ke ba can? 6 Ke a löng ut Saulo hofuc ho Jonathana: ke Saulo ame khemanyin, ka habe, Kia inya Iehova, adre me ca he ka hlingá. 7 Ke Jonathana ame hawo Davita, ke Jonathana ame thumeto ge ta je hofuc hia eling. Ke Jonathana ame hum Davita kö Saulo, ke e ame tha e mē helá me ehac. 8 Ke ame kú hmetu thö vat: ke Davita ame he, me vat me at Filisiti, me hling'ödrin, ke gan hmá hna hlingá; ke adre, me kec gan. 9 Ke e bi hnyi hu Saulo hanu ae kong únyi ga Iehova, ke e ame laba hnyi umen uma, ke e hnyi hnyamen dân ö: ke Davita ame kokot ge hnyamen. 10 Ke Saulo ame elám he ka dá fineci Davita ka hnyi hnyeige uma ge ö; ke e ame naúá úheny hnyi hnyimakö Saulo, ke ame hwádá thö ö hnyi hnyeige uma: ke Davita ame wadring, me kec möt hnyi lit eling. 11 Ke haba Saulo ame kuná tavat ka hnyi uma umö Davita he ka tuó e, me hlingá hnyi hnyomakatu: ke ame thumetu Davita hnö Mikala a áián, ka habe, U je ne ca omeli u bi eáu hnyinghet, adre me he ka hlingö u nyi. 12 Ke haba Mikala ame öü Davita úheny hnyi mamalama, me ame he, me kec, me möt. 13 Ke Mikala ame hom idola, me ip hon hna mokut, me ip bwiny leinen got hnán uthuöng, me tube ge mano. 14 Ke Saulo ame kuná tavat he ka hum Davita, me e ame ha, ka

habe, E mok. 15 Ke Saulo ame kuná tavat he ka ö Davita, me ha, ka habe, He thö ka vadren jem kõnya hon hna mokut, me nye he ka hlingá. 16 Ke a didró tavat, me wá bi, idola ame mokut hon hna mokut, me bwiny leúnen got hnán uthu-nöng. 17 Ke haba Saulo ame ha kö Mikala, ka habe, Ieú gam u je iyawö nya heláe, me hna but iwahnaihmiöny mõnya, me me kec möt? Ke Mikala ame thu kö Saulo, ka habe, E ame ha kõnya, ka habe, Hnö nya but; hnán eú oge ma he ka hlingö u?

18 Ke Davita ame kec möt me he Rama ai kö Samuela, me thumeto e ge ta je únyi hia ame hia but ányá káu Saulo. Me e ame tha he, me laba me Samuela hnyi Naioth. 19 Ke adre me thumetu Saulo, ka habe, Wá bi, e but Davita Naioth hnyi Rama. 20 Me Saulo ame kuná tavat he ka hum Davita: ke ödrin e wá bunyen perofeta adre me perofeta, k' ame tot Samuela helá me homakan ködrin, me ame o hanon Khong ka tavat a je atö Saulo, m' ödrin e hnyi perofeta minya. 21 Me adre me thumetu Saulo, me e ame kuná ke je hnyat, me ödrin e hnyi perofeta minya. Ke Saulo ame kuná ke je hnyat minya a okuniny, me ödrin e hnyi perofeta minya. 22 Me e ame he Rama ai me o ka hnyi an ae gan hnyi Seku: ke e ame hnei, ka habe, Ewa Samuela me Davita? Me haingen ke at, ka habe, Wá bi, ödru but hnyi Naioth hnyi Rama. 23 Me e ame he ká e Naioth ai hnyi Rama: ke ame o minya káu hanon Khong, me e ame perofeta tot ke ne o but Naioth hnyi Rama. 24 Ke e ame uny jut je úkhaúen, ke e ame hnyi perofeta minya hnyi hnyimakö Samuela, me mokut ke ba úkhaú hnyi bong hia eling me lit hia. Anyin a wale adre me ha, ka habe, Hawa, tha Saulo minya but me je perofeta?

HNHYIMAKAN 20.

KE Davita ame kec úheny Naioth hnyi Rama, me he me ha hnyi hnyimakö Jonathana, ka habe, Ieú oge me ányá? ke ieú anyik hulö? ke ieú kongik hnyi hnyimakan kámám, me me elám he ka hlingö nya? 2 Me haingen, ka habe, E so adre me thawá: m' u me ca he ka mok: wá bi, ama ca ányá ke únyi cica, ame ne gan ame ne úhnyúkong, ke ame bán ka omanená kõnya: ke hnán ieú ame he cica ka ikhálá gak únyi eling? ame ca hnathu bi. 3 Me

Davita ame khemanyin, me ha, ka habe, E khana wia kámám a u me betenge gak; me haingen, ka habe, E so Jonathana ame ca löng e, wá e nye vec ut: je kia inya Iehova, ke kia inya u, a e okhaca biju okca me oge me he ka mok. 4 Ke Jonathana ame ha kö Davita, ka habe, haba únyi u me he ka ha, me oge me he ka ányá hobi köu. 5 Ke haingö Davita kö Jonathana, ka habe, Wá bi, tehi ae teb únyi nyi, ke hanmök he ka tha laba me than he ka hnyi han: ke hnö nya but he ka lubaduöng hnyi utkáná ke ne o but hnyi sahacin bong a kuniny. 6 Ame ne hnei nya kámám, u me he ka ha, ka habe, Ame sumat újöngi nya Davita he ka wadring Bethe-leema ai wale anyin taun: anyin ae hu hudiny huna eling hobi káu anyin lap hia. 7 Ame ne ha, ka habe, E so; me ame he ka hnabic athnyabaem: ke ame ne gan anyin hmönyin, awe, khanö u thö a ga hia but ip hnök. 8 Anyin a wale e so u me ányá betenge ka athnyabaem; anyin a u je hia but hum nya athnyabaem ka hnyi úhihinyköu anyi Iehova: ke ame ne e unyik hulö, hamám he ka hlingö nya; anyin a hnán eú he ka hum nya ka kámám? 9 Ke haingö Jonathana, ka habe, Ohe, e ba e: anyin a ne khanö nya a cica ame ip hnám, hawa, oge me ca he ka ha köu? 10 Ke Davita ame ha kö Jonathana, ka habe, Hamö ia he ka ha kõnya ame ne thu hwegiá kámám? 11 Ke haingö Jonathana kö Davita, ka habe, Ötu he ka hnyi hnyei. Ke ödru me tha he ka hnyi hnyei.

12 Ke Jonathana ame ha kö Davita, ka habe, Hamö Iehova Khongon at Isaraela he ka ohnathoa; haba nyi hnyi úen helang ame ne we, iny ka hia but elám unyi cica, me wá bi, a ne so but kö Davita, hawa, oge me ca he ka úkhúnöng köu me omanená köu? 13 Ke so Iehova ame ányá heláe kö Jonathana, me bi hanen minya, ame ne so kö cica he ka okongu u, me oge ne ca omanená köu, me kunö u, me u me he ka he hnyi hnabic: ö e tha Iehova möu helá me hnen hna tha e me cica e hac. 14 Ke u me he ka omanená kõnya ibetengö únyi ga Iehova inye tiga möt, me inye ca mok: 15 ke walang minya u me ca he ka subá degecá ányám ibetengö ge anyik lap nyiele balua: wale e ka hia but subá degecá je iwahnaihmiöny me Davita hia únyi eang hmeledrany ga Iehova. 16 Me haba Jonathana ame úhihinyköu me lap anyi Davita, me ha, ka habe, Ame e Iehova ka elám e unyin je iwahnaihmiöny me Davita. 17 Ke

Jonathana ame kunö Davita hmetu he ka khemanyin, can anyin ibetengiö gan: anyin a e ame betenge gan helä me hing hanon bi. 18 Ke Jonathana ame ha kâu, ka habe, Nyi, me tehi ae teb ünyi: ke adre me he ka hnei u, anyin ae ba at hnyi tabâm tap. 19 Ke kun biju bongom, me u me he ka ie he me o ka hnyi dok waleji u je ikhölö hnyin hnyi bong ae hu hwakecin, ke u me he ka laba hnyi veto Azela. 20 Ke oge me he ka fana kun ta fana hnyi baten, heläke oge me vakha. 21 Ke wâ bi, oge me he ka kunâ da, me ha, ka habe, Wâ thö he ka elâm je fana. Ke oge ne ha ka da, ka habe, Wâ bi ke keihâm e jem je fana: awe, u ma hom dö me he jem; anyin ae hu hnahic köu, ke ba kong, ke kia inya Iehova. 22 Ke oge ne ha ka da, ka habe, Wâ bi, hnyi ke keihâm hâang je fana: awe, u me he but, anyin a Iehova ame kunö u. 23 Ke haba hofuc ötu me ünenamö, wâ bi, e bi Iehova hnyi wanbötu nyiele balua.

24 Me Davita ame ikhölö hnyi utkânâ: ke ame laba thö tehi, me ame laba ju je than he ka tha han. 25 Ke ame laba than hon taben tap, helâji me hnyi je üen, wale hon tap hnyi hnyeige uma: ke ame todrö Jonathana, ke Abinera ame laba ütangköu me Saulo: ke ba at hnyi tap tabö Davita. 26 Ke so bi e ba hofuc ho Saulo hnyi bong eling: anyin a haingen, ka habe, Ame ne o kâu ke ünyi, ame ne ca bo so; eke, e ca bo so. 27 Ke haba nyi, wale bong a loiny tehi, me ba bala at hnyi tap tabö Davita: me haba Saulo ame ha kö Jonathana a nokon, ka habe, Anyin a ieu ame ca he jem ka hnyi han nöku Jese, et me hnyi bong ang? 28 Ke Jonathana ame thu kö Saulo, ka habe, Davita ame sumâtâ ütöngi nya me me he Bethe-leema ai: 29 haingen, ka habe, Ö u hnö nya but, anyin ame he anyihmun lap hnyi taun he ka bi hut; ke haba tuhök ame hia but hûna kõnya he ka hnyi hanen: ke walang ang u je ne betenge gak, ö u me hnö nya but he ka iouny me je liamekeiny mönya. Can e, me me ca he jem ka hnyi laulau anyin than. 30 Me ame ubâhlâ hmönyin anyi Saulo kö Jonathana, me e ame ha kâu, ka habe, Nokon momo hwege hnyimen me at ükhin fuc, hawa, e ca khanö nya a u je üca nöku Jese he ka ohmehma u bi, me ohmehma hinyâm e ka he thu? 31 Ke hnyi ta je üen hia thithö e ka tiga möt bala bi eang hmeledrany nöku Jese, u me ca he ka tethmä me dokhom dökhü. Ke ükhünöng dö walang ang me hom e

kõnya, anyin e hnathu e ame he ka mok. 32 Ke Jonathana ame thu kö Saulo a kamen, me ha kâu, ka habe, Can ieu e ame he ka mok? ieu hnen hna ânyâ? 33 Ke Saulo ame khûâ dân ö kâu he ka dâ e: anyin a wale ame wâhmakhmeto Jonathana a kamen ame ip hmâ hnân, he ka hlingö Davita. 34 Ke haba Jonathana ame todrö üheny hnyi laulau, ke ame ubâhlâ anyin hmönyin, me e ame ca hnyi han hnyi bong a loiny tehi: anyin a e ame tenge ga Davita, anyin a ohmehma e kamen.

35 Ke nyi Jonathana ame dit ka hnyi hnyeie waleji hnyi üen a ha kö Davita, ke tha e më ke da ae ühnyükong. 36 Ke e ame ha ka da unyin, ka habe, Wadring dö walang ang he ka elâm je fana oge me he ka fana. Ke ame tiga wadring da, me a ame fana ke fana ka hnyi hnyimakan. 37 Ke ame o thö da ka hnyi dok a e hnyin fana, wale a fana Jonathana, me haba Jonathana ame ha ka da, ka habe, Hawa, e ca e fana hnyi hnyimakâm? 38 Ke Jonathana ame hongot ka da, ka habe, Logotö, hele thö, ca bec bi. Ke da anyi Jonathana ame hlo je fana, me hom ka tuhan. 39 Ke ca khana da a ke ünyi bi: ke Jonathana thibi me Davita ödru me wâhmakhmeto. 40 Ke Jonathana ame ham anyin je ünyi vat ka da unyin, me ha kâu, ka habe, Hom dö ka hnyi taun. 41 Ke a he but da, me Davita ame o üheny hnyi hwaiöu, me ta hnyikânâi, me okun nom: ke ödru me ücimhnyimak, me ütengiö, ke beönua tenge a Davita. 42 Ke Jonathana ame ha kö Davita, ka habe, He thö me hnahic, anyin öte hia but khemanyin hnyi iö Iehova, ka habe, Ame he ka e wanbötu Iehova, me mâtrânitu nyiele balua. Me e ame tot me he: ke Jonathana ame hmetu ka hnyi taun.

HNYIMAKAN 21.

ME ame o but Davita hnyi Nob kö Ahimelek at bihut: ke Ahimelek ame he he ka ükhanö me Davita hnyi öbubuny, me ha kâu ka habe, Ieu ang a hake u thibi, ke ba at a tha he möu? 2 Ke haingö Davita kö Ahimelek at bihut, ka habe, A kunö nya than ka ke ünyi, haingen kõnya, ka habe, Ca he ke at ka löng ünyi oge me he ka kunö u kâu, me ünyi oge me hûna köu: ke oge hia but kunâ wahidrüu ka hnyi ke dok me ke dok. 3 Ke ieu ünyi eang unyâm? ö u ham kõnya je areto a thabúng, ame ne ke ünyi bi ae hu. 4 Ke

ame thu kö Davita at bihut, ka habe, E ba areto ae baú unyik, ke hu areto ae kap; wale thibi ame ne ca kálá omomo hnen wahidróu. 5 Ke Davita ame thu ka at bihut, me ha káu, ka habe, E hnathu öbmun e ca kálá omomo helá me kun ta bong; hwán hnyi hnök hna he jem me kap ta je únyi anyin je hidróu, ke so bi únyi baú hnömun hna he; hawa, ame ca bo so hnyi bong ang anyidrin ta je únyi? 6 Me haba at bihut ame ham káu únyi ae kap; anyin ae ba minya ju ke areto eling, ke so thibi areto hnán omanená, wale adre me hom únyi hnyi hnyimakö Iehova, m' adre ip bi areto ae kahwa hnyi bonginy hna hom e. 7 Ke wale ke athnyabai Saulo hnyi bong eling, adre me tuó hnyi hnyimakö Iehova, Doega ien, at Edoma, a taben tavat tuó omeno hale Saulo. 8 Ke Davita ame ha kö Ahimelek, ka habe, Hawa, e ba ö, ame ne hele vat eang unyám? anyin oge me ca hom anyik hele vat me anyik je únyi vat, anyin a haba huliwa anyin than, me, hnán ányá logotá. 9 Ke haingen at bihut, ka habe, Haba hele vat anyi Goliatha at Filisiti, at u je kot hnyi hnyigöulen bucen Ela, wale but ang adre lan ge ecmano, ame mokut hoton iefoda; u je ne wem he ka hom e, hom dö: anyin ae ba hanen eang, ke hake e thibi. Me haingö Davita, ka habe, Hó jem; anyin ae ba khaca a heláe.

10 Ke Davita ame tot me kec hnyi bong eling can hna outö Saulo, me he kö Akisa thaniny Gatha. 11 Ke haba lathnyabai Akisa ödrin e ha káu, ka habe, Hawa, ca Davita ang, tuhan hnyei? hawa, ödrin e ca sitwhanán hnyi je bibiá, ka habe

Saulo ame hia but kot haniny je thauzan,

Ke Davita bi, haniny je ten thauzan?

12 Ke Davita ame ip hmâ hnyi hnyekon ta je hofuc eling, ke gan hmâ hna outö Akisa thaniny Gatha. 13 Ke e ame oke-bongoná hwakecin hnyi hnyimaködrin, me monu thoi unyikrin, me sisit hon li hlinginy homagöüle, me ányá hangöc ka hnyi wainy. 14 Ke Akisa ame ha ka lathnyabainy, ka habe, Wá bi, öbun e wá a ga monu but at: ieu gabun öbun e hia but hom e könya? 15 Hawa e ba but je at ae monu unyik, me öbun e hom khop ang he ka monu hnyi hnyimakök? hawa, ame he ka dit khop ang ka hnyi umök uma?

HNYIMAKAN 22.

KE Davita ame he úheny e, me kec ka hnyi op Adulama: ke a löng ut je liamekeiny mē ke lap hia anyin kamen, me ödrin e he káu eling. 2 Ke ame úkhacaköu unyin tavat hia ae hu hmak, me tavat hok gufa hia, me tavat hia ae hiny hnyekudrin; ke e bi taben ködrin: ke e unyin helá me foa haded tavat.

3 Ke Davita ame he úheny e Mizepa ai hnyi Moaba: Ke e ame ha ka thaniny Moaba, ka habe, E na he ju cica me bai jem, ka laba unyibun, me inye wá thö únyi ame he Khong ka ányá hobi könya. 4 Ke e ame hum ödru ka than Moaba, ke ödru me tha laba mē hnyi ta je bong hia thithö ame laba Davita hnyi hñabá. 5 Ke haba Gada perofeta ame ha kö Davita, ka habe, Ca laba bi hnyi hñabá; he thö, me he ka hnyi hnyei Juda. Me Davita ame he me o hnyi hnyot hnyi Hareth.

6 Ke a löng ut Saulo a g' adre ö Davita me tavat unyin: ke Saulo ame me laba hnyi Gibeá, eú hmelen úö hnyi Rama, ke e hnyi hnyamen dân ö, k' ame tot igigilö lathnyabainy. 7 Ke Saulo ame ha ka lathnyabainy ödrin e tot unyin, ka habe, Löng ju öbun walang ang hnyat Beniamina; hawa, ame he nöku Jese ka ham köbun je utkáná, me je hnyei vine, me otil' öbun hia hnán taben je thauzan me taben je haded; 8 m' öbun e úsabö hnök, ke ba at ame thumetu nya a g' ame úhinhnyköu nöku me nöku Jese, ke ba at gabun amé betenge gak me omanená könya a g' ame huliwan athnyabaik hnen nöku he ka bi hnök helá me hnyi bong ang? 9 Me ame thu Doega at Edoma, k' ame tot unyin lathnyabai Saulo, me ha, ka habe, Oge wá nöku Jese ame he nnyi hnyei Nob kö Ahimelek nöku Ahituba. 10 Ke at eling ame elám unyi Iehova hobi káu, ke e ame hán, me ham káu hele vat anyi Goliatha at Filisiti. 11 Me haba than ame úkhúnöng he ka hum Ahimelek at bihut a nöku Ahituba, me lap hia anyin kamen, a tavat bihut hnyi Nob: me ödrin e o hia thithö ka than. 12 Ke haingö Saulo, ka habe, Nöku Ahituba lö, löng ju walang ang. Me haingen, ka habe, Tuhök lö, inya ang. 13 Ke haingö Saulo káu, ka habe, Can ieu öbe úsabö hnök, a u me nöku Jese, waleji hnyi hnám hna hán, me ham káu hele vat, me elám unyin Khong hobi káu, me me tot könya, me ip hnök helá me

hnyi bong ang? 14 Me Ahimelek ame thu ka than, ka habe, Ke ie at ae hnathu unyin lathnyabaem hia helâ me Davita, a úngon than, k' adre hom ka hnyi ányâm úhnenamö, me ogânâ hnyi hnyabam? 15 Hawa, oge me ibi hwân hnyi bong ang he ka elâm unyin Khong hobi kâu? Ohe, ca helâe : ca he than ka únykûmi nya a athnyabaem me lap hia anyi cica : anyin ae ca khana athnyabaem ke únyi eling, ame ne úhnyûkong, ame ne gan. 16 Ke haingen than, ka habe, Ahimelek, u me he ka mok, u me lap hia anyin kâmâm. 17 Meame ha than ka tavat adre me labö tot unyin, ka habe, Hwiö th' öbun, me hlingâ hnyat bihut kö Iehova ; anyin ödrin e tha hien me Davita, ke e khan' ödrin a e ame kec, me ödrin e ca omanená könya. Ke lathnyabainy than ödrin höcö he ka inâ je hnyamödrin he ka kot hnyat bihut kö Iehova. 18 Me ame ha than kö Doega, ka habe, Hwiö thö u me kot hnyat bihut. Me ame hwiö Doega at Edoma me kot at bihut ; me e ame hlingâ hnyi bong eling eite faiv tavat ödrin e khavâ iefoda lino. 19 Ke e ame kot Nob taun anyin tavat bihut ge hele vat, obaga me omomo, je wanakat me mendreng, me je bolok, me asina me mamoe, ge hele vat. 20 Ke ame kec möt ke nöku Ahimelek nöku Ahituba, Abiathara ien, me kec kö Davita. 21 Ke Abiathara ame thumetu Davita ge hna kot tavat bihut kö Iehova ga Saulo. 22 Haba Davita ame ha kö Abiathara, ka habe, E khanö nya hnyi bong eji a eling Doega at Edoma, a g' ame he ka thumetu Saulo : oge hia but bi jönniny tavat hia hnyi lap anyin kâmâm. 23 Tha laba ju mönya, ca ot bi ; anyin a haba at ama elâm he ka hlingö u, e ame elâm he ka hlingö nya : anyin a u me he ka laba so unyik.

HNYIMAKAN 23.

KE adre me ha kö Davita, ka habe, Wâ bi, ame vat at Filisiti me Keila, ke ödrin e hügúnâ je hna huje whit. 2 Anyin a wale Davita ame hnö ga Iehova, me ha, ka habe, Hawa, oge me he ka he me kot at Filisiti eling? Haba Iehova ame thu kö Davita, ka habe, He thö ka kot at Filisiti, me omelö Keila. 3 Ke haba je atö Davita ödrin e ha kâu, ka habe, Wâ bi, ötin ka ot eang Juda : hawa, ame ca he ka ti gan hnötin hna ot ötin ka he Keila ai ka je utbavat anyin at Filisiti? 4 Ke Davita

ame hnö hmetu unyi Iehova. Ke Iehova ame thu kâu, me ha, ka habe, Todrö, he thö Keila ai ; anyin oge me he ka hna at Filisiti ka hnyi hnyamâm. 5 Me Davita me lahien ödrin e he Keila ai, me vat me at Filisiti, me sö haledrin je meno, me kuc ödrin ge hna hlingâ ae gan. Me Davita ame omelö at Keila.

6 Ke haba hnyi úen ame kec dö kö Davita hnyi Keila Abiathara nöku Ahimelek, me e ame o me iefoda hnyi hnyamen. 7 Ke adre me thumetu Saulo a g' ame o Davita hnyi Keila. Ke haingö Saulo, ka habe, A hia but Khong hna e ka hnyi hnyamök ; anyin adre me hlöng hwanumen kâu, k' ame dit ka hnyi taun ae hu homagöuleny me ohmäiny. 8 Me Saulo ame ok vat, a tavat hia, he ka he Keila ai me theling Davita me lahien. 9 Ke e khanö Davita but a Saulo ame elâm he ka okongö, me e ame ha kö Abiathara at bihut, ka habe, Hö jem iefoda. 10 Haba Davita ame ha, ka habe, Iehova lö, Khongu Isaraela, inya athnyabaem oge me löng a g' ame be he jem Saulo, Keila ai he ka obia taun cak. 11 Hawa, ame he at Keila ka hnö nya ka hnyi hnyamen? ke ame he ka o Saulo, helâ me hna löng gak a athnyabaem? Iehova lö, Khongu Isaraela, ö u thumetu nya thö a athnyabaem. Me Iehova ame ha ka habe, E ame he ka he jem. 12 Me haingö Davita, ka habe, Hawa, ame he at Keila ka hnö nya me lahiök ka hnyi hnyamö Saulo? Me haingö Iehova, ka habe, Adre me he ka hnö u. 13 Me ame todrö Davita me lahien, ame ne siks haded ödrin, me didrut úheny Keila, me he hnyi je gethen ae khan' ödrin he ka he hnyin. Ke adre me thumetu Saulo a g' ame kec ut Davita úheny Keila ; me e ame digic he.

14 Ke haba Davita ame laba hnyi hnyebuba hnyi je hnabâ, me laba hnyi hnyei ae hut hnyi hnyebuba Zif. Ke Saulo ame elâm e hnyi je bong, ke Khong ame ca hna e kâu. 15 Me a wâ but Davita a g' ame he but Saulo he ka elâm anyin möt : ke e bi Davita hnyi hnyebuba Zif hnyi hnyot. 16 Ke ame todrö Jonathana nöku Saulo, me he kö Davita hnyi hnyot, me sihwegia unyin Khong. 17 Me e ame ha kâu, ka habe, Ca ot anyin ame ca he cica Saulo ka ö u ; ke u me he ka tuhan Isaraela, ke oge me he ka loiny hmelâm ; ke haba hbaca, e khanö cica Saulo ling. 18 Ke ödru me úhibinyköu hnyi hnyimakö Iehova. Ke Davita ame laba hnyi hnyot, ke Jonathana

ame he ka hnyi umen uma. 19 Ke haba at Zif, ödrin e he Gibeä ai kö Saulo, me ha, ka habe, Hawa, ame ca lubaduöng unyihmun Davita hnyi je hñabâ hnyi hnyot, hnyi hut Hakila, wale hnyi ke keihen ka hnyi hwaïouiny Jesimon? 20 Anyin a wale, than lö, u me he ka utut helâ me wem; ke haba öhmun e he ka hna e ka hnyi hnyamen than. 21 Me haba Saulo ame ha, ka habe, E so öbun e hnahic únyi ga Iehova; anyin a öbun e betenge gak. 22 Ö öbun he thö, ka me okhaca tuö, me wâhmakhmeto thö hnen hna lubaduöng hnyin, ke ia a wâ eling: anyin adre ha könya, ka habe, e ame ti metâ. 23 Anyin a wale wâ eäu, me khana wia je dok hia wale e ame lubaduöng hnyin, ke hmetu thö könya me hnathu, ke oge me he ka tha he möbun: ke wâ bi, ame ne e bi hnyi hnyei oge me he ka elâm e wanben je thauzan anyin at Juda hia thithö. 24 Me ödrin e tot me bödrin Zif ai, ke a bili Saulo: ke e bi Davita me lahién hnyi hnyebuba Maon, hnyi dok ae tha hon ke keihen ka hnyi hwaïouiny Jesimon. 25 Ke ame he Saulo me je aten he ka elâm. Ke adre me thumetu Davita: me e ame utut ka hnyi kic, me laba hnyi hnyebuba Maon. Ke Saulo ame löng, me e ame elöm Davita hnyi hnyebuba Maon. 26 Ke Saulo ame he hnyi ke keihen e jem bucen, ke Davita me lahién hnyi ke ke keihen: ke Davita ame logot he ka kec k' ame outö Saulo; anyin a Saulo me lahién ödrin e igigili Davita me lahién he ka köt ödrin. 27 Ke ame o kö Saulo úthumetu, me ha, ka habe, Logotö, me he jem; anyin a utut at Filisiti ka hnyi hon hnyei. 28 Me Saulo ame hmetu úheny hnyi hna hnu Davita, me he ka at Filisiti: anyin a wale adre me hwenyi ién hnyei eling me Sela-hamalekoth. 29 Ke Davita ame he úheny e, me laba hnyi je hñabâ hnyi Eni-gedi.

HNYIMAKAN 24.

KE a hmetu Saulo úheny hnyi hna hnu at Filisiti, me adre thumeto e, ka habe, Wâ bi, e but Davita hnyi hnyebuba Eni-gedi. 2 Me Saulo ame hom kun ta thauzan tavat adre úca anyin at Isaraela hia, me he he ka elâm Davita me lahién hon je kic hnyeuten je got ae hiny. 3 Ke e ame o but hnyi je haginymamoe eü hnyi gethen, wale ae hu op; ke Saulo ame didrö he ka tube li can. Ke Davita me lahién

ödrin e laba hnyi je ouben op. 4 Ke haba je atö Davita ödrin e ha kâu, ka habe, Wâ bi, bong a ha Iehova köu, ka habe, Wâ bi, oge me he ka hna je iwahnaihmiöny möu ka hnyi hnyamâm, ke u me he ka ányâ kâu únyi ae so köu. Ke Davita ame todrö me subâ higö but obiny úkhaú Saulo. 5 Ke hwaban e, me ame dá hnyeku Davita can e ame subâ obiny úkhaú Saulo. 6 Me e ame ha ka lahién, ka habe, E so Iehova ame thawo nya he ka ányâ únyi ang ka tuhök, at Iehova ame hú, he ka inâ hnyamök kâu, anyin a e bi at a hú hnö Iehova. 7 Ke Davita ame thawâ lahién ge je hofuc eling, k' ame ca hn' ödrin he ka tot kö Saulo. Ke Saulo ame todrö me he úheny hnyi op hnyi deny gethen. 8 Ke Davita ame tot hwaban e me didrut úheny hnyi op, me hongot hotu Saulo, ka habe, Tuhök, than lö. Ke Saulo ame hwiö, me Davita ame nom me hnyimakan hnyikânâi, me oganá, 9 Ke Davita ame ha kö Saulo, ka habe, anyin a ieü u me löng ta je hofuc hwan tavat, ka habe, Wâ bi, Davita ame elâm he ka okongu u? 10 Me wâ, haba hnyi bong ang a wâ but li emákâm a Iehova ame hia but hnö u eja ka hnyi hnyamök hnyi op: ke a ha könya ke je hnyat he ka hlingö u: ke so bi oge me betenge gam, me oge me ha, ka habe, oge me ca he ka inâ hnyamök ka tukök; anyin a e at Iehova ame hú. 11 Ke haba khaca, wâ bi, cica lö, me wâ bi obiny ányâm úkhaú eang hnyi hnyamök: ke oge me subâ obiny ányâm úkhaú me ca hlingö u, anyin a wale khañö u thö me wâ a e ba únyi ae kong me hulö unyik, ke ca kong hwakecik köu, eja ke ne u je ne elâm melik he ka obia. 12 Hamö Iehova he ka owisa kötu, ke hamö Iehova he ka bi hwaban köu gak: ke so bi ame ca he hnyamök ka mokut hom. 13 Helâji me wejec ehac anyin wahingat, ka habe, Ame o únyi ae kong únyi ge at ae kong: k' ame ca he hnyamök bi ka mokut hom. 14 A o but tuhan Isaraela kö ia? ie at u me hnu hoton? ame ne kuli ae mok, ame ne outo ame fifica. 15 Ke hamö Iehova he ka úhnö me owisa kötu, me wâ, me ivinö hobi könya, me hnö nya únyi hnyi hnyamâm. 16 Ke a hia but Davita ha ta je hofuc eling kö Saulo, me haba Saulo ame ha, ka habe, Hawa ifucâm e Davita, nokuk? Me Saulo ame tenge göranyai. 17 Me e ame ha kö Davita, ka habe, U at ae wisa k' iny monu: anyin a u je bi hwaban könya ge so, ke oge me bi hwaban köu ge kong. 18 Ke u je

omanenâ hnyi bong ang a u je ânyâ so kõnya: anyin a u je ca hlingö nya, hnyi üen Khong ame hnö nya ka hnyi hnyamâm. 19 Anyin a ne ke at ame wâ iwahnaihmiony mē, hawa, e ame he ka hna soâ e? anyin a wale e so ame he Iehova ka bi hwaban kōu ge so hwaban hnām hna ânyâ kõnya hnyi bong ang. 20 Ke walang ang, wâ bi, e khañö nya a u me he ka than, ke adre me he ka ohmâ dōkhu Isaraela hnyi hnyamâm. 21 Ke walang ang, khemanyin dö kõnya ga Iehova a u me ca he ka subâ degecâ je mâtânik hwabök, me ca he ka ohia iök ünyi hnyi lap anyi cica. 22 Ke Davita ame khemanyin kō Saulo. Ke Saulo ame he ka hnyi hnyaban, ke haba Davita me lahien ödrin e ölö hmetu ka hnyi hnabâ.

HNYIMAKAN 25.

HABA Samuela ame mokcu; me ame úkhacakōu Isaraela hia thithö, me tenge gan, me konâm e hnyi umen uma hnyi Rama. Ke Davita ame todrö me he ka hnyi hnyebuba Parana.

2 Ke e hu ke at hnyi Maon, ae tren ta ünyi hnyi Karemela; e bi at ae ünyi hnathu, ke kun ta thauzan haleny je mamoe, ke khaca thauzan je got: ke e ame tiga subâ leünen halen je mamoe hnyi Karemela. 3 Haba ien at Nabala; ke Abigaila ien âiân: ke haba momo at ae ti metâ, ke hmanenang hnyimakan: ke at ae wathethöt бага, me kong hwakecin; ke e hanen lap anyi Kaleba. 4 Ke a löng ut Davita hnyi hnyebuba a Nabala ame subâ leünen haleny je mamoe. 5 Haba Davita ame kunâ je hidröu a ten, ke Davita ame ha ka je hidröu, ka habe, He th' öbun Karemela ai, me o unyi Nabala, me iouny mē hnyi iök: 6 ke öbun e he ka ha heläng kâu, wale at ame sot hnyi anyin möt, ka habe, Hnahic kōu, me hnahic ka ânyâm lap, me hnahic ka ânyâm ta je ünyi hia thithö. 7 Ke walang ang oge me löng ae hu gam tavat subâ leünen mamoe: ke haba tavat tuö halem mamoe ödrin e hia but tha e möhmun, ke öhmun e ca okongu ödrin, ke ca hia gadrin ke ünyi hnyi ta je bong hia thithö, ke tiga ödrin bi hnyi Karemela. 8 Hnö thö ânyâm je hidröu, me ödrin e he ka thumetu u: anyin a wale e so u me betenge ge je hidröu; anyin a öhmun e o but hnyi bong ae so: ö u ham dö je ünyi ae hu gam ka athnyabaem me nokom a Davita. 9 Ke ame o but wahidröu anyi

Davita, me ödrin e ha kö Nabala ta je hofuc hia eling hnyi iö Davita me ame um dö. 10 Ke haba Nabala ame thu ka lathnyabai Davita, ka habe, Ia Davita? ke ia nöku Jesse? E se hia lathnyaba adre me ve hna degecâ latuhödra hnyi je bong ang. 11 Hawa, oge me he ka hom anyik areto, me belik köiö, me meno oge hlingâ hobi kâu hnyat subâ leünen halek mamoe, me ham ka tavat ae ca khañö nya dok adre mwi hnyin? 12 Me ame hwio wahidröu anyi Davita, me hmetu, me o, me thumeto e ge je hofuc eling. 13 Me Davita ame ha ka lahien, ka habe, Ve hûkälâ ju anyibun je hele vat. Me ödrin e ve hûkälâ anyidrin je hele vat; ke Davita ame hûkälâ minya anyin hele vat: ke ame he hotu Davita helâke foa haded tavat; ke lo biju li haded ame tuö ta je ünyi. 14 Ke haba ke hidröu ame thumetu Abigaila öiö Nabala. me ha, ka habe, Wâ bi Davita ame kunâ tavat üheny hnyi hnyebuba he ka iouny so me tuhötin; me e ame ü ödrin. 15 Ke e ti so hwakecin tavat köhmun, ke adre ca okongu öhmun, ke ca hia bi unyihmun ke ünyi hnyi ta je bong hia thithö öhmun e tha laba hnyin mödrin, ke tiga öhmun hnyi hnye: 16 haba ödrin me helâ me hak veto köhmun hnyi lit me lany, hnyi ta je bong hia thithö öhmun e tha laba mödrin he ka tuö je mamoe. 17 Ke walang ang khañö u thö me ünyküme wia ünyi u me he ka ânyâ, anyin ödrin e ip hnân ka tuhötin me anyin lap hia: anyin a e atö Belial me ca khana ke at ka fuc kâu. 18 Me Abigaila ame ie hom je areto a tu haded, me li waina, me faiv ta mamoe adre hia but penapena, me faiv ta tulut hwit adre le, me khaca haded je de wan vine adre hlec meleca, me lo li haded ü ometa, me ip hon je asina. 19 Me ame ha momo ka wahidröu unyin, ka habe, Böbun do, ke wâ bi, ama bilik bi. Ke e ame ca thumetu Nabala a âiân. 20 Ke haba momo ame tabâ asina, ke hnyi üen e ame utut ka hnyi dok ae nedronginy bucen. me wâ bi haba Davita me tavat unyin ödrin e utut me o kâu; me momo ame ukhañö mödrin. 21 Ke a hia but ha Davita, ka habe, E hnathu, e ünyi baü hnök hna tuö ta je ünyi anyin khop ang hnyi hnyebuba, me me ca hia bi ke ong ünyi hnyi ta je ünyi hia gan: ke e ame hia but bi hwaban kõnya so ge kong. 22 E so Khong ame ânyâ helâe me bi hanen ka je iwahnaihmiony me Davita, oge me ne he ka bi kolon ke da a khaca hnyi ta je

ányi hia thithö unyin e ka o thö lany hnyi hnyomakatu. 23 Ke a ö Davita hnö Abigaila, me e ame ie utut üheny hon asina, me nom ju hnyi hnyimakö Davita, me khudrung hnyikânâi. 24 Me e ame ta ju hnyi li can, me ha, ka habe, Tuhök, e so e ta huk hulö : ö u me hna athnyabaem he ka fuc hnyi hnyikönyâm ke löng ju hofuc hwan athnyabaem. 25 Ö u ca he tuhök ka ti únykúme ge at e, a atö Belial, jia Nabala : e úcú ien mē ; Nabala ien bi, ke monu ame laba unyin : ke inya athnyabaem oge ca wâ anyâm je hidröu, wale u je kunâ. 26 Ke walang ang tuhök, kia inya Iehova, me kia inya u, anyin a Iehova ame thawo u, me u me ca he ka hingälâ monoâ dra, me bi hwaban hobi köu ge hing hnyamâm, ke walang e so e helâ Nabala je iwahnaihmiony möu, me tavat ödrin e elâm únyi ae kong hobi kâu tuhök. 27 Ke walang ang haba bwihlany eâ wale a hom athnyabaem ka tuhök, ham dö ka je hidröu, tavat ödrin e he hoton tuhök. 28 Ö u hna but monu anyin athnyabaem : anyin ame he Iehova ka anyâ hobi kâu tuhök lap ae tethmâ, anyin ame vâtâ tuhök je vat anyi Iehova ; ke adre me ca he ka wâ hulö unyâm hnyi anyâm je bong hia. 29 Eja ke ne a ne hia but tot at he ka hnu u, me elâm he ka hlingö u, ke so bi adre me he ka tha lan hanom hnyi bwiny möt unyi Iehova Khoagom ; ke haba hanon je iwahnaihmiony möu e ame he ka kúlûa degecâ, helâ ke üheny hnyi hnyimen kolöu. 30 Ke e ka hia but Iehova anyâ ka tuhök, helâ me ta je únyi hia thithö ae so e ame ha gam, me otillö u hnân taben Isaraela ; 31 ca hnân otengiö u, me ovecâ hnyekon tuhök, wale ge hnen hna hingälâ dra ke ba can, me bi hwaban hobi kâu bi hnen tuhök : ke e ka hia but anyâ Iehova so ka tuhök, u me he ka únykúme ka athnyabaem. 32 Ke Davita ame ha kö Abigaila, ka habe, Ole kö Iehova Khongu Isaraela at ame kunö u he ka úkhanö mönya hnyi bong ang : 33 ke oleâ anyâm metâ, me oleâ köu bi, at ame thawo nya hnyi bong ang he ka ca hingälâ dra, me bi hwaban hobi könya bi ge hing hnyamök. 34 Ke kia inya Iehova, Khongu Isaraela, at ame thawo nya he ka ca okongu u, ke e hnathu a u je ne ca logot me he jem he ka úkhanö mönya, me, ame ne ba kolon kö Nabala da a khaca e ka o thö lany hnyomakatu. 35 Ke Davita ame kap ge momo únyi e ame hom kâu : me e ame ha, ka habe, He thö me hnahic ka hnyi umâm

uma ; wâ bi, oge me löng hwâm hofuc, me köb u bi. 36 Ke Abigaila ame o kö Nabala, ke wâ bi, e ame anyâ bijeu hnyi umen uma, helâ me bijeu anyin than ; ke Nabala ame senyin hnyi hnyekon, ke ti monu a ga ic : anyin a wale momo ame ca thumeto e ge ke únyi ame ne úhnyükong ame ne gan ke ne o but hnyi lany hnyomakatu. 37 K' ame hia but waina unyi Nabala hnyi hnyomakatu, me haba aiân ame thumeto e ge ta je únyi eling, me e ame gâ on, ke haba e, me helâ thibut ta veto. 38 Ke hwaban dö e, helâ me ten ta bong, haba Iehova ame kö Nabala, me me mokcu. 39 Ke a löng ut Davita a ga mokcu Nabala, me e ame ha, ka habe, Ole kö Iehova at ame ivinöâ hna ohmehmö nya ga Nabala me thawâ athnyabainy ge hulö : ke Iehova ame hia but ohmetoâ hulö anyi Nabala ka hnyi hon ban bi. Ke Davita ame úkhü-nöng he ka úhnenamö me Abigaila he ka hom me aiân. 40 Ke ame o lathnyabai Davita kö Abigaila hnyi Karemela, me ödrin e ha kâu, ka habe, A kun' öhmun Davita köu he ka hum u me aiân. 41 Me e ame tot me nom hnyikânâi, me ha, ka habe, Walö nya ang athnyabaem he ka bi athnyaba me hneu je can lathnyabainy tuhök. 42 Me Abigaila ame logot, me tot, me tabâ asina, a the me anyin je hlu baü a faiv ödrin e he hoton ; k' ame he hoton je úthumetu anyi Davita, ke aiân dö e. 43 Ke Davita ame hom Ahinoam minya üheny Jezerela ; ke tha aiân hia th' ödrü. 44 Ke a hia but Saulo ham Mikala a nokon öio Davita kö Paleti nöku Laisi, at üheny Galim.

HNYIMAKAN 26.

KE ame o but hnyat Zif kö Saulo hnyi Gibeä, me ha, ka habe, Hawa, ame ca lubaduöng Davita hnyi hut Hakila, cicö Jesimon ? 2 Ke haba Saulo ame todrö me utut ka hnyi hnyebuba Zif, ke tha e mē kun ta thauzan at Isaraela adre úca, he ka elöm Davita hnyi hnyebuba Zif. 3 Ke Saulo ame hunuma hnyi hut Hakila, cicö Jesimon, hnyi gethen. Ke Davita ame laba hnyi hnyebuba, ke e ame wâ a ga o but Saulo he ka elâm e hnyi hnyebuba. 4 Haba Davita ame kunâ je hnyat ecmak, me me khana ae hnathu a ga o but Saulo. 5 Ke Davita ame todrö me he ka hnyi dok ame hunuma hnyin Saulo : ke Davita ame wâhmakhmetoâ hna mokut hnö Saulo, me

Abinera nöku Neri, taben anyin utbavat : ke Saulo ame mokut hnyi dok hnân tot hnyin je kat, ke ame hunuma igigilö e tavat. 6 Ke Davita ame ha kö Ahimelek at Heth, me Abisai nöku Zerua, liamekeiny me Joab, ka habe, Ie at ame he ka tha utut mönya kö Saulo ka hnyi hna hunuma? Haingö Abisai, ka habe, Ötu he. 7 Me ame o but Davita me Abisai ka tavat hnyi hnyinghet : ke wâ bi Saulo ame mokut hnying hnyi dok ame tot hnyin je kat, ke adre otilâ anyin ö hnyi kânâ hnyi hunen : ke Abinera me tavat, ödrin e mokut igigilö e. 8 Haba Abisai ame ha kö Davita, ka habe, A hia but Khong äna ka hnyi hnyamâm iwahnaihmiöny möu hnyi bong ang : awe, ö iny he ka dâoâ e ka hnyi kânâ ge ö adre ma okhaca thibi dâ, ke ame ca he ka olo. 9 Haingö Davita kö Abisai, ka habe, Ca he ka hlingâ e : anyin a ie at ae khana he ka inâ hnyamen ka hna hû hnö Iehova, ke ba ju hulö gan? 10 Ke haingö Davita, ka habe, Kia inya Iehova, ke hamö Iehova ne ka kot e ; ame ne he ka o üen ame he ka mokcu hnyin ; ke ame ne he ka mekiny vat. 11 Iehova ame thawo nya, me inye ca he ka inâ hnyamök ka at a hû Iehova : ke ö u hom dö ö hnyi hunen me kaia ae lup, me ötu me he. 12 Me Davita ame hom ö me kaia ae lup ünyi hnyi hunö Saulo ; me ödru me he, ke ba at ame wâ, ke ba at ae khana, ke ba at ame hmak dö : anyin a ödra hia adre me mokut ; anyin a o but ködra mokut hnying ae gan ünyi ga Iehova. 13 Me haba Davita ame he ka hnyi ke keihen, me tot hon ban bucen ae sâkâü ; ke hu dok! ae lau hnyi wanbödrin : 14 ke Davita ame kuku ka tavat, me Abinera nöku Neri, me ha, ka habe, E, u me ca thu thö Abinera? Me Abinera ame thu, ka habe, U ia ame kuku ka than? 15 Haba Davita ame ha kö Abinera, ka habe, Hawa, u ca at ae hwege? ke ie at ae ücü möu hnyi Isaraela? ieu gam u je ca tuö tuhâm a than? anyin a o ke at eja ka kot than a tuhâm. 16 E ca so ünyi e u je änyâ. Kia inya Iehova, ke e ücü öbun he ka mok can öbun e ca tuö tuhöbun wale at a hû Iehova. Ke walang, wâ ju, ewa ö dân than, me kaia ae lup adre ip hnyi hunen? 17 Me haba Saulo ame löngmahkmeto ifuci Davita, me e ame ha, ka habe, Hwâm e, nöku Davita? Me haingö Davita, ka habe, Hok ang than lö a tuhök. 18 Ke e ame ha, ka habe, Ieu gam tuhök u me hnu athnya-baem? ke ieu oge änyâ? ke ieu hulö anyik.

19 Anyin a wale, e na he than a tuhök ka löng hofuc hwan athnyabaem. Ame ne ünyi ga Iehova hnâm hna tot könya, me so e ame he ka kap hut : ke ame ne ünyi ge tavat, me ödra ka hnaühangö hnyi hnyimäkö Iehova : anyin a ödrin e hia but öbö nya hnyi bong ang me me ca tha inya me jekhöü Iehova, me ha, ka habe, He thö ka athnyaba ke je khong bi. 20 Ke walang ang ca he ka hingälâ drök ka hnyi kânâ hnyi hnyimäkö Iehova : anyin ame he jem tuhan Isaraela he ka elâm outo ame fifca, helâ me hwakecin hnu meno ame gâ hon bucen. 21 Me haba Saulo ame ha, ka habe, E kong hwakecik : hmetu ju u, Davita nöku : anyin oge me ca he hmetu ka okongu u bi, anyin a haba anyik möt me e ünyi hnathu hnyi li emakâm hnyi bong ang : wâ bi, oge hia but änyâ monu, me ti monu gan hmâ. 22 Me Davita ame thu, ka habe, Than lö, wâ bi ö! kunâ thö jem ke hidröu he ka hom. 23 Ke ame he bi Iehova he ve bi hwaban ka tavat anyidrin hwakecin ae wisa, me anyidrin hwakecin ae hnathu : anyin a haba Iehova ame hnö u eja ka hnyi hnyamök, ke oge me ca wek bi nya he ka inâ hnyamök ka at a hû Iehova. 24 Ke wâ bi, adre me öunyi-hnathoâ änyâm möt eja ünyi gak, anyin a wale e so ame he Iehova ka öunyi-hnathoâ anyik möt, me so e ame omeli nya ünyi hnyi ta je vec hia thithö. 25 Ke haba Saulo ame ha kö Davita, ka habe, E so u me hnabic ut, Davita nöku u me he ka änyâ ünyi ae beönua, me he bala ka hwege. Ke Davita ame vheno deny gethen, ke Saulo ame hmetu ka hnyi hnyaban.

HNYIMAKAN 27.

KE haingö Davita hnyi hnyekon, ka habe, Oge me he ka mok hnyi ke bong ge hnyamö Saulo : khaca thibi ünyi ae so könya oge me he ka ie kec ka hnyi hnyeiny at Filisiti ; me ame he ka hia hna gejon hnö Saulo he ka elöm nya hmetu hnyi je hnyigöulen Isaraela : me oge me he ka kec möt helâe ge hnyamen. 2 Haba Davita ame todrö, me he hanyâüâ me je aten a siks haded a tha e më, kö Akisa, nöku Maoka, thaniny Gatha. 3 Ke Davita ame tha laba me Akisa hnyi Gatha, e me je aten, ödrin e ve laba hnyi je hnyabadrin, me Davita me laâian, jia Ahinoam at Jezerela, me Abigaila safaci Nabala, momc Karemela. 4 Ke adre thumetu Saulo, ka

habe, a kec ut Davita, Gatha ai, me e ame ca elâm hmetu.

5 Ke Davita ame ha kö Akisa, ka habe, U je ne betenge gak, ö u ham dö könya ke dok hnyi ke taun hnyi hulup, me inye he ka laba eling : anyin a ieu oge me he a athnyabam ka tha laba möu hnyi tauniny than? 6 Haba Akisa ame ham kâu hnyi bong eling Zikelag : anyin a wale iny je than Juda Zikelag ke ne o but hnyi bong ang.

7 Ke haba úseiny je bong ame laba Davita hnyi hnyeiny at Filisiti, me khaca huna ae bekhöt ke vak ta tehi. 8 Ke haba Davita me lahien ödrin e he me tot ka at Gerusi, me Girizi, me Amaleka : anyin a ödrin tavat a aten hnyeiny hwân ehac, wale hnyi gethen ame he Sura ai ke ne o but hnyi hnyeiny Aigupito. 9 Ke Davita ame kot hnyeiny ke e ame ca omelö ke baga me momo, ke e ame hom je mamoe, me bolok, me asina me kamela, me úkhaú ; ke e ame hmetu me he kö Akisa. 10 Haba Akisa ame ha, ka habe, Ie hnyeiny öbun e kot hnyeiny bong ang? Me ame thu Davita, ka habe, Úehmün hnyi ke keihen Juda ka hnyi hwaiöu, me Jeramela ka hnyi hwaiöu, me Keni ka hnyi hwaiöu. 11 Ke Davita ame ca omelö ke baga me momo, he ka hom Gatha ai, haingen, ka habe, Wá ödrin e nye haiöhmün, ka habe, A ányâ helâe Davita, ke helâe bala hwakecin hnyi ta je bong hia thibut hnyi hnyeiny at Filisiti. 12 Me Akisa ame kap hofuc ho Davita, me öa, ka habe, E ame ti oikikiâ e bi ka je lawaeny a at Isaraela ; me waleling e ame he ka bi athnyaba könya nyiele balua.

HNyimakan 28.

HABA hnyi úen eling me at Filisiti adre me úkhacaköuâ anyidra je utbavat he ka vat me at Isaraela. Me haba Akisa ame ha kö Davita, ka habe, Khanö u wia thö a u me he ka tha he mönya hnyi je utbavat, a u me je atâm. 2 Me haingö Davita kö Akisa, ka habe, Awe u me he ka wá únyi ame he ka ányâ athnyabam. Ke Akisa ame ha kö Davita, ka habe, Awe, oge me he ka otílö u he ka tuö bök nyiele balua.

3 Ke ame mokcu Samuela me a hia but tenge gan Isaraela hia thithö, me konâm e hnyi Rama wale anyin taun. Ke a hia but Saulo ohia hnyi hnyeiny tavat ae tren biobotkong me je at bibihwakecin. 4 Ke haba

at Filisiti ödrin e úkhacaköu me he me hunuma hnyi Sunema : ke Saulo ame ukhacaköuâ at Isaraela hia me hunuma hnyi Gileboa. 5 Ke a wá but Saulo je utbavat anyin at Filisiti, me ame ot, k' ame öbubuny gan hmâ hnyeikon. 6 Ke Saulo ame hnö ga Iehova, ke Iehova ame ca thu kâu, ca deny je bwi, ke ca deny Urim, ke ca deny je perofeta. 7 Me Saulo ame ha ka lathnyabainy, ka habe, He thö ka elâm hobi könya ke momo ae tren biobotkong, me inye he kâu he ka elâm unyin. Me ame ha kâu lathnyabainy, ka habe, Wá bi, e hnyi Eni-dora momo ae tren biobotkong. 8 Ke Saulo ame ka kebongonâ e bi, me kha-vá bi ke je úkhaú me he, a e me li at a tha he mē, me ödrin e o but unyin momo hnyeinyhet : me e ame ha, ka habe, Ö u elâm dö hobi könya a deny biobotkong, me oâ könya at oge me he ka ha köu. 9 Me ame ha kâu momo, ka habe, Wá bi, e khanö u hna ányâ hnö Saulo, wale e ame subâ degecâ tavat ae tren biobotkong me je at bibihwakecin hnyi hnyeiny : ke ieu gam u me he ka lau hnewe hobi könya, me hnân hlingö nya? 10 Ke Saulo ame khemanyin kâu ga Iehova, ka habe, Kia inya Iehova ae ba únyi ae kong ame he ka o köu can únyi ang. 11 Ke haingen momo, ka habe, O ge me he ka o ia köu? Haingen, ka habe, U me he ka oi Samuela könya. 12 Ke momo ame ö Samuela, me a ame hongot göranyai : ke haingen momo kö Saulo, ka habe, Can ieu u je iyawö nya? anyin a u Saulo. 13 Ke ame ha kâu than, ka habe, U ma ca ot : ke ieu ke únyi u je wá? ke haingen momo kö Saulo, ka habe, Oge wá ke khong ame o úheny hnyi kânâ. 14 Ke haingen kâu, ka habe, Ieu imaneniny e? Haingen, ka habe, Ame o hingat ; ke adre tube e ge úkhaú. Me ame khanö Saulo a Samuela ling, ke e ame nom me khudrung hnyikânâi. 15 Haba Samuela ame ha kö Saulo, ka habe, Anyin a ieu u je bwebweli nya, he ka oi nya? Haingö Saulo, ka habe, Iny hlohlo gan hmâ ; anyin ame he at Filisiti ka vat mönya, ke hia but Khong unyik ke ame ca thu hmetu bi könya, a ca deny je perofeta, ke ca deny je bwi : wale me inye hawo u thö, me u me omanená könya únyi oge me he ka ányâ. 16 Haba Samuela ame ha, ka habe, Ke hnân eú u je hnei nya anyin ae hiö Iehova but unyâm ke ame hwân he ka iwahnaihmiöny dut möu? 17 Ke Iehova ame hia but ányâ hobi kâu helâ me hnen hna ha a deny inya :

ke Iehova ame hia but kia dökhu úheny unyám, me ham e ka at a hanám, jia Davita. 18 Anyin a u je ca löng hofuc ho Iehova, me ca ohwádá anyin hmönyin ame ubáhlá kö Amaleka, anyin a wale Iehova ame ányá köu únyi eling hnyi bong ang. 19 Ke haba khaca ame he Iehova ka tha hna at Isaraela möu ka hnyi hnyamen at Filisiti : ke nyi u me he me lakom ka tha e mönya : ke ame he Iehova ka hna je utbavat anyi Isaraela ka hnyi hnyamen at Filisiti. 20 Haba Saulo ame ie ta ulili hon káná, me ot gan hmá, can hofuc ho Samuela : ke ba hmetu hwegien ; anyin a ca han eja hnyi lany ke ne o but hnyinghet. 21 Ke ame o but momo kö Saulo me wá ae gan anyin hlohlo, me ha káu, ka habe, Wá bi, inya athnyabaem oge me löng hwám hofuc, ke oge me ip anyik möt hnyi hnyamök, me löng hofuc u je ha könya. 22 Ke walang any ö u löng minya ju könya a athnyabaem, me oge me he ka ip ong jeté hnyi hnyimákám : ke me han dö, me u me he ka hwege u ka he. 23 Ke e ame höcö me ha, ka habe, Oge me ca he ka han. Me ame újengö e li lathnyabainy me momo ; me e ame ling ödrin. Me e ame tot úheny hnyi káná me laba hon hnamokut. 24 Ke e hu ge momo nokon kau ae pipikhenya hnyi hnyaba ; ke e ame ie hlingá, me hok falawa, me op, me le je areto adre ca levená : 25 me e ame hom kö Saulo me li lathnyabainy ; ke ödrin e han. Me ödrin e tot me he but hnyi lit eling.

HNyimakan 29.

KE haba at Filisiti ödrin e úkhacaköuá anyidra je utbavat hnyi Afeka : ke at Isaraela adre me hunuma hnyi an ame pupua hnyi Jezerela. 2 Ke ame he je than anyin at Filisiti, a je ve deo haded me deo thauzan : ke Davita me je hnyat unyin ödrin e tha bilidrin bi me Akisa. 3 Me haba je tuban at Filisiti ödrin e ha, ka habe, Ie hnyat Heberu ang ? Ke Akisa ame ha ka latuhan at Filisiti, ka habe, Hawa, e ca khan' öbun a Davita ang, athnyabai Saulo tuhan Isaraela, k' ame tha e mönya hnyi ta je bong ame ne je huna, ke ba ke únyi oge me wá unyin, hwán hnyi bong eji e ame kec hnyin, ke ne o but hnyi bong ang ? 4 Me ame hmönyin káu latuhan at Filisiti ; me haingen káu latuhan at Filisiti, ka habe, Kuná hmetu ju, me me he ka hnyi gan, wale dok u je

ip hnyin, ke e ame ca he ka tha he mötin ka hnyi vat, wá e nye hwiö thö me kuc ötin hnyi vat : ke iéu ame he ka úsökou káu me tuhan ? hawa ca ge je ban tavat eang ? 5 Ca Davita ang, waleji adre me sitwhanán hnyi bibiá, ka habe,

Saulo ame hia but kot haniny je thauzan,

Ke Davita bi, haniny je ten thauzan ?

6 Haba Akisa ame hawo Davita me ha káu, ka habe, Kia inya Iehova, a u wisa, ke so könya údilám dö me údilám but unyik hnyi utbavat : anyin a oge ca wá gam ke únyi ae kong, hwán hnyi bong eji u je he jem hnyin könya ke ne o but hnyi bong ang : ke so bi u ca o ka je taben. 7 Anyin a wale hmetu ju u, ke he thö me hnahic, me u me ca kong ka je tuhan at Filisiti. 8 Ke haingö Davita kö Akisa, ka habe, Iéu hnök hna ányá ? ke iéu u je wá unyin athnyabaem hwán hnyi bong eji oge tha e hnyin möu ke ne o but hnyi bong ang ; me inye ca he ka hnyi vat me je iwahnaihmiony me than'a tuhök ? 9 Haba Akisa ame thu me ha kö Davita, ka habe. E kxanö nya a u so könya helá me angela anyin Khong : ke so bi je tuhan at Filisiti ödrin e ha, ka habe, E ame ca he ka tha he mötin ka hnyi vat. 10 Awe, tha vesá-kong ut me lathnyabainy tuhám adre tha he jem möu : ke öbun ka todrö hnyi hnyomakatu, ke lany dö, ie he thö. 11 Me Davita me je aten ödrin e vesá hnyi hnyomakatu, he ka hmetu ka hnyi hnyeiny at Filisiti. Ke at Filisiti adre me he Jezerela ai.

HNyimakan 30.

KE ame o Davita me je aten hnyi Zikelag hnyi bong a kuniny, me ame hia but utut at Amaleka ka hnyi hon ke keihen hnyi Hwaiöu, me hon Zikelag minya, me kot Zikelag, me thoug ge meic : 2 me hügúná je momo me hnyat hia únyi hnyin, ame ne gan ame ne úhnyükong : ödrin e ca hlingá ke at, ke adre hügúná, me he but. 3 Ke ame o but Davita me je aten ka hnyi taun, me wá bi, adre hia but thong ge meic ; ke adre hia but hügúná je laöiödrin, me je lakudrin obaga me wahlu. 4 Haba Davita me tavat unyin ödrin e tenge tot göranyai ke ca khan' ödrin hmetu he ka tenge. 5 Ke adre hügúná minya thö laöiö Davita, jia Ahinoam at Jezerela, me Abigaila safaci Nabala at Karemela.

6 Ke gan hmá hlöuhlöu anyi Davita ; anyin ame úhnenamö tavat he ka lúá e, anyin ae vec hnyekon tavat hia thithö can je lakudrin obaga me wahu : ke Davita ame siwhegiá e bi ga Iehova Khongon.

7 Ke Davita ame ha kö Abiathara at bihut, nöku Ahimelek, ka habe, Ó u hö jem kõnya iefoda. Me Abiathara ame hom iefoda kö Davita. 8 Ke Davita ame hnö ga Iehova, ka habe, Oge ne hnu hoton deö vat, hawa, oge me he ka hom tilödrin ? Me ame ha káu, ka habe, Hnu thö ; me u me he ke khöu ödrin, me hügúnâ hia hmetu. 9 Me Davita ame he me tavat a siks haded a tha odrin më ; ke ödrin e o but hnyi wagewe Besor, wale a úlubahing hnyin tavat adre laba biju. 10 Ke Davita ame úhnúhnú, a e me foa haded tavat : anyin a laba biju lo li haded tavat ae sényin me ca khan' ödrin he ka hanyáúâ wagewe Besor : 11 ke ödrin e wâ ke at Aigupito hnyi hnyei, me ödrin e hom e kö Davita, me hân ge falawa me habelen ge köiö ; 12 ke ödrin e hân ge ú ometa, me li de wan vine adre hlec meleca ; ke e ame han, me ame hmetu banon : anyin a kun ta bong ke kun ta lit a ca han hnyin me ic. 13 Ke haingö Davita káu, ka habe, U atö ia ? ke úhem ua ? Haingen, ka habe, Iny hidróu Aigupito, a athnyabainy ke at Amaleka ; ke a digic nya tuhök, anyin a o kõnya mok hnyi bong et eji. 14 Ke öhmun e utut ka hnyi hon ke keihen a hwaiöuiny at Kerethi, me ke keihen iny at Juda, me hwaiöuiny Kaleba ; ke öhmun e thong Zikelag ge meic. 15 Ke Davita ame ha káu, ka habe, Hawa, u me he ka su nya ka hnyi deö vat eling ? Me haingen, ka habe, Khemanyin dö kõnya unyin Khong a u me ca he ka hlingö nya, me hnö nya hmetu ka tuhök, me oge me he ka hum u kâe ka hnyi deö vat. 16 Me e ame su e, me wâ bi, adre me laba me avá kánâ hia, k' adre me han me ic me bijeúâ, anyin ae se hia je únyi adre me hügúnâ ödrin e hom únyi hnyi hnyei iny at Filisiti, me hnyei Juda. 17 Ke haba Davita ame kuc ödrin hwân hnyi hauhao-treng ke ne o but nyi hnyi sahac : ke ba at ame kec möt, ke so thibi ta je hidróu a foa haded, a hnyat tabâ je kamela m' ödrin e kec. 18 Me Davita ame hügúnâ hmetu ta je únyi hia waleji a hom at Ameleka : ke Davita ame hügúnâ hmetu minya laáian. 19 Ke ba ke únyi bi ae hia gadrin ame ne úhnyúkong ame ne gan,

me lakudrin obaga me wahu, me ta je únyi adre sö, me ta je únyi hia ödrin e hom : me Davita ame hom hmetu hia. 20 Ke Davita ame hom je hnahat mamoe me kau, wale ödrin e alen hnyi hnyimakan ke je meno eling, me haingen, ka habe, Anyi Davita but je únyi ang. 21 Ke ame o but Davita ka tavat a tu haded wale ae ti sényin me me ca khan' ödrin he ka he hotu Davita, wale ödrin e hia but olabâ hnyi wagewe Besor : ke ödrin e he me úkhanö me Davita me tavat a tha e më : ke e hakekeny dut Davita me tavat e ame iouny mödrin. 22 Me ame ha tavat ae kong hia me tavat Belial adre tha he me Davita, ka habe, Ca he ötin ka khenâ ködrin ta je únyi adre sö wale ötin e sö, anyin a ödrin e ca hnyi tha he mötin, ke so bi ötin e he ka ve ham ka je baga je laöiödrin me je lakudrin mödrin e lili ödrin me he. 23 Ke haingö Davita, ka habe, Hnyat me lakeiny mönya lö, öbun e ca he ka ányâ helâe ge ta ja únyi wale a ham kötin Iehova, at ame hia but tu' ötin, me hna ka hnyi hnyamötin deö vat ame utut kötin. 24 Ke ie at ame he ka ling öbun hnyi únyi eang ? anyin adre me he ka khenâ káu at ame he ka hnyi vat helâ me hna khenâ káu at ame laba me tuö ta je omjehen : adre me he ka khenâ ofuco thibi. 25 Ke hwân hnyi bong eling ke ne o but nyiele, e ame otilâ e hnân hnanyibu me owisa hnyi Isaraela ke ne o but hnyi bong ang.

26 Ka o but Davita hnyi Zikelag, me e ame kunâ ke je únyi adre sö ka je hingatiny hnyei Juda, a je lahanen, me ha, ka habe, Walang bwihlany hobi köbun únyi hnyi je únyi adre sö ge je iwahnaihmiöny me Iehova ; 27 ködrin hnyi Beth-ela, me Ramoth hnyi hwaiöu, me Jatira ; 28 me ködrin hnyi Aroera, me Sifemo, me Esetemoa ; 29 me ködrin hnyi Rakal, me ödrin hnyi je taun anyin at Jeramela, me ödrin hnyi je taun anyin at Keni ; 30 me ködrin hnyi Horema, me Kor-asan, me ködrin hnyi Atak ; 31 me ködrin kny Heberona, me ködrin hia thithö wale hnö Davita me anyin tavat hna labö he káu.

HNYIMAKAN 31.

KE haba at Filisiti adre me vat me Isaraela : me ame kec bi at Isaraela ge at Filisiti, me ta mok hnyi bucen Gileboa. 2 Ke haba at Filisiti adre me hnu hwegio

II. SAMUELA 1.

Saulo me lakon; me at Filisiti ödrin e hlingö Jonathana, me Abinadab, me Malekisua a laku Saulo. 3 Ke hwege vat kö Saulo, ke ame khâu e ge tavat fana; k' ame ohmakâ gan hmâ e ge tavat fana. 4 Me Saulo ame ha ka at ame hom tilâ anyin ta je ûnyi vat, ka habe, Oc ut ânyâm hele vat me dâoi nya kâu; wâ e nye o but tavat adre ca peritomonâ me dâoi nya, me okongu nya. Ke ame hócö at ame hom tilâ anyin je ûnyi vat; anyin ae gan hmâ anyin ot. Me haba Saulo ame hom hele vat me hamen ta takoué e. 5 Ke a wâ but at ame hom tilâ anyin je unyi vat, a ga mokcu Saulo, me e ame ka ta takoué minya anyin bi hele vat, me tha mok me. 6 Me a tha mokcu Saulo me ta lakon a kun, me at ame hom tilâ je omjehen vat, me aten hia thithö hnyi bong eling. 7 Ke a wâ but at Isaraela hnyi ke keihen hnyigöulen bucen, me tavat hnyi hoton Jordano, a ga kec dö at Isaraela, ke a mokcu Saulo me ta lakon

a kun, me ödrin e hna je taun, me kec; k' ame o but at Filisiti me labâ.

8 Ke haba nyi ame he at Filisiti he ka uny je úkhaü anyin je komok, me adre me ö Saulo me ta lakon a kun, odrin e ta hnyi bucen Gileboa. 9 Me adre me subâ degecâ ban me uny dut je omjehen vat, me úkhü-nöng ka hnyi hnyeiny at Filisiti hia he ka thumeto hnyi uma umen anyidrin je hnatheat, me ka tavat. 10 Ke adre me ip omjehen vat hnyi uma umö Aseira: ke haba unyin bi, me adre me uhno hnyi hna up hak veto hnyi Bethes-san. 11 Ke a löng ut at Jabesi-gileada ûnyi a ânyâ at Filisiti kö Saulo, 12 me ame todrö tavat hwege hia, me he hnyi lit, me hom unyi Saulo, me unyin ta lakon a kun ûnyi hnyi hna up hak veto hnyi Bethes-san; me ödrin e o hnyi Jabesi, me thong degecâ je unyin eling. 13 Ke ödrin e hom je jei-ödrin me konâm hmelen úö hnyi Jabesi, me ca han bi hnyi seven ta bong.

TUSI A LOINY ANYI SAMUELA.

HNYIMAKAN 1.

KE hwaban mok anyi Saulo, ke a hmetu Davita úheny hnyi hna kot at Amaleka, ke lo li bong Davita ame laba hnyi Zikelag; 2 me haba hnyi bong a kuniny, wâ bi, ame o but ke at úheny hnyi hna hunuma unyi Saulo ae khekke anyin je úkhaü, ke e hu kânâ hon ban: ke e ame o but kö Davita me e ame ta hnyikânâi me khudrung. 3 Me haba Davita ame ha kâu, ka habe, U je mwi ua? Haingen, ka habe, Oge kec möt ûnyi hnyi hna hunuma anyin Isaraela. 4 Ke haingö Davita kâu, ka habe, Hawa bongon? Ö u thumetu nya thö. Ke e ame thu, ka habe, A kec dö tavat ûnyi hnyi vat, ke se hia tavat a ta me mokcu; ke a mokcu minya Saulo me Jonathana a nokon. 5 Ke Davita ame ha ka hidröu at ame thumeto e, ka habe, Hawa, a kâmâu ka khanö u a ga mokcu Saulo me Jonathana a nokon? 6 Me ame ha hidröu at ame thumeto e, ka habe, Inya o ge me he hom bucen Gileboa, ke wâ bi, Saulo ame tot inyifälâ dân ö; ke wâ bi, je kariota me tavat tabö hors adre me hnu hwegiâ e. 7

Ke e ame hwiö me ö nya, me hawo nya. Ke haingök dö, Inya ang. 8 Haingen könya, ka habe, U ia? Ke oge me thu kâu, ka habe, Iny at Amaleka. 9 Me e ame ha könya, ka habe, Ö u tödrü huk. me hlingö nya, anyin ame o but könya hmak; can ae tiga bekhöt möt eü hnyik. 10 Me oge me tot hon, me hlingâ, anyin a oge wâ but a ga me ca he bi ka möt hwa-ban hnen hna ta but: ke oge me hom korona ûnyi hnyi hon ban, me waen hnyi benyin, ke oge me hom jem ka tubök. 11 Ke Davita ame kât anyin je úkhaü, me kia, ke helâe minya tavat hia unyin: 12 ke ödrin e tenge, me tenge gan hmâ, me ca han ke ne o but sahaç, ca Saulo me Jonathana a nokon, me tavat anyi Jehova. me lap anyi Isaraela; anyin a ödrin e ta but ge hele vat. 13 Ke Davita ame ha ka hidröu at ame thumeto e, ka habe, U at ua? Haingen ka habe, Iny nokon atkanyua a at Amaleka. 14 Ke Davita ame ha kâu, ka habe, Ieü gam a u ca ot he ka hinobenjom ka at Iehova ame hú? 15 Ke Davita ame hawâ ke hidröu, me ha, ka habe, Hakekeny ju me hlingâ. Me e ame

HNYIMAKAN 2.

kot moko e. 16 Ke Davita ame ha kâu, ka habe, Ame he drâm ka mokut bi ka hnyi hon bâm; anyin a u je haiö u bi ge hnyimâm, ka habe, Oge me hia but hlingâ at Iehova ame hü.

17 Ke Davita ame tenge ge utengien eang ca Saulo me Jonathana a nokon: 18 ke e ame hûna ködrin he ka nâ lakon Juda ge utengien cafana: wâ bi, adre sihnalimen e hnyi tusi Jasar; ka habe,

19 Isaraela lö, adre hlingâ hmanenangâm hnyi je dok ae görany unyâm!

Ekölö a ta but tawat ae hwege!

20 Ca he ka thumetoâ hnyi Gatha, Ca he ka khetâ e hnyi je getheniny Asekelona;

Wâ e nye senyin wahlulakon at Filisiti, Wâ e nye hobâ wahlulakon tawat adre ca peritomonâ.

21 E, öbun je bucen hnyi Gileboa, E so ame ca ta hubun dân hau me we, ke ba je utkânâ hnân hut:

Anyin adre degecâ eling becin at ae hwege me me kong ut, Bec anyi Saulo, helâke adre ca hü ge wakaco.

22 Ame ca hwiö cafana anyi Jonathana, K' ame ca hmetu baü hele vat anyi Saulo

Ûnyi hnyi dren hna hlingâ, me ûnyi hnyi pipikhenyainy tawat ae hwege,

23 E tha so me hmanenang Saulo me Jonathana hnyi anyidru möt,

Ke adre ca öusâkâü' ödru hnyi mok; Ödru logot hon je aeto, Ödru hwege hon je liona.

24 Wahlulaku Isaraela lö, tengiö Saulo, At ame khaü' öbun ge ûnyi ae dra hnân omecâ,

At ame ip je omjehen gol hnyi je khaü-öbun.

25 Ekölö a ta but hnyi wanben vat tawat ae hwege!

Adre hlingö Jonathana hnyi je dok ae görany unyâm.

26 Iny hlöuhlöu gam Jonathana liamekeiny mönya:

E gan hmâ ânyâm mec kõnya: Hnân läiâ ânyâm ibetengiö kõnya, E beönua hon betenge anyin omomo.

27 Ekölö a ta but tawat ae hwege, Ke a hia but je ûnyi hnân vat!

KE hwaban e Davita ame hnö ga Iehova, ka habe, Hawa oge me he ka he hnyi ke je taun anyin at Juda? Ke Iehova ame ha kâu, ka habe, He thö. Ke Davita ame ha, ka habe, Oge ma he kâ? Haingen, ka habe, Heberona. 2 Me Davita ame he kâe, me laâiân minya, jia Ahinoam momo Jezerela, me Abigaila safaci Nabala at Karemela. 3 Ke haba tawat a tha e mē, me Davita ame hum ödrin, tha e me anyidrin je lap: ke ödrin e laba hnyi je taun hnyi Heberona. 4 Me ame o hnyat Juda, ke ödrin e hü Davita eling hnân than hon lap anyin at Juda.

Ke adre me thumetu Davita, ka habe, Haba hnyat a könim Saulo ödrin hnyat Jabesi-gileada. 5 Haba Davita ame ûkhûnöng ka at Jabesi-gileada, me ha ködrin, ka habe, E so öbun e hnabic ut ga Iehova anyin öbun e omanená ibetengiö e ka tuhöbun a Saulo, me konâm e. 6 Ke walang ang, e so Iehova ame omanená anyin ibetengiö me hnathu köbun: ke haba khaca oge me he bi nya ka bi hwaban köbun betenge eling, anyin öbun e hia but ânyâ ûnyi e. 7 Ke walang ang, hwege th' öbun, me hnyök бага but: anyin a mokcu Saulo tuhöbun, ke haba khaca a hia but hü nya lap anyi Juda me hnân tuhödrin.

8 Ke Abinera nöku Neri, taben ta je vat anyi Saulo, ame hia but hum Ise-boseth nöku Saulo, me hom e Mahanaima ai; 9 me otilâ e ka than hon at Gileada, me Asuri, me Jezerela, me Eferaima, me Beniamina, me Isaraeli hia. 10 (Ke fâte je hunai Ise-boseth nöku Saulo hnyi ün e ame hwân ka than hnyi Isaraela, ke e ame musi hnyi lo li hunu.) Ke ame hnu hotu Davita lap anyin at Juda. 11 Ke haba ün ame musi hnyi Heberona Davita hon lap anyi Juda, me seven je huna ke siks ta tehi.

12 Ke ame he but Abinera nöku Neri me lakei Ise-boseth a nöku Saulo üheny Mahanaima Gibeona ai. 13 Ke ame he but Joab nöku Zeruia, me lakei Davita, me ûkhanö mödrin hnyi an Gibeona; ke ödrin e ve laba ju, ke vat hnyi ke baten an, ke ke vat bi hnyi ke baten. 14 Ke Abinera ame ha kö Joab, ka habe, Me todrö wahi-dröu me walak hnyi hnyimakötin. Me haingö Joab, ka habe, E so ödrin e tot. 15 Me ödrin e ve todrö me he hoton üseidrin; a ödrin twelv ga Beniamina me Ise-boseth

nöku Saulo, ke ke twelv a lakei Davita. 16 Ke ödrin e ve úkátköüá je bödrin, me ve únáköüá anyidrin je hele vat hnyi je vhaködrin; me ödrin e tha ta ju: anyin a wale adre me hwenyi ien dok e, me, Hele-kath-huzurim, wale Gibeona. 17 Ke ti gan hmá vat hnyi bong eling; k' adre me kuc Abinera me at Isaraela hnyi hnyimakan lakei Davita. 18 Ke kun ta laku Zerua eling, jia Joab, me Abisai, me Asnel: ke haba Asael at ame wadring hwege helá me zebiiny hnyot. 19 Ke Asael ame hnu Abinera; me e ame wadring hotu Abinera k' ame ca saú ka hnyi ke keihen metá me me. 20 Ke Abinera ame hwiö me ha, ka habe, U Asael? Me e ame thu, ka habe, Iny ang. 21 Me Abinera ame ha káu, ka habe, Saú thö ka hnyi ke keihen metá ame ne me, me kát ke hidröu, me hom anyin ta je únyi vat. Ke e höcö bi Asael he ka saú gan. 22 Me Abinera ame ha hmetu kö Asael, ka habe, Saú thö gak: hnán eú oge me he ka kuc u hnyikánái? ke oge ányá e me oge ma kamáu ka iouny hmetu me Joab a tubám? 23 Ke e höcö he ka saú: anyin a wale Abinera ame dá e ge obiny ö hnyi hnyekon me ame manen bi ö hnyi hoton; me e ame ta ju me mokcu eling: ke haba tavat hia, hnyat adre me o ka hnyi dok ame ta hnyin Asael me mok hnyin, me, ödrin e todru. 24 Ke haba Joab me Abisai ödru me hnyi hnu Abinera: ke ame didrut seúnö hnyi úen ödru me o hnyi bucen Ama, wale cicö Gia gethen ame he hnyi hnye-buba Gibeona. 25 Ke ame úkhacaköu lakon Beniamina hotu Abinera, me me khaca hmetu thö vat, me tot hon ke dok ae hut. 26 Haba Abinera ame hongot kö Joab me ha, ka habe, Hawa, ame he ka han bala hele vat? u me ca wá a g'ame he ka hiny hnyi obiny? ke ie úen u me he ka ha ka tavat he ka hmetu úheny hnyi hna hnu je liamekeiny mödrin? 27 Ke haingö Joab, ka habe, Kia inya Khong, ke u je ne ca fuc me ame ne he ka hmetu nyi tavat úheny hnyi hna hnu je liamekeiny mödrin. 28 Me Joab ame tuá trutru me ame todru tavat hia thithö, me ca hnu Isaraela hmetu, ke haba khaca ödrin e ca vat hmetu. 29 Ke haba Abinera me lahien ödrin e vheno dok ae tha hon hnyi lit hia eling; ke ödrin e banyáúá Joridano, me vheno Betheron hia, me o hnyi Mahanaima. 30 Ke Joab ame hmetu úheny hnyi hna hnu Abinera: ke e ame úkhacaköüá tavat hia, me ame hia but ke je lakei

Davita a eitin, me Asael minya. 31 Ke haba lakei Davita ödrin e hia but kot at Beniamina me lahíö Abinera, a theri haded ke sikste je komok. 32 Ke ödrin e hum Asael me konám e hnyi erkemok anyin kamen, wale hnyi Bethe-leema. Ke haba Joab me lahien ödrin e vheno lit hia, ke a lany dö ködrin hnyi Heberona.

HNYIMAKAN 3.

KE ame vat beú hmá, lap anyi Saulo me lap anyi Davita: ke Davita ame hwege tot, ke ame ngá tot lap anyi Saulo.

2 Ke Davita ame hnokoá lakon obaga hnyi Heberona: Aminona nokon a báu, nöku Ahinoam momo Jezerela; 3 ke Kile-aba útangköu më, nöku Abigaila, safaci Nabala, at Karemela; ke Abasoloma a kuniny, nöku Maaka, momo nöku Talemai than Gesuri; 4 ke Adonia yakiny, nöku Hagitha; ke Sefatia a thabúnginy, nöku Abitala; 5 ke Itherama a síksiny, nöku Egela öio Davita. Adre hnöku ödrin ga Davita hnyi Heberona.

6 Ke hnyi úen ae tiga hu vat ge lap anyi Saulo me lap anyi Davita, me haba Abinera ame silhwegiá e bi singiny lap anyi Saulo. 7 Ke e hu ke momo anyi Saulo, adre hwenyi ien me Rizepa, nöku Aia: ke Ise-boseth ame ha kö Abinera, ka habe, leú gam u je hom momo anyi cica? 8 Me Abinera ame ti hmönyin can hofuc ho Ise-boseth, me ha, ka habe, Hawa, iny ban kuli anyi Juda? Haba hnyi úen ang oge me omanená ibetengiö ka lap anyi Saulo a kámám, me je liamekeiny më, me je lahanen, me ca hnö u ka hnyi hnyamö Davita, ke so bi u je he hnyi bong ang ka haikongu nya me momo ang? 9 Hamen Khong he ka ányá heláe kö Abinera, me bi hanen minya, oge ne ca he bi nya ka ányá kö Davita helá me Iehova ame khemanyin káu; 10 he ka wia dökhua únyi hnyi lap anyi Saulo, me otílá theron anyi Davita hon Isaraela me hon Juda, hwán hnyi Dana ke ne o but hnyi Bere-seba. 11 Me e ca khana he ka thu kö Abinera ke hofuc a khaca, anyin a e ame outen.

12 Haba Abinera ame kuná je úthu-metu kö Davita, a ka únyi gan bi, ka habe, I ia hnyei? haingen minya, ka habe, U me he ka ányá úhinhnyököu mönya, me wá bi, ame he hnyamök ka tha e möu ke ka wia kö Isaraela hia thithö. 13 Me haingen, ka habe, E so, me oge me he ka úhihi-

II. SAMUELA 3.

nykôu môu: ke so bi khaca thibi únyi oge me wek gam, ka habe, a u me ca he ka wâ hnyimakök u ka ca hum Mikala nõku Saulo jem, u ka he jem, ka iouny mõnya. 14 Ke Davita ame kunâ je metâ kö Ise-boseth, nõku Saulo, he ka ha, ka habe, Ham dö kõnya öiök, jia Mikala, waleji oge me bi sániny ge je unen unyin at Filisiti a wan haded. 15 Me haba Ise-boseth ame kunâ je uthumetu he ka hom e unyin áân бага jia Paletielä nõku Laisi. 16 Ke ame tha he бага me áân, k' ame tenge hoton, ke ne o but hnyi Bahurim. Me wale Abinera ame ha ka бага, ka habe, Hmetuhmetu ju: me e ame he hmetu.

17 Ke haba Abinera ame úhnenamö me wahingatiny Isaraela, me ha, ka habe, Haba ebac öbun e elöm Davita me me tuhöbun: 18 awe, ányâ thö walang ang: anyin a Iehova ame hia but ha ga Davita, ka habe, Oge me he ka omelö lakeik a at Isaraela únyi hnyi hnyamen at Filisiti, me únyi hnyi hnyamen je iwahnaihmiöny mödrin ge hnyamö Davita athnyabaik. 19 Ke Abinera ame fuc minya hnyi hnyikönyen at Beniamina: ke ame he minya Abinera ka fuc hnyi hnyikönyö Davita hnyi Heberona ge ta je únyi hia ae so kö Isaraela, me lap hia anyi Beniamina. 20 Me Abinera ame o kö Davita hnyi Heberona, ke tha e me tavat a twente. Ke Davita ame ányâ bijeü hobi kö Abinera me anyin bunyen. 21 Ke Abinera ame ha kö Davita, ka habe, Oge me he ka tot me he, me úkhacaköuä ka than a tuhök Isaraela hia, m' ödrin e úhihinyköu möu, me u me musi ködrin hia hoton wem. Me Davita ame kunö Abinera; me e ame he hnyi hnahic. 22 Ke wâ bi ame o but lakei Davita me Joab úheny hnyi hna hnu vat, me oä je únyi adre sö ae gan: ke hiö Abinera unyi Davita hnyi Heberona; anyin a hia but kunâ e, k' ame he but hnyi hnahic. 23 Ke hnyi úen ame o but Joab me utbavat hia unyin, adre me ha kö Joab, ka habe, A mwi ang Abinera nõku Neri, a he ka wâ than, ke e a hia but kunâ e, me a he but hnyi hnahic. 24 Haba Joab ame o ka than, me ha, ka habe, Ieü ang u je ányâ? wâ bi a o köu Abinera; anyin a ieü u je kunâ e, ke a he but eja? 25 E khañö u Abinera nõku Neri a ga o he ka iyawö u, me wáhmakhmeto hnám hna didrut me didrö, me he ka wáhmakhmeto ta je únyi u me ányâ. 26 Ke ame didrut Joab úheny unyi Davita, me e ame kunâ je úthumetu

hotu Abinera, ke ödrin e ohmeto e únyi hnyi an Sira: ke ca khañö Davita bi. 27 Ke ame hia hmetu Abinera Heberona ai, me haba Joab ame tha saü but mē hnyi homagöule he ka úhnenamö duöng, me ame dá e eling hnyi hnyekon, me ame mokcu, can drö Asael liamekeiny mē. 28 Ke hwaban e Davita ame löng me ha, ka habe, Iny gufa me dökhuk dökhü hnyi hnyimakö Jehova nyiele balua ge dra drö Abinera nõku Neri: 29 e so e he ka takou bö Joab me lap hia anyin kamen; ke ame ca he ka hia únyi hnyi lap anyi Joab at ame hingölö, me lepera, me at ame ci, me at ame ta ge hele vat, me at ae ba jeü. 30 Ke Joab me Abisai liamekeiny mödrü me hlingö Abinera, can e ame hlingö Asael liamekeiny mödrü hnyi Gibeona hnyi vat.

31 Ke haba Davita ame ha kö Joab, me tavat hia unyin ka habe, Kia but anyibun je úkhaü, me weiká ec mano ae gan nán, me tengiö Abinera. Ke haba Davita a than ame he hoton taben komok. 32 Ke adre me könim Abinera hnyi Heberona: ke ame tenge göranyai than hnyi hu Abinera; k' ame tenge tavat hia. 33 Ke than ame tengiö Abinera, me ha, ka habe,

Hawa, e úcü Abinera he ka mokcu helâ me imekiny at ae monu?

34 Adre ca ca li hnyamám, me inâ li cam hnyi wen a fao:

Helâ me at ame ta hnyi hnyimakan tavat ae kong, me u je ta helâe.

K' ame tenge hmetu bi tavat hia gan. 35 Ke ame o but tavat hia ka kunö Davita ka han falawa e me tiga lany; ke Davita ame khemanyin, me ha, ka habe, Hamen Khong he ka ányâ helâe kõnya me bi hanen minya, oge ne kâlâ falawa, ame ne ke jeü bi, e ka tiga ca dit bi seünö. 36 Ke haba tavat hia adre me wáhmakhmeto e, ke so hwa-kecin ködra bi: ke haba khaca, ame senyin bi tavat ge ta je únyi hia a ányâ than. 37 Me ame wáhmakhmetoâ hnen tavat hia me at Isaraela hia hnyi bong eling a ca únyi ge than he ka hlingö Abinera nõku Neri. 38 Ke haingon than ka lakeiny, ka habe, Hawa, e ca khañ' öbun a ga ta but ke taben me at ae gan hnyi bong ang hnyi Isaraela? 39 Ke iny senyin dut hnyi bong ang, eja ke ne adre me hia but hú nya huân than; ke ti hmak kõnya li at ang a li laku Zerua: e so Iehova ame he ka bi hwaban ka at a ányâ hwakecin ae kong hoton anyin bi monu.

HNyimakan 4.

KE a löng ut nöku Saulo a ga moku Abinera hnyi Heberona, me ame sēnyin li hnyamen, k' ame hmak hnyekon at Isaraela hia. 2 Ke e bi unyin nöku Saulo li at a li taben deō vat: Baana ien ke at, ke Rekaba ien ke at, a li laku Rimona, at Berotha, hanen lakon Beniamina: (anyin adre tha öü Berotha me Beniamina: 3 k' ame kec Gitaim ai at Berotha, k' ödrin e laba atkanyua eling ke ne o but hnyi bong ang.)

4 Ke e hu ke nöku Jonathana nöku Saulo ae mat li can. Ke thabúng hunainy wale hnyi ūen -ame o úthumetu ka haiö Saulo me Jonathana ūnyi Jezerela, ka ame hijen e hnen momo ame tuö me kec ut: ke momo ame tiga kec logot, me e ame ta me omadrá e. Haba ien bi, me Mefiboseth.

5 Me ame he li laku Rimona at Berotha, jia Rekaba me Baana, me o helá me jebigö ka hnyi uma umö Ise-boseth, hnyi ūen e ame mená hnyi jebigö. 6 Ke ödru me o hnyi wanben uma helá ke ödru me he ka hok hwit; ke ödru me dá e hnyi hnyekon: ke Rekaba me Baana a liamekeiny me ödru me kec. 7 Ke ödru me o ka hnyi uma, me e ame mokut hon hna mokut hnyi hnyeuleny, me ödru me kot e, me hlingá, me subá but ban, me hom ban, me vheno lit hnyi gethen hnyi dok ae tha hon. 8 Ke ödru me hom bö Ise-boseth kö Davita hnyi Heberona, me ha ka than, ka habe, Wá bi, bö Ise-boseth nöku Saulo iwahnaihmiony möu, wale at ame elám ányám möt; ke a hia but Iehova bi hwaban kö Saulo me je mátrániny hobi káu than a tuhök hnyi bong ang. 9 Ke haba Davita ame thu kö Rekaba me Baana a liamekeiny me a li laku Rimona at Berotha, me ha ködru, ka habe, Kia inya Iehova, at ame omelö hanuk ūnyi hnyi ta je kong hia, 10 hnyi ūen a thumetu nya ke at, ka habe, Wá bi, a moku Saulo, ke ame ūnyküme wale úthumetu ae so könya, me oge me kát e, me hlingá e hnyi Zikelag, wale hwaban oge me bi hwaban anyin úthumetu. 11 Ke hawa ge úganiny hwaban, e ka he tavat ae monu ka hlingá at ae wisa hnyi umen bi uma me hon anyin hna mokut, hawa, oge me ca he ka elám dren ūnyi hnyi hnyamöbu, me ohi' öbu eang hmeledrany? 12 Ke haba Davita ame kuná anyin je hidróu, me ödrin e hling'

ödru, me subá but li hnyamödru me li cadru, me uhni ödru hon an hnyi Heberona. Ke adre me hom bö Ise-boseth, me konám e hnyi hu Abinera hnyi Heberona.

HNyimakan 5.

KE ame he je tribu Isaraela hia kö Davita hnyi Heberona, me ha, ka habe, Wá bi öhmun ang je jeiám me utiöiám. 2 Ke haba ehac waleji a than kötin Saulo, me u thibi at ame lelö háang me lelö hmetu jem at Isaraela: ke Iehova ame ha köu, ka habe, U ma he ka bi than lakeik a Isaraela, ke u me he ka bi than hnyi Isaraela. 3 Ke ame o but wahingatingy at Isaraela hia thithö ka than hnyi Heberona; me Davita than ame úhinhnyköu mödrin hnyi Heberona hnyi hnyimakö Iehova: me ödrin e hú Davita me me tuhan Isaraela.

4 Ke thöte je hunai Davita hnyi ūen e ame hwân he ka musi, ke e ame musi hnyi ta je huna a fáte bi. 5 E ame musi Juda hnyi Heberona seven je huna ke siks je tehi: ke thöte theri je huna e ame musi Isaraela me Juda hia hnyi Jerusalema.

6 Ke ame he than me tavat unyin Jerusalema ai me tot úcon at Jebusi, a je aten hnyei: tavat adre me ha kö Davita, ka habe, U je ne ca hom je wadröu me tavat ame ci, me u me ca he ka didró jem: anyin adre me ūnyküme a ga ca khanö Davita he ka dit káe. 7 Ke so bi Davita ame hügüná hñabá wale Ziona; a wale taun anyi Davita. 8 Ke Davita ame ha hnyi bong eling, ka habe, Haba at ame he ka kot at Jebusi, me hamen he ka ölö ka hnyi deny köiö, me kot hnyat ame ci me wadröu, a je hückotiánö Davita. Anyin a wale, adre me labö ha, ka habe, Wale bi eling je wadröu me hnyat ame ci; me ca khana he ka dit ka hnyi uma. 9 Ke Davita ame laba buyi hñabá, k' ame hwenyi ien, me, taun anyi Davita. Ke Davita ame up veto igigilö hwân hnyi Milo ke ne o thö eiö hnyin. 10 K' ame hweje tot Davita; anyin a e bi unyin Iehova Khongon sabaoth.

11 Ke haba Hirama thaniny Turo ame kuná je úthumetu kö Davita, me je úö arasi, me tavat tretrau ütö, me hnyat tretrau veto, me ödrin e up uma umö Davita. 12 Ke Davita ame wáhmakhmeto a Iehova ame otílá me me thaniny Isaraela, k' ame

ogänä dokhon dökhu can je lakeiny a at Isaraela.

13 Ke Davita ame hok hanen anyin je momo me lañiän minya üheny Jerusalema, hnyi üen e ame o thö üheny Heberona : ke adre hnokoâ ke je laku Davita obaga me omomo. 14 Ke walang je iödrin adre hnokoâ kâu hnyi Jerusalema ; jia Samua, me Sobab, me Nathana, me Solomona, 15 me Ibara, me Elisua, me Nefega, me Jafia ; 16 me Elisama, me Eliada, me Elifelet.

17 Ke a löng ut at Filisiti a g' adre hia but hü Davita hnân than Isaraela, me ame he at Filisiti hia ka elöm Davita ; ke a löng ut Davita, me e ame utut ka hnyi hnabâ. 18 Haba at Filisiti ödrin e o me avâ hnyigöuleny bucen Refai. 19 Haba Davita ame hnö unyi Iehova, ka habe, Hawa, oge me he ka tot ka at Filisiti ? u me he ka hn' ödrin ka hnyi hnyamök ? Haingö Iehova kö Davita, ka habe, He thö : anyin oge me he ka ti hna at Filisiti ka hnyi hnyamâm. 20 Ke ame o but Davita hnyi Baala-farez, ke Davita ame kuc ödrin eling : me e ame ha, ka habe, A hia but Iehova ohmetro je iwahnaihmiöny mönya hnyi hnyimakök, helâ me ükhutuiny köö. Anyin a wale e ame hwenyi ien dok eling me Baala-farez. 21 Ke ödrin e hna degecâ eling anyidrin je idola, me ame hom e Davita me lakeiny.

22 Ke ame o hmetu thö at Filisiti, me avâ hnyigöulen bucen Refai. 23 Ke Davita ame hnö unyi Iehova, me e ame ha, ka habe, U me ca he ka he : ke so bi u me he hwale thö ka hnyi hotudrin, ke he thö ködrin cicö je üö baka. 24 Ke u ka löng dö hwa he ethö hon sabaka, awe, ie utut : anyin a Iehova ame hia but bán hnyi hnyimakâm, he ka kot utbavat anyin at Filisiti. 25 Ke Davita ame änyâ helâ me hna huna kâu ga Iehova ; me kot at Filisiti hwân hnyi Geba ke ne o but hnyi Gezera.

HNHYIMAKAN 6.

KE Davita ame ükhacaköüâ hmetu tavat adre üca ge at Isaraela, ödrin thöte thauzan. 2 Ke Davita ame tot me tha he me tavat hia unyin, üheny Baala Juda, he ka hom üheny e tang tangen Khong, adre hwenyi Ien, a iö Iehova tuban sabaoth, at ame laba hon li kerubi. 3 Ke ödrin e ip tang tangen Khong hon kat ae teb ünyi, me hom e ünyi hnyi uma

umö Abinadab, wale hnyi dok ae hut : ke haba Uza me Ahio li laku Abinadab, ödrü me alen kat ae teb ünyi. 4 Ke ödrin e hom e ünyi hnyi uma umö Abinadab, a e hnyi dok ae hut, tha e me tang tangen Khong : ke Ahio ame he hnyi hnyimakan tang. 5 Ke haba Davita me lap Isaraela hia, adre me khumöngö hnyi hnyimakö Iehova ta je ünyi khumöng kop, me je kitara, me nabeli, me bwinybet, me pate, me simebalo. 6 Ke adre me o ka hnyi hna huje hwit anyi Nakan, me haba Uza ame inâ benyin ka hnyi tang tangen Khong, me kät e ; anyin ame haü li bolok. 7 Me ame ubählä hmönyin anyi Iehova kö Uza ; me Khong ame kot e eling can anyin monu ; me e ame mokcu eling hnyi tang tangen Khong. 8 Ke hmak bi Davita can ame utut Iehova kö Uza : ke e ame hwenyi ien dok eling me Farez-uzza, ke ne o but hnyi bong ang. 9 Ke Davita ame outö Iehova hnyi bong eling, me e ame ha, ka habe, Ame ka kâmâu ka o könya tang tangö Iehova ? 10 Ke höcö Davita he ka hom bi kâu tang tangö Iehova ka hnyi taun anyi Davita ; me haba Davita ame saüâ ka hnyi uma umö Obed-edoma at Gatha. 11 Me ame mokut tang tangö Iehova eiö hnyin uma umö Obed-edoma at Gatha hnyi kun ta tehi : me Khong ame ohnabici Obed-edoma me anyin lap hia. 12 Ke adre me thumetu Davita than, ka habe, Iehova ame hia but ohnabicâ lap anyi Obed-edoma me ta je ünyi hia can tang tangen Khong. Me haba Davita ame he me hom senyina tang tangen Khong, üheny hnyi uma umö Obed-edoma, ka hnyi taun anyi Davita. 13 Ke ame he hnyat vaden tang tangö Iehova, ke ödrin e he siks ta hna okca, me e ame hudo ke bolok me ke meno ae pipikhenya. 14 Ke Davita ame biâ hwege hnyi hnyimakö Iehova ; ke Davita ame weikâ iefoda lino. 15 Ke haba Davita me lap hia anyi Isaraela, adre me hom tang tangö Iehova me hongot me tüö trutru. 16 Ke hnyi üen ame didrü tang tangö Iehova ka hnyi taun anyi Davita, haba Mikala nöku Saulo ame bwele hnyi mamalama me ö Davita than ame gâ me bibiâ hnyi hnyimakö Iehova ; me e ame hükötia e hnyi hnyekon. 17 Ke ödrin e odilâ tang tangö Iehova, me ip e hnyi hnen hnyi wanben uma mano wale ame otilâ Davita hobi kâu : ke Davita ame hudo je hudiny leü me je hudiny ole hnyi hnyimakö Iehova. 18 Ke a hia but Davita

hudo je hudiny leú me je hudiny ole me e ame ha hnahicá tavat hnyi iö Iehova tuhan sabaoth. 19 Ke e ame khenâ úco ka tavat hia, wale ka úseiny Isaraela hia, obaga me omomo minya, úsa khaca ong areto, me khaca uthmeno, me khaca u wan vine ae meleca. Me ame vese thö tavat hia ka hnyi je hnyabadrin. 20 Ke Davita ame hmetu he ka ha hnahicá anyin bi lap. Ke ame didrut Mikala nöku Saulo he ka úkhanö me Davita, me ha, ka habe, E ti hmanenang eja than Isaraela, at ame bi wánen lathnyaba a je hlu hluiny lathnyabaem, helâ me at ae hop ame bi wánen! 21 Ke haingö Davita kö Mikala, ka habe, Wale hnyi hnyimakö Iehova at ame úcö nya hon kámám me anyin lap hia, he ka otilö nya huân taben tavat anyi Iehova, a Isaraela: wale me inye he ka khumöng dö hnyi hnyimakö Iehova. 22 Ke oge me he ka ikiki tot hon e, ke hamök he ka he hnyikánái hnyi hnyimakök bi: ke ame he ka oganö nya lathnyaba omomo wale u me ha eja. 23 Ke ba nöku Mikala nöku Saulo ke ne o but bong e ame mokcu hnyin.

HNYIMAKAN 7.

KE ame laba than hnyi umen uma, ke a hia but Iehova omenâ e únyi ge ta je iwahnaihmiöny më hia igigilö, 2 me haba than ame ha kö Nathana perofeta, ka habe, Wa bi inya oge me laba hnyi uma arasi, ke haba tang tangen Khong ame laba hnyi wanben je tubwiny mano. 3 Ke Nathana ame ha ka than, ka habe, He thö, ányâ ju ta je únyi hia eú hnyi hnyekom; anyin a tha unyám Iehova. 4 Ke haba hnyi lit eling, me ame o but hofuc ho Iehova kö Nathana, ka habe, 5 He thö me ha kö Davita athnyabaik, ka habe, Wulang hofuc ho Iehova, ka habe, Hawa u me he ka up uma me hnyabak? 6 Anyin oge me ca laba eiö hnyin uma hwân hnyi bong oge me hom jem hnyin lakon Isaraela, úheny Aigupito ke ne o but hnyi bong ang; ke oge me hia but laba hnyi uma ame ne uma monâ. 7 Ke hnyi ta je hnyei hia waleji oge me tha he me lakon Isaraela hia ka hnyin, hawa, e hu ke ong hofuc oge me ha ka ke tribu Isaraela, waleji oge me húna he ka hân lakeik a at Isaraela, me ha, ka habe, Ieú gabun öbun e ca up umök uma arasi? 8 Ke haba walang u me he ka ha helâe kö Davita athnyabaik, ka habe, Wulang hofuc ho Iehova tuhan sabaoth, ka habe,

Oge me hum u únyi hnyi haginny mamoe, a únyi hnyi hna tuö je mamoe, m' u me he ka musö lakeik a at Isaraela: 9 ke oge me tha he möu waleji hnyi hnám hna he ka hnyin, me subá degecâ je iwahnaihmiöny möu hnyi hnyimakám; ke oge me he ka olungâ iâm helâ me ien tavat ae gan eang hmelen. 10 Ke oge me he ka úca dok hobi káu lakeik a at Isaraela, me otil' ödra, m' adre me he ka laba hnyi idrin bi, k' adre me ca he hmetu ka bwebweli ödra; ke haba khaca, ame ca he hmetu tavat ae kong ka oveci ödra helâji me ehac, 11 me helâji me úen oge hwân ka kunâ hnyat owisa he ka musi ka lakeik a at Isaraela; ke oge me he ka omenö u únyi ge ta je iwahnaihmiöny möu hia thithö. Ke haba khaca, Iehova ame thumetu u a g' ame he Iehova ka otilâ ányám lap. 12 Kee ka bekhöt ut bongom ta je bong, ke u ka mokut ut unyin lakámám, me oge me he ka otilâ mátránám hwabám, wale at a hing nokom bi, ke oge me he bi nya ka ohmâ dokhon dökhua. 13 Me e ame he ka otilâ uma hobi káu iök, me oge me he bi nya ka ohmâ theroniny dokhon dökhua nyiele balua. 14 Oge me he ka kamen bi, ke e ame he ka nöku: k' ame ne ányâ hulö, me oge me he ka kot ge osö hnân kot at, a unyi adre kot káu lakon at; 15 k' ame ca he ka hia anyik ibetengiö unyin bi, helâji me hnök hna húgúnâ e únyi ga Saulo, wale oge me ohia hnyi hnyimákám. 16 Ke adre me he ka otilâ hmâ ányám lap me dokhom dökhua hnyi hnyimákám nyiele balua: adre me he ka ohmâ ányám theron nyiele balua. 17 Helâ me ta je únyi hia eling me ta je hna omanená hia eling a ha Nathana kö Davita.

18 Haba Davita than ame didrö me laba ju hnyi hnyimakö Iehova; me haingen, ka habe, Iny ia Than Iehova, ke ieú anyik lap m' u je hum nya ke ne o but walang ang? 19 Ke únyi ae úhnyúkong e hnyi hnyimákám, Than Iehova; ke so bi u je hia but ha ge lap anyin athnyabaem hobi káu nyiele; ke hoton hwakecin at eling, Than Iehova! 20 Ke ieú hmetu ame he Davita ka ha köu? anyin a u je wáhmakhmeto athnyabaem, Than Iehova. 21 Únyi hnyi hwám hofuc, ke helâ me hnyekom, u je hia but ányâ ta je únyi hia ae gan eling, he ka owáhmakhmeto athnyabaem. 22 Anyin a wale u gan Iehova Khong: anyin ae ba at ae úcú möu, ke ba ju ke Khong, ke hake u thibi, helâ me hnöhmun hna löng ge je hnyikönyöhmun. 23 Ke ewa ke hnyei

eang hmeledrany ae úcú me em hnyei, a Isaraela, wale ame he Khong ka omelö káu bi hnân iny, me otilâ ien bi, me ânyâ hobi kôbun je únyi ae gan me hnân outen hobi káu em hnyei, hnyi hnyimakan lakem, wale-ji u je omelö kôu bi úheny Aigupito, únyi ge ta je hnyei me je khongudrin? 24 Ke u je ohmâ em hnyei a at Isaraela hobi kôu, hnân em hnyei nyiele balua; ke haba u Iehova, u je bi Khongudrin. 25 Ke walang ang, Iehova Khong lö, otilâ hmâ ju hofuc u je ha hobi káu athnyabaem, me anyin lap nyiele balua, me ânyâ helâ me hnâm hna ha. 26 Ke e so he ka ogânâ iâm nyiele balua, me ha, ka habe, Iehova tuhan saba-oth e thibi Khongu Isaraela: ke adre me he ka ohmâ lap anyi Davita athnyabaem hnyi hnyimâkâm. 27 Anyin a u, Iehova tuhan saba-oth, Khongu Isaraela, a hia but omanená ka athnyabaem, ka habe, Oge me he ka op ânyâm lap: anyin a wale haba athnyabaem ame wâ eú hnyi hnyekon he ka hijö kôu hic eling. 28 Ke walang ang, Than Iehova lö, u thibi Khong, ke hnathu hwâm hofuc, ke u je hia but ha bánâ ka athnyabaem únyi eling ae so: 29 ke walang ang, e na wem bi he ka ohnahicâ lap anyin athnyabaem, me me e bi nyiele balua hnyi hnyimâkâm: anyin a u at ame ha, Than Iehova: me ö u ohnahicâ lap anyin athnyabaem ge hnahic únyi gam nyiele balua.

HNYIMAKAN 8.

KEhwaban e Davita ame kot at Filisiti me hom úhnyükongu ödra: ke Davita ame hügúnâ Metheg-ama únyi hnyi hnyamen at Filisiti. 2 Ke e ame kot at Moaba, me tuluti ödra ge tulut tö, me omokuli ödra eú hnyi kânâ; ke e ame tuluto lo li gaö he ka hling' ödrin, ke khaca gaö ae bekhót he ka omelö. Me ame hwân tavat Moaba he ka bi lakei Davita, k' ödrin e hom je bwihlany. 3 Ke Davita ame kot minya Hadadeza, nöku Rehoba, than Zoba, wale me me he ka hügúnâ hmetu iny hnyei hnyi Wagewe. 4 Ke Davita ame hügúnâ gan khaca thauzan ke seven haded tavat tabö hors, ke twente thauzan tavat he hon kânâ: ke Davita ame sö can je hors hanen je kariota hia, k' ame ip biju keihen hobi káu je kariota a khaca haded. 5 Ke ame o thö at Suria úheny Damaseko he ka hom hadruo Hadadeza, than Zoba, me Davita ame kot twente tu thauzan at Suria. 6 Ke

haba Davita ame otilâ je lap tue hnyi Suria hnyi Damaseko: ke ame bi lakei Davita but at Suria, me adre me hom je bwihlany. Ke Iehova ame ham dökhü kö Davita hnyi je hnyei e ame he ka hnyin hia. 7 Ke Davita ame hügúnâ je bec gol únyi ge lathnyabai Hadadeza, me hom Jerusalem ai. 8 Ke Davita a than ame hügúnâ bras ae ti gan hmâ únyi hnyi taun Beta me Berothai a li taun anyi Hadadeza. 9 Ke a löng ut Toi than Hamath a Davita ame kot utbavat hia anyi Hadadeza, 10 me haba Toi ame kunö Jorama a nokon kö Davita than, he ka iouny mē, me ha hnahicâ e, anyin a e ame hia but vat me Hadadeza, me kot e: anyin a li iwahnaihmiöny jia Toi me Hadadeza. Ke e hu eú hnyi hnyamen je kaia sileva, me je kaia gol, me je kaia bras: 11 Ke Davita than ame okabâ je únyi eling minya kö Iehova, tha e me je sileva me gol wale e ame okabâ únyi hnyi je hnyei hia e ame hom úhnyükongu; 12 únyi Suria, me Moaba, me laku Amona, me at Filisiti, me Amaleka, me únyi hnyi hna hügúnâ ga Hadadeza nöku Rehoba, thaniny Zoba. 13 Ke ame lung iö Davita hnyi üen e ame hmetu úheny hnyi hna kot at Suria hnyi Hnyigöulen bucen Salt, wale eitín thauzan tavat. 14 Ke e ame otilâ je lap tue hnyi Edoma; hnyi Edoma hia e ame otilâ je lap tue, ke ame bi lathnyabai Davita but at Edoma hia. Ke Iehova ame ham dökhü kö Davita hnyi hnen hna he ka hnyin hia.

15 Ke Davita ame musö Isaraela hia; ke Davita ame úhnö me ânyâ wisa ka lakeiny hia. 16 Ke Joab nöku Zeruaia ame bi taben anyin je utbavat; ke haba Jehosofata nöku Ahiluda at ame oúnykümeâ: 17 ke Zadoka nöku Ahituba, me Ahimelek nöku Abiathara, li at bihut; ke Seraia at sihnalimen; 18 ke Benaia nöku Jehoiada ban ka at Kerethi me Pelethi; ke je laku Davita tavat musi.

HNYIMAKAN 9.

KE Davita ame hnei, ka habe, Hawa, e hu kolon biju lap anyi Saulo, me o ge me he ka betenge gan ga Jonathana? 2 Ke e hu ke athnyaba hanen lap anyi Saulo, Ziba ien, ke ödrin e hawâ e kö Davita; ke haba than ame ha káu, ka habe, Ziba u? Haingen, ka habe, E ke, athnyabaem. 3 Me ame ha than, ka habe, Hawa, e hu kolon biju lap anyi Saulo, m' inye he ka omanená

ibetengö anyin Khong kâu? Ke haba Ziba ame ha ka than, ka habe, Khaca biju nöku Jonathana, wale ae mat li can. 4 Ke haingen than kâu, ka habe, Ewa? Me haingö Ziba ka than, ka habe, Wâ bi, e hnyi hnyaba Makir nöku Amiela, hnyi Lo-deba. 5 Me Davita than ame ukhünöng me hom e únyi hnyi hnyaba Makir nöku Amiela úheny Lo-deba. 6 Me ame o but Mefiboseth, nöku Jonathana, nöku Saulo kö Davita, me e ame ta hnyikânâi me nom. Me haingö Davita, ka habe, Mefiboseth lö. Me haingen, ka habe, Walonya eang a athnyabaem! 7 Ke Davita ame ha kâu, ka habe, Ca ot, anyin oge me he ka betenge gam ga Jonathana a kâmâm, ke oge me he ka hna kôu ta hnyeï hia i Saulo a kibâm; ke u me he bala ka tha han mönya hnyi anyik laulau. 8 Me e ame nom me ha, ka habe, Iny ia athnyabaem m' u me wâ kuli a mok a iny úcú mē? 9 Me than ame hawo Ziba, athnyabai Saulo, me ha kâu, ka habe, Oge hia but ham ka nokon tuhâm ta je únyi anyi Saulo me anyin lap. 10 Ke hamâm me lakom me lathnyabaem he ka belökâ kânâ hnân hobi kâu; ke u me he ka hom jem jeúiny me me hu an nokon tuhâm: ke ame he bala bi Mefiboseth nokon tuhâm ka tha han mönya hnyi anyik laulau. Ke ödrin fifitin je бага laku Ziba, ke twente je hnyat a bi athnyabainy. 11 Me haba Ziba ame ha ka than, ka habe, Ame he athnyabaem ka ányâ únyi hia wale tuhök a than ame húna kónya a athnyabaem. Ke haingen than, ka habe, Ame he bi Mefiboseth ka tha han mönya hnyi anyik laulau helâ me ke nokon than. 12 Ke hu nöku Mefiboseth ae úhnyükong, Mika ien. Ke haba je hnyat hia ödrin e laba hnyi hnyaba Ziba, me ödrin hia ödrin e bi athnyabai Mefiboseth. 13 Waleling me me laba Mefiboseth hnyi Jerusalema: anyin a e ame han bala hnyi laulau anyin than; ke e mat li can.

HNYIMAKAN 10.

KE hwaban e ame mokcu thaniny lakon Amona, ke Hanuna nokon ame musi bi hnyi hwaban. 2 Me haba Davita ame ha, ka habe, Oge me he ka betenge kö Hanuna nöku Nahasa helâji me kamen ame betenge gak. Me Davita ame kunâ ke je lathnyabainy he ka otubwelâ ge kamen. Me ame o but lathnyabai Davita hnyi hnyeï iny lakon Amona. 3 Ke haba

je tuhan laku Amona ödrin e ha kö Hanuna a thanidrin, ka habe, U me únykúme a Davita ame oganá kâmâm, me ame kunâ kôu tavat he ka otubwelâ? ke ca Davita bi ame kunâ athnyabainy kôu he ka elâm taun, me ecmâkâ e, me obia e? 4 Me haba Hanuna ame hom lathnyabai Davita, me giâ ke keihen je waidrin, me subâ but anyidrin je úkhaú hnyi wanben, wale ke ne o but hnyi bon je hújiödrin, me kun' ödrin. 5 Ke adre hia but thumetu Davita, me e ame úkhünöng he ka úkhanö mödrin: anyin ae hmehma gan hmâ tavat. Ke haingen than, ka habe, Laba ju öbun hnyi Jeriko, ke ne o but ame kú thö je waibun, me hmetu but jem. 6 Ke e ka khana but laku Amona a ödrin bon dut kö Davita, me haba je laku Amona ödrin e ham bak ka at Suria hnyi Betherehob, me at Suria hnyi Zoba, ödrin twente thauzan tavat he hon kânâ, me than Maaka tha e me tavat a khaca thauzan, me tavat anyi Tob a twelv thauzan. 7 Ke áme löng ut Davita, me e ame kunö Joab, me utbavat hia anyin tavat ae hwege. 8 Ke ame o but laku Amona, me tot metâ ka vat hnyi homagöuleny taun: ke at Suria úheny Zoba, me Rehoba, me atö Tob, me Maaka, ödrin e hake tot hnyi ke keihen hnyeï. 9 Ke a wâ but Joab a e cicö e vat hnyi hnyimakan me hoton, me e ame úca je hna wia ge at Isaraela hia, me otill' ödrin metâ ka úcú me at Suria: 10 ke e ame hna kolon tavat kö Abisai liamekeiny mē, ke e ame otill' ödrin metâ ka úcú me je laku Amona. 11 Ke haingen, ka habe, A ne hwege huk at Suria u me he ka hadruo nya; ke ame ne hwege hom laku Amona, me oge me he bi nya ka hadruo u. 12 Hwege thö, ke so ötu me hnyok бага thö hobi kâu itin hnyeï, me hobi kâu je taun anyin Khongutin: ke hamö Iehova bi he ka ányâ únyi ae so kâu. 13 Me Joab me tavat unyin ödrin e hakekeny he ka vat me at Suria: me ödrin e kec gan. 14 Ke a wâ but laku Amona a ga kec dö at Suria, me ödrin e kec minya ga Abisai, me dit hnyi taun. Ke Joab ame hmetu úheny hnyi hna hnu laku Amona, me he Jerusalema ai. 15 Ke a wâ but at Suria a ga kac ödra at Isaraela, me ödra adre me úkha-caköu. 16 Ke Hadadeza ame úkhünöng he ka hom at Suria únyi hnyi ke keihen Wagewe: ke ödrin e o but hnyi Helam, tha ödrin me Sobaka taben utbavat anyi Hadadeza hnyi hnyimaködrin. 17 Ke adre me thumetu Davita; me e ame úkha-

caköu at Isaraela hia, me he hanyâûâ Joridano, me o hnyi Helam. Ke at Suria adre me tot metâ cici Davita, me vat mē. 18 Ke ame kec at Suria ge at Isaraela; ke Davita ame hlingâ at Suria tavat tabö kariota a seven haded, ke fâte thauzan tavat tabö hors, me kuc Sobaka taben anyidrin utbavat, me ame mokcu eling. 19 Ke a wâ but je than hia a lathnyabai Hadadeza a ga kuc ödrin dut at Isaraela, me ödrin e üsoköu me at Isaraela, me bi athnyabaidrin. Me ame ot at Suria he ka hadruâ hmetu lakon Amona.

HNYIMAKAN 11.

KE ame o hmetu but huna a üen ame labö he je than he ka vat hnyin, me haba Davita ame kunö Joab me lakeiny unyin, me Isaraela hia; ke ödrin e ohia lakon Amona me thelöng Raba. Ke Davita ame laba hnyi Jerusalema.

2 Ke haba hnyi sahac Davita ame todrö üheny hon hnen hna mokut, me ngenu hon uma umen than: ke e ame wâ ünyi hnyi hon uma ke momo ame soü; ke e te hmanenang momo at ka wâ. 3 Ke Davita ame ükhünöng he ka hnei ge momo. Ke hangen ke at, ka habe, hawa, ca Bathe-seba e. a nöku Eliama, öiö Uria at Heth? 4 Ke Davita ame kunâ je úthumetu me hom e; ke e ame he kâu, me e ame tha mokut mē; (anyin ae bo so but üheny hnyi hna bo kong;) me e ame hmetu ka hnyi umen uma. 5 Me ame erkin dut momo, me e ame ükhünöng he ka thumetu Davita, ka habe, Iny erkin dut. 6 Me haba Davita ame ükhünöng kö Joab, ka habe, Kunö Uria thö jem at Heth kõnya. Me Joab ame kunö Uria kö Davita. 7 Ke ame o but Uria kâu, me Davita ame hnö, ka habe, Hawa ga Joab, ke hawa ge tavat, ke hawa ge vat? 8 Haba Davita ame ha kö Uria, ka habe, He thö ka hnyi umâm uma me hneü li cam. Ke ame didrut Uria üheny hnyi uma umen than, ke adre me kunâ kâu ujeü ünyi ge than. 9 Ke Uria ame mokut hnyi hwanumen uma umen than tha e me lathnyabainy tuban hia, ke a ca he ju ka hnyi umen uma. 10 Ke ödrin e hia but thumetu Davita, ka habe, A ca he bi Uria ka hnyi umen uma, me haba Davita ame ha kö Uria, ka habe, U je ca o bi ühem hnyi hna he? ieu u je ca he gan ka hnyi umâm uma? 11 Haba Uria ame ha kö Davita, ka habe, Ame laba tang hnyi je

uma menâ, me Isaraela, me Juda; ke Joab a tuhök, me lathnyabainy tuhök, ödrin e hunuma hnyi hnyei; ke hawa oge me he ka he ka hnyi umök uma he ka han me ic me tha mokut me öiök? kia inya u, ke kia inya hanom, a oge me ca he ka ânyâ ünyi eling. 12 Ke Davita ame ha kö Uria, ka habe, Me laba hmetu ju hnyi bong ang, ke nyi oge me he ka kunö u. Ke Uria ame laba hnyi Jerusalema hnyi bong eling me nyi. 13 Ke a hia but hawâ e Davita, me e ame tha han me ic mē; ke e ame habelen me me monu but: ke hnyi sahac e ame didrut he ka mokut hnyi hnen hna mokut tha e me lathnyabainy than, ke a ca he bi ka hnyi umen uma. 14 Ke hnyi hnyomakatu Davita ame sihnalimen tusi kö Joab, me kunâ e hnyi hnyamö Uria. 15 Ke e ame sihnalimen hnyi tusi, ka habe, Ip Uria ju cicö dok adre vat hwege hnyin, me hna but e, m' adre me kot, me me mokcu. 16 Ke hnyi üen Joab ame hmâkâ taun, me e ame kunö Uria ka hnyi dok cicö hnen hna khana ae hu tavat hwege hnyin. 17 Ke ame didrut tavat hnyi taun, me vat me Joab; ke ame ta but ke je hnyat, wale je lakei Davita; ke ame mokcu minya Uria at Heth. 18 Ke haba Joab ame ükhünöng he ka thumetu Davita ge ta je ünyi hia thithö hnyi vat; 19 ke e ame hûna ka úthumetu, ka habe, U ka hia but thumeto than ge ta je ünyi hnyi vat, 20 ke ame ne hmönyin than, me e ame ha köu, ka habe, Ieu gabun öbun e hakekeny ka hnyi taun he ka vat? e ca khan' öbun e ödrin e he ka fana ünyi hnyi hon hna up hagin? 21 ia kuc Abimelek nöku Jerubeseth? ca hnen ke momo a khûâ veto hnân oamamá hwit hon ünyi hnyi hon hna up hak veto, me e ame mokcu hnyi Thebez? ieu gabun öbun e hakekeny ka hnyi hna up hagin? awe, u me he ka ha, ka habe, Ke a mok minya ju athnyabaem jia Uria at Heth. 22 Me ame he úthumetu, me o, me omanenâ kö Davita je hofuc hia ho Joab. 23 Me ame ha úthumetu kö Davita, ka habe, E hwege huumen tavat, ke adre me o köhmun ka hnyi hnyei, me öhmun e he ködra ke ne o but ka hnyi homagöuleny taun. 24 Ke haba hnyat fana ödrin e fana lathnyabaem ünyi hnyi hon hna up hak veto; k' ame mokcu ke je lathnyabainy than, me a mok minya lathnyabaem jia Uria at Heth. 25 Me Davita ame ha ka úthumetu, ka habe, U me he ka thu kö Joab, ka habe, U me ca he ka vec ünyi

hnyi únyi e, anyin a haba hele vat ame han monu : hwege thö ányám vat ka hnyi taun, me kot : ke u me he ka silhwegiá. 26 Ke a löng ut öö Uria a ga mokcu áián a Uria, me e ame tenge can áián. 27 Ke e a hia but tenge, me haba Davita ame úkhúnöng he ka hom e ka hnyi umen uma, ke áián dö e, k' ame hnokoá nokon a da. Ke kong kö Iehova únyi eling a ányá Davita.

HNyimakan 12.

ME haba Iehova ame kunö Nathana kö Davita. Ke e ame o but káu, me ha, ka habe, E hu li at hnyi taun a khaca ; e tren omjeú ke at, ke ba ta únyi anyin ke at. 2 Ke e hu ge at ae tren omjeú je mamoe me kau ae ti se hia hmönyin : 3 ke ba ke únyi anyin at ae ba ta únyi, ke so bi khaca thibi nokon mamoe a momo, waleji e ame úco me hat : ke ame gan tot hnyi hnyimakan me lakon ; k' ame hnyi an an jeú, k' ame hnyi ijem belen kaia, k' ame mokut hnyi úlainy, ke e thibi helá me nokon hlu. 4 Ke ame o but ka at ae tren omjeú ke at úheny hnyi hna he, k' ame höcö bi he ka hom únyi hnyi haleny je mamoe me kau he ka thán hobi káu at a o káu, me e ame hom nokon mamoe haleny at ae ba ta únyi, k' ame thán bi hobi káu at a o káu. 5 Me ame úbahlá gan hmá hmönyin anyi Davita ka at ; ke e ame ha kö Nathana, ka habe, Kia inya Iehova, ae úcü he ka mok at ame ányá heláe : 6 ke e ame he ka ovak ham hnán bi nhen nokon mamoe, can e ame ányá únyi e, ke ba betenge gan.

7 Haba Nathana ame ha kö Davita, ka habe, U at eling, Walang hna ha hnö Iehova, Khongu Isaraela, ka habe, Oge hú u hnán thaniny Isaraela, ke oge omeli u únyi hnyi hnyamö Saulo ; 8 ke oge ham köu hnyaban tuhám, me laáián tuhám ka hnyi úlaiám, me ham köu lap anyi Isaraela me Juda ; ke ame ne ti úhnyúkong e, oge me ne he ka bi hanen köu ge ke únyi me ke únyi. 9 Ieú gam u je hia but höciá hofuc ho Iehova he ka ányá hulö hnyi hnyimakan ? u je hia but kuc Uria at Heth ge hele vat, me hom áián me áiám, ke u je hlingá e ge hele vat anyin lakon Amona. 10 Ke walang ang ame ca he ka hia hele vat hnyi hnyabam nyiele balua ; anyin u je höciö nya me hom öö Uria at Heth me áiám. 11 Walang hna ha hnö Iehova, ka habe, Wá bi, oge me he ka okúá únyi ae

kong köu únyi hnyi hnyabam, ke oge me he ka hom laáiám hnyi hnyimákám, me ham bi ka ke at, ke e ame he ka tha mokut me laáiám hnyi hnyimakan seúnö ang. 12 Anyin a u je ányá duóngá e, ke oge me he bi nya ka ányá únyi ang hnyi hnyimákö Isaraela hia, me hnyimakan seúnö. 13 Haba Davita ame ha kö Nathana, ka habe, Oge hia but ányá hulö kö Iehova. Ke haingö Nathana kö Davita, ka habe, Iehova ame hia but obia minya ányám hulö ; u me ca he ka mok. 14 Ke so bi can anyin a u je kuná je iwahnaihmiöny me Iehova he ka bi gan ge únyi e. awe, ame he ka mok nokom adre me he ka hnokoá. 15 Me haba Nathana ame he ka hnyi hnyaban.

Ke Iehova ame kot wanakat wale a hnokoá öö Uria ga Davita, ke e gan imekiny. 16 Haba Davita ame elám Kkong hobi káu wanakat ; ke Davita ame ca han, me didrö, me mokut eú hnyi káná hnyi lit hia. 17 Ke ame todrö je bingatiny hnyaban anyin, he ka kap e únyi hnyi káná : ke e ame höcö, ke e ame ca hnyi tha han mödrin. 18 Ke ame mokcu wanakat hnyi bong a seveniny. Ke e ot lathnyabai Davita he ka thumeto e a ga mokcu wanakat : anyin a haingödrin, ka habe, Wá bi, ötin e fuc káu ke tiga möt wanakat, me e ame ca löng hötin : ke hawa anyin vec walang ang, ötin e ne ha káu, ka habe, A mokcu wanakat ? 19 Ke Davida ame wá a g' ame ulitköu lathnyabainy, me Davita ame wáhmakhmeto a ga mokcu wanakat : ke haingö Davita ka lathnyabainy, ka habe, Hawa, a mokcu wanakat ? Me haingödrin, ka habe, A mokcu. 20 Me haba Davita ame todrö úheny hnyi káná, me soú, me hú ge wakaco, me khavá ke je úkhaüen ; me o ka hnyi uma umö Iehova, me khudrung : me e ame he ka hnyi umen uma ; ke e ame huna ködrin, me ödrin e ip jeú hnyi hnyimakan, me e ame han. 21 Me ame ha káu lathnyabainy, ka habe, Ieú únyi ang u je ányá ? a u je ca han k' u tengiá wanakat ke tiga möt ; ke a mokcu wanakat, me u me todrö me han. 22 Me haingen, ka habe, K' ame tiga möt wanakat oge me ca han, k' oge me tenge : anyin a haingök, ka habe, Ie at ae khana ame ne he Iehova ka betenge gak, me me möt bi wanakat. 23 Ke walang a mokcu, hnán eú oge me ca he ka han ? Hawa, e khañö nya he ka ohmeto e ? Oge me he bi nya ka he káu

II. SAMUELA 13.

k' ame ca he bi e ka hmetu kõnya. 24 Ke Davita ame otubweli Bathe-seba a âiân, me didrö kâu, me laba unyin : me e ame hnoköä da, me hwenyi ien Solomona. Ke Iehova ame betenge gan ; 25 me e ame úkhunöng a deny Nathana a perofeta, ke e ame hwenyi ien bi me Jedidia ga Iehova.

26 Ke haba Joab ame vat me Raba banen lakon Amona, me hügúnâ taun anyin than. 27 Ke Joab ame kunâ je úthumetu kö Davita, me ha, ka habe, Oge me vat me Raba, eke, oge hia but hügúnâ taun adre khu an hnyin. 28 Ke haba walang ang u ma he ka úkhacaköü kolon tavat, me hunuma hnyi taun, me hügúnâ e : wâ oge nye hügúnâ bi nya, me adre me hwenyi ien e venyik. 29 Ke Davita ame úkhacaköü tavat hia thithö, me he Rama ai, me vat me, me hügúnâ e. 30 Ke e ame hom koronainy anyidrin than únyi hnyi hon ban ; ke haba ihmakinny me khaca talan gol, ke e hnyin je veto ae gan hwabab ; ke adre me ip hnyi hon bö Davita bi. Ke e ame hom but je únyi adre sö únyi hnyi taun, ae ti gan hmâ. 31 Ke e ame hom but tavat úheny hnyi taun, me ip ödrin hmelen je gili, me je fao ae údö, me je giwa fao, me odili ödrin hnyi hna leü veto kânâ : ke e ame ányâ helâe ka je taun hia anyin lakon Amona. Ke Davita me tavat hia ödrin e hmetu Jerusalema ai.

HNYIMAKAN 13.

KE a um dö ta je únyi e, haba Abasoloma nöku Davita me hu haniny ae hmanenang, Tamara ien ; ke Aminona nöku Davita ame weny e. 2 Ke ame vec Aminona me mok unyin ga Tamara a haniny ; anyin a e hlu bau ; ke e hmak kö Aminona bi he ka ányâ ke únyi kâu. 3 Ke e hu ihumi Aminona, Jonadaba ien, nöku Simea, liamekeiny me Davita : ke at metâ Jonadaba. 4 Ke haingen kâu, ka habe, leü gam, nokon than lö, a u delâ hnyi je bong ? u me ca he ka thumetu nya ? Haba Aminona ame ha kâu, ka habe, E wek Tamara, hani Abasoloma liamekeiny mõnya. 5 Ke Jonadaba ame ha kâu, ka habe, U me he ka mokut hon hnâm hna mokut, me mok thoi : ke e ka o kâmâm he ka ö u, u me he ka ha kâu, ka habe, Ö e me he jem Tamara a hanik, he ka haök, me bi han hnyi hnyimakök, m' inye he ka wâ, me han únyi gan. 6 Me Aminona ame mokut, me mok thoi : ke ame o but than

he ka wâ e me haba Aminona ame ha ka than, ha habe, Ö e me he jem Tamara a hanik, me op li ong areto unyik, me inye he ka han únyi gan. 7 Haba Davita ame úkhunöng kö Tamara ka hnyi hnyaba, me ha, ka habe, He thö ka hnyi uma umö Aminona a hanâm, me bi an. 8 Haba Tamara ame he ka hnyi uma umö Aminona a haniny ; ke e ae mokut. Ke e ame hom falawa, me op, me ányâ je ong areto hnyi hnyimakan, me le je ong areto. 9 Me e ame hom öt, me hingälâ hnyi hnyimakan ; ke e höcö han. Haba Aminona ame ha, ka habe, Didrut tavat hia thithö unyik. Me ame didrut tavat hia thithö unyin. 10 Me Aminona ame ha kö Tamara, ka habe, Hukâ thö jem jeü ka hnyi hnyeule, m' inye he ka han únyi hnyi hnyamâm. Me Tamara ame hom je ong areto a op, me hom kö Aminona a haniny hnyi hnyeule. 11 Ke e ame hom e kâu me me han me e ame kât, me ha kâu, ka habe, Hanik, ötu me he ka tha mokut. 12 Me e ame ha kâu, ka habe, Ohe, hanik, u me ca he ka okongu nya ; anyin adra me ca ányâ helâe hnyi Isaraela : u me ca he ka ányâ monu ang. 13 Ke oge me he bi nya ka kácâ kâ anyik hmehma ? ke haba u, me u me he ka helâ me at ae monu hnyi Isaraela. Ke walang ang ö u ma ha thö ka than, anyin a e ame ca he ka behanö nya gam. 14 Ke höcö he ka löng hofuc hwan hlu : ke e hwege hon, me ame okongö, me tha mokut mē. 15 Me Aminona ame ti ikikiâ hlu bi ; ke beönua tulutiny hna ikikiâ hon tulutiny hna betenge gan abân. Me Aminona ame ha ka hlu, ka habe, Todrö, he thö. 16 Me haingen hlu kâu, ka habe, Ohe, anyin ae beönua monu ang a u je obö nya, hon unyi eji u je ányâ kõnya. Ke e ame ca löng kâu. 17 Me e ame hawâ athnyabainy at a labö huliwa unyin, me ha, ka habe, Lelö but momo ang unyik, me ohmâ hwanuma hwaban. 18 Haba khaüen hlu me úkhaü ae ve makan : anyin ame labö khavâ je úkhaü helâe wahlu lakon than ödrin tiga hlu hmai. Me haba athnyabiny ame hom hlu kâu ka hnyi hwanuma, me ohmâ bi hwanuma hwaban. 19 Me haba Tamara ame ip dröu ka hnyi hon ban, me kia úkhaü ae ve makan a khavâ, me hai hnyamen hon ban, me tenge tot. 20 Ke Abasoloma a haniny ame ha kâu, ka habe, Hawa, a mwi unyâm Aminona a hanâm ? awe, laba hnyibu ju, hanik : hanâm e ; ca vecâ únyi ang. Ke Tamara ame laba baü

II. SAMUELA 14.

hnyi uma umö Abasoloma a haniny. 21 Ke a löng ut Davita je únyi hia eling, me e ame gan hmönyin. 22 Ke Abasoloma ame ca fuc kö Aminona, ame ne únyi ae kong ame ne únyi ae so: anyin a Abasoloma ame ikikiö Aminona, can e ame okongu Tamara a haniny.

23 Ke hwaban lo li huna me hu tavat subá leúnen mamoe hale Abasoloma hnyi Baala-hazor, hakekeny Eferaima: ke Abasoloma ame hawâ obaga hia lakon than.

24 Ke Abasoloma ame o ka than, me ha, ka habe, Wâ bi, walang ang, e hu tavat subá leúnen mamoe haleny athnyabaem; ö e he but than me lathnyabainy kõnya athnyabaem. 25 Ke haingen than kö Abasoloma, ka habe, Ohe, nõkuk, öhmun e ca he hia thithö ka hnyi he, wâ e nye hmak köu. Ke e ame újengö: ke so bi e ame ca he, ke e ame ha hnahicâ e. 26 Haba Abasoloma ame ha, ka habe, Ame ne ba, ö e tha he möhmun Aminona liamekeiny mõnya. Haba than ame ha kâu, ka habe, Hnân eü e ame he ka tha he möu? 27 Ke Abasoloma ame újengö e, me e ame hnö Aminona me je бага hia lakon than he ka tha he mē. 28 Ke Abasoloma ame hûna ka lathnyabainy, ka habe, Wâ wia öbun, e ka senyin hnyeku Aminona ge waina; ke iny ka ha köbun, ka habe, Kuc Aminona but, awe, hlingâ but e, ca ot bi, hawa, inya oge ca hûna köbun? hwege thö, me hnyok бага but. 29 Me haba lathnyabai Abasoloma ödrin e ânyâ kö Aminona helâ me hna hûna hnö Abasoloma. Me ame todrö je бага lakon than hia, me ve tabâ haledrin je miul, me kec. 30 Ke tiga ödrin bi eü hnyi gethen, me ame o but kö Davita úthumetú, ka habe, A hia thö Abasoloma hlingâ obaga lakon than hia, ke ba but kolon. 31 Me ame todrö than me kia anyin je úkhaü, me mokut eü hnyi kânâ; ke ame tot unyin lathnyabainy hia adre hia but kia anyidrin je úkhaü. 32 Me ame ha Jonadabu nõku Simea, liamekeiny me Davita, ka habe, Ca he bi tuhök ka únykúme e ga mokcu je hidröu hia je lakon than; anyin a Aminona thibi a mokcu: anyin a Abasoloma ame ip hnân, hwân hnyi bong e ame okongu Tamara hnyin a haniny. 33 Ke walang ang ca he bi than a tuhök ka hmak ge únyi ang he ka únykúme a ga mokcu hia je lakon than; anyin a Aminona thibi a mokcu. 34 Ke Abasoloma ame kec. Ke ame bwele hidröu at ame hmak, me wâ, ke wâ bi, wale tavat

ae se hia ödrin e he hnyi getheniny bucen hnyi hoton. 35 Ke haingö Jonadaba ka than, ka habe, Wâ bi, e but ang je lakon than: e hnathu helâji me athnyabaem ame ha. 36 Ke ame um dö ha, me wâ bi, ame o but je lakou than me ödrin e tenge göranyai: ke ame ti tenge gan hmâ minya than me lathnyabainy. 37 Ke Abasoloma ame kec, me he kö Talemai nõku Amihuda than Gesuri. Ke Davita ame tenge hnyi ta ogö bong ge nokon.

38 Ke Abasoloma ame kec, me he Gesuri ai, k' ame laba eling kun ta huna. 39 Ke e gan hmâ behe Davita kö Abasoloma: anyin a tubwet ut ga Aminona, anyin a mokcu.

HNYIMAKAN 14.

KE e khandö Joab nõku Zeruaia a g' ame hnyok kö Abasoloma than. 2 Ke Joab ame úkhünöng Tekoa ai, me hawâ ke momo ae metâ, me ha kâu, ka habe, Ö u me he ka tenge thoi, me khavâ je úkhaüen hnyamok, k' u me ca he ka süö wakaco, k' u me he ka helâ me momo ame tenge beü can at a mokcu: 3 ke he thö ka than me ha kâu je hofuc ang. Me Joab ame ip hofuc hnyi hnyimen momo. 4 Ke momo Tekoa ame fuc ka than, me e ame ta hnyikânâi, me iyâü, me ha, ka habe, Than lö, hadruâ thö. 5 Ke haingen than ka momo, ka habe, Ieü gam? Me haingen, ka habe, Ipy safac, Ieü a mokcu öiök. 6 Ke e hu gak a athnyabaem lakuk li бага, ke ödru me ú hnyi hnye, ke ba at he ka öüsâkâü ödru, k' ame kot ke at ge ke at, me hlingâ. 7 Ke wâ bi, ame tha todrö lap hia kõnya athnyabaem, ke haingödrin dö, ka habe, Hna but at a hlingâ liamekeiny mē, m'öbmun e he ka hlingâ e can möt anyin liamekeiny mē, waleji e ame hlingâ, me ohia minya hlaç at ame he ka tren ta je omjeü u ka mok bi: he haba helâe me ödrin e he ka omoko walep a kolon unyik, me me ba but ien me kolon ka öiök eang hmeledrany. 8 Me haba than ame ha ka momo, ka habe, He thö ka hnyi umâm uma, me oge me he bi nya ka hûna gam. 9 Haba momo Tekoa ame ha ka than, ka habe, Than a tuhök lö, e so ame he hulö ang ka ta huk me lap anyi cica; ke ba konginy than me anyin theron. 10 Ke haingen than, ka habe, Ame ne he ka fuc köu ke at, hom but jem kõnya, k' ame ca he hmetu ka kalö u. 11 Me haingen momo, ka habe Ö u úny-

kúme than Iehova Khongom, me me ca he hmetu at ame bi hwaban komok ka bi hwaban bi, wá ödrin nye he ka ohja nökkuk. Me e ame ha ka momo, ka habe, Kia inya Iehova ame ca he ka kölu hnyikánái ke leúnen ban nokom. 12 Haba momo ame ha, ka habe, Ö iny me he a athnyabaem ka ha ke hofuc ka than a tuhök. Haingen, ka habe, Ha thö. 13 Ke haingen momo, ka habe, Ieü can u je hia but únykúme he ka ányá heläe ka tavat anyin Khong? Anyin a haba nhen than hna ha hofuc eling helä ke e hu hulö ge than, wale hnyi nhen hna tha hom hmetu at e ame obá. 14 Anyin a bongon bi at he ka mok, me helä me köiö adre hingälá hnyikánái, waleji adre me ca he hmetu ka úkhöúná; ke haba khaca Khong ame ca hlingá at, ke e ame bi deny, me me ca hia gan at adre me obá. 15 Ke walang ang oge o but he ka ha hofuc eling ka than a tuhök, anyin a tavat ödrin e hia but ooti nya: ke oge me ha, a athnyabaem, ka habe, Oge me he ka he walang ang ka ha ka than; ame ne he than ka ohwádá hna ha ge athnyabaem. 16 Anyin ame he than ka löng, me omelö athnyabainy únyi hnyi hnyamen at ame he ka tha ohio nya me nökkuk únyi hnyi jekhóu jekhon Khong. 17 Ke ame ha athnyabaem, ka habe, Ö u, he ka öusökouá but hofuc hwan than a tuhök: anyin a helä than a tuhök me angela anyin Khong, he ka wáhmakhmeto so me kong: ke ame he Iehova Khongom ka tha e möu. 18 Me ame thu than me ha ka momo, ka habe, Ö u ca he ka ikhálá gak únyi oge me he ka hnö gam. Haingen momo, ka habe, E so than a tuhök ame fuc walang ang. 19 Me ame ha than, ka habe, ca tha u me Joab hnyi únyi ang? Me ame thu momo, ka habe, kia inya u than a tuhök a g' ame ca khana ke at he ka saü ka hnyi ke keihen metá me me, únyi hnyi hna ha hia nhen than a tuhök: anyin a Joab, athnyabaem, e bi a hüna könya, me ip ta je hofuc hia eling hnyin hnyimök a athnyabaem: 20 A ányá únyi eling Joab athnyabaem, hnän he ka wia bongon: ke e metá tuhök helä me úmetáiny angela anyin Khong, he ka wáhmakhmetoá ta je únyi hia thithö eang hmeledrany. 21 Haba than ame ha kö Joab, ka habe, Wá bi, oge hia but ányá únyi ang: he thö ka hawá hidróu jia Abasoloma. 22 Haba Joab ame ta hnyikánái me khudrung, me ha hnahicá than: ke Joab ame ha, ka habe, A wá but athnyabaem hnyi bong ang a oge me wá

ibetengiö hnyi hnyimákám than lö a tuhök, anyin a than ame kap hofuc hwan athnyabainy. 23 Haba Joab ame todrö me he Gesuri ai, me hum Abasoloma Jerusalema ai. 24 Ke haingen than, ka habe, E ame he ka saü ka hnyi umen uma, k' ame ca he ka wá hnyimákök. Me Abasoloma ame saü ka hnyi umen uma, k' ame ca wá hnyimakan than.

25 Ke ba at ae lung gan hmá helä me Abasoloma hnyi anyin hmanenang hnyi Isaraela hia: e ba hnyikongon hwän hnyi li hnyeücan ke ne o but hnyi ban. 26 Ke e ka subá leúnen ban (ke ame sö hnyi obiny huna anyin ae hmak bi me e ame sö): k' adre me ne tuluto ihmakiny leúnen ban, me lo li haded je sekel, hoton tulut anyin than. 27 Ke adre hnokoá kun ta бага laku Abasoloma, ke khaca hlu, Tamara ien: e momo ae hmanenang.

28 Ke Abasoloma ame laba hnyi Jerusalema hnyi lo li huna ae bekhöt; k' ame ca wá hnyimakan than. 29 Ke Abasoloma ame hawö Joab me me kuná ka than, ke e ame höcö löng; me ame olo hawá, ke höcö bi he. 30 Me e ame ha ka lathnyabainy ka habe, Wá bi, e hakekeny könya utkáná i Joab, ke e hu anyin bali eling; he th' öbun ka thong. Me haba lathnyabai Abasoloma ödrin e thong utkáná. 31 Haba Joab ame todrö me he kö Abasoloma ka hnyi umen uma, me ha káu, ka habe, Can ieü a thong ik utkáná ge lathnyabaem? 32 Me Abasoloma ame thu kö Joab, ka habe, Wá bi, oge me úkhúnöng köu, ka habe, Aiö u, m' oge me he ka kunö u ka than, he ka ha, ka habe, Oge me he jem úheny Gesuri ká ieü? e so könya inya tiga laba eling: ke walang ang iny bewá hnyimakan than; ke ame ne hu hulö unyik me hamen he ka hlingö nya. 33 Me ame he Joab ka than, me thumeto e: ke e ame hawö Abasoloma, me e ame he ka than, me nom hnyikánái hnyi hnyimakan than: me ame úcimhnyimak than me Abasoloma.

HNYIMAKAN 15.

KE hwaban e Abasoloma ame penapena ke kariota me je hors hobi káu e bi, me tavat a fifite he ka bödrin ka wadring hnyi hnyimakan bi. 2 Ke Abasoloma ame vesá kong, k' ame tot hnyi getheniny homagöule: ke ame ne o ke at ae hu iwatretra me me he than ka owisa, me haba Abasoloma ame hawá e, me ha, ka

habe, U je mwi ua? Ke haingen, ka habe, Uhek athnyabaem hnyi ke tribu hnyi je tribu Israaela. 3 Ke Abasoloma ame ha kâu, ka habe, Wâ bi, e so me wisa ânyâm je ûnyi; ke ba at a kunâ hnen than he ka löng kôu. 4 Ke Abasoloma ame ha minya, ka habe, E na kunö nya ju he ka owisa hnyi hnyeï, me me he kõnya tavat hia thithö ae hu iwatretra, me ûhnei, me inye he ka owisa kâu! 5 Ke e ka hakekeny kâu ke at he ka nom kâu, me e ame inâ benyin me kât e, me úcimhnyimak më. 6 Ke Abasoloma ame ânyâ helâe kö Israaela hia ödrin e o ka than he ka ûhnei: ke Abasoloma ame venâu hnyekon at Israaela.

7 Ke hwaban je huna a fâte, Abasoloma ame ha ka than, ka habe, Ö u hnö nya he ka he ka subâ anyik khöbi, wale o ge hûkâlâ kö Iehova hnyi Heberona. 8 Anyin a inya athnyabaem oge hûkölö khöbi ke oge me tiga laba hnyi Gesuri hnyi Suria, ka habe, A ne he Iehova ka hum nya hmetu Jerusalema ai, awe, oge me he ka bi athnyabai Iehova. 9 Haba than ame ha kâu, ka habe, He thö me hnahic. Me e ame tot me he Heberona ai. 10 Ke haba Abasoloma ame kunâ je hnyat wâ bongon ka hnyi ta je tribu hia anyi Israaela, haingen, ka habe, Öbun ka löng dö hwan trutru, öbun e he ka ha, ke habe, Than dö Abasoloma hnyi Heberona. 11 Ke ame tha he me Abasoloma tavat a tu haded úheny Jerusalema, adre haw' ödrin, ke ödrin e he me hnathu, ke ca khan' ödrin ke ûnyi. 12 Ke Abasoloma ame úkhûnöng he ka hum Ahithofela at Gilo, ke obotkongi Davita, úheny hnyi anyin taun, wale úheny Gilo, ke e ame tiga hudo je hut. Ke e hwege but hna sihnân; anyin ame se hia tot tavat unyi Abasoloma.

13 Ke ame o but kö Davita úthumetu, me ba, ka habe, A ok ut hnyekon at Israaela kö Abasoloma. 14 Haba Davita ame ha ka lathnyabainy hia unyin hnyi Jerusalema, ka habe, Todrö, ötin e kec, wâ e nye ca kec möt ke at gatin ûnyi ga Abasoloma: logotö, m' ötin e he, wâ e nye hom til' ötin logot, me me oâ unyi ae kong kötin, me kot taun ge hele vat. 15 Me ame ha ka than ge lathnyabainy than, ka habe, Wâ bi ame le lathnyabaem ka ânyâ hia helâ me hna he than a tuhömmun ka ha. 16 Ke ame didrut than me anyin lap hia hoton. Ke than ame ip biju je momo a ten, a anyin je momo he ka tuö hnyaban.

17 Ke ame didrut than me tavat hia hoton; me laba hnyi Bethemerhak. 18 Ke ame tha he ehele lathnyaba hia unyin; me at Kerethi me Pelethi, me Gatha hia, tavat a siks haded hnyat he hoton úheny Gatha, ödrin e bödrin hnyi hnyimakan than. 19 Ke than ame ha kö Itai at Gatha, ka habe, Anyin a ieu u me tha he möhmun! hmetu ju ka hnyi hnâm, me tha laba me than: anyin a u atkanyua me bâ. 20 U je o et, ke hawa, oge me he ka kunö u hnyi bong ang he ka tha vheno möhmun, iny ka he hnyi je dok oge me wek ka he hnyin? hmetu ju, ke ohmeto ju je liamekeiny möu; ke so e bi unyâm ibetengjö me hnathu. 21 Haba Itai ame thu ka than, ka habe, Kia inya Iehova, ke kia inya than a tuhök, haba inya athnyabaem oge me he ka tha laba hnyi dok ame laba hnyin than a tuhök. 22 Ke haingö Davita kö Itai, ka habe, he thö me hanyâûâ. Me Itai at Gatha ame tha he hanyâûâ me tavat hia unyin, me tavat hia ae úhnyükong unyin. 23 Ke ame tenge göranyai hnyeï hia, ke tavat hia adre me he hanyâûâ: me than minya bi ame hanyâûâ wagewe Kederon, k' ame hanyâûâ tavat hia thithö getheniny hnyebuba. 24 Ke wâ bi, Zadoka minya me at Levi hia unyin, ödrin e vadren tangen úhinhnyköu anyin Khong; ke ödrin e ip tang tangen Khong, ke Abiathara ame ölö ke ne o but ame didrut tavat hia úheny hnyi taun. 25 Me ame ha than kö Zadoka, ka habe, Hom hmeto thö tang tangen Khong ka hnyi taun: ame ne he Iehova ka betenge gak, me e ame he ka ohmetu nya, me tha omanenâ e bi kõnya me hnyaban minya: 26 ke ame ne ha, ka habe, Oge me ca senyin gam; awe walönya ang, hamen he ka ânyâ kõnya unyi ae so hnyi hnyimakan. 27 Ame ha minya than kö Zadoka, at bihut, ka habe, U at ame wâ? awe, hmetu ju ka hnyi taun hnyi hnahic, me Ahimaza a nokom, me Jonathana a nöku Abiathara, li lakubu a tha ödru möbu. 28 Wâ bi, oge me he ka me laba hnyi dok ae tha hon hnyi hnyebuba, ke ne o but ame o hofuc ûnyi gabu he ka thumetu nya. 29 Anyin a wale haba Zadoka me Abiathara ödru me vadren hmetu tang tangen Khong Jerusalema ai: me ödru me laba eling.

30 Ke Davita ame ölö hnyi getheniny bucen Elaio, me ölö me tenge tot; ke adre tube ban, ke ba tangen linyeüca: ke haba tavat hia adre me tha he më, ödrin e ve

tube je bödrin, me ölö me tenge tot. 31 Ke ame ha ke at kö Davita, ka habe, Ahithofela, ame tha he me tavat hügüná dökhu, me Abasoloma. Haba Davita ame ha, ka habe, Iehova lö, ohavá but úhnenamö anyi Ahithofela me me monu but. 32 Ke ame o thö Davita ka hnyi ban bucen, wale adre labö khudrung hnyin ka Khong, wá bi, Husai at Areki ame úkhanó mé a kia anyin úkot, me e hu káná hon ban : 33 ke Davita ame ha káu, ka habe, U je ne tha he mönya u me he ka ohmakö nya : 34 ke u je ne hmetu ka hnyi taun, me ha kö Abasoloma, ka habe, Oge me he ka bi athnyabaem, than ; helá me hnök hna bi athnyabainy kámám e hac, heláe oge me he walong ang ka bi athnyaba köu : ke wale u me he ka ohavá hobi könya úhnenamö anyi Ahithofela. 35 Ke hawa, ca tha e möu eling Zadoka me Abiathara li at bihut? ke haba ta je únyi hia thithö u me he ka löng hnyi uma umen than, me u me he ka thumetu Zadoka me Abiathara li at bihut. 36 Wá bi, eling unyidru li lakudru, jia Ahimaza nöku Zadoka, me Jonathana nöku Abiathara ; ke öbun e he ka kun' ödrü me ta je hofuc hia thithö öbun e he ka löng. 37 Me haba Husai ihumi Davita ame he ka hnyi taun ; ke ame o but Abasoloma hnyi Jerusalema.

HNYIMAKAN 16.

KE a hia but Davita önuá úhnyúkong ge ban bucen me wá bi, ame úkhanó me Ziba athnyabai Mefiboseth tha e me li asina adre hije hok, lo li haded je areto, ke khaca haded de wan vine adre hlec meleca, ke khaca haded je wan úö hnyi huna, ke khaca waina. 2 Ke haingen than kö Ziba, ka habe, Ieú u me he ka ányá ge ta je únyi ang? Haingö Ziba, ka habe, Haba li asina me hnán bi taben lap anyin than ; ke haba je areto me je wan úö, me, an wahidróu ; ke haba waina me belen tavat ae sényin hnyi hnyeubua. 3 Ke than ame hnö, ka habe, Ke ewa nokon tuhám? Haingö Ziba ka than, ka habe, e ame laba bi hnyi Jerusalema : anyin a haingen, Ame he lap anyi Isaraela ka ham könya hnyi bongang dökhu dökhu cica. 4 Ke haingen than kö Ziba, ka habe, Wá bi e unyám ta je únyi hia anyi Mefiboseth. Ke haingö Ziba, ka habe, Inya oge me nom köu, me u me betenge gak than a tuhök.

5 Ke a o but Davita than hnyi Bahurim,

me wá bi, ame didrut úheny e ke at hanen lap anyi Saulo, Simei ien, nöku Gera : k' ame didrut me úhangö tot. 6. Ke e ame kuc Davita ge veto, me lathnyabai Davita hia thithö : ke e bi hnyi ke keihen a metá me meny tavat hia me tavat ae hwege hia. 7 Ke haba Simei ame úhangö me ha, ka habe, He thö, he thö, u aten dra, me atö Belial : 8 haba Iehova ame hia but ohmeto köu dra hia dren lap anyi Saulo, at u je hwöhwan ; ke a hia but Iehova hna dökhu ka hnyi hnyamö Abasoloma a nokom : ke wá bi, adre me hum u hnyi ányám hulö, anyin a u ke aten dra. 9 Me haba Abisai nöku Zeruaia ame ha ka than, ka habe, Can ieú ame he at ang a e kuli ae mok ka hanga than a tuhök? ö u hnö nya he ka sö degecá ban. 10 Ke haingen than, ka habe, Ieú könya gabun ta laku Zeruaia? haba hnen hna úhangö, me can ame ha káu Iehova, ka habe, Hangö Davita thö ; ke ie at ame he ka ha, ka habe, Ieú gam u me ányá e? 11 Ke Davita ame ha kö Abisai, me lathnyabainy hia, ka habe, Wá bi, e bekuc nya nöku, at a o únyi hnyi hnye-kuk ; me hawa, ame ca he at Beniamina eang ka ányá heláe? hna but e, hamen he ka úhangö thö, anyin a Iehova ame kuná e. 12 Ke ame ne he Iehova ka wá hna okongu nya, me me he Iehova ka bi hwaban so könya hwaban hnen hna hangö nya hnyi bongang. 13 Ke haba Davita me je aten ödrin e vheno gethen : haba Simei ame vheno baten bucen cicó e, me úhangö tot, me kot e ge veto, me iá sesá. 14 Ke ame o but than me tavat hia thithö unyin, ke ödrin sényin dut, me ödrin e mená eling. 15 Ke ame o but Abasoloma me tavat hia thithö a at Isaraela unyin hnyi Jerusalema, ke tha e mé Ahithofela. 16 Ke ame o but Husai at Areki ihumi Davita kö Abasoloma, me haba Husai ame ha kö Abasoloma, ka habe, E so e möt bi than, e so e möt bi than. 17 Ke Abasoloma ame ha kö Husai, ka habe, wale ányám betenge ka hanám? anyin a ieú u je ca tha he me hanám? 18 Haba Husai ame thu kö Abasoloma ka habe, Ohe ; ke haba at a úca Iehova, me tavat eang, me at Isaraela hia, me oge me he ka bi aten, me tha laba mé. 19 Ke haba khaca, ie at ae úcú könya he ka bi athnyabainy káu? oge me ca he ka bi athnyaba hnyi hnyimakan nokon? oge me he ka bi athnyaba köu heláje me hnök hna bi athnyaba hnyi hnyimakan kámám. 20 Ke Abasoloma ame ha kö Ahithofela, ka

habe, Omanenâ thö ûnykûmânâm ge ûnyi ötin he ka ânyâ. 21 Ke Ahithofela ame thu kö Abasoloma, ha habe, U me he ka didrö ka je momo anyin kâmâm, wale e ame ip he ka tuö uma; ke ame he ka löng Isaraela hia a u bon dut ka kâmâm: me ame he ka hwege hnyamen ta je lahiâm. 22 Me ödrin e ulolo una mano hon ban una; me haba Abasoloma ame didrö ka je momo anyin kamen hnyi hnyimakan at Isaraela hia thithö. 23 Ke haba ûhnenamö anyi Ahithofela, wale e ame ûhnenamö hnyi je bong eling, e bi helâ ke at ame hnö hnyi hofuc hwan Khong: helâe minya bi je ûhnenamö hia anyi Ahithofela ga Davita me ga Abasoloma.

HNYIMAKAN 17.

KE haba Ahithofela ame ha kö Abasoloma, ka habe, Hnö nya he ka úca twelv thauzan tavat, me oge me he ka tot me hnu hotu Davita eâu hnyinghet: 2 ke oge me he ka o kâu e ka tiga sênyin, me wakhalet tavat unyin, me ootâ e: ke ame he ka kec tavat hia thithö unyin; ke oge me he ka kot thibi than: 3 ke oge me he ka ohmeto tavat hia thithö kôu: haba at u me elâm me helâke ame hmetu tavat hia: ke ame he ka hnahic tavat hia thithö. 4 Ke so hofuc e kö Abasoloma me wahingatiny Isaraela hia.

5 Ke Abasoloma ame ha, ka habe, Me hawo Husai at Areki, m' ötin e löng minya hwan. 6 Ke a o but Husai kö Abasoloma, me Abasoloma ame ha kâu, ka habe, Ahithofela ame ha helâng: hawa, ötin e he ka ânyâ hoton hnen hna ha? ame ne ba, fuc dö u. 7 Me haingö Husai kö Abasoloma, ka habe, E ca so ûhnenamö a ûnö Ahithofela walang ang. 8 Ke haba Husai ame ha minya, ka habe, E kханö u hwakecin kâmâm me tavat unyin, a ödrin hnyat ae hwege, ke hmönyin je hnyekudrin helâ me bea adre hûgúnâ lakon hnyi hnyot: ke at vat kâmâm, ke ame ca he ka tha mokut me tavat. 9 Wâ bi, e ame ikhölö walang ang hnyi ke hmonop, ame ne ke dok bi: ke e ka ta ke je hnyat a bân, k' ame löng bi tavat, me adre me he ka ha, ka habe, E hu hna úhlingö unyin tavat adre me hiö Abasoloma. 10 Me haba at ae hwege, a helâke hnyekon liona but hnyekon, me e ame he ka ti aú but: anyin ae khana Isaraela hia a e hwege kâmâm, me hwege tavat unyin. 11 Anyin a wale inya oge me ûnö he ka úkhacakouâ

Isaraela hia unyâm, hwân Dana ke ne o but Bere-seba, helâ me je önyin köö úseiny; me u me he ka hnyi vat. 12 Me ötin e he ka o kâu hnyi dok adre me he ka wâ hnyin, me ötin e he ka o kâu helâ me dân hau ame ta ka hnyi kânâ: m' ate me ca he ka hna kolon bi me tavat unyin, e ba hmönyin me khaca. 13 Ke haba khaca, ame ne dit ka hnyi taun bi, awe ame he Isaraela hia ka hom ta je tö ae gan ka hnyi taun eling, me lelö e ka hnyi wagewe, ke ne o but ame ca he ka manen ke ong veto eling. 14 Me ame ha Abasoloma me at Isaraela hia, ka habe, E beönua hofuc ho Husai at Areki hon hofuc ho Ahithofela. Anyin a Iehova ame musö he ka ohavâ hofuc ae so ho Ahithofela, me me he Iehova ka oâ ûnyi ae kong kö Abasoloma.

15 Me haba Husai ame ha kö Zadoka me Abiathara li at bihut, ka habe, A helâng me helâng hofuc ho Ahithofela kö Abasoloma me wahingatiny Isaraela; ke a helâng me helâng hok bi hofuc. 16 Ke walang ang ie úkhúnöng dö me thumetu Davita, ka habe, U me ca he ka mokut eâu hnyinghet hnyi dok ae tha hon hnyi hnyeububa, ke so bi hanyâúâ thö; wâ e nye utâ than me tavat hia thithö unyin. 17 Ke Jonathana me Ahimaza ödrü me laba bi hnyi Eni-rogel; ke ame labö he ke athnyaba a hlu me thumetu ödrü; me ödrü me he me thumetu Davita than: anyin e ca úcú he ka ö ödrü hnyi taun. 18 Ke ame ö ödrü ke da, me thumetu Abasoloma: ke ödrü me ie he me o hnyi uma umen ke at hnyi Bahurim, ae hu hna khú an hnyi hnyeuleny; ke ödrü me utut ka hnyin. 19 Ke haba momo ame hom me ulolo hna tube hon hnyimen hna khú an, me ve lau but hon e je hwit adre thotho; ke ba ke ûnyi ae manen. 20 Ke ame o but lathnyabai Abasoloma ka momo hnyi uma, me ha, ka habe, Ewa Ahimaza me Jonathana? Haingen momo ködrin, ka habe, Ödrü me he but me hanyâúâ wagewe. Ke ödrin e hia but elöm ödrü, me ca wâ bi, me ödrin e hmetu Jerusalema ai. 21 Ke ödrin e he but, me ödrü me ölö thö úheny hnyi an, me he me thumetu Davita a than; ke ödrü me ha kö Davita, ka habe, Todr' öbun me ie he hanyâúâ wagewe: anyin a helâng hofuc ho Ahithofela gabun. 22 Me ame todrö Davita me tavat hia thithö unyin, me he hanyâúâ Joridano: ke hnyi lany hnyi hnyomakatu e ba at a ca hnyi hanyâúâ Joridano. 23 Ke a wâ but Ahithofela a g' adre ca ânyâ hoton hnen hna

ha, me e ame ip taben hon haleny asina, me todró, me he ka hnyi umen uma, hnyi anyin taun me húna ka anyin lap, me hnok ; me e ame mokcu, me adre me konám e hnyi erkemok anyin kamen.

24 Ke ame o but Davita hnyi Mahanaima. Ke Abasoloma ame hanyáúú Joridano, e me at Isaraela hia unyin. 25 Ke Abasoloma ame otílö Amasa hnân taben utbavat hwabö Joab. Ke Amasa me nokon ke at adre hwenyi ien Ithara at Isaraela, at ame he kö Abigaila nöku Nahasa a hlu, hani Zeruia, hinyö Joab. 26 Ke Isaraela me Abasoloma adre me hunuma hnyi Gileada.

27 Ke ame o Davita hnyi Mahanaima, me haba Sobi nöku Nahasa at Raba hanen lakon Amona, me Makir nöku Amiela úheny Lo-deba, me Bazilai at Gileada úheny Rogel, 28 ödrin e hom je hna mokut, me je kumete, me je kaia káná, me je hwit, me hali, me falawa, me hwit adre le, me je wan owi, me je lentil, me je hna le, 29 me hani, me bata, me mamoe, me fromaginy kau, hobi kö Davita me tavat unyin, hnân han : anyin a haingödrin, ka habe, E meki-hnânem, me sēnyin, me beic tavat hnyi hnyebuba.

HNYIMAKAN 18.

KE Davita ame áú tavat unyin, me otílá hudrin je taben thauzan me je taben haded. 2 Ke Davita ame khená kúná tavat, haba ke keihen a kuniny hmelen hnyamö Joab, ke ke keihen a kuniny hmelen hnyamö Abisai nöku Zeruia liamekeiny me Joab, ke keihen a kuniny hmelen hnyamö Itai at Gatha. Me haingen than, ka habe, haba inya oge me he ka tha he möbun minya. 3 Ke haingen tavat, ka habe, U me ca he ka hnyi he : anyin öhmun e ne kec gadrin me ödrin e ca he ka öuni-hnathu öhmun ; ke ame ne mokcu ke keihen a haf gahmun, me ödrin e ca he ka öunyi-hnathu öhmun : ke u úcü me ten thauzan gahmun : anyin a wale e so u me penapena he ka hadru' öhmun únyi hnyi taun. 4 Me ame ha ködrin than, ka habe, Oge me he ka ányá únyi ae so köbun. Me ame tot than hnyi homagöule, me ame didrut tavat hia, a je deö haded, me je deö thauzan. 5 Ke haba than ame húna kö Joab, me Abisai, me Itai, ka habe, Ö öbun e menyik ka hidróu jia Abasoloma, can bi inya. Ke a löng ut tavat hia hnyi úen

than ame húna ka je taben hia ga Abasoloma. 6 Me ame didrut tavat ka hnyi hnyei he ka vat me Isaraela : ke adre me vat hnyi hnyot e Eferaima. 7 Me haba lahiö Davita ödrin e kot tavat eling a at Isaraela, ke e gan hmá hna hlingá eling hnyi bong e, ödrin twente thauzan. 8 Ke lau vat eling hon hnyei hia : ke se hia tavat a mok eling ge hnyot, ke e wakhalet thibi a mok ge hele vat hnyi bong eling. 9 Ke haba Abasoloma ame úkhanö me lahiö Davita. Ke Abasoloma ame tabá miul, ke haba miul ame gethen hmelen je vheiny ae khöt hnyi iwajo, me ame vhet ju ban hnyi iwajo, me e ame uhni wanben drany me hmeledrany ; ke ame he bala but miul. 10 Haba ke at ame wá, me ame thumetu Joab me ha, ka habe, Wá bi oge ö Abasoloma ame uhni hnyi iwajo. 11 Haba Joab ame ha ka at ame thumeto e, ka habe, Wá bi, u je wá, ieu u je ca kot gan eling ka hnyi káná ? me inye he ka ham köu ten je sileva, ke wen hnyekon. 12 Haba at ame ha kö Joab, ka habe, Eja ke ne adre ne ham ka hnyi hnyamök khaca thauzan je sileva, me oge me ca he ka iná hnyamök ka nokon than : anyin a haba hnyi hnöhmun hna löng, than ame húna köu, me Abisai, me Itai, ka habe, Wá thibi he ka ca kálá hidróu, jia Abasoloma, hnen ke at. 13 Ke haba khaca oge ne ányá monoá me hlingá e, (ke ba ke únyi ae iyong ka than) haba u bi, u je he ka tot gufa. 14 Ke Joab ame ha, ka habe, E ca kханö nya he ka bec heláe unyám. Ke e ame hom kun ta uthö hnyi hnyamen, me dáóá önyúkúmi Abasoloma e ka tiga möt hnyi wanben iwajo. 15 Ke ten je hidróu ödrin e hom tilá je únyi vat anyi Joab ödrin e tot igigilö me hlingö Abasoloma. 16 Ke Joab ame túá trutru, me ame hmetu ju tavat úhedrin hnyi hna hnu Isaraela : anyin a Joab ame thawá tavat. 17 Ke ödrin e hum Abasoloma me khúá ka hnyi thop ae gan hnyi hnyot, me ti khon gáná je veto hon : ke Isaraela hia ödrin e ve kec ka hnyi umödrin je uma mano. 18 Ke e ka tiga möt bi Abasoloma e ame hia but hom me otílá hobi káu bi veto ame tot, wale hnyi thop anyin than : anyin a haingen, ka habe, E ba nöku baga me me önyúkúmeá iök : ke e ame hwenyi ien e ge ien bi : ke adre me labö ha e, ka habe, hnân únyúkúmi Abasoloma, ke ne o but hnyi bong ang.

19 Haba Ahimaza nöku Zadoka ame ha, ka habe, Ö inye he ka wadring me thu-

meto than, a ga hia but Iehova bi hwaban ka je iwahnaihmiony mē. 20 Ke haingö Joab kâu, ka habe, U me ca he ka thumeto hnyi bong ang, ke u me he ka thumeto hnyi ke bong : ke haba hnyi bong ang u me ca he ka hom je úthumetu anyin a ga moku nōkon than. 21 Ke Joab ame ha ka at Kusi, ka habe, He thō ka thumeto than ge ta je únyi u je wâ. Ke at Kusi ame nom kö Joab me wadring. 22 Ke ame ha hmetu Ahimaza nōku Zadoka kö Joab, ka habe, Ö iny he ka wadring hoton at Kusi. Haingö Joab, ka habe, Hnân eú u me he nōkuk ka wadring, anyin a u me ca he ka hu troban uthumetu e? 23 Ke haingen, E so bi, oge ma me wadring. Me haingen kâu, ka habe, Wadring dö. Me Ahamaza ame wadring a gethen hnyi dok ae tha hon, me khaletâ at Kusi.

24 Ke haba Davita ame laba ju hnyi wanben li homagöule : ke ame ölä at hmâkâ ka hnyi hon homagöule ka hnyi hna up veto, me bwele, me wâ, ke wale ke at ame hake wadring. 25 Me ame hongot at hmâkâ, me thumeto than. Me haingen than, ka habe, A ne at a khaca, awe e hu je úthumetu hnyi hnyimen. Ke e ame he logot me hakekeny. 26 Haba at hmâkâ ame wâ ke at ame wadring ; me ame hongot at ame hmâkâ ka at ame tuö homagöule, ka habe, Wâ bi, ke at bi ame wadring. Ke haingen than, ka habe, E ame hom je uthumetu minya. 27 Ke haingen at hmâkâ, ka habe, Oge me wâ iwadringiny at ame bân me halâke iwadringi Ahimaza nōku Zadoka. Haingen than, ka habe, At e ae so, k' ame hom je úthumetu ae so. 28 Ke Ahimaza ame hongot, me ha ka than, ka habe, E hnahic ut. Ke e ame nom hnyikânâi hnyi hnyimakan than, me ha, ka habe, Ole kö Jehova Khongom at ame hom hwenbâ tavat adre me hoibeny ka than a tuhök. 29 Ke haingem than, ka habe, Hawa, e so hidröu, jia Abasoloma? Me haingö Ahimaza, ka habe, Oge me wâ úkbacaköu ae gan hnyi úen Joab ame kunö nya athnyabainy than, walönya ang a athnyabaem, ke ca khañö nya bi ame ne ieú. 30 Ke haingen than, ka habe, Me saú thö, me todru háang. Me e ame saú me tot. 31 Ke wâ bi ame o at Kusi ; me haingen at Kusi, ka habe, E hu je úthumetu hobi kâu than a tuhök : anyin a haba Jehova ame bi hwaban ködrin hia thithö hnyi bong ang adre me tot köu. 32 Ke haingen than ka at Kusi, ka habe, Hawa, e so

hidröu, jia Abasoloma? Me haingen at Kusi, ka habe, E na he ka helâ me hidröu eling ta je iwahnaihmiony me than a tuhök, me ödrin hia ödrin e tot köu he ka okongu u. 33 Ke ame hmak hmönyin than, me ölä ka hnyi hnyeule hon homagöule, me tenge : ke e ame he k' ame ha helang, ka habe, Ekölö ge nōkuk Abasoloma, e kölä ge nōkuk, nōkuk Abasoloma! Ekölö, iny na moku me hwabâm, Ekölö Abasoloma, nōkuk, nōkuk!

HNYIMAKAN 19.

KE adre me thumetu Joab, ka habe, Wâ bi, than ame tenge thungau ga Abasoloma. 2 Ke adre wia dökhu hnyi bong eling me me hnyamok ka tavat hia thithö : anyin a löng ut tavat hnyi bong eling, ka habe, Than ame tengege nokon. 3 Ke ame he hnihnik tavat ka hnyi taun hnyi bong eling, helâ me tavat adre me he hnihnik me hmehma ödra ka kec ge vat. 4 Ke haba than ame tube hnyimakan, me than ame tenge hwege göranyai, me ha, ka habe, Ekölö ge nōkuk Abasoloma, ekölö Abasoloma, nōkuk, nōkuk! 5 Ke ame o but Joab ka than ka hnyi uma, me ha, ka habe, U je ohmehma hnyi bong ang hnyimakan lakem, tavat adre me omeli u hnyi bong ang, me lakom je бага me hlu, me laaiâm, me anyâm je momo ; 6 wale hnyi bnâm hna betenge ge tavat adre me hûkötia u, me hûkötia tavat adre me betenge gam. Anyin a u je hia but omanená hnyi bong ang ae ca únyi hnathu köu je tuhan me lathnyaba : anyin a oge me wahmakhmetöa hnyi bong ang a g' ame ne möt bi Abasoloma, ke öhmun moku hia thithö hnyi bong ang, ame he ka so hmönyin köu. 7 Ke walang ang, todrö, me didrut, me fuc so ka lakem : anyin oge khemanyin me haiö Iehova a u je ne ca didrut, ame he ka ba at unyâm eâu hnyinghet : Ke ame he ka beönua köu monu eling hon ta je monu hia a o köu ehac k' u tiga thöth ke ne o but hnyi bong ang. 8 Me ame todrö than me laba hnyi homagöule. Ke ödrin e thumeto tavat hia thithö, ka habe, Wâ bi, ame laba than hnyi homagöule : me ame he tavat hia ka than.

Haba at Isaraela ödrin e ve kec ka hnyi umödrin je uma mano. 9 Ke ame labö iwatretra tavat hia thithö hnyi je tribu Isaraela hia, ke haingödrin, ka

II. SAMUELA 19.

habe, Than ame omeli öta únyi ge je iwahnaihmiöny möta, ke e ame omeli öta únyi ge at Filisiti; ke walang e ame kec ge hnyei ca Abasoloma. 10 Ke a moku hnyi vat Abasoloma, at ötin e hú. Ke iéú gabun öbun e laba hnyibú he ka ohmeto than?

11 Haba Davita than ame úkhúnöng kö Zadoka me Abiathara li at bihut, me haingen, ka habe, Fuc d' öbu ka wahingatiny Juda, me ha, ka habe, Iéú gabun a öbun e bec he ka ohmeto than ka hnyi umen uma? ke a o but hofuc hwan at Isaraela hia thithö ka than hnyi umen uma. 12 Je liamekeiny öbun mönya, a je jeiök me utiök öbun: ke iéú ang a öbun bec he ka ohmeto than? 13 Ke ha thö kö Amasa, ka habe, Hawa, ca jeiök u me utiök? e so Khong ame ányá helâe kõnya me bi hanen minya, u je ne ca he ka taben utbavat hnyi hnyimakök bala hwabö Joab. 14 Ke e ame ohmehmela hnyekon at Juda hia thithö helâ me at a khaca; me adre me úkhúnöng ka than me ha, ka habe, Hmetu ju me lathnyabaem hia thithö. 15 Me ame hmetu than me o hnyi Joridano. Ke ame o at Juda hnyi Gilegala, me úkhanö me than, he ka hom than hanyáúú Joridano.

16 Ke e logot Simei nöku Gera at Beniamina, wale at Bahurim, me tha he me at Juda he ka úkhanö me Davita a than. 17 Ke khaca thauzan tavat unyin a at Beniamina me Ziba athnyabainy lap anyi Saulo, tha e me lakon ta бага a fíftiny, me lathnyabainy a twente; ke ödrin e he hanyáúú Joridano hnyi hnyimakan than. 18 Ke ame he hanyáúú ke galu, me me houden lap anyin than, me ányá anyin ta je huliwa. Ke Simei nöku Gera ame hanyáúú Joridano me ta ju hnyi hnyimakan than. 19 Me e ame ha ka than, ka habe, Ca he tuhök ka ip hnök, ke u me ca he ka únykúme monu a ányá athnyabaem hnyi bong than a tuhök ame he but úheny Jerusalema, me me vec hnyekon than. 20 Anyin ae khanö nya athnyabaem a oge me ányá hwakecin ae kong: me wá bi, inya oge me bök ka o ke tiga hia lap hia anyi Josefahnyi bong ang he ka ut ka úkhanö me than a tuhök. 21 Ke haba Abisai nöku Zerua ame thu, ka habe, Hawa, adre me ca ke ka hlingö Simei can ang, wale e ame hangá hna hú hnö Iehova? 22 Ke haingö Davita, ka habe, Iéú kõnya gabun je laku Zerua, m' öbun e he ka bi iwahnaihmiöny mönya hnyi bong ang? hawa, adre me he

ka hlingá ke at hnyi Isaraela hnyi bong ang? hawa oge me ca wá a iny than Isaraela hnyi bong ang? 23 Haba than ame ha kö Simei, ka habe, U me ca he ka mok. Haba than ame khemanynin káu.

24 Ke haba Mefiboseth nöku Saulo ame utut he ka úkhanö me than; ke a ca hneú li can, me ányáwia wainy, me hneú anyin je úkhaú, hwán hnyi bong ame he than ke ne o but e ame o hmetu me hnahic. 25 Ke e ame o but hnyi Jerusalema he ka iouny me than, me ame ha káu than, ka habe, Iéú gam Mefiboseth u je ca tha he mönya? 26 Me e ame thu, ka habe, Than lö a tuhök, a iyawö nya athnyabaik: anyin a oge me ha athnyabaem, ka habe, Oge me he ka ip taben hon asina, me laba hon, me tha he me than, anyin ae mat can athnyabaem. 27 Kee ame bi fuco athnyabaem ka than a tuhök; ke helâ me angela anyin Khong than a tuhök: hamám he ka ányá únyi ae so köu. 28 Anyin a helâ ke je komok ödrin hia hnyi lap anyi cica hnyi hnyimakan than a tuhök: ke so bi u je ip nya athnyabaem unyidrin tavat ödrin e han hnyi ányám lanlau. Ke hawa, iny úcú hmetu he ka tenge ka than? 29 Haba than ame ha káu, ka habe, Hnân eú he ka ha hmetu ányám je únyi? Oge me ha, ka habe, u me he me Ziba ka khenâ hnyei. 30 Ke haingö Mefiboseth ka than, ka habe, E so e he ka hom hia, anyin a haba than a tuhök ame o but ka hnyi umen uma me hnahic.

31 Ke ame utut Bazilai at Gileada úheny Rogel; ke e ame tha hanyáúú Joridano me than, he ka su e hanyáúú Joridano. 32 Ke ti hingat ut Bazilai, eite je hunainy: ke e ame hia but han than k' ame tiga laba hnyi Mahanaima; anyin a e at ae ti únyi hnathu. 33 Ke haingen than kö Bazilai, ka habe, Öte tha hanyáúú, ke u me he ka tha han mönya hnyi Jerusalema. 34 Ke haingö Bazilai ka than, ka habe, Ve biju ta je bong hnyi je huna oge me ka möt hnyin, me inye he ka tha he me than Jerusalema ai? 35 Eite but je hunaik hnyi bong ang: hawa, e khanö nya he ka wáhmakhmeto so me kong? ke khanö nya athnyabaem he ka drem únyi oge me han me ic? ke khanö nya löng hmetu hwan khumöng anyin obaga me omomo? ke hnân eú oge me he a athnyabaem ka hmak ka tuhök? 36 E na omi hanyáúú Joridano athnyabaem me than: ke hnân eú ame he than ka bi hwaban kõnya

ge hwaban a helae? 37 Ö u hnö nya athnyabaem he ka hmetu m'oge me mok hnyi anyik taun cicö hu cica me bai. Ke wâ bi ang athnyabaem jia Kimeama; hamen he ka tha he me than a tuhök; me u me he ka ânyâ kâu wem. 38 Me than ame thu, ka habe, Ame he Kimeama ka tha he mönya, me oge me he ka ânyâ kâu wem bi, haba ûnyi u je ha kõnya me oge me he bi nya ka ânyâ. 39 Ke ame he hanyâûâ Joridano tavat hia, k'ame hanyâûâ minya than: ke than ame úcimhnyimak me Bazilai me hahnahicâ; me e ame hmetu ka hnyi hnyaban.

40 Me haba than ame he hanyâûâ Gilegalai, ke Kimeama ame tha he mē: ke ame su than ge at Juda hia thithö, me hafiny at Isaraela. 41 Ke wâ bi, ame he at Isaraela hia thithö ka than, me ha ka than, ka habe, Anyin a ieu a hom duöngi u je liamekeiny möhmun a at Juda, me hom than me anyin lap, me tavat hia atö Davita a tha ödrin mē he ka hanyâûâ Joridano? 42 Haba at Juda hia thithö adre me thu ka at Isaraela, ka habe, Anyin a iate m'öhmun than: ke can ieu ame hmönyibun köhmun can ûnyi e? E hu hnöhmun hna han ûnyi ge than? e hu omjehehmun ûnyi gan? 43 Me haba at Isaraela adre me thu ka at Juda, ka habe, Ten je ke keihen gahmun unyin than, ke öhmun e hu beönua hubun unyi Davita: ke ieu gabun öbun e hûkötiohmun, me ca me úhnenamö möhmun he ka ohmeto tuhöhmun? Ke e hwege hofuc hwan at Juda hon hofuc hwan at Isaraela.

HNYIMAKAN 20.

KE e hu eling ke at Belial, Seba ien, nöku Bikeri, at Beniamina: ke e ame tûâ trutru, me ha, ka habe, E ba ke keihöhmun unyi Davita, ka ba jekhööhmun unyin laku Jese: vese but ka hnyi umöbun je uma mano, Isaraela lö. 2 Me tavat Isaraela hia thithö, adre me vese but ga Davita, hotu Seba nöku Bikeri: ke so bi at Juda adre me kece ka tuhödrin, úheny Joridano ke ne o but Jerusalema.

3 Ke Davita ame o but ka hnyi umen uma hnyi Jerusalema; haba than ame hom je momo a ten a anyin je momo, waleji e ame ip he ka tuö uma, me ip ödrin hnyi uma ceat, me haödrin, ke e ame ca dit ködrin. Ke a Ire ip ödrin ke ne o but

hnyi bong ödrin e mokcu hnyin ödrin e laba helâ me safac.

4 Haba than ame ha kö Amasa, ka habe, Ukhacaköuâ thö kõnya at Juda e tiga ca um dö je bong a kun, ke u me he minya ka hnyi hanen. 5 Me Amasa ame he he ka úkhacaköuâ at Juda: ke e bec hnyi úen adre thu. 6 Haba Davita ame ha kö Abisai, ka habe, Ame he walang ang Seba nöku Bikeri ka okongu ötin hu Abasoloma: he thö ka hom lathnyabainy tuhâm, me hnu e, wâ e nye hu gan je taun adre bi haginny ge veto, me kec gatin. 7 Ke ame he hoton je atö Joab, me at Kerethi, me at Pelethi, me tavat hwege hia thithö: ke ödrin e didrut úheny Jerusalema he ka hnu Seba nöku Bikeri. 8 Ke ödrin e o but hnyi veto ae gan hnyi Gibeona, me Amasa ame o he ka úkhanö mödrin. Ke Joab ame weikâ ge úkhaúen vat, wale e ame khavâ, ke hnyi hon e wen hnyekon me hele vat adre ohmâ ka hnyi li jevan hnyi tangen; ke e ame tiga he me ame kölu but hele vat. 9 Ke Joab ame ha kö Amasa, ka habe, U so bi, muma? Ke Joab ame kât wai Amasa ge hnyamen a meta he ka úcimhnyimak mē. 10 Ke ame ca únykúme bi Amasa ge hele vat hnyi hnyamö Joab: ke e ame dá hnyekon, me ame hingölö but tang tiny hnyikânâi, ke a ca kot e hmetu; ke e ame mokcu. Ke Joab me Abisai liamekeiny mē ödrü me hnu Seba nöku Bikeri. 11 Ke ame todrö unyin ke hidröu atö Joab, me ha, ka habe, Haba at a hiö Joab, me at ame hiö Davita, me hamen he ka he hotu Joab. 12 Ke Amasa ame mokut hwihwiö hnyi dren eü hnyi wanben gethen. Ke a wâ but a g'ame todrü tavat hia, me e ame hum Amasa ûnyi hnyi gethen ka hnyi hnyot, me tube ge úkhaú, anyin e ame wâ a ga todrü tavat ödrin ka o me wâ e. 13 Ke a hia but hom e ûnyi hnyi gethen, me ame he hotu Joab tavat hia he ka hnu Seba nöku Bikeri. 14 Ke e ame vhenö je tribu anyin at Isaraela hia ke ne o but Abela, me Bethemaka, me at Beri hia: me ödrin e úkhacaköu me hnyi he hoton. 15 Ke adre me o me thelöng e hnyi Abela hnyi Bethemaka, ke ödrin e úkhöünâ göranyi kânâ cicö taun, ke ame tot ûnyi e cicö hak veto: ke haba tavat hia unyi Joab adre me kokot hna up hak, me me ta but. 16 Ke ame hongot ke momo ae metâ ûnyi hnyi taun, ka habe, Löng ju, löng ju; ö öbun me ha kö Joab, ka habe, Aiö u, m'innye he ka fuc

II. SAMUELA 21.

köu. 17 Me e ame hakekeny kâu, me haingen momo ka habe, Joab u? Haingen, ka habe, E. Me e ame ha kâu, ka habe, Löng ju hofuc hwan athnyabaem a momo. Haingen, ka habe, Oge me löng. 18 Me haingen momo, ka habe, Adre me labö ha ehac, ka habe, Adre me he ka hnö wia hnyi Abela; me me bi obiny ju. 19 Inya hanen tavat adre behnahic me hnathu hnyi Isaraela: ke u je elâm he ka ohia taun a hinyen hnyi Isaraela: can ieu u me he ka utâ jekhöu Iehova? 20 Ke Joab ame thu me ha, ka habe, Ohe, Ohe, oge me ca he ka utâ me ohia. 21 Ca bongon e: ke so bi haba ke at a aten hnye ae hut hnyi Eferaima, Seba ien, nöku Bikeri, ame hai hnyamen ka than, Davita: më hna but at e, me oge me he ka he but úheny hnyi taun. Haba momo ame ha kö Joab, ka habe, Wâ bi, adre me he ka khüâ köu ban únyi hnyi hna up hak. 22 Me haba momo ae metâ ame he ka tavat hia. Me ödrin e subâ but bö Seba nöku Bikeri me khüâ kö Joab. Me e ame tuâ trutru me ödrin e vese thö únyi hnyi taun ka hnyi umödrin je uma mano. Ke haba Joab ame hmetu Jerusalema ai ka than.

23 Ke haba Joab me e taben je utbavat hia anyin at Isaraela: ke Benaia nöku Jehoiada me ban ka at Kerethi, me Pelethi: 24 ke Adorama at ame ö fat: ke Jehosafata nöku Ahiluda at ame öuny-kümeä: 25 ke Seva at ame sihnalimen: ke Zadoka me Abiathara li at bihut: 26 ke Ira minya, at Jaira, at ame musu unyi Davita.

HNYIMAKAN 21.

KE e hu hmiâ hnyi öö Davita a kun hunainy, ke huna me ke huna; ke Davita ame elâm hnyimakö Iehova. Ke Iehova ame thu, ka habe, Ga Saulo me anyin lap ame hingälâ dra, anyin a e ame hingä at Gibeona. 2 Haba than ame hawâ at Gibeona me ha ködrin, (ke ca hanen lakon Isaraela at Gibeona, ke hanen je kolon at Amora; ke a hia but lakon Isaraela khemanyin ködrin: ke Saulo ame elâm he ka kuc ödrin can weny ae gan hmâ ka lakon Isaraela me Juda.) 3 ke Davita ame ha ka at Gibeona, ka habe, Ieu oge me he ka ányâ hobi köbun? ke oge me he ka bi hwaban ge ieu, me öbun e he ka hahnahicä jekhöu Iehova? 4 Ke

haba at Gibeona ödrin e thu, ka habe, E ca wehmun sileva me gol únyi ga Saulo ame ne anyin lap; ke ca hanymöhmun he ka hlingâ ke at hnyi Isaraela. Ke haingen, ka habe, Oge me he ka ányâ hobi köbun únyi öbun e he ka ha. 5 Me ödrin e thu ka than, ka habe, Haba at a ohí' öhmun, me heleü deny gahmum, me me ohí' öhmun, m' öhmun e ca laba hnyi hnyeí hia iny at Isaraela, 6 ame he ka ham köhmun seven lakon obaga me öhmun e he ka uhni ödrin hobi kö Iehova hnyi Gibe a Saulo, wale hnö Iehova hna íca. Ke haingen than, ka habe, Oge me he ka ham ödrin. 7 Ke than ame omeli Mefiboseth, nöku Jonathana nöku Saulo, can hna khemanyin anyi Iehova a wanbödrü, wale wanbö Davita me Jonathana nöku Saulo. 8 Ke haba than ame hom li бага laku Rizepa momo nöku Aia, wale e ame hnokoâ ga Saulo, jia Aremoni me Mefiboseth; me ta бага a thabúng laku Mikala momo nöku Saulo, wale e ame hnokoâ ga Aderiela nöku Bazilai at Mehola: 9 ke e ame ham ödrin ka hnyi hnyamen at Gibeona, ke ödrin e uhni ödrin hnyi bucen hnyi hnyimakö Iehova, ke ödrin a tha ta hia but a ödrin seven ke adre hling' ödrin hnyi úen ibi hwân menu, hnyi hna hwân dö meno bali. 10 Ke Rizepa momo nöku Aia ame hom mano ae gan nân me ulolo hobi kâu bi hon kic, hwân hnyi hnyimakan menu ke ne o but ame ta we hudrin únyi hnyi drany; ke e ame ca hna je meno ame gâ ethö he ka laba hudrin hnyi lany, me je menoiny hnyot hnyi lit. 11 Ke adre me thumetu Davita wale ge hna ányâ hnö Rizepa momo nöku Aia, wale momo anyi Saulo. 12 Ke habe Davita ame he me hom je jeió Saulo me je jeió Jonathana a nokon unyin at Jabesi-gileada, tavat adre venâu e únyi hnyi gethen hnyi Bethes-an, wale hnen at Filisiti hna uhno hnyin, hnyi úen at Filisiti ödrin e hingö Saulo hnyi Gibeoa: 13 ke e ame hom úheny e je jeió Saulo me je jeió Jonathana a nokon; ke ödrin e úkhöúnâ je jeiódrin adre uhno. 14 Ke ödrin e konâm je jeió Saulo me Jonathana a nokon hnyi hnyeí Beniamina hnyi Zela, hnyi hu Kiso a kamen: ke ödrin e ányâ ta je únyi hia hnen than hna húna. Ke hwaban e Khong ame löng hodrin ge hnyeí.

15 Ke haba at Filisiti ödrin e vat hmetu me Isaraela; ke Davita ame utut, tha e me lakeiny, me vat me at Filisiti: ke ame

II. SAMUELA 22.

sényin Davita. 16 Ke haba Isebi-benobe, wale hanen lakon at ae beú, ke kun ta haded sekel bras ihmakiny dân ö, ke adre oweiká e ge hele vat ae teb únyi, e ame únykúme he ka kuc Davita. 17 Ke haba Abisai nóku Zerua ame hom hadruá, me kot e, me hlingá at Filisiti. Ke haba lakei Davita ödrin e khemanyin káu, ka habe, U me ca he hmetu he ka tha he möhmun ka vat, wá e nye omoko lamepainy Isaraela.

18 Ke hwaban e, e hu vat hmetu me at Filisiti hnyi Gob: ke haba Sibekai at Husa ame hlingö Saf, hanen lakon at ae beú. 19 Ke e hu vat hmetu me at Filisiti hnyi Gob; ke haba Eleanana nóku Jaare-oragim at Bethe-leema ame hlingá liame-keiny me Goliatha at Gatha, ke haba taben anyin ö helá me utöiny únyi hnân hwáwá mano. 20 Ke e hu vat hmetu hnyi Gatha, ke eling at ae beú hmá, ke úsa siks je banyen hnyi li hnyamen, me siks je bacan hnyi li can, wale twente foa úseiny; ke ame hnokoá minya e hnen at ae beú. 21 Ke e ka humbasö Isaraela, haba Jonathana nóku Simea a liamekeiny me Davita ame hlingá e. 22 Wale hnyat a vak eling nokon at ae beú adre hnokoá hnyi Gatha; ke ödrin e ta but ge hnyamö Davita me lakeiny.

HNYIMAKAN 22.

KE Davita ame ha kö Iehova je hofuciny khumöng ang hnyi bong Iehova ame omelö e únyi hnyi hnyamen je iwahnaihmiöny mē hia, me únyi hnyi hnyamö Saulo: 2 haingen, ka habe,

Iehova kicik, me hnök hhabá, me at a omeli nya, walönya ang;

3 E Khongon kicik, oge me he ka labageju káu;

E becik, me faoiny meno hnân omeli nya, me tabök tap ae görany, me hnök hna he ka kec káu:

At úhömeli nya lö, u je omeli nya únyi hnyi úkonguny.

4 Oge me he ka hongot kö Iehova, e úcú he ka ogáná:

M' adre me he ka omeli nya únyi ge je iwahnaihmiöny mönya.

5 Anyin ame wadrö nya je waköio adre me mekiny,

Ame oti nya je di anyin tavat ae kong.

6 Ame wadrö nya je töiny hedis:

Oge hnok dö ge je tö adre me mekiny.

- 7 Oge me hongot kö Iehova hnyi anyik vec, Eke, oge me hawá Khanguk:
Ke e ame löng hok hnyi umen uma,
Ke ame o but hwan anyik khöü ka hnyi li hnyikönyen
- 8 Ke ame bwebwet me öbubuny hmele-drany,
A okokok dö je taben drany
Me bwebwet, anyin a e hmönyin.
- 9 Ame ölö hai únyi hnyi li hnyingöiny,
Ke meic ame han únyi hnyi hnyimen:
A möt dö je walep káu.
- 10 E ame oto hwalö drany minya, me utut;
Ke e hu menekholom ae khöt eú hmelen li can.
- 11 Ke e ame laba hon kerubi, me gá:
Eke, adre me wá e hon li labenyin ang.
- 12 Ke e ame ányá menekholom hnân je tungen igigilö e,
K' ame úkhöüná je köio hnân je úlá ae haki ethö.
- 13 Adre omelö je walepiny meic
Únyi ge hadröngöc hnyi hnyimakan.
- 14 Iehova ame ányá hendreng únyi hnyi drany,
Ke ame fuc At ae ti Beönya.
- 15 Ke e ame kuná je fana me ovesei ödrin;
Me hucuce, m' ödrin e monumonu.
- 16 Me manen dut je deny köio ae gan,
Adre me omanená je taben hmele-drany,
Anyin a Iehova ame thawá,
Únyi ge homenáiny li hnyingöiny.
- 17 E ame úkhünöng úheny dö, e ame hum nya;
E ame lili nya únyi hnyi hnyin je köio ae se;
- 18 E ame omeli nya únyi ge iwahnaihmiöny mönya ae hwege
Me tavat adre me húkotiö nya; anyin a ödra hwege huk.
- 19 Adre me o könya hnyi bonginy anyik vec:
Ke Iehova cik.
- 20 E ame hum nya minya ka hnyi dok ae gan:
E ame omeli nya, anyin a e ame senyin könya.
- 21 Iehova ame hia but bi hwaban könya hoton hwakecik ae wisa:
E ame bi hwaban könya hoton hauen li hnyamök.
- 22 Anyin oge me vheno je gethen de Iehova,
Ke oge me ca saú degecá bi Khong me he monu but.

II. SAMUELA 23.

- 23 Anyin a e bi hnyi hnyimakök anyin je hna owisa hia :
Ke oge me ca saú ge anyin je hnanyibu.
- 24 Ke ba kongik káu,
Ke oge me tuö nya, m' oge me ca hnyi monu.
- 25 Anyin a wale Iehova ame hia but bi hwaban kõnya, hoton hwakecik ae wisa ;
Hoton hwakecik ae wisa hnyi hnyimakan,
- 26 U me he ka betenge ka at ame betengete bi,
U me he ka ti wisa ka at ae ti wisa ;
- 27 U me he ka hwakecin ae hau ka at ame hwakecin ae hau ;
Ke u me he ka hwali ka at ame ányá hwakecien ae hwali.
- 28 Ke u me he ka omelö tavat andre me oevcá :
Ke u me he ka wá tavat ae bi gan, m' u me he ka ohnyikánái ödrin ju.
- 29 Anyin a u, Iehova lö, anyik lamepa :
Ke ame he Iehova ka omelamá anyik menekholom.
- 30 Anyin a únyi gam oge me wadring hon deó vat :
Únyi ge Khonguk oge me gá hanyáúá hna up baginy.
- 31 Haba Khong, e ti wisa deny gethen :
Adre cubec hofuc ho Iehova ;
E becidrin hia tavat andre me labageju káu.
- 32 Anyin a ia Khong e ka ca Iehova ?
Ke ia kic e ka ca Khongutin ?
- 33 Khong anyik hhabá ae hwege :
Ke e ame su at ae ti wisa hnyi deny gethen.
- 34 E ame ányá li can me me helá me aila :
Me olabó nya hon anyik je dok ae görany.
- 35 E ame ná li hnyamök he ka vat ;
Me me oto cafana bras ge li benyik.
- 36 U je hia but ham kõnya becin ányám 'úhómeli :
Ke ame oganö nya ge hwakecám ae menyik.
- 37 U je hia but oganá je hna okca hmelik,
Ke ame ca hau hau li hnyefcak.
- 38 Oge hia but hnu boton anyik je iwahnai-hmiöny me ohi' ödrin ;
Ke khaca oge me ca hmetuhmetu ke ne o but ame hi' ödrin hia but.
- 39 Ke oge hia but ohi' ödrin, me láoi ödrin, me me ca khan' ödrin bi tot :
Eke, ödrin e ta but hmelen li cak.
- 40 Anyin a u je oweikö nya ge man hobi káu vat :
U je hom úhnyúkongu ödrin hmelik,
tavat andre me tot kõnya.
- 41 Ke u je wia hoton kõnya je iwahnai-hmiöny mõnya,
M' oge me he ka ohi' ödra andre me húkotiö nya.
- 42 Adre me bwebwele, ke ba at he ka omelö ;
Kö Iehova, ke e ame ca thu ködra.
- 43 Me oge me kot omomonu ödra helá me sesáiny káná,
Oge uti ödrin helá me hmudrainy je gethen, me ulili ödra.
- 44 Ke u je hia but omeli nya únyi hnyi je iwatretra anyin ik hnyei ;
U je tuö nya m' inye ban ta je hnyei bi :
Ame he ka bi athnyabaik hnyei ae ca khanö nya.
- 45 Ame he je atkanyua ka nom kõnya :
Ödra ka löng gak, me andre me he ka ling nya.
- 46 Ame he je atkanyua ka aú tot,
Me o hnyi öbubuny únyi hnyi hnyeutidra ae nedrong.
- 47 E möt Iehova ; ke so e hnahic ut kicik ;
E so andre ogöranyá Khongon kiciny melik :
- 48 Wale Khong at ame bi hwaban hnân hobi kõnya,
Me hom úhnyúkongoá ta je hnyei hmelik,
- 49 Me hum nya únyi ge je iwahnai-hmiöny mõnya :
Eke, u je ogöranyi nya hudrin andre me tot kõnya :
U je omeli nya ge at ame úkongun.
- 50 Anyin a wale oge me he ka ole köu Iehova hnyi wanben ta je hnyei,
Me khumöng me oganá iám.
- 51 E ame omelö gan hmâ hnân hobi káu than a únyi gan :
Me omanavá ibetengiö ka at e ame hú,
Kö Davita me je mátrániny nyiele balua.

HNYIMAKAN 23.

- K**E walang je hofuc a biliny ho Davita,
Haingö Davita nõku Jese,
Ke ame ha at andre me ogöranyá,
At a hú hnen Khongu Jakob,
Me at a ányá je khumöng ae hnebwia anyi Isaraela :
- 2 Hanu Iehova ame fuc únyi gak,

Ke e bi hnyi bohök hwan hofuc.
 3 Ame ha Khongu Isaraela,
 Ame fuc kõnya kic anyi Isaraela :
 At ame musö tavat hnyi wisa
 Ame musi me outen Khong ;
 4 Ke e ame he ka helä me lany hnyi
 hnyomakatu, hnyi ün ame o seünö,
 Hnyomakatu ae ba ülänny ;
 Hnyi ün ame kü hna önying ünyi hnyi
 kânä,
 Hnyi lany ae hadröngöc hwaban we.
 5 Ke ca heläläng anyik lap me Khong ;
 Ke so bi e ame änyä mönya ühiny-
 köu ame ca ba balua,
 Adre penapena ta je ünyi hia thithö
 hnyin, ke hwege :
 Anyin a melik hia, me wek hia,
 Ke so bi e ame tiga ca oküä e.
 6 Ke ame he tavat Belial hia thithö ka
 helä me je üdedö adre degec,
 Anyin adre me ca he bi ka kät je hnyam :
 7 Ke haba at ame mädrä
 Ame he ka hu fao me taben ö ;
 Ke adre me he ka thong degecä ge meic
 hnyi hnen.
 8 Ke walang ien tavat ae hwege anyi
 Davita : jia Josheb-basebeth at Takemoni,
 homakan je taben ; wale Adino at Ezeni, e
 ame kot eit haded hnyi ün a khaca. 9 Ke
 hwaban e Eleazara nöku Dodai nokon at
 Aohi, ke at hnyi ta hnyat a kun ae hwege
 anyi Davita, hnyi ün ödrin e humbasö at
 Filisiti adre me ükbacköu he ka vat, ke
 ame he but at Isaraela : 10 e ame tot, me
 kot at Filisiti, ke ne o but ame hmokun dut
 hnyamen, ke ame kece hnyamen ka hnyi
 hele vat : ke Iehova ame omelö gan hmä
 hnyi bong eling ; ke haba tavat adre me
 hmetu he ka sei thibi. 11 Ke hwaban e
 Sama nöku Age at Harari. Ke ame ükha-
 caköu at Filisiti me me deö vat, wale baten
 utkânä ae ünöngöt ge je lentil ; ke haba
 tavat adre me kec ge at Filisiti. 12 Ke e
 ame tot hnyi wanben utkânä, me tuö e, me
 kot at Filisiti : ke Iehova ame omelö gänä.
 13 Ke ame utut hnyat a kun hanen je
 taben a thöte, me o kö Davita hnyi op
 Adulama, hnyi ün menu : ke ame hunuma
 deö vat anyin at Filisiti hnyi thop Refai.
 14 Ke e bi Davita hnyi hnyabä, ke e Bethe-
 leema lap tue anyin at Filisiti. 15 Ke
 haba Davita ame ti beweny, me ha, ka
 habe, E na he ke at ka habelik ge an
 hnyi Bethe-leema hnyi homagöule ! 16 Me
 ame he hnyat a kun ae hwege me haguta
 utbavat anyin at Filisiti, me se köiö hnyi an

hnyi Bethe-leema hnyi homagöule, me hom
 kö Davita : ke so bi e ame höcö ic, ke e ame
 hingälä kö Iehova. 17 Ke e ame ha, ka
 habe, Ohe, Than lö, oge me ca he ka änyä
 ünyi eling : hawa, oge me he ka ijem dra
 dren hnyat ödrin e vheno deny mok?
 waleling me me ca ijem utköiö. A änyä
 ünyi e ta hnyat eling a kun ae hwege
 18 Haba Abisai liamekeiny me Joab nöku
 Zeruia, me at ae beönua hnyi ödrin kun.
 Ke e ame hai anyin ö ka tavat a kun ta
 haded me hling' ödrin, ke adre me tha
 häiä me ke li at. 19 Hawa e ca beönua
 soiny at e hon ke li at a lo? ke e ame taben
 ködrü : ke so bi adre ca otilä e hnyi kun
 ta hnyat a bán. 20 Me Benaia nöku
 Jehoiada, nokon ke at ae hwege hnyi Ka-
 bezeela, at ame änyä je ünyi ae gan, e ame
 hlingä li laku Ariel at Moaba : ke haba
 hnyi hunainy kiona, me e ame utut ka
 hnyi thop me hlingä liona : 21 ke e ame
 kot ke at Aigupito ae hmanenang : ke hu
 ö dân at Aigupito ; ke e ame utut käu me
 uci, me e ame hügünä ö ünyi hnyi hnya-
 men at Aigupito, me hlingä e ge dân ö.
 22 Wale je ünyi a änyä Benaia nöku Je-
 hoiada, ke adre me tha häiä e me ke li at
 a ödrin kun ae hwege. 23 E beönua e
 unyin tavat a thöte, ke so bi adre me ca
 otilä e hnyi kun a bán. Ke haba Davita
 ame otilä e hon je obotkonginy.

24 Ke Asael liamekeiny me Joab, me,
 hanen hnyat a thöte ; me Elekana nöku
 Dodo at Bethe-leema ; 25 me Sama at
 Harod, me Elika at Harod ; 26 me Helez
 at Paleti, me Ira nöku Ikis at Tekoa ;
 27 me Abiezera at Anathoth, me Mebunai
 at Husa ; 28 me Zalemon at Aohi, me Ma-
 harai at Netofa ; 29 me Hebeb nöku Baana
 at Netofa ; me Itai nöku Ribai at Gibeä
 hanen lakon Beniamina ; 30 me Benaia at
 Pirathon, me Hidai ünyi hnyi je wagewe
 hnyi Gasa ; 31 me Abi-alibon at Araba, me
 Azemaveth at Bahurim ; 32 me Eliaba at
 Salabin, hanen laku Jasen, me Jonathana ;
 33 me Sama at Harari, me Ahiam nöku
 Sarari at Arari ; 34 me Elifelet nöku Ase-
 bai, nokon at Maaka, me Eliama nöku
 Ahithofela at Gilo ; 35 me Hezerai at
 Karemela, me Paarai at Araba ; 36 me
 Igala nöku Nathana üheny Zoba, me Bani
 at Gada ; 37 me Zelek at Amona, me
 Nahari at Berotha at ame hom tilä je omje-
 hen vat anyi Joab nöku Zeruia ; 38 me Ira
 at Iethero, me Gareb at Iethero ; 39 me
 Uria at Heth : ödrin thöte seven hia.

HNHYIMAKAN 24.

KE ame ubâhla hmetu thö hmönyin anyi Iehova kö Isaraela, ke e ame kunö Davita ködrin he ka ha, ka habe, He thö ka aú at Isaraela me Juda. 2 Ke haba than ame ha kö Joab taben utbavat wale anyin, ka habe, He thö walang ka vhenö hnyi wanben je tribu Isaraela hia, hwân hnyi Dana ke ne o but Bere-seba, me öbun e he ka aú tavat, me me khanö nya thö úseiny tavat. 3 Haba Joab ame ha ka than, ka habe, E na he ju Iehova Khongom ka bi hanen ka tavat, ame ne ve úseidrin, he ka osehia ge haded, me me wâ li emakan than a tuhök : anyin a iéú ame weny únyi eling than a tuhök? 4 Ke so bi e hwege hofuc hwan than hu Joab, me je taben vat. Ke Joab me je taben vat ödrin e didrut ge than, he ka aú tavat a at Isaraela. 5 Ke ödrin e he hanyâúâ Joridano me hunuma hnyi Aroera, hnyi ke keihen metân taun hnyi wanben hnyigöulen bucen e Gada, me cicö Jazera ; 6 ke ödrin e o but hnyi Gileada, me hnyeí Tati-hodesi ; ke ödrin e o hnyi Dana-jaan, me wadrá Zidona, 7 me o but hnyi hñabâ hnyi Turo, me je taun hia anyin at Hivi me Kanana : ke ödrin e umo hnyi ke keihen Juda hnyi hwaíou, hnyi Bere-seba. 8 Ke ödrin e hia but vhenö hnyeí hia, me ödrin e o hnyi Jerusalema obiny je tehi a naininy me twente je bong. 9 Ke haba Joab ame ham ka than úseiny hna aú tavat : ke e hu hnyi Isaraela eit haded thauzan tavat hwege, tavat hok hele vat ; ke faiv haded thauzan at Juda.

10 Me haba hnyeku Davita ame dá e hwaban hnen hna aú tavat. Me haingö Davita kö Jehova, ka habe, Oge hia but ányâ monu ae gan hnyi únyi oge me ánya : ke walang ang, Than lö, oge me khöú köu he ka hna but hulö anyin athnyabaem ; anyin oge me ányâ monu. 11 Ke a hmak dö Davita hnyi hnyomakatu, me ame o but hofuc ho Jehova kö Gada perofeta, at wâ unyi Davita, ka habe, 12 He thö ka fuc kö Davita, ka habe, Walang hofuc ho Iehova, ka habe, Inya oge me ip köu kun ta únyi ; úca thö khaca m' inye he ka ányâ köu. 13 Ke ame o but Gada kö Davita, me thumeto e, me ha kâu, ka habe, Hawa, ame he ka o köu hmia hnyi em hnyeí ke ne o but seven je huna? ke hawa, u je bekec ge je iwahnaimöny möu adre me hnu u ke ne o but kun ta tehi? ke hawa, adre me ne kunâ mok ae cap hnyi em

hnyeí ke ne o but kun ta bong? awe wâhmakhmetö thö hofuc oge me he ka ha hmeto ka at a kunö nya. 14 Haba Davita ame ha kö Gada, ka habe, E gan hma hlohlo gak : e so ate me ta walang ang ka hnyi hnyamö Iehova ; anyin ae gan hmâ anyin ta je ibetengió : ke ca he bi nya ka ta ka hnyi hnyamen at. 15 Me Iehova ame kunâ mok ae cap ka at Isaraela hwân hnyi hnyomakatu ke ne o but hnyi úen adre me thu : me ame mokcu sevente thauzan tavat hwân hnyi Dana ke ne o but Bere-seba. 16 Ke hnyi úen ame he angela ka lau hnyamen hon Jerusalema he ka okongoâ, me haba Jehova ame ietra kong eling, me ha ka angela at ame ohia tavat, ka habe, Soju ; kât ju hnyamâm. Ke ame tot angela anyi Iehova hnyi hna huje hwit anyi Aruna at Jebusi. 17 Me Davita ame wâ angela at ame kot tavat, me e ame ha kö Jehova, ka habe, Me wâ ju, e kong hwakecik, ke oge me hia but ányâ hwali : ke iéú a ányâ je mamoe ang? ö u hai hnyamâm kõnya ke úcon lap anyi cica.

18 Ke ame o but Gada kö Davita hnyi bong eling, me ha kâu, ka habe, Ölö thö, me otílâ taben hut kö Iehova hnyi hna huje hwit anyi Aruna at Jebusi. 19 Haba Davita ame ölö hoton hofuc ho Gada, helâ me hna húna hnö Iehova. 20 Ke Aruna ame bwele me wâ than me lathnyabainy ödrin e he kâu : ke Aruna ame didrut me nom hnyikânâi ka than. 21 Ke Aruna ame ha, ka habe, Iéú can a o thö than eang unyik? Haingö Davita, ka habe, He ka úco möu hna huje hwit, me hnân otílâ taben hut kö Jehova, me me hia ju mok cap unyin tavat. 22 Ke Aruna ame ha kö Davita, ka habe, E so than tuhök ame hom me hudo únyi ae so kâu : wâ bi je bolok hnân hudiny leú, me je únyi hnân huje hwit me omjehen je bolok me hlogon : 23 haba ta je únyi hia eling, than lö, a ham Aruna ka than. Ke haingö Aruna ka than, ka habe, E so ame he Iehova a Khongom ka köp u. 24 Ke baingen than kö Aruna, ka habe, ohe ; ke so bi oge me he ka úco möu ge hwaban : ke haba khaca oge me ca he ka hudo kö Iehova Khonguk je hudiny leú ame o gufa but kõnya. Me Davita ame úco hna huje hwit me je bolok hwaban je sekel sileva a fitte. 25 Ke haba Davita ame otílâ taben bi hut kö Iehova eling, me hudo je hudiny leú, me je hudiny ole. Ke Iehova ame kap je hna khöú hobi kâu hnyeí, me ame hia ju mok ae cap unyin at Isaraela.

TUSINY JE THAN, TUSI A BAN.

HNYIMAKAN 1.

HABA Davita a than, me hingat ut ke se hia je hunainy; ke ödrin e khavâ e ge je imano, k' ame ca mage bi unyin. 2 Me ame ha kâu lathnyabainy, ka habe, E so adre me he ka elâm hlu hmai hobi kâu than a tuhök: ke hamen he ka tot hnyi hnyimakan than, me tuö e; ke e ame he ka mokut hnyi úlaiâm, me me mage than a tuhök. 3 Me adre me elâm hnyi je ke keihen Israela hia ke hlu ae hmanenang, me ö Abisaga at Sunema me adre me hom ka than. 4 Ke ti hmanenang hlu; ke e ame tuö than me huliwa unyin; ke than ame ca kâlâ bi. 5 Ke haba Adonia nöku Hagitha ame bi gan, me ha, ka habe, Oge me he bi nya ka than: me e ame penapena je kariota, me tavat tabö hors, me tavat a fifte he ka bödrin ka wadring hnyi hnyimakan. 6 Ke ame ca obmakâ e hnen kamen hnyi ta je ün ehac, me ha kâu, ka habe, Ieú gam u me ânyâ helâng? ke e at ae ti hmanenang; ke adre hnokoâ e hwabö Abasoloma. 7 Ke e ame únenamö me Joab noku Zerua, me Abiathara at bihut: me ödru me hadruö Adonia me he hoton. 8 Ke haba Zadoka at bihut, me Benaia nöku Jehoiada, me Nathana perofeta, me Simei, me Rei, me tavat ae hwege unyi Davita, ödrin e ca tha hien me Adonia. 9 Ke haba Adonia ame thân je mamoe me je bolok me je meno ae pipikhenya, hnyi veto anyi Zoeleth wale hnyi En-rogel; me e ame hawâ je liamekeiny më hia a lakon than, me hnyat Juda hia lathnyabainy than: 10 ke haba Nathana perofeta, me Benaia, me tavat hwege, me Solomona liamekeiny më, e ame ca hnyi hawâ bi. 11 Haba Nathana ame ha kö Bathe-seba hinyö Solomona, ka habe, U me ca löng a ga musi but Adonia nöku Hagitha, ke ca khanö Davita bi a tuhötin? 12 Ke walang ang oge me úsabö möu, m' u me he ka omeli u bi me nokom a Solomona. 13 He thö ka dit kö Davita than me ha kâu, ka habe, Than lö a tuhök, u je ca khemanyin könja athnyabaem, ka habe, E hnathu ame he Solomona a nokom ka than hwabök, ke e ame he ka tabâ anyik theron?

ke anyin a ieu ame musi but Adonia? 14 Wâ bi, u ka tiga únenamö eling me than, me oge me he ka dit hotom, me ohnathö hwâm hofuc. 15 Haba Bathe-seba ame didrö ka than hnyi hnyeule: a hingat hmönyin dut than; ke Abisaga at Sunema ame bi athnyaba ka than. 16 Haba Bathe-seba ame iyâú me nom ka than. Ke haingen than, ka habe, Ieú u je elâm? 17 Ke e ame ha kâu, ka habe, Tuhök lö, u je khemanyin ga Iehova Khongom ka athnyabaem, ka habe, Ame he Solomona a nokom ka than hwabök, ke e ame ke ka tabâ anyik theron. 18 Ke wâ bi, walang ang ame musi but Adonia, ke ca khanö u than a tuhök: 19 ke e a hia but thân je bolok me je meno ae pipikhenya me je mamoe ae se hia, ke a hia but hawâ lakon than, me Abiathara at bihut, me Joab taben vat: ke Solomona athnyabaem, e ame ca hawâ bi. 20 Ke haba u, than lö a tuhök, ame bwele köu je li emakan at Israela hia, m' u me he ka ha ködrin at ame he ka tabâ theron anyin than a tuhök hwaban. 21 Ke a ne ba, adre me he ka hai kongu nya me Solomona a nöku, u ka tha mokut ut me je lakâmâm. 22 Ke wâ bi, e ame tiga únenamö me than, me ame o but Nathana perofeta. 23 Ke ödrin e ha ka than, ka habe, Wâ bi, Nathana perofeta. Ke e ame didrö ka hnyi hnyimakan than, me e ame nom ju hnyikânâi ka than. 24 Haba Nathana ame ha, ka habe, Than lö a tuhök, hawa, u je hia but ha, ka habe, Ame he ka musi but Adonia hwabök, ke e ame he ka tabâ anyik theron? 25 Anyin a e ame he but eja, me thân je bolok me je meno ae pipikhenya, me je mamoe ae se hia, ke e a hia but hau lakon than hia, me je taben vat, me Abiathara at bihut; ke wâ bi, ödri ne han me ic hnyi hnyimakan, ke ödrin e ha, ka habe, E so e möt than Adonia. 26 Ke haba inya athnyabaem, me Zadoka at bihut, me Benaia nöku Jehoiada, me Solomona athnyabaem, e ame ca hnyi hau' öhmun. 27 Hawa, adre me ânyâ ünny eling ünny ge than a tuhök, ke u je ca omanená ka lathnyabaem, at ame he ka tabâ theron anyin than a tuhök hwaban? 28 Haba Davita than ame thu me ha, ka habe, Hawö Bathe-seba

I. JE THAN 2.

thö. Me ame o momo ka than, me tot hnyi hnyimakan than. 29 Me haba than ame khemanyin, ka habe, Kia inya Iehova at ame omeli nya únyi hnyi anyik ta je vec hia, 30 a oge me he ka ányá hnyi bong ang helá me hnök hna khemanyin köu ga Iehova Khongu Isaraela, ka habe, E hnathu ame he Solomona a nokom ka than hwabök, me e ame he ka tabá anyik theron hwabök. 31 Me Bathe-seba ame nom hnyikánái, me ogáná than, me ha, ka habe, E so e möt bi than Davita a tuhök nyiele balua. 32 Me Davita ame ha, ka habe, Hawö Zadoka thö kõnya at bihut, me Nathana perofeta, me Benaia nõku Jehoida. Me ödrin e o but ka than. 33 Ke than ame ha ködrin, ka habe, Tha he th' öbun me lathnyabainy tuhöbun, me otabö Solomona nõkuk hon halek miul, me hom e Gihona ai: 34 me hamö Zadoka at bihut me Nathana perofeta, he ka hú e eling me me than bi hon at Isaraela: ke öbun e he ka túá trutru, me ha, ka habe, E so e möt bi than Solomona. 35 Ke öbun e he ka he hoton, me e ame he ka tabá anyik theron; anyin a e ame he ka than hwabök: ke oge me hia but wia e me me tuhan at Isaraela me Juda. 36 Me haba Benaia nõku Jehoiada ame thu ka than, me ha, ka habe, Amen: e na helá ju e hna ha hnö Iehova, Khongon than a tuhök. 37 Iehova a tha e möu than a tukök, e na helá minya ju ame he ka tha e me Solomona, me obeönua anyin theron hon theron anyin than Davita a tuhök. 38 Me ame he Zadoka at bihut me Nathana perofeta, me Benaia nõku Jehoiada, me tavat Kerethi me Pelethi, me olabö Solomona hon miul hale Davita than, me hom e Gihona ai. 39 Me haba Zadoka at bihut ame hom faoiny meno taben wakaco únyi hnyi Uma Mano, me hú Solomona. Ke ödrin e túá trutru; ke ame ha tavat hia, ka habe, E so e möt bi than Solomona. 40 Me tavat hia adre me he hoton, ke ödrin e tåö je köwi me senyin ke gan hmá senyin, me ame hmouca hmeledrany ge medi ödra. 41 Ke a löng ut Adonia m' ödrin hia thithö unyin, ödrin e hia but han. Ke a löng ut Joab ifucin trutru, me e ame ha, ka habe, Ieú ang ame mede hnyi taun? 42 Ke e ame tiga ha, me wá bi, ame o but Jonathana nõku Abiathara at bihut: haba Adonia ame ha, ka habe, Didrö; anyin a u at ae so, me u me hom úthumetu ae so. 43 Haba Jonathana ame thu me ha kö Adonia, ka habe, E, a hia but Davita than

otilö Solomona ka than: 44 ke a hía but than tha kuná e me Zadoka at bihut, me Nathana perofeta, me Benaia nõku Jehoiada, me hnyat Kerethi me Pelethi, ke ödrin e olaba e hon miul haleny than: 45 ke a hia but Zadoka at bihut me Nathana perofeta hú e hnân than hnyi Gihona: ke ödrin e o but úheny e hnyi senyin me ame ú but taun. Wale mede öbun e löng. 46 Ke Solomona ame tabá minya theroniny dökhu. 47 Ke wale minya ang, a o but je lakeiny than he ka ha hnahici Davita a tuhötin, me ha, ka habe, E so Khongom ame he ka obeönua iö Solomona hon iám, me ogáná anyin theron hon ányám theron: ke than ame nom ju hon hnen hna mokut. 48 Ke ame ha minya than, ka habe, Ole kö Iehova Khongu Isaraela at ame ham hnyi bong ang at he ka tabá anyik theron, ke inya oge me wá. 49 Me ame ot tavat hia a tha ödrin me Adonia, me todrö, me vese but. 50 Haba Adonia ame outö Solomona; ke e ame tot, me kát je baitoiny taben hut. 51 Ke adre me thumetu Solomona, ka kabe, Wá bi, Adonia ame outö Solomona than: ke wá bi, e ame kát je baitoiny taben hut me ha, ka habe, Ó e khemanyin kõnya hnyi bong ang Solomona than a e ame ca he ka hlingá athnyabainy ge hele vat. 52 Haba Solomona ame ha, ka habe, Ame ne he ka ányá hwakecin ae úcú ame ca he ka kölu hnyikánái ke leúnen ban: ke adre me ne he ka wá hwakecin ae kong gan, me e ame he ka mok. 53 Me Solomona than ame úkhü-nöng, ke ödrin e hom e únyi hnyi taben hut. Ke e ame o me nom ju kö Solomona than: ke Solomona ame ha káu, ka habe, He thö ka hnyi hnyabam.

HNYIMAKAN 2.

KE bakekeny dut úen ame he but Davita ka moku; me e ame húna kö Solomona a nokon, ka habe, 2 Oge me he ka vheno gethen deny aten hmeledrany hia: bethe hwege ju u, me hnyok бага thö; 3 ke tuö je hanymám únyi ga Iehova Khongom, he ka vheno deny je gethen, me tuö anyin je hna húna, me anyin je hnan-yibu, me hnen je hna owisa, me hnen je hna otílá, heláji me hna síhnalimen hnyi tuisi anyi Mose, m' u me hnahic hnyi ta je únyi hia u me he ka ányá, me ta je dok u me he ka he káu: 4 me me he Iehova ka ohmá hwan hofuc, waleji e ame ha gak, ka

I. JE THAN 2.

habe, Ame ne he lakom ka tuö dedrin je gethen he ka he hnyi hnyimakök hnyi hnathu ge hnyekudrin ae bekhöt me hanu ae bekhöt, (haingen,) ame ca he ka ba hwabâm hon theron hnyi Isaraela. 5 Ke haba khaca, e khanö u but waleji a ânyâ kõnya Joab nõku Zerua, waleji e ame ânyâ ka li taben vat anyin at Isaraela, jia Abinera nõku Neri, me Amasa nõku Jether, a li at e ame hlingâ, me hingâlâ dren vat hnyi ûen hnahic, me ip dren vat hon wen hnyekon hnyi hnyin, me hnyi tangen hnyeûcan hnyi li can. 6 Anyin a wale ânyâ thö hoton ânyâm metâ, me ca hna ban ae hûen ka utut ka hnyi erkemok hnyi hnahic. 7 Ke u me he ka betenge ge laku Bazilai at Gileada, ke ödrin e he ka hnyi han hnyi ânyâm laulau: anyin a helâe ödrin e he kõnya hnyi ûen oge me kec ga Abasoloma liamekeiny möu. 8 Ke wâ bi e unyâm Simei nõku Gera at Beniamina ûheny Bahurim, ke e ame hangö nya ke hwege hnen hna ûhangö waleji hnyi bong oge me he hnyin Mahanaima ai: ke so bi e ame utut he ka úkhanö mönya hnyi Joridano, me oge me khemanyin kâu ga Iehova, ka habe, Oge me ca he ka hlingö u ge hele vat. 9 Ke walang ang u me ca he ka ha a e ba anyin monu, anyin a u at ae metâ, ke e khanö u únyi ae úcú he ka ânyâ kâu, ke u me he ka hom ban ae hûen ka hnyi erkemok ge dra. 10 Ke Davita ame tha mokut me lakamen, me adre me konâm e hnyi taun anyi Davita. 11 Ke haba ta je bong ame musi hnyin Davita hon at Isaraela, me, fâte je huna: seven je huna e ame musi hnyi Heberona, ke thöte theri je huna e ame musi hnyi Jerusalem.

12 Ke Solomona bi ame tabâ theron anyi Davita a kamen; ke adre ti ohmâ dokhon dökhu. 13 Ke haba Adonia nõku Hagitha ame o kö Bathe-seba hinyö Solomona. Ke haingen momo ka habe, Hawa u me oâ hnahic? Haingen, ka habe, E ke. 14 Me e ame ha ka momo, ka habe, E hu hok hofuc he ka ha köu. Haingen, ka habe, ha thö. 15 Haba e ame ha, ka habe, e khanö u a hanymök dökhu, ke haba at Isaraela hia ödrin e tha hnyimaködrin kõnya me inye than; ke so bi adre wia bi dökhu, me adre ham bi ka keik, anyin a Iehova ame ham kâu. 16 Ke walang ang inya oge me sumató u ge ke únyi a khaca, u me ca he ka behânâ. Haingen momo, ka habe, Ha thö. 17 Haingen,

Ö u ha kö Solomona than (anyin a e ame ca he ka behânâ gam,) me me ham Abisaga kõnya at Sunema me öiök. 18 Ke Bathe-seba ame ha, ka habe, E so; oge me he ka úhnenamö me than hobi köu. 19 Haba Bathe-seba ame he kö Solomona than he ka úhnenamö mē ga Adonia. Ke than ame tot he ka úkhanö mē, ke e ame nom kâu, me laba hon anyin theron, me kunâ he ka ip ke theron hobi kâu hinyen than; ke momo ame laba hnyi ke keihen a metân. 20 Haba momo ame ha, ka habe, Inya oge me sumató u ge ke ong únyi a khaca; ca he ka behanö nya. Haingen than, ka habe, Bai, sumâtâ thö: anyin a oge me ca he ka behânâ gam. 21 Haingen momo, ka habe, He ka ham Abisaga at Sunema kö Adonia liamekeiny möu me âiân. 22 Haba Solomona than ame thu me ha ka hinyen, ka habe, Anyin a ieu u me sumató Abisaga at Sunema hobi kö Adonia? sumâtâ minya thö dökhu hõbi kâu; anyin a tuhök e; a hobi kâu bi, me Abiathara at bihut, me Joab nõku Zerua. 23 Haba Solomona than ame khemanyin ga Iehova me ha, ka habe, Ame he Khong ka ânyâ helâe kõnya me bi hanen minya, a ne ca ha Adonia hofuc e hnân hangâ e bi. 24 Awe, kia inya Iehova, at ame ohmö nya, me olabö nya hon theron anyi cica Davita, me at a bi hnyabak, helâ me hnen hna ha bânâ, a g' adre me he ka hlingö Adonia hnyi bong ang. 25 Haba Solomona ame kunö Benaia nõku Jehoiada; ke ame kot moko e. 26 Ke haba than ame ha kö Abiathara at bihut, ka habe, He thö Anathoth ai ka hnyi em hnyei; anyin ae úcú u me he ka mok: ke oge me ca he ka hlingö u walang ang, anyin a u je hom tilâ tang tangö Iehova a Than hnyi hnyimakö cica Davita, ke can u je hom vec hnyi ta je únyi hia ame vec cica hnyin. 27 Me haba Solomona ame obö Abiathara únyi hnyi hanymen at bihut kö Iehova; me me ohwâdâ hofuc ho Iehova, waleji a ha ge lap anyi Eli hnyi Silo. 28 Ke Joab ame long úthumetu eling: anyin a hia but Joab he hoton Adonia, ke so bi a ca he hotu Abasoloma bi. Me Joab ame kec ka hnyi Uma Mano umö Iehova, me kât je baitoiny taben hut. 29 Ke adre me thumetu Solomona than a ga kec dö Joab ka hnyi Uma Mano umö Iehova, ke wâ bi e but hnyi taben hut. Me haba Solomona ame kunö Benaia nõku Jehoiada, me ha, ka habe, He thö ka kot.

30 Haba Benaia ame he ka hnyi Uma, Mano umö Iehova, me ha kâu, ka habe, Walang hofuc hwan than, ka habe, Aiö u. Haingen, Ohe; oge ma he ka mok ang. Me Benaia ame hmeto hofuc ka than, me ha, ka habe, Ame ha helâng Joab, ke e ame thu kõnya helâng. 31 Ke haingen than kâu, ka habe, Änyá thö helá me hnen hna ha, ke kot ju, me konám e; m' u me he ka ohia dra ae ba hnyikongon, waleji a hingálá Joab únyi gak, me únyi ge lap anyi cica. 32 Ke ame he Iehova ka ohmeto dren ka hnyi hon ban bi, anyin a e ame kot li at ae wisa me so hon, me hling' ödru ge hele vat, ke ca khanö cica Davita, wale ji Abinera nöku Neri, taben vat anyin at Israela, me Amosa nöku Jether taben vat anyin at Juda. 33 Ke ame he hmetu dödru ka mokut hon bö Joab me hon ban je mátrániny nyiele balua: ke ame he ka hu hnahic únyi ga Iehova nyiele balua kö Davita, me je mátrániny, me anyin lap, me anyin theron. 34 Me haba Benaia nöku Jehoiada ame he, me kot hlingá e; ke adre me konám e hnyi umen uma hnyi hnyebuba. 35 Me haba than ame otílö Benaia nöku Jehoiada hon je utbavat me hwaban: ke than ame otílö Zadoka at bihut me hwabö Abiathara. 36 Ke haba than ame úkhúnöng he ka hawo Simei, me haingen kâu, ka habe, He thö ka bi umám uma hnyi Jerusalema, me laba eling, ke ca he bi ka hnyi hoton hak. 37 Anyin a hnyi bong u me he ka he didrut me hanyátá wagewe Kideron, wáhmakhmeto ju a u me he ka mok: ame he ka mokut hon bâm drám bi. 38 Haba Simei ame ha ka than ka habe, E so hna ha: ame he athnyabaem ka ányá helá me hnám than hna ha. Ke haba Simei ame laba hnyi Jerusalema e se hia je bong. 39 Ke hwaban kun ta huna me ame kec li lathnyabai Simei kö Akisa, nöku Maaka, thaniny Gatha. Ke ödrin e thumetu Simei, ka habe, Wá bi, haba li lathnyabaem ödru but Gatha. 40 Haba Simei ame todrö, me húkálá taben hon haleny asina me he Gatha ai kö Akisa he ka elám li lathnyabainy hlu: ke Simei ame he me hom anyin li athnyaba úheny Gatha. 41 Ke adre me thumetu Solomona a Simei ame he Gatha ai úheny Jerusalema, ke a o hmetu thö. 42 Haba than ame úkhúnöng he ka hum Simei, me ha kâu, ka habe, Hawa, oge me ca kunö u he ka khemanyin kö Iehova, me ha hwegiá köu, ka habe, Wáhmakhmeto ju a u me he ka

mok hnyi bong u me he ka he hnyöu ai, me he monu me ngenü? ke u je ha kõnya, ka habe, E so hofuc oge me löng. 43 Ieü can u je ca vheno hna khemanyin kö Iehova, me hnanyibu oge hína köu? 44 Ke haba than ame ha minya kö Simei, ka habe, U je wáhmakhmeto but ae kong hia eü hnyi hnyekom, waleji u je ányá kö cica Davita; ke ame he Iehova ka bi hwaban ányám mou hon bi bâm, 45 ke ame he Solomona than ka hnahic, ke ame he ka tet hmá theron anyi Davita hnyi hnyimakö Iehova nyiele balua. 46 Haba than ame kunö Benaia nöku Johoiada me e ame he me kot hlingá e. Ke hmá but dökhü unyi Solomona.

HNYIMAKAN 3.

KE haba Solomona ame hwán he ka liameüngon me Faraö than Aigupito, anyin a e ame hom hlu nöku Faraö, me hom e ka hnyi taun anyi Davita, ke ne o but e ame mä um dö op umen uma, me uma umö Iehova, me hak veto igigilö Jerusalema. 2 Ke so bi haba tavat adre bi hut hnyi je dok ae görany, anyin a ödra tiga ca um op uma umen iö Iehova ke ne o but hnyi je bong eling. 3 Ke Solomona ame hnyok kö Iehova, k' ame vheno je hnanyibu anyi Davita a kamen; ke so bi e ame hudo me leü ütö ae bo so hnyi je dok ae görany.

4 Ke haba than ame he Gibeona ai he ka bi hut eling; anyin a haba wale dok ae görany ke gan bi: khaca thauzan je hudiny leü ame hudo eling Solomona hon taben hut. 5 Ke Iehova ame manen kö Solomona hnyi Gibeona hnyi bwi hnyi hnyinghet: ke ame ha Khong, ka habe, Sumátá thö únyi oge me he ka ham köu. 6 Ke haingö Solomona, ka habe, U je betenge gan hmá ga cica Davita athnyabaem, hoton hnen hna' he hnyi hnyimákâm hnyi hnathu, me hwakecin ae so, me hnyekon ae wisa köu; ke u je tuö hobi kâu ibetengiö ang ae gan, a u je ham kâu nokon he ka laba hon anyin theron, helá me hnyi bong ang. 7 Ke haba walang ang, Iehova lö a Khonguk, u je otílö nya athnyabaem he ka than hwabö cica Davita: ke iny wanakat ae úhnyükong; ke ca khanö nya bongon he ka didrut me didrö. 8 Ke inya but ang a athnyabaem hnyi wanben lakem waleji u je uca, hnyeí ae gan, ae pason he ka ha úseiny, ke ca hnán aú anyin aese hia. 9 Ö u ham kõnya athnyabaem hnyok ae metá he ka owisa ka lakem,

m' inye he ka wáhmakhmeto so me kong ; anyin a ie at ae khana he ka owisa ka lakem ae gan heláng? 10 Ke haba hofuc ho Solomona me so ka Than, wale ame sumátá únyi eling. 11 Ke haba Khong ame ha káu, ka habe, Anyin a u je sumátá únyi eling, ke u je ca sumátá he ka möt beú hobi kóu bi, ke u je ca sumátá omjeú hobi kóu bi, ke u je ca sumátá me me mok je iwahnaihmiöny möu ; ke u je sumátá bi metá hobi kóu m' u me wáhmakhmetoá he ka owisa ; 12 awe, oge hia but ányá helá me hnám hna ha : me wá bi, oge hia but ham kóu hnyok ae metá me wáhmakhmeto ; ke ba ke at a helá möu ehac, ke haba khaca, e ba ke at ame he ka úcú möu ame he ka o hwabám. 13 Ke oge hia but ham minya kóu únyi u je ca sumátá, wale omjeú me he ka lung, me me ca he bi ka úcú möu ke than, hnyi bongom ta je bong hia thithö. 14 Ke u je ne he ka vhenodek je gethen he ka tuö anyik je hnanyibu me hnök je hna húna, helá me hnö Davita a kámám hna vhenodek me oge me he ka osehia bongom je bong. 15 Ke ame hmak dö Solomona, me wá bi, ame bwi : ke e ame o Jerusalem a ai me tot hnyi hnyimakan tangen úhinhinkóu anyi Iehova, me hudo je hudiny leú, me je hudiny ole, me ányá bijeú ka lathnyabainy hia.

16 Ke ame o but ka than li momo hnyi gethen, me tha tot hnyi hnyimakan. 17 Ke ame ha ke momo, ka habe, Than lö, oge laba me momo ang hnyi uma a khaca ; ke oge me hnokoá hnyi uma eling me. 18 Ke haba hnyi bong a kuniny hwaban hnök hna hnokoá, haba momo ang ame hnokoá minyá ; öhmu thibi ; ke ba ke at unyihmu hnyi uma, ke hake öhmu ke hnyi uma. 19 Ke ame mokcu nokon momo ang hnyi hnyinghet ; anyin a e ame hwiö takóú. 20 Ke e ame todrö wanbenset, me hom nökk da gak, e ka tiga mokut bi nya athnyabaem me ip e hnyi úlainy, ke e ame ip bi nokon a mokcu hnyi úlaik. 21 Ke iny ka hmak dö hnyi hnyomakatu he ka asen nökk, me wá bi a mokcu : k'oge hia but wáhmakhmeto e hnyi hnyomakatu, me wá bi, a ca nökk bi waleji oge hnokoá. 22 Ke haingen ke momo, ka habe, Ohe, nökk bi ang ae möt, ke ka nokom e ae mok. Ke haingen momo, a bán, ka habe, Ohe, nokom bi e ae mok, ke ka nökk bi ang ae möt. Wale hnödrü hna ha hnyi hnyimakan than. 23 Haba than ame ha, ka habe, Haingen ke at, ka habe, Ka nökk ang ae möt, ke

nokom bi e ae mok : ke haingen bi ke at, ka habe, Ohe, nokom bi e ae mok, ke ka nökk bi ang ae möt. 24 Ke haingen than, ka habe, Hö jem könya hele vat. Ke ödrin e hom ke hele vat ka hnyi hnyimakan than. 25 Haba than ame ha, ka habe, Kave luá but wanakat ae möt, me ham ke keihen ka ke at me ke keihen ka ke at. 26 Haba momo hinyen wanakat ae möt ame ha ka than, anyin a e ame hnyok ka nokon, ka habe, Than lö, ham káu wanakat ae möt, ke ca he bi ka hlingá. Ka ame ha bi ke at, ka habe, Awe me me ca nökk bi at ca nokom, kave luá but. 27 Me than ame thu, ka habe, Ham ka at eji wanakat ae möt, ke ca hlingá bi ; e bi hinyen. 28 Haba at Isaraela hia adre me löng hna owisa hnen than ; me adre me outen than : anyin adre me wá a e unyin metá he ka owisa únyi ge Khong.

HNYIMAKAN 4.

HABA Solomona than, me e thaniny at Isaraela hia thithö. 2 Ke walang je taben unyin ; Azaria nöku Zadoka at bihut ; 3 me Eliorefa me Ahia, li laku Sisa, li at sihnalimen ; me Jehosafata nöku Ahiluda, at ame önykümeá ; 4 me Benaia nöku Jehoiada, taben je utbavat ; me Zadoka me Abiathara, li at bihut ; 5 me Azaria nöku Nathana, taben tavat tue ; me Zabuda nöku Nathana, obotkong me at ame tha hnyok me than ; 6 me Ahisara ame tuö hnyaba ; me Adonirama nöku Abeda at ame ö fat. 7 Ke twelv je obotkongi Solomona hon at Isaraela hia, ke hanymödrin he ka bi an than me anyin lap : úsa khaca tehi ködrin ka bi han hnyin hnyi huna. 8 Ke walang je iödrin : jia Bene-huro, hnyi hnyei ae hut hnyi Eferaima : 9 Bene-dekera, hnyi Makaza, me hnyi Salabim, me Bathe-emes, me Elona-bethe-hanan : 10 ke Bene-heseda hnyi Aruboth ; ke hanymen hnyi Soko me hnyei hia Hefera : 11 ke Bene-abinadab hnyi hnyei ae hut hia e Dora ; wale at a hum Tafatha hlu nöku Solomona me áitan bi : 12 ke Baana nöku Ahiluda, hnyi Tanaka, me Megido, me Bethe-seana hia a hakekeny Zaretana, hnyi hmelen Jezerela, hwán e Bethe-seana ke ne o but hnyi Abela-mehola, ke ne o but cicó Jokameama : 13 ke Bene-gibera, hnyi Ramoth-gileada ; e hu hanymen bi hnyi je taun anyi Jaira nöku Manase hnyi Gileada, me hnyi ke keihen Aregoba

I. JE THAN 5.

hnyi Basana, sikste je taun ae gan adre up hagny veto me je ohmâiny a bras: 14 ke Ahinadaba nöku Ido, hnyi Mahanaima: 15 ke Ahimaza hnyi Nafatali; e ame hum Basimathi hlu nöku Solomona me âiân: 16 ke Baana nöku Husai, hnyi Asera me Aloth: 17 ke Jehosafata nöku Parua, hnyi Isakara: 18 ke Simei nöku Ela, hnyi Beniamina: 19 ke Gebera nöku Uri, hnyi hnyeï Gileada, hnyeï i Sihona than Amora, me Oga than Basana; ke hake e thibi obotkong hnyi hnyeï. 20 Ke e se hia at Juda me Isaraela, helâ me önyin köiö üseiny, adre me han me ic me senyin.

21 Ke haba Solomona ame musö je dökhua hia hwân hnyi Wagewe ke ne o but hnyi hnyeï iny at Filisiti, ke ne o but hnyi hnyiguölen Aigupito: ke adre me ham bwihlany me huliwa kö Solomona hnyi bongon ta je bong hia thithö. 22 Ke haba ö Solomona hnyi bong a khaca, me thöte je tulutiny falawa ae so, ke sikste je tulutiny ke falawa bi; 23 ten je bolok ae pipikhenya, ke twente je bolokiny hnyot, ke khaca haded je mamoe, ca ha bi je aila, me je zebi, me je imura, me je meno ae pipikhenya helâ me koto. 24 Anyin a e ame musö hia hnyi ke keihen ejem Wagewe, hwân hnyi Tifesa ke ne o but hnyi Gaza, hon ta je than hia hnyi ke keihen ejem Wagewe: ke e hu üsököu hnyi je ke keihen hia igigilö. 25 Ke haba at Juda me Isaraela hia adre me ve laba hnahic, hmelen haledrin je üvine, ke hmelen haledrin je imeta, hwân hnyi Dana ke ne o but hnyi Bere-seba, hnyi ta je bong hia thithö anyi Solomona. 26 Ke e hu ga Solomona fâte thauzan je hnyeuleny horse hobi kâu anyin je kariota, ke twelv thauzan tavat tabö horse. 27 Ke haba je obotkong eling ödrin e bi ö Solomona than mödrin hia thitho ödrin e he ka hnyi laulau anyi Solomona than, üsa khaca tehidrin: ke ba ke ünyi ae hia. 28 Ke adre me hom bali me je thatünyin whit minya hobi kâu je hors me je meno ame he logot, ödrin e hom ka hnyi nhen hna laba hnyin, hoton je ve hudrödrin.

29 Ke Khong ame ham kö Solomona metâ me wâhmakhmetoâ ae ti gan, me hnyok ae gan hmâ, helâ me öny hnyi köiö. 30 Ke haba metâ anyi Solomona, me gan hon metâ anyin tavat hia thithö e deiö, me metâ hia hnyi Aigupito. 31 Ke e beönua anyin metâ hon tavat hia thithö; hu Ethana at Ezera, me Heman, me Kalekol, me Dada, je laku Mahola; ke e lung hnyi ta je hnyeï

hia igigilö. 32 Ke e ame ha ta je vejec a theri thauzan: ke haba anyin je khumöng, khaca thauzan me faiv. 33 Ke e ame ha bongon je üö hwân ge arasi hnyi Lebanona ke ne o but ge hisop ame kü hnyi hna up veto: ke e ame ha minya ge je meno ae gan, me je meno ame gâ me je meno ame iyâü, me ta je wâ. 34 Ke ame o tavat ühedrin hnyi je hnyeï hia he ka löng metâi Solomona, ünyi ge je than hia eang hmele-drany adre me löng ge anyin metâ.

HNYIMAKAN 5.

KE haba Hirama thaniny Turo ame kunâ lathnyabainy kö Solomona; anyin a e ame löng a g'adre hû me me than hwaban kamen: anyin a Hirama ame labö hnyokö Davita. 2 Ke Solomona ame ükhünöng kö Hirama, me ha, ka habe, 3 E khañö u a e ca khañö cica Davita he ka bi uma hobi kâu iö Iehova Khongon can je vat igigilö, ke ne o but Iehova ame ip ödra hmelen li hnyeücan. 4 Ke walang ang Iehova Khonguk ame omenö nya igigilö; e ba iwahnaihmiöny, ke ba ke ünyi ae kong ame kü. 5 Ke wâ bi, oge me ünyküme bi nya he ka bi uma hobi kâu iö Iehova Khonguk, helâ me Iehova ame ha kö cica Davita, ka habe, Haba nokom oge me he ka bi uma hobi kâu iök. 6 Ke walang ang u me he ka hûna he ka si arasi hnyi Lebanona hobi könya; ke ame he lakeik ka tha ödrin bi me lakeim; ke oge me he ka ham köu hwaban lakem hoton hnâm hna ha: anyin ae khañö u ae ba at gahmun ae khana he ka si utö helâ me at Sidona. 7 Ke a löng ut Hirama hofuc ho Solomona, me e ame senyin gan hmâ, me ha, ka habe, Ole kö Iehova hnyi bong ang, at ame ham kö Davita nokon ae metâ he ka musö hnyeï eling ae gan. 8 Me haba Hirama ame ükhünöng kö Solomona me ha, ka habe, Oge me löng ut uthumetu u je hunâ könya: me oge me he ka änyâ hia wem, ge ta je utö arasi, me ta je utö kop. 9 Ke hamen lathnyabaik he ka lelö je üö ka hnyi köiö üheny Lebanona: me oge me he ka ükhülâlköuâ je üö he ka häitâ tilâ hnyi köiö ka hnyi dok u me he ka kü könya, ke adre me he ka thang ut eling, me u me he ka kap: ke u me he ka änyâ wek he ka ham jeü hcbi kâu anyik lap. 10 Me Hirama ame ham kö Solomona je utö arasi me je utö köp e ame weny. 11 Ke Solomona bi ame ham kö Hirama

je hwit a twente thauzan je tulut hnân han hobi kâu anyin lap, me je tulutiny wakaco adre kokot a twente: ame ham helâe Solomona kö Hirama hnyi ke huna me ke huna. 12 Ke lehova ame ham kö Solomona metâ helâ me hnen hna ba bânâ kâu; ke Solomona me Hirama ödrü me laba úsoköu; ke ödrü me úhinhinköu.

13 Ke Solomona than ame úca tavat úheny Isaraela hia; ke haba hna húce at, me ödrin thöte thauzan tavat. 14 Ke e ame kun' ödrin Lebanona ai, ödrin ten thauzan hnyi tehi: khaca tehidrin hnyi Lebanona, ke lo li tehidrin hnyi hnyabadrin: ke hanymö Adonirama hon tavat adre úca. 15 Ke ödrin sevente thauzan tavat atö Solomona tavat hije hok, ke eite thauzan tavat si utö hnyi je bucen; 16 ca ha bi je homakan adre tuö huliwa anyi Solomona, ödrin theri thauzan ke theri haded tavat musö tavat adre me bi huliwa. 17 Ke haba than ame úkhúnöng he ka hom je veto ae gan hmâ, je veto ae ti únyi hnathu, hnân he ka ip taben uma ge je veto adre tretrao. 18 Ke ame huliwan hnen tavat up uma atö Solomona, me tavat up uma atö Hirama, me tavat Gebali, me penapena je utö me je veto hnân up uma.

HNYIMAKAN 6.

KE hnyi huna a foa haded ke eite wale ame he but hnyin lakon Isaraela únyi hnyi hnyeí Aigupito, hnyi huna a vakiny musi anyi Solomona hnyi Isaraela, hnyi tehi Zif, wale tehi a loiny, me e ame ibi hwân op uma umö Iehova. 2 Ke haba uma ame op Solomona than hobi kö Iehova, sikste je kubit ibeúen, ke twente úlauen, ke thöte kubit ibeúen göranyai. 3 Ke haba poretiko cicö dok ae kap hnyi uma, twente kubit ibeúen hoton úlauen uma; ke ten je kubit úlauen hnyi hnyimakan uma. 4 Ke e ame ányâ je mamalama hobi kâu uma me pewânâ hmâ. 5 Ke e ame ányâ hnyi hnyeige uma je deö hnyeüle igigilö, hnyi uma, me dok ae kap hmönyin: ke e ame ányâ je hnyeule igigilö. 6 Haba je deö hnyeule eú hmelen, faiv kubit úlauen, ke je deö hnyeule hnyi wanben, siks kubit úlauen, ke haba kuniny, seven kubit ulauen: anyin a e ame op úhnyúkongo me me hu je deö taben hnyi hna up veten uma igigilö hnyöu, ke adre me ca ohmâ je wangöningön eú hnyin je hna up veten uma. 7 Ke haba uma adre me op ge je veto adre penapena

hnyi kic adre me hom únyi hnyin: ke adre me ca löng hama, me gö, me ke fao hnyi uma ödra ka tiga op. 8 Haba hwanumen je hnyeule eú wanben, me hnyi ke keihen metân uma: ke adre me ölö wali ka hnyi je hnyeule eú wanben, ke adre me ölö úheny ang wale hnyi wanben ka hnyi kuniny. 9 Waleling e ame op uma ge je esö arasi. 10 Ke e ame op je deö hnyeule hnyi baten uma hia, úsa faiv kubit ibeúen göranyai, k' ame bi taben je hnyeule ge utö arasi.

11 Ke ame o but hofuc ko Iehova kö Solomona, ame ha, ka habe, 12 Haba bongon uma ang u je op, me u je ne he ka vheno anyik je hnanyibu, me ányâ hnök je hna owisa, me tuö hnök je hna húna hia he ka vheno e; awe, oge me he ka ohmâ köu hok hofuc, waleji oge me ha kö Davita a kámâm. 13 Ke oge me he ka laba unyin lakon Isaraela, ke oge me ca he ka hna degecâ lakeik a at Isaraela.

14 Me haba Solomona ame op uma, me umo e. 15 Ke e ame op je hnyeige uma eiö hnyin ge je esö arasi; hwân eú hnyikânâ ke ne o thö ethö, e ame tube eiö hnyin ge utö: ke e ame bi deikiny uma ge je esö köp. 16 Ke e ame bi haginy eiö hnyin uma a twente kubit ge je esö arasi, hwân eú hnyikânâi ke ne o thö ethö: wale e ame otílâ e eiö hnyin me hnân umen hofuc, wale hnân dok ae kap hmönyin. 17 Ke haba uma wale uma kap hnyi hnyimakan umen hofuc, me, fáte kubit ibeúen. 18 Ke e hu arasi eiö hnyin uma adre kave je ovejien hnyin, me je vongon úö ae susu, arasi hia, e ba veto ae manen bi. 19 Ke e ame penapena umen hofuc eiö hnyin hnyi wanben uma, m' adre me he ka ip eling tangen úhinhinköu anyi Iehova. 20 Ke haba umen hofuc me twente je kubit ibeúen, ke twente je kubit úlauen, ke twente je kubit ibeúen göranyai; ke ame tube ge gol ae so, me tube taben hut ge arasi. 21 Haba Solomona ame tube eiö hnyin uma ge gol ae so: ke e ame lelö je cein gol hnyi hnyimakan umen hofuc; me tube e ge gol. 22 Ke e ame tube hia uma ge gol ke ne o but ame um do uma: ke e ame tube hia taben hut hnyi umen hofuc ge gol. 23 Ke e ame ányâ hnyi hnyin umen hofuc li kerubi utö elaiö úsa ten kubit ibeúödrü göranyai. 24 Ke faiv kubit ke labenyin ke kerubi, ke faiv kubit ke labenyin ke kerubi: ten je kubit hwân hnyi obiny ke labenyin ke ne o but hnyi obiny ke labenyin.

25 Ke ten je kubit ke kerubi : khaca tulut me khaca bongon li kerubi. 26 Ten kubit ibeüen göranyai ke kerubi, ke helâe minya ke kerubi. 27 Ke e ame ip li kerubi hnyi hnyin uma eiö hnyin : ke ame lau li labenyin li kerubi, me ame kâlâ hnyeige uma labenyin ke at, ke ame kâlâ ke hnyeige uma hnen labenyin ke kerubi ; ke ame üginö ke li labenyidru wanben uma. 28 Ke e ame tube li kerubi ge gol. 29 Ke e ame kave je hnyeige uma hia igigilö ge je kerubi adre kave, me je üö pama, me je vongon ae susu, eiö me eü. 30 Ke e ame ave uma ge gol eiö me eü. 31 Ke e ame tibet li hlinginy üö elaiö hnân hwanumen umen hofuc : haba hlanyin me li uthwanuma üsa ke keihen a thabünginy hnyeige uma. 32 Ke haba li hlinginy, utö elaiö ; ke e ame kave hnyin je huatheati kerubi, me je üö pama, me je vongon ae susu, me tube ge gol, ke e ame khavâ ge gol je kerubi me je üö pama. 33 Ke helâe minya e ame änyâ hnân hwanumen uma li uthwanuma elaiö üsa ke keihen a vakiny hnyeige uma ; 34 ke utö köp li hlinginy ; haba li hlinginy ke kwana adre iounyâ, ke li hlinginy ke hwanuma adre iounyâ minya. 35 Ke e ame kave hon je kerubi, me je üö pama, me je vongon ae susu, me e ame tube ge gol adre okhavâ hon hna kave. 36 Ke e ame änyâ hnyeule hnyi hnyin ge kun ta deö veto adre tetrao, me ke deö venyâ a arasi. 37 Hnyi hunâ a vakiny hnyi tehi Zif adre bi taben uma umö Iehova. 38 Ke hnyi hunâ a eleveniny hnyi tehi Bul, wale tehi a eitiny ame um dö uma me je ke keihen a hia hoton je bongon hia. Me e ame änyâ hnyi seven je hunâ.

HNYIMAKAN 7.

KE haba Solomona ame otilâ umen uma bi hnyi je hunâ a thötin, me ame um hia thö umen uma. 2 Anyin e ame änyâ uma üöiny Lebanona ; khaca haded kubit ibeüen e, ke fite kubit ülauen ke thöte kubit ibeüen göranyai, k' ame bi taben hon vak ta gaütö arasi a je hmolom, ke je venyâ arasi hon je hmolom. 3 Ke adre bi arasi hon je venyâ ae hon je hmolom a fâte faiv ; a fiftin je gaö. 4 Ke kun ta deö mamalama, khaca mamalama cicö ke mamalama, a kun ta dö. 5 Ke haba hwanuma me uthwanuma, me khaca tulutiny baten a vak : ke ke mamalama cicö ke mamalama a kun ta dö. 6 Ke e ame änyâ poretiko a

je hmolom ; haba ibeüen e, me, fite kubit, ke thöte kubit ülauen ; ke e hu poretiko hnyi hnyimakan ; ke je hmolom me je venyâ ae gan cicö e. 7 Ke e ame änyâ poretiko hobi kâu theron me me owisa hon, wale poretikoiny hna owisa ; ke adre me khavâ e ge arasi hwân eü hnyikânâ ke ne o thö ethö. 8 Ke haba umen uma he ka laba hnyin, me wale hnyeule hnyin poretiko, a khaca thibi hna huliwan. Ke e ame bi uma umen hlu nöku Farao, (at a hom Solomona me äiân,) helâ me poretiko eling. 9 Haba je vetoiny hia, me, gan hwaban, adre tetrao hoton tulut, k' adre gilö ge je gili, eü me eiö, hwân hnyi taben ke ne o but hnyi je vetö ethö, a helâe bala ke ne o but hnyi hnyeule ae gan. 10 Ke haba taben, me je veto ae gan hwaban, a je veto ae gan, ke eit kubit je veto. 11 Ke je veto ae gan hwaban minya ethö, a je veto adre me tetrao, hoton tulut, me je arasi. 12 Ke haba hnyeule ae gan igigilö, me kun ta deö veto adre tetrao, ke khaca deö venyâ arasi ; helâ me hnyeule eiö hnyin uma umö Iehova, me poretikoiny uma.

13 Ke haba Solomona than ame ükhü-nöng he ka hum Hirama üheny Turo. 14 E nokon safac hanen tribu Nafatali, ke at Turo kamen, at ame huliwan bras : e unöngöt ge metâ, me wâhmakhmeto, me wâ ünyküme, he ka änyâ ta je huliwa bras hia. Me e ame he kö Solomona than, me änyâ anyin ta je huliwa hia. 15 Anyin a e ame änyâ li hmolom bras, üsa eitn je kubit ibeüen göranyai, ke üsa twelv kubit tulutiny igigilö, ke at me ke at. 16 Ke e ame änyâ li ovejien bras adre oköiâ hnân tot ethö hon li ban li hmolom : ke faiv kubit ibeüen göranyai ke ovejien, ke faiv kubit ibeüen göranyai ke ovejien. 17 Ke e ame änyâ je boert, me je ünyi adre wâdrâ kâu helâ me cen, hobi kâu li ovejien wale ethö hon ban li hmolom ; seven hobi kâu ke ovejien, ke seven hobi kâu ke ovejien. 18 Ke e ame änyâ li hmolom ; ke e hu lo li gaö igigilö hon ke boert he ka oiyoungâ li ovejien wale ethö hon li ban li hmolom, ke e ame änyâ helâe hobi kâu ke ovejien. 19 Ke haba li ovejien wale hon ban li hmolominy poretiko, me e hu hna huliwan helâ me obedila, foa je kubit. 20 Ke e hu li ovejien minya ethö hon li hmolom, hakekeny ka hnyi dok a ganiny baten boert : ke haba je wan rimona me tu haded, adre wâdrâ igigilö hon ke ovejien. 21 Ke e ame otilâ li hmolom hnyi poretikoiny

uma kap; ke e ame otilá hmolom hnyi metá me hwenyi ien Jakina: ke e ame otilá ke hmolom hnyi me, me hwenyi ien Boaza. 22 Ke haba ethö hon ban li hmolom e hu hna huliwan helá me obedila: ke adre umo je huliwainy li hmolom eling. 23 Ke e ame ányá taben köiö adre oköiá, ten kubit hnyi ke baten ka hnyi ke baten, me op wathelaba igigilö, ke faiv kubit ibeüen göranyai; ke haba tulutiny igigilö thöte kubit. 24 Ke e hu je ovejien igigilö hmelen baten e, úsa ten hnyi kubit, ame igigilö taben köiö igigilö: adre tha oköiá li deö ovejien hnyi ün adre oköiá taben. 25 Ke adre otabá e hon je bolok a twelv, kun ame hnyimakan ka hnyi hwadrö, ke kun ame hnyimakan jio, ke kun ame hnyimakan ka hnyi hwaiöu, ke kun ame hnyimakan deö: ke ethö hon e taben köiö, ke ame iobinyköu eü hnyin. 26 Ke khaca hnyam úhakiny; ke adre ányá baten helá me baten utkaia, helá me vongon obedila: lo li thauzan je bath tulutiny. 27 Ke e ame ányá je taben a ten ge bras; foa kubit ibeüen ke taben me ke taben, me foa kubit úlauen, ke kun ta kubit ibeüen göranyai. 28 Ke walang hwakecin hna huliwan je taben: e hu je hwenöniny; ke wanben je baten je hwenöniny: 29 ke haba hnyi je hwenöniny wanben je baten, je liona, me bolok, me kerubi; ke ethö hon je baten e hu je taben: ke eü hmelen je liona me bolok je sa vongon úö adre uhno. 30 Ke haba je taben hia, úsa vak je wil bras me li venyainy wil bras: ke eü hmelen je can a vak e ve hu je ciny: eü hmelen taben soü je ciny adre oköia, ve cicö je sa vongon uö adre uhno. 31 Ke haba hnyimen hnyin ovejien ke ethö, me, khaca kubit; ke wathelaba hnyimen hoton hna huliwan taben, khaca kubit me haf: ke e bi hnyi hon hnyimen minya je hna kave mecá, ke khaca tulutiny vak ta hwenoniny je baten, ke ca wathelaba bi. 32 Ke e hu je wil a vak, eü hmelen je baten, ke e bi hnyi taben je venyáiny je wil: ke haba ibeüen vak ta wil, me, úsa khaca kubit me haf. 33 Ke haba hna huliwan vak ta wil, me helá me wiliny kariota: ke adre oköiá hia, a je venyáiny wil, me otruinny, me je dáiny, me je taben venyáiny je wil. 34 Ke úsa vak ta ci hnyi vak ta baten je taben hia: haba je ciny me hanen je taben. 35 Ke haba ethö hnyi ban taben igigilö únyi ae wathelaba haf kubit göranyai: ke e hnyi hon ban taben je ciny me je baten ke hanen e.

36 Ke e ame kave hon hnyimakan je ciny, me hon je baten, ta je kerubi, me liona, me pama, helá me ve úcü, ke je sa vongon úö igigilö. 37 Heláe e ame ányá je taben a ten: adre ve oköiá hia a khaca tulut, ke khaca bongon. 38 Ke e ame ányá je taben soü bras a ten: haba úganiny taben soü a khaca, me, fáte je bath: úsa vak kubit je taben soü hia: ke úsa khaca taben soü hon je taben a ten. 39 Ke e ame ip je taben a thabúng hnyi ke keihen metán uma, ke ke thabúng hnyi ke keihen meny uma: ke e ame ip taben köiö hnyi ke keihen metán uma, deö, ka hnyi hwaiöu. 40 Ke haba Hirama ame ányá je taben soü, me je soi, me je kaia. Ke Hirama ame umo ányá je huliwa hia thithö wale e ame ányá hobi kö Solomona than hnán hobi káu uma umö Iehova: 41 a li hmolom, me li únyi a khibiny ovejeien walethö hon ban li hmolom; me li boert hnán tube li dok a khibiny ovejien ethö hon li hmolom; 42 me je wan rimona a foa haded hobi káu li boert; lo li deö wan rimona hobi káu li ve boert, hnán tube li dok a khibiny ovejien walethö hon li hmolom; 43 me je taben a ten, me je taben soü a ten hon je taben; 44 ke khaca taben köiö, me je bolok a twelv hmelen taben köiö; 45 me je öt, me je soi, me je kaia: kaba je únyi hia eling wale a ányá Hirama hobi kö Solomona than hnán hobi káu uma umö Iehova, a bras adre ohadröngöcá. 46 Haba than ame oköiá e hnyi dok ae tha hon hnyi Joridano, hnyi káná ae keci, wanben Sukotha me Zaretana. 47 Ke Solomona ame hna ta je únyi hia, me ca tuluto bi, anyin ae ti se hia hmönyin: ke e ca khana he ka elám ihmakiny je bras. 48 Ke Solomona ame ányá je omjehen hia uma umö Iehova: wale taben hut a gol, me laulau gol taben areto hnán omanená; 49 me je taben lamepa gol ae so, thabúng hnyi ke keihen metá, ke ke thabúng hnyi ke keihen me, cicö umen hofuc; me je vongon, me je lamepa, me je akofi gol; 50 me je utkaia, me je uthesiún, me je kaia me je spun, me je taben meic, gol ae so; me je hinge wale hobi káu je hlingin uma eiö hnyin uma, wale dok ae ti kap, me hobi káu je hlingin uma kap wale ke keihen ae gan. 51 Ke ame um dö je huliwa wale ame ányá Solomona than hnyi uma umö Iehova. Haba Solomona ame odilá thö je únyi a okabá Davita a kamen, wale sileva, me gol, me je kaia, e ame tha ip me omjeúny uma umö Iehova.

HNYIMAKAN 8.

HABA Solomona ame úkxacakóná wahingatiný Isaraela, me je ban je tribu hia, je tuban je lap anyin je kamen laku Isaraela, kö Solomona than hnyi Jerusalema, he ka hom tangen úhihinköu anyi Iehova úheny hnyi taun anyi Davita, wale Ziona. 2 Ke ame úkxacaköu kö Solomona than tavat Isaraela hia hnyi bijéú, hnyi tehi Ethanima, wale tehi a seveniny. 3 Ke ame o hia but wahingatiný Isaraela, ke je at bihut ödrin e kap tang. 4 Ke ödrin e hom tang tangö Iehova, me uma mano hnán úkxacaköu, me ta je únyi hia thithö ae kap hnyi hnyin uma; haba tavat bihut me at Levi ödrin e hom ta je únyi eling. 5 Ke haba Solomona me úkxacaköu hia anyi Isaraela, tavat adre me úkxacaköu káu, ödrin e tha e mé hnyi hnyimakan tang, me hudo je mamoe me bolok, a ca hnán bi áú me ha úseiny anyin ae se hia. 6 Ke haba tavat bihut ödrin e odilá tangen úhihinyköu anyi Iehova ka hnyi hnen, ka hnyin umen hofuc hnyin uma kap, wale dok ae ti kap, eú hmelen je labenyin li kerubi. 7 Anyin ame lau li kerubi li labenyidru hon tang, me haba li kerubi ödrin me tube tang me li venyáiny. 8 Ke ame beú hmá li venyá me me manen li hnyiban li venyá hnyi dok ae kap cicö umen hofuc, ke ca manen bi eú: ke ka ödrin e ke ne o but hnyi bong ang. 9 E ba únyi hnyi hnyin tang, ke li veto thibi ae lau, waleji ame ip hnyin Mose bnyi Horeba, hnyi úen Iehova ame úhihinyköu me lakon Isaraela, waleji a úhedrin hnyi hnyeí Aigupito. 10 Ke ame didrut tavat bihut úhedrin hnyi dok ae kap, me ame unöngötö uma umö Iehova ge úlá, 11 me me ca khana hnyat bihut he ka tot me huliwa can úlá: anyin ame unöngötö uma umö Iehova ge hmanenangi Iehova.

12 Ke haba Solomona ame fuc, me ha, ka habe, A hia but ha Jehova a e ame he ka laba hnyi menekholom ae gan. 13 Awe, oge me hia but otílá uma me hnyabam, wale dok hobi köu bi, m' u me he ka laba hnyin nyiele balua. 14 Me haba than ame hwiö me hahnahicá ukxacaköu hia anyin Isaraela: ke ame todrö úkxacaköu anyin Isaraela hia. 15 Ke haingen, ka habe, Ole kö Iehova, Khongu Isaraela, at ame ha ge hnyimen kö cica Davita, me

ohwádá ge hnyamen, ka habe, 16 Hwán hnyi bong waleji oge me hom lakeik a at Isaraela úheny Aigupito, me oge me ca úca ke taun únyi hnyi je tribu hia anyin at Isaraela he ka op uma, m' adre me ip eling iök; ke oge me úcö Davita he ka musi hon lakeik a Isaraela. 17 Ke eú hnyi hnyeku cica Davita he ka op uma hnán hobi káu iö Iehova, Khongu Isaraela. 18 Ke Iehova ame ba kö cica Davita, ka habe, Haba hnám hna hnyok he ka op uma hobi káu iök, me so hnám hna hnyok: 19 ke so bi u me ca he ka op uma; ke haba nokom ame he ka o gam, me hamen bi he ka op uma hobi káu iök. 20 Ke Iehova ame ohwádá hwán hofuc e ame ha; anyin a oge me o but hwabö cica Davita, me tabá theron anyi Isaraela, helá me hofuc ho Iehova waleji e ame ha báná, me oge me hia but op uma hobi káu iö Iehova Khongu Isaraela. 21 Ke oge me hia but bi hnen eling tang, adre hitangen úhihinyköu anyi Iehova, waleji e ame ányá me lakamöta, k' ame hum ödrin únyi hnyi hnyeí Aigupito.

22 Haba Solomona ame tot cicö taben hut anyi Iehova hnyi hnyimakan úkxacaköu hia anyin Isaraela, me hai göranyai li hnyamen: 23 ke haingen, ka habe, Iehova lö, Khongu Isaraela, e ba ke khong ae úcú möu, ethö hnyi drany, me eang hmeledrany; at ame tuö úhihinyköu me ibetengiö ka je laathnyabaem, tavat adre me vheno hnyi hnyimákám me hnyekudrin ae bekhöt: 24 at ame tuö hobi káu athnyabaem, a cica Davita, waleji u je fuc káu: eke, u je fuc ge hnyimám, me u je hia but ohwádá ge hnyamám, helá me hnyi bong ang. 25 Ke walang ang, Jehova lö, Khongu Isaraela, tuö thö hobi káu athnyabaem a cica Davita waleji u je ha káu, ka habe, Ame ca he ka ba hwabám hnyi hnyimakök hnán tabö theron anyi Isaraela; wale thibi e ame ne he lakom ka tuö dedrin je gethen, he ka vheno hnyi hnyimakök, helá me hnám hna vheno hnyi hnyimakök. 26 Ke walang ang, Khongu Isaraela lö, ö u ohnatho hwám hofuc, waleji u je ha ka athnyabaem a cica Davita. 27 Ke hawa, e hnathu ame he Khong ka laba eang hmeledrany? wá ju, e ca úcú u drany me dranyin ta je drany; ke e ti ca úcú u uma eang o ge op 28 Ke so bi Iehova Khonguk lö, ö u löng hic hijin athnyabaem, me anyin sumat, he ka löng hwan hwatenge me hic wale ame hic athnyabaem hnyi hnyimákám hnyi bong

ang : 29 me me bwele, li emakâm ka hnyi uma eang hnyi hnyinghet me lany, wale ka hnyi dok u je ha gan, ka habe, Ame he ka hnen e iök: he ka löng hic hijin athnyabaem hnyi dok ang. 30 Ke löng ju sumat anyin athnyabaem, me lakem a Isaraela, ödrin ka he ka hic hnyi dok ang: eke, löng ju u e hnyi drany wale hnyabam; ke u ka löng ut, ö u thang ut. 31 Ame ne ke at ame monu ka ke at, me adre me ip khöbi kâu he ka kunâ e he ka khemanyin, ke e ame o me khemanyin hnyi hnyimakan ânyâm taben hut hnyi uma eang: 32 awe, löng ju u ethö hnyi drany, me ânyâ thö, me owisa ka lathnyabaem, me bi hwaban at ae kong, me ip hon ban hwakecin bi; me haiwisa at ae wisa he ka ham kâu hoton hwakecin ae wisa. 33 Adre me ne he ka kot lakem a Isaraela hnyi hnyimakan iwahnaihmiony, anyin a ödrin e ânyâ hulö köu; ke ödrin e ne he ka hmetu köu, me haimemenâ iâm, me hic me sumat köu hnyi uma ang: 34 awe, u na löng ju hnyi drany, me hna hulö anyin lakem a Isaraela, me ohmetu ödrin ju ka hnyi hnye i u je ham ka lakamödrin. 35 Adre me ne he ka hlöng drany, me ba we, can adre me ânyâ hulö köu; ke ödrin ka hic köu hnyi dok ang, me haimemenâ iâm, me hwiö ünyi hnyi anyidrin monu, u ka oveci ödrin: 36 awe, u na löng ju hnyi drany, me hna monu anyin lathnyabaem, me lakem a Isaraela, u ka he ka n' ödrin ge gethen ae so he ka vhenö gadrin; me ham we ka hnyi hon em hnye i, waleji u je ham ka lakem me me idrin. 37 Ame ne hu hmiâ hnyi hnye i, ame ne mok ae cap, ame ne ut me löhau me wahamon me ihmâ; ame ne theling ödrin je iwahnaihmiony mödrin hnyi hnyeiny anyidrin je taun; ame ne hu vec, ame ne hu mok; 38 haba je hic hia me hna sumat hia hnen ke at, ame ne lakem a Isaraela hia, a tavat adre me ve wâhmakhmetoâ vecin je hnye kudrin, me hai li hnyamödrin ka hnyi uma ang: 39 awe, u na löng ju hnyi drany, a hnyabam, me hna monu bi, me ânyâ, me ham ka tavat hia hoton dedrin je gethen, ke u je wâhmakhmetoâ hnye kudrin; (anyin a hake u thibi at ame wâhmakhmetoâ hnye kon lakon at hia;) 40 m' ödrin e he ka outö u hnyi ta je bong hia thithö bongon anyidrin möt hon kânâ, wale hnye i u je ham ka lakamöhmun. 41 Ke haba atkanyua a ca hanen bi lakem a Isaraela, ke e ka o üheny hnyi hnye i ae sâkâü ge iâm; 42 (anyin a adre me he ka löng ge iâm ae

gan, me hnyamâm ae hwege, me benyâm adre hai;) ke e ka o me hic hnyi uma eang; 43 awe, u na löng ju hnyi drany, a hnyabam, me ânyâ helâ me ta je ünyi hia ame hawo u hnyin atkanyua; me me khana iâm tavat hia eang hmeledrany, he ka outö u, helâ me hna ânyâ hnen lakem a tavat Isaraela, me me khan' ödra a g' adre hweny ien uma eang wale oge ânyâ, me iâm bi. 44 Ame ne he lakem he ka vat me je iwahnaihmiony mödrin, hnyi hnâm hna kun' ödrin kâu, ke ödrin e he ka hic kö Iehova cicö taun wale u je üca, me uma wale oge ânyâ hobi kâu iâm: 45 awe, u na löng ju hnyi drany hijidrin hic, me hnödrin hna sumat, me owisa ködrin. 46 Ödrin e ne ânyâ hulö köu, (anyin ae ba at ame ca ânyâ hwakecin ae kong;) ke u je hmönyâm ködrin, me hn' ödrin ka je iwahnaihmiony, m' adre me hum ödrin ka hwenbâ ka hnyi hnyeiny je iwahnaihmiony, ame ne dok ae sâkâü, ame ne hakekeny; 47 ke so bi ödrin e ne ünyküme hnyi hnye kudrin hnyi hnye i adre hom hwenb' ödrin hnyin, me hwiö thö, me khöü köu hnyi hnye i ny tavat adre me hwenb' ödrin, me ha, ka habe, Öhmun e ânyâ hwakecin ae kong, me hwali, me monu; 48 ke ödrin e ne hmetu köu ge hnye kudrin ae bekhöt me hanudrin ae bekhöt hnyi hnye i ny je iwahnaihmiony mödrin, tavat adre me hwenb' ödrin, me hic köu cicö idrin hnye i, wale u je ham ka lakamödrin, taun u je üca, me uma wale oge ânyâ hobi kâu iâm: 49 awe, u na löng ju hnyi drany, a hnyabam, hijidrin hic me anyidrin sumat, me owisa ködrin; 50 me hna but lakem wale ödrin e ânyâ hwakecin ae kong, me hnödrin je hna hanyâüâ hia ânyâm hnanyibu; me oküâ thö betenge gadrin ünyi ge tavat adre me hwenb' ödrin, mödrin e he ka betenge gadrin: 51 anyin a lakem me em hnye i ödrin, waleji u je hom üheny Aigupito, ünyi hnyi meic hnân leü fao: 52 me u me he ka wâ sumat anyin athnyabaem, me sumat anyin lakem a Isaraela, he ka ling ödrin hnyi ta je üen hia thithö ödrin e he ka hawo u hnyin. 53 Anyin a u, Khong lö a Than, u je üc' ödrin hnân em hnye i ünyi hnyi ta je hnye i hia thithö eang hmeledrany, helâ me hnâm hna ha a deny Mose athnyabaem, hnyi hnâm hna hom lakamöhmun üheny Aigupito.

54 Ka um dö Solomona hijöta je hic eling me sumat kö Iehova, me e ame todrö üheny hnyi taben hut anyi Iehova, üheny

hnyi hna cibouca me hna hai li hnyamen hnyi drany ai. 55 Ke e ame tot me hahnahicâ úkhacaköu anyin Isaraela hia ge hwan ae gan, haingen, ka habe, 56 Ole kö Iehova at ame omenâ lakeiny a at Isaraela, helâ me hnen hna ha bánâ hia: e ca haú bi ke hofuc a khaca hnyi hwan ta je hofuc hia ae so, waleji e ame ha a deny Mose athnyabainy. 57 E na tha Iehova ju Khonguta möta helâ me hnen hna tha e me lakamöta: e na ca he ju ka hia gata me hna degeci öta: 58 me me he ka wia je hnyekuta kâu, he ka vheno deny ta je gethen hia, me tuö hnen je hna húna, me anyin je hnanyibu, me hnen je hna owisa, waleji e ame húna ka lakamöta. 59 E na hakekenyâ ju Iehova Khonguta hok ta je hofuc ang, wale oge me sumâtâ hnyi hnyimakö Iehova, hnyi lany me lit, me me he ka owisa ka athnyabainy, me lakeiny a Isaraela, únyi ae úcú hnyi ke bong me ke bong: 60 me me khana ta je hnyei hia thithö eang hmele drany a Iehova thibi Khong; ke ba minya ju. 61 E so e bekhöt je hnyekubun unyi Iehova Khonguta, he ka vheno anyin je hnanyibu, me tuö hnen je hna húna, helâ me hnyi bong ang. 62 Ke haba than me at Isaraela hia a tha ödra më, adre me hudo je hut hnyi hnyimakö Iehova. 63 Ke Solomona ame hudo me je hudiny ole, wale e ame hudo kö Iehova, me twente tu thauzan je bolok, ke wan haded ke twente thauzan je mamoe. Me haba than me lakon Isaraela hia adre me okabâ uma umö Iehova. 64 Ke hnyi bong eling than ame okabâ wanben hnyeule ae hnyi hnyimakan uma umö Iehova; anyin a e ame hudo eling hudiny leú, me hudiny han, me pipikhenyainy hudiny ole: anyin ae úhnyúkong taben hut a bras hnyi hnyimakö Iehova, ke ca úcú bi hobi kâu hudiny leú, me hudiny han, me pipikhenyainy hudiny ole. 65 Me Solomona ame ányâ bijeu hnyi úen eling, a tha e me at Isaraela hia, e gan hmâ úkhacaköu, hwân hnyi gethen úheny Hamath ke ne o but hnyi wagewe Aigupito, hnyi hnyimakö Iehova Khonguta, seven ta bong ke seven minya ta bong, wale fotin je bong. 66 Ke haba hnyi bong a eitiny e ame kunâ tavat, me adre me hahnahicâ than me ve he ka hnyi umödra je uma mano me senyin me hnyok ame hobâ, can ta je so hia ame ányâ Iehova kö Davita athnyabainy, me Isaraela a lakeiny.

HNYIMAKAN 9.

KA hia but Solomona umo uma umö Iehova, me uma umen than, me ta je we Solomona hia e ame weny he ka ányâ, 2 me Iehova ame hmetu kö Solomona helâ me hnen hna manen kâu hnyi Gibeona. 3 Ke Iehova ame ha kâu, ka habe, Oge hia but löng hijâm hic me ányâm sumat hnyi hnyimakök: oge hia but okabâ uma ang, wale u je ányâ hnân ip iök hnyin nyiele balua; ke ame he ka e ling li emakök me hnyekuk hnyi je bong hia thibut. 4 Ke haba u, u je ne he ka he hnyi hnyimakök, helâ me hnö Davita a kâmâm hna he me hnyekon ae bekhöt me wisa, he ka ányâ ta je únyi hia oge húna köu, me tuö anyik je hnanyibu me hnök je hna owisa; 5 me oge me he ka ohmâ theroniny dokhom dökhu hon Isaraela nyiele balua; helâ me hnök hna ha bánâ kö Davita a kâmâm, ka habe, Ame ca he ka ba hwabâm hon theroni Isaraela. 6 Ke öbun e ne hmetu gak, ame ne lakom bi, me ca tuö bi hnök je hna húna me anyik je hnanyibu, wale oge hia but ip hnyi hnyimaköbun, he ka he me bi athnyabainy je khong baú, me khudrung ködrin: 7 awe, oge me he ka subâ degeci Isaraela únyi hnyi hnyei wale oge ham ködrin; ke haba uma ang oge okabâ hobi kâu iök, me oge me he ka degec únyi hnyi hnyimakök; ke ame he Isaraela ka tot hnân hofuc vejec me hluma hnyi ta je hnyei hia: 8 ke haba uma eang ae beú göranyai, ame he tavat hia adre me he eú hnyi gethen ka láia, me jú; ke adre me he ka ha, ka habe, Anyin a iéú Iehova ame ányâ helâe ka hnyei ang me uma ang? 9 Ke adre me he ka thu, ka habe, Anyin ödrin e hna degeci Iehova Khongudrin, at ame hom lakamödrin úheny hnyi hnyei Aigupito, ke ödrin e kât ke je khong bi, me khudrung ködrin, me bi athnyaba ködrin: anyin a wale Iehova ame oâ ködrin ta je únyi hia thithö eang ea kong.

10 Ke a um dö je hunai Solomona a twente ka op li uma, wale uma umö Iehova me uma umen than, 11 (haba Hirama than Túro ame hia but ham kö Solomona je úö arasi, me je úö köp, me gol, helâ me je weny hia) haba Solomona than ame ham kö Hirama twente je taun hnyi Galelaia. 12 Ke Hirama ame he úheny Túro he ka wâ je taun a ham kâu Solomona; me ca so bi kâu. 13 Me haingen, ka habe, Muma

lö, ie je taun ang u je ham könya? Me e ame hwenyi ien je taun, ka habe, hnyei Kabul, ke ne o but hnyi bong ang. 14 Ke Hirama ame kunâ ka than je gol a wan haded ke twente je talan.

15 Ke walang bongon a ga úca at hnö Solomona than he ka op uma umö Iehova, me umen uma bi, me Milo, me hak vetoiny Jerusalema, me Hazora, me Megido, me Gezera. 16 Haba Farao than Aigupito ame hia but he me hügûnâ Gezera, me thong ge meic, me hlingâ at Kanana tavat a idrin taun, me ham e hnân bwihlany ka nokon hlu, a öiö Solomona. 17 Me Solomona ame op Gezera, me Bethe-horona eü, 18 me Baalath, me Tamara hnyi hnyebuba, hnyi hnyei, 19 me je taun hia hnân ip omjeü omjehe Solomona, me je taun hnân ip anyin je kariota, me je tauniny tavat tabö hors, me únyi a we Solomona he ka op hnyi Jerusalema hnân weny bi, me Lebanona, me hnyi hnyei hia hnyi dokhon döku. 20 Ke haba tavat hia, a je kolon at Amora, me Heth, me Perizi, me Hivi, me Jebusi, wale a ca lakon Isaraela; 21 ke lakon aten hnyei a wan hwabödrin, waleji ae ca khana lakon Isaraela he ka ohia, me haba Solomona ame úca hnyat gadrin he ka ányâ anyin ta je huliwa ke ne o but hnyi bong ang. 22 Ke Solomona ame ca hawâ lakon Isaraela he ka ányâ anyin ta je huliwa: ke ödrin bi tavat vat, me je athnyabainy, me je taben, me je homakan, me tavat musö anyin je kariota, me tavat tabö hors. 23 Haba tavat eling ödrin e musi hon ta je huliwa anyi Solomona, a ödrin faiv haded ke fifte, ke ödrin e musö tavat huliwa anyi Solomona. 24 Ke haba momo nöku Farao ame o úheny hnyi taun anyi Davita ka hnyi umen uma wale adre op hnân hobi kâu; me e ame op Milo. 25 Ke Solomona ame okun hudo je hudiny leü, me je hudiny ole, hnyi ke huna me ke huna, hon taben e ame ányâ hobi kö Iehova, ke e ame leü ütö ae bo so hon taben hut ae hnyi hnyimakö Iehova. Ke ame um dö uma.

26 Ke habâ Solomona than ame tibet je hu hnyi Eziona-gebera, ae hakekenyâ Elath, hnyi hobatköiöiny Köiö ae Dra hnyi hnyei Edoma. 27 Ke haba Hirama ame kunâ hon hu ai lathnyabainy a je aten hu, tavat ödrin e wâhmakhmeto köiö, he ka tha he me lathnyabai Solomona. 28 Ke ödrin e he Ofira ai, me hok gol úheny e foa haded me twente je talan, me hom kö Solomona than.

HNYIMAKAN 10.

KA löng ut momo than Sheba lung anyi Solomona hnyi iö Iehova, me e ame o but he ka cubec ge je hofuc ae iyong. 2 Ke e ame o but hnyi Jerusalema me bunyen ae se, a je kamela ame hijen je ütö ae bo so, me gol ae ti gan, me je veto ae únyi hnathu: k' ame o but kö Solomona, me e ame úhnenamö mä ge ta je únyi eü hnyi hnyekon. 3 Ke Solomona ame omanenâ kâu ta je únyi e ame hnö: e ba únyi a ikhâlâ than a ga ca omanenâ kâu. 4 Ke a hia but momo than Sheba wâ ta je metâ anyi Solomona, me uma e ame op. 5 me jeü hon anyin laulau, me hwakecin úlabainy lathnyabainy, me hwakecin útilen anyin tavat huliwa, me je khaúdrin, me tavat khöp anyin utkaia, me deny gethen ame olö ka hnyi uma umö Iehova; me e ame gâ on ge láiiâ. 6 Ke e ame ha ka than, ka habe, E hnathu úthumetu oge löng hnyi ik hnyei ge hnâm hna ányâ, me ányâm metâ. 7 Ke so bi oge ca kap úthumetu ke ne o but oge me o me wâ ge li emakök: ke wâ bi, adre me ca thumetu nya ge hafiny: e beönua ányâm metâ me sot hon úthumetu oge me löng. 8 E hnahic ányâm tavat, e hnahic lathnyabaem ang, wale adre tot bala hnyi hnyimákâm, me löng ányâm metâ. 9 Ole kö Iehova Khongom, at ae weny u, he ka otilö u hon theroni Isaraela: anyin a Iehova ame betenge ka at Isaraela nyiele balua, anyin a wale e ame otilö u ka than, he ka ányâ wisa me únyi ae úcü. 10 Ke e ame ham ka than gol a wan haded ke twente je talan, me je ütö ae bo so ae ti gan, me je veto ae únyi hnathu: adre me ca oâ hmetu bi je ütö ae bo so ae ti gan helâ me hna ham hnen momo than Sheba kö Solomona than. 11 Ke haba je hu minya hu Hirama ödrin e hom gol úheny Ofera ödrin e hom je úö alemuga ae se hia, me je veto ae únyi hnathu. 12 Ke haba than ame tibet je ci ge je úö alemuga hnyi uma umö Iehova me uma umen than, me hnân je kitara, me je nabeli, hobi kâu tavat khumung: adre ca hom je úö alemuga a helâe, ke adre me ca wâ hmetu bi ke ne o but hnyi bong ang. 13 Ke Solomona ame ham ka momo than Sheba ta je únyi hia ae weny, wale a sumâtâ, ca ha bi ta je únyi a ka ham bi kâu Solomona. Me ame hwiö bi momo me he ka hnyi iny hnyei, a e me lathnyabainy.

14 Ke haba ihmakiny gol adre me oâ kö Solomona hnyi huna a khaca, me, siks haded ke siksste siks je talan gol, 15 ke ca ha bi gol únyi ge tavat úcú, me tavat úcú tot, me je thaniny Arabia, me tavat musô hnyei. 16 Ke Solomona than ame ányâ je uthat ae lau a tu haded, gol adre kokot: ke úsa siks haded je sekel gol hnyi uthat a khaca. 17 Me theri haded je bec gol adre kokot; ke úsa kun ta mina gol hnyi bec a khaca: me than ame ip ta je únyi e hnyin uma utóiny Lebanona. 18 Ke than ame ányâ theron ae gan, a nyon elefan, me tube ge gol ae ti so. 19 Ke e hu hnân ölö ka hnyi theron siks ta deö hna okca, ke wathelaba hon theron hnyi hoton, ke e hu li ci hnyi li ke keihen dok adre me tabâ hnyin theron, ke lo li liona ame tot hnyi li ci. 20 Ke twelv je liona ame tot eling hnyi li ke keihen je deö hna okca a siks: ke ba únyi helâe adre me ányâ hnyi je dökhu hia thithö. 21 Ke haba je kaia hia hnân ic beli Solomona than, me gol, ke haba je kaia hia hnyi uma utóiny Lebanona; me gol ae so: ke ba kaia sileva; k' adre me ca óúnyihnatho sileva hnyi bongu Solomona. 22 Anyin ae hu hnyi köiö ta je hu hon than úheny Tasesa, tha e me je hu hu Hirama: ke ame labö khöp ta je huiny Tasesa hnyi je ve obiny ta hna a kun, k' adre me hok gol, me sileva, me je nyon elefan, me ta je cako, me je pikák. 23 Ke haba Solomona than, me beönua hon ta je than hia eang hmeledrany ge omjeú me metâ. 24 Me haba hmeledrany hia ame elöm Solomona, he ka löng anyin metâ, wale Khong ame ip eú hnyi hnyekon. 25 Ke adre me ve hom anyidrin je bwihlany, a je kaia sileva, me je kaia gol, me je úkhaú, me je únyi hnân vat, me je utö ae bo so, me je hors, me je miul, adre fátâ hnyi ke huna me ke huna. 26 Ke Solomona ame úkhacaköuâ je kariota, me tavat tabö hors; me e hu gan bi wan thauzan ke foa haded je kariota, ke twelv thauzan tavat tabö hors, wale e ame khene ödrin ka hnyi je tauniny kariota, me Jerusalema unyin than. 27 Ke haba than ame osehia sileva hnyi Jerusalema me me helâ me je veto, ke e ame osehia minya je arasi me me helâ me je úö sukamore, wale hnyi je hnyei ae hnyikánâ. 28 Ke haba je hors hale Solomona, me adre hom úheny Aigupito; ke haba tavat úcú hobi kâu than me ödrin e kap je deö hors, ke deö hors ge ke hwaban. 29 Ke ame o but me he úheny

Aigupito ke kariota hwaban siks haded je sekel sileva, me wan haded ke fifte je sekel hwaban horse; ke ödrin e hom helâe hobi kâu je thaniny at Heth me Suria.

HNHYIMAKAN 11.

KE haba Solomona than ame hnyök ka je momo kanyua ae se hia tha ödrin me momo nöku Farao, a je momo Moaba, me Amona, me Edoma, me Zidona, me Heth; 2 únyi hnyi je hnyei waleji a ha Iehova ka lakon Isaraela, ka habe, Ca he öbun ködrin, ke khaca ödrin e ca he ka he köbun: anyin ae hnathu ödrin e he ka wia je hnyekubun he ka hnu hoton je khongudrin: me ame kece hnyeku Solomona ködrin. 3 Ke e hu gan seven haded je áiân, je momo than, ke kun ta haded anyin je momo: ke ame wia thö hnyekon hnen je áiân. 4 Anyin ae ka hingat ut Solomona, haba laáiân ödrin e wia thö hnyekon he ka hnu hoton je khong me monu: ke e ca bekhöt bi hnyekon kö Iehova a Khongon, helâ me hnyeku Davita a kamen. 5 Anyin a Solomona ame hnu hotu Aseira khong momo anyin at Zidona, me Milekoma ae ikiki anyin at Amona. 6 Ke Solomona ame ányâ hwakecin ae kong hnyi hnyimakö Iehova, ke ame ca ti hnu hotu Iehova helâ me Davita a kamen. 7 Haba Solomona ame op dok ae görany hobi kö Kemosa ae ikiki anyi Moab, hnyi bucen ae cicö Jerusalema, me hobi kö Moleka at ae ikiki anyin je laku Amona. 8 Ke e ame ányâ helâe hobi kâu je áiân hia a je atkanyua, ödrin e leú utö ae bo so, me hudo ka je khongudrin.

9 Ke haba Iehova ame hmöyin kö Solomona can hna wia hnyekon ga Iehova, Khongu Isaraela, wale a olo omanená e bi kâu, 10 k' ame hûna kâu hnyi únyi ang; a e ame ca he bi ka hnu hoton je khong: ke e ame ca tuö hna hûna hnö Iehova kâu. 11 Anyin a wale ame ha Iehova kö Solomona, ka habe, anyin a u je ányâ únyi ang, ke u je ca tuö anyik úhinhinyköu, me anyik ta je hnanyibu, waleji oge me búna köu, me oge me he ka húgúnâ gam dökhu, me ham ka athnyabaem. 12 Ke so bi oge me ca he ka ányâ e hnyi úam, ga Davita a kámâm: ke oge me he ka húgúnâ e hnyi hnyamen nokom. 13 Ke oge me ca he ka húgúnâ hia dökhu; ke oge me he ka ham khaca tribu ka nokom, ga Davita athnya-baik, me Jerusalema waleji oge me úca.

14 Ke haba Iehova ame okúâ iwahnai-hmiöny kö Solomona, jia Hadada at Edoma: a e mâtrâniny than hnyi Edoma. 15 Haba ehac ke tiga Davita hnyi Edoma, ke ame he Jaob taben vat he ka konâm je hnyat adre kot, ke adre hia but hlingâ obaga hia hnyi Edoma; 16 (k' ame laba eling Joab me at Isaraela hia hnyi siks ta tehi, ke ne o but adre hia but subâ degecâ obaga hia hnyi Edoma;) 17 me haba Hadada ame kec, a tha e me keihen at Edoma lakeiny kamen, me he Aigupito ai; ke tiga úhnyúkong Hadada. 18 Ke ödrin e todrö úhedrin Midiana, me he Parana ai: ke ödrin e hom ke je hnyat úheny Parana he ka tha he mödrin, me ödrin e o Aigupito, kö Farao than Aigupito; me e ame ham kâu uma, me húna he ka hân, me ha iny. 19 Ke e gan hmâ ibetengió anyi Farao kö Hadada, he e ame ha áiân a liamekeiny me áiân bi, wale liamekeiny me momo than jia Tapenes. 20 Me haba liamekeiny me Tapenes ame hnokoâ nokon baga jia Genubath, ke haba Tapenes ame hnebaiö e hnyi uma umö Farao: ke Genubath ame laba hnyi uma umö Farao a tha e me laku Farao. 21 Ke a löng ut Hadada hnyi Aigupito a ga tha he Davita ka lakamen, ke a mokcu Joab taben vat, me haba Hadada ama ha kö Farao, ka habe, Ó u hnö nya but m' inye he but ka hnyi ik hnyei. 22 Me haba Farao ame ha kâu, ka habe, Ie únyi ae hia gam unyik, m' u me elâm he ka he ka hnyi em hnyei? Ke haingen, ka habe, E ba: ke so bi ö u hnö nya but.

23 Ke haba Khong ame okúâ kâu ke iwahnaihmöny bi, jia Rezona nöku Eliada, at ame kec ga Hadadeza a tuhan, than Zoba: 24 ke e ame úkhacaköuâ tavat unyin bi, me me taben deö vat, waleji nnyi hnö Davita hna kuc ödrin at Zoba: ke ödrin e he Damaseko ai, me laba eling, me musi hnyi Damaseko. 25 Ke e iwahnaihmöny me at Isaraela hnyi ta je bong hia bongu Solomona, ca ha bi monu Hadada ame ányâ: ke e ame húkötíö Isaraela, me musi hnyi Suria.

26 Ke haba Jeroboama nöku Nebata, at Eferaima úheny Zeroda athnyabai Solomona, ke Zerua ien hinyen, e safac, me e at ame hai hnyamen minya ka than. 27 Ke walang can e ame hai hnyamen ka than: haba Solomona ame op Milo, me okhötâ je dok ae hmouca hnyi taun anyi Davita a kamen. 28 Ke at ae hwege hmönyin Jeroboama:

ke a wâ but Solomona a e hidröu ae ti huliwa, ke e ame otílâ e hon ta je huliwa hia hnyi lap anyi Josefa. 29 Ke haba hnyi úen eling, me ame he Jeroboama úheny Jerusalema, me ame úkhanö mé Ahia perofeta at Silo eú hnyi gethen; ke e ame hia but khavâ ke úkhaúen ae teb únyi; ke hake ödrü thibi hnyi hnyei. 30 Ke haba Ahia ame kât úkhaú ae teb únyi e ame khavâ, me kia mña me me twelw je ec mano. 31 Ke e ame ha kö Jeroboama, ka habe, Hom dö je ec mano a ten: anyin a walang ame ha Iehova, Khongu Isaraela, ka habe, Wâ bi oge me he ka kia dökhü únyi ga Solomona, me ham bi köu je tribu a ten: 32 (ke khaca thiju tribu hobi kâu, ga Davita athnyabaik, me ge Jerusalema, taun oge úca hnyi ta je tribu hia hnyi Isaraela:) 33 can ödrin e digic nya, me khudrung kö Aseira khong momo anyin at Zidona, me Kemosa khongon at Moaba, me Milekoma khongon laku Amona; ke ödrin e ca vheno dek je gethen, he ka ányâ wisa hnyi hnyimakök, me tuö anyik je hnanyibu helâ me Davita a kamen. 34 Ke so bi oge me ca he ka hügúnâ hia dökhü gan: ke oge me he ka ányâ e, me me tuhan hnyi ta je bonginy hia anyin möt, ga Davita athnyabaik, wale o ge úca, anyin a e ame tuö hnök je hna húna, me anyik je hnanyibu: 35 ke oge me he bi ka hügúnâ dökhü únyi hnyi hnyamen nokon, me ham e köu, ten je tribu. 36 Ke khaca tribu oge me he ka ham ka nokon, me me hu ga Davita athnyabaik nyiele balua lamepa hnyi hnyimakök hnyi Jerusalema, taun oge úca hobi könya bi he ka ip eling iök. 37 Ke oge me he ka hum u, ke u me he ka musö hia hoton weny hnyekom, ke u me he ka than hon at Isaraela. 38 Ke u je ne he ka löng hia hoton hnök hna húna köu, me vheno dek je gethen, me ányâ únyi ae wisa hnyi hnyimakök, me tuö anyik je hnanyibu, me hnök je hna húna, helâji a ányâ Davita athnyabaik; me oge me he bi nya ka tha inya möu, me bi uma ae tet hmâ me umâm, helâji me hnök hna ányâ hobi kö Davita, me oge me he ka ham köu Isaraela bi. 39 Ke oge me he ka ovecâ je mâtrâni Davita can e, ke ca nyiela balua. 40 Ma haba Solomona ame elâm he ka hlingö Jeroboama; me Jeroboama ame todrö, me kec Aigupito ai kö Sisaka than Aigupito, ke e bi Aigupito ke ne o but ame mokcu Solomona.

41 Haba kolon je huliwa a ányá Solomona, me nhen hna ányá hia, me anyin metá, hawa, adre me ca sihnalimen hnyi tusiny ta je huliwa anyi Solomona? 42 Ke haba áen ame musi hnyin Solomona hon Isaraela hia hnyi Jerusalema, me fáte je huna. 43 Ke ame tha mokut ut Solomona me lakamen, me adre me konám e hnyi taun anyi Davita a kamen: me Reoboama a nokon ame than ju hwaban.

HNyimakan 12.

KE Reoboama ame he Sekema ai: anyin ame o hnyi Sekema Isaraela hia he ka otílá e me than. 2 Ke a löng ut Jeroboama nöku Nebata, (anyin ae tiga e bi hnyi Aigupito, k' ame kec káe ehac ga Solomona, me ame laba Jeroboama hnyi Aigupito, 3 me adre me úkhünöng he ka hawá e;) me ame tha o Jeroboama me úkhacaköu hia anyin at Isaraela, me ha ko Reoboama, ka habe, 4 Haba kámám ame ohmaká únyi hnán úhúkáláköuá huhmun: ke haba walang ang u ma he ka oháhá huliwa anyin kámám ae vec, me únyi hnán úhúkáláköuá ae hmak e ame ip huhmun, me öhmun e he ka bi lakem. 5 Me e ame ha ködrin, ka habe, He thö ama kun ta bong, m' öbun hmetu thö könya. Me ame vese thö tavat. 6 Me haba Reoboama than ame úhnenamö me wahingat, a hnyat adre me tot hnyi hnyimako Solomona a kamen ke tiga möt, me ha, ka habe, Ie hofuc öbun e únyküme hnán thu ka tavat ang? 7 Ke haingödrin káu, ka habe, U je ne he ka bi athnyaba ka tavat ang hnyi bong ang, me ányá wedrin, me thu ködrin, me ha ködrin ta je hofuc ae so, awe, ödrin e he bi ka bi athnyaba köu nyiele balua. 8 Ke e ame degecá hofuc hwan wahingat ödrin e úhnenamö, ke e ame ka úhnenamö me je hidróu a ödrin tha dö mē, wale ödrin e tot hnyi hnyimakan. 9 Ke haingen ködrin, ka habe, Ieú hnöbun hna ha, mötin e he ka thu ka tavat ang ödrin e ha könya, ka habe, Oháhá thö únyi hnán úhúkáláköuá waleji ame ip kámám huhmun? 10 Me ame ha káu je hidróu a ödrin tha dö mē, ka habe, Walang únyi u me he ka ha ka tavat ang adre me fuc köu, ka habe, Haba kámám ame ohmaká únyi hnán úhúkáláköuá huhmun, ke u me he ka oháhá e huhmun; walang únyi u me he ka ha ködrin, ka habe, haba banyök a bakevic ame he ka baki hon hnyi cica. 11 Ke wale bi ang, haba cica ame

ip hubun únyi hnán úhúkáláköuá ae hmak: ke oge me he bi nya ka bi hanen e hubun: haba cica ame kuc öbun ge osö, ke oge me he bi nya ka kuc öbun ge je sekopio. 12 Haba Jeroboama, me tavat hia, ödrin e o kö Reoboama hnyi bong a kuniny, helá me hna huna nhen than, ka habe, Hmetu thö könya hnyi bong a kuniny. 13 Ke haba than ame thu hwegiá ka tavat, me degec hofuc hwan je hingat wale ödrin e úhnenamö; 14 me fuc ködrin hoton hofuc hwan je hidróu, me ha, ka habe, Haba cica ame ohmaká únyi hnán úhúkáláköuá hubun, ke oge me he bi nya ka bi hanen ka únyi hnán úhúkáláköuá hubun: haba cica ame kuc öbun ge osö, ke oge me he bi nya ka kuc öbun ge sekopio. 15 Me ame ca löng bi than ka tavat; anyin a únyi ga Iehova únyi eling, me me ohwadá hwan hofuc, waleji ame ha Iehova kö Jeroboama nöku Nebata a deny Ahia at Silo. 16 Ke a wá but Isaraela hia a g' ame ca löng ködrin than, haba tavat adre me thu ka than me ha, ka habe, Ewa ke keihöhmun anyi Davita? ke ba jekhöthmun anyin laku Jese: at Isaraela lö, vese th' öbun ka hnyi umöbun je uma mano: Davita lö, hamám he ka tuö ányám lap. Me Isaraela ame vese but ka hnyi umödrin je uma mano. 17 Ke haba lakon Isaraela, a tavat adre me labá je taun anyin Juda, me Reoboama ame musi ködrin. 18 Ke Reoboama than ame kunö Adorama, at ame ö fat; me haba Isaraela hia adre me lúá ge veto me ame mokeu. Me Reoboama than ame ie he logot me ölö ka hnyi anyin kariota, me kec Jerusalema ai. 19 Me haba Isaraela ame hna degecá lap anyi Davita ke ne o but hnyi bong ang. 20 Ke a löng ut Isaraela hia a ga o thö Jeroboama, me adre me úkhünong he ka hawá ka hnyi úkhacaköu, me otílá e me than Isaraela hia: ke ba at ame hnu hoton lap anyi Davita, ke so bi hake tribu Juda thibi.

21 Ke ame o thö Reoboama hnyi Jerusalema, me e ame úkhacaköuá lap anyi Juda, me tribu Beniamina, ödra wan haded ke eite thauzan tavat adre úca, tavat vat, he ka vat me lap anyi Isaraela, he ka ohmeto dökhu kö Reoboama nöku Solomona, 22 Ke ame o but hofuc hwan Khong kö Semaia aten Khong, ka habe, 23 Fuc dö kö Reoboama nöku Solomona than Juda, me lap hia anyi Juda me Beniamina, me kolon biju tavat, me ha ködra ka habe, 24 Walang hna ha hnö Iehova, ka habe.

Ca he öbun, ke ca vat bi me je liamekeiny möbun a lakon Isaraela: ve hmetu ju öbun ka hnyi umöbun je uma; anyin a haba únyi ang me únyi gak. Me adre me löng hofuc ho Iehova, me hmetu me vese but, hoton hofuc ho Iehova.

25 Ke haba hnyi únen e Jeroboama ame op Sekema hnyi hnyeie hut hnyi Eferaima, me laba eling: ke e ame he úheny e me op Penuela. 26 Ke haba Jeroboama ame ha hnyi hnyekon, ka habe, Ame he ka hmetu walang ang dökhu ka hnyi lap anyi Davita: 27 ame ne he tavat ang he ka bi hut hnyi uma umö Iehova hnyi Jerusalema; me ame he ka wia hmetu hnyekon tavat ang ka tuhödra, a Reoboama than Juda; me adre me he ka hlingö nya, me hmetu kö Reoboama than Juda. 28 Me than ame úhnenamö, me ányá li nokon kau gol; ke e ame ha ködrin, ha habe, E hmak köbun he ka he Jerusalema ai; Isaraela lö, wá ju ang li khongom, a li at ödre hum u únyi hnyi hnyeie Aigupito. 29 Me e ame otílá khaca hnyi Beth-ela, ke e ame ip khaca hnyi Dana. 30 Ke haba únyi eling ame okúá hulö: anyin a haba tavat adre me he ka khaca, wale ke ne o but hnyi Dana. 31 Ke e ame bi uma hnyi je dok ae görany, me otílá je hnyat bihut únyi hnyi tavat hia, wale a ca je laku Levi. 32 Ke Jeroboama ame húna he ka bijeúá hnyi tehi a eitiny, hnyi bong a fiftininy tehi, helá me bijeú hnyi Juda, ke e ame ölö ka hnyi taben hut; me e ame ányá heláe hnyi Beth-ela, me bi hut ka li nokon kau wale e ame ányá: ke e ame ip hnyi Beth-ela tavat bihut hnyi dok ae görany wale e ame ányá. 33 Ke e ame ölö ka hnyi taban hut wale e ame ányá hnyi Beth-ela hnyi bong a fiftininy tehi a eitiny, wale hnyi tehi e ame únykúme hnyi hnyekon bi: ke e ame húna ke bijeú hobi káu lakon Isaraela, me ölö ka hnyi taben hut, he ka leú ütö ae bo so.

HNyimakan 13.

KE wá bi, ame o but hnyi Beth-ela ke aten Khong úheny Juda ge hofuc ho Iehova: ke Jeroboama ame tot hnyi taben hut he ka leú ütö ae bo so. 2 Ke e ame hongot ka hnyi taben hut ge hofuc ho Iehova, me ha, ka habe, Taben hut, taben hut lö, walang hna ha hnö Iehova, Wá bi, adre me he ka hnoká wanakat ka hnyi lap anyi Davita, Josea ien; ke e ame he ka

hudo hom je hnyat bihut hnyi je dok ae görany, tavat ödrin e leú ütö ae bo so hom, ke ödrin e he ka le hom je jaien at. 3 Ke e ame bi haten hnyi bong eling, me ha, ka habe, Walang haten ame ha Iehova: Wá bi, ame he ka hmouca taben hut, me hingölö je dröu únyi hnyi hon. 4 Ka löng ut than hofuc hwan aten Khong, wale e ame ha ka hnyi taben hut hnyi Beth-ela, me haba Jeroboama ame iná hnyamen, únyi hnyi hon taben hut, me ha, ka habe, Kát ju e. Me ame meleca hnyamen wale e ame iná káu, me me ca khana bi he ka oc hmetu káu bi. 5 Ke ame hmouca but minya taben hut, me hingölö but je dröu únyi hnyi hon, helá me haten ame ha aten Khong únyi ge hofuc ho Iehova. 6 Haba than ame thu me ha ka aten Khong, ka habe, Ö u khöú thö kö Iehova Khongom walang ang, me hic hobi könya, me me so hmetu but hnyamök. Me haba aten Khong ame khöú kö Iehova, me me so hmetu hnyamen than helá me eja. 7 Ke haba than ame ha ka aten Khong, ka habe, Ötu he ka hnyi hnyabak, m' u me mená, me oge me he ka ham köu hwaban. 8 Ke haingen aten Khong ka than, ka habe, U je ne ham könya hafiny umám uma, oge me ca he ka tha dit möu, ke haba khaca, oge me ca he ka han areto me ic köiö hnyi dok ang: 9 anyin a heláe hna húna könya hofuc ho Iehova, ka habe, U me ca he ka han areto me ijem köiö, ke u me ca he ka vheno hmetu dem gethen. 10 Me e ame hmetu hnyi ke gethen, k' ame ca he hnyi gethen. e ame o hnyin Beth-ela ai.

11 Ke ame laba hnyi Beth-ela ke perofeta a hingat; ke ame o but ke nokon me thumeto e ge ta je únyi hia ame ányá aten Khong hnyi bong eling hnyi Beth-ela: k' ödrin e thumeto minya kamödrin ge ta je hofuc e ame ha ka than. 12 Haba kamödrin ame ha ködrin, ka habe, A he ua? Ke haba lakon ödrin e wá gethen a vheno aten Khong at ame o úheny Juda. 13 Me haingen ka lakon, ka habe, Húkálá ju taben hon asina. Me ödrin e húkálá taben hon asina: me e ame tabá. 14 Ke e ame he hoton aten Khong me khaú ju e, a ga laba hmelen iwajo: ke e ame ha káu, ka habe, U aten Khong waleji a o úheny Juda? Me haingen, ka habe, Inya. 15 Me e ame ha káu, ka habe, Ötu he ka hnyi hnyabak ka me han. 16 Ke haingen ka habe, Eca khañö nya he ka tha hmetu möu: ke oge

me ca he ka tha han me tha ic möu hnyi dok ang : 17 anyin a ha kõnya hofuc ho Iehova, ka habe, U me ca he ka han areto me ic kõiö eling, ke u me ca he ka vheno hmetu gethen u je o hnyin. 18 Ke haingen kâu, ka habe, Inya ang ke perofeta helâ möu; ke haba angela ame ha kõnya hnyi hofuc ho Iehova, ka habe, Ohmeto ju e ka hnyi umâm uma, me me han areto me ijem kõiö. Ke e ame thoi kâu. 19 Me e ame tha hmetu mē, me e ame han areto me ijem kõiö. 20 Ke ödrü me tiga laba hnyi lau-lau, me ame o hofuc ho Iehova ka perofeta, at ame ohmeto e : 21 me e ame hongot ka aten Khong at ame o úheny Juda, me ha, ka habe, Walang hofuc ame ha Iehova, ka habe, Can anyin a u je hia but hanyâúâ hofuc ho Iehova, me ca löng bi hna hûna, waleji a hûna kôu Iehova Khongom, 22 ke u je hmetu, me han areto me ijem kõiö hnyi dok waleji e ame hûna kôu, ka habe, ca he bi ka han areto, me ijem kõiö; anyin a wale ame ca he ka o unyâm ka hnyi erkemok anyin lakâmâm. 23 Ke a hia but han areto, ke a hia but ic, me e ame húkálâ taben hon asina hobi kâu, waleji perofeta e ame ohmeto. 24 K' ame he but, me ame ikhanö mē liona eú hnyi gethen, me hlingá e; ke adre khûâ eú hnyi gethen unyin a mokcu, ke ame tot asina hakekenyâ e; ke liona minya ame tot hakekenyâ komok. 25 Ke wâ bi ame he eú hnyi gethen tavat, me wâ komok adre khûâ eú hnyi gethen, me liona ame tot hakekenyâ komok : ke ödrin e o me úthumetu hnyi taun waleji ame laba hnyin perofeta hingat. 26 Ke a löng ut perofeta at ame ohmeto e úheny ú hnyi gethen, me e ame ha, ka habe, Wale aten Khong at ame hanyâúâ hofuc ho Iehova : anyin a wale a hia but Iehova hna e ka liona, me ame kia me hlingá e, boton hofuc ho Iehova waleji e ame ha kâu. 27 Haba e ame ha ka lakon, ka habe, Húkálâ ju taben hon asina hobi kõnya. Me ödrin e húkálâ. 28 Me e ame he me wâ komok adre khûâ eú hnyi gethen, me asina me liona ödrü me tha tot hakekenyâ komok : haba liona ame ca an komok, k' ame ca kia minya asina. 29 Haba perofeta ame hom unyin aten Khong me ip hon asina, me hmeto : ke e ame o ka hnyi taun anyin perofeta hingat, he ka tenge, me konâm e. 30 Ke e ame ip unyin hnyi anyin bi erkemok; ke ödrin e tenge gan me ha, ka habe, E kõlö ge keik! 31 Ka hia but konâm e, me e ame ha ka lakon, ka

habe, Iny ka mokcu öbun e he ka kõnminya hnyi erkemok hon aten Khong; ip ju je jeiök hnyi je jeien. 32 Anyin ame he ka hwâdâ hofuc waleji e ame hongot ge hofuc ho Iehova ka hnyi taben hut hnyi Beth-ela, me hon je uma hia hnyi je dok ae görany hnyi je taun hnyi Samaria.

33 Hwabab únyi eling haba Jeroboama ame ca hmetu únyi hnyi hwakecin bi ae kong, ke e ame otílâ hmeto je hnyat bihut anyin je dok ae görany únyi hnyi wanben tavat : ame ne weny ke at, e ame okabâ e, me me he ka hu je at bihut hnân je dok ae görany. 34 Ke haba únyi eling ame okúâ hulö ka lap anyi Jeroboama, wale he ka subâ degecâ e me ohia e eang hmeledrany.

HNyimakan 14.

KE haba hnyi úen eling e mok Abia nõku Jeroboama, 2 Me Jeroboama ame ha ka áiân, ka habe, Ö u todrö, ke oiyongi u bi, me me ca manen a u öiö. Jeroboama : ke he thö Silo ai; wâ bi, eling Ahia perofeta, at ame ha kõnya a oge me he ka thaniny hnyeai ang. 3 Ke hom dö hnyi hnyamâm je areto a ten, me je ong areto ae halelöü, me tap hani, me he thö kâu : me e ame he ka thumetu u ge únyi ame he ka o ka wanakat. 4 Ke ame ányâ helâe öiö Jeroboama, me e ame tot me he Silo ai, me o ka hnyi uma umö Abia. Ke ca kxanö Ahia but bwele, anyin ae hâe but li emakan anyin a hingat ut. 5 Ke haba Iehova ame ha kö Ahia, ka habe, Wâ bi, öiö Jeroboama ame he jem he ka hnö únyi gam ge nokon; anyin a e mok : u me he ka ha helang me helang kâu; anyin a e ka didrö; me e ame he ka bi ke at. 6 Ke a löng ut Ahia hwan li can momo ame dit hnyi hwanuma, me e ame ha, ka habe, Didrö, öiö Jeroboama; ieu gam u me iyawa me bi ke at anyin adre me kunö nya me úthumetu ae únyi hnathu kôu. 7 He thö ka ha kö Jeroboama, ka habe, Walang hna ha hnö Iehova Khongu Isaraela, ka habe, Oge me oganö u hnyi wanben tavat, me úcü u hnân thaniny hnyeai Isaraela, 8 me kia luâ dökhu únyi hnyi lap anyi Davita, me ham e kôu : ke haba u ca úcü me Davita athnyabaik, at ame tuö hnök je hna hûna. me vheno hotuk hia ge hnyekon a khaca, he ka ányâ thibi wisa hnyi hnyimakök; 9 ke u je hia but ányâ hulö ae gan hon lakâmâm, me he me ányâ hobi kôu bi je khong monu, me je hnatheat adre me oköiâ,

he ka ohmönyini nya, ke u je digic nya bi hotom ai : 10 anyin a wale, wâ bi, oge me he ka okûâ únyi ae kong ka lap anyi Jeroboama, ke oge me he ka subâ degecâ ga Jeroboama obaga hia, a hnyat adre ca, me hnyat adre hna hnyi Isaraela, ke oge me he ka aba degecâ lap anyi Jeroboama, helâ me man at ame aba degecâ tet, ke ne o but ame ba but. 11 Haba atö Jeroboama ame ne he ka mok hnyi taun, me ame he je kuli ka an ; ke haba at ame he ka mok hnyi hnyeï, me ame he je meno ame gâ ka an : anyin a hia but Iehova ha. 12 Anyin a wale todrö u, me he thö ka hnyi hnyabam : ke u ka utö thö taun, haba wanakat ame he ka mokcu. 13 Ke ame he ka tenge gan Isaraela hia, me konâm e ; anyin a e thibi hanö Jeroboama ame he ka o ka hnyi erkemok : anyin adre wâ unyin únyi ae so kö Iehova Khongu Isaraela hnyi lap anyi Jeroboama. 14 Ke ame he Iehova ka oâ hobi kâu bi than hon Isaraela, at ame he ka subâ degecâ lap anyi Jeroboama hnyi bong eling : ke ne hö? walang ang. 15 Anyin ame he Iehova ka kot Isaraela helâ me hna jijingâ sa hlowe hnyi an ; ke e ame he ka oc me wân Isaraela únyi hnyi hnyeï ang ae so, waleji e ame ham ka je lakamödrin, me ovesei ödrin ka hnyi ke keihen hoton Wagewe ; anyin a ödrin e hia but theati Aseira, me okûâ hmönyin anyi Iehova. 16 Ke e ame he ka hna degeci Isaraela can je hulö anyi Jeroboama, wale e ame ânyâ, me at ame okûâ je hulö kö Isaraela. 17 Me ame todrö öö Jeroboama, me he, me o hnyi Tirezä : k' ame o thö hnyi hwanumen uma, me ame mokcu wanakat. 18 Ke haba Isaraela hia ödrin e konâm e, me tenge gan ; hoton hofuc ho Iehova, waleji a ha a deny Ahia perofeta athnyabainy. 19 Haba kolon je hna ânyâ hnö Jeroboama, wale hwakecin anyin vat, me musi, wâ bi adre hia but sihnalimen hnyi tusi hnân ha je bong bongon je than hnyi Isaraela. 20 Ke haba je bonginy musi anyi Jeroboama, me twente tu je huna : ke e ame tha mokut me lakamen, ke Nadaba bi a nokon ame musi hwaban. 21 Ke haba Reoboama nöku Solomona ame musi hnyi Juda. Fâte wan je hunai Reoboama hnyi ün e ame hwân ka musi, ke e ame musi seventin je huna hnyi Jerusalema, wale taun ame úca Iehova hnyi je tribu hia anyi Isaraela he ka ip ien hnyin : ke haba ien hinyen, jia Naama momo Amona. 22 Ke haba at Juda ame ânyâ

hwakecin ae kong hnyi hnyimakö Iehova ; kè ödrin e ociâ gan hmâ e hon hna ânyâ hnen lakamödrin, hnyi ta je monu hia ödrin e ânyâ. 23 Ke ödrin e ânyâ minya hobi ködrin je dok ae görany, me je veto ame tot, me je Aseira, hon je dok ae lut hia, me hmelen je úö ae hât hia thithö ; 24 ke e hu minya hnyi hnyeï tavat adre me hwen Sodoma : ödrin e ânyâ hia hoton je hwakecin ae ikiki anyin je hnyeï a obâ ga Iehova hnyi hnyimakan lakon Isaraela. 25 Ke haba hnyi huna a thabûngi Reoboama, me ame o but Sisaka than Aigupito he ka vat hnyi Jerusalema : 26 ke e ame hom ta omjeüiny uma umö Iehova, me omjeüiny uma umen than ; e ame hügûnâ hia : ke e ame hom hia je bec gol a ânyâ Solomona. 27 Me Reoboama than ame ânyâ je bec bras me hwaban je bec eling, me hna ka taben tavat tue, a hnyat tuö hwanumen uma umen than. 28 Ke ame ne dit than ka hnyi uma umö Iehova, me ame ve hom hnen tavat tue, me odilâ hmeto ka hnyi hnyeuleiny tavat tue. 29 Ke haba kolon je hna ânyâ hnö Reoboama, me anyin ta je huliwa, hawa, adre me ca sihnalimen hnyi tusi hnân ha je bong bongon je than Juda ? 30 Ke ame labö vat Reoboama me Jeroboama hnyi ta ogö bong hia thithö. 31 Ke ame mokut ut Reoboama tha e me lakamen, me adre me tha konâm e me lakamen hnyi taun anyi Davita : ke haba ien hinyen, me, Naama momo Amona. Ke ame than biju Abiama a nokon hwaban.

HNYIMAKAN 15.

KE haba hnyi huna a eitinyin musi anyi Jeroboama nöku Nebata me ame hwân Abiama he ka musi hnyi Juda. 2 E ame musi hnyi Jerusalema hnyi kun ta huna : ke haba ien hinyen, me, Maaka, momo nöku Abisaloma. 3 Ke e ame vhenota je hwakecin hia ae kong anyin kamen, waleji e ame ânyâ ehac : ke ame ca bekhöt ut hnyekon kö Iehova a Khongon, helâ me hnyeku Davita a kiben. 4 Ke so bi haba Iehova Khongon ame ham kaü lamapa hnyi Jerusalema, ga Davita, he ka otilâ nokon hwaban, me he ka otilâ hmâ Jerusalema : 5 anyin a haba Davita ame ânyâ únyi ae wisa hnyi hnyimakö Iehova, me ca saü únyi hnyi ta je únyi hia e ame hûna kâu hnyi bongon ta je bong hia, ke so bi

hwakecin thibi ga Uria at Heth. 6 Ke ame labö vat Reoboama me Jeroboama hnyi bongon ta je bong hia. 7 Ke haba kolon je hna änyâ hnö Abiama, me anyin ta je huliwa, hawa, adre me ca sihnalimen hnyi tusi hnân ha je bong bongon je than Juda? Ke ame labö vat Abiama me Jeroboama. 8 Ke ame mokut ut Abiama tha e me lakamen; me ödrin e konâm e hnyi taun anyi Davita: ke ame than biju Asa a nokon hwaban.

9 Ke haba hnyi hunu a twenteiny musu a Jeroboama, than Isaraela, me haba Asa ame hwân ka musu hnyi Juda. 10 Ke fâte wan je hunainy ka musu hnyi Jerusalem: ke haba ien hinyen, me, Maaka nöku Abisalom. 11 Ke haba Asa ame änyâ wisa hnyi hnyimakö Iehova helâ me Davita a kibin. 12 Ke e ame obia tavat adre me hwen Sodoma ünyi hnyi hnyei, me hom hia je idola wale a änyâ lakamen. 13 Ke e ame digic Maaka minya a hinyen, me me ca momo than hmetu, anyin a e ame theati Aseira; ke haba Asa ame sö degecâ idola anyin momo, me thong degecâ hnyi wagewe Kederon. 14 Ke adre ca ohia je dok ae görany: ke so bi e bekhöt ut hnyeku Asa anyi Iehova hnyi bongon ta je bong hia. 15 Ke e ame hom ka hnyi uma umö Iehova je ünyi a okabâ kamen, me je ünyi a ka okabâ bi e, sileva, me gol, me je kaia. 16 Ke ame labö vat Asa me Baasa than Isaraela hnyi bongudru ta je bong hia. 17 Ke haba Baasa than Isaraela ame he Juda ai ka vat, me op Rama, me me ca hna ke at he ka didrut me didrö kö Asa than Juda. 18 Ke haba Asa ame hom sileva me gol hia kolon je omjeü hnyi uma umö Iehova, me je omjeüiny uma umen than, me hna ka hnyi hnyamen lathnyabainy: ke haba Asa than ame kun' ödrin me kö Ben-adada nöku Taberimona, nöku Heziona, than Suria, at ame laba hnyi Damaseko, me ha, ka habe, 19 E hu hnötu hna ühinhinköu, wanbö cica me kâmâm: wâ bi, inya oge me kunâ köu bwihlany sieva me gol; he thö ka subâ degecâ änyâm ühinhinköu me Baasa than Isaraela, me me he but ünyi gak. 20 Ke haba Ben-adada ame ling Asa than, me kunâ je taben anyin je deö vat he ka tot ka je tauni Isaraela, me kot Ijon, me Dana, me Abela-bethemaaka, me Kinereth hia, me hnyei Nafatali hia. 21 Ka löng ut Baasa, me e ame hna ju op Rama, me e ame laba hnyi Tireza. 22 Ke hnyi ün e haba Asa than

ame hûna manenâ kö Juda hia thithö; a e ba at ame he ka laba baü: ke ödrin e hom degecâ je vetoiny Rama, me utöiny, waleji a op Baasa; ke haba Asa than ame hom ta je ünyi e he ka op Geba hnyi Beniamina, me Mizepa. 23 Ke haba kolon je hna änyâ hia hnö Asa, me hwegien hia, me anyin ta je huliwa, me je taun e ame op, hawa, adre ca sihnalimen hnyi tusi hnân ha je bong bongon je than Juda? Ke hnyi anyin hingat, me ame tabâ li can mok. 24 Ke ame mokut ut Asa tha e me lakamen, ke adre me konâm e tha e me lakamen hnyi taun anyi Davita a kibin: ke ame than biju Jehosafata a nokon hwaban.

25 Ke haba hnyi hunu Asa a loiny than Juda, me ame hwân he ka musu hon Isaraela Nadaba nöku Jeroboama, ke e ame musu hon Isaraela lo li hunu. 26 Ke e ame änyâ monu hnyi hnyimakö Iehova, me vheno gethen deny kamen, me anyin hulö, wale ünyi ame okûâ hwakecin ae kong hnyi Isaraela. 27 Ke haba Baasa nöku Ahia hanen lap anyi Isakara ame sihnân: me Baasa ame kot e hnyi Gibethon anyin at Filisiti; anyin a Nadaba me Isaraela hia ame thelöng Gibethon. 28 Ke haba Baasa ame hlingâ e hnyi hunu a kuni Asa than Juda, me e ame than hwaban. 29 Ke e than dut, me e ame ie hlingâ lap hia anyi Jeroboama; e ame ca hna but ga Jeroboama ke at he ka möt ke ne o but e ame hlingâ; hoton hofuc ho Iehova waleji e ame ha a deny Ahia athnyabainy a at Silo: 30 can je hulö anyi Jeroboama waleji e ame änyâ, wale ame okûâ hwakecin ae kong hnyi Isaraela; me can anyin monu wale ame okûâ hmönyin anyi Iehova Khongu Isaraela. 31 Ke haba kolon je hna änyâ hnö Nadaba, me anyin ta je huliwa hia, hawa, adre ca sihnalimen hnyi tusi hnân ha je bong bongon je than Isaraela? 32 Ke ame labö vat Asa me Baasa than Isaraela hnyi bongudru ta je bong hia.

33 Ke haba hnyi hunu a kuni Asa than Juda, me ame hwân Baasa nöku Ahia ka musu hon Isaraela hia hnyi Tireza ke ne o but hnyi twente foa je hunu. 34 Ke e ame änyâ hwakecin ae kong hnyi hnyimakö Iehova, me vheno gethen de Jeroboama, me anyin monu, waleji ame okûâ hwakecin ae kong hnyi Isaraela

HNYIMAKAN 16.

KE ame o but hofuc ho Iehova kö Jehu nöku Hanania ga Baasa ame ha, ka habe, 2 Anyin a oge ogöranyi u únyi hnyi sesâ me otilö u hnân thaniny lakeik a at Isaraela; ke u je hia but vheno gethen de Jeroboama, me kunâ lakeik a Isaraela he ka monu, he ka okúâ anyik hmönyin ge anyidrin je hulö; 3 wâ bi, oge me he ka aba degeci Baasa but me anyin lap; ke oge me he ka wia ányâm lap he ka helâ me lap anyi Jeroboama nöku Nebata. 4 Haba hanö Baasa ame he ka mok hnyi taun, ame he je kuli ka an, ke haba hanen ame he ka mok hnyi ta hnyeí, ame he je meno ame gâ ka an. 5 Ke haba kolon je hna ányâ hnö Baasa, me anyin je huliwa, me anyin hwege, hawa, adre ca sihnalimen hnyi tusi hnân ha je bong bongon je than Isaraela? 6 Ke ame mokut ut Baasa tha e me lakamen, me adre konâm e hnyi Tireza; ke ame than biju Ela a nokon hwaban. 7 Ke ame o but hofuc ho Iehova minya a deny Jehu a perofeta nöku Hanani ga Baasa, me ga anyin lap, can ta je monu hia e ame ányâ hnyi hnyimakö Iehova he ka okúâ anyin hmönyin ge huliwa anyin li hnyamen, wale me me helâ me lap anyi Jeroboama, me khaca minya anyin a e ame hlingâ.

8 Ke haba hnyi huna twente siksi Asa than Juda, ame hwân Ela nöku Baasa he ka musi hon Isaraela hnyi Tireza, me musi hnyi lo li huna. 9 Ke haba Zimeri athnyabainy, taben hafiny anyin je kariota, ame sihnân: ke e bi hnyi Tireza ame ic me ka omono e bi hnyi uma umö Areza, at ame tuö hnyaban hnyi Tireza: 10 ke Zimeri ame didró, me kot e, me hlingâ e, hnyi huna a twente seveni Asa than Juda, me e ame than ju hwaban. 11 Ke e ame bi hwân he ka than, ke e ame hap tabâ anyin theron, me e ame hlingâ hia lap anyi Baasa: e ame ca hna wan ke da a khaca, ame ne liamekeiny më, ame ne lahanen. 12 Ke haba Zimeri ame ohia lap anyi Baasa helâe, helâ me hofuc ho Iehova waleji e ame ba ga Baasa a deny Jehu perofeta, 13 can ta je hulö hia anyi Baasa, me ta je hulö anyi Ela a nokon, wale ödre ányâ, me waleji hna okúâ monu anyi Isaraela, he ka kunö Iehova Khongu Isaraela he ka hmönyin ge anyidrin ta je únyi baú. 14 Ke haba kolon je hna ányâ hnö Ela, me anyin ta je huliwa, hawa, adre ca sihnalimen hnyi tusi hnân ha je bong bongon je than Isaraela?

15 Ke haba hnyi huna a twente seveni Asa than Juda, me, haba Zimeri ame than hnyi Tireza hnyi seven ta bong. Ke ame hunuma tavat úcon Gibethon, wale iny at Filisiti. 16 Ke a löng ut tavat hunuma a ga hia but sihnân ga Zimeri, k' ame hia but kot minya than: anyin a wale haba at Isaraela hia adre me otilö Omeri wale taben vat me me than hnyi bong eling hnyi hna hunuma. 17 Me ame he Omeri tha e me at Isaraela hia úhedrin Gibethon, me ödrin e thelöng Tireza. 18 Ke a wâ but Zimeri a g' adre húgúnâ but taun, me e ame didró ka hnyi uma umen than, me e ame thong uma umen than ka hnyi hon e bi ge meic, me ame mokcu, 19 can ta je hulö e ame ányâ hnyi hnyimakö Iehova, hnyi hnen hna vheno gethen de Jeroboama, me anyin hulö, waleji ame kú monu ka at Isaraela. 20 Ke haba kolon je hna ányâ hnö Zimeri, me hnen hna sihnân, hawa adre ca sihnalimen hnyi tusi hnân ha je bong bongon je than Isaraela?

21 Me haba at Isaraela adre me khekhe lo but: haba ke hafiny adre me hnu hotu Tibení nöku Ginath, he ka otilâ me than; ke haba ke haf adre me hnu hotu Omeri. 22 Ke hwege tavat adre me hnu hotu Omeri hon tavat adre me hnu hotu Tibení nöku Ginath: me ame mokcu Tibení, me Omeri ame than. 23 Ke haba hnyi huna a thöte wani Asa than Juda, me, ame hwân Omeri he ka musi hon Isaraela hnyi twelw ta huna: ke e ame than hnyi Tireza hnyi je huna a siks. 24 Ke e ame úco únyi ga Semeri ong bucen Samaria hwaban lo li talan sileva; ke e ame bi uma hon bucen, me hwenyi ien taun e ame op, me, Samaria, hoton ien at a iny ehac, jia Semeri. 25 Ke haba Omeri ame ányâ hwakecin ae kong hnyi hnyimakö Iehova, ke beönua anyin ta je hulö hon tavat hia ehac. 26 Anyin a e ame vheno gethen hia de Jeroboama nöku Nebata, me anyin hulö waleji ame okúâ hwakecin ae kong ka at Isaraela, he ka okúâ hmönyin anyi Iehova Khongu Isaraela can anyidra ta je únyi baú. 27 Ke haba kolon je hna ányâ ga Omeri waleji e ame ányâ, me tang hwegien, hawa, adre ca sihnalimen hnyi tusi hnân ha je bong bongon je than Isaraela? 28 Me ame mokut ut Omeri tha e me lakamen, me adre me konâm e hnyi Samaria: ke ame than dö Ahaba a nokon hwaban.

29 Ke haba hnyi huna a thöte eiti Asa than Juda ame hwân Ahaba nöku Omeri

I. JE THAN 17.

he ka musî hon Isaraela : ke Ahaba nõku Omeri ame musî hnyi Samaria twente tu je huna hon Isaraela. 30 Ke haba Ahaba nõku Omeri ame ånyå ûnyi ae kong hnyi hnyimakõ Iehova e beõnua hudrin hia ehac. 31 Ke helåke e håhå kåu waleji hnen hna vheno je hulõ anyi Jeroboama nõku Nebata, me e minya bi ame hum Jezebelå nõku Ethebaala thaniny at Zidona, me åiån, me e ame he me bi athnyaba kõ Baala, me khudrung kåu. 32 Ke e ame otilå taben hut kõ Baala hnyi uma umõ Baala, wale e ame hia but op hnyi Samaria. 33 Ke Ahaba ame theati Aseira ; ke beõnua hna ånyå hñõ Ahaba he ka okúå hmõnyin anyi Iehova, Khongu Isaraela, hon ta je than Isaraela hia a bån. 34 Ke haba hnyi bongon je bong haba Hiel at Beth-ela ame op Jeriko : e ame bi taben ge hna ohia nokon a bån jia Abirama, me otilå je homagõule ge hna ohia nokon a wakeiat hmõnyin jia Seguba ; hoton hofuc ho Iehova, waleji e ame ha a deny Josua nõku Nuna.

HNYIMAKAN 17.

KE haba Elia at Tisebi, hanen tavat adre me laba hnyi Gileada, ame ha kõ Ahaba, ka habe, Kia inya Iehova, Khongu Isaraela, wale oge me tot hnyi hnyimakan, a ame he ka ba hau, me we hnyi je huna, ke so bi hoton hok hofuc. 2 Ke ame o but hofuc ho Iehova kåu, ka habe, 3 He thõ eang, me he jio, me lubaduõng hnyi wagewe Kerith, cicõ Joridano. 4 Ke u me he ka ijem wagewe, ke oge hia but huna je oreba he ka hãm. 5 Ke e ame he me ånyå hoton hofuc ho Iehova : anyin a e ame he me laba hnyi wagewe Kerith, cicõ Joridano. 6 Ke haba je oreba ame hom kåu areto me utiõ hnyi je hnyomakatu, me areto me utiõ hnyi je sahac ; ke e ame ijem wagewe. 7 Ke haba hwaban ta je bong, ame hme thõ wagewe, anyin ae ba we hnyi hnyeî.

8 Ke ame o but hofuc ho Iehova kåu, ka habe, 9 Todrõ, he thõ Sarepeta ai, hnyi Sidona, me laba ju eling : wå bi oge hia but ha ka safac eling he ka hãm. 10 Me e ame todrõ me he Sarepeta ai ; ke e ame o hnyi homagõuleny taun, me wå bi ame thigõ eling safac : ke e ame hawå momo, me ha kåu, ka habe, Ö u he thõ ka hom tap kõiõ belik, me inye he ka ic. 11 Ke ame he momo ka hom, me e ame hongot

ka momo, ka habe, Ö u hom minya thõ kõnya ong areto ae ûbnyûkong hnyi hnyamãm. 12 Me ame thu momo, ka habe, Kia inya Iehova Khongom, ae ba ong areto unyik, ke khaca thibi hna auk falawa hnyi taben, me ong wakaco hnyi kaia : ke wå bi, oge me thigå li ong utõ, me inye he ka didrõ me le hobi kõnya me nõkuk, m' õhmu me an dõ k' õhmu mokcu. 13 Haba Elia ame ha kåu, ka habe, Ca ot ; he thõ ka ånyå helå me hnãm hna ha : ke me bãm ka ånyå hobi kõnya ke ong areto, me hom kõnya, ke hwaban dõ e, me u me he ka ånyå hnãn hobi kõbu bi a liamokon. 14 Ke walang hna ha hñõ Iehova Khongu Isaraela, ka habe, Ame ca he ka åu tap falawa, ke ame ca he ka hme tap wakaco, ke ne o but ka hnyi bong ame he Iehova ka kunå we ka hnyi hon kånå. 15 Me ame he momo me ånyå hoton hofuc ho Elia : me haba momo, me e, me lap anyin momo õdrin e han hnyi je bong ae se hia. 16 K' ame ca åu bi tap falawa, k' ame ca hme tap wakaco, helå me hofuc ho Iehova, wale e ame ha deny Elia. 17 Ke hwaban ta je ûnyi eling, me hu mok ge nokon momo at a umen uma ; ke e ti gan hmå imekiny, k' ame ca menå hmetu bi. 18 Me haba momo ame ha kõ Elia, ka habe, Aten Khong lõ, ieu gak kõu ? u je o kõnya he ka õunyktmî nya ge anyik hulõ, me he ka hlingå nõkuk ! 19 Ke haingen ka momo, ka habe, Hom but jem kõnya nokom. Me e ame kap ûnyi hnyi ulainy momo, me oliå e ka hnyi hnyeule wale e ame laba hnyin, me ip ju hon hnen hna mokut. 20 Me e ame hongot kõ Iehova me ha, ka habe, Iehova lõ a Khonguk, hawa, u je oå monu minya hon safac wale at oge me laba unyin, he ka hlingå nokon ? 21 Me e ame okun mokut hon wanakat me hongot kõ Iehova, me ha, ka habe, Iehova lõ, a Khonguk, õ u ohmeto ju hanon wanakat ang kåu. 22 Ke Iehova ame lõng hofuc ho Elia, me ame hmetu bi hanon wanakat kåu, me e ame mõt dõ. 23 Haba Elia ame hom wanakat me oliå hmeto e ûnyi hnyi hnyeule ka hnyi uma, me ham e ka hinyen : ke Elia ame ha, ka habe, Wå bi a mõt ut nokom. 24 Ke haingen momo kõ Elia, ka habe, Walang e khandõ nya a u aten Khong, ke e hnathu hofuc ho Iehova hnyi hnyimãm.

HNYIMAKAN 18.

KE hwaban je bong ae se, ame o but hofuc ho Iehova kö Elia, hnyi huna a kuniny, me ha, ka habe, He thö, ka omanenö u bi kö Ahaba; ke oge me he ka kunâ we ka hnyi kânâ. 2 Ke Elia ame he he ka omanenâ e bi kö Ahaba. Ke e gan hmiâ hnyi Samaria. 3 Ke haba Ahaba ame hao Obadia, at ame tuö hnyaban. (Ke haba Obadia ame ot gan hmâ ga Iehova: 4 ke haba hnyi ün Jezebela ame subâ degecâ je perofeta anyi Iehova, haba Obadia ame hom je perofeta a wan haded, me ikhöl' ödrin úsa fitte hnyi li op, me haödrin me habeledrin.) 5 Ke Ahaba ame ha kö Obadia, ka habe, Vheno thö hnyei ka hnyi je pupuainy köiö hia, me je wagewe hia: ötin e ne he ka wâ hnaönying me hnân omelö je hors me miul, wâ e nye hia but je meno. 6 Ke ödrin me khenâ hnyei me vhenö e: he haba Ahaba ame hake he hnyi ke gethen, ke Obadia ame hake he hnyi ke gethen. 7 Ke e tiga e Obadia eü hnyi gethen, me wâ bi, ame úkhanö mä Elia: ke e ame wâhmakhmeto e, me ta hnyikânâi me ha, ka habe, Hawa, u Elia than? 8 Ke haingen kâu, ka habe, Inya ang: he thö ka ha ka tuhâm, Wâ bi, wale but ang Elia. 9 Ke haingen, ka habe, Ieü anyik hulö, m' u me hnö nya a athnyabaem ka hnyi hnyamö Ahaba he ka hlingö nya? 10 Kia inya Iehova Khongom, ae ba hnyei me dökhü, wale a ca úkhünöng than ka hnyin he ka elöm u: ke ödrin e ha, ka habe, E hia, me e ame khemanyin me dökhü me hnyei, a ödrin e ca ö u hnyin. 11 Ke walang ang u me ha, ka habe, He thö ka ha ka tuhâm, ka habe, Wâ bi, walang Elia. 12 Ke oge me ne he eäu ka he gam, me ame he Hanu Iehova ka hum u ka hnyi dok ae ca kânö nya; ke iny ka he but me thumetu Ahaba, ke e ame ca ö u, me e ame he bi ka hlingö nya: ke inya athnyabaem oge me outö Iehova hwân k'iny tiga wanakat. 13 Hawa, a ca thumetu u than waleji ge hnök hna ányâ hnyi ün ame hlingâ je perofeta anyi Iehova ga Jezebela, a oge me ikhâlâ ta je perofeta anyi Iehova a wan haded, úsa fitte hnyi li op, me haödrin, me habelidrin? 14 Ke walang ang u me ha, ka habe, He thö ka ha ka tuhâm, ka habe, Wâ bi, walang Elia: me e ame he ka hlingö nya. 15 Me haingö Elia, ka habe, Kia inya Iehova tuhan sabaöth, a at oge me tot hnyi hnyimakan,

a oge me he ju ka omanenö nya kâu hnyi bong ang. 16 Me ame he Obadia ka úkhanö me Ahaba, me thumeto e: me ame he Ahaba he ka úkhanö me Elia. 17 Me Ahaba ame ö Elia, me haba Ahaba ame ha kâu, ka habe, Awe, u bi; a u at ame omonö at Isaraela? 18 Ke e ame thu, ka habe, Oge me ca omonö at Isaraela, ke so bi únyi gam me lap anyin kâmâm, waleji hnyi hnöbun hna hna degecâ je hnanyibu anyi Iehova me hnu hoton bi je Baala. 19 Ke haba walang ang u me he ka úkhünöng me úkhacaköuâ kónya at Isaraela hia ka hnyi bucen Karemela, me je perofeta anyi Baala a foa haded ke fitte, me je perofeta anyi Aseira a ödrin foa haded a hnyat adre me hnyi han hnyi laulau anyi Jezebela. 20 Me Ahaba ame úkhünöng ka lakon Isaraela hia, me úkhacaköuâ je perofeta ka hnyi bucen Karemela. 21 Ke haba Elia ame hakekeny ka tavat hia, me ha, ka habe, Ke ne o but kehö öbun e he ka lolo hnyi li hna únykúme a lo? Ame ne Khong Iehova, awe hnu thö e: ke ame ne Baala, awe hnu e bi. Ke ame ca thu kâu tavat ge hofuc a khaca. 22 Ke haba Elia ame ha ka tavat, ka habe, Inya thiju kolon ta je perofeta anyi Iehova; ke haba je perofeta anyi Baala, me ödrin foa haded ke fitte tavat. 23 Anyin a wale hamödrin he ka ham köhmun lo li bolok; me ödrin e he ka úca ke bolok hnân hobi ködrin, me susubâ, me ip e hon je utö, ke adre me ca he ka vâc: ke oge me he bi nya ka penapena ke bolok, me ip e hon je utö, ke adre me ca he bi ka vâc. 24 Ke öbun e he ka hawâ ien khongubun, ke oge me he bi nya ka hawâ iö Iehova: ke haba Khong at ame he ka thu ge meie, me wale thibi Khong. Haba tavat hia thithö adre me thu, ka habe, E so hna ha e. 25 Ke haba Elia ame ha ka je perofeta anyi Baala, ka habe, Úca thö ke bolok hobi köbun, me penapena ama öbun; anyin a öbun se hia; ke hawâ thö ien khongubun, ke so bi ca he ka vâc. 26 Ke ödrin e hom bolok adre ham ködrin, me penapena, me hawâ iö Baala hwân hnyi hnyomakatu ke ne o but jebigö, me ha, ka habe, Baala lö, löng ju köhmun. Ke ba hwan, me ba at ame thu. Me ödrin e gâ hon taben hut adre hia but ányâ. 27 Ke haba hnyi jebigö Elia ame hlum' ödrin me ha ködrin, ka habe, Hongot hwege thö: anyin a e khong; ame ne hu únykúmanen e, ke ame ne saü, ke ame ne he but, ke ame ne mokut, me so he ka öhmákâ. 28 Ke

ödrin e hongot hwege me ve kavi ödrin bi helä me hwakecidrin ge je hele, me je ö, ke ne o but ame hingölö drödrin hudrin bi. 29 Ke ame hau but seúnö ödrin e perofeta ke ne o but adre me hudo hut hnyi sahac; ke ba hwan, ke ba at hnân thu, ke ba at ame löng. 30 Haba Elia ame ha ka tavat hia thithö, ka habe, Hakekeny dö kõnya; me ame hakekeny kâu tavat hia thithö. Ke e ame ânyâwia taben hut anyi Iehova adre hagutâ hnyikânâi. 31 Haba Elia ame hom je veto a twelv hoton je tribuiny laku Jakob, me wale ame o hofuc ho Iehova kâu, ka habe, adre me he ka hwenyi iâm me Isaraela. 32 Haba e ame khcn je veto hnân taben hut hnyi iö Iehova; ke e ame hiny thop igigilö taben hut, haba kahmen thop wale ae úcú ka ip eú hnyin lo li sea hwit. 33 Me e ame ip gaga utö, me susubâ bolok, me ip hon utö. Ke e ame ha, ka habe, Öunöngötâ thö vak ta kask ge köiö, me hingälâ hon hudiny leú, me hon utöiny. 34 Ke e ame ha, ka haba, Anyâ hmetu ju, me ödrin e olo ânyâ. Ke e ame ha, ka habe, Anyâ hmetu ju; me ödrin e okun ânyâ. 35 Ke ame di köiö igigilö taben hut; ke e ame öunöngötâ minya thop ge köiö. 36 Ke haba hnyi üen hudo hudiny sahac, haba Elia perofeta ame hakekeny me ha, ka habe, Iehova lö, Khongu Aberahama, me Isaaka, me Isaraela, omanená thö hnyi bong ang a u Khongu Isaraela, me inya ang athnyabaem, me oge hia but ânyâ ta je únyi hia thithö ang únyi hnyi löng ju kõnya. 37 Löng ju kõnya Iehova, löng ju kõnya, me me wâhmakhmeto tavat ang a u Iehova Khong, me u je ohmeto hnyekudrin. 38 Me ame kölu but meic hlögu Iehova, me thong hudiny leú, me je utö me veto, me kânâ, me ame cem degeca minya köiö hnyi thop. 39 Ke ame wâ e hnen tavat, me ödrin e ta hnyikânâi, me ha, ka habe, Iehova, Khong. 40 Me haba Elia ame ha, ka habe, Kât ju je perofeta anyi Baala, ca hna ke at a khaca he ka kec. Me ödrin e köt ödrin; ke Elia ame hum ödrin ka hnyi wagewe Kisona, me hling' ödrin eling. 41 Me Elia ame ha kö Ahaba, ka habe, Todrö, han ju me ic; anyin ae hu hwan we ae gan. 42 Me Ahaba ame he me han me ic. Ke Elia ame ölö ka hnyi ban Karemela; ke e ame ta ju hnyikânâi, me hnyimakan ka hnyi li boucan. 43 Ke e ame ha ka athnyabainy, ka habe, Ölö thö walang ang, me bwele ka hnyi köiö. Me e ame ölö, me wâ, me ha, ka habe, E ba

únyi, He thö hmetu ke ne o but ka hnyi seven ta úhem. 44 Ke haba hnyi üen a seveniny e ame ha, ka habe, Wâ bi ame o thö úheny ú hnyi köiö úlá ae úhnyükong helä me hnyamen at. Ke haingen, ka habe, He thö ka ha kö Ahaba, ka habe, Penapena thö ânyâm kariota, me he ju me me ca ovheli u bi we. 45 Me ame ie khömet ut drany ge je úlá me ang, ke gan hmâ we. Ke haba Ahaba ame tabâ anyin kariota me he Jezerela ai. 46 Ke e unyi Elia hnyamen Khong; me e ame oweikâ hnyekon, me wâdring hnyi hnyimakö Ahaba ke ne o but hnyi homagöuleny Jezerela.

HNYIMAKAN 19.

KE Ahaba ame thumetu Jezebela ge ta je únyi hia thithö ame ânyâ ga Elia, me hnen hna hlingâ ta je perofeta hia ge hele vat. 2 Me haba Jezebela ame kunâ úthumetu kö Elia, me ha, ka habe, Ame he je khong ka ânyâ heläe kõnya me bi hanen minya, oge ne ca ânyâ ânyâm möt me me tha úcú me möt anyin ke at gadrin, ame ne bong nyi hnyi awa eang. 3 Ke e amelöng e, me todrö, me ie kec anyin ae be möt bi, me e ame o hnyi Bere-seba hnyi hnyei Juda, me ip eling athnyabainy. 4 Ke e ame he ka hnyi hnyebuba, a khaca bongon ka he; ke e ame o but me laba ju hmelen úö ratami: ke e ame sumâtâ me me he ka mokcu; haingen, ka habe, Soju; walang ang, Iehova lö, hom dö anyik möt; anyin a iny ca so hon lakamök. 5 Ke e ame hlöhlöu me mokut hmelen úö ratami; ke wâ bi, angela ame bwebwelâ e me ha kâu, ka habe, Todrö me han. 6 Ke e ame bwele, me wâ bi, hnyi ban ong areto adre le hon walep, me utköiö. Me e ame han, me ic me hlöhlöu hmetu ju. 7 Ke ame olo o angela anyi Iehova me bwebwelâ e, me ha, ka habe, Todrö me han; anyin ae ti sákâú dem gethen. 8 Me e ame todrö me han me ic, me e ame he fâte je bong ke fâte je lit ge troban han eling, ke ne o but hnyi Horeba bucen anyin Khong. 9 Ke e ame o but ka hnyi op, me laba eling; ke wâ bi, ame o but kâu hofuc ho Iehova, me e ame ha kâu, ka habe, Elia lö, iéu u me ânyâ ang? 10 Haingen, ka habe, Inya oge ciâ ga Iehova, Khongon sabaoth; anyin a lakon Isaraela ödrin e hna degecâ ânyâm úhinyköu, me hagutâ hnyikânâi ânyâm taben hut, me hlingâ ânyâm je perofeta ge hele vat: ke hake inya thiju kolon; ke ödrin e elâm

anyik möt he ka ohia e. 11 Haba e ame ha, ka habe, He thö ka tot hon bucen hnyi hnyimakö Iehova. Ke wâ bi Iehova ame he, ke haba ang ae gan ke hwege ame ohmouca je bucen, me tho je kic hnyi hnyimakö Iehova ; ke e hiö Iehova hnyin ang : ke hwiöi hwaban ang, ke e hiö Iehova hnyin hwiöi : 12 ke meic hwaban hwiöi, ke e hiö Iehova hnyin meic : ke haba hwaban meic ke ifucin ae menyik me ûhnyûkong. 13 Ke a löng ut e Elia me e ame lan hnyimakan ge anyin ûkhaû, me he me tot hnyi hwan-umen op. Ke wâ bi ame o but kâu hofuc, ka habe, Elia lö, ieü u me ânyâ ang ? 14 Haingen, ka habe, Inya oge me ciâ ga Iehova Khongon sabaoth ; anyin a lakon Isaraela ödrin e hna degecâ ânyâm ûhihi-nykôu, me hagutâ degecâ ânyâm je taben hut, me hlingâ ânyâm je perofeta ge hele vat ; ke haba inya thiju kolon ; ke ödrin e elâm anyik möt he ka ohia e. 15 Haba Iehova ame ha kâu, ka habe, He hmetu thö hnyi dem gethen ka hnyi hnyebuba Dama-seko : ke u ka o but u me he ka hû Hazaela hnân than Suria : 16 ke u me he ka hû Jehu nöku Nimesi hnân than Isaraela : ke u me he ka hû Elisaia nöku Safata, ûheny Abela-mehola me perofeta hwabâm. 17 Ke haba at ame he ka kec ge hele vat anyi Hazaela, me ame he Jehu ka hlingâ : ke haba at ama kec ge hele vat anyi Jehu, me ame he Elisaia ka hlingâ. 18 Ke so bi oge me he ka hna biju gak hnyi Isaraela seven thauzan tavat adre me ca cibouca kö Baala, me je hnyem hia adre ca ûcimhnyimak mē. 19 Me e ame he ûheny e, me ö Elisaia nöku Safata ame wia kânâ me twelv je ûcü lo li bolok hnyi hnyimakan, k' ame tot me at a twelviny : me Elia ame he kâu me khûâ anyin ûkhaû ka hnyi hon. 20 Ke e ame hna li bolok, me wadring hotu Elia, me ha, ka habe, Ö u hnö nya but he ka ûcimhnyimak me cica me bai, m' inye he ka he hotom. Ke e ame ha kâu, ka habe, He hmetu thö, ieü oge ânyâ köu ? 21 Me e ame hmetu ûheny unyin, me hom ûcü lo li bolok, me hlingâ, me thân utioiny ge omjehen li bolok, me ham ka tavat, me ödrin e han. Me e ame todrö me he hotu Elia, me bi athnyabainy.

HNyimakan 20.

KE haba Ben-adada than Suria ame ûkuacakouâ aten wat hia unyin ; me e bi unyin je than a thöte tu, me je

hors me kariota : me e ame ölö Samaria ai me thelöng, me vat mē. 2 Ke e ame kunâ je ûthumetu kö Ahaba than Isaraela ka hnyi taun, me ha, ka kâu, ka habe, Walang hofuc ho Ben-adada, ka habe, 3 Anyik bi ânyâm sileva me gol ; ke anyik bi minya laâiâm me lakom, a tavat ae so unyidrin. 4 Me haba than Isaraela ame thu me ha, ka habe, Than lö, a tuhök, haba inya me anyik ta je ûnyi, me ânyâm bi helâ me hnâm hna ha. 5 Ke ame o hmetu je ûthumetu, me ha, ka habe, Walang hofuc ho Ben-adada, ka habe, Oge hia but ûkhünöng köu, me ha, ka habe, U me he ka hna kõnya ânyâm sileva, me ânyâm gol, me laâiâm me lakom ; 6 ke haba nyi cicö ün ang oge me he ka kunâ köu lathnyabaik, me ödrin e he ka elâm hnyin umâm uma, me je uma umen lakem ; ke haba ta je ûnyi hia thithö ae wem, ödrin e he ka ip hnyi je hnyamödrin, me hom. 7 Haba than Isaraela ame hawâ wahingatiny hia hnyei me ha, ka habe, Wâhmakhmeto th' öbun, a g' ame elâm hna okongoa hnen at e : anyin a e ame ûkhünöng he ka hom laöiök, me lakuk, me anyik je sileva, me anyik gol, ke oge ca behânâ gan. 8 Haba wahingat hia me tavat hia ödrin e ha kâu, ka habe, Ca löng, ke ca oga. 9 Anyin a wale e ame ha ka je ûthumetu anyi Ben-adada, ka habe, Ha thö ka than a tuhök, ka habe, Haba ta je ûnyi hia u je ha kõnya athnyabaem a bân oge me he ka ânyâ : ke haba ûnyi ang e ca khan' nya he ka ânyâ. Me ame he je ûthumetu, me thumetu e. 10 Haba Ben-adada ame ukhünöng kâu me ha, ka habe, Ame he je khong ka ânyâ helâe kõnya me bi hanen minya, ame ne ûcü kânâiny Samaria, me me úsa khaca hna auk hobi kâu tavat adre me he ka hnu hotuk. 11 Haba than Isaraela ame thu me ha, ka habe, E ca so he ka hobelöu hnen at ame khavâ je ûkhaûen vat, helâ me at ame uny. 12 Ke ame löng hofuc eling, ke ame tiga ic me je than, hnyi anyin je uma menâ, me e ame ha ka lakeiny, ka habe, Penapena thö. Me ödrin e tot metâ cicö taun. 13 Ke wâ bi, ame o but ke perofeta kö Ahaba than Isaraela me ha, ka habe, walang hna ha hnö Iehova, ka habe, Hawa, u je wâ but köien at ang ? wâ bi, oge me he ka hna e ka hnyi hnyamâm hnyi bong ang ; ke u me he ka wâhmakhmeto a inya Iehova. 14 Haba Ahaba ame ha, ka habe, Hamö ia ! Ke haingen, ka habe, Walang hna ha hnö Iehova, ka habe, Hanymen wahidrouiny je thaniny je ke keihen hnyei. Ke haingen

bi, ka habe, Hamö ia he ka ibi hwân vat ? Haingen, ka habe, Hamâm. 15 Me e ame hawâ wahidröuiny je thaniny je ke keihen hnyei, ödrin tu haded ke thöte tu : ke hwa-bödrin dö e ame hawâ tavat hia, wale lakon Israela hia, ödrin seven thauzan. 16 Ke ödrin e he hnyi jebigö. Ke haba Ben-adada ame ic me ka omonöa e hnyi je uma menâ, e me je than, wale je than a thöte tu ödrin e hadruâ e. 17 Me ame bân ka didrut je hidröuiny je thaniny je ke keihen hnyei ; ke haba Ben-adada ame úkhúnöng thö, me ödrin e thumeto e, ka habe, E hu tavat adre didrut úheny Samaria. 18 Ke haingen, ka habe, ödrin e ne he so, hom melö thö, ke ödrin e ne he ka vat, hom melö thö. 19 Me ame didrut úheny hnyi taun wahidröuiny je thaniny je ke keihen hnyei, k' ame hnu hotudrin utbavat. 20 Ke ödrin e ve hlingâ at ; k' ame kec at Suria, k' ame hnu ödrin Israela : ke ame kec bemöt Ben-adada hon hors tha e me tavat tabö hors. 21 Ke haba than Israela ame he me kât je hors me kariota, me hlingâ at Suria ke se hia hna hlingâ. 22 Ke ame he hakekeny but perofeta ka than Israela me ha kâu, ka habe, He thö, hwege thö, ke wâhmakhmeto thö únyi u me ânyâ : anyin a e ka huna but me ame he ka o hmetu köu than Suria.

23 Ke haba lakeiny than Suria ödrin e ha kâu, ka habe, haba khongudrin, me, khongon je hnyei ae hut ; waleling mödrin e hwege hutin : ke ötin ka he ka vat mödrin hnyi hnyebuba, me ötin e he bi ka hwege hudrin. 24 Ke walang únyi he ka ânyâ, hom dö je than únyi hnyi je hanymödrin, me ip je taben vat hwabödrin : 25 ke u me he ka aú ke utbavat hobi köu, helâji me utbavat a ta but unyâm, a je hors hwaban je hors, me je kariota hwaban je kariota : me ötin e he ka vat mödrin hnyi hnyebuba, me ate me he ka hwege hudrin. Me e ame löng hodrin, me ânyâ helâe. 26 Ke a huna but, me haba Ben-adada ame hawâ at Suria, me he Afeka ai he ka vat me at Israela. 27 Ke adre me hawâ lakon Israela, me ha ödrin, me he ka vat mödrin : ke haba lakon Israela ödrin e laba cici ödra helâke li hnahat got ae wakhalet, ke unöngötö hnyei ge at Suria. 28 Ke ame o but ke aten Khong me ha ka than Israela, ka habe, Walang hna ha hnö Iehova, ka habe, Anyin ame ha at Suria, ka habe, haba Iehova me Khongon je hnyei ae hut, ke ka Khongon je hnyigöulen bucen, awe, oge me he ka hna köien at ang hia ka hnyi hnyamâm, m' öbun

e he ka wâhmakhmeto a inya Iehova. 29 Ke ödrin e hunuma úciödraköu hnyi seven ta bong. Ke haba hnyi bong a seveniny ame úkhanö li vat, ke haba lakon Israela ödrin e hlingâ at Suria a wan haded thauzan tavat adre me he hon kânâ hnyi bong a khaca. 30 Ke ame kec dö je kolon Afeka ai ka hnyi taun ; me ame ta takou je kolon ge hak veto, a ödrin twente seven thauzan. Ke ame kec dö Ben-adada ka hnyi taun ka hnyeule eiö hnyin. 31 Haba lathnyabainy ödrin e ha kâu, ka habe, Wâ bi öhmun e löng ut a je than ae betenge je thaniny lap anyi Israela ; Ö u hn' öhmun he ka khavâ je ecmano ae gan nân hnyi je hnyihmun, me je tö ae gan kahmen hon je böhmun, me he ka than Israela : ame ne he ka omeli u. 32 Me ödrin e weikâ je ecmano ae gan nân hnyi je hnyidrin, me je tö hnyi je bödrin, me he ka than Israela me ha, ka habe, Haingö Ben-adada athnyabaem, ka habe, Ö u hnö nya he ka möt. Me haingen, ka habe, Hawa e möt ? keik e. 33 Haba tavat adre me wâhmakhmeto, me je belöng ame ne únykúmânen e ; ke ödrin e ha, ka habe, Kem Ben-adada. Ke haingen, ka habe, He th' öbun ka hawâ. Ke Ben-adada ame he kâu ; me e ame hawâ e ka hnyi anyin kariota. 34 Haba Ben-adada ame ha kâu, ka habe, Haba je taun a hûgúnâ cica ge kâmâm, oge me he ka hna ; ke u me he ka ânyâ je gethen hnyi Damaseko hobi köu, helâ me hnö cica hna ânyâ hnyi Samaria. Ke haingö Ahaba, ka habe, Oge me he ka hnö u me úhilihnyköu ang. Me e ame ânyâ úhilihnyköu mē, me hna but e.

35 Ke haba ke at hanen lakon je perofeta ame ha ka hanen hnyi hofuc ho Iehova, ka habe, Ö u ku' nya. Ke höcö bi at he ka kot e. 36 Haba e ame ha kâu, ka habe, Anyin a u je ca löng hofuc ho Iehova, wâ bi, u ka he thö úhem ang unyik, ame he bi liona ka hlingö u. Ke e ame tiga ibi he but úheny unyin, me haba liona ame wâ e, me hlingâ. 37 Ke e ame wâ ke at me ha, ka habe, Ö u ku' nya. Me e ame kot e, ame kot me e ame ât. 38 Haba perofeta ame he, me tot halubahingen than eú hnyi gethen, me oiyongâ e bi ge hna tube li emakan ge manöiny ban. 39 Ke ame he ehele than, me e ame hawâ than : ke haingen, ka habe, Inya athnyabaem ame he wanben vat ; ke wâ bi ke at ame saúâ kónya ke at, me ha, ka habe, Tuö ju at ang : ame ne he ka hia e, ame he ânyâm möt he ka bi hwaban anyin möt, ke u je ne he ka bi hwaban khaca

talan sileva. 40 Ke inya athnyabaem ame huliwa tot, me ame hia but e. Haba than Isaraela ame ha kâu, ka habe, Ame he ka belâ me hnâm hna owisa; u je hia but ha muâ. 41 Ke e ame ie uny jut manoiny ban hnyi hnyimakan; me than Isaraela ame wâ a e hanen je perofeta. 42 Me haingen kâu, ka habe, Walang hna ha hnö Iehova, ka habe, Anyin a u je hna at oge me hangâ únyi hnyi hnyamâm, me ame he ányâm môt ka bi hwaban anyin môt, me lakem ka bi hwaban lakeiny. 43 Me ame he than Isaraela ka hnyi umen uma me vec me hmönyin, me o hnyi Samaria.

HNYIMAKAN 21.

KE hwaban ta je únyi e, haba e hu hnyeí vine i Nabotha at Jezerela, wale hnyi Jezerela, baten uma umö Ahaba than Samaria. 2 Ke Ahaba ame fuc kö Nabotha me ha, ka habe, Ham dö kõnya em hnyeí vine me me ik hnyeí khölak, anyin ae hakekeny e ka hnyi umök uma; me oge me he ka ham köu ke hnyeí vine ae ti so me hwaban, ke ame ne wem, me oge me ke ka ham köu mone me hwaban. 3 Haba Nabotha ame thu kö Ahaba, ka habe, Ohe, e kap ga Iehova a oge me he ka ham iny lakamök köu. 4 Ke a o but Ahaba ka hnyi umen uma me hmak me hmönyin can hofuc a ha kâu Nabotha at Jezerela; anyin a e ame ha, ka habe, Oge me ca he ka ham köu iny lakamök, Me e ame hlöhlöu hon hnen hna mokus me hwiö hnyimakan, k' ame ca han bi. 5 Ke ame o but kâu Jezebela a áián, me ha kâu, ka habe, Can iéú ame hmak hnyekom, me u me ca hnyi han. 6 Me haingen ka momo, ka habe, Anyin a oge me fuc kö Nabotha at Jezerela, me ha kâu, ka habe, Ham dö kõnya em hnyeí vine hwaban mone; ke ame ne wem, me oge me he ka ham köu ke hnyeí vine me hwaban: ke e ame thu, ka habe, Oge me ca he ka ham köu ik hnyeí vine. 7 Me haba Jezebela a áián ame ha kâu, ka habe, Hawa u at ame musö dökhu hnyi Isaraela? Todrö, han ju, ke so e senyin dö hnyekom: haba inya oge me he bi nya ka ham köu hnyeí vine i Nabotha at Jezerela. 8 Me haba momo ama sihnalimen je tusi me ha iö Ahaba, me ohmâ ge haten anyin than, me e ame kunâ je tusi ka wahingat me je taben hnyi anyin taun, wale hnyat ödrin e tha laba me Nabotha. 9 Ke momo ame sihnalimen

hnyi je tusi, ka habe, Öbun e he ka ha manená ca han, me ip Nabotha hnyi dok ae görany hon tavat: 10 ke ip ju li at a li at Belial hnyi hnyimakan, he ka bi fuco e, me ha, ka habe, U je bi gan ka Khong me than. Me hwaban thö e, hom dö e, me lûâ ge veto me me mokcu. 11 Haba tavat hnyi anyin taun, wale wahingat me je taben ödrin e laba hnyi anyin taun, ödrin e ányâ helâ me hna kun' ödrin ga Jazebela, hoton hna sihnalimen hnyi je tusi, wale e ame kunâ ködrin. 12 Ödrin e ha manená ca han, me ip Nabotha hnyi dok ae görany hon tavat. 13 Ke a o thö li at, a li at Belial, me laba hnyi hnyimakan: ke haba li at Belial ödrü me bi fuco e, jia Nabotha, hnyi hnyimakan tavat, me ha, ka habe, A hia but Nabotha bi gan ka Khong me than. Me ödrin e hom e ka hnyi hoton taun, me lûâ e ge veto me e ame mokcu. 14 Me ödrin e úkhünöng kö Jezebela me ha, ka habe, Adre hia but lûö Nabotha, ke a mokcu. 15 Ke a löng ut Jezebela a g' adre hia but lûö Nabotha, me a mokcu, haba Jezebela ame ha ko Ahaba, ka habe, Todrö, hom dö hnyeí vine i Nabotha at Jezerela me em, waleji a höcö ham köu hwaban mone: anyin ae ca möt bi Nabotha, ke e a mokcu. 16 Ke a löng ut Ahaba a ga mokcu Nabotha, haba Ahaba ame tot me he ka hnyi hnyeí i Nabotha at Jezerela he ka hom e me iny bi.

17 Ke ame o but hofuc ho Iehova kö Elia at Tisebi, me ka, ka habe, 18 Todrö he thö ka úkhanö me Ahaba than Isaraela hnyi Samaria: wâ bi, e bi hnyi hnyeí vine i Nabotha, wale e ame he ka hnyin he ka hom me iny. 19 Ke u me he ka ha kâu, ka habe, Walang hna ha hnö Iehova, ka habe, Hawa, u je hia but úhlingö me húgúnâ minya? ke u me he ka ha kâu, ka habe, Walang hna ha ga Iehova, ka habe, Haba hnyi dok ame drem je kuli dö Nabotha me ame he je kuli ka drem minya drâm, wale drâm bi. 20 Haba Ahaba ame ha kö Elia, ka habe, E, iwanaihmiöny mönya, u je ö nya bi? Haingen, ka habe, Oge hia but ö u: anyin a u je úcú u bi he ka ányâ hulö hnyi hnyimakö Iehova. 21 Wâ bi, oge me he ka oâ köu únyi ae kong, me aba degeci u, me subâ degecâ ga Ahaba je wainda hia, me at adre ca, me at ame he baú hnyi Isaraela: 22 ke oge me he ka wia ányâm lap me me helâ me lap anyi Joroboama nöku Nebata, ke helâ me lap anyi Baasa nöku Ahia, anyin a

u je okûâ anyik hmönyin, me oâ hulö kö Isaraela. 23 Ke haingö Iehova ga Jezebela, ka habe, Ame he je kuli ka ön Jezebela hnyi hna up hagin Jezerela. 24 Haba hanö Ahaba ame he ka mok hnyi taun, me ame he je kuli ka an, ke haba at ame he ka mok hnyi ta hnye, me ame he je meno ame gâ ethö ka an. 25 (Ke ba at helâ me Ahaba, wale ame ka fico e he ka ânyâ hulö hnyi hnyimakö Iehova, k' ame ûjôngö e âiân jia Jezebela. 26 Ke e ame ânyâ ûnyi ae ikiki hnyi hnen hna hnu hoton je idola, helâ me hna ânyâ hia ge at Amora, waleji ame ob' ödra Iehova hnyi hnyimakan lakon Isaraela.) 27 Ke a löng ut Ahaba ta je hofuc eling, me e ame kia anyin ûkhaû, me khavâ ecmano ae gan nân, k' ame ca han, k' ame mokulec ec mano ae gan nân, me he menyöng. 28 Me ame o but hofuc ho Iehova kö Elia at Tisebi, ame ha, ka habe, 29 Hawa, u je wâ but a Ahaba ame oûhnyûkongo e bi hnyi hnyimakök? awe, anyin a e ame oûhnyûkongo e hnyi hnyimakök, me oge me ca he bi nya ka oâ ûnyi ae kong hnyi bongon ta je bong: ke o ge me he bi nya ka oâ ûnyi ae kong ka anyin lap hnyi ta je bong bongon nokon.

HNYIMAKAN 22.

KE adre me laba hnyi kun ta huna ke ba vat anyin at Suria me Isaraela. 2 Ke haba hnyi huna a kuniny, haba Jehosafata tnan Juda ame o ka than Isaraela. 3 Ke haba than Isaraela ame ha ka lakeiny, ka habe, Hawa, e ca khan' öbun a itin Ramothe-gileada, ke ötin e laba hnyiibu, me ca hûgûnâ e ûnyi hnyi hnyamen at Suria? 4 Me e ame ha kö Jehosafata, ka habe, Hawa, u me he ka tha he mönya he ka vat hnyi Ramothe-gileada? Me haingö Jehosafata ka than Isaraela, ka habe, Iny ûcü möu, ke ûcü lakeik me lakem, ke ûcü halek je he me halem je hors. 5 Ke haba Jehosafata ame ha ka than Isaraela, ka habe, Ö u hnö thö hofuc ho Iehova hnyi bong ang. 6 Me haba than Isaraela ame ha kö Jehosafata ta je perofeta, helâ me foa haded, me ha ködrin, ka habe, Hawa, oge me he ka he Ramothe-gileada ai he ka vat, oge ma hna ju? Haingödrin, ka habe, He thö anyin a ame he Iehova ka hna e ka hnyi hnyamen than. 7 Ke haingö Jehosafata, ka habe, E ba minya but ke perofeta anyi Iehova ang, me ötin e he ka hnö e

minya? 8 Haba than Isaraela ame ha kö Jehosafata, ka habe, Khaca biju at jia Mikaiä nöku Imela, me e khan' ötin he ka hnei Iehova a deny e : ke so bi hûkötiänök e ; anyin a e ame ca perofeta ûnyi ae so gak, ke ûnyi bi ae kong. Ke haingen Jehosafata; ka habe, Than, ca ha helâe. 9 Haba than Isaraela ame hawâ ke eunuka, me ha, ka habe, He thö ka ie hawo Mikaiä nöku Imela. 10 Ke baha than Isaraela me Jehosafata than Juda ödrü me ve laba hon anyidru li theron, ödre khavâ je khaû-ödrü, hnyi dok ae ba ta ûnyi hnyin hnyi hna didrö ka hnyi homagöüleny Samaria ; ke haba ta je perofeta hia ödrin e perofeta hnyi hnyimaködrü. 11 Ke haba Zedekia nöku Kenaana ame ânyâ li faoiny meno a fao bi, me ha, ka habe, Walang hna ha hnö Iehova, ka habe, U me he ka hagtâ at Suria ge li ûnyi ang, ke ne o but ame hi' ödrin dut. 12 Ke haba ta je perofeta hia adre me perofeta helâe, me ha, ka habe, He thö Ramothe-gileada ai me hnahic : anyin ame he Iehova ka hna e ka hnyi hnyamen than. 13 Ke haba ûthumetu at a hawo Mikaiä ame ha kâu, ka habe, Wâ bi, walang ang, khaca thibi hofuc hwan je perofeta, ödrin e omanenâ so ka than : e na so minya ju hwâm e me helâ me hodrin, ke hnyi ha thö ûnyi ae so. 14 Ke haingö Mikaiä, ka habe, Kia inya Iehova, a haba ûnyi ame he Iehova ka ha, wale thibi e oge me he ka ha. 15 K' ame o but ka than, me haingen than kâu, ka habe, Mikaiä lö, hawa, öhmü ma he Ramothe-gileada ai he ka vat, ke öhmü ma hna ju? Haingen kâu, ka habe, He thö me hnahic ; ke ame he Iehova ka hna e ka hnyi hnyamen than. 16 Ke haingen than kâu, ka habe, U me he ka ove khemanyâm kõnya a u me ca he ka ha kõnya ke hofuc ke hna-thu thibi hnyi iö Iehova? 17 Ke haingen, ka habe, Oge wâ but Isaraela hia adre me tot monu hon je bucen, helâ me ta je manoe ae ba at ame tuö : ke haingö Iehova, ka habe, E ba tuhan tavat ang ; hamödrin he ka ve hmetu ka hnyi je hnyabadrin hnyi hnahic. 18 Haba than Isaraela ame ha kö Jehosafata, ka habe, Awe, oge ca ha köu, a e ame ca he ka perofeta ûnyi ae so kõnya, ke ûnyi bi ae kong? 19 Ke Mikaiä ame ha, ka habe, Anyin a wale löng ju u hofuc ho Iehova : oge me ö Iehova ame tabâ anyin theron, k' ame ütiteny unyin ta je dö hia hnyi drany hnyi ke keihen metâ me meny. 20 Ke haba Iehova ame ha, ka

habe, Ie at ame he ka iyawö Ahaba me me he ka he me ta hnyi Ramothe-gileada? Ke ame ha heläng ke at, ke heläe ke at. 21 Ke ame o but ke hanu me tot hnyi hnyimakö Iehova, me ha, ka habe, Oge me he bi nya ka iyawâ e. 22 Ke haba Iehova ame ha kâu, ka habe, U ma he ka kâmâu? Me haingen, ka habe, Oge me he ka he but, ke oge me he bi nya a hanu ae thoi hnyi hnyimen anyin ta je perofeta hia. Haingen, ka habe, U me he ka iyawâ, me u me he minya ka tom : he thö, me ânyâ heläe. 23 Ke walang ang, wâ bi, a hia but Iehova ip hanu ae thoi hnyi hnyimen ânyâm ta je perofeta eang ; ke a hia but Iehova ha ûnyi ae kong gam. 24 Haba Zedekia nöku Kenaana ame hakekenyâ me khaü wahicö Mikaia, me ha, ka habe, A deny ua hanu Iehova ûheny unyik he ka ha bi köu? 25 Ke haba Mikaia ame thu, ka habe, Wâ bi, u me he ka wâ hnyi bong u me he ka didrö ka hnyi hnyeule eiö hnyin he ka lubaduöng. 26 Me haba than Isaraela ame ha, ka habe, Hum Mikaia thö, me hom e kö Amona at ame musö taun, me Joasa nokon than ; 27 me ha, ka habe, Walang hna ha hnen than, ka habe, Ip dö at ang hnyi uma ceat, me hân ge aretoiny vec me köien vec, ke ne o but oge me o me hnahic. 28 Ke haba Mikaia ame ha, ka habe, U je ne he ka o hmetu me hnahic, awe, a ca ha Iehova a deny inya. Me haingen, ka habe, Löng ju öbun tavat hia thithö. 29 Ke haba than Isaraela me Jehosafata than Juda, ödru me he Ramothe-gileada ai. 30 Ke haingen than Isaraela kö Jehosafata, ka habe, Oge me he ka oiyongi nya bi, me hnyi vat : ke u me he ka khavâ ânyâm je ûkhaü. Me haba than Isaraela ame oiyongâ e bi, me hnyi vat. 31 Ke haba than Suria ame hûna ka je taben anyin je kariota a thöte tu, me ha, ka habe, ca he ka vat me tavat ae ûhnyükong me gan, ke hake than Isaraela thibi. 32 Ke haba je taben kariota ödrin e ö Jehosafata, me ödrin e ha, ka habe, Wale but ang than Isaraela me ödrin e saü kâu he ka kot : ke haba Jehosafata ame hongot görunyai. 33 Ke haba je taben kariota ödrin e wâ a ca than Isaraela e, me ödrin e hna but e. 34 Ke haba ke at ame hlec mono fana, me ame aat dö than Isaraela hnyi wanben hna ûhujäköuâ ûkhaüen vat : anyin a wale e ame ha ka at ame owisa anyin kariota, ka habe, Saü thö, me hum nyâ ûheny hnyi hna vat ; anyin oge aat dö. 35 Ke gan

tot vat hnyi bong eling ; ke adre me otilâ than hon anyin kariota cicö at Suria, me e ame mokcu hnyi sahac : ke ame hingölö dren ûnyi hnyi aat ka hnyi hnyin kariota. 36 Ke ame he úthumetu háâng ka hnyi wanben je utbavat e ka he but ka dit seünö, ka habe, Ve hmetu but ka hnyi anyibun je taun me je ibun. 37 Me ame mokcu than, ke adre me hom Samaria ai, me ödrin e konâm than hnyi an hnyi Samaria. 38 K' adre me hneü kariota hnyi an Samaria, ke haba je kuli ödrin e drem dren ; (ke haba je momo hnyi gethen ödrin e soü eling ;) helä me hofuc ho Iehova waleji e ame ha. 39 Ke haba kolon je hna ânyâ hnö Ahaba, me anyin ta je huliwa, me uma nyon elefan waleji e ame op, me ta je taun hia e ame op, hawa adre ca sihnalimen hnyi tusi hnân ha je bong bongon je than Isaraela? 40 Ke ame mokut ut Ahaba tha e me lakamen, ke ame than biju Ahazia a nokon hwaban.

41 Ke haba Jehosafata nöku Asa ame hwân he ka thaniny Juda hnyi huna a vaki Ahaba thaniny at Isaraela. 42 Ke thöte faiv je hunai Jehosafata hnyi hna otilâ e ka than ; ke e ame musi hnyi Jerusalem twente faiv je huna. Ke Azuba ien hnyien, momo nöku Silehi. 43 Ke e ame vhenö gethen de Asa a kamen ; e ame ca saü ûnyi hnyin, ame ânyâ ûnyi ae wisa hnyi hnyimakö lehova : ke so bi adre me ca ohia je dok ae görany ; ke haba tavat adre me bi hut bala me leü utö ae bo so hon je dok ae görany. 44 Ke haba Jehosafata ame ânyâ úsoköu me than Isaraela. 45 Ke haba kolon je hna ânyâ hnö Jehosafata, me tang hwegien wale a manen gan, me hnen minya hna vat, hawa, adre ca sihnalimen hnyi tusi hnân ha je bong bongon je than Juda? 46 Ke haba kolon tavat adre me hwen sodoma, a je kolon biju hnyi je bong bongu Asa a kamen, me e ame oh' ödrin ûnyi hnyi hnyei. 47 Ke ba than hnyi Edoma : ke haba ke at ame musi. 48 Ke haba Jehosafata ame tibet je huiny Tasesa, me me he Ofira ai he ka haudin gol : k' ame ca kec bi je hu, anyin a hmouca but je hu hnyi Eziona-gebera. 49 Ke haba Ahazia nöku Ahaba ame ha kö Jehosafata, ka habe, E so e tha he je lakeik me lakem hnyi je hu. Ke ca we Jehosafata bi. 50 Ke ame mokut ut Jehosafata tha e me lakamen, me adre me konâm e me lakamen hnyi taun anyi Davita a kiben : ke ame than biju Jorama a nokon hwaban.

II. JE THAN 1.

51 Ke haba hnyi hun a seventini Jehosafata than Juda, ame hwân Ahazia nöku Ahaba he ka musö at Isaraela hnyi Samaria, ke e ame musi hnyi Isaraela hnyi lo li hun. 52 Ke e ame ânyâ hwakecin ae kong hnyi hnyimakö Iehova, me vhen gethen deny kamen, me gethen deny hin-

yen, me hnyi gethen de Jeroboama nöku Nebata, waleji hnyi hnen hna oâ hulö ka at Isaraela. 53 Ke e ame bi athnyabai Baala, k' ame khudrung kâu, me ame okûâ hmönyin anyi Iehova, Khongu Isaraela, hoton hna ânyâ hia hnen kamen.

TUSINY JE THAN, TUSI A LOINY.

HNYIMAKAN 1.

KE haba at Moaba ödrin e úkhnin fuc ka at Isaraela hwaban dö a mokcu Ahaba. 2 Ke haba Ahazia ame kölu únyi hnyi hna pewaná mamalama hnyi hnyeule-ny ethö, hnyi Samaria, me e ame moko: ke e ame kunâ je úthumetu, me ha ködrin, ka habe, He thö ka hnei Bele-sebuba kongon Ekerona me inye he ka möt únyi hnyi mok ang. 3 Ke haba angela anyi Iehova ame ha kö Elia at Tisebi, ka habe, he thö ka úkhanö me je úthumetu anyin than Samaria me ha ködrin, ka habe, Hawa, anyin ae ba Khong hnyi Isaraela me öbun e he ka hnei Bele-sebuba khongon Ekerona? 4 Anyin a wale, walang hna ha hnö Iehova, kâ habe, U me ca he ka ut únyi hnyi hna mokut u me mokut hon, ke e hnathu u me he ka mokcu. Haba Elia ame he but. 5 Ke ame hmetu ju kâu je úthumetu, ke e ame ha ködrin, ka habe, Anyin a ieu öbun e hmetu? 6 Ke ödrin e ha kâu, ka habe, Haba ke at ame o me úkhanö möhmun me ha köhmun, ka habe, He hmetu thö ka than at a kún' öbun, me ha kâu, ka habe, Walang hna ha hnö Iehova, ka habe, Hawa, anyin ae ba Khong hnyi Isaraela, me u me úkhúnöng he ka hnei Bele-sebuba khongon Ekerona? anyin a wale u me ca he ka ut únyi hnyi hna mokut u me mokut hon, ke e hnathu u me he ka mokcu. 7 Me e ame ha ködrin, ka habe, Ieu bongon at ame o me úkhanö möbun, me ha köbun hofuc e? 8 Ke ödrin e thu kâu, ka habe, At ae leün unyin, k' ame weikâ unen meno. Me e ame ha, ka habe, Elia e at Tisebi. 9 Haba than ame kunâ kâu taben tavat a fifte tha e me anyin tavat a fifte. Ke e ame ölö but kâu: ke wâ bi e ame laba hon ban dok ae hut. Ke e ame ha kâu, ka habe, Aten

Khong lö, haingen than, Utut. 10 Ke haba Elia ame thu me ha ka taben tavat a fifte, ka habe, Oge ne aten Khong, me hamen meic he ka gâ únyi hnyi drany me le degeci u me tavat a fifte unyâm. Me ame gâ but meic únyi hnyi drany me le degecâ e me tavat unyin a fifte. 11 Ke e ame kunâ hmetu kâu ke taben tavat a fifte me tavat a fifte unyin. Me e ame thu me ha kâu, ka habe, Aten Khong lö, walang hofuc hwan than, ka habe, Ie utut. 12 Ke Elia ame thu me ha ködrin, ka habe, Oge ne aten Khong, me hamen meic he ka gâ únyi hnyi drany me le degeci u me fifte unyâm. Me ame gâ but meic hlogon Khong únyi hnyi drany, me le degecâ e me anyin fifte. 13 Ke e ame kunâ hmetu ke taben tavat a fifte, at a kuniny, a tha e me anyin fifte. Me ame ölö thö taben tavat a fifte a kuniny, me o me ciboucâ hnyi hnyimakö Elia, me ame khöü kâu, me ha kâu, ka habe, Aten Khong lö, ö u öününhathoâ anyik möt, me möt minya anyin tavat a fifte eang a lathnyabaem. 14 Wâ bi, ame gâ meic únyi hnyi drany me le degecâ lo li taben tavat a fifte a tha ödrü me anyidru li ve fifte: ke haba walang ang e so e únyi hnathu anyik möt hnyi hnyimákâm. 15 Haba angela anyi Iehova ame ha kö Elia, ka habe, Tha utut mē; ca outen e. Me e ame tot me tha utut mē ka than. 16 Ke e ame ha kâu ka habe, Walang hna ha hnö Iehova, ka habe, Anyin a u je kunâ je úthumetu he ka hnei Bele-sebuba khongon Ekerona, hawa can ae ba Khong hnyi Isaraela he ka hnö hofuc a hwan? anyin a wale u me ca he ka ut únyi hnyi hnâm hna mokut, ke u me he bi ka mokcu. 17 Me e ame mokcu helâ me hofuc ho Iehova wale a ha Elia. Ke ame hwân ka than Jorama hwaban, hnyi hun a loi Jorama nöku

Jehosafata than Juda ; anyin ae ba nokon da. 18 Ke haba kolon je hna ányá hnö Ahazia, waleji e ame ányá, hawa, adre me ca sihnalimen hnyi tusi hnân ha je bong bongon je than Isaraela ?

HNYIMAKAN 2.

KE haba hnyi úen ame he Iehova ka hum Elia hnyi drany ai a deny höu, me Elia ame tha he me Elisaia úheny Gilegala. 2 Ke haingö Elia kö Elisaia, ka habe, Ö u me laba ju ang ; anyin a Iehova ame kunö nya Beth-ela ai. Ke haingö Elisaia, ka habe, Kia inya Iehova, ke kia inya u, a oge me ca he ka hnö u. Me ödrü me tha he Beth-ela ai. 3 Ke ame o kö Elisaia lakon je perofeta hnyi Beth-ela me ha káu, ka habe, Hawa e, khatö u a g' ame he Iehova ka hom at ame nö u únyi gam hnyi bong ang ? Me haingen, ka habe, E khañö nya, ca ha bi. 4 Haba Elia ame ha káu, ka habe Elisaia lö, ö u laba biju ang ; anyin a Iehova ame kunö nya Jeriko ai. Haingen, ka haba, kia inya Iehova, ke kia ioya u, a oge me ca he ka hnö u. Me ödrü me tha o hnyi Jeriko. 5 Me ame o kö Elisaia lakon je perofeta hnyi Jeriko, me ha káu, ka habe, Hawa e, khatö u but a g' ame he Iehova ka hom at ame nö u únyi gam hnyi bong ang ? Ke e ame thu, ka habe, E, e khañö nya but ; ca ha bi. 6 Haba Elia ame ha káu, ka habe, Ö u laba biju ang ; anyin ame kunö nya Iehova Joridano ai. Ke haingen, ka habe, kia inya Iehova, ke kia inya u, a oge me ca he ka hnö u. Me ödrü me tha he. 7 Ke haba fite tavat hanen lakon je perofeta ödrin e he me útililen cici ödrü ke úsákáúö ; ke haba ödrü, ödrü me tot hnyi baten Joridano. 8 Haba Elia ame hom anyin úkhaú me vhec, me wádrá wia, me kot wagewe, me ame khekhe lo but, me ödrü me he hanyáúá hnyi dok ae mada. 9 Ke ödre hia but he hanyáúá, haba Elia ame ha kö Elisaia, ka habe, Bethe ha únyi oge me he ka ányá hobi köu me adre me tiga ca hum nya gam. Haba Elisaia ame ha, ka habe, Ö u he ka olo ham könya hanom. 10 Ke e ame ha, ka habe, Únyi e ae hmak u je sumátá : ke so bi, u je ne ö nya hnyi úen adre me hum nya gam, ame he ka heláe köu ; ke ame ne ba, ame ca he ka heláe. 11 Ke ödrü me tiga he, me úhnenamö, me wá bi, kariota me, me je hors meic, wale ame óúsákáúödrüköü-

drü ; ke haba Elia ame ölö hnyi drany ai a deny höu. 12 Ke haba Elisaia ame wá e, me e ame hongot, ka habe, Cica, cica, je kariota anyin at Isaraela me aten tabö hors ! Ke ame ca wá hmetu bi e : me ame kát anyin bi je úkhaú me kia luá. 13 Ke e ame hom minya úkhaú anyi Elia wale a kölu gan, me he hmetu me tot hnyi baten Joridano. 14 Ke e ame hom úkhaú anyi Elia, wale a kölu gan, me kot wagewe, me ha, ka habe, Ewa Iehova Khongu Elia ? ke a hia but kot wagewe me ame khekhe lo but, me Elisaia ame he hanyáúá. 15 Ke a wá but e ge lakon je perofeta hnyi Jeriko, hnyat ödrin e tot cici e, me ödrin e ha, ka habe, Ame ta hanu Elia ka hnyi hu Elisaia. Me ödrin e he me úkhañö mé, me nom ju hnyi kánái hnyi hnyimakan. 16 Ke ödrin e ha káu, ka habe, Wá bi, wale unyin lathnya-baem hnyat ae hwege a fite ; e so ödrin e he me elám at ame nö u : ame ne home ge hanu Iehova, me khaú ka hnyi hon ke bucen, ame ne hnyigöulen bucen. Me haingen, ka habe, Ca he öbun ka úkhúnöng. 17 Ke ödrin e újengö e ke ne o but e ame hmehma, me e ame ha, ka habe, Úkhúnöng dö. Anyin a wale ödrin e kuná hnyat a fite ; ke ödrin e elám hnyi kun ta bong, ke ödrin e ca wá bi. 18 Me ödrin e o hmetu thö káu, ke e ame tiga laba hnyi Jeriko ; me haingen ködrin, ka habe, Hawa, oge me ca ha köbun, ka habe, Ca he ? 19 Ke ame ha kö Elisaia tavat aten taun, ka habe, Than lö, wá bi, e so úlabainy taun ang a u me wá : ke kong bi je köiö, ke hnyei бага kánáiny. 20 Me haingen, ka habe, Hom but jem könya kaia ae teb únyi, ke bi sáltiny. Me ödrin e hom káu. 21 Me e ame he ka hnyi hna pupuainy je köiö, me khaú sált ka hnyin, me ha, ka habe, Walang hofuc ho Iehova, ka habe, Oge hia but osoá je köiö ang ; k' ame ca he ka o hmetu mok únyi gan, me hnyei бага. 22 Ke adre me osoá köiö ke ne o but hnyi bong ang, hoton hofuc ho Elisaia waleji e ame ha. 23 Ke e ame he úheny e Beth-ela ai ; ke ame he eú hnyi gethen, me ame o je waında únyi hnyi taun, me hluma e, me ha, ka habe, Hadróú, ölö thö ; hadróú, ölö thö. 24 Me e ame hwiö me ö 'drin, me hang' ödrin hnyi iö Iehova. Me ame o li bea momo únyi hnyi hnyot me ki' ödrin je waında a fate tu. 25 Ke e ame he úheny e ka hnyi bucen Karemela, me hmetu úheny e Samaria ai.

HNYIMAKAN 3.

KEhaba Jorama nöku Ahaba ame hwân ka musî hon Isaraela hnyi Samaria hnyi huna a eitini Jehosafata than Juda, ke twelv but hunainy anyin musî. 2 Ke e ame ânyâ ûnyi ae kong hnyi hnyimakö Iehova; ke so bi ca helâ me kamen, me hinyen: anyin a e ame degec veto ame tot anyi Baala a ânyâ kamen. 3 Ke so bi e ame kece ka je hulö anyi Jeroboama nöku Nebata, wale ame okûâ je hwakecin ae kong anyin at Isaraela; e ame ca saû ûnyi hnyin.

4 Ke Mesa than Moaba at ae tren mamoe; ke e ame fâtâ ka than Isaraela leûnen je nokon mamoe a wan haded thauzan, me je mamoe бага a wan haded thauzan. 5 Ke hwaban dö mok anyi Ahaba, me ame ûkhin fuc than Moaba ka than Isaraela. 6 Ke haba Jorama than ame he ûheny hnyi Samaria hnyi ûen eling, me hawâ at Isaraela hia thithö. 7 Ke e ame he me ûkhû-nöng kö Jehosafata than Juda, ka habe, A hia but than Moaba ûkhin fuc kõnya: hawa, ötu ma tha he Moaba ai he ka vat? Haingen, ka habe, Ötu ma tha he: inya ang helâ möu, me lakeik helâ me lakem, me halek je hors helâ me halem je hors. 8 Ke haingen, ka habe, Ewa detu? Ke e ame thu, ka habe, Detu hnyi hnyeubaba hnyi Edoma. 9 Me ame tha he than Isaraela, me than Juda, me than Edoma: me ödrin e he igigilö hnyi seven ta bong: ke ba köiö hobi kâu je utbatat me je meno ödrin e tha he mä. 10 Ke haingen than Isaraela, ka habe, Ekölö, Iehova ame ûkhacaköuâ kun ta than he ka hn' ödrin ka hnyi hnyamen at Moaba. 11 Haba Jehosafata ame ha, ka habe, Hawa, e ba perofeta anyi Iehova eang, m' ötin e he ka hnei Iehova a deny? Me ame thu ke athnyabainy than Isaraela, ka habe, Waleû Elisaia nöku Safata, at ame hingölö köien li hnyamö Elia. 12 Ke haingö Jehosafata, ka habe, E unyin hofuc ho Iehova. Me ame he kâu than Isaraela, me Jehosafata, me than Edoma. 13 Ke Elisaia ame ha ka than Isaraela, ka habe, Ieû gak köu? he bi thö ka je perofeta anyin kâmâm, me je perofeta anyin hinyâm. Ke haingen than Isaraela kâu, ka habe, Obe, anyin a Iehova ame ûkhacaköuâ kun ta than eang he ka hn' ödrin ka hnyi hnyamen at Moaba. 14 Ke haingö Elisaia, ka habe, Kia inya Iehova tuhan sabaath wale oge me tot hnyi hnyimakan, oge ne ca oga-

nâ hnyimakö Jehosafata than Juda, me oge me ca he bi nya ka bwele köu, me ö u. 15 Ke walang ang hom but kõnya ke at ame ânyâ ûnyi khumöng. Ke ame tiga ânyâ ûnyi khumöng, me ame o but kâu hnyamö Iehova. 16 Me e ame ha, ka habe, Walang hna ha hnö Iehova, ka habe, Hiny ju je thopæ se hnyi hnyegöulen bucen eang. 17 Anyin a walang hofuc ho Iehova, ka habe, Öbun e ca he ka wâ ang, me we, ke so bi ame he ka unöngöt hnyigöulen bucen eling ge köiö: m' öbun e he ka ic, a öbun, me je hnahat halebun, me omeno a halebun. 18 Ke ûnyi ae hâhâ e kö Iehova: ke e ame he bi ka hna tavat Moaba ka hnyi hnyamöbun. 19 Ke öbun e he ka kot je taun hia adre up haginy, me je taun hia ae so, me sö degecâ je üö ae so hia, me hlöng je hna pupuainy je köiö, me okongoâ je utkânâ hia ae so ge veto. 20 Ke haba hnyi hnyomakatu hnyi ûen adre me hudo hudiny han, me wâ bi, ame o thö köiö hnyi gethen ûheny Edoma, me ame unöngötö hnyeï ge köiö. 21 Ke a löng ut at Moaba a ga o thö je than he ka vat mödrin, me ödrin e hawâ ûkhacaköuâ tavat hia hnyat ae khan' ödrin he ka khavâ khaûen vat, ke ne o but ka wahingat minya, me ödrin e tot hnyi hnyigot. 22 Ke ödrin e vesâ hnyi hnyomakatu kong, ke ame hat dö seûnö hon köiö, ke haba at Moaba ödrin e wâ köiö cici ödrin, k' ame helâ me dra: 23 me haingödrin ka kabe, Waleû dra; adre hia but kot je than, k' ödrin e ivatköu: anyin a wale, at Moaba lö, ate me he bi walang ka sei. 24 Me ödrin e o but ka hnyi hunuma anyin at Isaraela, me ame tot at Isaraela me kot at Moaba, m' ödrin e kec hnyi hnyimaködrin: ke ödrin e ûhnûhnû me kot tilâ at Moaba. 25 Ke ödrin e hagutâ hnyikânâ ta je taun; me ve khüö veto hon je utkânâ hia ae so, me ounöngötâ; ke ödrin e hlöng je hna pupuainy köiö hia, me sö degecâ je üö hia ae so: k' adre hnen biju hnyi Kira-haraseth je vetoiny; k' ame he igigilö e tavat kolou, me kot e. 26 Ke a wâ but than Moaba a g' ame hwege but vat hon, me e ame hom tavat a seven haded, tavat hok hele vat, me me thu vat ka than Edoma: ke ca khan' ödra. 27 Me e ame hobe nokon a atö, at ame he ka than hwaban, me hudo e hnân hudiny leû hon hna up haginy. Ke e gan hmâ anyidrin hmönyin ka at Isaraela: me ödrin e hna e me he ka hnyi idrin hnyeï.

HNYIMAKAN 4.

KE ame tenge kö Elisaia ke momo âiân ke nokon je perofeta, me ha, ka habe, A mokcu öiök athnyabaem : ke u me wâ e at ame outö Iehova, athnyabaem : ke ame o but at waleji e ame hom gufa gan, he ka hom lakuk li бага he ka bi athnyaba. 2 Haba Elisaia ame ha ka momo, ka habe, Ieü oge me ânyâ hobi köu ? ha thö könya ; ie ünyi unyâm hnyin umâm uma ? Haingen momo, ka habe, E ba but ünyi unyik a athnyabaem hnyin uma, ke tap wakaco thibi. 3 Ke e ame ha, ka habe, he thö ka me sumâtâ ke je kaia unyin tavat hia adre me laba hakekenyi u, je kaia ae ba önyen ; ca owakhaletâ bi. 4 Ke u me he ka tha didrö me lakom me hlöng hwanumâm, me hingälâ ka hnyi je kaia hia eling, me ip je kaia ae unöngöt. 5 Haba momo ame he but gan, me hlöng hwanumen me lakon ; ke ödrin e hom je kaia kâu, me e ame hingälâ. 6 K' ame unöngöt je kaia, haba momo ame ha ka nokon, ka habe, Hö jem ke kaia. Ke haingen kâu ka habe, E ba hmetu kaia. Me ame todru wakaco. 7 Ke haba momo ame he me thumeto aten Khong. Ke haingen, ka habe, He thö ka üco wakaco me bi hwaban hna hok gufa, ke u me he bi me lakom ka möt ge kolon.

8 Ke haba hnyi ke bong Elisaia ame he Sunema ai, ke wale ke momo ae ünyi hna-thu ; ke e ame thawâ e he ka han. Ke haba hnyi je üen e ame vhenö gethen, e ame labö saü kâe he ka han. 9 Ke momo ame ha ka âiân, ka habe, Wâ bi e khanö nya a aten Khong ae kap e, at ame labö he eang. 10 Ötu me he ka ânyâ hnyeule ae ühnyükong hon hna up hagin ; ke ötu me he ka ip eling hobi kâu, hna mokut, me laulau, me tap, me taben lamepa : ke e ka o kötu, me ame he ka saü kâe. 11 Ke hnyi ke bong e ame o kâe, me saü ka hnyi hnyeule, me mokut eling. 12 Ke e ame ha kö Gehazi a athnyabainy, ka habe, Hawâ thö momo Sunema. Ke e a hia but hawâ, me e ame tot hnyi hnyimakan. 13 Ke e ame ha kâu, ka habe, Ha thö ka momo, ka habe, Wâ bi, u je kong hnyekuni öhmö ge ta je ünyi hia eang adre penapena ; ie ünyi adre me he ka ânyâ hobi köu ? hawa, u je wem adre me he ka haiö u ka than, ame ne taben utbavat ? ke momo ame ha ka habe, Inya oge me laba thibi me je lahanök. 14 Ke haingen, ka habe, Ie ünyi adre me he ka ânyâ hobi

kâu momo ? Haba Gehazi ame thu, ka habe, E ba nokon, ke hingat ut âiân. 15 Me haingen, ka habe, hawâ hmeto. Ke a hia but hawâ, me ame tot momo hnyi hwanuma. 16 Me ame ha, ka habe, Cico üen ang hnyi huna ame he ka o, me u ma he ka delütâ ke da. Haingen momo, ka habe, Ohe, than a aten Khong u me ca he ka thoi ka athnyabaem. 17 Ke ame erkin dut momo me hnokoâ da hnyi üen eling hnyi huna ame o wale a ha Elisaia ka momo. 18 Ke ame gan dut da, me haba hnyi ke bong e ame he unyin kamen ka tavat subö hwit. 19 Ke haingen ka kamen, ka habe, Ekölö ge bök, ekölö ge bök. Me e ame ha ka athnyabainy, ka habe, Hom dö ka hinyen. 20 Ke e ame hom e, me hom ka hinyen, me e ame laba hon li jewan momo ke ne o but jebigö, k' ame mokcu. 21 Ke haba momo ame öliâ, me ip e hon hna mokut a hnen aten Khong, me hlöng hwanumen, me didrut. 22 Ke haba momo ame hawâ âiân me ha, ka habe, Ö u kunâ thö könya ke athnyaba me asina, m' inye he ka wadring ka aten Khong, me ie hmetu. 23 Me haingen, ka habe, Anyin a ieü u me he kâu hnyi bong ang ? ke ca teb ünyi tehi me sabath ang. Me haingen momo, ka habe, ame he ka so. 24 Ke haba momo ame hûkälâ taben hon asina, me ha ka athnyabainy, ka habe, Alen logotâ me he ; ke ca obeci nya hnyi ühek iny ka ca ha bi köu. 25 Ke ame he momo me o ka aten Khong hnyi bucen Karemela. Ke ame wâ, momo ke tiga sâkâü, me ame ha kö Gehazi a athnyabainy, ka habe, Wâ bi, ame he jem momo Sunema : 26 ö u wadring dö walang ang he ka ükhanö me, me hnö, ka habe, Hawa, u so ? ke so âiâm ? ke so wanakat ? Me haingen momo, ka habe, E so. 27 Ke ame o but momo ka ateu Khong hnyi dok ae hut, me ame kât li can. Me haba Gehazi ame hakekeny he ka hagutâ momo ; ke haingen aten Khong, ka habe, Ca ânyâ : anyin ae vec hnyekon momo ; k' ame ikhâlâ gak Iehova a ca thumetu nya. 28 Ke haingen momo, ka habe, Hawa, than a tuhök lö, oge me sumâtâ gam da ? Hawa, oge me ca ha köu, ka habe, Ca iyawö nya bi ? 29 Me e ame ha kö Gehazi, ka habe, Hûkälâ ju wen hnyekom, me hom anyik uci hnyi hnyamâm, me he : ame ne ükhanö möu ke at, ca iouny mē ; ke ame ne fuc köu ke at, ca fuc bi : ke u me he ka ip anyik uci hon hnyimakan wanakat. 30 Haba hinyen wanakat ame ha, ka habe, Kia inya Iehova, ke kia inya u, a oge me ca he ka

hnö u. Me e ame todrö me he hoton momo. 31 Ke ame bö Gehazi k' ame bilidru, me ip uci hon hnyimakan wanakat, ke ba hwan, ke ame ca löng. Me e ame hmetu he ka ükhanö me, me ha kâu, ka habe, Ame ca hmak bi wanakat. 32 K' ame o but Elisaia ka hnyi uma, me wâ bi, a mokcu wanakat, ke adre ip hnyi hon hnen hna mokut. 33 Me e ame didrö me hlöng hwanumödrü, me hic kö Iehova. 34 Me e ame he me mokut takoü wanakat, me ip hnyimen hon hnyimen wanakat, me li emakan hon li emakan wanakat, me li hnyamen hon li hnyamen wanakat: me e ame hlöhlöu hon, me ame mage unyin wanakat. 35 Ke e ame hmetu me okhaca ngenü hnyi hnyin uma; me e ame ölö me hlöhlöu hnyi hon wanakat: ke haba wanakat ame ibi oseven cingö, me ame bwela thö li emakan wanakat. 36 Me e ame hawo Gehazi, me ha, ka habe, Hawa thö at Sunema. Me e ame hawâ e. K' ame o but momo kâu, me e ame ha, ka habe, Hom dö nokom da. 37 Ke haba momo ame didrö me ta ju ka hnyi li can, me nom hnyikânâi; me e ame hom nokon da, me didrut.

38 Ke Elisaia ame hmetu Gilegala ai: ke ame hmiâ thö hnyei; ke ame laba hnyi hnyimakan lakon je perofeta: me e ame ha ka athnyabainy, ka habe, Ip ju öt ae gan me öli jeü hobi kâu lakon je perofeta. 39 Me ame he ke at ka hnyi hnyot he ka wö khölak, me e ame wâ ke úkaia hnyi hnyot me tau wan, me unöngötö ulainy me bom, me heleâ ka hnyi öt jeü; anyin adre ca wâhmakhmeto üö e. 40 Ke ödrin e hingälâ hobi kâu tavat he ka han. Ke ödrin e tiga han hna öt jeü, me ödrin e kuku, me ha, ka habe, Aten Khong lö, e hu hnân mekiny hnyin öt. Ke ka khan' ödrin bi he ka han. 41 Haba e ame ha, ka habe, Hok falawa. Me e ame ip e hnyi öt; me haingen, ka habe, Hingälâ but hobi kâu tavat, m' ödrin e han. Ke ba but kongon hnyin öt.

42 Ke ame o but ke at úheny Baalalisa, ke ame hom ka aten Khong aretoiny je wan a bân, a twente je areto bali, me je ban whit ae hát hnyi tangen tang. Me haingen, ka habe, Ham dö ka tavat m' ödrin e han. 43 Haba athnyabainy ame ha, ka habe, Hawa, oge me he ka ip e hnyi hnyimakan tavat a wan haded? Me ame thü, ka habe, Ham dö ka tavat m' ödrin e han; anyin a walang hna ha hnö Iehova, ka habe, Ödrin e he ka han, k' ame he bi ka hu kolon.

44 Me e ame ip hnyi hnyimaködrin, me ödrin e han me hu kolon bi, hoton hofuc ho Iehova.

HNYIMAKAN 5.

HABA Naamana a taben vat anyin than Suria, me e at ae gan anyin tuhan, k' adre me ogânâ, anyin a Iehova ame omelö at Suria a deny e; ke e at ae hwege, ke lepera bi. 2 Ke haba at Suria ödrin e hia but he a únya vat, k' adre hügünâ únyi hnyi hnyei Isaraela ke in ae úhnyükong; k' ame bi athnyaba ka öjö Naamana. 3 Ke haba in ame ha ka momo at ame muso e, ka habe, E na laba ju tuhök unyin perofeta wale hnyi Samaria! anyin a e ame he ka omelö e únyi hnyi anyin lepera. 4 Me ame didrö ke at me thumeto tuhan, ka habe, Ame ha helang me helâe in úheny hnyi hnyei Isaraela. 5 Me haba than Suria ame ha, ka habe, Awe, oge me he ka kunâ tusi ka than Isaraela. Me e ame he, k' ame tha hom me ta je talan sileva a ten, ke siks thauzan je sekel gol, ke ten ta hna khaü. 6 Ke e ame hom tusi ka than Isaraela, ame ha, ka habe, E ka o köu tusi ang, me wâ bi, oge me hia but kunö Naamana a athnyabaik köu, m' u me he ka omelö e hnyi anyin lepera. 7 Ke a hia but than Isaraela aü tusi, me e ame kia anyin ukhaü, me ha, ka habe, Hawa, iny Khong, he ka hlingâ me omelö, me me kunâ könya at ang he ka ohia lepera ge ke at? Ke wâhmakhmetoâ thö, me wâ, a e ame heleü can gak. 8 Ke a löng ut Elisaia aten Khong a g' ame kia anyin úkhaü than Isaraela, me e ame úkhünöng ka than me ha, ka habe, Ieü gam u je kia ányâm úkhaü? e so e ame he jem könya, me e ame he bi ka wâhmakhmeto ae hu perofeta hnyi Isaraela. 9 Me ame o Naamana tha e me haleny je hors me anyin kariota me tot hnyi hwanumen uma umö Elisaia. 10 Haba Elisaia ame kunâ úthunetu kâu me ha, ka habe, He thö ka sóu ama oseven hnyi Joridano, me ame he ka so hmetu unyâm me hát. 11 Ke ame hmönyi Naamana, me e ame he, me ha, ka habe, Wâ bi, oge me únykúme a e ame he ka didrut me tot me hawâ ö Iehova a Khongon, me aba dok eling ge hnyamen, me ohia lepera. 12 Hawa, e ca beönua bi Abana me Farapa li wageweiny Damaseko hon ta je köiö hia thithö hnyi Isaraela? hawa, oge me ca he ka sóu hnyin me inye so but? Me e ame hwiö me he hmönyin. 13 Haba

lathnyabainy ödrin e hakekenyâ e me ha, ka habe, Cica, hawa, a ne ha perofeta kôu ûnyi ae gan hmâ, u me ca he ka ânyâ? ke ca bâhâ kôu ûnyi e a ha, ka habe, Soû but me u me so? 14 Me e ame he me oseven khut hnyi Joridano helâ me hofuc hwan aten Khong: me ame hmetu utiöiny helâ me utiöiny wanakat ae ûhnyûkong, ke e ame so but. 15 Me e ame hmetu ka aten Khong, e me anyin bunyen hia, me o, me tot hnyi hnyimakan: ke e ame ha, ka habe, Wâ bi, oge me wâ ju walang ang, ae ba Khong hnyi hmeledrany hia, ke hnyi Isra- raela thibi: ke walang ang ö u hom dö bwihlany gak a athnyabaem. 16 Ke haingen, ka habe, Kia inya Iehova at oge me tot hnyi hnyimakan, a oge me ca he ka hom ke ûnyi. Ke e ame ûjengö e he ka kap; ke e ame höcö. 17 Haba Naamana ame ha, ka habe, Hawa, a ne ca eling, ö u hn' ödrin he ka ham ka athnyabaem tang kânâ ame aijen li miul, anyin ame ca he hmetu athnyabaem ka hudo hudiny leû me ke hut bi ka ke je khong ke so bi kö Iehova thibi. 18 Ke haba hnyi ûnyi ang e so ame he Iehova ka betenge ka athnyabaem; e ka didrö tuhök hnyin uma umö Rimona he ka khudrung eling, ke e ame cimâ hnyamök, me oge me nom hnyi uma umö Rimona, haba iny ka nom hnyi uma umö Rimona, me e so ame he Iehova ka betenge ge athnyabaem hnyi ûnyi eling. 19 Ke e ame ha, ka habe, He thö me hnahic. Me e ame he gan, k' ame ca sâkâû ûheny.

20 Ke haba Gehazi athnyabai Elisaia aten Khong ame ha, ka habe, Wâ bi tuhök ame betenge ga Naamana at Suria, k' ame ca kap ûnyi hnyi li hnyamen ûnyi e ame hom jem: kia inya Iehova a oge me he ka wâdring hoton me hom gan ke ûnyi. 21 Me Gehazi ame he hotu Naamana. Ke a wâ but Naamana a ga wâdring hoton ke at, me e ame utut ûheny hon kariota he ka ûkhanö mä, me ha, ka habe, Hawa e so hia? 22 Haingen, ka habe, E so hia. Ke a kunö nya tuhök he ka ha, habe, Wâ bi ame o kõnya walang ang li hidröu ûhedru hnyi hnyei ae hut hnyi Eferaima, hanen lakon je perofeta; ö u ham ju ködru khaca talan sileva, ke lo li hna khaû. 23 Haba Naamana ame ha, ka habe, E so ka hom lo li talan. Ke e ame ûjengö e, me e ame ca li talan sileva hnyi hnyin li tang, me li hna khaû, me ip hon li lathnyabainy, me ödru me hom tilâ hnyi hnyimakan. 24 Ke e ame o but ka hnyi dok ae hut, me e ame

hom ta je ûnyi e gadru, me ip hnyin uma: me e ame kunâ li at, m' ödru me he. 25 Ke e ame didrö me tot hnyi hnyimakan tuhan. Ke haba Elisaia ame ha kâu, ka habe, Gehazi lö u je mua? Me e ame thu, ka habe, E ba dok a mwi hnyin athnyabaem. 26 Ke haingen kâu, ka habe, Hawa, ame ca he unyâm hnyekuk k' ame hwiö thö at ûheny hon anyin kariota he ka ûkhanö möü? Hawa, e úcú ûen ang he ka kap sileva, me je ûkhaû, me je hnyei elaiö me vine, me je mamoe me bolok, me lathnyaba obaga me omomo? 27 Anyin a wale ame he ka kece kôu me je matrânâm nyiele baluae lepera anyi Naamana. Me e ame didrut gan a e lepera but ke hau helâ me kiona.

HNYIMAKAN 6.

KE haba lakon je perofeta ödrin e ha kö Elisaia, ka habe, Wâ bi, haba dok öhmun e laba hnyin hnyi hnyimakâm, me ti hnek bi köhmun. 2 Ö u hn' öhmun dö he ka he Joridano ai me ve hok utö ûheny e, ke öhmun e he ka bi hnyaba eling, m' ötin e he ka laba eling. Me e ame thu, ka habe, He th' öbun. 3 Ke haba ke at ame ha, ka habe, Ö u tha he me lathnyabaem. Ke haingen, ka habe, Ötin a tha he. 4 Me e ame tha he mödrin. Ke ödrin e o but hnyi Joridano, me ödrin e si utö. 5 K' ame tiga si utö ke at, ame kölu but gö ka hnyi köiö: me e ame kuku, ka habe, Ekölö than! anyin a ûnyi adre hia but mä sum- âtâ. 6 Ke haingen aten Khong, ka habe, A kölu ua? Me e ame omanenâ kâu dok. Me e ame sö ke ong utö me khûâ eû, me ame mat dö fao. 7 Ke e ame ha, ka habe, Hom dö. Me e eme inâ but hnyamen me hom e.

8 Ke ame vat than Suria me Israela; me e ame ûhnenamö me lathnyabainy, me ha, ka habe, Oge me he ka hunuma hnyi dok e me dok eling. 9 Haba aten Khong ame ûkhúnöng ka than Israela me ha, ka habe, Wâ eâu, ca he kâe ka hnyi ke dok; anyin ame tiga he but at Suria ka hnyi dok eling. 10 Ke haba than Israela ame ûkhúnöng ka hnyi dok wale a ha aten Khong me khû hnyiköny e, me e ame omelö e bi eling ca okhaca me olo. 11 Ke ame kong dö hnyekon than Suria can hofuc eling; me e ame hawâ lathnyabainy me ha ködrin, ka habe, Hawa, öbun e ca he ka thumetu nya a ie at gatin ame tha bien me

than Isaraela? 12 Haba ke athnyabainy ame ha, ka habe, Than a tuhök, e ba: ke so bi Elisaia perofeta hnyi Isaraela, ame labö thumeto than Isaraela ge ta je únyi u me ha hnyin hnyeulem mokut. 13 Ké haingen, ka habe, He thö ka wâ dok e ame laba hnyin, m' oge me he ka úkhúnöng he ka hom e. Me adre me thumeto e, ka habe, Wâ bi e but hnyi Dothana. 14 Anyin a wale e ame kunâ kâe je hors, me je kariota, me utbavat ae gan hmâ: ke ödrin e o but hnyi lit me tot igigilö taun. 15 Ke ame vesâ hnyi hnyomakatu athnyabainy aten Khong, me he hnyöu ai, wâ bi, adre igigilö but taun hnen vat, je hors me je kariota. Haba athnyabainy ame ha kâu, ka habe, Ekölö tuhök! ötin e he ka hawa? 16 Ke haingen, ka habe, Ca ot bi: anyin a hnyat ödrin e laba unyitin ame se hia hon hnyat adre laba unyidrin. 17 Haba Elisaia ame hic me ha, ka habe, Iehova lö, ö u obwela but li emakan, me me wâ. Me Iehova ame obwela li emakan hidröu; ke e ame wâ: ke wâ bi, ame unöngötö bucen ge je hors me je kariota meic igigili Elisaia. 18 Ke ödrin e o but kâu, me haba Elisaia ame hic kö Iehova, me ha, ka habe, Ö u owadrüâ but hnyat ang. Me e ame owadru' ödrin helâ me hna ha ga Elisaia. 19 Ke Elisaia ame ha ködrin, ka habe, Ca gethen bi ang, ke ca taun bi e; ke hnu hotuk me oge me he ka hum öbun ka at öbun e elâm. Ke e ame hum ödrin Samaria ai. 20 Ke ödrin e o but hnyi Samaria, me haingö Elisaia, ka habe, Iehova lö, obwela but li emakan tavat ang, m' ödrin e wâ. Me Iehova ame obwela je emaködrin, me ödrin e wâ, ke wâ bi ödrin dut hnyi Samaria. 21 Ke ame ö' drin than Isaraela me haingen kö Elisaia, ka habe, Cica lö, hawa, oge me he ka kuc ödrin? hamök he ka kuc ödrin? 22 Ke e ame thu, ka habe, U me ca he ka kuc ödrin: hawa, u me he ka kot je hna hwenbâ ge anyâm hele vat me cafa? ha ödrin me babelidrin, me ödrin e he ka han me ic, me hmetu ka tuhödrin. 23 Ke e ame pena-pena gan hmâ hõbi ködrin: ke ödrin e hia but han me ic, me e ame kun' ödrin, me ödrin e he hmetu ka tuhödrin. Ke a ca he hmetu bi je utbavat anyin at Suria ka hnyi hnyeI Isaraela.

24 Ke hwaban ta je únyi eling haba Ben-adada than Suria ame úkhacaköuâ anyin utbavat hia, me he me thelöng Samaria. 25 Ke gan hmâ hmiâ hnyi Samaria: ke wâ bi ödrin e thelöng e me

me cite je sileva hwaban ban asina, ke faiv je sileva hwaban ke keihen kabe a vakiny tatet tiny biny. 26 Ke ame ngenu than Isaraela hon hna up haginy, ke haba ke momo ame hongot kâu, ka habe, Than a tuhök lö, hom hadruo nya. 27 Me e ame thu, ka habe, Ame ne ca he Iehova ka hadruo u, me oge me he bi nya ka kâmâu ka hadruo u? ame ne únyi hnyi hna huje hwit, ame ne únyi hnyi hna hlec wan vine! 28 Ke haingen than kâu, ka habe, Ieü gam bi? Ke haba momo ame thu, ka habe, Haba momo ang ame ha könya, ka habe, Hö jem nokom da k' ötin e he ka an hnyi bong ang, me ötin e he nyi ka an nöku. 29 Me öhmun e ölä nöku, me an: me haba nyi oge me ha kâu, ka habe, Hö jem nokom da me ötin e he ka an: ke haba momo ame hia but ikhâlâ nokon. 30 Ke a löng ut than hofuc hwan momo, me e ame kia anyin úkhaü; (ke e ame ngenu hon hna up haginy;) ke haba tavat adre me wâ, ke wâ bi, e ame khavâ unyin ge ecmano ae gan nân. 31 Ke e ame ha, ka habe, Ame he Khong ka anyâ helâe könya me bi hanen dö minya, ame ne e bala bö Elisaia nöku Safata hnyi bong ang. 32 Ke Elisaia ame laba hnyin umen uma, me wahingat ödrin e tha laba mē; haba than ame kunâ ke at úheny unyin: ke e tiga ca o bi úthumetu kâu, me e ame ha ka wahing-at, ka habe, Hawa, öbun e wâ but hnen nokon at úhlingö ang hna úkhúnöng he ka hom bö? wâ bi, e ka o but úthumetu hlöng ju hwanuma, ke kât ju hlingin kâu: hawa, ca e bi hoton hwan li can tuhan? 33 Ke e ame tiga úhnenamö mödrin, wâ bi, ame o but kâu úthumetu: me e ame ha, ka habe, Wâ bi, únyi ga Iehova kong ang; anyin a ieü oge me he ka halubahing Iehova hmetu?

HNYIMAKAN 7.

KE haba Elisaia ame ha, ka habe, Löng ju hofuc ho Iehova: walang hna ha hnö Iehova, ka habe, Helâ nyi ang, ame he ka khaca sea falawa hwaban sekel, ke lo li sea bali hwaban sekel adre me he ka úco hnyi homagöuleny Samaria. 2 Haba taben, waleji a he cimâ hnyamen than, ame thu ka aten Khong, ka habe, Wâ bi, ame ne he Iehova ka bi mamalama hnyi drany ame ne he ka manen únyi e? Ka haingen, ka habe, Wâ bi, u me he ka hnyi wâ e ge li emakâm k' u me ca he ka hnyi han.

3 Ke e hu tavat a lepera a ödrin foa hnyi hwanumen homagöule, ke ödrin e úhnenamökouâ me ha, ka habe, Anyin a ieu ötin e he ka laba eang ke ne o but ötin e mokcu? 4 Ötin e ne ha, ka habe, Ötin a he ka hnyi taun, ke e hmiâ hnyi taun, me ötin e he ka mok eling: ke ötin e ne laba bala eang, ötin e he ka mokcu minya. Ke walang ang ötin a kec ka hnyi utbavat anyin at Suria: ödrin e ne he ka omeli ötin, ötin e he ka möt; ke ödrin e me hling' ötin ötin e he bi ka mokcu. 5 Me ödrin e todrö ke hauhaotreng ut, he ka he ka hnyi hna hunuma anyin at Suria: ke ödrin e o but ka hnyi baten hna hunuma anyin at Suria, me wâ bi, a ba but at eling. 6 Anyin a hia but Iehova olöngâ je utbavat anyin at Suria ge medien je kariota, me medien je hors, wale medien je utbavat ae gan: me ödrin e úhnenamökouâ, ka habe, Wâ bi, than Isaraela ame hia but bi hwaban je than Heth, me je than Aigupito, m' adre me vat mötin. 7 Anyin a wale ödrin e todrö me kec hnyi hauhaotreng, me hna degecâ umödrin je uma mano, me haledrin je hors me haledrin je asina, wale hna hunuma thiju, me ödrin e kec, anyin a ödrin bemöt. 8 K' ame o but je lepera eling ka hnyi baten hna hunuma, me ödrin e didrö hnyin ke uma mano me han me ic, ke ödrin e hom úheny e sileva, me gol, me úkhaú, me hom, me ikhálâ; ke ödrin e hmetu me dit hnyin ke uma mano, me hom úheny e minya, me he me ikhálâ. 9 Ke ödrin e úhnenamökouâ, ka habe, E ca so hnötin hna ányâ: bonginy úthumetu ae so bong ang, ke ötin e laba hnyibú: ötin e ne laba ke ne o but ame hmouca lany ötin e ne he ka wâ únyi ae kong: ötin e he walang ang ka thumeto lap anyin than. 10 Me ödrin e o me hongot ka hnyat tuö homagöuleny taun: me ödrin e thumetu ödrin me ha, ka habe, Öhmun e o hnyi hna hunuma anyin at Suria, ke wâ bi, e ba but at eling, ke ba hwan at, ke so bi je hors thibi adre noc, me je asina adre noc, me je uma mano thiju. 11 Haba tavat tuö homagöule ödrin e hongot; ke ödrin e thumeto lap anyin than eiö. 12 Haba than ame todrö hnyi hnyinghet me ha ka lathnyabainy, ka habe, Oge me he ka haimamenâ köbun walang ang hna ányâ hnen at Suria kötin. E khan' ödrin but a ötin mekihnânem; anyin a wale ödrin e he but únyi hnyi hna hunuma he ka ikhölö hnyi hnyot, ke haingödrin, ka habe, Ödrin ka he but únyi

hnyi taun, me ötin e he ka kât meliödrin, me dit ka hnyi taun. 13 Haba ke athnyabainy ame thu me ha, ka habe, E so he ka hom je hors a thabúng a ke je kolon biju hnyi taun, (wâ bi, ödrin helâ me úseiny at Isaraela hia thithö je kolon hnyin; wâ bi ödrin helâ me úseiny at Isaraela hia thithö a mokcu;) me ötin e he ka úkhúnöng me wâ. 14 Me ödrin e hom li kariota je je hors; ke haba than ame úkhúnöng he ka he hoton utbavat anyin at Suria, haingen, ka habe, He thö ka wâ. 15 Me ödrin e he hotudrin ke ne o but Joridano: ke wâ bi, adre avâ gethen hia ge je úkhaú me je kaia, wale a hna degecâ ju at Suria hnyi hnödrin hna kec logot. Ke haba je uthumetu ame he hmetu me thumeto than. 16 Me ame didrut tavat me sö hna hunuma anyin at Suria. Me adre me úco khaca sea falawa hwaban sekel, ke lo li sea bali hwaban sekel, helâ me hofuc ho Iehova. 17 Ke haba than ame húna taben, wale at e ame he cimâ hnyamen, he ka tuö homagöule, me haba tavat adre me utö e hnyi homagöule me e ame mokcu, helâ me hna ha hnen aten Khong, waleji a ha hnyi úen a o kâu than. 18 Me ame hwadá thö helâ me hna ha hnen aten Khong ka than, ka habe, Ame he ka bi hwaban lo li sea bali ge sekel, ke khaca sea falawa hwaban sekel, helâ nyi ang, hnyi homagöule Samaria; 19 ke haba taben eling ame thu ka aten Khong, ka habe, Wâ bi, ame ne he Iehova ka bi mamalama hnyi drany ame ne he ka manen únyi e? Ke haingen, ka habe, Wâ bi, u me he ka hnyi wâ e ge li emakâm, ke u me ca he ka hnyi han: 20 me ame aat dö helâe kâu, anyin a tavat adre me utö e hnyi homagöule, me e ame mokcu.

HNYIMAKAN 8.

KE a hia but Elisaia fuc ka momo waleji e ame omelö nokon, me ha, ka habe, Todrö, me u me he, me ányâm lap, me laba kanyua hnyi hnâm hna he ka wâ: anyin a hia but hawâ hmiâ ga Iehova; k' ame he ka o minya hnyi hnyei ke ne o but hnyi seven je huna. 2 Me haba momo ame todrö, me ányâ helâ me hna ha ge aten Khong: me e ame he me anyin lap me laba kanyua hnyi hnyei iny at Filisiti ke ne o but hnyi seven je huna. 3 Ke hwaban je huna a seven, haba momo ame hmetu úheny hnyi hnyei iny at Filisiti: ke e ame he me tenge ka than can umen uma me

iny hneyi. 4 Ke haba than ame úhnenamö me Gehazi a athnyabainy aten Khong me ha, ka habe, Me thumetu nya ge ta je únyi ae gan ame ányá Elisaia. 5 Ke e ame tiga omanená ka than hnen hna omelö at a mokcu, ke wá bi, wale momo a omelö nokon ame tenge ka than can umen uma me iny hneyi. Me haba Gehazi ame ha, ka habe, Than a tuhök lö, wale but ang momo, ke wale but ang nokon waleji a omelö ga Elisaia. 6 Me haba than ame hnö momo, me e ame thumeto e. Me haba than ame kuná ke athnyaba, me ha, ka habe, Ham hmetu thö ka momo anyin ta je únyi hia, me troban iny hneyi hia, hwán hnyi bong a hna hnyin momo hneyi ke ne o but walang ang.

7 Ke haba Elisaia ame he Damaseko ai; ke a mok Ben-adada than Suria; ke adre me thumeto e, ka habe, A o but ang aten Khong. 8 Haba than ame ha kö Hazaela, ka habe, He thö ka hom bwihlany me úkhanö me aten Khong, me hnö unyi Iehova a deny, me ha, ka habe, Hawa oge me he ka möt únyi hnyi mok ang? 9 Me Hazaela ame he ka úkhanö mē, me hom bwihlany, a ta je únyi ae so hia únyi hnyi Damaseko, k' ame hijen ta je kamela a fâte, me e ame he me tot hnyi hnyimakan me ha, ka habe, A kunö nya kōu Ben-adada a nokom, than Suria he ka ha, ka habe, Hawa, oge me he ka möt únyi hnyi mok ang? 10 Haba Elisaia ame ha káu, ka habe, He thö ka ha káu, ka habe, U me he ka möt; ke so bi a hia but Iehova omanená kōnya a e ame he ka mokcu. 11 Ke e ame wá hmá e ke ne o but e ame hmehma but; me haba aten Khong ame tenge. 12 Haba Hazaela ame ha, ka habe, Tuhök lö, iéu u me tenge gan? Me e ame thu, ka habe, Anyin ae khanö nya únyi ae kong u me he ka ányá ka lakon Isaraela: haba anyidrin ta je hhabá u me he ka thong ge meic, me u me he ka hlingá ge hele vat ta je hidrōu unyidrin, me sa degecá lakudrin je mendreng, me kave je erkin gadrin. 13 Me haba Hazaela ame ha, ka habe, Ie inya a athnyabaem, a kuli, m' oge me he ka ányá únyi e ae gan? Me Elisaia ame thu, ka habe, A hia but Iehova omanená kōnya a u me he ka than Suria. 14 Ke e ame he but únyi ga Elisaia me o unyin tuhan; me e ame hnö e, ka habe, Iéu a ha kōu Elisaia? Me e ame thu, ka habe, E ame ha kōnya a u me he ka möt. 15 Ke haba nyi e ame hom mano tubwiny hna

mokut, me húlúlúá hnyi kōiö me lau e hon hnyimakan, me e ame mokcu: ke ame than biju Hazaela hwaban.

16 Ke haba hnyi huna a thabúngi Jorama nöku Ahaba than Isaraela, ke Jehosafata than hnyi Juda, me ame hwán Jorama nöku Jehosafata than Juda he ka than. 17 Ke e ame hwán he ka than, ke thöte tu je hunainy; ke e ame musi hnyi Jerusalem e it je huna. 18 Ke e ame vheno gethen deny je than Isaraela, helá me hna ányá hnen lap anyi Ahaba: anyin a áián momo nöku Ahaba: ke e ame ányá únyi ae kong hnyi hnyimakö Iehova. 19 Ke so bi e ca we Iehova bi he ka ohia Juda, ga Davita athnyabainy, helá me hna ha báná káu he ka ham lamepa káu, hobi káu bala lakon. 20 Ke haba hnyi bongon je bong Edoma ame hna degeci Juda, me otilö thanidrin bi. 21 Ke haba Jorama ame tha he Zaira ai me anyin te je kariota hia thithö: ke e ame todrö hnyi hnyinghet me kot at Edoma wale adre igigilö e, me je taben kariota, me ame kec tavat ka hnyi umödrin je uma mano. 22 Haba Edoma ame hna degeci Juda bala bi ke ne o but hnyi bong ang. Ke Libena ame hna degecá minya hnyi úen a khaca. 23 Ke haba kolon je hna ánya hnö Jorama me anyin ta je huliwa hia, hawa, adre ca sihnalimen hnyi tusi hnán ha je bong bongon je than Juda? 24 Ke ame mokut ut Jorama tha e me lakamen, me adre me konám e tha e me lakamen hnyi taun anyi Davita: ke ame than biju Ahazia a nokon hwaban.

25 Ke haba hnyi huna a twelvi Jorama nöku Ahaba than Isaraela, ame hwán ka than Ahazia nöku Jorama than Juda. 26 Twente tu je hunai Ahazia me e ame hwán ka than; ke e ame than khaca huna hnyi Jerusalem. Ke haba ien hinyen jia Athalia, momo nöku Omeri than Isaraela. 27 Ke e ame vheno gethen deny lap anyi Ahaba, me ányá únyi ae kong hnyi hnyimakö Iehova, helá me lap anyi Ahaba: anyin a e úngon lap anyi Ahaba. 28 Ke e ame tha he me Jorama nöku Ahaba he ka vat me Hazaela than Suria hnyi Ramoth-gileada: ke ame aat dö Jorama ge at Suria. 29 Ke haba Jorama than ame hmetu Jezerela ai he ka bi anyin hnán aat ge at Suria hnyi Rama, hnyi hnen hna vat me Hazaela than Suria. Ke haba Ahazia nöku Jorama than Juda ame he he ka ö Jorama nöku Ahaba hnyi Jezerela, anyin a e mok.

HNYIMAKAN 9.

KE haba Elisaia perofeta ame hawá ke at hanen lakon je perofeta me ha káu, ka habe, Húkálá ju wen hnyám, ke hom tap wakaco eang hnyi hnyámám, me he Ramothi-Gileada ai. 2 Ke u ka o but, me u me he ka elóm Jehu nóku Jehosafata nóku Nimesi, me didró, me otílá e unyin je liamekeiny mē, me hom dö e ka hnyi hnyeule eiö hnyin. 3 Me hom dö wakaco me hingálá hon ban me ha, ka habe, Walang hna ha hnö Iehova, ka habe, Oge hia but hú u hnân than Isaraela. Ke u ma khöng ut hwanuma me kec, ke ca bec bi. 4 Me ame he hidróu, a hidróu perofeta, Ramothi-gileada ai. 5 K' ame o but, me wá bi, je taben vat ödrin e tha laba; me e ame ha, ka habe, Tuhök lö, e hu hofuc gak köu. Me haingö Jehu, ka habe, Kö ie at gabmun? Me e ame thu, ka habe, Köu a tuhök. 6 Me e ame todrö me dit ka hnyin uma; ke e ame hingálá wakaco hon ban me ha káu, ka habe, Walang hna ha hnö Iehova, Khongu Isaraela, ka habe, Oge hia but hú u hnân tuhan lakei Iehova, wale Isaraela. 7 Ke u me he ka kot lap anyi Ahaba a tubám, me inye he ka bi hwanan kö Zezebela dra dren lathnyabaik a je perofeta, me dra dren lathnyabai Iehova hia thithö. 8 Anyin ame he ka hia but lap anyi Ahaba hia: ke oge me he ka subá degecá ga Ahaba je wainda hia, me hnyat adre me ca, me hnyat adre he monu hnyi Isaraela. 9 Ke oge me he ka wia lap anyi Ahaba, me me helá me lap anyi Jeroboama nóku Nebata, me helá me lap anyi Baasa nóku Ahia. 10 Ke ame he je kuli ka ön Zezebela hnyi ke keihen Jezerela, ke ha at ame he ka konám. Me e ame khöng ut hwanuma me kec. 11 Ke haba Jehu ame he ka lathnyabainy tuhan: ke haingen ke at káu, ka habe, Hawa, e so? anyin a iéu ame o köu at e ae monu? Me haingen ködrin, ka habe, E khan' öbun dut at, me hwan hofuc. 12 Me haingödrin, ka habe, E thoi e; thumetu öhmun dö walang ang. Me haingen ködrin, ka habe, E ame ha könnya heláng me heláe, ke haingen, ka habe, Walang hna ha hnö Iehova, ka habe, Oge hia but hú u hnân than Isaraela. 13 Me ödrin e ie he me ve hom anyidrin je úkhaú, me ip hmelen hnyi hon wacuat, me túá trutru me ha, ka habe, Than dö Jehu. 14 Ke haba Jehu nóku Jehosafata nóku

Nimesi ame úkhin fuc kö Jorama. (Ke Jorama ame tue hnyi Ramothi-gileada, e me Isaraela hia thithö, ga Hazaela than Suria: 15 ke ame hmetu but Jorama than Jezerela ai, he ka bi anyin je aat waleji hnân je aat ge at Suria, hnyi hnen hna vat me Hazaela than Suria.) Ke haba Jehu ame ha, ka habe, A ne webun e, awe ca hna ke at a khaca he ka kec únyi hnyi taun, he ka he me thumeto e hnyi Jezerela. 16 Haba Jehu ame tabá ke kariota, me he Jezerela ai; anyin a Jorama ame mokut eling. Ke Ahazia than Juda ame úö Jorama. 17 Ke haba at ame tue ame tot hon ban hna hnyai Jezerela, me e ame wá bunyen anyi Jehu, me e ame ha, ka habe, Oge me wá bunyen. Haba Jorama ame ha, ka habe, Úca thö at tabö hors me kuná he ka úkhanö mödrin, he ka ha, ka habe, Hawa, úsoköu? 18 Me ame he ke at tabö hors he ka úkhanö mē, me ha, ka habe, Walang hna ha hnen than, Hawa, úsoköu? Ke haingö Jehu, ka habe, Iéu úsoköu gam? he but ka hnyi hotuk. Haba at ame tue ame úthumetu ködrin, ka habe, A o but úthumetu ködrin ke e ame ca hmetu. 19 Me e ame kuná at tabö hors a loiny, ke e ame o ködrin me ha, ka habe, Walang hna ha hnen than, Hawa, úsoköu? Ke haingö Jehu, ka habe, Iéu úsoköu gam? he thö ka hnyi hotuk. 20 Haba at ame tue ame úthumetu me ha, ka habe, A o but ködrin, ke e ame ca hmetu: ke haba hnen hna alen me helá me hna alen hnö Jehu nóku Nimesi; anyin a e ame alen hwegjá. 21 Haba Jorama ame ha, ka habe, Penapena thö. Me adre me penapena anyin kariota. Me ame didrut Jorama than Isaraela, me Ahazia than Juda; me ve tabö kariota, ke ödrin me he he ka úkhanö me Jehu, me wá e hnyi hnyei i Nabotha at Jezerela. 22 K' ame ö Jehu hnö Jorama, me e ame ha, ka habe, Hawa, úsoköu Jehu? Ke e ame thu, ka habe, Iéu úsoköu, ke se hia bala je bi únyi monu me bibihwakecin anyin hinyám jia Zezebela? 23 Haba Jorama ame hwiö me kec, me ha kö Ahazia, ka habe, E hu iyawá Ahazia. 24 Haba Jehu ame hlec cafana ge tang hwegen hia, me ame aat dö Jorama hnyi wanben li benyin, me ame o but fana hnyi óunykúminy, me e ame ta hweti hnyi anyin kariota. 25 Haba Jehu ame ha kö Bidekara a taben unyin, ka habe, Hom dö, me khúá but e hnyi hnyei i Nabotha at Jezerela, anyin u me únykúme úen waleji ötu me tha tabö kariota hotu

II. JE THAN 10.

Ahaba a kamen, me Iehova ame ip hon hok eling ae hmak ; 26 ke haingö Iehova, ka habe, Haba et oge me wä drö Nabotha, me dren lakon je бага ; me haingö Iehova, ka habe, Oge me he ka bi hwaban köu hnyi dok ang. Ke walang ang hom dö me khûâ but e ka hnyi utkânâ, helâ me hofuc ho Iehova. 27 Haba Ahazia than Juda ame wä me e me kec hnyi getheniny uma umen hna belök. Ke haba Jehu ame hnu e, me ha, ka habe, Kot e hnyi kariota : me adre me kot e hnyi gethen ûheny Gura hnyi lbeleama. Ke e ame kec Megido ai, me e ame mokcu eling. 28 Ke haba lathnyabainy ödrin e hom e Jerusalema ai hon kariota, me konâm hnyi erkemok tha e me lakamen hnyi taun anyi Davita.

29 Ke haba hnyi hunâ a eleveni Jorama nöku Ahaba, me hwân Ahazia ka musi hon at Juda.

30 Ke ame o but Jehu hnyi Jezerela, me haba Jezebela ame löng ; me e ame bi hnalimen li emakan, me omeçâ ban, me selat hnyi mamalama. 31 Ke haba Jehu ame tiga didrö hnyi homagöule, me momo ame ha, ka habe, Hawa, Zimeri lö, at ûhlingâ tubâm, u je o hnyi úsoköu ? 32 Me e ame hngele hnyidranayi ka hnyi mamalama, me ha, ka habe, Ia ame tha hien mönya ? ia ? me ame selatâ e li at a lo ame ne kun a je eunuka. 33 Me e ame ha, ka habe, Khûâ but momo hnyikânâi. Me ödrin e khûâ hnyikânâi, me ame fifle thö dren ka hnyi hon haginny veto, me hon je hors : me e ame uto momo ge li can. 34 Me e ame didrö me han me ic, me e ame ha, ka habe, Tuö momo ang adre ohnauhangoâ me konâm bi, anyin a e nokon than. 35 Me ödrin e he ka konâm ; ke ödrin e ca wä bi, ke so bi ibokomok thiju me li hnyeüca me li hnyam. 36 Me ödrin e hmetu me thumeto e. Me haingen, ka habe, Wale hofuc ho Iehova waleji e ame ha deny athnyabainy a Elia at Tisebi, ka habe, Ame he je kuli ka an anyi Jezebela hnyi hnyeï Jezerela : 37 k' ame he unyi Jezebela ka helâ me tet hon kânâ hnyi hnyeï Jezerela ; m' adre me ca he ka ha, ka habe, Wale Jezebela.

HNYIMAKAN 10.

KE sevente je laku Ahaba hnyi Samaria. Ke haba Jehu ame sihnalimen je tusi me úkhünöng Samaria ai ka je than Jezerela, wale wahingat, me ka tavat

hat je laku Ahaba, ka habe, 2 Ke ka o but tusi ang köbun, ke e unyibun je lakon tuhöbun, ke e unyibun je kariota me je hors, me taun adre up veten, me je omjehen vat ; 3 öbun e he ka üca ke nokon tuhöbun ae so me ücü, me ip e hon theron anyin kamen, me vat hobi kâu lapanyin tuhöbun. 4 Ke ti gan anyidrin ot, me ödrin e ha, ka habe, Wä bi, a ca tot li than hnyi hnyimakan : ke ötin e he ka hawa ka tot ? 5 Hababa at ame musö hnyaba, me at ame musö taun, me wahingat, me tavat ödrin e hat je wanakat, ödrin e úkhünöng kö Jehu, ka habe, Öhmun ang lathnyabaem, me öhmun e he ka ânyâ ta je ûnyi hia u me he ka hunâ köhmun ; öhmun e ca he ka otillâ ke at hnân than : ânyâ thö ûnyi ae so hnyi hnyimákâm. 6 Me e ame sihnalimen ködrin tusi a loiny, me ha, ka habe, A ne tha hiöbun mönya ke öbun e ne he ka löng hok hofuc, me hom but ban tavat a je lakon tuhöbun, me hom but jem könya hnyi Jezerela helâ nyi ang. Ke ödrin sevente je lakon than ödrin e laba anyin je at hna-thuiny taun tavat adre me hat ödrin. 7 K' ame o but tusi ködrin, me ödrin e hom je lakon than, me hling' ödrin a ödrin sevente, me hitangen je bödrin me kunâ kâu Jezerela ai. 8 Ke ame o but at me thumeto e me ha, ka habe, Ödrin e o but me ban je lakon than. Ke haingen, ka habe, Khonju me me lo li hna khon hnyi homagöule ke ne o but nyi. 9 Ke hnyi hnyomakatu e ame didrut, me tot, me ha ka tavat hia, ka habe, Wisa but öbun : wä bi oge ûhüg-ünö than me tuhök, me hlingâ e : ke ia hlingâ tavat hia eang ? 10 Khan' öbun dö walang ang a ame ca he ka kölu hnyikânâi ke uthofuc ho Iehova, wale ame ha Iehova ge lap anyi Ahaba : anyin a hia but Iehova ânyâ ûnyi e ame ha a deny Elia athnyabainy. 11 Ke wale Jehu ame kot kolon hia lap anyi Ahaba hnyi Jezerela, me anyin je at hnathu hia, me je waeny, me anyin tavat bihut, ke ne o but ame ba but kolon. 12 Me e ame todrö me he, me he Samaria ai. Ke e eü hnyi gethen hnyi uma hnân subâ leünen mamoe umen tavat tuö mamoe, 13 haba Jehu ame úkhanö me je liamekeiny me Ahazia than Juda, me ha, ka habe, Öbun je hnyat ? Ke ödrin e thu, ka habe, Öhmun je liamekeiny me Ahazia ; k' öhmun e he he ka iouny me lakon than, me lakon momo than. 14 Me e ame ha, ka habe, Hom meliödrin dö, me ödrin e hom meliödrin hnyi thopiny uma adre sö leünen

mamoe hnyin, a ödrin fâte tu, k' ame ca hna but kolon.

15 Ke e ame he but úheny e, me e ame úkhanö me Jonadab, nöku Rekaba ame he ka iouny më : ke e ame iouny, me ha kâu, ka habe, Hawa e wisa hnyekom helâ me hnyekuk köu? Me haingö Jonadab, ka habe, Eke. A ne helâe, awe, ho jem hnyamâm. Ke e ame inâ hnyamen; me e ame hom e kâu ka hny hon kariota. 16 Ke haingen, ka habe, Ötu ma tha he, me u me he ka wâ tang hwegiök hobi kö Iehova. Me adre me olaba e hon kariota. 17 Ke ame o hnyi Samaria, me e ame kot hia je kolon lap anyi Ahaba hnyi Samaria, ke ne o but e ame ohia, hoton hofuc ho Iehova, waleji e ame ha ko Elia. 18 Ke haba Jehu ame úkacaköuâ tavat hia thithö, me ha ködra, ka habe, E úhnyükong hnö Ahaba hna bi athnyaba kö Baala; ke gan bi hnö Jehu hna he ka bi athnyaba kâu. 19 Anyin a wale, hawâ thö könya je perofeta anyi Baala hia thithö, me lathnyabainy hia, me tavat bi hut hia kâu; e so e he ka ca hia ke at a khaca. anyin ae hu gak hut ae gan kö Baala; ame ca he ka möt bi at ame hia. Haba Jehu ame ányâ iyawâ e, me me he ka ohia lathnyabai Baala. 20 Ke haingö Jehu ka habe, Okabâ ju úkacaköu ae únyi hnathu kö Baala. Me adre me haímemenâ. 21 Ke Jehu ame úkhünöng ka hnyi Isaraela hia thithö: me ame o je lathnyabai Baala hia, ke ba at ae hia. Ke ödrin e o ka hnyi uma umö Baala; k' ame umöngöt uma umö Baala hnyi je ke keihen hia. 22 Me e ame ha ka at ame tuö hnyeuleny je úkhaú, ka habe, Hom jem je úkhaú me oúco lathnyabai Baala hia. Me e ame hom je úkhaú hobi ködrin. 23 Ke haba Jehu me Jonadab nöku Rekaba ödru me didrö eiö hnyin uma umö Baala; me e ame ha ka lathnyabai Baala, ka habe, Elâm dö, me wâ, wâ e nye hu athnyabai Iehova eang unyibun, ke so e hake lathnyabai Baala. 24 Ke ödrin e didrut he ka hudo ta je hut me je hudiny leú. Ke a hia but Jehu ip tavat a eite hnyöu, me ha ködrin, ka habe, Haba at ame he ka möt únyi hnyi tavat oge me he ka hom ka hnyi hnyamöbun, ame he ka hwaban e unyibun. 25 K' a hia but hudo hudiny leú me haba Jehu ame ha ka tavat tue, me je taben, ka habe, Didrö, me hling' ödrin; ame ca he ka didrut ke at. Me ödrin e kuc ödrin ge hele vat; ke haba tavat tue me je taben ödrin e khú' ödrin kâu, me he but ka hnyi tauniny uma umö

Baala. 26 Ke ödrin e hom kâu je veto ame tot únyi hnyi uma umö Baala, me le degecâ e. 27 Ke ödrin e hagutâ degecâ hnatheati Baala, me kia degecâ uma umö Baala, me wia hnân uma digic thatúnyi, ke ne o but hnyi bong ang. 28 Helâe hnö Jehu hna ohio Baala únyi hnyi Isaraela. 29 Ke so bi Jehu ame ca saú únyi hnyi je hulö anyi Jeroboama nöku Nebata, at ame okúâ je hwakecin ae kong anyin at Isaraela, ge li nokon kau gol waleji hnyi Beth-ela, me Dana. 30 Haba Iehova ame ha kö Jehu, ka habe, Anyin ae so hnâm hna ányâ, wale u je ányâ wisa hnyi hnyimakök, me ányâ ka lap anyi Ahaba helâ hia me hnyekuk, anyin a wale ame he je mátránâm ka tabâ theron hnyi Isaraela ke ne o but hnyi dö a vakiny. 31 Ke ame ca wâ wia Jehu he ka vheno hnanyibu anyi Iehova Khongu Isaraela, me hnyekon a khaca: e ame ca saú únyi hnyi ta je hulö anyi Jeroboama, wale ame okúâ je hwakecin ae khong anyin at Isaraela.

32 Ke haba hnyi ün eling Iehova ame hwân he ka hom úhnyükongo at Isaraela: ke haba Hazaela ame kuc ödrin hnyi ta je hnyigöulen Isaraela hia; 33 me hwân hnyi Joridano e deiö, hnyei Gileada hia, me at Gada, me Rheubena, me Manase, hwân Aroera hnyi hnyigöulen bucen e Arenona, wale Gileada me Basana. 34 Ke haba kolon je hna ányâ hnö Jehu, me anyin je huliwa, me tang hwegien, hawa, adre ca sihnalimen hnyi tusi hnân ha je bong bongon je than Isaraela? 35 Ke a mokut ut Jehu tha e me lakamen; me ödrin e konâm e hnyi Samaria. Ke ame than biju Jehoaza a nokon hwaban. 36 Haba Jehu ame musi at Isaraela hnyi Samaria hnyi je huna a twente eit.

HNYIMAKAN 11.

KE a wâ but Athalia hnyö Ahazia a ga mokcú nokon, me e ame todrö me hlingâ je mátrániny than hia thithö. 2 Ke haba Joseba, hlu nokon than a Jorama, hani Ahazia ame hum Joasa nöku Ahazia, me hom duöngâ únyi hnyi lakon than adre hlingâ, a tha e me momo ame hat e, me tuö hnyi hnyeule mokut; k'adre me ikhâlâ e ga Athalia, me me ca hlingâ e. 3 K'adre tha ikhâlâ e me momo hnyi uma umö Iehova hnyi je huna a siks: ke ame than dö Athalia hnyi hnyei.

4 Ke haba hnyi huna a seven, haba

II. JE THAN 12.

Jehoiada ame úkhúnöng he ka hawá je taben haded, me at Keri, me tavat tue, me hum ödrin káu ka hnyi uma umö Iehova; me e ame úhihinyköu mödrin, me kun' ödrin he ka khemanyin hnyi uma umö Iehova, me omanená ködrin nokon than. 5 Ke e ame ha ködrin, ka habe, Walang únyi öbun e he ka ányá: haba ke keihen gabun a kuniny, tavat adre me didró hnyin hnyi sabath, adre me he ka tuö hna hmak hnyi uma umen than; 6 ke haba ke keihen a kuniny adre me he ka laba hnyi homagöüle Sura; ke haba ke keihen a kuniny hnyi homagöüle hoton tavat tue: me öbun e he heláe ka tuö hna hmakiny uma, m' öbun e helá me hak bi. 7 Ke haba lo li ke keihen gabun tavat adremedidrut hnyi sabath, adre me he ka tuö uma umö Iehova singiny than. 8 Ke öbun e he hia ka lan than, me ve kát anyibun je omjehen vat hnyi je hnyamöbun; ke haba at ame he ka dit hnyin anyibun je deö vat, me adre me he ka hlingá: ke öbun e he ka tha e me than e ka didró me didrut. 9 Ke haba je taben haded ödrin e ányá helá me hofuc hia a ha Jehoiada at bihut; me ödrin e ve hom je atödrin, tavat adre me he ka didró hnyi sabath, tha ödrin me tavat adre me he ka didrut hnyi sabath, me o kö Jehoiada at bihut. 10 Ke haba at bi hut ame ham ka je taben haded je ö me je bec waleji anyi Davita a than a e hnyi uma umö Iehova. 11 Ke haba tavat tue ödrin e ve tot me je omjehen vat hnyi je hnya-mödrin, igigilö than, hwán hnyi ke keihen metáiny uma ke ne o but hnyi ke keihen meny uma, hnyi baten taben hut me uma. 12 Ke e ame hom but nokon than, me obicá e ge korona, me ham káu únyi hnán ohnatho; ke ödrin e otílá e me me than, me hú e; me ödrin e khöúkhöú hnyam me ha, ka habe, Khong lö omelö than. 13 Ke a löng ut Athalia medien hnyat tue me tavat, me e ame he ka tavat hnyi uma umö Iehova: 14 me haba momo ame wá, ke wá bi, ame tot than hnyi tap, helá me hwakecin, me tha e me than ta je taben me ta je trutru; ke ame senyin tavat bia hnyi hnyei me tuö trutru. Ke haba Athalia ame kia anyin je úkhaú, me hongot, ka habe, Úhúgúnö than, úhúgúnö than dut ang. 15 Haba Jehoiada at bihut ame huna ka je taben haded tavat musö uttavat me ha ködrin, ka habe, Hom but momo ka hnyi wanben li deö vat; ke haba at ame he hoton, hlingá ju ge hele vat: anyin a at bihut ame ha, ka habe, ca he ka hlingá

momo hnyi uma umö Iehova. 16 Me ödrin e hna deny hobi káu momo; me momo ame vheno gethen deny je hors ka hnyi uma umen than: me adre me hlingá momo eling.

17 Haba Jehoiada ame ányá ke úhihi-nyköu wanbö Iehova, me than me tavat, me me lakei Iehova ödrin; wanben than me tavat minya. 18 Haba tavat hnyi hnyei hia adre me didró ka hnyi uma umö Baala me kia but e; ke ödrin e thu omomono anyin je taben hut, me je hna theatá e bi, me hlingö Matana at bihut kö Baala cicö je taben hut. Ke haba at bihut ame otílá tavat tuö uma umö Iehova. 19 Ke e ame hom je taben haded, me tavat Keri me tavat tue, me aten hia hnyei; me ödrin e utut me than únyi hnyi uma umö Iehova, me he hnyi gethen homagöüleny tavat tue ka hnyi uma umen than. Ke e ame tabá theroniny je than. 20 Me ame senyin tavat hia hnyi hnyei, ke ame laba wia taun: ke ödrin e hlingö Athalia ge hele vat hnyi umen than.

21 Ke seven ta hunai Joasa hnyi ün e ame hwán ka than.

HNYIMAKAN 12.

A ME hwán Joasa ka than hnyi hunainy musi a seveni Jehu: k' ame musi hnyi Jerusalema hnyi je huna a fáte; haba ien hinyen me Zibia momo Bere-seba. 2 Ke haba Joasa ame ányá únyi ae so hnyi hnyimakö Iehova hnyi bongon ta je bong hia; wale hnö Jehoiada at bihut hna ná e. 3 Ke so bi adre me ca ohia je dok ae görany: ke haba tavat adre me bi hut bala me leú utö ae bo so hnyi je dok ae gorany.

4 Ke haba Joasa ame ha ka tavat bihut, ka habe, Haba je mone hia ae kap wale adre me labö hom ka hnyi uma umö Iehova, a mone cici, wale mone anyin tavat adre ve úcú, me mone hia a únykúme tavat he ka hom ka hnyi uma umö Iehova, 5 me hamen tavat bihut he ka ve kap únyi ge je lahanödrin: me adre me he ka okhötá je dok ae hmouca hnyi uma, wale je dok ae hmouca adre me he bi ka wá. 6 Ke haba hnyi huna a twente theri anyi Joasa a than me haba tavat bihut ödrin e tiga (a okhötá je dok ae hmouca hnyi uma. 7 Me haba Joasa than ame hawo Jehoiada at bihut, me tavat bihut, me ha ködrin, ka habe, Ieú gabun öbun e ca okhötá je dok a hmouca hnyi uma? ke walang ang ca kap

hmetu bi je mone únyi ge je lahanöbun, ke so bi ham but e hnân hobi kâu je dok ae hmouca hnyi uma. 8 Me haba tavat bihut ödrin e ogâ a ödrin e ca he hmetu ka kap mone únyi ge tavat, ke haba khaca ödrin e ca he ka okhötâ je dok ae hmouca hnyi uma. 9 Me haba Jehoiada at bihut ame hom ke tang me köu moko hlinginy, me ip e hnyi baten taben hut, hnyi ge keihen a metân at ame he ka hnyi uma umö Iehova : ke haba tavat bihut a tavat tuö homagöule ödrin e hitangen eling ta je mone hia adre me hom ka hnyi uma umö Iehova. 10 Ke hnyi únen ödrin e wâ a e gan mone hnyin tang, me ame o but at sihnalimen anyin than, tha e me at bihut ae beönuua, me ödru me hitangen me aú je mone adre me wâ hnyi uma umö Iehova. 11 Ke ödru me ham mone wale adre hia but tuluto ka hnyi hnyamen tavat ödrin e ányâ huliwa, tavat tuö uma umö Iehova : me ödrin e bi hwan tavat tretrau utö, me tavat up uma, tavat adre me huliwan uma umö Iehova ; 12 me hobi kâú minya tavat up veto, me tavat tretrau veto, me hnân úcú utö, me je veto adre tretrao he ka okhötâ je dok ae hmouca hnyi uma umö Iehova, me hobi kâu ta je únyi hia adre úco hobi kâu uma he ka ányâwia e. 13 Ke adre ca ányâ hobi kâu uma umö Iehova je utkaia sileva, me uthe-siún, me je kaia me je trutru, me je kaia gol, me je kaia sileva, únyi hnyi mone adre hom ka hnyi uma umö Iehova : 14 anyin a ödru me ham e ka tavat ányâ huliwa : ke ödrin e ányâwia uma umö Iehova ge mone eling. 15 Ke haba khaca ödru me ca tuluto ka tavat, wale ödru me ham ködrin mone he ka ham ka tavat huliwa : anyin a ödrin e khenâ hnathoâ. 16 Haba moneiny je hudiny hulö, me moneiny je hudiny monu, adre ca hom ka hnyi uma umö Iehova : ke hobi kâu tavat bihut e.

17 Ke haba Hazaela than Suria ame he me vat hnyi Gatha, me hügúna e : ke Hazaela ame hnyimakan he ka he Jerusalema ai. 18 Haba Joasa than Juda ame hom ta je únyi hia ae kap, wale a okabâ Jehosafata, me Jorama, me Ahazia, a lakamen, je than Juda, me anyin bi ta je únyi ae kap, me ta je gol hia adre me wâ hnyi hna ip omjeú hnyi uma umö Iehova, me uma umen than, me kunâ kö Hazaela than Suria : me e ame he but úheny Jerusalema. 19 Ke haba kolon je hna ányâ hnö Joasa, me anyin ta je huliwa, hawa, adre ca sihnalimen hnyi tusi hnân ha je bong bongon je than Juda?

20 Ke ame todrö lathnyabai Joasa, me sihnân, me hlingâ hnyi uma hnyi Milo, gethen úheny Sila. 21 Ke haba Jozakara nöku Simeatha me Jehozabada nöku Somera, a li athnyabainy, ödru me kot e, me e ame mokcu : ke adre me konâm e tha e me lakamen hnyi taun anyi Davita : k'ame than biju Amazia a nokon hwaban.

HNHYIMAKAN 13.

KE haba hnyi hunu a twente theri anyi Joasa nöku Ahazia, than Juda, ame hwân dö Jehoaza nöku Jehu he ka than hon Isaraela hnyi Samaria, ke ame musu hnyi je hunu a seventin. 2 Ke e ame ányâ únyi ae kong hnyi hnyimakö Iehova, k' ame hnu hoton je hulö anyi Jeroboama noku Nebata, at ame okúâ hwakecin ae kong hnyi Isaraela ; e ame ca saú únyi hnyin. 3 Me ame ubáhlâ thö hmönyin anyi Iehova ka at Isaraela, me e ame hn' ödra ka hnyi hnyamö Hazaela than Suria, me ka hnyi hnyamö Ben-adada nöku Hazaela hnyi je bong hia. 4 Ke haba Jehoaza ame khöú kö Iehova, me Iehova ame löng kâu ; anyin a e ame wâ hnödra hna okongoâ at Isaraela : anyin a than Suria ame okongu ödrin. 5 (Me haba Iehova ame ham ka at Isaraela at úhömeli, m' ödrin e didrut únyi hnyi hmelen hnyamen at Suria : k'ame laba hnyi umödrin je uma mano lakon Isaraela helâji me ehac. 6 Ke so bi ödrin e ca saú but únyi hnyi ta je hulö anyin lap anyi Jeroboama, at ame okúâ hwakecin ae kong hnyi Isaraela, ke ödrin e vheno e : k'ame tot bala bi Aseira hnyi Samaria.) 7 Ke e ame ca hna tavat kö Jehoaza, ke so bi ödrin fifte thibi a tavat tabö hors, ke ten je kariota, ke ten thauzan tavat he hon kânâ ; anyin a than Suria ame ohí' ödrin, me wí' ödrin me me helâ me sesâ adre me utö. 8 Ke haba kolon je hna ányâ hnö Jehoaza, me ta je únyi hia e ame ányâ, me tang hwegien, hawa, adre me ca sihnalimen hnyi tusi hnân ha je bong bongon je than Isaraela? 9 Ke ame mokut ut Jehoaza tha e me lakamen, me adre me konâm e hnyi Samaria : k'ame than biju Joasa a nokon hwaban.

10 Ke haba hnyi hunu a thöte seven anyi Joasa than Juda me ame hwân dö Joasa nöku Jehoaza ka than hon Isaraela hnyi Samaria, ke ne o but hnyi je hunu a sikstin. 11 Ke e ame ányâ únyi ae kong

hnyi hnyimakö Iehova ; k' ame ca saü únyi hnyi ta je hulö hia anyi Jeroboama nöku Nebata, at ame okúá hwakecin ae kong hnyi Isaraela : ke e ame vhenö e. 12 Ke haba kolon je hna ányâ hnö Joasa, me anyin ta je huliwa, me tang hwegien, wale e ame vat me Amazia than Juda, hawa, adre ca sihnalimen hnyi tusi hnân ha je bong bongon je than Isaraela? 13 Ke ame mokut ut Joasa tha e me lakamen ; ke ame tabâ biju Jeroboama anyin theron : ke adre me kônim Joasa hnyi Samaria tha e me je than Isaraela.

14 Ke ame takú Elisaia mok wale e ame he ka mokcu hnyin : ke Joasa than Isaraela ame he káu me tenge gan, me ha, ka habe, cica, cica, kariota anyi Isaraela, me anyin tavat tabö hors ! 15 Haba Elisaia ame ha káu, ka habe, Hom dö cafana me thi fana. Me e ame hom cafana me thi fana. 16 Ke e ame ba ka than Isaraela, ka habe, Ip dö hnyamâm hon cafana : me e ame ip hnyamen. Ke haba Elisaia bi ame ip li hnyamen hon li hnyamen than. 17 Ke haingen ka habe, Khöng ut mamalama eiö : ke e ame khöng ut. Ke haingö Elisaia, ka habe, Hlec ut : me e ame hlec. Haingen, ka habe, Fana hnân úhömeli anyi Iehova, wale fana úhömeli ga Suria : anyin a u me he ka kot at Suria hnyi Afeka, ke ne o but u je hia but ohí' ödrin. 18 Ke haingen, ka habe, Hom dö thi fana : me e ame hom. Ke haingen ka than Isaraela, ka habe, Kot ju kánâ : ke e ame kot a ga okun hna, me soju. 19 Haba aten Khong ame hmönyin káu, me ha, ka habe, Hamâm eja he ka kot, ame ne faiv, ame ne siks hna hna ; ke wale u ma kuc Suria ke ne o but ame ba but : ke haba walang ang u me he ka kot Suria ama okun thibi.

20 Ke ame mokcu Elisaia me ödrin e konâm e. Ke haba hnyi ioiny huna me ame o but je deö vat anyin at Moaba hon hnyei. 21 Ke hnyi ke bong, ödrin e tiga konâm ke komok, ke wâ bi, ödrin e wâ ke deö vat ; me ödrin e khúâ komok ka hnyi hu Elisaia : ke ame mádrâ hnen komok je jeü Elisaia, me e ame möt hmetu thö, me tot.

22 Ke haba Hazaela than Suria ame okongoá at Isaraela hnyi ta je bong hia thithö bongu Jehoaza. 23 Ke haba Iehova ame betenge gadrin, me hmak gadrin, me ö' drin, can anyin úhibinyköu me Aberahama, me Isaaka, me Jakob ; ke ca weny bi he ka ohí' ödrin, me digic ödrin bala únyi hnyi

hnyimakan. 24 Ke ame mokcu Hazaela than Suria ; k' ame than biju Ben-adada a nokon hwaban. 25 Haba Joasa nöku Jehoaza ame hügúnâ hmetu je taun únyi ga Ben-adada nöku Hazaela, waleji a hügúnâ únyi ga Jehoaza a kamen hnen vat. Ke Joasa ame okun kot e, me hügúnâ hmeto je taun anyin at Isaraela.

HNYIMAKAN 14.

KE haba hnyi huna a loi Joasa nöku Jehoaza than Isaraela, me ame hwân Amazia nöku Joasa than Juda he ka than. 2 Twente faiv je hunainy hnyi úen e ame hwân ka than ; ke e ame musi hnyi Jerusalema twente nain ta je huna : ke haba ien hinyen, me, Jehoadana a momo Jerusalema. 3 Ke e ame ányâ únyi ae so hnyi hnyimakö Iehova, he so bi a ca helâ me Davita a kiben : k' ame ányâ hia hoton hna ányâ hnö Joasa a kamen. 4 Ke so bi adre me ca ohia je dok ae görany : ke haba tavat adre me bi hudo bala bi je hut me leü ütö ae bo so hnyi je dok ae görany. 5 Ke adre hia but ohmâ dökhü hnyi hnyamen, me e ame hlingâ li athnyabainy a li at ödre hlingâ than a kamen : 6 ke e ame ca hlingâ lakon li at úhlingö : helâ me hna sihnalimen hnyi tusi hnanyibu anyi Mose, waleji a húna Iehova, ka habe, Adre me ca he ka hlingâ je kamen can je nokon, ke haba khaca adre me ca he ka hlingâ je lakon can je kamen ; ke adre me he ka ve hlingâ at can anyin bi hulö. 7 Ke e ame kot at Edoma hnyi thopiny sált, a ödrin ten thauzan, me húgúnâ Sela hnyi vat, me hwenyi ien me Jokeheela ke ne o but hnyi bong ang.

8 Ke haba Amazia ame kunâ je úthu-metu kö Joasa nöku Jehoaza, nöku Jehu, than Isaraela, me ha, ka habe, Ötu me he ka úhnyimakötüköu. 9 Me Joasa than Isaraela ame úkhünöng kö Amazia than Juda me ha, ka habe, Haba iwadekonginy Lebanona ame úkhünöng ka arasiny Lebanona, me ha, ka habe, Ham dö nokom hlu me me áîân nökkuk : he haba ke menoiny hnyeuten Lebanona ame he ehele me ututo iwadekong. 10 E hnathu u je kot at Edoma, k' ame ogöranyi u ge hnyekom bi : senyin dö, ke laba ju hnyi hnyabam ; anyin a ieü u me he ka okúâ monu, me u me he ka ta me at Juda a tha ödrin möu? 11 Ke Amazia ame höcö löng. Me haba Joasa than Isaraela ame he ; ke e me Amazia than Juda ödrü me úhnyimaködrüköu hnyi Bethese-

mes hanen hneyi Juda. 12 Ke Juda ame ngâ but hnyi hnyimakan Isaraela; me ödrin e ve kec ka hnyi umödrin je uma mano. 13 Ke haba Joasa than Isaraela ame hum Amazia than Juda, nöku Joasa, nöku Ahazia, hnyi Bethesemes, me o hnyi Jerusalem, me kia hna up haginy veto hnyi Jerusalem hwan hnyi homagöüleny Eferaima ke ne o but hnyi homagöüleny obiny bahebet, foa haded je kubit. 14 Ke e ame hom gol hia, me sileva, me ta je kaia hia adre me wâ hnyi uma umö Iehova, me hnyi hnyeuleny omjeü hnyi uma umen than, me tavat adre hügünâ me hnân hwaban hneyi, me adre me hmetu Samaria ai. 15 Ke haba kolon je hna ânyâ hnö Joasa, me anyin ta je huliwa hia, me tang hwegien, me hnen hna vat me Amazia than Juda, hawa, adre ca sihnalimen hnyi tusi hnân ha je bong bongon je than Isaraela? 16 Ke ame mokut ut Joasa tha e me lakamen, me adre me konâm e hnyi Samaria tha e me je than Isaraela; ke ame than biju Jeroboama a nokon hwaban.

17 Ke ame möt Amazia nöku Joasa than Juda hwaban dö a mokcu Joasa nöku Jehoaza than Isaraela, hnyi fiftin je huna. 18 Ke haba kolon je hna ânyâ hnö Amazia, hawa, adre ca sihnalimen hnyi tusi hnân ha je bong bongon je than Juda? 19 Ke ödrin e sihnân e hnyi Jerusalem; ke e ame kec Lakisa ai: ke ödrin e ükhünöng hoton Lakisa ai, me ödrin e hlingâ eling. 20 Ke ödrin e hom e hon je hors: ke adre konâm e hnyi Jerusalem tha e me lakamen hnyi taun anyi Davita. 21 Haba tavat Juda hia ödrin e hum Azaria, wale a sikstin dut je hunainy, me otilâ e ka than hnân hwabö Amazia a kamen. 22 Haba e ame op Elath me ham hmetu e ka at Juda, hwaban dö a mokut ut than tha e me lakamen.

23 Ke haba hnyi huna a fiftini Amazia nöku Joasa than Juda, me ame hwan ka than Jeroboama nöku Joasa than Isaraela hnyi Samaria, ke ne o but hnyi fâti wan je huna. 24 Ke e ame ânyâ ünyi ae kong hnyi hnyimakö Iehova: k' ame ca saü ünyi hnyi ta je hulö hia anyi Jeroboama nöku Nebata, at ame oküâ monu hnyi Isaraela. 25 Ke ame hom hmeto hnyigöülen Isaraela hwan hnyi gethen üheny Hamath ke ne o but hnyi köiöiny hneyi ae tha hon, helâ me hofuc ho Iehova Khongu Isaraela, waleji e ame ha a deny athnyabainy a Jona nöku Amitai, profeta, üheny Gathahefera. 26 Anyin a Iehova ame wâ vec

anyin at Isaraela ae ti gan: anyin ae ba at adre ca, ke ba at he monu, ke ba ühadruo hnyi Isaraela. 27 Ke Iehova, ame ca ha a g' ame he ka kot degecâ but iö Isaraela ünyi eang hmeledrany: me e ame omeli ödra ge hnyamö Jeroboama nöku Joasa. 28 Ke haba kolon je hna ânyâ hnö Jeroboama, me anyin ta je huliwa hia, me tang hwegien, me hnen hna vat, me hom hmetu Damaseko, me Hamath hnyi Juda, hobi kâu Isaraela, hawa adre ca sihnalimen hnyi tusi hnân ha je bong bongon je than Isaraela? 29 Ke ame mokut ut Jeroboama tha e me lakamen je than Isaraela; ke ame than biju Zakaria a nokon hwaban.

HNYIMAKAN 15.

KE haba hnyi huna a twente seveni Jeroboama than Isaraela, me ame hwan Azaria nöku Amazia than Juda he ka than. 2 Sikstin dut je hunainy hnyi üen e ame hwan ka than; ke e ame musi hnyi Jerusalem fiftu tu je huna: haba ien hinyen, me, Jekolia momo Jerusalem. 3 Ke e ame ânyâ ünyi ae so hnyi hnyimakö Iehova, helâ me ta je ünyi hia a ânyâ Amazia a kamen. 4 Ke so bi adre me ca ohia je dok ae görany: ke haba tavat adre me bi hut bala, me leü utö ae bo so hnyi je dok ae görany. 5 Ke haba Iehova ame kot than, ke a lepera bala bi, ke ne o but hnyi bong e ame mokcu hnyin, ke e ame laba hnyi uma uö komok. Ke Jotham nokon than ame musö hnyaba, me owisa tavat a aten hneyi. 6 Ke haba kolon je hna ânyâ hnö Azaria, me anyin ta je huliwa hia, hawa, adre me ca sihnalimen hnyi tusi hnân ha je bong bongon je than Juda? 7 Ke ame mokut ut Azaria tha e me lakamen; me ödrin e konâm e tha e me lakamen hnyi taun anyi Davita: ke ame than biju Jotham a nokon hwaban.

8 Ke haba hnyi huna a thöte eit anyi Azaria than Juda, me ame than dut Zakaria nöku Jeroboama hon Isaraela hnyi Samaria hnyi siks je tehi. 9 Ke e ame ânyâ ünyi ae kong hnyi hnyimakö Iehova, helâ me hna ânyâ hnen lakamen: e ame ca saü ünyi hnyi ta je hulö anyi Jeroboama, nöku Nebata, at ame oküâ monu hnyi Isaraela. 10 Ke haba Saluma nöku Jabese ame sihnân e, me kot e hnyi hnyimakan tavat, me hlingâ, me e ame than biju hwaban. 11 Ke haba kolon je hna ânyâ hnö Zakaria, wâ bi, adre hia but sihnalimen hnyi tusi hnân ha je

bong bongon je than Isaraela. 12 Wale hofuc ho Iehova a ha kö Jehu, ka habe, Ame he je mâtrânâm ka tabâ theron hnyi Isaraela ke ne o but hnyi dö a vakiny. Me adre helâe.

13 Ke ame hwân Saluma nöku Jabese he ka than hnyi hunu a thöte naini Uzia than Juda; ke e ame musî hnyi Samaria hnyi khaca tehi. 14 Ke ame he thö Menahema nöku Gadi ûheny Tirezâ, me o hnyi Samaria, me kuc Saluma nöku Jabese hnyi Samaria, me hlingâ e, me e ame than biju hwaban. 15 Ke haba kolon je hna ânyâ hnö Saluma, me hnen hna sihnân wale e ame ânyâ, wâ bi, adre hia but sihnalimen hnyi tusi hnân ha je bong bongon je than Isaraela. 16 Ke haba Menahema ame kot Tifesa me tavat hia hnyin, me hnyi hnyigöulen e, hwân Tirezâ : anyin a ödrin e ca khöng homagöule kâu, me e ame kot e ; me e ame kave je erkin hia.

17 Ke haba hnyi hunu a thöte naini Azaria than Juda, ame hwân Menahema nöku Gadi ka than hon Isaraela ten je hunu hnyi Samaria. 18 Ke e ame ânyâ ûnyi ae kong hnyi hnyimakö Iehova : e ame ca saü, hnyi bongon je bong hia, ûnyi hnyi ta je hulö anyi Jeroboama, nöku Nebata, at ame oküâ monu hnyi Isaraela. 19 Ke ame o but Pula than Asuria he ka vat me hnyeî ; ke haba Menahema ame ham kö. Pula khaca thauzan talan sileva, me me hadruâ e he ka ohmâ dökhu unyin. 20 Ke Menahema ame hom mone hnyi Isaraela, gadrin hia tavat ae tren omjeü, üsa fifte je sekel sileva, he ka ham ka than Asuria. Ke haba than Asuria ame he hmetu, ke ame ca laba bi eling hnyi hnyeî. 21 Ke haba kolon je hna ânyâ hnö Menahema, me anyin ta je huliwa hia, hawa adre me ca sihnalimen hnyi tusi hnân ha je bong bongon je than Isaraela ? 22 Ke ame mokut ut Menahema tha e me lakamen ; k' ame than biju Pekahia a nokon hwaban.

23 Ke haba hnyi hunu a fiftei Azaria than Juda, me ame hwân Pekahia nöku Menahema ka than hon Isaraela hnyi Samaria hnyi lo li hunu. 24 Ke e ame ânyâ ûnyi ae kong hnyi hnyimakö Iehova : k' ame ca saü but ûnyi hnyi je hulö anyi Jeroboama, nöku Nebata, at ame oküâ monu hnyi Isaraela. 25 Ke haba Peka, nöku Remalia, taben anyin vat ame sihnân e, me kot e hnyi Samaria, hnyi uma umen than, tha e me Aregoba me Arie ; ke tha e mē at Gileada a ödrin fifte : ke ame hlingâ e me

ame than ju hwaban. 26 Ke haba kolon je hna ânyâ hnö Pekahia, me anyin ta je huliwa hia, wâ bi, adre hia but sihnalimen hnyi tusi hnân ha je bong bongon je than Isaraela.

27 Ke haba hnyi hunu a fifte tui Azaria than Juda, me ame hwân Peka nöku Remalia ka than hon Isaraela hnyi Samaria, twente je hunu. 28 Ke e ame ânyâ unyi ae kong hnyi hnyimakö Iehova : k' ame ca saü but ûnyi hnyi je hulö anyi Jeroboama nöku Nebata, at ame oküâ monu hnyi Isaraela. 29 Ke haba hnyi je bong bongu Peka than Isaraela ame o but Tigelathepilesera than Asuria, me húgünâ Ijon, me Abela-bethemaka, me Janoa, me Kadesi, me Hazora, me Gileada, me Galiläia, hnyeî hia Nafatali ; me e ame hum ödrin hia a je hwenbâ Asuria ai. 30 Ke haba Hosea nöku Ela ame sihnö Peka nöku Remalia, me kot e, me hlingâ, me e ame than biju hwaban, hnyi hunu twentei Jotham nöku Uzia. 31 Ke haba kolon je hna ânyâ hnö Peka, me anyin ta je huliwa hia, wâ bi, adre hia but sihnalimen hnyi tusi hnân ha je bong bongon je than Isaraela.

32 Ke haba hnyi hunu a loi Peka nöku Remalia than Isaraela, me ame hwân Jotham nöku Uzia than Juda, he ka than. 33 Twente faiv je hunainy hnyi ün e ame hwân ka than ; ke e ame musî hnyi Jerusalem sikstin je hunu : ke haba ien hinyen, me, Jerusa momo nöku Zadoka. 34 Ke e ame ânyâ ûnyi ae wisa hnyi hnyimakö Iehova : e ame ânyâ helâ me ta je ûnyi hia a ânyâ hnö Uzia a kamen. 35 Ke so bi adre ca ohia je dok ae görany : haba tavat ödrin e bi hut bala bi me leü ütö ae bo so hnyi je dok ae görany. E ame op homagöule walethö hnyi uma umö Iehova. 36 Ke haba kolon je hna ânyâ hnö Jotham, me anyin ta je huliwa hia, hawa, adre ca sihnalimen hnyi je tusi hnân ha je bong bongon je than Juda ? 37 Hnyi je bong eling Iehova ame hwân he ka kunö Rezina than Suria, me Peka nöku Remalia, he ka vat me Juda. 38 Ke ame mokut ut Jotham tha e me lakamen, me adre me konâm e tha e me lakamen hnyi taun anyi Davita a kiben : ke ame than biju Ahazi a nokon hwaban.

HNHYIMAKAN 16.

KE haba hnyi huna a seventini Peka nöku Remalia me ame hwân ka than Ahaza nöku Jotham than Juda. 2 Twente but hunai Ahaza hnyi tien e ame hwân ka than; ke e ame musi hnyi Jerusalema sikstin je huna: ke e ame ca ânyâ únyi ae wisa hnyi hnyimakö Iehova a Khongon, helâ me Davita a kiben. 3 Ke e ame vhenogethen deny je than Isaraela, eke, me kunâ nokon he ka he hnyi wanben meic, helâ me hwakecin ae ikiki anyin ke je hnyei, waleji a obâ Iehova hnyi hnyimakan lakon Isaraela. 4 Ke e ame bi hut me leû ütö ae bo so hnyi je dok ae görany, me hon je dok ae hut, me hmelen je üö hia ae hât. 5 Ke haba Rezina than Suria, me Peka nöku Remalia than Isaraela, ödrü me he Jerusalema ai he ka vat: me ödrü me theling Ahaza, ke ca tudrin bi. 6 Haba hnyi üen eling Rezina than Suria ame hûgûnâ hmetu Elath hobi kâu Suria, me obâ at Juda úheny Elath: ke ame o at Suria Elath ai me laba eling, ke ne o but hnyi bong ang. 7 Haba Ahaza ame kunâ je úthumetu kö Tigelathi-pilesera than Asuria, me ha, ka habe, Inya ang athnyabaem me nokom: aiö u, me omeli nya únyi hnyi hnyamen than Suria, me únyi hnyi hnyamen than Isaraela, hnyat adre me tot kõnya. 8 Ke haba Ahaza ame hom sileva me gol adre me wâ hnyi uma umö Iehova, me hnyi hna ip omjeú hnyi uma umen than, me kunâ e hnân bwihlany ka than Asuria. 9 Me haba than Asuria ame löng kâu: me ame he than Asuria Damaseko ai, me hûgûnâ e, me hom tavat adre hom bá Kira ai, me hlingö Rezina. 10 Ke ame he Ahaza than Damaseko ai he ka úkhanö me Tigelathi-pilesera than Asuria, ke e ame wâ taben hut hnyi Damaseko: me Ahaza a than ame kunâ úthumetu kö Uria at bihut he ka ha bongon e, me tulutiny, hoton hia hna huliwan. 11 Me haba Uria at bihut ame otilâ taben hut: hoton hia hna kunâ hnö Ahaza than úheny Damaseko, me Uria at bihüt ame ânyâ helâe hobi kâu e ka o hmetu Ahaza than úheny Damaseko. 12 Ke ame o but than úheny Damaseko, me e ame wâ taben hut: me haba than ame hakekenyâ taben hut, me hudo hut hon. 13 Me e ame le hudiny leû, me budiny han, k'ame hingálâ hudiny ic, me e ame dukâiâ dra dren hudiny ole hon taben hut. 14 Ke e ame oc taben

hut a bras wale ame tot hnyi hnyimakö Iehova, únyi hnyi hnyimakan uma, wale únyi hnyi wanben anyin taben hut me uma umö Iehova, me ip bi hnyi ke keihen anyin taben hut ka hnyi hwadrö. 15 Ke haba Ahaza than ame hûna kö Uria at bihut me ha, ka habe, Adre me he ka le hon taben hut ae gan hudiny leû anyin hnyomakatu, me hudiny han anyin sahad, me hudiny leû anyin than, me anyin hudiny han, me hudiny leû anyin tavat hia hnyi hnyei, me anyidrin hudiny han, me anyidrin hudiny ic; me dukâiâ hon e dra hia dren hudiny leû, me dra hia dren hut: ke haba taben hut a bras me hnân hobi kõnya bi hnân hnei hnyin. 16 Me Uria at bihut ame ânyâ hia helâ me hna hûna hnö Ahaza than. 17 Ke haba Ahaza ame subâ degecâ je baten je taben, me oc únyi hnyi hon je taben sö; me oc kâú taben köiö únyi hnyi hon je bolok a bras eú hmelen, me ip bi hon hna bi dek veto. 18 Ke haba gethen adre bi ban ethö hon hobi kâu bong sabbath, wale adre me ânyâ hnyi uma, me gethen deny than hnyön, me e ame wia únyi hnyi uma umö Iehova, can than Asuria. 19 Ke haba kolon je hna ânyâ hnö Ahaza wale e ame ânyâ, hawa, adre ca sibnalimen hnyi tusi hnân ha je bong bongon je than Juda? 20 Ke ame mokut ut Ahaza tha e me lakamen, me adre me konâm e tha e me lakamen hnyi taun anyi Davita: ke ame than biju Hezekia a nokon hwaban.

HNHYIMAKAN 17.

KE haba hnyi huna a twelvi Ahaza than Juda, me ame hwân Hosea nöku Ela ka than hnyi Samaria hon Isaraela, nain je huna. 2 Ke e ame ânyâ únyi ae kong hnyi hnyimakö Iehova, ke so bi e ca helâ me je than Isaraela a bán. 3 Ke ame o kâu vat ga Salemanesa than Asuria; ke haba Hosea ame bi athnyaba kâu, me ham kâu je bwihlany. 4 Ke a wâ but than Asuria hna sihnân ga Hosea; anyin a e ame hia but kunâ je úthumetu kö So than Aigupito, me ca kunâ ke bwihlany ka than Asuria, helâ me hnen hna labö ânyâ hnyi ke huna me ke huna: anyin a wale haba than Asuria ame hlöng hwanuma kâu, me ca e hnyi uma ceat. 5 Haba than Asuria ame vhenö hnyei hia, me he Samaria ai, me thelöng e hnyi kun ta huna. 6 Ke hnyi huna a nain Hosea, haba than Asuria ame hûgûnâ Samaria, me hom Isaraela Asuria ai, me ip ödrin hnyi Hala.

II. JE THAN 17.

me Habora, hnyi wagewe Gozana, me je taun anyin at Madai. 7 Ke helâe anyin a je lakon Isaraela ame kong hwacacidrin kö Iehova Khongudrin, at a hum ödrin únyi hnyi hnyeí Aigupito únyi hnyi hmelen hnyamö Farno than Aigupito, me ouden je khong, 8 me vheno je hnanyibu anyin je hnyeí, wale a obâ Iehova hnyi hnyimakan lakon Isaraela, me je hnanyibuiny je than Isaraela, wale ödrin e otilâ. 9 Ke haba lakon Isaraela ödrin e ânyâ duongâ je únyi ae ca wisa bi kö Iehova Khongudrin; ke ödrin e otilâ hobi ködrin bi je dok ae görany hnyi anyidrin je taun hia, hwân hnyi tap anyin tavat hmâkâ, ke ne o but hnyi taun adre up veten. 10 Ke ödrin e otilâ hobi ködrin bi je veto ame tot, me je Aseira hon je bucen hia, me hmelen je úo hia ae hât: 11 ke ödrin e leú utö ae bo so eling hnyi je dok ae görany hia helâ me je hnyeí wale a oc degecâ Iehova hnyi hnyimaködrin; ke ödrin e ânyâ je únyi ae kong he ka ohmönyini Iehova: 12 ke ödrin e bi athnyaba ka je idola, waleji a ha Iehova ködrin, ka habe, Ca he öbun ka ânyâ únyi e. 13 Ke so bi haba Iehova ame haimemenâ ka Isaraela, me Juda, a deny je perofeta hia, me tavat wâ hia, me ha, ka habe, Hwiö thö únyi hnyi debun ta je gethen ae kong, ke tuö ju hnök je hna húna, me anyik je hnanyibu, helâ me je hnanyibu hia waleji oge húna ka lakamöbun, me kunâ köbun a deny je athnyabaik a je perofeta. 14 Ke so bi ödrin e höcö löng, me ohwegiâ je nyidrin, helâ me nyin je lakamödrin, tavat adre me ca labageju bi kö Iehova Khongudrin. 15 Ke ödrin e hna degecâ anyin je hnanyibu, me anyin úhinyköu waleji e ame ânyâ me lakamödrin, me hnen je hna ohna-thoâ ködrin; ke ödrin e hnu hoton únyi ae únyi baú, me ödrin e hop bi, me hnu hoton je hnyeí igigili ödrin, waleji a ha Iehova a ödrin e ca he ka ânyâ e úcú mödrin. 16 Ke ödrin e hna degecâ je hna húna hnö Iehova Khongudrin, me ânyâ hobi ködrin je idola adre oköiâ, a li nokon kau, me ânyâ Aseira me khudrung ka je únyi hia hnyi drany, me bi athnyaba kö Baala. 17 Ke ödrin e kunâ lakudrin je бага me hlu he ka he hnyi wanben meic, me bi khong, me biobotkong, me úcú ödrin bi he ka ânyâ hulö hnyi hnyimakö Iehova, he ka ohmönyiná e. 18 Anyin a wale Iehova ame hmönyin gan hmâ kö Isaraela me kun' ödrin dut únyi hnyi hnyimakan: e ba köluidrín, ke hake so thiju tribu anyi Juda.

19 Ke haba Juda minya ame ca tuö je hnanyibu anyi Iehova Khongudrin, ke ödrin e vheno je hnanyibu anyin je than Isaraela waleji ödrin e otilâ. 20 Haba Iehova ame hna degecâ je mâtrâni Isaraela hia, me oveci ödrin, me hn' ödrin ka hnyi hnyamen tavat sei, ke ne o but e ame ob' ödrin únyi hnyi hnyimakan. 21 Anyin a e ame kia Isaraela únyi hnyi lap anyi Davita; ke ödrin e othani Jeroboama nöku Nebata: ke haba Jeroboama ame lili Isaraela me me ca hnu hotu Iehova, me kun' ödrin he ka ânyâ hulö ae gan hmâ. 22 Ke haba lakon Isaraela ödrin e vheno ta je hulö hia anyi Jeroboama e ame ânyâ; ödrin e ca saú but únyi hnyin; 23 ke ne o but Iehova ame hom Isaraela but únyi hnyi hnyimakan, helâ me hnen hna ha a deny je athnyabainy hia a ta je perofeta. Me adre me hom at Isaraela únyi hnyi idrin hnyeí Asuria ai, ke ne o but hnyi bong ang.

24 Ke haba than Asuria ame hom tavat úheny Babulona, me Kutha, me Ava, me úheny Hamath me Sefaravaima, me ip ödrin hnyi je tauniny Samaria hwaban lakon Isaraela: me ödrin e labâ Samaria, me laba hnyi je tauniny. 25 Ke haba hnyi ibi laba a ödrin e, me ödrin e ca outö Iehova: waleling me me kunâ je liona hnö Iehova, me hlingâ keihen gadrin. 26 Me ödrin e fuc ka than Asuria, me ha, ka habe, Haba tavat u je hia but hom me ip hnyi je tauniny Samaria, me ca khan' ödrin bongon Khongon hnyeí: anyin a wale e ame kunâ ködrin je liona, me wâ bi, ödrin e hling' ödrin, anyin ae ca khan' ödrin bi bongon Khongon hnyeí. 27 Me haba than Asuria ame húna me ha, ka habe, Adre me he ka kunâ eling ke at bihut, waleji at öbun e hom úheny e; ke ödrin e he ka he me laba eling, ke hamen he ka n' ödrin bi ge bongon Khongon hnyeí. 28 Me haba ke at bihut waleji ödrin e hom úheny Samaria ame o me laba hnyi Beth-ela me n' ödrin ge bongon he ka outö Iehova. 29 Ke so bi haba aten je hnyeí ödrin e ve ânyâ je khongudrin bi, me ip hnyin je uma hnyi je dok ae görany waleji a ânyâ at Samaria, a ta je hnyeí hia hnyi anyidrin je taun wale ödrin e labâ. 30 Ke haba at Babulona ödrin e ânyâ Sukotha-benotha, ke haba at Kutha ödrin e ânyâ Neregala, ke haba at Hamath ödrin e ânyâ Asima, 31 ke haba at Avi ödrin e ânyâ Nibehaza me Taretaka, ke haba at Sefaravaima ödrin e thong lakudrin ge meic kö Aderameleke me Anameleke a li khongon

Sefaravaima. 32 Me ödrin e outö Iehova, me otilâ hobi ködrin ke únyi gadrin, hnyat bihut hnyi je dok ae görany, a hnyat ödrin e bi hut hobi ködrin hnyi je uma umen je dok ae görany. 33 Ödrin e outö Iehova me bi athnyabainy je khongudrin, hoton hwakecin je hnyei adre hia but hum ödrin únyi hnyin. 34 Ke ödrin e ányâ hoton hwakecidrin ehac ke ne o but hnyi bong ang : ödrin e ca outö Iehova, ke haba khaca ödrin e ca ányâ hoton anyidrin je hnanyibu, me anyidrin tulut, me hoton hnanyibu me hna húna waleji a húna Iehova ka lakon Jakob, a hnyat e ame hwenyi iödrin me Isaraela ; 35 at eji Iehova ame úhahinykôu më, me húna ködrin, ka habe, Ca he öbun ka outen je khong, me nom ködrin, me bi athnyabaidrin, me bi hut ködrin : 36 Ke haba Iehova at ame hum öbun únyi hnyi hnyei Aigupito ge man ae gan me benyin ame hai, öbun e he ka outen, me khudrung kâu, me bi hut kâu : 37 ke haba je hna ohmâ, me je hna otilâ, me hnanyibu, me hna húna, waleji e ame sihnalimen hobi köbun, me öbun e he ka tuö me ányâ hnyi taogo bong hia ; ke ca he öbun ka outen ta je khong bi : 38 ke ca he öbun ka hnying hnök hna úhahinykôu möbun ; ke ca he öbun ka outen je khong : 39 ke so bi öbun e he ka outö Iehova Khongubun ; k' ame he ka omeli öbun únyi hnyi hnyamen je iwahnaihmiöny möbun hia. 40 Ke ödrin e ca löng, ke ödrin e ányâ helâ me hwakecidrin ehac. 41 Ke haba je hnyei eling ödrin e outö Iehova, me bi athnyaba ka anyidrin je hnatheat : helâe minya lakudrin, me lakon lakudrin, ödrin e ányâ helâ me hna ányâ hnen lakamödrin ke ne o but hnyi bong ang.

HNHYIMAKAN 18.

KE haba hnyi hun a kuni Hosea nöku Ela than Isaraela me ame hwân Hezekia nöku Alaza than Juda he ka than. 2 Twente faiv but hunainy hnyi úen e ame hwân ka than ; ke e ame musi hnyi Jerusalema twente nain je hun : haba ien hinyen me, Abi a nöku Zakaria. 3 Ke e ame ányâ wisa hnyi hnyimakö Iehova, helâ me hna ányâ hia hnö Davita a kiben. 4 Haba e ame obia je dok ae görany, me tho je veto ame tot, me sö degecâ je Aseira : ke e ame kot amamá on bras waleji a ányâ Mose ; anyin a lakon Isaraela ödrin e leú utö ae bo so kâu, ke ne o but hnyi bong

eling ; ke e ame hwenyi ien me Nehusetana. 5 Ke ame labageju kö Iehova Khongu Isaraela ; ke ba at a biliny ae úcú më unyin je than Juda hia, ke ba ehac. 6 Anyin a e ame kece hmâ kö Iehova, k' ame ca saú but gan, ke e ame tuö anyin ta je hnanyibu, waleji a húna Iehova kö Mose. 7 Ke haba Iehova ame tha e më ; haba hnyi je dok hia e ame he ka hnyin e ame hnalic, ke e ame hota degecâ than Asuria, me ca bi athnyabainy. 8 E ame kot at Filisiti ke ne o but hnyi Gaza, me hnyigöulen e, hwân hnyi tap anyin tavat hmákâ, ke ne o but hnyi taun adre up haginyy veto.

9 Ke haba hnyi hun a vaki Hezekia than, wale hun a seveni Hosea nöku Ela than Isaraela, me ame o Salemanesa than Asuria Samaria ai, me thelöng e. 10 Ke ödrin e húgúnâ e hnyi obiny kun ta hun : wale hnyi hun a siksi Hezekia, wale hun a naini Hosea than Isaraela, adre húgúnâ Samaria. 11 Ke haba than Asuria ame hom at Isaraela Asuria ai, me ip ödrin hnyi Hala, me Habora hnyi wageweiny Gozana, me je taun anyin at Madai : 12 anyin a ödrin e ca löng hofuc ho Iehova Khongudrin, ke ödrin e hanyâüâ anyin úhahinykôu, wale hna húna hia hnö Mose athnyabai Iehova, ke ödrin e höcö bi löng me ányâ.

13 Ke haba hnyi hun a fotini Hezekia than, ame o but Saneribi than Asuria he ka vat me je taun hia adre up haginyy veto hnyi Juda, me húgúnâ. 14 Haba Hezekia than Juda ame úkhúnöng Lakisa ai ka than Asuria, me ha, ka habe, Oge hia but monu ; hmetu ju gak : haba ta je únyi hia u me he ka ip huk me oge me he ka hom. Haba than Asuria ame bi hwaban kö Hezekia than Juda a kun ta haded talan sileva ke thöte je talan gol. 15 Ke haba Hezekia ame ham kâu ta je sileva hia adre wâ hnyi uma umö Iehova, me hnyi hna ip omjeú hnyi uma umen than. 16 Haba hnyi úen eling Hezekia ame subâ muâ gol hnyi je blinginy hwanumen uma umö Iehova, me hnyi je hmolom wale a tube Hezekia than Juda, me ham ka than Asuria. 17 Ke haba than Asuria ame kunö Tare-tana, me Rabesarisa, me Rabesake úheny Lakisa Jerusalema ai kö Hesehia than, me utbavat ae gan. Ke ödrin e he me o hnyi Jerusalema. Ke ödrin e hia but ethö, me ödrin e tot hnyi deny köioiny an ethö, wale hnyi gethen ame he ka hnyi utkánâ anyin at hnú mano. 18 Ke ödrin e hia but hawâ

than, me ame o but ködrin Eliakima nöku Hilekia, at ame musö hnyaba, me Sibena at sihnalimen, me Joa nöku Asafa at ame oünykümeâ. 19 Haba Rabesake ame ha ködrin, ka habe, Ha thö walang ang kö Hezekia, ka habe, Walang hna ha hnen than ae gan, wale than Asuria, ka habe, Ie ünyi eang u me labageju kâu? 20 Hai-ngâm, ka habe, E hu metâ me tang hwege hobi kâu vat; ke so bi hofuc baü e thibi. Ke u me labageju kö ia anyin a u me bi gan könya? 21 Wâ bi, u me bi cem ka uci hlowe ae hmetru, a Aigupito; ke e ka hlec hnyiban e ge at me ame he ka dá oâ hnyamen: helâe Faroa than Aigupito ködrin hia adre me labageju kâu. 22 Ke öbun e ne ha könya, ka habe, Öhmun e labageju kö Iehova Khonguhmun; hawa, ame ca ohia ga Hezekia anyin je dok ae görany me je taben hut, me ha ka at Juda me Jerusalema, ka habe, Walang taben hut hnyi Jerusalema öbun e he ka khudrung hnyi hnyimakan? 23 Ke walang ang u me he ka ham je haten ka tuhök than Asuria, me oge me he bi nya ka ham köu lo li thauzan je hors, a ne khanö u he ka ve otabâ ge tavat. 24 Ke ieu gam me u me ohmeto ke taben vat ae ühnyükong hmönyin anyin tuhök, m' u me labageju ka Aigupito ge je kariota me tavat tabö hors? 25 Ke hawa, oge me o but ka hnyi taun ang, ke ba Iehova unyik, he ka ohia e? Haba Iehova ame ha könya, ka habe, He thö ka hnyi hnyei ang me ohia e. 26 Me haba Eliakima nöku Hilekia, me Sebena, me Joa, ödrin e ha kö Rabesake, ka habe, Ö u fuc köhmun a lathnyabaem hnyi hwen Suria; anyin ae khan' öhmun e; ke ca fuc köhmun hnyi hwen Juda wâ e nye löng dö tavat hon hna up haginny. 27 Me haba Rabesake ame thu ködrin, ka habe, Hawa, a kunö nya tuhök ka tuhâm, möu minya, he ka ha hofuc ang? hawa, e ame ca kunö nya ka tavat adre me laba hon hna up haginny, m' adre me han tidrin me ijem hnödrin hna hwen hingat a tha ödrin möbun? 28 Ke haba Rabesake ame tot me hongot hwege hnyi hwen Juda, ka habe, Löng ju öbun hofuc hwan than ae gan, a than Asuria. 29 Walang hna ha hnen than, ka habe, Ca he ka iyaw' öbun ga Hezekia; anyin a e ame ca he ka omeli öbun ünyi hnyi hnyamen: 30 ke haba khaca ca he Hezekia ka kun' öbun he ka labageju kö Iehova, haingen, ka habe, Ame he Iehova ka omeli ötin, k' adre me ca he

ka hna taun ang ka hnyi hnyamen than Asuria. 31 Ca he öbun ka ling Hezekia: anyin a walang hna ha hnen than Asuria, ka habe, Öbun e he ka üsökou mönya, me he könya; m' öbun e he ka ve ijem wan anyibun je vine, me wan anyibun je meta, me ve ijem je an öbun e köü; 32 ke ne o but oge me o me hum öbun ka hnyi ke hnyei helâ me ibun, a hnyei ae hu whit me waina, hnyei ae hu areto me je hnyei vine, hnyei ae hu wakaco elaiö me hani, m' öbun e ka möt, me ca he ka mokcu: ke ca he öbun ka ling Hezekia, e ka cubic öbun me ha, ka habe, Iehova ame he ka omeli ötin. 33 Hawa, e hu hna omelö tavat ge je khongon je hnyei ünyi hnyi hnyamen than Asuria? 34 Ewa je khongon Hamath, me Arepada? ewa je khongon Sefaravaima, me Hena, me Iva? hawa, ödrin e hia but omeli Samaria ünyi hnyi hnyamök? 35 Ia unyin je khongon je hnyei a omelö je idrin ünyi hnyi hnyamök, me me he Iehova ka omelö Jerusalema ünyi hnyi hnyamök? 36 Ke haba tavat ödrin e laba hnyibü, me ca thu kâu ge ke hofuc: anyin a hûna than, ka habe, Ca he bi ka thu kâu. 37 Haba Eliakima nöku Hilekia, at ame musö hnyaba, me Sebena at sihnalimen, me Joa nöku Asafa at ame oünykümeâ, ödrin e o kö Hezekia me je ükhâüdrin adre kia, me thumeto e ge hofuc ho Rabesake.

HNYIMAKAN 19.

K' a löng ut Hezekia than, me e ame kia anyin je ükhaü, me khavâ mano ae gan nân, me he ka hnyi uma umö Iehova. 2 Ke e ame kunö Eliakima at ame musö hnyaba, me Sebena at sihnalimen, me je hingat bihut, ödrin e ve khavâ mano ae gan nân, kö Isaia perofeta nöku Amosa. 3 Ke ödrin e ha kâu, ka habe, Walang hna ha hnö Hezekia, ka habe, Haba bong ang bonginy vec, me ü, me ühaikonguny: anyin a o ün e a je wanakat, ke ba tang hwegien he ka hnokoâ. 4 Ame ne he Iehova Khongom ka löng la je hofuc hia ho Rabesake, wale a kunâ than Asuria a tuhan he ka haikongoâ Khong ae möt, ke e ame he ka thawâ je hofuc a löng Iehova Khongom: anyin a wale hic dö hobi kâu je kolon. 5. Me ame he je athnyabai Hezekia than kö Isaia. 6 Ke haba Isaia ame ha ködrin, ka habe, Öbun e he ka ha helâng ka tuhöbun, ka habe, Walang hna ha hnö Iehova, ka habe, Ca he bi ka outen je hofuc u je löng waleji

hnen lathnyabainy, than Asuria hna haikongu nya. 7 Wâ bi, oge me he ka ip hnyi hnyekon ke hanu, ke e ame he ka löng ke úthumetu, me me hmetu ka hnyi iny hnyei; ke oge me he ka ota e ge hele vat hnyi iny hnyei

8 Me ame hmetu but Rabesake me wâ than Asuria hnyi Lebena ame vat eling: ke e ame löng a ga he but úheny Lakisa. 9 Ke e ame löng ga Tiraka than Aithiop, ka habe, Wâ bi, e but ang, k' ame he ka vat möu; me e ame kunâ hmetu je úthumetu kö Hezekia he ka ha, ka habe, 10 Walang hofuc öbun e he ka ha kö Hezekia than Juda, ka habe, Ca he bi ka iyawö u ge Khongom at u je labageju kâu, ka habe, Adre me ca he ka hna Jerusalema ka hnyi hnyamen than Asuria. 11 Wâ bi, u je hia but löng hna ányâ hnen je than Asuria ka je hnyei hia, k' ame ohí' ödrin hia: me hawa, adre me he ka omeli u? 12 Hawa, a hia but je khongon je hnyei omeli ödrin, waleji a ohia ge lakamök, a Gozana, me Karan, me Refef, me laku Edena hnyi Thelasa? 13 Ewa thaniny Hamath, me thaniny Arepada, me thaniny taun Safaravaima, me Hena, me Iva? 14 Me haba Hezekia ame kap tusi únyi hnyi hnyamen uthumetu, me áú: me ame he Hezekia ka hnyi uma umö Iehova, me ame ulolo e hnyi hnyimakö Iehova. 15 Ke haba Hezekia ame hic hnyi hnyimakö Iehova, me ha, ka habe, Iehova lö, Khongu Isaraela, at ame laba hnyi wanben li kerubi, u thibi Khong hnyi ta je dökhü hia eang hmeledrany; u je op drany me hmeledrany. 16 Iehova lö, tevehlöng ju, me löng; ngele thö me wâ: me löng hofuc ho Saneribi, wale e ame kunâ he ka haikongoâ Khong ae möt. 17 Iehova lö, e hnathu a g' ame öba wan je hnyei me je idrin hnen je than Asuria, 18 me khûâ je khongudrin ka hnyi meic: anyin a ödrin ca je khong, ke so bi huliwa anyin li hnyamen at, a je utö me veto; waleling m' adre me ohí' ödrin. 19 Iehova lö, Khonguhmun, ö u omeli öhmun walang ang únyi hnyi hnyamen, me me khana ge je dökhü hia eang hmeledrany a u Iehova Khong, a u thibi.

20 Ke haba Isaia nöku Amosa ame úkhúnöng kö Hezekia, me ha, ka habe, Walang hna ha hnö Iehova, Khongu Isaraela, ka habe, Haba hnyi hnâm hna hic nöka ga Saneribi than Asuria, me oge hia but löng. 21 Ke walang hofuc a ha Iehova

gan, ka habe, Haba hlu baú a nöku Ziona ame hukötö u, k' ame hlumö u; k' ame nyinyikâ ban köu hnen hlu nöku Jerusalema. 22 U je úhaikonguny me bi gan kö ia? u je ha kö ia hofuc ae hwege me bi gan? ka At ae Kap anyi Isaraela. 23 U je hia but haikongo Than a deny ányâm je úthumetu me ha, ka habe, Oge ölö hon bucen, ka hnyin je ke keihen Lebanona, tha e me anyik je kariota ae se hia; ke oge me he ka sö je arasiny ae beú, me je köpiny adre úca: ke oge me he ka o ka hnyi omtabaga hnyi obiny e, hnyi hnyeutén hna belök. 24 Oge hia but khûâ an ikanyua me ic, ke haba li hnyeúcak ame he ka ohmö je wageweiny hia Aigupito. 25 Hawa, u me ca löng ge hnök hna ányâ e ehac, me op e hnyi je bong a bán? walang ang oge hia but ohwâdâ a g' ame he ka ba wan je taun adre up veten, me me je hudrei 26 Anyin ae ba maniny tavat adre me labâ e, ödrin ot me hmehma; ödrin helâ me hna önying, me úö ae ometu ae hât, me hna önying hon uma, me hwit ae meleca ae tiga ca metu bi. 27 Ke oge wâ but hnâm hna laba me hnâm hna didrut me didrö, me hnâm hna ohmönyini nya. 28 Can anyin a o but ka hnyi hnyikönyök hnâm hna ohmönyini nya, me hnâm hna bi gan könya, oge me he ka inâ anyik otru hnyi hnyingöiam, me anyik fao hnyi hnyimâm, ke oge me he ka ohmetu u hnyi gethen u je o hnyin. 29 Ke walang haten köu: a öbun e he ka han únyi ame ku hwege hnyi huna ang, ke haba hnyi huna a loiny únyi ame ku hwege minya hwaban; ke haba hnyi huna a kuniny öbun e he ka belök, me menu, me ta ta je hnyei vine me ijem wan. 30 Ke haba je kolon lap anyi Juda ae möt, ame he ka kú thö éú me wa göranyai. 31 Anyin ame he ka he úheny Jerusalema je kolon, me úheny hnyi bucen Ziona je hnyat adre me he ka möt: adre me he ka ányâ e hnen we Iehova ae gan hmâ. 32 Anyin a wale, walang hna ha hnö Iehova ge than Asuria, ka habe, E ame ca he ka o ka hnyi taun ang, me blec fana ka hnyin, me e ame ca he ka o hnyi hnyimakan, tha e me je bec, me khon kânâ kâu. 33 Ke e ame he ka hmetu hnyi gethen a o hnyin, ke e ame ca he ka o ka hnyi taun ang, haingö Iehova. 34 Anyin oge me he ka söng taun ang he ka omelö e, gak bi, me ga Davita athnyabaik.

35 Ke haba hnyi lit eling ame he but angela anyi Iehova me kot tavat a wan haded ke eite faiv thauzan hnyi hna hu-

numa anyin at Asuria : ke ame vesâ tavat hnyi hnyomakatu, me wâ bi, ôdrin je komok a mokcu hia. 36 Me ame todrö Saneribi than Asuria, me he, me laba hnyi Nineve. 37 Ke e ame laba he ka hmi hnyi uma umö Niseroka a khongon, me haba Aderameleke me Sarezera ôdru me kot e ge hele vat, me ôdru me kec ka hnyi hnyei Ararata. Ke ame than biju Esar-adon a nokon hwaban.

HNYIMAKAN 20.

KE haba hnyi ün eling ame he but Hezekia ka mokcu. Me ame o kâu Isaia perofeta nöku Amosa, me ha kâu, ka habe, Walang hna ha hnö Iehova, ka habe, Ününe thö me ânyâm lap; anyin a u me he ka mokcu, m' u ca he ka möt bi. 2 Me haba Hezekia ame hwiö hnyimakan ka hnyeige uma, me hic kö Iehova, me ha, ka habe, 3 Iehova lö, oge me khöü köu, Ö u ünükume ju walang ang hnök hna he hnathu hnyi hnyimäkâm, me hnyok ae wisa, me ânyâ ünüi ae so hnyi hnyimäkâm. Ke Hezekia ame tenge hwege. 4 Ke tiga ca o Isaia ka hnyi wanben taun, me ame o kâu hofuc ho Iehova, me ha, ka habe, 5 Hwiö hmetu thö, me ha kö Hezekia, a taben lakeik, ka habe, Walang hna ha hnö Iehova Khongu Davita a kibâm, ka habe, Oge hia but löng hijâm hic, me wâ deköiâm : me wâ bi, oge me he bi nya ka omeli ur: haba hnyi bong a kuniny u me he ka he ka hnyi uma umö Iehova. 6 Me oge me he bi nya ka bi hanen bongom je bong ama fiftin je huna; me oge me he ka omeli u me taun ang ünüi hnyi hnyamen than Asuria, ke oge me he ka söng taun ang gak bi, me ga Davita athnyabaik. 7 Ke haba Isaia ame ha, ka habe, Hom dö u wan meta. Me ôdrin e hom ünüi eling me ip hon ohuc, me e ame möt hmetu. 8 Me haba Hezekia ame ha kö Isaia, ka habe, Ieü haten a g' ame he Iehova ka omeli nya, k' oge me he ka dit ka hnyi uma umö Iehova hnyi bong a kuniny? 9 Me haingö Isaia, ka habe, Walang haten köu ünüi ga Jehova, a g' ame he Iehova ka ânyâ ünüi a ha : hawa, ame he ka he bala hmenon seünö hnyi ten je haten, ame ne he ka he hmetu hnyi ten je haten? 10 Haba Hezekia ame ha, ka habe, Ünüi ae hâhâ he ka he bala hmenon seünö ke ne o but hnyi ten je haten : ohe, e so e hmetu hmenon hnyi ten je haten. 11 Haba Isaia perofeta ame hongot kö

Iehova : ke e ame ohmeto hmenon ten je haten, wale je haten adre me vheno hnyi haten seünö anyi Ahaza.

12 Ke haba hnyi ün eling Berodakabaladana nöku Baladana, than Babulona, ame kunâ je tusi me bwihlany kö Hezekia : anyin a e ame löng ae gan imeki Hezekia. 13 Ke Hezekia ame ling ôdrin, me omanenâ ködrin uma omjeüiny hia, a sileva me gol, me je utö ae bo so, me wakaco ae gan hwaban, me umen je omjehen vat, me ta je ünüi hia ae hnyi uma omjeüiny : e ba ünüi hnyi umen uma, me dokhon dôkhu hia a ca omanenâ Hezekia ködrin. 14 Haba Isaia perofeta ame he kö Hezekia than, me ha kâu, ha habe, Ieü hna ha hnen tavat eling? ke ûhedrin ua köu? Haba Hezekia ame ha, ka habe, Ünhedrin hnyi hnyei ae sâkâü, wale Babulona. 15 Ke haingen, ka habe, Ieü ôdrin e hamâ hnyi umâm uma? Haba Hezekia ame thu, ka habe, Ödrin e hia but wâ ta je ünüi hia hnyi umök uma : e ba ke ünüi hnyi omjehek oge ca omanenâ ködrin. 16 Haba Isaia ame ha kö Hezekia, ka habe, Löng ju hofuc ho Iehova. 17 Wâ bi, ame he ka o je bong me adre me he ka tha hom Babulona ai ta je ünüi hia hnyi umâm uma, me je ünüi a ip lakâmâm ke ne o but hnyi bong ang : ke ame he ka ba kolon, haingö Iehova. 18 Ke haba ke je lakom ame he ka o ünüi gam, a je matrânâm, adre me he ka hom dö; me me je eunuka hnyi hnyaban than Babulona. 19 Haba Hezekia ame ha kö Isaia, ka habe, E so hofuc ho Iehova wale u me ha. Ke haingen minya, ka habe, Hawa, e ca so eling, ame ne hu ûsökou me hnathu hnyi bonguk je bong? 20 Ke haba kolon je lina ânyâ hnö Hezekia, me tang hwegien hia, me hnen hna ânyâ an, me bi deny köien, me oâ köiö ka hnyi taun, hawa adre ca sihnalimen hnyi tusi hnân ha je bong bongon ta je than Juda? 21 Ke ame mokut ut Hezekia tha e me lakamen : ke ame than biju Manase a nokon hwaban.

HNYIMAKAN 21.

TWELV ta hunai Manase hnyi ün e ame hwân ka than; ke ame musi hnyi Jerusalema hnyi fifte faiv je huna : haba ien binyen me, Hefeziba. 2 Ke e ame ânyâ unüi ae khong hnyi hnyimakö Iehova, hoton hwakecin ae ikiki anyin ke je hnyei, waleji Iehova ame obâ hnyi hnyimakan lakon Isaraela. 3 Anyin a e ame

otilâ hmetu je dok ae görany waleji a ohia ga Hezekia a kamen; ke e ame otilâ je taben hut kö Baala, me ânyâ ke Aseira, helâ me hna ânyâ hnö Ahaba than Isaraela, me khudrung ka ta je ûnyi hia hnyi drany, me bi athnyabaidrin. 4 Ke e ame op je taben hut hnyi uma umö Iehova, wale a ha gan Iehova, ka habe, Oge me he ka ip iök hnyi Jerusalema. 5 Ke e ame op je taben hut hobi kâu ta je ûnyi hia hnyi drany hnyi li hnyeuleny uma umö Iehova. 6 Ke e ame kunâ nokon бага he ka he hnyi wanben meic, ke e ame bibihwakecin, me bi biobotkong, me tha laba anyin tavat tren hanu ae kong, me tavat bi khong: e gan hmâ hulo e ame ânyâ hnyi hnyimakö Iehova, me me ohmönyinâ e. 7 Ke e ame otilâ Aseira, wale e ame ânyâ, hnyi uma a ha gan Iehova kö Davita me Solomona a nokon, ka habe, Haba hnyi uma ang, me hnyi Jerusalema, wale oge me úca ûnyi hnyi je tribu Isaraela hia, me oge me he ka ip iök hnyin nyiele balua: 8 ke oge me he ka hom li can at Isaraela he ka he ûnyi hnyi hnyeí oge me ham ka lakamödrin; ödrin e ne wâ wia he ka ânyâ hia hoton hnök hna hûna ködrin, me helâ me hnanyibu hia waleji a hûna ködrin Mose a athnyabaik. 9 Ke so bi ödrin e ca löng bi: ke haba Manase ame omonu ödrin he ka ânyâ ûnyi ae kong hon ta je hnyeí hia, waleji a obâ Iehova hnyi hnyimakan lakon Isaraela. 10 Ke haba Iehova ame fuc a deny je perofeta a je athnyabainy, ka habe, 11 Anyin a Manase than Juda ame ânyâ ta je ûnyi eling ae ikiki, me ânyâ ûnyi ae kong hon ta je ûnyi a ânyâ at Amora, tavat a bán, me okûâ hwakecin ae kong anyin at Juda ge anyin ta je idola: 12 anyin a wale, walang hofuc ho Iehova, Khongu Isaraela, ka habe, Wâ bi, oge me he bi nya ka oâ úokonguny hnyi Jerusalema me Juda, me me he ka umet hnyikönyen tavat, ödrin ka löng. 13 Ke oge me he ka lelö hon Jerusalema tulutiny Samaria, me tulut adre otilâ anyin lap anyi Ahaba: ke oge me he ka kot Jerusalema helâ me at ame khut kaia, ame kot e me wia hnyimen hnyikânâi. 14 Ke oge me he ka hna degecâ kolon ik, me hn' ödrin ka hnyi hnyamen je iwhnai-hmiöny mödrin; ke ödrin e he ka je bâ me hna sei hnen je iwhnaihmiöny mödrin; 15 Anyin a ödrin e hia but ânyâ ûnyi ae kong hnyi hnyimakök, me ohmönyini nya, hwân hnyi bong a o hnyin lakamödrin úheny Aigupito, ke ne o but hnyi bong ang. 16 Ke haba khaca, Manase ame hingâlâ

dra ae ba hnyikongon e ti gan, ke ne o but ame ti unöngötö Jerusalema gan hnyi je ke keihen hia; me anyin minya hulö waleame okûâ hwakecin ae kong anyin at Juda, wale he ka ânyâ ûnyi ae kong hnyi hnyimakö Iehova. 17 Ke haba kolon je hna ânyâ hnö Manase me anyin ta je huliwa, me anyin hulö e ame ânyâ, hawa, adre ca sihnalimen hnyi tusi hnân ha je bong bongon je than Juda? 18 Ke ame mokut ut Manase tha e me lakamen, me adre me konâm e hnyi utkânâ hnyi umen uma, wale utkânâ anyi Uza: ke ame than biju Amona a nokon hwaban.

19 Twente tu but hunai Amona hnyi úen e ame hwân ka than; ke e ame musi hnyi Jerusalema lo li hunai: ke haba ien hinyen me Mesulemeth, momo nöku Haruza úheny Jotebath. 20 Ke e ame ânyâ ûnyi ae kong hnyi hnyimakö Iehova, helâ me hna ânyâ hnö Manase a kamen. 21 Ke e ame vheno ta je gethen hia a vheno kamen, me bi athnyabainy je idola wale a bi athnyabainy kamen, me khudrung ködrin: 22 ke e ame hna degeci Iehova Khongon lakamen, me ca vheno bi gethen de Iehova. 23 Ke haba lathnyabai Amona ödrin e sihnân e, me hlingâ than hnyi umen uma. 24 Ke haba aten hnyeí ödrin e hlingâ hia tavat adre sihnö Amona than; ke haba tavat aten hnyeí ödrin e otilö Josea a nokon ka than hwaban. 25 Ke haba kolon je hna ânyâ hnö Amona waleji e ame ânyâ, hawa, adre ca sihnalimen hnyi tusi hnân ha je bong bongon je than Juda? 26 Ke adre me konâm e hnyi erkemok hnyi utkânâ anyi Uza: ke ame than biju Josea a nokon hwaban.

HNYIMAKAN 22.

EIT ta hunai Josea hnyi úen e ame hwân ka than, ke e ame musi hnyi Jerusalema thöte wan je hunai: haba ien hinyen me Jedida, nöku Adaia úheny Bozekath. 2 Ke ame ânyâ ûnyi ae so hnyi hnyimakö Iehova, me vheno gethen hia de Davita a kiben, k' ame ca saú ka hnyi ke keihen metâ me e.

3 Ke haba hnyi hunai a eitini Josea than, me haba than ame kunö Safana nöku Azalia nöku Mesulama, at sihnalimen, ka hnyi uma umö Iehova, me ha, ka habe, 4 He thö kö Hilekia at bihut ae nua, me me aú je mone adre hom ka hnyi uma umö Iehova, wale a kap hnen tavat tuö hwanuma ûnyi

ge tavat : 5 k' ödrin e he ka ham e ka tavat adre me ányá huliwa k' adre me tuó uma umö Iehova ; ödrin e he ka ham e ka tavat adre me huliwan uma umö Iehova, he ka okhötá je dok ae hmouca hnyin uma ; 6 hobi káu hnyat tretrau utö, me hnyat up uma, me hnyat up veto ; me hnân bi hwabân utö me je veto adre kave he ka ányáwia uma. 7 Ke so bi adre me ca tuluto ködrin mone adre ham ködrin ; anyin a ödrin e khenâ hnathoá. 8 Ke haba Hilekia at bihut ae nua ame ha kö Safana at sihnalimen, ka habe, Oge me wá tusiny hnanyibu hnyi uma umö Iehova. Ke Hilekia ame ham tusi kö Safana, me e ame aú. 9 Ke haba Safana at sihnalimen ame o ka than, me thumeto than, me ha, ka habe, A hia but lathnyabaem hingálá je mone a e hnyin uma, me ham e ka tavat bi huliwa, tavat adre me tuó uma umö Iehova. 10 Ke haba Safana at sihnalimen ame thumeto than, me ha, ka habe, Haba Hilekia ame ham könja ke tusi. Me Safana ame aú e hnyi hnyimakan than. 11 Ke a löng ut than ta je hofuc hnyi tusiny hnanyibu, me e ame kia anyin je úkhaú. 12 Me haba than ame húnö Hilekia at bihut, me Ahikama nöku Safana, me Akebora nöku Mikaia, me Safana at sihnalimen, me Asaia athnyabainy than, me ha, ka habe, 13 He th' öbun, me elám unyi Iehova hnân hobi könja, me tavat, me Juda hia thithö ge önyen tusi ang adre wá : anyin ae gan hmá hmönyin anyi Iehova kötin, can a ca löng hnen lakamötin hoton je hofuc hnyi tusi ang, he ka ányá hia hna sihnalimen gatin. 14 Me haba Hilekia at bihut, me Ahikama, me Akebora, me Safana me Asaia, ödrin e he kö Huleda perofeta momo, öiö Saluma nöku Tikeva, nöku Hasera, at tuó khaú ; (ke haba momo ame laba hnyi Jerusalema hnyi ke keihin a loiny) ; me ödrin e úhnenamö me momo. 15 Ke haba momo ame ha ködrin, ka habe, Walang hna ha hnö Iehova Khongu Isaraela, ka habe, Ha th' öbun ka at wale a kun' öbun könja, ka habe, 16 Walang hna ha hnö Iehova, ka habe, Wá bi, oge me he ka oá monu ka taun ang me tavat adre me labä e, wale ta je únyi hia hnyin tusi a aú than Juda : 17 can ödrin e hia but hna degeci nya, me leú utö ae bo so ka je khong, me ohmönyini nya ge ta je huliwa hia anyin je hnyamödrin, anyin a wale ame ubáhlá thö anyik hmönyin ka dok ang, ke adre me ca he ka omoko. 18 Ke haba than Juda at a kun' öbun he ka elöm Iehova, öbun e

he ka ha heláng káu, ka habe, Walang hna ha hnö Iehova Khongu Isaraela : haba ge ta je hofuc u je löng, 19 anyin ae menyik hnyekom, ke u je ohnyikánâi u bi hnyi hnyimakö Iehova, hnyi úen u me löng hnök hna ha ge dok ang, me tavat adre me labä e, m' ödrin e he ka ba at ke hnaúhangö, ke u je kia ányám je úkhaú, me tenge hnyi hnyimakök ; awe, haingö Iehova, Oge hia but ling u. 20 Wá bi, anyin a wale, oge me he ka úkhacaköüö u tha e me lakámám, ke adre me he ka úkhacaköüö u ka hnyi erkemok k' u hnahic, ke ame ca he li emákám ka wá ta je únyi hia ae kong oge me he ka oá ka hnyi dok ang. Me ödrin e hmeto je hofuc eling ka than.

HNHYIMAKAN 23.

KE haba than ame úkhúnöng, me ödrin e úkhacaköü káu wahingatiny hia Juda me Jerusalema. 2 Haba than ame he ka hnyi uma umö Iehova, tha e me tavat Juda hia, me aten Jerusalema hia, me tavat bihut, me ta je perofeta, me tavat hia ae úhnyükong me gan : ke e ame aú hnyi je hnyikönyidrin ta je hofuc hnyi tusiny úhinyköü adre wá hnyi uma umö Iehova. 3 K' ame tot than hnyi tap me ányá úhihinyköü hnyi hnyimakö Iehova, he ka he hotu Iehova, me tuó anyin ta je hnanyibu, me hnen ta je hna ohnatho, me hnen je hna otílá, ge hnyekon ae bekhöt me hanon ae bekhöt, he ka ányá je hofuc hnyi úhihinyköü ang, adre me sihnalimen hnyi tusi ang : me haba tavat hia adre me tot hwege ka hnyi úhihinyköü. 4 Me haba than ame húnö Hilekia at bihut ae nua, me tavat bihut a loiny, me tavat tuö hwanuma, he ka hom únyi hnyi hnyin uma umö Iehova je kaia hia adre ányá hobi kö Baala, me Assira, me hobi káu ta je únyi hia hnyi drany : me e ame thong degecá hnyi hoton Jerusalema hnyi je utkánâ hnyi Kederon, me hom je dron Beth-ela ai. 5 Me e ame obá hnyat bihut anyin je idola, wale a otílá je than Juda he ka leú utö ae bo so hnyi je dok ae görany hnyi je taun hnyi Juda, me je dok a igigilö Jerusalema ; me tavat leú utö ae bo so kö Baala, me seúnö, me tehi, me je okhú, me ta je únyi hia hnyi drany. 6 Kee ame hom but Aseira únyi hnyi hnyin uma umö Iehova hoton Jerusalema ai ka hnyi wagewe Kederon, me thong degeci ödrin hnyi wagewe Kederon, me omomono e, me khúá but dröüiny hon je erkemok anyin

houmonu. 7 Ke e ame tho hnyikânâi je uma umen tavat adre me hwen Sodoma wale hnyi uma umö Iehova, a hwâwâ hnyin je mano singiny Aseira hnen omomo. 8 Ke e ame hom tavat bihut ûnyi hnyi je taun Juda hia, me oikikiâ je dok ae görany ame leû hnyin utö ae bo so ge tavat bihut, hwân hnyi Geba ke ne o but hnyi Bere-seba; ke e ame tho degecâ je dok ae görany hnyi je homagöule wale hnyi homagöule Josua at ame musö taun, wale hnyi ke keihen a meny homagöuleny taun. 9 Ke so bi, haba tavat bihut hnyi je dok ae görany ödrin e ca hnyi he ka hnyi taben hut kö Iehova hnyi Jerusalema, ke ödrin e hnyi an areto adre ca levenâ bi, tha ödrin me je liamekeiny mödrin. 10 Ke e ame oikikiâ Tofet a e hnyi hnyigöulen bucen iny laku Hinom, me me ca he ke at ka kunâ nokon бага ame ne hlu he ka he hnyi wanben meic kö Moleka. 11 Ke e ame hom je hors waleji a ham je than Juda ka seûnö, hnyi hwanuma uma umö Iehova, hnyi baten hnyeule Nathana-meleka, at tuö umen omjeû, wale eiö hnyin haginy; ke e ame thong degecâ je kariota anyin seûnö ge meic. 12 Ke haba je taben hut walethö hnyi hon ban hnyeule Ahaza, a ânyâ ge je than Juda, me je taben hut a ânyâ Manase hnyi li hnyeuleny uma umö Iehova, me haba than ame kia but, me hagutâ hnyikânâi ûheny e, me khûâ dron ka hnyi wagewe Kederon. 13 Ke haba je dok ae görany cicö Jerusalema hnyi ke keihen metân buceniny hnaûhangö, waleji a ânyâ Solomona than Isaraela hobi kö Aseira ûnyi ae ikiki anyin at Zidona, me hobi kö Kemosa ûnyi ae ikiki anyin at Moaba, me hobi kö Milekoma ûnyiae ikiki anyin je laku Amona, me haba than ame oikikiâ. 14 Ke e ame kot omomono je veto ame tot, me sô degecâ je Aseira, me ounöngötâ hnödrin je hna tot hnyin ge je jeien je komok. 15 Ke haba taben hut minya hnyi Beth-ela, me dok ae görany waleji a ânyâ Jeroboama nöku Nebata, at a okûâ hwakecin ae monu anyin at Isaraela, haba taben hut me dok nunya ae görany, e ame hagutâ hnyikânâi; ke e ame thong degecâ dok ae görany me oamamâ e, me thong degecâ Aseira. 16 Ke haba Josea ame hwiö me wâ je erkemok ae hnyi bucen; me e ame ûkhûnöng he ka hom je jeien komok ûnyi hnyi je erkemok me thong degecâ hon taben hut me oikikiâ e hoton hofuc ho Iehova, waleji a ha aten Khong, wale at a ha je hofuc ang. 17 Ke e ame ha, ka habe, Ie ûnyi hnân ûnykûme eling

oge me wâ? Ke ame thu kâu aten taun, ka habe, Wale erkemok hon aten Khong, at a o ûheny Juda, me ha ta je ûnyi e wale u je hia but ânyâ ka taben hut hnyi Beth-ela. 18 Ke haingen, ka habe, Hnen biju e; ca he ke at ka hom but je jeien. Me ame hnen ju je jeien tha e me jeien perofeta at ame o ûheny Samaria. 19 Haba Josea ame hom but je uma hia hnyi je dok ae görany hnyi je tauniny Samaria waleji a ânyâ je than Isaraela he ka okûâ hmönyin anyi Iehova, me ânyâ ködrin helâ me hnen hna ânyâ hnyi Beth-ela. 20 Ke e ame blingâ je at bihut hia anyin je dok ae görany eling, hon je taben hut, me thong je jeien ta je komok hon; me e ame hmetu Jerusalema ai.

21 Haba than ame hûna ka tavat hia me ha, ka habe, He th' öbun ka tuö paseka kö Iehova Khongubun, helâ me hna sihnalimen hnyi tusiny ûhilihnykôu eang. 22 Ke ba ke paseka adre tuö helâe, hwân hnyi je bong bongon je hnyat owisa wale adre owisa Isaraela, me hnyi je bong hia bongon je than Isaraela, me je than Juda; 23 ke so bi hnyi huna a eitini Josea than adre me ânyâ paseka ang kö Iehova hnyi Jerusalema. 24 Ke haba tavat a ödra tren biobotkong, me bi khong, me je terafi, me je idola, me je ûnyi hia ae ikiki adre me wâ hnyi hnyei Juda, me hnyi Jerusalema, me, Josea ame ohia, me me he ka ohwadâ je hofucin hnanyibu adre sihnalimen hnyi tusi a wâ Hilekia at bihut hnyi uma umö Iehova. 25 Ke ba than a helâ mē ebac, ame hwiö kö Iehova me hnyekon ae bekhöt, me hanon ae bekhöt, me hwegien ae bekhöt, hoton ta je hnanyibu hia anyi Mose; ke a ca o bi ke at ae úcú hwaban. 26 Ke so bi Iehova ame ca hwiö ûnyi hnyi anyin hmönyin ae gan wale e ame hmönyin ka Juda, can ta je hwakecin hia a ânyâ Manase he ka ohmönyinâ e. 27 Ke haba Iehova ame ha, ka habe, Oge me he ka hom Juda ûnyi hnyi hnyimakök, helâ me hnök hna hom Isaraela, ke oge me he ka degec taun ang oge úca wale Jerusalema, me uma wale oge ha gan, ka habe, Ame he ka hnen e iök. 28 Ke haba kolon je hna ânyâ hnö Josea, me anyin ta je huliwa, hawa, adre ca sihnalimen hnyi tusi hnân ha je bong bongon je than Juda? 29 Haiy bongon je bong ame o but Farao-neko than Aigupito he ka vat me than Asuria hnyi wagewe Euferate: ke haba Josea than ame he he ka vat mē; ke ödrü me iouny dö, me

e ame hingälä e hnyi Megido. 30 Haba lathnyabainy ödrin e hom anyin a mokuu hon kariota úheny Megido, me hom e Jerusalema ai, me konám e hnyi hon erkemok. Haba tavat aten hnyei ödrin e hum Jehoaza nöku Josea, me hñ e, me otilä e ka than hwaban kamen.

31 Twente theri but je hunai Jehoaza hnyi úen e ame hwán ka than; ke e ame musi hnyi Jerusalema kun ta tehi: ke haba ien hinyen me Hamutala momo nöku Jeremia at Libena. 32 Ke e ame ányá únyi ae kong hnyi hnyimakö Iehova, helä me hna ányá hia ge lakamen. 33 Ke haba Farao-neko ame ca e hnyi Ribela hnyi hnyei Hamath, me me ca he ka musi hnyi Jerusalema; me e ame kunä tavat he ka fat khaca haded je talan sileva, ke khaca talan gol. 34 Ke haba Farao-neko ame otilö Eliakima ka than, a ke nöku Josea, me hwabö Josea a kamen, me hwenyi ien Jehoiakima; ke e ame hum Jehoaza but; ke e ame o but hnyi Aigupito me e ame mokuu eling. 35 Ke haba Jekoiakima ame ham je sileva me gol kö Farao; ke e ame kunä tavat he ka fat me ham mone helä me hnanyibu anyi Farao: k' ame hawä újengö sileva me gol únyi ge tavat aten hnyei, hoton hnen hna ve hawä fat, he ka ham e kö Farao-neko.

36 Twente faiv but je hunai Jehoiakima hnyi úen e ame hwán ka than; ke e ame musi hnyi Jerusalema hnyi eleven ta hunä: haba ien hinyin, me, Zebuda, nöku Pedaia at Ruma. 37 Ke e ame ányá únyi ae kong hnyi hnyimakö Iehova, helä me hna ányá hia ge lakamen.

HNYIMAKAN 24.

HABA hnyi bongon je bong ame o but Nebukaneza than Babulona, me haba Jehoiakima ame bi athnyabainy hnyi kun ta hunä: ke e ame tot me hna degecä e. 2 Ka haba Iehova ame kunä käu je deö vat anyin at Kaledaia, me je deö vat anyin at Suria, me je deö vat anyin at Moaba, me je deö vat anyin laku Amona, me kun' ödrin Juda ai he ka ohia e, helä me hofuc ho Iehova waleji e ame ha a deny lathnyabainy a je perofeta. 3 E hnathu a únyi ge hna hña hnö Iehova, me me o únyi eling ka hnyi hon at Juda, he ka hum ödrin únyi hnyi hnyimakan, can je hulö anyi Manase, hoton hnen hna ányá; 4 me can minya dra ae ba hnyikongon, waleji e

ame hingälä; anyin a e ame ounöngötä Jerusalema ge dra ae ba hnyikongon: ke ame höcö Iehova he ka hna degecä. 5 Ke haba kolon je hna ányá hnö Jehoiakima me anyin ta je huliwa hia thithö, hawa, adre me ca sihnalimen hnyi tusi hnán ha je bong bongon je than Juda? 6 Ke ame mokut ut Jehoiakima tha e me lakamen, ke ame than biju Jehoiakin a nokon hwaban. 7 Ke ame ca o hmetu bi than Aigupito úheny hnyi iny hnyei: anyin a than Babulona ame hia but hügúnä hia je hanymen than Aigupito, hwán hnyi wagewe Aigupito ke ne o but hnyi wagewe Euferati.

8 Eitin je hunai Jehoiakin hnyi úen e ame hwán ka than; ke e ame musi hnyi Jerusalema hnyi kun ta tehi: ke haba ien hinyen me Nehuseta, nöku Elenathana at Jerusalema. 9 Ke e ame ányá únyi ae kong hnyi hnyimakö Iehova, helä me hna ányá hia ge lakamen. 10 Ke hnyi úen e, ame o but lakei Nebukaneza than Babulona ka hnyi Jerusalema, me adre me thelöng taun. 11 Ke haba Nebukaneza than Babulona ame o ka hnyi taun, ke ame tiga thelöng e ge lakeiny; 12 me ame he but Jehoiakin, me hinyen, me anyin je taben, me anyin je eunuka ka than Babulona: ke than Babulona ame hom e hnyi hunainy ka musi a eit. 13 Ke e ame hom but úheny e ta je omjeúiny hia uma umö Iehova, me je omjeúiny uma umen than, me susubä je kaia gol hia waleji a ányá Solomona than Isaraela hnyi uma umö Iehova, helä me Iehova ame ha. 14 Ke e ame hom Jerusalema hia, me je than hia, me tavat hwege vat hia, a ödrin ten thauzan je bâ, me tavat ae metä hia hnyi ta je huliwa, me tavat huliwan fao; e ba but kolon, ke so bi tavat thiju ae theduoc hnyi hnyei. 15 Ke e ame hum Jehoiakin Babulona ai; tha e me hinyen than, me laáian than, me anyin je eunuka, me je homakan hnyei, e ame hum ödrin a je hwenbä Babulona ai úheny Jerusalema. 16 Ke haba tavat hwege hia ödrin seven thauzan, me haba je hnyat ae metä huliwa, me hnyat huliwa fao ödrin wan thauzan, a tavat hwege hia me khan' ödrin vat, haba tavat eling than Babulona ame hom Babulona ai a je hwenbä. 17 Ke haba than Babulona ame otilö Matania ka than, a liamekeiny me kamen, me hnán hwaban, me hwenyi ien e me Zedekia.

18 Twente wan dut je hunai Zedekia hnyi úen e ame hwán ka than; ke e ame musi hnyi Jerusalema hnyi eleven je hunä:

ke haba ien hinyen me Hamutala nöku Jeremia at Libena. 19 Ke e ame ányá únyi ae kong hnyi hnyimakö Iehova, helá me hna ányá hia hnö Jehoiakima. 20 Ke haba Iehova ame hmönyin ka Jerusalema me Juda ke ne o but e ame digic ödrin hnyi hnyimakan bi : ke haba Zedekia ame hna degecá than Babulona.

HNYIMAKAN 25.

KE haba hnyi huna a naininy anyin musi, hnyi tehi a teniny, hnyi bong a teniny tehi, ame o but Nebukaneza than Babulona, me anyin je utbavat hia, ka Jerusalema, me hunuma cicö e ; me ödrin e otilá igigilö e je tap hnân vat. 2 Me adre me thelöng taun ke ne o but hnyi huna a eleveni Zedekia than. 3 Ke haba hnyi bong a naininy tehi a vakiny e gan hmá hmiá hnyi taun, me ba jeú hobi káu aten hnyei. 4 Ke adre me kia taun, me ame kec tavat vat hia hnyi hnyinghet, ödrin e gethen hnyi homagöule wanben li hak veto, hnyi utkáná iny than : (ke e bi at Kaledaia cicö taun igigilö :) ke haba than ame kec hnyi getheniny dok ae tha hon. 5 Me haba utbavat anyin at Kaledaia adre me hnu than, me khaú ju e hnyi dok ae tha hon hnyi Jeriko : ke ame ve kec ut anyin utbavat hia gan. 6 Ke ödrin e kát than me hom e ka than Babulona Ribela ai ; ke ödrin e owisa káu. 7 Me ödrin e hlingá je laku Zedekia hnyi hnyimakan, me úá li emakö Zedekia, me ca e ge fao me hom e Babulona ai.

8 Ke haba hnyi tehi a thabúnginy, hnyi bong a seveniny tehi, wale huna a naintini Nebukaneza than, wale than Babulona, me ame o but Nebuzaradana taben tavat tue, athnyabainy than Babulona, Jerusalema ai : 9 me e ame thong degecá uma umö Iehova, me uma umen than ; me je uma hia hnyi Jerusalema, wale je uma ae gan, e ame thong degecá ge meic. 10 Ke haba utbavat hia anyin at Kaledaia, unyin taben tavat tue, ödrin e hagutá hnyikáná hna up haginy Jerusalema igigilö. 11 Ke haba je kolon tavat hia a hnen biju hnyi taun, me tavat adre me kec waleji adre kec ka than Babulona, me kolon tavat ae se, haba Nebuzaradana taben tavat tue ame hom bá. 12 Ke haba taben tavat tue ame ip biju ke je hnyat ae theduoc hnyi hnyei, me hnân hnyat tuö je hnyei vine, me tavat belök. 13 Ke haba li hmolom bras hnyi uma umö

Iehova, me je taben, me taben köiö bras hnyi uma umö Iehova, haba at Kaledaia ödrin e susubá me hom brasiny Babulona ai. 14 Ke haba je öt, me je soi, me je uthesiün, me je spun, me je kaia bras hia waleji adre huliwan, ödrin e hom. 15 Ke haba je taben wableúhleü, me je kaia, e ka gol me adre me hom goliny, ke e ka sileva, me adre me hom silevainy, hnen taben tavat tue. 16 Lo li hmolom, ke khaca taben köiö, me je taben waleji a ányá Solomona hobi káu uma umö Iehova ; ca hnân tuluto bi bras hnyin je únyi hia eling. 17 Eitin kubit ibeüen göranyai ke hmolom, ke e hu ovejien hon ban e : ke haba ibeüen göranyai ovejien kun ta kubit ; me hna huliwan boert me rimona igigilö ovejien, bras hia : ke heláe minya hmolom a loiny, me únyi a boert. 18 Ke haba taben tavat tue ame hum Seraia at bihut ae beönuu, me Zefania at bihut a loiny, me kun ta hnyat tuö hwanuma : 19 Ke únyi hnyi taun e ame hom ke eunuka at ame musö tavat vat ; ke ödrin thabúng tavat bwele ka wá hnyimakan than, adre wá hnyi taun ; me at sihnalimen anyin taben utbavat, at ame úkacaköuá tavat aten hnyei ; me ödrin sikste tavat aten hnyei, adre wá hnyi taun. 20 Ke haba Nebuzaredana taben tavat tue ame hum ödrin, me hom Ribela ai ka than Babulona. 21 Ke haba than Babulona ame hling' ödrin hnyi Ribela, hnyi hnyei Hamath. Me adre me hom hwenbá Juda únyi hnyi idrin hnyei. 22 Ke haba tavat a je kolon hnyi hnyei Juda, waleji a ip biju Nebukaneza than Babulona, e ame otilö Gedalia nöku Ahikama nöku Safana hudrin.

23 K' a löng ut je taben vat hia, ödrin me je atödrin a haba than Babulona ame otilö Gedalia, me ödrin e o kö Gedalia hnyi Mizepa, wale Isamaela nöku Nethania, me Johanana nöku Karea, me Seraia nöku Tanumeth at Netofa, me Jazania nokon at Maaka, ödrin me je atödrin. 24 Haba Gedalia ame khemanyin ködrin me je atödrin, me ha ködrin, ka habe, Ca he öbun ka outen lathnyabainy at Kaledaia : laba ju hnyi hnyei me bi athnyaba ka than Babulona, me ame he ka so köbun. 25 Ke haba hnyi tehi a seveniny ame o but Isamaela nöku Nethania nöku Elisama, hanen je matrániny than, ke ödrin ten tavat unyin, me e ame kuc Gedalia, me e ame mokcu, me at Juda me at Kaledaia tavat a tha e më hnyi Mizepa. 26 Me ame todrö

I. MAN ÛLABAINY JE THAN 1.

tavat hia thithô ae ûhnyûkong me gan, me je taben vat, me o hnyi Aigupito : anyin a ödrin e ouden at Kaledaia.

27 Ke haba hnyi hun a thöte seveniny bâ a Jehoaikin than Juda, hnyi tehi a twe-lviny, hnyi bong a twente seveniny tehi, me haba Evile-merodak than Babulona ame ogöranyâ bö Jehoiakin than Juda ûnyi hnyi uma ceat hnyi hun a hwân hnyin he ka musi ; 28 me e ame ha kâu hofuc ae

menyik, me e ame ogöranyâ anyin theron hon je theron anyin ta je than a hnyat ödrin e tha laba mē hnyi Babulona. 29 Ke e ame ham kâu je ûkhaû a hwaban je ûkhaûen uma ceat, ke e ame hnyi han hnyi hnyimakan bala hnyi ta je bong hia bongon möt. 30 Ke haba jekhon adre me labö ham kâu, me jekhon ûnyi ge than, hnyi ke bong me ke bong ke jekhon, hnyi ta je bonginy hia anyin möt.

TUSI A BAN

GE

MAN ÛLABAINY JE THAN.

HNyimakan 1.

ADAMU, Setha, Enosa ; 2 Kainana, Mahalaleel, Jareda ; 3 Enoka, Methusela, Lameka ; 4 Noa, Sema, Hama, Jafeta.

5 Je бага laku Jafeta ; Gómera, me Magog, me Madai, me Javana, me Tubala, me Meseka, me Tirasa. 6 Ke haba je бага laku Gómera ; Asekenaza, me Rifatha, me Togarema. 7 Ke haba je бага laku Javana ; Elisa, me Tasesa, me Kitim, me Dodanima.

8 Haba je бага laku Hama ; Kuza, me Mizeraima, me Futa, me Kanana. 9 Ke haba je бага laku Kuza ; Saba, me Havila, me Sabeta, me Rama, me Sabeteka. Ke lo li бага laku Rama ; Sheba, me Dedana. 10 Haba Kuza ame hnöku Nimeroda : wale at ame ibi hwân he ka hwege eang hmelen. 11 Ke haba Mizeraima ame hnöku Luda, me Anami, me Lehabi, me Nafetui, 12 me Patherusi me Kaselui (ûnyi gan at Filisiti), me Kafetori. 13 Ke haba Kanana ame hnöku Zidona atö, me Heth ; 14 me at Jebusi, me Amora, me Girigasa ; 15 me Hivi, me Areki, me Sini ; 16 me at Arevadi, me Zimari, me Hamath.

17 Haba je бага laku Sema ; me, Elama, me Asura, me Afasada, me Luda, me Arama, me Uza, me Huli, me Gethera, me Meseka. 18 Ke haba Afasada ame hnöku Sala, he haba Sala ame hnöku Heberu. 19 Ke adre me hnokoâ li бага laku Heberu ; haba ien ke at, me, Pelege ; anyin adre me

khenâ hmeledrany hnyi bongon ta je bong ; ke Joketana ien liamekeiny mē. 20 Ke haba Joketana ame hnöku Alemodada, me Salefa, me Hazemaveta, me Jara ; 21 me Hadorama, me Uzala, me Dikela ; 22 me Ebala, me Abimaela, me Sheba ; 23 me Ofira, me Havila, me Jobab. Wale je бага laku Johetana hia.

24 Sema, Afasada, Sala ; 25 Heberu, Pelege, Reu ; 26 Serugo, Nahora, Tera ; 27 Aberama (wale Aberahama). 28 Haba li бага laku Aberahama ; jia Isaaka, me Ismaela. 29 Walang anyidrin je dö : Nebaioth, бага nöku Isamaela a bân ; hwaban dö e Kedara, me Adebeela, me Mibesam, 30 Misema, me Duma, me Masa ; me Hadara, me Tema, 31 me Jetura, me Naíso, me Kedema. Wale je бага laku Isamaela.

32 Ke haba je бага laku Ketura momo anyi Aberahama : e ame hnöku Zimeran, me Jokesana, me Medana, me Midiana, me Isebak, me Sua. Ke lo li бага laku Jokesana ; jia Sheba, me Dedana. 33 Ke haba je бага laku Midiana ; me Efa, me Efera, me Enoka, me Abida, me Eledaa. Je бага laku Ketura tavat hia e.

34 Haba Aberahama ame hnöku Isaaka. Lo li бага laku Isaaka ; jia Esau, me Isaraela.

35 Haba je бага laku Esau ; me Elifaza, me Reuela, me Jeuso, me Jalama, me Kora. 36 Je бага laku Elifaza ; jia Temana, me Omar, me Zefo, me Gatama, me Kenaza, me Timena, me Amaleka. 37 Je бага

laku Reuela; jia Nakath, me Zera, me Sama, me Miza. 38 Ke haba je baga laku Seira; jia Lotana, me Sobala, me Zibeona, me Ana, me Disona, me Ezera, me Disana. 39 Ke lo li baga laku Lotana; jia Hori, me Homama: ke haba Timena wale hani Lotana. 40 Je baga laku Sobala; jia Alevana, me Manakatha, me Ebalala, me Sefo, me Onama. Ke li baga laku Zibeona; jia Aia, me Ana. 41 Baga nõku Ana; jia Disona. Ke haba je baga laku Disona; jia Hemedan, me Eseban, me Itheran, me Kiran. 42 Je baga laku Ezera; jia Bilehana, me Zaavana, me Akana. Li baga laku Disona; jia Uza, me Arama. 43 Ke walang je than ödrin e musu hnyi hneyi Edoma, ke tiga ba than ame musö lakon Isaraela: Bela nõku Beora; ke Dinaba ien anyin taun. 44 Ke ame mokcu Bela, ke haba at ame musu hwaban, jia Jobab baga nõku Zera üheny Bozera. 45 Ke ame mokcu Jobab, haba at ame musu hwaban, jia Husama ünyi hnyi hneyi iny at Temana. 46 Ke ame mokcu Husama, haba at ame musu hwaban, jia Hadada, nõku Bedada, wale at a kuc Midiana, hnyi utkânâ i Moaba: ke Avitha ien anyin taun. 47 Ke ame mokcu Hadada, haba at ame musu hwaban, jia Samela üheny Masereka. 48 Ke ame mokcu Samela, haba at ame musu hwaban, jia Saulo üheny Rehobath hnyi Wagewe. 49 Ke ame mokcu Saulo, me haba at ame musu hwaban, jia Baala-hanana nõku Akebora. 50 Ke ame mokcu Baala-hanana, k' ame musu hwaban Hadada; ke Pau ien anyin taun: ke haba ien âiân me Mehetabela nõku Matereda a momo nõku Meza-haba. 51 Ke ame mokcu Hadada. Ke walang ien je taben Edoma; jia Timena taben; me Aleva taben, me Jethetha taben; 52 Aholibama taben, me Ela taben, me Pinono taben; 53 Kenaza taben me Temana taben, me Mibezara taben; 54 me Megediela taben, me Irama taben. Wale je taben Edoma.

HNHYIMAKAN 2.

WALANG je baga laku Isaraela; Reubena, Simeona, Levi, Juda, Isakara, Zebulona; 2 Dana, Josefa, Beniamina, Nafatali, Gada, Asera.

3 Haba je baga laku Juda; me Era, me Onana, me Sela: ödrin kun a hnokoâ kâu hnö Bathe-sua momo Kanana. Haba Era

nõku Juda a bân, me, at ae kong hnyi hnyimakö Iehova; me e ame hlingâ. 4 Ke haba Tamara a üngon ame hnokoâ kâu Farez me Zera. Ke ödrin thabûng je baga laku Juda hia. 5 Ke lo li baga laku Farez; Hezerona, me Hamula. 6 Ke haba je baga laku Zera; me Zimeri, me Ethana, me Heman, me Kalekol, me Dara: ödrin thabûng hia hnyat e. 7 Ke haba je baga laku Karemi; jia Akara at ame ovecâ at Isaraela, waleji ame ânyâ hwakecin ae kong ge ünyi adre okabâ. 8 Ke haba je baga laku Ethana; me Azaria. 9 Ke haba je baga laku Hezerona, wale adre hnokoâ kâu; me Jeramela, me Ram, me Kalebala. 10 Ke haba Ram ame hnöku Aminadaba; ke Aminadaba ame hnöku Nasona, taben laku Juda. 11 Ke haba Nasona ame hnöku Salema; ke Salema ame hnöku Boaza; 12 ke Boaza ame hnöku Obed, ke Obed ame hnöku Jese; 13 ke Jese ame hnokoâ nokon a bân jia Eliaba, me Abinadab a loiny, me Simea a kuniny; 14 me Nathaniela a vakiny, me Radai a thabûnginy; 15 me Ozema a siksiny, me Davita a seveniny: 16 ke haba li lahanidrin, jia Zeruaia, me Abigaila. Ke haba je baga laku Zeruaia; me Abisai, me Joab, me Asael, ödrin kun. 17 Ke Abigaila ame hnöku Amasa; ke haba kamö Amasa, me Jethero at Isamaela. 18 Ke haba Kalebala baga nõku Hezerona, e hu nokon ga Azuba a âiân me Jeriotha: ke walang je baga lakon momo e: jia Jesera, me Sobab, me Aredon. 19 Ke ame mokcu Azuba, me Kalebala ame hum Eferatha me âiân, at a hnöku Huro kâu. 20 Ke haba Huro ame hnöku Uri, ke Uri ame hnöku Bezalele. 21 Ke hwaban e haba Hezerona ame didrö ka hlu nõku Makir kamö Gileada; wale e ame hom me âiân ke sikeste but je hunainy; ke e ame hnöku Seguba kâu. 22 Ke Seguba ame hnöku Jaira, at ae hu je taun a twente theri hnyi hneyi Gileada. 23 Ke haba Gesuri me Arama ödru me hügünâ je taun anyi Jaira ünyi gadrin, tha e me Kenath, me je tauniny ae ühnyükong, sikeste je taun. Ödrin hia je baga laku Makir kamö Gileada. 24 Ke hwaban dö a mokcu Hezerona hnyi Kalebala-eferatha, haba Abia öö Hezerona ame hnokoâ nokon jia Asura kamö Tekoa. 25 Ke haba je baga laku Jeramela nõku Hezerona a bân; jia Ram, nokon a bân, me Buna, me Oren, me Ozema, me Abia. 26 Ke haba Jeramela, me, hu ke âiân minya, haba ien jia

I. MAN ÇLABAINY JE THAN 3.

Atara; me e hinyö Onama. 27 Ke haba je baga laku Ram, wale nöku Jeramela a bân, jia Maaz, me Jamina, me Ekerâ. 28 Ke haba li baga laku Onama, jia Samai, me Jada; ke haba li baga laku Samai, jia Nadaba, me Abisura. 29 Ke haba ien momo öiö Abisura, jia Abihaila; ke e ame hnokoâ li lakon jia Aheban, me Molid. 30 Ke li baga laku Nadaba, jia Seled, me Apaim: ke ame mokcu Seled ke ba nokon. 31 Ke haba baga nöku Apaim; jia Ishi. Ke haba baga nöku Ishi; jia Sesan. Ke haba baga nöku Sesan; jia Ahelai. 32 Ke lo li baga laku Jada kei Samai; jia Jethero me Jonathana: ke ame mokcu Jethero ke ba nokon. 33 Ke lo li baga laku Jonathana; jia Peleth, me Zaza. Wale je laku Jeramela. 34 Ke ba baga nöku Sesan, ke je in thibi. Ke e hu athnyabi Sesan, Jara ien, at Aigupito. 35 Haba Sesan ame ham nokon hlu kö Jara athnyabainy me äian; ke e ame hnokoâ kâu jia Atai. 36 Ke haba Atai ame hnöku Nathana, ke Nathana ame hnöku Zabad; 37 ke Zabad ame hnöku Efelal; ke Efelal ame hnöku Obed; 38 ke Obed ame hnöku Jehu; ke Jehu ame hnöku Azaria; 39 ke Azaria ame hnöku Helez, ke Helez ame hnöku Elasa; 40 ke Elasa ame hnöku Sisemai, ke Sisemai ame hnöku Saluma; 41 ke Saluma ame hnöku Jekamia, ke Jekamia ame hnöku Elisama. 42 Ke haba je baga laku Kaleba liamekeiny me Jeramela; jia Misa nokon a bân, kamö Zif; me je baga laku Maresa kamö Heberona. 43 Ke haba je baga laku Heberona; jia Kora, me Tapua, me Rekeam, me Sema. 44 Ke haba Sema ame hnöku Rahama, kamö Jorekeam; ke Rekeam ame hnöku Samai. 45 Ke haba baga nöku Samai, jia Maon; ke haba Maon me kamö Bethe-zur. 46 Ke haba Efa, momo anyi Kaleba, ame hnöku Karan, me Moza, me Gazez: ke Karan ame hnöku Gazez. 47 Ke haba je baga laku Jadai; jia Regem, me Jotham, me Gesam, me Pelet, me Efa, me Saaf. 48 Haba Maaka, momo anyi Kaleba, ame hnöku Saber, me Tirehana. 49 Ke haba momo eling ame hnöku Saaf, kamö Mademan, me Seva kamö Makebena, me kamö Gibeä; haba hlu nöku Kaleba, jia Akesa. 50 Wale je baga laku Kaleba; nöku Huro, nöku Eferatha a atö, me Sobala kamö Kiriatha-jarim; 51 me Solema kamö Bethe-leema, me Haref kamö Bethe-gader. 52 Ke hu je baga laku Sobala kamö Kiriatha-jarim; jia Haroe,

me hafiny at Manakatha. 53 Ke haba je lap anyi Kiriatha-jarim; me, at Iethero, me at Puth, me at Suma, me at Misera; k'ame o at Zorea, me at Esetaol ünyi gadrin. 54 Haba je baga laku Salema; me Betheleema, me at Netofa, me Ataroth-bethejoaba, me hafiny at Manakatha, me at Zorea. 55 Me je lap anyin tavat sihnalimen adre me laba hnyi Jabez; at Tira, me Simea, me at Suka. Wale at Keni waleji adre me o ünyi ga Hamath, kamen lap anyi Rekaba.

HNYIMAKAN 3.

KE walang je baga laku Davita adre me hnokoâ kâu hnyi Heberona; jia Aminona nokon a bân, nöku Ahinoam momo Jezerela; me Daniela a loiny nöku Abigaila momo Karemela; 2 me Abasoloma a kuniny, nöku Maaka momo nöku Talemai, than Gesuri; ke Adonia a vakiny, nöku Hagitha; 3 Sefatia a thabúnginy nöku Abitalia; Itherama a siksiny nöku Egela a äian. 4 Wale ödrin siks adre hnokoâ kâu hnyi Heberona; ke e ame musi eling hnyi seven ta huna me siks ta tehi: ke e ame musi hnyi Jerusalema hnyi je huna a thöte theri. 5 Ke walang lakon adre hnokoâ kâu hnyi Jerusalema: jia Simea, me Sobab, me Nathana, me Solomona, ödrin vak je laku Bathe-sua momo nöku Amiela: 6 ke Ibara, me Elisama, me Elifelet; 7 me Noga, me Nefega, me Jafia; 8 me Elisama, me Eliada, me Elifelet, ödrin nain. 9 Wale je baga laku Davita hia, ke ca ha bi je baga lakon anyin je momo; ke haba hanidrin, jia Tamara. 10 Ke haba nöku Solomona, me Reoboama, ke haba nokon bi, jia Abia, ke nokon bi e Asa, ke nokon bi e Jehosafata; 11 ke nokon bi e Jorama, ke nokon bi e Abazia, ke nokon bi e Joasa; 12 ke nokon bi e Amazia, ke nokon bi e Azaria, ke nokon bi e Jotham; 13 ke nokon bi e Ahaza, ke nokon bi e Hezekia, ke nokon bi e Manase; 14 ke nokon bi e Amona, ke nokon bi e Josea. 15 Ke haba je baga laku Josea; Johanana nokon a bân, Jehoiakima a loiny, Zedekia a kuniny, Saluma a vakiny. 16 Ke haba li laku Jehoiakima: me haba nokon bi, jia Jekonia, ke haba nokon bi e, Zedekia. 17 Ke haba je baga laku Jekonia, at a bâ; jia Sealetielä a nokon, 18 me Malekiram, me Pedaia, me Senazara, me Jekamia, me Hosama, me Nedabia. 19 Ke

haba li бага laku Pedaiа; jia Zerubabela, me Simei; ke haba li бага laku Zerubabela; jia Mesulama, me Hanania; ke hanidru jia Selomith; 20 me Hasuba, me Ohel, me Berekia, me Hasadia, me Jusabe-hesed, ödrin thabúng. 21 Ke haba li бага laku Hanania; jia Pelatia, me Jisaia: ta je бага laku Refaia, me je бага laku Arenan, me je бага laku Obadia, me je бага laku Sekania. 22 Ke haba бага nöku Sekania; jia Semaia: me haba laku Semaia; Hatusa, me Igalа, me Baria, me Nearia, me Safaat, ödrin siks. 23 Ke haba je бага laku Nearia; jia Elioenai, me Hezekia, me Azerikam, ödrin kun. 24 Ke haba je бага laku Elioenai; jia Hodaia, me Elia-siba, me Pelaia, me Akub, me Johanana, me Delaia, me Anani, ödrin seven.

HNHYIMAKAN 4.

HABA je бага laku Juda; jia Farez, me Hezerona, me Karemi, me Huro, me Sobala. 2 Ke haba Reaia nöku Sobala ame hnöku Jahath; ke Jahath ame hnöku Ahumai me Lahad. Wale ta je lap anyin at Zorea. 3 Ke walang je бага lakon kamö Etama; jia Jezerela, me Isema, me Idebas: ke haba ien hanidrin, jia Hazelepöni: 4 me Penuela kamö Gedor, me Ezera kamö Husa. Wale je бага laku Huro, nokon a bán nöku Eferatha, kamö Bethe-leema. 5 Ke hu lo li öiö Asura kamö Tekoa, jia Hela, me Naara. 6 Ke haba Naara ame hnokoá káu Ahuzama, me Hefera, me Temana, me Hahasetari. Wale je бага laku Naara. 7 Ke haba je бага laku Hela, jia Zereth, me Zoara, me Ethenan. 8 Ke haba Koz ame hnöku Anuba, me Zobela, me je lap anyi Aharehel бага nöku Harum. 9 Ke ame lung sa Jabez hon je liamekeiny më: ke haba hinyen ame hwenyi ien, me ha, ka habe, Anyin a oge me hnokoá ke hmak hnyekuk. 10 Ke haba Jabez ame hongot ka Khongu Isaraela me ha, ka habe, Ö u he ka ti ohnahici nya, me ogáná ik, ke e na tha e ju mönya hnyamâm, me me tuö nya ge hulö, me inye ca vec bi gan! Me haba Khong ame ham káu únyi e ame sumátá. 11 Ke haba Kelubo liamekeiny me Sua ame hnöku Mehир, kamö Eseton. 12 Ke Eseton ame hnöku Bethe-rafa, me Pasea, me Tehina kamö Ire-nahasa. Wale je aten Reka. 13 Ke haba li бага laku Kenaza; me

Otheniela; me Hathath. 14 Ke haba Meonothai ame hnöku Ofera: ke haba Seraia ame hnöku Joaba kamö Ge-harashim; ke ödrin hnyat metá huliwa. 15 Ke haba je бага laku Kaleba nöku Jefune; me, Iru, me Ela, me Naam: ke je бага laku Ela; me Kenaza. 16 Ke haba je бага laku Jehaleela; me, Zif, me Zifa, me Tiria, me Asareel. 17 Ke haba je бага laku Ezera; me, Jethero, me Mered, me Efera, me Jalon: ke e ame hnöku Miriama, me Samai, me Iseba kamö Esetemoa. 18 Ke haba áián a momo Juda ame hnöku Jareda, kamö Gedor, me Heberu kamö Soko, me Jekuthiel kamö Zanoa. Ke wale je бага laku Bithia momo nöku Farao, waleji at a hom ga Mered. 19 Ke haba li бага lakon momo öiö Hodia hani Nahama, kamö Kiela at Garemi, me Esetemoa at Maaka. 20 Ke haba je бага laku Simon; jia Aminona, me Rina, me Beni-hanan, me Tilon. Ke haba li бага laku Ishi; me Zoheth, me Beni-zoheth. 21 Ke haba je бага laku Sela nöku Juda; me, Era kamö Leka, me Laada kamö Maresa, me je aten lap anyin tavat huliwan mano lino, hanen lap anyi Asebea; 22 ke Jokima, me tavat aten Kozeba, me Joasa, me Saraf, ödrin e musi hnyi Moaba me Jasubi-leem. Ke ta je hofuc but ehac ling. 23 Ödrin ling tavat up kaia káná, me tavat ödrin e laba hnyi Netaim me Gedera: ödrin e tha laba eling me than ge anyin huliwa. 24 Haba je бага laku Simeona; jia Nemuela, me Jamina, me Jarib, me Zera, me Saulo: 25 ke nokon бага bi Saluma, me nokon бага bi Mibesam, me nokon бага bi Misema. 26 Ke haba je mátráni Misima; nokon бага bi Hamuel, nokon бага bi Zakuri, nokon бага bi Simei 27 Ke ödrin sikstin je laku Simei бага ke ödrin siks je hlu; ke ca se hia bi lakon je liamekeiny më, ke ca se bi anyidrin lap hia helá me lap anyi Juda. 28. Ke ödrin e laba hnyi Bere-seba, me Molada, me Hazarasual; 29 me hnyi Bila, me Azem, me Tolad; 30 me Bethuela, me Horema, me Zikelag; 31 me Bethe-marekaboth, me Hazarasusa me Bethe-birei, me Saraim. Wale anyidrin je taun ke ne o but hnyi musi anyi Davita. 32 Ke haba anyidrin je taun ae úhnyükong, Etama, me Aina, me Rimona, me Token, me Asan, thabúng je taun: 33 me anyidrin je taun hia ae úhnyükong igigilö je taun eling ke ne o but hnyi Baala. Wale je hnyabadrin, ke

e hu gadrin je hna sihnalimen gagai ödrin. 34 Ke Mesobab, me Jamelek, me Josa бага нöку Amazia ; 35 me Joela, me Jehu бага нöку Josibia, бага нöку Seraia, бага нöку Asiela ; 36 me Elioenai, me Jaakoba, me Jeohaia, me Asaia, me Adiela, me Jesimiela, me Benaia ; 37 me Ziza бага нöку Sefi, бага нöку Alona, бага нöку Jedaia, бага нöку Simeri, бага нöку Semaia ; 38 tavat e ae ütangköu hoton je ien, wale je taben anyidrin je lap. K' ame si gan hmâ je lap anyin je lakamödrin. 39 Ke ödrin e he ka hnyi gethen ame didrö Gedor ai, ka hnyi ke keihen e deiö thop, he ka heleü an je hnahat haledrin. 40 Ke ödrin e wâ hna önying ae hlau me so, ke hnyi ae lau, me laba wia, me hnahic ; anyin a haba ehac ame laba eling ke je atö Hama. 41 Ke ame o but tavat adre sihnalimen je iödrin hnyi üö Hezekia than Juda, me sö mödrin je uma mano, me kot at Maon adre wâ eling, me ti ohî' ödrin, ke ne o but hnyi bong ang, me laba je hnödrin : anyin ae hu an eling haledrin je meno. 42 Ke haba keihen gadrin, wale je laku Simeona, a faiv haded obaga ödrin e he ka hnyi bucin Seira, ke haba anyidrin je taben, jia Pelatia, me Nearia, me Refaia, me Uziela, je бага laku Ishi. 43 Ke ödrin e kot je kolon at Amaleka a je wan biju, me laba ju eling ke ne o but hnyi bong ang.

HNHYIMAKAN 5.

KE haba je бага laku Reubena нöку Isaraela a bân, (anyin a e atö ; ke so bi e ame okongoâ hna mokut waleji a hnen kamen, me adre me ham bi jekhon a atö ka li laku Josefa нöку Isaraela ; ke adre me ca sihnalimen je dö hoton je ütangköu. 2 Ke haba Juda me at ae hwege hon je liamekeiny më, ke a deny e than ; he e hu ga Josefa hanymen atö :) 3 haba je бага laku Reubena нöку Isaraela a bân ; me, Enoka, me Palu, me Hezerona, me Karemi. 4 Ke haba je бага mätrâni Joela ; me, Semaia a nokon, me Goge a nokon, me Simei a nokon, 5 me Mika a nokon, me Reaia a nokon, me Baala a nokon ; 6 me Beera a nokon, waleji a hom hwenbâ ga Tigelathe-pilesera than Asuria : e tuhan at Reubena. 7 Ke haba je liamekeiny më hoton anyidrin je lap at ka aü hna sihnalimen anyidrin ta je dö ; Jeiela a tuhan, me Zakaria, 8 me Bela бага нöку Azaz, бага нöку Sema, бага нöку Joela,

at ame laba hnyi Aroera, ke ne o but hnyi Nebo me Baala-meon : 9 ke e ame laba e deiö ke ne o but hnyi gethen ame he ka hnyi hnyeubaba hnyi wagewe Euferati : anyin ame si but haledrin je meno hnyi hnyi Gileada. 10 Ke haba hnyi üö Saulo me ödrin e vat me at Hagara, me kuc ödrin : me ödrin e laba bi hnyi umödrin je uma mano hnyi ke keihen e deiö Gileada hia.

11 Ke haba je бага laku Gada ödrin e laba cici ödrin, hnyi hnyi Basana ke ne o but hnyi Saleka : 12 Joela a tuhan, me Sefama a loiny, me Janai, me Safata hnyi Basana : 13 ke je liamekeiny mödrin hanen je lap anyin je lakamödrin ; jia Mikaela, me Mesulama, me Sheba, me Jorai, me Jakan, me Zia, me Heberu, ödrin seven. 14 Wale je бага laku Abihaila, бага нöку Huri, бага нöку Jaroa, бага нöку Gileada, бага нöку Mikaela, бага нöку Jesisai, бага нöку Jado, бага нöку Buza ; 15 Ahi бага нöку Abediela, бага нöку Guni, taben je lap anyin lakamödrin. 16 Ke ödrin e laba hnyi Gileada hnyi Basana, me je tauniny, me hnyi je utkânâ igigilö Sarona, ke ne o but hnyi je hnyigölödrin. 17 Adre sihnalimen hia anyidrin je dö hnyi je bong bongu Jotham than Juda, me hnyi je bong bongu Jeroboama than Isaraela.

18 Haba je бага laku Reubena, me at Gada, me hafiny tribu Manase, tavat ae hwege, ae khan' ödrin hok bec me hele vat, me hlic fana, me metâ hnyi vat, ödrin fâte foa thauzan seven haded ke sikste tavat, ae khan' ödrin he ka hnyi vat. 19 Ke ödrin e vat me at Hagara, me Jetura, me Nafiso, me Nodab. 20 Ke adre hadru' ödrin he ka vat mödrin, ke adre hna ködrin at Hagara, me je lahiödrin hia : anyin a ödrin e hongot kö Iehova hnyi vat, me e ame ling ödrin ; anyin a ödrin e labageju kâu. 21 Ke ödrin e söâ haledrin je meno ; a fite thauzan haledrin je kamela, ke tu haded me fite thauzan haledrin je mamoe, me tu thauzan je asina, ke wan haded thauzan tavat. 22 Ke se hia tavat adre ta a g' adre mokcu, anyin a ünyi ge Khong vat. Me ödrin e laba hwabödrin ke ne o but ödrin e bâ but.

23 Ke haba lakon hafiny tribu Manase ödrin e labâ hnyi : ödrin e ogânâ idrin üheny Basana ke ne o but hnyi Baalahere-mona me Senir me bucen Here-mona. 24 Ke walang je taben je lap anyin lakamödrin ; jia Efera, me Ishi, me Eliela, me

Azeriela, me Jeremia, me Hodavia, me Jadiela, tavat ae ti hwege, me lung, je taben je lap anyin lakamödrin.

25 Ke ödrin e ányá monu ka Khongon lakamödrin, me bi únyi monu me je khongon tavat aten hnyei, waleji a ohia Khong hnyi hnyimaködrin. 26 Ke haba Khongon at Isaraela ame bwebwelá hnyeku Pula than Asuria, me hnyeku Tigelathepilesera than Asuria, me e ame hum ödrin but, wale at Reubena, me Gada, me hafiny tribu Manase, me hum ödrin Hala ai, me Habora, me Hara, me ka hnyi wagewe hnyi Gozana, ke ne o but hnyi bong ang.

HNyimakan 6.

HABA je бага laku Levi; me, Geresoma, me Kohatha, me Merari. 2 Ke haba je бага laku Kohatha; me, Amerama, me Izara, me Heberona, me Uziela. 3 Ke haba je laku Amerama; me Arona, me Mose, me Miriama. Ke haba je бага laku Arona; me, Nadaba, me Abiu, me Eleazora, me Ithamara. 4 Ke haba Eleazara ame hnöku Fineasa, ke Fineasa ame hnöku Abisua; 5 ke Abisua ame hnöku Buki, ke Buki ame hnöku Uzi; 6 ke Uzi ame hnöku Zeraia, ke Zeraia ame hnöku Meraioth; 7 ke Meraioth ame hnöku Amaria, ke Amaria ame hnöku Ahituba; 8 ke Ahituba ame hnöku Zadoka, ke Zadoka ame hnöku Ahimaza; 9 ke Ahimaza ame hnöku Azaria, ke Azaria ame hnöku Johanana; 10 ke Johanana ame hnöku Azaria, (wale at a hom hanymen at bihut hnyi uma ame otilá Solomona hnyi Jerusalema:) 11 ke Azaria ame hnöku Amaria, ke Amaria ame hnöku Ahituba; 12 ke Ahituba ame hnöku Zadoka, ke Zadoka ame hnöku Saluma; 13 ke Saluma ame hnöku Hilekia, ke Hilekia ame hnöku Azaria; 14 ke Azaria ame hnöku Seraia, ke Seraia ame hnöku Jozadaka; 15 ke ame hnyi he Jozadaka hnyi úen Iehova ame hom bá Juda me Jerusalema a ányá ge hnyamö Nebukaneza.

16 Haba je бага laku Levi; me, Geresoma, me Kohatha, me Merari. 17 Ke walang li ien li бага laku Geresoma; jia Libeni me Simei. 18 Ke haba je бага laku Kohatha, me Amerama, me Izara, me Heberona, me Uziela. 19 Ke haba li бага laku Merari; me Maheli me Musi. Ke walang je lap anyin at Levi hoton ta je lap anyin lakamödrin. 20 Haba únyi ga Geresoma; me, Libeni a nokon бага, Jahath

a nokon бага, Zima a nokon бага; 21 Joa a nokon бага, Ido a nokon бага, Zera a nokon бага, Jeaterai a nokon бага. 22 Ke haba mátráni Kohatha; Aminadaba a nokon бага, Kora a nokon бага, Asiro a nokon бага; 23 Elekana a nokon бага, Ebiasafa a nokon бага, Asiro a nokon бага; 24 Tahath a nokon бага, Uriela a nokon бага, Uzia a nokon бага, Saulo a nokon бага. 25 Ke haba li бага laku Elekana; me, Amasai, me Ahimoth. 26 Haba Elekana; me je mátráni Elekana; jia Zofai a nokon бага, me Nakath a nokon бага; 27 Eliaba a nokon бага, Jerohama a nokon бага, Elekana a nokon бага. 28 Ke haba li бага laku Samuela; jia Joela a atö, me Abia útangköu më. 29 Haba je mátráni Merari; Maheli, Libeni a nokon бага, Simei a nokon бага, Uza a nokon бага; 30 Simea a nokon бага, Hagia a nokon бага, Asaia a nokon бага.

31 Ke walang je hnyat ame otilá Davita hon hanymen khumöng hnyi uma umö Iehova, k' ame laba hmá tang. 32 Ke ödrin e hnyi khumöng hnyi hnyimakan uma manoiny uma hnân úhacaköu, ke ne o but a hia but Solomona otilá uma umö Iehova hnyi Jeruselema: ke ödrin e tot gaga hnyi je hanymödrin. 33 Ke walang je hnyat tot, me je mátránidrin je бага. Haba keihen únyi ge at Kohatha: jia Heman at khumöng, бага nöku Joela, бага nöku Samuela; 34 бага nöku Elekana, бага nöku Jerohama, бага nöku Eliela, бага nöku Toa; 35 бага nöku Zuf, бага nöku Elekana, бага nöku Mahatha, бага nöku Amasai; 36 бага nöku Elekana, бага nöku Joela, бага nöku Azaria, бага nöku Zefania; 37 бага nöku Tahath, бага nöku Asiro, бага nöku Abiasafa, бага nöku Kora; 38 бага nöku Izara, бага nöku Kohatha, бага nöku Levi, бага nöku Isaraela. 39 Ke liamekeiny më, jia Asafa, at ame tot hnyi ke keihen a metán, wale Asafa бага nöku Berekia, бага nöku Simea; 40 бага nöku Mikaela, бага nöku Baaseia, бага nöku Malekia; 41 бага nöku Etheni, бага nöku Zera, бага nöku Adaia; 42 бага nöku Ethana, бага nöku Zima, бага nöku Simei; 43 бага nöku Jahath, бага nöku Geresoma, бага nöku Levi. 44 Ke haba hnyi ke keihen a meny je liamekeiny mödrin je бага mátráni Merari; jia Ethana бага nöku Kisi, бага nöku Abedi, бага nöku Maluka; 45 бага nöku Hasabia, бага nöku Amazia, бага

nöku Hilekia ; 46 бага нöку Amezi, бага нöку Bani, бага нöку Semeri ; 47 бага нöку Maheli, бага нöку Musi, бага нöку Merari, бага нöку Levi. 48 Ke adre ip at Levi a je liamekeiny mödrin hobi kâu je hanymen hia hnyi uma umen Khong.

49 Ke haba Arona me lakon ödrin e hudö hon taben leü hut, me hon taben le utö ae bo so, me änyä huliwainy dok ae ti kap, me bi hwaban möt anyin at Isaraela, helä me Mose athnyabainy Khong ame hûna. 50 Ke walang je бага matrâni Arona : Eleazara a nokon бага, Fineasa a nokon бага, Abisua a nokon бага ; 51 Buki a nokon бага, Uzi a nokon бага, Zeraia a nokon бага ; 52 Meraioth a nokon бага, Amaria a nokon бага, Ahituba a nokon бага ; 53 Zadoka a nokon бага, Ahimaza a nokon бага.

54 Ke walang je hnyabadrin hoton hnödrin hna hunuma hnyi je hnyigöulödrin : 55 adre me ham ka laku Arona hanen lap anyin at Kohatha, haba leköp a bân hobi ködrin, Heberona hnyi hnyei Juda, me je hnyaban igigilö e ; 56 ke haba je utkânäiny taun, me je tauniny ae ühnyikong, adae me ham kö Kaleba нöку Jefune. 57 Ke adre me ham ka laku Arona je taun hnân laba duöng hnyin, a Heberona ; me Libena me je hnyaban igigilö, me Jatira, me Esetemoa me je hnyaban igigilö ; 58 me Holon me je hnyaban igigilö, me Debira me je hnyaban igigilö ; 59 me Asan me je hnyaban igigilö, me Bethesemes me je hnyaban igigilö : 60 ke ünyi hnyi tribu anyi Beniamina ; Geba me je hnyaban igigilö, me Alemeth me je hnyaban igigilö, me Anathoth me je hnyaban igigilö. Haba anyidrin je taun hia hnyi anyidrin je lap, a, thötin je taun. 61 Ke adre me ham ka kolon laku Kohatha ge leköp, ünyi hnyi lap anyin tribu, ünyi hnyi hafiny tribu, a hafiny Manase, a ten ta taun. 62 Ke hobi kâu laku Geresoma hoton anyidrin je lap, ünyi hnyi tribu Isakara, me ünyi hnyi tribu Asera, me ünyi hnyi tribu Nafatali, me ünyi hnyi tribu Manase hnyi Basana, a thötin je taun. 63 Ke haba hnân hobi kâu laku Merari hoton anyidrin je lap, adre ham ge leköp ünyi hnyi tribu Reubena, me ünyi hnyi tribu Gada, me ünyi hnyi tribu Zebulona, a twelv je taun. 64 Haba lakon Isaraela ödrin e ham ka at Levi ta je taun me je hnyaban je taun a igigilö. 65 Ke ödrin e ham ge leköp je taun eling adre me ha ien, ünyi hnyi tribu anyin laku

Juda, me ünyi hnyi tribu anyin laku Simeona, me ünyi hnyi tribu anyin laku Beniamina. 66 Ke haba ke je lap anyin je laku Kohatha ae hu je taun hnyi idrin ünyi hnyi tribu Eferaima. 67 Ke adre ham ködrin je taun hnân lubaduöng hnyin, wale Seke-ma hnyi hnyei ae hut hnyi Eferaima me je hnyaban igigilö ; me Gezera me je hnyaban igigilö ; 68 me Jokameama me je hnyaban igigilö, me Bethes-horona me je hnyaban igigilö ; 69 me Ajalona me je hnyaban igigilö, me Gatha-rimona me je hnyaban igigilö : 70 ke ünyi hnyi hafiny tribu Manase ; Anere me je hnyaban igigilö, me Bileam me je hnyaban igigilö, hobi kâu kolon lap anyin laku Kohatha. 71 Hobi kâu laku Geresoma adre ham, ünyi hnyi lap anyin hafiny tribu Manase, Golana hnyi Basana, me je hnyaban igigilö, me Aseterota me je hnyaban igigilö : 72 ke ünyi hnyi tribu Isakara ; Kadesi me je hnyaban igigilö, me Daberath me je hnyaban igigilö ; 73 me Ramotha me je hnyaban igigilö, me Anem me je hnyaban igigilö : 74 ke ünyi hnyi tribu Aser ; Miseal me je hnyaban igigilö, me Abedon me je hnyaban igigilö ; 75 me Hukok me je hnyaban igigilö, me Rehoba me je hnyaban igigilö : 76 ke ünyi hnyi tribu Nafatali ; Kadesi hnyi Galilaia me je hnyaban igigilö, me Hamona me je hnyaban igigilö, me Kiriathaima me je hnyaban igigilö. 77 Ke hobi kâu kolon at Levi, laku Merari, adre ham, ünyi hnyi tribu Zebulona, Rimona me je hnyaban igigilö, me Tabora me je hnyaban igigilö : 78 ke haba hoton Joridano hnyi Jeriko, wale ke keihen Joridano e deiö adre ham ködrin ünyi hnyi tribu Reubena, Bezeri hnyi hnyebuba me je hnyaban igigilö, me Jahaza me je hnyaban igigilö, 79 me Kademotha me je hnyaban igigilö, me Mefath me je hnyaban igigilö : 80 ke ünyi hnyi tribu Gada ; adre ham, Ramotha hnyi Gileada me je hnyaban igigilö, me Mahanaima me je hnyaban igigilö, 81 me Hesebona me je hnyaban igigilö, me Jazera me je hnyaban igigilö.

HNHYIMAKAN 7.

KE haba je бага laku Isakara ; me, Tola, me Pua, me Jasuba, me Simerona, ödrin vak. 2 Ke haba je бага laku Tola ; me, Uzi, me Refaia, me Jeriela, me Jakemai, me Ibesam, me Samuela, je taben je lap anyin lakamödrin, wale Tola ; tavat

ae hwege hnyi anyidrin je dö: haba úsei-
drin hnyi úö Davita, ödrin twente tu thau-
zan ke siks haded. 3 Ke haba бага нöku
Uzi; me Iezeraia; ke haba je бага laku
Iezeraia; me, Mikaela, me Obadia, me
Joela, me Isia, ödrin thabúng: ödrin je
taben hia. 4 Ke unyidrin je deö vat a
thöte siks thauzan, hnyi anyidrin je dö
hoton je lap anyin lakamödrin: anyin ae
se hia laöiödrin me lakudrin je бага. 5
Ke haba je liamekeiny mödrin unyin je
lap anyi Isakara, a ödrin tavat hwege,
ödrin eite seven thauzan, adre öü ödrin
hia hnyi anyidrin je dö.

6 Haba je бага laku Beniamina; me,
Bela, me Bekera, me Jediaela, ödin kun.
7 Ke haba je бага laku Bela; me, Eze-
bona, me Uzi, me Uziela, me Jerimoth,
me Iri, ödrin faiv; je taben lap anyin
lakamödrin, tavat hwege; ödrin twente
tu thauzan ke thöte foa tavat, adre me öü
ödrin hnyi anyidrin je dö. 8 Ke haba je
бага laku Bekera; me, Zemira, me Joasa,
me Eliezera, me Elioenai, me Omeri, me
Jeremoth, me Abia, me Anathoth, me
Alemeth. Ödrin hia je бага laku Bekera.
9 Ke adre me öü ödrin hnyi je dö, hoton
anyidrin je dö, je taben je lap anyin laka-
mödrin, hnyat ae hwege, ödrin twente
thauzan ke tu haded. 10 Ke haba бага
нöku Jediaela; me Bilehana: ke haba je
бага laku Bilehana; me, Jeuso, me Benia-
mina, me Ebuda, me Kenaana, me Zethan,
me Tasesa, me Ahisahara. 11 Ödrin hia
e je бага laku Jediaela, hoton je taben je
lap anyin je lakamödrin, hnyat ae hwege,
ödrin seventin thauzan ke tu haded, tavat
ae khan' ödrin he ka hnyi he hnyi utbavat
he ka vat. 12 Ke Supima me Hupima li
бага laku Iri, ke Husima, бага нöku
Ahere.

13 Haba je бага laku Nafatali; me,
Jazela, me Guni, me Jezera, me Saluma;
a laöbi Bila.

14 Haba je бага laku Manase; me
Aseriela, wale a hnokoá áián: (ke haba anyin
momo, a momo Arama ame hnöku Makir
kamö Gileada: 15 ke haba Makir ame hok
áián ga Hupima me Supima, haba ien hani-
dru, jia Maaka;) ke Zelofeada ien a loiny:
ke e hu lakon je hlu ga Zelofeada. 16 Ke
haba Maaka öiö Makir ame hnokoá da, me
hwenyi ien Peres; ke Sères ien liamekeiny
mä; ke li lakon jia Ulam me Rekem. 17
Ke haba бага нöku Ulum; jia Bedan.
Wale je mátráni Gileada, нöku Makir,

нöku Manase. 18 Ke haba Hamoleketh
a haniny ame hnöku Isod, me Abiezera,
me Mala. 19 Ke haba je бага laku
Semida; me, Ahian, me Sekema, me Liki,
me Aniam.

20 Ke haba je mátrani Eferaima; me,
Suthela, ke Barida a nokon бага, me Tahath
a nokon бага, me Elada a nokon бага, me
Tahath a nokon бага, 21 me Zabada a nokon
бага, me Suthela a nokon бага, me Ezera,
me Elead, waleji a hling' ödru at Gatha tavat
adre hnokoá hnyi hnyi, anyin a ödrin e o
but he ka venäu haledrin je meno. 22 Ke
ame tege gadru Eferaima a kamödrü hnyi
je bong ae se, ke ame o but je liamekeiny
mä he ka otubwelá e. 23 Ke e ame didrü
ka áián, me ame erkin dut momo, me hno-
koá da, me hwenyi ien Beria, anyin ame o
je okongon hnyaban. 24 Ke haba nokon
hlu, jia Seera, wale at ame otílá Bethe-
horona eü me ethö, me Uzen-seera. 25
Ke haba nokon бага, Refa, me Resef, me
Tela a nokon бага, me Thana a nokon
бага; 26 me Laadan a nokon бага, me
Amihuda a nokon бага, me Elisama a
nokon бага; 27 me Nuna a nokon бага,
me Josua a nokon бага. 28 Ke haba je
idrin me je hnyabadrin, Beth-ela me je
tauniny, ke e deiö Naara, ke e jio Gezera
me je tauniny; Sekema minya me je tauniny
ke ne o but hnyi Aza me je tauniny: 29
ke haba hnyi hnyigöulen je laku Manase,
Betheseana me je tauniny, Megido me je
tauniny, Dora me je tauniny. Adre labä
e hnen laku Josefa нöku Isaraela.

30 Ke haba je бага laku Asera; me
Iemina, me Ieseva, me Isevi, me Beria, me
Sara a hanidrin. 31 Ke haba li бага laku
Beria; me Heberu, me Malekiela, wale at
a ibi hwán laba hnyi Birezavith. 32 Ke
haba Heberu ame hnöku Jafelet, me Somera,
me Hotham, me Sua a hanidrin. 33 Ke
haba je бага laku Jafelet; me Pasak, me
Bimeal, me Asevath. Wale laku Jafelet.
34 Ke haba je бага laku Simeri; me, Ahi,
me Roga, me Jehuba, me Arama. 35 Ke
haba je бага laku Helem a liamekeiny mä:
me Zofa, me Iemina, me Seles, me Amal. 36
Ke haba je бага laku Zofa; me, Sua, me
Harenefa, me Sual, me Beri, me Imera; 37
me Bezeri, me Hodi, me Sama, me Silesa,
me Itheran, me Bera. 38 Ke haba je бага
laku Jethero, me, Jefune, me Pisepa, me
Ara. 39 Ke haba je бага laku Úla, me
Ara, me Haniela, me Risea. 40 Ödrin hia
ling je mátrám Asera, je ban je lap anyin

lakamen, tavat adre úca ae ti hwege, je ban je taben. Ke haba úseidrin adre me aú he ka hnyi vat, me, twente siks thauzan tavat.

HNyimakan 8.

KE haba Beniamina ame hnöku Bela nokon a bán, me Asebala a loiny, me Ahara a kuniny; 2 me Noa a vakiny, me Rafa a thabúnginy. 3 Ke e hu je бага laku Bela; jia Adara, me Gera, me Abihuda; 4 me Abisua, me Naamana, me Ahoa; 5 me Gera, me Supima, me Hirama. 6 Ke walang je бага laku Ehuda; ödrin je ban je lap anyin lakamen a aten Geba, ke adre me hom hwenb' ödrin Manakatha ai: 7 ke e ame hom hwenbá minya Naamana, me Ahia, me Gera; ke e ame hnöku Uza, me Ahihuda. 8 Ke haba Saharaim ame hnokoá je lakon hnyi utká-náiny Moaba, hwaban hnen hna hn' ödrin dut; Husima me Baara ien laáian. 9 Ke e ame hnokoá ga Hodes a áian, Jobab, me Zibia, me Mesa, me Malekam; 10 me Jez, me Sabia, me Mirema. Wale lakon, je ban je lap anyin lalamen. 11 Ke e ame hnokoá ga Husima, Ahituba, me Elepaala. 12 Ke haba je бага laku Elepaala; me, Heberu, me Misam, me Semeri, at ame otílá Ono me Lod, me je tauniny: 13 me Beria, me Sema, wale li ban je lap anyin lakamen aten Ajalona, tavat ödrin e obá aten Gatha; 14 me Ahio, me Sasak, me Jeremoth; 15 me Zebadia, me Arada, me Eder; 16 me Mikaela, me Isepa, me Joha, a je бага laku Beria; 17 me Zebadia, me Mesulama, me Hezeki, me Heberu; 18 me Isemerai, me Izelia, me Jobab, je бага laku Elepaala; 19 me Jakim, me Zikeri, me Zabedi; 20 me Elienai, me Zilethai, me Eliela; 21 me Adaia, me Beraia, me Simerath, je бага laku Sema; 22 me Isepana, me Heberu, me Eliela; 23 me Abedon, me Zikeri, me Hanan; 24 me Hanania, me Elama, me Anetothia; 25 me Ifedia, me Penuela, je бага laku Sasak; 26 me Sameserai, me Searia, me Athalia; 27 me Jaresia, me Elia, me Zikeri, je бага laku Jerohama. 28 Ödrin je ban je lap anyin je lakamen, a je taben: ödrin e laba hnyi Jerusalema. 29 Ke ame laba hnyi Gibeona at ame ibi hwán Gibeona, (jia Jeieia) ke Maaka ien áian: 30 ke haba бага nokon a bán me, Abedon; me Zura, me Kiso, me Baala, me Nadaba; 31 me Gedor,

me Ahio, me Zaker. 32 Ke haba Mike-loth ame hnöku Sema. Ke ödrin minya ödrin e tha laba me je liamekeiny mödrin hnyi Jerusalema, cicó je liamekeiny mödrin. 33 Ke haba Neri ame hnöku Kiso; ke Kiso ame hnöku Saulo; ke Saulo ame hnöku Jonathana, me Maleki-sua, me Abinadab, me Esibaala. 34 Ke haba бага nöku Jonathana, me, Meri-baala; ke haba Meri-baala ame hnöku Mika. 35 Ke haba je бага laku Mika; jia Pithon, me Melek, me Tarea, me Ahaza. 36 Ke Ahaza ame hnöku Jehoda; ke Jehoda ame hnöku Alemeth, me Azemaveth, me Zimeri; ke Zimeri ame hnöku Moza: 37 ke Moza ame hnöku Binea; ke Rafa a nokon бага, me Elasa a nokon бага, me Azela a nokon бага; 38 ke ödrin siks je бага laku Azela, walang je ödrin; jia Azerikam, me Bokeru, me Isamaela, me Searia, me Obadia, me Hanan; ödrin hia e laku Azela. 39 Ke haba je бага laku Eseka a liamekeiny më; me, Ulam nokon a bán, me Jeuso a loiny, me Elefelet a kuniny. 40 Ke haba laku Ulam ödrin je hnyat ae ti wwege, tavat fana, ke se hia je lakudrin, me je öbidrin, ödrin wan haded ke fite. Ödrin hia e je mátráni Beniamina.

HNyimakan 9.

ME helæ adre aú je dö anyin at Isara-ela hia; ke wá bi, adre sihnalimi-drin hnyi tusi anyin je than Isaraela: ke adre me hom at Juda Babulona ai can hnödrin hna hanyáúá. 2 Ke haba tavat a bán ka laba hnyi idrin hnyi anyidrin je taun, me, at Isaraela, me tavat bihut, me at Levi, me at Nethini. 3 Ke ame laba hnyi Jerusalema ke je laku Juda, me ke je laku Beniamina, me ke je laku Eferaima me Manase; 4 wale Uthai бага a nöku Amihuda, бага nöku Omeri, бага nöku Imeri, бага nöku Bani, wale ke je mátráni Farez nöku Juda. 5 Ke haba keihen at Silo; me Asaia a atö, me je lakon. 6 Ke haba ke je бага laku Zera; me Jeuela, me je liamekeiny mödrin, ödrin siks haded me nainte. 7 Ke ke je бага laku Beniamina; jia Salu nöku Mesulama, me бага nöku Hodavia, me бага nöku Hasenua; 8 me Ibeneia бага nöku Jerohama, me Ela бага nöku Uzi, me бага nöku Mikeri, me Mesulama бага nöku Sefatia, бага nöku Reuela, бага noku Ibeneia? 9 me je liamekeiny mödrin, hoton anyidrin je lap, ödrin nain

haded ke fitte siks. Ödrin hia je ban je lap anyin lakamen hoton je lap anyin lakamödrin.

10 Ke haba ke je at bihut ; wale Jedaia, me Jehoiarib, me Jakina ; 11 me Azaria baga nöku Hilekia, baga nöku Mesulama, baga nöku Zadoka, baga nöku Mersioth, baga nöku Ahituba, at ame musö uma umen Khong ; 12 me Adaia baga nöku Jerohama, baga nöku Pasur, baga nöku Malekia, me Maseia baga nöku Adiela, baga nöku Jazera, baga nöku Mesulama, baga nöku Mesilemoth, baga nöku Imer ; 13 me je liamekeiny mödrin je ban je lap anyin je lakamödrin wan thauzan ke seven haded ke sikste ; tavat ae ti khana he ka huliwa hnyi uma umen Khong. 14 Ke ke je at Levi ; wale Semaia baga nöku Hasuba, baga nöku Azerikam, baga nöku Hasabia, hanen je baga laku Merari ; 15 me Bakebakara, me Heres, me Galal, me Matania baga nöku Mika, baga nöku Zikeri, baga nöku Asafa ; 16 me Obadia baga nöku Semaia, baga nöku Galal, baga nöku Jeduthun, me Berekia baga nöku Asa, baga nöku Elekana, tavat adre me labä je taun ae úhnyúkong anyin at Netofa. 17 Ke haba tavat tuö hwanuma ; me Saluma, me Akub, me Talemon, me Ahiman, me je liamekeiny mödrin ; haba at ae nua me Saluma ; 18 ke haba hanymen, me, homagöuleiny than e jemeiö hwân ehac : ödrin tavat tuö homagöule hobi kâu hna hunuma anyin laku Levi. 19 Ke Saluma baga nöku Kore, baga nöku Ebiasafa, baga nöku Kora, me je liamekeiny më, hanen lap anyin kamen, tavat Kora, haba ödrin homakan je huliwa, je hnyat tuö je homagöuleiny uma mano : ke je kamödrin waleji ödrin e musö je hna hunuma anyi Iehova, tavat tuö hwanumen ; 20 ke Fineasa nöku Eleazara at ame musi ödrin ehac, ke tha Iehova më. 21 Haba Zakaria baga nöku Meselemia ame tuö hwanumen uma hnân úkhacaköu. 22 Ödrin hia e tavat adre úca he ka tuö hwanuma, ödrin tu hadad ke twelv. Adre öü ödrin hoton anyidrin je dö hnyi anyidrin je taun, waleji hnö Davita me Samuela at wä hna otilä ka hnyi je hanymödrin adre thu. 23 Ke hanymödrin me je lakudrin, je hwanumen uma umö Iehova, wale umen uma mano he ka tuö hnyi je deö hmak. 24 E hu tavat tuö hwanuma hnyi je ke keihen a vak, jimeiö, me jimeü, me hvadrö, me hwaiöu. 25 Ke hamen je liamekiny

mödrin, hnyi anyidrin je taun, he ka tha ö mödrin hwaban je bong a seven, hnyi ke ün me ke ün : 26 anyin a haba tavat tuö hwanuma a foa, wale ae beönua, ödrin at Levi, e hu hanymen adre thu, ke ödrin e tuö je hnyeule me je uma omjeü hnyi uma umen Khong. 27 Ke ödrin e laba igigilö uma umen Khong, anyin a hamödrin he ka tuö, ke hamödrin he ka khöing hwanuma hnyi je hnyomakatu thibut. 28 Ke hanymen keihen gadrin je kaiainy huliwa ; anyin a ödrin e tuluto e ka odilä thö, me ödrin e tuluto e ka odilä but. 29 Ke haba keihen minya gadrin adre ip hnân tuö je omjehen, me je kaiainy hia dok ae kap, me falawa ae so, me waina, me wakaco, me libanu, me je únyi ae bo so. 30 Ke haba ke je lakon hnyat bihut ödrin e penapena je wakaco adre obosö. 31 Ke hamö Matathia, ke at Levi, nöku Saluma at Kora a atö, he ka musö je únyi adre le hnyin je öt. 32 Ke hanymen ke je laku Kohatha a je liamekeiny mödrin, areto adre omanená, he ka penapena e hnyi je sabath thibut. 33 Ke wale tavat khumöng, je ban je lap anyin je lakamen at Levi, adre me laba hnyi je hnyeule, me ba ju ke huliwa ; anyin a ödrin e tot hnyi je hanymödrin hnyi lany me lit. 34 Ödrin je ban je lap anyin je lakamen at Levi, hnyi anyidrin ta je dö hia, je hnyat ae beönua : haba tavat eling ödrin e laba hnyi Jerusalema.

35 Ke ame laba hnyi Gibeona at ame ibi hwân Gibeona, wale Jeiela, ke Maaka ien áiän : 36 ke haba baga nokon a bän, me Abedon, me Zura, me Kiso, me Baala, me Neri, me Nadaba ; 37 me Gedor, me Ahio, me Zakaria, me Mikeloth. 38 Ke haba Mikeloth ame hnöku Semama. Ke ödrin e tha laba me je liamekeiny mödrin hnyi Jerusalema, cicö je liamekeiny mödrin. 39 Ke haba Neri ame hnöku Kiso ; ke Kiso ame hnöku Saulo ; ke Saulo ame hnöku Jonathana, me Maleki-sua, me Abinadab, me Esebaala. 40 Ke haba baga nöku Jonathana, me, Meri-baala ; ke Meri-baala ame hnöku Mika. 41 Ke haba je baga laku Mika : me Pithon, me Melek, me Tarea, me Ahaza. 42 Haba Ahaza ame hnöku Jara ; ke Jara ame hnöku Alemeth, me Azemaveth, me Zimeri ; ke Zimeri ame hnöku Moza ; 43 ke Moza ame hnöku Binea ; ke Refai a nokon baga, me Elasa a nokon baga, me Azela a nokon baga. 44 Ke ödrin siks je baga laku Azela, haba

je iödrin, me, Azerikam, me Bokeru, me Isamaela, me Searia, me Obadia, me Hanan : wale je бага laku Azela.

HNYIMAKAN 10.

KE haba at Filisite ödrin e vat me at Isaraela : me ame kec at Isaraela ge at Filisiti, k' ame ta hnyat adre hlingá hnyi bucen Gileboa. 2 Ke ame hnu hwegjö Saulo me lakon ge at Filisiti ; me haba at Filisiti ödrin e kuc Jonathana, me Abinadab, me Maleki-sua, laku Saulo a kun. 3 Ke hwege vat kö Saulo, me ame khaú ju e ge tavat fana ; k' ame hmak ge tavat hlec fana. 4 Me haba Saulo ame ha ka at ame hom tilá anyin ta je omjehen vat, ka habe, Oc ut ányám hele vat me dáoi nya káu ; wá e nye o but tavat eling adre ca peretomoná me oveci nya. Ke höcö bi at ame hom tilá anyin je omjehen vat ; anyin ae gan hmá anyin ot. Anyin a wale Saulo ame hom anyin hele vat me ta takou. 5 Ke a wá but at ame hom tilá anyin je omjehen vat a ga mokcu Saulo, me e ame ka ta takou bi anyin hele vat me mokcu. 6 Waleling me me mokcu Saulo me ta lakon a kun ; k' ame tha mokcu hia anyin lap. 7 Ke haba at Isaraela hnyi hnyigöulen bucen ödrin e wá a g' adre kec, ke a mokcu Saulo me ta lakon a kun, me ödrin e hna but je taun me kec ; ke ame o but at Filisiti me labá e.

8 Ke haba nyi me ame o at Filisiti he ka uny je úkhaúen je komok, me ödrin e ö Saulo me lakon ödrin e ta but hnyi bucen Gileboa. 9 Ke ödrin e uny anyin úkhaú, me ödrin e hom ban, me omjehen vat me kuná ka hnyi hnyei iny at Filisiti igigilö, he ka thumeto anyidrin je idola, me tavat. 10 Ke ödrin e ip anyin je omjehen vat hnyi uma umen anyidrin je khong, me uhno ban hnyin uma umö Dagona. 11 K' a löng ut at Jabesi-gileada wale ge hnen at Filisiti hna ányá kö Saulo, 12 me ame todrö tavat hwege hia me hom unyi Saulo, me unyin je lakon, me hom Jabese ai, me konám je jeiödrin hmelen iwajo hnyi Jabesi, k' ödrin e ca ban hnyi seven je bong. 13 Heláe ame mokcu Saulo can anyin monu wale a ányá kö Iehova, waleji a ca löng hoton hofuc ho Iehova ; ke khaca, anyin a e ame elám unyin at ae tren biobotkong, me hnei ; 14 ke a ca hnei bi ga Iehova : wale me e ame hlingá e, me wia dökhü kö Davita nöku Jese.

HNYIMAKAN 11.

KE ame úkchacökü thö Isaraela hia unyi Davita hnyi Heberona me ha, ka habe, Wá bi, öhmun ang je jeiám me je utioiám. 2 Hnyi je ün ehac ke tiga than bi Saulo u je lelö ehele me lelö jem at Isaraela : ke haba Iehova Khongom ame ha köu, ka habe, U at ame he ka hán lakeik a Isaraela, ke u me he ka taben lakeik a Isaraela. 3 Me ame o but walingatiny Isaraela hia thithö ka than hnyi Heberona ; ke Davita ame úhinhnyköu mödrin hnyi Heberona hnyi hnyimakö Iehova ; ke ödrin e hú Davita me hnán thaniny Isaraela, hoton hofuc ho Iehova a deny Samuela. 4 Ke haba Davita me Isaraela hia ödrin e he Jerusalema ai (wale Jebusi) ; e eling at Jebusi tavat a idrin hnyei. 5 Ke haba aten Jebusi ödrin e ha kö Davita, ka habe, U me ca he ka didrö ang. Ke so bi Davita ame hügüná hnbá hnyi Ziona ; wale taun anyi Davita. 6 Ke haingö Davita, ka habe, Haba at ame he ka bán ka kot at Jebusi, e ame he ka homakan me taben. Me ame bö Joab nöku Zerua, me e ame homakan. 7 Ke ame laba Davita hnyi hnbá ; anyin a wale adre me hwenyi ien e taun anyi Davita. 8 Ke e ame op taun igigilö hwán hnyi Milo igigilö : ke haba Joab ame ányáwia ke keihen taun. 9 K' ame görany tot Davita, ke e bi unyin Iehova Khongon sabaoth.

10 Ke walang tavat ae beónua ge tavat ae hwege unyi Davita, tavat a tha hwege mé hnyi dokhon dökhü, tha ödrin me Isaraela hia, he ka otílá e me than, hoton hofuc ho Iehova ga Isaraela. 11 Ke walang úseiny tavat hwege unyi Davita : Jasobeam nokon at Hakemoni, taben hnyat a thöte ; e ame hai dán ö me hlingá kun ta haded hnyi ün a khaca. 12 Ke hwaban e, Eleazara nöku Dodo, at Aohi, hanen hnyat a kun ae hwege. 13 Habe e me unyi Davita waleji hnyi Efesi-damim, k' ame úkchacökü eling at Filisiti he ka vat, wale hnyi ke utkáná, dok ae si hnyin bali ; ke ame kec tavat ge at Filisiti. 14 Ke ödrin e tot hnyi wanben utkáná, me tuö wia e, me hlingá at Filisiti ; ke Iehova ame omeli ödrin ge úhömeli ae gan hmá. 15 Ke ame he hnyat a kun hanen je taben a thöte kö Davita hnyi op Adulama, hnyi kic ; ke haba at Filisiti ödrin e hunuma hnyi hnyigöulen bucen e Refai. 16 Ke e bi Davita hnyi

hnabá, ke e but hnyi Bethe-leema lap tue anyin at Filisiti. 17 Ke Davita ame weny ke únyi, me haingen, ka habe, E na he bi ke at ka habelik ge an úheny Bethe-leema wale hnyi homagöüle! 18 Ke haba ödrin kun ödrin e thu vat anyin at Filisiti, me se köö hnyi an hnyi Bethe-leema hnyi homagöüle, me hom, me hom kö Davita: ke so bi Davita ame höcö he ka ic, ke e ame hingälá e kö Iehova, 19 me ha, ka habe, Ohe, Khonguk lö, oge me ca he bi nya ka ányá únyi eling: hawa, oge me he ka ijem dren tavat eang ödrin e ne moku? anyin a ödrin e hom e, ke ödrin e ne moku. Anyin a wale e ame höcö he ka ijem. Wale hna ányá nhen hnyat eling a kun ae hwege. 20 Ke haba Abisai liamekiny me Joab, me, e beónua ge hnyat a kun: anyin a e ame hai dán ö hon tavat a theri haded me hling' ödrin, me me tha e ien bi me ke li at a lo. 21 Haba ödrin kun, ke e ame lung hon li at a lo, ke adre me otilá e hnán taben ködru: ke so bi adre ca otilá e hnyi kuniny a bán. 22 Haba Benaia nöku Jehoiada nokon at ae hwege hnyi Kabezeela, at ame ányá je únyi ae gan, me e ame kot li laku Ariel a li at Moaba; ke e ame ut ka hnyi op me hlingá ke liona eú hnyi wanben, wale hnyi úen ae hu kiona. 23 Ke e ame hlingá ke at Aigupito, at ae beú hmá, faiv kubit ibetúen; ke e hu hnyi hnyamen at Aigupito, ö helá me man utóiny únyi hnán hwáwá mano; me e ame he káu me uci, me oc ut ö únyi hnyi hnyamen at Aigupito, me hlingá e bi ge dán ö. 24 Wale ta je únyi a ányá Benaia nöku Jehoiada, me me hu ien unyin hnyat a kun ae hwege hmönyin. 25 Wá bi, e ame lung hon hnyat a thöte, ke so bi adre ca otilá e hnyi kuniny a bán: ke Davita ame otilá e hnán taben tavat tue.

26 Me je aten je deó vat minya ae hwege; Asael liamekiny me Joab, me Eleanana бага nöku Dodo at Bethe-leema; 27 me Sama at Harari, me Helez at Pelone; 28 me Ira бага nöku Ikez at Tekoa, me Abiezera at Anathoth; 29 me Sibekai at Husa, me Itai at Aohi; 30 me Maharai at Netofa, me Heled бага nöku Baana at Netofa; 31 me Itai бага nöku Ribai úheny Gibeá anyin laku Beniamina, me Benaia at Pirathon; 32 me Hurai úheny hnyi je wagewe hnyi Gasa, me Abiela at Araba; 33 me Azemaveth at Bahurim, me Eliaba at Salabon; 34 me je бага laku Hasem at Gizon, wale Jonathana nöku

Sage at Harari; 35 me Ahiam бага nöku Sakari at Harari, me Elifal бага nöku Uri; 36 me Hefera at Mekerathi, me Ahia at Pelone; 37 me Hezero at Karemela, me Naarai бага nöku Ezebai; 38 me Joela liamekiny me Nathana, me Mibeka бага nöku Hagara; 39 me Zelek at Amona, me Nahari at Berotha, at ame hom tilá je omjehen vat anyi Joab nöku Zerua; 40 me Ira at Iethero, me Gareb at Iethero; 41 me Uria at Heth, me Zabad nöku Ahelai; 42 me Adina nöku Siza at Reubena, ke taben at Reubena, ke tha e me tavat a thöte; 43 me Hanan бага nöku Maaka, me Josafata at Mitheni; 44 me Uzia at Aseterota, me Sama me Jehiela li бага laku Hotham at Aroera; 45 me Jediaela nöku Simeri, me Joha liamekiny me, at Tizi; 46 me Eliela at Mahavi, me Jeribai me Josavia li laku Elenama, me Ithema at Moaba; 47 me Eliela, me Obeda, me Jaasiela at Mezoba.

HNYIMAKAN 12.

KE walang tavat adre me o kö Davita lubaduöng ga Saulo nöku Kiso: ke ödrin e hanen je hnyat ae ti hwege, ödrin e hadruá hnyi vat. 2 Ke ödrin e hok cafana, ke tha metá hia je li hnyamödrin he ka kúlúá veto, me hlec fana; haba ödrin je liamekiny me Saulo at Beniamina. 3 Ahiezera at a bán, ke Joasa a loiny, a li laku Sema at Gibeá; me Jeziela, me Pelet, li laku Azemaveth; me Beraka, me Jehu at Anathoth; 4 me Isemaia at Gibeona at ae ti hwege unyin tavat a thöte k' ame musó hnyat a thöte; me Jeremia, me Jaziela, me Johanana, me Jozabada at Gedera; 5 me Eluzi, me Jeremoth, me Bealia, me Semaria, me Sefatia at Harufi; 6 me Elekana, me Iesia, me Azareela, me Joezer, me Jasobeam, tavat Kora; 7 me Joela me Zebadia, li laku Jerohama at Gedor. 8 Ke ame ut minya ke je at Gada kö Davita hnyi hnabá hnyi hnyebuba, tavat ae ti hwege, tavat ae khana vat, hnyat hok bec me ö; ke haba je hnyimaködrin me helá me je liona, ke háhá je cadrin helá me je zebi hon je bucen; 9 Ezera at a bán, me Obadia a loiny, me Eliaba a kuniny; 10 me Misemana a vakiny, me Jeremia a thabúnginy; 11 me Atai a siksiny, me Eliela a seveniny; 12 me Johanana a eitiny, me Elezabad a naininy; 13 me

Jeremia a teniny, me Makebanai a eleveniny. 14 Wale ke je taben vat a laku Gada: haba at ae úhnyúkong gadrin, me, tha úcú me wan haded, ke haba at ae gan, me, tha úcú me wan thauzan. 15 Ke wale hnyat ödrin e he hanyáúá Joridano hnyi tehi a bán, k' ame bahihingölö je baten wagewe hia; k' ödrin e hnu aten je hnyigöulen bucen hia e deió me jio. 16 Ke ame o but ke je laku-Beniamina me Juda kö Davita hnyi hnabá. 17 Ke Davita ame didrut he ka úkhanö mödrin, me ha ködrin, ka habe, Öbun e ne o könya hnyi úsoköu he ka hadruö nya, awe, oge me he ka tha hnyok möbun: ke so bi öbun e ne he ka alecuo nya ka je iwahnaihmiöny mönya, ke ba kongik, awe, e so ame he Khongon lakamötin ka wá, me thawá. 18 Me haba hanu ame o kö Amasai wale taben thöte, haingen, ka habe, Davita lö, öhmun je atám, me je lahiám, nöku Jese lö: úsoköu, úsoköu köu, me úsoköu ka tavat andre me hadruö u, anyin a Khongom ame hadruö u. Haba Davita ame köp ödrin me otil' ödrin hnán je taben vat. 19 Ke haba keihen je laku Manase andre me utut kö Davita, waleji hnyi úen e ame tha he me at Filisiti he ka vat me Saulo, ke ödrin e ca hadru' ödrin: anyin a je than Filisiti ödrin e úhnenamö me kuná hmetu e, haingödrin, ka habe, E ame he ka kec hmetu kö Saulo a tuhan me je bötin. 20 Ke e ame tiga he Zikelag ai, me ame utut káu ke je laku Manase, jia Adena, me Jozabada, me Jediaela, me Mikaela, me Jozabada, me Elihu, me Zilethai, je taben thauzan anyin at Manase. 21 Ke ödrin e hadruö Davita he ka vat me deó vat andre sei: anyin a ödrin tavat hwege hia, ke je taben vat ut ödrin. 22 Anyin a hnyi ke bong me ke bong andre me labö o kö Davita he ka hadruá e, ke ne o but ödrin e se hia hmönyin, helá me utbavat anyin Khong.

23 Ke walang úseiny je taben hnyat andre me penapena hobi káu vat, tavat andre utut kö Davita hnyi Heberona, he ka wia káu dökhu dökhu Saulo, hoton hofuc ho Iehova. 24 Haba laku Juda tavat hok bec me ö, ödrin siks thauzan ke eit haded, tavat andre penapena hobi káu vat. 25 Ke laku Simeona tavat hwege he ka vat, ödrin seven thauzan ke wan haded. 26 Ke laku Levi ödrin foa thauzan ke siks haded. 27 Ke Jehoiada at ame müsö lap anyi Arona, ke tha e mä theri thauzan me

seven haded; 28 ke Zadoka hidrüu ae hwege, ke únyi hnyi lap anyin kamen twente tu je taben. 29 Ke haba ke je laku Beniamina, je liamekeiny me Saulo, ödrin theri thauzan; ke haba ehac ödrin se hia gadrin ödrin e tha hien me lap anyi Saulo. 30 Ke haba ke laku Eferaima, ödrin twente thauzan ke eit haded, tavat hwege, tavat ae lung hnyi je lap anyin lakamödrin. 31 Ke haba keihen únyi hnyi hafiny tribu Manase, ödrin eitn thauzan, tavat andre ha ien, he ka he me otilö Davita ka than. 32 Ke haba ke je laku Isakara, tavat ae metá he ka wáhmakhmetóá je úen, me je únyi ae úcú he ka ányá hnen at Isaraela, ödrin tu haded je taben, ke haba je liamekeiny mödrin hia ödrin e ling ödrin. 33 Keihen at Zebulona tavat andre hnyi vat, tavat ae khana he ka vat me je omjehen vat hia ae ve bongon, ödrin fifte thauzan, tavat andre me tot metá hnyi vat, ke ca lolo bi hnyok. 34 Me keihen at Nafatali, ödrin wan thauzan je taben, ke tha e mödrin seventin thauzan tavat hok bec me ö. 35 Me keihen at Duna, ae khan' ödrin he ka hnyi vat, ödrin twente eit thauzan ke siks haded. 36 Me keihen Asera, ae khan' ödra he ka hnyi vat, me tot metá, a ödrin fáte thauzan. 37 Ke úheny hnyi hoton Joridano keihen at Reubena, me Gada, me hafiny tribu Manase, me je omjehen vat ae ve bongon hia, ödrin wan haded ke twente thauzan. 38 Ödrin hia e tavat vat, tavat tot metá, k' andre me he Heberona ai me hnyok ae bekhöt he ka otilö Davita ka than hon Isaraela hia: ke haba khaca, e tha hnyekon bi je kolon at Isaraela he ka otilö Davita ka than. 39 Ke tha ödrin ling me Davita hnyi je bong a kun, k' ödrin e tha han me ic: anyin a hia but penapena hobi ködrin ge je liamekekeiny mödrin. 40 Ke haba khaca, haba tavat ae hakekeny ködrin, ke ne o but Isakara, me Zebulona, me Nafatali, me ödrin e hok areto hon je asina, me kamela, me miul, me bolok, a jeú falawa, me je ú wan meta, me je de wan vine andre hlec meleca, me waina, me wakaco, me bolok, me je mamoe ae ti se hia: anyin ae hu senyin hnyi Isaraela.

HNYIMAKAN 13.

KE haba Davita ame úhnenamö me je taben thauzan me je taben haded, a je homakan hia. 2 Ke haingö Davita

ka úkchacaköu hia anyin at Isaraela, ka habe, Ame ne so köbun, ke ame ne únyi ga Iehova Khongutin, me ötin e he ka úkhünöng ka ta je liamekeiny mötin ehele, a je kolon hnyi hneyi hia iny at Isaraela, wale a tha e mödrin je at bihut me at Levi hnyi anyidrin je taun ae hu je hnyaba igigilö, m' ödrin e he ka úkchacaköu kötin: 3 me ötin e he ka hom hmetu tang tangen Khongutin kötin bi: anyin a ötin e ca hnei hnyin hnyi je bong bongu Saulo. 4 Me haingen úkchacaköu hia, ka habe, adre me he ka ányá helâe; anyin a hofuc ae so e hnyi hnyimakan tavat hia thithö. 5 Me haba Davita ame úkchacaköuá Isaraela hia, hwân hnyi Sihora (wageweyny) Aigupito, ke ne o but ka hnyi hna didrö ka hnyi Hamath, he ka hom tang tangen Khong, úheny Kiriatha-jarim. 6 Haba Davita me at Isaraela hia ödrin e tha he Baala ai, wale, Kiriatha-jarim, hanen Juda, he ka hom úheny e tang tangen Khong a Iehova at ame laba hon li kerubi, wale adre hwenyi ien e me Ien. 7 Ke ödrin e hauden tang tangen Khong hon kat ae teb únyi úheny hnyi hnyin uma umö Abinadab: ke haba Uza me Ahio ödrü me alen kat. 8 Ke haba Davita me at Isaraela hia ödrin e khumöng hnyi hnyimakan Khong me tang hwegiödrin hia: ge je khumöng, me je kitara, me nabeli, me bwinybet, me simebalo, me trutru. 9 Ke ödrin e o but ka hnyi hna huje hwit hnyi Kidon, haba Uza ame inâ benyin he ka kât tang; anyin a haü li bolok. 10 Me ame ubâhlâ hmönyin anyi Iehova kö Uza, me e ame kot e, can e ame hinöbeny ka hnyi tang: me e ame mokcu eling hnyi hnyimakan Khong. 11 Haba Davita ame vec can anyin a Iehova ame gâ kö Uza: me e ame hwenyi ien hneyi eling Farez-uz, ke ne o but hnyi bong ang. 12 Ke haba Davita ame ouden Khong hnyi bong eling me ha, ka habe, Oge me he ka kâmâu ka hom könya tang tangen Khong? 13 Me Davita ame ca hom kâu tang ka hnyi taun anyi Davita, ke e ame saüâ ka hnyi uma umö Obed-edoma at Gatha. 14 Ke ame hnen tang tangen Khong unyin lap anyi Obed-edoma eiö hnyi uma hnyi kun ta tehi: ke haba Iehova ame ohnahicâ lap anyi Obed-edoma, me anyin ta je únyi hia.

HNYIMAKAN 14.

KE haba Hirama than Turo ame kunâ je úthumetu kö Davita, me je üö arasi, me tavat huliwan veto, me tavat tretrau utö, m' adre me op umen uma. 2 Ke Davita ame wâhmakhmeto a Iehova ame ohmâ e hnân than Isaraela, anyin a adre ogöranyâ dokhon dökhu únyi ge lakeiny a at Isaraela.

3 Haba Davita ame hok hanen laâian hnyi Jerusalema: ke haba Davita ame hnokoâ ke je da me in. 4 Ke walang ien je lakon a o hnyi Jerusalema; jia Samua, me Sobab, me Nathana, me Solomona; 5 me Ibara, me Elisua me Elipelet; 6 me. Noga, me Nefega, me Jafia; 7 me Elisama, me Beeliada, me Elifelet.

8 Ke a löng ut at Filisiti a g' adre hia but hú Davita me me tuhan at Isaraela hia, me ame he but at Filisiti hia he ka elöm Davita; k' ame löng ut Davita me e ame he but ködra. 9 Ke a o at Filisiti me sö hnyigöulen bucen e Refai. 10 Me Davita ame hnö unyin Khong, ka habe, Hava, oge me he ka he ka vat me at Filisiti? ke hawa, u me he ka hn' ödrin ka hnyi hnyamök? Me haingö Iehova kâu, ka habe, He thö; anyin a oge me he ka hn' ödrin ka hnyi hnyâmâm. 11 Ke ödrin e o but hnyi Baala-farez, me Davita ame kuc ödrin eling; me haingö Davita, ka habe, A hia but Khong okhuto je iwahnaihmöny mönya ge hnyamök helâ me úkhutuiny köiö. Anyin a wale adre me hwenyi ien dok eling, me, Baala-farez. 12 Ke ödrin e ip biju eling je khongudrin; ke haba Davita ame hûna he ka thong degeci ödrin ge meic. 13 Ke haba at Filisiti ödrin e sö hmetu hnyigöulen bucen. 14 Ke haba Davita hmetu ame hnei unyin Khong, me haba Khong ame ha kâu, ka habe, U ma ca he bi ka ölö ködrin: ke u me saü but gadrin, me u me he ka o ködrin cicö je sa baka. 15 Ke walang bongon bi, haba u ka löng do hwa he hwan tavat ethö hon sa baka, awe u me he ka didrut he ka vat: anyin a hia but he bân Khong hnyi hnyimakâm he ka kot je utbavat anyin at Filisiti. 16 Me haba Davita ame ányâ helâ me Khong ame hûna kâu: me ödrin e kot je utbavat anyin tavat Filisiti, hwân hnyi Gibeona ke ne o but ka hnyi Gezera. 17 Me ame he but ehele úlungi Davita ka hnyi ta je hneyi hia; ke Iehova ame

ányâ me me he ka outen e ge ta je hnyeï hia.

HNYIMAKAN 15.

KE haba Davita ame ányâ umen je uma hnyi taun anyi Davita: ke e ame penapena hnen tang tangen Khong, me otílâ uma manoiny. 2 Ke haingö Davita, ka habe, Cu hamen ke at he ka vadrén tang tangen Khong, ke so thibi at Levi: anyin a Iehova ame hia but uc' ödrin he ka vadrén tang tangen Khong, me huliwa káu nyiele balua. 3 Ke haba Davita ame úkacaköüâ Isaraela hia hnyi Jerusalema, he ka hom tang tangö Iehova, ka hnyi hnen, waleji e ame penapena hobi káu. 4 Ke Davita ame úkacaköüâ laku Arona, me at Levi: 5 laku Kohatha; wale Uriela at ae beönua, me je liamekeiny më a wan haded ke twente: 6 laku Merari; wale Asaia at ae beönua, me je liamekeiny më a tu haded ke twente: 7 laku Geresoma; wale Joela at ae beönua, me je liamekeiny më a wan haded ke thöte: 8 laku Elizafana; wale Semaia at ae beönua, me je liamekeiny më a tu haded: 9 laku Heberona; wale Eliela at ae beönua, me je liamekeiny më a eite: 10 laku Uziela; wale Aminadaba at ae beönua, me je liamekeiny më, a wan haded ke twelv. 11 Ke haba Davita ame hawö Zadoka me Abiathara li at bihut, me at Levi, wale Uriela, me Asaia, me Joela, me Semaia, me Eliela, me Aminadaba, 12 me ha ködrin, ka habe, Öbun je kamen ae beönua ge at Levi: okabi öbun ju me je liamekeiny möbun, m' öbun e hom tang tangö Iehova Khongon at Isaraela ka hnyi dok oge penapena hobi káu. 13 Anyin a öbun e ca hom e hnyi hwân, haba Iehova Khongutin ame gá but kötin, anyin a ötin e ca hnö e hoton hnanyibu. 14 Haba tavat bihut me at Levi ödrin e ka okabi ödrin bi he ka hom tang tangö Iehova Khongon Isaraela. 15 Ke haba lakon at Levi ödrin e vadrén tang tangen Khong hon je bajebenidrin ge li venyáiny, helâ me hna húna hnö Mose hoton hofuc ho Iehova. 16 Haba Davita ame ha ka je tuhan at Levi he ka otílâ je liamekeiny mödrin, je aten khumöng, me je únyi khumöng, je nabeli, me kitara, me simebalo, ödrin e khumöng hwege göranyai me senyin. 17 Ke haba at Levi ödrin e otílö Heman бага nöku Joela; me ke je liamekeiny më, wale Asafa бага nöku Berekia; me ke бага nöku Merari liame-

keiny mödrin, Ethana бага nöku Kusaia; 18 Ke tha e mödrin je liamekeiny mödrin tavat a loiny, wale Zakaria, me Ben, me Jaziela, me Semiramoth, me Jehiela, me Uni, me Eliaba, me Benaia, me Maseia, me Matathia, me Elifelu, me Mikeneia, me Obed-edoma me Jeila, hnyat tuö hwanuma. 19 Haba tavat khumöng, wale Heman, me Asafa, me Ethana, me, hamödrin he ka ofuco je simebalo bras; 20 ke haba Zakaria, me Aziela, me Semiramoth, me Jehiela, me Uni, me Eliaba, me Maseia, me Benaia me, hanymödrin je nabeli hnyi Alamoith; 21 ke haba Matathia, me Elifelu, me Mikeneia, me Obed-edoma, me Jeila, me Azazia me, hanymödrin je kitara hnyi Seminitih, he ka vhiik. 22 Ke haba Kenania tuhan at Levi, ame musö khumöng: e ame ná khumöng, anyin a e metâ. 23 Ke haba Berekia me Elekana li at tuö hwanuma me hobi káu tang. 24 Ke haba Sebania, me Jehosafata, me Nathaniela, me Amasai, me Zakaria, me Benaia, me Eliezera, a tavat bihut, me, hamödrin he ka tuö trutru tot hnyi hnyimakan tang tangen Khong: ke Obed-edoma, me Jeila, li at tuö hwanuma hobi káu tang. 25 Me Davita me wahingatiny Isaraela, me je taben thauzan, ödrin e he me hom senyinâ tangen úhihinyköu anyi Iehova únyi hnyi hnyin uma umö Obed-edoma: 26 ke ame hadruâ at Levi hnen Khong hnyat vadrén tangen úhihinyköu anyi Iehova, me ödrin e hudo je bolok a seven, me je mamoe бага a seven. 27 Ke haba Davita me at Levi hnyat vadrén tang, me hnyat khumöng, me Kenania at vhiik khumöng ka tavat khumöng me, ödrin e khavâ úkhaü a mano lino: ke Davita ame khavâ iefoda lino. 28 Ke haba at Isaraela hia ödrin e hom tangen úhihinyköu anyi Iehova, me kuku tot, me tuö sofara, me je trutru, me simebalo, ödrin e ofucâ ta je nabeli me kitara. 29 Ke adre me odilâ thö tangen úhihinköu anyi Iehova hnyi taun anyi Davita, me haba Mikala momo nöku Saulo ame selat hnyi mamalama me ö Davita than ame biâ me khumöng; me e ame húkotiâ e eü hnyi hnyekon.

HNYIMAKAN 16.

KE ödrin e odilâ thö tang tangen Khong, me ip hnyi wanben uma mano a otílâ Davita: ke ödrin e hudo je hudiny leü, me ole hnyi hnyimakan Khong.

I. MAN ÛLABAINY JE THAN 16.

2 Ke a hia but Davita hudo je hudiny leû me ole, me e ame hahnahicâ tavat hnyi iö Iehova. 3 Ke e ame khenâ ouco ka tavat hia hnyi Isaraela, obaga me omomo, a úsa khaca areto, me khaca uthmeno, me khaca ù wan vine.

4 Ke e ame otilà keihen at Levi he ka huliwa hnyi hnyimakan tang tangö Iehova, me he ka ounykümeâ, me ole, me oganö Iehova Khongu Isaraela : 5 haba Asafa at ae beónua, me Zakaria tang hoton, me Jeiela, me Semiramoth, me Jehiela, me Matathia, me Eliaba, me Benaia, me Obededoma, me Jiela, a tha ödrin me je nabeli, me kitara ; ke Asafa me je simebalo ame ofucâ göranyai ; 6 me Benaia me Jaziela a li at bihut ödru me tot me li trutru bala hnyi hnyimakan tangen úhinhinköu anyin Khong.

7 Ke haba hnyi bong eling Davita ame ibi otilö Asafa me je liamekeiny më he ka ole kö Iehova.

8 E na ole thö kö Iehova, hawâ thö ien ; Haimemenâ anyin ta je huliwa hnyi wanben ta je hnyei.

9 Khumöng dö kâu, hai thö je khumöng kâu ;
Ûnhenamö thö anyin ta je huliwa hia hnân láia.

10 Ohobelua ju öbun hnyi ien ae kap :
Ame he ka hobâ hnyekon tavat adre me elöm Iehova.

11 Elöm Iehova ju öbun me tang hwegien ;
Eläm dö hnyimakan nyiele balua.

12 Ûnyküme thö je únyi hnân láia e ame ányâ ;
Wale je úöman, me je hna owisa únyi hnyi hnyimen ;

13 Öbun je mátráni Isaraela a lathnyabainy,
Öbun laku Jakob tavat adre úca.

14 E thibi Iehova Khonguta :
Ke e thibut hnyi hmeledrany hia thithö nhen je hna owisa.

15 Ûnyküme bala ju öbun anyin úhinhinköu,
Waleji hofuc e ame húna ke ne o but hnyi je dö a thauzan ;

16 Waleji e ame ányâ me Aberahama,
Me nhen hna khemanyin kö Isaaka ;

17 Me otethmä e kö Jakob me hnân hnan-yibu,
Me úhinhinköu me Isaraela nyiele balua :

18 Ka habe, Oge me he ka ham köu hnyei
Kanana,

A hwajaköü me hnân ibun :
19 Waleji e tiga wakhalet úseibun,
Eke, e ti wakhalet, k' öbun je atkanyua hnyin ;

20 K' ödrin e he baú hnyi ke hnyei me ke hnyei
Ûheny hnyi ke dokhu ka hnyi ke hnyei.

21 E ame ca hna ke at he ka okongu ödrin ;
Eke, e ame ou je than cadrin ;

22 Ke haingen, ka habe, Ca kálâ bi hnök je hna hú,
Ke ca okongo anyik je perofeta.

23 Hmeledrany hia thithö lö, khumöng dö kö Iehova ;
Omanená thö hnyi ke bong me ke bong anyin úhömeli.

24 Ha gaga thö anyin hmanenang hnyi wanben ta je hnyei,
Me anyin je huliwa hnân láia, hnyi wanben je hnyei hia.

25 Anyin ae gan hmâ Iehova, me hnân he ka ti oganá :
Ke hnân minya outen hon ta je khong hia.

26 Anyin a je idola thibi je khongon ta je hnyei :
Anyin a Iehova ame op je drany

27 E bi hnyi hnyimakan hna oganá me hmanenang :
Tang hwege me senyin hnyi hnyaban.

28 Öbun je lap anyin je hnyei lö, ham dö kö Iehova,
Ham kö Iehova hmanenang me tang hwege.

29 Ham dö kö Iehova hmanenang ae úcü ka hnyi ien :
Hom dö ke hut, me o ka hnyi hnyimakan :

30 Hmeledrany hia thithö lö, öbubuny ju hnyi hnyimakan :
K' adre ohmä hmeledrany, me me ca khana he ka bwebwet.

31 Senyin dö je drany, ke hobâ thö hmeledrany ;
Me ha hnyi wanben je hnyei, ka habe, Iehova at ame musi.

32 Ú thö köiö ae gan, me unöngötiny ;
E so e hobâ ta hnyei, me ta je únyi hia hnyin e ;

33 Ke ame he ka khumöng senyin dö je úöiny hnyot hnyi hnyimakö Iehova.
Anyin a e ame he jem he ka owisa hmeledrany.

- 34 Ö e ole thö kö Iehova ; anyin ae so :
 Anyin a nyiele balua anyin ibetengiö.
 35 Ke ha thö, ka habe, Khongon hna omeli
 öhmun lö, omeli öhmun ju,
 Me ükhacaköu öhmun, me hn' öhmun
 ünyi hnyi je hnyei.
 He ka oleä iam ae kap,
 Me hobä ge hna oganö u.
 36 E so he ka haisoi Iehova, Khongu
 Isaraela.
 Hwan ehac balu ke ne o but nyiele
 balua.

Ke haba tavat hia ödrin e ha, ka habe,
 Amen, me oganá Iehova.

37 'Ke e ame ip Asafa eling me je liame-
 keiny mä, hnyi hnyimakan tangen ühihi-
 nyköu anyi Iehova, hoton huliwa hnyi ke
 bong me ke bong : 38 me Obed-edoma me
 je liamekeiny mödrin, a ödrin sikste eit :
 me Obed-edoma nöku Jeduthun, me Hosea,
 he ka tuö hwanuma : 39 me Zadoka at
 bihut, me je liamekeiny mä a je at bihut,
 hnyi hnyimakan uma mano umö Iehova,
 hnyi dok ae görany hnyi Gibeona, 40 he
 ka hudo je hudiny leü bala kö Iehova hon
 taben hut hnyi hnyomakatu me sabac,
 hoton hna sihnalimen hia hnyi hnanyibu
 anyi Iehova, waleji e ame hüna ka Isarae-
 la ; 41 ke tha ödrin me Heman me Jedu-
 thun, me je kolon adre üca, wale adre ha
 ödrin, he ka ole kö Iehova, anyin a nyiele
 balua anyin ibetengiö ; 42 ke tha ödrin me
 Heman me Jeduthun me je trutru me
 simebalo hobi káu tavat adre me he ka
 ofuc e, me je ünyi khumöng hnän je khu-
 möng anyin Khong : me laku Jeduthun he
 ka tot hnyi homagöule. 43 Ke ame vese
 öut tavat hia ka hnyi je hnyabadrin : ke
 Davita ame hmetu he ka hahnahicä umen
 bi uma.

HNYIMAKAN 17.

KE ame laba Davita hnyi umen uma,
 me Davita ame ha kö Nathana, a
 perofeta, ka habe, Wä bi inya but ang oge
 me laba hnyi uma arasi, ke e hmelen je
 mano tangen ühihinyköu anyi Iehova.
 2 Me haingö Nathana perofeta kö Davita,
 ka habe, Anyä thö ta je ünyi ae eü hnyi
 hnyekom ; anyin a tha e möu Khong. 3 Ke
 haba hnyi hnyinghet eling, ame o but
 bofuc hwan Khong kö Nathana, ame ha, ka
 habe, 4 He thö ka ha kö Davita athnya-
 baik, ka habe, Walang hofuc ho Iehova,
 ka habe, U ma ca he ka otilä uma me

hnyabak : 5 anyin a oge me ca laba hnyi
 uma hwän hnyi bong waleji oge me hom jem
 hnyin at Isaraela ke ne o but hnyi bong
 ang ; ke oge me ngenü ühek hnyi ke uma
 mano ka hnyi ke uma mano, me ühek ke
 uma menä ka hnyi ke uma menä. 6 Ke
 haba hnyi ta je dok hia waleji oge me tha
 he hnyin me at Isaraela hia, hawa, e hu
 hofuc oge me ha ka hnyat owisa Isaraela, a
 hnyat oge me kunä he ka han lakeik, ka
 habe, Ieü gabun öbun e ca up umök uma
 arasi? 7 Anyin a wale, u me he ka ha
 walang ang kö Davita athnyabaik, ka
 habe, Walang hofuc ho Iehova tuhan sa-
 baöth, ka habe, Oge me hum u hnyi haginü
 mamoe, ühem hnyi hna hnu hoton je ma-
 moe, m'u me taben lakeik a at Isaraela :
 8 ke oge me laba unyäm hnyi je dok hia u
 je he ka hnyin, me subä degecä je iwahnai-
 hmiöny möu hnyi hnyimäkäm ; ke oge me
 he ka ogänä iam helä me ien tavat ae gan
 eang hmeledrany. 9 Ke oge me he ka üca
 ke dok hobi káu lakeik a Isaraela, me t'
 ödrin eling, m' ödrin e he ka laba hnyi idrin
 bi, me ca bwebwelä hmetu bala bi ; k' ame ca
 he hmetu bi tavat a lakon hulö ka öba wan
 gadrin helä me ehac, 10 ke helä me hnyi
 hnök hna hwän he ka otilä tavat owisa ka
 lakeik a Isaraela ; ke oge me he ka hom
 ühnyükongo ta je iwahnaihmiöny möu hia.
 Ke haba khaca, oge me thumetu u a g' ame
 he Iehova ka otilä ke lap a änyäm bi.
 11 Ke e ka bekhöt ut bongom ta je bong
 me u me he ka he but ka tha e me lakämäm,
 me oge me he bi nya ka otilä mätränäm
 hwabäm ünyi hnyi lakom ; ke oge me he
 ka otethmä dokhon dökhu. 12 E ame he
 ka op uma hobi könya, ke oge me he ka
 otethmä anyin theron nyiele balua. 13 Oge
 me he ka kamen, k'ame he ka nöku : ke
 oge me ca he ka hom hmetu anyik ibeten-
 giö gan heläji me hnök hna hom hmetu ge
 at a bän : 14 ke oge me he ka ohmä e hnyi
 umök uma me dökhu dökhu nyiele balua :
 ke adre me he ka otethmä anyin theron
 nyiele balua. 15 Helä me je hofuc hia
 eling, me hna omanená hia eling a ha
 Nathana kö Davita.

16 Haba Davita than ame didrö, me
 laba ju hnyi hnyimakö Iehova me ha, ka
 habe, Iny ia, Iehova Khong, ke ieü ge
 anyik lap wale u je hum nya ke ne o but
 hnyi bong ang? 17 Ke ünyi e ae ühnyü-
 kong hnyi hnyimäkäm Khong lö ; ke so bi
 u je hia but ha minya ge lap anyin athnya-
 baem hobi káu nyiele, ke u je hia but ö nya,

Iehova Khong, helâ me at ae ûnyi hnathu. 18 Ke ieu hmetu bi ae khanö Davita he ka ha köu ge hnâm hna ogânâ athnyabaem? anyin a u je wâhmakhmetöâ athnyabaem. 19 Iehova lö, ûnyi ge athnyabaem, me hoton weny hnyekom, u je hia but ânyâ ta je ûnyi hia eling ae gan, he ka omanenâ ta je ûnyi hia eling ae gan. 20 Iehova lö, e ba ke at ae ûcü möu, ke ba ju ke Khong ke hake u thibi, helâ me hnöhmun hna löng hia ge je hnyikönyöhmun. 21 Ke ewa ke hnyei eang hmeledrany ae ûcü me em hnyei wale a Isaraela, waleji a he but Khong he ka omelö kâu bi me hnân lakeiny, me he ka hu iâm, ge je ûnyi ae gan, me hnân outen, ge hna obâ je hnyei hnyi hnyimakan lakem, waleji u je omelö ûheny Aigupito? 22 Anyin a u je wia lakem a Isaraela me me em hnyei nyiele balua; ke u thibi, Iehova, u je bi Khong ködrin. 23 Ke walang ang, Iehova lö, e so adre ohmâ hofuc waleji u je ha ge athnyabaem, me anyin lap, nyele balua, me ânyâ thö helâ me hnâm hna ha. 24 Ke so ama tethmâ iâm me hnân ogânâ nyiele balua, madre me ha, ka habe, Haba Iehova tuhan saba-oth, e bi Khongon Isaraela, wale Khong ka at Isaraela: ke haba lap anyi Davita a athnyabaem adre hia but otethmâ hnyi hnyimákâm. 25 Anyin a u Khonguk lö, u je hia but thumeto athnyabaem a u me he ka otílâ anyin lap: anyin a wale haba athnyabaem ame wâ he ka hic hnyi hnyimákâm. 26 Ke walang ang, Iehova, u thibi Khong, ke u je hia but ha bánâ ûnyi eang ae so ka athnyabaem: 27 ke walang ang ame o ûnyi hnyi hnyekom he ka ohnahicâ lap anyin athnyabaem, me me e bala bi hnyi hnyimákâm: anyin a u Iehova, u je hia but hahnahicâ, k' ame he ka hnahic bi nyiele balua.

HNYIMAKAN 18.

KE hwaban dö e Davita ame kot at Filisiti, me hom ûhnyükongu ödrin, me hügünâ Gatha me je tauniny ûnyi ge at Filisiti. 2 Ke e ame kot Moaba; me lakei Davita but at Moaba, m' ödrin e fat. 3 Ke haba Davita ame kot tilö Hadadeza than Zoba ke ne o but Hamath, k' ame tiga he ka ohmâ anyin musi hnyi wagewe Euferate. 4 Ke Davita ame hügünâ gan wan thauzan je kariota, ke seven thauzan tavat tabö hors, ke twente thauzan tavat he hon kânâ: ke Davita ame subâ can je

hors anyin je kariota, ke e ame ip biju keihen hobi kâu je kariota a wan haded. 5 Ke ame o but at Suria ûheny Damaseko he ka hadruö Hadadeza than Zoba, me Davita ame kot twente tu thauzan at Suria. 6 Ke haba Davita ame ip je lap tue hnyi Suria hanen Damaseko: ke lakei Davita but at Suria, me ödrin e fat. Ke haba Iehova ame ham dökhü kö Davita hnyi je dok hia e ame he ka hnyin. 7 Ke haba Davita ame hügünâ je bec gol ûnyi ge lakei Hadadeza, me hom Jerusalema ai. 8 Ke Davita ame hügünâ bras ae ti gan ûnyi hnyi Tibath me Kuni a li taun anyi Hadadeza, wale hnö Solomona hna ânyâ kâu taben köiö bras, me li hmolom, me je kaia bras ûnyi hnyin. 9 Ke a löng ut Toi thaniny Hamath a Davita ame kot hia je utbavat anyi Hadadeza than Zoba, 10 me e ame kunö Hadorama a nokon kö Davita than he ka talofa mē, me hahnahicâ, anyin a e ame vat me Hadadeza me kot e; anyin a iwahnahimöny Hadadeza me Toi, ke e unyin je kaia gol me sileva me bras ae ve bongon. 11 Ke haba Davita than ame okabâ je ûnyi e kö Iehova, a tha e me je sileva me gol, waleji e ame hügünâ ûnyi hnyi ta je hnyei; ûnyi hnyi Edoma, me Moaba, me lakon Amona, me at Filisiti, me at Amaleka. 12 Ke haba Abisai nöku Zeruia ame kot at Edoma hnyi Hnyigöulen bucen Sâlt ödrin eitín thauzan. 13 Ke e ame ip je lap tue hnyi Edoma; ke haba at Edoma hia ödrin e athnyabai Davita. Ke haba Iehova ame ham dökhü kö Davita hnyi je dok hia e ame he ka hnyin.

14 Ke haba Davita ame musö at Isaraela hia; ke e ame ûhnei me ânyâ wisa ka lakeiny hia. 15 Ke haba Joab nöku Zeruia, me taben je utbavat; ke Jehosafata nöku Abiluda at ame oûnykümeâ. 16 Ke Zadoka nöku Ahituba me Abimeleke nöku Abiathara li at bihut; ke Savesa at sihnalimen; 17 ke Benaia nöku Jehoiada ban ka at Kerethi me Pelethi; ke je laku Davita ödrin e musi unyin than.

HNYIMAKAN 19.

KE hwaban mok a Nahasa thaniny lakon Amona, me haba nokon ame musi biju hwaban. 2 Haba Davita ame ha, ka habe, Oge me he ka betenge ga Hanuna nöku Nahasa, anyin ame betenge k nya kamen. Me Davita ame kunâ je úthumetu he ka otubwelâ e ge kamen. Ke

ame e but je athnyabai Davita hnyi hnyei iny lakon Amona unyi Hanuna he ka otubwelâ e. 3 Ke haba je tuhan lakon Amona ödrin e ha kö Hanuna, ka habe, Hawa, u me ûnyküme a Davita ame ogânâ kâmâm, me me ûkhûnöng köu he ka otubwelâ? hawa, a ca o je athnyabainy he ka elâm, me hagutâ, me ecmâkâ hnyei? 4 Haba Hanuna ame hom lathnyabai Davita, me gi' ödrin, me subâ but je khaüdrin hnyi wanben ke ne o but hnyi hon je hujüödrin me kun' ödrin dut. 5 Me ame he keihen me thumetu Davita ge hna anyâ ka tavat. Me e ame ûkhûnöng he ka ûkhanö mödrin; anyin ae hmehma gan hmâ tavat. Ke haingen than, ka habe, Laba ju öbun hnyi Jeriko ke ne o but ame kü thö je waibun, me he but jem hnyi üen e. 6 K' a wâ but lakon Amona, a adre ka oboni ödrin bi kö Davita, me haba Hanuna me lakon Amona ödrin e kunâ wan thauzan je talan sileva he ka më üco je kariota me tavat tabö hors ünyi hnyi Mesopotamia, me Arama-maka, me Zoba. 7 Ke ödrin e bi hwabâ je kariota a thöte tu thauzan, me than Maaka me lakeiny: me ödrin e o but me laba cicö Medeba. Ke ame ûkhacaköu lakon Amona ünyi hnyi anyidrin je taun me he ka hnyi vat. 8 Ke a löng ut e ga Davita, me eame kunö Joab me je utbatat hia tavat ae hwege. 9 Ke ame o but lakon Amona me tot metâ he ka vat hnyi homagöuleny taun: ke haba je than hnyat ödrin e o me ödrin e hake laba hnyi ke keihen utkânâ. 10 Ke a wâ Joab a g' adre tot metâ ka vat më hnyi hnyimakan me hoton, me e ame üca tavat adre me üca ge at Isaraela hia, me otil' ödrin metâ cicö at Suria. 11 Ke e ame hna kolon tavat kö Abisai liamekeiny më, ke ödrin e otill' ödrin metâ bi cicö lakon Amona. 12 Ke e ame ha, ka habe, A ne hwege huk at Suria, me u me he ka hadruö nya: ke ame ne hwege hom lakon Amona, me oge me he bi nya ka hadruö u. 13 Hwege ju, ke hnyok бага but hobi kâu itin hnyei, me hobi kâu je taun anyin Khongutin: ke hamö Iehova bi he ka änyâ ünyi ae so hnyi hnyimakan. 14 Ke haba Joab me tavat unyin ödrin e hakekenyâ at Suria me vat; ke adre me kec hnyi hnyimaködrin. 15 Ke a wâ but lakon Amona a ga kec dö at Suria, me adre me kec minya hnyi hnyimakö Abisai liamekeiny më, me dit ka hnyi taun. Ke haba Joab ame hmetu Jeru-

salema ai. 16 Ke a wâ but at Suria a ga kuc ödrin dut hnen at Isaraela, me adre me kunâ je uthumetu, me hawâ at Suria ünyi hnyi ke keihen Wagewe, tha ödrin me Sobaka taben je utbatat anyi Hada-deza. 17 Ke adre me thumetu Davita; me e ame ûkhacaköuâ Isaraela hia, me he hanyâüâ Joridano, me o ködrin me otillâ metâ vat cici ödrin. Ke a um dö Davita otillâ metâ vat cicö at Suria, me adre me vat më. 18 Ke ame kec ut at Suria hnyi hnyimakan at Isaraela; ke Davita ame hlingâ at Suria, a seven thauzan je aten kariota, ke fâte thauzan tavat adre me he hon kânâ, k' ame hlingö Sobaka taben vat. 19 Ke a wâ but lakei Hada-deza a ga kuc ödrin hnen at Isaraela, me ödrin e üsoköu me Davita, me bi lathnyabainy: me ame höcö bala but at Suria he ka hadruâ hmetu lakon Amona nyiele.

HNYIMAKAN 20.

KE ame o hmetu but huna, üen he ka he but je than ka vat, me haba Joab ame lelö maniny utbatat, me oba wan hnyei iny lakon Amona, me o me igigilö Raba. Ke Davita ame laba biju hnyi Jerusalema. Ke haba Joab ame kot Roba me ohia e. 2 Ke Davita ame hom korona anyin tuhödrin ünyi hnyi hon ban, ke adre wâ tuluto ihmakiny khaca talan gol, me je veto ae ünyi hnathu hnyin; ke adre me ip hon bö Davita: ke e ame hom ünyi hnyi taun je ünyi adre sö ae se hia. 3 Ke e ame hom but tavat ünyi hnyin, me ip ödrin hmelen je gili, me je fao ae üdö, me je nganga. Ke Davita ame änyâ helâe ka je taun hia anyin lakon Amona. Ke haba Davita me tavat hia ödrin e hmetu Jerusalema ai.

4 Ke hwaban e, ame kü thö ke vat me at Filisiti hnyi Gezera: me Sibekai at Husa ame hlingö Saf, hanen lakon at ae beü: me ödrin e ngâ but. 5 Ke e hu hmetu vat me at Filisiti; me haba Eleanna nöku Jaira ame hlingö Lahmi liamekeiny me Goliatha at Gatha, ke haba taben dân ö helâ me ütöiny ünyi hnân hwâwâ mauo. 6 Ke e hu hmetu vat hnyi Gatha ke eling at ae ti beü, ke üsa siks je banyen me je bacan, a twente foa hia; ke e nokon at ae beü. 7 Ke e ame humbasö at Isaraela, me haba Jonathana nöku Simea liamekeiny me Davita ame hlingâ e. 8 Wale je hnyat adre hnokoâ ka at ae beü hnyi

Gatha; ke ödrin e ta but ge hnyamö Davita, me hnyamen lakeiny.

HNYIMAKAN 21.

HABA Satana ame todrö ka at Isara-
 ela, me cubic Davita he ka aú at
 Isaraela. 2 Ke haingö Davita kö Joab me
 je taben hnyei, ka habe, He thö ka aú at
 Isaraela hwán Bere-seba ke ne o but hnyi
 Dana; ke thumetu nya thö me me khanö
 nya úseidrin. 3 Ke haingö Joab, ka habe,
 E na he Iehova ka osehia lakem ge haded :
 ke so bi, than a tuhök, hawa, ca lakeiny
 tuhök ödrin hia? anyin a ieu ame weny
 únyi e hnen tuhök? anyin a ieu u me he ka
 bi jöning at Isaraela? 4 Ke so bi e hwege
 ifucin than hu Joab. Me haba Joab ame
 he me vheno Isaraela hia, me o hnyi Jeru-
 salema. 5 Ke Joab ame ham kö Davita
 kahmen úseiny tavat. Ke haba at Isaraela
 hia, ödra eleven haded thauzan tavat hok
 hele vat: ke haba at Juda, me, foa haded
 ke sevente thauzan tavat hok hele vat.
 6 Ke e ame ca aú at Levi me Beniamina
 unyidrin: anyin ae ikiki kö Joab hofuc
 hwan than. 7 Ke monu ka Khong únyi
 eling; anyin a wale e ame kot at Isaraela.
 8 Me Davita ame ha ka Khong, ka habe,
 Oge me ányá hulö ae ti gan, hnyi únyi e
 oge me ányá: ke inya oge me khöü köu, ö
 u hna but hulö anyin athnyabaem, anyin a
 oge me hia but ányá monu ae ti gan. 9 Me
 haingö Iehova kö Gada at wá anyi Davita,
 ka habe, 10 He thö ka ha kö Davita, ka
 habe, Walang hofuc ho Iehova, ka habe,
 Oge me he ka omanená köu kun ta unyi:
 úca thö khaca me inye he ka ányá köu.
 11 Me ame o Gada kö Davita me ha káu,
 ka habe, Walang han ha hnö Iehova, Úca
 thö hobi köu bi; 12 ame ne kun ta huna-
 iny hmiá; k' ame ne kun ta tehi kec a u ge
 iwahnaihmióny möu, k' ame hom tilö u ge
 hele vat anyin je iwahnaihmióny; k' ame ne
 kun bongon hele vat anyi Iehova, wale mok
 ae cap hnyi hnyei, k' ame he angela anyi
 Iehova ka hlingá tavat hnyi Isaraela hia.
 Anyin a wale únykúme wia ju hofuc oge
 me he ka ha hmetu káu at a kunö nya.
 13 Me haingö Davita kö Gada, ka habe, E
 gan hmá anyik hmak: ke walang oge me
 he bi nya ka ta ka hnyi hnyamö Iehova; an-
 yin ae ti gan hmá anyin ibetengö, me oge
 me ca he ka ta ka hnyi hnyamen at. 14 Me
 haba Iehova ame kuná mok ae cap ka hnyi
 hon Isaraela: me ame mokcu at Isaraela a

sevente thauzan. 15 Ke Khong ame kuná
 angela Jerusalem a he ka ohia e: k' ame
 tiga he ka ohia, me haba Iehova ame wá,
 me ietra únyi ae kong, me ha ka angela
 at ame ohia, ka habe, Soju, thu hmetu ju
 benyám. Ke ame tot angela anyi Iehova
 hnyi hna huje hwit anyi Aruna at Jebusi.
 16 Ke Davita ame bwele göranyai me wá
 angela anyi Iehova ame tot hnyi wanben
 hmeledrany me drany, ke e hnyi hnyamen
 hele vat adre oc me hai hon Jerusalem. Me
 ame ta hnyikánái Davita me wahingat k'
 ödrin e khavá mano ae gan nán. 17 Ke
 haba Davita ame ha ka Khong, ka habe,
 Hawa, ca únyi gak hnödra hna aú tavat?
 ke haba inya at ae monu ke at ányá hulö ae
 gan hmá; ke ieu a ányá ta je mamoe ang?
 Iehova Khonguk lö, ö u ip hnyamám huk me
 lap anyi cica, ke ca he ka ip hon lakem me
 hling' ödrin. 18 Haba angela anyi Iehova
 ame húna kö Gada he ka ha kö Davita, me
 me ölö he ka otílá taben hut kö Iehova
 hnyi hna huje hwit anyi Aruna at Jebusi.
 19 Haba Davita ame ölö hoton hofuc ho
 Gada, wale e ame ha hnyi iö Iehova. 20 Ke
 haba Aruna ame hwiö me wá angela; me
 ame lubaduöng lakon a vak unyin. Ke
 Aruna ame huje hwit. 21 K' ame tiga he
 Davita kö Aruna, me Aruna ame bwele me
 ö Davita; me e ame he úheny hnyi hna
 huje hwit, me iyáú hnyikánái kö Davita.
 22 Haba Davita ame ha kö Aruna, ka
 habe, Ham dö könnya hna huje hwit, me
 oge me he ka op eling taben hut hobi kö
 Iehova: u me he ka ham e könnya hwaban
 mone ae úcú, me me hia but mok ae cap
 unyin tavat. 23 Ke haingö Aruna kö
 Davita, ka habe, Hom dö, ke hamen than
 a tuhök ka ányá únyi ae so köu: wá bi,
 inya oge me ham je bolok hnán bi hut, me
 je omjehen huje hwit hnán hlogon, me hwit
 hnán hudiny han; oge me ham hia. 24 Ke
 haingö Davita than kö Aruna, ka habe,
 Ohe; ke so bi oge me he ka úco e hw ban
 mone ae úcú: anyin a oge me ca he ka hom
 ányám ta je únyi hobi kö Iehova, ke oge
 me ca he ka hudo hudiny leú ae ba hwaban.
 25 Ke haba Davita ame ham kö Aruna
 hwaban dok eling siks haded je sekel gol
 adre tuluto. 26 Haba Davita ame otílá
 eling taben hut kö Iehova, me hudo je
 hudiny leú, me je hudiny ole, me hongot
 kö Iehova; ke e ame thu káu ge meic únyi
 hnyi drany hon taben hut. 27 Ke Iehova
 ame húna ka angela; me e ame iná hmetu
 anyin hele vat ka hnyi tangen.

I. MAN ULABAINY JE THAN 22, 23.

28 Haba hnyi ùen eling, a wâ but Davita a Iehova ame thu kâu hnyi hna hui whit anyi Aruna at Jebusi, me e ame bi hut eling. 29 Anyin a haba uma mano umö Iehova, waleji a ânyâ Mose hnyi hnye-buba, me taben hudiny leû, e but hnyi dok ae görany hnyi Gibeona hnyi ùen eling. 30 Ke ca khanö Davita bi he ka he ka hnyi hnyimakan e he ka ka elâm ùnyi ga Iehova: anyin a e ame ot ge hele vat anyin angela anyi Iehova.

HNyimakan 22.

KE haingö Davita, ka habe, Walang uma umö Iehova Khong, ke walang taben hudiny leû hobi kâu at Isaraela.

2 Ke Davita ame hûna he ka ùkhaca-köüa je atkanyua hnyi hnyei Isaraela; me e ame otilâ tavat tretrau veto he ka tretrau me ânyâwia je veto hnân op uma omen Khong. 3 Ke Davita ame penapena gânâ fao hnân faoiny je hlinginy homagöule, me je hna hûjö; ke gan hmâ minya bras adre me ca tuluto; 4 me je ùö arasi adre me ca aû, anyin a at Sidona me Turo ödrin e hom kö Davita je ùö arasi ae se hia. 5 Ke haingö Davita, ka habe, E tiga wanakat me but Solomona a nökek, ke haba uma adre me he ka op hobi kö Iehova me ame he ka ti beöna mecin, me lung, me hmanenang hnyi ta je hnyei: anyin a wale oge me he ka penapena hobi kâu. Ke Davita ame penapena gan hmâ e me tiga ca mok.

6 Ke e ame hawo Solomona a nokon, me hûna kâu he ka op uma hobi kö Iehova, Khongu Isaraela. 7 Ke haingö Davita kö Solomona a nokon, ka habe, Haba inya, me, waleû hnyi hnyekuk he ka op uma hobi kâu iö Iehova a Khonguk. 8 Ke so bi ame o konya hofuc ho Iehova, ka habe, E gan hmâ dra u je hingälâ, ke gan hmâ hnâm hna vat: ke u me ca he ka op uma hobi kâu iök, anyin ae gan hmâ dra u je hingälâ hon kânâ hnyi hnyimakök: 9 wâ bi, adre me he ka hnokö nokom, at ame laba úsoköu, anyin a oge me he ka otisokö-üa e me je iwahnaihmiony më igigilö: anyin a adre me he ka hwenyi ien Solomona, ke oge me ke ka ham úsoköu me me laba wia at Isaraela hnyi bongon je bong hia: 10 hamen bi he ka op uma hobi kâu iök, k'ame he ka nökek, ke oge me he bi nya ka kamen; ke oge me he ka otethmâ the-roniny dokhon dökhü hon at Isaraela nyiele balua. 11 Ke walang ang nökek, e so

Iehova ame tha e möu; m' u me hnahic bi, ke op dö uma umö Iehova a Khongom, helâ me hnen hna ha gam. 12 E na he ju Iehova ka ham köu metâ me wâhmakhmeto, me hûna köu ge at Isaraela; me u me he ka tuö hnanyibu anyi Iehova Khongom. 13 Me u me he ka hnahic u je ne kong hnyekunâ he ka ânyâ je hna otilâ me je hna owisa waleji a hûna Iehova kö Mose ge at Isaraela: hwege thö, me hnyok бага but; ca ot bi me öbubuny. 14 Me wâ bi oge hia but penapena hnyi anyik vec wan haded thauzan je talan gol, me wan thauzan thauzan je talan sileva; me bras me fao adre ca tuluto, anyin ae ti se hia; ke oge hia but penapena minya je utö me veto; ke e khatö u he ka bi hanen. 15 Ke haba khaca e unyâm tavat huliwa ae se hia, tavat tretrau me huliwan veto, me utö, me tavat ae metâ hobi kâu je huliwa hia; 16 wale ge gol, me sileva, me bras, me fao, ca hnân aû bi; todrö, ânyâ thö, ke ame he Iehova ka tha e möu. 17 Ke haba Davita ame hûna minya ka je than hia hnyi Isaraela he ka hadruö Solomona a nokon; 18 ka habe, Hawa, ca tha e Iehova a Khongubun möbun? ke a ca omen' öbun hnyi je ke keihen hia? anyin a hia but hna konya tavat a idrin hnyei; ke a hia but hom ùhnyükongo hnyei hnyi hnyimakö Iehova, me hnyi hnyimakan lakeiny. 19 Walang ang ham but je hnyekubun he ka elöm Iehova Khongubun; anyin a wale todrö, me op dok ae kap anyi Iehova Khong, m' adre me hom tangen ùhinhnyökou anyi Iehova, me je kaia ae kap anyin Khong, ka hnyi uma adre me he ka otilâ hobi kâu iö Iehova.

HNyimakan 23.

KE hingat ut Davita me se hia je hna nainy; me e ame otilö Solomona a nokon ka than hon at Isaraela. 2 Ke e ame ùkhacaköüa je than Isaraela hia, me tavat bihut me at Levi. 3 Ke adre aû at Levi hwân ge tavat a thöte huna me gan hon e: ke haba úseidrin adre aû ke бага me ke бага, ödrin thöte eit thauzan. 4 Ke hanymen tavat a twente foa thauzan gadrin he ka tuö huliwa hnyi uma umö Iehova; ke haba siks thauzan wale je homakan me tavat owisa: 5 ke ödrin foa thauzan tavat tuö hwanuma; ke foa thauzan tavat oganö Iehova ge je ùnyi khumöng oge ânyâ hnân oganá. 6 Ke haba Davita ame khene

ödrin hnyi je dö hoton je laku Levi ; wale Geresoma, me Kohatha, me Merari. 7 Ûnyi ge at Geresoma ; Laadan, me Simeï. 8 Haba laku Laadan ; me Jehiela at ae beönuu, me Zetham, me Joela, ödrin kun. 9 Haba laku Simeï ; me Selomith, me Haziela, me Harana, ödrin kun. Wale je at a ban ge lakamen je lap anyi Laadan. 10 Haba laku Simeï ; me, Jahath, me Ziza, me Jeuso, me Beraia. Wale ta laku Simeï a vak. 11 Ke Jahath at a ban, ke Ziza útangköu mē : ke ca se hia laku Jeuso me Beria ; anyin a wale adre öü ödru helä me lap anyin lakamen a khaca. 12 Haba laku Kohatha ; me, Amerama, me Izara, me Heberona, me Uziela, ödrin vak. 13 Haba li laku Amerama ; me, Arona, me Mose ; ke adre me hake ip Arona me me he ka okabä ta je únyi ae ti kap, a e me lakon nyiele balua, he ka leü ütö ae bo so hnyi hnyimakö Iehova, me huliwa käu, me hahnahicä tavat hnyi ien nyiele balua. 14 Ke haba Mose aten Khong, me, adre me tha aü lakon unyin tribu Levi. 15 Ke lo li laku Mose ; wale Geresoma me Eliezera. 16 Haba nöku Geresoma ; me Sebuela at ae beönuu. 17 Haba nöku Eliezera ; me, Rehabia at ae beönuu. Ke ba hmetu bi бага nöku Eliezera ; ke se hia je laku Rehabia. 18 Haba nöku Izara ; me, Selomithat ae beönuu. 19 Haba laku Heberona ; me Jeria at ae beönuu, me Amaria a loiny, me Jaziela a kuniny, me Jekameama a vakiny. 20 Haba li laku Uziela ; me, Mika at ae beönuu, me Iesia a loiny. 21 Haba li laku Merari ; me Maheli me Musi. Haba li laku Maheli ; me, Eleazara, me Kiso. 22 Ke ame mokcu Eliazara, ke ba nokon бага, ke lakon je hlu thibi : k'ame hum ödrin laku Kiso a je liamekeiny mödrin. 23 Haba laku Musi ; me, Maheli, me Edera, me Jeremoth, ödrin kun. 24 Wale laku Levi hoton je lap anyin lakamödrin, wale je ban je lap anyin je lakamen a tavat adre me aü me ha úseidrin ke at me ke at, tavat ödrin e ányä huliwa me bi athnyaba hnyi uma umö Iehova, hwän ge hnyat a twente hunaidrin me gan hon e. 25 Anyin a haingö Davita, ka habe, Haba Iehova, Khongu Israaela ame hia but omenä lakeiny ; ke e ame laba hnyi Jerusalema nyiele balua : 26 me haba at Levi ödrin e ca he hmetu ka vaden uma mano me ta je omjeüiny hia hnän huliwan. 27 Ke adre me aü laku Levi hwän ge tavat a twente hunaidrin me

gan hon e, hoton hofuc a biliny ho Davita. 28 Ke hanymödrin he ka bi athnyabainy lakü Arona hobi käu huliwa hnyi uma umö Iehova, hnyi je hnyeule, me eio hnyi uma, me obosoä ta je únyi hia ae kap, wale je huliwa adre me ányä hnyi uma umen Khong ; 29 me areto minya hnän omanená, me falawa ae so hobi käu hudiny han, ame ne je ong areto ae halelöü adre ca levenä bi, ame ne únyi adre ölä, me hna op, me je tulutiny ta je únyi, me kahmen je únyi wale ae ve bongon ; 30 me he ka tot hnyi ta je hnyomakatu he ka ole me olungi Iehova, heläe minya hnyi je sahac ; 31 me he ka hudo kö Iehova ta je hut hia, hnyi je sabath, me je tehi ae teb únyi, me hnyi je bijeü adre thu, hoton úseiny heläe thibut hna owisa gadrin hnyi hnyimakö Iehova bala : 32 ke ödrin e he ka tuö je hanymen hnyi uma hnän úkhacaköu, me je hanymen hnyi dok ae kap, me je hanymen laku Arona je liamekeiny mödrin, hobi käu huliwainy uma umö Iehova.

HNYIMAKAN 24.

KE adre khenä laku Arona heläng. Je laku Arona ; wale Nadaba, me Abihu, me Eleazara, me Ithamara. 2 Ke a bö Nadaba me Abihu ka mokcu ke tiga möt bi kamödrü, ke ba nökuöru : anyin a wale Eleazara me Ithamara ödru me tuö hanymen at bihut. 3 Ke haba Davita tha e me Zadoka nöku Eleazara me Abimelek nöku Ithamara, ödrin e khene ödrin hoton hanymödrin hnyi anyidrin huliwa. 4 Ke se hia je at ae beönuu adre wä unyin laku Eleazara, ke e wakhalet bi unyin je laku Ithamara ; ke adre khene ödrin heläng : haba ge laku Eleazara ödrin sikstin, je ban je lap anyin je lakamen ; ke eit ge je laku Ithamara, hoton je lap anyin lakamödrin. 5 Heläe adre khene ödrin hoton ugleköp, hnyat ang me hnyat e ; anyin ae hu tavat musö dok ae kap, me tavat musö uma umen Khong, je laku Eleazara me je laku Ithamara minya. 6 Ke haba Semaia nöku Nathaniela at sihnalimen, hanen je at Levi, ame sihnalimidrin hnyi hnyimakan than, me ta je than, me Zadoka at bihut, me Ahimeleke nöku Abiathara, me je ban je lap anyin lakamen at bihut, me at Levi : khaca thibi lap anyin lakamen adre hom hobi kö Eleazara, me khaca adre hom hobi kö Ithamara. 7 Ke ame aat dö Jehoiarib ge leköp a bán, me

Jedaia a loiny ; 8 ke Harim a kuniny, me Seorim a vakiny ; 9 me Malakia a thabûnginy, me Miamin a siksiny ; 10 me Koz a seveniny, me Abia a eitiny ; 11 me Jesua a naininy, me Sekania a teniny ; 12 me Elisiba a eleveniny, me Jakim a twelviny ; 13 me Hupa a thötöiny, me Jesebeab a foatininy ; 14 me Bilega a fiftininy, me Imer a sikstininy ; 15 me Hezir a sevenininy, me Hafezez a eitiny ; 16 me Pethaia a naintininy, me Ezekielä a twent-einy ; 17 me Jakina a twente waniny, me Gamuel a twente tuiny ; 18 me Delaia a twente theriiny, me Maazia a twente foainy. 19 Wale je ütangköu hnyi je hanymödrin, he ka o ka hnyi uma umö Iehova, hoton hna hûna gadrin a deny Arona a kibidrin, helä me Iehova, Khongu Isaraela ame hûna käu.

20 Ke haba ge kolon laku Levi: haba ge laku Amerama; Sebuela; ge laku Sebeula; Jehedia. 21 Ke haba ga Rehabia: haba ge laku Rehabia; me, Isia at ae beönuu. 22 Ge at Izara; me Selomith; ge laku Selomith; me, Jahath. 23 Ke haba laku Heberona; me, Jeria, me Amaria a loiny, me Jaziela a kuniny, me Jakameama a vakiny. 24 Ke nöku Uziela; me, Mika; ge laku Mika; me, Samira. 25 Ke liamekeiny me Mika; me, Isia: ge laku Isia; me, Zakaria. 26 Li laku Merari; me Maheli me Musi; ke nöku Jaazia; me, Beno. 27 Haba je laku Merari; ga Jaazia; me, Beno, me Sohama, me Zakuri, me Iberi. 28 Ga Maheli; me, Eleazara, ke ba nokon. 29 Ga Kiso; haba nöku Kiso; me, Jeramela. 30 Haba laku Musi; me, Maheli, me Edera, me Jeremoth. Wale lakon at Levi hoton je lap anyin je lakamödrin. 31 Haba tavat eling ödrin e ugleküb minya helä me je liamekeiny mödrin a laku Arona, hnyi hnyimakö Davita than, me Zadoka, me Ahimelek, me je ban je lap anyin lakamen tavat bihut me at Levi; je lap anyin lakamen a je taben helä me je liamekeiny mödrin ae ühnyükong.

HNyimakan 25.

KE haba Davita me je taben vat ödrin e hake ip keihen ge laku Asafa, me Heman, me Jeduthun hobi käu huliwa, he ka perofeta me je kitara, me nabeli, me simebalo: ke haba üseidrin ödrin e ve änyä huliwa hoton je hanymödrin, 2 haba ge laku

Asafa, me, Zakuri, me Josefa, me Nethania, me Asarala; wale laku Asafa; k'ame musi ödrin Asafa, ödrin e perofeta hoton musi anyin than. 3 Ga Jeduthun: haba laku Jeduthun; wale Gedalia, me Zeri, me Isaia, me Hasabia, me Matathia, ödrin siks; ame musi ödrin Jeduthun a kamödrin, at perofeta me kitara, me ole me oganö Iehova. 4 Ga Heman: haba laku Heman; wale Bukia, me Matania, me Uziela, me Sebuela, me Jeremoth, me Hanania, me Hanani, me Eliatha, me Gidaleti, me Romameti-ezerä, me Josebekasa, me Malathi, me Hothir, me Mabhazioth: 5 ödrin hia laku Heman at wä anyin than, hnyi hofuc hwan Khong he ka ogöränyä faoiny meno. Ke haba Khong ame ham kö Heman lakon je бага a fotin ke kun lakon ta hlu. 6 Haba hnyat hia eling ame musi ödrin kamödrin hobi käu khumöng hnyi uma umö Iehova, me je simebalo, me nabeli, me kitara, hobi käu huliwa hnyi uma umen Khong; ke haba Asafa, me Jeduthun, me Heman ame musi ödrin than. 7 Ke haba üseidrin tha ödrin me je liamekeiny mödrin tavat adre nä he ka khumöng kö Iehova, tavat hia ae metä, ödrin tu huded ke eite eit. 8 Ke ödrin e ugleküb ge je hanymödrin, wale tavat ae gan me tavat ae ühnyükong, at üne me at adre nä. 9 Ke ame aat dö kö Josefa hobi kö Asafa ge leküb a bán: ke Gedalia a loiny; e me je liamekeiny më me je lakon ödrin twelv: 10 Zakuri a kuniny, e me je lakon me je liamekeiny më a twelv: 11 lezera a vakiny, e me je lakon me je liamekeiny më a twelv: 12 Nethania a thabûnginy e me je lakon me je liamekeiny më a twelv: 13 Bukia a siksiny, e me je lakon me je liamekeiny më a twelv: 14 Jesarela a seveniny, e me je lakon me je liamekeiny më a twelv: 15 Isaia a eitiny, e me je lakon me je liamekeiny më a twelv: 16 Matania a naininy, e me je lakon me je liameheiny më a twelv: 17 Simeia a teniny, e me je lakon me je liamekeiny më a twelv: 18 Azareela a eleveniny, e me je lakon me je liamekeiny më a twelv: 19 Hasabia a twelviny, e me je lakon me je liamekeiny më a twelv: 20 Sebuela a thötöiny, e me je lakon me je liamekeiny më a twelv: 21 Matathia a foatininy, e me je lakon me je liamekeiny më a twelv: 22 Jeremoth a fiftininy, e me je lakon me je liamekeiny më a twelv: 23 Hanania a sikstininy, e me je lakon me

je liamekeiny mē a twelv: 24 Josebekasa a seventininy, e me je lakon me je liamekeiny mē a twelv: 25 Hanani a eitiny, e me je lakon me je liamekeiny mē a twelv: 26 Malothi a naintininy, e me je lakon me je liamekeiny mē a twelv: 27 Eliatha a twenteiny, e me je lakon me je liamekeiny mē a twelv: 28 Hothir a twente waniny, e me je lakon me je liamekeiny mē a twelv: 29 Gedaleti a twente tuiny, e me je lakon me je liamekeiny mē a twelv: 30 Mahazioth a twente theriny, e me je lakon me je liamekeiny mē a twelv: 31 Romameti-ezera a twente foainy, e me je lakon me je liamekeiny mē a twelv.

HNYIMAKAN 26.

KE haba je deö hnyat tuö hwanuma: ge at Kora; me, Meselemia nöku Kore hanen laku Asafa. 2 Ke e hu laku Meselemia; wale Zakaria a atö, me Jediaela a loiny, me Zebadia a kuniny, me Jatheniela a vakiny; 3 me Elama a thabünginy, me Johanana a siksiny, me Elioenai a seveniny. 4 Ke e hu laku Obed-edoma, wale Semaia a atö, me Jehozabada a loiny, me Joa a kuniny, me Sakari a vakiny, me Nathaniela a thabünginy; 5 me Amiela a siksiny, me Isakara a seveniny, me Peulethai a eitiny: anyin a Khong ame ohnabicâ e. 6 K' adre hnokoâ minya kö Semaia a nokon, lakon бага, ödrin e musö lap anyin kamödrin: anyin a ödrin tavat ae hwege hmönyin. 7 Haba laku Semaia; me, Otheni, me Refaela, me Obed, me Elezabad, ke hnyat ae hwege je liamekeiny mē, me Elihu, me Semakia. 8 Haba hnyat hia eling hanen laku Obed-edoma; a ödrin me lakudrin me je liamekeiny mödrin, hnyat ae hwege unyidrin hnân hobi kâu huliwa; ödrin sikste tu ünyi ga Obed-edoma. 9 Ke e hu laku Meselemia me je liamekeiny mē, hnyat ae hwege, k' ödrin eitiny. 10 Ke Hosa minya hanen laku Merari; wale Simeri at ae beönua, (e ca atö, ke so bi kamen ame wia e he ka ban;) 11 me Hilekia a loiny, me Tebalia a kuniny, me Zakaria a vakiny: haba laku Hosa me je liamekeiny mē hia, ödrin thötin. 12 Ünyi ge hnyat eling je deö hnyat tuö hwanuma, wale ge hnyat ae beönua, hnyat ae ve hu hanymödrin helâ me je liamekeiny mödrin, he ka huliwa hnyi uma umö Iehova. 13 Ke ödrin e uglekôb, a tavat ae ühnyükong me tavat ae gan, hoton je

lap anyin lakamödrin, hobi kâu je homagöüle hia. 14 Ke ame aat dö Selemia ge lekôb e deiö. Me ödrin e uglekôb hobi kö Zakaria a nokon, at ae metâ hnyi ühnenamö; ke ame aat dö e ge lekôb ka hnyi hwadrö. 15 Ke hobi kö Obed-edoma ka hnyi hwaiöu; me hobi kâu lakon uma omjeü. 16 Hobi kö Supima me Hosa e jio hnyi homagöüle hnyi Saleketh hnyi getheniny hna ölö, ke tavat tue cicö ke tavat tue. 17 Haba e deiö, ödrin siks at Levi, ka hnyi hwadrö, foa hnyi je bong, ke foa ka hnyi hwaiöu hnyi je bong, ke üsa lo hnyi uma omjeü. 18 Hobi kâu Parebara e jio ödrin vak hnyi gethen, ke ödru lo hnyi Parebara. 19 Wale je hanymen tavat tue, a laku Kora me laku Merari.

20 Ke haba ge at Levi, jia Ahia at ame tuö tang omjeünya uma umen Khong, me je omjeü ae kap. 21 Haba laku Laadan; lakon hnyat Geresoma ünyi ga Laadan, ta je ban je lap anyin lakamen ünyi ga Laadan at Geresoma; jia Jehiela. 22 Lo li laku Jehiela; wale Zetham, me Joela a liamekeiny mē, li at tuö tang omjeü hnyi uma umö Iehova. 23 Ge at Amerama, me at Izara, me at Heberona, me at Uziela: 24 ke Sebuela nöku Geresoma, nöku Mose, wale at ame musö tang omjeü. 25 Me je liamekeiny mē; ünyi ga Eliezera, Rehabia a nokon, me Jesaia a nokon, me Jorama a nokon me Zikeri a nokon, me Selomith a nokon. 26 Ke haba Selomith me je liamekeiny mē wale tavat tuö hia tang omjeü ae kap, waleji hnö Davita than, me je ban je lap anyin lakamen, me je taben thauzan me haded, me je taben vat hna okabâ. 27 Ödrin e okabâ ta je ünyi adre söâ hnyi je vat hnân änyäwia uma umö Iehova. 28 Me je ünyi hia hnö Samuela at wâ, me Saulo nöku Kiso, me Abinera nöku Neri, me Joab nöku Zerua hna okabâ; ke ame ne ke at ame okabâ ke ünyi, ame tuö Selomith, me je liamekeiny mē. 29 Ünyi ge at Izara, hamö Kenania me lakon he ka huliwa ehele bon hnyeï Isaraela, hnân je homakan me tavat owisa. 30 Ünyi ge at Heberona, Hasabia me je liamekeiny mē, je hnyat ae hwege, ödrin wan thauzan ke seven haded, tavat musi hnyi Isaraela ke keihen Joridano e jio; hobi kâu ta je huliwa hia anyi Iehova me ta je huliwa anyin than. 31 Ünyi ge at Heberona jia Jeria at ae beönua, wale ge at Heberona hoba je dö anyin je lap anyin lakamen. Haba hnyi huna a fäteiny musi anyi Davita adre me

elöm ödrin, k' adre wâ unyidrin hnyat ae hwege hnyi Jezera hnyi Gileada. 32 Ke haba je liamekeiny mē a tavat ae hwege, me, ödrin tu thauzan ke seven haded, je ban je lap anyin lakamen, wale Davita than ame otila he ka musö at Reubena, me Gada, me hafiny tribu Manase, hnyi ta je ūnyi hia anyin Khong, me ta je ūnyi anyin than.

HNYIMAKAN 27.

KE haba lakon Isaraela boton ūseidrin, wale je ban je lap anyin lakamen, me je taben thauzan me haded, me je homakan tavat adre me bi athnyabainy than hnyi ke huliwa adre hhenâ, hnyat adre me didrö me didrut hnyi ke tehi me ke tehi a je tehiny hia huna, me, ödrin twente foa thauzan hnyi je dö. 2 Haba at ame musö dö a bân hnyi tehi a bân, me, Jasobeam nöku Zabediela: haba ūseiny aten deö hanyemen, me twente foa thauzan. 3 E hanen laku Farez, at ae beönuu hnyi ta je taben vat hia hnyi tehi a bân. 4 Ke hanymö Dodai at Aohi hon dö hnyi tehi a loiny, me deö hanyemen; ke Mikeloth at musi; ke haba tavat aten deö hanyemen, me, ödrin twente foa thauzan. 5 Haba at musi tavat, at a kuniny ke hobi kâu tehi a kuniny, me, Benaia nöku Jehoiada at bihut, wale taben: ke ödrin twente foa thauzan tavat aten deö hanyemen. 6 Haba Benaia ling at ae hwege unyin tavat a thöte, ke hon tavat a thöte: ke Amizabada a nokon hanen deö hanyemen. 7 Haba taben a vakiny hobi kâu tehi a vakiny, me, Asaela liamekeiny me Joab, ke Zebadia a nokon hwaban; ke ödrin twente foa thauzan tavat aten deö hanyemen. 8 Haba taben a thabünginy hobi kâu tehi a thabünginy, me, Sama at Izara; ke ödrin twente foa thauzan tavat aten deö hanyemen. 9 Haba taben a siksiny hobi kâu tehi a siksiny, me, Ira nöku Ikes at Tekoa; ke ödrin twente foa thauzan tavat aten deö hanyemen. 10 Haba taben a seveniny hobi kâu tehi a seveniny, me, Helez at Pelone hanen laku Eferaima: ke ödrin twente foa thauzan tavat aten deö hanyemen. 11 Haba taben e eitiny hobi kâu tehi a eitiny, me Sibekai at Husa, hanen at Zera: ke ödrin twente foa thauzan tavat aten deö hanyemen. 12 Ke haba taben a naininy hobi kâu tehi a naininy, me, Abiezera at Anathoth, hanen at Beniamina: ke twente foa thauzan tavat aten deö hanyemen. 13 Haba

taben a teniny hobi kâu tehi a teniny, me, Maharai at Netofa, hanen at Zera: ke twente foa thauzan tavat aten deö hanyemen. 14 Haba taben a eleveniny hobi kâu tehi a eleveniny, me Benaia at Pirathon, hanen laku Eferaima: ke twente foa thauzan tavat aten deö hanyemen. 15 Haba taben a twelviny hobi kâu tehi a twelviny me Heledai at Netofa, hanö Otheniela: ke twente foa thauzan tavat aten deö hanyemen.

16 Ke walang ang minya hon je tribu Isaraela: haba, hanen at Reubena, me, Eliezera nöku Zikeri, at musi; hanen at Simeona, me, Sefata nöku Maaka: 17 hanö Levi, me, Hasabia nöku Kemuela: hanö Arona; Zadoka: 18 hanö Juda; Elihu, wale hanen je liamekeiny me Davita: hanö Isakara; Omeri, nöku Mikaela: 19 hanö Zebulona; Isemaia, nöku Obadia: hanö Nafatali; Azeriela: 20 hanö Eferaima; Hosea nöku Azazia: banen hafiny tribu Manase; Joela, nöku Pedai: 21 hanen hafiny tribu Manase hnyi Gileada; Ido nöku Zakaria: hanö Beniamina; Jaasiela, nöku Abinera: 22 hanö Dana; Azareela nöku Jerohama. Wale je taben je tribu hnyi Isaraela. 23 Ke a ca öü ödrin Davita tavat a twente huna me ūhnyükong hon e: anyin a ga ha Iehova a e ame he ka osehia at Isaraela me me he ka helä me je okhüiny drany. 24 Ke haba Joab nöku Zerua ame ibi hwân he ka aü, ke a ca umo bi; anyin a can e, ame o but hmönyin ka at Isaraela; ke haba khaca adre ca sihnalimen ūseiny hnyi tusi hnân ha je bong bongu Davita than.

25 Ke Azemaveth nöku Adiela me wale at ame musö je uma omjeü anyin than: ke Jonathana nöku Uzia at ame musö je tang omjeü hnyi ta hnyei, me je taun, me je taun ae ūhuyükong, me je hhabâ: 26 ke Ezeri nöku Kelubo at ame musö tavat adre me huliwa hnyi ta hnyei he ka belökâ kânâ: 27 ke Simei at Rama at ame musö je hnyei vine: ke Zabedi at Sefama at ame musö wan je hnyei vine hobi kâu je uma waina: 28 ke Baala-hanana at Gedera at ame musö je ūö elaiu me sukamore wale hnyi hnyei ae hnyikânâ: ke Joasa at ame musö je uma wakaco: 29 ke Setari at Sarona at ame musö je hnahat kau ödrin e han tot hnyi Sarona: ke Safata nöku Adelai at ame musö je kau wale hnyi hnyigöulen je bucen: 30 ke Obeli at Isamaela at ame musö je kamela: ke Jehedeia at

Merono at ame musö je asina : 31 ke Jaziz at Hagara at ame musö je mamoe. Ödrin hia ling hnyat musö ta je únyi anyi Davita than.

32 Ke Jonathana a ke kamö Davita, me, at úhnenamö, me at wáhmakhmeto, me at sihnalimen : k' ame tha e me lakon than Jehiela nöku Hakemoni : 33 ke Ahithofela at úhnenamö hobi káu than : ke Husai at Areki lahanen than : 34 ke hwabö Ahithofela, me, Jehoiada nöku Benaia, me Abiathara : ke Joab taben vat anyin than.

HNyimakan 28.

KE haba Davita ame úkhacaköuâ ta je taben at Isaraela hia hnyi Jerusalem, a je taben je tribu, me je taben tavat bi huliwa ka than adre ve khenâ, me je taben thauzan, me je taben haded, me hnyat musö je únyi me omjehen than me lakon, tha ödrin me je eunuka, me tavat ae hwege, wale je hnyat hia ae hwege. 2 Me ame tot Davita than, me ha, ka habe, Ling nya ju le liamekeiny mönya me lakeik : haba inya oge me únykúme he ka op uma umen tang úhinhinköu anyi Iehova, me taben hnyeúcan Khongutin ; ke oge hia but penapena he ka op e. 3 Ke so bi Khong ame ha könya, ka habe, U me ca he ka op uma hobi káu iök, anyin a u at vat me hingälâ dra. 4 Ke so bi haba Iehova, Khongu Isaraela, ame úcö nya únyi hnyi lap hia anyi cica m' inye than Isaraela nyiele balua ; anyin a e ame úcö Juda me hnân at musi ; me lap anyi cica únyi hnyi lap anyi Juda ; k' ame senyin gak unyin laku cica, m' inye than Isaraela hia : 5 ke e ame hia but úcö Solomona nöku unyin lakuk (anyin ae se lakuk a ham könya Iehova) he ka laba hon theroniny dökhu dökhu Iehova hnyi Isaraela. 6 Ke e ame ha könya, ka habe, Hamö Solomona nokom he ka op umök uma me je hnyeulek : anyin a oge me hia but úca e me me nöku, k' oge me he bi nya ka kamen. 7 Ke oge me he ka otilâ hmâ dokhon dökhu nyiele balua, ame ne tethmâ he ka ányâ anyik ta je hnanyibu, me hnök je hna owisa, helâ me hnyi bong ang. 8 Ke walong ang, inya oge me ha hnyi hnyimakan at Isaraela hia, a úkhacaköu anyi Iehova, ke ame löng minya Khongutin, ka habe, Wâ wia ju, me elâm dö ta je hnanyibu anyi Iehova Khongubun ; me me hu gabun hnyeí ang ae so, me hnân iny lakubun hwaböbun nyiele balua. 9 Ke

haba u, Solomona nöku, khanö u thö Khongon kâmâm, me bi athnyaba káu ge hnyok ae bekhöt me hanu ae weny : anyin a Iehova ame elâm ta je hnyok hia, me wáhmakhmeto ta je hna únykúme hia eú hnyi hnyok : u je ne elâm e, me u me he ka wâ e ; ke u je ne hna degecâ e, me ame he ka digic u nyiele balua. 10 Wâ wia walong ang, anyin a Iehova ame úcö u he ka op uma hnân dok ae kap : hwege thö, me ányâ thö.

11 Ke haba Davita ame ham kö Solomona a nokon tulutiny poretiko, me li umainy, me je uma omjéúny, me je hnyeuleny ethö, me je hnyeuleny eú hnyin, me dok hnân taben ibetengö : 12 me tulutiny ta je únyi hia ae hu gan ge hanu, hobi káu je hnyeuleny uma umö Iehova, me je hnyeule hia igigilö, hnân uma omjéúny uma umen Khong, me uma omjéú ae kap : 13 me hobi káu je at bihut me at Levi, me hobi káu ta je huliwa m' adre me bi huliwa hnyi uma umö Iehova, me hobi káu je kaiainy hia huliwa hnyi uma umö Iehova : 14 e ame ham gol adre tuluto hnân je kaia gol, hobi káu je kaiainy je ve huliwa hia ; me sileva adre tuluto hnân je kaia sileva hia hnân je ve huliwa hia : 15 ke adre tuluto gol minya hnân je taben lamepa gol me je lamepainy, adre ve tuluto goliny je taben lamepa me je lamepainy : ke adre tuluto sileva hnân je taben lamepa sileva hnân je taben lamepa me je lamepainy, hoton je huliwainy je taben lamepa : 16 me gol adre tuluto hnân je laulau taben areto hnân omanená, ke laulau me ke laulau ; me sileva hnân je laulau sileva : 17 me gol hnân je báletiny utiö, me je kaia, me je utkaiâ : ke adre tuluto gol hnân je kaia gol hia, ke kaia me ke kaia ; me sileva hnân je kaia sileva, ke kaia me ke kaia : 18 ke adre tuluto gol adre ányáwia, hnân taben leú ütö ae bo so ; me gol hnân tulutiny kariota, li kerubi ödru me lau li labe nyidru, me tube tangen úhinhinköu anyi Iehova. 19 Haingö Davita, ka habe, Adre omanená könya hnyi tusi ta je únyi hia eling ge hnyamö Iehova wale ta je huliwainy hia tulot eang. 20 Ke Davita ame ha kö Solomona a nokon, ka habe, Hwege thö, me hnyok бага but, me ányâ thö ; ca ot bi, ke ca öbubuny bi : anyin ame he Iehova Khong, a Khonguk, ka tha e möu ; e ame ca he ka hia unyám, me hna degeci u, ke ne o but adre umo ta je únyi hia hnân huliwainy uma umö Iehova. 21 Ke

wà bi wale tavat bi hut me at Levi, ödrin e he ka ânyâ huliwainy uma umen Khong : ke ame he ka e unyâm tavat ae weny, tavat ae metâ hobi kâu ta je huliwa hia ke ame he ta je than me tavat hia ka löng ifucâm.

HNYIMAKAN 29.

KE haingö Davita than ka ùkacaköu hia, ka habe, Wanakat ae tiga but, Solomona a nöku, e thibi úcanen Khong, ke ti gan hmâ huliwa : anyin a ca hobi kâu at uma, ke hobi kö Iehova Khong. 2 Ke iny ti hwege penapena hobi kâu uma umen Khonguk gol hnân je únyi gol, me sileva hnân je únyi sileva, me bras hnân je únyi bras, me fao hnân je únyi fao, me utö hnân je únyi utö ; me je veto soama, me je veto hnân ohmâ, me je veto hnân omecâ, ae se makan, me je veto hia ae únyi hnathu, me je out ae hau ae se hia. 3 Ke anyin a inya oge me hnyok ka hnyi uma umen Khonguk, me hu gak omjehek gol me sileva, me oge me ham e hobi kâu uma umen Khonguk, ca ha bi hnök hna penapena hobi kâu uma ae kap ; 4 wale kun ta thauzan talan gol, goliny Ofira, ke seven thauzan je talan sileva adre ânyâwia, hnân tube je hnyeige uma : 5 gol hnân je únyi gol, me sileva hnân je únyi sileva, me hnân ta je únyi hia he ka huliwan. Ke ewa at ame weny he ka okabâ e bi hnyi bong ang kö Iehova ? 6 Haba je taben je lap anyin lakamen, me je taben je tribu anyi Isaraela, me je taben thauzan me haded, me je taben huliwa anyin than ödrin e ka ham thibut ; 7 me ham hobi kâu huliwainy uma umen Khong faiv thauzan je talan ke ten thauzan je dareke gol, me ten thauzan je talan sileva, me eitn thauzan je talan bras, me wan haded thauzan je talan fao. 8 Ke haba tavat ae hu veto ae únyi hnathu, ödrin e ham kö Jehiela at Geresoma, hobi kâu tang omjeüiny uma umö Iehova. 9 Ke haba tavat ödrin e senyin he ka ham baûâ, anyin a ödrin e ham baûâ me hnyok ae bekhöt kö Iehova : ke haba Davita than ame senyin gan hmâ. 10 Anyin a wale Davita ame ole kö Iehova hnyi hnyimakan ùkacaköu hia : haingö Davita, ka habe, Ole köu Iehova lö, Khongu Isaraela a kamöhmun, nyiele nyiele balua. 11 E unyâm, Iehova lö, úganiny, me man, me hmanenang, me hwege, me musi : anyin a ânyâm ta je únyi hia ethö hnyi drany me eang hmeledrany ; e unyâm dökhü, Iehova lö, ke adre oganö u

me me ban ta je únyi hia thithö. 12 Únyi gam ta je omjeü, me hmanenang, ke u je musö hia ; ke e unyâm man me hwege, ke hamâm he ka oganâ me ha hwegien hia. 13 Ke walang ang Khonguhmun lö, öhmun e oleâ köu, me olungâ iâm ae hmanenang. 14 Ke iny ia, ke ia lakeik me me khan' öhmun he ka labö ham me wehmun heláng ? anyin a únyi gam ta je únyi hia, ke öhmun e ham köu ta je únyi a ânyâm. 15 Anyin a je atkanyua öhmun hnyi hnyimákâm, me tavat hunuma tot, helâ je lakamöhmun hia : haba bonguhmun je bong eang hmelen helâ me hmenon, ke ba tethmâ. 16 Iehova Khonguhmun lö, únyi gam ta je omjeü hia eang, wale öhmun e penapena hnân op uma hobi kâu iâm ae kap, me hing ânyâm. 17 E khanö nya, Khonguk lö, a u at ame elâm hnyok, me senyin hnyi hwakecin ae wisa. Inya oge hia but ham ta je únyi hia ang ge wisainy hnyekuk : ke walang ang oge me wâ lakem ang me senyin, k' adre me ka hamödra hna köu. 18 Iehova lö, Khongu Aberahama, me Isaaka, me Isaraela a lakamöhmun, tuö ju hnyi únyküme me weny je hnyekon lakem nyiele balua, ke ohmâ je hnyekudrin köu bi : 19 ke ham kö Solomona a nöku hnyok ae bekhöt, he ka tuö hnâm je hna hûna, me hna ohnathöâ, me hnâm je hnanyibu, me he ka ânyâ ta je únyi hia eling, me otillâ uma, wale oge me penapena kâu. 20 Ke haba Davita ame ha ka ùkacaköu hia, ka habe, Walang ang, oleâ thö kö Iehova Khongubun. Me haba ùkacaköu hia adre me ole kö Iehova Khongon lakamödrin, me nom ju, me khudrung kö Iehova, me than. 21 Ke haba nyi ödrin e hudo je hut kö Iehova, me hudo je hudiny leü kö Iehova, wan thauzan je bolok, ke wan thauzan je mamoe бага, ke wan thauzan je nokon mamoe, tha e me je hudiny ic, me je hut ae se hobi kâu Isaraela hia ; 22 ke ödrin e han me ic hnyi hnyimákö Iehova hnyi bong eling me senyin gan hmâ. Ke ödrin e olo otillö Solomona nöku Davita ka than, me hú e kö Iehova hnân at musi, me Zadoka he ka at bihut. 23 Ke Solomona ame tabâ theron anyi Iehova me me than hwabö Davita a kamen, k' ame sot bi ; ke ame löng kâu Isaraela hia. 24 Ke haba ta je taben hia, me tavat hwege, me laku Davita minya, ödrin e nom ju kö Solomona than. 25 Ke haba Iehova ame ti oganö Solomona hnyi hnyimakan at Isaraela hia, me ham kâu hmanenanginy than, ke ca helâe ke than Isaraela ehac.

II. MAN ÛLABAINY JE THAN 1.

26 Haba Davita nõku Jese ame musö at Isaraela hia. 27 Ke haba ùen e ame musi hnyi Isaraela, me, fâte huna; e ame musi hnyi Heberona seven je huna, ke e ame musi hnyi Jerusalema hnyi thöte theri ta je huna. 28 Ke e ame mokcu k' ame ti hingat ut, ke se hia bongon je bong, me omjeú, me hmanenanginy: ke ame than biju Solomona a nokon. 29 Ke haba ta je

ùnyi ame ányâ Davita a bán me biliny, wâ bi, adre hia but sihnalimen hnyi tusi Samuela at wâ, me hnyi tusi anyi Nathana perofeta, me hnyi tusi anyi Gada at wâ; 30 tha e me anyin musi hia, me tang hwegien, me ta je ùen ame o kâu, me ka at Isaraela, me je dökhu hia dokhon ta je hnyei.

TUSI A LOINY

GE

MAN ÛLABAINY JE THAN.

HNYIMAKAN 1.

KE adre me ohwegiö Solomona nõku Davita hnyi dokhon dökhu, ke tha Iehova a Khongon mē, k' ame ogânâ e. 2 Ke haba Solomona ame fuc ka at Isaraela hia, ka je taben thauzan me haded, me tavat owisa, me je taben Isaraela hia, je ban je lap anyin lakamen. 3 Ke haba Solomona me úkhacaköu hia, ödrin e tha he ka hnyi dok ae görany hnyi Gibeona; anyin a eling uma úkhacaköu umen Khong, a ányâ Mose athnyabainy Khong hnyi hnye-buba. 4 Ke Davita ame hia but hom tang tangen Khong úheny Kiriatha-jarim ka hnyi dok ame penapena ga Davita hobi kâu: anyin a bia but otilâ uma mano hnyi Jerusalema hobi kâu. 5 Ke haba taben hut a bras, waleji hnö Bezaleli nõku Uri, nõku Huro, hna ányâ, e but ling hnyi hnyimakan uma mano umö Iehova: ke haba Solomona me úkhacaköu hia ödrin e elâm hnyin e. 6 Ke haba Solomona ame ölö kâe ka hnyi taben hut bras hnyi hnyimakö Iehova, hnyi uma úkhacaköu, me hudo hon e je hudiny leú a wan thauzan.

7 Ke haba Khong ame manen hnyi lit eling kö Solomona, me ha kâu, ka habe, Sumâtâ thö ùnyi oge me he ka ham köu. 8 Me haingö Solomona ka Khong, ka habe, U je betenge gan hmâ ga cica Davita, me otilö nya ka than hwaban. 9 Ke walang, Iehova Khong lö, ö u ohmâ ju hwâm hofuc kö cica Davita: anyin a u je otilö nya he ka than hon tavat ae se helâ me sesáiny

hmeledrany úseidrin. 10 Ö u ham kõnya walang metâ me wâhmakhmeto, m' inye he ka didrut me didrö hnyi hnyimakan tavat eang: anyin a ie at ae khana he ka owisa ka lakem eang ae gan! 11 Haba Khong ame ha kö Solomona, ka habe. Anyin a e hnyi hnyekom ùnyi e, ke u je ca sumatö omjeú, me ta je ùnyi, me hna ogânâ, me he ka kot je iwahnaihmöny möu, ke u je ca sumâtâ minya he ka möt beú: ke u je sumâtâ he ka metâ me wâhmakhmeto, m' u me owisa ka lakeik a hnyat oge me otilö u he ka than hon: 12 awe, adre ma ham köu metâ me wâhmakhmeto; ke oge me he ka ham köu omjeú, me ta ùnyi, me hna ogânâ ae ca hu helâe je than a bán, ke ame ca he ka helâe hwabâm. 13 Ke haba Solomona ame he Jerusalema ai úheny hnyi dok ae görany hnyi Gibeona, hnyi hnyimakan uma úkhacaköu; ke e ame musi hnyi Isaraela.

14 Ke Solomona ame úkhacaköuâ je kariota, me tavat tabö hors: ke hu gan wan thauzan ke foa haded anyin je kariota, ke twelv thauzan tavat tabö hors, wale e ame ip ödrin hnyi je tauniny je kariota, me e unyin than hnyi Jerusalema. 15 Ke haba than ame osehia sileva me gol hnyi Jerusalema helâ me je veto, me je arasi helâ me je sukamore hnyi hnyigöulen bucen. 16 Ke haba je hors hale Solomona me adre hom úheny Aigupito; ke haba tavat úcu anyin than, me ödrin e kap je deö hors ge hwaban. 17 Ke ödrin e hom me hom úheny Aigupito kariota hwaban sileva a siks haded

II. MAN ULABAINY JE THAN 2, 3.

je sekel, ke wan haded ke fifte je sekel : hwaban hors : me ödrin e hom heläe hobi kâu je thaniny at Heth me Suria.

HNHYIMAKAN 2.

KE haba Solomona ame únykúme he ka op uma hobi kâu iö Iehova, me ke uma hnân dokhon dökhü. 2 Ke Solomona ame aú tavat a ödrin sevente thauzan tavat sukhöünâ, ke eite thauzan tavat si utö hnyi je bucen, ke theri thauzan ke siks haded tavat tu' ödrin. 3 Ke haba Solomona ame úkhúnöng kö Hirama thaniny Turo, he ka ha, ka habe, U me he ka ányâ kónya, helä me hnâm hna ányâ kö cica Davita, me kunâ kâu je arasi hnân op umen uma hnân laba hnyin. 4 Wâ bi, inya oge me op uma hobi kâu iö Iehova Khonguk, he ka okabâ kâu, me he ka leú utö ae bo so hnyi hnyimakan, me hnân hobi kâu bala thibut areto hnân omanená me je hudiny leú hnyi je hnyomakatu me sahac, hnyi je sabath, me je tehi ae teb únyi, me je bijeú adre thu anyi Iehova Khonguhmun. Wale hna otílâ ka at Isaraela nyiele balua. 5 Ke e gan hmâ uma oge me op, anyin ae beönua Iehova Khonguhmun hon ta je khong. 6 Ke ie at ae khana he ka op uma hobi kâu, anyin ae ca úcú kâu drany me draniny ta je drany? ke iny ia, me inye he ka op uma hobi kâu, ke so bi he ka leú utö ae bo so thibi hnyi hnyimakan? 7 Walang ang kunâ thö kónya at ae metâ he ka huliwan gol me sileva, me bras, me fao, me udruadrâ hlit, me dra vec, me udruadrâ, me at ae khana he ka khavi hnalimen, he ka tha e me tavat ae metâ eang unyik hnyi Juda me Jerusalema, waleji a penapena ga cica Davita. 8 Kunâ minya ju kónya je úö arasi, me köp, me alemuga, úheny Lebanona; ke wâ bi ame he ka tha he lathnyabaik me lathnyabaem, 9 wale he ka penapena hobi kónya je utö ae se : anyin ae ti gan hmâ uma oge me he ka op. 10 Ke wâ bi, oge me he ka ham ka lathnyabaem a hnyat si utö je tulut hwit adre kokot a twente thauzan, ke twente thauzan je tulut bali, ke twente thauzan je bath waina, ke twente thauzan je bath wakaco. 11 Me haba Hirama than Turo ame thu hnyi tusi a kunâ kö Solomona, ka habe, Anyin a Iehova ame betenge ge lakeiny, me ame otílô u he ka tuhödrin. 12 Haingö Hirama minya, ka habe, E so adre me ole kö Iehova, Khongu Isaraela, at a op drany me hmele-

drany, at a ham nokon ae metâ kö Davita than, at wâhmakhmeto, me wâ únykúme, me me op uma hobi kö Iehova, me uma hobi kâu dokhon dökhü. 13 Ke walang ang oge me kunâ ke at a aten cica Hirama, at ae metâ, me wâhmakhmeto, 14 nokon momo Dana, ke at Turo kamen, at ae khana he ka huliwan gol, me sileva, me bras, me fao, me veto, me utö, me udruadrâ hlit, me udruadrâ, me lino ae úhnyúkong nân, me dra vec; me he ka khavi hnalimen, me únykúme wia ta je únyi adre me hna kâu : me ame he ka tha e me lakem ae metâ, me hnyat ae metâ lakei Davita than a kamâm. 15 Ke walang ang tuhök lö, e so u ma kunâ jem ka lathnyabaem hwit, me bale, me wakaco, me waina, waleji u je ha : 16 ke öhmun e he ka si utö hnyi Lebanona hoton wem : k' öhmun e he ka mâtâ eú hnyi köiö Jopa ai köu bi; ke u me he ka hom Jerusalema ai. 17 Ke Solomona ame aú ta je atkanyua hia hnyi hnyeí Isaraela, hwaban hna öú ödrin ga Davita a kamen; k' adre ö ödrin a wan haded ke fifte theri thauzan siks haded tavat. 18 Ke ame otílâ sevente thauzan gadrin he ka sukhöünö únyi, ke eite thauzan he ka si utö hnyi je bucen, ke theri thauzan ke siks haded he ka musö tavat huliwa.

HNHYIMAKAN 3.

ME haba Solomona ame hwân he ka op uma umö Iehova hnyi Jerusalema hnyi bucen Moria, waleji a manen hnyin Iehova kö Davita a kamen, wale e ame penapena hnyi dok ame kü Davita hnyi hna huje hwit anyi Aruna at Jebusi. 2 Ke e ame hwân he ka op uma hnyi bong a loiny tehi a loiny, hnyi huna a vakiny anyin musi. 3 Ke walang hnö Solomona hna bi taben, me me op uma umen Khong. Haba ibeüen hoton tulut a bán, sikste je kubit, ke haba úlaúen, twente je kubit, 4 Ke haba poretiko hnyi hnyimakan uma, e tha úcú ibeüen me úlaúen uma, twente je kubit, ke ibeüen göranyai, wan haded me twente : ke e ame tube hnyin ge gol ae so. 5 Ke e ame bi esö ethö hon uma ae gan ge köp, me tube ge gol ae so, me op hon je pama me je cen. 6 Ke e ame omecâ uma ge je veto ae únyi hnathu me me hmanenang : ke haba gol, me goliny Parevaima. 7 E ame tube goliny minya uma, je venyâ, me utkhetep, me je baten uma, me je hlinginy hwanuma ; me kave je

kerubi hnyi baten uma. 8 Ke e ame ânyâ uma ae ti kap; haba ibeüen e úcú me ùlauen uma, twente je kubit, ke haba ùlauen twente je kubit: ke e ame tube ge gol ae so ke ne o but siks haded je talan. 9 Ke haba ihmakiny je fao fifte je sekel gol. Ke e ame tube goliny je hnyeule ethö. 10 Ke e ame ânyâ hnyi hnyin uma ae ti kap li kerubi adre theátâ, ke ödrin e tubi ödru ge gol. 11 Ke haba ibeüen je labenyin li kerubi twente je kubit: faiv kubit ke labenyin, ame kâlâ baten uma; ke faiv kubit minya ke labenyin ame kâlâ labenyin ke kerubi. 12 Ke haba labenyin ke kerubi faiv kubit, ame kâlâ baten uma; ke haba ke labenyin faiv kubit minya ame kâlâ labenyin ke kerubi. 13 Adre lau je labenyin li kerubi eling ke ne o but twente je kubit: ke ödru me tot ge li cadru, me hnyimaködru ka hnyi uma. 14 Ke e ame ânyâ singiny ae udrudrá, me udrudrá hlit, me dra vec, me lino ae ùhnyükong nân, me tibet je kerubi hnyin e. 15 Ke e ame ânyâ minya hnyi hnyimakan uma li hmolom úsa thöte faiv kubit ibeüen göranyai, ke haba li ovejien walethö hon li bau úsa faiv kubit. 16 Ke e ame ânyâ je cen hnyi umen hofuc, me ip hnyi ban li hmolom; ke e ame ânyâ je wan rimona a wan haded, me ip hon je cen. 17 Ke e ame otílâ li hmolom hnyi hnyimakan uma, khaca hnyi ke keihen metâ, ke khaca hnyi ke keihen me; me hwenyi ien khaca hnyi ke keihen metâ Jakina, ke ien khaca hnyi ke keihen me, Boaza.

HNyimakan 4.

KE e ame ânyâ ke taben hut bras minya a twente je kubit ibeüen, ke twente je kubit ùlauen, ke ten kubit ibeüen göranyai. 2 Ke e ame ânyâ minya taben köiö adre okoiâ a ten kubit únyi hnyi ke baten ka hnyi ke baten, ke wathelaba, ke faiv kubit ibeüen göranyai; ke thöte kubit tulutiny igigilö. 3 Ke eú hmelen adre me theátâ je bolok adre wadrâ igigilö, hnyi ten kubit, igigilö taben köiö. Adre me ânyâ je bolok hnyi li deö hnyi üen adre okoiâ. 4 K' adre bi taben e hon je bolok a twelv, kun amè tot me hnyimakan ka hnyi hwadrö, kun ame hnyimakan jio, kun ame hnyimakan ka hnyi hwaiöu, kun ame hnyimakan deiö: k'ame tab' ödrin taben köiö, k' ödrin e iobinyköu eú hmelen. 5 Ke khaca hnyam úhakiny; k' adre ânyâ

baten helâ me baten kaia, helâ me obedila: e khana he ka hu hnyin kun ta thauzan bath. 6 Ke e ame ânyâ je taben sou a ten, k' ame ip thabúng hnyi metâ, ke thabung hnyi me, hnân sou hnyin: k' adre me hneü eling je únyi hnân hndiny leü: ke haba taben köiö, me, hnân süen tavat bihut. 7 Ke e ame ânyâ je taben lamepa gol a ten hoton tulut adre ha, k' ame ip eiö hnyin uma kap, thabung hnyi metâ, ke thabúng hnyi me. 8 Ke e ame ânyâ minya je laulau a ten, k' ame ip hnyin uma kap, thabúng hnyi ke keihen metâ, ke ke thabung hnyi ke keihen me. Ke e ame ânyâ je kaia gol a wan haded. 9 Ke haba khaca, e ame ânyâ hnyeuleny tavat bihut, me hnyeule aegan, me je hlinginy hnyeule, me tube je hlinginy ge bras. 10 Ke haba taben köiö, e ame ip e hnyi ke keihen metâ e deiö ke ka hnyi hwaiöu. 11 Ke haba Hirama ame ânyâ je öt, me je soi, me ta je kaia. Me haba Hirama ame umo ta je huliwa e ame ânyâ hobi kö Solomona than hnân hobi kâu uma umen Khong: 12 waling li hmolom, me je únyi ae wathelaba, me li ovejien hon ban li hmolom; me li boert hnân tube li únyi ae wathelaba anyin li ovejien walethö hnyi hon ban li hmolom; 13 ke foa haded je wan rimona hobi kâu li boert; ke lo li deö wan rimona hobi kâu ke boert, hnân tube li únyi ae wathelaba anyin li ovejien ethö hon ban li hmolom. 14 K' ame ânyâ minya je taben, k' ame ânyâ minya je taben sou hon je taben; 15 me khaca taben köiö ke twelv ta bolok eú hmelen. 16 Ke haba je öt, me je soi, me je båletiny utiö, me je omjehen hia, wale ame ânyâ Hirama a kâmen hobi kö Solomona than, hnân hobi kâu uma umö Lehova ge bras ae hadröngöc. 17 Ame okoiâ e hnen than hnyi dok ae tha hon hnyi Joridano, hnyi kânâ ae kece wale wanben Sukotha me Zaretana. 18 Ke haba Solomona ame ânyâ ta je únyi hia eling ae ti se hia: ke adre me ca wâ bi ihmakiny bras. 19 Ke haba Solomona ame ânyâ ta je únyi wale eiö hnyiu uma umen Khong, me taben hut minya a gol, me je laulau taben je areto hnân onanenâ; 20 me je taben lamepa me je lamepainy, me me möt hoton tulut hnyi hnyimakan umen hofuc, gol ae so; 21 me je vongon üö, me je lamepa, me je akofi, gol, wale gol ae so; 22 me je uthesiün, me je kaia, me je spun, me je taben meic, gol ae so: ke haba hwanumen uma, je hlinginy eiö

II. MAN ULABAINY JE THAN 5, 6.

hnyin hobi kâu dok ae ti kap, me je hlin-giny uma, wale uma kap, gol.

HNyimakan 5.

KE helâe adre umo ta je huliwa a ânyâ Solomona hobi kâu uma umö Iehova. Me Solomona ame odilâ thö je ûnyi a okabâ Davita a kamen; wale sileva me gol. me je ûnyi hia, me ip hnyi uma omje-ûiny uma umen Khong.

2 Haba Solomona ame ûkhacaköuâ wahingatiny Isaraela, me je ban hia anyin je tribu, kamen ae beönua ge lakon Isaraela, Jerusalema ai, he ka hom tangen ûhihiny-köu anyi Iehova ûnyi hnyi taun anyi Davita, wale Ziona. 3 Ke ame ûkhacaköu thö tavat Isaraela hia ka than hnyi bijeü, wale hnyi tehi a seveniny. 4 Ke ame o but wahingatiny Isaraela hia, me at Levi ödrin e radren tang. 5 Ke ödrin e hom tang me uma hnân ûkhacaköu, me ta je ûnyi ae kap hia hnyi uma hnân ûkhacaköu; wale je ûnyi a hom tavat bihut a at Levi. 6 Ke haba Solomona than, me ûkhacaköu hia anyin Isaraela, tavat adre tha ûkhacaköu kâu hnyi hnyimakan tang, me, ödrin e hudo je mamoe me bolok a ca hnân ai üseiny anyin ae se hia. 7 Ke haba tavat bihut ödrin e hom tangen ûhihinyköu anyi Iehova ka hnyi hnen, ka hnyi umen hofuc hnyi hnyin uma, wale dok ae ti kap, eü hmelen je labenyin li kerubi. 8 Anyin a li kerubi ödrü me lau li labenyidru hon tang, ke haba li kerubi ödrü me tube ethö tang me li venyâiny. 9 Ke ame beü li venyâ me me manen li hnyiban li venyâ hnyi tang cicö umen hofuc, ke ca manen bi eü. Ke ka eling ke ne o but hnyi bong ang. 10 Ke ba ûnyi hnyin tang ke li veto thibi ae lau waleji a ip Mose hnyin hnyi Horeba, waleji hnyi üen Iehova ame übi-hinyköu me lakon Isaraela, hnyi ühedrin Aigupito. 11 Ke ame didrut tavat bihut ûnyi hnyi dok ae kap, (anyin adre me okabâ tavat bihut hia ae ling, k' ödrin e ca huliwa zaga; 12 me at Levi minya hnyat khumöng, ödrin hia, wale Asafa, me Heman, me Jeduthun, me je lakudrin, me je liame-keiny mödrin, adre khavâ mano lino, k' ödrin e hom je simebalo, me je nabeli, me je kitara hnyi ke keihen taben hut e deiö, ke tha ödrin me tavat bihut a wan baded ke twente ödrin e tûö trutru :) 13 ke haba tavat tûö trutru me tavat khumöng, me, helâ me at a khaca, he ka hai khumöng

helâ me khaca thibi hofuc he ka ogânâ me ole kö Iehova; ke ödrin e fuc göranyai ge je trutru me simebalo me je ûnyi khumong' me oganö Iehova, me ha, ka habe, Anyin ae so e, anyin a nyiele balua anyin ibeten-giö; me haba hnyi üen eling ame unöngötö uma ge ulâ, wale uma umö Iehova, 14 me me ca khana bi tavat bihut he ka tot me ânyâ hudrudrin, can ulâ: anyin a unöngötö uma umen Khong ge hmanenangi Iehova.

HNyimakan 6.

ME haba Solomona ame ha, ka habe, A hia but ha Iehova a g' ame he ka laba hnyi menekholom. 2 Ke oge me hia but op uma hnân hnyabam, a dok u me he ka laba hnyin nyiele balua. 3 Me haba than ame hwiö me hahnahicâ ûkhacaköu hia anyin Isaraela: k' ame todrö ûkhaca-köu anyin Isaraela hia. 4 Me e ame ha, ka habe, Ole kö Iehova, Khongu Isaraela, at ame fuc ge hnyimen kö cica Davita, me ohwâdâ ge li hnyamen, ke haingen, ka habe, 5 Hwân hnyi bong oge me hom lakeik ühedrin Aigupito, me oge me ca üca ke taun hnyi je tribu Isaraela hia, he ka op uma hnyin, me me laba eling iök; ke oge me ca üca ke at me me tuhan lakeik Isaraela: 6 ke oge me üca Jerusalema, m' adre me ip eling iök; ke oge me ücö Davita he ka musi hon lakeik a Isaraela. 7 Ke e hu eü hnyi hnyeku cica Davita weny he ka op uma hnân hobi kâu iö Iehova, Khongu Isaraela. 8 Ke haba Iehova ame ha kö cica Davita, ka habe, Anyin a eü hnyi hnyekom he ka op uma hobi kâu iök, me so hnâm hna hnyok: 9 ke so bi, u me ca he ka op uma, ke hamen nokom bi at ame he ka o ûnyi gam, e bi ame he ka op uma hobi kâu iök. 10 Ke a hia but Iehova ohwâdâ hwan hofuc a ha; anyin a oge me o but hwabö cica Davita, me tabâ theroniny Isaraela, helâ me hna ha bânâ hnö Iehova, ke oge me hia but op uma hobi kâu iö Iehova, Khongu Isaraela. 11 Ke oge hia but ip eling tang, wale adre hitangen hnyin ûhihinyköu anyi Iehova, wale e ame ânyâ me lakon Isaraela. 12 Ke e ame tot cicö taben hut anyi Iehova, hnyi hnyimakan ûkhacaköu hia anyin Isaraela, me lau li hnyamen: 13 (ke a hia but Solomona ânyâ ke tap a bras, faiv kubit ibeüen, ke faiv kubit ulauen, ke kun ta kubit göranyai, me ip e hnyi wanben hnyeule; ke e ame tot hon, me cibouca

II. MAN ULABAINY JE THAN 6.

hnyi hnyimakan úkacaköu hia anyin Isaraela, me hai hnyi dranyai li hnyamen : 14 ke e ame ha, ka habe, Iehova lö, Khongu Isaraela, e ba ke Khong ae úcú möu, ethö hnyi drany me eang hmeledrany; at ame tuö úhinyökü me ibetengü ka lathnyabaem, tavat adre me vheno hnyi hnyimakâm me je hnyekudrin ae bekhöt : 15 at ame tuö hobi kâu athnyabaem a cica Davita waleji ge hnâm hna ha bânâ kâu : eke, u je fuc ge hnyimâm, me ohwâdâ ge hnyamâm, helâ me hnyi bong ang. 16 Anyin a wale, Iehova lö, Khongu Isaraela, tuö thö hobi kâu athnyabaem a cica Davita waleji u je ha bânâ kâu, ka habe, Ame ca he ka ba hwabâm hnyi hnyimakök, he ka tabâ theron hnyi Isaraela ; ame ne he thibi lakom ka tuö dedrin je gethen, he ka vheno anyik hnanyibu helâ me hnâm hna hia but vheno hnyi hnyimakök. 17 Ke walang ang, Iehova lö, Khongu Isaraela, e so adre me ohnatho hwâm hofuc, waleji u je ha ka athnyabaem a Davita. 18 Ke hawa, e hnathu ame he Khong ka tha laba me tavat eang hmeledrany? wâ bi, e ca úcú köu drany me drany ta je drany; ke ti ca úcú köu uma ang oge hia but op! 19 Ke so bi Iehova Khonguk lö, ö u wâ ju hic hijin athnyabaem me anyin sumat, me löng hwatenge me hic hijin athnyabaem hnyi hnyimákâm : 20 me me bwelâ but li emakâm cicö uma eang hnyi lany me lit, wale cicö dok waleji u je ha gan a u je he ka ip iâm eling; me löng hic hijin athnyabaem cicö dok ang. 21 Ö u long ju hic hijin athnyabaem me lakem a Isaraela, ödrin ka he ka hic cicö dok ang : eke, ö u löng ju hnyi hnyabam ethö hnyi drany; ke u ka löng ut, ö u hna but. 22 Ame ne monu ke at ka ke at bi, k' adre me kunâ e he ka khemanyin, ke ka o but me khemanyin cicö ányâm taben hut hnyi uma ang : 23 awe, ö u löng ju hnyi drany, me ányâ, me owisa ka lathnyabaem, me bi hwaban ka at ae kong, me oâ ka hnyi hon ban hwakecin ae kong; me owisa ka at ae wisa, me hna kâu boton hwakecin ae wisa. 24 Ke adre me ne kot lakem a Isaraela hnyi hnyimakan iwahnaihmiöny can anyidrin monu köu; k' ödrin e ne he ka hmetu me ha iâm, me hic me khöü hnyi hnyimákâm hnyi uma ang : 25 awe, ö u löng ju hnyi drany me hna konginy lakem a Isaraela, me ohmetu ödrin ka hnyi hnyei waleji u je ham ködrin me lakamödrin. 26 Ke adre me ne hlöng drany, me ba we, can hwakecidrin ae köng köu; ke ödrin e ne he ka hic cicö dok ang, me ha iâm, me hwiö únyi hnyi anyidrin monu, u ka oveci ödrin : 27 awe, ö u löng ju hnyi drany, me hna hwakecin ae kong anyin lathnyabaem, me lakem a Isaraela, u ka n' ödrin ge gethen ae so ködrin he ka vheno; me kunâ but we ka hnyi em hnyei, wale u je ham ka lakem me me idrin. 28 Ke a ne hu hmiâ hnyi hnyei, k' ame ne mok ne cap, k' ame ne ut, me löhan, me wahamon, me ihmâ; k' ame ne theling ödrin iwahnaihmiöny mödrin hnyi hnyei adre me bi anyidrin je taun hnyin; ame ne ke je vec ame ne ke je mok; 29 k' ame ne he ke at ka hic me sumâtâ, k' ame ne lakem hia a Isaraela, tavat adre me ve wâhmakhmeto vec me anyidrin hmak, m' ödrin e hai li benyidrin cicö uma ang : 30 awe, ö u löng ju hnyi drany a hnyabam, me hna, me ham ka tavat hia thithö helâ me dedrin je gethen, ke u je wâhmakhmeto je hnyekudrin; (anyin a hake u ke thibi at ame wâhmakhmeto hnyekon tavat;) 31 m' adre me ka outö u, me vheno dem ta je gethen hnyi ta je bong hia bongon anyidrin möt hon kânâ, waleji u je ham ka lakamöhmun. 32 Ke haba atkanyua a ca hanen bi lakem a Isaraela, ke e ka o únyi hnyi hnyei ae sâkâú ge iâm ae gan, me hnyamâm ae hwege, me benyâm adre hai; ke ödrin ka o but me hic cicö uma ang; 33 awe, ö u löng ju ethö hnyi drany wale hnyabam, me ányâ helâ me ta je hofuc hia ame hawo u hnyin atkanyua; me me khana iâm ge ta je hnyei hia thithö eang hmeledrany, me outö u helâ me hnen lakem a Isaraela, me me khan' ödrin a g' adre hwenyi ien uma ang, wale oge ányâ ge iâm. 34 Ame ne he but lakem he ka vat me je iwahnaihmiöny mödrin, hnyi je gethen hia u me he ka kun' ödrin hnyin, ke ödrin e he ka hic köu cicö taun ang wale u je úca, me uma oge hia but op hobi kâu iâm : 35 awe, ö u löng ju ethö hnyi drany hijidrin hic me anyidrin sumat, me owisa ködrin. 36 Ödrin e ne ányâ hulö köu. (anyin ae ba at ame ca ányâ monu,) me u me hmönyâm ködrin, me hn' ödrin ka je iwahnaihmiöny, me adre me lili ödrin a je hwenbâ ka hnyi ke hnyei ame ne sâkâú ame ne hakekeny; 37 ke so bi ödrin e ne únykúme hmetu hnyi hnyei ödrin e laba hwenbâ hnyin, me hwiö thö, me khöü köü hnyi hnyei ödrin e laba hwenbâ hnyin, me ha, ka habe, Öhmun e hia but ányâ hwakecin ae kong, me hwali, me monu; 38 ödrin

e ne hmetu kôu ge hnyekudrin ae bekhôt me hanudrin ae bekhôt hnyi hnyei ôdrin e laba hwenbâ hnyin, wale adre lili ôdrin me hwenbâ ka hnyin, me hic cicô idrin hnyei, waleji u je ham ka lakamôdrin, me taun u je úca, me uma wale o ge ânyâ hobi kâu iam : 39 awe, ô u lóng ju hnyi drany, wale hnyabam, hijidrin hic me hnôdrin je hna sumat, me owisa ködrin ; me hna monu anyin lakem wale ôdrin e monu kôu. 40 Walang ang, Khonguk lö, inya o ge me sumatö u, ô u bwela ge li emâkâm, me tevehlông ge li hnyikönyâm, hic adre hic hnyi dok ang. 41 Ke walang, Iehova Khong lö, todrö ka hnyi hnâm hna mokut, u me tangen hwegiam : Iehova Khong lö, e so adre me khavâ ge ûhömeli ânyâm tavat bihut, me senyinâ hwakecin ae so ânyâm tavat ae kap. 42 Iehova Khong lö, ca he ka wia degecâ hnyimakan hnâm hna hû : ûnykâme thö je ibetengiö anyi Davita a athnyabaem.

HNYIMAKAN 7.

K' a um dö Solomona hic, me ame kôlu but meic ûnyi hnyi drany, me an hudiny leú me je hut ; ke ame unöngötö uma ge hmanenangi Iehova. 2 Ke ca khana bi tavat bihut he ka didrö ka hnyin uma umö Iehova, anyin a unöngötö uma umö Iehova ge hmanenangi Iehova. 3 Ke haba lakon Isaraela hia ôdrin e wâ meic ame kôlu me hmanenangi Iehova hon uma ; ke ôdrin e nom hnyikânâi ka hnyi dek veto, me khudrung, me ole kö Iehova, me ha, ka habe, Anyin ae so ; anyin a nyiele balua anyin ibetengiö. 4 Ke haba than me tavat hia ôdrin e hudo je hut hnyi hnyimakö Iehova. 5 Ke Solomona than ame hudo je bolok a twente tu thauzan, ke wan haded ke twente thauzan je mamoe. Me haba than me tavat hia ôdrin e okabâ uma umen Khong. 6 Ke haba tavat bihut ôdrin e ve tot hnyi je hanymôdrin ; me tavat Levi me ta je ûnyi khumöng anyi Iehova, waleji a ânyâ Davita than hnân ole kö Iehova, anyin a nyiele balua anyin ibetengiö, waleji hnyi ñen Davita ame ogânâ hnen ta je ûnyi eling : ke haba tavat bihut ôdrin e túö tru-tru hnyi hnyimakôdrin ; k' ame todrö at Isaraela hia. 7 Ke Solomona ame okabâ wanben hnyeule wale hnyi hnyimakan uma umö Iehova ; anyin a e ame hudo je hudiny leú hnyi dok e. me pipikhenyainy je hudiny ole : anyin a haba taben hut a bras, wale a ânyâ Solomona, me ca ñicú hnân ta je

hudiny leú, me je hudiny han, me pipikhenya. 8 Ke haba hnyi ñen eling haba Solomona ame ânyâ bijeú hnyi seven ta bong, tha e me Isaraela hia, úkacaköu ae gan hmâ hmönyin, hwân hnyi homagöuleny Hamath ke ne o but wageweiny Aigupito. 9 Ke haba hnyi bong a eitiny, me ôdrin e ânyâ úkacaköu ae ûnyi hnathu : ke ôdrin e okabâ taben hut hnyi seven ta bong, me bijeú hnyi seven ta bong. 10 Ke haba hnyi bong a twente theriny tehi a seveniny, me, e ame kunâ tavat ka hnyi umôdrin je uma mano, me senyin me hobâ hnyi je hnyekudrin ge ta je so Iehova ame ânyâ hobi kö Davita, me Solomona, me Isaraela a lakeiny.

11 Helâling Solomona ame umo uma umö Iehova, me uma umen than : ke haba ta je ûnyi hia a o ka hnyi hnyeku Solomona he ka ânyâ hnyi uma umö Iehova, me hnyi umen uma, me e ame umo hnyi hnahic. 12 Ke Iehova ame manen kö Solomona hnyi ke hnyinghet, me ha kâu, ka habe, Oge hia but löng hijâm hic, me úca dok ang hnân hobi kônya bi ke hnân umen bi hut. 13 Oge ne hlông drany me me ba we, ke oge ne kunâ wahamon he ka an hnyei, ke oge ne kunâ mok ae cap ka lakeik ; 14 ke e ka he lakeik, hnyat adre ip iök hudrin, ka oûhnyükongu ôdrin bi, me hic, me elâm hnyimakök, me hmetu ûnyi hnyi dedrin je gethen ae kong ; awe, oge me he ka löng hnyi drany, me hna anyidrin monu, me osoâ idrin hnyei. 15 Ke walang ang, oge me he ka bwela, me tevehlông hic adre me hijö hnyi dok eang. 16 Ke walang oge hia but úca me okabâ uma ang, me me eling iök nyiele balua : ke ame he ka eling li emakök me hnyekuk hnyi je bong hia thibut. 17 Ke haba u, u je ne he ka he hnyi hnyimakök helâ me hna vhenö hnö Davita a kâmâm, me ânyâ koton hnök hna hûna kôu, me tuö anyik je hnanyibu, me hnök je hna owisa ; 18 awe, oge me he ka otethmâ theroniny dokhom dökhu, helâ me hnök hna ûhihnyökou me Davita a kâmâm, ka habe, Ame ca he ka ba hwabâm hnân musi hnyi Isaraela. 19 Ke öbun e ne hwiö me hna degecâ anyik je hnanyibu, me hnök je hna hûna wale oge ip hnyi hnyimaköbun, me he me bi athnyaba ka ke je khong, me khudrung ködrin : 20 me oge me he bi nya ka oc degeci ôdrin ûnyi hnyi ik hnyei wale oge ham ködrin ; ke haba uma ang wale o ge hia but okabâ hobi kâu iök me oge me he ka degec ûnyi hnyi hnyi-

makök, me oge me he ka wia e hnân úhöücú me hluma hnyi ta je hnyei hia. 21 Ke haba uma eang ae beú görany ai, ame he ka hnân láíá ka tavat adre me he, me ha, ka habe, Anyin a ieú Iehova ame ányá helâe ka hnyei ang me uma eang? 22 Ke adre me he ka thu, ka habe, Can ödrin e hna degeci Iehova Khongon je lakamödrin, at ame hum ödrin únyi hnyi hnyei Aigupito, me hom ke je khong bi, me khudrung ködrin, me bi athnyaba ködrin : anyin a wale e ame oâ ködrin ta je únyi eang ae kong.

HNyimakan 8.

KA um dö je huna a twente, wale hnö Solomona hna op uma umö Iehova hnyin, me umen bi uma, 2 me haba je taun a hia but ham hnö Hiram kö Solomona, me Solomona ame up ödrin me olabâ lakon Isaraela hnyin.

3 Ke haba Solomona ame he Hamathezoba ai, me hom úhnyükongo. 4 Me e ame op Tademora hnyi hnyebuba, me je taun hia hnân ip omjeú, waleji e ame otilâ hnyi Hamath. 5 Ke e ame op Bethe-horona ethö, me Bethe-horona eú, li taun adre up hagny, me je hak veto, me je homagöule, me je ohmäiny; 6 me Baalath, me je taun hnân ip omjeú anyi Solomona, me je taun hobi kâu je kariota, me je tauniny anyin tavat tabö hors, me je únyi hia ame we Solomona he ka op hnyi Jerusalem, me Lebanona, me je ke keihen hia hnyei e ame musi hnyin. 7 Ke haba tavat hia a kolon a at Heth, me Amora, me Perizi, me Hivi, me Jebusi, wale a ca at Isaraela; 8 ke lakudrin a je wan hwabödrin hnyi hnyei, waleji a ca ohia hnen lakon Isaraela, me haba Solomona ame wia keihen gadrin he ka bi athnyaba, ke ne o but hnyi bong ang. 9 Haba Solomona ame ca kunâ lakon Isaraela he ka bi athnyaba hnyi anyin huliwa; ke ödrin tavat vat, me je taben ae beönua, me taben anyin je kariota, me tavat tabö hors. 10 Wale je taben ae beönua unyi Solomona than, ödrin tu haded ke fifte, hnyat musö tavat. 11 Ke haba Solomona ame hom but momo nöku Farao únyi hnyi taun anyi Davita ka hnyi uma e ame op hobi kâu : anyin a haingen, ka habe, Ame ca he öiök ka laba hnyi uma umö Davita than Isaraela, anyin ae kap je dok adre me oâ tang tangö Iehova kâu.

12 Ke haba Solomona ame hudo je hut

kö Iehova hon taben hut anyi Iehova, wale e ame ányá cicö poretiko, 13 k' ame bi hanymen adre me thu hnyi ke bong me ke bong, k' ame hudo hoton hnanyibu anyi Mose, hnyi je sabath, me je tehi a teb únyi, me hnyi je bijeú adre me thu, wale kun hnyi huna, wale bijeúiny areto adre me ca levenâ, me bijeúiny je wik, me bijeúiny uma hunuma. 14 Ke e ame huna hoton hna otilâ ga Davita a kamen je deö hanymen tavat bihut, me at Levi ka je hanymödrin, he ka ogânâ, me huliwa hnyi hnyimakan tavat bi hut hoton huliwa hnyi ke bong me ke bong : me tavat tuö hwanuma hoton je dö hnyi je homagöule : anyin a hia but huna helâe Davita aten Khong. 15 K' ödrin e ca ohavâ hnanyibu anyin than ka tavat bi hut, me at Levi, ge ta je únyi hia, me ta je omjeú. 16 Ke a hia but Solomona penapena anyin ta je huliwa ke ne o but hnyi bong adre me bi taben hnyin uma umö Iehova, ke ne o but a um dö. K' adre umo uma umö Iehova helâe.

17 Ke haba Solomona ame he Ezionagibera ai, me Eloth ai, hnyi hobat köiöiny hnyei Edoma. 18 Ke haba Hirama ame kunâ kâu je hu a deny lathnyabainy, me lathnyabainy a hnyat wâhmakhmeto köö; k' ödrin e tha he me lathnyabai Solomona Ofira ai, me hom gol úheny e a foa haded ke fifte je talan, me hom e kö Solomona than.

HNyimakan 9.

K'a löng ut momo than Sheba lung anyi Solomona, me e ame o ka cubic Solomona ge ta je hofuc hnei ae hmak hnyi Jerusalem, tha e me bunyen ae se hia, me je kamela ödrin e hijen je utö ae bo so, me gol ae gan, me je veto ae únyi hnathu : k' ame o but momo kö Solomona me e ame úhnenamö më ge ta je únyi hia eú hnyi hnyekon. 2 Ke haba Solomona ame omanená ka momo anyin ta je hofuc hia : e ba ke únyi adre ikhâlâ kö Solomona wale a ca omanená ka momo. 3 Ke a hia but momo than Sheba wâ metâ anyi Solomona, me uma e ame op, 4 me jeú hon anyin laulau, me úlabainy lathnyabainy, me útilen hnyat huliwa kâu, me je khaúödrin; me tavat hok utkaia hnân belen, me khaúödrin; me gethen ame ölö ka hnyi uma umö Iehova : me ame gâ ön momo. 5 Me haba momo ame ha ka than, ka habe, E hnathu úthumetu oge löng hnyi ik hnyei ge hnâm hna

II. MAN ŪLABAINY JE THAN 10.

ányâ, me ânyâm metâ. 6 Ke so bi oge ca kap hnödrin je hna ha, ke ne o but oge me o me wâ ge li emakök: ke wâ bi adre ca hia but thumetu nya hafiny ânyâm metâ: u beönua hon metâ oge me löng. 7 E hnahic tavat unyâm, me hnahic lathnyabaem, tavat adre me utitilen hnyi hnyimâkâm hnyi je bong, me löng ânyâm metâ. 8 Ole kö Iehova a Khongom, at ame senyin gam he ka olabö u hon anyin theron, he ka than hobi kö Iehova a Khongom: anyin a Khongom ame betenge ge at Isaraela he ka otethm' ödrin nyiele balua, anyin a wale e ame otilö u he ka than hudrin, he ka ânyâ wisa, me ûnyi ae ûcü. 9 Me haba momo ame ham ka than gol a wan haded ke twente je talan, me je utö ae bo so ae ti gan, me je veto ae ûnyi hnathu: ke ba hmetu utö ae bo so helâ me hnen momo than Sheba hna ham kö Solomona than. 10 Ke haba lathnyabai Hirama, me lathnyabai Solomona, tavat adre hom gol üheny Ofira, ödrin e hom je üö alemuga me je veto ae ûnyi hnathu. 11 Ke haba than ame huliwan je üö alemuga hnân gethen he ka ölö ka hnyi uma umö Iehova, me uma umen than, me hnân je kitara me je nabeli hobi kâu tavat khumöng: ke adre ca wâ ehac a helâe hnyi hnyei Juda. 12 Ke haba Solomona than ame ham ka momo than Sheba ta je ûnyi hia ae weny, e ame sumâtâ, ca ha bi hnen momo hna hom ka than. Me haba momo ame hwiö thö me he ka hnyi iny hnyei, tha e me lathnyabainy.

13 Haba ihmakiny gol adre me hom kö Solomona hnyi huna a khaca, me, siks haded ke sikste siks je talan gol; 14 me gol minya a hom hnen tavat ûcü, me tavat ûcü tot: ke haba je than Arabia me latuhan hnyei ödrin e hom gol me sileva kö Solomona. 15 Ke Solomona than ame ânyâ je ûnyi adre vakha a gol adre me kokot a tu haded: haba khaca ûnyi adre vakha, me siks haded je sekel gol adre kokot. 16 Me theri haded je bec gol adre kokot; haba bec a khaca me theri haded sekel: k' ame ip hnyin uma utöiny Lebanona hnen than. 17 Ke haba than ame ânyâ ke theron ae gan a nyon elefan, me tube ge gol ae so. 18 Ke e hu wacúat hnân ölö ka hnyi theron siks je utöiny wacúat, me taben can a gol adre me ohmâ ka hnyi theron, ke e hu ci hnyi li ke keihen hnyi hna lap, ke lo li liona ame tot hnyi li ci. 19 K' ame tot twelv je liona eling hnyi lo li ke keihen

hon je utöiny je wacúat a siks: e ba ûnyi adre ânyâ helâe hnyi je dökhu hia thithö. 20 Ke haba je kaia hnân ci anyi Solomona than, me gol, ke ta je kaiainy uma utöiny Lebanona, me, gol ae so hia: ke adre me ca oûnyihnatho sileva hnyi üö Solomona. 21 Anyin e hu ta je hu hon than ame labö he Tasesa ai me lathnyabai Hirama: k' ame labö khöp je huiny Tasesa hnyi obiny je huna a kun, me hom gol, me sileva, me nyon elefan, me je cako, me je pikâk. 22 Ke beönua Solomona than hon je than hia eang hmeledrany hnyi omjeü me metâ. 23 K' ame elöm Solomona ge ta je than hia eang hmelen he ka löng anyin metâ wale a ip Khong eü hnyi hnyekon. 24 Ke ödrin e ve hom anyidrin je bwihlany, a je kaia sileva, me je kaia gol, me je úkbaü, me je ûnyi hnân vat, me utö ae bo so, me je hors, me je miul, adre me fatâ hnyi ke huna me ke huna. 25 Ke hu ga Solomona foa thauzan je hnyeuleny je horse me je kariota, ke twelv thauzan tavat tabö horse, wale e ame ip hnyi je tauniny kariota, me keihen unyin than hnyi Jerusalema. 26 Ke e ame musi hon ta je than hia thithö hwân hnyi Wagewe ke ne o but hnyi hnyei iny at Filisiti, me ke ne o but hnyi hnyigöulen Aigupito. 27 Ke haba than ame osehia sileva hnyi Jerusalema me me helâ me je veto, k' ame osehia minya je üö arasi me me helâ me je sukamore hnyi je hnyei ae hnyikânâi. 28 K' adre me hom kö Solomona je hors üheny Aigupito me ta je hnyei hia.

29 Ke haba kolon je hna ânyâ hnö Solomona a bân me biliny, hawa, adre ca sibnalimen hnyi tusi anyi Nathana perofeta, me hnyi hna perofeta hnö Ahia at Silo, me hnyi hna omanená kö Ido at wâ ga Jeroboama nöku Nebata? 30 Ke haba Solomona ame musi hnyi Jerusalema hon at Isaraela hia fâte je huna. 31 Ke Solomona ame tha mokut ut me lakamen, me adre me konâm e hnyi taun anyi Davita a kamen: ke ame than biju Reoboama a nokon hwaban.

HNYIMAKAN 10.

KE Reoboama ame he Sekema ai: anyin ame o but hnyi Sekema Isaraela hia he ka otilâ e ka than. 2 K' a löng ut e Jeroboama nöku Nebata, (anyin a e hnyi Aigupito waleji e ame kec ka hnyin ga Solomona than) me haba Jeroboama ame o

hmetu úheny Aigupito. 3 Me ödrin e ùkhúnöng me hawá e; ke haba Jeroboama ame tha o me at Isaraela hia, me ödrin e ha kö Reoboama, ka habe, 4 Haba kámám ame ohmáká únyi hnân úhúkálákouá humun: ke walang ang, e so u me he ka oháhâ huliwa anyin kámám ae vec, me únyi hnân úhúkálákouá ae hmak e ame ip huhmun, me öhmun e he ka bi athnyabaem. 5 Haba e ame ha ködrin, ka habe, Hmetu thö kõnya hwaban kun ta bong. Me ame vese thö tavat. 6 Haba Reoboama ame úhnenamö me je hingat, tavat adre me tot hnyi hnyimakö Solomona a kamen ke tiga möt, me ha, ka habe, Ie hofuc öbun e únykúme he ka thu ka tavat ang? 7 Ke haingödrin káu, ka habe, U je ne he ka menyik ka tavat ang, me osenyini ödrin, me ha ködrin je hofuc ae so, ödrin e ne ka bi athnyabaem hnyi je bong hia thibut. 8 Ke e ame degec hofuc hwan wahingat ödrin e úhnenamö, me e ame úhnenamö me je hidróu tavat a tha dö mä, ödrin e tot hnyi hnyimakö. 9 Ke haingen ködrin, ka habe, Ieú anyibun úhnenamö, m' adre me he ka thu ka tavat ang, ödrin e fuc kõnya, ka habe, Oháhâ thö únyi hnân úhúkálákouá waleji a ip kámám huhmun? 10 Me ame ha káu je hidróu tavat a tha dö mä, ka habe, Walang hofuc u me he ka ha ka tavat ang, ödrin e fuc köu, ka habe, Haba kámám ame ohmáká únyi hnân úhúkálákouá huhmun, ke u me he ka oháhâ e huhmun; walang u me he ka ha ködrin, ka habe, Haba bakevicik ame he ka hake hon hnyi cica. 11 Haba cica ame ip hubun únyi hnân úhúkálákouá ae hmak, ke oge me he bi nya ka bi hanen e hubun: haba cica ame kuc öbun ge je osö, ke oge me he bi nya ka kuc öbun ge je sekopio. 12 Ke haba Jeroboama me tavat hia ödrin e o kö Reoboama hnyi bong a kuniny, helâ me hna ha ge than, ka habe, Hmetu thö kõnya, hnyi bong a kuniny. 13 Me haba than ame thu hwegiâ ködrin; ke haba Reoboama ame degec hofuc hwan wahingat, 14 k' ame fuc ködrin hoton hofuc hwan wahidróu me ha, ka habe, Haba cica ame ohmáká únyi hnân úhúkálákouá hubun, ke oge me he bi nya ka bi hanen kâe: haba cica ame kuc öbun ge je osö, ke oge me he bi nya ka kuc öbun ge je sekopio. 15 Ke ame ca löng bi than ka tavat; anyin a únyi ge Khong, me me he Iehova ka ohwádâ hwan hofuc waleji e ame ha kö Jeroboama nöku Nebata deny Ahia at Silo. 16 Ke a wá but

Isaraela hia a g' ame ca löng ködrin than, me ame thu tavat ka than me ha, ka habe, Ewa ke keihöhmun unyi Davita? ke ha jekhöhmun unyin nöku Jese: Isaraela lö vese th' öbun ka hnyi umöbun je uma mano: Davita lö, wá biju ányám lap. Me ame vese thö Isaraela hia ka hnyi umödrin je uma mano. 17 Ke haba je lakon Isaraela hnyat adre me labâ je tauniny Juda, me, ame musi ködrin Reoboama. 18 Ke haba Reoboama ame kunö Hadorama, at ame o fat; ke haba lakon Isaraela ödrin e lúâ ge veto me ame mokcu. Ke haba Rehoboama ame ie he logot me ölö ka hnyi anyin kariota he ka kec Jerusalema ai. 19 Waleling me adre me degec lap anyi Davita ke ne o but hnyi bong ang.

HNyimakan 11.

KE a o but Reoboama hnyi Jerusalema, me e ame úkhacakouá lap anyi Juda me Beniamina, ödrin wan haded ke eite thauzan tavat adre úca, a tavat vat, he ka vat me Isaraela, he ka ohmeto dökhu kö Reoboama. 2 Ke ame o but hofuc ho Jehova kö Semaia aten Khong, ame ha, ka habe, 3 Ha thö kö Reoboama, nöku Solomona, than Juda, me ka at Isaraela hia hnyi Juda me Beniamina, ka habe, 4 Walang hna ha hnö Iehova, ka habe, (öbun e ca he ka he, k' öbun e ca he ka vat me je liamekeiny m' öbun: ve hmetu ju öbun ka hnyi umöbun je uma; anyin a únyi gak únyi ang. Me ödrin e löng hofuc ho Iehova, me hmetu me ca he ka vat me Jeroboama. 5 Ke haba Reoboama ame laba hnyi Jerusalema, me op je taun tue hnyi Juda. 6 E ame op Bethel-leema, me Etama, me Tekoa, 7 me Bethel-zur, me Soko, me Adulama, 8 me Gatha, me Maresa, me Zif, 9 me Adoraima, me Lakisa, me Azeka, 10 me Zorea, me Ajalona, me Heberona, wale hnyi Juda me Beniamina, je taun adre up haginy. 11 Ke e ame ohwegiâ je hhabâ, ma ip hnyin je taben, me úkhöünâ je jeú, me wakaco me waina. 12 Ke e ame ve ip je bec me je ö hnyi je taun hia, me ti ohwegia. Ke tha hien mä Juda me Beniamina. 13 Ke haba tavat bihut me at Levi a e hnyi Isaraela hia ödrin e úkhacakou káu únyi hnyi ta je ke keihen idrin hnyei. 14 Anyin a haba at Levi ödrin e kec hota je hnyabadrin igigilö je taun, me je idrin, me he Juda ai me Jerusalema: anyin a Jeroboama me je lakon ödrin e ob'

ödrin únyi hnyi hanymödrin ga Jehova : 15 ke e bi ame ka otilá je at bihut hobi káu je dok ae görany, me je got бага, me li lakon kau e ame hia but ányá. 16 Ke hwabödrin dö, únyi hnyi je tribu Isaraela hia, je hnyat ae mou hnyekudrin he ka elöm Jehova Khongon at Isaraela, ödrin e he Jerusalema ai he ka bi hut kö Iehova Khongon lakamödrin. 17 Ke ödrin e otethmä dökhu hnyi Juda, me otethmä Reoboama nöku Solomona ke ne o but hnyi kun ta huna : anyin a ödrin e vheno gethen de Davita me Solomona ke ne o but hnyi kun ta huna. 18 Ke haba Reoboama ame hum Maalatha nöku Jeremoth, nöku Davita, me Abihaila nöku Eliaba nöku Jese ; 19 wale at a hnokoá je lakon бага a kun ; a Jeuso, me Semaria, me Zaham. 20 Ke e ame hok hwaban e Maaka momo nöku Abasoloma ; ke e ame hnokoá lakon jia Abia, me Atai, me Ziza, me Selomith 21 Ke Reoboama ame betenge ga Maaka momo nöku Abasoloma hon je laáian hia, me anyin je momo : (anyin a. ödrin eitín laáian, me sikste anyin je momo, ke twente eit lakon je бага, me sikste je in.) 22 Ke haba Reoboama ame otiló Abia nöku Maaka hnán taben, me me musö je liamekeiny mä : anyin a e ame únykúme he ka otilá e hnán than. 23 Ke e ame metá me khená je lakon hia ka hnyi je ke keihen hia hnyei Juda me Beniamina, ka hnyi je taun adre up haginy : ke e ame ham ködrin jeú ae gan. Ke e ame elám hobi ködrin je momo ae se hia.

HNÝIMAKAN 12.

KE adre hia but ohmä dokhon dökhu Reoboama k' ame hwege but, me e ame hna degecá hnanyibu anyi Jehova tha e me Isaraela hia. 2 Ke haba hnyi huna a thabúngi Reoboama than, me ame o but Sisaka than Aigupito Jerusalema ai he ka vat, anyin ödrin e ányá hwakecin ae kong kö Jehova, 3 me je kariota a twelw haded, me tavat tabó horse a sikste thauzan : ke ca hnán bi áu tavat adre me tha he mä úheny Aigupito ; a at Lubi, me Suki, me Aithiop. 4 Ke e ame hügúná je taun adre up haginy anyin at Juda, me o hnyi Jerusalema. 5 Haba Semaia a perofeta ame o kö Reoboama, me je taben hnyi Juda a hnyat úkhacákou hnyi Jerusalema ga Sisaka, me ha ködrin, ka habe, Walang hna ha hnó Jehova, ka habe, Öbun e hia but

digic nya, anyin a wale oge hia but hna degeci öbun bi ka hnyi hnyamö Sisaka. 6 Me ame oúhnyúkongu ödrin bi je taben hnyi Isaraela me je than, me haingödrin, ka habe, E wisa Jehova. 7 Ke a wá but Iehova a ödrin e oúhnyúkongi ödrin bi, me ame o but hofuc ho Iehova kö Semaia, ka habe, Ödrin e oúhnyúkongi ödrin ; awe, oge me ca he bi nya ka ohí ödrin : ke so bi oge me he ka omi omeli ödrin, k' adre me ca he ka hingálá anyik hmönyin ka hnyi hon Jerusalema a deny Sisaka. 8 Ke so bi ödrin e he ka bi lathnyabainy ; me me khan' ödrin bi anyik huliwa, me huliwainy je dökhuieny ta je hnyei. 9 Ke ame o but Sisaka than Aigupito ka Jerusalema, me hom je omjeúiny uma umó Iehova, me uma umen than ; e ame hom hia thibut : k' ame hom minya je bec gol waleji a ányá Solomona. 10 Haba Reoboama than ame ányá je bec bras me hwaban, me hna but e ka taben tavat tue, tavat adre me tuó hwanumen uma umen than. 11 Ke haba hnyi je únen ame didró than ka hnyi uma umó Iehova, me ame o but tavat tue me hom je bec, ke ödrin e hom hmetu bi ka hnyi hnyeuleny tavat tue. 12 Ke e ame ka oúhnyúkongo e bi, me ame hwiö únyi gan hmönyin anyi Iehova, me e ame ca ti ohia e : ke haba khaca e hu ta je únyi ae so adre me wá hnyi Juda. 13 Ke haba Reoboama than ame ohwegiá e bi hnyi Jerusalema, k' ame musi bi : ke fâti wan je hunai Reoboama hnyi únen e ame hwán ka musi, ke seventiny je huna e ame musi hnyi Jerusalema, wale taun a úca ga Iehova únyi hnyi ta je tribu hia hnyi Isaraela, he ka ip hnyin ien : ke haba ien hinyen, me, Naama momo Amona. 14 Ke e ame ányá huló, anyin a e ame ca penapena hnyekon ke ka elöm Iehova. 15 Ke haba je hna ányá hnó Reoboama a bán me biliny, hawa, adre ca sihnalimen hnyi tusi anyi Semaia a perofeta, me Ido at wá, hoton bongon je dö? Ke haba Reoboama me Jeroboama ödrü me labó vat hnyi je bong. 16 Ke ame tha mokut ut Reoboama me lakamen, me adre me konám e hnyi taun anyi Davita : ke ame than biju Abia a nokon hwaban.

HNÝIMAKAN 13.

KE haba hnyi huna a eitini Jeroboama than, me ame hwán Abia ka than hnyi Juda. 2 E ame musi hnyi Jerusa-

II. MAN ÛLABAINY JE THAN 14.

lema hnyi kun ta huna : ke haba ien hinyen, me, Mikaia momo nöku Uriela at Gibea. Ke ame vat Abia me Jeroboama. 3 Ke haba Abia ame hnyi vat tha e me anyin deö vat wale tavat vat ae hwege, ödrin foa haded thauzan tavat adre úca : ke Jeroboama ame otilá metá vat m' adre me vat mē haba lahien ödrin eit haded thauzan tavat adre úca, tavat hwege. 4 Haba Abia ame tot hon bucen Zimeri, wale hnyi hnyei ae hut hnyi Eferaima me ha, ka habe, Jeroboama lö, me Isaraela hia, löng ju könya ; 5 hawa, adre ca omanená köbun a haba Jehova Khongu Isaraela ame ham dökhuiy Isaraela kö Davita nyiele balua, káu me je mátráiny ge úh-hinyköuiny sált? 6 Ke so bi a hia but Jeroboama nöku Nebata athnyabai Solomona nöku Davita tot me úkhin fuc ka tuhan. 7 Ke a hia but úhacaköu káu tavat ae monu, je atö Belial, wale ödrin e ohwegi' ödrin bi kö Reoboama nöku Solomona, ke tiga hidróu Reoboama, me tiga but hnyekon, ke ca khana bi he ka hlic ödrin. 8 Ke walang ang öbun e únykúme he ka hlec dökhü dökhü Iehova unyin je laku Davita ; ke öbun se hia hmönyin, ke e unyibun lí nokon kau gol wale a ányá Jeroboama hobi köbun hnân li khong. 9 Hawa öbun e ca hia but obá tavat bihut kö Iehova, je mátráni Arona, me at Levi, me otilá tavat bihut hobi köbun hoton hwakecin aten ke je hnyei? me me a ne he ke at ka tha e me nak bolok me seven ta je mamoe бага hnân okabá e bi, me e ame he ka at bihut ka at a khong bi. 10 Ke haba öhmun, me, Khonguhmun Iehova, ke öhmun e ca hna degecá ; ke haba tavat bihut ödrin e huliwa kö Iehova unyihmun, me, ödrin je mátráni Arona, me at Levi hnyi je hanymödrin : 11 ke ödrin e le kö Jehova je hut me je utö ae bo so hnyi je hnyomaktu me sahac : ke ödrin e ip gaga areto hnan omanená hon laulau gol ae so ; me taben lamepa gol me je lamepainy he ka möt hnyi je sahac : anyin a öhmun e tuö huliwa anyi Iehova Khonguhmun ; ke öbun e hia but hna degecá. 12 Ke wá bi e unyihmun Khong me ban köhmun, me anyin tavat bihut me je trutru ame fuc haten ot, he ka túá haten ot gabun. Lakon Isaraela lö, ca vat bi me Iehova Khongon lakamöbun ; anyin öbun e ca he ka hnahic. 13 Ke haba Jeroboama ame ikhálá ke vat hotudrin ; ke haba ödrin e tot hnyi hnyimakan at Juda, ke vat adre ikhálá hotudrin.

14 K' ame bwele hotudrin ai at Juda, me wá bi, e but vat hnyi hnyimaködrin me hotudrin : me ödrin e tenge kö Iehova, ke haba tavat bihut ödrin e túá je trutru. 15 Me haba at Juda ödrin e hongot hwege ; ke ame tiga hongot at Juda, me haba Khong ame kuc Jeroboama me Isaraela hia hnyi hnyimakö Abia me Juda. 16 Ke haba lakon Isaraela ödrin e kec ge at Juda : ke Khong ame hn' ödrin ka hnyi hnyamödrin. 17 Ke haba Abia me lakeiny ödrin e kuc ödrin, ke gan hmá hna hling' ödrin : ke ame ta but a mokcu hnyat a faiv haded thauzan at Isaraela, hnyat adre úca. 18 Me adre me hom úhnyükongo at Isaraela hnyi ün eling, ke hwege but at Juda, anyin a ödrin e labageju kö Jehova Khongon lakamödrin. 19 Ke Abia ame hnu Jeroboama, me hügúná gan je taun, wale Beth-ela me je tauniny, me Jesana me je tauniny, me Eferona me je tauniny. 20 K' ame ca hwege hmetu bi Jeroboama hnyi ta je bong bongu Abia : ke Jehova ame kot e me ame mokcu. 21 Ke ame hwege tot Abia, me e ame hok je momo a fotin me laíán, me hnokoá twente tu lakon je бага, ke sikstin lakon je in. 22 Ke haba kolon je hna ányá hnö Abia, me ta je hwakecin, me hwan ta je hofuc, me, adre hia but sihnalimen hnyi tusiny hna omanená ta je únyi a set hnö Ido a profeta.

HNYIMAKAN 14.

KE ame tha mokut ut Abia me lakamen me adre me konám e hnyi taun anyi Davita, ke ame than biju Asa a nokon hwaban. Ke ame laba wia hnyei hnyi bongon je bong, ten je huna. 2 Ke haba Asa ame ányá so me wisa hnyi hnyimakö Iehova a khongon : 3 anyin a e ame ohia je taben hut kanyua, me je dok ae görany, me sö degecá je Aseira ; 4 me huna ka at Juda he ka elöm Iehova, Khongon lakamödrin, me ányá hmanyibu me hna huna. 5 Ke e ame ohia minya je dok ae görany me je hna theati seúnö únyi hnyi je tauniny Juda : ke ame laba wia dökhü hnyi hnyimakan. 6 Ke e ame op je taun adre up hagny hnyi Juda : anyin ame laba wia hnyei, ke ba anyin vat hnyi ta je huna eling ; anyin a Iehova ame omená e. 7 Ke haingen ka at Iuda, ka habe, E so ötin e op je taun eling, me ányá je hagny igigila me je hhabá, me homagöule, me ohmäiny :

II. MAN ULABAINY JE THAN 15.

e tige e bi hnyei hnyi hnyimakötin, anyin a ötin e elöm Iehova Khongutin ; ötin e hia but elâm e, me e ame hia but omen' ötin igigilö. Me ödrin e op me ame hnahic ut. 8 Ke e hu utbavat anyi Asa tavat hok bec me ö, ünyi ge at Juda theri haded thauzan, me ünyi ge at Beniamina, tavat hok bec me hlic fana ödrin tu haded ke eite thauzan : haba ödrin hia eling tavat ae hwege. 9 Ke ame o but ködrin he ka vat Zera at Aithiope, me utbavat a wan thauzan je thauzan, ke theri haded je kariota; ke e ame o but hnyi Maresa. 10 Ke haba Asa ame he but he ka úkhanö mä, me ödrin e otílâ metâ vat hnyi hnyigöulen bucen Zefatha hnyi Maresa. 11 Haba Asa ame tenge kö Iehova Khongon me ha, ka habe, Iehova lö, e ba at ke u thibi he ka hadruâ, wanben at ae hwege, me at ae ba maniny : Iehova lö, Khonguhmun, hadru' öhmun; anyin öhmun e labageju köu, ke ünyi hnyi lám öhmun e hia but o ka tavat ang ae se. Iehova lö, u thibi Khonguhmun; e so e ca he at ka hwege hom. 12 Me haba Iehova ame kot at Aithiope hnyi hnyimakö Asa, me Juda; me ame kec dö at Aithiope. 13 Ke haba Asa me tavat unyin ödrin e hnu ödrin ke ne o but hnyi Gerara : me ame ta but at Aithiope ae se hia me me ba hmetu manidrin; anyin adre ohi 'ödrin hnyi hnyimakö Iehova, me anyin utbavat; ke ti gan ta je ünyi adre sö. 14 Ke ödrin e kot je taun hia igigilö Gerara, anyin a ödrin e outö Iehova : me ödrin e sö je taun hia; anyin ae se hia ta je ünyi hnyin. 15 K' ödrin e sö minya je umen kau, me hom je mamoe me kamela ae se, me hmeto Jerusalema ai.

HNyimakan 15.

KE ame o but hanon Khong kö Azaria nöku Obed : 2 me e ame he ka úkhanö me Asa, me ha kâu, ka habe, Asa lö, löng ju öbun könya, Juda me Beniamina hia : e bala bi Iehova anyibun hnyi üen öbun e tha öbun mä; ke öbun e ne elâm me öbun e he ka wá e; ke öbun e ne degec, me e ame he ka digic öbun minya. 3 Ke se hia je bong ae ca lu Khong ae hnathu unyin at Isaraela, ke ba at üne a at bihut, ke ba hnayibu : 4 ke so bi hnyi üen ödrin e hmetu kö Iehova, Khongu Isaraela hnyi anyidrin vec, me elâm e, awe ödrin e wá e. 5 Ke haba hnyi je

bong eling me ba hnahic ka tavat adre me didrut me didrö, ke gan hmá vec ködrin hia a aten ta je hnyei. 6 Ke ödrin e hmouca but, k' ame iwahnaihmiöny ke hnyei me ke hnyei, me ke taun me ke taun : anyin a Khong ame bwebweli ödrin ge ta je vec hia. 7 Ke hwege th' öbun, ke ca ohimö je hnyamöbun; anyin adre me he ka bi hwaban anyibun huliwa. 8 Ke a hia but Asa löng je hofuc eling, me hna perofeta hnö Oded a perofeta, me e ame hwege me ohia ta je ünyi ae ikiki ünyi hnyi hnyei Juda me Beniamina hia, me je taun e ame hügnâ hnyi hnyei ae hut hnyi Eferaima; ke a ame ányáwia taben hut anyi Iehova, cicö poretiko anyi Iehova. 9 Ke e ame úkacaköuâ at Juda me Beniamina hia, me je atkanyua unyidrin úhedrin Eferaima, me Manase, me Siméona : anyin ae se hia at Isaraela adre me utut unyin, hnyi üen ödrin e wá a Iehova Khongon ame tha e mä. 10 Me ödrin e úkacaköu hnyi Jerusalema hnyi tehi a kuniny, hnyi huna a fittininy musi anyi Asa. 11 Ke ödrin e hudo kö Iehova hnyi bong eling ke je ünyi adre me sö, wale ödrin e hom, seven haded je bolok, ke seven thauzan je mamoe. 12 Ke ödrin e úhinyköu he ka elöm Iehova Khongon lakamödrin ge hnyekudrin ae bekhöt me hanudrin ae bekhöt; 13 ke haba at ama höcö elöm Iehova Khongon Isaraela me adre me he ka hlingâ, ame ne úbnyükong ame ne gan, ame ne бага ame ne momo. 14 Ke ödrin e khemanyin kö Iehova ge hwan ae gan, me hongot, tha e me je trutru me sofara. 15 Ke haba at Juda hia ödrin e senyiná hna khemanyin : anyin ödrin e khemanyin ge hnyekudrin ae bekhöt, me elâm e ge wedrin ae bekhöt; me ödrin e wá e : ke haba Iehova ame omen' ödrin igigilö. 16 Ke haba Maaka hinyö Asa than, me e ame wia degecâ e me me ca momo than hmetu, anyin a e ame ányâ hna theati Aseira; ke Asa ame sö degecâ idola anyin momo, me oamamâ e, me thong degecâ hnyi wagewe Kederon. 17 Ke adre ca hom degecâ je dok ae görany hnyi Isaraela : ke so bi, e wisa hnyeku anyi Asa, hnyi bongon je bong hia. 18 Ke e ame odilâ ka hnyi uma umen Khong ta je ünyi a okabâ kamen, me ta je ünyi a ka okabâ, sileva, me gol, me ta je kaia. 19 Ke ba hmetu vat ke ne o but hnyi huna a thöte faiviny musi anyi Asa.

HNYIMAKAN 16.

HABA hnyi huna a thöte siksiny musi anyi Asa, haba Baasa than Isaraela ame he but ka vat me Juda, me op Rama, me me ca khana ke at he ka didrut me didrö kö Asa than Juda. 2 Haba Asa ame hom sileva me gol ünyi hnyi uma omjeü hnyi uma umö Iehova me uma umen than, me kunâ kö Ben-adada than Suria, at ame laba hnyi Damaseko, me ha, ka habe, 3 E hu anyitu ühinhinköu, ke helâ minya lakamötu : wâ bi, inya oge me kunâ köu sileva me gol ; he thö ka subâ degecâ ühinhinköu me Baasa than Isaraela, me me he but gak. 4 Haba Ben-adada ame ling Asa, me kunâ anyin je taben vat ka vat me je tauniny Isaraela ; me ödrin e kot Ijon me Dana me Abel-maima, me je tauniny ip omjeü hnyi Nafatali. 5 K' a löng ut Baasa, me e ame hna degecâ he ka op Rama, ke e ame umo ju anyin huliwa. 6 Ke haba Asa than ame oc at Juda hia ; me ödrin e sukhöünâ je veto me utö hnyi Rama, waleji a op Baasa ; ke e ame hom hnân op Geba me Mizepa. 7 Haba hnyi üen eling ame o but Hanani at wâ kö Asa than Juda me ha kâu, ka habe, Anyin a u je hia but labageju ka than Suria, me ca labageju kö Iehova Khongom, anyin a wale a haühaü but gam utbavat anyin than Suria. 8 Hawa, e ca utbavat ae gan hmâ hmönyin at Aithiope, me Lubi, me se hia hmönyin je kariota me tavat tabö hors? ke so bi anyin a u labageju kö Iehova, me e ame hn' ödrin ka hnyi hnyamâm. 9 Anyin ame labö ngele mweimwei li emakö Iehova hnyi hmeledrany hia, he ka hadruâ tavat ae bekhöt ut je hnyekudrin kâu. U je hwen monu hnyi ünyi ang ; anyin a hwân hnyi üen ang u me he bala ka labö vat. 10 Me ame hmönyin Asa ka at wâ, me ip hnyi uma ceat ; anyin a e ame hmönyin kâu can hofuc e. Ke Asa ame ovecâ keihen tavat hnyi üen eling. 11 Ke wâ bi, haba ta je ünyi a änyâ Asa, a bân me a biliny, wâ bi, adre hia but sihnalimen hnyi tusiny je than Juda me Isaraela. 12 Ke haba hnyi huna a thöte naininy musi anyi Asa, me, e ame moko li can ; ke ti gan anyin mok : ke so bi e ame ca elöm Iehova hnyi anyin mok, ke je at bi tren bubuny. 13 Ke a mokut ut Asa tha e me lakamen, k' ame mok hnyi huna a fâte waniny anyin musi. 14 Me

adre me konâm hnyi anyin hing erkemok waleji e ame hia but thu hnân hobi kâu e bi hnyi taun anyi Davita, me ip ju e hnyi hnen hna mokut dok adre öunongöta ge basama, me ke je ünyi adre me ühaniken hoton metâiny at ame huliwan je bubuny : ke gan hmâ hnödra hna leü utö ae bo so hobi kâu.

HNYIMAKAN 17.

KE ame than biju Johosafata a nokon hwaban, ke e ame penapena hwege ücon at Isaraela. 2 Me a ame ip vat hnyi ta je tauniny Juda adre me up haginny, me ip je lap tue hnyi hnyeï Juda, me je tauniny Eferaima, waleji a hüünâ Asa a kamen. 3 Ke Iehova ame tha e me Jehosafata, anyin a e ame vhenö je de Davita a bân a kiben, ke e ame ca elâm unyin je Baala ; 4 ke e ame elâm unyin Khongon kamen, me vhenö anyin je hnanyibu, k' ame ca hnu hoton hwakecin Isaraela. 5 Anyin a wale Iehova ame otethmä dökhü hnyi hnyamen ; ke haba at Juda hia ödrin e hom kö Jehosafata je bwihlany ; ke e gan hmâ anyin omjeü me hmanenanginy. 6 Ke görany hnyekon hnyi ta je hwakeci Iehova : me e ame ohia je dok ae görany, me je Aseira hnyi Juda. 7 Ke haba hnyi huna a kuniny anyin musi, me e ame kunâ anyin je taben, wale Benaila, me Obadaia, me Zakaria, me Nathaniela, me Mikaila he ka üne hnyi je tauniny Juda ; 8 me tha e mödrin at Levi, wale Semaia, me Nethania, me Zebadia, me Asael, me Semiramoth, me Jonathana, me Adonia, me Tobia, me Tobadonia, tavat Levi ; ke tha e mödrin Elisama, me Jorama, li at bihut. 9 Me ödrin e üne hnyi Juda, ke unyidrin tusi hnanyibu anyi Iehova ; ke ödrin e ngenü hnyi je tauniny Juda, me üne unyin tavat. 10 Ke ame ta but hna outö Iehova hon je dökhüiny hia je hnyeï igigilö Juda, me ödrin e ca vat me Jehosafata. 11 Ke haba keihen at Filisiti ödrin e hom kö Jehosafata je bwihlany, me fâtâ sileva ; ke at Arabia ödrin e hom kâu je meno, a seven thauzan ke seven haded je mamoe бага, me seven thauzan ke seven haded je got бага. 12 Ke ame ti gan tot Jehosafata ; ke e ame otilâ hnyi Juda je hnabâ me je taun hnân ip omjeü. 13 Ke se hia anyin je huliwa hnyi je tauniny Juda ; ke e hnyi Jerusalemä tavat vat, a tavat ae hwege.

14 Ke walang úseidrin hoton je lap anyin je lakamödrin; je taben thauzan hnyi Juda; Adena taben, ke tha e me tavat ae hwege ödrin theri haded thauzan: 15 ke haba utangköu më Johanana taben, ke tha e me tu haded ke eite thauzan: 16 me útangköu më, jia Amasia nöku Zikeri, at a ka hamen hna e kö Iehova; ke tha e me tavat ae hwege, ödrin tu haded thauzan: 17 Me únyi ga Beniamina; Eliada at ae hwege, ke tha e më tavat hok fana me bec, ödrin tu thauzan: 18 Ke haba útangköu më, Jehozabada, ke tha e më tavat adre hia but penapena he ka vat, ödrin wan haded me eite thauzan. 19 Haba tavat eling ödrin e bi athnyabainy than, ke ca ha minya tavat a ip than hnyi je taun adre up hagny hnyi hnyei Juda hia.

HNYIMAKAN 18.

KE e gan hmâ omjeû me hmanenangi Jehosafata; ke e ame liameúngon me Ahaba. 2 Ke hwaban ke je huna, me e ame he Samaria ai kö Ahaba. Ke Ahaba ame hlingá ta je mamoe me kau ae se hobi káu me anyin bunyen, me siwhegiá e he ka tha he Ramothe-gileada ai. 3 Ke haba Ahaba than Isaraela ame ha kö Jehosafata than Juda, ka habe, Hawa, ötu ma tha he Ramothe-gileada ai? Haingen, ka habe, Iny úcú möu, ke úcú lakeik me lakem; ötin a tha he ka vat. 4 Ke haingö Jehosafata ka than Isaraela, ka habe, Me hnö únyi Iehova hnyi bong ang. 5 Me haba than Isaraela ame úkhaçaköuá ta je perofeta a ödrin foa haded, me ha ködrin, ka habe, Hawa, öhmun e he ka he Ramothe-gileada ai he ka vat, ame ne ba? Me ödrin e ha, ka habe, He thö; k' ame he Khong ka hna e ka hnyi lnyamen than. 6 Me haingö Jehosafata, ka habe, E ba hmetu ke perofeta eang anyi Iehova, m' ötin e he ka hnö minya e? 7 Ke haingen than Isaraela kö Jehosafata, ka habe, Khaca biju at ötin e he ka hnei Iehova a deny e: ke hûkötianök e; anyin a e ame ca labö perofeta so gak bala, ke kong bi: wale jia Mikaia nöku Imela. Me haingö Jehosafata, ka habe, Than lö, ca ha helâe. 8 Me than Isaraela ame hawá ke eunuka, me ha, ka habe, Ie he thö ka hawo Mikaia nöku Imela. 9 Ke haba than Isaraela me Jehosafata than Juda ödrü me ve laba hon anyidru li theron, adre khavá je úkhaú, ke ödrü me laba hnyi dok ae ba únyi hnyin

hnyi hna didrö ka hnyi homagöuleny Samaria; ke haba ta je perofeta hia ödrin e perofeta hnyi hnyimaködrü. 10 Ke haba Zedekia nöku Kenaana ame ányá li faoiny meno a fao bi, me ha, ka habe, Walang hna ha hnö Iehova, ka habe, U me he ka hagtú at Suria ge li únyi ang ke ne o but ame hi' ödra bi. 11 Ke haba ta je perofeta hia ödrin e perofeta helâe, me ha, ka habe, He thö Ramothe-gileada ai, me hnahic: anyin ame he Iehova ka hna e ka hnyi hnyamen than. 12 Ke haba úthümetu at a he ka hawo Mikaia ame ha káu, ka habe, Wá bi, haba ifucin je perofeta ödrin e omanená so ka than ge hnyem a khaca: e na so minya ju hwâm hofuc helâ me hodrin, me u ma he ka fuc so. 13 Me haingö Mikaia, ka habe, Kia inya Iehova, ke haba hofuc ame he Khonguk ka ha, me oge me he bi nya ka ha. 14 K' ame o but e ka than, me than ame ha, ka habe, Mikaia lö, hawa, öhmu me he ka he Ramothe-gileada ai he ka vat, ame ne ba? Ke haingen, ka habe, He th' öbu, me hnahic; k' adre me he ka hnödrin ka hnyi li hnyamöbu. 15 Ke haingen káu than, ka habe, Hawa oge me he ka ibi ove ha köu a u ma ca ha kõnya ke hofuc ke hnathu thibi hnyi iö Iehova? 16 Ke haingen, ka habe, Oge me wá but at Isaraela hia adre me ve avá but hon je bucen helâ me je mamoe ae ba at ame tuö: ke haingö Iehova, ka habe, E ba tuhan tavat eang; ve hmetu ju ödrin ka hnyi je hnyabadrin me hnahic. 17 Hababa than Isaraela ame ha kö Jehosafata, ka habe, Awe, oge ca ha köu a e ame ca he ka perofeta so gak, ke únyi bi ae kong? 18 Ke haingö Mikaia, ka habe, Anyin a wale löng ju hofuc ho Iehova: oge ö Iehova but ame laba hon anyin theron, ke ame útitilen je dö hnyi drany hnyi ke keihen metá me meny. 19 Ke haba Iehova ame ha, ka habe, Ie at ame he ka cubic Ahaba than Isaraela, me me he ka hnyi Ramothe-gileada? Me ame ha heláng ke at, ke helâe ke at. 20 Me ame he but ke hanu me tot hnyi hnyimakö Iehova, me ha, ka habe, Oge me he ka cubec e. Ke haingö Iehova káu, ka habe, Ame he ka kâmáu? 21 Haingen, ka habe, Oge me he ka he but, ke oge me he ka bi hanu ae thoi hnyi hnyimen ta je perofeta hia. Haingen, ka habe, U me he ka cubec e, k' u me he ka tom: he but, me ányá helâe. 22 Ke walang ang, wá bi, a hia but Iehova ip hanu ae thoi hnyi hnyimen ányám ta je perofeta

eang ; ke a hia but Iehova ha ùnyi ae kong gam. 23 Haba Zedekia nõku Kenaana ame hakekenyá, me khaù wahicö Mikaia me ha, ka habe, A deny ua hanu Iehova ùheny unyik he ka ha bi kôu? 24 Ke haba Mikaia ame thu, ka habe, Wâ bi, u me he ka wâ hnyi bong u me he ka kec ka hnyeule eiö hnyin he ka lubaduöng. 25 Haba than Isaraela ame ha, ka habe, Hum Mikaia thö, me hom e kö Amona at ame musö taun, me Joasa nokon than ; 26 me ha, ka habe, Walang hna ha hnen than, ka habe, Ip ju e hnyi uma ceat, me hân ge aretoiny vec, me köiöiny vec, ke ne o but oge me o me hnahic. 27 Haba Mikaia ame ha, ka habe, U je ne he ka o me hnahic awe, a ca ha Iehova a deny inya. Ke haingen, ka habe, Löng ju öbun tavat hia.

28 Haba than Isaraela me Jehosafata than Juda ödrü me he Ramothe-gileada ai. 29 Me haingen than Isaraela kö Jehosafata, ka habe, Oge me he ka oiyoungi nya bi, me hnyi vat ; ke u me he ka khavá ãnyâm je ùkhaù. Me than Isaraela ame oiyoungá e bi, me e ame hnyi vat. 30 Ke haba than Suria ame huna ka je taben anyin je kariota, ka habe, ca he bi ka vat me tavat ae ùhnúycong me gan, ke hake than Isaraela thibi. 31 Ke haba je taben kariota ödrin e ö Jehosafata, me ödrin e ha, ka habe, Wale but ang than Isaraela. Anyin a wale ödrin e saù kâu he ka kot : ke haba Jehosafata ame hongot göranyai, me Iehova ame hadruá e ; ke Khong ame ohmetu ödrin gan. 32 Ke ame wâ ge je taben kariota a ca than Isaraela, me ödrin e hna but. 33 Ke haba ke at ame hlec mono anyin fana, me ame aat dö than Isaraela hnyi wanben hna hújá ùkhaùen vat : me e ame ha ka at ame owisa anyin kariota, ka habe, Saù but, me hum nya ùhek hnyi vat, anyin a oge aat dö. 34 Ke e gan tot vat hnyi bong eling : ke so bi haba than Isaraela ame otilà e bi hon kariota cicö at Suria ke ne o but sahac : me ame mokcu hnyi ùen ame dit seúnö.

HNyimakan 19.

KE haba Jehosafata than Juda ame hmetu ka hnyin umen uma hnyi Jerusalem me hnahic. 2 Ke haba Jehu nõku Hanani at wâ ame he me ùkhanö më, me ha kö Jehosafata than, ka habe, Hawa, e so kôu he ka hadruá at ae kong, me

betenge gadrin adre me hùkötio Iehova anyin a wale e hu hmönyin anyi Iehova kôu. 3 Ke so bi, e hu so adre wâ gam, anyin a u je hia but obia je Aseira hnyi hnyei me penapena hnyekom he ka elâm Khong.

4 Ke Jehosafata ame laba hnyi Jerusalem : ke e ame vheno hmetu hnyei, hwan hnyi Bere-seba ke ne o but hnyei ae hut hnyi Eferaima, me ohmetu ödrin kö Iehova Khongon lakamödrin. 5 Me e ame otilà tavat owisa hnyei hnyi je tauniny Juda adre up hagin, hnyi ke taun me ke taun. 6 Me ha ka tavat owisa, ka habe, Ûnykúme wia hnöbun hna ãnya : anyin a öbun e ca owisa hobi kâu at, ke Iehova bi ; ke e bi unyibun öbun ka owisa. 7 Anyin a wale outö Iehova ju öbun : wâ eaù ke ãnyá thö : anyin ae ba monu unyi Iehova Khongutin, ke e ame ca wâhmakhmetoá at, k' ame ca kap hwaban. 8 Ke Jehosafata ame otilà hnyi Jerusalem ke je at Levi, me hnyat bihut, me je kamen ae beönua hnyi Isaraela. he ka owisa hobi kö Iehova, me hnyi je iwatretra. Ke ödrin e hmetu Jerusalem ai. 9 Me e ame ha wia ködrin, ka habe, Öbun e he ka ãnyá helæ me outö Iehova hnyi hnathu me hnyok ae wisa. 10 Ke ka o köbun ke iwatretra ùnyi ge je liamekeiny möbun a hnyat labá anyidrin je taun, ge dra, ame ne hnaanyibu, me hna huna, me hna otilà, me hna owisa, me öbun e he ka kou ködrin, m' ödrin e ca he ka kong kö Iehova, wâ e nye o hmönyin köbun me je liamekeiny möbun : ãnyá thö helæ me öbun e ca monu. 11 Ke, wâ bi, Amaria, at bihut ae beönua, e bi at musi öbun hnyi ta je ùnyi anyi Iehova ; me Zebedia nõku Isamaela, at ame musö lap anyin Juda, ge ta je ùnyi anyin than : me at Levi a je homakan hnyi hnyimaköbun. Hwege thö, me ãnyá thö, k' ame he Iehova ka tha e me at ae so.

HNyimakan 20.

KE hwaban ùnyi eling ame o but lakon Moaba, me lakon Amona, ke tha ödrin më ke je at Amona, he ka vat me Jehosafata. 2 Me ame o keihen me thumetu Jehosafata, ka habe, Ame o but kôu tavat ae se hia hmönyin ùnyi hnyi ke keihen köiö ùhedra Suria ; ke wâ bi, ödrin dut hnyi Hazazo-tamara (wale Eni-gedi). 3 Ke haba Jehosafata ame ot me hwân he he ka elâm unyi Iehova : me otilà he ka ca

han ehe e hnyi Juda hia. 4 Me ame úkha-
caköu thö at Juda hia, he ka eläm úhadruo
unyi Iehova : ödrin e o but únyi hnyi ta
je tauniny Juda hia he ka eläm unyi
Iehova. 5 Ke haba Jehosafata ame tot
hnyi úkhaçaköu anyin at Juda me Jerusa-
lema, hnyi uma umö Iehova, cicö hnyeule
ae teb únyi; 6 me e ame ha, ka habe,
Iehova lö, Khongon lakamöhmun, hawa,
ca u Khongon drany, me at ame musö ta
je dökuhiny hia je hnyei? hawa, e ca
hwege me man hnyamäm, me me ca khana
ke at he ka hwege hom? 7 Hawa Khon-
guhmun lö, ca u at ame obä tavat adre me
labä hnyei ang hnyi hnyimakan lakem a at
Isaraela, me ham e ka mátráni Aberahama
hanäm nyiele balua? 8 Me ödrin e labä
e me op hnyin e uma hobi káu iäm, me ha,
ka habe, 9 A ne o köhmun únyi ae kong,
ame ne hele vat, ame ne hna owisa, ame ne
mok ae cap, me hmiä, öhmun e he ka tot
cicö uma ang, me hnyi hnyimákäm, (anyin
a e bi iäm hnyi uma ang,) me tenge köu
hnyi anyihom vec, me u me he ka löng me
omelö. 10 Ke walang ang wä ju lakon
Amona, me Moaba, me bucen Seira, waleji
u je ca hna at Isaraela he ka vat mödrin,
hnyi ioidrin úheny Aigupito, ke so bi
ödrin e hwiö úheny unyidrin, me ca ohí'
ödrin; 11 wä bi, huödrin hna bi hwaban
köhmun, me o but ang he ka ob' öhmu únyi
hnyi em hnyei waleji u je ham köhmun.
12 Khonguhmun lö, u me ca he ka owisa
ködrin? anyin ae ba manihmun he ka tot
ka tavat ae se hia hmönyin adre me o köh-
mun; ke ca khan' öhmun ke únyi he ka
anyä : me öhmun e wä hmö u. 13 Ke
haba Juda hia ödrin e tot hnyi hnyimakö
Iehova, tha ödrin me tavat ae úhnyúkong
gadru, me laöiödrin, me lakudrin. 14 K'ame
ta hanu Iehova hu Jaziela, nöku Zakaria,
nöku Benaia, nöku Jeiela, nöku Matania,
at Levi, hanen laku Asafa, hnyi wanben
úkhacaköu; 15 ke haingen, ka habe, Löng
ju öbun at Juda hia, me öbun aten Jerusa-
lema, me u Jehosafata than : walang hna
ha köbun hnö, Iehova, ka habe, Ca ot bi,
me ca öbubuny can tavat ang ae se hia
hmönyin; anyin a ca anyibun vat ang, ke
vat bi anyin Khong. 16 Haba nyi he th'
öbun ködrin : wä bi ödrin e ölö jem deny
Ziz; k' öbun e he ka ö 'drin hnyi obiny
hnyigöuleny bucen, cicö hnyebubainy Je-
ruela. 17 E ca únyi hnathu köbun he ka
vat eling : tot metä ju, me todru, me wä
ühmeli anyi Iehova hobi köbun a at

Juda me Jerusalema : ca ot bi, me ca
öbubuny : he th' öbun ködrin nyi : anyin a
tha Iehova möbun. 18 Ke haba Jehosa-
fata ame nom hnyikánái : ke haba Juda
hia me aten Jerusalema ödrin e ta ju hnyi
hnyimakö Iehova, me khudrung kö Iehova.
19 Ke haba at Levi, hanen lakon at Ko-
hatha, me lakou at Kora, ödrin e tot he
ka ogánö Iehova Khongon at Isaraela, me
fuc hwege göranyai. 20 Ke ödrin e vesä
hnyi hnyomakatu me he ka hnyi hnyebuba
hnyi Tekoa : ke ödrin e tiga he, me haba
Jehosafata ame tot me ha, ka habe, Juda
lö me aten Jerusalema, löng ju könya :
labageju kö Iehova Khongubun, m' öbun e
he ka tethmä; labageju ka anyin je perofeta
me öbun e he ka hnahic. 21 Me e
ame úhnenamö me tavat, me otílá tavat
khumöng kö Iehova, me olungä meciny
hwakecin ae kap, ödrin ka he hnyi hnyi-
makan utbavat, me ha, ka habe, Ole thö kö
Iehova, anyin a nyiele balua anyin ibeten-
giö. 22 Me ödrin e hwän he ka khumöng,
me olungä, me haba Iehova ame ip tavat
lubaduöng úcon lakon Amona me Moaba,
me bucen Seira, tavat a o he ka vat me
Juda; ke adre kuc ödrin. 23 Anyin a
haba lakon Amona me Moaba ödrin e tot
úcon aten bucen Seira he ka hlingä me ohí'
ödrin : ke ödrin e hia but hlingä aten
Seira, me ödrin e ka úhlingödrinkö ju.
24 Ke a o but at Juda ka hnyi hnabä hnyi
hnyebuba, me ödrin e wä tavat ae se hia;
me wä bi, ödrin je komok a ta but, me ba
at ame kec möt. 25 K' a o but Jehosafata
me lakeiny he ka sö anyidrin ta je únyi,
ödrin e wä unyidrin je omjeü ae se hia tha
e me je komok, me je omjeü ae so, wale
ödrin e uny jut hobi ködrin bi, me ba
hmetu hmai he ka hom : ke kun bongudrin
ka labö sukhöünä ta je únyi, anyin ae ti
gan. 26 Ke haba hnyi bong a vakiny
ödrin e úkhaçaköu hnyi hnyigöulen bucen
Beraka; anyin a ödrin e ole eling kö
Iehova : anyin a wale adre me hwenyi ien
dok eling Hnyigöulen bucen Beraka ke
ne o but hnyi bong ang. 27 Ke ame hmetu
but at Juda me Jerusalema hia, me Jehosa-
fata hnyi hnyimaködrin, he ka he hmetu
Jerusalema ai me senyin; anyin a Iehova
ame osenyini ödrin hon je iwahnaihmiöny
mödrin. 28 Me ödrin e o Jerusalema ai
me je nabeli me kitara me trutru ka hnyi
uma umö Iehova. 29 Ke ame outen
Khong hnen je dokhuiny je hnyei, e ka
khan' ödrin a Iehova ame vat e tha hien

me Isaraela. 30 Ke ame laba wia dökhu Jehosafata : anyin a Khongon ame omenâ e ehele.

31 Ke haba Jehosafata ame musî hnyi Juda : ke thôte faiv je hunainy hnyi ùen e ame hwân he ka than ; ke e ame musî hnyi Jerusalema twente faiv je huna : ke haba ien hinyen me Azuba momo nôku Silehi. 32 Ke e ame vheno gethen de Asa a kamen, me ca saû ùnyi hnyin, k' ame ânyâ wisa hnyi hnyimakö Iehova. 33 Ke so bi adre ca ohia je dok ae görany ; ke haba khaca e tiga ca um tavat penapena je hnyekudrin ka Khongon lakamödrin. 34 Ke haba kolon je hna ânyâ hnö Jehosafata a bân me biliny, wâ bi, adre hia but sihnalimen hnyi hofuc ho Jehu nôku Hanani, waleji adre ha hnyi tusiny je than Isaraela.

35 Ke hwaban e Jehosafata than Juda ame tha e me Ahazia than Isaraela ; ke haba at eling ame ânyâ hwakecin ae kong : 36 ke e ame tha e mē he ka tibet je hu hnân kec Tasesa ai : ke adre tibet je hu hnyi Eziona-gebera. 37 Ke haba Eliezera nôku Dodava úheny Maresa ame perofeta kö Jehosafata, me ha, ka habe, Anyin a u je hia but tha e me Ahazia, a hia but Iehova ohia ânyâm ta je huliwa. Ke ame hmouca but ta je hu me me ca khan' ödrin he ka kec Tasesa ai.

HNYIMAKAN 21.

KE ame mokut ut Jehosafata tha e me lakamen, me adre me konâm e unyin lakamen hnyi taun anyi Davita : k' ame than biju Jorama a nokon hwaban. 2 Ke hu je liamekeiny mē a laku Jehosafata, wale Azaria, me Jehiela, me Zakaria, me Azaria, me Mikaela, me Sefata : ödrin hia e je baga laku Jehosafata than Isaraela. 3 Ke haba kamödrin ame ham ködrin je bwihlany ae se hia, sileva, me gol, me omjeû ae ùnyi hnathu, tha e me je taun adre up hagny hnyi Juda : ke e ame ham dokhon kö Jorama, anyin a e atö. 4 Ke adre me otillö Jorama hnyi dökhu dokhon kamen, k' ame ohwegiâ e bi, me e ame tha hlingâ je liamekeiny mē, me ke je than minya hnyi Isaraela ge hele vat. 5 Thôte tu je hunai Jorama hnyi ùen e ame hwân ka than ; ke e ame musî hnyi Jerusalema eit je huna. 6 Ke e ame vheno gethen deny je than Isaraela, helâ me hna ânyâ ge lap anyi Ahaba : anyin a âiân momo nôku Ahaba : ke e ame ânyâ ùnyi ae kong hnyi

hnyimakö Iehova. 7 Ke so bi e ca we Iehova bi he ka ohia lap anyi Davita, can úhihinyköu waleji e ame ânyâ me Davita, me helâ me hnen hna ha bânâ he ka ham lamepa kâu me je matrâniny nyiele balua. 8 Ke haba hnyi bongon je bong me haba at Edoma ödrin e hügünâ musî ùnyi hnyi hnyamen at Juda, me otilâ ke than hudrin bi. 9 Me ame he Jorama me anyin je taben vat, tha e me anyin je kariota hia : ke e ame todru hnyi hnyinghet, me kot at Edoma tavat adre me igigilö e, me je taben kariota 10 Me haba at Edoma ödrin e hna degecâ at Juda ke ne o but hnyi bong ang : ke haba at Libena ödrin e hna degecâ e hnyi ùen minya e : anyin a e ame digic Iehova Khongon lakamen. 11 Ke haba khaca e ame ânyâ je dok ae görany hnyi je bucen Juda, me kunâ aten Jerusalema he ka bi ùnyi monu, me cubec at Juda. 12 Ke ame o kâu ke tusi ùnyi ga Elia perofeta ame ha, ka habe, Walang hna ha hnö Iehova Khongu Davita a kibâm, ka habe, Anyin a u je ca vheno gethen de Jehosafata a kâmâm, me je gethen de Asa than Juda ; 13 ke u je vheno gethen deny je than Isaraela obiünymono at Juda me aten Jerusalema, helâ me hnâ ânyâ ge lap anyi Ahaba ; ke haba khaca u je hia but hlingâ je liamekeiny möu wale lap anyin kâmâm, tavat ae so hom ; 14 wâ bi, ame he Iehova ka kot lakem ge vec ae gan hmâ, me je lakom, me laâiâm, me ânyâm ta je ùnyi hia : 15 ke u me he ka mok gan hmâ ge tangtem, ke ne o but ame he ka hingölö tangtem ge mok hnyi je bong. 16 Ke haba Iehova ame okhûâ hnyekon at Filisiti, me at Arabia tavat adre me hakekenyâ at Aithi-ope, kö Jorama : 17 me ödrin e o hnyi Juda, me kot e, me hom je tang omjeû hia adre wâ hnyi uma umen than, me lakon minya, me laâiân ; me ame ba but nokon ke Jehoaza thiju a wakeiat hmönyin. 18 Ke hwaban ta je ùnyi hia eling, Iehova ame kot e me e ame moko tangtiny, me ca khana he ka möt. 19 Ke hnyi ke ùen hwaban lo li huna, ame hingölö tangtiny ge mok, me e ame mokcu ge mok ae kong. Ke ödrin e ca leû ütö ae bo so hobi kâu, helâ me hna leû ütö ae bo so hobi kâu lakamen. 20 Thôte tu je hunainy hnyi ùen e ame hwân ka than, ke e ame musî hnyi Jerusalema eit je huna : ke e ame he but k' adre ca tengiâ ; me ödrin e konâm e hnyi taun anyi Davita, ke ca hnyi je erkemok anyin je than.

HNyimakan 22.

KE haba aten Jerusalema adre me hmönyin ka than hwaban : anyin a hia but hlingâ je tuhan hia hnen deö vat adre tha o me at Arabia ka hnyi hna hunuma. Me Ahazia nöku Jorama than Juda ame musi. 2 Fäte tu je hunai Ahazia hnyi ün e ame hwân ka than ; ke e ame musi hnyi Jerusalema khaca huna : ke haba ien hinyen, me, Athalia momo nöku Omeri. 3 Ke e ame vheno minya gethen deny lap anyi Ahaba : anyin a hinyen ame labö úsabö më he ka ányâ únyi ae kong. 4 Ke e ame ányâ hulö hnyi hnyimakö Iehova, helâ me lap anyi Ahaba : anyin a ödrin je hnyat úsabö më hwabat mok anyin kamen, me e ame kong ut. 5 E ame vheno minya anyidrin úhnenamö, me tha he me Jorama nöku Ahaba than Isaraela he ka vat me Hazaela than Suria hnyi Ramothe-gileada : ke ame aat dö Jorama ge at Suria. 6 Ke e ame hmetu Jezerela ai he ka bi anyin je aat, wale hnân je aat hnyi Rama waleji e ame vat me Hazaela than Suria. Ke haba Ahazia nöku Jorama than Juda ame he he ka ö Jorama nöku Ahaba hnyi Jezerela, anyin a e mok. 7 Ke únyi ge Khong mok anyi Ahazia, can e ame he kö Jorama : anyin a e ame o but, me e ame tha he me Jorama ka vat me Jehu, nöku Nimesi, at ame hú ga Iehova he ka subâ degecâ lap anyi Ahaba. 8 Ke haba Jehu ame tiga bi hwaban lap anyi Ahaba, me e ame wâ a g' ame bi athnyabai Ahazia hnen je tuhan Juda me lakon je liamekeiny me Ahazia, me e ame hling' ödrin. 9 Me e ame elöm Ahazia, ke ödrin e kât e, (ke e ame ikhölö hnyi Samaria), me adre me hom e kö Jehu, me hlingâ e ; ke ödrin e konâm e, anyin a haingödrin, ka habe, E nöku Jehosafata, at ame elöm Iehova ge hnyekon ae bekhöt. Ke ba hmetu bi maniny lap anyi Ahazia he ka kât döku.

10 Ke a wâ but Athalia hinyö Ahazia a ga mokcu nokon, me e ame todrö me hlingâ je matrâniny lap hia anyin than Juda. 11 Ke haba Joseba momo nokon than, ame hum Joasa nöku Ahazia, me hom duöngâ únyi hnyi lakon than adre me hlingâ, me tha ipe me at ame hat hnyi hnyeule mokut. Me Joseba momo nöku Jorama than, öiö Jehoiada at bihut, (anyin a e hani Ahazia) ame ikhâlâ e ga Athalia, me me ca hlingâ

e hnen momo e. 12 Ke e ame laba unyidrin hnyi uma umen Khong, k' ame lubaduöng hnyi siks ta huna : ke Athalia ame musi hnyi hnyei.

HNyimakan 23.

KE haba Jehoiada ame ohwegiâ e hnyi huna a seveniny, me hom je taben haded, wale Azaria nöku Jerohama, me Isamaela nöku Johana, me Azaria nöku Obed, me Maseia nöku Adaia, me Elisafata nöku Zikeri, me úhinhinyköu mödrin. 2 Ke ödrin e ngenu hnyi Juda, me úkhacaköüâ at Levi hnyi je taun hia hnyi Juda, me je kamen ae beönuia hnyi Isaraela, me ödrin e tha o hnyi Jerusalema. 3 Ke haba úkhacaköu hia ödrin e úhinhinyköu me than hnyi uma umen Khong. Me e ame ha ködrin, ka habe, Wâ bi, ame he nokon than ka musi helâji me hnö Iehova hna ha ge laku Davita. 4 Walang únyi öbun e he ka ányâ : ke haba ke keihen gabun a kuniny hnyat adre me didrö hnyi sabath, tavat bihut me at Levi, me hamöbun he ka tuö je hwanuma ; 5 ke hamen ke keihen a kuniny ka laba hnyi uma umen than ; me ke ke keihen a kuniny biju hnyi homagöuleny taben : ke ame he ka hnen hnyi hnyeuleny uma umö Iehova tavat hia thithö. 6 Ke ba at ame he ka dit hnyi uma umö Iehova, e so thibi tavat bihut, me tavat huliwa a at Levi ; hamödrin he ka dit, anyin a ödrin tavat ae kap : ke hamen tavat hia he ka tuö huliwa anyi Iehova. 7 Ke hamen at Levi he ka walö igigilö than, ödrin e ve hom je únyi hnân vat ; ke ame ne he ke at bi he ka dit ka hnyi uma umö Iehova, me adre me he ka hlingâ : ke öbun e he ka tha e me than e ka didrö me didrut. 8 Me haba at Levi me Juda hia ödrin e anyâ helâ me hna húna ga Jehoiada at bihut : ke ödrin e ve hom tavat gadrin, wale tavat adre me he ka didrö hnyi sabath, tha ödrin me tavat adre me he ka didrut hnyi sabath ; anyin a ca ovesâ je dö hnö Jehoiada. 9 Ke haba Jehoiada at bihut ame ham ka je taben haded je ö, me je bec, me je bec ae gan anyi Davita than a e hnyi uma umen Khong. 10 Me e ame otílâ tavat hia unyin than igigilö, ke ve hu únyi vat hnyi hnyamödrin, hwân hnyi ke keihen metân uma ke ne o but hnyi ke keihen meny uma, me baten taben hut. 11 Me ödrin e hom nokon than, me obicâ e ge korona, me hau

kâu únyi hnân ohnatho, me otílâ e ka than : ke haba Jehoiada me lakon ödrin e hú e ; me ödrin e ha, ka habe, E so e möt than. 12 K' a löng ut Athalia hwan tavat adre me wadring me oganá than, me e ame he ka tavat hnyi uma umö Iehova : 13 me e ame bwele, me wâ bi, ame tot than hnyi anyin tap hnyi hwanuma, ke tha e me than je taben me je trutru ; ke ame senyin tavat hia aten hnyeí, me túö je trutru ; ke tavat khumöng ödrin e ányâ je únyi khumöng, me hai je khumöng hnân oganá. Me haba Athalia ame kia anyin je úkhaú, me ha, ka habe, Úhúgúnö dökhu, úhúgúnö dökhu but ang. 14 Haba Jehoiada at bihut ame hom je taben haded, tavat musö utbavat, me ha ködrin, ka habe, Hom but momo wanben li deö at ; ke haba at ame he ka he hoton, adre me he ka hlingâ ge hele vat : anyin ame ha at bihut, ka habe, Ca he ka hlingâ momo hnyi uma umö Iehova. 15 Me ödrin e hne deny momo ; me e ame he ka hnyi uma umen than hnyi gethen deny homagöuleny je hors : ke ödrin e hlingâ momo eling.

16 Haba Jehoiada ame ányâ anyin úhi-hinykôu me tavat hia me than, m' ödrin e lakei Iehova bi. 17 Ke haba tavat hia ödrin e he ka hnyi uma umö Baala, me kia e, me tho omomono je taben hut kâu, me je hna theatâ, me hlingö Matana at bihut anyi Baala cicö je taben hut. 18 Ke haba Jehoiada ame khenâ huliwainy uma umö Iehova ka tavat bihut a at Levi, waleji Davita ame ve ip hnyi uma umö Iehova he ka hudo je hudiny leú kö Iehova, helâ me hna sihnalimen hnyi tusiny hnanyibu anyi Mose, adre me senyin me khumöng, helâ me Davita ame húna. 19 Me e ame ip tavat tuö hwanuma hnyi je homagöuleny uma umö Iehova, wâ e nye didrö at a bo kongge ke únyi. 20 Ke e ame hom je taben haded, me je than, me tavat musö tavat, me aten hnyeí hia, me hom than únyi hnyi uma umö Iehova : ke ödrin e gethen únyi hnyi homagöule ethö ka hnyi uma umen than, me ip than hon theroniny dökhu. 21 Me ame senyin tavat hia aten hnyeí, me ame laba wia taun ; k' adre hlingö Athalia ge hele vat.

HNHYIMAKAN 24.

SEVEN dut ta hunai Joasa hnyi úen e ame hwân ka than ; ke ame musi hnyi Jerusalema fâte je huna : haba ien hinyen, me Zibia momo Bere-seba. 2 Ke

haba Joasa ame ányâ únyi ae wisa hnyi hnyimakö Iehova, hnyi je bong hia bongu Jehoiada at bihut. 3 Ke haba Jehoiada ame hok li momo hobi kâu than, me e ame hnokoâ lakon je бага me hlu. 4 Ke hwabân e Joasa ame únykúme hnyi hnyekon he ka ányâwia uma umö Iehova. 5 Me e ame úkhacakôuâ tavat bihut me at Levi, me ha ködrin, ka habe, He th' öbun ka hnyi je tauniny Juda me úhnöhnö únyi ge at Isaraela hia mone hnân ányâwia uma umen Khongubun hnyi ke huna me ke huna, ke so öbun e he but ka omweimweiâ únyi e. Ke so bi ame ca omweimweiâ nhen at Levi. 6 Me than ame hawo Jehoiada at ae beönuu, me ha kâu, ka habe, Ieú gam u me ca húna at Levi he ka hom je bwihlany únyi ge at Juda me Jerusalema waleji a húna ge Mose athnyabai Iehova, me únyi ge úkhacakôu anyin at Isaraela, hobi kâu uma hnân ohnatho? 7 Anyin a haba laku Athalia, momo ae kong, ödrin e hia but tho degeçâ uma umen Khong ; ke haba khaca ödrin e hia but ham hia ta je únyi a kapiny uma umö Iehova kö Baala. 8 Ke ame húna than, me ödrin e tibet ke tang, me ip eú hnyi homagöuleny uma umö Iehova. 9 Me ödrin e omanená hnyi Juda me Jerusalema hia, a g' adre me he ka hom kö Iehova ta je bwihlany a húna Mose athnyabainy Khong ka at Isaraela hnyi hnyeubua. 10 Ke haba je than me tavat hia ödrin e tha senyin, me hom je bwihlany, me khúâ ka hnyi tang, ke ne o but ödrin e um dö. 11 Ke haba hnyi ta je úen hia ame oâ but at Levi tang ka tavat tuö ta je únyi anyin than, ke ödrin ka wâ but ae gan hmâ mone, me ame o but at sihnalimen hobi kâu than me at tuö ta je únyi anyin at bihut ae beönuu, me hingâlâ tang, me hom, me hmeto e ka hnyi nhen. Ödrin e ányâ helâe hnyi ke bong me ke bong, ke e gan hmâ mone ödrin e úhnöhnö. 12 Haba than me Jehoiada ödru me ham ka tavat bi huliwa hnyi uma umö Iehova ; ke ödrin e bi hwaban tavat up veto me tretrau utö he ka ányâwia uma umö Iehova. 13 Ke haba tavat huliwa ödrin e huliwa me ödrin e umo huliwa, ke ödrin e ányâ uma umen Khong me me helâ me ehac, me ohmâ e. 14 Ke ame um dö huliwa, me ödrin e hom ka than me Jehoiada je kolon mone, ke adre tibet kâu je kaia hobi kâu uma umö Iehova, wale je kaiainy huliwa, me hnân bi hut, me je spun, me je kaia gol me sileva. Ke ödrin e bi

lut bala hnyi uma umö Iehova hnyi ta je bong hia bongu Jehoiada. 15 Ke hingat ut Jehoiada ke se hia je bongon, me e ame mokcu; ke wan haded ke thöte je hunainy me e ame mokcu. 16 Me ödrin e konâm e hnyi taun anyi Davita tha e me je than, anyin a e ame ânyâ so hnyi Isaraela, me ka Khong minya me umen uma. 17 Ke hwaban mok a Jehoiada, me ame o je taben Juda, me nom ka than. Me than ame löng ködrin. 18 Me ödrin e hna degecâ uma umen Khongon lakamödrin, me bi athnyaba ke je Aseira me je idola: me ame o but hmönyin ka at Juda me Jerusalema can hulö eling. 19 Ke so bi e ame kunâ ködrin je perofeta, he ka ohmetu ödrin kö Iehova; me ödrin e siwhegi ödrin, ke ödrin e ca löng bi. 20 Ke ame o but hanon Khong kö Zakaria nöku Jehoiada at bihut; me e ame tot hon tavat me ha ködrin, ka habe, Walang ina ha hnen Khong, ka habe, Anyin a ieu öbun e hanyâûâ hnanyibu anyi Iehova me me ca khan' öbun he ka hnahic? anyin a öbun e hia but hna degeci Iehova, me e ame hia but hna digic öbun. 21 Me ödrin e sihnân, me lüâ e ge veto hnyi hnyeuleny uma umö Iehova hoton musi anyin than. 22 Haba Joasa than ame ca ünyküme ibetengö anyi Jehoiada a kamen, k' ame hlingâ nokon bi. Ke ame tiga he but ka mokcu, me haingen, ka habe, E na wâ ju Iehova me bi hwaban. 23 Me haba hnyi obiny huna ame o but kâu deö vat anyin at Suria: ke ödrin e o but hnyi Juda me Jerusalema, me kot je taben tavat hia, me kunâ ta je anyi hia adre me sö ka than Damaseko. 24 Anyin ame o but utbavat anyin at Suria a deö vat ae ühnyükong; me haba Iehova ame hna utbavat ae gan hmâ ka hnyi hnyamödrin, can ödrin e hna degeci Iehova Khongon lakamödrin. Me adre me owisa belâe kö Joasa. 25 Ke ödrin e he but gan (anyin a ödrin e hna e ke gan je imekiny) me ame sihnân e hnen lathnyabainy, can dra dren laku Jehoiada at bihut, me hlingâ hon hnen hna mokut, me e ame mokcu: me ödrin e konâm e hnyi taun anyi Davita, k' adre me ca konâm e hnyi erkemok anyin je than. 26 Ke haba li at ödru me sihnân, me Zabad nöku Simeatha momo Amona, me Jehozabada nöku Simerith momo Moaba. 27 Ke haba ge lakon, me je hok ae hmak kâu, me hna ânyâwia uma umen Khong, wâ bi, adre hia but sihnalimen hnyi tusi ame ha bongon tusiny je than. Ke ame than biju Amazia a nokon hwaban.

HNyimakan 25.

TWENTE faiv but je hunai Amazia hnyi üen e ame hwân ka than: ke e ame musi hnyi Jerusalema twente nain je huna: ke haba ien hinyen, me, Jehoadana momo Jerusalema. 2 Ke e ame ânyâ wisa hnyi hnyimakö Iehova, ke so bi e ca bekhöt ut hnyekon. 3 Ke hnyi üen adre hia but ohmä dökhu unyng, me e ame hlingâ li lathnyabiny, waleji ödre hlingâ than a kamen. 4 Ke so bi e ame ca hlingâ lakudru, ke e ame ânyâ hoton hna sihnalimen hnyi tusi hnanyibu anyi Mose, waleji a huna Iehova, ka habe, Ame ca he ka mok je kamen can lakon, k' ame ca he ka mok je nokon can je kamen; k' ame he tavat hia ka ve moko anyidrin bi hulö. 5 Ke haba Amazia ame ükacacökouâ at Juda, me khen' ödrin hoton je lap anyin je lakamen, hmelen je taben thauzan me je taben haded, wale Juda me Beniamina hia: me e ame öü ödrin hwân ge tavat a twente huna me gan hon e, me ö ödrin a ödrin theri haded thauzan tavat adre üca, ae ücü ka hnyi vat, tavat hok ö me bec. 6 Ke e ame bi hwaban minya wan haded thauzan tavat ae hwege ühedrin Isaraela, a ham hwaban wan haded je talan sileva. 7 Ke ame o but kâu ke aten Khong, me ha, ka habe, Than lö, e so ame ca tha he möu deö vat anyin at Isaraela; anyin a ca tha Iehova me at Isaraela, a je laku Eferaima hia. 8 Ke u je ne behe, he thö, hwege thö hnân vat: ke ame he Khong ka otö u hnyi hnyimakan iwahnaihmiöny; anyin ae hu maniny Khong he ka ühadruö, me he ka ota. 9 Me haingö Amazia ka aten Khong, ka habe, Ötin e he ka kâmâu ta je talan a wan haded waleji o ge ham ka deö vat anyin Isaraela? Ke haingen aten Khong, ka habe, E khañö Iehova he ka ham gâñâ köu hon e. 10 Haba Amazia ame hake ip ödrin, wale deö vat a o kâu ühedrin Eferaima, he ka he hmetu ka hnyi hnödrin: anyin a wale ame ubâhlâ anyidrin hmönyin ka at Juda, me ödrin e he hmetu ka hnyi hnödrin me hmönyin ae gan hmâ. 11 Ke haba Amazia ame hnyok бага, me hom lakeiny ka hnyi Hnyigöulen bucen Sält, me kot je laku Seira a ten thauzan gadrin. 12 Ke haba ke ten thauzan minya tavat ae möt a hom je laku Juda, me hum ödrin ka hnyi ban kic, me hagut' ödrin ünyi ethö hnyi kic, me ödrin e amam hia. 13 Ke haba aten deö vat waleji a

kunâ hmetu Amazia, m' adre me ca tha he mē ka hnyi vat, me, ödrin e utut ka hnyi je tauniny Juda, hwân hnyi Samaria ke ne o but hnyi Bethé-horona, me hlingâ kun ta thauzan gadrin, me sô gan hmâ.

14 Ke haba hnyi ün ame o hmetu thö Amazia üheny hnyi hna kot at Edoma, me e ame hom je khongon je laku Seira, me otil' ödrin hnân je khongon, me nom ködrin, me leü ütö ae bo so ködrin. 15 Me ame ubâhlâ thö hmönyin anyi lehova kö Amazia, me e ame kunâ kâu ke perofeta, at ame ha kâu, ka habe, Anyin a ieu u je elâm unyin je khongon tavat, wale ödrin e ca hia but omelö je atödrin ünnyi hnyi hnyamâm? 16 Ke e ame tiga fuc kâu, me haingen than kâu, ka habe, Hawa, öhmun e hia but otilö u he ka hnyi hanen ünhenamö anyin than? soju anyin a ieu adre me he ka hlingö u? Me haba perofeta ame um ju, me ha, ka habe, Oge me wâ but a Khong ame ünüküme he ka ohiö u, can u je hia but änyâ ünnyi eling, me ca löng hnök hna nö u.

17 Me haba Amazia than Juda ame üsâbö, me e ame ükhünöng kö Joasa nöku Jehoaza, nöku Jehu, than Isaraela, me ha, ka habe, Ötu me he ka ünnyimakötüköu. 18 Me haba Joasa than Isaraela ame ükhünöng kö Amazia than Juda me ha, ka habe, Haba iwadekonginy Lebanona ame ükhünöng ka arasiny Lebanona, me ha, ka habe, Ham dö nokom hlu me me äiân nökkuk: ke haba ke meno hnyeuten Lebanona ame he, k' ame üto iwadekong. 19 Ke haingâm, ka habe, Wâ bi, u je hia but kot at Edoma; k' ame kap göranyi u ge hnyekom he ka hobelöu: laba ju hnyi hnyabam; ieu gam u me he ka oküâ ünnyi ae kong m' u me he ka ta, u, me Juda a tha ödrin möu? 20 Ke ame ca löng bi Amazia; anyin a ünnyi ga Iehova m' adre me he ka hn' ödrin ka hnyi hnyamen ta je iwahnaihmiöny mödrin, anyin a ödrin e hia but elâm unyin je khongon Edoma. 21 Me haba Joasa than Isaraela ame he; ke haba e me Amazia than Juda ödrü me ünnyimaködruköu hnyi Bethesemes hnyi Juda. 22 Me ame kong ut at Juda ge at Isaraela; m' ödrin e ve kec ka hnyi umödrin je uma mano. 23 Ke haba Joasa than Isaraela ame köt Amazia than Juda, nöku Joasa, nöku Jehoaza, hnyi Bethesemes, me hom e Jerusalema ai, me kia hna up haginny veto hnyi Jerusalema, an hnyi homagöule Eferaima ke ne o ünnyi homagöuleny kopiny, foa haded

je kubit. 24 Ke e ame hom hia gol me sileva, me ta je kaia adre me wâ hnyi uma umen Khong unyi Obed-edoma, me je omjet hnyi uma umen than, me je hnyat hnân hwaban, me adre me hmetu Samaria ai.

25 Ke e möt Amazia nöku Joasa than Juda hwaban a moku Joasa nöku Jehoaza than Isaraela, fittin je huna. 26 Ke haba kolon je hna änyâ hnö Amazia, a bân me biliny, wâ bi, adre ca sihnalimen e hnyi tusi anyin je than Juda me Isaraela? 27 Ke hwân hnyi ün ame hwiö Amazia ga Iehova, me ödrin e sihnân e hnyi Jerusalema; me e ame kec Lakisa ai: me ödrin e ükhünöng Lakisa ai me hlingâ eling. 28 Me ödrin e hom e hon je hors, me konâm e tha e me lakamen hnyi taun anyi Davita.

HNYIMAKAN 26.

KE haba tavat Juda hia ödrin e hum Uzia, ke sikstin dut hunainy, me otilâ e ka than hnân hwaban kamen a Amazia. 2 E ame op Elath, me ham hmetu e ka at Juda, hwaban dö a mokut ut than tha e me lakamen. 3 Sikstin dut hunai Uzia, me e ame hwân ka musu; ke e ame musu hnyi Jerusalema fitte tu je huna: ke haba ien hinyen me Jekolia momo Jerusalema. 4 Me e ame änyâ wisa hnyi hnyimakö Iehova, hoton hna änyâ hnö Amazia a kamen. 5 Ke e ame penapena hnyekon he ka elâm Khong hnyi je bong bongu Zakaria, at a hu metâ hnyi je hna omanenâ hnen Khong: ke haba hnyi ta je bong e ame elöm Iehova me haba Khong ame ohnahicâ e. 6 Me e ame he but me vat me at Filisiti, me tho degecâ hna up haginny hnyi Gatha, me hna up haginny hnyi Jabene. me hna up haginny hnyi Asedoda; me e ame op je taun hnyi hnyeie Asedoda, me Filisiti. 7 Ke haba Khong ame hadruâ e he ka vat me at Filisiti, me at Arabia ödrin e laba hnyi Gure-baala, me at Maon. 8 Ke haba at Amona ödrin e ham je bwihlany kö Uzia: me ame lung ut ien ke ne o but hnyi gethen ame dit ka hnyi Aigupito; anyin a e ame hwege tot gan hmâ. 9 Ke haba Uzia ame op je tap ae beü göranyai hnyi Jerusalema hnyi homagöuleny kopiny, me homagöuleny thop, me hnyi hna hwali hnen haginny, me bi aten. 10 Ke e ame op je tap ae beü göranyai hnyi hnyebuba, me khü je an ae se hia, anyin ae se hia haleny je meno; helâe minya hnyi hnyeie ae hnyikânâ, me dok ae tha

II. MAN ÛLABAINY JE THAN 27, 28.

hon : ke e hu gan tavat belök me ányávia vine hnyi je bucen, me hnyi Karemela ; anyin a e at ae bebelök. 11 Ke e hu utbavat anyi Uzia, k' ödrin e ve he but ka vat ke deö me ke deö, hoton úseidrin hna öu ödrin hnö Jeiela at sihnalimen me Maseia a taben vat, hmeli Hanania a taben vat anyin than. 12 Haba úseiny je kamen ae beönua, hnyat ae hwege, me odrin tu thauzan ke siks haded. 13 Ke e hu gadrin ke deö vat adre hia but úne, a theri haded ke seven thauzan ke faiv haded, tavat ödrin e vat ge man ae gan, he ka hom hadruá than k' ame vat me je iwahnai-hmiöny. 14 Ke haba Uzia ame penapena hobi ködrin a utbavat hia, je bec, me ö, me hnabinybak, me je úkhaüen vat, me cafana, me je veto hnân koloú. 15 Ke e ame ányá hnyi Jerusalema le baliseta a ányá ge tavat ae metá, hnân ip hon je tap ae beú goranyai, me je tap taben vat, he ka hlic fana me khuá je veto ae gan. Me e ame lung ehele ; anyin ae ti gan hnödra hna hadruá, ke ne o but e ame hwege.

16 K' a hwege but e, me ame bi gan hnyekon, me e ame ányá únyi ae kong, anyin a e ame hanyáúá hnanyibu anyi Iehova Khongon ; anyin a e ame dit ka hnyi uma umö Iehova he ka leú utö ae bo so hon taben leú utö ae bo so. 17 Ke haba Azaria at bihut ame dit hoton, tha e me tavat bihut kö Iehova a ödrin eite, hnyat ae hwege : 18 me ödrin e tot kö Uzia than, me ha káu, ka habe, Uzia lö, ca hanyám bi e, wale he ka leú utö ae bo so kö Iehova, ke so bi hanyemen tavat bihut a je mátráni Arona, tavat adre okabá he ka leú utö ae bo so : didrut únyi hnyi dok ae kap ; anyin a u je hia but hanyáúá ; ke ca hnân e oganö u únyi ga Iehova Khong. 19 Haba Uzia ame hmönyin ; ke hu hnyi hnyamen taben meic he ka leú utö ae bo so ; ke ame tiga hmönyin ka tavat bihut, me ame o but lepera hnyi bariny hnyi hnyimakan tavat bihut hnyi uma umö Iehova, hnyi baten taben leú utö ae bo so. 20 Ke haba Azaria at bihut ae beönua, me tavat bihut hia ödrin e wá e, me wá bi a tabá thö bariny lepera, me ödrin e logotá obá e úheny dok e ; eke, me e ame ie didrut bi, anyin a Iehova ame hia but kot e. 21 Me haba Uzia than ame lepera balua ke ne o but hnyi bong e ame mokcu hnyin, k' ame laba hnyi ke uma bi adre hake ip, anyin a e lepera ; anyin adre subá degecá e únyi hnyi uma umö Iehova :

ke Jotham a nokon ame musö biju hnyaban than, me owisa ka aten hnyei. 22 Ke haba kolon je hna ányá hnö Uzia, a bán me biliny, me, ame sihnalimen Isaia a perofeta, nöku Aмоса. 23 Ke haba Uzia ame tha mokut me lakamen ; ke adre me tha konám e me lakamen hnyi utkáná iny je than ; anyin a haingödrin, ka habe, E lepera : ke ame than biju Jotham a nokon hwaban.

HNYIMAKAN 27.

TWENTE faiv je hunai Jotham hnyi úen e ame hwân ka than ; ke e ame musi hnyi Jerusalema sikstin je huna : ke haba ien hinyen me Jerusa momo nöku Zadoka. 2 Ke e ame ányá wisa hnyi hnyimakö Iehova helá me hna ányá hia hnö Uzia a kamen ; ke e ame ca hnyi dit ka hnyi uma umö Iehova. Ke haba tavat ödrin e tiga ányá monu. 3 E ame op homagöule ethö hnyi uma umö Iehova, ke e ame bi hanen hak veto hnyi Ofela. 4 Me e ame op minya ke je taun hnyi hnyei ae hutiny Juda, me op je hna bá me je tap ae beú göranyai hnyi hnyot. 5 E ame vat minya me thaniny je lakon Amona, me hwege hudrin. Ke haba lakon Amona ödrin e ham káu hnyi huna eling wan haded je talan sileva, me ten thauzan je tulut whit, me ke ten thauzan bali. Ke heláe hnen lakon Amona hna ham káu hnyi huna a loiny me kuniny. 6 Ke hwege but Jotham, anyin a e ame tuö wia je hwakecin hnyi hnyimakö Iehova Khongon. 7 Ke haba kolon je hna ányá hnö Jotham, me anyin je vat hia, me je hwakecin, wá bi, adre hia but sihnalimen hnyi tusi anyin je than Isaraela me Juda. 8 Twente faiv je hunainy hnyi úen e ame hwân he ka than, me e ame musi hnyi Jerusalema sikstin je huna. 9 Ke haba Jotham ame tha mokut me je lakamen, me ödrin e konám e hnyi taun anyi Davita : ke ame than biju Ahaza a nokon hwaban.

HNYIMAKAN 28.

TWENTE but je hunai Ahaza hnyi úen e ame hwân ka musi ; ke ame musi hnyi Jerusalema sikstin je huna : ke e ame ca ányá wisa hnyi hnyimakö Iehova helá me Davita a kiben : 2 ke so bi e ame vheno gethen deny je than Isaraela, me ányá je idola adre oköiá hobi káu Baala. 3 Ke

haba khaca e ame leú utö ae bo so hnyi hnyigöulen bucen anyin lakon Hinom, k' ame thong lakon bi ge meic, hoton je hwakecin ae ikiki anyin je wanaithila waleji a obâ Iehova hnyi hnyimakan lakon Isaraela. 4 Ke e ame bi hut me leú utö ae bo so hnyi je dok ae görany, me hon ta je hut, me hmelen ta je úö hia ae hát. 5 Anyin a wale haba Iehova Khongon ame hna e ka hnyi hnyamen than Suria; m' adre me kot e, me hom hwenbâ je hnyat ae se hia a lakeiny, me hum ödrin Damas-eko ai. Ke adre me hna e minya ka hnyi hnyamen than Isaraela, at a kot e, me gan hmâ hna hlingâ. 6 Anyin a haba Peka nöku Remalia ame hlingâ hnyi Juda tavat a wan haded ke twente thauzan hnyi bong a khaca, ödrin hnyat ae hwege hia; anyin a ödrin e hia but hna degeci Jehova Khongon lakamödrin. 7 Ke haba Zikeri at ae hwege a at Eferaima ame hlingö Maseia nokon than, me Azerikam at ame musö hnyaba, me Elekana utangköu me than. 8 Ke haba lakon Isaraela ödrin e hom je liamekeiny mödrin adre hom hwenbödrin, a tu haded thauzan, wale omomo, me je thöth, me je in, ke haba khaca adre me sö gånâ anyidrin ta je únyi, me hom ta je únyi adre sö Samaria ai. 9 Ke e hu eling ke perofeta anyi Iehova, Obed ien: ke e ame he me úkhanö me je utbatav adre me o hnyi Samaria, me ha ködrin, ka habe, Wâ bi, anyin a Iehova Khongon lakamöbun ame hmönyin ka at Juda, me ame hn' ödrin ka hnyi hnyamöbun, m' öbun e hia but hling' ödrin k' ame sâ thö hnyi drany ai anyibun hmönyin. 10 Ke walang ang öbun e únyküme he ka hom úhnyükongo je lakon Juda me Jerusalem a m' ödrin e lathnyabaibun obaga me omomo: ke hawa, e ba hnöbun hna hanyâúâ ga Iehova Khongon? 11 Ke walang ang, ling nya ju, me hna hmetu but je bâ waleji öbun e hom ge je liamekeiny möbun: anyin a e but hubun hmönyin ae gan anyi Iehova. 12 Ke haba ke je taben lakon Eferaima, wale Azaria nöku Johanana, me Berekia, nöku Mesilemoth, me Jezikia nöku Saluma, me Amasa nöku Hadelai, ödrin e todrö ka tavat adre o úheny hnyi hna vat, 13 me ha ködrin, ka habe, Öbun e ca he ka hom jem je bâ: anyin a öbun e beányâ únyi ame he ka oâ monu kötín ga Iehova, he ka bi hanen kongitin, me hwakecetin ae monu: anyin ae gan hmâ anyitin monu, ke gan hmâ minya hmönyin ka at Isaraela. 14 Me

haba tavat vat ödrin e hna je bâ me je únyi adre sö hnyi hnyimakan je than, me úkhacaköu hia. 15 Ke haba tavat waleji adre ve ha iödrin, ödrin e todrö me hom je bâ, me okhavâ tavat hia ae ba úkhaú ge je únyi adre sö, me khavâ, me inâ taben hnyeúcadrin, me haödrin, me habelidrin, me osú' ödrin, me otabâ je at ae sényin gadrin hon je asina, me hum ödrin Jeriko ai, tauniny pama, ka je liamekeiny mödrin: ke ödrin e hmetu Samaria ai.

16 Ke haba hnyi úen eling Ahaza than ame úkhúnöng ka je than Asuria he ka hadruâ e. 17 Anyin ame o hmetu but at Edoma, me kot at Juda, me hom je hna hwenbâ. 18 Ke haba khaca a hia but utut at Filisiti ka hnyi je tauniny dok ae hnyikánâ, me ke keihen ka hnyi Whaiöiny Juda, me hügúnâ Bethesemes, me Aijalona, me Gederoth, me Soko me je tauniny, me Timena me je tauniny, me Gimezo me je tauniny: me ödrin bi, ödrin e ka labâ. 19 Anyin a Iehova ame hom úhnyükongo at Juda ga Ahaza. than Isaraela; anyin a e ame hia but ányâ hwakecin ae khálânden hnyi Juda, me ti kong hmönyin hwakecin kö Iehova. 20 Ke ame o but kâu Tigelathe-pilesera than Asuria, me ovecâ e, me ca hadruâ e bi. 21 Anyin a haba Ahaza ame hom ke je únyi únyi hnyi uma umö Iehova, me uma umen than, me je taben, me ham ka than Asuria: ke ame ca hadruâ e únyi eling. 22 Ke haba hnyi úen anyin vec, e ame ányâ hmetu hwakecin ae kong kö Iehova, wale than Ahaza. 23 Anyin a e ame bi hut ka je khongon Damaseko, tavat adre kot e: haingen ka habe, Anyin a je khongon je than Suria ödrin e hadru' ödrin, ke oge me he ka bi hut ködrin, m' ödrin e he ka hadruö nya. Ke so bi ödrin e hangâ e me at Isaraela hia a tha ödrin mē. 24 Ke haba Ahaza ame úkhacaköuâ je kaiainy uma umen Khong, k' ame susubâ je kaiainy uma umen Khong, k' ame hlöng je hwanumen uma umö Iehova; ke e ame ányâ je taben hut hnyi je ke keihen Jerusalem a hia. 25 Ke e ame ányâ hnyi ta je tauniny Juda hia je dok ae görany hnân leú utö ae bo so ka ke je khong, me ohmönyini Iehova, Khongon lakamen. 26 Ke haba kolon hnen je hna ányâ, me je hwakecin a bân me biliny, wâ bi, adre hia but sihnalimen hnyi tusi anyin je than Juda me Isaraela. 27 Ke ame tha mokut ut Ahaza me lakamen, me ödrin e konâm e hnyi taun. wale hnyi Jerusalem a; anyin a ödrin e ca

II. MAN ÛLABAINY JE THAN 29.

hom e ka hnyi je erkemok anyin je than Isaraela: ke ame than biju Hezekia a nokon hwaban.

HNYIMAKAN 29.

TWENTE faiv but je hunai Hezekia hnyi ùen e ame hwân he ka than; ke e ame musi hnyi Jerusalema twente nain je huna: ke haba ien hinyen me Abia momo nõku Zakaria. 2 Ke e ame ânyâ ùnyi ae wisa hnyi hnyimakõ Iehova, hoton hna ânyâ hnõ Davita a kiben. 3 Ke haba hnyi huna a bâniny anyin musi, ke hnyi tehi a bân, me e ame khõng je hwanumen uma umõ Iehova, k' ame ânyâwia e. 4 Ke e ame hawâ tavat bihut me at Levi, k' ame ùkhacakõu ödrin hnyi dok ae laú e jimeyõ, 5 me ha kõdrin, ka habe, At Levi lõ ling nya ju; okabi õbun ju, ke okabâ thõ uma umõ Iehova Khongon lakamõbun, me hom degecã ta je ùnyi ae ikiki ùnyi hnyi dok ae kap. 6 Anyin a haba lakamõtin ödrin e hia but ânyâ hwakecin ae monu, k' ödrin e ânyâ ùnyi ae kong hnyi hnyimakõ Iehova Khongutin, me hna degecã e, me wia je hnyimakõdrin ùnyi hnyi hnyaba Iehova, me hwiõ hotudrin kâu. 7 Ke ödrin e hia but hlõng je hwanumen pore-tiko, me omokã ta je lamepa, k' ödrin e ca leú utõ ae bo so, me ca hudo je hudiny leú ka Khongon Isaraela hnyi dok ae kap. 8 Anyin a wale e but hon at Juda me Jerusalema hmõnyin anyi Iehova, me e ame hia but hn' ödrin he ka bwebwet, me hnân láia, me jû, helã me õbun e wã ge je liemakõbun. 9 Anyin a hia but ta but je lakamõtin ge hele vat, ke adre hom hwenbã minya, je lakutin бага, me in, me je laãõitín can e. 10 Ke walang ang ame mokut eú hnyi hnyekuk he ka ânyâ ke ùhihinykõu me Iehova, Khongon Isaraela, me me he ka hia but gatin anyin hmõnyin ae gan hmã. 11 Lakuk lõ, ca oúnyibauã walang ang ùnyi ang: anyin a Jehova ame ùc' õbun he ka tot hnyi hnyimakan, he ka bi athuyabainy, m' õbun e he ka huliwa kâu, me leú utõ ae bo so.

12 Haba at Levi ödrin e todrõ, wale Mahatha, nõku Amasai, me Joela nõku Azaria, li mãtrãni Kohatha: ke haba li mãtrãni Merari, wale Kiso, nõku Abedi, me Azaria, nõku Jehaleela: ke haba li Mãtrãni Geresoma, wale Joa nõku Zima, me Edena, nõku Joa: 13 ke haba li mãtrãni Elizafana, wale Simeri me Jeieia:

ke haba li mãtrãni Asafa, wale Zakaria me Matania: 14 ke haba li mãtrãni Heman, wale Jehiela me Simei: ke haba li mãtrãni Jeduthun, wale Semaia me Uziela. 15 Me ödrin e ùkhacakõuã je liamekeiny mödrin, me okabi ödrin bi, me didrõ, hoton hna hûna nhen than hnyi je hofuc ho Iehova, he ka ânyâwia uma umõ Iehova. 16 Ke haba tavat bihut ödrin e dit ka hnyi hnyin uma umõ Iehova, he ka ânyâwia, me degec ta je ùnyi hia ae kong ödrin e wã hnyi uma umõ Iehova ka hnyi hnyeuleny uma umõ Iehova. Ke haba at Levi ödrin e hom kãú ka hnyi wagewe Kederon. 17 Me ödrin e ibi hwân he ka okabã hnyi bong a bân, hnyi tehi a bân, ke haba hnyi bong a eitiny tehi ödrin e o but ka hnyi pore-tiko anyi Iehova; me ödrin e okabã uma umõ Iehova hnyi je bong a eit: ke haba hnyi bong a sikstiny tehi a bân ödrin e umo. 18 Me ödrin e didrõ kõ Hezekia than, me ha, ka habe, Öhmun e hia but ânyâwia uma umõ Iehova, me taben leú hut, me je omjehen, me laulau taben je areto, me je omjehen hia. 19 Ke haba khaca, haba ta je kaiã hia a degec Ahaza than hnyi anyin musi hnyi ùen e ame ânyâ hwakecin ae kong, me, öhmun e hia but penapena me okabã; me wã bi, adre ip cicõ taben leú hut kõ Iehova.

20 Me haba Hezekia than ame vesã hnyi hnyomakatu, me ùkhacakõuã tavat musõ taun, me he ka hnyi uma umõ Iehova. 21 Ke adre me hom je bolok a seven, me je mamoe бага a seven, me je nokon mamoe a seven, me je got бага a seven, hnân hudiny hulõ hobi kãú dõkhu, me dok ae kap, me at Juda. Ke e ame ha ka tavat bihut a je mãtrãni Arona he ka hudi ödrin hon taben hut kõ Iehova. 22. Me ödrin e hlingã je bolok, ke haba tavat bihut ödrin e hom dra, me dukãia taben hut: k' ödrin e hlingã je mamoe бага, me dukãia taben hut ge drõdrin: k' ödrin e hlingã minya je nokon mamoe, me dukãia taben hut ge drõdrin. 23 Ke ödrin e hom je got бага hnân hudiny hulõ ka hnyi hnyimakan than me ùkhacakõu; me ödrin e ip je hnyamõdrin hudrin: 24 ke haba tavat bihut ödrin e hling' ödrin, m' ödrin e bi hudrin hulõ ge drõdrin, hnân he ka bi hwaban möt hobi kãú at Isaraela hia thithõ: anyin a than ame ha a adre me he ka bi hudiny leú me budiny hulõ hobi kãú Isaraela hia thithõ. 25 Ke e ame otilã at Levi hnyi uma umõ Iehova me je

simebalo, me nabeli, me kitara, hoton hnanyibu anyi Davita, me Gada at wá unyin than, me Nathana a perofeta: anyin a únyi ga Iehova hnanyibu eling a deny anyin je perofeta. 26 Ke haba at Levi ödrin e tot me je únyi khumöng anyi Davita, k' ame tot tavat bihut me je trutru. 27 Ke haba Hezekia ame húna he ka hudo hudiny leú hon taben hut. Ke hnyi úen adre me hwân he ka hudo, me adre me hwân minya ka khumöng kö Iehova me hwan je trutru me ta je únyi khumöng anyi Davita than Isaraela. 28 Ke haba úkhacaköu hia ödrin e khudrung, k'ame khumöng tavat khumöng, k' ame túö trutru hnen tavat túö trutru; k' adre me ányâ helâe ke ne o but a um dö hudiny leú. 29 Ke ödrin e hia but um dö le je hut, me haba than me tavat hia unyin ödrin e nom me khudrung. 30 Me haba Hezekia than me je taben ödrin e húna ka at Levi he ka khumöng me oganö Iehova ge hofuc ho Davita me Asafa at wá. Me ödrin e khumöngö je hna oganá, me senyin, me ödrin e nom ju me khudrung. 31 Haba Hezekia ame ha, ka habe, Walang öbun e hia but okabi öbun bi kö Iehova, hok ju jem me hom je hut me je hudiny ole ka hnyi uma umö Iehova. Haba úkhacaköu ödrin e hom je hut me je hudiny ole; me tavat ödrin e weny hnyi hnyekudrin ödrin e hom je hudiny leú. 32 Ke haba úseiny je hudiny leú, wale a hom hnen úkhacaköu, me sevente je bolok, me wan haded je mamoe бага, me tu haded je nokon mamoe: ödrin hia e hnân hudiny leú kö Iehova. 33 Ke haba ta je únyi adre okabâ, me, siks haded je bolok, me theri thauzan je mamoe. 34 Ke e wakhalet tavat bihut, ke ca khan' ödrin bi he ka uja ta je hudiny hia leú: anyin a wale ame hadru' ödrin je liamekeiny mödrin a je at Levi, ke ne o but ame um dö huliwa, ke ne o but ame um dö keihen at bihut okabi ödrin bi: anyin ame kong hnyekunâ at Levi hon tavat bihut he ka okabi ödrin bi. 35 Ke se hia minya je hudiny leú, me pipikhenyainy je hudiny ole, me je hudiny ic hobi kâu je hudiny leú. Ke adre helâe hna penapena ta je huliwainy uma umö Iehova. 36 Ke ame senyin Hezekia, me tavat hia, can únyi ame penapena Khong hobi kâu tavat: anyin ae logot únyi eling.

HNHYIMAKAN 30.

KE haba Hezekia ame úkhúnöng ka at Isaraela me Juda hia, me sihnalimen minya je tusi ka at Eferaima me Manase, m' ödrin e he ka o ka hnyi uma umö Iehova hnyi Jerusalem, he ka hnyi ányâ paseka kö Iehova, Khongon Isaraela. 2 Anyin a hia but than úhnenamö, me anyin je taben, me úkhacaköu hia hnyi Jerusalem, he ka tuö paseka hnyi tehi a loiny. 3 Anyin ae ca khan' ödrin tuö e hnyi úen eling, anyin ae tiga ca úcú úseiny tavat bihut ödrin e hia but okabi ödrin, ke ödra tiga ca úkhacaköu bi tavat hnyi Jerusalem. 4 Ke e wisa únyi eling hnyi hnyimakan than me úkhacaköu hia. 5 Me ödrin e otílâ hofuc he ka omanená hnyi Isaraela hia, hwân hnyi Bere-seba ke ne o but hnyi Dana, m' ödrin e he ka o ka hnyi paseka kö Iehova, Khongon Isaraela, hnyi Jerusalem: anyin adre me ca tuö ge tavat ae se helâji me hna sihnalimen. 6 Me ame he but tavat, k' ödrin e ve hom je tusi únyi ge than me anyin je taben ka hnyi je ke keihen Isaraela hia me Juda, k' ödrin e ha hoton hnanyibu anyin than, ka habe, Öbun lakon Isaraela lö, hwiö hmetu ju öbun kö Iehova, Khongu Aberahama, me Isaaka, me Isaraela, me e ame he bi ka hmetu köbun je kolon tavat adre me kec möt únyi ge than Asuria. 7 E so öbun e ca he ka helâ me lakamöbun, me je liamekeiny möbun, tavat adre me ányâ hwakecin ae kong kö Iehova, Khongon lakamödrin, me e ame hn' ödrin he ka ba wan, helâ me hnöbun hna wá. 8 Ke ca he th' öbun walang ang ka ohwegiâ je nyibun, helâji me lakamöbun; ke so bi hn' öbun dut kö Iehova, me didrö ka hnyi anyin dok ae kap, wale e ame hia but okabâ nyiele balua, me bi athnyabai Iehova a Khongubun, me me hwiö únyi gabun anyin hmönyin ae gan hmâ. 9 Anyin a öbun e ne hwiö hmetu ju kö Iehova, me ame he je liamekeiny möbun me lakubun ka wá betenge hnyi hnyimakan tavat adre me hum ödrin a je hwenbâ, me ödrin e he ka hmetuhmetu ka hnyi hnyeai ang: anyin a haba Iehova, me, at ae so me at betenge, at ame ca he ka hwiö hnyimakan gabun öbun e ne hmetu kâu. 10 Ke haba je hnyat hom tusi, me ödrin e ve he ka hnyi ke taun me ke taun hnyi hnyeai Eferaima me Manase ke ne o but hnyi Zebulona:

II. MAN ÛLABAINY JE THAN 31.

me ödrin e hlum' ödrin me hi' ödrin. 11 Ke so bi haba keihen at Asera, me Manase, me Zebulona, me, ödrin e ouhnyü-kongi ödrin bi, me hnyi he Jerusalema ai. 12 Ke e hnyi Juda hnyamen Khong he ka ham ködrin hnyök a khaca, he ka änyâ hnanyibu anyin than, me je taben, hoton hofuc ho Iehova. 13 Ke se hia tavat adre me ûkhacaköu hnyi Jerusalema he ka bijeuâ areto adre ca levenâ hnyi tehi a loiny, e se hia hmönyin tavat adre me ûkhacaköu. 14 Ke ödrin e todrö me hom je taben hut wale hnyi Jerusalema, k' ödrin e hom minya ta je taben leü ütö ae bo so, me ödrin e khtüâ ka hnyi wagewe Kederon. 15 Me ödrin e hlingâ paseka hnyi bong a fotininy tehi a loiny: ke haba tavat bihut me at Levi ödrin e hmehma, me okabi ödrin bi, me hom je hudiny leü ka hnyi uma umö Iehova. 16 Me ödrin e ve tot hnyi je hnödrin helâ me hwakecidrin, hoton hnanyibu anyi Mose aten Khong: ke haba tavat bihut ödrin e dukâiâ ge dra wale adre me kap ünyi ge at Levi. 17 Anyin ae se hia tavat hnyi ûkhacaköu adre ca okabi ödrin bi: anyin a wale hamen at Levi he ka hlingâ je paseka hobi ködrin hia tavat ae ca bo so, he ka okabi ödrin kö Iehova. 18 Anyin ae se hia tavat, wale se hia at Eferaima, me Manase, me Isakara, me Zebulona, adre ca obosoi ödrin bi, ke so bi ödrin e hnyi han paseka ke ca helâ me hna sihnalimen. Anyin a hia but Hezekia hic hobi ködrin, me ha, ka habe, Iehova at ae so, hna but hulö 19 anyin tavat hia, at a penapena hnyekon he ka elâm Khong, Iehova, Khongon lakamen, eja ke ne adre ne ca obosoi ödrin hoton hwakecin hna obosoäiny uma kap. 20 Ke haba Iehova ame ling Hezekia, me osoâ tavat. 21 Ke haba lakon Isaraela tavat adre me laba hnyi Jerusalema ödrin e änyâ bijeuüny areto adre ca levenâ hnyi seven je bong me senyin gan hmâ: ke haba at Levi me tavat bihut ödrin e oganö Iehova hnyi ke bong me ke bong ge je ünyi khumöng ae gan hwan kö Iehova. 22 Ke Hezekia ame fuc wia ka at Levi hia tavat ae metâ hnyi huliwa anyi Iehova. Me ödrin e bijeuâ hnyi seven je bongon, me hudo je hudiny ole, me omanenö hulö kö Iehova Khongon lakamödrin. 23 Ke haba ûkhacaköu hia adre me ûhnenamö he ka tuö ke je bong a seven, me ödrin e tuö ke je bong a seven me senyin. 24 Anyin a Hezekia than Juda ame ham ka ûkhacaköu hnân bi hut

wan thauzan je bolok me seven thauzan je mamoe; ke haba je taben ödrin e ham ka ûkhacaköu wan thauzan je bolok me ten thauzan je mamoe: me se hia tavat bihut ödrin e okabi ödrin bi. 25 Ke ame tha senyin ûkhacaköu hia anyin at Juda, me tavat bihut me at Levi, me ûkhacaköu hia tavat adre me o üheny Isaraela, me je atkanyun tavat adre me o üheny hnyi hnye Isaraela, me tavat adre me laba hnyi Juda. 26 Me gan hmâ senyin hnyi Jerusalema: anyin a hwân hnyi üö Solomona nöku Davita than Isaraela me ba helâe hnyi Jerusalema. 27 Me ame todrö tavat bihut a at Levi, me hahnahicâ tavat: k' adre me löng hodrin, k' ame o but hijidrin hic ka hnyi hnyaban ae kap, walethö hnyi drany.

HCNYIMAKAN 31.

KE a um dö ünyi hia eling, me ame he Isaraela hia, wale tavat adre me mwi e, ka hnyi je tauniny Juda, me oamamâ je veto ame tot, me sö degecâ je Aseira, me hagutâ je dok ae görany, me je taben hut hnyi hnye Juda hia, me Beniamina, me Eferaima, me Manase, ke ne o but adre me ohia hia thithö. Me haba lakon Isaraela hia adre me ve he ka hnyi je idrin hnyi anyidrin je taun. 2 Ke haba Hezekia ame otillâ tavat bihut me at Levi hoton anyidrin je dö, hoton je ve hanymödrin, wale tavat bihut me at Levi, hobi kâu je hudiny leü, me je hudiny ole, he ka huliwa, me ole, me oganâ hnyi je homagöuleny uma umö Iehova. 3 Ke e ame otillâ minya jekhon than ünyi hnyi anyin ta je ünyi, hobi kâu je hudiny leü, wale hobi kâu je hudiny leü hnyi hnyomakatu me sahaç, me je hudiny leü hnyi je sabath, me hobi kâu je tehi ae teb ünyi, me je bijeu adre me thu, helâ me hna sihnalimen hnyi hnanyibu anyi Iehova. 4 Ke haba klaca e ame hûna ka tavat adre me laba hnyi Jerusalema he ka ham jekhon tavat bihut me at Levi, m' ödrin e he ka hwege hnyi hnanyibu anyi Iehova. 5 Ke ame hap o ju ehele hnanyibu, me haba lakon Isaraela ödrin e ham gånâ je wan hwit a bân, me waina, me wakaco, me lani, me troban kânâ hia thithö; ke ödrin e hom gånâ a je ke keihen a libenyitainy ta je ünyi hia. 6 Ke haba lakon Isaraela me Juda, tavat adre me labâ je tauniny Juda, me, ödrin e hom minya je

ke keihen a libenyitainy je bolok me mamoe, me je ke keihen a libenyitainy je únyi ae kap wale adre me okabá kö Iehova. Khongudrin, me khon. 7 Ke haba hnyi tehi a kuniny ödrin e hwân ka bi taben je hna khon, me umo hnyi tehi a ten. 8 K' ame o but Hezekia me je taben me wâ je hna khon, me ödrin e haisoi Iehova, me lakeiny a Isaraëla. 9 Ke wale Hezekia ame hnö tavat bihut me at Levi ge je hna khon. 10 Ke haba Azaria at bihut ae beönua hanen lap anyi Zadoka ame thu kâu, me ha, ka habe, Hwân hnyi üen adre hwân ka hom jem je hut ka hnyi uma umö Iehova, öhmun e han me sekuhmun dö, ke gan hmâ bala biju: anyin a Iehova ame hia but ohnahicâ lakeiny; ke haba kolon, wale ta je únyi ang ae gan. 11 Haba Hezekia ame ha he ka penapena je hnyeule hnyi uma umö Iehova; me ödrin e penapena. 12 Ke ödrin e odilâ hnyi hnathu je bwihlany, me je ke keihen a libenyitainy, me je hna okabâ: me ame musö ta je únyi e hnö Konania at Levi, me Simei liamekeiny më ame útangköu më. 13 Ke haba Jehiela, me Azazia, me Nakath, me Asael, me Jeremoth, me Jozabada, me Eliela, me Isemakia, me Mahatha, me Benaia, me ödrin je homakan minya hmeli Konania me Simei a liamekeiny më, hoton musi anyi Hezekia than, me Azaria at ame musö uma umen Khong. 14 Ke Kore nöku Iemina at Levi at ame tuö homagöule e jimeyö, e ame tuö je hut ae betenge ka Khong, he ka khenâ je bwihlany kö Iehova, me je únyi ae ti kap. 15 Ke útangköu më, Edena me Miniamin, me Jesua, me Semaia, me Amaria, me Sekania, hnyi ta je tauniny tavat bihut, hnyi je hanymödrin, he ka ham ka je liamekeiny mödrin, hoton je dö, e úcü ka tavat ae gan me úhnyükong: 16 ca háiâ bi tavat adre sihnalimen a je baga, hwân ge tavat a kun hunaidrin me gan hon e, wale tavat adre laböj didrö ka hnyi uma umö Iehova, hoton huliwainy ke bong me ke bong, hobi kâu anyidrin huliwa hnyi hanymödrin, hoton anyidrin je dö; 17 me tavat adre sihnalimen hnyi je dö anyin tavat bihut hoton je lap anyin je lakamödrin, me at Levi hwân ge tavat a twente hunaidrin me gan hon e, hnyi je hanymödrin hoton anyidrin je dö; 18 me tavat adre sihnalimen tavat hia ae úhnyükong gadrin, me laöiödrin, me lakudrin obaga me wahu, hnyi úkhacaköu hia: anyin a haba hnyi je hanymödrin, me,

ödrin e ka okabi ödrin bi: 19 me ka je mãtrâni Arona a tavat bihut, hnyi je utkânâiny je hnyaba igigilö je taun, hnyi je taun hia, me hu tavat adre me ha iödrin, he ka ham je jekhoü ka ta je baga hia a tavat bihut, me ka tavat adre hia but at unyin at Levi. 20 Ke haba Hezekia ame ânyâ helâe hnyi Juda hia; ke e ame ânyâ únyi ae so, me wisa, me hnathu hnyi hnyimakö Iehova a Khongon. 21 Ke haba je huliwa hia e ame ibi hwân hnyi huliwainy uma umen Khong, me hnanyibu, me je hna hûna, he ka elâm Khongon, me e ame ânyâ ge hnyekon ae bekhöt, me e ame hnahic ut.

HNHYIMAKAN 32.

HWABAN ta je únyi eling, me hwa-kecin ae hnathu eling, me ame o thö Saneribi than Asuria, k' ame o hnyi Juda, me hunuma cicö je taun adre up hagin, k' ame únyküme he ka húgûná me me anyin bi. 2 Ke a wâ but Hezekia a ga o thö Saneribi, k' ame he ka vat me Jerusalem, 3 me e ame úhnenamö me anyin je taben me anyin tavat ae hwege he ka hlöng je köien je hna pupua wale hotou taun; me ödrin e hadruâ e. 4 Ke adre me úkhacaköuâ tavat ae se hia, me ödrin e hlöng je hna pupua hia, me wagewe wale ame hingälö hnyi wanben hnye, me ha, ka habe, Hnânéu ame he ka o je than Asuria me wâ köiö ae gan? 5 Ke e ame hwege me op hagin veto hia a ü, me obeüâ göranyai ke ne o but ka hnyi je tap ae beü göranyai, me ke hagin waleü hoton, k' ame ohwegiâ Milo hnyi taun anyi Davita, k' ame ânyâ je únyi hnân vat me je bec ae se hia. 6 Ke e ame otilâ je taben vat hon tavat me úkhacaköu ödrin kâu hnyi dok ae laü hnyi homagöuleny taun, me e ame sihwege ödrin me ha, ka habe, 7 Hwege th' öbun, me hnyok baga but, ca ot bi, ke ca öbubuny bi ge than Asuria, me tavat ae se hia unyin: anyin ae se hia gatin, ke wakhalet bi unyin: 8 haba e unyin, me benyin at; ke unyitin Iehova Khongutin he ka hadru' ötin, me vatâ anyitin je vat. Ke haba tavat me adre me labageju ka hofuc ho Hezekia than Juda.

9 Ke hwaban e haba Saneribi than Asuria ame kunâ lakeiny Jerusalem a. (ke e but hnyi Lakisi ke tha e më maniny man hia.) kö Hezekia than Juda, me at Juda hia hnyi Jerusalem, he ka ha, ka

II. MAN ULABAINY JE THAN 33.

habe, 10 Walang hna ha hnö Sane ribi than Asuria, ka habe, Öbun e labageju ia ; me öbun e laba bala bi hnyi Jerusalema ? 11 Hawa a ca cubic öbun Hezekia m' adre me hn' öbun he ka mok ge hmiâ me beic, me ha, ka habo, Hamö Iehova Khongutin he ka omeli ötin ünyi hnyi hnyamen than Asuria. 12 Hawa, a ca hom Hezekia anyin je dok ae görany, me anyin je taben hut, me hûna ka at Juda me Jerusalema, ka habe, Öbun e he ka hic cicö taben hut a khaca, me leü utö ae bo so hon e ? 13 Hawa, e ca khan' öbun waleji ge hnök me lakamök hna änyâ ka aten je hnyei ? Hawa, e khana je khongon tavat aten je hnyei he ka omelö je atödrin gak ? 14 Ewa khongon je hnyei eling waleji hnen lakamök hna ohia, ae khana he ka omelö je aten gak, me me khana Khongubun he ka omeli öbun ünyi hnyi hnyamök ? 15 Ke walang ang ca e Hezekia ka iyau' öbun, me cubic öbun helâe, ke ca labageju kâu : anyin ae ba khongon ke hnyei me ke dökhu ae khana he ka omelö je aten gak, me lakamök : awe, ama kâmâu ka he bi Khongubun ka omeli öbun gak ? 16 Me haba je lakeiny ödrin e haikongu Iehova Khong, me Hezekia a athnyabainy. 17 Me e ame sihnalimen je tusi minya, hnân bifuci Iehova Khongon at Isaraela, me he ka haikongoâ e, ka habe, Haba khongon aten je hnyei ödrin e ca omelö je atödrin ünyi hnyi hnyamök, me helâe ame ca he Khongu Hezekia ka omelö je aten ünyi hnyi hnyamök. 18 Me ödrin e hongot hwege hnyi hwen Juda ka at Jerusalema hon je haginy veto, he ka oot' ödrin me ohmaki ödrin : m' ödrin e he bi ka hügünâ taun. 19 Ke ödrin e hâiâ Khongon Jerusalema helâ me hna hâiâ je khongon aten je hnyei, waleji adre änyâ ge hnyamen at. 20 Anyin a wale haba Hezekia than, me Isaia nöku Amosa perofeta, ödru me hic me tenge hnyi dranyai. 21 Ke haba Iehova ame kunâ angela, he ka subâ degecâ tavat ae hwege, me je homakan, me je taben, hnyi hna hunuma anyin than Asuria. Me e ame hmehma me hmetu ka hnyi iny hnyei. Ke e ame o but ka hnyin uma umen khongon, me haba li hing lakon ödru me hlingâ e ge hele vat. 22 Helâe Iehova ame omeli Hezekia me aten Jerusalema ünyi hnyi hnyamö Sane ribi than Asuria, me ünyi hnyi hnyamen tavat hia, me su ödrin ka hnyi je ke keihen hia. 23 Ke se hia tavat adre me hok bwihlany kö Iehova hnyi Jerusalema, me

je omjeü minya kö Hezekia than Juda : k' ame ogânâ e nyiele hnen ta je hnyei hia.

24 Haba hnyi je bong eling ame he but Hezekia ka mokcu : ke e ame hic kö Iehova ; me e ame ühnenamö mē me ham kâu ke haten. 25 Ke haba Hezekia ame ca bi hwaban hmetu helâ me hna betenge gan ; ke bi gan hnyekon : anyin a wale ame o but hmönyin kâu me at Juda me Jerusalema. 26 Ke so bi haba Hezekia ame ka oühnyükongoâ e bi hnyi bi ganiny hnyekon, a e me tavat adre me laba hnyi Jerusalema, me me ca aat bi ködrin hmönyin anyi Iehova hnyi je bong bongu Hezekia. 27 Ke ti gan hmâ omjeü me hmanangi Hezekia : me e ame änyâ hobi kâu bi je uma hnân ip sileva me gol, me je veto ae ünyi hnathu, me je utö ae bo so, me je bec, me je kaia ae so ae ve hwa-kecin ; 28 me je uma hnân ip hwit hnyin, me waina, me wakaco ; me je hnyeule hobi kâu je meno ae gan, me je hnahat meno hnyi je haginy. 29 Ke haba khaca, e ame änyâ hobi kâu e bi je taun, me je hnahat mamoe me kau ae se hia : anyin a Khong ame ham kâu ta je ünyi ae se hia hmönyin. 30 Ke haba Hezekia ling me wale at ame hlöng deny köiö hnyi Gihona ethö, me owisa e ka hnyi ke keihen jimeüiny taun anyi Davita. Ke sot Hezekia hnyi anyin ta je huliwa hia. 31 Ke so bi haba hnyi hwakecin ge je üthumetu anyin je than Babulona, waleji adre me ükhünöng kâu he ka hnö e ge ünyi hnân lâiâ adre änyâ hnyi hnyei, me haba Khong ame hna e, he ka cubec e, me me wâ bongon hia hnyekon. 32 Ke haba kolon je hna änyâ hnö Hezekia, me hwakecin ae so, wâ bi, adre hia but sihnalimen e hnyi hna wâ hnö Isaia a perofeta nöku Amosa hnyi tusi anyin je than Juda me Isaraela. 33 Ke haba Hezekia ame tha mokut ut me lakamen, me ödrin e konâm e hnyi dok adre me ölö hnyin ka hnyi erkemok anyin je laku Davita : ke haba at Juda hia me tavat adre me laba hnyi Jerusalema ödrin e oganâ e hnyi anyin mok. Ke ame musi biju Manase a nokon hwaban.

HNYIMAKAN 33.

TWELV but je hunai Manase hnyi üen e ame hwân ka than ; ke e ame musi hnyi Jerusalema fifte faiv je huna. 2 Ke e ame änyâ ünyi ae monu hnyi hnyimakö Iehova, helâ me hwakecin ae ikiki

anyin je wanaithila waleji a obâ Iehova hnyi hnyimakan lakon Isaraela. 3 Anyin a e ame op hmetu je dok ae görany waleji a ohia Hezekia a kamen ; ke e ame otilâ je taben hut kö Baala, me theati Aseira, me khudrung ka ta je únyi hia hnyi drany, ne bi athnyabaidrin. 4 Ke e ame op je taben hut hnyi uma umö Iehova, waleji a ha Iehova, ka habe, adre me he ka ip iök hnyi Jerusalema nyiele balua. 5 E ame op minya je taben hut hobi kâu ta je únyi hia hnyi drany hnyi li hnyeuleny uma umö Iehova. 6 Ke e ame kunâ minya lakon he ka he hnyi wanben meic hnyi hnyigöulen bucen anyin nõku Hinom, me e ame bibi-hwakecin, me biobotkong, me bi khong, me elâm unyin tavat ae tren biobotkong, me tavat bi khong : e gan hmâ hulö e ame ânyâ hnyi hnyimakö Iehova, me ohmönyninâ e. 7 Ke haba idola adre theatâ wale e ame ânyâ, me e ame otilâ hnyi uma umen Khong, waleji a ha gan Khong kö Davita me Solomona a nokon, ka habe, Haba hnyi uma eang me hnyi Jerusalema wale o ge úca únyi hnyi ta je tribu hia anyin at Isaraela, oge me he ka ip iök hnyin nyiele balua : 8 ke haba khaca, oge me ca he hmetu ka khöbe at Isaraela únyi hnyi hnyei waleji oge ham ka je lakamöbun ; ödrin e ne he ka wâ wia thibi he ka ânyâ hia hnök hna hûna ködrin, wale hnanyibu hia, me je hna otilâ, me je hna owisa a deny Mose. 9 Ke haba Manase ame omono at Juda me tavat adre me laba hnyi Jerusalema, me ödrin e ânyâ hulö ae gan hon ta je hnyei, waleji a ohia ga Iehova hnyi hnyimakan lakon Isaraela. 10 Ke haba Iehova ame fuc kö Manase me lakeiny : k' ödrin e ca löng bi. 11 Anyin a wale haba Iehova ame oâ ködrin je taben vat anyin than Asuria, me ödrin e hum Manase ge je cen, me ca e ge fao, me hom Babulona ai. 12 Ke e ame vec, me ame elöm Iehova Khongon, me ti öuhnyükongoa e hnyi hnyimakan Khongon lakamen. 13 Ke e ame hic kâu ; me e ame betenge gan, me löng hwan hwakhöü, me ohmeto e Jerusalema ai ka hnyi dokhon lökhu. Me haba Manase ame wahmakhmeto a Iehova thibi Khong.

14 Ke hwaban, e me ame op ke hak veto hoton eü taun anyi Davita, hnyi ke keihen e jio Gihona, hnyi hnyigöulen bucen, ke ne o but hnyi gethen ame dit hnyi homagöuleny je wâ ; k' ame khenyi ka hnyi Ofela, me ti op göranyai : ke e ame ip je taben vat hnyi ta je taun hia adre up

haginy hnyi Juda. 15 Ke e ame hom degecâ je khong kanyua, me idola únyi hnyi uma umö Iehova, me je taben hut hia waleji e ame op hnyi buceniny uma umö Iehova, me hnyi Jerusalema, me khû' ödrin ka hnyi hoton taun. 16 Ke e ame ânyâwia taben hut anyi Iehova, me hudo hon e je hudiny úsökou me je hudiny ole, me ha ka at Juda he ka bi athnyabai Iehova Khongon at Isaraela. 17 Ke so bi haba tavat me ödrin e bi hut bala bi hnyi je dok ae görany, ke ödrin e ânyâ thibi eling kö Iehova Khongudrin. 18 Ke haba kolon je hna ânyâ hnö Manase, me hijin hic ka Khongon, me ta je hofuc hwan tavat wâ, ödrin e fuc kâu hnyi iö Iehova, Khongon Isaraela, wâ bi, adre hia but sihnalimen unyin je hna ânyâ hnen je than Isaraela. 19 Me hijin hic minya, me hwakecin hna betenge kâu hnen Khong ge anyin khöü. me anyin hulö hia, me hnen hna he hwali, me je ke keihen e ame op je dok ae görany hnyin, me otilâ je Aseira me je hnathat hnyin, waleji ke tiga ca öuhnyükongoa e : wâ bi, adre hia but sihnalimen hnyi hofuc hwan tavat wâ. 20 Ke haba Manase ame tha mokut me lakamen, me ödrin e konâm e hnyi umen uma : ke ame musi biju Amona a nokon hwaban.

21 Twente tu but je hunai Amona hnyi üen e ame hwân he ka than ; ke e ame musi lo li hunai hnyi Jerusalema. 22 Ke e ame ânyâ únyi ae kong hnyi hnyimakö Iehova, helâ me hna ânyâ hnö Manase a kamen : ke haba Amona ame bi hut ka ta je hnathat, waleji a ânyâ Manase a kamen, me bi athnyaba ködrin. 23 Ke so bi, e ame ca öuhnyükongoa e bi hnyi hnyimakö Iehova helâ me hnö Manase a kamen hna öuhnyükongoa e bi ; ke haba Amona ame ânyâ hwakecin ae kong hmönyin. 24 Ke haba lathnyabainy ödrin e sihnân e, me hlingâ e hnyi umen bi uma. 25 Ke haba tavat aten hnyei ödrin e hlingâ hia tavat ödrin e sihnö Amona than ; me haba tavat aten hnyei ödrin e otilö Josea a nokon he ka than hwaban.

HNYIMAKAN 34.

EIT but je hunai Josea hnyi üen e ame hwân ka than ; ke e ame musi hnyi Jerusalema thöte wan je hunai. 2 Ke e ame ânyâ wisa hnyi hnyimakö Iehova, me vbeno hia je gethen de Davita a kiben, me e ame ca saü ka hnyi ke keihen metâ me

me. 3 Ke haba hnyi hunu a eitiny anyin musi, ke tiga ùbnyúkong, e ame ibi hwân he ka elâm Khongu Davita a kiben : ke haba hnyi hunu a twelv e ame hwân ka ohia je dok ae görany hnyi Juda me Jerusalem, me je Aseira, me je hnatheat, me je hna oköiâ. 4 Ke ödrin e tho degecâ hnyi hnyimakan je taben hut anyi Baala ; ke e ame sö degecâ je hna theati seúnö ethö hudrin ; ke e ame oamamâ je Aseira, me je hnatheat adre kave, me hna oköiâ, me omomono, me khûâ ka hnyi hon je erkemok anyin tavat bihut ködrin. 5 Ke e ame thong degecâ je jeien tavat bihut hon anyidrin je taben hut, me ânyâwia Juda me Jerusalem. 6 Ke e ame ânyâ helâe hnyi je tauniny Manase me Eferaina, me Simeona, ke ne o but hnyi Nafatali, hnyi je hnyaba ae ba at hnyin igigilö. 7 Me e ame tho degecâ je taben hut me kot omomono je Aseira me je hnatheat, me sö degecâ je hna theati seúnö hia hnyi je ke keihen hnyei Isaraela hia, me e ame hmetu Jerusalem ai.

8 Ke haba hnyi hunu a eitiny anyin musi, k' ame hia but ânyâwia hnyei, me uma, me e ame kunö Safana nöku Azalia, me Maseia at ame musö taun, me Joa nöku Jehoaza at ame oúnykúmeâ, he ka anyawia uma umö Iehova a Khongon. 9 Ke ödrin e o but kö Hilekia at bihut ae beónua, me ham mone waleji adre me hom ka hnyi uma umen Khong, wale a úkhöünâ at Levi tavat tuö hwanuma únyi ge at Manase me Eferaina, me je kolon at Isaraela, me at Juda me Beniamina hia, me tavat adre me laba hnyi Jerusalem. 10 Ke ödrin e ham ka hnyi hnyamen tavat huliwa wale tavat tuö uma umö Iehova ; ke haba tavat huliwa hnyi uma umö Iehova, me ödrin e ham e hnân he ka op hmetu me ânyâwia uma ; 11 wale ödrin e ham e ka tavat tretrau utö me op veto, hnân úcü veto adre sö, me je utö hnân wangöningön, me hnân je venyâiny je uma waleji a okongo ge je than Juda. 12 Me haba tavat ödrin e ânyâ hnthoâ huliwa : ke haba tavat ame musi ödrin, me, Jahath, me Obadia, a li at Levi, ke li laku Merari ; me Zakaria me Mesulama, ke li laku Kohatha, he ka hnyi musö huliwa : me ke je at Levi tavat ae metâ ge je únyi khumöng. 13 Ke ödrin e musö bi minya hnyat sukhöünâ ta je únyi, me tavat tuö aten huliwa hnyi ta je huliwa : ke haba keihen at Levi, me, ödrin hnyat sihnalimen, me je homakan, me hnyat tuö

hwanuma. 14 Ke haba hnyi ün ödrin e hom mone waleji adre me hom ka hnyi uma umö Iehova, me haba Hilekia at bihut ame wâ tusiny hnanyibu anyi Iehova a ham ga Mose. 15 Me ame ha Hilekia kö Safana at sihnalimen, ka habe, Oge me wâ tusiny hnanyibu hnyi uma umö Iehova. Ke Hilekia ame ham tusi kö Safana. 16 Ke haba Safana ame hom tusi ka than, ke haba khaca e ame thumeto e me ha, ka habe, Haba ta je únyi hia adre me hna ka lathnyabaem, me, ödrin e ânyâ. 17 Ke ödrin e hia but hingälâ mone adre me wâ hnyi uma umö Iehova, me ham ka tavat tuö me tavat huliwa. 18 Ke haba Safana at sihnalimen ame thumeto than, me ha, ka habe, A hia but Hilekia at bihut ham könya ke tusi. Me Safana ame aú ke hofuc hnyin, ka than. 19 K' a löng ut than ta je hofuciny hnanyibu, me e ame kia anyin je úkhaú. 20 Haba than ame búna kö Hilekia, me Ahikama nöku Safana, me Abedon nöku Mika, me Safana at sihnalimen, me Asaia athnyabainy than, me ha, ka habe, 21 He th' öbun ka elâm unyi Iehova hobi könya, me je kolon hnyi Isaraela me Juda, ge hofuciny tusi adre wâ : ânyin ae gan hmâ hmönyin anyi Iehova adre hingälâ kötin, can a ca vheno lakamötin hofuc ho Iehova, he ka ânyâ hia helâ me hna sihnalimen hnyi tusi ang. 22 Haba Hilekia me tavat a kunâ than, ödrin e he kö Huleda profeta momo, öiö Saluma, nöku Tikeva, nöku Hasera at tuö je úkhaú ; (haba momo eling ame laba hnyi Jerusalem, hnyi ke keihen a loiny ;) me ödrin e úhnenamö me momo únyi eling. 23 Ke haba momo ame ha ködrin, ka habe, Walang hna ha hnö Iehova Khongon Isaraela, ka habe, Ha th' öbun ka at a kun' öbun könya, 24 Walang hna ha hnö Iehova, ka habe, Wâ bi, oge me he ka oâ únyi ae kong hon dok ang, me tavat adre me labâ e, wale ta je hnaúhangö adre sihnalimen hnyi tusi ödrin e aú ka than Juda : 25 can ödrin e hna degeci nya, me leú utö ae bo so ka ke je khong, m' ödrin e ohmönyini nya ge ta je huliwa hia anyin je hnyamödrin ; anyin a wale ame ubâhla thö anyik hmönyin ka dok ang, ke adre me ca he ka ume. 26 Ke haba than Juda at ame kun' öbun ke ka elöm Iehova, öbun e he ka ha helâng kâu, ka habe, Walang hna ha hnö Iehova Khongon Isaraela hnyi ta je hofuc u je löng, 27 anyin ae menyik hnyekom, ke u je oúhnyúkongu u bi hnyi

hnyimakan Khong, hnyi hnâm hna löng hwan hofuc ge dok ang, me tavat adre me labâ e, ke u je oûhnyûkongu u bi hnyi hnyimakök, me kia ânyâm je ûkhaû, me tenge hnyi hnyimakök; anyin a wale oge me he bi nya ka ling u, haingö Iehova. 28 Wâ bi oge me he ka ûkhacaköuö u tha e me lakâmâm, ke adre me he ka ûkhacaköu u ka hnyi erkemok me hnahic, ke ame ca he li emâkâm ka wâ ta je ûnyi hia ae kong, oge me he ka oâ ka hnyi hon dok ang, me tavat adre me labâ e. Me ödrin e hmeto hofuc ka than.

29 Ke haba than ame ûkhûnöng me ûkhacaköuâ unyin bi wahingatiny Juda me Jerusalema hia. 30 K' ame he than ka hnyi uma umö Iehova, tha e me at Juda hia, me tavat adre me laba hnyi Jerusalema, me tavat bihut, me at Levi, me tavat hia, tavat ae gan me ûhnyûkong: ke e ame aû ka hnyi je hnyekönyödrin ta je hofuciny tusi ûbihinyköu hia, wale adre me wâ hnyi uma umö Iehova. 31 Ke ame tot than hnyi hnen, me ânyâ ûbihinyköu hnyi hnyimakö Iehova; he ka hnu hotu Iehova, me tuö anyin je hnanyibu me hnen je hna ohnathoâ, me huen je hna otillâ, ge hnyekon ae bekhöt, me hanon ae bekhöt, he ka ânyâ je hofuciny ûbihinyköu adre me sihnalimen hnyi tusi ang. 32 Me e ame sihwegiâ tavat hia kâe, wale tavat adre me wâ hnyi Jerusalema me Beniamina. Ke haba tavat adre me laba hnyi Jerusalema, me ödrin e ânyâ hoton hnanyibu anyin Khong, a Khongon lakamödrin. 33 Ke haba Josea ame ohia ta je ûnyi ae ikiki hnyi ta je hnyei iny lakon Isaraela, k' ame musi ödrin hia adre me wâ hnyi Isaraela he ka bi athnyaba, wale he ka bi athnyabai Iehova Khongudrin. Ke haba hnyi bongon je bong hia ödrin e ca saû, k' ödrin e hnu hotu Iehova, Khongon lakamödrin.

HNYIMAKAN 35.

KE haba Josea ame ânyâ paseka kö Iehova hnyi Jerusalema: ke ödrin e hlingâ paseka hnyi bong a fotininy tehi a bân. 2 Me e ame otillâ tavat bihut hnyi hanymödrin, me sihwegi ödrin he ka huliwan uma umö Iehova. 3 Me e ame ha ka at Levi tavat ûne ka at Isaraela hia, tavat ae kap anyi Iehova, ka habe, Ip ju tang ae kap hnyi uma a op Solomona nôku Davita than Isaraela; k' öbun e ca he hmetu ka vadren: ke walang ang bi athnyabai Iehova Khongubun, me lakeiny a at Isaraela.

4 Ke penapena thö hoton je lap anyin lakamöbun me anyibun je dö, helâ me hna sihnalimen hnö Davita than Isaraela, me hna sihnalimen hnö Solomona a nokon. 5 Ke ve todr' öbun hnyi dok ae kap hoton je hna khenâ je lap anyin je lakamöbun je je liamekeiny möbun a tavat aten hnyei, me e so c ve hu jekhon lap anyin lakamen a at Levi. 6 Ke hlingâ ju paseka, me okabi öbun bi, me penapena thö hnân je liamekeiny möbun, me ânyâ hoton hofuc ho Iehova a deny Mose. 7 Ke haba Josea ame ham ka tavat je lakon mamoe me got, ûnyi hayi hna hat, hnân je hudiny paseka hia, hobi kâu tavat hia adre me hnyi hanen, ödrin thöte thauzan, ke theri thauzan je bolok: ûnyi ge than je meno eling. 8 Ke haba anyin je taben ödrin e ham ke hut ae betenge ka tavat, me tavat bihut, me ka at Levi. Haba Hilekia me Zakaria me Jehiela tavat musö uma umen Khong me, ödrin e ham ka tavat bihut hnân je hudiny paseka tu thauzan ke siks haded je meno ae ûhnyûkong, me theri haded je bolok. 9 Ke haba Konania, me Semaia, me Nathaniela li liamekeiny mē, me Hasabia, me Jehiela, me Jozabada, je taben at Levi, ödrin e ham ka at Levi hnân je hudiny paseka faiv thauzan je meno ae ûhnyûkong, me faiv haded je bolok. 10 Me adre me penapena je huliwa, haba tavat bihut ödrin e tot hnyi hnödrin, me at Levi hnyi anyidrin je dö, hoton musi anyin than. 11 Ke ödrin e hlingâ paseka, ke haba tavat bihut ödrin e dukâiâ ge je hpyamödrin, ke haba at Levi ödrin e uja. 12 Me ödrin e hom je hudiny leû me ham hoton jekhon je lap anyin je lakamen tavat, he ka hudo kö Iehova, hoton hna sihnalimen hnyi tusi anyi Mose. Ke ödrin e ânyâ helâe minya ka je bolok. 13 Me ödrin e omesikâ ge meic paseka hoton bongon e; Ke ödrin e omesikâ ke je hut ae kap hnyi je öt, me je öt ae gan, me je öt ae lau, me je hom ka tavat hia. 14 Ke hwaban e ödrin e penapena hobi ködrin bi me tavat bihut; anyin a haba tavat bihut je matrâni Arona ödrin e hudo je hudiny leû me pipikhenya ke ne o but hnyi hnyinghet: anyin a wale at Levi ödrin e penapena hobi ködrin bi me tavat bihut a je matrâni Arona. 15 Ke haba tavat khumöng a je matrâni Asafa ödrin e tot hnyi hnödrin hoton musi anyi Davita, me Asafa; me Heman, me Jeduthun at wâ anyin than; ke haba tavat tuö hwanuma ödrin e tot hnyi

je hwanuma : ödrin e ca he ûhedrin hnyi hanymödrin, anyin a haba at Levi a je liamekeiny mödrin ödrin e penapena hobi ködrin. 16 Ke adre hia but penapena ta je huliwa hia anyi Iehova hnyi bong eling, ne ka ânyâ paseka, me hudo je hudiny leû hon taben hut anyi Iehova hoton musi anyi Josea than. 17 Ke haba lakon Isaraela eling, ödrin e ânyâ paseka hnyi ûen e, me bijetiâ areto adre me ca levenâ hnyi seven ta bong. 18 Ke ba paseka helâe hnyi Isaraela hwân hnyi ûö Samuela a perofeta ; me haba khaca e ba paseka anyin je than Isaraela hia adre me ânyâ helâ me hna anyâ hnö Josea, me tavat bihut, me at Levi, me at Juda me Isaraela hia ling, me aten Jerusalema. 19 Adre me ânyâ paseka e hnyi huna a eitinyin musi anyi Josea.

20 Hwaban ta je ûnyi hia eling, k' ame hia but Josea penapena uma kap, me ame he but Neko than Aigupito ke ka vat me kakemis hnyi Euferati : ke haba Josea ame he but he ka vat mē. 21 Me e ame kunâ je uthumetu kâu, me ha, ka habe, Ieû gak kôu than Juda? oge me ca o he ka vat möu hnyi bong ang, ke so bi me lap a iwahnaihmïöny mönya ; ke Khong ame ha kënya he ka ânyâ logotâ : soju u ihwegiökou me Khong, at ame tha hien mönya, wâ e nye obiö u. 22 Ke so bi ame ca hwïö bi Josea gan, ke e ame oiyongâ e bi, me me he ka vat mē, k' ame ca löng bi hofuc ho Neko ûnyi ge Khong, me e ame o ka hnyi vat hnyi hinyigöulen bucen e Megido. 23 Ke haba tavat hlic fana, me, ödrin fanö Josea than ; me haingen than ka lathnyabainy, ka habe, Ie hum nya thö ; anyin a oge me aat kong ut. 24 Me lathnyabainy ödrin e hom e ûnyi hnyi kariota e, me ip e hon anyin kariota a loiny, me hom e Jerusalema ai ; me ame mokcu, me adre me konâm e hnyi je erke-mok anyin lakamen. Me ame hnyamök Juda me Jerusalema hia ga Josea. 25 Ke haba Jeremia ame khumöngö tenge ca Josea : ke haba tavat khumöng obaga me omomo hia, me, ödrin e haiö Josea hnyi anyidrin tenge ke ne o but hnyi bong ang ; ke adre me otilâ hmâ bongon e hnyi Isaraela : me wâ bi, adre hia but sihnalimen hnyi je khumönginy tenge. 26 Ke haba kolon je hna ânyâ hnö Josea, me hwakecin ae so hoton hna sihnalimen hnyi hnanyibu anyi Iehova, 27 me anyin ta je huliwa a bân me biliny, wâ bi, adre hia but sihnalimen hnyi tusiny je than Isaraela me Juda.

HNYIMAKAN 36.

HABA tavat aten hnyei ödrin e hum Jehoaza nöku Josea, me otilâ e ka than hnyi Jerusalema hwaban kamen. 2 Twente theri but je hunai Jehoaza, hnyi ûen e ame hwân ka than ; ke e ame musi hnyi Jerusalema hnyi kun ta tehi. 3 Ke haba than Aigupito ame hlec e hnyi Jerusalema, me kunâ tavat he ka bi hwaban wan haded je talan sileva me kkaca talan gol. 4 Ke haba than Aigupito ame otillö Eliakima ka than, liamekeiny me Jehoaza, hnyi Juda, me Jerusalema, me wia ien me me Jehoiakima bi. Ke haba Neko ame hum Jehoaza liamekeiny mē me hom e Aigupito ai.

5 Twente faiv but je hunai Jehoiakima hnyi ûen e ame hwân ka than ; ke e ame musi hnyi Jerusalema eleven je huna ; ke e ame ânyâ ûnyi ae kong hnyi hnyimakö Iehova Khongon. 6 Ke ame o but Nebukaneza than Babulona, me ca e ge je fao, he ka hom e Babulona ai. 7 Ke haba Nebukaneza ame hom minya Babulona ai ke je kaiainy uma umö Iehova, me ip hnyin umen uma hnyi Babulona. 8 Ke haba kolon je hna ânyâ hnö Jehoiakima, me hwakecin ae kong e ame ânyâ, me adre me wâ gan, wâ bi, adre hia but sihnalimen hnyi tusi anyin je than Isaraela me Juda : ke ame musi biju Jehoiakin a nokon hwaban.

9 Eit but je hunai Jehoiakin hnyi ûen e ame hwân ka than ; ke e ame musi hnyi Jerusalema hnyi kun ta tehi me ten je bong : ke e ame ânyâ ûnyi ae kong hnyi hnyimakö Iehova. 10 K' a o hmetu huna, haba Nebukaneza a than ame ûkhünöng, me adre me hom e Babulona ai, tha e me ta je kaiainy uma umö Iehova, me otillö Zedekia, liamekeiny me Jehoiakin hnân thaniny Juda me Jerusalema.

11 Twente wan but je hunai Zedekia hnyi ûen e ame hwân ka than ; ke e ame musi hnyi Jerusalema hnyi eleven je huna : 12 me e ame ânyâ ûnyi ae kong hnyi hnyimakö Iehova Khongon ; e ame ca ouhnyû-kongo e bi hnyi hnyimakö Jeremia a perofeta at ame fuc ûnyi ga Iehova. 13 Ke haba khaca e ame ûkhin fuc kö Nebukaneza than, at a hia but kunâ e he ka khemanyin kö Iehova : me e ame hwegiâ nyin, me okhötâ hnyekon me me ca hmetu kö Iehova Khongon Isaraela. 14 Khaca

haba ta je taben tavat bihut hia, me tavat, ödrin e ányá hwégiá monu, hoton hwakecin ae ikiki anyin je wanaithila; me ödrin e oikikiá uma umö Iehova waleji e ame hia but okabá hnyi Jerusalema. 15 Ke haba Iehova Khongon je lakamödrin, ame úkhúnöng ködrin a deny anyin je úthumetu, ame vesákong me úkhúnöng; anyin a e ame betenge ge lakeiny, me hnyaban: 16 Ke so bi ödrin e hluma je uthumetu anyin Khong, me húkotiá hwan hofuc, me hiá anyin je perofeta, ke ne o but ame okuá hmönyin anyi Iehova ka lakeiny, ke ne o but ae ba únyi hnán omelö. 17 Anyin a wale e ame oá ködrin thaniny at Kaledaia, at ame hlingá je hidröuidrin ge hele vat hnyi uma dok a kabidrin, ke adre ca betenge ka ke hidróu, me hlu, me hingat me hún: e ame hn' ödrin hia ka hnyi hnyamen. 18 Ke haba ta je kaia hia anyin uma umen Khong ae gan me úhnyúkong, me ta je omjeúiny uma umö Iehova, me ta je omjeúiny than me anyin je taben; haba ta je únyi hia eling e ame hom Babulona ai. 19 Me ödrin e thong degecá uma umen Khong, me tho degecá hak veto hnyi Je-

rusalema, me thong degecá ge meic je uma umen than, me okongoá hia je kaiainy ae so. 20 Ke e ame hom je kolon adre ca hlingá ge hele vat Babulona ai; me ödrin e bi athnyabainy me je lakon eling, ke ne o but hnyi úen ame musö ge dökhu at Peresi: 21 me me hwádá hofuc ho Iehova a deny Jeremia, ke ne o but ame bekhöt ut ta je sabathiny káná: anyin a haba hnyi ta je bong ae ba aten hnyei, me wale bi e sabath, ke ne o but hnyi je huna a sevente.

22 Ke haba hnyi huna a bani Koreso than Peresi, me haba Iehova ame bwebwelá hnyeku Koreso than Peresi, me me hwádá hofuc ho Iehova a deny Jeremia, me e ame kuná metá ka hnyi dokhon dökhu ehele, me sihnalimen minya, ka habe, 23 Walang hna ha hnö Koreso than Peresi, ka habe, Haba Iehova Khongon drany ame hia but ham könýa ta je dökhu hia thithö eang hmeledrany; ke e ame hia but huna könýa he ka op ke uma hobi káu hnyi Jerusalema, wale hnyi hnyei Juda. Haba tavat hia unyibun a hanen je lakeiny hia, e so e ame he thö káe, me ame he Iehova a Khongon ka tha e mē.

TUSI EZERA.

HNYIMAKAN 1.

HNYI huna a bâniny musí anyi Koreso tuhan Peresi, me haba Iehova ame bwebwelá hnyeku Koreso than Peresi, me me hwádá hofuc ho Iehova a ha Jeremia, me e ame haimemená hnyi dokhon dökhu hia, k' ame sihnalimen minya, ka habe, 2 Walang hna ha hnö Koreso than Peresi, ka habe, A hia but ham könýa ga Iehova Khongon dran ta je dökhu hia eang hmelen; ke a hia but huna könýa he ka op umen uma hnyi Jerusalema, wale hnyi hnyei Juda. 3 Haba at unyibun a hanen lakeiny hia, ke so e he Khong ka tha e mē, ke so e ame he thö Jerusalema ai, wale hnyi hnyei Juda, me me hnyi op uma umö Iehova, Khongu Isaraela, hnyi Jerusalema, (e thibi Khong). 4 Ke haba kolon tavat hia hnyi je hnyaba hia ödrin e laba hnyin, me so e he tavat aten je hnyabadrin

he ka hadru' ödrin ge sileva, me gol, me omjeú, me omeno, me ta je bwihlany minya ae betenge hobi káu uma umen Khong wale hnyi Jerusalema. 5 Me ame todró je kamen ae beönua ge at Juda me Beniamina, me tavat bihut me at Levi. a ödrin hia hnyat a bwebwelá je hnyekudrin ge Khong he ka he me op uma umö Iehova hnyi Jerusalema. 6 Ke haba hnyat hia a igigilö, me, ödrin e hadru' ödrin ge je kaia sileva, me gol, me omjeú, me omeno, me je únyi ae únyi hnathu, ke ca ha bi je bwihlany hia adre me ham hnyi betenge. 7 Ke haba Koreso a than ame hom minya but je kaiainy uma umö Iehova. waleji a hom Nebukaneza únyi Jerusalema me ip hnyi uma umen khongon je khong: 8 me haba Koreso than Peresi ame hom ta je únyi e a deny hnyamö Mitheredath at ame tuö omjeú, me áú kö Sesebaza ke than Juda. 9 Ke walang úseiny: thöte je kaia gol, ke wan thauzan je kaia sileva,

EZERA 2.

ke twente nain je hele; 10 ke thöte je utkaia gol, ke foa haded ke ten je utkaia sileva a loiny, ke wan thauzan ke je kaia. 11 Haba úseiny je kaia gol me sileva hia, me, faiv thauzan ke foa haded. Ke haba Sesebaza ame hom but ta je únyi hia eling hnyi úen adre hom je aten hwenbâ úhedrin Babulona, Jerusalema ai.

HNHYIMAKAN 2.

KE walang tavat aten hnyeí, ödrin e he úhedrin hnyi hñabâ tavat waleji adre me hom, waleji hñö Nebukaneza than Babulona hna hom Babulona ai, me ödrin e he hmetu Jerusalema me Juda ai, ka hnyi anyidrin je taun; 2 tavat adre me tha o me Zerubabela, a Jesua, me Nehemia, me Seraia, me Reelaia, me Modikai, me Bilesan, me Misepa, me Bigevai, me Reh-um, me Baana. Haba úseiny tavat aten Isaraela: 3 je laku Paros, tu thauzan ke wan haded ke sevente tu. 4 Je laku Sefata, ödrin theri haded ke sevente tu. 5 Je laku Ara, ödrin seven haded ke sevenfe faiv. 6 Je laku Pahatha-moaba, je laku Jesua me Joab, ödrin tu thauzan ke eit haded me twelv. 7 Je laku Elama, ödrin wan thauzan ke tu haded ke fifte foa. 8 Je laku Zatu, ödrin nain haded ke fáte faiv. 9 Je laku Zakai, ödrin seven haded ke sikste. 10 Je laku Binui, ödrin siks haded ke fáte tu. 11 Je laku Bebai, ödrin siks haded ke twente theri. 12 Je laku Azegada, ödrin wan thauzan ke tu haded ke twente tu. 13 Je laku Adonikama, ödrin siks haded ke sikste siks. 14 Je laku Bigevai, ödrin tu thauzan ke fifte siks. 15 Je laku Adin, ödrin foa haded ke fifte foa. 16 Je laku Atera, únyi ga Hezekia, ödrin nainte eit. 17 Je laku Bezai, ödrin theri haded ke twente theri. 18 Je laku Jora, ödrin wan haded ke twelv. 19 Je laku Hasum, ödrin tu haded ke twente theri. 20 Je laku Giba, ödrin nainte faiv. 21 Je laku Bethe-leema, ödrin wan haded ke twente theri. 22 At Netofa, ödrin fifte siks. 23 At Anathoth, ödrin wan haded ke twente eit. 24 Je laku Azemaveth, ödrin fáte tu. 25 Je laku Kiriatha-jarim, Kefira, me Berotha, ödrin seven haded ke fáte theri. 26 Je laku Rama me Geba, ödrin siks haded me twente wan. 27 At Mikemas, ödrin wan haded ke twente tu. 28 At Beth-ela me Ai, ödrin tu haded ke twente theri. 29 Je

laku Nebo, ödrin fifte tu. 30 Je laku Magebis, ödrin wan haded ke fifte siks. 31 Je lakon ke Elama, ödrin wan thauzan ke tu haded ke fifte foa. 32 Je laku Harim, ödrin theri haded ke twente. 33 Je laku Lod, me Hadid, me Ono, ödrin seven haded ke twente faiv. 34 Je laku Jeriko, ödrin theri haded ke fáte faiv. 35 Je laku Senaa, ödrin theri thauzan ke siks haded ke thöte. 36 Ke tavat bihut: haba laku Jedaia, je hanen lap anyi Jesua, ödrin nain háded ke sevente theri. 37 Je laku Imer, ödrin wan thauzan ke fifte tu. 38 Je laku Pasur, ödrin wan thauzan ke tu haded ke fáte seven. 39 Je laku Harim, ödrin wan thauzan ke seventin. 40 Ke at Levi: je laku Jesua me Kademiél, únyi ge laku Hodavia, ödrin sevente foa. 41 Ke tavat khumöng: je laku Asafa, ödrin wan haded ke twente eit. 42 Je lakon tavat tuö hwanuma: je laku Saluma, je laku Atera, je laku Talemon, je laku Akub, je laku Atlia, je laku Sobai, haba ödrin hia, wan haded ke thöte nain. 43 At Nethini: je laku Ziha, je laku Hasufa, je laku Tabaoth; 44 je laku Keros, je laku Sia, je laku Padona; 45 je laku Lebana, je laku Hagaba; je laku Akub; 46 je laku Hagab, je laku Salemai, je laku Hanan; 47 je laku Gidel, je laku Gaha, je laku Reaia; 48 je laku Rezina, je laku Nekoda, je laku Gazam; 49 je laku Uza, je laku Pasea, je laku Besai; 50 je laku Asena, je laku Meunim, je laku Nefusim; 51 je laku Bakebuk, je laku Hakufa, je laku Harehur; 52 je laku Bazeluth, je laku Mehida, je laku Haresa; 53 je laku Berekos, je laku Sisera, je laku Tama; 54 je laku Nezia, je laku Hatifa. 55 Je lakon lathnyabai Solomona: je laku Sotai, je laku Sofereth, je laku Feruda, 56 je laku Jaala, je laku Darekon, je laku Gidel; 57 je laku Sefata, je laku Hatil, je laku Pokereth-zebaim, je laku Ami. 58 Haba at Nethini hia me lakon lathnyabai Solomona, me, ödrin theri haded ke nainte tu. 59 Ke walang tavat adre me o úheny Tele-mela, me Tele-haresa, me Kerubi, me Adan, me Imer: ke ca khan' ödrin he ka omanená je lap anyin lakamödrin bi, me anyidrin dö, ödrin e ne at Isaraela la: 60 je laku Delaia, je laku Tobia, je laku Nekoda, ödrin siks haded ke fifte tu. 61 Me ke je lakon tavat bihut: je laku Habaia, je laku Koz, je laku Bazilai at ame hok áian únyi ge je laku Bazilai at

Gileada, m' adre me hawá e hoton iödrin. 62 Hnyat eling ödrin e elám hna sihnalimidrin hnyi hna sihnalimen je dö, ke so bi adre ca wá je iödrin: anyin a wale adre me haikongu ödrin me ob' ödrin me me ca at bihut. 63 Ke haba at ame musi ame ha ködrin m' ödrin e ca he ka hnyi an je únyi ae ti kap, ke ne o but ame tot ke at bihut me Urim me Thumim. 64 Haba úkhacaköu hia ödrin fáte tu thauzan ke theri haded ke sikste, 65 me lathnyabaidrin minya obaga me omomo; ödrin seven thauzan ke theri haded ke thöte seven: ke e hu gadrin tavat khumöng obaga me omomo a ödrin tu haded. 66 E hu haledrin je hors, seven haded ke thöte siks; ke haledrin je miul a tu haded ke fáte faiv; 67 haledrin je kamela a foa haded ke thöte faiv; je asina, siks thauzan seven haded ke twente. 68 Ke haba ke je kamen ae beönua ödrin e o but ka hnyi uma umö Iehova hnyi Jerusalema, m' ödrin e ka hamödrin ham hobi káu uma umen khong he ka otílá e hnyi hnen: 69 ödrin e ham hoton hna ve hu ka hnyi tang omjeúiny huliwa, sikste wan thauzan je dareki gol, ke faiv thauzan je mina sileva, ke wan haded je úkhaüen tavat bihut. 70 Ke haba tavat bihut, me at Levi, me ke je hnyat, me tavat khumöng, me tavat tuö hwanuma, me at Nethini, adre me ve labá anyidrin je taun, me at Isaraela hia hnyi anyidrin bi je taun.

HNYIMAKAN 3.

KE ame o but tehi a seveniny, ke e but lakon Isaraela hnyi anyidrin je taun, me haba tavat adre me úkhacaköu hnyi Jerusalema helá me at a khaca. 2 Me ame todrö Jesua nöku Jozadaka me je liamekeiny më a tavat bihut, me Zerubabela nöku Sealetiola, me je liamekeiny më, me otílá taben hut anyin Khongon Isaraela, hnán hudo je hudiny leú hon e, helá me hna sihnalimen hnyi hnanyibu anyi Mose aten Khong. 3 Ke ödrin e otílá taben hut hnyi ka hnen bi; anyin a ödrin e outen tavat aten je hnyei: me ödrin e hudo hon e je hudiny leú kö Iehova, je hudiny leú hnyi hnyomakatu me sahac. 4 Ke ödrin e anyá bijeúiny uma hunuma, helá me hna sihnalimen, me hudo je hudiny leú hnyi je bong hia thibut hoton numera, helá me hna huna, me hoton hanyen ke bong me ke bong; 5 ke hwaban e, e bala bi hudiny

leú, me je tehi a teb únyi, me je bijeú ae kap adre thu anyi Iehova hia, me je hut adre ka hamödra hudo kö Iehova. 6 Ödrin e ibi hwán he ka hudo je hudiny leú kö Iehova hnyi bong a bâniny tehi a seveniny: k' ödra tiga ca umo bi taben uma umö Iehova. 7 Ke ödrin e ham mone ka tavat up veto, me tavat tretrau utö; me ham jeú me köiö, me wakaco, ka at Zidona me Turo he ka hom je utö arasi únyi Lebanona ka hnyi köiö, Jopa ai, hoton hna hna ködrin ga Koreso than Perei.

8 Ke haba hnyi huna a loiny hnödrin hna o ka hnyi uma umen Khong hnyi Jerusalema, hnyi tehi a loiny, me ame hwán Zerubabela nöku Sealetiola, me Jesua nöku Jozadaka, me je kolon a je liamekeiny mödrin a tavat bihut, me at Levi, me hnyat hia adre me he Jerusalema ai úhedrin hnyi hna bá; he ka otílá at Levi, hnyat a twente huna me gan hon e, he ka musö huliwa hnyi uma umö Iehova. 9 Me ame todrö Jesua tha e më lakon me je liamekeiny më, me Kademiël me lakon, je laku Juda, helá me at a khaca, he ka musö tavat bi huliwa hnyi uma umen Khong: me laku Henadada, je lakudrin, me je liamekeiny mödrin a je at Levi. 10 Ke haba hnyat op uma umö Iehova me adre me otílá tavat bihut adre khaú, ke je trutru hnyi hnyamödrin, ke haba at Levi a laku Asafa ödrin e tot me je simebalo he ka oganö Iehova hoton musi anyi Davita than Isaraela. 11 Ke ödrin e khumöng oganá me ole kö Iehova, anyin a e at ae so, anyin a nyiele balua anyin ibetengió ka at Isaraela. Ke haba tavat hia ödrin e hongot hwege göranyai me oganö Iehova, anyin adre me bi taben uma umö Iehova. 12 Ke se hia tavat bihut, me at Levi, me je kamen ae beönua, a wahingat ödrin e wá uma a ban, ke adre me bi taben uma eang hnyi hnyimaködrin, me ödrin e tenge hwege göranyai; ke se hia tavat adre me hongot hwege göranyai hnyi senyin: 13 me ca manen bi ka tavat hwakuku senyin me hwatenge: anyin a tavat adre me hongot hwege göranyai, ke adre me löng medien hnyi dok ae sákáú.

HNYIMAKAN 4.

KE ame löng je iwahnaihmiöny me at Juda me Beniamina a g'ame he but je lakon bá ka op uma umö Iehova, Khongon at Isaraela; 2 me ödrin e he but

Zerubabela, me je kamen ae beõnua, me ha ködrin, ka habe, Hn' õhmun dut he ka tha op möbun : anyin a õhmun e elâm Khongubun e úcú möbun ; ke õhmun e labö bi hut káu hwân hnyi je bong bongu Eear-adona than Asuria, at a hum õhmun kââng. 3 Me ame ha ködrin Zerubabela, me Jesua, me je kolon je kamen ae beõnua hnyi Isaraela, ka habe, E ca hu hanymöbun unyihmun he ka op uma hobi káu Khonguhmun ; ke õhmun e he ka hake op hobi kö Iehova Khongon at Isaraela, helâ me hna hûna köhmun ga Koreso a than, tuhan at Peresi. 4 Me haba tavat aten hnyeï ödrin e osënyinâ je hnyamen at Juda, me oti ödrin hnyi hna up uma, 5 me bi omjeú ka tavat ha bongon m' adre me ovhelâ únykümenödrin hnyi ta je bong hia bongu Koreso than Peresi. 6 Ke haba hnyi musi anyi Asueru, hnyi ùen e ame hwân ka musi, ödrin e sihnalimen káu he ka haikongoâ aten Juda me Jerusalema.

7 Ke haba hnyi je bong bongu Aretaseta, haba Biselama, me Mitheredath, me Tabeela, me je kolon a je hanödrin, ödrin e set kö Aretaseta than Peresi ; ke haba hna sihnalimen tusi me mataitusi Suria, me adre set hnyi hwen Suria. 8 Haba Rehum at owisa, me Simesai at sihnalimen, ödru me sihnalimen tusi kö Aretaseta than, me haiö Jerusalema helâng : 9 ame sihnalimen Rehum at owisa, me Simesai at sihnalimen, me je kolon a je lahanödrü ; at Dinai, me at Afareseka, me at Tarepelai, me at Aferesai, me at Areka, me at Babulona, me at Susana, me at Deave, me at Elama, 10 me je ke keihen je hnyeï waleji hnö Asenapa ae gan me únyi hnathu, hna hom but, me ip ödrin hnyi taun Samaria, me hnyi ke keihen hnyeï hoton wagewe, me tavat a helâe. 11 Walang hna set hnyi tusi waleji ödrin e kunâ kö Aretaseta than, ka habe, õhmun je athnyabaem tavat hoton wagewe, me tavat a helâe. 12 Khanö u thö than, a haba at Juda tavat ödrin e he but köhmun úhedrin unyâm, ödrin e o but hnyi Jerusalema ; ke ödrin e op taun ame thu musi me kong, k' adre hia but umo je hna up haginny, me okhötâ je taben. 13 Khanö u thö walang ang than a g' adre me ne op hmetu taun ang, me umo je hna up haginny, me ödrin e ca he ka bi fâtâ omjeú me jeú, me bi õhnyeï, k' adre me he ka okongoâ je than nyiele. 14 Ke walang ang, anyin a õhmun e an jeú únyi hnyi uma umen than, ke ca úcú köhmun he ka wâ hna oñnyibâu

than, anyin a wale õhmun e úkhûnõng he ka thumeto than ; 15 m' adre me he ka elâm hnyi tusi hnân oñnykümeâ anyin lakâmâm : m' u me he wâ hnyi tusi hnân oñnykümeâ me khana a g' ame thu musi taun ang, k' ame okongoâ ta je than me ta je hnyeï, ke haba ehac ödrin e úhûgúnö musi anyin than hnyin : ke wale can adre me ohia taun ang ehac. 16 Ke õhmun e thumeto than a g' adre me ne he ka op hmetu taun ang, me umo je hna up haginny, awe, ame he ka ba hmetu ányâm musi hoton wagewe. 17 Me haba than ame úkhûnõng he ka thu kö Rehum at owisa, me Simesai at sihnalimen, me je kolon je lahanödrü hnyat adre me laba hnyi Samaria, me je kolon hnyi ke keihen hoton wagewe, ka habe, Hnahic ut, me hofuc helâe. 18 Haba tusi öbun e kunâ köhmun, me adre me hia but aú manenâ hnyi hnyimakök. 19 Ke oge me hûna he ka elâm, me adre me wâ a g' ame bi gan taun eling ehac ka ta je than, k' ame kú hnyin ukhin fuc me úhûgúnö than. 20 Ke haba ehac e hu je than ae hwege hnyi Jerusalema, k' ödrin e musö je hnyeï hia thithö hoton wagewe ; k' adre me labö fâtâ omjeú, me jeú, me bi õhnyeï ködrin. 21 Ke haba walang ang e so öbun e he ka nyibo me thawâ tavat eling, m' adre me ca he ka op taun eling ke ne o but oge me he ka otilâ hnanyibu. 22 Ke wâ wia ju me ca ányâ becâ : anyin a ieu ame he ka kú únyi ae kong me oñnyükongoâ je únyi anyin je than? 23 Ke haba hnyi ùen adre me aú tusi anyi Aretaseta than hnyi hnyimakö Rehum me Simesai at sihnalimen, me je lahanödrü, me ödrin e ie he Jerusalema ai ka at Juda me thaw' ödrin ge tang hwege me man. 24 Me adre me ip ju huliwainy uma umen Khong hnyi Jerusalema ; ki adre me hna huliwa bala ke ne o but hny' huna a loiny musi anyi Dariu than Peresi.

HNYIMAKAN 5.

KE haba li perofeta, wale Hagai perofeta, me Zakaria nõku Ido, ödrü me perofeta ka at Juda me Jerusalema, hnyi ien Khongu Isaraela ödrü me perofeta ködrin. 2 Me ame todrö Zerubabela nõku Sealetiel, me Jesua nõku Jozadaka, me hwân he ka op uma umen Khong hnyi Jerusalema ; ke e unyidru je perofeta anyin Khong he ka hadru' ödrü. 3 Haba hnyi ùen eling ame o but ködrin Tatenai at ame musi hoton

wagewe, me Setara-bozenai, me je lahanödru, me ha ködrin ka habe, Ie at ame hn' öbun he ka op uma ang, me umo hna up hak ang? 4 Ke öhmun e ha helâng ködrin, ka habe, Ia ien je hnyat ödrin e op uma ang? 5 Ke e but emakan Khongudrin hon wahingatiny at Juda, me adre me ca thaw' ödrin, me me o but hofuc kö Dariu, me adre me he ka thu hmetu hofuc eling hnyi tusi.

6 Haba tusi ame kunâ kö Dariu than hnö Tatenai at ame musi hnyi ke keihen hoton wagewe, me Setara-bozenai, me lahanen a at Afareseka, wale hnyi ke keihen hoton wagewe: 7 ödrin e kunâ tusi kâu, ke adre sihnalimen hnyin helâng, ka habe, Kö Dariu than, hnahic hia but. 8 Khanö u thö than, a öhmun e he ka hnyi hnyeï Juda, ka hnyi uma umen Khong ae gan, wale adre op je veto ae gan hnyin, ke adre kha je utö hnyi hna up uma, ke e logot huliwa eang, ke e hnahic ut e hnyi je hnyamödrin. 9 Me öhmun e hnö wahingat eling, me ha ködrin, ka habe, Ia ame hna köbun he ka op uma eang, me umo hak veto ang? 10 Ke öhmun e hnö minya je iödrin, me hnân thumetu u, me me khan' öhmun he ka sihnalimen ien je athnathuidrin. 11 Ke ödrin e thu köhmun helang, ka habe, Öhmun je athnyabainy Khongon drany me hmeledrany me öhmun e op uma waleji adre op ebac ae se hia je hunainy, waleji hnen ke than Isaraela ae gan hmâ hna op me umo. 12 Ke haba hwaban dö e a hia but lakamöhmun ohmönyinâ Khongon drany, me e ame hn' ödrin ka hnyi hnyamö Nebukaneza than Babulona at Kaledaia, at ame ohia uma eang, me hom tavat Babulona ai. 13 Ke haba hnyi huna a bân a than hnyin Koreso than Babulona, me Koreso than ame hûna he ka op uma eang umen Khong. 14 Ke haba je kaia gol me silevainy uma umen Khong, waleji a hom Nebukaneza únyi hnyi uma e Jerusalem, k' ame hom Babulona ai ka hnyi uma hmi; me haba Koreso ame hom ta je únyi e únyi hnyi uma hmi e Babulona, k' ame ham ka ke at Sesebazara ien, at e ame hia but otilà me gavena; 15 me e ame ha kâu, ka habe, Hom dö je kaia ang, me he thö, me ip ka hnyi uma kap hnyi Jerusalem, k' adre me he ka op uma umen Khong hnyi hnen. 16 Me ame o but Sesebazara at eling, me bi taben uma umen Khong hnyi Jerusalem: ke hwân hnyi úen e ke ne o but walang ang, adre me

labö op, k' adre me tiga ca umo bala. 17 Ke walang ang ame ne so ka than, awe, adre me he ka elâm hnyi uma umen omjeü anyin than hnyi Babulona, ame ne hnathu a g' ame hûna ga Koreso than he ka op uma umen Khong eling hnyi Jerusalem, ke so ame he than ka kunâ köhmun weny hnyi bongon eling.

HNYIMAKAN 6.

ME haba Dariu than ame úkhûnöng m' adre me elâm hnyi uma umen je tusi, dok adre me hip omjeü hnyin hnyi Babulona. 2 Me adre me wâ hnyi Ake-metha, hnyi uma umen than hnyi hnyeï Madai, tusi adre vhec, k' adre me hia but sihnalimen hnyin hofuc hnân oúnykîmeâ, ka habe, 3 Haba hnyi huna a bân a than hnyin Koreso, me haba Koreso than ame hûna, ka habe, Haba ge uma umen Khong hnyi Jerusalem, me adre me he ka op uma, waleji adre me bi hut hnyin, ke adre me he ka ip hwegiâ je taben; k' ame he ka beü göranyai sikste kubit, ke sikste kubit úlauen; 4 kun ta deö veto ae gan, ke khaca deö utö ae teb unyi: k' adre me he ka bi hwaban e únyi hnyi uma umen than: 5 ke haba je kaia gol me sileva anyin uma umen Khong, waleji a hom Nebukaneza únyi hnyi uma kap hnyi Jerusalem, me hom Babulona ai, adre me he ka ham hmetu, me hom hmetu ka hnyi uma kap hnyi Jerusalem, ke únyi me ke únyi ka hnyi hnen, ke u me he ka ip hnyi uma umen Khong. 6 Ke walang ang, Tatenai lö, at musi hnyi ke keihen hoton wagewe, me Setara-bozenai, me je lahanöbu a at Afareseka hnyi ke keihen hoton wagewe oúsákâú öbun dut me únyi e: 7 ca he ka ovhelö huliwa hnyi uma umen Khong; hamen at ame musö at Juda me wahingatiny at Juda op uma umen Khong eling hnyi hnen. 8 Ke haba khaca inya oge me hûna ge hnöbun hna he ka ányâ ka wahingatiny at Juda hobi kâu hna op uma umen Khong eling: a haba ke je omjeü, wale únyi hnyi fat hnyi ke keihen hoton wagewe, adre me he ka ie ham ka tavat ang hnân hwaban huliwa, m' adre me ca ovheli ödrin bi. 9 Ke haba je únyi ae úcú ködrin, wale je nokon kau, me je mamoe бага, me je nokon mamoe, hnân hudiny leü ka Khongon drany, me hwit, me sâlt, me waina, me wakaco, hoton hofuc hwan tavat bihut hnyi Jerusalem, me, adre me he ka ham ködrin

hnyi ke bong me ke bong k' adre me ca he ka önua : 10 m' ödrin e he ka hudo je hut ae bo so ka Khongon drany, me hic me me möt than, me lakon. 11 Ke oge me hia but hûna minya, a haba tavat hia thithö adre me he ka wia hofuc ang, adre me he ka oc ut ke utö únyi hnyi umen uma, me adre me he ka ogöranyá e me ca e hon; me ame he umen uma ka hnân hna digic thátúny can e : 12 ke so ame he Khong at ame ip ien eling ka ohia ta je than me ta je hnyeí hia thithö, ödrin e he ka iná je hnyamödrin he ka wia únyi e, he ka ohia uma umen Khong eling wale hnyi Jerusalema. Oge me hia but hûna, inya Dariu, ie ányá thö.

13 Ke haba Tatenai at ame musi hnyi ke keihen hoton wagewe, me Satara-bozenai, me je lahanödrü, ödrin e ie ányá, can hna úkhünöng hnö Dariu than ködrin. 14 Ke haba wahingatiny at Juda adre me op uma me hnahic ut, únyi ge hna perofeta hnö Hagai a perofeta me Zakaria nöku Ido. Ke ödrin e op me umo e, hoton musi anyin Khongu Isaraela, me hoton hna hûna hnö Koreso, me Dariu, me Aretaseta thaniny Peresi. 15 Ke adre me umo uma eling hnyi bong a kuniny tehi Adara, wale hnyi huna a siksiny musi anyi Dariu a than. 16 Ke haba lakon Isaraela, me tavat bihut, me at Levi, me je kolon a je bâ, me adre me delec uma umen Khong me senyin. 17 Ke haba hnyi hnödra hna delec uma umen Khong, me ödrin e hudo wan haded je bolok, ke tu haded je mamoe бага, ke foa haded je nokon mamoe; ke twelw ta got бага hnân hudiny hulö tavat Isaraela hia, öúco úseiny je tribu Isaraela. 18 Ke ödrin e otílá tavat bihut ka hnyi je hanymödrin, me at Levi hnyi anyidrin je dö, hobi kâu huliwa anyin Khong, wale hnyi Jerusalema; hoton hna sihnalimen hnyi tusi anyi Mose.

19 Ke haba je lakon bâ adre me ányá paseka hnyi bong a fotininy tehi a bán. 20 Anyin a haba tavat bihut me at Levi ödrin e hia but tha obosoi ödrin; ke ödrin e bo so but hia thithö : ke ödrin e hlingá paseka hobi kâu je lakon bâ hia thithö, me je liamekeiny mödrü a tavat bihut, me hobi ködrin bi. 21 Ke haba lakon Isaraela, hnyat adre me hmetu úhedrin hnyi hna bâ, me hnyat ödrin e laba unyidrin úhedrin hnyi ta je únyi ae ikiki anyin je wanathila hnyi hnyeí he ka elöm Iehova Khongu Isaraela, me, ödrin e hnyi han,

22 me ányá senyiná hnyi seven je bong bijeúny areto adre ca levená : anyin a Iehova ame osenyini ödrin, me wia ködrin hnyekon than Asuria, me ohwegiá je hnyamödrin hnyi huliwainy uma umen Khong, wale Khongon at Isaraela.

HNYIMAKAN 7.

KE hwaban ta je únyi eling hnyi musi anyi Aretaseta than Peresi, me ame he Ezera nöku Seraia, nöku Azaria, nöku Hilekia, 2 nöku Saluma, nöku Zadoka, nöku Abituba, 3 nöku Amaria, nöku Azaria, nöku Meraioth, 4 nöku Zeraia, nöku Uzi, nöku Buki, 5 nöku Abisua, nöku Fineasa, nöku Eleazara, nöku Arona at bihut ae beönua : 6 haba at eling a Ezera ame he but úheny Babulona; ke e at ae ti khana sihnalimen hnyi hnanyibu anyi Mose, waleji a ham Iehova Khongu Isaraela : ke haba than ame ham hia kâu hnen hna sumátá, helá me hnyamö Iehova a Khongon hon. 7 Ke ame he but ke je lakon Isaraela, me ke je at bihut, me at Levi, me tavat khumöng, me tavat tuö hwanuma, me at Nethini, Jerusalema ai hnyi huna a seveni Aretaseta than. 8 Ke e ame o but hnyi Jerusalema hnyi tehi a thabúnginy wale huna a seveniny than. 9 Anyin a haba hnyi bong a bániny tehi a bán e ame ibi hwân he ka he úheny Babulona, ke haba hnyi bong a bániny tehi a thabúnginy, e ame o but hnyi Jerusalema, helá me hnyamen Khongon ae so hon. 10 Anyin a Ezera ame penapena hnyekon he ka elâm hnanyibu anyi Iehova, me ányá, me he ka ünö hnyi Isaraela je hnanyibu me je hna owisa.

11 Ke walang je hofuc hnyi tusi wale a ham Aretaseta than kö Ezera at bihut, me at sihnalimen, at ame sihnalimen je hofuc hnyi je hnanyibu anyi Iehova me hnen je hna hûna ka at Isaraela. 12 Aretaseta, thaniny ta je than, kö Ezera at bihut, at ame sihnalimen hnanyibu anyin Khongon drany, ae bekhöt, me helâe. 13 Inya oge me hûna, a haba at Isaraela hia, me anyidrin tavat bihut, me at Levi, hnyi dökhuk dökhü, ödrin e ka hamödra weny he ka he Jerusalema ai, awe, adre me he ka tha he möu. 14 Anyin a inya than oge me kunö u me je obotkongik a seven he ka elâm ge Juda me Jerusalema, hoton hnanyibu anyin Khongom a e hnyi hnyamâm; 15 me he ka hom sileva me gol, waleji a ka únyi gak

me je obotkongik hna ham ka Khongon Isaraela, at ame laba hnyi Jerusalema, 16 me sileva me gol hia u me he ka wá hnyi hnyei Babulona hia, tha e me hna ham báúá hnen tavat, me tavat bihut, ödrin e ka hamödrin ham ka hnyi uma umen Khongudrin hnyi Jerusalema; 17 anyin a wale u me he ka ie úco hwaban je mone eling je bolok, me je mamoe бага, me je nokon mamoe, me je hudiny han, me je hudiny ic, me hudo hon taben hut hnyi uma umen Khongubun hnyi Jerusalema. 18 Ke haba únyi ae so kôu me je liamekeiny môu he ka ányá ge je kolon je sileva me gol, ányá thö helá me weny Khongubun. 19 Ke haba je kaia adre ham kôu hobi káu huliwa hnyi uma umen Khongom, ip ju hnyi hnyimakan Khongon Jerusalema. 20 Ke haba ke je únyi ae úcú hobi káu uma umen Khongom a u me wem he ka ham, me ham dö únyi hnyi uma omjeú anyin than. 21 Ke haba inya, Aretasetá than, me oge me húna ka tavat tuó omjeú hia thithö hnyi ke keihen hoton wagewe, a haba ta je únyi hia ame he Ezera at bihut, at a sihnalimen hnanyi-bu anyin Khongon drany, ka sumátá unyibun, me, adre me he ka ie ányá, 22 ke ne o but hnyi wan haded je talan sileva, ke wan haded je tulut whit, ke wan haded je bath waina, ke wan haded je bath wakaco, ke sált adre me ca he ka ha tulutiny. 23 Haba ta je únyi hia a húna Khongon drany, me ányá wisa thö hobi káu uma umen Khongon drany; anyin a ieu ame he ka hu hmönyin ka dökhu dokhon than me je lakon? 24 Ke öhmun e ha minya köbun, a haba tavat bihut, me at Levi, me tavat khumöng, me tavat tuó hwanuma, me at Nethini, me lathnyabainy uma eling umen Khong, me adre me ca he bi ka kun' ödrin ka fátá omjeú, me jeú, me bi öhnyei. 25 He haba u Ezera, me u ma he ka otílá tavat úhnei me tavat owisa, hoton metáiny Khongom wale unyám, he ka owisa ka tavat hia thithö hnyi ke keihen hoton wagewe, tavat hia ae khan' ödra hnanyi-bu anyin Khongom; ke ná thö tavat ae ca khan' ödra. 26 Ke haba tavat hia adre me ca hnyi ányá hnanyi-bu anyin Khongom me hnanyi-bu anyin than, me adre me he ka ie bi hwabödra, ame ne he ka mok, ame ne he ka obá, ame ne he ka hügúná anyin ta je únyi, ame ne he ka ca.

27 Ole kö Jehova Khongon lakamötin, at ame ip únyi e hnyi hnyekon than, he ka

ohmanenangá uma umö Jehova hnyi Jerusalema; 28 me at ame okúá kónya ibetengió hnyi hnyimakan than me anyin je obotkong, me hnyi hnyimakan je taben aegan hia thithö anyin than. Ke adre me ohwegió nya hoton hnyamö Jehova Khonguk huk, me oge me úkhacaköúá ke je at ae únyi hnathu úhedrin hnyi Isaraela he ka tha he mönya.

HNHYIMAKAN 8.

WALE je lakamödrin ae beónua, ke walang je dö anyin tavat adre tha he mönya úhedrin Babulona, hnyi úen musi anyi Aretasetá than. 2 Hanen je laku Fineasa, Geresoma: hanen je laku Ithamara, Daniela: hanen je laku Davita, Hatusa. 3 Hanen je laku Sekania; hanen je laku Paros, Zakaria: ke adre tha aú gaga më obaga a wan haded ke fite. 4 Hanen je laku Pahatha-moaba, Elicenai nöku Zeraia; ke tha e me obaga a ödrin tu haded. 5 Hanen je laku Sekania nöku Jaziela, ke tha e më obaga a theri haded. 6 Hanen je laku Adin, Ebed nöku Jonathan; ke tha e me obaga a fite. 7 Ke hanen je laku Elama, Jesaia nöku Athalia; ke tha e më obaga a sevente. 8 Ke hanen je laku Sefata, Zebadia, nöku Mikaela, ke tha e më obaga a eite. 9 Hanen je laku Joab, Obadia nöku Jehiela; ke tha e më obaga a ödrin tu haded ke eitin. 10 Ke hanen je laku Selomith, nöku Josefia; ke tha e më obaga a wan haded ke sikste. 11 Ke haba hanen je laku Bebai, Zakaria nöku Bebai; ke tha e më obaga a twente eit. 12 Ke hanen je laku Azegada, Johana nöku Hakatan; ke tha e me obaga a wan haded ke ten. 13 Ke hanen je laku Adonikama, tavat a bilidrin; ke walang je iödrin, Elifelet, me Jeiela, me Semai, ke tha e mödrin obaga a sikste. 14 Ke lo li hanen je laku Rigevai, Uthai me Zabud; ke tha e mödrü obaga a sevente.

15 Ke o ge me úkhacaköu ödrin hnyi wagewe ame hingölö Ahava ai; ke öhmun e hunuma eling hnyi kun ta bong: ke oge me wá gaga tavat, me tavat bihut, ke oge me ca wá bi eling je laku Levi. 16 Ke oge me hawo Eliezara, me Ariela, me Semaria, me Elenathana, me Jarib, me Elenathana, me Nathana, me Zakaria, me Mesulama, je at ae únyi hnathu; me Joiarib minya, me Elenathana li at úne. 17 Me oge me kun' ödrin kö Ido tuhan hnyei

Kasifa, ke oge me bi hodrin hofuc hnân ha kö Ido, me je liamekeiny mē a at Nethini, hnyi hnyeï Kasifa, m' ödrin e he ka hom köhmun ke je lathnyaba hobi kâu uma umen Khonguhmun. 18 Ke helâ me hnyamen Khonguhmun ae so huhmun me ödrin e hom ke at ae metâ köhmun, hanen je laku Maheli nôku Levi, nôku Isaraela; me Serebia, me lakon me je liamekeiny mē a ödrin eitin; 19 me Hasabia, ke tha e mē Jesaia nôku Merari, me je liamekeiny mē me je lakudrin, a twente; 20 me ke je Nethini, hnyat eji a ham ga Davita me je than hobi kâu huliwa anyin at Levi, a tu haded ke twente at Nethini: k' adre me ve ha je ödrin. 21 Ke oge me haimemenâ üen he ka ca han eling hnyi wagewe Ahava, me hom ûhnyûkongi öhmun bi hnyi hnyimakan Khonguhmun, he ka elâm gan dehmun gethen ae wisa, me je wanakat gahmun, me anyihmun ta je ûnyi hia thithö. 22 Anyin a iny hmehma he ka sumâtâ ge than je soje me tavat tabö hors he ka hadru' öhmun can je iwahnaihmïöny eü hnyi gethen: anyin a öhmun e hia but ha ka than, ka habe, E bala bi hnyamen Khonguhmun hnân so ködrin a hnyat adre me elâm e; ke haba maniny man me anyin hmönyin me e bala bi hudrin bia thithö tavat adre me hna degecâ. 23 Me öhmun e ca han k' öhmun e sumâtâ bi Khonguhmun ge ûnyi eling; me e ame ling öhmun. 24 Me oge me ip ke je at bihut ae beönua a ödrin twelw, wale Serebia me Hasabia ke tha mödru ke je liamekeiny mödru a ödrin ten, 25 me oge me tuluto ködrin sileva, me gol, me je kaia, adre me ham hnân hobi kâu uma umen Khong, waleji a ham than me je obotkonginy, me anyin je taben, me at Isaraela hia thithö eling: 26 haba sileva oge me tuluto ka hnyi hnyamödrin, me, siks haded ke fite je talan, me je kaia sileva a wan haded je talan; ke wan haded je talan gol; 27 ke twente je utkaia gol, a wan thauzan je dareki ihmakiny, ke lo li kaia bras ae so ae hadröngöc ae ûnyi hna-thu helâ me gol. 28 Ke oge me ha ködrin, ka habe, Öbun e kap ut kö Iehova, ke kap ut je kaia; ke haba sileva me gol, adre me ka hamödra ham kö Iehova Khongon lakamöbun. 29 Wâ wia, me tuö, ke ne o but öbun e he bi ka tuluto hnyi hnyimakan tavat bihut ae beönua, me at Levi, me je taben je kamen ae beönua hnyi Isaraela, hnyi Jerusalema, hnyi je hnyeuleny umö Iehova. 30 Me haba at bihut, me at Levi,

ödrin e tuluto ihmakiny sileva me gol, me je kaia, he ka hom Jerusalema ai ka hnyi uma umen Khonguhmun.

31 Me öhmun e he üheny hnyi wagewe Ahava hnyi bong a twelviny tehi a bân, he ka he Jerusalema ai: ke ka e huhmun hnyamen Khonguhmun, me e ame omeli öhmun ûnyi hnyi hnyamen je iwahnaihmïöny, me at ame laba duöng eü hnyi gethen. 32 Ke öhmun e o but hnyi Jerusalema, me laba eling hnyi kun ta bong. 33 Ke haba hnyi bong a vakiny adre me tuluto sileva, me gol, me je kaia, ka hnyi hnyamö Mere-moth nôku Uria at bihut, hnyi uma umen Khonguhmun; ke tha e mē Eleazara nôku Fineasa; ke tha e mödru Jozabada nôku Jesua, me Noadia nôku Binui, li at Levi; 34 ta je ûnyi hia ge üseiny me ihmakiny; ke adre sihnalimen ihmakiny hia hnyi üen eling. 35 Ke haba lakon je bâ, tavat adre me o ûhedrin hnyi hna bâ, ödrin e hudo je hudiny leü ka Khongon Isaraela, twelw je bolok hobi kâu Isaraela hia, ke nainte siks je mamoe бага, ke sevente seven je nokon mamoe, ke twelw je got бага hnân hudiny hulö: wale hia e je hudiny leü kö Iehova. 36 Ke ödrin e ha hofuc hwan than ka tavat musi ae beönua anyin than, me je gavena hnyi ke keihen hoton wagewe, me ödrin e hadruâ tavat, me uma minya umen Khong.

HNYIMAKAN 9.

K' AME um dö ta je ûnyi eling, me ame hakekeny kõnya je than hia, haingödrin, ka habe, Haba tavat Isaraela, me tavat bihut, me at Levi, ödrin e ca hia but ouśákâüöâ me tavat aten je hnyeï, ge anyidrin je hwakecin ae ikiki, wale at Kanana, me Heth, me Perizi, me Jebusi, me Amona, me Moaba, me Aigupito, me Amora. 2 Anyin a ödrin e hia but hom lakudrin je hlu hobi ködrin me lakudrin je бага; m' adre me hia but ühaniken wan ae kap me tavat aten je hnyeï: eke, ame bân je than me tavat musi ka hnyi hulö eling. 3 Ke oge me löng hofuc eling, me kia but anyik ûkhaü, me anyik ükot, me hnimö leünen bök me waik, me laba ot. 4 Me ödrin e ûkhacaköu hia thithö kõnya hnyat adre me öbubuny ge hofuc hwan Khongu Isaraela, can hulö anyin je aten bâ; ke oge me laba ot ke ne o but adre me hudo hnyi sahac. 5 Ke hnyi üen adre me hudo hnyi sahac, me oge me todrö ühek

hnyi anyik hmak, k' ame khekhe but úkha-
úik me anyik úkot; me oge me cibouca, me
hai li hnyamök kö Iehova Khonguk; 6 me
oge me ha, ka habe, Khonguk lö, iny hme-
hma but me hmak he ka hngele hnyidra-
nyai köu Khonguk: anyin ae gan hmá
hnyikonguhmun hnyi hon je böhmun, ke
gan hmá anyihmun hulö ke ne o but hnyi
drany. 7 E gan anyihmun hulö hwan
hnyi úen lakamöhmun ke ne o but hnyi
bong ang; ke can anyihmun je monu, me
adre me hn' öhmun, me latuhömun, me
tavat bihut anyihmun, ka hnyi hnyamen
je thaniny je hnyei, ka hnyi hele vat, me
ka hnyi hwenbá, me ka tavat söh, me he
ka hmehma, helá me hnyi bong ang. 8 Ke
walang ang e okhulit thibi úen ae hu ga-
hmun betenge únyi ga Iehova Khongu-
hmun, he ka bi kolon köhmun möhmun
e möt, me ham köhmun ke fao hnyi anyin
dok ae kap, me me he Khonguhmun ka
omelamá je emaköhmun, me ham köhmun
úhömeli ae úhnyúkong köhmun a je bá.
9 Anyin a öhmun hoúbá; ke so bi Khongu-
hmun ame ca hnying öhmun hoúbá, ke e
ame oktáá ibetengö hnyi hnyimakan than
Peresi he ka ham köhmun úhömeli, m' adre
me otilá uma umen Khonguhmun, me ányá-
wia dok adre me tho, me he ka hna köhmun
ke hak hnyi Jerusalema me Juda. 10 Ke
walang ang, Khonguhmun lö, hwaban e, ie
hofuc öhmun e he ka ha? anyin a öhmun e
hia but hna degecá ányám je hnanyibu,
11 waleji u je húna a deny lathnyabaem
a je perofeta, ka habe, Haba hnyei öbun
e he ka he ka hnyin me hu, hnyei ae bo
kong ge bokonginy aten je hnyei, hnen je
hwakecidrin ae ikiki wale ame öunöngötá
je ke keihen hnyei ge hwakecidrin ae ikiki.
12 Ke walang ang ca he ka ham lakubun
wahlu ka lakudrin obaga, ke ca hok laku-
drin wahlu hobi káu lakubun obaga, ke ca
he ka elám anyidrin hnahic me so nyiele
balua: m' öbun hwege bi, me an soiny
káná, me újelabá ge lakubun nyiele balua.
13 Ke hwaban ta je únyi hia ame o
köhmun can hwakecihmun ae kong, me
anyihmun hulö ae gan, anyin a u Khongu-
hmun u je bi hwaban úhnyúkongo köhmun
ke ca gan hmá hoton anyihmun monu, ke
u je ham köhmun úhömeli heláng, 14 hawa
öhmun e ne he ka he hmetu ka hanyátá
ányám je hnanyibu, me úhamtamomo me
tavat adre me ányá je únyi ae ikiki eling?
hawa, u me ca he ka hmönyám köhmun ke
ne o but adre me ohi' öhmun, me ba ju

kolon, me at ae möt? 15 Iehova lö, Kho-
ngu Isaraela, u wisa; anyin a öhmun thiju
ang je kolon ae möt, helá me hnyi bong
ang: wá ju, öhmun dut ang hnyi hnyimá-
kám me hnyikonguhmun; anyin a can e e
ca khana ke at he ka tot hnyi hnyimákám.

HNYIMAKAN 10.

K' AME tiga hic Ezera, me omanenö
hulö, me tenge, me ta hnyikánái hnyi
hnyimakan uma umen Khong, me ame
úkacaköu káu tavat ae ti se hia úhedrin
Isaraela, obaga me omomo me je wanakat:
anyin ame tenge hwege tavat. 2 Ke haba
Sekhania nöku Jehiela, ke nöku Elama, ame
thu me ha kö Ezera, ka habe, Öhmun e hia
but ányá hulö ka Khonguhmun, me hok
laóöhmun kanyua anyin aten je hnyei: ke
so bi, walang ang, e hu hna gejon hnyi
Isaraela hnyi únyi eling. 3 Ke walang
ang, ötin e he ka ányá úhinhnyköu me
Khongutin he ka degec laóöhmun me je
lakudrin, helá me hwám hofuc than, me
tavat adre me öbubuny ge hnanyibu anyin
Khongutin; ke adre me he ka ányá hoton
hnanyibu. 4 Todró: anyin a hanyám
únyi ang, ke öhmun e he ka tha hiöhmun
möu: hwege thö me ányá thö. 5 Me
Ezera ame todrö me kuná tavat bihut ae
beönua, me at Levi, me at Isaraela hia, he
ka khemanyin a ödrin e he ka ányá hoton
hofuc ang. Me ödrin e khemanyin. 6 Me
Ezera ame todrö hnyi hnyimakan uma umen
Khong, me he ka hnyi hnyeule anyi Joha-
nana nöku Eliasiba, ke hnyi úen e ame o
but, e ame ca han me ic: anyin a e ame
tenge gadrin ge hulö anyin je bá. 7 Ke
ödrin e haimenená ka lakon je bá hia thithö
hnyi Juda me Jerusalema hia, he ka
úkacaköu hnyi Jerusalema; 8 ke haba
ödrin hia tavat adre me ne ca o hnyi
kun ta bong, hoton hofuc hwan than me
wahingat, adre me he ka ohia anyidrin ta
je únyi hia, me oúsakáú ödrin me úkha-
caköu anyin hoúbá. 9 Me haba at Juda
me Beniamina hia ödrin e úkacaköu hnyi
Jerusalema hnyi kun ta bong; ke tehi e a
naininy, ke bong twenteiny tehi: ke haba
tavat hia ödrin e laba hnyi dok ae lau hnyi
hnyimakan uma umen Khong, me öbubuny
can únyi eling, me can we ae gan. 10 Ha-
ba Ezera at bihut ame todrö me ha ködrin
ka habe, Öbun e hia but monu, me hok momo
kanyua, he ka bi hanan ka hulö anyin Isa-
raela. 11 Ke walang ang omanená thö

anyibún hulö kö Iehova, Khongon laka-möbun, me ányá weny: me úsákáú' öbun me tavat aten hnyei, me je momo kanyua. 12 Me ame thu úkhacaköu hia me ha hwegiá, ka habe, Helá me hnám hna ha gahmun hamöhmun he ka ányá heláe. 13 Ke se hia tavat, ke úen we ae gan, ke ca khan' öhmun he ka tot éú hnyöu, ke ca huliwa hnán khaca bong ame ne lö li bong: anyin ae gan hmá hnyikonguhmun hnyi únyi ang. 14 E so adre me otílá je tuhöhmun hobi káu úkhacaköu hia, ke ödrin e he hia thithö tavat adre hok momo kanyua hnyi anyihmun je lap ka he but hnyi úen adre thu, ke tha e mödrin wahingatinj je taun, me tavat owisa, ke ne o but adre wia hmönyin anyin Khonguhmun gahmun hnyi únyi eling. 15 Ke haba Jonathana nöku Asael me Jahazia nöku Tikeva, ödrü hwege hnyimaködrü hnyi únyi eling: ke haba Mesulama me Sabethai a at Levi, ödrü me tha hien mödrü. 16 Ke haba je lakon hoúbá adre me ányá helá me hna ha. Ke adre otísákáúö Ezera at bihut, tha e me ke je kamen ae beónua, hoton je lap anyin je lakamödrin, ke adre háiá iödrin hia; ke ödrin e laba hnyi bong a bániny tehi a teniny he ka elám únyi eling. 17 Ke ödrin e umo úhnö tavat hia thithö, tavat hoc momo kanyua hnyi bong a bániny tehi a bán. 18 Ke ödrin e wá ke je lakon tavat bihut, tavat hok momo kanyua: wale ke je laku Jesua nöku Jozadaka, me je liame-keiny më, jia Maseia, me Eliezera, me Jarib, me Gedelia. 19 Ke ödrin e hai hnyamödrin a ödrin e he ka degec laöiödrin; k' ödrin e hulö but, me ödrin e hudo mamoe бага únyi hnyi hna hat meno, can anyidrin monu. 20 Ke lo li laku Imer; wale Hanani me Zebadia. 21 Ke laku Harim; Maseia, me Elia, me Semaia, me Jehiela, me

Uzia. 22 Ke laku Pasur: Elioenai, me Maseia, me Isamaela, me Nethaniela, me Jozabada, me Elasa. 23 Ke haba at Levi; Jozabada, me Simei, me Kelaia (wale Kelita) me Pethaia, me Juda, me Eliezera. 24 Ke haba at khumöng; Eliasiba: ke tavat tuö hwanuma; Saluma, me Telem, me Uri. 25 Ke at Isaraela: haba laku Paros; Ramaia, me Iezia, me Malekia, me Miamin, me Eleazara, me Malekia, me Benaia. 26 Ke laku Elama; Matania, me Zakaria, me Jehiela, me Abedi, me Jeremoth, me Elia. 27 Ke laku Zatu; Elioenai, me Eliasiba, me Matania, me Jeremoth, me Zabad, me Aziza. 28 Ke laku Bepai; Johanana, me Hanania, me Zabai, me Athelai. 29 Ke haba laku Bani; Mesulama, me Maluka, me Adaia, me Jasuba, me Seal, me Ramoth. 30 Ke haba laku Patha-moaba; Adena, me Kelal, me Benaia, me Maseia, me Matania, me Bezaleli, me Binui, me Manase. 31 Ke haba laku Harim; Eliezera, me Isia, me Malekia, me Samaia, me Simeona; 32 me Beniamina, me Maluka, me Semaria. 33 Ke haba laku Hasum; Matenai, me Matathia, me Zabad, me Elifelet, me Jeremai, me Manase, me Simei. 34 Ke haba laku Bani, Maadai, me Amerama, me Uel; 35 me Benaia, me Bedeia, me Kelu; 36 me Vania, me Meremoth, me Eliasiba; 37 me Matania, me Matenai, me Jasau; 38 me Bani, me Binui, me Simei; 39 me Selemia, me Nathana, me Adaia; 40 me Makenadebai, me Sasai, me Sarai; 41 me Azareela, me Selemia, me Semaria; 42 me Saluma, me Amaria, me Josefa. 43 Ke haba laku Nebo; Jeiela, me Matathia, me Zabad, me Zebina, me Jadau, me Joela, me Benaia. 44 Haba ödrin hia thithö ödrin e hok ta momo kanyua: ke hu lakon ke je momo.

TUSI NEHEMIA.

HNYIMAKAN 1.

HOFUC ho Nehemia nöku Hakalia. Haba hnyi tehi Kiselu, hnyi huna a twenteiny, ke inya hnyi Susani hnyaban than, 2 me ame o könja Hanani ke liame-keiny mönya me ke je at Juda; me oge me

hnei ödrin ge at Juda tavat ae möt je kolon a hoúbá, me ge Jerusalema. 3 Ke haing-ödrin könja, ka habe, Haba je kolon adre me möt úhedrin hnyi hna bá hnyi ke keihen hnyei eling, me gan hmá vec me hna haikongu ödrin: ke adre hia but kia hna up haginj Jerusalema, k' adre thong degécá

je hlinginy homagöuleny. 4 Ke hnyi ün oge me löng hofuc e, me oge me laba but me tenge, me hmak hnyekuk hnyi ke je bong, me ca han, ke oge me hic hnyi hnyimakan Khongon drany, 5 me ha, ka habe, Inya oge me khöü köu, Iehova, Khongon drany, Khong ae gan hmâ me hnân outen, at ame tuö ühinhnyköu me ibetengiö ködrin tavat adre me hnyok kâu me tuö anyin je hnanyibu: 6 ö u tevehlöng ju ge li hnyikönyâm, me wâ ge li emâkâm, me löng hic hijin athnyabaem, wale oge me hic köu hnyi ün ang hnyi lany me lit, hobi kâu lakon Isaraela a lathnyabaem, ke oge me haimemenâ je hulö anyin lakon Isaraela, waleji öhmun e hia but ânyâ köu: eke, oge me hia but hnyi ânyâ hulö me lap anyi cica. 7 Öhmun e hia but ânyâ hwakecin ae kong hmönyin köu, me ca tuö je hnanyibu, me je hna hûna, me je hna owisa, waleji u je hûna kö Mose a athnyabaem. 8 Ö u ünüküme thö hofuc waleji u je hûna kö Mose a athnyabaem, ka habe, Öbun, ka he ka ânyâ hwakecin ae kong, me oge me he bi nya ka ovesei öbun ka hnyi je hnyei: 9 ke öbun ka he ka hwiö könya me tuö anyik je hnanyibu me ânyâ, eja ke ne adre ne ob' öbun ka hnyi je can hmeledrany, me oge me he ka ükhaçaköu öbun ühebun e, me hum öbun ka hnyi dok waleji oge me üca he ka ip iök hnyin. 10 Ke walang ang lathnyabaem me lakem, waleji u je omelö ge manâm man ae gan, me hnyamâm ae hwege. 11 Than lö, ö u tevehlöng ju ge li hnyikönyâm ka hic hijin athnyabaem, me je hic hijin lathnyabaem, tavat adre me wedrin he ka outen iâm: ke ö u ohnahicâ but athnyabaem hnyi bong ang, me ham kâu me me betenge gan at ang. (Ke inya ke ji at ame khöp utköiö belen than.)

HNHYIMAKAN 2.

KE haba hnyi tehi Nisan, hnyi huna a twentei Aretaseta than, ke e hnyi hnyimakan waina, ke oge me kât waina, me ham ka than. Ke ca bonguk ehac he ka hmak hnyi hnyimakan. 2 Me haba than ame ha könya, ka habe, Ieü ame hmak gan hnyimâkâm, ke u me ca mok bi? wale ae hlöuhlöu hnyekom. Me oge me ot gan hmâ. 3 Me oge me ha ka than, ka habe, E na möt ju than nyiele balua: anyin a ieü ame ca he ka hmak hnyimâkök, ke hnyot ut taun ae hnyin je hon lakamök, ke a an dö je homagöuleny ge meic? 4 Me haba

than ame ha könya, ka habe, Ieü wem! Me oge me hic ka Khongon drany. 5 Ke haingök ka than, ka habe, Ame ne so ka than, ke u je ne he ka betenge ge athnyabaem, me u me he ka kunö nya Juda ai, ka hnyi tanniny je hon lakamök, m' inye he ka op. 6 Haba than ame ha könya, (ke ame tha laba më momo than,) ka habe, Ve ta bonginy ühem? ke ie ün u me he ka o hmetu? Ke so ka than he ka kunö nya; ke oge me thu bonguk kâu. 7 Ke haingök minya ka than, ka habe, Ame ne so ka than, e so he ka ham könya je tusi ka je gavena hnyi ke keihen hoton wagewe, m' ödrin e he ka hnö nya ka he ke ne o but oge me o hnyi Juda; 8 me ke tusi kö Asafa at ame tuö hnyot anyin than, me me he ka ham könya je üö hnân je venyâyiny je homagöuleny uma, me hobi kâu hagin taun, me uma minya oge me he ka dit ka hnyin. Ke haba than ame ham könya, helâ me hnyamen Khong ae so könya. 9 Ke oge me o but ka je gavena hnyi ke keihen hoton wagewe, me ham ködrin je tusi anyin than. Ke haba than ame hia hut tha kunö nya me je taben vat me tavat tabö hors. 10 Ke a löng ut Sanabalata at Horono, me Tobia a athnyaba, a at Amona, me ödrü me vec gan hmâ anyin ame o but at he ka elâm so hobi kâu lakon Isaraela. 11 Ke oge me o but hnyi Jerusalema me laba eling hnyi kun ta bong. 12 Ke öhmun e todrö hnyi hnyinghet, tha inya me keihen; ke oge me ca thumeto ke at ge ünyi a ip Khong eü hnyekuk he ka ânyâ hobi kâu Jerusalema: ke ba meno unyik, ke so bi meno thibi oge me tabâ. 13 Ke oge me he but hnyi hnyinghet, k' oge me gethen hnyi homagöuleny e hnyi hnyigöulen bucen cicö pupuainy köiö tanimo, me homagöuleny ta tet, me wâ hna up veto hnyi Jerusalema adre kia, me je hlinginy homagöuleny a aü but ge meic. 14 Ke oge me he ka hnyi homagöuleny pupua me an belen than: ke ba gethen deny meno oge me tabâ. 15 Me oge me ölö hnyi hnyinghet hnyi wagewe, me wâ hna up hak; ke oge me hwiö, me dit hnyi getheniny homagöuleny e hnyi hnyigöulen bucen, me hmetu eling. 16 Ke ca khana tavat musi dok oge mwi hnyin, me hnök hna ânyâ; ke oge me tiga ca thumeto at Juda me tavat bihut, me je than, me tavat musi, me je kolon tavat adre me huliwa. 17 Me oge me ha ködrin, ka habe, Öbun e wâ but anyitin hlöuhlöu, wale bi ang a hnyot ut Jerusalema, k' adre

thong ge meic je hlinginy homagöuleny : ai öbun, m' ate me he ka op haginý Jerusalema, m' adre me ca haikongu ötin hmetu bi. 18 Ke oge me thumetu ödrin ge hnyamen Khonguk ae so huk ; heläe minya ge je hofuc hwan than waleji e ame ha könya. Me ödrin e ha, ka habe, H' ötin ka op. Me ödrin e sihwegiä je hnyamödrin ka hnyi huliwa eling ae so. 19 Ke a löng ut Sanebalata at Horono, me Tobia a athnyaba, a at Amona, me Gesem, a at Arabia, me ödrin e hlum' öhmun, me hü-köti öhmun, me haingödrin, ka habe, Ie ünyi ang öbun e änya? hawa öbun e thu musi anyin than? 20 Me oge me thu ködrin, me ha, ka habe, Ame he Khongon drany ka ohnahici öhmun ; anyin a wale öhmun e he, a lathnyabainy, ka todrö me op: ke ba jekhöübun, me musi, me hnän önykümeä hnyi Jerusalema.

HNÝIMAKAN 3.

ME haba Eliasiba at bihut ae beönuame je liamekeiny mä a tavat bihut, ödrin e todrö me op homagöuleny mamoe ; me ödrin e okabä e, me otilä je hlinginy, ke ne o but ka hnyi hnabä hnyi Mea ödrin e okabä e, me ke ne o but hnyi hnabä hnyi Hananel. 2 Ke haba at Jeriko ödrin e op ütangköu mä. Ke haba Zakuri nöku Imeri ame op ütangköu mödrin. 3 Ke haba je laku Hasenaa ödrin e op homagöuleny je wä ; ödrin e ip je venyäiny, me otilä je hlinginy hwanumen, me je läkiny, me je ohmäiny. 4 Ke haba Meremoth, nöku Uria, nöku Koz, ame op ütangköu mödrin. Ke haba Mesulama, nöku Berekia, nöku Mesezabel ame op ütangköu mödrin. Ke haba Zadoka nöku Baana ame op ütangköu mödrin. 5 Ke haba at Tekoa ödrin e op ütangköu mödrin ; ke ame ca hadru' ödrin je tuhödrin ge huliwa anyin tuhödrin. 6 Ke haba Jehoiada nöku Pasea, me Mesulama nöku Besodeia, ödrü me änya homagöule a ünyi but ehac ; ödrü me ip je venyäiny, me otilä je hlinginy hwanumen, me je läkiny, me je ohmäiny. 7 Ke haba Melatia at Gibeona, me Jadon at Merono, me at Gibeona, me Mizepa, wale hanen theron anyin gavena hnyi ke keihen hoton wagewe, ödrin e op ütangköu mödrin. 8 Ke haba Uzuela nöku Haraia hanen tavat huliwan gol, ame op ütangköu mä. Ke haba Hanania nokon ke at huliwan ünyi ae bo so, ame op ütangköu mä, ke ödrin e

owhegiä Jerusalema ke ne o but hnyi hna up veto ae lau. 9 Ke haba Refaia nöku Huro at ame musö ke keihen a hafiny Jerusalema, ame op ütangköu mödrin. 10 Ke haba Jedaia nöku Harumaf, ame op ütangköu mödrin cicö umen uma. Ke haba Hatusa nöku Hasabenia ame op ütangköu mä. 11 Haba Malekia nöku Harim, me Hasuba nöku Pahatha-moaba, ödrü me op ke keihen, me tap ae beu göranyai, hnen je meic. 12 Ke haba Saluma nöku Halohe, at ame musö ke keihen a hafiny Jerusalema, ame op ütangköu mä e me lakon je hlu. 13 Ke haba Hanuma me tavat adre me laba hnyi Zanco, ödrin e op homagöuleny hnyi hnyigöulen bucen ; ödrin e op e, me otilä je hlinginy hwanumen, me je läkiny, me je ohmäiny, me wan thauzan je kubit hna up veto, ke ne o but hnyi homagöuleny ta tet. 14 Ke haba Malekia nöku Rekaba, at ame musö ke keihen hnyei wale Bethakerem, e ame op homagöuleny ta tet ; e ame op e, me otilä je hlinginy hwanumen, me je läkiny, me je ohmäiny. 15 Ke haba Saluma nöku Kole-hoz, at ame musö ke keihen hnyei a Mizepa, e ame op homagöuleny köiö ame pupua ; e ame op e, me tube, me otilä hlinginy hwanumen, me je läkiny, me je ohmäiny, me hak vetoiny an Siloa hnyi utkänä iny than, ke ne o but wacüat gethen ka hnyi taun anyi Davita. 16 Ke hwaban dö e, Nehemia nöku Azebuk, at ame musö ke keihen a hafiny Bethe-zur, e ame op ke ne o but hnyi cicö je erkemok anyi Davita, me ke ne o but hnyi uma umen hnyat ae hwege. 17 Ke hwaban dö e at Levi ödrin e op, a Rehüm nöku Bani. Ke haba Hasabia at ame musö ke keihen a hafiny Keila, wale hanymen, e ame op ütangköu mä. 18 Ke hwaban e je liamekeiny mä ödrin e op, a Bavai nöku Henadada, at ame musö ke hafiny Keila. 19 Ke Ezera nöku Jesua at ame musi hnyi Mizepa ame op ütangköu mä, a ke keihen e, cicö gethen ka hnyi uma adre hip omjehen vat hnyin, hnyi kopiny. 20 Ke hwaban e, Baruka nöku Zabai, e ame hwege op ke ke keihen, hwän hnyi kop ke ne o but ka hnyi hwanumen uma umö Eliasiba at bihut ae beönuame. 21 Ke hwaban e, Meremoth, nöku Uria, nöku Koz, ame op ke ke keihen, hwän hnyi hwanumen uma umö Eliasiba ke ne o but ame önuame but ge uma umö Eliasiba. 22 Ke hwaban e me tavat bihut a aten Dok ae Tha Hon, ödrin e op. 23 Ke hwaban e, Beniamina me Hasuba, ödrü me

op cicö umödru uma. Ke hwaban e Azaria nöku Maseia, nöku Anania ame op baten umen uma. 24 Ke hwaban e, Binui nöku Henadada ame op ke keihen, hwan hnyi uma umö Azaria ke ne o but hnyi kopiny, me ke ne o but hnyi bahebet. 25 Haba Palala nöku Uzai ame op, hwân hnyi cicö kopiny, me hnabâ ae silöü hnyi uma ethö umen than, ae hnyi hnyeuleny uma úceat. Ke hwaban e ame op Pedaia nöku Paros. 26 (Ke haba at Nethini me ödrin e laba hnyi Ofela, ke ne o but dok cicö homagöuleny köiö hnyi hnyimakan e deiö, me hnabâ ame silöü.) 27 Hwaban e, at Tekoa ödrin e op ke keihen, cicö hnabâ ae gan ame silöü ke ne o but hnyi hna up veto hnyi Ofela. 28 Haba tavat bihut ödrin e ve op cicö umödrin je uma hwân hnyi hon homagöuleny hors. 29 Hwabödrin dö, me ame op Zadoka nöku Imer, cicö umen uma. Ke hwaban e, ame op Semaia nöku Sekania, at ame tuö homagöule e deiö. 30 Ke hwaban e, ame op Hanania nöku Selemia, me Hanuna nöku Zalafa a siksiny, ke ke keihen. Hwaban e ame op Mesulama nöku Berekia cicö hnyeuleny. 31 Hwaban e, Malekia, hanen hnyat huliwan gol, ame op ke ne o but hnyi uma umen at Nethini, me tavat úcü, cicö homagöulei Mifekad, me ke ne o but hnyi gethen ame he ka hnyi bahebet. 32 Ke haba hnyi wanben gethen ame he ka hnyi bahebet me homagöuleny mamoe ame op hnyat huliwan gol ; me hnyat úcü.

HNYIMAKAN 4.

KE a löng ut Sanebalata a öhmun e op hak, me e ame hmönyin, me hmönyin gan hmâ, me hluma at Juda. 2 Me e ame fuc hnyi hnyimakan je liamekeiny mä, me utbavat anyin at Samaria, me ha, ka habe, Ieu, ame ânyâ at Juda ang a ödrin mat? hawa ödrin e he ka ohwegi ödrin bi? ödrin e he ka bi hut? ödrin e he ka umo hnyi bong a khaca? hawa ödrin e he ka oâ je veto únyi hnyi je hna khöü ve ta únyi waleji adre thong? 3 Ke e unyin Tobia, at Amona, me e ame ha, ka habe, Haba hnödrin hna op ame ne ölö thö alope, me ame he ka kölu but anyidrin hak veto. 4 Khonguhmun lö, löng ju, anyin adre me höci öhmun : ke ohmeto ju hnödrin hna úhaikonguny ka hnyi hon je bödrin bi, me hn' ödrin m' adre me sei ödrin hnyi ke hnyeie adre me hom hwenbödrin : 5 ke ca he ka tube anyidrin monu, ke ca he ka kot degecâ

anyidrin hulö hnyi hnyimákâm : anyin a ödrin e ohmönyini u hnyi hnyimakan tavat adre op veto. 6 Me öhmun e op hak ; ke adre úhújâköüâ hna up hagin hia ke ne o but hnyi hafiny ibeüen görany : anyin a tavat ödrin e huliwa únyi eü hnyi hnyok.

7 Ke a löng ut Sanebalata, me Tobia, me at Arabia, me Amona, me Asedoda, a e görany jut hna up hagin Yerusalem, ke adre okhötâ je dok ae hmouca, me ödrin e hmönyidrin gan hmâ ; 8 me ödrin e tha ip hnân, ödrin hia he ka vat hnyi Yerusalem, m' adre me ovheli ödrin eling. 9 Ke öhmun e hic ka Khonguhmun me otilâ tavat ka tu' ödrin hnyi lany me lit, gadrin. 10 Ke haba at Juda ödrin e ha, ka habe, E úhnyü-kong biju hwegien tavat sukhöünâ ta je únyi, ke gan hmâ thatúnyi ; me me ca khan' ötin he ka op hak. 11 Ke haba je iwahnaihmöny möhmun ödrin e ha, ka habe, Ame ca he ka khan' ödrin me wâ, ke ne o but ötin e o hnyi wanbödrin, me hling' ödrin, me bi obiny huliwa. 12 Ke ame o but at Juda hnyat adre me laba hakekenyi ödrin, me olibenyita ha köhmun hnyi je dok hia, ka habe, Hamöbun he ka hmetu köhmun. 13 Waleling me oge me ip tavat hnyi je dok ae hnyikânâ hoton hak, me hnyi je dok ae lau, oge me ip ödrin hoton anyidrin je lap, a tha ödrin me anyidrin je hele vat, me je ö, me je cafana. 14 Me oge me wâ, me tot, me ha ka je than me hnyat musi, me je kolon tavat, ka habe, Ca he öbun ka out' ödrin : únykúme ju ka Than, at ae gan me hnân outen, ke he th' öbun ka vat hobi kâu je liamekeiny möbun, me lakubun obaga me wahlu, me laöiöbun me umöbun je uma. 15 Ke a löng ut ta je iwahnaihmöny möhmun a ga khan' öhmun dut, ke a g' ame hia but Khong oúnyibaúâ anyidrin úhnenamö, me öhmun e ve hmetu hia ka hnyi hna up hak ka hnyi anyihmun huliwa. 16 Ke hwân hnyi bong eling, me haba hafiny lathnyabaik ödrin e hnyi ânyâ huliwa, ke haba ke haf ödrin e hom je ö, me je bec, me je cafana, me je úkhaüen vat ; k' ame laba hnyat musi hnyi hoton lap anyi Juda hia. 17 Haba je hnyat ödrin e op hak me tavat sukhöünâ ta je únyi ödrin ka ve kap he ka vadren, me ödrin e ve ânyâ huliwa ge hnyam a khaca, me hom omjehen vat ge ke hnyam ; 18 ke ödrin e ve op, k' adre ve ohmâ anyidrin je hele vat hnyi je jevadrin, k' ödrin e op helâe. Ke haba at ame tûö trutru ame laba unyik. 19 Ke oge me ha ka je than, me tavat musi, me je

kolon tavat, ka habe, E gan hmâ me lau huliwa, k'ötin e úsákáúö hon hak, ke at me keat : 20 ke haba hnyi je dok hia öbun ka he ka löng hwan trutru hnyin, me öbun e he ka he but köhmun kâ ling; ame he Khongutin ka vat hobi kötin. 21 Helâe öhmun e ânyâ huliwa : haba haf gadrin ödrin e hom je ö hwân hnyi haolany ke ne o but ame manen je okhú. 22 Ke haba khaca, oge me ha ka tavat, ka habe, Hamen tavat hia me lathnyabaidrin he ka mokut hnyin Jerusalema, me tu' ötin hnyi hnyinghet, k' adre me he ka huliwa hnyi lany. 23 Ke haba inya me je liamekeiny mönya, me lathnyabaik, me tavat tue, tavat adre me he hotuk, me öhmun e ca hnyi uny anyihmun je úkhaú, k' ödrin hia ödrin e seköio me je omjehen vat.

HNYIMAKAN 5.

KE ame kú gan hmâ ütengien tavat, me je laöiödrin ge je liamekeiny mödrin a at Juda. 2 Anyin ae hu gadrin tavat ödrin e ha, ka habe, Öhmun se hia öhmun me je lakuhmun obaga me wahu, hn' öhmun ju he ka hom hwit, m' öhmun e han me möt. 3 Ke haingen keihen, ka habe, Öhmun e tiga böhmun ka úco je ihmun, me ihmun je hnyei vine, me umöhmun je uma : e so öhmun e hom hwit, can hmiâ. 4 Ke haingen keihen, ka habe, Öhmun e hia but mē sumâtâ mone hnân bi fat ka than hwaban ihmun je utkânâ me ihmun je hnyei vine. 5 Ke walang ang haba je unyihmun e úcú me unyin je liamekeiny möhmun, me je lakuhmun e úcú me je lakudrin : ke wâ bi öhmun e ham lakuhmun obaga me wahu hnân lathnyaba, ke adre hia but hom keihen lakuhmun je hlu hnân bi athnyaba : ke ba manihmun he ka thawâ ; anyin ae unyin keihen bi ihmun je utkânâ, me ihmun je hnyei vine. 6 Ke e gan hmâ anyik hmönyin, hnyi ün oge me löng ütengiödrin me hofuc eling. 7 Me oge me úsabö eú'hnyi hnyekuk, me ou je than, me tavat musi, me ha ködrin, ka habe, Öbun e mē ve ham únyi ka je liamekeiny möbun hnân heleú troban. Ke oge me otilâ úkhacaköu ae gan hmâ ködrin. 8 Me oge me ha ködrin, ka habe, Öhmun e úco hmetu je liamekeiny möhmun a at Juda, tavat adre úco ka aten ke je hnyei, hoton hnöhmun hna hu ; hawa, öbun e ka he bi ka úco je liamekeiny möbun, ke adre me he ka úcú ödrin köhmun ? Me ödrin e

laba hnyibú, me ca wâ ke únyi hnân thu. 9 Haingök minya, ka habe, E ca so únyi e öbun e ânyâ ; hawa, öbun e ca he ka he me outen Khongutin, wâ e nye haikongoâ hnen je wanaithila a je iwahnaihmiöny mötin ? 10 Ke inya minya, me je liamekeiny mönya me lathnyabaik, öhmun e mē ham ködrin mone me hwit hnân heleú troban, Ö ötin a degec ut ling he ka mē ham hnân heleú troban. 11 Öbun na ham hmeto ködrin hnyi bong ang idrin je utkânâ, me idrin je hnyei vine, me idrin je hnyei elaiö, me umödrin je uma, me ke keihen a hadediny mone, me hwit, me waina, me wakaco, waleji öbun e hom gadrin. 12 Me ödrin e ha, ka habe, Öhmun e he ka ham hmetu ke adre me ca he ka hnei hwaban gadrin ; öhmun e he ka ânyâ helâ me hnâm hna ha. Me oge me hawâ tavat bihut, me kun' ödrin he ha khemanyin a ödrin e he ka ânyâ helâ me hofuc eling. 13 Ke oge me jijingâ manoiny úkhaúk, me ha, ka habe, Ame he Khong ka jijingâ degecâ tavat hia adre me ca ohwâdâ hofuc ang, únyi hnyi umödrin je uma, me anyidrin je huliwa ; e so adre me he ka jijing' ödrin helâe, me otheduocâ. Me ame ha úkhacaköu hia, ka habe, Amen, k' adre me oganö Iehova. Me haba tavat ödrin e ânyâ hoton hofuc eling. 14 Ke haba khaca, hwân hnyi ün adre me otilö nya he ka gavena ködrin hnyi hnyei Juda, hwân hnyi huna a twente ke ne o but hnyi huna a thöte tui Aretaseta than, wale twelv je huna, me haba inya me je liamekeiny mönya öhmun e ca an an gavena. 15 Ke haba je gavena ehac, ödrin e ohmakâ tavat, k' ödrin e hom únyi gadrin jeú me waina, me fâte je sekel sileva ; eke, ke lathnyabaidrin minya ödrin e muso tavat : ke oge me ca ânyâ helâe, anyin a iny outen Khong. 16 Eke, oge me hnyi hanen huliwan hak veto ang, ke öhmun e ca úcú hnyei : k' ame úkhacaköu eling lathnyabaik hia ka hnyi huliwa. 17 Ke haba khaca ame labö han hnyi anyik laulau at Juda me hnyat musi a wan haded ke fifte, ke ca ha bi ge aten ke je hnyei adre me he köhmun úhedrin hnyi je hnyei igigili öhmun. 18 Ke haba ta je únyi adre me penapena hnyi ke bong me ke bong, me, khaca bolok, ke siks ta mamoe adre me úca ; ke adre me penapena hobi könya minya je meno ame gâ, ke haba hnyi je bong a ten adre me hip waina ae ve bongon ; ke so bi hnyi ta je únyi hia eling oge me ca úkhünöng he ka hom an gavena, anyin adre me ohmakâ

tavat ang ge huliwa. 19 Khonguk lö, únykúmi nya ju m' inya hnahic, e úcú me ta je únyi hia wale oge me ányá ka tavat ang.

HNHYIMAKAN 6.

KE a löng ut Sanebalata, me Tobia, me Gesem, at Arabia, me je kolon a je iwahnaihmióny a oge hia but op hak, ke ba hmetu dok ae hmouca hnyin; (ke haba hnyi úen eling iny tiga ca otilá le hlinginy hnyi je homagöule;) 2 haba Sanebalata me Gesem ödru me úkhúnöng kõnya me ha, ka habe, Ötin e he ka iouny hnyi ke taun hnyi hnyigöulen bucen Ono. Ke ödrin e únykúme he ka okongu nya. 3 Me oge me kuná ködrin úthumetu he ka ha, ka habe, Inya oge me ányá huliwa ae gan hmá, ke ca khanö nya he ka he: anyin a iéú adre me he ka ip huliwa, me hna degecá, me inye he but köbun? 4 Ke ödrin e ovak úkhúnöng kõnya heláe; ke oge me thu bala ködrin heláe. 5 Me ame othabúng Sanebalata kuná bala kõnya heláe lathnyabainy, me tusi adre ca ohmá hnyi hnyamen; 6 adre sihnalimen hnyin, ka kabe, Adre me löng ut hnyi ta je hnyei, ke haba khaca ame ha Gesem a u me únykúme me at Juda he ka thu musi; anyin a wale u me op hak: ke u me bewem he ka tuhödrin helá me hna ha. 7 Ke u je hia but otilá je perofeta he ka khetá hofuc gam hnyi Jerusalema, me ha, ka habe, E hu than dut hnyi Juda: ke walang adre me he ka thumeto than helá me hna ha. Ke walang aiö u me ötin e he ka úhnenamö. 8 Me oge me úkhúnöng káu me ha, ka habe, E ba únyi helá me hnám hna ha, ke u je sit hofuc únyi hnyi hnyekom bi. 9 Anyin a ödrin hia thithö ödrin e beöti öhmun haingödrin ka habe, Ame he ka mat je hnyamödrin hnyi huliwa, m' adre me ca ányá bi. Ke walang Khong lö, owhegiá thö li hnyamök.

10 Ke o ge me he ka hnyi uma umö Semaia, nöku Delaia, nöku Mehetabela, wale at adre thelöng hwanumen; me e ame ha, ka habe, Ötu he ka úkhacaköu hnyi uma umen Khong, hnyin uma kap, me hlöng je hwanumen uma kap: anyin a ödrin e he ka he jem he ka hlingö u; eke, hnyi hnyinget ödrin e he ka he jem he ka hlingö u. 11 Ke haingök, ka habe, Ame he at a helá mönya ka kec? ke ewa at ae úcú mönya ame he ka kec ka hnyin uma

kap he ka omelö e bi? Oge me ca he ka kec ka hnyin. 12 Ke wá bi, oge me wáhmakhmetoá a ga ca kuná e Khong: ke e ame ha baúá hofuc hwan perofeta e gak: anyin a Tobia, me Sanebalata ödru me bi hwaban káu. 13 Anyin a wale adre me bi hwaban káu me inye ot ju, me ányá heláe, me inye kong dö, me me hu gadrin únyi hnán haikongu nya, m' adre me he ka oúhnyúkongu nya. 14 Khong lö, únykúme ju kö Tobia, me Sanebalata helá me anyidru je huliwa ang, me kö Noadia perofeta momo, me je kolon je perofeta hnyat ödrin e besoti nya.

15 Ke adre me umo up haginy hnyi bong a twente faiviny tehi Elul, hnyi je bong a fífte tu. 16 Ke a long ut je iwahnaihmióny möhmun hia, haba ta je hnyei hia igigili öhmun adre me ot me hmak hmönyin: anyin adre me wáhmakhmeto a g' adre ányá huliwa e ge Khongutin. 17 Ke hnyi úen e haba je than Juda ödrin e kuná anyidrin je tusi ae se kö Tobia, ke haba Tobia ame kuná je tusi ae se ködrin. 18 Anyin ae se hia tavat hnyi Juda adre me khemanyin káu, anyin a e úngu Sekania nöku Ara; ke haba Johanana a nokon ame hom hlu nöku Mesulama nöku Berekia. 19 Ke haba hnyi hnyimakök me ödrin e ha hwakecin ae so, me hom káu hok je hofuc. Ke haba Tobia ame kuná je tusi he ka ooti nya.

HNHYIMAKAN 7.

KE haba hnyi úen adre hia but op hak, ke oge hia but otila je hlinginy hwanuma, k' adre hia but otilá tavat khumöng me at Levi, 2 me oge me kú Hanani liamekeiny mönya, me Hanania at ame muso hhabá, he ka musi hnyi Jerusalema: anyin a e at ae wisa, k' ame ti outen Khong hon tavat ae se hia. 3 Ke oge me ha ködru, ka habe, Ca he öbu ka khöng je homagöuleny Jerusalema ke ne o but ame kahwa but seúnö; ke adre me he ka hlöng je hwanuma me ohmá hmetu k' ödrin e tiga hmáká: me otilá tavat adre me laba hnyi Jerusalema hnán tavat tue hnyi anyidrin je hmak, ve cicö umödrin je uma. 4 Ke ame lau me gan hmá taun: ke wakhalet ut tavat hnyin, ke adre me tiga ca op je uma. 5 Ke haba Khonguk ame ip eú hnyi hnyekuk he ka úkhacaköuá ta je than, me tavat musi, me tavat, m' adre me he ka sihnalimidrin gaga. Ke oge me wá tusi at ame omanená döiny tavat adre me bödra ka

o ang, ke oge me wâ hna sihnalimen hnyin, ka habe ; 6 walang tavat aten hnyei, tavat adre me he but ûhedrin hnyi hna bâ, tavat adre me hom, waleji a hom Nebukaneza than Babulona, ke adre me hmetu Jerusalema ai me Juda, ka hnyi anyidrin je taun ; 7 tavat adre me tha o me Zerubabela, Jesua, Nehemia, Azaria, Raamia, Nahamani, Modikai, Bilesan, Misespereth, Bigevai, Nehum, Baana. Haba ûseiny at Isaraela : 8 je laku Paros, ôdrin tu thauzan wan haded ke sevente tu. 9 Je laku Sefata, ôdrin theri haded ke sevente tu. 10 Je laku Ara, ôdrin siks haded ke fite tu. 11 Je laku Pahatha-moaba, je laku Jesua me Joab, ôdrin tu thauzan eit haded ke eit. 12 Je laku Elama, ôdrin wan thauzan tu haded ke fite foa. 13 Je laku Zatu, ôdrin eit haded ke fâte faiv. 14 Je laku Zakai, ôdrin seven haded ke siks. 15 Je laku Binui, ôdrin siks haded ke fâte eit. 16 Je laku Bebai, ôdrin siks haded ke twente eit. 17 Je laku Azegada, ôdrin tu thauzan theri haded ke twente tu. 18 Je laku Adonikama, ôdrin siks haded ke siks seven. 19 Je laku Bigevai, ôdrin tu thauzan ke siks seven. 20 Je laku Adin, ôdrin siks haded ke fite faiv. 21 Je laku Atera, ûnyi ga Hezekia, ôdrin nainte eit. 22 Je laku Hasum, ôdrin theri haded ke twente eit. 23 Je laku Bezai, ôdrin theri haded ke twente foa. 24 Je laku Harif, ôdrin wan haded ke twelv. 25 Je laku Gibeona ôdrin nainte faiv. 26 At Bethelasma me Netofa, ôdrin wan haded ke eite eit. 27 At Anathoth, ôdrin wan haded ke twente eit. 28 At Beth-azemaveth, ôdrin fâte tu. 29 At Kiriatha-jarim, me Kefira, me Berotha, ôdrin seven haded ke fâte theri. 30 At Rama me Geba, ôdrin siks haded ke twente wan. 31 At Mikemas, ôdrin wan haded ke twente tu. 32 At Beth-ela me Ai, ôdrin wan haded ke twente theri. 33 Je aten ke Nebo, ôdrin fite tu. 34 Je lakon ke Elama, ôdrin wan thauzan tu haded ke fite foa. 35 Je laku Harim, ôdrin theri haded ke twente. 36 Je laku Jeriko, ôdrin theri haded ke fâte faiv. 37 Je laku Lod, me Hadid, me Ono, ôdrin seven haded ke twente wan. 38 Je laku Senaa, ôdrin theri thauzan nain haded ke thôte. 39 Tavat bihut : je laku Jedaia, tavat hanen lap anyi Jesua, ôdrin nain haded ke sevente theri. 40 Je laku Imer, ôdrin wan thauzan ke fite tu. 41 Je laku Pasur, ôdrin wan thauzan tu haded

ke fâte seven. 42 Je laku Harim, ôdrin wan thauzan ke seventin. 43 At Levi : je laku Jesua, me Kademiel je laku Hodavia, ôdrin sevente foa. 44 Tavat khumông : je laku Asafa, ôdrin wan haded ke fâte eit. 45 Tavat tuô hwanuma : je laku Saluma, je laku Atera, je laku Talemon, je laku Akub, je laku Hatita, je laku Sobai, ôdrin wan haded ke thôte eit. 46 At Nethini : je laku Ziha, je laku Hasufa, je laku Tabaoth ; 47 je laku Keros, je laku Sia, je laku Padona ; 48 je laku Lebana, je laku Hagaba, je laku Salemai ; 49 je laku Hanan, je laku Gidel, je laku Gaba ; 50 je laku Reaia, je laku Rezina, je laku Nekoda ; 51 je laku Gozam, je laku Uza, je laku Pasea ; 52 je laku Besai, je laku Meunim, je laku Nefusim ; 53 je laku Bakebuk, je laku Hakufa, je laku Harehur ; 54 je laku Bazeluth, je laku Mehida, je laku Haresa ; 55 je laku Barekos, je laku Sisera, je laku Tama ; 56 je laku Nezia, je laku Hatifa. 57 Je lakon lathnyabai Solomona : je laku Sotai, je laku Sofereth ; je laku Perida ; 58 je laku Jaala, je laku Darekon, je laku Gidel ; 59 je laku Sefata, je laku Hatil, je laku Pokerethe-hazebaim, je laku Amona. 60 At Nethini hia, me je lakon lathnyabai Solomona, ôdrin theri haded ke nainte tu. 61 Ke walang tavat adre me he ûhedrin Tele-mela, me Teleharsa, me Kerubi, me Adan, me Imer : ke ca khan' ôdrin bi he ka omanenâ lap anyin lakamôdrin, me mâtrânidrin, ôdrin e ne at Isaraela la : 62 je laku Delaia, je laku Tobia, je laku Nekoda, ôdrin siks haded ke fâte tu. 63 Me keihen tavat bihut : je laku Habaia, je laku Koz, je laku Bazilai, at ame hom ke momo nôku Bazilai at Gileada, me adre me hawâ e hoton iôdrin. 64 Haba tavat eling ôdrin e elâm hna sihnalimidrin unyin je hnyat adre sihnalimen anyidrin je dô, ke hia bi : anyin a wale adre me haikongu ôdrin, me ob' ôdrin hnyi hanyen bi hut. 65 Ke haba at musi ame ha ködrin, a ôdrin e ca he ka hnyi an je ûnyi ae ti kap, ke ne o but ame tot at bihut me Urim me Thumim. 66 Haba ûkxacakou hia, ôdrin fâte tu thauzan theri haded ke siks. 67 me lathnyabaidrin obaga me omomo, ôdrin seven thauzan theri haded ke thôte seven : ke e unyidrin tavat khumông obaga me omomo, ôdrin tu haded ke fate faiv. 68 Ke haledrin ta je hors, seven haded ke thôte siks ; haledrin je miul, tu haded ke fâte faiv ; 69 haledrin

je kamela, foa haded ke thöte faiv ; je asina, siks thauzan seven haded ke twente. 70 Ke haba ke je kamen ae beönua ödrin e ham hobi kâu huliwa. Haba gavena ame ham ka hnyi tang omjeü wan thauzan je dareki gol, ke fite je kaia, ke faiv haded ke thöte je úkhaüen bi hut. 71 Ke haba ke je kamen ae beönua, ödrin e ham ka hnyi tang omjeü hnân huliwa, twente thauzan je dareki gol, ke tu thauzan tu haded je mina sileva. 72 Ke haba hna ham hnen kolon tavat, me, twente thauzan je dareki gol, ke tu thauzan je mina sileva, ke sikste seven je úkhaüen bi hut. 73 Ke haba tavat bihut, me at Levi, me tavat tuö hwanuma, me tavat khumöng, me keihen tavat, me at Nethlini, me at Isaraela hia, me, ödrin e ve labā anyidrin je taun.

Ke ame o but tehi a seveniny, me haba at Isaraela ödrin e laba hnyi anyidrin ta je taun.

HNYIMAKAN 8.

ME haba tavat hia thithö ödrin e úkhacaköu helâ me at a khaca hnyi dok ae lau cicö homagöuleny an ; ke ödrin e ha kö Ezera at sihnalimen he ka hom tusiny hnanyibu anyi Mose, waleji a hûna Iehova ka at Isaraela. 2 Me haba Ezera at bihut ame hom hnanyibu ka hnyi hnyimakan úkhacaköu obaga me omomo, me tavat hia ae khan' ödra he ka lönghmakhmeto, hnyi bong a bâniny tehi a seveniny. 3 Me e ame aü tusi e, hnyi dok ae lau cicö homagöuleny an, hwân hnyi haolany ke ne o but hnyi jebigö, hnyi hnyimakan obaga me omomo, me tavat ae khan' ödra he ka lönghmakhmeto ; ke ame tevehlöng je hnyikönyen tavat ka hnyi tusiny hnanyibu. 4 Ke haba Ezera at sihnalimen ame tot hon tap utö, waleji adre me tibet hobi kâu huliwa eling ; ke haba Matathia ame tot unyin, me Sema, me Anaia, me Uria, me Hilekia, me Maseia, hnyi ke keihen a metân ; ke ödrin bi hnyi ke keihen a meny, me Pedaia, me Misaela, me Malekia, me Hasum, me Hasebadana, me Zakaria, me Mesulama. 5 Ke haba Ezera ame ulolo tusi hnyi hnyimakan tavat hia ; (anyin a e ethö hon tavat hia ;) ke a hia but ulolo e, me ame tha todrö tavat hia : 6 ke Ezera ame haisoi Iehova Khong ae gan. Me haingen tavat hia, ka habe, Amen, Amen, me hai göranyai je hnyamödrin ; ke ödrin e nom ju hnyikânâi me khudrung kö

Iehova, me hnyimaködrin hnyikânâi. 7 Ke haba Jesua, me Bani, me Serebia, me Jamina, me Akub, me Sebethai, me Hodia, me Maseia, me Kelita, me Azaria, me Joza-bada, me Hanan, me Pelaia, me at Levi, me ödrin e ometâ tavat hnyi hnanyibu : ke ame ve tot tavat hnyi je hnödrin. 8 Ke ödrin e aü manená tusi hnanyibu anyin Khong ; me ödrin e ha bongon, m' adre me he ka wâ tremângâ hna aü. 9 Ke haba Nehemia a gavena, me Ezera at bihut ke at sihnalimen, me at Levi tavat adre me nâ tavat, me ödrin e ha ka tavat hia, ka habe, Bong ang me kap kö Iehova Khongubun ; ca hmak me tenge. Anyin ame tenge tavat hnyi üen adre me löng hofucin hnanyibu. 10 Ke e ame ha ködrin, ka habe, He th' öbun, an ju pipikhenya me ijem únyi ae senem, me kunâ je jekhöü ka tavat adre me ca penapena hobi kâu : anyin ae kap ka Tuhötin bong ang : ke ca he öbun ka hmak ; anyin a haba tang hwegjöbun me senyin kö Iehova. 11 Me at Levi ödrin e otubwelâ tavat hia, me ha ködrin, ka habe, Laba hnyibü, anyin ae kap bong ang ; ca hmak bi öbun. 12 Ke ame he tavat hia he ka han me ic, me kunâ je jekhöu, me ti senyin, anyin a ödrin e wâhmakhmetoâ je hofuc adre me omanená ködrin.

13 Ke haba hnyi bong a loiny ame úkhacaköu je kamen ae beönua ge tavat hia, me tavat bihut, me at Levi, kö Ezera at sihnalimen, m' adre me he ka tevehlöng hofucin hnanyibu. 14 Ke ödrin e wâ but hna sihnalimen hnyi hnanyibu waleji a hûna Iehova a deny Mose a g' ame he lakon Isaraela ka laba hunuma hnyi bijeü hnyi tehi a seveniny : 15 me hamödrin he ka omanená hnyi anyidrin je taun hia thithö, me Jerusalema, ka habe, He thö ka hnyi bucen, me hom je vheiny elaiö, me je vheiny elaiöiny hnyot, me je vheiny adasi, me je lan pama, me vheiny je uö ae gan, hnân he ka ányâ je uma menâ, helâ me hna sihnalimen. 16 Me ame he but tavat, me hom, me ve ányâ hobi ködrin bi je uma menâ ethö hon ban umödrin je uma, me hnyi je hnyabadrin, me je hnyaban uma umen Khong, me hnyi dok ae lau hnyi homagöuleny an, me hnyi dok ae lau hnyi homagöule Eferaima. 17 Haba úkhacaköu hia tavat adre me hmetu úheny hnyi hna bâ, adre me ányâ je uma menâ, me labâ je uma menâ : anyin a lakon Isaraela ödrin e ca ányâ helâe hwân hnyi bong bongu Josua

nöku Nuna ke ne o but hnyi bong ang. Ke e ti gan senyin. 18 Me e ame aú tusi hnanyibu anyin Khong hnyi ke bong me ke bong, hwán hnyi bong a bán ke ne o but hnyi bong a biliny. Me ödrin e tuö bijéú hnyi je bong a seven; ke haba hnyi bong a eitiny e hu úkhacaköu ae únyi hnathu, hoton hna húna.

HNHYIMAKAN 9.

KE haba hnyi bong a twente foainy tehi ang ame úkhacaköu thö lakon Isaraela me ca han, me mano ae gan nân, me konâm je bödrin ge kânâ. 2 Ke haba lakon Isaraela ödrin e úsákâú me je atkanyua hia, me útitilen me haimemenâ anyidrin je hulö, me je monu anyin lakamödrin. 3 Ke ödrin e todrö hnyi je hnödrin, me aú tusi hnanyibu anyi Iehova Khongudrin hnyi ke keihen a vakiny bong; ke haba hnyi ke ke keihen ödrin e omanenö hulö, me khudrung kö Iehova Khongudrin. 4 Ke haba Jesua, me Bani, me Kademiél, me Sebania, me Buni, me Serebia, me Bani, me Kenani, ödrin e tot hon wacúat anyin at Levi, me hongot göranyai kö Iehova Khongudrin. 5 Me ame ha at Levi, jia Jesua, me Kademiél, me Bani, me Hasabenia, me Serebia, me Hodia, me Sebania, me Pethaia, ka habe, Todr' öbun me oganö Iehova Khongubun nyiele balua: me so adre me haisoá iam ae hmanenang, waleji adre obeönua hon hna haisoá me oganá hia. 6 U thibi Iehova, a hake u; u je op drany, wale dranyin ta je drany, me je únyi hia hnyin, me hmeledrany me ta je únyi hia hnyin, je köiö hia me ta je únyi hia hnyin, ke u me tuö hia; ke ame khudrung köu ta je únyi hia hnyi drany. 7 U thibi Iehova Khong, wale at ame úcö Aberama, me hom e úheny Ure hnyi Kaledaia, me hwenyi ien Aberahama; 8 ke u je wá hnyekon ae wisa but hnyi hnyimakâm, me u je úhilihnykôu mé he ka ham káu hnyei iny at Kanana, me Heth, me Amora, me Perizi, me Jebusi, me Girigasa, he ka ham ka je matrâniny, me ohwádâ hwám hofuc; anyin a u wisa. 9 Ke u je wá vec anyin lakamöhmun hnyi Aigupito, me löng útengödrin hnyi Köiö ae Dra; 10 me omanenâ je haten me je únyi hnân láia kö Farao me lathnyabainy hia, me aten iny hnyei hia; anyin ae khandö u a ödrin e bi gan ködrin; me u je oganá iam bi, helâ me hnyi bong ang. 11 Ke u je kia luá köiö hnyi hnyimaködrin, m'

ödrin e he hnyi wanben köiö hnyi dok ae mada; ke u je khúâ je iwahnaihmióny mödrin ka hnyi dok ae dit, helâ me veto hnyi köiö ae gan. 12 Ke u je lili ödrin hnyi lany ge úlá ame tot wisa; ke hnyi hnyinghet ge mec ame tot wisa, me me omelami ödrin hnyi gethen ödrin e he ka vheno. 13 Ke u je utut ka hnyi hon bucen Sinai, me úhnenamö mödrin únyi hnyi drany, me ham ködrin je hna owisa ae úcú, me je hnanyibu ae hnathu, me je hna otílâ me hna húna ae so: 14 me omanenâ ködrin ányâm sabath ae kap, me ha ködrin je hna húna, me je hna otílâ, me hnanyibu a deny Mose athnyabaem: 15 me haödrin únyi hnyi drany anyin ödrin e mekihnänem, me oâ köiö únyi hnyi kic anyin ödrin e beic, me húna ködrin he ka he m' ödrin e he ka hu hnyei waleji u je khemanyin he ka ham ködrin. 16 Ke ödrin e bi gan me lakamödrin, me ohwegiâ je nyidrin, me ca löng bi ányâm je hnanyibu, 17 me höcö löng, me ca únykúme ányâm je únyi hnân láia, waleji u je ányâ hnyi wanbödrin; ke ödrin e ohwegiâ je nyidrin, me thu musi me otílâ taben he ka hmetu ka hnyi dok ae uthaluö: ke u thibi Khong at ame beohia hulö, at ae menyik me unöngöt ge ibetengió, e bec he ka hmönyin, ke gan hmâ ányâm ibetengió, me u je ca hna degeci ödrin. 18 Eke, ödrin e ányâ hobi ködrin nokon kau adre me oköia, me ha, ka habe, Walang Khongom, at ame hum u úhem Aigupito, ke ödrin e ányâ je únyi ae gan hnân ohmönnyinâ; 19 ke so bi u je ca hna degeci ödrin hnyi hnyebuba can ányâm ibetengió ae gan hmâ: ke ca hia unyidrin úlá ame tot wisa hnyi lany, he ka lili ödrin eú hnyi gethen; me meic ame tot wisa hnyi hnyinghet he ka omelami ödrin, me omanenâ gethen ödrin e he ka vheno. 20 U je ham ködrin minya hanom ae so he ka n' ödrin, ke u je ca behânâ ányâm mana ka hnyi je hnyimödrin, ke u je habelidrin, anyin a ödrin beic. 21 Eke, fâte je huna u je hat ödrin hnyin hnyi hnyebuba, e ba ke únyi ae hia gadrin; a ca amam bi anyidrin je úkhaú, ke a ca khibi je cadrin. 22 Ke u je ham ködrin je dökhu, me je hnyei, waleji u je khenâ hoton je jekhöúdrin: me ödrin e hu hnyei i Sihona, me hnyei iny than Hesebona, me hnyei i Oga than Basana. 23 Ke u je osehia je lakudrin helâ me je okhúiny drany, me hum ödrin ka hnyi hnyei, waleji u je ha ka lakamödrin, m' ödrin e he ka he ka hnyi he ka hu. 24 Me ame he ka

hnyin je lakon me hu hnyei, ke u je hom úhnyúkongoá hnyi hnyimaködrin at Kanana tavat a idrin hnyei, me hn' ödrin ka hnyi hnyamödrin, tha ödrin me je tuhödrin, me tavat aten hnyei, m' ödrin e he ka ányá wedrin ködrin. 25 Me ödrin e hügúná je taun adre bi haginy, me hnyei ae pipikhenya, me hu je uma ae unöngöt ge ta je únyi ae so hia, me je hna khú an, me je hnyei vine, me je hnyei elai, me je úo ame wa wan ae se hia : me ödrin e han me sekudrin, me ödrin e pipikhenya, me senyiná ányám so ae gan hmá. 26 Ke so bi ödrin e ca úling, ke ödrin e hna degeci u, me hna hotudrin ai ányám hnanyibu, me hlingá ányám je perofeta tavat adre me thaw' ödrin, he ka ohmetu ödrin köu, ke ödrin e oá hmönyin ae gan hmá. 27 Anyin a wale u je hn' ödrin ka hnyi hnyamen je iwahnaihmiöny mödrin, tavat adre me oveci ödrin : ke haba hnyi úen vec ödrin e tenge köu, me u me löng hnyi drany ; ke únyi hnyi ányám betenge ae gan hmá, me u me ham ködrin tavat he ka omeli ödrin únyi hnyi hnyamen je iwahnaihmiöny mödrin. 28 Ke hwaban hnödrin hna laba hnahic ut, me ödrin e ányá hmeto hulö hnyi hnyimákám : anyin a wale u je hna degeci ödrin ka je iwahnaihmiöny mödrin, me me hu musi hudrin : ke so bi hnyi úen ödrin e hmetu, me tenge köu, me u me ling ödrin hnyi drany ; ke u je osehia omeli ödrin hoton ányám betenge ; 29 ke u je thaw' ödrin, m' u me he ka ohmetu ödrin ka hnyi ányám hnanyibu : ke so bi ödrin e bi gan me ca löng bi hnám je hna húna, ke ödrin e monu hnyi hnám je hna owisa, (wale a ne ányá e ke at, me ame he ka möt hnen e,) ke ödrin e beháná li abenyidrin, me ohwegiá je nyidrin, me ca löng bi. 30 Ke se hia je huna u je hokhnyoki ödrin, me thaw' ödrin hnen hanom a deny ányám je perofeta : ke ödrin e ca belöng : anyin a wale u je hn' ödrin ka tavat aten je hnyei. 31 Ke so bi can ányám ibetengiö ae gan, u je ca ti ohi' ödrin, me hna degeci ödrin ; anyin a u Khong ame betenge me menyik. 32 Ke walang ang Khonguhmun lö, at ae gan, ke at ae hwege, a Khong hnán outen, at ame tuö úhihinyköu me ibetengiö, e na ca he ka únyi bau hnyi hnyimákám ta je vec hia ame o köhmun, ka latuhöhmun, me anyihmun je than, me tavat bihut unyihmun, me anyihmun je perofeta, me lakamöhmun, me lakem hia, hwán hnyi bong bongon je than Asuria ke ne o but hnyi bong ang. 33 Ke

so bi u wisa hnyi ta je únyi hia thithö ame o köhmun ; anyin ae wisa hnám hna ányá, ke kong hnöhmun hna ányá : 34 ke haba latuhöhmun, me anyihmun je than, me tavat bihut unyihmun, me lakamöhmun, me ödrin e ca ányá ányám hnanyibu, me ödrin e ca löng hnám je hna húna, me hnám je hna ohnathoa, waleji u je thaw' ödrin hnyin. 35 Anyin a ödrin e ca hia but bi athnyabaem hnyi dökhudrin dökhü, me ányám so ae gan hmá, waleji u je ham ködrin, me hnyi hnyei ae gan me pipikhenya u je ham hnyi hnyimaködrin, ke ödrin e ca hwiö únyi hnyi anyidrin je hna ányá ae kong. 36 Wá ju, öhmun ang lathnyabaem hnyi bong ang, ke haba hnyei waleji u je ham ka lakamöhmun he ka an wan, me soiny, wá bi, öhmun ang a lathnyaba hnyin. 37 Ke ame hwenying gan hmá hobi káu je than waleji u je otílá huhmun can anyihmun je hulö : ke ödrin e musö je unyihmun, me halehmun omeno, hoton wedrin, ke gan hmá vec köhmun. 38 Ke so bi únyi hnyi ta je únyi hia eling öhmun e ányá úhihinyköu ae hnathu, me sihnalimen ; ke haba tuhöhmun, me at Levi unyihmun, me tavat bihut unyihmun, me ödrin e ohmá haten.

HNYIMAKAN 10.

KE walang tavat adre me ohmá haten gadrin, Nehemia gavena nöku Hakkalia, me Zedekia ; 2 ke Seraia, Azaria, Jeremia ; 3 Pasur, Amaria, Malekia ; 4 Hattusa, Sebania, Maluka ; 5 Harim, Meroth, Obadia ; 6 Daniela, Ginethon, Baruka ; 7 Mesulama, Abia, Miámin ; 8 Mazaria, Bilegai, Semaia ; wale tavat bihut. 9 Me at Levi : Jesua, nöku Azania, Binui, hanen je Laku Henadada, Kademiél ; 10 me je liamekeiny mödrin, Sebania, Hodia, Kelita, Pelaia, Hanan ; 11 Mika, Rehoba, Hasabia ; 12 Zakuri, Serebia, Sebania ; 13 Hodia, Bani, Beninu ; 14 Je taben ka tavat : Paros, Pahatha-moaba, Elama, Zatu, Bani ; 15 Buni, Azegada, Bebai ; 16 Adonia, Bigevai, Adin ; 17 Atera, Hezekia, Azura ; 18 Hodia, Hasum, Bezai ; 19 Harif, Anathoth, Nebai ; 20 Magepias, Mesulama, Hezir ; 21 Mesezabel, Zadoka, Jada ; 22 Pelatia, Hanan, Anaia ; 23 Hosea, Hanania, Hasuba ; 24 Halohe, Pilea, Sobek ; 25 Rehum, Hasabena, Maseia ; 26 Abia, Hanan, Anan ; 27 Maluka, Harim, Baana. 28 Me je kolon tavat, tavat bihut, me at

Levi, me tavat tuö hwanuma, me tavat khumöng, me at Nethini, me tavat hia ödrin e hia but úsákâú ödrin bi me tavat aten je hnyei ka hnyi hnanyibu anyin Khong, me je laöiödrin, me lakudrin obaga me wahu, tavat wâhmakhmeto hia, me tavat ae metâ; 29 ke ödrin e kece hmâ ka je liamekeiny mödrin, me anyidrin je taben, me ödrin e tha ânyâ hna khemanyin me ha je manyidrin, he ka vheno hnanyibu anyin Khong, waleji a ham a deny Mose athnyabainy Khong, me he ka tuö me ânyâ je hna huna hia anyi Iehova a Tuhötin, me hnen je hna owisa me hna otilâ; 30 me öhmun e ca he ka ham lakuhmun wahu ka tavat aten hnyei, me ca he ka hom lakudrin wahu hobi kâu lakuhmun obaga: 31 me a ne hom tavat aten hnyei je omjeú me jeú hia hnyi bong sabath hnân úcú, öhmun e ca he ka úcú mödrin hnyi sabath, me ke bong adre okabâ: me öhmun e he ka hna degecâ hnyi huna a seveniny, me ca hnö je hna hok gufa hia. 32 Ke öhmun e otilâ hobi köhmun je hnanyibu, a hamöhmun he ka ve ham ke keihen a kuniny sekel hnyi ke huna me ke huna hobi kâu huliwa hnyi uma umen Khongutin; 33 hobi kâu areto hnân omanená, me hudiny han ae bala bi, me hudiny leú ae bala bi, me je sabath, me je tehi ae teb únyi, me je bijeú adre thu, me je únyi ae kap, me je hudiny hulö hnân bi hwaban mót anyin at Isaraela, me hobi kâu huliwa hia hnyi uma umen Khongutin. 34 Ke öhmun e uglekóbâ, wale tavat bihut, me at Levi, me tavat, únyi ge hudiny utö he ka hom ka hnyi uma umen Khongutin, hoton je lap anyin lakamöhmun, hnyi je üen adre me thu, hnyi ke huna me ke huna, hnân le hon taben hut kö Iehova Khongutin, helâ me hna sihnalimen hnyi hnanyibu: 35 me he ka hom ka hnyi uma umö Iehova wan a bán hnyi kânâ, me je wan úö hia a bán hnyi ke huna me ke huna: 36 helâe minya lakutin je бага a bán, me haletin omeno, helâ me hna sihnalimen hnyi hnanyibu, me je nokon kau a bán, me haletin je mamoe, he ka hom ka hnyi uma umen Khongutin, ka tavat bihut, tavat adre me huliwa hnyi uma umen Khongutin: 37 me ötin e he ka hom anyitin je falawa a bán, me anyitin je hut adre kap göranyai me wan haletin je úö, me waina me wakaco, ka tavat bihut, ka hnyi je hnyeuleny uma umen Khongutin; me je ke keihen a libenyitainy jeüiny könötin kânâ ka at Levi; anyin a haba at Levi ödrin e hom je ke

keihen a libenyitainy hnyi ta je taun hia ötin e belök hnyin. 38 Ke ame he at bihut a mâtârani Arona ka tha e me at Levi, e ka he at Levi ka hom je ke keihen a libenyitainy: k' ame he at Levi ka hom ke keihen a libenyitainy únyi hnyi je ke keihen a libenyitainy ka hnyi uma umen Khongutin, ka hnyi je hnyeule ka hnyin uma omjeú. 39 Ke hamen lakon Isaraela me lakon at Levi he ka hom ka hnyi je hnyeule hudiny hwit, me waina, me wakaco, a eling je kaiainy dok ae kap, me tavat bihut a hnyat bi huliwa, me tavat tuö hwanuma me tavat khumöng: ke ötin e ca he ka degec uma umen Khongutin.

HNYIMAKAN 11.

KE haba je thaniny tavat, me, ödrin e laba hnyi Jerusalema: me haba kolon tavat, me, ödrin e uglekóbâ, he ka hom khaca únyi hnyi je libenyitainy tavat he ka laba hnyi Jerusalema, taun ae kap, k' ame hnen bi je hnyat a nain hnyi ke je taun. 2 Ke ame hahnahicâ je hnyat ödrin e ka hamödrin hmehmela he ka laba hnyi Jerusalema hnen úhacaköu. 3 Ke walang je homakan je ke keihen hnyei, tavat adre me laba hnyi Jerusalema: ke haba hnyi je taun anyin at Juda ödrin e ve laba hnyi idrin je hnyei hnyi anyidrin je taun, at Isaraela, me tavat bihut, me at Levi, me at Nethini, me je lakon lathnyabai Solomona. 4 Ke adre me laba hnyi Jerusalema ke je lakon Juda, me ke je lakon Beniamina. Je laku Juda: Athaia, nöku Uzia, nöku Zakaria, nöku Amaria, nöku Sefata, nöku Mahalaleel, ke je laku Farez; 5 me Maseia, nöku Baruka, nöku Kole-hoz, nöku Hazaaia, nöku Adaia, nöku Joiarib, nöku Zakaria, nokon at Siloni. 6 Haba je laku Farez hia, tavat adre me laba hnyi Jerusalema ödrin foa haded ke sikste eit tavat ae hwege. 7 Ke walang je lakon Beniamina: Salu nöku Mesulama, nöku Joed, nöku Pedaja, nöku Kolaia, nöku Maseia, nöku Ithiela, nöku Jesaia. 8 Ke hwaban dö e, Gebai, Salai, ödrin nain haded ke twente eit. 9 Ke Joela nöku Zikeri at ame tu' ödrin: ke Juda nöku Senua at a loiny hon taun. 10 Ke je at bihut: Jedaia nöku Joiarib, Jakina, 11 Seraia, nöku Hilekia, nöku Mesulama, nöku Zadoka, nöku Meraioth, nöku Ahituba at ame musö uma umen Khong, 12 me je liamekeiny a hnyat adre me ânyâ huliwa

hnyi uma, ödrin eit haded ke twente tu : me Adaia, nöku Jerohama, nöku Pelalia, nöku Amezi, nöku Zakaria, nöku Pasur, nöku Malekia, 13 me je liamekeiny më, je kamen ae beönua ödrin tu haded ke fâte tu : me Amasai, nöku Azareela, nöku Ahazi, nöku Mesilemoth, nöku Imer, 14 me je liamekeiny mödrin tavat ae hwege, ödrin wan haded ke twente eit : ke Zabediela, nöku Hagedolima at ame tu' ödrin. 15 Me ke je at Levi minya : Semaia, nöku Hasuba, nöku Azerikam, nöku Hasabia, nöku Buni ; 16 me Sabetai, me Jozabada, ke li tuhan at Levi, hamödru he ka tuö huliwa hnyi hoton uma umen Khong ; 17 me Matania nöku Mika, nöku Zabedi, nöku Asafa, taben at ame hwân ogânâ hnyi hmi, me Babebukia, at a loiny unyin je liamekeiny më ; me Abeda nöku Samua, nöku Galal, nöku Jeduthun. 18 Haba at Levi hia hnyi taun ae kap, ödrin tu haded ke eite foa. 19 Ke haba tavat tuö hwanuma, Akub, me Talemon, me je liamekeiny mödru, tavat tuö homagöüle, ödrin wan haded ke sevente tu. 20 Ke haba je kolon at Isaraela, tavat bihut, me at Levi, hnyi je taun hia anyin at Juda, hnyi je ve idrin. 21 Ke haba at Nethini, ödrin e laba hnyi Ofela : ke haba Ziha me Gisepa ödru me tuö at Methini. 22 Ke haba homakan at Levi hnyi Jerusalema, me, Uzi, nöku Bani, nöku Hasabia, nöku Matania, nöku Mika, ke je laku Asafa, a tavat khumöng, ke hamödrin he ka tuö huliwa hnyi uma umen Khong. 23 Anyin ae hu hnanyibu hnen than gadrin, a e bala bi jekhon tavat khumöng hnyi ke bong me ke bong. 24 Ke haba Pethaia nöku Mesezabel, hanen laku Zera, nöku Juda, e unyin than hnyi ta je únyi hia hnyi hnye. 25 Ke haba ge je taun ae úhnyúkong me je utkânäiny, me ame laba ke je laku Juda hnyi Kiriath-areba, me je tauniny, me Dibona me je tauniny, me Jekabezal me je tauniny ; 26 me Jesua, me Molada, me Bethepalet ; 27 me Hazarasual, me Bere-seba, me je tauniny, 28 me Zikelag, me Mekona, me je tauniny, 29 me Ene-rimon, me Zorea, me Jamuth ; 30 me Zanoa, me Adulama, me je tauniny, me Lakisa, me je tauniny, me Azeka me je tauniny. Me ödrin e laba, hwân hnyi Bereseba ke ne o but hnyi hnyigöulen bucen Hinon. 31 Ke haba laku Beniamina, ödrin e laba, hwân hnyi Geba, ke ne o but Mikemas, me Aia, me Beth-ela, me je tauniny ; 32 me hnyi Anathoth, me Nob, me Anania ; 33 me

Hazora, me Rama, me Gitaim ; 34 me Hadid, me Zeboim, me Nebalat ; 35 me Lod, me Ono, me hnyigöulen bucen tavat ae metâ huliwa. 36 K' adre me khenâ at Levi hnyi Juda me Beniamina.

HNYIMAKAN 12.

WALANG tavat bihut me at Levi, hnyat adre me tha he me Zerubabela, nöku Sealetiela, me Jesua ; wale Seraia, Jeremia, Ezera ; 2 Amaria, Maluka, Hatusa ; 3 Sekania, Rehun, Meremoth ; 4 Ido, Ginetho, Abia ; 5 Miamin, Maadai, Bilega ; 6 Semaia, Joiarib, Jedaia ; 7 Salu, Amok, Hilekia, Jedaia. Wale je taben tavat bihut me je liamekeiny mödrin hnyi je bong bongu Jesua. 8 Me at Levi minya, wale Jesua, Binui, Kademiel, Serobia, Juda, Matania, at ame vhih khumöng, e me je liamekeiny më. 9 Ke haba Bakebukia, me Uni, li liamekeiny mödrin, ödru e laba, cici ödrin hnyi je hanyen. 10 Ke haba Jesua ame hnöku Joiakim, me Joiakim ame hnöku Eliasiba, ke Eliasiba ame hnöku Jehoiada, 11 ke Jehoiada ame hnöku Jonathana, ke Jonathana ame hnöku Jadua. 12 Ke haba hnyi je bong bongu Joiakim e hu tavat bihut, je kamen ae beönua : únyi ga Seraia, Meraia ; únyi ga Jeremia, Hanania ; 13 únyi ga Ezera, Mesulama ; únyi ga Amaria, Johanana ; 14 únyi ga Meliko, Jonathana : únyi ga Sebania, Josefa ; 15 únyi ga Harim, Adena ; únyi ga Meraioth, Halekia ; 16 únyi ga Ido, Zakaria ; únyi ga Ginethon, Mesulama ; 17 únyi ga Abia, Zikeri ; únya gâ Miamin, únyi ga Moadia, Piletai ; 18 únyi ga Bilega, Samua ; únyi ga Semaia, Jonathana ; 19 únyi ga Joiarib, Matenai ; únya ga Jedaia, Uzi ; 20 únyi ga Salai, Kolai ; únyi ga Amok, Heberu ; 21 únyi ga Hilekia, Hasabia ; únyi ga Jedaia, Nathaniela. 22 Ke haba at Bevi hnyi je bong bongu Eliasiba, Jehoiada, me Johanana, me Jadua, wale adre sihnalimidrin a je kamen ae beönua : me tavat bihut minya hnyi musi anyi Dariu than Peresi. 23 Je laku Levi, je kamen ae beönua, adre me sihnalimidrin hnyi tusi hnân ha je bong, ke ne o but hnyi je bong bongu Johanana, nöku Eliasiba. 24 Ke haba je taben at Levi ; Hasabia, me Serobia, me Jesua nöku Hademiel, me je liamekeiny mödrin cici ödrin, he ka oganâ me ole, hoton hna húna ga Davita aten Khong ke dö cicö ke dö. 25 Haba Matania, me Bakebukia, me Obadia, me Me-

sulama, me Talemon, me Akub, tavat tuö hwanuma, ödrin e tuö homagöuleny uma omjeü. 26 Ke tavat eling hnyi je bong bongu Joakim nöku Jesua, nöku Jozadaka, me hnyi üö Nehemia, at ame musu, me Ezera, at bihut a at sihnalimen.

27 Ke haba hnyi hna okabâ hna up hagin Jerusalem, ödrin e elâm at Levi hnyi anyidrin je taun hia, he ka hum ödrin Jerusalem ai, he ka hnyi okabâ hak me senyin, me ole, me khumöng, ge je simebalo, me je nabeli, me je kitara. 28 Ke haba lakon tavat khumöng ödrin e úkhacaköu únyi hnyi dok ae tha hon igigilö Jerusalem, me je taun anyin at Netofa; 29 me únyi hnyi Bethegilegala, me únyi hnyi je utkânâ anyi Geba, me Azemaveth; anyin a haba at khumöng ödrin e hia but otilâ anyidrin je taun ae úhnyúkong igigilö Jerusalem. 30 Ke haba tavat bihut me at Levi, ödrin e obosi ödrin bi; k' ödrin e obosoa tavat, me je homagöule, me hna up hak veto. 31 Ke oge me hom je than Juda kâ thö ka hnyi hon hna up hak veto hnyi je keihen metâ, ke ne o but ka hnyi homagöuleny ta tet: 32 ke hwabödrin dö ame he but Hosai me hafiny je than Juda, 33 Azaria, Ezera, Mesulama, 34 Juda, Beniamina, Semaia, Jeremia, 35 me ke je lakon tavat bihut a je бага, k' ödrin e hok trutru: Zakaria nöku Jonathana, nöku Semaia, nöku Matania, nöku Mikaila, nöku Zakuri, nöku Asafa; 36 me je liamekeiny mä, a Semaia, me Azareela, me Milalai, me Gilalai, me Maai, me Nathaniela, me Juda, me Hanani, tavat adre me hom je únyikhumöng anyi Davita aten Khong; me Ezera at sihnalimen ame hnyimakan anyidrin bunyen; 37 ke haba hnyi homagöuleny köiö ame pupua, me gethen hnyi hnyimaködrin, ödrin e öliâ wacúatiny taun anyi Davita, hnyi hna öliâ ka hnyi hon hak veto, walethö honuma umö Davita, ke ne o but ka hnyi homagöuleny köiö e deiö. 38 Ke haba dö a loiny tavat ole, me ödrin e he bi he ka úkhanö mödrin, ke inya bi hotudrin tha inya me hafiny tavat ka hnyi hon hak veto, walethö hon tap ae beü göranyai a hnen je meic, ke ne o but hnyi hna up hak veto ae lau: 39 me ethö hon homagöulei Eferaima me homagöule kâú adrem, me homagöuleny ta je wâ, me tap ae beü göranyai anyi Hananel, me tap ae beü göranyai anyi Mea, ke ne o but hnyi homagöuleny mamoe: me ödrin e todrö hnyi homagöuleny una ceat. 40 K' ame tot helâe li döiny hnyat ole hnyi uma umen Khong, k' inya minya, me

hafiny hnyat musu unyik: 41 ke haba tavat bihut, Eliakima, me Maseia, me Miamin, me Mikaila, me Elioenai, me Zakaria, me Hanania, hnyat hok trutru; 42 me Maseia, me Semaia, me Eleazara, me Uzi, me Johanana, me Malekia, me Elama, me Ezer. Ke haba tavat khumöng adre me khumöng göranyai tha ödra me Jezerai at ame tu' ödrin. 43 Ke ödrin e hudo je hut ae gan hnyi bong eling me senyin; anyin a Khong ame osenyini ödrin ge senyin; me je momo me je wanakat minya ödrin e hnyi senyin: me adre me löng hnyi dok ae sâkâú hwan senyin hnyi Jerusalem.

44 Ke adre me otilâ hnyi bong eling tavat hon je hnyeuleny omjeü, me je hut adre kap göranyai, me je wan a bán, me je ke keihen a libenyitainy, m' adre me úkhacaköu kâú únyi hnyi je utkânâiny je taun, je jekhöú hoton hnanyibu hobi kâú tavat bihut me at Levi: anyin a at Juda ödrin e senyin ka tavat bihut me at Levi, tavat huliwa. 45 Ke ödrin e tuö hanyen únyi ge Khongudrin, me hanyen ge hna obosoa, helâe minya tavat khumöng me tavat tuö hwanuma, hoton hnanyibu anyi Davita me Solomona a nokon. 46 Anyin a hnyi üö Davita ehac me Asafa e hu homakan ka tavat khumöng, me je khumöng hnân oganâ me hnân ole ka Khong. 47 Ke haba hnyi üö Zerubabela, me üö Nehemia, haba at Isaraela hia ödrin e ham je jekhon tavat khumöng me tavat tuö hwanuma, ke jekhöú hnyi ke bong: ke ödrin e okabâ ta je únyi hobi kâú at Levi; ke haba at Levi ödrin e okabâ hobi kâú laku Arona.

HNHYIMAKAN 13.

KE haba hnyi bong e adre me aú hnyi tusi anyi Mose, ke haba tavat adre me löng; ke adre me wâ hna sihnalimen hnyin, a ame ca he at Amona me Moaba ka hnyi dit hnyi úkhacaköu anyin Khong nyiele balua; 2 can ödrin e ca úkhanö me lakon Isaraela me je areto me köiö, ke ödrin e ham bak kö Balaama me me he ka hang' ödrin: ke so bi haba Khongutin ame wia hna hangâ me me hnahic bi. 3 Ke ödrin e löng ut hnanyibu, me ödrin e öúsâkâúö tavat ae se hia ae ve bongon bi únyi ge at Isaraela.

4 Ke haba ehac, Eliasiba at bihut wale adre me otilâ hon je hnyeuleny uma umen Khongutin, ke iatre Tobia mä, 5 me e ame hia but penapena hobi kâú hnyeule ae gan, waleji adre me ip hnyin je hudiny han, me

libanu, me je kaia, me je ke keihen a libenytainy hwit, me waina, me wakaco, waleji adre huná hobi káu at Levi, me at khumöng, me at tuö hwanuma ; me je hut adre kap göranyai, hobi káu tavat bihut. 6 Ke haba hnyi úen hia eling, me hiö nya hnyi Jerusalema : anyin a haba hnyi huna a thöte tui Aretaseta than Babulona, me oge me he ka than, ke hwaban dö ke je bong oge me sumâtâ than : 7 me oge me o but hnyi Jerusalema, me wâ hulö a ânyâ Eliasiba ga Tobia, a e ame penapena hobi káu hnyeule hnyi je hnyeuleny uma umen Khong. 8 Me gan hmâ anyik vec : waleling me oge me dedegec je thatúnyi anyi Tobia únyi hnyi hnyin hnyeule. 9 Me oge me húna m' ödrin e ânyâwia je hnyeule : ke oge me odilâ hmetu kâe je kaiainy uma umen Khong, tha eling me je hudiny han, me libanu. 10 Ke oge me wâ but a g' adre me ca ham bi je jekhon at Levi ; me haba at Levi, me tavat khumöng, a tavat ânyâ huliwa, adre me ve kec ka hnyi idrin je hnye. 11 Me oge me iwatretra me tavat musi me ha, ka habe, Anyin a ieu adre me hna degecâ uma umen Khong? Me oge me ukhacaköu ödrin, me otil' ödrin hnyi hanymödrin. 12 Me haba at Juda hia ödrin e hom ke keihen a libenytainy hwit, me waina, me wakaco ka hnyi je uma omjeü. 13 Me oge me otilâ tavat tuö uma omjeü, wale Selemia at bihut, me Zadoka at sihnalimen, me Pedaia a hanen at Levi : ke útangköu mödrin Hanan nöku Zakuri, nöku Matania : anyin adre me haiwisai ödrin, ke hamödrin he ka khenâ ka je liamekeiny mödrin. 14 Khonguk lö, únykümi nya ju hnyi únyi ang, ke ca he ka kot degecâ anyik je huliwa ae betenge waleji oge me ânyâ ka hnyi uma umen Khonguk, me je huliwainy.

15 Haba hnyi úen eling oge me wâ hnyi Juda keihen adre me hlec wan vine hnyi sabath, me hok je bwiny hwit, me ohijenâ je asina ; me waina minya, me je wan vine, me je wan meta, me je hok hia wale adre me sukhöünâ Jerusalema ai hnyi bong sabath : ke oge me thaw' ödrin hnyi bong ödrin e úcü jeü hnyin. 16 Ke hu minya ke je at Turo adre me laba eling, hnyat adre me hom je wâ, me ta je únyi hia hnân úcü, m' adre me úco hnyi sabath me lakon Juda hnyi Jerusalema. 17 Me oge me iwatretra me je taben hnyi Juda, me ha ködrin, ka habe, Ieu ang gabun, öbun e ânyâ únyi e ae kong, me okongoâ bong sabath? 18 Hawa a ca ânyâ helâe laka-

möbun, me haba Khongutin ame óa ta je únyi hia eang ae kong kötin, me hon taun ang? ke öbun e bi hanen hmönyin kö Isaraela hnyi hna okongoâ sabath. 19 Ke ame hauhaotreng ut hnyi je homagöuleny Jerusalema ke tiga hia bi sabath, me oge me úkhüông he ka hlöng je homagöule, ke oge me húna a g' adre me ca he hmetu bi ka khöng ke ne o but a um dö sabath : ke oge me otilâ ke lathnyabaik hnyi je homagöule, m' adre me ca he ka dit me je hok hnyi sabath. 20 Ke ame mokut tavat tren omjeü me úcü omjeü hnyi hoton Jerusalema, ame ne khaca úen ame ne lo. 21 Ke oge me ú ödrin, me ha ködrin, ka habe, Ieu ang gabun öbun e mokut hmelen hna up hak? öbun e ne helâe hmetu me oge me he ka köt öbun. Ke hwân e, ödrin e ca o hmetu bi hnyi sabath. 22 Me oge me kunâ at Levi he ka obosoi ödrin bi, m' adre me he ka tuö je homagöule, me okabâ bong sabath. Khong lö, únykümi nya ju hnyi únyi eang minya, me betenge gak helâ me úganiny ânyâm ibetengö.

23 Ke hnyi úen eling oge me wâ at Juda tavat adre me hok momo hnyi Ase-doda, me Amona, me Moaba : 24 ke haba je lakudrin adre me hom hanen hwen Ase-doda, ke ca khan' ödrin fuc wia bi hwen Juda, ke hoton hwan ke hnye. 25 Ke oge me ú ödrin, me haikongu ödrin, me kot keihen me hnimö je bödrin, me kun' ödrin he ka háia Khong, me ha, ka habe, Öbun e ca he ka ham lakubun wahu ka lakudrin obaga, me hom lakudrin wahu hobi káu lakubun obaga, me hobi köbun bi. 26 Hawa, a ca monu Solomona tuhan Isaraela hnen únyi e? ke so bi e ba than a helâ më hnyi je hnye. 27 Me oge me hna degecâ anyik je huliwa ae betenge waleji oge me ânyâ ka hnyi uma umen Khonguk, me je huliwainy. 28 Me oge me hna degecâ anyik je huliwa ae betenge waleji oge me ânyâ ka hnyi uma umen Khonguk, me je huliwainy. 29 Me oge me hna degecâ anyik je huliwa ae betenge waleji oge me ânyâ ka hnyi uma umen Khonguk, me je huliwainy. 30 Helâe oge me obosoi ödrin ge je atkanyua hia, me owisa hanymen tavat bihut, me at Levi hnyi je ve hanymödrin : 31 me hobi káu hudiny utö, hnyi úen adre owisa, me wan a bán. Khonguk lö, únykümi nya ju, me ohnabici nya.

TUSI ESETERA.

HNYIMAKAN 1.

HABA hnyi je bong bongu Asueru (haba Asueru ling ame musi hwân hnyi India ke ne o but hnyi Aithiope, ke hnyi je ke keihen hnyei a wan haded ke twente seven :) 2 haba hnyi ün eling ame laba Asueru than hon theroniny dokhon dökhu, hnyi Susani hnyaban than, 3 hnyi huna a kuniny anyin musi, me e ame ânyâ bijeu ka anyin je taben, me lathnyabainy; ke e unyin hmanenanginy Peresi me Madai, je taben me latuhan ta je hnyei: 4 me e ame omanená tang omjeüiny dokhon dökhu ae hmanenang, me meciny anyin musi ae so, hnyi je bong ae se, a wan haded ke eite je bong. 5 Ke ame um dö je bong eling, me haba than ame ânyâ ke bijeu ka tavat hia a ödra hnyi Susani hnyaban than, ka tavat ae gan me tavat ae ûhnyükong, hnyi seven ta bong, hnyi hnyeuleny utkânâhnyi uma umen than; 6 adre me uhno mano ae hau, me udrudrá löhau, me udrudrá, me ohmä ge je tö ae hau a lino ae ûhnyü kong nân me udrudrá hlit ka hnyi je otru sileva, me je hmolom veto oüt ae hau; ke gol me sileva je hna mokut ame tot hon hna bi dek veto ae dra, me hau, me mat, me hlit. 7 Ke adre me habelidrin hnyi je kaia gol, (ke ve bongon je kaia,) me waina ae gan anyin than, hoton ibetengiö anyin than. 8 Ke adre me ic bi hoton hnanyibu; a g' adre me ca újengö: anyin a helâe hna owisa hnen than ka hnyat musi hnyi umen uma, a ödrin e he ka ve ânyâ helâ me weny ke at me ke at. 9 Ke haba momo than a Vaseti ame ânyâ bijeu anyin omomo hnyi uma umo Asueru than. 10 Ke haba hnyi bong a seveniny, k' ame senyin hnyekon than ge waina, me e ame ha kö Meuman, me Bizetha, me Harebona, me Bigetha, me Abagatha, me Zethar, me Karekas je eunuka a seven, hnyat ödrin e huliwa hnyi hnyimakö Asueru than, 11 he ka hum Vaseti momo than ka hnyi hnyimakan than ame bicâ korona anyin than, he ka omanená hmanenanginy momo ka tavat, me je taben: anyin ae so hmainty momo. 12 Ke haba Vaseti momo than ame höcö he ka he hoton

hofuc hwan than a deny anyin je eunuka: anyin a wale ame hmönyin than, k' ame ubâhlâ anyin hmönyin. 13 Me haba than ame ha ka tavat ae metâ, tavat adre me wâhmakhmetoâ je ün, (anyin a wale hwa-kecin than ködrin hia thithö tavat adre me wâhmakhmetoâ hnanyibu, me hna owisa; 14 ke haba útangköu mē, Karesena, me Sethar, me Adematha, me Tasesa, me Meres, me Maresena, me Memukan je taben anyin at Peresi me Madai a ödrin seven, tavat adre me wâ hnyimakan than, me laba beönua hnyi dökhu :) 15 Ieü ötin e he ka ânyâ kö Vaseti momo than hoton hnanyibu, anyin a ca ânyâ helâ me hna huna hno Asueru than a deny anyin je eunuka? 16 Haba Memukan ame thu hnyi hnyimakan than me anyin je taben, ka habe, a ca monu Vaseti momo than ka than thibi, ke so bi ka je taben hia, me tavat hia ae hnyi je ke keihen hnyei hia i Asueru than. 17 Anyin ame he omomo hia ka löng hwakecin momo than, me ödrin e he ka hûkötîâ laöiödrin obaga, ödrin ka löng a Asueru than ame ûkhünöng he ka hawö Vaseti momo than ka hnyi hnyimakan, ke ame ca he bi. 18 Me ame he je momo than hnyi Peresi me Madai, adre me löng hna ânyâ hnen momo than he ka ha helâe ka je taben hia anyin than. Me ame he ka gan ûhöciö me hmönyin. 19 Ame ne so ka than, e so he ka kunâ hofuc hwan than ünyi gam, me sihnalimen e hnyi je hnanyibu anyin at Peresi me Madai, me me ca wia bi, a g' ame ca he hmetu bi Vaseti ka o hnyi hnyimakö Asueru than; ke ame he than ka ham hanyen momo than ka ke at ae so hon. 20 Ke hnyi ün adre me he ka omanená hofuc hwan than wale e ame he ka ha hnyi dokhon dökhu hia, (anyin ae gan hmâ,) me ame he omomo hia ka oganâ laöiödra, tavat ae gan me tavat ae ûhnyükong. 21 Ke so hofuc eling ka than me je taben; ke haba than ame ânyâ helâ me hofuc ho Memukan: 22 anyin a e ame kunâ je tusi ka hnyi je ke keihen hnyei hia iny than, hnyi ke keihen me ke keihen, hoton hna sihnalimen, me ke hnyei me ke hnyei hoton hwan hnyei, m' adre me ve musi obaga hnyi

umödra je uma, me omanená e hoton hwan idrin je hnyei.

HNHYIMAKAN 2.

HWABAN ta je únyi eling k' ame hia but hmönyin anyi Asueru than, me e ame únykúmi Vaseti, me únyi e ame ányá, me hna owisa káu. 2 Me haingen lathnyabainy than, a hnyat huliwa káu, ka habe, E so adre me elám hobi káu than wahlu ae hmanenang: 3 ke so ame he than ka otílâ je taben hnyi je ke keihen hia dokhon dökhu, m' adre me úkhacaköua wahlu ae hmanenang hnyi Susani hnyaban than, hnyi uma umen omomo, unyi Hege eunuka anyin than, at ame tuö omomo; k' adre ma ham ködrin ta je únyi hnán obosoá: 4 me haba hlu ae so ka than ame he ka momo than hwabö Vaseti. Ke so hofuc e ka than; me ame ányá helâe.

5 Ke wale ke at Juda hnyi Susani hnyaban than, Modikai ien, nöku Jaira, nöku Simei, nöku Kiso, at Beniamina; 6 a at adre me hom úheny Jerusalema tha e me je bâ, waleji adre tha hom me Jekonia than Juda, a hom Nebukaneza than Babulona. 7 Ke e ame hat Hadasa, wale Esetera, a nokon liamekeiny me kamen; anyin ae ba kamen me hinyen, ke hlu ae so hnyimakan ke hmanenang; haba Modikai ame hom e me me nokon bi hnyi úen ame mokcu kamen me hinyen. 8 Ke adre me löng hofuc hwan than me anyin hnanyibu, k' adre me úkhacaköua wahlu ae se hia hnyi Susani hnyaban than unyi Hege, me adre me hum Esetera minya ka hnyi uma umen than, unyi Hege, at ame tuö omomo. 9 K' ame so hlu eling, me e ame betenge gan; ke e ame ie ham káu ta je únyi hnán obosoá, me je jekhon, me seven ta hlu adre me úca hnán hobi káu bi, únyi hnyi uma umen than: k' ame hna e me anyin je hlu ka hnyi dok ae so hnyi uma umen omomo. 10 Ke haba Esetera ame ca omanená ge iny hnyei me je lahanen, anyin a Modikai ame húna káu a e ame ca he ka omanená. 11 Ke haba Modikai ame ngeny hnyi je bong hia hnyi hnyimakan hnyeuleny uma umen omomo, he ka wá hawa ga Esetera, ke ietú adre me he ka ányá káu. 12 Ke a o but úen je hlu he ka ve he kö Asueru than, hwaban twelv ta tehi adre me ányá káu hnyin hoton hnanyibu ge omomo, (anyin adre me ohwádâ ta je bong bongon obosoi ödrin, a siks ta tehi ge wakaco muro,

ke siks ta tehi ge je únyi ae bo so, me ke je únyi hnán obosoá omomo,) 13 ke walang bongon ame he je hlu ka than, adre me ham ködrin ta je únyi hia a wedrin he ka hom únyi hnyi uma umen than. 14 Ödrin e he hnyi sabac me hmetu hnyi hnyomakatu ka hnyi uma umen je momo a loiny, unyi Sasegaz eunuka anyin than, at ame tuö anyin omomo: ödrin e ca he ka hmetu ka than ame ne ca senyin ködrin than, me haw' ödrin ge iödrin bi. 15 Ke ame o but úö Esetera, nöku Abihaila, liamekeiny me kamö Modikai, at a hom e me me nokon, he ka he ka than, me haba hlu eling ame ca weny bi ke únyi, ke so bi hna ha thibi hnö Hege eunuka anyin than, at ame tuö je momo. Ke ame so Esetera hnyi hnyimakan tavat hia adre me wá e. 16 Ke adre me hum Esetera kö Asueru than ka hnyi uma umen than hnyi tehi a teniny, wale tehi Tebeth, hnyi hunu a seveniny anyin musi. 17 Ke haba than ame weny Esetera hon je momo hia, ke e gan hmá hnen hna betenge gan, ke e ame weny e hon je hlu hia thithö; me e ame obicâ e ge korona anyin than, me hom e hnán momo than hwabö Vaseti. 18 Me haba than ame ányá bijeú ae gan hmá hobi káu anyin je taben, me lathnyabainy, bijeú e anyi Esetera; ke e ame hna he ka mená, hnyi je ke keihen hnyei, me ham je bwihlany, hoton betenge anyin than. 19 Ke haba Modikai ame laba hnyi homagöuleny than hnyi úen a loiny adre úkhacaköua wahlu. 20 E tiga ca um bi Esetera omanená je lahanen me iny hnyei; helâ me hna húna káu ga Modikai: anyin a Esetera ame ányá hna ha hnö Modikai helâ me úen adre me hat hnyin. 21 Ke haba hnyi je bong e waleji ame laba Modikai hnyi homagöuleny than, me ame hmönyi Bigethan me Teres li eunuka anyin than hanen tavat tuö hwanuma, me ödru me heleú deny he ka hlingö Asueru than. 22 Ke amemanen dut únyi eling kö Modikai, me e ame thumetu Esetera, momo than; ke haba Esetera ame thumeto than únyi hnyi iö Modikai. 23 Ke haba hnyi úen adre me uhnö únyi eling, ke adre me wáhmakhmeto ae hnathu, me adre me tha uhni ödru hnyi ke úö: me adre me sihnalimen e hnyi tusi hnán ha je bong hnyi hnyimakan than.

HNYIMAKAN 3.

KE hwaban ta je únyi e haba Asueru than ame oganö Hamana nöku Hamedatha at Agaga, me ogöranyâ e, me ip taben tap hon taben je than hia unyin. 2 Ke haba lathnyabainy than a ödrin hnyi homagöuleny than, me ödrin e labö nom, me iyâú kö Hamana; anyin a than ame huna helâe gan. Ke haba Modikai ame ca nom me iyâú kâu. 3 Ke haba lathnyabainy than a ödrin hnyi homagöuleny than, ödrin e ha kö Modikai, ka habe, Ieú gam u me hanyâú hnanyibu anyin than? 4 Ke ödrin e ha kâu hnyi ke bong me ke bong, ke ame ca ling ödrin, m' ödrin e thumetu Hamana, me me manen bi a g' ame tethmä la bongu Modikai: anyin a e ame thumetu ödrin a e at Juda. 5 Ke a wâ Hamana a Modikai ame ca nom, me iyâú kâu, me Hamana ame unöngöt ge hmönyin. 6 Ke ame höcö he ka hake hlingö Modikai; anyin adre hia but omanená kâu hnye i Modikai: anyin a wale Hamana ame heleú deny he ka ohia at Juda hia thithö a ödrin hnyi je ke keihen hia dökhü dökhü Asueru, wale hnye i Modikai. 7 Haba hnyi tehi a bân, wale tehi Nisan, hnyi huna a twelviny musi anyi Asueru, me ödrin e ányâ Puro, wale ugleköb, hnyi hnyimakö Hamana hnyi ke bong me ke bong, me ke tehi me ke tehi, ke ne o but hnyi tehi a twelviny, wale tehi Adara. 8 Ke haba Hamana ame ha kö Asueru than, ka habe, E hu tavat adre me vese me ve laba hnyi je hnye a je ke keihen hia hnyi dokhom dökhü; ke e ke anyidrin je hnanyibu me ta ogo hnye hia thithö; ke ödrin e ca ányâ je hnanyibu anyin than: anyin a wale e ca úcú bi ka than he ka hokhnyoki ödrin. 9 Awe, ame ne so ka than, me so adre me sihnalimen m' adre me ohí' ödrin; ke hamök bi he ka ham ten thauzan je talan sileva ka hnyat adre me ányâ huliwa anyin than, m' adre me hom e ka hnyi tang omjehen than. 10 Ke haba than ame uny jut wen banyen me ham e kö Hamana nöku Hamedatha at Agaga, at ame bi iwahnaihmöny me at Juda. 11 Ke haba than ame ha kö Hamana, ka habe, Adre hia but ham köu aileva, me tavat minya, m' u me ányâ ködrin helâ me wem. 12 Me adre me hawâ tavat sihnalimen anyin than hnyi bong a thötininy tehi a bân, me adre me sihnalimen helâ me hnö Hamana hna huna ka tavat musi ae beónua anyin than, me je gavena

hnyi je ke keihen hnye i, me tavat musö je hnye i; ka ke ke keihen me ke ke keihen hnye i helâ me hna sihnalimen, me ka ke hnye i me ke hnye i hoton hwan je hnye i; ke adre me sihnalimen hnyi iö Asueru than, ke adre me ohmä haten hnen wen banyen than. 13 Ke adre me kunâ tavat wadringâ je tusi ka hnyi je ke keihen hnye i iny than, he ka ohia me hlingâ, me öba at Juda hia thithö, tavat ae úhnyükong me wahingat, me ta je wanakat me omomo, hnyi bong a khaca, wale hnyi bong a thötininy tehi a twelviny, wale tehi Adara, ke adre me he ka söh anyidrin ta je únyi. 14 Ke haba hua oc önyen tusi, adre me kunâ ka hnyi je hnye i, m' adre me he ka omanená hnanyibu hnyi je ke keihen hnye i, m' adre me he ka laba penapena hobi kâu bong eling. 15 Ke ame ie he but tavat wadring ge hna huna hnen than, ke adre me omanená hnanyibu hnyi Susani hnyaban than: ke haba than me Hamana ödrü me tha laba he ka ic; ke ame hlohlo but taun Susani.

HNYIMAKAN 4.

KE a wâ but Modikai ta je únyi hia thithö adre ányâ, haba Modikai ame kia anyin je úkhaú, me khavâ ec mano ae gan nân, me botru dröu, me he hnyi wanben taun, me fuc hwege göranyai me tenge: 2 ke e ame o but hnyi hnyimakan homagöuleny than: anyin ame ca he ka delec homagöuleny than at aine khavâ ec mano ae gan nân. 3 Ke haba hnyi je ke keihen hnye i hia waleji a o hnyin hofuc hwan than me anyin hnanyibu, wale hnyok ae hmak gan hmâ ka at Juda, me ca han, me tenge ae gan; ke haba tavat ae se hia adre me mokulec ec mano ae gan nân, me hnabadröu. 4 Haba je hlu anyi Esetera me anyin je eunuka ödrin e o me thumeto e; me ame hlöuhlöu gan hmâ momo than; me e ame úkhünöngâ je úkhaú he ka khaúö Modikai, me hom únyi gan mano ae gan 'nân: ke e ame ca kap. 5 Me Esetera ame hawo Hatak, ke eunuka anyin than, wale e ame otílâ hobi kâu, me bi hofuc kö Modikai he ka wâ ieú ang, ke ieú bongon. 6 Haba Hatak ame he kö Modikai ka hnyi dok ae lau hnyi taun, cicö homagöuleny than. 7 Me Modikai ame thumeto e geta je únyi hia ame o kâu, me úganiny mone a ha Hamana he ka ip hnyi uma omjeú anyin than únyi ge at Juda, he ka ohí' ödrin. 8 Ke e ame ham kâu tusi hnanyibu adre me oc,

wale adre me omanená hnyi Susani, he ka ohi' ödrin, m' adre me omanená kö Esetera, me thumeto e; me hûna kâu he ka he ka than he ka khôu kâu me sumâtâ aten iny hnyei hnyi hnyimakan. 9 Ke haba Hatak ame he me thumetu Esetera ge hofuc ho Modikai. 10 Me haba Esetera ame ha kö Hatak, me bi hofuc kö Modikai, ka habe; 11 E khana but lathnyabainy than, me aten je ke keihen hnyei iny than, a haba hnyat hia obaga me omomo, adre me ne he ka than hnyi hnyeule eiö, k' adre me ca hawâ, me khaca thibi hnanyibu ködrin a g' adre me he ka hling' ödrin ke so at ame he than ka inâ kâu uci gol, me me möt bi: ke adre me ca hawo nya he ka he ka than hnyi je bong a thöte. 12 Me adre me thumetu Modikai ge hofuc ho Esetera. 13 Me Modikai ame ha he ka thu kö Esetera, ka habe, Ca he ka únykúme hnyi hnyekom a g' ame he ka mok hia at Juda, ke u ma he biju ka möt hnyi uma umen than. 14 Anyin a u je ne laba hnyibú hnyi úen ang, me ame he ka hu menâ me möt ka at Juda únyi hnyi ke dok bi, ke haba u, me lap anyin kâmâm, me, adre me he ka ohia hia: ke khanö ia, hawa, ame ne o but köu dökhü hnân hobi kâu úen helâng? 15 Me haba Esetera ame ha he ka thu kö Modikai, ka habe, 16 He thö ka úkhacakouâ at Juda hia adre me wâ hnyi Susani, ke he th' öbun ka ca han, cak, ca he ka han me ic hnyi kun ta bong, hnyi lit me lany: ke oge me he bi nya me anyik je hlu he ka ca han minya; ke helâe oge me he ka he ka than, wale a ca úcü me hnanyibu: ke eja ke ne oge ne mokcu, awe, oge me he ka mokcu. 17 Ke haba Modikai ame he but, me ányâ hia helâ me hna hûna hnö Esetera.

HNHYIMAKAN 5.

KE haba hnyi bong a kuniny, haba Esetera ame khavâ je úkhaúen than, me tot hnyi hnyeule eiö hnyin uma umen than, cicö uma umen than: ke haba than ame laba hon anyin theron hnyi uma umen than, cicö hwânuma. 2 Ke than ame o Esetera momo than ame tot hnyi hnyeule, ke e ame hnyok kâu: me haba than ame inâ kö Esetera uci gol ae hnyi hnyamen. Me Esetera ame hakekeny dö, me kâlâ hnyiban uci. 3 Haba than ame ha kâu, ka habe, Ieú wem Esetera lö, momo than? ke ieú hnâm hna sumat? adre me he ka ham köu hia ke ne o but hafiny dökhü. 4 Haba

Esetera ame thu, ka habe, Ame ne so ka than, ame he than me Hamana ka hnyi hanen bijeú oge hia but penapena hobi kâu, hnyi bong ang. 5 Haba than ame ha, ka habe, Újôngi Hamana thö me me ányâ helâ me hofuc ho Esetera. Me haba than me Hamana ödru me he me hnyi hanen bijeú a penapena Esetera. 6 Ke haba than ame ha kö Esetera, hnyi úen ame ic waina, ka habe, Ieú wem? ke adre me he ka ham köu: ke ie únyi u me he ka sumâtâ? ke adre me he ka ányâ ke ne o but hnyi hafiny dökhü. 7 Me haba Esetera ame thu me ha, ka habe, Walang wek me únyi oge me he ka sumâtâ; 8 oge ne hia but wâ ibetengió hnyi hnyimakan than, ke ame ne so ka than he ka ham wek, me ányâ únyi oge me he ka sumâtâ, ame he than me Hamana ka hnyi hanen bijeú oge me he ka penapena hobi ködru, ke nyi oge me he ka ányâ helâ me hofuc hwan than. 9 Haba Hamana ame he me senyin hnyi bong eling me hobâ hnyi hnyekon: ke Hamana ame ö Modikai hnyi homagöuleny than, ke ame ca tot, me ca bwebwet gan, me ame unöngötö Hamana ge hmönyin ga Modikai. 10 Ke so bi Hamana ame hokhnyok, me he but ka hnyi umen uma; me e ame úkhúnöng he ka hawâ je lahanen me Zeres a áian. 11 Ke haba Hamana ame omanená ködrin hmanenanginy anyin tang omjeú, me úseiny je lakon, me ta je únyi hia than ame oganá hnyin, me hnen hna ogöranyâ e hon je than me lathnyabainy than. 12 Haingö Hamana minya, ka habe, Haba Esetera momo than ame ca tha hawâ ke at me than ka hnyi bijeú wale ame ányâ, ke hake inya thibi; ke e ame he ka hawo nya nyi tha inya me than. 13 Ke ca únyi hnathu könya ta je únyi hia thithö e, hnyi úen oge me ö Modikai at Juda ame laba hnyi homagöuleny than. 14 Me ame ha kâu Zeres a áian me je lahanen hia, ka habe, E so he ka penapena tap utö a fifte je kubit ibeúen göranyai, me nyi u me he ka úhuenamö me than, m' adre me he ka uhni Modikai hnyi hon: ke hwaban e, he senyin dö ka hnyi tha han me than. Ke so hofuc eling kö Hamana; me ame úkhúnöng he ka ányâ tap utö.

HNHYIMAKAN 6.

HABA hnyi lit eling ame ca mokut bi than; me e ame úkhúnöng he ka hom tusi hnân oúnykúmeâ ka hnyi ta je

bong eji, me adre me aú e hnyi hnyimakan than. 2 Ke adre me wá hna sihnalimen hnyin waleji a omanená hwakeci Modikai ga Bigethan, me Teres, ke li eunuka anyin than, a li at hanen hnyat tuó hwanuma, a li at ödru me heleú deny he ka hlingö Asueru than. 3 Me haingen than, ka habe, Ieú hnödra hna ogáná me ogóranyi Modikai hnyi únyi ang? Me haingen lathnyabainy than a hnyat adre me huliwa káu, ka habe, E ba únyi adre me ányá káu. 4 Haba than ame ha, ka habe, Ie at hnyi hnyeule? Anyin ame o but Hamana hnyi hnyeuleny uma umen than eió, he ka ha ka than he ka uhni Modikai hon tap utó wale ame hia but penapena hnán hobi káu. 5 Me haingen lathnyabainy than káu, ka habe, Wa bi, wale Hamana ame tot hnyi hnyeule. Me haingen than, ka habe, E so e ame he jem. 6 Me ame didró Hamana. Me haba than ame ha káu, ka habe, Ieú adre me he ka ányá ka at hnen than hna beogáná? Ke haingö Hamana eú hnyi hnyekon, ka habe, Ame he than ka beoganö ia, hawa ca inya la? 7 Me Hamana ame thu ka than ka habe, Haba at hnen than hna beoganá, 8 me so adre me hom but úkhaúen than waleji ame labó khavá káu than, me hors waleji ame labó tabá than, me bicá korona anyin than : 9 ke adre me he ka hna úkhaú me hors ka hnyi hnyamen ke taben ae únyi hnathu, me me khavá at hnen than hna beogáná, me otabá hon hors me me vheno getheniny taun, me kuku tot hnyi hnyimakan, ka habe, Adre me he ka ányá heláe ka at wale hnen than hna beogáná. 10 Haba than ame ha kö Hamana, ka habe, Logötó, hom but úkhaú me hors helá me hnám hna ha, me ányá heláe kö Modikai at Juda, at ame laba hnyi homagöuleny than : ca he ka degec ke únyi wale u je ha. 11 Haba Hamana ame hom úkhaú me hors, me khaúö Modikai, me otabá e me me he hnyi wanben taun, me kuku tot hnyi hnyimakan, ka habe, Adre me he ka ányá heláe ka at hnen than hna beoganá. 12 Ke haba Modikai ame hmetu ka hnyi homagöuleny than. Ke haba Hamana ame he logot ka hnyi umen uma, ame hmak hnyekon me tube ban. 13 Ke Hamana ame thumetu Zeres a áián me je lahanen hia ge ta je únyi hia a o káu. Ke ame ha káu hnen tavat unyin ae metá me Zeres a áián, ka habe, Ame ne at Juda Modikai waleji u je hwán he ka ta hnyi hnyimakan, u me ca he ka hwege hon, ke u me he bala bi ka ta

hnyi hnyimakan. 14 Me ödrin e tiga úhne-namö mé, me ame o but je eunuka anyin than he ka ie hawo Hamana ka hnyi bijeú a penapena Esetera.

HNHYIMAKAN 7.

ME ame o but than me Hamana he ka ic unyi Esetera momo than. 2 Ke haba than ame ha hmetu kö Esetera hnyi bong a loiny hnyi úen ic waina, ka habe, Ie únyi u me he ka sumátá, Esetera, momo than? m' adre me he ka ham köu : ke ieú wem? m' adre me he ka ányá ke ne o but hnyi hafny dökhu. 3 Haba Esetera momo than ame thu me ha, ka habe, Than lö, oge ne hia but wá ibetengió hnyi hnyimakám, ke ame ne so ka than, e so he ka omeli nya hoton hnök hna khöü, me ik hnyeí hoton hnök hna sumát : 4 ányin a adre hia but úcú öhmun, inya me ik hnyeí, he ka ohia, me hlingá, me öba. Ke adre ne hia but úcú öhmun hnán lathnyaba obaga me omo-mo, me oge me ne he ka laba hnyibú, ke so bi, ae ca úcú iwahnaihmiöny, me je omjeú anyin than ame he ka hia. 5 Haba Asueru than ame ha kö Esetera momo than, ka habe, Ie at, ke ewa, at ame bi gan hnyi hnyekon he ka ányá heláe? 6 Haba Esetera ame ha, ka habe, Haba at beúkúe, me iwahnaihmiöny, wale Hamana at ang ae kong. Me ame ot Hamana hnyi hnyimakan than me momo than. 7 Me ame todró than hnyi hmönyin úheny hnyi hna ic waina me he ka hnyi utkánáiny umen than : ke haba Hamana ame tot mé khöúá e bi kö Esetera momo than ; anyin a ga wá but a ga kong ut ge than. 8 Ke ame hmetu than úheny hnyi utkánáiny umen than ka hnyi dok adre ic waina hnyin ; ke wale Hamana ame ta hon hna mokut hnen Esetera. Me haingen than, ka habe, E ame he minya ka lelö momo than unyik hnyi uma? K' ame tiga he but hofuc únyi hnyi hnyimen than, me adre me tube hnyimakö Hamana. 9 Me haingö Harebona a eunuka hnyi hnyi makan than, ka habe, Wá bi minya tap utó a ányá ga Hamana hobi kö Modikai, at ame ha so hobi káu than, k' ame tot bi hnyi uma umö Hamana, ke fitte kubit ibeúen goranyai. Me haba than ame ha, ka habe, Uhno thö e hnyin. 10 Me ödrin e uhni Hamana hnyi tap utó waleji e ame penapena hobi kö Modikai. Me ame hia ju hmönyin anyin than.

HNYIMAKAN 8.

HABA hnyi bong eling Asueru than ame ham kö Esetera momo than uma umö Hamana, iwahnaihmiony me at Juda. Ke Modikai ame o hnyi hnyimakan than; anyin a Esetera ame ha kâu a ödrü tha at. 2 Ke haba than ame uny jut wen banyen, wale e ame hom únyi ga Hamana, me ham bi kö Modikai. Ke haba Esetera ame otillö Modikai hon hnyaba Hamana. 3 Ke haba Esetera ame fuc hmetu hnyi hnyimakan than, k' ame ta hnyi li can, me tenge me khöü kâu he ka ohia hna he ka okongoá ga Hamana at Agaga, me anyin bibihwakecin e ame únykúme ka at Juda. 4 Me haba than ame inâ kö Esetera uci gol. Me Esetera ame höhöi thö me tot hnyi hnyimakan than. 5 Ke haingen momo than ka habe, Ame ne so ka than, ke oge ne hia but wâ ibetengiö hnyi hnyimákâm, ke ame ne wisa únyi e hnyi hnyimakan than, ke ame ne senyin kõnya, awe, e so adre me he ka sihnalimen m' adre me he ka thawâ je tusi wale a únykúme Hamana nöku Hamedatha at Agaga, waleji e ame sihnalimen he ka ohia at Juda hnyi je ke keihen hnyei hia iny than: 6 anyin oge me he ka kâmâu ka wâ hna okongoá ame o ka hnyi hon ik hnyei? ke oge me he ka kâmâu ka wâ hnödra hna he ka ohia lahanök? 7 Me haba than ame ha kö Esetera momo than, me Modikai at Juda, ka habe, Wâ bi, oge hia but ham uma umö Hamana kö Esetera ke adre hia but úhno e hnyi tap ütö, can e ame inâ hnyamen ka at Juda. 8 Ke öbu me he ka sihnalimen ka at Juda helâ me únyi ae so köbu, hnyi ien than, me ohmâ haten ge wen banyen than: anyin a haba tusi adre sihnalimen hnyi ien than, me ohmâ haten ge wen banyen than, e ca khana ke at he ka wia hmetu. 9 Me adre me hawâ tavat sihnalimen anyin than hnyi úen eling, hnyi tehi a kuniny wale tehi Sivan, hnyi bong a twente theriny; ke adre me sihnalimen helâ me hna hûna hia ga Modikai ka at Juda, me tavat musi ae beónua, me je gavena, me je taben hnyi je ke keihen hnyei, hwân hnyi India ke ne o but Aithiope, wan haded ke twente seven je ke keihen hnyei, ka hnyi je ke keihen hia hoton hna sihnalimen me ka at Juda hoton hna sihnalimen, me ifucidrin. 10 Ke e ame sihnalimen hnyi iö Asueru than, me ohmâ ge wen banyen than, me kunâ

tavat ae logot adre me tabö hors, me je tusi, wale adre tabö hors ae logot wadring hanen je hors haleny than, adre hnoköá unyin: 11 haingen tusi, ka habe, haba than ame hna ka at Juda hnyi ke taun me ke taun, he ka úkhacaköu m' adre me tu' ödrin bi, he ka okongoá, me hlingá, me ohia man maniny tavat hia, me ke keihen hnyei adre me he ka kuc ödrin, me anyidrin tavat ae úhnyúkong me omomo, me he ka söh anyidrin ta je únyi, 12 hnyi bong a khaca hnyi je ke keihen hnyei hia i Asueru than, wale hnyi bong a thötininy tehi a twelv, wale tehi Adara. 13 Haba hna oc hna sihnalimen, adre me omanená ka hnyi je hnyei hia, m' adre me he ka ham hnân hnanyibu hnyi je ke keihen hnyei hia, me me laba penapena at Juda hnyi boug eling he ka bi hwaban ka je iwahnaihmiony mödrin. 14 Me ame he but tavat ae logot adre tabö hors ae logot wadring adre me labö he hnyi huliwa anyin than, adre újengö me ologotâ hnen hofuc hwan than; ke adre me ányâ hnanyibu hnyi Susui hnyaban than. 15 Ke haba Modikai ame he úheny unyin than k' ame khavâ úkhaúen than ae udrudrá me hau, me korona gol ae gan, me úkhaú a mano lino ae udrudrá hlit: k' adre me senyin me hobâ hnyi taun hnyi Susani. 16 Ke e unyin at Juda melam, me senyin, me hobâ, me oganá. 17 Ke haba hnyi je ke keihen hnyei hia, me je taun hia a o ka hnyin hnanyibu me hofuc hwan than, me ame senyin me hobâ at Juda, ke e hu bjeú me bong ae so. Ke se hia tavat aten hnyei adre me hnyi hanen hmi Juda; k' adre me outen at Juda.

HNYIMAKAN 9.

KE haba hnyi tehi a twelv, wale tehi Adara, hnyi bong a thötininy, k' ame hakekeny dö he úen he ka ohwâda hnanyibu me hna hûna hnen than, k' ame únykúme je iwahnaihmiony me at Juda he ka hu man hudrin; ke so bi adre me wia hmetu bi me me he ka hu man ge at Juda hon tavat adre me húkoti' ödrin; 2 me haba at Juda ödrin e úkhacaköu hnyi anyidrin je taun, hnyi je ke keihen hnyei hia i Asueru than, m' ödrin e hinöbeny ködrin a hnyat adre me beokongu ödrin: ke ba at ame tot hnyi hnyimaködrin; anyin adre me out' ödrin hnyi ta ogo hnyei hia thithö. 3 Ke haba tavat musö je ke keihen hnyei, me tavat musi ae beónua, me je gavena, me tavat adre me ányâ je huliwa anyin than,

me ödrin e hadruâ at Juda ; anyin ame ta hudrin ot ga Modikai. 4 Anyin ae gan hmâ Modikai hnyi uma umen than, k' ame lung hnyi je ke keihen hnyei hia thithö : anyin ame gan tot at eling, wale Modikai. 5 Ke haba at Juda ödrin e kot je iwahnaihmöny mödrin hia thithö ge hele vat, k' adre me hlingâ, me ohia, me ânyâ wedrin bi ka tavat adre me hûkötî' ödrin. 6 Ke haba at Juda ödrin e hlingâ hnyi Susani hnyaban than me ohia je hnyat a faiv haded. 7 Me Pasanedata, me Dalefona, me Asepatha, 8 me Poratha, me Adalia, me Aridatha, 9 me Pamaseta, me Arisai, me Aridai, me Vaezatha, 10 je laku Hamana, nöku Hamedatha, iwahnaihmöny me at Juda, ödrin ten, adre hlingâ ; ke so bi ödrin e ca söh bi anyidrin ta je únyi. 11 Haba hnyi bong eling adre me hom ka than úsiny tavat adre hlingâ hnyi Susani hnyaban than. 12 Haba than ame ha kö Esetera momo than, ka habe, A hia but at Juda hlingâ me ohia hnyi Susani hnyaban than ödrin faiv haded tavat, me je laku Hamana a ten ; ke ieû la hnödrin hna ânyâ hnyi je ke keihen hnyei iny than ! Ke ieû u me he ka sumâtâ ? m' adre me he ka ham köu : ke ieû hmetu wem ? m' adre me he ka ânyâ. 13 Ke haingö Esetera, ka habe, Ame ne so ka than, e so he ka hna nyi ka at Juda hnyi Susani he ka ânyâ minya helâ me hnyi bong ang, ke adre me he ka uhno je laku Hamana a ten hnyi tap utö. 14 Haba than ame ha he ka ânyâ helâe : ke adre me otîlâ hnanyibu hnyi Susani ; me ödrin e uhno je laku Hamana a ten. 15 Ke haba at Juda ae hnyi Susani, ödrin e úkhacaköu hmetu hnyi bong a fotininy tehi Adara, me hlingâ hnyi Susani ödrin theri haded tavat ; ke so bi ödrin e ca söh bi anyidrin ta je únyi. 16 Ke haba ke keihen at Juda hnyi je ke keihen hnyei iny than, adre me úkhacaköu, me tu' ödrin bi, me adre me menâ ju ge je iwahnaihmöny mödrin, me hlingâ tavat adre me ikiki ödra a ödrin sevenge faiv thauzan ; ke so bi adre me ca söh bi anyidrin ta je únyi. 17 Adre me ânyâ únyi e hnyi bong a thötininy tehi Adara ; ke ödrin e menâ hnyi bong a fotininy, me wia e hnân bijeû me senyin. 18 Ke haba at Juda a ödra hnyi Susani adre me úkhacaköu hnyi bong a thötininy, me bong a fotininy ; ke haba hnyi bong a fiftininy ödrin e menâ, me wia e hnân bijeû me senyin. 19 Anyin a wale haba at Juda hnyi je taun ae úhnyúkong, tavat adre me

laba hnyi je taun ae ba haginy, adre me wia bong a fotininy tehi Adara hnân bong senyin me bijeû, me bong ae so, me hnân úhamköuâ je jekhötü.

20 Haba Modikai ame sihnalimen ta je únyi eling me kunâ je tusi ka at Juda hia a ödra hnyi je ke keihen hnyei hia i Asuertü than, dok ae hakekeny me dok ae sâkâû, 21 he ka ha ködrin, m' adre me he ka wia bong a fotininy tehi Adara, me bong a fiftininy minya, hnyi ke huna me ke huna, 22 wale li bong waleji hnen at Juda hna menâ ge je iwahnaihmöny mödrin, me tehi waleji adre me wia hmutu ködrin úheny hnyi hna hmak hnyekon, me me senyin bi, ke úheny hnyi hna tenge, me me bong bi ae so ; m' adre me he ka ânyâ hnân li bong bijeû me senyin, me hnân úhamköuâ je jekhötü, me ham je bwihlany ka tavat ae theduoc. 23 Ke haba at Juda adre me ogâ he ka ânyâ waleji hoton hnödrin hna bi hwân, me hoton hna sihnalimen ködrin hnö Modikai ; 24 anyin a haba Hamana nöku Hamedatha, at Agaga, iwahnaihmöny me at Juda, ame únykúme ka at Juda he ka ohî' ödrin, me e ame khûâ Puro, wale uglekôb, he ka hling' ödrin me ohî' ödrin ; 25 ke ame o but únyi e ka hnyi hnyimakan than, me e ame hûna hnyi je tusi, me me hmetu ka hnyi hon ban anyin bibiwhakecin ae kong, waleji e ame únykúme ka at Juda ; me adre me he ka uhno e me je lakon hnyi tap utö. 26 Anyin a wale ödrin e hwenyi ien je bong eling, me je Puro, hoton ien Puro. Anyin a wale can ta je hofuciny tusi ang, me hnödrin hna wâ hnyi únyi ang, me únyi a o ködrin, 27 haba at Juda, ödrin e owisa, ke ödrin e ogâ, me je matrândrin, me tavat úkhacaköu mödrin hia, me me ca he ka önua bi, mödrin e he ka tuö li bong eling helâ me hna sihnalimen, me helâ me úen adre hia but thu, hnyi ke huna me ke huna ; 28 me ödrin e he ka únykúme li bong eling me tuö hnyi ta je dö hia thithö, ge ta je lap hia, me ta je ke keihen hnyei hia, me ta je taun hia ; me me ca he ka hia je bonginy Puro eling unyin at Juda, ke adre me ca he ka bi obiny únykúme e unyin je matrândrin. 29 Me haba Esetera momo than, nöku Abihaila me Modikai at Juda, ödra me sihnalimen hwegiâ he ka otîlâ hmâ tusi Puro eang a loiny. 30 Ke e ame kunâ je tusi ka at Juda hia thithö hnyi je ke keihen hnyei hia dökhü dökhü Asueru a wan haded ke twente seven, me je hofuc ae menyik me hnathu,

31 me me tot hmâ li bonginy Puro ang, hnyi li ñen adre me thu, helâ me Modikai at Juda me Esetera momo than ame hûna ködrin, ke haba khaca helâ me hnödrin hna owisa hnân hobi ködrin bi me ta je mâtrânidrin, a ta je ûnyi ge ca han me anyidrin tenge. 32 Ke haba hnanyibu hnö Esetera ame otilâ hmâ ta je ûnyi ge Puro ; ke adre me sihnalimen hnyi ke tusi.

HNHYIMAKAN 10.

KE haba Asueru than ame hûna ka ta je hnyei me ta je bomeneiny köö

he ka fat. 2 Ke haba ta je ûnyi e ame ânyâ ge tang hwegien me maniny man, me hna omanenâ ûgani Modikai, wale hnen than hna ogöranyâ, hawa, adre me ca sihnalimen hnyi tusi hnân ha je bong bongon je than Madai me Peresi! 3 Anyin a haba Modikai at Juda me ûtang-köu me Asueru than, ke at ae gan hmâ unyin at Juda, ke haba je liamekeiny më ae se hia me adre me kap soâ ; k' adre me elâm soiny iny hnyei, me ha hnahicâ je mâtrânidrin hia thithö.

TUSI JOBUB.

HNHYIMAKAN 1.

EHU ke at hnyi hnyei Uza, Jobu ien ; ke bekhöt me wisa hwakecin, e at ame outen Khong me úsâkâtö me hulö. 2 Ke adre me hnokoâ lakon ta бага a seven, ke kun ta hlu. 3 Ke haba haleny omeno me seven thauzan je mamoe, ke theri thauzan je kamela, ke faiv haded je úcú lo bolok, ke faiv haded je asina momo, ke ti se hia lathnyabainy ; me me beönua at eling hon tavat hia aten e deiö. 4 Ke ame labö he lakon je бага he ka ve bijeüâ hnyi umödrin bi je uma hnyi bongudrin je ve bong ; k' ödrin e hawâ ta lahanidrin a kun he ka hnyi han me ic. 5 Ke ame um dö je bonginy tha han, me haba Jobu ame úkhünöng he ka okabi ödrin, ke e ame vesâ hnyi hnyomakatu, me hudo je hudiny leú hoton úseidrin : anyin a haingö Jobu, ka habe, Ame ne ânyâ hulö ge lakuk, me haikongoâ Khong eü hnyi je hnyekudrin. Haba Jobu ame ânyâ helâe bala.

6 Ke ame o but ke bong wale ame o hnyin lakon Khong he ka tot hnyi hnyimakö Iehova, k' ame tha o but Satana mödra. 7 Ke haba Iehova ame ha kö Satana, ka habe, Ühem ua? Me Satana ame thu kö Iehova, ka habe, Ühek hnyi hna ngeno hmeledrany, me vheno e. 8 Haba Iehova ame ha kö Satana, ka habe, Hawa, u je wâ ûnyküme athnyabaik a Jobu, anyin ae ba ke at ae úcú më eang hmeledrany, at ae ti so hwakecin ke wisa,

at ame outen Khong, me úsâkâtö me hulö. 9 Me Satana ame thu kö Iehova, ka habe, Hawa, e ba troban hna outen Khong ga Jobu? 10 Hawa, u je ca hwö hak igigilö e, ke igigilö hnyaban, ke igigilö anyin ta je ûnyi hia hnyi je ke keihen hia? u je hia but ohnahicâ anyin huliwa, me osehia haleny je meno hnyi hnyei. 11 Ke so bi hai thö benyâm walang ang, me mâdrâ anyin ta je ûnyi hia, me e ame he ka haikongu u hnyi hnyimâkâm. 12 Me haba Iehova ame ha kö Satana, ka habe, Wâ bi, e but anyin ta je ûnyi hia thithö hnyi hnyamâm, ke so bi u ma ca he ka hai hnyamâm ka hnyi hon unyin bi. Me haba Satana ame he but úheny hnyi hnyimakö Iehova.

13 Ke hnyi ke bong hnyi ñen ame han me ic waina lakon je бага me lakon je hlu hnyi uma umen tuhödrin, 14 me ame o but úthumetu kö Jobu, me ha, ka habe, Ame hwiö kânâ hnen je bolok, ke e hakekeny ködrin je asina momo ödrin e han : 15 me haba at Sheba ödrin e utut, me húgún' ödrin ; eke, ödrin e hia but kot je athnyaba ge hele vat ; ke inya thiju ang kolon oge me thumetu u. 16 Ke e ame tiga fuc, me ame o but ke at me ha, ka habe, Ame kölu but meic hlogon Khong ûnyi hnyi drany, me thong degecâ je mamoe, me je athnyaba, me ohí' ödrin ; ke inya thiju ang kolon oge me thumetu u. 17 Ke e ame tiga fuc, me ame o but ke at me ha, ka habe, Haba at Kaledaia ödrin e vesâ me me kun ta deü vat, me utut ka ta je kamela, me húgún'

ödrin, eke, me kot ta je athnyaba ge hele vat; ke inya thiju ang kolon oge me thumetu u. 18 Ke e ame tiga fuc, me ame o but ke at me ha, ka habe, Adre me han me ic waina lakom je бага me lakom je hlu hnyi uma umen tuhödrin: 19 ke wâ bi, ame o but ang ae gan hmâ únyi hnyi hnye-buba, me tûâ vak ta kopiny uma, me ame ú takóú je hidróu, me ödrin e mokcu; ke inya 'thiju ang kolon oge me thumotu u. 20 Haba Jobu ame todrö me kia but anyin úkhaú, me giâ ban, me ta ju hnyikânâi me khudrung; 21 me haingen, ka habe, Oge o thu únyi hnyi hnyeku bai, ke oge me he ka he thu hmetu kâ e: a ham Iehova, k' ame he Iehova ka hom hmetu; e so he ka haisoá iö Iehova. 22 A ca ányâ hulö Jobu hnyi ta je únyi hia eling, ke e ame ca haimonoá Khong.

HNYIMAKAN 2.

KE ame o but hmetu ke bong ame o hnyin lakon Khong he ka tot hnyi hnyimakö Iehova, me ame tha o mödrin Satana he ka tot hnyi hnyimakö Iehova. 2 Haba Iehova ame ha kö Satana, ka habe, Ühem ua? Me Satana ame thu kö Iehova, ka habe, Ühek hnyi hna ngeno hmeledrany me vheno e. 3 Haba Iehova ame ha kö Satana, ka habe, Hawa u me wâ únykúme athnyabuik a Jobu? anyin ae ba ke at ae úcú me eang hmeledrany, at æ ti so hwakecin, ke wisa, ke e at ame outen Khong, me úsákáú me hulö: ke e hwege bala bi hnyi anyin wisa, ke u me cubic nya he ka ohia e, ke ba can. 4 Haba Satana ame thu kö Iehova, ka habe, Unen, hwaban unen, eke, haba ta je únyi hia hnen at hna hu, me e ame he ka ham hwaban anyin möt. 5 Ke so bi hai thö walang ang hnyamâm, me kot je jeien me viny, me e ame he ka haikongu u hnyi hnyimákâm. 6 Haba Iehova ame ha kö Satana, ka habe, Wâ bi, e but e hnyi hnyamâm, ke wâ thibi anyin möt. 7 Haba Satana ame he but úheny hnyi hnyimakö Iehova, me kuc Jobu ge je ohuc ae kong, hwân hnyi li hnyeúcan ke ne o but hnyi wanben ban. 8 Ke e ame hom ke watagi kaisa me khudreu anyin; ke e ame laba hnyi hhabadröu. 9 Haba áiân ame ha kâu, ka habe, Hawa, u me he bala ka hwege hnyi ányâm wisa? haikongoâ thö Khong, ke mokcu. 10 Me haingen ka momo, ka habe, E úcú ifucâm me ifucin ke momo ae monu. Hawa? ate me he ka kap so únyi

ge Khong, ke ate me ca he minya bi he ka kap únyi ae kong? Haba hnyi ta je únyi hia thithö eling a ca monu bi Jobu hnen li esongodiny.

11 Ke a löng ut je labanö Jobu a kun ta únyi eling ae kong ame o but kâu, me ödrin e ve o únyi hnyi je idrin; wale Elifaza at Temana, me Biledad at Sua, me Zofar at Naamathi: me ödrin e tha thu üen he ka he me tha tenge me me otubwelâ e. 12 Ke tiga sákáú me ödrin e wâ, ke ödrin e ca wâhmakhmeto e bi, me ödrin e tenge hwege goranyai; ke ödrin e ve kia anyidrin je úkhaú, me iâ kânâ ka hnyi hon je bödrin. 13 Me ödrin e tha laba me hnyi kânâ seven je lany ke seven je lit, ke ödrin e ca fuc kâu: anyin a ödrin e wâ ae ti gan anyin veo.

HNYIMAKAN 3.

HWABAN e haba Jobu ame fuc dö me hangâ bongon bong.

- 2 Ke haba Jobu ame fuc me ha, ka habe:
- 3 E so he ka mok bong adre hnöku nya hnyin,
Me lit adre ha hnyin, ka habe, Adre erkinâ da.
- 4 E so e hnyinghet ut bong eling;
Ca he bi Khong ka elâm e únyi ethö,
Ke ca he ka omelamá e ge melam.
- 5 E so ame he lit me hanon mok ka hom e:
E so he ka tube e ge úlá;
Me ootâ e ge menekholom hnyi jobigö.
- 6 Haba lit eling, me so he ka kât e hnen menekholom ae gan:
Me me ca he ka hnyi senyin me ta je bonginy huna;
M' adre me ca he ka tha aú e me ta je tehi.
- 7 Wâ bi, e so he ka ba wan lit eling;
M' adre me ca he ka löng hwan senyin hnyin.
- 8 E so he ka hangâ e hnen tavat adre me hangâ bong,
Tavat ae khan' ödra he ka bwebwelâ leviathana.
- 9 E so e he ka udrem je okhúiny okubelit:
Me elâm lany, ke ba bi;
Ke ame ca he ka wâ li emakan hnyomakatu:
- 10 Anyin a e ame ca theling nya hnyi hnyeku bai,
Me ikhâlâ vec ge li emakök.
- 11 Ieú oge me ca mok gan únyi hnyi hnyeku bai?

- Ke ieu oge me ca mok gan hnyi bong
oge me o únyi hnyi hnyeku bai?
- 12 K' ame köp nya hnen li jevan, geú?
Me li basin, m' inye he ka ijem?
- 13 Ame ne heláng, me oge me ne mokut
me ca bwebwet;
Me oge me ne mokut hnying, m' inye
mená:
- 14 Tha inya me je than me je obotkonginy
hmeledrany,
Tavat adre me op je dok ae ba hnyin
at, hnán hõbi ködrin bi;
- 15 Ke je than a ödra tren gol,
K' ödrin e öunöngötá umödrin je uma
ge sileva:
- 16 K' ame ne hiö nya helá me da a kölu-
habu, k' adre ikhâlá bi;
Helá me je mendring adre me ca wá bi
lany.
- 17 K' ame ca he hmetu ka ovec' ödra eling
ge tavat ae kong;
K' ame mená bi eling tavat adre me
sényin.
- 18 K' ame laba wia eling tavat adre me
ca;
K' adre me ca löng hmetu hwan at
khene huliwa.
- 19 Houmonu eling tha e me at ae únyi
hnathu;
K' ame gufa bi athnyaba ge tuhan.
- 20 Hnán eú adre me ham melam ka at
ame vec,
Me möt ka at ae hlöublöu hnyok:
- 21 A hnyat adre me bemok, k' ame ca o bi
ködrin;
K' adre me hiny me elám ka wá, hon je
omjeú ae iyong;
- 22 A hnyat adre me ti senyin,
Me hobá, ödrin ka wá erkemok?
- 23 Ieú gadra adre me ham melam ka at,
k' adre me oiyongá deny gethen,
At ame thelöng hnen Khong?
- 24 Anyin a inya oge me mâng helá me oge
me han,
K' ame hingálá anyik tenge helá me
köiö.
- 25 Anyin ame o but kõnya únyi oge me
ti ouden,
K' ame o but kõnya únyi oge me öbu-
buny gan.
- 26 Oge me ca laba wia, me ta hau, k' oge
me ca mená bi;
Ke ame o thö hlohlo.

HNyimakan 4.

- H**ABA Elifaza at Temana ame thu,
me ha, ka habe,
- 2 Hawa, u me he ka vec ame ne he ke at
ka me úhnenamö möu?
Ke ia ae khana he ka laba hnyibú?
- 3 Wá bi, u je hia but ná tavat ae se hia,
K' u je hia but ohwegiá je hnyam' ae
sényin.
- 4 U je hia but kát tavat adre me he but
ka ta hnen hwám ta je hofuc,
Ke u je hia but sihwegiá je boucan ae
mat.
- 5 K' ame o thö köu walang ang, me u me
ta;
K' ame kuc u, me u me hlohlo but.
- 6 Hawa ge hnám hna ouden Khong, ca
wale ányám labageju,
Ke hnám hna he wisa, ca wale bi
hnám hna gejon?
- 7 Me únykúme ju, Ie at ame mok ke ba
hnyikongon?
Ke ewa dok adre me subá degecá at ae
wisa hwakecin hnyin?
- 8 Wánök, a g' ame he tavat adre me
belöká únyi ae kong,
Me ta úokonguny, he ka hnyi meno e.
- 9 A hi' ödrin dut únyi ge imenáiny
Khong
Ke ödrin e aú but ge imenáiny anyin
hmönyin.
- 10 Haba hmuhuiny liona, me hwan liona
ae beúkcú,
Me je nyon je nak liona, me, adre hia
but thu.
- 11 A mokcu liona hingat, anyin ae ba but
haniny,
Ke adre me vese thö je lakon liona.
- 12 Adre oá duóngá kõnya ke únyi,
Ke haba hnyikönyök ame löng hwan
hwalit.
- 13 Hnyi ta je hna únykúme hnyi je hna
omanená hnyi hnyinghet,
Hnyi úen ame ta but mokut hnying
hon tavat,
- 14 Ame o but kõnya ot me öbubuny,
Me me bwebwet je jeiök hia thithö.
- 15 Me ame he but hnyi hnyimakök ke
hanu;
K' ame todrö dinen unyik.
- 16 E ame tot, ke oge me ca wá wia unyin;
Ke e hnyi hnyimakök helá ke unyin:
E ba hwan, ke so bi oge me löng hofuc,
ka habe,

- 17 Hawa, ame he at ame he ka hu obiny
ka beönua hon Khong hnyi hwakecin
ae wisa ?
Ke ame he at ka beönua hon At a op e
ge ba hnyikongon ?
- 18 Wá bi e ame ca labageju ka je athnya-
bainy ;
Ke e ame ha hnyikongon anyin je
angela :
- 19 Awe, ame ca heláe ge tavat adre me
labá je uma káná ae kece,
Ke káná dok adre hwán hnyin,
Ke adre bódra ka hlic ödrin, ke biliny
bi walelaba !
- 20 Adre ohí' ödrin hnyi wanben hnyoma-
katu me sahac :
Ame hi' ödra balua but, ke ba at ame
wáhmakhmeto.
- 21 Hawa, adre ca oc ut töiny umödrin
uma eú hnyidrin ?
Ödrin e mokcu, ke ba metá gadrin.

HNYIMAKAN 5.

- B**ETHE hongot, hawa, e hu at ame he
ka thu köü ?
Ke ewa at ae kap u me he ka hwiö káu ?
- 2 Anyin a haba hmönyin ame hlingá at
ae monu,
Ke haba ciá ame hlingá at ame hop.
- 3 Oge hia but wá at ae monu k' ame bi
hweciny :
Ke oge me ie hangá hnyaban.
- 4 E sákáú but lakon ge khötkic
K' adre me úhlic ödrin hnyi homagöule,
Ke ba at he ka omeli ödrin.
- 5 Ke ame han hnödrin hna menu hnen at
ae mekihnánem,
Eame húgúná e únyi hnyi je úö ae údö,
A memang ut hnewe hobi káu anyi-
drin ta je únyi.
- 6 Anyin ame ca o but vec únyi hnyi
sesáiny káná,
K' ame ca kú hlöuhlöu únyi eú hnyi
káná ;
- 7 Ke adre me hnokoá at ka hnyi hlöuhlöu
Helá me je wahleúhleúiny meic ame gá
göranyai.
- 8 Ke oge me behe bi nya ka elám
Khong.
K' oge me behna but ka Khong hnök
hna úhnenamö :
- 9 Wale at ame ányá ta je únyi ae gan, ke
ca hnán bi elám ;
Ke ta je únyi hnán láíá, ke ca hnán bi
aú :

- 10 Wale at ame ham we ka hnyi hmele-
drany,
Me kuná köiö ka hnyi hon ta je utkáná :
- 11 Haba e at ame ip tavat ae hnyikáná ka
hnyi dok ae göraný ;
Me ogöranýá tavat adre me tenge m'
adre me he ka laba khötkic.
- 12 E ame odilá je únykúmánen tavat
bibihwakecin,
Me me ba únyi adre me he ka ányá ge
je hnyamödrin.
- 13 E ame ohnoká tavat ae metá hnyi anyi-
drin je bibihwakecin :
Me ologotá úhnenamö anyin tavat adre
me bigan.
- 14 Adre me úkhanö me menekholom hnyi
lany,
Me khaúteta hnyi jebigö heláke me
hnyinghet.
- 15 Ke e ame omelo únyi ge hele vatiny
hnyimödrin,
Wale je at ae theduoc únyi ge hnya-
men at ae hwege.
- 16 Me me hu gejon ge at ae theduoc,
Ke hulö ame kát hnyi men bi.
- 17 Wá bi, e hnahic at Khong ame ná ;
Anyin a wale, u ma ca höciá hna ná
hnen Ataekhanahia.
- 18 Anyin a e at ame ovecá me lan minya ;
E at ame bi aat me ometo minya ge li
hnyamen.
- 19 E ame he ka omeli u hnyi je vec a siks ;
Eke, ame ca he ka kalö u hnen hulö
hnyi seveniny.
- 20 E ame he ka omeli u hnyi hmiá m' u
me ca mok ;
Me hnyi vat, únyi ge maniny hele vat.
- 21 Adre me he ka ikhölö u únyi ge hinyin
je bohmen ;
Ke u me ca he ka outen hnaúhangö e
ka o.
- 22 U me he ka hluma úhoiö me hmiá ;
Ke u me ca he ka outen je menoiny
hnyot.
- 23 Ke ame he je vetoiny hnyei ka tha
hien möu ;
Ke ame he ka úsoköu möu ta je menoi-
ny hnyot.
- 24 Ke u me he ka wá a g' ame hnahic ut
umám uma mano ;
Ke u me he ka wá hmetu hnyabam, ke
ba ke únyi ame he ka hia.
- 25 Ke u me he ka wá a g' ame he ka gan
mátránám ;
Ke ame he je sem ka helá me ajilatiny
hmeledrany.

- 26 U me he ka o ka hnyi erkemok ke u hingat ut ;
Helâ me thi hwit adre me hom hnyi ùen.
- 27 Wâ bi ùnyi e, wale hnöhmun hna elâm, ke e ke ;
Löng ju e, me wâhmakhmetoâ hobi köu bi.

HNHYIMAKAN 6.

- H**ABA Jobu ame thu me ha, ka habe,
2 Ödra na he ju ka tuluto ihmakin
anyik hmak,
Me tha ip anyik vec hnyi ùnyi hnân
tulut !
- 3 Anyin a walang ang ame he ka hmak
ut hon önyin köiö :
Anyin a wale e monu but hok je hofuc.
- 4 Anyin a eü hnyi hnyekuk je fana anyin
Ataekhanahia,
Haba hanuk ame ijem ùnyi imekiny :
K' ame tot metâ könya je hna ootâ
anyin Khong.
- 5 Hawa, ame he asinainy hnyot ka kuku
ame ne hu önying ?
K' ame he bolok ka kuku hon an jeü ?
- 6 Hawa, adre me he ka han ùnyi ae
bokânâ he ka ba bi sâlt ?
Ke hu hnamen waehenuiny wakunyin
khoto ?
- 7 E höcö bi hanuk he ka kâlâ ;
Ke helâ me jeü ame bokong könya.
- 8 Iny na he ju ka kap hnök hna sumâtâ ;
E na he ju Khong ka ham könya hnök
hna gejon !
- 9 Waleling me me beweny Khong ka hlic
nya ;
Me bethang hnyamen he ka subâ degeci
nya !
- 10 M' oge me he ka laba wia,
Eke, oge me he ka senyiná vec, a at ame
ca betenge :
Anyin oge me ca ivinöâ hofuc hwan At
ae Kap.
- 11 Ieü tang hwegiök me inye he ka halu-
bahingen ?
Ke ieü obiny gak, m' inye he ha hok-
hnyokâ ?
- 12 Hawa, ame helâ me ihwegien veto tang
hwegiök ?
Ke bras bi vik ?
- 13 Hawa, e ca hnathu ae ba úhadruo
unyik,
K' adre me ohia gak he ka ânyâ ke ùnyi
ae hu troban ?

- 14 A ne he but at ka mok, me so ame he
hanen ka betenge gan ;
Wâ e nye he ka hna degecâ outen Ataek-
khanahia.
- 15 A hia but iyawö ge je liamekeiny
mönya helâ me wagewe ;
Ke helâ me deny je wagewe a hingölö
but ?
- 16 Wale a hlit ut hnen köiö ae wahma,
K' ame laba duöng ut kiona eü hnyin :
- 17 Haba hnyi ùen mage, me, ame hia but :
Ke hnyi ùen hlöng, me, ame aü büt
hnyi hnen.
- 18 K' ame saü but je bunyen adre me
gethen eling
Adre me ölö but ka hnyi hnyebuba, me
mokcu.
- 19 Adre me wâ e hnen je bunyen anyi Tema,
K' adre me halubahingen hnen je bun-
yeniny Sheba.
- 20 Ödrin e hmehma anyin a ödrin e laba-
gejon ;
Ödrin e o but kâe me ame gâ udrin.
- 21 Anyin a walang öbun e gufa but ;
Öbun e wâ ùnyi hnân öbubuny gan, me
öbun e ot.
- 22 Hawa, oge me ha, ka habe, Hö jem
könya ?
Ke, ha omjehek ùnyi hnyi tang omje-
hebut ?
- 23 Ke, omeli nya ùnyi hnyi hnyamen
iwahnaihmiony ?
Ke, úcû melik ju unyin tavat seda ?
- 24 Nö nya thö, ke oge me he ka laba
hnyibú :
Ke owâhmakhmetu nya thö ge hnök
hna monu hnyin.
- 25 Shaiba ge maniny hofuc ae wisa !
Ke ieü troban fuc a öbun ?
- 26 Hawa, öbun e ùnykúme he ka úo je
hofuc ?
Ke hofuc hwan at ame ti hmönyin.
helâ me ang.
- 27 Eke, öbun e beugleköbâ nakahme,
Me ânyâ ka hanöbun, helâ me omjeü
adre úco.
- 28 Ke walang ang, öbun na ö nya thö ;
Anyin oge me ca he ka thoi hnyi hnyi-
maköbun.
- 29 Öbun na hmetu ju, me me ba ùnyi ae
hwali ;
E ke, hmetu ju, ame wisa anyik úhnen-
amö.
- 30 Hawa, e hu hwali hnyi bohök ?
E ca khana hnyimök he ka demhmakh-
metoâ ta je ùnyi ae kong ?

HNYIMAKAN 7.

- H**AWA, e ca hamen at he ka vat eang hmeledrany ?
 Ke, ca úcú anyin ta je bong me je bong bongon at ame hok hwaban ?
- 2 Helâ me athnyaba ame weny hmönyiná hmenu,
 Ke helâ me at ame hok hwaban ame halubahingen hwaban anyin huliwa :
- 3 Helâe adre kunö nya he ka hu gak je tehi ae únyi baú,
 Ke adre me ham könya je litiny vec.
- 4 Oge ne he ka mokut haingök, ka habe, Ieú úen oge me he ka höhöi huyin ? ke e beú hmâ lit ;
 Ke oge me labö seset ke ne o but haolany.
- 5 Adre me khavâ unyik ge je wahnyöng me je tap kânâ ;
 Ame metu but unen unyik, k' ame han hmetu but.
- 6 E logot bonguk je bong hon jebú anyin at ame hwâwâ mano,
 Adre me he but, ke ba gejon.
- 7 Öbun na únykúme ju a haba melik me helâ me ang :
 K' ame ca he hmetu emakök ka wâ so.
- 8 Haba emakan at ame ö nya, me ame ca he hmetu ka ö nya :
 Ame he ka e but huk li emâkâm, k' ame hiö nya but.
- 9 Helâke úlá ame aú, k' ame hia but,
 Me helâe at ame dit ka hnyi erkemok, e ame ca he hmetu ka ölö göranyai.
- 10 E ame ca he ka hmetu ka hnyi hnyaban, K' ame ca he hnen bi ka wâhmakhmeto hmetu e.
- 11 Anyin a wale oge me ca he ka kât hnyimök
 Oge me he ka fuc únyi hnyi vecin hanuk ;
 K' oge me he ka tenge hnyi hlöuhlöuiny hnyekuk.
- 12 Hawa, iny köiö ae gan, ame ne tanimo, M' u me otilâ at he ka tuö nya ?
- 13 Oge ne ha, ka habe, Ame he hnök hna mokut ka otubweli nya,
 K' ame he hnök hna mokut ka ohâhá anyik tenge ;
- 14 Awe, u je oti nya ge je bwi,
 Me öbubunyi nya ge je hna omanená :
- 15 Waleling m' oge me wek bi he ka hnok,
 Me he ka mokcu, ke kong bi vecin je jeiök ang.

- 16 Oge me ikikiâ anyik möt ; ca wek bi he ka he bala ka möt :
 Hnö nya but, anyin ae únyi baú but bonguk je bong.
- 17 E hö at, m' u me he ka ogânâ e,
 M' u me hnyok kâu,
- 18 Me u me he ka wâ e hnyi je hnyomakatu,
 Me labö cubec e hnyi je ong úen hia ?
- 19 U ma ca he ka hwiö únyi gak ke ne o but kehö,
 Me hnö nya but hnyi ong úen oge me utâ hangöjik hnyin ?
- 20 Oge ne hia but monu, ieú hnök hna ânyâ köu, a at tuö tavat ?
 Anyin a ieú u je otilö nya hnân ânyâm aat,
 Me inye hmak gak bi ?
- 21 Ke ieú u je ca hna degecâ gan anyik hulö, me hom degecâ anyik monu ?
 Anyin a walang ang oge me he ka mokut eú hnyi kânâ ;
 Ke u me he ka elöm nya wia, ke hiö nya bi.

HNYIMAKAN 8.

- K**E haba Biledad at Sua ame thu me ha, ka habe,
- 2 Ke ne o but kehö u me he ka ha je hofuc ang ?
 Ke ne o but kehö ame he hwâm je hofuc ka helâ me ang ae hwege ?
- 3 Hawa, ame he Khong ka önua hna owisa ?
 Ke ame he Ataekhanahia ka önua wisâ ?
- 4 A ne hia but ânyâ monu kâu hnen lakom,
 Me e ame hia but hn' ödrin ka hnyi hnyamen anyidrin hulö :
- 5 U je ne he ka elâm wia ka Khong,
 Ke khöu ka Ataekhanahia ;
- 6 Ke u me ne at ae ba hnyikongon me wisa whakecâm ;
 Awe e ame he ka hmâkâ walang ang hobi köu,
 Me ham sot ka hnyi umen hwakecâm ae wisa.
- 7 Eja ke ne a ne úhnyükong hnâm hna hwân ehac,
 Ame he ka he bi ka ti se hia obiny köu.
- 8 Ö u hnö thö ge dö a bán,
 Ke wâ wia ta je únyi waleji hnen lakamödrin hna elâm bongon :
- 9 (Anyin a ötin je hnyat et thibi, me tavat ae ca khana,

- Anyin a bongutin ta je bong eang hmeledrany helá me hmenon :)
- 10 Hawa, ödrin e ca he ka nö u, me thu köu,
Me ha je hofuc únyi eú hnyi je hnye-kudrin ?
- 11 Hawa, ame he ka kú hage he ba hmu-dra ?
Ke ame he ka kú amun, ke ba köiö ?
- 12 E ka tiga hát, k' adre tiga ca suba bi,
Me ame he ka bán ka meleca, ke biliny bi ta je hnyot hia.
- 13 Heláe minya je gethen deny tavat hia adre me hnying Khong ;
K' ame he ka hia hna gejon ge at ame ca outen bi Khong :
- 14 Adre me he ka subá degecá hnen hna gejon,
K' ame heláke umen wahaihna hnen hna labageju.
- 15 E ame he ka ci ka hnyi umen uma, k' ame ca he bi ka tot :
K' ame he ka kát hmá e, k' ame ca he ka tethmá.
- 16 E hát, ke tiga ca o bi seúnö,
K' ame he ka iyáú je vheiny hon hnen hna belöká.
- 17 A dit ut je wán hnyin hna digic thátúnyi,
E ame wá dok ae hu veto hnyin.
- 18 Adre me ne ohia e únyi hnyi hnen,
Me e ame he ka ivinöá e, ka habe, Oge me ca ö u.
- 19 Wá bi, wale senyin hnyi deny gethen,
K' ame he bi keihen ka kú únyi eú hnyi káná.
- 20 Wá bi, ame ca he Khong ka hota degecá at ae wisa,
K' ame ca he ka otethmá tavat adre me ányá hulö.
- 21 E ame he bi ka ounöngötá hnyimâm ge hluma,
Ke li esongodám ge hongot senyin.
- 22 Adre me khavá ge hmehma tavat adre me húkotiö u ;
K' ame he ka hia but uma mano umen tavat ae kong.

HNYIMAKAN 9.

- M**E hába Jobu ame thu me ha, ka habe,
2 E hnathu e khanö nya wia e :
K' ame he ka kámáu at ka wisa unyin Khong ?

- 3 Ame ne weny he ka ivinö mä,
E ca khana he ka thu ka ke únyi a khaca hnyi wan thauzan.
- 4 E at ae metá hnyekon, ke gan hmá man :
Ewa at ae hwege hnyimakan káu, me me ton ?
- 5 E thibi at ame oc je bucen, ke ca khañ ödrin,
Hnyi úen e ame wi' ödrin hnyi anyin hmönyin.
- 6 E ame bwewelá hmeledrany únyi hnyi hnen,
Me ame öbubuny je hmolominy.
- 7 E ame húna ka seúnö, me me ca he ka o ;
Ke e ame okeceá khötá je okhú.
- 8 Hake e ke thibi at ame lau drany,
Me uto hon je waköiöiny köiö
- 9 E thibi at ame ányá Uresa me Oriona me Kukuúnyi
Me je hnyeule ka hnyi hwaiöu.
- 10 At ame ányá ta je únyi ae gan ke ca hnán wáhmakmeto ;
Eke, ta je únyi hnán láíá ke ca hnán áu.
- 11 Wá bi, e ame he batök, ke oge me ca wá e :
E ame he bala, ke ca khañö nya e.
- 12 Wá bi, e ame hügúná, ke hamö ia he ka thawá ?
Ia ame he ka ha káu, ka habe, Ieú e u me ányá ?
- 13 Khong ame ca he ka ohmeto anyin hmönyin ;
Ame he ta je hnyok bi gan hia ka khudrung káu.
- 14 Ke hába inya me ti úhnyúkong hnök hna khana he ka thu káu.
Ke ca úca hok je hofuc he ka ivinöá mä.
- 15 Oge ne wisa, me oge me ca he ka thu káu ;
Ke oge me he ka khöü ka at ame owisö nya.
- 16 Oge ne hia but hongot, ke e ame thu kónya ;
Me oge me ca he ka únykúme a e ame löng hok.
- 17 Anyin a e ame ohmetru nya ge weneú,
Me osehia hnök je aat, ke ba can.
- 18 E ame ca he ka hnö nya he ka mená,
E ame ounöngöti nya ge je únyi ae hiny.
- 19 Adre ne ha ge maniny tavat ae hwege, wá bi, e bi e !
Ke adre me ne ha ge hna owisa, ie ame he ka thu úen kónya ?

- 20 Oge ne he ka haiwisai nya, ame he hnyimök ka haikongu nya :
Oge ne ha, ka habe, iny wisa, e ame he ka haihwali nya.
- 21 Oge ne wisa ; me oge me ca wâhmak-hmetu nya bi ; iny hōciâ anyik môt.
- 22 E khaca thibi bongon ; anyin a wale hnök hna ha, ka habe,
E ame ohia at ae wisa, me at ae kong.
- 23 Adre me ne ie blingâ ge osö,
Me ame he ka hluma hna cubec at ae ba hnyikongon.
- 24 Adre me hna hmeledrany ka hnyi hnyamen at ae kong :
E ame tube je hnyimakan tavat owisa e ;
K' ame ne ca at eling, awe, ia bi ?
- 25 E logot bonguk je bong hon at ae hâhâ li can :
K' ame kec ut, k' ame ca wâ so.
- 26 Ame hia but, helâ me hu ae logot kec :
Ke helâ me aeto ame gâ ka hnyi haniny.
- 27 Oge ne ha, ka habe, Oge me he ka hnying anyik tenge,
K' oge me he ka wia hnyimakök ae hmak me me menyik bi :
- 28 Me oge me outen anyik je vec hia,
Ke khanö nya a u me ca he ka ha ae ba kongik.
- 29 Adre me he ka haikongu nya ;
Ke hnân eü me oge me he ka huliwa baü ?
- 30 Oge ne he ka östüo nya ge köien kiona,
Ke hnyem ge oiöâ ;
- 31 Me u me he bi ka odili nya eü hnyi thop ae hmudra,
Me me he ka ikiki nya hnen hing ükhaük.
- 32 Anyin a e ca at helâ mönya, me inye he ka thu kâu,
M' öhmu me he ka ühnyimaköh muköu hnyi hna owisa.
- 33 Ke ba at he ka owisa köhmu,
Me ip li hnyamen buhmu.
- 34 E so e ame he ka hom anyin osö ünyi gak,
Ke ca oti nya ge anyin ta je ünyi hnân outen :
- 35 Me oge me he bi nya ka fuc me ca outen ;
Anyin e ca hwakecik he ka helâe.

HNYIMAKAN 10.

- OGE me sēnyin dut ge melik ;
Oge me ca he bi ka thawâ anyik tenge ;

- K' oge me he ka fuc hnyi hinyin hanuk.
- 2 K' oge me he ka ha ka Khong, ka habe,
Ca he ka haikongu nya ;
Omanenâ thö kõnya can u me ü nya gan.
- 3 Hawa e so köu m' u me he ka seda,
M' u me he ka hûkötia huliwa anyin li hnyamâm,
Me ohnahicâ ühnenamö anyin tavat ae kong ?
- 4 Hawa, li emakan at li emâkâm,
Ke u me wâ helâ me ibwelien at ?
- 5 Hawa, e ücü bongom je bong me je bong bongon at,
Ke e ücü hunaiâm me je bong bongon at,
- 6 Me u me hna hnö anyik hulö
Me elâm anyik monu ;
- 7 Ke so bi e khanö u a iny' ca at ao kong ;
Ke ba at ame he ka hûgûnâ ünyi hnyi hnyamâm ?
- 8 Haba li hnyamâm a huliwön nya, me up nya,
Hnyi je ke keihök hia ; ke so bi u me he ka ohio nya.
- 9 Ö u ünyküme ju a u je up nya helâ me kânâ ae kece ;
Ke hawa, u me he ka ohmetu nya ka hnyi kânâ ?
- 10 Hawa, u je ca hingölö nya helâ me dân basin,
Me owahmai nya helâ me fromage ?
- 11 U je okhaüo nya ge unen me viny,
Me üöhmaköuönya ge je jö me töiny.
- 12 U je hia but ham kõnya môt me ibetengio,
Ke u je tuö hanuk ge hnâm hna senö nya.
- 13 Ke u je ikhâlâ ta je ünyi e eü hnyi hnyekom ;
Ke e khanö nya a ka e bi e unyâm :
- 14 Oge ne änyâ hulö, u me bi hatök
Ke u me ca he ka hnö nya but ge anyik hulö.
- 15 Og ne at ae kong, ekölö gak !
Ke oge ne at ae wisa hwakecin, me oge me ca he ka ogöranyâ bök ;
E gan hmâ anyik hnehma,
Me oge me wâ anyik vec.
- 16 A ne hamen bök he ka ogöranyâ e bi, u je hnu nya helâ me liona :
Ke u me he ka änyâ hmetu kõnya je ünyi hnân läiâ.
- 17 U je hom gaga je hnyat gam, ödrin e haikongu nya,
Me bi hanen änyâm hmönyin kõnya ;

JOBU 11, 12.

- K' ame o but kõnya je únyi ae ve bongon me vat.
- 18 Ieú u je oi nya gan únyi hnyi hnyeku bai?
- Iny na mokcu ehac, k' adre ca õ nya!
- 19 Me inye ba, me ca möt bi ;
K' adre me köp nya únyi hnyi hnyeku bai ka hnyi erkemok.
- 20 Hawa, e ca wakhalet biju bonguk ta je bong? awe, soju,
Mê hnö nya but, me inye menâ thö hnyi ong úen,
- 21 K' inye tiga ca he ka hnyi dok adre me ca hmetu únyi hnyin,
Wale hnyei ae menekholom me hmenon mok ;
- 22 A hnyei ae ti menekholom hmönyin, helâ me menekholom cici ;
A hnyei iny hmenon mok, ae ba hwe-nöniny,
K' ame helâ me menekholom bi lany.

HNYIMAKAN 11.

- M**E haba Zofar at Naamathi ame thu me ha, ka habe,
- 2 Hawa, adre me ca he ka thu hmetu ta je hofuc ae se hia?
Adre me he bi ka hawisa at âme unöngöt ge je hofuc?
- 3 Ame he hwâm je hofuc gufa ka ohnyibö tavat?
U me he ka úhiö, ke ba at ame he ka oihmehmö u?
- 4 Anyin a u je ha, ka habe, E hau hnök hna úne,
Ke ba kongik hnyi hnyimâkâm.
- 5 Ke, E na he ju Khong ka fuc,
Me khöng li esongodiny he ka ivinö möu ;
- 6 Me omanená köu ta je únyi ae iyong hnyi metâ,
A g' ame huliwa so hnyi je ve bongon ae se!
Anyin a wale mē khanö u thö, a Khong ame ca únykúme ányâm ke je hulö.
- 7 Hawa, u je ne elâm Khong, e khatö u he ka wâ?
E khatö u he ka ti wâbmakhmeto Atækhanahia?
- 8 E görany hmönyin helâ me drany ; ieú u me he ka ányá?
E hnyikánâ hmönyin hmelen hedis ; ieú ae khanö u bi?
- 9 Haba tulutiny, me beú hmâ hon hmele-drany,

- Me lau hon köiö ae gan.
- 10 Ame ne he ka dit, me hlöng,
Me hawâ tavat ka hnyi hna owisa, ie at ame he ka thawâ?
- 11 Anyin a e ame wâhmakhmeto tavat ae únyi baú :
E ame wâ hulö minya, ame ne ca únykúme win gan.
- 12 Ke e ca hu metâ ge at ae hop,
Eke, adre hnokoá at helâ me nokon asinainy hnyot.
- 13 U je ne penapena hnyekom,
Me hinöbeny kâu ;
- 14 Ame ne hu hulö hnyi hnyamâm, degcut e sâkâu ai,
Ke ca hna hulö ka mokut hnyi umâm je uma manö :
- 15 Ke helâe u me he ka bwele thö göranyai me ba hnyikongom ;
Eke, u me he ka hwege, me ca ot bi :
- 16 Anyin a u me he ka hnying ányâm vec ;
U me he ka únykúme gan helâ me je di a hia but :
- 17 Ke ame he ka görany ányâm möt hon jebigö ;
A ne menekholom, ame he ka helâ me hnyomakatu.
- 18 Ke u me he ka laba hmâ, anyin ame he ka hu gejon ;
Eke, u me he ka elâm, me he ka mokut hnyi hnahic.
- 19 U me he minya ka mokut, me ba at ame he ka ooti u ;
Eke, ame he ka weny gam tavat ae se hia.
- 20 Ke ame he ka dit ut li emakan tavat ae kong,
Ke ba gethen adre me he ka koc ka hnyin,
Ke ödrin e he ka labageju ka hnyi úen mokcu.

HNYIMAKAN 12.

- H**ABA Jobu ame thu me ha, ka habe.
- 2 E hnathu öbun thibi tavat,
Me ame he ka tha mokcu metâ möbun.
- 3 Ke so bi e hu únykúmánök minya helâ möbun ;
Ca inya bi hnyi hmelibun :
Eke, ke ewa at ae ca khana ta je únyi heláng?
- 4 Oge me úcú me at ame hluma gan hnen waeny,

Waleji at ame hongot ka Khong, me e
ame thu ;
Adre me hluma ge at ae wisa, me so
hwakecin.

5 Haba at ame laba sot, me wale at ame
hükötiâ at ae hmak, eü hnyi hnyekon ;
Adre me penapena e hobi kâu at ame
he ka haü li can.

6 Ame mokut so je uma mano umen tavat
venöu,
Adre me laba hmâ, tavat adre me ohmö-
nyinâ Khong ;
He haba Khong ame ham gâná ka hnyi
je hnyamödra.

7 Ke he thö walang ang ka hnö omenoiny
hnyot, m' ödrin e he bi ka nö u ;
Me je meno ame gâ ethö, m' ödrin e he
ka thumetu u :

8 Fuc dö ka kânâ, me ame he ka nö u ;
K' ame he je wâ eü hnyi köiö ka oma-
nenâ köu.

9 Ie at ame ca wâ tremângâ ta je únyi
hia eling,
A g' ame ányâ e hnyamö Iehova ?

10 Haba e hnyi hnyamen hanon ta je únyi
hia ae möt,
Me homenâ anyin tavat hia thithö.

11 Hawa, ca hamen hnyiköny he ka cubec
ta je hofuc,
Helâ me hnyem ame dem cubecâ jeü ?

12 E unyin wahingat metâ,
Ke unyin tavat ae se hia, bongon wâ-
hmâkhmeto.

13 E unyin bi metâ me tang hwege ;
E unyin bi uhnenamö me wâhmakh-
meto.

14 Wâ bi, e ame hagutâ, ke ca khana ke
at he ka op hmetu ;
E ame thelöng at, ke ca khana ke at he
ka khöng hmetu.

15 Wâ bi, e ame behânâ köiö, me ame hme
thö :
Ke ame kunâ hmetu, me me wia hnyei.

16 E unyin hwege me metâ ae hnathu ;
E ame tren at omono, tha e me at adre
omono.

17 E ame lelö but ta je obotkong, hnyat
adre hia but söh,
K' ame omono tavat owisa.

18 E ame thang je than adre ca,
K' ame hükälâ bi wen hnyok hnyi je
hnyidrin.

19 E ame lelö but tavat bihut adre hia but
söh,
K' ame hagutâ tavat ae hwege.

20 E ame hom hofuc únyi ge at ae hnathu,

K' ame hom wâhmakhmeto únyi ge
wahingat.

21 E ame hingälâ but úöhüköti hon je
than,
K' ame thang wen hnyekon tavat ae
hwege.

22 E ame omanená ta je únyi ae iyong
únyi hnyi menekholom,
K' ame hom dö hmenon mok ka hnyi
lany.

23 E ame osehia ta je hnyei, me ohí' ödrin
hmetu :
E ame olauâ ta je hnyei me odili ödrin
hmetu.

24 E ame hom je hnyekon tavat ae beönua
hnyi hmeledrany,
Me kun' ödrin he ka vheno hnyebuba
ae ba getheniny.

25 Ödrin e khaüteta hnyi menekholom me
ba hnân omelamá.
K' ame omonu ödrin helâ me at ame
monu ge grág.

HNYIMAKAN 13.

WÂ bi, a wâ but emakök ta je únyi
hia eling,
A löng ut hnyikönyök me wâ únykü-
me e.

2 Haba únyi ae khan' öbun, e khanö nya
minya :
Iny ca úhnyúkong hmelibun.

3 Iny na he ju ka fuc ka Ataekhanahia,
Iny bewek he ka úhnenamö me Khong.

4 Ke öbun tavat sit hofuc thoi,
Ke öbun tavat tren bubun hia ae únyi
baü.

5 Öbun na he ju ka laba hnyibü !
Me me manen dut anyibun metâ.

6 Löng ju walang ang anyik úhnenamö,
Ke tpehlöng ju úivinöik.

7 Hawa, öbun e he ka ha únyi ae kong
he ka bi hien Khong,
Öbun e he ka fuc thoi he ka bi hien ?

8 Öbun e he ka bi so kâu ?
Öbun e he ka ivinö hobi kâu Khong ?

9 Hawa, e so e he ka elâm bongubun ?
Ke hawa, öbun e he ka iyawâ e, helâ
me hna iyawâ at ?

10 E hnathu e ame he ka thaw' öbun,
Öbun e ne wâhmakhmeto duöngâ tavat.

11 Hawa, ame ca he hmanenanginy ka oti
öbun,
Ke ame ca he ka o köbun hna outen e ?

12 Haba hobun je hofuc hnân únyküme,
me helâ me vejeciny hnabadröu,

- Ke haba anyibun je huabá, me je hnabá káná ae kece.
- 13 Laba hnyibú ju óbun gak, m' inye he ka fuc,
Eja ke ne a ne o but kõnya ke je únyi bi.
- 14 Anyin a iéú oge me he ka oloú vik ge je nyuk,
Me ip ju melik hnyi hnyamök ?
- 15 Eja ke ne a ne hlingö nya, oge me he ka halubahingen :
Ke so bi oge me he ka haisoá dek je gethen hnyi hnyimakan.
- 16 Haba únyi e, me ame he ka omeli nya ;
Anyin a haba at ame ca ot, me ame ca he ka o ka hnyi hnyimakan.
- 17 Tevehlöng wia ju ifucik,
Ke so ame dit ka hnyi je hnyikönyöbun hnök hna omanená.
- 18 Wá bi, oge hia but penapena anyik úhnenamö,
E kxanö nya a g' adre me he ka haiwisö nya.
- 19 Ie at ame he ka ivinö mönya ?
Anyin a oge ne laba hnyibú, me oge me he bi ka mok.
- 20 Haba lo thibi li únyi u me ca he ka ányá kõnya,
M' oge me ca he ka ikhölö nya bi hnyi hnyimákám :
- 21 Hom dö hnyamám gak,
M' oge me ca he ka outen ányám ta je únyi hnán outen.
- 22 Me u ma hongot, me oge me he bi nya ka iéú ;
Ke hnö nya bi he ka fuc, me u me he ka thu kõnya.
- 23 Ve úseiny anyik ta je monu me anyik ta je hulö ?
Omanená thö kõnya hnök hna hanyáúá me anyik hulö.
- 24 Anyin a iéú u me ikhálá hnyimákám,
Me únykúme a iny iwahnaihmiöny dut möu ?
- 25 U me he ka hwege ka lan úö ame túá ge ang ?
Ke u me he ka hnu tilá thatúnyin hwit ae meleca ?
- 26 Anyin a u me sihnalimen ta je únyi ae hmak gak,
Me oá kõnya anyik ta je hulö, waleji k' iny tiga wanakat :
- 27 U je ohmá li cak hnyi úö, me bi haten dek je gethen hia ;
U je bi haten ka hnyi li hnyeúcak :

- 28 Ke iny helá me únyi ae bobot ame at but,
Helá me úkhaú ame an hnen nokon walelaba.

HNYIMAKAN 14.

- H**ABA at a hnokoá hnen momo
Me wakhalet thibi je bongon, me unöngöt ge hlohlo.
- 2 E ame o but helá me vongon, me adre me subá but :
E ame he helá me hmenon, k' ame ca tethmá bi.
- 3 Ke hawa, u me bwela ka at a heláe,
Me hawo nya he ka úhnei möu ?
- 4 Ie at ae khana hom ke únyi ae kalaöt únyi hnyi únyi ae ca kalaöt? e ba at.
- 5 Anyin adre hia but omuá anyin je bong, e unyam úseiny je tehiny,
Me u je hia but bi hnyigöulen e, me e ame ca he ka hanyáúá ;
- 6 Hwiö thö gan, me me mená ju,
Ke ne o but e ame he ka ohwáá bongon bong, helá me athnyaba ame hok hwaban.
- 7 Anyin ae hu geju ka úö adre sö, a e ame he ka kú hmetu,
K' ame ca he ka ba je khúen.
- 8 Eja ke ne ka kueny ju wán eú hnyi káná,
Ke a bobot dö hnyiban eú hnyi káná ;
- 9 Ke ame he ka kú hmetu e ka löng köiö,
Me khú helá me úö adre teb ta.
- 10 Ke haba at ame mokcu, me at but :
Eke, ame mokcu at, me ewa hmetu ?
- 11 A hme thö je köien köiö ae gan,
K' ame kong ut je wagewe, me hme thö ;
- 12 Heláe minya at, e ame mokut, k' ame ca höhöi hmetu :
E ame ca he ka hmak ke ne o but ame hia but drany,
K' adre me ca he ka bwebwelá hnyi hnen hna mokut.
- 13 U na he ju ka ikhölö nya hnyi erkemok,
Ke oiyongi nya ke ne o but ame hia ányám hmönyin,
U na he ju ka thu bonguk, me únykúme kõnya !
- 14 Ame ne mokcu at, hawa ame he bi ka möt hmetu ?
Oge me halubahingen hnyi je bong bongon anyik vat hia,
Ke ne o but adre me he ka hnö nya.

- 15 U ma he ka hongot, me oge me he bi
 nya ka iéu köu :
 U ma he ka hnyok ka huliwa anyin li
 hnyamâm.
- 16 Ke u je aú walang ang hnök je hna
 okca :
 Hawa, u je ca tuö wia anyik hulö ?
- 17 Adre me okeceâ hmâ hnök je hna
 hanyâûâ hnyin tang,
 Ke u me thelö anyik monu.
- 18 E hnathu ame ü but bucen me hia but,
 K' adre me oc ut kic únyi hnyi hnen.
- 19 Ame aú tot je veto ge köiö ;
 Ke haba babihingölöiny ame kot degecâ
 kânâiny hmeledrany :
 Ke u je ohia hna gejon hnen at.
- 20 U je tom bi, me ame hia but ;
 U je wia hnyimakan, me obâ.
- 21 Adre me ogânâ lakon, ke e ame ca wâ
 bi ;
 Adre me hom úhnyúkongu ödrin, ke e
 ca khana bi.
- 22 Ke ame ka vec thibi unyin,
 K' ame tenge hnyekon bi, kâ únyi gan.

HNYIMAKAN 15.

- H**ABA Elifaza at Temana ame thu me
 ha, ka habe,
- 2 Hawa, ame he at ae metâ ka thu ge
 metâ ae únyi baú,
 Me ounöngötâ hnyekon ge ang hwei ?
- 3 Hawa, e ame he ka iwatretra ge hofuc
 ae gufa,
 Me je hofuc ae ca so troban ?
- 4 Eke, u je hota degecâ ot,
 Me oúhnyúkongoâ khudrung hnyi hnyi-
 makan Khong.
- 5 Anyin a haba hnyimâm ame omanená
 hwakecâm ae kong,
 Ke u je úca bohmen at bibihwakecin.
- 6 Haba hnyimâm bi ame haikongu u, ke
 ca hnök bi ;
 Eke, ame haikongu u li esongodâm.
- 7 Hawa u at adre bödra ka hnokoâ ?
 Ke adre bödra ka hnöku u, ke biliny bi
 je ong bucen ?
- 8 Hawa u je hia but löng úhnenamö ae
 nuöng anyin Khong ?
 Ke u je behânâ metâ hobi köu bi ?
- 9 Ie únyi ae khanö u, ke ca khan' öhmun
 bi ?
 Ke iéu e u me wâ únykúme, ke ca e bi
 unyihmun ?
- 10 Haba e unyihmun tavat ae húen ban
 me wahingat,

- Ae ti se hia hunaihmun hon kâmâm,
 11 Hawa, e ti úhnyúkong köu je únyi hnân
 okahwa únyi ge Khong,
 Me hofuc ae menyik köu ?
- 12 Iéu ame hom monu u gan hnyekom ?
 Ke iéu ame bi gan gan li emákâm ?
- 13 M' u me wia hanom he ka degec Khong,
 Me oâ je hofuc helâe únyi hnyi hnyi-
 mâm.
- 14 Ehö at me me hau bi ?
 Ke hna hnokoâ hnen momo, me me
 wisa ?
- 15 Wâ bi e ame ca labageju ka anyin tavat
 ae kap ;
 Eke, e ca kalaöt bi drany hnyi hnyi-
 makan.
- 16 Ke e ti ikiki me bokong at,
 Wale ame ijem hulö helâ me köiö !
- 17 Oge me he ka haimemenâ köu ; ling
 nya ju ;
 Ke haba únyi oge hia but wâ, me oge
 me he ka ha :
- 18 (Hofuc ame omanená hnen tavat ae
 metâ
 A únyi ge lakamödra, k' adre me ca
 ikhâlâ ;
- 19 Waleji hnyat adre ham ködrin hnyei
 Ke ba atkanyua amehhnyi wanbödrin :)
- 20 Haba at ae kong ame vec bala hnyi
 bongon je bong hia,
 Wale hnyi úseiny je huna adre me thu
 ka at úöveci.
- 21 E bala bi hnyi li hnyikönyen hwan je
 únyi hnân outen ;
 K' ame he ka o kâu at sei hnyi úen ae
 sot.
- 22 E ame ca geju a g' ame he ka hmetu
 únyi hnyi menekholom
 Ke haba hele vat ame halubahingen.
- 23 E ame ngenu he ka heleú han me ha, ka
 habe, Ewa ?
 E khana a e úhakekenyi mē bong ae
 menekholom :
- 24 Adre me ootâ a ge hlöuhlöu me hlohlo ;
 Ödra hwege hon, helâ me than, at ame
 penapena he ka vat.
- 25 Anyin a e ame hia but hai hnyamen ka
 Khong,
 K' ame tot bi gan ka Ataekhanahia ;
- 26 E ame utut kâu ke hwege nyin,
 E haki me khibi anyin je bec :
- 27 Anyin ame tube hnyimakan ge pipi-
 khenyainy,
 Ke ti gan dut li halelöüen ;
- 28 K' ame hia but labâ je taun ae ba wan,
 Me je uma ae ba aten,

- Wale adre me he ka ie wia me ve ta únyi.
- 29 E ame ca he ka tren omjeú, k' ame ca he ka tethmâ tang omjehen, K' ame ca he ka khulelau ehelehatungen ta je hatong
- 30 E ame ca he ka he but únyi hnyi menekholom; K' ame he anyin je khúen ka meleca ge bâhlân meic, Ke haba homená únyi hnyi hnyimen Khong ame he ka ohia e.
- 31 E so e ame ca hamen iyawâ e bi, me labageju ka hnyi únyi ae únyi baú Anyin adre me he ka bi hwaban ge únyi ae únyi baú.
- 32 Adre me he ka ohwâdá ke tiga ca úen bi, Ke ame ca he ka hát anyin vheiny.
- 33 E ame he ka jijingâ degecâ anyin je wan ae but helâ me vine, K' ame he ka kôlu anyin je wongon helâ me elaió.
- 34 Anyin a haba bunyen anyin at ame ca ot, me ame he ka ba wan, Ke meic ame he ka han je uma mano umen tavat adre me kap hwaban ae hwali.
- 35 Ödrin e erkinâ úokonguny, me hnokoâ but hulö, Ke ödrin e penapena iyawö eú hnyi je hnyekudrin.

HNyimakan 16.

- H**ABA Jobu ame thu me ha, ka habe, 2 E se hia je únyi a helâe, oge hia but löng :
Öbun hia tavat úótubweli ae monu.
- 3 Hawa, ame he ka hu obiny ta je hofuc baú ?
Ke ie únyi ame újengi u he ka thu ?
- 4 E khanö nya minya he ka fuc helâ möbun ;
A ne laba hanubun hnyi hnen hanuk, E khanö nya he ka úhújâkôuâ je hofuc köbun,
Me nyinyikâ böc köbun.
- 5 Ke so bi oge me he ka ha hwegi öbun ge hnyimök,
Me otubweli öbun ge hofuc betenge anyin li esongodik.
- 6 Oge ne fuc, ame ca he bi ka katebu anyik vec :
Ke oge ne laba hnyibú ame he ka kâmâu ka hia anyik vec ?

- 7 Ke walang ang e ame hia but osényini nya ;
U je hia but öba aten anyik bunyen.
- 8 U je hia but kât hmö nya, wale únyi hnân haikongu nya :
Ke haba unyik ae delâ ame tot kõnya me bi fuci nya hnyi hnyimakök.
- 9 E ame kiö nya hnyi anyin hmönyin, me sedö nya ;
E ame höc hnyu kõnya :
Ke iwahnaihmiöny mönya ame wâ hmö nya.
- 10 Ödrin e hia but memang kõnya ge hnyimödrin ;
Ödrin e hia but khaú wahicök me haikongu nya :
Ödrin e tha sihnök.
- 11 Haba Khong ame hia but hnö nya ka at ae hwali hwakecin,
K' ame digic nya ka hnyi hnyamen tavat ae kong.
- 12 Oge me laba sot me e ame thu hweti nya ;
Eke, e ame hia but kât nyik me sa omomonu nya :
E ame otilö nya hnân anyin únyi adre me vakha.
- 13 Haba anyin tavat hlic fana, ödrin e igigili nya,
E ame dá li jebalainuk me ca betenge bi ;
E ame hingâlâ waadaik hnyikânâi.
- 14 E ame kiö nya me osehia ohmoucö nya ;
E ame gâ thö huk helâ me at hwege.
- 15 Oge hia but tibet hon unyik mano ae gan nân,
Ke oge hia but ip anyik faoiny meno eú hnyi kânâ.
- 16 Ame kong ut hnyimakök ge tenge,
Ke e hon li bademakök hmenon mok ;
- 17 Ke so bi e ba úkonguny hnyi li hnyamök,
Ke ba hnyikongon hijic hic.
- 18 Kânâ lö, ca ikhâlâ bi drök,
E na ca he ju anyik khöú ka laba.
- 19 Ke walang ang, wâ bi, e hnyi drany at ame ohnathu nya,
Ke e hnyi dok ae görany at ame haiwisö nya.
- 20 Haba lahanök ödrin e hlumö nya,
Ame khukhula deköien li emakök ka Khong ;
- 21 Me me he ka otilâ wisainy at hnyi hnyimakan Khong,
Ke nokon at hnyi hnyimakan hanen !

JOBU 17, 18.

22 Anyin a hwaban ke je huna ae wakhalet,
Me oge me he ka vheno gethen, wale oge
me ca he bi ka hmetu.

HNYIMAKAN 17.

A ME aú but hanuk, ame um dö bonguk
je bong,
Ame laba penapena erkemok hobi kö-
nya.
2 E hnathu, e unyik tavat hluma at,
K' ame laba bala emakök hnyi anyidrin
iwatretra.
3 Ip ju haten walang ang, u ma he bi ka
ha hnathu nya ;
Ie at ame he ka úkhöúhnyam mönya ?
4 Anyin a u je okhötâ je hnyekudra he
ka ca wâhmakhmeto :
Anyin a wale u me ca he ka ogöranyi
ödrin ;
5 Haba at ame háiâ je lahanen m' adre me
sei ödrin,
Me ame he ka hanenak je li emakan je
lakan.
6 E ame wiö nya hnân taben hluma ka
tavat ;
Ke inya ang at ae ikiki hnyi hnyi-
maködrin.
7 E háe but emakök ge vec,
Ke haba je outhunyk hia me helâ me
hmenon.
8 Ame he ka uthmâhmâ tavat ae wisa
can e,
Ke ame he at ae ba hnyikongon ka
höhöi ka at ame ca ot bi,
9 Ke so bi ame he at ae wisa ka vheno
balua deny gethen,
Ke ame he ka hwege tot at ae tren li
hnyam ae kalaöt.
10 Ke haba öbun hia thithö, ö öbun hmetu
ju, ke ai öbun :
Ke oge me ca he bi ka wâ ke at ae metâ
unyibun.
11 A hia but bonguk je bong, a thu degecâ
but hnök je hna únykúme.
Wale önyen hnyekuk.
12 Ödrin e wia hnyinghet me me lany :
Ke úhakekenyi lany me menekholom.
13 Oge ne elâm erkemok helâ me umök
uma ;
Oge ne hia but ulolo hnök hna mokut
hnyi menekholom ;
14 Oge ne hia but ha ka bobot, ka habe,
U kamök ;
Me ka wahnyöng, U hinyök me hanik ;
15 Awe, ewa walang ang anyik labageju ?

Ke haba anyik geju, ia ame he ka wâ e ?
16 E ame he ka utut ka hnyi je ohmâiny
erkemok,
Me tha menâ eú hnyi kânâ.

HNYIMAKAN 18.

K E haba Biledad at Sua ame thu me
ha, ka habe,
2 Ke ne o but kehö öbun e he ka laba ip
je hnewe hnân hofuc ?
Mâ únykúme ju, ke hwaban e öhmun e
he ka fuc.
3 Anyin a ieu adre me tha öú öhmun me
je meno,
Ke öhmun kong bi hnyi hnyimaköbun ?
4 Hawa, at lö, u je kiö u hnyi ányâm
hmönyin,
Adre me he ka hna but hmeledrany
hnân hobi köu ?
Me oc dö kic únyi hnyi lnen ?
5 Eke, adre me he ka ume melaminy
tavat ae kong,
K' ame ca he ka melam bâhlân hlogon
meic.
6 Ame he lany ka lit bi hnyi umen uma
mano,
K' adre me he ka omoko anyin lamepa
ethö hon.
7 Ame he ka úhnyükong hnen je hna
okca ae hwege,
K' ame he ka hagutâ e ge únykúmánen
bi.
8 Haba li can ame hom e me me hnok
hnyi ert,
Ke e ame utu hnewe.
9 Adre me he ka noc ohmâiny can,
K' ame he offic ka det hmâ e.
10 Adre me he ikhâlâ hnewe eú hnyi kânâ
hobi kâu,
Ke eú hnyi gethen e hu hnewe hobi
kâu e.
11 E ame he ka gâon ge ta je únyi hnân
outen igigilö,
K' ame he ka wadring hoton li ohmâiny
can.
12 Ame he mekihnânem ka oloú tang
hwegien,
Ke haba úkonguny ame laba penapena
hobi kâu e ka tot.
13 K' ame he ka an je ong outhunyin,
Ame he ka an je ong outhunyin hia ge
watöiny mok.
14 Adre me he ka oc e me iwân únyi
hnyi umen uma mano, waleji e ame
labageju kâu ;

- Ke adre me he ka hom e ka tuhan ta je
 ûnyi hnân outen.
- 15 Ame he ka labâ umen uma mano me
 me ca he ka umen hmetu :
 K' adre me he ka jijingâ teiô ka hnyi
 hon hnyaban.
- 16 Ame he ka meleca anyin je iwân eû,
 K' adre me he ka subâ degecâ je vheiny
 ethô.
- 17 Adre me ca he hmetu ka ûnykûme kâu
 eang hmelen,
 Ke ba hmetu ien bi eû hnyi gethen.
- 18 Adre me he ka kunâ e ûnyi hnyi lany
 ka hnyi menekholom,
 Me hnu e ûheny ang hmeledrany.
- 19 E ame ca he ka hu nokon me ôbiny
 unyin iny hnyei,
 Ke ame he ka ba wan hnyi dok e ame
 laba hnyin.
- 20 Ame he tavat adre me o hwaban ka
 uthmâhmâ ge bongon bong,
 Ke haba dô a bân ôdrin e ti ot.
- 21 Wale bongon je hnyaban at ae kong,
 Ke wale hnen at ae ca khana Khong.
- HNYIMAKAN 19.
- H**ABA Jobu ame thu me ha, ka habe,
 2 Ke ne o but kehô ôbun e he ka
 ovecâ hnyekuk,
 Me thu omomonu nya ge je hofuc ?
- 3 Ôbun e hia but olibenyita but ú nya
 kongu nya :
 Ôbun e ca hmehma ge hnôbun hna
 omonumonu nya.
- 4 Ke ame ne hnathu hnök hna monu,
 Awe, ame laba unyik anyik monu.
- 5 Ame ne hnathu ôbun e bi gan kõnya,
 Me ha hwegiâ kõnya hna ú nya hnyin :
- 6 Khan' ôbun dô walang ang a hnen
 Khong hna ton huk,
 Me igigili nya ge anyin ert.
- 7 Wâ bi, oge me kukak ge úokonguny ke
 adre me ca ling nya :
 Oge me hongot hnân úhadruo, ke adre
 ca owisa bi.
- 8 E ame hia but hwô hak hnyi dek
 gethen, me me ca khanô nya bi he ka
 vhenô.
 Me omenekhulumâ dek je gethen.
- 9 E ame uny jut gak anyik hmanenang,
 Me hom korona ûnyi hnyi hon bök.
- 10 E ame hia but kia igigili nya, me hiô
 nya but :
 Ke e ame hia but oc ut hnök hna geju
 helâ me úô.
- 11 E ame hia but ôubâhlâ anyin hmönyin
 kõnya,
 Ke e ame ûnykûme kõnya helâ me
 iwahnaihmiöny mē.
- 12 Adre me tha o kõnya anyin je deô vat,
 ôdrin e otilâ göranyai dedrin je
 gethen kõnya,
 Me hunuma igigilô umök uma mano.
- 13 E ame hia but ôû sâkâúôâ mõnya je
 liamekeiny mõnya,
 Ke adre atkanyaua but gak je liame-
 waeny mõnya.
- 14 A hia but gak aten anyik lap,
 Ke adre hnying nya tavat ae khenen
 kõnya ehac.
- 15 Tavat adre me laba hnyi umök uma, me
 je athnyabaik a je hlu ôdrin e
 ûnykûme a iny atkanyua :
 Helâke iny aten ke hnyei hnyi hnyima-
 ködrin.
- 16 Oge me hawâ athnyabaik, ke e ame ca
 ieu bi,
 Eja ke ne oge ne khôû kâu ge hnyimök.
- 17 E ke bongon bi ka ôiök homenök
 Me hnök hna khôû ka laku bai.
- 18 Je wanakat ae úhnyüköng ôdrin e
 hûkötio nya ;
 Oge ne tot ôdrin e fuc kõnya.
- 19 Haba je hing lahanök hia ôdrin e
 hûkötio nya ;
 Ôdrin e wia gak tavat waleji oge me
 betenge gadrin.
- 20 Ame kece je jeiök ka hnyi unök, me
 vik,
 Ke oge ka môt thiju ge unen nyuk.
- 21 Betenge ju gak, betenge ju gak, ôbun
 je lahanök ;
 Anyin ame hia but kalô nya hnen
 hnyamen Khong.
- 22 Ieu gabun ôbun e oveci nya helâji me
 Khong,
 Ke ôbun e ca sekunâ hnyi vik ?
- 23 Ôdra na he ju ka sihnalimen walang ang
 hok hofuc !
 Ôdra na he ju ka set hnyi tusi !
- 24 Ôdra na he ju ka kave ge pen fao me
 led,
 Me khavi hnalimen hnyi kic nyiele
 balua !
- 25 Ke oge me wâhmakhmetoâ ae môt at
 ame úcû melik,
 Ke e ame he ka todrô hon kânâ nyiele :
- 26 Ke hwaban dô hna ohia unök helâng
 Me oge me he bi nya ka wâ Khong hnyi
 vik :
- 27 Oge me he ka wâ e hnök bi,

Me ame he ka wá ge li hing emakök, ke
ca ke at bi.
Ame áú but li jabalainuk eú hnyi
hnyekuk.
28 Öbun e ne ha, ka habe, öhmun e kámáú
he ka ovecá e !
Ke e bi eú hnyi hnyekuk iwániny
bongon e ;
29 Ot ju öbun ge hele vat ;
Anyin adre me bi hwaban hmönyin ge
hele vat,
Me me khan' öbun thö a ga hu hna
owisa.

HNYIMAKAN 20.

HABA Zofar at Naamathi ame thu me
ha, ka habe
2 Anyin a wale, ame thu könya bi hnök
je hna únykúme,
Únyi ge belogot wale eú hnyi hnyekuk,
3 Oge hia but löng ú, k' ame ohmehmö
nya bi,
K' ame thu könya hanon únykúmá-
nök.
4 Hawa, e ca manen köu únyi ang, hwân
ehac,
Hwân hnyi hna ip at eang hmeledrany,
5 A e okhulit thibi hna hobâ hnen tavat
ae kong,
Ke thuthubademak senyin anyin tavat
adre me ca ot ?
6 Eja ke ne a ne görany anyin hmane-
nang ke ne o thö hnyi drany,
Me kâlâ je úlá ge ban ;
7 E ame he ka hia balua but helâ me tiny
bi tatet :
K' ame he tavat waleji adre me wâ e ka
ha, ka habe, Ewa ?
8 E ame he ka hia helâ me bwî, m' adre
me ca he hmetu ka wâ e :
Eke, adre me he ka hnu degecá e helâ
me hna omanená hnyi hnyinghet.
9 Haba emakan at waleji ame wâ e, m' ame
ca he hmetu ka wâ e ;
K' ame ca he hmetu hnen hna mokut ka
wâ e.
10 Ame he lakon ka heleú so unyin tavat
ae theduoc,
K' ame he li hnyamen ka ham hmetu
tang omjehen.
11 E unöngötö je jeien ge anyin hidröu,
Ke so bi ame he ka tha mokut më eú
hnyi kânâ.
12 Eja ke ne a ne hnebwia hulö hnyi
hnyimen,

Eja ke ne a ne oiyongá e hmelen
bohmen ;
13 Eja ke ne a ne betenge gan, k' ame ca
he ka degec e,
K' ame ne behánâ e balua hnyi hnyimen ;
14 Ke so bi ame he an jeú ka wia eú hnyi
hnyekon,
Me me dán je asip bi eú hnyin.
15 E ame hia but utâ je omjeú, k' ame he
bi ka hmita hmetu :
K' ame he Khong ka degecá únyi eú
hnyi hnyekon.
16 E ame he ka cem únyi hnân mekin-
anyin je asip :
K' ame he bohmen vaipa ka hlingá e.
17 E ame ca he ka wâ je wagewe,
Wale hani me bata ame hingölö.
18 E ame he ka ham hmetu únyi a huliwan,
k' ame ca he bi ka utâ ;
K' ame ca he bi ka senyin hoton anyin
ta únyi.
19 Anyin a e ame hia but okongoá me hna
degecá tavat ae theduoc ;
K' ame hia but hügúnâ uma a ca
otilânen.
20 Anyin a e ame ca menâ ge monu eú
hnyi hnyekon
K' ame ca he ka hip kolon ta únyi e
ame hnyok káu.
21 E ba kolon waleji e ame ca han dö ;
Anyin a wale ame ca he ka tethmâ
anyin sot.
22 E ame he ka theduoc, hnyi úen e ame
unöngötö ge omjeú :
K' ame he tavât ae hlöuhlöu ka hai
hnyamödrin káu.
23 E ka tiga he ka sekon,
K' ame he Khong ka kunâ kaú anyin
hmönyin ae hwege,
Me hingölâ ka hnyi hon, e ka tiga han.
24 E ame he ka kec ge únyi hnân vat a
fao,
K' adre me he ka fana e ge cafana bras.
25 E ame oc ut, me ok ut únyi hnyi
unyin :
Eke, e ame ok ut homakan ae hadröngöc
únyi hnyi waadainy ;
K' ame tabâ e hnen ta je únyi hnân
outen.
26 Adre me hip menekholom hia hobi káu
tang omjehen :
Ame he meic ka áú e, a ca únyi ge at ;
K' ame he ka an je kolon hnyin umen
uma mano.
27 Ame he drany ka omanená hwakecin
ae kong,

- Ke ame he hmeledrany ka tot metâ kâu.
 28 Ame he ka hia tang omjehen umen uma,
 K' ame he ka hingölâ degecâ hnyi
 bonginy anyin hmönyin
 29 Wale jekhon at ae kong ûnyi ge Khong,
 Me hna khenâ kâu hnen Khong.

HNYIMAKAN 21.

- H**ABA Jobu ame thu me ha, ka habe,
 2 Löng wia ju öbun hok hofuc ;
 Ke wale hnân okaukahwö nya gabun.
 3 Hokhnyoki nya ju, ke oge me he
 minya ka ha ;
 Ke hwaban hnök hna ha, hlum r bala
 ju.
 4 Haba inya, hawa, oge me tenge ka at ?
 Ke hnân eü oge me he ka hokhnyok ?
 5 Walö nya ang, láiâ thö,
 Ke kât ju je hnyimöbun.
 6 Haba hnyi je ûen oge me ûnykúme, me
 ame kong hnyekuk,
 Ke öbubuny ame kât ju unyik.
 7 Anyin a ieu ae möt bi tavat ae kong,
 Me hingat ut, eke, ke gan tot manidrin
 man ?
 8 Adre me tha otilâ je matrânidrin
 mödrin hnyi hnyimaködrin,
 Me je lakudrin cici ödrin.
 9 E hnahic ut umödrin je uma, ke ba ot,
 Ke ca e bi hnyi hudrin ösö anyin Khong.
 10 Ame ütakû haledrin bolok, ke ca gufa
 bi ;
 Ame hnöku haledrin kau, k' adre ca
 kölu habû.
 11 Ödrin e kunâ je lakudrin helâ me
 hnahat mamoe,
 Ke je lakudrin ödrin e biâ.
 12 Ödrin e khumöng tha ödrin me bwinybet
 me kitara,
 Me senyina ifucin utköwi.
 13 Ödrin e laba sot hnyi bongudrin je bong,
 Me utut ka hnyi erkemok helâ me
 thuthubademak.
 14 Ke so bi ödrin e ha ka Khong, ka habe,
 Úsákâüö but möhmun ;
 E ca bewehmun he ka khana dem je
 gethen.
 15 Ia Ataekhanahia m' öhmun e he ka bi
 athnyabainy ?
 Ke ieu troban köhmun, öhmun ka he
 ka hic kâu ?
 16 Wâ bi, ca he bi hnyi hnyamödrin
 anyidrin sot :
 Ke úsákâü mönya je hna ûnykúme
 anyin tavat ae kong.

- 17 Adre me ove ume lamepa anyin tavat
 ae kong ?
 K' ame o but ka hnyi hudrin anyidrin
 úkonguny ?
 K' ame ve khenâ je hlöuhlöu hnen
 Khong hnyi anyin hmönyin ?
 18 M' ödrin e tha úcú me thatúnyin hwit
 ame túâ ang,
 Ke helâ me unen hwit ame túâ degecâ
 höu ?
 19 Öbun e ha, ka habe, Khong ame bip
 anyin je hulö hobi kâu lakon.
 E so e ame bi hwaban kâu bi, me me
 khana e.
 20 E so ame he li hing emakan ka wâ
 úkonguny,
 E so e ame ijem hmönyin anyin
 Ataekhanahia.
 21 Anyin a ewa anyin senyina ka anyin lap
 hwaban e,
 Hnyi ûen adre hia but subâ degecâ
 useiny je tehiny hnyi wanben ?
 22 Ewa at ame he ka ometâ Khong ?
 Anyin a e ame owisa ka tavat ae
 beöna.
 23 Ame mokcu ke at hnyi tang hwegien
 ae bekhöt,
 Ke ti hnahic k' ame laba so :
 24 E lup hmönyin li basin ge dân
 K' ame menyik önyen je jeien.
 25 Ke ame mokcu ke at bi hnyi vecin
 hnyekon,
 K' ame ca han ûnyi ae so.
 26 Ödru me tha mokut eü hnyi kânâ,
 K' ödru tha iyong ut ge je wahnyöng.
 27 Wâ bi, e khanö nya hnöbun je hna
 ûnykúme,
 Me anyibun je bibihwakecin hnân
 okongu nya.
 28 Anyin a haingöbun, Ewa uma umen
 than ?
 Ke ewa uma mano waleji ame laba
 hnyin tavat ae kong ?
 29 Hawa, öbun e ca hnö tavat adre me
 vhenö gethen ?
 Ke e ca khan' öbun je hatödrin ?
 30 A g' adre ip at ae kong hobi kâu
 bonginy hlöuhlöu ?
 Me adre me hom e hnyi bonginy
 hmönyin.
 31 Ia ame he ka haimemenâ deny gethen
 hnyi hnyimakan ?
 Ke ia ame he ka bi hwaban kâu hnen
 hna ányá ?
 32 Ke so bi adre me he ka hom e ka hnyi
 erkemok,

Me tuó e hnyi hon,
 33 Ame he ka hnebwia káu kânáiny thop,
 Ame he tavat hia ka he hoton,
 Ke ca hnân bi aú tavat adre bödra,
 34 Öbun a kâmâu ka otubweli nya, ke
 únyi baú,
 Ke haba hnöbun hna thu hawa, ca
 wale thibi je thoi ?

HNYIMAKAN 22.

HABA Elifaza at Temana ame thu me
 ha, ka habe
 2 Hawa, e khana ke at he ka bi troban
 hobi káu Khong ?
 E hnathu, ame he at ae metâ ka bi
 troban hobi káu e bi.
 3 Hawa hnân osenyinâ Ataekhanahia a
 u at ae wisa hwakecâm ?
 Ke ame he ka bi troban káu a u je öba
 hnyikongon hwakecâm ?
 4 Hawa, e ame ú u can hnâm hna outen,
 Me e ame tha he möu ka hnyi hna
 owisa ?
 5 Hawa, e ca gan ânyâm hulö ?
 Ke e ca hu obiny ge ânyâm je monu.
 6 Anyin a u je hia but hom je haten
 únyi ge liamekeiny möu, ke ba can,
 Me uny je úkhaüen tavat ae theduoc.
 7 U je ca habelen ge köiö at ae sényin,
 Ke u je behânâ jeú ge at ae mekihnâ-
 nem.
 8 Ke haba at ae hwege, me waleji at ae
 tren kánâ ;
 Ke haba at ae únyi hnathu, me waleji
 at ame labâ e.
 9 U je hia but kunâ je safac me ba ke
 únyi,
 Ke adre hia but thu je benyin je
 nakahme.
 10 Anyin a wale e but je hnewe igigili u,
 K' ame ie hlohlo thö hnyekom ge ot,
 11 K' ame ne menekholom, me u me ca wâ
 bi,
 K' ame hülülütö u hnen je köiö ae gan
 hmâ.
 12 Hawa, ame ca laba Khong ethö hnyi
 göranyin drany ?
 Ke wâ bi úgöranyin je okhú, e ti görany
 hmönyin !
 13 Me haingâm, ka habe, Khong ame wâ
 ieú ?
 Hawa, e khana he ka owisa únyi hnyi
 menekholom ?
 14 K' ame oiyongâ e ge je ulâ ae haki, me
 me ca wâ bi ;

Ke e ame vheno wathelabainy drany.
 15 Hawa, u me he bala ka laba hnyi gethen
 ehac
 Waleji a vheno hnen tavat ae kong ?
 16 Waleji adre hom buli ödrin hnyin,
 K' adre me hingölö tabödrin helâ me
 wagewe :
 17 Wale hnyat adre me ha, ka habe, Úsâ-
 kâütö but möhmun ;
 Ke, Ieú ae khana Ataekhanahia he ka
 ânyâ hnân hobi köhmun ?
 18 Ke so bi e ame öunöngötâ umödrin je
 uma ge ta je únyi ae so ;
 Ke haba je hna únykúme hnen tavat ae
 kong, me, úsâkâü mönya.
 19 A wâ e hnen tavat ae wisa, m' ödrin e
 senyin ;
 K' ame hlum' ödrin hnen tavat ae ba
 hnyikongudrin :
 20 Haingödrin, ka habe, E hnathu adre
 me suba degecâ ta je iwahnaihmiöny
 möhmun ;
 K' ame aú koluidrin ge meic.
 21 Imetenyimwi thö me walang ang, m' u
 me hnahic ut :
 Me ame he ka o köu únyi ae so.
 22 Ó u kap ju walang ang hnanyibu únyi
 hnyi hnyimen,
 Me ip hmâ ju hwan hofuc eú hnyi hnye-
 kom.
 23 U je ne hmetu but ka Ataekhanahia,
 me adre me he bi ka up u göranyai ;
 Ke u je ne degec ut hwakecin ae ca wisa
 únyi hnyi umam je uma mano.
 24 Ke so u ma ip ju tang omjehem eú hnyi
 kánâ,
 Ke goliny Ofira hnyi je vetoiny je
 wagewe ;
 25 Ke ame he ka hing tang omjehem Ataek-
 khanahia,
 Me ânyâm sileva ae únyi hnathu.
 26 Ke u me he ka senyin ka Ataekhanahia,
 Me bwele göranyai ka Khong.
 27 U me he ka hic káu, ke e ame he ka
 ling u ;
 Ke u me he ka hwâdâ ânyâm je hna bi
 khöbi.
 28 U me he ka thamûâ ke únyi hnyi hnye-
 kom, me ame he ka aat köu ;
 Ke ame he lany ka omelamá dem je
 gethen.
 29 Ödra ka ohnyikánâi u, u me he ka ha,
 ka habe, Todrö ;
 Ke e ame he ka omelö at ae hnyikánâ.
 30 E ame he ka omelö at minya ae tren
 jöniny :

Eke, e ame he ka möt hnen li hnyamâm
ae ba hnyikongon.

HNYIMAKAN 23.

- K**E haba Jobu ame thu me ha, ka habe,
2 Haba hnyi bong ang me hiny
hnök hna tenge :
E hmak hna kuc nya hon imângik.
3 E na khanö nya ju dok oge me he ka
wâ e hnyin,
Me inye he ka he ka hnyi taben tap !
4 Oge me he ka penapena hok hofuc hnyi
hnyimakan,
Me ounöngötâ hnyimök ge je hofuc
hnân ohnatho.
5 Ame he ka khanö nya hofuc e ame he
ka thu könya,
Me wâ únykúme a e ame he ka fuc
könya.
6 Hawa, e ame he ka ivinö mönya ge
man ae gan ?
Ohe ; e ame he ka ling nya.
7 E khana at ae wisa ka ivinö mē eling ;
Me oge me he balua ka möt únyi ge at
ame owisa könya.
8 Wâ bi, inya oge me he deiö, ke hia e
eling ;
Me jio, ke oge me ca wâ e :
9 Me ka hnyi hwadrö waleji e ame huliwa,
ke oge me ca wâ e :
E ame oiyongâ e hnyi hwaiöu, me oge
me ca wâ e.
10 Ke so bi e ame wâ dek gethen ;
E ka hia but cubic nya me oge me he
ka o helâ me gol.
11 E hwege cak ka hnyi hnen je hna okca ;
Oge me hia but tuö deny gethen, ke oge
me ca saü bi.
12 Oge ca hia but saüâ degecâ hnanyibu
únyi hnyi li esongodiny ;
Oge hia but oúnyihnatho hofuc a hwan,
hon ök jeü.
13 Ke khaca thibi únykúmánen, ke ewa at
ame he bi ka wia e ?
Ke e ame ányâ únyi e ame hnyok kâu.
14 Anyin a e ame ohwâdâ únyi adre ip
hobi könya :
Ke se hia je únyi a helâe unyin.
15 Anyin a wale iny hlohlo but hnyi hnyi-
makan ;
Iny ka únykúme, me oge me outen e.
16 Ke a hia but Khong osënyinâ hnyekuk,
Ke a hia but Ataekhanahia ohlohloinya :
17 Anyin adre me ca subâ degeci nya ke
tiga ca o bi menekholom,

Me oiyongâ hnyimakök ge menekholom
ae khöt.

HNYIMAKAN 24.

- I**EÜ can ame ca he Ataekhanahia ka thu
je úen ?
Ke hawa a g' ame ca wâ bongon je bong
hnen tavat ae khan' ödra e ?
2 E hu keihen ödrin e oc je hnyigot ;
Ödrin e hügúnâ je hnahat meno, me
haödrin.
3 Ödrin e alen asina haleny nakahme,
Me hom bolok haleny safac hnân haten.
4 Ödrin e osaüâ tavat ae theduoc únyi
hnyi gethen :
Haba tavat ae hnyikânâ eang hmelen
me ödrin e lubaduöng.
5 Wâ bi, helâ me man je asinainy hnye-
buba
Ödrin e he but ka hnyi anyidrin je huli-
wa, me heleü ö 'drin ;
Haba hnyeububa ame oâ han hobi kâu
lakudrin.
6 Ödrin e thu boh a ö 'drin hnyi hnyei,
K' ödrin e hlo je hnyei vine iny tavat
ae monu.
7 Ödrin e mokut thu hnyi hnyinghet hia,
e ba úkhaüdrin,
Ke ba tubidrin hnyi megic.
8 Ödrin e khubet ut ge we únyi hnyi hon
bucen,
K' ödrin e deluâ kic anyin ae ba tungu-
drin.
9 E hu keihen tavat ödrin e hügúnâ
nakahme únyi hnyi úlainy at,
Me hom hnân haten únyi hnyi unyin at
ae theduoc :
10 Me ödrin e he thu me ba úkhaü,
Ke ödrin e hom tilâ je thi hwit ge
mekihnânem ;
11 Ödrin e owö wakaco hnyi hnyeuleny
tavat eling ;
Ödrin e hlec je wan vine, ke odrin e
beic bi.
12 Tavat adre me mâng hnyi tauu ae gan,
Ke tavat ae aat adre me tenge :
Ke Khong ame ca haiwisa a e monu
bi.
13 Tavat eling ödrin hanen je hnyat degec
melam ;
E ca khan' ödrin je getheniny,
Ke ca vhenö je deny.
14 Ame vesâ hnyi hnyomakatu at uhlingö,
me hlingâ at ae theduoc me at ae ba
omjeü ;

- Ke haba hnyi hnyinghet e úcú e me at venöu.
- 15 K'ame halubahingen haubaotreng hnen emakan at bi únyi monu, Haingen, ka habe, e ba ecmak ame he ka ó nya :
- Ke e ame ikhölö hnyimak.
- 16 Hnyi lit ödrin e tho je uma : Hnyi lany ödrin e thelöng bi je hwanu-mödrin ;
- Eca khan' ödrin bi lany.
- 17 Anyin ae úcú ködrin hia haolany me hmenon mok ;
- Anyin ae khan' ödrin je öbubunyin hmenon mok.
- 18 E ame logot hon je köiö ;
- A hnaúhangö but jekhöúdrin hnyi hnyeí :
- E ame ca vheno hmetu bi gethen ka hnyi je hnyeí vine.
- 19 Ame hia köien kiona anyin ae ba we ke hlöng bi :
- Heläe minya tavat ae kong ge erkemok.
- 20 Ame he hinyen ka hnying ut e ; e hnebwia but e ka wahnyöng ;
- Adre me ca he hmetu ka únykúme e : Adre me he ka thu hwakecin ae ca wisa helä me úö.
- 21 E ame ohia omjeú anyin momo ae toúnyi wale ame ca hnöku bi ;
- E ame ca ányá bi so ka safac.
- 22 E ame lelö tavat ae hwege minya ge maniny man :
- E ame todrö, me ba at ame gejon möt.
- 23 Khong ame hna ködrin he ka laba hnahic, me me cidrin ling ;
- Ke e bi li emakan hon dedrin je gethen.
- 24 Adre me ogöranyi odrin ; ke meokhaca me hi' ödrin bi ;
- Eke, adre me ohnyikán' ödrin, adre me hom degeci ödrin helä me tavat hia, Me sub' ödrin helä me hwit.
- 25 Ame ne ca hnathu e, me ewa at ame he ka ohwádä a iny at thoi, Me óunyibaúá hok hofuc ?

HNYIMAKAN 25.

- M**E haba Biledad at Sua ame thu me ha, ka habe,
- 2 E unyin musi me hna outen ;
- E ame ohnahicá anyin je dok ae görany.
- 3 Hawa, e hu numerainy anyin je deó vat ?
- Ke cwa at ame ca he ka wá anyin melam.
- 4 Anyin a wale ame he ka kámáu at me me wisa unyin Khong ?

- Ke ama hawa he ka ba hnyikongon at adre me hnokoá hnen momo ?
- 5 Wá bi, ame ca hadröngöc tehi
- Ke ca kalaöt je okhú hnyi hnyimakan :
- 6 Ke ama kámáu at he ka so, a biget bi !
- Me nokon at, a wahnyöng !

HNYIMAKAN 26.

- H**ABA Jobu ame thu me ha, ka habe,
- 2 U je hawa he ka hadruá at ae ba maniny !
- Me omelö hnyam ae ba hwegien !
- 3 U je hawa he ka úne ka at ae ba metá
- Me haimemená gáná metá ae wisa !
- 4 U je hia but ha hofuc kö ia !
- Ke hanu ia waleji ame o únyi gam ?
- 5 Ame öbubuny je komok
- Hmelen je köiö me tavat adre me labä e.
- 6 Ame he thu erkemok hnyi hnyimakan,
- Ke ba úkhaúen hnaúhangö.
- 7 E ame ulolo ke keihen ka hnyi hwadrö hon ba önyen,
- Me uhno hmeledrany ka hnyi hon ba.
- 8 E ame lan köiö hnyi anyin je úlá ae khöt ;
- Ke ame ca mou bi úlá.
- 9 E ame bi haginy hnyimakan anyin theron,
- Me ulolo anyin úlá hon e.
- 10 E ame bi hnyigot hon köiö,
- Ke ne o but hnyigöulen lany me menekholom.
- 11 Ame öbubuny je hmolominy drany
- Me uthmáhmá ge ifucin.
- 12 E ame omuná köiö ge maniny man,
- Me kot hagutö Rahab ge anyin metá.
- 13 E ame osoá drany ge hanon ;
- Ke bnyamen ame dá on ame kec.
- 14 Wá bi, wale je baten thibi deny je gethen :
- Ke ötin e löng hwan hwaulit ae úhnyú-köng !
- Ke ia ame wá únykúme hwan thaniny maniny man.

HNYIMAKAN 27.

- K**E Jobu ame fuc hmetu hnyi anyin uhóúú me ha, ka habe,
- 2 Kia inya Khong, at ame hom degecá anyik wisa ;
- Me Ataekhanahia, waleji ame ovecá hnyekuk ;
- 3 (Anyin ae bala bi hanuk unyik,

- Me homenâ anyin Khong hnyi li hnyi-
ngöik ;)
- 4 E hnathu ame ca he li esongodik ka ha
ûnyi ae kong,
Ke ame ca he bohömök ka ha iyawö.
- 5 Kia inya Khong, oge me ca he ka
haiwisai öbun :
Oge me ca he ka degec ha hwakecik ae
ba hnyikongon ke ne o but oge me
mokcu.
- 6 Inya oge me kât hmâ hwakecik ae wisa,
ke oge me ca he ka hna but :
Ame ca he hnyekuk ka haikongu nya
iny ka tiga möt.
- 7 E so he ka ûcû iwahnaihmiöny mönya
me at ae kong,
Ke at ame tot kõnya, me helâ me at ae
ca wisa bi.
- 8 Eja ke ne a ne hom troban ge at ame ca
ot, me ewa gejon bi
E ka he Khong ka hom hanon ?
- 9 Hawa, ame he Khong ka löng hwakhöü
E ka o kâu vec.
- 10 Hawa, e ame he ka senyin ka Ataekha-
nahia,
Me hongot ka Khong hnyi je ûen hia ?
- 11 Oge me he ka n' öbun ge hwakecin
hnyamen Khong ;
Oge me ca he bi nra ka ikhâlâ je bongon
Ataekhanahia.
- 12 Wâ bi, öbun hia öbun e hia but wâ e ;
Ke iëü gabun a öbun e tha hop bi ?
- 13 Walang jekhon at ae kong ûnyi ge
Khong,
Me hwajekhon tavat seda, ödrin e he ka
kap ûnyi ge Ataekhana hia.
- 14 Adre me ne osebia lakon, me walödrin
hobi kâu hele vat ;
Ke ame ca he je mâträniny ka sekudrin
ge jeü.
- 15 Ke haba kolon gan me adre me he ka
konâm hnyi mok,
Ke ame ca he je safac gan ka tenge
thungaü.
- 16 Eja ke ne a ne ûkhöünâ sileva helâ me
kânâ,
Me penapena je ûkhaü helâ me kânâ ae
kece ;
- 17 Awe e ame penapena, k' ame he at ae
wisa ka khavâ,
K' ame he hnyat ae ba hnyikongon ka
khenâ sileva.
- 18 E ame op umen uma helâ me walelaba,
Helâ me uma menâ a ânyâ at tue.
- 19 E ame mokut ke tren omjeü, ke so bi
adre me ca he ka konâm e,

- E ame bwele ge li emakan, me ame hia
but.
- 20 Ame o but kâu je öbubuny helâ me
köiö ;
Ke höu ame venâu e hnyi hnyinghet.
- 21 Haba ang hwei ame tûâ degecâ, me ame
hia ju ;
K' ame aba degecâ e ûnyi hnyi hnen.
- 22 Ke ame he Khong ka lûâ e me ca
betenge :
K' ame bekec ut ûnyi hnyi hnyamen.
- 23 Ame he tavat ka khöükhöü hnyamá,
Me bwec degecâ e ûnyi hnyi hnen.

HNYIMAKAN 28.

- E** hu thopiny sileva,
Me hnen gol adre me ânyâwia.
- 2 Adre hom fao ûnyi eü hnyi kânâ,
Ke adre me oköiâ bras ûnyi hnyi veto.
- 3 Ame bi obiny menekholom hnen at,
Me elâm wia hnyi je hnyegöulen ae ti
sákâü
Je veto, hnyi menekholom, me hmenon
mok,
- 4 E ame hiny dilâ thop ae úsákâü me je
hnyaba ;
Adre me hnying e hnen can at ame
ngenu ;
Ödrin e him hnyihnyikâ, ke úsákâü me
tavat.
- 5 Ame kü jeü ûnyi hnyi kânâ ;
Ke adre me seü tilâ e eü hmelen helâ
me hnen meic.
- 6 Haba je veten e, wale hnen je safairo,
Ke eling kânâ gol.
- 7 Haba gethen e ae ca khana hnen menö
ame gâ,
Ke ame ca wâ e hnen emakan dring :
- 8 Ame ca uto e hnen je meno ae hiny,
Ke ame ca vhenö e hnen je liona ae
ûküc.
- 9 E ame hai hnyamen ka hnyi je veto
oüt,
E ame camamá je bucen ûnyi hnyi
hwecin.
- 10 E ame si deny köiö hnyi kic ;
Ke a wâ but emakan je ûnyi hnathu hia.
- 11 E ame thelöng je ong wagewe me me ca
khulu bi ;
Me oâ ka hnyi lany ûnyi ae iyong.
- 12 Ke adre me he ka wâ metâ ua !
Ke ewa hnen wâ únyküme ?
- 13 E ca khana hwaban e ge tavat ;
Ke adre me ca wâ e hnyi hnyeü iny
tavat ae möt.

- 14 Haingen dok ae dit, Ame ca laba unyik ;
Ke haingen köiö ae gan, E ba minya bi
gak.
- 15 Ca hnân úco ge gol,
Ke adre me ca he ka tuluto sileva hnân
hwaban e.
- 16 E ca hnân úco bi e goliny Ofira,
Me soama ae únyi hnathu, me safairo
- 17 Haba gol ke uselat me ca so helâ :
K' adre me ca he ka bihwaban e ge je
hmanenanginy gol.
- 18 Adre me ca he ka ha ramothe, me gi-
bisi :
Eke, e beönua metâ hon je penina.
- 19 E ca úcú mē topazioiny Aithiope,
K' adre me ca he ka úco e hwaban
gol ae so.
- 20 Awe, ame o úheny ua metâ ?
Ke ewa hnen wâ únykúme ?
- 21 Ame iyong e ge li emakan tavat hia ae
môt,
K' adre me ikhâlâ e me me iyong ka
omeno ame gâ ethö.
- 22 Haingen hnaúhangö me mok, ka habe,
Öhme löng ut uthumetu gan ge je hnyi-
könyöhmu.
- 23 Khong ame wâ únykúme deny e,
Ke e khana hnen bi.
- 24 Anyin a e ame wâ je can hmeledrany,
E ame bwele eú hnyi hmelen hia drany ;
- 25 He ka ányâ tulut hnân ihmakiny ang ;
Eke, e ame tuluto je köiö ge tulut.
- 26 Hnyi úen e ame ányâ hnanyibu hobi
kâu we,
Me bi deny hucuceiny hwan than :
27 Me e ame wâ e, me omanená e ;
E ame otilâ e, eke, e ame elâm e.
- 28 Ke e ame ha ka at, ka habe,
Wâ bi, haba hna outen Than, me wale
metâ ;
Ke adre me ne degec hulö, me wale wâ
únykúme.
- 29 HNYIMAKAN 29.
- K**E Jobu ame fuc hmetu hnyi anyin
úhöúcú, me ha, ka habe,
2 Ekölö ge je tehi ehac,
Waleji je bong a tuö nya hnyin Khong ;
3 K' ame umumelam anyin lamepa hon
bok,
Ke oge me vheno menekholom hnyi
anyin lany ;
4 Helâji me je bong a iny hmai hnyin,
Hnyi úen ame tha e mönya Khong hnyi
umök uma mano ;
- 5 Waleji a tiga e unyik Ataekhanahia,
Ke ame laba igigili nya je lakuk ;
- 6 Hnyi úen adre hneú hnök hna okca ge
bata,
Ke haba kic ame hingâlâ könya je wa-
geweiny wakaco !
- 7 Haba hnyi úen eji oge me he ka hnyi
homagöuleny taun,
Ke penapena tabök tap hnyi hna cit
gethen,
- 8 Me ame ö nya je hidröu me ödrin e luba-
duöng,
Me ame höhöi je hingat me tot ;
- 9 A hnyibû but je than,
Ke ödrin e kât je hnyimödrin.
- 10 Ame ca fuc hmetu tavat ae únyi hnathu,
Ke ame kece je bohmödrin ka hnyi je
ecngödidrin.
- 11 Anyin a hnyi úen ame ling nya hnyi-
köny, me e ame haisoi nya ;
Ke hnyi úen ame ö nya hnen ecmak,
me e ame ohnathu nya :
- 12 Anyin a oge me omelö at a theduoc ame
tenge,
Me nakahme minya, waleji ae ba at
ame hadruâ.
- 13 Ame o but könya hofuc hnahic únyi ge
at ame he ka mokcu :
Ke oge me osenyinâ hnyekon safac.
- 14 Oge me khavâ wisa huân anyik úkhaú :
Ke haba hnök hna owisa, e úcú me
úkhaú me hnabinybak.
- 15 Inya ji hing li emakan wadröu,
Ke inya ji li can at ae mat can.
- 16 Inya ji kamen ka at ae theduoc :
Ke haba ivinö ae ca khañö nya, oge me
thang.
- 17 Ke oge me thu jeien wainy at ae kong,
Me oc ut hnen hna húgúnâ únyi hnyi je
nyon.
- 18 Ke oge me ha, ka habe, Oge me he ka
mok hnyi hnök hna thu háú,
Ke oge me he ka osebia bonguk je bong
helâ me öny.
- 19 Ame iyâú anyik je wân ka hnyi köiö,
Ke ame mokut dán hau hon vheik hnyi
hnyinghet hia :
- 20 E hát bi soik unyik,
Ke hmâ bala bi anyik cafana hnyi hnya-
mök.
- 21 Tavat adre me ling nya, me haluba-
hingen,
Me laba hnyibû hobi kâu hnök hna úne.
- 22 Hwabán ifucik me adre me ca fuc
hmetu ;
E menyik hoc hofuc ködrin.

- 23 K' adre me halubahing nya helâ me we ;
K' adre me memang helâke adre me halubahingen we a biliny.
- 24 Oge ne hluma ködrin, me ödrin e ca kap e ;
K' ödrin e ca hna degecâ hnyimakök ae hna menyik.
- 25 Oge me úca dedrin je gethen me laba unyidrin helâ me ban,
Me laba helâ me than hnyi utbavat,
Helâ me at ame otubwelâ tavat tenge thungaú.

HNYIMAKAN 30.

- K**E walang ang ame hlumö nya dö a biliny,
Hnyat oge me höcö ip lakamödrin unyin je kuli a hanen halek je hnahat mamoe.
- 2 Eke, ewa troban könya únyi hnyi tang hwegien je hnyamödrin?
Ame hia but je hmaidrin.
- 3 Ödrin delâ ge theduoc me hmiâ ;
Ödrin e ác kânâ ae mada ge nyudrin hnyi hnyebuba dok ae ba wan, ke ba aten.
- 4 Ödrin e oc je hwi hnyi hnyot,
Ke hicödrin waiau.
- 5 Adre me ob' ödrin unyin tavat ;
K' adre me kuku ödrin helâke at venöu.
- 6 Hamödrin he ka laba hnyi je hokong,
Me je hmonopiny kânâ me kic.
- 7 Ödrin e kuku hnyi hnyot,
Ödrin e úkhacaköu hmelen iokhukhun.
- 8 Ödrin lakon tavat ae monu, eke, lakon tavat ae kong ;
Adre me kot degeci ödrin únyi hnyi hnyeí.
- 9 Ke walang ang ödrin e sit hwahnök,
Eke, inya ang taben úhiö ködrin ;
- 10 Ödrin e ikiki nya, me úsâkâúö mönya,
Ödrin e ca ot he ka hangöjá hnyimakök.
- 11 Anyin a e ame hia but thang weiken, me oveci nya,
Ke ödrin e hia but degec töiny hnyem hnyi hnyimakök.
- 12 Hnyi ke keihen metök ame tot dö kong hnyimakan ;
Ödrin e hagutâ li cak,
Ke ödrin e okhibö göranyai je dedrin he ka ohio nya.
- 13 Ödrin e okongoa dek gethen,
Ödrin e ip hnyi hnyimaködrin anyik hloúhloú,
Ödrin tavat ae ba at hnân hadru' ödrin.
- 14 Ödrin e o hnyi wanben hna kia vat ae gan hmâ :
Ödrin e tetebulo huk hnyi wanben hna okongoa.
- 15 Adre me wia könya ta je únyi hnân öbubuny gan,
Ödrin e hnu anyik hmanenang helâ me ang ;
Ke ame dit ut anyik hnahic helâ me ulâ.
- 16 Ke walang ang ame hlohlo but hanuk eú hnyi hnyekuk ;
Ame köt nya je bonginy vec.
- 17 Hnyi je hnyinghet adre me labö dá oa je jeiök
Je vec ame oc nya me ca menâ bi.
- 18 Ame kong ut úkhaúök ge hwegien anyik mok :
E ame cö nya helâ me nyin anyik úkhaú.
- 19 E ame hia but khuö nya ka hnyi hmudra,
K' iny úcú but me sesâiny kânâ me hnabadröu.
- 20 Inya oge me khöú köu, ke u me ca ling nya bi :
Oge me tot, ke u je bwele thibi könya.
- 21 U me hwân he ka oveci nya :
U me sedö nya ge hwegien hnyamâm.
- 22 U je köp nya göranyai ka hnyi ang, u je kunö nya he ka tabâ e ;
U je öú nya hnyi höu.
- 23 Anyin ae khanö nya a u me he ka lili nya ka hnyi mok,
Me uma adre penapena hobi kâu tavat hia ae möt.
- 24 Ke hawa ame he ka inâ hnyamen ka hnyi vetaúnyi !
E úcú at he ka tenge ge ta je únyi eling, eja ke ne adre ne ohia e.
- 25 Hawa, oge me ca tenge can at waleji ame vec ?
A ca tenge hnyekuk can at ae ba ta únyi ?
- 26 Haba hnyi úen oge me halubahingen so. me ame o bi könya únyi ae kong ;
K' oge me labagejoâ lany, me ame o bi könya menekholom.
- 27 A citróu hnyekuk, k' ame ca menâ bi ;
Ame o but je bonginy vec könya.
- 28 Oge me ngenu tenge ke ba seúnö :
Oge me tot hnyi úkhacaköu, me tenge hnân úhadruo.
- 29 Iny liamekeiny me je tanimo,
Ke liamekeiny me je iaena.
- 30 Ame lit ut unen unyik, k' ame kölu but gak,
K' adre hlöng ut je jeiök ge kahwa.

31 Anyin a wale adre me wia anyik kitara
me me tenge bi,
Ke anyik utkowi me me tenge thungau
bi.

HNYIMAKAN 31.

OGE me úhinhinköu me li emakök ;
Me oge ma kâmâu ka wâ hmâ hlu ?
2 Anyin a ieu jekhöu únyi ge Khong
ethö,
Me hwajeköu únyi ge Ataekhanahia
ethö ?
3 Hawa, ca hloúhloú bi hobi kâu at ae
kong.
Ke hnaúhangö hobi kâu tavat adre me
ányâ hulö ?
4 Hawa, e ame ca wâ dek je gethen,
Me aú hia hnök hna okca ?
5 Oge ne hia but tha he me únyi baú,
Ke logot li cak ka hnyi iyawö ;
6 (Ke so adre me tuluti nya hnyi tulut ae
wisa,
Me me he Khong ka wâ hwakecik ae
hnathu ;)
7 Ame ne hia but saú li cak únyi hnyi
gethen,
K' ame ne hnu hoton li emakök hnen
hnyekuk,
K' ame ne kece ong hnyikongon ka
hnyi li hnyamök :
8 Awe, e so oge me belök, k' ame he ke
at ka han troban ;
Eke, e so adre me he ka oc degecâ ha-
nen ik.
9 A ne hia but iyawâ hnyekuk hnen ke
momo,
Ke oge ne hia but tuö hnyi hwanumen
ke at :
10 Awe, e so ame he öiök ka camemâ hobi
kâu ke at,
Me ame he keihen ka nom ju ka hnyi
hon.
11 Anyin a hulö e ae gan hmâ hmönyin ;
Eke, monu ae úcú ka tavat owisa he ka
bi hwaban :
12 Anyin a e bi meic ame han ke ne o but
Hnaúhangö,
Me ame he ka oc degecâ hia hanen ik.
13 Oge ne hia but húkotiâ hofuc hmak
anyin athnyabaika бага me momo,
Hnyi úen ödrin e ivino mönya :
14 Ieu oge me he ka ányâ e ka he Khong
ka tot ?
E ka he ka senâ, ieu oge me he ka thu
kâu ?

15 Hawa, ame ca ope e, waleji hnen at ame
up nya eú hnyi hnyok ?
Khaca thibi at a up öhmu eú hnyi
hnyok ?
16 Oge ne hia but behânâ weny at ae the-
duoc,
Me ohmakâ li emakan safac ;
17 Me hake han,
Me ca tha han mönya je nakahme ;
18 (Ohe, oge me hat e hwân k' iny tiga
wanakat, helâke me hnen kamen,
Ke oge tuö safac hwân hnyi hna hmökü
nya ;)
19 Oge ne hia but wâ at ame he ka mok
anyin ae ba úkhaú,
Me at ae theduoc anyin ae ba hnân
khavâ e ;
20 Ame ne ca hia but haisoi nya hnen li
jebalainon,
Ke adre ne ca omageâ e ge leúnen halek
mamoe ;
21 Oge ne hia but hai hnyamök ka na-
kahme,
Hnyi úen oge wâ hiök hnyi homagöule :
22 Awe, e so he ka kölu but benyik únyi
hnyi bajebeniyik
Me thu benyik ke ne o but hnyi jeien.
23 Haba hlöúhlöú únyi ge Khong waleji
hnân öbubuny könya,
Ke ca khanö nya he ka ányâ ke únyi
ge ibeönuainy.
24 Oge ne labegejon gol,
Me ha ka gol, ka habe, U hnök hna
geju kâu ;
25 Oge ne senyin can ae gan hmâ tang
omjehkek,
Ke can oge hia but hom gâná ge li
hnyamök ;
26 Oge ne wâ seúnö hnyi úen e ame
manen,
Me tehi ame he hnyi melaminy ;
27 K' adre omono duóngâ hnyekuk,
K' ame ne úcimhnyimak me hnyamök :
28 Me wale minya ka monu hnân bi hwa-
ban ge tavat owisa :
Ke waleling thoi hnyi hnyimakan
Khong ethö.
29 Oge ne hia but senyiná hna ohia at ame
ikiki nya,
Me hobâ, hnyi úen hulö ame wâ e ;
30 (Eke, oge me ca hna hnyimök he ka
monu,
Waleji he ka sumâtâ anyin möt me
hofuc úhangö ;)
31 A ne ca ha tavat adre me tha laba
mönya, ka habe,

- Ewa at ae khana he ka wâ at a ca hnyi sekon unyin ?
- 32 Haba atkanyua ame ca mokut hnyi gethen ;
Ke oge me khöng je hwanumök ka at ame he ;
- 33 Oge ne ikhâlâ hnök je hna hanyâûâ helâji me Adamu,
Ke oiyongâ anyik monu hnyi ûlaik ;
- 34 Anyin a iny outen tavat ae se hia,
K' ame ne outhmoki nya hnen hûkötio nya ge je lap,
M' oge me laba hnyibû, me ca he bi kâû—
- 35 E na he ju ke at ka ling nya !
(Wâ bi, walang hatök, e so ame he Ataekhanahia ka thu kõnya ;)
E na hu gak lina sihnalimen hnen at ame iwahnaihmiony mönya !
- 36 Me oge me he bi nya ka vadren e hon bajebenyik ;
Me obicâ nya kâû, e me anyik konna.
- 37 Ke oge me he ka aú kâû úseiny hnök hna okca ;
Oge me he ka úhakekenyâ helâke iny than.
- 38 Ame ne he ik hnyei ka kuku gak,
K' ame ne tha tenge je hna belökâ e ;
- 39 Oge ne hia but an wan e, me ca bi hwaban,
Ke kunâ tavat a idra hnyei he ka mok ;
- 40 Awe, e so he ka kû iwadekong hwaban hwit,
Me je watetaföcö hwaban bali.

A um dö je hofuc ho Jobu.

HNYIMAKAN 32.

KE ame ca thu hmetu bi kö Jobu hnen je hnyat eling a kun, anyin a ka wisa e hnyi hnyimakan bi. 2 Ke ame ubâhlâ thö hmönyin anyi Elihu nöku Barakhela at Buza, hanen lap anyi Ram : ame ubâhlâ thö anyin hmönyin kö Jobu, anyin a e ame haiwisa e bi me ca haiwisa bi Khong. 3 Ke ame ubâhlâ thö anyin hmönyin minya ka je lahanan a kun, anyin a ödrin e ca wâ únyi hnân thu, ke so bi ödrin e hia but haikongu Jobu. 4 Ke haba Elihu ame hia but halubahing Jobu ge hofuc, anyin a ödrin dö a bân, ke e bi a biliny. 5 Ke a wâ but Elihu ae ba hofuc hnân thu hnyi je hnyimen ta hnyat a kun, me ame ubâhlâ anyin hmönyin.

- 6 Me haba Elihu nöku Barakhela at Buza ame thu me ha, ka habe,
E wakhalet thibi je hunaik, ke öbun je hingat hnathu but ;
Anyin a wale iny hlohlo, me ot he ka omanenâ únykúmenök köbun.
- 7 Haingök, Hamen at ae se hia bongon ka fuc,
Me hamen je huna ae se hia he ka únö metâ.
- 8 Ke e hu hanu eú hnyi at,
Ke haba homenân Ataekhanahia ame ham ködrin wâ únykúme.
- 9 Ca e unyin at ae beönua thibi metâ,
Me he ka wâhmakhmetoâ hna owisa, unyin wahingat.
- 10 Anyin a wale, haingök, Ling nya ju ;
Oge me he ka omanenâ minya hnök hna únykúme.
- 11 Wâ bi, oge me halubahingen hobun je hofuc,
Oge me tevehlöng hnöbun hna ha can, Öbun ka tiga elâm he ka ha.
- 12 Ke oge me tevehlöng köbun,
Me wâ bi, e ba at gabun a ngö Jobu,
Ke ba at unyibun ame thu hwan je hofuc.
- 13 Wâ eâu, wâ öbun nye ha, ka habe, Öhmun e wâ but metâ ;
E khana Khong he ka hwege hon, ke ca at bi :
- 14 Anyin a e ame ca penapena ifuciny hobi kõnya ;
Ke oge me ca he bi nya ka ha hobun hofuc iny ka thu kâû.
- 15 Ödrin e láiâ, k' ödrin e ca thu hmetu bi :
E ba but hodrin hofuc.
- 16 Hawa, oge me he ka halubahingen anyin a ödrin e ca fuc bi,
Anyin a ödrin e tot me ca fuc hmetu !
- 17 Oge me he bi nya ka thu hnyi hannyimök,
K' oge me he ka omanenâ hnök hna únykúme.
- 18 Anyin a iny unöngötö ge je hofuc ;
K' ame musi nya hnen hanu eú hnyi hnyekuk.
- 19 Wâ bi, e úcú hnyekuk me waina adre ca oc hlinginy ;
K' ame he but ka hmouca helâ me je tang ae teb únyi.
- 20 Oge me he ka fuc m' inye menâ ju ;
Oge me he ka khöng li esongodik me thu.
- 21 Iny na ca he ju ka wâbmakhmetoâ at ;

K'oge me ca he bi nya ka ham baûâ
ien ae gan hnân ogânâ at.

22 Anyin ae ca khanô nya he ka ogânâ at
ge je ien baú ;

Wâ e nye he At a Up nya he ka logot
hum nya.

HNyimakan 33.

A WE, Jobu lö, u na he ju ka löng hok
hofuc,

Me tevehlöng ju hnök je hna ha hia.

2 Wâ bi, walang ang oge hia but khöng
hnyimök,

Ame fuc bohmök hnyi hnyimök.

3 Ame he ka o hok hofuc úheny eú hnyi
hnyekuk ae wisa :

K'ame he li esongodik ka ha hnyi
hnathu hnök hna wâ.

4 Haba hanon Khong ame up nya,
Kea omeli nya homenân Ataekhanahia.

5 Ame ne khanö u, thu thö könya ;
Ipgaga hwâm je hofuc hnyi hnyimakök,
todró.

6 Wâ bi, oge me hnyimakök ka Khong
helâ me u :

Adre up nya minya únyi hnyi kânâ ae
kece.

7 Wâ bi, adre me ca he ka ooti u ge únyi
hnân ootâ gak,

K'ame ca he hnyamök ka hmak hom.

8 E hnathu u je hia but fuc hnyi hnyi-
könyök,

Ke oge hia but löng ifucâm, ka habe,

9 Iny kalaöt, anyin ae ba hnök hna ha-
nyâûâ ;

E ba hnyikonguk, ke ba hulö eú hnyi
hnyekuk :

10 Wâ bi, e ame heleú je can könya,
E ame öu nya me iwahnaihmüöny mä.

11 E ame ohmâ bi cak hnyi utö,

E ame bi haten dek je gethen hia.

12 Wâ bi, oge me he ka thu köu, a u je
ca wisa hnyi únyi e ;

Anyin ae gan hmâ Khong hon at.

13 Ieú gam u me ivinö mä ?

Anyin a e ame ca ha bi bongon anyin
ta je únyi.

14 E okhaca fuc Khong,

Me olo, ke a ca löng bi at.

15 Hnyi bwi, me hna omanenâ hnyi hnyi-
nghet,

Hnyi úen ame mokut hnying tavat,

Me leleú hon hna mokut ;

16 Hnyi úen eling e ame olöngâ je hnyi-
könyen tavat,

Me okeceâ hmâ hna úne ködrin.

17 Me me he ka lelö at únyi ge hnen hna
weny,

Me ikhâlâ bi gan ge at.

18 E ame behânâ hanon ge thop,

Me anyin möt wâ e nye hia ge hele vat.

19 Adre me siwhegiâ e minya hnen vec
hon hnen hna mokut,

Me ivinö bala eú hnyi je jeien :

20 Me me höcö jeú ge anyin möt,

Me jeú ae hnebvia ge hanon.

21 A aú but viny me me ca manen bi ;

Ke manen dut je jeien adre me ca wâ
ehac.

22 Eke, ame hakekeny hanon ka hnyi
erkemok,

Ke anyin möt ka tavat ohia,

23 Ame ne tha he mä ke angela,

At omanenâ bongon, a e beönua hon

tavat a wan thauzan,

He ka omanenâ ka at hanymen ae wisa ;

24 Awe, e ame he ka betenge gan me ha,
ka habe,

Omelö e me me ca ut kâú ka hnyi thop,

Anyin a oge me wâ but hwaban möt.

25 K'ame he ka habubut unyin hon unyin
wanakat ;

E ame he hmetu ka je bongon anyin
hidróu :

26 E ame hic ka Khong me e ame betenge
gan ;

Me e ame wâ hnyimakan me senyin :

Ke ame ohmeto ka at hwakecin ae wisa.

27 E ame khumöng hnyi hnyimakan tavat,
ka habe,

Oge hia but ânyâ hulö, me hanyâúâ
únyi ae wisa,

Ke ba troban könya :

28 E ame hia but omelö hanuk me me ca
ut ka hnyi thop,

K'ame he anyik möt ka wâ melam.

29 Wâ bi, Khong ame huliwan ta je únyi
eling,

A ibi olo, ke ibi okun, ka at,

30 He ka hom hmetu hanon únyi hnyi
thop,

M'adre me omelamâ e ge melaminy
tavat ae möt.

31 Jobu lö, tevehlöng ju, ling nya ju :

Laba hnyibú ju, me oge me he ka fuc.

32 Ame ne hu hofuc gam thu thö könya :
Fuc dö, anyin ae wek he ka haiwisai u.

33 Ame ne ba, ling nya ju :

Laba hnyibu, me oge me he ka nö u ge
metâ.

HNYIMAKAN 34.

HABA Elihu bala ame thu, me ha, ka habe,
 2 Öbun tavat ae metâ löng ju hok je hofuc ;
 Ke öbun tavat wâ únykúme, tevehling nya ju.
 3 Anyin a hanymen hnyiköny he ka löngmakhmeto hofuc,
 Helâ me hnyem ame drem cubecâ jeü.
 4 E so ötin e he ka úca wisa hobi kötin ;
 E so ötin e tha wáhmakhmeto so.
 5 Anyin a hia but Jobu ha, ka habe, Iny wisa but,
 Ke a hia but Khong húgúnâ anyik wisa :
 6 Eja ke ne a ne hu gak wisa, me iny at thoi köbun ;
 Ca hnân so hnök aat, eja ke ne a ne ba hnök hna hanyâúâ.
 7 Ie at ae úcú me Jobu,
 Wale ame ijem úhiö helâ me köiö ?
 8 At ame tha he me tavat adre me ányâ hulö,
 Me tha vheno me tavat ae kong.
 9 Anyin a haingen, ka habe, E ba troban ka at,
 E ka he ka senyin ka Khong.
 10 Anyin a wale, ling nya ju, öbun tavat wáhmakhmeto :
 E so e úsákátüö hulö me Khong ;
 Ke hwakecin ae kong me Ataekhanahia.
 11 Anyin a e ame he ka bi hwaban huliwa anyin at,
 Me ve oâ ka tavat hoton hwakecidrin.
 12 E hnathu ame ca he Khong ka ányâ hulö,
 * Ke ame ca he Ataekhanahia ka owhalö hna owisa.
 13 Ie at a ham kâu musi hon hmeledrany ?
 Ke ia ip gan hmeledrany hia ?
 14 Ame ne he ka hnyok ka at,
 Ame ne he ka ohmeto kâu bi hanon me homenân ;
 15 Ame he ka tha mok tavat hia,
 Ke ame he at ka hmetu ka hnyi kânâ.
 16 U je ne wáúnykúme, löng ju ang :
 Tevehlöng ju ifucik.
 17 Hawa, ame he at ame höciâ wisa ka musi ?
 Ke u me he ka haikongoâ e wale ae wisa me gan ?
 18 Hawa, e úcú he ka ha ka than, ka habe,
 U at ae ikiki ?

Ke ka je taben, Öbun tavat ae kong !
 19 Awe, hawa ge at ame ca wáhmakhmetoâ je than,
 Me ca önyihnatho at ae tren omjeü hon at ae theduoc ;
 Anyin a huliwa anyin li hnyamen ödra hia.
 20 Ödra logot mokcu, wale hnyi wanbenset ;
 Adre me obwebwelâ tavat me ame hi' ödra but,
 Ke adre me hom tavat hwege a ca hnen hnyam.
 21 Anyin a li emakan ame wâ je gethen deny at,
 Ke e ame wâ wia hnen hna okca.
 22 E ba menekholom, ke ba hmenon mok,
 Me me lubaduöng hnyin tavat adre me ányâ hulö.
 23 Anyin ae ca únyi hnathu kâu he ka olo únykúme ka at,
 Me me he hnyi hnyimakan Khong he ka úhnei.
 24 E ame kot omomono tavat hwege hnyi je deny a ca hnân elâm,
 Me otílâ keihen me hwabödrin.
 25 Anyin a wale e ame wáhmakhmetoâ anyidrin je huliwa ;
 K' ame wi' ödra hnyikânâi hnyi hnyinghet, me ohi' ödra but,
 26 E ame kuc ödra helâ me tavat ae kong
 Hnyi hnyimakan tavat adre me wâ ;
 27 Anyin a ödrin e degec hmeto e,
 Me ca únykúme bi deny je gethen :
 28 M' ödrin e oâ kâu hwa tenge anyin tavat ae theduoc,
 Ke e ame löng tenge anyin tavat adre me ovecâ.
 29 E ka omenâ, me ie ame he ka haikongoâ ?
 Ke e ka ikhâlâ hnyimakan, me ie ame he ka wâ e ?
 Adre me ne ányâ ka hnyei, k' adre me ne ányâ ka at, me, khaca thibi :
 30 Me me ca he bi at ame ca ot ka musi,
 Me me ca he ka hu at he ka omonoâ tavat.
 31 Hawa, ame hia but ha ke at ka Khong, ka habe,
 Oge hia but kap vec, k' oge me ca he hmetu ka monu :
 32 Ke haba únyi oge me ca wâ, me u me he ka nö nya :
 Oge ne ányâ hulö, awe, oge me ca he hmetu ka ányâ ?
 33 Hawa, adre me he ka bi hwaban e hotor hnâm hna únykúme, me u me he ka höciâ ?

JOBU 35, 36.

- Anyina hamâm he ka úca, ke ca hamök bi :
- Anyin a wale, ha thö hnâm hna khana.
- 34 Ame he ka he tavat wâhmakhmeto ka ha kõnya,
Me tavat ae metâ hia ödrin e löng kõnya, ka habe,
- 35 Haba Jobu ame fuc ke ba wâhmakhmeto,
Ke ba metâ hnyi hwan hofuc.
- 36 Ödra na he ka cubic Jobu ke ne o but obiny,
Anyin e ame thu helâ me tavat ae kong.
- 37 Anyin a e ame bi hanen bi gan ka anyin hulö,
E ame khaú li hnyamen unyihmun,
Me osehia hwan je hofuc ka Khong.

HNyimakan 35.

- K**E Elihu bala ame thu me ha, ka habe,
- 2 Hawa, u me únykúme ae wisa ang,
Haingâm, ke habe, Iny wisa hon Khong,
- 3 M' u me ha, ka habe, Ieú troban köu?
Ke ieú troban kõnya hon hnök hna ányâ hulö?
- 4 Oge me he ka thu köu,
Me je lahanâm unyâm.
- 5 Bwele thö ka hnyi drany me wâ ;
Ke wâ bi je úlá ae görany hom.
- 6 U je ne hia but ányâ hulö, ieú hnâm hna ányâ kâu ?
Ke ame ne se hia hnâm je hna hanyâúâ,
ieú e u me ányâ kâu?
- 7 U je ne at ae wisa hwakecin, ie únyi e u me ham kâu ?
Ke ieú e ame kap únyi hnyi hnyamâm?
- 8 E khana ányâm monu ka okongo tavat ae úcú môu ;
Ke e khana ányâm hwakecin ae wisa he ka osoâ tavat.
- 9 Tavat adre me tenge ge je úokonguny ae se hia ;
Adre me khôú ge benyin tavat ae hwege.
- 10 Ke ba at ame ha, ka habe, Ewa Khong at a up nya,
At ame ham je khumöng hnyi hnyinghet ;
- 11 At ame n' öta hon omenoiny kânâ,
Me omet' öta hon je meno ame gâ ?
- 12 Adre me tenge eling, ke ba at ame thu, Can bi gan anyin tavat ae kong.
- 13 E hnathu ame ca he Khong ka löng hofuc baú,

- K' ame ca he Ataekhanahia ka oúnyi-hnatho e,
- 14 Ke ti ca úcú eling, u je ne ha, ka habe, u je ca wâ e,
E bi hna owisa unyin, ke u je halubahingen !
- 15 Ke walang ang, anyin a e ame ca hia but senâ hnyi anyin hmönyin,
Ke e ame ti wâ hmâ bi gan ;
- 16 Anyin a wale, haba Jobu ame fuc baú :
E ame osehia je hofuc ke ba wâhmakhmeto.

HNyimakan 36.

- K**E ame fuc bala Elihu me ha, ka habe,
- 2 Mě na hokhnyok ju, me oge me he ka omanená köu ;
Anyin ae tiga hu hok hofuc bi he ka ha ge Khong.
- 3 Oge me he ka hok anyik metâ únyi hnyi dok ae sâkâú,
Me haiwisa At a Up nya.
- 4 Anyin ae hnathu ame ca thoi hok hofuc :
E bi unyâm at ae tren wâúnykúme ae bekhöt.
- 5 Wâ bi, e man Khong, ke ame ca hûkötîâ at :
E at ae man hnyi hwegien oúnykúmanen.
- 6 E at ame omelö at ae kong :
Ke e ame ham wisa ka at adre me ovecâ.
- 7 Eame ca ikhâlâ li emakan ge at ae wisa :
Ke haba je than hon theron
Me e ame otíl' ödra hmâ bala, m' adre me görany dö.
- 8 Ke adre me ne c' ödra ge je fao,
Ke nuc ödra ge je tö ae vec ;
- 9 Awe, e ame omanená ködra anyidra je huliwa,
Me hnödra hna hanyâúâ, a g' adre hia but ti ányâ hwakecin bi gan.
- 10 Ke ame olóngâ je hnyikonyödra ka hnyi hna úne,
Me húna ködra he ka hmetu únyi hnyi hulö.
- 11 Adre me ne he ka löng me bi athnyabainy,
Me adre me he ka laba sot hnyi bongudrin je bong,
Me senyin hnyi je hunaidrin.
- 12 Ke adre me ne ca löng bi, me ame he ka hi' ödra ge hele vat,

- Adre me he ka mok ke ca khan' ödra bongon.
- 13 Ke haba tavat ame ca ot bi je hnyekudra, me adre me úkhöünâ hmönyin : Adre me ca khöú hnyi úen e ame c' ödra.
- 14 Adre me mokcu k' ödra tiga je hidröu bi,
E tha obiny melidrin me tavat ae ikiki.
- 15 E ame omelö at ae vec hnen anyin vec. E ame olöngâ je hnyikönyödrin ge hna úöveci.
- 16 Eke, e ame belili u únyi hnyi dok ae kong
Ka hnyi dok ae lau, dok ae ca hnek bi ;
Ke haba hnödra hna ip hon ányâm laulau ame he ka ti pipikhenya.
- 17 Ke u je ounöngöt ge je hna owisa ka at ae kong,
Ame köt u ge hna owisa me wisa.
- 18 Ke haba khaca, e hu hmönyin, wâ eâu, wâ adre nye he ka hum u ge hnâm hna sekunâ ;
Ke so ame ca he úganiny hna omeli he ka osatú u.
- 19 Hawa, ame he ka úcú tang omjehem, m' u me ca he ka kong ut,
Ame ne je hwegien hia manom man ?
- 20 Ca he ka weny hnyinghet,
Wale úen adre me subâ degecâ tavat hnyi je hnödra.
- 21 Wâ eâu, ca he ka hnyok ka hwakecin ae kong :
Anyin a wale hnâm hna hia but úca hon vec.
- 22 Wâ bi, Khong ame ányâ huliwa ae beönua hnyi maniny man :
Ewa at úne a helâ mê ?
- 23 Ia kú kâu deny gethen ?
Ke ia ame he ka ha, ka habe, U je hia but ányâ hwakecin ae ca wisa ?
- 24 Únykúme ju he ka oganá anyin huliwa, Waleji ame khumöngö hnen tavat.
- 25 A hia but wâ e hnen tavat hia thithö ;
Tavat adre me wâ sákáú e.
- 26 Wâ bi, e gan hmâ Khong, k' ate me ca wâhmakhmeto e ;
Ke ca hnân elâm úseiny je hunainy.
- 27 Anyin a e ame lelö göranyai je köiö, K' ame ta but hmetu hnyi we únyi hnyi khömetiny :
- 28 Wale ame hingölö hnen je úlá
K' ame hingölö gan hmâ hon at.
- 29 Eke, ie at ame wáúnykúme hna ulolo je úlá,

- Ke hwan than únyi hnyi umen uma menâ ?
- 30 Wâ bi, e ame ulolo anyin lany igigilö e ;
Me khavâ taben köiö ae gan.
- 31 Anyin a e ame owisa tavat ge ta je únyi eling ;
Me hân gánâ.
- 32 E ame tube li hnyamen ge hucuce ;
K' ame húna kâu me me aat dö únyi e ame kú.
- 33 Haba úlunginy e, me wale at ame haimemenâ e,
K' ame ha omeno ge weneú ame o thö.

HNyimakan 37.

- H**NYI únyi eling ame öbubuny öúny-kúmik,
Me utut únyi hnyi hnen.
- 2 Löng wia ju öbun hwan ifucin,
Ke úlunginy ame he but únyi hnyi hnyimen.
- 3 E ame kunâ e kâú ka hnyi hmeledrany hia,
Ke anyin hucuce ke ne o but hnyi je can hmeledrany.
- 4 Hwaban dö e, me ame hmuhmu hwan ;
K' ame hwan than ge ifucin ae beönua :
K' ame ca behânâ, ödra ka löng ifucin.
- 5 Huân láiâ hwan than anyin Khong ;
E ame ányâ je únyi ae gan, k' ate me ca wâhmakhmeto.
- 6 Anyin a e ame ha ka kiona, ka habe, Ta but u ka hnyi hmeledrany ;
Ke helâe minya ka we ae úhnyúkong,
Me anyin we ae gan.
- 7 E ame okeceâ hmâ je hnyamen tavat hia thithö ;
Me me khana e hnen tavat hia e ame op.
- 8 Ke je menoiny hnyot adre me didrö ka hnyi je dok ae nedrong,
Me laba hnyi umödra je uma.
- 9 Ame o but höu úheny hnyi hwaiöu,
Me megic úheny hnyi hwadrö.
- 10 Adre ham köiö ae wahma ge homenâ anyin Khong :
Me hom úhnyúkong je köiö ae lau.
- 11 Eke, e ame ip khömetiny hon úlá ae khöt ;
E ame olauâ úláiny anyin hucuce,
- 12 Ke adre me hom tilâ e hnen anyin musi,
Me me aat hia hnen hna húna
Ka hnyi hon hmeledrany hia ae hu aten ;
- 13 Ame ne hnân únö, ame ne hobi kâu iny hnyeí,

- Ame ne betenge, me e ame oâ e.
 14 Jobu lö, tevehlöng ju ang :
 Todru, me wâ únykúme je huliwa
 huân láia anyin Khong.
 15 Hawa, e khanö u hwakecin hna húna ka
 je únyi eling hnen Khong,
 Me omanená imelaminy hucuce hnyi
 anyin úlá ?
 16 Hawa, e khanö u bongon hna tuluto je
 úlá,
 Je huliwa hnân láia gan at ae tren
 metâ ae bekhöt ?
 17 A kâmâu ka mage ânyâm je úkhaú.
 Hnyi úen ame ta hau hon hmeledrany
 can ang hnyi hwaiöu ?
 18 Hawa, e khanö u he ka tha ulolo mä
 drany,
 Waleji ae hmâ helâ me uselat bras adre
 oköiâ ?
 19 N' öhmun dö ge únyi hnân ha kâu ;
 Anyin ae ca khan' öhmun he ka pena-
 pena ifucihmun can menekholom.
 20 Adre me he ka ha kâu a iny befuc ?
 Ke ame he at ka beweny m' adre me
 utâ e ?
 21 Ke walang ame ca wâ but tavat lany ae
 hadröngöc hnyi je úlá :
 Ke ame o ang, me ânyâwia.
 22 Ame o but úheny hnyi hwadrö drany
 ae so helâ me gol :
 E unyin Khong hmanenang hnân outen.
 23 Haba Ataekhanahia, me ca khan' öta
 he ka wâ wia ; e nua man :
 Ke haba hnyi hna owisa me úhnei, me
 ame ca he ka úokonguny.
 24 Anyin a wale ame outen e ge tavat :
 Ke ame ca wâ hmâ tavat adre me
 hnyokâ wisa.

HNYIMAKAN 38.

- K**E haba Iehova ame thu kö Jobu únyi
 hnyi weneú, k' ame ha, ka habe,
 2 Ia olidrá úhnenamö
 Ge ta je hofuc ae ba wâhmakhmeto
 hnyin ?
 3 Hükälâ ju walang ang wen hnyekom
 me bi бага ju ;
 Anyin a oge me he ka hnei u, ke u ma
 omanená könya.
 4 U uaji hnyi úen oge me ip taben hme-
 ledrany ?
 U je ne wâhmakhmetoâ, awe ha thö.
 5 Ia tuluto e, ame ne manen köu ?
 Ke ia lau tö hon e ?
 6 Adre me ohmâ je taben hon ieu ?

- Ke ia ip veto hnân bahebetiny ;
 7 Hnyi úen ame tha kumöng je okhü
 lany,
 K' ame hongot senyin lakon Khong
 hia ?
 8 Ke ia hlöng hwanumen köiö ae gan,
 Hnyi úen e ame patrutrua helâke úheny
 eú hnyi hnyok ;
 9 Waleji hnyi hnök hna wia úlá hnân
 úkhaúen bi,
 Ke menekholom hnân hlanyin,
 10 Me kü hnyigöulen e,
 Me ip je venyâ me je hlinginy,
 11 Me ha, ka habe, Walang dok u ma o
 kâu, ke ca hanyâúâ bi ;
 Ke wale bi ang adre me he ka thawâ
 ânyâm waköiö ae hmanenang ?
 12 Hawa, u je hia but musö hnyomakatu
 hwân hnyi hna hnöku u,
 Me kü hnen ka haolany ;
 13 Me me he ka kât je can hmeledrany,
 Me jijingâ degecâ únyi hnyin e tavat
 ae kong ?
 14 Adre wia e helâ me kânâ ae kece adre
 bi haten hnyin ;
 Me ame manen dut ta je únyi helâ me
 úkhaú :
 15 Me ame hia but ge tavat ae kong me-
 lamidra,
 Ke ame hmetru thö benyin ae bi gan.
 16 Hawa, u je mwi eú hnyin je pupuainy
 köiö ae gan ?
 Me vhenö je dok ae lau ae owa ?
 17 Hawa, adre omanená köu je homagöu-
 leny mok ?
 Ke u je hia but wâ je homagöuleny
 hmenon mok ?
 18 U je wâhmakhmetoâ but úlauen hme-
 ledrany ?
 Ha thö, ame ne khanö u hia eling.
 19 Ewa gethen ka hnyi hnyaban melam,
 Ke haba menekholom, me ewa hnen ;
 20 Me u me he ka hom e ka hnyi hnyi-
 göulen e,
 Me wâhmakhmeto je gethen ka hnyi
 umen uma ?
 21 Hawa, adre bödra ka hnöku u, me me
 khanö u e,
 Ke se hia hmönyin bongom je bong ?
 22 U je mwi bi hnyi uma omjehen kiona,
 Me wâ je omjehen we ae wahma,
 23 Waleji hnök hna ip hobi kâu úen vec,
 Me bong bongon úkuc me vat ?
 24 Adre ma kâmâu ka khenâ lany,
 Me oveseâ ang hwei hon hmeledrany ?
 25 Ia hiny thop hobi kâu je di,

- Me bi deny hucuce me hwan than ;
 26 Me me he ka ta we ka hnyi kânâ dok
 ae ba aten ;
 Me hnyebuba wale ae ba at hnyin ;
 27 Me me he ka habelen kânâ ae únyi baú
 me hnyei бага ;
 Me okúâ hnaönying ae moumou ?
 28 E hu kamen we ?
 Ke ia hnokôâ je dân hau ?
 29 Ame o but úheny eú hnyi hnyeku ia
 köiö ae wahma ?
 Ke ia op dân hauiny drany ae wahma ?
 30 Adre ohia köiö helâ me hnen veto,
 Ke ame wahma thö hon köiö ae dit.
 31 Hawa, e khanö u he ka úhúkálakouâ je
 nyingen Kukuúnyi,
 Me thang je wen Oriona ?
 32 E khanö u he ka hom je Mazarothe
 hnyi úen e ?
 Ke khanö u he ka tha lili Uresa me
 anyin bunyen ?
 33 E khanö u but je hnanyibuiny drany ?
 Ke khanö u he ka otilâ musiny e hon
 hmeledrany ?
 34 E khanö u he ka ogöranyâ hwâm ka
 hnyi je úlá,
 Me me o we ae gan he ka tubi u ?
 35 E khanö u he ka kunâ je hucuce me
 me hia but,
 Me thu köu, ka habe, Walöhmun ang ?
 36 Ia ip metâ eú hnyi hnyekon at ?
 Ke ia ham hna únykúme ka hnyi oúny-
 kumânen at ?
 37 E khanö ia he ka aú je úlá ge metâ ?
 Ke khanö ia he ka hingâlâ je kaiainy
 drany,
 38 Me me hmudra but sesâiny kânâ,
 K' ame úkeceköu kânâ ?
 39 Hawa, u me he ka hnu meno me me an
 liona ?
 Me osekunâ je nak liona,
 40 Adre me laba iyâú hnyi je op,
 K' adre me laba hnyi dok ae nedrong
 he ka mokut duöng ?
 41 Ia penapena jeú hobi kâu oreba,
 E ka tenge lakon ka Khong,
 Me gâ monu ae ba an ?

HNYIMAKAN 39.

- E** KHANÖ u úen ame he je gotiny kie
 ka hnokôâ ?
 Me wâ haten vec a hnyekon je aila ?
 2 E khanö u he ka aú je tehiny erkin a
 ödra ?
 Me wâ úen adre me he ka hnokôâ ?

- 3 Adre me tot hwali me hnokôâ je la-
 kudra,
 Me ame hia but anyidra je vec.
 4 K' ame hwege lakudra, me gan tot hnyi
 hnyebuba ;
 5 Ia hna asinainy hnyot he ka he monu !
 Ke ia thang je wen asinainy hnyot ?
 6 Oge me ham hnyebuba hnân umen uma,
 Me hnyei бага hnân hnyaban.
 7 E ame hluma medien taun,
 Ke e ame ca löng hwahongot hwan at
 ame alin meno.
 8 Haba hna wâ hon je bucen, wale an
 jeú,
 Ke e ame elâm je únyi hia ae hát.
 9 Hawa, ame weny bolokiny hnyot he ka
 bi athnyabaem ?
 Me mokulec uma umen halem kau ?
 10 E khanö u he ka ca bolokiny hnyot ge
 wen hnyi hna belök ?
 Me amê he ka tha seú tilâ kânâ möu ?
 11 U me he ka labageju kâu anyin ae gan
 hmâ hwegien ?
 Ke u me he ka hna ânyâm huliwa kâu ?
 12 U me he ka labageju kâu a e ame he ka
 hom ânyâm hwit,
 Me hlo hwit hobi kâu umâm uma hnân
 huje hwit ?
 13 Ame lau senyiná labenyin renani ;
 Ke hawa, ame hmanenang taben labe-
 yin me je leúnen ?
 14 Anyin a e ame ip wakuny hnyi kânâ,
 Me omagei ödra hnyi sesâ,
 15 Ke e ame hnying ut a ame ne he can
 ka uto hmoucai ödra,
 Me ke menoiny hnyot ka uto veseâ.
 16 E khöt hnyekon ka lakon, helâ ke ca
 lakon bi :
 Ame ne únyi baú anyin huliwa e ame
 ca hlohlo bi ;
 17 Anyin a Khong ame hia but behânâ e
 ge metâ,
 Ke e ame ca ham kâu wâhmakhmeto.
 18 Hnyi je úen e ame höhöi thö göranyai.
 E ame hluma hors me at ame tabâ e.
 19 Hawa, u je ham tang hwege ka hors ?
 Me khavâ nyin e ge leúnen ame jijing ?
 20 U je kunâ e he ka gâ helâ me wahamon !
 Hnân outen hnen imenâiny ae hwege.
 21 E ame khinö ca hnyi thop me senyiná
 tang hwege :
 E ame he me úkhanö me vat.
 22 E ame hlumâ únyi hnân outen, ke ca
 öbubuny bi ;
 Ke e ame ca hwiö hmetu ge hele vat.
 23 Ame kitenge gan tangen fana,

- Me ö ae hadröngöc me uthö.
 24 E ame utá káná hnyi wathethöt me anyin hmönyin ;
 Ke ame ca únykúme a wale hwan trutru.
 25 Ame ne fuc dö trutru, me haingen, ka habe, Awe !
 K' ame löng bunen vat ke tiga sákátú, A hwan thaniny je taben vat, me huo.
 26 Hawa, ame nap dring ge ányám metá, Me lau li labenyin ka hnyi hwaiöu ?
 27 Ame gá göranyai aeto hnyi hnám hna húna,
 Me bi haüen ethö görany ?
 28 E ame labá kic, me bi hnyaban Hon ban kic, me je hnabá.
 29 E ame seládrá eling haniny ;
 Me wá e hnyi dok ae sákátú ge li emakan.
 30 Haba lakon me adre me ijem dra :
 Ke haba hnen je komok, me wale hnen bi minya.

HNYIMAKAN 40.

- K**E Iehova ame thu bala kö Jobu me ha, ka habe,
 2 Ame he at ae hwege hnyimen ka ivinö me Ataekhanahia ?
 Haba at ame ivinö me Khong, me so e ame thu.
 3 Me haba Jobu ame thu kö Iehova, me ha, ka habe,
 4 Wá bi, iny thatúnyi : ieu oge me he ka thu köu ?
 Oge me kát hnyimök.
 5 Iny okhaca but fuc ehac, ke oge me ca he ka thu ;
 Ke olo, me oge me ca he ka bi hanen.
 6 Haba Iehova ame thu kö Jobu únyi hnyi weneú, me ha, ka habe,
 7 Húkálá ju wen hnyekom walang ang me bi бага :
 Me oge me he ka hnei u, m' u ma omanená kónya.
 8 Hawa, u me he ka oúnyibaúá hnök hna owisa ?
 U me he ka haikongu nya, m' u me wisa bi ?
 9 E hu gam hnyam helá me Khong ?
 Ke e khanö u he ka bi hwan than helá me hwan hofuc ?
 10 Bete theibi u thö ge beönua me oganá ;
 Ke khatö u ju ge hmanenang me hwa-kecin than.

- 11 Hingálá but je bahihingölöiny ányám hmönyin :
 Bwele ju ka wá tavat ae bi gan hia, me hom úhnyúkongo ju.
 12 Ö 'dra ju tavat bi gan hia, me ohnyi-káná ju ;
 Me uto ju tavat ae kong hnyi je hnödra.
 13 Tha ikhöl' ödra ju eú hnyi káná ;
 Ca ju je hnyimaködra hnyi dok ae iyong.
 14 Me oge me he ka ogá gam
 A ae khana hnyamám a metám he ka omeli u bi,
 15 Wá bi walang behemoth, waleji hnök hna op möu ;
 E ame han önying helá me bolok.
 16 Wá bi, e tang hwegien hnyi li jebalainon,
 Me maniny man hnyi je töiny hnyekon.
 17 E ame bwebwelá obiny helá me arasi :
 Adre oúdílákouá je töiny li jevan.
 18 Helá me bras ae moku je jeien ;
 Ke úcú me je venyá fao je vhaken.
 19 E beönua hnyi ta je únyi a ányá Khong :
 E khana thibi at a op e he ka hakekenyá káu hele vat.
 20 E hnathu ame okúá an jeú hnen je bucen ;
 Ame walak eling ta je menoiny hnyot hia.
 21 E ame mokut hmelen je úö ae hlau,
 Me sa hlowe, me hnyei ae lup.
 22 Ame tube e hnen hmenon je úö ae hlau ;
 Je garabainy di ame tot igigilö e.
 23 Wá bi, e ka he wagewe ka bahihingölö, e ame ca öbubuny bi :
 E hwege hnyekon e ka di Joridano ke ne o but hnyi hnyimen.
 24 Ia noc e k' ame bwele thibi,
 Me kou hnyingöiny ge fao ?

HNYIMAKAN 41.

- E**KHANÖ u he ka lelö leviathana ge wage ?
 Me ca bohmen ge tö ?
 2 E khanö u he ka húkálá tö hnyi hnyingöiny ?
 Me kou wainy ge fao ?
 3 E ame he ka osehia khöu köu ?
 K' ame he ka ha je hofuc ae menyik köu ?
 4 Hawa, ame he ka ányá úhinyköu möu,
 M' u ma hom me athnyabaem bala bi ?

- 5 U me he ka walak mē helâ me meno
ame gâ?
Me noc e me me haleny ânyâm je hlu?
- 6 Ame he tawat thud ka úcú e?
Me kave ka tawat úcú?
- 7 E khanö u he ka öunöngötâ unen ge je
ö a telat,
Ke ban ge ta je úde?
- 8 Ip ju hnyamâm hon;
Únykúme ju vat, ke ca áuyâ hmetu
bala.
- 9 Wâ bi e únyi baú bi labageju he ka
hom e:
Hawa, ame ca he at ka ta but e ka
wâ e?
- 10 E ba at ae hwege hnyekon me me bwe-
bwelâ e:
Awe, ewa at ae khana tot hnyi hnyi-
makök?
- 11 Ke, ewa at ame bán ka ham könya, m'
inye he ka bi hwaban?
Anyin a anyik ta je únyi hia eang hme-
ledrany.
- 12 Oge me ca he ka laba hnyibú ge je ong
outhunyin,
Me tang hwegien, me manenanginy
unyin.
- 13 Ie at ae khana he ka uny anyin úkhaú?
Ie at ame he ka dit ka hnyi wanben
li ganyon?
- 14 Ie at ae khana he ka khöng li hlingen
hnyimakan?
E hu únyi hnân outen igigilö je nyon.
- 15 E ame senyinâ anyin je unö,
K' adre úohmâkôuâ helâ me únyi hnân
okeceâ.
- 16 Adre me oukeceâ ke at me ke at,
Me me ca khana ang he ka delec.
- 17 Adre me oukeceâkôuâ khaca me khaca,
Adre úkhötkou, me me ca hnân úsâ-
kâúö bi.
- 18 Hnyi hnen hna cihngö ame gâ thö lany,
Ke tha úcú li emakan me li emakan
hnyomakatu.
- 19 Ame o únyi hnyi hnyimen je thi okúnú,
Ke je wahleúhleúiny meic ame gâ.
- 20 Ame o únyi hnyi li hnyingöiny hai,
Helâke únyi hnyi öt me bö adre thong.
- 21 Adre omelö je walep ge homenáiny,
Ke báhlân ame o únyi hnyi hnyimen.
- 22 E bi hnyi nyin tang hwegien,
Ke öbubuny ame biâ hnyi hnyima-
kan.
- 23 Adre oukeceâkôuâ je ke keihen viny:
Ke e hwege e, ca hnân bwebwelâ.
- 24 E hwege öunykúminy helâ me veto;

- Eke, e hwege helâ veto eú hmelen únyi
hnân omomono.
- 25 E ka todrö, me haba tawat hwege adre
me ot:
Ame gäudrin ge hnödra hna öbubuny.
- 26 A ne he ke at ka kot e ge hele vat, me
únyi baú;
Helâe minya ge ö, me úde, me fana.
- 27 E ame únykúme fao helâ me thatúnyin
hwit,
Me bras helâ me utö bobot.
- 28 E ame ca he ke kec ge fana:
Ke e ame wia je veten kölóu me me
thatúnyin hwit.
- 29 E ame únykúme e úcú je utöhmü me je
thatúnyin hwit:
E ame hluma úgáiny ö.
- 30 Eú hnyi hmelen helâ me je ec watagi
ae so homakan:
E ame lau helâ me únyi hnân kokot
hwit hnyi hon hmudra.
- 31 E ame ocitröuâ köiö ae gan helâ me öt:
E ame wia köiö me me helâ me wakaco.
- 32 E ame ohauâ hwaban deny gethen;
Me me he at ka únykúme ae húen dut
köiö ae gan.
- 33 E ba at ae úcú mē eang hmeledrauy,
Adre op he ka ca ot.
- 34 E ame wâ ta je únyi hia ae görany:
E thibi than hon je lakon bi gan.

HNYIMAKAN 42.

- M**E haba Jobu ame thu kö Iehova me
ha, ka habe,
- 2 E khanö nya but ae khanö u he ka ányâ
ta je únyi hia,
Ke haba hnâm hna únykúme me pason
he ka thawâ.
- 3 Ie at ame ikhâlâ úhnenamö me ba wâu-
nykúme?
Anyin a wale oge hia but ha únyi oge
me ca wâhmakhmeto,
Je únyi ae beönua huk waleji ae ca
khanö nya.
- 4 Ö u löng ju, ke oge me he ka fuc;
Oge me he ka hnei u, ke nö nya ju.
- 5 Oge hia but löng gam ge li hnyikönyök;
Ke walang ang ame ö u hnen li emakök.
- 6 Anyin a wale, oge me ikiki nya bi me
ietra
Hnyi sesâ me hnabadröu.
- 7 Ke hwaban hna ha je hofuc eling kö
Jobu hnö Iehova, haba Iehova ame ha kö
Elifaza at Temana, ka habe, Ame ubâhli

thö anyik hmönyin köu me li lahânâm : anyin a öbun e ca hia but ha gak únyi ae wisa helâ me Jobu athnyabaik. 8 Ke walang ang hom dö hobi köbun bi je bolok a seven, me je mamoe бага a seven, ke he thö kö Jobu athnyabaik, me hudo hobi köbun hudiny leú ; ke ame he Jobu athnyabaik ka hic hobi köbun ; anyin a oge me he ka kap e, m'oge me ca he ka ânyâ köbun hoton anyibun monu ; anyin a öbun e ca ha gak únyi ae wisa helâ me Jobu athnyabaik. 9 Me haba Elifaza at Temana, me Biledad at Sua, me Zofar at Naamathi ödrin e he me ânyâ helâ me hna húna ga Iehova ködrin : me Iehova ame köp Jobu. 10 Ke Iehova ame ohmetu Jobu úheny hnyi hna bâ, e ka hijö je lahanen : ke Iehova ame ibi olo ham kö Jobu ta je únyi waleji ae hu gan ehac a bân. 11 Me ame o kâu je liamekeiny mē hia, me je lahaniny hia, me je hnyat hia a je liamewaeny hia mē ehac, me ödrin e tha han mē eiö hnyin umen uma ; me ödrin e tenge kâu, me otu-

bwelâ e hnyi ta je únyi hia ae kong walej a oâ kâu Iehova : ke ödrin e ve ham minya kâu ke mone, ke úsa khaca otru gol. 12 Me Iehova ame gan hmâ oganö Jobu hnyi bongon je bong a biliny hon je bongon a bân : ke e hu gan ta je mamoe a fotin thauzan, ke siks thauzan je kamela, ke wan thauzan je úcü lo bolok, ke wan thauzan je asina momo. 13 Ke e hu minya gan lakon бага a seven, ke kun ta lakon hlu. 14 Ke e ame hwenyi ien at a bân, me, Jemima ; ke Kezia ien at a loiny, ke Keren-apuka ien at a kuniny. 15 Ke haba hnyi hnyei hia me ba je momo ae hmanenang ka wâ, helâju me ta hlu laku Jobu : ke haba kamödrin ame bi jekhöúdrin helâ me je lahanidrin. 16 Ke hwaban dö e, me möt bala bi Jobu hnyi wan haded ke fâte ta je huna, k' ame wâ lakon, me je laöbiny ke ne o but hnyi dö a vakiny. 17 Me ame mokcu Jobu, ke hingat ut, ke se hia bongon ta je bong.

TA JE SALAMO.

TUSI I.

SALAMO 1.

HNAHIC hnen at ame ca vheno úhne-namö anyin tavat ae monu,
 K' ame ca tot hnyi gethen deny tavat adre me ânyâ hulö,
 K' ame ca laba hnyi tap taben at ame úhiö.
 2 Ke haba hnanyibu anyi Iehova, me wale anyin senyin ;
 K' ame labö únykúme ge anyin hnanyibu hnyi lany me lit.
 3 Me e ame he ka úcü me úö adre ta hnyi baten ta je wagewe,
 K' ame wa but wan hnyi huna,
 K' ame ca meleca thö lan ;
 K' ame he bi ka hnahic ta je únyi hia e ame ânyâ.
 4 E ca helâe ge tavat ae kong ;
 Ke ödra tha úcü me unen hwit ame öú ang dö.
 5 Anyin a wale ame ca he bi tavat ae monu ka tot hnyi úhnei,

Ke tavat adre me ânyâ hulö bi, ka tot hnyi úkhacaköu anyin tavat ae wisa.
 6 Anyin a haba Iehova ame wâ gethen deny tavat ae wisa :
 Ke haba gethen deny tavat ae monu, me ame he ka ba but.

SALAMO 2.

IEÜ can ame imonumonunyköu ta je hnyei,
 K' ame únykúme únyi ae ba troban ge aten ta je hnyei ?
 2 Haba je tuhan hmeledrany adre me tet metâ,
 Ke ame tha úsabö je taben,
 He ka hagutö Iehova me at e ame hú me haingödra, ka habe,
 3 E so ate me thamua hnödrü je hna ca,
 Me degec gata hnödrü je hna húkâlâ.
 4 Ame he at ame laba ethö hnyi drany ka hluma :
 Ke ame he than ka hi' ödra.

- 5 Me e ame he ka fuc ködra hnyi anyin hmönyin,
Me ohmaki ödra hnyi anyin wathe-thöt:
- 6 Ke so bi oge hia but otilä anyik than Hon Ziona, anyik bucen ae kap.
- 7 Oge me he ka omanená hnanyibu :
Haingö Iehova könya, ka habe, U thibi nöku ;
Oge hnöku u hnyi bong ang.
- 8 Sumatö nya thö, me oge me he ka ham köu je hnyei hnän hwajekhom,
Me je can hmeledrany hnän em hnyei.
- 9 U ma he ka thamú' ödra ge uci a fao ;
Me sa omomonu ödra helä me utkaia adre op.
- 10 Anyin a wale metä th' öbun je than :
Ke haba öbun hnyat owisa eang hmeledrany, hitangen ju hna úne.
- 11 Bi athnyaba ju kö Iehova me ot,
Ke senyin dö me öbubuny.
- 12 Ücimhnyimak dö öbun me nokon, wä e nye he ka hmönyin, me hi' öbun dut eü hnyi gethen,
Anyin ame he ka ie kü anyin hmönyin.
Hnödra hnahic ödra hia adre me labageju käu.

SALAMO 3.

Salamo anyi Davita, hnyi den e ame kec ga Abasatona nokon.

- I**JEHOVA lö, adre me osehia je iwahnai-hmiöny könya !
Ödra se hia tavat adre me tot könya.
- 2 E hu tavat ae se adre me ha ge hanuk, ka habe,
E ba úhadruö hobi käu unyin Khong. [Sela.]
- 3 Ke haba u, Iehova lö, u thibi bec igigili nya ;
Ke hmanenangik, me at ame ogöranyä böc.
- 4 Oge me hongot kö Iehova ge ifucik,
Me e ame thä könya únyi hnyi anyin bucen ae kap. [Sela.]
- 5 Oge me hlöhlöu me mokut ;
Ke oge me hmak hmetu ; anyin a Iehova ame ohwegiö nya.
- 6 Oge me ca he ka outen tavat a ten thuzan,
Tavat adre me tot metä könya igigilö.
- 7 Iehova lö, todrö ; Khonguk lö omeli nya thö :

- Anyin a u je hia but kot wahicen je iwahnai-hmiöny mönya ;
Ke u je thu hmetro ga nyon tavat ae monu.
- 8 E unyi Iehova úhomeli :
E na e ju ányám hnahic ka hnyi hon lakem. [Sela.]

SALAMO 4

Hobi käu At whik khumöng ; hnyi Neginat. Salamo anyi Davita.

- K**HONGON hwakecik ae wisa lö,
ling nya ju, iny ka hawo u ;
U je hia but thöng nya únyi hnyi anyik vec,
Betenge ju könya, me löng hijik hic.
- 2 Lakon at lö, öbun e he ka wia soik me me hnän hmehmä ke ne o but kehö ?
K' öbun e he ka hnyokä únyi ae únyi baü, me elám thoi, ke ne o but kehö ! [Sela.]
- 3 Mē khan' öbun dö a Iehova ame hia but hake ip at ae kap hobi käu e bi :
Ame he Iehova ka löng iny ka hawä.
- 4 Ot ju, ke ca ányä bi bulö :
Ühnenamö thö me je hnyekubun hon hnöbun hna mokut, ke ca bwebwet bi. [Sela.]
- 5 Hudö thö ta je hudiny hwakecin ae wisa,
Ke labageju thö kö Iehova.
- 6 E hu tavat ae se hia adre me ha, ka habe, Ie at ame he ka omanená köta so ?
Iehova lö, ogöranyä thö humun melaminy hnyimákäm.
- 7 U je hia but ip hnyi hnyekuk senyin Ae gan hon ün adre osehia anyidra hwit me waina.
- 8 Oge me he ka hlöhlöu me mokut minya hnyi hnahic :
Anyin a u thibi Iehova ame olabö nya, khötkici nya.

SALAMO 5.

Hobi käu at whik khumöng ; ge Nehilot. Salamo anyi Davita.

- J**IHOVA lö, löng ju ka ta je ifucik,
Ünyküme ju mekhunen hnyekuk.
- 2 Tuhök me Khonguk lö, tevehlöng ju ka hok hwatenge :
Anyin a oge me hic köu.

SALAMO 6, 7.

- 3 Iehova lö, hnyi hnyomakatu u ma he ka löng hok ;
 Hnyi hnyomakatu oge me he ka ha gaga hijik hic köu me hmâkâ.
- 4 Anyin a u ca Khong at ame senyin ka hwakecin ae kong :
 Ke ame ca he hulö ka laba unyâm.
- 5 Ame ca he ka tot hnyi hnyimâkâm tavat bi gan :
 U me ikiki gadra hia adre me ânyâ hwakecin ae kong.
- 6 U ma he ka chi' ödra adre me ha je thoi :
 Ke Iehova ame ikikiâ at ame hingâlâ dra me iyawâ.
- 7 Ke haba inya, oge me he ka didrö ka hnyin umâm uma hnyi ânyâm je ibetengiö ae se hia :
 Ke oge me he ka khudrung ka hnyi umâm uma ae kap me ot köu.
- 8 Iehova lö, lili nya ju ge hwakecâm ae wisa, can je iwahnaihmiöny mönya ;
 Owisa thö dem gethen hnyi hnyimâkök.
- 9 Anyin ae ba ke hnathu hnyi je hnyimödra ;
 E kong hmönyin hnyekudra :
 Haba je jeköwidra, me helâ me erkemok ae memang ;
 Ke adre me ütakû ge bohmödra.
- 10 Khong lö, haikongu ödra but ;
 E so adre me ta ûnyi ge anyidra bi je ûhnenamö :
 Ob' ödra but can adre osehia hanyâûâ
 Anyin adre me úkhin fuc möu.
- 11 Ke so ame he ka senyin tavat hia adre me labageju köu,
 E so adre me he bala ka hongot senyin, anyin a u thibi at ame sing ödra :
 E so ame he ka senyin köu minya tavat adre me hnyokâ iam.
- 12 Anyin a u me he ka ohnahicâ at ae wisa ;
 Iehova lö, u me he ka söng igigilöâ ge ibetengiö helâ me bec.

SALAMO 6.

Hobi kdu at thik khumöng ; ge Neginoth, adre hai hnyi eitiny. Salamo anyi Davita.

- I**EHOVA lö, ca he ka û nya hnyi ânyâm hmönyin,
 Ke ca he minya ka nö nya hnyi ânyâm wathethöt.
- 2 Iehova lö, betenge ju gak ; anyin a meleca thö unyik ;
 Iehova lö, ometu nya, anyin ame öbubuny je jeien unyik.

- 3 K' ame ot gan hmâ hanuk :
 Ke haba u Iehova, me ieu ûen gam ?
- 4 Iehova lö hmetu jem, me omelö hanuk :
 Omeli nya ûnyi ge ânyâm ibetengiö.
- 5 Anyin a haba ödra ka moku, me adre me ca he bi ka ûnykümi u :
 Ie at ame he ka ole köu eü hnyi erkemok ?
- 6 Iny senyin dut ge anyik mâng ;
 Ame uou hnök hna mokut ge tenge hnyi je lit hia ;
 Oge me okhubetâ hnok hna mokut ge deköien li emakök.
- 7 Ame jok ut li emakök ge hlöuhlöu ;
 Ke hadedak ûnyi ge je iwahnaihmiöny mönya hia thithö.
- 8 Úsákâûö but mönya, öbun hia th hö hnyat öbun e ânyâ hulö ;
 Anyin a hia but Iehova löng hok hwatenge.
- 9 Iehova ame hia but löng hnök hna sumâtâ ;
 Ame he Iehova ka kap hijik hic.
- 10 Ame he ka hmehma me ot gan hmâ ta je iwahnaihmiöny hia thithö mönya :
 Adre me ne ka hmetuhmetu, k' adre me he ka ie hmehma.

SALAMO 7.

Salamo anyi Davita e ame khumöngö kö Iehova anyi ge ta je hafuc ho Kusa at Beniamina.

- I**EHOVA Khonguk lö, oge me labageju köu :
 Omeli nya ju gadra hia thithö adre me hnu nya, ke hügünö nya but :
- 2 Wâ e nye he ka kia hanuk helâ me man liona,
 Me kia omomono e, ke ba at he ka omeli nya.
- 3 Iehova Khonguk lö, oge ne hia but ânyâ ûnyi ang ;
 Ke ame ne e bi hulö hnyi li hnyamök ;
- 4 Ke oge ne hia but bi hwaban kong ka at ae úsoköu mönya ;
 (Eke, oge hia but hna but at ae iwahnaihmiöny mönya ke ba can :)
- 5 E so e he iwahnaihmiöny ka hnu hanuk, me kât e ;
 Eke, e so e ame he ka uto ju anyik möt ka hnyi kânâ,
 Me ip hmanenangik eü hnyi sesâ. [Sela.]
- 6 Iehova lö, todrö hnyi ânyâm hmönyin,
 Höhöi thö ge hmönyin anyin je iwahnaihmiöny mönya :

- Ke hmákâ thö hobi kõnya : u je hia but otilâ hna owisa.
- 7 Ke so ame igigili u úkhacaköuiny ta je hnyei :
Ke hmetu ju hudrin ka hnyi dok ae görany.
- 8 Iehova ame owisa ka ta je hnyei :
Iehova lö, owisö nya ju helâ me hwakecik ae wisa, me hwakecik ae ba hnyikongon.
- 9 E na hu obiny ju monu anyin tavat ae kong, ke otethmâ ju at ae wisa :
Anyin a Khong at ae wisa ame elâm ta je hnyok me ta je únykúme.
- 10 E anyin Khong singik,
At ame omelö tavat ae wisa hnyekudra.
- 11 Haba Khong at owisa ae wisa,
Eke, e Khong at ae hwak ge monu hnyi je bong hia.
- 12 Ke ne a ne ca hwiö hmetu at, me ame he ka khet anyin hele vat ;
E ame hia but oto anyin cafana me penapena e.
- 13 Ke ame hia but penapena hobi kâu minya ta je únyi hnân hlingâ ;
E ame he ka vâc anyin je fana.
- 14 Wâ bi, ame vec hnyekon ge hulö ;
Eke, e ame erkinâ but úokonguny, me hnokoâ thoi.
- 15 E ame hia but hiny thop, k' ame hiny dilâ,
Me ame ka kölu but ka hnyi thop waleji e ame ânyâ.
- 16 Ame he anyin monu ka hmetuhmetu ka hnyi hon ban,
K' ame he hnen hna sihnân ka ta hmetu ka hnyi wanben ban.
- 17 Oge me he ka ole kö Iehova hoton hwakecin ae wisa :
K' oge me he ka khumöng olungâ iö Iehova ae Beönuu.

SALAMO 8.

Hobi kâu at zhik 'khumöng ; adre me hai hnyi Gith. Salamo anyi Davita.

- I** EHOVA lö, Tuhöhmun,
E ti so iâm hnyi hmeledrany hia thithö !
U je hia but ip ânyâm hmanenang ethö hon drany.
- 2 Únyi hnyi hnyimen ta je mendring me ta je inma u je otilâ tang hwege,
Can ta je iwahnaihmiöny möu,
M' u me he ka olaba wia iwahnaihmiöny, me at ame bi hwaban hmetu.

- 3 Oge me wâ hmâ ânyâm drany a huliwan ge ta je banyâm,
Wale tehi me ta je okhú u je hia but otilâ ;
- 4 Ehö at bi, m' u me ke ka únykúme gan ?
Me nokon at, m' u me he ka senâ ?
- 5 Anyin 'a u je op e me me omi úhnyú-kong bi hnyi hmelen Khong,
Me obicâ e ge mec me úoganö.
- 6 U je otilâ e he ka musö ta je huliwan anyin li hnyamâm ;
U je hia but ip ta je únyi hia thithö eú hmelen li can :
- 7 Ta je mamoe me ta je bolok hia,
Eke, me ta je menoiny hnyot :
- 8 Ta je meno ame gâ ethö, me ta je wâ eú hnyi köiö,
Me ta únyi hia adre me ka ve vheno dedra je gethen hnyi köiö.
- 9 Iehova a Tuhöhmun lö,
Shaiba ge únuainy iâm hnyi hmeledrany hia thithö !

SALAMO 9.

Hobi kâu at zhik khumöng ; adre hai hnyi Muth-laben. Salamo anyi Davita.

- O** GE me he ka oleâ kö Iehova ge hnyekuk ae bekhöt ;
Oge me he ka haimemenâ ânyâm ta je huliwa hnân láia.
- 2 Oge me he ka senyin me hobâ köu :
Ataebönuu lö, oge me he ka khumöng olungâ iâm.
- 3 E ka hmetu je iwahnaihmiöny mönya,
Adre me haú me hi' ödra hnyi hnyi-mákâm.
- 4 Anyin a u je hia but ci' nya hnyi anyik wisa me hnök hna ivinö ;
U je laba hon theron me owisa hnyi wisa.
- 5 U je hia but hijingâ je hnyei, u je obia tavat ae kong,
U je kot degecâ je iödra ke ne o but nyiele balua.
- 6 Haba iwahnaihmiöny adre me oum' ödra bi, e ba wan gadra balua ;
Me je taun u je hia but oc degecâ,
A áú but minya hna únykúme ködra.
- 7 Ke ame laba Iehova a than nyiele balua :
E ame hia but penapena anyin theron hnân úhnei.
- 8 Ke e ame he ka owisa hmeledrany hnyi wisa,

SALAMO 10.

- E ame he ka owisa soâ tavat.
- 9 Ame he Iehova ka bi hñabâ hobi kâu tavat adre me sed' ödra, Hñabâ hnyi je bonginy vec ;
- 10 Ke haba tavat ae khan' ödra iâm, me adre me he ka labageju köu ; Anyin a haba u, Iehova, u je ca hna degecâ tavat waleji adre me elöm u.
- 11 Khumöng olungi Iehova, at ame labâ Ziona : Omanenâ thö hnyi wanben ta je hnyei hnen je hna ânyâ.
- 12 Anyin a haba at ame hnei can dra ame únykúmi ödra : K' ame ca hnying hwatenge hwan tavat ae theduoc.
- 13 Iehova lö, betenge ju gak ; Wâ ju anyik vec únyi ge tavat adre me húkotiö nya, U at ame köp nya göranyai únyi hnyi homagöuleny mok ;
- 14 Me inye he ka haimemenâ je hofuc hia hnân oganö u : Ke oge me he ka senyinâ úhömeli gam, Hnyi je homagöuleny hlu nöku Ziona.
- 15 Haba ta je hnyei adre me ú but hnyi thop adre hia but ânyâ : K' ame hñok dö je cadra hnyi ert adre me ikhâlâ.
- 16 Ke haba Iehova ame omanenâ e bi, k' ame owisa : K' ame hñok dö at ae kong ge huliwa anyin li hnyamen. [Higaiona. Sela.
- 17 Ame he tavat ae kong ka hmetu ka hnyi hedis, Wale ta je hnyei hia adre me hnying Khong.
- 18 Anyin adre me ca he balua ka hnying tavat ae theduoc, K' ame ca he balua ka hia labageju anyin tavat ae ba ta únyi.
- 19 Iehova lö, todrö ; e so ame ca he at ka ton : E so adre me owisa ta je hnyei hnyi hnyimákâm.
- 20 Iehova lö, ooti ödra ju ; Omanenâ thö ka aten ta je hnyei a ödra tavat bi. [Sela.

SALAMO 10.

- I** EHOVA lö, iéú gam a u me tot sâ-káu ?
Me lubaduöng hnyi je úen ae vec ?
- 2 Adre me hwege hnu tavat ae theduoc hnen tavat ae koug ke bi gan ;

- E so adre me nuc ödra hnen je bibihwa-kecin adre me únykúme.
- 3 Haba at ae kong ame ohobeluâ weny hnyekon, K' ame hota degecâ hnen at ae behnyekon, me hmiö Iehova.
- 4 Haba at ae kong, únyi hnyi bi ganiny hnyimakan, ame ha, ka habe, E ame ca he ka elâm e. Ke haba hnen je hna 'únykúme hia, ka habe, E ba bi Khong.
- 5 E hmâ balua deny je gethen ; E sâkâú balua gan ânyâm je hna owisa : Ke haba je iwahnaihmiony hia mē, e ame tú' ödra.
- 6 Haingen eú hnyi hnyekon, ka habe, Oge me ca he ka bwebwet : Hnyi je dö hia oge me ca he balua ka vec.
- 7 A unöngötö hnyimen ge úhangö, me iyawö, me seda : Eú hnyi hmelen bohmen úkonguny me hulö.
- 8 E ame laba tue hnyi je dok ae iyong hnyi je taun : E ame hlingâ tavat ae ba hnyikongon hnyi ta je dok ae nuong : Haba li emakan ame ecmákâ tavat adre me okongoâ.
- 9 E ame laba hnyi dok ae nuong helâ me liona hnyit umen op : E ame mokut duöng he ka kât at adre ovecâ : E ame kât at adre ovecâ, me lelö e hnyi úten ert.
- 10 E ame iyâú, me nom, Me ame ta but tavat adre ovecâ hnen anyin tavat ae hwege.
- 11 Haingen eú hnyi hnyekon, ka habe, A hnying ut Khong : E ame ikhâlâ hnyimakan ; e ame ca he balua ka wâ.
- 12 Iehova lö, todrö ; Khong lö hai thö hnyamâm : Ca he ka hnying tavat adre ovecâ.
- 13 Geú ame hmiân Khong hnen at ae kong, Me ha eú hnyi hnyekon, ka habe, U me ca he ka hnei can ?
- 14 U je hia but wâ e ; anyin a u me wâ úoveci me vec, he ka hom e hnyi hnyamâm : Ke haba at ae theduoc ame hna but e bi köu ; U thibi at ame hadruâ nakahme.
- 15 Ohmetro but benyin at ae monu ; Ke haba at ae kong, e so u ma elâm

SALAMO 11-13.

- hwakecin ae kong me me ba hmetu
hnâm hna wâ.
- 16 Iehova thibi Than nyiele nyiele balua :
A hia but je hnyei únyi hnyi iny
hnyei.
- 17 Iehova lö, u je hia but löng weny tavat
ae hnyikáná :
U me he ka otílâ hmâ je hnyekudra, u
me he ka tevehlöng :
- 18 He ka owisa ka nakahme me tavat adre
ovecâ,
Me me ca he hmetu bi at a aten hmele-
drany ka hwege hnyimakan.

SALAMO 11.

Hobi kâu at ehik khumöng. Salamo anyi Davita.

- I**NYA oge me labageju kö Iehova :
Anyin a ieu öbun e ha ka hanuk, ka
habe,
Kec dö helâ me meno ame gâ ka hnyi
anyibun bucen ?
- 2 Anyin a wâ bi, ame lau cafana hnen
tavat ae kong,
K' adre me ip anyidra fana hnyi tö,
M' adre me he ka fana hnyi menekho-
lom tavat ae wisa hnyekudra.
- 3 Adre me ne ohia ta je taben,
Ieu ame he tavat ae wisa ka ânyâ ?
- 4 E bi Iehova hnyi umen uma ae kap,
Wale Iehova, ethö hnyi drany anyin
theron ;
Haba li emakan ame wâ, k' ame cubec
lakon at hnen li bademakan.
- 5 Iehova ame cubec at ae wisa :
Ke e ame hûkötîâ at ae kong, me at
ame beüokonguny eü hnyi hnyekon.
- 6 E ame he ka öta helâ me we ta je hnewe
hon at ae kong ;
Haba meic, me teio, me ang ame hlâ,
me wale kaia a jekhüüdra.
- 7 Anyin ae wisa Iehova ; k' ame hnyokâ
hwakecin ae wisa ;
E ame he ka wâ hnyimakan at ae wisa.

SALAMO 12.

*Hobi kâu at ehik khumöng ; adre me hai hnyi Se-
minüth. Salamo anyi Davita.*

- I**HEHOVA lö, omelö thö ; anyin ae ba at
ae wisa hwakecin ;
K' ame hia but tavat ae hnathu unyin
lakon tavat.
- 2 Adre me ve ha thoi ka at ame laba ha-
kekenyi ödra :

- Adre me fuc ge je esongodidra ae ütâkü,
me hnyok lo.
- 3 Ame he Iehova ka subâ degecâ ta je
esongot hia ae ütâkü,
- Me bohmen minya ame fuc bi gan :
- 4 Waleji tavat adre me ha, ka habe, Ame
he ka tuhmun ge je bohömömun ;
E unyihmun bi je esongodihmun ; ia
tuhöhmun ?
- 5 Can adre okongoâ tavat vec, can mâng
anyin tavat ae theduoc,
Oge me he ka todrâ walang ang, haingö
Iehova ;
Oge me he ka ip wia at wale adre me
tûâ.
- 6 Hofuc ae kalaöt je hofuc ho Iehova ;
Helâ me sileva adre le hnyi meic eü
hnyi kânâ
Wale adre, oseven le.
- 7 Iehova lö, u me he ka tu' ödra,
U me he ka tu ödra únyi ge dö ang
nyiele balua.
- 8 Ame vhenö je ke keihen hia hnen tavat
ae kong,
Ödra ka ogöranyâ hwakecin ae ikiki
unyin lakon tavat.

SALAMO 13.

Hobi kâu at ehik khumöng. Salamo anyi Davita.

- I**HEHOVA lö, u me he ka hnying nya
ke ne o but kehö ? ke ne o but nyiele
balua ?
U me he ka ikhâlâ hnyimâkâm gak ke
ne o but kehö ?
- 2 Ke ne o but kehö oge me he ka úhne-
namö eü hnyi hanuk,
Me hmak ut hnyekuk hnyi lany hia ?
Ke ne o but kehö ame he iwahnaihmiöny
mönya ka beönua huk ?
- 3 Iehova lö, Khonguk, únykümi nya me
ling nya :
Omelamá li emakök, wâ oge nye mokut
me moku ;
- 4 Wâ e nye he iwahnaihmiöny mönya ka
ha, ka habe, A tuk ut hon ;
Ke wâ e nye he tavat adre me oveci
nya ka senyin iny ka bwebwet.
- 5 Ke oge hia but labageju hnyi ányâm
ibetengiö,
Ame he hnyekuk ka senyinâ ányâm
ühömeli :
- 6 Oge me he ka khumöng kö Iehova,
Anyin a e ama hia but betenge gan
hmâ kõnya.

SALAMO 14.

Hobi kdu at rhik khumöng. Salamo anyi Davita.

- H**AINGEN at ae monu eü hnyi hnye-
kon, ka'habé, E ba Khong.
Odra bo kong, adre me ányá ta je hu-
liwa ae ikiki ;
E ba atame mádrá so.
2 Iehova ame bwele jem ethö hnyi drany
ka wá lakon at,
Me me wá thö, hawa, e hu at ame wá
únykúme,
A at ame elám Khong.
3 Ódra hia adre me saú ; k' adre me tha
kong ut ;
E ba at ame mádrá so, e ba hmönyin
me khaca.
4 Hawa, e ba hnyekudra tavat hia adre
ányá hulö ?
A tavat adre me an lakeik heláke me
hna an jeü,
K' adre me ca hongot bi kö Iehova.
5 Haba hnyi dok éling adre me ot gan
hmá :
Anyin a e Khong unyin tavat ae wisa.
6 Óbun e ohmehma úhnenamö anyin tavat
adre me vec,
Anyin a Iehova bi hnen hna lubaduöng.
7 E na he ju möt kö Israela úheny
Ziona !
E ka he Iehova ka ohmetö lakeiny úhe-
dra hnyi hhabá.
Me ame he Jakob ka senyin, k' ame he
Israela ka hobá.

SALAMO 15.

Salamo anyi Davita.

- I**EHOVA lö, ie at ame he ka mē laba
hnyin umám uma mená ?
Ie at ame he ka laba hon ányám bucen
ae kap ?
2 E so thibi at ame he wisa, me ányá wisa,
K' ame ha hnathu únyi eü hnyi hnyekon.
3 A at ame ca bi fuc ge bohmen,
K' ame ca okongoá liamewaeny mē,
Me ca kap bi hna haikongoá at ame
laba hakekenyá e.
4 E húkötö li emakan at ae ikiki ;
Ke e ame oganá tavat adre me outö
Iehova.
E ame khemanyin me okongoá e bi, k'
ame ca hwiö bi.
5 At ame ca mē ham anyin mone ge
hwaban,

Me ca kap hwaban hnán okongoá at ae
ba hnyikongon.

Ame ca he balua ka bwebwet at ame
mádrá ta je únyi e.

SALAMO 16.

Salamo anyi Davita.

- K**HONG lö, tuö nya ju : anyin a inya
oge me labageju köu.
2 Oge hia but ha kö Iehova, ka habe, U
thibi Tuhök :
E ba soik ke unyám thibi.
3 Ke haba tavat ae kap eang hmeledrany,
Ódra tavat ae beönuua soidra, wale oge
me ti senyin ködra.
4 Ame he ka se hia vec ka tavat adre me
hwiö ka ke khong :
Oge me ca he ka hudo anyidrin je hu-
diny dra hnán ie,
Ke hom ta je iödrin ge li esongodik.
5 Iehova thibi jekhök me anyik kaia ;
U thibi at ame othemá jekhök.
6 A aat dö kõnya je tulut hnyi dok ae so
hmönyin ;
Eke, e so kõnya ik.
7 Oge me he ka oganö Iehova at ame nö
nya :
Eke, ame siwhegiö nya hnen hnyekuk
hnyi je lit.
8 Oge hia but ip Iehova bala hnyi hnyi-
makök :
Oge me ca he ka bwebwet, anyin a e bi
hnyi ke keihök a metök.
9 Anyin a wale ame senyin hnyekuk, me
hobá anyik mec :
Ame he but minya unyik ka laba hnyi
gejon.
10 Anyin a u me ca he ka hna but hanuk
ka hnyi hedis ;
Ke u me ca he ka hna degecá atám ae
kap he ka wá hna bobot.
11 U me he ka omamená kõnya gethen
deny möt :
E unöngötö senyin hnyi hnyimákám ;
Ke e hnyi hnyamám a metám ta je
únyi hnán osenyiná nyiele balua.

SALAMO 17.

Hic hiji Davita.

- I**EHOVA lö, löng ju únyi ae wisa, hwiö
jem ka anyik tenge ;
Tevehlöng ju hijik hic, ame ca o únyi
hnyi li esongot ae thoi.

- 2 E so ame he ka o únyi hnyi hnyimákám hna owisa gak ;
E so ame he li emákám ka wá únyi ae úcú.
- 3 U je hia but cubec hnyekuk ; me senö nya hnyi lit ;
U je hia but cubic nya, ke ba wânâm ;
Oge me ip hmâ eú hnyi hnyekuk a g' ame ca he hnyimök ka hanyâúâ.
- 4 Haba ta je huliwa anyin tavat, me, únyi ge ifuciny li esongodâm
Oge hia but tuö nya m' inye ca he hnyi je gethen deny tavat úkuc.
- 5 Ame he hmâ hnök je hna okca hnyi dem je gethen,
K' ame ca haú bi li cak.
- 6 Khong lö, oge hia but hao u, anyin a u me he ka ling nya :
Tevehling nya ju, me löng ju hok hofuc.
- 7 Omanená thö ányâm ibetengiö ae gan hmâ, u thibi at ame omelö tavat adre me labageju köu
Ge hnyamâm a metâm, unyin tavat adre me tot ködra.
- 8 Tuö nya ju helâ me wahlidrin y ecmak, Ikhölö nya ju hnyi hmenon li labe-nyâm,
- 9 Únyi ge tavat ae kong tavat adre me oaúö nya,
Wale ta je iwahnaihmiöny hmönyin könya, hnyat adre me igigili nya.
- 10 Adre me lan ödra bi ge anyidra pipi-khenya,
K' adre me hobelu' ödra ge je hnyimö-dra bi.
- 11 Walang ang adre me igigilö hnöhmun je hna okca :
Adre me iwahmö he ka otai öhmun hnyikânâi.
- 12 Haba at e, me helâ me liona ame bekia he ka han,
Ke helâ me nak liona at ame laba tue hnyi je dok ae iyong.
- 13 Iehova lö, tödro,
Tot metâ kâu, me hagutâ e :
Omelö thö hanuk únyi ge at ae kong ge ányâm hele vat ;
- 14 Iehova lö, omeli nya thö únyi ge tavat hnen hnyamâm,
Únyi ge aten hmeledrany, tavat tren jekhöu hnyi möt ang,
U je öunöngötâ je tang tidra ge tang omjehem :
Adre sekudra but je lakudrin,
Ke adre me hna kolon ge anyidrin ta je únyi ka lakudrin je mending.

- 15 Ke haba inya oge me he ka wá hnyimákám hnyi hwakecin ae wisa :
Ame he ka sekuk, iny ka hmak dö a tha helâ möu.

SALAMO 18.

Hobi kâu at thik khumöng. Salamo anyi Dav'ia athnyabai Iehova, waleji at ame ha kö Iehova je ifuciny khumöng ang hnyi bong Iehova ame omelö e únyi hnyi hnyamen je iwahnaihmiöny mä hia, me únyi hnyi hnyamö Saulo : ke haingon, ka habe,

- I** EHOVA lö, tang hwegiök, oge me hnyök köu.
- 2 Iehova thibi kicik, me hnök hnabâ, me at ame omeli nya ;
Khonguk, kicik ae hmâ, oge me he ka labageju kâu ;
Becik, me faoiny meno hnân omeli nya, me anyik tap ae beú göranyai.
- 3 Oge me he ka hongot kö Iehova, at ae úcú hnân oganá :
Me ame he ka omeli nya únyi ge je iwahnaihmiöny mönya.
- 4 Adre wadrö nya ge ta je tö hnân me-kiny,
K' ame ooti nya hnen je uóúiny hwa-kecin ae kong.
- 5 Adre igigili nya ge je töiny erkemok :
Ame o but könya ta je hnewe hnân mekiny.
- 6 Oge me hongot kö Iehova hnyi anyik vec,
Me khöu ka Khonguk :
Ke e ame löng hok hofuc hnyi umen uma ae kap,
Ke hok hwatenge hnyi hnyimakan ame o but ka hnyi li hnyikönyen.
- 7 Ke ame bwebwet me öbubuny hmeledrany,
Ke memeny dö minya taben je bucen,
Ke okokok ut, anyin a e hmönyin.
- 8 Ame sâ hai únyi hnyi li hnyingöiny,
Ke meic ame han únyi hnyi hnyimen :
K' ame möt dö gan ta je walep.
- 9 E ame oto minya drany, me utut ;
Ke eú hmelen li can bi menekholom ae khöt.
- 10 Ke e ame laba hon kerubi, me gâ :
Eke, e ame gâ mweimwei hon li labe-nyin ang.
- 11 E ame lubaduöng hnyi menekholom, wale umen uma menâ igigilö e ;
Wale angwe, a je úláiny drany ae haki
- 12 K' ame aú but anyin je úlá únyi ge melaminy hnyimakan,

- We ae wahma me je walepiny meic.
- 13 Iehova ame bi hwan than minya hnyi drany,
K' ame fuc dö Beönuua ;
We ae wahma me je walepiny meic.
- 14 Ke e ame fana anyin je fana me ovesei ödra ;
Eke, je hucuce ae se, me omomonu ödra.
- 15 Ke manen dut je deny je di,
K' adre me omanenâ ta je taben hmele-drany,
Ge hnâm hna thawâ, Iehova,
Ûnyi ge homenâiny li hnyingöiâm ae hwege.
- 16 E ame ûkhûnöng ûheny thö, e ame hum nya ;
E ame lili nya ûnyi hnyi je köiö ae se.
- 17 E ame omeli nya ûnyi ge iwahnaihmiony mönya ae hwege,
Me tavat adre me hûkötio nya, anyin a ödra hwege huk.
- 18 Adre me o kõnya hnyi bonginy anyik vec :
Ke Iehova cik.
- 19 E ame su nya minya ka hnyi dok ae lau ;
E ame omeli nya anyin a e ame senyin kõnya.
- 20 Haba Iehova ame bi hwaban kõnya hoton hwakecik ae wisa ;
E ame bi hwaban kõnya eucû me li hnyamök ae kalaöt.
- 21 Anyin oge hia but vheno je gethen de Iehova,
Ke oge me ca saü degec monoâ Khonguk.
- 22 Anyin a eü bi hnyi hnyimakök hnen je hna owisa hia,
Ke oge me ca hota but gak anyin je hnanyibu.
- 23 Ke ba hnyikonguk minya gan,
Ke oge me tuö nya bi ge anyik hulö.
- 24 Anyin a wale a hia but Iehova bi hwaban kõnya hoton hwakecik ae wisa,
Me kalaötiny li hnyamök hnyi hnyimakan.
- 25 U me he ka betepge ka at ame betenge ;
U me he ka wisa ka at ae wisa ;
- 26 U me he ka hwakecin ae kalaöt, ka at ae kalaöt hwakecin ;
Ke u me he ka ânyâ hwali ka at ae hwali hwakecin.
- 27 Anyin a u me he ka omelö tavat ae vec ;
Ke u me he ka ohnyikânâ je ecmak ae bi gan.
- 28 Anyin a u me he ka omelö anyik lamepa :
Ame he Iehova Khonguk ka omelamâ anyik menekholom.
- 29 Anyin a ûnyi gam oge me utut ka hnyi hon deö vat ;
Ke ûnyi ge Khonguk oge me gâ hanyâûâ hna up hak.
- 30 Ke haba Khong, e wisa deny gethen :
Haba hofuc ho Iehova adre me cubec ;
E thibi bec anyin tavat hia adre me labageju kâu.
- 31 Anyin a ia Khong, e ka ca Iehova ?
Ke ia bi kic, e ka ca Khonguta ?
- 32 Wale Khong at ame oweikö nya ge man,
Me owisa dek gethen.
- 33 E ame ânyâ li cak me me helâ me je aila :
Me ip nya hon anyik je dok ae görany.
- 34 E ame nâ li hnyamök he ka vat ;
Me ame oto cafana bras ge li hnyamök.
- 35 U je hia but ham minya kõnya becin ânyâm ûhömeli :
K' ame köp nya göranyai hnyamâm a metâm,
K' ame oganö nya hwakecâm ae menyik.
- 36 U je ogânâ hnök je hna okca hmelik,
K' ame ca haûhaû li hnyeicak.
- 37 Oge me he ka hnu hoton je iwahnaihmiony mönya me khöü ödra :
K' oge me ca he ka hmetu ke ne o but adre ohi' ödra.
- 38 Oge me he ka kot mou ödra m' adre me ca he ka tot hmetu :
K' adre me he ka ta but eü hmelen li cak.
- 39 Anyin a u je oweikö nya ge man ae gan hobi kâu vat :
U je hom ûhnyükongu ödra eü hmelek, tavat adre me tot kõnya.
- 40 U je wia hoton je iwahnaihmiony mönya kõnya nya bi,
Me inye he ka subâ degecâ tavat adre me hûkötio nya.
- 41 Adre me khöü ke ba at ûhömeli :
Wale kö Iehova, ke e ame ca fuc ködra.
- 42 Me oge me kot omomonu ödra helâ me sesâ hnyi hnyimakan ang :
Oge me kot degeci ödra helâ me hmu-drainy gethen.
- 43 U je omeli nya ûnyi hnyi je iwatretra anyin tavat ;
U je wiö nya me hnân ban ta je hnyeï :
Ame he ka bi athnyabaik tavat ae ca khanö nya.
- 44 Adre me he ka löng me ie löng hotuk :
K' ame he je atkanyua ka nom kõnya.
- 45 Ame he je atkanyua ka aü tot,
Me o ûnyi hnyi anyidrin je dok ae 'nuong me öbubuny.

- 46 E möt Iehova ; e so he ka olongo kicik ;
Ke so adre me ogöranyâ Khongon melik :
- 47 Wale Khong at ame bi nya,
K' ame hom úhnyúkongoá ta je hnyei
hnyi hmelik.
- 48 E ame omeli nya únyi ge je iwahna-
ihmiöny mönya :
Eke, u je ogöranyi nya hon tavat adre
me tot kõnya :
U je omeli nya únyi ge at úokonguny.
- 49 Anyin a wale oge me he ka oleâ köu
Iehova, hnyi wanben ta je hnyei,
Me khumöng olungo iâm.
- 50 E gan hmâ hnen hna oâ úhömeli hobi
kâu than a aten ;
Me e ame omanená ibetengiö ka hnen
hna hú,
A Davita me je mátrániny nyiele balua.

SALAMO 19.

Hobi káu at chík khumöng. Salamo anyi Davita.

- A** ME omanená je drany mec anyin
Khong ;
Ke haba hnen ang ethö ame omanená
huliwa anyin li hnyamen.
- 2 Ame fuc ke bong ka ke bong,
Ke ke lit ame omanená metâ ka ke lit.
- 3 E ba bi hwan me ba hofuc ;
Ke adre me ca löng bi hodra.
- 4 Ame he but anyidrin tö tutut ka hnyi
hmeledrany hia,
Me hodrin je hofuc ke ne o but ka hnyi
je can hmeledrany.
E ame hia but otilà hnyin uma menâ
hobi káu setünö,
- 5 Wale ae úcú me at a tep faipoipo ame
he but úheny hnyi hnyeuleny,
Ke e ame senyin helâ me at ae hwege
he ka wadringâ deny gethen.
- 6 Eame o but úheny hnyi can hmeledrany.
Ke haba deny gethen ame he ke ne o
but ka hnyi ke je can :
Ke ba ke únyi adre ikhâlá únyi ge
kahwainy.
- 7 E bekhöt ut hnanyibu anyi Iehova, ame
ohâtâ hanu :
Ke e hmâ hnö Iehova hna ohnathoâ,
ame ometâ at ae ba oúnykuminy.
- 8 E wisa ta je hna húna hnö Iehova, ame
osenyinâ hnyok :
E alai hnanyibu anyi Iehova, ame ome-
lamâ je ecmak.
- 9 E kalaüt ot kö Iehova, ame tethmâ
nyiele balua :

- E hnathu ta je hna owisa hnö Iehova,
me wisa hia thithö.
- 10 Ame beónua hon gol, eke, me gol ae so :
E hnebwia hon hani minya, me hani
adre ca hlec.
- 11 K' adre me khú hnyekon athnyabaem
ge ta je únyi e :
Ke gan hmâ troban ködra tavat adre
me löng hoton.
- 12 Ie at ae khana he ka wâ monu unyin ?
Ö u degecâ but anyik ta je monu ae
iyong.
- 13 Ö u thawâ ju athnyabaem m' oge me
ca bi gan ;
K' ame ca he únyi eling ka musu nya :
me me wisa hwakecik,
Ké ba hnyikonguk únyi ge hna hanyátâ
ae gan hmâ.
- 14 E so e me he je hofuc hnyi hnyimök me
je hna únykúme eú hnyi hnyekuk ka
úcú but hnyi hnyimâkam,
Iehova, kicik, at ame omeli nya.

SALAMO 20.

Hobi káu at chík khumöng. Salamo anyi Davita.

- E** na he ju Iehova ka löng köu hnyi
bonginy vec ;
Me ogöranyi u ge ien Khongu Jakob ;
- 2 Me kunâ úhadruo köu únyi hnyi dok
ae kap,
Me ci u únyi hnyi Ziona ;
- 3 Me únykúme ányâm ta je bwihlany hia.
Me kap ányâm je hut adre me le ;
[Sela.
- 4 Me ham köu weny hnyekom,
Me ohwâdá ányâm je úhnenamö hia.
- 5 Öhmun e he bi ka hobâ hnyi úhömeli
gam,
Me otilà anyihmun je bouðila hnyi ien
Khongutin :
E na he ju Iehova ka ohwâdá hia hnâm
je hna sumâtâ.
- 6 E khañö nya walang ang a Iehova ame
omelö at waleji e ame hú ;
E ame he ka löng káu únyi hnyi anyin
drany ae kap
Ge hnyamen a metân ae hwege he ka
omelö at.
- 7 Haba keihen adre me labageju ka ta je
kariota, ke haba keihen ka ta je
hors :
Ke ate me he bi ka ha iö Iehova
Khonguta.
- 8 Adre me nom ju me ta but :
Ke ate me köüö thö me tot wisa.

9 Iehova lö, omelö thö :

E na he ju Than ka löng köhmun hnyi
ûen öhmun e hongot hnyin.

SALAMO 21.

Hobi kâu at vhiik khumöng. Salamo anyi Davita.

IEHOVA lö, ame he than ka senyinâ
hwegiâm ;

Ke haba ânyâm ûhömeli, shaiba ge hnen
hna senyinâ !

2 U je hia but ham kâu weny hnyekon,
Me ca behânâ bi hna sumâtâ hnen li
esongodiny. [Sela.

3 Anyin a u je outhmoko e ge ta je hna-
hacin betenge :

U je obicâ e ge korona gol ae so.

4 E ame sumatö möt gam, me u je ham
kâu ;

Wale ta je bong ae beú ke ne o but
nyiele balua.

5 E gan anyin mec únyi hnyi ânyâm
ûhömeli :

U je ip hon, hmanenang me ogânâ.

6 Anyin a u me wia e me me ti hnahic
nyiele balua :

U je osenyinâ e ge senyin hnyi hnyi-
mâkâm.

7 Anyin ame labageju but than kö Iehova,
Ke únyi ge ibetengiö anyi Beönua e
ame ca he ka bwebwet.

8 Ame he hnyâmâm ka wâ hia ta je
iwahnaihmiöny möu :

Ame he hnyâmâm a metâm ka wâ tavat
adre me hûkötiiö u.

9 U me he ka öúcú ödra me úgimön hnyi
bonginy ânyâm hmönyin.

Ame he Iehova ka ut' ödra hnyi
anyin hmönyin,

Ke adre me he ka aú but ge meic.

10 U me he ka ohia wan gadra únyi eang
hmeledrany,

Me je mât ránidra unyin lakon tavat.

11 Anyin adre me únykúme únyi ae kong
köu :

Adre me sihnân, ke ca khan' ödra bi
ânyâ.

12 Anyin a u me he ka hwiö hotudra,
U me he ka penapena töiny ânyâm
cafana ka hnyi hnyimaködra.

13 Iehova lö, e so u ma beönua hnyi manâm
man :

Me öhmun e he ka khumöng me ogânâ
manâm man.

SALAMO 22.

*Hobi kâu at vhiik khumöng; adre me hai hnyi
ailainy hnyomakatu. Salamo anyi Davita.*

KHONGUK lö, Khonguk lö, ieu gam u
me hnö nya ?

Ke sâkâu he ka hadruo nya hnyi hok
hwatenge ?

2 Khonguk lö, oge me hongot köu hnyi
lany, k' u me ca löng könya ;

Ke oge me ca laba hnyibú hnyi hnyi-
nghet.

3 U at ae kap,
At ame laba hnyi hna úoganö hnö
Isaraela.

4 Haba lakamöhmun adre me labageju
köu :

Adre me labageju, me u je omeli ödra.

5 Adre me tenge köu, me adre me möt ut :
Adre me labageju köu, k' adre me ca
hmehma bi.

6 Iny biget thibi, ke ca at bi ;
Wale hna haikongoâ hnen tavat, ke hna
hmiân hnen tavat.

7 Haba tavat hia adre me ö nya, me adre
me hlumö nya :

Adre me obeúâ je esongodidra, me nyi-
nyikâ je bödra, me haingödra, ka habe,

8 Hnö u thö kö Iehova ; hamen bi he ka
omelö e :

Hamen he ka omelö e, anyin a e ame
senyin kâu.

9 Ke u thibi at ame hum nya únyi hnyi
hnyok :

Me olabageju nya únyi hnyi li basi bai.

10 Adre me hnö nya köu hwân ge hna
hnoköâ :

U thibi Khonguk hwân a inya hnyi
hnyeku bai.

11 U me ca he ka úsâkâüö mönya ; anyin
ae hakekeny vec ;

Anyin ae ba at he ka hadruö.

12 E se hia je bolok adre me igigili nya :

K' ame tot igigili nya ta je bolokiny
Basana hnyat ae hwege.

13 Adre me memang könya,
Helâ me liona ame beolou usukia k' ame
kuku.

14 Adre me hingâlâ degeci nya helâ me
köiö,

Ke ame ok ut je jeiök hia :

Haba öunykúmik me helâ me wasu ;

Ame okiâ but eú hnyi hnyekuk.

15 E atgec dö tang hwegiök helâ me wata-
giny kaja ;

SALAMO 23, 24.

- Ke ame kece bohök ka hnyi wahicok ;
Ke u je hia but hum nya ka hnyi
sesäiny kânäiny mok.
- 16 Anyin a hia but igigili nya hnen ta je
kuli ;
A hia but theling nya hnen je deö at
ae kong ;
Me dá li hnyamök me li hnyeúcak.
- 17 E khandö nya he ka áú je jeiök hia ;
Wale adre me ö nya me wâ hmö nya :
- 18 Adre me khenâ anyik je úkhaú unyi-
drin bi,
Me uglekóbâ anyik úkot.
- 19 Ke so bi Iehova lö, u me ca he ka
úsákáúö mönya :
Tang hwegiök lö, logotö he ka hadruo
nya.
- 20 Omelö ju hanuk únyi ge hele vat ;
Me hnök hna betenge gan únyi hnyi
hwegien kuli.
- 21 Omeli nya thö hnyi hnyimen liona ;
Eke, u je hia but löng könya únyi hnyi
li faoiny bolokiny hnyot.
- 22 Oge me he ka omanená iâm ka je liame-
keiny mönya :
Oge me he ka oganö u hnyi wanben
úkhacaköu.
- 23 Öbun tavat öbun e outö Iehova, oganá
thö e ;
Haisoá thö e öbun je mátráni Jakob ;
Ke outen ju e öbun je mátráni Isaraela
hia thithö.
- 24 Anyin a e ame ca hmiân me húkötö ge
vec anyin tavat ae vec ;
Ke khaca e ame ca ikbálâ hnyimakan
gan ;
Ke hnyi ün e ame tenge kâu, ame löng.
- 25 Únyi thibi gam hna oganö nya hnyi
úkhacaköu ae gan hmâ :
Oge me he ka subâ anyik je khöbi hnyi
hnyimakan tavat adre me outen e.
- 26 Haba at ae ilemuk, me, e ame he ka
han me sekon :
Ame he ka oganö Iehova hnen tavat
adre me elâm e :
E so ame he je hnyekubun ka möt
nyiele balua.
- 27 Ame he je can hmeledrany hia ka
únykúme me hwiö kö Iehova :
Ke ame he ta je lap anyin ta je hnyei
ka khudrung hnyi hnyimakan.
- 28 Anyin a unyi Iehova dökhu :
Ke e at ame musö ta je hnyei :
- 29 Ame he hia tavat ae pipikhenya eang
hmeledrany ka han me khudrung :

- K' ame he ka nom kâu tavat hia adre
me he ka hnyi kânâ,
Wale at ae ca khandö he ka omelö e bi.
- 30 Ame he ke mátrân ka bi athnyabainy ;
K' adre me he ka ha dö a biliny únyi
ge Than.
- 31 Adre me he ka o but me omanená
hwakecin ae wisa
Ka tavat adre me he ka hnokoá, a g'
ame ányá e.

SALAMO 23.

Salamo anyi Davita.

- H**ABA Iehova at ame tuö helâ me at
tuö mamoe, ame ca he ka ba ta únyi
gak.
- 2 E ame omokuli nya hnyi hna önying ae
hat :
E ame su nya thö ka hnyi je wagewe
ame omise.
- 3 E ame ohmeto hanuk :
E ame su nya hnyi je gethen deny
hwakecin ae wisa únyi ge ien.
- 4 Eke, oge ne vheno hnyigöulen bucen a
hmenon mok,
Me oge me ca he ka outen únyi ae
kong ; anyin a tha u mönya :
K' ame okahwö nya ányâm utömhu me
cem uci.
- 5 U je penapena laulau hobi könya hnyi
hnyimakan je iwahnaihmiöny mönya :
U je hia but hú bök ge wakaco ; ame
babi hingölö thö anyik kaia.
- 6 Ame he thibi so me ibetengö ka hnu
hotuk hnyi bonguk ta je bong hia :
Ke oge me he bala ka laba hnyi uma
umö Iehova nyiele balua.

SALAMO 24.

Salamo anyi Davita.

- A**NYI Iehova hmeledrany me ta je
únyi ae unöngötiny ;
Me ta ogö hnyei, me tavat adre me laba
hnyin.
- 2 Anyin a e ame bi taben e hon köiö,
Me otílâ hmâ e hon je di.
- 3 Ie at ame he ka öliá bucen anyi Iehova ?
Ke ie at ame he ka tot hnyi anyin dok
ae kap ?
- 4 At thibi ae kalaöt li hnyamen, me
hnyekon ae ba hnyikongon ;
At ame ca ogöranyá bi hnyekon ka hnyi
únyi ae únyi baú,
Me ca khemanyn thoi.

SALAMO 25, 26.

- 5 Eame he ka kap hnahic únyi ga Iehova,
Me hwakecin ae wisa únyi ge Khong at
ame omelö e.
- 6 Wale thibi döiny tavat adre me elâm
hoton e,
Tavat adre me elöm u, Khongu Jakob.
[Sela.]
- 7 Je hlinginy homagöule lö, ogöranyâ thö
je böbun ;
Ke görany dö öbun je hlinginy hwan-
uma ae balua bi :
Me me he ka didrö Thaniny hmanenang.
- 8 Ie Thaniny hmanenang ?
Iehova at ae hwege me man,
Iehova at ae hwege hnyi vat.
- 9 Je hlinginy homagöule lö, ogöranyâ thö
je böbun ;
Eke, ogöranyâ thö, öbun je hlinginy
hwanuma ae balua bi :
Me me he ka didrö Thaniny hmanenang.
- 10 Ie Thaniny hmanenang e ?
Iehova tñhan sabaoth,
E thibi Thaniny hmanenang.

SALAMO 25.

Salamo anyi Davita.

- I**EHOVA lö, inya oge me ogöranyâ hanuk
köu.
- 2 Khonguk lö, oge me labageju köu,
Iny na ca he ju ka hmehma ;
U na ca hna ju je iwahnaihmiöny mönya
he ka ngö nya.
- 3 Eke, ame ca he ka hmehma at ame
halubahingâm :
Ke ame he ka hmehma tavat adre me
iyawö ke ba can.
- 4 Iehova lö, omanená thö könnya dem je
gethen ;
Nö nya thö ge dem je gethen.
- 5 Su nya thö hnyi hnathu gam, ke nö nya
thö ;
Anyin a u thibi Khong at ame omeli
nya ;
Inya oge me halubahing u hnyi je bong
hia.
- 6 Iehova lö, únykúme ju ibetengiö me
tang betenge gam,
Anyin a kueny dut e.
- 7 Ca he ka únykúme ta je hulöiny
anyik hidröu, me ta je hanyâúá
gak :
Únykúmi nya ju hoton ányâm ibetengiö,
Únyi ge hwakecâm ae so, Iehova.
- 8 Haba Iehova me so me wisa :

- Anyin a wale e ame he ka únö gethen
ka tavat ae monu.
- 9 E ame he ka su tavat ae ilemuk hnyi
hwakecin ae wisa.
Me ná deny gethen ka tavat ae hnyi-
káná.
- 10 Haba je gethen hia de Iehova, me,
ibetengiö me hnathu
Ka tavat adre me tuö hna úhihinyköu
mê, me hnen je hna ohnathóá.
- 11 Iehova lö, únyi hnyi iâm bi,
Hna but anyik hulö, anyin ae gan
hmá e.
- 12 Ie at ame outö Iehova ?
Me e ame he ka ná e ge gethen e ame
he ka úca.
- 13 Ame ne ka laba so hanon ;
Ke ame he je mátrániny ka hu ködra
hnyei.
- 14 Haba úhnenamö duöng únyi ga Iehova
me wale unyin tavat adre me outen e ;
Ke e ame he ka omanená ködra anyin
úhihinyköu.
- 15 E bala li emakök thibi kö Iehova ;
Anyin a e ame he ka uny li cak únyi
hnyi ert.
- 16 Hwiö thö könnya, me betenge ju gak ;
Anyin a hake inya, ke oge me hom vec.
- 17 Adre osehia ta je vecin hnyekuk :
U na hum nya únyi hnyi anyik ta je
vec.
- 18 Únykúme ju anyik hmak me anyik
vec ;
Me thang degecá but anyik ta je hulö
hia.
- 19 Únykúme ju ge je iwahnaihmiöny
mönya, anyin a ödra se hia ;
Ke e gan hmá hnödrin hna húkötio
nya.
- 20 U na tuö ju hanuk, me omeli nya thö :
Iny na ca he ju ka hmehma, anyin a
inya oge me labageju köu.
- 21 E so he ka otílö nya hmá hnen hwa-
kecin ae ba hnyikongon me wisa,
Anyin a inya oge me laba haluba-
hingâm.
- 22 Khong lö, omeli Isaraela thö
Únyi hnyi anyin ta je vec hia thithö.

SALAMO 26.

Salamo anyi Davita.

- I**EHOVA lö, owisö nya thö, anyin a oge
hia but vheno anyik wisa :
Ke oge hia but labageju kö Iehova, me
ca bwebwet.

- 2 Iehova lö, elöm nya thö, me ohnathu nya ;
Elâm dö únykúmenök me hnyekuk.
- 3 Anyin ame laba bala cicö li emakök ányâm ibetengiö ;
Ke oge hia but vheno ányâm hnathu.
- 4 Oge me ca tha laba me tavat ae monu ;
Ke oge me ca he ka thá he me tavat iyawö.
- 5 Hükötiánök úkhacaköu anyin tavat adre me ányá hulö,
Ke oge me ca he ka tha laba me tavat ae kong.
- 6 Oge me he ka hinyem hnyi hwakecin ae ba hnyikongon ;
Ke heláe oge me he ka igigilö ányâm taben hut, Iehova :
- 7 M' oge me he ka olungá hwan ole,
Me ha gaga ányâm ta je huliwa hia hnân láiiá.
- 8 Iehova lö, oge me hnyoká hnyaban umâm uma,
Me dok ame laba hnyin ányâm hmanenang.
- 9 Ca he ka tha hom hanuk me tavat ae kong,
Me melik unyin tavat úhlingö :
- 10 Ae hu úokonguny eú hnyin je hnyamödra,
Ke unöngötö hnyamödra a metá ge hok hwaban ae hwali.
- 11 Ke oge me he bi nya ka vheno hwakecin ae wisa :
Omeli nya ju, me betenge ju gak.
- 12 Ame tot li cak hnyi dok ae wisa hon :
K' oge me he ka haisoi Iehova hnyi jo úkhacaköu.

SALAMO 27.

Salamo anyi Davita.

- I**EHOVA melamik me at ame omeli nya ;
oge ma outö ia ?
Iehova tang hwegien anyik möt ; ia oge ma outen ?
- 2 Hnyi úen ame o but könýa tavat ae kong he ka an vik,
Waleji ae hmönyidra könýa ke iwahnaihmiöny mönya, me adre me haú but me ta.
 - 3 Eja ke ne a ne hunuma cici nya utbavat.
Me ame ca he bi huyekuk ka ot :
K' ame ne kú thö vat könýa,
Me oge me he bala ka labageju.
 - 4 Khaca thibi únyi oge hia but sumátá

- ga Iehova, k' oge me he bala ka elâm e ;
A oge me he bala ka laba hnyin uma umö Iehova hnyi je bongon hia anyik möt,
He ka wá hmanenangi Iehova, me hnö hnyi umen uma ae kap,
- 5 Anyin a haba hnyi úen vec e ame he ka ikhölö nya hnyi umen uma mená :
E ame he ka tubi nya hnyi dok ae iyong hnyi umen uma mano ;
E ame he ka ip nya hon kic.
- 6 Ke walang ame he ka görany bök hon ta je iwahnaihmiöny mönya hia igigili nya ;
Ke oge me he ka hudo je hudiny senyin hnyi umen uma mano ;
Oge me he ka khumöng, eke, oge me he ka khumöng olungi Iehova.
- 7 Iehova lö, löng ju, iny ka hongot ge ifucik :
Betenge ju minya gak, me thu thö könýa.
- 8 Hnyi úen u je ha, ka habe, Elâm d' öbun hnyimakök ; me ame ha hnyekuk, ka habe,
Iehova lö, oge me he ka elâm hnyimákâm.
- 9 U na ca he ju ka ikhálá hnyimákâm gak ;
Ca he ka obá athnyabaem hnyi hmönyin :
U thibi at ame labö hadruo nya ;
Khong lö, at ame omeli nya, ca he ka hota degeci nya, me hnö nya but.
- 10 Anyin a cica me bai ödrü me hna degeci nya,
Ke ame he Iehova ka köp nya.
- 11 Iehova lö, nö nya thö ge dem gethen ;
Ke su nya eú hnyi gethen ae wisa hon,
Can je iwahnaihmiöny mönya.
- 12 Ca hnö nya bi ka hnyi weny je iwahnaihmiöny mönya :
Anyin adre me tot könýa tavat adre me bifuci nya, me tavat adre me memená úokonguny.
- 13 Oge me monumonu, oge ne ca gejon he ka wá so únyi ga Iehova
Hnyi hnyeí iny tavat ae möt.
- 14 Halubahing Iehova ju :
Hwege ju, ke so ame he hnyekom he ka hwege ;
Eke, e so u ma halubahing Iehova.

SALAMO 28.

Salamo anyi Davita.

IEHOVA lö, oge me he ka hongot köu ;
Kicik lö, ca he ka wejiji gak :

Wâ u nye laba hnyibû gak,
M' inye he ka helâ me tavat adre me
utut ka hnyi thop.

2 Lông ju hwan anyik sumat, iny ka
hawo u,

Iny ka hai thö li hnyamök ka hnyi dok
ae kap u me fuc hnyin.

3 Ca tha lili nya me tavat ae kong,
Me tavat adre me ânyâ hulö ;
Adre me ha je hofuc iny úsoköu ka je
liamewaeny mödra,
Ke haba úokonguny eú hnyi hnyidrin.

4 Ham but ködra e úcú me hwakecidra,
me anyidra je huliwa ae kong :

Ham but ködra hoton huliwa anyin li
hnyamödra ;

Ké bi hwaban hwakecidra.

5 Adre me ca únykúme ta je huliwa anyi
Iehova,

Me hna ânyâ hnen li hnyamen,
Anyin a wale, e ame he ka hagut' ödra
but, k' ame ca he ka otil' ödra hmetu.

6 E so he ka haisoj Iehova,
Anyin a e ame hia but long hwan
anyik je sumat.

7 Iehova tang hwegiök me becik ;
Haba hnyekuk ame labageju kâu, k'
ame hadruo nya :

Anyin a wale ame ti senyin hnyekuk ;
Ke oge me he ka ogânâ e ge anyik
khumöng.

8 Haba Iehova tang hwegien lakeiny,
Ke e hhabâ hnân úhömeli hobi kâu at
e ame hú.

9 Omelö thö lakem, ke ohnahicâ ju jek-
hom :

Ha ö 'dra ju minya, ke kap til' ödra ju
ke ne o but nyiele balua.

SALAMO 29.

Salamo anyi Davita.

ÖBUN lakon tavat hwege lö, ham dö kö
Iehova,

Ham dö kö Iehova hmanenang me
hwege.

2 Ham dö kö Iehova hmanenang ae úcú
me ien ;

Khudrung ju kö Iehova hnyi mec ae
kap.

3 E hon je köiö hofuc ho Iehova :
Khongon hmanenang ame bi hwan than,
Wale Iehova hon je köiö ae se hia.

4 E hwege ifuci Iehova ;
Ame unöngötö ifuci Iehova ge bongon
than.

5 Ame hmetru je arasi hnen ifuci Iehova ;
Eke, Iehova ame thu je arasiny Leba-
nona.

6 E ame oututi ödra helâ me nokon kau ;
Lebanona me Siriona helâ me nak bolo-
kiny hnyot.

7 Ame ovheivheia je bählan meic hnen
ifuci Iehova.

8 Ame bwebwet hnyebuba hnen ifuci
Iehova ;
Iehova ame obwebwelâ hnyebuba hnyi
Kadesi.

9 Ame kölu habû je lakon aila ge ifuci
Iehova,

Me okolo but ta je lan hnyot :
Ke haba hnyin umen uma kap me ame
ha ta je únyi hia, ka habe, Hmane-
nang.

10 Iehova ame laba me than hnyi úen
Uou ;

Eke, Iehova ame laba a than nyiele
balua.

11 Ame he Iehova ka ham hwege ka
lakeiny ;

Ame he Iehova ka ohnahicâ lakeiny ge
úsoköu.

SALAMO 30.

Salamo anyi Davita. Khumöng hnyi dilic uma.

IEHOVA lö, oge me he ka oganö u, anyin
a a je hia but ogöranyi nya,

Me ca hna je iwahnaihmiöny mönya he
ka manhic könya.

2 Iehova Khonguk lö,
Oge me hongot köu, me u je hia but
ometu nya.

3 Iehova lö, u je hia but hai göranyai
hanuk únyi hnyi hedis :

U je labö omeli nya m' inye ca hnyi
utut ka hnyi thop.

4 Öbun anyin wakap lö, e so öbun e olungâ
kö Iehova,

Ke oleâ ka ien ae kap.

5 Anyin ae ti okhulit anyin hmönyin ;
E hu möt bi hnyi anyin ibetengio baú

- Adre me ne tenge hnyi sahad,
Me ame o thö senyin hnyi huyomakatu.
- 6 Haba inya, hnyi ùen oge me labö sot,
me oge me ha, ka habe,
Oge me ca he bala bi ka bwebwet.
- 7 Iehova lö, únyi ge ányâm ibetengiö baú
u je otethmä anyik bucen ;
U je ikhâlâ hnyimákâm ; me oge me
hlohlo.
- 8 Iehova lö, oge me hongot köu ;
Ke oge me khóu kö Iehova.
- 9 Ieú troban drök iny ka utut ka hnyi
thop ?
Hawa, ame he sesáiny kânâ ka oganö
u ? k' ame he ka haimemenâ ányâm
hnathu ?
- 10 Iehova lö, löng ju, me betenge ju gak :
Iehova lö, u na he ju ka hadruo nya.
- 11 U je hia but wia anyik hlöuhlöu ka
hnyi biâ ;
U je hia but uny anyik úkhaú ae gan
nân, me oweikö nya bi ge senyin :
- 12 Me me he ka khumöng oganö u hnen
anyik mec, k' ame ca he ka laba
hnyibú.
Iehova lö Khonguk, oge me he ka oganö
u nyiele balua.

SALAMO 31.

Hobi káu at vñik khumöng. Salamo anyi Davita.

- I** EHOVA lö, inya oge me labageju köu ;
iny na ca he ju ka huehma :
Omeli nya thö ge hwakecâm ae wisa.
- 2 Ta ju li hnyikönyâm könya ; ie omeli
nya thö :
U na he ju ka kicik ae hwege, me
hnabâ hnân omeli nya.
- 3 Anyin a u thibi kicik, me hnök hnabâ ;
Anyin a wale lili nya thö me su nya
únyi ge iâm.
- 4 Uny nya but únyi hnyi ert adre me
thong duöngâ gak ;
Anyin a u thibi hnök hnabâ.
- 5 Inya oge me hna hanuk ka hnyi hnya-
mâm :
Iehova lö, Khongon hnathu, u je hia
but bi hwaban anyik möt.
- 6 Húkotiánök tavat adre me hnyok ka ta
je únyi baú me thoi :
Ke oge me labageju kö Iehova.
- 7 Oge me he ka hobâ me senyin ge ányâm
tang betenge :
Anyin a u je hia but wâ anyik vec ;
U je hia but wâ únykúme hanuk hnyi
ta je úveci :

- 8 Ke u je ca hia but theling nya hnyin
hnyamen iwahnaihmiöny ;
U je hia but ip li cak hnyi dok ae gan.
- 9 Iehova lö, betenge ju gak, anyin oge
me vec :
A jok ut li emakök ge hlöuhlöu, eke,
me hanuk me unyik minya.
- 10 Anyin ame kec dö bonguk je bong hnyi
tenge, me je hunaik hnyi máng :
E mita but tang hwegiök can anyik
hulö, ke ame aú but je jeiök.
- 11 Can je iwahnaihmiöny mönya, adre me
haikongu nya ;
Eke, iny ti kong ut hnyi hnyimakan je
liamewaeny mönya, ke at ootâ laha-
nök :
Adre me kec gak tavat adre me ö nya
eú hnyi gethen.
- 12 Adre me hnying nya but eú hnyi je
hnyekudra helâ me komok :
Iny helâ me kaia ae hmouca but.
- 13 Anyin oge hia but löng hna bifuco
hnen tavat ae se,
K' adre me öbubuny hnyi je ke keihen
hia :
Ke adre me tiga tha fakatau nya,
Me adre me sihnök he ka ohia anyik
möt.
- 14 Ke so bi, Iehova lö, oge me labageju köu,
Haingök, ka habe, U thibi Khonguk.
- 15 Haba bonguk ta je bong me eú hnyi
hnyamâm :
Ö u omeli nya únyi hnyi hnyamen ta je
iwahnaihmiöny mönya, me tavat adre
me sedö nya.
- 16 Oumumelamá thö hnyimákâm ka athny-
abaem ;
Omeli nya thö hnen tang betenge gam.
- 17 Iehova lö, iny na ca he ju ka hmehma ;
anyin a oge hia but hao u :
E so e he tavat ae monu ka hmehma,
me laba hnyibú hnyi hedis.
- 18 E so he ka hum je esongot ae thoi ;
Wale adre me bifuco at ae wisa,
Hnyi hop me bi gan.
- 19 Shaiba ge úganiny ányâm so, wale u je
hitangen hobi káu tavat adre me
outö u,
Waleji u me ányâ hobi ködra adre me
labageju köu, hnyi hnyimakan tavat !
- 20 U me he ka olubaduongi ödra hnyi dok
ae nuong unyâm únyi ge fakatau
anyin tavat.
U me he ka ikhol' ödra hnyi uma menâ
únyi hnyi iwatretra anyin ta je
bohmen.

- 21 Haisoi Iehova thö :
Anyin a e ame hia but omanenâ kõnya
anyin ibetengiö hnân lâiâ hnyi taun
ae hwege.
- 22 Ke haba inya hnyi anyik uthmâhmâ,
oge me ha, ka habe, Adre subâ degeci
nya ûnyi hnyi hnyimâkâm :
Ke so bi u je löng hwan anyik je sumat
waleji oge me hao u.
- 23 Hnyok ju kõ Iehova, öbun laten ae kap
hia :
Iehova ame tuö tavat ae hnathu.
Me bi hwaban ganâ ka at ame ânyâ
hwakecin bi gan.
- 24 Hwege thö, ke so ame he je hnyekubun
ka hwege,
Öbun tavat hia öbun e halubahing
Iehova.

SALAMO 32.

Salamo anyi Davita. Hnân ünö.

- H**NAHIC hnen at adre hia but ohia
hnen hna hanyâûâ, me tube anyin
hulö.
- 2 Hnahic hnen at wale Iehova ame ca ha
anyin hulö,
Ke ba iyawö hnyi banon.
- 3 Hnyi ûnen oge me laba hnyibû, me ame
bobot je jeiök
Can anyik tenge ae gan hnyi je bong.
- 4 Anyin ae hmak hnyamâm huk hnyi
lany me lit :
Adre wia khubetiny unyik me me helâ
me kahwa hnyi hnyeyun. [Sela.]
- 5 Oge me ogâ anyik monu köu, ke oge me
ca ikhâlâ anyik hulö :
Haingök, ka habe, Oge me he ka oma-
nenâ kõ Iehova hnök je hna hanyâûâ ;
Me u je hna degecâ auyik hulö ae gan. [Sela.]
- 6 Can e, e so ame he tavat ae so ka hic
köu hnyi ûnen ae khan' ödra he ka
ö u :
E hnathu e ka o but wadutö ae gan, me
ame ca he ka hakekenyâ c.
- 7 U thibi hnök hna lubaduöng ; u me he
ka tuö nya ge vec ;
U me he ka igigili nya ge je khumön-
giny ûhömeli. [Sela.]
- 8 Oge me he ka nö u, me ku köu gethen
u me he ka vhenö :
Oge me he ka ûhnenamö möu me
ecmakö u.
- 9 Ca he öbun ka helâ me hors, me miul,
ae ba hnyekon :

- Ke hamen fao me töiny he ka hom
thaw' ödra,
Wâ ödra nye ca ûhakekenyi u.
- 10 E se hia ta je vec unyin at ae kong :
Ke haba at ame labageju kõ Iehova, me
ame he tang betenge ka igigilöâ.
- 11 Hobâ thö kõ Iehova, me senyin dö,
öbun tavat ae wisa :
Ke hongot senyin dö, öbun tavat hnyok
wisa.

SALAMO 33.

- S**ENYIN dö kõ Iehova, öbun tavat ae
wisa :
E úcú ka tavat ae wisa he ka oganâ.
- 2 Ole thö kõ Iehova ge kitara :
Khumöng olungâ e ge nabeli a hu töiny
a ten.
- 3 Khumöngö kâu khumöng ae teb ûnyi ;
Kokot metâ thö me hwan ae gan.
- 4 Anyin ae wisa hofuc ho Iehova ;
K' ame hnathu anyin ta je huliwa hia.
- 5 E ame hnyokâ hwakecin ae wisa me
hna owisa :
E unöngötö hmeledrany ge ibetengiö
anyin Iehova.
- 6 Adre me op drany ge hofuc ho Iehova ;
Ke ta je ûnyi hia hnyin ge homenâiny
hnyimen.
- 7 E ame ûkhacakouâ köien köiö helâ me
dok ae hut :
E ame hip je waköiö hnyi je uma omjeú.
- 8 E so ame he hmeledrany hia ka outö
Iehova :
Me aten hmeledrany hia ka tet ot ju
gan.
- 9 Anyin a e ame fuc, me ame aat :
E ame hûna, me ame tethmâ.
- 10 Iehova ame öunyibâûâ je ûhnenamö
anyin ta je hnyei :
Eame öba troban je ûnykümenen tavat.
- 11 Ame he ka tethmâ nyiele balua we
Iehova,
Ke je ûnykümenen hnyekon ka ta je dö
hia.
- 12 Hnahic hnen hnyei a Iehova Khongon ;
A tavat e ame úca hnân hing jekhon.
- 13 Iehova ame bwele ûnyi hnyi drany ;
E ame wâ lakon tavat hia thithö.
- 14 Ūnyi hnyi hnyaban e ame bwele hnyi-
kânâi
Ka wâ aten hmeledrany hia thithö ;
- 15 Wale at ame op ta je hnyekudra hia,
Ame ûnyküme anyidra ta je huliwa
hia.

SALAMO 34, 35.

- 16 E ba than ame möt ge utbavat ae gan hmâ :
Ame ca möt at ae hwege ge tang hwege ae gan.
- 17 E únyi baú hors hnân omelö :
Ke e ame ca he ka omelö at ge tang hwegien ae gan.
- 18 Wâ bi, e bi emakö Iehova hon tavat adre me ouden e,
Wale tavat adre me halubahingen anyin tang betenge ;
- 19 He ka hügúnâ je hanudra únyi hnyi mok,
Me omeli ödra hnyi úen hmiâ.
- 20 A hia but je hanuta lubahing Iehova :
E thibi at hadru' öta me becita.
- 21 Ame he je hnyekuta ka senyin kâu,
Anyin a ötin e labageju ka ien ae kap.
- 22 Iehova lö, e so e e huhmun ányâm tang betenge,
Hoton hnöhmun hna hia but labageju kôu.

SALAMO 34.

Salamo anyi Davita ; hnyi áen e ame wia bi hwa-kecin hnyi hnyimakö Abimelek, ke e ume ödâ e me me he but.

- O**GE me he bala ka haisoi Iehova hnyi je úen hia ;
Ame he bala hnyimök ka oganá e.
- 2 Ame he hanuk ka hobeluö Iehova :
Ame he tavat ae ilemuk ka löng me senyin.
- 3 Öbun na tha he ju mönya he ka oganá Iehova,
Ke so ötin e he ka tha ogöranyâ ien.
- 4 Oge me elöm Iehova, me e ame ling nya,
Me omeli nya únyi hnyi anyik je ot hia.
- 5 Adre me wâ e, me adre me melam but :
Ke ame ca he bi je hnyimaködra ka hmehma.
- 6 Ame hongot dö at eang ame hom vec,
k' ame löng ut Iehova,
Me omelö e únyi hnyi anyin ta je vec hia thithö.
- 7 Ame hunuma angela anyi Iehova igigillö tavat adre me ouden e,
Me omeli ödra.
- 8 Öbun na drem cubecâ ju me wâ a at ibetengiö Iehova :
Hnahic hnen at ame labageju kâu.
- 9 Öbun na he ju ka ot kö Iehova, öbun laten ae kap :
Anyin ae ba ke únyi ae ba gadra adre me ouden.

- 10 E ba an, ke mekfhnânem bi je nak liona :
Ke haba tavat adre me elöm Iehova, me ba ke únyi ae so ame he ka hia gadra.
- 11 Ai öbun je wanakat, ling nya ju :
Me oge me he ka n' öbun ge bongon he ka outö Iehova.
- 12 Ie at ae bemöt,
Ke weny ta je bong, me me wâ tho so !
- 13 Kât je bohâm me me ca hulö bi,
Ke li esongodâm wâ e nye fuc thoi.
- 14 Hota ju hulö, ke mádrâ so ;
Elâm hnahic, ke hnu hoton.
- 15 E bala li emakö Iehova hon tavat ae wisa,
Ke haba li hnyikönyen ame löng hodrin hwahongot.
- 16 K' ame khöt bi hnyimakö Iehova ka tavat adre me ányâ hulö,
He ka subâ degecâ but nyingen hna únykúme ködra únyi ge aten bmele-drany.
- 17 Ame hongot tavat ae wisa ke Iehova ame löng,
Me omeli ödra únyi hnyi anyidra ta je vec hia thithö.
- 18 E hakekeny Iehova ka tavat ae hmak je hnyekudra,
K' ame omelö tavat ame vec hanudra.
- 19 E se hia ta je vec anyin at ae wisa :
Ke Iehova ame omelö e únyi hnyi ta je únyi hia.
- 20 E ame tuö ta je jeien hia thithö :
E ba me khaca ame he ka hmetru.
- 21 Ame he monu ka hlingâ at ae monu :
Ke haba tavat adre me húkotiâ at ae wisa me adre me he ka hang' ödra bi.
- 22 Iehova ame omelö hanon lathnyabainy ;
Ke adre me ca ho ka hangâ ke at anyin tavat adre me labageju kâu.

SALAMO 35.

Salamo anyi Davita.

- I**EHOVA lö, u ma he ka ivinö me tavat adre me ivinö mönya :
Vat dö me tavat adre me vat mönya.
- 2 Hom dö bec, me bec ae gan,
Ke todrö ka hadruo nya.
- 3 Oc dö minya ö, me thelöng ju gethen deny tavat adre hnu hotuk :
Ha thö ka hanuk, ka habe, Inya ang at ame omeli u.
- 4 E so he ka hmehma me laba úhnyükong tavat adre me elâm hanuk :

SALAMO 36.

- E so he ka ohmetuhmeto me omonu-
monu ödra adre me beokongu nya.
- 5 E so adre me he ka helâ me unen hwit
hnyi hnyimakan ang,
Ke angela anyi Iehova ame alin ödra.
- 6 E so e lit me haübaü dedra je gethen,
Ke angela anyi Iehova ame hnu ödra.
- 7 Anyin adre hia but ikhâlâ anyidra ta je
hnewe gak ke ba can,
Ke adre hia but hiny thop hobi kâu
hanuk, ke ba can.
- 8 E so ame ie utut kâu hnaühangö ;
Ke so e he ka hnok hnen hnewe e ame
ikhâlâ :
- E so e ame ta ka hnyi hnaühangö eling.
- 9 K' ame he hanuk ka senyin kö Iehova :
E ame he ka senyin hnyi anyin ühö-
meli.
- 10 Ame he je jeiök hia ka ha, ka habe,
Iehova lö, ie at ae ücü möu,
At ame omelö at ae vec ünyi ge at ae
hwege hon,
Eke, me at ae vec me theduoc ünyi ge
at ame söh e.
- 11 Adre me todrö je at ohnathoâ ae ca
wisa ;
Adre me hnei nya ge je ünyi ae ca
khanö nya.
- 12 Adre me bi hwaban anyik so ge kong,
Me me hlöuhlöu banuk.
- 13 Ke haba inya, me oge me khavâ ükhaü
ae gan nân hnyi üen mok a ödra :
K' oge me hom ühnyükongo hanuk me
ca han ;
Ke ame hmetu hijik hic ka hnyi ülaik.
- 14 Ke haba hwakecik kâu, me helâ me
liamewaeny k' ame ne liamekeiny
mê :
K' oge me nom me tenge helâ me at
ame tenge thungau ge hinyen.
- 15 Ke hnyi üen vec a inya, me adre me
senyin me ükhacaköu :
Ame ükhacaköu hoümonu könya, ke ca
khanö nya ;
Adre me kiö nya, me ca menâ bi.
- 16 Helâ me man tavat ae monu, a hnyat
ühö hnyi je bijeü,
Adre me höc nyu könya.
- 17 Than lö, u me he ka wâ ke ne o but
kehö ?
Omelö thö hanuk ünyi hnyi anyidra je
ükonguny,
A hnök hna betenge gan ünyi hnyi
wanben je liona.
- 18 Oge me he ka ole köu hnyi ükhacaköu
ae gan :

- K' oge me he ka oganö u hnyi wanben
tavat ae se hia.
- 19 U na ca he ju ka hna ta je iwahnai-
hmiöny mönya ka senyin huk hnyi
hwali :
Ke ca hn' ödra a tavat adre me hâkötio
nya ke ba can, he ka hinoutmhak bi.
- 20 Anyin adre me ca üsabö üsoköu :
K' adre me penapena je hofuc iyawö
ka tavat adre me laba so hnyi
hnyei.
- 21 Eke, adre me memang gan hmâ könya ;
Haingödra, ka habe, Awe ! Awe ! öhmun
e wâ but.
- 22 Iehova lö, u je hia but wâ e ; ö u ca
laba hnyibü :
Than lö, ca laba üsâkâüö mönya.
- 23 Bwebwet dö, ke todrö he ka owisö nya,
Hnyi hnök hna ivinö, Khonguk me Tu-
hök.
- 24 Iehova, Khonguk lö, owisö nya thö
hoton hwekecam ae wisa ;
Me ca hn' ödra bi he ka senyin huk.
- 25 Ca hn' ödra bi he ka ha eü hnyi je hnye-
kudra, ka habe, Awe, a so but :
Ca hn' ödra he ka ha, ka habe, Ötin e
hia but utâ e.
- 26 E so e tha hmehma me lolo tavat adre
me senyina hna okongu nya :
E so e he hmehma me haikongoâ ka
khavâ tavat adre me bi gan könya.
- 27 E so e hongot senyin me hobâ tavat
adre me senyin ge hwakecik ae wisa :
E ke, e so adre me ha bala bi, ka habe,
Oganö Iehova thö,
Wale at ame senyina hnahic anyin
athnyabainy.
- 28 Ke ame he bohök ka ha hwakecam ae
wisa,
Me hna oganö u hnyi je bong.

SALAMO 36.

*Hobi kâu at thik khumöng. Salamo anyi Davita
athnyabai Iehova.*

- A** ME ha eü hnyi hnyekuk ge hna ha-
nyâüâ hnen at ae kong, ka habe,
E ca hu hnyi li emakan, hna outen
Khong.
- 2 Anyin a e ame haisoâ e bi hnyi ka
hnyimakan bi,
A adre me ca he ka wâ anyin hulö, me
ikikiâ e.
- 3 E kong me iyawö ta je hofuc ünyi hnyi
hnyimen :
E ame ca metâ hmetu me ânyâ so.

- 4 E ame únykúme úokonguny hon hnen
hna mókut;
E ame labö vheno gethen ae ca so;
E ame ca ikiki ge monu.
- 5 Iehova lö, ethö hnyi drany ányâm ibe-
tengiö;
Ke ne o but hnyi je úlá ányâm hnathu.
- 6 Haba ányâm wisa, me helâ me je bucen
anyin Khong;
E dit hmönyin hnâm je hna owisa:
Iehova lö, u thibi at ame tuö möt anyin
at me meno.
- 7 Khonguk lö, shaiba ge iúnyihnathuiny
ányâm betenge!
K' ame labageju lakon tavat hnyi hme-
non li labenyâm.
- 8 Adre me he ka sekudra gan hmâ ge ta
je únyi ae pipikhenya hnyi umâm
uma;
Ke u me he ka habelidra ge wageweiny
ányâm senyin.
- 9 Anyin a e bi unyâm pupuainy möt:
Öhmun e he bi ka wâ melam hnen
ányâm melam.
- 10 U na he bala ju ka betenge ge tavat ae
khan' ödra u;
Ka ányâ hwakecâm ae wisa ka tavat
adre me hnyok wisa.
- 11 Ca he bi ka hna hnyeúcan at ae bi gan
he ka tot könya,
Ke ca hna je hnyamen tavat ae kong
he ka obö nya.
- 12 Waleling ame ta but tavat adre me
ányâ únyi ae kong:
Adre me hagut 'ödra, ke ca khan' ödra
hmetu bi he ka tot.
- 6 Me e ame he ka oâ hwakecâm ae wisa
hela me melam,
Ke je hna owisa u helâ me jebigö.
- 7 Laba wia ju unyi Iehova, ke halubahi-
ngen ju:
Ca he ka hmak ge at ae sot hnyi deny
gethen,
Wale at ame bibihwakecin he ka oko-
ngoâ.
- 8 Soju hmönyin, ke oumo thö wathe-
thöt:
U ma ca he ka hmak, ke wale gethen
deny hulö.
- 9 Anyin adre me he ka subâ degecâ tavat
adre me ányâ hulö:
K' ame he ka hu hnyei ka tavat adre
me halubahing Iehova.
- 10 Anyin a meokhaca, me ame he ka hia
but at ae kong:
Eke, u me he ka ti wâ wia hnen, ka
hia but e.
- 11 K' adre me he tavat ae ilemuk ka hu
hnyei;
Ke adre me he ka senyiná úsoköu ae
gan hmâ.
- 12 Haba at ae kong ame sihnân at ae wisa,
Me höc nyu kâu.
- 13 Ame he Than ka hlumâ e:
Anyin a e ame wâ ae hakekeny jut
bongon bong.
- 14 Haba tavat ae kong adre hia but oc
hele vat, me oto cafana;
M' adre me he ka hagutâ at ae vec me
at ae theduoc,
Me hlingâ tavat adre me he wisa hnyi
gethen.
- 15 Ame he anyidra je hele vat ka dit ka
hnyi je hnyekudra bi,
Ke adre me he ka thu anyidra je cafana.
- 16 E nua úhnyúkong hna hu hnen at ae
wisa hwakecin
Hon tang omjehen tavat ae kong.
- 17 Anyin adre me he ka thu je benyin
tavat ae kong:
Ke haba Iehova ame cö tavat ae wisa.
- 18 E khanö Iehova bi ta je bong bongon
tavat ae wisa:
Ke ka e bala bi jekhöüdra nyiele balua.
- 19 Adre me ca he bi ka hmehma hnyi ün
ae kong:
Ke adre me he ka sekudra hnyi je
bonginy hmiâ.
- 20 Ke ame he ka hia tavat ae kong,
Ke ame he je iwahnaihmöny me Iehova
ka helâ me pipikhenyainy lakon
mamoe:

SALAMO 37.

Salamo anyi Davita.

- U** MA ca vec bi ge tavat adre me ányâ
únyi ae kong,
Ke u me ca he ka huhnynyâ tavat
adre me ányâ únyi ae ca wisa.
- 2 Anyin adre me he ka ie subâ degeci ödra
helâ me hnaönying,
Me melea helâ me hnyot ae hát.
- 3 Geju thö kö Iehova, ke mádrâ so;
Labâ hnyei, ke hnu hoton hnathu.
- 4 Senyin dö minya kö Iehova;
Me e ame he ka ham köu je hna sumâtâ
hnen hnyekom.
- 5 Hna but dem gethen kö Iehova;
Geju thö minya kâu, me e ame he ka
ányâ.

SALAMO 38.

- Adre me he ka aû but, me hi ödra but
hnyi hainy meic.
- 31 Haba at ae kong ame mē sumat, me ca
ham hmetu bi :
Ke haba at ae wisa ame betenge me
ham.
- 32 Ame he tavat, wale e ame ohnahicâ, ka
hu hnyei ;
Ke e ame he ka subâ degecâ tavat ae
hnaûhangö.
- 33 Iehova ame otilâ hmâ je hna okca hnen
at ;
Ke e ame senyin ge deny gethen
- 34 K' ame ne he bi ka ta, me ame ca he
ka ta kong :
Anyin a Iehova ame kât ge hnyamen.
- 35 Iny wanakat ehac, k' iny hingat ut
walang ang ;
Ke so bi oge me ca wâ at ae wisa adre
me degec,
Me je mâtrâniny adre me sumâtâ jeû.
- 36 Haba at eling ame betenge hnyi je bong,
k' ame mē ham ;
K' ame hnahic ut je mâtrâniny.
- 37 Ūsâkâûö but me hulö, ke mâdrâ so ;
M' u ma laba hmâ nyiele balua.
- 38 Anyin a Iehova ame weny hna owisa,
Ke e ame ca degec bi anyin wakap.
K' adre me tu' ödra balua bi :
Ke adre me he ka subâ degecâ je mâtrân
tavat ae kong.
- 39 Ame he ka tren hnyei hnen tavat ae
wisa,
Me labâ balua.
- 30 Haba hnyimen at ae wisa me ame úsabö
uetâ,
K' ame fuc bohmen ge hna owisa.
- 31 E bi eû hnyi hnyekon hnanyibu anyin
Khongon ;
K' ame ca he ka haûhaû hnen je hna
okca.
- 32 Haba at ae kong ame ecmâkâ at ae
wisa
Me elâm he ka hlingâ e.
- 33 K' ame ca he Iehova ka hna e ka hnyi
hnyamen,
K' ame ca he ka ohnaûhangöâ e hnyi
ûen adre me owisa gan.
- 34 Halubahing Iehova ju, ke vheno deny
gethen,
Me e ame he ka ogöranyi u m' u me he
ka hu hnyei :
Ödra ka subâ degecâ tavat ae kong, me
u me he ka wâ.
- 35 Oge me hia but wâ at ae kong hnyi
maniny man ae gan,

- K' ame okhulelauâ helâ me ûö ae hât
hnyi kânân kânâ.
- 36 K' ame he ke at hnyi hnyimakan, me
wâ bi, e hia but e :
Eke, oge me elâm e, k' oge me ca
wâ bi.
- 37 Bi haten ju at ae wisa, ke wâ ju at ae
fofâ :
Anyin ame he ka hnahic ut obiny at
eling.
- 38 Ke haba tavat hanyâûâ, adre me he ka
tha ohî' ödra bi :
Haba obiny tavat ae kong adre me he
ka subâ degecâ.
- 39 Ke haba ûbömeli anyin tavat ae wisa,
me ûnyi ga Iehova ;
E thibi tang hwegiödra hnyi ûen vec.
- 40 Ke Iehova ame hadru' ödra, me hûgûn'
ödra :
E ame hûgûn' ödra ûnyi ge tavat ae
kong, me omeli ödra,
Anyin adre me lubaduöng anyin.

SALAMO 38.

Salamo anyi Davita hndn önykâmed.

- I**EHOVA lö, ca he ka ú nya hnyi ânyâm
hmönyin :
Ke ca he bi ka nö nya hnyi hnâm hna
wathethöt.
- 2 Anyin ame aat dö ânyâm je fana kõnya,
Ke u je hlic nya hwegiö nya ge hnya-
mâm.
- 3 E ba ong dok ae so hnyi vik, can ânyâm
hmönyin ;
Ke haba khaca, e ba hwegien je jeiök
can anyik hulö.
- 4 Anyin ame ölö thö hon bök anyik je
hulö :
Helâ me mân hok ae pason ge ihma-
kiny.
- 5 E bon dut me bobot hnök je aat,
Can hwakecik ae monu.
- 6 Oge me seset me ti nom hnyikânâi ;
Oge me tenge tot hnyi je bong.
- 7 E unöngötö li jebalainuk hnen iei,
Ke ba ong dok ae so hnyi vik.
- 8 Iny sēnyin k' adre kot hwegiâ unyik :
Oge me kuku can ame hloblo but hnye-
kuk.
- 9 Than lö, e bi hnyi hnyimâkâm ta je wek
hia thithö ;
Ke ca iyong bi köu anyik mâng.
- 10 Ame utmomokhon hnyekuk, ke hia but
hwegiök :
Ke hia minya but melaminy li emökök.

- 11 Adre me tot sákâû laihumik me je lahanök ge anyik mok.
Ke ame tot sákâû gak je liamekeiny mönya.
- 12 Adre me töu hnewek tavat adre me elâm hanuk.
K' ame haiö nya hnen tavat adre me bekuc nya,
K' adre me únykúme tang iyawö hnyi je bong.
- 13 Ke oge me ca he bi nya ka löng, iny helá me at ae wejiji ;
K' iny helá me hum, a at ame ca khöng hnyimen.
- 14 Eke, iny úcú me at ame ca löng bi,
Ae ba hnán ivinö hnyi hnyimen.
- 15 Anyin a oge me geju u, Iehova :
Than lö a Khonguk, u me he ka thu könya.
- 16 Anyin a haingök, ka habe, wá adre nye he ka manhic huk :
E ka haúhaú cak, m' adre me he ka ogan' ödra bi huk.
- 17 Anyin a heláke oge me he ka ta but éáu,
Ke haba anyik hlöuhlöu ka e bala bi hnyi hnyimakök.
- 18 Anyin a oge me he ka haimemená anyik hulö ;
Oge me he ka hmak can anyik monu.
- 19 Ke ame tot je iwahnaihmiöny mönya, k' ödra hwege :
Ke se hia tavat adre me húkhötiö nya baúö nya.
- 20 Ke haba tavat adre me bi hwaban so ge kong,
Me adre me bi iwahnaihmiöny mönya, can oge me hnu hoton únyi ae so.
- 21 Iehova lö, ca hna degeci nya bi :
Khonguk lö, ca he ka úsákâúö mönya.
- 22 Than lö, at ame omeli nya,
Logotö he ka hadruo nya.

SALAMO 39.

Hobi kâu at rhik khumöng, wale Jeduthun. Salamo anyi Davita.

- H** AINGÖK, Oge me he bi nya ka tuö dek je gethen,
M' oge me ca he ka monu ge bohök :
Oge me he ka tuö hnyimök ge únyi hnán ohnyibö,
E ka tiga laba hnyi hnyimakök tavat ae kong.
- 2 Oge me laba hum ke hnyibú, eke, hnyi únyi ae so ;
Ke ame bwebwet anyik hlöuhlöu.

- 3 E kahwa hnyekuk eú hnyik ;
Inya oge me tiga únykúme, me ame ubáhlá bala thö meic.
Me oge me fuc dö ge bohök ;
- 4 Iehova lö, omanená thö könya obiny gak,
Me tulutiny bonguk je bong, me bongon e ;
Omanená thö könya ae okhulit bonguk je bong.
- 5 Wá bi, u je hia but oá bonguk je bong helá me je tulutiny hnyam ;
Ke heláke e ca únyi hnathu je hunaik hnyi hnyimákâm : [Sela.
Awe, thatúnyi tavat hia thithö adre op.
- 6 Ame labö vbeno tavat hia hnyi hmenon thibi :
E únyibaú anyidra útüböny :
E ame khon, ke ca khana ewa at ame he ka hlo.
- 7 Ke walang ang, Than, iéu oge me halubahingen ?
Ke u thibi hnök hna gejon.
- 8 Thöng nya but únyi hnyi hnök je hua hanyáúá hia :
Ca hna but at ae monu he ka haiö nya.
- 9 Oge me hum but, oge me ca khöng hnyimök ;
Anyin a u thibi at a ányá.
- 10 Hom but gak hna kuc nya gam :
Oge me áu hut ge hna úkúc hnen benyâm.
- 11 Hnyi úen u je ná at wale he ka thawá hulö,
M' u me ohia anyin hmanenang helá me walelaba : [Sela
Awe, thatúnyi tavat hia thithö.
- 12 Iehova lö, löng ju hijik hic, tevehlöng ju anyik tenge ;
Ca laba hnyibú ge deköök :
Anyin a iny atkanyua unyâm,
Me at ame mé laba, helá me lakamök hia thithö.
- 13 Ö u hwiö thö gak, m' inye he ka hwege hmetu,
Inye tiga ca he but, me hia but.

SALAMO 40.

Hobi kâu at rhik khumöng. Salamo anyi Davita.

- O** GE me labö halubahing Iehova ;
Me e ame tevehling nya, me löng anyik tenge.
- 2 E ame thö nya minya göranyai únyi hnyi öop ae lulung, me únyi hnyi kâná ae kece ;

- Me e ame otilâ li cak hon kic, me ote-
thmâ hnök je hna okca.
- 3 E ame ip hnyi hnyimök khumöng ae
teb únyi, wale he ka ogânâ Kho-
nguta :
- Ame he tavat ae se ka wâ, me ot,
Me geju kö Iehova.
- 4 Hnähic hnen at ame hum Iehova me
hnân gejon,
K' ame ca únykúme ka at ame hnyok
bi gan, me tavat adre me saú ka hnyi
thoi.
- 5 Iehova Khonguk lö, e se hia ányâm ta
je huliwa hnân láia u je ányâ,
Me hnâm ta je hna únykúme köhmun :
Ca hnân he ka ha gaga köu ;
Oge ne beomanená me ha,
Me ti se hia hmönyin a ca hnân bi aú.
- 6 E ca wem hut adre me hlingâ me bwi-
hlany ;
U je kou li hnyikönyök :
U je ca hawâ hudiny leu me hudiny
hulö.
- 7 Ke haingök, Wâ ju, inya ang :
Adre me sihnalimen gak hnyi tusi adre
vhec :
- 8 Khonguk lö, oge me senyin he ka ányâ
wem ;
Eke, eú hnyi hnyekuk ányâm hnanyibu.
- 9 Oge hia but khetâ hwakecin ae wisa
hnyi úkhacaköu ae gan ;
Wâ bi, oge me ca he ka behânâ li esö-
ngodik,
E manen köu e, Iehova.
- 10 Oge ca hia but ikhâlâ eú hnyi hnyekuk
hwakecâm ae wisa ;
Ke oge hia but omanená ányâm hnathu
me úhömeli gam :
Oge ca hia but ikhâlâ ányâm ibetengiö
me hnathu ka úkhacaköu ae gan.
- 11 Iehova lö, ca behânâ bi gak ányâm je
tang betenge :
E so ame he bala ányâm ibetengiö me
hnathu he ka tuö nya.
- 12 Anyin ame igigili nya hnen ta je hulö
a ca hnân bi aú,
Ame hia but hom tilö nya hnen anyik
je hulö, me ma ca khanö nya he ka
bwele göranyai ;
Ae se hia hon úseiny leúnen bök, me
ame gâuk.
- 13 Iehova lö, ö u he ju ka omeli nya ;
Iehova lö, logotö he ka hadruo nya.
- 14 E so adre me he ka hmehma me tha
monumonu
Tavat adre me elâm hanuk he ka ohia e :

- E so adre me he ka ohmetuhmeto me
ohmehma
Tavat adre me senyin ge hna okongu
nya.
- 15 E so adre me he ka ba wan hwaban
hwakecidrin hnân ohmehma,
Tavat adre me ha könya, ka habe, Ohö,
Ohö.
- 16 E so adre me he hia tavat adre me
elöm u ka hobâ me senyin köu :
E so adre me labö ha hnen tavat adre
me hnyok ka ányâm úhömeli, ka
habe,
Oganö Iehova thö.
- 17 Ke iny vec me theduoc ;
Ke so bi Than ame únykúmi nya :
U thibi at ame hadruo nya me omeli
nya ;
Khonguk lö, ca he ka bec.

SALAMO 41.

Hobi kâu at whik khumöng. Salamo anyi Davita.

- H**NAHIC hnen at ame únykúme ka at
ae sēnyin :
- Ame he Iehova ka omelö e hnyi bong
ae kong.
- 2 Ame he Iehova ka tuö e, me obeúâ
anyin möt, ke adre me he ka ohna-
hicâ e hnyi hnyei ;
Ke u me ca he bi ka hna e ka hnyi
weny je iwahnaihmiony mē.
- 3 Iehova ame he ka kap e hnyi hna úâ :
U je ányawia hia hnen hna mokut hnyi
anyin mok.
- 4 Haingök dö, Iehova lö, betenge ju gak :
Ometo thö hanuk ; anyin oge hia but
monu köu.
- 5 Haba je iwahnaihmiony mönya me adre
me haikongu nya, ka habe,
Ie tien e ame he ka mokcu hnyin, me
hia bi ien ?
- 6 K' ame ne o ka ö nya, me e ame ha
thoi :
Haba hnyekon ame úkhöünâ hulö eú
hnyin :
Me e ame didrut me ha e.
- 7 Haba tavat hia adre me húkötio nya,
me adre me ulidri nya :
Adre me vak he ka okongu nya.
- 8 Haingödra, E kece but kâu mok ae
kong :
E ame mokut walang ang, k' ame ca he
hmetu ka tot.
- 9 Eke, haba ihumik, waleji at oge me
geju kâu, at ame an ök jeú

- Ame hia but húki nya ge ohmáiny can.
- 10 Ke haba u, Iehova lö, u ma betenge gak, me otílö nya thö,
Me inye he ka bi hwaban ködra.
- 11 Walang haten könya a u me senyin könya,
Anyin a ame ca ohobelua huk hnen iwahnaihmiöny mönya.
- 12 Ke haba inya, me u je ci nya hnyi hwa-
kecik ae hnathu,
Me otílö nya hnyi hnyimákám nyiele balua.
- 13 E so he ka haisoi Iehova, Khongu Isaraela,
Hwán ehac balua ke ne o but nyiele balua.
Amen, me Amen.

TUSI II.

SALAMO 42.

Hobi káu at vhiik khumöng. Hnúu áno. Anyin laku kora.

- H**ELÂ me aila ame he momokhon ka hnyi ta je wagewe,
Helâe minya hanuk ame mokhon köu, Khong.
- 2 E beic hanuk ka Khong, ka Khong ae möt :
Ie ün oge me he ka o me manen hnyin hnyi hnyimakan Khong ?
- 3 Haba hing ök jeú hnyi lany me lit me deköien li emakök,
Waleji adre me labö ha könya hnyi je bong, ka habe, Ewa Khongom ?
- 4 Oge me únykúme ta je únyi eling, me hingálâ hanuk eú hnyi hnyekuk,
Waleji ge hnök hna tha he me bunyen, me hum ödra ka hnyi uma umen Khong,
Tha öhmun me hwan senyin me oganá, at se hia adre me tuö bong ae kap.
- 5 Hanuk lö, ieú gam u me ilitmak ?
Ke ieú u me hmak gan eú hnyi hnyekuk ?
Lubahingen ju Khong : anyin oge me he ka oleâ káu
Ge möt únyi hnyi hnyimakan.
- 6 Khonguk lö, e hmak ut hanuk eú hnyi hnyekuk :

- Anyin a wale oge me únykúmi u hnyi hnyei Joridano,
Me je Heremona, úheny hnyi bucen Mizar.
- 7 Ame hongot ke dok ae dit ka ke dok ae dit hnen hwan ányâm je bouDET :
A hia but khutukhaüö nya ányâm ta je waköio me ányâm je wabulu.
- 8 Ke ame he Iehova ka húna anyin betenge hnyi lany,
Ke haba hnyi lit ame he ka tha e mönya anyin khumöng,
Wale hic ka Khongon melik.
- 9 Oge me he ka ha ka Khong a kicik, ka habe, Ieú gam u me hnying nya ?
Geú oge me tenge tot ge hna okongu nya lnen je iwahnaihmiöny ?
- 10 Je iwahnaihmiöny mönya adre me hiö nya, helâke e hu hele vat eú hnyi je jeieök ;
Me labö ha könya hnyi je bong, ka habe, Ewa Khongom ?
- 11 Hanuk lö, ieú gam u me ilitmak ?
Ke ieú u me hmak gan eú hnyi hnyekuk ?
Lubahingen ju Khong : anyin oge me he ka oleâ káu bi,
Wale melen hnyimakök, me Khonguk.

SALAMO 43.

- K**HONGUK lö, owisö nya, ke ivinö ju hobi könya ka hnyei ame ca ot :
Ö u omeli nya thö únyi ge at iyawö me at ae ca wisa.
- 2 Anyin a u Khongon tang hwegiök ; can ieú u me digic nya ?
Can ieú oge me tenge tot ge hna okongu nya hnen ta je iwahnaihmiöny ?
- 3 Ö u kunâ but ányâm melam me ányâm hnathu ; hnân he ka su nya :
Me hum nya ka hnyi ányâm bucen ae kap,
Me ka hnyi umâm je uma menâ.
- 4 Me oge me he ka didrö ka taben hut anyin Khong,
Wale ka Khong hnök hna senyiná gan hmâ :
Khong a Khonguk lö, oge me he ka oganö u ge kitara.
- 5 Hanuk lö, ieú u me ilitmak gan ?
Ke ieú gam u me hmak gan eú hnyi hnyekuk ?
Lubahingen ju Khong : anyin a oge me he ka oleâ káu,
A melen hnyimakök, me Khonguk.

SALAMO 44.

Hobi kdu at ehik khumöng. Salamo anyin laku Kora. Hnân ünö.

KHONG lö, öhmun e löng ge je hnyikönyöhmun, k' ame ha gaga köhmun hnen je lakamöhmun.

Waleji ge huliwa u je ânyâ hnyi bongudra ta je bong, waleji hnyi ta je bong adrem.

2 U je obâ aten je hnyei ge hnyamâm, me te hwabödra :

U je okongoâ je hnyei, me obâ degeci ödra.

3 Anyin a adre me ca hu hnyei hnen bi anyidra ta je hele vat,

Ke adre me ca möt hnen je hing hnyamödra bi :

Ke so bi hnen hnyamâm, me benyâm, me melaminy hnyimâkâm,

Anyin a u me betenge baü gadra.

4 Khonguk lö, u thibi Tuhök :

Hûna ju möt hobi kö Jekob.

5 Öhmun e he ka hagutâ je iwahnaihmiöny möhmun únyi gam :

Únyi hnyi iâm öhmun e he ka uto ju tavat adre me tot köhmun.

6 Anyin oge me ca he ka gejoâ anyikafana,

Keame ca he ka omeli nya anyikhele vat.

7 Ke u je hia but omeli öhmun únyi ge je iwahnaihmiöny möhmun,

Me ohnehma tavat adre me hûkoti öhmun.

8 Öhmun e hia but ohobeluâ Khong hnyi je bong,

Me öhmun e he ka oleâ iâm ke ne o but nyiele balua. [Sela.

9 Ke walang ang u je hia but digic öhmun, me oúhnyükongu öhmun ;

Me ca tha he hele me anyihmun je utbat.

10 U je ohmetubmetu öhmun únyi ge je iwahnaihmiöny,

Me ame he tavat adre me hûkoti öhmun ka söh hobi ködra bi.

11 U je hia but hn' öhmun helâ me je mamoe hnân han ;

Me ovesei öhmun dut hnyi wanben ta je hnyei.

12 U je úco látâm ke ba troban,

Me u je ca bi hanen ka omjehem ge hwabödra.

13 U me wi' öhmun m' adre me he ka

haikongu öhmun, tavat adre me laba hakekenyi öhmun,

Me hnân hi öhmun me hlum' öhmun hnen tavat adre me laba igigili öhmun.

14 U me wi' öhmun me hnân taben úhiö anyin aten ke je hnyei,

Me hnân nyinyikâ ban hnyi wanben je hnyei.

15 Haba hna hom úhnyükongu nya, e bala bi hnyi hnyimakök hnyi je bong hia,

K' ame tubi nya hnen hmehmainy li emakök ;

16 Únyi hnyi hwan at ame úhaiö me fuc bi gan ka Khong ;

Ke únyi hnyi iwahnaihmiöny me at ame bi hwaban hmeto.

17 Ame o but ta je únyi hia e köhmun ; ke so bi öhmun e ca hnying u bi,

Ke öhmun e ca hia but thoi hnyi ânyâm úhinhnyökü.

18 Ame ca hmetu je hnyekuhmun, K' ame ca saü bi hnöhmun je hna okca únyi hnyi dem gethen ;

19 Ke so bi u je hia but kuc öhmun hnyi hnen je tanimo,

Me tubi öhmun ge hmenon mok.

20 Öhmun e ne hia but hnying ien Khonguhmun,

Me hinöbeny ka ke Khong bi ;

21 Hawa, ame ca he Khong ka elâm e ? Anyin ae khana ta je únyi ae iyong eü hnyi hnyok.

22 Eke, can iâm adre me hling' öhmun hnyi je bong hia ;

K' âdre me öü öhmun helâ me je mamoe hnân hlingâ.

23 Than lö, hmak dö, ieu gam u me mokut ? Todrö, ca digic öhmun bala bi.

24 Ieu gam u me ikhâlâ hnyimâkâm, Me hnying anyihmun vec me hra sed' öhmun.

25 Anyin adre hia but oto hanuhmun ka hnyi sesâ :

K' ame kece but je hnyekuhmun ka hnyi kânâ.

26 Todrö he ka hadru' öhmun, Me bi hwaban anyihmun möt únyi hnyi ânyâm ibetengio.

SALAMO 45.

Hobi kdu at ehik khumöng ; adre hai hnyi Sosani. Salamo anyin laku Kora. Hnân ünö. Khumöng ibetengio.

AME bahihingölö thö hnyekuk ge únyi ae so :

SALAMO 46.

- Oge me ha anyik ta je huliwa hobi kâu than :
- Haba bohök, me pen anyin at ame sisit mweimwei.
- 2 E nua hmönyin soâm hon lakon tavat ; Adre hia but hingâlâ ibetengiö ka hnyi hnyimâm :
- Anyin a wale a hia but Khong ohnahici u nyiele balua.
- 3 At ae hwege lö, weikâ ju ânyâm hele vat hon jevam, Wale ânyâm hmanenang me bongon than gam.
- 4 He thö me hnahic hnyi bongon than gam, Ûnyi ge hnathu, me menyik, me wisa : Ke ame he hnyam a metâm ka no u ge je huliwa hnân outen.
- 5 E so hmönyin homakan ânyâm je fana ; A ta but je hnyei eü hmelâm ; A hia but dit hnyi hnyekon je iwahnai-hmiöny me than.
- 6 Khong lö, e bi ânyâm theron nyiele balua : Uci ae wisa uciny dokhom dökhu.
- 7 U je hia but hnyok ka hwakecin ae wisa, me ikiki ge hwakecin ae kong : Anyin a wale Khong a Khongom ame hia but hú u Ge wakacoiny senyin hon je lahanâm bi.
- 8 E bo so je úkhaúâm hia ge muro, me aloe, me kesia ; Adre hia but osenyini u ge je únyi-khumöng, únyi hnyi je uma nyon elefan.
- 9 E hu bi je hlu lakon je than hanen je athnyabaem a je momo unyâm : Ame tot hnyi hnyamâm a metâm momo than ame theibâ goliny Ofira.
- 10 Nökuk hlu lö, löng ju, me únykúme ju, me tevehlöng ju ; E so u ma hnying ut em hnyei me hnyaban kâmâm ;
- 11 Be me he than ka weny soâm : Anyin a e thibi Tuhâm ; ke nom ju kâu.
- 12 Ke ame he ka e bi nöku Turo tha e me bwihlany ; Ke ame he tavat tren omjeú hnyi hnyei ka sumâtâ ibetengiö gam.
- 13 E hmanenang hia, eü hnyin uma, hlu nokon than : Adre me tha hwâwâ gol hnyi úkhaúen.
- 14 Adre me he ka su e ka than, a khavâ úkhaú adre tibet mecâ :

- Haba wahu a je lahanen adre me hnu hoton
- Me adre me he ka hum ödrin köu.
- 15 Adre me he ka hum ödrin me senyin me hobâ ; Ödrin e he ka didrö ka hnyi uma umen than.
- 16 Ame he je lakom ka hwö hwaban lakâmâm, M' u me he ka otil' ödrin, m' ödrin je than eang hmelen hia.
- 17 Oge me he ka oúnykúmeâ iâm hnyi je dö hia : Anyin a wale, ame he tavat ka oleâ köu nyiele nyiele balua.

SALAMO 46.

Hobi kâu at vik khumöng ; Salamo anyin laku Kora ; Adre me hai hnyi Alamotha. Khumöng.

- K**HONG thibi hnöta hñabâ me tang hwegiöta, E úhadruo ae hakekeny hmönyin hnyi vec.
- 2 Anyin a wale ate me ca he ka ot, eja ke ne adre ne okebongonâ hmeledrany, Me hom je bucen ka hnyi wanben je köiö ;
- 3 Eja ke ne a ne ü me úkhtukhaúâ je waköien, Me bwebwet je bucen ge ukhibiny [Sela.
- 4 E hu wagewe, k' ame osenyinâ taun anyin Khong ge je wadutö a únyi gau, Wale dok ae kap a hnen je uma mano umen Beónua.
- 5 E but Khong hnyi wanben e ; k' ame ca he ka bwebwet : Ame ie he Khong ka hadruâ e, wale hnyi okubelit.
- 6 Ame imemedien ta je huyei, k' ame bwebwet ta je dökhu : E ame fuc ge hwan, me ame köiö but hmeledrany.
- 7 Iehova tuhan sabaoth ame laba unyita ! Khongu Jakob hnöta hñabâ [Sela.
- 8 Ai öbun, wâ ju ta je huliwa anyi Iehova, A at ame hia but öba wan hmeledrany.
- 9 E ame bi obiny je vat ke ne o but can hmeledrany ; E ame ohmetro cafana, me subâ luâ ö ; E ame thong degecâ je kariota ge meic.

- 10 Mē soju, ke khan' öbun dö a inya thibi
Khong :
Oge me he ka beönua hnyi ta je hnyei,
oge me he ka beönua eang hmele-
drany.
- 11 Tha e möta Iehova tuhan sabaoth ;
Hnöta hñabâ Khongu Jakob. [Sela.]

SALAMO 47.

Hobi kâu at vñik khumöng : Salamo anyin laku Kora.

- T**A je hnyei hia thithö lö, khaúkhaú ju
je hnyamöbun ;
Hongot ka Khong ge hwan manhic.
- 2 Anyin a Iehova Beönua at hnân outen ;
E than ae gan hmâ hon hmeledrany hia
thithö.
- 3 E ame he ka hom ûhnyúkongo ta je
hnyei eú hnyi hmelita,
Me tavat minya eú hnyi hmelen
hnyeúcata.
- 4 E ame he ka úca jekhóu hobi köta,
Waleji ame önyihnatho Jakob at e ame
betenge gan. [Sela.]
- 5 Ame ölö thö Khong tha e me hwahongot
hwege,
Wale Iehova me ifucin trutru.
- 6 Khumöng oganá thö Khong, khumöng
oganá thö :
Khumöng oganá thö Tuhöta, khumöng
oganá thö.
- 7 Anyin a Khong Tuhan hmeledrany hia
thithö :
Khumöng oganá thö, tha e me wâ
únykúme.
- 8 Khong ame musö hon je hnyei :
Khong ame laba hon anyin theron ae
kap.
- 9 Ame úkacaköu thö ta je tuhan je
hnyei,
Me me lakeiny Khongu Aberahama :
Anyin a anyin Khong ta je becin hmele-
drany ;
Ke e ti beönua.

SALAMO 48.

Khumöng ; Salamo anyin laku Kora.

- E**GAN hmâ Iehova, a hnân ti oganá,
Hnyi taun anyin Khonguta, a
anyin bucen ae kap.
- 2 E hmanenang utilen ethö, ke hnân
osenyinâ hmeledrany hia thithö,
A bucen Ziona, hnyi je ke keihen ka
hnyi hwadrö,

Taun anyin than ae gan.

- 3 A hia but Khong omanená e bi me
hnân hñabâ hnyi je uma umen than
eling.
- 4 Anyin a wâ bi, ame úkacaköu thö ta
je than,
Ke adre me tha vheno dok eling.
- 5 Adre me wâ, m' adre me láia ;
Adre me gâ thö udrin me ie kec.
- 6 Ame khöü ödra ju eling ge öbubuny ;
Me vec, helâ me momo ame vec hnyin.
- 7 U je ohmouca je huiny Tasesa.
Ûnyi ge ang hwei.
- 8 Helâji me hnöta hna löng, me helâe
hnöta hna wâ
Hnyi taun anyi Iehova tuhan sabaoth,
hnyi taun anyin Khonguta :
Ame he Khong ka otethmâ e nyiele
balua [Sela.]
- 9 Khong lö, öhmun e hia but únykúme
ányâm ibetengiö.
Hnyin umâm uma kap.
- 10 Khong lö, e úcú iam,
Me hna oganö u, ke ne o but je can
hmeledrany :
E unöngötö hnyamâm a metâm ge hwa-
kecin ae wisa.
- 11 E so ame he bucen Ziona ka senyin,
Me wahlu laku Juda ka hobâ,
Can hnâm je hna owisa.
- 12 Vheno thö Ziona, me he igigilö e :
Aú thö úseiny anyin je hñabâ ae beú
göranyai.
- 13 Ûnykúme wia ju öbun je haginy e,
Wâ gaga ju je uma umen je than eling ;
M' öbun e he ka ha gaga e ka dö a
biliny.
- 14 Anyin a haba Khong ang me Khonguta
nyiele nyiele balua :
E ame he ka su öta ke ne o but hnyi
mok.

SALAMO 49.

Hobi kâu at vñik khumöng : Salamo anyin laku Kora.

- T**A je hnyei hia thithö lö, löng ju
ang ;
Tevehlöng ju öbun hia thithö je aten
hmeledrany :
- 2 Tavat ae hnyikânâ me tavat ae görany,
Me tavat ae tren omjeú me tavat ae ba
ta únyi.
- 3 Ame he hnyimök ka ha metâ :
Ke ame he hnyekuk ka únykúme me
wâhmakhmeto.

- 4 Oge me he ka tā hnyikönyök ka hna oûco :
Oge me he ka hwân hnök je hna ha ae iyong tha e me kitara.
- 5 Hnân eû oge me he ka ot hnyi je bong ae kong,
E ka igigili nya hnen hulö wale at ame beweny he ka hwö hwabök ?
- 6 Haba tavat adre me gejon tang mone gadra
Me hobelua tang omjedra ae gan hmâ ;
- 7 E ca khana bi ke at gadra he ka bi hwaban möt anyin ke liamekeiny mē,
Ke ca khana bi he ka ham ka Khong hwaban at eling :
- 8 (Anyin a omjeû ae gan hmâ wale hnân bi hwaban je hanudra,
Ke pason e nyiele balua :)
- 9 Me me möt balua e,
Me ca he ka wâ bobot.
- 10 Anyin a e ame wâ a g' ame labö mokcu tavat ae metâ,
Ke ame tha hia but at ae monu me at ae ba oûnykûminy,
Me hna but je omjedrin ka keihen.
- 11 Adre me ûnykûme eû hnyi je hnyekudra a g' ame he ka tethmâ umödra je uma nyiele balua,
Ke je hnyabadra ka hnyi je dö hia ;
K' adre me hwenyi ien je idra ge iödra bi.
- 12 Haba at, me ame ca laba hnyi hmanenang :
K'ame helâ me omeno wale ame he ka hia.
- 13 Haba hwakecidra eling me wale anyidra monu :
K' ame he bi tavat a bilidra ka haisoâ hnödra hna ha. [Sela.]
- 14 Adre me ip ödra a hnahat hobi kâu hedis ;
K' ame tu' ödra ge mok, helâke at tuö mamoe :
Ame he tavat ae wisa ka musi ödra hnyi haolany ;
K' ame he anyidra hmanenang ka bi obiny hnyi hedis, me me ba umen bi e.
- 15 Ke ame he Khong ka omelö hanuk ûnyi hnyi man maniny hedis :
Anyin a e ame he ka köp nya. [Sela.]
- 16 Ca he ka ot bi a ne he ke at ka hu K' ame ne khulelau hmanenanginy anyin lap :
17 Anyin a e ka mokcu, me ba ke ûnyi e ame he ka hom ;
K' ame ca he anyin mec ka ke hoton.
- 18 Eja ke ne a ne hahnahicâ hing hanon ke tiga möt,
K' ame he keihen ka haisoi u, can u je ka ohmanenangi u bi,
- 19 Ke so bi e ame he ka he ka ta je döiny lakamen ;
K' adre me ca he bala bi ka wâ melam.
- 20 Haba at adre me ogânâ, k' ame ca wâ ûnykûme bi,
Me úcû me omeno ame he ka hia.

SALAMO 50.

Salamo anyi Asifa.

- H**ABA Khong, a Khong Iehova ame hia but fuc,
Me hawâ hmeledrany ûnyi hnyi hna o hnen seûnö ke ne o but hnyi hnen hna dit.
- 2 A hia but umumelam Khong,
Ûheny Ziona, wale ae ti hmanenang.
- 3 Ame he ka o but Khonguta, k' ame ca he ka laba hnyibû :
Ame he meic ka han hnyi hnyimakan,
Ame he ka igigilö e weneû ae gan hma.
- 4 E ame he ka hongot ka drany ethö,
Me hmeledrany, me me he ka owisa lakeiny :
- 5 Ûkhacaköu thö könya ta je latök ae kap ;
Waleji tavat adre hia but úhhiinyköu mönya ûnyi ge hut.
- 6 Ke ame he je drany ka omanená hwakecin ae wisa ;
Anyin a Khong thibi at ame owisa. [Sela.]
- 7 Lakeik lö, löng ju me inye he ka ha ;
Isaraela lö, löng ju, me oge me he ka ha hnyikongom.
Inya thibi Khong, wale Khongom.
- 8 Oge me ca he ka nö u ge hnâm hna bi hut ;
Ke e bala bi hnyi hnyimakök ânyâm ta je hut adre le.
- 9 Oge me ca he ka hom ke bolok ûnyi hnyi umâm uma,
Me ta je got бага ûnyi hnyi hnyin bagâm je hak.
- 10 Anyin a halek bi ta je menoiny hnyot hia thithö

- Me ta je meno wale hon je bucen a wan thauzan.
- 11 E kxanö nya ta je meno hia thithö ame gâ hnyi je bucen ;
Ke halek bi ta je meno hnyi ta hnyei.
 - 12 Oge ne mekihnânem, me oge me ca he ka ha köu :
Anyin a anyik hmeledrany me unöngö-tiny.
 - 13 Hawa, oge me he ka an utiöiny ta je bolok,
Me ijem dren ta je got ?
 - 14 Hudo thö ole ka Khong ;
Ke ham but ka Beönua hnâm je hna khemanyin :
 - 15 Ke hao nya thö hnyi bonginy vec ;
Oge me he ka omeli u, ke ume he ka oganö nya.
 - 16 Ke haingen Khong ka tavat ae kong, ka habe,
Ieu hanyâm a ume haimemenâ anyik ta je hnanyibu,
Me u me ha anyik úhinykôu ge hnyimâm ?
 - 17 Anyin a u me höciâ hna ûne,
Me degec hotom ai hok ta je hofuc.
 - 18 U je wâ at ae venöu, me u je tha hnyok mē,
Ke u je hia but hom jekhom unyin tavat bi únyi monu.
 - 19 U je hna hnyimâm ka hulö,
K' ame sisit iyawö bohâm.
 - 20 U je laba ju me haikongoâ liamekiny möu ;
U je sit hofuc thoi ka nokon hinyâm.
 - 21 U je ânyâ ta je únyi eling ke oge me laba hnyibú ;
U je únykúme a iny tha úcú möu :
Ke so bi oge me he ka nö u, me ip gaga ta je únyi e hnyi hnyimâkâm.
 - 22 Tavat öbun e hnying Khong lö, únykúme ju öbun ang,
Wâ oge nye he ka ki' öbun, ke ba at he ka omelö :
 - 23 Haba tavat hia adre me hudo ole, me adre me oganö nya ;
Ke oge me he ka omanenâ úhomeli anyin Khong
Ka at ame penapena deny gethen.

SALAMO 51.

*Hobi kâu at vhiik khumöng. Salamo anyi Davita :
hnyi áen ame o kâu Nathana perofeta, hwaban dö hnen hna he kö Batheseba.*

- K**HONG lö, betenge ju gak hoton ânyâm ibetengiö :
- Kot degecâ but hnök ta je hna hanyâûâ hoton úganiny ânyâm tang betenge.
 - 2 Ti ösüö nya but únyi hnyi anyik monu,
Me ânyâwiö nya thö únyi hnyi anyik hulö.
 - 3 Anyin a oge me ogâ hnök je hna hanyâûâ :
Ke e bala bi hnyi hnyimakök anyik hulö.
 - 4 Oge hia but monu köu, köu thibi,
Me ânyâ únyi ae kong hnyi hnyimâkâm,
M'u me he ka wisa u ka ha,
Ke so hnyi hnâm hna owisa.
 - 5 Wâ bi, adre me hnöku nya hnyi monu ;
Ke a erkin mönya bai hnyi hulö.
 - 6 Wâ bi, e bewem hnathu eú hnyi hnyok.
Ke u me he ka okxanö nya ge metâ hnyi dok ae iyong.
 - 7 U me he ka ânyâwiö nya ge hisop, me inye he ka kalaöt ut :
Ösüö nya ju, me inye he ka hau but hon kiona.
 - 8 Olöngi nya ju ge senyin me hobâ ;
Me me senyin dö je jeien waleji u je thuthu.
 - 9 Ikhâlâ ju hnyimâkâm ge anyik ta je hulö,
Ke kot degecâ but anyik ta je monu hia thithö.
 - 10 Khong lö, op dö hobi könya hnyok ae kalaöt ;
Ke mádrâ hmeto thö hanu ae wisa eú hnyi hnyik.
 - 11 Ca digic nya bi hnyi hnyimâkâm ;
Ke ca hom bi gak hanom ae kap.
 - 12 Ohmeto ju könya senyiny ânyâm úhömeli :
Ke ci nya thö ge hanu ame ie úling.
 - 13 Me inye he ka ná dem je gethen ka tavat adre me hanyâûâ ;
Ke ame he ka hmetuhmetu köu tavat ae kong.
 - 14 Khöng lö, Khongon melik, hnö nya but únyi hnyi dra a jönik ;
Me ame he bohök ka khumöng ogânâ hwakecâm ae wisa.
 - 15 Than lö, u me he ka khöng li esongodik ;

- K' ame he hnyimök ka omanená hnân oganö u.
- 16 Anyin ae ca wem hut ; me inye he ka ham e :
E ca senem köu je hudiny leü.
- 17 Haba ta je hut ka Khong me wale thibi hanu ae mita :
Khong lö, u me ca he ka oúnyibaúá hnyok adre omomono ae bewisa.
- 18 Ányá thö so kö Ziona hoton hnyekom ae betenge :
Otilá thö hak veto Jerusalema.
- 19 Me u me he ka senyiná ta je hut ae wisa, wale hut adre me le, me hudiny leu ae bekhöt :
M' adre me he ka hudo je bolok hon ányâm taben hut.

SALAMO 52.

Hobi káu at vñik khumöng. Salamo anyi Davita hnân únö : hnyi áen waleji ame o hnyin Doega at Edomo he ka ha kö Saulo, a g' ame he but Davita ka hnyi uma umö Abimelek.

- A**T ae hwege lö, ieu gam u me ohobelúa úokonguny ?
E bala bi íbetengiö anyin Khong.
- 2 Haba bohám ame penapena hwakecin ae ti kong,
Helá me heleúgi ae so hwan, k' ame huliwa iyawá.
- 3 U je hnyoká monu hon so ;
Ke thoi, hon he ka ha hofuc ae wisa. [Sela.]
- 4 Bohmen lö, at thoi,
U je hnyoká hofuciny hutö hia.
- 5 K' ame he Khong ka hagutá degeci u ke ne o but nyiele balua,
E ame he ka köt u, me oc degeci u únyi hnyi umâm uma mano,
Me uk u únyi hnyi hnyeiny tavat ae möt. [Sela.]
- 6 K' ame he bi tavat ae wisa ka wá e, me ot,
Me hlumá e, ka habe,
- 7 Wá ju at ame ca oúnyihnatho bi Khong me me hnabâ bi káu ;
K' ame gejoá úganiny tang omjehen,
Me ohwegiá e bi hnyi anyin hulö.
- 8 Ke iny úcú me elaiö ame kú khulelau hnyi uma umen Khong :
Oge me labageju ka íhetengiö anyi Khong nyiele nyiele balua.
- 9 Oge me he ka ole köu ke ne o but nyiele balua, anyin a u je hia but ányá e :

Ke oge me he ka labageju ka iám hnyi hnyimakan ányâm wakap, anyin ae so e.

SALAMO 53.

Hobi káu at vñik khumöng ; adre hai hnyi Mahalath. Salamo anyi Davita hnân únö.

- H**AINGEN at ae monu eü hnyi hnyekon, ka habe, E ba Khong.
Adre me bö kong ut, ke adre hia but ányá huliwa ae ikiki ;
E ba at ame mádrá so.
- 2 Haba Khong ethö hnyi drany ame wá lakon tavat,
Me me wá thö, hawa, e hu at ame wá únykúme,
Me elám Khong.
- 3 Adre me saü hia but ; adre me tha kong ut ;
E ba at ame mádrá so, e ba hmönyin me khaca.
- 4 Hawa, e ba hnyekudra tavat adre me ányá hulö ?
Wale tavat adre me an lakeik helá me hna an jeü,
Me ca hongot bi ka Khong.
- 5 Adre me ot gan hmá eling, ke ba únyi hnân outen bi :
Anyin a hia but Khong khúa degecá je jeien tavat waleji adre me hunumá cici u ;
U je hia but ohmehm' ödra, anyin a hia but Khong digic ödra.
- 6 E na o but úhömeli anyi Isaraela úheny Ziona !
E ka he Khong ka ohmeto lakeiny tavat adre bá,
Me me he Jakob ka senyin, k' ame he Isaraela ka hobá.

SALAMO 54.

Hobi káu at vñik khumöng ; hnyi Neginoth. Salamo anyi Davita hnân únö : hnyi áen a o hnyin at Zif, me ha kö Saulo, ka habe, Harca ame ca lubadúöng bi Davita unyihmun ?

- K**HONG lö, omeli nya thö únyi hnyi iám,
Ke owisö nya thö hnen tang hwegiám.
- 2 Khong lö, löng ju hijik hic ;
Tevehlöng ju ifucin hnyimök.
- 3 Anyin ame todrö könya ta je atkanyua, K' adre me elám hanuk tavat úokonguny :
Adre me ca ip Khong hnyi hnyimáködra. [Sela.]

- 4 Wâ bi Khong thibi at ame hadruo nya :
Haba Than ame tha e me tavat adre me
cô hanuk.
- 5 E ame he ka bi hwaban monu anyin je
iwahnaihmiöny mönya :
Ohi' ödra but hnyi ânyâm hnathu.
- 6 Oge me he ka hudö köu hut ae betenge :
Iehova lö, oge me he ka oleâ iâm, anyin
ae so.
- 7 Anyin a e ame hia but omeli nya hnyi
je vec hia thithö ;
Ke a hia but wâ hnen li emakök únyi
oge me wek ka ta je iwahnaihmiöny
mönya.

SALAMO 55.

*Höbi kâu at ehik khumöng ; hnyi Neginoth.
Salamo anyi Davita, hnân ünö.*

- K**HONG lö, long ju ka hijik hic ;
Ke ca he bi ka ikhâlö u iny ka
sumat.
- 2 Ling nya ju, me thu thö könya :
Oge me seset hnyi vec me mâng ;
- 3 Can ifucin iwahnaihmiöny,
Ke can úoveci anyin at ae kong .
Anyin adre me hna hulö könya,
K' adre me sedö nya hnyi anyidra
hmönyin.
- 4 Ame vec gan hmâ hnyekuk eú hnyik :
K' ame ta but huk je ot adre me
mekiny.
- 5 Ame o but könya ot me öbubuny,
K' ame hülülüo nya hnen gâön.
- 6 Ke haingök, ka habe, E na hu ju gak
li labenyik helâ me biny !
Me oge me he ka gâ thö, me menâ
but.
- 7 Wâ bi, oge me he ka ngenu sâkâú ai,
Oge me he ka laba hnyi hnyebuba. [Sela.
- 8 Oge me he ka logot ka tung
Únyi ge ang ae gan me weneú.
- 9 Than lö, ohi' ödra but, ovehwanâ but je
bohmödra :
Anyin oge hia but wâ úokonguny me
iwatretra hnyi taun.
- 10 Adre me he igigilö hon hak vetoiny hnyi
lany me lit :
Ke eú hnyi hnyin e hulö me úokonguny.
- 11 E bi eú hnyi wanben e hwakecin ae
kong :
Ke ame ca he but iyawö me thoi úheny
hnyi je gethen.
- 12 Anyin a ca iwahnaihmiöny bi at ame
haikongu nya ;

- Ame ne eling, me oge hia but hokhu-
yokâ :
Ke ame ca hûkötio nya at eji ame bi
gan könga ;
Ame ne eling, me oge hia but ikhölö
gan :
- 13 Ke únyi gam, at ae úcú mönya,
A liamewaeny mönya, me ihumik.
- 14 Ötuji li at ötu me úhnenamö so,
Me tha he me bunyen ka hnyi uma
umen Khong.
- 15 E so e ie o but ködra mok,
Me tha utut ka hnyi thop k' ödra tiga
möt :
Anyin a e bi monu hnyi hnyabadra, eú
hnyi wanbödra.
- 16 Ke haba inya, oge me he ka hongot ka
Khong ;
K' ame he Iehova ka omeli nya.
- 17 Oge me he ka tengge me mâng, hnyi
sahac me hnyomakatu, me jebigö :
Me e ame he ka löng ifucik.
- 18 E ame hia but omelö hanuk hnyi hnahic
únyi hnyi hnödra hna vat mönya :
Anyin a ödra se hia unyik.
- 19 Ame he Khong ka löng me thu ködra,
Wale at ame laba kâú adrem, [Sela.
Tavat adre me ca wia bi,
Me ca ot bi ka Khong.
- 20 E ame hia but hinöbeny he ka kot tavat
adre me úsoköu më ;
Me degec hnen hna úhihinyköu.
- 21 E haúhaú hnyimen helâ me bata,
Ke vat bi hnyekon :
E menyik hwan je hofuc hon wakaco,
Ke je hele vat bi ling adre oc.
- 22 Khúâ but kö Iehova únyi u me hmak
gan, ke e ame he ka ci u ;
E ame ca he balua ka hna at ae wisa
he ka hwebwet.
- 23 Khong lö, u ma he ka hagut' ödra ka
hnyi thopiny bobot :
Haba tavat behingâlâ dra me tavat
iyawo me adre me ca he bi ka möt
hnyi hafiny bongudra je bong ;
Ke oge me he ka labageju köu.

SALAMO 56.

*Höbi kâu at ehik khumöng ; adre hai hnyi Jonath
elem rehokin. Salamo anyi Davita : Mectam :
hnyi ün adre me hom e hnen at Filisiti únyi
Gatha.*

- K**HONG lö, betenge ju gak ; anyin a
beutâ unyik hnen at :
E ame vat mönya me oveci nya hnyi je
bong.

- 2 Ame beweny he ka utâ unyik hnen je iwahnaihmiöny mönya hnyi je bong : Anyin a ödra se hia adre me vat mönya me bi gan.
- 3 Haba bong oge me ot hnyin, Me oge me he ka labageju köu.
- 4 Ge Khong oge me he bi ka ogânâ hwan hofuc : Ge Khong oge hia but labageju, k' oge me ca he ka ot ;
Ie únyi ae khana at he ka ânyâ könya ?
- 5 Adre me labö wia hok hofuc hnyi je bong hia : Hnân okongu nya je únykúmenödra hia.
- 6 Adre me úkhacaköu, adre me laba duöng, Adre me bi haten hnök je hna okca, Helâji me hnödra hna halubahingen hanuk.
- 7 Hawa, adre me he ka kec möt a deny hulö ? Khong lö, hagutâ but ta je hnyei hnen ânyâm bi hmönyin.
- 8 U je aû hnök je hna ngönu : Hingälâ but je deköiök ka hnyi ânyâm kaia ;
Hawa, ca e bi hnyi anyam tusi ?
- 9 Me ame he ka hmetuhmetu je iwahnaihmiöny mönya hnyi bong oge me hawâ hnyin : Walang hnök hna khana, ka habe, hiök Khong.
- 10 Ge Khong, oge me he ka ogânâ hwan hofuc : Ga Iehowa, oge me he ka ogânâ hwan hofuc.
- 11 Ge Khong, oge hia but labageju, oge me ca he ka ot ;
Ie únyi ae khana at he ka ânyâ könya ?
- 12 Khong lö, e unyik anyik je khöbi gam : Oge me he ka hudo je ole köu.
- 13 Anyin a u je hia but omelö hanuk únyi hnyi mok :
Hawa, u je ca omelö li cak, ödra ka waifilica ?
Me inye he ka he hnyi hnyimakan Khong
Hnyi melaminy tavat ae möt.
- Eke, oge me he ka ikhölö hnyi hnenon li labenyâm,
2 Oge me he ka hongot ka Khong ae Beönua ;
A Khong, at ame ânyâ ta je únyi hia hobi könya.
3 E ame he ka úkhünöng únyi hnyi drany me omeli nya,
Eka haikongu nya hnen at ame me-mang könya. [Sela.
Ame he Khong ka kunâ anyin betenge me hnathu.
4 E 'ú hanuk hnyi wanben ta je liona ;
Oge me mokut unyin tavat adre me hlâ,
Wale lakon tavat a je ö me fana ta je nyudra.
Ke haba bohmödra me hele vat ae so hwan.
5 Khong lö, e so u he ka görany hon ta je drany ;
Me ânyâm hmanenang hon hmeledrany hia thithö.
6 Adre hia but penapena hnewe hobi kâu li cak ;
Ame hlec hnyikânâi hanuk :
Adre hia but hiny thop hnyi hnyimakökö ; Adre me ka ta hmetu but eü hnyi hnyin e. [Sela.
7 Khong lö, e hmâ but hnyekuk, e hmâ bala but hnyekuk :
Oge me he ka khumöng, eke, oge me he ka khumöng olungö.
8 Hmanenangik lö, hmak dö ; nabela me kitarâ lö, hmak dö :
Ke oge me he bi nya ka hmâkâ hnyi haolany.
9 Than lö, oge me he ka ole köu hnyi wanben ta je hnyei :
Oge me he ka khumöng olungi u hnyi wanben tavat.
10 Anyin ae gan hmâ ânyâm ibetengjö ke ne o but ka hnyi ta je drany ;
Ke ânyâm hnathu ke ne o but hnyi ta je úlä.
11 Khong lö, e so adre me ogöranyi u hon ta je drany ;
Ke ânyâm hmanenang hon hmeledrany hia thithö.

SALAMO 57.

Hobi kâu at thik khumöng ; adre hai hnyi Al-tasheth. Salamo anyi Davita ; hnyi ðen e ame kec ga Saulo, ka hnyi op.

KHONG lö, betenge ju gak, betenge ju gak ;
Anyin ame kic gam hanuk :

SALAMO 58.

Hobi kâu at thik khumöng ; adre hai hnyi Al-tasheth. Salamo anyi Davita.

HAWA, öbun e laba hnyibü ke wisa !
Hawa, e föfâ hnöbun je hna owisa,
öbun lakon tavat ?

SALAMO 59.

- 2 Eke, öbun e ányá únyi ae hwali eú hnyi hnyok ;
Öbun e tuloto hnyi hnyei úokongúny anyin je hnyamöbun.
- 3 Adre me oatkanyua tavat ae kong hwán ge hna hnokoá :
Adre me he hwali hwán eú hnyi hnyok, me ha je thoi.
- 4 Haba anyidra páizon me helá me páizoniny on :
Ödra úcú me asipi ae wejiji, at ame hlöng hnyikönyen ;
- 5 K' ame ca löng ifucin tavat bibihwakecin,
Eja ke ne a ne metá hmönyin hnödra hna bibihwakecin.
- 6 Khong lö, kot hmetro but je nyudra hnyi hnyin ta je hnyimödra :
Iehova lö, tho degecá but ta je wehúlúsinainy je nak liona.
- 7 E so adre me oköi' ödra but helá me köio ame hingölö wia :
E ka lau anyin cafana, me so ame he je fana ka heláke únyi adre subá degecá.
- 8 E so adre ohí' ödra helá me wasua ame köio but :
Helá me erkin ame köluhabú, a ca hnyi wá bi seúnö.
- 9 E tiga ca löng bi hnen anyibun je öt je angö,
Me e ame he ka túá degecá e ge höu, ame ne hát ame ne möt.
- 10 Ame he at wisa ka senyin, e ka wá hna bi hwaban :
E ame he ka hneú li can hnyi dren at ae kong.
- 11 Me me he bi tavat ka ha, ka habe, E hnathu e hu troban hobi káu at ae wisa :
E hnathu e hu Khong at ame owisa eang hmeledrany.

SALAMO 59.

Hobi káu at whik khumöng ; adre hai hnyi Al-tasheth. Salamo anyi Davita : hnyi hna úkhá-nöng hnö Saulo he ka tuö uma m' adre me he ka hlingá e.

- K**HONG lö, omeli nya but únyi ge je iwahnaihmiony mönya ;
Ogöranynya thö únyi ge tavat adre me tot könya.
- 2 Omeli nya but únyi ge tavat adre me ányá únyi ae kong,
Ke omeli nya thö únyi ge tavat adre me behingála dra.

- 3 Anyin a wá bi, adre me mokut duöng ka hanuk ;
Tavat hwege adre me úkhacaköu könya :
Iehova lö, ca can hnök hna hanyáúá, me monu.
- 4 Adre me wadring me penapen' ödra bi ke ba bi anyik monu :
Hmak dö he ka hadruo nya, me wá.
- 5 Haba u Iehova lö Khongon sabaoth, Khongu Isaraela,
Todró he ka sená ta je hnyei hia thithö :
Ca he ka betenge bi ge tavat ae kong adre hanyáúá. [Sela.]
- 6 Adre me hmetuhmetu hnyi sahad, adre me tenge kukák helá me kuli,
Me he igigilö taun.
- 7 Wá bi, adre me khöimage but ae je hnyimödra ;
E bi ta je hele vat hnyi je esongodidra :
Anyin a haingödra, ka habe, Ie at ame löng ?
- 8 Iehova lö, u me he ka hlum' ödra ;
U me he ka hiá ta je hnyei hia thithö.
- 9 Tang hwegiök lö, oge me he ka lubahing u :
Anyin a Khong thibi anyik hhabá ae beú göranyai.
- 10 Ame he Khongon anyik betenge ka úkhanö mönya
Khong ame he ka hna könya ka wá wek ge je iwahnaihmiony mönya.
- 11 Ca hling' ödra bi, wá e nye he lakeik ka hnying :
Than lö, a becihmun,
Ovesei ödra but ge manám man, ke hagut' ödra but.
- 12 Can hnödra hna hulö ge hnyimödra, me hofuciny je esongodidra,
E so adre me he ka nuc ödra hnyi anyidra bi gan,
Ke can úhangö me thoi adre me ha.
- 13 Öaú' ödra but ge hmönyin, öaú' ödra but, me me hi' ödra but :
Ke okhan' ödra thö a g' ame musi Khong hnyi wanbö Jakob, [Sela.]
Ke ne o but hnyi je can hmeledrany.
- 14 Ke hn' ödra he ka hmetuhmetu hnyi sahad, hn' ödra he ka tenge kukák helá me kuli,
Me he igigilö taun.
- 15 Adre me he ka he monu he ka heleú han,
Me bec thibi hnyi hnyinghet hia a ne ca sekudra bi.
- 16 Ke oge me he ka khumöngö tang hwegiám ;

- Eke, oge me he ka khumöng ogânâ ânyâm ibetengiö hnyi hnyomakatu : Anyin a u thibi anyik tap ae beú göranyai, Me hnök hnabâ hnyi üen oge me vec hnyin.
- 17 Tang hwegiök lö, oge me he ka khumöng olungi u : Anyin a khong thibi anyik tap ae beú göranyai, me Khongon ibetengiö gak.

SALAMO 60.

Hobi kâu at vhiik khumöng : adre me hai hnyi Susani Edutha : Salamo anyi Davita, hnân ünö : hnyi ün e ame val me Arama-naharaimi me Aramazoba, walegi hnyi ün ame hmetuhmetu Joab me kot tavat a treelv thauzan at Edoma hnyi hnyigöulen bucen Sält.

- K**HONG lö, u je hia but hna degeci öhmun, me tho bagut' öhmun ; U je hia but hmönyâm ; u na he ju ka ot'il' öhmun hmetu.
- 2 U je hia but bwebwelâ hmeledrany ; u je hia but kia e : Tibet hmetoâ thö je hmoucainy ; anyin ame bwebwet.
- 3 U je hia but omanenâ ka lakem ta je ünyi ae hmak : U je hia but kun' öhmun he ka ijem waina ame omonumonu at.
- 4 U je hia but ham boúdila ka tavatadre me outö u, Me me he ka manen can hnathu. [Sela.
- 5 E so u ma omelö ge hnyamâm a metâm, me ling öhmun ju. Me me möt ut tavat u me betenge gadra,
- 6 A hia but Khong fuc hnyi hwakecin ae kap ; oge me he ka ohobelua : Oge me he ka khenâ Sekema, me tuluto hnyigöulen bucen Sukotha.
- 7 Anyik bi Gileada, ke anyik Manase ; Ke singiny bök Eferaima ; Ke Juda anyik uciny musi.
- 8 Moab anyik utkaia hnân sou ; Oge me he ka khûâ hnyi Edoma tangen hnyeúcak : Filsiti lö, hongot dö göranyai can inya.
- 9 Ie at ame he ka hum nya ka hnyi taun ae hwege ? Ia hia but lili nya Edoma ai ?
- 10 Khong lö, hawa, ca u thibi at ame hna degeci öhmun ? Khong lö, u je ca tha he me anyihmun je utbavat.

- 11 Hadru' öhmun dö ünyi ge iwahnaihmiöny : Anyin ae ünyi baú bi hna hadruâ hnen at.
- 12 Ünyi ge Khong, ate me he ka hwege : Anyin a e thibi at ame he ka uto ta je iwahnaihmiöny möta,

SALAMO 61.

Hobi kâu at vhiik khumöng ; hnyi Negina. Salamo anyi Davita.

- K**HONG lö, löng ju hok hwatenge ; Tevehlöng ju hijik hic.
- 2 Oge me he ka hongot köu ünyi hnyican hmeledrany, e ka hlöuhlöu hnyekuk : Lili nya ju ka hnyi kie görany huk.
- 3 Anyin a u thibi hnök hna lubaduöng hnyin, Me hnabâ ae hwege hnyi hnyimakan iwahnaihmiöny.
- 4 Oge me he ka laba hnyin umâm uma menâ nyiele balua : Oge me he ka lubaduöng hnyi hmenou li labenyâm. [Sela.
- 5 Anyin a haba u Khong lö, u je hia but löng anyik je khöbi : U je hia but ham könya jekhöu e ücü ködra adre me outen iâm.
- 6 U me he ka bi hanen ta je bong ka je bong bongon than : K' ame helâ me ta je dö ae se ta je hunainy.
- 7 E ame he ka laba hnyi hnyimakan Khong nyiele balua : U na penapena thö ibetengiö me hnathu, hnân he ka tuö e.
- 8 Me oge me he ka khumöng ogânâ iâm nyiele balua, M' inye he ka vheno thö anyik je khöbi hnyi je bong.

SALAMO 62.

Hobi kâu at vhiik khumöng ; hoton hwakeci Jeduthun Salamo anyi Davita.

- A**ME laba hnyibú hanuk ka Khong thibi : Ünyi gan anyik möt.
- 2 E thibi kicik me at ame omeli nya : E thibi anyik tap ae beú göranyai : adre me ca he ka ti bwebweli nya.
- 3 Ke ne o but kehö öbun e he ka utut ha at, M' öbun e he ka hlingâ e, wale öbun hia,

- Helâ me hak veto ame ihnyöng, ke hak
ae memeny ?
- 4 Adre me vñök úhnenamö he ka hagutâ
e únyi hnyi anyin so ;
Adre me senyiná je thoi :
Adre me haisoá ge je hnyimödra, ke
úhangö bi eú hnyi hnyok. [Sela.]
- 5 Hanuk lö, e so u me he ka laba hnyibú
ka Khong thibi ;
Anyin a únyi gan hnök hna gejon.
- 6 E thibi kicik, me at ame omeli nya :
E thibi anyik tap ae beú göranyai ; adre
me ca he ka bwebweli nya.
- 7 E bi unyin Khong melik me hmanenan-
gik :
Kicik ae hwege me hnök hhabâ unyin
Khong.
- 8 Tavat lö, labageju thö kâu hnyi je bong ;
Hingálâ but je hnyekubun hnyi hnyi-
makan :
Khong thibi hnöta hhabâ. [Sela.]
- 9 Ta je thatúnyi bi houmonu, ke thoi bi
tawat ae únyi hnathu :
Ödra háhá hnyi tulut ;
Ödra tha háhá hon thatúnyi.
- 10 Ca geju bi ka hwakecin sedá,
Ke ca hobelöu bi ka hnyi hwakecin
venöu :
E ka osehia tot omejeú, ca hnyok kâu.
- 11 Khaca thibi hofuc ame ha Khong,
Lo li hofuc oge me löng, ka habe,
E unyin thibi Khong tang hwege.
- 12 Than lö, e unyâm thibi minya ibetengiö :
Anyin a u je bi hwaban ka tawat hia e
úcû me anyidra huliwa.

SALAMO 63.

Salamo anyi Davita, ke tiga e hnyi hnyebuba Juda.

- K**HONG lö, a thibi Khonguk, o ge me
he ka elöm u hnyi haolany :
E beic hanuk unyâm, e gan hmâ weny
unyik kôu,
Hnyi hnyeí ae mada me sēnyin, dok ae
ba köiö hnyin.
- 2 Oge hia but ö u hnyi umâm uma ae kap,
M' inye he ka wâ manâm man me ânyâm
hmanenaug.
- 3 Anyin ae so ânyâm ibetengiö hon möt ;
Ame he li esongodik ka oganö u.
- 4 Helâe oge me he ka haisoi u inye tiga
möt :
Únyi hnyi iâm oge me he ka hai göran-
yai li hnyamök.
- 5 Ame he ka sekon hanuk helâ me hnen
onyen je jö me pipikhenya ;

- Ke ame he hnyimök ka oganö u hnen li
esongodiny senyin ;
- 6 Iny ka únykúmi u hon hnök hna
mokut,
Me wâ únykúme gam hnyi je hmak
hnyi hnyinghet.
- 7 Anyin a u je hadruo nya ehac,
Me oge me he ka senyin hnyi hmenon
li labenyâm.
- 8 Ame hwege he hanuk hotom :
Haba at ame ci nya, me, hnyamâm a
metâm.
- 9 Ke haba ödra adre me elâm hanuk, he
ka ohia e,
Me adre me he ka utut ka hnyi je
uthankonginy hmeledrany.
- 10 K' adre me he ka hn' ödra but ka hnyi
maniny hele vat :
Adre me he ka hnân an je alope.
- 11 Ke ame he than ka senyin ka Khong :
Adre me he hia ka hobeluâ, wale tavat
adre me khemanyin gan ;
Anyin adre me he ka hlöng hnyimen
tawat adre me thoi.

SALAMO 64.

Hobi kdu at vñik khumöng. Salamo anyi Davita.

- K**HONG lö, löng ju hok hwatenge iny
ka khöu :
U me he ka tuö anyik möt e ka outen
iwahnaihmöny.
- 2 U me he ka ikhölö nya hnyi úhnenamö
duöng anyin tavat adre me ânyâ
monu ;
Me imonumonuinny tavat adre me ânyâ
hwali :
- 3 Hnyat adre me khet je bohmödra helâke
hele vat,
Me lau kafana me hlec anyidra je fana,
wale je hofuc ae hiny :
- 4 M' adre me he ka fana at ae wisa hnyi
je dok ae iyong :
Adre me ie fana e, ke ca ot bi.
- 5 Adre me sihwegi ödra bi hnyi únyi ae
kong ;
Adre me vak he ka töu hnewe hnyi dok
ae iyong ;
Haingödra, ka habe, Ie at ame he ka
wâ ?
- 6 Adre me elâm ta je únyi ae kong, hai-
ngödra, ka habe, Ate hia but elâm
wia :
Ke ve dit je hna únykúme, me je hnye-
kudra.
- 7 Ke Khong ame he ka fan' ödra ;

- Adre me he ka ie aat dö ge fana.
- 8 Heläe adre me he ka ta, ke e kong bi je bohödra bi ködra.
Adre me he tavat hia adre me ö'dra ka nyinyikâ je bödra.
- 9 Ke ame he tavat hia thithö ka ot ;
Ke adre me he ka haimemenâ huliwa anyin Khong.
Me wâ únykúme hnyi metâ hnen hna ányâ.
- 10 Ame he tavat ae wisa ka senyin kö Iehova, me labageju káu ;
K' adre me he hia tavat adre me hnyok wisa ka hobeluâ.

SALAMO 65.

Hobi káu at chik khumöng. Salamo wale khumöng anyi Davila.

- K**HONG lö, adre me he ka laba hnyibú, me oganö u hnyi Ziona :
Adre me he ka subâ köu ta je khöbi.
- 2 At ame löng hic lö,
Ame he tavat hia thithö ka o but köu.
- 3 E hwege huk ta je únyi ae kong :
Haba hnöhmun ta je hna hanyáúâ u me he ka kot degecá.
- 4 Hnahic hnen at u je úca, me ohakekenyi u,
Me me he ka laba hnyin je hnyeulem :
Ame he ka sekuhmun ge soiny umâm uma,
Wale dok ae kap a umâm uma.
- 5 Khong lö, at ame omeli öhmun,
U me he ka thu köhmun ge ta je únyi hnân outen hnyi hwakecin ae wisa.
U thibi at adre me labageju káu ke ne o but hnyi je can hmeledrany,
Me hnyi köiö hnyi dok ae sákáú :
- 6 Wale at ame otethmâ je bucen hnen maniny man ;
Ke ame weikâ hwege :
- 7 Wale at ame ohnyibö iüiny je köiö, a iüiny je wabuluiny,
Me imonumonuiy ta je hnyei.
- 8 Adre me outen minya ányâm ta je haten tavat adre me labâ je can hmeledrany ;
U me wia hanymen hnyomakatu me sahac he ka senyin.
- 9 U je senâ hmeledrany, me ödiâ e,
U je ohosoâ e ;
A unöngötö ge köiö wagewe anyin Khong :
U je penapena hwit hobi ködra, u je penapena bánâ kânâ.

- 10 U je hneú gânâ je ogoweiny,
K' u je ányáwia je khölökiny :
U je omitâ e ge we ae hwege ;
U je ohnahicâ e k' ame kú.
- 11 U je obicâ huna ge hwakecin ae so ;
K' ame khukhula dem je gethen ge pikhenya.
- 12 Ame khukhula ka hnyi hon ta hnyei hnyi hnyeubua :
K' adre me oweikâ je dok ae hut ge senyin.
- 13 Adre me khavâ ta hnyei ge je hnahat mamoe ;
Ke adre me tube je hnyigöuleny bucen ge hwit ;
Adre me hongot senyin, k' adre me khumöng dö.

SALAMO 66.

Hobi káu at chik khumöng. Salamo anyi Davila, a khumöng.

- H**MELEDRANY hia thithö lö, hongot senyin ka Khong :
- 2 Khumöngö hmanenanginy ien ;
Omeca thö hna oganá e.
- 3 Ha thö ka Khong, ka habe, Hnân öbubuny ge hnâm je hna ányâ !
Únyi hnyi úganiny tang hwegiâm ame he je iwahnaihmiöny möu ka nom ju köu.
- 4 Ame he hmeledrany hia thithö ka khudrung ju köu,
Me khumöng köu ;
Adre me he ka khumöngö iâm. [Sela.]
- 5 Ai öbun ka wâ ta je huliwa anyin Khong ;
Hnân öbubuny gan hnyi hnen hna ányâ hon ta je lakon at
- 6 E ame wia köiö me me hnyei ae mada :
Adre me he hanyáúâ wagewe ge ta je cadra :
Waleling ate me senyin káu.
- 7 E ame musi nyiele balua hnen hwegien ;
Ke haba li emakan ame tuö ta je hnyei ;
Ca he tavat úkhin fuc ka bi gan. [Sela.]
- 8 Öbun ta je hnyei lö, haisoâ thö Khong nguta,
Ölungâ thö hna oganá e ;
- 9 Wale at ame omeli öta tot,
K' ame ca hna but ta je cata he k' bwebwet.
- 10 Khonguhmun lö, u je hia but cubic öhmun :
U je hia but cubic öhmun helâ me man hna cubec sileva.

- 11 U je hum öhmun ka hnyi ert ;
U je ip bok ae hmak hon li jebalainu-
hmun.
- 12 U je kunâ tavat he ka tabâ je böhmun ;
Öhmun e vheno meic me köiö ;
Ke so bi u je oi öhmun ka hnyi dok ae
widrany.
- 13 Oge me he ka o ka hnyin umâm uma
me je hudiny leu,
Oge me he ka thamua köu anyik je
khöbi,
- 14 Waleji hna ha hnen li esongodik,
Me úsabö ge hnyimök, hnyi anyik vec.
- 15 Oge me he ka hudo köu je hudiny leü
ae pipikhenya,
Me únyi ae bo so hanen je mamoe бага ;
Oge me he ka tha hudo je bolok me je
got. [Sela.
- 16 Ai öbun, löng ju öbun hia öbun e outen
Khong,
Me oge me he ka aü gaga hnen hna
mädrâ hobi kâu hanuk.
- 17 Oge me hongot kâu ge hnyimök,
K' ame ogânâ e hnen bohök.
- 18 Oge ne únykúme hulö eü hnyi hnyekuk,
Ame ca he Than ka ling nya :
- 19 Ke e hnathu a hia but Khong löng ;
Ke a hia but tevehlöng hwan hijik hic.
- 20 E so he ka haisoâ Khong,
At ame ca degec hijik hic, me anyin
ibetengiö gak.

SALAMO 67.

*Hobi kâu at vñik khumöng. Hnyi Neginoth
Salamo, a Khumöng.*

- E** NA he ju Khong ka betenge gahmun,
me ohnahici öhmun,
Me oumumelamâ hnyimakan huhmun ;
[Sela.
- 2 M' adre me he ka wâ dem gethen eang
hmeledrany,
Me ânyâm úhömeli hnyi ta je hnyei hia
thithö.
- 3 Khong lö, e so ame he tavat ka ole köu.
E so ame he tavat hia thithö ka ole
köu.
- 4 E na he ju ta je hnyei ka senyin me
hobâ :
Anyin a u me he ka owisa tavat hnyi
wisa,
Me muso ta je hnyei eang hmeledrany.
[Sela.
- 5 Khong lö, e so ame he tavat ka ole köu ;
E so ame he tavat hia thithö ka ole
köu.

- 6 Haba hmeledrany ame wa :
K' ame he Khong, a hing Khonguta ka
ohnahici öta.
- 7 Ame he Khong ka ohnahici öta ;
K' ame he je can hmeledrany hia thithö
ka outen e.

SALAMO 68.

*Hobi kâu at vñik khumöng. Salamo anyi Davita,
a Khumöng.*

- E** SO Khong ame todrö, me me vese but
je iwahnaihmiöny mä ;
E so ame he tavat adre me hûkotiâ e ka
kec hnyi hnyimakan.
- 2 Ob' ödra ju, helâ me úchiöiny hainy
meic :
E so ame he ka hia tavat ae kong hnyi
hnyimakan Khong,
Helâ me wasu ame köiö ge meic.
- 3 Ke so ame he tavat ae wisa ka senyin
me hongot senyin hnyi hnyimakan
Khong :
Eke, e so adre me hobâ gan hmâ.
- 4 Khumöng dö ka Khong, ogânâ thö ien :
Khaü thö gethen hobi kâu at ame he
hnyi wanben je hnyebuba ;
Ien bi Ja ; ke senyin dö hnyi hnima-
kan.
- 5 Haba Khong hnyi hnyaban ae kap,
E thibi kamen ta je nakahme, me at
owisa ka ta je safac.
- 6 Khong ame oji hmâ tavat adre me hake
laba :
E ame hom je hua ca ka hnyi je dok
hnân senyin :
Ke haba tavat úkhin fuc, me adre me
laba hnyi dok ae atgec.
- 7 Khong lö, hnyi úen u je he hnyi hnyi-
makan lakem,
Me vheno hnyi wanben hnyebuba ;
[Sela.
- 8 Ame öbubuny hmeledrany,
Ame ta but minya drany hnyi hnyi-
makan Khong :
Waleling Sinai hnyi hnyimakan Khong,
Khongu Isaraela.
- 9 Khong lö, u je öta we ae gan hmâ,
U je hwegiâ hmeto jekhom e ka senyin
dut e.
- 10 Ame laba hnyin e ânyâm úkhacaköu :
Khong lö, hnyi ânyâm ibetengiö u me
penapena hobi kâu tavat ae ba ta
únyi.
- 11 Than ame ha hofuc :

- E ti se hia je momo adre me khetâ je uthumetu.
- 12 Ame kec je tuhan je utbavat, adre me kec dô :
Ke haba momo ame laba eiô hnyin uma ame khenâ omjeû adre sôh.
- 13 Hawa, öbun e he ka mokut hnyi je hagingy mamoe,
Helâ me li labenyin biny adre tube ge sileva,
Me je leûnen unyin ge gol ae hadröngöc.
- 14 Hnyi ün Ataekhanahia ame oveseâ je than hnyin e,
Waleji ame helâ me útainy kiona hnyi Zalemon.
- 15 Bucen anyin Khong, bucen Basana ;
Bucen ae beû göranyai, bucen Basana.
- 16 Ieû gabun öbun je bucen ae beû göranyai, öbun e wâ ciâ,
Ge bucen waleji ame weny Khong he ka labâ ?
E ke, ame he Iehova ka labâ e nyiele balua.
- 17 Lo li miriad, ke se hia hmönyin je thauzan, je kariota anyin Khong :
E bi unyidra Than, helâe hnyi Sinai hnyi dok ae kap.
- 18 U je hia but ölö ka hnyi dok ae görany, u je hia but hom bâ ânyâm je bâ ;
U je hia but hom je bwihlany hnyi wanben tavat.
Eke, hnyi wanben tavat ûkhin fuc, me me he Iehova a Khong ka laba unyidra.
- 19 E so he ka haisoâ Than, at ame hijen honöta hok hnyi je bong,
Wale Khong at ame omeli öta. [Sela.
- 20 Haba Khong, me Khongon ûhömeli hobi köta ;
Ke e unyi IEHOVA Than je deny he ka kec ge mok.
- 21 K' ame he Khong ka tho ban je iwahnaihmioñy mē,
Wale wakaian ban ame kû leûnen at ame vheno bala hnyi anyin hulö.
- 22 Haingen Than, ka habe, Oge me he ka hom hmetu ûnyi hnyi Basana,
Oge me he ka hum ödra hmetu ûnyi hnyi ta je diliny köiö :
- 23 M' u me he ka hneû cam hnyi dra,
Me me he bohmen halem je kuli ka hu jekhöû ûnyi ge je iwahnaihmioñy möu.
- 24 Khong lö, adre hia but wâ hnâm je hna vheno,
- Waleji je hna he hnen Khonguk a Tuhök ka hnyi uma kap.
- 25 Ame bân tavat khumöng, k' ame bilingdrin tavat hai ta je ûnyikhumöng,
Hnyi wanben wahlu adre me khaûkhaû je bwinybet.
- 26 E so öbun e haisoâ Khong hnyi je ûkhacaköu,
Wale Than, öbun hanen hna pupuainy Isaraela.
- 27 Wale Beniamina a wakeiat ame musi ödra,
Me je taben at Juda me anyidrin dô,
Me je taben at Zebulona, me je taben at Nafatali minya.
- 28 Haba Khongom ame musö tang hwegiâm :
Khong lö, owhegiâ thö hnâm hna ânyâ hobi köhmun.
- 29 Can umâm uma kap hnyi Jerusalema
Ame he je than ka ham je bwihlany köu.
- 30 Thawâ ju je menoiny ta saamun,
Me je bolok ae se hia, tha ödra me je nokon kau halen tavat,
Adre me uto ge je cadra je ong sileva ;
E ame hia but oveseâ tavat adre me senyina vat.
- 31 Ame he ka o but je than ûhedra Aigupito ;
Ame he Aithiope ka ie inâ li hnyamen ka Khong.
- 32 Öbun ta je dökhuiñy hmeledrany lö, khumöng dô ka Khong ;
Ö öbun e oganâ Than ; [Sela.
- 33 At ame tabâ draniny ta je drany, a ûnyi adrem ;
Wâ bi, e ame ha hofuc ge hwan ae hwege.
- 34 Ha thö hwegien Khong :
E bi anyin hmanenang hu Isaraela,
Me hwegien hnyi ta je ûlä.
- 35 Khong lö, u at hnân outen ûnyi hnyi ânyâm je dok ae kap :
Haba Khongu Isaraela, e ame ham wege me man ka je lakeiny.
Haisoâ thö Khong.

SALAMO 69.

Hobi kau at vhiik khumöng: adre hai hnyri je Sosani. Salamo anyi Davita.

KHONG lö, omeli nya thö,
Anyin ame o but ta je di ka hanuk.
2 Oge me cûlûlû hnyi hmudra ae dit, ke ba dok he ka tot hnyin :

- Oge me o but ka hnyi je köiö ae dit, me ame hülülüö nya hnen je wadutö.
- 3 Oge sēnyin dut ge anyik tenge; e atgec dö jeköwik:
A jok ut li emakök ke oge me halubahingen Khonguk.
- 4 Ödra se hia but hon leünen bök tavat adre me hmiödra inya ke ba can:
E hwege tavat adre me behlingö nya, wale je iwahnaihmiony mönya ge can ae ca hnathu:
Waleling m' oge me ham hmetu únyi oge me ca hügúná.
- 5 Khong lö, e khañö u anyik monu;
K' adre ca ikhâlâ gam hnök je hna ányâ hulö.
- 6 Than lö, Iehova tuhan sabaöth, ca he ke hna tavat adre me halubahingám ke ka hmehma únyi gak:
Khongu Isaraela lö, ca he ka hna tavat adre me elöm u he ka hmehma únyi gak.
- 7 Anyin a oge hia but hokhnyokâ úkong-uny can u;
A hia but tube hnyimakök ge hmehma.
- 8 Iny atkanyua but unyin je liamekeiny mönya,
Iny helâ me aten ke hnyei ka lakon hinyök.
- 9 Anyin a hia but utö nya hnen weny ae gan ka hnyi umâm uma;
K' ame ta but huk ta je úhiö anyin tavat adre me hiö u.
- 10 Hnyi úen oge me tenge, k' ame vec hanuk ge ca han,
Me adre me hiö nya can e.
- 11 Hnyi úen oge me khavâ úkhaú ae gan nân,
Me adre me wiö nya bi hnân taben úhiö ködra.
- 12 Adre me úhnenamö gak tavat adre me laba hnyi homagöule;
K' adre sit hwanök hnen tavat ic grâg.
- 13 Ke haba inya, Iehova lö, oge me hic köu hnyi úen ae úcú:
Khong lö, únyi hnyi úganiny ányâm ibetengiö
Thu thö könya hnyi hnathuiny ányâm úhömeli.
- 14 Omeli nya thö únyi hnyi hmudra, ke ca hnö nya but he ka cúlúlú:
E so adre me omeli nya únyi ge tavat adre me húkötüö nya, ke únyi hnyi je köiö ae dit:
- 15 Ca hna uóú he ka hülülüö nya,
- Ke ca hna bi dok ae dit he ka utö nya;
Ke ca hna bi thop he ka hlöng hnyimen huk.
- 16 Iehova lö, thu thö könya, anyin ae so ányâm ibetengiö:
Hwiö thö konya hoton ányâm je betenge ae se hia.
- 17 Ke ca ikhâlâ bi huyimákâm ka athnya-baem;
Anyin a iny vec; ie thu thö könya.
- 18 Hakekeny ju ka hanuk, me omelö e;
Bi hwaban dö anyik möt can je iwahnaihmiony mönya.
- 19 E khañö u hna haikongu nya, me anyik hmehma, me anyik hlöuhlöu:
E hnyi hnyimákâm ta je iwahnaihmiony hia thithö mönya.
- 20 E vec hnyekuk ge hna haikongu nya; ke iny unöngötö ge hmak:
Ke oge me halubahingen ibetengiö, ke ba bi;
Me úötubweli, ke oge me ca wâ bi.
- 21 Ke adre ham könya waada hnân ök jeú;
Ke hnyi hnök hna beic adre me ham könya vinega he ka ijem.
- 22 E so e hnân hnewe anyidra laulau hnyi hnyimaködra;
Ke ödra ka laba khötkic, e so ame offic únyi eling.
- 23 E so e wadröu but ta je emaködra, m' adre me ca wâ bi;
Me öbubuuy bala bi je jebalainudra.
- 24 Hingâlâ but hudra ányâm hmönyin,
Ke so he ka khöü ödra hwegien ányâm wathethöt.
- 25 E so e he ka ba wan anyidra je lap;
Ke ca he ke at ka laba hnyi umödra je uma mano.
- 26 Anyin adre me ovecâ at u je hia but kot;
Ke adre me úhnenamö ge tenge anyin tavat u je hia but oaatá.
- 27 Bi hanen ju hulö hon anyidra hulö:
Ke so adre me ca o ka hnyi hwakecám ae wisa.
- 28 E so adre me kot degeci ödra únyi hnyi tusiny möt,
Ke ca tha sihnalimidra bi me tavat ae wisa.
- 29 Ke iny vec me hlöuhlöu:
Khong lö, e so he ka ogóranyi nya thö ge ányâm úhömeli.
- 30 Oge me he ka oganá ien Khong hnyi khumöng.
Me olungá e ge ole.

- 31 Anyin a wale thibi ae so kö Iehova hon bolok,
Wale ae hu faoiny me boújimen bacan.
- 32 Adre hia but wá hnen tavat ae menyik:
Haba öbun tavat öbun e elám Khong, e so e he ka möt je hnyekubun.
- 33 Anyin a Iehova ame löng tavat ae theduoc,
K' ame ca húkötíá hnyat e ame ca.
- 34 E so e he drany me hmeledrany ka ogáná e,
Me köiö, me ta je únyi hia adre me he hnyin.
- 35 Anyin ame he Khong ka omeli Ziona, me otilá je taun anyi Juda;
K' adre me he ka labā e, me hu e.
- 36 K' ame he ka hu e hnen mátrániny lathnyabainy;
K' ame he tavat adre me hnyoká ien ka labā e.

SALAMO 70.

Hobi káu at chík khumöng. Salamo anyi Davita; hnán óánykáméa.

- K**HONG lö, logotö he ka omeli nya;
Iehova lö, logotö he ka hadruo nya.
- 2 E so adre me hmehma me monumonu
Tavat adre me elám hanuk;
E so adre me ohmetuhmetu ödra me ohmehm' ödra
Tavat adre me senyin he ka okongu nya.
- 3 E so adre me ohmetuhmetu ödra can hwakecidra hnán hmehma gan,
Tavat adre me ha, ka habe, Ohö, öhö.
- 4 Ke so ame he ka senyin me hoba gam tavat hia thithö adre me elöm u;
Ke so ame he bala tavat adre me hnyoká ányám úhömeli ka ha, ka habe,
Ogáná thö Khong.
- 5 Khong lö, mweimwei thö könýa;
K' inye at ae vec me theduoc:
U thibi at ame hadruo nya me omeli nya;
Iehova lö, ca he ka bec.

SALAMO 71.

- I**HOVA lö, oge me labageju köu:
Iny na ca he bala ju ka hmehma.
- 2 Omeli nya únyi ge hwakecám ae wisa, me uny nya:
Tevehling nya ju, me omeli nya.

- 3 Hamám bi he ka kicik hnán laba hnyin, me inye labö he bala ka hnyin:
U je hia but húná he ka omeli nya;
Anyin a u thibi kicik me hnök hnabá.
- 4 Khonguk lö, uny nya but únyi hnyi hnyamen at ae kong,
Únyi hnyi hnyamen at ae ca wisa me at úokonguny.
- 5 Iehova lö, Than, u thibi hnök hna labagejon;
Oge me labageju köu, hwán k' iny tiga hidróu.
- 6 Ame kap tilö nya únyi gam hwán hnyi hna hnöku nya:
U thibi at u je hum nya but únyi hnyeku bai:
Oge me he bala ka oganö u.
- 7 Iny úcü me únyi hnán láia gan ka tavat ae se hia;
Ke u thibi hnök hnabá ae hwege.
- 8 Ame he ka unöngötö hnyimök ge hna oganö u,
Me ge hmanenangám hnyi je bong hia.
- 9 Ca he ka hna degeci nya hnyi úen a iny hingat;
Ca hna degeci nya bi e ka hia but hwegiök.
- 10 Anyin ame úsabö gak je iwahnaihmiöny mönya;
Ke haba tavat tuö hanuk adre me vhök úhnenamö,
- 11 Haingödra, ka habe, A hia but Khong hna degecá e:
Wadring dö hoton me kát e; anyin ae ba at ame he ka omelö.
- 12 Khong lö, ca úsákátü mönya;
Khonguk lö, logotö he ka hadruo nya.
- 13 E so adre me he ka hmehma me hi' ödra but je iwahnaihmiöny me hanuk;
E so e he ka khaú' ödra adre me elám he ka okongu nya ge úhaikonguny me hlöuhlöu.
- 14 Ke ogo me he ka geju bala bi,
Me bi hanen tilá ka hnyi hnök hna oganö u.
- 15 Ame he hnyimök ka ha gaga hwakecám ae wisa,
Me ányám úhömeli hnyi ta ogö bong;
Anyin ae ca khanö nya úseiny e.
- 16 Oge me ka o hnyi man mani Iehova Than:
Oge me he ka ha thibi hwakecám ae wisa, a hwakecám thibi.
- 17 Khong lö, u je hia but nö nya hwán k' iny tiga hidróu;

- Ke oge hia but omanená ke ne o but walang ang ányâm ta je huliwa hnân láia.
- 18 Eke, Khong lö, ca he ka hnö nya hnyi anyik hingat me hûen ;
M' inye më he ka omanená tang hwegiâm ka ke dö,
Ke manâm man ka tavat adre me he ka o.
- 19 Khong lö, e ti beönua hwakecâm ae wisa ;
U at ame hia but ányâ ta je únyi ae gan hmâ,
Khong lö, ie at ae úcú möu ?
- 20 Haba u at ame omanená köhmun je vec ae hwege ke se hia,
Me u me he ka hmetu ka omeli öhmun,
Me hum öhmun hmetu göranyai únyi hnyi je dok a diliny hmeledrany.
- 21 Bi hanen ju ka hmanenangik,
Ke hmetu bi me okahwö nya.
- 22 Khonguk lö, oge me he ka oganö u ge nabeli,
Wale ányâm hnathu :
At ae Kap anyi Isaraela lö
Oge me he ka khumöng olungi u ge kitara.
- 23 Iny ka khumöngi u, me ame he li esongodik ka senyin gan hmâ ;
Me hanuk minya, waleji u je omelö.
- 24 Ame he bohömök ka ha hnyi je bong ge hwakecâm ae wisa :
Anyin a ödra hmehma me monumonu tavat adre me elâm he ka okongu nya.

SALAMO 72.

Salamo anyi Solomona.

- K**HONG lö, ham dö ka than he ka owisa únyi gam,
Ke ham hwakecâm ae wisa ka nokon than.
- 2 E ame he ka owisa lakem ge hwakecin ae wisa,
Me latâm ae vec hoton wisa.
- 3 Ame he ta je bucen ka öküâ úsoköu hobi kâu tavat,
Me je dok minya ae hut, hnen hwakecin ae wisa.
- 4 E ame he ka owisa tavat ae vec hnyi hnyei,
E ame he ka omelö lakon tavat ae ba ta únyi,
Me thu omomono at ame úkonguny.
- 5 Adre me he ka outö u ke tiga e bi seúnö,

- Ke tiga e bi tehi, ke ne o but hnyi ta je dö hia.
- 6 E ame he ka ta helâ me we hon ta hnaönying adre sö :
E úcú me we ame ta but ka hnyi ta hnyei.
- 7 Hnyi bonginy ta je bong ame he at ae wisa ka kú khulelau ;
K' ame he ka gan hmâ úsoköu ke ne o but ame aú but tehi.
- 8 E ame he ka musî minya únyi hnyi ke köiö ke ne o but ka hnyi ke köiö,
Ke únyi hnyi Wagewe ke ne o but ka hnyi je can hmeledrany.
- 9 Ame he ka nom kâu tavat adre me laba hnyi hnyebuba ;
Ke ame he je iwahnaihmiöny më ka drem kânâ.
- 10 Ame he je than Tasesa me je bomene ka ham ta je bwihlany ;
K' ame he je than Sheba me Seba ka ham ta je fat.
- 11 E ke, ame he je than hia thithö ka ta ju hnyikânâi kâu :
K' ame he ta je hnyei hia ka bi athnya-bainy.
- 12 Anyin a e ame he ka omelö at ae ba ta únyi e ka tenge ;
Me at ae vec waleji ae ba at he ka hadruâ,
- 13 Ke e ame he ka betenge ge at ae vec me at ae theduoc,
K' ame he ka omelö je hanon tavat ae ba ta únyi.
- 14 E ame he ka omelö je hanudra únyi hnyi hwakecin úsedö me hna okongoá ;
K' ame he ka únyi hnathu drödra hnyi hnyimakan :
- 15 M' adre me he ka möt : k' adre me he ka ham kâu goliny Sheba :
K' amo he tavat ka hic bala hobi kâu ;
K' adre me he ka haisoâ e hnyi je bong hia.
- 16 Ame he ka hu hnyi hnyei hwit ae gan hmâ hon ban je bucen ;
K' ame he ta je waniny ka bwebwet helâ me Lebanona :
K' ame he ka sot aten je taun helâ me hnaönyinginy hmeledrany.
- 17 Amo he ka thetmâ ien nyiele balua ;
K' ame he ka e bala bi e ka tiga hu seúnö ethö :
Ke ame he ka hnahic tavat únyi gan ;
Ame he ta ogö hnyei hia ka ha a e ame senyin.

- 18 E so adre me haisoi Iehova a Khong,
wale Khongu Isaraela,
E thibi at ame ányá ta je únyi hnân
láâ :
- 19 Ke so adre haisoâ ien ae hmanenang
nyiele balua ;
Ke so e unöngöt hmeledrany hia thithö
ge anyin hmanenang.
Amen me Amen.
- 20 A um dö ta je hic hiji Davita a nöku
Jese.

TUSI III.

SALAMO 73.

Salamo anyi Asafa.

- E** HNATHU e so hwakecin Khong kö
Isaraela,
A tavat ae kalaöt hnyekudra.
- 2 Ke haba inya, me oge me thöthö,
A ne haúhaú but li cak.
- 3 Anyin oge me ciâ ge tavat bi gan,
Hnyi üen oge me wá hnahic anyin tavat
ae kong.
- 4 Anyin ae ba vec hnyi anyidra mok :
Ke hwenying ut hwegiödra.
- 5 Adre me ca hnyi vec helâ me ke je
hnyat,
K' adre me ca okongu ödra helâ me
keihen.
- 6 Anyin a wale adre ovhekinyi ödra ge bi
gan ;
Adre me khavâ úkhaüen a úokonguny.
- 7 A didrut li emaködra hnen pipikhenya :
A bahihingölö je únykúmânen ta je
hnyekudra.
- 8 Adre me úhiö, me ha úkonguny hnyi
anyidra hulö :
Adre me ha biganá.
- 9 Adre me fuc göranyai ka hnyi drany,
K' ame ngenü eang hmeledran je bohmö-
dra.
- 10 Anyin a wale, ame hmetuhmetu jem
lakeiny :
Adre me ijem je köiö hnyin utkaia ae
unöngöt.
- 11 Haingödra, ka habe, Ame he Khong ka
kâmâu ka khana ?
Ke hawa, e hu wâhmakhmetoâ unyi
Beönua ?
- 12 Wá bi, wale bi eling tavat ae kong ;

- Adre me laba khötkic bala bi, me se
hia tot je omjehedra.
- 13 E hnathu, e únyi baú hnök hna okhala-
ötâ hnyekuk,
Me hinyem hnyi hwakecin ae ba hnyi-
kongon ;
- 14 Anyin adre me oveci nya hnyi je bong,
Me osöi nya hnyi je hnyomakatu hia.
- 15 Oge ne hia but ha, ka habe, Oge me he
ka ha helâe ;
Wá bi, inya at ame omonoâ ta je lakom.
- 16 Oge ne únykúme deny me inye he ka
khana e,
Únyi e ae vec kõnya ;
- 17 Ke ne o but oge me o ka hnyi uma
umen Khong,
Me únykúme thö obiny ködra.
- 18 E hnathu u je ip ödra hnyi je dok ae
haúhaú :
U je hagut' ödra hnyikânâi ka hnyi
hnaúhangö.
- 19 Eke, ame ie logöt ka ohi' ödra !
Adre me aú but hnen je únyi hnân
ootâ.
- 20 Helâ me man bwi e ka hmak dö at,
Helaê, Than lö, u ka hmak dö, u me he
ka ikiki ge hmenudra.
- 21 Anyin ame hiny dut hnyekuk,
K' adre me dá li jebalainuk :
- 22 Iny monu ke ca khandö nya ;
Iny helâ me meno hnyi hnyimákâm.
- 23 Ke so bi inya bala bi unyâm :
U je kât hnyamök a metök.
- 24 U me he ka su nya ge hnâm hna
úhnenamö,
Ke hwaban dö e u me he ka hum nya
ka hnyi hmanenang.
- 25 Anyin a ca hobi kõnya hnyi drany
ethö ?
Ke ba wek ge at eang hmelen ke hake
u ke.
- 26 E sēnyin dut unyik me hnyekuk :
Khong thibi kicin hnyekuk me jekhök
nyiele balua.
- 27 Anyin a wá bi, ame he ka hia but tavat
adre me úsákáúö möu ;
U je hia but ohi' ödra hia adre me bi
únyi monu digic u,
- 28 Ke haba inya, e so kõnya he ka hakekeny
ka Khong :
Oge me hia but wia Than Iehova me me
hnök hna lubaduöng,
M' oge me he ka omanená ányâm ta je
huliwa hia thithö.

SALAMO 74.

Salamo anyi Asafa, hnân ünö.

KHONG lö, iéu gam u me údigic balua but ?

- Iéu ame sâ gan ânyâm hmönyin ka hnahat mamoe a em ?
- 2 Ünükúme ju ânyâm úkhacaköu waleji u je úco ehac,
Waleji u je bi hwaban me me tribu a jekhom ;
Me bucen Ziona, dok u je laba hnyin.
- 3 Ogóranyâ thö li cam hon ta je uma ae únyi baú bala but,
Wale ta je únyi ae kong hia ame ânyâ hnen iwahnaihmiöny hnyi dok ae kap.
- 4 Haba ta je iwahnaihmiöny me adre me hmuhuu hnyi wanben ânyâm úkhacaköu ;
Adre me hai thö anyidra je boúdila me hnân je haten.
- 5 E manen dut e helâ me at ame hai thö Ta je giwa hnyi hnyot ae wanenec.
- 6 Ke walang haba ta je únyi adre kave mecâ,
Adre me tha kot degecâ ge je gö me je hama.
- 7 Adre hia but thong degecâ umâm uma kap ;
Adre hia but okongoâ hnyaban iâm ke ne o but ka hnyi kânâ.
- 8 Haingödra eú hnyi je hnyekudra, ka habe, Ótin e he ka tha walak' ödra :
Adre hia but thong degecâ je uma úkhacaköu hia umen Khong hnyi hnyei.
- 9 Ate me ca wâ ta je hatöta :
E ba hmetu bi perofeta ;
Ke ba at gata ame wâ úen ame he ka bi obiny hnyin.
- 10 Khong lö, ke ne o but kehö ame he je iwahnaihmiöny ka úhaikonguny ?
Hawa, ame he bala bi iwahnaihmiöny ka hmi ödra iâm ?
- 11 Hnân eú u je hom hmetu hnyamâm, wale hnyamâm a metâm ?
Lau but únyi hnyi úlaiâm me ohi' ödra.
- 12 Ke Khong thibi Tuhök kâú adrem,
At ame huliwan hna úhömeli hnyi wanben hmeledrany.
- 13 U je hia but subâ luâ köiö ge tang hwegiâm :
U je tho ban ta je tanimo hnyi je köiö.

- 14 U je kot omomono ta je ban leviathana,
U je ham e hnân han ka tavat adre labâ hnyebuba.
- 15 U je khenâ luâ pupua me wadutö :
U je ohmô ta je wagewe ae gan hmâ.
- 16 Ânyâm bi lany ânyâm minya bi lit :
U je hia but penapena melam me seúnö.
- 17 U je hia but ip je hnyigöulen hmeledrany hia :
U je hia but op honivakeny me hnyeun.
- 18 Iehova lö, ünükúme thö únyi ang, a ga hia but iwahnaihmiöny úhaikonguny,
Ke adre hia but hmiödra iâm hnen tavat ae monu.
- 19 U na ca he ju ka hna halem biny ka menoiny hnyot :
Ca he bala ka hnying möt anyin lakem adre me vec.
- 20 Ünükúme ju ânyâm úhihinyköu :
Anyin ae unöngötö je dok ae menekholom eang hmeledrany ge je bnyaban úkonguny.
- 21 E na ca he ju ka hmetuhmetu me hmehma tavat adre me okongoâ :
E so e he ka ogânâ iâm hnen at ame vec me at ae ba ta únyi.
- 22 Khong lö, todrö, ivinö thö hobi köu bi :
Ünükúme ju hna haikongu u hnen at ae monu hnyi ta je bong.
- 23 Ca he ka hnying ifucin je iwahnaihmiöny möu :
Ame ölö bala göranyai imedien tavat adre me tot köu.

SALAMO 75.

Hobi köu at thik khumöng ; adre hai hnyi Al-taseth Salamo anyi Asafa, a Kkumöng.

- K**HONG lö, öhmun e ole köu ;
Öhmun e ole, anyin a hakekeny dut iâm :
Ame úsabö tavat ge ânyâm ta je huliwa hnân láia.
- 2 Iny ka he ka wâ úen adre thu,
Me oge me he ka owisa hnyi wisa.
- 3 Adre me oköiâ hmeledrany me tavat hia thithö adre me labâ e :
Ke oge hia but otilâ je hmolominy [Sela.
- 4 Haingök dö ka tavat bi gan, ka habe,
Ca bi gan bi :
Me ka tavat ae kong, ka habe, Ca hai bi göranyai faoiny meno :
- 5 Ca ogóranyâ bi anyibun faoiny meno ;
Ke ca fuc bi ke hwege nyibun.
- 6 Anyin a ca úheny jimeio me jimeú,

- Ke ca úheny hwaiöu ame o but hna ogöranyá.
- 7 Ke Khong thibi at owisa :
E ame ohnyikáná ke at me ogöranyá ke at.
- 8 Anyin a e hnyi hnyamö Iehova kaia, ke ame hülülú hangoc dö waina ;
Ke unöngötö ge hna úthueniken, ke e ame hingálá únyi hnyi hnyin e :
E hnathu ame he tavat hia ae kong hnyi hmeledrany ka drem e, me ijem kánáiny.
- 9 Ke oge me he ka haimanená nyiele balua,
Oge me he ka khumöng ogáná Khongu Jakob.
- 10 Oge me he ka subá degecá ta je faoiny meno hia anyin tavat ae kong ;
K' adre me he ka ogöranyá li faoiny at ame ányá hwakecin ae wisa.

SALAMO 76.

*Hobi káu at chík khumöng ; hnyi Neginoth.
Salamo anyi Asafa, a Khumöng.*

- E** KHAN' ödra but Khong hnyi Juda :
E gan hmá ien hnyi Isaraela.
- 2 Ke e bi hnyi Salema umen uma mená,
Ke e hnyi Ziona hnyaban.
- 3 E ame thu degecá eling je fanainy cafana ;
Me bec, me hele vat, me vat. [Sela.]
- 4 U hmanenang me so úheny hnyi je bucen adre sei hnyin.
- 5 Adre hia but söh tavat hwege adre me mokut balua but ;
Ke adre me ca wá hmetu ta je hnyamödra hnen tavat hwege hia.
- 6 Khongu Jakob lö, únyi ge hnám hna thawá,
Ame tha mokut hnying kariota me hors.
- 7 U thibi hnán outen, wale a u :
Ke ie at ame he ka tot hnyi hnyimákâm u ka hmönyin dö ?
- 8 Únyi hnyi drany u je olöngá hnám hna owisa ;
Ame ot bi hmeledrany me ca bwebwet,
- 9 Waleji hnyi hna tot hnen Khong he ka owisa,
Me omelö tavat ae hnyikáná eang hmeledrany hia [Sela.]
- 10 E hnathu ame he ka oganö u hnen hmönyin anyin tavat :
Ke u me he ka thawá kolon je wathethöt.
- 11 Hükölö khöbi ju, me thamúa kö Iehova Khongubun :

- E so ame he tavat hia adre me laba igigilö e ka ham je bwiblany ka at ae úcú ke ka outen.
- 12 E ame he ka sö degecá but hanon ta je tuhan :
E at hnán outen ka ta je thaniny hmeledrany.

SALAMO 77.

*Hobi káu at chík khumöng ; hoton hwakeci
Jeduthun. Salamo anyi Asafa.*

- O**GE me he ka tenge ka Khong ge ifucik ;
Wale ka Khong ge hok hofuc, me e ame he ka tevehling nya.
- 2 Oge me elám Khong hnyi bonginy anyik vec :
Oge me iná hnyamök hnyi lit, me ca mená bi ;
E höcö hanuk he ka kap únyi hnán otubwelá.
- 3 Oge me únykúme ge Khong, ke iny hlohlo :
Oge me ha gaga anyik vec, k' ame bahihingölö hanuk. [Sela.]
- 4 U je ci li emakök inye hmáká :
Iny hlouhlou but, ke ca khanö nya hmetu bi he ka fuc.
- 5 Oge hia but únykúme ta je bong káu adrem,
Wale ta je huna adrem balua.
- 6 Oge me únykúme ge anyik khumöng hnyi hnyinghet :
Oge me úhnenamö me hnyekuk bi ;
Ke haba hanuk ame ti elám wia.
- 7 Hawa, ame he bala Than ka údigic !
K' ame ca he hmetu bi ka betenge !
- 8 Hawa ame hia anyin íbetengiö nyiele balua ?
Hawa, ame he ka önua hnen hna ha báná nyiele balua ?
- 9 Hawa, a hnying ut Khong he ka betenge ?
Ke hawa, e ame hlöng ut anyin tang betenge ae menyik hnyi anyin hmönyin ? [Sela.]
- 10 Ke haingök, ka babe, Walang anyik sényin ;
Ke oge me he ka únykúme ta je hunainy hnyam bi a metán Beönu.
- 11 Oge me he ka ha gaga ta je huliwa anyi Ja ;
Anyin oge me he ka únykúme ányám ta je únyi hnán láia únyi adrem.

- 12 Ke oge me he ka únykúme ányám ta je huliwa hia,
Me únykúme gaga ge hnám ta je hna ányá.
- 13 Khong lö, e bi dem gethen hnyi dok ae kap;
Ie ke khong ae gan ae úcú me Khong?
- 14 U thibi Khong at ame ányá ta je únyi hnán láia :
U je hia but omanená tang hwegiám hnyi wanben ta je hnyei.
- 15 U je hia but omelö lakem ge benyám a metám,
Wale je mátráni Jakob me Josefa. [Selá.
- 16 Khong lö, a o u but köiö ;
A o u but köiö, me ot ju.
Ame öbubuny minya je dok ae dit.
- 17 Ame hingölö but köiö hnen je úlá ;
Ame lung drany :
Ame gá thö minya ányám je fana.
- 18 E hnyi höu hwan ányám than ;
Je hucuce adre me ömumelamá hmeledrany :
Ke hmeledrany ame öbubuny me bwebwet.
- 19 E bi hnyi köiö dem gethen,
Ke eú hnyi köiö ae gan deny hnám hna he,
Ke ca manen bi je deny je hnyéucam.
- 20 U je su lakem helá me hnahat mamoe,
Ge hnyamö Mose me Arona.

SALAMO 78.

Salamo anyi Asafa, hnán únö.

- L**AKEIK lö, tevehlöng ju hnök hnan-nyibu :
Ta ju je hnyikönyöbun ka ta je ifucin hnyimök.
- 2 Oge me he ka khöng hnyimök me úhö-úcú ;
Oge me he ka ha ta je hofuc ae iyong káu adrem :
- 3 Waleji ta je únyi ate me löng me khan' öta,
Ke haba lakamöta adre me ha gaga köta.
- 4 Ate me ca he ka ikhálá ge ta je mátránidra,
K' adre me he ka ha gaga je hna oganö Iehova ka dö ame he ka o but,
Ke tang hwegien, me ta je únyi hnán láia gan waleji e ame ányá.
- 5 Anyin a e ame otílá unyi Jakob únyi hnán ohnatho,

- K' ame omanená hnan-yibu unyi Isaraela,
Waleji e ame húna ka lakamöta,
M' adre me he bi ka omanená ka lakudra :
- 6 Me me khana thö hnen dö ame he ka o,
a lakudra adre me he ka hnokoá ;
M' adre me he bi minya ka todrö me ha gaga ka lakudra :
- 7 M' adre me he ka geju ka Khong,
Me ca hnying je huliwa anyin Khong,
M' adre me he ka tuö anyin je hnan-nyibu :
- 8 M' adre me ca he ka tha úcú me lakamödra,
Waleji dö ae újöng me úkhin fuc ;
Wale tavat adre me ca penapena ta je hnyekudra,
Ke ca hnathu ta je hanudra ka Khong.
- 9 Adre me kec dö hnyi bonginy vat
Lakon Eferaima adre penapena me hom je cafana.
- 10 Adre me ca vheno hna úhinhinköu me Khong,
K' adre höcö he ka vheno anyin hnan-nyibu ;
- 11 K' adre me hnying anyin ta je huliwa,
Me hnen je hna ányá hnán láia, waleji e ame omanená ködra.
- 12 E ame ányá ta je únyi hnán láia hnyi hnyimakan lakamödra,
Hnyi hnyei Aigupito, hnyi ta hnyei hnyi Zoana.
- 13 E ame subá luá köiö, me bi dedra ;
Ke e ame otílá köiö helá me li khölöki.
- 14 Haba hnyi lany e ame su ödra ge úlá,
Ke melaminy meic hnyi je hnyinghet hia.
- 15 E ame tho luá je kic hnyi hnyebuba,
Me habelidra heláke me únyi hnyi je dok ae dit.
- 16 E ame oá minya únyi hnyi kic je wadutö ame hingölö
Me hingálá köiö helá me je wagewe.
- 17 Ke so bi adre me monu bala bi káu,
He ka thu musi anyi Beönua hnyi hnyebuba.
- 18 Ke adre me cubec Khong ge je hnyekudra
Hnyi hnödra hna sumató ö 'dra meno.
- 19 Eke, adre me ulidro Khong ;
Haingödra, ka habe, Hawa, e khana Khong he ka laulau hnyi hnyebuba ?
- 20 Me wá bi, e ame kot kic, me ame hingölö but köiö,
Ame bahihingölö ta je wadutö ;

- Ke hawa, e khana he ka ham jeú minya ?
Hawa, e ame he ka penapena utiö hobi káu lakeiny ?
- 21 Anyin a wale Iehova ame löng, me ame wathethöt dö :
Ke adre hú meic unyi Jekob,
K' ame ölö bi minya hmönyin kö Isaraela ;
- 22 Anyin adre me ca labageju ka Khong,
Me gejon anyin úhömeli.
- 23 Ke so bi e ame húna ka ta je úlá ethö,
Me khöng ut ta je hwanumen drany ;
- 24 Ke e ame hingálá únyi ethö mana he ka ha ö 'dra,
Me ham ködra jeú únyi hnyi drany.
- 25 Haba tavat, adre me ve an jeú an tavat ae hwege :
E ame kúna ködra jeú a sekudra.
- 26 E ame okúá thö ang hwei únyi hnyi drany :
Me lelö hwaiöu ge maniny man.
- 27 Ke e ame hingálá ködra únyi ethö minya utiö helâ me sesâ,
Me je meno ame gâ helâ me önyin köiö :
- 28 Ke e ame okoloâ hnyi wanben hnödra hna hunuma,
Igilö ta je hnyabadra.
- 29 Me adre me han me sekudra hmönyin ;
Ke e ame hna but ködra wedra
- 30 Ke adre me ca thawâ bala bi hnödra hna weny,
Ke tiga e bi utiö hnyi je hnyimödra,
- 31 Me ame kú thö hmönyin anyin Khong ködra,
Me hlingâ ta je pipikhenya unyidra,
Me kot degecâ wahidrou hnyi Isaraela,
- 32 Ke so bi adre me tiga ányâ hulö,
K' adre ca labageju bi hnyi anyin ta je huliwa hnân láia.
- 33 Anyin a wale e ame ohia bongudra je bong hnyi únyi baú,
Ke je hunaidra hnyi ot.
- 34 Hnyi úen e ame hling' ödra, me adre me elâm dö e :
Adre me hmetuhmetu, me hwege hnö Khong.
- 35 Ke adre me únykúme a Khong thibi kicidra,
Me Khong ae Beönu a ame omoli ödra.
- 36 Ke adre me útakú ge hnyimödra káu,
Ke thoi káu ge je bohmödra.
- 37 Anyin ae ca wisa hnyekudra káu,
K' adre me ca hnathu bi ka hnyi hna úhinykôu mē.
- 38 Ke e at ae unöngöt ge ibetengiö, me e ame thang anyidra hulö, k' ame ca ohí' ödra bi :
Eke, e ame osehia ohmeto anyin hmönyin,
Ke ame ca oubáhlá anyin wathethöt.
- 39 Ke e ame únykúme a ödra tavat bi ;
A ang ame he but, k' ame ca hmetu but.
- 40 Ke ti se hia hnödra hna ukhin fuc máu hnyi hnyebuba,
Me ojátá hnyekon hnyi hnyot !
- 41 Ke adre me hmetuhmetu me cubec Khong,
Me haiúhnyúkongoâ At ae Kap anyi Isaraela.
- 42 Adre me ca únykúme bi hnyamen,
Me bong waleji e ame omeli ödra hnyin únyi ge iwahnaihmiöny.
- 43 Me hnen hna otílâ hnyi Aigupito anyin ta je haten,
Me anyin ta je únyi hnân láia hnyi ta hnyei hnyi Zoana ;
- 44 Me wia anyidra je wagewa, me me dra bi,
Me anyidra ta je di, m' adre me ca he hmetu ka ic.
- 45 E ame kunâ ködra ta je nöng he ka úlú' ödra ;
Me je rana he ka ohí' ödra.
- 46 Ke e ame ham troban ta idra ka ta je ihmâ
Me anyidra huliwa ka ta je wahamon.
- 47 E ame omoko haledra je vine ge we ae wahma,
Me haledra ta je úö sukamore ge megic.
- 48 E ame hna but minya haledra ta je meno ka we ae wahma,
Me je hnahat haledra ka ta je hucuce.
- 49 E ame kunâ ködra hlönginy anyin wathethöt,
A hmönyin, me wathethöt, me vec,
A je hna kunâ ae kong.
- 50 E ame bi gethen deny anyin hmönyin ;
E ame ca hom behânâ hanudra ge mok,
E ame hna but anyidra möt ka mok ae cap ;
- 51 Me hlingâ watö hnyi Aigupito,
Je wahwege ae nua hnyi je uma mano umö Hama :
- 52 Ke e ame lelö lakeiny helâ me je mamoe,
Me su ödra hnyi hnyebuba helâ me hnahat meno.
- 53 Ke e ame su ödra til' ödra wia, m' adre me ca ot bi :
Ke ame húlúlúâ je iwahnaihmiöny mödra hnen köiö.

- 54 Ke e ame hum ödra ka hnyi baten anyin dok ae kap,
Wale becen ang, a úco hnen hnyamen a metân.
- 55 E ame obâ aten ke je hnyei hnyi hnyimaködra,
Me ve khene idra hnen tulut,
Me olabâ je tribu Isaraela hnyi umödra je uma mano,
- 56 Ke so bi adre me cubec me úkhin fuc me Khong ae Beönuu,
Me ca vheno bi hnen je hna ohnatho.
- 57 Ke adre me hmetuhmetu me iyâwâ helâ me lakamödra :
Adre me saú but helâ me cafana ame önuu.
- 58 Anyin a adre me ohmönyinâ e ge anyidra je dok ae görany,
Me ociâ e ge anyidra je hnatheat,
- 59 Ke haba Khong ame löng, me e ame hmönyin,
Me ame ti ikikiâ at Isaraela :
- 60 Me e ame hna degecâ uma hnyi Silo,
Waleji uma mano e ame otilâ unyin tavat ;
- 61 Me hna anyin hwege ka hnyi hwenbâ,
Ke hmanenanginy ka hnyi hnyamen iwahnaihmiöny.
- 62 E ame hna but minya lakeiny ka hnyi hele vat ;
Ke e ame hmönyin ka jekhon.
- 63 Haba meic ame an wahidröu unyidra ;
Ke ba khumönginy faipoipo ge wahu.
- 64 Ame ta but anyidra tavat bihut ge hele vat ;
K' ame ca tengi' ödra hnen anyidrin ta je safac.
- 65 Waleling me me hmak dö Than helâ me at ame mokut,
Helâ me at ae hwege ame kuku can ame ic waina.
- 66 Ke e ame kot tilâ ta je iwahnaihmiöny mä hnyi kec a ödra :
Me hn' ödra hnân taben úhiö nyiele balua.
- 67 Ke haba khaca, e ame hom behânâ uma mano umö Josefa,
K' ame ca úca bi tribu Eferaima ;
- 68 Ke e ame úca tribu Juda,
Wale bucen Ziona e ame hnyok kâu.
- 69 Ke e ame op umen uma kap helâ me je dok ae görany,
Helâ me hmeledrany waleji e ame otet-hmä nyiele balua.
- 70 E ame úca minya Davita me me athnyabainy,
- K' ame hom but e únyi hnyi je haginymamoe :
- 71 E ame hom e únyi hnyi linen hna he hoton je mamoe ame úasin,
Me me haö Jakob a lakeiny, me Isara-ela wale jekhon.
- 72 Me e ame haödra hoton wisainy hnyekon :
Me su ödra hnen metâiny li hnyamen.

SALAMO 79.

Salamo anyi Asafa.

- K**HONG lö, ame o but aten ke je hnyei ka hnyi em ;
Adre hia but okongoâ umâm uma ae kap ;
Adre hia but tho Jerusalema me me vetaúnyi but.
- 2 Adre hia but ham ta je unyin lathnyabaem me hnân an ta je meno ame gâ ethö,
Wale viny ányâm wakap ka ta je me-noiny hmeledrany.
- 3 Adre hia but hingâlâ drödra helâ me köiö igigilö Jerusalema ;
Ke ba at he ka konim ödra.
- 4 Adre haikongu öhmun tavat adre me laba kakekenyi öhmun,
Adre me útuböny me hluma hnen tavat adre me laba igigili öhmun.
- 5 Iehova lö, ke ne o but kehö, u me he bala ka hmönyin ?
Ame he ányâm ciâ ka ubâhlâ helâ me meic ?
- 6 Hingâlâ but ányâm wathethöt ka tavat ae ca khan' ödra u,
Me ka ta je dokhu waleji adre me ca hawâ iâm.
- 7 Anyin adre hia but ön Jakob,
Me kia degecâ bi hnyaban.
- 8 Ca únyküme köhmun can ta je hulö anyin lakamöhmun :
E so e ie he ányâm je tang betenge ka outhmoki öhmun,
Anyin adre me hom úhnyükongo hwegiöhmun.
- 9 Khongon melihmuu lö, hadru' öhmun dö can hmanenanginy iâm :
Ke thöng öhmun dö, me ohia anyihmun je hulö ge iâm,
- 10 Hnân eú ame he ta je hnyei ka ha, ka habe, Ewa Khongudrin ?
E so e ka manen dut hnyi ta je hnyei hnyi hnyimaköhmun.

- Hna bi hwaban dra dren lathnyabaem adre hingälä.
- 11 E so e ame o but ka hnyi hnyimákâm mâng anyin tavat adre ca ;
Omelö tavat adre me kunâ he ka mok hoton úganiny manâm man ;
- 12 Ke bi hwaban ju a oseven ka hnyi úlainy tavat adre me laba hakekenyi öhmun
Hnödra hna haikongoâ, adre me haikongu u gan Than.
- 13 Me haba öhmun je lakem, me je mamoeiny em hneyi,
Öhmun e he ka ole köu nyiele balua :
K' öhmun e he ka haimemenâ hnân oganö u ka ta je dö.

SALAMO 80.

Hobi kâu at vñik khamöng : adre hai hnyi Sosani-Edutha. Salamo anyi Asafa.

- A**T tue mamoe a Isaraela lö, loug ju,
At ame su Josefa helâ me hnahat mamoe ;
At amelaba hon li kerubi, öumumelamá but.
- 2 Bwebwelâ thö tang hwegiâm hnyi hnyimákö Eferaima, me Beniamina, me Manase,
Me o but jem he ka omeli öhmun.
- 3 Khong lö, ohmetu öhmun ju ;
Me öumumelamá thö hnyimákâm, m' öhmun e he ka möt.
- 4 Iehova lö, Khongon sabaoth,
U me he ka hmönyin ke ne o but kehö ge hic hijin lakem ?
- 5 U je hia but haödra ge jeúiny tenge
Me habelidra gan hmâ ge deköien ecmak.
- 6 U je otíl' öhmun hnân iwatretra ka tavat adre me laba hakekenyi öhmun :
K' ame hluma je iwahnaihmiony möhmun.
- 7 Khongon sabaoth lö, ohmetu öhmun ju ;
Ke omelamá thö hnyimákâm me öhmun e he ka möt.
- 8 U je hom vine únyi Aigupito :
U je obâ je hneyi, me ta ju e hnyin.
- 9 U je bi hnyimakan e,
Me ame hwân dut me öunöngötâ hneyi.
- 10 Ame khavâ je bucen hnen hmenon,
Ke je vheiny e, helâ me je arasi anyin Khong.
- 11 Ame hlau ta je anginy ke ne o but hnyi köiö,

- Me je vheiny ke ne o but hnyi Wagewe.
- 12 Ieú gam u je kia degecâ haginý je hak,
Me adre me tau e hnen tavat hia adre me gethen eling ?
- 13 Ame oloú usukia e hnen buakainy hnyot,
Me an e hnen menoiny hnyot.
- 14 Khongon sabaoth lö, Ö u hmetu ju :
Wâ ju únyi hnyi drany, me wâ me senâ vine ang,
- 15 Ke tuö ju hna ta hnen hnyamâm a metâm,
Me anginy u je hat hobi köu bi.
- 16 Adre thong degecâ e ge meic, ke adre sö degecâ :
A hi' ödra but ge hna ú ödra hnen hnyimákâm.
- 17 E so e bala bi hnyamâm hon aten a hnyamâm a metâm
Hon lakon at waleji u je hat hobi köu bi.
- 18 Me öhmun e ca he ka hmetu gam :
Omeli öhmun ju, m' öhmun e he ka hawâ iâm.
- 19 Iehova lö, Khongon sabaoth, ohmetu öhmun ju ;
Omelamá thö hnyimákâm, m' öhmun e möt ut.

SALAMO 81.

Hobi kâu at vñik khamöng : adre hai hnyi Gitith. Salamo anyi Asafa.

- K**HUMÖNG hwege thö ka Khongon tang hwegiöta :
Hongot senyin dö ka Khongu Jekob.
- 2 Vec dö salamo, ke hom jem bwinybet,
Me kitara a adre me belöng, me nabela minya.
- 3 Túâ thö trutru hnyi úlabainy tehi,
Hnyi tehi a bekhöt hnyi bongon anyita bijeu ac únyi hnathu.
- 4 Anyin a hnanyibu ling kö Isaraela,
Hna húna hnen Khongu Jekob.
- 5 E ame otílâ e unyi Josefa hnân ohnathoâ,
Hnyi úheny dut hnyi hneyi Aigupito :
Waleji hnyi úen oge me löng hwan hneyi ae ca khanö nya.
- 6 Oge me uny jut hok únyi hnyi li abenyin :
Adre thang li hnyamen únyi hnyi tang.
- 7 U je khöú hnyi vec, me oge me omeli u ;
Oge me thu köu únyi hnyi dok ae iyong, a amen hwan than ;
Oge me cubic u hnyi je köien Meriba.

[Sela.]

- 8 Lakeik lö, löng ju, me oge me he ka ha
 cicö köu : Isaraela lö, u na he ju ang
 ka löng könya !
- 9 Ame ca he ka e unyâm ke khong
 kanyua ;
 Ke u me ca he ka khudrung ka khongon
 ke hnyei.
- 10 Inya thibi Iehova Khongom,
 At ame hum u but únyi hnyi hnyei
 Aigupito :
 Memang gan hmâ but hnyimâm, me
 oge me he bi ka öunöngötâ e.
- 11 Ke haba lakeik adre me ca löng ifucik ;
 K' ame ca ogö nya bi Isaraela.
- 12 Me oge me hn' ödra but ka hnyi ikikiny
 ta je hnyekudra bi,
 M' adre me he ka vheno bala bi ta je
 únykúmenödra.
- 13 E na he ju lakeik ha ling nya,
 Me vheno dek je gethen hnen at Isara-
 ela !
- 14 Oge me he ka ie ngâ je iwahnaihmiöny
 mödra,
 Me wia ju hnyamök ka tavat adre me
 oveci ödra.
- 15 Ame he tavat adre me húkotiö Iehova
 he ka iyâu kâu ;
 K' ame he ka tethmâ balua bi bongudra
 je bong.
- 16 Ke e ame he ka haödra ge hwit ae ti
 so :
 Me osekuni u ge hani únyi hnyi kic.

SALAMO 82.

Salamo anyi Asafa.

- K**HONG ame tot hnyi úkhacaköu anyin
 Khong ;
 E ame owisa hnyi wanben ta je khong.
- 2 Ke ne o but kehö öbun e he ka owisa
 hwalö,
 Me bi haten tavat ae monu ? [Sela.]
- 3 Owisa thö ka at ae sényin me nakahme :
 Ányâ thö wisa ka at ae vec me at ae
 theduoc.
- 4 Omelö at ae sényin me ba ta únyi :
 Thöng ödra bi únyi hnyi hnyamen tavat
 ae kong.
- 5 E ca khan' ödra, ke ca wâhmakhmeto bi ;
 Adre me genu hnyi menekholom :
 Ame bwebwet hia thö je taben hmele-
 drany.
- 6 Haingök, ka habe, Öbun je khong,
 Ke öbun hia je lakon Beónua.
- 7 Ke so bi öbun e he ka mok helâ me
 tavat,

- Me ta helâ me ta je than.
- 8 Khong lö, todrö, owisa thö hmeledrany :
 Anyin ame he ka hu gam ta je hnyei
 hia thithö.

SALAMO 83.

Khumöng walc Salamo anyi Asafa.

- K**HONG lö, ca laba hnyibú bi :
 Khong lö, ca hum bi, ke ca laba
 hmâ bi.
- 2 Anyin a wâ ju, a imonumonuny je iwa-
 hnaihmiöny möu :
 Ke haba tavat adre me húkotiö u adre
 hia but ogöranyâ je bödra.
- 3 Adre me vak wia he ka okongoâ lakem,
 Me úhanyinyâ ge tavat u je ikhâlâ.
- 4 Adre hia but ha, ka habe, Ötin e he
 ka ohi' ödra me me ca hnyei hmetu
 bi ;
 M' adre me ca he hmetu ka únykúme
 iö Isaraela.
- 5 Anyin adre hia but tha úhanyinyâ
 hwegeâ ;
 Ke adre me ohmâ úhinhinköu úö bi
 únyi möu :
- 6 Je uma mano umö Edoma, me at Isa-
 maela ;
 Me Moaba, me at Hagara ;
- 7 Me Gebal, me Amona, me Amaleka ;
 Me Filisiti, tha e me tavat aten Turo :
- 8 Ke ame úkhacaköu mödra Asuria ;
 K' adre hia but hom hadruâ laku Lota.
 [Sela.]
- 9 Ányâ thö ködra helâji me hua ányâ kö
 Midiana ;
 Me Sisera, me Jabin, hnyi wagewe
 Kisona :
- 10 Waleji adre ohi' ödra hnyi Eni-dora ;
 Adre me wi' ödra me me helâ me tatet
 hobi kâu kânâ.
- 11 Öuco ju ta je tuhödra me Oreba me
 Zeeba ;
 Eke, öuco ju je tuhödra hia me Zeba
 me Zalemuna :
- 12 Waleji tavat adre me ha, ka habe, E so
 ate me hügúnâ
 Je hnyei iny Khong.
- 13 Khonguk lö, öucü ödra me sesâ ame
 khenyi ge ang ;
 Me thatúnyin hwit ame ou ang dö.
- 14 Me meic at ame thong hnyot,
 Me báhlân meic at ame thong je bucen ;
- 15 Helâe u me he ka hnu ödra til' ödra ge
 ányâm höu,
 Me ooti ödra ge ányâm weneú.

- 16 Iehova lö, tube ju je hnyimaködra ge hmehma ;
M' adre me he ka elâm iâm.
- 17 E so adre me he bala ka hmehma me ot ;
Eke, e so adre me he ka hmak, me hia but :
- 18 Me me khan' ödra a u thibi, wale a iâm IEOVA,
At ae Beönua hon hmeledrany hia thithö.

SALAMO 84.

*Hobi kâu at whik khumöng; adre hai hnyi Gitith.
Salamo anyin laku Kora.*

- I**EOVA tuhan sabaoth lö,
Shaiba ge soiny umâm je uma menâ !
- 2 Ame ti weny hanuk, eke, ame mokhon ae behe ka hnyi je hnyeule Iehova ;
Ame khumöng senyin hnyekuk me vik ka Khong ae möt.
- 3 Eke, a wâ but wahelö hâûen,
Ke wahalep ame wâ dok he ka hnokoâ hnyin,
Wale ânyâm je taben hut, Iehova tuhan sabaoth,
Tuhök me Khonguk.
- 4 Hnahic hnen tavat adre me laba hnyin umâm uma :
Adre me he ka oganö u bala. [Sela.
- 5 Hnahic hnen at at ae hwege gam ;
Eû bi hnyi hnyekoâ hna cit gethen ame he Ziona ai.
- 6 Ame he hnyi wanben thopiny Tenge, adre me ânyâ e me hnân je hna pupu-ainy köiö ;
Eke, haba we a bân ame tube e ge je hnahic.
- 7 Adre me he ka hwege tot,
Adre me ve manen dut hnyi hnyimakan Khong hnyi Ziona.
- 8 Iehova lö, Khongon sabaoth, löng ju hijik hic :
Khongu Jakob lö, tevehlöng ju. [Sela.
- 9 Khong a becihmun lö, bwele but,
Me wâ hnyimakan at u je hû.
- 10 Anyin ae so bong a khaca hnyin je hnyeulem, hon je bong a wan thauzan.
E beönua soiny könya he ka tuö hwanumen uma umen Khonguk,
Hou he ka laba eiö hnyin je uma mano umen tavat ae kong.
- 11 Anyin a Iehova Khong seúnö me bec :
Ame he Iehova ka ham betenge me hmanenang :

- E ame ca he ka behânâ ke únyi ae so ge tavat adre me vheno wisa.
- 12 Iehova tuhan sabaoth lö,
Hnahic hnen at ame labageju köu.

SALAMO 85.

Hobi kâu at whik khumöng. Salamo anyin laku Kora.

- I**EOVA lö, u je hia but betenge ka em hnyei :
U je hia but ohmetuhmetu Jakob úheny hnyi hna bâ.
- 2 U je hia but thang degecâ hulö anyin lakem,
U je hia but tube hia anyidra ta je monu. [Sela.
- 3 U je hia but hom degecâ hia ânyâm wathethöt :
U je hia but hwiö únyi hnyi ânyâm hmönyin ae hlöng.
- 4 Khong at ame omeli öhmun lö, hwi' öhmun ju,
Ke oumo ânyâm hmönyin köhmun,
- 5 Hawa, u me he bala ka hmönyâm köhmun ?
U me he ka obeûâ ânyâm hmönyin ka ta je dö hia ?
- 6 Hawa, u me ca he hmetu bi ka omeli öhmun :
Me me he bi lakem ka senyin gam ?
- 7 Iehova lö, omanenâ thö köhmun ânyâm ibetengiö,
Me ham köhmun ânyâm úhömeli.
- 8 Oge me he ka löng hna ha hnen Khong ae Iehova :
Anyin a e ame he ka ha úsoköu ka lakeiny me anyin wakap :
Ke so adre me ca he hmetu bi ka hwa-kecidra ae monu.
- 9 E hnathu e hakekeny ka tavat adre me ouden e anyin úhömeli ;
Me me he hmanenang ka labâ ita hnyei.
- 10 A úkhanö thö ibetengiö me hnathu ;
A úcimhnyimak dö wisa me úsoköu.
- 11 Ame kû thö hnathu únyi hnyi hmeledrany ;
Ke haba wisa ame selat jem ethö hnyi drany.
- 12 Eke, Iehova ame he ka ham únyi ae so ;
K' ame he ita hnyei ka widrany.
- 13 Ame he hwakecin ae wisa ka he hnyi hnyimakan ;
Me ame he ka ânyâ deny li hnyeúcan me me gethen he ka he hnyin.

SALAMO 86.

Hic hiji Davita.

- I**EHOVA lö, ta jem hnyikönyâm, me thu kõnya;
Anyin a iny vec me theduoc.
- 2 Tuö ju hanuk; anyin a inya ang at ot köu:
Khonguk lö, ö u omelö thö athnyabaem, at ame labageju köu.
- 3 Than lö, betenge ju gak;
Anyin oge me hongot bala köu hnyi je bong.
- 4 Osenyinâ thö hanon athnyabaem;
Anyin oge me ogöranyâ hanuk köu Than.
- 5 Anyin a Than lö, u thibi at ae so, me at ame thang,
Me se hia ibetengiö ködra hia adre me hongot köu.
- 6 Iehova lö, tevehläng ju hijik hic;
Me löng ju hok hwakhöu.
- 7 Hnyi bonginy anyik vec, oge me he ka hongot köu;
Anyin a u me he ka thu kõnya.
- 8 Than lö, e ba at ae úcú möu ge ta je khong;
Ke ba je huliwa ae úcú me ânyâm ta je huliwa.
- 9 Than lö, ame he ta je hnyei hia thithö u je op ka o me khudrung ju hnyi hnyimákâm,
Me adre me he ka oganá iâm.
- 10 Anyin a u gan, me at ame ânyâ je únyi hnân láia:
U thibi Khong a khaca.
- 11 Iehova lö, nö nya thö ge dem gethen;
oge me he ka vheno ânyâm hnathu:
Othabongonâ ju hnyekuk me inye ot ge iâm.
- 12 Than a Khonguk lö, oge me he ka oganö u ge hnyekuk ae bekhöt;
Ke oge me he bala ka olungâ iâm.
- 13 Anyin ae gan lámâ ânyâm betenge kõnya:
Ke u je hia but thang hanuk únyi hnyi erkemok ae dit hmönyin.
- 14 Khong lö, ame tot kõnya tavat bi gan,
Ke ame elâm hanuk hnen úkhacaköu anyin tavat úkonguny,
K' adre me ca ip u hnyi hnyimáködra.
- 15 Than lö, u thibi Khongon ibetengiö me betenge baü,
At ame ca ie hmönyin bi, ke ti hu gam ibetengiö me hnathu.

- 16 Ö u hwiö thö kõnya me betenge gak:
Hna but hwegiâm ka athnyabaem,
Me omelö nokon бага athnyabaem a momo.
- 17 Omanenâ thö kõnya haten ae sa;
Me me he ka wâ me hmehma bi hnen tavat adre me hükötiö nya,
Anyin a u Iehova at ame hadruo nya,
me otubweli nya.

SALAMO 87.

Salamo anyin laku Kora, a Khumöng.

- E**THÖ hnyi je bucen ae kap taben.
2 Iehova ame ti beweny je homagöuleny Ziona,
Hon ta je hnyaba Jakob hia thithö.
- 3 Taun anyin Khong lö,
Adre me ha ta je hofuc ae hmanenang gam. [Sela.]
- 4 Oge me he ka haiö Rahaba, me Babulona a unyin tavat ae khan' ödra inya:
Wâ bi Filisiti me Turo, tha ödru me Aithiop;
Walang at adre hnokoâ eling.
- 5 Eke, adre me he ka ha ga Ziona, ka habe, Adre me hnokoâ eling at ang ame ne at e;
Ke ame he ka otethmä e hnö Beönuu.
- 6 Ame he Iehova ka aü, e ka sihnalimen ta je hnyei, ka habe,
Walang at adre me hnokoâ eling. [Sela.]
- 7 Ke haba tavat khumöng, me tavat minya biâ, adre me he ka ha, ka habe,
E unyâm anyik je pupua hia thithö.

SALAMO 88.

Khumöng wale Salamo anyin je laku Kora; hobi këu at vhiik khumöng; adre hai hnyi Mahalatha Leanatha. Salamo hnân ünö anyi Hemana at Ezera.

- I**EHOVA lö, Khongon melik,
Oge hia but hongot köu hnyi lany me lit:
- 2 E so e ölö thö hijik hic hnyi hnyimákâm;
Ta ju hnyikönyâm ka hok hwatenge:
- 3 Anyin ae unöngötö hanuk ge je vec:
Ke ame hakekeny anyik möt erkemok ai.
- 4 Adre me tha öü nya me tavat adre me utut ka hnyi thop;
Iny úcú me at ae ba at huân hadruâ e:
5 Wale at adre hna baüâ unyin je komok,
Helâ me tavat adre hia but hlingâ adre me mokut hnyin erkemok,

- Waleji u me ca únykúme hmetu bi ;
K' adre subâ degecâ bi únyi hnyi hnyamâm.
- 6 U je hia but ip nya hnyi thop ae dit hmönyin,
Hnyi je dok ae menkholom, hnyi je dok ae dit.
- 7 E hmak hmönyin huk ányâm hmönyin,
Ke u je hia but oveci nya ge ányâm ta je waköio hia thithö. [Sela.]
- 8 U je hia but öúsákâúöâ je liamewainy mönya ;
Ke u je hia but okúâ ködra he ka ikiki nya :
Adre hia but theling nya, ke ca khanö nya hmetu he ka dit ut.
- 9 A jok ut li emakök can vec :
Iehova lö, oge hia but hawo u hnyi je bong,
Oge hia but inâ li hnyamök köu.
- 10 Hawa, u me he ka omanená ta je únyi hnân láiâ ka tavat a mokcu ?
Hawa, ame he ta je komok ka tot me oganö u ? [Sela.]
- 11 Hawa, adre me he ka ha ányâm ibetengio eú hnyi erkemok ?
Me ányâm hnathu hnyi Hnaúhangö ?
- 12 Hawa, adre me he ka wâ ányâm ta je únyi hnân láiâ hnyi menekolom ?
Me ányâm wisa hnyi hnyeie adre me hnying hnyin ?
- 13 Iehova lö, oge hia but tenge köu,
Ke ame he ka ölö ka hnyi hnyimákâm hnyi je hnyomakatu hijic hie.
- 14 Iehova lö, iéú gam u me degec hanuk ?
Iéú gam u me ikhálâ hnyimákâm gak ?
- 15 Iny vec ut me mok hwân k' iny tiga wanakat :
K' ame gâuk hnyi úen oge vheno ányâm ta je únyi hnân outen.
- 16 A hia but húlúlüö nya hnen ányâm wathethöt ae gan hmâ ;
Ame subâ degeci nya ge je únyi hnân ootâ únyi gam.
- 17 Adre me igigili nya hnyi je bong helâ me köio ;
Adre me tha útitilen kõnya.
- 18 U je hia but öúsákâúöâ at ame betenge gak me hanök,
Ke u je ip hnyi menekholom liamewaeny mönya.
- Oge me he ka omanená ányâm hnathu ge hnyimök ka ta je dö hia.
- 2 Anyin a oge hia but ha, ka habe, Adre me he ka op göranyai Betenge baú nyiele balua ;
U me he ka otethmâ ányâm hnathu hnyi je drany.
- 3 Oge hia but úhihinyköu me hnök hna úca,
Oge hia but khemanyin kö Davita athnyabaik, ka habe,
- 4 Oge me he ka otethmâ je mâtranâm nyiele balua,
Me otilâ ányâm theron ke ne o but hnyi ta je dö hia. [Sela.]
- 5 Iehova lö, ame he ta je drany ka olungâ ányâm ta je únyi hnân láiâ ;
Me ányâm hnathu minya hnyi úkhacaköu anyin wakap.
- 6 Anyin a ie ke at ethö hnyi drany ae úcü me Iehova ?
Ie ke at unyin lakon tavat ae hwege ae úcü me Iehova,
- 7 Wale Khong adre outen hnyi úkhacaköu anyin wakap,
Me hnân outen hudra hia adre me laba igigilö e ?
- 8 Iehova lö, Khongon sabaoth,
Ja lö, ie at ae úcü möu, at ae man ?
Ke ame igigili u ányâm hnathu.
- 9 U je musö hmanenanginy köio :
E ka o thö ta je waköioiny, u thibi at ame otahauâ.
- 10 U je hia but thuthu omomonu Rahaba, helâ me at adre hia but hlingâ ;
U je hia but oveseâ je iwahnaihmiöny möu ge hnyamâm ae hwege.
- 11 Ányâm drany me hmeledrany minya ;
Me hon kânâ me unöngötiny, u je bi taben e.
- 12 Haba hwadrö me hwaiöu me u je up li dok e :
Tabora me Heremona ame senyinâ iâm.
- 13 E hwege hmönyin hnyamâm :
E man benyâm, ke görany hnyamâm a metâm.
- 14 Haba taben ányâm theron me wisa me hna owisa :
Ame he ibetengio me hnathu ka bán hnyi hnyimákâm.
- 15 Hnahic hnen hnyeie a löng ut hwan senyin :
Iehova lö, adre me he hnyi melaminy hnyimákâm.
- 16 Adre me senyin hnyi je bong hia ge iâm :

SALAMO 89.

Salamo hnân únö anyi Ethana at Ezra.

OGE me he bi nya ka khumöngö ibetengio anyi Iehova nyiele balua :

- Ke adre me ogöranyi ödra hnyi hwakecin ae wisa únyi gam.
- 17 Anyin a u thibi hmanenanginy hwegiödra :
Ke adre me he ka ogöranyá anyihmun faoiny meno hnyi ányâm ibetengiö.
- 18 Anyin a e unyi Iehova becihmun
Ke tuhöhmun unyin At ae Kap anyi Isaraela.
- 19 U je ha eji ka latâm ae kap deny hna omanená,
Haingâm, ka habe, Oge hia but ip úhadruo unyin at ae hwege ;
Oge hia but ogöranyá hna úca unyin tavat.
- 20 Oge hia but ö Davita athnyabaik ;
Me hú e ge anyik wakaco ae kap :
- 21 Ame he bala hnyamök ka tha e më ;
K' ame he benyik ka ohwegiá e.
- 22 Ame ca he iwahnaihmiöny ka okongoá e ;
K' ame ca he nokon at ae kong ka ovecá e.
- 23 Ke oge me he ka kot omomono hnyi hnyimakan ta je iwahnaihmiöny më,
Me kot tavat adre me húkotiá e.
- 24 Ke ame he ka tha e me anyik hnathu me anyik ibetengiö ;
K' adre me he ka ogöranyá anyin faoiny meno hnyi iök.
- 25 Oge me he ka otílâ minya hnyamen hon köiö
Me hnyamen a metân hon je wagewe.
- 26 E ame he ka hawo nya, ka habe, U thibi kamök,
Me Khonguk, me kiciny melik.
- 27 Ke oge me he ka wia e me me nökek a bán,
At ae beönua hon je than eang hmele-drany.
- 28 Oge me he bala ka tuö anyik ibetengiö hobi kâu e,
K' ame he ka tethmá anyik úhinhinykôu unyin.
- 29 Ke oge me he ka otethmá je mátrániny nyiele balua,
Me anyin theron helá me ta je bong hnyi drany.
- 30 A ne he lakon ka hna degecá anyik hnanyibu,
Ke ca vheno hnök je hna owisa ;
- 31 Adre me ne hanyáúá hnök je hna otílâ,
Me ca tuö anyik ta je hnanyibu ;
- 32 Awe, oge me he bi nya ka bi hwaban hnödra ta je hna hanyáúá ge osö,
- Me anyidrin ta je hulö ge ta je hna hmatá.
- 33 Ke so bi, oge me ca he ka hom anyik betenge hia únyi gan,
Me ohaúá anyik hnathu.
- 34 Oge me ca he ka oúnyibaúá anyik úhinhinykôu,
Ke oge me ca he ka wia hofuc ame he but únyi hnyi li esongodik.
- 35 Oge hia but okhaca khemanyin hnyi hwakecik ae kap ;
Oge me ca he ka thoi kö Davita ;
- 36 Ame he ka tethmá je mátrániny nyiele balua,
Me anyin theron helá me seúnö hnyi hnyimakök.
- 37 Ame he ka tethmá balua e bi helá me tehi,
Me helá me únyi hnân ohnathoá ae hnathu hnyi drany. [Sela.
- 38 Ke u je hia but hna degecá me ounyibaúá,
Ke u je hia but hmönyin ka at u je hú.
- 39 U je hia but húkotiá hna úhinhinykôu me athnyabaem ;
U je hia but okongoá anyin korona hnyikánâi.
- 40 U je hia but kia haginy je hak hia ;
U je hia but okongoá anyin je hnabá.
- 41 Adre me söh e hnen tavat, hia adre me vheno gethen :
Adre me hiá e hnen tavat adre me laba hakekenyá e.
- 42 U je hia but ogöranyá hnyamen a metân tavat adre me ovecá e ;
U je hia but osenyinâ ta je iwahnaihmiöny hia më.
- 43 Eke, u je öönua homakan anyin hele vat,
Me ca otethmá e hnyi vat.
- 44 U je hia but ohia anyin hmanenang,
Me hagutá hnyikánâi anyin theron.
- 45 U je hia but owakhaletá je bonginy hidröu a e :
U je hia but tube e ge hmehma. [Sela.
- 46 Iehova lö, ke ne o but kehö, hawa u me he ka ikhölö u nyiele balua ?
Ke ne o but kehö ame he ányâm hmönyin ka ubáhlâ helá me meic ?
- 47 Ö u únykúme ju ae okhulit bonguk ta je bong :
Ieú gam u je hia but op gufa lakon tavat hia thithö !
- 48 Ie at ame he ka möt, k' ame ca he ka wâ mok bi,

- At ame he bi ka omelö hanon únyi hnyi
hnyamen erkemök ? [Sela.]
- 49 Than lö, ewa ányâm tang betenge ehac,
Waleji u je khemanyin kö Davita hnyi
anyâm hnathu ?
- 50 Than lö, únykúme ju hnödra hna hiá
lathnyabaem ;
Me hnök hna kap tilá hnyi úlaik hna
úhiö hnen ta ogö hnyeí hia ;
- 51 Iehova lö, ányâm ta je iwahnaihmiöny
adre me úhiö,
Waleji hnyi hnödra hna úhiö ta je hna
okca anyin at u je hú.
- 52 E so he ka haisoi Iehova thö nyiele
balua. Amen, me Amen.

TUSI IV.

SALAMO 90.

Hic hiji Mose a athnyabainy Khong.

- T**HAN lö, u thibi hnyabahmun
Hnyi je dö hia.
- 2 Adre me tiga ca hnokoá ta je bucen,
K' u tiga ca op hmeleledrany me hon
káná,
Waleji hwán adrem balua ke ne o but
nyiele balua, u thibi Khong.
- 3 U je wia at me me sesáiny káná ;
Me ha, ka habe, Hmetuhmetu ju öbun
lakon tavat.
- 4 Anyin ae úcú hnyi hnyimákâm ta je
huna a wan thauzan,
Me bong et waleji a hia but,
Me helá me ke hna hmak hnyi lit.
- 5 U je hom degeci ödra helá me hnen di ;
ödra úcú me at ame mokut :
Hnyi hnyomakatu ödra úcú me hna-
önying ame kú wia.
- 6 Haba hnyi hnyomakatu e ame kú hlau,
me kú wia ;
Ke haba hnyi sahac adre me subá e,
me ame meleca thö.
- 7 Anyin a adre ou öhmun hnyi ányâm
hmönyin,
Ke adre oveci öhmun hnyi ányâm wa-
thethöt.
- 8 U je hia but ip anyihmun ta je monu
hnyi hnyimákâm,
Me ta je monu gahmun ae iyong hnyi
melaminy hnyimákâm.
- 9 Ame hia gaga bonguhmun ta je bong hia
hnyi ányâm hmönyin :
Amo hia tot ta je hunaihmun helá me
hna ha hofuc.

- 10 Haba ta je bonginy ta je hunaihmun,
me sevente ta je huua,
K' ame ne eite ta je huna, e ka hwege at ;
Ke so bi e huliwa me hlöuhlöu hmanen-
angidra ;
Anyin a ame ie hia but, me öhmun e
did ut.
- 11 Ie at ame wáhmakhmetoá hwegien
hmönyin gam,
Me ányâm wathethöt, hoton hna outö
u hnyi tulut ae úcú köu ?
- 12 Ö u he ju ka n' öhmun he ka aú bongu-
hmun ta je bong,
Me me he ka ve hu gahmun hnyok ae
metá.
- 13 Iehova lö, metu ju ; ke ne o but kehö ?
E so u ma ietra ge ta je lathnyabaem.
- 14 Ö u osekuni öhmun dö hnyi je hnoma-
katu ge ányâm ibetengiö ;
M' öhmun e he ka senyin me hobá hnyi
bonguhmun ta je bong hia.
- 15 Osenyini öhmun dö hoton úseiny je bong
waleji u je oveci öhmun hnyin,
Waleji ta je huna öhmun e wá monu
hnyin.
- 16 E so e manen ka lathnyabaem ányâm
huliwa,
Me ányâm hmanenang ka lakudra.
- 17 Ke so e he ka e huumun hmanenangi
Iehova a Khonguhmun :
Ke otethmä ju huumun huliwa anyin je
hnyamöhmun ;
Eke, haba huliwa anyin ta je hnyamöh-
mun, ö u otethma ju e.

SALAMO 91.

- H**ABA at ame laba hnyi hna lubaduöng
anyi Beönuá,
Me ame he ka laba bala huyi hmenon
Ataekhanahia.
- 2 Oge me he ka ha kö Iehova, ka habe, E
thibi hnök hna lubaduöng me hnök
hnabá ;
Me Khonguk, a at oge me labageju káu.
- 3 Anyin a e ame he ka uny u únyi hnyi
hnewe anyin at ame töu hnewe,
Me únyi hnyi mok cap at ame okongoá.
- 4 E ame he ka tubi u ge leúnen,
Ke u me he ka lubaduöng hmelen li
labenyin :
Haba anyin hnathu, me, hnân bec me
bec ae gan.
- 5 U me ca he ka outen únyi adre me outen
hnyi hnyinghet,
Ke fana at ame gá hnyi lany ;

- 6 Ke mok cap at ame ngeny hnyi menek-holom,
Ke mok hnân mekiny at ame úhohiö hnyi jebigö.
- 7 Ame he khaca thauzan ka ta hnyi ke keihâm ;
Ke ten je thauzan hnyi hnyamâm a metâm ;
K' ame ca he bi ka hakekenyi u.
- 8 Ame he ka wâ e thibi hnen li emâkâm,
Me wâ hwaban ka tavat ae kong.
- 9 Anyin a u thibi Iehova hnök hnabâ !
U je hia but wiö Beönua me hnân hnyabam ;
- 10 Ame ca he ka o köu ke únyi ae kong,
K' ame ca he mok ka dit ka hnyi umâm uma mano.
- 11 Anyin a e ame he ka hûna anyin ta je angela gam,
He ka tuö u hnyi dem ta je gethen hia,
- 12 Adre me he ka kap tilö u ge ta je hnyamödra,
Wâ u nye he ka thö hnyeúcâm hnyi veto.
- 13 U me he ka uto liona me asip :
U me he ka uto nak liona me on ge li cam.
- 14 Can e ame hnyok kõnya, me oge me he ka omelö e :
Oge me he ka otilâ e göranyai anyin' a e khana but iök.
- 15 E ame he ka hawo nya, me oge me he ka thu kâu ;
Oge me he ka tha inya mē hnyi vec :
Oge me he ka omelö e, me ogânâ e.
- 16 Oge me he ka osekunâ hnyekon ge möt ae beú,
Me omanená kâu anyik úhömeli.

SALAMO 92.

Salamo, wale khumöng hobi kâu bong sabath.

- H**ULIWA ae so he ka ole kö Iehova,
Me khumöngö iâm, Beönua :
- 2 He ka omanená ányâm ibetengiö hnyi hnyomakatu,
Me ányâm hnathu hnyi je lit ;
- 3 Hnen únyi khumöng ae hu je töiny a ten, me nabeli ;
Me hwan kitara ae únyi hnathu.
- 4 Anyin a u thibi Iehova at ame osenyini nya ge ányâm huliwa :
Oge me he ka ohobeluâ hnyi ta je huliwa anyin li hnyamâm.
- 5 Iehova lö, shaiba ge úganiny ányâm ta je huliwa !

- E dit hmönyin hnâm ta je hna únykúme.
- 6 E ca khana bi at ae ba hnyekon ;
K' ame ca wâhmakhmeto e hnen at ae monu.
- 7 E ka kú thö helâ me hnaönying tavat ae kong,
Ke hu sot ge tavat hia adre me ányâ hulö ;
Me haba obiny ködra a g' adre me he ka ohí' odra balua.
- 8 Ke haba u Iehova, u je laba ethö görany nyiele balua.
- 9 Anyin a wâ bi, Iehova, ta je iwahnaihmiöny möu,
Wâ bi, ame he ka hia ta je iwahnaihmiöny möu ;
Adre me he ka oveseâ hia tavat adre me ányâ hulö.
- 10 Anyin a u je hia but ogöranyâ anyik faoiny meno helâ me faoiny rema :
Adre me hú nya ge wakaco ae teb únyi.
- 11 A hia but wâ minya hnen li emakök hnök hna wek ka ta je iwahnaihmiöny mönya.
A hia but löng hnen li hnyikönyök hnök hna wek ka tavat ányâ hulö adre tot kõnya.
- 12 Ame he at ae wisa ka kú wia helâ me pama :
E ame he ka kú gan hmâ helâ me arasi Lebanona.
- 13 Haba ödra adre me t' ödra hnyin uma umö Iehova,
Me adre me he ka kú wia hnyi je hnyeleny Khonguta.
- 14 Adre me he bala ka wa k' ödra hingat ut ;
Adre me he ka pipikhenya me hát.
- 15 He ka omanená a e wisa Iehova ;
E thibi kicik, ke ba balua hwali gan.

SALAMO 93.

- I**EHOVA ame musi ; e ame khavâ ge hmanenang ;
Iehova ame khavâ, e ame öweikâ e ge hwege :
Adre otethmâ minya hmeledrany, me ma ca khana he ka bwebwet.
- 2 E tethmâ ányâm theron hwân adrem :
U únyi kâu adrem balua.
- 3 Iehova lö, ame hai göranyai hnen ta je di,
Haba ta je di adre me hai göranyai ifucidra ;

- Haba ta je di adre me ogöranyâ meaidra.
 4 E hwege Iehova hnyi dok ae görany
 Hon hwan je köiö ae se hia,
 Me je wabuluiny köiö ae hwege.
 5 E hnathu hmönyin hnâm ta je hna
 ohnatho :
 E úcú hwakecin ae kap ka hnyi umâm
 uma,
 Ke ne o but nyiele balua, Iehova.

SALAMO 94.

- I** EHOVA lö, wale Khong at ame bi
 hwaban hulö,
 Khong lö, at ame bi hwaban, umume-
 lam but.
 2 At ame owisa hmeledrany lö, todrö :
 Bi hwaban dö ka tavat adre me hnyok
 bi gan.
 3 Iehova lö, ke ne o but kehö ame he
 tavat ae kong,
 Ke ne o but kehö ame he tavat ae kong
 ka ton ?
 4 Adre me fuc, adre me ha bi gan :
 Adre me hai ödra bi hnödra hia tavat
 adre me ânyâ hulö ?
 5 Iehova lö, adre me kot omomono lakem,
 Me ovecâ jekhom.
 6 Adre me hlingâ safac me atkanyua,
 Me hlingâ ta je nakahme.
 7 Haingödra, ka habe, Ame ca he Ja ka wâ,
 K' ame ca he Khongu Jakob ka wâh-
 makhmetoâ.
 8 Ūnykúme ju öbun tavat ae ba hnyeku-
 bun unyin tavat :
 Ke haba öbun tavat ae monu, ie ün
 öbun e he ka meta hnyin ?
 9 Hawa ge at ame op hnyiköny, e ame ca
 he ka löng ?
 Haba at ame op ecmak, e ame ca he ka wâ ?
 10 Haba at ame osöâ ta je hnyei, e ame ca
 he ka bi obiny,
 Wale at ame nâ tavat m' adre me metâ ?
 11 Iehova ame wâ ta je ūnykümenen tavat,
 Ae ūnyi baü bi.
 12 Ja lö, hnabic hnen at u je osöâ,
 Me nâ e ūnyi hnyi ânyâm hnanyibu ;
 13 Me u me he ka omenâ e ūnyi hnyi je
 bong ae kong,
 Ke ne o but hnyi hna hiny thop hobi
 kâu at ae kong.
 14 Anyin ame ca he bi Iehova ka hna
 degecâ lakeiny,
 K' ame ca he ka hna but hwajekhon.
 15 Anyin ame he ka hmetu thö hna owisa
 ka hwakecin ae wisa

- K' ame he tavat adre me hnyok wisa
 hia ka hnu hoton e.
 16 Ie at ame he ka tot hobi könya ka
 tavat adre ânyâ hulö ?
 Ie at ame he ka tot hobi könya ka tavat
 adre me ânyâ ūnyi ae kong ?
 17 A ne ca hadruo nya Iehova,
 Me logota laba hanuk hnyi dok adre
 laba hnyibú hnyin.
 18 Hnyi ün eji oge me ha, ka habe, Ame
 haühaü but cak ;
 Haba ânyâm ibetengiö, Iehova, ameköp
 nya göranyai,
 19 Ame okahwa hnyekuk ge ta je ūnyi
 hnân otubwelâ unyi gam,
 Hnyi hnök ta je hna ūnykúme ae se hia
 eü hnyik.
 20 Hawa, ame he ka tha e möu taben lap
 anyin hwakecin ae kong,
 Waleji at ame tretrao ūkonguny me
 hnân hnanyibu ?
 21 Adre me tha ūkhacaköu he ka okongö
 hanon at ae wisa hwakecin,
 Me ohnaühangöâ dra ae ba hnyikongon.
 22 Ke Iehova thibi hnök hnabâ ae beü
 göranyai ;
 Ke Khonguk thibi kicin hnök hna luba-
 duöng hnyin.
 23 Ke e ame hia but bi hwaban ködra bi
 hwakecidra aa monu,
 Ke e ame he ka subâ degeci ödra hnyi
 anyidra monu bi ;
 K' ame he Iehova a Khonguta ka obi
 ödra.

SALAMO 95.

- A** I öbun ate me he ka khumöng kö
 Iehova :
 Ate me he ka hongot senyin ka kic at
 ame omeli öta.
 2 E so ate me o but ka hnyi hnyimakan
 me ole,
 E so ate me hongot senyin kâu ge je
 salamo,
 3 Anyin a Khong ae gan hmâ Iehova,
 Ke Than ae gan hmâ hon ta je khong
 hia thithö.
 4 E bi hnyi hnyamen ta je diliny hmele-
 drany ;
 Anyin bi minya je ban ta je bucen ethö.
 5 Anyin köiö, e bi at a op e ;
 E ame mádrâ minya kânâ ge li hnya-
 men.
 6 Ai öbun, e so ate me he ka khudrung
 ju me nom ;

- Ate me he ka cibouca hnyi hnyimakö Iehova at a up öta :
- 7 Anyin a e thibi Khonguta,
Ke öta tavat aten iny hnyei, me haleny ta je mamoe hnyi hnyamen.
Hnyi bong ang, öbun na he ju ka löng hwan hofuc !
- 8 Ca okhötä bi je hnyekubun helä me eji hnyi Meriba,
Ke heläji me bonginy Masa hnyi hnyebuba :
- 9 Waleji a cubic nya hnyin ta je lakam-öbun,
Me nö nya, me wä anyik huliwa.
- 10 Hnyi ta je huna a fâte oge me wä dö ang me iny vec gadrin,
Me haingök dö, ka habe, Hnyei angame he monu ta je hnyekudra ;
Ke ca khan' ödra dek ta je gethen :
- 11 Anyin a waleji oge me khemanyn hnyi anyik wathethöt, ka habe,
Adre me ca he ka dit ka hnyi hnök hna menä.

SALAMO 96.

- K**HUMÖNGÖ thö kö Iehova khumöng a teb ünyi :
- Hmeledrany hia thithö lö, khumöng dö kö Iehova.
- 2 Khumöng dö kö Iehova, ogänä thö ien ;
Omanenä thö anyin ühömeli hnyi ke bong me ke bong.
- 3 Aü gaga thö anyin hmanenang hnyi wanben aten ke je hnyei,
Me anyin ta je huliwa hnän läiä hnyi wanben tavat hia.
- 4 Anyin ae gan hmä Iehova, me hnän olungä göranyai ;
E bi hnän outen hon ta je khong hia thithö.
- 5 Anyin a haba je khongon ta je hnyei hia thithö wale, a je hnatheat ;
Ke haba Iehova ame op ta je drany.
- 6 E bi hnyi hnyimakan hna ogänä me hmanenginy than :
Eiö hnyi umen uma ae kap tang hwege me hmanenang.
- 7 Öbun je döiny ta je hnyei lö, ham but kö Iehova,
Ham but kö Iehova hmanenang me hwege.
- 8 Ham dö kö Iehova hmanenang ae ücü ka hnyi ien :
Hom dö hut, me hom dö ka hnyi je hnyeuleny.

- 9 Öbun na he ju ka khudrung kö Iehova hnyi hmanenang ae kap :
Hmeledrany hia thithö lö, öbubuny ju hnyi hnyimakan.
- 10 Ha th' öbun hnyi wanben ta je hnyei, ka habe, Ame musi Iehova :
Ke tethmä minya hmeledrany, k' ame ca he bi ka bwebwet :
E ame he ka owisa ta je hnyei hnyi wisa.
- 11 E so ame he je drany he ka senyin, me hmeledrany he ka hobä ;
E so he ka ü köiö me unöngötiny ;
- 12 E so e hobä ta hnyei, me ta je ünyi hia hnyin ;
Me ame he ka khumöng senyin dö ta je üöiny hnyot hia thithö ;
- 13 Hnyi hnyimakö Iehova, anyin a e ame he jem ;
Anyin a e ame he jem he ka owisa hmeledrany :
E ame he ka owisa hmeledrany hnyi wisa ;
Me ta je hnyei hia hnyi anyin hnathu.

SALAMO 97.

- I**EHOVA ame musi ; e so e hobä hmeledrany ;
E so e senyin ta je bomene ae se hia.
- 2 E igigilö e je ülä me menekholom :
Haba taben anyin tberon, me, hwakecin ae wisa me hna owisa.
- 3 Ame he but meic hnyi hnyimakan,
Me thong degecä igigilö ta je iwahnaih-miöny me.
- 4 Ame umumelam hmeledrany ge anyin ta je hucece :
A wä but hnen hmeledrany me öbubuny bi.
- 5 Ame köiö but je ong bucen hnyi hnyimakö Iehova helä me wasu,
Hnyi hnyimakan Tuhan hmeledrany hia thithö.
- 6 Ame omaneuä hwakecin ae wisa hnen ta je drany,
Ke a hia but wä hnen ta je hnyei anyin hmanenang.
- 7 E so e hmehma but hia thithö tavat adre me bi athnyabainy je hnatheat,
Me hobelu' ödra bi ge ta je idola :
Khudrung ju käu, öbun ta je khong hia thithö.
- 8 A löng ut Ziona me senyin,
K' adre me hobä wahlulaku Juda ;
Can hnäm ta je hna owisa, Iehova.

- 9 Anyin a u beónua hmónyin Iehova hon hmeledrany hia thithö :
Adre ti ogóranyi u hon ta je khong hia thithö.
- 10 Öbun tavat öbun e hanyok kö Iehova lö, ikikiâ thö monu :
E ame tuö ta je hanon anyin wa kap ;
E ame hügún' ödra únyi hnyi hnyamen tavat ae kong.
- 11 Adre tā melam hobi káu at ae wisa hwakecin,
Me senyin hobi káu tavat hanyok wisa.
- 12 Öbun tavat ae wisa lö, senyin dö kö Iehova ;
Ke ole thö ka ien ae kap.

SALAMO 98.

Salamo.

- K**HUMÖNGÖ thö kö Iehova khumöng a teb únyi ;
Anyin a e-ame hia but ányâ ta je únyi hnân láia :
Haba hnyamen a metân, me benyin ae kap ödrü me hia but ányâ úhömeli hobi káu e.
- 2 A hia but Iehova omanená anyin úhömeli :
E ame hia but omanená hwakecin ae wisa hnyi hnyimakan ta je hnyei.
- 3 E ame hia but únykúme anyin ibetengiö me anyin hnathu ka lap anyi Isaraela :
A hia but wâ hnen je can hmeledrany hia úhömeli anyin Khonguta.
- 4 Hmeledrany hia thithö lö, hongot senyin kö Iehova :
Hai thö me khumöng senyin, eke khumöng ogánâ.
- 5 Khumöng olungi Iehova ge kitara ;
Ge kitara me hwan khumöng.
- 6 Bi hwan dö senyin kö Iehova
Ge je trutru me hwan sofara.
- 7 E so he ka mea köiö me unöngötiny ;
Me kánâ me tavat adre me laba hon ;
- 8 E so ame he je wadutö ka khöúkhöú hnyam ;
Me ta je ong bucen he ka khumöng senyin.
- 9 Hnyi hnyimakö Iehova, anyin a e ame he ka o ka owisa hmeledrany ;
E ame he ka owisa hmeledrany hnyi wisa,
Me ta je hnyei hnyi hnathu.

SALAMO 99.

- I**HEHOVA ame musi ; e so he ka öbubuny ta je hnyei :
E ame laba hon li kerubi ; e so e he hmeledrany ka bwebwet.
- 2 E gan hmâ Iehova hnyi Ziona ;
Eke, e ame laba görány hon ta je hnyei hia thithö.
- 3 E so adre me he ka ogánâ iám ae gan me hnân outen :
E kap thibi e.
- 4 Ke haba hwegien than me ame hanyok ka hna owisa ;
U je otethmâ hnathu,
U je mádrâ hna owisa me wisa unyi Jakob.
- 5 Ogóranyi Iehova thö a Khonguta,
Ke khudrung ju hnyi taben li hnyeúcan :
E kap thibi e.
- 6 E bi Mose me Arona unyin anyin tavat bi hut,
Me Samuela unyin tavat adre me hawâ ien ;
Ödrin e hongot kö Iehova, ke e ame thu ködrin.
- 7 E ame ha ködrin hnyi úlá ame tot wisa :
Ödrin e vheno hnen je ohnatho, me hnanyibu waleji e ame ham ködrin.
- 8 Iehova a Khonguhmun lö, u je thu ködrin :
U thibi Khong waleji at ame thang anyidrin je hulö,
Ke so bi u je bi hwaban hnödrin je hna ányâ.
- 9 Ogóranyi Iehova thö a Khonguta,
Ke khudrung ju hnyi anyin ong bucen ae kap :
Anyin ae kap Iehova a Khonguta.

SALAMO 100.

Salamo hnân ole.

- J**E hnyei hia thithö lö, hongot senyin dö kö Iehova.
- 2 Bi athnyabai Iehova thö me senyin :
He thö ka hnyi hnyimakan me khumöng.
- 3 Khan' öbun dö a Iehova thibi Khong :
E thibi at a up öta, ke öta bi laten ;
Öta ta je lakeiny, me mamoeiny iny ta hnyei.
- 4 Didrö ka hnyi homagöuleny me ole,

Me ka hnyi je hnyeuleny me ogânâ :
 Oleâ ju kâu, me haisoâ thö ien.
 5 Anyin ae so Iehova ; e tethmä balua
 bi anyin ibetengiö ;
 Me anyin hnathu ke ne o but ta je dö
 hia thithö.

SALAMO 101.

Salamo anyi Davila.

OGE me he ka khamöngö ibetengiö me
 hna owisa :
 Iehova lö, oge me he ka khumöng köu.
 2 Oge me he ka metâ hnyi gethen ae
 wisa :
 Ie ün u me he ka o hnyin könya ?
 Oge me he ka he hnyin umök uma me
 hnyok ae wisa.
 3 Oge me ca he ka ip ke ünüi ae kong
 hnyi hnyimakök :
 Hükötianök hwakecin tavat adre me
 saü ;
 K' ame ca he ka kece könya.
 4 Ame he ka úsákâü mönya hnyok ae
 hwali :
 Oge me ca he ka khana ünüi ae kong.
 5 Haba at ame háiâ duöngâ liamewaeny
 mä, me oge me he bi nya ka ohia :
 Oge me ca he ka hokhnyokâ at ae hwege
 hnyimakan, me at ame hnyok bi gan.
 6 Oge me he ka ngele ka tavat ae hnathu
 hnyi hnyei, m' adré me he ka tha
 laba mönya :
 Haba at ame vheno gethen ae wisa, me
 e ame he ka bi athnyabaik.
 7 Ame ca he ka laba eiö hnyin umök uma
 at ame iyawâ ;
 Haba at ame ha thoi ame ca he ka teth-
 mä hnyi hnyimakök.
 8 Haba hnyi je hnyomakatu me oge me
 he ka ohia tavat hia thithö ae kong
 hnyi hnyei ;
 He ka subâ degecâ ünüi hnyi taun anyi
 Iehova tavat hia adre me änyâ hulö.

SALAMO 102.

*Hic hijin at ae vec, hnyi hua hâtlâü e, K' ame hin-
 gâü anyin tenge hnyi hnyimakö Iehova.*

IEHOVA lö, löng ju hijic hic,
 Ke so e o but köu hok hwatenge.
 2 Ca ikhâlâ gak hnyimâkâm hnyi bon-
 giny anyik vec :
 Tevehlöng ju könya ;
 Ie thu thö könya hnyi bong oge me
 hongot hnyin.

3 Anyin a âü but bonguk ta je bong helâ
 me hainy meic,
 K' ame hlâ thö je jeiök helâke uthmeic.
 4 Ame kot ut me meleca hnyekuk helâ me
 hnaönying ;
 Ke oge me hnying ut he ka an ök jeü.
 5 E úkeceköu thö je jeiök me vik
 Can hwan anyik ta je mâng.
 6 Iny úcü me kati hnyi hnyebuba ;
 Iny helâ me mun at ame laba hnyi
 hwaban je hnyaba.
 7 Oge me hmâkâ, ke haba iny
 Úcü me wahelö ame hake laba hon uma.
 8 Adre me labö hiö nya ta je iwahnai-
 hmiöny mönya ;
 Haba ödra adre me wathethöt könya
 adre me hahnâhangö nya.
 9 Anyin oge hia but an dröu helâ me jeü,
 Me úthueniken belik me dân ecmak.
 10 Can änyâm hmönyin me wathethöt ;
 Anyin u je hia but köp nya göranyai
 me hna degeci nya hmetu,
 11 Haba bonguk ta je bong me helâ me
 hmenu ae beü ;
 Ke iny meleca helâ me hnaönying.
 12 Ke haba u Iehova lö, u me he ka laba
 nyiele balua ;
 Me hna ünüküme köu, ke ne o but ka
 hnyi je dö hia.
 13 U me he ka tot me betenge ge Ziona :
 Anyin a ün dut he ka betenge gan,
 eke, a o but ün adre thu.
 14 Anyin a lathnyabaem adre hnyok ka
 ta je vetoiny,
 Me betenge ge sesäiny.
 15 Ke ame he ta je hnyei ka outen iö
 Iehova,
 Me änyâm hmanenang minya hnen ta
 je tuhan hmeledrany hia thithö ;
 16 Anyin a hia but Iehova up Ziona,
 E manen dut e hnyi anyin hmanenang.
 17 E ame hia but hwio ka hic hijin at ae
 ba ta ünüi,
 Me ca hükötia bi hijidrin je hic.
 18 Adre me he ka sihnalimen ünüi aug
 hobi kâu dö ame he ka o :
 Ke ame he ka oganö Ja hnen tavat
 adre me he ka op,
 19 Anyin a e ame hia but selâdrâ jem ethö
 hnyi anyin dok ae kap ;
 Iehova hnyi drany ethö ame wâ hmele-
 drany ;
 20 He ka löng mâng anyin at adre ca ;
 He ka thang tavat adre me he ka
 hlingâ ;

- 21 Me me he tavat ka ha iö Iehova hnyi
Ziona,
Me hnân ogânâ e hnyi Jerusalema ;
- 22 Hnyi hna úkhacaköu hnen ta je hnyei,
Me ta je dökhu, he ka athnyabai
Iehova.
- 23 E ame oúhnyúkongoâ hwegiök hnyi
gethen ;
E ame owakhaletâ bonguk ta je bong.
- 24 Haingök, ka habe, Khonguk lö, ca he
ka hum nya hnyi wanben bonguk ta
je bong :
Haba je hunaiâm, me, wale hnyi ta je
dö hia.
- 25 U je hia but bi taben hmeledrany kâú
adrem ;
Ke haba ta je drany me wale huliwa
anyin li hnyamâm.
- 26 Ame he ka hia ta je únyi e, ke u tethmâ
balua bi ;
Eke, ame he ta je únyi e hia ka amam
helâ me úkhaú ;
U me he ka wia e helâ me úkhaú, m'
adre me ke bongon bi :
- 27 Ke tha úcú bala bi hwakecâm,
Ke ba obiny ta je hunaiâm ;
- 28 Haba lakon lathnyabaem, me, adre me
he ka laba hmâ,
K' adre me he ka otethmâ je mâtâ-
nidra hnyi hnyimâkâm.

SALAMO 103.

Salamo anyi Davita.

- H**ANUK lö, haisoi Iehova thö ;
Ke so he ka haisoâ ien ae kap ge ta
je únyi hia eú hnyi hnyekuk.
- 2 Hanuk lö, haisoi Iehova thö,
Ke ca he bi ka hnying anyin ta je
betenge ;
- 3 Wale at ame hna degecâ ányâm ta je
hulö hia ;
Me ometo hnâm je mok hia ;
- 4 Wale at ame omeli u únyi hnyi úhiö ;
Me obicö u ge ibetengiö me betenge ae
menyik :
- 5 Wale at ame osekuensi u ge ta je únyi
ae so ;
Me ame hát ányâm hidröu helâ me aeto.
- 6 E wisa ta je hna ányâ hnö Iehova,
Me hnen ta je hna owisa hobi kâú
tawat hia adre me okongu ödra.
- 7 E ame omanená deny ta je gethen kö
Mose,

- Me anyin ta je huliwa ka lakon Isa-
raela.
- 8 E unöngötö Iehova ge ibetengiö me
betenge ae menyik,
Ke bec he ka hmönyin, ke gan hmâ
anyin betenge.
- 9 E ame ca he balua ka labö thawâ ;
Ke haba khaca, e ame ca he ka kât
hmâ anyin hmönyin nyiele balua.
- 10 E ame ca hia but ányâ köta e úcú me
anyita ta je hulö,
K' ame ca bi hwaban köta e úcú me
anyita ta je monu.
- 11 Anyin ae gan hmâ anyin ibetengiö ka
tawat adre me ouden e,
Helâ me úgöranyn je drany hon hme-
ledrany.
- 12 E ame öúsákâúöâ möta anyita ta je
hulö,
Helâ me úsákâúen jimeö me jimeú.
- 13 Iehova ame betenge ge tawat adre me
ouden e,
Helâ me kamen ame betenge ge lakon.
- 14 Anyin ae khana bongon hna tretrau öta ;
E ame labö únykúme a öta sesâiny
kânâ.
- 15 Haba at, helâ me hnaönying bongon
je bong ;
Ke e ame kú so helâ me hnyot ame
vhöng.
- 16 Anyin ame túâ e hnen ang, me ame
hia ju e ;
K' ame ca he hmetu hnen e ka wâhma-
khmetoâ e.
- 17 Ke hwân adrem balua ke ne o but
nyiele balua ibetengiö anyi Iehova
ka tawat adre me ouden e,
Ke e bi hwakecin ae wisa ka lakon ta
je lakon ;
- 18 Ka tawat adre me vheno anyin úhihi-
nyköu,
Me tawat adre me únykúme anyin je
hna húna he ka ányâ.
- 19 A hia but Iehova ip hmâ anyin therou
hnyi drany ;
Ke haba dokhon dökhu me ame musö
hon ta je únyi hia thithö.
- 20 Haisoi Iehova ju, öbun ta je angela
unyn :
Öbun hnyat ae man hnyi tang hwege,
a hnyat ányâ hwan hofuc,
Me tevehlöng ifucin.
- 21 Haisoi Iehova ju, öbun hia ta je únyi e
ame op ;
Öbun lathnyabainy, hnyat öbun e labö
ányâ weny.

22 Haisoi Iehova ju, öbun hia a anyin ta je huliwa,
 Hnyi je ke keihen hia hnyi dokhon dökhü :
 Hanuk lö, haisoi Iehova thö.

SALAMO 104.

HANUK lö, haisoi Iehova thö.
 Iehova Khonguk lö, u gan hmâ hmönyin ;
 Adre me khaüö u ge hna ogânâ me mecin than.

2 U je tubi u ge melam helâ me úkhaü ;
 Me ulolo drany helâ me imano :

3 Wale at ame bi taben je hnyeuleny hnyi köiö ;
 K' ame wia je úlá me hnân anyin kariota ;
 Me gâ hnyi li labenyin ang :

4 E ame wia je ang me me anyin je úthumetu ;
 Ke haba lathnyabainy, me, meic ame ubâhlâ :

5 At ame bi taben hmeledrany,
 Me me ca he ka bwebwet nyiele balua.

6 U je tube e ge köiö ae dit helâ me úkhaü ;
 K' ame bongon dö köiö hon ta je bucen.

7 U je hûna me ame kec ut ;
 K' ame kec mweimwei ge hwan ânyâm than.

8 Ame öliâ je bucen me utut ka hnyi je hnyigöulen bucen,
 Ka hnyi dok u je penapena hobi kâu.

9 U je hia but bi hnyigöulen, me me ca he bi ka hanyâüâ ;
 Me he hmetu he ka tube hmeledrany,

10 E ame kunâ ta je pupua ka hnyi je hnyigöulen bucen ;
 K' ame hingölö wauben je bucen.

11 Ame ijem e hnen ta je menoiny hnyot hia ;
 Ke sekon dö ta je asinainy hnyot adre beic.

12 Ame bi háüen ta je meno ame gâ ethö hnyi baten,
 Adre me fuc hon ta je anginy.

13 E ame hneü je bucen únyi hnyi je hnyeuleny ethö :
 A unöngötö hmeledrany ge wan ânyâm ta je huliwa.

14 E ame oküâ hnaönying hobi kâu ta je meno,
 Me ta je hatong hobi kâu at ;
 Me me he ka oâ jeü únyi hnyi kânâ :

15 Me waina minya hnân osenyinâ hnye-
 kon at,
 Me wakaco hnân hmanâ hnyimakan,
 Me jeü hnân sihwegiâ hnyeikon at.

16 E sekon dut ta je úö anyi Iehova ;
 Je arasiny Lebanona waleji e ame tä ;

17 Waleji hnen je meno ame gâ hna bi háüödra hnyin :
 Haba kasida ame bi umen hnyi ta je köp.

18 Haba je bucen ae beü göranyai me hobi kâu je gotiny hnyot ;
 Me je kic hobi kâu je shefani hnân lubaduöng hnyin.

19 E ame op tehi hobi kâu je úen :
 E khana but seünö úen ame he ka dit hnyin.

20 U je ânyâ menekholom me ame hnyinghet ut ;
 Wale úen ame ibi hwân je menoiny hnyot he ka ngenü.

21 Je nak liona adre me kuku me bi ö'dra,
 Me heleü ö'dra únyi ge Khong.

22 Ame o but seünö adre me he but,
 Me ve mokut hnyi je hnödra.

23 Ame he but at he ka huliwa
 Me ânyâ hudrân ke ne o but sahac.

24 Iehova lö, shaiba ge úsheiainy ânyâm ta je huliwa !
 U je hia but huliwan hia thithö ge metâ :
 A unöngötö hmeledrany ge tang omjehem.

25 Wale köiö, e gan hmâ me lau,
 Ae eü hnyin ta únyi ame bwebwet ke ca hnân aü,
 A je meno ae úhnyükong me gan hmâ.

26 Ame kec eling ta je hu ;
 Ke wale leviathana at u je op he ka walak hnyin.

27 Ödra hia thithö adre me halubahingâm,
 M' u me he ka ha ödra hnyi úen ae úcú.

28 Adre me hlo únyi u je ham ködra ;
 U je lau hnyamâm me ame sekudra but ge jeü.

29 U je ikhâlâ hnyimâkâm me adre me hlohlo ;
 U je hom hmetu homenâ gadra, me adre me mokcu,
 K' adre me hmetuhmetu ka hnyi sesâ.

30 U je kunâ hanom, me adre me up ödra ;
 Ke u je ohâtâ hnyimakan kânâ.

31 E so e tethmâ hmanenangi Iehova nyiele balua :
 E so Iehova ame senyiná anyin ta je huliwa :

- 32 Haba e at ame bwele ka wâ hmeledrany, me ame bwebwet bi ;
E ame kâlâ je bucen, me ame sâ thö.
- 33 Oge me he ka khumöng kö Iehova ke ne o but obiny anyik möt :
Oge me he ka khumöng ogânâ Khonguk e ka tiga hu möt gak.
- 34 E so ame hnebwia mekhunen hnyekuk kâu :
Oge me he ka senyin kö Iehova.
- 35 E so adre me he ka ohia tavat ae kong únyi eang hmeledrany,
Me me ba but balua tavat ae monu.
Hanuk lö, haisoi Iehova.
Oganö Ja th' öbun.
- 13 Me adre me ngenu úhedra hnyi ke hnyei ka hnyi ke hnyei,
Úhedra hnyi ke dökhu ka hnyi ke hnyei.
- 14 E ame ca hna ke at he ka okongu ödra ;
Eke, e ame thawâ ta je than gadra ;
- 15 Haingen, ka habe, Ca he ka kâlâ hnök ta je hna hú,
Ke ca okongu anyik ta je perofeta.
- 16 Ke e ame hawâ hmiâ ka hnyi hnyei ;
E ame thu uciny jeü hia thithö
- 17 E ame kunâ bánâ at ;
Wale Josefa at adre úco me me athnyaba :
- 18 Adre me ovecâ li can ge fao úceat ;
K' adre me ca e ge cen a fao :
- 19 Ke ne o but úen adre me ohwâdâ hwan hofuc :
Haba hofuc ho Iehova ame cubec e.
- 20 Haba than ame úkhünöng he ka thang e ;
Waleji at ame muso ta je hnyei, me hna baúâ but e.
- 21 E ame otilâ e hnân tuhan hnyaban,
He ka musö tang omjehen hia :
- 22 He ka ca je taben hoton weny,
Me ometâ wahingatin.
- 23 K' ame o but minya Isaraela hnyi Aigupito ;
Haba Jekob ame laba atkanyua hnyi hnyei i Hama.
- 24 Me e ame ti osehia lakeiny,
Me ohwegi ödra hon ta je iwahnaihmiöny mödra.
- 25 E ame wia hnyekudra he ka húkötia lakeiny,
He ka iyawâ lathnyabainy.
- 26 E ame kunö Mose a athnyabainy,
Me Arona wale hnen hna úca.
- 27 Ödru me omanená hnyi wanbödra anyin ta je haten,
Me ta je únyi hnân láia hnyi hnyei i Hama.
- 28 E ame kunâ lit, me ame menekholom but ;
Ke ödru me ca hna degecâ hwan hofuc.
- 29 E ame via belidra je an me me dra,
Me hlingö haledra ta je wâ.
- 30 A öunöngötâ idra hnyei ge ta je rama,
Wale hnyi je hnyeuleny latuhödra.
- 31 E ame ba, me ame o but ta je nöng,
Me je outo hnyi idra hnyei hia.
- 32 E ame ham ködra we ae wahma me hwaban we,
Me meic ame ubâhlâ hnyi idra hnyei.

SALAMO 105.

- O**LEÂ thö kö Iehova, hawâ thö ien :
Omanená thö hnyi wanben ta je hnyei anyin ta je huliwa.
- 2 Khumöng dö kâu, khumöng ogânâ e ;
Uhenamö ju öbun ge anyin ta je huliwa hnân láia hia.
- 3 Ohobeluâ thö hnyi ien ae kap :
E so ame he hnyekon tavat adre me elöm Iehova ka hobâ,
- 4 Elöm Iehova thö me hwegien :
Elâm balu thö hnyimakan.
- 5 Únykúme ju ta je únyi hnân láia waleji e ame hia but ányâ ;
Anyin ta je úöman, me ta je hna owisa hnen hnyimen ;
- 6 Öbun ta je mátrâni Aberahama a athnyabainy,
Öbun je mátrâni Jekob wale tavat a úca.
- 7 E thibi Iehova a Khonguta :
E but hnyi hmeledrany hia hnen ta je hna owisa.
- 8 E ame hia but únykúme bala anyin úhinhinyköu,
Waleji hofuc e ame húna ka ta je dö a khaca thauzan,
- 9 Waleji e ame ohmâ kö Aberahama,
Me hnen hna khemanyin kö Isaaka ;
- 10 E ame otethmâ kö Jekob me hnân hnanyibu,
Kö Isaraela hnân úhinhinyköu a nyiele balua :
- 11 Haingen, ka habe, Oge me he ka ham köu hnyei Kanana,
Wale hna ugleköp a hwajekhöubun :
- 12 Waleji ae tiga wakhalet tavat ;
Eke, ädre ti wakhalet, me je atkanyua bi hnyin ;

- 33 E ame kot minya haledra ta je vine,
me haledra te je imeta ;
Me thu omomono ta je úo hnyi idra
hnyei hia.
- 34 E ame ha, me ame o but ta je wahamon,
Me ta je wanyilö ke ca hnân bi aú,
- 35 Me adre me an hia ta je khölakiny idra
hnyei
Me an minya troban ta idra.
- 36 E ame kot minya ta je lakudra a bán
hia thithö hnyi idra hnyei,
Je wan a bán hwegiödra hia.
- 37 Ke e ame hum ödra but me sileva me
gol :
Ke ba ke at ae senyin ge anyidra ta je
tribu.
- 38 Ame senyin Aigupito hnyi úen adre
he but ;
Anyin ame hia but ta hudra hna out'
ödra.
- 39 E ame ulolo úlá hnân tube,
Me meic he ka húnú ödra hnyi hnyi-
nghet.
- 40 Adre me sumat me e ame oâ ta je
júö,
Me sekudra ge jeú únyi hnyi drany.
- 41 E ame khöng ut kic, me ame badedö
but köiö ;
Me di ka hnyi je dok ae atgec helâ me
wagewe.
- 42 Anyin a e ame únykúme hwan hofuc
ae kap,
Me Aberahama athnyabainy.
- 43 Me e ame hom but lakeiny me senyin,
Me tavat e ame úca me hobâ.
- 44 Me e ame ham ködra ta je hnyei iny
aten ke je hnyei ;
M' adre me he ka hu hobi ködra bi
huliwa hnen aten ke je hnyei :
- 45 M' adre me he ka vheno hnen ta je
hna otilà,
Me löng hoton anyin ta je hnanyibu.
Oganö Ja th' öbun.
- 4 Iehova lö únykúmi nya ju hel me
hnâm hna labö betenge ka lakem ;
U na senö nya ju ge ányâm úhömeli :
- 5 M' oge me he so but helâ me tavat u
je úca,
M' inye he ka tha senyin me lakem,
Me tha ohobelúa me jekhom.
- 6 Öhmun e hia but ányâ hwakecin ae
kong helâ me lakamöhmun,
Öhmun e hia but he hwali, me ányâ hulö.
- 7 Ame ca wáhmakhmeto ányâm ta je
únyi hnân láia hnen lakamöhmun
hnyi Aigupito ;
K' adre me ca únykúme bi úganiny
ányâm ta je betenge ;
K' adre me úkhin fuc hnyi köiö, wale
Köiö ae Dra.
- 8 Ke so bi e ame omeli ödra can ien bi,
Me me he ka omanená maniny man.
- 9 E ame thawâ Köiö ae Dra, me ame
mada :
Me e ame hum ödra hnyi je dok ae dit
helâ me hnyebuba.
- 10 Ke e ame omeli ödra únyi hnyi hnyamen
at ame húkoti' ödra,
Me omeli ödra únyi hnyi hnyamen
iwahnaihmióny.
- 11 Ke haba köiö ame húlúlúa ta je iwa-
hnaihmióny mödra :
Ke ba ju kolon me khaca.
- 12 Me adre me kap hwan hofuc ;
Me khumöng ogânâ e.
- 13 K' adre me ie hnying ut hnen je hna
ányâ ;
K' adre me ca lubahingen bi anyin
úhnenamö :
- 14 K' adre me behnyekon gan hmâ hnyi
hnyebuba,
Me cubec Khong hnyi hnyebuba.
- 15 Me e ame ham hnödra hna sumâtâ ;
Ke so bi e ame kunâ delâ ka ta je
hanudra.
- 16 Ke adre me ciâ ga Mose hnyi hna hu-
numa,
Me Arona at ae kap anyi Jehova.
- 17 Ame memang ut kânâ me utö Dathana,
Me húlúlúa but dö anyi Abirama.
- 18 Ke haba meic ame an hnyi anyidrin dö
Haba bálhân meic ame thong degecâ
tavat ae kong.
- 19 Adre me ányâ nokon kau hnyi Horeba,
Me khudrung ka hnatheat adre oköiâ.
- 20 Helâe adre me wia but anyidra hmane-
nang
Me me úcú me bolok ame han önying.

SALAMO 106.

- O** GANÖ Ja th' öbun.
Oleâ ju kö Iehova, anyin ae at ae so :
Anyin a nyiele balua anyin ibetengiö.
- 2 Ie at ae khana he ka ha ta je huliwa ae
man anyi Iehova,
Me omanená hia ta je únyi hnân ogânâ
e ?
- 3 Hnahic hnen tavat adre me vheno hna
owisa,
Ke at ame ányâ bala hwakecin ae wisa.

- 21 Adre me hnying Khong wale at ame
omeli ödra,
At ame änyâ ta je ünyi ae gan hnyi
Aigupito ;
- 22 Wale ta je ünyi hnân lâiâ hnyi hnyei i
Hama,
Me ta je ünyi hnân ouden hnyi köiö ae
Dra.
- 23 Anyin a wale e ame ha he ka ohî' ödra,
Ke so bi hnö Mose, waleji e ame üca,
hna tot hnyi iwatretra hnyi hnyima-
kan,
He ka ohmeto anyin hmönyin, wâ e nye
ohî' ödra but,
- 24 Eke, adre me hmiödra hnyei ae hmane-
nang,
K' adre me ca kap bi hwan hofuc :
- 25 Me adre me ulit hnyi umödra je uma
mano,
Me ca löng ifuci Iehova.
- 26 Anyin a wale e ame ogöranyâ hnyamen
ködra,
A e ame he ka hagut' ödra hnyi hnye-
buba ;
- 27 Me hagutâ ta je mâtrânidra anyin aten
ta je hnyei,
Me ovesei ödra ka hnyi ta je hnyei.
- 28 Me adre me ûkhacaköu kö Baala-
peora,
Me an ta je hut ka ta je komok.
- 29 Helâe adre me ohmönyinâ e ge anyidra
ta je hulö ;
Me ame utut mok ae cap ködra.
- 30 Ke haba Fineasa ame tot me änyâ
wisa ;
Me ame todru mok ae cap.
- 31 Ke adre me aú e kâu hnân hwakecin
ae wisa,
Ke ne o but ta je dö hia nyiele balua.
- 32 Adre me ohmönyinâ e hnyi an Meriba,
Me ame o but kong kö Mose ünyi
gadra :
- 33 Anyin adre me ovecâ hanon,
Me e ame fuc monu ge li esongodiny.
- 34 Adre me ca ohia ta je hnyei,
Helâ me Iehova ame hûna ködra ;
- 35 K' adre me úthuenikeni ödra me ta je
hnyei,
Me nâ ta je hwakecidra :
- 36 Ke adre me bi athnyaba ka anyidra je
hnatheat ;
Wale me hnân hnewe ködra :
- 37 Eke, adre me hudo lakudra obaga me
wahlu ka je demoni,
- 38 Me hingâlâ dra ae ba hnyikongon wale
dren lakudra obaga me wahlu,
- Waleji adre hudo ka ta je idolainy
hnyei Kanana ;
Me ame kong ut hnyei ge dra,
39 Waleling m' ödra kong bi ünyi ge anyi-
dra ta je huliwa,
Me bi ünyi monu ge hnödra hna änyâ.
- 40 Anyin a wale, ame ubâhlâ thö hmönyin
anyi Iehova ka lakeiny,
Me e ame hûkötîâ jekhon.
- 41 Me e ame hn' ödra but ka hnyi hnyamen
ta je hnyei ;
Me ame musi ödra bi hnen tavat adre
me hûkötî' ödra.
- 42 K' ame sed' ödra hnen je iwahnaihmiöny
mödra,
M' adre me oûhnyükongoi ödra hnyi
hmelen ta je hnyamödra.
- 43 E ame omeli ödra hnyi ta je üen ae se ;
Ke adre me ûkhin fuc hnyi anyidra
ûhnenamö,
K' ame ohnyikön' ödra hnen hwakecidra
ae monu.
- 44 Ke so bi e ame löng hnödra hna vec,
Hnyi üen e ame wâ anyidra tenge :
- 45 Ke e ame ünykûme hnân hobi ködra
anyin ûhikinyköu,
Me ame ietra hoton úganiny anyin be-
tenge.
- 46 E ame öküâ betenge minya ködra
Unyin tavat adre me hwenb' ödra.
- 47 Iehova Khonguhmun lö, omeli öhmun,
Me ûkhacaköu' öhmun dö ünyi hnyi ta
je hnyei,
He ka oleâ iâm ae kap,
Me ohobeluâ hnyi hna oganö u.
- 48 Eso he ka haisoi Iehova, Khongu Isara-
ela,
Hwân ehac balua ke ne o but nyiele
balua.
Ke so ame he tavat hia ka ha, ka habe,
Amen.
Oganö Ja th' öbun.

TUSI V.

SALAMO 107.

- O LEÂ ju kö Iehova ; anyin ae at ae so :
Anyin a nyiele balua anyin betenge.
- 2 E so he ka ha helâe tavat a omeli ödra
Iehova,
Waleji e ame omelö ünyi hnyi hnyamen
iwahnaihmiöny ;

- 3 Me úkhacaköu ödra únyi hnyi ta je hnyei,
 Úhedra jimeio me jimeú,
 Úhedra hnyi hwadrö me hwaiöu.
- 4 Adre me ngenu monu hnyi hnyebuba
 ae ba getheniny ;
 Adre me ca wâ taun bnân labâ.
- 5 Adre me mekihnânem me beic,
 Me e hlohlo ta je hanudra eú hnyidra.
- 6 Me adre me tenge kö Iehova hnyi
 anyidra hlöuhlöu,
 Me e ame omeli ödra únyi hnyi anyidra
 ta je vec.
- 7 E ame su ödra minya eú hnyi gethen ae
 wisa,
 M' adre me he ka he ka hnyi taun hnân
 labâ.
- 8 E na he ju tavat ka oleá kö Iehova can
 anyin betenge,
 Me anyin ta je huliwa hnân láia gan ka
 lakon tavat !
- 9 Anyin a e ame osekunâ hanon at ame
 behu,
 Me öunöngötâ ge so hanon at ae meki-
 hnânem.
- 10 Haba tavat adre me laba hnyi menekh-
 lom me hmenon mok,
 Wale adre me c' ödra hnen vec me fao ;
- 11 Anyin adre me hna degecâ hofuc hwan
 Khong,
 Ke hmiödra ta je hofuc ho Beönuu :
- 12 Anyin a wale e ame hom úhnyúkongoâ
 je hnyekudra ge vec ;
 Adre me ta but ke ba at he ka úhadruo.
- 13 Ke adre me tenge kö Iehova hnyi anyi-
 dra hlöuhlöu,
 Me e ame omeli ödra únyi hnyi anyidra
 ta je vec.
- 14 E ame hum ödra únyi hnyi menekholom
 me hmenon mok,
 Me thu je hna c' ödra.
- 15 E na he ju tavat ka oleá kö Iehova can
 anyin betenge,
 Me can anyin ta je huliwa hnân láia
 gan ka lakon tavat !
- 16 Anyin a e ame hia but thu je homagöule
 bras,
 Me subâ degecâ ta je venyâ fao.
- 17 Adre me ovecâ tavat ae monu can
 hnödra hna hanyâtâ,
 Me can anyidra ta je monu.
- 18 Haba hanudra ame höciâ ta je jeú hia
 thithö ;
- K' adre me hakekeny ka hnyi homagöu-
 leny mok.
- 19 Ke adre me tenge kö Iehova hnyi anyi-
 dra hlöuhlöu,
 Me e ame omeli ödra únyi hnyi anyidra
 ta je vec.
- 20 E ame kunâ hwan hofuc, me ohmetu
 ödra,
 Me omeli ödra únyi hnyi anyidra ta je
 thop.
- 21 E na he ju tavat ka oleá kö Iehova can
 anyin betenge,
 Me can anyin ta je huliwa hnân láia
 gan ka lakon tavat !
- 22 Ke so adre me he ka hudo je hudiny
 ole,
 Me ha anyin ta je huliwa me khumöngö.
- 23 Haba tavat adre me utut ka hnyi ta je
 hu hnyi köio,
 Wale adre me bi huliwa hnyi köio ae
 gan :
- 24 Me adre me wâ ta je huliwa anyi Iehova,
 Me anyin ta je huliwa hnân láia gan
 hnyi dok ae dit.
- 25 Anyin a e ame hûna, me okûâ ang ae
 hwege,
 Wale ame vhiik dö ta je waköio.
- 26 Ame ölö thö göranyai, me ut hnyikânai
 ka hnyi dok ae dit :
 Ke ame köio but ta je hanudra ge vec.
- 27 Adre me thöthö me hwalihwali helâ me
 at ame monu ge grâg,
 Ke monumonu hia anyidra metâ.
- 28 Ke adre me tenge kö Iehova hnyi anyi-
 dra hlöuhlöu,
 Me e ame hum ödra but únyi hnyi
 anyidra ta je vec.
- 29 E ame wia thö weneú me me ta but
 hau,
 Me ame hnyibi ju ta je waköio.
- 30 Ke adre me senyin anyin a ta but hau
 ködra ;
 Me e ame su ödra ka hnyi wasaú adre
 bekec ka hnyin.
- 31 E na he ju tavat he ka oleá kö Iehova
 can anyin betenge,
 Me can anyin ta je huliwa hnân láia gan
 ka lakon tavat !
- 32 E so minya adre me he ka ogöranyâ e
 hnyi úkhacaköu anyin tavat,
 Me ogânâ e hnyi taben lap anyin wahi-
 ngat.
- 33 E ame wia ta je wagewe me me hnye-
 buba but,

- Me je pupuainy köö me me kânâ ae mada ;
- 34 Me kânâ ae wa me me hnyebubainy sâlt,
Can hulö anyin tavat adre me labâ e.
- 35 E ame wia hnyebuba me me an,
Me kânâ ae mada me me je pupuainy köö.
- 36 Ke e ame olabâ eling tavat ae mekihnâ-nem,
M' adre me he ka penapena taun hnân labâ ;
- 37 Me belökâ ta hnyei, me tâ ta je vine,
Me hom bi hobi ködra troban.
- 38 E ame ohnahici ödra minya, m' adre me ti se hia ;
K' ame ca hna haledra omeno he ka wakhalet.
- 39 Ke hnyi ke ün adre me owakhaletâ me ohnyikön' ödra hmetu,
Can hna okongoâ, me vec, me tenge.
- 40 Eame hingälâ hna hûkötiâ ka hnyi hon ta je tuhan,
Me kun' ödra he ka he monu hnyi hnyebuba ae ba getheniny.
- 41 Ke so bi e ame ogöranyâ at ae vec únyi hnyi vec,
Me osehiâ anyin lap helâ me hnabat mamoe.
- 42 Ame he tavat ae wisa ka wâ e me senyin ;
K' ame he hia hulö ka kât hnyimen bi.
- 43 Haba at ae metâ ame he ka wâ wia ta je únyi eling,
K' adre me he ka únykúme wia tang betenge anyi Iehova.

SALAMO 108.

Salamo anyi Davita, a Khumöng.

- K**HONG lö, e mou but hnyekuk ;
Oge me he ka khumöng, eke, oge me he ka khumöng ogânâ me hmanenangik.
- 2 Nabela me kitara lö, hmak dö !
Oge me he bi nya ka hmak hnyi haolany.
- 3 Iehova lö, oge me he ka ole köu hnyi wanben ta je hnyei :
Ke oge me he ka khumöng oganö u hnyi wanben tavat.
- 4 Anyin ae gan hmâ ânyâm ibetengiö hon drany,
Ke haba ânyâm hnathu ke ne o but ka hnyi ta je úlá.
- 5 Khong lö, e so adre me ogöranyi u hon ta je drany :

- Me ânyâm hmanenang hon hmeledrany hia.
- 6 Ö u omelö ju ge hnyamâmu a metâm me ling öhmun ju,
Me me möt tavat a laounykûmâm.
- 7 A hia but Khong ha hnyi hwakecin ae kap ; oge me he ka ohobeluâ :
Oge me he ka khenâ Sekema, me tuluto hnyigöülen bucen Sukotha.
- 8 Anyik bi Gileada ; ke anyik minya Manase ;
Ke haba Eferaima wale hwegien bök :
Ke Juda at ame ham hnök huanyibu.
- 9 Moab anyik utkaia hnân söu ;
Oge me he ka khûâ hnyi Edoma taben hnyeúcak :
Oge me he ka hongot göranyai hon Filisiti.
- 10 Hawa, ie at ame he ka hum nya ka hnyi taun adre up haginny ?
Ie at a hia but su nya Edoma ai ?
- 11 Khong lö, hawa, u je ca hna degeci öhmun ?
Ke u je ca tha he möhmun, Khong, me anyihmun je utbavat.
- 12 Hadru' öhmun dö únyi ge iwahnaihmiöny :
Anyin ae únyi baú bi úhadruo anyin at.
Únyi ge Khong ate me he ka hwege :
Anyin a e bi at ame he ka uto ta je iwahnaihmiöny möta.

SALAMO 109.

Hobi kâu at vhiik khumöng. Salamo anyi Davita.

- K**HONGON hnök hna ogânâ lö, ca laba hnyibû bi.
- 2 Anyin adre hia but khöng hnyem ae kong me hnyem ae iyawö könya :
Adre hia but bi fuc könya ge bohmen ae thoi.
- 3 Adre me igigili nya minya me ta je hofuc ae hiny,
Me vat mönya ke ba can.
- 4 Adre me iwahnaihmiöny mönya hwabanyik betenge :
Ke haba inya oge me hic.
- 5 Ke adre hia but bi hwaban könya so ge kong
Me anyik betenge ge hûköto.
- 6 Ötilâ thö hon e at ae kong :
Ke so e tot iwahnaihmiöny hnyi hnyamen a metân.
- 7 Ödra ka owisa kâu, e so e ame he but ke hu jonin dut ;

- Ke so adre wia anyin khöü me me hulö bi.
- 8 E so e he ka wakhalet bongon je beng ;
E so e he ke at ka hom hanyemen.
- 9 E so he ka wia lakon me me je nakahme,
Me he ka safac âiân.
- 10 E so e he monu bala bi lakon, me sumat ;
Me so adre me heleü jeü hnyi hwaban hnödra je hna laba.
- 11 E so ame hügünâ anyin ta je únyi hia hnen at ame bibihwakecin ;
Ke so ame he je atkanyua ka venâu hnen hna huliwan.
- 12 E so e ba at ama betenge gan ;
Ke so e ba at ame he ka betenge ge lakon a je nakahme.
- 13 E so he ka subâ degecâ ta je mâtrâniny ;
E so he ka kot degecâ iödra hnyi dö a biliny.
- 14 E so e he Iehova ka únykúme jönin lakamen ;
Ke so he ka ca kot degecâ monu anyin hinyen.
- 15 E so e he ka e bala ta je únyi e hnyi hnyimakö Iehova,
Me me he ka subâ degecâ únyi eang hmeledrany hna únykúme ködra.
- 16 Anyin a e ame ca únykúme he ka betenge,
Ke e ame seda at ae vec me at ae theduoc,
Me hlingâ at ae hlöuhlöu hnyekon.
- 17 Eke, e ame weny he ka hahnauhangöâ,
me ame o but e kâu ;
Ke e ame ca senyin he ka ohnabicâ, me ame sâkâú balua but gan únyi eling.
- 18 E ame khavâ úhangö minya helâ me úkhaûen,
Me ame dit e eü hnyi hnyekon helâ me köiö,
Me hnyi hnyin je jeien helâ me wakaco.
- 19 E so e he ka e bi kâu helâ me úkhaû e ame khavâ,
E so he ka e bi kâu helâ me weiken e ame weikâ,
- 20 Walang hwaban ka ta je iwahnaihmiöny mönya únyi ga Iehova,
Me ka tavat adre me haikongoâ hanuk.
- 21 Iehova lö, Than, e so u ma ânyâ hobi kõnya únyi hnyi iâm :
Thöng nya but, anyin ae so ânyâm ibetengiö,
- 22 Anyin a iny vec me theduoc,
K' ame hwadâ but eü hnyi hnyekuk.
- 23 Inya oge me hia helâ me hmenon ae beü :
K' adre me tûö nya helâ me wahamon.
- 24 E senyin dut li boucak anyin oge me cahán ;
K' ame aü tot pipikhenyainy vik.
- 25 Ke iny' taben úhiö ködra :
Adre me ö nya me adre me hnyihnyikâ je bödra.
- 26 Iehova Khonguk lö, hadruo nya ;
Ö u omeli nya ju hoton. ânyâm ibetengiö,
- 27 Me me kham' ödra a walang hnyamâm ;
Ke u thibi Iehova at ame ânyâ e.
- 28 E so adre me he ka hahnauhangö, ke so u ma he bi ka ohnabicâ :
Ödra ka tot, me adre me he ka hmehma,
ke ame he athnyabaem ka senyin.
- 29 E so he ka khavâ te je iwahnaihmiöny mönya ge hmehma,
Ke so adre me tubi ödra bi ge ilitmak helâ me úkhaû.
- 30 Oge me he ka ole oganö Iehova ge hnyimök ;
Eke, oge me he ka ogânâ e hnyi wanben tavat ae se hia.
- 31 Anyin a e ame he ka tot hnyi hnyamen a metân at ae ba ta únyi,
He ka omelö e únyi ge tavat adre me he ka owisa hanon.

SALAMO 110.

Salamo anyi Davita.

- H** AINGÖ Iehova ka tuhök, ka habe,
Laba ju hnyi ke keihök a metök,
Ke ne o but oge me he ka wia ta je iwahnaihmiöny möu me hnân taben li cam.
- 2 Ame he Iehova ka kunâ uciny tang hwegiâm úheny Ziona :
U ma musö bi hnyi wanben ta je iwahnaihmiöny möu.
- 3 Haba lakem adre me he ka hudo me hnyekudra bi hnyi bonginy manâm man :
Hnyi ta je hmanenang ae kap únyi hnyi tangen hnökuiny haolany,
E bi únyâm dân hauiny ânyâm hidröu,
- 4 Iehova a hia but khemanyin, k' ame ca he bi ka ictra, ka habe,
U thibi at bihut nyiele balua helâ me hwakeci Melekisedek.
- 5 Haba Than hnyi hnyamâm a metâm,

Ame he ka kot muâ ta je than hnyi bonginy anyin hmönyin.

- 6 E ame he ka owisa hnyi wanben ta je hnyei,
E ame he ka öunöngötâ ta je dok ge je komok ;
E ame he ka kot muâ ban ta je hnyei ae se.
- 7 E ame he ka ijem wagewe eü hnyi gethen :
Anyin a wale, e ame he ka ogöranyâ ban.

SALAMO 111.

O GANÖ Ja th' öbun.
Oge me he ka ole kö Iehova ge hnyok ae bekhöt.

Hnyi ühnenamö anyin tavat ae wisa me hnyi ükhacaköu.

- 2 E gan hmâ ta je huliwa anyi Iehova, Adre me elâm wia e hnen tavat hia thithö adre me senyin gan.
- 3 E mec me hmanenang anyin huliwa :
Ke ame tethmä bala bi hwakecin ae wisa.
- 4 E ame hia but wia me hnân ünykûme anyin ta je huliwa hnân lâiâ :
E menyik Iehova me unöngöt ge ibetengjö.
- 5 E ame hia but ham jeü ka tavat adre me ouden e :
E ame he ka ünykûme anyin ühinhinykôu nyiele balua.
- 6 E ame hia but omanenâ maniny anyin huliwa ka lakeiny,
Hnyi hnen hna ham ködra jekhon ta je hnyei.
- 7 Haba huliwa anyin li hnyamen, me, hnathu me wisa ;
E hmâ hnen ta je hna hûna.
- 8 E tethmä e ke ne o but nyiele nyiele balua,
Ke ame änyâ hoton hnathu me wisa.
- 9 E ame hia but kunâ ühömeli ka lakeiny ;
E ame hia but hûna anyin ühinhinykôu ke ne o but nyiele balua :
E kap me hnân okabâ ien.
- 10 Haba hwân metâ wale he ka ot kö Iehova ;
Ke adre me wâhmakhmeto wia hnen tavat hia adre me änyâ hoton e :
Ame tethmä hna ogânâ e nyiele balua.

SALAMO 112.

- O** GANÖ Ja th' öbun.
Hnahic hnen at ame outö Iehova,
At ame senyin gan hmâ ge anyin ta je hnanyibu.
- 2 Ame he ta je matrâniny ka hu man eang hmelen :
Ame he ka hnahic döiny tavat ae wisa.
- 3 E bi hnyi umen uma ta je möne me omjeü :
Ke e tethmä nyiele balua hwakecin ae wisa.
- 4 Ame o but melam hnyi menekholom ka tavat ae wisa :
E menyik, me betenge vec, me wisa.
- 5 Hnahic hnen at ame menyik, me më ham ;
E ame he ka tuö anyin te je ünyi hnyi hna owisa.
- 6 Anyin a e ame ca he bala ka bwewwet ;
Adre me he ka ünykûme nyiele balua at ae wisa hwakecin.
- 7 E ame ca he ka ouden te je üthumetu ae kong :
E mou but hnyekon, k' ame labageju kö Iehova.
- 8 Ame tethmä hnyekon, e ame ca he ka ot,
Anyin a e ame he ka wâ weny ka ta je iwahnaihmiöny me.
- 9 E ame hia but kuia, me ham ka tavat ae theduoc ;
K' ame tethmä nyiele balua hwakecin ae wisa :
Ame he ka görany anyin faoiny meno ge ogânâ.
- 10 Ame he tavat ae kong ka wâ e, me hmak bi ;
Me ame he ka hoc nyu, me aü but :
Ame he ka hia weny tavat ae kong.

SALAMO 113.

- O** GANÖ Ja th' öbun
Lathnyabai Iehova lö, ogânâ thö,
Ogânâ thö iö Iehova.
- 2 E so he ka haisö iö Iehova,
Hwân walang ang ke ne o but nyiele balua.
- 3 E so adre me ogânâ iö Iehova,
Hwân hnyi hna o thö seünö ke ne o but hnyi hna üdiliny.
- 4 E beönua Iehova hon ta je hnyei hia thithö,

- Me anyin hmanenang hon ta je drany.
- 5 Ie at ae úcú me Iehova Khonguta,
Wale at ame laba ethö,
- 6 Wale at ame óhnyúkongo e bi me me wá
Ta je únyi hnyi drany me hmeledrany?
- 7 E ame ogóranyá at ae theduoc únyi
hnyi sesá,
Me kap göranyai at ae ba ta únyi, únyi
hnyi hna khúö thatúnyi :
- 8 Me me he ka tha ólaba e me ta je than,
Wale ta je tuhan lakeiny.
- 9 E ame wia momo ae toúnyi he ka tuö
uma,
Me me hnokoá je lakon hnyi senyin.
Oganö Ja th' öbun.

SALAMO 114.

- H**NYI úheny but Isaraela úheny Aigu-
pito,
Wale lap anyi Jakob únyi hnyi hnyi
ae atkanyua hwan káu ;
- 2 E bi Juda umen uma ae kap,
Ke Isaraela dokhon dökhü.
- 3 A wá but nhen köiö, me ame kec ut ;
Ame ohmetu thö Joridano.
- 4 Ame ututut ta je bucen helá me je ma-
moe бага,
Me ta je ong hut helá me je lakon
mamoe.
- 5 Köiö lö, ieu can gam, me u me kec ut ?
Me u Joridano, a u je hmetu ju ?
- 6 Me öbun je bucen a öbun e ututut helá
me ta je mamoe бага ;
Me öbun ta je ong hut, a helá me je
lakon mamoe ?
- 7 Hmeledrany lö, öbubuny ju hnyi hnyi-
makan Than,
Hnyi hnyimakan Khongu Jakob ;
- 8 Waleji at ame wia kic me me an,
Me öut me me hna pupua nhen je köiö.

SALAMO 115.

- I**HOVA lö, ca köhmun bi, ca köhmun
bi,
E so bi he ka hna hna olungá ka iám,
Únyi hnyi ányám betenge me ányám
hnathu.
- 2 Hnán eú ame he ka ha ke je hnyi, ka
habe,
Ewa walang ang Khongudrin ?
- 3 Ke ethö hnyi drany Khonguta :
A hia but ányá hia nhen hna weny.
- 4 Haba anyidra ta je idola, me sileva me
gol,

- A huliwan ta je hnyamen at.
- 5 E ve hu hnyimödra, k' adre me ca fuc
bi ;
E ve hu li emaködra, k' adre me ca wá
bi ;
- 6 E ve hu li hnyikönyödra, k' adre me ca
löng bi ;
E ve hu hnyingoidra, k' adre me ca bu-
bune bi ;
- 7 E ve hu li hnyamödra, k' adre me ca
mádrá bi ;
E ve hu li cadra, k' adre me ca he bi ;
K' adre me ca fuc bi a deny je jeköwi-
dra,
- 8 Ame he tavat adre me up ödra ka helá
mödra ;
Eke, ödra hia hnyat adre me labageju
ködra.
- 9 Isaraela lö, labageju thö kö Iehova :
E thibi at ame hadru' ödra me becindra.
- 10 Lap anyi Arona lö, labageju th' öbun
kö Iehova :
E thibi at ame hadru' ödra me becindra.
- 11 Öbun tavat outö Iehova lö, labageju thö
kö Iehova :
E thibi at ame hadru' ödra me becindra.
- 12 Iehova ame hia but únykúmi öta ; ke
ame he ka ohnahici öta :
E ame he ka ohnahicá lap anyi Isaraela ;
E ame he ka ohnahicá lap anyi Arona.
- 13 E ame he ka ohnahicá tavat adre me
outö Iehova,
Tavat ae úhnyúkong me tavat ae gan.
- 14 E na he ju Iehova ka osehiai öbun til'
öbun,
Wal' öbun me lakubun.
- 15 Öbun e hnahic ut ga Iehova,
At ame op drany me hmeledrany.
- 16 Haba ta je drany, me je drany anyi
Iehova ;
Ke e ame ham hmeledrany ka ta je
lakon at.
- 17 Haba tavat ae mokcu, me adre me ca
ogánö Ja,
Me tavat hia adre me utut ka hnyi dok
adre me laba hnyibu hnyin.
- 18 Ke so bi ate me he ka haisoi Ja
Hwán walang ang, ke ne o but nyiele
balua.
Ogáná Ja th' öbun.

SALAMO 116.

- O**GE me hnyok kö Iehova anyin a e
ame hia but löng
Hok hofuc me anyik khöü.

- 2 Anyin a e ame hia but ta hnyikönyen könya,
Me oge me he ka hawâ e hnyi bonguk ta je bong hia.
- 3 Ame wadrö nya hnen ta je toiny mok,
Me ame köt nya hnen ta je vecin erke-mok :
Oge me wâ vec me tenge.
- 4 Me oge me hawâ iö Iehova, ka habe,
Iehova lö, ö u omelö thö hanuk.
- 5 E betenge me wisa Iehova ;
Eke, at ame betenge baú Khonguta.
- 6 Iehova ame tuö tavat ae ba hnyeku-dra :
Adre me hom úhnyükongu nya, me e ame omeli nya.
- 7 Hanuk lö, hmetu ju ka hnyi hnâm hna menâ ;
Anyin a hia but Iehova ányâ köu so.
- 8 Anyin a u je hia but omelö hanuk me me ca mok,
Me li emakök me me ca tenge,
Me li cak me me ca ta.
- 9 Oge me he ka he hnyi hnyimakö Iehova
Hnyi hnyi iny tavat ae möt.
- 10 Oge me labageju, wale me inye fuc dö :
E gan hmâ anyik vec :
- 11 Oge me ha hnyi hnök hna uthmâhmâ,
ka habe,
E thoi tavat hia thithö.
- 12 Oge me he ka bi hwaban ge ieu kö Iehova
Anyin ta je so hia könya ?
- 13 Oge me he ka hom utkaia anyin úhömeli,
li,
- 14 Me hawâ iö Iehova.
Oge me he ka thamua anyik ta je khöbi kö Iehova,
Eke, hnyi hnyimakan lakeiny hia thithö.
- 15 E únyi hnathu kö Iehova
Mok anyin anyin wakap.
- 16 Than lö, e hnathu inya athnyabaem :
Iny' athnyabaem a nokon athnyabaem a momo ;
U je hia but thang hna cö nya.
- 17 Oge me he ka hudö köu hudiny ole,
Me hawâ iö Iehova.
- 18 Oge me he ka thamua kö Iehova anyik ta je khöbi,
Eke, hnyi hnyimakan lakein hia thithö ;
- 19 Hnyi je hnyeuleny uma umö Iehova,
Ke hnyi wanbâm Jerusalema.
Oganö Ja th' öbun.

SALAMO 117.

- O GANÖ Iehova th' öbun ta je hnyi hia ;
Olungâ thö e öbun tavat hia thithö.
- 2 Anyin ae gan hmâ anyin betenge köta :
K' ame tethmâ nyiele balua hnathu anyi Iehova.
Oganö Ja th' öbun.

SALAMO 118.

- O LEÂ ju kö Iehova ; anyin a e at ae so :
Anyin a nyiele balua anyin ibetengiö.
E na he ju Isaraela ka ha, ka habe,
- 2 Nyiele balua anyin ibetengiö.
- 3 E na he ju lap anyi Arona ka ha, ka habe,
Nyiele balua anyin ibetengiö.
- 4 E na he ju tavat adre me outö Iehova ka ha, ka habe,
Nyiele balua anyin ibetengiö.
- 5 Hnyi anyik vec oge me hongot kö Ja :
Me ame löng könya hnö Ja, me e ame ip nya hnyi dok ae gan.
- 6 Hiök Iehova : oge me ca he bi nya ka ot :
Ieu ke únyi ame he at ka ányâ könya ?
- 7 Hiök Iehova e unyin tavat adre me hadruo nya :
Anyin a wale oge me he ka wâ wek ge tavat adre húkotiö nya.
- 8 E únyi hnathu he ka labageju kö Iehova
Hon he ka labageju ka at.
- 9 E únyi hnathu he ka labageju kö Iehova
Hon he ka labageju ka ta je than.
- 10 Adre me igigili nya ta je hnyi hia thithö :
Hnyi iö Iehova oge me he ka subá degeci ödra.
- 11 Adre me igigili nya, eke, adre me igigili nya :
Hnyi iö Iehova oge me he ka subá degeci ödra.
- 12 Adre me igigili nya helâ me ta je bi ;
adre me aú but helâ me ta je angö hnyi meic ;
Hnyi iö Iehova oge me he ka subá degeci ödra.
- 13 U je hagutö nya hwegiö nya, me inye he ka ta :
Ke haba Iehova ame hadruo nya.

SALAMO 119.

- 14 Tang hwegiök Ja, me anyik khumöng ;
Ke e thibi at ame omeli nya.
- 15 E bi hnyi je uma mano umen tavat ae
wisa hwan senyin, me úhömeli :
Ame ányá hwegiá hnen hnyam a metö
Iehova.
- 16 Ame görany dut hnyam a metö Iehova :
Ame ányá hwegiá hnen hnyam a metö
Iehova.
- 17 Oge me ca he ka mok, ke oge me he
ka möt,
Me omanená ta je huliwa anyi Ja.
- 18 Haba Ja ame hia but osöi nya hwegiö
nya :
K'ame ca hia but hnö nya bi he ka mok.
- 19 Khöng ut könya ta je homagöuleny
hwakecin ae wisa :
Oge me he ka didrö hnyin, oge me he
ka ole kö Ja.
- 20 Walang thibi homagöule Iehova ;
Ame he tavat ae wisa ka dit hnyin.
- 21 Oge me he ka ole köu, anyin a u je hia
but thu könya,
Ke u thibi at ame omeli nya.
- 22 Haba veto waleji a degec hnen tavat
up uma,
Wale thibi e hnân ban bahebet.
- 23 Haba únyi eling únyi ga Iehova ;
Ke hnân láia köta.
- 24 Walang thibi bong ame ányá Iehova ;
Ate me he ka senyin me hobá hnyin.
- 25 Iehova lö, ö u omelö ju :
Than lö, öhmun e khöü köu, ohnahici
öhmun.
- 26 Hnahic hnen at ame o hnyi iö Iehova :
Öhmun e hia but ha hnahici öbun únyi
hnyi uma umö Iehova.
- 27 Iehova Khong, ke e ame hia but ome-
lami öta :
Ca ju je hut ge je tö, wale ka hnyi je
baitoiny taben hut.
- 28 U thibi Khonguk, ke oge me he ka
ole köu :
U thibi Khonguk, oge me he ka ogö-
ranyi u.
- 29 Oleá ju kö Iehova ; anyin a e at ae so :
Anyin a nyiele balua anyin ibetengö.

SALAMO 119.

¶ ALEF.

HNAHIC hnen tavat adre me fofá
hnyi gethen,
Tavat adre me vheno hnanyibu anyi
Iehova.

- 2 Hnahic hnen tavat adre me vheno
hnen ta je hna ohnathöá,
Tavat adre me elám e hnen hnyok ae
bekhöt.
- 3 Eke, adre me ca hnyi ányá hwakecin
ae hwali ;
K' adre me vheno deny ta je gethen.
- 4 U je hia but huná ányám ta je hna-
nyibu,
M' öhmun e he ka tuö wia.
- 5 E na tethmä ju dek ta je gethen
He ka vheno ányám ta je hnanyibu !
- 6 Oge me ca he ka hmehma,
Iny ka wá wia ányám ta je hnanyibu
hia.
- 7 Oge me he ka ole köu ge hnyekuk ae
wisa,
E ka khanö nya thö hnâm je hna owisa
ae wisa.
- 8 Oge me he ka tuö ányám ta je hna-
nyibu :
U na ca he ju ka hna degeci nya.

∩ BETH.

- 9 Ame he ka kâmâu hidröu ka ányáwia
deny gethen ?
Hamen he ka wá wia e hoton hwâm
hofuc.
- 10 Oge me hia but elöm u ge hnyekuk ae
bekhöt :
Ö u ca hnö nya but he ka he monu
únyi hnyi ányám ta je hnanyibu.
- 11 Oge hia but hitangen hwâm hofuc eü
hnyi hnyekuk,
Me inye ca he ka ányá hulö köu.
- 12 Iehova lö, e so adre me haisoi u :
Nö nya thö ge ányám ta je hnanyibu.
- 13 Oge hia but omanená ge li esongodik
Ta je hna owisa hia únyi hnyi hnyi-
mâm.
- 14 Oge hia but senyinâ deny hnâm je hna
ohnathöá,
Helá me hnök hna senyinâ ta je omjeü
hia thithö.
- 15 Oge me he ka únyküme wia ka ányám
je hnanyibu,
Me wá wia dem je gethen.
- 16 Oge me he ka hobá ge hnâm ta je hna
otilá :
Oge me ca he ka hnying hwâm hofuc.

∩ GIMEL.

- 17 Ányá thö so ka athnyabaem, me inye
he ka möt ;
Me oge me he ka tuö hwâm hofuc.

- 18 Obwela but li emakök, me inye he ka wá
Ta je únyi hnân láii únyi hnyi ányám hnanyibu.
- 19 Iny atkanyua eang hmeledrany :
Ca ikhálá bi gak ányám ta je hnanyibu.
- 20 Ame hmouca but hanuk hnen weny ae gan hmá
Hnyi je bong hia ka hnyi hnám ta je hna owisa.
- 21 U je hia but oú tavat bi gan a tavat hnaúhangö,
Tavat adre me he monu únyi hnyi ányám ta je hnanyibu.
- 22 Ohia but gak úhiö me hna úhúkötö ;
Anyin a oge hia but tuö hnám ta je hna ohnatho.
- 23 Ame tha laba je than me bifuci nya :
Ke inya athnyabaem oge me únykúme ka ányám je hnanyibu.
- 24 Hnân osenyini nya hnám ta je hna ohnatho.
K' ame nö nya hnyi anyik úhnenamö.
- † DALETH.
- 25 Ame kece hanuk ka hnyi sesá :
Omeli nya thö hoton hwám hofuc.
- 26 Oge me haimemená dek ta je gethen,
me u je thu kõnya :
Nö nya thö ge ányám ta je hnanyibu.
- 27 Okhanö nya thö ge deny ányám ta je hnanyibu :
M' oge me he ka únykúme ányám ta je huliwa hnân láii.
- 28 Ame tenge hanuk ge hmak :
Sihwegiö nya thö hoton hwám hofuc.
- 29 Oútsákáúúá but mönya deny thoi :
Me ham baúá kõnya ányám hnanyibu.
- 30 Oge hia but úca gethen deny hnathu :
Oge hia but ip hnyi hnyimakök hnám ta je hna owisa.
- 31 Oge me kece ka hnám ta je hna ohnathoá :
Iehova lö, ca ohmehmai nya but.
- 32 Oge me he ka wadringá deny ányám ta je hnanyibu.
U ka he ka ogáná hnyekuk.
- † HE.
- 33 Iehova lö, nö nya thö ge deny ányám ta je hnanyibu ;
Me oge me he ka vheno e ke ne o but obiny.
- 34 Ham kõnya metá, me oge me he ka tuö ányám hnanyibu ;
- Eke, oge me he ka tuö e ge hnyekuk ae bekhöt.
- 35 Su nya thö hnyi gethen deny ányám ta je hnanyibu ;
Anyin oge me senyiná e.
- 36 Ohmehmela thö hnyekuk ka hnyi hnám ta je hna ohnathoá,
Ke ca he ka behnyoká omjeú bi.
- 37 Wia ju li emakök, me inye ca he ka wá únyi ae únyi baú,
Me omeli nya thö hnyi dem je gethen.
- 38 Ohwádá ju hwám hofuc ka athnyabaem,
Wale at ame outö u.
- 39 Wia degecá but hna hiö nya wale oge me outen ;
Anyin ae so hnám je hna owisa.
- 40 Bethe wá bi, oge me wek hwegiá ányám ta je hnanyibu :
Omeli nya thö hnyi ányám wisa.
- † VAU.
- 41 Iehova lö, e so e o but kõnya ányám betenge,
Wale ányám úhömeli hoton hwám hofuc.
- 42 Me oge me he ka hu hnân thu ka at ame hiö nya ;
Anyin a inya oge me labagejon hwám hofuc.
- 43 Ke ca he ka hom hia únyi hnyi hnyi-mök hofuc ae hnathu ;
Anyin a oge hia but gejon hnám je hna owisa.
- 44 Me oge me he bala ka tuö ányám hnanyibu
Ke ne o but nyiele balua.
- 45 Ke oge me he ka vheno dok ae gan ;
Anyin a oge hia but elám ányám ta je hnanyibu.
- 46 Oge me he minya ka úhnenamö hnyi hnyimakan je than hnám ta je hna ohnathoá,
Ke oge me ca he ka hmehma.
- 47 Ke oge me he ka hobá ányám ta je hnanyibu,
Waleji oge me hnyok káu.
- 48 Oge me he minya ka ogöranya li hnyamök ka hnyi ányám ta je hnanyibu,
waleji oge me hnyok káu ;
Ke oge ma he ka únykúme wia ányám ta je hnanyibu.
- † ZAIN.
- 49 Únykúme ju je hofuc ka athnyabaem,
Waleji u je kunö nya he ka gejon.

- 50 Wale at ame otubweli nya hnyi anyik vec :
Anyin a hia but omeli nya hwâm hofuc.
- 51 E gan hmâ hna hlumö nya ge tavat bi gan :
Ke so bi oge me ca hia but saü ûnyi hnyi ânyâm hnanyibu.
- 52 Iehova lö, oge hia but ûnykûme hnâm je hna owisa kâû adrem,
Me oge me otubweli nya bi.
- 53 Ame hia but o kõnya hmönyin ae gan hmâ,
Can tavat ae kong adre me degec ânyâm hnanyibu.
- 54 Haba ânyâm je hnanyibu me wale hwanyik je khumöng
Hnyi uma oge me laba kanyua hnyin.
- 55 Iehova lö, oge hia but ûnykûme iâm hnyi hnyinghet,
Me tuö ânyâm hnanyibu.
- 56 Ka hia but helâe kõnya,
Anyin oge me ânyâ ânyâm ta je hnanyibu.
- KHETH.
- 57 Iehova thibi jekhöük :
Oge hia but ha a oge me he ka vheno hwâm je hofuc
- 58 Oge hia but sumatâ ânyâm ibetengiö ge hnyekuk ae bekhöt :
Betenge ju gak hoton hwâm hofuc.
- 59 Oge hia but ûnykûme dek je gethen,
Ke oge me wia li cak ka hnyi hnâm ta je hna ohnathöa.
- 60 Oge me mweimwei me ca bec bi,
He ka tuö ânyâm ta je hnanyibu.
- 61 Ame hia but wâdrö nya ge ta je tö anyin tavat ae kong ;
Ke oge me ca hnying ânyâm ta je hnanyibu.
- 62 Oge me he ka todrö hnyi wanbenset he ka oleâ köu
Can hnâm ta je hna owisa ae wisa.
- 63 Iny liamewaeny mödra hia thithö adre me outö u,
Me tavat adre me tuö ânyâm ta je hnanyibu.
- 64 Iehova lö, e unöngötö hmeledrany ge ânyâm tang betenge :
Nö nya thö ge anyâm je hnanyibu.
- SETH.
- 65 Iehova lö, u je hia but mâdrâ so ka athnyabaem,
Hoton hwâm hofuc.
- 66 Nö nya thö ge hna owisa ae so me metâ ;
Anyin a inya oge me kap ânyâm ta je hnanyibu.
- 67 Oge me he monu waleji hnyi ûen a iny tiga ca vec ;
Ke walang ang inya oge me vheno hwâm hofuc.
- 68 U thibi at ae so, me at ame ânyâ so ;
Nö nya thö ge ânyâm ta je hnanyibu.
- 69 A hia but sit hofuc thoi kõnya tavat bi gan :
Oge me he ka tuö ânyâm ta je hnanyibu ge hnyekuk ae bekhöt.
- 70 A khöt ut ta je hnyekudra ge pipi-khenya ;
Ke inya oge me hobâ ânyâm hnanyibu.
- 71 E hu soik ûnyi hnyi hna oveci nya ;
Me inye he ka nâ ânyâm ta je hnanyibu.
- 72 E beönua soiny kõnya hnanyibuiny hnyimâm
Hon je thauzan gol me sileva.
- ▷ JOD.
- 73 Ame up nya me tretrau nya ge li hnyamâm :
Okhanö nya thö, me me khanö nya ânyâm ta je hnanyibu.
- 74 Adre me he tavat adre me outö u ka ö nya me senyin ;
Anyin a oge me gejon hwâm hofuc.
- 75 Iehova lö, e khanö nya but ae wisa hnâm ta je hna owisa.
- 76 E na he ju ânyâm betenge ka otubweli nya,
Helâ me hwâm hofuc ka athnyabaem.
- 77 E so e he ka o but kõnya ânyâm ibetengiö, m' inye he ka möt :
Anyin a inya oge me senyina ânyâm hnanyibu.
- 78 E so e hmehma tavat bi gan : anyin adre hia but hagutö nya ge thoi :
Ke oge me he bi nya ka ûnykûme wia ge ânyâm ta je hnanyibu.
- 79 E so e hwiö thö kõnya tavat adre me outö u,
M' adre me he ka khana hnâm ta je hna ohnathöa.
- 80 E so e ba hnyikongon hnyekuk hnyi ânyâm ta je hnanyibu ;
Me inye ca he ka hmehma.
- ▷ KAF.
- 81 Ame mokhon hanuk hnyi wek ka ânyâm ûhömeli :

- Ke oge me gejon hwâm hofuc.
- 82 A jok ut li emakök can hwâm hofuc,
Wale me inya ha thö, ka habe, Ieú
úen u me he ka okhahwö nya hnyin?
- 83 Iny úcú me tangen köiö hnyi hainy
meic;
Ke oge me ca hnying bi ányâm ta je
hnanyibu.
- 84 Ve ta bong bonginy athnyabaem?
Ieú úen u me he ka bi hwaban ka tavat
adre me oveci nya?
- 85 A hia but hiny je thop hobi kõnya
hnen tavat bi gan,
Ke ca tha úcú ödra me ányâm hnanyibu.
- 86 E hnathu hia ányâm ta je hnanyibu:
Adre me oveci nya ge thoi; hadruo
nya thö.
- 87 K' adre me ne ohiö nya but hnyi hnyei;
Ke inya oge me ca hna degecá ányâm
ta je hnanyibu.
- 88 Omeli nya thö hoton ányâm íbetengiö;
Me oge me he ka vheno hnâm hna
ohnathoá ge hnyimâm.
- ↳ LAMED.
- 89 Iehova lö, adre otethmä nyiele balua
Ethö hnyi drany hwâm hofuc.
- 90 Ke ne o but hnyi ta je dö hia ányâm
hnathu:
U je hia but otethmä hmeledrany, me
ame hmá e.
- 91 Ame hmá hnyi bong ang hoton hnâm
je hna otílá:
Anyin a lathnyabaem ta je únyi hia
thithö.
- 92 Oge ne ca senyiná ányâm hnanyibu,
Ma hiö nya but hnyi anyik vec.
- 93 Oge me ca he ka hnying bala ányâm ta
je hnanyibu;
Anyin a u je hia but omeli nya a deny e.
- 94 Ányâm inya, omeli nya;
Anyin a o ge me elám ányâm ta je
hnanyibu.
- 95 A hia but tavat ae kong halubuhing'
nya he ka hlingö nya;
Ke inya oge me he ka únykúme hnâm
ta je ohnathoá.
- 96 Oge hia but wá obiny ta je únyi hia ae
bekhöt soiny;
Ke laú hmönyin ányâm hnanyibu.
- ↳ MEM.
- 97 Shaiba ge hnök hna hnyok ka ányâm
hnanyibu!
E bi mekhunen hnyekuk hnyi je bong
hia.
- 98 Haba ányâm hnanyibu ame ometö nya
hon ta je iwahnaihmiöny mönya;
Anyin a ödra bala but unyik.
- 99 Iny metá hon tavat hia adre me nö
nya;
Anyin a inya oge me únykúme wia
hnâm ta je hna ohnathoá.
- 100 E nua hnök hna wáhmakhmeto hon
wahingat,
Anyin oge hia but vheno ányâm ta
je hnanyibu.
- 101 Oge hia but beháná li cak ge ta je
gethen hia ae kong,
Me inye he ka tuö hwâm hofuc.
- 102 Oge me ca hia but saú únyi hnyi
hnâm ta je hna ohnathoá;
- 103 Shaiba ge hnebwiainy hwâm ta je
hofuc hnyi eengodik!
Eke, e hnebwia hon hani hnyi hnyi-
mök.
- 104 Oge me wáhmakhmeto a deny ányâm
ta je hnanyibu:
Anyin a wale húkötianök ta je gethen
hia ae thoi.
- ↳ NUN.
- 105 Haba hwâm hofuc, me, lamepainy li
cak,
Me melaminy dek gethen.
- 106 Oge hia but khemanyik, me ohmä e,
A oge me he ka vheno hnâm ta je hna
owisa ae wisa.
- 107 E gan hmá anyik vec:
Iehova lö, omeli nya thö helá me
hwâm hofuc.
- 108 Iehova lö, ö u kap ju je hut ae betenge
únyi hnyi hnyimök,
Ke nö nya thö ge hnâm je hna owisa.
- 109 E bala bi hanuk hnyi hnyamök;
Ke oge me ca hnying bi ányâm hna-
nyibu.
- 110 A hia but tavat ae kong töu hnwei
nya;
Ke oge me ca he monu únyi hnyi
ányâm ta je hnanyibu.
- 111 Oge hia but hom hnâm ta je hna
ohnathoá hnân jekhöúk nyiele ba-
lua;
Anyin ame osenyiná hnyekuk.
- 112 E hmehmela hnyekuk he ka ányá
ányâm ta je hnanyibu,
Nyiele balua, ke ne o but obiny.
- ↳ SAMEK.
- 113 Húkötianök tavat adre me hnyok lo;
Ke oge me hnyoká ányâm hnanyibu.

- 114 U thibi hnök hna lubaduöng me becik :
Oge me gejon hwâm hofuc.
- 115 Úsákáúö but mönya öbun tavat ányâ hulö ;
Me oge me he ka vheno ta je hnanyibu anyin Khonguk.
- 116 Ci nya thö e úcú me hwâm hofuc, m' oge me he ka möt :
Ke ca hnö nya bi he ka hmehma ge hnök hna gejon.
- 117 Ci nya thö, me oge me he ka möt,
Ke oge me he bala bi ka wâ wia ányâm ta je hnanyibu.
- 118 U je hia but wâ öúnyibaú' ödra hia adre he monu únyi hnyi ányâm ta je hnanyibu ;
Anyin a ödra thoi me iyawö.
- 119 U je ohia hia tavat ae monu eang hmeledrany helâ me dron fao :
Anyin a wale inya oge me hnyok ka hnâm ta je hna ohnathoâ.
- 120 Ame öbubuny vik ge hnök hna outö u ;
Ke iny ot ge hnâm ta je hna owisa.

V AIN.

- 121 Oge hia but ányâ hna owisa me hwa-kecin ae úcú ;
Ca hnö nya bi ka tavat adre me okongu nya.
- 122 Bi singiny ju athnyabaem, me me so :
Ca hna but tavat ae bi gan he ka okongu nya.
- 123 A jok ut li emakök anyin hna lubahingen ányâm úhómeli,
Me hwâm hofuc ae wisa.
- 124 Mádrâ thö ka athnyabaem hoton ányâm betenge,
Ke nö nya thö ge ányâm ta je hnanyibu,
- 125 Inya ang athnyabaem, okhanö nya thö,
Me me khanö nya thö hnâm ta je hna ohnathoâ.
- 126 Úen dut ang kö Iehova he ka huliwa ;
Anyin adre hia but öúnyibaúâ ányâm hnanyibu.
- 127 Anyin a wale inya oge me hnyok ka ányâm ta je hnanyibu
Hon gol, eke, hon gol ae so.
- 128 Anyin a wale oge me haiwisa hia, ányâm ta je hnanyibu ge ta je únyi hia ;
Hmiök ta je gethen hia ae thoi.

E PE.

- 129 Hnân láia hnâm ta je hna ohnathoâ :
Anyin a wale ame tuö hnen hanuk.
- 130 Haba hna omanená bongon hwâm ta je hofuc, me wale hnân omelamá ;
Ame owáhmakhmeto tavat ae ba hnyekudra.
- 131 Inya oge me memang, me mokhon hwege ;
Anyin oge me wek gan hmâ ka ányâm ta je hnanyibu.
- 132 Hwiö thö könya, me betenge ju gak,
Helâ me hwakecâm ka tavat adre me hnyokâ iâm.
- 133 Lelö ju li cak ka hnyi hwâm hofuc ;
Ke ca hna but hulö he ka musi nya.
- 134 Húgúnö nya but únyi hnyi úkonguny anyin at :
Me oge me he ka tuö ányâm ta je hnanyibu.
- 135 Öumumelamá thö hnyimákâm hon athnyabaem ;
Ke nö nya thö ge ányâm ta je hnanyibu.
- 136 Ta je di ame hingölö hnyi li emakök,
Can adre me ca tuö ányâm ta je hnanyibu.

S TZADE.

- 137 Iehova lö, u wisa,
Ke wisa minya hnâm ta je hna owisa.
- 138 U je hia but húna hnâm ta je hna ohnathoâ hnyi hwakecin ae wisa,
Me hwakecin ae hnathu hmönyin.
- 139 Ame hia but oaúö nya hnen wek ae gan hmâ,
Anyin ame hnying ut hwâm hofuc hnen ta je iwahnaihmöny mönya.
- 140 E kalaöt hmönyin hwâm hofuc ;
Anyin a wale a hia but athnyabaem hnyok kâu.
- 141 Iny úhnyúkong me hmiödra :
Ke oge me ca hnying hnâm ta je hnanyibu.
- 142 E wisa balua but hwakecâm ae wisa,
Ke hnathu ányâm hnanyibu.
- 143 Ame hia but o könya vec me hmak :
Ke inya oge me senyin ge ányâm ta je hnanyibu.
- 144 E wisa balua bi hnâm ta je hna ohnathoâ :
Okhanö nya thö, me oge me he ka möt.

7 KOF.

- 145 Oge hia but hongot ge hnyekuk ae bekhöt; Iehova lö thu thö könya: Oge me he ka vheno änyâm ta je hnanyibu.
- 146 Oge hia but hongot köu; omeli nya thö, Me oge me he ka wâ wia hnâm ta je hna ohnathoâ.
- 147 Oge me khaletâ haolany, me tenge; Oge me gejon hwâm hofuc.
- 148 Ame khaletâ je üen hmak hnyi hnyinghet hnen li emakök; Me inye he ka únykúme wia hwâm hofuc.
- 149 Iehova lö, löng ju ifucik hoton änyâm ibetengjö; Omeli nya thö, hoton hnâm ta je hna owisa.
- 150 E hakekeny jut tavat úkonguny; Ödra úsákáú but me änyâm hnanyibu.
- 151 Iehova lö, u hakekeny thibi; Ke hnathu hia änyâm ta je hnanyibu.
- 152 E khanö nya but adrem únyi hnyi hnâm ta je hna ohnathoâ, A u je hia but bi taben e ke ne o but nyiele balua.

7 RESH.

- 153 Únykúme ju ge anyik vec, me omeli nya; Anyin oge me ca hnying änyâm ta je hnanyibu.
- 154 Ivinö thö hobi könya, me bi hwaban anyik möt: Omeli nya thö hoton hwâm hofuc.
- 155 E sákáú but úhömeli ka tavat ae kong; Anyin adre me ca elâm änyâm ta je hnanyibu.
- 156 Iehova lö, e gan hmâ änyâm ta je ibetengjö: Omeli nya thö hoton hnâm ta je hna owisa.
- 157 E se hia tavat adre me sedö nya me bi iwahnaihmiöny mönya; Ke oge me ca hia but saú únyi hnyi hnâm ta je hna ohnathoâ.
- 158 Oge me wâ but tavat úalecuo, me oge me hmak dö; Anyin adre me ca vheno hwâm hofuc.
- 159 Iehova lö, únykúme ju ge hnök hna hnyok ka änyâm ta je hnanyibu. Omeli nya thö, hoton änyâm ibetengjö.
- 160 Haba önyen hwâm hofuc, me, hnathu;

K' ame ve tethmä nyiele balua hnâm ta je hna owisa hia.

7 SHIN.

- 161 A hia but sedö nya hnen ta je than, ke ba can; Ke haba hnyekuk ame outen hwâm hofuc.
- 162 Oge me senyiná hwâm hofuc, Helâ me at ame hlo omjeú ae gan hmâ adre söh.
- 163 Oge me húkötia me ikikiâ thoi; Ke oge me hnyok ka änyâm hnanyibu.
- 164 Iny oseven oganö u hnyi bong a khaca, Can hnâm je hna owisa ae wisa.
- 165 E gan hmâ hnahic hnen tavat adre me hnyokâ änyâm hnanyibu; Ke ba únyi hnân ohaú' ödra.
- 166 Iehova lö, inya oge hia but gejon änyâm úhömeli, Me änyâ hnâm ta je hna húna.
- 167 Haba hanuk, me, ame hia but vheno hnâm ta je hna ohnatho; Ke oge me hnyok gan hmâ káu.
- 168 Inya oge hia but vheno hnâm ta je hnanyibu me hnâm ta je hna ohnathoâ; Anyin a eú hnyi hnyimákâm dek ta je gethen hia.

7 TAU.

- 169 Iehova lö, e so e ka o but ka hnyi hnyimákâm anyik tenge: Okhanö nya thö hoton hwâm hofuc.
- 170 E so e he ka o but hnyi hnyimákâm hok hwakhöú: Omeli nya thö hoton, hwâm hofuc.
- 171 E so ame he li esongodik ka ha hna ogânâ; Anyin a u me nö nya ge änyâm ta je hnanyibu.
- 172 E so ame he bohömök ka khumöngö hwâm hofuc; Anyin ae wisa änyâm ta je hnanyibu hia.
- 173 E so e penapena hnyamâm ka hadruo nya; Anyin oge hia but úca änyâm ta je hnanyibu.
- 174 Iehova lö, oge me ti wek hmönyiná änyâm úhömeli; Ke oge me senyin ge änyâm hnanyibu.
- 175 E so e he hanuk ka möt, me e ame he ka oganö u; Ke so e he hnâm je hna owisa ka hadruo nya.

SALAMO 120—124.

176 Oge hia but he monu helá me mamoe a hia ; ö u elom nya,
Anyin oge me ca hnying ányâm ta je hnanyibu.

SALAMO 120.

Khumöng ölö.

HNYI anyik vec oge me hongot kö Iehova,
Me e ame thu kõnya.
2 Iehova lö, omelö thö hanuk únyi ge li esongot ae thoi,
Me únyi hnyi bohmen ae thoi.
3 Bohmen ae iyawö lö,
Ieú adre me he ka ham köu, ke ie ke únyi minya adre me he ka ányâ köu ?
4 Je fana anyin at hwege ae so homakan,
Me je walepiny sâ.
5 E kölö gak anyin a inya oge me laba kanyua hnyi Meseka,
Ke unyin je uma mano hnyi Kedara !
6 E kueny dut tha laba hanuk
Me at ame hûkotiâ úsoköu,
7 Iny at ae beúsoköu :
Ke iny ka fuc, me adre me bi vat.

SALAMO 121.

Khumöng ölö.

OGE me he ka hngele göranyai ka hnyi je bucen :
Ama he ka o úheny ua hna hadruo nya ?
2 Haba úhadruo nya me únyi ga Iehova,
At ame op drany me hmeledrany.
3 E ame ca he ka hna li cam he ka bwebwet :
Ame ca he ka ta mokut bi at ame tuö u.
4 Wâ bi, haba at ame tuö Isaraela
Ame ca he ka ta mokut me mokut hnying.
5 Iehova thibi at ame tuö u :
Iehova thibi hmenom hnyi hnyamâm a metâm.
6 Ame ca he bi seúnö ka li u hnyi lany,
Ke tehi hnyi lit.
7 Ame he Iehova ka tuö u hnyi ta je únyi hia ae kong ;
E ame he ka tuö hanom.
8 Ame he Iehova ka tuö u, u ka dit ut,
ke u ka didrö hmetu,
Hwân walang ang ke ne o but nyiele balua.

SALAMO 122.

Khumöng ölö : anyi Davita.

INYA oge me senyin hnyi úen ödrin e ha kõnya, ka habe,
E so ötin e he ka hnyi uma umö Iehova.
2 Jerusalema lö, ame tot je li cahmun
Hnyi ta je homagöulem ;
3 Wale Jerusalema adre op
Helá me taun adre úhújâkôuâ wia :
4 K' ame ölö ka hnyin hnen ta je tribu, a ta je tribu anyi Ja,
Hnân únyi hnân ohnathoâ kö Isaraela,
M' adre me he ka oleâ iö Iehova.
5 Anyin a eling ta je theron hnân owisa,
Je theroniny lap anyi Davita.
6 Hic ju, me me hnahic Jerusalema :
Ame he ka hu sot ka tavat adre me hnyok köu.
7 E so e eú hnyi hagâm hak hnahic,
Me sot hnyin umâm ta je uma.
8 Ge ta je liamekeiny mönya me ta je lahanök,
Oge me he ka ha hnahici u.
9 Únyi ge uma umö Iehova a Khonguta
Oge me he ka elâm ányâm so.

SALAMO 123.

Khumöng ölö.

INYA oge me bwele göranyai köu,
At ame laba hnyi drany.
2 Wâ bi, je li emakan ta je athnyaba ame hngele ka hnyi hnyamen ta je tuhödra,
Ke li emakan in ame hngele ka hnyi hnyamen tuban a momo ;
Helâe minya je li emaköta kö Iehova a Khonguta,
Ke ne o but e ame he ka betenge gata.
3 Iehova lö, betenge ju gahmun, betenge ju gahmun :
Anyin adre me haikongu öhmun gan hmâ.
4 Ame ti unöngöt hanuhmun
Ge hna hmiân hnen tavat adre me laba khötkie,
Me hna úhiö hnen tavat bi gan.

SALAMO 124.

Khumöng ölö ; anyi Davita.

ESO ame he Isaraela ka ha, ka habe
Ame ne ca tha hiö Iehova möta ;

- 2 A ne ca Iehova bi at ame tha hien möta,
Hnyi ün waleji ame todrö köta tavat :
- 3 Awe, ma hia but ut' öta k' öta tiga möt bi.
Waleji hnyi iubáhláiny hmönyin anyin tavat köta.
- 4 Ma hia but hülülú' öta hnen ta je köiö,
Me khutukhaúá je hanuta hnen di :
- 5 A ne heláe me a hia but khutukhaúá ta je hanuta ge ta je köiö ae bi gan.
- 6 Haisoi Iehova thö,
Wale at ame ca hn' öta ka ta je nyudra me hnán han.
- 7 A möt ut hanuta helá me meno ame gá unyi hnyi hnewe anyin tavat tóu hnewe :
A mou thö hnewe, m' ate me möt ut.
- 8 Haba iö Iehova ame hadru' öta,
At ame op drany me hmeledrany.

SALAMO 125.

Khumöng ölö.

- H**ABA tavat adre me labageju kö Iehova,
Ödra úcú me bucen Ziona, wale at ame ca bwebwet, k' ame tethmá nyiele balua.
- 2 Ame igigili Jerusalema hnen ta je bucen,
Me heláe ame igigilö lakeiny hnö Iehova,
Hwán walang ang ke ne o but nyiele balua.
- 3 Anyin ame ca he uciny musi anyin tavat ae kong ka laba hon hwajekhon tavat ae wisa ;
Me me ca he tavat ae wisa ka hinöbeny ka hulö.
- 4 Iehova lö, ányá thö sö ka tavat ae so,
Me ka tavat adre me hnyok wisa.
- 5 Ke haba tavat adre me saú ka hnyi ta je gethen ae hwali,
Ame he Iehova ka hum ödra he ka tha he me tavat adre me ányá hulö.
E so e e hon Isaraela hnahic.

SALAMO 126.

Khumöng ölö.

- H**NYI hna ohmetu Ziona ga Iehova úheny hnyi hna bá,
Öta úcú me tavat adre me bwi.
- 2 Me ame unöngötö ta je hnyimöta ge behluma,

- Me ta je bohmöta ge khumöng :
Me ame ha thö ta je hnyei, ka habe,
Iehova ame hia but ányá ta je únyi ae gan ka tavat ang.
- 3 A hia but Iehova ányá ta je únyi ae gan köta ;
Waleji ate me senyin gan.
- 4 Iehova lö, hmetu ju köhmun ta je bá,
Helá me ta je wekhet hnyi Hwaiöu.
- 5 Haba tavat adre me ta tengiá, adre me he ka meno hnyi senyin.
- 6 Eja ke ne a ne tenge tot me tang hantong :
E ame he ka hmetuhmetu hnyi senyin me ta je thi hwit.

SALAMO 127.

Khumöng ölö ; anyi Solomona.

- A**NE ca op Iehova uma,
Mé me he tavat ka okhot ka op e :
Ame ne ca tuö bi taun Iehova,
Ma me he ka hmak baú at ame tue.
- 2 E únyi baú hnöbun hna vesákong, me bec he ka mokut,
Me an jeúiny huliwa ae hmak :
Anyin a heláe e ame ham mokut ka laofnykúminy.
- 3 Wá bi, jekhöúta únyi ga Iehova ta je wanakat :
Ke hwaban únyi gan, wale wan tangen hnöku.
- 4 Haba lakon hidróu,
Helá me thi fana hnyi hnyamen at ae hwege.
- 5 Hnahic hnen at ae hu tangen fana ae unöngöt gadrin :
Adre me ca he ka hmehma,
Ödra ka úhnenamö me ta je iwahnaihmióny mödra hnyi homagöule.

SALAMO 128.

Khumöng ölö.

- H**NAHIC hnen at ame outö Iehova,
A at ame vheno deny ta je gethen.
- 2 U me he ka senyin me hnahic ;
Anyin a u me he ka an troban huliwa anyin li hnyamám.
- 3 Haba áiam ame he ka helá me vine ame wa, hnyi je ke keihen umám uma eiö hnyin :
Ke lakom helá me khúen elaiö igigilö ányám laulau.
- 4 Wá bi, heláe män hnahic anyin at
Ame outö Iehova,

- 5 Ame he Iehova ka ohnahici u úheny Ziona :
Ke u me he ka wâ so ka Jerusalema hnyi je bong hia bongon ányâm môt.
6 Eke, u me he ka wâ lakon ta je lakâm.
E so e hon Isaraela hnahic.

SALAMO 129.

Khumöng ölö.

- E**SO ame he Isaraela ka ha, ka habe,
Adre hia but osehia oveci nya,
hwân k' iny tiga hidröu ;
2 Adre hia but osehia oveci nya hwân k'
iny tiga hidröu ;
K' ödra ca hwege bi huk.
3 Haba tavat adre me hwiö káná, me,
adre me trohnen hon juk ;
Adre me obeúá anyidra je ogowe.
4 E wisa Iehova :
E ame hia but subâ degecá tö anyin
tavat ae kong.
5 E so adre me he ka hmehma, me ohme-
tuhmetu ödra hia
Wale ame hmiödra Ziona.
6 E so adre me he ka helâ me hnaönying
hon ban je uma,
A meleca thö ke tiga ca kú wia :
7 Wale ae ca úco beuyin at ame subö
hwit,
Me úlainy at ame ce hwit.
8 Ke ame ca ha bi tavat adre me gethen
hnyin, ka habe,
E so e e unyibun hnahic anyi Iehova ;
Öhmun e ha hnahici öbun hnyi iö
Iehova.

SALAMO 130.

Khumöng ölö.

- I**EHOVA lö, inya oge me hia but hongot
köu únyi hnyi je dok ae dit.
2 Than lö, löng ju itucik :
E so u ma tevehlöng
Hok ta je hwatenge.
3 Ja a Than lö, u je ne he ka bi haten je
hulö,
Ie at ame he ka tot ?
4 Ke u thibi at ame thang degecá,
M' adre me he ka outö u.
5 Inya oge me halubahing Iehova, ame
úlubahing hanuk,
Ke inya oge me gejon hwan hofuc.
6 Ame halubahingen Than hnen hanuk,
E nua hon tavat tue adre me boulany ;
Eke, hon tavat tue adre me boulany.

- 7 Isaraela lö, geju Iehova ju ;
Anyin ae unyi Iehova ibetengjö,
Ke gan hmâ úhömeli unyin.
8 Ke e ame he ka omeli Isaraela
Únyi hnyi anyin ta je monu hia thithö.

SALAMO 131.

Khumöng ölö ; anyi Davita.

- I**EHOVA lö, e ca bi gan hnyekuk, k'
ame ca hop li emakök ;
Ke oge me ca vheno ta je únyi ae gan
hmâ,
Me ta je únyi ae iyong huk.
2 E hnathu oge hia but otubwelâ me
ohnyibö hanuk ;
Helâ me mendreng adre hia but hnebaio
unyin hinyen ;
Haba hanuk me e bi unyik helâ me
mendreng adre hnebaio.
3 Isaraela lö, geju Iehova ju
Hwân walang ang, ke ne o but nyiele
balua.

SALAMO 132.

Khumöng ölö.

- I**EHOVA lö, únykúme ju kö Davita
Anyin ta je vec hia ;
2 A g' ame khemanyin kö Iehova,
Me bi khöbi ka Mani Jakob :
3 E hnathu oge me ca he ka dit ka hnyi
uma menâ a umök uma,
Me ölö ka hnyi hon hnok hna mokut ;
4 Oge me ca he ka hna li emakök he ka
mokut,
Me li bademakök he ka ta mokut ;
5 Ke ne o but oge me he ka wâ dok hobi
kö Iehova,
Wale uma menâ hobi kâu Mani
Jakob.
6 Wâ bi ate me löng únyi eling hnyi
Eferatha :
Ate me wâ but e hnyi ta hnyei hnyi
hnyot.
7 Öta he ka dit ka hnyi umen je uma
menâ ;
Ate me he ka khudrung ka hnyi taben
li hnyeúcan.
8 Iehova lö, todrö ka hnyi dok u je menâ
hnyin,
U, me tangen manâm man.
9 E so e khavâ hwakecin ae wisa hnen
tavat bi hut köu,
Ke so ame khumöng senyin hnen
ányâm wakap.

- 10 Ca wia degecâ bi hnyimakan at u je hû.
Can athnyabaem a Davita.
- 11 A hia but Iehova khemanyin kö Davita
hnyi hnathu ;
E ame ca he ka hwiö gan, ka habe,
Ûnyi hnyi mâtrân unyâm oge me he ka
ctilâ hon ânyâm theron.
- 12 Ame ne he lakom ka vheno anyik ûhi-
hinykôu,
Me je ûnyi hnân ohnathu nya wale oge
me he ka n' ödra gan,
Awe, ame he balua ta je lakudra ka
tabâ ânyâm theron.
- 13 Anyin a hia but Iehova úca Ziona ;
E ame weny e hnân hnyaban.
- 14 Wale thibi e hnök hna menâ nyiele
balua :
Oge me he ka labâ e ; anyin oge wek e.
- 15 Oge me he ka ti ohnahicâ jeûiny ;
Oge me he ka osekunâ ge jeû ta je aten
ae ba ta ûnyi.
- 16 Oge me he ka khavâ minya anyin tavat
bihut ge ûhmeli :
K' ame he anyin wakap ka khumöng
senyin.
- 17 Oge me he ka vhöng eling faoiny meno
anyi Davita :
Oge hia but penapena lamepa hobi kâu
hnök hna hû.
- 18 Oge me he ka khavâ ta je iwahnaihmi-
öny mē ga hmehma :
K' ame he ka khulelau hon e anyin
korona.

SALAMO 133.

Khumöng ölö ; anyi Davita.

- W**Â bi, e ti so me kese hmönyin
He ka tha laba je liamekeiny me
ûhnyokôu !
- 2 E úcú me wakaco ae ûnyi hnathu hon
ban.
Ame khukhula ka hnyi wainy,
Waleji a wai Arona ;
Ame khukhula ka hnyi baten khâuen.
- 3 E úcú me dân hau hnyi Heberona,
Ame ta hon je bucen Ziona :
Anyin a Iehova ame hûna eling hna-
hic,
A möt nyiele balua.

SALAMO 134.

Khumöng ölö.

- W**Â bi, haisoi Iehova th' öbun, öbun
lathnyabai Iehova hia.

- Tavat öbun e labö tot hnyi uma umö
Iehova hnyi je hnyinghet.
- 2 Hai thö hnyamöbun ka hnyi dok ae
kap,
Me haisoi Iehova.
- 3 E so he ka hahnahici u úheny Ziona
hnö Iehova ;
Wale at ame op drany me hmeledrany.

SALAMO 135.

- O**GANÖ Ja th' öbun.
Oganâ thö iö Iehova ;
Öbun lathnyabai Iehova lö, ogânâ e :
2 Öbun tavat öbun e labö tot hnyi uma
umö Iehova,
Hnyi je hnyeuleny uma umen Khon-
guta.
- 3 Oganö Ja th' öbun ; anyin ae so Ie-
hova :
Khumöng ogânâ thö ien ; anyin ae
so e.
- 4 Anyin a Ja ame hia but úcú Jakob
hnân hobi kâu,
Me Isaraela hnân tang omjehen ae ûnyi
hnathu.
- 5 Anyin ae khanö nya a e gan hmâ
Iehova,
K' ame beönua Tuhöta hon ta je khong
hia.
- 6 Haba ta je ûnyi hia ame we Iehova,
me ame hia but ânyâ,
Hnyi drany ethö, me hmeledrany, me
eú hnyi köiö, me je dok hia ae dit.
- 7 E ame öliâ thö hai ûnyi hnyi je can
hmeledrany ;
E ame bi hucuce hobi kâu we ;
E ame hom but ang ûnyi hnyi tang
omjehen.
- 8 Waleji at ame kot watö hnyi Aigupito,
Tavat me omeno.
- 9 Aigupito lö, e ame kunâ köu ta je haten,
me ta je ûnyi hnân láiâ,
Hu Faraö, me lathnyabainy hia thithö.
- 10 Waleji at ame kot ta je hnyeí ae se
hia,
Me hlingâ ta je than ae man ;
- 11 Wale Sihona tuhan at Amora,
Me Oga tuhan Basana,
Me je dökhü hia hnyi Kanana :
- 12 Me ham but idra hnyeí hnân hwaje-
khöü,
Hwajekhon Isaraela a lakeiny.
- 13 Iehova lö, ke ne o but nyiele balua iám ;
Iehova lö, ke ne o but hnyi ta je dö hia
hna únykúmi u.

- 14 Anyin ame he Iehova ka owisa lakeiny,
Me ietra ge lathnyabainy.
- 15 Haba ta je idola anyin ta je hnyei me
sileva me gol,
A huliwan ta je hnyamen at.
- 16 E hu hnyimödra, k' adre me ca fuc bi ;
E hu li emaködra, k' adre me ca wâ bi ;
- 17 E hu li hnyikönyödra, k' adre me ca
löng bi ;
Ke ba homenâ hnyi je hnyimödra.
- 18 Ame he tavat adre up ödra ka helâ
mödra ;
Eke, tavat hia adre me labageju ködra.
- 19 Lap anyi Isaraela lö, oganö Iehova th'
öbun :
Lap anyi Arona lö, oganö Iehova th'
öbun :
- 20 Lap anyi Levi lö, oganö Iehova th'
öbun :
Öbun tavat öbun e outö Iehova lö,
oganö Iehova th' öbun.
- 21 E so adre haisoi Iehova úheny Ziona,
At ame laba hnyi Jerusalema.
Oganö Ja th' öbun.

SALAMO 136

- O** LEÀ ju kö Iehova ; anyin a e at ae so :
Anyin a nyiele balua anyin ibetengio.
- 2 Oleâ ju ka Khongon ta je khong :
Anyin a nyiele balua anyin ibetengio.
- 3 Oleâ ju ka Tuhan ta je than :
Anyin a nyiele balua anyin ibetengio.
- 4 Kâu at ame hake ányâ ta je únyi hnân
láia gan hmâ :
Anyin a nyiele balua anyin ibetengio.
- 5 Kâu at ame op drany hnyi metâ :
Anyin a nyiele balua anyin ibetengio,
- 6 Kâu at ame olauâ kânâ hon köio :
Anyin a nyiele balua anyin ibetengio :
- 7 Kâu at ame op ta je melam ae gan
hmâ :
Anyin a nyiele balua anyin ibetengio.
- 8 Wale seúnö he ka musö selany :
Anyin a nyiele balua anyin ibetengio.
- 9 Tehi me ta je okhú he ka musö lit :
Anyin a nyiele balua anyin ibetengio.
- 10 Kâu at ame kot Aigupito wale ta je
lakudra a bán :
Anyin a nyiele balua anyin ibetengio :
- 11 Me hum Isaraela únyi hnyi wanbödra :
Anyin a nyiele balua anyin ibetengio :
- 12 Hnen hnyamen ae hwege, me benyin
ame hai :

- Anyin a nyiele balua anyin ibetengio.
- 13 Kâu at ame subâ luâ Köio ae Dra :
Anyin a nyiele balua anyin ibetengio :
- 14 Me ohei Isaraela hnyi wanben e :
Anyin a nyiele balua anyin ibetengio :
- 15 Me khúö Farao me anyin utbavat ka
hnyi Köio ae Dra :
Anyin a nyiele balua anyin ibetengio.
- 16 Kâu at ame su tilâ lakeiny hnyi hnye-
buba :
Anyin a nyiele balua anyin ibetengio.
- 17 Kâu at ame kot ta je than ae gan :
Anyin a nyiele balua anyin ibetengio :
- 18 Me hlingâ ta je than ae lung :
Anyin a nyiele balua anyin ibetengio :
- 19 A Sihona tuhan at Amora :
Anyin a nyiele balua anyin ibetengio :
- 20 Me Oga tuhan Basana :
Anyin a nyiele balua anyin ibetengio :
- 21 K'ame ham idra hnyi hnân hwajekhóu :
Anyin a nyiele balua anyin ibetengio :
- 22 Wale a hnân jekhóu Isaraela a athnya-
bainy :
Anyin a nyiele balua anyin ibetengio.
- 23 At ame únykúmi öta hnyi hna ohnyi-
kânâi öta :
Anyin a nyiele balua anyin ibetengio
- 24 K'ame hia but omeli öta únyi ge ta je
iwahnaihmiöny möta :
Anyin a nyiele balua anyin ibetengio.
- 25 E ame hia but ham han ka ta je únyi
hia ae möt :
Anyin a nyiele balua anyin ibetengio.
- 26 Oleâ ju ka Khongon drany :
Anyin a nyiele balua anyin ibetengio.

SALAMO 137.

- H**ABA hnyi je wagewe hnyi Babulona,
Me ate me laba ju eling, eke k' ate
me tenge,
Öta ate me únykúme Ziona.
- 2 Ate me uhno anyita je kitara
Hnyi je úö garaba hnyi wanben e.
- 3 Anyin a tavat adre hwenböta ödrin e
kun' öta eling he ka khumöng,
Ke tavat sed' öta adre me kun' öta he
ka senyin, haingödra, ka habe,
Hai thö köhmun ke khumönginy Ziona.
- 4 Öhmun e he ka kâmâú ka hai khumöng
anyi Iehova.
Hnyi ke hnyei bi ?
- 5 Jerusalema lö, oge ne he bi ka hny
ing u,
Me so e he hnyamök a metök ka hnying
metâiny.

- 6 E so e he ka kece bohök ka hnyi
 ecngödik,
 Oge ne ca únykúmi u ;
 Ke oge ne ca ogöranyi Jerusalema,
 Hon anyik je senyin hia.
- 7 Iehova lö, únykúme ju ka laku Edoma
 Ge bong bongon Jerusalema ;
 Waleji adre me ha, ka habe, Thö degecá
 but, thö degecá but,
 Ke ne o but ka hnyi taben.
- 8 Hlu nöku Babulona lö, adre me he ka
 ohö u,
 Ame he ka hnahic ut at ame bi hwaban
 köu,
 Hnám hna ányá kohmun.
- 9 Ame he ka hnahic at ame kát me sa
 degecá lakom ta je inma
 Hnyei ge kic.

SALAMO 138.

Salamo anyi Davita.

- O**GE me he ka ole köu ge hnyekuk ae
 bekhöt :
 Oge me he ka khumöng oganö u hnyi
 hnyimakan ta je khong.
- 2 Oge me he ka khudrung ka hnyi umâm
 uma ae kap,
 Me oleá iâm can ányâm ibetengiö, me
 ányâm hnathu :
 Anyin a u je hia but ogánâ hwâm hofuc
 hon iâm hia.
- 3 U je thu könya hnyi bong oge me
 hongot,
 U je sihwegiö nya ge tang hwege ka
 hnyi hanuk.
- 4 Iehova lö, ame he je tuhan hmeledrany
 hia ka oleá köu,
 Anyin adre hia but löng hofuc únyi
 hnyi hnyimâm.
- 5 Eke, adre me he ka khumöngö je gethen
 de Iehova ;
 Anyin ae gan hmâ hmanenangi Iehova.
- 6 Eja ke ne a ne görany Iehova, e ame
 he ka wá tavat ae hnyikánâ :
 Ke e ame wáhmakhmetoá tavat bi gan
 hnyi dok ae sákáú.
- 7 Eja ke ne oge ne he hnyi wanben vec,
 u me he ka omeli nya :
 U me he ka hai hnyamâm hon hmönyin
 anyin je iwahnaihmiöny mönya,
 K' ame he hnyamâm a metâm ka omeli
 nya.
- 8 Ame he Iehova ka obekhötâ hobi könya :
 Iehova lö, nyiele balua ányâm ibetengiö ;

Ca hna degecá bi ta je huliwa anyin li
 hnyamâm.

SALAMO 139.

Hobi káu at vhiik khumöng. Salamo anyi Davita.

- I**EHOVA lö, u je hia but elölöm nya, me
 wáhmakhmetu nya.
- 2 U je wáhmakhmeto úlabaik me útilök,
 U je wá únykúme únykúmenök hnyi
 dok ae sákáú.
- 3 U je elâm wia dek gethen me hnök hna
 mokut,
 Me khenená dek ta je gethen hia.
- 4 Iehova lö, e ba bi ke hofuc hnyi bohök,
 Ke wá bi, u je wáhmakhmeto hia.
- 5 U je hia but theling nya hnyi hotuk
 me hnyimakök,
 Me ip hnyamâm huk.
- 6' E iyöng huk metâ eling ;
 E görany e, ke ca khanö nya he ka ölö
 káu.
- 7 Oge me he ka he kâ úhek unyin hanom ?
 Ke oge me he ka kec kâ ge hnyimákâm ?
- 8 Oge ne he ka ölö ka hnyi drany, me u
 ling :
 Ke oge ne ulolo hnök hna mokut hnyi
 hedis me wá bi, u bi ling.
- 9 Oge ne he ka hom li labenyin hnyoma-
 katu,
 Me laba hnyi can je köiö ;
- 10 Me ame he hnyamâm ka su nya eling,
 K' ame he benyâm a metâm ka köt
 nya.
- 11 Oge ne ha, ka habe, E hnathu ame he
 menekholom ka húlúlúö nya,
 K' ame he melam igigili nya ka lit ;
- 12 Ke so bi ca hnân olidrâ bi köu menek-
 holom,
 Me ame umumelam lit helâ me lany :
 E tha úcú menekholom me melam köu.
- 13 Anyin a ányâm li jebalainuk :
 U je tubi nya hnyi hnyeku bai.
- 14 Oge me he ka oleá köu ; anyin a hnân
 ot me láiá ge hnödra hna tetrâu nya :
 Hnân láiá ányâm ta je huliwa ;
 Ke a wá wia but e hnen hanuk.
- 15 E ca iyong köu unyik,
 Waleji hnyi hna up nya hnyi dok ae
 iyong,
 Ke hna huliwan hnyi je dok a diliny
 hmeledrany.
- 16 A wá but unyik hnen li emákâm k' iny
 tiga ca bekhöt ut,
 Ke u je sihnalimen hnyi ányâm tusi je
 ong outhunyik hia,

SALAMO 140, 141.

- Waleji adre me tretrao hnyi ke bong
me ke bong,
Ke tiga ba ke únyi ae bekhöt.
17 Khong lö, shaiba ge soiny kõnya hnâm
ta je hna únykúme !
Shaiba ge úseiny ae ti se hia !
18 Oge ne aú, me ti se hia hmönyin hon ta
je waöny :
Inya oge me hmak dö ke inya bala bi
unyâm.
19 Khong lö, e hnathu u me he ka hlingá
at ae kong :
Anyin a wale, úsákâüö but mönya öbun
tavat öbun e mádrá dra.
20 Anyin adre me úhnenamöi u kongu u,
Adre me ha baúá iâm, ta je iwahnaih-
miöny möu.
21 Iehova lö, hawa oge me ca húkötíá
tavat adre me ikiki u ?
Me vec minya ge tavat adre me bi tot
kôu ?
22 Oge me ti hmiök hmönyin ödra :
Oge me öü ödra a je iwahnaihmiöny.
23 Khong lö, elölöm nya thö, me wá thö
hnyekuk :
Cubic nya ju, me wá thö je únykúme-
nök :
24 Me wá ju ame ne eú hnyi hnyekuk
gethen deny monu,
Ke su nya thö hnyi gethen a nyiele
balua.

SALAMO 140.

Hobi káu at rhik khumöng. Salamo anyi Davita.

- I**EHOVA lö, húgúnö nya but unyin at ae
kong ;
Tuö nya ju ge at úokonguny :
2 Waleji adre me únykúme ta je úokon-
guny eú hnyi je hnyekudra ;
Adre me labö úkhacaköu he ka vat.
3 Adre hia but khet homakan ta je bo-
hmödra helá me on :
Eú hnyi hmelen je esongodidra páizo-
niny asip. [Sela.]
4 Iehova lö, tuö nya ju ge li hnyamen at
ae kong ;
Tuö nya ju ge at úokonguny :
Waleji tavat adre me únykúme he ka
ötö nya.
5 Haba tavat bi gan adre hia but töu
hnewe duöng, me ta je tö me hnok ;
Adre hia but thong ert eú hnyi baten
gethen ;
Adre hia but ta je ofíc me hnok. [Sela.]

- 6 Oge me ha kö Iehova, ka habe, U thibi
Khonguk :
Iehova lö, löng ju hok hwatenge.
7 Iehova a Than lö, tang hwegien melik,
U je hia but tube bök hnyi bonginy vat.
8 Iekova lö, ca ham bi ta je weny at ae
kong ;
Ca ohwádá anyin bibihwakecin ; wá
adre nye görany dö. [Sela.]
9 Haba je bodra adre me igigili nya,
Me so ame tubi ödra ge úokongunyin je
esongodidra.
10 E so ame ta ta je walep ae möt hudra :
E so adre me khú' ödra ka hnyi meic :
Me je thop ae dit, m' adre me ca he
hmetu ka tot.
11 Ame ca he at ame ha monu ka tethmá
hnyi hnyi :
K' ame he hulö ka hnu at úokonguny
he ka hugutá e.
12 E khaü nya but a g' ame he Iehova
ka ányá wisa ka at ae vec,
Me owisa ka at ae theduoc.
13 E hnathu ame he tavat ae wisa hwake-
cidra ka oleá iâm :
K' ame he tavat ae wisa ka laba hnyi
hnyimákâm.

SALAMO 141.

Salamo anyi Davita.

- I**EHOVA lö, oge hia but hongot köu,
mweimwei thö kõnya :
Löng ju ifucik, iny ka hongot köu.
2 E so e tethmá hijik hic hnyi hnyimákâm
helá me utö ae bo so ;
Ke hna ogöranyá li hnyamök, helá me
hut adre me hudo hnyi je sabac.
3 Iehova lö, otílá thö at he ka tuö hnyi-
mök ;
Tuö ju hwanumen li esongodik.
4 Ca ohmehmela hnyekuk ka hofuc ae
kong,
He ka tha ányá hwakecin ae kong
Me tavat adre me ányá hulö :
Ke ca hnö nya he ka an ö 'dra jeú ae
senem.
5 E so he ka kuc nya hnen at ae wisa
hwakecin, wale a betenge ;
Ke thawo nya, wale heláke wakaco hobi
káu ban ;
E so ame ca he bök ka höcö :
Anyin oge me he bala ka hic, ödra ka
úokonguny.
6 Ame hugutá anyidra tavat owisa ka
hnyi ta je kic ;

- Me adre me he ka löng hok ta je hofuc anyin aa hnebwia.
- 7 Ame oveseâ ta je jeiöhmun hnyi hwanumen erkemök,
Helâ me hnyi ün at ame wia kânâ me seütilâ e.
- 8 Anyin a e bi köu, Iehova a than, li emakök :
Oge me labageju köu ; ca hingälâ bi melik.
- 9 Tuö nya ju ünyi hnyi hnyimen hnewe adre hia but ip me hnok,
Me je offic anyin tavat adre me ânyâ hulö.
- 10 E so e he ka hnok tavat ae kong hnyi ütödra je ert,
Ke inya bi oge me he ka möt.

SALAMO 142.

Salamo anyi Davita ; hndn ün, hnyi ün e ame laba hnyi op ; Hic.

- O**GE me tenge kö Iehova ge ifucik ;
Ge ifucik oge me tenge khöü kö Iehova.
- 2 Inya oge me hingälâ hnyi hnyimakan je ûnykûmenök ;
Oge me ha anyik vec hnyi hnyimakan.
- 3 Hnyi hna hülülûâ hanuk eü hnyi hnyekuk, e kxanö u dek gethen.
Hnyi dek gethen adre hia but töu hnewe hobi könya.
- 4 Wâ ju hnyi ke keihök a metök, me wâ ;
anyin ae ba at ae khana inya :
E ba but hnyeütök ; ke ba at ame ûnykûme hanuk.
- 5 Iehova lö, oge me tenge köu ;
Haingök, ka habe, U thibi hnyeütök,
Me jekhök hnyi hnyei iny tavat ae möt.
- 6 Löng ju anyik tenge ; anyin ae gan hmâ hna hom ûhnyükongu nya ;
Hügünö nya but ge tavat adre me oveci nya, anyin a ödra hwege huk.
- 7 Hom but hanuk ünyi hnyi uma ceat, m' oge me he ka oleâ iâm :
Ame he tavat ae wisa ka igigili nya ;
Anyin a u me he ka mâdrâ so könya.

SALAMO 143.

Salamo anyi Davita.

- I**EHOVA lö, löng ju hijik hic ; tevehlöng ju anyik je hwakhöü :
Thu thö könya hnyi ânyâm hnathu, me hwakecâm ae wisa.

- 2 Ke u me ca he ka ûhnei me athnyabaem ;
Anyin ae ba at ae möt ae wisa hnyi hnyimâkâm.
- 3 Anyin a hia but ovecâ hanuk hnen iwahnaihmiöny ;
E ame hia but hagutâ melik hnyikânâi :
E ame hia but olabö nya hnyi je dok ae lit, helâ me tavat a kueny mok.
- 4 Anyin a wale, ame hülülûâ hanuk eü hnyi hnyekuk.
K' ame ba wan hnyekuk.
- 5 Inya oge me ûnykûme je bong kâü adrem ;
Oge me labö ûnykûme ânyâm ta je huliwa hia :
Oge me ûnykûme hna mâdrâ hnen li hnyamâm.
- 6 Oge me lau li hnyamök köu :
E beic hanuk unyam helâ me kânâ ae atgec. [Sela.]
- 7 Iehova lö, mweimwei thö he ka thu könya ; ame sënyin hanuk ;
Ca ikhâlâ bi gak hnyimâkâm ;
Wâ oge nye ücü me tavat adre me utut ka hnyi erkemök.
- 8 Hnö nya he ka löng ânyâm ibetengiö hnyi hnyomakatu ;
Anyin a inya oge me labageju köu :
Okxanö nya thö gethen deny hanymök ;
Anyin oge me ogöranyâ hanuk köu.
- 9 Iehova lö, hügünö nya but unyin ta je iwahnaihmiöny mönya :
Oge hia but lubaduöng unyâm.
- 10 Nö nya thö he ka ânyâ wem ; anyin a u thibi Khonguk :
E so hanom ; su nya ju ka hnyi hnyei iny hwakecin ae wisa.
- 11 Iehova lö, omeli nya thö, ünyi hnyi iâm :
Hnyi hwakecâm ae wisa hum nya but ünyi hnyi vec.
- 12 Ke hnyi ânyâm ibetengiö subâ degecâ but ta je iwahnaihmiöny mönya,
Me obia tavat hia adre me ovecâ hanuk ;
Anyin a inya athnyabaem.

SALAMO 144.

Salamo anyi Davita.

- E**SO he ka haisoi Iehova a kicik,
At ame nâ li hnyamök he ka vat,
Me je banyök he ka ûkûc :
- 2 At ame betenge gak, ke hnök hnabâ,
Anyik tap ae beü görany, me at ame omeli nya ;
Becik, me at oge me labageju kâü ;

- At ame hom úhnyúkongoá lakeik eú
hnyi hmelik.
- 3 Iehova lö, ehö at, me u me wáhmakh-
meto e ?
Me nokon at, me u me he ka wá úny-
kúme e ?
- 4 E úcú at me únyi ae únyi baú :
Ke bonginy ta je bong e úcú me hmenu
ame hia but.
- 5 Iehova lö, ken dut ányám drany me ölö
ju :
Kálá ju ta je bucen me me he ka sá.
- 6 Jijingá but hucuce, me ovesei ödra ;
Fana but ányám ta je fana me omonu-
monu ödra.
- 7 Hinöbeny dut úheny thö ;
Omeli nya but, me hügúnö nya únyi
hnyi je köiö ae gan,
Me hnyamen ta je atkanyua ;
- 8 Hnyat adre me fuc baú ge je hnyimö-
dra,
Ke haba je hnyamödra a metödra, me,
úthumetu ae thoi.
- 9 Khong lö, oge me he ka hai köu khu-
möng ae teb únyi :
Oge me he ka khumöng köu ge nabeli
ae hu töiny a ten.
- 10 E thibi at ame ham möt ka ta je than :
At ame omeli Davita a athnyabainy
únyi hnyi hele vat hnân mekiny.
- 11 Omeli nya me hügúnö nya únyi hnyi
hnyamen ta je atkanyua,
Hnyat adre me fuc baú ge je hnyimö-
dra.
Ke haba je hnyamödra a metödra, me,
úthumetu ae thoi.
- 12 E ka helá me je úö ame kú so lakuta
obaga hnyi anyidra hidröu ;
Ke lakuta wahlu helá me vetoiny bahe-
bet adre me tretrao hnân uma umen
than ;
- 13 E ka unöngötö umöta ta je omhani ge
ta je jeú ae ve bongon hia ;
K'ame he haleta ta je mamoe ka hnokoá
je thauzan me je ten thauzan hnyi
ta ita ;
- 14 Hnyi úen adre me hijen je hok ae gan
haleta je bolok ;
Ke ba hmetu úhagutö ka hnyi taun me
hna utut hnyöu ai,
Ke ba hwatenge hnyi deta ta je gethen ;
- 15 Awe, hnahic nhen hnyei a heláe ;
Eke, hnahic nhen hnyei a Iehova Kho-
ngudrin.

SALAMO 145.

Salamo hnân ogáná ; anyi Davita.

- K**HONGUK lö, Than, oge me he ka
ogánö u :
Ke oge me he ka haisoá iâm nyiele
nyiele balua.
- 2 Oge me he ka haisoi u hnyi je bong ;
Ke o ge me he ka ogáná iâm nyiele
nyiele balua.
- 3 E gan hmâ Iehova, me hnân ti ogáná ;
Ke ca hnân elám úganiny.
- 4 Ame he ke dö ka ogáná ányám ta je
huliwa ka ke dö,
Me omanenâ hnâm ta je hna ányá ae
man.
- 5 Oge me he ka únykúme hmanenanginy
úganâm ae mec,
Me hnâm ta je hna ányá hnân láiiâ.
- 6 Ke ame he tavat ka ha ge man maniny
ányám ta je huliwa hnân outen ;
Ke oge me he ka haimemenâ úganâm.
- 7 Adre me he ka ha hnödra hna únykúme
ge ányám so ae gan hmâ,
Me khumöngö hwakecám ae wisa.
- 8 E betenge baú me betenge vec Iehova ;
E bec he ka hmönyin, ke betenge gan
hmâ.
- 9 E so Iehova ka ta je únyi hia ;
Ke e hon anyin ta je huliwa hia anyin
ibetengiö
- 10 Iehova lö, ame he ka oleá köu ányám
ta je huliwa hia thithö ;
Ke ame he ányám wakap ka haisoi u.
- 11 Adreme heka ha hmanenanginy dokhom
dökhu,
Me úhnenamö manâm man ;
- 12 M' adre me he ka haimemenâ ka lakon
tavat anyin ta je huliwa ae man,
Me hmanenanginy dokhon dökhu ae
mec.
- 13 Haba dokhom dökhu, dökhu a nyiele
balua,
Me ka ta je dö hia thithö ányám musi.
- 14 Iehova ame cö tavat hia adre me ta,
Me otílá wisa tavat hia adre me iyáú.
- 15 Ame ngele but köu je emaködra hia :
Me u je ha ödra hnyi úen ae úcú.
- 16 U je lau hnyamâm,
Me osekunâ ta je únyi hia thithö ae
möt.
- 17 E wisa Iehova hnyi deny ta je gethen
hia,
K'ame betenge hnyi anyin ta je huliwa
hia.

- 18 E hakekeny Iehova ködra hia adre me hawâ e,
A tavat hia adre me hawâ e hnyi hnathu.
- 19 E ame he ka ânyâ weny tavat adre me outen e ;
E ame he minya ka löng hodra hwatenge me omeli odra.
- 20 Iehova ame tu' ödra hia adre me hnyok kâu ;
K' ame he ka ohia tavat hia ae kong.
- 21 Ame he hnyimök ka ha hnân oganö Iehova ;
Ke so ame he tavat hia ka haisoâ ien ae kap nyiele nyiele balua.

SALAMO 146.

- O GANÖ Ja th' öbun.
Hanuk lö, oganö Iehova thö.
- 2 Oge me he ka oganö Iehova inye tiga möt :
Oge me he ka khumöng oganá Khonguk e me tiga inya ang.
- 3 Ca geju öbun ka ta je than,
Ke nokon at bi, wale ae ba hna úhadruo unyidrin.
- 4 Ame he but homenáiny, me e ame hmetuhmetu ka hnyi kánáiny ;
Hnyi bong eling e ame ca únykúme hmetu bi.
- 5 Hnahic hnen at ame hadruâ e hnen Khongu Jekob,
At ame labageju kö Iehova a Khongon :
- 6 Waleji ame op drany me hmeledrany,
Me köio me ta je únyi hia thithö hnyin ;
At ame tuö hnathu nyiele balua :
- 7 At ame ânyâ wisa ka tavat adre me oveci ödra ;
K' ame ham jeú ka tavat a ödra meki-hnânem :
Iehova ame thang tavat adre c' ödra ;
- 8 Iehova ame obwela ta je wadröu ;
Iehova ame otílâ wisa tavat adre me iyau :
Iehova ame betenge ka tavat ae wisa ;
- 9 Iehova ame tuö ta je atkanyua ;
E ame cö je nakahme, me je safac ;
Ke e ame ohnyimenâ hnyikánâi gethen deny tavat ae kong.
- 10 Ame he Iehova ka musi nyiele balua,
Ziona lö, ame he Khongom ka musi ka ta je dö.
Oganö Ja th' öbun.

SALAMO 147.

- O GANÖ Ja th' öbun ;
Anyin ae so he ka khumöng oganá Khonguta ;
Anyin ae kese, me úcú he ka oganá.
- 2 Iehova ame op Jerusalema ;
E ame úkhacakouâ hmetu at Isaraela adre obâ,
- 3 E ame ometo tavat ae vec hnyekudra,
Me lan hnödra ta je aat.
- 4 E ame aú ta je okhú ;
Me hwenyi ien hia.
- 5 E gan hma Tuböta, ke ti tren man ;
Ke ca hnân bi ha hnen hna wáhma-khmeto.
- 6 Iehova ame cö tavat ae hnyikánâ :
E ame hagutâ hnyikánâi tavat ae kong.
- 7 Khumöng thö kö Iehova me ole ;
Khumöng oganá Khonguta ge kitara :
- 8 At ame tube drany ge ta je úlá,
Me penapena we hobi kâu hmeledrany,
Me okúâ önying hon ta je bucen.
- 9 E ame ham ka ta je meno ö 'dra jeú,
Me ka je lakou oreba ame kuku.
- 10 E ame ca senyin bi ka hwegien hors :
E ame ca senyin ge li can at.
- 11 Iehova ame senyin ka tavat adre me outen e,
Tavat adre me gejon anyin ibetengiö.
- 12 Jerusalema lö, oganö Iehova thö :
Ziona lö, oganá thö Khongom.
- 13 Anyin a e ame hia but ohwegiâ je venyainy ta je homagöulem ;
E ame hia but ohnahicâ lakom hnyi wanbâm.
- 14 E ame ham úsoköu hnyi je ke keihâm ;
E ame ounöngöti u ge hwit ae ti so.
- 15 E ame kunâ anyin hnanyibu ka hnyi hmeledrany ;
K' ame walring logot hwan hofuc.
- 16 E ame ham kiona helâ me leünen mamoe ;
E ame jijingâ dân hau ae wahma helâ me hnabadröu.
- 17 E ame khúâ köien köio ae wahma helâ me je atmen :
Ie at ae khâna he ka tot hnyi hnyimakan anyin megic ?
- 18 E ame kunâ hwan hofuc me oköio but ta je únyi e :
E ame kunâ anyin ang he ka túâ, me ame hingölö but ta je köio.
- 19 E ame omanená hwan hofuc kö Jekob,

Ke anyin ta je hnanyibu me hna owisa kö Isaraela.

- 20 E ame ca ányá heláe ka ke hnyei :
Ke haba hnen je hna owisa, me ca manen bi ködra.
Oganö Ja th' öbun.

SALAMO 148.

- O GANÖ Ja th' öbun.
Oganö Iehova ju öbun únyi ethö hnyi drany :
Ogáná thö e hnyi je dok ae görany.
2 Ogáná thö e öbun anyin ta je angela hia thithö :
Ogáná thö e öbun tavat hia e ame op.
3 Ogáná thö e öbu seúnö me tehi :
Ogáná thö e öbun hia ta je okhú ae umumelam.
4 Ogáná thö e öbun je draniny drany, Me öbun ta je köiö ethö hon drany.
5 E so adre me he ka ogáná iö Iehova : Anyin a e ame huna, me up ödra.
6 E ame hia but otetm' ödra minya nyiele nyiele balua :
E ame hia but ip hnanyibu wale ame ca he ka hia but.
7 Oganö Iehova thö eang hmeledrany, Öbun ta je tanimo me ta je dok hia ae dit :
8 Meic me we wahma, kiona me hai ; Ang ae hwege, at ame hwádâ hwan hofuc :
9 Je bucen me je hut hia ; Je úö ae wa me je arasi hia :
10 Je meno ae hiny me je meno hia ae hnam ;
Je únyi ame iyâú me ta je meno ame gâ :
11 Je tuban hmeledrany me ta je hnyei hia ;
Je taben me tavat owisa hmeledrany hia ;
12 Je wahidröu me wahu minya ; Wahingat me je wanakat :
13 E so adre me he ka ogáná iö Iehova ; Anyin ae hake görany thibi ien :
Ethö hon hmeledrany me drany anyin hmanenang.
14 Ke e ame hia but ogöranyá faoiny meno anyin lakeiny,
Wale hna ogáná hnen anyin wakap.
A hnen laku Isaraela, hnyei ae hakekeny kâu.
Oganö Ja th' öbun.

SALAMO 149.

- O GANÖ Ja th' öbun.
Hai thö kö Iehova khumöng a teb únyi,
Me hna ogáná e hnyi úkhacaköu anyin wakap.
2 E so e he Isaraela ka senyin ka at a op e :
E so e hobâ je laku Ziona ka Tuhödra.
3 E so adre me he ka ogáná ien ge bibiâ :
E so adre me he ka khumöng olungâ e ge bwinybet me kitara.
4 Anyin a Iehova ame senyin ka lakeiny :
E ame he ka ohmanenangâ tavat ae hnyikánâ ge úhömeli.
5 E so ame he wakap ka hobâ ge hmanenang :
E so adre me he ka khumöng senyin hon hnödra ta je hna mokut.
6 E so e he ka e bi hnyi je hnyimödra hnân ogáná hmönyin Khong,
Me hnyi ta je hnyamödra hele vat a lo li homakan ;
7 Hnân he ka bi hwaban ka ta je hnyei hia,
Me bi hwaban ka tavat hia ;
8 He ka ca ta je tuhödra ge je cen,
Me anyidra je taben ge je tö a fao ;
9 He ka ányá hnyi wanbödra hna owisa adre sihnalimen :
Wale hna ogáná hobi kâu anyin wakap hia thithö.
Oganö Ja th' öbun.

SALAMO 150.

- O GANÖ Ja th' öbun.
Ogáná thö Khong hnyi umen uma ae kap :
Ogáná thö e hnyi drany ethö a hnyaban maniny man.
2 Ogáná thö e can anyin ta je huliwa ae man :
Ogáná thö e hoton soiny úganiny.
3 Ogáná thö e ge hwan ifucin trutru :
Ogáná thö e ge nabela me kitara.
4 Ogáná thö e ge bwinybet me bibiâ :
Ogáná thö e ge únyi khumöng ae hu töiny, me utköwi.
5 Ogáná thö e ge simebalo ae mea hwege :
Ogáná thö e ge simebalo wale at ame mea hwege göranyai.
6 E so ame he ka oganö Ja hnen ta je únyi hia thithö ae hu homenân.
Oganö Ja th' öbun.

TA JE VEJEC.

HNYIMAKAN 1.

- T**A je vejec anyi Solomona nöku Davita tuhan Isaraela :
- 2 Me me kbana metâ me hna ünö :
Me wâhmakhmetoâ je hofucin wâ tremângâ ;
 - 3 Me kap hna úne hnyi hwakecin ae metâ,
Me wisa, me hna owisa, me hwakecin ae úcú ;
 - 4 Me me ometâ tavat ae ba hnyekudra,
Me ham ka wahidröu hna úne me hna únykúme :
 - 5 Me me löng hnen at ae metâ, me bi hanen anyin metâ ;
Me me he at wâhmakhmeto ka hu metâ hnân úhnenamö :
 - 6 Me me wâhmakhmetoâ vejec me úhöücú ;
A ta je hofuc hwan tavat ae metâ, me hodra ta je hofuc ae vhet.
 - 7 Haba hwakecin he ka ot kö Iehova, me wale hwân he ka wâhmakhmeto ;
Haba tavat ae monu me adre me hmiödra meta me hna úne.
 - 8 Nökuk lö, löng ju hna nö u hnen kâ-mâm,
Ke ca degec bi hna úne hnen hinyâm :
 - 9 Anyin ame he ka helâ me korona ae hmanenang hon bâm,
Ke sawakiny hnyi nyem.
 - 10 Nökuk lö, a ne cubic u tavat ae kong,
Ca hmehmela bi.
 - 11 Adre me ne ha, ka habe, Öta he,
Ate me mokulec at,
Ate me he ka tuö at ae ba hnyikongon,
ke ba can ;
 - 12 Ate me he ka ut' ödra meli ödra helâ me hedis,
Ke tiga bekhöt, helâ me tavat adre me utut ka hnyi thop ;
 - 13 Ate me he ka wâ je wakomjeú hia
Ate me he ka ounöngötâ umöta je uma ge ta je únyi adre söh ;
 - 14 U ma tha uglekóbâ möhmun ;
K' ame he minya ka tha tangöta tang hia :
 - 15 Nökuk lö, ca tha he hnyi gethen mödra ;
Behânâ ju cam ge dedra je gethen :
 - 16 Anyin ame wadring je caära ka hnyi hulö,
Ke adre he mweimwei he ka hingâlâ dra.
 - 17 Anyin e únyi baú he ka lau hnewe,
E ka wâ but e hnen meno ame gâ :
 - 18 Ke haba je hnyat eling adre me khöu mokut ködra bi,
Adre me mokut duöng ködra bi.
 - 19 Helâe dedra ta je gethen hia tavat adre me behnyekudra omjeú ;
Ame ohia möt anyin tavat ae tren e.
 - 20 Metâ ame kuku eú hnyi gethen,
E ame hongot ge hwan hnyi je hnau-drà ;
 - 21 E ame kuku hnyi je dok ae únyi hnathu adre laba úkbacaköu hnyin ;
Hnyi hna dit hnyi je homagöule,
E ame ha hwan je hofuc hnyi taun ; ka habe ;
 - 22 Tavat ae ba hnyekudra lö, öbun e he ka hnyok ka hwakecin ba hnyekon ke ne o but kehö ?
Me tavat úhiö he ka hiâ ke ne o but kehö,
Me tavat ae monu ha hmiödra wâhmakhmeto ?
 - 23 Hwiö th' öbun ge hnök hna úne :
Wâ bi, oge me he ka hingâlâ köbun hanuk,
Oge me he ka omanená köbun hok ta je hofuc.
 - 24 Can oge me hongot, ke öbun höcö ;
Oge me hinöbeny, ke ba at ame löng ;
 - 25 Ke öbun e öunyibâúâ hia anyik úhnenamö,
Me ca weny bi hnök hna únö ;
 - 26 Oge me he bi inya ka hlumâ anyibun vec ;
Me úhiö e ka o köbun ot ;
 - 27 E ka o köbun ot helâ me weneú,
E ka o köbun vec helâ me höu ;
E ka o köbun vec me hmak.
 - 28 Me adre me he ka tenge könya, ke oge me ca he bi nya ka thu ;
Adre me he ka elölöm nya, k' adre me ca he ka o nya :

- 29 Anyin adre me hûkötö he ka wâhmak-
hmeto,
K' adre me ca úca he ka outö Iehova :
30 Ke adre me ca wedra anyik musî ;
K' adre me hmiödra hia hnok hna
ûnö ;
31 Anyin a wale adre me he ka an wan
hwakecidra bi,
K' ame he ka sekudra hnen anyidra bi
bihihwakecin.
32 Anyin adre me he ka hling' ödra hnen
ihwiöiny tavat ae ba hnyekudra bi,
Ke ame he ka hi' ödra hnen sot anyin
tavat ae monu.
33 Ke haba at ame ling nya me ame he ka
laba khötkic,
Me laba wia, me ca outen únyi ae kong.

HNYIMAKAN 2.

- N**ÖKUK lö, u je ne he ka kap hok ta
je hofuc,
Me ip unyâm anyik ta je hnanyibu ;
2 M' u ma tevehlöng metâ,
Me hnyokâ he ka wâhmakhmeto ;
3 Eke, u je ne hawâ metâ,
Me hongot ka wâ únykúme ;
4 U je ne elâm e helâ me sileva,
Me elâm e helâ me tang omjeû adre
ikhâlâ ;
5 Awe, u me he ka wâhmakhmetoâ hwa-
kecin ot kö Iehova,
Me khanö u bi Khong.
6 Anyin a Iehova ame ham metâ ;
Ke únyi hnyi hnyimen ame o wâhmak-
hmeto me wâ únykúme :
7 E ame ip metâ ae so hobi kâu tavat ae
wisa,
E thibi becin tavat adre me he, ke ba
hnyikongudra ;
8 Me me he ka wâ je gethen deny hna
owisa,
Me tuö gethen deny anyin wakap.
9 Me u me he ka wâ únykúme wisa, me
hna owisa,
Me únyi ae úcú, me je gethen hia ae so.
10 Anyin ame he metâ ka dit eû hnyi
hnyekom,
K' ame he ka senem bi ka hanom wâ-
hmakhmeto ;
11 Ame he ka ö u hnen únykúme,
K' ame he ka tuö u hnen wâ úny-
kúme :
12 Me me omeli u únyi hnyi gethen ae
kong,
Únyi ge at ame úkhin fuc ;

- 13 Tavat adre me hna degecâ je gethen
deny wisa,
Me vheno bi je gethen deny menekho-
lom ;
14 Tavat adre me senyin he ka ányâ hulö,
Me hobâ hwegien hwakecin ae kong ;
15 E háu dedra ta je gethen,
Ke ödra hwali hnyi anyidra je gethen :
16 Me he ka tuö u ge momo kanyua,
Wale momo kanyua, at ame fuc útakú ;
17 At ame hna degecâ at úne kâu ke tiga
hlu,
Me hnying hna úhinhnykôu me Khon-
gon :
18 Anyin ame ihnyöng ka hnyi mok umen
bi uma,
Me deny ta je gethen ka ta je komok :
19 Ame ca hmetu ke at ge tavat adre me
he kâu,
K' adre' me ca he ka o hmetu ka hnyi
je gethen deny möt :
20 Me u me he ka vheno je gethen deny
tavat ae so,
Me tuö je gethen deny tavat ae wisa.
21 Anyin ame he tavat ae wisa ka labâ
hnyei,
K' ame he tavat ae ba hnyikongudra ka
mö.
22 Ke adre me he ka subâ degecâ tavat ae
kong únyi hnyi hnyei,
Ke adre me he ka ve degecâ tavat iyawö
únyi hnyin.

HNYIMAKAN 3.

- N**ÖKUK lö, ca he ka hnying anyik hna-
nyibu ;
Ke hna bi hnyekom he ka tuö hnök je
hna hûna :
2 Anyin ame he ka ou kâu hnabic,
Me je bong ae se hia, me möt ae beú.
3 E so e ca hia gam ibetengiö me hnathu :
Vekiny ju li únyi e hnyi nyem ;
Ke sihnalimen ju hnyi laulauiny hnye-
kom :
4 Me u me he bi ka wâ ibetengiö me laba
wia
Hnyi hnyimakan Khong me at.
5 Labageju thö kö Iehova ge hnyekom ae
bekhöt,
Ke ca labageju bi ka hnâm hna wâ
únykúme :
6 Únykúme ju kâu hnyi dem ta je gethen
hia,
Me e ame he ka owisa dem ta je gethen.
7 Ca oúnyihnathoâ ányâm bi metâ ;

- Ot ju ga Iehova, me kec dö ge hulö :
 8 K' ame he ka hnân tang hvegien bibi-
 kâm,
 Me önyen bi ka je jeiâm.
 9 Oganö Iehova thö ge je omjehem,
 Me wan a bán hnyi em ta hnyei hia :
 10 Me me he ka ti uröngöt umâm je uma
 jeú,
 K' ame he ka bahihingölö ge waina
 ânyâm je hna hlic vine.
 11 Nökuk lö, ca húkotiâ bi je hna nö u ga
 Iehova ;
 Ke u ma ca sünynin e ka fuc :
 12 Anyin a Iehova ame ná at wale e ame
 betenge gan ;
 Helâ me mân kamen ame ná nokon e
 ame senynin kâu.
 13 Hnahic hnen at ame wâ metâ,
 Me at ame hom wâhmakhmêto.
 14 Anyin ae gan hmâ hwaban e hon hwa-
 ban sileva,
 Ke troban e hon gol.
 15 E únyi hnathu e hon je penina ;
 Ke haba ta je omjeú u je ne bewem hia
 e ca úcú mē.
 16 E se hia ta je bong hnyi benyin a
 metân ;
 Ke tang omjeú, me hna ogânâ hnyi
 benyin a meny.
 17 Je gethen ae hmanenang deny ta je
 gethen,
 Ke hnahic deny ta je gethen hia.
 18 Cöiny möt e, ka tavat hia adre me
 kât e :
 Ke hnahic tavat adre me kât hmâ e.
 19 Iehova ame bi taben hmeledrany hnen
 metâ ;
 M otilâ drany hnen wâ únykúme.
 20 Ame hmetruhmetru je dok ae dit ge
 hnen hna wâ tremângâ,
 Ke je úlá ame ota but únya hau.
 21 Nökuk lö, e so e me ca he ta je únyi e
 ka hia hnyi hnyimákâm ;
 Kât hmâ ju metâ me hna únykúme ;
 22 K' ame he ka hnân melen hanom,
 Me theibiny nyem.
 23 Me u me he ka he khötkic hnyi dem
 gethen,
 K' ame ca he ka haú cam.
 24 Hnyi úen u me he ka mokut u me ca
 he ka ot :
 Eke, u me he ka mokut, k' ame he ka
 hnebwia hnâm hna mokut hnying.
 25 Ca he bi ka outen únyi hnân ie outen,

- Me hna okongoâ anyin tavat ae kong e
 ka o but :
 26 Anyin a Iehova ânyâm hna gejon,
 Ke e ame he ka tuö li cam wâ e nye
 hnok.
 27 Ca behânâ so ge tavat ae úcú he ka
 kap e,
 A ne khanö u he ka ânyâ.
 28 Câ ha bi ka waem, ka habe, Mē he thö.
 ke u hmetu thö,
 Ke nyi oge me he ka ham ;
 Ke ka e bi únyi unyâm.
 29 Ca vak únyi ae kong ka waem,
 Anyin a e ame laba hnahic unyâm.
 30 Ca iwatretra baú me waem,
 E ka ba únyi ae kong e ame ânyâ kôu.
 31 Ca behnyökâ bi at úkonguny,
 Ke ca úca bi deny ke gethen.
 32 Anyin ae ikiki Iehova ge at ae hwali
 hwakecin :
 Ke e unyin tavat ae wisa anyin úsabâ
 ae iyong.
 33 E bi hnyi uma umen at ae kong hnaú-
 hangö únyi ga Iehova ;
 Ke e ame ohnahicâ uma umen at ae
 wisa.
 34 E hnathu, e ame hlumâ tavat úhlu-
 möny,
 Ke e ame ham betenge baú ka tavat ae
 úhnyúkong.
 35 K' ame he tavat ae metâ ka hu hmane-
 nang ;
 Ke haba tavat ae monu adre me he ka
 hom bi hmehma.

HNYIMAKAN 4.

- L**AKUK lö, löng ju hna úne hnen at
 ae hu lakon,
 Tevehlöng ju me wâhmakhmetoâ.
 2 Anyin a inya oge me ná soi öbun ;
 Ca hna dogecâ bi anyik hnanyibu.
 3 Anyin a inya nöku cica ehac,
 Iny mita me ofnykúm a khaca kö bai,
 4 Ke e ame nö nya, me ha könya, ka
 habe,
 Kât ju hok ta je hofuc ge hnyekom ;
 Tuö ju anyik ta je hnanyibu me u me
 möt :
 5 Bi metâ thö, bi wâhmakhmeto thö ;
 Ca hnying bi, ke ca saú bi ge ta je hofuc
 únyi hnyi hnyimök :
 6 Ca hna degecâ bi, me e ame he ka
 tuö u ;
 Betenge ju gan, me e ame he ka omeli u.
 7 E beönua metâ : bi metâ thö :

- Eke, bi wáhmakhmeto thö, tha e me ta je únyi u je hom.
- 8 Oúnyihnathöa thö e, me e ame he ka ogöranyi u :
K' ame he ka oganö u, u ka he ka deluá e.
- 9 E ame he ka obicö u ge korona ae hmanenang,
Me ham köu hnbinybak ae mec.
- 10 Nökuk lö, löng ju, me kap ju hok ta je hofuc ;
Me me se hia ta je hunainy ányám möt.
- 11 Oge nö u hnyi deny metá ;
Oge me su u hnyi je gethen deny wisa.
- 12 U ka he, ame ca he ka hnek hnám ta je hna okca ;
Ke u je ne wadring u me ca he ka haü.
- 13 Kát hmá ju hna únö ; ca hna :
Tuö ju e ; anyin a wale melám.
- 14 Ca dit ka hnyi gethen deny tavat ae monu,
Ke ca he hnyi gethen deny tavat ae kong.
- 15 Sákáú but gan, ca vhenö e ;
Hwiö thö únyi hnyin, ke ie he thö.
- 16 Anyin adre me ca mokut ödra ka ca ányá hulö ;
Ame hia but hnödra bemokut ödra ka ca othöá keihen.
- 17 Anyin adre me han aretoiny hulö,
Me ijem wainainy úokonguny.
- 18 Ke haba gethen deny tavat ae wisa me helá me melam ae hadröngöc,
Ame melam tot ke ne o but jebigö.
- 19 Haba gethen deny tavat ae monu me helá me menekholom :
Adre me ca wá bi únyi adre thö hnyin.
- 20 Nökuk lö, löng ju hok ta je hofuc ;
Ta ju hnyikönyám ka hok ta je uthofuc.
- 21 E so e me ca he ka hia hnyi hnyimákám,
Tuö ju ta je únyi e eü hnyi wanben hnyekom.
- 22 Anyin a wale melen tavat adre me wá ta je únyi e,
Me tang hwegien unyin hia.
- 23 Ti tuö wia ju hnyekom ;
Anyin ame o but möt únyi e.
- 24 Degec ut hwali únyi hnyi hnyimám,
Ke úsákáúöá but möu li esongot ae úkhin fuc.
- 25 Bwele wisa ju li emákám,
Ke so ame he wan li emákám ka bwele cici u.

- 26 Okhabalavá deny li cam,
Me me tethmá dem ta je gethen hia.
- 27 Ca saü bi ka hnyi ke keihen metá me me :
Oc ut cam únyi hnyi hulö.

HNHYIMAKAN 5.

- NÖKUK lö, löng ju ka anyik metá ;
Ta ju hnyikönyám ka hnök hna wáhmakhmeto :
- 2 Me me he ka hu gam hna únykúme,
K' ame he li esongodám ka tuö wá únykúme.
- 3 Anyin ame khukhula hani únyi hnyi esongodiny momo kanyua,
Ke menyik hnyimen hon wakaco :
- 4 Ke haba obiny gan, me hiny helá me khöhlöng,
Ke so hwan helá me hele vat a lo homakan.
- 5 Ke ame utut li can ka hnyi mok ;
K' ame kát hmá hedis hnen je hna okca ;
- 6 Waleling me me ca wá bi dok ae tha hon hnen momo eling, hnyi gethen deny möt :
K' ame hwhiwüö deny je gethen, ke ca khana bi.
- 7 Ke walang ang, lakuk lö, ling nya ju,
Ke ca saü bi ge ta je hofuc únyi hnyi hnyimök.
- 8 Otísákáúöá but me, dem gethen,
Ke ca hakekenyá hwanumen uma :
- 9 Wá u nye ham hmaem ka ke je hnyat,
Me ta je hunaiám ka tavat adre beovecá :
- 10 Wá e nye he ta je atkanyua ka unöngöt ge tang hwegiám ;
Ke e biju hnyi uma umen ke at bi hnám hna huliwa ;
- 11 Ke u je máng hnyi obiny jut,
Hnyi ün ame aü but utiöiám me unyám,
- 12 Ke u me he ka ha, ka habe, Nakaik ge hna úne oge hmiök,
Me hna unö a höciá ge hnyekuk ;
- 13 Ke oge me ca löng ifuciny tavat adre me nö nya,
Me ca tevelhlong tavat adre me úne könya !
- 14 Oge ne he but hnyi ta je monu hia,
Unyin tavat adre tha laba, me úkhaca-köu.
- 15 Ijem dö an u je ka hiny,
Me köö ame di únyi hnyi belám bi an.

- 16 Hawa, e so e ve di ehē ányâm ta je pupua,
Me ányâm je wagewe eú hnyi ta je gethen?
- 17 E so e hake hobi kôu bi ta je únyi e,
Ke ca hobi kâu bi ta je atkanyua a tha ödra möu.
- 18 E so e hnahic ányâm pupua,
Ke tha senyin dö me áiân ányâm hidróu.
- 19 Helâ me aila wale amo hnyok so, me gotiny hnyot ae kese,
E so e sekóm ge li basin hnyi je úen hia;
Ke u me he ka senyin gan hmâ bala ge hna betenge gan.
- 20 Anyin a iéú, nökkuk, u me he ka senyin ge momo kanyua,
Me deluâ úlainy ke momo kanyua?
- 21 Anyin ae cicö li emakö Iehova ta je gethen deny at,
Ke e ame tuluto deny ta je gethen hia.
- 22 Ame he ka hnok at ae kong hnen hwakecin bi ae kong,
Ke adre me he ka noc e ge je töiny bi anyin hulö.
- 23 E ame he ka mok can ae ba úne gan;
Ke e ame he ka he monu hnen anyin hwen monu ae gan.

HNYIMAKAN 6.

- N**ÖKKUK, u je ne tot me hwaban hânâm,
Ke u je ne úkhöú hnyam hobi kâu atkanyua,
- 2 Wale u je nuc u hnen ta je hofuc únyi hnyi hnyimâm,
Me hnok ut hnen ta je hofuc únyi hnyi hnyimâm.
- 3 Walang únyi u me he ka ányâ, nökkuk, me omeli u bi,
Anyin a u je o ka hnyi hnyamen hânâm;
He thö, oúhnyúkongi u bi, ke újengö thö hânâm.
- 4 Ca he ka mokut,
Me ta mokut.
- 5 Okhulu u but helâ me zebi hnyi hnyamen at hnuk meno,
Ke meno ame gâ únyi hnyi hnyamen at ame töu hnewe.
- 6 Úsenyin lö, he thö ka wahajö;
Wâ ju ta je hwakecin, m' u ma metâ but:
- 7 Ke ba at owisa kâu,

- Ke ba homakan, ke ba at ame müsö,
- 8 Ke ame penapena an jeú hnyi honivakeny,
K' ame sukhöúnö an jeú hnyi úen menu.
- 9 Úsenyin lö, u me he ka mokut ke ne o but kehö?
Ie úen u me he ka höhöi thö úhem hnyi hna mokut?
- 10 Mē na mokut ju, mē na ta mokut,
Mē na húkálá li hnyamâm me mokut leleú:
- 11 Waleling me me o kôu theduoc helâ me ioiny at húgúnâ,
Ke ba jeu, helâ me at ame hom omjehen vat.
- 12 Haba at ae únyi baú, a at ányâ hulö;
Me e ame hwege hnyimen;
- 13 E ame atmemákâ, k' ame fuc hnen li can.
E ame kú hnen je banyen;
- 14 Eú hnyi hnyekon hwali, k' ame labö vak únyi ae kong;
E ame okúâ iwatretra.
- 15 Anyin a wale ame he ka ie o úokonguny kâu;
E ame he ka ie oamamá but, ke ba eny.
- 16 Walang ta je únyi a siks ame ikiki gan Iehova;
Eke, e hu seven e ame hmiân, ka habe,
- 17 Bi gan, me bohmen at ame thoi,
Me li hnyam ame hingálâ dra ae ba hnyikongon;
- 18 Me hnyok ame únykúme bibihwakecin ae kong,
Me li can ame wadring ka hnyi hulö;
- 19 Me at bi fuco wale at ame ha je thoi,
Me at ame okúâ iwatretra ka hnyat me lakeiny.
- 20 Nökkuk lö, tuö ju hna húna hnen kâ-mâm,
Ke ca degec bi hna úne hnen hinyâm:
- 21 Ca bala ju hnyi hnyekom,
Kinyâ ju hnyi nyem.
- 22 U je ne he, e ame he ka su u;
U je ne mokut, e ame he ka tuö u;
U je ne hmak hmetu, e ame he ka úhnenamö möu.
- 23 Anyin a haba hna húna, me wale lamepa; ke haba hnanyibu, me wale melan;
Ke haba hna ná me me metâ, me wale gethen deny möt:
- 24 He ka tuö u ge momo ae kong,

- Únyi ge útakúiny bohmen momo kanyua.
 25 Ca behnyekom eú hnyi hnyekom anyin hmanenang ;
 Ke so ame ca omonu u hnen bademakan.
 26 Anyin a ong jeú thibi áu ka at, can momo hnyi gethen :
 Ke haba áián ke бага wale at ame bi únyi monu, ame noc hanu ae únyi hnathu.
 27 Hawa, e khana at he ka hok meic ka hnyi úlainy,
 K' ame ca he ka hlá anyin úkhaú ?
 28 Hawa, e khana at ka uto je walep ae möt,
 K' ame ca he ka hlá li hnyetúcan ?
 29 Ke heláe at ame he ka áián ke at ;
 Ame ca he ka ba hwaban ka at ame kálá momo e.
 30 Adre me ca labö hmiödra at venöu, ame ne venöu bi
 Me me sekon hnyekon, anyin ae meki-hnánem :
 31 Ke ödra ka kát e, e ame he ka oseven bi hwaban ;
 E ame he ka ham lia önyen umen uma.
 32 Ke haba at ame bi únyi monu me momo, e at ae ba hnyekon ;
 E ame ányá ke únyi wale ame he ka ohia hanon bi.
 33 E ame he ka hu aat, me hmehma ;
 Ke adre me ca he ka kot degecá hna haikongóá e.
 34 Anyin u haba ciá, wale at ame ohmönyiná at ;
 Ke e ame ca he ka betenge hnyi bong bi hwaban.
 35 E ba hwaban e ame he ka kap,
 Ke u je ne ham káu ta je bwihlany ae se hia, me e ame ca he ka so hmetu bi.
- HNYIMAKAN 7.
- N**ÖKUK lö, tuö ju hok ta je hofuc,
 Ke ip ju unyám hnök ta je hna húna.
 2 Tuö ju hnök je hna húna, m' u me möt bi ;
 Ke anyik hnanyibu helá me wan li emákám.
 3 Ca ju ka hnyi je banyám ;
 Sihnalimen ju hnyi laulauiny hnyekom.
 4 Ha thö ka metá, ka habe, Hanik u ;
 Ke hawá thö wáhmakhmeto me ha, ka habe, Waek :
- 5 Me me tuö u ge momo kanyua,
 A atkanyua ame útakú ge hwan ta je hofuc.
 6 Anyin a oge me selat hnyi hna pewan,
 Hnyi mamalaminy umök uma ;
 7 Me oge me wá unyin tavat ae ba hnyekudra,
 Ke wá bi eú unyin je thöth
 Ke hidróu ae ba hnyekon,
 8 K' ame he hnyi gethen hakekeny hnyekhutuiny momo,
 Me e ame vheno gethen ka hnyi umen uma ;
 9 Wale hnyi hauhaotreng, hnyi sahad,
 Hnyi hnyinghet ae lit, ke menekholom hmönyin.
 10 Me wá bi, ke momo ame úkhanö mä,
 K' ame khavá khaúen momo hnyi gethen, ke hnyok thoi.
 11 A momo ae fuc bebehu, ke beányá weny ;
 K' ame ca laba li can hnyi hnyaban :
 12 Haba úen ang, me eú hnyi gethen,
 haba eáu me eú hnyi je hnaudrá,
 K' ame tue hnyi ta je hnyekhutiny,
 13 Me haba momo ame kát e, me úci-mhnyimak mä,
 K' ame ca hmehma bi hnyimakan, k' ame ha káu, ka habe,
 14 E bi unyik je hudiny ole ;
 Oge hia but thamúá anyik ta je khöbi hnyi bong ang.
 15 Anyin a wale oge me o but he ka úkhanö möu,
 He ka elám hnyimákám, me oge me ö u ju.
 16 Oge hia but ulolo je kubö hon hnök hna mokut,
 Mano ae se se hia hnalimen únyi Aigupito.
 17 Oge hia but hú hnök hna mokut
 Ge muro, me aloe, me kinamo.
 18 Aiö u, ame he ka sekutu ge ibetengió ke ne o but ame lany dö,
 Ötu me he ka hobá ibetengió.
 19 Anyin ae hia but бага hnyi uma,
 E a he but ka hnyi dok ae sákáú :
 20 A hia but hom tang mone ;
 Ke e ame he ka hmetu e ka bekhöt ut tehi.
 21 Ke haba momo ame osaúá e hnen anyin ta je hofuc ae iyawá,
 E ame lelö e hnen útakúiny li esongodiny.
 22 Me ame ie he hoton,
 Helá me bolok adre me he ka hlingá,

- Ke helâ me at ame monu, wale adre
ca, m' adre me nâ e :
- 23 Ke ne o but adre me dâoâ akiny ge
fana ;
Helâ me meno ame logot ka hnyi
hnewe,
Ke ca khana a g' adre me mekiny.
- 24 Ta je lakuk lö, ling nya ju walang ang,
Ke tevehlöng ju ta je hofuc únyi hnyi
hnyimök.
- 25 Ca saú bi hnyekom ka hnyi deny je
gethen,
Ca he monu bi hnyi deny ta je gethen.
- 26 Anyin a e ame othoâ tavat ae se hia
adre me aat ut gan :
Eke, haba ta je haniny me utbavat ae
hwege.
- 27 Gethen ame he hedis ai umen uma,
Ame ihnyöng ka hnyi je hnyeuleny
mok.

HNYIMAKAN 8.

- H**AWA, ame ca hongot bi metâ,
Ke fuc göranyai wâhmakhmeto ?
- 2 E ame tot hon je dok ae görany hnyi
gethen,
Ke hnyi je dok ame iouny hnyin je
gethen ;
- 3 Hnyi je homagöule, hnyi hna dit ka
hnyi taun,
Ke hnyi hna dit ka hnyi je hwanuma,
e ame kuku, ka habe,
- 4 Tavat lö, inya oge me haw' öbun,
Ke hobi kâu lakon at bi ifucik.
- 5 Öbun tavat ae ba hnyekubun lö, Wâ-
hmakhmeto ju wâ wia ;
Ke öbun tavat ae monu, wâ únykúme
ju öbun.
- 6 Löng ju, anyin oge me he ka ha ta je
hofuc ae beönua ;
Oge me he ka khöng li esongodik he
ka ha ta je hofuc ae wisa.
- 7 Anyin ame he hnyimök ka ha hnathu ;
Ke ikiki hulö ka li esongodik.
- 8 E wisa hia ta je hofuc únyi hnyi hnyi-
mök ;
E ba ke ong hwali me monu hnyin.
- 9 E ti manen hia ka at wâhmakhmeto,
Ke wisa bi ka tavat adre me wâ metâ.
- 10 Kap ju hnök hna úne ke ca kap sileva
bi ;
Ke metâ, hon gol ae so.
- 11 Anyin ae so metâ hon ta je penina ;
Ke ca úcú mē ta je únyi hia adre me
wedra.

- 12 Inya, a metâ, oge hia but ip wâ trema-
ngâ hnân dok oge me laba hnyin,
Oge me elâm wia wâhmakhmeto, ke
hna ányâ ae úcú.
- 13 Haba ot kö Iehova, me wale he ka
hmiân hulö :
Ke haba bi gan, ke begörany, ke gethen
ae kong,
Ke hnyem ae hwali, me wale je húkö-
tiânök.
- 14 E unyik wâ bongon, me úne ae wisa :
Inya bi wâhmakhmeto ; e hu manik.
- 15 Haba je than me adre me musi bi únyi
gak,
K' ame owisa hnen ta je taben.
- 16 Únyi gak ame musi je taben,
Me tavat ae beönua, me tavat owisa
hia eang hmelen.
- 17 Inya oge me betenge gadra adre me
hnyok kõnya ;
K' adre me he ka ö nya tavat adre me
elâm hwegiö nya.
- 18 E unyik omejeú, me hmanenang ;
Eke, je omjeú ae tethmâ, me hwakecin
ae wisa.
- 19 E so anyik wan hon gol, eke, hon gol
ae so ;
Me anyik troban, hon sileva ae so.
- 20 Inya oge me vheno gethen ae wisa,
Hnyi wanben je gethen owisa :
- 21 M' oge me he ka otreni ödra ge omjeú
adre me hnyok kõnya,
M' oge me he ka öunöngötâ umödra je
uma omjeú.
- 22 Iehova ame tren inya, hnyi hwân deny
je gethen,
Ke tiga ba anyin huliwa kâu adrem.
- 23 Adre otillö nya kâu adrem bala, hnyi
hwân,
Hnyi úen ae tiga ba bi hmeledrany.
- 24 Adre hnöku nya, ke tiga ba bi dok ae
dit ;
Hnyi úen ae tiga ba pupua ae unöngöt
ge köiö.
- 25 Adre hnöku nya ke tiga ca otillâ ta je
bucen,
Ke tiga ba bi je dok ae hut :
- 26 Hnyi úen ae tiga ca op kânâ, me hnyot,
Me sesâiny kânâ a bân, eang hmelen.
- 27 Hnyi úen e ame penapena drany, inya
but ling :
Hnyi hnen hna tuluto wathelaba hon
köiö :
- 28 Hnyi úen e ame otethmâ ta je úlâ ethö :
Me hwegiâ je pupuainy dok ae dit :
- 29 Hnyi úen e ame bi hnyigöulen köiö

- Me me ca he je köiö ka hanyátá hnen
hna hûna :
- Hnyi ûen e ame bi taben hmeledrany :
- 30 Oge me laba unyin ling, inya ke taben
huliwa :
- E ame senyin gak hnyi je bong,
Ke oge me hobâ bala hnyi hnyimakan ;
- 31 Me hobâ hnyi hmeledrany adre me
labâ ;
- Ke haba anyik senyin ae gan wale
unyin lakon tavat.
- 32 Anyin a wale, lakuk lö ling nya ju
walang ang :
- Anyin ae hnahic tavat adre me tuö dek
ta je gethen.
- 33 Löng ju hna ûne, me metâ but,
Ke ca höcö bi.
- 34 Hnahic hnen at ame hling nya,
At ame hmâkâ hnyi je homagöulek
hnyi ta ogö bong,
At ame tue hnyi uthwanumök.
- 35 Anyin a haba at ame ö nya, me ame
wâ möt,
K' ame he ka hu gan ibetengiö ûnyi ga
Iehova.
- 36 Ke haba at ame haü bi gak, me e ame
okongoâ hanon bi :
- Ke haba tavat adre me hûkötio nya,
me adre me hnyok mok.

HNYIMAKAN 9.

- H**ABA metâ ame hia but op umen
uma,
A hia but delâ anyin je hmolom a
seven :
- 2 A hia but hlingâ haleny ta je meno ; a
hia but ûhaniken anyin waina ;
A hia but laulau.
- 3 A hia but kunâ anyin wahlu, k' ame
hongot
Hon je dok ae görany hnyi taun, ka
habe,
- 4 Ewa at ae ba hnyekon, saü ju ang :
Ke haingen ka at ae ba ûnykûme, ka
habe,
- 5 Ai öbun, me hnyi an ök jeü,
Me ijem anyik waina oge me ûhaniken.
- 6 Soju, öbun tavat ae ba hnyekubun, m'
öbun e möt ;
Me vheno gethen deny wâ ûnykûme.
- 7 Haba at ame thawâ at ame hlumö at,
me ame he ka hmehma bi ;
Ke haba at ame nâ at ae kong, me ame
he ka hu monu.

- 8 Ca nâ at ame hlumö at, wâ e nye he ka
hmiön u :
- Nâ thö at ae metâ, me e ame he ka
betenge gam.
- 9 Nâ thö at ae metâ, me e ame he ka
metâ tot :
- Nâ thö at ae wisa, me e ame he ka
bihanen anyin ûne.
- 10 Haba ot kö Iehova, wale hwân metâ :
Ke haba he ka khana At ae Kap, wale
wâhmakhmeto.
- 11 Anyin ame he ka osehia bongom ta je
bong ûnyi gak,
Me ame he ka bihanen je hunainy
ânyâm möt.
- 12 U je ne metâ, hobi köu bi metâ :
U je ne hlumö at me, u me he ka hake
wâ troban.
- 13 Haba momo ae monu ame fuc bebehü ;
E at ae ba hnyekon, ke ca khana ta je
ûnyi.
- 14 E ame laba hnyi hwanumen umen uma,
Hon tap hnyi je dok ae görany hnyi
taun,
- 15 He ka hawâ tavat adre me he,
Wale adre me he wisa hnyi dedra je
gethen ;
- 16 Ewa at ae ba hnyekon, hamen he ka
saü eang :
Ke haingen ka at ae ba hnyekon, ka
habe,
- 17 E hnebwia köiö adre venâu,
Ke kese bi jeü adre an duöngâ.
- 18 Ke e ca khana a wale hnen ta je komok ;
Me haba tavat adre me mē laba hnyi
umen uma wal' ödra bi hnyi je dok
a diliny hedis.

HNYIMAKAN 10.

- T**A je vejec anyi Solomona.
- Haba nokon ae metâ ame osenyinâ
kamen :
- Ke haba nokon ae monu ame ovecâ
hinyen.
- 2 E ba troban uma omjetüiny hwakecin
ae kong :
- Ke haba hwakecin ae wisa, wale ûhö-
meli ûnyi hnyi hna mok.
- 3 Ame ca he Iehova ka omekihânemâ at
ae wisa hwakecin :
- Ke e ame hna degecâ weuny at ae kong.
- 4 Ame he ka ba ta ûnyi ge at ame huliwa
me hnyam ae hwen höcö :

- Ke haba hnyamen at ae hwege huliwa
ame he ka tren omjeú.
- 5 Nokon ae metá at ame úkhöünâ hnyi
honivakeny :
Ke haba at ame mokut hnyi úen menu,
me wale nokon at ame ohmehma.
- 6 Ame laba je hnahic hon ban at ae
wisa :
Ke haba hnyimen at ae kong ame
ikhâlâ úkongun.
- 7 E so he ka únykúme ka at ae wisa :
Ke ame he ka bobot ien at ae kong.
- 8 Ame he at ame hnyok metá ka kap ta
je hnanyibu :
K' ame he ka ta at ae monu ifucin.
- 9 Haba at ame vheno wisa, me ame he
khötkic :
Ke ame he ka manen at ame ohwalö
deny ta je gethen.
- 10 Haba at ame úatmemakö, me ame okûâ
vec :
K' ame he ka ta at ae monu ifucin.
- 11 Pupuainy möt hnyimen at ae wisa :
Ke haba hnyimen at ae kong, me ame
ikhâlâ úkonguny.
- 12 Haba hmönyin, me wale at ame okûâ
iwatretra :
Ke ibetengiö ame tube ta je hulö hia.
- 13 E manen dut metá hnyi hnyimen at
ame wâ únykúme :
Ke hu osö hobi kâu jon at ae ba hnye-
kon.
- 14 Haba tavat ae metá, adre me hitangen
wâhmakhmeto :
Ke haba hnyimen at ae monu ame
hakekenyâ úkonguny.
- 15 Haba tang omjehen at ae tren omjeú,
me, anyin taun ae hwege :
Ke haba úkonguny anyin at ae ba ta
únyi, me ba anyidra omjeú.
- 16 Haba huliwa anyin at ae wisa, me ame
oâ möt ;
Ke haba troban at ae monu, me hulö.
- 17 Haba at ame tuö hna ná e, me ame
laba hnyi gethen deny möt :
Ke haba at ame degecâ hna ná e, me
ame háu bi.
- 18 Haba at ame oiyongâ úöhúkoti, me
ame thoi hnyimen ;
Ke haba at bifuco, me wale at ae monu.
- 19 E ka se hia hofuc, me ca ba hulö :
Ke metá at ame noc bohmen.
- 20 Sileva ae so li esongodiny at ae wisa :
Ke thatúnyi hnyekon tavat ae monu.
- 21 Haba li esongodiny at ae wisa me ame
hân tavat ae se :
- Ke a mok ut tavat ae monu anyin ae
ba hnyekudra.
- 22 Haba hnahic únyi ga Iehova ame ohuâ
omjeú,
Ke e ame ca vecâ.
- 23 Helâke walak ka at ae monu he ka
ányâ hulö :
Ke helâe minya metá ka at ame wâ
únykúme.
- 24 Haba hna ouden hnen at ae kong, me
ame he ka aat kâu :
Ke ame he ka ham weny at ae wisa.
- 25 E ka o höu, me ame he ka hia at ae
kong :
Ke hu taben nyiele balua at ae wisa.
- 26 Haba at ae hwen höcö ka at ame kunâ e,
Me úcú me vinega ka nyu, me hai ka li
ecmak.
- 27 Haba ot kö Iehova, ame osehia ta je
bong :
Ke adre me he ka owakhaletâ ta je
hunainy tavat ae kong.
- 28 Hnân osenyinâ gejon anyin tavat ae
wisa :
Ke ame he ka hia geju anyin tavat ae
kong.
- 29 Haba gethen de Iehova, wale hnbâ ka
tavat ae wisa ;
Ke úkonguny bi ka tavat adre me
ányâ monu.
- 30 Adre me ca hom degecâ at ae wisa nyiele
balua ;
Ke ame ca he bi tavat ae kong ka labâ
hnyei.
- 31 Haba hnyimen at ae wisa me ame oâ
metá :
Ke adre me he ka subâ degecâ bohmen
at ae hwali.
- 32 E khana but li esongodiny at ae wisa
únyi ae úcú ;
Ke haba hnyimen at ae kong me ame
ha hwali.

HNYIMAKAN 11.

- I KIKI kö Iehova tulut uhni ae iyawö ;
Ke e ame senyiná tulut ae ti wisa.
- 2 E ka o but bi gan, me ame o but hme-
hma :
Ke e unyin tavat ae hnyikânâ bi, metá.
- 3 Ame he hwakecidra ae ba hnyikongon
ka su tavat ae wisa :
K' ame he hwakecin ae hwali ge tavat
ae kong ka ohí' ödra.
- 4 E ca únyi hnathu omjeú hnyi úen hmö-
nyin :

- Ke haba hwakecin ae wisa me wale úhömeli únyi hnyi hna mok.
- 5 Ame he hwakecin at ae wisa ae ba hnyikongon ka kú deny gethen :
K' ame he at ae kong ka ta ge anyin bi hulö.
- 6 Ame he hwakecin ae ba hnyikongon anyin tavat ae wisa ka omeli ödra :
K' ame he ka hnok tavat adre me ányá iyawá hnen hwakecidra ae hwali.
- 7 E ka mokcu at ae kong, me ame hia but hnen hna gejon :
K' ame he ka hia but gejon hwakecin ae kong.
- 8 Adre me omelö at ae wisa únyi hnyi vec,
K' ame o but at ae kong ka hnyi hnen bi.
- 9 Haba hnyimen at ame ca ot, me ame okongoá waenḡ :
Ke adre me he ka omelö tavat ae wisa únyi ge wáhmakhmeto.
- 10 E ka sot at ae wisa, me ame senyin taun :
Ke ka mok at ae kong, me adre me kuku.
- 11 Adre me ogöranyá taun hnen hnähic anyin tavat ae wisa :
K' adre me hagutá e ge hnyimen tavat ae kong.
- 12 Haba at ame húkotiá hanen, me ba metá bi gan :
Ke ame laba hnyibú at ame wá únykúme.
- 13 Haba at ame hok hofuc, me ame omanená ta je únyi ae iyong ;
Ke haba at ae hnathu hnyekon me ame ikhölö hofuc.
- 14 E ka ba musi ae wisa ame he ka ta but aten hnyei :
Ke ame laba wia hnen tavat ha bongon ae se hia.
- 15 Ame he ka vec at ame tot me hwaban atkanyua :
Ke haba at ame höcö úkhóu hnyam me ame laba khötkic.
- 16 Haba momo ae so me ame hom hmá hna ogáná :
Ke haba tavat hwege me adre me hok omjeú.
- 17 Haba at ame betenge, me ame ányá hwakecin ae so bi káu :
Ke haba at beovecá me ame ovecá unyin bi.
- 18 Ame bi huliwa iyawö hnen at ae kong :

- Ke haba at ame tá hwakecin ae wisa me hu hwaban ae hnathu.
- 19 Haba at ame tethmá hnyi hwakecin ae wisa me ame he ka hu möt :
Ke haba at ame hnu hoton hulö me ame hlingá e bi.
- 20 Hmiö Iehova ta je hnyok ae hwali :
Ke e ame senyin ge tavat ae wisa hwakecidra.
- 21 Eja ke ne a ne ihok beny me ke at, ame ca he ka ba hwaban ka at ae kong :
Ke ame he ka möt ta je mátrániny tavat ae wisa.
- 22 Otru gol hnyi hnyingöiny buaka,
Momo ae ba hna únykúme ae úcú.
- 23 E hake so thibi weny tavat ae wisa :
Ke haba úlubahing anyin tavat ae kong me wale hmönyin.
- 24 E hu at ame oveseá anyin ta únyi, me ame gan tot anyin ta únyi ;
Ke e hu tavat adre beháná únyi ae úcú, ke adre me he bala ka theduoc.
- 25 Ame he ka pipikhenya at ame ham baúá :
Ke adre me he ka hú at ame úöhúö.
- 26 Haba at ame beháná hwit, ame he tavat ka hangá e :
Ke ame he hnähic ka laba hon ban at ame úco e ka tavat.
- 27 Haba at ame elám hwegiá so, me ame elám ibetengiö :
Ke haba at ame elám úkonguny me ame he ka o káu.
- 28 Haba at ame labageju ka tang omjeú me ame he ka ta :
Ke ame he tavat ae wisa ka hlau helá me lan úö ae hát.
- 29 Haba at ame bwebwelá anyin lap, me ame he ka hu ang hnân jekhon :
K' ame he at ae monu ka bi athnyabainy at ame hnyok metá.
- 30 Haba wan at ae wisa me úöiny möt,
Ke haba at ae metá, me ame ohmehmela ta je hanu.
- 31 Wá bi adre me he ka bi hwaban eang hmeledrany ka at ae wisa :
Ke hawa bi ge at ae monu me at ae kong !

HNYIMAKAN 12.

- H**ABA at ame weny hna úne, me ame hnyok wáhmakhmeto :
Ke hwakecin meno at ame hociá hna ná.
- 2 Haba at ae so, me ame he ka hu ibetengiö ga Iehova ;

- Ke e ame he ka ohnaûhangöä at ae kong.
- 3 Ame ca he ka tethmä at ge hulö :
K' adre me ca he ka oc degecä iwân tavat ae wisa.
- 4 Haba momo ae so hwakecin, me korono anyin äiân :
Ke haba momo ame ohmehma, me heläke amam but ta je jeien.
- 5 Ame úcú ta je hna únykúme hnen at ae wisa,
Ke tang iyawö je úhnenamö anyin tavat ae kong.
- 6 Haba ta je hofuc hwan tavat ae kong, me ame ha ge dra adre me mokulec tuö :
K' ame he ka omeli ödra ge hnyimen tavat ae wisa.
- 7 Adre me hagutä tavat ae kong, me ame hi' ödra but :
K' ame he ka tethmä uma umen tavat ae wisa.
- 8 Adre me he ka haisoä at hoton anyin metä :
K' adre me he ka húkötíä at ae hwali hnyekon.
- 9 E so at adre me ca oúnyihnatho, k' ame hu athnyabainy,
Hon at ame ogánä e bi, ke ba an jeú.
- 10 Haba at ae wisa, me ame betenge ge haleny meno :
Ke haba ibetengiö anyin at ae kong, me wale beovecä.
- 11 Haba at ame belökä kánán káná, me ame he ka sekon ge jeú :
Ke ba hnyekon at ame hnu hoton ta je únyi baú.
- 12 Haba tavat ae kong, me adre me weny ert úten tavat ae monu :
Ke haba iwân tavat ae wisa me ame wa wan.
- 13 Ame hnok dö at ae kong ge hna hanyá-úä ge li esongodiny :
Ke ame he at ae wisa ka khulu but únyi hnyi vec.
- 14 Ame he at ka sekon ge so hnen wan hnyimen bi :
Ke haba troban li hnyamen at, me ame he ka hmetu káu.
- 15 Haba gethen deny at ae monu, me ka wisa bi káu :
Ke metä bi at ae löng hna une.
- 16 Ame ie manen hmönyin anyin at ae monu :
Ke ame tube hmehma hnen at ae metä.
- 17 Haba at ame ha hnathu, me ame omanená wisa,
Ke haba at ame ohnathoä thoi, me ame omanená iyawö.
- 18 E hu tavat adre me ie fuc, heläke adre dä ge hele vat :
Ke haba bohmen at ae metä, me hnân ometo.
- 19 Haba esongot ae hnathu, me ame he ka tethmä nyiele balua :
Ke helä me hna thuthubademak bohmen ae thoi.
- 20 E hu iyawö eú hnyi hnyekon tavat adre me únykúme hulö ;
Ke ame senyin tavat adre me úhnenamö me me hnahic.
- 21 E ba únyi ae kong ame he ka o ka at ae wisa :
Ke ame he ka unöngöt tavat ae monu ge hulö.
- 22 Hmiö Iehova ta je esongot ae thoi :
Ke e ame senyin ge tavat adre me mádrä hnathu.
- 23 Haba at ame wä wia, me e ame ikhálä metä :
Ke haba hnyekon tavat ae monu, me ame omanená hwen monu.
- 24 Ame he hnyamen tavat ae hwege huliwa ka musi :
Ke adre me he ka kunä úsënyin he ka ányä je huliwa.
- 25 Haba hlöuhlöu eú hnyi hnyekon at, me ame okhudrungo at :
Ke ame osenyiná e hofuc ae so.
- 26 Haba at ae wisa, me ame kú gethen ka lahanen :
Ke haba gethen deny tavat ae kong, me ame omonu ödra.
- 27 Haba úsënyin, me, ame ca le haniny :
Ke haba wakomjeú anyin tavat, me hobi káu bi at ae hwege huliwa.
- 28 E hu möt bi eú hnyi gethen deny hwa-kecin ae wisa ;
Ke ba mok bi hnyi deny gethen.

HNYIMAKAN 13.

- H**ABA nokon ae metä me ame löng hna úne hnen kamen :
Ke haba at ame úhiö, me ame ca löng bi hna ná.
- 2 Ame he at ka an so únyi hnyi wan hnyimen :
K' ame he tavat iyawö ka an úokonguny.

- 3 Haba at ame tuö hnyimen, me ame tuö bi anyin möt.
Ke haba at ame fuc gâná me ame he ka hu hnaúhangö.
- 4 Ame weny hnen hnyekon üsényin, ke ba bi :
K' ame he ka pipikhenya at ae hwege huliwa.
- 5 Haba at ae wisa me ame húkötîá hofuc ae thoi :
K' adre me ikiki at ae kong, me hnân ohmehma.
- 6 Hwacekin ae wisa ame tuö at ae ba hnyikongon eü hnyi gethen :
Ke hwacekin ae monu ame hagutá at ae kong.
- 7 E hu tavat adre me otreñi ödra omjeú, me ba bi :
Ke hu tavat adre me otheduoci ödra, me gan bi omjeú gadra.
- 8 Haba hwaban möt anyin at, me únya tang omjehen :
Ke ame ca löng hna ná hnen at ae theduoc.
- 9 Ame senyin melaminy tavat ae wisa :
K' adre me he ka omoko lamepa anyin tavat ae kong.
- 10 Ame oá iwatretra ge bigan
Ke hu metá ge tavat adre me kap úhne-namö ae so.
- 11 Haba omjeú adre me ie hom, me ame he ka hia tot bi :
K' ame he ka osehia hnen at ame úkhö-úná deny huliwa.
- 12 Haba geju adre bec ka ohwádâ me ame omoko hnyok :
Ke adre me ne ohwádâ weny, me helâke úöiny möt.
- 13 Haba at ame húkötîá hofuc, me ame okongoâ e bi :
Ke ame he ka hu troban ge at ame outen hnanyibu.
- 14 Haba hnanyibu anyin at ae metâ, me wale pupuainy möt,
Me me kec ge je hnewe adre me me-kiny.
- 15 Haba únykúme ae so, me ame okúâ ibetengüö :
Ke hokong gethen deny tavat iyawö.
- 16 Ame huliwa metâ hnen at ae so :
Ke haba at ae monu me ame omanená anyin hwen monu.
- 17 Haba úthumetu ae monu me ame ta ka hnyi hulö :
Ke haba úthumetu ae hnathu me hnyi hwegien unyin.
- 18 Ame he ka theduoc me hnehma at ame hücüâ hna úne ;
Ke adre me he ka ogânâ at ame löng hna ná.
- 19 E hnebwia ka hnyi hnyok hna weny ae hwádâ :
Ke ikiki ka tavat ae monu he ka saú únyi hnyi hulö.
- 20 Tha he ju me tavat ae metâ, m' u me he ka metâ :
Ke ame he ka iei at ame hanen tavat ae monu.
- 21 Ame he hulö ka he hoton tavat ae kong :
Ke adre me he ka bi hwaban so ka tavat ae wisa.
- 22 Haba at ae so me ame he ka ha jekhon je laöbiny ;
Ke adre me ip hobi kâu tavat ae wisa omjehen at ae kong.
- 23 E gan hmâ jeú hnyi hnyei iny at ae theduoc :
Ke e hu minya hna ohia ge hna owisa ae hwali.
- 24 Haba at ame behânâ osö me ame húkö-tîá nokon :
Ke haba at ame betenge ge nokon me e ame ná e hnyi ke je úen.
- 25 Ame han me sekon at ae wisa :
Ke ame he ka ba önyen hnyekon tavat ae kong.

HNYIMAKAN 14.

- T**A je momo ae metâ adre me ve ânyâwia ta je hnyabadra :
Ke haba momo ae monu ame thang degecâ hnen li hnyamen bi.
- 2 Haba at ame he hnyi anyin wisa me e ame outö Iehova ;
Ke haba at ae hwali deny gethen, me ame húkötîá e.
- 3 E hnyi hnyimen at ae monu osöiny bigan :
K' ame he je hnyimen tavat ae metâ ka tu' ödra bi.
- 4 A ne ba bolok, me kalaöt taben han :
Ke se hia jeú hwaban ihwegien bolok.
- 5 Ame ca he at ohnatho ae hnathu ka thoi bi ;
K' ame he ka ha thoi hnen at ohnatho ae ca wisa bi.
- 6 Ame heleú metâ hnen at ame úhiö, k' ame ca wâ bi :
Ke háhá he ka wâhmakhmeto hnen at ame wâ únykúme.

- 7 U je ne he hnyi hnyimakan at ae monu,
Me u me ca he ka wâ unyin bi li esongot
ae wâ ûnykûme.
- 8 Haba metâ anyin at e so, me wale he
ka wâ ûnykûme deny gethen :
Ke haba hwen monu anyin tavat ae
monu, me wale tang iyawö.
- 9 Ame hlumâ hulö hnen tavat ae monu :
Ke e unyin tavat ae wisa ibetengiö.
- 10 E khana hnyok anyin bi vec ;
K' ame ca he atkanyua ka hnyi hanen
anyin senyin.
- 11 Adre me he ka hagutâ uma umen tavat
ae kong :
K' ame he ka hwege uma mano umen
tavat ae wisa.
- 12 E hu gethen ae wisa hnyi hnyimakan
at,
Ke haba obiny e, me gethen deny mok.
- 13 Ame hmak hnyok hnyi ûen adre me
hluma ;
Ke haba obiny senyin, me hlöuhlöu.
- 14 Ame he at ame saü hnyekon ka sekon
ge deny ta je gethen :
K' ame he at ae so ka sekon a ka únyi
gan bi.
- 15 Haba at ae ba hnyekon me ame kap ta
je hofuc hia :
Ke haba at wâ wia me ame wâ ûnykûme
deny gethen.
- 16 Ame ot at ae metâ, me kec ge hulö :
Ke haba at ae monu ame bi gan, me ka
geju kâu bi.
- 17 Haba at ame ie hmönyin, me ame he ka
ânyâ monu.
Ke adre me hûkötîâ at bibihwakecin ae
kong.
- 18 Haba hwajekhon tavat ae ba hnyekudra,
me monu :
Ke haba tavat wâ wia me adre obicâ
ge wâhmakhmeto.
- 19 Tavat ae kong adre me iyâú ka tavat
ae so ;
Ke tavat ae monu adre me iyâú hnyi je
homagöuleny at ae wisa.
- 20 Ame hmiân at ae theduoc hnen hanen :
Ke se hia tavat adre me betenge ge at
ae tren omjeú.
- 21 At ae kong at ame hmiân hanen :
Ke hnahic at ame betenge ge at ae ba
ta únyi.
- 22 Hawa, e ca monu tavat adre me vak
hulö ?
Ke ame he ka hu betenge me hnathu
ge tavat adre me vak so.
- 23 E hu troban hnyi ta je huliwa hia :
Ke haba ifucin li esongot me ame hake
ûötheduoci.
- 24 Haba tang omjehen tavat ae wisa, me
anyidra korona :
Ke haba hwen monu anyin tavat ae
monu, me ka hwen monu bi.
- 25 Haba at ohnathoâ hnathu me ame omelö
tavat :
Ke haba at ame ha thoi ame okúâ iyawö.
- 26 E hnyi ot kö Iehova labageju ae hwege :
K' ame he lakon ka hu dok hnân luba-
duöng hnyin.
- 27 Haba ot kö Iehova, me wale pupuainy
möt,
M' adre me kec ge je hnewe hnân
mekiny.
- 28 Haba hmanenanginy than, me tavat ae
se hia :
Ke e ka wakhalet thibi, hnân e okongoâ
than.
- 29 Haba at ae bec he ka hmönyin, me gan
hmâ wâhmakhmeto :
Ke haba at ame ie hmönyin, me ame
ogânâ hwen monu.
- 30 Haba hnyekon ae wisa me wale melen
unyin :
Ke haba ciâ me wale bobot ka ta je
jö.
- 31 Haba at ame ovecâ at ae theduoc me
ame baikongoâ At a op e :
He haba at ame betenge ge at ae the-
duoc, me ame ogânâ e.
- 32 Adre hagutâ hnyikânâi at ae kong hnyi
anyin monu :
Ke haba at ae wisa, me hu gejon hnyi
anyin mok.
- 33 Ame laba metâ hnyi hnyekon at ame
wâ ûnykûme :
K' ame manen ta je únyi eú hnyi hnye-
kon tavat ae monu.
- 34 Haba at ame ogöranyâ hnyei, me hwa-
kecin ae wisa :
Ke ame haikongoâ tavat hnen hwakecin
bi ae kong.
- 35 Ame betenge than ge athnyaba ame
huliwa metâ
K' ame he ka hmönyin ka at ame ohme-
hma.

HNyimakan 15.

ADRE me thu menyikâ, me adre me
obâ hmönyin

Ke hofuc ae vec ame okúâ hmönyin.

2 Haba bohnen at ae metâ me ame ha
wisa ge wâhmakhmetö :

- Ke haba hnyimen tavat ae monu, me ame hingälâ hwen monu.
- 3 Ka e bi li emakö Iehova hnyi ta je dok hia,
E ame wâ so me kong.
- 4 Haba bohmen ae wisa, me wale üöiny möt :
Ke haba he ka fuc hwali, me wale hnân oamamâ hnyok.
- 5 Haba at ae monu, me ame hmiân hna ûne hnen kamen :
Ke haba at ame kap hna nâ, me ame he ka wâ wia.
- 6 E gan hmâ omjeû hnyi uma umen at ae wisa :
Ke e hu vec ae gan hnyi troban at ae kong.
- 7 Haba li esongodiny at ae metâ, me ame khukhua wâhmakhmeto :
K' ame ca hnyi helâe hnyekon at ae monu.
- 8 Hmiö Iehova hut anyin tavat ae kong ;
Ke e ame senyin ge hic hijin at ae wisa.
- 9 Hmiö Iehova gethen deny at ae kong :
Ke e ame betenge ge tavat adre me vheno wisa.
- 10 E hu hna nâ ae vec hobi kâu at ame hna degecâ gethen :
K' ame he ka mok at ame hociâ hna nâ.
- 11 E bi hnyi hnyimakö Iehova hedis me hnaühangö,
Awe, ame ca he ka helâe ge je hnyekon tavat !
- 12 Haba at ame ühiö, me ame ca betenge bi ka at ame nâ e :
E ame ca he ka he ka at ae metâ.
- 13 Haba hnyok ame senyin, me ame osoâ hnyimak :
Ke haba hnyok ae hmak me ame ohlôuhlöuâ at.
- 14 Haba hnyekon at ame wâ ünykûme, me ame elâm metâ :
Ke haba hnyimen tavat ae monu, me ame han hwen monu.
- 15 E kong ta je bong hia ka at ame vec :
Ke haba hnyok ae hâhâ, me wale bijeû hnyi ta je bong.
- 16 E so e ühnyûkong hna hu tha e me ot kö Iehova,
Hon e ka se hia ta je ünyi tha e me hlohlo.
- 17 E so jekhöu a tap khölak tha e me ibetengiö,
Hon ut bolok ame han eiö hnyuma, tha e me üöhüköti.
- 18 Haba at ae hmönyin, me ame ohuâ iwatretra :
Ke haba at ae bec he ka hmönyin, me ame thawâ ivinö.
- 19 Haba gethen deny üsenyin, me helâ me lak üö ae udedö :
Ke adre ânyâ deny at ae wisa me me hna cit gethen.
- 20 Haba nokon ae metâ, me ame osenyinâ kamen :
Ke haba at ae monu, me ame hûkötîâ hinyen.
- 21 Haba hwen monu, me wale senyin ka at ae ba hnyekon :
Ke haba at amê wâhmakhmeto, me ame vheno wisa.
- 22 A ne ba ûnnenamö, ame ca he ka hwädâ je weny :
Ke ame otîlä e, hnen tavat ûnnenamö ae se hia.
- 23 Ame senyin at ge hna thu hnen hnyimen :
Shaiba ge soiny hofuc adre me ha hnyi ün ae ücü !
- 24 Ame ölö göranyai gethen deny möt, ka tavat ae metâ,
Me me kec ge hedis eü.
- 25 Ame he Iehova ka oc degecâ uma umen at ae bi gan :
Ke e ame he ka otethmâ hnyigöulen safac.
- 26 Hmiö Iehova ta je bibihwakecin ae kong :
Ke alai ta je hofuc ae kese.
- 27 Haba at ame behnyekon omjeû, me ame omonumonoâ anyin bi lap :
Ke ame he ka möt at ame hûkötîâ ta je bwihlany.
- 28 Haba hnyekon at ae wisa, me ame ünykûme hnen hna thu :
Ke haba hnyimen at ae kong, me ame wala hofuc ae kong.
- 29 Iehova ame üsâkâüö me tavat ae kong :
Ke e ame löng hic hijin tavat ae wisa.
- 30 Haba melaminy li ecmak, me ame osenyinâ hnyok :
Ke haba üthumetu ae so ame opipikhenya je jö.
- 31 Haba hnyiköny, me ame löng hna ûne hnân melen,
Me ame he ka tha laba me tavat ae metâ.
- 32 Haba at ame hmiân hna ûne me ame ka hmiân e bi :
Ke haba at ame löng hna nâ, me ame he ka hu ûne gan.

33 Haba at ot kö Iehova, me wale hna úne hnen metá ;
Ame bán hwakecin ae úhnyúkong, me biliny bi hna ogânâ.

HNYIMAKAN 16.

Ú NYI bi ge at hna penapena hnyok :
Ke únyi ga Iehova bi he ka thu ge bohmen.

2 Haba ta je gethen hia deny at, me ka so bi káu :

Ke haba Iehova ame tuluto ta je hanu.

3 Hna but ányám ta je huliwa kö Iehova, K' ame he ka tethmâ hnâm je hna únykúme.

4 Iehova ame op ta je únyi hia he ka ve lu hanyen :

Eke, me at minya ae kong hobi káu bong ae kong.

5 Hmiö Iehova tavat hia adre me bi gan :
A ne he ke at ka ihok beny me ke at, me ame ca he ka ba hwaban.

6 Ame he ka hneú degecâ hulö hnen ibetengiö me hnathu :

K' ame he tavat ka hota hulö ge ot kö Iehova.

7 Ame ne osenyini Iehova ge je gethen deny at

Me e ame oúsoköüâ e me je iwahnai-hmiöny mä.

8 E so e úhnyúkong hna tren, tha e me hwakecin ae wisa,

Hon je troban ae gan hmâ, a tha e me hwali bi.

9 Haba hnyekon at, me ame únykúme deny gethen :

Ke Iehova ame musö hnen ta je hna okca.

10 E beönua hofuc hnyi hnyimen than :
Ame ca he hnyimen ka hanyáúâ hnyi hna owisa.

11 Haba tulut ke tulut uhni ae wisa, me li únyi anyi Iehova :

Anyin bi huliwa ta je fao hnân tulut eú hnyin tang.

12 E ikiki hwakecin je than adre me ne ányâ hulö :

Anyin ame tethmâ theron hnen wisa.

13 Ame senyinâ je esongot ae wisa hnen je than ;

Ke adre me betenge ge at ame ha hofuc ae wisa.

14 Haba hmönyin anyin than, me helâ me je uthumetu adre me mekiny :

Ke ame he at ae metâ ka omenyikâ e.

15 E bi möt hnyi melaminy hnyimakan than ;

Ke haba anyin betenge me helâ me úláiny we a biliny.

16 Shaiba ge soiny hom metâ hon gol !

Eke, e so he ka hu wáhmakhmeto hon he ka húce sileva.

17 Haba hna cit gethen deny at ae wisa, me ame saú únyi ge hulö :

Haba at ame tuö deny gethen, me ame omelö hanon.

18 Ame bán bi gan, ke biliny bi hnaú-hangö,

Ke ame bán hnyok ae hop, ke biliny bi he ka ta.

19 E so he ka hnyok hnyikânâ tha e me tavat ae ilemuk,

Hon he ka tha khenâ je hna söh me tavat bi gan.

20 Haba at ame löng hoton hofuc me ame he ka wâ so :

Ke hnahic bi at ame labageju kö Iehova.

21 Haba tavat ae tren hnyok ae metâ, me adre me he ka ha me tavat wâ wia.

Ke haba hnebwaiainy li esongot, me ame bi hanen metâ.

22 Haba wáhmakhmeto, me wale pupuainy möt ka at ae hu e :

Ke haba hwen monu anyin tavat ae monu, me ame n' ödra bi.

23 Haba hnyekon at ae metâ ame ná hnyimen,

Me bi hanen úne ka li esongodiny.

24 Haba hofuc ae kese, me helâ me hani adre tiga ca hlec,

Ae hnebwia ka hnyi hanu, me möt ka hnyi je jeien.

25 E hu gethen ae wisa hnyi únykúmenen at,

Ke haba obiny e, me gethen deny mok.

26 Haba behan jeú ge at huliwa me ame huliwa hobi káu :

Anyin a hnyimen ame újengöâ e.

27 Haba at ae únyi baú, me ame vak úkonguny :

Ke e hnyi hnyimen meic ame an.

28 Haba at ae hwali, me ame tâ iwatretra :
Ke haba at ame úhaiö me ame oúsákáúöâ tavat me lawaedra.

29 Haba at úkonguny, me ame cubec waeny,

Me lelö e ka hnyi gethen ae ca so.

30 Haba at ame mook, me ame únykúme ta je únyi ae hwali :

Ke ame oâ hulö lnen at ame obuhlumo li esengodiny.

- 31 Korona ae hmanenang úhúen,
K' adre me he ka wá e hnyi gethen
deny wisa.
- 32 E nua at ame bec he ka hmönyin, hon
at ae hwege ;
Ke nua at ame musö hnyekon hon at
ame húginá taun.
- 33 Adre me khúá leköp ka hnyi hon li
jevan,
Ke hamö Iehova he ka musö hia.

HNYIMAKAN 17.

- E** SO ujeú ae atgec a tha e me laba wia.
Hon bijeú hnyi uma hia a tha e me ú.
- 2 Ame he athnyaba ae metá ka musö
wanakat ame ohmehma,
K' ame he ka tha hu jekhöú unyin je
liamekeiny.
- 3 Hnân leú sileva öt, ke hnân leú gol meic :
Ke Iehova bi at ame cubec ta je hnyok.
- 4 Haba at ae kong, me ame tevehlóng je
esongot ae thoi ;
K' ame löng hoton bohmen ae úko-
nguny bi hnen at thoi.
- 5 Haba at ame hiá at ae theduoc, me ame
haikongoá At a Op e :
K' ame ca he bi ka ba hwaban ka at
ame senyiná úkonguny.
- 6 Korona anyin wahingat ta je laöbidra ;
Ke haba hmanenanginy je wanakat, me
únya lakamödra.
- 7 Hofuc ae hmanenang, ame ca úcú ka
at ae monu :
Ke hawa ge li esongot ae thoi anyin ke
taben !
- 8 Veto ae gan hwaban, bwihlany ka at
ae hu e :
E so troban e hnyi hna wia e ka ke dok
me ke dok.
- 9 Haba at ame tube hna hanyáúá, me
ame elám ibetengiö :
Ke haba at ame haha ta je únyi, me
ame úsákáúöá tavat me lawaedra.
- 10 Ame nua dit hofuc ná ka hnyi hnyekon
at ae wáhmakhmeto
Hon je hna kot a khaca haded hnyi
knyekon at ae monu.
- 11 Haba at ae kong, me ame elám he ka
okúá hna thu musi ;
Anyin a wale adre me he ka kuná káu
úthumetu ae beovecá.
- 12 E so at ame he ka úkhanö me bea adre
huguná lakon,
Hon he ka úkhanö me at ae monu hnyi
anyin hwen monu.

- 13 Haba at ame bi hwaban so ge kong,
Me ame ca he bi ka hia hulö hnyi
hnyaban.
- 14 Haba hwân iwatretra, me helâ me
adre si deny köiö :
Anyin a wale degec ut ivinö, ka tiga
ca kú wathethöt.
- 15 Haba at ame haiwisa at ae kong, ke at
ame haikongoá at ae wisa,
Me tha hmiö Iehova hia ödrü.
- 16 Hnân eú hwaban hnyi hnaymen at ae
monu he ka úcú metá,
Ke ba hnyekon bi ?
- 17 Haba waeny me ame betenge hnyi je
úen hia,
Ke adre hnökoá liamakeiny hobi kau
bong adre me vec hnyin.
- 18 Haba at ae ba hnyekon, me ame úkhöú
hnyam,
Me tot hnân hwaban hnyi hnyimakan
waeny.
- 19 Haba at ame weny ka hanyáúá, me
ame weny iwatretra :
Haba at ame ogöranyá homagöuleny,
me ame heleú hnaúhangö.
- 20 Haba at ame hnyok ae hwali me ame
ca he ka wá so :
Ke haba at ame hwihwiö ge bohmen,
me ame he ka ta ka hnyi úkonguny.
- 21 Haba at ame hnokoá at ae monu, me e
hmak káu :
Ke ba senyin ge kamen at ae monu.
- 22 Haba hnyok ae háhá, me wale bubuny
ae so :
Ke haba hnyok ame hlöuhlöu me ame
ohwahwacitá je jö.
- 23 Haba at ae kong, me ame oc ut bwi-
hlang únyi hnyi úlainy,
Hnân ohwalö deny hna owisa.
- 24 E bi metá hnyi hnyimakan at ame
wáhmakhmeto :
Ke e bi li emakan at ae monu hnyi je
can hmeledrany.
- 25 Haba nokon ae monu, me ame ovecá
kamen,
Ke únyi ae hiny ka momo a hnokoá e.
- 26 E ca so he ka bi hwaban ka at ae wisa,
Ke kot je than bi can anyidrin wisa.
- 27 Haba at ame takoú hwan ta je hofuc,
me ame wáhmakhmeto :
Ke haba at ae menyik hnyekon, me at
ame wá únykúme.
- 28 Ame ne laba hnyibu at ae monu, me
adre me ha me metá bi :
K' ame ne obuhlumo li esongodiny, me
adre me únykúme me at ame wá wia.

HNYIMAKAN 18.

- H**ABA at ame ka hake laba, me ame elâm bi weny,
K' ame hmönyin ge metâ hia ae so.
- 2 Haba at ae monu, me ame ca senyînâ wâhmakhmeto,
Ke so bi e ame omanenâ hnyekon.
- 3 E ka o at ae kong, me ame o but minya ikiki,
Ke haba û, me ame tha e me hmehma.
- 4 Helâ me köiö ae dit je hofuc hwan hnyimen at ;
Ke helâ me wagewe ame di pupuainy metâ.
- 5 E ca so he ka tha hien me at ae kong, Me ohaûâ at ae wisa hnyi hna owisa.
- 6 Haba li esongodiny at ae monu me ame he hnyi ivinö,
K' ame hawâ je hna kot ge hnyimen.
- 7 Haba hnyimen at ae monu, me ame ohnaûhangöâ e,
Ke haba hnyimen, me wale hnewe hobi kâu anyin möt.
- 8 Haba ta je hofuc hwan at úhaiö, me helâ me je ong jeû ae hnebwia,
Ke adre me dit ka hnyi hnyin hnyekon.
- 9 Haba at ame bec hnyi anyin bi huliwa, E liamekeiny me at ame okongoâ.
- 10 Hnabâ ae hwege iö Iehova :
Ame kec ka hnyin at ae wisa me laba khötkic.
- 11 Haba tang omjehen at ae tren ta únyi, me wale anyin taun ae hwege,
Ke helâ me hak veto ae beû göranyai hnyi únykúmenen bi.
- 12 Ame bân ka bi gan hnyekon at, ke biliny bi he ka hia,
Ke ame bân hnyok ae hnyikânâ, ke biliny bi hna ogânâ.
- 13 Haba at ame thu ka hofuc, ke tiga ca löng wia,
Me wale anyin monu bi, me hnân hmehma.
- 14 Ame he hnyekon at ka hokhnyokâ anyin mok :
Ke haba hnyok ae hlöuhlöu bi, me ie at ame he ka hokhnyokâ e ?
- 15 Haba hnyekon at ame wâ wia, me ame bi hanen wâhmakhmeto ;
Ke haba hnyikönyen at ae metâ, me ame elâm he ka wâhmakhmeto.
- 16 Haba bwihlany anyin at, me ame bi hnen hobi kâu ;

- Me hom e ka hnyi hnyimakan tavat ae beönua.
- 17 Helâke wisa at ame bân hnyi anyin ivinö ;
Ke ame o but ke at me omanenâ e.
- 18 Haba ugleköp ame bi obiny ivinö,
Me oveseâ tavat hwege.
- 19 E gan huliwa he ka ohmehmela liamekeiny e ka hu jöniny, hon taun ae hwege,
Ke haba je ivinö eling, me helâ me je ohmäiny hnabâ.
- 20 Ame he ka sekon hnyekon at ge wan hnyimen bi ;
E ame he ka sekon ge únyi hnyi li esongodiny.
- 21 Haba mok me möt, me ame musö hnen bohmen ;
Ke haba tavat adre me betenge gan, me adre me he ka an wan.
- 22 Haba at ame wâ momo e me âiân bi, me ame wâ so,
Ke ame betenge gan Iehova.
- 23 Ame ha hofuc ae menyik ge tavat ae theduoc :
Ke hwege ifucin at ae tren omjeû.
- 24 Haba at ae se hia laihuminy, me ame okongoâ e bi :
Ke hu ihum a at betenge, k' ame kece hmâ hon je liamekeiny.

HNYIMAKAN 19.

- E**SO at ae ba ta únyi k' ame vheno anyin wisa,
Hon at ae hwali ifucin ke monu.
- 2 E ca so he ka ba wâhmakhmeto ge at ;
Ke ame he ka monu at ame he logot ge li can.
- 3 Haba hwen monu anyin at, me ame ohwalö deny gethen ;
Ke ame hmönyin hnyekon kö Iehova.
- 4 Adre me bi hanen je lawaeny ae se ge omjeû :
K' adre óúsákâúöâ lahanen ka at ae ba ta únyi.
- 5 Ame ca he ka ba hwaban ka at ame sit hofuc thoi :
K' ame ca he bi ka so at ame ha thoi.
- 6 E se hia adre me he ka sumat ge at ame ham gânâ :
Ke haba at ae kuia je bwihlany, me lawaeny thithö tavat hia.
- 7 Adre me húkotiâ at ae ba ta únyi hnen je liamekeiny mē :
K' ame ti he je lawaeny ka úsákâúö mē,

- E ame hnu hotudrin me je hofuc, ke hi' ödra bi.
- 8 Haba at ae hu hnyekon, me ame ka betenge bi gan :
Ke ame he ka wâ so at ame tuö wâ únykúme.
- 9 Ame ca he ka ba hwaban ka at ame sit hofuc thoi :
K' ame he bi ka hia at ame ha thoi.
- 10 E ca úcú bi ka at ae monu he ka kap sot,
Ke ti ca úcú bi ka athnyaba he ka musö ta je than.
- 11 Haba hna wâ wia hnen at, me ame obecâ anyin hmönyin ;
Ke hnân ohmanenangâ e, he ka onuâ hna hanyâúâ,
- 12 Haba wathethöt anyin than, me helâ me liona ame kuku ;
Ke haba anyin betenge, me helâ me dân hau hon hnaönying.
- 13 Haba nokon ae monu me wale hmakiny kamen :
Ke ame khukhula bala bi je iwatretra anyin momo.
- 14 Haba uma me omjeú, me wale jekhöü únyi ge lakamen :
Ke únyi ga Iehova áiân a momo wâ wia.
- 15 Haba hwakecin úsönyin me ame okúâ mokut hnying ae gan ;
Ke ame he ka mekihuânem at ame höciâ huliwa.
- 16 Haba at ame tuö hnanyibu, me ame ka tuö hanon bi :
Ke haba at ame khâlânden hnyi deny gethen, me ame he ka mok.
- 17 Haba at ame betenge ge at ae theduoc, me ame mē ham kö Iehova,
Ke e ame he ka bi hwaban hnen hna ányâ ae so.
- 18 Nâ tho nokom, e me tiga hu geju bi ;
Ke u me ca he ka ip hnyi hnyekom he ka ohia e.
- 19 Ame he ka hu hwaban ka at ae gan wathethöt :
Anyin a u je ne omelö e, me hamâm he ka ányâ hmeto bala.
- 20 Löng ju úhnenamö, me kap ju hna úne, M' u me he ka metâ hnyi obiny.
- 21 E se bia únykúme eú hnyi hnyekon at ;
Ke ame he ka tethmâ musî anyi Iehova.
- 22 Haba weny at, me betenge :
Ke so at ae theduoc hon at ae thoi.
- 23 Haba ot kö Iehova, me wale hnân möt :
K' ame he ka laba sekon wale at ae hu e ;

- Ame ca he hulö ka senâ e.
- 24 Haba úsönyin, me ame ödilâ hnyamen hnyin mini,
Ke ame höcö he ka ohmeto e ka hnyi hnyimen.
- 25 Kot dö at ame úhiö, me ame he ka nâ wâ wia hnen at ae ba hnyekon :
Ke nâ thö at ame wâ únykúme, me e ame he ka wâhmakhmetoâ metâ.
- 26 Haba at ame fuc bebehu ka kamen, ke obâ degecâ hinyen,
Me wale nokon a at ame okúâ hmehma me haikongo.
- 27 Nökuk lö, soju löng hwa úne
U ka he ka labö omono thibut je ifucin wâ únykúme.
- 28 Haba at ohnatho ke at ae únyi baú, me ame hlumâ hna owisa :
K' ame utâ hulö ge hnyimen tavat ae kong.
- 29 Adre hia but penapena hna owisa hobi kâu tavat úhiö,
Ke je hna kot hobi kâu jön tavat ae monu.

HNYIMAKAN 20.

- H**ABA waina, me wale at hlumö at, ke haba grâg me wale at ame mede monu.
Keca metâ bi at ame monu ge li únyi e.
- 2 Haba outen than, me helâ me liona ame kuku :
Haba at ame ohmönyinâ e, me ame ka okongoâ e bi.
- 3 Hnân ogânâ at ame ne tot sâkâú ge iwatretra :
K' ame he tavat hia ae monu ka beú.
- 4 Haba úsönyin me ame höcö he ka seú kânâ can megic ;
Anyin a wale e ame he ka sumat hnyi úen menu, ke ba bi.
- 5 Haba hna únykúme eú hnyi hnyekon at, me helâ me köiö ae dit ;
K' ame he at wâ únykúme ka sâú e.
- 6 E se hia tavat adre me ve ha hwakeci-dra bi ae betenge :
Ke ie at ae khana elâm at ae hnathu ?
- 7 Haba at ae wisa, wale at ame he hnyi anyin wisa,
Me huahic bi lakon hwaban.
- 8 Haba than ame tabâ theroniny owisa,
Me ame oveseâ ta je hulö hia ge li emakan.
- 9 Ie at ame he ka ha, ka habe, Oge hia but okalaötâ hnyekuk,

- Iny bo so but únyi ge hulö ?
- 10 A ne ve ihmakiny bi tulut, k' ame ne ve tulut bi,
Me hmiö Iehova li únyi hia e.
- 11 E manen wanakat bi ge hnen hna ányá,
Ame ne so, ame ne wisa anyin huliwa.
- 12 Hnyiköny at ame löng, ke ecmak at ame bwele,
Ke Iehova ame tha up hia.
- 13 Ca hnyoká bemokut, wá u nye theduoc;
Hmak ut, e me sekome ge jeú.
- 14 Haingen at úco ke únyi, ka habe, Únyi baú, únyi baú :
Ke e ame he but, me e ame hobá gan.
- 15 E hu gol, ke se hia ta je penina :
Ke haba li esongot ame wáhmakhmeto me wale omjeú ae únyi hnathu.
- 16 Hom dö úkhaúen at ame tilö hwaban atkanyua ;
Ke hok haten únyi ge at ame tot hnân hwaban je atkanyua.
- 17 E hnebwia ka at jeú hwaban thoi ;
Ke hnyi ke bong ame he ka unöngöt hnyimen ge káná.
- 18 Ame ohmá ta je únykúme hnen úhnenamö :
Ke u ma vak dö vat hoton hna úhnenamö wia.
- 19 Haba at ame hok úsabú me ame omanená ta je únyi ae iyong :
Awe, ca tha e me at ame memang li esongodiny.
- 20 Haba at ame hangá kamen me hinyen,
Me adre me he ka ume anyin lamepa hnyi wanben menekholom.
- 21 Adre me ne ie hom tang omjeú hnyi hwân ;
Ke ame ca he ka hnahic obiny.
- 22 Ca ha, ka habe, Oge me he ka bi hwaban monu :
Halubahing Iehova ju, ke e ame he ka omeli u.
- 23 E hmiö Iehova je tulut ae ve ihmakiny ;
Ke ca so tulut uhni ae iyawö.
- 24 Únyi ga Iehova ta je hna okca hnen at ;
Ke ame he at ka kámáu ka wá únykúme deny gethen ?
- 25 Hnân hnewe ka at ame ie ha okabá ke únyi,
Ke e ka hia but bi khöbi, me ame he bi ka hnö.
- 26 Haba than ae metá, me ame oveseá ta je monu,
Me wiwia waengen hnyi hudrin.
- 27 Lamepa anyi Iehova, me hanon at,

- Ame elám ta je ke keihen hnyok hia.
- 28 Betenge me hnathu, li at tuö than :
Ke haba ciny anyin theron me ibetengiö.
- 29 Haba mecin wahidröu, me tang hwege gadra : : :
Ke haba hmanenanginy wahingat, me húen.
- 30 Adre me hneú degecá hulö ge je hna kot ame aatá :
K' ame dit ka hnyi hnyin hnyok ta je hna kot.

HNHYIMAKAN 21.

- E** HNYI hnyamö Iehova hnyekon than helá me je deny köiö :
K' ame wia e ka hnyi hnen hna weny.
- 2 Haba je gethen hia deny at, me ka wisa bi káu :
Ke Iehova ame tuluto je hnyok.
- 3 He ka ányá únyi ae úcü me owisa,
Me wale únyi ae so kö Iehova hon hut.
- 4 Haba begörany ke hnyok bi gan,
Wale lamepa anyin tavat ae monu, me hwakecin ling ae kong.
- 5 Haba je hna únykúme hnen tavat hwege huliwa, me ame otená omjeú :
Ke haba tavat adre me he logot, me adre me he logot ka theduoc.
- 6 Adre me ne bi hanen omjeú ge bohmen ae thoi,
Me wale hai ame tûá, ke hnewe adre me mekiny.
- 7 Ame he úkonguny anyin tavat ae kong ka ohí' ödra bi ;
Anyin a ödra höcö ányá hna owisa.
- 8 E ti hwali gethen deny at ame hijen monu :
Ke haba at ae kalaöt hnyekon, me wisa anyin huliwa.
- 9 E so he ka laba hnyi bahebetiny ban uma
Hon he ka laba eiö hnyi uma ae gan tha e me momo ae fuc bebehu.
- 10 Haba hnyekon at ae kong me ame weny únyi ae kong :
Ke e ame ca betenge ka waeny.
- 11 Ödra ka bi hwaban ka at ame úhiö, me adre me ometá at ae ba hnyekon :
Ke ödra ka ná at ae metá, me ame he ka wáhmakhmeto.
- 12 Haba at ae wisa, ame wá únykúme uma umen at ae kong ;
A g' adre me hagutá tavat ae monu me ohí' ödra bi.

- 13 Haba at ame hlöng hnyikonyen ge úte-
ngien at ae theduoc,
Me ame he bi ka tenge ke adre me ca
he ka löng káu.
- 14 Haba bwihlany ae iyong ame omenyiká
hmönyin,
Me bwihlany hnyi úlainy ame omenyiká
wathethöt ae hwege.
- 15 Hnân osenyinâ at ae wisa, he ka ânyá
wisa ;
Ke ame he ka hnaúhangö tavat adre
me mádrâ hulö.
- 16 Haba at ame saú monoá únyi hnyi
gethen deny metá,
Me ame he ka tha laba me tavat adre
mokcu.
- 17 Haba at ame hnyok senyin baú me
ame he ka ba ta únyi :
Haba at ame hnyok ka waina me
wakaco, me ame ca he ka hu omjeú.
- 18 Haba at ae kong, me e bi hnân úcú
melen at ae wisa ;
Ke haba tavat iyawö, me adre me he
ka hwaban tavat ae fofâ.
- 19 E so he ka laba hnyi hnyebuba,
Hon he ka tha e me momo ae fuc bebe-
hu me tenge monu.
- 20 E hu omjeú ae únyi hnathu, me wakaco
hnyi hnyaban at ae metá ;
Ke haba at ae monu, me ame utá hia.
- 21 Haba at ame hnu hoton wisa me
ibetengiö
Me ame wá möt, me wisa, me ogânâ.
- 22 Haba at metá me ame öliâ haginy taun
anyin tavat ae hwege,
Me öhnyikánâ tang hwege adre me
geju káu.
- 23 Haba at ame tuö hnyimen me bohmen,
Me ame ka tuö e bi ge vec.
- 24 At ae began me begörany, me úhiö
ien bi,
E ame huliwa hnyi biganiny at ae hop.
- 25 Ame he weny üsényin ka hlingá e bi ;
Anyin ame höcö li hnyamen huliwa.
- 26 E hu tavat adre behnyekon gánâ hnyi
je bong :
Ke at ae wisa ame kuia, me ca behaná
bi.
- 27 Únyi ae ikiki hut anyin at ae kong :
Ke beönua monuiny, e ka hom e me
únykúmenen ae kong.
- 28 Ame he ka mok at ame ohnathoâ thoi :
Ke haba at ame löng ame he bala bi ka
ha hofuc.
- 29 Haba at ae monu, me ame öhühnöhnöká
hnyimakan :

- Ke haba at ae fofâ, me ame penapena
deny gethen.
- 30 E ba metá, ke ba wáhmakhmeto,
Ke ba úhnenamö, ame vak kö Iehova.
- 31 Adre me penapena hors hobi káu bon-
giny vat :
Ke hamö Iehova he ka omelö.

HNYIMAKAN 22.

- E** SO he ka weny ien ae lung so hon
ta je omjeú ae se hia,
Me betenge hnyok hon sileva me gol.
- 2 Tavat tren omjeú me ta je theduoc adre
me iouny :
Ame up ödra hia Iehova.
- 3 Haba at wá wia, me ame wá monu me
ikhölö :
Ke haba tavat ae ba hnyekon me adre
me he, ka hu vec bi.
- 4 Haba troban hwakecin ae hnyikánâ,
me ot kö Iehova,
Wale omjeú, me hna ogânâ, me möt.
- 5 E bi ta je úö ae údedö me ta je hnewe
hnyi gethen deny at ae hwali :
Ke haba at ame ka tuö e bi, me ame
he ka úsákáúö me je únyi e.
- 6 Ná thö wanakat hnyi deny ae úcú,
Ke e ka hingat ut, me ame ca he bi ka
sáú únyi hnyin.
- 7 Ame he at ae tren omjeú ka musö ta je
theduoc,
K' ame he at ame mē sumâtá ka bi
athnyabainy at ame mē ham.
- 8 Haba at ame tã hulö, me ame he ka
meno vec :
K' ame he ka hia uciny anyin wathethöt.
- 9 Ame he ka hnahic at ae hu li ecmak ae
so ;
Anyin a e ame he ka hân at ae theduoc.
- 10 Obâ but at úhiö, me ame he ka hia
minya ú ;
Eke, ame he ka ba ivinö me hmehma.
- 11 Haba at ame weny hnyok ae alai,
Me ame he ka ihuminy than, can ibe-
tengiö anyin li esongodiny.
- 12 Ame he li emakö Iehova ka tuö at wá
únykúme,
Ke e ame he ka hagutá hofuc hwan at
ae iyawö.
- 13 Haingen üsényen, ka habe, Kabeú ge
liona :
Ame he ka hlingö nya eú hnyi gethen.
- 14 Hmonop ae dit hnyimen momo kanyua :
Ame he ka kôlu káu at ae ikiki kö
Iehova.

- 15 Adre lan hwen monu hnyi hnyekon wanakat ;
Ke osöiny hnân nâ ame he ka úsákâúôâ e mē.
- 16 Haba at ame ovecâ at ae theduoc he ka osehia anyin bi ta je únyi,
Ke at ame ham ka at ae tren omjeû me ödru me he ka ba ta únyi.
- 17 Tevehlöng ju, ke löng ju hofuc hwan at ae metâ,
Me hnyok ju ka hnök hna wâhmakhmeto.
- 18 Anyin a únyi ae kese, u ka he ka tuö ta je únyi e eü hnyi hnyekom,
Adre ne otethmâ hnyi li esongodâm.
- 19 Oge hia but omanenâ e köu hnyi bong ang,
Me u me labageju kö Iehova.
- 20 Hawa, oge ca sihnalimen köu ehac ta je únyi ae so,
Je úhnenamö me wâhmakhmeto ;
- 21 He ka okhanö u hnathuiny je hofuc ae hnathu,
M' u me he ka hom hmetu ka tavat adre me kunö u ta je hofuc ae hnathu?
- 22 Ca söh at ae theduoc, can anyin e ame theduoc,
Ke ca seda at ae vec hnyi homagöüle :
- 23 Anyin ame he Iehova ka ivinö hobi ködra,
Me hügúnâ melen tavat adre me sei ödra.
- 24 Ca bi liamewaeny me at ae hmönyin ;
Ke ca tha he bi me at ae wathethöt :
- 25 Wâ u nye nâ je hwakecin,
Me ame nuc u bi.
- 26 U ma ca hanen tavat adre me úkhöü hnyam,
Me tavat adre me tot hnân hwaban ge hna hok gufa.
- 27 A ne ba gam únyi hnân bi hwaban,
Hnân eü ame he ka hom hnâm hna mokut únyi eü hmelâm ?
- 28 Ca he ka oc je hnyigot kâü adrem,
A konâm je lakibâm.
- 29 U je wâ but at ame ânyâ logotâ anyin huliwa? awe, e ame he ka tot hnyi hnyimakan je than ;
E ame ca he bi ka tot hnyi hnyimakan houmonu.
- 2 Ke u je ne at hutö,
Me ip ju hele hnyi hnyem.
- 3 Ca wem bi anyin ta je ujeü ae so ;
Anyin ame iyawö ta je jeü e.
- 4 Ca osënyini u bi he ka tren omjeü ;
Degec ut a ka hnâm bi hna wâ únykûme.
- 5 Hawa, u me he ka wâ hmâ únyi ae ba önyen ?
Anyin a haba je omjeü, me ame labö bi labenyin,
Helâ me aeto at ame gâ dranyai.
- 6 Ca he hnyi an jeü an at ae hmak li emakan,
Ke ca wem bi anyin je ujeü ae so :
- 7 Anyin ae úcú e me únykûmânen hnyekon ;
Haingen köu, ka habe, Han dö ke ic dö ;
K' ame ca tha e bi möu hnyekon.
- 8 U me he ka hmita hmetoâ ujeü u je an,
Ke únyi baü hwâm ta je hofuc ae kese.
- 9 Ca fuc bi hnyi hnyikönyen at ae monu ;
Anyin a e ame he ka húkötîâ hwâm je hofuc ae metâ.
- 10 Ca oc bi hnyigöulen kâü adrem ;
Ke ca hnyi he ka hnyi hnyeï iny nakahme :
- 11 Anyin ae hwege singidra ;
E ame he ka ivinö hobi ködra möu.
- 12 Hna but hnyekom ka úne,
Ke li hnyikönyâm ka ta je ifucin wâ únykûme.
- 13 Ca behânâ bi ka wanakat hna nâ :
Anyin u je ne kot_ge osö, e ame ca he ka mok.
- 14 U me he ka kot ge osö,
Me omelö e ge hedis.
- 15 Nökuk lö, a ne metâ but hnyekom
Ame he hnyekuk ka senyin :
- 16 Eke, ame he ka hobâ únykûmânök,
E ka ba ta je únyi ae wisa hnen li esongodâm.
- 17 Ca hna but hnyekom he ka behnyekon ge tavat ae kong :
Ke outö Iehova ju hnyi je bong hia thibut.
- 18 Anyin e hnathu ame he ka hu obiny ;
Ke adre me ca he ka subâ degecâ ânyâm geju.
- 19 Nökuk lö, löng ju, ke metâ but,
Ke tuö ju hnyekom eü hnyi gethen.
- 20 Ca tha e me tavat adre me hwen hmiâ waina :
Me tavat utâ uthmeno :

HNYIMAKAN 23.

U KA he ka laba ka tha han me than,
Únykûme wia ju at e hnyi hnyimákâm ;

- 21 Anyin ame he ka theduoc at ame hwen
hmiâ waina me utâ meno :
Ke ame he at bemokut ka khavâ úkhaú
ae ti khekhe.
- 22 Lóng ju ka kâmâm at a hnöku u,
Ke ca húkötö ge hinyâm e ka somaca
but.
- 23 Úco thö hnathu, ke ca úco degecâ hmetu
bi ;
Eke, metâ, me úne, me wâ únykúme.
- 24 Ame he ka hobâ gan hmâ kamen at ae
wisa :
Ke haba at ame hnokoâ at ae metâ me
ame he ka senyin gan.
- 25 Eso ame he kâmâm me hinyâm ka
senyin,
Me so ame he momo at a hnöku u ka
hobâ.
- 26 Nökuk lö, hö jem hnyekom kõnya,
Ke wâ thö dek je gethen ge li ema-
kâm.
- 27 Anyin a hmonop ae dit momo hnyi
gethen ;
Ke op ae hnek momo kanyua.
- 28 Eke, e ame mokut duöng helâ me at
venöu,
Me bihanen ka tavat iyawö, unyin tavat.
- 29 Ie at ame hlöuhlöu ? ie at ame vec ? ie
at ame iwatretra ?
Ie at ame fufuc ? ie at ame aat baú ?
Ie at ae hngihngidra li emakan ?
- 30 Walödra tavat adre me bec hnyi waina ;
Tavat adre me ná elâm waina adre úha-
niken.
- 31 Ca he ka wâ hmâ waina e ka ubâhlâ,
E ka ke man bi hnyi utkaia
Ke omi hingâlâ but :
- 32 Haba hnyi obiny, me e ame úhúlú helâ
me on,
Me dá helâ me vaipa.
- 33 Ame he li emâkâm ka wâ je momo
kanyua,
K' ame he bi hnekom ka ha ta je únyi
ae hwali.
- 34 Eke, u me he ka helâ me at ame mokut
hnyi wanben köiö,
Ke helâ me at ame mokut hnyi ban
aneunyainy hu.
- 35 U ma he ka ha, ka habe, Adre hia but
kuc nya, ke oge me ca vec ;
Adre hia but osöi nya ke oge me ca
lóng vecin.
Oge me he ka hmak dö kehö ? oge me
he hmetu ka elâm e.

HNYIMAKAN 24.

- CA he ka behnyekom tavat ae kong,
Ke ca wem bi he ka tha u mödra :
- 2 Anyin a je hnyekudra adre me únykúme
he ka oseda,
Ke je esongodidra ame ha úkonguny.
- 3 Adre me op uma únyi ge metâ,
K' adre me otethmâ e ge wâ únykúme.
- 4 Ke únyi ge wâhmakhmeto adre me
öunöngötâ je hnyeuleny
Ge ta je omjeü ae únyi hnathu me kese
hia thithö.
- 5 E hwege at ae metâ ;
Eke, haba at wâhmakhmeto e ame
ohwegiâ man.
- 6 Anyin a u me he ka vak wia ânyâm vat
hoton hna úhnenamö wia :
Ke adre me he ka laba khötkic hnen
tavat úhnenamö ae se hia.
- 7 E ti görany hmönyin metâ ka at ae
monu :
E ame ca hnyi ha hofuc hnyi homagöule.
- 8 Haba at ame vak monu,
Me ame he tavat ka háiâ e me at ame
ânyâ hwali.
- 9 Haba hna únykúme hnen at ae monu,
me wale hulö :
Ke húkötö tavat ge at ame úhiö.
- 10 U ka senyin hnyi bonginy vec,
E úhnúkong bi tang hewegiâm.
- 11 Omeli ödra thö tavat adre me hom he
ka mok,
Ke behan' ödra ju tavat adre hia but
penapena he ka hling' ödra.
- 12 U ka ha, ka habe, Wâ bi, e ca khan'
öhmun e :
Hawa, ame ca he ka únykúme e ge at
ame tululo hnyok ?
Ke hawa, e ca khana e hnen at ame
tuö hanom ?
Ke hawa, ame ca he bi e ka bi hwaban
ka at hoton anyin ta je huliwa ?
- 13 Nökuk lö, han dö hani, anyin ae so e ;
Me hani adre tiga ca hlec ae hnebwia
ka hnyi hnyimâm :
- 14 Helâe, u ma he ka wâ metâ ka hnyi
hnyekom :
U je ne wâ e, awe, ame he ka hu
hwaban,
Ke adre me ca he ka subâ degecâ ânyâm
geju.
- 15 At ae kong lö, ca mokulec ecmakâ hnya-
ban at ae wisa ;
Ca ohia hnen hna menâ hnyin.

- 16 Anyin ame oseven ta ju at ae wisa,
k' ame tot hmetu :
Ke ame he bi tavat ae monu ka hia
hnen vec.
- 17 E ka ta iwahnaihmöny möu, ca he ka
senyin,
Ke adre ne hagutá e, ca he ka hobá
hnyekom :
- 18 Wá e nye wá Iehova, me e ame hmö-
nyin,
Me ame via anyin wathethöt únyi gan.
- 19 Ca he ka hmak hnyekom ge tavat ányá
hulö ;
Ke ca behnyekom tavat ae kong :
- 20 Anyin ame ca he ka hu troban ka at ae
kong ;
Adre me he ka ume lamepa anyin tavat
ae monu.
- 21 Nökuk lö, outö Iehova ju me than :
Ca tha e me tavat adre me hwihwiö :
- 22 Anyin ame he ka ie o ködra anyidra vec ;
Ke ie at ae khana ge úhnaúhangöiny je
hunaidra.
- 23 Walang ke je hofuc hwan tavat metá.
- E ca so he ka wáhmakhmetoá at hnyi
hna owisa.
- 24 Haba at ame ha ka at ae kong, ka habe,
U wisa ;
Me ame he je at ka hangá e, me ikikiá
e hnen je hnyei :
- 25 Ke ame he ka hu senyin ge tavat adre
me thawá e,
Ke ame he ka o ködra hnahic ae únyi
hnathu.
- 26 Haba at ame thu wisa
Heláke e ame úcimhnyimak.
- 27 Penapena ju ányám huliwa eú,
Ke hnakáná wia e hobi köu bi hnyi
hnyot ;
Ke hwaban e, u me he ka op umám
uma.
- 28 U ma ca he ka hnyi ha a ga monu ke
at, ke ba can ;
Ke u me ca he ka iyawö ge li esongodám.
- 29 Ca ha bi, ka habe, Oge me he ka ányá
káu helá me hnen hna mádrá kónya ;
Ke oge me he ka bi hwaban ka at helá
me anyin huliwa.
- 30 Inya oge me he ka hnyi ta hnyei iny
úsēnyin,
Ke hnyi hnyei vine iny at ae ba hnye-
kon ;
- 31 Ke wá bi, i watetaföcö but e,
K' ame kú takoú e ge vhat,

- Ke kong ut hak vetoiny.
- 32 Me oge me wá, me únykúme wia :
Oge me wá me kap hna úne.
- 33 Mē na mokut, mē na ta mokut,
Mē na húkálá li hnyam me mokut leleú.
- 34 Me ame he ka o köu theduoc helá me at
ame venöü ;
Me ba han, helá me at ame khavá
ukhaúen vat.

HNYIMAKAN 25.

WALANG minya je vejec anyi Solo-
mona, waleji hnen je atö Hezekia
tuhan Juda hna uny.

- 2 Hmanenanginy Khong he ka oiyongá
ke únyi :
Ke hmanenanginy je than he ka elelam
ke únyi,
- 3 E görany drany, ke dit hmeledrany,
Ke haba hnyekon je than, me ca hnán
thang.
- 4 Hom degecá but kánáiny sileva,
Me me manen dut kaia hobi káu at ame
le :
- 5 Hom degecá but at ae kong unyin than,
Me me hwege anyin theron hnyi wisa.
- 6 Ca he ka jöjón hnyi hnyimakan than,
Ke ca tot bi hnyi hnen tavat ae beónua :
- 7 Anyin ae so he ka ha köu, ka habe, Aiö
u ká áng ;
Ke kong bi he ka ohnyikönö u hnyi
hnyimakan than,
U je wá e hnen li emákám.
- 8 Ca ie he logot he ka ivinö
Wá e nye ca khanö u únyi he ka ányá
hnyi obiny,
E ka hia but ohmehmö u hnen at ame
laba hakekenyi u.
- 9 Ka ivinö thö hobi köu bi me at ame
laba hakekenyi u,
Ke ca omanená únyi ae iyong ge ke at :
- 10 Wá e nye haikongu u hnen at ame löng,
Ke ca wia hmetu bi gam hna haiko-
ngu u.
- 11 Je ohköiö gol hnyi je tang sileva
Hofuc adre me ha hnyi ün ae úcú.
- 12 Otru gol, me omjeú gol ae so,
Heláe at metá ame ná at ame löng ge
hnyikönyen,
- 13 Haba úthumetu ae hnathu,
Me helá me imegecin kiona hnyi ün
menu, ka at a kuná e,
Anyin a e ame omenyiká hnyekon la-
tuhan.

- 14 Je ùlà, me ang, ke ba we,
At ame ka haisoâ e bi ge anyin je
betenge, k' ame thoi bi.
- 15 Adre me ohmehmela than ge hok hnyok,
K' ame ohmetro jö ge esongot ae men-
yik,
- 16 Hawa, u je wâ hani? an dö ûnyi ae úcú
kôu;
Wâ e nye sekom me hmita hmetu.
- 17 E so cam ame owakhaletâ uto uma
umen waem;
Wâ e nye höcö thö gam, me hûkötïö u.
- 18 Hama, me hele vat, me fana ae so ho-
makan
At ame ohnathoâ thoi ge ke at.
- 19 Nyu ae hmetru, ke ca a khikhin,
He ka geju ka at ae ca hnathu hnyi
ûen vec.
- 20 Haba at ame hai je khumöng ka hnyok
ae hlöuhlöu,
Me helâ me at ame uny dö úkhaú hnyi
bong megic, ke helâ me soda adre me
hú ge vinega.
- 21 A ne mekihnanem iwabnahmiöny möu,
bethe hân ju;
K' ame ne beic, babelen ju ge köiö :
- 22 Anyin a u me he ka úkhöünâ je walep
ae möt hon ban,
K' ame he Iehova ka bi hwaban kôu.
- 23 Haba ang ûnyi hnyi hwadrö, me ame
hom we :
Ke ame öktâ hnyimak ae hmönyin
hnen bohmen ame úhaiö.
- 24 E so he ka laba hnyi bahebetiny ban
uma,
Ke kong bi he ka tha uma hnyi uma ae
gan me momo ame ú.
- 25 Helâ me köiö ae katebu ka at ame beic,
Helâe uthumetu ae so ûnyi hnyi hnyei
ae sâkâú.
- 26 Pupua adre uto, ke köiö adre oikikiâ
Helâe at ae wisa k' ame he hwahwali
hnyi hnyimakan at ae monu.
- 27 E ca so he ka han gâná hani :
Ke ca hmanenang ka tavat he ka ve
elâm anyidrin hmanenang bi.
- 28 Haba at ame ca musö hnyekon bi,
Wale helâ me taun adre me hagutâ
hnyikânâi he ba hak vetoiny.

HNYIMAKAN 26.

HELÂ me kiona hnyi honivakeny, me
helâ me we hnyi ûen menu ;
Helâe minya e ca úcú hmanenang ka at
ae monu.

- 2 Ame gâ monu meno, me gâ baú waha-
lep,
Ke helâe ame ca he bi ka man úhangö
baú.
- 3 Hobi kâu hors ong ütö, ke hobi kâu
asina töiny hnyimen,
Ke hobi kâu unyin at ae monu osö.
- 4 Ca thu ka at ae monu hoton anyin
hwen monu,
Wâ u nye úcú thö më.
- 5 Thu thö ka at ae monu hoton anyin
hwen monu,
Wâ e nye bemetâ hnyi únykúmenen.
- 6 Haba at ame kunâ at monu he ka bi
úthumetu
E ame ka subâ li can bi, me ijem monu.
- 7 Ame him li can at ae khikhin can :
Ke helâe vejec hnyi hnyimen tavat ae
monu.
- 8 Helâ me tang veto ae gan hwaban hnyi
ve veto,
At ame ogânâ at ae monu.
- 9 Helâ me makjöngöc ame dit hnyi hnya-
men at ie monu,
Helâe vejec hnyi hnyimen at ae monu.
- 10 Haba at fana ame sat hia,
Helâe at ame hawâ at ae monu he ka
huliwa kâu, me tavat adre me he
baú bi.
- 11 Helâ me kuli ame hmetu ka hnyi hnen
hna hmita,
Helâe at ae monu, wale ame hmetu ka
hnyi anyin hwen monu.
- 12 U je wâ at ae metâ hnyi hnen bi hna
únykúme?
E so geju ka at ae monu hon e bi.
- 13 Haingen üsënyin, ka habe, Kabeú ge
liona ;
Waleú liona hnyi gethen.
- 14 Helâ me ame hwihwiö hlingen hwanu-
ma hnyi hinj,
Helâe üsënyin hon hnen hna mokut.
- 15 Haba üsënyin ame odilâ hnyamen hnyin
mini,
Ke ti sënyin e he ka ohmeto e ka hnyi
hnyimen.
- 16 E metâ üsënyin hnyi ka hnen hna úny-
kúme
Hon tavat a seven adre me thu wisa.
- 17 Haba at ame he, k' ame saú he ka hnyi
hanen ivinö anyin ke at,
E úcú me at ame kât li hnyikönyen kuli.
- 18 Helâ me at ae wiákú ame khúâ ta je
okúnú,
Me je fana, me mok,
- 19 Helâe at ame iyawa ke at,

- K' ame ha, ka habe, Hawa, oge me ca úhiö?
- 20 E ka ba utö, me mok ut meic :
Heläe, e ka ba at ame úhaiö, me ba but ú.
- 21 Helä me walep hnyi wanben je uthmeic, ke utö hnyi meic,
Heläe minya at ú, a hnân okúâ iwatretra.
- 22 Haba hofuc hwan at ame úhaiö, me helä me je ujeú ae hnebwia,
Ame dit ka hnyi hnyin hnyekon.
- 23 Haba esongot ae kaukahwa, ke hnyok ae kong,
Me úcú me kaia kânâ adre me tube ge drön sileva.
- 24 Haba at ame úöhúkoti, e ame iyawö hnen li esongodiny,
Me ip tang iyawö hnyi hnyekon :
- 25 E ka ha hofuc ae wisa, ca kap bi ;
Anyin a eú hnyi hnyekon je únyi ae ikiki a seven.
- 26 Eja ke ne a ne khavâ anyin úöhúkoti ge iyawö,
Ame he ka manen hwakecin ae kong hnyi ukhacaköu.
- 27 Haba at ame hiny thop me ame he ka ta kâu ka hnyin :
Ke haba at tetebulo veto, me ame ka tetebulo hmetu bi kâu.
- 28 Haba bohmen ae thoi, me ame húkotiâ tavat e ame oveçâ ;
Ke haba hnyem ae útakú, me ame okúâ úokonguny.

HNyimakan 27.

- U** ma ca hobâ ge bong nyi,
Anyin ae ca klanö u únyi ame he ka o hnyi bong.
- 2 E so ame he ke at he ka haisoi u, ke ca hing hnyimâm bi ;
Ke hnen atkanyua, ke ca hnen esongodâm bi.
- 3 E hmak veto, ke hmak minya öny ;
Ke haba hmönyin anyin at ae monu, e ti hmak bi hon li únyi e.
- 4 Wathethöt ame beoveçâ, ke hmönyin ame bahihingölö ;
Ke ie at ame he ka tot hnyi hnyimakan ciâ ?
- 5 E so hwa úne ae manen
Hon betenge ae iyöng.
- 6 E hnathu je aat hnen at ibetengö :
Ke osehia úcimhnyimak at iwahnaihmiöny.

- 7 Haba at ae sekon me ame höcö ge hani ;
Ke hnebwia hia ta je únyi ae hiny ka at ae mekihnanem.
- 8 Helä me meno ame gâ monu únyi hnyi háúen,
Heläe at ame he monu únyi hnyi hnen.
- 9 Wakaco me únyi ae bo so ame osenyinâ hnyok :
Ke hnebwia úhnenamö únyi hnyi hnyekon ihuminy at.
- 10 Ca degec ihumâm me ihuminy kâmâm ;
Ke ca dit bi ka hnyi uma umen liamekeiny möu hnyi bong u me vec hnyin :
E so at ame laba hakekeny, hon liamekeiny ame laba sákâú.
- 11 Nökuk lö, metâ but, me me senyin dö hnyekuk,
Me me hu hnân thu kâu at ame haikongu nya.
- 12 Haba at wâ wia, me ame wâ monu, me ikhölö :
Ke haba tavat monu adre me he, me hu vec gadra.
- 13 Hom dö úkhaúen at, wale ame tot hnân hwaban atkanyua ;
Ke hok haten dö únyi ge at ame tot hnân hwaban momo ae atkanyua.
- 14 Haba at ame vesâ hnyi haolany me haisoâ ihuminy ge hofuc ae gan,
Me adre me he ka ha hofuc e, me hnân hangâ.
- 15 E úcú khukhula hnyi bong we
Me momo ae fuc bebehu.
- 16 Haba at ame thawâ momo e, e ame thawâ ang,
Ke haba hnyamen a metân ame kâlâ wakaco.
- 17 Adre khet homakan fao hnen fao ;
Heläe ame so hnyimakan at únyi ge ihuminy.
- 18 Haba at ame tuö imeta, me ame he ka an wan ;
Ke haba at ame tuö tuhan, me adre me he ka ogânâ.
- 19 E úcú hnyimak me hnyimak hnyi an,
Heläe minya hnyekon ke at ka ke at :
- 20 Ame ca sekon hedis me hnaúhangö ;
Ke haba khaca, ame ca sekon li emakan at.
- 21 Hnân leú sileva öt, ke hnân leú gol meic,
Ke adre tuluto at ge hna ogânâ e.
- 22 U je ne oamemâ at ae monu ge utö tha e me hwit hnyi hnyin kumete,

- Me ame ca he ka hia gan anyin hwen monu.
- 23 U ma labö ie wâhmakhmetoâ halem ta ja mamoe ;
Me tuö wia ju je hnahat meno a halem :
- 24 Anyin ame ca tethmä nyiele balua je omjeü ;
Ke hawa, e bi korona ke ne o but ke dö me ke dö ?
- 25 Adre hom hna önying me ame manen dut je bätân ae hât,
Ke adre úkhacaköüâ je khölakiny ta je bucen.
- 26 Je nokon mamoe hnân úkhaúâm,
Ke je nokon got hnân bi hwaban hnyei :
- 27 Ke ame he ka úcú dân basin got hnân âm, me ânyâm lap ;
Me hnân melen je athnyabaem a je hlu.

HNYIMAKAN 28.

- A** ME kec at ae kong ke ba at ame hnu :
Ke haba tavat ae wisa ödra helâ me liona ame ca ot.
- 2 E se hia je tuhan hnyei can ta je hna hanyâúâ :
Ke ame he ka beü musi hnen tavat wâ bongon me wâhmakhmeto.
- 3 Haba at ae ba ta únyi k' ame ovecâ tavat ae theduoc,
Me wale at ame helâ me we ame hom degecâ ta je jeü.
- 4 Haba tavat adre me degec hnanyibu, me adre me ogânâ tavat ae kong ;
Ke haba tavat adre me tuö hnanyibu, me adre me ivinoâ mödra.
- 5 Haba tavat ae kong, me adre me ca wâhmakhmeto bi hna owisa :
Ke haba tavat adre me elöm Iehova me adre me wâ únykúme hia.
- 6 E so at ae theduoc k' ame vheno hwa-kecin ae wisa
Hon at ame he hwali hnyi deny je gethen ke tren bi omjeü.
- 7 Haba at ame vheno hnanyibu, me wale nokon ae metâ :
Ke haba at ame hanen tavat hwen hmiâ, me ame ohmehma kamen.
- 8 Haba at ame osehia anyin ta je únyi ge hnen hna mē ham hnân heleü troban me bi gâná,
E ame úkhöünâ hobi kâu bi at ame betenge ge ta je theduoc.
- 9 Haba at ame wia hnyikönyen me me ca löng bi hnanyibu,

- Me ikiki bi hijin hic.
- 10 Haba at ame omono at ae fofâ ka hnyi gethen ae kong,
Me ame he ka kölu ka hnyi anyin bi hmonop :
K' ame he ka hu so ge tavat ae wisa hwakecidra.
- 11 Haba at tren ta únyi, me ame metâ hnyi ka hnen bi hna únykúme ;
K' ame wâ bongon bi e hnen at ae theduoc a at ame wâ únykúme.
- 12 E ka senyin tavat ae wisa, me gan hmâ hmanenang :
Ke e ka todrö tavat ae kong, me ame he tavat ka ikhölö.
- 13 Haba at ame ikhâlâ hnen je hna hanyâúâ, me ame ca he ka sot :
Ke adre me he ka betenge ge at ame omanená me degecâ.
- 14 Hnahic hnen at ame labö ot :
Ke haba at ame onâkâ hnyekon me ame he ka ta ka hnyi vec.
- 15 Haba at ae kong ame musö tavat ae theduoc,
Me liona ame kuku, ke bea ame he monu.
- 16 Haba than ame ca wâ únykúme, me e at ame ovecâ :
Ke haba at ame hûkötîâ behnyokâ omjeü, me ame he ka osehia bongon ta je bong.
- 17 Haba at ae hmak ut ge dren ke at Me ame he ka kec ka hnyi hmonop ; ke so ame ca he ke at ka thawâ e.
- 18 Haba at ame vheno wisa, me ame he ka möt :
Ke haba at ae hwali a lo bongon, me ame he ka ie ta.
- 19 Ame he ka sekon ge jeü at ame belökâ kânân :
K' ame he ka sekon ge theduoc at ame he hoton tavat ae hop.
- 20 Haba at ae hnathu me ame he ka ti hú je hnahic :
Ke haba at ame ie behu omjeü me ame ca he ka ba hwaban.
- 21 E ca so he ka wahmakhmetoâ at :
Ke ca so he ka hanyâúâ hobi kâu ujeü.
- 22 Haba at ae khöt hnyimakan me ame ie hnu hoton omjeü,
Ke ca khana a g' ame he ka o kâu theduoc.
- 23 Haba at ame úthao me ame he bi ka wâ ibetengió
Hon at ame útakú ge bohmen.

- 24 Haba at ame venâu ta je únyi anyin kamen me hinyen, ke ha, ka habe, E ba monu ;
Me e hanen at ame usada.
- 25 Haba at ame behu ta je únyi, me ame okúâ iwatretra :
Ke haba at ame labageju kö Iehova, me ame he ka pipikhenyâ.
- 26 E monu at ame ka labageju ka hnyi hnyekon bi :
Ke haba at ame vheno wisa, me ame he ka möt.
- 27 Haba at ame ham omjeú ka at ae theduoc, me ame ca he ka ba anyin ta je únyi :
Ke haba at ame tube li emakan me adre me he ka oshia hângâ.
- 28 E ka todrö tavat ae kong me ame he tavat hia ka lubaduöng :
Ke e ka hi' ödra but, me ame he ka se hia tavat ae wisa.

HNYIMAKAN 29.

- H**ABA at adre me oshia ná, k' ame ka ohwegiâ bi nyin,
Me adre me he ka ie oamâmâ, ke ba bi eny.
- 2 E ka se hia tavat ae wisa, me ame senyin tavat :
Ke e ka musi at ae kong, me ame he ka mâng tavat.
- 3 Haba at ame hnyok ka metâ me ame osenyinâ kamen :
Ke haba at ame tha e me je momo hnyi gethen, me ame odilâ omjeú.
- 4 Haba than, me ame ohmâ hnyeï ge hna owisa :
Ke haba at ame hnö je bwihlany, me ame hagutâ e.
- 5 Haba at ame ita hofuc ka ke at
Me ame ka thong ert hobi kâu li can.
- 6 E hu hnewe hnyi hna hanyâúâ hnen at ae kong :
K' ame khumöng me senyin at ae wisa.
- 7 Haba at ae wisa, me ame únykúme he ka bi hien at ae theduoc :
Ke haba at ae kong, me ba wâhmak-hmeto gan he ka khana thö.
- 8 Haba tavat úhiö, me adre me thong taun :
Ke haba tavat ae metâ, me adre me öhaúâ bi hmönyin,
- 9 E ka he at ae metâ ka ivinö me at ae monu,

- Ame ne hmönyin, ame ne hluma, me ba ta hau.
- 10 Haba at ame behingâlâ dra, me ame hmiân at ae wisa,
Ke haba at ae fofâ, me adre me elâm ke ka hlingâ e.
- 11 Haba at ae monu, me ame ha hia anyin hmönyin :
Ke haba at ae metâ, me ame noc e, me omenâ e.
- 12 E ka he at musi ka löng hoton ta je hofuc thoi,
Me tavat ae kong hia je athnyabainy.
- 13 Haba at ae theduoc ke at úöveci, me ödru me iouny ;
Iehova bi at ame omelamá li emaködru hia.
- 14 Haba than a at ame owisa hnathoâ ka tavat ae theduoc,
Me ame he bala bi ka tethmâ anyin theron.
- 15 Haba osö ke hwa úne, me wale li at úömetö ;
K' ame he ka ohmehma hinyen ge wanakat adre me hna.
- 16 E ka se hia tavat ae kong, me se hia minya hanyâúâ :
K' ame he tavat ae wisa ka wâ hnödra hna kölu.
- 17 Nâ thö nokom, me u me he ka laba so ;
Eke, e ame he ka osenyinâ hnyekom.
- 18 E ka ba hna omanená, me ame he tavat ka hota degecâ hokhnyok :
Ke hnahic hnen at ame tuö hnanyibu.
- 19 E ca khana bi ta je hofuc he ka thawâ athnyaba :
Eja ke ne a ne wâhmakhmeto, me ame ca he ka löng hoton.
- 20 U je wâ but at ame fuc bebehú ?
E so geju ka at ae monu hon momo eling.
- 21 Haba at ame betenge ge athnyabainy hwân ke tiga wanakat,
Me ame he ka kap e me nokon hnyi obiny.
- 22 Ame okúâ iwatretra at ame hmönyin,
K' ame oshia hanyâúâ ge at ae wathe-thöt.
- 23 Haba bigan anyin at, me ame ohnyikânâ e :
K' adre me he ka ogânâ at ame hnyok hnyikânâ.
- 24 Haba at ame tha hien me at venöu, me e ame ka hmiân hanon bi :
E ame löng úhangö, k' ame ca omanená bi.

- 25 E ka ot at, me hnân e hnewe :
K'ame he ka laba khötkic at ame labageju kö Iehova.
- 26 E se hia tavat adre me elâm ibetengiö ge at musi :
Ke únyi ga Iehova hna owisa ka at.
- 27 Hükötiänen tavat ae wisa, at ae hwali hwekecin :
Ke hükötiänen at ae kong, at ae fofâ hnyi gethen.

HNYIMAKAN 30.

JE hofuc ho Agura nôku Jake : wale hofuc.

- Haingen at kö Ithiela, wale Ithiela me Ukala, ka habe,
- 2 E hnathu iny monu hon tavat,
Ke ba gak wâhmakhmeto anyin at :
- 3 Ke oge ca hia but úne ge metâ,
Ke oge me ca wâhmakhmeto At ae Kap.
- 4 Ie at ame ölö hnyi dranyai me ut hmetu but ?
Ie at ame úkhöünâ ang hnyi li hnyamen ?
Ie at ame lan köiö hnyi úkhaûen ?
Ie at ame otilâ hia je can hmeledrany ?
Ia ien ke ia ien nokon ame ne khanö u ?
- 5 E kalaöt hia hofuc hwan Khong :
E thibi becin tavat adre me labageju kâu.
- 6 Ca bi hanen bi ka hnyi hwan hofuc,
Wâ e nye he ka nö u, k' u thoi bi.
- 7 Lo li únyi oge me sumâtâ gam ;
Ca behana bi gak inye tiga ca mok ;
- 8 U na öúsákâúöâ but mõnya únyi baú me thoi :
Ca otheduoci nya, me otrene nya ;
Ke haök ge únyi ae úcú kõnya.
- 9 Wâ e nye sekuk dö, me ivinö u, me ha, ka habe, Ia Iehova ?
Ke wâ iny nye theduoc, me venöu,
Me ha monoâ ien Khonguk.
- 10 Ca hai thoiâ athnyaba ka tuhan,
Wâ e nye hangö u hnen e, ke adre me haikongu u.
- 11 E hu dö adre me hangâ kamödra,
Me ca haisoâ hinyödra.
- 12 E hu dö ae ba hnyikongon hnyi hnödra hna únyküme bi.

- Ke adre me ca hneü degecâ ikiki gadra.
- 13 E hu dö ae görany hmönyin je emakodra,
Ke ti görany dö je bademaködra.
- 14 E hu dö ke hele vat je nyudra, ke je hele vat je wehülúsinaidra,
He ka an tavat ae theduoc hnyi hnyei, ke tavat ae ba ta unyi unyin tavat.
- 15 Lo li hlu laku Aluka, ödru me ha, ka habe, Hojem, hojem.
Kun ta únyi ame ca hnyi sekon bala, Eke, vak ta únyi ame ca hnyi ha, ka habe, Soju :
- 16 Wale erkemok ; me hnyok ae toúnyi ;
Me kânâ ame ca unöngöt ge köiö ;
Me meic ame ca ha, ka habe, Soju
- 17 Haba eomak at ame hlumâ kamen,
Ke höcö long hinyen,
Me ame he je orebainy hnyigöulen bucen ka úâ e,
K'ame he je lakon aeto ka an e.
- 18 Kun ta únyi ae iyong kõnya,
Eke, vak ta únyi ae ca khanö nya :
- 19 Wale deny aeto hnyi drany ;
Me deny on hnyi kic ;
Me deny hu hnyi wanben köiö ;
Me deny бага me hlu.
- 20 Helae deny momo ame bi únyi monu ;
E ame han ke kot hnyimen,
Me ha, ka habe, E ba monu oge me ányâ.
- 21 Ame öbubuny hmeledrany can kun ta únyi,
Ke ca khana he ka hokhnyokâ ta únyi a vak :
- 22 Wale athnyaba k'ame ne than bi ;
Me at ae monu ae sekon dut ge jeü
- 23 Can momo ae kong ae hu áiân dut ;
Me athnyaba a momo at ame he ka hwöhwaban at ame musö e.
- 24 Vak ta únyi ae úhnyúkong eang hmeledrany,
Ke ödrin ti metâ gan hmâ bi :
- 25 Wale je wahajö a ödra ca hwege bi,
Ke so bi adre me penapenö ö' dra hnyi honivakeny ;
- 26 Je shefani a ödra ca man bi,
Ke adre me bi umödra hnyi je kic ;
- 27 E ba tuhan je wahamon,
Ke so bi adre me he guga hia hnyi je bunyen ;

- 28 Je behölök ame iyâw ge li hnyamen,
Ke e bi hnyin je uma umen than.
- 29 Kun ta únyi ae hmanenang hnyi hnö-
drin hna he,
Eke, vak ta únyi ae mec úhedrin.
- 30 Wale liona, at ae man hon je meno,
K' ame ca whiö bi ge ke je meno hia ;
- 31 Horsiny vat, me got бага minya ;
Me than, ae ca khan ödra tot metâ kâu.
- 32 U je ne hia but hwen monu me ka
oganö u bi,
Ke u je ne vak hulö,
Kât ju hnyimâm.
- 33 Ödra ka huliwan debai me ame manen
dut bata,
Ke ödra ka ken böhöhiny, me ame
hingölö but dra :
Helâe ödra ka hlec wathethöt, me ame
o but iwatretra.

HNYIMAKAN 31.

JE hofuc ho Lemuela than ; wale hofuc
ame úne kâu hnen hinyen.

- 2 Nökuk lö, ieú ? nökek lö, úheny ú hnyi
hnyekuk, ieú ?
Nökuk lö, oge bi khöbi gan, ieú ?
- 3 Ca ham hwegiâm ka ta je momo,
Ke ca ânyâ únyi wale ame okongoâ je
than.
- 4 Lemuela lö, e ca úcú je than, e ca úcú
ka je than he ka ic waina ;
Ke ca úcú ka je taben he ka ha, ka
habe, ewa grág ?
- 5 Wâ adre nye ic me hnying ut hnanyibu,
Me omonoâ iwatretra anyin at ame
vec.
- 6 Ham bi grág ka at ame he but ka mok,
Me waina ka at ae vec hnyekon :
- 7 E ame he ka ic me hnying anyin the-
duoc,
Me ca únykúme hmetu bi anyin vec.
- 8 Fuc dö hobi kâu at ame laba hnyibú,
Hnyi ivinö anyin tavat adre mok de-
gecá.
- 9 Fuc dö, owisa wia ju,
Ivinöâ thö hobi kâu at ae vec me the-
duoc.
- 10 Ie at ame wâ momo ae so hwakecin ?
E beönua hwaban e hon je penina.
- 11 Ame labageju kâu hnyekon áiân,
K' ame ca he ka hia gan troban.
- 12 Ame ânyâ so kâu hnen momo, ke ca
kong bi
Hnyi je bonginy hia anyin möt.
- 13 A momo ame elâm je leünen mamoe me
lino,
Me huliwa senyin ge li hnyamen.
- 14 Momo ame helâ me je hu úcú ;
E ame hok an jeú úheny sâkâú.
- 15 E ame vesâ ke tiga hnyinghet,
Me hân anyin lap,
Me khene hanyen lathnyabainy a je
blu.
- 16 E ame únykúme utkânâ me úco e :
E ame te vine troban li hnyamen.
- 17 Momo ame weikâ e ge tang hwege,
Me ohwegiâ li benyin bi.
- 18 E ame wâ ae so tang omjeú a úco :
K' ame ca mok anyin lamepa hnyi
hnyinghet.
- 19 E ame ip hnyamen hon únyi hnân amu
tö mano ;
Me kât taben tö hnyi hnyamen.
- 20 E momo ame lau li hnyamen ka at ae
vec :
Eke, e ame hinobeny ka at ae theduoc.
- 21 E ame ca outen kiona ge anyin lap :
Anyin ame khavâ úkhaú ae dra vec
anyin lap hia.
- 22 E ame hwâwâ je kubö me omeca :
K' ame khavâ úkhaú lino ae so ke
udrudrá hlit.
- 23 E manen dut áiân hnyi homagöule,
A ne tha laba me wahingatiny hnyei.
- 24 E momo ame tibet je úkhaú lino me
úco
K' ame hna je wen hnyok ka at úcú.
- 25 Tang hwege me hmanenang anyin
úkhaú ;
Ke ame hluma buhlumâ je bong ame he
ka o.
- 26 E momo ame ha metâ ;
Ke e hnyi bohmen hnanyibuiny ibete-
ngiö.
- 27 E ame tuö wia hwakecin anyin lap,
K' ame ca an jeú ke laba baú bi.
- 28 Ame tot je lakon me haisoâ e ;
K' ame ogânâ e ge áiân, me ha, ka habe,
- 29 E se hia omomo ae so hwakecidra,
Ke u beönua hudrin hia.
- 30 Ame thoi hmai, ke thatúnyi bi hma-
nenang :
Ke haba momo a at ame outö Iehova,
me adre me he ka haisoâ momo e.
- 31 Ham but ka momo wan li hnyamen ;
Ke hamen ta je huliwa anyin momo he
ka ogânâ e hnyi je homagöule.

TUSI ANYIN AT KHET.

HNYIMAKAN 1.

WALANG hofuc hwan at Khet, a nöku Davita, tuhan Jerusalema.

2 Haingen at Khet, ka habe, E ti thatúnyi e ti thatúnyi ta je únyi hia. 3 Ieú troban ka at hnyi anyin ta je huliwa hia e ame mádrá hmelen seúnö? 4 Ame hia ke dö, k' ame o bi ke dö; ke haba hmeledrany, me tet hmá bala bi, 5 Ame labö o seúnö, k' ame dit hmetu seúnö, me wadring ka hnyi hnen hna o hnyin. 6 Ame he ang ka hnyi hwaiöu me hwiö ka hnyi hwadrö; k' ame hwihwiö monu hnyi deny gethen, k' ame he hmetu ang bi ka hnyi deny gethen e igigilö. 7 Ame hingálá ta je di ka hnyi köiö ae gan, ke so bi ame ca unöngöt bi köiö; ke haba dok ame hingálá je wagewe hnyin, me wale thibi e dok ame hmetu ka hnyin. 8 E ti unöngöt ta je únyi hia ge sényin; e pason he ka ha: ke ca sekon bi li ecmak ge hna wá, k' ame ca unöngöt li hnyeköny ge hna löng. 9 Haba únyi ame o ehac, me ame he hmetu bi ka o; ke haba únyi adre hia but ányá, me adre me he hmetu bi ka ányá: ke ba únyi ae teb únyi hmelen seúnö. 10 Hawa, e hu ke únyi wale adre me ha gan, ka habe, Wá bi, únyi ae teb-únyi? me wale únyi a o ehac hnyi úen ae tiga hi' öta. 11 E ha hna únykúme hmetu je dö ehac; he haba khaca, ame ca he ka hu hna únykúme minya je dö ame he ka o, wale unyin tavat adre me he ka o nyiele.

12 Inya at Khet, tuhan Isaraela hnyi Jerusalema. 13 Ke oge me kong hnyekuná he ka elám me hnö a deny metá, ta je únyi hia adre me ányá hnyi hmeledrany: e hmak hmönyin huliwa Khong ame ham ka lakon tavat he ka huliwan. 14 Oge hia but wá ta je huliwa hia adre me ányá hmelen seúnö; ke wá bi thatúnyi hia, k' adre me han ang. 15 E pason he ka owisa únyi ae hwali: ke pason he ka aú bi ta je únyi ae ba. 16 Oge me úhnenamö me hnyekuk, haingök, ka habe, Wá bi, oge hia but hom hobi könya metá ae beönua hudra hia adre bödra hnyi Jerusalema: eke, a wá but hnyekuk metá me wáhmakhmeto ae gan hmá. 17 Ke oge me kong hnyekuná

he ka metá, me he ka khana hwen monu me hwakecin ae únyi baú: oge me wá a g' ame han minya ang. 18 Anyin a e ka gan hmá metá, me gan minya bi hmak: ke e ka bi hanen wáhmakhmeto hnen at, me ame bi hanen minya vec.

HNYIMAKAN 2.

HAINGÖK eú hnyi hnyekuk, ka habe, Awe, oge me he ka cubic u ge senyin; anyin a wale he thö vheno thö so: ke wá bi, wale ke thatúnyi. 2 Oge me ha ge hwen hluhluma, ka habe, Hwen monu e: ke ge senyin, e ame bö? 3 Oge me únykúme eú hnyi hnyekuk he ka ose-nyiná unyik ge waina, ke ame tiga lelö hnyekuk hnen metá, me he ka kát hmá hwen monu, m' oge me he ka wá únyi ae so ka tavat he ka ányá hnyi hmeledrany hnyi ta je bonginy anyidra möt. 4 Oge me ányá je huliwa ae gan hmá: oge me op umök je uma; o ge me tá je hnyei vine; 5 ke oge me bi ik, me bi anyik je utkáná, me tá eling ta je úö hia ame ve wa wan: 6 oge me ányá anyik je köiö, hnán hú káná ame kú hnyin ta je úö: 7 oge me úco je hlu бага me momo, ke e hu je athnyabaik adre hnökoá hnyi hnyabak; e hu minya unyik je hnahat kau me je mamoe, ae nua hudra hia adre bödra ka laba hnyi Jerusalema: 8 oge me úkhöüná minya sileva, me gol, me je omjehen je than, me je hnyei: e hu gak minya tavat khumöng obaga me omomo, me je weny tavat, wale omomo ae se hia. 9 Ke oge me gan dut me tren gáná hudra hia tavat adre bödra ka laba hnyi Jerusalema: ke e bi minya unyik anyik metá. 10 Ke oge me ca beháná ta je únyi hia ame bewá hnen li emakök: oge me ca thawá hnyekuk únyi hnyi ta je senyin hia, anyin ame senyin hnyekuk ge anyik ta je huliwa hia; ke wale troban anyik ta je huliwa hia. 11 Me oge me wá ta je únyi hia ame ányá hnen li hnyamök, me ta je huliwa oge me huliwan he ka ányá; ke wá bi, thatúnyi hia, ke ame han ang, ke ba troban hmelen seúnö.

12 Ke oge me hwiö he ka wá metá, me

hwen monu, me hwakecin ae únyi baú : anyin ae hö at ame he ka o hwaban than? me wale thibi e adre hia but ányá ehac. 13 Ke oge me wá but ae únyi hnathu metá hon hwen monu, helá me lany ae únyi hnathu hon menekholom. 14 Haba at ae metá me hu li emakan hnyi ban, ke ame he at ae monu hnyi menekholom : ke so bi oge me wá a g' ame o khaca thibi únyi ka tavat hia. 15 Ke haingök eú hnyi hnye-kuk, ka habe, Haba únyi ame he ka o ka at ae monu, me ame he ka o minya kõnya ; awe, hnân eú a iny metá gan hmá? Me oge me ha eú hnyi hnyekuk, ka habe, Wale minya ke thatúnyi. 16 Anyin adre me ca únykúme nyiele balua at ae metá me at ae monu ; anyin adre me he ka hnying hia hnyi je bong ame he ka o. Ekölö ame he ka mok at ae metá helá me at ae monu! 17 Me oge me höcö möt ; anyin ae vec kõnya huliwa adre me ányá hmelen seúnö ; anyin a thatúnyi hia, k' ame han ang.

18 Ke oge me höciá anyik ta je huliwa hia wale oge me ányá hmelen seúnö : anyin a hamök he ka hna e ka at ame he ka hwöhwabök. 19 Ke e khanö ia ame ne he ka at ae metá ame ne at ae monu? ke e ame he bi ka musö anyik ta je huliwa hia wale oge me huliwan, me omanená hnyin metá hnyi hmelen seúnö. Wale ke thatúnyi. 20 Anyin a wale oge me hwihwiö k' ame hmak hnyekuk ge ta je huliwa hia oge me ányá hmelen seúnö. 21 Ke waleú at ame huliwa hnyi metá, me wáhma-khmeto, me ti khana ; ke so bi e ame he ka hna e ka at a ca hnyi huliwan bi me hnân weúhúneny. Wale minya thatúnyi, me monu ae gan hmá. 22 Anyin a iéú ame hu ke at ge anyin ta je huliwa hia, me ivecin hnyekon, waleji e ame huliwa hnyin hmelen seúnö? 23 Anyin a e ame vec thibi hnyi bongon taje bong, k' ame huliwa hnyi hlöuhlöu ; eke, ame ca mokut bi hnyekon hnyi je hnyinghet. Wale ke thatúnyi.

24 E ba nua soiny at hon he ka han me ic me hna hnyekon he ka senyin so hnyi anyin huliwa. Oge me wá minya e, a únyi ge Khong. 25 Ke ie at ae khana han, ke ie at ae khana senyin, huk? 26 Anyin a Khong ame ham metá ka at k' ame ose-nyiná e, ke wáhmakhmeto, ke senyin : ke e ame ham huliwa ae hmák ka at ae kong, he ka úkhacaköúá me úkhöúná, me me he ka ham bi ka at ame osenyiná Khong. Wale ke thatúnyi, ke ame han ang.

E HU bonginy ta je únyi hia, me úen hobi káu ta je huliwa hia hnyi hmeledrany : 2 e hu úen hna hnöku öta, me úen mok ; úen he ka tá, me úen oc hmetu hna tá ; 3 úen hlingá, me úen ometo ; úen hagutá, me úen otílá ; 4 úen tenge. me úen hluma : úen hnyamok, me úen bibiá ; 5 úen khúá degecá je veto, me úen úkhöúná je veto ; úen údeluö, me úen ca he ka deluá ; 6 úen hlo, me úen okolo ; úen tuö, me úen degec ; 7 úen kia, me úen tibet ; úen laba hnyibú, me úen fuc ; 8 úen be-tenge, me úen hükötíá ; úen vat, me úen úsoköu. 9 Ieú troban ka at ame huliwa hnyi ta je únyi e ame ányá? 10 O ge wá but huliwa ae hmak wale a ham Khong ka tavat he ka huliwan. 11 E ame hia but ányá ta je únyi hia he ka hmanenang hnyi je úen ae úcú : ke khaca, e ame ip únykúme ka hmeledrany eú hnyi hnyekudra, ke so bi, at ame ca wá huliwa ame ányá Khong únyi hnyi hwân, ke ne o but hnyi obiny. 12 E khanö nya ae ba soidra, hon he ka senyin, me ányá so, ödra ka tiga möt. 13 Ke haba khaca, ae ka han me ic tavat, me senyin so hnyi anyidra huliwa, wale bwihlany anyin Khong. 14 E khanö nya a haba hna ányá hnen Khong ame he ka e nyiele balua : adre me ca he ka bi hanen ka hnyin, ke adre me ca he ka ohia únyi hnyin : ke Khong ame ányá e me me ot at hnyi hnyimakau. 15 Haba únyi káu adrem ka e bi walang ang ; ke haba únyi ame he ka o, me únyi káu adrem : ke Khong ame elám únyi ae hia.

16 Ke oge me wá hmetu hmelen seúnö, ae hnyi umen owisa, a e bi ling hwakecin ae kong ; ke e bi hnyi hnen hwakecin ae wisa, wale bi e hwakecin ae kong. 17 Haingök hnyi hnyekuk, ka habe, Hamen Khong he ka owisa ka at ae wisa me at ae kong : anyin ae hu úen ta je únyi hia me ta je huliwa hia. 18 Haingök hnyi hnyekuk, ka habe, Wale can tavat, me me he Khong ka cubic ödra, me he ka omanená ködra a ödra úcú me ta je meno. 19 Anyin a haba únyi ame o ka at, me ame o minya ka meno ; k' ame o ködru únyi a khaca ; haba mok anyin ke at, me helá me mok anyin ke at ; eke, e tha úcú homenödru ; ke ca beönua bi at hon meno : anyin a thatúnyi hia. 20 K' ame he ödru lo hia ka hnyi dok a khaca ; úhedru hia eú hnyi

kânâ, k' ödru me he ka wia hmetu hia me me kânâ. 21 Ie at ae khana hanon at ame ölö göranyai, me hanon meno ame utut kâu hnyikânâi? 22 Anyin a wale oge me wâ but ae ba soiny at ae nua hon he ka senyina anyin ta je huliwa; anyin a wale jekhon: anyin a ie at ame he ka hom hmetu e, me me wâ ta je únyi hwaban?

HNYIMAKAN 4.

KE oge me hmetu me wâ je hna seda hia hmelen seúnö: ke wâ bi je deköien tavat adre me oveci ödra, ke ba at ame hadru' ödra; ke tren hwege tavat adre me oveci ödra, ke ba at ame hadru' ödrin bi. 2 Ke oge me ha hnahicâ tavat ae mok a g' adre mokcu e hac, hon tavat adre möt a g' adre me möt walang ang; 3 eke, ke hnahic hudru hia at ae tiga ca o, at ame tiga ca wâ huliwa ae kong adre me ányâ hmelen seúnö.

4 Me oge me wâ ta je huliwa hia, me ta je únyi hia ae so adre me huliwan, a g' ame behnyokâ at ge ke at bi can e. Wale ke thatúnyi, ke adre me han ang. 5 At ae monu ame hûkâlâ li hnyamen, me ka an bi viny. 6 E so e khaca hnyam ae unöngöt tha e me laba wia, hon li hnyam ae tha unöngöt bi tha e me huliwa me hna han ang.

7 Me oge me hmetu me wâ ta je únyi baú hnyi hmelen seúnö. 8 E hu at a khaca, a hake e bi; eke, e ba nokon me liamekeiny; ke so bi e ba obiny anyin ta je huliwa hia, ke ca sekon li emakan ge omjeú. Haingen, ka habe, Inya oge me huliwa hobi kö ia, me ka behanö nya bi ge ta je únyi ae so? Wale ke thatúnyi, me huliwa ae kong. 9 E so li at a lö hon at a khaca; anyin ödru me he ka hu hwaban ae so anyidru huliwa. 10 Ame ne ta ke at me hamen ke at he ka lelö hanen: ke e kölö ge at a khaca e ka ta but, ke ba hanen he ka lelö hmetu e. 11 Walang khaca, ame ne tha mokut li at a lo, ödru me he ka mage: ke ame he ka kâmâu ka mage at a khaca? 12 Ke ame ne ton ke at hon at a khaca, e khana li at a lo he ka tot kâu; ke ame ca ie mou tö a kun ta waamoiny.

13 E so hidröu ae theduoc ke at ae metâ bi, hon than a hingat at ae monu, wale at ame höcö löng, ödra ka he ka nâ. 14 Anyin a e ame dit út únyi hnyi uma ceat he ka than; eke, adre me hnökoâ hnyi dokhon dökhü ke ba omjeú. 15 Oge wâ

but ta je únyi ae möt, adre me he hmelen seúnö, a tha ödra me hidröu, wale at a loiny, at ame hwöhwaban. 16 Ca hnân bi aú tavat e ame müsö: ke so bi adre me ca he ka senyin kâu hwaban dö e. E hnathu e thatúnyi e, k' ame han ang.

HNYIMAKAN 5.

TUÖ ju li cam u ka he ka hnyi uma umen Khong; anyin ae so he ka hakekeny dö he ka löng, hon he ka hudö bi hut anyin at ae monu. 2 Ca he ka logot hnyimâm, ke ca he ka logot hnyekom, he ka ha ke hofuc hnyi hnyimakan Khong; anyin a ethö Khong hnyi drany, ke u ang hmele-drany: anyin a wale e so e wakhalet hwâm je hofuc. 3 Anyin ame kú bwi hnen ta je huliwa ae se hia; me ifucin at ae monu hnen ta je hofuc ae se hia. 4 U ka he ka bi khöbi ka Khong, ca bec bi he ka ohwâdá; anyin a e ame ca senyin ka tavat ae monu: owhâdá thö hnâm hna bi khöbi. 5 E so he ka ca bi khöbi, ke kong he ka bi khöbi me ca ohwâdá bi. 6 Ca hna hnyimâm he ka bijöniny unyâm; ke ca ha bi hnyi hnyimakan angela, ka habe, e monu e: anyin a iéú ame he Khong ka hmönyin ge ifucâm, me ohîâ huliwa anyin li hnyâmâm? 7 Anyin ame he ka helâe can je bwi ae se hia, me je thatúnyi, me se hia je hofuc: ke u me he ka ouden Khong.

8 U je ne wâ hna okongoâ at ae theduoc, k' adre me ne hûgúnâ hwegiâ hna owisa me únyi ae úcú hnyi ke keihen hnye, ca uthmâhmâ bi ge únyi eling: anyin ae hu at ae gan hon tavat ae beönua ame wâ; ke e hu bi ae beönua hudra. 9 Ke haba jeúiny kânâ me hobi kâu tavat hia: k' adre me bi an than únyi hnyi hnye.

10 Haba at ame hnyokâ sileva, me ame ca he ka sekon ge sileva; ke haba at ame hnyokâ omjeú ae se hia, me ame ca he bi ka sekon ge hna osehia: Wale ke thatúnyi. 11 E ka se hia omjeú, me se hia minya ödra adre me an e: ke iéú troban ka at a anyin ta je únyi, k' ame wâ thibi ge li ecmak? 12 E senem hna mokut ka at huliwa, k' ame ne han gan ame ne úhnyükong: ke ca khana at tren omjeú he ka mokut, can ae ti unöngöt hnyekon.

13 Walang únyi ae kong ae vec oge me wâ hmelen seúnö, je omjeú a tuö hnen ke at a omjehen, k' ame ka ovecâ e bi gan: 14 ke ame hia ta je omjeú eling hnyi deny ae kong; ke ame ne hu nokon, me ba ke

únyi hobi káu bi. 15 Heláji me ioiny a g' ame he thu únyi hnyi hnyekon hinyen, me helâe minya e ame he ka hmetuhmetu helâ me úen a o hnyin, ke ba únyi e ame he ka hom únyi hnyi anyin ta je huliwa me hom hnyi hnyamen bi. 16 Ke wale monu ae vec, a g' ame he ka hmetuhmetu tha úcú me úen waleji e ame o hnyin: ke iéú troban káu a e ame huliwa ka ang? 17 Ke haba khaca, e ame han hnyi bongon je bong hia hnyi menekholom, me vec hmönyin, me mok, me wathethöt.

18 Wâ bi, e so wânök ke mec bi a g' ame he at ka han me ic, me senyina so hnyi anyin ta je huliwa hia, waleji e ame ânyâ hmelen seúnö hnyi je bong bongon anyin môt, wale a ham káu Khong: anyin a wale jekhon. 19 Ke haba at ame ham káu omjeú me ta je únyi nhen Khong, k' ame ham káu minya man he ka han hnyi ta je únyi e, me hom jekhon, me senyina anyin huliwa; me wale bwihlany anyin Khong. 20 Anyin a e ame ca he ka ti únykúme ta je bong bongon anyin mot; anyin a Khong ame thu káu me me senyin hnyekon.

HNYIMAKAN 6.

E HU ke monu oge me wâ hmelen seúnö, ke e hmak e ka tavat: 2 wale at hnen Khong hna ham omjeú káu, me ta je únyi, me ogânâ, ke ca hia bi gan ke únyi e ame weny, ke so bi Khong ame ca hna but káu man he ka han hnyin, ke ame han hnen atkanyua; wale thatúnyi me mok ae kong. 3 A ne khaca haded je lakon ke at, ke se hia hunainy anyin môt, me me ti se hia je bonginy ta je hunainy, ke ame ca sekon bi ge so, ke adre ca konâm bi; inya oge me ha, me so köluhabú hon e; 4 anyin ame o hnyi únyi baú, me he hmetu hnyi menekholom, ke ame oiyongâ ien hnen menekholom; 5 ke haba khaca e ame ca wâ seúnö, ke ca khana bi; e nua menâiny at ang hon at eji: 6 eke, eja ke ne a ne môt hnyi lo li thauzan je huna, k' ame ca wâ bi so: hawa, me ca he ka he ka hnyi dok a khaca? 7 Haba ta je huliwa hia anyin at, hnân hobi káu bi hnyimen, k' ame ca sekon bi weny. 8 Anyin a iéú troban ka at ae metâ hon at ae monu? ie únyi anyin at ae theduoc at ae khana he ka he hnyi hnyimakan tavat ae môt? 9 E so hna wâ hnen li ecmak, hon nna weny hnen hnyok; wale ke thatúnyi, ke ame han ang.

10 Haba únyi ame o adre hia but hwenyi

ien ehac, ke manen dut ae at: ke ca khana bi he ka ivinö me at ae beónua hon e. 11 E se hia ta je únyi ame bi hanen ka únyi baú, anyin a wale iéú troban ka at? 12 Anyin ae khanö ia únyi ae so ka at hnyi môt ang, hnyi ta je bonginy anyin môt ae únyi baú, ame môt hnyin helâ me hmenu? ke ie at ame he ka omanená ka at únyi ame he ka o hwaban e hmelen seúnö!

HNYIMAKAN 7.

E ÚNYI hnathu ien ae lung so hon wako ae so; ke únyi hnathu bong mok, hon bong ate o hnyin. 2 E so he ka he ka hnyi uma ödra ka tenge hnyin, hon he ka he ka hnyi uma ödra ka bijeú hnyin: anyin a wale obiny tavat hia; ke ame he at ae môt ka únykúme e eú hnyi hnyekon. 3 E so hlöuhlöu hon hluma: anyin ae so but hnyok hnen hnyimak ae menyöng. 4 E bi hnyekon at ae metâ hnyi uma adre me tenge hnyin, ke e bi hnyekon tavat ae monu hnyi uma adre me senyin hnyin. 5 E so he ka löng úthaö hnen at ae metâ, hon he ka löng khumöng anyin tavat ae monu. 6 Anyin ame fifica je wableúhleú hmelen öt, ke helâe úhlmumainy at ae monu: ke thatúnyi e. 7 Haba behom gânâ ame omonoâ at ae metâ; ke haba bwihlany ame okongoâ wâ únykúme. 8 E so obiny ke únyi hon hwân: ke so hokhnyok hon hnyok bi gan. 9 Ca logot hnyekom he ka hmönyin, anyin a haba hnyekon at ae monu, me wale hnyaban hmönyin. 10 Ca ha bi, ka habe, A hawa ae so je bong a bân hon je bong ang? anyin ae ca metâ bi hnam hna hnö e. 11 E so metâ, ae úcú e me hwajekhóú: eke, e ti beónua e ka tavat adre me wâ seúnö. 12 Anyin a haba metâ me hnân söng, helâ me mone bi me hnân söng: ke haba nuainy wâhmakhmeto a g' ame he metâ ka tuö môt anyin at ae tren e. 13 Únykúme ju huliwa anyin Khong: anyin a ie at ae khana he ka owisa hnen hna ohwalö? 14 Senyin dö hnyi bong sot, ke únykúme ju hnyi bonginy vec: Khong ame ânyâ khaca me me úcon khaca, me me ca he bi at ka wâ ta je únyi ame he ka o hwaban e.

15 Wale hia wânök hnyi je bong bongon anyik hnyok baú: e hu at ae wisa ame moku hnyi hwakecin ae wisa, ke hu bi at ae kong ame môt beú hmâ hnyi hwakecin ae kong. 16 Ca he ka hwakecâm ae ti wisa; ke ca ogânâ hmönyinâ anyâm metâ:

anyin a iéu u me he ka hamâm hlingö u bi? 17 U ma ca he ka ti kong, ke ca he bi ka monu: anyin a iéu u me he ka mok ke tiga ca ûâm bi? 18 E so u ma kât únyi ang; eke, ca hom hmetu hnyamâm únyi hnyin: anyin a haba at ame outen Khong, me ame he ka o únyi hnyi je únyi e hia.

19 E man hmönyin metâ ka at ae metâ hon tavat musi a ten hnyi taun. 20 Anyin ae ba at ae wisa eang hmeledrany, a at ame ânyâ so k' ame ca ânyâ hulö. 21 Ke haba khaca ca he ka hnyok bi ta je hofuc hia adre me ha; wâ u nye löng athnyabaem me hangö u but: 22 anyin e khandö u hnyi hnyekom minya a u je osehia hangâ keihen.

23 Oge hia but ohnathoâ ta je únyi hia e hnen metâ: haingök, Oge me he ka metâ; ke e ame úsâúkâúôâ mönya. 24 Haba únyi ae sâkâú but, me dit hmönyin; ie at ae khana he ka wâ e? 25 Oge me hwihwiö, me únykúme eú hnyi hnyekuk he ka khana, me elâm, me wâ metâ, me bongon ta je únyi, me khandö nya hnyikongon monu, me hwen monuiny monu: 26 ke oge me wâ ke únyi ae hiny hon mok, wale momo a haba hnyekom bi me je hnewe me je ert, ke je únyi hnân úce at li hnyamen: haba at ae so hnyi hnyimakan Khong, me ame he ka kec gan; ke ame he ka hnok at ae kong gan. 27 Haingen at Khet, ka habe, Wâ bi, walang hnök hna wâ, iny ka tuluto ke únyi me ke únyi, me inye wâ bongon: 28 wale oge me tiga elâm bi, ke oge me ca wâ bi: oge wâ but бага a khaca únyi hnyi thauzan; ke oge me ca wâ bi momo unyidra hia. 29 Wâ bi, waleú únyi a khaca oge me wâ, a Khong ame op at he ka wisa; ke adre me elâm bi je biúnyi ae se hia.

HNYIMAKAN 8.

I E at ae úcú me at ae metâ? ke ie at ae khana bongon ta je únyi? Haba metâ anyin at ame omelamâ hnyimakan, me wia thö hwegien hnyimakan. 2 Haingök, Vheno thö hnanyibu anyin than, ke únyi ge úhinykôu hnyi hnyimakan Khong. 3 Ca logot bi he ka he gan; ca hwege ka hnyi únyi ae kong: anyin a e ame ânyâ hia weny. 4 Anyin ae hu man maniny hofuc hwan than; ke ie at ame he ka ha kâu, ka habe, Iéu u me ânyâ? 5 Haba at ame vheno hnanyibu, me ame ca he ka wâ únyi ae kong; ke haba hnyeú-

kon at ae metâ ame wâhmakhmeto úen me hna owisa: 6 anyin a haba ta je únyi hia, me e hu úen me öwisa; anyin a haba okongon at, me hmak kâu: 7 anyin ae ca khana únyi ame he ka o; ke ie at ame he ka omanenâ kâu ge úen ame he ka o? 8 E ba at ame tren musi hon hanu, he ka behânâ hanu; ke ba at ame musö bong mok; ke ba at adre me hna únyi hnyi vat eling: k' ame ca he hwakecin ae kong ka omelö tavat adre me mádrâ e. 9 Oge hia but wâ ta je únyi hia eling, ke oge me únykúme eú hnyi hnyekuk ta je únyi hia adre me ânyâ hmelen seuno: e hu úen adre me musö ke at ge ke at bi me me kong.

10 Me oge me wâ minya tavat ae kong adre konâm, k' adre me o but ka hnyi erkemok; ke haba tavat adre hia but ânyâ so me adre me he but únyi hnyi dok ae kap, k' adre me hnying ödra hnyi taun: wale ke thatúnyi. 11 Anyin adre me ca ie bi hwaban huliwa ae kong, anyin a wale e hwege hnyekom tavat he ka mádrâ hulö. 12 Eja ke ne a ne khaca haded hna ânyâ hulö hnen at ae kong, k' adre osehia bongon je bong, ke so bi, oge me wâ but a g' ame he ka so ka tavat adre me outen Khong, a tavat ot hnyi hnyimakan: 13 ke ame ca he bi ka so at ae keng, k' adre me ca he ka osehia bongon je bong, ke helâ me hmenu; anyin a e ame ca ot hnyi hnyimakan Khong. 14 E hu thatúnyi adre me ânyâ eang hmeledrany, a g' ame aat ka tavat ae wisa helâ me hna ânyâ ka tavat ae kong: ke haba khaca, ame aat ka tavat ae kong helâ me hna ânyâ ka tavat ae wisa: haingök, Wale ke thatúnyi. 15 Me oge me haisoâ hna hobâ, anyin ae ba so ka at hmelen seúnö, ke so bi adre me he ka han me ic me senyin: anyin a wale únyi ame he ka tha e me at hnyi anyin huliwa hnyi bongon ta je bong hia wale a ham kâu Khong hmelen seúnö.

16 Hnyi úen oge me únykúme eú hnyi hnyekuk he ka khana metâ, me wâ ta je únyi adre me ânyâ eang hmelen; (anyin ae hu at ame ca mokut hnyi lany me lit:) 17 me oge me wâ hia huliwa anyin Khong, ae ca khana bi at he ka wâ ta je huliwa adre me ânyâ hmelen seúnö: anyin ame ne he at ka huliwa me elâm e, me e ame ca he ka wâ; eke, ame ne únykúme ge at ae metâ he ka khana e, me ca khana bi he ka wâ.

HNYIMAKAN 9.

OGE me únykúme ta je únyi eling eú hnyi hnyekuk, he ka wâ wia ta je únyi e; a haba tavat ae wisa ke tavat ae metá, ke anyidra ta je huliwa, me wale hnyi hnyamen Khong: ame ne ibetengiö, ame ne úöhúkoti, e ca khana tavat: e hnyi hnyimaködra ta je únyi e. 2 E tha úcü thibi ta je únyi hia ame o ka tavat hia: khaca thibi únyi ame o ka at ae wisa me at ae kong; ka at ae so, me at ae bo so, me at ae bo kong; me ka at ame bi hut, me ka at ame ca bi hut: e úcü at ae so me at ae kong; e úcü at ame úhinhinykôu me at ame ot úhinhinykôu. 3 Walang únyi ae kong hnyi ta je únyi adre ányâ hmelen seúnö, a khaca thibi únyi ame o ka tavat hia: eke, e únöngöt minya thö hnyekon tavat ge hulö, ke e bi hwen monu hnyi ta je hnyekudra, k' ödra tiga möt bi, ke hwaban e adre me he ka tavat adre mokcu. 4 Anyin a haba at ame tiga hanen tavat ae möt me hu geju bi unyin: anyin ae so kuli ae möt hon liona ae mok. 5 Anyin ae khana tavat ae möt a g' adre me he ka mok: ke ca khana bi tavat adre mokcu ke únyi, ke ba hmetu bi hwaban ködra; anyin adre hnying bi gadra. 6 A tha hia but walang ang anyidra ibetengiö, me anyidra úöhúkoti, me anyidra hmönyin; ke adre me ca he hmetu ka hnyi hanen nyiele balua ke huliwa adre ányâ hmelen seúnö.

7 He thö u, an ju ám jeú, me senyin me ijem ányâm waina me hnyok ame hobá; anyin a hia but Khong walang ang kap ányâm ta je huliwa. 8 E so e hau bala je khaúâm; ke ca he ka hia wakaco hnyi hon bâm. 9 Möt senyin dö tha u me áiâm u me hnyok káu hnyi je bonginy ányâm möt ae únyi baú: anyin a wale jekhom hnyi möt ang, me hnyi ányâm huliwa u je huliwan hmelen seúnö. 10 Haba hna wâ hnen li hnyamâm he ka ányâ, ányâ thö hnen hwegiâm; anyin ae ba huliwa, me únykúme, me wâhmakhmeto, me metá, hnyi erkemok, u me he ka hnyin.

11 Oge me hmetu me wâ hmelen seúnö, a g' ame ca bân ka o at ae háhá can, ke haba khaca ame ca tou bi at ae hwege, ke haba khaca e ca tren jeú at ae metá, ke haba khaca ame ca o je omjeú ka at ame wâhmakhmeto, ke betenge baú, ka at ame huliwa tremang; ke haba úen, me únyi ame o monu, ame o ködra hia. 12 Anyin

a haba at, e ca khana bi úen: helá me ta je wâ adre me hnok hnyi ert, me ta je meno adre me hnok hnyi hnewe, ke ame hnok dö e úcü mödra tavat hnyi úen ae kong, e ka ie o ködra.

13 Oge hia but wâ minya metá helang hnyi hmelen seúnö, ke haingök, E gan hmâ: 14 wale a g' ame hu taun ae úhnyü-kong, ke wakhalet thibi aten; k' ame he than ae gan úcon k' ame igigilö e, me op ta je tabiny vat cicö e: 15 ke adre me wâ ke aten e ae metá ae theduoc, ke e ame omelö taun ge anyin metá; ke ba at ame únykúme ka at eling ae theduoc. 16 Me oge me ha, ka habe, E so metá hon tang hwege: ke so bi adre me húkotiá metá anyin at ae theduoc, k' adre me ca löng hwan hufoc.

17 Adre me löng hufoc ae menyik hwan tavat ae metá, hon hna ha hwegiá hnen at ame musi unyin tavat ae monu. 18 E so metá hon je omjehen vat; ke haba at hulö a khaca, me ame okongoá so ae gan hmâ.

HNYIMAKAN 10.

HABA ta je nöng adre mokcu, me adre me obokongoá wakaco ae bo so: heláe minya e hmak hnyi tulut monu ae úhnyükong hon metá me hna oganá. 2 E bi hnyekon at ae metá hnyi ke keihen a metân, ke e bi hnyekon at ae monu hnyi ke keihen a meny. 3 Eke, ke haba khaca, e ka vheno gethen hnen at ae monu, me ba únykúmenen, ke e ame omanená ka tavat hia a e at ae monu. 4 A ne tot köu hmönyin anyin than, ca he thö hnyi hnâm: anyin a hwakecin ae menyik ame thawá ta je monu ae gan. 5 E hu monu oge hia but wâ hmelen seúnö, heláke monu ame o únyi ge at musi: 6 a g' adre me otílá hwen monu hnyi je dok ae görany, ke haba tavat tren omjeú me adre me laba hnyikánái. 7 Oge hia but wâ ta je athnyaba adre me tabö hors, ke haba ta je than adre me he hon kánâ heláke ta je athnyaba. 8 Haba at ame hiny thop, me ame he ka kólu ka hnyin; ke haba at ame thu hak me ame he ka oloú on. 9 Haba at ame thu veto me ame he ka kong hnen e: ke haba at ame khú utö, me ame he ka aat káu. 10 Ame ne kong hwan fao, k' adre ca bân ka khet homakan e, me hamen at he ka ti ham hwegien, ke so metá bi hnân he ka owisa. 11 A ne úhúlu on k' adre me tiga ca ohnamá, me ba troban ka at

ame ohnamâ. 12 Haba je hofuc hwan hnyimen at ae metâ, me wale tang beten-ge; ke haba li esongodiny at ae monu me ame he ka utâ e bi. 13 Haba hofuc a bân únyi hnyi hnyimen me wale hwen monu; ke haba hofuc a biliny únyi hnyi hnyimen; me ti hwen monu. 14 Haba at ae monu e ame osehia hwan je hofuc: ke so bi e ca khana at únyi ame he ka o; ke ie at ame he ka omanená kâu ta je únyi ame he ka o hwaban? 15 Haba huliwa anyin tavat ae monu, me ame osényini ödra hia, anyin adre me ca wâ bi gethen ka he ka hnyi taun. 16 Hnyei lö, e kölö gam, e ka wanakat tuhâm, ke ame han hnyi hnyo-makatu ányâm je taben! 17 Hnyei lö, hnâm hnahic e ka nokon than tuhâm, ke ányâm je taben adre me han hnyi úen ae úcú m' adre me hwege, ke ca hnân bi he ka monu ge grág! 18 Can hwen hócö ame ü but ban uma; ke e ka ca huliwa li hnyam ame he ka khula uma. 19 Adre ányâ bijeu hnân hnyi hluma, ke waina ame osenyinâ môt: ke úcú ta je únyi hia ka mone. 20 Ca hangâ bi than, ohe, ca ányâ hnyi hnyekom; ke ca hangâ bi tavat adre tren omjeü eiö hnyi ányâm hnyeule mokut: anyin ame he meno ame gâ ethö ka hom hwan, ke ame he at ae hu li labenyin ka omanená hna ha.

HNYIMAKAN 11.

KHÇÂ but ányâm areto ka hnyi hon du: anyin a u me he ka wâ hmetu hwaban je bong ae se hia. 2 Ve ha jekhon tavat a ödrin seven, eke, ame ne eit; anyin ae ca khanö u úkonguny ame he ka o eang hmeledrany. 3 Ame ne unöngöt je úlá ge we, me ame ta we ka hnyi hon kânâ: ke ame ne ta úö, ame ne ka hnyi hwaiöu, ame ne ka hnyi hwadrö, haba hna ta hnen úö, me ame he ka mokut hnyi dok eling. 4 Haba at ame tuö ang, e ame ca he ke belök; ke haba at ame tuö je úlá ame ca he ka menu. 5 E ca khanö u gethen deny ang, me úküen ta je jö hnyi hnyekon momo ae erkin; helâe e ca khanö u ta je huliwa anyin Khong at ame ányâ hia. 6 Hnyi hnyomakatu tâ ju hatungâm je hatong, ke hnyi sahac ca thawâ li hnyamâm: anyin ae ca khanö u únyi ame he ka kû, ame ne eang ame ne e, ke ame ne he ka tha so hia. 7 E hnathu e kese lany, ke so ka li emak he ka wâ seúnö. 8 Eke, ame ne môt at, me se hia ta je hunainy, me so e ame senyinâ

hna; ke so bi e so e ame únykúme je bong ae menekholom, anyin ame he ka se hia. Thatúnyi ta je únyi hia ame o.

9 Hidröu lö, senyin dö, u ka tiga but; ke hobâ thö hnyekom hnyi je bonginy ányâm hidröu, ke vheno thö je gethen deny hnyekom, me ta je únyi u je wâ hnen li emâkâm: ke khanö u thö a ame he Khong ka hum u can ta je únyi hia e ka hnyi hna owisa. 10 Anyin a wale, degec ut vec únyi hnyi hnyekom, ke úsâkâüö but me hulö: anyin ae thatúnyi úen wanakat me hmai.

HNYIMAKAN 12.

KE únykúme ju At a up u hnyi je bonginy ányâm hidröu, e tiga ca o ta je bong ae kong, me tiga ca hakekeny bi ta je huna wale u me he ka ha hnyin, ka habe, O ge me ca senyinâ hmetu e; 2 e ka tiga ca menekholom bi seúnö, me lany, me tehi, me ta je okhû, k' ame ca hmetu ta je úlá hwaban útainy we: 3 hnyi bong adre me he ka öbubuny hnyin tavat tuö uma, ke haba tavat hwege adre me he ka iyâü, ke haba tavat khin hwit adre me ca huliwa hmetu bi, anyin a ödra wakhalet biju, ke menekholom but tavat selat hnyi je mamalama, 4 k' adre me he ka hlöng je hwanuma eü hnyi gethen; e ka úhnyükong ut hwan khin hwit, ke ame he ka tot bi at hnyi ifuciny meno ame gâ, k' ame he ka sényin hia omomo hia adre hnyok ka khumöng; 5 eke, adre me he ka outen únyi ae görany, ke e bi eü hnyi gethen ta je únyi hnân outen; k' ame he saked ka vhong, k' ame he ka hmak ge wahamon, ke ba hmetu hna weny: anyin ame he at ka hnyi umen uma a nyiele balua, k' ame vheno gethen hnen tavat adre me hnyamok: 6 e ka tiga ca mou bi tö sileva, ke tiga ca hmouca kaia gol, ke tiga ca hmouca kaia hnyi an, ke tiga ca ok waengen hnyi taben köiö; 7 ke ame hmetu sesâ hnyikânâi, helâ me ehac, ke ame he hmetu hanu ka Khong at ame ham e. 8 Awe, haingen at khet, ka habe, E ti thatúnyi ke thatúnyi ta je únyi hia.

9 Ke haba khaca, anyin ae metâ at Khet, me e ame nâ tavat ge metâ; eke, e ame únykúme, me elelâm, me ip gaga ta je vejec ae se hia. 10 Haba at Khet ame elâm ta je hofuc ae úcú, ka ta je hofuc adre me sihnalimen hnyi wisa, wale je hofuc ae hnathu.

KHUMÖNG HWANYI SOLOMONA 1, 2.

11 Haba je hofuc hwan at ae metâ, me helâ me ûnyi hnân dô bolok, ke haba ta je hofuc hwan je homakan ta je ûkhacakôu, me helâ me je fao adre me ti ohmâ, a ham ge at a khaca a at tuô mamoe. 12 Ke walang khaca, nôkuk lö, kap ju hna nâ : e ba obiny bi ka hnôdra hna sihnalimen ta je tusi ae se hia ; ke ödra ka unô gânâ tusi, me ame sênynin dut anyin.

13 Walang obiny ûnyi e ; adre hia but löng hia : outen ju Khong ke vheno anyin ta je hnanyibu ; anyin a wale hanyemen ae bekhöt ge tavat hia. 14 Anyin ame he Khong ka hom ta je huliwa hia ka hnyi hna owisa, ke ta je ûnyi hia ae iyong, ame ne ta je ûnyi ae so, k' ame ne ta je ûnyi ae kong.

KHUMÖNG HWANYI SOLOMONA.

HNYIMAKAN 1.

KHUMÖNG ae beönua hwanyi Solomona.

- 2 E so e ame úcimhnyimak mönya ge je úcimhnyimakiny hnyimen :
Anyin ae so ânyâm ibetengiö hon waina.
- 3 E so bunen wakaco unyam ;
Ke haba iâm, me helâ me wakaco adre hingâlâ ;
Anyin a wale ame hnyok köu wahu.
- 4 Lili nya thö ; m' öhmun e he ka wadring hotom :
Than ame su nya ka hnyi je hnyeuleny :
Öhmun e he ka senyin me hobi u,
Öhmun e he ka ha gânâ ge ânyâm ibetengiö hon waina :
Adre me hnyok köu hnyi wisa.
- 5 Ta je wahuiny Jerusalema lö,
Iny hlit, k' iny hmanenang bi,
Helâ me je uma mano hnyi Kedara,
Helâ me je mano singi Solomona
- 6 Ca ö nya öbun, anyin a iny hlit,
Anyin ame li nya seünö.
Laku bai ödrin e hmönyidrin kõnya,
Ödrin e otilö nya he ka tuö je hnyeivine ;
Ke oge me ca tuö ik hnyeivine.
- 7 U na ha ju kõnya, u at oge me hnyok köu
Hnâm hna hân halem hnyin, ke dok u je omenâ hnyin hnyi jebigo :
Ieü gak bi a oge me he ka helâ me ame tubi hnyimak
Hakekeny je hnahat meno halen je lawaem ?

- 8 U at ae ti mec hon omomo lö, a ne ca khanö u bi,
Vheno thö je hna okca hnen je hnahat meno,
Me hân je lakon halem je got hnyi hnyeivine tavat tuö mamoe.
- 9 Oûnykûmik lö, inya oge me oúcú u
Me hors hnyi kariota anyi Farao.
- 10 E hmanenang li wahicâm ge je leünen adre hwâwâ,
Ke nyem ge sawakiny.
- 11 Öhmun e he ka ânyâ hobi köu je hna hwâwâ gol
Ke je fao sileva.
- 12 Than ame tiga han,
Me ame bo so anyik nardo.
- 13 Bwiny muro kõnya oûnykûmik
At ame mokut hnyi úlaik.
- 14 Vongon kofera kõnya oûnykûmik,
Hnyi je hnyeivine Eni-gedi.
- 15 Wâ bi, u hmanenang oûnykûmik ; wâ bi, u hmanenang ;
Li emakâm helâ me li biny.
- 16 Wâ bi, u hmanenang oûnykûmik, eke, me mec :
Ke hát hnötu hna mokut.
- 17 Je arasi je venyâiny umötu uma,
Ke je kóp je dáiny.

HNYIMAKAN 2.

INYA ang obedilainy Sarona,
Me sosaniny je hwatapkölu

- 2 Helâ me sosani hnyi je úö ae údedö,

- Heläe oúnykúmik unyin wahu.
- 3 Helä me i okhöiö hnyi je úöiny hnyot,
Heläe oúnykúmik unyin wahidröu.
Oge me laba ju hnyi hmenon me gan
senyin,
Ke hnebwia anyin wan hnyi hnyimök.
- 4 E ame hum nya ka hnyi uma adre me
bijeú hnyin,
Ke haba anyin boúdila huk, me ibe-
tengiö.
- 5 Thawo nya ju ge je hmata a wan vine,
okahwö nya ju ge je okhöiö :
Anyin a oge me moko ibetengiö.
- 6 Hunen bök hnyamen a meny,
K' ame köt nya ge hnyamen a metán.
- 7 Wahluiny Jerusalema lö, oge me khe-
manyin köbun,
Ge je zebi me je ailainy hnyot,
M' öbun e ca he ka bwebwelä me ohmakä
ibetengiö,
Ke ne o but e ame beweny.
- 8 Hwan oúnykúmik ! wä bi, e ame he jem,
E ame utut hon je bucen, me gä hon
je hut.
- 9 E úcü oúnykúmik me zebi me nokon
aila :
Wä bi, e ame tot hoton hagitin hak,
E ame selat hnyi je mamalama,
E ame omanená e bi hnyi hna pewan.
- 10 Ame fuc dö oúnykúmik me ha kõnya,
ka habe,
Todrö, oúnykúmik, hmanenangik, me
he jem.
- 11 Anyin a wä bi, e hia but hnyeun,
A um dö we, ke hia but ;
- 12 E manen dut je vongon úö hnyi hnyei ;
K' ame o but úen ame cük hnyin je
meno ame gä,
K' adre me löng úkukuiny biny hnyi
ita hnyei ;
- 13 Ame he but ka metu je wan meta ae
hät,
K' ame vhöng je vine,
Me obosö hnyei.
Todrö, oúnykúmik, hmanenangik me he
jem.
- 14 Biny a halek lö, u hnyi khekheiny kic,
hnyi dok ae nedrong hnyi hwatap-
kölu,
Iny na wä ju hnyimákám, iny na löng
ju ifucám ;
Anyin ae kese hwâm, ke hmanenang
hnyimákám.
- 15 Kät do hobi kötin ta je alope, wale je
alope ae úhnyúkong wale adre oko-
ngoä je vine ;
Anyin ame vhöng anyitin je vine.
- 16 Anyik oúnykúmik, ke inye bi a anyin.
E ame úhalin hnyi je sosani.
- 17 Hwiö thö, oúnykúmik, me u me helä
me zebi me nokon aila
Hon je buceniny Bether,
Ke ne o but menyikiny bong, ke ame he
but je hmenu.

HNHYIMAKAN 3.

- I** NYA hon hnök hna mokut hnyi hnyi-
nghet oge me elám at oge me hnyok
káu :
- Oge me elám, ke oge me ca wä bi.
- 2 Oge me he ka tot walang ang me vheno
taun,
Hnyi je gethen me je hna cit gethen,
Oge me he ka elám at oge me hnyok
káu :
- Oge me elám, ke oge me ca wä bi.
- 3 Ame ö nya hnen tavat tue tavat adre
me vheno taun :
Me haingök, ka habe, Öbun e wä at oge
hnyok káu ?
- 4 Oge me he úhek unyidra ke tiga ca
sákäü,
Me oge me wä e at oge me hnyok káu :
Ke oge me kät e, me ca hna hmetu bi,
Ke ne o but o ge me hom e ka hnyi
uma umö bai,
Hnyi hnyeuleny at ame erkini nya.
- 5 Je wahluiny Jerusalema lö, o ge me
khemanyin köbun,
Ge je zebi me je ailainy hnyot,
Ca he öbun ka bwebwelä me ohmakä
ibetengiö,
Ke ne o but e ame weny.
- 6 Ie at ang ame o únyi hnyi hnyeuba
helä me hai ame sä göranyai,
Adre me obosö ge muro me libano,
Me je únyi adre me oamamá anyin at
úcü omjeú ?
- 7 Wä bi hna mokut hnö Solomona :
Ödrin sikste tavat hwege igigilö e,
Hanen tavat hwege hnyi Isaraela.
- 8 Ödrin hia ödrin e hok hele vat, adre n'
- ödrin he ka vat :
Adre ve weikä anyidra je hele vat hnyi
je jevadrin,
Can ot hnyi hnyinghet.

KHUMÖNG HWANYI SOLOMONA 4, 5.

- 9 Haba Solomona than, e ame ânyâ tap
hnân sam
A utöiny Lebanona.
- 10 E ame ânyâ je can sileva,
Ke haba taben, me gol, ke taben lap
mano ae udrudrà,
K' adre omecâ e ge ibetengiö,
Ûnyi ge wahluiny Jerusalema.
- 11 Wahluiny Ziona lö, he th' öbun ka ö
Solomona than,
A bicâ korona wale hnen hinyen hna
okorona e hnyi bonginy ûkôcö,
Ke hnyi bong e ame senyin hnyi
hnyekon.
- 9 U je hia but venâu hnyekuk, waek,
öiök ;
U je hia but venâu hnyekuk ge emâkâm
a khaca,
Hnen kinyâm sawakiny a khaca hnyi
nyem.
- 10 E ti mec ânyâm ibetengiö, waek, öiök ;
E beönua ânyâm ibetengiö hon waina,
Me bunen ânyâm wakaco hon ta je üö
hia ae bo so.
- 11 Öiök lö, e lup esongodâm helâ me hani
adre tiga ca hlec :
Hani me debai eü hnyi hmelen bo-
hmâm ;
Ke haba bunen ânyâm ûkhaü me helâ
me bunen Lebanona.

HNYIMAKAN 4.

- W**Â bi, u hmanenang önykûmik ; wâ
bi u hmanenang ;
Helâ me li biny li emâkâm hnyi hnyin
hna tube hnyimâkâm :
E úcú leúnen bâm me hnabat got,
Adre me mokut hnyi bucen Gileada.
- 2 E úcú je nyom me hnabat mamoe adre
me tep subâ leúnen,
Wale adre me o únyi hnyi hna sou ;
Ke hu gadra hia li lakon a li húnye,
Ke ba at ae hlöuhlöu unyidra.
- 3 E úcú li esongodâm me tö ae dra,
E hmanenang hnyimâm :
E úcú halelöüâm me ong rimona
Hnyi hnyin hna tube hnyimâkâm.
- 4 E úcú nyem me uma ae beü göranyai
umö Davita waleji adre op hnân uma
hip omjehen vat,
Adre me uhno je bec a wan thauzan
hnyin e
Je bec anyin tavat hwege hia.
- 5 E úcú li bâsâm me li lakon zebi a li
húnye,
Ödru me tha han tot hnyi je sa sosani,
- 6 Oge me he ka he ka hnyi buceniny
muro,
Me hutiny libano,
Ke ne o but hnyi sahac e ka beü but je
hmenu.
- 7 Önykûmik lö, u hmanenang hia
E ba hnyikongon hnyi unyâm.
- 8 Öiök lö, he thö jem mönya úheny
Lebanona,
He jem mönya úheny Lebanona :
Selat dö únyi hnyi hon Amana,
Ûnyi hnyi hon Senira me Heremona,
Ûnyi hnyi je opiny je liona,
Me je bucen anyin je lepat.
- 12 Utkânâ adre hlöng homagöuleny, waek,
öiök
An adre hlöng, pupua adre okeceâ
haten.
- 13 Je rimona tha e me je wan ae únyi
hnathu je khûâm ;
Kofera me je úöiny nardo,
- 14 Nardo me keroko,
Kane me kinamo, tha e me je úöiny hia
libanu ;
Muro me aloe, me je hing üö ae bo so.
- 15 Pupuainy taun,
Pupuainy köiö möt,
Ke je di únyi Lebanona.
- 16 Ang hnyi hwadrö lö, hmak dö ; ang hnyi
hwaïöu lö, aiö u ;
Bwang ut ka hnyi ik hnyei, me me bon
je üö ae bo so.
E na o ju önykûmik ka hnyi iny
hnyei,
Me me an wan haleny je üö ae únyi
hnathu.

HNYIMAKAN 5.

- I**NYA oge me o ka hnyi ik hnyei, waek,
öiök :
Oge hia but auk anyik muro, ke anyik
je üö ae bo so ;
Oge me an anyik hani adre ca hlec tha
e me hani ;
Oge me ijem anyik waina me debai.
Je lahanök lö, han ju ;
Öbun laönykûmik lö, ijem gâná thö.
- 2 Inya oge me mokut, ke hmak bi hnye-
kuk :
Wale ifucin önykûmik ame kokot,
haingen, ka habe,

- Hanök lö, oúnykúmik, halek biny, beö-
nuaik khöng ut könya :
Anyin a menyik ut bök ge hau,
Ke leúnen bok ge dân hau hnyi lit.
- 3 Oge me uny anyik ukot ; oge ma kámáu
ka kháva hmetu ?
Oge me hneü li cak ; oge ma kámáu ka
okongoá hmetu ?
- 4 Oúnykúmik ame iná hnyamen hnyin
omokuiny hwanuma,
Ke haba hnyekuk ame tenge gan.
- 5 Me oge me tot he ka khöng ka oúnykú-
mik ;
K' ame khula but muro únyi hnyi
hnyamök,
Ke muro ae lup únyi hnyi otbanyök,
Ka hnyi hnyiban ohmáiny.
- 6 Oge me khöng ka oúnykúmik,
Ke oúnykúmik ame hia but hwiö me
he.
E ame fuc eja ke ame sényin hnyekuk :
Oge me elám e, ke oge me ca wá bi ;
Oge me hawá e, ke e ame ca iéü könya.
- 7 Adre me ö nya tavat tue, tavat adre me
vheno taun,
Adre me kuc nya, me oge me aat dö ;
Haba tavat tuö hna up haginy adre me
húgúná gak únyi hnán tube hnyi-
makök.
- 8 Je wahluiny Jerusalema lö, inya oge me
ha hwegiá köbun, ka habe, Öbun e ne
wá oúnykúmik,
Thumeto thö e, a oge me moko ibe-
tengiö.
- 9 Momo ae hmanenang hon ta je momo
hia lö,
Hawa, e nua oúnykúmám hon ta je
oúnykúmíny at ?
Iéü oúnykúmám hon ta je hna únykúme,
Anyin a u me ha hwegiá helâe köhmun ?
- 10 E hau me dra oúnykúmik,
E beönua hon ta je ten thauzan.
- 11 Haba ban me helâ me gol ae hma-
nenang,
Haba leúnen ban, me hlau, ke hlit helâ
me oreba.
- 12 Haba li emakan me helâ me li biny
hnyi baten wagewe ;
Adre hneü ge debai, k' adre ohmá wia.
- 13 Haba li wahicen me helâ me sa basama,
me je úö ae bo so :
Haba esongodiny me helâ me li sosani.
ame khula muro ae hnebwia únyi
hnyin.

- 14 Haba li hnyamen, me li ötru gol adre
ohmá berulo hnyin :
Haba unyin, me nyon elefan adre huli-
wan, ke adre tube ge safairo.
- 15 Haba li can, me li hmolom a veto ae
hau adre otilá hnyi taben'gol ae so :
Haba hmainy me helâ me Lebanona, e
hmanenang helâ me arasi.
- 16 E hnebwia but hnyimen ; eke, e ti hma-
nenang hia.
Wahluiny Jerusalema lö,
Wale oúnykúmik, ke wale hanök.

HNYIMAKAN 6.

- M**OMO ae hmanenang hon omomo hia
lö,
Ame he kâ oúnykúmám ?
Ame saú kâ oúnykúmám
M' ötin e he ka tha elám e ?
- 2 A he but háang oúnykúmik ka hnyi
iny hnyeí, ka hnyi ta sa basama
He ka úhalin hnyi ta hnyeí, me aoc je
sa sosani.
- 3 Anyik oúnykúmik, ke inya bi anyin
oúnykúmik :
E ame úhalin hnyi je sa sosani.
- 4 Oúnykúmik lö, u hmanenang helâ me
Tireza,
Ke mec helâ me Jerusalema.
Hnán outen helâ me utbavat k' adre
hom je bouðila.
- 5 Wia thö li emákám gak,
Anyin a oge me ngá but gadru.
E úcü leúnen bâm me hnahat got,
Adre mokut hnyi baten bucen Gile-
ada.
- 6 E úcü nyom me hnahat mamoe momo,
Adre me o únyi hnyi hna sou ;
K' ödra hia adre me hnöku húnye,
Ke ba at ae hlöuhlöu gadra.
- 7 E úcü li halelouám me ong rimona
Hnyi hnyin únyi hnán tube hnyimâ
kám.
- 8 Ödrin sikste ta je momo than, ke eite
anyidrin je momo
Ke ca hnán bi aú wahlu.
- 9 Halek biny, a beönuaik, e khaca thibi
E thibi hake nokon hinyen ;
A oúnykúmíny momo at a hnokoá e.
Ame wá e hnen wahlu, me adre me
haisoá e ;
Je momo than, me anyidra je momo
adre me oganá e.

- 10 Ie momo e, ame selat helâke me haolany,
Ke e hmanenang helâ me tehi,
Ke alai helâ me seûnô
Hnân outen helâ me utbavat adre hom je boûdila ?
- 11 Oge me he ka hnyi ta sa egozi,
He ka wâ ta je únyi ame kû hnyi hnyi-göulen bucen,
Me he ka wâ ame ne kû hlau vine,
Me vhöng rimona.
- 12 Ke tiga ca khanö nya bi, haba hnyekuk ame ip nya
Unyin je kariota anyin je aten ik hnyei a je taben.
- 13 Hmetu ju, hmetu ju, at Sulami;
Hmetu ju, hmetu ju, m' öhmun e he ka ö u.
- Öbun e he ka wâ at Sulami geú,
Helâ me li deö biâ ?

HNYIMAKAN 7.

- M**OMO nokon than lö, shaiba ge hmanenanginy li cam hnyi li taben hnyeúca !
E úcú hna hjúâ jevam me sawakiny ae únyi hnathu,
Hna huliwan hnen at huliwa ae metâ.
- 2 Haba bibikâm me úcú me únya kaia ae wathelaba,
Ae unöngöt ge waina adre úhaniken :
Haba hnyekom, me úcú me thi hwit,
Adre theibâ ge sosani.
- 3 E úcú li básâm me li nokon zebi
A li húnye.
- 4 E úcú nyem me uma ae beú göranyai a nyon elefan ;
E úcú li emâkâm me li köiöiny Hesebona, hnyi homagöuliny Bathe-rabim ;
E úcú hnyingöiâm me tap ae beú göranyai e Lebanona,
Wale a cicö Damaseko.
- 5 E úcú bâm me Karemela,
Ke úcú leúnen bâm me únyi ae udru-drâ ;
A hnok ut than ge je leúnen.
- 6 Shaiba ge ânyâm hmanenang me mec Oúnykúmik, hnân senyiná !
- 7 E úcú ibetiâm me pama,
Ke úcú li básâm me li de vine.
- 8 Haingök, Oge me he ka ölö hnyi pama,
Oge me he ka kât je lan :

- Ke ame he li básâm ka helâ me li de vine,
Ke úcú bunen homenâm me je okhöiö ;
- 9 Ke helâ me waina ae so hnyimâm,
Wale adre me omi uto hobi kâu oúnykúmik,
K' ame ofuco li esongodiny at ame mokut.
- 10 Inya a anyin oúnykúmik,
Ke e ame weny inya.
- 11 Oúnykúmik lö, aiö u, ötu me he ka hnyi utkânâ ;
Ötu me he ka laba hnyi je taun ae úhnyúkong.
- 12 Ötu me he ka vesâ ka hnyi je hnyei vine ;
Me wâ ame ne vhöng vine, ke wa je ong vine,
Ke vhöng rimona :
Oge me he ka betenge gam eling.
- 13 E so bunen je dudai,
Ke ta je wan üö ae so hnyi homagöuleta,
a teb únyi ke but ehac,
Waleji oge ip hobi köu, oúnykúmik.

HNYIMAKAN 8.

- U**NA úcú ju me hanik,
At a ijem li basi bai !
Iny ka ö u thö ehele, me oge me he ka ucimhnyimak möu ;
Eke, e ba at ame he ka húkotiö nya.
- 2 Oge me he ka su u me hum u ka hnyi uma umö bai,
At ame he ka nö nya ;
Oge me he ka habelâm ge waina ame bo so,
Dân anyik rimona.
- 3 Taben bök benyin a meny,
Ke e ame he ka köt nya ge benyin a metân.
- 4 Ta je wahluiny Jerusalema lö, inya oge me ha hwegiâ köbun,
Ca he öbun ka bwebwelâ, me ohmâká ibetengiö,
Ke ne o but e ame weny.
- 5 Ie at e, ame o úheny hnyi hnyebuba,
Ame he cimâ oúnykúminy ?
- Oge ohmakö u hmelen okhöiö :
Waleling a vec hnyin hnyekon hinyâm gam,

ISAIA 1.

- | | |
|---|--|
| <p>Waleji e ame hnöku u, hnyi nhen hna
vec hnyekon gam.</p> <p>6 Ip nya ju eü hnyi, hnyekom helä me
hna ohmä haten, helä me hna ohmä
haten hnyi benyâm :
Anyin ae hmä ibetengiö helä me mok ;
Ke haba ciä, e ame bevecä helä me
erkemok :
Haba bählan, me helä me bählan meic,
A bählan bi anyi Ja.</p> <p>7 E ca khana köiö ae gau he ka ume
ibetengiö,
Ke ca khana je wadutö he ka odilä e :
A ne he ke at ka ham ta je omjeüiny
hia umen uma me hwaban ibetengiö,
Me ame ca he bi ka ücü.</p> <p>8 E hu hanihmun ae ühnyükong,
Ke ba bi haten li basin :
Ieü ate me he ka änyä hobi käu hani-
hmun
Hnyi bong adre me he ka ühnenamö
gan ?</p> <p>9 Ame ne hak veto adre op, hlu e
Me ate me he ka op hon e bi hak sileva :
Ke ame ne hlinginy hwanuma,</p> | <p>Me ate me the ka tube e ge je esöiny
arasi,</p> <p>10 Inya ang hna up veto, ke li basik helä
me li hhabä hon
Ke iny ücü käu me at adre betenge gan.</p> <p>11 E hu ga Solomona hnyei vine hnyi
Baala-hamon ;
E ame hna hnyei vine ka tavat tue ;
Hamödra he ka ve hom je ong sileva a
wan thauzan hwaban je wan.</p> <p>12 Haba ik hnyei vine, a ik hnyei, e bi
hnyi hnyimakök :
Solomona lö, u ma he ka hom wan
thauzan
Ke tu haded hobi käu tavat tuö je wan.</p> <p>13 At ame labä je hna belök lö,
Haba je lawaem adre me tevehlöng
ifucâm :
Ö u hnö nya he ka hnyi löng e.</p> <p>14 Oünykümik lö, mweimwei thö,
Ke u me he ka helä me ziba me nokon
aila
Hon je bucen, dok ae hu hnyin je utö
ae bo so.</p> |
|---|--|

TUSI ISAIA A PEROFETA.

HNYIMAKAN 1.

HNA wä hnö Isaiä nöku' Amosa, wa-
leji e ame wä ge Judä me Jerusa-
lema, hnyi je bong bongu Uzia, me Jotham,
me Ahaza, me Hezekia, a je thaniny Juda.

2 Drany lö, löng ju, ke hmeledrany lö,
tevehlöng ju, anyin a Iehova ame hia but
fuc me ha, ka habe, Oge hia but hat me
tuö je wanakat, ke ödra bi adre me ükhin
fuc mönya. 3 E khana but bolok at a
haleny e, ke e khana but asina taben han
ünyi ge tuhan : ke ca khana Isaraela bi,
k' ame ca ünyküme bi lakeik. 4 Ekölö
gam hnyei ae kong hwakecin, tavat ae
hmak ut ge hulö, mäträniny tavat adre
änyä monu, je lakon adre he hwali: adre
hia but hna degeci Iehova, me hükötiä
Kapi Isaraela, adre me atkanyua but me
hmetu hmetu but. 5 Anyin a ieü adre me
he hmetu ka kuc öbun, me tiga bihanen

bala hnöbun hna ükhin fuc? Ame mok
hia ban, ke sēnyin hia hnyok. 6 Hwän
hnyi hnyeüca ke ne o but hnyi ban, e ba
dok ae so hnyin ; ke je aat, me je khibi,
me je dok ae han : adre ca hia but ometo,
me lan, me omenyikä ge wakaco. 7 A ba
but wanibun hnyei ; a hia but thong
anyibun je taun ge meic ; ke haba könöbun
känä, me ame an e nhen ta je atkanyua
hnyi hnyimaköbun, me ba wan, heläke adre
hagutä degecä hnen je atkanyua. 8 Ke
adre hna degecä wahluiny Ziona, helä me
uma hwaelu hnyi hnyei vine, ke helä me
uma tue hnyi hnyin ta sa kokuma, ke helä
me taun adre thelöng ut. 9 Haba Iehova
tuhan sabaoth, a ne ca hia but bi kolon ae
ühnyükong thibi köta, me ate me he ka
helä me Sodoma, me ate me he ka ücü me
Gomora.

10 Öbun je taben hnyi Sodoma lö, löng
ju hofuc ho Iehova ; at Gomora lö, teveh-

löng ju ka hnanyibu anyin Khonguta. 11 Haingö Iehova, ka habe, Hnân eü kõnya anyibun ta je hut ae se hia? oge unöngötö ge je hudiny leü a je mamoe бага, me pipikhenyainy je meno adre hat; ke oge me ca senyin ge dren ta je bolok, me lakon mamoe, me je got бага. 12 Ke öbun ka he ka manen hnyi hnyimakök, me ia kun' öbun he ka uto je hnyeulek? 13 Ca hom hmetu bi je hut ae ünyi baü; ke ikiki kõnya je utö ae bo so; ke haba je tehi ae manen, me je sabath, me hna hawâ je úkhacaköu, E ca khand nya he ka hota hulö me úkhacaköu ae ünyi hnathu. 14 Ke oge me ikikiâ je tehibun ame manen, me anyibun je bijeü adre thu: e hmak kõnya je ünyi e; ke oge me hücö bi ka hom. 15 Ke öbun ka he ka hinöbeny, me oge me he ka ikhâlâ li emakök gabun: eke, öbun ka he ka osehia hic, me oge me ca he ka löng: a unöngöt je hnyamöbun ge dra. 16 Sou but, okalaöti öbun; degec ut anyibun ta je huliwa ae kong hnyi hnyimakök; soju hna mádrâ hulö: 17 ná thö he ka ányâ so; elâm dö hna owisa, betenge ge at adre ovecâ, owisa at ae ba kamen, ivinö thö hobi kau safac.

18 Haingö Iehova, ka habe, Ai öbun walang ang, ate me he ka tha úsabö: eja ke ne a ne helâ me dra vec anyibun ta je hulö, me ame he ka hau bi helâ me kiona; ke ame ne dra helâ me dila, me ame he ka helâ me leünen mamoe. 19 Öbun e ne hmehmela me löng, me öbun e he ka an so ünyi hnyi kânâ: 20 ke öbun e ne hücö ke úkhin fuc, me adre me he ka ön öbun ge hele vat: anyin a hia but ha ge hnyimö Iehova.

21 Ekölö, momo hnyi gethen dut taun hnathu! waleji ae unöngöt ge wisa! ame laba ehac hnyi hwakecin ae wisa, ke walang ang bi tavat úhlingö. 22 E kânâ but ányâm sileva, k' adre me úhaniken ányâm waina me köiö. 23 Tavat úkhin fuc je tuhâm, ke lahanen tavat venöu; ödra hia thithö adre me lnyok ta je bwihlany, ka hnu hoton je hwaban: adre me ca owisa hobi kâu at a mokcu kamen, ke adre me ca oâ ködra hna ivinö hobi kâu safac.

24 Anyin a wale ame ha Than, Iehova tuban sabaoth, Maniny Isaraela, ka habe, Awe, oge me he ka omenö nya ge tavat hükötiö nya, oge me he ka bi hwaban ka je iwahnaihmiony mönya; 25 ke oge me he ka wia hnyamök köu, me ti thong degecâ kânâm kânâ, me hom hia ányâm

dron fao: 26 ke oge me he ka ham hmetu köu tavat owisa, helâji me ehac, me je at úhnenamö belâ me hnyi hwân: hwaban e adre me he ka hwenyi iâm, Taun ae wisa, me taun ae hnathu. 27 Adre me he ka omeli Ziona ünyi ge hna owisa, me je laten adre hmetu kâu ünyi ge hwakecin ae wisa. 28 Ke ame he ka tha hnaúhangö tavat hanyâüâ me tavat ae kong, k' ame he ka hia but tavat adre me hna degeci Iehova. 29 Ke adre me he ka hmehma ge je iwajo öbun e weny, ke öbun e he ka monumonu can ta hnyeü öbun e úca. 30 Anyin a öbun e he ka helâ me iwajo ae meleca lan, me helâ me hnyeü ae ba köiö hnyin. 31 Ke ame he at hwege ka helâ me wakunenu, me anyin huliwa helâ me wahleúhleuiny meic; ke adre me he ka tha thong degeci ödra, ke ba at ame he ka ume.

HNHYIMAKAN 2.

HOFUC ame wâ Isiaia nöku Amosa ge Juda me Jerusalema.

2 Hnyi ta je bong a biliny adre me he ka otethmä buceniny uma kap umö Iehova hon ban je bucen, ke adre me he ka ogöranyâ hon je hut; ke ame he ta je hnyeü hia ka ok ut kâu. 3 Ke ame he ka o ta je hnyeü ae se hia me ha, ka habe, Ai öbun me ötin e ölö thö ka hnyi bucen anyi Iehova, ka hnyi uma umen Khongu Jakob; ke e ame he ka n' öta ge deny je gethen, ke ate me he ka vhenö je gethen ünyi gan: anyin ame he ka he but hnanyibu úheny Ziona, me hofuc ho Iehova úheny Jerusalema. 4 Ke e ame he ka owisa ge ta je hnyeü, me ná je hnyeü ae se: ke adre me he ka kokot anyidra je hele vat, me me hnân bi hwiö kânâ, me dödra je ö hnân je bálet adre dela kâu vine: ame ca he ke hnyeü ka nang hele vat ka kot ke hnyeü, ke adre me ca he hmetu bala he ka ná vat.

5 Lap anyi Jakob lö, ai öbun, ate me he ka vhenö melam anyi Iehova. 6 Anyin a u je degec lakem, a lap anyi Jakob, anyin a ödra unöngötö ge je hwakecin ünyi jemeiö, ke ödra tavat bibihwakecin helâ me at Filisiti, k' adre me úkhöü hnyam me lakon je atkanyua. 7 Ke unöngötö idra hnyeü ge sileva me gol, ke ca hnân bi aü omjehedra ta je omjeü; ke unöngötö idra hnyeü ge ta je hors, ke ca hnân bi aü anyidra je kariota. 8 Ke unöngötö idra hnyeü ge ta je idola; k' adre me khudrung ka huliwâ anyin ta je hnyamödra, wale adre me ányâ

ge je banyödra. 9 Ke ame nom ju hoümonu, ke ame hnyikáná but at ae únyi hnathu : anyin a wale u me ca he ka kot degecá anyidra hulö. 10 Didrö hnyi hnyin kic, ke ikölö u bi eü hnyi káná, únyi ge hna outö Iehova, ke únyi ge anyin hmanenang ae mec. 11 Adre me he ka ohnyikáná hnyimakan tavat adre me begörany, ke adre me he ka hom úhnyükongo tavat adre me bi gan, ke adre me he bi ka oganö Iehova thibi hnyi bong e. 12 Anyin ame he ka o ke bong bongu Iehova tuhan sabaoth, ka hnyi hon tavat begörany me bi gan hia, ke tavat hia adre me ogán' ödra ; me adre me he ka ohnyikón' ödra : 13 ke hon je arasiny hia Lebanona, ae görany ke beü ; ke hon je iwajoiny hia Basana ; 14 ke hon ta je bucen hia ae beü, ke hon je hut hia ae görany ; 15 ke hon je hnabá hia ae beü, ke hon je hna up hak veto ; 16 ke hon je huiny 'hia Tasesa, ke hon ta je únyi adre tretrau hia ae kese. 17 Ke adre me he ka hom úhnyükongo tavat adre me begörany, k' adre me he ka ohnyikáná tavat ae bi gan : ke adre me he ka oganö Iehova thibi hnyi bong e. 18 Ke ame he ka hia hia but ta je idola. 19 K' ame he ka dit tavat ka hnyi hnyin ta je op hnyi je kic, ke eü hnyi hnyin ta je uthankonginy káná únyi ge hna outö Iehova, ke únyi ge anyin hmanenang ae mec, hnyi úen e ame he ka todrö ka jijingá hwegiá hmeledrany. 20 Ke hnyi bong eling ame he tavat ka degec anyidra je idola sileva, me anyidra je idola gol, waleji adre me tibet hnán hic ködra, adre me he ka degec ka je afora, ke ta je obúbú bi ; 21 me me dit ka hnyin je esopiny kic, ke je khekheiny je kic ae újejong, únyi ge outö Iehova me anyin hmanenang ae mec, e ka todrö ka jijingá hwegiá hmeledrany. 22 Soju öbun labageju ka at, ame mená ge li hnyingöiny : anyin a hnán eü he ka únyküme kaü ?

HNYIMAKAN 3.

ANYIN a wá bi, haba Than Iehova tuhan sabaoth, ame hom únyi Jerusalem me Juda ke ci me ke ci, wale je ci areto hia, me je ci köiö hia ; 2 me at hwege, me at vat ; me at owisa, me perofeta, me at bi khong, me hingat ; 3 me taben ka fifte, me at lung so, me obongon, me at tretrau ae metá, me at ae khana khet. 4 Ke oge me he ka ham ta je wanakat me hnán tubödra, ke ame he ta je mendreng

ka musi ödra. 5 Ke ame he tavat ka öüveciköu, ke at me ke at : ame he wanakat ka bi gan ka hingat, me hoümonu ka je than. 6 Ke ame he at ka kát liamekeiny mē hnyi hnyaban kamen, me ha, ka habe, E hu úkhaúâm, u me he ka tuböhmun, ke u me he ka musö monu ang : 7 ke haba hnyi bong eling e ame he ka hongot göranyai, me ha, ka habe, Oge me ca he ka bi anyin, anyin ae ba jeú me úkhaú hnyi umök uma ; ca he öbun ka otölö nya bi hnán than thaniny hnyei. 8 Anyin ame hangá but Jerusalem, ke Juda ame ü : anyin ae iwahnaihmióny me Iehova je bohmödra me anyidra je huliwa, he ka ohinyá li emakan ae hmanenang. 9 Ame omanen' ödra hnen ta je hnyimaködra ; ke adre me omanená anyidra hulö helá me Sodoma, adre ca ikhálá bi. Ekölö ge hanudrin : anyin adre me hia but bi hwaban hulö ködra bi. 10 Ha thö ka at ae wisa hwa-kecin, ka habe, ame he ka hu so gan ; anyin adre me he ka an wan anyidra huliwa. 11 Ekölö ge at ae monu ! ame he ka hu konggan ; anyin adre me he ka ham káu hwaban li hnyamen. 12 Ke haba lakeik, ame sed' ödra hnen je wanakat, ke ame musi ödra hnen je momo. Lakeik lö, a omonu u hnen tavat adre me su u, me ohia dem ta je gethen. 13 Ame todrö Iehova he ka ivinö, e ame tot he ka owisa ta je hnyei. 14 Ame he Iehova ka he me owisa ka wahingatiny lakeiny, me latuhödra ; ka habe, Öbun e hia but an hia hnyei vine ; ke eiö hnyi umöbun je uma ta je únyi adre hügúná ge tavat ae theduoc : 15 ke ieü gabun öbun e okongoá lakeik, me omomono hnyimakan ta je theduoc ? haingö Iehova tuhan sabaoth.

16 Ke ame ha Iehova, ka habe, Can anyin ame hop wahluiny Ziona, k' adre me he me öbeúá je nyidra, ke iyawö li ecmak, ke he hop, ke ocuha je omakhmäiny cadra : 17 anyin a wale ame he Than ka kot waben je bodra ge oholök, k' ame he Iehova ka omanená je unyidra. 18 Ke haba hnyi bong eling, me ame he than ka hügúná je mecin je ohmakhnainy je cadra, me je boert, me je omjehedrin e úcü me ong tehi ; 19 me je únyi adre ohima, me je waen, me je únyi hnán tubi hnyimak ; 20 me je hnabecin, me je omjehen li cadra, me je wen hnyok, me je kaia hnán hnulá, me je ong khong ; 21 me je wen banyen, me je oturu hnán hnyingöidra ; 22 me je úkhaú ae hmanenang, me je úkot, me je mano hnán

tube, me je tang ; 23 me je ong uselat, me je lino ae úhnyúkong nân, me telenuiny ban, me je úkhaú ae halelöü. 24 Ke ame he ka hu bebong hwaban bo so ; ke tö ae gan nân, hwaban wen hnyok ; ke hadreú, hwaban hna theibâ ban ; ke hnamöc a mano ae gan nân, hwaban úkhaú ae laú ; ke delâ, hwaban hmainy hnyimak. 25 Ke ame he je obaga unyâm ka ta ge hele vat, ke tavat hwege bi hnyi vat. 26 K' ame he je homagöuleny ka tenge me hlöuhlöu ; ke e ame he ka laba eú hnyi kânâ ke ba at unyin.

HNYIMAKAN 4.

KE hnyi bong eling ame he ta momo a seven ka kât бага a khaca me ha, ka habe, Öhmun e he ka an ö'hmun bi jeú, ke khavâ anyihmun bi je úkhaú : haba wehmun thibi a u me ip iâm huhmun ; m' u ma ohia but hna haikongu öhmun.

2 Hnyi bong eling ame he ka hmanenang me mec hanö Iehova, k' ame he ka so me kese wan kânâ ka at Isaraela tavat adre kec möt. 3 Ke adre me he ka ha, me kap kolon hnyi Ziona, me at ame laba biju hnyi Jerusalema, wale tavat hia thithö adre tha sihnalime me tavat ae möt hnyi Jerusalema : 4 e ka hia but Than hneú ikikiny wahluny Ziona, me kot degecâ dren Jerusalema únyi hnyi wanben e hnen homenáiny owisa, me homenáiny kahwa. 5 K' ame he Iehova ka op hnyi ta je hnyaban hia hnyi bucen Ziona, me hnyi je úkhaca-köuiny e, úlá me hai hnyi lany, ke báhlân meic ame ubáhlâ hnyi hnyinghet : anyin ame he ka hu únyi hnân tube hon hmanenang hia. 6 Ke ame he ka hu ama menâ hnân hwaelu hnyi lany can kahwa, me hnân lubaduöng me nedrong ge weneú me we.

HNYIMAKAN 5.

INY bekhumöngö ka ti öúnykúmik khumöng ge öúnykúmik ge iny hnyei vine. E hu ge öúnykúmik ehac hnyei vine hnyi hutiny kânâ ae hosö : 2 ke e ame seú igigilö, me hlo je vetoiny, me tä vine soreka hnyin e, me otilö uma hnân belök wanben e, me si taben hlic vine hnyin minya : me e ame lubahingen he ka wa wan vine, ke ame wa bi wan vineiny hnyot. 3 Ke walang ang öbun tavat öbun e laba hnyi Jerusalema, me at Juda, öbun na owisa thö

könya me ik hnyei vine. 4 Ieú ae khan' ödra ányâ hmetu hnyi ik hnyei vine a oge ca hia but ányâ hnyin e? oge me halubahingen he ka wa wan vine, ke ieú ame wa wan vineiny hnyot gan? 5 Ke oge me he ka omanená walang ang köbun únyi oge me he ka ányâ hnyi ik hnyei vine : oge me he ka hom degecâ hagny, m' adre me he ka an dö e ; oge me he ka hagutâ hagny, m' adre me he ka uto but e : 6 ke oge me he ka öúnyibauâ e ; ke adre me ca he ka ányâwia me jien ; ke ame he ka kú hnyin e je iwadekong me watetaföcö : ke oge me he ka húna ka je úlá me me ca he ka ta we káu. 7 Anyin a hnyei vine i Iehova tuhan sabaoth lap anyi Isaraela, ke haba tavat Juda haleny uö ae so : ke e ame elâm hna owisa, ke wâ bi hna ovecâ ; k' ame elâm hwakecin ae wisa, ke wâ bi hwan tenge bi.

8 Ekölö ge tavat adre me bi hanen ke uma ka ke uma, ke bi hanen ke utkânâ me ke utkânâ, ke ne o but ame ba dok hnân laba hnyin, m' öbun biju öbun e hake laba hnyi wanben hnyei! 9 Ame ha Iehova hnyi li hnyikönyök, ka habe, E hnathu ame he ka ba önyen ta je uma ae se, je uma ae gan me hmanenang, ke ba at ame he ka labâ. 10 Anyin a ten ta ekeriny hnyei ame he ka wa thibi bath a khaca, ke khaca homer wan adre tä ame he ka wa khaca thibi efa.

11 Ekölö ge tavat adre me vesâkong hnyi hnyomakatu he ka hnu hoton grág ; ke adre me laba ke ne o but hnyi hnyinghet m' adre me monu ge waina! 12 Ke e bi kitara me nabeli, me bwinybet, me utköwi, me waina, hnyi anyidra je bijeú : ke adre me ca únykúme ge huliwa anyi Iehova, k' adre ca hia but únykúme bi huliwa anyin li hnyamen. 13 Anyin a wale ame he lakeik ka bá, can e ba únyi ae khan' ödra : k' ame mekihnânen tavat ae beönuwa gadra, ke mok ge beic hoúmonu gadra. 14 Anyin a wale a hia but hedis ogânâ weny bi, k' ame memang gan hmâ a ca hnân bi tuluto : me ame tha utut ka hnyin anyidra hmanenang, me hoúmonu, me tavat mede, me tavat hobâ. 15 Ke ame nom ju hoúmonu, ke adre me hom hnyikânâi je taben, k' adre me ohnyikânâ li emakan at ae begörany : 16 ke adre me oganö Iehova tuhan sabaoth ge hna owisa, k' adre me okabâ Khong at ae Kap ge hwakecin ae wisa. 17 Ke ame he lakon mamoc ka han hnyi hna alin ödra ka hnyin, k' ame he ta je atkanyua ka han

ta je hnyei iny tavat ae pipikhenya adre me hna degecâ.

18 Ekölö gadra adre me lelö monu ge je töiny thoi, ke lelö hulö ge töiny kat : 19 tavat adre me ha, ka habe, E so e ame logot, e so e ame mweimweiâ anyin huliwa, m' öhmun e he ka wâ e; ke ohakekenyâ thö, me o but musi anyin Kabiny Isaraela me me khan' öhmun dö!

20 Ekölö gadra adre me ha únyi ae kong, me so; ke haba so, me kong; me ip menekholom hnyi hnen lany, ke lany hnyi hnen menekholom; me ip hiny hnyi hnen hnebwia, ke hnebwia hnyi hnen hiny!

21 Ekölö ge tavat a ödra metâ hnyi hnödra hna únykúme bi, me únykúme a ödra tavat wâ wia!

22 Ekölö ge tavat a ödra hwege ka ic waina, me tavat hwege he ka úhaniken tap grág: 23 adre haiwisa at ae monu ge hwabân, me hok wisa anyin at ae wisa! 24 Anyin a wale, helâ me bâhlân meic ame an thatúnyi, ke helâ me önying ae meleca ame ta hnyikânâi hnyi meic, helâe ame he ka bobot anyidra iwân, k' ame he ka sâ göranyai anyidra je vongon helâ me sesâiny kânâ: anyin adre me hna degecâ hnanyibu anyi Iehova tuhan sabaoth, me hûkötia hofuc hwan Kapi Isaraela.

25 Anyin a wale ame han hmönyin anyi Iehova ka lakeiny, ke e ame nang hnyamen hudra, me kuc ödra, me ame öbubuny je ong bucen, ke haba je unyidra a mokcu, me helâ me únyi ae ikiki eû hnyi gethen. Ke hnyi ta je únyi e, e ame ca wia bi anyin hmönyin, ke ame inâ bala bi hnyamen. 26 Ke e ame he ka ogöranyâ boûdila ka hnyi ta je hnyei ae sâkâû, ke e ame he ka hûlúwhajû ködra únyi hnyi obiny hmeledrany: ke wâ bi adre me he ka ie o logot: 27 ame ca he ke at gadrin ka sényin me haû; e ba at ame he ka tamokut me mokut; k' ame ca ok bi wen hnyekudra, k' ame ca mou bi hna hûkâlâ hnyeûcadra: 28 e so homakan anyidra je fana, ke oto anyidra je cafana hia, ke helâ me out je botjimen can haledra je hors, ke helâ me höu anyidra je waengen: 29 ke adre me he ka kuku helâ me liona, adre me he ka kuku helâ me je nak liona: eke, adre me he ka kip me oloû je hanidra, me hom ka hnyi dok ae iyöng, ke ame he ka ba at ka omelö. 30 Hnyi bong eling adre me he ka kuku gadra helâ me imeainy köio: ke ödra ka wâ hnyei, wâ bi, e menekholom me hmak, me khömet ge je úlainy.

HABA hnyi hunainy mok a Uzia than, me oge me wâ Than ame tabâ theron ae görany ke beónua, ke unöngötö uma ge obiny anyin úkhaû. 2 K' ame tot ethö hon e je serafi; ke ve hu labenyidra a siks; k' adre me tube je hnyimaködra ge li labenyidra, k' adre tube li cadra ge ke lo, k' adre me gâ ge ke lo hmetu. 3 Ke adre me úkukoköu me ha, ka habe, E kap, e kap, e kap, Iehova tuhan sabaoth: e unöngötö hmeledrany hia ge anyin hmanenang. 4 Ke ame bwebwelâ je taben je hwanuma ge ifucin at ame hongot, k' ame unöngötö uma ge hai. 5 Me oge me ha, ka habe, Ekölö gak! anyin oge ngâ but; anyin a inya at ae kong esongodiny, ke inya oge me laba anyin tavat ae kong je esongodidra: anyin a li emakök ame wâ Than, a Iehova tuhan sabaoth. 6 Haba ke serafi ame gâ könya, ke e bi hnyi hnyamen walepae möt, wale e ame hom únyi hnyi taben hut ge akofi: 7 me e ame kâlâ hnyimök kâu, me ha, ka habe, Wâ bi, ame kâlâ li esongodâm ge únyi e; ke adre ohia but ânyâm monu, k' adre me hneû degecâ ânyâm hulö. 8 Ke oge me löng ifuci Iehova ame ha, ka habe, Oge me he ka kunö ia, ke ie at ame he ka he hobi kötin? Me oge me ha, ka habe, Inya ang; kunö nya thö. 9 Me e ame ha, ka habe, He thö, me ha ka tavat ang, ka habe, Öbun e labö löng, ke ca wâhmakhmeto bi; ke öbun e labö wâ, ke ca wâ únykúme bi. 10 Opiikhenya ju hnyekon tavat eang, ke owejijö but ta je hnyikönyödra, ke omûko but ta je emaködra; wâ adre nye wâ ge ta je emaködra, me löng ge ta je hnyikönyödra, me khana ge je hnyekudra, me hwiö hmetu bi, me metu but. 11 Me oge me ha, ka habe, Than lö, ke ne o but kehö? Ke haingen, ka habe, Ke ne o but ame ba but wan je taun, ke ba at ame labâ, ke ba but at hnyi je uma; ke ba but wan hnyei, 12 ke Iehova ame hom but sâkâû ai tavat, ke e gan hmâ hna hna degecâ hnyei. 13 Ke ame ne tiga hu ke keihen a libenyitainy biju hnyin e, adre me he ka han metoâ e: helâ me man ela me iwajo, wale ame tiga e bi önyen, ödra ka hia but öuo; helâe ame he ka wan ae kap önyen.

KE hnyi je bong bongu Ahaza nöku Jotham, nöku Uzia, than Juda,

haba Rezina than Suria, me Peka nöku Remalia, than Isaraela, ödrü me o hnyi Jerusalema he ka vat më ; ke ca khan' ödrü he ka hwege hon e. 2 Ke adre thumeto lap anyi Davita, ka habe, Ame tha hien at Eferaima me at Suria. Me ame bwebwet hnyekon, me hnyekon lakeiny, helä me je üö hnyi hnyot ame bwebwet ge ang.

3 Me haba Iehova ame ha kö Isaia ka habe, He thö walang ang ka ûkhanö me Ahaza, u me Sear-jasub a nokom, hnyi obiny gethen deny köiöiny an ethö, hnyi gethen wanben utkânâ anyin at hnû khaü ; 4 me ha kâu, ka habe, Wâ ju, me më laba ju ; ca ot bi, ke ca sêniny bi hnyekom, can li hnyiban utö eang ae hai, ke can hmönyin anyi Rezina, me Suria, me nöku Remalia. 5 Anyin a Suria, me Eferaima, me nöku Remalia, ödrin e si hnâm, me ha, ka habe, 6 Ötin he Juda ai, me ovecâ, me bi detin ka hnyin, me otillö thaniny, wale nöku Tabeela ; 7 walang hofuc hwan Than Iehova, ka habe, Ame ca he ka hmâ ûnyi e, ke ame ca he ka aat. 8 Anyin a Damaseko ban ka Suria, ke Rezina ban ka Damaseko : ke tiga ca um bi je huna a sikste faiv me adre me he ka bödra ka susubâ Eferaima, me me ca hnyei hmetu bi : 9 Ke Samaria ban ka Eferaima, ke nöku Remalia ban ka Samaria. Öbun e ne ca labageju, e hnathu öbun e ca he ka tethmä.

10 Ke Iehova ame ha hmetu kö Ahaza, ka habe, 11 U me he ka sumâtâ hobi köu baten ûnyi ga Iehova, a Khongom ; sumâtâ thö ame ne ûnyi eü, ame ne ûnyi ethö. 12 Haba Ahaza ame ha, ka habe. Oge me ca he ka sumat, ke oge me ca he ka cubic Iehova. 13 Ke e ame ha, ka habe, Lap anyi Davita lö, löng ju walang ang ; hawa, ûnyi ae ûhnyükong e öbun e ovecâ at, ke öbun e he minya ka ovecâ Khong ? 14 Anyin a wale, ame he Than ka ham köbun haten ; wâ bi, ame he hlu ka erkin, me hnoköä da, me hwenyi ien e Emanuela. 15 E ame he ka han bata me hani, e ka khana he ka höciâ hulö, me ûca so. 16 Anyin ae ka tiga ca khana e wanakat he ka höciâ hulö me ûca so, me adre me he ka hna degecâ hnyei iny li than u je hûkötîä. 17 Ame he Iehova ka oâ köu, me em hnyei, me lap anyin kâmâm ta je bong adre tiga ca wâ, hwân hnyi bong ame he Eferaima ûheny Juda ; wale than Asuria.

18 Ke haba hnyi bong eling me ame he Iehova ka hülûwhajü ka je nöng ûnyi hnyi

obiny je wageweiny Aigupito, me ta je bi minya ûnyi hnyi hnyei Asuria. 19 Ke adre me he ka o hia me tabâ je thop ae ba aten, me je esopiny kic, me je üö oe üdedö hia, me je hnaönying hia.

20 Ke haba hnyi bong eling ame he Than ka ügi ge heleügi adre me më bi hwaban, a e bi hnyi ke keihen hoton wagewe, wale unyin than Asuria, ban me leünen li can : k' ame he minya bi ka khudreü bi wainy.

21 Ke haba hnyi bong eling ame he at ka hat nak kau me li mamoe ; 22 ke can ûganiny dân basidrin, e ame he ka han bata : anyin ame he ka han bata me hani ödra hia je kolon hnyei.

23 Ke haba hnyi bong eling, hnyi ta je hnyei hia ae hu vine hnyin a wan thauzan, a hwaban je ong sileva a wan thauzan, me wale ame he bi ka hnen ta je iwadekong me watetaföcö. 24 Adre me he ka o ang me je fana me je cafana ; anyin ame he ka unöngötö hnyei hia ge je iwadekong me watetaföcö. 25 Ke haba hnyi je ong bucen hia waleji adre me labö trohnenâ ge unu, me u me ca he ka he ka hnyin, anyin a u ma outen je iwadekong me watetaföcö, ke hnân bi e kunâ je bolok ka hnyin, me hnân u to ge je mamoe.

HNYIMAKAN 8.

KE haba Iehova ame ha könya, ka habe, U ma he ka hom veto ae gan ae lau, me sihnalimen hnyin e ge pen anyin at, ka habe, Hobi kâu Mahera-salala-hasa-baza ; 2 ke oge me he ka hom könya li at ohnathoä ae hnathu he ka sihnalimen, wale Uria at bihut, me Zakaria nöku Jeberekia. 3 Ke oge me he but ka perofeta momo ; ke e ame erkin me hnoköä da. Haba Iehova ame ha könya, ka habe, Hwenyi ien ju Mahera-salala-hasa-baza. 4 Anyin ae ka tiga ca khana wanakat he ka ha, ka habe, Cica ke bai, me adre me he ka hom je omjeüiny Damaseko me je hna söh hnyi Samaria hnyi hnyimakan than Asuria.

5 Ke haba Iehova ame ha hmetu könya, ka habe, 6 Anyin a hnen tavat hna höciâ je köiöiny Siloa, ame omi di, me senyin bi kö Rezina me nöku Remalia ; 7 anyin a wale, wâ bi, ame he Than ka oâ ködra je köiö ûnyi hnyi Wagewe, wale ae hwege me gan, than Asuria me anyin hmanenang hia : ke e ame he ka o hnyi deny je gethen hia, me bahihingölö hon je baten ; 8 ke e ame he ka di bala Juda ai ; me bahihingölö

me vheno e, me khibi ke ne o but hnyi nyin; me ame he ka unöngötö úlauden em hnyei, Emanuela.

9 Ta je hnyei lö, hmönyin dö, ke öbun e he ka omomonu; ke je hnyei hia ae sákáu lö, tevehlöng ju; oweiká ju je hnyekubun, ke öbun e he ka omomonu. 10 Tha úhne-namö thö, ke ame he bi ka únyi baú; ha thö hofuc, ke ame ca he bi ka hwádâ: anyin ae unyita Khong. 11 Anyin a walang hna ha hnö Iehova kõnya me man ae hwege, me nö nya m' inye ca he ka vheno gethen deny tavat ang, me ha, ka habe, 12 Ca he öbun ka hnyi ha, ka habe, Ame sihnân, hnyi ta je únyi hia thithö ame he tavat ang, ka ha hnyin ka habe, Ame sihnân; ke haba khaca, ca ot bi helâ me iotidra, ke ca öbubuny bi. 13 Öbun e he ka okabi Iehova tuhan sabaoth; ke so öbun e he ka ot kâu, me öbubuny gan. 14 Ke e thibi hnân dok ae kap; ke veto hnân setu me kic hnân öhúkötö ka li lap anyi Isaraela, hnân hnewe me offic ka tavat adre me laba hnyi Jerusalem. 15 Ke se hia tavat adre me he ka haú hnyin, me ta, me amam, me hnok, me hom.

16 Húkâlâ ju únyi hnân ohnatho, ke okeceá hmâ ju hnanyibu unyin je latök. 17 Ke oge me he ka halubahing Iehova, at ame ikhâlâ hnyimakan ge lap anyi Jakob, ke oge me he ka elâm e. 18 Wâ bi, haba inya ke lakuk a ham kõnya Iehova, me hnân je haten ke hnân lâiâ hnyi Isaraela únyi ga Iehova tuhan sabaoth, at ame laba hnyi bucen Ziona.

19 Ke ödra ka ha köbun, ka habe, Elâm dö unyin tavat tren je khong, me tavat bi khong, tavat adre me cuk me fufuc: hawa, ca hamen hnyei he ka elâm unyin Khongudra? hawa, adre me he ka elâm hobi kâu tavat ae möt unyin ta je komok? 20 Kec do ka hnyi hnanyibu me hna ohnatho! adre me ne ca fuc hoton hwan hofuc eling me ame he ka ba hnyomakatu hobi ködra. 21 Ke adre me he ka vheno e hnyi vec me mekihânem: ke ödra ka he ka mekihânem, me adre me he ka vec hnyok, me hangâ hnyi ien tuhödra me Khongudrin, ke hngele bi hnyi dranyai: 22 ke adre me he ka wâ hmeledrany, ke wâ bi, vec me menekholom, k' ame he ka lit ge vec; ke adre me he ka ob' ödra ka hnyi menekholom ae khot.

HNHYIMAKAN 9.

KE ame ca he bi ka lit at eji ame vec hnyok. Haba hnyi je bong ehac e ame öhúkötîâ hnyei Zebulona me hnyei Nafatali, ke haba hnyi úen a biliny, me e ame obmanenangâ, hnyi gethen hnyi hobat köiö, hoton Joridano, Galilaia iny ke ta je hnyei. 2 Haba tavat waleji adre me vheno menekholom, me adre me wâ melam ae gan: ke baba tavat adre me labâ je hnyei a hanon mok, me ame umumelam hudra lany. 3 U je hia but osehia hnyei, ke u je ogânâ senyin: k' adre me senyin hnyi hnyimákâm helâ me senyin hnyi menu, ke helâ me hna senyin ge tavat adre me khenâ je hna söh. 4 Anyin a u je hia but thu anyin únyi hnân úhúkâlâkôuâ ae hmak, me uciny abenyin, me osö anyin at ame okongoâ e, helâke hnyi bong bongon Midiana. 5 Anyin a haba je omjehen vat hia anyin tavat penapena hnân vat, ke je úkhaú adre me kina hnyin dra, me adre me he ka ip hnân thong, ke hnân hlogon meic. 6 Anyin adre me hnokoâ hobi köta wanakat, k' adre me ham köta da; ke ame he ka e bi hon bajebenyin musi; ke adre me he ka hwenyi ien e, Hnân lâiâ, me At ame obongon, me Khong ae man, me Kamen a nyiele balua, me Thaniny úsoköu. 7 Ame ca he ka hu obiny úganiny anyin musi, me úsoköu hon theron anyi Davita, me hon dokhon dökhü, he ka ohmâ e me cö e ge hna owisa me hwakecin ae wisa hwân walang ang ke ne o but nyiele balua. Ame he ka ányâ e hnen weny ae gan hmâ anyi Iehova tuhan sabaoth.

8 Than ame kunâ hofuc kö Jakob, ke ame ta bi hon Isaraela. 9 Ke ame he ka khana hnen tavat hia, wale Eferaima, me tavat adre me laba hnyi Samaria, tavat adre me ha ge hnyok bi gan me begörany, ka habe, 10 A kölu but je veto kânâ, ke öhmun e he bi ka up uma ge je veto adre kave: adre sö but je sukamore, ke öhmun e he bi ka bi hnen ge je arasi. 11 Anyin a wale ame he Iehova ka otîlâ görany kâu je iwahnaihmiöny me Rezina, me obwe-bwelâ anyin je iwahnaihmiöny; 12 at Suria hnyi hnyimaködra, me at Filisiti hotudra ai; ke adre me he ka utö Isaraela ge hnyem ae memang. Ke hnyi ta je únyi e hia, e ame ca hwiö hnyi anyin hmönyin, ke ame lau bala bi hnyamen.

13 Ke so bi ame ca hwiö tavat kâu at

ame kuc ödra, ke haba khaca adre me ca elöm Iehova tuhan sabaoth. 14 Anyin a wale ame he Iehova ka subá degecá hnyi Isaraela ban me obiny, pama me amun, hnyi bong a khaca. 15 Haba hingat ae lung so, me wale ban; ke haba obiny, me wale perofeta ame úne thoi. 16 Anyin a haba tavat adre me su tavat ang, me wale tavat omonu ödra; ke adre me ohi ödra a tavat he hotudrin. 17 Anyin a wale ame ca he Than ka senyin ge je hidröu unyidra ke e ame ca he ka betenge ge tavat ae ba kamödra, me je safac: anyin a ödra hia thithö adre me ca ot, ke tavat bi ae kong, me je hnyem hia ame hwen monu. Hnyi ta je únyi e hia, ame ca hwiö anyin hmönyin, ke ame lau bala bi hnyamen.

18 Anyin a haba hwakecin ae kong ame han helá me meic; ke ame an je iwadekong me watetaföcö: eke, e ame möt hnyi je ndrönginy hnyot, ke adre me sá khekhenyi göranyai hainy e. 19 Ame le degecá hnyei únyi ge wathethöt anyi Iehova: ke haba tavat, me helá me utö hnán hlá hnyi meic; ke ba at ame betenge ge liamekeiny mē. 20 Ame he ke at ka söh hnyi ke keihen a metá, k' ame he ka mekihnánem bala bi; ke e ame he ka han hnyi ke keihen me, k' ame ca he ka sekon bi: k' adre me he ka ve an viny je benyidra bi: 21 Manase ame he ka ön Eferaima; ke Eferaima ame he ka ön Manase: k' ödrü ma he ka tha hiödrü ka vat me Juda. Ke hnyi ta je únyi e hia, e ame ca hwiö hnyi anyin hmönyin, k' ame lau bala bi hnyamen.

HNyimakan 10.

EKÖLÖ ge tavat adre me otölö hnan-yibu ae ca wisa, me tavat adre me sihnalimen únyi ae hwali: 2 he ka wia at ae theduoc hnyi hna owisa, me ohia wisa únyi ge lakeik adre me vec, m' adre me söh ta je safac, me hügúná ta je únyi anyin tavat ae ba kamödra! 3 Ke ieu öbun e he ka ányá hnyi bonginy sene, ke hnyi hnauhangö ame he ka o únyi hnyi dok ae sákáu? öbun e he ka kec kö ia me me hadru' öbun? ke öbun e he ka ip ua anyibun hmanenang? 4 Adre me he bi ka tha iyáú thibi me ta je bá, me tha ta me tavat adre me hlingá. Ke hnyi ta je únyi e hia, e ame ca hwiö hnyi anyin hmönyin, k' ame lau bala bi hnyamen.

5 Ekölö ge at Asuria, osöiny anyik hmö-

nyin, ke utöhmü hnyi hnyamen anyik wathethöt! 6 Oge me he ka kuná e ka tavat a adre ca ot, ke oge me he ka huna káu hnyei ae hmönyik ka hnyin, he ka hügúná ta je omjeú, me söh ta je únyi, me uti ödra helá me hmudra hnyi je gethen. 7 Ke so bi e ame ca weny bi he ká heláe, k' ame ca únykúme hnyekon he ka heláe; ke e bi hnyi hnyekon he ka ohia me subá degeca je hnyei ke ca wakhalet bi. 8 Anyin a e ame ha, ka habe, Hawa, ca je hing than hia anyik je taben? 9 Hawa, e ca tha úcú Kalene me Kakemis? ke ca úcú Hamath me Arepada? ke ca úcú Samaria me Damaseko? 10 Haba hnyamök ame hia but wá ta je dökhü ae hu je idola, ke be-önuá hnödra hnatheat hudra hnyi Jerusalema me Samaria; 11 me hawa, oge me ca he bi ka ányá ka Jerusalema me je idolainy helá me hnök hna ányá ka Samaria me je idolainy?

12 Anyin a wale e ka hia but Than umo anyin huliwa hia ka bucen Ziona me Jerusalema, me oge me he ka sená wan hnyok bigan anyin than Asuria, me hmanenanginy li emakan ame begörany. 13 Anyin a haingen, ka habe, Oge hia but ányá e ge hnyamök ae hwege, me anyik metá; anyin a inya at wá wia: ke oge hia but wia je hnyigöulen ta je hnyei, me hügúná ta je tang omjehedra, me ohnyikáná tavat adre me tabá je theron helá me at hwege: 14 ke hnen hnyamök hna wá ta je omjeúiny je hnyei helá me háüen meno; ke helá me at ame hlo je wakunin meno adre de degec, heláe oge hia but hlo ta je hnyei hia: ke ba at ame bwebwet abenyin, me memang, me cük. 15 Hawa, ame he gö ka ohobeuá hon at ame nang e? ame he gili ka ogáná e ka at ame obwebwelá e? heláke hnen osö hna obwebwelá at ame nang e, ke heláke hnen uci hna kap göranyai at a ca utö bi.

16 Anyin a wale ame he Than, Than tuhan sabaoth, ka kuná delá ka anyin ta je pipikhenya; ke eú hnyi hmelen anyin hmanenang adre me he ka vác hna hlá helá me hna hláiny meic. 17 Ke haba melaminy Isaraela ame he ka hnán meic, ke haba anyin Kap hnán báhlán: ke ame he ka thong me an anyin je iwatetaföcö me iwadekong hnyi bong a khaca. 18 Ke e ame he ka an hmanenanginy anyin hnyot, me iny hnyei ame wa wan, wale hanu me unyin: k' ame he ka heláke at kát boúdíla ame ta ke mok. 19 Ke haba kolon ta je úöiny anyin hnyot

ame he ka wakhalet, me me khana wanakat ka sihnalimidrin.

20 Hnyi bong eling ame ca he hmetu ti ka he je kolon hnyi Isaraela, me tavat adre kec möt hnyi lap anyi Jekob ka labageju ka at a kuc ödra : ke adre me he ka labageju, hnyi hnathu kö Iehova, wale Kabi Isaraela. 21 Ame he ka hmetu ke kolon, wale kolon anyi Jekob, ka Khong ae man. 22 Anyin a eja ke ne a ne helä me öny eü hnyi köiö lakem Isaraela, ame he ka hmetu thibi koluidra : adre me ip hmâ he ka ohia, ke wale ame badedö but hwakecin ae wisa. 23 Anyin a haba üohiö waleji adre ip hmâ, me ame he Than Iehova tuhan sabaoth ka ânyâ hnyi wanben hmeledrany hia.

24 Anyin a wale, walang hna ha hnen Than, Iehova tuhan sabaoth, ka habe, Lakeik lö, tavat adre me laba hnyi Ziona, ca outen bi öbun at Asuria : eja ke ne a ne kuc u ge osö, me nang anyin uci köu helâji me hnyi Aigupito. 25 Anyin a mē okhaca, me ame he ka hwâdâ wathethöt, me anyik hmönyin hnyi üohi' ödra bi. 26 Ke ame he Iehova tuhan sabaoth ka oâ kâu osö, helä me hna kot at Midiana hnyi kic Oreba ; k' ame he anyin uci ka e hon köiö, ke e ame he ka hai göranyai e helä me hnyi Aigupito. 27 Ke hnyi bong eling adre me he ka hom honen hok ünyi hnyi hon bajebenyâm, me anyin bi hna ühükälâkôuâ ünyi hnyi hon nyem, ke adre me he ka ohia hna ühükälâkôuâ, can wakaco hnân hû.

28 E ame o but hnyi Aiath, e ame vheno Migeron ; e ame ip anyin bi thatünyi hnyi Mikemas : 29 adre me hanyâüâ gethen ae hnek ; adre me mokut hnyi Geba ; ame öbubuny Rama ; Gibeä anyi Saulo ame kec dö. 30 Hlu nöku Galim lö, hongot dö göranyai ! Laisi lö, löng ju ! ekölö gam Anathoth ! 31 Ame kekec ut at Mademana ; k' ame ükhacaköu aten Gebim, he ka kec. 32 Hnyi bong ang e ame he ka laba hnyi Nob : k' ame jijingâ hnyamen ka bucen anyin hlu Ziona, a hutiny Jerusalema.

33 Wâ bi ame ke Than, Iehova tuhan sabaoth, ka sö degecâ ta je vheiny ge hna outen : ke haba tavat ae beü göranyai, me adre me he ka öüo, ke adre me he ka ohnyikânâ tavat bi gan. 34 Ke e ame he ka sö hnyot ae khöt ge fao, k' ame he Lebanona ka ta ge at ae hwege.

HNYIMAKAN 11.

KE ame he ka o khüen ünyi hnyi iwân anyi Jese, ke ame he ka wa wan ke vheiny ünyi hnyi anyin iwân : 2 ke ame he hanu Iehova he ka laba hon, a hanuiny metâ me wâhmakhmeto, hanuiny omanenâ bongon, hanuiny man, hanuiny wâ ünyküme me outö Iehova ; 3 ke haba anyin senyin, me wale he ka ot kö Iehova : ke e ame ca he ka owisa hoton hna wâ hnen li ecmak, me nâ hoton hna löng hnen li hnyiküny : 4 ke e ame he ka owisa ka ta je theduoc hnyi hwakecin ae wisa, me nâ hnyi tulut ae ücü ka tavat ae menyik eang hmeledrany : ke e ame he ka kot hmeledrany ge osöiny hnyimen, me hlingâ tavat ae kong ge homenâ ünyi hnyi hnyimen. 5 Ke wen hnyekon hwakecin bi ae wisa, ke wen fetriny hwakecin bi ae hnathu. 6 Ke ame he luko ka tha laba me nokon mamoe, ke ame he lepad ka tha mokut me nokon got ; ke ame he nokon kau me nokon liona ka tha e me meno adre opipikhenyâ ; ke ame he wanakat ae ühnyükong ka su ödra. 7 Ke ame he nak kau me bea ka tha han ; k' ame he je lakudru ka tha mokut : k' ame he liona ka han thatünyin hwit helä me bolok. 8 Ke ame he wanakat ame i ka walak hon hwanumen asip, k' ame he wanakat adre hnebaiö ka ip hnyamen hon häuen vaipa. 9 Adre me ca he ka ovecâ me okongoâ hnyi anyik bucen hia ae kap : anyin ame he ka unöngötö hmeledrany ge wâ ünyküme ga Iehova, helä me köiö ame tube taben köiö ae gan.

10 Ke haba hnyi bong eling, haba iwân anyi Jese, at ame tot hnân haten ka ta je hnyei, me ame he ta je hnyei ka elâm e ; ke ame he ka hmanenang hnen hna menâ.

11 Ke hnyi bong eling ame he hmetu Iehova ka olo inâ hnyamen he ka hom kolon lakeiny, wale a tiga laba, üheny Asuria me Aigupito, me Patherusi, me Kuza, me Elama, me Sinara, me Hamath, me ünyi hnyi ta je bomene hnyi köiö. 12 Ke e ame he ka ogöranyâ bou-dila hobi kâu ta je hnyei, me ükhacaköuâ je hna degec ge at Isaraela, me ükhacaköuâ je hna ovecâ a at Juda ünyi hnyi je can hmeledrany a vak. 13 Ke ame he ka hia ciâ anyi Eferaima, ke adre me he ka subâ degecâ tavat adre me oveci Juda : ame ca he Eferaima ka ciâ ga Juda, k' ame ca he Juda ka oveci Eferaima. 14 Ke adre me he

ka utut ka hnyi hon je bajebenyin at Filiti e jimeü ; adre me he ka tha söh tavat aten jimeü : adre me he ka inâ hnyamödra hon Edoma me Moaba ; ke ame he ka ling ödra je laku Amona. 15 Ke ame he Iehova ka ohia beduainy köio hnyi Aigupito, ke jijingâ hnyamen hon Wagewe ge anyin ang ame hlâ, me kot e me me seven but ta je di, m' adre me he ka hanyâüa ke mada bi tangen hnyeücadra. 16 K' ame he ka hu hna cit gethen anyin kolon lakeiny, a kolon únyi Asuria ; helâji ka Isaraela hnyi bong e ame he úheny hnyi hnyei Aigupito.

HNYIMAKAN 12.

KE haba hnyi bong eling, me u me he ka ha, ka haba, Iehova lö, oge me he ka oleâ köu ; anyin a eja ke ne u je ne hmönyin könya, me ame hwiö but ányâm hmönyin, me u je otubweli nya. 2 Wâ bi Khong thibi melik ; ke oge me he ka labagejon, me ca he ka ot : anyin a haba Than Iehova, me wale tang hwegiök, me hwanyik khumöng : me e bi ang anyik úhömeli. 3 Anyin a wale öbun e he ka se köio me senyin únyi hnyi je pupuainy möt. 4 Ke haba hnyi bong eling öbun e he ka ha, ka habe, Oleâ thö kö Iehova, hawâ thö ien ; omanená thö unyin ta je hnyei anyin ta je huliwa, ke thumeto thö ae beönua thibi ien. 5 Khumöng dö kö Iehova ; anyin a e ame ányâ ta je únyi ae beönua : e so adre me omanená e hnyi hmeledrany hia. 6 At ame laba hnyi Ziona lö, hongot dö göranyai me kuku : anyin ae gan hmâ Kabi Isaraela eü hnyi wanbâm.

HNYIMAKAN 13.

HOK honen Babulona, waleji a wâ Isaia nöku Amosa. 2 Ogöranyâ thö bouðila hon bucen dok ae ba leünen, hongot dö ködra, úalú thö ge hnyam, m' adre me didrö hnyi je homagöuleny je than. 3 Oge hia but hûna ka anyik wakap, eke, oge hia but hawâ je atök a tavat hwege he ka ohwâdâ anyik hmönyin, a je atök adre me hobâ me bi gan. 4 E hu hwan tavat ae se hia hnyi je bucen helâ me tavat ae se hia hmönyin ! hwan medien je dökhuieny je hnyei adre me tha úkhacaköu ! Iehova tuhan sabaoth ame oc je utbavat he ka vat. 5 Úhedra hnyi

hnyei ae sâkâü, únyi hnyi je can drany, wale Iehova, a tha e me je omjeben anyin hmönyin, he ka ohia hia hnyei. 6 Tenge ju öbun ; anyin a e but ang bong bongu Iehova ; ame he ka o helâ me hna ohia hnen Ataekhanahia. 7 Anyin a wale ame he ka him but ta je beny hia, k' ame he ka köio but hnyekon tavat hia thithö : 8 adre me he ka gâ udra ; k' ame he ka o ködra vec me hlöuhlöu ; adre me he ka hmak helâ me momo ame vec hnyekon : adre me he ka úläiaköüa ; helâ me bahlân meic hnyi ta je hnyimaködra. 9 Wâ bi, e but ang bongu Iehova, a hlâ thö ge wathethöt me hmönyin ae kahwa ; he ka öba aten hnyei, me ohia tavat ae kong hnyin e. 10 Anyin a haba ta je okhüiny drany me ta je deö okhüiny, ame ca he ka manen melamidra, ke ame ca he tehi ka oumumelamá. 11 Ke oge me he ka bi hwaban hulö ka hmeledrany, me hwakecin ae monu ka tavat ae kong ; ke oge me he ka bi obiny bi gan anyin tavat hnyok bigan, me ohnyikânâ begörany ge tavat adre ootâ. 12 Oge me he ka owakhaletâ at hon gol ae so, ke ame he ka wakhalet tavat hon goliny Ofira. 13 Anyin a wale oge me he ka oöbubunâ je drany, ke ame he ka jijingâ hmeledrany únyi hnyi hnen e, hnen hmönyin ga Iehova tuhan sabaoth, me hnyi bonginy anyin wathethöt ae kahwa. 14 Ke adre me he ka ve hwiö ka hnyi idra ta je hnyei, me ve kec ka hnyi ta je idra, helâ me zebi adre hnu, me helâ me je mamoe ae ba at ame alen. 15 Adre me he ka d' ödra hia tavat adre me wâ ; ke ame he ka ta ge hele vat tavat hia adre me hom. 16 Ke adre me he ka sa lakudra je mendreng hnyi hnyimaködra ; ke adre me he ka söh umödra ta je uma, me okongö laöioödra. 17 Wâ bi, oge me he ka bwebwelâ at Madai ködra, tavat adre me ca únykúme sileva, ke haba gol, me adre me ca he ka senyiná e. 18 Ke ame he anyidra je cafana ka öuo wahidróu ; ke adre me ca he ka betenge ge wan hnyok ; ame ca he li emaködra ka hna baúâ je wanakat. 19 Ke ame he Babulona, hmanenanginy je dökhü. me soiny mec anyin at Kaledaia, ka helâ me Sodoma me Gomora hnyi sien Khong ame hagut' ödrü. 20 Adre me ca he bala ka laba hnyin, k' adre me ca he ka labâ e hnyi ke dö me ke dö nyiele balua : k' ame ca he at Arabia ka otilâ umen uma mano eling ; k' ame ca he tavat tuö mamoe ka omokulec e je hnahat mamoe. 21 Ke

ame he ka mokut eling ta je menoiny hnyot; k' ame he ka unöngöt umödra ta je uma ge ta je meno hnân outen, ke ame he ka laba eling je kasida, k' ame he je got бага ka walak eling. 22 Ke ame he je luko ka kuku hnyi je uma umen latubödra, me ta je iaena hnyi umödra je uma ae kese: ke hakekeny dut fien he ka o, k' ame ca he ka bec bonginy je bong.

HNYIMAKAN 14.

A NYIN ame he Iehova ka betenge ga Jekob, ke e ame he hmetu ka ücö Isaraela, me ip ödra hnyi idra: k' ame he je atkanyua ka tha e mödra, k' adre me he ka kece ka lap anyi Jekob. 2 Ke ame he je hnyei ka hum ödra, me ip ödra hnyi hnödra: ke ame he lap anyi Isaraela ka hum ödra ka hnyi hnyei i Iehova hnân je athnyaba obaga me omomo: ke adre me he ka hwenbödra bi, waleji tavat adre me bâ gadra; k' adre me he bi ka musik ka tavat adre me sed' ödra.

3 Ke haba hnyi bong ame he Iehova ka omenö u ünyi hnyi änyâm vec, me änyâm ot, me huliwa ae hmak adre me kunö u ka hnyin, 4 me u me he ka hai ühöücü eang ge than Babulona, u me ka ha, ka habe, Ekölö ge hna bi obiny at üsedö! ke adre me bi'obiny taun gol! 5 A hia but Iehova thu uci anyin tavat ae kong, me haten musik anyin tavat musik; 6 waleji ame kot tavat ge wathethöt k' ame ca menâ bi nang, waleji ame musö hmönyinâ ta je hnyei, ge hna seda ae ca hnân thawâ bi. 7 A menâ hia thibut hmeledrany me laba wia: k' adre me ie hai khumöng. 8 Eke, ame senyin köu ta je köp, me je arasiny Lebanona, me ha, ka habe, Hwân hnyi hnödra hna omokuli u, me ba at si utö ame o köhmun. 9 Ame bwebwet ut hedis eü gam he ka ükhanö möu, u ka dit ka hnyin: e ame bwebwela je komok gam, a je taben hnyei hia; e ame otilâ je thaniny hia hmeledrany ünyi hnyi anyidra je theron. 10 Adre me he hia thithö ka ha köu, ka habe, Hawa u je senyin dut helâ möhmun? hawa, u ücü but möhmun. 11 Adre ohnyikânâ hedis ai änyâm hmanenang, me meainy änyâm je nabeli: adre me ulolo eü hnyi hmelmâm je biget, ke adre me okhoti u ge waahnyöng. 12 Okhû lan lö, nokon hnyomakatu, ekölö ge hnâm hna ta ünyi ethö hnyi drany! at ame ohnyikânâ ta je hnyei lö, ekölö ge hnödra hna si u hagutuö

u hnyikânâi. 13 Ke u je ha eü hnyi hnyekom, ka habe, Oge me he ka ölö hnyi dranyai, oge me he ka ogöranyâ anyik theron hon je okhû anyin Khong; ke oge me he ka laba hon buceniny ükhacaköu hnyi ke keihen ka hnyi hwadrö: 14 oge me he ka ölö hon je ülä; oge me he ka helâ me Beönua. 15 Ke so bi adre me he ka ohnyikânâi u hedis ai, ka hnyi üdiliny thop. 16 Haba tavat adre me ö u adre me he ka wâ wia, me wâ ünyküme me ha, ka habe, Hawa, wale at ame jijingâ hmeledrany, at ame bwebwelâ je dökhü; 17 at ame wia hmeledrany me me helâ me hnyebuba, me hagutâ hnyikânâi je tauniny; at ame ca hna tavat hwenbâ ka hnyi ta je idra? 18 Haba je thaniny hia ta je hnyei, ödra hia thithö adre me ve mokut hnyi hmanenang hnyi umödra bi je uma. 19 Ke haba u, me adre digic u helâ me anginy ae ikiki ke ba erkemok gam, ke helâ ükhaüten komok, adre dâ ge hele vat, adre me utut ka hnyi ta je veten thop; ke helâ me komok adre me uto hmelen je cadrin. 20 U me ca he ka ükhacaköu mödra hnyi erkemok, anyin a u je okongö em hnyei, me hlingâ lakem; adre me ca he bi ka ha nyiele balua matrâniny tavat ae kong. 21 Penapena thö dok hnân hlingâ je lakon, can hulö anyin je kamödra; m' ödra me ca he ka tot me me idra hnyei, me ounöngötâ kânâiny hmeledrany hnen ta je taun. 22 Ke haingö Iehova tuhan sabaoth, ka habe, oge me he ka höhöi ködra, me subâ degecâ ge Babulona ien me kolon, me nokon me öbiny, haingö Iehova. 23 Ke oge me he ka wia e hnân iny kifoda, me hnân je wadutö; ke oge me he ka aba e ge brum hnân mekiny, haingö Iehova tuhan sabaoth.

24 Haba Iehova tuhan sabaoth ame khemanyin, me ha, ka habe, Ehnathu ame he ka helâji me hnök hna ünyküme; ke ame he ka tethmâ helâji me hnök hna ip hmâ hnyi hnyekuk: 25 Ke oge me he ka oamâmâ at Asuria hnyi ik hnyei, me uto e hmelen li cak hon anyik je bucen: me ame he ka hia hna ühükälâköuâ ünyi gadra, me honen hok ünyi hnyi hon je bajebenyidra. 26 Wale hna ünyküme adre me ünyküme hnyi hmeledrany hia: ke wale hnyam adre me hai hon ta je hnyei hia. 27 Anyin a hia but ünyküme hnö Iehova tuhan sabaoth, ke ie at bi ame he ka thawâ e? ke ame hai hnyamen, ke ie at ame he ka ohmetu e?

28 Hnyi hunainy mok a Ahaza than ame o but hok eang.

29 Filisiti hia lö, ca senyin bi can adre thu uci waleji ame kuc u : anyin ame he ka o but vaipa únyi hnyi iwân anyin on, ke haba mâtrân e me on ame hlâ me gâ. 30 Ke ame he nokon a bân at ae theduoc ka han, k' ame he tavat ae ba ta únyi ka mokut khôtkic : ke oge me he ka hlingâ ânyâm wân ge mekihnânem, ke adre me he ka hlingâ ânyâm je kolon. 31 Homagöule lö, kuku tenge thö ; taun lö, tenge thö : Filisiti hia lö, u je aú hia but ; anyin ame o hai únyi hnyi hwadrö, ke ba at ame he ka tot baú e ka o thö bonginy bong adre thu. 32 Ke iéú hnân thu ka je úthumetuiny je hnyei? ame ha, ka habe, A hia but Iehova bi taben Ziona, ke ame he ta je aten adre me vec ka lubaduöng hnyin e.

HNYIMAKAN 15.

HOK honen Moaba.

Adre me söh Ara-moaba hnyi hnyinghet, k' adre me oúnyibaúâ e ; adre me söh Kira-moaba hnyi hnyinghet, k' adre oúnyibaúâ e. 2 Me e ame ölö ka hnyi uma kap, me Dibona, ka hnyi je dok ae görany he ka tenge : Moaba ame kuku tenge ge Nebo, me Medeba : ame hadreu je bödra hia, k' adre me sö degecâ je waidra hia thithö. 3 Hnyi dedra je gethen adre me weikâ ecmano ae gan nân : ödra hia adre me kuku tenge, me tenge gan hmâ hon ban umödra je uma, ke hnyi je hnaudrá. 4 Ke Hesebona ame kuku, me Eleala ; k' adre me löng hodra ke ne o but hnyi Jahaza : anyin a wale haba vat anyi Moaba adre me hongot göranyai ; k' ame öbubuny je hnyekudra. 5 Ame tenge hynekuk ge Moaba ; ame kec anyin je taben Zoara ai, wale Egelath-selisia : ke adre me vheno gethen úheny Luhith me tenge tot ; anyin a haba hnyi gethen úheny Horonaim adre me hongot göranyai tenge ae imekiny. 6 Anyin ame he ka mada thö je aniny Nimera : anyin a meleca thö önying ; e ba but hna önying ae mita, ke ba but hnyot ae hát. 7 Anyin a wale haba je omejeú gadrin ae gan, me ta je omjedra adre ip, adre me he ka hom ka hnyi wageweiny garaba. 8 Anyin ame hia but hwan tenge he igigilö je hnyigöulen Moaba ; me anyin kuku tenge ke ne o but Egelaim, me anyin kuku tenge ke ne o but Beer-elima. 9 Anyin a unöngötö je aniny Dimon ge dra ; anyin a oge

me he ka bi hanen monu kö Dimon, oge me he ka kunâ liona ka at Moaba tavat adre me kec, me je kolon hnyei.

HNYIMAKAN 16.

KUNÂ tho je lakon mamoe hobi kâu at musö hnyei úheny Sela wale cicö hnyebubu, ka hnyi bucen anyin huiny Ziona. 2 Ke ame he wahluiny Moaba hnyi je hna utihai hnyi Arenona ka helâ me je meno ame gâ monu, ke helâ me háúeu meno adre oveseâ. 3 Ha ju bongon, owisa thö ; bi hmenom ju helâ me lit hnyi jebigö : ikhâlâ ju je hna obâ ; ca he ka háiâ tavat adre kec. 4 E na he ju ka laba unyâm ta je atök adre obâ ; ke haba u Moaba eso u me he ka tubi ödra hnyi hnyimakan at sei : anyin ame he ka hia at úöveci, a um do hwakecin sei, adre ohia tavat seda únyi hnyi hnyei. 5 Ke adre me he ka otillâ ke theron hnyi ibetengio, k' ame he ka tabâ e ke at hnyi hnathu, hnyi uma mano umö Davita ; he ka owisa, me elâm hna owisa, me logot he ka ânyâ wisa.

6 Ate hia but löng hnyok bi gan anyi Moaba, a e bi gan hmönyin ; wale anyin bi gan, me begörany, me wathethöt ; ke únyi baú bi anyin je bi gan. 7 Anyin a wale, ame he Moaba ka tenge kuku ge Moaba, adre me he hia ka tenge : öbun e he ka mâng ge je taben Kira-haraseth, adre ti okongöâ. 8 Anyin a ut ame kot je utkânâ iny Hesebona, me vine hnyi Sibema ; je thaniny je hnyei adre me hia but thu je úöiny ae so ; adre me o ke ne o but Jazera, adre me vheno hnyebuba ; ke ame hlau je vheiny, me hanyâúâ köio. 9 Anyin a wale oge me he ka tenge helâ me ütengien Jazera can vine hnyi Sibema : Hesebona me Eleala lö, oge me he ka hú u ge je deköiök : anyin ame o but hwan vat hon ânyâm je waniny hnyeu me ânyâm menu. 10 Ke adre me hom degecâ senyin me hobâ únyi hnyi hnyei ame wa wan ; ke ame ca he ka hu hmetu khumöng, me hongot senyin hnyi je hnyei vine : ame ca he at ka uto waina hnyi je taben, a at ame ututo ; oge hia but bi obiny kuku senyin. 11 Anyin a wale ame fuc hnyekuk helâ me kitara can Moaba, k' ame fuc hnyekuk can Kira-heres. 12 Ke e ka manen Moaba, ke e ame kong hnyekunâ e hon dok ae gorany, k' ame dit ka hnyi anyin dok ae kap he ka hic, me e ame ca he bi ka ton.

13 Walang hofuc ho Iehova ehac ge Moaba. 14 Ke a hia but fuc Iehova walang ang, me ha, ka habe, Hnyi ta huna a kun hoton je hunainy at ame hok hwaban, me andre me he ka húkotiâ hmanenanginy Moaba, tha e me aten ae se hia hmönyin ; k' ame he ka wakhalet hmönyin je kolon ke ca únyi hnathu hmetu.

HNYIMAKAN 17.

HOK honen Damaseko. Wâ bi, andre me he ka degec Damaseko me me ca taun hmetu bi, k' ame he biju ka hudrei. 2 Andre me he ka hna degecâ but je tauniny Aroera : ke hnân bi hobi kâu je hnahat mamoe, k' andre me he ka mokut eling ke ba at ame he ka ootödra. 3 Ke ame he ka hia hnabâ hnyi Eferaima, me dökhü hnyi Damaseko, me je kolon hnyi Suria ; k' andre me he ka helâ me hmanenanginy lakon Isaraela, haingö Iehova tuhan sabaoth.

4 Ke haba hnyi bong eling me andre me ke ka ohalelöüâ hmanenangi Jakob, k' ame he ka delâ unyin ae pipikhenya. 5 Ke ame he ka helâ me at subö hwit ame úkhacaköüâ hwitame tot, k' ame subâ je wan ge benyin ; eke, ame he ka helâ me hna hlo hwit hnyi hnyigöulen bucen e Refaima. 6 Ke so bi ame he ka hu kolon hnyin e hnân hlo, helâke hna jijingâ üö elaiö, ame ne lo ame ne kun thibi ta wan hnyi obiny vheiny ae görany, ame ne vak ame ne thabûng hnyi je vheiny üö ae wa so wale hnyi je baten, ame ha Iehova Khongu Isaraela. 7 Hnyi bong eling ame he at ka bwela ka At a op e, ke ame he li emakan ka wâ Kabi Isaraela. 8 Ke e ame ca he ka bwela ka hnyi ta je taben hut, huliwa anyin li hnyamen, ke ame ca he ka wâ ta je únyi a ânyâ hnen je banyen, je Aseira, me je hna theati seünö. 9 Hnyi bong eling ame he anyin je taun andre up veten ka helâ me je dok ae ba aten hnyi hnyot me bon ban bucen, waleji andre hna degecâ hnyi hnyimakan lakon Isaraela : k' ame he ka dok ae ba wan. 10 Anyin a u je hnying Khongon ânyâm üöhmeli, ke u je ca únyküme kicin tang hwegiâm ; anyin a wale u je tâ je üö ae hmanenang, metâ ta je hatong kanyua : 11 hnyi bong u je tâ hnyin u je si haginy, ke hnyi hnyomakatu u je ovhöngâ ânyâm je hatong : ke ame he ka ba menu hnyi bonginy hlöuhlöu me vec ae gan hmâ.

12 Ekölö ! hwan tawat ae se hia, andre

me mede helâ me hwan köiö ; me iwadringiny je hnyei, andre me wadring helâ me wekhetiny je köiö ae se hia ! 13 Ame he je hnyei ka wadring helâ me wekhetiny je köiö ae se hia : ke e ame he ka thaw'ödra, m' andre me kec sâkâü ai, ke andre me he ka hnu ödra helâ me unen hwit hon je bucen ge ang, ke helâ me thatünyi ge hön. 14 Ke e ka sahal ut, wâ bi andre me öbubuny ; ke e tiga ca hnyomakatu bi, e hia ödra but. Wale jekhon tawat sei öta, me jekhon tawat andre me hügünâ anyita ta je únyi.

HNYIMAKAN 18.

EKÖLÖ ! hnyei ae hu hwan li labe-nyidra, a e bi hnyi ke keihen wageweiny Aithiope : 2 at ame kunâ je úthumetu a deny je köiö, wale andre me tabâ je hu gom hon köiö, me ha, ka habe, he th' öbun je úthumetu ae logot, ka hnyi hnyei ae hwege me hnyok бага, ka hnyei andre outen hwân ehac me nyiele ; wale a hnyei andre ham je tulut, me andre me ututo, hnyei a susubâ hnen je wagewe ! 3 Öbun hia thithö tawat andre me laba hnyi hmeledrany, ke tawat laba hon kânâ hia, e ka kap göranyai boüdila hon je bucen, wâ thö ; ke e ka túâ trutru löng ju öbun. 4 Anyin a walang hna ha hnö Iehova könya, ka habe, Oge me he ka laba wia, me wâ hnyi hnyabak ; helâ me hlöng ae gan e ka o seunö, ke helâ me hauiny úlä e ka hlöng hnyi üen menu. 5 Anyin a ödra tiga ca menu, e ka kölu vongon, k' ame wia bi vongon me me wan vine ame he ka metu but, me e ame he ka sö je vheiny ge hele si vine, m' andre me he ka hom je anginy ame iyâü me sö degecâ. 6 K' andre me he ka tha hna degecâ e ka ta je meno ame gâ andre me behan hon je bucen, me omenoiny hnyot : ke ame he ta je meno ame gâ andre me behan ka laba e hnyi honivakeny, k' ame he omenoiny hnyot hia ka laba e hnyi hnyeu. 7 Hnyi üen eling andre me he ka ham bwihlany kö Iehova tuhan sabaoth únyi hnyi hnyei ae hwege me hnyok бага, wale hnyei andre me outen hwân ehac ke ne o but nyiele ; a hnyei ame tuluto, k' ame ututo, a hnyei ame susubâ ge ta je wagewe, ka hnyi hnen iö Iehova tuhan sabaoth, wale bucen Ziona.

HNYIMAKAN 19.

HOK honen Aigupito. Wâ bi Iehova ame tabâ úlä ae

logot, k' ame he ka o hnyi Aigupito : me ame he ka bwebwet je idolainy Aigupito hnyi hnyimakan, k' ame he ka köiö but hnyekon Aigupito eü hnyin e. 2 Ke oge me he ka obwebwelâ at Aigupitö ka tot metâ bi ka at Aigupito ; k' adre me he ka ve vat, a ke at me liamekeiny nã, ke ke at me at ame laba hakekny kâu ; ke ke taun me ke taun, ke ke dökhu me ke dökhu. 3 K' ame he Aigupito ka gâon hnyin e ; ke oge me he ka ohia ûhnenamöiny : ke adre me he ka elâlâm je idola, me tavat ulit, me tavat tren biobotkong, me tavat bi khong. 4 Ke oge me he ka hna at Aigupito ka hnyi hnyamen than ae beovecâ ; k' ame he bi ka musi ödra hnen than ae hwege hnyimakan, ame ha Than, Iehova tuhan sabaoth. 5 Ke ame he ka hme köiö, k' ame he ka mada me hwa-hwacit wagewe. 6 Ke ame he ka bo kong ta je wagewe ; k' ame he ka hme me hwa-hwacit ta je wadutöiny : ame he ka meleca je saköwi me je saamun. 7 Haba je hna önying hnyi wagewe Nail, hnyi baten Nail, me ta je ûnyi hia adre tâ hnyi baten Nail, ame he ka mada, me hia, me me ba but. 8 Ke ame he ka tenge tavat thut, ke adre me he ka hlöuhlöu hia tavat adre me hnahna wage ka hnyi Nail, ke adre me he ka hmak hnyok tavat adre thung ert eü hnyi köiö. 9 Ke adre me he ka hmehma tavat adre me huliwan lino, me tavat hwâwâ mano ae hau. 10 Ke adre me he ka kia je taben e, ke ame he ka hmak hnyekon tavat hia thithö adre me huliwa ge hwaban. 11 E ti monu but je thaniny Zoana ; ke ûhnenamöiny tavat ae nua metâ he ka ha bongon unyi Farao ödrin e monu but : ieü gabun öbun e ha kö Farao, ka habe, Inya nokon at ae metâ, nokon je than kâu adrem? 12 Ewa bi ânyâm tavat ae metâ? hamödrin he ka thumetu u walang ang, me omanenâ ; me so e khan' ödrin ûnyi ame ip hmâ Iehova ge Aigupito. 13 A monu but je thaniny Zoana, adre iyawâ je thaniny Nofi ; haba je taben je tribuiny, adre hia but omonoâ Aigupito. 14 A hia but Iehova hingâlâ ka hnyi wanben e hanu ae hwali : ke adre omonoâ Aigupito hnyi anyin ta je huliwa hia, helâ me at ame monu ge grâg ame he monumonu hnyi hnen hna hmita. 15 Ke ame ca he ka hu huliwa anyin Aigupito he ka ânyâ hnen ban me hmokunen, me lan pama, me saköwi.

16 Hnyi bong eling ame he Aigupito ka helâ me omomo : ke ame he ka öbubuny

me ot can hna jijingâ hnyamö Iehova tuhan sabaoth, wale e ame jijingâ hudra. 17 Ke ame he ka hnân outen hnyei Juda ka Aigupito, ame he tavat hia thithö ka ot e ka ha ien bi ködra, can hna únykûme ga Iehova tuhan sabaoth, wale e ame únykûme gadra.

18 Hnyi bong eling adre me he ka ha hwen Kanana hnyi je tauniny Aigupito a thabúng, me khemanyin kö Iehova tuhan sabaoth ; adre me he ka hwenyi ien khaca me taun ae hnaúhangö.

19 Hnyi bong eling ame he ka hu taben hut kö Iehova hnyi wanben hnyei Aigupito, me haten adre otilâ kö Iehova hnyi hnyigöulen e. 20 Ke wale hnan haten me ohnathoâ kö Iehova tuhan sabaoth hnyi hnyei Aigupito : anyin adre me he ka hongot kö Iehova can tavat adre me oveci ödra, me e ame he ka kunâ ködra at úhömeli, me at sing ödra, me e ame he ka omeli ödra. 21 Ke ame he Iehova ka manen bi hnyi Aigupito, k' ame he at Aigupito ka khan' ödra Iehova hnyi bong eling ; eke, adre me he ka khudrung me je hut me je bwihlany, me bi khöbi kö Iehova, me ohwâdá bi e. 22 Ke ame he bala bi Iehova ka kot Aigupito, me osoâ bi ; ke adre me he ka hmetu kö Iehova, me e ame he ka ling ödra, me osoi ödra.

23 Hnyi bong eling ame he ka hu hna cit gethen ûheny Aigupito Asuria ai, ke ame he at Asuria Aigupito ai, ke at Aigupito ame he ka he Asuria ai ; k' ame he at Aigupito ka tha hmi me at Asuria.

24 Hnyi bong eling ame he Isaraela ka bi kuniny me Aigupito me Asuria, hnân hnahic hnyi wanben hmeledrany : 25 anyin ame hia but Iehova tuhan sabaoth hahnahici ödra me ha, ka habe, E so e hnahic Aigupito a lakeik, me Asuria troban li hnyamök, me Isaraela jekhöúk.

HNYIMAKAN 20.

HNYI ûen waleji ame o Taretana Asedoda ai hnyin, wale hnyi ûen Saregon than Asuria ame kunâ e, k' ame vat me Asedoda k' ame hûgûnâ e ; 2 haba hnyi ûen eling, me ame ha Iehova a deny Isaia nöku Amosa, ka habe, He thö ka thang mano ae gan nân hnyi fetrem, ke uny jut tangen li hnyeúcam. Me e ame ânyâ helâe, k' ame he thu ke ba tangen hnyeúca. 3 Ke haingö Iehova, ka habe, Helâ me hnö Isaia athnyabaik hna

he thu hnyi kun ta huna, ke ba tangen hnyeucan hnan haten me hnân úoman ka at Aigupito me Aithiope; 4 helâe minya ame he than Asuria ka lelô at Aigupito a je bâ me at Aithiope tavat adre me ca, wahidröu me wahingat ae ba úkhaúidra me tangen hnyeucadra, k' adre ca tube je hújiödra me me hmehma Aigupito. 5 Ke adre me he ka ot me hmehma can at Aithiope wale adre me geju ködra, me can at Aigupito wale adre me hobeluâ. 6 Ke ame he tavat adre laba hnyi hobat köiö ka tha ha hnyi bong eling, ka habe, Wâ bi, wale hnöta hna geju kâu, m' ate me kec kâu me me hadru' öta m' ate me möt únyi ge than Asuria : ke haba öta ate ma hawa ka kec ?

HNYIMAKAN 21.

HOK honen hnyeubainy köiö. E ame o but úheny hnyi hnyeubâ, únyi hnyi hnyeï adre ouden, helâ me hõu ame tûâ úheny hnyi hwaïöu. 2 Adre thumetu nya ge hna omanená ae hmak ; at ânyâ hwakecin iyawâ ame iyawâ, ke at sei ame söh. Elama lö, ölö thö ; Madai lö, igigilö ju ; oge hia but umo je bongon mâng hia. 3 Anyin a wale a unöngötö li fetrem ge vec ; ame hum nya hnen vec helâ me momo ame vec hnyekon ame he ka hnökoâ : inya oge me vec me me ca kxanö nya löng bi ; inya oge me öbubuny me me ca kxanö nya bwela bi. 4 Ame momokon hnyekuk, oge me öbubuny ge ot ae gan hmâ : haba hauhaotreng oge me wek, me adre hia but wia ka öbubuny könya. 5 Adre me penapena laulau, adre otilâ tavat tue, adre me han me ic : todr' öbun je than, botro ju je bec. 6 Anyin a walang hna ha hnö Iehova könya, ka habe, He thö ka otilâ at hmâkâ ; hamen he ka omanená únyi e ame he ka wâ : 7 ke e ka wâ deö vat adre me tabö hors, a úsa lo, me tavat tabö asina, me tavat tabö kamela, me hamen he ka löng wia me ti wâ wia. 8 Me e ame hongot helâ me liona, ka habe, Than lö, inya oge me tot bala hnyi je lany hon tap tue, ke oge me tuö hanymök hnyi lit hia : 9 ke wâ bi, waleú deö at ame o, tavat tabö hors a ödra úsa lo. Ke e ame thu me ha, ka habe, A' ta but, a ta but Babulona ; ke adre hia but sa hnyikânâi je idolainy je khongon. 10 Ekölö gam hnök hna kokot, me hwit hnyi anyik om hani : oge hia but

omanená köbun hnök hna löng ga Iehova tuhan sabaoth, Khongu Isaraela.

11 Hok honen Duma.

Ame hongot könya úheny Seira, ke at, me ha, ka habe, At hmâkâ lö, hawa ge lit ? At hmâkâ lö, hawa ge lit ? 12 Ke ame thu ge at hmâkâ me ha, ka habe, Ame o hnyomakatu, k' ame o minya lit : öbun e ne he ka hnö, hnö thö : hmetu ju öbun me he jem.

13 Hok honen Arabia.

Öbun je bunyen Dedana lö, öbun e he ka mokut hnyi hnyot hnyi Arabia. 14 Adre me hom köiö ka tavat beic ; haba je aten hnyeï Tema, me adre me hok areto me úkxanö me tavat kec. 15 Anyin adre me kec ge je hele vat, a hele adre oc, me cafana adre lau, me vecin vat. 16 Anyin ame ha helâng könya Than, ka habe, Hnyi huna a khaca, hoton ta je hunainy at ame hok hwaban, me ame he ka ta but hia hmanenanginy Kedera : 17 ke haba kolon úseiny tavat hlic fana, a tavat hwege unyin lakon Kedara, me adre me e ka wakhalet ut : anyin a hia but ha Iehova Khongu Isaraela.

HNYIMAKAN 22.

HOK honen hnyigöulen bucen adre me omanená hnyin.

Ieü gam walang ang a u je tha ölö ka hnyi hon je ban uma me je âtân hia ? 2 U at ae unöngöt ge hwan kuku, taun ae mede, taun ae senyin ; haba je kokâm me adre me ca hlingâ ge hele vat, k' adre me ca mok hnyi vat. 3 Adre tha kec hia latuhâm, adre c' ödra ge tavat hlic fana : adre tha c' ödra hia adre me wâ gam, adre kec sâkâú ai. 4 Anyin a wale, haingök, Hwiö thö gak, oge me he ka tenge hwege ; ca huliwa bi he ka otubweli nya, can hna okongoâ hluiny ik hnyeï. 5 Anyin a bonginy hmak eling, me iututi, me monumonu únyi ge Than, Iehova tuhan sabaoth, hnyi hnyigöulen bucen hna omanená ; adre me kia je hak veto, me tenge ka je bucen. 6 Ke Elama ame hom thi fana, me je kariota me tavat tabö hors : ke Kira ame uny ju hna tube bec. 7 Ke ame unöngöt ge je kariota je hnyigöulen bucen ae ti so hnyi em hnyeï, k' ame tot metâ tavat tabö hors hnyi homagöule. 8 Me e ame hom degec hna tube Juda ; ke hnyi bong eling u me únykúme ge ta je omjehen vat eiö hnyin yua hnyi wanben hnyot. 9 Ke

öbun e wá je dok a hmoucainy taun anyi Davita, ae se hia : ke öbun e úkhacaköüá je köiö hnyi an eü. 10 Ke öbun e aü je umainy Jerusalema, me kia je uma m' adre me op hnetu hak. 11 Öbun e op minya an wanben li hna up veto hobi káu köiöiny an a káu adrem : ke öbun e ca únykúme ge at a ányá, me ca únykúme wia ge at tibet e káu adrem. 12 Ke hnyi bong eling Than, Iehova tuhan sabaoth ame hawá he ka tenge, me tenge thungaú, me hadreú, me weiká manó ae gan nán : 13 ke wá bi, adre me senyin me hobá, adre me khuc bolok, me hlingö mamoe, me han útiö, me ic waina : ate me he ka han me ic, anyin a nyi ate me he ka mok. 14 Ke haba Iehova tuhan sabaoth ame omamená ka hnyi li hnyikönyök, ka habe, E hnathu adre me ca he ka hna köbun hulö eang ke ne o but öbun e mokeu, ame ha Iehova tuhan sabaoth.

15 Walang hna ha ge Than, Iehova tuhan sabaoth, ka habe, He thö, didrö ka at tuö tang omjeü eang jia Sebena, at ame musó uma me ha, ka habe, 16 Ieü u je ányá eang ? ke ie at e unyám, anyin a u me thu op hnán erkemok ? u je thu opiny erkemok ethö hobi káu, me kave umen bi hnyi kic ! 17 Wá bi, ame he Iehova ka ti khúá hwegiö u, helá me at ae hwege ; eke, e ame he ka lan hwegiö u. 18 E hnathu e ame he ka hwiö me khuö u ka hnyi hnyei ae gan helá me wáthá ; u me he ka moku eling, ke ame he ka e eling je kariotainy ányám hmanenang, u at ame hi hmehma hnyaban tuhám. 19 Ke oge me he ka obö u únyi hnyi hanymám, me hagutö u únyi hnyi hnám hna tot görany hnyin. 20 Ke hnyi bong eling oge me he ka hawá athnyabaik jia Eliakima nöku Hilekia : 21 ke oge me he ka okhavá e ge ányám úkhaú, me ohwegiá e ge wen hnyekom, ke oge me he ka hna ányám musi ka hnyi hnyamen : ke e ame he ka kamen ka tavat adre me laba hnyi Jerusalema, me lap anyi Juda. 22 Ke oge me he ka ip kiiny lap anyi Davita hon bajebenynin ; ke e ame he ka khöng ke ba at ame he ka hlöng, ke e ame he ka hlöng ke ba bi at ame he ka khöng. 23 Ke oge me he ka ohmá e helá me fao hnyi dok ae hwege ; ke e ame he ka hnán theron ae hmanenang hnyi lap anyin kamen. 24 Ke adre me he ka uhno hon e hmanenanginy hia lap anyin kamen, wale ta je mátrán, me ta je wan, me ta je kaia hia ae úhnyúkong, hwán ge je utkaia ke

ne o but ta je kaia hia ae gan. 25 Ke haingö Iehova tuhan sabaoth, ka habe, Hnyi bong eling ame he ka kong ut fao adre ohmá hnyi dok ae hwege ; ke adre me he ka sö degecá me me kölu but, k' adre me he ka subá degecá hok a honen ; anyin ame ha Iehova.

HNHYIMAKAN 23.

HOK honen Turo. Je huiny Tasesa lö, kuku tenge thö ; anyin ae ba wan e, ke ba uma, ke ba hna dit : adre me omanená e ködra únyi hnyi Kitim. 2 Öbun tavat a aten bomene, laba hnyibú ju ; a u at adre me ounöngötá hnen tavat úcü hnyi Zidona, tavat adre me hanyáúá köiö. 3 Ke haba hon je köiö ae gan me wale wan Sihora, ke hu gan hna menu hnyi Nail ; ke wale hnyaban úcü anyin je hnyei. 4 Zidona lö, hmehma ju : anyin a hia but fuc hnen köiö, haingen hna báiny köiö, ka habe, A ca vec hnyekuk, me hnokoá, ke oge me ca hat je hidröu, me tuö wahu. 5 E ka o úthumetu Aigupito ai, me adre me he ka vec gan hmá ge hna thumetu ge Turo. 6 He th' öbun Tasesa ai ; kuku tenge thö, öbun tavat öbun e labá bomene. 7 Hawa, wale tauniny anyibun senyin, ae káu adrem hwán, waleji ame labö hom e ge li can ka hnyi dok ae sákáú he ka mé laba ? 8 Ie at ame únykúme he ka ányá e ka Turo, a at ame ham je korona, ke haba je tuhan, me tavat úcü omjeü, k' ame úcü omjeü hnyin je at hna thui ny hmeledrany ? 9 Ame únykúme e hnö Iehova tuhan sabaoth, hnán he ka oúnyibaúá bigan anyin tavat hia ae hmanenang, me ohúkotiá je at hnathuiny hia hmeledrany. 10 Hluiny Tasesa lö, vheno thö em hnyei helá me Nail ; e ba hmetu bala wen hnyekom. 11 E ame hia but hai hnyamen hon köiö, e ame oöbubunyá je dökhü : a hia but húna Iehova ge Kanana, m' adre me he ka ohia je hna báiny. 12 Ke e ame ha, ka habe, U me ca he hmetu ka hobelöu, u hluiny Ziona adre me okongu u : tödrö, he thö Kitim ai ; ke ba bi hna mená eling hobi köu. 13 Wá bi, hnyei iny at Kaledaia ; wale hnyei a hia but ; haba at Asuria adre me ip e hobi káu je menoiny hnyot : adre me otílá je uma tue, adre me hagutá je uma umen thaniny ; e ame öba wan e. 14 Je huiny Tasesa lö, kuku tenge thö : anyin a ba but wan anyibun hna bá. 15 Ke hnyi bong eling, adre

me he ka hnying Turo hnyi sevente je huna, helâ me je bong bongon ke than a khaca : ke hnyi obiny je huna a sevente ame he Turo ka helâ me sit khumöng ka momo hnyi gethen. 16 Hom dö kitara, vheno thö taun, u momo hnyi gethen adre hnying; kokot me me hwan æ kese, khumöngö thö je khumöng æ se hia, m' adre me he ka únykúme köu. 17 Ke hnyi obiny je huna a sevente, ame he Iehova ka senâ Turo; ke e ame he ka hmetu ka hnyi hok hwaban, me bi únyi monu me je dökhüiny hia hmeledrany hnyi hon kânâ. 18 Ke ame he ka hwakecin æ kap kö Iehova ta je únyi gan hnân úcö me hnen hna hok hwaban : adre me ca he ka ip me úkhöünâ; anyin a hobi kâu tavat adre me laba hnyi hnyimakö Iehova ta je únyi hnân úcö gan, he ka han sekon, me úkhaü æ nâk.

HNYIMAKAN 24.

WÂ bi, Iehova ame öba únyi hnyi hmeledrany, me öba waniny, me ohnyimenâ e hnyikânâi, me oveseâ tavat adre me labâ e. 2 Ke walang bongon ame he ka o, khaca thibi tulut ka tavat me at bi hut; khaca thibi tulut ka athnyaba me tuhan; khaca thibi tulut ka athnyaba momo me momo a tuhan; khaca thibi tulut ka at úco ke únyi me at kap hwaban gan; khaca thibi tulut ka at ame mē ham ke únyi me at ame mē sumâtâ e; khaca tulut ka at ame mē ham mone ge hwaban me at ame mē hom mone ge hwaban. 3 Ame he ka ti ba önyen hnyei, me ti söh; anyin a hia but Iehova ha hofuc ang. 4 Ame hlöuhlöu tavat me meleca, ame sēnyin hmeledrany me meleca, adre me sēnyin je tavat æ be-önua hnyi hnyei. 5 E ikiki hnyei hmeledrany tavat adre me labâ e; anyin adre me hanyâüâ ta je hnanyibu, me wia hna otilâ, me thu hna úhilihnyköu a nyiele balua. 6 Anyin a wale ame an hnyei hnen hnaúhangö, ke adre wâ jöning tavat adre me labâ e; anyin a wale adre me thong degecâ tavat adre me labâ hnyei, ke ödra wakhalet biju je kolon. 7 Ame tenge waina adre teb ânyâ, k' ame sēnyin vine, adre me mâng hia tavat æ hnyok senyin. 8 E hia but senyiny bwinylbet, a um dö hwan tavat senyin, e hia but senyiny kitara. 9 Adre me ca he ka ic waina me khumöng; k' ame he ka hiny grâg ka tavat adre me

ijem e. 10 Adre me hagutâ taun æ monu : adre hlöng je uma hia me me ca he bi at ka dit. 11 Adre me tenge eü hnyi gethen can waina; e lit ut senyin hia, e hia but hobâ anyin tavat. 12 E ba önyen hnyi taun, ke adre kot homagöule ge hnaúhangö. 13 Anyin ame he ka helâe bi hnyi hmeledrany anyin je hnyei, helâ me hna jijingâ üö elaiö, ke helâ me je wan vine adre me hlo, ödra ka hia but tau je wan. 14 Ame he tavat eling ka hongot göranyai me kuku; k' adre me hongot göranyai únyi hnyi köiö ge hmanenangi Iehova. 15 Anyin a wale, oganö Iehova thö ihnyi jimejö, ke hnyi je bomene hnyi köiö, wale iö Iehova, a Khongon Isaraela.

16 Ate me hia but löng je khumöng únyi hnyi can hmeledrany, hna ogânâ tavat æ wisa. Ke haingök, Oge me delâ tot, oge me delâ tot, ekölö gak! a hia but iyawö ge tavat iyawö; eke, ame iyawö gan hmâ hnen tavat iyawö. 17 Aten hmeledrany lö, e but unyâm ot, me thop, me hnewe. 18 Ke ame he ka ta ka hnyi thop at ame kec ge hwan únyi hnân ootâ; ke ame he ka hnok hnyi hnewe at ame ölö únyi hnyi thop: anyin adre me khöng ut je mamalamainy drany, me ame bwebwet dö je taben hmeledrany. 19 A ti mou but hmeledrany, a aü but hia hmeledrany, a ti bwebwet hmeledrany. 20 Ame he ka he ta tot hmeledrany helâ me at æ monu ge grâg; me bwebwet helâ me uma menâ; k' ame he ka hmak hon e je hna hanyâüâ, me ame he ka ta, k' ame ca he hmetu bi ka tot.

21 Ke hnyi bong eling ame he Iehova ka bi hwaban ka tavat æ gorany ethö, ke je tuhan hmeledrany hnyi hmeledrany. 22 Ke adre me he ka úkhacaköu ödra helâ me hna úkhacaköuâ tavat adre c' ödra hnyi thop, k' adre me he ka hlöng hwanuma hnyi uma ceat, ke hwaban ta je bong æ se hia, me adre me he ka sen' ödra. 23 Ke ame he ka hmak tehi, me hmehma bi seünö; anyin ame he Iehova tuhan sabaoth ka musi hnyi hmanenang hnyi bucen Ziona, me hnyi Jerusalema, me hnyi hnyimakan anyin wahingat.

HNYIMAKAN 25.

I EHOVA lö, u thibi Khonguk; oge me he ka ogöranyi u, oge me he ka ogânâ iâm; anyin a u je hia but ânyâ ta je únyi hnân lâiâ, wale je hna musi ehac, hnyi hnathu, me wisa. 2 Anyin a u je

wia taun me me je hna digic thatúnyi bi; ke taun adre up hagin y me me ba wan: ke uma umen je atkanyua me me ca taun hmetu bi; ke adre me ca he bala bi ka op e. 3 Anyin a wale ame he ka oganö u hnen hnyei ae hwege, ame he ka outö u hnen tauniny je hnyei ae hwege hnyimaködra. 4 Anyin a u thibi hñabá ka at ae vec, me hñabá ka at ae theduoc hnyi anyin hmak, me hñedrong hnyi weneú, me hna baelelu hnyi kahwa, e ka helá me weneú anyin tavat ae hwege hnyimaködra ka hnyi hna up veto. 5 U me he ka hom úhnyúkongo mede anyin je atkanyua, helá me kahwa hnyi dok ae hwahwacit; adre me he ka hom úhnyúkongo khumöng anyin tavat ae hwege hnyimaködra helá me kahwá hnyi baten hmenon úlá. 6 Ke ame he Iehova tuhan sabaoth ka ányá hnyi bucen ang hobi káu ta je hnyei hia thithö bijeú ge ta je únyi ae pipikhenya, bijeú waina adre tha ip me kolon, ke adre ányá-wia. 7 Ke e ame he ka ohia hnyi bucen ang hnán tubiny at ame tube tavat hia thithö, me hnán tube, wale ame tube ta je hnyei hia thithö. 8 E ame hia but utá mok me ohia e; ke ame he Than Iehova ka kot degecá ta je deköö únyi hnyi ta je hnyimak hia thithö; ke e ame he ka ohia hna haikongoá lakeiny únyi eang hmeledrany hia: anyin ame ha Iehova.

9 Ke adre me he ka ha hnyi bong eling, ka habe, Wá bi, Khonguta ang; ate me halubahingen, ke e ame he ka omeli öta: Iehova ang; ate me halubahingen, ate me he ka senyin me hobá anyin úhömeli. 10 Anyin ame he ka laba hmá hnyamö Iehova hon bucen ang, ke adre me he ka ututo Moaba hnyi hnen bi, helá me hna ututo je thatúnyin hwit hnyi köien tatet. 11 Ke e ame he ka iná li hnyamen hnyi wanben, helá me at ame hai ame hinoben y: ke e ame he ka ohnyikáná anyin bigan tha e me bibihwakecin anyin li hnyamen. 12 Ke e ame he ka öö hñabá ae görany wale hnyi hagám hak, me hagutá me othahoná me káná, wale ka hnyi sesá.

HNYIMAKAN 26.

HNYI bong eling adre me he ka sit khumöng ang hnyi hnyei Juda, ka habe, E hu but gata taun ae hwege; e ame he ka otílá úhömeli hnán hak me singiny. 2 Khöng ut je homagöule me me didró hnyei ae wisa, a at ame tuö

hnathu. 3 U ma he bi ka tuö hnyi hnahic ae bekhöt at ame tethmä hnyok unyám: anyin a e ame labageju köu. 4 Labageju thö kö Iehova nyiele balua: anyin a haba THAN IEHOVA, me kic nyiele balua. 5 Anyin a e ame hia but öüo tavat adre me laba ethö, wale taun ae görany: e ame ohnyikáná e, me othahoná e me sesá. 6 K' adre me he ka ututo e ge ca; a je can tavat ae theduoc, a je can tavat ae ba ta únyi. 7 E wisa gethen deny tavat ae wisa: u thibi at ae wisa ke u je okh-balaúá gethen deny tavat ae wisa. 8 Eke, Iehova lö, hnyi gethen deny hnám je hna owisa, öhmun e hia but halubahingám; ke weny je hnyekuhmun ka iám, ke he ka únykúmi u. 9 Ame weny u ge hnyekuk hnyi hnyinghet; eke, oge me he ka elelöm u ge hanuk eú hnyi hnyekuk; ke wale but ang hnyi hmeledrany hnám je hna owisa, waleling me me he tavat adre me laba hnyi hmeledrany ka ná hwakecin ae wisa. 10 Eja ke ne adre ne betenge ge at ae kong, me ame ca he ka ná wisa; k' ame he ka ányá hwakecin ae hwali hnyi hnyei ae wisa, k' ame ca he bi ka wá hmá hman-nangi Iehova.

11 Iehova lö, e görany hnyamán, k' adre me ca wá bi: ke so bi adre me he ka wá wem ae gan hmá ka tavat, m' adre me he ka hmehma bi; eke, ame he meic ka an ta je iwahnaihmiöny möu. 12 Iehova lö, u me he ka otílá úsoköu hobi köhmun: anyin a u je hia but ányá hobi köhmun anyihmun ta je huliwa hia thithö. 13 Iehova Khong-uhmun lö, adre hia but musi öhmun hnen ke je than minya; ke hake u ke thibi, m' öhmun e he ka ogáná iám. 14 Adre mokcu, adre me ca he bi ka möt; ödra ta je komok, adre me ca he ka tot hmetu: anyin a wale u je hia but sen' ödra me ohí' ödra, me tha ohia hna únykúme gadra. 15 Iehova lö, u je hia but osehíá hnyei, u je osehia hnyei; adre hia but oganö u: u je oc úsákáúóá je hnyigöuleny hnyei hia.

16 Iehova lö, hnyi úen vec adre hia but senö u, adre me hingálá hic, u ka hom úhnyúkongu ödra. 17 Haba momo ame he ka o erkin, me ame vec ke ame kuku ge vec; heláe gahmun Iehova lö, hnyi hnyimákám. 18 Öhmun e heláji me erkin, öhmun e vec, me oá thibi ang; öhmun e ca bi melen tavat; ke adre me ca kölu bi tavat adre me laba hmeledrany. 19 Ame he ka möt hmetu ta je kokám; ame he ka tot hmetu ta je kokik. Hmak dö, me

khumöng d' öbun tavat öbun e laba hnyi sesâ: anyin a helâ me dân hau hon üö ae ometu dân ânyâm hau, ke ame he kânâ ka ôa ta je komok.

20 Aiö u, ik hnyei, didrö ka hnyi je hnyeulem, ke hlöng ju hwanuma hwabâm: ke ikhölö ju helâ me thuthubadecmak ke ne o but ame hia but hmönyin, 21 Anyin a wâ bi, ame he Iehova ka he úheny hnyi hnen hna laba, he ka bi hwaban hulö anyin tavat adre me labâ hmeledrany: ke ame he hmeledrany ka omanená dren e, ke ame ca he hmetu ka tube ta je hna hlingâ.

HNHYIMAKAN 27.

HNYI bong eling ame he Iehova ka bi hwaban ge anyin hele vat ae nâk me gan hmâ me hwege kö leviathana, on ame kec logot, me leviathana on ame hwahwali; ke ame he ka hlingâ tanimo wale hnyi köiö.

2 Hnyi bong eling: hnyei vine ae kese, khumöng dö kâu. 3 Inya Iehova at ame tuö e; oge me he ka labö hû e hnyi je ong ün hia, oge me he ka tuö e hnyi lit me lany, wâ e nye okongoâ e hnen ke at. 4 E ba wathethöt unyik; e na tot metâ kõnya je iwadekong me watetaföcö hnyi vat! oge me he ka he ködra, oge me he ka tha thong degeci ödra. 5 Ke walang khaca, e so e ame kât tang hwegiök, me me úso-köu mönya. 6 Hnyi ün ame he ka o me ame he Jakob ka hu iwân; k' ame he Israela ka vhei me vhöng: k' ödru me he ka ounöngötâ hon hmeledrany ge ta je wan üö.

7 Hawa, e ame kot e bi helâji me hnen hna kot tavat adre me kot e? ke hawa, adre me hlingâ e bi helâ me hnen hna hlingâ tavat adre hlingâ e? 8 Hnyi tulut, hnyi ün u je obâ e, u je ou e; e ame hia but hom e ge ang ae hwege hnyi bonginy ang hwei. 9 Anyin a wale adre me he ka hneü degecâ hulö anyi Jakob, ke walang wan hia hnyi hna ohia anyin hulö; e ka ânyâ je vetoiny hia taben hut, me me helâ me veten inyâ veto adre me oamâmâ, me me ca he hmetu ka tot je Aseira, me je hna theati seünö. 10 Anyin ame hake laba taun adre up haginy, hnyaba ae ba wan k' adre degec ut, helâ me hnyeububa: ame he ka han tot eling nokon kau, k' ame he ka mokut eling, me an ta je anginy. 11 Ke e ka meleca ta je vheiny, me adre me he ka thu degecâ; ame he omomo ka

he bi, me thong ut ge meic: anyin a e hnyei ame ca wâhmakhmeto; anyin a wale ame ca he ka betenge gadra at ame up ödra, ke haba at ame otil' ödra, me ame ca he bi ka ânyâ so ködra.

12 Hnyi bong eling ame he Iehova ka tau wan, hwân hnyi wadutöiny Wagewe, ke ne o but hnyi wageweiny Aigupito, k' adre me he ka hlu öbun a úsa khaca, öbun lakon Israela.

13 Ke haba hnyi bong eling, me adre me he ka tûâ trutru ae gan; ke ame he ka he tavat* wale adre me hakekeny ka mok hnyi hnyei Asuria, me tavat adre me hna degecâ hnyi hnyei Aigupito; me adre me he ka hmi kö Iehova hnyi bucen ae kap hnyi Jerusalema.

HNHYIMAKAN 28.

EKÖLÖ ge koronainy bigan anyin tavat adre me monu ge grâg hnyi hnyei Eferaima, me vongan ame meleca ge hmainty ae hmanenang, wale hnyi ban hnyigöulen bucen ae pipikhenya anyin tavat adre me ngâ ge waina. 2 Wâ bi, e unyin Than at ae hwege me hnyok бага; helâ me hna ta hnen we ae wahma, me höu ame okongoâ, helâ me je köiö ame di hwege me bahihin-gölö, adre me he ka sa hwegiâ hnyikânâi. 3 Adre me he ka ututo ge ta je hnyetca koronainy biganiny tavat adre me monu ge grâg hnyi Eferaima: 4 ke haba vongan ame meleca ge hmainty ae hmanenang, wale hnyi ban hnyigöulen bucen ae pipikhenya, ame he ka helâ me wan meta a bân ke tiga ca honivakeny; e ka wâ e hnen ke at, ke tiga e bi hnyi hnyamen e ame ie han e. 5 Ke hnyi bong eling ame he Iehova tuhan sabaoth ka tot hnân korona ae hmanenang, me hnbinybak ae mec, hobi kâu je kolon lakeiny: 6 me hnân hanuiny hna owisa ka at ame laba hnyi tap owisa, me hnân tang hwege ködra adre me ohmetuhmeto vat únyi hnyi homagöule. 7 Ke a hia but minya tavat ang he hwali ge waina, me he monu ge grâg; ame he hwali at bi hut me perofeta ge grâg, ame ut' ödra ge waina, ke adre me he monu ge grâg; adre me haü hnyi hnödra hna wâ, me ta tot hnyi hna owisa. 8 Anyin a unöngötö je laulau hia ge hna hmita me ikiki, e ba dok ae kalaöt. 9 E ame he ka nö ia ge metâ? ke ame he ka owâhmakhmetu ia ge uthumetu? tavat adre hnebaiö, me hom únyi hnyi li basin? 10 Anyin a

e bi hna únö, me ke hna únö ; hna únö, me ke hna únö ; ke tulut, me ke tulut, tulut me ke tulut ; hnyiban ang ae úhnyúkong, me hnyiban e ae úhnyúkong. 11 Ohe, ke e ame he ka ha ka tavat ang a deny tavat adre ha hofuc hwen kanyua, me hwen ke hnyei bi : 12 walegi e ame ha ködra, ka habe, Walang hna mená, omená ju at ae sényin ; ke walang hnahic : ke so bi ödra höcö bi löng. 13 Anyin a wale ama e bi ködra hofuc ho Iehova, a hna únö, me ke hna únö, hna únö, me ke hna únö ; tulut me ke tulut, tulut me ke tulut ; *hnyiban ang ae úhnyúkong, me hnyiban e ae úhnyúkong ; m' adre me he ka he me ta hnyimen göranyai, me hmetru, me hnok, me ca.

14 Anyin a wale löng ju hofuc ho Iehova, öbun tavat hlumö at, tavat öbun e musö tavat eang a e hnyi Jerusalema : 15 Anyin a öbun e ha, ka habe, Öhmun e hia but úhinhnyékou me mok, ke öhmun e tha hien me hedis ; e ka o thö okongon ae bahihingölö, ame ca he ka o köhmun ; anyin a öhmun e hia but wia thoi me hnân anyihmun hhabá, ke öhmun e hia but ikhölö hmelen iyawö : 16 anyin a wale ame ha Than Iehova, ka habe, Wá bi, inya oge me ip hnyi Ziona veto hnân taben, a veto adre cubec, vetoiny ban kopiny ae gan hwaban hnân taben ae hmá : k' ame ca he ka he mweimwei at ame labageju káu. 17 Ke oge me he ka ányá hna owisa hnân tulut, ke hwakecin ae wisa hnân tulut úhni ; k' ame he we wahma ka aba degécá hna-báiny thoi, k' ame he ka bahihingölö ta je köiö ka hnyi dok adre me lubaduöng hnyin. 18 Ke ame he ka únyi baú hnöbun hna úhinhnyékou me mok, k' ame ca he ka tethmá hnöbun hna tha hien me hedis ; ke e ka o thö okongon ae bahihingölö, me adre me he ka utiti öbun. 19 Hnyi je úen e ame he ka o, me ame he ka hum öbun ; anyin a e ame he ka o hnyi je hnyomakatu, me lany me lit : ke e thibi ot he ka wáhmakhmeto úthumetu. 20 Anyin ae okhulit hna mokut, me me ca khana bi at he ka hlöhlöu hnyin ; ke úhnyúkong aven kubö, me ca úcú bi e ka tube e. 21 Anyin ame he Iehova ka todrö heláji me hnyi bucen Farez, k' ame he ka hmönyin heláji me hnyi hnyigöulen Gibeona ; me me ányá anyin huliwa, wale anyin huliwa ae ke bongon bi, me oá hnen hna ányá, wale hnen hna ányá ae ke bongon bi. 22 Ke walang ang ca he öbun ka hlumö at, wá adre nye ohmá je hna c' öbun : anyin a oge

hia but löng únyi ge Than, Iehova tuhan sabaoth, a g' ame ip hmá he ka ohia hnyi hmeledrany hia.

23 Tevehlöng ju öbun, ke löng ifucik : tevehlöng ju, ke löng hofuc oge me he ka ha. 24 Hawa, ame he at trohnen ka labö trohnen me me cekön? hawa e ame he bala ka wia me omomono kánán káná? 25 E ka thaohoná e, hawa, ame ca he bi ka khúkhúá je kesaka, ke jijingá but je komina, me tá gaga hwit me bali hnyi hnen, ke kesein hnyi baten e? 26 Anyin a Khongon ame ometá e hoton wisa, me ná e. 27 Anyin adre me ca uja kesaka ge únyi ae so homakan, k' adre me ca wia waengeniny kat hon komina ; ke adre me kokot kesaka ge uci, k' adre kokot komina ge ong utö. 28 Adre me omomono hwit ; anyin a e ame ca he bala ka kokot : ke ame ne jijingá e hnen waengeniny kat me haleny je hors, me e ame ca omomono e. 29 Ame o minya únyi ga Iehova tuhan sabaoth, at ae khana bongon hnân láia, ke e gan hmá anyin metá.

HNyimakan 29.

EKÖLÖ ge Ariela, waleji Ariela a taun ame hunuma hnyin Davita! bi hanen ke je huna ka ke je huna ; ányá gaga je bijeú : 2 me oge me he ka ovecá Ariela, ke ame he ka hu hlöuhlöu me tenge : ke e ame he ka hing Ariela könya. 3 Ke oge me he ka hunuma igigili u, ke o ge me he ka theling u ge je lap tue, me otílá je uma ae hwege cici u. 4 Ke u me he ka hnyikáná, me fuc eú hnyi káná, ke ame he ka úhnyúkong ifucám eú hnyi sesá ; ke ame he ifucám ka helá me hwan at tren biobotkong, eú hnyi káná, me ame he hnâm hna fuc ka ulit eú hnyi sesá. 5 Ke ame he ka úcú me sesá ame gá úgá-niny je iwahnaihmöny möu, ke ame he ka helá me unen hwit ame óú ang úseiny tavat ae hwege hnyimaködra : eke, e ame he ka ie o helá me thuthubadecmak. 6 Ame he Iehova tuhan sabaoth ka sená e tha e me hwan than, me hwiöi, me hwan ae gan hmá, me höu, me weneú, me báhlán meic ame han. 7 Ke ame he ka helá me bwi me hna omanená hnyi lit úseiny je hnyei hia, tavat adre me vat me Ariela. tavat adre me vat mē me je singiny, me tavat adre me hlec e. 8 Ke ame he ka helá me at ae mekihnänem ame bwi, ke wá bi, e ame han ; ke e ame hmak dö, ke

mekihnânem bi: ke helâ me at ae beic ame bwî, ke wâ bi e ame ic; ke e ame hmak dô, me wâ bi, e sēnyin bi, ke beic: ke ame he ka helâe ūseiny je hnyeî hia tavat adre me vat me bucen Zîona.

9 Todru, ke lâîâ thö; hobâ thö ke wadröu but: adre monu but, ke ca ūnyi ge waina; adre me ta tot, ke ca ūnyi ge grâg. 10 Anyin a hia but Iehova hingâlâ hubun hanuiny mokut hnying, me ömûki öbun, wale ta je perofeta; ke ame tube je böbun, wale tavat wâ. 11 Ke haba hnaomanenâ hia köbun me helâ me hofuc hnyi tusi adre ohmâ, waleji adre ham ka at ae khana tusi, me ha, ka habe, Ö u aû thö ang; ke haingen, ka habe, E ca khanö nya, anyin adre okeceâ hmâ e: 12 ke adre ham tusi ka at ae ca khana tusi, me ha, ka habe, Öu aû thö ang: ke haingen, ka habe, E ca khanö nya tusi.

13 Ke haingö Iehova, ka habe, Anyin ame hakekenyi nya tavat ang ge je hnyimödra me oganö nya ge je esongodidra, k' adre me ösâkâtö mönya je hnyekudra, ke haba hnödra hna outö nya, me wale thibi hna n' ödra ge hna ūne hnen at: 14 anyin a wale wâ bi, oge me he bala ka ânyâ ūnyi ae ke bongon bi ka tavat ang, a ūnyi hnân lâîâ me ūnyi a ūöman: ke ame he ka hia metâ anyin tavat ae metâ gadra, k' ame he ka iyong ūnykûmânen tavat wâ wia gadra.

15 Ekölö gadra tavat adre me elâm eû hnyin he ka ikhâlâ ga Iehova anyidra ta je ūhnenamö, ke e bi hnyi menekholom anyidra ta je huliwa, me ha, ka habe, Ia ame ö ta? ia ae khana öta? 16 Öbun e ohnyimenâ hnyikânâî ta je ūnyi! Hawa, adre me he bi ka ūnykûme ka at up kaia, me helâ me kânâ ae kece; me me he bi ūnyi adre tibet ka ha ka at ânyâ, ka habe, E ame ca up nya; me he ūnyi adre me tretaö ka ha ka at ame tretaö, ka habe, E ba metâ gan? 17 Hawa, adre me ca he logot ka wia Lebanona me me utkânâ ae hoso, k' adre me he bi ka ūnykûme utkânâ ae hoso, me hnyot bi? 18 Ke hnyi bong eling ame he ta je wejiji ka löng hofuc hnyi tusi, k' ame he li emakan je wadröu ka bwela e ka ba but lit me menekholom. 19 Ke ame he tavat ae ilemuk ka ogânâ anyidra senyin ga Iehova, k' ame he tavat ae theduoc ka hobâ ge Kabi Isaraela. 20 Anyin adre me önyibaûâ at ūöveci, ke a obiny jut at hlumö at, ke adre me subâ degeci ödra hia thithö adre me hmâkâ

hwakecin ae kong: 21 a tavat adre me bijöniny at hnyi hna ivinö, me lau hnewe hobi kâu at ame nâ hnyi homagöule, me ohaûâ at ae wisa ke ba can. 22 Anyin a wale, walang hna ha hnö Iehova at ame omeli Aberahama, haingen ge lap anyi Jakob, ka habe, Ame ca he Jakob ka hmehma walang ang, k' ame ca he ka löhau hnyimakan. 23 Ke e ka wâ lakon, wale huliwa anyin li hnyamök hnyi wanben, me adre me he ka okabâ iök; eke, adre me he ka okabâ Kabi Jakob, me outen Khongu Isaraela. 24 Me ame he tavat ae monu hnyekudra ka wâ metâ, k' ame he tavat ulit ka ūnö hna ūnö.

HNYIMAKAN 30.

EKÖLÖ ge tavat adre me ukhin fuc, ame ha Iehova, tavat adre me elâm bongon, ke ca ūnyi bi gak; adre me tube hnen ūnyi hnân tube, ke ca ūnyi bi ge hanuk, m' adre me he ka bi hanen hulö ka hulö: 2 tavat adre me he but he ka he Aigupito ai, me ca elâm bi unyik; he ka ohwegi ödra ge tang hwegiö Farao, me labageju ka hmenon Aigupito! 3 Anyin a wale ame he tang hwegiö Farao ka hnân ohmehmai öbun, ke haba hna labageju ka hmenon Aigupito ame he ka hnân ohmaki öbun. 4 Anyin a e hnyi Zoana je tuhan, ke ame o but hnyi Hanes anyin ta je ūthumetu. 5 Ödra hia thithö adre me he ka hihmehma tavat ae ba troban ködra, ke ca hnân ūhadruo me troban, ke hnân hmehma me haikongoâ minya.

6 Hok honen je meno hnyi Hwaiöu.

Adre me he hnyi wanben hnyeî ae vec me hlöuhlöu, wale ame o ūnyi hnyin liona momo me liona, vaipa me on ae hlâ ame gâ, adre me hom je omjehedra hnyi hon jon je asina, me tang omjehedra hon je jon ae khibi ge je kamela, ka tavat adre me ca he ka bi troban ködra. 7 Ke ca ūnyi hnathu, ke ūnyi baû ūhadruö ge Aigupito: anyin a wale oge me hwenyi ien e, Rahaba, at ame laba thibi. 8 Ke haba walang ang he thö, sihnalimen ju e hnyi taben hnyi hnyimaködra, me sihnalimen ju e hnyi tusi, me me e bi huân hobi kâu je bong nyiele nyiele balua. 9 Anyin a ödra tavat ūkhin fuc, tavat thoi, tavat höcö löng hnanyibu anyi Iehova: 10 tavat adre me ha ka tavat wâ, ka habe, Ca wâ ju; me ha ka ta je perofeta, ka habe, Ca omanenâ köhmun wisa, ha bi thö köhmun ūnyi ae

menyik, perofeta thö tang iyawö : 11 kec dö únyi hnyi gethen, saú but únyi hnyi deny, ohia but únyi hnyi hnyimaköhmun Kabi Isaraela. 12 Anyin a wale, walang hna ha hnen Kabi Isaraela, ka habe, Anyin a öbun e hna degecâ hofuc ang, me geju bi ka úveci me hwakecin ae hwali, me labageju kâu ; 13 anyin a wale ame he hulö ang ka helâ me hmouca köbun, ame he ka ta, ae dua hnyi hna up veto ae beú göranyai, ame he ka ie bobot helâ me thuthubadecmak. 14 Ke e ame he ka tho e helâ me hna tho kaia kânâ adre oamamá me ca betenge gan ; m' adre me ca he bi ka wâ ong eckeihen ae úcú he ka hok meic únyi hnyi hnabadröu, me seköio únyi hnyi taben köio. 15 Anyin a walang hna ha hnen Than Iehova, Kabi Isaraela, ka habe, Adre me he ka omeli öbun, öbun ka hmetu me menâ ; ke haba tang hwegiöbun, me ame he ka e bi hnyi labawia me labageju : ke so bi e ca webun. 16 Ke haingöbun, ka habe, E ba, anyin öhmun e he ka tabö hors me kec ; awe, öbun e he ka kec : ke haingöbun, Öhmun e he ka tabâ je meno ae logot ; awe ame he bi ka logot tavat hnu öbun. 17 Ame he wan thauzan ka kec ge ifucin at a khaca ; öbun e he ka kec ge ifucin hnyat a thabúng : ke ne o but adre me hn' öbun dut helâ me aneunya hon bucen, ke helâ me boúdila hon dok ae hut. 18 Anyin a wale ame he Iehova ka halubahingen me me betenge gabun, ke can e adre me he ka ogânâ e, me me he ka betenge baú köbun ; anyin a Khongon owisa Iehova ; hnödra hnahic hia adre me halubahingen e.

19 Anyin ame he tavat ka laba hnyi Ziona wale Jerusalema : u me ca he ka tenge hmetu ; ke e ame he ka betenge gam hnyi hnâm hna hongot ; ke ka löng, me ame he ka thu köu. 20 Ke ame he Than ka ham köbun jeúiny vec me köien úveci, ke so bi ame ca he hmetu tavat adre me nö u ka iyong, k' ame he li emâkam ka wâ tavat adre me nö u : 21 ke ame he li hnyikönyâm ka löng hofuc hnyi hotom, ka habe, Walang gethen, vhenö ju öbun hnyin e ; öbun ka saú ka hnyi ke keihen metâ, ke öbun ka saú ka hnyi keihen me. 22 Ke öbun e he ka oikikiâ sileva tubwiny anyibun je hnatheat, me gol adre oköiâ hmanenanginy anyibun je idola : u me he ka degec helâ me ecmano ae ikiki ; u me he ka ha kâu, ka habe, Kec dö u. 23 Me e ame he ka ham we hobi kâu hatungâm ta

je hatong, wale u me he ka tã hnyi kânâ ; me jeú minya a troban kânâ, k' ame he ka pipikhenya me se hia : ke hnyi bong eling ame he halem ta je meno ka han tot hnyi je hnyeí ae gan. 24 Ke ame he je bolok me je asina wale adre me huliwan kânâ ka an jeú ae senem, wale adre me ulec ge soi me ut. 25 Ke ame he ka e bi hnyi hon ban ta je bucen hia ae beú göranyai, me je hut hia ae görany, je wagewe me je köio ame di, hnyi bonginy úhlingö ae gan hmâ, e ka ta but je tap ae beú göranyai. 26 Ke ame he melaminy tehi ka helâ me melaminy seúnö, k' ame he ka oseven melaminy seúnö, helâ me melaminy je bong a seven, hnyi bong ame he Iehova ka lan aat ge lakeiny, me ometo aat a je hna d' ödra.

27 Wâ bi, ame o but iö Iehova únyi hnyi dok ae sâkâú, ame ubâhlâ ge anyin hmönyin, ke khöt ge hai ame ölö göranyai : ame unöngötö li esongodiny ge wathethöt, ke helâ me meic ame han bohmen : 28 ke haba hnen hna menâ me helâ me wagewe ame bahihingölö ke ne o but hnyi nyin, he ka cubeta ka je hnyeí ge úcúbec únyi a ohia : ke ame he ka e hnyi hnyimen je hnyeí töiny hors wale at ame omonoâ. 29 Öbun e he ka hu khumöng helâ me hnyi lit hnyi hna ányâ bijeú ; ke ame he ka senyin hnyok, helâ me at ame hom utköwi he ka he ka hnyi bucen anyi Iehova, ka Kici Isaraela. 30 Ke ame he Iehova ka olöngâ ifucin ae hmanenang, me omanená úköluiny hnyamen, tha e me anyin hmönyin ae gan, me bâhlân meic ame han, tha e me hna oamamá, me weneú, me we wahma. 31 Anyin adre me he ka tho oamamá Asuria hnen ho Iehova, e ame he ka kot ge osö. 32 Ke haba je hna hna hia ge uci at a hanymen, wale ame he Iehova ka ip hon, ame he ka tha e me je bwinybet me kitara : ke e ame he ka vat mē ge je vat ae hwege. 33 Anyin adre hia but penapena Tofet kâu adrem ; eke, adre hia but penapena e hobi kâu than ; e ame hia but ányâ e ae dit me lau : haba hna khon e, wale meic me utö ae se hia, ke ame vâc e ge homenö Iehova, helâ me wagewe teio.

HNYIMAKAN 31.

EKÖLÖ gadra tavat adre me he Aigupito ai, he ka hok úhadruö, me labageju ka ta je hors ; me labageju ka ta je kariota, anyin ae se hia : me labageju ka tavat tabö hors, anyin a ödra ti hwege ; ke

adre me ca bwela ka Kabi Isaraela, me ca elöm Iehova! 2 Ke so bi e metâ, ke e at ame oâ únyi ae kong, ke ame ca he ka ohmeto hwan je hofuc : ke e ame he ka tot metâ ka lap anyin tavat ae kong, me ka singiny tavat adre me ányâ monu. 3 Ke ta je at thibi at Aigupito, ke ca Khong bi ; ke je viny haledra je hors, ke ca je hanu bi ; ke e ka he Iehova ka hai hnyamen, me ame he ka tha ta, a at ame hadruâ me at hok úhadruö, m' ödru me he ka tha hia but. 4 Anyin a walang hna ha hnö Iehova kõnya, ka habe, Ame fuc hnyin liona me nak liona hon haniny adre me ne hawâ tavat tuö mamoe ae se hia úcon, k' ame ca outen ifucidra, k' ame ca iyâú ge imediödra ; ke helâe ame he Iehova tuhan sabaoth ka utut he ka vat hnyi hon bucen Ziona, ke hon hutiny eling. 5 Haba je meno adre me gâ, me helâe ame he Iehova tuhan sabaoth ka tuö Jerusaleima ; e ame he ka tuö, me hna e, k' ame he ka he me omelö e. 6 Lakon Isaraela lö, hmetu ju öbun kâu, waleji öbun e ti hna degecâ. 7 Anyin a hnyi bong eling adre me he ka ve degec anyidra je idola sileva, me anyidra je idola gol, waleji ame tibet je hing hnyamöbun me me hulö bi. 8 Me ame he at Asuria ka ta ge hele vat, ca hele vat bi anyin at ; ke ame he ka an e ge hele vat, a ca hele vat anyin at : ke e ame he ka kec ge hele vat, k' ame he wahidrou unyin ka bi fat. 9 Ke ame he ka hia hnen hna kic gan can e ame ti ot bi, k' ame he anyin je taben ka outen bouðila, ame ha Iehova, at a anyin bi meic hnyi Ziona, ke at a anyin bi inyâ ji hnyi Jerusalema.

HNYIMAKAN 32.

WÂ bi, ame he ke than ka musu hnyi hwakecin ae wisa, k' ame he je taben ka owisa hnyi hna owisa. 2 Ke ame he at ka helâ me hna lubaduöng ge ang, ke nedrong ge weneú ; helâ me je di hnyi dok ae hwahwacit, helâ me dok ae hmenu hnyi kic ae gan hnyi hnyei ae sényin. 3 Ke ame ca he ka hadedak li emakan tavat adre me bwela, k' ame he ka tevehlöng li hnyikönyen tavat adre me löng. 4 Ke ame he je hnyok ame tot bebehú ka ná he ka wâhmakhmeto, ke ame he je esongodiny tavat ae teta ka ie fuc wisa. 5 Adre me ca he hmetu ka ha ge at ae monu, a e at betenge bi, k' adre me ca he ka ha ge at iyawö, a e at ame ham gâná bi. 6 Anyin

ame he at ae monu ka ha hofuc ae monu, k' ame he hnyekon ka ányâ hulö, wale he ka ányâ hwakecin ae ca úcú, me ha monu ga Iehova, me öba jeú ka at ae mekihñanem, me ohmö köiö belen at ae beic. 7 Ke e kong je bibihwakecin anyin at iyawö : e ame elâm je úkonguny, me me ohia tavat ae ilemuk ge hofuc ae thoi, eja ke ne a ne wisa ifucin at ae ba ta únyi. 8 Ke haba at betenge e ame elâm deny betenge, ke e ame he ka tethmâ únyi ge hwakecin betenge.

9 Omomo lö, tavat adre me laba wia lö, todrö, löng ju ifucik ; wahlu, tavat adre me laba monu lö, tevehlöng ju hok hofuc. 10 Öbun e he ka öbubuny hnyi je bong ae se hia hon khaca huna, öbun je momo ae monu : anyin ame he ka ba wan vine, ame ca he ka o hna menu. 11 Öbun je momo adre me laba wia lö, öbubuny ju ; tavat adre me laba monu lö, ot ju : uny jut me me ba úkhaú, ke húkölö hnamejibun ju mano ae gan nân. 12 Adre me he ka khaú úladra can ta hnyei ae kese, me can vine ae wa. 13 Ame he ka kú hnyi kânâ kânân lakeik ta je iwadekong me je iwatetaföcö, eke, hon je umainy senyin hia hnyi tauniny senyin : 14 anyin adre me he ka hna bi uma ae mec, adre me he ka degec taun ae ti hu aten ; ame he dok ae hut me tap tue ka hnân op nyiele balua, hnân senyin hnen je asinainy hnyot, hnân han tot hnen ta je hnahat meno ; 15 ke ne o but adre me hingâlâ huta hanu únyi ethö, k' ame he ka hnyei belök hnyebuba, k' adre me he ka aú hnyei belök me hnyot bi. 16 Me ame he wisa ka laba hnyi hnyebuba, ke ame he hwakecin ae wisa ka laba hnyi hnyei belök. 17 Ke haba troban hwakecin ae wisa, wale úsoköu, ke haba obiny hwakecin ae wisa wale laba hnahic me laba khötkic nyiele balua. 18 Ke ame he lakeik ka laba hnyi dok ae úsoköu, me je uma adre me laba khötkic hnyin, me je hna menâ wale je dok adre me laba wia hnyin. 19 Ke ame he ka ta we ae wahma, hnyi ün ame he ka ü hnyot ; ke ame he ka hnyikânâ taun. 20 Hnöbun hnahic tavat öbun e te hwit hnyi baten ta je köiö hia, me hna je can ta je bolok me asina.

HNYIMAKAN 33.

EKÖLÖ gam at ame söh, k' adre ca sei u bi ; ke u at ame iyawö, k' adre ca iyawö u bi ! U ka hia but söh, me adre

me he ka sei u ; ke u ka bi obiny ányám iyawö, me adre me he ka iyawö u. 2 Iehova lö, betenge ju gahmun ; öhmun e hia but halubahingám : e so u ma bi hnyamödra hnyi je hnyomakatu, ke melihmun minya hnyi üen vec. 3 Ame kec ta je hnyei ge hwan imonumonun ; k' ame vese but ta je hnyei u ka todrö. 4 Adre me he ka hlo hnöbun ta je hna söh helä me hna hlo hnen ihmä : helä me hna gâ ge ta je wahamon, adre me he ka gâ kâu. 5 Adre me oganö Iehova ; anyin a e ame laba ethö : e ame hia but onöngötä Ziona ge hna owisa me hwakecin ae wisa. 6 Ke ame he ka hu hwakecin ae tethmä hnyi bongom ta je bong, wale ühömeli ae gan, me metä me wâhmakhmeto : haba tang omjehen bi, me ot kö Iehova.

7 Wä bi, ame kuku eü tavat ae hwege gadra ; k' ame tenge hlöuhlöu ta je üthumetuiny üsoköu. 8 E ba but aten je hna cit gethen, k' ame ca ngenu tavat : e ame hia but thu ühinhnyköu, e ame hia but hûkötä je taun, e ame ca ünyküme at. 9 Ame tenge me sényin hnyei : e hmehma Lebanona, ke meleca thö : ke ücü but Sarona me hnyebuba ; ke ame öbubuny Basana me Karemela. 10 Ke haingö Iehova, oge me he bi nya walang ang ka tot ; oge me he ka oganö nya bi walang ang ; k' adre me he walang ang ka ogöranyi nya. 11 Öbun e he ka erkinä unen hwit, k' öbun e he ka hnokö taan thatúnyin hwit : haba hmenöbun me meic hnân ön öbun bi. 12 Ke ame he ta je hnyei ka helä me hna inyä veto : ke helä me je üö ae üdedö adre thong.

13 Öbun tavat sákâü, löng ju ge hnök hna ányä ; ke öbun tavat ae hakekeny, ogä thö manik man. 14 Ame ot hnyi Ziona tavat ae kong ; k' ame o but öbubuny ka tavat adre me ca ot bi. Ie at gata ae khana he ka laba hnyi meic ame han ? ie at gata ae khana he ka laba hnyi bâhlân meic nyiele balua ? 15 Haba at ame vheno wisa, k' ame ha hofuc ae wisa ; ke ame hûkötä hvaban hna ovecä, k' ame jijingä li hnyamen be me ca kap hwaban ae hwali, k' ame hlöng li hnyikönyen me me ca löng ge dra, k' ame müko li emakan me me ca wä hulö ; 16 awe, e ame he ka laba hnyi dok ae görany : ke hnen hna lubaduöng bi je kic a je hnabä : adre me he ka hân e ; ame he ka tethmä hna habelen e. 17 Ame he li emäkäm ka wä Than hnyi anyin hmanenang : ödru me he ka wä hnyei ae

beü hmä hmönyin. 18 Ame he hnyekom ka ünyküme hna ootä : Ewa at aü üseiny, ewa at tuluto fat ? ewa at ame aü je hnabä ae beü göranyi ? 19 U ma ca he ka wä tavat ae hwege hnyimödra, a tavat ae iyong ifucidra, u me ca löng bi ; ke atkanyua bohömödra, u me ca löngmakhmeto. 20 Ünyküme thö kö Ziona taun anyita je bijeü : ame he li emäkäm ka wä Jerusalema taun adre laba wia hnyin, uma mano adre me ca he ka hom, adre me ca he bala ka oc je faoiny, ke ba ke töiny ame he ka mou. 21 Anyin ame he ka e bi eling Iehova hnyi anyin hmanenang, wale dok ae hu je wagewe ae lau me je di ; ke ame ca he hnyin je galu adre me galo, ke ame ca kec eling hu ae gan. 22 Anyin a Iehova at ame owis' öta, Iehova at ame ha anyita ge hnanyibu, Iehova tuhöta ; e ame he ka omeli öta. 23 A ok ut je töiny hom hu ; e ca ücü hnân ohmä taben anyidra aneunya, e ca khan' ödra he ka ulolo hünýü : me adre me khenä but hna söh ae gan hmä : ame he tavat ae kong je cadra ka hügünä hna söh. 24 Ke ame ca he bi ka ha hnen at ame labä e, ka habe, Iny mok : adre me he ka hna degecä hulö anyin tavat adre me labä e.

HNYIMAKAN 34.

ÖBUN ta je hnyei lö, hakekeny dö he ka löng ; ke öbun tavat, tevehlöng ju : e so ame he hnyei me unöngötiny ka löng, me hmeledrany minya me ta je ünyi hia ame kü hnyin. 2 Anyin a e but hmönyin anyi Iehova hon ta je hnyei hia, me anyin wathethö hon anyidra ta je utbavat hia : e a hia but ohi' ödra, e a hia but hn' ödra, m' adre me he ka hling' ödra. 3 Ke adre me he ka degec ta je hna hlingä unyidra, k' ame he ka hu bokonginy je unyidra ae mok, k' ame he ka köiö but je bucen ge drödra. 4 Ke ame he ka aü but ta je döiny drany hia, ke adre me he ka vhec drany helä me tusi : ke ame he je dö hnyin e ka kölu helä me lan vine ame kölu, ke helä me lan ae meleca ünyi hnyi imeta. 5 Anyin a sekond anyik hele vat ge hnen hna ijem hnyi drany : wä bi, e ame he ka utut hon Edoma me hon tavat oge me hangä, m' adre me owisa. 6 A sekondut ge dra hele vat anyi Iehova, adre me opipikhenya e hnen dren lakon ta je mamoe me ta je got, me pipikhenyainy je wagien je mamoe бага : anyin ae hu hut

kö Iehova hnyi Bozera, me ûhlingö ae gan hmâ hnyi knyei Edoma. 7 Ke ame he je bolokiny hnyot ka tha ta mödra, me je nokon kau me je bolok; ke ame he ka monu idra hnyei ge dra, me ame he ka opipikhenya könödra kânâ. 8 Anyin a wale bong bi hwaban ga Iehova, hunainy bi hwaban hulo hnyi hna ivinö ge Ziona. 9 Ke ame he ka wia je wageweiny me me tar, ke adre me he ka wia sesâiny me me teio, ke ame he kânâiny ka tar ame hlâ. 10 Adre me ca he ka ume e hnyi lit me lany; ame he bala bi ka o hainy: ame he ka ba wan e, hwân hnyi ke dö ke ne o but ka hnyi ke dö; e ba at ame he ka vheno e nyiele balua. 11 Ke ame he ka iny kati me kifoda, ke ame he ka labâ e mun me oreba: ke e ame he ka inâ hon e tulutiny imonumonuny, me tulutiny e ba önyen. 12 Adre me he ka hawâ tavat ae beönua he ka musi, ke ba at eling; ke ame he ka únyi baú hia je thaniny. 13 Ke ame he ka kú ta je ivatetaföcö hnyi je uma umen je thaniny, ke je vhat me iwadekong hnyi je hnabâiny: ke e ame he ka hnân hnen je luko me je mun. 14 Ke ame he ka iouny eling je menoiny hnyebuba me je luko, k' ame he got бага ka hawâ hanen; eke, ame he ka hnen ling lilith, me wâ hobi kâu e hna menâ. 15 Ame he minya kifosa ka bi hâtien eling, me hip akuny, me tho wakuny me ûkhacaköuâ lakon hmelen e: eke, ame he minya je da a ka ûkhacaköu eling, a úsa lo. 16 Elâm d' öbun tusi anyi Iehova, ke aú thö: ame ca he ka hia ke at a khaca gadra, ke ame ca he bi ka ba úcon: anyin a hia but húna e hnen hnyimök, ke a ûkhacaköuâ e ge hanon. 17 Ke e ame ugleköpi ödra, ke ame khenâ ge hnyamen ködra hoton tulut: ame he ka idra nyiele balua, adre me he ka laba eling hwân hnyi ke dö ke ne o but ka hnyi ke dö.

HNYIMAKAN 35.

AME he hnyebuba me dok ae atgec ka senyin; k' ame he hnyot ka hobâ me vhöng helâ me obedila. 2 E ame he ka vhöng gan hmâ me senyin ge hobâ me khumöng; adre me he ka ham kâu hmanenanginy Lebanona me mecin Karemela me Saronâ: adre me he ka wâ hmanenangi Iehova, wale mec anyin Khonguta.

3 Ohwegiâ je hnyam ame him, ke ohwegiâ je bouca ae mat. 4 Ha thö ködra

tavat ae sēnyin hnyok, ka habe, Hwege thö, ca ot bi: wâ bi, ame he ka o Khongubun tha e me hwaban, ame he Khongka bi hwaban; e ame he ka o me omeli öbun. 5 Me ame he ka obwela je emakan tavat a ödra wadröu, me khöng je hnyikönyen tavat ae wejiji. 6 Me ame he ka gâ tavat ae kong cadra helâ me ailla, k' ame he bi ka khumöng bohmen at ae hum: anyin ame he ka patrutrua köiö hnyi hnyebuba, me je wagewe hnyi dok ae hnyei бага. 7 Ke ame he kânâ a öny ka wia me me an, ke dok ae atgec ame he ka wia me me pupuainy köiö: hnyi uma umen je luko waleji adre me mokut hnyin, ame he ka kú hnyin sa kowi me amun. 8 Ke ame he ka hu hna cit gethen eling, me ke gethen, k' adre me he bi ka hwenyi ien e, me, gethen ae kap; ame ca he ka vheno e ge tavat ae kong; ke ame he ka hobi ködra: ke haba tavat vheno gethen, k' ame ne tavat ae monu, me adre me ca he ka he monu hnyin. 9 Ame he ka ba liona eling, ke ame ca he ka he kâe meno ame úhúlú, adre me ca he ka wâ e eling: ke ame he tavat adre úcú melidra ka vheno e: 10 ke ame he ka hmetu tavat a úcú melidra Iehova, me o hnyi Ziona me hwan khumöng; ke e hon je bödra senyin a nyiele balua: k' adre me he ka senyin me hobâ, k' ame he ka hia hlöuhlöu me máng.

HNYIMAKAN 36.

KE haba hnyi huna a fotini Hezekia than, me ame o but Saneribi than Asuria ka vat me je taun adre up veten hnyi Juda, me húgúnâ. 2 Ke haba than Asuria ame kunö Rabesake úheny Lahisa Jerusalema ai kö Hezekia than me utbavat ae gan hmâ. Ke e ame tot hnyi deny köiö ethö, hnyi gethen ame he ka hnyi utkânâ anyin at ame hnú khaú. 3 Me ame o but kâu Eliakima nöku Hilekia, at ame musö hnyaba, me Sebena at sinalimen, me Joa nöku Asafa at ame önykümeâ. 4 Ke Rabesake ame ha ködra, ka habe, Ha thö walang ang kö Hezekia, ka habe, Walang hna ha hnen than ae gan, a than Asuria, ka habe, Ie únyi e u me labageju kâu? 5 Haingök a haba ányâm metâ me tang hwegiâm hobi kâu vat, me wale je hofuc baú thibi: ke u me labageju kö ia waleling m' u me bi gan könya? 6 Wâ bi, u me labageju ka uci hlowe ae mita eú, wale Aigupito; ke e ka hlec hnyiban e ge at.

me ame he ka dáoâ hnyamen : ke helâe Farao than Aigupito ködra hia adre me labageju kâu. 7 Ke u je ne ha kõnya, ka habe, Öhmun e labageju kö Iehova Khonguhmun ; hawa, ca anyin je dok ae görany me anyin je taben hut waleji a ohia hnö Hezekia, me ha ka at Juda me Jerusalem, ka habe, Öbun e he ka hic hnyi hnyimakan taben hut ang? 8 Ke walang ang, u na he ju ka uhihinyköu me tuhök thaniny Asuria, ke oge me he bi nya ka ham köu lo li thauzan je hors a ne khanö u he ka ve bi at he ka tab' ödrin. 9 Ke u me he ka kâmâu ka ohmeto ke taben vat ae úhnyükong hmönyin unyin lathnyabainy tuhök, me labageju kö Aigupito hobi kâu je kariota me tavat tabö hors? 10 Ke hawa, oge me o but ka hnyei ang ka ohia e, ke a ca musi bi Iehova? Haba Iehova ame ha kõnya, ka habe, He thö ka hnyei eang me ohia e. 11 Me haingö Eliakima, me Sebera, me Joa, kö Rabesake, ka habe, Ö u fuc ka lathnyabaem hnyi hwen Suria ; anyin ae khan' öhmun e: ke ca fuc köhmun hnyi hwen Juda wâ e nye löng dö tavat hon hna up haginý. 12 Me Rabesake ame thu, ka habe, Hawa, a kunö nya tuhök ka tuhâm möu mýnya he ka ha hofuc e? hawa, a ca kunö nya ka tavat adre me laba hon hna up haginý, m' adre me an tidra tatet me ijem hnödra hna hwen hingat tha ödra möbun? 13 Ke haba Rabesake ame tot me hongot hwege göranyai hnyi hwen Juda me ha, ka habe, Löng ju hofuc hwan than ae gan a than Asuria. 14 Walang hna ha hnen than, ka habe, Ca hna but kö Hezekia he ka iyaw' öbun ; anyin ae ca khana he ka omeli öbun : 15 ke haba khaca e so ame ca he Hezekia ka kun' öbun he ka labageju kö Iehova, ame ha, ka habe, Ame he Iehova ka omeli öta ; ke ame ca he ka hna taun ang ka hnyi hnyamen than Asuria. 16 Ca he öbun ka ling Hezekia : anyin a walang hna ha hnen than Asuria, ka habe, Üsköu thö mönya, me he kõnya ; ke öbun e he ka ve an wan anyibun vine me halebun je elaio, me ve ijem je an öbun e köü : 17 ke ne o but oge me o me hum öbun ka hnyi hnyei helâ me ibun hnyei, hnyei ae hu whit me waina, hnyei ae hu areto me je hnyei vine. 18 Wâ wia wâ e nye he Hezekia ka iyaw' öbun, me ha, ka habe, Ame he Iehova ka omeli öbun. Hawa, e hu hna omelö tavat hnen je khongon je hnyei únyi hnyi hnyamen than Asuria? 19 Ewa je khongon Hamath

me Arefada? ewa je khongon Sefaravaima? hawa, ödrin e hia but omeli Samaria únyi hnyi hnyamök? 20 Ewa je khongon je hnyei a hnyat adre hia but omelö idra je hnyei únyi hnyi hnyamök, me me he Iehova ka omeli Jerusalem a únyi hnyi hnyamök? 21 Ke adre me laba hnyibü, me ca thu kâu ge ke hofuc, anyin a huna than, ka habe, Ca he ka thu kâu. 22 Me haba Eliakima nöku Hilekia at ame musö hnyaba, me Sebera at sihnalimen, me Joa nöku Asafa at önykümeâ, me ödrin e he kö Hezekia me je úkhaü adre kia, me thumeto e ge je hofuc ho Rabesake.

HNYIMAKAN 37.

KE a löng ut Hezekia than me e ame kia anyin je úkhaü, me khavä ecmano ae gan nân, me dit ka hnyi uma umö Iehova. 2 Ke e ame kunö Eliakima at ame musö hnyaba, me Sebera at sihnalimen, me wahingat a tavat bi hut, adre ve khavä ecmano ae gan nân, kö Isiaia perofeta nöku Amosa. 3 Ke ödrin e ha kâu, ka habe, Walang hna ha hnö Hezekia, ka habe, Bonginy vec, me ú, me úhaikonguny bong ang : anyin a úen a o ta je wanakat, ke ba at ae hwege he ka hnokö. 4 Ame ne he ka löng ut la Iehova Khongom hofuc ho Rabesake, waleji a kunä hnen than Asuria a tuhan he ka haikongö Khong ae möt, ke e ame he ka thawä hofuc ame löng Iehova Khongom : anyin a wale hic dö hobi kâu ta je kolon. 5 Me ame o lathnyabai Hezekia kö Isiaia. 6 Ke ame ha Isiaia ködrin, ka habe, Öbun e he ka ha heläng ka tuhöbun, ka habe, Walang hofuc ho Iehova, ka habe, Ca he ka outen hofuc u je löng, waleji hnen athnyabainy than Asuria hna haikongu nya. 7 Wâ bi, oge me he ka ip ke hanu eü hnyi hnyekon, me e ame he ka löng úthumetu me hmetu ka hnyi iny hnyei ; ke oge me he ka öta e ge hele vat hnyi iny hnyei bi.

8 Me ame hmetu but Rabesake, me wâ a g' ame vat than Asuria me Libena : anyin a e ame löng a g' ame he but úheny Lakisa. 9 Ke e ame löng bongu Tiraka than Aithi-ope, ka habe, E but ang ame he ka vat möu. Ke a löng ut e, me e ame kunä je úthumetu kö Hezekia he ka ha, ka habe, 10 Walang hofuc öbun e he ka ha kö Hezekia than Juda, ka habe, Ca he ka iyawö u bi hnen Khongom wale u je labageju kâu me ha, ka habe, Adre me ca he

ka hna Jerusalema ka hnyi hnyamen than Asuria. 11 Wâ bi u je löng ut hna ânyâ hnen than Asuria ka ta je hnyei hia, a g' adre ti ohia bi: ke adre me kâmâu ka omeli u. 12 Hawa, a hia but je khongon je hnyei omeli ödra waleji a ohia hnen lakamök, waleji Gozana, me Karan, me Rezeß, me laku Edena hnyi Thalasa? 13 Ke ewa tuhan Hamath, ke tuhan Arepada, ke tuhan taun Sefaravaima, ke Hena, ke Iva? 14 Ke haba Hezekia ame kap tusi únyi hnyi hnyamen je úthumetu me ame aú: me Hezekia ame he ka hnyi uma umö Iehova, me e ame ulolo e hnyi hnyimakö Iehova. 15 Ke haba Hezekia ame hic kö Iehova, me ha, ka habe, 16 Iehova tuhan sabaoth lö, Khongu Isaraela, ke at ame laba wanben li kerubi, u thibi Khong, a hake u ke, hnyi ta je dökhü hia eang hmeledrany; u je op drany me hmeledrany. 17 Iehova lö, tä ju hnyikönyâm me löng; Iehova lö, hmak dö me wâ; me löng ju hofuc ho Saneribi, wale e ame úkhünöng he ka haikongoâ Khong ae möt. 18 Iehova lö, e hnathu, hnen je than Asuria hna öba wan je hnyei me je idrin, 19 me adre hia but khûâ je khongudrin ka hnyi meic: anyin a ödrin ca je khong bi, ke so bi huliwa anyin je hnyamen at, k' ödrin utö me veto bi; anyin a wale adre ohí ödrin. 20 Iehova lö, Khonguhmun, walang ang ö u omeli öhmun dö únyi gan, me me khana hnen je dökhü hia eang hmeledrany a u thibi Iehova, a hake u ke.

21 Me haba Isaiä nöku Amosa ame úkhünöng kö Hezekia me ha, ka habe, Walang hna ha hnö Iehova Khongu Isaraela ka habe, U je hic könya ga Saneribi than Asuria, 22 awe, walang hofuc ho Iehova ame ha gan, ka habe, A hûkötio u me hlumö u hnen hlu wale hlu Ziona; ke ame nyinyikâ ban gam hnen hlu Jerusalema. 23 U je haikongoâ me bi gan kö ia? u je hongot göranyai kö ia ge hwâu hofuc me bi gan ge li emâkâm? wale ka Kabi Isaraela. 24 U je hia but haikongoâ Than a deny je athnyabaem, me ha, ka habe, O ge ölö hon je bucen hnyi ke keihen Lebanona tha inya me anyik ta je kariota ae se hia; ke oge me he ka sö but ta je arasiny ae beú göranyai me je köpiny adre úca: ke oge me he ka o ka hnyi dok a göranyin, hnyi hnyeuten adre belökâ. 25 Oge hia but khû an, ke haba li hnyeúcak ame ohmö je wageweiny hia Aigupito. 26 Hawa, u je ca löng a oge ânyâ e kâu

adrem, ke oge mádrâ e hnyi je bong a bân? walang ang oge hia but ohwadá mu me he ka öba je taun adre up haginý me me je ve ta únyi. 27 Anyin a wale e úhnyúkong maniny tavat adre me labâ e, ke ödra ot me ame gâüdrin; ödra úcü me hna önying, me úö ae ometu ae hât, me hna önying hon ban uma, ke helâ me hnyei hwit ae tiga ca metu. 28 Ke oge wâ but hnâm hna laba, me hnam hna didrut, me didrö, me hnâm hna hmönyin könya. 29 Can hnâm hna hmönyin könya, ke ame o but ka hnyi li hnyikönyök hnâm hna bi gan könya, me oge me he bi nya ka inâ anyik otru hnyi hnyingöiâm, me anyik fao hnyi li esongodâm, ke oge me he ka ohmetu u hnyi gethen u je o hnyin. 30 Ke walang ame he ka haten köu: öbun e he ka han únyi ame kü hwege hnyi huna ang, ke haba hnyi huna a loiny öbun e he ka han únyi ame kü hwaban e; ke haba hnyi huna a kuniny, me öbun e he ka belök me menu, me tä je hnyei vine me ijem je wan. 31 Ke haba je kolon lap anyi Juda, tavat ae möt, adre me he ka kü hmetu eú, me wa göranyai. 32 Anyin ame he ka he úheny Jerusalema ta je kolon, k' ame he ka he únyi hnyi bucen Ziona tavat adre me he ka möt: ame he ka ânyâ e ge weny ae gan ga Iehova tuhan sabaoth. 33 Anyin a wale, walang hna ha hnö Iehova ge than Asuria, ka habe, E ame ca he ka o ka hnyi taun ang, me hlic fana hnyin, ke e ame ca he ka hom bec me tot hnyi hnyimakan e, me otílâ taben kânâ cieö e. 34 E ame he ka hmetu hnyi gethen a o hnyin, k' ame ca he ka o ka hnyi taun ang, ame ha Iehova. 35 Anyin a oge me he ka tuö taun ang me omelö e gak bi, me ga Davita athnyabaik. 36 Me ame he but angela anyi Iehova me kot hna hunuma anyin at Asuria, a wan haded ke eite faiv thauzan: ke hnyi úen adre me vesâ hnyi hnyomakatu, me wâ bi, adre mok hia ju. 37 Me ame todrö Saneribi than Asuria me he, me laba hnyi Nineve. 38 Ke e ame hic hnyi uma umö Niseroka a khongon, me ame kot e ge hele vat hnen li lakon jia Aderamelek me Sarezera: ke ödru me kec ka hnyi hnyei Ararata. Ke ame than biju Esar-adon a nokon hwaban.

HNYIMAKAN 38.

KE haba hnyi úen eling ame he but Hezekia ka mok. Ke ame o kâu

Isaia perofeta nöku Amosa me ha kâu, ka habe, Walang hna ha hnö Iehova, ka habe, Ünnekou thö me anyâm lap ; anyin a u me he but ang ka mok, ke u me ca he bi ka möt. 2 Me Hezekia ame wia hnyimakan ka hnyi hnyeige uma, me hic kö Iehova, 3 me ha, ka habe, Iehova lö, u na he ju ka únyküme walang ang hnök hna he hnathu hnyi hnyimákâm me hnyok-ae wisa, ke anyá so hnyi hnyimákâm. Ke Hezekia ame tenge hwege. 4 Ke ame o but hofuc ho Iehova kö Isaia, ka habe, 5 He thö me ha kö Hezekia, ka habe, Walang hna ha hnö Iehova Khongu Davita a kibâm, ka habe, Oge hia but löng hijâm hic, me wá ta je deköiâm : me wá bi oge me he ka bi hanen bongom je bong a fittin je huna. 6 Ke oge me he ka omeli u me taun ang únyi hnyi hnyamen than Asuria : ke oge me he ka bi singiny taun ang. 7 Ke walang haten köu únyi ga Iehova, a g' ame he Iehova ka anyá únyi eang e ame ha : 8 wá bi, oge me he ka ohmeto hmenon hnyi hon wacuat, waleji ame dit hnyi haten seúnö anyi Abaza, he ka hmetu-hmetu ten je haten. Me ame hmetu seúnö hnyi ten je haten waleji ame dit hnyin.

9 Tusi anyi Hezekia than Juda hnyi anyin mok, ke ame möt hmetu hnyi hna úá.

10 Oge me ha, ka habe, Hnyi jebigöiny bonguk je bong oge me he ka he ka hnyi homagöuleny erkemok :

Ke adre húgünö nya kolon je hunaik.

11 Haingök, Oge me ca he ka ö Ja, wale Ja hnyi hnyeiy iny tavat ae möt :

Oge me ca he hmetu ka wá at unyin tavat adre me labü hmeledrany.

12 Adre oc anyik dö, ke adre hom únyi gak helá me uma mano umen at tuö mamoe :

Oge hia but vhec anyik möt helá me at ame hwáwá mano ; e ame he ka subá degeci nya únyi hnyi hna tubuny :

U me he ka bi obiny gak hwán hnyi lany ke ne o but hnyinghet.

13 Inya oge me hok hnyok ke ne o but hnyi hnyomakatu ; ke e ame thu je jeiök hia helá me liona :

U me he ka bi obiny könya hwán hnyi lany ke ne o but hnyi lit.

14 Inya oge me fufuc helá me wahalep me áiá,

Inya oge me tenge helá me biny ; e hanenak ut li emakök anyin bwela göranyai ;

Iehova lö, iny vec, u na he ju ka sing nya.

15 Ieú oge me he ka ha ? e ame hia but ha könya, ke e bi at ame anyá :

Oge me he ka omis he hnyi ta je hunaik hia can vecin hnyekuk.

16 Than lö, ame möt at hnen ta je únyi eling,

Ke e bi eú hnyin hia anyik möt :

Anyin a wale ö u osoi nya me omeli nya.

17 Wá bi, inya hnahic ut únyi hnyi vec ae gan hmá :

Ke u je hia but betenge ge hanuk me omelö únyi hnyi monop ae bon ;

Anyin a u je hia but khúá hotom ai anyik ta je hulö hia.

18 Anyin ame ca he erkemok ka oganö u, e ca khana mok he ka haisoi u :

E ca khana tavat adre me dit ka hnyi thop ka gejon anyâm hnathu.

19 Ame he at ae möt ka oganö u, a at ae möt, helá me hnök hna anyá hnyi bong ang :

Hamen kamen he ka omanená anyâm hnathu ka lakon.

20 Iehova ame tot he ka omeli nya :

Anyin a wale ate me he ka hai hwanyik je khumöng tha e me je únyikhumöng ae hu töiny.

Hnyi ta je bonginy anyita möt, hnyin uma umö Iehova.

21 Ke haba Isaia ame hia but ha, ka habe, E so adre me hom hmata a wan meta, me ip hon ohuc hnán bubuny, me e ame möt dö. 22 Ke a hia but minya ha ga Hezekia, ka habe, Ieú haten a oge me he ka he hnyi uma umö Iehova ?

HNYIMAKAN 39.

HNYI ün eling haba Merodaka-baladana nöku Baladana, than Babulona ame kuná je tusi me je bwihlany kö Hezekia ; anyin ame löng ut a ga ne mokcu ke a möt hmetu thö. 2 Me Hezekia ame senyin ködrin, me omanená ködrin tang omjehen, wale sileva me gol, me je utö ae bo so, me wakaco ae so, me uma umen omjehen vat hia, me ta je únyi hia eú hnyi tang omjehen : e ba ke únyi hnyi umen uma me hnyi dokhon dökhu hia a ca omanená Hezekia ködrin. 3 Me haba Isaia perofeta ame he kö Hezekia than me ha kâu, ka habe, Ieú hna ha hnen tavat e ! ke úhedrin ua köu ? Me Hezekia ame thu

ka habe, Ũhedrin hnyi hnyei ae sákáu ka o kónya, wale Babulona. 4 Ke haingen, ka habe, Ieú ödrin e hamâ hnyi umâm uma? Ke Hezekia ame thu, ka habe, Ödrin e hia but wâ ta je únyi hia thithö hnyi umök uma: e ba ju ke omjehek oge me ca omanenâ ködrin. 5 Me Isaia ame ha kö Hezekia, ka habe, Löng ju hofuc ho Iehova tuhan sabaoth. 6 Wâ bi, ame he ka o ta je bong, me adre me he ka tha hom Babulona ai ta je únyi hnyi umâm uma, me ta je únyi a hip hnen lakâmâm ke ne o but hnyi bong ang: ke ame he ka ba kolon ame ha Iehova. 7 Ke haba ke je lakon ame he ka o únyi gam, a je mátrânâm, adre me he ka hom dö; adre me he ka hnân je eunuka hnyi hnyaban than Babulona. 8 Haba Hezekia ame ha kö Isaia, ka habe, E so hofuc ho Iehova wale u me ha. Ke e ame ha minya, ka habe, Ame he ka hu úsökou me hnathu hnyi bonguk ta je bong.

HNYIMAKAN 40.

OTUBWELÂ ju öbun, otubwelâ ju öbun lakeik, haingen Khongubun. 2 Ha thö hofuc ae kaukahwa kö Jerusalema, ke hongot dö kâu a ga um dö bonginy vec, ke adre hia but thang degecâ anyin hulö; a hia but kap únyi ga Iehova hna olo bi hwaban anyin ta je hulö hia.

3 Ifucin at ame hongot, ka habe, Penapena th' öbun gethen de Iehova hnyi hnye-buba, okhabalavâ hna cit gethen hobi kâu Khonguta hnyi hnyei бага. 4 Adre me he ka ogöranyâ ta je hnyigöuleny bucen hia, ke adre me he ka ohnyikânâ ta je bucen me ta je hut hia: ke adre me he ka owisa ta je dok ae hwahwali, ke adre me he ka othahonâ ta je dok ae újejöng: 5 ke adre me he ka omanenâ hmanenangi Iehova, ke ame he ka tha wâ hnen tavat hia thithö: anyin a ha hnen hnyimö Iehova. 6 Ifucin ke at ame ha, ka habe, Hongot dö. Ke haingen ke at, ka habe, Oge me he ka hongoti ieu? Hna önying tavat hia thithö, ke helâ me vongan hnyot hmanenanginy: 7 ame meleca hna önying, ke ame kölu vongan; anyin ame túâ hon e homenö Iehova: e hnathu a hna önying tavat. 8 Hna önying ame meleca, ke vongan ame kölu: ke tethmâ bi nyiele balua hofuc hwan Khonguta.

9 At ame omanenâ úthumetu ae so kö Ziona lö, ölö thö ka hnyi bucen ae beú

göraný; at ame omanenâ úthumetu ae so kö Jerusalema lö, fuc hwege thö; fuc hwege thö göranýai ca ot bi; ha thö ka je tauniny Juda, ka habe, Wâ bi, Khongubun! 10 Wâ bi, ame he Than Iehova ka o helâ me at ae man, k' ame he benyin ka musi hobi kâu e bi: wâ bi, e unyin hwaban, ke e hnyi hnyimakan hwaban anyin huliwa. 11 E ame he ka hân haleny hnahat mamoe helâ me at tuö mamoe, e ame he ka hom tillâ lakon mamoe hnyi li benyin, me köp ödra hnyi úlainy, me omi alen je hnyat adre me úasin.

12 Ia tuluto köiö hnyi thopiny hnyamen, ke tuluto drany ge banyen, ke hitangen hnyi tulut sesáiny hmeledrany, ke tuluto ihmakiny ta je bucen, ke ta je hut bi hnyi tulut? 13 Ie at a tuluto hanu Iehova, ke ia obotkonginy me me ometâ e? 14 E ame úhnenamö me ia, me me ná e, ke úne kâu hnyi gethen deny hna owisa, me ná e he ka khana wâhmakhmeto, me okhana e hnyi gethen deny wâ únykúme? 15 Wâ bi, haba je hnyei me helâ me úkhulainy baket, k' adre me únykúmi ödra me helâ me kânâ hnyi únyi hnân tulut: wâ bi, e ame kap göranýai je bomene helâ me únyi ae ti úhnyúkong hmönyin. 16 Ke ca úcú bi Lebanona hnân thong, ke ca úcú bi ta je menoiny hnân hudiny leú. 17 Haba ta je hnyei hia, me helâke ba hnyi hnyimakan; ke ti ba me ba önyen hnyi únykúmenen. 18 Awe, öbun e he ka öuco Khong me ia? ke ewa úhöfcú, m' öbun e he ka öuco mé? 19 Haba at huliwa ame oköiâ hnatheat, k' ame tube e ge göl hnen at ame huliwan gol, k' ame le je tö sileva hobi kâu e. 20 Ke haba at ae ba ta únyi, me ame úca úö ame ca he ka amam bi; e ame elâm hobi kâu bi ke at ae metâ huliwa he ka penapena hnatheat a únyi ame ca he ka bwebwet. 21 Hawa, e ca kban' öbun? öbun e ca löng? k' adre ca thumetu öbun únyi hnyi can? k' öbun e ca wâhmakhmeto hwân hnyi hna bi taben hmeledrany? 22 E at ame laba hon wathelabainy hmeledrany, ke helâ me ta je wahamon tavat adre me labâ e; at ame ulolo drany helâ me imano, k' ame ulolo e me helâ me uma mano adre me laba hnyin: 23 at ame öúnyúkongo me öba je than; at ame wia tavat owisa hmeledrany m' adre me únyi baú bi. 24 Eke, adre me tiga ca te ödra, k' adre me tiga ca kónim ödra; eke e tiga ca hu wân anyidra hnyiban eú hnyi kânâ; me e ame tú' ödra, me adre me meleca thö,

ke haba weneû ame tûa degeci ödra helâ me thatûnyin hwit. 25 Ke öbun e he ka öucû nya me ia, m' oge me he ka tha ûcû mē' ame ha At ae Kap. 26 Bwela th' öbun göranyai, me wâ, ia op ta je ûnyi e, ke ame su anyidra ta je dö hnyi úseidra: e ame ve hawâ ta je iödra hia thithö; ke haba hnyi úganiny maniny man, ke can hwegien ae gan, me ame ca hia bi khaca.

27 Anyin a ieu gam Jakob u me ha, ke u Isaraela u me fuc, ka habe, E iyong kö Iehova dek gethen, ke a he but ûnyi ge Khonguk hna owisa kõnya? 28 Hawa, e ca khand u? u me ca löng? a Khong nyiele balua, a Iehova, at a op je can hmeledrany e ame ca mat, me sēnyin; ca hnân bi wâ anyin metâ. 29 E ame ha hwegien at ae sēnyen, me ham gâná hwege ka at ae ba maniny. 30 Ke ame he je thöth ka mat me sēnyin, ke ame he je wahidröu ka ta but: 31 ke ame he tavat adre me halubahing Iehova ka ohâtâ tang hwegiödra; adre me he ka gâ göranyai ge je labenyidra helâ me aeto; adre me he ka wadring, ke adre me ca he ka mat; adre me he ka he, me ca he bi ka sēnyin.

HNyimakan 41.

TA je bomene lö, laba hnyibû ju hnyi hnyimakök; ke ame he ta je hnyei ka ohâtâ tang hwegeiödra: he but jem ödra, m' adre me fuc dö: ate me he ka úkacaköu me úhnei. 2 Ia oâ ke at úheny jimeio, waleji e ame hawâ ka hnyi li can hnyi hwakecin ae wisa? e ame hna je hnyei kâu, me otilâ he ka musi hon ta je than; e ame hn' ödra ka hnyi anyin hele vat helâ me sesâ, me ka anyin cafana helâ me je thatûnyin hwit ame tûa ang. 3 E ame hnu hotudra, me he so; waleji hnyi gethen e ame tiga ca vheno ge li can. 4 Ia mâdrâ me ânyâ e, ame hawâ je dö ûnyi hnyi can? Inya Iehova at a bân me biliny, inya thibi e. 5 Haba je bomene adre me wâ me ot; haba je can hmeledrany adre me öbubuny: adre me hakekenyâ, me o. 6 Adre me úhadruoköu ödra ke at me ke at; ke adre me ve ha ka je liamekeiny mödra, ka habe, Hwege ju. 7 Ke haba at tretrau úto ame sihwegiâ at leû fao, ke haba at ame okhabalavâ ge hama ame sihwegiâ at ame kot taben huliwa a fao, me ha, ka habe, E so hna leû veto hnân hújâ: me e ame ohmâ e ge je fao me me ca bwebwet.

8 Ke haba u Isaraela lö a athnyabaik,

ke Jakob at oge me úca, mâtrâni Aberahama a hanök; 9 a u at oge me kât ûnyi hnyi je can hmeledrany, ke hawâ ûnyi hnyi je ke keihen e, ke ha köu, ka habe, U thibi athnyabaik oge úcö u ke ca hna degeci u; 10 awe, ca ot bi, anyin a tha inya möu; ca hlohlo bi, anyin a inya Khongom: oge me he ka ohwegiö u; eke, oge me he ka hadruö u; eke, oge me he ka ci u ge hnyamök a metök ae wisa. 11 Wâ bi, adre me he ka hmehma me hlohlo ödra hia thithö adre me hmönyidra köu: ke haba tavat adre me ivinö möu me adre me he ka helâ me ba k' adre me he ka hia but. 12 U me he ka elöm ödra, ke u me ca he ka ö 'dra, wale tavat adre me ivinö möu; k' ame he ka helâ me ba me ûnyi haû bi tavat adre me vat möu. 13 Anyin a inya Iehova Khongom oge me he ka kat benyâm a metâm, me ha köu, ka habe, Ca ot; oge me he bi nya ka hadruö u. 14 Ca ot bi u Jakob a waahnyöng, ke öbun tavat Isaraela; haingö Iehova, ka habe, Oge me he ka hadruö u; ke haba at úhömeli u, me Kabi Isaraela. 15 Wâ bi, oge me he ka wiö u hnân huje hwit ae so hwan a teb ûnyi ke hu nyon: m' u me he ka kokot je bucen me me úhny-ükong ju, ke u me he ka wia je hut me me helâ me unen hwit. 16 U me he ka ulic ödra, k' ame he ang ka tûa degeci ödra, k' ame he höu ka ovesei ödra: ke u me he ka senyini Iehova, ke u me he ka hobâ Kabi Isaraela. 17 Tavat adre me vec, ke ta je theduoc, me adre me heleû köio, me ba, ke atgec dö ta je bohmödra ge baic; ke oge me he bi nya Iehova ka thu ködra, oge me ca he bi nya Khongu Isaraela ka hna degeci ödra. 18 Oge me he ka oâ je-wagewe hon je bucen ae ba leûnen, ke je hna pupua köio hnyi je hnyigoulen je bucen: oge me he ka wia hnyebuba me me köio, ke hnyei ae hwahwacit me me je an ame pupua. 19 Oge me he ka tã ta je arasi hnyi hnyebuba, ke je öhum, ke adasi, ke üö hnân wakaco; oge me he ka tha ip hnyi hnyei бага köp, ke tidera, ke tasura: 20 m' adre me he ka wâ me khand' ödra, me únykúme, me tha wâ únykúme a ga ânyâ hnen benyi Iehova, ke a op e hnen Kabi Isaraela.

21 Hö je hnuöbun hna ivinö, ame ha Iehova; omanenâ thö hobun ta je hofuc ae hwege, ame ha Tuhö Jakob. 22 E so adre me he ka omanenâ, me thumetu öta ge ta je ûnyi ame he ka kû: ha th' öbun ge bongon ta je ûnyi kâu adrem, m' ate me únykúme me wâ obiny ta je ûnyi e; ke

ame ne he ka omanená kôta ta je únyi ame he ka o. 23 Úthumetu thö ge ta je únyi ame he ka kú hnyi obiny, me me khan' öhmun a öbun ta je khong: eke, ányá thö so, ame ne kong, m' öhmun e he ka hlohlo, me tha wá bi e. 24 Wá bi, öbun ti ba, ke ti ba önyen anyibun huliwa: e ikiki at ame úc' öbun.

25 O ge hia but oá ke at úheny hnyi hwadrö, ke e ame he jem; ke úheny hnyi hna o hnen seúnö, oge me oá ke at ame hawá iök: e ame he ka je than helá me hna dá dröu, ke helá me at ame op kuaia ame ututo káná ae kece. 26 Ie at ame haimemená e únyi hnyi can, me me khan' öta thö? me káu adrem m' ate me he ka ha ka habe, E at ae wisa? eke, e ba at a haimemená, eke, e ba at ame omanená, eke, e ba at a löng höbun je hofuc. 27 Oge ma bök ka ha kö Ziona, ka habe, Wá bi, wá bi ödra; ke oge me he ka ham kö Jerusalema at ame he ka hom úthumetu ae so. 28 Ke oge me wá, ke ba at, ke ba at ha bongon unyidra, ke oge me hnei ödra, ke ba at ae khana thu ge ke hofuc. 29 Wá bi, ödra hia, e únyi baú me ba önyen anyidra je huliwa: ang thibi, me monu but anyidra ta je hnatheat adre oköiá.

HNYIMAKAN 42.

WÁ bi ang athnyabaik, at o ge me cö; úcanök, ame senyin káu hnye-kuk: oge hia but ip hanuk hon e; e ame he ka oá hna owisa ka je Ethen. 2 E ame ca he ka hna hwegiá, me fuc göranyai, k' ame ca he ka olöngá ifucin eú hnyi gethen. 3 E ame ca he ka thu hlowe ame hmetru, ke ame ca he bi ka ume wakunenu ame ven: e ame he ka oá hna owisa hoton hnatu. 4 E ame ca he ka senyin me ngá, ke ne o but e ame he ka ip hna owisa eang hmeledrany; ke ame he ta je bomene ka halubahingen anyin hnanyibu. 5 Walang hna ha hnö Iehova a Khong, at a op drany, me ulolo e; at a olauá hmeledrany me ta je únyi ame kú hnyin; at a ham homená ka tavat hia thithö hon e, ke hanu ka tavat adre me vheno e: 6 haba inya Iehova, oge hia but hawo u hnyi wisa, ke oge me he ka kát benyám, me tuó u, me hnö u hnán úhinhinköu me tavat hnán melaminy ta je Ethen; 7 he ka obwela je ecmak ae wadröu, he ka hom but at adre me ca únyi hnyi uma ceat, ke tavat adre me laba hnyi mene-kholom únyi hnyi dok adre cö 'dra hnyin.

8 Inya Iehova, wale iök: ke oge me ca he ka ham anyik hmanenang ka ke at, ke hna oganö nya bi ka ta je idola. 9 Wa bi, a hwadá thö ta je únyi a bán, ke inya oge me omanená ta je únyi ae teb únyi: ke oge me bök ka omanená köbun, ke tiga ca kú ta je únyi e.

10 Hai thö kö Iehova khumöng ae teb únyi, ke hna oganá e únyi hnyi can hmeledrany; öbun tavat öbun e ut hnyi köiöai, ke unöngötiny e, ke je bomene, ke ta je aten. 11 E so ame fuc göranyai hnye-buba me je tauniny, a je taun ae úhnyú-kong ame labá at Kedara; e so ame khum-öng tavat a aten Sela, e so adre me he ka hongot ethö hon bucen. 12 E so adre me he ka hna hmanenang kö Iehova, me omanená hna oganá e hnyi je bomene. 13 Ame he Iehova ka he helá me at ae hwege; e ame he ka oá tang hwege helá me taben vat: e ame he ka kuku, eke, e ame he ka hongot göranyai; e ame he ka hwege hon je iwahnaihmiony mä. 14 E beú but hnök hna laba hnyibu; oge hia but laba wia me hokhnyoká: ke walang ang oge me he ka kuku helá me momo ame hnokoá; oge me he ka máng me momokhon. 15 Oge me he ka öba wan je bucen me je hut, ke omeleca anyidra ta je khölak; ke oge me he ka wia ta je wagewe me me je bomene bi, ke oge me he ka ohmö je an. 16 Ke oge me he ka hom ta je wadröu hnyi gethen ae ca khan' ödra; me su ödra hnyi je gethen ae ca khan' ödra: ke oge me he ka wia mene-kholom hnán lany bi hnyi hnyimaködra, ke owisa je dok ae hwhawali. Wale ta je únyi oge me he ka ányá hobi ködra, ke oge me ca he bi ka hn' ödra. 17 Ke adre me he ka ohmetu ödra, m' adre me he ka hmehma, tavat adre me labageju ka ta je idola, tavat adre me ha ka je hnatheat adre oköiá, ka habe, Öbun je khonguhmun.

18 Löng ju, öbun ta je wejiji; bwela but, me me wá thö, öbun ta je wadröu. 19 Ie wadröu, wale athnyabaik? me ie wejiji helá me anyik úthumetu oge me kuná? ie wadröu helá ma at ame úsoköu mönya? ke wadröu helá me athnyabai Iehova? 20 E se hia ta je únyi u je wá, me ca vheno bi; adre khöng ut li hnyikönyen, ke e ame ca löng bi. 21 Ame so kö Iehova hnyi anyin hwa-kecin ae wisa, he ka oganá hnanyibu, me ohmanenangá e. 22 Ke hnyei adre hügú-ná me söh hnyei ang; ke adre nuc ödra hia thithö hnyi je thop, ke adre ikhöl' ödra hnyi je uma ceat: ödra a tavat hnán hügú-

nâ, ke ba at ame tubi ödra ; me hnân söh, ke ba at ame ha, ka habe, Ham hmetu but. 23 Ia gabun ame he ka tevehlöng ünyi ang? me tä hnyikönyen me löng hobi kâu nyiele? 24 Ia hnö Jakob m' adre me söh, me Isaraela ka tavat venöu? hawa, ca hnö Iehova? waleji at ate me änyâ hulö kâu, ke adre me höcö he ka vheno deny je gethen, ke khaca adre me ca löng bi anyin ta je hnanyibu. 25 Anyin a wale e ame hingälâ hudra úganiny anyin hmönyin, me ihwegien anyin vat ; ke e ame vác e igigilö e, ke e ca khana bi ; ke ame hlá e, ke e ame ca únykúme bi.

HNHYIMAKAN 43.

KE walang ang, walang hna ha hnö Iehova at a up u Jakob, me at a huliwön u Isaraela, ka habe, Ca ot bi, anyin a oge hia but úcö änyâm möt ; oge hia but hawâ iâm, anyin a atök ut u. 2 U ka he ka hanyâúâ je köiö, me oge me he ka tha inya möu ; me je wagewe, adre me ca he ka khutukhaúö u : u ka he ka he wanben meic, ame ca he ka thung u ; k' ame ca he bâhlân ka möt unyâm. 3 Anyin a inya Iehova Khongom, Kabi Isaraela, at ame omeli u ; oge hia but ham Aigupito hnân hwaban melâm, ke Aithiope me Teba hnân hwabâm. 4 Anyin a u oúnykúmik, me hmanenang, me hnök hna betenge gan ; awe, oge me he ka ham tavat hnân hwabâm, me je hnyei hwaban melâm. 5 Ca ot bi, anyin a tha inya möu : oge me he ka hom ta je mâtrânâm úheny jimeio, me úkhacaköuö u úheny jimeü ; 6 oge me he ka ha ka ke keihen hwadrö, ka habe, Hna but ; ke ka ke keihen hwaiöu, Ca behânâ bi ; hom but lakuk obaga úhedra sákâú, ke lakuk wahu ünyi hnyi je can hmeledrany ; 7 haba ödra hia adre ip hudra iök, waleji oge me op hnân oganö nya ; me inya at a huliwön ödra ; eke, oge hia but up ödra. 8 Hö jem tavat ae wadröu ke hu ecmak, ke tavat ae wejiji ke hu hnyiköny. 9 Úkhacaköuâ thö ta je hnyei hia, me ame he tavat ka úkhacaköu : ie at gadra ame he ka haime-menâ e, me omanená köta ta je ünyi a bân? hamödra he ka hawâ tavat ohnatho, m' adre me he ka ohnathu ödra : ke adre me ne he ka löng me ha, ka habe, E hnathu. 10 Öbun tavat ohnathu nya, haingö Iehova, ke athnyabaik waleji oge me úca : me me khañ öbun me labageju könya, me wâ únykúme a inya thibi ; e ba ke Khong a

ban ke bilik bi, ke haba khaca, me ba ke at hnyi hwabök. 11 Inya thibi Iehova, ke ba ju ke at úhömeli, ke hake inya ke. 12 Oge hia but haime-menâ, ke oge hia but omelö, ke oge hia but omanená, ke tiga ba khong kanyua unyibun : anyin a wale hai-ngö Iehova, öbun tavat ohnathu nya, a inya thibi Khong. 13 Eke, inya but ling ke tiga ba bong ; ke ba at ae khana he ka hügünâ ünyi hnyi hnyamök : inya oge me he ka huliwa, ke ie at ame he ka bi ovheliny.

14 Walang hna ha hnö Iehova at omeli öbun, a Kabi Isaraela, ka habe, Can gabun, oge me he ka úkhünöng Babulona ai, ke oge me he ka hum ödra hia thithö a je bá, wale at Kaledia, adre me tabâ je hu adre me senyin hnyin. 15 Inya Iehova, Kabi-bun, at a Up Isaraela, ke Tuhöbun. 16 Walang hna ha hnö Iehova at ame bi gethen hnyi köiö, k' ame bi deny gethen hnyi wanben köiö ae gan ; 17 at ame hom je kariota me je hors, me utbavat me tang hwege ; adre me tha mokut ju, k' adre me ca he ka tot hmetu bi ; e hi' ödra but, k' adre me mok ut helâ me wakunenu : 18 haingen, ke habe, Ca únykúme bi ta je ünyi a bân, ke ca hnyok bi ka ta je ünyi kâu adrem. 19 Wâ bi, oge me he ka ányâ ünyi a teb ünyi ; k' ame he ka kú walang ang ; ame ca he ka khañ öbun e? Oge me he ka bi gethen hnyi hnyebuba, me bi wagewe hnyi hnyei бага. 20 Ke ame he ka oganö nya hnen je menoiny hnyot, je luko me je iaena : anyin oge me oâ köiö hnyi hnyebuba, me je wagewe hnyi dok ae hnyei бага, he ka habelen lakeik waleji oge úca : 21 waleji tavat oge me op hobi könya bi, m' adre me he ka oganö nya. 22 Ke so bi u je ca hawo nya, Jakob ; ke u je katebu könya Isaraela. 23 U je ca hom könya halem ta je nak meno a je hudiny leü ; ke u je ca oganö nya ge änyâm ta je hut. Oge ca ohmakö u ge ta je hut, me osényini u ge ta je üö ae bo so. 24 U je ca úcü üö ae hnebwia hobi könya hwaban mone, ke u je ca osekuni nya ge pipikhenyainy änyâm ta je hut : ke u je hia but ohmaki nya ge änyâm ta je hulö, u je hia but osényini nya ge hwakecâm ae kong. 25 Inya, inya thibi at ame kot degecâ hnâm ta je hna hanyâúâ cak bi ; ke oge me ca he ka únykúme änyâm ta je hulö. 26 Oúnykúmi nya thö ; ate me he ka tha úbneiköu : ha thö hnâm hna ivinö, m' adre me he ka haiwisai u. 27 Ame änyâ hulö hnen kâmâm a bân, ke ame úkhiñ fuc

mönya ányám je úthumetu. 28 Anyin a wale oge me he ka okongoá je tuhan dok ae kap, me hnö Jekob ka hnaúhangö, ke Isaraela hnân haikongoá.

HNYIMAKAN 44.

KE walang ang löng ju, Jekob athnya-baik ; ke Isaraela waleji oge úca : 2 walang hna ha hnö Iehova at a huliwön u, at a up u hwân hnyi hnyekon hinyám, at ame he ka hadruo u, ame ha, ka habe, Ca ot bi, Jekob a athnyabaik ; me u Jesuruna, waleji oge úca. 3 Anyin oge me he ka hingálá köiö hon at ame beic, me je wagewe hon dok ae hwahwacit : oge me he ka hingálá hanuk hon je mátránám, me hnabicik hon tavat adre me o únyi gam : 4 ke adre me he ka tha kú me hna önying, helá me je garaba hnyi baten je wagewe. 5 Ame he ke at ka ha ka habe, Inya atö Iehova ; ke ame he ke at ka hwenyi ien bi hoton iö Jekob ; ke ame he ke at ka sihnalimen ge hnyamen hobi kö Iehova, me hwenyi ien boton iö Isaraela.

6 Walang hna ha hnö Iehova, Tubö Isaraela, me at úco anyin möt, wale Iehova tuhan sabaoth : inya ang at a bán, me a biliny ; ke ba ju ke Khong ke inya thibi. 7 Ke ia ame he ka hongot helá mönya, me haimemená, me penapena hobi könya, hwân hnyi hnök hna ip tavat káu adrem ? ke so adre me he ka haimemená ta je únyi ame he ka o, me ta je únyi ame he ka aat dö. 8 Ca ot bi, ke ca öbubuny bi : hawa oge ca haimemená köu ehac, me omanená köu ? ke öbun tavat ohnathu nya. Hawa, e hu ke Khong minya ju ke inya thibi ? eke e ba ke Kic ; e ca khanö nya khaca. 9 E únyi baú hia tavat adre me bi hnatheat ; ke ba troban anyidra ta je únyi adre me hnyok káu : ke ame ca bwele tavat adre me ohnathu ödra, ke ca khan' ödra bi ; m' adre me he ka hmehma but. 10 Ie at ame tibet ke khong, me oköiá ke hnatheat ae ba troban ? 11 Wá bi, ame he ka hmehma je lawaeny hia ; ke je at, tavat adre me huliwan : e so adre me oúhacaköu ödra hia, e so adre me úti-tilen ; adre me he bi ka ot, adre me he ka tha hmehma. 12 Haba at leú fao e ame ányá giwa, me huliwan hnyi walep, me kokot e ge je hama, me huliwan e ge benyin ae hwege : eke, e ame mekihnánem, me ame ba hwegien ; e ame ca ijem köiö me e ame sényin dut. 13 Haba at ame tretrau utö ame lelö tulut ; e ame bi hualimen e

ge pensel ; e ame tibet e ge je omelö, ke e ame tuluto e ge je kompas, ke e ame ányá öuco e me at, hoton hmáiny at, me me laba hnyin uma. 14 E ame sö hobi káu e je arasi, me hok tireza, me wajo, me onáká khaca hobi káu e hnyi je úöiny hnyot : e ame tá köp, ke ame he we ka öküá e. 15 Ke ame he ka le e hnen at ; ke e ame hom hanen hnân hlök ; eke, e ame vác e, me le falawa : eke, e ame thekhong, me khudrung káu ; e ame bi hnatheat, me ta ju hnyi hnyimakan. 16 Ke hnyiban e, e ame vác hnyi meic ; ke ke hnyiban hnân leú uthmeno me han, me me sekon dö : eke e ame hlök me ha, ka habe, Awe, oge mage thö, oge löng dö meic : 17 ke haba kolon, e ame bi khong káu, hnân anyin idola : e ame ta káu me khudrung, me hic káu, me ha, ka habe, Omeli nya thö ; anyin a u khouguk. 18 E ca khan' ödra, ke adre me ca wá únykúme : anyin a e ame omúko je emaködra, m' adre me ca bwela bi ; me je hnyekudra m' adre me ca wáhmakhmeto. 19 Ke ba at ame únykúme hnyi hnyekon, ke ba metá me wáhmakhmeto me me he ka ha, ka habe, Oge hia but vác ke hnyiban hnyi meic ; eke, oge hia but le falawa hon walepiny ke hnyiban ; oge hia but leú meno me han : ke hawa, oge me he bi ka bi únyi ae ikiki hnyi kolon ? hawa, oge me he ka khudrung ju ka hnyiban úö ? 20 E ame han dröu : k' ame omono e ge hnyok adre iyawö, me me ca khana he ka omelö hanon me ha, ka habe, Hawa, e ba thoi hnyi hnyam a metök ?

21 Jekob lö, únykúme ta je únyi e, ke u Isaraela, anyin a u athnyabaik : oge me up u, ke u athnyabaik : Isaraela lö, oge me ca he ka hnying u. 22 Oge hia but kot degecá hnám ta je hna hanyáúá helá me úlá ae khöt, me ányám ta je hulö helá me úlá : hmetu ju könya, anyin a oge hia but úcü u. 23 Drany lö, khumöng dö, anyin a ányá e Iehova ; je hnyikánáiny hmeledrany lö, hongot senyin dö ; öbun je bucen lö, ie khumöng dö göranyai, ke hnyot minya, ke ta je úö hia hnyin e : anyin a hia but Iehova úcü Jekob, ke e ame he ka oganá e bi hnyi Isaraela.

24 Walang hna ha hnö Iehova, at a úcü u, ke at a up u hwân hnyi hnyekon hinyám : inya Iehova at a op ta je únyi hia ; at a hake ulolo drany ; at thibi a olauá hmeledrany ; ie at unyik ? 25 inya at ame oúnyi-baúá je haten anyin tavat ae thoi, me omono tavat bi khong ; me ohmeto tavat

ae metâ, me omono anyidra wâhmakhmeto: 26 at ame ohnathoâ hofuc hwan athnyabainy, me ohwâdâ hna úhnenamö hnen anyin je metâ; at ame ha ge Jerusalema, ka kabe, Adre me he ka labâ e; haingen ge je tauniny Juda, ka habe, Adre me he ka up veto, ke oge me he ka otilâ hmeto je hudrei: 27 at ame ha ka dok ae dit, ka habe, Hme but, ke oge me he ka ohwahwacitâ ânyâm je wagewe: 28 at ame ha ga Koreso, ka habe, At tuö mamoe hobi kõnya, e ame he ka ânyâ hia: e ame he bi ka ha ge Jerusalema, ka habe, Adre me he ka up vetoiny; e ame he ka ha ge uma kap, ka habe, adre me ke ka bi trobâm.

HNYIMAKAN 45.

WALANG hna ha hnö Iehova kö Koreso, a at e ame hû, at oge me kât hnyamen a metân he ka hom úhnyükongoa je hnyeï hnyi hnyimakan, ke oge me he ka thang wen hnyin je than; he ka khöng je hlinginy hnyi hnyimakan, k' adre me ca he ka hlöng je homagöule; 2 oge me he ka bök hnyi hnyimákâm he ka okhabalavâ je dok ae újejöng: oge me he ka tho amamá je hlinginy bras, ke subâ degecâ je ohmâiny fao: 3 ke oge me he ka ham köu je omejeúiny menekholom, me je tang omjeú adre ikhâlâ hnyi je dok ae iyong, me me khanö u a inya Iehova Khongu Isaraela, at ame ha iâm. 4 Oge hia but ha iâm, ga Jakob a athnyabaik, ke ga Isaraela hnök hna úca: oge hia but ham köu iâm ke ca khanö u bi inya. 5 Inya Iehova, ke ba ju ke at; ke ba ju ke Khong, ke hake inya ke: oge me he ka oweikâ hnyâm, ke ca khanö u bi nya: 6 me me khân' ödra hwân hnyi hna o hnen seúnö, me únyi jimeú, ae ba ju ke at, ke hake inya thibi: inya Iehova ke ba ju ke at. 7 Oge me op lauy ke oâ lit; oge me ânyâ úsoköu, ke oâ hulö; inya Iehova at ame ânyâ ta je únyi hia thithö eling.

8 Ta ju, öbun je drany únyi ethö, ke so ame he je úlâ ka hingâlâ jem hwakecin ae wisa: e so ame he hmeledrany ka memang, me owa but möt, me tha oâ hwakecin ae wisa; inya Iehova at a op e.

9 Ekölö ge at ame iwatretra me at a op e! a ec kaia unyin ta je ec kaia eang hmeledrany! hawa, ame he kânâ ae kece ka ha ka at a op e, ka habe, Ieú u me op? ke hawa, ame he únyi u je huliwan ka ha, ka habe, E ba li hnyamen? 10 Ekölö ge at

ame ha ka kamen, ka habe, Ieú u je hnoko? ame ne ha ka momo, ka habe, U je hnoko? ieú? 11 Walang hna ha hnö Iehova Kabi Isaraela, at a op e, ka habe, Hnei nya thö ge ta je únyi ame he ka o; ke hûna thö kõnya ge lakuk, me huliwa anyin li hnyamök. 12 Oge hia but ânyâ hmeledrany me op tavat adre me labâ e: oge me ulolo drany ge li hnyamök, ke oge musö ta je únyi hia hnyin e. 13 Oge hia but oâ at e hnyi wisa, ke oge me he ka owisa deny je gethen hia, e ame he ka op anyik taun, me hna ta je atök a je hwenbâ, ke ca ge hwabban ke ca ge bwihlany, ame ha Iehova tuhan sabaoth.

14 Walang hna ha hnö Iehova, ka habe, Haba troban huliwa hnyi Aigupito, me je omjeúiny Aithiope hnân úcú, me at Seba, tavat ae beú, adre me he ka hum ödra köu, me me ânyâm; adre me he ka he hotom; adre me he ka he ke tiga c' ödra ge je tö a fao: ke adre me he ka iyâú köu, me khöu köu me ha, ka habe, E hnathu e bi Khong unyâm; ke ba ju ke at, ke ba ke Khong. 15 E hnathu u Khong ame ikhölö, Khongu Isaraela, at úhömeli. 16 Adre me he hia thithö ka hmehma me hlohlo: adre me he ka he me tha monumonu, tavat adre me bi idola. 17 Ke adre me he ka omeli Isaraela unyi Iehova hnyi möt ame ca ba balua: öbun e ca he ka hmehma me hlohlo nyiele balua.

18 Anyin a walang hna ha hnö Iehova at a op drany; e thibi Khong; at ame ânyâ hmeledrany me op e; e ame otethmä e, k' ame ca op baúâ e, e ame mádrâ e me me labâ e: haingen, ka habe, Inya Iehova ka ba ju ke at. 19 Oge me ca ha ikhâlâ hnyi dok a menekholominy hnyeï; oge me ca ha ka je mátrâni Jakob, ka habe, Elâm baúö nya thö: inya Iehova at ame ha wisa, oge me haimemenâ ta je únyi ae úcú. 20 Úkchacaköu thö ke ai öbun; tha hakekenyâ ju, öbun tavat öbun e kec möt únyi hnyi je hnyeï: e ca hu metâ gadra adre me hom tillâ ütöiny anyidra je idola, me hic ka khong ae ca khana he ka omelö. 21 Haimemenâ thö, ke hakekenyâ thö; eke, e so adre me tha úhnenamö: ia omanená e hwân kâú adrem? ia haimemenâ e hwân kâú ehac? hawa, ca hnök Iehova? ke ba ju ke Khong, ke hake inya ke; Khong ae wisa me at úhömeli; ke ba ju ke at, ke inya thibi. 22 Bwele ju jem kõnya m' adre me he ka omeli öbun, öbun hia thithö je can hmeledrany: anyin a inya thibi Khong ke

ba minya ju ke at. 23 Oge hia but khexanyin gak bi, ame he but hofuc únyi hnyi hnyimök hnyi wisa, ke ame ca he bi ka hmetu a g' adre me he hia ka cibouca kónya, ke ame he ta je hnyem hia thithö ka khemanyin gak. 24 Ame he ka ha kónya ke at, ka habe, E hu but gak thibi únyi ga Iehova wisa me hwege : ame he ka o tavat káu, ke adre me he ka hmehma, waleji tavat adre me hmönyidra káu. 25 Adre me he ka haiwisa ta je mátráni Isaraela hia thithö unyi Iehova, ke adre me he ka hobá.

HNYIMAKAN 46.

BEL ame iyáú, Nebo ame he nom ; e bi hon je meno anyidra je idola, ke hon je meno ae hnam ; e hmak anyibun je hok ka ta je meno, k' adre sényin dut. 2 Adre me he nom, k' adre me tha iyáú ; e ca khan' ödra he ka hauden hok, k' adre me he but a g' adre me bá.

3 Ling nya ju lap anyi Jakob, me je kolon hia lap anyi Isaraela, tavat adre me hom til' ödra únyi hnyi hna huokoa, tavat adre me kap til' ödra únyi hnyi hnyok : 4 ke inya thibi e, ke ne o but öbun e hingat ut, ke oge me he ka kap til' öbun ke ne o but öbun e húen dut : oge hia but op me oge me he ka kap ; eke, oge me he ka kap me omelö. 5 Öbun e he ka úhöüü nya ke öüü nya me ia, ke tuluti nya me inye ücü me ia? 6 Haba tavat adre me hingálá gol únyi hnyi tang, ke tuluto sileva hnyi tulut, me adre me hawá at ame huliwan gol, me e ame ányá e me me khong ; adre me ta ju hnyikánái, eke, adre me khudrung. 7 Adre me vaden e hon abenyidra, k' adre me hom tilá e, me ip e hnyi hnen, ke e ame tot ; k' ame ca he bi únyi hnyi hnen : eke, ame he at ka tenge káu, ke e ca khana he ka thu, me omelö e únyi hnyi anyin hmak.

8 Únykúme thö e öbun, ke hnyok бага thö : tavat banyáú lö, únykúme hmetu e. 9 Únykúme ju ta je únyi waleji a hân : anyin a inya Khong, ke ba minya ju ; inya Khong, ke ba at ae ücü mönya ; 10 at ame haimemená obiny únyi hnyi can, ke ame ha ehac ta je únyi a ödra, tiga ca ányá bi ; k' ame ha, ka habe, Ame he ka tethmá anyik musí, ke oge me he bi nya ka ányá hia wek : 11 at ame hawá meno ame gá ae behan úheny jimeió, úheny hnyi hnyei ae sákáú, waleji at oge me úsabö mē ; eke, oge

hia but ha, me oge me he ka ohwádá e ; oge hia but ip hnyi hnyekuk, me oge me he bi ka ányá. 12 Ling nya ju, öbun tavat ae hnyok бага, tavat adre me úsákáú me wisa : 13 oge me hakekenyá anyik wisa, e ame ca he ka úsákáú, ke ame ca he ka bec úhömeli únyi gak ; ke oge me he ka ip hnyi Ziona úhömeli hobi kö Isaraela hmanenangik.

HNYIMAKAN 47.

UTUT, ke laba ju hnyi sesá, u hlu Babulona ; laba ju eü hnyi káná ke ba but theron, u hlu anyin at Kaledaia : anyin adre me ca he hmetu ka haiö u a u menyik me mita. 2 Hom dö li veto hnân oamamá me khenyö falawa : ip ju únyi hnân tube hnyimákám, kia degecá but baten khaúám, omanená ju cam, vheno thö je wagewe. 3 Ame he ka manen ányám hmehma, eke, adre me he ka wá unyám : oge me he ka bi hwaban, oge me ca he ka betenge ge ke at. 4 At ame ücü melita, Iehova tuhan sabaoth ien, wale Kabi Isaraela. 5 Hlu nokon at Kaledaia lö, laba hnyibú ju, ke he thö ka hnyi dok ae lit : anyin adre me ca he hmetu ka hawo u momo thaniny je dokhu. 6 Oge me hmönyik ka lakeik, oge me okongoá ik hnyei me hn' ödra ka hnyi hnyamám : e ba hmönyin betenge u je ányá ködra ; u je ti ohmáká ányám hna úhúkálákouá hon wahingat. 7 Ke u je ha, ka habe, Oge me he bala ka than momo ; ke u je ca únykúme ta je únyi eling eü hnyi hnyekom, u je ca únykúme ge obiny ta je únyi e.

8 Ke walang ang, löng ju ang, u at ame labö hnu hoton je senyin, at ame laba khöt-kic, at ame ha eü hnyi hnyekon, ka habe, Inya thibi, ke ba ju ke at ; oge me ca he ka laba helá me safac, ke haba khaca oge me ca he ka wá ba nokon : 9 ke so bi ame he ka o köu li únyi ang helá me thuthubadecmak hnyi bong a khaca, wale ba nokon, me ba áian : ame he ka ti o köu, eja ke ne u je ne osehia bala ányám je bibihwakecin, me osehia bi khong. 10 Anyin a u je hia but labageju ka ányám je hulö ; u je ha, ka habe, E ba at ame ö nya ; ame omono u hnen ányám metá me ányám wáhmakmeto : ke u je ha eü hnyi hnyekom, ka habe, Inya thibi, ke ba minya ju ke at. 11 Anyin a wale ame he ka o köu únyi ae kong, ke u me ca he ka wá deny ame he ka o hnyin : ke ame he ka o köu úkonguny ke ca khañö

u he ka önua : ke ame he ka ie o köu hnaúhangö ke ca khanö u bi. 12 Todró walang ang me ányám ta je bibihwakecin, me hnám hna osehia bi khong, wale u je huliwa hnyin hwán k' u tiga wanakat ; ame ne khanö u he ka bi troban, ame ne he ka tom. 13 U at ae sényin ge ányám je úhnenamö ae se hia : e so ame he tavat adre me khená drany, ke tavat adre tuö je okhú, ke tavat wá tremângá je tehi, he ka tot me omeli u únyi hnyi ta je únyi ame he ka o köu. 14 Wá bi adre me he ka helá me thatúnyin hwit ; k' ame he meic ka thong degeci ödra ; k' adre me ca he ka omeli ödra únyi hnyi maniny báhlán ; k' ame ca helá me walep hnán hlok, ke meic adre laba hnyi hnyimakan. 15 Adre me he ka heláe köu ta je únyi waleji u je hia but huliwa hnyin : haba tavat adre me úcú omjeú unyám hwán ke u tiga wanakat me adre me he ka ve he but hnyi dedra je gethen ; ke ba bi at ame he ka omeli u.

HNYIMAKAN 48.

LAP anyi Jakob lö, löng ju ang, öbun tavat adre hwenyi iödra hoton iö Isaraela, a tavat adre me o but únyi hnyi je köien Juda ; a tavat adre me khemanyin hnyi iö Iehova, me ha ge Khongon Isaraela, ke ca hnathu bi me wisa. 2 Anyin a adre me ka haw' ödra a hanen taun ae kap, ke adre me ka laba kece ka Khongu Isaraela ; Iehova tuhan sabaoth ien. 3 Oge me bök ka ha ta je hofuc káú adrem : eke, ame he but únyi hnyi hnyimök, me oge me omanená : oge me ie ányá, me adre me ohwádá bi. 4 E khanö nya a u at újông, ke töiny fao nyem, ke bras barem ; 5 anyin a wale, oge hia but haimemená e köu únyi adrem ; oge me omanená köu ke tiga ca hwádá but : wá u nye he ka ha, ka habe, Hnen anyik idola hna ányá, ke hnen anyik hnatheat, ke anyik hnatheat adre me okóia hna húna ködra. 6 U je hia but löng ; wá ju ta je únyi hia e ; ke hawa gabun, öbun e ca he bi ka haimemená e? hwán hnyi úen ang oge hia but omanená köu ta je únyi ae teb únyi, waleji ta je únyi ae iyong, ae ca khanö u. 7 Adre op ta je únyi e walang ang, ke ca ehac ; ke e hia bong ang u je ca löng ta je únyi e ; wá u nye ha, ka habe, Wá bi, e khanö nya ta je únyi e. 8 Eke, u je ca löng ; eke, e ca khatö u, eke, adre ca khöng li hnyikönyám hwán ehac : anyin ae khanö nya a u at iyawö gan hmá, ke u

at hanyáúá hwán hnyi hnyekon hnyám. 9 Can iök bi, oge me he ka obecá anyik hmönyin, ke can hna oganö nya oge me he ka hokhnyok gam, m' o ge me ca he ka subá degeci u. 10 Wá bi, oge hia but cubic u, ke ca helá me sileva ; oge úcú u hnyi hna meicin seda. 11 Gak, gak bi, oge me he ka únyá e ; anyin a iéu adre me he ka haikongoá iök? ke oge me ca he ka ham anyik hmanenang ka ke at.

12 Ling nya ju Jakob me Isaraela waleji oge úca : nya thibi ; nya ang at a bán, ke inya minya ang at a biliny. 13 Eke, hnen hnyamök hna bi taben hmeledrany, ke hnen hnyamök a metök hna ulolo je drany : oge me hawá ta je únyi e, me adre me tha tot. 14 Úkhacaköu th' öbun hia thithö me löng ; ie at gadra ame haimemená ta je únyi e? Iehova ame betenge gan, e ame he ka ányá weny ka Babulona, ke ame he benyin ka e hon at Kaledaia. 15 Inya, inya at ame ha ; eke, oge hia but hawá e : oge hia but hom e, ke e ame bi sot hnyi deny bi gethen. 16 Hok ju jem könya, löng ju ang ; oge ca fuc hnyi dok ae iyong hwán hnyi can ; hnyi úen eji. inya ling : ke walang ang Iehova Than ame kunö nya, me hanon. 17 Walang hna ha hnö Iehova at ame úcú melám, Kabi Isaraela : Inya Iehova Khongom, at ame nö u he ka hu troban, at ame su u hnyi gethen u me he ka vheno. 18 Nakaem, u je ne löng anyik ta je hnanyibu' me me helá me wagewe ányám hnahic, ke helá me je waköiöiny köiö hwakecám ae wisa : 19 ke helá me öny ta je mátránám, ke haba wan hnyekom me helá me úseiny je waöny : adre me ca he ka subá degeci me ohia ien hnyi hnyimakök.

20 He but úheny Babulona, kec d' öbun ge at Kaledaia ; haimemená thö ge hwan khumöng, thumeto ju e, ha ju e ke ne o but hnyi can hmeledrany : ha thö, ka habe. A hia but Iehova úcú melen athnyabainy a Jakob. 21 Ke adre me ca beic hnyi úen e ame su ödra hnyi hnyebuba : e ame óá köiö únyi hnyi kic hobi ködra : k' ame öö kic me ame patrutrua but köiö. 22 Haingö Iehova, ka habe, E ba hnahic ge tavat ae kong.

HNYIMAKAN 49.

LING nya ju öbun je bomene ; ke tevehlöng ju öbun ta je hnyeí ae sákáú : Iehova ame ha iök únyi hnyi hnyok ; k' ame ha iök únyi hnyi hnyeku

bai: 2 ke e ame ânyâ hnyimök me me helâ me hele vat ae so hwan, e ame ikhölö nya hnyi hmenon hnyamen; ke e ame wiö nya m' inya fana ae hadröngöc, e ame ikhölö nya hnyi tangen anyin fana: 3 ke e ame ha könya, ka habe, U thibi athnyabaik; a Isaraela, at oge me he ka hmanenang gan. 4 Ke haingök, ka habe, Oge hia but huliwa baü, ke a dit ut hwegiök, ke ba troban ke ünyi baü bi: ke so bi, e hnathu, hamö Iehova he ka owisa könya, ke e unyin Khonguk hwabök bi. 5 Ke walang ang ame ha Iehova, at a up nya ünyi hnyi hnyok m' inya athnyabainy, he ka ohmetu Jakob kâu, me me úkacaköu hmetu Isaraela unyin: (anyin a inya at adre ogánâ hnyi hnyimakö Iehova, ke haba Khonguk me wale tang hwegiök:) 6 eke, haingen, ka habe, E ti háhá a u me he ka bi athnyabaik he ka ogöranyâ je tribu anyi Jakob, ke ohátâ hmetu hnyat adre tuö a at Isaraela: me oge me he bi minya he ka hnö u hnân melaminy ta je Êthen, ke hnân anyik úhömeli ka hnyi can hmeledrany. 7 Walang hna ha hnö Iehova, at ame úcü meli Isaraela, wale Kabiny, kâu a at ame húkhötiâ hnen tavat, ke u at ame bi athnyabainy tavat musi, ka habe, Ame he je than ka wâ me tot; k' ame he lakon than ka khudrung; can bi Iehova ae hnathu, wale Kabi Isaraela at a úcü u. 8 Walang hna ha hnö Iehova, ka habe, Oge me thu köu hnyi ün ae úcü, ke oge me hadruö u hnyi bonginy möt: ke oge me he bi nya ka tuö u, me hnö u hnân úhihinyköu me tavat, he ka ogöranyâ hnyei, me olab' ödra hnyi hnyei ae ba aten: 9 me ha ka tavat adre ca, ka habe, Didrut öbun; ke ködra hnyi dok ae lit, ka habe, Omanen' öbun ju. Adre me he ka han hnyi je gethen, me han tot hnyi je dok hia ae görany. 10 Adre me ca he ka mekihnanem me beic; ke ame ca he ka li ödra kahwa, me seünö: anyin ame he at a betenge gadra ka hum ödra, me su ödra ka hnyi an ame pupua. 11 Ke oge me he ka wia anyik je bucen hia hnân gethen, ke adre me he ka ögoranyâ anyik je hna cit gethen. 12 Wâ bi, ame he ka o tavat ang úhedra sâkâü: ke wâ bi, tavat ang úhedra hnyi hwadrö, me úhedra jimeü; ke tavat ang úhedra hnyi hnyei Sinim. 13 Je drany lö, khumöng dö; hmeledrany lö, senyin dö; je bucen lö, ie khumöng dö göranyai: anyin a Iehova ame otubwelâ lakeiny, me e ame he ka betenge ge anyin tavat adre me oveci ödra.

14 Ke haingen Ziona, ka habe, A hia but Iehova digic nya, ke a hnying nya but Than. 15 Hawa, ame he mono ka hnying nokon ame asen, me me ca he ka betenge ge onyen hnyekon? eke, e khan' ödra he ka hnying, ke so bi oge me ca he ka hnying u. 16 Wâ bi, oge hia but khavi hnalimâm hnyi li hnyamök; e bala bi hnyi hnyimakök ta je bahebetâm. 17 Ame hweimwei je lakom; ame he ka he but unyâm tavat adre me okongu u me tavat adre me ohio u. 18 Bwela thö göranyai li emâkâm me wâ igigilö: ödra hia thithö ang adre me úkacaköu, me he jem köu. Haingö Iehova, Kia inya, ke e hnathu, u me he ka hum ödra hia me me khaüâm me hnân theibâm, me hnân oweikö u, helâ me hlu ame he ka faipoipo. 19 Ke haba je dok unyâm ae ba hnyin wan, ke je dok ae ba hnyin tavat, ke em adre hia but okongoâ, me e hnathu, ame he ka hnek em walang ang ge tavat adre me he ka labâ, ke adre me he ka ösâkâü ödra waleji adre me ohio u. 20 Ame he lakem waleji u je tenge gadra, ka ha bi hnyi li hnyikönyâm, ka habe, E hnek könya hnen: ö u ha hnök m' inye he ka labâ. 21 Ke u me he ka ha eü hnyi hnyekom, ka habe, Ia hnöku ödra ang könya anyin oge hia but tenge ge imekiny lakuk, me hake laba, a at adre obâ he me lonu? ke ia hat hnyat ang? Wâ bi, iny khaca thibi; ke haba hnyat ang, me úhedra ua? 22 Walang hna ha hnö Iehova, ka habe, Oge me he ka hai hnyamök ka ta je hnyei, ke oge me he ka otilâ anyik boudila ka tavat: ke adre me he ka hom jem lakom obaga hnyi je úlaidra, ke vaden lakom wahu. 23 Ke ame he je than ka hat ödra hobi köu, ke je momo than ka úhalin: adre me he ka nom hnyikânâi köu, me drem sesâiny li cam; ke ame he ka khanö u a inya Iehova, k' adre me ca he bi ka hmehma, a tavat adre me halubahing nya. 24 Hawa, adre me he ka húgúnâ je hna söh unyin at ae hwege, me omelö je bâ waleji adre me hom hoton hnanyibu? 25 Ke so bi, walang hna ha hnö Iehova, ka habe, Adre me he ka húgúnâ je bâ unyin tavat ae hwege, ke adre me he ka hna but hna söh hnen tavat ae hwege hnyimen: anyin a oge me he ka ivinö me at ame ivinö möu, ke oge me he ka omelö ta je lakom. 26 Ke oge me he bi nya ka hân tavat ge hing vidra a ödra adre me oveci u; k' adre me he ka monu ge hing drödra bi, helâke me hnen waina ae hne-

bwia : ke ame he tavat hia ka khan' ödra a inya Iehova, at ame omeli u, me at ame úcú melâm, a Man mani Jakob.

HNYIMAKAN 50.

WALANG hna ha hnö Iehova, ka habe, Ewa tusiny thang faipoipo ge hinyöbun, waleji oge me degec e káu? ke ewa at oge hia but úcú öbun káu unyin tavat oge me hom gufa gadra? Wá bi, can hwakecibun ae kong adre úcú öbun, k' adre me degec hinyöbun can hnöbun hna hanyáúá. 2 Ieú can a e ba at hnyi úen oge me o hnyin? ke oge me hongot ke ba at ame ieú? Hawa, e okhulit hnyamök me ca khanö nya he ka omelö? ke ba but manik man he ka hügúná? Wá bi, hnyi hnök hna thawá oge me omada köiö, me wia je wagewe me me hnyebuba bi : ame bokong ut haledra je wá anyin ae ba köiö, ke adre mok ut ge beic. 3 Oge me tube drany ge menekholom, me khavá e ge mano ae gan nân.

4 Haba Than Iehova ame hia but ham könya bohmen at úne, me me khanö nya he ka sihwegiá at ae sényin ge hofuc : e ame úohmak hnyi je hnyomakatu, e ame ohmáká hnyikönyök he ka löng helá me tavat úne. 5 Haba Than Iehova ame khöng li hnyikönyök, ke oge me ca úkhin fuc, ke oge me ca he hmetu. 6 Oge me hna juk ka tavat úkúc, me li wahicök ka tavat adre me hnimö je leúnen : oge me ca ikhálá hnyimakök ge hmehma me úhangöji. 7 Ke ame he Than Iehova ka hadruo nya ; anyin a wale ame ca kong hnyekuk : anyin a wale oge me ányá hnyimakök helá me öüt, ke e khanö nya but a oge me ca he ka hmehma. 8 E hakekeny jut at ame haiwisö nya ; ie at ame he ka ivinö mönya? ötu me he ka tha todrö : ie at ama tot könya? e so e ame he jem könya. 9 Wá bi, ame he Than Iehova ka hadruo nya ; ie at ame he ka haikongu nya? wá bi adre me he hia thithö ka anam helá me úkhaú ; ame he walelaba ka ön ödra.

10 Ia gabun ame outö Iehova, at ame löng ifucin athnyabainy? haba at ame he hnyi menekholom ke ba melam gan, e so e ame labageju ka iö Iehova, me fát ka Khongon. 11 Wá bi, öbun hia thithö tavat öbun e hú meic, öbun e igigili öbun bi ge je okúnú : vheno thö melaminy hlögubun meic me je okúnú öbun e vác.

Öbun e he ka hu únyi gak ; wale öbun e he ka mokut hnyi hlöuhlöu.

HNYIMAKAN 51.

LING nya ju öbun tavat öbun e hnu hoton wisa, tavat öbun e elöm Iehova : wá ju kic adre sub' öbun únyi hnyin, me hwanumen thop adre hiny öbun hnyin. 2 Wá thö kamöbun a Aberahama, me Sara at a hnöku öbun : anyin oge hawá e ke tiga khaca, ke oge me ohnahicá me osehia e. 3 Anyin ame hia but Iehova otubweli Ziona ; e ame hia but otubwelá je dok hia thithö unyin ae ba wan, me wia hnyebubainy me me úcú me Edena, me iny hnyei бага me me helá me hna belök hnö Iehova ; adre me he ka wá hnyin e senyin me hobá, me ole, me hwan khumöng.

4 Lakeik lö, ling nya ju ; ik hnyei lö, tevehlöng ju könya : anyin ame he ka he but úheny unyik hnanyibu, ke oge me he ka ip hnök hna owisa hnân melaminy ta je hnyei. 5 E hakekeny jut hwakecin ae wisa, a he but anyik úhömeli, ke ame he li benyik ka owisa ta je hnyei ; ke ame he ta je bomene ka halubahing nya, me labageju ka hnyi benyik. 6 Bwele thö göranyai ka hnyi drany, ke wá ju hmeledrany eú : anyin ame he ka didrut drany helá me hai, k' ame he ka amam hmeledrany helá me úkhaú, k' ame he tavat adre me labá e ka mok heláe : ke ame he ka e balua bi anyik úhömeli, k' adre me ca he ka ohia hwakecik ae wisa.

7 Ling nya ju öbun tavat ae khan' öbun wisa, tavat ae hu anyik hnanyibu eú hnyi hnyekudra ; ca he ju öbun ka outen hna haikongu öbun ge at, ke ca gäubun ge hnödra hna hlum' obun. 8 Anyin ame he bi walelaba ka ön ödra helá me úkhaú, k' ame he bi waahnyöng ka ön ödra helá me leúnen mamoe : k' ame he ka e balua bi hwakecik ae wisa, ke anyik úhömeli ke ne o but hnyi ta je dö hia.

9 Hmak dö, hmak dö, hnyamö Iehova, khavá ju tang hwege ; hmak dö heláji me hnyi ta je bong káu adrem, wale ta je dö a bân. Hawa, ca u at ame sö omomonu Rahaba me kot tanimo? 10 Hawa, ca u at ame ohmö köiö wale köiö ae dit hmönyin ; at ame wia dok ae dit hnyi köiö me hnân gethen bi me me vheno hnen tavat adre úco melidra? 11 Ke ame he ka hmetu tavat a bi hwaban melidra hnö Iehova, me o hnyi Ziona me hwan khumöng ; k' ame

he ka e bi hon ta je bödra senyin a nyiele balua : adre me he ka senyin me hobâ, k' ame he ka hia hlöuhlöu me mâng.

12 Inya, inya at ame otubweli öbun : u ia, at ame ouden at ame he ka mok, ke nokon at adre me he ka wia me me ücü me hna önying : 13 ke u me hnying Iehova bi At a up u, at ame ulolo drany k' ame bi taben hmeledrany ; ke u me labö ouden hnyi ta je bong hia can wathethöt anyin at üöveci, hnyi ün e ame penapena he ka ohia ? ke e but ua hmönyin anyin at üöveci ? 14 Adre me he ka ie thang at bâ adre ca ; ke e ame ca he ka moku me dit ka hnyi thop, ke ame ca he ka ba an jeü. 15 Anyin a inya Iehova Khongom at ame oâ je waköiöiny köiö me ame mea but : haba ien, me Iehova tuhan sabaoth. 16 Ke oge hia but ip hok ta je hofuc hnyi hnyimâm, me tubi u hnyi hmenon hnyamök, m' oge me he ka ohmä drany me bi taben hmeledrany, me ha kö Ziona, ka habe, U ik hnyei.

17 Jerusalema lö, hmak dö, hmak dö, todrö, at ame ic ünü hnyi beli Iehova wale kaiainy anyin hmönyin ; u je hia but ijem önyen kaiainy ta tot, me ijehmö e. 18 E ba at ame he ka su tilâ e wale unyin je lakon hia e ame hnokoâ ; ke ba at ame hom hnyamen wale unyin je lakon hia e ame hat. 19 Walang li ünü ame o köu ; ie at ame he ka tenge gam ? habe, e ba at, me hnaühangö, me hmiâ, me hele vat ; oge ma kâmâu he ka otubweli u. 20 Ame ta but je lakom, adre me mokut hnyi je hna saü hia hnyi gethen, helâ me gotiny hnyot ame hnok hnyi ert ; adre unöngötö ge hmönyin anyi Iehova, wale hna thawâ hnen Khongom. 21 Anyin a wale, löng ju ang, u at adre ovecâ, me at he monu ke ca hnen waina : 22 walang hna ha hnen Tuhâm, a Iehova, a Khongom, at ame ivinöâ lakeiny, ka habe, Wâ bi, oge hia but hom ünü hnyi hnyamâm kaiainy ta tot ; me u me ca he hmetu ka ijem e : 23 ke oge me he ka ip e hnyi hnyamen tavat adre me oveci u ; waleji tavat adre me hia but ha köu, ka habe, Nom ju m' öhmun e he ka he but hom : ke u je hia but ham jom hnân hing kânâ, ke helâ me gethen, ka tavat adre me vhenö.

HNYIMAKAN 52.

HMAK dö, hmak dö, Ziona, khavâ thö tang hwegiâm ; Jerusalema lö, taun ae kap, khavâ ju khaüâm a je úkhaü

ae hmanenang : anyin ame ca he hmetu ka o köu at adre ca peretomon, me ikiki. 2 Jijingö u but ünü hnyi hnyi sesâ ; Jerusalema lö, todrö, laba thö : thang ut hna ca nyem hlüny Ziona at a bâ.

3 Anyin a walang hna ha hnö Iehova, ka habe, adre ücü öbun ke ünü baü bi ; ke adre me he ka ücü öbun hmetu ke ca bi hwaban bi ge mone. 4 Anyin a walang hna ha hnen Than Iehova, ka habe, Haba lakeik a bân adre me he Aigupito ai he ka laba eling : ke haba tavat Asuria adre me oveci ödra ke ba can. 5 Ke walang ang, haingö Iehova, oge ma änyâ ieü eang, anyin adre hom bâüâ lakeik ? ame kuku tavat adre me musi ödra, haingö Iehova, ke adre me haikongoâ iök hnyi je bong hia thibut. 6 Anyin a wale, ame he lakeik ka khan' ödra iök : anyin a wale, ame he ka khan' ödra hnyi bong eling a inya at ame ha ; wâ bi inya.

7 E so hmönyin hon je bucen li can at ame hom üthumetu ae so, at ame haime-menâ üsoköu, at ame hom üthumetu ae kese, at ame haimemenâ ühömeli ; at ame ha kö Ziona, ka habe, Ame musi Khongom ! 8 Ifucin tavat tue unyâm ! adre me hongot göranyai, adre me tha khu-möng ; anyin adre me he ka wâ, me iohnyimaköu, hnyi hnö Iehova hna ohmetu Ziona. 9 Ie tha hongot senyin dö göranyai, öbun je dok ae ba wan hnyi Jerusalema : anyin a hia but Iehova otubwelâ lakeiny, e ame ücü meli Jerusalema. 10 A hia but Iehova vhec úkhaüen benyin ae kap hnyi hnyimakan je hnyei hia ; ke ame he je can hmeledrany hia ka wâ ühömeli anyin Khonguta. 11 He thö, he th' öbun, he but ühebun e, ca kâlâ bi ünü ae ikiki ; he but ünü hnyi hnyin e ; e so e kalaöt ut öbun, tavat öbun e kap tilâ je kaia anyi Iehova. 12 Anyin a öbun e ca he ka he logot, ke öbun e ca he ka kec duöng ; anyin ame he Iehova : ka bân hnyi hnyimaköbun ; k' ame he Khongu Isaraela ka he hotubun.

13 Wâ bi, ame he athnyabaik ka änyâ ünü ae metâ, adre me he ka ogöranyâ e, me obeönua e, me e ame he ka görany hmönyin. 14 Ödra se hia adre me üth-mâhmâ gam, (adre okongoâ gan hmâ hnyimakan hon hnyimakan tavat hia, ke unyin, hon unyin tavat,) 15 helâe e ame he ka dukâiâ je hnyei ae se hia ; ame he ta je than ka laba hum gan : anyin adre me he ka wâ ünü adre me tiga ca thumetu ödra gan ; ke

adre me he ka wâ únykúme únyi adre me tiga ca löng.

HNYIMAKAN 53.

IE at a kap anyihmun úthumetu? k' adre hia but omanená kö ia benyi Iehova? 2 Anyin a e ame kú tot hnyi hnyimakan helâ me bätân, ke helâ me wân únyi hnyi kânâ ae atgec: e ba anyin hmanenang, ke ba meciny; ke ate me wâ e, me ba hmanenang gan m' ate me he ka weta. 3 E hûkötianen tavat, k' adre me hna degecâ e; e at ae vec, ke at ae khana hlöuhlöu: ke adre me hûkötia e helâ me at ame he tavat ka ikhâlâ je hnyimaködra gan, k' ate me ca oúnyihnathoâ e.

4 E hnathu e ame hia but vaden anyita ta je hlöuhlöu, ke hom tilâ anyita ta je vec: ke ate me únykúme e a g' adre hom oúhnyúkongoâ, a g' ame kot e ge Khong, k' adre ovecâ. 5 Ke so bi e ame aat dö can hnöta ta je hna hanyâúâ, k' adre me khaú e can hwakecita ae kong: adre me ip hon e je hna kot m' ate me hnahic bi, ke öta metu but can hna khaú hnân. 6 Öta hia thithö ate me hia but he monu helâ me je mamoe; ate me ve saú ka hnyi je gethen, ke haba Iehova ame ip hon e anyita ta je hulö hia thithö.

7 Adre me ovecâ e, ke e ame ka hok-hnyokâ, k' ame ca khöng hnyimen bi; adre me lelö e helâ me nokon mamoe adre me hom he ka hlingâ, ke helâ me mamoe ame laba hnyibú hnyi hnyimakan tavat subâ leúnen; eke, e ame ca khöng hnyimen. 8 Adre me hom e únyi hnyi hna ovecâ me hna úhnei; ke ewa at bi hnyi anyin dö ame únykúme a g' adre subâ degecâ e únyi hnyi hnyi iny tavat ae möt? adre me kot e can je hna hanyâúâ hnen lakeik. 9 Ke adre me penapena anyin erkemok unyin tavat ae kong, ke ame mök bi unyin tavat adre tren omjeú; ke so bi e ba hnyikongon, ke ba iyawö hnyi hnyimen.

10 Ke so bi e úcü kö Iehova he ka thu hwetö e; e ame hia but ohlöuhlöuâ e: ke u ka he ka hudo e hnân hudiny hulö, me e ame he ka wâ je mátrân, e ame he ka osehia bongon je bong, ke haba we Iehova ame he ka sot unyin. 11 E ame he ka wâ ivecín hanon me sekunâ: k' ame he athnya-baik ae wisa ka owisa tavat ae se hia ge hnen hna wâhmakhmeto: ke e ame he ka vaden anyidra ta je hulö. 12 Anyin a wale, oge me he ka khene jekhon me tavat

ae beónua, ke e ame he ka tha khenâ je hna söh me tavat ae hwege: anyin a e ame hingälâ anyin möt ka mok, ke adre me tha lelö e me tavat hanyâúâ: ke so bi e ame vaden hulö anyin tavat ae se hia, k' ame khöúâ tavat hanyâúâ.

HNYIMAKAN 54.

KHUMÖNG dö, u momo toúnyi at ame ca hnokoâ; ke ie khumöng dö göranyai, ke hongot senyin dö momo ame ca vec hnyekom: anyin ae se hia lakon tavat laba baú hon lakon tavat ae hu laöödra, haingö Iehova. 2 Ogânâ but umâm uma mano, ke so adre me he bi ka ulili mano singiny hnyabam; ca behânâ: öbeúâ but ányâm je tö, ke ohmâ ju ányâm je ohmâiny tö. 3 Anyin a u me he ka lau hnyi ke keihen metâ me me; ke ame he je mátrânâm ka hu je hnyi, me labâ je taun ae ba wan. 4 Ca ot bi; anyin a u me ca he ka hmehma: ke ca hlöhlö bi; anyin adre me ca he ka ohmehmai u: anyin a u me he ka hnying hmehma waleji u ka tiga úhnyúkong, ke u me ca he bi ka únykúme hna ohmehmai u waleji u tiga safac. 5 Anyin a áâm bi at a up u: haba ien, me Iehova tuhan sabaoth: ke haba at a úcü melâm, me Kabi Isaraela; adre me he ka hawâ e me Khongon hmele-drany hia thithö. 6 Anyin a hia but Iehova hawo u helâ me momo adre me degec ke hlöuhlöu hnyok, ke helâ me momo adre hom ke blu, k' adre obâ degecâ, haingen Khongom. 7 Ke oge hia but hna degeci u hnyi ong úen ae úhnyúkong; ke oge me he ka köp u hmetu hnyi tang betenge ae gan. 8 Hnyi wathethöt ae bahihingölö oge me ikhâlâ hnyimakök gam helâ me thuthubadecmak; ke oge me he ka betenge gam ge betenge a nyiele balua, haingö Iehova at a omeli u. 9 Anyin ae úcü könya únyi ang me uou únyi Noa; anyin a helâ me hnök hna khemanyin a g' ame ca he uou ga Noa ka tube hmele-drany, helâe oge hia but khemanyin a oge me ca he ka hmönyin hmetu köu, me thawo u. 10 Anyin ame he ka hia ta je bucen, ke ame he ka bwewet je hut; ke ame ca he bi ka hia anyik betenge unyâm, ke ame ca he ka hom degecâ hnök hna úhinyökou ge úsokou, haingö Iehova at ame betenge gam.

11 At ae vec lö, a túâ weneú, ke adre ca otubwelâ, wâ bi, oge me he ka ohmâ ányâm

je veto hnyi je ve makan, me bi tabâm ge je safairo. 12 Ke oge me he ka ânyâ ta je baitoâm ge je veto ae dra vec, me je homagöülem ge je veto a bereketh, me je hnyigöülâm hia ge je veto ae kese. 13 Ke ame he Iehova ka nâ lakom hia; ke ame he ka gan hnahic anyin lakom. 14 Adre me he ka otethmô u hnyi hwakecin ae wisa : me u me he ka laba sâkâu ge seda, anyin u me ca he ka ot ; me laba sâkâu me öbubuny, anyin a e ame ca he bi ka o köu. 15 Eja ke ne adre ne ûkhacaköu, ke ca únyi bi gak : haba tavat adre me ûkhacaköu he ka vat möu, adre me he bi ka ta, can bi u. 16 Wâ bi, oge hia but op at leú fao wale ame tûâ je walep hnyi meic, at ame hom je omjehen huliwa ; ke oge hia but op at ame sei he ka ohia. 17 E ba únyi adre ânyâ hnân vat möu ame he ka ton; ke haba ta je bohnen hia thithö tavat adre me he ka tot ka ivinö möu hnyi hna owisa, u me he ka haikongoâ. Wale jekhon je athnyabai Iehova, me hwakecidra ae wisa únyi gak, haingö Iehova.

HNYIMAKAN 55.

E ÖBUN hia tavat ae beic lö, ai öbun ka hnyi je an, ke at ae ba mone ; ai öbun, úco ju, ke an ju ; eke, ai öbun úco ju waina me debai, ke ca ge mone bi, ke ca ge hwaban. 2 Ieú gabun öbun e ham mone hwaban únyi a ca jeú ? ke anyibun huliwa hwaban únyi ame ca osekunâ ? long wia ju kõnya, ke an ju únyi ae so, ke ame he je hnyekubun ka senyinâ únyi ae pipikhenya. 3 Tevehlöng ju, ke ai öbun kõnya ; löng ju me me möt je hanubun : ke oge me he ka ânyâ úhinhinköu möbun a nyiele balua, wale tang betenge ae hnathu unyi Davita. 4 Wâ bi, oge hia but otílâ e hnân at ohnathö ka tavat, ke homakan, ke at musi ka tavat. 5 Wâ bi, u me he ka hawâ hnyei ae ca khanö u, k' ame he ka wadring hotom tavat ae ca khanö u bi, únyi ga Iehova a Khongom, ke Kabi Isaraela ; anyin a e ame hia but oganö u.

6 Elöm Iehova th' öbun, e me tiga ün he ka wâ e, hawâ thö e, e me tiga hakekeny : 7 e so ame he at ae kong ka degec hwakecin, ke so ame he at ae monu ka degec ta je únykúmenen : ke so e ame hmetu kö Iehova me me he ka betenge gan ; ke so e ame hmetu ka Khonguta, anyin a e ame he ka ti kot degecâ hia. 8 Ke haba ta je únykúmenök, me ca ta je únykúmenöbun

bi, ke haba debun je gethen, me ca dek bi, haingö Iehova. 9 Anyin ae görany drany hon hmeledrany, helâe dek ta je gethen ae görany hmönyin hon debun je gethen, ke ta je únykúmenök ae görany hmönyin hon ta je únykúmenöbun. 10 Anyin ame ta we me kiona únyi hnyi drany, k' ame ca hmetu bi ka hnyin, k' ame okhubitâ kânâ, me öwa e me ovhöngâ e, me ame ham je hatong ka at ametâ, ke jeú ka at ame han ; 11 ke ame he ka helâe hok hofuc wale ame he but únyi hnyi hnyimök : a g' ame ca he ka hmetu baú kõnya, ke so bi, ame he ka ânyâ wek, k' ame he bi ka aat hnyi únyi oge me kunâ e ka hnyin. 12 Anyin a öbun e he ka didrut hnyi senyin, ke adre me he ka lili öbun ge hnahic : ame he ta je bucen me ta je hut ka ie khumöng dö huyi hnyimaköbun, ke ame he je úöiny hnyot hia ka khóukhöu hnyam. 13 Ame he ka kü köp hwaban watetaföcö, ke ame he ka kü adaasi hwaban iwadekong : ke e ame he ka hnân ien kö Iehova, me hnân haten nyiele balua, ke adre me ca he ka subâ degecâ.

HNYIMAKAN 56.

WALANG hna ha hnö Iehova, ka habe, Vheno thö únyi ae úcú, ke ânyâ thö únyi ae wisa : anyin ae hakekeny jut he ka o anyik úhömeli, me he ka omanenâ anyik wisa. 2 Hnahic hnen at ame ânyâ e, me nokon at ame kât hmâ e ; at ame tuö sabath, me ca okongoâ e, me at ame tuö hnyamen me me ca ânyâ bi hulö. 3 Ke haba khaca, e so ame ca he atkanyua, at ame hia but úkhacaköu kö Iehova ka ha, ka habe, E hnathu ame he Iehova ka obö nya únyi hnyi inyi hnyei : ke haba khaca, e so ame ca he eunuka ka ha, ka habe, Wâ bi, inya ang úö ae mada. 4 Anyin a walong hna ha hnö Iehova Tuhan ta je eunuka, tavat adre me tuö anyik je sabath, me úca ta je únyi oge me senyinâ, me kât hmâ anyik úhinhinköu, ka habe ; 5 Oge me he ka ham ködra hnyi umök uma me hnyi hnyin hna up hagik hak ke haten, me ien ae so, hon lakudra a wainda me wahlu ; oge me he ka ham ködra ien ae tethmâ, wale adre me ca he bi ka subâ degecâ. 6 Ke haba ta je atkanyua minya, tavat adre me úkhacaköu kö Iehova, he ka bi athnyabainy, me hnyok ka iö Iehova, me bi huliwa kâu, ödra hia thithö adre me tuö sabath me ca okongoâ, me kât hmâ anyik

úhíhínykôu ; 7 oge me he ka hom tavat eling ka hnyi anyik bucen æ kap, me osenyini ödra hnyi uma hnân hic kõnya ; ke haba anyidra je hut adre le, ke anyidra je hut, adre me he ka káp hon tabök tap : ke adre me he ka ha ge umök uma, ka habe, æ uma hnân hic hobi káu ta je hnyeí hia thithö. 8 Haingen Than Iehova, at ame úkhacakóuá ta je hna obá a at Isaraela, ka habe, Oge me he bi ju ka úkhacaköu keihen unyin, ke ca ha bi ge hing aten adre hia but úkhacaköu.

9 Ai öbun omenoiny ta hnyeí he ka han, eke, öbun hia thithö omenoiny hnyot. 10 E wadröu but tavat tue unyin, ödra tavat hia thithö ae ca metá bi ; ödra je kuli hia thithö ae hum, e ca khan' ödra kuku ; a tavat bwi, me leleú, tavat be-mokot. 11 Eke, e hwenhmiá je kuli ke ca khan' ödra he ka sekudra ; ke tavat tuö mamoe ke ca khan' ödra bi he ka wáhma-khmeto : ödra hia thithö adre me ve saú ka hnyi dedra bi ta je gethen, adre me ve wia ka anyidra bi troban hnyi je hnödra. 12 Haingödra, ka habe, Ai öbun, oge má he ka hok waina, ke ötin e he ka ijem gáná grág ; he bong nyi ame he ka helá me bong ang, bong æ gan me pason he ka ha.

HNYIMAKAN 57.

AME hia at ae wisa, ke ba at a' úny-kúme e hnyi hnyekon ; ke adre me hom tavat æ wisa, ke ba at ame únykúme a g' adre hom at ae wisa ge monu ame he ka o. 2 E ame dit ka hnyi hnahic ; k' adre me ve mená hon hnödra hna mokut, wale tavat adre me vheno hwakecidra æ fofá.

3 Ke hakekeny ju öbun je lakon momo at ame bibihwakecin, a je mátrân momo ame bi únyi monu me momo hnyi gethen. 4 Öbun e hlumö ia ? öbun e memang kö ia, me iná bohmöbun ? hawa, ca öbun je lakon tavat hanyáúá ? a je mátrân at æ thoi, 5 öbun tavat ame ka öújongöi öbun hnyi hmelen je iwajo me je úö hia thithö ae hát ; tavat adre me hlingá je wanakat hnyi hnyigöulen je bucen hmelen je hmakat hnyi kic. 6 Haba jekhom, me eú hnyi hnyigöulen bucen hnyi wanben je veto æ haúhaú ; wale, wale bi hna khená köu : u je hia but hingálá hudiny ic bi ködra me bi hut. Hawa, oge me he ka hna baúá ta je únyi e ? 7 U je hia but ip hnâm hna mokut hon bucen æ beú ke görany, u je ölä

kâe me hudo je hut. 8 Ke u je hia but ötlá hnâm hna öúnykúmeá hoton je hlinginy je hwanuma, me je uthwanuma : anyin a u je hia but omanená unyâm bi ka ke at ke ca inya bi, ke u je ölä thö ; u je hia but olauá hnâm hna mokut, me ányá úhíhínykôu mödra ; u je wem hnödra hna mokut hnyi dok u je wá e. 9 Ke u je hom wakaco ka than, me osehia ányâm je únyi æ bo so, ke u je kuná ányâm je uthumetu sákáu ai, me ohnyikánái u bi ke ne o but hnyi hedis. 10 U je sényin dut hnen dem gethen æ sákáu ; ke so bi u je ca ha, ka habe, E ba but hna gejon : u je wá tang hwegien hnyamâm ; anyin a wale u je ca sényin. 11 Ke ie at waleji u me outen me öbubuny gan, anyin a u me thoi, me ca únykúme kõnya, ke u je ca ipe eú hnyi hnyekom ? hawa, oge me ca laba hnyibú hwán ehac, me u je outó nya ? 12 Oge me he ka haimemená ányâm wisa ; ke haba ányâm ta je huliwa bi, me ame ca ke ka hu troban köu. 13 U ka tenge, me hamen je hnyat u je úkhacaköuá he ka omeli u ; ke so bi, ame he ka tú' ödra hnen ang, ame he homená ka hom degeci ödra hia thithö : ke ame he bi ka hu hnyeí hnen tavat adre me labageju kõnya, ke idra bi anyik bucen æ kap. 14 Ke e ame he ka ha, ka habe, op dö göranyai, op dö göranyai, penapena thö gethen, hom but únyi ame othöá hnyi gethen deny lakeik.

15 Anyin a walang hna ha hnen At æ görany me Beönuá, at ame laba nyiele balua, ke E kap ien, ka habe, Inya oge me labá dok æ görany me dok æ kap, ke haba khaca, tha inya me at æ bewisa me hnyikáná hanon, me me omelö hanon at æ hnyikáná, me okaukahwa hnyekon at æ bewisa. 16 Anyin oge me ca he ka ivinö ke ne o but nyiele balua, ke oge me ca he bala ka hmönyin : anyin ame he ka ta sényin hnyok hnyi hnyimakök, me hanu o ge op. 17 Can hulöiny anyin behnyekon oge me hmönyik me kot e, oge me ikhölö me hmönyik : ke e ame hanyáúá tilá hnyi je deny hnyekon. 18 Oge wá but deny ta je gethen, ke oge me he ka omelö e : ke oge me he bi minya ka su e, me öküá hmetu je únyi æ so káu, me tavat adre me tha tenge me. 19 Inya oge me op wan esongot : habe, Hnahic, hnahic ka at hnyi dok æ sákáu, me káu hnyi dok æ hakekeny, haingö Iehova ; ke oge me he ka omelö e. 20 Ke haba tavat æ kong, me ödra tha úcü me köiö ame bwewet ; anyin æ ca khana he ka mená, ke ame khúkhúá

göranjai hmudra me thatúnyi nhen je wakö-iöiny. 21 Haingen Khonguk, ka habe, E ba hnahic anyin tavat ae kong.

HNYIMAKAN 58.

HONGOT hwege ju, hai göranjai ifucâm helâ me trutru, ke haimemenâ thö ka lakeik hnödra hna hanyâúâ, ke haimemenâ thö ka lap anyi Jakob anyidra ta je hulö. 2 Ke adre me elöm nya hnyi je bong, k' adre me senyin he ka khan' ödrâ dek je gethen: helâ me hnyei ame ânyâ wisa, me ca hna degecâ je hna otilâ nhen Khongudrin, helâe adre me hnei nya ge hna owisa ae úcú, adre me senyin he ka hakekeny ka Khong. 3 Haingödra, ka habe, Anyin a iéú öhmun e ânyâ ca han ke u me ca wâ bi? anyin a iéú öhmun e ovecâ ta je hanuhmun, ke u me ca wâhmakhmeto? Wâ bi, hnyi bonginy anyibun ca han, öbun e hnu webun, ke hwege hûna troban anyibun je huliwa. 4 Wâ bi, öbun e ânyâ ca han m' öbun e he ka iwatretra me ivinö, me úkhulup ge hnyam adre vhec a hulö: k' öbun e ca ânyâ ca han hnyi bong ang m' adre me löng ethö ifucibun. 5 Hawa, oge me úca ca han a helâe? ke hawa, bong ang me bonginy ovecâ hnyekon at? he ka nyingö ban helâ me saamun, ke bi nhen hna mokut mano ae gan nân me hnabadröu? hawa, u me he ka ha e me úen ca han bi, ke bong ae so kö Iehova? 6 Hawa, ca walang bi ca han oge me wek? a g' adre me he ka hna baúâ at adre me ca monoâ, ke thang je töiny únyi hnân úhúkâlâkôuâ, ke hna baúâ tavat adre me oveci ödra, ke thamúâ je hna úhúkâlâkôuâ hia thithö. 7 Hawa, ca e bi minya, he ka khenâ âm je jeú ka at ae mekihnânem, ke u me he ka hom tavat ae theduoc adre me obâ but ka hnyi hnyabam? ke u ka wâ at ame he thu m' u me he ka okhavâ e; ke u me ca he bi ka lubaduöng ge je liamekeiny möu. 8 Me ame he ka o melamâm helâ me hao-lany, ke u me he ka ie so; ke ame he ka he hwakecâm ae wisa hnyi hnyimákâm; ke ame he hmanenangi Iehova ka he hnyi hotom. 9 Me u me he ka hongot, k' ame he Iehova ka iéú; u me he ka khöú, ke e ame he ka ha, ka haba, Inya ang. U je ne hom but únyi gam hna úhúkâlâkôuâ, me kú ge banyen, me úhnenamö monu; 10 ke u je ne betenge ge at ae mekihnânem, me osekônâ at adre ovecâ; awe, ame he ka o melamâm hnyi menekholom, ke ame he

ânyâm lit ka helâ me jebigö: 11 ke ame he bala bi Iehova ka su u, me oseknui u hnyi je dok ae atgec, me ohwegiâ je jeien unyâm; ke u me he ka helâ me hna belök adre hû, ke helâ me an ame ca hme bi köien. 12 Ke ame he ke je lahanâm ka op je dok ae ba wan kâú adrem: u me he ka otilâ je taben ta je dö ae se hia; ke adre me he ka hwenyi iâm, At ame op hmetu dok ae hmouca, me at ame ânyâwia je gethen m' adre me laba hnyin. 13 U je ne thawâ cam hnyi sabath, me ca ânyâ bi wem hnyi anyik bong ae kap; ke u me he ka ha ge sabath a bonginy senyin, me ha ge hna okabâ hnö Iehova a hnân ogânâ; ke u je ne ogânâ e, me ca vhenö dem je gethen, me ânyâ únyi hnân osenyini u, me ca ha bi hwâm bi je hofuc: 14 awe, u me he ka senyin kö Iehova; ke oge me he ka hum u, m' u me tabâ je dok ae göranjin hmeledrany; ke oge me he ka hâm únyi hnyi hnyei i Jakob a kâmâm: anyin a hia but ha nhen hnyimö Iehova.

HNYIMAKAN 59.

WÂ bi, e ca okhulit benyi Iehova me me ca khana he ka omelö; ke ca wejeji li hnyikönyen me me ca khana he ka löng: 2 ke haba ta je hwakecibun ae kong, me ame úsákâú öbun me Khongubun, ke anyibun je hulö ame ikhöl' öbun ge hnyimakan, me me ca löng. 3 Anyin ae kong ut je hnyamöbun ge dra, me je banyöbun nhen hulö; ame ha thoi nhen je eson-godibun, ke ame fuc monu je bohmöbun. 4 E ba at ame hawâ hnyi hwakecin ae wisa, ke ba at ame ivinö hnyi hnathu: adre me labageju ka únyi ae ba önyen, me ha thoi; k' adre me erkinâ úökonguny, me hnokoâ but hulö. 5 Adre me tho je wakunyin vaipa, ke hwâwâ haibnai wahainná: ama mok at ame he ka an je akunyidra, ke at ka tho but khaca, me ame ie oâ but on. 6 K' ame ca he bi ka úkhaú anyidra je úhainná, ke adre me ca he bi ka tubi ödra ge anyidra ta je huliwa: haba anyidra je huliwa, me je huliwa ae kong, ke e bi hnyi hnyamödra úökonguny. 7 Ke ame wadring je cadra ka hnyi hulö, k' adre me logot hingâlâ dra ae ba hnyikongon: je únykúme ae kong je únykúmenödra; ke eú hnyi anyidra je hna cit gethen hnaúhangö me úökonguny. 8 E ca khan' ödra gethen deny hnahic; ke ba wisa hnyi je dedra: k' adre me ka ânyâ hobi ködra je gethen ae

hwali ; e ca khan' ödra hnahic tavat adre me vheno e. 9 Anyin a wale e úsákáúö möhmun hna owisa, k' ameca khöü öhmun wisa: öhmun e halubahingen lany, ke wá bi, wale lit ; öhmun e halubahingen umumelam, ke wá bi, wale menekolom. 10 Öhmun e khaüteta hna up veto heláke ta je wadröu, eke, öhmun e khaüteta heláke ba li ecmak : öhmun e haúhaú hnyi jebigö heláke me hauhauotreng : öhmun heláke me ta je komok unyin tavat ae möt. 11 Öhmun e kuku hia helá me je bea, ke kuku tenge tot helá me je biny : öhmun e halubahingen owisa ke ba bi ; me halubahingen úhómeli ke úsákáúö bi möhmun. 12 Anyin ae se hia hnöhmun je hna hanyáúú hnyi hnyimákám, ke ame hai öhmun anyihmun je hulö : a e bi unyihmun hnöhmun je hna hanyáúú, ke e khan' öhmun dut anyihmun ta je monu : 13 wale hnyi hnöhmun hna hanyáúú me ivinö Iehova, me hmetu-hmetu ge Khonguhmun, me ha úöveci me thu musi, me únykúme me ha únyi hnyi hnyok je hofuc ae thoi. 14 Ke adre me ohmetu hna owisa, ke ame tot sákáú hwakecin ae wisa : anyin a kölu but hnathu eú hnyi gethen, ke ca khana hwakecin ae fofá he ka didró. 15 Eke, e hia but hnathu ; ke haba at ame kec ge hulö, me e ame ka ányá e bi me hnán söh : ke Iehova ame wá e, me ame kong káu ae ba owisa. 16 Ke e ame wá ae ba at, me e ame láia ae ba at ame khöüá : anyin a wale ame ka ányá möt hobi káu e hnen hnyamen bi ; ke ame cö e anyin bi hwakecin ae wisa. 17 Ke e ame khavá hwakecin ae wisa heláke me hna tube úláiny, ke e ame bicá möt ; ke e ame khavá úkhaúen bihwaban hnán úkhaú, me khavá weny ae gan hmá helá me úkot. 18 E ame he ka bi hwaban hoton huliwa, wale hmönyin ka tavat a úcon, me hwaban ka ta je iwahnaihmiöny mä ; e ame he ka bi hwaban ka je bomene. 19 Me adre me he ka outen iö Iehova úhedra jimeú, me outen anyin hmanenang úhedra hnyi hna o hnen seúnö : anyin a e ame he ka o helá me wagewe ae hwege, wale ame túá hnen homenö Iehova. 20 Ke ame he at úhómeli ka o hnyi Ziona, me ködra tavat adre me hmetu únyi hnyi hulö anyi Jekob, haingö Iehova. 21 Ke haba inya, waleú anyik úhinhnyköu mödra, haingö Iehova : Haba hanuk at ame laba hom, me hok je hofuc waleji oge ip hnyi hnyimám, ame ca he ka hia únyi hnyimám, me hnyimen ta je mátránám, me hnyimen ta je mátrániny

ta je mátránám, hwán walang ang, ke ne o but nyiele balua, haingö Iehova.

HNYIMAKAN 60.

HÖHÖI thö, umumelam dö ; anyin a o but melamám, ke a o but hom hmanenang Iehova. 2 Anyin a wá bi, ame he ka tube hmeledrany hnen lit, ke ame he ka tube ta je hnyei hnen menekholom : ke ame he Iehova ka o hom, ke ame he ka manen hmanenanginy hom. 3 Ke ame he ta je hnyei ka he ka hnyi únyám metam, me je than ka hnyi iumulaminy hnám hna o. 4 Bwele thö göranyai igigilö me wá : ödra hia thithö adre me úkhacaköu, adre me o köu : ame he ka o lakom je бага úhedra hnyi dok ae sákáú, ke adre me he ka deluá lakom je hlu. 5 Me u me he ka wá me senyin, ke ame he hnyekom ka öbubuny me hlau ; anyin adre me he ka wia köu tang omjeú únyi hnyi köiö, ke adre me he ka hom köu tang omjeúiny je hnyei. 6 Ame he ka avi u hnen ta je kamela ae se hia, me je nak kamela únyi Midiana me Efa ; adre me he ka o hia úhedra Sheba : adre me he ka hom gol, me libanu, me haimemená hnán oganö Iehova. 7 Adre me he ka úkhacaköuá je hnahat hia hnyi Kedera köu, k' ame he je mamoe bagainy Nebaioth hia ka bi athnyabaem : adre me he ka óliá tabök tap hnyi so, ke oge me he ka omecá uma umen anyik hmanenang. 8 Ie je hnyat ang adre me gá helá me úlá, ke helá me je biny ka hnyi je hwanumödra bi ? 9 E hnathu, ame he je bomene ka halubahing nya, k' ame he ka bán je huiny Tasesa he ka hom lakom obaga únyi hnyi dok ae sákáú, ke e unyidra anyidra sileva me gol, hobi káu iö Iehova a Khongom, me Kabi Isaraela at ame ohmanengi u. 10 Ke ame he je atkanyua ka op hagám je hak, k' ame he je tuhödra ka bi athnyabaem : anyin a oge me kuc u ehac hnyi anyik hmönyin, ke hnyi anyik ibetengiö oge hia but betenge gam. 11 Ame he bala ka khöng ut je homagöulem ; k' adre me ca he bi ka hlöng hnyi lany me lit, me me he tavat ka suköhüná köu ta je omjeúiny ta je hnyei, me lelö tilá latuhödra. 12 Anyin ame he ka hia tavat me dökhü bi adre me höcö bi athnyabaem ; eke, adre me he ka ti öba wan ta je hnyei eling. 13 Ame he ka o köu hmanenanginy Lebanona, wale köp, me tidera ; hnán he ka ohmanengá

anyik dok ae kap, ke oge me he bi nya ka ohmanenangá e a hnen li cak. 14 Ke ame he lakon tavat adre me oveci u ka o me iyâú gam ; ke ame he tavat hia adre me hûkôtiö u ka nom ju ka hnyi li hnyeúcam ; ke adre me he ka haiö u, a Taun anyi Iehova, Ziona anyin Kabi Isaraela. 15 Anyin a adre hia but digic u me hûkôtiö u, waleling me me ca he keat unyâm, awe, oge me he bi nya ka wiö u hnân hnyeí ae mec nyiele balua, ke hnân senyin hnyi ta je dö ae se hia. 16 Ke u me he ka he minya ke ijem debainy ta je hnyeí, ke ijem je basin ta je than : ke ame he ka khanö u a inya Iehova at ame omeli u, ke at ame úcú melâm, Mani Jekob. 17 Oge me he ka ham gol hwaban bras, ke oge me he ka ham sileva hwaban fao, ke bras hwaban utö, me fao hwaban veto : ke oge me he ka wia ânyâm je taben me me hnahic, me je homakan ânyâm huliwa m' adre me wisa. 18 Adre me ca he hmetu ka löng úökonguny hnyi em hnyeí, ke ame ca he bi ka ba wan me hna úhangö hnyi je hnyigöulâm ; ke u me he ka hwenyi ien ânyâm je hna up hagin, ka habe, Úhömeli, me je homagöulem, ka habe, Ogâná. 19 Ame ca he hmetu seúnö ka hnân melamâm hnyi lany ; ke ame ca he ka omelami u ge melaminy tehi : k' ame he Iehova ka olanyi u nyiele balua, ke Khongom a mecâm. 20 Ame ca he hmetu ka dit ânyâm seúnö, ke ame ca he bi ka hia ânyâm tehi : anyin ame he Iehova ka melamâm nyiele balua, ke adre me he ka umo je bonginy tenge a u. 21 Ke ame he ka wisa hia ânyâm tavat, adre me he ka hu hnyeí nyiele balua ; a bätân ogetä, huliwa anyin li hnyamök, m' adre me he ka oganö nya. 22 Ame he ka wan thauzan bi, tavat ae wakhalet, ke ame he ka hnyeí ae hwege bi, hnyeí ae úhnyükong : oge me he, inya Iehova, ka ologotá e hnyi üen e.

HNYIMAKAN 61.

E HUK hanon Than Iehova ; anyin a hia but Iehova hú nya he ka khetá uthumetu ae so ka tavat ae ilemuk ; e ame kunö nya he ka lan tavat ae vec hnyekudra, me he ka hna hna bâúá ka ta je bá, me hna khöng una ce at ka tavat adre ca ; 2 he ka haimemená hunainy ae úcú kö Iehova, me bonginy bi hwaban ge Khonguta ; he ka otubwelá tavat hia adre me tenge thungaú ; 3 he ka ip hobi káu

tavat adratenge hnyi Ziona, he ka ham ködra únye vekiny hwaban hnabadröu, me waka-coiny senyin hwaban hlöuhlöu, me úkhaüen ogâná, hwaban hnyok ae hmak ; m' adre me he ka hwenyi lödra me je úöiny wisa, a tá Iehova, m' adre me he ka ogâná e. 4 Ke adre me he ka op je dok ae ba wan ehac, adre me he ka otílá hmeto je ke keihen adre degec ehac, ke adre me he ka ányáwia je taun ae ba aten, je dok adre degec hnyi je dö ae se hia. 5 Ke ame he ka tot ta je atkanyua me hân halebun je hnahat mamoe, ke ame he tavat aten ke je hnyeí ka seú tila káná hobi köbun, me tuö ibun je hnyeí vine. 6 Ke adre me he ka hwenyi löbun, me Tavat bihut kö Iehova : k' ame he tavat ka haiöbun me Lathnyabainy Khonguta : öbun e he ka an je soiny ta je hnyeí, ke öbun e he ka hobeluá anyidra hmanenang. 7 Ame he ka lo li hwaban köbun, hwaban anyibun hmehma ; ke hwaban imonumununy adre me he ka senyiná jekhöüdra ; anyin a wale adre me he ka olo hu hnyi idra hnyeí : k' adre me he bi ka senyin nyiele balua. 8 Anyin a inya Iehova oge me hnyok ka hna owisa, inya oge me hûkôtiá venöu, ke hwakecin ae kong ; ke oge me he ka bihwaban ködra hnyi hnathu, k' oge me he ka ânyá mödra úhihinyköu a nyiele balua. 9 Ke ame he ka lung je matránidra anyin ta je hnyeí, me lakudra huyi wanben tavat : ame he hia tavat adre me ö 'dra ka wáhmakhmeto a ödra ta je matrán a ohnahicá Iehova.

10 Oge me he ka ti senyini Iehova, k' ame he hanuk ka hobá Khonguk ; anyin a e ame hia but khaúö nya ge je úkhaúiny möt, k' ame khaúö nya ge úkotiny hwakecin ae wisa, helá me at ame hap faipoipo ame omecá e ge únyevekiny, ke helá me hlu ame he ka faipoipo ame theibá e. 11 Anyin a káná ame okúá je vongon, ke ta hnyeí ame okúá je hatong adre me tá hnyin ; heláe minya ame he Iehova ka okúá kwakecin ae wisa me ogâná hnyi hnyimakan ta je hnyeí hia thithö.

HNYIMAKAN 62.

HABA can bi ge Ziona, me oge me ca he ka laba hnyibú, ke can bi ge Jerusalema, me oge me ca he bi ka mená, ke ne o but ame o but hwakecin ae wisa helá me lany, me anyin úhömeli helá me okúnú ae umumelam. 2 Ke ame he je hnyeí ka wá hwakecâm ae wisa, k' ame he

ta je than hia ka wá ányám hmanenang : ke adre me he bi ka hwenyö ke iám bi ae teb únyi ame he hnyimö Iehova he ka ha. 3 Ke u me he ka hnân korona ae mec hnyi hnyamö Iehova, ke hnân hnabinybak anyin than hnyi hnyamen Khongom. 4 Ke adre me ca he hmetu ka haiö u, ka habe, Adre degec ; ke adre me ca he bi ka ha ge em hnyei, ka habe, E ba aten : ke adre me he ka hwenyi iám, ka habe, Hnök hna senyin gan, ke haba ien em hnyei, A faipoipo thö : anyin ame senyin köu Iehova, k' ame he ka faipoipo em hnyei. 5 Anyin a helâke hidröu ame hom hlu, helâe ame he je lakom ka faipoipo möu : ke ame he Khongom ka senyin köu, helâ me at ame hap faipoipo ame senyinâ áiân.

6 Jerusalem lö, o ge hia but ip tavat tue hon hagám je hak ; adre me ca he bala bi ka hum hnyi je lany me lit hia : öbun tavat öbun e únykümi Iehova, ca he bi ka menâ, 7 ke ca hna but kâu he ka menâ, ke ne o but e ame otílâ, me ke ne o but e ame wia Jerusalema hnân ogânâ hnyi hmele-drany. 8 A hia but Iehova khemanyin ge hnyamen a metân, me benyin ae hwege, ka habe, E hnathu oge me ca he hmetu ka hna ányám hwit hnân an je iwahnaihmiöny möu ; ke ame ca he je atkanyua ka ijem ányám waina waleji u je huliwan : 9 ke ame he tavat adre hip e ka han, me oganö Iehova ; ke ame he tavat adre úkhöünâ e ka ijem e hnyi je hnyeuleny anyik dok ae kap.

10 Didrö, didrö hnyi je homagöule ; penapena thö deny tavat ; op dö göranyai, op dö göranyai hna cit gethen ; hlo thö je veto ; ogöranyâ thö bouðila hobi kâu ta je hnyei. 11 Wá bi, Iehova ame hia but ha ka je can hmele-drany, ka habe, Ha thö ka hluiny Ziona, ka habe, Wá bi, ame o but ányám úhömeli ; wá bi, e unyin hwabab, ke e bi hnyi hnyimakan hwaban anyin huliwa. 12 Ke adre me he ka hwenyi iödra, Hnyei ae kap, A úco Iehova : ke adre me he ka hwenyi iám, Hna elám, Taun adre degec.

HNHYIMAKAN 63.

IE at ang ame he jem úheny Edoma, ae dra anyin úkhaú úheny Bozera ; a at ae hmanenang ge anyin úkhaú, k' ame he hnyi meciny anyin tang hwege ? Inya thibi, at ame ha hnyi wisa, at ae hwege he ka omelö. 2 Ieú ae dra gan ányám je

úkhaú, haba ányám je úkhaú me helâ me je úkhaúen at hlic vine ? 3 Inya oge hia but hake hlic vine ; ke ba at unyik únyi hnyi ta je hnyei : eke, oge me hlic ödra hnyi anyik hmönyin, ke ututi ödra hnyi anyik wathethöt ; me ame kong anyik je úkhaú ge drödra, ke oge hia but okongá hia anyik úkhaú. 4 Anyin a e bi eú hnyi hnyekuk bonginy hmönyin, k' ame o but hunainy hnök hna úco. 5 Ke oge me wá, me ba at úhadruo ; ke oge me láiâ ae ba at hnân ci : anyin a wale ame hom möt könya hnen hing benyik ; ke ame ci nya hnen bi anyik wathethöt. 6 Ke oge me ututo tavat hnyi anyik hmönyin, ke omonu ödra hnyi anyik wathethöt, ke oge me hingálâ dren anyidra möt ka hnyi hon kánâ.

7 Oge me he bi nya ka ha ge tang betenge anyi Iehova, me je hnân oganö Iehova, hoton ta je únyi hia thithö waleji a ham köta Iehova ; me so ae gan hmâ ka lap anyi Isaraela, waleji e ame ham ködra hoton anyin ibetengiö baú, ke hoton anyin tang betenge ae gan hmâ. 8 Anyin a e ame ha, ka habe, E hnathu, ta je atök ödra, a je wanakat adre me ca he bi ka ányâ iyawö : me me at omeli ödra bi. 9 E ame tha vec mödra hnyi anyidra ta je vec hia, ke e ame omeli ödra ge angelainy hnyimakan : e ame úcú ödra hnyi anyin ibetengiö, ke hnen hna betenge baú ; ke ame hum ödra me köp ödra bala bi hnyi je bong ehac. 10 Ke adre me úkhin fuc, me ovecá hanon ae kap : anyin a wale e ame hwiö but me ame iwahnaihmiöny mödra, ke e ame ka hamen bi vat mödra. 11 Me e ame únyküme je bong ehac, wale ga Mose me lakeiny, ke haingen, ka habe, E but ua at ame hum ödra úhedra eú hnyi köiö, tha e me tavat tuö haleny hnahat mamoe ? ke e but ua at ame ip hanon ae kap eú hnyi hnyekudra ? 12 At ame su ödra ge benyen ae hmanenang tha e me hnyam a metö Mose ? at ame subá luâ köiö hnyi hnyimaködra, me wia hobi kâu bi ien a nyiele balua ? 13 at ame hum ödra hnyi je dok ae dit, helâ me hors hnyi hnyeubaba, m' adre me ca haú. 14 Haba hanu Iehova ame omen' ödra, helâ me je meno ame utut hnyi je hwatapkölu : helâe u je su lakem, me wia hobi köu ien ae hmanenang. 15 Wá ju únyi hnyi drany, me wá únyi hnyi hnyabam ae kap me hmanenang ; ewa wem ae hwege me hna ányâ hnen manám man' adre hom behânâ medien hnyekom me ányám betenge könya. 16 Anyin a u

kamöhmun, eja ke ne a ne ca ö 'hmun Aberahama, ke ca khanö Isaraela öhmun : Iehova lö, u thibi kamöhmun ; at a ücü öhmun hwân nyiele, wale iâm. 17 Ieü u je omonu öhmun gan Iehova únyi hnyi dem gethen, me okhötâ je hnyekuhmun m'öhmun e ca outö u ? Hmetu ju can je athnyabaem, a je tribuiny em hnyei. 18 E okhulit hna labâ e hnen ânyâm tavat ae kap : haba je iwahnaihmiony möhmun, adre me hia but uto ânyâm dok ae kap. 19 Öhmun e helâ me tavat u je ca musi ödra adrem balua ; ke helâ me tavat adre ca ip iâm hudra.

HNyimakan 64.

Ö U he ju ka kia but drany, me utut, me me badedö but je bucen hnyi hnyimákâm ; 2 helâ me meic ame vâc je ong utö, me ame citröu köiö ge meic : he ka omanená iâm ka ta je iwahnaihmiony möu, me me öbubuny je hnyei hnyi hnyimákâm ! 3 Waleji hnyi hnâm hna ânyâ je únyi hnân outen waleji öhmun e ca únykúme, u je utut, me ame badedö but je bucen hnyi hnyimákâm. 4 Anyin a haba hwân kâü adrem, ame ca löng bi hnen tavat, me ca tevehlöng bi, ke ame ca wâ hnen ecmak ke Khong, ke hake u ke thibi, at ame huliwa ködra adre me halubahingen e. 5 U me úkhanö me at ame senyin me ânyâ hwakecin ae wisa, tavat adre me únykúme köu hnyi dem ta je gethen : wâ bi, u je hmönyâm, ke öhmun e ânyâ hwakecin ae kong : öhmun e laba kueny hnyin, ke hawa, öhmun e ha ka möt ? 6 Öhmun hia thithö öhmun e helâ me únyi ae bo kong, ke helâ me je úkhaü ae ikiki anyihmun wisa hia thithö : öhmun hia öhmun e meleca helâ me lany hnyot ; k' ame ohí öhmun hnen hwakecihmun ae monu helâke ame óú ang dö. 7 Ke ba at ame hawâ iâm, me ka bwebwelâ e bi me me he ka köt u : anyin a u je hia but ikhâlâ hnyimákâm gahmun, ke u je oau' öhmun hnen je hwakecin ae monu öhmun e ânyâ. 8 Ke walang ang, Iehova lö, u thibi Kamöhmun ; öhmun ang kânâ ae kece, ke u at ame op kaia ; ke ohmun hia thithö ang huliwa anyin hnyamâm. 9 Iehova lö, ca he ka hmönyâm gan hmâ, ke ca he ka únykúme hwakecin ae kong nyiele balua : wâ bi, ö u wâ thö, öhmun hia thithö ang je atâm. 10 A hnyot ut ânyâm je taun ae kap, a hnyöt ut Ziona, e ba but wan hnyi Jeru-

salema. 11 Adre hia but hlâ ge meic umöhmun uma ae kap ke hmaenang, waleji a oganö u hnyin hnen lakamöhmun ; k' adre hia but hagutâ anyihmun ta je únyi hia ae kese. 12 Iehova lö, hawa, u me he ka hokhnyokâ ta je únyi e ? u me he ka laba hnyibú, me oveci öhmun hwegi öhmun ?

HNyimakan 65.

Ö GE me ling ödra tavat adre me ca hnei nya ; ame ö nya bi ge tavat adre me ca elöm nya : oge me ha, ka habe, Walö nya ang, walö nya ang, ka hnyei adre me ca haw' ödra hoton iök. 2 Oge hia but lau li hnyamök hnyi je bong hia ka tavat adre me ca úling, waleji adre me vhenö gethen ae ca so hoton je únykúmenödra bi ; 3 tavat adre me ohmönyini nya hnyi hnyimakök hnyi ta je bong, adre me bi hut hnyi ta hnyei, k' adre me leü utö ae bo so hon je veto kânâ ; 4 tavat adre me laba hnyi wanben je erkemok, ke hnyi je dok ae iyong ; tavat adre me han utiöiny buaka, ke e hnyi anyidra je kaia dán ta je únyi ae ikiki ; 5 tavat adre me ha, ka habe, Tot ut háang, ca hakekenyi nya anyin a iny kap hom : wale hai hnyi li hnyingöik, ke meic ame hlâ hnyi je bong hia. 6 Wâ bi, a sihnalimen dut hnyi hnyimakök : oge me ca he ka laba hnyibú, ke oge me he ka bi hwaban, eke, oge me he ka bi hwaban ka hnyi je úlaidra, 7 wale ta je hwakecibun ae kong, tha e me hwakecin ae kong anyin lakamöbun, haingö Iehova, waleji adre leü utö ae bo so hon je bucen, me bi gan könya hon je hut : anyin a wale oge me he ka böc ka tuluto anyidra ta je huliwa ka hnyi je úlaidra.

8 Walang hna ha hnö Iehova, ke habe, Adre me wâ waina ae teb únyi hnyi thi vine, ke haingen ke at, ka habe, Ca degec e, anyin ae hu hnahic hnyin : helâe oge me he ka ânyâ, can ta je athnyabaik, m' oge me ca he ka tha ohí' ödra hia. 9 Ke oge me he ka óâ ke mâtân únyi ga Jakob, me at ame he ka labâ anyik je bucen únyi ga Juda : ke ame he tavat oge úca ka hu hnyei, k' ame he je athnyabaik ka labâ e. 10 Ke ame he Sarona ka hnân hnyeuleiny ta je mamoe, ke haba, hwatapköluiny Akora me hnân mokut hnen je hna hat meno, hobi kâü lakeik waleji tavat adre me elöm nya. 11 Ke haba öbun tavat öbun e hna degeci Iehova, me hnying anyik bucen ae kap, me penapena laulau kö Gada,

me ünöngötâ hudiny ic hobi kö Meni ; 12 me oge me he ka ip öbun hobi kâu hele vat, ke öbun e he hia ka iyâtu ka hnyi hna hlingâ : anyin oge hongot, ke öbun e ca ieu ; oge me fuc, ke öbun e ca löng ; ke öbun e ânyâ hulö hnyi hnyimakök, me úca únyi oge me ca wek.

13 Anyin a wale, walang hna ha hnen Than Iehova, Wâ bi, ame he je athnyabaik ka han, ke öbun e he bi öbun ka mekihnâ-nem : wâ bi, ame he je athnyabaik ka ic, ke öbun e he bi öbun ka beic : wâ bi ame he je athnyabaik ka senyin, ke öbun e he bi öbun ka hmehma : 14 wâ bi, ame he je athnyabaik ka khumöng ge senyin hnyok, ke öbun e he bi öbun ka tenge ge hnyok ae hlöuhlöu, me kuku tenge ge vecin hanu. 15 Ke öbun e he ka hna iöbun hnân hângâ ka tavat oge úca, k' ame he Than Iehova ka hlingö u ; me wenyö ke ien bi hon je athnyabainy : 16 me me he at ame ha hnahicâ e bi hnyi hmeledrany, me ame he ka ha hnahicâ e bi ge Khong ae hnathu ; ke haba at ame khemanyin hnyi hmeledrany, me ame he ka khemanyin ge Khong ae hnathu ; anyin a hia but hnying ta je vec a bân, ke adre hia but ikhâlâ ta je únyi e ge li emakök. 17 Anyin a wâ bi, inya oge me op drany a teb únyi, me hmeledrany a teb únyi : ke adre me ca he bi ka únykú-me ta je únyi a bân, k' ame ca he ka o eú hnyi hnyekon at. 18 Ke so öbun e senyin me hobâ balua hnyi únyi oge me op : anyin a wâ bi, oge me op Jerusalema, hnân senyin, ke ta je aten hnân hobâ. 19 Ke oge me he ka senyinâ Jerusalema, me hobâ ta je atök : ke adre me ca he hmetu ka löng hwan thungaú, me tenge. 20 Ame he ka ba hmetu inma adre me konâm hnyi je bong a tep thibi, ke hingat ae ca bekhöt bongon je bong : anyin ame he wanakat ka mok a khaca haded ta je hunainy, ke haba at ae kong a khaca haded hunainy, me ame he bi ka hnaúhangö. 21 Ke adre me he bi ka op ta je uma me laba hnyin ; k' adre me he bi ka tâ je vine, me ijem wan. 22 Adre me ca he bi ka up uma, me ame he ke at bi he ka labâ e ; k' adre me ca he bi ka tâ, me ame he ke at bi he ka han : anyin a haba ta je bong bongon lakeik me ame he ka helâ me ta je bong bongon úö, ke ame he hnök je hna úca ka senyinâ beú hmâ ta je huliwa anyin je hnyamödra. 23 Adre me ca he bi ka huliwa baú, k' adre me ca he ka hnokoâ hnân hobi kâu úokonguny ; anyin a ödra

je mâtrâniny tavat a hahnahicâ Iehova, tha ödra me lakudra. 24 Ke ödra ka tiga ca hongot bi, me oge me he bi nya ka ieu : ke ödra ka tiga fuc, me oge me he bi nya ka ling ödra. 25 Ame he bi luko ka tha han me nokon mamoe, ke ame he liona ka han thatúniny whit helâ me bolok : ke haba sesâiny kânâ, me wale an ta je on. Ke adre me ca he bi ka okongo me ohia hnyi anyik bucen hia ae kap, haingö Iehova.

HNYIMAKAN 66.

WALANG hna ha hnö Iehova, ka habe, Anyik theron drany, ke taben li hnyeúcak hmeledrany : ieu bongon uma öbun e he ka op hobi könya ? ke ewa dok oge me he ka menâ hnyin ? 2 Anyin a haba ta je únyi hia ang ame ânyâ hnen hnyamök, me me e bi ta je únyi hia thithö e, haingö Iehova : ke walang at oge me he ka wâ, wale at ae theduoc me bewisa hanon, me öbubuny ge hök hofuc. 3 Haba at ame hlingâ bolok, me ame helâ me at ame hlingâ at ; haba at ame hudo nokon mamoe, me ame helâ me at ame thu nyin kuli ; haba at ame hudo bwihlany, me ame helâ me at ame hudo dren buaka ; haba at ame leú libanu, me ame helâ me at ame hahnahicâ hnathat : eke, adre hia but úca dedra bi je gethen, ke ame senyin je hanudriu hnyi anyidra bi ta je únyi ae ikiki. 4 Oge me he bi minya ka úca anyidra ta je tang iyauö, me oâ ködra ta je únyi adre me ouden ; anyin a hnyi úen oge me hongot, e ba at ame ieu ; hnyi úen oge me fuc, e ba at ame löng : ke so bi adre me ânyâ hulö hnyi hnyimakök, me úca únyi oge me ca senyinâ.

5 Löng ju öbun hofuc ho Iehova, tavat adre me öbubuny ge hwan hofuc, ka habe, A hia but ha hnen je liamekeiny möbun tavat adre me húkoti' öbun, me digic öbun can iök, ka habe, E so adre oganö Iehova, m' öhmun e he ka wâ anyibun senyin ; ke adre me he ka hmehma. 6 Hwan mede hnyi taun, hwan hofuc hnyi uma kap, ho Iehova ame bi hwaban ka je iwahnaihmiöny mē. 7 E ka tiga ca vec hnyekon momo e ame hnokoâ ; ke tiga ca o anyin vec, e ame hnokoâ da. 8 Ie at ame löng a helâe ? ie at ame wâ ta je únyi a helâe ? Hawa, adre me he ka hnokoâ hnye i hnyi bong a khaca ! hawa, adre me he ka hnokoâ ke dökhu hnyi úen a khaca thibi ? ke so bi ame o

but je lakon Ziona e ka tiga vec hnyekon. 9 Hawa, oge me he ka oâ vec hnyekon, me ca he ka oâ? haingö Iehova: hawa, oge me he bi nya at ame oâ, ka thawâ bi? haingen Khongom.

10 Tha senyin d' öbun me Jerusalema, me hobâ thö gan öbun hia thithö tavat öbun e hnyok kâu: tha senyin hwege thö më, öbun hia thithö öbun e tenge gan: 11 m' öbun e he ka ijem me sekubun ge li basin hnân otubwelâ; m' öbun e he ka oâ debai me hobâ úganiny anyin hmanenang. 12 Anyin a walang hna ha hnö Iehova, ka habe, Wâ bi, oge me he ka inâ hnahic kâu helâ me wagewe, me hmanenanginy je hnyei helâ me di ame bahihingölö, ke öbun e he ka ic; adre me he ka abiny öbun, me jijing' öbun hon li jevan. 13 Ame otubwelâ wakat hnen hinyen, ke helâe oge me he ka otubweli öbun; ke adre me he ka otubweli öbun bi hnyi Jerusalema. 14 Ke öbun e he ka wâ e, me ame he ka senyin je hnyekubun, ke ame he ka möt so je jeiöbun, helâ me je bätân: ke ame he je athnyabainy ka khan' ödra hnyamö Iehova, ke e ame he ka hmönyin ka je iwahnaihmiöny më. 15 Anyin a wâ bi, ame he Iehova ka o me meic, ke helâ me höu anyin je kariota; me me ohmeto anyin hmönyin hnyi wathethöt, me hnen hna thawâ hnyi bâhlân meic. 16 Anyin ame he Iehova ka ivinö me tavat hnen meic, me anyin hele vat: ke ame he ka se hia hani Iehova. 17 Haba tavat adre me okabi ödra bi me obosoi ödra bi, he ka he hnyi ta hnyei, hoton khaca hnyi wanben, adre an utiöiny buaka, me únyi ae ikiki, me tep: awe, adre me he ka tha bi obiny ködra, haingö Iehova. 18 Anyin ae khanö nya hnödra hna ányâ,

me je únykúmenödra: ame o thö úen, me oge me he ka úkhacakouâ ta je hnyei hia thithö, me je hwen hnyei; ke adre me he ka o but, me wâ anyik hmanenang. 19 Ke oge me he ka ip unyidra haten, ke oge me he ka kunâ ka hnyi ta je hnyei tavat gadra adre me kec möt, Tasesa ai, me Pula ai me Luda ai, wale tavat hlic fana, me Tubala ai, me Heleni ai, me ka hnyi je bomene ae sâkâú, tavat adre me ca hnyi löng úthumetu gak, me ca wâ anyik hmanenang: ke adre ma he ka khetâ anyik hmanenang ka hnyi je hnyei. 20 Ke adre me he ka hom je liamekeiny möbun hia thithö únyi hnyi ta je hnyei hia thithö hnân hut kö Iehova, hon ta je hors, me ta je kariota, me hon je tap, me je miul, me hon je meno adre me he logot, ka hnyi anyik bucen ae kap a Jerusalema, haingö Iehova, helâ me lakon Isaraela adre me hom bwihlany hnyi kaia ae kalaöt ka hnyi uma umö Iehova. 21 Ke oge me he ka hom keihen gadra, m' adre me tavat bihut, me at Levi but, haingö Iehova. 22 Anyin ame he ka tet hmâ hnyi hnyimakök drany a teb únyi, me hmeledrany a teb únyi, wale oge me he ka op, haingö Iehova, ke helâe ame he ka tethmâ mâtrânibun me iöbun. 23 Ke hwân hnyi ke imaneniny tehi, ke ne o but hnyi ke imaneniny ke tehi, ke hwân hnyi ke sabath, ke ne o but hnyi ke sabath, ame he ka o tavat hia he ka khudrung hnyi hnyimakök, haingö Iehova. 24 Ke adre me he ka he me wâ ta je unyin tavat adre mokcu, a tavat adre hia but úkhiny fuc mönya: anyin ame ca he ka mok hnödra waahnyöng, k' ame ca he bi ka mok anyidra meic; ke ame he bi tavat hia thithö ka húkoti ödra.

TUSI JEREMIA PEROFETA.

HNHYIMAKAN 1.

HOFUC ho Jeremia nöku Hilekia, hanen tavat bihut waleji a ödra hnyi Anathoth, hnyi hnyei Beniamina: 2 waleji ame o hofuc ho Iehova kâu hnyi bongongu Josea, nöku Amona than Juda, hnyi huna a thötininy anyin musí. 3 Ke ame o minya hnyi bongongu Jehoiakima nöku Josea, than Juda, ke ne o but hnyi

obiny huna a eleveni Zedekia, nöku Josea than Juda; ke ne o but adre me hom hwenbâ at Jerusalema hnyi tehi a thabunginy.

4 Ke ame o but könya hofuc ho Iehova, ame ha, ka habe, 5 Oge bök ka ö u, ke ödra tiga ca up u hnyi hnyok, ke oge bök ka okabi u, ke u tiga ca o bi úhem hnyi hnyok; oge hia but ip u hnân peropeta ka ta je hnyei. 6 Me oge me ha, ka habe,

Ekölö Than Iehova! wâ bi, e ca khanö nya he ka fuc: anyin a iny wanakat. 7 Haba Iehova ame ha kõnya, ka habe, Ca ha bi, ka habe, Iny wanakat: anyin a u me he ka he ködra hia thithö, wale oge me kunö u ka hnyin, ke u me he ka ha ta je hofuc hia thithö oge me he ka hûna köu. 8 Ca he bi ka ot gadra: anyin a tha inya möu he ka omeli u, haingö Iehova. 9 Me haba Iehova ame inâ hnyamen me kâlâ hnyimök; ke Iehova ame ha kõnya, ka habe, Wâ bi, oge hia but ip hok ta je hofuc hny hnyimâm: 10, wâ bi, oge hia but ötilö u hnyi bong ang hon ta je hnyei me hon ta je dökhu, he ka oc degecâ me hagutâ, ke he ka ohia, ke he ka öuo; he ka op göranyai, me tã.

11 Ke ame o minya but kõnya hofuc ho Iehova ame ha, ka habe, Jeremia lö, ieú u me wâ? Me haingök, ka habe, Inya oge me wâ ong ütö saked. 12 Ke haba Iehova ame ha kõnya, ka habe, E so hnâm hna wâ: anyin oge me hmâkâ hok hofuc he ka ohwâdâ. 13 Ke ame olo o kõnya hofuc ho Iehova ame ha, ka habe, Ieú u me wâ? Me haingök, ka habe, Inya oge me wâ öt ame citröu; ke ame hwiö hnyimen únyi hnyi hwadrö. 14 Ke haba Iehova ame ha kõnya, ka habe, Ame he ka patrutrua únyi ae kong úheny hnyi hwadrö ködra hia thithö tavat adre me labâ hnyei. 15 Anyin a wâ bi, inya oge me he ka hawâ ta je lap hia hnyi dökhu únyi hnyi hwadrö, haingö Iehova: ke adre me he ka he jem, me ve otílâ anyidra je theron hnyi je homagöuleny Jerusalema, me cicö hna up haginy hia igigilö, me cicö je tauniny Juda hia. 16 Ke oge me he ka ha hnök je hna owisa gadra, can anyidra ta je hulö hia; waleji hnyi hnödra hna digic nya, me leú ütö ae bo so ka ke je khong, me hmi ka ta je huliwa anyin ta je hnyamödra bi. 17 Anyin a wale, u me ke ka hûkâlâ wen hnyekom, ke todrö, me ha ködra ta je únyi hia thithö oge me hûna köu: ca hlohlo gadra, wâ oge nye he ka ohlohloi u hnyi hnyimaködra. 18 Anyin a wâ bi, oge hia but wiö u hnyi bong ang me hnân taun adre up haginy, me hmolom fao, me hak bras, úcon tavat hia, úcon je than Juda, me je taben e, me anyin tavat bihut, me tavat aten hnyei. 19 Ke adre me he ka vat möu; ke adre me ca he ka hwege hom; anyin a tha inya möu he ka omeli u, haingö Iehova.

HNYIMAKAN 2.

KE ame o but kõnya hofuc ho Iehova, ame ha, ka habe, 2 He thö, hongot dö hnyi je hnyikönyen Jerusalema, ka habe, Walang hna ha hnö Iehova, ka habe, Inya oge me únykümi u wale ge hwakecâm ae menyik ku tiga hlu, me ányâm betenge waleji hnyi hnâm hna úkocö: waleji hnyi hnâm hna he hotuk hnyi hnyeububa, hnyi hnyei adre ca belökâ. 3 E kap Isaraela kö Iehova, wan a bân hnyi troban hnyei: adre me ha hnaühangöâ tavat adre me utá e; ame he ka o únyi ae kong ködra, haingö Iehova.

4 Lap anyi Jakob lö, löng ju hofuc ho Iehova, me öbun je lap hia hnyi lap anyi Isaraela: 5 Walang hna ha hnö Iehova, ka habe, Ieú ke únyi ae ca wisa a wâ lakamöbun unyik, m' adre me öusákâü ödra mönya, me hnu hoton únyi ae ba önyen, me bibi hop! 6 Ke haba khaca, adre me ca ha ka habe, Ewa Iehova at ame su' öta únyi hnyei Aigupito; at ame hum öta hnyi hnyeububa, wanben hnyei a hnyei бага me hu je uthankong, hnyi hnyei ae hwahwacit me hmenon mok, hnyi hnyei ame ca vheno hnen at, ke ba at ame labâ e? 7 Ke oge me hum öbun ka hnyi hnyei ae hu jeúuy, he ka an wan me soiny; ke öbun e o but me oikikiâ ik hnyei, me wia lakeik me me únyi ae ikiki. 8 Haba tavat bihut adre me ca ha ka habe, Ewa Iehova! ke haba tavat adre me huliwan hnanyibu. me ca khan' ödra inya; ke haba tavat musi adre me úkhin fuc mönya, ke haba je perofeta adre me perofeta ga Baala, me hnu hoton ta je únyi ae ba troban. 9 Anyin a wale, oge ma he hmetu ka ivinö möbun, haingö Iehova, ke oge me he ka ivinö me laöbibun. 10 Ke he th' öbun ka hnyi je bomeneiny Kitim, me wâ; me úkhünöng dö Kedara ai me únyküme wia; m' adre me wâ ame ne hu únyi heläe ehac. 11 Hawa, e hu hnyei ame wia je khongon, ke ca je khong bi? ke so bi, a hia but lakeik wia anyidra hmanenang, m' adre me hom bi únyi ae ba troban. 12 Drany lö, láia ju ge únyi ang, ot gan hmâ ju, me hlöuhlöu ju, haingö Iehova. 13 Anyin a lo li monu a ányâ lakeik; a g' adre hia but hna degeci nya köiöiny möt ame pupua, me tho hobi ködra bi je an, a je an ae hmouca, ame ca hom behaná köiö. 14 Hawa, athnyaba bi Isaraela? hawa, e bi athnyaba

adre úco k' adre hnokoâ hnyi hnyaba? can iéu' adre sôh e? 15 Ame hia but kuku je nak liona, me fuc hwege göranyai: ke adre hia but ôba wan iny hnyei; adre me thong anyin je taun, me ba at ame labâ e. 16 Haba je lakon Nofi, me Tapanes adre hia but tho koronainy bâm. 17 Hawa, u je ca ânyâ hobi kôu bi, hnyi hnâm hna digic Iehova a Khongom, waleji hnyi ûen e ame su u eû hnyi gethen? 18 Ke walang ang iéu u me ânyâ hnyi gethen úheny Aigupito, he ka ijem kôïöiny Sihora? ke iéu u me ânyâ hnyi gethen úheny Asuria, he ka ijem kôïöiny Wagewe? 19 Ame he ka thao u hnen bi ânyâm hulô, ke ame he ka ú u hnen bi hnâm je hna kôlu: anyin a wale khanô u thô me wâ únyi ae hiny me kong, wale ge hnâm hna digic Iehova a Khongom, ke u je outô nya, haingen Than Iehova tuhan sabaoth. 20 Anyin a hwân ehac oge hia but thu degecâ ânyâm hna úhûkálákouâ, me thamua hna cö u; ke haingâm, ka habe, Oge me ca he ka bi athnyaba; anyin a u me mokut hon je buchen hia ae beû, ke hmelen je úô hia ae hát, he ka bi únyi monu. 21 Ke haba u, me oge me tã helâ me vine ame khulelau, hatong ae so: iéu gam u me hwiö gak, ke u vine but ae monu me atkanyua? 22 Eja ke ne u je ne söü soda, me hom gânâ sop, e bala bi hnyi hnyimakök ânyâm hulô, haingen Than Iehova. 23 U ma kâmâu he ka ha, ka habe, Iny ca monu, k' oge me ca hnu hoton ta je Baala? wâ ju dem gethen hnyi hnyigöulen bucen, khanô u thô hnâm hna ânyâ: u nak kamela ame he logot, ame he monu hnyi dem gethen: 24 asinainy hnyot at ame khenená hnyebuba, ame bubune ang hnyi weny hnyekon; ie at ame he ka ohmeto e. hnyi weny? ame ca he ka osényini ödra bi tavat adre me elâm e, adre me he ka wâ e hnyi anyin tehi. 25 Tuö ju li cam wâ e nye ba tangen hnyeúcâm, me jeköwem wâ e nye beic: ke u je ha, ka habe, E únyi baú: e ba; anyin oge hia but betenge ge ta je atkanyua, ke oge me he bala ka hnu hotudra. 26 Ame hnehma at venöu at ka wâ e, helâe ame he ka hnehma lap anyi Isaraela; walödra e ta je than, me ta je taben, me tavat bihut, me ta je perofeta; 27 wale tavat adre me ha ka hnyiban utö, ka habe, Kamök u; me ka veto, U je hnöku nya: anyin adre me hotudra kônya, me ca hnyimaködra bi; ke hnyi ûen anyidra vec, adre me he ka ha, ka habe, Todro me omeli öhmun. 28 Ke ewa

je khongom waleji u je ânyâ hobi kôu? Hamödrin he ka tot, a ne khan' ödrin he ka omeli u hnyi ûen u me vec hnyin: anyin ae úcú úseiny ânyâm je khong, Juda, me ânyâm je lap.

29 Geú öbun e ivinö mönya? öbun hia öbun e hia but úkkin fuc mönya, haingö Iehova. 30 Oge kot je lakubun ke únyi baú bi; adre me ca kap hna n' ödra; hnen anyibun hele vat hna an anyibun je perofeta, helâ me liona at ame ohia. 31 Dö lö, wâ ju hofuc ho Iehova. Hawa, oge hia but helâ me hnyebuba ka at Isaraela? ame ne hnyei ae khömet? anyin a iéu ame ha lakeik, ka habe, Öhmun e monu, öhmun e ca he hmetu kôu? 32 Hawa, ame he hlu ka hnying je hna theibâ e, ke hlu ame tep faipoipo ka hnying bi úkhaúen? ke haba lakeik adre me hnying nya hnyi je bong a ca hnân bi aú. 33 U je ti theibi u bi he ka úkôcö! anyin a wale u je nâ je momo ae kong ge je hwakecâm. 34 Ke adre me wâ minya hnyi obiny ânyâm je úkhaú dren tavat ae theuoc ae ba hnyikongudrin; oge ca wâ e hnyi dek adre thu ka hnyin, ke hon je únyi e hia. 35 Ke so bi, u je ha, ka habe, E ba monu gak; e hnathu, e ame ohmeto anyin hmönyin gak, wâ bi, oge me he ka ivinö möu, anyin a u je ha, ka habe, Oge ca ânyâ hulô. 36 Anyin a iéu u me labö ngenu monu gan me wia dem je gethen? u me he ka hnehma ge Aigupito, helâji me hnâm hna hnehma ge Asuria. 37 Ke u me he ka he úhem e me li hnyamâm hon bâm: anyin a Iehova ame hna degecâ ta je únyi u me geju kâu, ke u me ca he ka sot gadra.

HNYIMAKAN 3.

H AINGÖDRA, ka habe, A ne ke at ame degec âiân, ke ame he gan me ame âiân ke бага bi, hawa, e ame he ka hmetu ka momo? Ame ca he ka ti kong hnyei eling? Ke u je hia but bi únyi monu me tavat ae se hia; ke so bi, hmetu ju kônya, haingö Iehova. 2 Bwele thö ka hnyi je dok ae ba leúnen ethö, me wâ: ewa dok adre ca tha mokut möu hnyin? U je laba halubahing' ödra eû hnyi je gethen, helâ me at Arabia hnyi hnyebuba; ke u je hia but oikikiâ hnyei ge hnâm hna bi únyi monu, me hwakecâm ae kong. 3 Anyin a wale adre behânâ je uth we, ke ba but we a biliny; ke hu gam bariny momo hnyi gethen, u je ca hnehma bi 4 Hawa, u

me ca he ka hao nya hwân walang ang, Cica, u at ame su nya k'iny tiga ûhnyûkong? 5 Hawa, e ame he bala ka hmönyin? me tuö e ke ne o but obiny? Wâ bi, u je hia but ha me ânyâ ta je ûnyi ae kong me ânyâ wem bi.

6 Ke haba Iehova ame ha kõnya hnyi je bong bongu Josea than, ka habe, Hawa, u je wâ but hnö Isaraela, at ame labö kölu, hna ânyâ? E ame ölö ka hnyi je bucen hia ae beû göranyai ke he hmelen je üö hia ae hât, me bi ûnyi monu eling. 7 Ke oge me ha hwaban hnen hna ânyâ ta je ûnyi eling, ka habe, E ame he ka hmetu kõnya; ke e ame ca hmetu: ke a wâ but ûnyi e hnen liamekeiny më, jia Juda at iyawö. 8 Ke oge me wâ but, anyin a hnyi hna bi ûnyi monu hnö Isaraela, at ame labö kölu, me oge me degec e, me ham kâu tusiny thang hna faipoipo, ke so bi, ame ca ot bi Juda at iyawö a liamekeiny më; ke e ame he minya bi, me bi ûnyi monu. 9 Ke can ame hâhâ kâu he ka bi ûnyi monu, me ame ikiki but hnyei, ke e ame bi ûnyi monu me je veto, me hnyiban je utö. 10 Ke so bi, hnyi ta je ûnyi e hia, haba liamekeiny më, jia Juda at iyawö, ame ca hmetu kõnya me hnyekon ae bekhöt, ke ame thoi, haingö Iehova. 11 Ke haba Iehova ame ha kõnya, ka habe, E hu omi wisa ge Isaraela, at ame labö kölu, hon Juda at iyawö. 12 He thö me ha ta je hofuc ang hnyi ke keihen hnyi hwadrö, ka habe, Hmetu ju u Isaraela, at ame labö kölu, haingö Iehova; oge me ca he ka ö' bun hnyi hmönyin; anyin a inya at ibetengiö, haingö Iehova; oge me ca he ka ip hmönyin nyiele balua. 13 Ke so bi, ogâ thö ânyâm hulö, a u je ânyâ hwakecin ae ikiki kö Iehova Khongom, me he monu unyin je atkanyua hmelen ta je üö hia ae hât: ke öbun e ca löng hok hofuc haingö Iehova. 14 Öbun na hmetu ju, öbun tawat labö kölu, haingö Iehova; anyin a iny helâ me âian köbun: ke oge me he ka hum öbun, úsa khaca ûnyi hnyi taun, ke úsa lo ûnyi hnyi lap, me hum öbun Ziona ai: 15 ke oge me he ka ham köbun tawat tuö mamoe hoton hnyekuk bi, tawat adre me he ka ha ö' bun ge metâ me wâhmakhmeto. 16 Ke öbun ka se hia but, me ti osehia hnyei, hnyi je bong eling, haingö Iehova, adre me ca he hmetu ka ha, ka habe, Tangen úhinykôu anyi Iehova: ke adre me ca he ka únykúme ka hnyin; ke adre me ca he ka únykúme gan; ke adre me ca he ka senâ e; ke adre me ca he ka ânyâ

hmetu. 17 Hnyi üen eling adre me he ka hâia Jerusalema, ka habe, theron anyi Iehova: ke adre me he ka úkhacaköu ka hnyin je hnyei hia thithö, ka iö Iehova hnyi Jerusalema: ke adre me ca he hmetu ka hnu hoton je hnyekudra ae újông me kong. 18 Hnyi je bong eling ame he lap anyi Juda ka tha he me lap anyi Isaraela, ke adre me he ka tha o ûnyi hnyi hnyei hnyi hwadrö ka hnyi hnyei waleji oge ham ka lakamöbun me hnân ibun. 19 Ke oge me ha, ka habe, Oge me he ka kâmâu ka ip u unyin je lakon, me ham köu hnyei ae so, a jekhom ae so unyin je döiny ta je hnyei? ke oge me ha, ka habe, Öbun e he ka hao nya, ka habe, Cica; me ca he ka hwiö hmetu gak. 20 E hnathu, öbun e hia but ânyâ hwakecin ae iyawö kõnya lap anyi Isaraela, helâ me momo ame degec âian ge hwakecin iyawö, haingö Iehova. 21 Adre me löng hofuc hon je dok ae ba leúnen ethö görany, wale tenge me khöü anyin lakon Isaraela; anyin adre hia but omono dedra je gethen, me hnying Iehova Khongudrin. 22 Hmetu ju öbun tawat öbun e labö kölu, oge me he ka ometo hnöbun je hna kölu. Wâ ju, öhmun e o but köu; anyin a u Iehova Khonguhmun. 23 E hnathu, e ûnyi baú úhadruo ûnyi hnyi je hut, wale imonumouny hon je bucen: e hnathu, e unyi Iehova Khonguta úhömeli anyi Isaraela. 24 Ke haba hna hmehman ame ohia huliwa anyin lakamöta hwân k' öta tiga hidröu; wale haledra je hnahat mamoe me kau, je lakudra obaga me wahu. 25 E so ate me mokut hnyi anyita hmehma, ke so ame tubi öta hnen anyita hlohlo: anyin ate hia but ânyâ hwakecin ae kong kö Iehova Khonguta, öta me lakamöta, hwân k' öta tiga úhnyûkong ke ne o but hnyi bong ang; ke ate me ca hia but löng hofuc ho Iehova Khonguta.

HNYIMAKAN 4.

ISARAELA lö, u je ne he ka hmetu, u me he ka hmetu bi kõnya, haingö Iehova; ke u je ne he ka degec ûnyi hnyi hnyimakök je ikikiâm, u me ca he bi ka he monu: 2 ke u me he ka khemanyin hnyi hnathu, me owisa, me wisa hnyok, ka habe, Kia inya Iehova; ke ame he je hnyei ka ha hnahici ödra gan, me ohobelua gan.

3 Anyin a walang hna ha hnö Iehova ka at Juda me Jerusalema, ka habe, Trohnenâ ju könöbun kânâ ae itremacat ut, ke

JEREMIA 4.

ca he bi ka belöká dok ae hu wadekong hnyin. 4 Peritomoni öbun dö kö Iehova, ke hom but ong unen hnyekubun, öbun tavat Juda me aten Jerusalema: wá e nye gá but anyik hmönyin helá me meic, me hlá, ke ba at ame he ka ume, can úkongon anyibun ta je huliwa. 5 Khetá thö hnyi Juda, ke haimemená thö hnyi Jerusalema me ha, ka habe, Úkhacaköu thö, ate me he ka didró ka hnyi je taun adre up haginý. 6 Ogöranyá thö boúdila hnyi Ziona, kec dö ka hnyi dok ae khötkic, ca tot bi: anyin oge me he ka hom okongon úheny hnyi hwadrö, me hnaúhangö ae gan hmá. 7 Ame he but liona úheny hnyi umen úhnyot, at ame okongoá je hnyei; e ame he hnyi deny gethen, e ame he úheny hnyi hnen; he ka obá aten em hnyei, me öba wan ányám je taun, me ba but aten. 8 Can e, weiká ju öbun mano ae gan nán, tenge thö me kuku; anyin ame ca hmetu gata hmönyin ae gan hmá anyi Iehova. 9 Haingö Iehova, ka habe, Hnyi bong eling ame he ka aú but hnyekon than, me hnyekon je taben; ke ame he tavat bihut ka uthmáhmá, k' ame he ta je perofeta ka láia. 10 Me oge me ha, ka habe, E kölö Than Iehova, e hnathu u je ti omono tavat ang me Jerusalema, me ha, ka habe, Öbun e he ka hu úsoköu; ke hwadá but hele vat ka hnyi hnyok. 11 Hnyi ün e, adre me he ka ha ka tavat ang me Jerusalema, ka habe, Ang ae kahwa únyi ethö je dok ae ba leünen hnyi hnyebuba cicö hluiny ik hnyei, ca hnán ulec me ányáwia; 12 ame he ka o hobi könya ang ae hwege úheny e: ke walang ang oge me he ka ha je hna bi hwaban ködra. 13 Wá bi, e ame he ka o helá me je úlá, me anyin je kariota helá me höu: haba haleny je hors e logot hon je aeto. Ekölö gata anyin ate hnaúhangö but. 14 Jerusalema lö, hneú but hnyekom wale hwakecám ae kong, me u me he ka möt. Ame he ka mokut eú hnyekom je hna únykúme ae kong ke ne o but kehö? 15 Anyin ame ha hofuc úheny Dana, me haimemená monu únyi hnyi bucen Eferaima: 16 ha thö ka ta je hnyei: wá bi, haimemená thö ka Jerusalema, a ame he jem tavat tue úheny hnyi hnyei ae sákáú, me kuku göranyai ka hnyi je tauniny Juda. 17 Adre me he ka tot igigilö e, helá me tavat hmáká ta hnyei; anyin a e ame úkhin fuc mönya, haingö Iehova. 18 Hnen dem je gethen me hnám hna ányá hna ohwádá köu ta je únyi eling; wale ányám

hulö: anyin ae hiny e; ame o but ka hnyi hnyekom.

19 Hnyekuk, hnyekuk! oge me vec ut eú hnyi hing hnyik; ame bwewbet hnyekuk eú hnyik; e ca khanönya he ka laba hnyibú; anyin a u je löng ut, hanuk lö, ifucin trutru me hwan vat. 20 Adre me hongot úhangö me úhangö; anyin adre söh hia thö hnyei: adre ie söh umök je uma mano, me anyik je hak mano helá me thuthubadecmak. 21 Oge me he ka wá boúdila ke ne o but kehö, me löng ifucin trutru? 22 Anyin ae monu but lakeik, e ca khanö nya hnödra; ödra tavat ae monu, ke ödra tavat adre me ca wáhmakhmeto: ödra metá he ka ányá hulö, ke ca khan' ödra bi he ka ányá so.

23 Oge me wá hmeledrany, ke wá bi, e ba hwenöiny, ke ba önyen; ke oge me wá drany ae ba but melam. 24 Oge me wá je bucen, ke wá bi, adre me öbubuny, ke haba je hut hia adre me jijing. 25 Oge me wá, ke wá bi, e ba but at, ke a hia but ta je meno hia ame gá ethö. 26 Oge me wá, ke wá bi, a hnyotö ta hnyei ae so, ke adre me hagutá but je tauniny hia hnyi hnyimakö Iehova, hnyi hnyimakan anyin hmönyin ae kahwa. 27 Anyin a walang hna ha hnö Iehova, ka habe, Ame he ka ba wan hnyei hia; ke so bi, oge me ca he ka kot hia. 28 Anyin a wale ame he hmeledrany ka tenge, ke 'ame he ka khömet ut drany: anyin oge hia but ha, me únykúme, ke oge me ca he ka ietra, ke haba khaca oge me ca he ka hmetu úhek e. 29 Ame he taun hia ka kec ge hwan tavat tabö hors, me tavat hlic fana; adre me kec ka hnyi hnyot, me ölö hnyi kic: adre me he ka hna degecá je taun hia, ke ba at a khaca ame he ka labá. 30 Ke haba u, ödra ka hia but sei u, ieu u me he ka ányá? Eja ke ne u je ne he ka hkaúö u ge úkhaú ae dra vec, me theibi u ge je hmanenanginy gol me ogáná li emákám ge botru, e únyi baú bi hnám hna he ka ohmanenanginy u; ame he tavat adre me wedra u ka húkötö u, adre me he ka elám he ka hlingö u. 31 Anyin oge hia but löng hwatenge helá me momo ame vec hnyekon, helá me vec anyin momo ame o nokon a bán, útengien hluiny Ziona, at ame momokhon, me iná but li hnyamen, haingen, ka habe, Ekölö gak walang ang! anyin ae sényin dut hnyekuk hnyi hnyimakan tavat úhlingö.

HNYIMAKAN 5.

WADRINGÂ thö je gethen hnyi Jerusalema, me wâ walang ang, me khana, me elâm hnyi je dok ae nedrong, ame ne he ka wâ at, ame ne hu at ame ânyâ wisa me elâm hnathu; me oge me he ka hna anyin hulö. 2 Ke adre me ne he ka ha, ka habe, Kia inya Iehova; e hnathu, adre me khemanyin thoi. 3 Iehova lö, hawa, ame ca wâ únyi ae hnathu hnen li emákâm? u je kuc ödra ke adre me ca vec bi; u je öau' ödra, k' ödra hócö bi he ka kap hna ná: adre hia but onákâ je hnyimaködra hon veto; ödra hócö bi he ka hmetu. 4 Me oge me ha, ka habe, Ame ne ta je theduoc ang: adre me hwen monu; anyin ae ca khan' ödra bi gethen de Iehova, me hna owisa hnen Khongudrin: 5 oge me he ka he ka tavat ae únyi hnathu, me fuc ködra; anyin ae khan' ödra gethen de Iehova, me hna owisa hnen Khongudrin. Ke haba tavat ang adre hia but tha thamua hnaúhúkálákouâ, me thu je wen. 6 Anyin a wale ame he liona únyi hnyi hnyot ka hling' ödra, ame he lukoiny sahac ka sei ödra, ame he lepad ka tuö anyidra je taun, ame he ka olou usuki' ödra tavat adre me didrut únyi hnyi hnyin: anyin a ödra ibi ose úkbin fuc, ke ödra ose hia kölu. 7 Oge me he ka kâmâu he ka hnö u? haba je lakom adre hia but hna degeci nya, adre me khemanyin ge tavat a ca je khong bi: hnyi üen oge me ha ö'dra sekuni ödra, adre me bi únyi monu, me úkhacakouâ je deö at hnyi je uma umen momo hnyi gethen. 8 Haba hnyi je hnyomakatu ödra úcü me je hors adre me han so: adre me ve kuku ka ta je laaiân ke at. 9 Hawa, oge me ca he ka bi hwaban can ta je únyi e? haingö Iehova: ke ame ca he hanuk ka bi hwaban ka hnyi hnyei a helâe?

10 Óliâ thö je hna up haginy, me hlingâ; ke ca he bi ka ohia hia: hom but je anginy, anyin a ca je únyi e anyi Iehova. 11 Anyin a hia but lap anyi Isaraela, me lap anyi Juda ânyâ hwakecin ae iyawö könya, haingö Iehova. 12 Adre hia but ivinö Iehova, me ha, ka habe, Ca e bi; ke ame ca he ka o köta únyi ae kong; ke ate me ca he ka wâ hele vat me hmiâ: 13 ke ame he bi je perofeta ka helâ me ang, ke ca eü bi hnyidrin hofuc hwan Khong: adre me he ka ânyâ helâe ködra bi. 14 Anyin

a wale walang hna ha hnö Iehova Khongon sabaoth, ka habe, Anyin a öbun e ha hofuc e, wâ bi, oge me he ka wia hok hofuc hnyi hnyimâm me me meic bi, ke hnyei ang, me me utö, ke e ame he ka ön ödra. 15 Wâ bi, oge me he ka hom tavat únyi hnyi dok ae sákâü köbun, lap anyi Isaraela, haingö Iehova: hnyei ae hwege, hnyei kâü adrem, hnyei ae ca khanö u hwan idra, ke u me ca wâhmakhmetoâ bi ifucidra. 16 Helâ me erkemok adre khöng tangen anyidra je fana, ödra tavat hwege hia. 17 Ke adre me he ka an huâm hna meno, me ám jeü, wale ae úcü he ka han hnen lakom obaga me wahlu: adre me he ka an halem je mamoe, me kau; adre me he ka an halem je vine, me halem je meta: adre me he ka kot ge hele vat ânyâm je taun adre up haginy, waleji u je labageju kâü. 18 Ke so bi haba hnyi je bong eling, oge me ca he ka hling' öbun hia, haingö Iehova. 19 Ke öbun e he ka ha, ka habe, Anyin a ieu Iehova Khonguta ame ânyâ köta ta je únyi hia eling? u me he ka thu ködra, ka habe, Anyin a öbun e digic nya me bi athnyaba ka je khong kanyua hnyiibun hnyei, awe helâe öbun e he ka bi athnyaba ka je atkanyua hnyi hnyei a caibun bi.

20 Ha thö e ka lap anyi Jakob, me haimemenâ hnyi Juda me ha, ka habe, 21 Löng ju hofuc walang ang tavat ae monu me ba hnyekudra: tavat ae hu li cemak, k' adre me ca wâ bi; e hu li hnyiköny k' adre me ca löng bi: 22 Hawa, öbun e ca outö nya? haingö Iehova: ke öbun e ca he ka öbubuny gak, at ame ip öny hnân hnyigöulen köiö, hoton hnanyibu ae tethmä, m' adre me ca he bi ka hanyâüâ e. 23 Ke haba tavat ang e hu gadra hnyok ae újöng, me úkbin fuc; adre me thu musi me he but. 24 Ke adre me ca ha eü hnyi je hnyekudra, ka habe, Ate me he walang ang ka outö Iehova Khonguta, at ame ham we, wale a bân, me beliny hnyi üen e; at ame tuö hobi köta je wikiny menu adre thu. 25 Hnen hwakecibun ae kong hna ohavâ bi ta je únyi eling ke hnen anyibun je hulö hna thelöng so. 26 Anyin adre wâ tavat ae kong anyin lakeik: adre me tuö, helâ me úyâüiny at ame töu hnewe: adre me hwa ofific me me hnok at. 27 E unöngötö umödra je uma ge thoi, helâ me tangen ame unöngöt ge je meno ame gâ: anyin a wale ödra gan hmâ me tren omjeü. 28 Ödra pipikhenya me habubut; eke, adre me beönua hnyi hulö: adre me ca ivinö, wale

ivinö hobi kâu at a mokcu kamen, m' adre me he ka sot; ke adre me ca owisa ge wisainy at ae theduoc. 29 Hawa, oge me ca he ka bi hwaban can ta je ûnyi e? haingö Iehova: ke ame ca he bi hanuk ka bi hwaban ka hnyei a helâe?

30 Adre hia but ânyâ hnyi hnyei ûnyi hnân lâiâ ke ikiki: 31 je perofeta adre me profeta thoi, ke haba tavat bihut me adre me musi ûnyi gadra bi; ke adre me weny helâe hnen lakeik: ke ieu öbun e he ka ânyâ hnyi obiny e?

HNYIMAKAN 6.

TA je lakon Beniamina lö, kec bemöt dö ûnyi hnyi wanben Jerusalema, ke tuâ thö khoto hnyi Tekoa ke ogörânyâ thö haten hnyi hon Beth-akerem: anyin ame selâdrâ ûnyi ae kong ûheny hnyi hwadrö, me hna ûhangö ae gan. 2 Oge me he ka subâ degecâ hluiny Ziona ae hmanang me menyik. 3 Ame he ka o kâu tavat tuö mamoe tha ödra me haledra ta je hnahat meno; adre me he ka ötilâ umödra je uma mano igigilö e, adre me he ka ve ûhalin hnyi ta je hnödra. 4 Penapena thö he ka vat më; todrö, me ate me he ka ölö hnyi jebigö. E kölö gata! anyin ae haü but seünö, e beü but je hmenon sahac. 5 Todrö, m' ate me he ka ölö hnyi hnyinghet, me ate me he ka ohia je uma umen tuhau. 6 Anyin a hia but Iehova tuhan sabaoth ha, ka habe, Sö but ta je üö, ke hlu thö görauyai kânâ cicö Jerusalema: wale taun adre me he ka bi hwaban; ae ti hu üoveci eü hnyin e. 7 E ame hingälâ hwakecin ae kong helâ me pupua ame hingölö hnyin köiö: adre me löng hnyin e üokonguny me hna söh; e bala bi hnyi hnyimakök mok me je aat. 8 Jerusalema lö, kap ju hna ünö, wâ e nye hwiö hnyekuk gam; wâ oge nye he ka öba wanâm, me u me hnyei adre me ca labâ.

9 Walang hna ha hnö Iehova tuhan sabaoth, ka habe, Adre me he ka hlo je kolon Isaraela helâ me hnyei vine: hmetu ju hnyamâm ka hnyi je tangen, helâ me at ame tau je wan vine. 10 Oge me he ka fuc me kou köia, me me löng? wâ bi, adre ca peritomonâ je hnyikönyödra, me me ca khan' ödra he ka tevehlöng: wâ bi, adre me wia hofuc ho Iehova me me hnân bi ühiö; adre me ca senyinâ e. 11 Anyin a wale, oge me unöngöt ge hmönyin anyi Iehova; iny senyin dut ge hok hnyok:

hingälâ but e hon je thöth eü hnyi gethen, me hon wahidröu adre me tha ûkhacaköu: anyin adre me he ka tha hom бага me âian momo, me hingat me at ae se hia hunainy. 12 Ke ame he ka umen ke keihen umödra je uma, tha e me ta je hnyei me omomo: anyin oge me he ka hai hnyamök hon aten hnyei, haingö Iehova. 13 Anyin a hwân ge tavat ae ûhnyükong gadra, ke ne o but ge tavat ae gan gadra, ödra hia thithö adre me behnyekudra omjeü; ke hwân ge ta je perofeta ke ne o but ka tavat bihut adre me ânyâ thoi. 14 Ke adre hia but ometo ûhnyükongâ je aat hnân lakeik me ha, ka habe, E hnahic ut, e hnahic ut: ke ba bi hnahic. 15 Hawa, ödra hmehma can ta je ûnyi ae ikiki adre me ânyâ? e ba, ke ba ong hmehma gadra, ke ca khan' ödra hmehma: anyin a wale adre me he ka tha ta me tavat adre me ta: hnyi üen oge me he ka sen' ödra adre me he ka haü, haingö Iehova.

16 Walang hna ha hnö Iehova, ka habe, Todr' öbun hnyi je gethen, me wâ, me hnö je gethen kâu adrem; ewa gethen ae so, me vheno e, me öbun e he bi ka wâ hna menâ hobi kâu je hanubun: ke haingödra, ka habe, Öhmun e ca he ka vheno e. 17 Ke oge me otilâ tavat he ka tu' öbun he ka ha, ka habe, Löng ju ifucin trutru; ke haingödra, ka habe, Öhmun e ca he ka löng. 18 Anyin a wale löng ju öbun ta je hnyei, ke haba öbun tavat öbun e ûkhacaköu, khan' öbun dö ta je ûnyi gadra. 19 Hmeledrany lö, löng ju: wâ bi, oge me he ka hom ûnyi ae kong ka tavat ang, wale troban je únykümenödra, anyin adre me ca hia but löng hok hofuc; ke haba anyik hnanyibu adre hia but hna degecâ e. 20 Hnan eü kõnya libanu adre me oâ ûheny Sheba, me üö ae hnebwia ûnyi hnyi hnyei ae sâkâü? oge me ca kap soâ je hudiny anyibun leü, ke oge me ca senyinâ anyibun ta je hut. 21 Anyin a wale walang hna ha hnö Iehova, ka habe, Wâ bi, oge me he ka ip ta je ûnyi hnân ohavâ hnyi hnyimakan tavat ang: ke ame he je kamen me je lakon ka tha haü hnyin e; ame he ka tha mok at me waeny.

22 Walang hna ha hnö Iehova, ka habe, Wâ bi, ame he ka o tavat ühedra hnyi hnyei hnyi hwadrö; ke adre me he ka obwebwelâ ke hnyei ae gan ûnyi hnyi je can hmeledrany. 23 Adre me hok cafana me ö; ödra tavat beöveci, me ca betenge; ame ü ifucidra helâ me köiö, ke adre me

tabá je hors ; adre me ve tot metá hia, helá me tavat ka hnyi vat, úcom, bluiny Ziona. 24 Ate hia but löng úthumetu gadra ; e sēnyin dut ta je hnyamöta : ame hom til' öta hnen hlöuhlöu me vec, helá me momo ame he ka hnokoá. 25 Ca he but ka hnyi ta hnyei, ke ca vheno gethen ; anyin ae hu hele vat eling anyin iwahnaihmiöny, me hnân otá hnyi je ke keihen hia. 26 Nokon ik hnyei a hlu lö, oweikö u ju ge mano ae gan nân, seset ju hnyi hnabadröu : tenge thungaú thö helá me at ame tenge ge nokon a khaca, ame tenge thungaú hwege ; anyin ame he ka ie o kóta at sei. 27 Oge hia but otílö hnân tap tue me hnabá hnyin lakeik ; me ame he ka khanö u me cubec dedra gethen. 28 Ödra tavat újông hia, adre me tha ngenu me tavat úhaiö : ödra bras me fao : ödra tavat iyawö hia thithö. 29 Ame sá hwege únyi hnân túá meic ; ke haba meic ame an led ; ame ányáwia báúá hnen at ame leú fao ; ke adre me ca oc degécá tavat ae kong. 30 Adre me he ka hwenyi iödra sileva adre degéc, anyin a hia but Iehova digic ödra.

HNyimakan 7.

WALANG hofuc ame o kö Jeremia únyi ga Iehova, ka habe, 2 Todró hnyi hnyigöulen uma umö Iehova, ke haimemená thö eling hofuc ang me ha, ka habe, Löng ju hofuc ho Iehova öbun hia thithö at Juda öbun e dit hnyi je homagöule ang he ka khudrung kö Iehova. 3 Walang hna ha hnö Iehova tuhan sabaoth Khongu Isaraela, ka habe, Ányáwia wia thö debun je gethen, me je hwakecibun ; me oge me he ka olab' öbun hnyi dok ang. 4 Ca he öbun ka labageju ka ta je hofuc thoi me ha, ka habe, Umö Iehova, umö Iehova, ödrin hia eang. 5 Anyin a öbun e ne ti ányáwia debun je gethen, me je hwakecibun ; öbun e ne ti owisa ka ke at me ke at ; 6 öbun e ne ca ovecá atkanyua, me at a mok kamen, me safac, me ca hingálá bi dra ae ba hnyikongon hnyi dok ang, me ca hnu hoton ke je khong, m' adre me okongu öbun : 7 awe, oge me he ka olab' öbun hnyi dok ang hnyi hnyei waleji oge ham ka lakamöbun, ke ne o but nyiele balua. 8 Wá bi, öbun e labageju ka ta je hofuc ae thoi, ae ba troban. 9 Hawa, öbun e he ka venöu, me úhlingö, me bi únyi monu me khemanyn thoi, me leú utö ae bo so kö Baala, me hnu hoton

ke je khong, wale ae ca khan' öbun, 10 me o me tot hnyi hnyimakök hnyi uma eang, waleji adre ip hon e iök me ha, ka habe, Adre hn' öhmun ; m' öbun e he ka ányá ta je únyi hia eling ae ikiki? 11 Hawa, op umen tavat venöu hnyi hnyimaköbun uma eang wale adre ip hon e iök ? Wá bi inya oge wá but, haingö Iehova. 12 Ke he thö walang ang ka hnyi hnök ehac hnyi Silo waleji oge bök ka ip iök hnyin, ke wá thö hnök hna ányá káu can hulö anyin lakeik a at Isaraela. 13 Ke walang can hnöbun hna ányá ta je huliwa hia eling, haingö Iehova, ke oge me he ka fuc köbun, oge me vesá hnyi hnyomakatu me fuc, ke öbun e ca löng bi öbun ; ke oge me haw' öbun ke öbun e ca ieu bi : 14 anyin a wale oge me he ka ányá ka uma wale adre ip hon iök waleji öbun e labageju káu, me ka hnyi dok waleji oge ham köbun me lakamöbun helá me hnök hna ányá ka Silo. 15 Ke oge me he ka digic öbun únyi hnyi hnyimakök, heláji me hnök hna degéc je liamekeiny möbun hia, je mátráni Eferaima hia.

16 Anyin a wale u me ca he ka hijö tavat ang, ke ca ogöranyá tenge me hic hobi ködra, ke ca khöu bi könya : anyin oge me ca he ka ling u. 17 Hawa, u me ca wá hnödra je hna ányá hnyi je tauniny Juda me je gethen hnyi Jerusalema! 18 Ta je wanakat adre me thigö utö, ke haba je kamen adre me hú meic, ke haba je momo adre me up falawa, me adre me ányá je ong areto hobi káu momo thaniny drany, me hingálá ka ke je khong je hudiny ic, me adre me ohmönyini nya. 19 Hawa, adre me ohmönyini nya? haingö Iehova ; ke ca ödra bi, me ame hmehma ta je hnyimaködra? 20 Anyin a wale, walang hna ha hnen Than Iehova, ka habe, Wá bi, ame he ka hingölö, but anyik hmönyin me anyik wathethöt hon dok ang ; hnyi hon at me hon meno, me hon je úöiny hnyot, me hon wan káná ; ke ame he ka ubáhlá, k' ame ca he bi ka mok.

21 Walang hna ha hnö Iehova tuhan sabaoth Khongu Isaraela, ka habe, Tha hom d' öbun je hudiny leú me anyibun ta je hut, ke an d' öbun ta je utiö. 22 Anyin oge ca fuc ka je lakamöbun me huna ködra hnyi úen oge hum ödra únyi hnyi hnyei Aigupito, ge ta je hudiny leú me ta je hut : 23 ke wale bi ang únyi oge huna ködra, ka habe, Löng ju öbun hok hofuc, ke oge me he ka Khongubun, ke öbun

e he ka lakeik : ke tha vheno th' öbun gethen oge hûna, m' öbun e so. 24 Ke adre me ca löng bi, me tevehlöng, ke adre me vheno hnödra bi hna ünhenamö hoton ihwegien hnyekudra ae kong ; me he nulötudra, ke ca hnyimaködra bi. 25 Hwân hnyi bong a he but hnyin je lakamöbun ünvi hnyi hnyei Aigupito ke ne o but hnyi bong ang, oge hia but kunâ köbun je athnyabaik hia a je perofeta, me vesäkong hnyi je bong me úkhûnöng : 26 ke so bi adre me ca ling nya bi, me tevehlöng, ke adre me ohwegiâ je nyidra : me ânyâ hwakecin ae kong hmönyin hon je lakamödra.

27 Ke u me he ka ha hia ta je hofuc ang ködra : ke adre me ca he ka ling u : u me he ka haw' ödra ke adre me ca he ka ieu köu. 28 Ke u me he ka ha ködra, ka habe, Walang hnyei adre me ca löng bi ifuci Iehova Khongudrin, me ca kap hna ünö : a mokcu hnathu, adre subâ degecâ thö ünvi hnyi ta je hnyimödra.

29 Jerusalema lö, subâ luâ but leünen bâm, me degec e, ke tengge thungau thö hnyi dok ae görany ; anyin a hia but Iehova degec me hna but dö e ame hmönyin kâu. 30 Anyin a ânyâ ünvi ae kong hnen lakon Juda hnyi hnyimakök, haingö Iehova : adre hia but ip anyidra ta je ünvi ae ikiki hnyi hnyin uma waleji oge ip iök hon, m' adre me okongoâ e. 31 Ke adre me op ta je dok ae göranyin Tofet, ae hnyin hnyigöulen bucen anyin je laku Hinom, me adre me thong je lakudra бага me hlu hnyi meic ; waleji oge ca úkhûnöng, ke oge ca ünükume. 32 Anyin a wale, wâ bi, ame he ka o je bong haingö Iehova, ke adre me ca he hmetu ka haiö Tofet, me hnyigöulen bucen anyin je laku Hinom, ke so bi hnyigöulen bucen hnân hlingâ at : anyin adre me he ka khön komok hnyi Tofet ke ne o but ame ba but hnen. 33 Ke ame he je unyin tavat ang ka hnân an je meno ame gâ ethö, me je menoiny hnyot ; ke ba at ame he ka bwebwelâ. 34 Ke oge me he ka obuhlumo hnyi je tauniny Juda, me je gethen minya hnyi Jerusalema, hwan senyin, me hwan hobâ, me hwan li at ödre tep faipoipo : anyin ame he ka ba aten hnyei.

HNYIMAKAN 8.

HNYI ün eling, haingö Iehova, adre me he ka hom je jeien je than

Juda, me je jeien je taben, me je jeien tavat bi but, me je jeien ta je perofeta, me je jeien aten Jerusalema ünvi hnyi ta je erkemok : 2 ke adre me he ka ve ip ödra hnyi hnyimakan sefinö me tehi, me je dö hia hnyi drany, waleji adre me hnyok kâu, me bi athnyaba kâu, me hnu hoton, me elâm, me khudrung kâu : adre me ca he ka úkhacaköu me könim ödra ; adre me he ka hnân tatet hnyi kânâ. 3 Ke adre me he ka bemok hon bemöt hnen ta je kolon hia anyin lap ang ae kong, waleji adre me tiga laba bi ju hnyi ta je dok oge ob' ödra ka hnyin, haingö Iehova tuhan sabaath.

4 Ke u me he ka ha ködra, ka habe, Walang hna ha hnö Iehova, ka habe, Hawa, ame he tavat ka ta, me ca tot hmetu? hawa, ame he at ka saü, ke ame ca he ka hmetuhmetu? 5 Anyin a ieu ame hmetuhmetu tavat ang wale Jerusalema ke ame labö kölu balua? adre me kât hmâ thoi ödra, höcö he ka hmetu. 6 Oge me tevehlöng me löng, ke adre me ca fuc wisa : e ba at ame ietra anyin hulö me ha, ka habe, Ieu hnök hna ânyâ? ödra hia thithö adre me ve hmetu ka hnyi dedra je gethen, helâ me hors ame ie wadring ka hnyi vat. 7 Eke, e khana but kasidainy drany ün e : ke a wâhmakhmeto but meköta, me wahalep, me aguru, ün adre me o hnyin ; ke ca khana bi lakeik hna otillâ hnö Iehova. 8 Ieu gabun öbun e ha, ka habe, öhmun tavat ae metâ, ke e unyihmun hnanyibu anyi Iehova? Ke wâ bi, a hia but huliwa iyawö pen ae thoi anyin tavat sihnalimen. 9 A hmehma but tavat metâ, adre me monumonu but, me hnok dö : wâ bi, adre hia but hna degecâ hofuc ho Iehova ; ke ieu bongon metâ unyidra? 10 Anyin a wale oge me he ka ham je laöiödra ka keihen, me je idra ka keihen he ka labâ : anyin a hwân ge tavat ae ünnyükong, ke ne o but ka tavat ae gan ödra hia thithö adre me behnyekudra omjet, hwân ge tavat perofeta, ke ne o but ka tavat bihut, ödra hia thithö adre me huliwa iyawö. 11 Ke adre hia but ometo ünnyükongo aat hnân hlu a lakeik me ha, ka habe, Hnahic ut, hnahic ut ; ke ba bi hnahic. 12 Hawa, adre me hmehma hwaban hnödra hna ânyâ ünvi ae ikiki? e ba, ödra ca hmehma bi, ke ca khan' ödra bi he ka hmehma : anyin a wale adre me he ka tha ta me tavat adre me ta : hnyi ün adre me sen' ödra, adre

me he ka haú, haingö Iehova. 13 Oge me he ka ti ohi' ödra, haingö Iehova : ame he ka ba wan hnyi je ivine, ke ame he ka ba wan meta, ke ame he ka melea je lan ; ke ame he ka hia gadra ta je únyi o ge hia but ham ködra. 14 Ke ieu ate me he ka laba monu gan? Úkhacaköu thö, me ate me he ka dit hnyi je taun adre up haginy, me laba hnyibú eling : anyin a Iehova Khonguta ame öhnyibú öta, me habelita ge köiö adre me mekiny, anyin ate me hia but ányá hwakecin ae kong kö Iehova. 15 Ate me halubahingen hnahic, ke ba bi so, ke ate me halubahingen üen metu, ke wá bi, hlohlo bi! 16 Ame o but úheny Dana hwan hna mená hwege hnen haleny je hors : ame tha öbubuny hnyei hnyi úkukuiny anyin tavat hwege, ke adre me o me an hnyei me ta je únyi hia hnyin : taun me tavat adre me labá e. 17 Ke wá bi, oge me he ka kuná köbun ta je on, me je vaipa a ca hnân ohnamá ; m' adre me he ka úlú öbun, haingö Iehova.

18 E na khanönya ju he ka otubweli nya hnyi hlöuhlöu ! e sényin dut hnyekuk eú hnyik. 19 Wá bi, útengien hluiny ik hnyei únyi hnyi hnyei ae sákáú : hawa, ca e bi Iehova hnyi Ziona ? ke ca e bi ling thaniny ? anyin a ieu adre hia but ohmönyini nya ge anyidra je hnatheat, me anyidra ta je únyi baú a je atkanyua. 20 A um dö üen menu : obiny ju ang honivakeny, ke adre ca omeli öta bi. 21 Oge aat dö, anyin a aat dö hluiny ik hnyei : iny hlit ut ame o but könnya uthmáhmá. 22 Hawa, e ba basama hnyi Gileada ? e ba at eling ae tren bubuny ? anyin a ieu adre me ca omelö hluiny ik hnyei.

HNYIMAKAN 9.

E NA köiö ju bök, ge pupuainy deköien li emakök, me inye he ka tenge hnyi lany me lit can tavat adre me hlingá aten hluiny ik hnyei ! 2 E na hu ju gak hnyi hnyebuba omtabaga wale hna mená hnen tavat adre me he, me inye he bi ka hna lakeik, me he digic ödra ! anyin a ödra hia thithö tavat bi únyi monu úkhacaköu anyin tavat iyawö. 3 Ke adre me lau je bohmödra helá me anyidra je cafana hnân thoi ; ke adre me hwege hnyi hnyei ke ca hnân bi hnathu : anyin adre me ogáná tilá anyidra hulö, ke ca khan' ödra inya haingö Iehova. 4 Ve

wá ju öbun je lahanöbun, ke ca labageju öbun ka je liamekeiny : anyin ame he je liamekeiny hia thithö ka iobö. 5 Ke adre me he ka ve iyawá je lahanödra, me ca ha bi hnathu ; adre hia but ná je bohmödra he ka fuc thoi ; adre sényin dut anyin ányá hwakecin ae kong. 6 E bi, hnyabam hnyi wanben iyawö ; can iyawö ödra höcö he ka wáhmakhmetu nya, haingö Iehova.

7 Anyin a wale walang hna ha hnö Iehova tuhan sabaoth, Wá bi, oge me he ka oköi' ödra, me cubic ödra ; anyin a ieu hmetu ke únyi oge me he ka ányá, can hluiny ik hnyei ? 8 Fana adre me mekiny ta je bohmödra ; e ame fuc iyawö : ke at ame ha úsoköu ge hnyimen ka ke at, ke e ame ip hnân bobi káu e eú hnyi hnyekon. 9 Hawa, oge me ca he ka sen' ödra can ta je únyi e ? haingö Iehova : hawa ame ca he hanuk ka bi hwaban ka hnyei a heláe ?

10 Oge me he ka tenge thungau can ta je bucen, me khumöng tenge can ta je dok a je sajjilat hnyi hnyebuba, anyin adre thong degecá thö, me me ca vheno hnen at ; ke ca khana tavat he ka löng hwan je meno ; ame tha hia but je meno ame gá ethö me je menoiny hnyot. 11 Ke oge me he ka wia Jerusalema me me helá me je hna digic thátúnyi, me op umen je luko ; ke oge me he ka öba wan je tauniny Juda, me me ba but at ama labá. 12 Ie at ae metá me me wá únykúme e ? ke ie at ame ha káu hnen hnyimö Iehova, me me haimemená e ? anyin a ieu ame kong ut hnyei adre thong helá me hnyebuba, me me ba at ama vheno ?

13 Ke haingö Iehova, ka habe, Anyin adre hna degecá anyik hnanyibu waleji oge hia but ip hnyi hnyimaködra, me ca löng bi ifucik, me ca hnu bi hoton ; 14 ke adre hia but hnu hoton ihwegien hnyekudra. me je Baala, waleji a n' ödra hnen lakamödra : 15 anyin a wale, walang hna ha hnö Iehova tuhan sabaoth Khongu Isaraela. ka habe, Wá bi, oge me he ka ha ö' dra ge khöhlöng wale tavat ang, me habelidra ge köiöiny úö adre me mekiny. 16 Ke oge me he ka ovesei ödra ka hnyi ta je hnyei a ca wá bi gadra me hnen lakamödra : ke oge me he ka kuná hotudra hele vat, ke ne o but oge hia but öau' ödra hia.

17 Walang hna ha hnö Iehova tuhan sabaoth, ka habe, Únykúme ju öbun, ke hawá thö je momo tenge, m' adre me he jem : ke hom dö je momo ae metá, m' adre

me he jem : 18 m' adre me ie tenge thungaü gata, me me hingölö je deköio hnyi je emaköta, me khukhula köio ünyi hnyi je bademaköta. 19 Anyin adre me löng hnyi Ziona hwan tenge thungaü, ka habe, Ekölö adre sei öta! e gan hmâ anyita hlöhlö, anyin ate hia but hna degecâ hnyei, anyin adre hia but kia je hnyabata. 20 Omomo lö, löng ju hofuc ho Iehova, ke tevehlöng ju ifucin hnyimen, nâ thö lakubun wahlu ge bongon tenge thungaü, ke ve nâ thö je lawaebun ge khumöng tenge. 21 Anyin ame o but mok a deny hnyi anyita je mamalama, ame dit ka hnyi umöta je umen than : he ka subâ degecâ ta je wanakat eü hnyi hwanuma, me wahidröu eü hnyi ta je gethen. 22 Ha thö, ka habe, Walang hna ha hnö Iehova, ka habe, Ame he tavat adre moku ka ta hnyi ta hnyei helâ me tatet, me helâ me je thi hwit hwaban at ame subâ, ke ba at ame he ka hlu ödra.

23 Walang hna ha hnö Iehova, ka habe, E so e me ca he at ae metâ ka hobâ anyin metâ, ke ca he at ae hwege ka hobâ ihwegen, ke ca he at tren omjeü ka hobâ tang omjehen : 24 ke so at ame hobâ he ka hobâ ünyi ang, a e ame wâhmakhmeto me khana inya, a inya Iehova at ame ânyâ betenge, me owisa, me ünyi ae ücü eang hmeledrany : anyin a inya oge me senyin ka ta je ünyi eling, haingö Iehova. 25 Wâ bi ame he ka o je bong, haingö Iehova, ke oge me he ka tha bi hwaban ka tavat adre me peritomonâ hnyi hna ca peritomoni ödra ; 26 at Aigupito, me Juda, me Edoma, me je laku Amona, me Moaba, me tavat hia adre me giâ ke keihen leünödra, tavat adre me laba hnyi hnyebuba : anyin adre ca peritomonâ je hnyei hia, ke adre ca peritomonâ lap anyi Isaraela hia eü hnyi je hnyekudra.

HNYIMAKAN 10.

LAP anyi Isaraela lö, löng ju hofuc ame ha Iehova köbun : 2 walang hna ha hnö Iehova, ka habe, Ca he öbun ka nâ hwakecin je hnyei, ke ca outen je haten drany ; anyin ame outen e hnen ta je hnyei. 3 Anyin ae ünyi baü bi hwakecin ta je hnyei : anyin a ke at ame sö üö hnyi hnyot, huliwa anyin li hnyamen at huliwa ge gö. 4 Adre me theibâ e ge sileva me gol, ke adre me ohmâ e ge fao me hama, me me ca bwebwet bi. 5 Ödra ücü me pama adre kave, ke ca khana bi fuc : adre me labö vadren, anyin ae ca khana he. Ca he bi

ka out' ödra ; anyin ae ca khan' ödra he ka okongo, ke haba khaca, me ca khan' ödra bi he ka ânyâ so. 6 E ba ju ke at ae ücü möu Iehova : u gan hmâ, ke gan hmâ iâm hnyi man. 7 Ie at ame ca he ka outö u, Tuhan ta je hnyei? anyin ae ücü u : ke haba khaca, me ba ju ke at ae ücü möu unyin tavat ae metâ hia hnyi ta je hnyei me hnyi ta je dökhudra hia. 8 Ke ödra tavat a hwakecin meno me monu hia : haba hna ünö hnen je hnatheat wale thibi e a hnyiban utö. 9 Adre me hom sileva adre kot halelöüâ ünyi Tasesa, me gol ünyi Ufaz, huliwa anyin at ame khavi, ke hnen hnyamen at huliwan gol : haba je khaüödra ae udrudrâ me udrudrâ hlit : huliwa hia anyin tavat a ödra metâ huliwa. 10 Ke Iehova Khong ae hnathu, e thibi Khong ae möt, me Than nyiele balua : ame öbubuny hmeledrany hnyi anyin hmönyin, ke ca khana ta je hnyei ka tot hmâ hnyi anyin wathethöt.

11 Walang hnöbun hna he ka ha ködra, ka habe, Haba ta je khong wale adre ca op drany me hmeledrany, ame he ka hi' ödra eang hon kânâ hia ; me hnyi hmeledrany. 12 E thibi at a op kânâ ge maniny man, e ame otilâ hmâ hmeledrany ge anyin metâ, me ulolo drany ge anyin wâhmakhmeto : 13 e ame fuc k' ame bwebwelâ ta je köio ethö hnyi drany, ke ame öliâ hai ünyi hnyi can hmeledrany ; e ame ânyâ hucece hobi kâu we, me hom ang ünyi hnyi tang omjehen. 14 Ame ve hwakecin meno bi tavat hia, me ba wâhmakhmeto unyidra : a ve hmehma but tavat huliwan gol hia ge anyidra bi hnatheat : anyin ae thoi but anyin idola adre ököiâ, ke ba homenâ eü hnyidrin. 15 Ödrin bi a ünyi baü me hnân iyawö : hnyi üen bi hwabödrin, ame he ka hi' ödrin. 16 E ca helâe jekhöü Jakob : anyin a e at ame op hia ; ke Isaraela tribuiny jekhon : Iehova tuhan sabaoth ien.

17 Çkacacaköüâ thö je tang omjehem ünyi hnyi hnyei, u at ame labâ hhabâ. 18 Anyin a walang hna ha hnö Iehova, ka habe, Wâ bi, oge me he ka kûlûâ helâke me veto, tavat adre me labâ hnyei walang ang, me hom ühnyükongu ödra, me me khan' ödra thö. 19 Ekölö ge hnök aat l ame han gan hmâ : ke haingök, ka habe, E hnathu wale anyik bi vec, ke oge me he ka hokhnyokâ. 20 E kong ut umök uma mano, ke mou but anyik je tö hia thithö : a he but lakuk, ke ba but, e ba hmetu at he ka ulolo umök uma mano, me otilâ anyik hak mano. 21 Anyin a hwa-

kecin dut meno tavat tuõ mamoe, me ca elám bi unyi Iehova; anyin a wale, e ba sot gadra, ke ame vese hia haledra je hna hat mamoe. 22 Hwan úthumetu, wá bi, e but ang, ke gan hmá imonumonuny úheny hnyi hnyeí hnyi hwadrö, he ka wia je tauniny Juda me me ba wan, me hnen je luko. 23 Iehova lö, e kxanö nya but a ca hanymen bi at deny gethen: e ca hanymen at ame he ka owisa hnen je hna okca. 24 Iehova lö, nö nya thö, ke ányá thö hnyi úen ae úcú: ca hnyi ányám hmönyin wá e nye hia but. 25 Hingálá but ányám hmönyin hon je hnyeí ae ca kxan' ödra u, me hon je lap adre me ca hawá bi iám: anyin adre hia but óafü Jekob, eke, adre hia but utá e, me ohia e, me öba wan hnyaban.

HNYIMAKAN 11.

WALANG hofuc ame o kö Jeremia únyi ga Iehova ame ha, ka habe, 2 Löng ju öbun je hofucin úhíhinykõu ang, me ha ka tavat Juda me aten Jerusalema; 3 ke ha thö ködra, ka habe, Walang hna ha hnö Iehova Khongu Isaraela, ka habe, Hna úhangö at ame ca he ka löng ta je hofucin úhíhinykõu ang, 4 waleji oge húna ka lakamöbun, hnyi bong oge hum ödra hnyin únyi hnyi hnyeí Aigupito, únyi hnyi hnyin meic fao me ha, ka habe, Löng ju ifucik, me ányá thö hoton hnök hna húna köbun; me öbun e he ka lakeik, ke oge me he inya ka Khongubun: 5 me inye he ka ohwádá úhíhinykõu oge khemanyiná ka lakamöbun, he ka ham ködra hnyeí ame dí hnyin debai me hani, helá me hnyi bong ang. Me oge me thu me ha, ka habe, Iehova lö, Amen.

6 Haba Iehova ame ha könya, ka habe, Khetá thö ta je hofuc hia thithö ang hnyi ta je tauniny Juda, me je gethen hnyi Jerusalema me ha, ka habe, Löng ju öbun je hofucin úhíhinykõu ang, me ányá. 7 Anyin oge ha hwegiá ka lakamöbun hnyi bong oge hum ödra hnyin únyi hnyi hnyeí Aigupito, ke ne o but hnyi bong ang, me vesákong me ha hwegiá, ka habe, Löng ju ifucik. 8 Ke adre me ca löng me tevehlöng, ke so bi, adre me ve vheno hwegien je hnyekudra bi ae kong: anyin a wale, oge me óá ködra ta je hofucin úhíhinykõu hia eang, waleji, oge húna ködra he ka ányá, ke adre me ca ányá bi.

9 Ke haba Iehova ame ha könya, ka habe, Adre wá hna úhnehnámö duöng

anyin at Juda, me aten Jerusalema. 10 Adre me hmetuhmetu but ka je hulö anyin lakamödra waleji adre me höcö löng hok ta je hofuc; ke adre me hnu hoton ke je khong he ka bi athnyaba ködrin: a hia but lap anyi Isaraela me lap anyi Juda thamuá úhíhinykõu, waleji oge khemanyiná ka lakamödra. 11 Anyin a wale walang hna ha hnö Iehova, ka habe, Wá bi, oge me he ka óá ködra únyi ae kong ae ca kxan' ödra bi he ka kec gan; ke adre me he ka tenge könya, ke oge me ca he ka ling ödra. 12 Me ame he ka he je lap anyi Juda me je aten Jerusalema, me tenge ka je khong, waleji adre leú utö ae bo so káu: ke adre me ca he bi ka omeli ödra hnyi úen anyidra vec. 13 Anyin ae úcú úseiny ányám je khong Juda me ányám je taun; ke öbun e hia but otílá je taben hut ka únyi ae ikiki, a je tap huán leú utö ae bo so kö Baala, hoton úseiny je getheniny Jerusalema. 14 Anyin a wale, u me ca he ka hijö tavat ang, ke u me ca he ka tenge me hic hobi ködra: anyin oge me ca he ka löng ködra hnyi úen adre me he ka hawo nya hnyin hnyi anyidra vec.

15 Ieú ame ányá óunykúmik eang hnyi umök uma, anyin a e ame hia but bi únyi monu me tavat ae se, ke a he but gam utiö ae kap? hnyi úen u je ányá únyi ae kong u me senyin bi. 16 Haba Iehova ame hwenyi iám, ka habe, Elaio ae hát, ae hmanenang, ke so wan: ke e ame hú meic hon e me gan hmá hwan hwalung, ke hmetru but je anginy e. 17 Anyin a haba Iehova tuhan sabaoth at ame te u, ame ha únyi ae kong köu, can hulö anyin lap anyi Isaraela, me lap anyi Juda, waleji adre me ányá hobi ködra bi me ohmönynini nya, adre me leú utö ae bo so kö Baala.

18 Ke haba Iehova ame owáhmakhmetu nya gan, me me kxanö nya thö: me u je omanená könya anyidra ta je huliwa. 19 Ke iny úcú me nokon mamoe ae hnam adre me lelö he ka hlingá; ke ca kxanö nya bi, a g' adre me ip je hna únykúme könya me ha, ka babe, Ate me he ka tha ohia úö me wan, ke ate me he ka subá degecá e hnyi hnyeí iny tavat ae möt, m' adre me ca he hmetu ka únykúme ien. 20 Ke Iehova tuhan sabaoth lö, at ame owisa wia, at ame cubec je únykúme me hnyok, e so oge me wá hna bi hwaban ködra gam: anyin oge hia but omanená hok hofuc köu. 21 Anyin a wale, walang hna ha hnö Iehova ge aten Anathoth, tavat

adre me elâm he ka hlingö u, ka habe, U me ca he ka perofeta hnyi iö Iehova, wâ u nye mok ut gahmun : 22 Anyin a wale walang hna ha hnö Iehova tuhan sabaoth, ka habe, Wâ bi, oge me he ka bi hwaban ködra : ame he wahidröu ka mok ge hele vat ; ame he lakudra obaga me wahlu ka mok ge hmiâ ; 23 ke ame he ka ba kölu-idra : anyin oge me he ka oâ únyi ae kong ka tavat aten Anathoth, wale hnyi hunainy hna sen' ödra hnyin.

HNyimakan 12.

IEHOVA lö, u thibi at æ wisa, iny ka he ka ivinö möu : ke so bi, oge me beúhnenamö möu ge hna owisa : ieu can ame sot gan gethen deny tavat ae kong? adre me laba so geú ödra hia adre me ti iyawö? 2 U je hia but te ödra, eke, e hu iwân gadra ; adre me kú, eke, adre me wa wan ; u hakekeny hnyi je hnyimödra, ke sákâú hnyi je únykümenödra. 3 Ke haba u Iehova lö, u je wâhmakhmetu nya : u je ö nya, me cubec hnyekuk gam : lili ödra but helâ me je mamoe hnân he ka hlingâ, me penapen' ödra hobi kâú bong he ka hlingâ hnyin. 4 Ame he hnyeí he ka tenge ke ne o but kehö, me meleca je úoiny hnyot hia ae ometu? can hulö anyin tavat adre me labâ e, adre hia but ohia je meno a vak can, me ta je meno ame gâ ; anyin a haingödra, ka habe, E ame ca he ka wâ obiny köta. 5 U je ne hia but tha wadring me tavat adre me he hon kânâ, ke u sényin dut unyidra, u me he ka kâmâú ka úö wadring me ta je hors? ke u je ne laba khötkic hnyi hnyeiny úsoköu, ieu u me he ka ányâ hnyi hmanenanginy Joridano? 6 Anyin a hia but iyawö u hnen je liamekeiny möu, ke hnen minya lap anyin kâmâm ; ke adre me hao u hwegiö u : eja ke ne adre ne há so köu, ca köp ödra bi.

7 Oge hia but hna umök uma, oge hia but hna degecâ ik hnyeí ; oge hia but hna oúnykümic ka hnyi hnyamen je iwahnaih-miöny mē. 8 Haba ik hnyeí me helâ me liona hnyi hnyot : e ame fuc hwege könya ; anyin a wale, oge hia but húkotiâ e. 9 Hawa, helâ me meno ame gâ ame seset ke at ae úhúlú, ik hnyeí könya? ame o but kâú ta je meno ame gâ ae úhúlú wale a igigilö but? he th' öbun, úkhacaköuâ thö je menoiny hnyot hia thithö, hum ödra ju he ka úhúlú. 10 Haba tavat tuö mamoe

æ se hia, adre hia but ohia ik hnyeí vine, adre hia but ututo jekhóúk, me wia jekhóúk æ kese hnân hnyeububa æ ba wan. 11 Adre hia but öba wan e ; e ame tenge könya ke ba but wan ; adre öba wan hnyeí hia, anyin æ ba at ame únyküme eú hnyi hnyekon. 12 Ame he but tavat sei hon je dok hia æ görany hnyi hnyeububa : anyin a hele vat anyi Iehova ame han, hwân hnyi ke obiny hnyeí ke ne o but hnyi ke obiny, ke ba bi hnahic ka ke at. 13 Adre hia but belökâ hwit, me meno iwadekong ; adre hia but oveci ödra bi, ke ba troban : ke öbun e he ka hmechman je jefiinyibun hnyeí, can hmönyin æ gan hmâ anyi Iehova.

14 Walang hna ha hnö Iehova ge tavat hia æ kong adre me laba hakekeny nya, tavat adre me kâlâ hnyeí waleji oge ham ka lakeik a Isaraela, haingen, ka habe, Wâ bi, oge me he ka uk ödra únyi hnyi idra hnyeí, me oc lap anyi Juda únyi hnyi wanbödra. 15 Ke iny ka hia but uk ödra oge me he ka hmetu me betenge gadra ; ke oge me he ka ve ohmetu ödra ka hnyi je idra, me idra ta hnyeí. 16 Ke ödra ka he ka ti nâ je gethen deny lakeik, me khemanyin hnyi iök, ka habe, Kia inya Iehova ; helâji me hnödra hna nâ lakeik he ka khemanyin ga Baala ; awe, adre me he ka up ödra göranyai wanben ik hnyeí. 17 Ke adre ne ca he ka löng, me oge me he ka oc degecâ, me ohia hnyeí eling haingö Iehova.

HNyimakan 13.

WALANG hna ha hnö Iehova könya, ka habe, He thö me úco hobi köu bi wen hnyekom a lino, ke oweikâ ju hnyâm, ke ca he ka hneú e hnyi köiö. 2 Me oge me úco wen hoton hofuc ho Iehova, me oweikâ hnyik. 3 Me ame olo o hofuc ho Iehova könya ame ha, ka habe, 4 Hom dö wen u je úco, wale hnyi hnyâm, ke todrö, he thö Euferate ai, me ikhâlâ e hnyi esopiny kic. 5 Me oge me he me ikhâlâ e hnyi Euferate hoton hna húna könya ga Iehova. 6 Ke hwaban je bong æ se hia, haba Iehova ame ha könya, ka habe, Todrö, he thö Euferate ai, me hom úheny e wen waleji oge húna köu he ka ikhâlâ eling. 7 Me oge me he Euferate ai, me hiny, me hom wen únyi hnyi dok oge ikhâlâ e hnyin : ke wâ bi, e kong ut wen, ke únyi baú but. 8 Me ame o but könya hofuc ho Iehova ame ha, ka habe, 9 Walang hna ha hn

Iehova, ka habe, Helâe oge me he ka okongoâ hnyok bi gan anyi Juda, me hnyok bi gan ae gan hmâ anyin Jerusalema. 10 Haba hnyeï ang ae kong, tavat adre me h c  l ng hok je hofuc, tavat adre me hnu hoton hwegien hnyekudra bi, me he hoton ke je khong bi he ka bi athnyaba k drin, me khudrung k drin, adre me he ka  c  me wen ang, ae  nyi ba  but. 11 Anyin ame kece wen ka hnyi hnyin at, hel e  ge hia but okece  k nya lap hia anyi Isaraela, me lap hia anyi Juda, haing  Iehova; m' adre me he ka hn n lakeik, me i k, me og n , me hmanenang: ke adre me h c  l ng. 12 Anyin a wale, u me he ka ha k dra hofuc ang, ka habe, Walang hna ha hn  Iehova Khongu Isaraela, ka habe, Ame he ka un ng t ta je kaia hia ge waina: ke adre me he ka ha k u, ka habe, Hawa, e ca khan'  hmun a g' ame he ka un ng t d  ta je kaia ge waina? 13 Me u me he ka ha k dra, ka habe, Walang hna ha hn  Iehova, ka habe, W  bi, oge me he ka  un ng t  tavat aten hnyeï ang hia, wale je than a tavat adre me tab  theron anyi Davita, me tavat bi hut, me ta je perofeta, ma aten Jerusalema hia, m' adre me he ka monu ge gr k. 14 Ke oge me he ka  usetu drak u  dra, a je kamen me lakon, haing  Iehova: oge me ca he ka menyik, me hokhnyok, me betenge, ke oge me he ka oh'  dra.

15 L ng ju  bun, ke tevehl ng ju: ca hnyok bi gan: anyin a hia but ha Iehova. 16 Hna but k  Iehova Khongubun hna og n , e me tiga ca omenekhulum , ke e me tiga ca ha  je cabun hon je bucen ae lit; ke  bun ka tiga halubahingen melam me e ame wia bi ka hnyi hmenon mok, me lit ae gan. 17 Ke  bun e ca l ng, ame he hnyekuk ka tenge hnyi dok ae iyong can anyibun bigan; ke ame he li emak k ka ti tenge, me lup ge deko k, anyin adre hom b  hna hat mamoe hale Iehova. 18 Ha th  ka than me momo than, ka habe,  hnyik n'  bun ju, ke laba ju: anyin a k lu but anyibu li korona ae mec, wale koronainy anyibun hmanenang. 19 Adre hl ng ut je taun hnyi hwai u, ke ba at ame he ka kh ng: a hom hwenb  Juda hia; adre me tha hwenb  hia.

20 Bwela th  g ranyai me w  tavat adre me o  hedra hnyi hwadr : ewa hna hat meno adre ham k u, hna hat halem ae kese? 21 Ie  u me he ka ha, e ka he ka otil  je waem hom hn n b m, anyin a u je hia but n'  dra he ka musi u? hawa, ame

ca he ka k t u ge je vec, hel  me momo ame he kahno ? 22 Ke u je ne ha e  hnyi hnyekom, ka habe, Can ie  ame o k nya ta je  nyi ang? can  ganiny hwakec m ae kong adre hai obiny  ny m  kha , me adre me okongo  ohm iny li cam. 23 Hawa, e khana at Aithiop he ka wia unen unyin, me lepad, hna bi hnahlimen unen? awe, e khan'  bun he ka  ny  so, wale tavat adre me khenen he ka  ny  hul . 24 Anyin a wale, oge me he ka ovesei  dra, hel  me that nyi ame o  ang d   nyi hnyi hnyebu-ba. 25 Walang hna khen  k u, jekhom adre tuluto k u  nyi gak, haing  Iehova; anyin a u je hnying nya me labageju ka hnyi thoi. 26 Anyin a wale oge me he ka hai obiny  ny m  kha  ka hnyi hnyim k m, me e me manen hn n ohmehmai u. 27 Oge hia but w  hwakec m ae ikiki, wale hn m je hna bi  nyi monu, me hw m hwakuku hel  me hors, me  ganiny hn m hna bi  nyi monu hon je dok ae hut hnyi ta hnyeï. Ek l  gam Jerusalema! u me ca he ka bo so; ke ne o but keh ?

HNYIMAKAN 14.

WALANG hofuc ho Iehova k  Jeremia ge ibainy we, ka habe,

2 Juda ame tenge, ke je homag uleny ame hl uhl u, adre me laba, ke hlit bi hon k n ; ke ame o th  hwan tenge hnyi Jerusalema. 3 Ke haba je tuh dra, me adre me kun  je lakudra ka hnyi ta je an: adre me o but ka hnyi ta je thop, k' adre me ca w  bi k i ; adre me hmetu me belidra je kaia ae hme: adre me hmehma me hlohlo, me tube je b dra. 4 Adre me hmehma tavat trohnen, me tube je b dra, anyin a khekhe but k n , can ae ba we hnyi hnyeï.

5 Eke, ame hnoko  aila minya hnyi hnyot, me ame hna degec  nokon, anyin ae ba but  nying. 6 Ke haba je asinainy hnyot adre me tot hnyi je dok ae g rany, adre me momokhon can ae ba ang, hel  me je alegeta: a dit ut je emak dra anyin ae ba but  nying.

7 Iehova j , eja ke ne a ne hwad  k  hmun anyihmun ta je hul ,  ny  bi th  u can i m; anyin a  hmun e osehia but k lu:  hmun e hia but  ny  hul  k u. 8 Geju Israela l , at ame  mel  e hnyi  en vec, anyin a ie  u je hel  me atkanyua hnyi hnyeï, me hel  me at ame vheno gethen me e ame sa  th  ka mokut? 9 Anyin a ie , u je hel  me at ame g   n, ke hel  me at ae

hwege ae ca khana he ka omelö ? ke so bi, u bi Iehova hnyi wanböhmun, ke u je ip iâm huhmun ; ca hna degeci öhmun bi.

10 Walang hna ha hnö Iehova, ka tavat ang, ka habe, Heläe, e wedra he ka he baü : adre me ca hia but behânâ bi je cadra : anyin a wale ame ca he bi Iehova ka köp ödra ; e ame he walang ang ka únykúme anyidra monu, me senâ anyidra je hulö. 11 Ke haba Iehova ame ha kõnya, ka habe, U me ca he ka hijö tavat ang, m'adre me so. 12 Ödra ka he ka ányâ ca han, oge me ca he ka löng útengiödra ; ke ödra ka ha ke hudo je hudiny leü me bwihlany, me oge me ca he ka köp ödra : ke oge me he ka ohí' ödra ge hele vat, me hmiâ, me mok ae cap. 13 Me oge me ha, ka habe, Ekölö Than Iehova ! wâ bi, je perofeta adre me ha ködra, ka habe, Öbun e ca he ka wâ hele vat, ke öbun e ca he ka hu hmiâ : ke oge me he ka ham köbun eang úsoköu ae únyi hnathu. 14 Me Iehova ame ha kõnya, ka habe, Je perofeta adre me perofeta thoi hnyi iök : oge ca kun' ödrin, ke oge ca hûna ködrin, ke oge ca fuc ködrin : ödrin e perofeta köbun me omanená thoi, me hna bi khong, me únyi ae ba önyen, me iyawö eü hnyi je hnyekudrin. 15 Anyin a wale walang hna ha hnö Iehova ge ta je perofeta, tavat adre me perofeta hnyi iök, ke oge ca kun' ödrin, ke so bi, ödrin e ha, ka habe, Ame ca he ka hu hele vat me hmiâ hnyi hnyei ang : Awe, adre me he ka ohia je perofeta eling ge hele vat me hmiâ. 16 Ke haba tavat ödrin e perofeta ködrin, adre me he ka khú' ödra ka hnyi je getheniny Jerusalema can hmiâ me hele vat ; ke ba atame he ka kõnim ödra, ödra, me laöiödra, me lakúdra obaga me wahu : anyin oge me he ka hingálâ hudrin hwakecidrin bi ae monu. 17 Ke u me he ka ha ködra hofuc ang, ka habe, E so ame hingölö únyi hnyi li emakök deköiö hnyi lany me lit, me ca he ka menâ ; anyin a aat dö hluiny ik hnyei, ke gan hmâ aat, ke gan hmâ hna kot. 18 Oge ne he ka hnyi hnyei, wâ bi je hna kot hnen hele vat ! ke oge ne he ka hnyi taun, me wâ bi, tavat ae sēnyin ge hmiâ ! anyin ame tha ngeno baüâ hnyei hnen perofeta, me at bihut, ke ba metâ gadrin.

19 Hawa, u je hia but ti digic Juda ? ke a hia but hanom ikikiâ Ziona ? anyin a ieu u je kuc öhmun, ke ba eny köhmun ? öhmun e halubahingen hnahic, ke ba bi so, me ūen metu, ke wâ bi ot bi. 20 Iehova

lö, e khan' öhmun dut anyihmun hulö, me hulö anyin lakamöhmun : anyin a öhmun e hia but ányâ köu hwakecin ae kong. 21 Ca he bi ka ikiki öhmun, únyi hnyi iâm ; ca he ka okongoâ theroniny ányâm hmanenang : únykúme ju, ca he ka thamua ányâm úhinhinyköu möhmun. 22 Hawa, e hu at unyin ta je únyi baü anyin ta je wanaithila ae khana he ka bi we ? hawa, e khana drany he ka ham we ? hawa, ca u bi Iehova Khonguhmun ? anyin a wale öhmun e he ka halubahingâm ; anyin a u je op ta je únyi hia eling.

HNYIMAKAN 15.

HABA Iehova ame ha kõnya, ka habe, Eja ke ne a ne tot Mose me Samuela hnyi hnyimakök, oge me ca he ka hnyok ka tavat ang : ob' ödra but gak, m' adre me he but. 2 Ke adre me ne he ka ha köu, ka habe, Öhmun a he kâ ? u me he ka ha ködra, ka habe, Walang hna ha hnö Iehova, ka habe, Haba at hobi kâu mok, me ame ka he bi ka hnyi mok ; ke haba at hobi kâu hele vat, me ame ka he bi ka hnyi hele vat ; ke haba at hobi kâu hmiâ, me ame ka he bi ka hnyi hmiâ ; ke haba at hobi kâu bá, me ame ka he bi ka bá. 3 Ke oge me he ka otillä ködra vak ta únyi, haingö Iehova : wale hele vat he ka hlingâ, me je kuli he ka oloú kia, me ta je meno ame gâ, me ta je menoiny hnyot he ka an me ohia. 4 Ke oge me he ka hn' ödra ka hnyi hlohlo hnyi ta je dökhu hia eang hmeledrany, jöni Manase nöku Hezekia than Juda, can hnen hna ányâ hnyi Jerusalema. 5 Anyin a ie at ame he ka betenge gam Jerusalema ? ke ie at ame he ka mâng gam ? ke ie at ame he ka saü me me hnö bongom ? 6 Haingö Iehova, ka habe, U je hia but hna degeci nya, ke u je hmetuhmetu : anyin a wale oge hia but hai hnyamök gam, me ohio u ; oge sēnyin dut ge ietra. 7 Ke oge hia but ulic ödra ge ut hnyi je homagöuleny hnyei ; oge hia but öba lakudra, oge hia but öba lakeik ; adre me ca hmetu únyi hnyi dedra je gethen. 8 Adre ose hia je safac unyidra hnyi hnyimakök hon je waönyin köiö : oge hia but hom ködra ūcon hinyen wahidróu, at ame söh hnyi jebigö : oge hia but ie oâ ködra ot me öbubuny. 9 E sēnyin dut momo ame hnöku ödrin seven ; e ame mokcu ; ame didrut anyin seünö, ke tige lany bi ; e ame hia but hmehma me hlohlo : ke oge me he ka hna je

köluidra ka hnyi hele vat hnyi hnyimakan je iwahnaihmiony mödra, haingö Iehova.

10 Ekölö gak, bai lö, anyin a u je hnokoâ at ae iwatretra, ke at ivinö me hmeledrany hia! oge ca hia but më ham mone hnân troban, ke haba khaca adre ca më ham mone kõnya hnân troban; ke so bi, ödra hia adre me hangö nya. 11 Haingö Iehova, ka habe, E hnathu, oge me he ka sihwegio u hnyi so; e hnathu, oge me he ka kunâ iwahnaihmiony he ka khöu köu hnyi ün ae kong me ün ae vec.

12 Hawa, e khana at he ka thu fao wale fao úheny hnyi hwadrö, me bras? 13 Oge me he ka ham manâm man me tang omjehem hnân söh ke ca ge hwaban, ke can bi ányâm je hulö hia hnyi je hnyigöulâm hia. 14 Ke oge me he ka tha ohei ödra me je iwahnaihmiony möu ka hnyi hnyei ae ca khanö u: anyin ame ubáhlá meic hnyi anyik hmönyin, ke ame he ka thong hubun.

15 Iehova lö, u je wâ but: únykúmi nya ju, me senö nya, me bi hwaban ka tavat cak, ka tavat adre me sedö nya, ca hom digic nya hnyi hnâm hna ling vec ae beúhmá: khanö u thö a adre hia but haikongu nya can iâm. 16 Adre me wâ hwâm je hofuc, me oge me an e; ke hnân senyin me hnân hobá hwâm je hofuc hnyi hnye-kuk: anyin adre me hwenyi iök ge iâm, Iehova Khongon sabaoth. 17 Oge me ca laba hnyi úkhacaköu anyin tavat adre me walak me hop: oge me hake laba can hnyâmâm; anyin a u je hia but öunöngöti nya ge hmönyin. 18 Anyin a iéu a e bala bi anyik vec, ke ba eny hnök aat, ke ame ca bemetu? hawa, u me he ka helá me wagewe ame iyawö, a köiö ame hme?

19 Anyin a wale, walang hna ha hnö Iehova, ka habe, U je ne he ka hmetu, me oge me he ka hum u, ke u me he ka tot hnyi hnyimakök: ke u je ne he ka oc ut únyi ae únyi hnathu únyi hnyi únyi ae ikiki, u me he ka helá me hnyimök: adre me he ka hmetu köu, ke u me ca he ka hmetu ködra. 20 Ke oge me he ka wiö u ka tavat ang hnân hak bras ae hwege; ke adre me he ka vat möu, ke ame ca he ka tudra: anyin a tha inya möu he ka tuö u, me omeli u, haingö Iehova. 21 Ke oge me he ka húgünö u únyi hnyi hnyamen tavat ae kong, ke oge me he ka úco melam únyi hnyi hnyamen tavat a ödra wathethöt.

HNYIMAKAN 16.

AME o minya but kõnya hofuc ho Iehova ame ha, ka habe, 2 U me ca he ka hok momo me hu nokom бага me hlu hnyi dok ang. 3 Anyin a walang hna ha hnö Iehova ge ta je da me in adre hnokoâ eang, me je lahinyödra adre hnöku ödra, me je lakamödra adre hnöku ödra hnyi hnyei ang, ka habe, 4 Adre me he ka mok ge je mok ae kong; adre me ca he ka tenge gadra, ke adre me ca he ka kõnim ödra; adre me he ka hnân tatet hon kâná; ke ame he ka ön ödra hnen hele vat me hmiâ, ke ame he je unyidra ka hnân an ta je meno ame gâ ethö, me je menoiny hnyot. 5 Anyin a walang hna ha hnö Iehova, ka habe, Ca didrö ka hnyi uma tenge, ka ca he bi ka hnyi tenge thungaü, ke ca mâng gadra; anyin oge hia but hom anyik hnahic únyi ge hnyei ang, wale ibetengio me betenge vec, haingö Iehova. 6 Ke ame he tavat ae gan me tavat ae úhnyükong ka mok hnyi hnyei ang: adre me ca he ka kõnim ödra; ke ame ca he tavat ka tenge gadra, ke adre me ca he ka thamüö hwadrak ny, me ohadreúâ, adre me ányâ hnyi hnyamok; 7 ke ame ca he tavat ka tha subö areto hnyi tenge gadra wale hnân otubweli ödra ge je komok; k' ame ca he tavat ka ham ködra kaia ka habelidra hnân otubwelá ge kamödra me hinyödra a mokcu. 8 Ke u me ca he ka dit hnyin uma bijéu he ka tha laba mödra, me hnyi han me ic. 9 Anyin a walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka bi obiny hnyi dok ang hnyi hnyimaköbun hnyi bongubun ta je bong hwan senyin me hwan hobá, me hwan li at ödre tep faipoipo. 10 Ke hnyi ün u me he ka haimemenâ ta je hofuc hia ang ka tavat ang, me adre me he ka ha köu, ka habe, Anyin a iéu Iehova ame ha gahmun ta je únyi ae kong hia thithö ae gan hmá? ke iéu hwaceihmun ae kong? ke iéu hnöbmun hna ányâ kö Iehova Khonguhmun! 11 me u me he bi ka ha ködra, ka habe, Can lakamöbun ödrin e hna degeci nya, haingö Iehova, me hnu hoton je khong, me bi athnyaba ködrin, me khudrung ködrin, ke adre me hna degeci nya bi, me ca tuö bi anyik hnanyibu; 12 ke öbun e hia but ányâ hulö ae gan hmá hon je lakamöbun; anyin a, wâ bi, öbun e ve hnu hoton ihwegien je hnyekubun ae kong, me öbun e ca

ling nya bi : 13 anyin a wale oge me he ka ob' öbun hnyi hnyeï ang ka hnyi hnyeï ae ca khan' öbun, öbun, me je lakamöbun ; ke öbun e he ka bi athnyaba eling ka ke je khong hnyi lany me lit ; ke oge me ca he ca betenge gabun.

14 Anyin a wale, wá bi, ame he ka o je bong, haingö Iehova, ke adre me ca he ka ha, ka habe, Kia inya Iehova, at ame hom je lakon Isaraela únyi hnyi hnyeï Aigupito ; 15 ke so bi, Kia inya Iehova at ame hom lakon Isaraela únyi hnyi hnyeï hnyi hwa-drö, me únyi hnyi je hnyeï hia waleji e ame ob' ödra ka hnyin : ke oge me he ka ohmetu ödra ka hnyi idra hnyeï, waleji oge ham ka lakamödra. 16 Wá bi, oge me ho ka hawá tavat thut ae se hia, haingö Iehova, m' adre me he ka nuc ödra ; ke hwaban e, oge me he ka hawá tavat hnu meno ae se hia, ke adre me he ka hnu ödra únyi hnyi je bucen hia, me je hut hia, me únyi hnyi je hmakaniny je kic. 17 Anyin a e hnyi hon dedra je gethen hia li emakök : ödra ca iyong hnyi hnyimakök, ke adre ca ikhálá gak hwakecidra ae kong. 18 Ke oge me he ka bök ka olo bi hwaban hwakecidra ae kong me anyidra hulö ; anyin adre hia but oikikiá ik hnyeï hnen unyin anyidra ta je únyi ae bon a g' adre mokcu, ke adre hia but öunöngötá ik hnyeï ge anyidra ta je únyi ae ikiki. 19 Iehova lö, tang hwegiök, me hnök hhabá, me hnök hna lubaduöng hnyi bonginy vec, ame he ka o köu ta je hnyeï únyi hnyi je can hmeledrany me ha, ka habe, e ba jekhon je lakamöbun, ke so bi, thoi, wale je únyi baú me ba troban hnyin. 20 Hawa, ame he ke at ka ányá je khong hobi káu, ke ca je khong bi thö? 21 Anyin a wale, wá bi, oge me he ka owáhmakhmetu ödra, hnyi úen ang oge me he ka owáhmakhmetu ödra ge hnyamök, me manik man ; ke ame he ka khan' ödra a iök Iehova.

HNYIMAKAN 17.

ADRE hia but sihnalimen hulö anyi Juda ge pen fao, me homakan samira : adre kave hnyi viny je hnyekudra, me hon je baitoiny anyibun je taben hut ; 2 ke haba ta je lakudra adre me únykúme anyidra ta je taben hut, me anyidra je Aseira hnyi je úö ae hát hon je hut ae görany. 3 Anyik bucen hnyi utkáná lö, oge me he ka ham ányám ta je únyi me je tang omjehem hia, hnán söh, me ányám

je dok ae görany hnyi ta je hnyigöulám hia thithö, can hulö. 4 Ke haba u, u me ka he ka hamám bi degec em hnyeï waleji oge ham köu ; ke oge me he ka kunö u he ka bi athnyaba ka je iwahnaihmiöny möu, hnyi hnyeï ae ca khanö u : anyin a öbun e hia but hú meic eú hnyi hnyekuk, ke ame he bala bi ka möt.

5 Walang hna ha hnö Iehova, ka habe, E ka mok at ama labageju ka at, me wia at me me hnán hnyamen, ke haba hnyekon ame hota degeci Iehova. 6 Ke e ame he ka helá me úö ae ba lan hnyi hnyebuba, ke ame ca löng bi, e ka o so ; ke e ame he ka labá je dok ae hwahwacit hnyi hnyebuba, hnyeï ae salt, ke ca hnán labá. 7 Hnahic hnen at ame labageju kö Iehova, at ame ip Iehova hnán jekhon. 8 Anyin a e ame he ka helá me úö adre tá hnyi ta je köiö, ame iyáú je wán ka hnyi wagewe, ke ame ca he ka hlohlo, e ka o bi kahwa, ke ame he ka hát ta je lan ; ke ame ca he ka hmak hnyi huna ae ba hnyin we, ke ame ca mená bi wa. 9 Haba hnyekon at, me wale at ae ti iyawö hon ta je únyi hia thithö, ke ti kong e : ie at ame he ka wáhmakhmeto e? 10 Inya Iehova at ame elám hnyok, oge me cubec ta je hna únykúme, he ka ve ham ka tavat hia helá me dedra ta je gethen, me helá me wan anyidra ta je huliwa. 11 Haba kore ame mokulec ta je lakon, ke ca ta je hing lakon bi, heláe ge at ae tren omjeú ke ca hoton bi wisa ; hnyi wanben bonginy je bong, e ame he ka hna degecá bi e, ke haba hnyi obiny e ame he ka at ae monu.

12 Theron ae hmanenang me görany únyi hnyi hwán, wale hnen anyita dok ae kap. 13 Iehova gejon Isaraela lö, adre me he ka hmehma ödra hia adre me hna degeci u ; ke haba tavat adre me digic nya, me adre me he ka sihnalimen hnyi káná, anyin adre me hna degecá köiöiny möt ame pupua, wale a Iehova. 14 Iehova lö, ometu nya but, me inye metu but ; omeli nya thö, me inye möt ut ; anyin a u thibi hnök hna ogáná. 15 Wá bi, ödra adre me ha könya, ka habe, Ewa hofuc ho Iehova? e so e hwádá thö walang ang. 16 Ke haba inya oge me ca ie ngá he ka at tuö mamoe hotom ; ke haba khaca, oge me ca hia but weny bonginy vec ; e khanö u ; e hnyi hnyimákám hofuc ame he but únyi hnyi li esongodik. 17 E so u me ca bi hnán ot könya ; u thibi hnök hhabá hnyi bonginy vec. 18 E so e hmehma tavat adre mo

sedö nya, ke ca hnö nya bi he ka hmehma : e so ödra hlohlo, ke ca hnö nya bi he ka hlohlo : oâ ju ködra bong ae kong, ke ohî ödra but, me olo ohia.

19 Walang hna ha kõnya hnö Iehova, ka habe, He thö ka tot hnyi homagöuleny je lakon tavat, wale hnen je tuhan Juda hna didrö me didrut hnyin, me hnyi je homagöuleny hia Jerusalema; 20 ke ha thö ködra, ka habe, Löng ju hofuc ho Iehova, öbun je than Juda me at Juda hia, me aten Jerusalema hia, tavat adre me didrö hnyi je homagöule ang : 21 walang hna ha hnö Iehova, ka habe, Wâ eâu öbun, ke ca hom bi ke únyi hnyi bong sabath, ke ca dit mē hnyi je homagöuleny Jerusalema : 22 ke ca he öbun ka hok únyi únyi hnyi umöbun je uma hnyi bong sabath, ke ca ányá bi ke huliwa, ke so öbun e okábá bong sabath, heláji me hnök hna húna ka lakamöbun; 23 ke so bi adre me ca löng, me tevehlong, ke adre me ohwegiá je nyidra, m' adre me ca löng bi me kap bi hna únö. 24 Ke öbun e ne ti ling nya, haingö Iehova, me ca hom bi ke únyi ka hnyi je homagöuleny taun ang hnyi bong sabath, ke öbun e ne okabá bong sabath me ca huliwa hnyin e; 25 awe, ame he ka labö didrö hnyi je homagöuleny taun ang je than me je taben, tavat adre me tabá theron anyi Davita, adre me tabá je kariotá me je hors, ödrin, me je taben, aten Juda, me aten Jerusalema: ke ame he ka tethmä taun ang nyiele balua. 26 Ke adre me he ka o únyi hnyi je tauniny Juda me je ke keihen igigilö Jerusalema, me únyi hnyi hnyei Beniamina, me hnyei ae tha hon, me je bucen, me únyi hnyi Hwaiöu, adre me hom je hudiny leú, me je hut, me je hudiny han, me libanu, me adre me he ka hom je hudiny ole, ka hnyi uma umö Iehova. 27 Ke öbun e ne ca ling nya he ka okabá bong sabath, me he ka ca hije hok, me didrö ka hnyi je homagöuleny Jerusalema hnyi bong sabath; awe, oge me he ka hú meic hnyi ta je homagöuleny e, ke ame he ka an je uma umen je than hnyi Jerusalema, ke ame ca he ka mok.

HNYIMAKAN 18.

HOFUC ame o kö Jeremia únyi ga Iehova ame ha, ka habe, 2 Todrö, he thö ka hnyi uma umen at ame up kaia ke oge me he ka ölöngi u e ge hok hofuc. 3 Me oge me he ka hnyi uma umen at ame

up kaia, ka wá bi, e ame ányá anyin huliwa hon li waengen. 4 Ke ame kong ut kaia hnyi hnyamen at ame up kaia waleji e ame op, me e ame op hmetu e, me me ke kaia, helá me weny at ame up kaia he ka ányá.

5 Me ame o but kõnya hofuc ho Iehova ame ha, ka habe. 6 Lap anyi Isaraela lö, hawa, e ca khañö nya he ka ányá köbun helá me man at ang ame up kaia? haingö Iehova. Lap anyi Isaraela lö, wá bi, öbun úcü hnyi hnyamök me kâná ae kece hnyi hnyamen at ame up kaia. 7 Hnyi únen oge me he ka fuc ge ke hnyei me ke dökhü, he ka oc ut, me hagutá me ohia e; 8 ame ne he hnyei eling wale oge me fuc gan he ka hmetu únyi hnyi anyidra hulö, awe, oge me he ka ietra únyi ae kong waleji oge únyküme he ka ányá ködra. 9 Ke haba hnyi únen oge me he ka fuc ge ke hnyei, me ke dökhü he ka otílá me tá e; 10 ame ne ányá hulö hnyi hnyimakök, me ca löng ifucik, awe, oge me he ka ietra so, waleji oge ha he ka ohnahici ödra hnyin. 11 Ke walang ang, he thö ka ha ka at Juda me aten Jerusalema, ka habe, Walang hna ha hnö Iehova, ka habe, Wá bi, oge me he ka penapena únyi ae kong hobi köbun, me únyküme hna únyküme he ka ányá köbun: ve hmetu ju öbun walang ang únyi hnyi debun ta je gethen ae kong, ke osoá but debun je gethen me anyibun ta je huliwa. 12 Ke adre me ha, ka habe, E únyi baú bi: anyin öhmun e he ka hnu hoton anyihmun ta je bibihwakecin, me ve ányá hoton ihwegien je hnyekuhmun ae kong.

13 Anyin a wale, walang hna ha hnö Iehova, ka habe, Hnö th' öbun unyin ta je hnyei, ie at ame löng je únyi a helá e hia but ányá únyi ae ti kong hnen hluiny Isaraela. 14 Hawa, ame he kionainy Lebanona ka kölu únyi hnyi hon kicin utkána? ame he ka hme köiö katebu wale ame hingölö úbeny hnyi dok ae sákáú? 15 Anyin adre hnying nya lakei, adre hia but leú utö ae bo so ka únyi ae ba önyen; ke adre hia but ohaú ödra bi hnyi dedra je gethen, a je gethen káu adrem, he ka he hnyi je ong gethen, adre ca okhibö göranyai; 16 me adre me wia idra hnyei hnân láiá, me jú nyiele balua; ame he tavat hia adre me gethen unyin ka láiá me nyinyiká je bödra. 17 Oge me he ka ovesei ödra hnyi hnyimakan iwahnaihmiöny helá me hnen ang hwei; oge me he ka hotuk me ca hnyimakök bi ködra, hnyi bonginy anyidra vec.

18 Me adre me ha, ka habe, Ai öbun m' ate me he ka ányá je bibihwakecin kö Jeremia; anyin ame ca he ka hia hnanyibu unyin at bihut, me úhnenamö unyin at ae metá, me hofuc únyi ge perofeta. Ai öbun, ate me he ka kot e ge bohmen, ke ca he bi öta ka tevehlöng bi hwan ta je hofuc.

19 Iehova lö, tevehlöng ju könya, ke löng ju ifucin tavat adre me ivinö mönya. 20 Hawa, adre me he ka bi hwaban so ge kong? anyin adre hia but hiny thop, me inye he ka mok. Únykúme ju waleji hnök hna tot hnyi hnyimákám he ka khöúá so hobi ködra, me ohavá ányám hmönyin gadra. 21 Anyin a wale hna but lakudra ka hnyi hmiá, ke hn' ödra but ka hnyi maniny hele vat, ke ame he ka ba but lakon laöiödra, me je safac bi, ke ame he mok ka hlingá obaga, adre me he ka hlingá anyidra wahidróu ge hele vat hnyi vat. 22 E so adre me löng tenge hnyi umödra je uma, hnyi úen u me he ka ie oá ködra deö vat; anyin adre hia but hiny thop hnân odili nya, me ikhâlâ je hnewe hnân li cak. 23 Ke so bi, Iehova lö, e khanö u hia anyidra úhnenamö gak hnân he ka hlingö nya; ca he ka hna hwakecidra ae kong, ke ca he ka kot degecá anyidra monu únyi hnyi hnyimákám: ke so he ka hagut' ödra but hnyi hnyimákám; ke ányá thö ködra hnen ányám hmönyin.

HNHYIMAKAN 19.

WALANG hna ha hnö Iehova, ka habe, He thö ka úco kaia kánâ adre op me hom ke je hingatiny tavat, me ke je hingatiny tavat bihut; 2 ke he thö ka hnyi hnyigöulen bucen anyin nöku Hinom, ae hnyi homagöuleny Harsith, ke khetá thö eling ta je hofuc oge me he ka ha köu: 3 me ha, ka habe, Löng ju öbun hofuc ho Iehova je than Juda, me aten Jerusalema; walang hna ha hnö Iehova tuhan sabaoth, Khongu Isaraela, ka habe, Wá bi, oge me he ka oá únyi ae kong ka hnyi hon dok ang; ke ame he ka tenge met hnyi hnyikönyen tavat adre me löng. 4 Anyin adre hia but hna degeci nya me okebongoná bi dok ang, me leú utö eang ae bo so ka ke je khong, waleji ae ca khan' ödra, ödra me je lakamödra me je than Juda; ke adre hia but öunöngötá dok ang ge dra dren tavat ae ba hnyikongudrin: 5 me op je dok ae görany anyi Baala, he ka thong je lakudra ge meic hnân hudiny leú kö

Baala; waleji oge ca húna, ke oge ca ha, ke oge ca únykúme; 6 anyin a wale, wá bi, ame he ka o je bong, haingö Iehova, ke adre me ca he hmetu ka ha ka dok ang Tofet me hnyigöulen bucen anyin nöku Hinom, ke so bi, Thopiny hlingö at. 7 Ke oge me he ka öúnyibaúá úhnenamö anyin Juda me Jerusalema hnyi dok ang; ke oge me he ka otai ödra ge hele vat hnyi hnyimakan je iwahnaihmiöny mödra, me hnen hnyamen tavat adre me elám he ka hling' ödra: ke oge me he ka hom ta je unyidra hnân an ta je menö ame gá ethö, me je menoiny hnyot. 8 Ke oge me he ka wia taun ang hnân kuko me jú; ame he tavat adre me gethen hnyin ka láia me jú, can ta je mok hnyin. 9 Ke oge me he ka hn' ödra he ka an viny lakudra obaga, me viny lakudra wahlu, ke adre me he ka ve an viny je lawaedra, hnyi hna igigilö, me hna thelöng, wale ame he ka oveci ödra hnyin hnen je iwahnaihmiöny mödra, me tavat adre me elám he ka hling' ödra. 10 Me u me he ka tho kaia hnyi hnyimakan tavat adre me tha he möu. 11 Ke u me he ka ha ködrin, ka habe, Walang hna ha hnö Iehova tuhan sabaoth, ka habe, Oge me he ka ohmouca hnyei ang helâ me hna tho kaia kánâ, wale ae ca khan' ödra he ka obekhötá hmetu: ke adre me he ka khön komok hnyi Tofet, ke ne o but ame ba but dok hnân khön komok hnyin. 12 Haingö Iehova, ka habe, Oge me he ka ányá helâe ka dok ang, me tavat adre me labâ e, me wia taun ang me me helâ me Tofet: 13 ke haba ta je uma hnyi Jerusalema, me ta je uma umen je than Juda, a je uma adre oikikiá, ame he ka helâ me Tofet, wale je uma hia thithö waleji adre me leú utö ae bo so ka hnyi hon ka ta je únyi hia hnyi drany, me hingâlâ hudiny ic ka ke je khong.

14 Me ame o thö Jeremia úheny Tofet, waleji hnyi hnö Iehova hna kunâ he ka perofeta; me e ame tot hnyi hnyeuleny uma umö Iehova, me ha ka tavat hia thithö, ka habe, 15 Walang hna ha hnö Iehova tuhan sabaoth, Khongu Isaraela, ka habe, Wá bi, oge me he ka oá ka taun ang me ta je tauniny hia je únyi ae kong hia thithö, waleji oge ha gan: anyin adre hia but ohwegiá je nyidra, me ca löng bi ta je ifucik.

HNYIMAKAN 20.

KE haba Pasur, nöku Imer at bihut, ke at musi ae beönua hnyi uma umö Iehova, ame ling Jeremia ame perofeta ta je únyi eling. 2 Me haba Pasur ame fuc kö Jeremia perofeta, me ca e, a ohmä hnyi utö ae hnyi homagöuleny Beniamina ethö, waleji hnyi uma umö Iehova. 3 Ke haba nyi Pasur ame hum Jeremia únyi hnyi utö adre ce at hnyin. Me Jeremia ame ha kâu, ka habe, Ame ca he Iehova ka ha hmetu iam me Pasur, ke jia bi a Magora-misabibi. 4 Anyin a walang hna ha hnö Iehova, ka habe. Wá bi, oge me he ka wiö u bi hnân ooti u bi me lawaem hia : ke adre me he ka ta ge hele vat anyin je iwahnaihmiöny mödra, ke ame he li emäkâm ka wá e : ke oge me he ka hna at Juda hia ka hnyi hnyamen than Babulona, ke ame he ka hum ödra Babulona ai, me hling' ödra ge hele vat. 5 Ke haba khaca oge me he ka hna tang omjeüny taun ang, me ta je troban gan, me ta je únyi ae únyi hnathu hnyin, eke, ta je omjeü anyin je than Juda hia, oge me he ka ham ka hnyi hnyamen ta je iwahnaihmiöny mödra, ke adre me he ka ka sei ödra, me hum ödra, me tha he mödra Babulona ai. 6 Ke haba u Pasur, me tavat hia adre me tha laba möu, öbun e he ka bâ : ke u me he ka o hnyi Babulona, me mokcu eling, me könim u eling, u me lahánâm hia, waleji u je perofeta thoi ködra.

7 Iehova lö, u je hia but cubic nya, me oge me hmehmela : u hwege huk, me ame tom : iny taben úhiö hnyi je bong hia, ame hlumö nya hnen ke at me ke at hnyi ta je bong hia. 8 Anyin a hnyi úen oge me fuc, oge me kuku ; oge me hongot, ka habe, Úokonguny me söh : anyin adre wia hofuc ho Iehova, me hnân haikongu nya, me úhiö hnyi je bong hia. 9 Ke oge me ha, ka habe, Oge me ca he ka háia e, me fuc hmetu hnyi ien, ke haba, e bi ú hnyi hnye-kuk helâ me meic ae möt, adre hlöng hnyi hnyin je jeiök, ke iny sényin dut anyin hokhnyok, ke pason. 10 Anyin a oge hia but löng hna úhaikonguny hnen tavat ae se hia, me hna öbubuny hnyi je ke keihen hia. Haingödrin a je hing waek, tavat adre me tuö hnök hna haühaü, ka habe, Haikongoá ju e, m' öhmun e he ka hnyi haikongoá ; ame ne he ka hnehmela m' ate me he ka hwege hon, m' ate me he ka

bi hwaban kâu. 11 Ke e bi Iehova unyik helâ me taben vat ae hwege : anyin a wale ame he ka haühaü but tavat adre me hnu nya, me ca tudra bi : adre me he ka hmehma gan hmâ, anyin a ca tudra bi, adre me ca he ka hnying anyidra hmehma nyiele balua. 12 Iehova tuhan sabaoth lö, at ame cubic tavat ae wisa at ame wâhmakhmeto je hna únyküme me je hnyok, e so oge me he ka wâ hnâm hna bi hwaban ködra ; anyin oge hia but omanená köu hok hofuc. 13 Khumöng dö kö Iehova, oganö Iehova thö : anyin a e ame hia but húginâ hanon at ae theduoc únyi hnyi hnyamen tavat ae kong.

14 Eka mok bong adre hnöku nya hnyin : e so adre me ca haisoâ bong a hnöku nya hnyin bai. 15 Eka mok at ama thumetu cica, ka habe, A o but nokom da, ame osenyiná e. 16 E so ame he at e ka helâ me je taun waleji a hagutâ Iehova, me ca ietra bi : ke so e ame löng hwakuku hnyi hnyomakatu, me hwahongot hnyi jebigö ; 17 anyin a e ame ca hlingö nya únyi eü hnyi hnyok : me me erkemok könya hnyeku bai me erkin bala thibut hnyekon. 18 Anyin a iéú oge me o but úhek hnyi hnyok he ka wá vec me hlöuhlöu, me me he ka um dö bonguk je bong hnyi hmehma ?

HNYIMAKAN 21.

WALANG hofuc ame o kö Jeremia únyi ga Iehova waleji hnyi hnö Zedekia than hna kunö Pasur nöku Malekia kâu, me Zefania nöku Maseia at bihut ame ha, ka habe, 2 Ö u hnei Iehova thö gatin ; anyin a Nebukaneza than Babulona ame vat mötin : ame ne he Iehova ka ányâ hobi kötin hoton anyin ta je huliwa hia hnân láia, me me he ka, he but gatin.

3 Me haba Jeremia ame ha ködrü, ka habe, Walang hofuc öbu me he ka ha kö Zedekia, ka habe, 4 Walang hna ha hnö Iehova Khongu Isaraela, ka habe, Wá bi, oge me he ka ohavâ je omjehen vat ae hnyi je hnyamöbun, waleji ge hnöbun hna vat me than Babulona, me at Kaledaia, tavat adre me igigili öbun hoton hna up veto, ke oge me he ka úkhacaköu ödra hnyi wanben taun ang. 5 Ke haba inya oge me he ka vat möbun ge hnyam adre hai me beny ae hwege, me hnyi hmönyin me wathethöt, me hmönyin ae gan hmâ. 6 Ke oge me he ka kot aten taun ang, wale a at me

meno : adre me he ka mok ge mok ae gan, wale mok cap. 7 Ke hwaban e, haingö Iehova, oge me he ka hnö Zedekia than Juda, me je athnyabainy, me tavat a je kolon hnyi taun ang ünyi hnyi mok ae cap, me hele vat, me hmiä, ka hnyi hnyamö Nebukaneza than Babulona, me hnyamen je iwahnaihmiöny mödra, me hnyamen tavat adre me eläm he ka hling' ödra : ke e ame he ka kuc ödra ge hele vat ; e ame ca he ka omeli ödra, me hnyok ködra, me betenge. 8 Ke u me he ka ha ka tavat ang, ka habe, Walang hna ha hnö Iehova, ka habe, Wá bi, inya oge me ip hnyi hnyim-aköbun gethen deny möt, me gethen deny mok. 9 Haba at ame he ka laba bala bi hnyi taun ang, ame he ka mok ge hele vat, me hmiä, me mok ae cap : ke haba at ama didrut, me kec ka at Kaledaia, tavat adre me igigilö öbun, me ame he ka möt, ame he ka jekhon anyin möt. 10 Anyin a inya oge bia but hnyimakök ka hnyi taun ang me me kong, ke ca hnän bi so, haingö Iehova : adre me he ka hna e ka hnyi hnyamen than Babulona, ke e ame he ka thong e ge meic.

11 Ke haba lap anyin than Juda, löng ju hofuc ho Iehova gan, ka habe, 12 Lap anyi Davita lö, walang hna ha hnö Iehova, ka habe, Änyä thö ünyi ae wisa hnyi hnyomakatu, ke omelö thö at adre söh ünyi hnyi hnyamen at üöveci, wá e nye gá but anyik hmönyin helâ me meic ame ubählä, ke ba at ama ume, can ükongon anyibun ta je huliwa. 13 Wá bi, ücük u, at ame laba hnyi hnyigöulen kicin dok ae tha hon, haingö Iehova, öbun tavat, öbun e ha, ka habe, le at ame he ka utut köta? ke ie at ame he ka dit ka hnyi je hnyabata? 14 Ke oge me he ka bi hwaban köbun, e ücü me wan anyibun ta je huliwa, haingö Iehova : ke oge me he ka hú meic hnyi je hnyeuten, ke e ame he ka an igigilö ehele.

HNYIMAKAN 22.

WALANG hna ha hnö Iehova, ka habe, He thö ka hnyi uma umen than Juda, me ha hofuc ang eling, ka habe, 2 Than Juda lö, löng ju hofuc ho Iehova, u at ame tabâ theron anyi Davita, u, me je athnyabaem, me lakem, tavat adre me dit hnyi je homagöüle ang. 3 Walang hna ha hnö Iehova, ka habe, Änyä thö wisa me ünyi ae ücü, ke omelö thö at adre söh ünyi hnyi hnyamen at üöveci : ca he ka änyä

monu, me ükonguny ka atkanyua, me nakahme, me safac, ke ca hingälâ dra ae ba hnyikongon hnyi dok ang. 4 Anyin a öbun e ne he ka änyä ünyi e, me ame he ka dit hnyi je homagöüleny uma ang je than tavat adre me tabâ theron anyi Davita, adre me laba hon je kariota me hors, e me je athnyabainy me je lakeiny. 5 Ke öbun e ne ca löng je hofuc ang, oge me khemanyin gak bi, haingö Iehova, a g' ame he ka ba wan uma eang. 6 Anyin a walang hna ha hnö Iehova ge uma umen than Juda, ka habe, U Gileada könya, ke ban Lebanona : ke so bi, e hnathu, a oge me he ka wiö u me hnän hnyebuba, je taun ae ba aten. 7 Ke oge me he ka penapena gam tavat ohia, ae ve hu ünyi hnän vat : ke adre me he ka sö but änyâm je arasi adre üca, me khüâ ka hnyi meic. 8 Ke ame he je hnyei ae se hia ka gethen hnyi taun ang me ve ühaköuâ, ha habe, Can iéü Iehova ame änyä heläng ka taun ang ae gan? 9 Ke adre me he ka thu, ka habe, Can hnödra hna degec ühibinyköu anyi Iehova Khongudrin, me khudrung ka ke je khong, me bi athnyabaidrin.

10 Ca tenge bi can at a mokcu, ke ca mâng bi gan : ke tenge hwege bi thö ge at ame he ; anyin a e ame ca he ka hmetu, me wâ hnyei adre hnokoâ e hnyin. 11 Anyin a walang hna ha hnö Iehova ga Saluma nöku Josea than Juda, at ame hwö hwabö Josea a kamen, at ame he but ünyi hnyi dok ang, ka habe, E ame ca he ka hmetu kâang ; 12 ke e ame he ka mokcu hnyi dok adre hom bá e ka hnyin, ke ame ca he hmetu bi ka wâ hnyei ang.

13 Ekölö gan at ame op umen uma hnyi hwakecin ae ca wisa, me je hnyeuleny hnyi hwakecin ae ca ücü : at ame kap huliwa ge tavat me ca bi hwaban bi, ke ame ca ham kâu troban ; 14 at ame ha, ka habe, oge me he ka op umök uma ae lau, ke bwang je hnyeule, ke e ame kave anyin je mamalama ; ke adre me tube ethö hnyin ge arasi, me botro ge botru ae dra. 15 Hawa, u me he ka musu, anyin a u me bebeönua hnyi arasi? hawa, a ca han kâmâm, me ic, me änyä wisa, me ünyi ae ücü? me e ame so but. 16 E ame owisa ivinö anyin at ae theduoc me at ae vec ; me ame so but e. Hawa, ame ca wâhmak-hmetu nya e? haingö Iehova. 17 Ke haba li emâkâm me hnyekom hobi kâu hnâm hna behnyekon, me he ka hingälâ dra ae ba hnyikongon, me hobi kâu hna okongâo,

me úkonguny, me me ányá thö. 18 Anyin a wale, walang hna ha hnö Iehova ga Jehoiakima nöku Josea, than Juda, ka habe, Adre me ca he ka tenga gan me ha, ka habe, Ekölö ge keik! Ke ekölö ge hanik! ke ekölö ge anyin hmanenang! 19 Adre me he ka konâm e helâ me hna konâm asina, adre me he ka lelö e me khúa hnyi hoton je homagöuleny Jerusalema.

20 Ölö thö Lebanona ai me hongot; ke hongot dö göranyai hnyi Basana: me hongot hnyi Abarima; anyin adre hia but ohia je oúnykúmâm. 21 Oge fuc köu hnyi ányâm sot, me u me ha, ka habe, Oge me ca he ka löng. Wale hwakecâm k' u tiga úhnyúkong, ke u je ca löng ifucik. 22 Adre me he ka hân tavat adre me tuö halem ta je mamoe ge ang, ke ame he je oúnykúmâm ka bá; me u me he ka hnehma me hlohlo can ányâm ta je monu hia thithö. 23 At ame laba hnyi Lebanona lö, at ame bi umen uma hnyi je arasi, nakaem, e ka o vec köu, wale vec helâ me momo ame vec hnyekon e ka he ka hnokoâ. 24 Kia inya haingö Iehova, eja ke ne a ne hnân okeceâ haten hnyi hnyam a metök könya jia Konia nöku Jehoiakima than Juda, oge me he ka oc degeci u e; 25 me oge me he ka bnö u ka hnyi hnyamen tavat adre me elâm he ka hlingö u, me ka hnyi hnyamen tavat waleji u me ouden, wale ka hnyi hnyamö Nebukaneza than Babulona, me ka hnyi hnyamen at Kaledaia. 26 Ke oge me he ka obö u me hinyâm at a hnöku u ka hnyi ke hnyei bi, waleji adre ca hnöku öbun hnyin; ke öbun e he ka mok eling. 27 Ke haba hnyei waleji adre me weny he ka hmetu ka hnyin, adre me ca he ka hmetu ka hnyin. 28 Hawa, kaia kânâ ae hmöuca adre me hûkötiâ at ang, wale a Konia? hawa, e kaia a ca hnân senyiná? anyin a ieu adre digic ödra, e me je mátrániny, ke adre ob' ödra ka hnyi hnyei ae ca khan' ödra bi? 29 Hmeledrany, hmeledrany, hmeledrany lö, löng ju hofuc ho Iehova. 30 Walang hna ha hnö Iehova, ka habe, Sihnalimen ju at aug a g' ame he ka ba nokon, ke ame ca he ka so bongon je bong: anyin ame ca he ka hnahic ke mátrániny, at ame he ka tabâ theron anyi Davita, me musi hmetu hnyi Juda.

HNHYIMAKAN 23.

EKÖLÖ ge tavat tuö mamoe, tavat adre me ohia me oveseâ je mamoe

oge me hat! haingö Iehova. 2 Anyin a wale walang hna ha hnö Iehova Khongu Isaraela ge tavat tuö mamoe tavat adre me tuö lakeik, ka habe, Öbun e hia but oveseâ halek je mamoe, me ob' ödra, me ca sen' ödra; wâ bi, oge me he ka bi hwaban úkongon anyibun ta je huliwa, haingö Iehova. 3 Ke oge me he ka hawâ kolon halek ta je mamoe únyi hnyi ta je hnyei hia waleji oge ob' ödra ka hnyin, me ohmetu ödra ka hnyi hnyeuledra; ke adre me he ka hnokoâ sehia me ti sehia. 4 Ke oge me he ka otilâ hudrin tavat tuö mamoe, he ka ha ö'dra: ke adre me ca he hmetu ka ot, me hlohlo, me hia, haingö Iehova.

5 Wâ bi, ame he ka o je bong, haingö Iehova, ke oge me he ka oâ kö Davita Khüen ae wisa, ke e ame he ka than me musi me so, me ányá únyi ae wisa me únyi ae úcü hnyi hnyei. 6 Hnyi bonginy je bong, ame he ka möt Juda, k' ame he Isaraela ka laba khotkic: ke walang ien adre me he ka hawâ, ka habe, Iehova wisaita. 7 Anyin a wale, wâ bi, ame he ka o je bong, haingö Iehova ke adre me ca he hmetu bi ka ha, ka habe, Kia inya Iehova at ame hom lakon Isaraela únyi hnyi hnyei Aigupito; 8 ke so bi, Kia inya Iehova at ame su je mátrániny lap anyi Isaraela únyi hnyi hnyei hnyi hwadrö, me únyi hnyi je hnyei waleji oge ob' dra ka hnyin: me adre me he ka labâ idra bi.

9 Ge ta je perofeta. Ame vec eú hnye-kuk me öbubuny hia je jeiök, oge me helâ me at ame monu ge grák, me helâ me at ame ngâ ge waina; can ga Iehova me hwan hofuc ae kap. 10 Anyin a unöngötö hnyei ge tavat bi únyi monu; anyin ame tenge hnyei can hna hángâ: e atgec dö je dok a je sajilat hnyi hnyebuba: ke kong dedra je gethen, ke ca wisa tang hwegiödra. 11 Anyin ame bi gan je perofeta me tavat bihut, eke, oge hia but wâ anyidra hulö hnyi umök uma, haingö Iehova. 12 Anyin a wale ame he dedra je gethen ka helâ me dok ae haúhaú hnyi menekholom ködra, adre me he ka alin ödra m' adre me ta hnyin: anyin oge me he ka oâ ködra únyi ae kong, wale hunainy bi hwaban ködra, haingö Iehova. 13 Ke oge hia but wâ hwen monu unyin je perofetainy Samaria: adre me perofeta me haiö Baala, me omonoâ lakeik a at Isaraela. 14 Ke oge hia but wâ únyi ae ikiki unyin je perofeta hnyi Jerusalema; adre me bi únyi monu me vheno thoi, ke adre me ohwegiâ je hnyamen

tavat ae kong, me me ca ve ödra hmetu hnyi anyidra hulö: ödra hia thithö adre me helä me at Sodoma könya, ke haba tavat adre me labä e, ödra helä me Gomora.

15 Anyin a wale, walang hna ha hnö Iehova tuhan sabaoth ge je perofeta, ka habe, Wä bi, oge me he ka ha ö'dra ge khöhlöng me habelidra ge köiö hnän mekiny: anyin ame o but bi gan ka hnyi hnyeï hia únyi ge je perofeta hnyi Jerusalema. 16 Walang hna ha hnö Iehova tuhan sabaoth, ka habe, Ca löng ta je hofuc hwan ta je perofeta adre me perofeta köbun; adre me ünö köbun ta je únyi baü bi; adre me ha hna omanená únyi eü hnyi hnyekudra bi, ke ca únyi bi hnyi hnyimö Iehova. 17 Adre me ha bala bi ka tavat adre me hükötio nya, ka habe, Iehova ame ha, ka habe, Öbun e he ka hnahic: ke adre me ha ködra hia thithö tavat adre me hnu hoton hwegien je hnyekudra bi, ka habe, E ba hulö ame he ka o köbun. 18 Anyin a ie at a mwi hnyi úhnenamö anyi Iehova me me khana me löng hwan hofuc? ie at ame hia but tevehlöng me löng hnök hna ha? 19 Wä bi, ame o but weneü anyi Iehova, wale anyin hmönyin, eke, weneü ame khenyö: e ame he hwége hon ban tavat ae kong. 20 Ame ca he ka hmetu hmönyin anyi Iehova, ke ne o but e ame hia but únyä, ke ne o but e ame ohwädä je únykümenen hnyekon: öbun e he ka ti wämhakhmeto e hnyi je bong a biliny. 21 Oge ca kunä je perofeta e, ke so bi, adre me wadring: oge ca fuc ködra, ke so bi, adre me perofeta. 22 Ke so bi adre ne hia but mwi hnyi anyik úhnenamö, awe, adre me he ka olöngä lakeik ge hok ta je hofuc, me ohmetu ödra únyi hnyi dedra je gethen ae kong, me úkonginy anyidra ta je huliwa. 23 Hawa, inya ang Khong hnyi dok ae hakekeny, haingö Iehova, ke ca Khong hnyi dok ae säkäü? 24 E hu at ama ikhölö hnyi dok ae iyong ke oge me ca he ka wä? haingö Iehova. Hawa, e ca unöngöt drany me hmeledrany gak? haingö Iehova. 25 Oge hia but löng waleji ge hna ha hnen ta je perofeta, tavat adre me perofeta thoi hnyi iök me ha, ka habe, Oge hia but bwo, oge hia but bwo. 26 Ame he ka e bi ke ne o but kehö eü hnyi hnyekon ta je perofeta tavat adre me perofeta thoi: wale tavat adre me perofeta iyawöä je hnyekudra? 27 Tavat adre me únyküme he ka ohnyingä lakeik wale ge iök hnen je bwidra, wale adre me ve ha ka

lahanödra, heläji me hnen lakamödra hna hnying iök ga Baala. 28 Haba perofeta ae hu bwi, me hamen bi he ka ha bwi; ke haba at ae hu gan hok hofuc, hamen he ka ha hnathöä hok hofuc. Hawa, e úcü thatúnyin hwit me je wan? haingö Iehova. 29 Hawa, e úcü hok hofuc me meic? haingö Iehova, ke helä me hama at ame kot omomono kic?

30 Anyin a wale, wä bi, úcü ta je perofeta, haingö Iehova, tavat adre me ivenäuköüä hok ta je hofuc. 31 Wä bi, úcü ta je perofeta, haingö Iehova, tavat adre me fuc ge bohmödra me ha, ka habe, E ame ha. 32 Wä bi, úcü ta je perofeta tavat adre me bwi thoi, haingö Iehova, wale tavat adre me ha bi me omono lakeik hnen anyidra ta je thoi, me hwakecidra ae hop: ke oge me ca kun' ödra me húna ködra; ke ame he ka ba troban ka hnyeï ang únyi gadra, haingö Iehova. 33 Ke e ka he ka hnei u hnen tavat ang, ame ne perofeta, ame ne at bihut me ha, ka habe, Ieü hok únyi ga Iehova? me u me he ka thu ködra, ka habe, Ie hok? Oge me he ka hna degeci öbun, haingö Iehova. 34 Ke haba perofeta, me at bihut, a tavat adre me he ka ha, ka habe, Walang hok únyi ga Iehova, awe, oge me he ka bi hwaban ka at eling me anyin lap. 35 Walang únyi öbun e he bi ka úhaköüä, a ke at me ke at, ka habe, Ieü hna thu hnö Iehova? ke ieü hna ha hnö Iehova. 36 Ke ca he hmetu öbun ka ha hok únyi ga Iehova: anyin a haba ve ifucin tavat wale honödra bi je hok; anyin a öbun e hia but ohavä hofuc hwan Khong ae möt, Iehova tuhan sabaoth Khonguta. 37 U me he ka ha heläng ka je perofeta, Ra habe, Ieü hna thu hnö Iehova köu? ke ieü hnen hna ha? 38 Ke öbun e ha, ka habe, Hok únyi ga Iehova; awe, walang hna ha hnö Iehova, ka habe, Can hnöbun hna ha hofuc ang, ka habe, Hok únyi ga Iehova, ke so bi, oge úkhünöng köbun m' öbun e ca he ka ha, ka habe, Hok únyi ga Iehova: 39 anyin a wale oge me he ka ti hnying öbun, ke oge me he ka obä degeci öbun únyik, öbun, me taun, waleji oge hain köbun me lakamöbun: 40 ke oge me he ka wi' öbun hnän haikongoä nyiele balua, me hnän hmehma nyiele balua, a ca hnän he ka hnying.

HNYIMAKAN 24.

HABA Iehova ame omanená kõnya, ke wá bi, li tang meta adre ip hnyi hnyimakan uma umö Iehova : hnyi üen Nebukaneza than Babulona ame hia but hum Jekonia nõku Jehoiakima than Juda, me je taben hnyi Juda, me tavat huliwa me tavat leú fao, úhedra Jerusalema, me hum ödra Babulona ai. 2 Haba ke tang meta, me, ti so helá me je wan meta a bân : ke haba ke tang meta, me kong, ke ca hnân han, anyin ae kong. 3 Haba Iehova ame ha kõnya, ka habe, Jeremia lö, ietü u je wá? ke haingök, ka habe, Je wan meta : haba je wan meta ae so, me e ka ti so, ke haba je wan ae kong, me e ka ti kong, ke ca hnân han anyin ae kong. 4 Me ame o but kõnya hofuc ho Iehova, ka habe, 5 Walang hna ha hnö Iehova Khongu Isaraela, ka habe, Oge me he ka wáhmakhmeto je bâ anyin at Juda, waleji oge kun' ödra úhedra ang ka hnyi hnyei Kaledaia, m' adre me so, helá me je wan meta eang ae so. 6 Ke oge me he ka wá hm' ödra, m' adre me so, ke oge me he ka ohmetu ödra ka hnyi hnyei ang : ke oge me he ka up ödra göranyai, ke adre me ca he ka hagut ödra ; ke oge me he ka te ödra, me ca he ka oc. 7 Ke oge me he ka ham ködra hnyok he ka wáhmakhmetu nya, a inya Iehova : ke adre me he ka bi lakeik, ke oge me he ka Khongudrin, anyin adre me he ka hmetu kõnya ge hnyok ae bekhöt. 8 Ke haba je wan meta ae kong, ke ca hnân han anyin ae kong : E hnathu, haingö Iehova, oge me he ka hnö Zedekia than Juda heläc, me anyin je taben, me je kolón hnyi Jerusalema, je kolon tavat aten hnyei ang me tavat adre me laba hnyi Aigupito : 9 ke oge me he ka hn' ödra m' adre me he ka lili ödra monu ödra hnen ta je dökhu hia eang hmeledrany ; m' adre me he ka hnân haikongoá, me taben úhiö me hlumä, me hangá hnyi ta je dok hia thithö oge me he ka ob' ödra ka hnyin. 10 Ke oge me he ka kuná ködra hele vat, me hmiá, me mok ae cap, ke ne o but adre me oaú' ödra únyi hnyi hnyei oge ham ködra me lakamödra.

HNYIMAKAN 25.

HOFUC ame o kö Jeremia ge tavat Juda hia hnyi huna a vaki Jehoiakima nõku Josea, than Juda ; wale huna a báni

Nebukaneaz than Babulona ; 2 waleji hofuc a ha Jeremia perofeta ka tavat hia hnyi Juda, me tavat hia adre me laba hnyi Jerusalema, ka habe, 3 Hwân hnyi huna a thötini Josea nõku Amona than Juda, ke ne o but hnyi bong ang, wale hnyi huna a twente theri, ame o but kõnya hofuc ho Iehova, me oge hia but ha köbun, me labö vesá kong me ha, ke öbun e ca löng bi öbun. 4 Ke a hia but Iehova kuná köbun je perofeta hia a je athnyabainy, ame vesá kong me úkhünöng : ke öbun e ca hia but löng, me ca tá je hnyikönyöbun he ka löng ; 5 Haingödra, ka habe, Ve hmetu ju öbun únyi hnyi debun ta je gethen ae kong, me úkonginy anyibun ta je huliwa, me öbun e he ka labá hnyei a ham köbun Iehova, me lakamöbun káu ehac, ke ne o but nyiele balua : 6 ke ca hnu hoton ke je khong he ka bi athnyaba ködrin, me khudrung ködrin, ke ca he bi ka ohmönyini nya ge ta je huliwa anyin je hnyamöbun ; ke oge me ca he ka okongu öbun. 7 Ke so bi, öbun e ca hia but ling nya, haingö Iehova ; me öbun e he ka ohmönyini nya ge ta je huliwa anyin je hnyamöbun me öbun e he ka kong. 8 Anyin a wale, walang hna ha hnö Iehova tuhar sabaoth, ka habe, Anyin a öbun e ca löng hok ta je hofuc. 9 Wá bi, oge me he ka kuná me hom je lap hia hnyi hwadrö, haingö Iehova, me Nebukaneza than Babulona athnyabaik, me oi ödra úcúdrin hnyei ang, me tavat adre me laba hnyin, me ta je hnyei hia igigilö e ; ke oge me he ka ti ohí' ödra, me wi' ödra hnân kuko me ju, me ba wan nyiele balua. 10 Ke oge me he ka ohia gadra hwan senyin me hwan hobá, me ifucin li at ödre tep faipoipo, me mainy li veto hnân omomono, me melaminy lamepa. 11 Ke ame he ka ba wan hnyei ang hia, me hnân láia, ke ame he ta je hnyei eling ka bi athnyabainy than Babulona hnyi sevente ta je huna. 12 Ke e ka bekhötö ta je huna a sevente, me oge me he ka bi hwaban ka than Babulona ke tavat eling can hwakecidra ae kong, haingö Iehova, ke hnyei Kaledaia : ke oge me he ka wia e me me ba wan nyiele balua. 13 Ke oge me he ka oá ka hnyei eling ta je hofuc hia oge hia but ha gan, wale hna sihnalimen hia hnyi tusi ang, waleji hnö Jeremia perofeta ge ta je hnyei hia. 14 Anyin ame he je hnyei ae se hia me je than ka thalu' ödra, ke oge me he ka bi hwaban ködra helá me hwakecidra, me helá me hna ányá hnen je hnyamödra.

15 Anyin a walang hna ha hnö Iehova Khongu Isaraela kõnya, ka habe, Hom dö tap wainainy hmönyin ang únyi hnyi hnyamök, me habelen je hnyei hia waleji oge me he ka kunö u ka hnyin. 16 Ke adre me he ka ic me ta tot, me ti hmönyin, can hele vat oge me he ka kunâ ködra. 17 Me oge me hom kaia únyi hnyi hnyamö Iehova, me habelen je hnyei hia waleji ame kunö nya Iehova ka hnyin : 18 wale Jerusalema me je tauniny Juda, me je thaniny, me je taben, m' adre me wi' ödra he ka ba wan, me hnân kuko me jû, me hangâ helâ me hnyi bong ang ; 19 kö Farao than Aigupito, me lathnyabainy, me anyin je taben, me je lakeiny hia ; 20 me ke je tavat bi ae ve bongon hia, me ta je than hia thithö hnyei Uza, me ta je than hia thithö hnyi hnyei Filisiti, me Asekelona, me Gaza, me Ekerona, me je kolon hnyi Asedoda ; 21 me Edoma, me Moaba, me je laku Amona ; 22 me ta je thaniny hia Turo, me ta je thaniny hia Sidona, me je thaniny bomene hnyi ke keihen hoton köiö ; 23 me Dedana me Tema, me Buza, me ödra hia thithö tavat adre me giâ ke keihen leünödra ; 24 me je thaniny hia Arabia, me ta je thaniny hia ke je hnyat ae ve bongon bi adre me laba hnyi hnyebuba ; 25 me ta je thaniny hia Zimeri, me ta je thaniny hia Elama, me ta je thaniny hia Madai ; 26 me ta je than hia hnyi hwadrö, tavat ae hakeny me sâkât, ke at me ke at, me ta je dökhuiiny hia hmeledrany hnyi hon kânâ : ke ame he than Sesaka ka ic hnyi hwabödra. 27 Ke u me he ka ha ködra, ka habe, Walang hna ha hnö Iehova tuhan sabaath, Khongu Isaraela, ka habe, Ijem d' öbun, ke monu thö, me hmita but, me ta ju, ke ca tot hmetu bi, can hele vat oge me he ka kunâ köbun. 28 Ke adre ne höcö hom kaia únyi hnyi hnyamâm ke ic, u me he ka ha ködra, ka habe, Walang hna ha hnö Iehova tuhan sabaath, ka habe, E hnathu öbun e he ka ijem. 29 Anyin a wâ bi, inya oge me hwân he ka oatâ únyi ae kong ka taun wale adre wenyö kâu iök, ke hawa, adre me ca he minya ka bi hwaban köbun? Öbun e ca he ka he baú : anyin oge me he ka hawâ hele vat hobi kâu tavat hia thithö adre me laba eang hmeledrany, haingö Iehova tuhan sabaath. 30 Anyin a wale, u me he ka perofeta ködra ta je hofuc ang hia me ha ködra, ka habe, Ame he Iehova ka kuku ethö, me fuc göranyai únyi hnyi hnyaban ae kap ;

e ame he ka kuku úcon haleny haginny hnahat ; e ame he ka kuku úcon aten hmeledrany hia helâ me tavat adre me ututo wan vine. 31 Ame he ka o mede ke ne o but hnyi can hmeledrany : anyin ae hu ivinö anyi Iehova me ta je hnyei, e ame he ka úhnei me tavat hia : ke haba tavat ae kong, e ame he ka hn' ödra ka hnyi hele vat, haingö Iehova.

32 Walang hna ha hnö Iehova tuhan sabaath, ka habe, Wâ bi, ame he ka he úkonguny únyi hnyi ke hnyei ka hnyi ke hnyei, ke ame he ka o weneú ae gan únyi hnyi can hmeledrany. 33 Ke haba hnyi bong eling ame he ka e bi ta je hani Iehova ka e hnyi ke can hmeledrany ke ne o but ka hnyi ke can hmeledrany : adre me ca he ka tenge gadra, me hlu ödra, me konâm ; ke adre me he ka hnân tatet hon kânâ. 34 Kuku tenge thö, öbun tavat tuö mamoe ; ke tenge thö me seset hnyi kânâ öbun je homakan hnahat mamoe, anyin a hwâdâ thö je bong hnân he ka hling' öbun, ke oge me he ka tha camem' öbun, ke öbun e he ka kölu helâ me kaia ae so. 35 Ke ame he ka ba gethen deny tavat tuö mamoe he ka kec hnyin, me hnân homakan hnahat mamoe he ka möt hnyin. 36 E hu hwatenge ge tavat tuö mamoe, me kuku tenge ge homakan hnahat! anyin a hia but Iehova okongoâ hnödra hna han hnyin. 37 Ke adre ohnyibö je haginny mamoe ae hnahic ge hmönyin anyi Iehova. 38 A hia but hna degecâ umen uma helâ me liona : anyin adre hia but wia idra hnyei me hnân lâiâ hnen hwegien at úöveci, me hnen anyin hmönyin ae hwege.

HNYIMAKAN 26.

HABA hnyi hwân musi a Jehoiakima nöku Josea than Juda, ame o but hofuc ang únyi ga Iehova, ka habe, 2 Walang hna ha hnö Iehova, ka habe, He thö ka tot hnyi hnyeuleny uma umö Iehova, me ha ka ta je tauniny Juda hia, tavat adre me o he ka hnyi khudrung hnyi uma umö Iehova, ta je hofuc hia thithö wale oge húna he ka ha ködra ; ca ikhâlâ bi ke hofuc. 3 Adre me ne he ka löng, me ve hmetu únyi hnyi dedra ta je gethen ae kong : me oge me he ka ietra únyi ae kong waleji oge únykúme he ka ányâ ködra can úkongon anyidra ta je huliwa. 4 Ke u me he ka ha ködra, ka habe, Walang hna ha hnö Iehova, ka habe, Öbun e ne ca ling

nya he ka vheno anyik hnanyibu, waleji oge ip hnyi hnyimaköbun, 5 me löng ta je hofuc hwan lathnyabaik a je perofeta, waleji oge kunâ köbun, me vesâ kong me kun' ödra, ke öbun e ca löng bi ; 6 awe, oge me he ka wia uma eang me me helâ me Silo, ke oge me he ka wia taun ang hnân hangâ hnen je hnyi hia eang hmelen. 7 Ke haba tavat bihut, me je perofeta, me tavat hia adre me ling Jeremia ame ha ta je hofuc eling hnyi uma umö Iehova. 8 Ke a hia but Jeremia ha hia hna hûna kâu hnö Iehova he ka ha ka tavat hia, me ame kât e hnen tavat bihut, me ta je perofeta, me tavat hia me ha, ka habe, U me he but ka mok. 9 Anyin a ieu, u je perofeta hnyi iö Iehova me ha, ka habe, Ame he Uma kap eang ka helâ me Silo, ke ame he ka hnyot taun ang, ke ama ba at ame he ka labâ e? Ke ame ûkhacaköu tavat hia kö Jeremia hnyi uma umö Iehova.

10 Ke a löng ut ta je hofuc eling hneu je taben hnyi Juda, me ödrin e he übedrin hnyi uma umen than ka hnyi uma umö Iehova, ke ödrin e laba hnyi homagöule ae teb únyi gethen ame he ka hnyi uma umö Iehova. 11 Me haba tavat bihut, me je perofeta, adre me ha ka je taben me tavat hia, ka habe, E úcú but at ang he ka mok, anyin a e ame perofeta úcon taun ang, helâ me hna löng hnen je hnyikönyöbun. 12 Me Jeremia ame ha ka ta je taben hia, me tavat hia, ka habe, Iehova ame kunö nya he ka perofeta únyi ae kong ka uma eang me taun eang a ta je hofuc waleji öbun e löng. 13 Ke walang ang ányâwia thö debun je gethen, me je hwakecibun, ke löng ju ifuci Iehova Khongubun; me he Iehova ka ietra únyi ae kong waleji e ame ha gabun. 14 Ke haba inya, wâ bi, inya but hnyi hnyamöbun : ányâ thö könya helâ me únyi ae so me úcú könya. 15 Ke so bi, wâhmakhmeto ju öbun, öbun e ne he ka hlingö nya, öbun e he ka ohwâdá dra ae ba hnyikongon hubun, me hon taun ang. me tavat adre me labâ e : anyin ae hnathu Iehova ame kunö nya köbun he ka ha ka hnyi je hnyikönyöbun ta je hofuc ang. 16 Me ame ha hnen je taben me tavat hia ka tavat bihut me ta je perofeta, ka habe, E ca úcú bi at ang he ka mok, anyin a e ame fuc köta hnyi iö Iehova Khonguta. 17 Me ame tot ke je hingatiny hnyi me ha ka tavat hia adre me ûkhacaköu, ka habe, 18 Haba Mika at Moresa ame perofeta

hnyi bongongu Hezekia than Juda : ke e ame ha ka tavat hia, ka habe, Walang hna ha hnö Iehova tuhan sabaoth, ka habe, Adre me he ka seú Ziona helâ me utkânâ, ke adre me he ka wia Jerusalema me me hna digic thatúnyi, me buceniny uma ka helâ me je dok ae görany hnyi hnyot. 19 Hawa ga Hezekia than Juda me at Juda hia, adre me hlingâ e? hawa, e ame ca outö Iehova, me khöu kö Iehova, ke haba Iehova ame ietra hulö waleji e ame ha gadra? Ate me ne ányâ hulö ae gan hmâ köta bi. 20 Ke hu minya ke at ame perofeta hnyi iö Iehova jia Uria nöku Semaia at Kiriatha-jarim, ke e ame perofeta únyi ae kong hon taun ang me hnyi ang, helâ me ta je hofuc ho Jeremia : 21 Ke haba Jehoiakima than, me anyin tavat hia ae hwege, me anyin je taben hia, adre me löng hwan, haba than ame elâm he ka hlingâ e ; ke e khanö Uria but, me e ame ot, me kec, me he Aigupito ai : 22 ke haba Jeboiakima than ame ûkhünöng Aigupito ai, jia Elemathana nöku Akebora, me keihen a tha ödra më Aigupito ai : 23 ke adre me hum Uria úbeny Aigupito me hom e kö Jehoiakima than, me e ame hlingâ e ge hele vat me khüâ unyin ka hnyi ermekom anyin houmonu. 24 Ke so bi, haba Ahikama nöku Sefana ame hadruo Jeremia, m' adre me ca hna e ka tavat he ka hlingâ.

HNYIMAKAN 27.

HABA hnyi hna hwân musi a Jehoiakima nöku Josea, than Juda, ame o but hofuc ang únyi ga Iehova kö Jeremia, ka habe, 2 Walang hna ha könya hnö Iehova, ka habe, Ányâ thö hobi köu je tö. me je hna úhúkálákouâ, me ip hon nyem : 3 ke kunâ thö ta je únyi e ka than Edoma, me than Moaba, me thaniny je laku Amona, me thaniny Turo, me thaniny Zidona, a deny je úthumetu tavat adre me o hnyi Jerusalema kö Zedekia than Juda ; 4 ke hûna thö ka je tuhödra, ka habe, Walang hna ha hnö Iehova tuhan sabaoth Khongu Isaraela, ka habe : Walang hofuc öbun e he ka ha ka ta je tuhöbun ; 5 ka habe, Oge hia but op hmeledrany, wale at me meno hon hmeledrany hnen manik man ae gan hmâ me benyik ae lau ; ke oge me ham e ka at ae úcú könya. 6 Ke walang ang oge hia but ham je hnyi ang kö Nebukaneza than Babulona, athnyabaik ;

ke haba khaca oge hia but ham kâu je menoiny hnyot hnân bi athnyabainy. 7 Ke ame he je hnyei hia thithö ka bi athnyabainy, me lakon, me laöbiny, ke ne o but ame o but ün iny hnyei bi : ke ame he bi je hnyei ae se hia, me je than ae gan ka thaluâ e. 8 Ke haba hnyei me dökhu ame ca bi athnyabai Nebukaneza eling than Babulona me ca hna je nyidra ka hnyi hna ûhûkâlâkôuâ anyin than Babulona, me oge me he ka kot hnyei eling, haingö Iehova, ge hele vat, me hmiâ, me mok ae cap, ke ne o but oge hia but oau' ödra a deny hnyamen. 9 Ke haba öbun ca löng bi ka anyibur je perofeta, me anyibun tavat bi khong, me anyibun tavat bwi, me anyibun tavat bibihwakecin, me anyibun tavat tren khong, tavat adre me fuc köbun me ha, ka habe, Ca he öbun ka bi athnyabainy than Babulona : 10 anyin adre me perofeta thoi köbun, m' adre me he ka öüsâkâû' öbun me ibun hnyei ; me oge me he ka ob' öbun me öbun e he ka mok. 11 Ke haba hnyei tavat adre me hna je nyidra ka hnyi hna ûhûkâlâkôuâ anyin than Babulona, me bi athnyabainy, me oge me he ka ip tavat eling ka laba bi hnyi idra, haingö Iehova ; ke adre me he ka belökâ me labâ e.

12 Me oge me ha kö Zedekia than Juda helâ me ta je hofuc hia eling, ka habe, Hna but je uyibun ka hnyi hna ûhûkâlâkôuâ anyin than Babulona, me bi athnyabainy, me iny hnyei me öbun e mot. 13 Anyin a ieu öbun e he ka mok, u me lakem ge hele vat, me hmiâ, me mok ae cap, helâji me hna ha ga Iehova ka hnyei ame höcö bi athnyabainy than Babulona ? 14 Ke ca löng bi hofuc hwan je perofeta, tavat adre me fuc köbun me ha, ka habe, Öbun e ca he ka bi athnyabainy than Babulona : anyin a ödra adre me perofeta thoi köbun. 15 Anyin oge ca kun' ödra, haingö Iehova, ke adre me perofeta thoi hnyi iök ; waling me inye he ka ob' öbun, m' öbun e he ka mok, öbun me je perofeta tavat adre me perofeta köbun. 16 Ke oge me fuc minya ka tavat bihut, me tavat hia eang, ka habe, Walang hna ha hnö Iehova, ka habe, Ca löng bi je hofuc hwan anyibun je perofeta, tavat adre me perofeta köbun me ha, ka habe, Wâ bi, adre me he ka ie hom hmetu je kaiainy uma umö Iehova úheny Babulona : anyin a ödra adre me perofeta thoi köbun. 17 Ca ling ödra bi ; bi athnyaba thö ka than Babulona me

öbun e möt : anyin a ieu ame he ka ba wan taun ang? 18 Ke adre ne je perofeta, ke a ne e bi unyidra hofuc ho Iehova, e so adre me he walang ang ka khöü kö Iehova tuhan sabaoth, m' adre me ca hom Babulona ai ta je kaia a kolon biju a e biju hnyi uma umö Iehova, me hnyi uma umen than Juda me Jerusalema. 19 Anyin a walang hna ha hnö Iehova tuhan sabaoth ge li hmolom, me taben köiö ae gan, me je taben, me je kolon ta je únyi a hnen biju hnyi taun ang, 20 waleji a ca hom Nebukaneza than Babulona waleji hnyi hnen hna hum Jekonia nöku Jehoiakima than Juda úheny Jerusalema Babulona ai, me je taben hia hnyi Juda me Jerusalema : 21 eke, walang hna ha hnö Iehova tuhan sabaoth Khongu Isaraela ge ta je únyi a hnen biju hnyi uma umö Iehova me uma umen than Juda me Jerusalema, ka habe, 22 adre me he ka hom ta je únyi e Babulona ai, ke ame he ka hnen ling ke ne o but hnyi bong oge me he ka sen' ödra hnyin, haingö Iehova ; me oge me he ka hom ta je únyi e me ohmeto ka hnyi dok ang.

HNyimakan 28.

KE haba hnyi huna eling, hnyi hwân- iny musi a Zedekia than Juda, hnyi huna a vakiny, hnyi tehi a thabúnginy, me ame fuc könya Hanania nöku Azura perofeta at úheny Gibeona, hnyi uma umö Iehova hnyi hnyimakan tavat bihut me tavat hia, ka habe, 2 Walang hna ha hnö Iehova tuhan sabaoth, Khongu Isaraela, ka habe, Oge hia but thamua hna ûhûkâlâkôuâ anyin than Babulona. 3 E ka tiga ca um bi li huna oge me he ka ohmeto ka hnyi dok ang ta je omjehen hia uma umö Iehova, waleji hnö Nebukaneza than Babulona hna hom úheny ang, me hom Babulona ai : 4 ke oge me he ka ohmetu Jekonia nöku Jehoiakima, than Juda ka hnyi dok ang, me ta je bâ hia anyin at Juda, tavat adre me he Babulona ai, haingö Iehova : anyin oge me he ka thamua hna ûhûkâlâkôuâ anyin than Babulona. 5 Me haba Jeremia perofeta ame ha kö Hanania perofeta hnyi hnyimakan tavat bihut, me tavat hia adre me ütitilen hnyi uma umö Iehova, 6 haingö Jeremia perofeta, ka habe, Amen : e na ânyâ helâ ju e Iehova : e na ohwâdâ ju Iehova hwan hofuc, waleji u je perofeta, he ka ohmeto ka hnyi dok ang ta je omje-

hen uma umö Iehova, me ta je bâ hia úheny Babulona. 7 Ke so bi, walang ang löng ju hofuc ang wale oge me he ka ha ka hnyi li hnyikönyâm, me li hnyikönyen tavat hia, ka habe, 8 Haba je perofeta a bödra ehac, ke a bilik bi möu, adre me perofeta ge ta je hnyei ae se hia, me ta je dökhü ae gan, he ka vat, me monu, me mok ae cap. 9 Haba perofeta at ame perofeta hnahic, ke e ka hwädâ thö hofuc hwan perofota eling, adre me he ka wâhmakhmeto perofeta e a ga kunâ Iehova. 10 Me haba perofeta Hanania ame hom hna úhúkâ-lâkôuâ únyi hnyi hon nyi Jeremia perofeta me thamua e. 11 Ke haba Hanania ame ha hnyi hnyimakan tavat hia, ka habe, Walang hna ha hnö Iehova, ka habe, Helâe oge me he ka thamua hna úhúkâ-lâkôuâ anyi Nebukaneza than Babulona únyi hnyi hon nyin ta je hnyei hia, ke tiga ca um bi li huna. Ke haba Jeremia perofeta ame he but. 12 Me ame o but hofuc ho Iehova kö Jeremia, hwaban hnö Hanania perofeta hna thamua hna úhúkâ-lâkôuâ únyi hnyi hon nyi Jeremia perofeta, me ha, ka habe, 13 He thö ka ha kö Hanania perofeta, ke habe, Walang hna ha hnö Iehova, ka habe, U je hia but thamua hna úhúkâ-lâkôuâ a utö, ke u me he ka ányâ ke je hna úhúkâ-lâkôuâ a fao me hnân hwaban. 14 Anyin a walang hna ha hnö Iehova tuhan sabaoth, Khongu Isaraela, ça habe, Oge hia but ip hna úhúkâ-lâkôuâ a fao hon nyin ta je hnyei hia eling, m' adre me he ka bi athnyabai Nebukaneza than Babulona : ke adre me he bi ka bi athnyabainy : ke oge hia but ham kâu minya je menoiny hnyot. 15 Me haba Jeremia perofeta ame ha kö Hanania perofeta, ka habe, Hanania lö, löng ju walang ang ; a ca kunö u Iehova ; ke u je olabagejo tavat ang ka hnyi thoi. 16 Anyin a wale, walang hna ha hnö Iehova, ka habe, Wâ bi, oge me he ka obö u únyi eang hmeledrany ; u me he ka mok hnyi huna eang, anyin a u je hia but fuc úkhin fuc me Iehova. 17 Me ame mokcu Hanania perofeta hnyi huna eling, hnyi tehi a seveniny.

HNYIMAKAN 29.

WALANG önyen tusi wale a kunâ Jeremia perofeta úheny Jerusalema ka ta je kolon wale a wahingatiny je bâ, me tavat bihut, me ta je perofeta, me tavat hia, waleji hnö Nebukaneza hna hom

úheny Jerusalema Babulona ai : 2 (hwaban hna he hnö Jekonia than, me momo than, me je eúnuka, me je taben Juda me Jerusalema, me tavat ae metâ huliwa, me tavat leú fao úhedra Jerusalema;) 3 a deny Elasa nöku Safana, me Gemaria nöku Helekia, (waleji hnö Zedekia than Juda hna kunâ Babulona ai kö Nebukaneza than Babulona) me ha, ka habe, 4 Walang hna ha hnö Iehova tuhan sabaoth, Khongu Isaraela, ka ta je bâ hia, waleji oge úkhü-möng he ka hom úheny Jerusalema Babulona ai, ka habe, 5 Bi umöbun dö uma me labâ ju ; ke bi ibun dö me an ju wan ; 6 hok ööbun dö me bi lakubun da me in ; ke heleú áiân dö lakubun obaga, ke úham-kôuâ thö lakubun wahu ka je бага, m' adre me he ka hnokoâ obaga me wahu ; me öbun e he ka se hia eling, me ca he bi ka wakhalet. 7 Ke elâm dö hnahicin taun waleji oge úkhünöng he ka hum öbun ka hnyin, ke hic dö kö Iehova hobi kâu e : anyin a hnyi hnahicin e, öbun e he ka hnyi hnahic. 8 Anyin a walang hna ha hnö Iehova tuhan sabaoth, Khongu Isaraela, ka habe, E so he ka ca omonu öbun ge anyibun je perofeta a ödra unyibun, me anyibun tavat bi khong, ke ca löng öbun ka ta je bwi, waleji adre bwo hobi köbun. 9 Anyin adre me perofeta thoi köbun hnyi iök : oge ca kun' ödra, haingö Iehova. 10 Anyin a walang hna ha hnö Iehova, ka habe, E ka bekhöt dö ta je huna a sevente hnyi Babulona, oge me he ka sen' öbun, me ohwädâ köbun hok hofuc ae so, m' adre me ohmetu öbun ka hnyi dok ang. 11 Anyin ae khanö nya bi ta je únyküme, oge me únyküme köbun, haingö Iehova, je hna únyküme ae hnahic, ke ba kong hnyin, me me he ka hu gejon hnyi obiny. 12 Ke öbun e he ka hao nya, me öbun e he ka he me hic könya, me oge me he ka ling öbun. 13 Ke öbun e he ka elöm nya me ö nya, öbun ka he ka elöm nya nhen je hnyekubun ae bekhöt. 14 Ke öbun e he ka ö nya, haingö Iehova, ke oge me he ka ohmetu öbun únyi hnyi hna hwenbâ, ke oge me he ka úkhacaköu öbun únyi hnyi ta je hnyei hia, me je dok hia, waleji oge ob' öbun ka hnyin, haingö Iehova ; ke oge me he ka ohmetu öbun ka hnyi dok waleji oge hwenb' öbun hnyin. 15 Anyin a öbun e hia but ha, ka habe, Haba Iehova ame hia but oâ hobi köta hnyi Babulona ta je perofeta. 16 Anyin a walang hna ha hnö Iehova ge than at ame tabâ theron anyi Davita me

tavat hia, tavat adre me labā taun ang, a je liamekeiny möbun adre ca hnyi he möbun ka hnyi bâ; 17 walang hna ha hnö Iehova tuhan sabaoth, ka habe, Wâ bi, oge me he ka kunâ ködra hele vat, me hmiâ, me mok ae cap, ke oge me he ka wi' ödra, m' adre me úcú me wan meta ae kong ke ca hnân bi han, anyin ae kong. 18 Ke oge me he ka hnu ödra ge hele vat, me hmiâ, me mok ae cap; ke oge me he ka hnödra ka he monu hnyi je dökhü hia eang hmeledrany, me me hnân hangâ, me kuku, me jü, me hnân haikongoâ hnyi ta je hnyei hia thithö waleji oge me he ka ob' ödra ka hnyin: 19 anyin adre me ca hia but löng hok hofuc, haingö Iehova, waleji oge kunâ ködra a deny je athnyabaik a je perofeta, ke vesákong, me úkhünöng, ke öbun e hócö löng, haingö Iehova. 20 Anyin a wale, löng ju öbun hofuc ho Iehova, öbun hia thithö je bá waleji oge kunâ Babulona ai úhebun Jerusalema.

21 Walang hna ha hnö Iehova tuhan sabaoth, Khongu Isaraela, ga Ahaba nöku Kolaia, me Zedekia nöku Maseia li at ödrü me perofeta thoi köbun hnyi iök, ka habe, Wâ bi, oge me he ka hn' ödrü ka hnyi hnyamö Nebukaneza than Babulona, ke e ame he ka hling' ödrü hnyi hnyimaköbun. 22 Ke adre me he ka hom bongon hangâ gadru hnen ta je bá hia thithö anyin at Juda a ödra hnyi Babulona me ha, ka habe, Ame he Iehova ka wiö u helâ me Zedekia, ke helâ me Áhaba, waleji a thong hnen than Babulona hnyi meic: 23 can anyin ödre hia but ányâ hwen monu hnyi Isaraela, ke ödre hia but bi únyi monu me laâiân la-wædrü, ke ödre hia but ha je hofuc ae thoi hnyi iök, waleji oge ca hûna ködrü; ke inya at ae khana e, me ohnatho, haingö Iehova.

24 Ke u me he ka fuc ga Semaia at Nehelami me ha, ka habe, 25 Walang hna ha hnö Iehova tuhan sabaoth, Khongu Isaraela, ka habe, Anyin a u je úkhünöng me je tusi hnyi iâm ka tavat hia a ödra hnyi Jerusalema, me kö Zefania nöku Maseia at bihut, me ka tavat bihut hia me ha, ka habe, 26 A hia but Iehova otilö u hnân at bihut hwabö Jehoiada at bihut, m' öbun e he ka musí hnyi uma umö Iehova, ka tavat ae monu, me tavat adre me wi' ödra hnân perofeta, m' adre me hn' ödra ka hnyi utö hnân ce at hnyin, me je tö a fao. 27 Ke walang ang anyin a ieu u je ca thao Jeremia at Anathoth, at ame wia e bi hnân perofeta köbun, 28 Anyin a hnyi únyi e

e ame kunâ köhmun ka hnyi Babulona me ha, ka habe, E tiga bec hna bâ: bi umöbun dö uma me labâ ju, me bi ibun dö, me an ju wan? 29 Ke haba Zefania at bihut ame aú tusi eling, ke ame löng Jeremia perofeta. 30 Me ame o but hofuc ho Iehova kö Jeremia perofeta me ha, ka habe, 31 Úkhünöng dö ka je bá hia me ha, ka habe, Walang hna ha hnö Iehova ge Semaia at Nehelami, ka habe, Anyin a Semaia ame perofeta köbun, ke oge ca kunâ, ke e ame olabageju öbun ka hnyi thoi; 32 anyin a wale, walang hna ha hnö Iehova, ka habe, Wâ bi, oge me he ka bi hwaban kö Semaia, me je mátrániny; ame ca he ka hu aten ame he ka laba unyin tavat ang, ke haba khaca e ame ca he ka hnyi wâ so, wale oge me he ka ányâ ka lakeik, haingö Iehova, anyin a e ame hia but ha he ka úkhin fuc me Iehova.

HNYIMAKAN 30.

HOFUC ame o kö Jeremia únyi ga Iehova ame ha, ka habe, 2 Walang hna ha hnö Iehova, Khongu Isaraela, ka habe, Sihnalimen ju hnyi tusi ta je hofuc hia wale oge me ha köu. 3 Anyin a wâ bi, ame he ka o je bong, haingö Iehova, me oge me he ka ohmeto lakeik a at Isaraela me Juda úhedra hnyi hna bâ, haingö Iehova: ke oge me he ka ohmetu ödra ka hnyi hnyei, waleji oge ham ka lakamödra, ke adre me he ka hu e.

4 Ke walang je hofuc ho Iehova ge at Isaraela, me Juda. 5 Anyin a walang hna ha hnö Iehova, ka habe, Ate hia but löng hwan öbubuny me ot, ke ca hnahic bi. 6 Hnö thö walang ang me wâ, a ne бага ame hnokoâ wanakat: anyin a ieu oge me wâ je бага hia adre me ve tot cimâ je jebalainudra helâ me momo ame vec hnyekon, ke löhau hia but ta je hnyimaködra! 7 Ekölö! anyin ae gan hmâ bong eling, ke ba ke bong a helâe: wale üen vec kö Jakob; ke so bi, adre me he ka omelö e hnyin. 8 Ke hnyi bong eling haingö Iehova tuhan sabaoth, oge me he ka thamüâ hna úhúkalálakouâ únyi hnyi hon nyem, me thu omomono je hna cö u; ke ame ca he hmetu ta je atkanyua ka thaluâ e: 9 ke adre me he ka bi athnyabai Iehova Khongudrin me Davita a tuhödra wale oge me he ka oâ ködra. 10 Anyin a wale Jakob lö, athnyabaik, ca ot, haingö Iehova; ke Isaraela lö, ca hlöho bi: anyin a wâ bi, oge me he ka omeli u

únyi hnyi dok ae sákáú, me je mátránám únyi hnyi hnyei waleji adre hwenb' ödra hnyin; ke ame he Jakob ka hmetu me mená, me laba hnahic, ke ba at ame he ka ootá e. 11 Anyin a haingö Iehova, ka habe, tha inya but möu he ka omeli u; anyin oge me he ka bi obiny ka je hnyei hia waleji oge obö u ka hnyin, ke oge me ca he ka bi obiny köu; ke oge me he ka nö u ge hna owisa, ke oge me ca he ka hnö u ke ba hwaban.

12 Anyin a walang hna ha hnö Iehova, ka habe, E ba eny ge ányám vec, ke gan hmá hnám aat. 13 E ba at ame he ka ivinö hobi köu, m' adre me he ka lan u; e ba bubuny adre me melen unyám. 14 A hnying u but hnen je lawaem hia; adre me ca elöm u: anyin oge kuc u helá me hna kot hnen iwahuaihmöny, me hna kot hnen at ame bevecá: can úganiny hwakecám ae kong, anyin ae se hia ányám ta je hulö. 15 Ieú gam u me tenge can hna kuc u? e ca hnán e eny ányám vec: oge ányá e köu can ae se hia je hwakecám ae kong, ke ti se hia ányám je hulö. 16 Anyin a wale, adre me he ka ohí' ödra tavat adre me ohíö u; ke adre me he ka hwenbá ta je iwahnaihmöny möu; ke adre me he ka söh tavat adre me sei u, ke oge me he ka hna he ka hügúná hia ta je únyi anyin tavat adre me hügúná ányám ta je únyi. 17 Anyin oge me he ka oá hmetu köu möt, ke oge me he ka ometa hnám je aat, haingö Iehova; anyin adre hia but hao u, ka habe, Hna degec, haingödra E bi Ziona, waleji ame ca elám hnen ke at. 18 Walang hna ha hnö Iehova, ka habe, Wá bi, oge me he ka ohmeto je uma mano umö Jakob adre hom, me betenge ge hnyaban; ke adre me he ka otílá taun hon hna hagutá e, ke ame he ka tot uma umen than hoton bongon e. 19 Ke ame he ka o gadra hwan ole, me hwan tavat adre me senyin: ke oge me he ka osehi' ödra, ke adre me ca he ka wakhale; ke oge me he ka ogan' ödra, k' adre me ca he bi ka úhnyúkong. 20 Ke ame he lakudra ka helá me ehac, ke ame he ka tethmá anyidra úkhacaköu hnyi hnyimakök, ke oge me he ka bi hwaban ködra hia adre me sed' ödra. 21 Ke ame he ka o than únyi gadra, ke ame he ka o únyi hnyi wanbödra at ama musi ödra; ke oge me he ka ohakekenyá e könya: ke ie at ae hu tang hwegien he ka hakekenyi nya? haingö Iehova. 22 Ke öbun e he ka lakeik, ke oge me he ka Khongubun.

23 Wá bi weneú anyi Iehova wale anyin wathethöt ame he thö, a weneú at ame aba: e ame he ka hwádá hon ban tavat ae kong. 24 Ame ca he hmönyin ae hwege anyi Iehova ka hmetu, ke ne o but e ame hia but mádrá, me ohwádá je únykúmenen hnyekon; öbun e he ka wáhmakhmetoá hnyi je bong a biliny.

HNYIMAKAN 31.

H AINGÖ Iehova, ka habe, hnyi úen eling, oge me he ka Khongon je lap hia anyin at Isaraela, ke adre me he ka lakeik. 2 Walang hna ha hnö Iehova, ka habe, Adre wá betenge hnyi hnyebuba hnen ta je lakon únyi ge hele vat; waleji a Isaraela hnyi hnök hna he ka omen' ödra. 3 Haba Iehova ame manen dut könya ehac me ha, ka habe, Inya oge me betenge gam ge betenge a nyiele balua: anyin a wale oge hia but lili u ge betenge baú. 4 Hluiny Isaraela lö, oge me he ka up u hmetu, me adre me he ka up u; adre me he ka ohmanenangi u ge ányám je bwinybet, ke u me he ka he hnyi bibiá anyin tavat adre me senyin. 5 U me he hmetu ka tá ta je vine hon je bucen hnyi Samaria: ame he tavat belök ka tá me ijem ta je wan hnyi senyin. 6 Anyin ame he ka lu úen hongot ge tavat tue hnyi bucen Eferaima, ka habe, Todrü, ate me he Ziona ai kö Iehova Khonguta. 7 Anyin a walang hna ha hnö Iehova, ka habe, Khumöng senyin dö ga Jakob, me hongot dö ge hnyei ae beónua: haimemená thö, oganá thö, me ha, ka habe, Iehova lö-omelö thö lakem, a je kolon hnyi Isaraela. 8 Wá bi, oge me he ka hum ödra únyi hnyi hnyei hnyi hwadrö, me úkhacaköu ödra únyi hnyi je can hmeledrany, tha e mödra je wadröu, me tavat ae kong cadra, me erkin, me momo ame he ka bnokoá: adre me he ka hmetu káang, a bunyen ae gan. 9 Adre me he ka o me tenge tot, ke oge me he ka lili ödra ge khöu: oge me he ka hum ödra ka hnyi je wagewe, hnyi gethen ae wisa, wale adre me ca he ka haú hnyin: anyin a inya ang kámám Isaraela, ke haba Eferaima, me, nöku k a bán. 10 Je hnyei lö, löng ju hofuc ho Iehova, ke haimemená thö e hnyi je bomene ae sákáú: me ha, ka habe, Haba at ame ovesei Isaraela ame he ka úkhacaköu ödra hmetu, me tu' ödra, helá me at ame tuö haleny hnahat mamoe. 11 Anyin a Iehova ame hia but omeli Jakob, me hügúná e únyi

hnyi hnyamen at ae hwege hon. 12 Ke adre me he ka o me khumöng hnyi dok ae görany hnyi Ziona, me tha he ka hnyi soi Iehova, ka hnyi hwit, me waina, me wakacc, me je nokon mamoe, me kau : ke ame he je hnyekudra ka helâ me hna belök adre hû ; ke adre me ca he balua hmetu he ka tenge. 13 Me ame he ka senyin hlu hnyi bibiâ, me wahidrou eang me wahingat ; anyin oge me he ka wia anyidra tenge me me hnân bi senyin, ke oge me he ka otu-bweli ödra, me oseyini ödra únyi hnyi tenge. 14 Ke oge me he ka osekunâ tavat bihut ge pipikhenya, ke oge me he ka osekunâ lakeik ge soik, haingö Iehova.

15 Walang hna ha hnö Iehova, ka habe, Adre me löng hnyi Rama, hwa tenge thungau, me tenge hwege, Rakela ame tenge ge lakon ; k' ame ca tubet bala bi ge lakon, anyin adre au but. 16 Walang hna ha hnö Iehova, ka habe, Soju hwâm hwatenge, me khula a li deköiâm : anyin adre me he ka bi troban ânyâm huliwa, haingö Iehova ; ke adre me he ka hmetu únyi hnyi hnyei iny je iwahnaihmiony. 17 Ke e hu hnân gejon hnyi ânyâm obiny, haingö Iehova ; ke ame he lakom ka hmetu ka hnyi hnyigöülödra. 18 E hnathu oge hia but ling Eferaima ame mâng me ha, ka habe, U je hia but kuc nya, me adre me kuc nya, helâ me bolok ae ca khenená hna úhükálákouâ ; ohmetu nya ju, me oge me he ka hmetu : anyin a u Iehova Khonguk. 19 Ke hwaban e, e hnathu oge me hmetu, me oge me ietra ; ke hwaban hnödra hna nö nya, me oge me khaú jevak : iny hmehma but, eke, iny hlohlo, anyin oge me hokhnyokâ hna haikongu nya k' iny tiga hidrou. 20 Hawa, nöku k a oúnykúmik Eferaima ? hawa, e wanakat ae kese ? anyin a iny ka hia but fuc gan, oge me ti únykúme bala hmetu gan ; anyin a wale ame fuc hnyekuk gan ; e hnathu oge me he ka betenge gan, haingö Iehova.

21 Otilâ thö hobi köu je haten gethen, konâm ju hobi köu je utö hnân kú gethen ; hnyok ju ka hna cit gethen, waleji gethen u me he hnyin : hluiny Isaraela lö, hmetu ju, hmetu ju kââng ka hnyi ânyâm taun. 22 Ke ne o but kehö u me he ka he monu, u hlu ame labö kölu ? anyin a Iehova ame hia but op únyi ae teb únyi hnyi hnyei, ame he momo ka ton ge бага.

23 Walang hna ha hnö Iehova tuhan sabaoth, Khongu Isaraela, ka habe, Adre me he hmetu ka ha hofuc ang hnyi hnyei

Juda, me je tauniny, iny ka he ka ohmetu ödra úhedra hnyi hna bâ me ha, ka habe, Hnyaban hna owisa lö, me bucen ae kap, E so e he Iehova ka ohnabici u. 24 K' ame he Juda me je tauniny hia ka tha labâ e ; tavat belök, me tavat alin meno. 25 Anyin oge hia but osekunâ tavat hia ae sēnyin, me öunöngötâ tavat hia ae hlöuhlöu. 26 Me oge me hmak me wâ, ke so könya hnök hna mokut. 27 Wâ bi, ame he ka o je bong, haingö Iehova, me oge me he ka tâ lap anyi Isaraela me lap anyi Juda, a je wan at, me wan meno. 28 Ke helâ me hnök hna tu' ödra he ka oc, me kia, me hagutâ, me ohia, me ovecâ ; helâe oge me he ka tu' ödra he ka op göranyai, me tâ, haingö Iehova. 29 Hnyi bong eling adre me ca he hmetu ka ha, ka habe, Haba je lakamöhmun adre hia but ijem wan vine ae but, me ame miminy bi nyon je lakon. 30 Ke ame he ka ve mok tavat can hwakecidra ae kong ; ke haba at ama ijem wan vine ae but, ame he bi ka miminy nyon.

31 Haingö Iehova, ka habe, Wâ bi, ame he ka o je bong me oge me he ka ânyâ úhihinyköu a teb únyi me lap anyi Isaraela, me lap anyi Juda : 32 ca helâ me úhihinyköu eji oge ânyâ me lakamödra, waleji hnyi bong oge hom hnyamödra he ka su ödra únyi hnyi hnyei Aigupito ; ke adre me thamuâ anyik úhihinyköu eja ke ne oge ne helâ me áiân бага ködra, haingö Iehova. 33 Ke walang úhihinyköu oge me he ka ânyâ me lap anyi Isaraela, hwaban je bong eling, haingö Iehova ; oge me he ka ip anyik hnanyibu eü hnyidra, me sihnalimen e hnyi je hnyekudra ; ke oge me he ka Khongudrin, ke adre me he ka lakeik ; 34 ke adre me ca he hmetu ka ve nâ tavat ae hakekeny ködra, me je liamekeiny mödra, me ha, ka habe, Khan' öbun dö Iehova : anyin adre me he hia ka khan' ödra inya, hwân ge ta je hoúmonu ke ne o but ka tavat ae beönuu, haingö Iehova : anyin oge me he ka hna but hwakecidra ae kong, ke oge me ca he hmetu ka únykúme anyidra ta je hulö. 35 Walang hna ha hnö Iehova at ame ham seünö hnân lany hnyi selany, me hnanyibuiny tehi me ta je okhú hnân melam hnyi lit, at ame bwebwelâ köiö me me ü je waköiöiny ; Iehova tuhan sabaoth ien : 36 haingö Iehova, ka habe, a ne he ka hia hnyi hnyimakök je hnanyibu eling, me ame he ka ba hmetu hnyei hnyi hnyimakök mátrániny Isaraela nyiele balua. 37 Walang hna ha hnö Iehova, ka habe, A

ne khana he ka tuluto drany ethö, me elâm e taben hmeledrany, me oge me he minya ka degec hia je matrâniny Isaraela, can ta je únyi hia adre me ányâ, haingö Iehova. 38 Wâ bi, ame he ka o je bong, haingö Iehova, me adre me he ka op taun hobi kö Iehova, hwân hnyi tap ae beû göranyai tabö Hananel, ke ne o but hnyi homagöuleny kop. 39 Ke ame he ka he wisa tulut tö ka hnyi bucen Gareb, me ame he ka khenyi hnyi Goatha. 40 Ke ame he ka kap kö Iehova hnyigöulen bucen hia anyin je komok, me je hnabadröu, me je utkânâ hia ke ne o but hnyi wagewe Kederon, ke ne o but hnyi kopiny homagöuleny je hors e deiö; adre me ca he hmetu ka oc e, me kia nyiele balua.

HNYIMAKAN 32.

WALANG hofuc ame o kö Jeremia únyi ga Iehova hnyi hunu a teni Zedekia than Juda, waleji hunu a eitini Nebukaneza. 2 Haba hnyi úen eling ame igigilö Jerusalema hnen vat anyin than Babulona: ke adre me ip Jeremia perofeta hnyi hnyeuleny uma ceat, ae hnyi uma umen than Juda. 3 Anyin ame ip e Zedekia than Juda hnyi uma ceat me ha, ka habe, Ieû gam u me perofeta me ha, ka habe, Walang hna ha hnö Iehova, ka habe, Wâ bi, oge me he ka hna taun ang ka hnyi hnyamen than Babulona, ke e ame he ka hügünâ e; 4 ke ame ca he bi Zedekia than Juda ka kec ge at Kaledaia, ke e hnathu adre me he ka hna e ka bnyi hnyamen than Babulona, ke ödrü me he ka ifucköu me ionhyimak; 5 ke e ame he ka lili Zedekia Babulona ai, ke e ame he ka laba eling ke ne o but hnyi úen oge me he ka senâ e, haingö Iehova: eja ke ne öbun e ne vat me at Kaledaia, öbun e ca he ka hwege.

6 Haba Jeremia ame ha, ka habe, Ame o kõnya hofuc ho Iehova ame ha, ka habe, 7 Wâ bi, ame he ka he but köu Hanamela nöku Saluma a ke kâmâm he ka ha, ka habe, Úco thö utkânâ a ik hnyi Anathoth: anyin ae hu musi gam he ka úco hmetu e. 8 Me ame o kõnya Hanamela nöku cica hoton hofuc ho Iehova hnyi hnyeuleny uma ceat, me ha kõnya, ka habe, Ó u úco thö utkânâ a ik hnyi Anathoth hnyi hnyei Beniamina: anyin ae úcú köu he ka hu, ke hu musi gam he ka úco hmetu; úco thö me hobi köu. Me oge me wâhmakhmeto a hofuc e ho Iehova. 9 Me oge me úco

utkânâ me Hanamela nöku cica hnyi Anathoth, me tuluto kâu mone, a seventin je sekel sileva. 10 Me oge me set iök hnyi hna úhihinyköu, me okeceâ haten, me hawâ tavat ohnatho, me tuluto mone hnyi tulut. 11 Me oge me hom hna set úhihinyköu ge hna úco, waleji at adre okeceâ haten hoton hnanyibu me hwakecin, me tusi minya adre ca ohmâ: 12 Me oge me ham tusiny úcú kö Baruka nöku Neria, nöku Maseia, me hnyi hnyimakö Hanamela nöku cica, me hnyi hnyimakan tavat ohnatho tavat adre set iödra hnyi hna úhihinyköu ge hna úco, me hnyi hnyimakan tavat Juda hia tavat adre me laba hnyi hnyeuleny uma ceat. 13 Ke oge me húna kö Baruka hnyi hnyimaködra, ka habe, 14 Walang hna ha hnö Iehova tuhan sabaoth, Khongu Isaraela, ka habe, Hom dö li tusi ang, wale úhihinyköu ge hna úco, wale tusi adre okeceâ haten, me tusi minya adre ca ohmâ, me hitöng ödrü hnyi kaiâ kânâ; me me e bala bi hnyi ta je bong ae se hia. 15 Anyin a walang hna ha hnö Iehova tuhan sabaoth, Khongu Isaraela, ka habe, Adre me he ka he hmetu bi ka úco je uma, me je utkânâ, me je hnyei vine hnyi hnyei ang.

16 Ke iny ka hia but ham tusiny úcú kö Baruka nöku Neria, me oge me hic kö Iehova, me ha, ka habe, 17 Ekölö Than Iehova! wâ bi, u je hia but op drany me hmeledrany ge manâm man ae gan hmâ me benyâm adre hai; ke ba únyi ae hmak köu: 18 at ame omanenâ tang betenge ka ta je dö a thauzun, me bi hwaban hulö anyin je kamen ka hnyi úlainy ta je lakudra hwabödra: Khong ae gan hmâ me man, Iehova tuhan sabaoth ien: 19 e beönua hnyi úhnenamö, me maniny huliwa: at ame wâ ge li emakan ta je gethen hia deny tavat; me me ve ham ka tavat únyi ae úcú me dedra ta je gethen me hoton wan anyidra ta je huliwa: 20 at ame ip je haten me je únyi hnân láiâ hnyi hnyei Aigupito, ke ne o but hnyi bong ang, hnyi wanben at Isaraela me ke je tavat; me bi iâm, helâ me hnyi bong ang; 21 ke u je hom lakem a Isaraela únyi hnyi hnyei Aigupito ge je haten, me je únyi hnân láiâ, me hnyam ae hwege, me beny adre hai, me únyi hnân ot ae gan hmâ; 22 ke u je ham ködra hnyei ang, waleji u je khemanyinâ ka lakamödra he ka ham ködra, hnyei amedi hnyin debai me hani; 23 ke adre me o ka hnyin, me labâ e; ke so bi, adre me ca löng hwâm hofuc, ke adre me ca vheno bi ányâm je

hnanyibu ; ke adre ca ânyâ ke ûnyi hnyi je ûnyi hia thithö u je hûna ködra : anyin a wale, u me oâ ködra ta je ûnyi hia eang ae kong : 24 wâ bi je kânâ adre hlu göranyai, adre me o but hnyi taun he ka hûgûnâ e ; ke adre me hna taun ka at Kaledaia, tavat adre me vat mē, can hele vat, me hmiâ, me mok ae cap : ke ame hwâdâ thö hnâm hna ha ; ke, wâ bi, u je wâ. 25 Ke haba u Than Iehova u je hia but ha kõnya, ka habe, Úcú em ju hwaban mone, me hawâ tavat ohnatho ; ke so bi, adre hia but hna taun ka at Kaledaia.

26 Me ame o but hofuc ho Iehova kö Jeremia me ha, ka habe, 27 Wâ bi, Inya Iehova Khongon tavat hia thithö : hawa, e hu ke ûnyi ae ca khanö nya he ka ânyâ ?

28 Anyin a wale, walang hna ha hnö Iehova, ka habe, Wâ bi, oge me he ka ham taun ang ka hnyi hnyamen at Kaledaia me hnyamö Nebukaneza than Babulona, me e ame he ka hûgûnâ e : 29 ke ame he ka o at Kaledaia tavat adre me vat me taun ang, me thong taun ang ge meic me me hlâ, tha e me je uma wale adre me leü ütö ae bo so hon kö Baala, me hingâlâ hudinyic ka ke je khong, me adre me ohmönyini nya. 30 Anyin a haba lakon Isaraela me lakon Juda, adre me ânyâ thibi ûnyi ae kong hnyi hnyimakök, hwân k' ödra tiga hidröu : anyin a lakon Isaraela adre me labö ohmönyini nya ge ta je huliwa anyin je hnyamödra, haingö Iehova. 31 Anyin a hnân öküâ hmönyin me wathethöt kõnya taun ang hwân hnyi bong adre op e hnyin ke ne o but hnyi bong ang ; me oge me beohia e hnyi hnyimakök : 32 can ta je hulö hia anyin lakon Isaraela, me lakon Juda, waleji adre me mâdrâ he ka ohmönyini nya, ödra, me latuhödra, me anyidra je taben, me anyidra tavat bihut, me anyidra je perofeta, me at Juda, me aten Jerusalem. 33 Ke adre me hia but wia kõnya hotudra, me ca hnyimaködra bi : eja ke ne oge ne n' ödra, me vesâ kong me ûne, me adre me ca he ka löng me kap hna únö. 34 Ke adre me otilâ je ûnyi ae ikiki hnyi uma waleji adre wenyö kâu iök, me adre me okongoâ e. 35 Ke adre me otilâ je dok ae görany anyi Baala, hnyigöulen bucen anyin nöku Hinom, me kunâ je lakudra obaga me wahlu ka he hnyi wanben meic kö Moleka ; waleji a oge ca úkhünöng, ke oge ca únykúme, ag' adre me he ka ânyâ ûnyi eling ae ikiki ; he ka oâ hulö ge at Juda.

36 Anyin a wale, walang hna ha hnö Iehova Khongu Isaraela ge taun ang, waleji öbun e ha gan, ka habe, adre hia but ham e ka hnyi hnyamen than Babulona, ge hele vat, me hmiâ, me mok ae cap : 37 haingen, ka habe, Wâ bi, oge me he ka hlu ödra ûnyi hnyi ta je hnyeï hia, waleji oge ob' ödra ka hnyin hnyi anyik hmönyin, me anyik wathethöt, me hmönyin ae gan hmâ ; ke oge me he ka ohmetu ödra ka hnyi dok ang, me olabâ khötkici ödra : 38 ke adre me he ka lakeik, ke oge me he ka Khongudrin : 39 ke oge me he ka ham ködra hnyok a khaca, me gethen a khaca, m' adre me he ka outö nya balua ; m' adre me he ka so, me je lakudra hwabödra : 40 ke oge me he ka ânyâ mödra úhinhnyköu a nyiele balua, a oge me ca he ka hwiö gadra, wale he ka ânyâ ködra so ; ke oge me he ka ip eü hnyi hnyekudra he ka ot kõnya, m' adre me ca he ka digic nya. 41 Eke, oge me he ka senyin ködra, he ka mâdrâ ködra so, ke e hnathu oge me he ka te ödra hnyi hnyeï ang, ge hnyekuk ae bekhöt me hanuk ae bekhöt. 42 Anyin a walang hna ha hnö Iehova, ka habe, Oge me he ka oâ ködra ta je so hia oge hia but ha bânâ ködra, helâji me hnök hna oâ ta je ûnyi hia eang ae kong ka tavat ang. 43 Ke adre me he ka úco je utkânâ hnyi hnyeï ang, waleji öbun e ha gan, ka habe, E ba wan, ke ba minya at me meno ; ke adre hia but hna e ka hnyamen at Kaledaia. 44 Ame he bi tavat ka úco je utkânâ hwaban mone, me set iödra hnyi úhinhnyköu, me okeceâ haten, me hawâ tavat ohnatho, wale hnyi hnyeï Beniamina, me hnyi je dok igigilö Jerusalem, me je tauniny Juda, me je tauniny je bucen, me je tauniny hnyeï ae hnyikânâ, me je taun hnyi Hwaiöu : anyin oge me he ka ohmetu ödra a ta je bâ, haingö Iehova.

HNYIMAKAN 33.

KE ame olo o hofuc ho Iehova kö Jeremia hnyi ûen e ame tiga laba hnyi hnyeuleny uma ceat, me ha, ka habe, 2 Walang hna ha hnö Iehova at ame ânyâ, a Iehova at ame op e, me ohmâ e, Iehova ien ; 3 ame ha, ka habe, Hongot dö kõnya, me oge me he ka thu köu, me omanená köu ta je ûnyi ae gan, me hmak, wale ae ca khanö u. 4 Anyin a walang hna ha hnö Iehova, Khongu Isaraela ge je umainy taun ang, me je uma umen je than Juda, wale adre kia hnân singidra ge je dok adre

hlu göranyai me je hele vat, ame ha, ka habe, 5 Adre me o he ka vat me at Kale-daia, ke so bi, adre me he ka öunöngöti ödra ge je komok, waleji oge hlingâ hnyi anyik hmönyin me wathethöt, ke oge hia but ikhâlâ hnyimakök ge taun ang can anyidra ta je hulö hia. 6 Wâ bi, oge me he ka hom kâe ünyi hnân ometo me eny, ke oge me he ka ometu ödra; ke oge me he ka omanená gâná ködra hnahic me hnathu. 7 Ke oge me he ka ohmeto at Juda me Isaraela úhedra hnyi hna hwenbâ, me up ödra hmetu göranyai helâ me hnyi hwân. 8 Ke oge me he ka ösü' ödra ünyi hnyi anyidra ta je hulö hia waleji adre ânyâ kõnya; ke oge me he ka hna hia anyidra ta je hulö waleji adre me ânyâ me monu kõnya. 9 Ke ame he taun ang he ka hnân ien adre senyinâ, me hnân ogânâ, me haisoâ hnyi hnyimakan ta je hnyei hia eang hmeledrany, tavat adre me he ka löng ta je so hia thithö wale oge me he ka ânyâ ködra, ke adre me he ka ot me öubuny ge ta je so hia me ta je hnahic hia wale oge me he ka oâ kâu. 10 Walang hna ha hnö Iehova, ka habe, Adre me he hmetu ka löng hnyi dok ang, waleji öbun e ha gan, ka habe, E ba wan, e ba at, ke ba meno, hnyi ta je tauniny Juda, me je getheniny Jerusalema wale ae ba wan, ke ba minya at he ka labâ e, ke ba meno, 11 me adre me he bi ka löng hwan senyin me hwan hobâ, me ifucin li at ödre tep faipoipo, me ifucin tavat adre me ha, ka habe, Oganö Iehova thö tuhan sabaoth, anyin ae so Iehova, anyin a nyiele balua anyin ibetengjö: me hwan tavat adre me hom hudiny ole ka hnyi uma umö Iehova. Anyin oge me he ka ohmeto tavat adre bâ helâ me hnyi can, haingö Iehova. 12 Walang hna ha hnö Iehova tuhan sabaoth, ka habe, Hnyi dok ang ae ba wan, ke ba minya at me meno, me hnyi ta je tauniny hia, ame he ka hu hnyaban tavat tuö mamoe, adre me mokulec haledra je hnahat mamoe. 13 Hnyi je tauniny hnyei ae hut me je tauniny hnyei ae hnyikânâ, me je taun hnyi Hwaiöu, me hnyi hnyei Beniamina, me je dok igigilö Jerusalema, me je tauniny Juda, ame he hmetu je hnahat mamoe ka he hmelen li hnyamen at ame tu' ödra, haingö Iehova.

14 Wâ bi, ame he ka o je bong, haingö Iehova, me oge me he ka ohwâdâ hofuc ae so waleji oge ha ge lap anyi Isaraela me lap anyi Juda. 15 Hnyi je bong eling,

me ün eling, oge me he ka oâ kö Davita Angin hwakecin ae wisa, ke e ame he ka ânyâ ünyi ae wisa me ünyi ae úcú hnyi hnyei. 16 Hnyi je bong eling adre me he ka omeli Juda, ke ame he Jerusalema ka laba khötkic: ke walang ien adre me he ka hawâ, ka habe, Iehova wisaita. 17 Anyin a walang hna ha hnö Iehova, ka habe, Ame ca he ka ba hwabö Davita at ame he ka tabâ theroniny lap anyi Isaraela: 18 ke ame ca he ka hia hnyimakök ka tavat bihut a at Levi, at ame he ka hudo je hudiny leü, me le je hudiny han, me labö bi hut hnyi je bong. 19 Ke ame o but hofuc ho Iehova kö Jeremia ame ha, ka habe, 20 Walang hna ha hnö Iehova, ha habe, A ne khan' öbun he ka thamuâ anyik úhinhnyköu a lany, me anyik úhinhnyköu a lit, be me ca he ka ve o but lany me lit hnyi ün; 21 awe, adre me he minya ka thamuâ anyik úhinhnyköu me Davita athnyabaik, me me ba mâtâniny he ka musi hon anyin theron; me anyik úhinhnyköu me at Levi a tavat bihut, a lathnyabaik. 22 E ca khan' ödra he ka aú ta je ünyi ethö hnyi drany, me tuluto je önyin köiö; ke helâe oge me he ka osehia je mâtânini Davita athnyabaik, me at Levi a anyik tavat huliwa. 23 Ke ame o but hofuc ho Iehova kö Jeremia, ka habe, 24 Hawa, u me ca ünyküme hofuc hwan tavat ang waleji a haingödra, ka habe, Haba li lap waleji a úca Iehova, me e amé hna degecâ but? ke adre me hûkötia lakeik, me me ca hnyei hmetu bi hnyi hnyimaködra. 25 Walang hna ha hnö Iehova, ka habe, A ne ca e bi anyik úhinhnyköu a lany me lit, ke oge ne ca hia but otilâ je hnanyibuiny drany me hmeledrany, 26 awe, oge me he ka hna degecâ je mâtânini Jakob, me Davita athnyabaik, m' oge me ca he ka hom unyin je mâtâniny hnân musö je mâtânini Aberahama, me Isaaka, me Jakob: anyin oge me he ka ohmetu ödra úhedra hnyi hna bâ, me betenge gadra.

HNHYIMAKAN 34.

WALANG hofuc ame o kö Jeremia ünyi ga Iehova, waleji hnyi hnö Nebukaneza than Babulona, me anyin utbavat hia, me je dökhu hia e ame musö eang hmelen, me je tavat hia adre me vat me Jerusalema, me je tauniny hia, ame ha, ka habe, 2 Walang hna ha hnö Iehova

Khongu Isaraela, ka habe, He thö ka ha kö Zedekia than Juda me ha kâu, ka habe, Walang hna ha hnö Iehova, ka habe, Wâ bi, oge me he ka ham taun ang ka hnyi hnyamen than Babulona, ke e ame he ka thong e ge meic : 3 ke u me ca he ka kec gan, ke e hnathu adre me he ka köt u, me hnö u ka hnyi hnyamen ; ke u me he ka ühnyimâkâmköu me than Babulona, ke öbu me he ka ifucköu, ke u me he ka he Babulona ai. 4 Ke so bi, Zedekia than Juda lö, löng ju hofuc ho Iehova : walang hna ha hnö Iehova gam, ka habe, U me ca he ka mok ge hele vat ; 5 u me he ka mok wia, ke adre me he ka le hobi köu helä me hna le hobi kâu lakâmâm, je than a bân hnyi üen ae tiga hiö u ; ke adre me he ka tenge thungau gam me ha, ka habe, Ekölö ge than ! anyin oge hia but ha, haingö Iehova. 6 Me Jeremia perofeta ame ha kö Zedekia than Juda ta je hofuc eling hnyi Jerusalema, 7 hnyi üen ame vat deö vat anyin than Babulona me Jerusalema, me je tauniny Juda hia a je kolon, wale Lakisa, me Azeka : anyin a wale li kolon je tauniny Juda, je taun adre up haginyy.

8 Walang hofuc ame o kö Jeremia ünyi ga Iehova hwaban hna ühinyköu hnö Zedekia than me tavat hia hnyi Jerusalema he ka haimemenâ hna thang baüâ ; 9 m' adre me he ka ve hna baüâ je athnyabaidra obaga me omomo, a je tavat Heberu ; m' adre me ca he ka thalu ödra, wale at Heberu a je liamekeiny mödra : 10 ke ame änyä e hnen je than hia me tavat hia, waleji adre ühinyköu he ka ve hna baüâ je athnyabaidra obaga me omomo, m' adre me ca he hmetu ka thalu ödra nyiele ; adre me hnu hoton, me kun' ödra : 11 ke hwaban e adre me hwiö me ohmeto je athnyaba obaga me omomo, waleji adre hna baüâ, me thalu ödra, m' adre me je athnyaba hmetu obaga me omomo ; 12 anyin a wale ame o but hofuc kö Jeremia ünyi ga Iehova, ka habe, 13 Walang hna ha hnö Iehova Khongu Isaraela, ka habe, Oge ühinyköu me lakamöbun, waleji hnyi bong oge hum ödra hnyin ünyi hnyi hnyeï Aigupito, ünyi hnyi hnyaba ae üthaluö me ha, ka habe, 14 Hnyi obiny je huna a seven u me he ka hna liamekeiny möu a at Heberu, waleji u je üco, ke a bi athnyabaem hnyi siks ta huna, u me he ka hna baüâ e : ke haba je lakamöbun adre me ca ling nya, me tevehling nya. 15 Ke öbun e hwiö walang ang me änyâ wisa hnyi

hnyimakök, wale hnyi hnöbun hna haime-menâ he ka ve thöng waeny ; ke öbun e hia but ühinyköu hnyi hnyimakök, hnyi uma waleji adre ip hon iök : 16 ke so bi öbun e hwiö hmetu me okongoâ iök, me ve ohmeto je athnyaba obaga me omomo, waleji öbun e hna baüâ hoton wedra ; ke öbun e musai ödra, he ka bi athnyaba obaga me omomo. 17 Anyin a wale, walang hna ha hnö Iehova, ka habe, Öbun e ca hia but ling nya, he ka ve haimemenâ hna thang baüâ ka je liamekeiny möbun, me je lahanöbun : wâ bi, haingö Iehova, inya oge me haimemenâ köbun hua thang baüâ, ka hnyi hele vat, me mok ae cap, me hmiä ; ke oge me he ka hn' öbun he ka monu hnyi ta je dökhu hia thithö eang hmeledruny. 18 Ke oge me he ka ham ka tavat a tavat hanyäüâ anyik ühinyköu, waleji adre ca ohwädâ hofucin ühinyköu waleji adre änyä hnyi hnyimakök, waleji hnyi hnödra hna subä luâ nokon kau, me he hnyi wanben li ke keihen e ; 19 je than Juda, me je thaniny Jerusalema, je eunuka, me tavat bihut, me tavat hia hnyi hnyeï, a tavat adre me he hnyi wanben li ke keihen nokon kau ; 20 awe, oge me he ka ham ödra ka hnyi hnyamen ta je iwahnaihmiöny mödra, me ka tavat adre me elâm he ka hling' ödra : ke ame he ta je unyidra ka hnân an ta je meno ame gâ, me ta je menoiny hnyot. 21 Ke oge me he ka ham Zedekia than Juda me anyin je taben ka hnyi hnyamen ta je iwahnaihmiöny mödra, me ka tavat adre me elâm he ka hling' ödra, me ka hnyi hnyamen ubtavat anyin than Babulona, tavat adre me he háâng ühedra unyibun. 22 Wâ bi, haingö Iehova, ka habe, o ge me he ka hûna me ohmetu ödra ka hnyi taun ang ; ke adre me he ka vat mē, me hügünâ e, me thong e ge meic : ke oge me he ka wia je tauniny Juda, me me ba wan, ke ba at ama labä.

HNYIMAKAN 35.

WALANG hofuc ame o kö Jeremia hnyi je bong bongu Jehoiakima nöku Josea than Juda, ka habe, 2 He thö ka hnyi lap anyi Rekaba, me ünhenamö mödra, me hum ödra ka hnyi uma umö Iehova, ka hnyi ke hnyeule, me habelidra ge waina. 3 Me oge me hum Jazania nöku Jeremia, nöku Habazinia, me je liamekeiny mē, me je lakon hia, me lap hia anyi Rekaba ; 4 me oge me hum ödra ka

hnyi uma umö Iehova, ka hnyi hnyeuleny je laku Hanan, nöku Igedalia, a aten Khong, a hnyi baten hnyeuleny je taben, a hnyi hon hnyeule anyi Maseia nöku Saluma, at ame tuö hwanuma; 5 ke oge me ip hnyi hnyimakan je lakon lap anyi Rekaba je kaia ae lup ge waina, me je utkaia, me ha ködrin, ka habe, Ijem dö waina. 6 Ke haingödra, ka habe, Öhmun e ca he ka ic waina, anyin a Jonadaba nöku Rekaba a kamöhmun ame hûna köhmun, ka habe, Ca he öbun ka ijem waina, öbun, me je mât ránibun nyiele balua: 7 ke öbun e ca he ka up uma, me belök, me te vine, me hu je únyi e: ke öbun e he ka labá je uma mano hnyi je bong hia thithö; m' öbun e he ka möt hnyi je bong ae se hia hon káná wale öbun e laba atkanyua hnyin. 8 Ke öhmun e hia but ányá hoton hofuc ho Jonadaba nöku Rekaba a kamöhmun hnyi hnen hna hûna hia köhmun, he ka ca ic waina hnyi bonguhmun ta je bong hia, öhmun, me laöiöhmun, me je lakuhmun obaga me wahu; 9 me ca up umöhmun uma hnân labá; ke ba minya gahmun hnyei vine, me utkáná, me hatunguhmun; 10 ke so bi, öhmun e hia but labá je uma mano, me löng me ányá hoton hia hna hûna köhmun ga Jonadaba a kamöhmun. 11 Ke haba hnyi únen eji ame o Nebukaneza than Babulona ka hnyi hnyei, me öhmun e ha, ka habe, Ai öbun, ate me he Jerusalema ai me kec ge utbavat a at Kaledaia, me utbavat a at Suria; me öhmun dut ang öhmun e laba hnyi Jerusalema.

12 Me ame o but hofuc ho Iehova kö Jeremia ame ha, ka habe, 13 Walang hna ha hnö Iehova tuhan sabaoth, Khongu Isaraela, ka habe, He thö ka ha ka at Juda me tavat aten Jerusalema, ka habe, Hawa, öbun e ca he ka kap hna únö me löng hok hofuc? haingö Iehova. 14 A hwadá but hofuc ho Jonadaba nöku Rekaba waleji e ame hûna ka je lakon, m' ödrin e ca ic waina, ke ödrin e ca ic ke ne o but hnyi bong ang, anyin ödrin e löng hoton hna hûna hnen kamödrin: ke so bi, oge hia but fuc köbun me vesákong me ha, ke öbun e ca ling nya bi. 15 Ke oge hia but minya kuná köbun je athnyabaik hia a je perofeta, me vesákong me úkhúnöng me ha, ka habe, Ve hmetu ju öbun walang ang únyi hnyi debun je gethen ae kong, me ányáwia thö je hwakecibun, ke ca hnu hoton ke je khong he ka bi athnyabaidrin,

me öbun e he ka laba hnyi hnyei waleji oge ham köbun me lakamöbun: ke so bi, öbun e ca tevehlöng me ling nya. 16 Ke anyin a je laku Jonadaba nöku Rekaba ödrin e hia but ohwadá hna hûna hnen kamödrin, ke haba bi tavat ang, adre me ca wen ling nya; 17 anyin a wale walang hna ha hnö Iehova Khongon sabaoth, Khongu Isaraela, ka habe, Wá bi, oge me he ka oá ka at Juda, me aten Jerusalema hia ta je únyi ae kong waleji oge ha gadra: anyin a oge hia but fuc ködra ke adre me ca löng bi: ke oge hia but hongot ködra ke adre me ca ieu bi. 18 Ke haba Jeremia ame ha ka lap anyi Rekaba, ka habe, Walang hna ha hnö Iehova tuhan sabaoth, Khongu Isaraela, ka habe, Anyin öbun e hia but löng hoton hna hûna hnö Jonadaba a kamöbun, me tuö hia hnen je hna hûna, me mádrá helá me hnen hna hûna hia köbun; 19 anyin a wale, walang hna ha hnö Iehova tuhan sabaoth, Khongu Isaraela, ka habe, Ame ca he ka ba mât rání Jonadaba, nöku Rekaba, he ka tot hnyi hnyimakök nyiele balua.

HNYIMAKAN 36.

KE haba hnyi huna a vaki Jehoiakima nöku Josea than Juda, me ame o but hofuc ang kö Jeremia únyi ga Iehova, ka habe, 2 Hom dö tusi adre vhec, me sihnalimen hnyin e ta je hofuc hia waleji oge ha köu ge Isaraela, me Juda, me je hnyei hia, hwân hnyi bong waleji oge fuc hnyin köu, hwân hnyi ta je bong bongu Josea, ke ne o but hnyi bong ang. 3 Ame ne he la lap anyi Juda ka löng ge ta je únyi hia ae kong waleji oge me únykúme he ka ányá ködra; m' adre me he ka ve hmetu únyi hnyi dedra ta je gethen ae kong; m' oge me he ka hna anyidra monu me hulö. 4 Haba Jeremia ame hao Baruka nöku Neria; ke haba Baruka ame sihnalimen hia únyi hnyi hnyimö Jeremia ta je hofuc ho Iehova waleji e ame ha káu, hnyi tusi adre vhec. 5 Ke haba Jeremia ame ha kö Baruka, ka habe, Inya ang at adre thawá; e ca khanö nya he ka dit hnyi uma umö Iehova; 6 anyin a wale, he thö ka áu tusi waleji u je set únyi hnyi hnyimök, ta je hofuc ho Iehova ka hnyi je hnyikönyen tavat hnyi uma umö Iehova hnyi bonginy ca han: ke u me he minya ka áu ka hnyi hnyikönyen at Juda hia tavat adre me o únyi hnyi anyidra je taun. 7 Adre ne

he ka he la ka ha hnödra hna khöu hnyi hnyimakö Iehova, me ve hmetu únyi hnyi dedra je gethen ae kong; anyin ae gan hmâ hmönyin me wathethöt ame ha Iehova hon hnyeí ang. 8 Ke haba Baruka nöku Neria ame ányá hia helá me hna húna káu ga Jeremia perofeta, me e ame áú tusi wale ta je hofuc ho Iehova hnyi uma umö Iehova.

9 Ke haba hnyi huna a thabúngi Jehoiakima nöku Josea, than Juda, hnyi tehi a naininy, me ame haimemená he ka ányá ca han hnyi hnyimakö Iehova hnen tavat hia hnyi Jerusalema, me tavat hia tavat adre me he únyi hnyi je tauniny Juda Jerusalema ai. 10 Me Baruka ame áú tusi wale ta je hofuc ho Jeremia hnyi uma umö Iehova hnyi hnyeule anyi Gemaria nöku Safana at sihnalimen, hnyi hnyeule ethö, hnyi hna dit hnyi homagöuleny ae teb únyi uma umö Iehova ka hnyi hnyikönyen tavat hia. 11 Ke haba Mikaia nöku Gemaria, nöku Safana, ame löng únyi hnyi tusi ta je hofuc hia ho Iehova, 12 me e ame utut ka hnyi uma umen than, ka hnyi hnyeuleny at sihnalimen: ke wá bi, ta je taben hia adre me laba eling, wale Elisama at sihnalimen, me Delaia nöku Semaia, me Elenathana nöku Akebora, me Gemaria nöku Safana, me Zedekia nöku Hanania, me je taben hia. 13 Me haba Mikaia ame thumetu ödrin ge ta je hofuc hia waleji e ame löng, hnyi úen Baruka ame áú tusi ka hnyi hnyikönyen tavat hia. 14 Anyin a wale haba je taben hia ödrin e kunö Jehudi, nöku Nethania, nöku Selemia, nöku Kusi kö Baruka, he ka ha, ka habe, haba tusi waleji u je áú ka hnyi hnyikönyen tavat hia, hamám he ka hom jem. Me haba Baruka nöku Neria ame hom tusi hnyi hnyamen, me he ködrin. 15 Ke ödrin e ha káu, ka habe, Laba ju ka áú köhmun. Me haba Baruka ame áú ködrin. 16 Ke ödrin e hia but löng ta je hofuc hia, me ödrin e tha ot, me ha kö Baruka, ka habe, Öhmun e he ka thumeto than ge ta je hofuc e. 17 Ke ödrin e hnei Baruka me ha, ka habe, Mē thumetu öhmun dö, u je kámáu ka sihnalimen ta je hofuc hia e únyi hnyi hnyimen? 18 Me ame ha ködrin Baruka, ka habe, E ame ha könya ge hnyimen ta je hofuc hia e, me oge me sihnalimen hnyi tusi ge köiö sisit. 19 Me haba je taben ödrin e ha kö Baruka, ka habe, He thö ka ikhölö, u me Jeremia, me me ca wá hnöbu hnen ke at. 20 Ke ödrin e

didró ka than hnyi hnyeule; k' ödrin e ip biju tusi hnyi hnyeule anyi Elisama at sihnalimen; ke ödrin e thumeto than ge ta je hofuc hia thithö 21 Me haba than ame kunö Jehudi he ka hom tusi; me e ame hom e únyi hnyi hnyeule anyi Elisama at sihnalimen. Ke haba Jehudi ame áú e ka hnyi li hnyikönyen than, me je taben hia tavat ödrin e tot unyin than. 22 Ke ame laba than hnyi uma honivakeny hnyi tehi a naininy; ke ame hlá meic hnyi taben meic hnyi hnyimakan. 23 Ke a hia but Jehudi áú je ke keihen ame ne kun ame ne vak, me e ame kave e ge hele delö pen, me khúá ka hnyi meic wale hnyi taben, ke ne o but ame an dut tusi meic. 24 Ke ödrin e ca ot bi, me kia anyidrin je úkhaú, wale than me je athnyabainy hia, tavat ödrin e löng ta je hofuc hia eling. 25 Ke haba kbaca, ame kböu ka than ga Elenathana, me Delaia, me Gemaria, me me ca thong tusi, ke ame ca ling ödrin. 26 Ke haba than ame húna kö Jeramela nokon than, me Seraia nöku Azeriela, me Selemia nöku Abedela he ka hum Baruka at sihnalimen me Jeremia perofeta: ke haba Iehova ame ikhöl' ödrü.

27 Me ame o but hofuc ho Iehova kö Jeremia, hwaban hna thong tusi ge than, me ta je hofuc waleji a sihnalimen Baruka únyi hnyi hnyimö Jeremia, ka habe, 28 U me he hmetu ka hom ke tusi me sihnalimen hnyin e ta je hofuc hia a bán waleji a e hnyi tusi a bán, wale a thong degecá Jehoiakima than Juda. 29 Ke u me he ka ha ga Jehoiakama than Juda, ka habe, Walang hna ha hnö Iehova, ka habe, U je hia but thong tusi ang, haingám, Anyin a ieú u je sihnalimen hnyin e, ka habe, Ame he ka o than Babulona me okongoá hnyeí ang, me ohia hnyin e at me meno? 30 Anyin a wale walang hna ha hnö Iehova ga Jehoiakima than Juda, ka habe, Ame he ka ba hwaban hnân tabá theron anyi Davita: ke adre me he ka khúá unyin ae mok ka hnyi kahwa hnyi lany me megic hnyi hnyinghet. 31 Ke oge me he ka bi hwaban káu, me je mátrá-niny, me je athynabainy, can hwakecidra ae kong: ke oge me he ka oá ködra me aten Jerusalema, me at Juda ta je únyi hia ae kong waleji oge ha gadra, ke adre me ca löng bi. 32 Me Jeremia ame hom ke tusi me ham e kö Baruka at sihnalimen, nöku Neria; me e ame sihnalimen hnyin e únyi hnyi hnyimö Jeremia ta je hofucin tusi hia waleji a thong degecá Jehoiakima

than Juda hnyi meic : ke adre me bi hanen ke je hofuc ae se minya ka hnyin a helâe.

HNYIMAKAN 37.

KE ame musi bi ju Zedekia than nöku Josea hwabö Konia nöku Jehoiakima, waleji hnö Nebukaneza than Babulona hna otilâ hnyi hnyeï Juda. 2 Ke e ame ca löng bi, me lathnyabainy, me tavat aten hnyeï, ta je hofuc ho Iehova, waleji e ame ha a deny Jeremia perofeta.

3 Haba Zedekia than ame kunö Jukala nöku Selemia, me Zefania, nöku Maseia at bihut, kö Jeremia perofeta me ha, ka habe, Ö u hic dö hobi köhmun kö Iehova Khonguta. 4 Ke ame didrö Jeremia me didrut unyin tavat anyin a ödra tiga ca hia but ip e hnyi uma ceat. 5 Ke ame o but utbavat anyi Faraö ühedra Aigupito : ke hnyi üen ame khana e hnen at Kaledaia tavat adre me igigilö Jerusalema, me adre me vese but ühedra Jerusalema. 6 Me ame o but hofuc ho Iehova kö Jeremia perofeta, ka habe, 7 Walang hna ha hnö Iehova, Khongu Isaraela, ka habe, Ha th' öbu ka than Juda, at a kun' öbu könya ka hnei nya, ka habe, Wâ bi, haba utbavat anyi Faraö tavat adre me o he ka hadru' öbun, adre me he ka hmetu Aigupito ai ka hnyi idra. 8 Ke ame he at Kaledaia ka hmetu me vat me taun ang, me hügünâ e, me thong ge meic. 9 Walang hna ha hnö Iehova, ka habe, Ca iyawöbun bi me ha, ka habe, E hnathu ame he but gata at Kaledaia : anyin adre me ca he ka he. 10 Anyin a eja ke ne öbun e ne hia but kot utbavat a at Kaledaia tavat adre me vat möbun, ke hu aat dö ge je kolon gadra, adre me he bi ka ve tot hnyi umödra je uma mano, me thong taun ang ge meic.

11 Ke hnyi üen ame he but utbavat a at Kaledaia ühedra Jerusalema can utbavat anyi Faraö, 12 me haba Jeremia ame didrut üheny Jerusalema he ka he hnyi hnyeï Beniamina, me me hom jekhon eling unyin tavat. 13 Ke hnyi üen e ame o hnyi homagöuleny at Beniamina, e bi ling ke taben tavat tue, Iria ien, nöku Selemia, nöku Hanania ; me e ame kuc Jeremia perofeta, me ha, ka habe, U me utut ka at Kaledaia. 14 Ke haingö Jeremia, ka habe, U me thoi ; oge me ca utut ka at Kaledaia ; ke e ame ca löng kâu : me Iria ame kuc Jeremia me hom e ka je taben. 15 Ke haba je than adre me hmönyidra kö Jere-

nia, me kot e, me ca e hnyi uma umö Jonathana at sihnalimen : anyin adre me hia but ânyâ e me hnân uma ceat. 16 Ke ame didrö Jeremia ka hnyi uma ceat, eü hmelen uma, ke se hia je bongu Jeremia ka laba eling ; 17 me haba Zedekia than ame ükhünöng he ka hawâ e : ke than ame hnö duöngâ e hnyi umen uma me ha, ka habe, Hawa, e hu hofuc ünyi ga Iehova ? Ke haingö Jeremia ame ha, ka habe, E hu, Ke e ame ha minya, ka habe, Adre me he ka hnö u ka hnyi hnyamen than Babulona. 18 Ke haba Jeremia ame ha minya kö Zedekia than, ka habe, Ieü anyik monu köu, me je athnyabaem, me taun ang, m' öbun e cö nya ? 19 Ke ewa anyibun je perofeta adre me perofeta köbun me ha, ka habe, Ame ca he than Babulona ka o köbun, me hnyeï ang ? 20 Ke walang ang ö u na löng ju könya than lö a tuhök : ö u na kap soâ ju hnök hna khöü hnyi hnyimâkâm ; me u me ca kunö nya hmetu bi ka hnyi uma umö Jonathana at sihnalimen, wâ oge nye moku eling. 21 Me haba Zedekia than ame hûna, me adre me ip Jeremia hnyi hnyeuleny uma ceat, me ham kâu hnyi ke bong me ke bong khaca falawa ünyi hnyi gethen anyin tavat up falawa, ke ne o but ame ba but areto hnyi taun. Helâe Jeremia ame laba hnyi hnyeuleny uma ceat.

HNYIMAKAN 38.

KE haba Sefata nöku Matana, me Gedalia, nöku Pasur, me Jukala nöku Selemia, me Pasur, nöku Malekia, ödrin e tha löng je hofuc waleji ame ha Jeremia ka tavat hia, ka habe, 2 Walang hna ha hnö Iehova, ka habe, Haba at ama laba bala bi hnyi taun ang, ame he ka mok ge hele vet, me hmiâ, me mok ae cap : ke haba at ame he ka he ka at Kaledaia, e ame he ka möt biju, ke ame he bi ka jekhon anyin möt, ke e ame he bi ka möt. 3 Walang hna ha hnö Iehova, ka habe, E hnathu adre me he ka hna utbavat anyin than Babulona, ke e ame he ka hügünâ e. 4 Me ame ha je taben ka than, ka habe, E so adre me hlingâ but at ang ; anyin a helâe e ame osënyinâ je hnyamen tavat vat a ta je kolon hnyi taun ang me tavat hia, hnyi hnen hna ha je hofuc helâe : anyin a haba at ang, e ame ca elâm he ka osoâ bi tavat ang, ke e ame okongöâ bi. 5 Ke haingö Zedekia than, ka habe, Wâ bi, e but e

hnyi je hnyamöbun : anyin ae ca khana bi than he ka ve e möbun. 6 Me adre me hum Jeremia me khûâ ka hnyi hmonop anyi Malekia nokon than, ae hnyi hnyeuleny uma ceat : ke adre me hnöhnö Jeremia but ge je tö. Ke ba but köiö hnyi hmonop ke hmudra thiju, ke ame cilok ut Jeremia hnyi hmudra. 7 Ke e ka khanö Ebede-melek ut, a eunuka at Aithiop, ae hnyi hnyaban than, a g' adre me ip Jeremia hnyi hmonop ; ke haba than ame laba hnyi homagöuleny Beniamina ; 8 Me haba Ebede-melek, ame he únyi hnyi uma umen than me ha ka than, ka habe, 9 Than a tuhök lö, e kong hia hwakecin tavat e waleji adre ányâ kö Jeremia perofeta, wale adre khûâ ka hnyi hmonop ; anyin a e ame he ka mok, la, eling ge mekihñanem : anyin ae ba hmetu bi areto hnyi taun. 10 Me haba than ame húna kö Ebede-melek at Aithiop me ha, ka habe, Hom dö tavat a thöte úhedra ang, me öú Jeremia perofeta úheny ú hnyi hmonop, e me tiga ca mok. 11 Me haba Ebedemelek ame hom tavat ka tha he mē, me he ka hnyi uma umen than hnyi hmelen hna hip omjeú, me hom úheny e je ecmáno ae khekke, me je úkhaú ae bobot ut, me khûâ kö Jeremia eú hnyi hmonop ge je tö. 12 Haba Ebedemelek at Aithiop ame ha kö Jeremia, ka habe, mē ip ju ec mano ae khekke me bobot ut hmelen li hnyabenyám hnyi tö. Haba Jeremia ame ányâ helâe. 13 Me adre me öú Jeremia ge je tö, me hom e úheny hnyi hmonop ; ke Jeremia ame laba hnyi hnyeuleny uma ceat.

14 Me haba Zedekia than ame úkhûnöng he ka hao Jeremia perofeta kâu, ka hnyi hwanuma a kuniny hnyi uma umö Iehova : ke haingen than kö Jeremia, ka habe, Oge me he ka hnei u ge ke hofuc ; ca he ka ikhâlâ gak. 15 Ke haingö Jeremia kö Zedekia, ka habe, Oge ne thumetu u, hawa, u me ca he ka hlingö nya? ke oge ne he ka ha bongon köu, u me ca he ka ling nya. 16 Me Zedekia than ame khemanyin duöng kö Jeremia me ha, ka habe, Kia inya Iehova, at a up ötu a oge me ca he ka hlingö u, me hnö u ka hnyi hnyamen tavat ang adre me elâm he ka hlingö u. 17 Ke haba Jeremia ame ha kö Zedekia, ka habe, Walang hna ha hnö Iehova Khongon sabaoth, Khongu Isaraela, ka habe, U je ne he ka je taben anyin than Babulona, u me he ka möt, ke adre me ca he ka thong taun ang ge meic ; ke u me he ka möt me

ányâm lap ; 18 ke u je ne ca he ka je taben anyin than Babulona, me adre me he ka hna taun ang ka hnyi hnyamen at Kaledaia, ke adre me he ka thong ge meic, ke u me ca he ka kec gadra. 19 Me Zedekia ame ha kö Jeremia, ka habe, Iny outen at Juda tavat adre hia but utut ka at Kaledaia, wâ adre nye he ka hnö nya ka hnyi je hnyamödra m' adre me he ka hlumö nya. 20 Ke haingö Jeremia, ka habe, Adre me ca he ka hnö u. Ö u löng ju walang ang hofuc ho Iehova, wale oge me ha köu, me me he ka hu so gam, ke u me he minya, ka möt. 21 Ke u je ne höcö he, walang hofuc ame omanená könnya Iehova, ka habe, 22 Wâ bi, adre me he ka hom omomo hia a je kolon hnyi uma umen than Juda ka je taben anyin than Babulona, ke ame he je momo eling ka ha, ka habe, Haba je lawaem adre me iyawö u, ke ame tudra but : a didrut li cam hnyi hmudra, me adre me hmetu but. 23 Ke adre me he ka hom je láâiâm me je lakom ka at Kaledaia : ke u me ca he ka kec gadra, anyin ame he ka köt u hnen than Babulona : ke u me he ka thong taun ang ge meic. 24 Me haba Zedekia ame ha kö Jeremia, ka habe, Ca he ke at ka khana je hofuc ang, me u me ca he ka mok. 25 Ke ame ne löng je taben a oge hia but úhnenamö möu, me adre me he ka o köu me ha köu, ka habe, Mē thumetu öhmun dö walang ang waleji ge hnâm hna ha ka than ; ca ikhâlâ gahmun, ke öhmun e ca he ka hlingö u : 26 awe, u me he ka ha ködra, ka habe, Oge me khöu ka than me me ca he ka ohmetu nya ka hnyi uma umö Jonathana, wâ oge nye mokcu eling. 27 Me ame o but kö Jeremia je taben hia me hnö e : me e ame thumetu ödra helâ me je hofuc hia waleji a húna than. Me adre me laba hnyibú but ; anyin adre ca löng hna úhnenamö. 28 Ke haba Jeremia ame laba hnyi hnyeuleny uma ceat, ke ne o but hnyi bong adre me kot Jerusalema.

HNYIMAKAN 39.

KE haba hnyi úen adre kot Jerusalema, (hnyi huna a naini Zedekia than Juda, hnyi tehi a teniny ame o but Nebukaneza than Babulona me anyin utbavat hia ka Jerusalema me igigilö e ; 2 ke haba hnyi huna a eleveni Zedekia hnyi tehi a vakiny, hnyi bong a naniny tehi, adre me tho hmouca haginny taun :) 3 me ame didrö je taben anyin than Babulona, me laba

hnyi homagöüle eü hnyi wanben, jia Neregale-sareza, me Samegara-nebo, me Saresekim, a Rab-saris, me Neregale-sareza, a Rab-mag, me ke je taben hia anyin than Babulona. 4 Ke a ö 'dra but Zedekia than Juda, me tavat vat hia, me adre me kec me he hnyi hnyinghet, únyi hnyi taun, hnyi gethen úheny hnyi utkáná iny than, hnyi homagöüle wanben li hak veto: ke e ame vheno gethen úheny hnyebuba. 5 Ke haba utbavat anyin at Kaledaia adre me hnu ödra me khöü Zedekia hnyi dok ae tha hon hnyi Jeriko: ke adre me kát e me hom kö Nebukaneza than Babulona hnyi Ribela hnyi hnyei Hamath, ke e ame owisagan. 6 Haba than Babulona ame hlingá hnyi Ribela je laku Zedekia hnyi hnyimakan; ke haba than Babulona ame hlingá je homakan at Juda hia. 7 Ke e ame úá li emakö Zedekia, me ca e ge fao, me hom e Babulona ai. 8 Ke haba at Kaledaia adre me thong uma umen than, me je uma umen tavat ge meic, me kia hna up hagin Jerusalema. 9 Ke haba je kolon tavat a hnen biju hnyi taun, me tavat kec waleji adre me utut káu, me keihen minya a je kolon ame hum ödra Nebuzaradana taben tavat tue, Babulona ai. 10 Ke haba Nebuzaradana taben tavat tue, ame ip biju keihen ae theduoc, tavat ae ba omjeü unyidra, hnyi hnyei Juda, me ham minya ködra je hnyei vine me je utkáná hnyi bong eling. 11 Ke haba Nebukaneza than Babulona ame hünö Jeremia kö Nebuzaradana taben tavat tue me ha, ka habe, 12 Hom dö e, me wá wia e, ke ca okongoá e, ke ányá thö káu helá me únyi e ame he ka ha köu. 13 Me Nebuzaradana taben tavat tue, me Nebusazepana, a Rab-saris, me Neregale-sareza, a Rab-meg, me ta je taben hia anyin than Babulona, ödrin e kuná; 14 adre me úkhúnöng me hum Jeremia únyi hnyi hnyeuleny uma ceat me hna e kö Gedalia nöku Ahikama, nöku Safana, me me hom e ka hnyi uma: me e ame tha laba me tavat.

15 Ke ame o but kö Jeremia hofuc ho Iehova, waleji hnyi ün adre hlöng hnyin hwanumen hnyi hnyeuleny uma ceat, ame ha, ka habe, 16 He thö ka ha kö Ebedemelek at Aithiop, ka habe, Walang hna ha hnö Iehova tuhan sabaoth, Khongu Isaraela, ka habe, Wá bi, oge me he ka oá hok hofuc ka taun ang me me kong ke ca so bi; ke ame he ka aat hnyi hnyimákám hnyi bong eling. 17 Ke haingö Iehova, ka habe,

Oge me he ka omeli u hnyi bong eling; ke adre me ca he ka hnö u ka hnyi hnyamen tavat waleji u je outen. 18 Anyin ae hnathu oge me he ka omeli u, ke u me ca he ka ta ge hele vat, ke ame he ányám möt ka jekhom: anyin u je hia but labageju könya, haingö Iehova.

HNYIMAKAN 40.

WALANG hofuc ame o kö Jeremia únyi ga Iehova, hwaban hna thang e hnyi Rama ga Nebuzaradana taben tavat tue, waleji hnyi hna hom e adre ca ge tö fao tha e me je bá hia úheny Jerusalema me Juda, tavat adre hom Babulona ai. 2 Haba taben tavat tue, ame hum Jeremia me ha káu, ka habe, Haba Iehova a Khongom ame ha úkongon ang ka hnyi dok ang; 3 ke a hia but Iehova oá, me ányá heláji me hnen hna ha; anyin a öbun e hia but ányá hulö kö Iehova, me ca löng hoton ifucin, anyin a wale ame o but köbun únyi eling. 4 Ke walang ang, wá bi, oge me thang je tö fao hnyi bong ang ae hon li hnyamám, A ne so köu he ka tha he mönya Babulona ai, aiö u, ke oge me he ka ö u, ke a ne kong köu he ka tha he mönya Babulona ai, degecu, wá bi, wale hnyei hia hnyi hnyimákám; haba dok ae so me úcü köu he ka he ka hnyin, he thö ka hnyin. 5 Ke e ka tiga ca hmetu, haingen, ka habe, Hmetu ju kö Gedalia nöku Ahikama, nöku Safana, waleji hnen than Babulona hna otílá hon je taun Juda, me tha laba mé unyin tavat: ke ame ne úcü u he ka he ka hnyi ke dok, he thö ka hnyin. Me haba taben tavat tue ame ha kamejin me bwihlany, me kuná e. 6 Me haba Jeremia ame he kö Gedalia nöku Ahikama hnyi Mizepa, me tha laba mé unyin je kolon hnyi hnyei.

7 Ke hnyi ün ae khana but je taben vat hia hnyi hnyei, ödra me anyidra tavat, a than Babulona ame otílö Gedalia nöku Ahikama hnán gavena hon hnyei, me hna but káu obaga me omomo, me ta je wanakat, me ta je theduoc hnyi hnyei unyin tavat adre ca hom bá Babulona ai; 8 me adre me o kö Gedalia hnyi Mizepa, jia Isamaela nöku Nethania, me Johanana me Jonathana li laku Karea, me Seraia nöku Tanumeth, me je laku Efai at Netofa, me Jezania nokon ke at Maaka, ödra me je atödra. 9 Ke haba Gedalia nöku Ahikama, nöku Safana ame khemanyn ködra, me je

atödra me ha, ka habe, Ca ot öbun he ka bi athnyaba ka at Kaledaia : laba ju hnyi hnyei me bi athnyabainy than Babulona, me ame he ka hu so gabun. 10 Ke haba inya, wá bi, oge me he ka laba hnyi Mizepa, he ka tot hnyi hnyimakan at Kaledaia tavat adre me he ka o kôta : ke haba öbun, úkhöúná thö waina me wan ae metu, me wakaco, ke hitangen ju hnyi tangöbun je tang, ke labá ju je taun öbun e hom. 11 Ke hnyi üen ame löng ut at Juda hia hnyi Moaba, me unyin je laku Amona, me hnyi Edoma, me hnyi je hnyei hia a than Babulona ame ip biju je kolon at Juda, ke e ame hia but otölö Gedalia nöku Ahikama, nöku Safana hudrin, 12 me ame hmetu at Juda hia únyi hnyi ta je dok waleji adre ob' ödra ka hnyin, me o ka hnyi hnyei Juda, kö Gedalia hnyi Mizepa, me úkhöúná waina, me je wan ae metu ae se hia hmönyin.

13 Ke haba Johanana nöku Karea, me ta je taben vat hia ae hnyi hnyei, adre me o kö Gedalia hnyi Mizepa, 14 me adre me ha kau, ka habe, E khanö u a haba Baalisa thaniny je laku Amona ame kunö Isamaela nöku Nethania he ka hlingö u? Ke haba Gedalia nöku Ahikama ame ca kap hnödra hna ha. 15 Me haba Johanana nöku Karea ame ha duöngá kö Gedalia hnyi Mizepa, ka habe, Ö u më hnö nya but, me oge me he ka hlingö Isamaela nöku Nethania, ke ba at ame he ka wá : can ief e ame he ka hlingö u? ke ame he ka vese but at Juda tavat adre me úkhacaköu köu, me ame he ka hia je kolon at Juda? 16 Ke haba Gedalia nöku Ahikama ame ha kö Johanana nöku Karea, ka habe, U ma ca he ka ányá únyi e : anyin a u me thoi hnyi hnám hna ha ga Isamaela.

HNYIMAKAN 41.

KE haba hnyi tebi a seveniny haba Isamaela nöku Nethania, nöku Elisama, a ke nokon than, ke hanen je taben ae beónua anyin than, ke tha e më je hnyat a ten, ödrin e o kö Gedalia nöku Ahikama hnyi Mizepa ; ke ödrin e tha han eling hnyi Mizepa. 2 Me ame todrö Isamaela nöku Nethania me hnyat a ten a tha ödrin më, me kuc Gedalia nöku Ahikama nöku Safana ge hele vat, me hlingá e, waleji hnen than Babulona hna otílá hnán gavena hon hnyei. 3 Haba Isamaela ame kot minya at Juda hia unyin, wale unyi Gedalia

hnyi Mizepa, me at Kaledaia tavat adre me wá eling. 4 Ke hnyi bong a loiny hwaban hna hlingö Gedalia, ke ca khana bi ke at, 5 me ame o but tavat a eite úhedra Sekema me Silo me Samaria, adre giá je waidra, me kia anyidra je úkhaú, me ka kavi ödra bi, adre me hom je bwihlany me libanu ka hnyi uma umö Iehova. 6 Me ame he Isamaela nöku Nethania úheny Mizepa he ka úkhanö mödra, ame tenge tot hnyi gethen : ke e ame úkhanö thö mödra, me e ame ha ködra, ka habe, Ai öbun kö Gedalia nöku Ahikama. 7 Ke ödrin e o but hnyi wanben taun, me haba Isamaela nöku Nethania ame hling' ödrin me khú' ödrin ka hnyi hmonop, e, me tavat a tha e më. 8 Ke e anyidrin tavat a ten tavat adre me ha kö Isamaela, ka habe, Ca he ka hling' öhmun anyin ae hu anyihmun únyi öhmun e ikhálá hnyi utkáná, hwit, me bali, me wakaco, me hani, me e ame hokhnyoká, me ca tha hling' ödrin unyin je liamekeiny mödrin. 9 Ke haba hmonop waleji hnö Isamaela hna khúá je komok hia, e ame tha hling' ödra me Gedalia ka hnyin, (wale hnö Asa than hna ányá can e ame ot ga Basa than Isaraela,) haba Isamaela nöku Nethania ame öunöngötá e ge je komok. 10 Me haba Isamaela ame hombá je kolon tavat hnyi Mizepa, je lakon than a je hlu, me tavat hia a je kolon hnyi Mizepa, waleji hnö Nebuzaradana taben tavat tue hna hna kö Gedalia nöku Ahikama : haba Isamaela nöku Nethania ame hum ödra a hwenbá m' adre me he ka je laku Amona.

11 Ke a löng ut Johanana nöku Karea me je taben vat hia unyin ta je monu hia a ányá Isamaela nöku Nethania, 12 me adre hom tavat hia me he me vat me Isamaela nöku Nethania, me adre me wá e hnyi an ae gan hnyi Gibeona. 13 Ke adre me ö Johanana me je taben vat hia unyin hnen tavat hia unyi Isamaela nöku Nethania, me adre me senyin. 14 Ke haba tavat hia a hom Isamaela úhedra Mizepa, adre me hwiö, me hmetu, me he kö Johanana nöku Karea. 15 Ke ame kec Johanana ga Isamaela nöku Nethania tha e me tavat a eit, me he ka je laku Amona. 16 Me haba Johanana nöku Karea, me je taben vat a tha ödrin më adre me hom je kolon tavat waleji e ame húgúná hmetu ga Isamaela nöku Nethania úheny Mizepa, hwaban hnen hna kuc Gedalia nöku Ahikama, wale tavat ae hwege, me omomo, me je

wanakat, me je eunuka, waleji e ame hom hmeto úheny Gibeona: 17 ke adre me he but me laba hnyi Garuthe-kimeama hakekeny Betheleema, m' adre me he Aigupito ai, 18 ge at Kaledaia; anyin adre me out' ödra hnyi hnö Isamaela nöku Nethania hna kuc Gedalia nöku Ahikama waleji hnen than Babulona hna otílâ hnân Gavena hon hnyei.

HNYIMAKAN 42.

KE haba je taben vat hia me Johanana nöku Karea, me Jezania nöku Hosaia, me tavat hia, hwân ge tavat ae úhnyúkong ke ne o but ka tavat ae gan adre me hakekenyâ, 2 me ha kö Jeremia perofeta, ka habe, Ó u kap ju hnöhmun hna khöü köu, ke u me he ka hie hobi köhmun kö Iehova a Khongom, öhmun je kolon ang; anyin a je wan biju öhmun ae wakhalet thibi, ke se hia ehac, öhmun manen köu: 3 me me he Iehova a Khongom ka omanená köhmun gethen öhmun e he ka vheno, me únyi öhmun e he ka ányâ. 4 Ke Jeremia perofeta ame ha ködra, ka habe, Oge hia but ling öbun; wâ bi, oge me he ka hie kö Iehova Khongubun, hoton hnöbun hna ha; ke haba ta je únyi hia ame he Iehova ka thu köbun, oge me he ka omanená köbun; oge me ca he ka ikhâlâ gabun ke únyi. 5 Ke ödrin e ha kö Jeremia, ka habe, Iehova at ame ohnathu öta me owisa köhmun, öhmun ka ca ányâ bi hoton hofuc ame he Iehova a Khongom ka kunö u mē köhmun. 6 A ne so, A ne kong, öhmun e he ka löng hoton ifuci Iehova Khonguta, wale öhmun e kunö u kâu; me öhmun e so öhmun ka löng hoton ifuci Iehova Khonguta.

7 Ke hwaban je bong a ten ame o but hofuc ho Iehova kö Jeremia. 8 Me e ame hao Johanana nöku Karea, me je taben vat hia anyin, me tavat hia hwân ge tavat ae úhnyúkong ke ne o but ka tavat ae gan, 9 me ha ködra, ka habe, Walang hna ha hnö Iehova, Khongu Isaraela, waleji öbun e kunö nya kâu, he ka ip hnöbun hna khöü hnyi hnyimakan, ka habe, 10 Öbun e ne he ka laba bala bi hnyi hnyei ang, oge me he ka up öbun göranyai, me ca hagut' öbun, ke oge me he ka könim öbun, me ca oc degeci öbun: anyin oge me ietra ge únyi ae kong oge hia but ányâ köbun. 11 Ca he öbun ka outen than Babulona, wale at öbun e outen; haingö Iehova, ca he ka

outen e, anyin a tha inya but möbun he ka omeli öbun, me hügün' öbun únyi hnyi hnyamen. 12 Ke oge me he ka betenge gabun, me ohmetu öbun ka hnyi ibun hnyei. 13 Ke öbun e ne ha, ka habe, Öhmun e ca he ka laba hnyi hnyei ang, me ca löng hofuc ho Iehova Khongubun; 14 me ha, ka habe, Ohe, öhmun e he ka he ka hnyi hnyei Aigupito, me öhmun e ca he ka löng vat eling, me löng ifucin trutru, ke ame ca he bi ka hmiâ jeü; ke öhmun e he ka laba eling: 15 anyin a wale, löng ju walang ang hofuc ho Iehova öbun je kolon hnyi Juda: walang hna ha hnö Iehova tuhan sabaoth, Khongu Isaraela, ka habe, Öbun e ne ohwegiâ je hnyimaköbun he ka he Aigupito ai, me he me laba atkanyua eling; 16 awe, ame he ka khöü öbun eling hnyi hnyei Aigupito hele vat, wale öbun e outen, ke ame he hmiâ ka hnu öbun ka hnyi hnyei Aigupito, wale öbun e outen; ke öbun e he ka mok eling. 17 Ame he ka helâe ka tavat hia adre me ohwegiâ ta je hnyimaködra he ka he Aigupito ai me laba kanyua eling: adre me he ka mok ge hele vat, me hmiâ, me mok ae cap: ke ba at gadra ame he ka hnen biju me kec ge okongon wale oge me he ka oâ ködra. 18 Anyin a walang hna ha hnö Iehova tuhan sabaoth, Khongu Isaraela, ka habe, Oge hia but hingâlâ anyik hmönyin me anyik wathethöt hon tavat adre me laba hnyi Jerusalem, helâe oge me he ka hingâlâ anyik wathethöt hubun, öbun ka he ka he Aigupito ai; ke öbun e he ka hnân oú, me kuko, me hângâ, me haikongo; ke öbun e ca he hmetu ka wâ hnyei ang. 19 A hia but Iehova ha gabun, je kolon hnyi Juda, ka habe, Ca he öbun Aigupito ai: wâhmakhmeto ju a oge me ha hwegiâ köbun hnyi bong ang. 20 Anyin öbun e hia but iyaw' öbun bi; anyin a öbun e kunö nya kö Iehova Khongubun me ha, ka habe, Hie dö hobi köhmun kö Iehova Khonguta; ke öhmun e he ka ányâ hia hoton hofuc ame he Iehova Khonguta ka ha köu: 21 ke oge hia but thumetu öbun hnyi bong ang; ke öbun e ca löng ifuci Iehova Khongubun, me ke hofuc waleji e ame kunö nya. mē köbun. 22 Ke walang ang wâhmakhmeto th' öbun a öbun e he ka mok ge hele vat, me hmiâ, me mok ae cap. hnyi dok waleji öbun e weny he ka he kâu me laba atkanyua hnyin.

HNYIMAKAN 43.

KE-a um dö Jeremia ha ka tavat hia thithö ta je hofuc ho Iehova Khongudrin, waleji a kunâ më ködra Iehova Khongudrin, wale ta je hofuc hia eling, 2 me haba Azaria nöku Hosai, me Johana nöku Karea, me tavat bi gan hia, ödrin e ha kö Jeremia, ka habe, U me ha thoi : a ca kunö u Iehova Khonguta he ka ha, ka habe, Ca he öbun Aigupito ai he ka më laba eling : 3 anyin a haba Baruka nöku Neria, ame kunö u gahmun, he ka hn' öhmun ka hnyi hnyamen at Kaledaia, m' adre me he ka hling' öhmun me hum öhmun a je bâ Babulona ai. 4 Me haba Johanana nöku Karea me je taben vat hia, me tavat hia, adre me ca löng hofuc ho Iehova he ka laba bala bi hnyi hnyeï Juda. 5 Ke haba Johanana nöku Karea, me je taben vat hia, adre me hom je kolon at Juda hia tavat adre me hmetu ühedra hnyi je hnyeï waleji adre ob' ödra ka hnyin, m' adre me laba hnyi hnyeï Juda ; 6 wale obaga, me omomo, me ta je wanakat, me je hlu lakon than, me tavat hia waleji hnö Nebuzaradana taben tavat tue hna ip unyi Gedalia nöku Ahikama, nöku Safana, me Jeremia profeta, me Baruka nöku Neria ; 7 ke adre me o ka hnyi hnyeï Aigupito ; anyin adre me ca löng bi hofuc ho Iehova : ke adre me o but hnyi Tapanesi. 8 Me ame o but hofuc ho Iehova kö Jeremia hnyi Tapanesi ame ha, ka habe, 9 Hom dö je veto ae gan ge hnyamâm, me konâm hnyi dröu adre dâ, hnyi veto kânâ ae hnyi hwanumen uma umö Farao hnyi Tapanesi, hnyi hnyimakan at Juda : 10 ke ha thö ködra, ka habe, Walang hna ha hnö Iehova tuhan sabaoth Khongu Isaraela, ka habe, Wâ bi, oge me he ka hum Nebukaneza than Babulona athnyabaik, ke oge me he ka otillâ anyin theron hon je veto e waleji oge konâm ; ke e ame he ka ulolo anyin imanoiny than hon e. 11 Ke e ame he ka o me kot hnyeï Aigupito ; ke haba at hobi kâu mok, me ame ka he bi ka mok, ke haba at hobi kâu bâ, me ame ka he bi ka bâ, ke haba at hobi kâu hele vat, me ame ka he bi ka hnyi hele vat. 12 Ke oge me he ka hû meic hnyi je uma ümen je Khongon Aigupito, ke e ame he ka thong degecâ me hum ödrin a je bâ : ke e ame he ka omecâ e bi ge hnyeï Aigupito helâ me at tuö mamoe ame khavâ anyin je ükhaü ; ke e ame

he ka he üheny e me hnahic. 13 Ke ame he ka tho minya je veto ame tot hnyi Bethe-theses, a e hnyi hnyeï Aigupito, ke e ame he ka thong degecâ je uma umen je khongon Aigupito ge meic.

HNYIMAKAN 44.

WALANG hofuc ame o kö Jeremia ge at Juda hia, tavat adre me laba hnyi hnyeï Aigupito, tavat adre me laba hnyi Mighedola, me Tapanesi, me Nofi, me hnyeï Patherusi ame ha, ka habe, 2 Walang hna ha hnö Iehova tuhan sabaoth, Khongu Isaraela, ka habe, öbun e wâ but ta je okongon hia waleji oge oâ ka Jerusalem, me je tauniny Juda hia ; ke wâ bi, e hnyot ut hnyi bong ang, ke ba but at ame labâ ; 3 can anyidra ta je hulö waleji adre me ânyâ me adre me ohmönyini nya, hnyi hnödra hna he ka leü ütö ae bo so, me bi athnyaba ka ke je khong bi, waleji ae ca kxan' ödra ; ödra, möbun, me lakamöbun. 4 Ke so bi, oge me kunâ köbun je athnyabaik hia je perofeta, me vesâkong, me ükhünöng, me ha, ka habe, Öbun a ca ânyâ ünyi ang ae ikiki wale a hmiök. 5 Ke adre me ca löng bi, ke adre me ca tevehlöng bi he ka hmetu ju ünyi hnyi anyidra ta je hulö, m' adre me ca he ka leü ütö ae bo so ka ke je khong. 6 Anyin a wale oge me hingälâ anyik wathethöt me anyik hmönyin, ke ame ubâhlâ hnyi je tauniny Juda, me je gethen hnyi Jerusalem, ke ame ba wan gdra, ke hnyot dö helâ me hnyi bong ang. 7 Anyin a wale, walang hna ha hnö Iehova, Khongon sabaoth, Khongu Isarnela, ka habe, Anyin a ieu öbun e ânyâ hulö ae gan hmâ eang me hnân jönbun bi, he ka subâ degeci öbun bi obaga me omomo, me je mendreng, me wanakat ame i, ünyi hnyi wanben Juda, me me ba but kolon gabun ; 8 me ame ohmönyini nya hnen ta je huliwa anyin li hnyamöbun, öbun e leü ütö ae bo so ka ke je khong bi hnyi hnyeï Aigupito, wale öbun e he ka hnyin he ka me labâ ; me adre me he ka subâ degeci öbun, me öbun e he ka hnân hangâ me haikongoâ unyin ta je hnyeï hia thithö eang hmele-drany? 9 Hawa, öbun e hnying ut je hwakecin ae kong anyin lakamöbun, me hwakecin ae kong anyin je tuhan Juda, me hwakecin ae kong anyin je laöiodra, me hwakecibun ae kong, me hwakecin ae kong anyin je laöiöbun, waleji adre ânyâ hnyi hnyeï Juda, me je getheniny Jerusalem?

10 Adre me ca vec ke ne o but hnyi bong ang, ke adre ca hia but ot, ke adre me ca vheno anyik hnanyibu, me hnök je hna hûna, waleji oge ip hnyi hnyimaköbun me lakamöbun. 11 Anyin a wale walang hna ha hnö Iehova tuhan sabaoth, Khongu Isaraela, ka habe, Wâ bi, inya oge me he ka wâ hm' öbun me öbun e kong ut, me subâ degecâ at Juda hia thithö. 12 Ke oge me he ka hom je kolon at Juda, tavat adre me ohwegiâ je hnyimaködra he ka he Aigupito ai he ka me laba eling, ke adre me he ka oâü' ödra hia hnyi hnyei Aigupito, adre me he ka ta ge hele vat, me hmiâ, adre me he ka mok hwân ge tavat ae ûhnyükong ke ne o but ge tavat ae gan, ge hele vat, me hmiâ; ke adre me he ka hnân ou, me kuko, me hangâ, me haikongo. 13 Anyin oge me he ka bi hwaban ka tavat adre laba hnyi Aigupito, helâji me hnök hna bi hwaban ka Jerusalema ge hele vat, me hmiâ, me mok ae cap: 14 me me ca he ka kec möt ke at, a kolon at Juda adre me he Aigupito ai he ka labâ, me hmetu ka hnyi hnyei Juda wale adre me weny he ka hmetu ka hnyin me laba: anyin adre me ca he bi ka hmetu, ke so thibi hnyat adre me kec möt.

15 Me ame thu kö Jeremia hnen ta je бага hia tavat ae khan' ödra a haba laöiödra adre me leü ütö ae bo so ka ke je khong, me je momo hia adre me ütitilen, a ûkhacakou ae gan hmâ, me tavat hia adre me laba hnyi Aigupito, hnyi Patherusi me ha, ka habe, 16 Haba hofuc u je hia but ha köhmun hnyi iö Iehova, öhmun e ca he ka löng köu. 17 Ke e hnathu öhmun e he bi ka ânyâ ta je ûnyi hia ame o but hnyi je hnyimöhmun, he ka leü ütö ae bo so ka momo thaniny drany, me hingälâ je hudiny ic kâu, me hia gahmun ta je ûnyi hia, ke adre oâü öhmun ge hele vat me hmiâ. 19 Ke hnyi ûen öhmun e leü ütö ae bo so ka momo thaniny drany, me hingälâ je hudiny ic kâu, hawa, ame hia but unyihmun je laöiöhmun, a je бага, waleji hnyi hnöhmun hna op je ong areto hobi kâu he ka khudrung kâu, me hingälâ je hudiny ic kâu?

20 Me haba Jeremia ame ha ka tavat hia, ka obaga me omomo, me tavat hia tavat adre me hia but thu kâu eling, ka habe. 21 Haba ütö ae bo so öbun e le hnyi je tauniny Juda me je getheniny Jerusalema, öbun me lakamöbun, me latuhöbun, me anyibun je taben, me tavat aten hnyei. hawa, ame ca ûnyküme e Iehova, me ip hnyi hnyekon? 22 me me ca khanö Iehova hmetu bi he ka hokhnyokâ ûkongon anyibun ta je huliwa me ta je ûnyi ae ikiki öbun e ânyâ; anyin a wale a hnyot döibun hnyei, ke hnan lâiâ, me hnân hangâ, ke ba but at ame labâ, helâ me hnyi bong ang. 23 Can öbun e hia but leü ütö ae bo so, me can öbun e hia but ânyâ hulö kö Iehova, me ca löng bi ifuci Iehova, me ca vheno anyin hnanyibu, me hnen je hna hûna, me hnen je hna ohnatho; anyin a wale ame o köbun okongon, helâ me hnyi bong ang.

24 Ke haba Jeremia ame ha ka tavat hia me omomo hia, ka habe, Löng ju hofuc ho Iehova, öbun at Juda a öbun hnyi hnyei Aigupito. 25 Walang hna ha hnö Iehova tuhan sabaoth, Khongu Isaraela, ka habe. Öbun e hia but me laöiöbun ha ge hnyimöbun, me ohwädâ ge je hnyamöbun, ka habe, Öhmun e he ka ohwädâ anyihmun je khöbi waleji öhmun e bi khöbi, he ka leü ütö ae bo so ka momo thaniny drany, me hingälâ je hudiny ic kâu; awe, he th' öbun he ka ohwegiâ anyibun je khöbi, me ohwädâ anyibun je khöbi. 26 Anyin a wale, long ju öbun hofuc ho Iehova, at Juda hia. tavat öbun e laba hnyi Aigupito, ka habe. Wâ bi inya oge hia but khemanyin hnyi iök ae gan hmâ, haingö Iehova, a g' ame ca he hmetu ka ha iök hnen hnyimen at Juda hnyi hnyei Aigupito hia, ka habe, Kia inya Than Iehova. 27 Wâ bi, oge me hmak' ödra m' adre me kong, me ca so bi: ke adre me he ka aü but hia at Juda a ödra hnyi hnyei Aigupito ge hele vat me hmiâ, ke ne o but ame ba but. 28 Ke baba tavat adre me kec möt ge hele vat, me adre me he ka hmetu ûnyi hnyi hnyei Aigupito ka hnyi hnyei Juda, a ödra wakhalet thiju; ke ame he ka khana je köluiny at Juda hia tavat adre me he ka hnyi hnyei Aigupito he ka më labâ, a ho ia hofuc ame he ka ton, ame ne hok, ame ne hodra. 29 Ke haingö Iehova, ka habe, Walang haten köbun a oge me he ka bi hwaban köbun hnyi dok ang, me me khan' öbun a g' ame he ka ton hok hofuc köbun hnân okongon: 30 wa-

lang hna ha hnö Iehova, ka habe, Wâ bi, oge me he ka hnö Farao Hofera than Aigupito ka hnyi hnyamen ta je iwahnaihmïöny mē, me ka hnyi hnyamen tavat adre me elâm he ka hlingâ e; helâ me hnök hna hnö Zedekia than Juda ka hnyi hnyamö Nebukaneza than Babulona, a iwahnaihmïöny mē, ke at ame elâm he ka hlingâ e.

HNYIMAKAN 45.

WALANG hofuc ame ha Jeremia profeta kö Baruka, nöku Neria, waleji hnyi hnen hna sihnalimen ta je hofuc ang hnyi tusi únyi hnyi hnyimö Jeremia, hnyi huna a vaki Jehoiakima nöku Josea than Juda, ka habe, 2 Walang hna ha hnö Iehova Khongu Isaraela gam Baruka, ka habe, 3 U je ha, ka habe, Ekölö gak walang ang! anyin a Iehova ame hia but bi hanen hlöuhlöu ka hnyi anyik vec; oge sēnyin dut anyin mâng, ke oge me ca wâ hna menâ. 4 U me he ka ha helâng kâu, ka habe, Walang hna ha hnö Iehova, ka habe, Wâ bi, baba hnök hna op göranyai oge me he ka kia but, ke haba hnök hna tâ oge me he ka oc hmetu; waleling hnyei hia eang. 5 Ke hawa, u me elâm je únyi ae gan hobi köu bi? ca elâm bi: anyin a wâ bi, oge me he ka oâ okongon ka tavat hia thithö, haingö Iehova; ke oge me he ka ham köu ányâm bi möt hnân jekhom hnyi ta je dok hia thithö waleji u me he ka he ka hnyin.

HNYIMAKAN 46.

WALANG hofuc ho Iehova ame o kö Jeremia profeta ge ta je hnyei, 2 Ge Aigupito: me utbavat anyi Farao-neko thaniny Aigupito, a e hnyi wagewe Euferate hnyi Kakemis, waleji hnö Nebukaneza than Babulona hna kot hnyi huna a vaki Jehoiakima nöku Josea than Juda. 3 Penapena th' öbun bec, me bec aegan, ke bakekeny ju he ka vat. 4 Bi omjehen ju je hors, ke tabâ th' öbun tavat tabö hors, ke todrö me je hnabicen vat; khet ju jeö, khavâ ju je úkhaüen vat. 5 Anyin a ieu oge me wâ e? adre me ot me hmetu-hmetu; ke adre kot anyidra je taben, adre me kec hwege me ca hwiö bi: e hu únyi hnân ootâ igigilö, haingö Iehova. 6 E so ame ca kec at ae hâhâ can, e so ame ca he ka kec möt at ae hwege; adre me haü me ta hnyi hwadrö hnyi baten wagewe

Euferate. 7 Ie at ang ame ölö helâ me Nail, me bwewelâ je köiöiny helâ me je wagewe? 8 Aigupito ame ölö helâ me Nail, ke ame bwewelâ köiöiny helâ me je wagewe: ke haingen, ka habe, Oge me he ka ölö, oge me he ka tube hmeledrany; oge me he ka ohia taun me je aten e. 9 Ölö thö, öbun je hors; wadring hwege thö, öbun je kariota; e so ame he but tavat ae hwege; jia at Kusa me Futa, tavat ae khan' ödra he ka kât bec; ke at Luda tavat ae khan' ödra he ka kât me hlöu cafana. 10 Anyin a bong bongon Than Iehova tuhan sabaoth bong eling, a bong bi hwaban, he ka bi hwaban ka je iwahnaihmïöny mē: ke ame he hele vat ka an, me sekon, ke ijem drödra me me sekon: anyin ae hu hut ka Than Iehova tuhan sabaoth hnyi hnyei hnyi hwadrö hnyi wagewe Euferate. 11 Ölö thö Gileada ai, me hok basama, u hluiny Aigupito: e únyi baü bi hnâm hna bi bubuny ae se hia; e ba bi eny hobi köu. 12 A löng ut ta je hnyei ányâm hmehma, k' ame unöngötö hnyei ge útengiâm: anyin a at ae hwege ame haü ge at ae hwege, k' ödrü me tha ta ju.

13 Walang hofuc ame ha Iehova kö Jeremia profeta ge iöi Nebukaneza than Babulona he ka kot hnyei Aigupito.

14 Haimemenâ thö hnyi Aigupito, ke omanenâ thö hnyi Mighedola, ke omanenâ thö hnyi Nofi me Tapenesi; ha th' öbun, ka habe, Todrö, penapena thö; anyin ame an igigili u hnen hele vat. 15 Anyin a ieu adre me aba degecâ tavat ae hwege unyâm? adre me ca tot bi, anyin ame hagut' ödra Iehova. 16 E ame ohaüâ tavat ae se hia, eke, ke at ame ta hon ke at; ke haingödra, ka habe, Todrö, ate me hmetu ka ta je atöta, me hnyei adre me hnöku öta hnyin, can hele vat at ame úokonguny. 17 Adre me kuko eling me ha, ka habe, Haba Farao than Aigupito me mede thibi; e ame onua but tien adre thu. 18 Haingen Than, Iehova tuhan sabaoth ien, ka habe, Kia inya, e hnathu e ame he ka o helâ me Tabora unyin ta je bucen, ke helâ me Karemela hnyi baten köiö. 19 Hlu lö, at ame laba hnyi Aigupito lö, penapena thö hobi köu he ka he ka hnyi hwenbâ: anyin ame he ka ba but wan hnyi Nofi, ke ame he ka le degecâ ke ba aten. 20 Aigupito kau ae mec unyin; ke ame o but okongon úheny hnyi hwadrö, a o thö e. 21 Haba je aten adre me hok hwaban hnyi wanben e, ödra helâ me je

nokon kau adre me tuö hnyi uma ; anyin adre me hwiö minya me tha kec, adre me ca tot hmâ bi : anyin ame o but ködra bong bongudra vec, üen he ka sen' ödra. 22 Ame he ka heifucin helâ me on ; anyin adre me he ka tha bunyen me utbayat, ke Adre me he ka o kâu me je giwa, helâ me tavat si utö. 23 Haingö Iehova, ka habe, adre me he ka sö anyin hnyot, ke ca hnân wâ ; anyin a ödra se hia hon ta je wahamon, ke ca hnân aú üseidra. 24 Ame he ka hmehma hluiny Aigupito ; adre me he ka hna e ka hnyi hnyamen tavat aten hwadrö. 25 Haingö Iehova tuhan sabaoth, Khongu Isaraela, ka habe, Wâ bi, oge me he ka bi hwaban kö Amona üheny No, me Farao, me Aigupito, tha e me je khongon, me je thaniny ; wale Farao, me tavat adre me labageju kâu : 26 ke oge me he ka hn' ödra ka hnyi hnyamen tavat adre me elâm he ka hling' ödra, me ka hnyi hnyamö Nebukaneza than Babulona, me ka hnyi hnyamen ta je athnyabainy : ke hwaban e adre me he ka labâ e helâ me hnyi je bong kâu adrem, haingö Iehova. 27 Ke haba u Jakob a athnyabaik, ca ot bi, me Isaraela, ca hlohlo bi : anyin a wâ bi oge me he ka omeli u ünyi hnyi dok ae sâkâú, me je mátrânâm ünyi hnyi hnyei waleji oge hum ödra ka hnyin ; ke ame he Jakob ka hmetu, me laba so me menâ, ke ba hmetu bi at ame he ka ootâ e. 28 Jakob, athnyabaik lö, ca ot bi, haingö Iehova ; anyin a tha inya möu : anyin oge me he bi ka ti ohia je hnyei hia waleji oge obö u ka hnyin, ke oge me ca he ka ti ohio u ; ke so bi oge me he ka nö u ge hna owisa, ke oge me ca he bi ka hnö u ke ba hwaban.

HNHYIMAKAN 47.

WALANG hofuc ho Iehova ame o kö Jeremia perofeta ge at Filisiti, k' ame tiga ca kot Gaza ga Farao.

2 Walang hna ha hnö Iehova, ka habe, Wâ bi, ame o but je köiö üheny hnyi hwa-drö, k' ame he ka wagewe ae uou, k' ame he ka khutu takou hnyei me ta je ünyi hia hnyin, me taun me tavat adre me labâ e : ke ame he tavat ka tenge, k' ame he tavat hia aten hnyei ka kuku göranyai. 3 Ke ame ca hwiö lakamen ka ta je lakudra, anyin ae sényin dut ta je hnyam, can hwan can haleny je hors ae hwege, me kec hwegeiny anyin je kariota, me lunginy anyin je waengen ; 4 can bong ame o he ka söh

at Filisiti hia, me subâ degecâ e hnyi Turo me Zidona ta je úhadruo a laba biju : anyin ame he Iehova ka söh at Filisiti, ta je kolon bomene Kafetori. 5 A o but hadreú ban kö Gaza ; adre me ohia Asekelona, kolon hnyigöulen anyidra bucen ; u me he ka kavi u bi ke ne o but kehö? 6 Hele vat anyi Iehova lö, ie üen u me he ka laba so? didrö hnyi tangâm, menâ ju, ke ca bwebwet bi. 7 U ma kâmâu ka laba so, ke Iehova ame hia but húna kâu? wale ge Asekelona me hobat köiö ; wale dok e ame kü.

HNHYIMAKAN 48.

GE Moaba. Walang hna ha hnö Iehova tuhan sabaoth, Khongu Isaraela, ka habe, Ekölö ge Nebo! anyin a hnyot dö ; a hmehma but Kiriathaima, adre me húgúnâ e : a hmehma but Misegab, k' adre hagutâ e. 2 E ba but hmetu hna ogânâ Moab : k' adre hia but penapena okongon hobi kâu bi hnyi Hesebona, haingödra, ka habe, Ate me he ka subâ degecâ e me me ca hnyei hmetu bi. Ke haba u Mademena lö, adre me he minya ka ohnyibú u ; k' ame he hele vat ka hnu u. 3 Hwan tenge ünyi Horonaim, adre me söh me ohia! 4 Adre me ohia Moaba ; adre me löng ütengien tavat ae úhnyükong eú hnyin. 5 Anyin adre me he ka he me tenge tot hnyi gethen ame ölö Lihith ai ; anyin a hnyi gethen adre me utut üheny Horonaim adre hia but löng tengeiny kuku hnyi hna ohia. 6 Kec dö, omeli öbun dö, me öbun e he ka helâ me üö ae ba lan hnyi hnyebuba. 7 Anyin a hnyi hnâm hna labageju ka ányâm ta je huliwa me tang omjehem, adre me he ka hum u minya : ke ame he Kemosâ ka hnyi bá me anyin tavat bihut, me anyin je taben. 8 Ke ame he ka utut at söh ka hnyi je taun hia, ke ame ca he ka möt ke taun ; ke adre me he ka okongoâ hnyegöulen bucen, me öba wan dok ae tha hon ; helâ me hna ha hnö Iehova. 9 Ham dö li labenyin kö Moaba, me me gâ me kec : ke ame he ka ba önyen je tauniny, ke ba bi aten. 10 E ka mok at ame mádrâ iyawoâ huliwa anyi Iehova, ke e ka mok at ame behân anyin hele vat ka hnyi dra. 11 Haba Moaba ame hia but laba menâ hwân ke tiga hidröu, me laba hon anyin je atmen, ke adre ca hingâlâ e ünyi hnyi ke kaia ka hnyi ka kaia, ke adre ca hia but hom hwe-

nbâ e : anyin a wale e bi hnebwiainy, ke ame ca wia bi bunen e. 12 Anyin a wale, wâ bi, ame he ka o je bong, haingö Iehova, me oge me he ka kunâ kâu tavat adre hingälâ, m' adre me he ka hingälâ e ; ke adre me he ka hingälâ hia únyi hnyi anyin je kaia, me oamamá anyidra je kaia. 13 Ke ame he Moaba ka hmehma ge Kimosa, helâji me lap anyi Isaraela ame hmehma ge Beth-ela, waleji adre me labageju kâu. 14 Ieú gabun öbun e ha, ka habe, Öhmun tavat hwege, me tavat khenen vat? 15 Adre kot hia thö Moaba, ke adre me he ka hnyi je taun, ke haba anyin je hidröu e ame úca, adre me he unyin tavat adre me he ka hling' ödra, haingen Than, Iehova tuhan sabaoth ien. 16 E hakekeny jut he ka o vec anyi Moaba, ke logot hmönyin dut okongon. 17 Öbun hia thithö tavat igigilö e, máng dö gan, ke öbun hia tavat ae khan' öbun ien, ha thö, ka habe, Ekölö a hmetru thö uci ae hwege, utö ae mec! 18 Hlu ame laba hnyi Dibona lö, utut úhem hnyi ányâm hmanenang, ke laba biju hnyi dok ae atgec; anyin ame o köu at ame söh Moaba, e ame ohia ányâm je hhabâ. 19 At ame laba hnyi Aroera lö, todru eü hnyi gethen me selâdrâ : hnö thö at ame kec me at ae möt, ka habe, Ieú adre hia but ányâ? 20 A hmehma but Moaba ; anyin adre hagutâ e : kuku thö göranyai me tenge ; ha thö e hnyi Arenona a ga aü hia but Moaba. 21 Ke ame o but hna owisa ka hnyi hnyei ae tha hon ; ka hnyi Holon, me Jahaza, me Mefath ; 22 me Dibona, me Nebo, me Bethe-dibela-thaim ; 23 me Kiriathaima, me Bethe-gamul, me Bethe-meon ; 24 me Kerioth, me Bozera, me je tauniny hia hnyin Moaba, dok ae sákâu me dok ae hakekeny. 25 Adre me subâ degecâ faoiny meno anyi Moaba, ke ame hmetru thö benyin, haingö Iehova. 26 Habelen ju ge grâg me me monu ; anyin a e ame bi gan kö Iehova : ke ame he Moaba ka seset hnyi huen hna hmita, ke adre me he ka wia e hnân hlumâ. 27 Ke hawa, u je ca hlumö Isaraela? adre me wâ e unyin tavat venöu? anyin a u je háia e me u je nyinyikâ bâm kâu. 28 Öbun tavat öbun e laba hnyi Moaba lö, hna but je taun, ke labâ thö je kic ; m' u me helâ me biny at ame bi umen uma hnyi baten hnyimen op. 29 Ohmun e löng ut bigan anyi Moab, a e gan hmâ hop ; k' ame begörany, ke bi gan, ke bemusi, ke khulelau hnyekon. 30 Haingö Iehova, ka

habe, Oge me wâ anyin wathethot ae únyi baú e ; ke ba troban ge hnen hna labö fuc bigan. 31 Anyin a wale oge me he ka kuku göranyai ge Moab ; eke, oge me he ka hongot tenge ge Moaba hia : adre me he ka tenge thungau ge at Kira-heres. 32 Vineiny Sibema lö, oge me he ka tenge gam ae nua hon útengiö Jazera : ame hanyâú köiö je angâm, me o ke ne o but köiö anyi Jazera : k' ame utut at söh ka hnyi ányâm je wan ae metu, me wan vine. 33 Ke adre hom degecâ senyin me hobâ únyi hnyi hnyei a wa so ke únyi hnyi hnyei Moaba, ke oge hia but öba waina hnyi hna hlec wan vine : e ba at ame he ka uti me hongot senyin ; haba hongot senyin, me helâ me ba hongot senyin. 34 Hwân hnyi Hesebona ke ne o but hnyi Eleala, me Jahaza, adre hia but hongot göranyai, ke hwân hnyi Zoara ke ne o but Horonaim ke ne o but hnyi Egelath-selisia, anyin ame he ka hme je aniny Nimera minya. 35 Ke haingö Iehova, ka habe, Oge me he ka ohia hnyi Moaba at ame bi hut hnyi dok ae görany, me at ame leú utö ae bo so ka je khongon. 36 Anyin a wale ame fuc hnyekuk helâ me utköwi ge Moaba, k' ame fuc hnyekuk helâ me utköwi ge at Kira-heres : anyin a hia but je kolon je únyi adre me hu. 37 Ke hadreú je bödra hia, ke adre giâ je waidra hia : e hu hwadeny hna kave hon je hnyam hia, ke ecmano ae gan nân hon je nyidra. 38 E hu hwan tenge hon je ban uma hia hnyi Moaba, me hnyi je getheniny : anyin oge hia but tho hmouca Moaba helâ me káiâ a ca hnân senyiná, haingö Iehova. 39 Nakainy hua hagutâ e ! nakainy hnödra hna kuku göranyai ! nakainy Moaba at ame hwiö but hoton ai anyin ae hmehma ! ke helâe ame he Moaba ka hnân hlumâ me ot ködra hia igigilö e. 40 Anyin a walang hna ha hnö Iehova, ka habe, Wâ bi, e ame he ka gâ helâ me aeto, me lau li labenyin ka Moaba. 41 Adre hüginâ Kerioth, ke ame hom uthmâhmâ je hhabâ, ke hnyi bong eling ame he hnyekon tavat hwege hnyi Moaba ka helâ me hnyekon momo ame he ka hnokoâ. 42 Ke adre me he ka kot Moaba me me ca he hmetu ka hnyei, anyin a e ame hia but bi gan kö Iehova. 43 E but unyâm ot me thop, me hnewe, at ame laba hnyi Moaba, haingö Iehova. 44 Haba at ame kec ge ot, e ame he ka ta ka hnyi thop ; ke haba at ame ölö únyi hnyi thop, ame he ka hnok hnyi hnewe ; anyin oge

me he ka oâ kâu, jia Moaba, huna adre sen' ödra lnyin, haingö Iehova. 45 Haba tavat adre kec adre me tot hnyi hmenu Hesebona ke ba tang hwegödra: anyin ame he but meic úheny Hesebona, me bâhlân meic únyi hnyi hnyin Sihona, me ame an baten wainy Moaba, me wanben ban tavat adre me imonumonu. 46 Ekölö gam Moaba! e kong ut at Kemosa: anyin adre hom lakom je бага m' adre me bâ, me lakom je hlu he ka bâ. 47 Ke so bi, oge me he ka ohmeto at Moaba úhedra hnyi hna bâ hnyi je bong a biliny, haingö Iehova. Wale hna owisa ka Moaba.

HNYIMAKAN 49.

GE je laku Amona. Walang hna ha hnö Iehova, ka habe, Hawa, e ba laku Isaraela? ke ba at he ka hwöhwanban? ke anyin a ieu ame hwöhwabö Gada hnö Malekama, ke ta je aten adre me labâ je tauniny? 2 Anyin a wale, wâ bi, ame he ka o je bong, haingö Iehova, me oge me he ka olungâ hnyi Raba iny lakon Amona hwan vat; me e ame he ka hna digic thâtûnyi ae ba önyen, k' adre me he ka thong degecâ ge meic lakon wahu: k' ame he Isaraela ka hom iny tavat waleji adre me hom iny, haingö Iehova. 3 Kuku tenge thö, Hesebona, anyin ae kong ut Ai; hongot dö göranyai wahu laku Raba, oweik' öbun ju ge ec mano ae gan nân: tenge thungau thö, me he monu hnyi je hak; anyin ame he ka bâ Malekama, tha e me anyin tavat bihut, me anyin ta je taben. 4 Anyin a ieu u me hobeluâ je hnyigöulen bucen, a ânyâm hnyigöulen bucen ame di, u hlu at ame labö kölu? a at ame labageju je omjehen me ha, ka habe, Ie at ame he ka he könya? 5 Wâ bi oge me he ka oâ ot köu, haingen Than Iehova tuhan sabaoth, únyi gadra hia tavat adre me igigili u; ke adre me he ka ob' öbun hnyi je ve cici öbun bi, ke ame he ka ba at he ka hlo tavat adre me he monu. 6 Ke hwaban e oge me he ka ohmeto je bâ anyin lakon Amona, haingö Iehova.

7 Ge Edoma. Walang hna ha hnö Iehova tuhan sabaoth, ka habe, Hawa, e ba hmetu metâ hnyi Temana? hawa, a au but hna khana bongon unyin tavat wâ wia? ke a hia but anyidra metâ? 8 Aten Dedana lö, kec hmetu ju öbun, laba ju hnyikânâi; anyin a oge me he ka oâ okongon Esau kâu, wale

hnyi üen oge me he ka senâ e. 9 Ame ne o köu tavat hlu wan vine, hawa, adre me ca he ka hna ke je wan ae wakhalet? ame ne o köu tavat venöu hnyi hnyinghet, me adre me ca he ka okongoâ únyi ae ücü ködra? 10 Ke oge me öba khauö Esau, oge me khöng je dok ae iyong gan, ke e ca khana bi he ka ikhâlâ e: adre me ohia ta je matrânyin, me je liamekeiny mē, me tavat ae hakekeny kâu, ke e ame hia but. 11 Hna but lakom a ga mokcu lakamödra, me oge me he ka tuö melidra; ke so e he ânyâm je safac ka labageju könya. 12 Anyin a walang hna ha hnö Iehova, ka habe, Wâ bi, haba tavat a ca hamödra he ka ijem kaia, e hnathu adre me he ka ijem; ke haba u, u at adre me ca he ka bi hwaban? ohe, u me ca he bi ka he ke ba hwabâm, e hnathu u me he ka ic. 13 Anyin oge hia but khemanyin gak bi, haingö Iehova, a ga me he Bozera ka hnân kuko, me haikongo, me ba wan, me hnân hangâ; ke ame he ka ba wan je tauniny hia nyiele balua. 14 Oge hia but löng úthumetu únyi ga Iehova, ke adre kunâ úthumetu ka hnyi je hnyei hia thithö, he ka ha, ka habe, Úkhacaköu thö, ke he thö kâu, ke todrö he ka vat. 15 Anyin a wâ bi, inya oge hia but wiö u mu me úhnyükong unyin je hnyei, me húkotiânen tavat. 16 Ame iyawö u bi nhen hnyekom ge hnâm hna ootâ, u at ame laba hnyi je khekheiny kic, me je dok ae göranyin bucen: eja ke ne u je ne ip hauâm ethö helâ me aeto, oge me he ka höi u úheny e, haingö Iehova. 17 Ke ame he Edoma ka hnân láia: ame he tavat hia adre me he hnyin ka kuko, me ju can hnân je aat hia. 18 Haingö Iehova, ka habe. E ba at ame he ka labâ e, helâ me hnyi hnödra hna ohia Sodoma me Gomora me je taun ae hakekenyâ, ke ame ca he ke at he ka me laba eling. 19 Wâ bi, e ame he ka ölö helâ me liona únyi hnyi hmanenanginy Joridano ka hnyi taun ae hwege, ke oge me he ka ie okecâ e úheny e; ke haba at adre me úca, oge me he ka otílâ e hon: anyin a ie at ae ücü mönya? ke ie at ame he ka thu üen könya? ke ie at tuö mamoe ame he ka tot hnyi hnyimakök? 20 Anyin a wale löng ju öbun hna únyküme hnö Iehova, waleji e ame únyküme ge Edoma; me je únykümenen waleji e ame únyküme ka tavat adre me laba hnyi Temana: E hnathu adre me he ka lili ödra, wale tavat ae úhnyükong hnyi hna hat meno; e hna-

thu e ame he ka öba wan je hnyabadra. 21 Ame jijing ut hmeledrany hnen hwan ütandra; e hu hwatenge, adre me löng e hnyi Köiö ae Dra. 22 Wá bi e ame he ka ölä me gá helá me aeto, me lau li labe-nyin ka Bozera: ke hnyi bong eling ame he je hnyekon je tavat ae hwege hnyi Edoma ka helá me hnyekon momo ame he ka hnokoa.

23 Ge Damaseko. Ame hmehma but Hamath me Arefada; anyin adre me hia but löng je uthumetu ae kong, k' ame oaü ödra but: e bi hlöuhlöu hon köiö, ke ca khana bi he ka ta hau. 24 Ame sēnyin dut Damaseko, e ame hwiö he ka kec, ame kät e ge öbubuny: k' ame o but káu hlöuhlöu me vec helá me momo ame vec hnyekon. 25 Ieü adre ca hni degecá gan taun ae lung, taun oge me senyin káu? 26 Anyin a wale ame he ka ta wahidrouiny hnyi je getheniny, ke ame he ka mok hia aten vat hnyi bong eling, haingö Iehova tuhan sabaoth. 27 Ke oge me he ka hú meic hnyi hak vetoiny Damaseko, k' ame he ka an je uma ae únyi hnathu umö Ben-adada.

28 Ge Kedara, me je dökhü hnyi Hazora, waleji hnö Nebukaneza than Babulona hna kot.

Walang hna ha hnö Iehova, ka habe, Todr' öbun, he thö Kedara ai, me söh tavat e deiö. 29 Adre me hügüná umödra je uma mano, me haledra je hna hat mamoe; adre me he ka hom hobi ködra bi singidra je mano, me anyidra je kaia hia, me haledra je kamela: ke adre me he ka hongot ködra, ka habe, Únyi hnán outen hnyi je ke keihen hia. 30 Öbun tavat aten Hazora lö, kec dö, he sákáu ai, laba ju hnyikánái, haingö Iehova; anyin a hia but úhnenamö gabun Nebukaneza than Babulona, me únykúme hna ányá köbun. 31 Todrö, ke he th' öbun ka hnyi hnyei ame laba so, k' adre me labá ke ba hmak, haingö Iehova, tavat ae ba hlinginy hwanuma me ohmáiny, k' adre me hake laba. 32 Ke haba haledra je kamela, me hnán hügüná bi, ke hnán söh bi úsēny haledra omeno: ke oge me he ka ovesea ka hnyi je ang tavat adre me giá ke keihen waidra; ke oge me he ka oaü anyidra vec úheny hnyi je ke keihidra, haingö Iehova. 33 Ke haba Hazora me hnán uma umen je lukö, ke ba wan nyiele balua: ame ca he ke at ka laba eling, k' ame ca he nokon at ka me laba eling.

34 Hofuc ho Iehova ame o but kö Jeremia profeta ge Elama, hnyi hna hwán musi a Zedekia than Juda, ka habe, 35 Walang hna ha hnö Iehova tuhan sabaoth, ka habe, Wá bi oge me he ka thu cafana anyi Elama, wale úbeönuainy hwegiödra. 36 Ke oge me he ka oaü kö Elama je ang a vak hnyi vak ta ke keihen drany, ke oge me he ka ovesei ödra ka hnyi vak ta ang hia; ke ame he ka ba hnyei ame ca he ka o ka hnyin hnödra hna obá únyi hnyi Elama. 37 Ke o ge me he ka ootá at Elama hnyi hnyimakan je iwahuaiahmiöny mödra, me hnyi hnyimakan tavat adre me elám he ka hling' ödra: ke oge me he ka oaü ködra okongon, wale anyik hmönyin ae hwege, haingö Iehova; ke oge me he ka kuná hotudra hele vat, ke ne o but oge hia but ohí' ödra: 38 ke oge me he ka otílá anyik theron hnyi Elama, ke oge me he ka ohia eling than me je taben, haingö Iehova. 39 Ke haba hnyi je bong a biliny, oge me he ka ohmeto at Elama úhedra hnyi hna bá, haingö Iehova.

HNYIMAKAN 50.

HOFUC ame ha Iehova ge Babulona me hnyei Kaledaia a deny Jeremia perofeta.

2 Haimemená thö unyin ta je hnyei me omanena thö, me otílá thö ke haten; omanená thö, ke ca ikhála bi: ha thö, ka habe, Adre hügüná Babulona, a hmehma but Bel, e hlohlo but Merodaka; e hmehma but anyin je hnatheat, e hlohlo but je idolainy. 3 Anyin ame o ke hnyei úcon únyi hnyi hwadrö, ame he ka öba wan iny hnyei, e ba at ame hé ka labá e: adre kec ut, e hi' ödra, wale at me meno. 4 Hnyi je bong eling me úen e, haingö Iehova, ame he ka o je lakon Isaraela, tha ödra me je lakon Juda, adre me he ka he me tenge tot, me elöm Iehova Khongudrin. 5 Adre me he ka hnö ge Ziona me hnyimaködra káe, me ha, ka habe, Ai öbun, ate me he ka úkhacaköu unyi Iehova, hnyi úhihinyköu a nyiele balua, ke ca hnán hnying.

6 Haba je lakeik a hia but helá me je mamoe a hia, a omonu ödra hnen tavat tu' ödra, adre hia but hna degeci ödra hon je bucen: adre me he monu hon je bucen me je hut, adre hnying ut hnödra hna mená. 7 Ame hia but ön ödra hnen tavat hia adre me ö'dra: ke haingen je iwahnaihmöny mödra, ka habe, Ohmun ca kong

anyin adre hia but ânyâ hulö kö Iehova, a hnyaban wisa, wale Iehova hna gejon hnen lakamödra. 8 Kec dö únyi hnyi hnyin Babulona, ke he but únyi hnyi hnyeí Kaledaia, ke helâ ju öbun me je got бага a hnyimakan hna hat meno. 9 Anyin a wâ bi oge me he ka bwebwet, me oâ ka Babulona ta je hnyeí ae gan ke se hia úheny hnyi hwadrö : ke adre me he ka tot metâ kâu ; adre me he ka hom e úheny e ; ame he anyidra je fana ka helâ me je fana anyin at ae hwege ae khenen vat ; e ba at gadra ame he ka hmetu baú. 10 Ke adre me he ka söh Kaledaia : ke ame he ka sekudra hia tavat adre me söh e, haingö Iehova. 11 Anyin a öbun e senyin me hobâ, tavat adre me soh ik, anyin a öbun e ututut helâ me nak kau at ame uto wan hwit, me kuku helâ me je hors ae hwege ; 12 ame he hinyöbun ka hmehma gan hmâ ; ke ame he ka hlohlo at ame hnöku öbun : wâ bi, e ame he ka hnyeí a biliny, hnye-buba, me atgec, ke hnyot ut. 13 Can hmönyin anyi Iehova adre me ca he ka labâ e, ke e ame he hia ka ba wan : ke adre me he ka láia tavat hia thithö tavat adre me he hnyi Babulona, me jú, can ta je okongon hia thithö. 14 Tot metâ thö ka Babulona igigilö, öbun hia thithö tavat hlöu cafana ; hlec ut kâu, ca behânâ je fana : anyin a e ame hia but ânyâ hulö kö Iehova. 15 Hongot dö göranyai kâu igigilö ; a ngâ but ; a kölu but je hak, k' adre kia thö je hna up haginý : anyin a waleling hmönyin anyi Iehova ; bi hwaban ju kâu ; ânyâ thö kâu helâ me lnen hna ânyâ. 16 Suba degecâ but at ame tã úheny Babulona, me at ame huliwa ge únyi hnân subö hwit hnyi úen menu : adre me he ka ve hnyimaködra ka hnyi je idra, me ve kec ka hnyi idra je hnyeí, can hele vatiny úöveci.

17 Isaraela mamoe adre oveseâ ; ame alen e hnen je liona : a bán than Asuria ka an e ; ke a biliny Nebukaneza eang than Babulona ame thö je jeien. 18 Anyin a wale, walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka bi hwaban ka than Babulona me iny hnyeí, helâji me hnök hna bi hwaban ka than Asuria. 19 Ke oge me he ka ohmetu Isaraela ka hnyi hnyaban ; ke e ame he ka han tot hon Karemela me Basana, ke e ame he ka han me sekon hon je hut hnyi Eferaima me Gileada. 20 Hnyi je bong eling me hnyi úen e, haingö Iehova,

adre me he ka elâm hulö anyin Isaraela, ke ba but : me je hulö anyin Juda, ke adre me ca he ka wâ : anyin oge me he ka thang je monu anyin tavat oge me hna me hnân kolon.

21 He thö ka hnyi hnyeí Merathaim, he ka vat mē, me úcon tavat adre me laba hnyi Pekoda : hlingâ ju me ti ohia hwa-bödra, haingö Iehova, ke ânyâ hia thö helâji me hnök hna húna köu. 22 E hu hwan vat hnyi hnyeí, me úokonguny ae gan. 23 Nakainy, hna thu hmetro hamainy hmeledrany hia ! Nakainy Babulona a ba wan anyin je hnyeí ! 24 Oge hia but töu hnewem, me u me hnok dö Babulona, ke e ca khanö u bi : adre me ö u me köt u minya, anyin a u je vat me Iehova. 25 Haba Iehova ame hia but khöng anyin je uma omjehen vat, me hom but únyi hnyeí je únyi hnân vat hnyi anyin hmönyin : anyin ae hu huliwa anyin Than Iehova tuhan sabaoth, hnyi hnyeí Kaledaia. 26 Ai öbun kâu úhebun hnyi je dok ae sâkâú, khöng ut je omjehen ; jien dö e göranyai helâ me hna digic thatúnyi, ke ti ohia e ; me me ba but kolon. 27 Hlingâ but haleny je bolok hia ; e so adre me he ka hnyi hna hlingâ : ekölö gadra ! anyin ame o but bongudra bong, úen senâ e. 28 Ifucin tavat adre me kec me tavat ae möt únyi hnyi hnyeí Babulona, m' adre me haime-menâ hnyi Ziona hna bi hwaban hnö Iehova Khonguta, wale hwaban ge umen uma kap. 29 Hawâ úkhacakouâ thö ka Babulona tavat hlic fana, tavat hia adre me hlöu cafana ; hunuma ju igigilö e ; ca hna ke at ka kec möt : ham dö kâu helâ me anyin huliwa ; ânyâ hia thö kâu helâ hiaji me hnen hna ânyâ : anyin a e ame hia but hwege hnyimakan kö Iehova, Kabi Isaraela. 30 Anyin a wale ame he ka ta hnyi ta je getheniny wahidröuny, ke adre me he ka ohia anyin tavat vat hia hnyi bong eling haingö Iehova. 31 Wâ bi, iny iwahnai-hmiöny möu, u at bigan, haingen Than. Iehova tuhan sabaoth : anyin ame o but bongom bong, wale úen oge me he ka senö u. 32 Ke ame he ka haú me ta at ae bigan, ke ba at ame he ka hai hmetu e : ke oge me he ka hú meic hnyi tauniny, k' ame he ka an e igigilö hia.

33 Walang hna ha hnö Iehova tuhan sabaoth, ka habe, Adre me tha ovecâ lakon Isaraela, me lakon Juda : ke adre me köt ödra hnen tavat adre hwenb' ödra ; adre me höcö ke ka hn' ödra. 34 E hwege at

ame úcú melidra; Iehova tuhan sabaoth ien: e ame he ka ti ivinö hobi ködra, me me he ka omená hmeledrany, me oöbubunyá tavat adre me laba hnyi Babulona. 35 Ke haingö Iehova, ka habe, E hu hele vat hon at Kaledaia, ke hon tavat adre me laba hnyi Babulona, ke hon anyin je taben, ke hon anyin tavat ae metá. 36 E hu hele vat hon tavat bigan thoi, ke adre me he ka monu: e hu hele vat hon anyin tavat ae hwege, ke adre me he ka hlohlo. 37 E hu hele vat hon haledra je hors, ke hon anyidra je kariota, ke hon tavat hia ae ve bongon hnyi wanben, k' adre me he ka helá me omomo: e hu hele vat hon tangen tang omjeú, ke adre me he ka hügúná. 38 E hu bongon ihmeiny hon köien je köihnam, k' ame he ka hwahwacit: anyin a e hnyeiny ta je hnatheat, k' adre me ti hobá je idola. 39 Anyin a wale ame he je menoiny hnyot me je luko ka tha labá e, k' ame he ta je iaena ka laba eling: ke ca hnân hmetu bi hnyaba nyiele balua; ke adre me ca he ka labá hnyi ke dö me ke dö. 40 Heláji me hnen Khong hna ohia Sodoma me Gomora me je taun ae hakekenyá, haingö Iehova; heláe minya ame ca he hmetu ke at ka laba eling, ke ame ca he ke nokon at ka me labá e. 41 Wá bi, ame o but tavat úhedra hnyi hwadrö; ke hnyeí ae gan, me je than ae se hia ame he ka bwebwet únyi hnyi je can hmeledrany. 42 Adre me hok cafana me ö; ödra tavat beovecá, ke ca tren ibetengjö; ame mea ifucidra helá me köiö, ke adre me tabö hors; adre me ve tot metá, helá me útilen at hnyi vat, he ka vat möu hlu nokon Babulona. 43 A löng ut than Babulona ge úlungidra, me ame sényin li hnyamen; ame khaú ju e hnen hlóuhlóu, me vec helá me momo ame vec hnyekon. 44 Wá bi, e ame he ka ölö helá me liona únyi hnyi hmanenanginy Joridano ka taun ae hwege: ke oge me he ka ie okeci ödra gan; ke oge me he ka otílá hon, at adre úca: anyin a ie at ae úcú mönya? ke ie at ame he ka thu úen könya? ke ie at tuö mamoe ame he ka tot hnyi hnyimakök? 45 Anyin a wale löng ju öbun hna únykúme hnö Iehova, waleji e ame únykúme ge Babulona; me hnen je hna únykúme he ka ányá waleji e ame ip hmâ he ka ányá ka hnyeí Kaledaia, ka habe, E hnathu adre me he ka lili ödra, wale tavat ae úhnyúkong hnyi hna hat meno; e hnathu e ame he ka öba wan hnyabadra mödra. 46 Hnyi hwan hna kot Babulona ame öbubuny hme-

ledrany, ke adre me löng útengien hnyi ta je hnyeí.

HNYIMAKAN 51.

WALANG hna ha hnö Iehova, ka habe, Wá bi oge me oá úcon Babulona, me úcon tavat adre me laba hnyi Leb-kamai, ang at ame ohia. 2 Ke oge me he ka kuná Babulona ai je atkanyua, tavat adre me he ka ulec e; ke adre me he ka öba önyen hnyeí: anyin adre me he ka ve tot káu igigilö hnyi bonginy vec. 3 E so ame ca he at hlic fana ka lau anyin cafana, ke so e ame ca he ka hobelúa anyin úkhaúen vat: ke ca he öbun ka omelö wahidróuiný; kot hia thö anyin utbavat. 4 Ke adre me he ka ta a ta je hna kot hnyi hnyeí Kaledaia, me je hna dáoa hnyi je getheniny. 5 Anyin a ca degec Isaraela me Juda hnen Khongon, a Iehova tuhan sabaoth; eja ke ne a ne unögöt idra hnyeí ge hulö ka Kabi Isaraela. 6 Kec ut únyi hnyi Babulona, ke ve omeli öbun dö; ca he öbun ka hnyi mok hnyi anyin bi hulö: anyin a úen dut ang bi hwaban ga Iehova; e ame he ka ham káu hwaban. 7 Babulona ehac, me heláji me kaia gol hnyi hnyamö Iehova, k' ame omono hmeledrany hia: k' ame hia but ijem wainainy ge ta je hnyeí; anyin a wale ame monu thö ta je hnyeí. 8 Ame ie ta but Babulona me aú but: kuku tenge thö gan; hok basama thö hnân eny anyiu vec, k' ame ne he la ka möt. 9 Ate me beomeli Babulona, k' ame ca möt bi: hna but e, ke ate me he ka ve he ka hnyi ta je ita; anyin a haba hwaban bi, me ke ne o but ka hnyi drany, k' ame o but ka hnyi ta je úlá. 10 Haba Iehova ame hia but oá hwakecita ae wiša: ai öbun m' ate me he ka ha gaga hnyi Ziona huliwa anyi Iehova Khonguta. 11 Khet ju je fana; kât hma ju je bec: Iehova ame otílá hanon je than Madai; anyin a haba hnen hna únykúme ge Babulona, he ka ohia e: anyin a wale hwaban únyi ga Iehova, a hwaban umen uma. 12 Otílá thö haten hon hna up veto hnyi Babulona, ohmá ju tavat adre me hmáká, otílá thö tavat tue, penapena thö he ka khöu mokut: anyin a Iehova ame únykúme me ányá, waleji hnen hna ha ge tavat adre me laba hnyi Babulona. 13 At ame laba hnyi je köiö ae se hia, me tren omjeú ae gan, ame o but obiny köu, tulutiny behnyekon a u. 14 Haba Iehova tuhan sabaoth ame khem-

anyin gan bi, ka habe, E hnathu oge me he ka ounöngöti u ge at helâ me je waha-mon; ke adre me he ka hongot göranyai úcom.

15 E ame hia but op drany ge maniny man, me otílâ hmâ ta je hneyi ge anyin metâ, me ulolo drany hnen anyin wâhma-khmeto: 16 e ame fuc me ame bwebwet bi ta je köiö hnyi drany, ke e ame oâ hai únyi hnyi je can hmeledrany; e ame op hucuce hobi kâu we, me oâ ang únyi hnyi tangen omjeú. 17 Ödra monu hia tavat, tavat ae ca khan' ödra; ame hmehma but tavat hia huliwa gol can anyidra bi hna-theat: anyin a thoi but anyin idola adre oköiâ, ke ba homená eú hnyidrin. 18 Ödra ta je únyi baú, huliwa hnân hlumâ: ame he ka hi ödra but hnyi úen adre me sen' ödra. 19 E ca helâe jekhóú Jakob; anyin a e at ame op hia; ke Isaraela tri-buiny a wajekhon: Iehova tuhan sabaoth ien.

20 U anyik utóhmu me anyik únyi hnân vat: oge me he ka hum u hnân he ka tho oamamá je hneyi; me ohia je dökhú; 21 ke únyi gam oge me he ka tho oamamá hors me at ame tabâ; me oamamá kariota me at ame tabâ; 22 ke únyi gam oge me he ka oamamá obaga me omomo, me oamamá hingat me thóth; me oamamá hidróu me hlu; 23 ke oge me he ka oamamá at tuö mamoe me hnahat meno unyin, únyi gam; me oamamá at ame hwiö kânâ me li bolok unyin, me oamamá je gavena me je taben. 24 Ke oge me he ka bi hwaban kö Babulona, ke tavat hia adre me laba hnyi Kaledaia ta je monu hia waleji adre ányâ hnyi Ziona hnyi hnyimaköbun, haingö Iehova.

25 Wâ bi, bucen lö at ame okongo, e ve inya but möu, haingö Iehova, u at ame okongo hia hmeledrany: ke oge me he ka lau hnyamök hom, me hagutö u únyi hnyi hon je kic, me wiö u hnân bucen adre thong. 26 Ke adre me ca he ka hom unyâm veto hnân ban bahebet, me veto hnân taben; ke u me he ka ba wan nyiele balua, haingö Iehova. 27 Otilâ thö boúðila hnyi hneyi, tûâ thö trutru hnyi je hneyi, penapena thö je hneyi kâu, hawâ úkhaca-köuâ thö kâu ta je dökhúiny Ararata, me Mini, me Asekenaza: otílâ thö ke taben vat kâu; oâ thö je hors helâ me je wahamon ae újejong. 28 Penapena thö je hneyi úcon, wale je tuhan Madai, me anyin je gavena, me anyin je taben hia, me je hneyi

hia e ame musö. 29 Ke ame öbubuny hneyi me vec: anyin ame tethmâ je hna únyküme hnö Iehova ge Babulona, he ka öba wan hneyi Babulona, ke ba aten. 30 Ame ca bevat hnen tavat hwege hnyi Babulona, adre me laba hnyi hnyin je hnaabâ: e ba but tang hwegiödra; ödra úcú me omomo: a thong ut je hnyabadra; ke a mou thö ta je ohmäiny. 31 Ame he ke at ame wadring ka iouny me ke at ame wadring, k' ame he ke úthumetu ka iouny me ke úthumetu, he ka thumeto than Babulona a g' adre hia but kot anyin taun hnyi je ke keihen hia: 32 ke adre me hügúnâ je gethen, me thong je sahlowe ge meic, k' ame seon bi tavat vat.

33 Anyin a walang hna ha hnö Iehova tuhan sabaoth, a Khongu Isaraela, ka habe, Haba hluiny Babulona, me helâ me hna huje hwit hnyi úen adre me ututo e; ke meokhaca me ame he ka o but kâu úen menu. 34 A hia but ön nya hnö Nebukaneza than Babulona, e ame hia but ohmöiöngi nya, e ame wiö nya me kaia ae ba önyen; e ame utö nya helâ me tannimo; e ame osekunâ e ge anyik ta je únyi ae ti senem; e ame obö nya kâu. 35 Ame he ka ha hnen at ame laba hnyi Ziona, ka habe, E so ame he ka mokut hon Babulona hna okongu nya me je liame-keiny mönya; k' ame he Jerusalema ka ha, ka habe, Ame he drök ka mokut hon tavat adre me laba hnyi Kaledaia. 36 Anyin a wale walang hna ha hnö Iehova, ka habe, Wâ bi, oge me he ka ivinö hobi köu, me bi hwaban hobi köu; ke oge me he ka ohmö anyin köiö, me ohmö anyin hna pupua. 37 Ke ame he Babulona ka helâ me hna digic thatúnyi, ke hnyaban ta je luko, a hnân láiâ, me ju, ke ba at ame he ka labâ. 38 Adre me he ka tha kuku helâ me je nokon liona. 39 Ödra ka kahwa me oge me he ka bi jeú hobi ködra, me omonu ödra ge grág, m' adre me he ka hobâ, me mokut nyiele balua, me ca hmak hmetu, haingö Iehova. 40 Oge me he ka hum ödra helâ me lakon mamoe he ka hling' ödra, helâ me je mamoe бага me je got бага. 41 Nakainy hna hügúnâ Sesaka! k' ame ie utut hnen hna oganá hnen hmeledrany hia! Ekölö, e ba but wan Babulona unyin je hneyi hia! 42 Ame khibi thö köiö hon Babulona, ame khutu takou e hnen je waköiöny ae se hia. 43 A hnyot ut anyin je taun, hneyi ae hwahwacit, me hnyebuba, hneyi ae ba at ame he ka

labā, k' ame ca he hnyin ke nokon at. 44 Ke oge me he ka bi hwaban kö Bel hnyi Babulona, ke oge me he ka hom hmetu únyi hnyi hnyimen únyi e ame hia but utá; ke ame ca he ka o káu je hnye: eke, ame he ka ta but hna up veto hnyi Babulona.

45 Lakeik lö, he th' öbun únyi hnyi hnyin e, m' öbun e ve möt únyi ge hmönyin anyi Iehova ae gan hmá. 46 Ke ca sēnyin bi je hnyekubun, me outen úthumetu adre me he ka löng hnyi hnye; anyin ame he ka o úthumetu hnyi huna eang, ke hwaban huna ang ame he ka o ke úthumetu me úkonguny hnyi hnye, ke taben ame ve e me ke taben. 47 Anyin a wale, wá bi, ame he ka o je bong ke oge me he ka bi hwaban ka je hnatheat anyin Babulona, ke ame he ka hmehma hnyeiny hia; ke ame he ka ta je hna kot hia hnyi wanben e. 48 Ke ame he drany me hmeledrany me ta je únyi hnyin ka khumöng senyin hon Babulona; anyin ame he ka o káu je tavat söh únyi hnyi hwadrö, haingö Iehova. 49 A hia but Babulona ota je hna hlingá a at Isaraela, helâe ame he ka ta je hna hlingá hnyi Babulona hnyi hnye hia. 50 Öbun tavat öbun e kec möt ge hele vat, hele thö, ca tot bi; únykúmi Iehova thö únyi hnyi dok ae sákáú, e so e kú Jerusalema eú hnyi je hnyekubun. 51 Öhmun e hmehma but anyin a öhmun e löng hna úhaikonguny; ame tube je hnyimaköhmun hmehma: anyin a haba je atkanyua adre me o but ka hnyi je dok a kabiny uma umö Iehova. 52 Anyin a wale, wá bi, ame he ka o je bong, haingö Iehova, ke oge me he ka bi hwaban ka anyin je hnatheat; ke ame he tavat ae aat ka vec hnyi hnyeiny hia. 53 Eja ke ne a ne ölö hnyi drany ai Babulona, ke eja ke ne a ne ohmá je dok a göranyin ae hwege, ame he ka o káu únyi gak tavat söh, haingö Iehova. 54 Hwan kuku tenge únyi Babulona, me úkonguny ae gan únyi hnyi hnye Kaledaia! 55 anyin a Iehova ame söh Babulona, me ohia únyi hnyin e hwan ae gan; ke ame mea je waköiöiny helâ me je köiö ae se hia, ame fuc ut hwan: 56 anyin ame o but káu, wale ka Babulona at söh, ke adre me hom but anyin tavat hwege, ame hmetru thö anyidra je cafana: anyin a Iehova Khong at ame bi hwaban, e ame he bi ka bi hwaban. 57 Ke oge me he ka omono je tuhan me tavat unyin ae metá, me je gavenainy me anyin je taben, me tavat unyin ae

hwege; ke adre me he ka mokut nyiele balua, me ca hmak hmetu bi, haingen Than, Iehova tuhan sabaoth ien. 58 Walang hna ha hnö Iehova tuhan sabaoth, ka habe, Adre me he ka tho degecá je haginny ae lau adre op hnyi Babulona, k' adre me he ka thong ge meic je hlinginy homagöuleny ae görany; ke ame he tavat ka hulliwa hnân únyi baú, me je hnye hnân meic; ke adre me he ka sēnyin.

59 Walang hofuc ame huna Jeremia perofeta kö Seraia, nöku Neria, nöku Maseia, waleji hnyi nhen hna tha he me Zedekia than Juda Babulona ai hnyi huna a vakiny anyin musi. Haba Seraia, me wale at musö hnyaban than. 60 Ke haba Jeremia ame sihnalimen hnyi tusi ta je únyi ae kong ame he ka o kö Babulona, wale ta je hofuc eang hia waleji adre me sihnalimen ge Babulona. 61 Ke haba Jeremia ame ha kö Seraia, ka habe, U ka o but hnyi Babulona, me wá ju, me áú ta je hofuc ang hia, 62 me ha, ka habe, Iehova lö, u je ha ge dok ang he ka ohia, me me ca he ke at ka labā, ame ne at, ame ne meno, ke ame he ka hnyot nyiele balua. 63 Ke u ka um dö áú tusi ang, me u me he ka húkölö veten me khûá e ka hnyi wanben Euferate: 64 ke u me he ka ha, ka habe, Ame he Babulona ka dit helâe, ke ame ca he bi ka höhöi can okongon oge me he ka oá káu: ke adre me he ka sēnyin.

A um dö je hofuc ho Jeremia.

HNHYIMAKAN 52.

TWENTE wan dut je hunai Zedekia hnyi úene ame hwân he ka musi; ke e ame musi eleven je huna hnyi Jerusalema: ke haba ien hinyen, me Hamutala a nöku Jeremia at Libena. 2 Ke e ame ányá hulö hnyi hnyimakö Iehova, helâji me hna ányá hia ga Jehoiakima. 3 Anyin a can hmönyin anyi Iehova adre me ányá ka Jerusalema me Juda ke ne o but ame digic ödra hnyi hnyimakan: ke haba Zedekia ame úkhin fuc ka than Babulona. 4 Ke haba hnyi huna a naininy anyin musi, hnyi tehi a teniny, hnyi bong a teniny tehi, haba Nebukaneza than Babulona ame o but hnyi Jerusalema, e me anyin utbavat hia, me hunuma cicö e; ke adre me otílâ je taben vat igigilö. 5 Ke adre me igigilö taun ke ne o but hnyi huna a eleveni Zedekia than. 6 Haba hnyi tehi a vakiny, hnyi bong a naininy tehi, e gan hmá hmiá

hnyi taun, ke ba but an tavat. 7 Ke adre me kia taun, me ame kec tavat vat hia me he but hnyi hnyinghet únyi hnyi taun adre gethen hnyi homagöulen wanben li hak adre up veten, hnyi utkánâ anyin than; (ke e bi at Kaledaia igigilö taun:) ke adre me kec hnyi gethen úheny hnyi dok ae tha hon. 8 Ke haba utbavat anyin at Kaledaia, me adre me hnu than, me khöü Zedekia hnyi je dok ae tha hon hnyi Jeriko; ke ame vese but anyin utbavat gan. 9 Me adre me kât than, me hom e ka than Babulona Ribela ai hnyi hnyeí Hamath, me e ame owisa kâu. 10 Ke haba than Babulona ume hlingá je laku Zedekia hnyi hnyimakan; ke e ame hlingá minya je taben Juda hia hnyi Ribela. 11 Ke e ame úâ li emakö Zedekia; ke haba than Babulona me ame ca e ge fao, me hom e Babulona ai, me ip e hnyi uma ceat ke ne o but bong e ame mokcu hnyin.

12 Ke haba hnyi tehi a thabúnginy hnyi bong a teniny tehi, wale huna a naintini Nebukaneza than Babulona, ame o but Nebuzaredana hnyi Jerusalema wale taben tavat tue, at ame tot hnyi hnyimakan than Babulona: 13 ke e ame thong degecá uma umö Iehova, me uma umen than; ke e ame thong degecá ge meic ta je uma hia hnyi Jerusalema, wale je uma ae gan hia. 14 Ke haba utbavat hia anyin at Kaledaia unyin taben tavat tue, me adre me kia degecá hna up veto hnyi Jerusalema igigilö. 15 Me haba Nebuzaradana taben tavat tue ame hom bâ ke je hnyat ae theduoc me je kolon tavat a hnen biju hnyi taun, me tavat kec waleji adre me ut ka than Babulona, me ke je hnyat minya a je kolon. 16 Ke haba Nebuzaradana taben tavat tue ame ip biju keihen ae ti theduoc hnân tuö je hnyeí vine me tavat belök. 17 Ke haba li hmolom bras hnyi uma umö Iehova, me je taben, me taben köiö a bras hnyi uma umö Iehova, at Kaledaia adre tho amamá me hom brasiny hia Babulona ai. 18 Adre me hom minya je öt, me je soi, me je uthesiún, me je kaia, me je spun, me je omjehen bras hia waleji adre me huliwa kâu. 19 Ke haba taben tavat tue ame hom je utkaia, me je taben meic, me je kaia me je öt, me je taben lamepa, me je spun, me je kaia; adre hom goliny je únyi ae gol, me silevainy je únyi ae sileva. 20 Haba li hmolom, ke khaca taben köiö, me je bolok bras a twelv eú hnyi hmelen je taben, waleji hnö Solomona than hna ányâ hobi kâu

uma umö Iehova: e ca hnân tuluto úhmakiny bras hnyi ta je únyi hia eling. 21 Ke haba li hmolom, me eitiny kubit ibeüen göranyai hmolom; ke a wádrá e ge tö a twelv kubit; ke haba úbakiny me vak ta banyen; e moku hnyin. 22 Ke e hu ethö hon e ban a bras; ke faiv kubit ibeüen göranyai ban, tha e me boert me je rimona hon ban igigilö, bras hia: ke belæ hmolom a loiny ae hu e me je rimona. 23 Ke úsa nainte siks je rimona hnyi je baten; haba ta je rimona hia hnyi boert igigilö, me wan haded. 24 Ke haba taben tavat tue ame hum Seraia at bihut ae beönuá, me Zefania at bihut a loiny, me je hnyat a kun hnyat tuö hwanuma: 25 ke e ame hom únyi lnyi taun ke eunuka at ame musö tavat vat; me tavat a seven tavat ödrin e wá hnyimakan than, wale tavat adre wá hnyi taun; me at sihnalimeu anyin taben utbavat, at ame úkhaçakönâ tavat aten hnyeí; me tavat a sikste adre wá hnyi taun unyin aten hnyeí. 26 Ke haba Nebuzaradana taben tavat tue ame hum ödra, me hum ödra ka tuhan Babulona Ribela ai. 27 Ke haba than Babulona ame kot hling' ödra hnyi Ribela hnyi hnyeí Hamath. Me adre me hom hwenbâ at Juda únyi hnyi idra hnyeí. 28 Walang tavat a hom Nebukaneza a je bâ; haba hnyi huna a seveniny, me ödrin theri thauzan ke twente theri at Juda: 29 haba hnyi huna a eitini Nebukaneza, me ödrin eit haded ke thöte tu e ame hom bâ úhedrin Jerusalema: 30 ke haba hnyi huna a twente theri Nebukaneza, me Nebuzaradana taben tavat tue ame hom bâ at Juda, a ödrin seven haded ke fâte faiv: ke haba úseiny tavat hia me fou thauzan ke siks haded.

31 Ke haba hnyi huna a thöte seveniny bâ a Jehoiakin than Juda, hnyi tehi a twelviny, hnyi bong a twente faiviny tehi, me haba Evile-merodiak tuhan Babulona, hnyi huna a hwân hnyin anyin musi, me e ame ogöranyâ bö Jehoiakin than Juda, me hom e únyi hnyi uma ceat; 32 me e ame ha hofuc ae menyik kâu, me ogöranyâ anyin theron hon je theron anyin ta je than unyin hnyi Babulona. 33 Ke e ame bi hnen anyin je úkhaüen uma ceat, ke e ame hnyi han mē hnyi ta je bongon hia anyin möt. 34 Ke haba jekhon, me adre me labö khene jekhon unyin than Babulona, hnyi ke bong me ke bong ke ne o but hnyi bong e ame mokcu hnyin, a je bongon hia anyin möt.

JE TENGE ANYI JEREMIA.

HNYIMAKAN 1.

NAKAINY taun ame hake laba, waleji ae unöngöt ge at!

Ke helâ me momo a safac ut walang ang!

Waleji ae gan unyin ta je hnyei, ke momo than unyin je ke keihen hnyei, K' ame bi fat walang ang!

2 E ame tenge gan hmâ hny hnyinghet, ke e hnyi li wahicen deköien;

E ba at hnyi je lawaeny hia he ka otubwelâ e:

K' ame iyawâ e je liamewaeny më, K' adre me bi iwahnaihmiöny më.

3 A bâ but Juda can töveci me huliwa ae hmak;

E ame laba unyin je ethen, k' ame ca wâ bi hna menâ:

Haba tavat hia adre me ovecâ e, me adre me khaú e hnyi dok ae hnek.

4 Ame tenge je getheniny Ziona, anyin ame ca o tavat ka hnyi úkhacaköu ae únyi hnathu;

E ba but at hnyi je homagouleny hia, k' ame mâng anyin tavat bihut:

Ame hlöuhlöu wahlu unyin, ke haba e, me momo ame vec dö.

5 E beönya tavat adre me okongoâ e, k' ame sot bi je iwahnaihmiöny më;

Anyin a Iehova ame hia but ovecâ e, can hnen je hna hanyâúâ ae se hia:

Adre me hom bâ lakon ae úhnyúkong hnyi hnyimakan je iwahnaihmiöny.

6 K' ame hia hia but bongon than unyin blu lakon Ziona:

Haba anyin je taben, me ödra tha úcú me je aila adre me ca wâ bi únyi hnân han.

Ke adre me kec ke ba bi tang hwege hnyi hnyimakan at ame úhnúnú.

7 Hnyi bonginy vec me hmak, Jerusalema ame únykúme

Ta je únyi gan ae kese hwân hnyi je bong kâú ehac:

Hnyi úen ame ta anyin tavat ka hnyi hnyamen iwahnaihmiöny, ke ba at ame hadruâ e,

Ame wâ e hnen je iwahnaihmiöny, adre me hlumâ ta je hna okongoâ e.

8 Jerusalema ame hia but hulö gan hmâ; anyin a wale e ame helâ me únyi ae ikiki:

Haba tavat adre me ogânâ e adre me húkotiâ e, anyin adre hia but wâ a e ame he thu:

Eke, e ame mâng, me hwiö.

9 E hnyi obiny anyin úkhaú anyin ikiki; e ame ca únykúme obiny kâú;

Anyin a wale hnân láitâ hna óuhnyúkongoâ e; e ba at ame otubwelâ e:

Iehova lö, wâ bi anyik vec; anyin ame bi gan iwahnaihmiöny.

10 Haba iwahnaihmiöny ame inâ hnyamen ka hnyi anyin ta je únyi hia ae kese:

Anyin e ame hia but wâ je wanaithila a g' adre me hia but dit ka hnyi anyin dok ae kap,

Waleji u je ha a g' adre me ca he ka dit ka hnyi ányâm úkhacaköu.

11 Adre me mâng ta je aten hia, adre me heleú jeú;

Adre hia but ham anyidra ta je únyi ae kese hnân úcú jeú, m' adre me ohâtâ melidra:

Iehova lö, bwele ju, ke wâ ju; anyin oge kong ut.

12 Hawa, e únyi baú köbun tavat hia adre me vhenö gethen?

Bwele thö, me wâ, ame ne hu hlöuhlöu helâ me anyik hlöuhlöu, wale adre ányâ könya.

Waleji hnö Iehova hna oveci nya hnyi bonginy anyin hmönyin ae hwege.

13 E ame hia but kunâ úbeny dö meic ka hnyi je jeiök, k' ame ton bi:

E ame nia but thong ert hobi kâú li cak, e ame hia but ohmetu nya;

E ame hia but hake ip nya, me ohlohloi nya hnyi je bong.

14 Ame ca ge hnyamen úhúkálaköuâ hnök je hna hanyâúâ;

K' adre úcaköuâ, k' adre me ip hon nyik; e ame oatâ tang hwegiök;

Haba Than ame hia but hnö nya ka hnyi je hnyamödra, ke ca khanö nya he ka tot ködra.

15 Haba Than ame hia but húkotiâ anyik tavat hwege hia unyik;

- E ame hia but hawâ úcuk úkhacaköu
ae únyi hnathu he ka oamamá je
wahidröu anyik :
- Than ame hia but ututo hlu, wale hluiny
Juda hnyi hna hlec wan vine.
- 16 Can ta je únyi eling, me oge me tengé ;
ke haba emakök, me ame hingölö köö
únyi hnyi li emakök ;
Anyin ae úsákáúú but mönya at úutu-
bweli, at a hamen he ka okahwa
hnyekuk :
- E ba but thatúnyi anyin je lakuk, anyin
ame ton iwahnaihmiöny.
- 17 Ziona ame lau li hnyamen ; e ba at he
ka otubwelá ;
Iehova ame hia but ha ga Jakob, a g'
adre me he ka iwahnaihmiöny mē
tavat igigilö e :
E ikiki Jerusalema unyidra.
- 18 E wisa Iehova ; ke oge hia but thu
anyin je hnanyibu :
Je hnyei hia lö, öbun na löng ju, me wá
anyik hlöuhlöu :
Adre hom hwenbâ anyik je wahlu me
wahidröu.
- 19 Oge me hawâ je lawek, k' adre me
iyawö nya :
A mokcu anyik tavat bihut me wa-
hingat hnyi taun,
Hnyi üen adre me heleú ö 'dra, m' adre
me möt hmetu.
- 20 Iehova lö, wá ju ; anyin a inya oge me
vec ; ame bwebwet hnyekuk ;
Ame hwiö hnyekuk eú hnyik ; anyin
oge hia but úkhin fuc hwege :
Haba hele vat ame öba lakon e hele, ke
eiö hnyin uma e hu mok.
- 21 Adre löng ut a inya oge mâng ; ke ba
at ame otubweli nya ;
A löng ut je iwahnaihmiöny mönya hia
hna okongu nya ; adre me senyin a
u je hia but ányá :
U me he ka oá bong waleji u je thu, m'
adre me he ka úcú mönya.
- 22 E na o ju ta je hwakecidra hia ae kong
hnyi hnyimákám ;
Ke ányá thö ködra heláji me hnâm hna
ányá könya can hnök je hna ha-
nyáúú :
Anyin a iny osehia but mâng, ke sēnyin
dut hnyekuk.

HNYIMAKAN 2.

NAKAINY hna okhömetá hluiny Ziona
hnen Than hnyi anyin hmönyin !

- E ame hia but khúá únyi hnyi drany
hmanenanginy Isaraela ka hnyi hme-
ledrany,
Ke ame ca hia but únykúme taben
hnyeúcan hnyi bonginy anyin hmö-
nyin.
- 2 A hia but Than utá je hnyaba Jakob
hia, ke ame ca betenge bi ;
E ame hagutá hnyi anyin hmönyin je
hnabâ anyin hluiny Juda ;
E ame tha ohoná me káná :
E ame oikikiá dökhü me je thaniny.
- 3 E ame hia but subâ degecá hnyi anyin
hmönyin faoiny meno hia anyi Isa-
raela ;
E ame hia but oc hmetu benyin a metán
hnyi hnyimakan je iwahnaihmiöny :
E ame hia but thung Jakob helá me
meic ame ubáhlá, at ame han igigilö.
- 4 E ame hia but lau anyin cafana helá
me iwahnaihmiöny, k' ame tot helá
me at vat ame hai hnyamen a metán,
Me hlingá hia tavat ae kese at ka wá :
E ame hingálá anyin hmönyin helá me
meic hnyi uma mano umen hluiny
Ziona.
- 5 Ke heláke e iwahnaihmiöny Than, e
ame utá Isaraela ;
E ame utá je uma hia umen than, e ame
ohia anyin je hnabâ :
Ke e ame hia but osehia tengé me tengé
thungaú ka hluiny Juda.
- 6 Ke e ame hia but hügúná hwegiá umen
uma mená, heláke uma mená bi hnyi
ta hnyei ;
E ame hia but ohia dok adre me úkha-
caköu hnyin :
Haba Iehova ame ohnyingá hnyi Ziona
úkhacaköu ae únyi hnathu, me sa-
bath,
K' ame húkotiá than me at bihut hnyi
anyin hmönyin ae gan.
- 7 Haba Than ame hia but hota degecá
taben hut káu, e ame hia but ikikiá
anyin dok ae kap,
E ame hia but hna ka iwahnaihmiöny
umen je uma ae mec :
Adre hia but mede hnyi uma umö
Iehova helá me bong úkhacaköu ae
únyi hnathu.
- 8 Iehova ame hia but únykúme he ka
ohia hna up veto anyin hluiny Ziona ;
E ame hia but lelö tulut, e ame ca thu
hmetu hnyamen hnyi hnen hna ohia :
Ke e ame kuná singiny me hna up veto
he ka tengé ; k' ame tha sēnyin.

- 9 Ame dit bi je homagöuleny ka hnyi kânâ; k' ame ohia me oamamá je ohmáiny:
E but je thaniny me je taben hnyi je hnyei ae ba hnanyibu gadra;
Eke, adre me ca wâ bi hnen anyin je perofeta hna omanená únyi ga Iehova.
- 10 Haba wahingatin hlu Ziona adre me laba hnyi kânâ, adre me hnyibú;
Adre hia but konâm je bödra ge kânâ; adre hia but weiká ecmano ae gan nân:
Je wahuiny Jerusalema adre me nom hnyikânâi.
- 11 A didrut li emakök anyin tenge, ame bwebwet hnyekuk,
Ame hingölö akik hnyikânâi, can hnödra hna okongoâ hlu nokon lakeik;
Anyin ame ta mok hnyi getheniny taun je wanakat me je mendreng adre i.
- 12 Adre me ha ka lahinyödra, ka habe, Ewa hwit me waina?
Ödra ka ta mok helâ me at ae aat hnyi je getheniny taun,
Me ödra ka hingälâ je hanudrin hnyi úlainy je lahinyödra.
- 13 Ieú oge me he ka ohnathu köu? ieú oge me he ka öúcú u mē hluiny Jerusalema?
Ieú oge me he ka öúcú u mē he ka otubweli u, hlu nokon Ziona?
Anyin ae gan hmâ hnâm aat helâ me köiö: ie at ame he ka okhötâ hmetu?
- 14 Ânyâm je perofeta adre hia but wâ hobi köu ta je hna omanená ae únyi baú me monu;
Ke adre me ca omanená bi hwakecâm ae monu, he ka ohmetu u úhem hnyi hna bâ:
Ke adre hia but wâ hobi köu je hok ae thoi me hnân omono.
- 15 Adre me khöúkhöú hnyam köu tavat hia adre me vheno unyâm;
Adre me jû me nyinyikâ je bödra ka hluiny Jerusalema, haingödra, ka habe
Hawa, wale taun adre me labö ha, ka 'habe, E beönuua hmanenanginy, ame senyiná hnen hmeledrany hia?
- 16 Adre hia but memang köu ta je iwahnaihmiöny hia möu;
Adre me jû me höchnyu me ha, ka habe, Ate hia but ut' ödra;
E hnathu walang bong ate me labö lubahingen; ate me elâm me wâ.
- 17 A hia but Iehova ányâ waleji hnen hna únykúme;
E ame hia but ohwädâ hwan hofuc waleji e ame hûna hnyi ta je bong kâú adrem;
E ame hia but kia, me ca betenge bi:
Ke e ame osenyiná iwahnaihmiöny hom,
Me ogöranyâ faoiny menö anyin je tavat adre me tot köu.
- 18 Haba je hnyekudra ame tenge ka Than:
Hna up veto anyin hluiny Ziona lö, e so e hingölö li deköö helâ me wagewe hnyi lany me lit;
U ma ca menâ ju; e so e me ca soju wan emâkâm.
- 19 Todrö, hongot dö hnyi hnyinghet hnyi je hna hmak a bân;
Hingälâ but hnyekom helâ me köiö hnyi hnyimakan Than;
Hai thö kâú li hnyamâm ge melen lakom a je wanakat,
Wale adre me ta mok hnen hmiâ hnyi je hna saú hnen je gethen hia.
- 20 Iehova lö, wâ ju, me únykúme ju waleji ge hnâm hna ányâ e kâú!
Hawa, ame he ka he bi je momo ka an ta je troban gadra, a je lakudra adre bwebwelâ hnyi li hnyamödra?
Hawa, adre me he ka hlingâ at bihut me perofeta hnyi dok ae kap anyin Than?
- 21 Wahidröu me wahingat adre me mokut hnyi kânâ eú hnyi gethen;
Anyik wahu me wahidröu adre me ta ge hele wat:
U je hia but hling' ödra hnyi bonginy ányâm hmönyin; u je hia but kot me ca betenge bi.
- 22 U je hia but hawâ helâ me hnyi bonginy úkhacaköu ae únyi hnathu, ta je únyi hnân ooti nya igigilö,
Ke ba at ame kec möt me kolon hnyi bonginy hmönyin anyi Iehova:
A hia but oâúâ hnen iwahnaihmiöny mönyua tavat waleji oge me kap me hat.

HNYIMAKAN 3.

I NYA at a khana úöveci ge osö a anyin hmönyin.

- 2 E ame hia but su nya me hum nya ka he hnyi menekholom, ke ca bi hnyi lany.
- 3 E hnathu e ame labö ohmeto hnyamen me úcúk hnyi je bong hia thibut

JE TENGE ANYI JEREMIA 3.

- 4 E ame hia but odelá vik me unök ; e ame hia but thu je jeiök.
- 5 E ame up tap cici nya, me oigigili nya ge khöhlöng me vec.
- 6 E ame hia but olabö nya hnyi je dok ae menekholom helá me tavat adre me kuedra ka mokcu.
- 7 E ame hia but theling nya, me ca khanö nya didrut ; e ame ohmaká anyik sa cen fao.
- 8 Eke, iny ka tenge me hongot göranyai, me e ame hlöng hwanuma ge hijik hic.
- 9 E ame hia but thelöng dek je gethen ge je veto adre tretrao, me ohwalö dek je gethen.
- 10 E heláke me bea kõnya, at ame mokut tu' önya, helá me liona hnyi je dok ae iyong.
- 11 E ame hia but osaúá dek je gethen, me oloú kiö nya ; e ame hia but öba wan gak.
- 12 E ame hia but lau anyin cafana, me otilö nya hnân dá ge fana.
- 13 E ame hia but odilá je can anyin je fana ka hnyi li wagiök.
- 14 Iny taben úhiö ka tavat hia ; ke adre me khumöngi nya hnyi je bong.
- 15 E ame hia but öunöngöti nya ge únyi ae hiny me osekuni nya ge khökhölong.
- 16 E ame hia but thu hmetro je nyuk ge je oveto, e ame kõnim nya ge dröu.
- 17 Ke u je hia but öusákáüö nya me hna-hic ; oge hnying ut senyin.
- 18 Ke haingök, ka habe, E hia but tang hwegiök, me hnök hna geju káu únyi ge Iehova.
- 19 Ênykúme ju anyik vec me hmak, wale ge det me khökhölong.
- 20 Ame labö únykúme e, me ame nom ju hnyekuk eú hnyik.
- 21 Oge me únykúme hmetu e, anyin a wale oge me labageju.
- 22 Iehova ame betenge, waleling me ca hi' öta, anyin ame ca um bi anyin ibetengio.
- 23 K' ame teb únyi hnyi je hnyomakatu ; e gan hmâ ányâm hnathu.
- 24 Haingen hnyekuk, ka habe, Jekhök Iehova ; anyin a wale, oge me he ka geju káu.
- 25 E so Iehova ka tavat adre me halubahingen, ke at ame elám e.
- 26 E so he ka gejon me halubahingen úhömeli anyi Iehova.
- 27 E so ka at he ha hijen hna úhúkálákouá ke tiga úhnyúkong.
- 28 Hamen he ka hake laba me laba hnyibú, anyin a e ame ip hon.
- 29 Hamen he ka ciron hnyimen eú hnyikáná ; ame ne hu gejon.
- 30 Hamen he ka hna wahicen ka at ame khaú, a unöngötö ge hna haikon-goá.
- 31 Anyin ame ca he bi Than ka degec nyiele balua.
- 32 Anyin a eja ke ne a ne ovecá, e ame he hmetu ka betenge hoton úganiny anyin betenge.
- 33 Anyin a e ame ca ovecá únyi ge hnyok, me otengia lakon tavat.
- 34 Adre ne uto eú hnyikáná aten uma ceat hia hnyi hmeledrany,
- 35 Adre ne ohaúá hna owisa at hnyi hnyimakan At ae Beönua,
- 36 Adre ne omono at hnyi hna ivinóá e bi, ame ca so bi ka Than.
- 37 Ie at ame ha, me ame hwadá thö, ke ame ca húna e Than ?
- 38 Hawa, ame ca o bi únyi ae kong me so hnyi hnyimen At ae Beönua ?
- 39 Anyin a iéú úhaiö at ae möt, wale at, can hwaban anyin ta je hulö ?
- 40 Ate me he ka elám me cubec deta je gethen, me hmetu kö Iehova.
- 41 Ate me he ka kap göranyai je hnyekuta me je hnyamöta ka Khong ethö hnyi drany.
- 42 Öhmun e hia but hanyáúá me thu musi ; ke u je ca hna.
- 43 U je hia but khaüö u ge hmönyin me hnu öhmun ; u je hia but hlingá me ca betenge.
- 44 U je hia but tubi u ge úlá, me me ca didrö hijihmun hic.
- 45 U je hia but wi' öhmun me tiren me únyi baú wanben je hnyei.

- 46 Adre hia but memang köhmun je iwahnaihmiöny hia möhmun.
- 47 Ame o but köhmun ot, me thop, me ba at, me hna ohia.
- 48 Ame hingälâ je wagewe únyi hnyi li emakök, can hna ohia hluiny ik hnyei.
- 49 Ame hingölö li emakök, me ca menâ bi, ke ba thö obiny,
- 50 Ke ne o but Iehova ame bwele ju me wâ únyi ethö hnyi drany.
- 51 Li emakök ame ovecâ hnyekuk, can je hluiny hia ik taun.
- 52 Adre hia but hnu nya helâ me meno ame ga, ödra je iwahnaihmiöny mönya ke ba can.
- 53 Adre hia but subâ degecâ anyik möt hnyi thop, me khúö veto huk,
- 54 Ame khutukhavâ bök köiö; ke haingök, Adre hia but subâ degeci nya.
- 55 Iehova lö, oge me hawâ iâm únyi hnyi thop ae dit.
- 56 U je löng ifucik; ca ikhâlâ li hnyikönyâm ge anyik homenâ, ke anyik tenge.
- 57 U je hakekenyâ hnyi bong oge me hao u hnyin : u je ha, ka habe, Ca ot bi,
- 58 Than lö, u je hia but ivinö hobi könya; u je hia but úcú melik.
- 59 Iehova lö, u je wâ hwali könya; owisa thö hobi könya.
- 60 U je hia but wâ hia anyidra hmönyin me hnödra je hna únykúme hia gak.
- 61 Iehova lö, u je hia but löng hnödra hna haikongoâ, me hnödra je hna únykúme hia gak;
- 62 Je esongödidra tavat adre me tot könya, me anyidra je bibihwakecin könya hnyi je bong.
- 63 Bethe wâ ju úlabaidra me utilödra; inya ang at adre me sit hwânân.
- 64 Iehova lö, u me he ka bi hwaban ködra hoton huliwa anyin je hnyamödra.
- 65 U me he ka ham ködra hnyok ae khöt, ke hang' ödra but.
- 66 U me he ka hnu ödra hnyi hmönyin, me ohí' ödra eang hmeledrany anyi Iehova.

HNYIMAKAN 4.

- N**AKAINY gol ae udrem but! a hwiö but gol ae so!
- Adre hingälâ je vetoiny dok ae kap hnyi je hna saú hia.
- 2 Je lakon Ziona ae únyi hnathu, ödra tha úcú me gol ae so,
Nakainy hna ócú ödra me ta je kaia kânâ, huliwa anyin at ame up kaia.
- 3 Je luko adre me ham je basidra, ke ame ijem ta je lakudra :
Ke haba hlu nokon lakeik ame beovecâ helâ me je iaenainy hnyi hnyebuba.
- 4 Ame kece bohnen mendreng ka hnyi eengödiny ge beic :
Ta je wanakat adre me sumató jeú, ke ame ca subâ ködra hnen ke at.
- 5 Haba tavat adre me han so, me adre me hake laba hnyi je gethen :
Haba tavat adre me hat hnyi mano ae dra, me adre me deluâ je hna digic thatúnyi.
- 6 Anyin ae gan hmâ hulö anyin hluiny ik hnyei hon hulö anyin Sodoma,
Waleji adre ohia helâ me thuthubademak, ke ba hnyam ame hinöbenyn ka hnyin.
- 7 Ame alae but anyin je taben hon kiona, ke hau hon debai,
E hngihngidra je únyidra hon je penina, haba úhadröngöcidra helâ me safairo :
- 8 Ke hlit je unyidra hon walep; adre me ca wáhmakhmetu ödra bi eú hnyi gethen :
Ame kece thö unyidra ka hnyi je jeiödra; adre me meleca thö, ke helâ me uci.
- 9 E so tavat adre me hlingâ ge hele vat hon tavat adre me mok ge hmiâ ;
Anyin a ödra aú but, adre kot moko, anyin a ba but wan kânâ.
- 10 Haba je momo betenge adre me thân je hing lakudra ge je hnyamödra bi ;
Adre me ön ödra hnyi hna ohiainy hluiny ik hnyei.
- 11 Haba Iehova ame ohwâdâ anyin hmönyin, me hingälâ anyin wathethöt ae gan ;
Ke e ame hia but hú meic hnyi Ziona, waleji ame thong degecâ je taben e.
- 12 Ame ca únykúme je thaniny hnyei me tavat adre me labâ hmeledrany,
A g' ame he ka dit hnyi homagöuleny Jerusalem iwahnaihmiöny bi ke at ame tot metâ.

- 13 Can hulö anyin je perofetainy, me hulö anyin tavat bihut,
Hnyat adre hia but hingälá dra dren tavat ae wisa hnyi wanben e.
- 14 Adre me ngenu helá me wadröu hnyi je gethen, adre me kong ut ge dra,
Me me ca khana at he ka kálá je khaúödra.
- 15 Adre me hongot ködra, ka habe, He th' öbun ae ikiki! he thö, he thö, ca kálá bi :
Hnyi úen adre me kec ut ke he monu, me haingen tavat aten ta je hnyei, ka habe, Adre me ca he hmetu ka me laba eang.
- 16 Ame hia but ovesei ödra nhen hmönyin anyi Iehova ; e ame ca he hmetu ka únykúmi ödra bi :
Adre me ca okabá hnyimakan tavat bihut ; k' adre me ca betenge ge wahingat.
- 17 Ame dit je emaköhmun ge hnöhmun hna eláu úhadruöhmun ae únyi baú.
Hnyi bnöhmun hna hmak öhmun e hia but hmaká ke hnyei ae ca khana he ka omeli.
- 18 Adre me cet je nyeúcahmun, me ca khan' öhmun he ka vheno dehmun je gethen :
E hakekeny jut obiny köhmun, a bekhöt ut bonguhmun ta je bong, anyin ame o but obiny köhmun.
- 19 E logot tavat adre me hnu öhmun hou ta je aetöiny drany :
Adre me hnu öhmun hon je bucen, adre me khöu mokut hnyi hnyebuba köhmun.
- 20 Haba hna menú hnyi je hnyingöihmun, wale a hú Iehova, me ame didrut hnyi anyidra je thop ;
Waleji at öhmun e ha gan, ka habe, Öhmun e he ka möt unyin je hnyei hnyi hmelen hmenon.
- 21 Senyin dö me hobá thö, u hluiuny Edoma, at ame laba hnyi Uza :
Ke ame he ka o köu minya kaiu ; u me he ka monu ge grâg, me he thu ka únyi bi gam.
- 22 Hluiuny Ziona lö, a hwádá but hna bi hwaban ányám hulö ;
E ame ca he hmetu ka hwenbö u ehele :
Hluiuny Edoma lö, e ame he ka sená ányám hulö ;
E ame he ka omanená je hwakecám ae kong.

HNyimakan 5.

- I**EHOVA lö, únykúme ju únyi a o köhmun :
Bwele ju me wá hna haikongu öhmun.
- 2 Adre hom ihmun hobi káu ta je at-kanyua,
Me umöhmun je uma hobi káu aten ke je hnyei bi.
- 3 Öhmun je nakahme, me tavat a mokcu kamen,
Haba je lahinyöhmun me helá me je safac.
- 4 Öhmun e hia but ijem belihmun je an hwaban mone ;
Ke öhmun e bi hwaban ködra hlöghmun je utö.
- 5 Tavat adre me hnu öhmun adre me tot hon je nyihmun :
Öhmun e sényin, me ca mená bi.
- 6 Öhmun e hia but ham hnyam me nom ka at Aigupito,
Me at Asuria, me me hnyi sekuhmun.
- 7 A hia but monu je lakamöhmun, me hí ödra but ;
Ke öhmun e hia but hanö obiny anyidra ta je hulö.
- 8 Je athnyaba adre me musi öhmun :
Ke ba at he ka hügún' öhmun hnyi je hnyamödra.
- 9 Öhmun e bi ö 'hmun, me öhmun e ne mokcu,
Can hele vat hnyi hnyebuba.
- 10 E hlit ut unen je unyihmun helá me wahnainyâ
Anyin ae höc hmiâ.
- 11 Adre me okongoâ omomo hnyi Ziona,
Me wahlu minya hnyi je tauniny Juda.
- 12 Adre me uhno je taben waleji adre noc je hnyamödra :
Ke adre me ca oganá bi hnyimakan wahingat.
- 13 Adre me hom wahidröu he ka klin hwit,
Ke haba je da adre me ta hmelen je utö adre hom.
- 14 E ba but wahingat hnyi je homagöule,
Ke soju khumöng anyin wahidröu.
- 15 E ba hmetu senyin hnyi ta je hnyekuhmun,
Adre me wia anyihmun bibiâ me me hlöuhlöu bi.
- 16 Ame kölu but korona únyi hnyi hon ta je böhmun :
Ekölö gahmun walang ang! anyin ae kong ut hwakecihmun.

EZEKIELA 1.

17 Anyin a wale, e sēnyin dut hnye-
kuhmun ;
Ke can ta je ūnyi eling amo hadedak
ta je emaköhmun.
18 Can bucen Ziona, wale ae ba wan ;
Je alope adre me vheno e.
19 Iehova lö, u at ame laba nyiele balua ;
E bi ányám theron ke ne o but hnyi ke
dö me ke dö.
20 Anyin a ieu u je hnying öhmun bala,

Me hn' öhmun hnyi je bong helâe, ae
se hia hmönyin ?
21 Iehova lö, ohmetu öhmun ju köu, me
öhmun e hmetu ju ;
Ohâtá thö bonguhmun ta je bong helâji
me ehac.
22 Ke so bi u je hia but ti hna degeci
öhmun,
U je hmönyám hmönyin köhmun.

TUSI EZEKIELA PEROFETA.

HNYIMAKAN 1.

HNYI huna a thöte, hnyi tehi a vakiny,
ke tha inya me je bâ hnyi wagewe Kebara,
me ame hmouca but drany, me oge me wâ
je hna omanená ūnyi ge Khong. 2 Hnyi
bong a thabúnginy tehi, wale huna a
thabúnginy bâ a Jehoiakin, 3 me ame o
but hnyi hnathu hofuc ho Iehova kö Eze-
kiela at bihut, nöku Buzi, hnyi hnyei
Kaledaia hnyi wagewe Kebara ; k' ame
laba hon e eling hnyamö Iehova. 4 Ke
oge me bwele me wâ höu ame o úheny
hnyi hwadrö, ke úlá ae gan, me meic ame
gâ khenyi tot, ke e hadröngöc igigilö, ke
eú hnyin e helâ me makan bras, ame hlâ
únyi hnyi hnyin meic. 5 Ke únyi hnyi
hnyin e ame o but helâke ta únyi ae möt a
vak. Ke walang hwakecidrin ; ödrin helâ
me at. 6 Ke úsa vak je hnyimaködrin,
ke usa vak je labenyidrin. 7 Ke haba je
cadrin, me ame wisa je cadrin ; ke haba je
hnyeúcadrin, me helâ me hnyeúcan nokon
kau ; k' ödrin hadröngöc helâ me bras adre
me kot wia. 8 Ke ve hu je hnyamödrin
helâ me at eú hmelen je labenyidrin hnyi
vak ta ke keihödrin : ke walang bongon je
hnyamödrin me labenyidrin hnyat a vak ;
9 adre úohmákouâ labenyidra ; k' ödrin ka
he me ödrin e ca hwiö ; k' ödrin e ve he
wisa. 10 Ke haba hwakecin je hnyima-
ködrin, me ve hu hnyimak helâ me at ; ke
haba ödrin vak, m' ödrin ve hu hnyimak
helâ me liona hnyi ke keihen metâ ; ke
hnyi ke keihen me, me ve hu hnyimak helâ
me bolok ; ke haba hnyat a vak, me ve hu

hnyimak helâ me aeto. 11 Ke haba je
hnyimaködrin me labenyidrin me ame ca
hújö ethö ; k' adre me úohmákouâ laben-
yidrin khaca me khaca, ke lo ame tube je
unyidrin. 12 Ke adre me ve he wisa :
haba dok ame he ka he hnyin hanu, me
ödrin e he minya ka hnyin : ödrin e ca
hwiö, ödrin ka he. 13 Ke haba bongon
ge ta je únyi ae möt, me helâ me walep
ame möt ge meic, helâ me je okúnú : e ame
he wanben je únyi ae möt : ke ame ubâhlâ
meic, ke ame gâ but hucuce únyi hnyi
hnyin meic. 14 Ke haba je únyi ae möt
me ödrin e gâ me hmetu helâ me hucuce.
15 Ke oge me wâ je únyi ae möt, ke wâ
bi, waengen a khaca hnyi kânâ unyin je
únyi ae möt, hobi kâu je hnyimakan a vak.
16 Haba bongon je waengen me huliwainy
helâ me makan veto berulo : ke tha úcú
ödrin vak ; ke haba bongudrin me hul-
iwainy, me helâ me ke waengen hnyi hnyin
ke waengen. 17 Ödrin ka he, me ödrin e
vheno vak ta ke keihödrin : ödrin e ca
hwiö, ödrin ka he. 18 Ke haba anyidrin
je otru me beú göranyai me hnân outen ;
ke unöngötö anyidrin je otru ge je ecmak
igigili ödrin hnyat a vak. 19 Ke e ka he
je únyi ae möt me ame he je waengen hnyi
je batödrin : ke ödra ka ogöranyâ je únyi
ae möt únyi ang hmelen, me adre me
ogöranyâ minya je waengen. 20 Haba
dok ame he ka he hnyin hanu, me ödrin e
he minya ka hnyin ; wale dok ame he ka
he hnyin hanu : ke ame he göranyai je
waengen tha e mödrin ; anyin a e hnyi je
waengen hanon je únyi ae möt. 21 Ödrin
ka he, me ödrin e he minya ; ke ödrin ka

tot, me ödrin e tot minya ; ke ödra ka köp ödrin göranyai ûheny ang hmelen, me adre me kap göranyai je waengen minya tha e mödrin : anyin a e bi hnyi je waengen hanon ûnyi ae möt. 22 Ke ethö hon ban ûnyi ae möt helâke unyin ae lau, helâ me makan veto ae alai adre ouden, adre olauâ ethö hon je bödrin. 23 Ke wisa je labenyidrin hmelen unyin ae lau, khaca cicö khaca : úsa lo hnân tube ke keihen, ke úsa lo hnân tube ke keihen unyidrin. 24 Ke oge me löng hwan je labenyidrin ödrin ka he, helâ me hwan köiö ae gan, helâ me ifuci Ataekhanahia, hwan imonumonuny helâ me hwan utbavat : ödrin ka todru me ödrin e ohimö je labenyidrin. 25 Ke e hu hwan ûnyi hnyi unyin ae lau ae hon je bödrin : ödrin ka todru, me ödrin e ohimö je labenyidrin. 26 Ke e hnyi hon unyin ae lau ae hnyi hon je bödrin ke ûnyi helâ me theron, helâ me veto safairo ; ke ethö hon ûnyi helâ me theron me hu bongon helâ me bongon at ethö hon e. 27 Ke oge me wâ helâ me makan bras, helâ me man meic hnyi hnyin e igigilö, hwân hnyi hnyin ke ne o but ethö ; ke hwân hnyi hnyin ke ne o but hnyikânâi oge me wâ helâ me man meic, k' ame hadröngöc e igigilö. 28 Ke haba hwakecin hadröngöc igigilö, me helâ me man wajileufat ae hnyi úlâ hnyi úen we. Wale bongon a manen me hmanengi Iehova. Ke oge me wâ, me oge me ta hnyikânâi, me löng ifucin ke at ame fuc.

HNYIMAKAN 2.

KE e ame ha könya, ka habe, Nokon at lö, todrö ge li cam, me oge me he ka fuc köu. 2 Ke ame dit hanu ka hnyi hnyekuk hnyi úen e ame fuc könya, me otilâ li cak ; me oge me löng ifucin at ame fuc könya. 3 Ke e ame ha könya, ka habe, Nokon at lö, inya oge me kunö u ka lakon Isaraela, ka je hnyei adre me úkhin fuc, waleji tavat adre me thu anyik musi : ödra me lakamödra adre hia but ânyâ hwakecin ae kong könya ke ne o but hnyi bong ang. 4 Ke haba lakon, me hwege hnyimaködra me khöt hnyekudra ; inya oge me kunö u ködra : ke u me he ka ha ködra, ka habe, Walang hna ha hnen Than Iehova. 5 Ke haba ödra, adre me ne he ka löng, k' ame ne ba, (anyin a ödra lap úkhin fuc,) me ame he ka khan' ödra ae unyidra perofeta. 6 Ke haba u, nokon at, ca ot bi gadra, ke ca ouden hodra ta je

hofuc, eja ke ne a ne tha e möu úö ae údedö me watetaföcö, ke eja ke ne a ne tha laba möu ta je sekopio : ca ouden bi hodra ta je hofuc, ke ca öbubuny ge je hnyimaködra, anyin a ödra lap úkhin fuc. 7 Ke u ma he ka ha ködra hok ta je hofuc, k' adre me ne he ka löng, k' ame ne ba : anyin a ödra tavat úkhiny fuc hmönyin. 8 Ke haba u, nokon at, löng ju hnök hna ha köu ; ca he ka úkhin fuc helâ me lap ang ae úkhin fuc : memang ut me u me he ka an ûnyi oge me he ka ham köu. 9 Ke oge me wâ, ke wâ bi, ame inâ ke hnyam könya ; ke wâ eü hnyin ke tusi adre vhec ; 10 ke e ame ulole e hnyi hnyimakök ; ke adre me tha sihnalimen li ke keihen : ke adre me sihnalimen hnyin e tenge, ke tenge thungaú, ke vec hnyok.

HNYIMAKAN 3.

KE e ame ha könya, ka habe, Nokon at lö, an ju ûnyi e u me wâ, an ju tusi ang adre vhec, ke he thö, me fuc ka lap anyi Isaraela. 2 Me oge me memang ut, me e ame haök ge tusi adre vhec. 3 Ke e ame ha könya, ka habe, Nokon at lö, ip ju eü hnyi hnyekom, ke öunöngötâ thö hnyekom ge tusi e adre vhec wale oge ham köu. Me oge me an e ; ke haba hnebwiainy hnyi hnyimök me helâ me hani.

4 Ke e ame ha könya, ka habe, Nokon at lö, he thö ka lap anyi Isaraela, me ha ködra hok ta je hofuc. 5 Anyin adre ca kunö u ka hnyi hnyei ae atkanyua ifucidra, me hmak ifucidra, ke ka lap anyi Isaraela ; 6 ca ka hnyi je hnyei ae se ae atkanyua ifucidra, me hmak ifucidra, ke ca khanö u ifucidra. E hnathu, oge ne kunö u ködra, me adre me ne he ka ling u. 7 Ke so bi ame ca he lap anyi Isaraela he ka ling u ; anyin adre me höcö ling nya : anyin a tavat hwege hnyimakan me khöt hnyekudra hia lap anyi Isaraela. 8 Wâ bi, oge hia but ohwegiâ hnyimákâm cicö hnyimaködra, me barem cicö je baridra. 9 Oge hia but wia barem me me helâ me samira ae hwege hon out : ca ot bi gadra, ke ca öbubuny ge je hnyimaködra, anyin a lap úkhin fuc. 10 Ke e ame ha könya, ka habe, Nokon at lö, haba hok ta je hofuc hia oge me he ka ha köu, ip ju eü hnyi hnyekom, me löng ju ge li hnyikönyâm. 11 Ke he thö ka je bâ wale tavat aten em hnyei, me fuc ködra, me ha ködra, ka habe, Walang hna ha

hnen Than Iehova ; adre me ne he ka löng, ame ne ba.

12 Ke haba hanu ame köp nya göranyai, ke oge me löng hnyi hotuk hofuc hwawadring ae hwege, ame ha, ka habe, E so he ka haisoâ hmanenangi Iehova únyi hnyi hnen. 13 Ke oge me löng hwan jelabenyin je únyi ae möt ame úsetu, me hwan je waengen cici ödriin, wale hmuhmuiny hwege wadring. 14 Me hanu ame köp nya göranyai, me hum nya : ke oge me he but, ke iny vec me hmönyin, ke e hwege hnyamö Iehova huk. 15 Me oge me o but ka ta je bâ hnyi Tel-abib, vatat adre me laba hnyi wagewe Kebara, me ka hnyi dok adre me labâ ; me oge me tha laba hmak mödra hnyi seven ta bong.

16 Ke a um dö je bong a seven, me ame o but kõnya hofuc ho Iehova, ka habe, 17 Nokon at lö, oge hia but otillö u hnân at tue hobi kâu lap anyi Isaraela : anyin a wale löng ju hofuc únyi hnyi hnyimök, me kou ködra únyi gak. 18 Iny ka ha ka at ae kong, ka habe, U me he ka mok ; ke u je ca kou kâu, ke ca fuc he ka khú hnyikönyen at ae kong únyi hnyi deny gethen ae kong me me möt ; awe, ame he at ae kong ka mekiny anyin hulö ; ke oge me he bi nya ka elâm dren gam. 19 Ke u je ne khú hnyikönyen at ae kong, k' ame ca hmetu bi únyi hnyi anyin hulö me deny gethen ae kong, me ame he ka mekiny anyin hulö, ke u me he bi ka möt. 20 Ke haba khaca, ame ne hmetu thö at ae wisa únyi hnyi hwakecin ae wisa, me ânyâ hulö, ke inya oge me ip únyi hnân öthöâ hnyi hnyimakan, me e ame he ka mok : e ame he ka mekiny anyin hulö, k' adre me ca he ka únyküme hwakecin ae wisa e ame ânyâ, anyin a u je ca kou kâu ; k' oge me he bi nya ka elâm dren gam. 21 Ke so bi u je ne khú hnyikönyen at ae wisa, me me ca kong bi at ae wisa, k' ame ca kong bi, me e ame he bi ka möt, anyin a e ame kap hnödra hna khú hnyikönyen ; ke u me omeli u bi.

22 Ke eling huk hnyamö Iehova : ke e ame ha kõnya, ka habe, Todrö, he thö ka hnyi dok ae tha hon, me oge me he ka fuc eling köu. 23 Me oge me tot me he ka hnyi dok ae tha hon : ke wâ bi, ame tot eling hmanenangi Iehova, helâ me hmanenang waleji oge me wâ hnyi wagewe Kebara : me oge me ta ju hnyikânâi. 24 Me ame dilic nya hnen hanu me otillâ li cak ; me ha kõnya, ka habe, He thö ka

hlöng bi hwanumâm hnyi umâm uma. 25 Ke haba u, nokon at, wâ bi adre me he ka ip hom je tö hnân ca, k' adre me he ka cö u kâu, ke u me ca he ka didrut ködra : 26 ke oge me he ka okeceâ bohâm ka hnyi ecngödrâm, me u me he ka hum, ke u me ca he ka thaw' ödra : anyin a ödra lap úkhin fuc. 27 Ke iny ka he ka fuc köu, me oge me he ka khöng hnyimâm, ke u me he bi ka ha ködra, ka habe, Walang hna ha hnen Than Iehova, ka habe, Haba at ame löng, löng ju ; ke haba at ae höcö, höcö ju : anyin a ödra lap úkhin fuc.

HNyimakan 4.

KE haba u, nokon at, u me he ka hom veto kânâ ae lau me ip e hnyi hnyimâkâm, ke op ju lau e taun Jerusalema : 2 ke u me he ka thelöng e ge vat, me op cico e je taben vat, me hlu kânâ cico e ; me ânyâ minya je hunuma cico e, me ip igigilö cico e je únyi hnân tho. 3 Ke u me he ka hom fao ae lau, me ip e hnân hak fao hnyi wanbâm me taun ; ke u me hnyimâkâm kâu, ke adre me he ka igigilö e, ke u me he ka thelöng e. Wale thubi e ame he ka bi haten ka lap anyi Isaraela.

4 Ke u me he ka mokut hnyi ke keihâm a mem, me ip hon e hulöiny lap anyi Isaraela : haba úseiny je bong u me he ka mokut hnyin e, ame he ka tabö u anyidra hulö. 5 Ke oge hia but ip köu je hunainy anyidra hulö, hoton úseiny je bong, wale theri haded me nainte úseiny je bong : me ame he ka takú u hulö anyin lap anyi Isaraela. 6 Ke haba khaca u ka umo thö e, me u me he hmetu ka mokut hnyi ke keihâm a metâm. ke ame he ka takú u hulö anyin lap anyi Juda : fâte je bong, oge me hia but ip köu ke bong hnân ke huna. 7 Ke u me he ka hnyimâkâm ka Jerusalema adre igigilö, me vhec benyin ânyâm úkhaú ; ke u me he ka profeta ácon. 8 Ke wâ bi, oge me cö u ge tö, ke u me ca he ka hwiö ge ke keihâm ka hnyi ke keihâm, ke ne o but u je hia but umo je bonginy igigilö. 9 Ke u me he ka hok hwit me bali, me owi, me lentil, me dokana, me kesem, hobi köu, me tha ip hnyi kaia a khaca, ke u me he ka bi âm ; hoton úseiny je bong u me he ka mokulec ke keihâm, wale theri haded ke nainte je bong, u me he ka an e. 10 Ke haba âm u me he ka han, ame he ka he hoton tulut, twente je sekel hnyi bong : u me he ka an e hnyi ke

ûen me ke ûen. 11 Ke u me he ka ijem köiö hoton tulut, hanen a siksiny hin : u me he ka ijem hnyi ke ûen me ke ûen. 12 Ke u me he ka an e helâ me je ong areto bali, ke u me he ka thân e hnyi hnyimaködra ge tatet ame he but ûnyi ge at. 13 Ke Iehova ame ha, ka habe, Ame he lakon Isaraela ka an helâe ö 'dra jeû ae bokong hnyi je hnyei oge me he ka ob' ödra ka hnyin. 14 Me oge me ha, ka habe, Ekölö Than Iehova ! wâ bi, adre me ca obokongu nya : anyin oge me ca hnyi an ûnyi ame ka hamen mok, ke hna olou kia ge meno, hwân k' iny tiga ûhnyûkong ke ne o but walang ang ; k' ame ca hnyi dit utiö ae ikiki ka hnyi hnyimök. 15 Me e ame ha kõnya, ka habe, Wâ bi, inya oge me ham köu tiny kau hwaban tiny at, ke u me he ka bi âm hnen e. 16 Ke e ame ha kõnya, ka habe, Nokon at, wâ bi, oge me he ka thu uciny han hnyi Jerusalema : ke adre me he ka han ge tulut, ke hom ûhnyûkong ; ke adre me he ka ic ge tulut me hlohlo : 17 me me ba but jeû me köiö gadra, m' adre me ûlâiaköuâ, me oaûâ but hnyi anyidra hulö.

HNYIMAKAN 5.

KE haba u nokon at, hom dö hele vat ae so hwan, wale hele me heleûgi anyin at ûgi u me he ka hom, me u me he ka giâ bâm me waiâm : ke u me he ka hom tulut adre me ûhnö gan, ke u ma khenâ je leûn. 2 Haba ke keihen a kuniny, u me he ka thong ge meic hnyi wanben taun, e ka um dö je bonginy thelöng ; ke u me he ka hom ke hanen a kuniny me kokot tilâ ge hele vat ; ke haba ke hanen bi a kuniny, me u ma khûâ ka hnyi ang, ke oge me he bi nya ka oc hele vat he ka hnu hoton. 3 Ke u me he ka hom ûheny e ke je leûnen, me hûkâlâ hnyi obiny ânyâm ûkhaû. 4 Ke u me he ka hom hmetu keihen eling, me khûâ ka hnyi meic, me thong degecâ hnyi meic ; me ame he meic ka he but ûnyi gan ka hnyi lapanyi Isaraela hia.

5 Walang hna ha hnen Than Iehova, ka habe, Walang Jerusalema : oge hia but ip e hnyi wanben je hnyei, ke ame laba ta je hnyei igigilö. 6 Ke e ame hia but hanyâûâ hnök hna owisa hnyi hnen hna ânyâ monu hon ta je hnyei, me hanyâûâ anyik je hna-nyibu hon je hnyei igigilö : anyin adre me hia but hna degecâ hnök je hna owisa, me ca vheno anyik je hnanyibu. 7 Anyin a

wale walang hna ha hnen Than Iehova, ka habe, Anyin a öbun e monumonu hon je hnyei igigili öbun, me ca vheno bi anyik je hnanyibu, me ca ânyâ hnök je hna owisa, ke haba khaca, öbun e ca hia but ânyâ hoton je hna otillâ ge je hnyei igigili öbun : 8 anyin a wale, walang hna ha hnen Than Iehova, ka habe, Wâ bi, e ve inya möu, a inya ; ke oge me he ka ti bi hwaban köu eû hnyi wanbâm hnyi hnyimakan ta je hnyei. 9 Ke oge me he ka ânyâ unyâm ûnyi oge tiga ca ânyâ, ke oge me ca he hmetu ka ânyâ helâe, can ta je hwakecâm ae ikiki. 10 Anyin a wale ame he je kamen ka an jo lakudra hnyi wanbâm, ke ame he je lakon ka an je lakamödra ; ke oge me he ka bi hwaban köu, ke oge me he ka oveseâ je kolon hia gam ka hnyi ta je ang hia. 11 Anyin a wale, kia inya, haingen Than Iehova, e hna-thu anyin a u je okongoâ anyik dok ae kap ge ânyâm ta je ûnyi hia ae kong, me ânyâm ta je ûnyi ae ikiki hia, anyin a wale, oge me he bi nya ka ouhnyûkongu u ; ke oge me ca he ka hok hnyok, ke haba khaca, oge me ca he ka betenge. 12 Ke ame he ke keihâm a kuniny ka mok ge mok ae cap, ke ame he ka oaû' ödra hnyi wanbâm ge hmiâ ; ke ame he ke keihâm a kuniny ka ta ge hele vat igigili u ; ke haba ke keihâm oge me he ka oveseâ ka hnyi ta je ang hia, ke oge me he ka oc hele vat he ka hnu ödra. 13 Ame he ka hwâdâ helâe anyik hmönyin, ke oge me he ka osekunâ hudra anyik wathethöt, me inye menâ thö : ke ame he ka khan' ödra a inya Iehova oge me fuc hnyi anyik ciâ, iny ka hia but ohwâdâ anyik wathethöt hudra. 14 Ke haba khaca, oge me he ka öba wan gam, ke adre me he ka haikongu u, unyin je hnyei igigili u, hnyi hnyimakan tavat hia adre me he unyâm. 15 Ke e ame he ka hnân haikongoâ me taben ûhiö me hnân nâ me kuko ka je hnyei igigili u, iny ka he ka bi hwaban köu, hnyi hmönyin me wathethöt, me hna û hwegiâ : oge hia but ha, inya Iehova : 16 hnyi ûen oge me he ka kunâ ködra je fanainy hmiâ ae kong, wale hnân ohia, wale oge me he ka kunâ he ka ohî' öbun ; ke oge me he ka ogânâ hmiâ köbun me thu uciny anyibun jeû ; 17 ke oge me he ka kunâ köbun hmiâ me je meno ae kong, ke adre me he ka ohia lakom ; k' ame he mok ae cap me dra ka vhenu u ; ke oge me he ka oâ köu hele vat : Inya Iehova, oge hia but ha e.

HNYIMAKAN 6.

KE ame o but kõnya hofuc ho Iehova, ka habe, 2 Nokon at lö, hnyimákám dö ka hnyi je buceniny Isaraela, ke perofeta thö ködrin, 3 ma ha, ka habe, Je buceniny Isaraela lö, löng ju hofuc hwan Than Iehova, ka habe, Walang hna ha hnen Than Iehova, ka je bucen, me je hut, me je wadeny köiö, me je hnyigöuleny bucen, ka habe, Wâ bi, inya oge me he ka oâ köbun hele vat, ke oge me he ka ohia anyibun je dok ae görany. 4 Ke ame he ka ba önyen anyibun je taben hut, k' adre me he ka thu anyibun je hna theati seúnö; ke oge me he ka ota tavat adre hlingâ anyibun hnyi hnyimakan anyibun je idola. 5 Ke oge me he ka ip je kokiny lakon Isaraela hnyi hnyimakan anyidra ta je idola; ke oge me he ka khûkhûâ ta je jeiöbun igigilö anyibun je taben hut. 6 K' ame he ka ba wan je taun öbun e labâ, ke ba önyen anyibun je dok ae görany; me me ba at ke kong ut anyibun je taben hut, me me monumonu ke hia anyibun je idola, me suba degecâ anyibun je hna theati seúnö, me ohia anyibun je huliwa. 7 Ke ame he ka ta hnyi wanböbun tavat adre me hlingâ, ke öbun e he ka wâ a inya Iehova. 8 Ke so bi oge me he ka bi kolon, me me hu tavat anyibun adre me he ka kec möt ge hele vat hnyi je hnyei, öbun ka vese ka hnyi je hnyei. 9 K' ame he tavat adre me kec möt ka únykúmi nya hnyi ta je hnyei adre me he ka laba hwenbâ hnyiu, a inya höcö wâ hmetu je hnyekudra ae bi únyi monu, waleji ame hna degeci nya, me je emaködra ae bi únyi monu hoton anyidra je idola: ke adre me he ka hûkötî' ödra bi hnyi hnyimaködra bi, can je hulö waleji adre me ányâ ge anyidra ta je únyi ae ikiki. 10 Ke ame he ka khan' ödra a inya Iehova: oge ca hia but ha baúâ bi a oge me he ka ányâ ködra únyi eling ae kong.

11 Walang hna ha hnen Than Iehova, ka habe, Khaúkhaú thö, ke ututo ju, me ha, ka habe, Ekölö! can ta je únyi ae kong me ikiki anyin lap Isaraela: anyin adre me he ka ta ge hele vat, me hmiâ, me mok ae cap. 12 Haba at hnyi dok ae sákâú ame he ka mok ge mok ae cap; ke haba at ae hakekeny ame he ka ta ge hele vat; ke haba kolon, wale adre thelöng ame he ka mok ge hmiâ: helâe oge me he ka

ohwâdâ anyik hmönyin hudra. 13 Ke ame he ka khan' öbun a inya Iehova, e ka e but je kokidra hnyi wanben anyidra je idola igigilö anyidra je taben hut, hon je dok ae hut hia ae görany, me hon ban je bucen hia, me hmelen je úö hia ae hát, me hmelen je iwajo hia ae wanenec, waleji adre ham hnyin je únyi ae bo so ka anyidra je idola hia. 14 Ke oge me he ka hai hnyamök hudra me öba wan hnyei me wia ka hnyot, hwân hnyi hnyebuba hnyi Dibela, hnyi je hnyabadra hia: ke ame he ka khan' ödra a inya Iehova.

HNYIMAKAN 7.

KE ame o but kõnya hofuc ho Iehova ame ha, ka habe, 2 U nokon at lö, walang hna ha hnen Than Iehova ka hnyei Isaraela, ka habe, Obiny dut: ame o but obiny ka vak ta kopiny hnyei. 3 Ame o but walang ang köu obiny, ke oge me he ka ohwâdâ anyik hmönyin köu, me owisa köu hoton hwakecâm; ke oge me he ka oâ ka hnyi hom ányâm ta je únyi ae ikiki. 4 Ke oge me ca he ka hok hnyok gam, me betenge: ke oge me he ka oâ dem je gethen hom, ke ame he ka e hnyi wanbâm ányâm ta je únyi ae ikiki: ke ame he ka khan' öbun a inya Iehova.

5 Walang hna ha hnen Than Iehova, ka habe, Úkongon, úkongon a khaca; wâ bi, a ame o thö. 6 Ame o but obiny, wale obiny ame o, e ame hmak dö úcom, wâ bi, e ame o but. 7 At ame labâ hnyei lö, ame o but hna saú gam: ame o but úen, ke hakekeny jut bong; a bonginy imonumunuy ke ca bong bi hnân hongot senyin hon je bucen. 8 Walang, e hakekeny jut me oge me he ka hingâlâ anyik wathethöt hom, me ohwâdâ anyik hmönyin hom, ke oge me he ka owisa gam hoton dem je gethen; ke oge me he ka oâ ka hnyi hom ányâm ta je únyi hia ae ikiki. 9 Ke oge me ca he ka hokhnyok me betenge: ke oge me he ka oâ köu hoton dem je gethen, ke ame he ka e hnyi wanbâm ányâm ta je únyi ae ikiki; me ame he ka khan' öbun a inya Iehova, at úkúc. 10 Wâ bi bong, wâ bi e ame o thö: a o thö hnâm hna saú, k' ame vhong uci, e blau but bi gan. 11 Ame todrö úokonguny hnan úci ae kong; ame he ka hi' ödra hia me úseidra, me omjehedra: ke haba khaca, ame ca he ka hu je beónua gadra. 12 Ame o but úen, e hakekeny jut bong: e so ame ca senyin at ame

úcú, ke hlöuhlöu at ame kap mone : anyin
 ae bi hmönyin hon tavat ae se hia. 13
 Anyin ame ca he hmetu bi at ame úcú
 ka hnyi únyi adre úcú, eja ke ne adre
 ne môt bala bi : anyin a haba hna omanená
 hobi kâu tavat ae se hia hnyin, me ba at
 ame he ka hmetu ; k' ame ca he ke at ka
 ohwegiâ e bi ge hwakecin ae kong. 14
 Adre hia but túâ trutru, me penapena hia ;
 ke ba at ame hnyi he ka hnyi vat : anyin
 a e bi hon úseidra hia anyik hmönyin.
 15 Hele vat hnyi hoton hak, ke mok ae
 cap me hmiâ eú hnyin : ame he ka mok at
 hnyi ta hnyi ge hele vat, ke ame he bi
 hmiâ me mokae cap ka an tavat hnyi taun.
 16 Ke haba tavat adre me kec gadra, me
 adre me he ka kec môt, k' adre me he ka
 helâ me je binyin hnyigöulen bucen, k'
 adre me he ka ve tengge hon je bucen
 hwakecidra. 17 Ame he ka mat ta je
 hnyam hia, k' ame he je bouca hia ka
 sényin helâ me köö. 18 Adre me he
 minya ka weikâ ecmano ae gan nân, ke
 adre me he ka tubi ödra ge öbubuny : ke
 ame he ka hnehma ta je hnyimak hia, me
 hadreú hia ta je bödra. 19 Adre me he ka
 khuâ eú hnyi gethen anyidra sileva, ke ame
 he ka helâ me únyi ae ikiki anyidra gol : e
 ca khana anyidra sileva me gol he ka omeli
 ödra hnyi bonginy hmönyin anyi Iehova ;
 ame ca he ka sekudra, me öunöngötâ je
 hnyekudra ; anyin a wale hulö at ame öhaú'
 ödra. 20 Ke haba mecin anyin hmane-
 nang, e ame otilâ e hnyi bongon than : ke
 adre me otilâ bi je idola ae ikiki me hnân
 húkotiâ hnyin e : anyin a wale oge hia but
 hna e ködra hnân únyi ae ikiki. 21 Ke
 inya oge me he ka hna e ka hnyi hnyamen
 je atkanyua hnân söh, me ka tavat ae kong
 eang huelen hnân únyi adre hügúnâ ; ke
 adre me he ka okongoâ e. 22 Oge me he
 ka wia hnyimakök gadra, ke adre me he ka
 okongoâ anyik dok ae iyong ; ke ame he
 tavat venâu ka dit hnyin e me okongoâ e.
 23 Ányâ thö sa' cen : anyin ae unöngötö
 hnyi ge dra a jöniny, ke a unöngötö taun
 ge úokonguny. 24 Ke oge me he ka oâ
 tavat ae kong hmönyin hnyi je hnyi, ke
 adre me he ka hu umödra je uma : ke oge
 me he ka bi obiny hobelöuin anyidra tavat
 hwege ; ke adre me he ka oikikiâ anyidra
 je dok ae kap. 25 Ame he jem hnaúhangö ;
 ke adre me he ka elâm hnahic ke ba bi.
 26 Ame he ka o but' ke úokonguny me ke
 úokonguny, ke ame he ka hu ke úthumetu
 me ke úthmetu ; ke adre me he ka elâm

hna omanená unyin perofeta ; ke ame he
 ka hia hnanyibu unyin at bihut, me wâ
 bongon unyin wahingat. 27 Ame he
 than ka tengge, ke ame he taben ka khavâ
 hlohlo, ke ame he hnyamen tavat aten
 hnyi ka öbubuny ; oge me he ka ányâ
 ködra hoton dedra ta je gethen, me oge me
 he ka owisa ködra hoton únyi ae úcú ködra ;
 ke ame he ka khan' ödra a inya Iehova.

HNYIMAKAN 8.

KE hnyi huna a siks hnyi tehi a siksiny,
 hnyi bong a thabünginy tehi, inya
 oge me laba hnyi umök uma, ke ame laba
 ju hnyi hnyimakök wahingatiny Juda, me
 ame ta but huk eling hnyamen Than
 Iehova. 2 Ke inya oge me bwele, ke wâ
 bi, wale bongon a helâ me meic ; hwân hnyi
 hnyin at ke hnyikânâi me helâ me meic ;
 ke hwân hnyi hnyin göranyai me ame
 ubâhlâ helâ me makan bras. 3 Ke e ame
 hinöbeny helâke hnyam. me kât leúnen
 bök : ke haba hanu ame köp nya göranyai
 wanben hmeledrany me drany, k' ame hum
 nya Jerusalema ai hnyi hna omanená únyi
 ge Khong, ka hnyi hlinginy homagöule ka
 hnyi hnyeule eiö hnyin ka hnyi hwadrö ;
 wale taben idolainy ciâ hnyin, at ame ociâ.
 4 Ke wâ bi eling hmanenanginy Khongu
 Isaraela, helâ me hna omanená waleji oge
 me wâ hnyi dok ae tha hon. 5 Ke e ame
 ha konya, ka habe, Nokon at lö, wâ thö
 walang ang gethen ka hnyi hwadrö. Me
 oge me bwele ka hnyi gethen ka hnyi
 hwadrö, ke wâ bi jimele hnyi homagöuleny
 taben hut ame tot idolainy cia eling hnyi
 hna dit. 6 Ke e ame ha konya, ka habe,
 Nokon at lö, u je wâ but únyi adre me
 ányâ? wale únyi ae ikiki ame ányâ eang
 ge lap anyi Isaraela, me inye he ka úsâkâtö
 me anyik dok ae kap? ke u me he eâu ka
 wâ minya je únyi ae ikiki. 7 Ke e ame
 hum nya ka hnyi hwanumen hnyeule ; ke
 inya oge me bwele, ke wâ bi wale wakhala
 hnyi hna up veto. 8 Ke e ame ha konya,
 ka habe, Nokon at lö, u me he walang ang
 ka hiny hnyi hna up veto ; ke inya oge me
 hiny hnyi hna up veto, ke wâ bi hwanuma.
 9 Ke haingen konya, ka habe, Didrö me
 wâ ta je únyi ae ikiki me kong adre me
 ányâ eling. 10 Me oge me dit me wâ. ke
 wâ bi, ta je úhöfcú hia únyi ame iyâú, me
 je meno ae ikiki, me ta je idola hia anyin
 lap Isaraela, adre sihnalimen igigilö hnyi
 hna up veto. 11 Ke ame tot hnyi hnyi-

makan ta je únyi e tavat a sevente hanen wahingatiny lap anyi Isaraela, ke ame tot Jazania nõku Safana hnyi wanbödrin, ke ve hu taben meic hnyi je hnyamödrin ; ke ame sâ göranyai hai ae gan huâ a hainy utö ae bo so. 12 Ke e ame ha kõnya, ka habe, Nokon at lö, hawa u me hia but wâ hna ve ânyâ hnen wahingatiny lap anyi Isaraela hnyi dok ae menekholom hnyi je hnyeuleny je úhöúcú? anyin adre me ha, ka habe, Ame ca õ'ta but Iehova ; Iehova ame hia but hna degecâ hmeledrany. 13 Ke e ame ha kõnya, ka habe, U me he ka wâ eâu ke ta je únyi ae gan hmâ úfikikiny adre me ânyâ. 14 Me e ame hum nya ka hnyi homagöuleny uma umö Iehova ka hnyi ke keihen ka hnyi hwadrö ; ke wâ bi, omomo adre me laba eling ka tenge ga Tamuza. 15 Ke haingen kõnya, ka habe, Nokon at lö, u je wâ but e ? u me he ka wâ eâu je únyi ae ikiki gan hmâ hon e. 16 Me e ame hum nya ka hnyi hnyeuleny uma umö Iehova eiö hnyin, ke wâ bi, hnyi hwanumen uma umö Iehova, wanben poretiko me taben hut, helâke me twente faiv tavat adre me hotudra ka hnyi uma umö Iehova, me hnyimaködra deiö ; ke adre me khudrung deiö ka seúnö. 17 Ke e ame ha kõnya, ka habe, Nokon at lö, u je wâ but e ? Hawa, únyi ae hâhâ ka lap anyi Juda wale a g' adre me ânyâ je únyi ae ikiki wale adre me ânyâ eang? anyin adre hia but öunöngötâ hnyei ge úokonguny, me hwiö hmetu m' adre me ohmönyini nya : ke wâ bi, adre me inâ anginy túo ka hnyi je hnyingöidra. 18 Anyin a wale oge me he bi nya ka huliwa hnyi hmönyin : oge me ca he ka hok hnyok, me betenge : eja ke ne adre ne hongot hwege göranyai ka hnyi li hnyikönyök, oge me ca he ka ling ödra.

HNyimakan 9.

KE e ame hongot hwege ka hnyi li hnyikönyök, ka habe, Öhakekenyâ ju jem tavat adre me tuö taun, tha ödrin me anyidrin je únyi hnân úhlingö. 2 Ke wâ bi ame o but silks tavat únyi hnyi getheniny homagöule ethö hnyi ke keihen ka hnyi hwadrö, ödrin e ve o me anyidrin ta je únyi hnân úhlingö ; ke haba hnyi wanbödrin ke at ame khavâ úkhaú lino, ke hu kaia sisit hnyi vhaken. Ke ödrin e didrö me tot hnyi baten taben hut bras. 3 Ke ame he but hmanenanginy Khongu Isaraela únyi hnyi hon kerubi, waleji ame tabâ ka

hnyi hwanumen uma : Me e ame hawâ at ame khavâ lino, ae hu kaia sisit hnyi, vhaken. 4 Ke haba Iehova ame ha kâu, ka habe, Vheno thö taun wanben Jerusalema, ke u me he ka bi haten hnyi je bariny tavat adre me mâng me tenge can ta je únyi hia ae ikiki wale adre me ânyâ hnyi wanben e. 5 Ke e ame ha ka keihen, ke oge me hnyi löng, ka habe, He th' öbun ka vheno taun hoton e, me kot : ca he öbun ka hok hnyok me betenge : 6 hlingâ degecâ but wahingat me wahidröu, me wahlu, me wanakat, me omomo : ke ca he ka hakekenyâ ke at ae hu haten ; ke hwân dö hnyi anyik dok ae kap. Me adre me hwân ge wahingat hnyi hnyimakan uma. 7 Ke e ame ha ködrin, ka habe, Okongoâ but uma, me öunöngötâ thö je hnyeule ge je hna hlingâ : he th' öbun. Me adre me he me hlingâ hnyi taun. 8 Ke hnyi úen ödrin e hlingâ, k' oge me hake laba, me oge me ta hnyikânâi me tenge, me ha, ka habe, Ekölö Than Iehova ! hawa, u me he ka kot hia je kolon Isaraela, anyin a u me hingâlâ ânyâm hmönyin hon Jerusalema? 9 Me e ame ha kõnya, ka habe, E ti gan hmâ hulö anyin lap Isaraela me Juda, ke ame unöngötö hnyei ge dra, k' ame unöngötö taun ge hna ohwalö je hna owisa : anyin a haingödra, ka habe, Iehova ame hia but hna degecâ hmeledrany, ke ame ca wâ bi Iehova. 10 Ke haba inya oge me ca he bi nya ka hok hnyok me betenge, ke oge me he ka oâ dedra je gethen ka hnyi hon je bödra. 11 Ke wa bi, haba at ame khavâ lino, ae hu kaia sisit hnyi vhaken, ame thumetu, ka habe, Oge hia but ânyâ helâ me hnâm hna kûna kõnya.

HNyimakan 10.

KE oge me wâ, ke wâ bi, wale hnyi unyin ae lau hnyi hon ban je kerubi ame manen ethö hudrin helâke veto safairo, ame manen helâ me man ke theron. 2 Ke e ame fuc ka at ame khavâ lino, me ha, ka habe, He thö ka hnyi wanben je waengen ame khenyi, wale hmelen kerubi, me öunöngötâ hnyamâm ge je walep ae möt únyi hnyi wanben je kerubi, me khûkhûâ ka hnyi taun. Me e ame he, ke oge me wâ. 3 Ke haba je kerubi ödrin e tot hnyi ke keihen metân uma, e ka didrö at ka huyin : ke unöngötö hnyeule eiö huyin ge úlâ. 4 Ke haba hmanenangi Iehova ame ölö úheny hon kerubi, me tot hon hwanumen

uma ; ke unöngötö hnyeule ge ùlá, ke unöngötö hnyeule ge melaminy hmanenangi Iehova. 5 Ke adre me löng hwan je labenyin je kerubi ke ne o but hnyeule eú, helá me ifucin Khong Aekhanahia, e ka fuc. 6 Ke hnyi úen e ame húna ka at ame khavá lino, ka habe, Hom dö meic únyi hnyi wanben je waengen ame khenyi, hnyi wanben je kerubi, me e ame didró me tot hnyi baten ke waengen. 7 Ke haba kerubi ame iná hnyamen únyi hnyi wanben je kerubi ka hnyi wanben meic a e hnyi wanben je kerubi, me aoc e, me ip hnyi hnyamen at ame khavá lino, ke e ame hom me didrut mē. 8 Ke ame manen ge je kerubi helá me hnyamen at hmelen je labenyidrin. 9 Ke oge me wá, ke wá bi, vak ta waengen hnyi baten je kerubi, ke waengen hnyi baten ke kerubi, ke ke waengen hnyi baten ke kerubi : ke haba bongon je waengen me helá me makan veto berulo. 10 Ke haba bongudrin, ödrin vak ae tha úcú, heláke ke waengen hnyi hnyin ke waengen. 11 Ödrin ka he ödrin e tha vheno vak ta ke keihödrin : ödrin e ca hwiö ödrin ka he, ke haba dok ame hnyimakan ka hnyin je bödrin, ödrin e vheno e ; ödrin e ca hwiö ödrin ka he. 12 Ke haba je unyidrin hia me je hotudrin, me je hnyamödrin, me je labenyidrin, me je waengen, e unöngötö ge je ecmak ígigilö, wale je waengen unyidrin a vak. 13 Haba je waengen, adre me haw' ödrin, ke oge löng e, a je waengen adre me okhenyö. 14 Ke úsa vak je hnyimaködrin, hnyimakan kerubi ke hnyimak, ke hnyimakan at hnyimak a loiny, ke hnyimakan liona kuniny, ke hnyimakan aeto vakiny. 15 Ke ame ölö göranyai je kerubi : wale únyi ae möt, waleji oge wá hnyi wagewe Kebara. 16 Ke hnyi úen ame he je kerubi, me ame tha he mödrin je waengen, ke e ka ulolo je labenyidrin je kerubi he ka gá göranyai úhedrin ang hmelen, me ame ca hwiö bi je waengen unyidrin. 17 Ödrin ka tot me ödrin e tot minya ; ke ödrin ka olö göranyai me ödrin e he minya göranyai : anyin a e hnyi hnyidrin hanon únyi ae möt. 18 Me ame he but hmanenangi Iehova únyi hnyi hwanumen uma me laba hon je kerubi. 19 Haba je kerubi ödrin e lau göranyai je labenyidra me gá göranyai úhedrin ang hmelen, ke inya oge me wá, ödrin ka he, me ka tha ödrin me je waengea : ke ödrin e tot hnyi homagöuleny uma umö Iehova e jimeió ; ke thö hudrin hmanenanginy Khongu Isaraela.

20 Wale únyi ae möt, waleji oge me wá hmelen Khongu Isaraela hnyi wagewe Kebara ; ke khanö nya but a ödrin je kerubi. 21 Usa vak je hnyimaködrin, ke úsa vak labenyidrin ; ke helá me hnyamen at hmelen je labenyidrin. 22 Ke haba bongon je hnyimaködrin, je hnyimak waleji oge me wá hnyi wagewe Kebara, wale bongudrin ke walödrin bi ; ke ödrin e ve he hnyimaködrin wisa.

HNYIMAKAN 11.

KE haba hanu ame köp nya göranyai me hum nya ka hnyi homagöuleny uma umö Iehova e jimeió, hnyi hnyimakan e deió : ke wá bi, wale hnyi homagöule ödrin twente faiv tavat ; ke oge me ö Jazania nöku Azura hnyi wanbödrin, me Pelatia nöku Benaia, li taben tavat. 2 Ke e ame ha könya, ka habe, Nokon at lö, wale tavat adre me vak hulö, me úhnenamö iyawö hnyi taun ang : 3 haingödrü, ka habe, E ca hakekeny bi úen he ka op uma : haba taun ang, me helá me öt, ke öta ang ta je utiö. 4 Anyin a wale perofeta thö ködrü, nokon at, perofeta thö. 5 Ke ame o but könya hanu Iehova, ke e ame ha könya, ka habe, Ha thö, ka habe, Walang hna ha hnö Iehova, ka habe, Lap anyi Isaraela lö, walang hobun hofuc ; anyin a oge me wá but ta je únyi ame kü eú hnyi je hnyekubun. 6 Öbun e hia but osehia je hanibun hnyi taun ang, k' öbun e hia but öunöngötö je getheniny ge je hanibun. 7 Anyin a wale walang hna ha hnen Than Iehova, ka habe, Haba je hanibun waleji öbun e ip hnyin e, ödra a ta je viny bi, ke haba taun ang, me öt bi : ke adre me he ka hum öbun únyi hnyin e. 8 Öbun e hia but outen hele vat ; ke oge me he bi nya ka oá köbun hele vat, haingen Than Iehova. 9 Ke oge me he ka hum öbun únyi hnyi hnyin e, me hn' öbun ka hnyi hnyamen je atkanyua, me bi hwaban köbun. 10 Öbun e he ka ta ge hele vat ; oge me he ka owisa köbun hnyi hnyigöulen Isaraela ; ke ame he ka khan' öbun a inya Iehova. 11 Ame ca he taun ang ka hnán öt köbun, ke öbun e ca he ka hnán utiö hnyi hnyin e ; oge me he ka owisa köbun hnyi hnyigöulen Isaraela ; 12 ke ame he ka khan' öbun a inya Iehova : anyin a öbun e ca hia but vheno anyik je hnanyibu, ke öbun e ca ányá hnök je hna owisa, ke öbun e hia but ányá hoton je hna otílá hnen je hnyei igigili öbun. 13

Ke inya oge me tiga perofeta, me ame mokcu Pelatia nõku Benaia. Me oge me ta hnyikânai me tenge hwege, me ha, ka habe, Ekölö Than Iehova! u me he ka bi obiny ka je kolon Isaraela?

14 Me ame o but kõnya hofuc ho Iehova, ka habe, 15 Nokon at lö, haba je liamekeiny möu, je liamekeiny möu, wale tavat ödra tha at möu, me lap anyi Isaraela hia, haba ödra bi wale tavat a hia but ha ködra hnen aten Jerusalema, ka habe, Úsákâüü but me Iehova; adre me ham hnyei ang köhmun me hnân ihmun: 16 anyin a wale, ha thö, ka habe, Walang hna ha hnen Than Iehova, ka habe, Eja ke ne oge ne hia but úsákâü ödra unyin je hnyei, ke eja ke ne oge ne hia but ovesei ödra unyin je hnyei, oge me he bi nya ka dok ae kap ködra hnyi üen ae úhnyúkong hnyi je hnyei adre me he ka o ka hnyin. 17 Anyin a wale ha thö, ka habe, Walang hna ha hnen Than Iehova, ka habe, Oge me he ka hum öbun únyi hnyi je hnyei, me úkhacaköu öbun únyi hnyi je hnyei waleji adre ovesei öbun ka hnyin, ke oge me he ka ham köbun hnyei Isaraela. 18 Ke adre me he ka he kâe, me degec e je únyi ae ikiki me kong hia. 19 Ke oge me he ka ham ködra hnyok a khaca, me ip eú hnyi je hnyekubun hanu ae teb únyi; ke oge me he ka hom but hnyok ae veto hnyi je unyidra, me ham bi ködra hnyok a utiö: 20 m' adre me he ka vheno anyik je hnanyibu, me tuö hnök je hna otilá, me ányá e: ke adre me he ka bi lakeik, ke oge me he bi nya ka Khongudrin. 21 Ke haba tavat adre me hnu hoton hnen je hnyekudra ta je önyen anyidra ta je únyi ae ikiki me kong, oge me he ka oá dedra je gethen ka hnyi hon je bödra, haingen 'Than Iehova. 22 Ke haba je kerubi adre me lau göranyai je labenyidrin ke tha ödrin me je waengen; ke ethö hnyi hudrin hmananginy Khongu Isaraela. 23 Ke ame he göranyai hmanenangi Iehova únyi hnyi wanben taun, me laba hon bucen hnyi ke keihen taun e deö. 24 Ke haba hanu ame köp nya göranyai, me hum nya Kaledaia ai ka ta je bá, hnyi hna omanená hnen hanon Khong. Me ame ölö thö gak hna omanená waleji oge me wá. 25 Me oge me ha ka ta je bá únyi hia a omanená kõnya Iehova.

HNYIMAKAN 12.

KE ame o but kõnya hofuc ho Iehova, ame ha, ka habe, 2 Nokon at lö, u je laba hnyi wanben lap ae úkhin fuc, tavat ae hu li ecmak hnân bwele, k' adre me ca bwele bi, ke hu li hnyikönyödra hnân löng, k' adre me ca löng bi; anyin a ödra lap ae úkhin fuc. 3 Anyin a wale, nokon at lö, u ma penapena ta je únyi hnân sukhöüná, ke sukhöüná but hnyi lany hnyi hnyimaködra; ke u me he ka he thö únyi hnyi hnâm ka hnyi ke dok hnyi hnyimaködra: eja ke ne ödra lap ae úkhin fuc, me adre ne he la ka únyúkme. 4 Ke u me he ka sukhöüná ányám ta je únyi hnyi lany hnyi hnyimaködra, heláke me ta je únyi hnân sukhöüná: ke haba u, me u me he ka didrut hnyi sahac hnyi hnyimaködra, heláke me úhedra tavat ka hnyi ke hnyei. 5 Tho moko but hna up uma hnyi hnyimaködra, ke sukhöüná hnyi gethen eling. 6 U me he ka vaden ta je únyi e hon bajebenyám hnyi hnyimaködra, me sukhöüná but hnyi lit; ke u me he bi ka tube hnyimákám, m' u me ca wá bi kâná: anyin a oge hia but ip u hnân haten ka lap anyi Isaraela. 7 Me oge me ányá helá me hna húna kõnya: ke oge me sukhöüná hnyi lany anyik thatúnyi, heláke me ta je únyi adre me hom ka hnyi ke dok, ke hnyi sahac oge me tho hna up uma ge li hnyamök; oge me hom hnyöü ai hnyi lit, ke oge me vaden hon bajebenyik hnyi hnyimaködra. 8 Ke haba hnyi hnyomakatu, me ame o kõnya hofuc ho Iehova ame ha, ka habe, 9 Nokon at lö, hawa, ame ca ha bi köu hnen lap anyi Isaraela, lap ae úkhin fuc, ka habe, Iéu u me ányá? 10 Ha thö ködra, ka habe, Walang hna ha hnen Than Iehova, ka habe, Haba hok ang, únyi ge than Jerusalema, me lap hia anyi Isaraela hnyi wanbödra. 11 Ha thö, ka habe, Inya ang haten köbun: adre me he ka ányá ködra helá me hnök hna ányá: adre me he ka he ka hnyi ke hnyei, ka bá. 12 Ke haba than unyidra e ame he ka vaden hon abenyin hnyi lit, me didrut: adre me he ka tho moko hna up uma, he ka sukhöüná hnyi gethen e: e ame he ka tube hnyimakan me me ca wá bi kâná ge ecmak. 13 Ke oge me he ka lau útök ert hon e, ke e ame he ka hnok hnyi anyik hnewe: ke oge me he ka hom e Babulona ai, ka hnyi hnyei at Kaledaia: ke so bi, e ame ca he ka wá e, ke e ame he ka mok e. 14 Ke

oge me he ka khûkhûâ lahien hia igigilö e, me anyin je deö vat hia, ka hnyi je ang hia ; ke oge me he ka oc hele vat he ka hnu ödra. 15 Ke adre me he ka wâ a inya Iehova, iny ka he ka ovesei ödra unyin ta je hnyei, me ve ob' ödra ka hnyi je hnyei. 16 Ke oge me he ka bi köluidra ae wakhalet únyi ge hele vat, me hmiâ, me mok ae cap ; m' adre me he ka ha gaga anyidra ta je únyi ae ikiki hia unyin ta je hnyei adre me he ka he ka hnyin ; ke adre me he ka wâ a inya Iehova.

17 Ke ame o but kõnya hofuc ho Iehova ame ha, ka habe, 18 Nokon at lö, an ju ám jeü me öbubuny, me ijem belâm utköiö me ot, me hom úhnyûkongo ; 19 ke ha thö ka tavat aten hnyei, ka habe, Walang hna ha hnen Than Iehova, ha thö ge aten Jerusalema, me hnyei Isaraela, ka habe, Adre me he ka an ö'dra jeü me hom únyûkongo me ijem belidra utköiö me láiiâ, me me hia but ta je únyi hnyi iny hnyei, can úkonguny anyin tavat adre me labâ e. 20 Ke ame he ka iny wau ta je taun adre me labâ, ke ame he ka ba aten hnyei ; ke ame he ka khan' öbun a inya Iehova.

21 Ke ame o but kõnya hofuc ho Iehova ame ha, ka habe, 22 Nokon at lö, ietüji öbun e vejetâ hnyi hnyei Isaraela ka habe, Adre me hobefûâ but je bong, k' ame ca hwâdâ but je hna omanenâ ? 23 Anyin a wale, ha thö ködra, ka habe, Walang hna ha hnen Than Iehova, ka habe, Oge me he ka bi obiny vejec eling, k' adre me ca he hmetu ka vejecâ e hnyi Isaraela ; ke ha thö ködra, ka habe, E hakekeny jut je bong, ke ihwâ-dâiny' ta je hna omanenâ hia. 24 Anyin ame ca he hmetu ka hu omanenâ ae únyi baü, me bi khong ae iyawö hnyi wanben lap anyi Isaraela. 25 Anyin a inya Iehova ; oge me he bi nya ka fuc, ke haba hofuc oge me he ka ha me ame he bi ka hwâdâ ; ame ca he hmetu ka bec : anyin oge me he ka ha hofuc hnyi bongubun je bong, lap ae úkhin fuc, me ohwâdâ e, haingen Than Iehova.

26 Ke ame o but kõnya hofuc ho Iehova, ame ha, ka habe, 27 Nokon at lö, wâ bi, ame ha lap anyi Isaraela, ka habe, Haba hna omanenâ e ame wâ, me hobi kâu je bong ae tiga sâkâü, ke e ame perofeta ge ta je ün nyiele. 28 Anyin a wale ha thö ködra, ka habe, Walang hna ha hnen Than Iehova, ka habe, Ame ca he ka bec hmetu bi hok ta je hofuc hia, ke haba hofuc oge me he ka ha, me ame he ka hwâdâ, haingen Than Iehova.

HNYIMAKAN 13.

KE ame o but kõnya hofuc ho Iehova ame ha, ka habe, 2 Nokon at lö, perofeta thö úcon ta je perofetainy Isaraela a tavat adre me perofeta, ke ha ködra tavat adre me perofeta únyi eü hnyi je hnyekudra bi, ka habe, Löng ju öbun hofuc ho Iehova ; 3 Walang hna ha hnen Than Iehova, ka habe, Ekölö ge je perofeta ae monu, tavat adre me hnu hoton ta je hnyekudra bi, ke ba únyi adre me wâ ! 4 Isaraela lö, haba ányâm je perofeta me helâke me je alopeiny je dok ae hnyot. 5 Öbun e ca hia but ölö ka hnyi je dok ae khekhe, ke öbun e ca okhötâ hna up haginy lap anyi Isaraela, me me tot hnyi vat hnyi bongu Iehova. 6 Adre me hia but wâ únyi ae únyi baü, ke bi khong thoi, me ha, ka habe, Haingö Iehova ; ke ame ca kun' ödra ga Iehova : ke adre hia but kunâ tavat he ka geju a ga me he ka hwâdâ but hofuc. 7 Hawa, öbun e ca wâ hna omanenâ ae únyi baü, me bi khong thoi, anyin öbun e ha, ka habe, Hö Iehova ; ke so bi oge ca fuc bi ?

8 Anyin a wale walang hna ha hnen Than Iehova, ka habe, Anyin a öbun e hia but ha únyi ae únyi baü me wâ je thoi, awe, wâ bi, e ve inya möbun haingö Iehova. 9 Ke ame he hnyamök ka ve e me je perofeta tavat adre me wâ únyi ae únyi baü, me bi khong thoi ; adre me ca he ka hnyi hanen úhnenamö anyin lakeik, ke adre me ca he ka sihnalimidra hnyi tusiny lap anyi Isaraela, ke adre me ca he ka o ka hnyi hnyei Isaraela ; ke ame he ka khan' öbun a inya Iehova. 10 Anyin a wale, ke can minya anyin adre me hia but omono lakeik me ha, ka habe, E hnahic ut ; ke ca hnahic bi ; ke hnyi ün ame up veto ke at, wâ bi, adre me botru ge dröu adre ca huliwan : 11 ha thö ka tavat adre me botru ge dröu adre ca huliwan, ka habe, E ame he ka kölu : ame he ka ta we ae gan ; me haba öbun, je veto we wahma, öbun e he ka kölu ; ke ame he ka kia e hnen weneü. 12 Wâ bi, e ka ü but hna up veto, hawa, adre me ca he ka ha köbun, ka habe, Ewa tap dröu waleji öbun e botro e ? 13 Anyin a wale, walang hna ha hnen Than Iehova, ka habe, Oge me he bi nya ka kia e ge weneü hnyi anyik wathethöt ; ke ame he ka gan we hnyi anyik hmönyin, me je veto we wahma hnyi wathethöt he ka ohia e.

14 Ke oge me he ka kia hna up veto öbun e botro ge dröu adre me ca huliwan, me hagutá e hnyikánái, me me manen dut taben : ke e ame he ka ü, ke ame he ka hi' öbun hnyin e ; ke öbun e he ka wá a inya Iehova. 15 Heláe oge me he ka ohwádá anyik wathethöt hon hna up veto me tavat adre me botro e ge tap dröu adre ca huliwan ; ke oge me he ka ha köbun, ka habe, E hia but hna up veto, me tavat adre me botro e ; 16 wale je perofetainy Isaraela tavat adre me perofeta ga Jerusalema, me wá hobi káu e je hna omanená e hnahic ke ba bi hnahic, haingen Than Iehova.

17 Ke haba u, nokon at lö, hnyimákám dö ka omomo wale hnyi em hnyei, tavat adre me perofeta únyi hnyi je hnyekudra bi ; ke u ma perofeta thö úcúdra, 18 me ha, ka habe, Walang hna ha hnen Than Iehova, ka habe, Ekölö ge omomo hnyat adre me tibet taben je bokhulubenyidra hia, me ányá je hnabinybak hobi káu je dö hia, m' adre me töuhneweny tavat ! Hawa, öbun e he ka noc tavat aten ik hnyei, me omelö tavat hobi köbun bi ? 19 Ke öbun e hia but okongu nya unyin lakeik hwaban je hnyam bali, me je ujeú, he ka hlingá tavat a ca hnân bi mok, me omelö tavat a ca hnân bi möt, hnen anyibun thoi ka ta je atök tavat adre me long thoi. 20 Anyin a wale, walang hna ha hnen Than Iehova, ka habe, Wá bi, e ve inya me taben je bokhulubenyibun, waleji öbun e töuhneweny tavat eling, me alin ödra, ke oge me he ka hügün' ödra únyi hnyi je hnyamöbun ; ke oge me he ka uny tavat, waleji öbun e noc, waleji tavat adre me alen. 21 Ke oge me he ka kia je hnabicöbun, me omelö lakeik únyi hnyi hnyamöbun, ke adre me ca he hmetu bi ka hn' ödra hnyi je hnyamöbun he ka noc ; ke ame he ka khan' öbun a inya Iehova. 22 Anyin a öbun e hia but ovecá hnyekon at ae wisa ge je thoi, waleji oge me ca ovecá ; me ohwegiá hnyamen tavat ae kong, me me ca he ka hmetu bi únyi hnyi deny gethen ae monu, me me möt : 23 anyin a wale öbun e ca he hmetu ka wá únyi ae únyi baú, me bi khong : ke oge me he ka omelö lakeik únyi hnyi hnyamöbun : k' ame he ka khan' öbun a inya Iehova.

HNyimakan 14.

KE ame o but könya keihen wahingatiny Isaraela, me laba hnyi hnyi-

makök. 2 Me ame o but könya hofuc ho Iehova ame ha, ka habe, 3 Nokon at lö, haba tavat ang me adre hia but odilá anyidrin je idola ka hnyi je hnyekudra, me ip hnyi hnyimáködra anyidra hulö, at ame othöá : hawa, e úcú bi ödra he ka hnei nya ? 4 Anyin a wale, ha thö ködra, ka habe, Walang hna ha hnen Than Iehova, ka habe, Haba tavat hia aten lap anyi Isaraela, at ame hom anyin ta je idola ka hnyi hnyekon, me ip hnyi hnyimakan anyin hulö, at ame othöá, me ame o ka at a perofeta ; hamök bi Iehova he ka thu ka at eling hoton úseyin anyin je idola ; 5 m' oge me he ka noc lap anyi Isaraela eü hnyi hnyekudra bi, anyin a ödra úsákáúö mönya hia ge anyidra je idola. 6 Anyin a wale, ha thö ka lap anyi Isaraela, ka habe, Walang hna ha hnen Than Iehova, ka habe, Hmetu ju, hmetu ju öbun únyi hnyi anyibun je idola ; me wia thö je hnyimaköbun, únyi hnyi anyibun ta je únyi ae ikiki hia. 7 Anyin a haba aten lap anyi Isaraela hia, me je atkanyua adre me mē laba hnyi hnyei Isaraela, at ame óúsákáúö mönya me kap anyin je idola hnyi hnyekon, me ip hnyi hnyimakan anyin hulö, at ame othöá, me ame o ka perofeta he ka hnei nya hobi káu e ; hamök bi Iehova he ka thu káu : 8 ke oge me he ka wáhmá at eling, me ip hnân láitá, me hnân haten me vejec, ke oge me he ka subá degecá e únyi hnyi wanben lakeik ; ke ame he ka khan' öbun a inya Iehova. 9 Ke a ne monu but perofeta me ha ke hofuc, inya Iehova at ame omonu perofeta eling, ke oge me he ka iná hnyamök hon e, me ohia e únyi hnyi ik hnyei a Isaraela. 10 Ke adre me he ka kap hwaban anyidra hulö : ame he ka tha úcú hwaban ka perofeta me at ame elám unyin ; 11 me me ca he monu hmetu gak lap anyi Isaraela, me oikiki ödra hmetu bi hnyi hnödra je hna hanyáúá ; ke so bi, m' adre me he ka lakeik, me oge me he bi nya ka Khongudrin haingen Than Iehova.

12 Ke ame o but könya hofuc ho Iehova ame ha, ka habe, 13 Nokon at lö, e ka ányá hulö könya hnen ke hnyei me ányá únyi ae kong, ke iny ka hai hnyamök hon e, me ohmetro ciny jeúiny, me kuná káu hniá, me subá degecá únyi hnyin e at me meno, 14 eja ke ne a ne eling hnyat ang a kun, a Noa, me Daniela, me Jobu, ödrin e he ka ve omeli ödrin bi hake ödrin hnen hwakecidrin ae wisa, haingen Than Iehova. 15 Oge ne kuná je meno ae kong

ka vheno hnyei, me ödrin e okongoá e, me me i wau, me me ca he at ka he hnyin, can je meno ; 16 eja ke ne a ne eling hnyat eji a kun, me haingen Than Iehova, Kia inya inya, a ödrin e ca he ka omelö je lakon obaga me wahu ; k' ödrin e he ka omeli ödrin bi, k' ame he ka i wau hnyei. 17 Ke oge ne oá hele vat ka hnyei eling, me ha, ka habe, Hele vat lö, vheno thö hnyei ; ke inya oge me subá degecá únyi hnyin e at me omeno ; 18 eja ke ne a ne eling hnyat eji a kun, me haingen Than Iehova, Kia inya inya, a ödrin e ca he ka omelö je lakon obaga me wahu, ke ödrin e he ka omeli ödrin thibi. 19 Ke oge ne kuná mok ae cap ka hnyi hnyei eling, ke hingalá anyik wathethöt hon e, wale dra, he ka subá degecá únyi hnyin e at me omeno : 20 eja ke ne a ne eling Noa, me Daniela, me Jobu, haingen Than Iehova, Kia inya inya, a ödrin e ca he bi ka omelö je lakon obaga me wahu ; ke ödrin e he thibi ka omeli ödrin bi ge hwakecadrin ae wisa. 21 Anyin a walang hna ha hnen Than Iehova, ka habe, Hawa, e ca beönua bi, iny ka he ka kuná Jerusalema ai anyik ta je hna owisa a vak ae kong, wale a hele vat, me hmiá, me omeno ae kong, me mok ae cap, he ka subá degecá únyi hnyin e at me omeno ? 22 Ke wá bi, ame he ka hu kolon hnyin e, a tavat adre me he ka hom but, a je lakon obaga me wahu : wá bi, adre me he ka he köbun, ke öbun e he ka wá ta je hwakecitra me anyidra ta je huliwa : m' adre me he ka otubweli öbun únyi ge okongon waleji oge me oá ka Jerusalema, me ta je únyi hia oge me oá ka hnyin. 23 Ke adre me he ka otubweli öbun, öbun ka wá je hwakecitra me anyidra je huliwa : ke öbun e he ka wá a oge me ca ányá ke ba can bi ta je únyi hia waleji oge me ányá ka hnyin, haingen Than Iehova.

HNYIMAKAN 15.

KE ame o but könya hofuc ho Iehova, ame ha, ka habe, 2 Nokon at lö, ieú únuainy vine hon ta je úö hia, wale anginy vine unyin ta je úöiny hnyot hia ? 3 Hawa, adre me he ka hom hnyiban útöiny hnán ányá ke huliwa ? hawa, adre me he ka bi matalafi únyi gan hnán uhno ke únyi ? 4 Wá bi, adre me khúá e ka hnyi meic hnán utö : ke haba meic ame an li hnyiban me thong wanben ; hawa, e úcú hnán ke huliwa ? 5 Wá bi, e ka tiga bekhöt, me

ame ca úcú hnán huliwan : ke e ti ca úcú hobi káu ke huliwa e ka hia but meic an me thong. 6 Anyin a wale walang hna ha hnen Than Iehova, ka habe, Haba vine unyin úöiny hnyot, me oge me hna hnán an meic, heláe oge me he ka hna aten Jerusalema. 7 Ke oge me he ka wáhm' ödra ; adre me he ka kec ge meic, ke ame he bi ka an hnen ke meic ; ke öbun e he ka wá a inya Iehova, iny ka wáhm' ödra. 8 Ke oge me he ka obia tavat, anyin adre hia but hanyáúú, haingen Than Iehova.

HNYIMAKAN 16.

KE ame o but könya hofuc ho Iehova ame ha, ka habe, 2 Nokon at lö, omanená thö ka Jerusalema ta je únyi ae ikiki hnyin. 3 Ke ha thö, ka habe, Walang hna ha hnen Than Iehova ka Jerusalema, ka habe, Haba dok u je kú hnyin, ke dok adre hnöku u hnyin, me únyi hnyi hnyei Kanana ; at Amora kámám, ke momo Heth hinyám. 4 Ke haba hna hnöku u, haba hnyi bong adre hnöku u hnyin, me adre ca subá bibikám, ke adre ca ösüö u hnyi köiö me u me so ; ke adre ca botru u ge sált, ke adre ca lan u ge mano. 5 E ba at a betenge gam me ányá hobi köu ta je únyi me betenge gam : ke adre khúö u hnyi utkáná, anyin adre húkhötiá unyam hnyi bong adre hnöku u hnyin. 6 Ke hnyi úen oge me he unyam, me ö u me u me seset hnyi drám, me oge me ha köu, ka habe, Eja ke ne u je ne seset hnyi drám, möt dö ; eke, oge me ha köu, ka habe, Eja ke ne u je ne seset hnyi drám, möt dö. 7 Oge me osehiö u helá me vongon hnyot, me u me se hia but, me gan dut, ke u je o ka hnyi bongon ae ti mec ; ame ku li basám, ke beú but leúnen bâm ; ke so bi ehac u je he thu me ba úkhaú : 8 ke hnyi úen oge me he unyam me ö u, me wá bi, úen betenge ányám bong, ke oge me lau hom obiny anyik úkhaú, me khaúö u at ame mokut thu : eke, oge me khemanyn köu, me úhinyköu möu, haingen Than Iehova, ke u anyik bi. 9 Ke oge me ösüö u ge köiö ; eke, oge me kot degecá drám hnyi unyam, me hú u ge wakaco. 10 Ke oge me okhaúö u ge mano adre tibet omecá, me odilá li hnyetcam hnyi unen takesa, ke oge me oweikö u ge lino, me khaúö u ge silek. 11 Ke oge me otheibi u ge je omeoin, me iná li waen hnyi li benyam, me

ovekinyi u ge ong sacen. 12 Ke oge me ip otru hnyi hnyingöiâm, me li theibiny hnyiköny hnyi li hnyikönyâm, me obicö u ge korana ae hmanenang. 13 Adre me theibi u helâe ge gol me sileva; ke haba khaûâm, me lino me silek, me mano adre me tibet omeçâ; ke haba âm jeú, me falawa ae so, me hani, me wakaco: ke u ti hmanenang hmönyin, ke u je so tot ke ne o but bongon than. 14 Ke ame lung ânyâm hmanenang ka hnyi je hnyei; anyin ae bekhöt ut e, ge bongon than gak waleji oge me ip hom, haingen Than Iehova.

15 Ke u je gejon ânyâm hmanenang, me bi únyi monu ge ânyâm lung, me hingálâ ânyâm je bi únyi monu ködra hia adre me gethen unyâm; ka anyin dut. 16 Ke u je hom ânyâm ke je úkhaú me ânyâ hobi kâu je dok ae görany ae ve bongon bi, me bi únyi monu eling: ame ka he ka o but ta je únyi helâe, k' ame ca he hmetu ka helâe. 17 Ke u je hom je hmanengâm gol me sileva gak, waleji oge me ham köu, me ânyâ je hna theátâ at, m' u me bi únyi monu mē; 18 ke u je hom ânyâm je úkhaú adre omeçâ, me khaú' ödrin, me ip hnyi hnyimaködrin anyik wakaco, me anyik utö ae bo so. 19 Ke haba jeú oge me ham köu, wale falawa me wakaco me hani, waleji oge me ham me âm, me u je ip hnyi hnyimaködrin, me hnân bo so, ke e hnathu e; haingen Than Iehova. 20 Ke haba khaca, u je hia but hom lakom obaga me wahlu, waleji u je hnoko hobi könya, me hudi ödra ködrin me hnân ö' drin. Hawa, únyi ae úhnyükong hnâm je hua bi únyi monu, 21 m' u me hlingá lakuk, me hn' ödra he ka he hnyi wanben meic ködrin? 22 Ke haba hnyi hwakeçâm ae ikiki me ânyâm je bi únyi monu hia, me u je ca únykúme je bonginy hlu a u, hnyi úen ae ba úkhaú, ke u me mokut thu, me seset hnyi drâm. 23 Ke hwaban ânyâm ta je hulö hia, (ekölö, ekölö gam! haingen Than Iehova,) 24 me u je op dok ae nua bi hobi köu, me ânyâ hobi köu me dok ae görany hnyi ta je gethen hia thithö. 25 U je hia but op ânyâm je dok ae görany, hnyi je hua saú hia, me oikikiâ ânyâm hmanenang, ke u je öüsa-kâúöâ li hnyeucâm ka tavat adre me gethen unyâm, me osehia hnâm hna bi únyi monu. 26 Ke u je hia but bi únyi monu me tavat Aigupito, tavat adre me laba hakekenyi u, tavat ae gan hmaidra; ke u je hia but osehia hnâm je hna bi únyi monu, me ohmönyini nya. 27 Anyin a wale wâ bi, oge

hia but hai hnyamök hom, me oúnyükongöâ âm jeú, me hnö u ka hnyi weny tavat adre me húkötïö u, je wahluiny Filisiti tavat adre me hmehma ge je hwakeçâm ae ikiki. 28 U je hia but minya bi únyi monu me at Asuria, anyin a u me ca hmâ; eke, u je hia but bi únyi monu mödra, ke so bi u je ca sekon bi. 29 Ke haba khaca u je hia but osehia hnâm hna bi únyi monu hnyi hnyei Kanana, ke ne o but hnyi Kaledaia; ke so bi ame ca sekom hnen e. 30 Nakaem ge sényin hnyi hnyekom, haingen Than Iehova, anyin u me ânyâ ta je únyi hia eling, huliwa anyin momo ae hwege hnyimen, at ame bi únyi monu; 31 ke anyin a u je op ânyâm dok ae nua hnyi je hna saú hia, me ânyâ ânyâm dok ae görany hnyi je gethen hia; ke ca úcú bi me momo hnyi gethen u bi, u me húkötïâ hwaban. 32 U momo at ame bi únyi momu! at ame weny je atkanyua ke degec bi âiân! 33 Adre me ham je bwihlany ka je momo hia hnyi gethen: ke u bi, u me ham ânyâm je bwihlany ka je lawem hia, me bi hwaban ködra, m' adre me o köu hnyi je ke keihen hia hnyi hnâm je hna bi únyi monu. 34 Ke ve bongom bi me ke je momo hnyi bi únyi monu a u, ke ba at ame he köu he ka bi únyi monu: ke u je bi hwaban, ke adre me ca bi hwaban köu, anyin a wale, e ke bongom bi.

35 Anyin a wale, momo hnyi gethen lö, löng je hofuc ho Iehova: 36 Walang hna ha hnen Than Iehova, ka habe, Can adre me hingálâ ikiki i u, ke manen dut unyâm ge hnâm hna bi únyi monu me je lawem; ke can je idolainy hia ânyâm je hwakecin ae ikiki, ke can dren lakom, waleji u je ham ködrin; 37 anyin a wale, wâ bi, oge me he ka úkhacaköu je lawem hia, waleji u je úsenyinköu mödra, me tavat hia waleji u je wem, tha ödra me tavat hia waleji u je húkötïâ; oge me he ka úkhacaköu ödrin úcom igigilö, me omanená unyâm ködra, m' adre me he ka wâ unyâm hia. 38 Ke oge me he ka bi hwaban köu, helâ me hna bi hwaban ka omomo, hnyat adre me bi únyi monu, me hingálâ dra: ke oge me he ka oâ köu dren wathethöt me ciâ. 39 Ke oge me he ka hnö u ka hnyi hnyamödrin, k' adre me he ka tho umâm uma ae nua, me hagutâ ânyâm je dok ae görany; ke adre me he ka un dö je khâuâm, me hom je ohmanenangâm ae meic: ke adre me he ka hnö u ke ba úkhaú ke ba únyi gam. 40 Ke adre me he ka oâ köu deö at, ke

adre me he ka lûö u ge veto, me dâöa u ge je hele vat. 41 Ke adre me he ka thong degecâ umâm je uma ge meic, me bi hwaban köu hnyi hnyimakan omomo ae se hia; k' oge me he ka thao u m' u me ca he hmetu ka bi ûnyi monu, ke u me ca he hmetu ka hawâ at ge hwaban. 42 Helâe oge me he ka bi obiny anyik hmönyin köu, ke ame he ka hwiö gam hnök hna ciâ, ke oge me he ka menâ, ke oge me ca he hmetu ka hmönyin. 43 Anyin a u je ca hia but ûnykûme je bonginy hlu a u, ke u je oveci nya ge ta je ûnyi hia eling, anyin a wale, wâ bi, oge me he ka bi hwaban hwakecâm ka hnyi bâm, haingen Than Iehova : ke u me ca he ka ânyâ hwakecâm ae ikiki eling hon ta je hwakecâm ae ikiki hia thithö.

44 Wâ bi, ame he tavat hia adre me vejecâ ka vejeci u, me ha, ka habe, E tha ûcü hinyen me nokon hlu. 45 U hlu nokon hinyâm, at ame hûkötîâ âiân me lakon ; ke u hanen je liamekeiny möu, tavat adre me hûkötîâ laöiödrin me je lakudrin : haba hinyöbun, me momo Heth, ke at Amora kamöbun. 46 Ke haba tuhâm Samaria, e me je lakon adre me laba hnyi ke keihen a men : ke haba kem a wakeiat at ame laba hnyi ke keihen a metâm, jia Sodoma me lakon wahu. 47 Ke so bi u je ca vheno dedra je gethen, me ânyâ hoton hwakecidra ae ikiki ; ke so bi helâke ame ûnyi ae ûhnyûkong eling, ke u je ânyâ hwakecin ae kong hmönyin hudra hnyi dem je gethen hia. 48 Haingen Than Iehova, ka habe, Kia inya inya a g' ame ca hia but ânyâ Sodoma, a liamekeiny möu, e me lakon wahu, helâji me hnâm hna ânyâ, u me lakom wahu. 49 Wâ bi, walang hulö anyi Sodoma a liamekeiny möu ; haba eû hnyin e me lakon wahu, bi gan, me gan hmâ jeû, me laba monu me sot ; ke e ame ca hadruâ je hna ovecâ me tavat theduoc. 50 Ke adre me hop, me ânyâ hwakecin ae kong hnyi hnyimakök : anyin a wale oge me hum ödra helâji me hnök hna wâ. 51 Ke haba Samaria ame ca hia but ânyâ hafiny ânyâm hulö ; ke u je osehia je hwakecâm ae ikiki hudra, me haiwisa je liamekeiny möu hnyi ta je hwakecâm ae ikiki waleji u je ânyâ. 52 Ke haba u, hamâm he ka hom ânyâm hmehma, anyin a u je hia but haiwisa je liamekeiny möu ; he ödra wisa bi hom, can ânyâm ta je hulö waleji u je ânyâ ae gan hmâ hudra : eke, u me he ka hlohlo, me hom ânyâm hmehma, anyin u je hia but haiwisa je liamekeiny möu. 53 Ke oge

me he ka ohmetu ödra tavat bâ, at Sodoma tavat bâ me je lakon wahu, me at Samaria tavat bâ me lakudra wahu, me je bâ unyidra : 54 m' u me he ka hom ânyâm hmehma, me hmehma hia ge hnâm hna ânyâ, waleji u je otubweli ödra. 55 Ke ame he ka hmetu thö je liamekeiny möu, wale Sodoma me lakon wahu ka idrin a bân, ke ame he Samaria me lakon wahu ka hmetu ka idrin a bân, ke haba u me lakon wahu öbun e ka hmetu ka ibun a bân. 56 Ke u je ca haiö Sodoma a liamekeiny möu ge hnyimâm hnyi bonginy ânyâm bi gan : 57 ödra ka tiga ca omanenâ ânyâm hulö, helâ me ûen hna haikongo hnen wahu laku Suria, m' ödra hia thithö igigilö e, wahu lakon at Filisiti, hnyat adre me hûkötîâ u igigilö. 58 Adre me hia but bi hwaban köu hwakecâm ae ikiki me kong, haingö Iehova. 59 Anyin a walang hna ha hnen Than Iehova, ka habe, Oge me he bi nya ka ânyâ köu helâ me hnâm hna ânyâ, anyin a u je hûkötîâ hna khemanyin me thamuâ ûhihinyköu. 60 Ke so bi oge me he ka ûnykûme waleji ge hnök hna ûhihinyköu möu hnyi ûen a u hlu, ke oge me he ka ohmâ hobi köu ûhihinyköu a nyiele balua. 61 Me u me he bi ka ûnykûme je hwakecâm me hmehma, u ka he ka kap je liamekeiny möu, wale je atö me je wakeiat : ke oge me he ka ham ödra köu hnân lakom, ke ca hoton bi ânyâm ûhihinyköu. 62 Ke oge me he ka ohmâ anyik ûhihinyköu möu ; me u me he ka wâ a inya Iehova : 63 m' u me he ka ûnykûme, me hlohlo, me ca he hmetu ka fuc, can ânyâm hmehma ; iny ka hia but thang degecâ hnâm hna ânyâ hia thithö, haingen Than Iehova.

HNYIMAKAN 17.

KE ame o but könya hofuc ho Iehova, ka habe, 2 Nokon at lö, ha thö hûkehmen, me ha ûhöücü ka lap anyin Isaraela ; 3 me ha, ka habe, Walang hna ha hnen Than Iehova, ka habe, Ame o but hnyi Lebanona aeto ae gan hmâ labenyin, ke beû je leünen labenyin, ke se hia leünen, ke se hia hnalimen, k' ame hom bovinny arasi : 4 e ame thu bovinny je khûen, me hom dö ka hnyi hnyei adre me ûcü omjeû hnyin ; e ame ip e hnyi taun adre ûcü omjeû hnyin. 5 Ke e ame hom ke je hatong hnyi hnyei, me tâ hnyi utkânâ ae hoso ; k' ame ip e hnyi baten je köiö ae se ;

k' ame tā helā me garaba. 6 Ke ame kú thö, k' ame ivine but ae hlau me ometu, k' ame hwiö káu bi je anginy, ke eü hnyi hmelen bi ta je wân : me ame ivine but e, k' ame vhei je vheiny, k' ame oā je khûen. 7 Ke e hu minya ke aeto ae gan labenyin, ke se hia leúen : ke wā bi, haba ivine eling me ame hwân ka hwiö káu je wân, k' ame vhei káu je vheiny, úheny hnyi dok adre me tā me me he ka hú e. 8 Adre tā e hnyi kânā ae hoso baten je köiö ae se hia, me me he ka vhei je anginy me wa, me me he ka ivine but ae hmanenang. 9 Ha thö, ka habe, Walang hna ha hnen Than Iehova, ka habe, Hawa, e ame he ka hnahic? hawa e ame ca he ka oc iwân, me subā degecā je wan me me meleca ; me me meleca hia je lan ae hāt ; ke ca hnen bi man ae gan me tavat ae se hia, m' adre me he ka oc e me iwân? 10 Eke, wā bi, eja ke ne adre ne tā, hawa ame he ka hnahic? hawa, ame ca he ka meleca, e ka kálā e hnen ang hwei? e ame he ka meleca hnyi dok e ame kú hnyin.

11 Ke ame o but könya hofuc ho Iehova ame ha, ka habe, 12 Ha thö walang ang ka lap ae úkhin fuc, ka habe, Hawa e ca khan' öbun bongon ta je únyi e? ha thö ködra, ka habe, Wā bi, ame o but hnyi Jerusalema than Babulona, me hom thaniny me je taben, me hum ödrin káu hnyi Babulona ; 13 ke e ame hom ke nokon than, me úhihinykôu mē, me kunā e he ka khemanyin, ke e ame hom minya tavat ae hwege hnyi hnye: 14 me me ohnyikânā but dökhu, me ca he ka ogânā but e, ke so bi me me tethmā hnyi hna tuö anyin úhihinykôu. 15 Ke e ame úkhin fuc mē, me kunā anyin je úthumetu Aigupito ai, m' adre me he ka ham káu je hors me tavat ae se hia. Hawa, e ame he ka hnahic? ame he at ame ányā ta je únyi e ka möt? hawa e ame he ka thamua úhihinykôu, ke möt bi? 16 Haingen Than Iehova, ka habe, Kia inya inya, e hnathu hnyi dok ame laba hnyin than, at ame othanā e, ke e ame húkötia hnen hna khemanyin me thamua anyin úhihinykôu, e ame he ka mok gan hnyi wanben Babulona. 17 Ke ame ca he bi Farao me anyin utbavat ae gan hmā, me anyin úkhacakôu ae gan ka tha e mē hnyi vat, hnyi úen adre okhibö kânā göranyai, me up uma hnân tue, m' adre me subā degecā tavat ae se hia. 18 Anyin a e ame hia but húkötia hna khemanyin hnyi hnen hna thamua úhihinykôu ; ke wā bi, e ame

hna but ham hnyamen, me ányā ta je únyi eling hia ; e ame ca he ka kec möt. 19 Anyin a wale walang hna ha hnen Than Iehova, ka habe, Kia inya inya, e hnathu oge me he ka bi hwaban káu, hnök hna khemanyin waleji e ame húkötia me anyik úhihinykôu waleji e ame thamua. 20 Ke oge me he ka thong útök ert hobi káu, ke e ame he ka hnok hnyi anyik hnewe, ke oge me he ka hom e Babulona ai, ke ivinö mē eling, can hnen hna hanyatū waleji e ame ányā könya. 21 Ke ame he tavat hia adre me kec unyin hnyi anyin je deö vat hia ka ta ge hele vat, ke adre me he ka ovesea je kolon ka hnyi ta je ang hia : ke öbun e he ka wā a inya Iehova at ame ha.

22 Walang hna ha hnen Than Iehova, ka habe, Oge me he bi nya ka hom boviny arasi ae görany, me tā e ; k' oge me he ka thu boviny khûen, at ae habubut, ke oge me he ka tā e hon bucen ae beü göranyai ke nua : 23 k' oge me he ka tā e hnyi bucen Isaraela ae beü : k' ame ke ka vhei je anginy, me wa, k' ame he bi ka arasi ae hmanenang : k' ame he ka laba eü hmelen ta je meno hia thithö ae ve man úgádra : adre me he ka laba hnyi hmenon je vheiny e. 24 Ke ame he ka khana je úöiny hnyot hia a inya Iehova at ame ohnyikânā üö ae beü göranyai, k' ame ogöranyā üö ae hnyikânā, k' ame omeleca üö ae hāt, k' ame öküleläuā üö ae meleca : inya Iehova at ame ha me ányā.

HNYIMAKAN 18.

KE ame o but könya hofuc ho Iehova ame ha, ka habe, 2 Anyia a ieu öbun e oüco hnye: Isaraela, me ha, ka habe, Haba lakamen adre hia but ijem wan vine ae but me ame miminy bi nyon je lakon? 3 Haingen Than Iehova, ka habe, Kia inya inya a öbun e ca he hmetu ka ha úhöücu e hnyi Isaraela. 4 Wā bi, haba je hanu hia, me anyik, anyik bi hanon kamen, ke anyik minya hanon nokon : ke haba hanu ame ányā hulö, me ame he bi ka mok. 5 Ke ame ne wisa at, k' ame ányā únyi ae úcu ke wisa, 6 k' ame ne ca munyi han hon je bucen, k' ame ca bwela göranyai ka je idolainy lap anyi Isaraela, k' ame ca hia but okongoā áian ke at, k' ame ca kálā momo hnyi úen ae ca úcu ; 7 ke ame ca iyawā ke at, ke ame ohmetoā haten ka at ame me hom omjeü gan, ke ame ca hügünā ta je únyi anyin ke at, ke

ame hân at ae mekihânem, ke ame okhavâ at ae ba ûkhaû; 8 at ame ca me ham mone ge hwaban, me ca hok hanen, ke ame ohmeto hnyamen ûnyi hnyi hulö, ke ame owisa wia hobi kâu ke at me ke at, 9 ke ame vheno anyik je hnanyibu, ke tuö hnök je hna owisa, ke me ânyâ hnathu; awe, e at ae wisa, e hnathu e ame he ka möt haingen Than Iehova. 10 Ke ame ne hu nokon at ame hûgûnâ, at ame hingâlâ dra, me ânyâ ke ûnyi a helâe, 11 ke ame ca ânyâ bi je hanyemen eling, ke so bi a hia but hnyi han hon je bucen, ke okongoâ âiân ke at, 12 ke a hia but iyawâ at ae vec me at ae theduoc, ke hûgûnâ omjeû, ke ame ca ohmeto haten, ke ame hia but bwele göranyai ka je idola, me ânyâ ûnyi ae ikiki, 13 ke ame me ham mone ûnyi ge hwaban, ke ame hok hanen: hawa, e ame he ka möt? e ame ca he ka möt: e ame hia but ânyâ hia ta je ûnyi ae ikiki: e hnathu e ame he ka mok; ame he ka takou e bi hnen dren. 14 Ke wâ bi ame ne hu nokon, at ame wâ ta je hulö hia waleji a ânyâ kamen, ke e ame ot, me ca ânyâ helâe, 15 at ame ca hnyi han hon je bucen, ke ame ca hia but bwele göranyai ka je idola-iny lap anyi Isaraela, ke ame ca okongoâ âiân ke at, 16 ke ame ca iyawâ ke at, ke hom haten, ke hûgûnâ omjeû, ke so bi ame hân at ae mekihânem, me okhavâ at ae ba ûkhaû, 17 k' ame ohmeto hnyamen ge at adre ovecâ, ke ame ca kap hwaban hna me ham mone me hok hanen, ke ame ânyâ hnök je hna owisa, me vheno anyik je hnanyibu; e ame ca he ka mok can hwakecin ae kong anyin kamen, ke e ame he bi ka möt. 18 Ke haba kamen, can anyin e ame seda, me söh liamekeiny mē, me ânyâ ûnyi ae ca so unyin iny hnyeï, e ame he ka mekiny hwakecin bi ae kong. 19 Ke öbun e ha bi, ka habe, anyin a ieu ame ca takou bi je lakon hulö anyin kamen? Ame ne ânyâ ûnyi ae ûcü me wisa hnen nokon, k' ame tuö hia anyik je hnanyibu, ke me ânyâ e, me ame he bi ka mök. 20 Haba at ame ânyâ hulö, me ame he bi ka mok; k' adre me ca he ka bi hwaban hulö anyin kamen ka nokon, k' adre me ca he ka bi hwaban hulö anyin nokon ka kamen; ke haba hwakecin ae wisa anyin at ae wisa me ame ka he bi ka mokut hon, ke haba hwakecin ae kong anyin at ae kong me ame he bi ka mokut hon. 21 Ke ame ne hmetu at ae kong ûnyi hnyi anyin ta je hulö hia waleji e ame ânyâ, ke tuö hia anyik je hnan-

yibu, k' ame ânyâ ûnyi ae ûcü me wisa, me ame he bi ka möt, me ca mok. 22 Adre me ca he hmetu ka ha kâu hnen ta je hna hanyâûâ: k' ame he bi ka möt ge hwakecin ae wisa e ame ânyâ. 23 Haingen Than Iehova, ka habe, Hawa oge me senyin e ka mok at ae kong? ke hawa oge me ca senyin bi e ka he ka hmetu ûnyi hnyi ta je hwakecin me me mot? 24 Ke ame ne hmetu at ae wisa ûnyi hnyi anyin hwakecin ae wisa, k' ame ânyâ bi hulö, k' ame ânyâ hia je ûnyi ae ikiki wale ame ânyâ at ae kong, hawa, e ame he bi ka möt? Haba ta je hwakecin hia ae wisa waleji e ame ânyâ, me adre me ca he hmetu ka ha: ke haba anyin monu waleji e ame monu hnyin, ke anyin hulö waleji e ame hulö hnyin, me e ame he ka moko. 25 Ke so bi, öbun e ha, ka habe, E ca ûcü hna ânyâ hnen Than. Lap anyi Isaraela lö, löng ju walang ang: Hawa e ca ûcü hwakecik? hawa e ca hwali bi hwakecibun? 26 E ka hmetu thö at ae wisa ûnyi hnyi hwakecin ae wisa, k' ame ânyâ bi hulö, ke moko e; me e ame he ka mok hnyi anyin hulö waleji e ame hia but ânyâ. 27 Ke haba khaca, e ka hmetu at ae kong ûnyi hnyi anyin hulö waleji e ame ânyâ, k' ame ânyâ ûnyi ae ûcü me wisa, me ame he ka omelö hanon. 28 Anyin a e ame ûnykûme ke hmetu ûnyi hnyi hnen ta je hna hanyâûâ hia waleji e ame ânyâ, me e ame he bi ka möt, me ame ca he bi ka mok. 29 Ke ame ha hnen lap anyi Isaraela, ka habe, E ca ûcü bi hwakecin Than. Lap anyi Isaraela lö, hawa e ca ûcü hwakecik? hawa e ca hwali bi hwakecibun? 30 Anyin a wale, lap anyi Isaraela lö, oge me he ka ve bi hwaban köbun hoton je hwakecibun, haingen Than Iehova. Hmetu ju, ke hmetu ju öbun ûnyi hnyi anyibun ta je hulö; me me ca he hulö ka hang' öbun. 31 Degec ut gabun anyibun ta je hulö hia waleji öbun e ânyâ; ke ânyâ thö hobi köbun hnyok a teb ûnyi me hanu a teb ûnyi: ke anyin a ieu öbun e he ka mok lap anyi Isaraela? 32 Anyin oge me ca senyin ge mok anyin at ame mok, haingen Than Iehova: anyin a wale hmetu ju öbun. m' öbun e möt.

HNYIMAKAN 19.

KE so u ma hwân ka tenge ge je taben Isaraela, 2 ke ha thö, ka habe, Ehö hinyâm? Liona: e ame mokut unyin je liona, e ame hat lakon unyin je nak liona.

3 Ke e ame hat ke nokon ; me ame nak liona but : ke e ame ná he ka kát je haniny, e ame han at. 4 Ke ame lung ut hnyi je hnyei ; adre noc e hnyi anyidra thop ; ke adre me hom e adre ca ge je bálet ka hnyi hnyei Aigupito. 5 Ke e ka wá hnen momo a g' ame lubahingen ke hia hnen hna gejon, me e ame hom ke nokon, me wia e hnân nak liona. 6 Me e ame ngeny hnyi wanben je liona, ke nak liona but e ; ke e ame ná he ka kát je haniny, e ame han at. 7 Ke e ame khana je uma umen tuhödra, me öba wan anyidra je lap ; ke ba but aten hnyei, me unöngötiny e can úkukuiny. 8 Me ame todró káu igigiló e úhedra hnyi je ke keihen hnyei : ke adre me thong útödra ert hon e ; adre noc e hnyi anyidra thop. 9 Ke adre me ca e ge je bálet me ip e hnyi umen meno, me hom e ka than Babulona ; adre me hom e ka hnyi je uma ce at ae hwege, m' adre me ca he hmetu ka löng ifuciny hon je buceniny Isaraela.

10 Haba hinyám me helá me vine, hnyi drám, at adre tá hnyi baten je köiö : e ame wa, ke se hia je anginy anyin ae se hia je köiö. 11 Ke e hu gan je vheiny ae hwege hnân uci anyin tavat musi, ke adre ogöranyá ibeüen e únyin je anginy ae khöt ke e manen ge ibeüiny göranyai unyin je anginy ae se hia. 12 Ke adre oc e hnyi wathethöt, ke adre khúa e hnyikânâi, me ame meleca but wan ge ang hwei : adre thu degecá me ame meleca but je anginy ae hwege ; ame an hnen meic. 13 Ke walang ang, adre tá e hnyi hnyebuba hnyi hnyei ae atec he ba köiö. Ke ame he but meic únyi hnyi utöiny je anginy, me thong wan, ke ba hmetu bi unyin ke anginy ae hwege hnân ciny musi. Wale tenge, k' ame he ka e bi hnân tenge nyiele.

HNYIMAKAN 20.

KE haba hnyi huna a seven, hnyi tehi e thabunginy, hnyi bong a teniny tehi, me ame o but keihen wahingatiny Isaraela he ka hnö ga Iehova, me ödrin e laba hnyi hnyimakök. 2 Me ame o but könnya hofuc ho Iehova ame ha, ka habe, 3 Nokon at lö, ha thö ka wahingatiny Isaraela, ka habe, Walang hna ha hnen Than Iehova, ka habe, Hawa, öbun e o but he ka hnei nya? Kia inya inya a öbun e ca he ka hnei nya, haingen Than Iehova. 4 Hawa, nokon at lö, u me he ka owisa kodra, hawa u me he ka owisa kodra?

omanená thö ködra je hwakecin ae ikiki anyin lakamödrin : 5 ke ha thö ködrin, ka habe, Walang hna ha hnen Than Iehova, ka habe, Haba hnyi bong eji oge me úcá hnyin Isaraela, ke oge me hinöbeny ka je mât rániny lap anyi Jekob, ke omanenö nya ködra hnyi hnyei Aigupito, ke oge me hinöbeny ködra me ha, ka habe, Inya Iehova Khongubun ; 6 haba hnyi bong eling oge me hinöbeny hnyin ködra he ka hum ödra únyi hnyi hnyei Aigupito ka hnyi hnyei waleji oge me elám hobi ködra, k' ame di hnyin debai me hani, k' ame hmanenang hon ta je hnyei hia thithö : 7 ke oge me ha ködra, ka habe, Ve degec ut öbun ta je únyi ae ikiki hnyi hnyimaköbun, ke ca okongu öbun bi ge ta je khongon Aigupito ; inya Iehova Khongubun. 8 Ke so bi adre me úkhin fuc mönya, me höcö ling nya ; k' adre me ca ve degec ta je únyi ae ikiki hnyi hnyimaködra, k' adre me ca hna degecá je khongon Aigupito : me oge me ha a oge me he ka hingálá anyik hmönyin hudra, hnân he ka umo anyik wathethöt hnyi wanben hnyei Aigupito. 9 Ke so bi oge me huliwa únyi hnyi iök, me me ca kong bi hnyi hnyimakan je hnyei waleji adre me laba hnyin, ke oge me omanenö nya bi ködra hnyi hnyimaködra, hnyi hnök hna hum ödra únyi hnyi hnyei Aigupito. 10 Ke oge me hum ödra únyi hnyi hnyei Aigupito, me hum ödra ka hnyi hnyebuba. 11 Ke oge me ham ködra anyik je hnanyibu, me omanená ködra hnök je hna owisa, waleji a e ka he at ka mádrá, me ame he ka möt hnyin. 12 Ke oge me ham minya ködra anyik je sabath, hnân haten könnya mödra, me me khan' ödra a inya Iehova at ame okabi ödra. 13 Ke haba lap anyi Isaraela adre me úkhin fuc mönya hnyi hnyebuba : adre me ca vheno anyik je hnanyibu, ke adre me hükötiá hnök je hna owisa, waleji a e ka he at ka mádrá, me ame he ka möt hnyin ; ke adre me okongó gan hmá anyik je sabath : me oge me ha a oge me he ka hingálá anyik hmönyin hudra hnyi hnyebuba, he ka ohí' ödra but. 14 Ke so bi oge me huliwa can iök, me me ca he ka kong bi hnyi hnyimakan je hnyei, waleji oge me hum ödra hnyi hnyimakan. 15 Ke haba khaca, oge me hinöbeny göranyai ködra hnyi hnyebuba, a oge me ca he ka hum ödra ka hnyi hnyei waleji oge ham ködra, ame di hnyin debai me hani, ae beónua hon ta je hnyei hia thithö ; 16

anyin adre me hùkötíá hnök je hna owisa, me ca vheno anyik je hnanyibu, ke adre me okongóá anyik je sabath : anyin a je hnyekudra ame hnu hoton je khongudrin. 17 Ke so bi oge me wá betenge gadra me ca ohí' ödra, ke oge me ca oumi ödra hnyi hnyebuba. 18 Ke oge me ha ka lakudra hnyi hnyebuba, ka habe, Ca vheno bi öbun whakecin lakamöbun, me ányá hnödra je hna owisa, me okongu öbun ge anyidra je idola : 19 Inya Iehova Khongubun ; vehno thö anyik je hnanyibu, ke tuö ju hnök je hna owisa, me ányá : 20 ke okabá thö anyik je sabath ; ke ame he ka hnân haten könya möbun, me me kham' öbun a inya Iehova Khongubun. 21 Ke haba je lakudra adre me úkhin fuc mönya ; adre me ca vheno anyik je hnanyibu, me ca tuö hnök je hna owisa me ányá, waleji a e ka he ke at ka ányá e ame he ka möt hnyin ; k' adre me okongóá anyik je sabath : me oge me ha a oge me he ka hingálá anyik hmönyin hudra, me umo anyik wathethöt hudra hnyi hnyebuba. 22 Ke so bi oge me ohmeto hnyamök, k' oge me huliwa can iök, me me ca he ka kong e hnyi hnyimakan je hnyei, waleji oge me hum ödra hnyi hnyimaködra. 23 Ke haba khaca, oge me hinobeny göranyai ködra hnyi hnyebuba, he ka ovesei ödra unyin aten ta je hnyei, me ob' ödra ka hnyi ta je hnyei ; 24 anyin adre me ca hia but ányá hnök je hna owisa, ke adre me hùkötíá anyik ta je hnanyibu, k' adre me okongóá anyik ta je sabath, ke adre me hnyimaködra ka ta je idola anyin lakamödra. 25 Ke haba khaca, oge me ham ködra je hnanyibu ae ca so, me je hna owisa a ca hnân melen ; 26 ke oge me okongu ödra hnyi anyidra bi ta je bwihlany, waleji hnyi hnödra hna ovheno je lakudra a watö hia hnyi wanben meic, m' oge me he ka öba wan gadra, me me khanödra a inya Iehova.

27 Anyin a wale, nokon at lö, ha thö ka lap anyi Isaraela, me ha ködra, ka habe, Walang hna ha hnen Than Iehova, ka habe, Haba lakamöbun adre hia but haikongu nya, waleji hnyi hnödra hna ányá hwakecin ae kong könya. 28 Anyin a hnyi ün oge me hum ödra ka hnyi hnyei, waleji oge me hinöbeny göranyai he ka ham ködra, k' adre me wá je hut hia ae beú, ke je úö hia ae hlau, me adre me hudo eling anyidra je hut, me ham eling anyidra bwihlany at ame okúá hmönyin, ke adre me obosóá anyidra bo so, ke adre me hingálá eling hudiny anyi-

dra ic. 29 Me oge me ha ködra, ka habe, Ehö dok ae görany öbun e he ka hnyin ? Waleling m' adre me hwenyi ien e me Bama ke ne o but hnyi bong ang. 30 Anyin a wale, ha thö ka lap anyi Isaraela, ka habe, Walang hna ha hnen Than Iehova, ka habe, Hawa, öbun e okongu öbun minya hoton hwakecin lakamöbun ? ke hawa, öbun e bi únyi monu hoton anyidra ta je únyi ae ikiki ? 31 ke öbun ka hom anyibun ta je bwihlany, ke öbun ka ovheno ta je lakubun hnyi wanben meic, hawa öbun e okongu öbun bi ge anyibun ta je idola ke ne o but hnyi bong ang ? ke hawa, öbun e he bi ka hnei nya, lap anyi Isaraela ? Haingen Than Iehova, ka habe, Kia inya inya a öbun e ca he ka hnei nya : 32 ke haba únyi ame o hnyi je hnyekubun ame ca he ka hwádá ; wale ge hnöbun hna ha, ka habe, Öhmun e he ka helá me je hnyei, helá me je lap hnyi je hnyei, adre me bi athnyabainy utö me veto. 33 Haingen Than Iehova, ka habe, kia inya inya a oge me he ka bi than hubun ge hnyam ae hwege me beny adre hai, me hmönyin adre hingálá : 34 ke oge me he ka hum öbun unyin tavat, me úkhacaköu öbun únyi hnyi je hnyei, waleji adre ovesei öbun ka hnyin, hnen hnyam ae hwege me beny adre hai, me hmönyin adre hingálá ; 35 ke oge me he ka hum öbun ka hnyebuba anyin je hnyei, me ivinö eling möbun ötin ka iohnyimak dö. 36 Oge ivinö me lakamöbun hnyi hnyebubainy hnyei Aigupito, heláe oge me he minya ka ivinö möbun, haingen Than Iehova. 37 Ke oge me he ka odili öbun hmelen uci, ke oge me he ka hum öbun ka hnyi ohmáiny úbihinykóu ; 38 ke oge me he ka kot degecá tavat úkhin fuc unyibun, me tavat ae kong hwakecidra könya ; oge me he ka lili ödra únyi hnyi hnyei adre me me laba hnyin, ke adre me ca he bi ka dit ka hnyi hnyei Isaraela : ke öbun e he ka wá a inya Iehova. 39 Ke haba öbun, lap anyi Isaraela lö, walang hna ha hnen Than Iehova, ka habe, Ve he th' öbun ka bi hluiny anyibun je idola, ke hwaban e öbun e ne ca ling nya ; ke so bi, öbun e ca he hmetu bi ka okongóá iök ae kap ge anyibun ta je bwihlany me anyibun je idola. 40 Anyin a hnyi hon anyik bucen ae kap, hon bucen dok ae görany hnyi Isaraela, haingen Than Iehova, ame he ka bi athnyabaik eling hnyi hnyei hnen lap anyi Isaraela hia, a ödra hia thithö ; oge me he ka köp ödra eling, ke oge me he ka elám eling anyibun je bwihlany, me je hudiny

anyibun wan a bân, me anyibun ta je únyi hia ae kap. 41 Oge me he ka köp öbun, helâ me únyi ae bo so, iny ka he ka hum öbun unyin ta je hnyei, me úkhaçaköu öbun únyi hnyi ta je hnyei waleji adre hia but owesei öbun ka hnyin ; k' oge me he ka kap bi únyi gabun hnyi hnyimakan ta je hnyei hia. 42 Ke öbun e he bi ka wâ a inya Iehova, iny ka he ka hum öbun ka hnyi hnyei Isaraela, waleji hnyei oge me hinö-beny he ka ham ka lakamöbun. 43 Ke öbun e he ka únykúme eling debun je gethen, me hnöbun je hna ányâ, waleji öbun e hia but okongu öbun hnyin ; m' öbun e he ka húkoti öbun can ta je hulö hia öbun e hia but ányâ. 44 Ke öbun e he ka wâ a inya Iehova, iny ka hia but huliwa unyibun can iök, ke ca hoton debun je gethen ae kong, ke anyibun je huliwa ae kong, lap anyi Isaraela, haingen Than Iehova.

45 Ke ame o but könya hofuc ho Iehova, ame ha, ka habe, 46 Nokon at lö, hnyimákâm ju ka hnyi hwaiöu, ke fuc dö ka hnyi hwaiöu, ke perofeta thö úcon hnyot hnyi utkânâ ka hnyi Hwaiöu ; 47 ke ha thö ka hnyot hnyi Hwaiöu, ka habe, Löng ju hofuc ho Iehova, ka habe, Walang hna ha hnen Than Iehova, ka habe, Wâ bi oge me he ka hú meic unyâm, k' ame he ka an igigili u je úö hia ae hát, me je úö hia ae bobot : k' ame ca he ka mok báhlân ame hlâ, ke ame he ka hlâ ta je hnyimak hia, hwân hnyi hwaiöu ke ne o but hnyi hwadrö. 48 Me ame he tavat hia thithö ka wâ a inya Iehova at ame hú e : k' adre me ca he bi ka ume. 49 Waleling m' oge me ha, ka habe, Ekölö Than Iehova, ödra adre me ha gak, ka habe, Hawa, e ca at ame ha je úhoücú ?

HNyimakan 21.

KE ame o but könya hofuc ho Iehova, ame ha, ka habe, 2 Nokon at lö, hnyimákâm dö Jerusalem a, me fuc dö ka hnyi je dok ae kap, ke perofeta thö úcon hnyei Isaraela ; 3 me ha ka hnyei Isaraela, ka habe, Walang hna ha hnö Iehova, ka habe, Wâ bi, ve e inya möu, ke oge me he ka oc ut anyik hele vat únyi hnyi tangeu, me subâ degeçâ únyi gam at ae wisa me at ae kong. 4 Anyin a oge me he ka subâ degeçâ gam at ae wisa me at ae kong, anyin a wale ame he ka he but anyik hele vat únyi hnyi tangen úcon tavat hia thithö hwân hnyi hwaiöu ke ne o but ka hnyi hwadrö : 5 ke ame he tavat hia thithö ka

wâ a inya Iehova at ame oc ut anyik hele vat únyi hnyi tangen, ke e ame ca he bala bi ka hmetu. 6 Anyin a wale, nokon at lö, mâng ju ; u me he ka mâng hnyi hnyime-ködra ke hmetru but li jebalainom me hmak. 7 Ke ödra ka ha köu, ka habe, Anyin a ieú u me mâng ? me u me he ka thu ködra, ka habe, Can je úthumetu, anyin ame he jem : ke ame he ka köiö but ta je hnyok hia, ke ame he ka him ta je beny hia, ke ame he ka sényin ta je hanu hia, ke ame he ka hwebwet ta je bouca hia helâ me köiö : wâ bi, e but ang, ke ame he ka hwädâ, haingen Than Iehova.

8 Ke ame o but könya hofuc ho Iehova ame ha, ka habe, 9 Nokon at lö, perofeta thö, me ha, ka habe, Walang hna ha hnö Iehova, ka habe, Ha thö, ka habe, Hele vat, hele vat, a so but hwan, adre khet : 10 e so hwan me me hlingâ ; adre khet e me me helâ me hucuce ; hawa, ate me he ka senyin ? haba uci anyin nökuçk ame húkotiâ ta je úö hia. 11 Ke adre ham e he ka khet me me hom hnen hnyam : ame so hwan hele vat, eke, adre khet e me ham ka hnyi hnyamen at úhlingö. 12 Nokon at lö, kuku thö, ke kuku tenge thö : anyin a e bi hon lakeik, e bi hon je taben Isaraela : adre hn' ödra ka hnyi hele vat tha ödra me lakeik : anyin a wale khaü thö jevam. 13 Anyin e hu úcúbic ; ke hawa, ame ne he ka hia but uci at ame hangâ ? haingen Than Iehova. 14 Anyin a wale, nokon at lö, u me he ka perofeta me khaúkhaü li hnyamâm ; ke so ame he ka olo hele vat hnyi úen a kuniny, wale hele vat anyin tavat adre kot moko ; e bi hele vat anyin at ae gan hmâ adre kot moko, wale ame dit ka hnyi je hnyeuledra. 15 Oge hia but ip obiny hele vat hnyi je homagöuledra hia, me me köiö but je hnyeu-kudra me me osehia hnödra je hna haü : ekölö ! adre ányâ e helâ me hucuce, adre khet homakan e hnân úhlingö. 16 Khaca ju öbun, he thö ka hnyi ke keihen metâ ; tet metâ ju, he thö ka hnyi ke keihen me ; hnyi dok u je hnyimákâm ka hnyin. 17 Ke oge me he bi nya ka khaúkhaü li hnyamök, ke oge me he ka sekunâ anyik hmönyin : inya Iehova at ame ha.

18 Ke ame o but hmetu könya hofuc ho Iehova ame ha, ka habe, 19 Nokon at lö, u me he ka kú li gethen, me me o hele vat anyin than Babulona ; lo li gethen ka he únyi hnyi hnyei a khaca : ke bi haten ju ke dok, bi haten e hnyi hwâniny gethen ka hnyi taun. 20 U me he ka kú gethen me

me o hele vat hnyi Raba anyin je laku Amona, me ka hnyi Juda hnyi Jerusalema adre up haginy. 21 Anyin ame tot than Babulona hnyi bnyivheden li gethen, wale hnyi hwäniny li gethen, he ka bi khong : e ame jijingâ je fana, e ame hnö je idola, k' ame wâ akiny. 22 E hnyi hnyamen a metân he ka bi khong ge Jerusalema, he ka ip je únyi vat hnân tho, he ka bi hwanumen hnân úhlingö, he ka ohwegiâ hwakuku, he ka ip je únyi vat hnân tho hnyi je homagöule, he ka okhibö kânâ, me ok je tap tue. 23 Ke haba e, me ame he ka helâ me hna bi khong ae thoi hnyi hnyimaködra bi, waleji adre hia but khemanyin ködra : ke e ame oúnykúmiâ hmetu hwakecin ae kong, m' adre hum ödra.

24 Anyin a wale, haingen Than Iehova, ka habe, anyin a öbun e hia but oúnykúmiâ hmetu hwakecibun ae kong, ke manen dö hnöbun hna hanyâtâ, ke manen dö anyibun je hulö hnyi anyibun je huliwa hia ; anyin adre me únykúmi öbun, awe, adre me he ka hum öbun ge hnyam. 25 Ke haba u, at adre me ti kot monoâ lö, a u at ae kong, tuhan Isaraela, k' ame o but bongom bong, hnyi úen adre umo hwakecin ae kong ; 26 me walang hna ha hnen Than Iehova, ka habe, Hom dö hnabinybak, ke hom dö korona ge : ame ca he ka tethmä únyi ang : ogöranyâ thö únyi ae hnyikânâ, ke ohnyikânâ ju dok ae görany. 27 Oge me he ka ohnyimenâ e hnyikânâi, hnyimen hnyikânâi, hnyimen hnyikânâi : k' ame he ka hia but únyi e, ke ne o but ame o at a hanyen bi ; ke oge me he ka ham kâu.

28 Ke haba u, nokon at lö, perofeta thö me ha, ka habe, Walang hna ha hnen Than Iehova ge je laku Amona, me hna haikongu ödra ; ke u me he ka ha, ka habe, Hele vat, hele vat adre oc, adre khet me me úhlingö, me me an, me me helâ me hucece. 29 Adre me wâ iyawöâ hobi köu, adre me bi khong thoi hobi köu, he ka ip u hon nyin tavat ae kong adre kot moko, wale a o but bongudra bong, hnyi úen umo hwakecin ae kong. 30 Ohmeto e bi ka hnyi tangen. Oge me he ka owisö u hnyi dok adre up u hnyin, wale hnyei adre hnöku u hnyin. 31 Ke oge me he ka hingälâ anyik hmönyin hom ; oge me he ka tûâ köu meicin anyik wathethöt : ke oge me he ka hnö u ka hnyi hnyamen tavat a helâ me meno, tavat ae khan' ödra he ka úohiö. 32 U me he ka hnân hing utö ka hnyi meic ; ame he drâm ka

hnen hnyi wanben hnyei ; adre me ca he hmetu ka únykúmi u : anyin a inya Iehova at ame ha.

HNYIMAKAN 22.

KE ame o but könya hofuc ho Iehova ame ha, ka habe, 2 Nokon at lö, hawa, u me he ka owisa, u me he ka owisa taun ae kong ge dra? awe, omanená thö kâu ta je únyi ae ikiki gan hia. 3 Ke u me he ka ha, ka habe, Walang hna ha hnen Than Iehova, ka habe, Taun ame hingälâ dra hnyi wanben e, me me o thö úen bi, at ame ányâ je idola hobi kâu e bi, me me okongoâ e ! 4 Jönâm bi dra u je hia but hingälâ, ke u je kong ut ge je idola u je hia but ányâ ; ke u je hia but ohakekenyâ bongom je bong, ke u je o but ang ka je hunaiâm : anyin a wale oge hia but hnö u hnân taben ou hnen ta je dökhü, me hnân hlumâ hnen ta je hnyei hia. 5 Ame he ka hlumö u hnen tavat ae hakekeny köu me tavat ae sákâú, u at ae kong ut, ke gan hmâ hna mediâ. 6 Wâ bi, a hia but mwi unyâm je taben Isaraela ödrin hia hoton je ve hwegiödrin, he ka hingälâ dra. 7 Ödrin e ca hia but oúnyihathoâ je kamen me hinyen unyâm ; ödrin e hia but seda atkanyua hnyi wanbâm : ödrin e hia but okongoâ at a mokcu kamen, me je safac unyâm. 8 U je hia but húkotiâ hnök je hna okabâ, me okongoâ anyik je sabath. 9 E hnyi wanbâm ehac tavat bifuco thoi m' adre me hingälâ dra : ke e unyâm hnyat adre me han hon je bucen : k' adre hia but ányâ únyi ae ikiki hnyi wanbâm. 10 E unyâm adre hia but hai fetriny kamödra : k' adre hia but okongoâ momo unyâm at ame hake laba hnyi bongon momo. 11 K' ame hia but ányâ ke at únyi ae ikiki me áian ke at ; k' ame hia but ke at bi únyi monu me úngon ; k' ame hia but ke at unyâm okongoâ haniny a nokon kamen. 12 E unyâm adre hia but kap je bwihlany m' adre me hingälâ dra ; u je hia but hok hwaban únyi adre me me ham, ke ta je troban bi, ke u je hia but hwenmiâ ka hom troban ge at ame laba hakekeny u ge úöveci, ke u je hnying nya, haingen Than Iehova. 13 Anyin a wale, wâ bi, oge hia but khaú li hnyamök can ta je únyi ae hu gam a deny únyi ae ca úéú, ke can dra ae hnyi wanbâm. 14 Hawa, u me he ka hok hnyokâ, k' ame he bi li hnyamâm ka hwege hnyi bong oge me he ka mádrö u hnyin ? Inya Iehova at

ame ha, me oge me he ka ânyâ. 15 Me oge me he ka ovesei u ka hnyi ta je dôkhu, me obö u ka hnyi ta je hnyei; me oge me he ka ohia hwakecin ae ikiki gam. 16 Ke u me he ka kong ka únyi gam bi, hnyi hnyimakan ta je hnyei; ke u me he ka wâ a inya Iehova.

17 Ke ame o but kõnya hofuc ho Iehova ame ha, ka habe, 18 Nokon at lö, helâ me kânâ kõnya lap anyi Isaraela : ödra bras hia thithö, ke tin, ke fao, ke led, hnyi wanben meic; ödra hia dron sileva. 19 Anyin a wale walang hna ha hnen Than Iehova, ka habe, Anyin a öbun e kânâ but hia thithö, anyin a wale, wâ bi, oge me he bi nya ka úkhacaköu öbun hnyi wanben Jerusalema. 20 Adre me úkhöünâ sileva me bras me fao me led me tin hnyi wanben meic, me öu meic me me köiö but; ke helâe oge me he ka úkhacaköu öbun hnyi anyik hmönyin me anyik wathethöt, ke oge me he ka ip öbun eling me oköi öbun. 21 Eke, oge me he ka úkhacaköu öbun, me tî' öbun ge bâhlân anyik wathethöt, me oköi öbun hnyi wanben e. 22 Adre me oköiö sileva hnyi wanben meic, helâe adre me he ka oköi öbun hnyi wanben e; ke öbun e he ka wâ a inya Iehova at ame hia but hingälâ hmönyin köbun.

23 Ke ame o but kõnya hofuc ho Iehova ame ha, ka habe, 24 Nokon at lö, ha thö kâu, ka habe, U hnyei adre ca ânyâwia, ke a ca hú we hnyi bonginyhmönyin. 25 Anyin je perofeta adre me si hnân hnyi wanben, helâ me liona ame kuku ame olou kia haniny: adre hia but an at; adre me hügünâ omjeü, me ta je únyi ae únyi hnathu; adre hia but oshia je safaciny hnyi wanben e. 26 Haba anyin tavat bi but adre me hia but hanyâüâ anyik hna-nyibu, me okongoâ hnök je hna okabâ: adre ca hia but ve bongon únyi ae kap me únyi ae monu, ke adre me ca hia but ve okhana tavat ge únyi ae bo kong me únyi ae bo so, me mâko je emaködra ge anyik je sabath, ke inya at adre okongoâ hnyi wanbödra. 27 Haba je taben hnyi wanben e, me helâ me je luko adre me olou kia je hanidra; he ka hingälâ dra, me ohia at, m' adre me hu omjeü a deny ta je únyi ae ca úcü. 28 Ke haba je perofetainy adre hia but botru hobi ködra ge dröu ae kong, adre me wâ únyi ae únyi baü, me bi khong thoi ködrin, me ha, ka habe, Walang hna ha hnen Than Iehova, ke a ca ha bi Iehova. 29 Haba tavat aten hnyei adre

hia but úoveci, me hügünâ omjeü; eke, adre hia but okongoâ ta je hna ovecâ, me tavat ae theduoc, me sedâ atkanyua hnen únyi ae ca wisa bi. 30 Ke oge me elâm gadra at he ka op hagik hak, me tot hnyi hnyimakök hnyi dok ae khekhe hobi kâu hnyei, m' oge me ca he ka ohia e: ke ba bi at oge me wâ. 31 Anyin a wale oge hia but hingälâ anyik hmönyin hudra; oge hia but ohî' ödra ge bâhlân anyik wathethöt: oge hia but bi hwaban ködra dedra je gethen, haingen Than Iehova.

HNYIMAKAN 23.

KE ame o but minya kõnya hofuc ho Iehova ame ha, ka habe, 2 Nokon at lö, e lu lö li momo ehac a tha hinyödrü: 3 ke ödrü me bi únyi monu hnyi Aigupito; ödre bi únyi monu k' ödrü tiga li hlu: k' adre hlec eling li basidru, k' adre ken eling li basidru k' ödrü tiga li hlu. 4 Ke haba li iödrü, me Ahola atö, ke Aholiba keiny: ke anyik ödrü, ke ödrü me hnokoâ obaga me wahu. Ke haba li iödrü, me haba Ahola me wale Samaria, ke haba Aholiba, me wale Jerusalema. 5 Ke tiga anyik momo Ahola, me e ame bi únyi monu; k' ame betenge ge je laweny, a at Asuria, tavat adre me laba hakekenyâ, 6 k' adre khavâ úkhaü ae udrudra, a je taben me tavat musi, a je wabidrüu ae hmanenang hia, ödra tavat tabö hors. 7 Haba momo ame bi únyi monu mödra, tavat adre me úca ge at Asuria hia: ke e ame okongoâ e bi ge je idola anyin tavat e ame betenge gadra. 8 Ke haba khaca, e ame ca degec anyin bi únyi monu úheny Aigupito; anyin adre me tha mokut mē ke tiga hlu, k' adre me ken li basin ke tiga hlu: k' adre me hingälâ anyidra je bi únyi monu ka hnyi hon. 9 Anyin a wale oge me hna e ka hnyi hnyamen ta je laweny, ka hnyi hnyamen at Asuria, waleji e ame betenge gan. 10 K' adre me hai fetriny: k' adre me hom lakon obaga me wahu, k' adre me hlingâ e bi ge hele vat: ke haba momo, me taben úhiö unyin omomo: anyin adre me bi lwa-ban kâu. 11 Ke haba Aholiba a keiny ame wâ e, ke so bi e nua weny bi hnyi bi únyi ae ikiki hon tuhan, ke beöna anyin bi únyi monu hon bi únyi monu anyin tuhan. 12 E ame betenge ge at Asuria tavat adre me laba hakekenyâ, a ta je taben me tavat musi, a tavat adre me khavâ úkhaü ae mec, a tavat tabö hors, a

wahidröu hia ae hmanenang. 13 Me oge me wâ ae kong minya but momo e; ke khaca thibi dedru gethen. 14 Ke e ame osehia hnen hna bi únyi monu; anyin a e ame wâ tavat adre me sihnalimen hnyi hna up uma, tavat adre op úcúbongo me at Kaledaia adre me sihnalimen ge botru ae dra, 15 adre me weikâ weiködra, adre me bicâ je hnabinybak adre bihnalimen, helâke me je taben hia ödra, helâ me at Babulona hnyi hnyei Kaledaia, hnyei adre hnöku ödra hnyin. 16 Ke e ame ö 'dra me ie betenge ködra, me kunâ je úthumetu ködra Kaledaia ai, 17 Ke haba at Babulona adre me o but kâu ka hnyi hnen hna mokut, ke adre me okongoâ e hnen anyidra bi únyi monu, ke e ame kong ut gadra, me e ame hûkötî ödra. 18 Me e ame omanenâ anyin bi únyi monu, me omanenâ anyin: me oge me hûkötîâ e helâji me hnök hna hûkötîâ tuhan. 19 Ke e ame osehia hnen hna bi únyi monu, ame únykúme je bonginy anyin hlu, waleji e ame bi únyi monu hnyi hnyei Aigupito. 20 Ke e ame betenge ka je lawedra, ke helâ me unyin Asina je unyidrin; ke helâ me dân unyin hors dân je unyidrin. 21 Me u je únykúme hmetu hwakecâm ae ikiki, k' u tiga hlu, waleji ge hna ken li basâm ge at Aigupito, waleji li basâm k' u tiga hlu.

22 Anyin a wale, Aholiba lö, walang hna ha hnen Than Iehova, ka habe, Wâ bi oge me he ka otîlâ je lawem úcom, waleji u je hûkötîâ, ke oge me he ka hum ödra úcom úhedra ebele; 23 wale at Babulona me at Kaledaia hia, Pekoda, me Shoa, me Koa, tha e mödra at Asuria hia; ödra wahidröu hia ae hmanenang, je taben me tavat musi hia, je lakon than, me tavat ae lung, ödra tavat tabö hors hia. 24 Ke adre me he ka o köu me je únyi hnân vat, me je kariota, me je kat, me je bunyen ae gan; adre me he ka igigili u, me je bec ae gan, me bec, me hnabinybak vat: ke oge me he ka hna ködra he ka bi hwaban, ke adre me he ka owisa gam hoton hnödra bi hna owisa. 25 Ke oge me oâ anyik ciâ úcom, ke adre me he ka mádrö u hnyi wathethöt; ke adre me he ka subâ degecâ hnyingöiâm me li hnyikönyâm; ke ame he je kolon gam ka ta ge hele vat: adre me he ka hom lakom obaga me wablu; ke ame he meic ka an je kolon gam. 26 Ke adre me he ka uny jut ányâm je úklaú, me hügúnâ je ohmanenangâm. 27 Helâe oge me he ka bi obiny hwakecâm ae ikiki, me

hnam hna bi únyi monu, waleji ge úhem Aigupito: m' u me ca he ka bwele ka ta je únyi e, me únykúme hmetu ka Aigupito. 28 Anyin a walang hna ha hnen Than Iehova, ka habe, Wâ bi, oge me he ka hnö u ka hnyi hnyamödra wale u je ikikiâ, ka hnyi hnyamödra wale u je hûkötîâ: 29 ke adre me he ka ányâ köu hnyi hmönyin, me hom hia hwabâm, me hnö u bi ke ba úkhaú me he thu: ke ame he ka manen dut hmehmainy hnâm je hna bi únyi monu wale hwakecâm ae ikiki, me ányâm tje bi únyi monu. 30 Adre me he ka ányâ ta je únyi e köu anyin a u je hia but bi únyi monu hoton ta je hnyei, ke u kong ut ge anyidra je idola. 31 U je hia but vheno gethen deny tuhâm; anyin a wale oge me he ka ham anyin kaia ka hnyi hnyamâm. 32 Walang hna ha hnen Than Iehova, ka habe, U me he ka ijem kaia belen tuhâm, wale ae dit ke gan hnyin: k' adre me he ka hlumö u, me hiö u; e gan hmâ önyen. 33 U me he ka unöngöt ge hna ic monu me hlöuhlöu, hnen kaiainy uthmâhmâ me ba wan, hnen utkaia anyin tuhâm a Samaria. 34 U me he ka ijem e me ijem hmö, ke u me he ka âc je anmen e, me seutâ li basâm: anyin a oge hia but ha, haingö Iehova. 35 Anyin a wale, walang hna ha hnen Than Iehova, ka habe, Anyin a u je hia but hnying nya, me kunö nya ka hnyi hotom, anyin a wale ame he ka tabö u hwakecâm ae ikiki me ányâm bi únyi monu.

36 Ke haba khaca, Iehova ame ha könya, ka habe, Nokon at lö, hawa, u me he ka owisö Ahola me Aholiba? awe, omanenâ thö ködrü hwakecidru ae ikiki. 37 Anyin a ödrü me hia but bi únyi monu, ke e hnyi li hnyamödrü dra, ke ödrü me hia but bi únyi monu ge anyidra je idola; ke adre hia but kunâ je lakudru obaga waleji ödre hnokô hobi könya, ka he hnyi wanben meic ködrü hnân han. 38 Wale hmetu ang hnödrü hna hia but ányâ könya; k' ödrü me hia but okongoâ anyik dok ae kap waleji hnyi bong eling, me öünyibaúâ anyik je sabath. 39 Ke ödrü ka hia but hlingâ je lakudru hobi kâu anyidru je idola, me ödrü me he ka hnyi anyik dok ae kap waleji hnyi bong eling he ka okongoâ e; ke wâ bi, adre hia but ányâ helâe hnyi umök uma. 40 Ke haba khaca, öbwe hia but úkhünöng ka ta je baga tavat adre me he but únyi hnyi dok ae sâkâú: waleji adre kunâ ka hnyin úthumetu, ke wâ bi, ödrin e o but; ke u je sou halubahing' ödrin, me

bi hnalimen li emákám, me theibi u ; 41 me laba hon hna mokut ae hmanenang, ke e hnyi hnyimakan e laulau adre penapena, waleji u je ip hon anyik utó ae bo so, me anyik wakaco. 42 Ke e hu bi unyin hwan tavat ae se hia adre me laba monu : ke adre me hom tavat adre me monu ge grák úheny hnyi hnyeububa tha ödra me je houmonu ; ke adre me inâ je waen hon li benyidru, me obic' ödru ge je korona ae hmanenang. 43 Me oge me ha ge momo at ame kueny bi únyi monu, ka habe, Ödrin e he bi walang ang ka bi únyi monu mē, ke e minya mödrin. 44 Ke ödrin e he kâu helâ me úhedra ka momo hnyi gethen : helâe ödrin e he kö Ahola me Aholiba, li at ae ikiki hwakecidru. 45 Ke ame he tavat ae wisa ka bi hwaban ködru helâ me hna bi hwaban ka momo hnyi gethen, me hna bi hwaban ka omomo adre me hingâlâ dra ; anyin a ödru li at bi únyi monu, ke e hnyi li hnyamödru dra. 46 Anyin a walang hna ha hnen Than Iehova, ka habe, Oge me he ka oú ködru deó at, me hna he ka oveci ödru me söh. 47 Ke ame he deó at ka lú ödru ge veto, me kuc ödru ge anyidra je hele vat ; adre me he ka hlingâ je lakudru obaga me wahlu, me thong degecâ umödru je uma ge meic. 48 Helâe oge me he ka bi obiny hwakecin ae ikiki hnyi hnyei, me me ná omomo hia thithó m' adre me ca he ka ányâ hoton hwakecibu ae ikiki. 49 Ke adre me he ka bi hwaban hwakecibu ae ikiki hubu, ke ame he ka tab' öbu huló ge anyibu je idola : ke öbu me he ka wâ a inya Iehova Than.

HNYIMAKAN 24.

KE ame o but hmetu kõnya hofuc ho Iehova hnyi huna a naininy, hnyi tehi a ten, hnyi bong a teniny tehi, me ha, ka habe, 2 Nokon at lö, sihnalimen ju ien bong, a bong ang : k' ame o than Babulona hnyi Jerusalema hnyi bong ang. 3 Ke ha thó úhöücü ka lap úkhin fuc, me ha ködra, ka habe, Walang hna ha hnen Than Iehova, ka habe, Ip ju öt hon meic, ip ju, ke hingölö köiö but minya ka hnyin : 4 ke úkhöünâ thó ka hnyin je uthmeno, je uthmeno ae so, wale li benyin me li can ; öunöngötâ thó ge je jö adre úca. 5 Hok mamoe thó adre úca, ke úkhöünâ je jö eú hmelen, ke ocitrouâ wia e ; eke, ölä ju je jö hnyi wanben e.

6 Anyin a wale, walang hna ha hnen

Than Iehova, ka habe, Ekölö ge taun ame hingâlâ dra, a öt ae hu vi hnyin, k' adre me ca obia vi wale únyi hnyi hnyin e ! hai thó ke uthmeno me ke uthmeno ; k' adre ca hia but kú e hnen ugleköbâ. 7 Anyin a e hnyi wanben e dra e ame hingölö ; e ame hingâlâ e hon kic ae ba leúnen ; k' ame ca hingâlâ e hon kânâ me me iyong ge sesâ ; 8 me me he ka oâ hmönyin he ka bi hwaban, ke oge hia but ip dren bi hon kic ae ba leúnen me me ca iyong. 9 Anyin a wale walang hna ha hnen Than Iehova, ka habe, Ekölö ge taun ame hingâlâ dra ! oge me he bi nya ka ogânâ hna khon utó. 10 Hom gâná thó utó, hú thó meic, ölä wia ju utiöiny, me me hu önyen dân, me thong degecâ je jö. 11 Hwaban e otílâ e ae ba önyen hon je walep ae möt, me me kahwa, me hlâ brasiny, me me köiö but konginy eú hnyin, me me obia vi hnyin. 12 A sényin dut momo ge huliwa ae hmak ; ke so bi ame ca he but únyi gan anyin vi ae gan ; k' ame ca hia bi vi hnyin ge meic. 13 E bi hnyi hwakecâm ae ikiki únyi ae ti kong : oge hia but obosoí u ke u ca bo so, anyin a wale adre me ca he hmetu ka obosoí u únyi hnyi hwakecâm ae ikiki, ke ne o but oge me he ka ip hom anyik hmönyin. 14 Inya Iehova at ame ha : ame he ka o, ke inya oge me he ka ányâ ; oge me ca he ka hmetu, ke oge me ca he ka betenge, ke oge me ca he ka ietra ; adre me he ka bi hwaban köu' hoton dem je gethen, ke hnâm je hna ányâ, haingen Than Iehova.

15 Ke ame o but minya kõnya hofuc ho Iehova ame ha, ka habe, 16 Nokon at lö, wâ bi, oge me hügúnâ gam wem hnen mok : ke so bi u me ca he ka tenge me tenge thungaú, ke ame ca he bi ka hingölö li deköiâm. 17 Máng ju ke ca hwege ; ca he bi ka hnyamok, wano ju hnabicom, ke ina ju li tangen hnyeúcam, ke ca tube li esongodâm, ke ca an ju jeú an tavat. 18 Me oge fuc ka tavat hnyi hnyomakatu ; ke hnyi sa hac ame moku öiök : ke haba hnyi hnomakatu oge me ányâ helâ me hna húnâ kõnya. 19 Ke haba tavat adre me ha kõnya, ka habe, Hawa, u me ca he ka thumetu öhmun hnân eú köhmun ta je únyi, m' u me ányâ helâe ? 20 Me oge me ha ködra, ka habe, Ame o but kõnya hofuc ho Iehova, ame ha, ka habe, 21 Ha thó ka lap anyi Isaraela, ka habe, Walang hna ha hnen Than Iehova, ka habe, Wâ bi, oge me he ka okongoá anyik dok ae kap, wale

tang hwegiöbun ae beönuu, webun, ame öünyihnatho hnen hnyekubun; ke ame he ka ta ge hele vat je lakubun obaga me wahu waleji öbun e kec hot' ödra. 22 Ke öbun e he ka änyâ helâji me hnök hna änyâ: öbun e ca he ka tube je esongodibun me an jeü an tavat. 23 Ke ame he ka e bi hon böbun je hnabinybak, ke hnen ju je tangen hnyeücabun hnyi je cabun: öbun e ca he ka tenga me tenga thungaü; ke öbun e he ka aü tot hnyi anyibun ta je hulö, me ütengiököu. 24 Helâe ame he Ezekielä ka hnân haten köbun: öbun e he ka änyâ helâji me hnen hna änyâ: ke e ka hwädä thö e, öbun e he ka wâ a inya Iehova.

25 Ke haba u nokon at lö, hnyi bong oge me he ka hom gadra tang hwegiödra, wale senyin ge anyidra hmanenang, wale wedra, me weny hnyekudra, wale lakudra obaga me wahu, 26 hawa, ame ca he ka o köu at ame kec möt hnyi bong eling, me thumetu u? 27 Haba hnyi bong eling u me he ka khöng hnyimâm ka at ame kec möt, ke u me he ka fuc, ke u me ca he ka hum hmetu: helâe u me he ka hnân haten ködra; ke adre me he ka wâ a inya Iehova.

HNYIMAKAN 25.

KE ame o but könya hofuc ho Iehova ame ha, ka habe, 2 Nokon at lö, hnyimâkâm dö ka je lakon Amona, me perofeta gadra: 3 ke ha thö ka lakon Amona, ka habe, Löng ju öbun hofuc hwan Than Iehova; Walang hna ha hnen Than Iehova, ka habe, Anyin a u je ha, ka habe, Öhö, ka anyik dok ae kap, hnyi üen eji adre me okongoâ; ke ka hnyei Isaraela hnyi üen adre me öba wan e; ke ka lap anyi Juda, hnyi üen adre me he but ka bâ: 4 anyin a wale, wâ bi, oge me he ka hnö u ka tavat e jimeio me hnân idra, k' adre me he ka hunuma hnyi wanbâm, me bi hnyabadra unyâm; k' adre me he ka an äm jeü, me ijem belâm debai. 5 Ke oge me he ka via Raba hnân umen kamela, ke lakon Amona hnân hnyaban je hnahat mamoe: me öbun e ka wâ a inya Iehova. 6 Anyin a walang hna ha hnen Than Iehova, ka habe, Anyin a u je hia but khaü li hnyamâm, ke uto ge li hnyeücäm, me hobâ, me ikikiâ hnyei Isaraela ge hnyekom; 7 anyin a wale, wâ bi, oge me he ka hai hnyamök hom, k' oge me he ka hnö u me hnân söh

hnen ta je hnyei; ke oge me he ka subâ degeci u unyin tavat, me ohio u ünyi hnyi je hnyei: k' oge me he ka ohio u, me u me he ka wâ a inya Iehova.

8 Walang hna ha hnen Than Iehova, ka habe, Anyin a haingen Moaba me Seira, ka habe, Wâ bi, e tha ücü lapanyi Isaraela me ta je hnyei hia thithö; 9 anyin a wale, wâ bi, oge me he ka khöng ke baten Moaba ünyi hnyi ta je taun, a ta je taun hnyi hnyigöulen, wale hmanenanginy tavat, a Beth-jesimoth, me Baal-meon, me Kiria-thaima, 10 ka tavat e jimeio, m' adre me he but ücon lakon Amona, me oge me he ka hn' ödra hnân idra, m' adre me ca he bi ka ünyküme hmetu Amona unyin ta je hnyei: 11 ke oge me he ka bi hwaban ka at Moaba; m' adre me he ka wâ a inya Iehova.

12 Walang hna ha hnen Than Iehova, ka habe, Anyin a Edoma ame okongoâ lap anyi Juda hnyi hnen hna bi hwaban, ke jöningy jut ae gan hmâ wale hnen hna bi hwaban ködra; 13 anyin a wale, walang hna ha hnen Than Iehova, ka habe, Oge me he ka hai hnyamök hon Edoma, me subâ degecâ gan at me meno; ke oge me he ka öba wan gan, hwân hnyi Temana; adre me he ka ta ge hele vat ke ne o but hnyi Dedana. 14 Ke oge me he ka bi hwaban kö Edoma a deny lakeik a at Isaraela; ke adre me he ka änyâ hnyi Edoma hoton anyik hmönyin me anyik wathethöt: ke adre me he ka wâ bongon hnök hna bi hwaban, haingen Than Iehova.

15 Walang hna ha hnen Than Iehova, ka habe, Anyin a at Filisiti adre me bi hwaban, me bi hwaban hnen hnyok ae hmönyin he ka ohia e me bi iwahnaihmiöny mē nyiele balua; 16 anyin a wale, walang hna ha hnen Than Iehova, ka habe, Wâ bi, oge me he ka hai hnyamök hon at Filisiti, ke oge me he ka subâ degecâ at Kerethi, me ohia je kolon hnyi hobatköio. 17 Ke oge me he ka ti bi hwaban ködra hnyi ü ae hwege; ke adre me he ka wâ a inya Iehova, iny ka he ka bi hwaban ünyi gak hnyi hudrin.

HNYIMAKAN 26.

KE hnyi huna a eleveniny, hnyi bong a bâniny tehi, ame o but könya hofuc ho Iehova, ame ha, ka habe, 2 Nokon at lö, anyin a Turo ame hia but ha ge Jerusalema, ka habe, Öhö, e hmetru but at eji a homa-

göuleny ta je hnyei; e ame hnyimakan dö könya : oge me he ka ünöngöt, ke ba but wan gan : 3 anyin a wale, walang hna ha hnen Than Iehova, ka habe, Wâ bi, úcúk u, Turo, ke oge me he ka öliâ köu ta je hnyei ae se hia, helâ me köiö ame öliâ ta je waköiöiny. 4 Ke adre me he ka ohia je hna up haginy, me kia je tap tue hnyin : oge ma aba minya sesâiny, me wia e me kic ae ba leünen. 5 Ke e ame he ka dok hnân ulolo je ert hnyin, hnyi wanben köiö ; anyin oge hia but ha, haingen Than Iehova : ke ame he ka hnân söh hnen ta je hnyei. 6 Ke haba je lakon wahu hnyi je hna belök adre me he ka hlingâ ge hele vat : me adre me he ka wâ a inya Iehova. 7 Anyin a walang hna ha hnen Than Iehova, ka habe, Wâ bi, oge me he ka oi Nebukaneza than Babulona úheny hnyi hwadrö, a tuhan je than, tha e me je hors, ke je kariota, ke tavat tabö hors, ke deö at, ke tavat ae se hia, ka Turo. 8 Ke e ame he ka hlingâ lakom wahu ge hele vat hnyi je hna belök : k' ame he ka op cici u je tap vat, ke okhibö kânâ cici u, ke hai göranyai bec cici u. 9 Ke e ame he ka otilâ anyin ta je únyi vat hnân tho hnyi ányâm je hna up haginy, ke e ame he ka kia degecâ ányâm je tap tue ge anyin je giwa. 10 Anyin ae se hia haleny je hors me ame he ka oiyongi u ge sesâiny kânâ gadra : k' ame he ka öbubuny ányâm je hna up haginy ge hwan tavat tabö hors, ke je kat, ke je kariota, e ka didrö ka hnyi je homagöulem, helâ me udilidra hnyi taun adre me kia. 11 K' ame he ka uto dem je gethen hia thithö hnen ta je boujimen can haleny je hors : ke e ame he ka hlingâ lakem ge hele vat, ke adre me he ka ohnyikânâ je taben tang hwegiâm. 12 K' adre me he ka hügünâ ta je omjehem, ke söh ányâm ta je únyi adre úcú : k' adre me he ka kia hagâm ta je hak, ke hagutâ umâm je uma ae hmanenang : k' adre me he bi ka khûâ hnyi köiö ányâm je veto me ütö me sesâiny kânâ. 13 Ke oge me he ka bi obiny hwan ányâm khumöng ; k' adre me ca he hmetu bi ka löng hwan ányâm je kitarâ. 14 Ke oge me he bi nya ka wiö u hnân kic ae ba leünen : ke u me he ka dok hnân döi ert ; k' adre me ca he hmetu ka up u : anyin a inya Iehova at ame ha, haingen Than Iehova.

15 Walang hna ha hnen Than Iehova ka Turo, ka habe, Hawa, ame ca he ta je bomene ka öbubuny ge hwan útaem, e ka

mäng tavat ae aat, k' ödra ka hlingâ tavat hnyi wanbâm ? 16 Haba hnyi úen eling me ame he ka utut ta je thaniny köiö hia úhedrin hnyi hon anyidrin ta je theron, me ip anyidrin je úkot, me uny anyidrin ta je úkhaú ae ve bongon bi : k' adre me he bi ka okhaú' ödra ge öbubuny ; k' adre me he ka laba hnyi kânâ, ke adre me he ka labö öbubuny, me uthmâhmâ gam. 17 Ke adre me he ka tenge thungaú gam, me ha köu, ka habe, Ekölö ge hna ohio u waleji a labâ hnen aten köiö, taun ae lung, me hwege hnyi köiö, e me tavat adre me labâ, tavat adre me ooti ödra hia tavat adre me he hnyin ! 18 Walang ang ame he je bomene ka öbubuny hnyi bonginy ta a u ; eke, ame he je bomene ka hlohlo hnyi bong u me he ka he hnyin. 19 Anyin a walang hna ha hnen Than Iehova, ka habe, Iny ka he ka wiö u me me taun ae ba önyen, helâ me je taun ae ba aten, wale iny ka okhibö dok ae dit hom, ke ame he ka khaúö u hnen köiö ae gan ; 20 hnyi úen eling, oge me he ka ohnyikânâi u tha u me tavat adre me utut kâú ka hnyi thop, ka tavat kâú adrem, me ip u hnyi dok a hnyikânâiny hmeledrany, hnyi je dok ae ba aten ehac, tha u me tavat adre me utut ka hnyi thop, me me ca labö u hmetu hnen tavat ; ke oge me he ka ip hmanenang hnyi hnyei iny tavat ae möt : 21 oge me he ka wiö u hnân outen ke ame he ka hiö u : eja ke ne adre ne elöm u, adre me ca he hmetu ka ö u nyiele balua, haingen Than Iehova.

HNYIMAKAN 27.

KE ame o but minya könya hofuc ho Iehova, ame ha, ka habe, 2 Nokon at lö, u me he ka hai khumöng tenge ge Turo ; 3 ke ha thö ka Turo, ka habe, U at ame laba hnyi hna dit hnyin úheny hnyi köiö, at ame úcú omjeúiny je hnyei hobi kâú je bomene ae se hia, walang hna ha hnen Than Iehova, ka habe, Turo lö, u je hia but ha, ka habe, E beönua hmanenangik. 4 E hnyi wanben köiö je hnyigöulâm, haba tavat adre up u adre me obeönua hmanenangâm. 5 Adre hia but tibet ányâm je eso hia ge je úö köp úheny Senir : adre me hom je arasi úheny Lebanona hnân bi aneunyainy hu hobi köu. 6 Adre hia but ányâ ányâm je wi a je iwajoiny Basana ; adre hia but tibet ányâm je tap ge ütö tasura adre me omecâ ge nyon elesfan, únyi hnyi je bomeneiny Kitim. 7 Mano lino

ae ve bongon únyi Aigupito u je ulolo hnân húnýú me me ányâm bouðila; mano ae udrudrá ke udrudrá hlit únyi hnyi je bomeneiny Elisa ányâm unyitung. 8 Aten Zidona me Arevadi ányâm tavat galu, Turo lö, haba tavat ae metá hnyi wanbám, me wale tavat adre me kú deny je hu. 9 E unyâm wahingatiny Gebala ke aten ae metá ányâm tavat bi ouge; e unyâm je huiny köiö hia ke ta je matelo he ka úco ta je omjehem. 10 Tavat Peresi me Luda me Futa je soja unyâm he ka bi singâm, k' adre me uhno hnyi wanbám bec me hnabinybak vat, ödra tavat adre me ohmanenangi u. 11 E hnyi hon hagâm hak igigili u tavat Arevadi a tha ödra me ányâm je deö vat, ke tavat Gamadi eiö hnyi ányâm je tap tue: k' adre me uhno anyidra je bec hnyi hagâm hak igigilö; k' adre me obe-khötä ányâm hmanenang. 12 Tasesa ame úcú omjehem anyin ae ti se hia je ve bongon omjeú hia; k' adre me úcú sileva me fao me bras me led hnyi ányâm je hna úcú. 13 Haba tavat úcú möu, me Javana, me Tubala, me Meseka, k' adre me úcú at me ta únyi a bras hnyi ányâm hna úcú. 14 Ke haba aten lap anyi Togarema, me adre me úco je hors, ke je hors hnân vat, ke je miul hnyi ányâm hna úcú. 15 Ame úcú unyâm at Dedana; k' ame úcú unyâm ta je bomene ae se hia: k' adre me hom je nyon elefan ke je úö ebeni hnân úcú. 16 Ame úco gam Suria, anyin ae se hia hnâm je hna huliwa; k' adre me úco hnyi ányâm je hna úcú je semerado, ke mano ae udrudrá hlit, ke úkhaú adre me tibet omecá, ke mano lino, ke waji, ke veto ae dra vec. 17 K' ame úcú unyâm at Juda me hnyei Isaraela, adre me úcú hnyi ányâm je hna úcú hwit únyi Minith, ke panag, ke hani, ke wakaco, ke basama. 18 Damaseko ke at ame úco gam hnâm je hna huliwa ae se hia, anyin ae se hia je omjeú ae ve bongon; ke waina minya únyi Elebona, ke leúnen mamoe ae hau. 19 Haba Vedana me Jevana ödru me úco tö hnyi ányâm je hna úcú; ke fao ame hadröngöc, ke kasia, ke kani hnyi ányâm je hna úcú. 20 Dedana ke at ame úco gam je úkhaú hnân tabö hors ae únyi hnathu. 21 Arabia me je thaniny hia Kedara, ödrin tavat adre me úco möu je nokon mamoe, me je mamoe бага, me je got; wale hnödra hna úco möu. 22 Tavat úcú hnyi Sheba me Rama tavat adre me úcú möu; adre me úco hnyi ányâm je hna úcú je utö hia ae bo so ae

únyi hnathu, me je veto ae únyi hnathu hia, me gol. 23 Karan me Kane me Edena tavat úcú hnyi Sheba, me Asur, me Kalemada tavat adre me úcú möu. 24 Ödra tavat adre me úco möu ta je únyi ae únyi hnathu, je bwinymano ae udrudrá me hna tibet omecá, me je tangen úkhaú ae mec, adre ca ge tö me tibet ge arasi, hnyi ányâm je hna úcú. 25 Haba je huiny Tasesa hnân hauden omjehem adre úco: ke adre me öunöngöti u, me ohmanenangi u hnyi wanben je köiö. 26 Haba ányâm tavat galu adre hia but hum u ka hnyi je köiö ae gan; ke ang hwei ame thu u hnyi wanben je köiö. 27 Haba je omjehem, me ányâm je hna úcú, me ányâm ta je únyi hnân úcú, me je aten höm je hu, me ányâm tavat adre kú deny hu, me ányâm tavat bi ouge, me tavat adre me úco ányâm ta je únyi, me ányâm tavat vat hia hnyi wanbám, me ányâm bunyen hia thithö hnyi wanbám, adre me he ka tha ú eú hnyi köiö hnyi bong adre me he ka hangö u hnyin. 28 Hnyi kuku teingeiny ányâm tavat ame kú deny je hu ame he ka öbubuny je hnyaba igigilö. 29 Ke ame he tavat galu hia, me je aten hu, me tavat ame kú deny je hu, ka utut únyi hnyi hon hudrin je hu me tot hnyi hnyei, 30 ke adre me he ka olungá anyidra hwatenge gam, ke adre me he ka tenge hwege, me konâm je bödra ge kâná, me hinö hnyi dröu: 31 ke adre me he ka öhadreúá je bödra gam, me weiká mano ae gan nân, me tenge me hnyok as vec gam, me tenge hwege. 32 Ke ödra ka tenge thungaú adre me he ka hai khumöng tenge gam, ke adre me he ka tenge gam me ha, ka habe, Ia ae úcú me Turo wale adre ohia hnyi köiö? 33 Ödra ka oá tang omjehem únyi hnyi köiö, me u je öunöngötá je hnyei ae se hia: u je otená je thaniny hmeledrany ge ta je omjehem, me ta je únyi hnân úcú ae se hia. 34 Hnyi úen adre me thu u ge köiö hnyi wanben je köiö ae dit, me a ta but ányâm ta je únyi hnân úcú me ányâm je bunyen hia hnyi wanbám. 35 Haba aten je bomene me adre me uthmáhmá hia gam, k' ame he je tuhödra ka ot gan hmá, ke hmak je hnyimaködra. 36 Haba tavat úcú hnyi je hnyei me adre me jú gam; u at ame ootá, ke u me ca he hmetu bi ka manen nyiele balua.

HNYIMAKAN 28.

KE ame o but minya kõnya hofuc ho Iehova, ame ha, ka habe, 2 Nokon at lö, ha thö ka je tuhan Turo, ka habe, Walang hna ha hnen Than Iehova, ka habe, Anyin ae bi gan hnyekom, ke u je ha, ka habe, Inya ang ke khong, me oge me laba hnyi tap taben Khong hnyi wanben je köiö; ke so bi u thibi at ke ca Khong, ke u je oüco hnyekom me hnyekon Khong: 3 ke wâ bi, u at ae metâ hu Daniela; ke ba ke únyi ae iyong adre me ikhâlâ gam: 4 ke hu but gam omjeü hnen ânyâm metâ me hnâm hna wâhmakhmeto, ke hu gol me sileva hnyi je tang omjehem: 5 u je hia but osehia ânyâm ta je únyi hnen úganiny ânyâm metâ, ke hnâm hna úcü, me bi gan hnyekom hnen tang omjehem: 6 anyin a wale, walang hna ha hnen Than Iehova, ka habe, Anyin a u je oüco hnyekom me hnyekon Khong; 7 wâ bi, haba can eling, me oge me he ka oâ köu je atkanyua, tavat adre me outen hnyi ta je hnyei: ke adre me he ka oc anyidra je hele vat me okongoâ hmanenanginy ânyâm metâ, k' adre me he bi ka oikiikiâ ânyâm hmanenang. 8 Ödra adre me he ka ohnyikönö u ka hnyi thop; me u me he ka mok helâ me imekiny tavat adre me hlingâ hnyi wanben je köiö. 9 Hawa, u me he bala ka labö ha hnyi hnyimakan at ame hlingö u, ka habe, Iny Khong? ke u at bi, ke ca Khong hnyi hnyamen at ame okongu u. 10 Me u me he bi ka mok helâ me imekiny tavat adre me ca peritomon, ge hnyamen ta je atkanyua: anyin oge hia but ha, haingen Than Iehova.

11 Ke ame o but minya kõnya hofuc ho Iehova ame ha, ka habe, 12 Nokon at lö, hai thö khumöng tenge ge thaniny Turo, me ha kâu, ka habe, Walang hna ha hnen Than Iehova, ka habe, U hnân okeceâ haten ae bekhöt, ae unöngöt ge metâ, ke bekhöt hmanenanginy. 13 U je mwi but Edena hnyi hnyaban Khong; adre tubi u ge je veto hia ae únyi hnathu, wale sadio, me topazio, me aloma, me berulo, me soama me jasepi, me safairo, me semerado, me bereketh, me gol: e bi unyâm hna huliwan ânyâm je pate me je utköwi; adre penapena hnyi wanbâm hnyi bong adre up u hnyin. 14 U kerubi adre hú a at ame tube; ke oge otillö u, me me hu hnyabam hnyi bucen ae kap anyin Khong; u je hia

but ngenu hnyi wanben ta je veto meic. 15 U je bekhöt ut hnyi dem je gethen, hwân hnyi bong adre up u hnyin ke ne o but adre me wâ hwakecîn ae kong gam. 16 Hnyi úganiny hnâm hna úco adre me öunöngöti u ge öokonguny, ke u je ânyâ hulö: anyin a wale oge hia but hagutö u únyi hnyi hon bucen anyin Khong; ke oge hia but ohiö u, kerubi at ame tube, únyi hnyi wanben je veto meic. 17 E bi gan dut hnyekom ge ânyâm hmanenang, e monu but ânyâm metâ hnen ânyâm mec: oge hia but khüö u hnyikânâi, oge hia but ip u hnyi hnyimakan je than m' adre me he ka ö u thö. 18 Hnyi úganiny ânyâm je hulö, wale hnyi úkongon hnâm hna úco, u je hia but okongoâ ânyâm je dok ae kap; anyin a wale oge hia but oâ meic hnyi wanbâm, e ame hia but ön u, ke oge hia but wiö u me dröu but hon kânâ hnyi hnyimaködra hia adre me ö u. 19 Adre me he ka uthmâhmâ gam wale tavat adre me wâhmakhmetu u hia hnyi ta je hnyei: u me he ka hnân hângâ, ke u me ca he hmetu ka manen nyiele balua.

20 Ke ame o but kõnya hofuc ho Iehova, ame ha, ka habe, 21 Nokon at lö, hnyimâkâm dö ka Zidona, me perofeta úcon, 22 me ha, ka habe, Walang hna ha hnen Than Iehova, ka habe, Wâ bi, úcü u Zidona; k' adre me he ka oganö nya hnyi wanbâm, m' adre me he ka wâ a inya Iehova, iny ka hia but owisa kâu, ke ka hia but okabi nya hnyin. 23 Anyin oge me he ka kunâ kâu mok ae cap ke dra hnyi deny je gethen; k' ame he tavat aat ka ta hnyi wanben, ke hele vat bi hnyi je ke keihen hia; m' adre me he ka wâ a inya Iehova. 24 Ke ame ca he hmetu lap anyi Isaraela ka hu iwadekong ame dá ke údö ae ocon únyi gadra igigili ödra, wale hnyat hûkoti ödra; ke adre me he ka wâ a inya Than Iehova.

25 Walang hna ha hnen Than Iehova, ka habe, Iny ka hia but úkhacakouâ lap anyi Isaraela únyi hnyi je hnyei a je hnyei adre ovesei ödra ka hnyin, k' adre hia but okabi nya bi hnyi hnyimakan ta je hnyei, me adre me he ka labâ idra waleji oge me ham ka athnyabaik a Jekob. 26 Ke adre me he bi ka laba khötkic hnyin e; eke, adre me he ka up uma, me belöki vine, me laba khötkic; iny ka hia but bi hwaban ködra hia tavat adre me hûkoti ödra igigilö; ke adre me he ka wâ a inya Iehova Khongudrin.

HNYIMAKAN 29.

HNYI huna a teniny, hnyi tehi a teniny, hnyi bong a twelv, ame o but kõnya hofuc ho Iehova ame ha, ka habe, 2 Nokon at lö, hnyimákâm dö kõ Farao than Aigupito me perofeta úcon me Aigupito hia thithö; 3 ha thö, ke habe, Walang hna ha hnen Than Iehova, ka habe, Wâ bi, úcúk u, Farao than Aigupito, a tanimo ae gan at ame laba hnyi je wage-winy, at ame hia but ha, ka habe, Haba anyik wagewe me ka anyik bi, ke oge me ka op e hobi kõnya bi. 4 Ke oge me he bi nya ka det hnyimâm ge je wage, ke oge me he ka okeceá je wáiny ányâm je wagewe ka hnyi je unâm; ke oge me he ka oi u únyi hnyi wanben ányâm je wagewe, tha u me ta je wáiny ányâm je wagewe hia adre me kece ka hnyi je unâm. 5 Ke oge me he ka hnö u adre digic u hnye-buba ai, u me je wáiny ányâm je wagewe: u me he ka ta ka hnyi hon kâná; adre me ca he ka tha úkhacakóúu u me úkhöúná: oge hia but hnö u hnân an ta je meno hnyi hnyot me ta je meno ame gâ ethö. 6 Ke ame he aten Aigupito hia ka wá a inya Iehova, anyin a ödra uci hlöwe ka lap anyi Isaraela. 7 Ödra ka köt u hnen hnyam, me u me hmetru, me ovechmwiá je bajebenyidra hia: ke ödra ka ci gam u me hmetru, me öbubunyá je jevadra hia. 8 Anyin a wale, walang hna ha hnen Than Iehova, ka habe, Wâ bi, oge me he ka oá köu hele vat, me subá degecá gam at me meno. 9 Ke ame he ka wau hnyei Aigupito me ba aten; ke adre me he ka wá a inya Iehova: anyin a e ame ha, ka habe, Anyik bi wagewe, ke oge hia but op e. 10 Anyin a wale, wâ bi, úcúk u, me ányâm je wagewe, ke oge me he ka wia hnyei Aigupito me me ba aten me wau, hwân hnyi tap tue hnyi Seveni ke ne o but hnyi hnyigöulen Aithiop. 11 Ke ame ca he ka vhenö e hnen je can tavat, ke ame ca he minya je can meno ka vhenö e, ke adre me ca he ka labá e ke ne o but hnyi fáti je huna. 12 Ke oge me he ka wia hnyei Aigupito me me wau hnyi wanben je hnyei a wau, ke ame he ka ba aten je tauniny hnyi wanben je taun adre öba wan, ke ne o but hnyi fáte je huna, ke oge me he ka oveceá at Aigupito ka hnyi je hnyei me ob' ödra ka hnyi ta je hnyei. 13 Ke walang hna ha hnen Than Iehova, ka habe,

E ka um dö je huna a fáte oge me he ka úkhacakóúu at Aigupito únyi hnyi ta je hnyei wale adre ovecei ödra ka hnyin: 14 ke oge me he ka ohmeto at Aigupito úhedra hnyi hna bá, ke oge me he ka ohmetu ödra ka hnyi hnyei Patherusi, hnyei adre hnöku ödra hnyin; ke adre me he ka dökhu ae hnyikáná eling. 15 E ame he ka hnyikáná hnyi hmelen je dökhu; ke ame ca he hmetu ka ogóranyá e bi unyin je hnyei: ke oge me he ka owakhaleti ödra, m' adre me ca musö je hnyei. 16 Ke ame ca he hmetu ka hnân labageju káu hnen lap anyi Isaraela, hnân öünykúmeá je hulö, ödra ka hwiö ködra: ke adre me he ka wá a inya Iehova.

17 Ke haba hnyi huna a twente seveniny, hnyi tehi a bán, ke hnyi bong a baniny tehi, ame o but kõnya hofuc ho Iehova, ame ha, ka habe, 18 Nokon at lö, haba Nebukaneza than Babulona ame ányá huliwa ae so hmönyin úcon Turo hnen anyin je utbavat: e hadréú thö je bödra hia, k' ame han hia but je abenyidra; ke so bi e ame ca kap troban, me anyin utbavat, únyi Turo, hnyi huliwa e ame ányá úcon: 19 anyin a wale, walang hna ha hnen Than Iehova, ka habe, Wâ bi, oge me he ka ham kö Nebukaneza than Babulona hnyei Aigupito; ke e ame he ka hom aten ae se hia, me je hna söh, me ta je omjeú; ke wale hwaban ka anyin je utbavat. 20 Oge me ham káu hnyei Aigupito hwabanyin anyin huliwa e ame ányá káu, anyin adre me huliwa hobi kõnya, haingen Than Iehova.

21 Hnyi bong eling oge me he ka oá faoiny meno hobi káu lap anyi Isaraela, ke oge me he ka hna köu m' u ma khöng hnyimâm hnyi wanbödra; k' adre me he ka wá e inya Iehova.

HNYIMAKAN 30.

KE ame o but minya kõnya hofuc ho Iehova, ame ha, ka habe, 2 Nokon at lö, perofeta thö, me ha, ka habe, Walang hna ha hnen Than Iehova, ka habe, Kuku tenge th' öbun, Ekölö ge bong! 3 Anyin ae hakekeny jut bong, e hakekeny jut bong bongu Iehova, bong ae khömet; a üen hobi káu ta je hnyei. 4 Ke ame he ka o hele vat hnyi Aigupito, k' ame he ka hu hlöuhlöu hnyi Aithiop, e ka ta but ta je komok hnyi Aigupito; ke adre me he ka hom aten ae se hia, ke adre me he ka tho je taben e.

5 Ke ame he bi ka tha ta mödra ge hele vat at Aithiop, me Futa, me Luda, me tavat hia ae ve bongon, me Kubu, me tavat aten hnyei adre me úhíhinykôu.

6 Walang hna ha hnö Iehova, ka habe, Ame he minya ka ta tavat adre me hadruá Aigupito, ke ame he ka hnyikánâ biganiny maniny man, hwân hnyi tap tue hnyi Seveni, adre me he ka ta hnyi wanben e ge hele vat, haingen Than Iehova. 7 Ke ame he ka wau idrin hnyi wanben je hnyei a wau, ke ame he je tauniny ka laba hnyi wanben je taun ae ba aten. 8 Ke adre me he ka wâ a inya Iehova, iny ka hia but hú meic hnyi Aigupito, me kot hia tavat úhadruo. 9 Hnyi úen eling ame he ka he but je úthumetu úheny unyik adre tabá je hu he ka ootá at Aithiop tavat adre me laba sot; ke adre me he ka hu vec helâ me je bonginy Aigupito; anyin a wâ bi, e but ang.

10 Walang hna ha hnen Than Iehova, ka habe, Oge me he ka úumo tavat ae se hia hnyi Aigupito a deny hnyamö Nebukaneza than Babulona. 11 Adre me he ka oâ e tha e me lakeiny, a oti ödra hnen je hnyei, he ka ohia hnyei; ke adre me he ka oc anyidra je hele vat úcon Aigupito, me únöngötâ hnyei ge je komok. 12 Ke oge me he ka ohmö je wagewe, me úco hnyei ka hnyi hnyamen tavat ae kong; ke oge me he ka öba wan hnyei, me ta je únyi hia hnyin ge hnyamen je atkanyua: inya Iehova at ame ha.

13 Walang hna ha hnen Than Iehova, ka habe, Oge me he minya ka ohia je khong, me bi obiny je idola hnyi Nofi: ke ame ca he hmetu ka hu thaniny hnyei Aigupito; ke oge me he ka okúâ ot hnyi hnyei Aigupito. 14 Ke oge me he ka öba wan Patherusi me hú meic hnyi Zoana, me bi hwaban ka No. 15 Ke oge me he ka hingâlâ anyik hmönyin hon Sina, wale singiny Aigupito; ke oge me he ka subâ degeçâ tavat ae se hia hnyi No. 16 Ke oge me he ka hú meic hnyi Aigupito; ame he ka vec gan hmâ Sina, ke adre me he ka thuthu hmetro No: k' ame he ka hu je iwahnaimiöny me Nofi hnyi selany. 17 Ame he ka ta wahidrouiny Aven me Pibeseth ge hele vat: k' ame he ka bá je hnyei eling. 18 Ke ame he ka olidrá lany hnyi Tapanesi, iny ka he ka thamúâ eling je hna úhúkálákôuâ anyin Aigupito, ke ame he ka o obiny hmanenanginy maniny man; ke haba e, me adre me he ka tube e

hnen úlá; k' ame he lakon wahlu ka bá. 19 Helâe oge me he ka bi hwaban hnyi Aigupito, m' adre me he ka wâ a inya Iehova.

20 Hnyi hunya a eleveniny hnyi tehi a bán, hnyi bong a seveniny tehi, ame o but kónya hofuc ho Iehova, ame ha, ka habe, 21 Nokon at lö, oge hia but thu benyi Farao than Aigupito; ke wâ bi, adre me ca lan e he ka bi bubunin, ke ca ge mano me lan e, me me hwege hmetu e hnân he ka hok hele vat. 22 Anyin a wale, walang hna ha hnen Than Iehova, ka habe, Wâ bi, úcúk u Farao than Aigupito, me oge me he ka thu li benyin, wale at ae hwege ke at minya adre hia but thu; ke oge me he ka okolo hele vat únyi hnyi hnyamen. 23 Ke oge me he ka oveseâ at Aigupito unyin tavat, me ob' ödrin ka hnyi ta je hnyei. 24 Ke oge me he ka ohwegiâ li hnyamen than Babulona, me ham anyik hele vat ka hnyi hnyamen: ke oge me he ka thu li benyi Farao, me e ame he ka máng hnyi hnyimakan helâ me imánginy tavat adre me kot moko. 25 Ke oge me he ka ogöranyâ li hnyamen than Babulona, k' ame he bi ka him li benyi Farao; ke adre me he ka wâ a inya Iehova, iny ka hia but ham anyik hele vat ka hnyi hnyamen than Babulona, ke e ame he ka hai hon hnyei Aigupito. 26 Ke oge me he ka oveseâ at Aigupito unyin tavat, me ob' ödra ka hnyi ta je hnyei, m' adre me he ka wâ a inya Iehova.

HNYIMAKAN 31.

HNYI hunya a eleveniny, hnyi tehi a kuniny, hnyi bong a bániny tehi, ame o but kónya hofuc ho Iehova ame ha, ka habe, 2 Nokon at lö, ha thö kö Farao than Aigupito, me anyin tavat ae se, ka habe, U úcú me ia hnyi úgânâm? 3 Wâ bi, haba at Asuria, me arasing Lebanona ae hmanenang anyin, ke gan hmenon, ke beú göranyai, ke haba ban, me walethö hnyi je úlá. 4 Ame hat e ge ta je köiö, k' ame ogöranyâ e hnen je dok ae dit; anyin je wagewe ame di igigilö dok e ame belökâ; ke ame di anyin je ong wagewe ka hnyi je úöiny hnyot hia. 5 Anyin a wale e beónua íbeúen göranyai hon ta je úöiny hnyot hia; ke adre osehia je anginy, ke beú je anginy can je köiö ae se hia, e ka okúâ. 6 Haba ta je meno hia ame gâ ethö, adre me bi haú' ödra hnyi je vheiny, ke haba je menoiny

hnyot hia adre me hnokoâ hmelen je vheiny, ke haba je hnyei hia ae gan adre me laba hnyi hmenon. 7 Ke e hmanenang hnyi úganiny, me ibeüen je anginy; anyin a e bi wân hnyi je köiö ae se hia. 8 Ame ca ikâlâ e hnen ta je arasi hnyi hnyaban Khong: e ca úcû ta je köp me ta je anginy, ke ca úcû ta je aremoni me ta je vheiny; ke ba úö hnyi hnyaban Khong ae úcû mē hnyi hmanenanginy. 9 Oge me omecâ e ge ta je anginy ae se hia: me me ciâ gan ta je úö hia hnyi Edena, hnyi hnyei iny Khong.

10 Anyin a wale, walang hna ha hnen Than Iehova, ka habe, Anyin a u beú göranyai, ke e bi ban hnyi je úlâ, ke ethö hnyekon hnyi ibeüen; 11 me oge me he ka hna e ka hnyi hnyamen at ae hwege hnyi je hnyei; ka e ame he ka mádrâ e: oge hia but obâ e can hwakecin ae kong. 12 Ke haba je atkanyua, tavat ame outen hnen ta je hnyei, adre hia but subâ degecâ e, me hna degecâ bi; a kölu but je anginy hon je bucen, me hnyi je hnyigöulen bucen hia, ke a hmetru but je vheiny hnyi je wageweiny hia hmeledrany: ke ame utut e tavat hia aten hmeledrany únyi hnyi hmenon, me hna degecâ e bi. 13 Ame he je meno hia ame gâ ethö ka ta hon hnyaban adre degec, ke ame he je menoiny hnyot hia ka mokulec je vheiny: 14 me me ca bi gan ta je úö hnyi baten je köiö ödra ka görany, me ca e je bödrin hnyi dok ae hlau, ke ame ca tot unyidrin hnyi ibeüödrin tavat ae hwege, wale tavat hia adre ijem köiö; anyin adre hn' ödra hia ka hnyi mok kâú ka hnyi kânâ unyin je lakon at tha ödra me tavat adre me utut ka hnyi thop.

15 Walang hna ha hnen Than Iehova, ka habe, Hnyi bong eji e ame dit ka hnyi hedis, me oge me oâ hnyamak; can e oge me tube dok ae dit, ke thawâ je wageweiny, k' ame todrö je köiö ae gan: ke oge me ohlöuhlöuâ Lebanona can e, k' ame mok unyin ta je úöiny hnyot hia can e. 16 Oge me oöbubunyâ ta je hnyei ge hwan útainy, hnyi úen oge me khúâ e ka hnyi hedis tha e me tavat adre me dit ka hnyi thop: ke haba je úöiny hia Edena, je hna úca me soiny Lebanona, a tavat hia adre me ic köiö, adre me tubet bi eú hnyi kânâ. 17 Adre me tha ut minya mē ka hnyi hedis ka tavat adre me hlingâ ge hele vat; eke, tavat eji a hnyamen, wale tavat adre me laba hnyi hmenon hnyi wanben je hnyei.

18 U hmanenang ke gan helâ me ia

unyin je úöiny Edena? ke so bi adre me he ka tha hum u me ta je úöiny Edena kât ka hnyi kânâ: ke u me he ka mokut hnyi wanben tavat adre me ca peritomonâ, tha u me tavat adre me hlingâ ge hele vat. Wale Farao me anyin tavat hia ae se, haingen Than Iehova.

HNYIMAKAN 32.

HNYI huna a twelviny, hnyi tehi a twelv, hnyi bong a bâniny tehi ame o but kõnya hofuc ho Iehova, ame ha, ka habe, 2 Nokon at lö, hai thö khumóng tenge ga Farao than Aigupito, me ha kâu, ka habe, Adre me oúcû u me nak lionainy ta je hnyei: ke u helâ me tanimoiny köiö; k' ame patrutruâ ânyâm je wagewe, ke u je obwewelâ köiö ge li cam, me ohâeâ anyidra ta je wagewe. 3 Walang hna ha hnen Than Iehova, ka habe, Oge me he ka ulolo anyik ert hom, a tha u me tavat ae se; k' adre me he ka lili u hnyi ütök ert. 4 Ke oge me he bi nya ka hnö u hnyi kânâ, ke khúö u ka hnyi utkânâ, ke oge me he ka olaba ka hnyi hom ta je meno adre me gâ ethö, me osekunâ je menoiny hnyot hia thithö adre me he ka ön u. 5 Ke oge me he ka ip je utiöiâm ethö hon je bucen, me öunöngötâ je hnyigöulin bucen ge ibeüâm göranyai. 6 Oge me he minya ka hú hnyei u je hai hnyin ke ne o but hnyi je bucen, ge drâm; ke ame he ka unöngöt je deny köiö gam. 7 Ke haba hnyi úen oge me he ka ouni u, me oge me he ka tube drany, me olidrá je okhúiny; ke oge me he ka tube seünö ge úlâ, ke ame ca he ka melam tehi. 8 Oge me he ka olidrá hom je lany hia hnyi drany ae umumelam, me hna but menekholom hon em hnyei, haingen Than Iehova. 9 Ke oge me he minya ka ohmönyninâ hnyekon je hnyei ae se hia, hnyi úen oge me he ka ohnauhangö u unyin ta je hnyei, ka hnyi je hnyei ae ça khanö u bi. 10 Eke, oge me he ka kunâ je hnyei ae se hia ka láiâ gam, ke ame he je tuhödra ka ot gan hmâ hobi köu, iny ka nyikâ anyik hele vat hnyi hnyimaködra; ke adre me he ka öbubuny bala, wâ adre nye moku, hnyi bonginy ta a u. 11 Anyin a walang hna ha hnen Than Iehova, ka habe, Ame he ka o köu hele vat anyin than Babulona. 12 Hnen je hele vat anyin tavat hwege oge me he ka öta tavat ae se hia unyâm; ödra hia tavat adre me outen hnen je hnyei: ke adre me

he ka kot hia hmanenanginy Aigupito, ke adre me he ka ohia aten hia ae se. 13 Ke oge me he ka ohia je menoiny hia únyi hnyi je köiö ae se hia; ke adre me ca he hmetu ka ohâeâ e hnen can at, ke adre me ca he hmetu ka ohâeâ e hnen újimen can meno. 14 Me oge me he ka oalaiâ anyidra je köiö, me hingälâ anyidra je wagewe helâ me wakaco, haingen Than Iehova. 15 Iny ka hia but öba wan hnyi Aigupito, me me hnyi wau, me ohia iunöngötiny hnyi, iny ka hia but kot hia tavat adre me laba hnyin, adre me he ka wâ a inya Iehova. 16 Walang khumöng tenge adre me he ka hai; ame he wahluiny je hnyi ka khumöng tengiâ; adre me he ka khumöng tenge gan, ge Aigupito, me aten hia ae se, haingen Than Iehova.

17 Ke hnyi huna a twelviny hnyi bong a fiftininy tehi, ame o but könya hofuc ho Iehova, ame ha, ka habe, 18 Nokon at lö, tenge thö ge aten Aigupito ae se hia, ke hagut' ödra but, e, me wahluiny je hnyi ae lung kâû ka hnyi kânâ tha ödra me tavat adre me utut ka hnyi thop. 19 U hmanenang hu ia? utut me tha mokut me tavat adre me ca peritomon. 20 Adre me he ka ta hnyi wanben tavat adre me hlingâ ge hele vat: adre hia but hna e ka hnyi hele vat: lelö e me aten ae se hia. 21 Ame he ka fuc kâû tavat ae hwege a je taben hnyi wanben hedis, tha e me tavat adre me hadruâ e: adre me utut, adre me mokut, a g' adre ca peritomonâ, k' adre hlingâ ge hele vat. 22 Wale Asuria me anyin ukhacaköu hia; ke wale hon ta je erkemok igigilöâ: ödra hia tavat adre me hling' ödra k' adre me ta ge hele vat: 23 k' adre me ip anyidra je erkemok hnyi je ke keihen thop ae sâkâû, k' ame mokut anyin úkhacaköu hnyi baten anyin erkemok: ödra hia tavat adre hling' ödra, k' adre me ta ge hele vat, tavat adre me ot gudra waleji hnyi úen adre me möt. 24 E bi Elama me aten hia ae se igigilö anyin erkemok: tavat adre hling' ödra, k' adre ta ge hele vat, k' adre me utut kâû ka hnyi kânâ a g' adre ca peritomonâ, waleji tavat adre ot gadra ödra tiga möt, k' adre me tha hmehma me tavat adre me utut ka hnyi thop. 25 Adre hia but ip hnen hna mokut hnyi wanben tavat adre me hling' ödra tha e me aten hia; ke igigilö e anyin je erkemok: tavat hia adre ca peritomon, k' adre hling' ödra ge hele vat; anyin adre me ot gadra waleji ödra tiga möt, k' adre

hia but tha hmehma me tavat adre me utut ka hnyi thop: k' adre me ip e hnyi wanben tavat adre me hling' ödra. 26 Ke wale Meseka me Tubala me aten hia ae se; ke igigilö anyin je erkemok: tavat hia adre me ca peritomon, k' adre hling' ödra ge hele vat; anyin a ödra tavat adre me ot gadra waleji hnyi úeu ödra tiga möt. 27 K' adre me ca he ka tha mokut me tavat ae hwege adre me ta, k' adre ca peritomon, a tavat adre me utut ka hnyi hedis tha ödra me anyidra ta je omjehen vat, k' adre me húnâ anyidra je hele vat, ke wale hwakecidra ae kong hnyi hon je jei ödra; anyin a g' adre ot gadra hnen tavat hwege hnyi úen adre me tiga möt. 28 Ke adre me he ka thu degeci u hnyi wanben tavat adre ca peritomonâ, me tha mokut me tavat adre hlingâ ge hele vat. 29 E bi Edoma me anyin je than me anyin je taben hia, waleji adre tha ip hnyi anyidra tang hwege unyin tavat adre hling' ödra ge hele vat: adre me he ka tha mokut me tavat adre ca peritomonâ, me tavat adre me utut ka hnyi thop. 30 E bi je thaniny hwardrö, ödra hia, me at Zidona hia, adre tha utut me tavat adre hling' ödra; waleji hnyi ot adre oâ hnyi hwegiödra ödra hmehma but; ke adre me mokut a g' adre ca peritomon, tha ödra me tavat adre hling' ödra ge hele vat, me tha hmehma me tavat adre me utut ka hnyi thop. 31 Ame he Farao ka ö'dra, me tubet can aten hia ae se: wale Farao me anyin utbavat hia, adre hling' ödra ge hele vat, haingen Than Iehova. 32 Anyin oge hia but ip m' adre me ot gan hnyi úen möt; ke adre me he ka omokulec e unyin tavat adre ca peritomonâ, me tavat adre hling' ödra ge hele vat, a Farao me aten hia ae se, haingen Than Iehova.

HNHYIMAKAN 33.

KE ame o but könya hofuc ho Iehova ame ha, ka habe, 2 Nokon at lö, ha thö ka tavat aten em hnyi, me ha ködra ka habe, Oge ne oâ hele vat ka hnyi ke hnyi, ke a ne he tavat aten hnyi ka hom ke at gadra, me otilâ e hnân anyidra at hmâkâ: 3 ke e ka wâ hele vat ame o ka hnyi hnyi, me e ame tüâ trutru me köu ka tavat; 4 ke haba at ame löng hwan trutru, ke ame ca vheno bi, ke ame ne o hele vat me hlingâ e, me ame he dren ka takou e bi. 5 E ame löng hwan trutru ke

ame ca vheno bi; me ame he ka takou e hnen dren bi: ke so bi ame ne hia but löng me ame ka omelö e bi. 6 Ke ame ne wâ hele vat hnen at hmâkâ, k' ame ca tûâ trutru, me ba haten ka tavat, me ame o but hele vat me hlingâ ke at unyidra; me ame mekiny hwakecin ae kong, me oge me he ka elâm dren bi unyin at hmâkâ. 7 Ke haba u nokon at, oge hia but otilö u hnân at hmâkâ lap anyi Isaraela; anyin a wale u me he ka löng hofuc únyi hnyi hnyimök, me kou ködra bi únyi gak. 8 Iny ka ha ka at ae kong, ka habe, At ae kong lö, u me he ka mok, ke u me ca he bi ka fuc me kou ka at ae kong hnyi deny gethen; awe, ame he at eling ae kong ka mekiny hwakecin ae kong, ke oge me he bi nya ka elâm dren gam. 9 Ke u je ne kou at ae kong he ka hmetu hnyi deny gethen, k' ame ca hmetu bi únyi hnyi deny gethen; awe, e ame he ka mekiny hwakecin ae kong, ke u bi u je omeli u.

10 Ke haba u, nokon at lö, ha thö ka lap anyi Isaraela, ka habe, Walang hnöbun hna ha, ka habe, Huhmun bi anyihmun je monu ke anyihmun je bulö, ke öhmun e aú tot hnyin; k' öhmun e he ka hawa he ka möt? 11 Ha thö ködra, ka habe, Kia inya inya, haingen Than Iehova, a oge me ca senyin bi ge mok anyin at ae kong; ke so bi me me he ka hmetu at ae kong únyi hnyi deny gethen me me möt: hmetu ju, hmetu ju öbun únyi hnyi debun ta je gethen ae monu; ke ieú gabun m' öbun e he ka mok lap anyi Isaraela? 12 Ke haba u, nokon at lö, ha thö ka lakon em hnyei, ka habe, Ame ca he hwakecin ae wisa anyin at ae wisa ka omelö e hnyi úen monu a e; ke haba hwakecin ae kong anyin at ae kong, me ame ca he ka öta e hnyi bong e ame hmetu únyi hnyi anyin hulö; k' ame ca he ka möt bi at ae wisa hwakecin hnen e hnyi bong e ame ányâ hnyin hulö. 13 Ke iny ka ha ka at ae wisa, ka habe, e ame he ka möt; k' ame ne he bi ka labageju hwakecin ae wisa, k' ame ne ányâ hulö bi, awe adre me ca he ka únykúme hwakecin ae wisa; k' ame he bi ka mekiny hulö e ame ányâ. 14 Ke haba khaca, iny ka ha ka ke at ae kong, ka habe, U me he ka mok; ke e ame hmetu bi únyi hnyi anyin monu, me ányâ únyi ae wisa me únyi ae úcü; 15 k' ame ne he at ae kong ka ohmeto haten, k' ame ne ham hmetu únyi e ame húgúnâ, me vheno je hnanyibuiny möt, ke ame ca ányâ bi monu;

awe, e ame ke ka möt, ke ame ca he bi ka mok. 16 Adre me ca he ka ha kâu ke monu hnyi ta je monu e ame hia but ányâ; e ame hia but ányâ únyi ae úcü me wisa; e ame he ka möt. 17 Ke so bi haingen lakon em hnyei, ka habe, E ca úcü bi hwakecin Than: ke haba ödra bi, e ca úcü hwakecidra. 18 E ka hwiö at ae wisa hnyi hwakecin ae wisa, me ányâ hulö, e ame he ka mekiny e. 19 Ke e ka hwiö at ae kong únyi hnyi anyin hulö, me ányâ únyi ae úcü me wisa, e ame he ka möt hnen e. 20 Ke so bi öbun e ha bi, ka habe, E ca úcü bi hwakecin Than. Lap anyi Isaraela lö, oge me he ka ve owisai öbun hoton je hwakecibun.

21 Ke haba hnyi hunu a twelviny bâ a öhmun, hnyi tehi a teniny, hnyi bong a faiviny tehi, ame o but könya ke at a kec möt úheny Jerusalema me ha, ka habe, Adre hia but kot taun. 22 Ke e huk hnyamö Iehova eja hnyi sahac, ke tiga ca o at a kec möt; ke e ame hia but khöng hnyimök, ke ne o but e ame o könya hnyi hnyomakatu; ke ame khöng ut hnyimök ke oge ca hum hmetu bi. 23 Ke ame o but könya hofuc ho Iehova, ame ha, ka habe, 24 Nokon at lö, ame ha tavat adre me labâ je dok ae hwahwacit ehele hnyi Isaraela, ka habe, Hake Aberahama thibi, ke e hu gan hnyei: ke öhmun se hia bi; ke adre hia but ha köhmun hnyei me me ihmun. 25 Anyin a wale, ha thö ködra, ka habe, Walang hna ha hnen Than Iehova, ka habe, Öbun e han menno me dren, me bwele ka je idola, me hingälâ dra: k' ame ka he bi kaibun hnyei? 26 Öbun e tot me anyibun je hele vat, me ányâ únyi ae ikiki, me ve okongoá lááiän keihen: k' ame ka he bi kaibun hnyei? 27 Walang hofuc u me he ka ha ködra, ka habe, Walang hna ha hnen Than Iehova, ka habe, Kia inya inya a haba ödra hnyi je dok ae hwahwacit adre me he ka ta ge hele vat, ke haba at ae hnyi ta hnyei, oge me he ka ham e ka je meno me me an e, ke haba ödra a ödra hnyi je hna bá me je op, adre me he ka mekiny mok ae cap. 28 Ke oge me he ka öba wan hnyei me me hnân láái, k' ame he ka um dö hmanenanginy maniny man; k' ame he ka ba wan je bucen Isaraela, ke ba at ame he ka vheno. 29 Me adre me he ka wâ a inya Iehova, iny ka hia but öba wan hnyei me me hnân láái, can ta je hwakecin hia ae ikiki adre hia but ányâ. 30 Ke haba u, nokon at

lö, ame haiö u nhen lakon em hneyi hnyi je hna up hak, ke hnyi hwanumen je uma, k' adre me úhaköuâ, ka habe, Öbun më he thö jem me löng hofuc ame o únyi ga Iehova. 31 Ke adre me he köu helâ me hwakecin tavat, k' adre me laba hnyi hnyimâkâm helâ me lakeik, k' adre me löng hwâm hofuc, ke so bi adre me ca mâdrâ: anyin adre me ha betenge ge ta je hnyimödra, k' adre me vheno hnödra hna behnyekon ge je hnyekudra. 32 Ke wâ bi, haba u, me u tha úcû me hhumöng æ kese anyin at æ so hwan, a at æ khana he ka ânyâ únyikhumöng ködra: anyin adre me löng hwam je hofuc ke adre me ca mâdrâ bi. 33 Ke e ka hwâdâ thö e (ke wâ bi, ame he ka hwâdâ,) me adre me he ka wâ a g' ame hu perofeta unyidra.

HNYIMAKAN 34.

KE ame o but kõnya hofuc ho Iehova ame ha, ka habe, 2 Nokon at lö, perofeta thö úcon tavat adre me tuö mamoe hnyi Isaraela, perofeta thö, me ha ködra, wale ka tavat âdre me tuö memoe, ka habe, Walang hna ha nhen Than Iehova, ka habe, Ekölö ge tavat tuö mamoe hnyi Isaraela, wale tavat adre me ka ha ödra bi! hawa, ca hanyen bi tavat tuö mamoe he ka hân hnahat mamoe? 3 Öbun e an je pipikhenya, ke khaú' öbun ge leünen, ke hlingâ je at æ pipikhenya; ke so bi, öbun e ca hân je mamoe. 4 Öbun e ca hia but sihwegiâ ta je meno æ sényin, ke omelö at æ mok, k' öbun e ca ujâ meno æ hmetru jein, k' öbun e ca ohmeto je hna obâ, k' öbun e ca elâm at æ hia; ke öbun e hia but musi ödra hwege me oveci ödra. 5 Ke adre me ovesei ödra anyin æ ba at æ me tuö: ke ame ön ödra thö ta je menoiny hnyot, k' adre me vese but. 6. Haba halek je mamoe adre me he monu hon je bucen me je hut hia æ görany: eke, ame vese thö halek ta je mamoe hon hmeledrany hia thithö; ke ba at æ elâm me hnö. 7 Anyin a wale, öbun tavat tuö mamoe lö, löng ju hofuc ho Iehova; 8 Haingen Than Iehova, ka habe, Kia inya inya, anyin adre hia but söh hnök hnahat mamoe, ke ka an dut je menoiny hnyot hia halek je mamoe, anyin æ ba at æ me tuö, ke adre me ca elâm hnök hnahat mamoe hnen tavat tuö halek je mamoe, ke haba tavat tuö mamoe adre me ka ha ödra bi, me ca hân bi hnök hnahat mamoe; 9 anyin a wale, öbun

tavat tuö mamoe lö, löng ju hofuc ho Iehova; 10 Walang hna ha nhen Than Iehova, ka habe, Wâ bi, úcûk tavat tuö mamoe; ke oge me he ka elâm hnök hnahat mamoe unyidra, me ob' ödra m' adre me ca hân hmetu hnök hnahat mamoe; ke ame ca he hmetu tavat tuö mamoe ka ha ödra bi; ke oge me he ka hûgûnâ hnök hnahat mamoe únyi hnyi je hnyimödra bi, me me ca ö 'dra hmetu. 11 Ke walang hna ha nhen Than Iehova, ka habe, Wâ bi, hamök he ka elâm hnök hnahat mamoe me elelâm. 12 Haba at tuö mamoe ame elam hnahat haleny hnyi úten e ame tha e me hnahat haleny mamoe adre vese, helâe oge me he ka elâm halek hnahat mamoe, ke oge me he ka hum ödra únyi hnyi je dok hia waleji adre vese ka hnyin, hnyi bong æ khömet me menekholom. 13 Ke oge me he ka su ödra úheny unyin tavat, me úkhacaköu ödra úheny hnyi je hneyi, me hum ödra ka hnyi idra; ke oge me he ka ha ödra hon je bucen Isaraela, hnyi je deny köiö, me hnyi je ke keihen hneyi adre me labâ. 14 Oge me he ka ha ödra hnyi je sajilat æ so, ke ame he ka hnen hagidra hon je bucen æ beú hnyi Isaraela: adre me he ka mokut eling hnyi hak æ so, me han hnyi sajilat æ hât hon je bucen Isaraela. 15 Inya oge me he ka hân halek hnahat mamoe, k' oge me he ka omokuli ödra, haingen Than Iehova. 16 Oge me he ka elâm at æ hia, me ohmeto hna obâ me ce ujâ at æ hmetru jein, me ohwegiâ at æ sényin, ke haba at æ pipikhenya ke at æ hwege, me oge me he ka ohia; k' oge me he ka ha ödra ge hna owisa. 17 Ke haba öbun hnök hnahat mamoe lö, walang hna ha nhen Than Iehova, ka habe, Wâ bi, oge me owisa ke meno me ke meno, a je mamoe бага tha ödra me je got бага. 18 Hawa, únyi æ úhnyûkong köbun wale hnöbun hna han hnyi sajilat æ so, me öbun e he minya ka uto bi ge cabun kolon anyibun sajilat? ke öbun e ijem je an æ alai, me ohâeâ bi kolon ge je cabun? 19 Me haba halek mamoe, adre me an hnöbun hna uto ge cabun, me ijem hnöbun hna ohâeâ ge cabun.

20 Anyin a wale, walang hna ha nhen Than Iehova, ka habe, hamök a walönya ang, he ka owisa je meno æ pipikhenya me je meno æ delâ. 21 Anyin a öbun e hagutâ ge je vhak me je abeny, me kot tavat æ mok hia ge je faoibun, me öbun e ovesei ödra ehele; 22 anyin a wale oge

me he bi nya ka omelö hnök hnabat mamoe, k' adre me ca he hmetu ka sei ödra ; k' oge me he ka owisa ke meno me ke meno. 23 Ke oge me he ka otillâ hudra ke at tuö mamoe e khaca, me e ame he ka ha ödra, a athnyabaik Davita ; ke hamen he ka ha ödra ; ke e at tuö mamoe ködra. 24 Ke inya Iehova Khongudrin, ke Davita athnyabaik tuhödra ; inya Iehova at ame ha. 25 Ke oge me he ka ânyâ úhinhinköu úsoköu m' ödrin, ke oge me he ka ohia ta je meno ae kong únyi hnyi hnyei : ke adre me he ka laba khötkic hnyi hnyebuba, ke mokut hnyin : hnyi hnyot. 26 Ke oge me he ka wi' ödra ke ta je dok igigili ödra, me me anyik hut ae hnahic ; ke oge me he ka öta we hnyi úen ; k' ame he ka ta hnahic helâ me we. 27 Ke ame he je úöiny hnyei ka wa, k' ame he kânâ ka ham jeúiny, k' adre me he ka laba khötkic hnyi idra ; me adre me he ka wâ a inya Iehova, iny ka hia but thu je venyâiny hna úhúkálaköu ödra, me omeli ödra únyi hnyi hnyamen tavat adre me thalu ödra. 28 Ke adre me ca he hmetu ta je hnyei ka sei ödra, ke ame ca he ka ön ödra hnen ta je menoiny hnyot ; ke adre me he ka laba khötkic, ke ba at ame he ka ooti ödra. 29 Ke oge me he ka okúâ hobi ködra ke úö ae lung, ke adre me ca he hmetu bi ka obi' ödra ge hmiâ hnyi hnyei, ke ame ca he hmetu bi ta je hnyei ka ohmehmai ödra. 30 Ke adre me he ka wâ a inya Iehova Khongudrin ame tha e m' ödra, ke haba ödra, wale lap anyi Isaraela, a je lakeik, haingen Than Iehova. 31 Ke haba öbun halek je mamoe, je mamoeiny ta ik, öbun je at, ke inya Khongubun, haingen Than Iehova.

HNYIMAKAN 35.

KE ame o but könya hofuc ho Iehova ame ha, ka habe, 2 Nokon at lö, hnyimákâm dö ka bucen Seira, me perofeta úcon, 3 me ha kâu, ka habe, Walang hna ha hnen Than Iehova, ka habe, Wâ bi, úcúk u bucen Seira, ke oge me he ka hai hnyamök úcom, ke oge me he ka öba wan gam me me hnân láiâ. 4 Oge me he ka öba önyen ânyâm je taun, ke u me he ka ba wan, ke u me he ka wâ a inya Iehova. 5 Anyin a hwân ehac ânyâm hmönyin, ke u je hia but hna but lakon Isaraela ka hnyi maniny hele vat hnyi úen anyidra vec, hnyi úen umo hwakecin ae kong : 6 anyin a wale, haingen Than

Iehova, ha habe, Kia inya inya, a oge me he ka ip u hobi kâu dra, ke ame he dra ka hnu u : u je ca ikiki ge dra, awe, ame he dra ka hnu u. 7 Helâe oge me he ka hna bucen Seira me me hnân láiâ me ba but wan ; ke oge me he ka subâ degecâ únyi hnyin e at ame vheno me at ame hmetu. 8 Ke oge me he ka öunöngötâ je buceniny ge je kokiny : hnyi ânyâm je hut, me ânyâm je hnyigöulen hut me ânyâm je deny köio hia, adre me he ka ta ge hele vat. 9 Oge me he ka wiö u me me ba wan nyiele balua, ke adre me ca he ka labâ ânyâm je taun : ke öbun e he ka wâ a inya Iehova. 10 Anyin a u je ha, ka habe, Ame he ka ik bi li aten hnyei ang a lo me li hnyei ang a lo, ke öhmun e he ka labâ e ; ke so bi waleji eling Iehova : 11 anyin a wale, haingen Than Iehova, ka habe, Kia inya inya, a oge me he ka ânyâ helâ me ânyâm hmönyin, ke hoton hnâm hna behnyekom wale ae manen gam hnyi hnâm hna hmönyin ködra ; ke adre me he ka ö nya iny ka bi hwaban köu. 12 Me u me he ka wâ a inya Iehova at ame long hia hnâm hna bi gan waleji u je hia but haiâ je bucen Isaraela, haingâm ka habe, E ba but wan, k' adre hna but köhmun he ka han. 13 Ke öbun e hia but bi gan könya ge je hnyimöbun, me osehia hobun je hofuc könya : oge me löng ut. 14 Walang hna ha hnen Than Iehova, ka habe, E ka senyin hia hmeledrany, me oge me he bi nya ka öba wan gam. 15 Helâji me hnâm hna senyin anyin ae ba wan lap anyi Isaraela, helâe oge me he ka ânyâ köu : bucen Seira lö, ke Edoma hia, u me he ka ba wan, wale hia thibut : m' adre me he ka wâ a inya Iehova.

HNYIMAKAN 36.

KE haba u, nokon at lö, perofeta thö ka je buceniny Isaraela, me ha, ka habe, Je buceniny Isaraela lö, löng ju hofuc ho Iehova. 2 Walang hna ha hnen Than Iehova, ka habe, Anyin a iwahnaihmiöny ame hia but ha gam, ka habe, Öhö ! ihmun dut je dok ae görany a je dok kâu adrem : 3 anyin a wale perofeta thö, me ha, ka habe, Walang hna ha hnen Than Iehova, ka habe, Can, anyin adre me öba wan gabun, ke ön öbun hnyi je ke keihen gabun, m' öbun e iny je kolon ta je hnyei, ke adre me hai öbun hnen tavat fufuc, k' adre me haikongu öbun hnen tavat : 4 anyin a

wale, öbun je buceniny Isaraela lö, löng ju hofuc hwan Than Iehova, ka habe, walang hna ha hnen Than Iehova ka ta je bucen me ta je hut me je deny köiö, me je hnyigöulen bucen, me je hnyebuba ae ba aten, me je taun adre me hna degecá, wale a hnân söh me öu hnen kolon ta je hnyei igigilö : 5 anyin a wale, walang hna ha hnen Than Iehova, ka habe, Haba hnyi meiciny anyik ciá oge hia but ha ka je kolon je hnyei, me ka Edoma hia, waleji adre hom ik hnyei me me idra a hnyi senyin hnyok ae bekhöt, me hnyi húkhötiá hnen öúnykúm, he ka hna degecá e hnân söh : 6 anyin a wale perofeta thö ka hnyei Isaraela, me ha ka je bucen me je hut, me je deny köiö me je hnyigöulen ta je bucen, ka habe, Walang hna ha hnen Than Iehova, ka habe, Wá bi, inya oge hia but ha hnyi anyik ciá, me anyik hmönyin, anyin ame hihmehm' öbun ta je hnyei ; 7 anyin a wale, walang hna ha hnen Than Iehova, ka habe, Oge hia but hai hnyamök, haingök, E hnathu ame he je hnyei igigili öbun ka hmehma ka únyi gadra bi. 8 Ke haba öbun, je bucen Isaraela lö, ame he ka vhei anyibun ta je anginy, me wa hobi káu lakeik a Isaraela ; anyin a ödra hakekeny jut he ka o. 9 Anyin a wá bi, inya oge me tha e möbun, ke oge me he ka hwiö köbun, ke adre me he ka trohnen me belöki öbun : 10 ke oge me he ka osehia tavat unyibun, lap hia anyi Isaraela, wale hia thibut : ke adre me he ka labá je taun, me op je dok ae ba wan : 11 ke oge me he ka osehia tavat me meno unyibun ; ke adre me he ka osehia me si : ke oge me he ka olab' öbun helá me bongubun ehac, me ányá gan hmá so köbun hon ehac a bán' : me öbun e he ka wá a inya Iehova. 12 Eke, oge me he ka ovheno tavat hubun, wale lakeik a Isaraela ; ke adre me he ka hum u me idra, ke u me he ka hnân jekhoúdra, ke u me ca he hmetu ka öba lakudra. 13 Walang hna ha hnen Than Iehova, ka habe, Anyin adre me ha köbun, ka habe, U bi hnyei, at ame an tavat me öba lakon hnyei ; 14 anyin a wale u me ca he hmetu ka an tavat, me öba lakon em hnyei, haingen Than Iehova ; 15 ke oge me ca he hmetu ka ha gan hmehma anyin ta je hnyei, ke ame ca he hmetu je hnyei ka haikongu u, ke u me ca he hmetu ka othöa em hnyei, haingen Than Iehova.

16 Ke ame o but minya könya hofuc ho Iehova ame ha, ka habe, 17 Nokon at lö,

hnyi ün waleji ame laba at Isaraela hnyi idra hnyei, me adre me okongoá ge hwakecidra me hnödra hna ányá : haba hwakecidra hnyi hnyimakök me helá me úkonginy momo ame hom bongon omomo. 18 Anyin a wale oge me hingálá anyik hmönyin hudra, can dra adre hia but hingálá hon káná, ke can adre me okongoá e hnen khongudrin je khong : 19 me oge me ovesei ödra unyin ta je hnyei, me adre me ob' ödra unyin tavat : ke oge me bi hwaban ködra hoton hwakecidra ke hnödra je hna ányá. 20 Ke hnyi ün adre me o ka hnyi je hnyei, waleji adre me he ka hnyin, me adre me okongoá iök ae kap ; anyin ame ha tavat gadra, ka habe, Ta je atö Iehova ang, k' adre me he but úhedra hnyi iny hnyei. 21 Ke so bi oge me betenge, can iök ae kap waleji ame haikongoá hnen lap anyi Isaraela unyin ta je hnyei, a je hnyei adre me he ka hnyin. 22 Anyin a wale ha thö ka lap anyi Isaraela, ka habe, Walang hna ha hnen Than Iehova, ka habe, Lap anyi Isaraela lö, oge me ca ányá e can öbun, ke so bi can iök ae kap, waleji öbun e hia but haikongoá hnyi ta je hnyei, waleji öbun e he ka hnyin. 23 Ke oge me he ka okabá iök ae gan, waleji adre me haikongoá unyin ta je hnyei, wale öbun e hia but haikongoá hnyi wanbödra ; me ame he je hnyei ka wá a inya Iehova, iny ka okabi nya bi gabun hnyi hnyimaköbun, haingen Than Iehova. 24 Anyin a oge me he ka hum öbun unyin tavat, me úkhacaköu öbun únyi hnyi je hnyei hia, me hum öbun ka hnyiibun. 25 Ke oge me he ka dukái' öbun ge köiö ae alai m' öbun e he ka kalaöt ut : ke oge me he ka obosoi öbun únyi hnyi hwakecibun ae ikiki hia, me khongubun je khong hia. 26 Ke oge me he bi minya ka ham köbun hnyok ae teb únyi, me ip hanu ae teb únyi eú hnyibun ; ke oge me he ka hom hnyok ae veto únyi hnyi je unyibun, ke oge me he ka ham köbun hnyok ae utiö. 27 Ke oge me he ka ip hanuk eú hnyibun, me wi öbun he ka vheno anyik je hnanyibu, m' öbun e he ka tuö hnök je hna owisa, me ányá. 28 Me öbun e he ka laba hnyi hnyei waleji oge me ham ka lakamöbun ; ke öbun e he ka lakeik, ke oge me he ka Khongubun. 29 Ke oge me he ka omeli öbun únyi hnyi hwakecibun ae ikiki hia : ke oge me he ka hawa hwit, me osehia e, ke oge me ca he ka kuná köbun hmiá. 30 Ke oge me he ka osehia ta je wan úö, me

jeúiny káná, m' adre me ca he hmetu ka haikongu öbun can hmiá unyin ta je hnyei. 31 Ke öbun e he ka únykúme ta je hwakecibun ae kong, me hnöbun je hna ányá ae ca so; ke öbun e he ka húkoti öbun bi hnyi hnyimaköbun bi can anyibun ta je hulö me hwakecibun ae ikiki. 32 Oge ca ányá e can öbun, e so öbun e tremángá e, haingen Than Iehova: hamöbun he ka hmehma me hlohlo can ta je hwakecibun, lap anyi Isaraela. 33 Walang hna ha hnen Than Iehova, ka habe, Haba hnyi bong oge me he ka okalaöti öbun únyi hnyi anyibun je hulö hia, me oge me he minya ka olab' öbun hnyi je taun, ke adre me he ka op je dok ae ba wan. 34 Ke adre me he hmetu ka belöká káná ae ba wan, ke so bi, e ba wan ehac hnyi hnyimaködra hia adre me he hnyin. 35 Ke adre me he ka ha, ka habe, Haba hnyei ang waleji ae ba wan, me úcú bi me hnyei Edena; ke adre up haginy me labá je taun waleji ae ba wan, me ba aten, me ve ta únyi. 36 Me ame he ka khana hnen je hnyei a je kolon igigili öbun, a inya Iehova at ame op hmetu je hnyaba adre hota degecá, me belöká je dok ae ba wan: inya Iehova at ame ha, ke oge me he ka ányá.

37 Walang hna ha hnen Than Iehova, ka habe, Can únyi e, hamen lap anyi Isaraela he ka elám unyik, he ka ányá hobi ködra; oge me he ka osehí' ödra helá me hnahat mamoe. 38 Adre me he ka öunöngotá je taun wale ae ba wan hnen ta je deö at, helá me hnahat meno hobi káu taben bi hut, ke helá me hnahat meno hnyi Jerusalema hnyi je bijeú adre thu: me adre me he ka wá a inya Iehova.

HNYIMAKAN 37.

KE ame o but huk hnyamö Iehova, ke e ame hum nya hnyi hanu Iehova, me ip nya hnyi wanben hnyigöulen bucen; ke e unöngöt ge je jö; 2 ke e ame hum nya eling igigilö, ke wá bi, e ti se hia je jö eú hnyi hnyigöulen bucen; ke wá bi e ti löülöu but je jö. 3 Ke e ame ha könya, ka habe, Nokon at lö, hawa, e khana je jö eling he ka möt? Me haingök, ka habe, Than Iehova lö, e manen köu. 4 Ke e ame ha minya könya, ka habe, Perofeta thö hon je jö ejo, me ha ködra, ka habe, Je jö ae löülöu but lö, löng ju hofuc ho Iehova. 5 Walang hna ha hnen Than Iehova ka je jö ang, ka habe, Wá bi oge me he ka odilá

homená ka hnyi je hnyibun m' öbun e he ka möt dö. 6 Ke oge me he ka ip je töiny unyibun, me bi vibun, me lan öbun ge unen, me odilá homená hnyi hnyibun, m' öbun e he bi ka möt; me öbun e he ka wá a inya Iehova. 7 Me oge me perofeta helá me hna húna könya: ke oge me tiga perofeta, me e hu mede, ke wá bi hwiöi, me ame úheköu ta je jö, a ke jö ka ke jö. 8 Ke inya oge me wá, me wá bi, e hu gadra ta je tö, k' ame kú viny, k' ame lan bi e ge unen: ke ha homená eú hnyidra. 9 Me e ame ha könya, ka habe, Nokon at lö, perofeta thö ka ang, perofeta thö me ha ka ang, ka habe, Walang hna ha hnen Than Iehova, ha habe, Homená lö, aiö u únyi hnyi je ang a vak, me mená ka hnyi hon je hna hlingá ejo, m' ödrin e he ka möt bi. 10 Me oge me perofeta helá me hnen hna húna könya, me ame dit hnyi hnyidrin homená, m' ödrin e möt dö, m' adre me tot ge cadra, a utbavat ae gan hmá hmönyin. 11 Me e ame ha könya, ka habe, Nokon at lö, haba je jö eling, me wale lap anyi Isaraela hia: wá bi, adre me ha, ka habe, E löülöu but je jeiöhmun, ke hia but anyihmun geju; k' adre hia but subá degeci öhmun. 12 Anyin a wale, perofeta thö me ha ködra, ka habe, Lakeik lö, wá bi, oge me he bi nya ka khöng ta je hubun, me höi öbun únyi hnyi je hubun, haingen Than Iehova; ke oge me he ka hum öbun ka hnyi hnyei Isaraela. 13 Me öbun e he ka wá a inya Iehova, lakeik lö, iny ka hia but khöng je hubun, me höi öbun únyi hnyi je hubun. 14 Ke oge me he ka ip hanúk eú hnyi hnyibun, ke öbun e he ka möt, ke öge me he ka ip öbun hnyi ibun hnyei: me öbun e he ka wá a inya Iehova at ame ha e, me ányá e, haingö Iehova.

15 Ke ame o minya könya hofuc ho Iehova ame ha, ka habe, 16 Nokon at lö, hom dö ke ong utö, me sihnalimen hon e, ka habe, Hnán hobi káu Juda, me lakon Isaraela a je lahanen: ke u ma hom dö ke ong utö minya me sihnalimen hon e, ka habe, Hnán hobi háu Iosefa, ong utö anyin Eferaima, me hobi káu lap anyi Isaraela a je lahanen: 17 ke úhújakouáju me me khaca thibi utö, m' ödra me khaca thibi hnyi hnyamám. 18 Ke e ka ha köu lakon em hnyei, ka habe, Hawa, u me ca he ka omanená köhmun bongon ta je únyi e? 19 me u me he ka ha ködra, ka habe, Walang hna ha hnen Than Iehova, ka habe, Wá bi oge me he ka hom ong utö

anyin Josefa a e hnyi hnyamen Eferaima, me je tribu Isaraela a lahanen ; ke oge me he ka tha ip mē, wale ong utō anyin Juda, me wia me me khaca thibi utō, ke adre me he ka khaca hnyi hnyamök. 20 Ke haba li ong utō waleji u je sihnalimen hon me ame he ka e hnyi hnyamâm hnyi hnyimäködra. 21 Ke ha thō ködra, ka habe, Walang hna ha hnen Than Iehova, ka habe, Wâ bi, oge me he ka hom je lakon Isaraela únyi hnyi wanben je hnyei, wale adre me he ka hnyin, me úkhacaköu ödra úhedra e he, ke oge me he ka hum ödra ka hnyi idra hnyei : 22 ke oge me he ka wi' ödra hnan hnyei a khaca hnyi kânâ, hnyi je bucen Isaraela : k' ame he than a khaca ka tuhödra hia : k' adre me ca he hmetu ka lo li hnyei, ke adre me ca he hmetu bi ka kia luâ me me lo li dökhu : 23 ke adre me ca he hmetu bi ka kong ge anyidra je idola, me anyidra ta je únyi ae ikiki, me hnödra je hna hanyâtâ hia : ke oge me he ka omeli ödra únyi hnyi je hnyabadra hia waleji adre ányâ monu hnyin, ke oge me he ka oboso ödra : helâe adre me he ka lakeik, ke oge me he ka Khongudrin. 24 Ke ame he Davita athnyabaik ka bi tuhödra ; ke ame he ka khaca at ama tuhödra helâ me hnahat mamoe : k' adre me he ka vheno hnök je hna owisa, me tuö anyik je hnanyibu, me ányâ. 25 Me adre me he ka labâ hnyei waleji oge me ham kö Jakob athnyabaik, waleji a labâ ge iakamöbun ; k' adre me he ka labâ e, ödra, me lakudra, me laöbidra nyiele balua : k' ame he Davita athnyabaik ka tuhödra nyiele balua. 26 Ke oge me he ka ányâ m' ödra úhihinykôu úsokôu : me úhihinykôu a nyiele balua m' ödra : me oge me he ka ti ödra, me osehi' ödra, me ip unyidra anyik dok ae kap nyiele balua. 27 Me ame he ka laba unyidra umök uma mano ; ke oge me he ka Khongudrin, k' adre me he ka lakeik. 28 Me ame he je hnyei ka wâ a inya Iehova at ame okabi Isaraela, e ka e bi unyidra anyik dok ae kap nyiele balua.

HNYIMAKAN 38.

KE ame o but kõnya hofuc ho Iehova, ame ha, ka habe, 2 Nokon at lö, hnyimákâm dö kö Gog, aten Magog, a tuhan Roshâ, me Meseka, me Tubala, me perofeta úcon, 3 me ha, ka habe, Walang hna ha hnen Than Iehova, ka habe, Wâ bi, úcúk u Gog, tuhan Roshâ, me Meseka, me

Tubala : 4 ke oge me he ka ohmetu u, me det hnyimâm ge je wage, me oge me he ka lili u but, me ányâm utbavat hia, je hors, me tavat tabö hors, adre me khavâ khaúen vat ae bekhöt, a bunyen ae gan hmâ, tavat ae hu gadra bec, me bec ae gan, ödra hia adre me hok hele vat : 5 Peresi, me Aithiop, me Futa, unyidra ; tavat hia ae ve hu bec me hnabecen vat : 6 Gomera me anyin je deö vai hia ; lap anyi Togarema úhedra hnyi hwadrö hmönyin, me anyin je deö vat hia : e se hia je hnyei adre me tha ödra möu. 7 Penapena wia thö, eke u ma ka penapenö u bi, u me je deö vat adre me ukhacaköu unyâm, ke u ma he ka taben ködra. 8 Ke hwaban je bong ae se hia adre me he ka senö u : ke hnyi je huna a biliny u me he ka o ka hnyi hnyei adre ohmeto únyi hnyi hele vat, wale adre úkhacaköu únyi hnyi je hnyei ae se hia, hon je bucen Isaraela ae itremacat but ehac : ke adre hom e únyi hnyi je hnyei, ke adre me he ka laba khötkic ödra hia thithö. 9 Ke u me he ka ölö me o helâ me weneú, u me he ka helâ me úlá ame tube hnyei, u, me ányâm je deö vat hia, me je hnyei ae se hia tha ödra möu. 10 Walang hna ha hnen Than Iehova, ka habe, Hnyi úen eling, ame he ka o je únyi hnyi hnyekom, ke u me he ka hu hna únykúme ae kong : 11 ke u me he ka ha, ka habe, Oge me he ka he ka hnyi hnyei ae hu je taun hnyin ae ba haginy ; oge me he ka he ködra tavat adre me laba sot, adre me laba khötkic, ödra hia adre me laba ke ba hak adre op, ke ba ohmáiny me hlinginy homagöule : 12 he ka hom hna söh, me hna húgúnâ ; me he ka wia hnyamâm ka hnyi je dok ae ba aten ehac ke adre me labâ walang ang, me ka tavat adre úkhacaköu únyi hnyi je hnyei, tavat a ödra tren je meno me omjeú, tavat adre me laba hnyi wanben hmeledrany. 13 Ame he Sheba ka ha köu, me Dedana, me tavat adre me úcú úhedra Tasesa, me je nak lionainy hia, ka habe, Hawa, u je o ka hom hna söh ? u je hawâ ányâm úkhacaköu he ka hom hna húgúnâ ? he ka sukhoúnö sileva me gol, he ka hom ta je meno me omjeú, he ka hom hna söh ae gan ?

14 Anyin a wale, nokon at lö, perofeta thö me ha kö Gog, ka habe, Walang hna ha hnen Than Iehova, ka habe, Hnyi bong eling e ka laba khötkic lakeik a at Isaraela, hawa ame ca he ka khanö u ? 15 Ke u me he ka o úhem hnyi hnâm, je ke keihen ae

sâkâû hnyi hwadrö, u, me je hnyei ae se a tha ödra möu, tavat tabö hors hia bunyen ae gan, me utbavat ae gan hmâ: 16 ke u me he ka o úcon ik hnyei a Isaraela, helâ me úlâ ame tube hnyei; ame he ka o hnyi je bong a biliny, me oge me he ka oi u ka hnyi ik hnyei, me me wâhmakhmetu u, iny ka kap gam Gog lö, hnyi hnyimaködra. 17 Walang hna ha hnen Than Iehova, ka habe, Hawa, u e at waleji oge ha ehac a deny je athnyabaik a je perofetainy Isaraela, tavat adre me perofeta hnyi je bong eling hnyi je huna ae se hia, a oge me he ka oi u úcúdra? 18 Ke haba hnyi bong eling, bong a o hnyin Gog úcon hnyei Isaraela, haingen Than Iehova, ame he ka manen anyik hmönyin hnyi hnyimakök. 19 Anyin a oge hia but ha hnyi hnök hna ciâ, ke hnyi meicin anyik hmönyin, ka habe, E hnathu hnyi úen eling ame he ka hu hwiöi ae gan hnyi hnyei Isaraela; 20 m' adre me he ka öbubuny ge hnyimakök ta je wâ eü hnyi köiö, me ta je meno ame gâ ethö, me je menoiny hnyot, me ta je únyi hia ame iyâû wale adre me iyâûâ kânâ, me tavat hia hon kânâ, k' ame he je bucen ka kölu, k' ame he ka ta je dok ae hwatapkölu, k' ame he je hna up veto hia ka ta hnyikânâi. 21 Ke oge me he bi nya ka hawâ hele vat úcon hnyi anyik ta je bucen hia, haingen Than Iehova; k' ame he anyidra je hele vat ka ve úcon tavat hia. 22 Ke oge me he bi nya ka ivinö úcon ge mok ae cap me dra, ke oge me he ka kunâ kâu, me ka anyin je deö vat, me je hnyei ae se hia unyin, we ae gan, me we wahma ae gan, me meic, me teio. 23 Ke oge me he ka oganö nya, me okabi nya bi, ke oge me he ka manen hnyi hnyimakan je hnyei ae se hia; me adre me he ka wâ a inya Iehova.

HNYIMAKAN 39.

KE haba u, nokon at, perofeta thö úcon Gog me ha, ka habe, Walang hna ha hnen Than Iehova, ka habe, Wâ bi, úcük u Gog lö, tuhan Rosha, me Meseka, me Tubala: 2 ke oge me he ka ohmetu u, me lili u, me oi u úhem hnyi hwadrö hmönyin; ke oge me he ka hum u ka hnyi je bucen Isaraela: 3 ke oge me he ka kot degecâ ányâm cafana únyi hnyi hnyamâm a mem, me okolo ányâm je fana únyi hnyi hnyamâm a metâm. 4 U me he bi ka ta hnyi je bucen Isaraela, u, ke ányâm je deö vat hia, me ta je hnyei unyâm: oge me he

ka hnö u ka ta je meno ame gâ a ödra behan, me menoiny hnyot he ka an. 5 U me he ka ta hnyi ta hnyei: anyin oge hia but ha, haingen Than Iehova. 6 Ke oge me he ka kunâ meic kö Magog, me ka tavat adre me laba köhtökc hnyi je bomene: me adre me he ka wâ a inya Iehova. 7 Ke oge me he ka omanenâ iök ae kap hnyi wanben ik hnyei a Isaraela; ke oge me ca hn' ödra hmetu he ka haikongoâ iök ae kap: ke ame he je hnyei ka wâ a inya Iehova a kabi Isaraela. 8 Wâ bi, ame o but, k' ame he ka hwádâ but, hangen Than Iehova; walang bong waleji oge ha. 9 Ke ame he tavat adre me labâ je taun Isaraela ka hú meic, me thong degecâ je únyi hnân vat, wale je bec, me je bec ae gan, je cafana me fana, me je ong ö, me je ö, ke adre me he ka thong degecâ ge meic hnyi seven je huna: 10 m' adre me ca he ka thigö hnyi hnyei, me si utö hnyi hnyot; anyin adre me he ka bi meic ge ta je únyi hnân vat: ke adre me he ka söh tavat waleji adre me sei ödra, me hügúnâ únyi ge tavat adre me hügúnâ gadra, haingen Than Iehova.

11 Ke haba hnyi bong eling, oge me he ka hna kö Gog ke dok hnân khön komok hnyi Isaraela, wale hnyigöulen bucen anyin tavat adre me he hnyi ke keihen e deiö hnyi köiö: ke ame he ka hlöng gethen ka tavat adre me he: ke adre me he ka könim Gog me anyin je deö vat hia eling: ke adre me he ka hwenyi ien e Hnyigöulen bucen Hamona-gog. 12 Ke seven je tehi ame he lap anyi Isaraela ka labö könim ödra, m' adre me obosoâ hnyei. 13 Eke, ame he tavat hia thithö hnyi hnyei ka hnyi könim ödra; ke ame he ka hnân ölungi ödra hnyi bong adre me oganö nya hnyin, haingen Than Iehova. 14 Ke adre me he ka úca tavat he ka huliwa hmâ he ka vheno hnyei m' adre me konâm tavat adre me he, a je kolon hon kânâ, he ka obosoâ e: ke e ka um dö je tehi a seven, adre me he ka elâm. 15 Ke haba at ame vheno hnyei ame he ka he hnyin; ke at ka wâ jeien komok, e ame he ka otilâ haten hnyin e, ke ne o but adre hia but konâm e hnen tavat adre me konâm hnyi hnyigöulen bucen a Hamona-gog. 16 Ke adre me he minya ka hwenyi ien ke taun, ka habe, Hamona. Helâe adre me he ka obosoâ hnyei.

17 Ke haba u, nokon at lö, walang hna ha hnen Than Iehova, ka habe, Ha thö ka je meno hia ame gâ, me je menoiny hnyot

hia, ka habe, Úkhacaköu thö, ke ai öbun ; úkhacaköu úhebum hnyi je ke keihen hia ka hnyi anyik hut wale oge me hudo hobi köbun, a hut ae gan hmá walethö hon je bucen Isaraela, m' öbun e he ka an utiö me ijem dra. 18 Ke öbun e he ka an utiöiny tavat ae hwege, ke ijem dren je taben eang hmelen, ke je mamoe бага, me je nokon mamoe, me je got, me je bolok, a je meno hia ae pipikhenya únyi hnyi Basana. 19 Ke öbun e he ka an pipikhenya me sekubun, me ijem dra me monu but, únyi hnyi anyik je hut oge hia but hudo hobi köbun. 20 Ke öbun e he ka sekon hnyi anyik laulau ge je hors me je kariota, me tavat hwege, me tavat vat hia, haingen Than Iehova. 21 Ke oge me he ka ip anyik hmanenang hnyi ta je hnyei, k' ame he je hnyei hia ka wá hnök hna owisa waleji oge me ányá, me hnyamök waleji oge me ip hudra. 22 Me ame he lap anyi Isaraela ka wá a inya Khongudrin, hwán hnyi bong eling ke ne o but nyiele. 23 Me ame he ka manen ka ta je hnyei a g' adre hwenbá lap anyi Isaraela can anyidra hulö ; can adre me ányá hwa-kecin ae kong könya, me oge me ikhálá hnyimakök gadra : me oge me hn' ödra ka hnyi hnyamen je iwahnaihmióny mödra, m' adre me ta hia but ge hele vat. 24 Oge me ányá ködra hoton anyidra bo kong, me hnödra hna hanyáúá ; me oge me ikhálá hnyimakök gadra.

25 Anyin a wale, walang hna ha hnen Than Iehova, ka habe, Oge me he walang ang ka ohmetu Jakob úheny hnyi hna bá, me betenge hia ge lap anyi Isaraela ; me oge me he bi nya ka ciá can iök ae kap. 26 Ke adre me he ka vheno anyidra hmehma, ke hwakecidra ae kong waleji adre me ányá könya, ödra ka he ka laba hnahic hnyi idra hnyei, ke ba at ame he ka oot' ödra ; 27 ke iny ka hia but ohmetu ödra úhedra hnyi je hnyei, me úkhacaköu ödra úhedra hnyi je hnyei iny je iwahnaihmióny mödra, ke iny kap ut gadra hnyi hnyimakan je hnyei ae se hia. 28 Me adre me he ka wá a inya Iehova Khongudrin, anyin oge me kun' ödra ka bá hnyi je hnyei, ke oge hia but úkhacaköu ödra ka hnyi idra bi ; ke oge me ca he hmetu ka hna degecá ke at gadra nyiele ; 29 ke oge me ca he hmetu ka ikhálá hnyimakök gadra : anyin oge hia but hingálá hanuk hon lap anyi Isaraela, haingen Than Iehova.

HNYIMAKAN 40.

HNYI huna a twente faiviny bá a öhmun, hnyi hnyimakan huna, hnyi bong a teniny tehi, hnyi huna a foininy hwaban hna kot taun, hnyi bong a ka e, ame e bi huk hnyamö Iehova, ke e ame hum nya ká e. 2 Hnyi je hna omanená únyi ge Khong e ame hum nya ka hnyi hnyei Isaraela, me ip nya hon bucen ae beú göranyai, ke haba hnyi hon e e hu heláke bongon ke taun hnyi hwaiöu. 3 Ke e ame hum nya ká e, ke wá bi eling at, haba anyin me helá me bras, ke e hnyi hnyamen tö lino, me hlowe tulut ; ke e ame tot hnyi homagöule. 4 Ke ame ha könya at, ka habe, Nokon at lö, wá thö ge li emákám, ke löng dö ge li hnyikönyám, ke wáhnakhmetoá thö ta je únyi hia wale oge me he ka omanená köu ; anyin adre hum u káang m' oge me he ka omanená köu ta je únyi e : omanená thö ka lap anyi Isaraela ta je únyi hia thithö u me he ka wá.

5 Ke wá bi, hna up hak veto hoton uma igigilö, ke e bi hnyi hnyamen at hlowe tulut a siks je kubit ibeüen, a je kubit me hnyam : ke e ame tuluto úlaueu uma, khaca hlowe ; ke khaca hlowe ibeüen göranyai. 6 Me e ame o but hnyi homagöule e deiö, me ölö hnyi wacúatiny ; ke e ame tuluto baten homagöule khaca hlowe úlaueu ; ke habe ke baten me khaca hlowe úlaueu. 7 Ke haba hnyenle me khaca hlowe ibeüen, ke khaca hlowe úlaueu, ke haba dok hnyi wanben je hnyeule, me faiv kubit ; ke haba baten homagöule hnyi baten poretikoiny homagöule eiö hnyin, me khaca hlowe. 8 E ame tuluto poretikoiny homagöule eiö hnyin, a khaca hlowe. 9 Ke e ame tuluto poretikoiny homagöule a eit kubit ; ke je hmolominy úsa lo li kubit ; ke haba poretikoiny homagöule, me eiö hnyin, cico uma. 10 Ke haba je hnyeule hnyi homagöule e deiö, me kun hnyi ke keihen, ke kun hnyi ke keihen ; a khaca tulut hia : ke khaca tulutiny je hmolom hnyi li ke keihen a lo. 11 Ke e ame tuluto úlaueu homagöule ten je kubit ; ke haba ibeüen homagöule me thötin je kubit ; 12 ke haba hnyigöulen cicö je hnyeule, me khaca kubit, ke khaca kubit hnyigöulen hnyi ke keihen ; ke haba ta je hnyeule, me úsa siks je kubit hnyi ke keihen, ke siks je kubit hnyi ke keihen. 13 Ke e ame tuluto homagöule hwán hnyi

hon ke hnyeule ka hnyi hon khaca, ke haba úlaueu me twente faiv je kubit; ke hwanuma cicö ke hwanuma. 14 Ke e ame ányá minya je hmolom a sikste je kubit; ke haba hnyeule me ame o ke ne o but hmolom, ke homagöule e igigilö. 15 Ke hwán hnyi hnyimakan homagöule adre me dit hnyin, ke ne o but hnyi hnyimakan poretikoiny homagöule eiö, me fifte je kubit. 16 Ke e hu je mamalama adre me hlöng hnyi je hnyeule, ke e hnyi je hmolominy eiö hnyi homagöule igigilö, ke helâe ka hnyi je poretika: ke hu je mamalama igigilö eiö: ke ve hu je pama hnyi je hmolom.

17 Ke e ame hum nya ka hnyi hnyeule eü, ke wá bi wale je hnyeule me je hna bi dek veto adre me ányá hobi káu hnyeule igigilö: thöte je hnyeule hon hna bi dek veto. 18 Ke haba hna bi dek veto hnyi ke keihen homagöule helâ me ibeüen je homagöule, wale hna bi dek veto eü. 19 Ke e ame tuluto úlaueu hwán hnyi hnyimakan homagöule eü ke ne o but hnyi hnimakan hnyeule eiö me hoton, wan haded je kubit, hnyi ke keihen e deiö, me hwadrö. 20 Ke haba homagöule eü ame hnyimakan ka hnyi hwadrö; ke e ame tuluto ibeüen e, me úlaueu e. 21 Ke haba je hnyeuleiny, me kun hnyi ke keihen ke kun hnyi ke keihen: ke haba je hmolominy me je poretikoiny helâ me tulutiny homagöule a bân; fifte kubit ibeüen e, ke twente faiv kubit úlaueu. 22 Ke haba je mamalamainy, me je poretikoiny, me je pamainy, helâ me tulutiny homagöule ame hnyimakan deiö; ke adre me ölö ka hnyin hnyi wacúat a seven je utwacúat; ke e hnyi hnyimaködra je poretikoiny. 23 Ke haba homagöuleiny hnyeule eü, cicö ke homagöule, ka hnyi hwadrö me deiö; ke e ame tuluto hwán hnyi ke homagöule ke ne o but hnyi ke homagöule wan haded kubit. 24 Ke e ame hum nya ka hnyi hwaiöu, ke wá bi ke homagöule ka hnyi hwaiöu: ke e ame tututo je hmolominy, me je poretikoiny hoton je tulut eling. 25 Ke e hu je mamalama hnyin, me hnyi je poretikoiny igigilö, helâ me je mamalama eling: haba ibeüen fifte kubit, ke twente faiv kubit úlaueu. 26 Ke seven je utwacúat hnân ölö, ke e cici ta je únyi e je poretika; ke e hu je pama khaca hnyi ke keihen, ke khaca hnyi ke keihen hnyi ta je hmolominy. 27 Ke e hu homagöuleiny hnyeule eiö hnyi hwaiöu: ke e ame tuluto hwán hnyi ke homagöule

ke ne o but ka hnyi ke homagöule ka hnyi hwaiöu, wan haded je kubit.

28 Me e ame hum nya ka hnyi hnyeule eiö a deny homagöule ka hnyi hwaiöu: ke e ame tuluto homagöule ka hnyi hwaiöu hoton je tulut eling; 29 ke haba je hnyeuleiny, me je hmolominy, me je poretikoiny, hoton ta je tulut eling: ke e hu je mamalama hnyin e, me hnyi je poretika igigilö: fifte kubit ibeüen, ke twente faiv kubit úlaueu. 30 Ke e hu je poretika igigilö, haba ibeüen me twente faiv kubit, ke úlaueu faiv kubit. 31 Ke ame hnyimakan ka hnyeule eü ta je poretika; ke e je pama hnyi je hmolominy: ke eit je utwacúat hnân ölö. 32 Ke e ame hum nya ka hnyi hnyeule eiö e deiö: ke e ame tuluto homagöule hoton je tulut e; 33 ke haba je hnyeuleiny, me je hmolominy, me je poretikoiny, me helâ me je tulut eling: ke wale je mamalama hnyin e, me hnyi je poretikoiny igigilö: haba ibeüen e, me fifte kubit, ke twente faiv kubet úlaueu. 34 Ke haba je poretikoiny, me cicö hnyeule eü; ke e hu je pama hnyi je hmolominy hnyi lo li ke keihen: ke eit je utwacúat hnân ölö. 35 Ke e ame hum nya ka hnyi homagöule ka hnyi hwadrö: ke e ame tuluto e hoton je tulut eling; 36 wale je hnyeuleiny, me je hmolominy, me je poretikoiny; ke e hu je mamalamainy igigilö: haba ibeüen e, me fifte kubit, ke twente faiv kubit úlaueu. 37 Ke haba je hmolominy, me cicö hnyeule eü; ke e hu je pama hnyi je hmolominy hnyi lo li ke keihen: ke eit je utwacúat hnân ölö.

38 Ke e hu hnyeule me hwanumen hnyi baten je hmolominy hnyi je homagöule; k' adre me hneü je hudiny leü eling. 39 Ke haba hnyi poretikoiny homagöule, me hu lo li laulau hnyi lo li ke keihen, hnân hlingá e ta je hudiny leü me hudiny hulö me hudiny monu. 40 Ke haba hnyi ke keihen eü, me gethen ame he ha hnyi homagöule hnyi hwadrö, wale li laulau; ke e hnyi ke keihen, hanen poretikoiny homagöule, ke wale lo li laulau. 41 Vak ta laulau hnyi ke keihen, ke vak ta laulau hnyi ke keihen, hnyi homagöule; a cit je laulau hnan hlingá je hut hnyin. 42 Ke e hu vak ta laulau hobi káu hudiny leü a je veto adre sö, úsa khaca kubit ke haf ibeüen, ke úsa khaca kubit me haf úlaueu, ke khaca kubit ibeüen göranyai: waleji adre me labö ip hnyin ta je omjehen hlingá hudiny leü me hut. 43 Ke ta je únyi hnân uhni, a khaca hnyam úlaueu

adre me ohmä eü igigilö : ke e hnyi hon je laulau utiöiny je hut. 44 Ke e hnyi hoton homagöule eiö je hnyeule anyin tavat khumöng hnyi hnyeule eiö, wale hnyi homagöüle ka hnyi hwadrö; k' ame hnyimakan ka hnyi hwaiöu, khaca hnyi homagöule e deiö ame hnyimakan ka hnyi hwadrö. 45 Ke e ame ha könya, ka habe, Haba hnyeule ang ame hnyimakan ka hnyi hwaiöu, ke hobi kâu tavat bihut, a tavat adre me tuö hanymen hnyi uma kap. 46 Ke haba hnyeule ame hnyimakan ka hnyi hwadrö, me hobi kâu tavat bihut, tavat adre me tuö huliwa hnyi taben hut : ödra je laku Zadoka, a ke je laku Levi, tavat adre hakekenyi Iehova me huliwa kâu. 47 Ke e ame tuluto hnyeule, ke wan haded je kubit ibeüen, ke wan haded kubit úlaunen; ke úcú vak ta ke keihen; ke e taben hut hnyi hnyimakan uma.

48 Me e ame hum nya ka hnyi poretikoiny uma, me tuluto je hmolominy poretika hia, faiv kubit hnyi ke keihen, ke faiv kubit hnyi ke keihen; ke haba úlaunen homagöule, me kun ta kubit hnyi ke keihen, ke kun ta kubit hnyi ke keihen. 49 Haba ibeüen poretika me twente je kubit, ke haba úlaunen me eleven kubit: wale hnyi wacuât adre ölö kâ e: ke e hu je utkhetep hnyi le hmolom, khaca hnyi ke keihen, ke khaca hnyi ke keihen.

HNYIMAKAN 41.

ME e ame hum nya ka hnyi uma kap, me tuluto ta je utkhetepiny, siks je kubit úlaunen hnyi ke keihen, ke siks je kubit úlaunen hnyi ke keihen, wale úlaunen uma mano. 2 Ke haba úlaunen hwanuma, me ten je kubit; ke haba li baten hwanuma, me faiv je kubit hnyi ke keihen, ke faiv je kubit hnyi ke keihen: ke e ame tuluto ibeüen e, me fáte je kubit, ke haba úlaunen, me twente kubit. 3 Me e ame didrö ka hnyin me tuluto uthwanuma, me úsa lo li kubit: ke haba hwanuma me siks je kubit, ke haba úlaunen hwanuma me seven je kubit. 4 Ke e ame tuluto ibeüen e, me twente je kubit, ke twente kubit úlaunen, hnyi hnyimakan uma kap: ke haingen könya, ka habe, Walang dok ae ti kap. 5 Me e ame tuluto hnyeigeuma, me siks je kubit; ke haba úlaunen je hnyeule hnyi baten me úsa vak ta kubit igigilö hnyi je ke keihen hia. 6 Ke haba je hnyeule hnyi baten uma me kun ta deö, khaca hon khaca,

me thöte hna ip gaga, ke adre me dit hnyin hna up veto a hanen hnyeigeuma hnân je hnyeule hnyi baten uma, m' adre me ohmä hnyin ke adre me ca ohmä hnyi hnyeigeuma. 7 Ke lau tot ta je hnyeule wale khaca hon khaca igigilö uma; anyin adre me igigilö gaga uma, khaca ethö hon khaca: anyin a wale ame lau tot uma göranyai; ke helâe adre me ölö hwân hnyi hnyeule hnyikânâi ke ne o but hnyi hnyeule ethö a deny hnyeule hnyi wanben. 8 Ke oge me wâ minya a g' adre ogöranyâ taben uma igigilö: haba taben je hnyeule hnyi baten, me khaca hlowe ae bekhöt wale siks je kubit ae gan. 9 Haba úhakiny hna up veto hobi kâu je hnyeule hnyi baten eü hnyöu, me faiv je kubit: ke haba kolon adre ip hobi kâu je hnyeule hnyi baten a hanen uma. 10 Ke haba úlaunen wanben je hnyeule, me twente je kubit igigilö uma hnyi je ke keihen. 11 Ke haba je hwanumen je hnyeule, me ame hnyimen ka hnyi kolon adre ip, khaca hwanuma ame hnyimen ka hnyi hwadrö, ke ke hwanuma ame hnyimen ka hnyi hwaiöu: ke haba úlaunen kolon adre me ip, me faiv je kubit igigilö. 12 Ke haba hna up uma cicö wanben hnyi ke keihen e jio, me sevente kubit úlaunen; ke haba úhakiny hna up veten uma, me faiv je kubit igigilö, ke nainte kubit ibeüen e. 13 Me e ame tuluto uma, me wan haded kubit ibeüen e; ke haba wanben ke uma, ke hna up veten e, me wan haded je kubit; 14 ke haba úlaunen hnyimakan uma, ke wanben e deiö, me wan haded je kubit.

15 Ke e ame tuluto úlaunen hna up uma hnyi hnyimakan ke uma wale hnyi hoton e, me je hnyeule görany hnyi ke keihen, me ke keihen, me wan haded je kubit; me uma kap eiö, me je poretikoiny hnyeule; 16 me li bahebetiny hwanuma, me je mamalama adre me hlöng, me je deö hnyeule ethö görany a je deö a kun, cicö hwanuma adre me tube ge esö ethö igigilö, me hwân hnyi kânâi ke ne o but hnyi je mamalama; k' adre me hlöng je mamalama; 17 ke ne o but hnyi hon hwanuma, me uma eiö hnyin, me hnyöu, me hna up veto hia igigilö eiö me hnyöu, ge je tulut. 18 Ke adre me bi kerubi me je pama; ke e hu pama wanben ke kerubi me ke kerubi, ke úsa lo hnyimakan je kerubi; 19 me me hu hnyimakan at cicö pama hnyi ke keihen, me hnyimakan nak liona cicö pama hnyi ke keihen: adre ányâ helâe uma hia igigilö. 20 Hwân hnyi kânâi ke ne o but ethö hon

hwanuma adre ânyâ je kerubi me je pama hnyi hna up veten uma. 21 E ûcû thibi vak ta ke keihen li uthwanumen uma kap; ke haba hnyimakan dok ae kap, e tba ûcû bongon me bongon uma kap. 22 Haba taben hut, me utô, ke kun ta kubit ibeûen göranyai, ke lo li kubit ibeûen e; ke utô je kopiny a vak, me taben, me je ke keihen: ke e ame ha kõnya, ka habe, Walang laulau a e hnyi hnyimakö Iehova. 23 Ke úsa lo li hwanumen uma kap, me dok ae kap. 24 Ke úsa lo li hlinginy li hwanuma, adre me khõng veseâ; lo hobi kâu ke hwanuma, ke lo li hlinginy hobi kâu khaca. 25 Ke adre ânyâ hnyin, wale hnyin li hlinginy uma kap, je kerubi me je pama, helâji me hna ânyâ hnyin hna up veto; ke e hu je esö ae haki hnyi hnyimakan poretiko hnyöu. 26 Ke e je mamalama adre hlõng me je pama hnyi ke keihen, hnyi baten poretiko: ame helâe je deö hnyeule hnyi baten uma, me je esö ae haki.

HNYIMAKAN 42.

ME e ame hum nya ka hnyi hnyeule eû, hnyi gethen ka hnyi hwadrö: me e ame hum nya ka hnyi hnyeule cicö wanben, ke e cicö hna up uma ame hnyimakan ka hnyi hwadrö. 2 Cicö ibeûen a wan haded je kubit, ke fifte kubit úlaunen, e bi hwanuma ka hnyi hwadrö. 3 Cicö dok a twente kubit a hanen hnyeule eiö, ke cicö hna bi hak veto a hanen hnyeule eû, e bi ke deö hnyeule ethö görany cicö ke deö hnyeule, a kun ta deö hnyeule ethö görany. 4 Ke cicö je hnyeule hna ngenu, ten je kubit úlaunen eiö hnyin, ke gethen a khaca kubit; ke ame hnyimakan ka hnyi hwadrö je hwanumen. 5 Ke okhulit je hnyeule ethö hon: anyin adre oûhnyûkongoâ ge je deö hnyeule ethö görany hon deö hnyeule hnyi wanben, me hnyikânâ, hnyi hna up veten uma. 6 Anyin a kun ta deö hnyeule, ke ba je hmolominy helâ me je hmolominy je hnyeule: anyin a wale adre me oûhnyûkongoâ at ethö görany hon at hnyikânâi me at hnyi wanben, hwân hnyikânâ ke ne o but ethö görany. 7 Ke haba hna up hak veto eû hnyöu, hnyi baten je hnyeule, a cicö hnyeule eû, hnyi hnyimakan je hnyeule, me fifte kubit ibeûen e. 8 Anyin a haba ibeûen je hnyeulen hnyi hnyeule eû, me fifte je kubit: ke wâ bi, wan haded je kubit hnyi hnyimakan uma kap. 9 Ke eû hmelen je hnyeule eling

gethen adre me dit hnyin jimeyö, wale at ka dit ka hnyin úheny hnyi hnyeule eû. 10 E hu je hnyeule hnyi úhakiny hna up veten hnyeule e deiö, cicö wanben, ke cicö hna up uma. 11 Ke haba gethen hnyi hnyimakan e, me helâ me getheniny je hnyeule ka hnyi hwadrö; haba ibeûen me tha ûcû me úlaunen: ke haba je gethen hia me hoton khaca bongon, me je hwanuma. 12 Ke helâ me je hwanumen je hnyeule ka hnyi hwaiöu, me e hu hwanuma hnyi hna hwân gethen, wale gethen cicö hna up hak veto e deiö, a gethen hnân dit ka hnyi je hnyeule. 13 Me e ame ha kõnya, ka habe, Haba je hnyeule ka hnyi hwadrö, ke je hnyeule ka hnyi hwaiöu cicö wanben, me wale je hnyeule ae kap, wale dok ame he tavat bihut ka an hnyin ta je únyi ae ti kap, a tavat adre me hakekeny kö Iehova: ke adre me he ka ip eling je únyi ae ti kap, me hudiny han, me hudiny hulö, me hudiny monu; anyin a dok e ae kap. 14 E ka didrö tavat bihut, me ödrin e ca he ka dit únyi hnyi dok ae kap ka hnyi hnyeule eû, ke ödrin e he ka më ip eling je khaüödrin, wale ödrin e huliwa kâu; anyin ae kap ta je únyi e: ke ödrin e he ka khavâ ke je úkhaü, m' ödrin e he ka úhakekenyâ ta je únyi anyin tavat.

15 Ke e ka hia but tuluto uma eiö hnyin, me e ame hum nya kâu a gethen deny homagöule e deiö, me tuluto e igigilö. 16 E ame tuluto ke keihen e jimeyö ge hlowe tulut, a faiv haded je hlowe, hoton hlowe tulut igigilö. 17 E ame tuluto ke keihen ka hnyi hwadrö, a faiv haded je hlowe, hoton hlowe tulut igigilö. 18 E ame tuluto ke keihen ka hnyi hwaiöu, faiv haded je hlowe, hoton hlowe tulut. 19 E ame hwiö ka hnyi ke keihen ka hnyi jimeû, me tuluto faiv haded je hlowe hoton tulut hlowe. 20 E ame tuluto e hnyi vak ta ke keihen: ke e hu hak veto adre op e igigilö, faiv haded ibeûen, ke faiv haded úlaunen, me me hu hnyigöulen dok ae kap me dok ca kap.

HNYIMAKAN 43.

HWABAN dö e, me e ame hum nya ka hnyi homagöule, wale homagöule e jimeyö: 2 ke wâ bi ame o but hmanenanginy Khongu Isaraela úheny jimeyö: ke haba hwan helâ me hwan ta je köiö: ke ame hadrõngöc hmeledrany ge hmanenanginy. 3 Ke haba imaneniny, me belâ me imaneniny oge me wâ, waleji oge wâ hnyi

ioik he ka ohia taun ; ke haba je hna omanenâ me helâ me hna omanenâ waleji oge wâ hnyi wagewe Kebara : me oge me ta hnyikânâi. 4 Ke haba hmanenangi Iehova ame didrô hnyin uma a gethen hnyi homagöule e jimeyö. 5 Ke haba hanu ame köp nya göranyai, me hum nya ka hnyi hnyeule eiö hnyin ; ke wâ bi ame unöngötö uma ge hmanenangi Iehova. 6 Ke oge me löng ke at ame fuc könya únyi hnyi hnyin uma ; ke ame tha tot mönya at. 7 Ke e ame ha könya, ka habe, Nokon at lö, walang hnen anyik theron, me hnen li hnyeúcak, wale oge me he ka laba hnyin unyin je lakon Isaraela nyiela balua : ke ame ca he hmetu lap anyi Isaraela ka okongoâ iök ae kap, ödra, me latuhödra, hnen anyidra bi únyi monu, me hnen unyin latuhödra ae mok hnyi anyidra je dok ae görany ; 8 me hnyi hnödra hna ip baten hwanumödra hnyi baten hwanumök, me uthwanumödra hnyi baten uthwanumök me ba hnyigöulök mödra, ke hna up hak veto thibi ; ke adre hia but okongoâ iök ae kap ge anyidra ta je únyi ae ikiki waleji adre me ányâ ; anyin a wale oge hia but ohí' ödra hnyi anyik hmönyin. 9 Walang ang, e so adre me degec sâkâú ai gak, anyidra bi únyi monu, me je unyin latuhödra ae mok, ke oge me he ka laba anyidra nyiele balua.

10 Nokon at lö, hamâm he ka omanenâ uma ka lap anyi Isaraela m' adre me he ka hmehma ge hwakecidra ae kong : ke hn' ödra bi he ka tuluto tulut. 11 Ke adre me ne he bi ka hmehma ge hnödra hia je hna ányâ, me omanenâ thö ködra tulutiny uma, me bongon, me je gethen hnân didrut me didrö, me ta je tulutiny hia, me ta je hna húna gan, me ta je bongon, ke sihnalimen ju e hnyi hnyimaködra : m' adre me he ka tuö je tulutiny hia, me je hna húna gan hia, me ányâ. 12 Walang hnanyibuiny uma : haba hnyi ban bucen, me ame he bi ka ti kap hnen e hia igigilö. Wâ bi, wale thibi e hnanyibuiny uma.

13 Ke walang tulutiny taben hut ge je kubit : (haba kubit, me khaca kubit me hnyam :) a khaca kubit hnyi hnyin, ke khaca kubit úlauen, ke haha baten e igigilö, me khaca hnyam : me ame he ka bi taben e hnân taben bi hut. 14 Ke haba hwân hnyi hnyin, eú hnyi kánâ, ke ne o but hnyi dok ame silöú eú, me lo li kubit, ke khaca kubit úlauen ; ke hwân hnyi dok ame silöú wale ae úhnyúkong ke ne o but hnyi dok ae silöú wale ae gan, me vak ta

kubit, ke khaca kubit úlauen. 15 Ke vak ta kubit taben hut göranyai : ke hwân hnyi hnabadröuiny taben hut ke ethö, me ame he ka hu vak ta baitoiny. 16 Ke haba hnabadröuiny taben hut, me ame he ka twelw kubit ibeúen, ke twelw úlauen, ke khaca thibi tulutiny je ke keihen a vak. 17 Ke haba dok ame silöú me ame he ka fotin kubit ibeúen, ke fotin úlauen hnyi je ke keihen a vak ; ke haba baten igigilö e, me ame he ka haf kubit ; ke khaca kubit hnyin e igigilö ; ke haba wacúatiny, me ame he ka hnyimakan deiö.

18 Ke e ame ha könya, ka habe, Nokon at lö, Walang hna ha hnen Than Iehova, ka habe, Wale je hnanyibuiny taben hut hnyi bong adre me he ka tibet e hnyin, hnân hudo hnyin e je hudiny leú, me dukâiâ dra ka hnyi hou. 19 Ke u me he ka ham nak bolok hnân hudiny hulö, ka tavat bihut a at Levi je mátráni Zadoka, tavat adre me hakekeny könya, haingen Than Iehova. 20 Ke u me he ka hom hanen dren e, me kina hon vak ta baitoiny, me hon vak ta kopiny dok ame silöú, me hon baten igigilö : helâe u me he ka obosoâ e me bi hwaban anyin möt. 21 U me he ka hom minya bolok hudiny hulö, ke e ame he ka thong degecâ e hnyi dok adre kú hnyi uma, hoton dok ae kap. 22 Ke haba hnyi bong a loiny u me he ka hudo got бага ae ba hnyikongon hnân hudiny hulö ; ke adre me he ka obosoâ taben hut, helâ me hna obosoâ e ge bolok. 23 Ke u ka hia but obosoâ e, u me he ka hudo nak bolok ae ba hnyikongon, me mamoe бага ae ba hnyikongon únyi hnyi hnahat meno. 24 Ke u me he ka úhakekenyi ödru hnyi hnyimakö Iehova, ke ame he tavat bihut ka khûö sâlt hudru, ke adre me he ka hudi ödru kö Iehova hnân hudiny leú. 25 Seven je bong u me he ka penapena got hnân hudiny hulö ke bong me ka bong : ke adre me he minya ka penapena nak bolok me mamoe бага únyi hnyi hna hat meno, ae ba hnyikongon. 26 Seven je bong adre me he ka bi hwaban möt anyin taben hut, me obosoâ ; adre me he ka okabâ e helâe. 27 Ke at ka hia but ohwâdá je bong, ke hwân hnyi bong a eitiny ke ne o but nyiele, me ame he tavat bihut ka hudo hon taben hut anyibun je hudiny leú, me anyibun je hudiny úsoköu ; ke oge me he ka köp öbun haingen Than Iehova.

HNYIMAKAN 44.

ME e ame ohmetu nya a gethen hnyi homagöule e deiö anyin dok ae kap eü hnyöu; ke a hlöng ut. 2 Ke haba Iehova ame ha könya, ka habe, Ame he ka hlöng ut homagöule eang, ame ca he hmetu ka khöng bi, ke ba at ame he ka dit hnyin, anyin a dit hnyin Iehova, Khongu Isaraela; anyin a wale ame he ka hlöng ut balua. 3 Ke haba than, e ame he ka laba hnyin, a e than bi, me han eling hnyi hnyimakö Iehova; e ame he ka didrö a gethen hnyi poretikoiny homagöule, ke e ame he ka didrut hmetu hnyi gethen eling. 4 Ke e ame hum nya a gethen hnyi homagöule hnyi hwadrö hnyi hnyimakan uma; ke inya oge me wä, ke wä bi, ame unöngötö uma umö Iehova ge hmanenangi Iehova: me oge me ta hnyikánái. 5 Ke Iehova ame ha könya, ka habe, Nokon at lö, wáhmakhmetoá ju, ke wä thö ge li emákám, ke löng ge li hnyikönyám hofuc hia oge me he ka ha köu ge je hna húna hia ge uma umö Iehova, me ta je hnanyibuiny hia; ke wáhmakhmetoá ju gethen hnán dit ka hnyi uma, me je gethen hia hnán didrut únyi hnyi dok ae kap. 6 Ke u me he ka ha ka tavat úkhin fuc, wale ka lap anyi Isaraela, ka habe, Walang hna ha hnen Than Iehova, ka habe, Lap anyi Isaraela lö, soju je hwakecibun hia ae kong, 7 waleji hnyi hnöbun hna ödilá je atkanyua, tavat adre me ca peritomoná hnyok, ke adre ca peritomoná unyidra, m' adre me he ka hnyi laba hnyi anyik dok ae kap, he ka okongoá e, wale umök uma, öbun ka hom ok jeü, wale pipikhenya, me dra, ke adre hia but thamuá hnök hna úhinhnyökou, he ka bi hanen ka hwakecibun ae kong. 8 Ke öbun e ca hia but tuö hanymen ge anyik ta je únyi ae kap: ke öbun e hia but otílá tavat tuö anyik huliwa hnyi anyik dok ae kap hobi köbun bi. 9 Walang hna ha hnen Than Iehova, ka habe, E ba atkanyua adre ca peritomoná hnyok, ke adre ca peritomoná unyin, ame he ka hnyi dit ka hnyi anyik dok ae kap, wale atkanyua at ame tha laba me lakon Isaraela. 10 Ke haba at Levi waleji adre me úsákáüö mönya, hnyi hna he monu hnen at Isaraela, waleji ame he monu gak ka anyidra je idola; me ame ka he bi ka takú ödra anyidra hulö. 11 Ke so bi hamödrin he ka huliwa hnyi anyik

dok ae kap, a tavat musi hnyi je homagöuleny uma, me bi huliwa eiö hnyi uma; ödrin e he ka hlingá hudiny leü me hut hobi káu hnyei, ke ödrin e he ka tot hnyi hnyimakan tavat me bi huliwa ködra. 12 Anyin ödrin e huliwa ködra hnyi hnyimakan je khongudrin, me othóá lap anyi Isaraela; anyin a wale, oge hia but hai göranyai hnyamök úcúdrin, haingen Than Iehova, ke ame he bi ka takú ödra anyidra hulö. 13 Ke adre me ca he ka hakekeny könya, he ka ányá hanymen at bihut könya, me he ka hakekenyá hnök je hna okabá, ka ta je únyi ae ti kap, ke ame he ka takú ödra anyidra hmehma, me ta je únyi ae ikiki adre hia but ányá. 14 Ke so bi oge me he ka wí' ödrin hnán tavat tuö hanymen hnyin uma me je huliwainy hia, me ta je únyi hia adre me he ka ányá hnyin.

15 Ke haba tavat bihut a at Levi, je laku Zadoka, waleji adre tuö je hanymen hnyi anyik dok ae kap hnyi hna he monu gak hnen lakon Isaraela, me adre me he ka hakekeny könya m' adre me huliwa könya; ke adre me he ka tot hnyi hnyimakök he ka hudo könya pipikhenya me dra, haingen Than Iehova; 16 Adre me he ka dit hnyi anyik dok ae kap, ke adre me he ka hakekeny ka hnyi anyik laulau, m' adre me huliwa könya, ke adre me he ka tuö hanymen gak. 17 Ke ödra ka he ka dit hnyi je homagöuleny hnyeule eiö, adre me he ka khavá je úkhaú lino; ke adre me ca he ka khavá leúnen mamoe ödra ka huliwa hnyi je homagöuleny hnyeule eiö, me eiö hnyin uma. 18 Adre me he ka bicá je hnabinybak lino, me iná je trauzes lino; ke adre me ca he ka weiká únyi ame oá khun. 19 Ke ödra ka didrut ka hnyi hnyeule eü, wale hnyeule eü hnyöu ka tavat, adre me he ka me uny jut anyidra je úkhaú wale adre me huliwa káu, me ip hnyi je hnyeule ae kap, me khavá ke je úkhaú, m' adre me ca he ka okabá tavat ge anyidra je úkhaú. 20 Ke adre me ca he ka giá je bödra, ke adre me ca he ka hna leúnen bödra; adre me he ka sö thibi je leúnen bödra. 21 Ke haba khaca, ame ca he ke at bihut ka ijem waina e ka dit ka hnyi hnyeule eiö. 22 Ke adre me ca he ka hom safac, me momo adre degec me hnán öiödra: ke adre me he ka hok hlu hnathu a je matrán lap anyi Isaraela, me ame ne safac áian at bihut. 23 Ke adre me he ka ná lakeik ge bongon únyi ae kap,

me únyi ae ca kap, me owâhmakhmetu ödra ge únyi ae bo kong, me únyi ae bo so. 24 Ke haba hnyi je ivinö, me adre me he ka tot me owisa; adre me he ka owisa hoton hnök hna owisa: ka adre me he ka tuö anyik je hnanyibu, me hnök je hna hûna hnyi anyik je bijeu hia adre thu; ke adre me he ka okabâ anyik je sabbath. 25 Ke adre me ca he ka e ka at a mokcu wâ adre nye obokongi ödra bi: ke so bi e khan' ödra he ka obokongi ödra bi can kamen, me hinyen, me nokon бага me hlu, me liamekeiny me haniny at ae ba âiân. 26 Ke ödra ka hia but obosoâ e, me adre me he ka aú kâu seven ta bong. 27 Ke haba hnyi bong e ame he ka dit ka hnyi dok ae kap, ka hnyi hnyeule eiö he ka huliwa hnyi dok ae kap, me e ame he ka hudo hudiny anyin hulö, haingen Than Iehova. 28 Ke ame he ka hu idra: ke inya ang idrin: ke öbun e ca he ka bi hwajekhöüdrin hnyi Isaraela, ke inya ang jekhoüdrin. 29 Adre me he ka an hudiny han, me hudiny hulö, me hudiny monu; ke hobi ködra ta je únyi hia adre me naúâ hnyi Isaraela. 30 Ke hobi kâu tavat bihut je únyi a bán hnyi ta je wan a bániny ta je únyi hia, me ta je bwihlanyin hia ta je únyi hia öbun e ányâ me bwihlany: öbun e he ka ham minya je falawa a bán adre tiga op ka at bihut, me me mokut hon umöbun je uma hnabic. 31 Ame ca he at bihut ka hnyi an únyi a mok hwege, me únyi adre olou kia, ame ne meno ame gâ ame ne meno ame he.

HNYIMAKAN 45.

KE haba khaca, öbun ka he ka khenâ ibun hnyei, me öbun e he ka ham kö Iehova bwihlany ong dok ae kap únyi hnyi hnyei: haba ibeüen e, me twente faiv thauzan je hlowe, ke ten thauzan úlaueu: k' ame he ka kap e hnyi hnyigöulen hia igigilö. 2 Ke haba, ke keihen e adre me he ka ip hnân dok ae kap me faiv haded ibeüen, ke faiv haded úlaueu, khaca thibi tulutiny vak ta ke keihen igigilö; ke fite je kubit utkânâ igigilö. 3 Ke haba hnyi hna tuluto eling u ma he ka tuluto twente faiv thauzan ibeüen, ke ten thauzan úlaueu: ke ame he ka e hnyin e dok ae kap, wale ae ti kap. 4 E bi dok ae kap hnyi hnyei; me hobi kâu tavat bihut tavat adre me huliwan dok ae kap, tavat adre me hakekeny he ka huliwa kö Iehova; ke

ame he ka huân hnen umödra je uma, me hnen ae kap huân dok ae kap. 5 Ke haba twente faiv thauzan ibeüen me ten thauzan úlaueu, me hobi kâu at Levi, tavat adre me huliwa hnyi uma, me me hwajeköüdra me hobi kâu je hnyeule a twente. 6 Ke öbun e he ka kú kânâ iny taun, faiv thauzan úlaueu, ke twente faiv thauzan ibeüen, hnyi baten bwihlany a utkânâ ae kap: ke wale hobi kâu lap anyi Isaraela hia. 7 Ke haba dok hobi kâu than, me ame he ka e hnyi ke keihen me ke keihen bwihlany ae kap, me kânâ iny taun, cicö bwihlany ae kap, me cicö kânâ iny taun, hnyi ke keihen hnyi jimeü e jio, ke hnyi ke keihen jimeyö e deiö: ke haba ibeüen ame he ka helâ me ke jekhöü, hwân hnyi hnyigöulen ka hnyi jimeü ke ne o but hnyi hnyigöulen e jimeyö. 8 Ke haba kânâ ame he ka huân iny bi hnyi Isaraela: ke adre me ca he hmetu je than unyik ka hom úhnyükongo lakeik; ke adre me he ka ham kânâ ka lap anyi Isaraela hoton anyidra ta je tribu.

9 Walang hna ha hnen Than Iehova, ka habe, Je than Isaraela lö, soju; degec ut öbun úokonguny, ke sei, me anyâ thö únyi ae úcü me únyi ae wisa; ohia ju hnöbun hna musi hwege hon lakeik, haingen Than Iehova. 10 Öbun e he ka hu tulut uhi ae wisa, me efa ae wisa, me bath ae wisa. 11 Ame he ka khaca thibi tulutiny efa me bath, me me hu hnyi bath ke keihen a libenyitainy homer, me efa ame he ka ke keihen a libenyitainy homer: ame he tulut ka hnu hoton homer. 12 Ke haba sekel me ame he ka twente je gera: twente je sekel, twente faiv je sekel, fiftin je sekel, wale anyibun mina. 13 Walang bwihlany öbun e he ka hudo; ke keihen a siksiny efa únyi hnyi homer hwit, ke öbun e he ka ham ke keihen a siksiny efa únyi hnyi homer bali: 14 ke haba jekhöü adre me ha ge wakaco, haba khaca bath wakaco, me wale ke keihen a libenyitainy únyi hnyi hnyin kori, wale ten je bath a khaca homer; anyin a haba ten je bath, me wale homer: 15 ke khaca nokon mamoe únyi hnyi hnabat meno hnyi lo li haded, únyi hnyi je sajjilat ae hoso hnyi Isaraela; huân hudiny han me hudiny leü, me je hudiny ole, huân úcü melidra, haingö Iehova. 16 Ke ame he tavat hia thithö hnyi hnyei ka ham bwihlany eling hobi kâu than Isaraela. 17 Ke hamen than he ka ham je hudiny leü, me je hudiny han, me je hudiny ic,

hnyi je bijeú, ke hnyi úen bi a manen hnyin je tehi, ke hnyi je sabath, ke hnyi je bijeú hia adre thu anyin lap Isaraela : e ame he ka penapena hudiny hulö, ke hudiny han, ke hudiny leú, ke ta je hudiny ole, hnân he ka bi hwaban melen lap anyi Isaraela.

18 Walang hna ha hnen Than Iehova, ka habe, Hnyi tehi a bân, hnyi bong a bâniny tehi, u me he ka hom nak bolok ae ba hnyikongon ; me u me he ka obosá dok ae kap. 19 Ke ame he at bihut ka hom hanen dren hudiny hulö, me kina hnyi je uthwanumen uma, ke hon je kopiny a vak dok ame silöú hnyi taben hut, ke hon ta je uthomagöuleny hnyeule eiö. 20 Ke u me he ka ányâ helâe hnyi bong a seveniny tehi hobi kâu at ame hau, ke hobi kâu at ae ba hnyok : m' öbun e he ka bi hwaban melen uma helâe. 21 Ke hnyi tehi a bân, hnyi bong a fotininy tehi, me öbun e he ka ányâ paseka, seven je bonginy bijeú ; k' adre me he ka han areto adre ca levenâ. 22 Ke hnyi bong eling ame he than ka penapena hobi kâu bi, ke hobi kâu tavat hia aten hnyei, bolok hnân hudiny hulö. 23 Ke haba hnyi je bong a seven hnyi bijeú, me e ame he ka penapena hudiny leú hnyi je bong hobi kö Iehova, a seven ta bolok, ke seven ta mamoe бага ae ba hnyikongon hnyi ta bong a seven ; ke úsa khaca got бага hnyi ke bong me ke bong hnân hudiny hulö. 24 Ke e ame he ka penapena hudiny han, khaca efa hobi kâu bolok, ke khaca efa hobi kâu mamoe бага, ke khaca hin wakaco hobi kâu efa. 25 Hnyi tehi a seveniny, hnyi bong a fittininy tehi, hnyi bijeú e ame he ka ányâ helâ me hnyi je bong a seven ; hoton hudiny hulö, me hudiny leú, me hudiny han, me hoton wakaco.

HNYIMAKAN 46.

WALANG hna ha hnen Than Iehova, ka habe, Haba homagöuleny hnyeule eiö wale a hnyimakan deiö, me adre me he ka hlöng hnyi je bonginy huliwa a siks ; ke adre me he ka khöng e hnyi bong sabath, ke hnyi bong ame manen hnyin tehi adre me he ka khöng e. 2 Ke ame he than ka didrö a deny getheniny poretikoiny homagöule eú, me tot hnyi uthomagöule, ke ame he tavat bihut ka penapena anyin hudiny leú, me anyin je hudiny ole, ke e ame he ka khudrung hnyi baten homagöule ; me

e ame he ka he : ke adre me ca he ka hlöng homagöule ke ne o but sahac. 3 Ke ame he tavat aten hnyei ka khudrung hnyi hlidinginy homagöule eling hnyi hnyimakö Iehova hnyi je sabath me je úen ame manen hnyin tehi. 4 Ke haba hudiny leú ame he than ka hom kö Iehova hnyi bong sabath, me siks ta nokon mamoe ae ba hnyikongon ke khaca mamoe бага ae ba hnyikongon ; 5 ke haba hudiny han, me khaca efa hobi kâu mamoe бага, me hobi kâu je nokon mamoe hudiny han, hoton hna hu, ke khaca hin wakaco hobi kâu efa. 6 Ke haba hnyi bong ame manen hnyin tehi me khaca nak bolok ae ba hnyikongon ; ke siks ta nokon mamoe ke khaca mamoe бага ; ae ba hnyikongudrin : 7 ke e ame he ka penapena hudiny han, khaca efa hobi kâu bolok, ke khaca efa hobi kâu mamoe бага, me hobi kâu je nokon mamoe hoton hna hu, ke khaca hin wakaco hobi kâu efa. 8 Ke e ka didrö than, me e ame he ka didrö a gethen poretikoiny homagöule, ke e ame he ka didrut hmetu e. 9 Ke e ka o tavat aten hnyei hnyi hnyimakö Iehova hnyi je bijeú adre thu, haba at ame he ka didrö hnyi homagöule ka hnyi hwadrö he ka khudrung, me e ame he ka hmetu but hnyi homagöule ka hnyi hwaiöu ; ke haba at ame didrö hnyi homagöule ka hnyi hwaiöu, me e ame he ka dit hmetu but hnyi homagöule ka hnyi hwadrö ; e ame ca he ka hmetu hnyi homagöule a dit hnyin, k' ame he ka didrut cicö e. 10 Ke haba than, me e ame he ka dit hnyi wanbödra ödra ka didrö ; ke ödra ka didrut, me e ame he ka tha didrut mödra. 11 Ke haba hnyi je bijeú ke je bong adre thu, me ame he ka hu hudiny han, khaca efa hobi kâu bolok, ke khaca efa hobi kâu mamoe бага, ke hobi kâu je nokon mamoe hoton hna hu, ke khaca hin wakaco hobi kâu efa. 12 Ke e ka he than ka penapena hut ae betenge, ame ne hudiny leú, ame ne hudiny ole hnân hut ae betenge kö Iehova, me hamen ke at he ka khöng ut kâu homagöule e deiö, ke e ame he ka penapena anyin hudiny leú, ke anyin je hudiny ole, helâ me hnen hna ányâ hnyi bong sabath : me e ame he ka dit ut ; me ame he ke at ka hlöng homagöule, e ka didrut. 13 Ke u me he ka penapena hnyi ke bong me ke bong khaca nokon mamoe a khaca hunainy ae ba hnyikongon hnân hudiny leú kö Iehova : u me he ka penapena e hnyi je hnyomakatu. 14 Ke u me

he ka penapena hudiny han hobi kâu e hnyi je hnyomakatu, ke keihen efa a siksiny, ke ke keihen a kuniny hin wakaco, hnân úhaniken me tap falawa; a hudiny han hobi kô Iehova, wale hnanyibu adre ohmâ nyiele balua. 15 Helâe adre me he ka penapena nokon mamoe, ke hudiny han, ke wakaco, hnyi je hnyomakatu hnan hudiny leú balua.

16 Walang hna ha hnen Than Iehova, ka habe, A ne he than ka ham bwihlany ka ke nokon, me wale hwajekhon bi: me ame he ka únyi anyin lakon: me ame he ka e bi unyidirin me hwajekhöudrin. 17 Ke so bi ame ne he ka ham bwihlany ka athnyabany, a hanen hwajekhon, me ame he ka anyin bi ke ne o but hnyi huna adre me thang; me ame he ka ohmetu e ka than; ke so bi hwajekhon me hobi kâu lakon. 18 Ke haba khaca, ame ca he than ka hûgúnâ hwajekhon tavat, me hagut' ödra únyi hnyi idra; e ame he ka ham hwajekhon ka je lakon ge iny bi: me me ca vese lakeik hnyi je idra bi.

19 Me e ame hum nya ka hnyi gethen, wale hnyi baten homagöule, ka hnyi je hnyeule ae kap anyin tavat bihut, hnyi hnyimakan ka hnyi hwadrö: ke wâ bi, wale ke dok hnyi ke keihen hoton e jiö. 20 Me e ame ha kõnya, ka habe, Walang dok ame he tavat bihut ka ölä hudiny monu, me hudiny hulö hnyin, ke adre me he ka thân hudiny han hnyin; m' adre me ca he ka kom e ka hnyi hnyeule eú, he ka okabâ tavat. 21 Me e ame hum nya ka hnyi hnyeule eú hnyöu, me ovhenu nya ka hnyi vak ta kopiny hnyeule; ke wâ bi, e ve hu hnyeule hnyi vak ta kopiny hnyeule. 22 Hnyi vak ta kopiny hnyeule e hu hnyeule adre bi hanen, fâte kubit ibeüen ke twente faiv úlaen: khaca thibi tulu-tiny vak ta hnyeule eling hnyi je kopiny. 23 Ke e hu hna up veto igigilö, a igigilö vak eling, ke adre ányâ je únyi hnân öt hmelen je hna up veto igigilö. 24 Me e ame ha kõnya, ka habe, Walang je uma hnân öt, ame he tavat huliwan uma ka ölä hut anyin tavat hnyin.

HNYIMAKAN 47.

ME e ame ohmetu nya ka hnyi hwanu-men uma; ke wâ bi, ame hingölö köiö únyi hnyi hmelen hwanumen uma e deiö, anyin ame hnyimakan deiö uma: ke ame hingölö köiö únyi hnyi hmelen, hnyi

ke keihen metân uma, hnyi ke keihen taben hut ka hnyi hwaiöu, 2 Me e ame hum nya kâú a gethen hnyi homagöule ka, hnyi hwadrö, me su nya hnyi gethen eú, ka hnyi homagöule eú, a gethen hnyi homagöule e deiö; ke wâ bi, ame hingölö köiö únyi hnyi ke keihen metâ. 3 Ke ame he deiö at ae hu tulut tö hnyi hnyamen, me e ame tuluto khaca thauzan je kubit, ke e ame ovhenu nya hnyi wanben köiö, me böngön ju köiö hnyi li omakhnâiny. 4 Ke e ame tuluto hmetu khaca thauzan, k' ame ovhenu nya hnyi wanben köiö, me böngön ju köiö hnyi li bouca. Ke e ame tuluto hmetu khaca thauzan, k' ame ovhenu nya hnyi wanben köiö, me böngön ju hnyi bibiköta. 5 Ke hwaban dö e e ame tuluto khaca thauzan; me wale wagewe but, me ca khanö nya hmetu he ka vheno: anyin ame khibi thö göranyai köiö, a köiö hnân hai hnyin, wagewe a ca hnân vheno. 6 Ke e ame ha kõnya, ka habe, Nokon at lö, hawa, u je wâ but? Me e ame hum nya, me ohmetu nya ka hnyi baten wagewe. 7 Ke oge me hmetu but, ke wâ bi, e se hia hmönyin je úö hnyi baten wagewe hnyi li ke keihen. 8 Ke e ame ha kõnya, ka habe, Ame hingölö köiö ang ka hnyi je ke keihen e deiö, me ame he ka badedö ka hnyi hnye-buba: k' ame he ka he bi hnyiköiöai; ke haba köiö adre hingälâ, me ame he ka utut ka hnyi köiö ae gan; me ame he ka so but köiö. 9 Ke haba, je únyi hia ae möt adre me si but hnyi je dok hia ame o hnyin wagewe, me adre me he ka möt; ke ame he ka se hia hmönyin ta je wâ: anyin ame o eling köiö ang, k' ame he ka omelö köiö ae gan, me ame he ka möt hia ta je únyi hnyi je dok hia ame o wagewe ka hnyin. 10 Ke ame he tavat thut ka útitilen hnyi baten: hwân hnyi Ene-gedi ke ne o but hnyi Ene-gelima, k' adre me he ka thong eling je ert; ke helâ me je wâiny köiö ae gan je wâ, e ve bongon, ke se hia hmönyin. 11 Ke ame ca he ka so but je hmudrainy, ke je utkânâiny ae lup; k' adre me he ka hna e me me köiö hiny. 12 Ke haba hnyi li baten wagewe hnyi ke keihen me ke keihen me ame he ka kú ta je úö hia hnân an wan, ae ca melea lan ke ca ba wan: ame he ka wa wan ae teb únyi hnyi je tehi hia, anyin ame hingölö köiö únyi hnyi dok ae kap; ke hnân an je wan, ke hnân bubuny je lan.

13 Walang hna ha hnen Than Iehova, ka habe, Waleú hnyigöulen öbun e he ka

khenâ hnyi hnyei hnân hwajekhon hoton je tribu Isaraela a twelv : ame he ka hu je hwajekhöü Josefa. 14 Ke öbun e he ka ve hu e, ke at me ke at ; waleji oge me inâ göranyai hnyamök he ka ham e ka je lakamöbun : ke öbun e he ka hu hnyei ang hnân ibun. 15 Ke walang hnyigöulen hnyei : haba ke keihen ka hnyi hwadrö, hwân hnyi köiö ae gan gethen Hethelon, ke ne o but hnyi gethen ame he Zedad ai ; 16 Hamath, me Berotha, me Siberaim wale wanben hnyigot hnyi Damaseko, me hnyigot hnyi Hamath ; Hazer-atikon hnyi hnyigot hnyi Hauran. 17 Ke haba hnyigot hwân hnyi köiö me Hazar-enana hnyi baten Damaseko, ke haba hnyi hwadrö me hwadrö hmönyin, me hnyigot hnyi Hamath. Wale ke keihen ka hnyi hwadrö. 18 Ke haba hnyi ke keihen e deiö, wanben Hauran, me Damaseko, me Gileada, me hnyei Isaraela, me e bi Joridano ; öbun e he ka tuluto hwân hnyi hnyigot ka hnyi hwadrö ke ne o but köiö e deiö. Wale ke keihen o deiö. 19 Ke haba ke keihen ka hnyi hwaiöu me hwaiöu hmönyin, hwân hnyi Tamara ke ne o but hnyi köiö Meribakadesi, ke ne o but wageweiny Aigupito, ke ne o but köiö ae gan. Wale ke keihen hnyi hwaiöu me hwaiöu hmönyin. 20 Ke naba ke keihen e jio, me köiö ae gan, hwân hnyi hnyigot hnyi hwaiöu ke ne o but hnyi cicö gethen ame he Hamath ai. Wale ke keihen e jio. 21 Heläe öbun e he ka khenâ köbun hnyei ang hoton je tribu Isaraela. 22 Ke öbun e he ka khenâ e hnân ibun me je atkanyua tavat adre me tha laba möbun, tavat adre me hnokoâ unyibun ; ke adre me he ka helä me tavat unyin lakon Isaraela wale adre hnokoâ hnyi hnyei ; me adre me he ka hu idra möbun unyin je tribu Isaraela. 23 Ke haba tribu wale ame laba unyin je atkanyua, öbun e he ka ha idrin eling, haingan Than Iehova.

HNYIMAKAN 48.

KE walang ien ta je tribu : hwân hnyi baten ka hnyi hwadrö hnyi baten gethen ame he Hethelon ai ke ne o but hnyi gethen ame he Hamath ai, me Hazar-enana hnyi hnyigöulen Damaseko, ka hnyi hwadrö hnyi baten Hamath ; wale li ke keihen e deiö me jimeü ; khaca jekhöü Dana. 2 Ke haba hnyi hnyigöulen Dana, hwân hnyi ke keihen e jimeyö ke ne o but

hnyi ke keihen e jimeü ; khaca jekhöü Asera. 3 Ke haba hnyi hnyigöulen Asera, hwân hnyi ke keihen e jimeyö ke ne o but hnyi ke keihen e jimeü ; khaca jekhöü Nafatali. 4 Ke haba hnyi hnyigöulen Nafatali, hwân hnyi ke keihen e jimeyö ke ne o but hnyi ke keihen e jimeü ; khaca jekhöü Manase. 5 Ke haba hnyi hnyigöulen Manase, hwân hnyi ke keihen e jimeyö ke ne o but hnyi ke keihen e jimeü ; khaca jekhöü Eferaima. 6 Ke haba hnyi hnyigöulen Eferaima, hwân hnyi ke keihen e jimeyö ke ne o but hnyi ke keihen e jimeü ; khaca jekhöü Reubena. 7 Ke haba hnyi hnyigöulen Reubena, hwân hnyi ke keihen e jimeyö ke ne o but hnyi ke keihen e jimeü ; khaca jekhöü Juda.

8 Ke haba hnyi hnyigöulen Juda hwân hnyi ke keihen e jimeyö ke ne o but hnyi ke keihen e jimeü, me wale bwihlany öbun e he ka ham, twente faiv thauzan je hlowe úlaun, ke haba ibeüen, me helä me khaca jekhöü, hwân hnyi ke keihen e jimeyö ke ne o but hnyi ke keihen e jimeü : k' adre me he ka bi hnen dok ae kap hnyi wanben e. 9 Ke haba bwihlany öbun e he ka ham kö Iehova, me ame he ka twente faiv thauzan ta je hlowe ibeüen, ke ten thauzan úlaun. 10 Ke haba hobi káu hnyat ang, wale hobi káu tavat bihut, me bwihlany ae kap ; haba ka hnyi hwadrö, me twente faiv thauzan ibeüen, ke ten thauzan úlaun e jio, ke ten thauzan úlaun e deiö, ke twente faiv thauzan ibeüen ka hnyi hwaiöü : ke ame he dok ae kap anyi Iehova ka hnen hnyi wanben e. 11 Wale hobi káu tavat bihut, tavat adre hia but okabâ a hanen je laku Zadoka, wale tavat adre hia but tuö hanyemen únyi gak ; tavat adre ca hnyi he monu, waleji hnyi hna he monu hnen lakon Isaraela, heläji me hnen at Levi hna he monu. 12 Ke ame he ka hnân bwihlany ködrin únyi hnyi bwihlany hnyi kânâ, únyi ae kap hmönyin, hnyi hnyigöulen at Levi. 13 Ke hoton tulutiny hnyigöulen tavat bihut, ame he ka hu hnen at Levi twente faiv thauzan ibeüen, ke ten thauzan úlaun : haba ibeüen hia, me twente faiv thauzan, ke ten thauzan úlaun. 14 Ke adre me ca he ka úco hanen utkânâ, ke khaca adre me ca he ka bi hwaban e, ke adre me ca he ka hna wan kânâ a bán ka ke at bi : anyin ae kap e kö Iehova. 15 Ke haba faiv thauzan kolon úlaun, hnyi hnyimakan twente faiv thauzan, me hnân dok ae ca kap, hobi káu taun, me je uma, me je

hnyaba igirilö: ke ame he taun ka hnen hnyi wanben e. 16 Ke walang je tulutiny; foa thauzan faiv haded hnyi ke keihen ka hnyi hwadrö, ke foa thauzan faiv haded hnyi ke keihen ka hnyi hwaiöu, ke foa thauzan faiv haded hnyi ke keihen e jimeyö, ke foa thauzan faiv haded hnyi ke keihen e jimeü. 17 Ke ame he ka hu utkânâ hobi kâu je hnyaba igirilö taun; haba ka hnyi hwadrö tu haded ke fifte, ke tu haded ke fifte ka hnyi hwaiöu, ke tu haded ke fifte jimeö, ke tu haded ke fifte jimeü. 18 Ke haba ibeüen kolon, hoton tulutiny bwihlany ae kap, me ten thauzan jimeyö, ke ten thauzan jimeü, ke e ame he ka hoton tulutiny bwihlany ae kap; ke haba jeüiny, me an tavat adre me huliwa hnyi taun. 19 Ke haba tavat adre me huliwa hnyi taun, ünyi hnyi je tribuiny Isaraela hia, adre me he ka belökâ e. 20 Haba bwihlany ae bekhöt, me twente faiv thauzan ke keihen, ke twente faiv thauzan ke keihen: öbun e he ka ham bwihlany ae kap, tha e me kânâ iny taun, khaca thibi tulutiny vak ta ke keihen. 21 Ke ame he ka hobi kâu than kolon hnyi ke keihen me ke keihen bwihlany ae kap, me kânâ iny taun, hnyi hnyimakan twente faiv thauzaniny bwihlany hnyi hnyigöulen e jimeyö, me jimeü cicö twente faiv thauzan hnyi hnyigöulen e jimeü, hoton tulutiny je jekhöü, wale hobi kâu than: ke haba bwihlany ae kap me dok ae kap anyin uma ame he ka hnen hnyi wanben e. 22 Ke haba hanen iny at Levi, me kânâ iny taun, a e hnyi wanben iny than, wale hnyi wanben hnyigöulen Juda, me hnyigöulen Beniamina, haba kânâ eling me iny than.

23 Ke haba ke je tribu: hwân hnyi ke keihen e jimeyö ke ne o but hnyi ke keihen e jimeü; khaca jekhöü Beniamina. 24 Ke haba hnyi hnyigöulen Beniamina, hwân hnyi ke keihen e jimeyö ke ne o but hnyi ke keihen e jimeü; khaca jekhöü Simeona.

25 Ke haba hnyi hnyigöulen Simeona, hwân hnyi ke keihen e jimeyö, ke ne o but hnyi ke keihen e jimeü; khaca jekhöü Isakara. 26 Ke haba hnyi hnyigöulen Isakara, hwân hnyi ke keihen e jimeyö ke ne o but hnyi ke keihen e jimeü; khaca jekhöü Zebulona. 27 Ke haba hnyi hnyigöulen Zebulona, hwân hnyi ke keihen e jimeyö, ke ne o but hnyi ke keihen e jimeü; khaca jekhöü Gada. 28 Ke haba hnyi hnyigöulen Gada, hnyi ke keihen ka hnyi hwaiöu, ame he hnyigöulen hwân hnyi Tamara ke ne o but hnyi köö Meriba-kadesi, ka hnyi wageweiny Aigupito, ke ne o but hnyi köö ae gan. 29 Wale hnyei öbun e he ka khenâ hnân iny je tribu Isaraela, ke wale je jekhöüdrin, haingen Than Iehova.

30 Ke walang je hnyigöuleiny taun; haba hnyi ke keihen ka hnyi hwadrö foa thauzan faiv haded je hlowe tulut: 31 ke haba je homagöuleiny taun me adre me he ka ha hoton ien je tribu Isaraela; kun ta homagöule ka hnyi hwadrö, khaca me homagöule Reubena; ke haba khaca, me homagöule Juda; ke haba khaca, me homagöule Levi: 32 ke haba hnyi ke keihen e jimeyö, me foa thauzan ke faiv haded je hlowe; ke kun ta homagöule: haba khaca, me homagöule Josefa; ke haba khaca, me homagöule Beniamina; ke haba khaca, me homagöule Dana: 33 ke haba hnyi ke keihen ka hnyi hwaiöu, me foa thauzan ke faiv haded je hlowe tulut; ke kun ta homagöule; haba khaca, me homagöule Simeona; ke haba khaca, me homagöule Isakara; ke haba khaca, me homagöule Zebulona: 34 ke haba hnyi ke keihen e jio, me foa thauzan ke faiv haded je hlowe, ke kun ta homagöule: haba khaca, me homagöule Gada; ke haba khaca, me homagöule Asera; ke haba khaca, me homagöule Nafatali. 35 Ke haba je hlowe igirilö me eitn thauzan: ke hwân hnyi bong eling haba ien taun, me, Iehova bi eling.

TUSI DANIELA.

HNYIMAKAN 1.

HNYI huna a kuniny musi a Jehoiakima than Juda, haba Nebukaneza than Babulona ame o hnyi Jerusalema me thelöng e. 2 Ke haba Than ame hnö Jehoiakima than Juda ka hnyi hnyamen, tha e me ke je omjehen uma umen Khong; me e ame sukhöünâ ka hnyi hnyei Sinara ka hnyi uma umen khongon: ke e ame ip je omjehen ka hnyi uma omjeü umen khongon. 3 Ke ame ha than kö Asepenaza at ame musö anyin je eunuka, he ka hom ke je lakon Isaraela, a je mäträniny than ke je hnyat ae nua; 4 a je thöth ae ba hnyikongudrin, hnyat ae hmanenang he ka wâ, ke hnyat ae khan' ödrin je metâ hia, k' ödrin e wâhmakhmeto, ke tremängâ je hna üne, hnyat ae úcú he ka tot hnyi uma umen than; me hamen he ka n' ödrin ge üne ke hwen Kaledaia. 5 Ke haba than ame khenâ ködrin jeü an than hnyi taogo bong, ke waina a belen, me adre me he ka hat ödrin hnyi kun ta huna; me hwaban e me ödrin e he ka tot hnyi hnyimakan than. 6 Ke wale unyidra, a hanen lakon Juda, Daniela, ke Hanania, ke Misaela, ke Azaria. 7 Ke haba tuhan je eunuka ame hwenyi iödrin: ke e ame hwenyi iö Daniela, me Beletisaza; ke Hanania, me Saderaka; ke Misaela, me Mesaka; ke Azaria, me Abedengo. 8 Ke e mou hnyi hnyeku Daniela a g' ame ca he ka okongoâ e hnen jeu than, ke waina a belen: anyin a wale e ame sumâtâ tuhan je eunuka, me me ca ka hamen bi okongoâ e. 9 Ke haba Khong ame okûâ he ka betenge me hnyok kö Daniela hnen tuhan ta je eunuka. 10 Me haba tuhan ta je eunuka ame ha kö Daniela, ka habe, Iny ot ge than a tuhök, at ame khenâ ö 'bun jeü ke belibun: ke anyin a ieü e ame he bi ka wâ je hnyimakhöbun ae hlöuhlöu, me ca helâ me hnyimakan wahidröu a tha dö möbun? me öbun e he ka bi jöniny bök ka than. 11 Ke haingö Daniela kö Meleza, wale at a otilâ tuhan je eunuka hu Daniela me Hanania me Misaela me Azaria, ka habe, 12 Mē cubic öhmun a lathnyabaem hnyi je bong a ten; me adre me he ka ha ö 'hmun

ge je khölak, me habelihmun ge köiö. 13 Ke u me he ka wâhmakhmeto je hnyimakhömun, me hnyimakan wahidröu hnyat adre me hnyi an jeü an than; ke änyâ thö köhmun a lathnyabaem hoton hnâm hna he ka wâ. 14 Me e ame ling ödrin hnyi ünyi eling, me cubic ödrin hnyi je bong a ten. 15 Ke ame um dö je bong a ten, me adre me wâ je hnyimaködrin ae hmanenang, ke gan je unyidrin, hon hnyimakan wahidröu hia hnyat adre me an jeü an than. 16 Me haba Meleza ame hom hmetu jeü an than, me belidrin waina, me ha ö 'drin bi ge je khölak. 17 Ke haba je hidröu eling a vak, me Khong ame ham ködrin wâhmakhmeto me wâünyküme hnyi je üne me metâ hia: ke haba Daniela ame metâ hnyi je hna omanenâ hia me ta je bwi. 18 Ke ame um dö je bong waleji hnen than hna thu bongon he ka hum ödrin, me haba tuhan je eunuka ame hum ödrin ka hnyi hnyimakö Nebukaneza. 19 Ke haba than ame ühnenamö mödrin; ke ba ke at gadra hia adre me wâ ae úcú me Daniela, me Hanania, me Misaela, me Azaria: anyin a wale ödrin e tot hnyi hnyimakan than. 20 Ke haba hnyi ta ünyi hia ge metâ me wâhmakhmeto, wale ame hnei ödrin gan than, e ame ö 'drin a ten beonüâ anyidrin metâ hon metâiny ta je magoi hia me tavat bibi-hwakecin hnyi dokhon dökhü hia. 21 Ke e bi Daniela ke ne o but hnyi huna a bâni Koreso than.

HNYIMAKAN 2.

HNYI huna a loiny musi a Nebukaneza, haba Nebukaneza ame bwo je bwi; me ame hlohlo hnyekon, me e ame ca mokut bi. 2 Me haba than ame ükhünöng he ka hom je magoi, ke tavat bibi-hwakecin, ke tavat tren khong, ke tavat Kaledaia, he ka omanenâ ka than je bwinny. Me ödrin e o but me tot hnyi hnyimakan than. 3 Ke haingen than ködrin, ka habe, Oge hia but bwi, k' ame hlohlo hnyekuk ae bekanö nya bwik. 4 Me ame fuc at Kaledaia ka than hnyi hwen Suria, me ha, ka habe, E so e möt than nyiele balua; ha thö bwi köhmun a lathnyabaem,

me öhmun e he ka omanená bongon. 5 Ke haba than ame thu me ha ka at Kaledaia, ka habe, E hia but gak únyi: ke öbun e ne ca he bi ka omanená kõnya bwi, ke bongon e, me adre me he ka subá omomonu öbun, m' adre me he ka wia umöbun je uma me hnân digic thatúnyi. 6 Ke so bi öbun e ne he ka omanená bwi me bongon e, awe, öbun e he ka hu únyi gak je bwihlany me hwaban, k' adre me he ka ogân' öbun: anyin a wale omanená thö kõnya bwi me bongon e. 7 Me adre me thu hmetu a loiny me ha, ka habe, E so ame he than ka ha bwi ka lathnyabaem, m' öhmun e he ka omanená bongon e. 8 Ke haba than ame thu, me ha, ka habe, Inya oge me wá but a öbun e he ka obecá ün, anyin ae khan' öbun dut a g' ame hia but gak únyi. 9 Ke öbun e ne ca he ka omanená bongon bwi, me khaca thibi hnanyibu köbun: anyin a öbun e hia but penapena thoi me iyawö he ka ha kõnya, ke ne o but adre me hwiö ün: anyin a wale ha thö kõnya bwi, me me khandö nya thö ae khan' öbun he ka omanená bongon e. 10 Me haba at Kaledaia adre me thu hnyi hnyimakan than, ka habe, E ba at eang hmeledrany ae khana he ka omanená únyi anyin than; anyin ae ba than, ke taben, ke at musi ame hia but elám únyi a heläe unyin je magoi ke tavat bibihwakecin ke at Kaledaia. 11 Ke haba únyi ame elam than, me e ti hmak, ke ca khana bi ke at he ka omanená e hnyi hnyimakan than, ke so thibi je khong, a tavat adre me ca tha laba me tavat. 12 Anyin a wale than ame hmönyin me wathethöt gan hmá, me úkhúnöng he ka ohia tavat hia ae metá hnyi Babulona. 13 Ke adre me haimemená hnanyibu, ke adre me he ka hlingá tavat ae metá; ke adre me elöm Daniela me je lahanen he ka hling' ödrin. 14 Haba Daniela ame thu hnyi wáhmakhmeto me metá kö Arioka taben tavat tue anyin than, at ame he he ka hlingá tavat metá hnyi Babulona; 15 me e ame ha kö Arioka a taben unyin than, ka habe, anyin a ieu ae logot hnanyibu únyi ge than? Haba Arioka ame omanená únyi eling kö Daniela. 16 Haba Daniela ame didró me sumátá ge than he ka hna kâu ün, me me he ka omanená bongon bwi ka than.

17 Haba Daniela ame he ka hnyi umen uma me omanená únyi eling kö Hanania, me Misaela, me Azaria a je lahanen: 18 m' ödrin e he ka sumátá betenge únyi ge Khongon drany hnyi únyi eling ae

iyong; me me ca tha he Daniela me je lahanen ka mok tha ödrin me tavat ae metá hnyi Babulona. 19 Me adre me omanená kö Daniela hnyi hna omanená hnyi lit únyi eling ae iyong. Me haba Daniela ame haisoá Khongon drany. 20 Ke haingö Daniela, ka habe, E so adre me haisoá ien Khong nyiele nyiele balua; anyin a e unyin metá me man: 21 ke e ame wia je huna me je ün: e ame hom but je than me otílá je than: e ame ham metá ka tavat ae metá, me wálmakhmeto ka tavat wáhmakhmeto: 22 e ame omanená je únyi ae dit ke iyong: e khana ta je únyi hnyi menekholom, ke ame tha laba mē lany. 23 Inya oge me ole me oganö u Khongon lakamök, u at a ham kõnya metá me man, ke u je hia but omanená kõnya walang ang hnöhmun hna sumató u: anyin a u je hia but omanená köhmun únyi anyin than. 24 Anyin a wale Daniela ame he kö Arioka, wale a kuná than he ka hlingá tavat ae metá hnyi Babulona: e ame he me ha kâu, ka habe, Ca he ka hlingá tavat ae metá hnyi Babulona: hum nya thö ka hnyi hnyimakan than, me oge me he ka omanena bongon ka than.

25 Me haba Arioka ame ie hum Daniela ka hnyi hnyimakan than, me ha heläng kâu, ka habe, Oge me wá at a hanen bá anyin at Juda, me ame he ka omanená bongon ka than. 26 Ke haingen than kö Daniela, adre hwenyi ien Beletisaza, ka habe, Hawa, e khandö u he ka omanená kõnya bwik bwi oge me bwo me bongon e? 27 Me Daniela ame thu hnyi hnyimakan than me ha, ka habe, Haba únyi ae iyong wale u je elám, than, ke ca khana bi tavat ae metá, ke tavat bibihwakecin, ke je magoi, ke tavat tren khong he ka omanená ka than; 28 ke so bi, e hu Khong hnyi drany at ame omanená ta je únyi ae iyong, me e ame hia but thumetu u Nebukaneza than, ta je únyi ame he ka o nyiele. Walang bwem ke únyi eji u je wá hon hnâm hna mokut: 29 haba u, than lö, ame o but hnâm je hna únykúme hon hnâm hna mokut, wale ta je únyi ame he ka o nyiele: ke haba at ame omanená ta je únyi ae iyong ame thumetu u ge ta je únyi ame he ka o. 30 Ke haba inya, me adre me ca omanená kõnya únyi ang ae iyong can a iny metá hon tavat hia ae möt, ke so bi hnân omanená bongon ka than, me me khandö u thö je únykúmenen hnyekom. 31 Than lö, u je wá, me wá bi hnatheat ae gan. Ke haba

hnatheat eling, wale ae gan, ke ti so hmönyin hmanenanginy, me ame tot hnyi hnyimákâm; ke hnân outhen e at ka wâ. 32 Ke haba ban hnatheat eling, me gol ae so, ke haba úlainy ke li benyin, me sileva, ke haba hnyekon ke li jevan, me bras, 33 ke haba li can, me fao, ke haba li hnyeúcan, me fao ke keihen ke kânâ kece ke keihen. 34 Ke u je wâ ke ne o but ame manen dö veto adre sö ke ca hnen hnyam, k' ame kot hnatheat hnyi li can a fao ke kânâ kece, me ame omomonu but. 35 Me ame tha omomonu but fao, me kânâ kece, me bras, me sileva, me gol, me helâ me unen hwit hnyi hna huje hwit hnyi honivakeny; ke haba ang ame tûâ degecâ, ke ba hmetu bi hnen: ke haba veto, at ame kot hnatheat, me e ame via me bucen ae gan hmâ, me ame öunöngötâ hmeledrany hia. 36 Wale bwi; ke öhmun e he ka omanená hnyi hnyimakan than bongon e. 37 U than lö, thaniny ta je than, ke Khongon drany ame ham köu dökhu, me man, me tang hwege, me hmanenang; 38 Ke e ame hia but hna ka hnyi hnyamâm je menoiny hnyot, me je meno ame gâ ethö, hnyi je dok hia ame laba hnyin lakon tavat, ke e ame hna köu he ka musi ödra hia: haba u, waleji ban a gol. 39 Ke hwabâm dö ame he ka kú ke dökhu ae úhnyúkong hmelâm; ke ke dökhu minya a kuniny, a bras, e ame he ka musö hmeledrany hia. 40 Ke haba dökhu a vakiny ame he ka hwege helâ me fao: anyin a haba fao at ame omomono me hom oúnyúk-ongoâ ta je únyi hia: ke helâ me fao ame oamemâ ta je únyi hia eling, helâe e ame he ka omomono me oamemâ. 41 Ke anyin a u je wâ li hnyeúca me je bacan, a kânâ hnân up kaia hanen, ke fao hanen, me adre me he ka subâ luâ dökhu; ke so bi, ame he ka e unyin hwegien fao, anyin a u je wâ fao adre úhaniken me kânâiny kaia. 42 Ke haba je bacan a fao me kânâ kece hanen, helâe ame he ka hwege ke keihen dökhu, me ngâ ke keihen. 43 Ke u je wâ fao adre úhaniken me kânâiny kaia, adre me he ka úhaniken me je mâtâniny at; ke adre me ca he ka úkeceköu bi, helâ me fao ame ca tha hújö me kânâ ae kece. 44 Ke haba hnyi je bong bongon je than eling, me ame he Khongon drany ka oâ ke dökhu a g' adre me ca he ka ohia nyiele balua, ke adre me ca he ka hna dökhu eling ka ke hnyei; ke e ame he ka kot omomono me ohia ta je dökhu hia eling, ke e ame he ka

tethmâ nyiele balua. 45 Anyin a u je wâ a g' adre sö veto únyi hnyi bucen, ke ca hnen hnyam, me e ame kot omomono fao, me bras, me kânâ ae kece, me sileva, me gol; haba Khong ae gan ame omanená ka than ta je únyi ame he ka o nyiele: ke e hnathu bwi, ke hmâ bi hna ha bongon. 46 Me haba Nebukaneza than ame ta ju hnyikânâi me nom kö Daniela, me úkhúnöng he ka ham bwihlany me je únyi ae bo so kâu. 47 Ke haingen than kö Daniela, ka habe, E hnathu, haba Khongubun me Khongon ta je khong, ke Tuhan ta je than, ke at ame omanená ta je únyi ae iyong, anyin ae kxanö u he ka omanená únyi e ae iyong. 48 Me haba than ame ogöranyi Daniela, me ham kâu je bwihlany ae gan, me otilâ e he ka musö hnyei Babulona hia, me wia e me taben ae beónua hon tavat ae metâ hia hnyi Babulona. 49 Ke Daniela ame sumâtâ than, me e ame otilö Saderaka, ke Mesaka, ke Abedenego hon ta je únyi hnyi hnyei Babulona: ke haba Daniela ame laba hnyi homagöuleny than.

HNYIMAKAN 3.

HABA Nebukaneza than ame ányâ hnatheat gol, ke sikste kubit ibeüen göranyai, ke siks ta kubit úlaun: me e ame otilâ e hnyi dok ae tha hon hnyi Dura, hnyi hnyei Babulona. 2 Ke haba than Nebukaneza ame úkhúnöng he ka úkhacaköuâ tavat musi ae gan, ke je gavena, ke tavat musi, ke tavat owisa, ke tavat tuö omjeú, ke tavat ha bongon hnanyibu, ke tavat úhnei ge hnanyibu, ke tavat musi hia hnyi hnyei, ka hnyi dok adre me he ka okabâ hnyin hnatheat wale a otilâ hnen Nebukaneza. 3 Ke ame úkhacaköu tavat musi ae gan, ke je gavena, ke tavat musi, ke tavat owisa, ke tavat tuö omjeú, ke tavat ha bongon hnanyibu, ke tavat úhnei ge hnanyibu, ke tavat musi hia hnyi hnyei, ka hnyi okabâ hnatheat wale a otilâ hnen Nebukaneza than; me adre me útitilen hnyi hnyimakan hnatheat wale a otilâ Nebukaneza. 4 Me ame ha gánâ hnen at bi hnyimen musi, ka habe, Walang hnanyibu kömun tavat lö me je hnyei, me je ve hwen hnyei, ka habe, 5 Haba úen öbun e he ka löng hnyin ifucin trutru, ke utköwi, ke kitara, ke sabeka, ke saniter, ke sumefono, ke ta je únyikhu-möng hia, me öbun e he ka ta ju hnyikânâi me khudrung ka hnatheat gol, wale a otilâ

Nebukaneza than : 6 ke haba at ame ca he ka hnyi ta, me khudrung, me adre me he ka khûâ e hnyi awa eling ka hnyi thop ae möt hnyin meic. 7 Anyin a wale hnyi ûen tavat hia adre me löng ifucin trutru, ke utköwi, ke kitara, ke saniter, ke ta je únyikhumöng hia, me ame ta hnyikânâi tavat hia, me je hnyei, me je ve hwen hnyei, me khudrung ka hnatheat gol a otilâ Nebukaneza. 8 Anyin a wale hnyi ûen eling ame hakekeny keihen at Kaledaia, me khûâ at Juda. 9 Adre me ha kö Nebukaneza than, ka habe, E so u möt than nyiele balua. 10 U, than lö u je otilâ hnanyibu a haba at ama löng ifucin trutru, ke utköwi, ke kitara, ke sabeka, ke saniter, ke sumefono, ke ta je únyikhumöng hia, me ame he ka ta ju me khudrung ka hnatheat gol : 11 ke haba at ame ca he ka hnyi ta me khudrung, me adre me he ka khûâ ka hnyi thop ae möt ge meic. 12 Wale keihen at Juda u je hia but otilâ hon ta je únyi hnyi hnyei Babulona, jia Sadereka, ke Mesaka, ke Abedenego ; haba hnyat eling, than lö, ödrin e ca löng köu : ödrin e ca bi athnyaba ka ânyâm je khong, me khudrung ka hnatheat gol u je otilâ. 13 Me ame hmönyi Nebukaneza ke wathethöt, me úkhünöng he ka hum Saderaka, ke Mesaka, ke Abedenego. Me adre me hom je hnyat eling ka than. 14 Ke haba Nebukaneza ame ha ködrin, ka habe, Hawa Saderaka, ke Mesaka, ke Abedenego lö e hu can gabun a öbun e ca bi athnyaba ka khonguk, me khudrung ka hnatheat gol oge otilâ ? 15 Walang ang, öbun e ne penapena, öbun ka löng ifucin trutru, ke utköwi, ke kitara, ke sabeka, ke saniter, ke sumefono, ke je únyikhumöng hia me öbun e he ka ta me khudrung ka hnatheat gol oge me ânyâ, me so ling : ke so bi öbun e ne ca he ka khudrung, haba hnyi awa eling, me adre me he ka khû' öbun ka hnyi thop ae möt hnyin meic ; ke ewa khong ame he ka hûgún' öbun hnyi li hnyamök ? 16 Me ame thu Saderaka, ke Mesaka, ke Abedenego, me ha ka than, ka habe, Nebukaneza lö, e ca úcú köhmun he ka thu köu hnyi únyi e. 17 A ne helâe, me khana Khonguhmun, at öhmun e bi athnyabainy he ka hûgún' öhmun únyi hnyi thop ae möt hnyin meic ; me e ame he ka hûgún' öhmun únyi hnyi hnyamâm, than. 18 Ke so bi a ne ba, me wâhmakhmetoâ ju than a öhmun e ca he ka bi athnyaba je khongom, me khudrung ka hnatheat gol u je otilâ.

19 Me ame unöngötö Nebukaneza ge hmönyi, ke ke bongon bi hnyimakan kö Saderaka, ke Mesaka, ke Abedenego : ke e ame fuc me hûna ködra a g' adre me he ka oseven okahwa meic hon hnödra hna labö okahwa e. 20 Me e ame hûna ka ke je taben, a hanen je deö vat unyin he ka cö Saderaka, ke Mesaka, ke Abedenego, me khû' ödrin ka hnyi thop ae möt hnyin meic. 21 Me adre me ca hnyat eling, ke hu tangen cadrin, ke hnabicödrin, ke úköt, ke je khaüödrin, me khû' ödrin ka hnyi wanben thop ae möt hnyin meic. 22 Anyin a wale, ke can ame hwege hna hûna hnen than, ke ti kahwa hmönyi meic, me ame hlingâ ge bâhlân meic tavat adre me hum Saderaka, ke Mesaka, ke Abedenego. 23 Ke haba hnyat eling a kun, wale Saderaka, ke Mesaka, ke Abedenego, me ödrin e ta adre me c' ödrin ka hnyi thop ae möt hnyin meic. 24 Me ame uthmâhmâ Nebukaneza than, me ie tot : me e ame thu me ha ka anyin tavat ûhnenamö, ka habe, Hawa, ötin e ca khûâ kun ta hnyat adre ca ka hnyi meic ? Me adre me thu me ha ka than, ka habe, E, than. 25 Me e ame thu me ha, ka habe, Wâ bi, oge me wâ hnyat a ödrin vak k' adre thang bi, ödrin e ngeny hnyin meic, k' ödrin e ca kong bi ; ke haba unyin at a vakiny, me helâ me unyin ke khong. 26 Me haba Nebukaneza ame hakekeny ka hnyi hnyimen thop ae möt hnyin meic, me ha, ka habe, E, Saderaka, me Mesaka, me Abedenego, je athnyabainy Khong ae Beöna, ai öbun, ka âng. Me ame didrut Saderaka, me Mesaka, me Abedenego únyi hnyi hnyin meic. 27 Ke ame wâ hnyat eling hnen tavat musi ae gan, ke je gavena, ke tavat musi, ke tavat ûhnenamö anyin than, wale adre úkhaaköu, ae ba maniny meic hon je unyidrin, ke a ca hlâ bi leünen bödrin, ke a ca wia bi tangen li cadrin, ke ca bon meic unyidrin. 28 Ke haba Nebukaneza ame ha, ka habe E so adre haisoâ Khongu Saderaka, me Mesaka, me Abedenego, at ame kunâ anyin angela, me omelö je athnyabainy hnyat adre me labageju kâu, ke ödrin e wia hofuc hwan than, me hna je unyidrin, m' ödrin e ca he ka bi athnyaba me khudrung ka ke khong bi. 29 Anyin a wale oge me otilâ hnanyibu, a haba tavat hia, me ta je hnyei, me je ve hwen hnyei, adre ne he ka ha únyi ae kong ge Khongu Saderaka, me Mesaka, me Abedenego, me adre me he ka subâ omomonu ödra, me

wia umödrin je uma hnân digic thatúnyi: anyin ae ba ke khong ae khana he ka úhömeli helâe. 30 Haba than ame ogö-ranyi Saderaka, me Mesaka, me Abedenego, hnyi hnyei Babulona.

HNHYIMAKAN 4.

INYA Nebukaneza than, ame ha ka tavat hia, me je hnyei me je ve hwen hnyei bi, tavat adre me labâ hmeledrany hia, ka habe, E so ame osehiâ anyibun hnahic. 2 Oge me únykúme e so he ka omanená ta je haten me je únyi hnân láia waleji a ányâ kónya Khong ae Beönua. 3 E ti beönua anyin je haten! ke ti gan hmâ anyin ta je únyi hnân láia gan! dökhu ae hmâ nyiele balua dokhon dökhu, ke; hwân hnyi ke dö, ke ne o but ka hnyi ke dö anyin musî.

4 Inya Nebukaneza oge me menâ hnyi umök uma, ke iny sot hnyi hnyabak. 5 Oge me bwo bwi, me ame ooti nya; ke oge me hmak ge je hna únykúme hon hnök hna mokut, ke ta je únyi ae manen kónya. 6 Anyin a wale oge me otílâ hnanyibu he ka hom kónya tavat metâ hia hnyi Babulona, me me hamödra he ka omanená bongon bwi. 7 Me ame o kónya ta je magoi, ke tavat bibihwakecin, ke at Kale-daia, ke tavat tren khong: me oge me ha bwi hnyi hnyimaködra; ke adre me ca omanená kónya bongon. 8 Ke hwaban e ame o but kónya Daniela, ke ien Beletisaza, k' adre tha ien me anyik khong, ke e unyin hanon je khong ae kap: me oge me ha kâu bwi me ha, ka habe, 9 Beletisaza lö, tuhan je magoi, e kxanö nya but a e unyâm hanon je khong ae kap, ke ba ke únyi ae iyong ae hmak köu, anyin a wale ha thö kónya hna wâ hnyi bwik waleji oge me bwo, me bongon e. 10 Ke walang hnök hna wâ hon hnök hna mokut; Wâ bi, inya oge me wâ üö hnyi wanben hmeledrany, ke beü hmönyin göranyai. 11 Ke ame kú thö üö, ke hwege bi, ke haba ibeüen e, me ame o but hnyi drany, me e manen ke ne o but hnyi je can hmeledrany. 12 Ke e hmanenang je lan, ke se hia je wan, ke hu han hnyin e hobi kâu hia: ke haba ta je menoiny hnyot me adre me tung hmelen, ke haba je meno adre me gâ ethö, me adre me tabâ je anginy, k' adre me hân ta je únyi hia ae möt únyi hnyin e. 13 Wale únyi oge me wâ hon hnök hna mokut, ke wâ bi at hmákâ ke e kap ame

utut úheny hnyi drany. 14 Me e ame hongot hwegiâ, ka habe, Sö but üö, ke subâ but ta je anginy, ke jijingâ degecâ but je lan, ke ve khúa je wan e: e so e kec ut únyi hnyi hmelen e ta je meno adre me he, ke je meno ame gâ únyi hnyi je anginy. 15 Ke so bi hnen ju hnyiban e ke iwân eü hnyi kânâ, ke ohmâ ju e ge je tö fao ke bras, hnyi hna önying ae hât hnyi kânâ; ke so e ame khubet ge dân hau únyi hnyi drany, ke so e ame he ka tha jekhon me ta je menoiny hnyot hnyi hna önying: 16 adre me he ka wia hnyekon at a e, me ham bi kâu hnyekon meno, ke ne o but ame um dö je ün a seven. 17 Hnen musi anyin tavat hmákâ únyi eling, me hnen hofuc hwan tavat ae kap hna húna eling: me me khana tavat ae möt a g' ame musi At ae Beönua hnyi dökhu dokhon tavat, ke e ame ham kâu hnen hna weny, me otílâ hon e hoúmonu. 18 Wale bwik waleji oge bwo, inya Nebukaneza than: ke hamâm Beletisaza he ka omanená bongon kónya, anyin ae ca khana bi tavat hia ae metâ hnyi dökhu dökhu he ka omanená kónya bongon; ke e kxanö u, anyin a e unyâm hanon je khong ae kap.

19 Me ame hlohlo Daniela, Beletisaza ke ien, hnyi ong ün, ke ame ohmákâ e hnen je hna únykúme. Me amé ha than, ka habe, Beletisaza lö, ca he ka hmak ge bwi me bongon e. Ke haingö Beletisaza, ka habe, thân lö, e na ödrin ju tavat adre me hükötüo u bwi e, ke e na ödra ju je iwahnaihmiöny möu bongon e. 20 Haba üö u je wâ, waleji ame kú thö me hwege, me beü ke ne o but hnyi drany, me manen ka hmeledrany hia; 21 ke hmanenang je lan, ke se hia je wan, ke hu han hnyin hobi kâu hia; ke je menoiny hnyot adre me laba hmelen, me je meno adre me gâ adre bi uma hnyi je anginy: 22 than lö, u ling, anyin a u gan hmâ me hwege; ke ame kú gan ányâm lung ke ne o thö hnyi drany, me ányâm musi ke ne o but hnyi je can hmeledrany. 23 Ke u je wâ than lö at hmákâ me at ae kap ame utut úheny hnyi drany me ha, ka habe, Sö but üö, me ohia e; ke so bi hna biju hnyiban e me iwân hnyi kânâ, ke ohmâ ju e ge tö fao ke bras hnyi hna önying ae hât; ke e ame he ka khubet ge dân hau únyi hnyi drany, ke ame he ka tha jekhon me je menoiny hnyot, ke ne o but ame um dö je ün a seven; 24 than lö, walang bongon, ke wale musi anyin At ae Beönua, ame he ka o ka

tuhök a than : 25 a adre me he ka obö u unyin tavat, ke u me he ka tha laba me je menoiny hnyot, ke u me he ka han önying helâ me bolok, ke u me he ka kubet ge dân hau únyi hnyi drany, k' ame he ka seven je úâm ; ke ne o but ame khanö u thö a g' ame musi At ae Beönua hnyi dökhu dokhon tavat, k' ame ham e ka hnen hna weny kâu. 26 Ke haba hna húna he ka hnen biju hnyiban úö ke wân, me wale ame he ka hmâ köu dokhom dökhu, e ka khanö u thö a g' ame musi drany. 27 Anyin a wale, than lö, e na so ju köu bok hofuc, ke soju monu gam, me ányâ wisa, ke soju lwakecâm ae kong, ke betenge ju ge tavat ae theduoc ; m' adre me ne he ka obeûâ hnâm hnahic. 28 Me ame aat dö kö Nebukaneza ta je únyi hia eling. 29 Ke hwaban je tehi a twelv e ame ngeny hnyi uma umen than e Babulona. 30 Ke haingen than, ka habe, Hawa, ca Babulona ang ae gan, waleji oge me op hnân hnyaban than hnen manik man ae hwege, ke hnân he ka ogânâ anyik hmanenang. 31 Ke tiga e hofuc hnyi hnyimen than, me ame o but ke hofuc únyi hnyi drany, ka habe, Nebukaneza than lö, adre me ha köu ke hofuc : a g' adre hia but hügúnâ dökhu gam. 32 Me adre me he ka obö u unyin tavat, me u me he ka tha laba me ta je menoiny hnyot ; u m he bi ka han önying helâ me bolok ke ame he ka seven je úâm, ke ne o but ame khanö u thö a g' ame musi At ae Beönua hnyi dökhu dokhon tavat, me ham e ka at e ame weny kâu. 33 Ke haba hnyi «wa eling ame hwâdâ thö kö Nebukaneza : me adre me öbâ e unyin tavat, me e ame han önying helâ me bolok, ke khubet unyin ge dân hau únyi hnyi drany, ke ne o but ame beû but leúnen ban helâ me leúnen aeto, ke helâ me újimen bacan meno ame gâ je boujimen. 34 Ke hwaban je bong, inya Nebukaneza oge me bwele thö göranyâi ka hnyi drany, me ame hmetu könya hnyekuk, me oge me haisoi Beönua, ke ogânâ ke ogöranyâ e at ae möt nyiele balua : anyin a nyiele balua anyin musi, ke haba dokhon dökhu ame o but ka hnyi ta je dö hia : 35 k' ame únykúme a helâ me thatúnyi tavat adre me labâ hia hmeledrany : ke e ame ányâ hoton weny unyin je köiöiny drany, ke tavat adre me labâ hmeledrany ; ke ba at ame he ka thawâ hnyamen me ha kâu ka habe, Ieú u me ányâ? 36 Hnyi úen eling ame hmetu

hnyekuk könya ; ke ame hmetu thö könya anyik lung ke anyik hmanenang, me me mec dökhu dökhu ; ke ame elöm nya hmetu hnen anyik tavat úhnenamö me anyik je taben ; ke adre ohmö nya hmetu thö hnyi dökhu dökhu, ke adre bi hanen anyik hmanenang ae gan. 37 Ke walang ang, inya Nebukaneza oge me olungâ me ogânâ Thaniny drany ; anyin ae wisa anyin ta je huliwa hia, ke úcú deny je gethen : ke e khana he ka hom úhnyúkongo tavat vheno bi gan.

HNYIMAKAN 5.

HABA Belesaza than ame ányâ bijeú ae gan ka anyin je taben a wan thauzan, ke e ame ic waina hnyi hnyimakan thauzan. 2 Hnyi úen e ame ic waina Belesaza ame úkhúnöng he ka hom je kaia gol me sileva, waleji a hügúnâ Nebukaneza a kamen únyi hnyi hnyin uma kap e Jerusalema ; me me ic kâu than, me anyin je taben, me laâiân, me anyin je momo. 3 Me adre me hom je kaia gol waleji adre hügúnâ únyi hnyi uma umen Khong hnyi Jerusalema ; me ame ic kâu than me anyin je taben, me laâiân, me anyin je momo. 4 Adre me ic waina me ogânâ je khong gol me sileva, me bras, me fao, me utö, me veto. 5 Haba hnyi awa eling ame o but je banyen at, me sihnalimen cicö taben lamepa hnyi hna up uma hnyi uma umen than : ke a wâ but than hanen hnyam at a sihnalimen. 6 Me ame hwiö hnyimakan than, ke ame ohmakâ e hnen je únykúmenen ; ke ame memen dut je jeien hnyin, ke ame öbubuny but li boucan. 7 Haba than ame ha hwegiâ he ka hom tavat bibihwakecin, me at Kaledaia, me tavat tren khong. Ke than ame ha ka tavat metâ hnyi Babulona, ka habe, Haba at ama aú hna sihnalimen ang, me omanená könya bongon e, me adre me he ka okhavâ ge úkhaú ae udrudrá hlit, ke ovhekinyâ ge sawakiny gol, ke e ame he ka tot me at a kuniny unyin je musi hnyi dökhu. 8 Ke ame o but tavat metâ hia anyin than : ke ca khan' ödrin he ka aú hna sihnalimen, me omananá bongon ka than. 9 Me ame hmak gan hmâ Belesaza than, me ame ke bongon bi hnyimakan, me ame hlohlo anyin je taben. 10 Ke ame didrö momo than ka hnyi uma han únyi hnyi hofuc hwan than me anyin je taben : ke haingen momo than, ka habe, E so e

möt than nyiele balua ; ca hmak bi ge je únykúmenâm, ke ca okebongonâ hnyimákâm : 11 e hu ke at hnyi dokhom dôkhu a e unyin hanon je khong ae kap ; ke haba hnyi úen kamâm, me adre me wâ unyin melam, ke wâ únykúme, ke metâ, helâ me metâ anyin je khong : ke haba Nebukaneza than a kamâm, wale than a kamâm bi, me e ame otilâ e hnân taben ka ta je magoi, ke tavat bibihwakecin, ke at Kaledaia, ke tavat tren khong ; 12 anyin adre me wâ hnyok ae beönua unyi Daniela eling, ke wâhmakbmeto, ke wâ únykúme, k' ame omanená bongon je bwi, k' ame wia je hofuc ae iyong, ke thang ta je vhet, ke haba than ame hwenyi ien e me Beletisaza. Ke walang, e so he ka hum Daniela, me ame he ka omanená bongon.

13 Me adre me hum Daniela ka hnyi hnyimakan than. Ke haingen than kö Daniela, ka habe, U Daniela hanen je bá anyin at Juda, waleji hnen than a kamök hna hom úheny Juda? 14 Oge hia but löng gam a e unyâm hanon je khong, ke adre me wâ melam unyâm, ke wâ únykume, ke metâ ae beönua. 15 Ke adre hia but hom tavat ae metâ ka hnyi hnyimákök, a tavat bibihwakecin, m' adre me he ka aú hna sihnalimen ang me omanená kõnya bongon : ke ca khan' ódra omanená bongon únyi e. 16 Ke oge me löng gam a e khanö u he ka omanená bongon, me thang ta ja vhet : ke walang a ne khanö u he ka aú hna sihnalimen, me omanená kõnya bongon, me adre me he ka okhaü u ge úkhaú ae udrudrá hlit, me ovhekinyu u ge sawakiny gol, ke u me he ka at a kuniny bi unyin je musi hnyi dôkhu. 17 Haba Daniela ame thu hnyi hnyimakan than, me ha, ka habe, Hnen ju unyâm ányâm je bwihlany, ke ham bi ka ke at hwaban únyi gam ; ke so bi oge me he ka aú kôu than hna sihnalimen, me omanená kôu bongon. 18 Than lö, Khong ae Beönua ame ham kö Nebukaneza a kamâm dôkhu, me hna oganá, me mec, me hmanenang : 19 ke can hna oganá e adre me ham kâu, me ame óbubuny me ot hnyi hnyimakan tavat hia, me ta je hnye, me je ve hwen hnye : e ame hlingâ hnen hna behlingâ, me omelö hnen hna beomelö ; ke e ame oganá hnen hna beoganá, me öhnyikánâ hnen hna beöhnyikánâ. 20 Ke hnyi úen ame bi gan hnyekon, ke hwege hnyekon me me huliwa hnyi hop, me adre me öhnyikánâ e únyi hnyi hon theroniny dokhon dôkhu, ke adre

me hügúnâ gan anyin hmanenang : 21 ke adre obâ e unyin tavat ; ke helâ but me je meno hnyekon, ke e ame tha laba me je asinainy hnyot ; e ame han önying helâ me bolok, ke khubet unyin ge dán hau únyi hnyi drany : ke ne o but e ame wâ a g' ame musi Khong ae Beönua hnyi dôkhu dokhon tavat, me e ame otilâ hon e hnen hna weny kâu. 22 Ke haba u, Belesaza a nokon lö, u je ca öhnyikánâ hnyekom, ke so bi e khanö u ta je únyi hia eling ; 23 ke u je bi gan ka Thaniny drany ; ke adre hia but hom je omjehen umen uma ka hnyi hnyimákâm, ke u je hia but, ke ányâm je taben, ke laáíâm, ke ányâm je momo, ic waina kâu ; ke u je hia but oganá je khong sileva, me gol, me bras, me fao, me utö, me veto, wale adre me ca bwele, me löng, me khana : ke haba Khong at aine musö homenâm, ke e unyin dem je gethen hia, me u je ca oganá : 24 me ame kunâ únyi gan hanen hnyam ang, me ame sihnalimen hofuc ang. 25 Ke walang hofuc adre set, ka habe, MENE, MENE, TEKEL, UPARESIN. 26 Ke walang bongon únyi e, ka habe, MENE ; a hia but Khong aú dokhom dôkhu me bi öbiny. 27 TEKEL ; adre hia but tuluti u hnyi tulut uhni me ö u a u háhâ thö. 28 PARES ; adre hia but kia dokhom dôkhu me ham ka at Madai me Peresi. 29 Me haba Belesaza ame húna, me adre me okhaü Daniela ge úkhaú ae udrudrá hlit, me ovhekinyâ e ge sawakiny gol, me haimemenâ gan a e ame he ka at musi a kuniny bi hnyi dôkhu. 30 Ke adre me hlingö Belesaza than Kaledaia hnyi hnyinghet eling. 31 Ke haba Dariu at Madai ame kap musi hnyi dôkhu, k' ame ne sikstê tu je hunainy.

HNYIMAKAN 6.

KE ame so kö Dariu he ka otilâ hon dôkhu tavat musi ae gan a wan haded ke twente, m' adre me he ka laba hnyi dôkhu hia ; 2 ke hudrin hia ta hnyat musi a kun ae beönua, ke Daniela khaca unyidrin ; me me he tavat musi ae gan he ka ha gaga ködrin je bongon, me me ca kong bi ta je únyi anyin than. 3 Ke adre me oúnyihnathu Daniela hon ke li at musi ae beönua ke tavat musi ae gan, anyin a e unyin hanon ae ti so ; ke únykúmenen than he ka otilâ e hon dôkhu hia. 4 Ke haba ke li at musi ae beönua ke tavat musi

DANIELA 6.

ae gan, me adre me elâm can ga Daniela ûnyi hnyi dôkhu ; ke ca khan' ôdra he ka wâ ke can ke hulö : anyin a e hnathu, ke ba monu ke kongon adre me wâ gan. 5 Me ame ha hnen tavat eling, ka habe, Ôtin e ca he bi ka wâ can ga Daniela, ke so bi ôtin e he ka me wâ can ge hnanyibu anyin Khongon. 6 Me haba ke li at musi ae beönua ke tavat musi ae gan, ôdrin e ukhacaköu ka than me ha kâu, ka habe, Dariu a than lö, e so u möt nyiele balua. 7 Ôhmun e hia but tha ûhnenamö a ôhmun tavat musi hia ae beönua hnyi dôkhu, ke je gavena, ke je musi ae gan, ke tavat ûhnenamö, ke je taben, hnân he ka ôtila hnanyibu anyin than, me ohmâ hna nyibon, ka habe, Haba at ame he ka sumâtâ ke ûnyi unyin ke khong me ke at ke ne o but hnyi je bong a thöte, ke so bi köu thibi than, me adre me he ka khûâ ka hnyi op liona. 8 Ke walang ang, than lö, u ma otilâ thö hna nyibon, me sihnalimen tusi, m' adre me ca he ka wia bi, hoton bongon hnanyibu anyin at Madai me Peresi, waleji adre me ca he ka wia. 9 Anyin a wale, haba Dariu than ame set ien hnyi hna sihnalimen me hna nyibon. 10 Ke e khanö Daniela but a g' adre set ut tusi, me e ame didrö ka hnyi umen uma ; (ke adre kböng je mamalaminy hnyeuleny cicö Jerusalema ;) ke e ame ibi okun cibouca hnyi je bong, me hic, me ole hnyi hnyimakan Khongon, helâ me hnen bi hna labö khenenâ. 11 Ke haba hnyat eling, adre me ûkhacaköu me ô Daniela ame sumât me khöü hnyi hnyimakan Khongon. 12 Me adre me he me ha ka than ge hnanyibu anyin than ; Hawa, u je ca set iâm hnyi hnanyibu, a haba at ame he ka sumât ûnyi ge ke khong me at, ke ne o but hnyi je bong a thöte, ke so bi köu thibi than, me adre me he ka khûâ e ka hnyi op liona ? Ke haba than ame thu me ha, ka habe. E hnathu ûnyi e, helâ me hnanyibu anyin at Madai me Peresi, wale adre me ca he ka wia. 13 Me adre me thu me ha ka than, ka habe, Haba Daniela hanen je bâ anyin at Juda, me e ame ca outö u, than, me hnanyibu u je set iâm hnyin, ke e ame ibi okun sumâtâ ta je ûnyi hnyi je bong. 14 Ke a löng ut than hofuc eling, me e ame vec gan hmâ, me ip hmâ hnyi hnyeikon he ka omeli Daniela : ke e ame huliwa ke ne o but ame didrut seünö he ka omelö e. 15 Haba tavat eling adre me ûkhacaköu ka than me ha ka than, ka habe, Khanö u thö,

than lö, a haba hnanyibu anyin at Madai me Peresi, m' adre me ca he ka wia hna nyibon me hnanyibu wale a otilâ than. 16 Ke than ame hûna me adre me lili Daniela, me khûâ e ka hnyi op liona. Ke haingen than kö Daniela, ka habe, Haba Khongom, wale u je bi athnyabainy hnyi je bong, me e ame he ka omeli u. 17 Ke adre me hom veto me hlöng hnyimen thop ; ke haba than ame bi haten e ge anyin ûnyi hnân ohmâ haten, ke je hna ohmâ haten anyin je taben unyin ; m' adre me ca wia bi ga Daniela ke ûnyi a khaca. 18 Me ame he than ka hnyi umen uma, k' ame ca hna hnyi lit ; k' adre me ca hom ta je ûnyikhumöng ka hnyi hnyimakan : ke e ame ca mokut. 19 Ke haba than ame vesâ hnyi hnyomakatu, me he logot ka hnyi op liona. 20 Ke e ame o but ka hnyi thop kö Daniela, me e ame hongot tenge göranyai : ke haingen than kö Daniela, ka habe, Daniela lö, athnyabainy Khong ae möt, hawa, e khana Khongom, wale at u je bi athnyabainy hnyi je bong he ka omeli u ûnyi ge je liona ? 21 Me Daniela ame thu ka than, ka habe, Than lö, e so u möt nyiele balua. 22 Haba Khonguk ame kunâ anyin angela, me öbuhlumo hnyimen je liona, m' adre me ca okongu nya : anyin adre me wâ ae ba hnyikonguk hnyi hnyimakan : ke haba khaca, than lö, e ba monu oge me ânyâ hnyi hnyimâkâm. 23 Me haba than ame senyin gan hmâ, me ûkhûnöng he ka öü Daniela ûnyi hnyi thop. Me adre me öü Daniela ûnyi hnyi thop, ke ba aat adre me wâ gan, anyin a e ame labageju ka Khongon. 24 Ke than ame hûna he ka hom tavat waleji adre me khûö Daniela, me adre me khû' ôdrin bi ka hnyi op liona, ôdrin, ke lakudrin, ke laöiödrin ; ke e hu maniny je liona hudrin, me me hmetru je jeiödrin hia, k' ôdrin tiga ca kâlâ kânâ eü hnyi hnyin thop.

25 Ke haba Dariu than ame sihnalimen ka tavat hiâ, ke ta je hnyei, ke je ve hwen hnyei, a tavat adre me labâ hmeledrany hia, ka habe, E so öbun e hnabic hmönyin. 26 Inya oge me otilâ hnanyibu, ka habe, haba hnyi ta je ke keihen hia dôkhuk dôkhu, me hamen tavat he ka ot me öbubuny hnyi hnyimakan Khongu Daniela : anyin a e Khong ae möt, k' ame tethmâ nyiele balua, ke adre me ca he bi ka ohia dokhon dôkhu, ke hameu bi he ka musi ke ne o but hnyi obiny : 27 e ame omelö, ke hûgûnâ, k' ame ânyâ je haten ke je ûnyi

hnân láâi êthö hnyi drany, ke eang hmelen ; at ame omeli Daniela únyi ge maniny je liona. 28 Ke so eling Daniela hnyi úten musi anyi Dariu, me úten musi anyi Koreso at Peresi.

HNYIMAKAN 7.

HNYI huna a bânî Belesaza than Babulona, Daniela ame bwi, ke hu únyi ame manen kâu hon hnen hna mokut : me e ame sihnalimen bwi, me ha ònyen ta je únyi. 2 Haingö Daniela, ka habe, Oge me wâ hnyi hna omanená kõnya hnyi lit, ke wâ bi, ame úhalupkõu vak ta aug hon kõiõ ae gan. 3 Ke vak ta meno ae gan ame o únyi hnyi kõiõ ae ve bongudrin. 4 Haba at a bân, me helâ me liona, ke hu li labenyin aeto gan : inya oge me wâ ke ne o but adre hia thõ hnimõ li labenyin, ke adre kap e göranyai únyi hnyi kânâ, me otilâ e ge li can helâ me at, ke adre me ham kâu hnyekon at. 5 Ke wâ bi ke meno, at a loiny, helâ me bea, ke adre ogöranyâ ke keihen, ke kun ta jeien vhak hnyi hnyimen wanben ga nyon : ke adre me ha kâu, ka habe, Todró, an gâûâ ju utiõ. 6 Hwaban e, inya oge me wâ, ke wâ bi ke meno helâ me lepad, ke e hu hnyi hoton vak ta labenyin meno ame gâ ; ke vak ta ban meno eling ; ke adre ham kâu he ka musi. 7 Hwaban e, inya oge me wâ hnyi je hna omanená hnyi lit, ke wâ bi meno a vakiny adre outen, ke tren man, ke ti hwege ; ke e hu je nyon ae gan a fao ; e ame oloú me thu omomono, me ututo je kolon ge je can ; ke ve e bi me je meno a bân a kun ; ke ten je faoiny. 8 Inya oge me únykúme je faoiny, ke wâ bi, ame o but hnyi wanben ke faoiny ae úhnyúkong, ke adre oc wia hnyi hnyimakan e ta faoiny a kun a bân ; ke wâ bi, hnyi faoiny eling je ecmak helâ me je emakan at, me hnyem at ame ha je únyi ae gan. 9 Inya oge me wâ ke ne o but adre otilâ je theron, ke ame laba hon ke hingat at kâú adrem : e hau anyin úkhaú helâ me kiona, ke helâ me leúnen mamoe ae so leúnen ban, ke helâ me bâhlân meic anyin theron, ke helâ me meic ame hlâ je waengen. 10 Ke ame hingölö wagewe meic me patrutrua únyi hnyi hnyimakan : k' adre me bi athnyaba kâu tavat a wan thauzan je thauzan, k' ame utitilen hnyi hnyimakan khaca miriad je miriad : k' adre me pena-pena he ka úhnei, k' adre me ulolo je tusi.

11 Ke oge me wâ hnyi úten eling, a can ifucin hwan ae gan hwan faoiny meno ; haba, inya oge me wâ ke ne o but adre me hlingö meno, ke obia unyin, k' adre me hna e me me thong meic. 12 Ke haba kolon je meno, me adre me hûgúnâ musi gadrin : ke so bi adre me obeúa melidrin, ke ne o but hnyi ke huna me úten. 13 Ke oge me wâ je hna omanená hnyi lit, ke wâ bi, ame tha o me je úlâiny drany, at helâ me nokon at, ke e ame o ka hingat kâú adrem, m' adre me hom e ka hnyi hnyimakan. 14 Ke adre me ham kâu musi, ke hmanenang, ke dõkhu, me me he tavat hia, ke ta je hnyei, ke je ve hwen hnyei ka bi athnyabainy : ke haba anyin musi, me musi ae tethmâ, k' ame ca he ka hia ; ke haba dokhon dõkhu, me adre me ca he bi ka obia.

15 Ke haba inya Daniela, me ogo me hlõuhlõu eú hnyi hnyekuk, k' ame ohmaki nya je hna omanená kõnya hon hnõk hna mokut. 16 Me oge me hakekeny ka ke at ame tot, me hnõ e ge hnathuiny ta je únyi eling. Me e ame ha kõnya, me omanená bongon ta je únyi, ka habe, 17 Haba ta meno ang ae gan a vak, me walõdrin vak ta than, õdrin e he ka o únyi hnyi hmele-drany. 18 Ke ame he ka kap dõkhu hnen tavat ae kap anyi Beõnua, mödrin e hu bala bi dõkhu, wale nyiele nyiele balua. 19 Ke oge me bekhanõ nya hnathuiny meno a vakiny ae ve bongon bi me je meno hia, k' adre me outen, ke haba je nyon, me je fao, ke bras je boújimen, at ame oloú, ke thu omomono, k' ame uto je kolon ge je can ; 20 ke hawa ge je faoiny a ten hnyi ban, ke fao ame o k' ame ta ju kun ta faoiny hnyi hnyimakan ; wale fao ae hu je ecmak, ke hnyem, at ame ha ta je únyi ae gan, ke gan hmâ unyin hon je lahanen. 21 Ke inya oge me wâ, ke ame vat fao eling me tavat ae kap, me hwege bi hudra ; 22 ke ne o but ame o hingat at kâú adrem, ke adre me hna ka tavat ae kap anyi Beõnua he ka owisa ; me ame o thõ úen me hu dõkhu ge tavat ae kap. 23 Haingen, ka habe, Haba meno a vakiny me wale dõkhu a vakiny eang hmelen, ae ve bongon bi me ta je dõkhu hia, e ame he ka an hmeledrany hia me uto e, me thu omomono e. 24 Ke haba je fao a ten, únyi hnyi hnyin dõkhu eling ame he ka o je than a ten : ke hwabaõdrin dö ame he ka o khaca ; ke e ame he ka ve e me je than a bân, ke e ame he ka hom úhnyúkongoâ

kun ta than. 25 Ke e ame he ka fuc bi gan kö Beönua, me ovecâ tavat ae kap anyi Beönua : ke e ame he ka únykúme ka wia je úen, me je hnanyibu ; ke adre me he ka hn' ödrin ka hnyi hnaymen, ke ne o but ame o ke úen me li úen, me haf úen. 26 Ke adre me he ka laba he ka úhnei, ke adre me he ka húgúnâ anyin musi, he ka ohia e, me oumo, ke ne o but obiny. 27 Ke haba dôkhu, me musi me uganiny ta je dôkhu eang hmeledrany hia, adre me he ka ham ka tavat ae kap anyi Beönua : dôkhu ae hmâ dokhon dôkhu, ke ame he ta je musi hia ka bi athnyaba me löng kâu. 28 Walang obiny únyi. Ke haba inya Daniela oge me hmak ge ta je únykúmenök, me ame ke man bi hnyimakök : ke oge me tuö únyi eling eú hnyi hnyekuk.

HNYIMAKAN 8.

HNYI huna a kuniny musi anyi Belesaza than, a o thö hna omanená kõnya, wale kõnya Daniela, hwaban hnök hna wâ a bân. 2 Ke inya oge me wâ hnyi hna omanená ; ke hnyi úen oge me wâ, me oge me laba hnyi Susani hnyi uma umen than hnyi ke keihen hnyei a Elaina ; ke oge me wâ hnyi hna omanená, ke inya but hnyi wagewe Ulai. 3 Me oge me bwele me wâ, ke wâ bi, mamoe бага ae hu li faoiny ame tot cicö wagewe ; ke beú göranyai li faoiny ; ke beú ke at hon ke at, ke haba at ae beönua, me a biliny ka o. 4 Inya oge me wâ mamoe бага ame hagutâ jio, me ka hnyi hwadrö, me ka hnyi hwaiöu ; ke ca khana ke meno he ka tot hnyi hnyimakan, ke ba at ae khana he ka húgúnâ gan ; ke e ame ányâ hoton weny, k' ame ogânâ e bi. 5 Ke inya oge me tiga únykúme, ke wâ bi, ame o but got бага úheny jimeú hon kânâ hia, k' ame ca kâlâ kânâ : ke hu fao got ae gan wanben li emakan. 6 Ke e ame o but ka mamoe бага a lo li faoiny, waleji oge me wâ ame tot cicö wagewe, me utut kâu hnyi tang hwegien ae gan. 7 Ke oge me wâ a g' ame hakekeny ka mamoe бага, k' ame hmönyin kâu, me kot mamoe бага, me thu li faoiny ; ke ba maniny mamoe бага he ka tot hnyi hnyimakan : me e ame hagutâ e hnyikânâi, me uto e ; ke ba at ae khana he ka húgúna mamoe бага gan. 8 Ke haba got бага ame ka ogânâ hmönyin e bi : ke hwege but e me hmetru but faoiny ae gan ; ke ame o thö vak ta fao ae gan hwan e, cicö vak ta ang hnyi drany. 9 Ke

haba únyi hnyi khaca fao, me ame o thö ke fao ae úhnyükong, k' ame gan tot ka hnyi hwaiöu ke deiö, ke ka hnyi hnyei ae hmanenang. 10 K' ame gan tot ke ne o but hnyi je utbavat hnyi drany ; k' ame hagutâ hnyikânâi ke je utbavat, ke je okhú, me uto ju. 11 Eke, e ame ka ogânâ e ke ne o but ka hnyi taben je utbavat ; k' ame húgúnâ gan hudiny leú adre labö hudo bala, k' ame hagutâ but hnen e, a dok ae kap. 12 K' adre me tha hna but kâu utbavat me hudiny leú adre me hudo bala, can hna hanyâúâ ; k' ame hagutâ hnathu hnyikânâi k' ame ányâ weny bi, ke hu sot gan. 13 Ke inya oge me löng ke at ae kap ame fuc ; ke ame fuc minya ke at ae kap ka at eji a bân ka fuc, ka habe, Ke ne o but kehö hna omanená ge hudiny leú adre me hudo bala, ke hna hanyâúâ wale at ame öba wan, a g' adre hna dok ae kap me utbavat minya, m' adre me uto ju ? 14 Me haingen kõnya, ka habe, Ke ne o but ka hnyi lo li thauzan ke theri haded ta je sahac me hnyomakatu ; ke hnyi úen eling adre me he ka ányâwia dok ae kap.

15 Ke haba inya Daniela, oge me wâ hna omanená, me oge me elâm bi he ka wâhmakhmeto e ; ke wâ bi, ame tot ke at hnyi hnyimakök helâ me at. 16 Ke oge me löng ifucin at wanben li baten Ulai, k' ame hongot me ha, ka habe, Gaberiela lö, omanená thö bongon hna omanená ka at ang. 17 Me e ame hakekeny ka hnyi dok oge me tot hnyin ; ke e ame o but, me oge me ot, me ta hnyikânâi ; ke e ame ha kõnya, ka habe, Nokon at lö, wâhmakhmeto ju ; anyin ame he ka hwâdâ hna omanená hnyi úen hnyi obiny. 18 Ke e ame tiga úhnenamö mönya, me oge me mokut hnying me ta ju hnyikânâi : ke e ame kâlö nya me otillö nya. 19 Ke haingen, ka habe, Wâ bi, oge me he ka thumetu u ge únyi ame he ka o hnyi úen hmönyin hnyi obiny : anyin ame he ka hwâdâ hnyi úen adre thu hnyi obiny. 20 Haba mamoe бага u je wâ a lo li faoiny, me wale li than Madai me Peresi. 21 Ke haba got бага at walak, me than Heleni e ; ke haba faoiny ae gan wanben li emakan, me than e a bân. 22 Ke haba at ae hmetru, waleji ame o thö vak hwaban, me wale ame he ka o vak ta dôkhu únyi hnyi hnyei, ke ca helâ me maniny e. 23 Ke haba hnyi obiny dôkhudrin dôkhu, hnyi úen ame he ka bekhöt tavat hanyâúâ, me ame he ka o than ae hwege hnyimakan, at ae khana je vhet. 24 Ke ame he ka gan hmâ hwegien,

ke ca hnen bi tang hwegien, ke ke bongon bi hnen hna he ka ohia, ke e ame he ka hnahic me ányá weny: ke e ame he ka ohia tavat tren man, me tavat ae kap. 25 Ke únyi hnyi anyin bibihwakecin ame he ka söt iyawö hnyi hnyameu: ke e ame he ka ogáná e bi hnyi hnyekon, ke e ame he ka ohia tavat ae se hia adre me laba khötkic: e ame he minya ka tot ka thaniny ta je than; ke so bi, e ame he ka hmetru, ke ca hnen bi hnyam. 26 Ke haba hna omanená je sa hac me hnyomakatu waleji adre ha, me e hnathu e; ke so bi, ikhálá ju hna omanená; anyin ae se hia je bonginy. 27 Ke inya Daniela oge me ta hnyikánái me mok hnyi ke je bong; me oge me todrö me mádrá huliwa anyin than: ke oge me láia hna omanená, ke ba at ame wá únykúme.

HNYIMAKAN 9.

HNYI huna a báni Dariu nöku Asueru, a mátrán at Madai, wale adre otílá me me thaniny dökhü anyin at Kaledaia; 2 haba hnyi huna a bâniny anyin musi, inya Daniela oge me wáhmakhneto ge je tusi numerainy je huna, waleji ge ioiny hofuc ho Iehova kö Jeremia perofeta hnyin, me me he ka hwádá je huna a seventi waleji hnyi hna öba wan Jerusalema. 3 Me oge me bwele thö ka than a Khong me elám a deny hic me khöü, me ca han, me mano ae gan nán, me hnabadröu. 4 Me oge me hic kö Iehova a Khonguk, me omanená, ka habe, Than lö, a Khong ae gan ke hna outen, at ame tuö úhinhýkôu me ibetengiö ka tavat adre me hnyok káu, me vheno anyin ta je hnanyibu; 5 öhmun e hia but ányá hulö, ke hwakecin ae hwali, ke hwakecin ae kong, ke úkhin fuc, ke saú únyi hnyi hnám je hna húna ke hnám hna owisa: 6 ke öhmun e ca hia but löng ka lathnyabaem a ta je perofeta, tavat adre me fuc hnyi iám ka latuhöhmun, ke anyihmun je taben, ke lakamöhmun, ke tavat hia thithö hnyi hnyei. 7 Than lö, e unyám wisa, ke e unyihmun hmehma, helá me hnyi bong ang; wale a at Juda, ke at Jerusalema, ke at Isaraela hia, a tavat hakekeny ke sákáu, hnyi je hnyei hia waleji u je ob' ödra ka hnyin, can hnödra hna hanyáú waleji adre hanyáúá gam. 8 Than lö, e unyihmun hmehma, wale latuhöhmun, ke anyihmun je taben, ke lakamöhmun, anyin a öhmun e hia but ányá hulö köu.

9 E unyin Than a Khonguhmun ibetengiö, k' ame thang degecá hulö; anyin a öhmun e hia but úkhin fuc káu; 10 k' öhmun e ca hia but löng hoton ifuci Iehova Khonguhmun, he ka vheno anyin je hnanyibu, waleji e ame ip hnyi hnyimáköhmun a deny lathnyabainy a ta je perofeta. 11 Eke, a hia but hanyáúá ányám je hnanyibu hnen at Isaraela hia, k' adre me saú but, k' adre me ca löng ifucám: anyin a wale, adre hia but hingálá huhmun hnaúhangö, ke hna khemanyin waleji adre me sihnalimen hnyi hnanyibu anyi Mose athnyabainy Khong; anyin a öhmun e hia but ányá hulö káu. 12 Me e ame hia but ohwádá hwan hofuc, waleji e ame hai' öhmun, ke tavat owisa köhmun, me e ame oá köhmun únyi ae kong hmönyin: anyin adre me ca ányá eang hmeledrany hia helá me hna ányá ka Jerusalema. 13 Ke ame aat köhmun ta je únyi hia ae kong eang, helá me hna sihnalimen hnyi hnanyibu anyi Mose: ke so bi öhmun e ca hia but sumátá betenge anyi Iehova Khonguhmun, me öhmun e hmetu ju únyi hnyi ta je hwakecihmun ae kong, me wá únykúme ányám hnathu. 14 Anyin a wale, a hia but Iehova hmáká únyi ae kong, me ohwádá köhmun: anyin ae wisa Iehova Khonguhmun hnyi anyin ta je huliwa hia e ame ányá, k' öhmun e ca hia but löng ifucin. 15 Ke walang ang, Than a Khonguhmun lö, at ame hom lakem únyi hnyi hnyeí Aigupito ge hnyam ae hwege, ke adre ölungi u heláe hnyi bong ang; öhmun e hia but ányá hulö, ke kong hwakecihmun. 16 Than lö, ö u öhaúá but ányám hmönyin me ányám wathethöt únyi hnyi ányám taun a Jerusalema, ányám bucen ae kap, hoton ányám wisa: anyin a can anyihmun je hulö, me je hwakecin lakamöhmun ae kong, adre me haikongoá Jerusalema, me lakem, hnen tavat hia igigili öhmun. 17 Ke walang ang Khonguhmun lö, löng ju hic hijin athnyabaem, me hnen hna khöü, ke omelamá thö hnyimákám hon ányám dok ae kap ae ba wan, únyi hnyi ien Than. 18 Khonguk lö, tevehlöng ju me löng; huak dö me wá a ga ba but wan gahmun, me taun waleji adre wenyö káu iám: anyin a öhmun e ip anyihmun je khöü hnyi hnyimákám, ca anyin a öhmun wisa, ke únyi hnyi ányám ta je betenge ae gan hmá. 19 Than lö, löng ju; Than lö, thang degecá but; Than lö, tevehlöng ju, me ányá; ca bec bi; únyi gam e Khonguk lö, anyin adre wenyö iám hon taun me lakem.

20 Ke inya oge me tiga fuc, me hic, me omanená anyik hulö, me hulö anyin je liamekeiny mönya a at Isaraela, me ip gaga hnyi hnyimakö Iehova Khonguk anyik khöü hobi káu bucen ae kap anyin Khonguk; 21 eke, inya oge me tiga fuc me hic, me haba Gaberiela, waleji oge böc ka wá hnyi hna omanená, ame gá logot, me kalö nya hnyi ün adre labö bi hut hnyi sahac. 22 Ke e ame nö nya me ünenamö mönya, me ha, ka habe, Daniela lö, oge me o but walang ang he ka ometö u, me okhanö u. 23 Haba hnyi ün u je hwán ka khöü, adre me húna, me oge me o but he ka thumetu u; anyin adre me ti betenge gam; anyin a wale, wá únykúme thö únyi eling, me wáhmakhmeto hna omanená. 24 Sevente je wik adre me thu ka hnyi em hnyeí, ke ányám taun ae kap, m' adre me obekhötá hna hanyáúá, me bi obiny je hulö, me tube hwakecin ae monu, m' adre me oá wisa a nyiele balua, me ohmá haten hna omanená ke hna perofeta, me hú dok ae ti kap. 25 Wáhmakhmetoá thö, ke wá únykúme, a haba hwán hnyi hna húna he ka obátá me op hmetu Jerusalem ke ne o but at adre hú, a than, me ame he ka seven ta wik: ke haba sikste tu je wik me adre me he ka ányá hmetu e, wale je gethen ke köiö igigilö, hnyi ün adre ovecá. 26 Ke hwaban ta je wik a sikste tu, me adre me he ka subá degecá at adre me hú, ke ba únyi gan: ke haba lakeiny than ame he ka o, m' adre me he ka ohia taun ke dok ae kap; ke ame he ka obiny e ge di, k' ame he ka hu vat ke ne o but obiny; k' adre me ohmá but he ka öba wan. 27 Ke e ame he ka ohmá úhinyköu ka tavat ae se hia hnyi wik a khaca; ke haba hnyi hafiny wik, me e ame he ka bi obiny hut ke bwihlany; ke ame he ka o at ame öba wan, k' ame he ka tabá labenyin ta je únyi ae ikiki; ke adre me he ka hingálá hmönyin hon at ame öba wan, ke ne o but ame bekhöt únyi adre ohmá.

HNYIMAKAN 10.

HNYI huna a kuni Koreso than Peresi, me adre me omanená ke únyi kö Daniela, adre hwenyi ien Beletisaza; ke e hnathu únyi e, wale vat ae gan, me e ame wáhmakhmetoá únyi e, k' ame wá únykúme hna omanená. 2 Haba hnyi ün eling, inya Daniela oge me labö tenge hnyi kun ta wik ae bekhöt. 3 E ba jéú ae so oge

me an, k' ame ca dit ke utiö ke tap waina hnyi hnyimök, ke oge me ca súö wakaco ke ne o but hnyi kun ta wik ae bekhöt. 4 Ke haba hnyi bong a twente foainy tehi a bán, tiga inya hnyi baten wagewe ae gan, a Hidekela, 5 inya oge me bwele me wá, ke wá bi at ame khavá mano lino, ke a oweiká e ge goliny Ufas: 6 ke helá unyin me berulo, ke helá hnyimakan me hucuce, ke helá li emakan me li lamepainy meic, ke helá me bras ae hadröngöc li benyin me li can, ke helá me hwan tavat ae se hia ifucin. 7 Ke hake inya Daniela at ame wá hna omanená eling: ke adre me ca hnyi wá hna omanená ge tavat adre me tha e mönya; ke so bi, ame o but ködra öbubuny ae gan hmá, me adre me kec dö me lubaduöng. 8 Me hake inya biju me oge me wá hna omanená eling ae gan, ke ba hmetu bi hwégiök: ke adre wia anyik hmanenang me oge me kong ut, ke ba but hwégiök. 9 Ke so bi oge me löng ifucin: he inya oge me tiga löng ifucin, me oge me mokut hnying ut, k' ame hnyimakök hnyikánái. 10 Ke wá bi, ame kalö nya hnen ke hnyam me oge me icimöng ge li boucak me li hnyamök. 11 Ke e ame ha könya, ka habe, Daniela lö, at adre ti betenge gan, wáhmakhmetoá thö hofuc oge me ha köu, ke tot wisa thö; anyin adre kunö nya köu: ke a hia but ha könya hofuc eling, me oge me tot öbubuny. 12 Ke haingen könya, ka habe, Daniela lö, ca ot bi; anyin a hwán hnyi bong a bán, waleji a mou hnyin hnyekom he ka wáhmakhmeto, me hom úhnyákongu u hnyi hnyimakan Khongom, adre löng ut ifucám: ke oge me o but ang únyi ge hwám je hofuc. 13 Ke haba thaniny dökhü Peresi ame labö iwatretra mönya twente wan je bong; ke wá bi, ame o but Mikaela, ke than ae gan he ka hadruo nya: ke oge me laba eling me je thaniny Peresi. 14 Ke walang ang oge me o but he ka thumetu u ge ta je únyi ame he ka o ka aten em hnyeí hnyi je bong a biliny: anyin ae bec je bonginy hna omanená. 15 Ke a hia but ha könya je hofuc eling, me oge me nom ju hnyikánái me laba hnyibú. 16 Ke wá bi, ame kálá hnyimök ke at helá me at: me oge me khöng ut hnyimök me fuc, me ha ka at ame tot hnyi hnyimakök, ka habe, Than lö, can hna omanená, ame takú nya anyik je hlöuhlöu, ke ba but hwégiök. 17 Ke ame he ka hawa ka khanö nya a athnyabaem than he ka úhmenamö mön than? anyin a haba

inya, me ba but hwegiök, ke oge me ca menâ hmetu bi. 18 Ke ame mâdrö nya hmetu hnen at a helâ me at, me ha hwegiök. 19 Ke e ame ha, ka habe, At adre me betenge gan lö, ca he bi ka ot; hnahic ju, hwege thö, eke, hwege thö. Ke a hia but fuc kõnya, me oge me hwege but, me ha, ka habe, Than lö, ha thö; anyin a u je ohwegiö nya. 20 Ke haingen, ka habe, E khandö u úhek köu? ke oge me he walang ang ka hmetu he ka vat me than Peresi: ke iny ka he but, wâ bi, ame he bi ka o than Heleni. 21 Ke so bi oge me he ka ha köu hna sihnalimen hnyi tusiny hnathu: ke ba hiök hnyi ta je únyi eling, ke so thibi Mikaela a tuhöbun.

HNYIMAKAN 11.

KE hnyi huna a bâni Dariu at Madai, inya oge me tot he ka hadruâ e me ha hwegien.

2 Ke walang ang oge me he ka omanená köu hnathu. Wâ bi, ame he ka o kun ta thaniny Peresi; k' ame he bi ka tren omjeü ae gan at a vakiny hon ta hnyat a kun: ke e ka hwege bi deny ta je omjehen, me e ame he ka obwebwelâ hia úcon dökhu Heleni. 3 Ke ame he ka tot ke than at ae hwege, at ame he ka musi ge musi ae gan, me ânyâ helâ me weny. 4 Ke e ka tot, me ame he ka hmetru dokhon dökhu, me adre me he ka kia väkâ e ka hnyi vak ta anginy drany: ke ca hobi kâu bi je mâtrânyin, ke ca hoton anyin musi; anyin adre me he ka oc dokhon dökhu, me me hobi kâu ke je hnyat, ke ca ödrin bi. 5 Ke ame he ka hwege thaniny hwaiöu, tha e me ke taben unyin, k' ame he ka hwege hon e me musi bi, ke haba anyin musi me musi ae gan. 6 Ke e ka um dö je huna me ödru me he ka úkhacaköu; k' ame he hlu nokon than hnyi hwaiöu ka senâ than hnyi hwadrö he ka ânyâ úhihinykôu: ke haba hwegien benyin hlu me ame ca he ka tethmä; k' ame ca he minya бага ka tot, ke benyin; ke adre me he ka hna but hlu, me tavat adre me hom e, me at ame hnokoâ e, me at ame ha hwegien hnyi úen eling. 7 Ke ame ke ka o ke khúen ge iwân hlu, hnyi hnen at eling, wale ame he ka o ka hnyi utbavat, me ame he ka delec hnabâ anyin than hnyi hwadrö, me bi ovhelidra, ke ame he ka hwege: 8 me hom bâ Aigupito ai je khöngudrin, me anyidra je hna theat adre oköiâ, me anyidra je kaia ae ti so, a silera me gol; ke e

ame he ka hokhnyok hnyi je huna ae se ge than hnyi hwadrö. 9 Ke e ame he ka he hnyi dökhu dokhon than hnyi hwaiöu, ke e ame he ka hmetu ka hnyi iny bi hnyei. 10 Ke ame he je lakon ka vat, me úkhacaköu köiö köien at ae gan, adre me he ka o me bahihingâlâ, me vheno: ke adre me he ka hmetu me vat, ke ne o but hnyi hnen hnabâ. 11 Ke ame he ka hmönyin hnyekon than hnyi hwaiöu, ke e ame he ka he me vat mē, wale a than hnyi hwadrö: ke e ame he ka otilâ metâ utbavat ae gan, ke adre me he ka hna utbavat eji ka hnyi hnyamen. 12 Ke ame he ka bi gan utbavat, ke ame he ka görany bi hnyekon: ke e ame he ka öta je miriad, ke e ame ca he ka ton. 13 Ke ame he ka hmetu than hnyi hwadrö, me otilâ utbavat ae gan hon a bân; ke e ka um dö je úen, wale je huna, me e ame he ka oâ je utbavat ae gan me omjeü ae gan. 14 Ke lnyi úen eling ame he ka tot ka than hnyi hwaiöu tavat ae se hia: ke ame he ka bi gan tavat úokonguny hnyi em hnyei m' adre me ohmâ hna omanená; ke adre me he ka ta. 15 Me ame he ka o than hnyi hwadrö, me okhibö göranyai kânâ, me hügúnâ taun adre up haginy ae so: ke ame ca he ka ton je utbavat hnyi hwaiöu, me tavat e ame úca, ke ame ke ka ba tang hwege hnân he ka ton. 16 Ke haba at ame he ka he úcon, me ame he ka ânyâ hoton weny, ke ba at ame he ka ot hnyi hnyimakan: ke e ame he ka tot hnyi hnyei ae hmanenang, ke e bi hnyi hnyamen úokonguny. 17 Ke e ame he ka hnyimakan dö he ka o me hom maniny dökhon dökhu hia, me tavat ae fofâ unyin: ke e ame he ka ânyâ weny: ke e ame he ka ham kâu hlu nokon momo me me kong; ke e ame he bi ka tethmä me tha hien mē. 18 Hwaban dö e, e ame he ka hnyimakan ka hnyi je bomene, me hügúnâ keihen ae se: ke haba ke than ame he bi ka biobiny hnen hna haikongoâ; eke, e ame he ka wia kongon kâu bi. 19 Me e ame he ka hnyimakan ka hnyi je hnabâny iny hnyei: ke e ame he ka haü me ta, ke adre me ca he hmetu ka wâ e. 20 Ke ame he ka tot ke at hwaban e, at ame he ka kunâ at hok fat he ka vheno hmanenanginy dökhu: ke adre me he ka ohia e hnyi ke je bong, ke ca hnen bi hmönyin, ke ca hnen bi vat. 21 Ke ame he ka tot hwaban e, at adre me hükötiâ, waleji adre me tiga ca ham kâu hmanenanginy dokhu: ke e ame he ka o hnyi úen úsoköu, me

hu dökhu ge hofuc útakú. 22 Ke ame he ka khutu takou e je vat ae uou hnyi hnyimakan, me hmouca but; eke, thaniny úhinhnykôu minya. 23 Ke hwaban do hna úhinhnykôu mē, me ame he ka othoiâ: anyin a e ame he ka he me hwege hnyi hnyei ae úhnyúkong. 24 E ame he ka o hnyi úen úsokôu ka hnyi je dok ae so hnyi hnyei; ke e ame he ka ányá únyi a ca ányá lakamen ke lakiben; e ame he ka khená ködra hna húgúná ke hna sôh, ke je omjeú: eke, e ame he ka bibihwakecin úcon je hnabá ke ne o but hnyi ke úen. 25 Ke e ame he ka obwebwelâ maniny man ke tang hwegein hnyekon, ke je utbavat ae gan, úcon than hnyi hwaiôu; k' ame he than hnyi hwaiôu ka vat, a tha e ke utbavat ae gan hmâ ke hwege: ke e ame ca he bi ka tot, anyin adre me he bi ka ányá bibihwakecin kâu. 26 Eke, ame he tavat adre me an an jeú ka kot e, k' ame he anyin utbavat ka ti osehia: ke ame he ka ú je komok ae se hia. 27 Ke haba li than eling, me ödru me he ka hnyok úokonguny, ke ödru me he ka úhnenamö thoi hnyi laulau a khaca: k' ame ca he ka hwadá: anyin adre me he ka bi obiny hnyi úen adre thu. 28 Me e ame he ka hmetu ka hnyi iny hnyei me je omjeú ae gan hmâ; ke ame he hnyekon ka hociâ úhinhnykôu ae kap; ke e ame he ka ányá weny, me hmetu ka hnyi iny hnyei. 29 E ame he ka hmetu hnyi úen adre me thu, me he ka hnyi hwaiôu; ke ca helâ me he a bân me biliny. 30 Anyin ame he je huiny Kitim ka he úcon; anyin a wale, e ame he ka hmak, me hmetu me hmönyin ka úhinhnykôu ae kap, me ányá weny bi: e ame he ka hmetu me tha úhnenamö me tavat adre me degec úhinhnykôu ae kap. 31 Ke ame he ka tot hobi kâu je deö vat, ke adre me he ka okongoâ dok ae kap wale a hnabâ, me ohia hudiny leú adre hudo hnyi je bong hia, ke adre me he ka otílâ únyi ae ikiki at ame öba wan. 32 Ke haba tavat ae kong hwakecidra ka hnyi úhinhnykôu, e ame he ka omonu ödra ge hofuc útakú: ke haba tavat ae khan' ödra Khongudrin adre me he ka hwege me újöng. 33 Ke haba tavat ae metâ hnyin tavat, adre me he ka ná tavat ae se hia: ke so bi adre me he ka ta ge hele vat, me meic, me hwenbâ me sôh, hnyi je bong ae se hia. 34 Ke ödra ka ta but, me adre me he ka na omi hadru' ödra: ke ame he tavat ae se hia ka bi hiödra ge hofuc útakú. 35 Ke ame he

keihen tavat ae metâ ka ta, madre me cubic ödra, me ányáwia, me ohawâ, ke ne o but úen obiny: anyin ame he ka e hnyi úen adre thu. 36 Ke ame he than ka ányá hoton weny; ke e ame he ka oganá e bi, me ogóranyâ e bi hon ta je khong hia, me ha ta je únyi hnân outen ge Khongon ta je [khong: ke e ame he ka sot ke ne o but ame hwadá but hmönyin; anyin adre me he ka ányá hna mou hnyok ka hnyin. 37 Ke e ame ca he ka únykúme je khongon lakamen, me wenyâ omomo, me únykúme ka ke khong bi: anyin a e ame he ka oganá e bi hudrin hia. 38 Ke e ame he ka oganá khongon je hnabâ hnyi hnen e: ke e ame he ka oganá ke khong ae ca khana lakamen, ge gol me sileva, me je veto ae únyi hnathu, me je únyi ae senem. 39 Ke e ame he ka ányá úcon je hnabâ ae ti hwege a tha hien me khong khanyua; ke haba at ame he ka nom kâu me e ame he ka bi hanen kâu hmanenang: ke e ame he ka kun' ödrin ka musö tavat ae se hia, me khená hnyei ge hwaban. 40 Ke haba hnyi úen obiny ame he than hnyi hwaiôu ka invinö mē: ke ame he than hnyi hwadrö ka utut kâu, helâ me höu me je kariota, me tavat tabö hors, me je hu ae se hia; ke e ame he ka dit ka hnyi je hnyei, me ave me vheno. 41 E ame he ka he minya ka hnyi hnyei ae hmanenang, ke ame he ka ta je hnyei ae se hia: ke ame he ka kec möt gan, Edoma, ke Moaba, ke lakon Amona ae beonua. 42 Ke e ame he ka hai hnyamen hon je hnyei: ke ame ca he ka kec möt hnyei Aigupito. 43 Ke e ame he ka musö ta je tang omjeú, je gol, me sileva, me je únyi hnathuiny Aigupito hia: ke ame he at Libua me Aithiop ka he hoton. 44 Ke ame he ka ohmakâ e je úthumetu úheny jimeyö me hnyi hwadrö; ke e ame he ka he me hmönyin ae gan ka hlingâ me ti ohia hmönyin tavat ae se hia. 45 Ke e ame he ka otílâ je uma manoiny hnyaban hnyi wanben köiö me bucen ae hmanenang ae kap; ke ame he ka o obiny kâu, ke ba at ame he ka hadruâ e.

HNYIMAKAN 12.

KE haba hnyi úen eling ame he Mikaela ka tot, wale than ae gan at ame tot singiny aten em hnyei: ke ame he ka hu úen vec, e ba helâe hwân hnyi hna hwenyien, me hnyei, ke ne o but hnyi úen eling: ke hnyi úen eling adre me he ka omelö

aten em hnyei, ödra hia adre me wâ hna sihnalimidra hnyi tusi. 2 Ke se hia tavat adre me mokut eü hnyi kânâ adre me he ka hmak hmetu, keihen ka hnyi möt nyiele balua, ke keihen ka hnyi hmehma me ikikiâ nyiele balua. 3 Ke haba tavat ae metâ, me adre me he ka umumelam helâ me melaminy drany; ke haba tavat adre me wia tavat ae se hia hnyi hwakecin ae wisa, me ödra helâ me ta je okhû nyiele balua. 4 Ke haba u Daniela lö, ikhâlâ ju je hofuc, me ohmâ ju haten tusi, ke ne o but hnyi üen obiny: k' ame he tavat ae se ka wadring ehele, me ame he metâ ka gan tot.

5 Ke inya Daniela oge me wâ, ke wâ bi, ke li at ödru me tot, ke at hnyi baten wagewe, ke ke at hnyi ke baten wagewe. 6 Ke haingen ke at ka at ame khavâ lino, at ame laba hon köien wagawe, ka habe, Ke ne o but kehö obiny ta je ünyi eling hnân lâiâ? 7 Ke oge me löng at ame khavâ lino, at ame laba hon köien wagewe, me ame ogöranyâ hnyamen a metân me hnyamen a meny ka hnyi drany, me hnyamen gan at ae möt nyiele balua

a g' ame he ka hobi kâu üen, me lo li üen, me üen me haf: ke e ka hia but oveseâ maniny hnyei ae kap, awe, ame he ka hwädâ ta je ünyi hia eling. 8 Ke oge me löng, ke oge me ca wâ ünykûme: me oge me ha, ka habe, Tuhök lö, ieu obiny ta je ünyi e? 9 Ke haingen, ka habe, Daniela lö, he thö; anyin adre hia but ikhâlâ me ohmâ haten ta je ünyi e ke ne o but hnyi üen obiny. 10 Ame he tavat ae se hia ka obosoi ödra, me ohaw' ödra, me ânyâwi ödra; ke ame he tavat ae kong ka ânyâ hwakacin ae kong bala; ke ame ca he ke at ae kong he ka wâ ünykûme: ke so bi, ame he tavat ae metâ ka wâ ünykûme. 11 Ke hwân hnyi üen adre me he ka ohia hnyin hudiny leü adre hudo hnyi je bong hia, ke ne o but adre me otilâ ünyi ae ikiki at ame öba wan, me wan thauzan tu haded ke nainte je bong. 12 Hnähic hnen at ame lubahingen ke ne o but hnyi je bong a wan thauzan ke theri haded ke thöte faiv. 13 Ke he thö u ke ne o but obiny: anyin a u me he ka menâ, me tot hnyi jekhom, e ka um dö je bong.

HOSEA.

HNHYIMAKAN 1.

WALANG hofuc ho Iehova, waleji ame o kö Hosea, nöku Beerî, hnyi je bong bongu Uzia, me Jotham, me Ahaza, me Hezekia, je than Juda, ke hnyi üö Jero-boama nöku Joasa, than Isaraela.

2 Hnyi üen Iehova ame bân ka fuc kö Hosea, me haingö Iehova kö Hosea, ka habe, He thö ka hok momo hnyi gethen ke lakon gethen: anyin ae gan hmâ bi ünyi monu ge tavat, a g' adre me digic Iehova. 3 Me e ame he me hum Gomera nöku Dibelaima; k' ame erkin bi, me hnokoâ nokon. 4 Ke haba Iehova ame ha kâu, ka habe, Hwenyi ien dö, ka habe, Jezerela; ke haba me okhaca me oge me he bi nya ka bi hwaban drö Jezerela ka lap anyi Jehu, ke oge me he ka bi obiny dökhû dokon lap anyi Isaraela. 5 Ke haba hnyi

bong eling, me oge me he ka thu cafana anyin Isaraela hnyi hnyigöulen bucen anyi Jezerela. 6 Ke e ame erkin hmetu me nokoâ in. Ke haingo Iehova kâu, ka habe, Hwenyi ien dö e, ka habe, Lo-ruama: anyin oge me ca he hmetu ka betenge ge lap anyi Isaraela, wale he ka thang degeci ödra. 7 Ke so bi, oge me he ka betenge ge lap anyi Juda me omeli ödra a deny Iehova Khongudrin, ke oge me he ka omeli ödra ge cefana, me hele vat, me vat, me je hors, me tavat tabö hors. 8 Ke ame hia but momo hnebaiö Lo-ruama, me e ame erkin hmetu me hnokoâ da. 9 Ke haingö Iehova, ka habe, Hwenyi ien dö, me Lo-ami; anyin a ca lakeik ut öbun, me oge me ca he bi nya ka Khongubun.

10 Ke so bi haba numerainy lakon Isaraela, me ame he ka ücü me önyin köiö, wale ae ca khana bi ke at he ka tuluto

me aú numerainy ; ke haba hnyi dok wale adre me ha ködra, ka habe, Ca lakeik ut öbun, me adre me he bi ka ha ködra, ka habe, Öbun lakon Khong ae möt. 11 Ke ame he ka úkhacaköu je lakon Juda, me je lakon Isaraela, ke adre me he ka otilà hobi ködra ke taben a khaca, ke adre me he ka he but únyi hnyi hnyei : anyin ame he ka bong ae gan bong bongu Jezerela.

HNYIMAKAN 2.

HA thö ka je liamekeiny möbun, ka habe, Ami ; me ka je lahanibun, ka habe, Ruama.

2 Ivinö thö me hinyöbun, ivinö thö ; anyin a ca öiök ut e, ke ca äian dut inya : ke so e ame degec anyin bi únyi monu únyi hnyi hnyimakan, me hnen hna venöu hnyi wanben li basin ; 3 wá oge nye uny jut anyin je úkhaú, me hna but e, helá me hnyi bong e ame o hnyin, me wia e me me helá me hnyeububa, me ip e helá me hnyei ae hwahwacit, me hlingá e ge beic ; 4 eke, oge me ca he ka betenge ge je lakon ; anyin a ödrin je lakon gethen. 5 Anyin a hinyödrin ame bi únyi monu : momo a hnöku ödrin ame ányá únyi hnán hmehma ; anyin a haingen, ka habe, Oge me he ka hnu hoton lawek, tavat adre me ha ök, me belik köiö, me leúnen mamoe, me lino, me wakaco, me belik. 6 Anyin a wale, wá bi, oge me he ka thelöng dem gethen ge je iwadekong, me hak veto, me me ca he ka wá deny je gethen. 7 Ke e ame he ka hnu hoton laweny, ke e ame ca he ka khalet' ödrin ; ke e ame he ka elöm ödrin, ke ame ca he bi ka wá : me e ame he ka ha, ka habe, Oge me he ka hmetu ka öiök a bán ; anyin ae so könya ehac, ke kong walang ang. 8 Anyin ae ca khana bi momo a oge me ham káu hwit, me waina, me wakaco, me osehia káu sileva, me gol, wale ödrin e bi Baala káu. 9 Anyin a wale öge me he hmetu ka hügúná anyik hwit hnyi ün e, me anyik waina hnyi ün e, me hügúná anyik leúnen mamoe, me anyik lino a hnán okhaúá hnen he thu. 10 Ke walang ang oge me he ka omanená hwakecin ae ikiki hnyi hnyimakan laweny, ke ba at ame he ka hügúná e únyi hnyi hnyamök. 11 Ke oge me he ka bi obiny anyin senyin hia, je bijeú, me je tehi a tebúnyi, me je sabath, me anyin je úkhacaköu hia adre thu. 12 Ke oge me he ka ohia anyin je vine, me imeta, wale e ame ha gan, ka habe, Wale

hwabök a ham könya lawek : ke oge me he ka wia me me hnyot bi, ke ame he je menoiny hnyot ka han. 13 Ke oge me he ka bi hwaban káu je bong bonginy je Baala, wale e ame leú utö ae bo so hnyin ködrin ; ke e ame theibá e ge je theibeny hnyikönyen me je ohmanenanginy, me hnu hoton je laweny, k' ame hnying nya bi, haingö Iehova. 14 Anyin a wale, wá bi oge me he ka lelö e me hom e hnyeububa ai, me ita hofuc káu. 15 Ke oge me he ka ham káu iny je hnyei vine úheny e, me hnyigöulen bucen Akora hnán gethen deny gejon : ke e ame he ka thu hmetu eling helá me ehac ke tiga hlu, ke heláji me ehac hnyi úheny hnyi hnyei Aigupito. 16 Ke haingö Iehova, ka habe, Hnyi bong eling u me he ka hawo nya, me Ishi ; ke u me ca he hmetu ka hawo nya, me Baali. 17 Ke oge me he ka hom but ien je Baala únyi hnyi hnyimen, ke adre me ca he hmetu ka únykúmi ödrin hoton je iödrin. 18 Ke hnyi ün eling oge me he ka ányá úhilihnyköu hobi ködrin me je menoiny hnyot, me je meno ame gá ethö, me je meno ame iyawá káná : ke oge me he ka thu cafana me hele vat, me vat únyi hnyi hnyei, ke oge me he ka omokulic ödrin hnyi sot. 19 Ke oge me he ka hum u me öiök nyiele balua ; eke, oge me he ka hum u me öiök hnyi wisa, me hna owisa, me hnyok ae so, me betenge. 20 Oge me he ka hum u könya hnyi hnathu : ke ame he ka khanö u Iehova. 21 Haingö Iehova, ka habe, Hnyi bong eling oge me he ka thu hmetu, oge me he ka thu hmetu ka je drany, ke drany ame he ka thu hmetu ka hnyi hmeledrany ; 22 ke ame he hmeledrany ka thu hmetu ka hwit, me waina me wakaco ; ke ödrin e he ka thu kö Jezerela. 23 Ke oge me he ka tá e hobi könya bi hnyi káná ; ke oge me he ka betenge gan waleji adre ca betenge gan ; ke oge me he ka ha ködra a ca lakeik, ka habe, Lakeik u ; ke adre me he ka ha, ka habe, Khonguk.

HNYIMAKAN 3.

KE Iehova ame ha könya, ka habe, He hmetu thö ka betenge ge momo at ame betenge gan waeny ke momo ame venöu, helá me betenge anyi Iehova ka lakon Isaraela, tavat adre me hnyimakan ka je khong, ke wedra je hmata a wan vine. 2 Ke oge me úco e hwaban je ong sileva a fiftin, ke khaca homer bali, ke haf

homer bali: 3 me haingök ka momo, ka habe, U me he ka laba halubahing nya hnyi ta je bong ae se hia; u ma ca he ka bi únyi monu, ke u me ca he ka áián ke бага bi: me oge me he bi nya ka helæ köu. 4 Anyin ame he lakon Isaraela ka laba thibi hnyi se hia je bong ke ba than, ke ba taben, ke ba at bihut, ke ba veto ame tot, ke iefoda ke hnatheat: 5 me hwaban e ame he lakon Isaraela ka hmetu me elöm Iehova Khongudrin, me Davita a tuhödra; me adre me he ka o me outö Iehova me anyin so hnyi je bong a biliny.

HNYIMAKAN 4.

LAKON Isaraela lö, löng ju hofuc ho Iehova: anyin ae hu ivinö anyi Iehova me aten hnyeí, anyin ae ba hnathu, me ibetengiö, ke ca khan' ödra bi Khong hnyi hnyeí. 2 Adre me khemanyin thibi, me thoi, me hlingâ at, me venöu, me bi únyi monu: k' adre me utut, me dra ame kálá dra bi. 3 Anyin a wale ame he hnyeí ka tenge, kē sēnyin hia but tavat adre me labā e, tha ödra me je menoiny hnyot, me je meno ame gâ ethö; eke adre me he minya ka hom but je wâ eú hnyi köiö. 4 Ke so bi, ca he ke at ka ivinö, ke ca he ke at ka ná; anyin a haba je liamekeiny möu, me ödrin úcú me tavat adre me ivinö me at bihut. 5 Ke u me he ka haú hnyi selany, ke u me he ka tha haú me perofeta hnyi lit; ke oge me he ka ohia hinyám. 6 Adre me ohia lakeik anyin ae ba wáhmakhmeto: anyin a u je hia but hna degecá wáhmakhmeto, awe, oge me he bi nya ka hna degeci u, m' u me ca at bihut könya: anyin a u je hnying hnanyibu anyin Khongom, me oge me he bi nya ka hnying lakom. 7 K' adre me ányâ hwakecin ae kong könya hoton úseidra: oge me he ka wia anyidra hmanenang, m' adre me hmehma but. 8 Adre me ha ö'dra bi ge hulö anyin lakeik, me behnyokâ hwakecidra ae kong. 9 K' ame he bi ka khaca bongon tavat me at bihut: ke oge me he ka bi hwaban ködra hoton dedra je gethen, me bi hwaban ködra hoton anyidra je huliwa. 10 Ke adre me he ka han, me ca sekudra bi; adre me he ka bi únyi monu, k' adre me ca he bi ka oshia: anyin adre hia but degec he ka löng kö Iehova. 11 Haba únyi ame hügúnâ hnyok, me wale bi únyi monu, ke waina, ke waina ae teb únyi. 12 K' ame labö he lakeik ka hnei unyin

anyidra je ong utö, k' ame thumetu ödra anyidra uci: anyin adre me omonu ödra hnen bi únyi monu, k' adre me kec únyi hnyi hmelen Khongudrin he ka bi únyi monu. 13 K' adre me bi hut hon ban je bucen, ke leu utö ae bo so hon je dok ae görany, ke hmelen je iwajo, ke je libene, ke je ela, anyin ae so hmenon: anyin a wale ame bi únyi monu lakubun wahlu, k' ame venöu laöiöbun. 14 Ke oge me ca he ka bi hwaban ka lakubun wahlu can hnödra hna bi únyi monu, ke laöiöbun can hnödra hna venöu; k' adre me ka tha he me hnyat venöu, k' adre me tha bi but me omomo hnyi gethen: ke haba hnyeí ame ca wáhmakhmeto, me adre me he ka öta e. 15 Isaraela lö, eja ke ne u je ne bi únyi monu, ke so u Juda ame ca he bi ka monu; ke ca he öbun Gilegala ai, ke ca he Beth-aven ai, ke ca khemanyin bi, ka habe, Kia inya Iehova. 16 Anyin a hia but Isaraela úkhin fuc, helâ me man kau at ame hwen höcö: ke ame he Iehova walang ang ka ha ö'dra helâ me nokon mamoe hnyi dok ae lau. 17 Ke Eferaima ame úkhacaköu me je idola; hna but e. 18 A hiny dut belidra; k' adre me bi únyi monu bala: ke haba je tuhan me adre me beányâ únyi hnân ohmehma gan. 19 Haba ang ame hia but vhec e ge li labenyin; ke adre me he ka hmehma ge anyidra je hut.

HNYIMAKAN 5.

TAVAT bihut lö, löng ju hofuc ang; lap anyi Isaraela lö, löng ju; lap anyin than lö, tevehlöng ju, anyin adre ha hwaban köbun; anyin a hnewe öbun ka Mizepä, me ert adre thong hon Tabora. 2 Ke haba tavat thu musi adre me úhlingö gan hmâ; ke inya bi at ú ödra hia. 3 Oge me ö Eferaima but, ke ca iyong bi Isaraela könya: anyin a walang ang, u Eferaima, u je hia but bi únyi monu, ke kong ut Isaraela. 4 Haba anyidra ta je huliwa ame ovheli ödra he ka hmetu ka Khongudrin: anyin a e unyidra weny he ka bi únyi monu, ke ca khan' ödra but Iehova. 5 Ke haba bi gan anyin Isaraela ame ohnathöa hnyi hnyimakan: anyin a wale ame he ka tha ta Isaraela me Eferaima hnyi anyidru hulö; k' ame he minya Juda ka ta unyidru. 6 Adre me he ka he me elöm Iehova me haledra je hnahat mamoe me kau; ke adre me ca he bi ka wâ e: e ame ka he me digic ödra. 7 Adre hia

but iyawö kö Iehova; anyin adre hia but hnokoá je lakudra a je atkanyua: ke walang ang ame he tehi a teb únyi ka ön ödra me je jekhóúdra.

8 Túâ th' öbun sofa hnyi Gibeá, me trutru hnyi Rama: kuku thö hnâa haten hnyi Beth-aven; e hnyi hotom Beniamina. 9 Ame he ka ba wan Eferaima hnyi bong ú: oge hia but omanená ka je tribuiny Isaraela únyi ame he ka o. 10 Haba je than hnyi Juda e úcú me tavat adre me hok hnyigot: oge me he ka hingálâ hudrin anyik hmönyin helâ me köiö. 11 Adre ovecá Eferaima, adre ngâ e hnyi úhnei; anyin a e ame ogâ he ka hnu hoton hna húna. 12 Anyin a wale, iny helâ me nokon walelaba ka Eferaima, ke iny helâ me bobot ka lap anyi Juda. 13 Ke a wâ but Eferaima anyin mok ke a wâ but Juda hnân aat, me haba Eferaima ame he Asuria ai, k' ame úkhúnöng kö Jareba than; ke ca khana bi he ka omeli u, me ometo hnöbun aat. 14 Anyin a oge me he ka helâ me liona ka Eferaima, ke helâ me nak liona ka lap anyi Juda: haba inya me oge me he ka olou kia me he but; oge me he ka hom, ke ba at ame he ka húgúnâ. 15 Oge me he ka he but me hmetu ka hnyi hnök, ke ne o but adre me ogâ anyidra monu, me elâm hnyimakök: ke adre me he ka ti elöm nya e ka hu vec gadra.

HNYIMAKAN 6.

AI öbun, ate me he hmetu kö Iehova; anyin a e ame hia but olou kia, me e ame he ka ometo; e ame hia but kot, k' ame he bi ka lan. 2 Hwabán lo li bong e ame he ka omeli öta: ke hnyi bong a kuniny e ame he ka höi öta, m' ate me he ka möt hnyi hnyimakan. 3 Ke so ate me wâhmakhmeto, e so ate me he hoton he ka ö Iehova; e hmâ bi hnen hna he, helâ me hnyomakatu; ke e ame he ka o köta helâ me we, helâ me we a biliny ame hú kânâ.

4 Eferaima lö, ie únyi oge me he ka ányá köu? Juda lö, ie únyi oge me he ka ányá köu? anyin ae úcú anyibu so me úlá hnyi hnyomakatu, ke helâ me dán hau ae logot hia. 5 Anyin a wale, oge hia but kuc' ödra a deny je perofeta; oge hia but hling' ödra ge je ifucin hnyimök: ke ame he but je hna owisa gam helâ me melam. 6 Anyin ae wek ibetengió, ke ca but bi; ke beónua he ka wâhmakhmetoâ Khong

hon je hudiny leú. 7 Ke adre hia but hanyáúâ úhilihinyköu helâ me Adamu: k' adre me iyawö nya eling. 8 Gileada taun anyin tavat adre me ányá hulö, k' ame kong ut ge dra. 9 Haba bunyen a tavat bi hut adre me úhlingö hnyi gethen úheny Sekema, helâ me tavat sei adre me mokulec at: eke, adre hia but ányá únyi ae ikiki. 10 Oge hia but wâ hnyi lap anyi Isaraela únyi ae ti kong hmönyin; wale bi únyi monu anyi Eferaima, ke kong minya but Isaraela. 11 Ke u minya Juda lö, adre hia but thu bongon subö hwit hobi köu, waleji hnyi hnök hna ohmeto lakeik úhedra hnyi hna bá.

HNYIMAKAN 7.

KE oge me be ometo Isaraela, me ame manen bi thö hwakecin ae monu anyin Eferaima, me hulö anyin Samaria; anyin adre me thoi: ke ame didro tavat venöu, ke haba deö at venöu adre me soh eú hnyöu. 2 Ke adre me ca únykúme bi hnyi je hnyekudra, a inya oge me únykúme ta je hwakecidra hia ae kong: ke walang ang ame theling ödra hnen bi anyidra ta je huliwa; ke e bi hnyi hnyimakök. 3 Adre me osenyinâ than ge anyidra bi monu, me je taben hnen anyidra je thoi. 4 Ödra tavat bi únyi monu hia; ödra helâ me wahnainyá ame khutâ at ame inyá; e ame ca ányáwia hmetu meic hwân hnyi hna up falawa ke ne o but ame khibi thö. 5 Ke haba hnyi bong bongon tuböta ame mok je taben ge úkahwáiny waina; e ame úkhöu hnyam me tavat úhiö. 6 Anyin adre hia but penapena hnyekudra helâ me wahnainyá, ke adre me mokut iyawö bi: ame mokut at ame inyá ö 'dra hnyi lit hia; ke hnyi hnyomakatu e ame han helâ me meic ame ubâhlâ. 7 Ödra kahwa hia but helâ me wahnainyá, ke adre me ohia tavat owis' ödra; a ta but anyidra je than: e ba ke at gadra ame hongot könya. 8 Eferaima ame úkhacaköu me je hnyeji; Eferaima ame helâ me ong areto adre ca wia. 9 A hia but ohia hwegien hnen je atkanyua, ke ca khana bi: eke, úsa khaca but tehüen, ke ca khana bi. 10 Ke ame ohnatho hnen bi gan anyin Isaraela hnyi hnyimakan: ke so bi adre me ca hmetu bi kö Iehova Khongudrin, me elâm e, hnyi je únyi hia eling. 11 Ke e úcú Eferaima me biny ae únyibaú me ba hnyekon: adre me hongot ka Aigupito, me he Asuria ai. 12 Ödra ka he me

oge me he ka thong ütök ert hudrin ; oge me he ka hagut' ödra helä me je meno ame gä ethö : oge me he ka kuc ödra helä me hna löng hnyi anyidra úkhacaköu. 13 Ekölö gadra ! anyin adre hia but he monu gak ; hang' ödra but ! anyin adre hia but hanyáúä gak : oge me beücü melidra, ke adre me sit hofuc thoi bi gak. 14 Ke ame ca hia but tenge je hnyekudra könya, ke adre me kuku tenge bi hon hnödra je hna mokut : adre me úkhacaköu ge hwit me waina, k' adre me úkhin fuc mönya. 15 Oge hia but n' ödra me ohwegiä je hnyamödra, ke so bi adre me únykúme úkönguny úcük. 16 Adre me hmetu ke ca káu bi ethö görany ; ödrin úcú me cafana ae iyawö ; k' ame he anyidra je taben ka ta ge hele vat can ae hwege ifucidra : wale hnân hlum' ödra hnyi hnyei Aigupito.

HNYIMAKAN 8.

IP ju trutru hnyi hnyimâm. E ame he úcon lap anyi Iehova helä me aeto : anyin adre hia but hanyáúä anyik úhihin-köu, me khikhin ge anyik hnanyibu. 2 Ke adra me he ka tenge könya, ka habe, Khonguk lö, öhmun hnyat Isaraela ke khanö u öhmun. 3 A hia but Isaraela degec so : me ame he ka hnu e hnen iwahnaihmi-öny. 4 Adre hia but otilä je than, ke ca únyi bi gak ; adre hia but bi taben, ke ca khanö nya : adre hia but ányä anyidra sileva me gol hnân anyidra je idola, m' adre me ka subä degeci ödra bi. 5 Samaria lö, e ame hia but hota degecä nokon kau unyâm ; k' ame ubáhlä thö anyik hmönyin ködra : ke ne o but kehö adre me ca he ka vhenö hwakecin ae so? 6 Anyin a únyi ga Isaraela e ; k' ame ányä e hnen at huliwa, ke ca Khong bi e : eke, adre me he ka kot omomonö nokon kau anyin Samaria. 7 Anyin adre me belökä ang, me adre me he ka meno höu : ke ba gan hwit ame kú, ke ba falawa hnyi boviny : ke a ne hu, me ame he bi je atkanyua ka utä e. 8 Adre hia but utä Isaraela : ödra bi walang ang unyin je hnyei helä me kaia a ca hnân senyina. 9 Anyin adre me he Asuria ai, helä me asinainy hnyot ame hake he : Eferaima ame hia but hok laweny ge hwaban. 10 Eke, eja ke ne adre ne hok ge hwaban unyin je hnyei, oge me he walang ang ka úkhacaköu ödra ; ke ödrin e hwân he ka úhnyükong tot can hok ge thaniny je taben. 11 Haba Eferaima ame

hia but osehia je taben hut he ka ányä monu, anyin a wale e hu hulö gan can je taben hut. 12 Oge ne sihnalimen káu anyik hnanyibu me je únyi hnân ná a ten thauzan, me adre me únykúme e me únyi a ca únyi hnathu. 13 Ke haba je bwihlany adre me hudo könya, adre me hudo utiö me an e ; ke ame ca he Iehova ka kóp ödra : e ame he walang ang ka únykúme anyidra hulö, me bi hwaban hwakecidra ae kong ; adre me he ka hmetu Aigupito ai. 14 Ke a hia but Isaraela hnying At a op e, me op je uma umen je khong ; ke Juda ame hia but osehia je taun adre up baginy ; ke so bi oge me he ka kunä meic ka hnyi anyin je taun, me me an je uma umen than.

HNYIMAKAN 9.

ISARAELA lö, ca senyin bi me hobä helä me je hnyei ; anyin a u je hia but bi únyi monu me degec Khongom, u je hok at ge hwaban hnyi je hna huje hwit hia. 2 Adre me ca he bi ka ha ö'dra ge hna huje hwit, me hna hlic wan vine, ame he ka hia gan waina ae teb únyi. 3 Adre me ca he ka labä hnyei i Iehova ; he ame he Eferaima ka hmetu Aigupito ai, me an je meno ae ikiki hnyi Asuria. 4 Adre me ca he ka hingälä waina kö Iehova, ke e ame ca he ka senyin ködra : haba anyidra je hut e úcú me han anyin tavat adre me hnyamok ködrin ; adre me he hia ka kong tavat adre me an e : anyin a haba ö'dra jeü me hnân behan bi, ke ame ca he ka o ka hnyi uma umö Iehova. 5 Ieü öbun e he ka ányä hnyi bonginy úkhacaköu ae únyi hnathu, me hnyi bonginy bijeü anyi Iehova? 6 Anyin a wä bi adre me he me degec hna úhangö, ke so ame he Aigupito ka úkhacaköu ödra, k' ame he Nofi ka könim ödra : haba hnen anyidra je sileva ae hmanenang, me ame he ka watetaföcö : k' ame he ka hnen iwadekong hnyi umödra je uma mano. 7 A o thö je bong bi hwaban, a o thö je bong he ka öuco ; k' ame he Isaraela ka wä e : at ae monu perofeta, ke monu at ae tren hanu, anyin ae se but ányâm je hulö, ke gan hmä úöhüköti. 8 Ke haba Eferaima, me at hmäkä ehac unyin Khonguk : ke haba perofeta hnyi deny je gethen hia ae hu hnewe anyin at ame töu hnewe, k' adre me ivinö bi hnyi uma umen Khongon. 9 Adre me ka oikiki ödra, heläji me hnyi je bong bongu Gibea : ke e ame he ka

únykúme hwakecidra ae kong, me bi hwa-
ban anyidra je hulö. 10 Oge me ö Isaraela
helâ me je wan vine hnyi hnyebuba; oge
me wâ lakamöbun helâ me je wan meta a
bân: ke adre me he kö Baala-peora, ke ka
hn' ödra bi ka únyi hnân ohmema, me
adre me tha ikiki me únyi adre me hnyok
kâu. 11 Ke haba at Eferaima, me ame
he ka gâ thö anyidra hmanenang helâ me
meno ame gâ: k' adre me ca he bi ka
hnokoâ, ke erkin, ke oerkinâ. 12 Eja ke
ne adre ne hat je lakudra, me oge me he
bi nya ka oh' ödra unyin tavat, me me
ba hmetu at a kolon: eke, ekölö gadra bi,
iny ka he ka digic ödra! 13 Adre me tä
Eferaima hnyi hnyei ae so, helâ me hnök
hna wâ Turo: ke so bi ame he Eferaima
ka hom je lakon ka at úhlingö. 14 Iehova
lö, ham ködra; ieü u me he ka ham? ham
ködra hnyok ame köluhabú, me li bai ae ba
dân. 15 E hnyi Gilegala hwakecidra ae
kong; anyin oge me hüköti' ödra eling: ke
oge me he ka ob' ödrâ únyi hnyi umök uma,
can anyidra ta je huliwa ae kong: oge me ca
he hmetu bi ka betenge gadra; tavat úkhin
fuc je latuhödra bia. 16 Adre me kot at
Eferaima, ke meleca thö iwân gadra k'
adre me ca he ka wa: eke, eja ke ne adre
ne hnokoâ, me oge me he bi nya ka hlingâ
lakudra adre me betenge gan. 17 Ame he
bi Khonguk ka hota degeci ödra, anyin
adre me ca löng kâu: me adre me he ka he
baú hnyi wanben ta je hnyei.

HNYIMAKAN 10.

HABA Isaraela, me vine, at ame kü
hlau, k' ame wa je wan; hoton
úganiny je wan e, e ame osehia je taben
hut; hoton úsoiny iny hnyei, adre op je
veto ame tot ae hmanenang. 2 Ame kia
but je hnyekudra; ke walang adre me he
ka owisa anyidra hulö; e ame he ka thö
degecâ anyidra je taben hut, me okongoâ
anyidra je veto ame tot. 3 E hnathu adre
me he walang ang ka ha, ka habe, E ba
but tuhöta: anyin ate me ca outö Iehova;
ke haba than, ieü ae khana he ka ányâ
hobi köta? 4 Adre me ha ta je hofuc baú,
adre me khemanyn thoi hnyi hnödra hna
úhinyökou: anyin a wale ame o but hna
owisa helâ me je úö adre me mekinyn hnyi
je utkânâ adre me belökâ. 5 Ame he tavat
adre me laba hnyi Samaria ka hmak hnye-
kudra ge je nokon kau hnyi Beth-aven;

anyin ame he aten ka tenge can e, ke tavat
bihut hnyin, waleji adre hobeluâ ge hman-
nanginy, anyin ae hia but e. 6 Ke adre
me he minya ka hom e Asuria ai hnân
bwhilany kö Jareba than: ame he Eferaima
ka hmehma, ke ame he Isaraela ka hmehma
ge hnen hna úhnenamö. 7 Haba Samaria,
me adre subâ degecâ tuhan, helâ me je ong
utö hon köiö. 8 Adre me he ka ohia minya
je dok ae görany hnyi Aven, wale hulöiny
Isaraela: ame he ka kü úö ae údedö me
watetaföcö hon anyidra je taben hut; ke
adre me he ka ha ka je bucen, ka habe,
Tubi öhmun ju; me ka je hut, ka habe,
öbun kölu takú öhmun ju. 9 Isaraela lö,
u je hia but ányâ hulö hwân hnyi je bong
bongu Gibeaa: adre me tot eling, me me ca
he ka khöü ödra hnyi Gibeaa hnen vat me
lakon hulö. 10 Iny ka wek oge me he ka
bi hwaban ködra; ke ame he je hnyei ka
úkhacaköu úcúdra, ödra ka c' ödra can
anyidra li monu. 11 Eferaima kau ae
kbenen, at ame beututo hwit; ke oge hia
but hanyâúâ nyin ae hmanenang: oge me
he ka ip at ka hije hu Eferaima; k' ame
he Juda ka wia kânâ, k' ame he Jekob ka
trohnenâ kânân kânâ. 12 Te hatungen
ju öbun hnyi hwakecin ae wisa, menâ ju
hoton ibetengiö; he th' öbun ka trohnenâ
kânöbun kânâ ae itremacat: anyin a úen
ang he ka elöm Iehova, ke ne o but e ame
o me öta hubun hwakecin ae wisa. 13
Öbun e hia but belökâ hwakecin ae kong,
me meno hulö; öbun e hia but an waniny
thoi: anyin a u je labageju ka hnyi dem
gethen, me ányâm tavat hwege ae se hia.
14 Anyin a wale ame he ka o imonumonuny
unyn em hnyei, k' adre me he ka ohia hnâm
je hnabâ hia, helâ me hnö Salemana hna
ohia Beth-arebela hnyi úen vat: waleji adre
me sa je wanakat me lahinyödrin. 15 K'
ame he Beth-ela ka ányâ helâe köbun can
hwakecibun ae kong: ke adre me he ka
subâ degecâ than Isaraela hnyi hnyomakatu
kong.

HNYIMAKAN 11.

HNYI úen ae tiga wanakat Isaraela,
oge me betenge gan, me hawâ nö-
kuk úheny Aigupito. 2 Adre me haw'
ödra, me adre me he but únyi gadra: adre
me bi hut ka je Baala, me leü utö ae bo so
ka je idola. 3 Ke so bi oge me nö Eferaima
he ka he, oge me delu' ödra ge li benyik;
ke ca khan' ödrin a oge me ometu ödra. 4

Oge me lili ödra hnyi je tö anyin at, wale a töiny ibetengiö; ke iny úcú ködrin me at ame hom degecá hna úhúkálákouá únyi hnyi je waidra. 5 E ame ca he bi ka hmetu ka hnyi hnyei Aigupito; k' ame he bi at Asuria ka tuhan, anyin adre me höcö he ka hmetu. 6 Me ame he ka nyiká hele vat hnyi anyin je taun, me ohia je venyáiny, me ön ödra, can hnödra je hna úhnenamö. 7 E hwege lakeik he ka digic nya: eja ke ne adre ne hongot kö Beönua, me ba at a khaca ame he ka ogáná e. 8 Eferaima lö, oge me he ka kámáu ka hna degeci u? Isaraela lö, oge me he ka kámáu ka hnö u? oge ma kámáu ka wiö u helá me Adema? me ip u helá me Zeboim? k' ame hwiö öünykúmik eü hnyi hnyekuk, k' ame tha kú gan hmá thö anyik je tang betenge. 9 Ke oge me ca he bi ka ohwádá anyik hmönyin ae gan, ke oge me ca he hmetu bi ka ohio Eferaima: anyin a inya Khong, ke ca at bi; At ae Kap hnyi wanbám: me oge me ca he ka delec taun. 10 Adre me he ka hnu hotu Iehova, hnyat adre me he ka kuku helá me liona: anyin a e ame he ka kuku thö, me ame he ka o je wanakat úhedra jimeú hnyi öbubuny. 11 Adre me he ka o me öbubuny helá me meno ame gá úheny Aigupito, ke helá me biny úheny hnyi hnyei Asuria: ke oge me he ka olab' ödra hnyi hnyin umödra je uma, haingö Iehova.

12 Eferaima ame wadrö nya ge thoi, me lap anyi Isaraela ge tang iyawö: ke haba Juda e ame tiga tha musu me Khong, ke ame hnathu ka At ae Kap.

HNYIMAKAN 12.

EFERAIMA ame an ang, me wadring hoton ang hwei: e ame osehia thoi me öba wan hnyi je bong; ke ödrin e úhi-hinykóu me at Asuria, me hok wakaco Aigupito ai. 2 Ke hu ivinö anyi Iehova me Juda, ke e ame he ka bi hwaban kö Jakob hoton deny je gethen; e ame he ka bi hwaban káu hoton hnen hna ányá. 3 E ame kát ohmáiny can liamekeiny mē hnyi hnyok; ke e ame újöng ka Khong hnyi anyin hmai: 4 eke, e ame újöng ka angela, me hwege bi: e ame tenge me khöú káu: e ame wá e hnyi Beth-ela, ke e ame úhnenamö möhmun eling; 5 wale Iehova Tuhan sabaoth; Iehova, wale hnán úny-kúme e. 6 Anyin a wale hmetu ju ka

Khongom: tuö ju ibetengiö me hna owisa, ke halubahingen bala Khongom.

7 E at ame úcú omjeú, e hnyi hnyamen tulut iyawö; e ame weny he ka seda. 8 Ke haingö Eferaima, ka habe, E hnathu, iny tren dut omjeú, oge wá but tang omjehek: adre me ca he ka wá hnyikonguk, wale a hulö bi hnyi anyik ta je huliwa hia. 9 Ke inya Iehova Khongom únyi hnyi hnyei Aigupito; oge me he hmetu bi ka olabö u hnyi je uma mano, heláji me hnyi je bonginy bijeú ae únyi hnathu. 10 Oge hia but fuc minya ka je perofeta, me osehia je hna omanená; me ha je úhöüct a deny je perofeta. 11 E kong ut Gileada? e hnathu ödra únyi baú; adre me hudo je bolok hnyi Gilegala: eke, haba anyidra je taben hut me helá me je vetaúnyi hnyi je deny utetebelökiny ta hnyei. 12 Ke haba Jakob ame kec ka hnyi utkáná hnyi Aram, k' ame huliwa Isaraela hnán he ka bi hwaban momo, k' ame tuö mamoe hwaban áián. 13 Ke haba Iehova ame hum Isaraela úheny Aigupito a deny perofeta, me tuö e a deny perofeta. 14 Ke a hia but Eferaima ti okuá hmönyin; anyin a wale ame he ka hnen bi ju dren hon, k' ame he Tuhan ka ohmeto káu hnen hna úhaikonguny.

HNYIMAKAN 13.

AME fuc Eferaima, me ame öbubuny ehe; ke e ame ka ogáná e hnyi Isaraela: ke e ame hulö but ga Baala, me ame mokcu. 2 Ke walang ang adre me kong tot, k' adre me ányá je idola hobi ködra adre me oköiá ge anyidra sileva, a je idola hoton anyidra metá, huliwa anyin at tretrao hia: k' adre me ha ge je únyi e, ka habe, E so ame he tavat adre me he ka hudo hut ka drem je nokon kau. 3 Anyin a wale adre me he ka helá me úlá hnyi hnyomakatu, ke helá me dán hau ae logot hia, ke helá me unen hwit ame ou ang dö únyi hnyi hna huje hwit, ke helá me hai únyi hnyi deny hai. 4 Ke inya Iehova Khongom únyi hnyi hnyei Aigupito; k' ame ca he ka khanö u ke khong ke hake inya thibi, ke ba at úhömeli ke hake inya ke. 5 E khanö nya u ehac hnyi hnyebuba, hnyi hnyei ae hwahwacit. 6 Adre me ka sekudra hoton ö'dra jeú; e sekudra thö me ame bi gan je hnyekudra: anyin a wale adre me hnying nya. 7 Anyin a wale iny

ûcû me liona ködra, oge me he ka tue eû hnyi gethen helâ me lepad : 8 ke oge me he ka ûkhanö mödra helâ me bea adre me hûgûnâ lakon, ke oge me he ka kia thamua tangel oûnykûmidra : ke oge me he ka ön ödra eling helâ me liona ; ame he ka olou ki' ödra hnen menoiny hnyot. 9 Isaraela lö, walang hna hangö u, a g' ame ve u mönya, at hadruö u. 10 Ewa tuhâm, me me omeli u hnyi ânyâm ta je taun hia thithö? ke ânyâm tavat owisa köu, waleji u je ha, ka habe, Ham kõnya than me je taben? 11 Oge hia but ham köu than hnyi anyik hmönyin, ke hûgûnâ e hmetu hnyi anyik wathethöt. 12 Adre hia but lan hulö anyin Eferaima ; adre hia but hitangen anyin monu. 13 Ame he ka o kâu vec, helâ me momo ame he ka hnokoâ : e nokon ae ba metâ ; anyin e ca so e ame bec he ka kölu. 14 Oge me he ka hûgûn' ödra ûnyi hnyi maniny erkemok ; oge me he ka omeli ödra ûnyi ge mok : Mok lö, ewa ânyâm je úokonguny? Erkemok lö, ewa hnâm hna úhangö? adre me he ka ikhâlâ ietra ge li emakök. 15 Eja ke ne a ne se hia but e unyin je liamekeiny, ame he bi ka o ang hwei wale ang anyi Iehova ûnyi hnyi hnyebuba, me me hwahwacit anyin pupua, me hme belen an : e ame he ka söh tang omjeû hia ae hmanenang. 16 Ame he Samaria ka hijen anyin bi hulö ; anyin e ame hia but ûkhin fuc me Khongon : adre me he ka ta ge hele vat ; adre me he ka sa lakudra je mending, me kave omomo a je erkin.

ISARAELA lö, hmetu ju kö Iehova Khongom ; anyin a u je ta but ge ânyâm hulö. 2 Hom dö je ifucibun ke hmeto ju kö Iehova, ha thö kâu, ka habe, Hom dö hulö hia, me kap ju ûnyi ae so : me öhmun e he ka ham je hudiny hnyimöhmun. 3 Ame ca he Asuria ka omeli öhmun ; öhmun e ca he ka tabâ je hors : ke öhmun e ca he hmetu bi ka ha ke je huliwa anyin je hnyamöhmun, ka habe, Obun je konguhmun : anyin ame wâ unyâm betenge ge tavat a mokcu kamödra. 4 Oge me he ka osoâ hna digic nya gadra : anyin ame hwiö gadra anyik hmönyin. 5 Oge me he ka helâ me dân hau kö Isaraela : e ame he ka vhöng hela me obedila, me sit ut helâ me Lebanona. 6 Ame he ka gan je angin, ke ame he hmanenanginy ka helâ me elaio, ke bunen ame he ka helâ me Lebanona. 7 Ame he tavat adre me laba hnyi hmenon ka hmetu ; adre me he ka möt hmetu helâ me hwit, me vhöng helâ me vine : ame he ka helâ me wainainy Lebanona bunen. 8 Ame he Eferaima ka ha, ka habe, Hnân eû hmetu kõnya je idola? oge hia but thu kâu ke oge me he ka wâ e : iny helâ me köp ae hât ; adre me he ka wâ gak wan gam. 9 Ie at ae metâ, me me wâ únykûme ta je ûnyi eling? ie at ame wâ wia me me wâhmakhmeto ta je ûnyi e? anyin ae wisa je gethen de Iehova, ke ame he at ae wisa ka vhenö ; ke ame he tavat hanyâûâ ka ta hnyin.

JOELA.

HNYIMAKAN 1.

WALANG hofuc ho Iehova waleji ame a kö Joela nöku Pethuela.

2 Öbun wahingat lö, löng ju hofuc ang, ke tevehlöng ju öbun tavat aten hnyei. Hawa, e hu ûnyi helâng hnyi bongubun je bong, ame ne hnyi bong bongon lakamöbun? 3 Thumeto thö lakubun ge ûnyi eling, ke ame he lakubun ka thumeto lakudra bi, ke hamen lakudra ka thumeto dö a biliny.

4 Haba kolon ame hna ge lakon wahamon, me ame han e hnen wahamon veto, ke haba ju hna hna hnen wahamon veto, me ame han hnen öböu, ke haba hna hna hnen öböu, me amé han hnen walewi. 5 Hmak d' öbun tavat öbun e ic monu, ke tenge ; ke haba öbun tavat hia öbun e ic waina, kuku tenge thö, ge waina ae hnebwia ; anyin adre me subâ degezá e ûnyi hnyi je hnyimöbun. 6 Anyin ame o but ke hnyei ka hnyi ik hnyei, a tavat hwege, ke ca

hnân aû ; haba je nyudra, me helâ me nyon liona, ke haba je ohûlûsinaidra, me helâ me ohûlûsinainy liona. 7 Ke e ame öba wan anyik vine, me thu anyik imeta : k' ame okalaötâ e, me degec ; ke hau but je vheiny. 8 Tenge thö, helâ me hlu ame weikâ ecmano ae gan nân can äân hlu a e. 9 Adre me subâ degecâ hudiny han me hudiny ic ûnyi hnyi uma umö Iehova ; k' ame tenge tavat bihut a lathnyabai Iehova. 10 E ba but wan ta hnyeï, ame tenge kânâ ; anyin ae ba but hwit, a hme thö waina ae teb ûnyi, ke ba wakaco. 11 Hme-hma ju öbun tavat belök, tenge th' öbun tavat huliwan vine, can hwit me bali ; anyin ae kong ut hwit hnyi ta hnyeï. 12 E melea thö vine, ke ba but meta ; a mok dö rimona, me pama, me tapua, wale je ûöiny hia hnyeï : anyin ame aû but senyin unyin tavat. 13 Tavat bihut lö, oweik' öbun ju, ke tenge ; tavat huliwan taben hut lö, kuku tenge thö ; lathnyabainy Khonguk lö, ai öbun, mokut hnyi lit hia hnyi mano ae gan nân : anyin ae ba hmetu hudiny han me hudiny ic hnyi uma umen Khongubun. 14 Thu bongon ju he ka ca han, hawâ thö úkhacaköu ae ûnyi hnathu ; úkhacaköuâ thö wahingat me aten hnyeï hia ka hnyi uma umö Iehova Khongubun, ke tenge th' öbun kö Iehova. 15 Ekölö ge bong ! anyin ame he jem bong bonga Iehova, ke e ame he ka o helâ me hnaühangö ûnyi ge Ataekhanahia. 16 Hawa, ame ca ba jeü gata, eke, me senyin me hobâ hnyi uma umen Khonguta ? 17 A bobot ut je hátong eü hnyi kânâ ; e ba but önyen je uma jeü, e amam but je omhani ; anyin ae melea thö hwit. 18 Ekölö ge ütengien je meno ! ame hlohlo je hnahat kau anyin ae ba but ö 'dra ; eke adre öba wan je hnahat mamoe. 19 Iehova lö, inya oge me tenge köu : anyin a hia but meic thong jeü an je meno hnyi hnyeubaba, ke haba bâhlân ame hia but an je ûöiny hnyot hia. 20 Eke, je menoiny hnyot adre me momokhon unyâm : anyin e hme but je deny köiö, ke a hia but meic thong jeü an je meno hnyi hnyeubaba.

HNyimakan 2.

TÛA thö trutru hnyi Ziona, me olungâ haten hnyi anyik bucen ae kap ; öbubuny ju öbun hia aten hnyeï ; anyin ame he jem bong bonga Iehova, ae hakekeny jut ; 2 bonginy lit me menekholom, bonginy ülâ me khömet, helâ me melaminy hnyo-

makatu ame ulolo hon je bucen ; hnyeï ae gan me hwege, e ba helâe ehac, ke ame ca he hmetu ka helâe, hnyi je hunainy je dö ae se hia. 3 Ame han meic hnyi hnyimaködra, ke haba bâhlân ame hlâ hwabödra : haba hnyeï hnyi hnyimaködra, me helâ me hnyeï Edena, ke hnyeubaba ae ba wan hnyi hwabödra ; eke, ke ba at ame kec möt ge ioidra. 4 Haba unyidra me helâ me unyin je hors ; ke adre me wadring helâ me je hors adre me tabâ. 5 Helâ me hwan je kariota hnyi ban je bucen hwan gâ a ödra, ke helâ me hwan bâhlân meic ame thong thatünyin hwit, helâ me tavat ae hwege adre me tot metâ he ka vat. 6 Ame öbubuny tavat hnyi hnyimaködra ; k' ame löhau ta je hnyimak hia. 7 Adre me wadring helâ me tavat hwege ; k' adre me ölö hanyâüâ hak veto helâ me tavat vat ; k' adre me ve vheno dedra je gethen, ke adre me ca saü ûnyi hnyi anyidra je deö at. 8 Adre me ca ühneki ; k' adre me ve vheno dedra je gethen : adre me thu vat me omjehen vat, k' adre me ca saü hnyi dedra. 9 Adre me utut ka hnyi taun ; adre me wadring hon hak veto ; adre me ölö ka hnyi hnyin je uma ; k' adre me didrö hnyi je mamalama helâ me at venöu. 10 Ame öbubuny hmeledrany hnyi hnyimaködra ; k' ame jijing drany : ame menekholom seüno me tehi, k' ame ca melam ta je okhü ; 11 ke ame fuc Iehova hnyi hnyimakan anyin utbavat ; anyin ae gan hmâ hnen hna hunuma ; anyin ae hwege at ame ohwâdâ hwan hofuc : anyin ae gan hmâ bong bonga Iehova me hnân outen e ; ke ie at ae hwege he ka hokhnyok hnyin e ? 12 Ke so bi, haingö Iehova, ka habe, Wanglang ang hwiö thö kõnya ge je hnyekubun ae bekhöt, me änyâ ca han, me tenge, me tenge thungaü : 13 kia but je hnyekubun, ke ca kia je úkhaü bi, me hwiö thö kö Iehova Khongubun : anyin a e at ame betenge baü, ke betenge vec, ke bec he ka hmönyin, ke gan hmâ anyin ibetengö, k' ame ka ietra hulö. 14 E khañö ia, a g' ame ca he bi ka hmetu me ietra, me ip bi hnahic hwaban, wale hudiny han ke hudiny ic hobi kö Iehova Khongubun.

15 Tûâ thö trutru hnyi Ziona, thu bongon ju änyâ ca han, hawâ úkhacaköuâ thö ae ûnyi hnathu : 16 úkhacaköuâ thö tavat, okabâ thö úkhacaköu, hawâ thö wahingat, úkhacaköuâ thö ta je wanakat, me tavat adre me i : hamen at a tep faipoipo ka he ûnyi hnyi hnyeuleny, me hlu a tep faipoipo

únyi hnyi ong hnyeuleny. 17 E so ame he tavat bihut, a je athuyabai Iehova ka tenge hnyi wanben poretiko me taben hut, me ha, ka habe, Iehova lö, betenge ju ge lakem, ke ca he ka hna jekhom me hnân taben haikongoâ, me he ka musi ödra hnen ta je hnyei: anyin a ieu ame he ka ha hnen je hnyei, ka habe, Ewa Khongudrin?

18 Me Iehova ame ciâ ge iny hnyei, me betenge ge lakeiny. 19 Ke Iehova ame thu me ha ka lakeiny, ka habe, Wâ bi, oge me he ka kunâ köbun hwit, me waina, me wakaco, me me sekubun hnen je únyi e: ke oge me ca he hmetu ka hn' öbun me hnân haikongoâ hnen ta je hnyei: 20 ke oge me he ka öúsákâúöâ m' öbun utbavat únyi hnyi hwadrö, me obâ e ka hnyi hnyei ae hwahwacit me ba wan, haba hnyimakan e ka hnyi köiö e deiö, me hoton ka hnyi köiö e jiö; ke ame he ka o anyin bokong, ke ame he ka o bunen anyin bobot, anyin a e ame hia but ányâ ta je únyi ae gan. 21 Hnyei lö, ca ot bi, senyin dö me hobâ; anyin a hia but Iehova ányâ ta je únyi ae gan. 22 Je menoiny utkânâ lö, ca ot bi; anyin ame kü jeú an je menö hnyi hnye-buba, anyin ame wa ta je úö, ke ame wa gan hmâ meta me vine. 23 Ke senyin dö, öbun je lakon Ziona me hobâ ga Iehova Khongubun; anyin a e ame ham köbun we a bán ae úcú, ke e ame kunâ köbun we, wale we a bán me we a biliny, hnyi tehi a bán. 24 Ke ame he ka unöngöt je hna huje hwit ge hwit, me bahihingölö thö je tengen waina me wakaco. 25 Ke oge me he ka bi hwaban köbun je huna, waleji a an hnen wahamon veto, me öböu me walewi, me nokon wahamon, wale anyik utbavat ae gan oge kunâ köbun. 26 Ke öbun e he ka han me sekubun, me ogânâ iö Iehova Khongubun, at ame hia but ányâ únyi hnân láia unyibun: ke ame ca he balua bi lakeik ka hmehma. 27 Ke öbun e he ka wâ a inya hnyi wanben Isaraela, ke inya Iehova Khongubun, ke ba ju ke at: ke ame ca he balua bi lakeik ka hmehma.

28 Ke hwaban e, oge me he ka hingálâ hanuk hon tavat hia thithö; ke ame he lakubun obaga me wahu ka perofeta, ame he wahingatibun ka bwo je bwi, ame he wahidróu unyibun ka wâ je hna omanená: 29 ke hnyi je bong eling oge me he bi minya ka hingálâ hanuk hon ta je athnyaba baga me momo. 30 Ke oge me he ka omanená je haten ethö hnyi drany me eang hmeledrany, wale dra, me meic, me

hai ame sâ göranyai. 31 Ame he ka wia seúnö me me lit, me tehi me me dra, me ame he ka o but bong bongu Iehova, bong ae gan hmâ ke hnân ouden. 32 Ke ame he ka e bi, a haba at ame he ka hawâ iö Iehova me e ame he ka möt: anyin ame he ka hu tavat kec möt hnyi bucen Ziona me Jerusalema, helâji me hna ha hnö Iehova, ke unyin je kolon, hnyat a haw' ödra ga Iehova.

HNYIMAKAN 3.

A NYIN a wâ bi, haba hnyi je bong eling ke ün eling, iny ka he ka hom hmetu je bâ wale a at Juda me Jerusalema, 2 me oge me he bi ka úkhacaköuâ je hnyei hia, me hum ödra ka hnyi hnyigöulen bucen anyi Jehosafata; ke oge me he ka úhnei m' ödra eling can lakeik me jekhöök a Isaraela, wale adre ovesê ka hnyi je hnyei, me khenâ ik hnyei. 3 Ke adre hia but uglekóbâ lakeik; k' adre ham da me hwaban momo hnyi gethen, k' adre úcú waina me hwaban hlu, m' adre me he ka ic. 4 Eke, Turo me Sidona lö, me je ke keihen hia Filisiti, ieu gabun könya? hawa, öbun e he ka ham könya hwaban? ke öbun e ne bi hwaban könya, me oge me he bi nya ka ie ohmeto hwaban eling ka hnyi hon je böbun. 5 Anyin a öbun e hia but hom anyik sileva me anyik gol, me sukhö-unâ je omjehek ae hmanenang ka hnyi je uma umen Khongubun: 6 ke öbun e hia but úco lakon Juda me Jerusalema ka at Heleni, m' öbun e he ka öúsákâú' ödra ge idra: 7 wâ bi, oge me he ka hoi' ödra únyi hnyi dok waleji öbun e úcú ödra ka hnyin, me ohmeto hwaban ka hnyi hon je böbun; 8 ke oge me he ka úco lakubun obaga me wahu ka je lakon Juda, k' adre me he bi ödra ka úcú ödra ka at Sheba, hnyei ae sákâú: anyin a hia but ha Iehova.

9 Haimemenâ thö e ka ta je hnyei; penapena thö vat: bwebwelâ thö tavat hwege; e so e hakekeny me ölö thö tavat vat hia. 10 Kokot anyibun je únyi hnân wia kânâ, me me ta je bele vat bi, ke anyibun je hele subö vine, me me ta je ö bi: e so ame he at ae senyin ka ha, ka habe, Iny hwege. 11 Logot öbun, ai öbun je hnyei hia igigilö, ke úkhacaköu thö: Iehova lö, oâ but kâe ányâm tavat hwege. 12 E so ame mweimwei je hnyei, me o ka hnyi hnyigöulen bucen anyi Jehosafata: anyin oge me he ka laba eling he ka owisa je

hnyei igigilö. 13 Inâ but ûnyi hnân subö hwit, anyin a hmahmat ut widrany: ai öbun, ututo ju; anyin ae unöngöt dö hna hlic wan vine, ame bahihingölö je tangen; anyin ae gan hmâ hwakecidra ae kong. 14 Ödra se, ödra se hia hnyi hnyigöulen bucen hna owisa! anyin ae hakekeny jut bong bongu Iehova hnyi hnyigöulen bucen hna owisa. 15 A lit ut seünö me tehi, ke ame ca melam ta je okhû. 16 Ke ame he Iehova ka kuku hwege hnyi Ziona, me fuc ûnyi hnyi Jerusalema; ke ame he ka jijing drany me hmeledrany: ke haba Iehova e ame he ka huân luabaduöng ka lakeiny, me hnaabâ hobi kâu lakon Isaraela. 17 Me öbun e he ka wâ a inya Iehova Khongubun, at ame laba hnyi Ziona, anyik bucen ae

kap: me ame he ka kap bi Jerusalema, ke ame ca he hmetu ta je atkanyua ka vheno e. 18 Ke haba hnyi ün eling ame he ta je bucen ka khukhula ge waina ae hnebwia. ke ame he hut ka di ge debai, ke ame he ka khukhutu köien je wagewe Juda; ke ame he pupua ka o ûnyi hnyi uma umö Iehova, me hû hnyigöulen bucen Sitima. 19 Ame he ka ba wan Aigupito, ke ame he Edoma ka hnyebuba ae ba wan, can hna ovecâ lakon Juda, anyin a adre hia but hingâlâ dra ae ba hnyikongon hnyi idrin hnyei. 20 Ke ame he Juda ka laba hmâ, me Jerusalema, ke ne o but hnyi ta je dö. 21 Ke oge me he ka haisoâ drödra waleji oge me tiga ca haisoâ: anyin a Iehova ame laba hnyi Ziona.

AMOSA.

HNYIMAKAN 1.

WALANG hofuc ho Amosa, wale at ame tha e me tavat tuö omeno hnyi Tekoa, ke walang wâhnen ge at Isaraela hnyi je bong bongu Uzia than Juda, me hnyi je bong bongu Jeroboama nöku Joasa than Isaraela, lo li huna ke tiga hia bi hwioi.

2 Ke haingen, ka habe, Ame he Iehova ka kuku hwege hnyi Ziona, me fuc ûnyi hnyi Jerusalema; k' ame he bi ka tenge je hnyaban tavat tuö mamoe, k' ame he ka meleca ban Karemela.

3 Walang hna ha hnö Iehova, ka habe, Can kun ta monuiny Damaseko, eke, can vak, me oge me ca he ka ohavâ hwaban e; anyin adre hia but kokot at Gileada hneu je ûnyi hnân huje hwit a fao: 4 ke oge me he ka kunâ meic ka hnyi lap anyi Hazaela, k' ame he bi ka an hnyi uma ae hmanenang umö Ben-adada. 5 Ke oge me he ka thu venyâiny Damaseko, me suba degecâ tavat adre me laba hnyi hnyigöulen bucen Aven, me at ame hom uciny musi ûnyi hnyi lap anyi Edena: k' ame he ka hom bâ at Suria, Kira ai, haingö Iehova.

6 Walang hna ha hnö Iehova, ka habe,

Can kun ta monuiny Gaza, eke, can vak, me oge me ca he ka ohavâ hwaban; anyin adre me hom bâ hnyei hia, m' adre me hn' ödra ka at Edoma: 7 ke oge me he ka kunâ meic ka hnyi hna up haginy Gaza, k' ame he ka thong degecâ je uma umen than hnyin. 8 Ke oge me he ka subâ degecâ aten Asedoda, me at ame hok uciny musi hnyi Asekelona; ke oge me he ka wia hnyamök üncon Ekerona, me ame he ka hia je kolon hnyi Filisiti, haingen Than Iehova.

9 Walang hna ha hnö Iehova, ka habe, Can kun ta monuiny Turo, eke, can vak, me oge me ca he ka ohavâ hwaban e; anyin adre me hna tavat hia ka at Edoma, ke adre me ca ûnykûme ûhinhinyköu liamekeiny: 10 ke oge me he ka kunâ meic ka hnyi hna up laginy Turo, k' ame he ka thong degecâ je uma umen than hnyin e.

11 Walang hna ha hnö Iehova, ka habe, Can kun ta monuiny Edoma, eke, can vak, me oge me ca he ka ohavâ hwaban e; anyin a e ame hnu liamekeiny mē ge hele vat, me degec ibetengiö, ke ame labö kia but anyin hmönyin, ke e ame tuö anyin wathethöt nyiele balua. 12 Ke oge me he ka kunâ meic ka hnyi Temana, ke ame he ka thong degecâ je uma umen than hnyi Boyera.

13 Walang hna ha hnö Iehova, ka habe, Can kun ta monuiny lakon Amona, eke, can vak, me oge me ca he ka ohavâ hwaban e; anyin andre hia but kave je erkin hnyi Gileada, m' andre me he ka ogânâ idra: 14 ke oge me he ka hû meic hnyi hna up haginy Raba, ke e ame he ka thong degecâ je uma umen than hnyin e, me kuku hwege hnyi bonginy vat, me weneû hnyi bonginy hâu: 15 ke ame he ka bâ tuhödra, e me anyin je taben, haingö Iehova.

HNYIMAKAN 2.

WALANG hna ha hnö Iehova, ka habe, Can kun ta monuiny Moaba, eke, can vak, me oge me ca he ka ohavâ hwaban e; anyin e ame thong je jeien than Edoma me me dröu but: 2 ke oge me he ka kunâ meic hon Moaba, me e ame he ka thong degecâ je uma umen than hnyi Kerioth; ke ame he Moaba ka mok hnyi mede, me kuku hwege, me hwan trutru: 3 ke oge me he ka subâ degecâ at owisa hnyi wanben e, me tha hlingâ e me ta je taben hia hnyin e, haingö Iehova.

4 Walang hna ha hnö Iehova, ka habe, Can kun ta monuiny Juda, eke, can vak, oge me ca he ka ohavâ hwaban e; anyin andre hia but hna degecâ hnanyibu anyi Iehova, me ca tuö hnen je hna otilâ, ke ame omonu ödra anyidra je thoi, waleji a hnu hoton lakamödra: 5 ke oge me he ka kunâ meic hon Juda, k' ame he ka thong degecâ je uma umen than hnyi Jerusalema.

6 Walang hna ha hnö Iehova, ka habe, Can kun ta monuiny Isaraela, eke, can vak, me oge me ca he ka ohavâ hwaban e; anyin andre hia but úco at ae so hwaban sileva, ke at ae theduoc hwaban li tangen hnyeûca: 7 tavat andre me behnyekudra kânâ a e hon ban tavat ae theduoc, k' andre me wia gethen deny tavat ae menyik: k' ame he at me kamen unyin hlu a khaca, me okongoâ iök ae kap: 8 ke andre me mokulec je úkhaû andre me ham hnân haten, hnyi hmelen ta je taben hut hia, k' andre me ijem waina anyin tavat andre me takouê ge hnanyibu hnyi uma umen Khongudrin. 9 Ke so bi, oge me ohia at Amora hnyi hnyimaködra, waleji a helâ me úgöranyn je arasi úgöranynidra, ke úcú me je iwajo tang hwegiödra; ke so bi oge me ohia wan gadra ethö, me je iwân eü. 10 Ke oge me hum öbun minya únyi hnyi hnyeï Aigupito, ke

lili öbun hnyi hnyeubaba fâte je huna, m' öbun e he ka hu hnyeï iny at Amora. 11 Ke oge me oâ ke je lakubun m' ödrin je perofeta bi, ke wahidróu gabun m' ödrin je Nazeri bi. Lakon Isaraela lö, hawa, ca e? haingö Iehova. 12 Ke öbun e habelen je Nazeri ge waina, ke öbun e húna ka je perofeta, ka habe, Ca he öbun ka perofeta. 13 Wâ bi oge me he ka hlic öbun hnyikânâ helâ me úkat ame hlec ae unöngöt ge je thi hwit. 14 Ke ame he ka ba but hna bân anyin at ae hâhâ can, k' ame ca he at ae hwege ka oâ tang hwegien, k' ame ca he at ae gan ka omelö e bi: 15 k' ame ca he bi ka tot at ame hok cafana: k' ame ca he ka kec möt at ae hâhâ can: ke haba khaca, ame ca he at tabö hors ka omelö e bi: 16 Ke haba at ae hwege hnyekon wale unyin tavat ae hwege, me e ame he ka kec ke ba úkhaû hnyi bong eling, haingö Iehova.

HNYIMAKAN 3.

JE lakon Isaraela lö, löng ju hofuc ang wale a ha Iehova úcúben, úcon lap hia oge hom úhny hnyi hnyeï Aigupito, ame ha, ka habe, 2 Oge hia but khanö nya thi bi öbun hnyi ta je lap hia eang hmeledranyn: anyin a wale oge me he ka bi hwaban ta je hwakecibun hia ae kong. 3 Hawa, ame he ka tha he li at a lo, e ka ca tha hnyekudru bi? 4 Hawa, ame he ka kuku liona hnyi hnyot, e ka ba haniny? hawa, ame he nak liona ka fuc hnyi umen bi, e ka ba únyi e ame hom? 5 Hawa, e khana meno ame'gâ he ka ta hon kânâ ge hnewe e ka ba offic hobi kâu? ame he ka fific offic eü hnyikânâ, e ka ba haniny? 6 Hawa, andre me he ka tûâ trutru hnyi taun, ke ame ca he ka ot tavat? hawa, ame he ka hu únyi ae kong hnyi taun ke a ca ányâ bi Iehova? 7 E hnathu ame ca he bi Than Iehova ka ányâ ke únyi a ne ca bân ka omanená weny ka je perofeta a je athnyabainyn. 8 A um dö kuku liona, ie at ame ca he ka outen? a hia but Iehova fuc, ie at ame ca he bi ka perofeta?

9 Haimemenâ thö hnyi je uma umen than hnyi Asedoda, me je uma umen than hnyi hnyeï Aigupito, me ha, ka habe, Úkhaçaköu thö hon je bucenyn Samaria, me wâ je imediököu ae gan hnyin e, me je hna oveçâ hnyi wanben e. 10 Anyin e ca khan' ödra he ka ányâ únyi ae úcú, tavat andre me úkhöúnâ úkongunyn me hna söh hnyi umödra je uma ae hmanenang, haingö

Iehova. 11 Anyin a wale, walang hna ha hnen Than Iehova, ka habe, Ame he ka hu iwahnaihmiony igigilö hnyei; ke e ame he ka hügünâ tang hwegiâm gam, ke adre me he ka söh umâm je uma ae hmanenang. 12 Walang hna ha hnö Iehova, ka habe, Adre me he ka hügünâ lakon Isaraela tavat adre me laba hnyi Samaria hnyi kopiny hna mokut, helâ me at tuö mamoe ame hügünâ únyi hnyi hnyimen liona li can, ame ne ke keihen hnyikönyen. 13 Löng ju öbun, me ohnathoâ úcon lakon Jakob, haingen Than Iehova Khongon sabaoth. 14 Anyin a hnyi bong oge me he ka bi hwaban monuiny Isaraela, me oge me he minya ka bi hwaban ka je taben hut hnyi Beth-ela, ke adre me he ka sö degecâ je baitoiny taben hut, me kölu hnyikânâi. 15 Ke oge me he ka tha kot umen hnyeyun me honivakiny; k' adre me he ka ohia je uma a nyon elefan, k' ame he ka ba but je uma ae gan, haingö Iehova.

HNYIMAKAN 4.

L ÖNG ju hofuc ang öbun je kau hnyi Basana, a öbun hnyi je bucen Samaria, a hnyat öbun e ovecâ tavat ae theduoc, me okongoâ tavat ae vec, a hnyat öbun e ha ka latuhöbun, ka habe, Hom but jem me habelihmun. 2 A hia but Than Iehova khemanyinâ hwakecin ae kap, a g' ame he ka o but köbun je bong adre me he ka hum öbun ge ta je bâlet, me lelö kolon gabun ge je wage. 3 Ke öbun e he ka he ehele hnyi je dok ae hmouca ve cici öbun; ke öbun e he ka khü' öbun ka hnyi Haremona, haingen Than.

4 Ai öbun Beth-ela ai, me ânyâ monu; ke Gilegala ai, me osehia hnöbun je hna hanyâûâ; ke hom anyibun je hut hnyi je hnyomakatu, ke anyibun je ke keihen a libenyitainy hwaban ta bong a kun hia; 5 me hudo thö hudiny ole adre me levenâ, me thu bongon je hut ae betenge me haimemenâ: anyin a wale webun, lakon Isaraela, haingen Than Iehova. 6 Ke oge hia but ham köbun je nyu ae ba tiren hnyi anyibun je taun hia, me ohmiâ jeû hnyi je hnöbun hia: ke so bi öbun e ca hmetu könya haingö Iehova. 7 Me oge hia but behânâ we köbun, ke adre me he bi ka menu hwaban kun ta tehi: ke oge me öta we hnyi ke taun, k' oge me ca öta hnyi ke taun: k' ame ta we ka hnyi hon ke ong dok, ke haba dok ame ca ta we ka hnyin

me ame melecâ thö. 8 Waleling me me he lo li taun ame ne kun ka hnyi taun a khaca he ka ic köiö, k' adre me beic bala bi: ke so bi öbun e ca hmetu könya haingö Iehova. 9 Oge hia but kuc öbun ge meleca me löhau: ke haba wahamon ame an hnyiganiny ibun ta hnyei, me ibun je hnyei vine, me halebun je meta, me halebun je elαιο: ke so bi öbun e ca hmetu könya haingö Iehova. 10 Oge hia but kunâ köbun mok ae cap helâ me hnyi Aigupito: oge hia but hlingâ wahidrou gabun ge hele vat, me hügünâ halebun je hors: ke oge hia but oâ bokonginy hnöbun hna hunuma ka hnyi je hnyingöibun: ke öbun e ca hmetu könya haingö Iehova. 11 Oge hia but ohia keihen gabun helâ me hnen Khong hna ohia Sodoma me Gomora, ke öbun ücü me uthmeic adre oc únyi hnyi meic: ke so bi öbun e ca hmetu könya, haingö Iehova. 12 Anyin a wale, oge me he ka ânyâ helâe köu Isaraela: ke can anyin oge me he ka ânyâ helâe köu, penapena thö he ka iouny me Khongom, Isaraela. 13 Anyin a wâ bi, haba at ame op je bucen, me mâdrâ ang, me omanenâ ka at únykümenen, at ame wia hnyomakatu me me lit, me vheno je dok ae görany hnyi hmeledrany; haba ien e, me Iehova Khongon sabaoth.

HNYIMAKAN 5.

L AP anyi Isaraela lö, löng ju hofuc ang wale oge me ha hnân khumöng tenge gubun. 2 A ta but hluiny Isaraela; e ame ca he hmetu bi ka tot: adre degec e hon kânân kânâ, e ba at ame he ka otilâ e. 3 Anyin a walang hna ha hnen Than Iehova, ka habe, Haba taun ame he ke wan thauzan úheny hnyin, me ame he ka wan haded biju kolon; ke haba at ama he ke wan haded úheny hnyin, me ame he ka ten biju kolon, hobi kâu lap anyi Isaraela. 4 Anyin a walang hna ha hnö Iehova ka lap anyi Isaraela, ka habe, Elöm nya th' öbun, m' öbun e he ka möt: 5 ke ca elâm bi hnyi Beth-ela, ke ca didró ka hnyi Gilegala, ke ca hanyâûâ Bere-seba ai: anyin e hnathu ame he Gilegala ka bâ, ke ame he ka únyi baú Beth-ela. 6 Elöm Iehova th' öbun m' öbun e he ka möt; wâ e nye gâ but helâ me meic ka lap anyi Josefa, me an e, ke ba at hnyi Beth-ela he ka ume: 7 öbun tavat öbun e wia hna owisa me me helâ me khöhlöng, me khüâ hnyikânâi hwakecin ae wisa; 8 elâm dö at ame ânyâ

kukuûnyi me orion, k' ame wia hmenon mok ka hnyi hnyomakatu, at ame omene-khulumo lany me me lit; k' ame hawâ köien köiö ae gan me hingâlâ ka hnyi kânâ: Iehova ien; 9 at ame ie oâ hnaû-hangö ka at; ae hwege, me ame o úohia ka hnyi hnaabâ. 10 K' adre me hûkötîâ at ame úthao hnyi homagöule, me ikikiâ at ame ha wisa. 11 Anyin a öbun e uto at ae theduoc, me hûgûnâ gan je hok hwit: anyin a wale öbun e ca he ka labâ je uma öbun e hia but op ge veto adre tretrao: k' öbun e ca he ka ic wainainy je hnyei vine öbun e belökâ. 12 Anyin ae khañö nya a öbun e osehia hanyâûâ, ke úganiny anyibun je hulö; öbun tavat ovecâ at ae wisa, me kap hwaban ae hwali, me ohavâ ka at ae theduoc hnyi homagöule. 13 Anyin a wale, ame he at wâ wia ka laba hnyibu hnyi úen eling; anyin a úen e ae kong bi. 14 Elâm dö so, ke ca monu bi, m' öbun e möt: me ame he Iehova Khongon sabaoth ka tha e m' öbun, helâ me hnöbun hna ha. 15 Hûkötîâ thö hulö, ke hnyok bi ka so, ke otilâ hmâ ju wisa hnyi homagöule: me ame he la Iehova Khongon sabaoth ka betenge ge je kolon ga Josefa. 16 Anyin a wale, walang hna ha hnen Than Iehova Khongon sabaoth, ka habe, Adre me he ka tenge hnyi ta je gethen ae lau hia; ke adre me he ka ha hnyi ta je hna cit gethen hia, ka habe, Ekölö! ekölö! he adre me he ka hawâ thö tavat belök m' adre me tenge, ke tavat ae khañ' ödra tenge he ka tenge thungaû. 17 Ke adre me he ka tenge thungaû hnyi ta je hnyei vine hia: anyin oge me he ka ovheni u, haingö Iehova. 18 Ekölö gabun tavat öbun e weny bongu Iehova! hnân eû bongu Iehova köbun? e menekholom bi, ke ca melam bi. 19 Ke helâ me at ame kec ge liona, k' ame úkhañö bi me bea; ke ame ne dit hnyin uma ke ame ka ip hnyamen hnyi hua up uma, me ame olou but on. 20 Hawa, ame ca he ka menekholom bongu Iehova, ka ba melam? ke hlit hmönyin, ke ba lany hnyin e? 21 Iny höcö me hûkötîâ anyibun je bongu bijeû, ke oge me ca he ka senyin hnyi anyibun je úkhacaköu ae únyi hnathu. 22 Eke, öbun e ne hudo könya anyibun je hudiny leú me hudiny han, me oge me ca he bi nya ka kap: ke oge me ca he ka wâ anyibun je hudiny úsoköu a halebut je meno ae pipikhenya. 23 Hom but gak hwan ányâm je khumöng; ke oge me ca he ka löng hwan ányâm je nabeli. 24 Ke

so ame di hna owisa helâ me köiö, me hwa-kecin ae wisa helâ me wagewe ae hwege. 25 Lap anyi Isaraela lö, hawa, öbun e hom könya je hut me bwihlany hnyi ta je huna a fâte hnyi hnyebuba? 26 Eke, öbun e hia but hom tilâ Sikutha a tuhöbun me Kiuna anyibun je hnatheat, okhûiny khongubun khong, waleji öbun e ka ányâ hobi köbun. 27 Anyin a wale, oge me he ka hum öbun ka hnyi bâ hnyi hoton Dama-seko, haingö Iehova, Khongon sabaoth ien.

HNYIMAKAN 6.

EKÖLÖ ge tavat adre me laba wia hnyi Ziona, me tavat adre me laba khötkic hnyi je buceniny Samaria, je at hnathu hnyi je hnyei ae beönua, wale ame he ködrin lap anyi Isaraela! 2 He thö Kalene ai me wâ; ke úhem e, he thö Hamath ai ae gan: ke utut minya Gatha ai anyin at Filisiti: hawa, ödra so hon je dokhu eling? ame ne gan je idra hon je ibun? 3 Öbun tavat öbun e úsákâûö me bong ae kong, me ohakekenyâ taben lap anyin úokonguny; 4 tavat adre me mokut hon je hna mokut a nyon elefan, me hlöhlöu hon hnödra je ong hna mokut, tavat adre me an lakon je hnahat mamoe, me lakon kau únyi hnyi hnyin uma; 5 tavat adre me khumöngö je khumöng baû tha e me hwan nabeli; tavat adre me únykúme je únyikhumöng hobi ködra bi, helâji me Davita; 6 tavat adre me ijem waina únyi hnyi je utkaia, k' adre me ka súâ wakaco ae so; ke adre me ca hmak bi ge vec anyin Josefa. 7 Anyin a wale adre me he walang ang ka bâ, tha ödra me tavat adre me bödra ka bâ, ke ame he ka hia hwan senyin anyin tavat adre me hlöhlöu. 8 A hia but Than Iehova khemanyin ame ka ha gan bi, me haingö Iehova Khongon sabaoth, ka habe, Oge me höcö ge beönua anyin Jakob, me hûkötîâ je uma umen tuhan: anyin a wale oge me he bi nya ka hna taun me önyen. 9 Ke ame ten je kolon tavat hnyi uma a khaca, me adre me he ka mok. 10 Ke ame ne he ke kamen ka vaden at, wale at ame thong degecâ e, k' ame hom but je jö únyi hnyi hnyin uma, ke ame he ka ha ka at eiö hnyauma, ka habe, E hu at biju unyâm? me e ame he ka thu, ka habe, E ba; me e ame he ka ha, ka habe, Laba hnyibú ju; anyin ate me ca he ka ha iö Iehova. 11 Anyin a wâ bi, Iehova ame hûna, ke adre me he ka kot uma ae gan,

me me amam but, ke uma ae úhnyúkong me me khekhe but. 12 Hawa, ame he ta je hors ka wadring hon kic? k' ame he at ka wia kánâ eling hnen ta je bolok? anyin a óbun e hia but wia hna owisa ka hnyi waada, ke wan hwakecin ae wisa ka hnyi khöhlöng: 13 óbun tavat óbun e hobâ únyi ae ba ónyen ea, ka habe, Hawa, óhmun e ca bi faoihmun meno ge tang hwegiöhmun? 14 Ke wâ bi, lap anyi Isaraela lö, oge me he bi nya ka otílâ hnyei úcúbun, haingö Iehova Khongon sabaoth; ke adre me he ka oveci óbun hwân hnyi homagöuliny Hamath ke ne o but ka hnyi wageweyny dok ae tha hon.

HNYIMAKAN 7.

WALANG hna omanená könya ge Than Iehova: ke wâ bi, e ame op je wahamon hnyi dok a hwân ka kú hnyin jeú a biliny; he wâ bi wale hna kú a biliny hwaban hna sö hobi kâu than. 2 Ke hnyi úen adre hia but an hia ónyinginy hnyei, me oge me ha, ka habe, Than Iehova lö, ö u thang degecâ hulö: ama kâmaú Jekob he ka tot? anyin a e úhnyúkong. 3 Haba Iehova ame ietra únyi e: Ame ca he ka hwádâ haingö Iehova.

4 Walang hna omanená könya ge Than Iehova: ke wâ bi, Than Iehova ame hawâ meic hnân bi hwaban, ke e ame thong dok ae ti dit, ke ame bethong ut kánâ. 5 Me o ge me ha, ka habe, Than Iehova lö, ö e soju: ama kâmaú Jekob he ka tot? anyin a e úhnyúkong. 6 Haba Iehova ame ietra únyi e: Ame ca he ka hwádâ haingen Than Iehova.

7 Walang hnen hna omanená könya: ke wâ bi Than ame tot hnyi hak veto ame tot wisa, ke e hnyi hnyamen tulut tot. 8 Haba Iehova ame ha könya, ka habe, Amosa lö, iéu u je wâ? He haingök, ka habe, Tulut tot. Ke haingen Than, ka habe, Wâ bi, oge me he ka otílâ tulut tot wanben lakeik a at Isaraela; oge me ca he hmetu ka he me digic ödra, 9 ke ame he ka ba wan je dok ae görany anyi Isaaka, me ba ónyen je dok ae kap anyi Isaraela; ke oge me he ka tot úcon lap anyi Jeroboama me hele vat.

10 Me haba Amazia at bihut hnyi Bethela ame úkhúnöng kö Jeroboama than Isaraela me ha, ka habe, A hia but Amosa si hnâm hnyi wanben lap anyi Isaraela: e ca úcú bi hnyei he ka hok hnyokâ hwan je

hufuc. 11 Anyin a walang hna ha hnö Amosa, ka habe, Ame he Jeroboama ka mok ge hele vat, ke e hnathu adre me he ka hom bâ at Isaraela únyi hnyi idra. 12 Ke haba Amazia ame ha kö Amosa, ka habe, At ame wâ lö, he thö, kec dö ka hnyi hnyei Juda, me han eling, me perofeta eling: 13 ke ca perofeta hmetu bi hnyi Beth-ela: anyin a dok e ae kap anyin than, ke hnyaban e than. 14 Me haba Amosa ame thu me ha kö Amazia, ka habe, Iny ca perofeta bi nya, ke ca nokon bi nya perofeta: ke iny at tuö meno me at ame huliwan je úö sukamoro: 15 ke Iehova ame hum nya únyi hnyi hoton hnahat meno, ke Iehova ame ha könya, ka habe, He thö, me perofeta ka lakeik a at Isaraela. 16 Anyin a wale löng ju walang ang hufuc ho Iehova, ka habe, Haingâm, ca perofeta bi ka at Isaraela, ke ca fuc bi ka lap anyi Isaaka; 17 anyin a wale walang hna ha hnö Iehova, ka habe, Ame he áiam ka helâ me momo hnyi getheniny taun, k' ame he ka ta lakon obaga me wahu ge hele vat, ke adre me he ka khenâ em hnyei ge tulut tö; ke u me he bi ka mok hnyi hnyei ae ikiki, ke e hnathu adre me he ka hom bâ at Isaraela únyi hnyi idra hnyei.

HNYIMAKAN 8.

WALANG hna omanená könya ge Than Iehova: ke wâ bi tang wan úö ae mat. 2 Ke e ame ha könya, ka habe, Amosa lö, iéu u je wâ? Me haingök. ka habe, tang wan úö ae mat. Me haingö Iehova könya, ka habe, A o but obiny ka lakeik a at Isaraela; oge me ca he hmetu ka he me digic ödra. 3 Ke haba je khumöng hnyi uma kap, me ame he ka helâ me kuku tenge hnyi bong eling, haingen Than Iehova: k' ame he ka se hia ta je komok; k' adre me he ka khúa hnyibú ödra hnyi je dok hia. 4 Löng ju hufuc ang óbun tavat óbun e beutâ ta je theduoc, me öta tavat ae vec hnyi hnyei, 5 haingödra, ka habe, ame he ka um kehö manan a tehi, m' ate me úcú anyita whit? ke sabbath, m' ate me khöng tang whit? ke adre me óhnyúkongoâ efa k' adre oganá sekel, k' adre omono tulut ge iyawö: 6 m' ate me úco tavat ae ba ta únyi, hwaban sileva, ke at ae theduoc hwaban li tangen hnyeuca, ke úco ta je tiren whit. 7 A hia but Iehova khemanyiná únuainy Jekob, ka habe, E hnathu oge me ca he balua ka

hnying anyidra ta je huliwa. 8 Hawa, ame ca he tavat ka öbubuny can eling, ke tengge hia tavat adre me labā e? eke, e ame he bi ka khibi hia helā me Wagewe; ke e ame he ka webwela, k' ame he ka dit hmetu ju, helā me wageweiny Aigupito. 9 Ke haingen Than Iehova, ka habe, Hnyi ūen eling oge me he ka odilā seūnō hnyi jebigō, me ölidrā hnyei hnyi lany. 10 Ke oge me he ka wia anyibun je bijeu ka hnyi tengge, me anyibun je khumōng hia ka hnyi tengge thungāu; ke oge me he ka oā ka hnyi ta je hnyin hia mano ae gan nān, me ohadreūā ta je ban hia; ke oge me he ka wia e helā me hwatenge can nokon a khaca, me obiny e helā me bong vec. 11 Haingen Than Iehova, ka habe, Wā bi ame he ka o je bong, me oge me he ka kunā hmiā ka hnyi hnyei, ca hmiā ge ba han me köiō, ke hmiā bi ge hofuc ho Iehova. 12 Ke adre me he ka he monu ūnyi hnyi ke köiō ka hnyi ke köiō, ke ūhedra hnyi hwadrō ke ne o but jimeyō; adre me he ka wadring monu he ka elām hofuc ho Iehova, ke adre me ca he bi ka wā. 13 Hnyi bong eling ame he wablu ae hmanenang me wahidrōu ka momonu ge beic. 14 Tavat adre me khemanyinā hulōiny Samaria me ha, ka habe, Dana lö, kia inya Khongom; ke kia inya gethen ūheny Bere-seba; ke adre me he ka ta, ke adre me ca he hmetu bi ka tot.

HNHYIMAKAN 9.

OGE me wā Than ame tot hnyi taben hut: ke haingen, ka habe, Kot dö je ban, me me jijing dö je hwanuma: me thu omomonu ödrin hon je bödra hia; ke oge me he ka hlingā at a biliny gadra ge hele vat: e ba at a khaca gadra ame he ka kec, ke ba ke at gadra ame he ka möt. 2 Eja ke ne adre ne hiny kânā ke ne o but hnyi hedis, ame he hnyamök ka lili ödra ūheny e; eja ke ne adre ne ölö hnyi drany ai oge me he ka hum ödra ūheny e. 3 Eja ke ne adre ne lubaduöng ethō hon Kare-mela, oge me he ka elām me lili ödrin ūheny e; eja ke ne ödrin e ne oiyongi ödra ge li emakök eū hnyi hmelen köiō, oge me he ka kunā on he ka ūlü ödra eling, 4 eja ke ne adre ne bā ge je iwahnaihm-öny mödra, oge me he ka kunā hele vat he ka hling' ödra eling: ke oge me he ka wā

hm' ödra, m' adre me kong ut, ke ca so bi. 5 Anyin a haba Than Iehova tuban sabaoth, wale thibi e at ame kälā hnyei, me ame köiō but, ke amo he tavat hia adre me labā e ka tengge; ke e ame he ka khibi hia helā me Wagewe; k' ame he ka dit hmetu helā me Wageweiny Aigupito; 6 e thibi at ame op je hnyeuleny ethō hnyi drany, k' ame bi taben hnyeuleny hnyi hmeledrany: at ame hawā köien köiō ae gan me hingälā ka hnyi hon kânā, Iehova ien. 7 Lakon Isaraela lö, hawa öbun ūcū me at Aithiop könya? haingō Iehova. Hawa, oge me ca su at Isaraela ūhedra hnyi hnyei Aigupito, ke at Filisti ūhedra hnyi Kafetori, ke at Suria ūhedra hnyi Kira? 8 Wā bi, e bi li emakan Than Iehova hon dökhū ae kong, ke oge me he ka ohia e ūnyi hnyi hon kânā; ke so bi oge me ca he ka ti ohia hia lap anyi Jakob, haingō Iehova. 9 Anyin a wā bi oge me he ka hūna, ke oge me he ka cubec lap anyi Isaraela unyin je hnyei, helā me hna degec tiren whit hnyi taben ūcubic, ke so bi ame ca he ka kölu ke wan ae ūhnyükong hnyikânāi. 10 K' ame he tavat ae kong hnyi ik hnyei ka mok ge hele vat, wale tavat adre me ha, ka habe, Ame ca he ka hakekeny köta, me khaū öta hnen ūnyi ae kong.

11 Hnyi bong eling oge me he bi ka hai uma menā umō Davita a ta, me okhötā hmetu je dok ae hmouca hnyin; ke oge me he ka otillā je ke keihen a amam but, me op hmeto e helā me hnyi je bong ehac; 12 m' adre me he ka hu je kolon ge at Edoma, ke ta je hnyei hia wale adre me ip hudra iök, haingō Iehova, at ame ānyā e. 13 Ke haingō Iehova, ka habe, Wā bi ame he ka o je bong, me ame he at ame trohnen ka khaū at ame subō whit, ke ame he at ame utoto wan vine ka khaū at ame cekön; ke ame he je bucen ka khukhula ge waina ae hnebwia, k' ame he je hut hia ka lup. 14 Me oge me he ka ohmeto lakeik a at Isaraela waleji adre me hom bā, me adre me he bi ka otillā hmeto ta je taun waleji ae ba wan, me labā hmetu; ke adre me he ka tā ta je hnyei vine me ic wainainy; ke adre me he ka belökā ta hnyei me an jeūiny. 15 Ke oge me he ka te ödra hnyi idra bi, ke adre me ca he hmetu ka khöbi ödra hnyi idra waleji oge ham ködra, haingō Iehova a Khongom.

OBADIA.

HNyimakan 1.

HNA omanená kö Obadia.
Walang hna ha hnen Than Iehova ge Edoma. Ate me löng ut je uthu-metu únyi ga Iehova, ke adre úkhü-nöng ka hnyi je hnyei, me ha, ka habe, Todr' öbun, ke so ate me tot úcon me vat mē. 2 Wá bi, oge hia but hom úhnyúko-ngu u unyin je hnyei: e gan hmá hna hñkötüö u. 3 A hia but omenu u bi hnen hnyekom ae bi gan, u at ame laba hnyi je op hnyi kic, ethö hnyabam; at ame ha hnyi hnyekon, ka habe, Ie at ame he ka ohnyikánö nya hnyikánái? 4 Eja ke ne u je ne ölö bi göranyai helá me aeto, ke eja ke ne u je ne ip háúám unyin je okhú, oge me he bi nya ka ohnyikánái u úheny e, haingö Iehova. 5 Ame ne o köu tavat venöu me tavat sei hnyi lit, (ekölö ge hna subá degeci u!) hawa, adre me ca he ka venöu ke ne ka úcú ödra thö? ame ne o köu tavat töu wan vine, hawa, adre me ca he ka hnen bi ju ke je wan? 6 Ekölö ge hna úhnei ga Esau! ekölö ge hna elám omjehen adre oiyongá! 7 Adre hia but hum u hnyi gethen hnen lahiám hia, wale ka hnyi hnyigot: adre hia but iyawö u, me hwege hom, tavat adre úsoköu möu; adre lau hnewe hobi köu hnen tavat adre me an ám jeú: e ba bi metá gan. 8 Haingö Iehova, ka habe, Hawa oge me ca he ka ohia hnyi bong eling tavat ae metá hnyi Edoma, me wá únykúme únyi hnyi bucen anyi Esau? 9 Temana lö, ame he ányám tavat hwege ka öbubuny, m' adre me hlingá degecá tavat hia hnyi bucen anyi Esau. 10 Ame he ka takú u hmehma can úoko-nguny ka kem a Jakob, ke adre me he ka subá degeci u nyiele balua. 11 Hnyi bong u je tot sákáú hnyin, wale hnyi bong adre me hügúná anyin ta je únyi hnen je atka-nyua, k' ame didró ke je hnyat ka hnyi je homagöuleny, k' adre me uglekóbá Jerusa-lemma, me heláke u me tha hien m' ödra.

12 Ca he ju ka wá hnyi bonginy kem, hnyi bonginy vec a e, ke ca hobá lakon Juda hnyi bonginy bá; ke ca fuc bi gan hnyi bonginy hlöuhlöu. 13 Ca he ju ka delec homagöuleny lakeik hnyi bonginy vec a ödra; eke, ca he ka wá hna oveci ödra hnyi bonginy vec a ödra, ke ca he öbun ka hinöbeny ka hnyi anyidra ta je únyi hnyi bonginy hlöuhlöu a ödra. 14 Ke u me ca he ka tot hnyi hna saú he ka hlingá tavat adre me kec gan; ke ca hna but káu je köluidra hnyi bonginy hlöuhlöu a ödra. 15 Anyin ae hakekeny jut bongongu Iehova hnyi ta je hnyei hia: me ame he ka ányá bi köu, heláji me hnám hna ányá; k' ame he ka hmetu bi ka hnyi hon bâm ányám huliwa. 16 Anyin a öbun e hia but ic hon anyik bucen ae kap, me ame he bala bi ta je hnyei ka ic heláe, eke, adre me he ka ic me utá, k' adre me he ka helá me at adre ca hnokoá. 17 K' ame he ka ku hon bucen Ziona tavat adre me kec möt, k' adre me he ka okabá, k' ame he lap anyi Jakob ka hu je idra. 18 Ke ame he lap anyi Jakob ka meic bi, ke lap anyi Josefa ka báhlán, ke lap anyin Esau helá me thatúnyin hwit, me adre me he ka vhök ödrin me thong degeci ödrin: ke ame he ka ba kolon lap anyi Esau, anyin a hia but ha Iehova. 19 Ke ame he aten Hwaiöu ka hu bucen anyi Esau; k' ame he tavat aten dok ae tha hon ka hu hnyei iny at Filisiti: k' adre me he ka hu utkáná hnyi Eferaima, ke utkáná hnyi Samaria; ke haba Gileada, me ame he ka iny Beniamina. 20 Ke haba je bá a je utbavat eang a lakon Isaraela unyin at Kanana, me adre me he ka hu ke ne o but hnyi Sarepeta; ke haba je bá a at Jerusalema hnyi Sefaradi, me adre me he ka hu je taun hnyi Hwaiöu. 21 Ke ame he tavat úhömeli ka o ka hnyi bucen Ziona he ka owisa ka bucen anyi Esau; ke ka anyi Iehova bi dökhu.

JONA.

HNyimakan 1.

AME o but hofue ho Iehova kö Jona nöku Amitai ame ha, ka habe, 2 Todrö he thö Nineve ai, wale taun ae gan, me fuc hwege úcon; anyin a o but hnyi hnyimakök anyidra monu. 3 Me haba Jona ame todrö me kec Tasesa ai ge hnyimakö Iehova; ke e ame he Jopa ai, me wâ ke hu ame he Tasesa ai: ke e ame bi hwaban hna houden e, me dit hnyi hnyin hu, he ka tha kec m' ödrin Tasesa ai, ame kec ge hnyimakö Iehova. 4 Ke haba Iehova ame kunâ ang ae gan ka hnyi köiö, me ame o but weneú ae gan hmâ hnyi köiö, ke a ne hmouca thö hu. 5 Me ame ot aten hu, me ve tenge ka anyidrin je khong; ke ödrin e khûâ hnyiköiöai je omjeú únyi hnyi hu me me háhá thö. Ke haba Jona, me ame hia but utut ka hnyi hnyin hu; ke e ame mokut, me mokut hnying. 6 Me haba tuhan hu ame ölö but kâu me ha, ka habe, Ieú gam u at mokut hnying? todrö me tenge ka Khongom, ame ne he Khong ka únykúmi ötin, me ötin e ca mok. 7 Ke ödrin e úhakouâ, ka habe, Ötin a ugleköp, me me manen kötin can ia ame o únyi eang ae kong kötin. Me ödrin e ugleköp me ame hwâdá kö Jona leköp. 8 Me ödrin e ha kâu, ka habe, Ö u ha thö köhmun únyi ga ia únyi ang ae kong kötin; ieú hanymâm? ke úhem ua? ewa em hnyei? ke u at ua? 9 Haingen ködrin, ka habe, Iny at Heberu; ke inya oge me outö Iehova, Khongon drany, at ame op köiö me hot. 10 Me ame ot gan hmâ tavat me ha kâu, ka habe, Ieú ke únyi ang u je hia but ányâ? anyin ae khana but tavat a e ame kec ge hnyimakö Iehova, anyin a e ame hia but thumetu ödrin. 11 Me haingödrin kâu, ka habe, Ieú öhmun e he ka ányâ köu me me ta but hau hon köiö köhmun? anyin ame hwege tot je waköiöiny köiö. 12 Ke haingen ködra, ka habe, Hum nya thö, me khúö nya but hnyiköiöai; me me he ka ta but hau hnyi köiö köbun: anyin ae khanö nya ame o but weneú ang ae gan hnyi köiö köbun, cak thibi. 13 Ke so bi tavat ödrin e hwege galu, he ka he hmetu hot ai; ke ca khan' ödrin bi; anyin ame hwege tot

köiö ködrin. 14 Anyin a wale ödrin e tenge kö Iehova, me ha, ka habe, Iehova lö, öhmun e khöü köu, öhinun e khöü köu, öhmun na ca he ju ka mok can at ang, ke ca he bi ka ip huhmun dra ae ba hnyikongon: anyin a u Iehova u je hia but ányâ helâ me wem. 15 Me ödrin e hum Jona me khûâ hnyiköiöai: me ame ta but hau hnyi köiö hwaban hna úkhotukhaú. 16 Haba tavat ödrin e ot gan hmâ ga Iehova, me bi hut kö Iehova, me bi khöbi. 17 Ke Iehova ame penapena wâ ae gan hmâ he ka utö Jona: ke Jona ame laba hnyi hnyekon wâ hnyi kun ta lany ke kun ta lit.

HNyimakan 2.

ME Jona ame hic kö Iehova a Khongon eú hnyi hnyin wâ. 2 Ke e ame ha, ka habe,

Oge me tenge kö Iehova hnyi anyik vec,

Me e ame thu könya;

Oge me khöü únyi hnyi hnyekon hedis, Me u je löng ifucik.

3 Anyin u je khúö nya ka hnyi dok ae dit, hnyi wanben köiö,

K' ame igigili nya hnen wekhet

K' ame khutukhaúö nya hnen ányâm je waköiö, ke ányâm je wabulu.

4 Me haingök, ka habe, Adre me hota degeci nya únyi hnyi hnyimákâm;

Ke so bi, oge me he hmetu ka bwele ka hnyi umâm uma ae kap.

5 A igigili nya köiö, ke ne o but ka hnyi hanu;

Ame húlúlúö nya hnen dok ae dit;

A wadrâ bök hnen leúnen hme.

6 Oge ú but ka hnyi je taben je bucen;

E bi huk hmeledrany me je ohmâiny nyiele balua;

Ke so bi, Iehovah Khonguk lö, u je hia but öliâ melik úheny ú hnyi thop.

7 Hnyi úen ame momon hanuk eú hnyik, oge me únykúmi Iehova:

Ke ame o but köu hijik hic ka hnyi ányâm dok ae kap.

8 Haba tavat adre me hnyok ka ta je únyi ae únyi baú me thoi,

Me adre me degec hing betenge ködra bi.

9 Ke oge me he bi nya ka bi hut köu me hwan ole ;

Oge me he ka thamua anyik khöbi.

Haba ühömeli únyi ga Iehova.

10 Ke Iehova ame fuc ka wá, me e ame hmitö Jona hmetu hot ai.

HNYIMAKAN 3.

KE ame o hmetu hofuc ho Iehova kö Jona hnyi úen a loiny, ame ha, ka habe, 2 Todrö me he Neneve ai, a taun ae gan, me khetá ka hnyin, hnök hna húna köu he ka khetá. 3 Me haba Jona ame todrö me he Nineve ai helá me hofuc ho Iehova. Ke haba Nineve me taun ae gan hmá hmönyin, ke kun ta bong he ka he igigilö e 4 Ke haba Jona ame hwán ka dit hnyi taun, ke khaca bong ka he, me e ame hongot, me ha, ka habe, Fáte biju ta bong me adre me he ka ohia but Nineve. 5 Ke haba at Nineve adre me kap Khong ; me adre me haimemená he ka ányá ca han, ke adre me khavá ec mano ae gan nán, hwán ge tavat ae gan ke ne o but houmonu. 6 Ke ame o but úthumetu ka than Nineve, me e ame todrö úheny hnyi anyin theron, me uny jut anyin úkhaú me khavá ec mano ae gan nán, me laba ju hnyi hnabadröu. 7 Ke e ame úkhúnöng me haimemená hna húna hnen than me anyin je taben, ka habe, Ca he ka an ke ujeú hnen at me meno, je hnahat kau me mamoe; adre me ca he ka han, ke adre me ca he ka ic köö: 8 ke adre me he ka khavá tavat me meno ge mano ae gan nán, ke tenge hwege th' öbun ka Khong: eke, hamödra he ka ve hwiö únyi hnyi dedra ta ge gethen ae kong, me únyi hnyi úkonguny anyin je hnyamödra. 9 E khanö ia, ame ne he Khong ka hwiö me ietra, me degec anyin hmönyin ae gan, m' ate me ca he ka mok? 10 Ke a wá but Khong anyidra je huliwa, a adre me hwiö únyi hnyi dedra ta je gethen ae kong; me

haba Khong ame ietra únyi ae kong wale a ha he ka ányá ködra; ke e ame ca ányá bi.

HNYIMAKAN 4.

KE e ti kong hmönyin e kö Jona, me e ame hmönyin. 2 Me e ame hic kö Iehova me ha, ka habe, Iehova lö, hawa, ca hok e ke tiga inya bi hnyi ik hnyei! Anyin a wale oge me kec ehac Tasesa ai: Anyin a wale oge me kec ehac Tasesa ai: anyin ae khanö nya a u Khong ae betenge, me betenge vec, me bec he ka hmönyin, ke gan hmá so, ke at ame ietra únyi ae kong. 3 Anyin a wale, Iehova lö, ö u hom dö walang ang melik; anyin ae so oge me he ka mok, hon he ka möt. 4 Haba Iehova ame ha könya, ka habe, Hawa, u úcú he ka hmönyin? 5 Me haba Jona ame he but únyi hnyi taun me laba hnyi ke keihen e deiö taun, me bi uma mená hobi káu e bi, me laba hmelen e hnyi hmenon, me wá únyi ame he ka o ka hnyi taun. 6 Ke haba Iehova ame penapena iogum, me öküá kö Jona, me hnán tungen ban, me omelö e únyi hnyi anyin vec. Me haba Jona ame ti senyin gan hmá ka iogum. 7 Ke hnyi ioiny lany nyi hnyomakatu, haba Khong ame penapena wacihngáú, ke e ame köu iogum me ame meleca thö. 8 Ke ame o thö seúno, me Khong ame penapena ang hwei ae kahwa; ke ame dei bö Jona me e ame momonu, ke e ame sumátá me me mokcu, haingen, ka habe, E so iny he ka mokcu, hon he ka möt. 9 Haba Khong ame ha kö Jona, ka habe, Hawa, u úcú he ka hmönyin ge iogum? Me e ame thu, ka habe, Iny úcú he ka hmönyin ke ne o but mok. 10 Me haingö Iehova, ka habe, U je betenge ge iogum wale u je ca huliwan, me öküá; at ame kú hnyi lit a khaca, k' ame hia hmetu hnyi lit a khaca: 11 ke hawa, e ca úcú könya he ka betenge ge Nineve taun ae gan, ke se hia aten hon khaca haded ke twente thauzan, tavat ae ca khan' ödra benyidra a metödra me me; ke ca ha bi omeno.

MIKA.

HNYIMAKAN 1.

WALANG hofuc ame o kö Mika at Moresa hnyi üö Jotham, me Aha-za, me Hezekia, a je than Juda, wale e ame wâ ge Samaria me Jerusalema.

2 Öbun ta je hnyeï hia lö, löng ju; hmeledrany lö, ke ta je ünyi hia hnyin e, tevehlöng ju: ke so ame he Than Iehova ka ohnatuôâ ücûbun, wale Than hnyi umen uma ae kap. 3 Anyin a wâ bi, ame he Iehova ka he ünyi hnyi hnen, me utut, me ututo je dok ae görany hnyi hmeledrany. 4 Me ame he je bucen ka köiö hnyi hmelen, k' ame he ka hmouca hnyigöulen je bucen, helâ me wasu hnyi meic, ke helâ me köiö ame hingölö hnyi dok ae hwatapkölu. 5 Ame o but ta je ünyi hia eling can hna hanyâüâ hnö Jakob, ke can je hulö anyin lap anyi Isaraela. Ie hna hanyâüâ hnö Jakob? hawa, ca Samaria bi? ke ie je dok ae görany ga Juda? hawa, ca Jerusalema bi? 6 Anyin a wale oge me he ka wia Samaria me me helâ me hna digic thatünyi hnyi utkânâ, ke hnân te vine hnyin, ke oge me he ka hagutâ je veto hnyin e ka hnyi hnyigöulen bucen, me omanenâ je taben e. 7 Ke adre me he ka thu omono je idolainy hia thithö, ke adre me he ka thong degecâ ge meic je troban hia, ke oge me he ka öba wan je khongon hia: anyin a e ame ükhöünâ e ge troban momo hnyi gethen, k' adre me he ka he hmetu k' ame troban momo hnyi gethen. 8 Can e oge me he ka tenge tot me huku tenge, ke oge me he ka he monu ke ba ükhaü me he thu; oge me he ka tenge tot helâ me luko, ke tenge thungâu helâ me ta je iaena. 9 Anyin a ca hnân eny ta je saat gan: anyin a o but ke ne o but hnyi Juda; k' ame o ke ne o but ka hnyi homagöuleny ik hnyeï a Jerusalema. 10 Ca he bi ka ha hnyi Gatha, ke ca tenge bi: oge hia but seset hnyi kânâ hnyi Bethel-Afera. 11 He thö hnyi hmehma ke ba ükhaü, at ame laba hnyi Safira: ame ca o but at ame laba hnyi Zaanan; k' ame he tenge tot hnyi Beth-ezel ka ohia gabun at ame tethmä. 12 Anyin a haba at ame laba hnyi Maroth, me ame kueny ka haluba-

hingen hnahic: anyin ame utut ünyi ae kong ünyi ga Iehova ka hnyi homagöuleny Jerusalema. 13 At ame laba hnyi Lakisa lö, ca ju kariota ka hnyi meno ame he logot: haba momo e, me hwân hulö ka hluiny Ziona; anyin adre me wâ unyâm je hna hanyâüâ hnen Isaraela. 14 Anyin a wale u me he ka ham bwihlany ühüne kö Moresa-gatha: k' ame he je lap anyin Akiziba ka helâ me thoi ka je than Isaraela. 15 At ame laba hnyi Maresa lö, oge me he bi nya ka hom köu at ame he ka hum u: k' ame he hmanenanginy Isaraela ka o ka hnyi Adulama. 16 Ohia but leünen bâm ke giâ bi; can lakom u me betenge gadrin: ogânâ but dok ae ba leünen helâ me aeto; anyin adre me he but ka bâ ühedra unyâm.

HNYIMAKAN 2.

EKÖLÖ ge tavat adre me ünyküme hna monu, me ânyâ hulö hon hnödra je hna mokut, adre me ânyâ e hnyi haolany anyin ae metâ ködra. 2 Ke adre me behnyekudra ta hnyeï me hügûna; ke ta je uma, me hom bi: ke adre me ovecâ at me anyin lap, wale at me iny hnyeï. 3 Anyin a wale walang hna ha hnö Iehova, ka habe, Wâ bi, oge me ünyküme ünyi ae kong ka lap ang, m' öbun e ca he ka thang je nyibun ünyi hnyin, ke öbun e ca he ka he kökôm; anyin a üen ang ae kong. 4 Hnyi üen eling adre me he ka hai ühöücü gabun me tenge thungâu gan hmâ me ha, ka habe, Adre ti öba wan gata; e a hia but wia jekhon lakeik: ekölö ge hnen hna hom e ünyi gak! e ame khenâ ita ta hnyeï ka tavat ükhin fuc. 5 Anyin a wale, ame he ka ba at gam ame he ka khûâ tulut ge ugleköp hnyi ükhacaköu anyi Iehova. 6 Haingödra ka habe, Ca perofeta thö. Adre me ca he ka perofeta ka hnyat eling; ame ca he ka hia bi ta je hna haikongoâ. 7 Lap anyi Jakob lö, hawa, adre me he ka ha, ka habe, Hawa, e sényin dut hanu. Iehova? hawa, e ame ânyâ je ünyi ang? Hawa ame ca he hok hofuc ka osoâ at ame vheno wisa? 8 Ke hwân hnyi je bong ang haba lakeik adre me tot helâ me iwa-

hnaihmiöny : öbun e uny úkhaú únyi hnyi hon khaúen tavat adre me he sot helá me tavat úhedra hnyi vat. 9 Ke öbun e obá omomoiny ik hnyei hnyi umödra je uma ae hmanenang ; öbun e húgúná anyik hmanenang ge lakudra nyiele balua. 10 Todr' öbun, ke he thö ; anyin ae ba hna mená köbun eang : can únyi ae kong, at ame ohia, wale at ame ti ohia. 11 Ame ne he ke at wale ame vheno ang me iyawö ka ha thoi, ka habe, Oge me he ka perofeta köu ge waina me grág ; awe, hamen bi he ka perofeta ka tavat ang.

12 Jekob lö, oge me he ka úkhacaköü u hia ; e hnathu oge me he ka úkhöúná je kolon Isaraela ; oge me he ka tha ip ödra helá me je mamoe hnyi Bozera ; helá me hnahat meno hnyi idra utkáná, adre me he ka mede, anyin ae se hia tavat. 13 Ame he at tho hnyi hnyimaködra : adre me hia but utut me he thö ka hnyi homagöule, me didrut hnyin : ke haba tuhödra ame he hnyi hnyimaködra, ke Iehova a hnyimakan ködra.

HNYIMAKAN 3.

KE haingök, ka habe, Öbun na löng ju, je at hnathu anyi Jekob, me tavat owisa ka lap anyi Isaraela : hawa, ca hamöbun he ka khan' öbun hna owisa ? 2 tavat adre me húkötíá so, ke wedra hulö ; tavat adre me uja unen unyidra, ke viny únyi hnyi je jeiödra ; 3 tavat adre me an minya anyin lakeik ; k' adre me uja unen unyidra, ke thu je jeiödra : eke, adre me susub' ödra heláke me hnán öt, ke heláke me je uthmeno hnán öt ae gan. 4 Me adre me he ka tenge kö Iehova, ke e ame ca he ka thu ködra ; eke, e ame he ka ikhálá hnyimakan gadra hnyi ün eling, hoton úkonginy anyidra ta je huliwa. 5 Walang hna ha hnö Iehova ge je perofeta, tavat adre me omono lakeik ; tavat adre me úhúlú ge ta je nyudra, k' adre me hongot, ka habe, Úsoköu ; ke haba at ame ca hinö únyi ka hnyi je hnyimödra, me adre me penapena he ka vat mē. 6 Anyin a wale, ame he ka lit köbun, me me ba hna omanená köbun bi ; k' ame he ka menekholom köbun, m' öbun e ca he bi ka bi khong ; ke ame he ka dit seúnö hon je perofeta, k' ame he ka khömet bong hudra. 7 Ke ame he ka hmehma tavat wá, me hlohlo tavat bi khong ; eke, adre me he ka tube je esongöidra : anyin ae ba hofuc hwan

Khong. 8 Ke hnathu a iny unöngötó ge man únyi ge hanu Iehova, ke únyi ge hna owisa, ke tang hwege he ka omanená kö Jekob hnen hna hanyátá, me kö Isaraela anyin hulö bi. 9 Ö öbun löng ju ang, öbun je at hnathuiny lap anyi Jekob, ke tavat owisa ka lap anyi Isaraela, tavat húkötíá hna owisa, me ohwalö ta je únyi hia ae úcü. 10 Ke adre me op göranyai Ziona hnyi dra, ke Jerusalema hnyi hwa-kecin ae kong. 11 Ke haba je homakan, me adre me owisa hnán hwaban, k' ame úne tavat bihut ge hwaban, k' ame bi kong hnen je perofetainy ge mone : ke so bi hwakecidra he ka labageju kö Iehova, me ha, ka habe, Hawa ca Iehova hnyi wanböta ? ke ba únyi ae kong ame he ka o köta. 12 Anyin a wale adre me he ka wia kánáiny Ziona helá me utkáná can gabun, ke haba Jerusalema, me ame he bi hnán digic thátúny hnyin, ke buceniny uma me ame he ka helá me je hut hnyi hnyot.

HNYIMAKAN 4.

KE haba hnyi je bong a biliny adre me he ka otethmá buceniny uma kap umö Iehova hon ban je bucen, ke adre me he ka ogöranyá e hon je hut, ke ame he ta je hnyei hia ke káu. 2 Ke ame he ka o ta je hnyei ae se hia me ha, ka habe, Ai öbun m' ate me he ka ölö ka hnyi bucen anyi Iehova, me uma umen Khongu Jekob ; ke e ame he ka n' öta ge deny je gethen, ke ate me he ka vheno je gethen únyi gan : anyin ame he ka he but hnanyibu úheny Ziona, ke hofuc ho Iehova úheny Jerusalema. 3 Ke e ame he ka owisa ka ta je hnyei ae se hia, me fuc ka je hnyei ae hwege hnyi je dok ae sákáú ; ke adre me he ka kokot anyidra je hele vat me me hnán bi hwiö káná, ke dödra je ö hnán bele subö vine : ame ca he ke hnyei ka hai hele vat ka ke hnyei, ke adre me ca he hmetu ka únö vat. 4 Ke adre me he ka ve laba hmelen haledra je vine me hmelen haledra je imeta ; ke ba at ame he ka ooti ödra : anyin a hia but ha hnen hnyimö Iehova tuhan sabaoth. 5 Anyin a tavat adre me ve he hnyi ien ta je khongudrin, ke ate me he bi öta ka he hnyi iö Iehova Khonguta nyiele nyiele balua.

6 Hnyi bong eling, haingö Iehova, oge me he ka úkhacaköüá tavat adre me he ci, ke oge me he ka úkhöúná at adre obá, me at oge hia but ovecá ; 7 ke oge me he ka

wia at ame ci me hnân kolon, me at adre degec me hnân hnyeï ae hwege : k' ame he Iehova ka musi ödra hnyi bucen Ziona, hwân walang ang ke ne o but nyiele balua. 8 Ke haba u tap tue anyin hnahat mamoe, but anyin hluiny Ziona me ame he ka o köu ; eke, ame he ka o musi a bân, wale dökhü dokhon hluiny Jerusalema. 9 Ieü ang a u me kuku göranyai? E ba than hnyi wanbâm? a mokcu at ame bi hnyimâm, anyin ame khöü u hnen vec helâ me momo ame vec hnyekon? 10 Vec dö, ke hnokoâ but, u hluiny Ziona, helâ me momo ame vec hnyekon : anyin a u me he ka he but walang ang ûnyi hnyi hnyin taun, me laba hnyi ta hnyeï, me o ka hnyi Babulona ; ke adre me he ka hügünö u ühem e ; k' ame he Iehova ka ücü u eling ûnyi ge je iwahnaihmiöny möu. 11 Ke walang ang ame ukhacaköu je hnyeï ae se ücom, ke haingödra, ka habe, E so e ame kong bi, e so ate me wâ weta ka Ziona ge je emaköta. 12 Ke ca khan' ödra je ûnykümenö Iehova, k' adre me ca wâ ûnyküme anyin musi : anyin a e ame ûkhacaköu ödra helâ me je thi hwit ka hnyi hna huje hwit. 13 Todrö, huje, u hluiny Ziona : anyin oge me he ka wia ânyâm fao meno me me fao bi, ke oge me he ka wia je boüjimen je bacam me me bras : m' u me he ka kot omomono je hnyeï ae se : ke u me he ka ham kö Iehova hnödra je hna söh, ke je omjehedra ka Thaniny hmeledrany hia.

HNYIMAKAN 5.

HLUINY je deö vat lö, u me he walang ang ka ûkhacaköu me me je deö vat : e ame igigili öta hnen wat : k' adre me he ka kot wahicen at owisa hnyi Isaraela ge uci.

2 Ke haba u Bethe-leema Eferatha, a at ae ûhnyükong unyin ta je thauzan hnyi Juda, me ame he ka o hobi könya ûnyi gam at musi hnyi Isaraela ; at ame he ehele hwân kâü adrem, ke nyiele balua. 3 Anyin a wale e ame he ka hn' ödra, ke ne o but ün ame he ka hnokoâ hnen momo ame vec hnyekon : me ame he ka hmetu je kolon a je liamekeiny më ka lakon Isaraela. 4 Ke e ame he ka tot me hân haleny hnahat hnyi man mani Iehova, me hmanenanginy iö Iehova a Khongon : k' adre me he ka laba hmâ ; anyin a e ame he ka gan hmâ walang ang ke ne o but hnyi je can hmeledrany. 5 K' ame he at ang me hnân úsoköu köta :

e ka o but at Asuria ka hnyi ita hnyeï, k' ame uto je umen latuhöta, waleling ate me he ka otilâ kâü hnyat tuö mamoe a ödrin seven, ke eit ta taben tavat. 6 Ke adre me he ka öba waniny hnyeï Asuria ge hele vat, ke hnyeï i Nimeroda hnyi je homagöülenny ; ke e ame he ka omeli öta ge at Asuria, e ka o ka hnyi ita hnyeï me uto je ita. 7 Ke ame he je kolon ga Jakob hnyi wanben je hnyeï ae se hia, helâ me dân hau ûnyi ga Iehova, helâ me we ame khukhula hon hna önying ; at ame ca bec ge at, ke ame ca halubahingen at. 8 Ke ame he ka e bi kolon ga Jakob unyin ta je hnyeï, hnyi wanben tavat ae se hia, helâ me liona unyin je menoiny hnyot, helâ me nak liona hnyi wanben je hnahat mamoe : wale, ame ne he wanben, e ame he ka uto, me oloü kia, ke ba at ame he ka hügünâ. 9 E so ame görany hnyamâm hon tavat adre me oveci u, ke so adre me subâ degecâ je iwahnaihmiöny hia möu.

10 Ke haba hnyi bong eling, haingö Iehova, me oge me he ka subâ degecâ je hors hnyi wanbâm, me ohia ânyâm je kariota : 11 ke oge me he ka subâ degecâ je taun hnyi em hnyeï, me hagutâ ânyâm je hnabâ hia : 12 ke oge me he ka subâ degecâ hna bibihwacekin ûnyi hnyi hnyamâm ; k' ame ca e bi hmetu unyâm tavat biobotkong : 13 ke oge me he ka sö degecâ ânyâm je hnatheat me ânyâm je veto adre otilâ hnyi wanbâm ; ke u me ca he hmetu ka khudrung ka huliwa anyin li hnyamâm. 14 Ke oge me he ka oc degecâ ânyâm Aseira unyâm : he oge me he ka ohia ânyâm je taun. 15 Ke oge me he ka bi hwaban hnyi hmönyin me wathethöt ka je hnyeï adre me ca löng bi.

HNYIMAKAN 6.

LÖNG ju öbun walang ang hna ha hnö Iehova, ka habe Todrö, ivinö ju hnyi hnyimakan je bucen, me me löng ifucâm hnen je hut. 2 Löng ju öbun je bucen lö, ivinö anyi Iehova, me öbun je taben a tethmäiny hmeledrany : anyin ae hu ivinö anyi Iehova me lakeiny, ke e ame he ka ühnei me Isaraela. 3 Lakeik lö, ieü o ge ânyâ köu? ke ieü o ge osënyini u hnyin? khüö nya but. 4 Anyin oge hum u ûnyi hnyi hnyeï Aigupito, me omeli u ûnyi hnyi hnyaba üthaluö ; ke oge kunö Mose me Arona, me Miriama hnyi hnyimâkâm. 5 Lakeik lö, ûnyküme thö walang

ang ge hna elâm gan hnö Baraka than Moaba, ke hnö Balaama nöku Beora hna thu kâu; únykúme ju hwân hnyi Sitima ke ne o but hnyi Gilegala, me me kham' öbun nwakecin ae wisa anyi Iehova. 6 Ieú oge me he ka oá hnyi hnyimakö Iehova, ke khudrung ka Khong ae beönu? hawa, oge me he ka hom kâu je hudiny leú, je nak kau a khaca hunainy? 7 Hawa, ame he Iehova ka senyin ge je thauzan mamoe бага, ke je ten thauzan wagewe wakaco? hawa, oge me he ka ham nöku a bán, me hwaban hnök hna hanyáúá, a wan unyik, me hwaban hulöiny hanuk bi? 8 At lö, e ame hia but omanená köu únyi ae so; ke ie ke únyi ame we Iehova gam, ke so bi he ka ányá wisa, me hnyoká ibetengiö, me tha he me Khongom ke hnyok ae hnyikáná?

9 Ifuci Iehova ame hongot hnyi taun, k' ame he at ae metá ka wá iám: löng ju öbun öso, ke at ame musö e. 10 Hawa, e bala bi tang omjeú a hwaban hulö eiö hnyin uma umen at ae kong, ke efa ae háhá a únyi ae kong? 11 Hawa, oge me he ka so ke e unyik tulut ae hwali, ke tangen ta je únyi hnân tuluto ae thoi bi? 12 A unöngötö tavat tren omjeú ge úokonguny, k' ame fuc thoi tavat adre me labá e, k' ame iyawö je bohmödra hnyi je hnyimödra. 13 Anyin a wale oge hia but kuc u me takú u ge aat ae gan hmá; ke oge hia but öba wan gam can ányám ta je hulö. 14 U me he bi ka han, me u me ca he bi ka sekome; ke ame he ka e bi hnyi wanbám hna hom úhnyúkongu u: ke u me he ka sukhöuná omjeú, k' ame ca he bi ka sot hnám hna sukhöuná; ke haba únyi u me hom, me oge me he bi nya ka hna ka hnyi hele vat. 15 U me he ka tá, ke u me ca he bi ka menu: u me he ka ututo je elaiö, ke u me ca he ka súá wakacoiny; ke wan vine, ke u me ca he ka ic wainainy. 16 Ke adre me tuö je hnanyibu anyi Omeri, ke ta je únyi hia a ányá ge lap anyi Ahaba, ke öbun e hnu hoton hnödra hna úhnenamö: waleling me oge me öba wan gam, ke wia tavat adre me labá e me me hnân jú; ke öbun e he ka hom tilá hna haikongoá lakeik.

HNYIMAKAN 7.

EKÖLÖ gak! anyin a iny úcú me öö adre me tau wan, ke iny úcú me hna hlo wan vine: ke ba hmetu bi wan vine hnân ic; me wan meta a bán wale ame wek hnen hanuk. 2 E hia but at

ae so eang hmeledrany, ke ba at ae föfá unyin tavat: ödra hia adre me mokut he ka mádrá dra; adre me ve hnu je lawaedra ge ert. 3 Adre me iná li hnyamödra ka hnyi únyi ae kong he ka ie ányá; ame hnei hwaban hnen taben me at owisa; ke haba at ae gan, me e ame ha úokonguny eba hnyi hnyekon: ke adre me tha hwáwá heláe. 4 Haba tavat ae so gadra, me helá me úö ae údedö: ke haba tavat ae ti föfá gadra, me kong hon hak ae údedö: e but ang bong bongon tavat adre me tuö u, wale úen he ka senö u; adre me he walang ang ka hlöhlö. 5 Ca labageju ka waem, ca geju bi ka at ame kú gethen: tuö ju hwanumen hnyimám ge momo at ame mokulec úlaiám. 6 Anyin a haba nokon бага ame ca oganá kamen, ke nokon momo ame tot úcon hinyen, ke úngon úcon úngon; haba je iwahnaihmiöny me at, me, ka e hnyi hnyaban bi.

7 Ke haba inya, oge me he ka bwele kö Iehova; oge me he ka lubahingen Khongon melik: ame he Khonguk ka ling nya. 8 Iwahnaihmiöny mönya lö, ca he ka senyin huk: iny ka he ka ta, oge me he ka tot hmetu; iny ka laba hnyi menekholom ame he Iehova ka omelami nya. 9 Oge me he ka hok hnyoká hmönyin anyi Iehova, anyin oge hia but monu kâu; ke ne o but e ame he ka ivinö hobi könya, me owisa hobi könya: e ame he ka su nya ka hnyi melam, ke oge me he ka wá hwakecin ae wisa gan. 10 Ke ame he je iwahnaihmiöny mönya ka hnyi wá, ke ame he ka takou e hnen hmehma; waleji at ame ha könya, ka habe, Ewa Khongom? Ame he li emakök ka wá e; walang ang adre me he ka ututo e helá me hmudra eú hnyi gethen. 11 Bong adre op hnyin hagám hak! hnyi bong eling adre me he ka thang hnyigot. 12 Hnyi bong eling adre me he ka o köu úhedra Asuria ke je tauniny Aigupito, ke úhedra Aigupito ke ne o but hnyi Wagewe, ke úhedra hnyi ke köiö ke ne o but hnyi ke köiö, ke úhedra hnyi ke bucen ke ne o but hnyi ke bucen. 13 Ke ame he ka ba wan hnyeí can hulö anyin tavat adre me labá e, me wale troban anyidra ta je huliwa.

14 Hân ju lakem ge ányám uci, wale hnahat mamoe a jekhom, wale hnyat adre me hake laba hnyi hnyot hnyi wanben Karemela: e so adre me he ka an tot hmetu hnyi Basana me Gileada helá me hnyi je bong kâu adrem. 15 Oge me he

NAHUMA 1, 2.

ka omanenâ ködra je únyi hnân láia helâ me hnyi je bong u je he hnyin úhem hnyi hnyi Aigupito. 16 Ame he je hnyi ka wá me hmehma ge manidra man hia: adre me he ka kát je hnyimödra, k' ame he ka wejiji je hnyikönyödra. 17 K' adre me he ka drem kânâ helâ me on; adre me he ka o me öbubuny helâ me ta je únyi adre me iyâwâ kânâ únyi hnyi je dok ae nedrong: adre me he ka o me ot kö Iehova Khonguta, ke adre me he ka outö u. 18 Ie ke Khong ae úcû möu, at ame

hna monu, k' ame ca óúnyihnathoâ hna hanyâfâ hnen je kolon jekhon? e ame ca tuó anyin hmönyin nyiele balua, anyin a e ame senyin he ka betenge. 19 Ke e ame he ka hmetuhmetu me betenge gata; e ame he ka uto anyita je hulö hmelen li can: ke u me he ka khûâ anyidra ta je monu hia thithö ka hnyi köiö hnyi dok ae dit. 20 U me he ka ohwâdâ hnathu kö Jekob, ke ibetengiö kö Aberahama, waleji u je khemanyiná ka lakamöhmun hwân hnyi je bong kâú adrem.

NAHUMA.

HNYIMAKAN 1.

HOK honen Nineve. Tusiny hna omanenâ kö Nahuma at Elekosi.

2 Haba Iehova, me e Khong ame ciâ ke bi hwaban: Iehova ame bi hwaban, ke tren hmönyin; Iehova ame bi hwaban ka je iwahnaihmiöny mä, ke e ame ip hmönyin hobi kâú je iwahnaihmiöny mä. 3 E bec Iehova he ka hmönyin, ke gan hmâ maniny man, ke e ame ca he ka hna bâfâ at ame ânyâ hulö: haba gethen de Iehova wale hnyi höu me weneû, ke haba je ulâ, me wale sesâ hnyi li can. 4 E ame thawâ köiö me omada e, me ohmö ta je wagewe hia: e sēnyin thö Basana me Karemela, e meleca thö vongon hnyi Lebanona. 5 Ame öbubuny je bucen gan, ke ame köiö but je hut; ke ame khibi göranyai kânâ hnyi hnyimakan, eke, hmeledrany, me tavat adre me labâ e. 6 Ie at ame he ka tot hnyi hnyimakan anyin hmönyin? ke ie at ame he ka tot e ka ubâhlâ anyin wathethöt? ame hingâlâ anyin hmönyin helâ me meic, ke e ame tho je kic. 7 E so Iehova, e hhabâ hnyi bong vec; ke e ame wâhmak-hmeto tavat adre me labageju kâú. 8 E ame he ka ti ohia dok e ge di at ame aba, me hnu je iwahnaihmiöny mä ka hnyi menekholom. 9 Ieú hnöbun hna si hnö Iehova? e ame he ka ti ohia: ame ca he ka olo o vec. 10 Eja ke ne adre ne vhet helâ me úö ae údedö, me ti khubet hnyi

hnödra hna ic, adre me he ka thung ödra helâ me thatúnyin hwit ae mada. 11 Ame he but únyi gam ke at ame únykúme únyi ae kong kö Iehova, at ame úhnenamö he ka ânyâ únyi ae monu. 12 Walang hna ha hnö Iehova, ka habe, Eja ke ne ödrin e ne bekhöta me se hia, helâe minya adre me he ka subâ degeci ödrin, ke e ame he ka hia. Oge hia but oveci u, ke oge me ca he hmetu ka oveci ú. 13 Ke walang ang oge me he ka thu anyin hna úhúkálákouâ walethö hom, ke thamua je hna cö u. 14 Ke a hia but Iehova húna gam a g' adre me ca he hmetu ka tâ hnyat a iâm bi: ke oge me he ka subâ degecâ je khongom a je hnatheat adre me kave me okoiâ únyi hnyi umödrin je uma; ke oge me he ka ânyâ ânyâm erkemok; anyin a u kong ut. 15 Wâ bi, e hon je bucen li can at ame hom uthumetu ae so, at ame haimemenâ úsoköu! Juda lö, tuó ju ânyâm je bijeü, ke thamua ânyâm je khöbi: anyin ame ca he hmetu at ae kong ka vheni u; k' adre hia but subâ degecâ e.

HNYIMAKAN 2.

AME o but hnyi hnyimákâm at ame sa omomono: hmákâ ju hhabâ, tuó thö gethen, ca ju hnyâm, ti ohwegiâ thö tang hwegiâm. 2 Anyin a Iehova ame ohmeto hmanenangi Jekob, helâ me hmanenangi Isaraela: anyin a hingâlâ degeci ödra hnen

tavat hingälä degecá, me okongoá anyidra je anginy. 3 Haba je taben unyin, me dra anyidrin je bec, k' ame khavá úkhaú ae dra ge tavat hwege: k' ame hadröngöc je kariota ge fao hnyi je bong e ame penapena hnyin, k' adre me hmejijingá je ö. 4 Ame he monoá je kariota eú hnyi je gethen, ke úöhnekiköu hnyi je hna cit gethen: me manen helá me uthmeic, me gá monu helá me hucuce. 5 E ame únykúme anyin je homakan: adre me haú hnyi úhedra; k' adre me logot ka hnyi hna up hak, ke adre hia but penapena únyi hnán tubi ödra. 6 Adre me khöng ut je homagöuleny je wagewe, k' ame aú but uma umen than. 7 Ke adre me öba khaúö Huzaba, adre me lelö momo e, me ame tenge lathnyabainy a wahu helá me je biny, k' ödrin e khaú je úlaidra. 8 Ke hwán káú adrem me helá me ong an Nineve: ke so bi adre me kec; haingödra, ka habe, Todru, todru öbun, ke ba at ame bwele hoton ai. 9 Söh thö sileva, söh thö gol: ke ca hnán bi aú je omjeú, wale soiny ta je únyi ae hmanenang. 10 E ba önyen e, adre me öba önyen, iny jut wau: ke ame köiö but hnyok, k' ame öbubuny je boucadra, ke vec hia thö je hnyidra, ke löhau but ta je hnyimaködra hia. 11 Ewa uma umen liona, ke dok ame an hnyin je nak liona, wale ame vheno hnen liona ke liona momo, ke nokon liona, ke ba at ame ooti ödra? 12 Haba liona ame olou kia, ka úócö je lakon, me hlingá hobi káú laáíán, me öunöngötá umen je op ge haniny, me umen je uma ge je hna hlingá. 13 Wá bi, e ve inya möu haingö Iehova tuhan sabaoth, ke oge me he ka thong anyin je kariota hnyi hai, k' ame he hele vat ka an halem je nak liona: ke oge me he ka subá degecá hanem únyi eang hmeledrany, ke adre me ca he hmetu ka löng ifucin ányám je úthümetu.

HNyimakan 3.

EKÖLÖ ge taun ae kong ge dra! a öunöngöt hia thö ge je thoi me úkonguny; ame ca hia je hanidra. 2 Ame usik osö, ke hu hwan je waengen; me je hors adre okca monu, me je kariota adre me utulut; 3 tavat adre me tabö hors, k' ame hadröngöc ö me hele vat; ke se hia tavat adre hlingá, ke hna úkhöúná je komok ae se hia; ke ca hnán bi aú tavat adre mokcu; adre me haú hon tavat adre

4 anyin ame osehia bi únyi monu momo hnyi gethen ae hmanenang, tuhan hna bi khong, at ame úco je hnyi ge anyin bi únyi monu, me je lap ge hnen hna bi khong. 5 Haingö Iehova tuhan sabaoth, ka habe, Wá bi, e ve inya but möu, ke oge me he ka hai ányám úkhaú ka hnyi hnyimákám; ke oge me he ka omanenö u ka ta je hnyi ke ba úkhaúám, me ányám hmehma ka ta je dökhü. 6 Ke oge me he ka khúá hom je únyi ae ikiki, me okongu u, me otilö u hnán wá. 7 Ke ame he ka e bi, a haba tavat adre me ö u me adre me he ka kec gam me ha, ka habe, Iny jut wau Nineve: ie at ame he ka tenge gan! oge me he ka elám ua tavat adre me he ka otubweli u? 8 Hawa, u beönua hon No-amona, wale ame laba hnyi je wagewe, ke ame igigilö e je köiö, haba köiö ae gan, me singiny, ke haba haginy hak, me köiö! 9 Aithiop me Aigupito li tang hwegien, ke ca hnán bi tulut; Futa me Lubi li at ödru me hadruö u. 10 Ke so bi adre hom e, e ame he but ka hnyi hwenbá: ke adre me sa lakudra je mendreng hnyi ta je hna saú hia gethen: ke adre me uglekóbá anyidra tavat ae únyi hnathu, ke adre me ca tavat ae beönua unyidra ge je tö fao. 11 U me he minya ka monu ge grág, ke u me he ka ikhölö; ke u me he ka heleú hhabá can je iwahnaihmiöny. 12 Ame he ányám je hhabá ka helá me imetá ae hu wan a bán: adre ne jijingá me ame he ka kölu je wan ka hnyi hnyimen at ame he ka ijem. 13 Wá bi, haba tavat hnyi wanbám, me helá me omomo; adre me khöng laúá je homagöuleny em hnyi ka ta je iwahnaihmiöny möu: k' adre me thong ányám je venyá ge meic. 14 Seköiö thö hobi káú he ka theling' u, ohwegiá ju ányám je hhabá: he thö ka hnyi káná ae kece, ke ututo ju dröu adre me huliwan, ohwegiá thö hna leú veto káná. 15 Ame he bi meic ka thung u eling; k' ame he hele vat ka subá degeci u, k' ame he ka ön u helá me oböu: e so u ma osehio u helá me je oböu, k' u ma osehio u helá me je wahamon. 16 U je hia but osehia tavat úcú unyám hon ta je okhúiny drany: ke haba je oböu adre me okongoá k' adre me ve gá thö. 17 Haba tavat adre me korona gam, me helá me ta je wahamon, ke haba je homakan tavat unyám, me helá me lakon wahamon ae se hia wale adre me laba hnyi ta je hak hnyi bong ae meic, ke e ka o but seúnö, me adre me gá thö, ke ca

manen bi dok adre me laba hnyin. 18 Than Asuria lö, ame mokut ut tavat tuö mamoe unyâm : k' ame mokut minya tavat ae únyi hnathu unyâm : k' ame vese but lakem hon je bucen, ke ba at he ka úkhacaköu

ödra. 19 E ba hnân okatebo hnâm hmouca ; ke kong ut hnâm aat : ke haba tavat adre me löng ge bongom, me adre me khöûkhöû hnyam gam ; anyin a ie at ame ca hia but labö cap kâu ânyâm hulö ?

HABAKUKA.

HNYIMAKAN 1.

WALANG hok ame wâ Habakuka perofeta.

2 Iehova lö, oge me he ka khöû köu ke ne o but kehö, ke u me ca ling nya bi ? oge me tenge köu ge úokonguny, ke u me ca omelö bi. 3 Anyin a ieu u je omanená könya hulö, me wâ hwakecin ae hwali ? ânyin a e hnyi hnyimakök hna söh me úokonguny : ke e hu hna ivinö, ke adre me oâ iwatreta. 4 Anyin a wale adre me oúnyibâúâ hnanyibu, ke ame ca he but hna owisa bala ka hwâdá ; anyin a tavat ae kong adre me igigilö tavat ae wisa ; anyin a wale ame he but hna owisa ae hwali. 5 Bwele thö unyin ta je hnyei me wâhmakhmeto, me láââ gan hmâ thö : anyin oge me ânyâ huliwa hnyi bongubun je bong, eje ke ne adre ne thumetu öbun, öbun e ca he ka kap. 6 Anyin a wâ bi, oge me oâ at Kaledaia, hnyei ae hiny ame ie utut ; tavat adre me vheno úläuen hmeledrany, he ka húgûná je dok hnân outen me öbubuny gadra : ame ka o bi gadra hna owisa me hmanangidra. 8 E logot minya haledra je hors hon je lepad, ke hwege hnyimak hon je luko hnyi sa hac ; tavat tabö hors unyidra adre me ave ehe thibut : eke, anyidra tavat tabö hors úhedra sâkâú ; adre me gâ helâ me aeto at ame logot ka an haniny. 9 Adre me tha o hia he ka úokonguny ; helâ me ang hwei imaneniny je hnyimaködra ; adre me úkhacaköu je bâ helâ me öny. 10 Eke, e ame hlumâ je than, ke taben úhiö kâu je taben : e ame hlumâ je hnabâ hia ; anyin a e ame okhibö göranyai kânâ me húgûná. 11 Me e ame he ka o helâ me ang me hanyâúâ,

me me hu hulö kâu : wale at a haba tang hwegien me únyi ge khongon. 12 Iehova lö, Khonguk, me Kapik, hawa, u ca at kâu adrem bala ? öhmun e ca he ka mok. Iehova lö, u je otilâ e me hnân owisa, Kicik lö, oâ e me hnân ná. 13 E kalaöt hmönyin li emâkâm, me u je ca bewâ hulö, ke u je höcö wâ hwakecin ae hwali, anyin a ieu u je wâ tavat iyawö, me laba hnyibú hnyi úen ame he at ae kong ka utâ at ae wisa hon e bi ; 14 me mádrâ tavat m' ödra helâ me wâiny köiö, ke ta je únyi ame iyâú ke ba at ame musi ödra ? 15 E ame kap göranyai ödra hia ge wage, k' ame ohnoki ödra hnyi úten ert, k' ame hum ödra hnyi úten ert lihli : anyin a wale e ame senyin me hobâ. 16 Anyin a wale, e ame bi hut ka úten ert, k' ame leú utö ae bo so ka úten ert lihli ; anyin ae pipikhenya jekhon únyi gan, ke gan hmâ an jeú. 17 Anyin a wale, hawa, ame he ka öba önyen úten ert, k' ame ca he ka hokhnyok hnyi hnen hna labö ohia ta je hnyei.

HNYIMAKAN 2.

OGE me he ka tot hnyi hnök hna hmâkâ, me laba hon tap tue, ke oge me he ka selâdrâ me löng hofuc e ame he ka ha könya, ke hofuc oge me he ka thu ge hnök hna tenge. 2 Ke haba Iehova ame thu könya me ha, ka habe, Sihnalimen ju hna omanená, me kave hnyi je taben, me me he ka at ge tavat adre me wadring bi. 3 Anyin a haba hna omanená me hobi kâu úen adre thu, k' ame he mweimwei ka hnyi obiny, k' ame ca he bi ka thoi : eja ke ne a ne bec, më halubahingen ; anyin e hnathu e ame he ka o, k' ame ca he ka bec. 4 Wâ bi, ame bi gan hnyekon.

k' ame ca fofâ bi eû hnyin : ke ame he at ae wisa hwakecin ka môt hnen anyin labageju. 5 Eke, haba waina, ame at iyawô, ke at bi gan, k' ame ca laba hmâ hnyi hing hnyaban bi ; ke ame ogânâ weny helâ me hedis, k' ame helâ me mok, k' ame ca sekon bi, ke e ame úkacakôuâ unyin ta je hneyi hia, k' ame hlo tavat hia thithô. 6 Hawa, ame ca he tavat ang hia ka ha úhóúcu gan, me vejec hnân úhiö kâu, me ha, ka habe, Ekölö ge at ame ca osehia ta je únyi a ca anyin bi ! ke ne o but kehô ? ke at minya ame osehia ta je haten hna hok gufa ! 7 Hawa, adre me ca he ka ie tot tavat adre me he ka úlú u, ke hmak bi tavat adre me he ka oveci u, m' u me he ka hnân sôh ködra ? 8 Anyin a u je hia but sôh ta je hneyi ae se hia, me ame he ka sei u hnen ta je kolon ta je hneyi hia ; can dren tavat, me úkonguny adre me ányâ ka hneyi, me taun me tavat hia adre me labâ e.

9 Ekölö ge at ame hûgúnâ troban ae hwali hobi kâu anyin lap, me me ip ethô görany háúten, me me môt únyi ge hnyamen úkongon ! 10 U je hia but únykúme únyi hnân ohmehma ányâm lap, hnyi hnâm hna subâ degecâ je hneyi ae se hia, me ányâ hulô köu bi. 11 Anyin ame he veto hnyi hna up uma ka fuc, ke ame he ka thu kâu hnen utô a venyâ.

12 Ekölö ge at ame otílâ ke taun ge dra, me ohmâ taun hnyi hwakecin ae kong ! 13 Wâ bi, hawa, ca únyi ga Iehova tuhan sabaoth a ame he tavat ka huliwa hobi kâu meic, me ame he je hneyi ka osényini ödra hnyi únyi ae únyi baú ? 14 Anyin ame he ka unöngöt hmeledrany ge hna wâhmakhmetoâ hmanenangi Iehova, helâ me köiö ame tube je taben e.

15 Ekölö ge at ame habelen waeny, ame bihanen ányâm hmönyin kâu, ke ame omono e, m' u me ke ka ô 'drin ae ba úkhaú ! 16 U je unöngötö ge hmehma ke ca hmanenang bi : bethé ic dô minya, m' u me helâ me at adre ca peritomonâ : adre me he ka wia köu kaiainy hnyam a metô Iehova, ke ame he ka e bi hon ányâm hmanenang hmehma ae ikiki. 17 Anyin ame he ka tubi u hnen úkonguny ka Lebanona, me hna obia je menô wale ame ooti ödrin ; can dren at, me úkonguny ka hneyi, me taun me tavat adre me labâ e.

18 Ieú troban hnatheat me me huliwan e hnen at ame op e ; me idola adre oköiâ, me at ame ná thoi, me me labageju kâu at

ame huliwan bi, he ka ányâ je idola ae hum. 19 Ekölö ge at ame ha ka utô, ka habe, Hmak dô : me ka veto ame ca fuc, ka habe, Todró ! Hawa, ame he ka únö únyi ang ? Wâ bi adre tube e ge goí me sileva, ke ba hmönyin homená eû hnyin e. 20 Ke e bi Iehova hnyi hnyin umen uma ae kap : e so ame he hmeledrany hia ka laba hnyibú ju hnyi hnyimakan.

HNYIMAKAN 3.

WALANG hic hiji Habakuka perofeta, adre me hai hnyi Shigionotha.

- 2 Iehova lö, oge hia but löng úthumetu gam, me oge me ot :
Iehova lö, ohâtâ thö ányâm huliwa hnyi wanben ta je luna,
Omanená thö hnyi wanben ta je luna :
Ke únykúme ju ibetengiö hnyi úten wathethöt.
- 3 Ame o but Khong úheny Temana,
Ke At ae Kap úheny hnyi bucen Parana. [Sela.
Ame khavâ drany hnen anyin hmanenang,
K' ame unöngötö hmeledrany ge hna ogânâ e.
- 4 Haba melaminy, me helâ me lany ;
K' ame o li basesönginy únyi hnyi hnyamen :
K' ame oiyongâ eling maniny man.
- 5 Ame he but mok ae caphnyi hnyimakan,
K' ame ga thö je uthmeic hnyi li can.
- 6 E ame tot me tuluto hmeledrany ;
E ame bwele me oveseâ ta je hneyi :
Ke adre me oveseâ je bucen kâu adröm,
K' ame nom ju je hut kâú ehac ;
E kueny jut deny ta je gethen.
- 7 Oge me wâ je uma mano umö Kuza hnyi vec :
K' ame öbubuny je mano singiny hneyi Midiana.
- 8 Hawa, Iehova ame hmönyin ka je wagewe ?
Hawa, u me hmönyâm ka je wagewe,
Ke wathethöt ge köiö ae gau,
M' u me tabâ halem je hors,
Ke ta je kariotainy ányâm úhömeli ?
- 9 Adre me oc ut ányâm cafana ;
E hnathu ta je hofuc u je khemanyin ka ta je tribu. [Sela.
Ke u je kia hmeledrany ge ta je wagewe.
- 10 Haba je bucen adre me ô u, me ot ;
Ame he but hwegeiny di :

ZEFANIA 1.

- Ame mea dok ae dit,
Me hinöbeny göranyai.
- 11 Ame tot seínö me tehi hnyi hnödrü ;
Hnyi melaminy ányám je fana adre gâ,
Hnyi melaminy ányám ö ame hadröngoc.
- 12 U je vhenö hnyei hnyi hmönyin,
U je uto je tavat hnyi wathethöt.
- 13 U je he but hnân he ka omelö lakem,
He ka omelö hnâm hna hú ;
U je aat dö ban únyi hnyi lap anyin at
ae kong
Me omanená taben ke ne o but hnyi
kic. [Sela.
- 14 U je dàoâ taben je aten vat gan ge dán
bi je ö :
Adre me utut helâ me höu he ka ovesei
nya ;
Adre me senyin helâ ke at ame he ka
han duöngâ at ae ba ta únyi.
- 15 U je oheâ halem je hors eú hnyi köiö,
Hnyi dok ame khibi hnyin göranyai köiö
ae gan.
- 16 Oge me löng, me ame ututut hnyekuk,
Ame öbubuny li esongödik ge hwan ;
- E amam but je jeiök, ke oge me öbu-
buny hnyi hnök :
M' oge me he ka menâ hnyi bonginy
vec,
Hnyi úen e ame o but úcon hnyei wale
ame o kâu a je deö vat,
- 17 Eja ke ne a ne ca vhöng imeta,
Ke ba wan hnyi je ivine ;
Eja ke ne a ne ba hna huliwan elaio,
Ke ba jeú hnyi je hna belök ;
Eja ke ne adre ne subâ degecâ hnahat
meno hnyi hak,
Ke ba but kau hnyi je hnyeuleny meno :
- 18 Ke so bi oge me he bala bi nya ka hobâ
kö Iehova,
Oge me he ka senyin ka Khong at ame
omeli nya.
- 19 Iehova Than me wale tang hwegiök,
E ame wia li cak me me helâ me can je
aila,
K' ame he ka ovhenu nya hnyi anyik
je dok ae görany.
- Hobi kâu at ame vhih khumöng hnyi
Neginoth.

ZEFANIA.

HNYIMAKAN 1.

WALANG hofuc ho Iehova ame o kö
Zefania nöku Kusi, nöku Gedalia,
nöku Amaria, nöku Hezekia, hnyi je bong
bongu Josea nöku Amona, than Juda.

2 Haingö Iehova, ka habe, Oge me he
ka ti ohia ta je únyi hia thithö únyi hnyi
hon kânâ. 3 Oge me he ka ohia tavat ke
omeno ; oge me he ka ohia omeno ame gâ
ethö, ke ta je wâ eú hnyi köiö, ke ta je
únyi ame öhaúâ, ke tavat minya ae kong ;
me oge me he ka subâ degecâ at únyi hnyi
hon kânâ haingö Iehova. 4 Ke oge me
he ka hai bnyamök ka hnyi hon at Juda,
ke tavat hia adre me laba hnyi Jerusalema ;
ke oge me he ka subâ degecâ únyi hnyi
dok ang je kolon Baala, ke ien tavat bihut
ka je hnatheat, tha ödra me tavat bihut ;
5 ke tavat adre me hic hon ban je uma ka

ta je únyi hnyi drany, ke tavat adre me
khemanyin kö Iehova, k' adre me khem-
anyin ge anyidrin than ; 6 ke tavat adre
me hmetu unyi Iehova ; ke tavat adre me
ca elöm Iehova, me ca hnö e.

7 Laba hnyibü ju hnyi hnyimakan Than
Iehova : anyin ae hakekeny jut bong bongi
Iehova : anyin a hia but Iehova penapena
hut, me okabâ hnen je hna hawâ. 8 Ke
haba hnyi bonginy hut anyi Iehova, me oge
me he bi nya ka bi hwaban ta je taben, ke
lakon than, ke tavat adre me khavâ je
úkhaúiny ta je hnyei bi. 9 Ke hnyi bong
eling oge me he ka bi hwaban ködra hia, a
tavat adre me gâ hanyâúâ hwanuma, tavat
adre me öunöngötâ je uma umen je tuhödra
ge úkonguny me thoi. 10 Ke haingö
Iehova, Haba hnyi bong eling me ame he
bi ka hu hwatenge hnyi homagöuleny wâ,
k' ame he ka hu kuku tenge hnyi ke keihen

a loiny, ke dia ae gan hnyi je hut. 11 Kuku tenge th' öbun tavat öbun e laba hnyi Maketas, anyin adre kot hia thö hnyei Kanana : adre subâ degeci ödra hia tavat adre me ngenu me sileva. 12 Ke hnyi ün eling oge me he ka jien Jerusalema ge je lamepa ; ke oge me he ka bi hwaban ka tavat adre me laba sot, tavat adre me ha eü hnyi hnyok ka habe, Ame ca he Iehova ka mâdrâ so, ke ame ca he ka ânyâ minya ünyi ae kong. 13 Ke ame he ka hnân söh bi je omjedra, ke ame he ka ba wan umödra je uma : eke, adre me he ka op je uma ke adre me ca he bi ka labâ ; adre me he ka belöki vine, ke adre me ca he bi ka ic wainainy. 14 E hakekeny jut bong ae gan bongi Iehova, e hakekeny jut ke logot hmönyin dut, hwan bong bongi Iehova ; ame tenge gan hmâ eling at ae hwege. 15 Haba bong eling bonginy hmönyin, bonginy vec me hlühlöu, bonginy hnaühangö me öba wan, bonginy lit me menekholom, bong ae hu ülä me khömet, 16 bonginy fuc trutru me öbubuny ka hnyi je taun adre up hagin, me je tap tue görany. 17 Ke oge me he ka ovecâ tavat, m' adre me he ka he helâ me je wadröu, anyin adre hia but ânyâ hulö kö Iehova : ke adre me he ka hingälâ drödra helâ me sesâ, me utioidra minya helâ me tatet. 18 E ca khana bi anyidra sileva me gol he ka omeli ödra hnyi bonginy hmönyin anyi Iehova ; ke adre me he ka thong degecâ hnyei hia ge meicin anyin ciâ : anyin a e ame he ka bi obiny, eke, obiny ae mweimwei ka tavat hia adre me laba hnyi hnyei.

HNHYIMAKAN 2.

HNYEI ame ca hmehma lö, ükhaca-köu th' öbun, eke, ükhacaköu thö ; 2 e ka tiga ca oâ hna otilâ, e ka tiga ca he but bong helâ me thatünyin whit, e ka tiga ca o bi köbun hmönyin ae gan anyi Iehova, e ka tiga ca o bi köbun bong bonginy hmönyin anyi Iehova. 3 Elöm Iehova th' öbun hia tavat ae ilemuk hnyi hnyei, tavat adre ânyâ hnen hna owisa ; elâm dö hwakecin ae wisa, elâm dö menyik : adre me ne he ka ikhöl' öbun hnyi bonginy hmönyin anyi Iehova. 4 Anyin adre me he he ka hota degecâ Gaza, ke ame he ka ba wan Asekelona : adre me he ka obâ Asedoda hnyi jebigo, k' adre me he ka oc Ekerona me iwân. 5 Ekölö ge tavat adre me labâ hobat köiö, wale hneyi iny at Kerethi ! e

ve e möbun hofuc ho Iehova, Kanana, hnyei iny at Filisiti ; oge me he ka öhö u me me ba at ame he ka labâ. 6 Ke haba hobat köiö, me ame he ka hu je uma umen tavat tuö mamoe hnyin, ke ta je hnyeuleny je hnahat mamoe. 7 Ke haba hobat köiö, me ame he ka hnân hobi kâu je kolon lap anyi Juda ; k' adre me he ka hân haledrin ta je hnahat mamoe eling : k' adre me he ka mokulec je uma umö Asekelona hnyi sabac ; anyin ame he Iehova Khongudrin ka sen' ödrin, me ohmetu ödrin ühedrin hnyi hna bâ. 8 Oge hia but löng hna haikongoâ hnö Moaba, ke hna ü hnen lakon Amona, waleji tavat adre me haikongoâ lakeik, k' adre me bi gan hnyi je hnyigöülödra. 9 Anyin a wale, haingö Iehova tuhan sabaoth, Khongu Isaraela, ka habe, Kia inya inya a g' ame he Moaba ka ücü me Sodoma, k' ame he lakon Amona ka ücü me Gomora, a iny jut vhat, ke thopiny salt, ke ba wan nyiele balua : k' ame he je kolon lakeik ka sei ödra, ke ame he je kolon hnyi ik hnyei ka hwöhwabödra. 10 Adre me he ka hu e kan anyidra bi gan, anyin adre hia but haikongoâ me bi gan ka lakei Iehova tuhan sabaoth. 11 Ke ame he Iehova ka ooti ödra : anyin a e ame he ka ohia tilâ je khong khongon hmeledrany hia ; me ame he tavat ka khudrung kâu, ke at me ke at hnyi je ve hnödra, wale ta je bomeneiny ta ogö hnyei hia. 12 Ke haba öbun, at Aithiop lö, me adre me he ka hling' öbun ge anyik hele vat. 13 Ke e ame he ka hai hnyamen ka hnyi ke keihen ka hnyi hwadrö, me ohia Asuria ; ke e ame he ka öba wan Nineve, me me hwahwacit helâ me hnyebuba. 14 Ke ame he je hnahat meno ka mokut hnyi wanben e, a omenoiny ta je hnyei hia : ame he kati me kifoda ka mokut hnyi ban je hmolominy : k' adre me he ka eük hnyi je mamalama ; ke ba at hnyi je hwanuma : anyin a e ame he ka hom singiny ünyi hnyi hon hna huliwan arasi. 15 Walang taun waleji ame senyin me laba wia, at ame ha eü hnyi hnyekon ka habe, Inya thibi, ke ba hmetu ke at : Ekölö, e ba but wan e, hnân mokut hnen je meno ae hiny ! ame he tavat adre me he unyin ka jü, me nyinyikâ ban.

HNHYIMAKAN 3.

EKÖLÖ ge at ame ükhin fuc me at ae ikiki, taun ame ovecâ ! 2 E ame ca löng hofuc ; e ame ca kap hna ünö ; e ame ca labageju bi kö Iehova ; e ame ca

hakekeny bi ka Khong. 3 Haba anyin je taben unyin, me helá me je liona ame kuku; anyin bi tavat owisa, me helá me je luko adre o hnyi sahad; adre me ca hna kolon bi hobi káu nyi. 4 Tavat hop me iyawö anyin je perofeta: a hia but anyin tavat bihut okongoá dok ae kap, adre hia but hanyáúú hnanyibu. 5 At ae wisa Iehova hnyi wanben e; e ame ca he ka ányá hulö; e ame oá hna owisa ka hnyi melam hnyi je hnyomakatu, e ame ca haú bi; ke haba at ae ca wisa bi, me ca khana bi hmehma. 6 Oge hia but subá degecá je hnyei, e ba but aten anyidra je tap tue; oge hia but ohnyeutá dedra je gethen, me ba at ame vheno: adre kot anyidra je taun, e ba but at, ke ba but at ame labá. 7 Haingök, ka habe, U ma he ka ot gak, me kap ju hna úne; m' adre me ca he ka subá degecá hnyaban, hoton hnök hna otílá hia gan: ke so bi adre me vesá hnyi hnyomakatu kong me okongoá anyidra ta je huliwa hia. 8 Anyin a wale halubahing nya ju, haingö Iehova, ke ne o but bong oge me he ka höhöi ka hnyi hna söh: anyin a mou but hnyekuk he ka úkhacaköúá je hnyei, m' oge me he ka úkhacaköúá je dökhü, he ka hingálá hudrin anyik hmönyin, wale anyik wathethöt ame ubáhlá; anyin adre me he ka thong degecá hnyei hia ge meicin anyik ciá. 9 Me oge me he bi ka wia ka hnyi hnyei hwen ae wisa, m' adre me he hia ka hawá iö Iehova, me bi athnyabainy ge hnyok a khaca. 10 Ame he tavat adre me khöú könya, a hlu tavat adre oveseá, ka hom ta je bwihlany könya, únyi hnyi hoton je wageweiny Aithiop. 11 Hnyi bong eling u me ca he ka hmehman ta je hwakecám hia waleji u je hanyáúú gak: anyin a wale oge me he bi nya ka hom but gam hnyi bong eling tavat hop ke bi

gan unyám, ke u me ca he hmetu ka begö-rany hnyi anyik bucen ae kap. 12 Ke oge me he ka ip hnyi wanbám ta je hna ovecá me theduoc, ke adre me he ka labageju ka iö Iehova. 13 Ke ame ca he je kolon hnyi Isaraela ka ányá hulö me ha thoi; k' adre me ca he ka wá hnyi je hnyimödra bohmen ae iyawö; anyin adre me he ka han me mokut, ke ba at ame he ka ooti ödra. 14 Hluiny Ziona lö, khumöng dö; Isaraela lö, kuku thö; hluiny Jerusalem lö, senyin dö ke hobá ge hnyekom ae bek-höt. 15 A hia but Iehova hom hna owisa gam, e ame hia but ohia iwahnaihmiony möu: e bi hnyi wanbám Iehova Tuhan Isaraela: u me ca he hmetu ka outen únyi ae kong. 16 Hnyi bong eling adre me he ka ha ka Jerusalem, ka habe, Ca ot bi: Ziona lö, e so ame ca he ka him bi li hnyamám. 17 E bi hnyi wanbám Iehova Khongom, at ae hwege, k' ame he bi ka omelö: e ame he ka senyin köu ke hobá, e ame he ka laba wia hnyi anyin betenge, e ame he ka senyin gam ge khumöng. 18 Oge me he ka úkhacaköúá tavat adre me hlöuhlöu ge wedra ka hnyi úkhacaköu ae únyi hnathu, tavat hanen em hnyei: wale ae hmak káu hna haikongoá. 19 Wá bi, hnyi úen eling oge me he ka mádr' ödra hia tavat adre me oveci u: ke oge me he ka omelö at ame he ci, ke hlo at adre me obá; ke oge me he ka wi' ödra hnán ogáná me lung bi, wale adre me hmehma gadra hnyi hmeledrany hia. 20 Ke hnyi úen eling oge me he ka hum öbun, ke hnyi úen eling oge me he ka úkhacaköu öbun: ke oge me he ka wi' öbun m' adre me lung me ogáná unyin ta je hnyei hia eang hmeledrany, iny ka he ka ohmetu öbun úhebun hnyi hna bâ wale hnyi hnyimaköbun, haingö Iehova.

HAGAI.

HNyimakan 1.

HNYI huna a loi Dariu than, hnyi tehi a siksiny, hnyi bong a bániny tehi, ame o but hofuc ho Iehova a deny Hagai perofeta kö Zerubabela nöku Sealetiela,

gavenainy Juda, me kö Josua nöku Joza-daka, at bihut ae beónua, ame ha ka habe, 2 Walang hna ha hnö Iehova tuhan sabaoth, ka habe, Haingen tavat ang, ka habe, E tiga ca o bi úen, wale úen he ka op uma umö Iehova. 3 Me ame o but hofuc ho

Iehova a deny Hagai perofeta ame ha, ka habe, 4 Hawa, e ün labâ umöbun je uma adre tubi esöiny, ke hnyot bi uma kap ang? 5 Ke walang ang, walang hna ha hnö Iehova tuhan sabaoth, ka habe, Ünüküme ju debun je gethen. 6 Öbun e hia but ti belök, ke ühnyükong bi hna hom; öbun e han, ke ca sekubun bi; öbun e ic, ke beic bala bi; öbun e khaü, ke ba at ame mage bi; ke haba at ame huliwa ge hwaban, me ame hom hwaban he ka hitangen hnyi tang ae moku. 7 Walang hna ha hnö Iehova tuhan sabaoth, ka habe, Ünüküme ju debun je gethen. 8 Ölo thö hon bucen me hok ütö, me hötilö uma; ke oge me he ka senyina e, ke adre me he bi ka oganö nya, haingö Iehova. 9 Öbun e gejon ünyi ae gan, ke wâ bi, e ühnyükong; ke öbun e hom e ka hnyi hnyaba, me oge me tûâ e. Geu? haingö Iehova tuhan sabaoth. Can umök uma ae hnyot dö, ke öbun bi, öbun e ve wadring ka hnyi umöbun je uma. 10 Anyin a wale, can gabun adre me thawâ drany me me ba dân hau, ke adre me thawâ kânâ me me ba jeüiny. 11 Ke oge me oi seünö ka hnyi kânâ, me ka je bucen, me ka hnyi hwit, me ka hnyi waina, me ka hnyi wakaco, me ka hnyi jeüiny kânâ, me ka at, me ka meno, me ka hnyi ta je huliwa hia hnen hnyam.

12 Me haba Zerubabela nöku Sealetiela, me Josua nöku Jozadaka, at bihut ae beönua, me je kolon hia hnyi hnyei, me adre me löng hoton hofuc ho Iehova Khongudrin, me hofuc ho Hagai perofeta, hoton hna kunâ ga Iehova Khongudrin; ke ame ootö Iehova hnen tavat. 13 Me haba Hagai, me üthumetu anyi Iehova hnyi hofuc ho Iehova, me e ame ha, ka habe, Tha inya but möbun haingö Iehova. 14 Me haba Iehova ame bwebwelâ hnyeku Zerubabela nöku Sealetiela gavenainy Juda, ke hnyeku Josua nöku Jozadaka at bihut ae beönua, ke je hnyekon tavat hia hnyi hnyei; me adre me o, me änyâ huliwa hnyi uma umö Iehova tuhan sabaoth, Khongudrin, 15 hnyi bong a twente foainy tehi a siks, hnyi hunâ a loi Dariu than.

HNYIMAKAN 2.

HABA hnyi tehi a seven, hnyi bong a twente waniny tehi, me ame o but hofuc ho Iehova a deny Hagai perofeta ame ha, ka habe, 2 Ha thö walang ang kö Zerubabela nöku Sealetiela gavenainy Juda,

ke Josua nöku Jozadaka at bihut ae nua, ke kolon tavat, ka habe, 3 Ia gabun a kolon at a wâ uma eang hnyi hmanenanginy a bân? ke hawa ge hnöbun hna wâ walang ang? hawa ca helâ me thatünyi hnyi je hnyimaköbun? 4 Ke walang ang, Zerubabela lö, hwege thö, haingö Iehova; ke hwege thö u Josua nöku Jozadaka at bihut ae nua; ke hwege th' öbun tavat hia aten hnyei, haingö Iehova, ke huliwa thö: anyin a tha inya but möbun haingö Iehova tuhan sabaoth, 5 hoton hofuc oge me ühinyköüâ m' öbun hnyi ün öbun e he but ühebum Aigupito, k' ame laba hanuk unyibun: ca ot bi öbun. 6 Anyin a walang hna ha hnö Iehova tuhan sabaoth, ka habe, Okhaca biju, ke ca bec bi, me oge me he bi nya ka jijingâ drany ke hmeledrany, ke köiö ke kânâ; 7 ke oge me he ka jijingâ ta je hnyei hia, ke ame he ka o ta je ünyi wale ame weny ta je hnyei hia, ke oge me he ka öunöngötâ uma eang ge hmanenang, haingö Iehova tuhan sabaoth. 8 Haba sileva, me anyik; ke anyik gol, haingö Iehova tuhan sabaoth. 9 Ame he bi ka gan hmâ hmanenanginy uma eang a biliny hon uma a bân, haingö Iehova tuhan sabaoth: ke oge me he ka ham üsoköu hnyi dok ang haingö Iehova tuhan sabaoth.

10 Hnyi bong a twente foainy tehi a nain hnyi hunâ a loi Dariu, ame o but hofuc ho Iehova a deny Hagai perofeta, ame ha, ka habe, 11 Walang hna ha hnö Iehova tuhan sabaoth, ka habe, Hnö thö walang ang tavat bihut hnyi hnanyibu, ka habe, 12 A ne ke at ame hom uthmeno ae kap hnyi baten khaüen, ke ame ne he khaüen ka kâlâ areto, ame ne öt jeü, ame ne waina, ame ne wakaco, ame ne ke jeü, hawa ame he ka kap? Ke haingen tavat bihut, ka habe, E ba. 13 Haba Hagai ame ha, ka habe, A ne ke at ame bo kong ge ünyi ae mok ame kâlâ khaca hnyi ta je ünyi eling, hawa, ame he ka bo kong? Ke haingen tavat bihut, ka habe, E bo kong ut. 14 Haba Hagai ame thu me ha, ka habe, Helâe tavat ang, ke helâe hnyei ang hnyi hnyimakök haingö Iehova; ke helâe ta je huliwa hia anyin je hnyamödra; ke haba ünyi adre me hudo eling me e bo kong ut. 15 Ke walang ang, ö öbun ünüküme ju hwân hnyi bong ang ke ne o but ehac, hnyi ün a ödra tiga ca hia but ip ke veto hon ke veto hnyi uma umö Iehova: 16 hwân hnyi je bong hia eling, ame ne o at ka

ZAKARIA 1.

hnyi hna khon hwit a twente je tulut, me ame ten biju; ame ne he ke at ka hnyi tangen waina he ka sâû fifte je tulut, me ame twente biju. 17 Oge me kuc öbun ge meleca me om, me we wahma hnyi ta je huliwa hia anyin je hnyamöbun; ke so bi öbun e ca hwiö könya haingö Iehova. 18 Ö öbun únykúme ju, hwân hnyi bong ang ke ne o but ehac, hwân hnyi bong a twente foainy tehi a naininy, hwân hnyi hna bi taben uma umö Iehova, únykúme ju. 19 Hawa e hu hatong hnyi omhani? eke, ame ca wa bi ivine, me imeta, me rimona, me elai; hwân hnyi bong ang oge me he ka ohnahici öbun.

20 Ke ame olo o hofuc ho Iehova kö

Hagai hnyi bong a twente foainy tehi, ame ha, ka habe, 21 Ha thö kö Zerubabela gavenainy Juda, ka habe, Oge me he ka jijingá drany me hmeledrany: 22 ke oge me he ka ohnyimená hnyikânâi je theroniny je dökhu, me ohia tang hwegien je dökhuiny je hnyei; ke oge me he ka ohnyimená hnyikânâi je kariota me tavat adre me tabá, ke ame he ka ta je hors me tavat adre me tabá, ge hele vat anyin je liamekeiny mödra. 23 Hnyi bong eling, haingö Iehova tuhan sabaoth, oge me he ka hum u Zerubabela, nöku Sealetiela, athnyabaik, haingö Iehova, me wiö u helâ me únyi hnân ohmâ haten: anyin oge hia but úcö u, haingö Iehova tuhan sabaoth.

ZAKARIA.

HNyimakan 1.

HNYI tehi a eitiny hnyi huna a loi Dariu, ame o but hofuc ho Iehova kö Zakaria, nöku Berekia, nöku Ido profeta, ame ha, ka habe, 2 Iehova ame hia but hmönyin gan hmâ ka lakamöbun. 3 Anyin a wale ha thö ködra, ka habe, Walang hna ha hnö Iehova tuhan sabaoth ka habe, Hmetu ju könya, me oge me he bi nya ka hmetu köbun, haingö Iehova tuhan sabaoth. 4 Ca he öbun ka helâ me lakamöbun waleji adre me hongot ka ta je perofeta kâû adrem, me ha, ka habe, Walang hna ha hnö Iehova tuhan sabaoth, ka habe, Hmetu ju öbun walang ang únyi hnyi debun ta je gethen ae kong, ke anyibun je huliwa ae kong: ke adre me ca löng bi, k' adre me ca tevehlöng könya, haingö Iehova. 5 Ewa lakamöbun? ke ta je perofeta, hawa, ödrin e ca khaú lakamöbun? me adre me hmetu me ha, ka habe, Haba Iehova tuhan sabaoth ame únykúme he ka ányá köhmun, hoton dehmun je gethen, ke anyihmun je huliwa, ke helâ e ame hia but ányá köhmun.

7 Ke haba hnyi bong a twente foainy

tehi a eleveniny, wale hnyi tehi Sebat, hnyi huna a loi Dariu, me ame o but hofuc ho Iehova kö Zakaria nöku Berekia, nöku Ido perofeta, me ame ha ka habe, 8 Oge me wá hnyi hnyinghet, ke wá bi at ame tabá hors ae dra, ke e ame tot hnyi wanben je úö adasi hnyi dok ae hwaelu; ke hwaban e je hors ae dra, ke hngingidra, ke hau. 9 Me oge me ha, ka habe, Than lö, je iéu e? Ke haba angela at ame úhnenamö mönya ame ha, ka habe, Oge me he ka omanená köu bongon ta je únyi ang. 10 Me ame thu hnen at ame tot hnyi wanben ta je úö adasi, me ha, ka habe, Wale je hna kunâ hnö Iehova he ka vheno hmeledrany. 11 Ke adre me thu ka angela anyi Iehova at ame tot hnyi wanben je úö adasi me ha, ka habe, Ohmun e hia but vheno hmeledrany, ke, wá bi ame laba wia hmeledrany hia, ke hnahic. 12 Me haba angela anyi Iehova ame thu me ha, ka habe, Iehova tuhan sabaoth lö, ke ne o but kehö a u me ca he ka betenge ge Jerusalema, me je tauniny Juda, wale u je hmönyám ka hnyin, hnyi je huna a sevente? 13 Ke haba Iehova ame thu ka angela at ame úhnenamö mönya hnyi je hofuc ae so, wale je hofuc hnân okhaukahwa hnyok. 14 Me haba angela at ame úhnenamö mönya, ame ha könya,

ka habe, Hongot dö me ha, ka habe, Walang hna ha hnö Iehova tuhan sabaoth, ka habe, Inya oge me ciâ Jerusalema, me Ziona, ke gan hmâ hna ciâ. 15 Ke e gan hmâ anyik hmönyin ka tavat adre me laba hnahic : anyin ae ûhnyûkong anyik hmönyin, ke haba ödrin bi, me adre me ogânâ hna ovecâ. 16 Anyin a wale, walang hna ha hnö Iehova, ka habe, Inya oge me hmetu Jerusalema ai me je ibetengiö ; adre me he ka op hmetu umök uma eling, haingö Iehova tuhan sabaoth, ke adre me he ka hlêlô tulut tö hon Jerusalema. 17 Hongot hmetu thö, me ha, ka habe, Walang hna ha hnö Iehova tuhan sabaoth, ka habe, Ame he ka se hia hmetu anyik je taun ûnyi ge hnahic ; ke ame he hmetu Iehova ka otubwelâ Ziona, me senyin ka Jerusalema.

18 Ke oge me bwele thö me wâ, ke wâ bi vak ta faoiny meno. 19 Ke haingök ka angela at ame ûhnenamö mönya, ka habe, je ieû e? Ke haingen kõnya, ka habe, Wale je faoiny meno hnyat ödrin e hia but oveesâ Juda, me Isaraela, me Jerusalema. 20 Haba Iehova ame omanenâ kõnya je hnyat huliwa a vak. 21 Me oge me ha ka habe, Ieû ang ödrin e o kâu? Ke haingen, ka habe, Wale je fao a vak ödrin e oveesâ at Juda, me me ba at ame ogöranyâ ban : ke so bi haba hnyat ang ödrin e o but he ka ooti ödrin, he ka hagutâ je faoiny je hnyei, tavat adre me ogöranyâ je fao ûcon hnyei Juda me oveesâ.

HNYIMAKAN 2.

KE oge me bwele thö, me wâ, ke wâ bi, at ae hu tulut tö hnyi hnyamen. 2 Me haingök, ka habe, U me he kâ? Me e ame thu kõnya, ka habe, Oge me he ka tuluto Jerusalema me wâ ûlauen ke ibeûen. 3 Ke wâ bi, ame he but angela at ame ûhnenamö mönya, ke ame he ke angela bi ka ûkhanö më, 4 me haingen kâu, ka habe, Më wadring dö he ka ha ka hidröu eling, ka habe, Adre me he bi ka labâ Jerusalema helâ me je taun ae ba haginny, anyin ae se hia but tavat me meno hnyi wanben e. 5 Anyin a haba inya, me oge me he ka helâ me hak meic igigilö e, haingö Iehova, anyin a haba inya, me hnân hmanenang hnyi wanben e. 6 E, e, kec dö ûnyi hnyi hnyei hnyi hwadrö, haingö Iehova : anyin a oge bia but ovesei öbun helâ me vak ta ang hnyi drany, haingö Iehova. 7 Ziona lö,

kec möt dö, u at ame laba unyin lakon Babulona. 8 Anyin a walang hna ha hnö Iehova tuhan sabaoth, ka habe, E ame hia but kunö nya ka hnyi je hnyei iny tavat adre me sei öbun he ka hom hmanenang : anyin a haba at ame kal' öbun, me ame ka kâlâ wan enakan bi. 9 Ke wâ bi oge me he ka nyinyikâ hnyamök hudra, me ame he ka sei ödra hnen tavat waleji adre me bi lathnyaba ködra ; m' öbun e he ka wâ a ga kunö nya Iehova tuhan sabaoth. 10 Khumöng dö ke senyin, u hluiny Ziona : anyin a wâ bi, oge me he, me oge me he ka laba hnyi wanbâm, haingö Iehova. 11 Ke ame he ta je hnyei ae se hia ka tha hien me Iehova hnyi bong eling, ke adre me he bi ka lakeik : ke oge me he ka laba hnyi wanbâm, me u me he ka wâ a ga kunö nya köu Iehova tuhan sabaoth. 12 Ke ame he Iehova ka laba hnyi Juda, wale hwajekhon hnyi hnyei ae kap, me ame he bi ka ûca Jerusalema. 13 Tavat hia thithö lö, laba hnyibû ju hnyi hnyimakö Iehova ; anyin a e ame todrö ûheny hnyi hnyaban ae kap.

HNYIMAKAN 3.

KE e ame omanenö Josua kõnya wale at bicut ae beönua, ame tot hnyi hnyimakan angela anyi Iehova, ke haba Satana ame tot hnyi ke keihen a metân he ka iwahnaihmiöny më. 2 Haba Iehova ame ha kö Satana, ka habe, Satana lö, e so e û u Iehova ; eke, e so ame he Iehova at ame senyin ka Jerusalema ka û u : hawa, ca uthmeic bi ang adre oc ûnyi hnyin meic! 3 Ke haba Josua ame khavâ je ûkhaû ae kânâ, me tot hnyi hnyimakan angela. 4 Me e ame thu me ha ka tavat adre me tot hnyi hnyimakan, ka habe, Uny jut je ûkhaû ae kânâ gan. Ke haingen kâu ka habe, Wâ bi oge hia but ohia hwakecâm ae kong gam, ke oge me he bi ka okhaûö u ge je ûkhaû ae hmanenang. 5 Ke oge me ha, ka habe, E so adre me obicâ e ge hnabinybak ae so. Me adre me obicâ e ge hnabinybak ae so, me okhaûâ e ge je ûkhaû ; ke haba angela anyi Iehova ame tot. 6 Haba angela anyi Iehova ame ha hwegiâ kö Josua, ka habe, 7 Walang hna ha hnö Iehova tuhan sabaoth, ka habe, U je ne he ka vhenö dek je gethen, me tuö hnök je hna otilâ, me u me he ka owisa umök uma, me tuö je hnyeulek, ke oge me he ka ham köu dok he ka vhenö unyin

tavat adre me tot eü. 8 Josua at bihut ae nua lö, löng ju walang ang, u me lahânâm tavat adre me tot hnyi hnyimâkâm; anyin a ödra tavat me hnân haten: anyin a wâ bi, oge me he ka oâ athnyabaik wale Khûen. 9 Anyin a wâ bi veto oge hia but ip hnyi hnyimakö Josua; seven je eemak hnyi veto a khaca: wâ bi oge me he ka kave hna kave e, haingö Iehova tuhan sabaoth, ke oge me he ka ohia hulöiny hnyei eling hnyi bong a khaca. 10 Hnyi bong eling haingö Iehova tuhan sabaoth, öbun e he ka ve hawâ je lahanöbun ka hnyi hmelen je ivine, me hmelen je imeta.

HNYIMAKAN 4.

KE ame hmetu angela, at ame ûhnenamö mönya, me ohmakö nya, helâ me hna ûöhmak hnyi hna mokut. 2 Me haingen kõnya, ka habe, Ieü u je wâ? Me haingök, Inya oge hia but wâ, ke wâ bi taben lamepa a gol hia, ke hu kaiainy hnyi ban e, ke je lamepainy a seven ethö hon e; ke seven je deny wakaco ka hnyi je lamepa hnyin e: 3 ke hu lo li elaiö hnyi baten e, khaca hnyi ke keihen metân kaia, ke khaca hnyi ke keihen me. 4 Me oge me thu me ha ka angela at ame ûhnenamö mönya, ka habe, Tuhök lö, ie je ûnyi e? 5 Me ame ha kõnya angela, at ame ûhnenamö mönya, ka habe, Hawa, e ca hanö u bongon ta je ûnyi e? Me haingök, ka habe, Tuhök lö, e ca khanö nya. 6 Me e ame thu me ha kõnya, ka habe, Walang hna ha hnö Iehova kö Zerubabela, ka habe, Ca ûnyi ge man, ke ca ûnyi ge tang hwege, ke so bi ûnyi ge hanûk, haingö Iehova tuhan sabaoth. 7 U ie at, bucen ae gan? u me he bi ka helâ me dok ae tha hon hnyi hnyimakö Zerubabela: ke e ame he ka hom je veto hnân öumo, me hongot, ka habe, Ibetengiö bâu, ibetengiö baü unyin e. 8 Ke ame o but kõnya hofuc ho Iehova, ame ha, ka habe, 9 A hia but hnyamö Zerubabela bi taben uma eang; me ame he li hnyamen ka öumo e; me u me he ka wâ a ga kunö nya köbun Iehova tuhan sabaoth. 10 Ke ie at ame hia but hûkotiâ bonginy ûnyi ae ûhnyükong? anyin a haba lnyat ang a seven, a je emakö Iehova, me ödrin e he ka senyin ödrin ka wâ tulut tot hnyi hnyamö Zerubabela; ke ödrin e vhenö hmeledrany hia. 11 Me oge me thu me ha kâu, ka habe, Ieü li elaiö eling hnyi ke keihen a metân taben lamepa, ke meny? 12 Me

oge me olo thu, me ha kâu, ka habe, Ieü li anginy elaiö wale hnyi deny hingälâ wakaco a gol, wale hnân hingälâ wakaco gol ûnyi hnyin? 13 Me e ame ha kõnya, ka habe, E ca khanö u bongon li ûnyi e? Ke haingök, ka habe, Tuhök lö, e ca khanö nya. 14 Ke haingen, ka habe, Wale li lakon wakaco, a li at ödrü me tot hnyi hnyimakan Thaniny hmeledrany hia.

HNYIMAKAN 5.

KE inya hmetu oge me bwela me wâ, ke wâ bi tusi adre vhec at ame gâ. 2 Ke e ame ha kõnya, ka habe, Ieü u je wâ? ke haingök ka habe, Inya oge me wâ tusi adre vhec ame gâ; twente kubit ibeüen e, ke ten kubit ûlauen. 3 Me haingen kõnya ka habe, Wale hnaûhangö at ame vhenö hia hon kânâ: anyin a haba at venöu, me adre me he ka subâ degecâ hoton e hnyi ke keihen e; ke haba at ame khemanyin adre me he ka subâ degecâ hoton e hnyi ke keihen e. 4 Oge me he ka kunâ e, haingö Iehova tuhan sabaoth, ke e ame he ka dit hnyi hnyin uma umen at venöu, me uma umen at ame khemanyinâ thoiâ iök: ke e ame he ka laba hnyi hnyin umen uma, me ohia e, tha e me utöiny, me je vetoiny. 5 Me ame he but angela at ame ûhnenamö mönya, me ha kõnya, ka habe, Bwele thö walang ang, me wâ thö ie ûnyi ang ame he but. 6 Ke haingök, ka habe, A ieü e? Ke e ame ha kõnya, ka habe, Walang efa at ame he. Ke haingen, ka habe, Walang hnân öücü ödra hnyi hnyei hia: 7 (ke wâ bi, adre me kap görany ai talan led:) ke walang ke momo ame laba hnyi wanben efa. 8 Ke haingen, ka habe, Wale Hwacecin ae Kong; ke e ame khûâ hnyikânâi momo, ka hnyi wanben efa: me e ame khûâ tulut led ka hnyi hnyimen ûnyi e. 9 Ke inya oge me bwele me wâ, ke wâ bi, li momo ödrü me o, ke e hnyi li labenyidru ang; ke ve hu labenyidru helâ me labenyin kasida: ke ödrü me kap göranyai efa hnyi wanben hmeledrany me drany. 10 Me oge me ha ka angela, at ame ûhnenamö mönya, ka habe, Ödrü me hom kâ efa? 11 Ke haingen kõnya, ka habe, Ödrü me he ka bi umen uma hnyi hnyei Sinara: ke e ka penapena, adre me he ka ip momo hnyin wale hnyi hing taben lap.

HNYIMAKAN 6.

KE inya oge me bwele hmetu me wâ, ke wâ bi ame o vak ta kariota únyi hnyi wanben li bucen ; ke haba li bucen, me li bucen bras. 2 E hnyi kariota a bán li hors ae dra, ke e hnyi kariota a loiny li hors ae hlit ; 3 ke e hnyi kariota a kuniny li hors ae hau ; ke e hnyi kariota a vakiny li hors ae sisit húen. 4 Ke oge me thu me ha ka angela at ame úhnenamö mönya, ka habe, Tuhök lö, je ieu e? 5 Ke haba angela ame thu me ha kõnya, ka habe, Wale je ang a vakiny drany, hnyat ödrin e he úhedrin hnyi hna tot hnyi hnyimakan Thaniny hmeledrany. 6 Ke haba kariota a e hnyin li hors ae hlit, me ame he ka hnyi hnyei hnyi hwadró ; ke haba li hors ae hau, me ödru me he hotudru ; ke haba li at ae sisit, me ödru me he ka hnyi hnyei hnyi hwaïöu. 7 Ke haba li at ae húen, me ödru me he me heleü he ka vheno hmeledrany : ke haingen, ka habe, He th'öbu ka vheno hmeledrany. Me ödru me vheno hmeledrany. 8 Ke e ame hongot kõnya, me ha kõnya, ka habe, Wâ bi, haba tavat adre me he ka hnyi hnyei ka hnyi hwadró, me adre hia but okatebo anyik hmönyin hnyi hnyei ka hnyi hwadró.

9 Ke ame o but kõnya hofuc ho Iehova, ame ha, ka habe, 10 Hom dö hanen je bâ únyi hnyi lap anyi Heledai, ke Tobija, ke Jedaia ; ke so u ma o hnyi bong eling me dit hnyi uma umö Josea nöku Zefania, wale ödrin e o ka hnyin úhedrin hnyi Babulona ; 11 eke, hom dö únyi gadrin sileva me gol, me ányâ je korona me ip hon bö Josua nöku Jozadaka at bihut ae nua ; 12 ke u me he ka ha kâu, ka habe, Walang hna ha hnö Iehova tuhan sabaoth, ka habe, Wâ bi at, haba ien, me Khúen ; ke e ame he ka kú únyi hnyi hnen me op uma umö Iehova : 13 ke e ame he ka op uma umö Iehova ; ke e ame he ka vaden hmanenang, ke e ame he ka laba me musi hon anyin theron ; ke e ame he ka at bihut hon anyin theron : ke ame he ka e bi hnyi wanbödru úhnenamoiny úsoköu. 14 Ke haba je korona, me hobi kö Helem, me Tobija, me Jedaia, me Hen nöku Zefania, hnân öúnykúmeâ hnyi uma umö Iehova. 15 Ke ame he tavat úhedra sákâú ka o me op uma umö Iehova, me öbun e he ka wâ a ga kunö nya köbun Iehova tuhan sabaoth. Ke ame he ka aat e, öbun e ne löng wia ifuci Iehova Khongubun.

HNYIMAKAN 7.

KE haba hnyi huna a vaki Dariu than, me ame o but hofuc ho Iehova kö Zakaria hnyi bong a vakiny tehi a naininy, wale Kiselu. 2 Ke haba at Beth-ela adre hia but kunö Sarezera me Rege-melek, me je aten he ka khöúâ betenge ga Iehova, 3 me ha ka tavat bihut hnyi uma umö Iehova tuhan sabaoth, me ka je perofeta, ka habe, Hawa, e úcú kõnya he ka tenge hnyi tehi a faiviny, me úsákâú helâji me hnök hna ányâ waleji hnyi je huna ae se hia? 4 Me ame o but hofuc ho Iehova tuhan sabaoth kõnya, me ha, ka habe, 5 Ha thö ka aten hia hnyei, me ka tavat bihut, ka habe, Haba hnyi je úen öbun e ányâ ca han me tenge thungaü hnyi tehi a faiviny me tehi a seveniny, hnyi je huna a sevente, hawa, öbun e ányâ ca han kõnya? 6 Ke haba hnyi je úen öbun e han me ic, hawa, öbun e ca han hobi köbun bi, me ic hobi köbun bi. 7 Hawa, e ca úcú köbun he ka löng hofuc waleji Iehova ame ha a deny je perofeta kâú adrem, hnyi úen adre labâ Jerusalem ke e sot, ke adre me labâ je tauniny igigilö e, me ke keihen ka hnyi Hwaïöu, me dok ae tha hon?

8 Ke ame o but hofuc ho Iehova kö Zakaria ame ha, ka habe, 9 Walang hna ha hnö Iehova tuhan sabaoth, haingen, ka habe, Owisa wia ju, ve omanená betenge me hnyok ae menyik ka je liamekeiny möbun : 10 ke ca ovecâ safac me nakahme, me atkanyua, me at ae theduoc ; ke ca únykúme eú hnyi hnyok únyi ae kong ka ke at. 11 Ke ödra höcö löng, me behânâ bajebenyidra, k' adre me löng je hnyikönyödra, m' adre me ca löng bi. 12 Eke, adre me wia je hnyekudra me me helâ me samira, m' adre me ca löng bi hnanyibu, me je hofuc ho Iehova tuhan sabaoth, waleji a kunâ hnen hanon a deny je perofeta a bán : anyin a wale ame o but hmönyin ae gan únyi ga Iehova tuhan sabaoth. 13 Ke e ame hongot, k' adre me ca löng bi ; helâe, adre me he ka hongot ke oge me ca he bi nya ka löng, haingö Iehova tuhan sabaoth ; 14 ke oge me he ka ovesei ödra ge höu ka hnyi je hnyei hia waleji ae ca khan' ödra. Me ba wan hnyei hwabödra, ke ba at ame he ehele me hmetu : anyin adre me öba wan hnyei ae hmanenang.

HNYIMAKAN 8.

KE ame o kõnya hofuc ho Iehova, ame ha, ka habe, 2 Walang hna ha hnö Iehova tuhan sabaoth, ka habe, Oge me ciâ Ziona, ke gan hmâ hna ciâ, ke oge me ciâ e hnyi hmönyin ae gan. 3 Walang hna ha hnö Iehova, ka habe, Oge me laba hmetu hnyi Ziona, ke oge me he ka laba hnyi wanben Jerusalema : ke adre me he ka hwenyien Jerusalema, me Taun ae hnathu ; k' adre me he ka hwenyien bucen anyi Iehova tuhan sabaoth, ka habe, Bucen ae kap. 4 Walang hna ha hnö Iehova tuhan sabaoth, ka habe ; Ame he bi wahingat me wasomaca ka laba hnyi ta je getheniny Jerusalema, k' adre me he ka ve he me uci, hoton úhingatidra bi. 5 Ke ame he ka unöngöt je getheniny taun ge waında me waindusem hnyat adre me walak eü hnyi ta je gethen. 6 Walang hna ha hnö Iehova tuhan sabaoth, ka habe, Ame ne hnân láia ka je kolon tavat ang hnyi je bong eling, hawa e ca úcú kõnya he ka hnyi láia? haingö Iehova tuhan sabaoth. 7 Walang hna ha hnö Iehova tuhan sabaoth, ka habe, Wâ bi, oge me he ka omelö lakeik únyi hnyi hnyei e deiö, ke hnyei e jiö : 8 ke oge me he ka hum ödra, m' adre me he ka laba hnyi wanben Jerusalema ; ke adre me he ka lakeik, ke oge me he ka Khongudrin hnyi hnathu me hwakecin ae wisa. 9 Walang hna ha hnö Iehova tuhan sabaoth, ka habe, Ohwegiâ thö je hnyamöbun, tavat öbun e löng hnyi bong ang hofuc ang a deny je perofeta a ödra hnyi bong adre bi taben hnyin uma umö Iehova tuhan sabaoth, wale uma kap, m' adre me he ka op e. 10 Anyin ae tiga ca o je bong eling, adre me ca bi hwaban ka tavat, me hobi kâu je meno ; ke ba hnahic ka at ame didrut me didrö can iwahnaihmiony : anyin oge me ve kunâ tavat hia he ka úiwahnaihmionyköu. 11 Ke walang ang, oge me ca he ka helâ hnyi je bong a bân ka je kolon tavat ang, haingö Iehova tuhan sabaoth. 12 Anyin ame he ka hu hatonginy úsoköu ; ame he vine ka wa, ke kânâ ame he ka oâ jeüiny, ke ame he drany ka ham dân hau ; ke oge me he ka kunâ je kolon tavat ang ka hu ta je únyi hia eling. 13 Adre ohnaúhang' öbun lap anyi Juda, me lap anyi Isaraela unyin je hnyei, helâe oge me he ka omeli öbun, ke öbun e he ka hnahic : ca ot bi, owhigiâ thö je hnyamöbun.

14 Anyin a walang hna ha hnö Iehova tuhan sabaoth, ka habe, Oge únykúme he ka ányâ únyi ae kong köbun, waleji ge hnen lakamöbun hna ohmönyini nya, haingö Iehova tuhan sabaoth, ke oge me ca ietra ; 15 helâe oge me únykúme hmetu hnyi bong ang he ka ányâ so ka Jerusalema, me ka lap anyi Juda : ca ot bi. 16 Walang únyi öbun e he ka ányâ. Úhaköuâ thö hnathu ; owisa hnatho thö me hnahic hnyi je homagöulebun : 17 ke ca he ke at unyibun he ka únykúme únyi ae kong hnyi je hnyekubun ka ke at ; ke ca hnyok bi hna khemanynin thoi : anyin a húkötianök ta je únyi hia e, haingö Iehova.

18 Ke ame o but kõnya hofuc ho Iehova tuhan sabaoth, ka habe, 19 Walang hna ha hnö Iehova tuhan sabaoth, ka habe. Haba hna ányâ ca han hnyi tehi a vakiny, me hna ányâ ca han hnyi tehi a thabúnginy, me hna ányâ ca han hnyi tehi a seveniny, me hna ányâ ca han hnyi tehi a teniny, me ame he ka hnân senyin me hobâ ka lap anyi Juda, me bijeü ae so. 20 Walang hna ha hnö Iehova tuhan sabaoth, ka habe, Ame he hmetu ka o tavat, ke aten ta je taun ae se hia : 21 k' ame he aten ke taun ka he ka aten ke taun bi me ha, ka habe, E so ate me he mweimwei me sumâtâ ibetengiö ga Iehova, me elöm Iehova tuhan sabaoth : ke oge me he ka hnyi he. 22 Eke, ame he ka o but tavat ae se hia ke ta je hnyei ae hwege he ka elöm Iehova tuhan sabaoth hnyi Jerusalema, me sumâtâ ibetengiö ga Iehova. 23 Walang hna ha hnö Iehova tuhan sabaoth, ka habe, Hnyi je bong eling, me ame he hnyat a ten ka kât obiny úkhaü anyin at Juda, walödrin hnyi ta je hwen hnyei hia, me ha, ka habe, Öhmun e he ka tha he möbun, anyin ae khan' öhmun dut a e unyibun Khong.

HNYIMAKAN 9.

WALANG hok, wale a hofuc ho Iehova hnyi hnyei i Haderaka, k' ame he ka menâ bi hnyi Damaseko : anyin ame bwele kö Iehova emakan at ke emakan ta je tribu Isaraela hia : 2 ke Hamath minya wale útangköu mē : ke Turo me Sidona anyin e gan hmâ metâiny. 3 Ke haba Turo, me ame ka op hnabâ, me úkhö-únâ sileva helâ me sesâ, ke gol ae so helâ me hmudrainy gethen. 4 Wâ bi, ame he Than ka obâ e, me kot maniny man hnyi köiö ; ke adre me he ka thong degecâ e ge

meic. 5 Ame he Asekelona ka wâ e, me ot ; ke Gaza, me ame he ka vec gan hmâ ; ke Ekerona ; anyin a e ame he ka hmehma ge hnen hna gejon : ke ame he ka hia than hnyi Gaza, ke adre me ca he bi ka labâ Asekelona. 6 Ke ame he atkanyua ka laba hnyi Asedoda, ke oge me he bi nya ka subâ degecâ bi ganiny at Filisiti. 7 Ke oge me he ka hom dren únyi hnyi hnyimen, ke ta je únyi ae ikiki e ame oloú ; k' ame he biju ka kolon hobi kâu Khonguta : ke e ame he ka helâ me taben hnyi Juda, k' ame he Ekerona ka helâ me at Jebusi. 8 Ke oge me he ka hunuma igigilö umök uma, úcon iwahnaihmióny, me me ca he ke at ka he me hmetu : ke ame ca he hmetu at úoveci ka he hnyi wanbödra : anyin a walang ang inya oge me wâ ge li emakök. 9 Senyin gan hmâ thö u hluiny Ziona ; kuku thö u hluiny Jerusalema : wâ bi ame he ka he but köu Tuhâm : e at ae wisa, ke tren úhömeli ; at ae ilemuk, ame tabö asina, me nak asina a nokon asina. 10 Ke oge me he ka subâ degecâ kariota únyi Eferaima, me hors únyi Jerusalema, ke adre me he ka subâ degecâ cafanainy vat ; ke e ame he ka ha úsoköu ka ta je hnyei : ke e ame he ka musi hwân hnyi ke köiö, ke ne o but ka hnyi ke köiö, ke hwân hnyi Wagewe ke ne o but ka hnyi je can hmele-drany. 11 Kehaba u, can dren úhilihinköu möu, me oge hia but kunâ tavat adre ca gam únyi hnyi thop ae ba köien. 12 Hmetu ju ka hnyi hna bâ, öbun tavat adre ca a tavat gejon : inya oge me ha hnyi bong ang a oge me he ka ibi olo ham köu. 13 Anyin oge hia but lau Juda hobi könya, me ip Eferaima hon cafana ; ke oge me he ka obwebwelâ le lakom, Ziona, lö, úcon je lakon Heleni, me oge me he ka wiö u helâ me hele vat anyin at ae hwege. 14 Ke ame he Iehova ka manen hudrin, ke ame he anyin fana ka gâ helâ me hucuce : ke ame he Than Iehova ka túâ trutru, me he hnyi je höu úheny hnyi hwaïou. 15 Ame he Iehova tuhan sabaoth ka sing ödra ; ke adre me he ka han me uto je veto adre külüec ; ke adre me he ka ic me mede helâ me tavat adre ic waina : ke adre me he ka unöngöt helâ me kaia, me helâ me je kopiny taben hut. 16 Ke ame he Iehova Khongudrin ka omeli ödra hnyi bong eling helâ me hnahat mamoe wale lakeiny : anyin adre me he ka helâ me vetoiny korona adre kap göranyai hon iny hnyei. 17 Anyin ae ti gan hmâ anyin so, ke ti gan hmâ anyin

hmanenang ! ame he ka sot wahidröu ge hwit, ke wahlu minya ge waina.

HNYIMAKAN 10.

SUMATÖ Iehova thö ge we hnyi úen we a biliny, Iehova at ame mádrâ je hucuce ; me e ame he ka ham we ae gan ködra me me ve hu gadra önyinginy hnyei. 2 Anyina a hia but ha thoi je idola, ke haba tavat bi khong adre hia but wâ thoi ; ke adre hia but ha je bwi ae thoi, e únyi baú bi hnödra hna otubwelâ : anyin a wale adre me vheno je dedra helâ me je mamoe, adre me vec anyin ae ba at ame tu' ödra. 3 Ame ubâhlâ thö anyik hmönyin ka tavat tuö mamoe, ke oge me he ka bi hwaban ka je got бага : anyin a hia but Iehova tuhan sabaoth senâ hnahat haleny wale a lap anyi Juda, ke e ame he ka wi' ödra helâ me haleny je hors ae mec hnyi vat. 4 Ame he ka o únyi gan veto hnân kopiny, ke únyi gan minya matalafi, me cafanainy vat, únyi gan ame he tavat musi hia. 5 Ke adre me he ka helâ me tavat hwege, tavat adre me uto je iwahnaihmióny hnyi hmu-drainy gethen hnyi vat ; ke adre me he ka vat, anyin a e unyidra Iehova : ke ame he tavat tabö hors ka hlöhlö. 6 Ke oge me he ka ha hwegien lap anyi Juda, me omelö lap anyi Josefä, me ohmetu ödra, anyin oge me betenge gadra ; ke adre me he ka helâ ke m' oge me ca digic ödra : anyin a inya Iehova Khongudrin, ke oge me he ka ling ödra. 7 Ke ame he at Eferaima ka helâ me at ae hwege, ke ame he je hnye-kudra ka senyin helâ me tavat adre ic waina : eke, ame he je lakudra ka wâ me senyin ; ame he je hnyekudra ka hobâ kö Iehova. 8 Oge me he ka hülúhwajú ködra, me úkhacaköu ödra anyin oge hia but úcü melidra : ke adre me he ka si helâ me hwakecin úsehiaidra. 9 Ke oge me he ka te ödra unyin je hnyei ; ke adre me he ka únyküme könya hnyi je dok ae sâkâu : ke adre me he ka tha möt hmetu me je lakudra. 10 Ke oge me he ka ohmetu ödra únyi hnyi hnyei Aigupito, me úkhacaköu ödra úhedra Asuria ; ke oge me he ka hum ödra ka hnyi hnyei Gileada me Lebanona ; ke adre me ca he ka wâ dok hobi ködra. 11 Ke e ame he ka vheno köien úoveci, me kot je waköiöiny köiö, ke ame he je dok ae dit hnyi Nail ka mada : ke adre me he ka ohnyikânâ bi gan anyin Asuria, ke ame he ka hia hnyi Aigupito uciny musi. 12

Ke oge me he ka ha hwegiödra únyi ga Iehova ; ke adre me he ka ngenu únyi ge ien e haingö Iehova.

HNYIMAKAN 11.

LEBANONA lö, khöng ut je homagöu-lem, me me he meic ka thong degecá ányâm je arasi. 2 Köp lö, kuku tenge thö, anyin a ta but arasi, k'ame kong ut je úö ae hmanenang: je iwajoiny Basana lö, kuku tenge thö, anyin ae hnyikánâ but uhnyot ae hwege. 3 Wale úkuku tengeiny tavat tuö mamoe! anyin ae kong ut anyidra hmanenang: úkukuiny je nak liona! anyin ae kong ut hmanenanginy Joridano. 4 Walang hna ha hnö Iehova Khonguk, ka habe, Hân ju hnahat mamoe hnâp hlingá; 5 haba tavat a haledra adre me hling' ödra, k' adre ca únykúme a ka ödra kong can e; ke haba tavat adre me úcú ödra, me adre me ha, ka habe, Ole kö Iehova anyin a iny tren dut omjeú: ke ame ca betenge gadrin je latuhödrin. 6 Anyin oge me ca he hmetu ka betenge ge tavat adre me labâ hnyei, haingö Iehova: ke wâ bi oge me he ka ve hna tavat ka hnyi hnyamen je lahanödra, ke ka hnyi hnyamen tuhan: me adre me he ka kot hnyei, ke oge me ca he ka omeli ödra únyi hnyi je hnyamödrin. 7 Waleling me oge me hân hnahat mamoe hnân hlingá, a ta je mamoe ae ti kong hnyi hnahat. Ke oge me hom li uci; haba khaca oge me hwenyi ien, me Hmanenang, ke oge me hwenyi ien khaca, me Je wen; ke oge me hân hnahat mamoe. 8 Ke oge me subâ degecá hnyat tuö mamoe a kun hnyi tehi a khaca; ke vec hnyekuk gadrin, k' ame húkötio nya ge ta je hnyekudrin. 9 Me haingök, ka habe, Oge me ca he bi nya ka ha ö 'bun: haba at ame he bi ka mok, me ame ka e bi ka mok; ke haba at adre me he ka subâ degecá, me adre me ka he bi ka subâ degecá; ke haba kolon, me so ame he ka ve an vidrin hnen keihen. 10 Ke oge me hom anyik uci wale Hmanenang, me thu e, m' oge me he ka ohmetro úhinhinyköu, waleji oge me ányâ me ta je hnyei hia. 11 Ke ame hmetru thö hnyi bong eling: ke e khana but hnahat mamoe ae vec ut, tavat adre me tevehlöng könya a wale hofuc ho Iehova. 12 Me haingök ködra, ka habe, A ne so köbun hö jem hwabök; ke a ne ba, hna ju. Me adre me tuluto hwabök a thöte je sileva. 13 Ke Iehova ame ha könya, ka habe, Khúâ thö

e ka at ame up kaia, wale hwaban adre me ha me hwabök. Me oge me hom je sileva a thöte, me khúâ hnyi uma umö Iehova ka at ame up kaia. 14 Ke haba ke uci, me oge me thu e, wale Je wen, m' oge me he ka ohmetro hwakecin liamekeiny, a Juda me Isaraela.

15 Ke Iehova ame ha könya, ka habe, Hom dö hmetu je omjehen at ae monu a at tuö mamoe. 16 Anyin a wâ bi, oge me he ka oâ at ame tuö mamoe hnyi hnyei, at ame ca he ka sen' ödra wale adre subâ degecá, ke e ame ca he ka elâm je mamoe adre ve se but, me ometo je aat; ke e ame ca he ka hân je mamoe ae hwege, ke e ame he ka an viny ae pipikhenya, me kia amemâ je boújimödrin. 17 Ekölö ge at ame ca ti tuö mamoe, at ame hna degecá hnahat mamoe! ame he hele vat ka ta hon benyin, ke emakan a metân: ame he ka meleca benyin, ke ti lit emakan a metân.

HNYIMAKAN 12.

WALANG hok, wale hofuc ho Iehova ge Isaraela.

2 Walang hna ha hnö Iehova at ame ulolo drany k' ame bi taben hmeledrany, me op hanon at eú hnyi hnyekon, ka habe, Wâ bi oge me he ka wia Jerusalema hnân kaiainy ta tot ka je hnyei hia igigilö, ke haba khaca me ame he ka e hon Juda hnyi hna igigilö Jerusalema. 3 Ke hnyi úen eling oge me he ka wia Jerusalema hnân veto ae hmak ka tavat hia; haba tavat adre me ka kap göranyai, me adre me he ka aat bi; ke ame he ka úkhacaköu úcon ta je hnyeiny hia hmeledrany. 4 Hnyi bong eling, haingö Iehova me oge me he ka kot ta je hors hia ge uthmâhmâ, k'ame he ka monu bi at ame tabâ e: ke oge me he ka bwele ka wâ lap anyi Juda, ke oge me he ka owadruâ ta je hors hia haleny tavat. 5 Ke ame he je taben hnyi Juda ka ha eú hnyi je hnyekudra, ka habe, Tang hwegiöhmun tavat adre me laba hnyi Jerusalema anyi Iehova tuhan sabaoth a Khongudrin. 6 Hnyi bong eling oge me he ka wia je taben Juda me me helâ me hlogon öt hnyi wanben utö, me helâ me okúnu hnyi je thi hwit; ke adre me he ka an tavat hia igigilö, hnyi ke keihen metâ me me: ke ame he hmetu Jerusalema ka labâ hnen, wale hnyi Jerusalema. 7 Ke ame he ka bö Iehova ka me omelö je uma mano umö Juda, me me ca görany hmanena-

nginy lap anyi Davita, me hmanenanginy aten Jerusalema hon Juda. 8 Hnyi bong eling ame he Iehova ka söng aten Jerusalema; ke haba at ae sēnyin gadra hnyi bong eling ame he ka helâ me Davita; ke ame he lap anyi Davita ka helâ me Khong, helâ me angela anyi Iehova hnyi hnyimaködra. 9 Ke hnyi bong eling oge me he ka elâm he ka ohia ta je hnyei hia, tavat adre me hok vat Jerusalema ai. 10 Ke oge me he ka hingâlâ hon lap anyi Davita me aten Jerusalema, hanuiny ibetengiö baû me hanuiny khôû; ke adre me he ka õ nya waleji adre dâ: ke adre me he ka tenge gan, helâ me at ame tenge ge nokon a khaca, ke adre me he ka vec gan, helâ me at ame vec ge nokon a bân. 11 Hnyi bong eling ame he ka tenge thungaû hnyi Jerusalema, helâ me tenge thungaû hnyi Haderimona hnyi hnyigöulen bucen Megido. 12 Ke ame he tavat ka tenge thungaû, úsa khaca je lap hia; hake tavat thibi hnyi lap anyi Davita, me hake laöiödra thibi; hake tavat thibi hnyi lap anyi Nathana, me hake laöiödra thibi; 13 hake tavat thibi hnyi lap anyi Levi, me hake je laöiödra thibi; me hake tavat thibi hnyi lap anyin at Simeï, me hake laöiödra thibi; 14 me kolon je lap hia, ke lap me ke lap a hake ödra thibi, me hake laöiödra thibi.

HNYIMAKAN 13.

HNYI bong eling adre me he ka oâ pupa ka lap anyi Davita me aten Jerusalema hobi kâu hulö me hwakecin ae ikiki. 2 Ke hnyi bong eling haingö Iehova tuhan sabaoth, me oge me he ka ohia ta je ien je idola hnyi hnyei, m' adre me ca he hmetu ka únykúme ködrin: ke haba khaca oge me he ka obâ ta je perofeta me ta je hanu ae ikiki hnyi hnyei. 3 Ke ame ne perofeta hmetu ke at, ke ame ne ba kâu hnen kamen me hinyen, a li at ödre hnokoâ, ka habe, U me ca he ka möt; anyin a u me ha thoi hnyi iö Iehova: ke e ka perofeta, me ame he kamen me hinyen a li at ödre hnokoâ ka dâoâ e. 4 Ke hnyi úen eling ame he ta je perofeta ka ve hmehma ge hnödra hna wâ, ödra ka perofeta; ke adre me ca he ka khavâ úkhaû ae hu dinen he ka iyawö: 5 ke adre me he ka ve ha, ka habe, Iny ca perofeta bi nya, ke iny at belök bi; anyin adre me thalüö nya k' iny tiga wanakat. 6 Ke adre me he ka ha kâu, ka habe, Aat wanben li benyâm ahö?

Me e ame he ka ha, ka habe, Wale hna kuc nya hnyi hnyaban je lahanök.

7 Hele vat lö, hmak dö ka at ame tuö mamoe könya, me úcon at ae úcú mönya, haingö Iehova tuhan sabaoth: kot dö at ame tuö mamoe, me ame he ka ve se but ta je mamoe; ke oge me he ka wia hnyamök ka tavat ae úhnyúkong. 8 Ke haingö Iehova, ka habe, Haba hnyi hnyei hia, me adre me he ka subâ degecâ li ke keihen hnyin e m' adre me mokcu; ke ame he ka hnen biju hnyin e ke keihen a kuniny. 9 Ke oge me he ka hom ke keihen a kuniny ka he hnyi wanben meic, me ányâwi' ödra helâ me hna ányâwia sileva, me cubic ödra helâ me hna cubic gol: ke adre me he ka hawâ iök, me oge me he bi nya ka ling ödra: ke oge me he ka ha, ka habe, Lakeik ödra; me adre me he ka ha, ka habe, Iehova Khonguhmun.

HNYIMAKAN 14.

WÂ bi, ame he ka o bong bongu Iehova, ke adre me he ka khenâ hnyi wanbâm hna söh. 2 Anyin oge me he ka úkhacakouâ ta je hnyei hia úcon Jerusalema he ka vat; ke adre me he ka húgúnâ taun, me söh je uma, me okongoâ omomo: ke adre me he ka hom bá hafúny taun, ke adre me ca he ka subâ degecâ únyi hnyi taun kolon tavat. 3 Ke haba Iehova ame he ka he but, me vat me je hnyei eling, helâji me hnen hna vat hnyi bonginy vat. 4 Ke haba hnyi bong eling, me ame he li can ka tot hon bucen Elaio, cioö deiö Jerusalema, ke adre me he ka subâ luâ bucen Elaio hnyi wanben e deiö me jio, me ame he ka hu hnyigöulen bucen ae gan; ke ame he ke keihen bucen ka he ka hnyi hwadrö, ke haba ke keihen ame he ka he ka hnyi hwaiöu. 5 Ke öbun e he ka kec me gethen hnyi hnyigöulen anyik je bucen: anyin ame he ka he ke ne o but hnyi Azale hnyigöulen je bucen: eke, öbun e he ka kec helâji me hnöbun hna kec ge hwiöi hnyi je bong bongu Uzia than Juda: ke ame he Iehova Khonguk ka o, ke ame he ka tha o möu tavat hia ae kap. 6 Ke haba hnyi bong eling, ame ca he ka tha e bi lany me melam me menekholom: 7 ke ame he ka khaca bong ae manen kö Iehova; ca lany bi, ke ca lit bi: ke so bi hnyi sabac ame he ka lany. 8 Ke haba hnyi bong eling ame he ka di köiö möt úheny Jerusalema; ame he ka di hanen ka hnyi köiö e

MALAKI 1.

deiö, ke ke hanen ka hnyi köö e jio : ame he ka e bi hnyi honivakeny me hnyeun. 9 Ke ame he Iehova ka Thaniny hmeledrany hia : hnyi bong eling ame he Iehova ka khaca thibi, ke khaca thibi ien. 10 Adre me he ka wia hnyeï hia me me helä me dok ae tha hon hwân hnyi Geba ke ne o but hnyi Rimona ke keihen ka hnyi hwaiöuiny Jerusalema ; ke adre me he ka ogöranyä e, ke e ame he ka labä iny, hwân hnyi homagöuleny Beniamina ke ne o but hnyi hnen homagöüle a bân, ke ne o but hnyi homagöuleny kop, he hwân hnyi tap tue anyi Hananel ke ne o but hnyi hna hlic wan vine anyin than. 11 Ke adre me he ka labä e, ke ame ca he hmetu ka hnaühangö ; k' ame he Jerusalema ka laba khötkic. 12 Ke walang mok ae cap ame he Iehova ka kunâ ka tavat hia waleji adre me vat me Jerusalema : ame he ka aü tot je imonumonuny gadra ünyi ga Iehova ; ke adre me he ka ükötköüödra, me ühaiköüâ je hnyamödra. 14 Ke ame he Juda ka vat hnyi Jerusalema ; ke adre me he ka ükhöüna ta je omjeüiny hia je hnyeï igigilö, gol, me sileva, me je ükhaü, ae se hia hmöryin. 15 Ke ame he ka ücü mok ae cap

anyin hors, me miul, me kamela, me asina, me ta je meno hia wale ame he ka he bi hnyi je hunuma eling, me mok eling ae cap. 16 Ke haba je kolon ta je hnyeï hia tavat adre me he ücon Jerusalema, me adre me he bi ka he hnyi je huna he ka hnyi khudrung ka Than, Iehova tuhan sabaoth, me hnyi hanen bijeüiny uma mano. 17 Ke haba aten je lapiny hmeledrany adre me ca hnyi he bi Jerusalema ai he ka hnyi khudrung ka Than Iehova tuhan sabaoth, me ame he bi ka ba we hobi ködra. 18 Ke a ne ca hnyi he lap anyin Aigupito, me o but, me ame he ka ba we ködra ; ame he ka e bi ling mok ae cap, wale hnö Iehova hna kunâ ka hnyi je hnyeï adre me ca hnyi he me tuö bijeüiny uma mano. 19 Wale konginy Aigupito me konginy je hnyeï hia tavat adre me ca hnyi he me tuö bijeüiny uma mano. 20 Hnyi bong eling ame he ka e hnyi je pate anyin je hors, ka habe, EJKAP KO IEHOVA ; ke ame he je öt hnyi uma umö Iehova ka helä me je kaia cicö taben hut. 21 Eke, ame he ka kap kö Iehova tuhan sabaoth je öt hia hnyi Jerusalema me Juda : ke ame he tavat bihut hia ka he me hom me ölä : ke ame he ka ba hmetu bi at Kanana hnyi uma umö Iehova tuhan sabaoth hnyi bong eling.

MALAKI.

HNYIMAKAN 1.

WALANG hok wale a hofuc ho Iehova ka Isaraela a deny Malaki.

2 Oge hia but betenge gabun, haingö Iehova. Ke haingöbun, ka habe, U je hai but betenge gahmun hnyi ieü ? Hawa, ca kei Esau Jakob ? haingö Iehova : ke oge me betenge ga Jakob ; 3 ke oge me höciö Esau, me wia anyin je bucen me me ba wan, me hna but jekhon ka ta je luko hnyi hnyebuba. 4 Anyin a haba Edoma ame ha, ka habe, Adre hia but kiä degeci öhmun,

ke öhmun e he ka hmetu ka op je dok ae ba aten ; ke walang hna ha hnö Iehova tuhan sabaoth, ka habe, Adre me he ka op, ke oge me he bi nya ka hagutâ hnyikânâi : ke ame he tavat ka hwenyi ödra, ka habe, Hnyigoulen hwakecin ae kong, ke Tavat ame hmönyin ködra Iehova nyiele balua. 5 Ke ame he je emaköbun ka wä, ke öbun e he ka ha, ka habe, E so adre me oganö Iehova hnyi je ke keihen hoton hnyigöuleny Isaraela.

6 Haba nokon, me ame ogânâ kamen, ke athnyaba ame ogânâ tuhan : awe, a ne

kamen bi nya, me ewa hna oganö nya? ke oge ne than, me ewa eang hna outö nya? haingö Iehova tuhan sabaoth köbun tavat bihut, tavat öbun e húkötia iök. Ke haingöbun, ka habe, Öhmun e hawa ka húkötia iâm? 7 Anyin a öbun e hudo areto ae kong hon anyik taben hut. Ke haingöbun, ka habe, Ieü öhmun e okongu u hnyin? Anyin öbun e ha, ka habe, Haba laulau anyi Iehova, me únyi hnân húkötia. 8 Ke hnyi úen öbun e hudo meno ae wadröu hnân hut, e ca hulö e! ke hnyi úen öbun e hudo ta je meno ame ci, ke at ame takou mok, e ca hulö bi e! Ham dö e walang ang ka tuhâm: hawa, e ame he bi ka senyin kou? hawa, e ame he ka köp u? haingö Iehova tuhan sabaoth. 9 Ke walang, öbun na he ka sumâtâ thö Khong, me me he ka betenge gata: ke deny öbun únyi ang; hawa, e ame ca he ka köp öbun? haingö Iehova tuhan sabaoth. 10 Nakainy ame ne hu ke at unyibun he ka hlöng je hwanuma, m' öbun e ca he ka vac baüâ meic hon anyik taben hut! Haingö Iehova tuhan sabaoth, ka habe, Oge me ca senyin köbun, ke oge me ca he ka kap hnöbun hna hudo. 11 Anyin a hwân hnyi hna o hnen seünö ke ne o but hnyi hnen hna dit adre me he ka ogânâ iök hnen ta je Hnyei; ke haba hnyi je dok hia adre me he ka leü ütö ae bo so ka iök, me hut ae so: anyin adre me he ka ogânâ iök hnen ta je Hnyei, haingö Iehova tuhan sabaoth. 12 Ke öbun e okongoa e, anyin a öbun e ha, ka habe, E kong ut laulau anyi Iehova, ke ikiki je wan ke jefi hon e. 13 Ke haingöbun, ka habe, Wá bi, únyi hnân höciâ! ke öbun e hia but húkötia e, haingö Iehova tuhan sabaoth: ke öbun e hia but hom únyi adre me hügünâ, ke at ae kong can, ke hna takou hnen mok; wale hut öbun e hom: hawa e úcü könya he ka kap e únyi gabun? haingö Iehova. 14 Ke e ka mok at iyawö, at ae hu бага hnyi haleny hnahat mamoe, ke e ame bi khöbi, me hudo at ae kong ka Than; anyin a iny than ae gan hmâ, haingö Iehova tuhan sabaoth, ke hnân outen iök unyin je Hnyei.

HNHYIMAKAN 2.

KE walang ang, tavat bihut lö, walang hna huna hobi köbun. 2 Öbun e ne ca he ka löng, me ca ip hmâ hnyi

hnyekubun, he ka ogânâ iök, haingö Iehova tuhan sabaoth, me oge me he bi nya ka kunâ köbun hnaühangö, ke oge me he ka hangâ hna ha hnahici öbun; eke, oge hia but hangâ, anyin öbun e ca ip hmâ e hnyi hnyekubun. 3 Wá bi, oge me he ka thawâ je hatong gabun, me khinö tatet hnyi je hnyimaköbun, wale tatetiny halebun je hut; k' adre me he ka tha hom degeci öbun mē. 4 Ke öbun e he ka wâ a oge me kunâ köbun hna huna e, me me e unyin at Levi anyik úhinhinköu, haingö Iehova tuhan sabaoth. 5 E unyin anyik úhinhinköu ge möt me úsoköu; ke oge me ham e kâu me me he ka ot, me e ame outö nya, me öbubuny ge iök. 6 E hnyi hnyimen hnanyibuiny hnathu, ke adre me ca wâ hwakecin ae kong hnyi esongödiny: e ame tha he mönya hnyi úsoköu me wisa, me ohmeto tavat ae se hia únyi hnyi hulö. 7 Anyin a hamen li esongodiny at bihut he ka tuö metâ, ke e úcü he ka elâm hnanyibu hnyi hnyimen: anyin a e úthumetu anyi Iehova tuhan sabaoth. 8 Ke öbun e saü but únyi hnyi gethen; öbun e hia but ohavâ tavat ae se hia hnyi hnanyibu; öbun e hia but okongoa úhinhinköu anyi Levi, haingö Iehova tuhan sabaoth. 9 Anyin a wale oge hia but wi' öbun hnân húkötia me kong hnyi hnyimakan tavat hia, hoton hnöbun hna ca tuö dek je gethen, ke öbun e úciákouâ ge hnanyibu.

10 Hawa, ca khaca kamöta hia? a ca up öta hnen Khong a khaca? anyin a ieü ate me úyawököu, me okongoa úbihinköu anyin lakamöta? 11 Juda ame hia but iyawö, ke adre ányâ únyi ae ikiki hnyi Isaraela me Jerusalem; anyin a hia but Juda okongoa únyi ae kap waleji e ame hnyok kâu, me hom blu nokon khong kanyua me áian. 12 Ame he Iehova ka subâ degecâ at ame ányâ e, wale at ame tue me at ame thu, hnyi je uma mano umö Jakob, me at ame hudo hut kö Iehova tuhan sabaoth. 13 Ke wale minya ang hnöbun hna ányâ: öbun e tube taben hut anyi Iehova ge dân ecmak, me tenge, me máng, me me ca wâ hmetu hut, me ca kap senyina e únyi gabun. 14 Ke öbun e ha ka habe, Anyin a ieü? Anyin a Iehova ame hia but ohnathoa gam me áian ányâm hidröu waleji u je iyawöâ, ke e bi lihum möu, me áiam u je úhinhinköu mē. 15 Hawa, e ame ca ányâ únyi a khaca, ke e unyin kolon hanu? Ke at a khaca geü?

Anyin e ame elâm mâtrân ae so. Anyin a wale, tuö ju je hanubun, me ca he ke at ka iyawâ âiân anyin hidrôu. 16 Anyin a haingö Iehova Khongon Isaraela, ka habe, Hükötiânök he ka digic ta momo, me at ame tube khaüen ge ûokonguny, haingö Iehova tuhan sabaoth: anyin a wale tuö ju je hanubun me me ca iyawö.

17 Öbun e hia but ohmakö Iehova ge je ifucibun. Ke haingöbun, ka habe, Öhmun e ohmakâ e ge ieü? Anyin öbun e ha, ka habe, E so kö Iehova tavat hia adre me ânyâ hulö, ke e ame senyin ködra; ke haingöbun, ka habe, Ewa Khong at ame owisa?

HNYIMAKAN 3.

WÂ bi, oge me kunâ anyik úthumetu ke e ame he ka ânyâwia gethen hnyi hnyimakök: ke ame he ka ie o ka hnyi uma umen Than wale öbun e elâm; me úthumetuiny úhikhinyköu at öbun e senyinâ, wâ bi, e ame o, haingö Iehova tuhan sabaoth. 2 Ke ie at ame he ka hokhnyokâ bonginy o a e? ke ie at ame he ka tot, e ka manen dut? anyin a e úcü me meic hlogon at ame leü fao, me helâ me sop anyin at ame hnü khaü: 3 ke e ame he ka laba helâ me at le me ânyâwia sileva, ke e ame he ka obosoâ je laku Levi, me ânyâwi 'ödra helâ me gol me sileva; ke adre me he ka hudo kö Iehova je hut hnyi hwakecin ae wisa. 4 Me Iehova ame he ka senyinâ hut anyi Juda me Jerusalema, helâ me hnyi je bong kâu adrem, me je huna a bán. 5 Ke oge me he ka hakekeny köbun he ka owisa; ke oge me he ka ie omanenâ at ae tren khong, me tavat bi únyi monu, me tavat khemanyin thoi; me tavat ovecâ at ame huliwa ge hwaban e, me safac, me nakahme, me tavat ohavâ wisa ka atkanyua, me ca outö nya, haingö Iehova tuhan sabaoth. 6 Anyin a inya Iehova oge me ca hwiö; anyin a wale, adre ca ohi' öbun je laku Jekob.

7 Hwân hnyi je bong bonginy je lakam-öbun öbun e hna degecâ anyik je hnanyibu, me ca tuö e. Hmetu ju öbun könya ke oge me he ka hmetu köbun, haingö Iehova tuhan sabaoth. Ke haingöbun, ka habe, Öhmun e he ka hmetu ka hnyi ieü? 8 Hawa, ame he at ka venâu je únyi anyin Khong? Ke so bi öbun e hia but venâu anyik ta je únyi. Ke haingöbun, Ie

únyi öhmun e venâu gam? Wale je ke keihen a libenyitainy me je hut. 9 Ame ti ohnaúhang' öbun; anyin öbun e venâu gak, wale hnyi hia ang. 10 Homd' öbun libenyitainy ae bekhöt ka hnyi uma hnân hip omjeü, me me hu han hnyi umök uma, me cubic nya ju walang ang hnen e, haingö Iehova tuhan sabaoth, oge ne ca he ka khöng ut köbun je hlinginy drany, me hingâlâ hubun hnahic, ke ne o but ame ba hnen e. 11 Ke oge me he ka thawâ hobi köbun at ame ohia, ke e ame ca he ka ohia jeüiny könöbun kânâ; ke ame ca he ka ba wan halebun vine hnyi ta hnyi, haingö Iehova tuhan sabaoth. 12 Ke ame he je hnyi hia ka ha hnahici öbun: anyin a öbun e he ka hnyi hnân wenyâ, haingö Iehova tuhan sabaoth.

13 E hwege ifucibun úcü, haingö Iehova, Ke haingöbun, ka habe, Ieü öhmun e ha gam? 14 Öbun e hia but ha, ka habe, E únyi baü he ka bi athnyaba ka Khong: ke ieü troban hnöta hna tuö hnen jehna otillâ, me tenge tot hnyi hnyimakö Iehova tuhan sabaoth? 15 Ke walang ang ate me he ka ha me hnahic ut at ame bi gan; eke, adre me op göranyai tavat adre me ânyâ hulö; eke, adre me cubic Iehova, ke ödra ka möt bi. 16 Me ame úhnenamököuâ tavat adre me outö Iehova: ke Iehova ame tevehlöng me löng, me adre me sihualimen tusi hnân öünykümeâ hnyi hnyimakan, hobi kâu tavat adre me outö Iehova, me únyküme ien. 17 Ke haba ödra me tang omjehek, haingö Iehova, hnyi bong oge me thu; ke oge me he ka betenge gadra helâ me at ame betenge ge nokon at ame huliwa kâu. 18 Me öbun e he ka hmetu me wâhm-akhmetoâ at ae wisa me at ae kong, ke at ame bi athnyaba ka Khong ke at ame ca ânyâ.

HNYIMAKAN 4.

A NYIN a wâ bi ame he ka o bong, k' ame kahwa helâ me inyâji; ke haba tavat bi gan hia, me tavat hia adre me ânyâ hulö me adre me he ka helâ me thatúnyin whit: ke haba bong ame he ka o, me ame he ka thong degeci ödra, haingö Iehova tuhan sabaoth me me ba wan me anginy gadra. 2 Ke haba öbun tavat öbun e outen iök, me ame he ka o köbun seüñöiny hwakecin ae wisa, me únyi hnân ometo hnyi li labenyin; ke öbun e he ka

MALAKI 4.

he but me ututut helâ me nokon kau ûheny | hnyi Horeba hobi kâu at Isaraela hia, wale
hnyi haginÿ. 3 Ke öbun e he ka uto | je hna otilâ, me hna owisa. 5 Wâ bi, oge
tawat ae kong; anyin adre me he ka helâ | me he ka kunö Elia perofeta köbun e ka
me hnabadröu hmelen je hnyeúcabun hnyi | tiga ca o bi bong bongu Iehova bong ae
bong waleji oge me thu, haingö Iehova | gan ke hnân outen. 6 Ke e ame he ka
tuhan sabaoth. | ohmeto je hnyekon lakamen ka lakon, ke

4 Únykúme th' öbun hnanyibu anyi | je hnyekon lakon ka lakamödra; wâ oge
Mose athnyabaik, waleji oge me hûna kâu | nye o me kot kânâ ge hnaúhangö.

ÛHIHINYKÖU AE TEB ÛNYI

ANYIN

TUHÖTA, AT A OMELI ÖTA

IESU KERISO.

ADRE WIA KA HNYI

HWEN IAI.

London :
BRITISH AND FOREIGN BIBLE SOCIETY.

1901

MATAIO.

HNYIMAKAN 1.

TUSI hnân aũ je dö anyi Iesu Keriso, mâtârâni Davita, mâtârâni Aberahama.

2 Aberahama ame hnöku Isaaka; Isaaka ame hnöku Jakob; Jakob ame hnöku Juda, me je liamekeiny mē; 3 Juda ame hnöku Farez me Zera únyi ga Tamara; Farez ame hnöku Ezerona; Ezerona ame hnöku Ram; 4 Ram ame hnöku Aminadaba; Aminadaba ame hnöku Nasona; Nasona ame hnöku Salemona; 5 Salemona ame hnöku Boaza únyi ga Rakaba; Boaza ame hnöku Obed únyi ga Rutha; Obed ame hnöku Jese; 6 Jese ame hnöku Davita a than.

Davita a than ame hnöku Solomona únyi ge öiö Uria; 7 Solomona ame hnöku Reoboama; Reoboama ame hnöku Abija; Abija ame hnöku Asa; 8 Asa ame hnöku Jehosafata: Jehosafata ame hnöku Jorama; Jorama ame hnöku Uzia; 9 Uzia ame hnöku Jotham; Jotham ame hnöku Ahaza; Ahaza ame hnöku Hezekia; 10 Hezekia ame hnöku Manase; Manase ame hnöku Amona; Amona ame hnöku Josea; 11 Josea ame hnöku Jekonia me je liamekeiny mē, hnyi úen adre hum ödra hnyin Babulona ai.

12 Ke hwaban dö hna hum ödra Babulona ai, haba Jekonia ame hnöku Sealetiela; ke Sealetiela ame hnöku Zerubabela; 13 Zerubabela ame hnöku Abiuda; Abiuda ame hnöku Eliakima; Eliakima ame hnöku Azora; 14 Azora ame hnöku Sadoka; Sadoka ame hnöku Akeimo; Akeimo ame hnöku Eliuda; 15 Eliuda ame hnöku Eleazara; Eleazara ame hnöku Mathana; Mathana ame hnöku Jakob; 16 Jakob ame hnöku Josefa öiö Maria, momo ame hnöku Iesu, adre me hwenyi ien Keriso.

17 Ke haba ta je dö hia hwân ga Abera-

hama ke ne o but kö Davita, me fotin ta je dö; ke hwân ga Davita ke ne o but hnyi hna hum ödra Babulona ai, me fotin ta je dö; ke hwân hnyi hna hum ödra Babulona ai ke ne o but Keriso me fotin ta je dö.

18 Ke walang hwakecin hna hnöku Iesu Keriso: Haba hnyi úen ame úkocö hinyen Maria me Josefa, ke ödrü tiga ca tha laba bi, me manen dut a ga erkin dut hnen Hanu Kap. 19 Ke at ae wisa Josefa a áiân, k' ame ca beweny he ka omanená hwakecin hnyi hnyimakan tavat, me e ame únykúme he ka degec duóngá e. 20 Ke e ame tiga únykúme ta je únyi eling, me wá bi ame manen dut káu angela anyin Than hnyi bwi, ame ha, ka habe, Josefa nöku Davita lö, ca ot he ka hum Maria áiâm; anyin a erkin dut hnen Hanu Kap. 21 Ke e ame he ka hnokoá da, ke u me he ka hwenyi ien Iesu; anyin a e at ame he ka omelö lakeiny únyi hnyi anyidra ta je hulö. 22 Ke adre me ányá ta je únyi hia thithö e, me me hwádá hna ha hnen Than a deny perofeta, ame ha, ka habe, 23 Wá bi, ame he hlu ka erkin, me hnokoá da,

K' adre me he ka hwenyi ien Emanuela;

walang bongon, E but unyita Khong. 24 Haba Josefa ame todrö úheny hnyi hna mokut, me ányá helá me hna hûna káu ge angela anyin Than, me e ame hom áiân; 25 ke e ame ca tha e mē ke ne o but e ame hnokoá nokon a da: ke e ame hwenyi ien Iesu.

HNYIMAKAN 2.

ADRE me hnöku Iesu hnyi Bethleema hnyi hnyeji Juda hnyi ta je bongu Heroda a than, ke wá bi, ame o but ta je magoi hnyi Jerusalem áhedrin jimeyö, 2 ke haingödrin, ka habe, Ewa at adre

hnokôa me Tuhan at Juda? anyin a öhmun e wâ but jimeyö anyin okhû, ke öhmun e o but he ka khudrung kâu. 3 A löng ut Heroda a than, me e ame blohlo tha e me Jerusalema hia. 4 Me e ame ûkhacakouâ tavat bihut ae nua, me tavat sihnalimen hnyi hnyeï, me e ame hnei ödra ge dok adre me he ka hnöku Keriso hnyin. 5 Haingödra kâu, ka habe, Betheleema hnyi hnyeï Juda: anyin a walang hna sihnalimen hnen perofeta, ka habe,

6 Ke haba u Betheleema hnyeï Juda,

U ca ûhnyükong ge je taben hnyi hnyeï Juda :

Anyin ame he ka o gam at musi,

At ame he ka musö lakeiki a at Isaraela.

7 Ke haba Heroda ame hawâ duöngâ ta je magoi, me hnö cicilâ gadrin a manen kehö okhû. 8 Ke e ame kun'ödrin Bethelleema ai, me ha, ka habe, He th' öbun ka elâm via bongon inma; ke öbun ka wâ ju, thumetu nya thö, m' inye he minya ka munyi khudrung kâu. 9 Ödrin e hia but löng hwan than, me ödrin e he but; ke wâ bi, haba okhû waleji ödrin e wâ e jimeyö, ame bân hnyi hnyimaködrin, ke ne o but ame laba cicö hon dok a e hnyin inma. 10 Ödrin e wâ okhû, me ödrin e ti senyin gan hmâ. 11 Ke ödrin e o thö ka hnyi hnyin uma me wâ inma me Maria a hinyen; ke ödrin e ta ju me khudrung kâu; ke ödrin e khöng ut tang omjedredin me ham kâu je bwhilany, gol, me libanu, me muro. 12 A hia but Khong kou ködrin hnyi bwi m' ödrin e ca he ka hmetu kö Heroda, me ödrin e he but ka hnyi idrin hnyeï hnyi ke gethen bi.

13 Ödrin e he but, me wâ bi, ame manen dut angela anyin Than kö Josefa hnyi bwi, ame ha, ka habe, Todrö, hom dö inma me hinyen, ke kec dö Aigupito ai, me laba eling, ke ne o but hnyi ün oge me he ka thumetu u hnyin: anyin ame he Heroda ka elâm inma he ka hlingâ e. 14 Me e ame todrö hnyi hnyinghet me hom inma me hinyen, me he Aigupito ai; 15 me laba eling ke ne o but hnyi ün ame mokcu hnyin Heroda: me me hwâdâ hna ha ge Than a deny perofeta, ka habe, Oge hia but hawâ nöku üheny Aigupito. 16 A wâ but Heroda a je magoi ödrin e iyawâ e, me e ame hmönyin gan hmâ, me ûkhünöng he ka hlingâ ta je wanakat hia thithö hnyi Bethelleema, ke hnyi je hnyigöulen e, hwân ge tavat a lo hunaidra ke ne o but ka ta je mendreng, hoton ün e ame hia but hnö

wia hnyin ta je magoi. 17 Me ame hwâdâ thö hna ha ga Jeremia perofeta, ka habe, 18 Adre me löng hnyi Rama hwan, Hwatenge me tenge thungaü, Rakela ame tenge ge lakon; K' ame ca tubet bi, anyin ae hi' ödrin dut.

19 Ke a mokcu Heroda, me wâ bi, ame manen dut angela anyin Than kö Josefa hnyi bwi hnyi hnyeï Aigupito, 20 ame ha, ka habe, Todrö hom dö inma me hinyen, me he thö ka hnyi hnyeï Isaraela: anyin ödrin e mokcu hnyat ödrin e elâm inma he ka hlingâ. 21 Me e ame todrö, me hom inma me hinyen, me he ka hnyi hnyeï Isaraela. 22 Ke e ame löng a g' ame than biju Arelaelo hnyi Juda, hwaban kamen a Heroda, me e ame ot he ka he kâe; ke adre me kou kâu hnyi bwi, me e ame he ka hnyi ke keihen Galilaia, 23 me o thö ka hnyi taun a Nazareta ien me laba ju eling: me me hwâdâ thö hna ha ge ta je perofeta, ka habe, Adre me he ka hââ e, me e at Nazareta.

HNYIMAKAN 3.

HNYI je bong eling ame o thö Ioane Bapataiso k' ame khetâ hofuc hnyi hnyeubaba hnyi Juda, 2 haingen ka habe, Ietra ju öbun; anyin ae hakekeny jut dokhon drany 3 Anyin a e at a ha gan Isaia perofeta, haingen, ka habe,

Ifucin at ame hongot hnyi hnyeubaba, ame ha, ka habe,

Penapena ju gethen deny Than,

Owisa thö deny ta je gethen.

4 Ke haba Ioane ame khavâ ûkhaü a leünen kamela, k' ame ca hnyeekon ge wen a unen meno; ke haba hing an jeü me hamon me haniiny hnyot. 5 Me ame he but kâu Jerusalema, me Juda hia thithö, me ke keihen hnyeï hia hakekenyâ Joridano; 6 ke e ame bapataisoï ödra hnyi wagewe Joridano, adre me omanenâ anyidra ta je monu. 7 Ke hnyi ün e ame wâ ta je Faresaio me ta je Sadukaio ae se hia adre me o but ka hnyi anyin bapataiso, me e ame ha ködra, ka habe, Je lakon on lö, ia kou köbun m' öbun e he ka kec ge hmönyin ame he ka o? 8 Wa but öbun wan ae ücü me ietra: 9 ke ca ûnyküme he ka ha eü hnyi je hnyekubun, ka habe, Aberahama kamöta: anyin oge me ha köbun e khana Khong he ka oküâ lakon kö Aberahama ünyi hnyi je veto ang.

10 Adre hia but walang ang ip giwa hnyi hwecin ta je úö: haba ta je úö hia ame ca wa so, me adre ma sö degecá me khúá ka hnyi meic. 11 Haba inya oge me bapataisoi öbun ge köiö ka hnyi ietra: ke haba at ame he jem hotuk ae beónua huk, ae ca úcú nya bi he ka hom taben li hnyeúcan: e ame he ka bapataisoi öbun ge Hanu Kap me meic: 12 e bi hnyi hnyamen anyin ut, ke e ame he ka ányáwia hwit hnyi hnen hna huje hwit; ke e ame he ka úkhöuná anyin hwit ka hnyi omhani, ke e ame he ka thong thatúnyin hwit hnyi meic ame ca mok balua.

13 Haba Jesu ame he but úheny Galilaia Joridano ai kö Ioane, e me he ka bapataisoi e. 14 Ke haba Ioane ame bethawá e, me ha, ka habe, E so u me he bi ka bapataisoi nya, ke u me he but könya? 15 Ke Jesu ame thu me ha káu, ka habe, Mē kap ju walang ang: anyin ae úcú kōta he ka hnu hoton hia thithö hwakecin ae wisa. Me e ame löng káu. 16 A hia but bapataisoi Jesu, me e ame ölö thö úheny hnyi köiö: ke wá bi adre me khöng ut káu drany, ke e ame wá Hanon Khong ame gá but káu helá me biny, me o hnyi hon; 17 ke wá bi ke hwan únyi hnyi drany, ame ha, ka habe, Walang Nökuk a öúnykúmik, at oge me ti senyin gan.

HNYIMAKAN 4.

KE haba Hanu ame hum Jesu ka hnyi hnyeububa, e me he diabolö he ka cubec e. 2 K' ame ca han hnyi fáte je lany ke fáte je lit, ke hwaban dö e, me ame mekihnánem. 3 Me ame o but káu at ame úcúbic, me ha, ka habe, U je ne Nokon Khong, ha thö, me me areto but je veto ang. 4 Me e ame thu me ha, ka habe, Adre hia but sihnalimen, ka habe, Ame ca he ka möt at ge areto thibi, ke hnen bi ta je hofuc hia ame o but únyi hnyi hnyimen Khong. 5 Haba diabolö ame hom e ka hnyi taun ae kap, me ip e hon ban uma kap, 6 ke ha káu, ka habe, U je ne Nokon Khong, utut: anyin adre sihnalimen, ka habe,

E ame he ka húna anyin ta je angela hnán hobi köu:

K' adre me he ka kap tilö u ge je hnyamödra,

Wá e nye thö thö hnyeúcam hnyi veto.

7 Haba Jesu ame ha káu, ka habe, Adre hia but sihnalimen minya, ka habe, U me

ca he ka cubec Than a Khongom. 8 Ke haba diabolö ame hom hmetu e ka hnyi bucen ae beú hmá, me omanená kaú ta je dökhü hia eang hmeledrany, ke ta je hmanenanginy; 9 me e ame ha káu, ka habe, Oge me he ka ham köu ta je únyi e, u je ne he bi ka nom me khudrung ju könya. 10 Ke haba Jesu ame ha káu, ka habe, Satana lö, kec dö: anyin adre hia but sihnalimen, ka habe, U ma he ka khudrung ka Than a Khongom, me bi athnyabainy thibi. 11 Me haba diabolö ame hna but e; ke wá bi, ame o thö ta je angela me bi athnyabainy.

12 Ke haba hnyi úen e ame löng a' adre hia but cö Ioane, me e ame he but Galilaia ai; 13 ke e ame hna but Nazareta, me he ka laba hnyi Kaperenauma, hnyi hobat köiö, hnyi hnyigöulen Zebulona me Nafatali: 14 me me hwadá hna ha ga Isaia perofeta, ka habe,

15 Hnyei Zebulona me Nafatali,
Cicö köiö, hoton Joridano,
Galilaia iny ke je hnyei,

16 Haba tavat adre me laba hnyi menekholom
Adre me wá melam ae gan,
Ke haba tavat adre me laba hnyi ke keihen hnyei a hmenon mok,
Ame o but melam ködra.

17 Hwán hnyi úen e, Jesu ame hwán he ka khetá me ha, ka habe, Ietra ju öbun; anyin ae hakekeny jut dokhon drany.

18 Ke e ame vhenö hobat köiö Galilaia, ke e ame wá li liamekeiny, jia Simona ke ien Peteru, me Anederea a keiny, ödru me thong ert eú hnyi köiö; anyin a ödru li at thut. 19 Ke e ame ha ködru, ka habe, He hotuk, me oge me he ka wi' öbu me hnán thelo at. 20 Me ödru me ie hna but je ert me he hoton. 21 Ke e ame he úheny e, me e ame wá ke li liamekeiny, jia Iakobo nöku Zebedaiö, me Ioane a keiny, ödru me tha laba me Zebedaiö a kamödru hon hu, ödrin e ena útödrin je ert; ke e ame ha' ödru. 22 Me ödru me ie hna but hu me kamödru, me he hoton.

23 Ke Jesu ame vhenö Galilaia hia thithö, ame úne hnyin umödrin je sunago, me khetá úthumetu a soiny dökhü, me ohia ta je mok hia thithö, me ta je sēnyin hia hnyi hnyei. 24 Ke e ame lung igigilö Suria hia thithö: me adre me hom but káu tavat ae mok hia thithö, wale ame taku ödra ge je ve mok me vec, tavat a delec demoni, me ing, me mat, me e ame omeli ödra. 25

Haba tavat ae se hia adre me he hoton e, ùhedra Galilaia me Dekapoli mo Jerusalema me Juda me ke keihen hoton Joridano.

HNHYIMAKAN 5.

E AME wâ tavat ae se hia, me e ame òlò thò ka hnyi bucen : ke hnyi ùen e ame laba, me ame o kâu laten : 2 me e ame khetâ me n' òdra, haingen, ka habe,

3 Hnahic hnen tavat ae theduoc hanudrin, anyin a hobi kòdra dökhu dokhon drany.

4 Hnahic hnen tavat adre me tenge, anyin a adre me he ka otubweli òdra.

5 Hnahic hnen tavat ae ilemuk : anyin adre me he ka hu hnyei.

6 Hnahic hnen tavat adre me bean ke beijem hwakecin ae wisa ; anyin adre me he ka osekuni òdra.

7 Hnahic hnen tavat adre me betenge : anyin adre me he bi ka betenge kòdra.

8 Hnahic hnen tavat ae kalaöt hnyekudra, anyin adre me he ka wâ Khong.

9 Hnahic hnen tavat adre me òusokòuâ : anyin adre me he ka hai òdra me lakon Khong.

10 Hnahic hnen tavat adre hia but oveci òdra can hwakecin ae wisa : anyin a hobi kòdra dökhu dokhon drany. 11 Hnòbun hnahic e ka he tavat ka ù òbun me oveci òbun, me haikongu òbun, me hai thoi òbun ge ta je ùnyi hia can inya. 12 Senyin d' òbun me hobâ : anyin ae gan hmâ hwabòbun ethò hnyi drany ; anyin a helâe adre me ovecâ ta je perofeta a bân.

13 Òbun ang sâltiny hmeledrany, ke a ne ba but hinyin sâlt, me adre ma kâmâu he ka òhinyâ hmetu e ? e ca so hmetu bi, ke so bi he ka degec me uto ju ge at. 14 Òbun e melaminy hmeledrany. E ca khana he ka iyong taun adre ip hon bucen. 15 Ke adre me ca vâc lamepa he ka ip hmelen kumete, ke so bi ethò hon taben ; me ame omelamâ tavat hia eiò hnyin uma. 16 Helâ ju e òbun, omelamâ thò melamibun hnyi hnyimakan tavat, m' adre me wâ anyibun ta je huliwa ae so, m' adre me he ka ogânâ Kamòbun ethò hnyi drany.

17 Ca he òbun ka ùnykùme a oge me o but he ka ohia hnanyibu me ta je perofeta : oge me ca o but he ka ohia, ke so bi he ka ohwâdâ. 18 Anyin ae hnathu inya oge me ha kòbun, a g' ame ca he bi ka hia ke iota, ame ne ke ong ùnyi ae ùhnyükong hmönyin ùnyi hnyi hnanyibu, ke ne o but ame

he ka hia drany me hmeledrany, me me he ka hwâdâ ta je ùnyi hia thibut. 19 Anyin a wale, haba at ame he ka hanyâûâ khaca hnyi ta je hnanyibu eang ae ùhnyükong hmönyin, k' ame nâ tavat he ka helâe, me adre me he ka ha òhnyükongo e hnyi dökhu dokhon drany : ke haba at ame he ka vheno me nâ, me adre me he ka ogânâ e hnyi dökhu dokhon drany. 20 Anyin a inya oge me ha kòbun, ka habe, A ne ca nua bi hwakecibun ae wisa hon hwakecin ae wisa ge tavat sihnalimen me je Faresaio, òbun e ca he bi ka didrò ka hnyi dokhon drany.

21 Òbun e hia but löng hnòdra hna ha kâû adrem, ka habe, Ca he ka ùhlingö ; anyin a haba at ame ùhlingö me ùcù he ka owisa e : 22 ke inya oge me ha kòbun, ka habe, haba at ame hmönyin ka liamekeiny mē ke ba can, me ùcù he ka owisa e ; ke haba at ame he ka ha ka liamekeiny mē, ka habe, Raka, e ùcù he ka hno e hnen tavat ùhnenamö ; ke haba at ame he ka ha ka habe, Mori, me ùcù kâu meicin gena. 23 Anyin a wale u je ne hom ânyâm bwihlany ka hnyi taben hut, ke u ka ùnykùme eling ae hu ùnyi ae vec gam! ka liamekeiny möu, 24 mē ip ju ânyâm bwihlany ciò taben hut, ke mē he thò, ke bâm he ka ùsoköu me liamekeiny möu, me u hap he but jem ka hudo ânyâm bwihlany. 25 Logotò ùsoköu me iwahnaihmiöny möu, u ka tiga tha u me hnyi gethen, wâ e nye hnò u but iwahnaihmiöny möu ka at owisa, ke at owisa ame hnò u but ka at tue, me e ame khûu u thò ka hnyi uma ce at. 26 E hnathu inya oge me ha kòu, u me ca he ka didrut ùheny e, ke ne o but u je mē ham hvaban hia ke ne o but je ong mone ae ùhnyükong.

27 Òbun e hia but löng hnòdra hna ha ehac, ka habe, U ca he ka venâu âiân ke at : 28 ke inya bi oge me ha kòbun, ka habe, haba at ame wâ hmâ âiân ke at me behnyekon e, me a hia but bi ùnyi monu mē eù hnyi hnyekon. 29 Ke a ne bi jônâm emâkâm a metâm, uâ degecâ thò e : anyin ae so kòu he ka hia ke outh unyâm, ke kong bi he ka khûâ hia unyâm hnyi gena. 30 Ke a ne bi jônâm hnyamâm a metâm. subâ degecâ but e : anyin ae so kòu he ka hia ke ong outh unyâm, ke kong bi he ka khûâ hia unyâm hnyi gena. 31 Adre me ha minya ehac, ka habe, Haba at ame degec âiân, e so e ame he ka ham tusinyo thang hna faipoipo : 32 ke inya bi oge me

ha köbun, ka habe, haba at ame degec áiân, k' ame ca bi únyi monu, me e ame kunâ e he ka bi únyi monu; k' ame bi únyi monu minya at ame hom momo e adre degec.

33 Ke haba khaca, öbun e hia but löng a g' adre ha ködra kâu adrem, ka habe, U me ca he ka khemanyin thoi, ke hamâm he ka thamúa ka Than hnâm hna khemanyin: 34 ke inya bi oge me ha köbun, ka habe, Ca khemanyin bi he ka ha ge drany, anyin a theron e anyin Khong; 35 ke helâe minya ge hmeledrany, anyin a taben e li hnyeúcân; ke helâe minya ge Jerusalema, anyin a hnyaban e Than ae gan hmâ. 36 Ke ca he minya ka khemanyin me ha ge bâm, anyin ae ca khanö u he ka ohawâ me ohlitâ ke leúnen bâm a khaca. 37 Ke so e helâng ifucibun, ka habe, E, e; e ba, e ba: anyin a únyi hnyi monu he ka bi hanen hon e.

38 Öbun e hia but löng hnödra hna ha, ka habe, Ecmak hwaban ecmak, ke nyu hwaban nyu: 39 ke inya oge me ha köbun, ka habe, Ca hagutâ at ae kong; ke haba at ame khaú wahicâm a metâm, mē wia minya thö ke keihen kâu. 40 Ke a ne ke at ame beivinö möu hnyi úhnei, k' ame hügünâ ányâm úkhaú, mē ham minya but kâu ányâm úkot. 41 Ke a ne ke at ame újôngi u he ka tha he mē hnyi ke mael, mē tha he thö mē ke ne o but hnyi lö. 42 Ham but ka at ame sumató u, ke ca hotom bi ka at ame mē sumató únyi gam.

43 Öbun e hia but löng a g' adre me ha, ka habe, Betenge ju ge at ae hakekenyi u, ke ikiki thö ka iwahnaihmiöny möu: 44 ke oge me ha bi nya köbun, ka habe, Betenge ju ge je iwahnaihmiöny möbun, ke hic ju hobi kâu tavat adre me oveci öbun; 45 m' öbun e he bi ka lakon Kamöbun ethö hnyi drany: anyin a e ame oâ anyin seúnö hon tavat ae kong me tavat ae so, k' ame kunâ we ka tavat ae wisa me tavat ae ca wisa bi. 46 Anyin öbun e ne betenge ge tavat adre me betenge gabun, me, iéu hwaban köbun? hawa, a ca ányâ helâe ta je telona? 47 Ke öbun e ne italofa me je liamekeiny möbun thibi, me iéu ke únyi ae beönua hnyi hnöbun hna ányâ? hawa a ca ányâ helâe ta je Aten ke je hnyei. 48 Anyin a wale hamöbun he ka wisa helâe me iwisainy Kamöbun ethö hnyi drany.

HNYIMAKAN 6.

WÁ eâu, ke ca he ka ányâ hwakecibun ae wisa hnyi hnyimakan tavat hnân bi wânödra: wâ e nye ba but hwaböbun únyi ge Kamöbun ethö hnyi drany.

2 Anyin a wale u ka he ka ham ta je betenge, ca tûâ khoto hnyi hnyimákâm, helâ me man tavat thoi hnyok hnyi je sunago me ta je gethen, me me he ka haisoi ödra hnen tavat. E hnathu inya oge me ha köbun, adre hia but kap hwabödra. 3 Ke u ka he bi ka ham ányâm betenge, e so e ca he hnyamâm a mem ka wâ únyi ame mãdrâ hnyamâm a metâm: 4 me me iyong hnâm hna ham betenge: me haba Kâmâm at ame wâ hnyi dok ae iyong ame he ka bi hwaban köu.

5 Ke öbun ka he ka hic, e so öbun e ca helâ me tavat thoi hnyok: anyin e senem ködra he ka tot me hic hnyi ta je sunago me vheden ta je gethen, me me haisoi ödra hnen tavat. E hnathu inya oge me ha köbun, adre hia but kap hwabödra. 6 Ke haba u, u ka he âu ka hic, didrut ka hnyi hnyeulem, eiö hnyin uma, ke u ka hia but hlöng hwanuma, hic ju ka Kâmâm hnyi dok ae iyong, ke ame he Kâmâm at ame wâ hnyi dok ae iyong ka bi hwaban köu. 7 Ke öbun ka he ka hic ca labö ha thiju ke hofuc a khaca, helâ me hna ányâ hnen Aten ke je hnyei: anyin adre me únykúme a g' adre me he ka ling ödra únyi ge hnödra hna osehia ha. 8 Anyin a wale, ca he öbun ka helâ mödra: anyin ae khana bi Kamöbun ta je únyi öbun e weny hnyi úen a öbun tiga ca sumatâ kâu. 9 Waleling, m' öbun e he ka hic helâng, ka habe, Kamöhmun lö, ethö hnyi drany, E so e kap iâm. 10 E so e o but dokhom dokhu. E so adre me ányâ wem eang hmeledrany e me úcú me ethö hnyi drany. 11 Ham but köhmun hnyi bong ang jeú ae úcú köhmun. 12 Thang ut ta je monu gahmun, helâ me hnöbmun hna thang ut ta je monu gadra adre me okongu öhmun. 13 Ca hum öhmun ka hnyi úcúbic, ke so bi hügün' öhmun dut únyi hnyi hulö. 14 Anyin a öbun e ne thang ut ge tavat hnödra je hna hanyâúâ me ame he Kamöbun ethö hnyi drany ka thang hnyöbun hna hanyâúâ. 15 Ke öbun e ne ca thang ut ge tavat hnödra je hna hanyâúâ, me ame ca he bi Kamöbun ethö hnyi drany ka thang ut hnöbun je hna hanyâúâ.

16 Ke haba khaca, öbun ka he ka ányá ca han, ca helá bi me man tavat thoi hnyok ae hmak hnyimaködra: anyin adre me okongóá je hnyimaködra me me manen dut ka tavat a adre me ca han. E hnathu inya oge me ha köbun, ka habe, Adre hia but kap hwabödra. 17 Ke haba u, u ka he ka ányá ca han, hneú but bâm, ke ányáwia hnyimákâm; 18 me me ca manen ka at a u me ca han, ke so bi ka Kâmâm hnyi dok ae iyong: me ame he Kâmâm, at ame wâ hnyi dok ae iyong, ka bi hwaban köu.

19 Ca ip hobi köbun tang omjeú eang hmeledrany, ae hu nokon walelaba me viiny he ka ohia, wale dok ae hu at venöu hnyin adre me he ka kia me venáu: 20 ke so bi ip ju hobi köbun tang omjeú ethö hnyi drany, dok ae ba nokon walelaba me viiny he ka an, ke ba minya at venöu ame he ka kia me venáu: 21 anyin a haba dok ame mokut hnyin tang omjehem, me ame he ka e bi minya hnyekom. 22 Haba ecmak, me lamepainy unyin: anyin a wale a ne bwele emákâm, me ame he bi ka tha melam, hia unyâm. 23 Ke e ka kong emákâm, me ame he ka tha menekholom hia but unyâm. Anyin a wale, e ka lit ut melam gam, shaiba ge kahmën menekholom eling! 24 E ba at ae khana he ka athnyabainy li tuhan a lo: anyin a e ame he ka húkotiá khaca me weny khaca; k' ame ne he ka kece ka khaca me hociá khaca. E ca khan' öbun he ka bi athnyabainy Khong me mamona. 25 Anyin a wale, inya oge me ha köbun, ka habe, Ca únykúme újengóá hnân hobi káu anyibun möt, wale ge hnöbun hna he ka han me ic; ke unyibun, wale ge hnöbun hna he ka khavá. Hawa, e ca beönya möt hon jeú, me unyin hon úkhaú? 26 Únykúme ju omeno ame gâ ethö, adre me ca hnyi belök me menu, me ip jeú hnyi je omhani; k' ame ha ö'dra Kamöbun ethö hnyi drany. Hawa, öbun ca únyi hnathu hudrin? 27 Ke ie at gabun ame únykúme újengóá ae khana he ka bi hanen kubit a khaca ka hnyi ibeúen? 28 Ke ieú gabun öbun e únykúme újengóá ka hnyi úkhaú? Únykúme ju úkúen ta je ibedila; wale a ca hnyi huliwa me amo: 29 ke so bi inya oge me ha köbun a haba Solomona hnyi anyin hmanenang hia ame ca theibá bi heláe. 30 Ke a ne khavá Khong hnyot heláe a e hnyi bong ang, ke nyi adre me he ka khúá but ka hnyi wahainyá, hawa, e ca únyi hnathu káu he ka khaú' öbun, öbun hnyat a labageju úhnyúkong? 31 Anyin a wale

ca únykúme bi me ha, ka habe, Ieú ate me he ka an? ke, Ieú ate me he ka ijem? ke, Ieú ate me he ka khavá? 32 Anyin ame elám hnen Aten ke je hnyi ta je únyi e; ke e khana Kamöbun ethö hnyi drany ae úcü köbun ta je únyi e. 33 Ke böbun he ka elám dokhon dökhu, me hwakecin ae wisa; ke adre me he minya ka ham köbun ta je únyi e. 34 Anyin a wale ca únykúme újengóá bi ge bong nyi: anyin a hamen bong nyi he ka únykúme gan bi. E úcü thibi bong me anyin monu.

HNYIMAKAN 7.

CA únykúme hwalö, m' adre me ca únykúme hwali öbun bi. 2 Anyin a haba tulutiny hnöbun hna únykúme hwalö, adre me he ka únykúme hwali öbun bi: heláe minya adre me he ka tulut köbun hoton hnöbun hna tuluto. 3 Ke ieú gam u me wáhmakhmeto atmen hnyin emakan liamekeiny möu, ke u me ca únykúme udá eú hnyin emákâm bi? 4 Ke u me he ka kâmáu ka ha ka liamekeiny möu, ka habe, Hnö nya thö he ka hom but atmen únyi hnyin emákâm; ke wá bi, wale udá hnyin emákâm bi? 5 U at thoi hnyok, bâm ka oc udá únyi hnyi emákâm bi; me u me he ka wá wia he ka hom atmen únyi hnyi hnyin emakan liamekeiny möu.

6 Ca ham únyi ae kap ka ta je kuli, ke ca khúá anyibun ta je penina ka hnyi hnyimakan ta je buaka, wá ödrin nye uto but ge je cadrin, ke hwiö me ki' öbun.

7 Sumátá thö, m' adre me he ka ham köbun; elám dö, me öbun e he ka wá thö; seseto thö, m' adre me he ka khöng ut köbun: 8 anyin ame he ka hu ka tavat hia adre me sumátá; k' ame wá hnen at ame elám; k' adre me khöng ka at ame seseto. 9 Ke ie at gabun ae hu nokon ame sumátá areto, me ame he ka ham káu veto: 10 ke a ne sumátá wá me ame he ka ham bi káu on? 11 Anyin a wale, a ne mabun, öbun tavat ae monu, he ka wáhmakhmeto hna he ka ham ta je únyi ae so ka lakubun, awe, ame ca ti he bi Kamöbun ethö hnyi drany ka ham ta je únyi ae so ka tavat adre me sumátá e. 12 Anyin a wale, haba ta je únyi öbun e weny e me he tavat ka ányá köbun, ányá thö e ködra: anyin a wale hnanyibu me ta je profeta.

13 Didrö ka hnyi homagöüle ae hnek: anyin ae gan homagöüle, me lau but gethen ka hnyi hnaúhangö, ke ödra se hia tavat

adre me dit hnyin. 14 Ke hnek homagöüle ke úhnyúkong gethen ka hnyi möt, ke wakhalet thibi tavat adre me wâ e.

15 O 'bun áu ge ta je perofeta thoi, adre me o but köbun, k' adre me khavâ je úkhaúny mamoe, ke eú hnyi hnyidrin je luko ae úhúlú hmönyin. 16 Öbun e he ka wâhmakhmetu ödrin ge anyidrin ta je wan. Hawa, adre me tau wan vine hnyi iwadekong, me je wan meta hnyi iwataföcö? 17 Ke helâe, haba ta je úö ae so, ame wa so; ke haba ta je úö ae kong ame wa kong. 18 E ca khana úö ae so he ka wa kong, ke ca khana úö ae kong he ka wa so. 19 Haba ta je úö hia ame wa kong, me adre me he ka sö degecâ, me khúâ but ka hnyi meic. 20 Wale, me öbun e he ka wâhmakhmetu ödra ge anyidra ta je wan. 21 Adre me ca he ka dit hia ka hnyi homagöuleney drany hnyat adre me ha könya, ka habe, Taböny Than lö, Tabon Than lö; ke so thibi at ame ânyâ weny Kamök ethö hnyi drany. 22 At se hia adre me he ka ha könya hnyi bong eling, ka habe, Taböny Than lö, Taböny Than lö, hawa, öhmun e ca hnyi perofeta hnyi iâm, me obâ ta je demoni hnyi iâm, ke se hia ta je huliwa ae man öhmun e ânyâ hnyi iâm? 23 Ke oge me he ka ha ködra, ka habe, E ca khanö nya öbun: úsâkaúö but mönya, öbun tavat öbun e ânyâ hulö. 24 Anyin a wale haba at ame löng hok ta je hofuc ang, me mâdrâ, oge me he ka öuco e me at ae metâ, wale at ame otílâ umen uma hon kic: 25 me ame ta but we, me ame o but di, me hwege but ang, me kot uma e; ke ame ca ü bi: anyin a taben kic. 26 Ke haba at ame löng hok ta je hofuc ang, ke ame ca mâdrâ bi, me adre me he ka öuco e me at ae monu, wale at ame otílâ umen uma hon öny: 27 ke ame ta but we, me o but di, ke hwege but ang, me kot uma e; me ame ü but: ke gan hmâ útainy uma e.

28 Ke ame um dö ta je hofuc e ho Iesu, me ame láia gan hmâ tavat ae se hia hnen hna úne: 29 anyin a e ame n' ödra helâ me at ae man, ke ca helâ bi me tavat sihnalimen.

HNYIMAKAN 8.

KE e ame ölö but úheny hon bucen, me haba tavat ae se hia adre me he hoton. 2 Me wâ bi, ame o but kâu ke lepera me khudrung ju kâu, me ha, ka habe, Taböny Than lö, u je ne bewem, me

khatö u he ka osoi nya. 3 Me e ame inâ but hnyamen me kâlâ, me ha; ka habe, E bewek; u je so but. Me ame ie hia but hnân lepera. 4 Ke haba Iesu ame ha kâu, ka habe, Wâ eâu, ca ha ka ke at; ke he thö, omanenö u bi ka at bihut, me ham bwihlany a húna Mose, hnân haten ohnathoâ ködrin.

5 Ke ame o but Iesu ka hnyi Kapernauma, me ame o but kâu ke keneturio me khöü kâu, 6 me ha, ka habe, Taböny Than, haba athnyabaik ame mokulec mok a mat eiö hnyin uma, ke vec gan hmâ. 7 Ke e ame ha kâu, ka habe, Oge ma he, ka osoâ e. 8 Haba keneturio ame thu me ha kâu, ka habe, Taböny Than, iny ca úcú m' u me he ka dit ka hnyi umök uma: ke so bi u me he ka ha thibi ke hofuc, me me he ka möt ut athnyabaik. 9 Anyin a inya bi at ame löng musi, ke e hu gak ta je soja: ke inya oge me ha ka ke at, He thö, me, e ame he; me ka ke at, Aiö u, me, e ame he könya; me ka athnyabaik, Anyâ thö e, me, e ame ânyâ. 10 A löng ut Iesu, me e ame láia, me ha ka tavat adre me he hoton, ka habe, E hnathu, inya oge me ha köbun, inya oge me ca wâ hnyi Isaraela labageju ae gan a helâe. 11 Ke inya oge me ha köbun, ka habe, E se hia tavat adre me he ka he úhedra jimeyö me jimeú he ka tha laba me Aberahama, me Isaaka, me Jakob, hnyi dökhü hnyi drany: 12 ke haba lakon dökhü, me adre me he ka ob' ödra ka hnyi menekholom hnyöu ai: k' adre me he ka tenge sesebila eling me úgiö ga nyudra. 13 Ke haba Iesu ame ha ka keneturio, ka habe, He thö, ke adre me he ka ânyâ hobi köu e úcú me ânyâm labageju. Me ame so but athnyabainy hnyi éen cici eling.

14 Ke ame o thö Iesu ka hnyi uma umö Peteru, k' ame wâ hinyen áian ame mokulec mok ae kahwa. 15 Me e ame kâlâ hnyamen momo, me ame hia but kahwa; me ame todrö momo, k' ame bi huliwa kâu. 16 Ke hnyi sahac ödrin e hom kâu tavat ae se hia a dilic ödra demoni: me e ame obâ je hanu ge hwan hofuc, me osoâ ta je mok hia: 17 me me hwâdâ hna ha hnö Isaia perofeta, ka habe, E ame ka hom hnöta ta je sényin, k' ame vaden ta je mekita.

18 Ke haba Iesu ame wâ tavat ae se hia igigilö e, me e ame úkhúnöng he ka he ka hnyi ke keihen. 19 Ke ame he ke at sihnalimen, me ha kâu, ka habe, At Úne lö, oge me he ka he hotom ka hnyi dok u

me he ka he ka hnyin. 20 Ke haba Iesu ame ha kâu, ka habe, Haba ta je alope, me hu hnödra hnyi kânâ, ke haba ta je meno ame ga ethö, me hu haüödra; ke haba bi Nokon at, me ba hnân omokulec ban hnyin. 21 Ke haba ke aten ame ha kâu, ka habe, Taböny Than, me hnö nya but m' inye böc ka könim cica. 22 Ke haba Iesu ame ha kâu, ka habe, He hotuk, ke hamen ta je komok he ka kônâm ta je kokidrin.

23 Ke e ame ölö ka hnyi hon galu, me haba laten adre me he hoton. 24 Ke wâ bi ame o but boudet ae gan eü hnyi köiö, k' ame khutu takou but hu hnen köiö: ke e ame mokut. 25 Me ödrin e he me bwebwelâ e, me ha, ka habe, Taböny Than lö, omeli ötin dö; ötin e he but ang ka mok. 26 Me e ame ha ködrin, ka habe, Ieü gabun öbun e ot hnyat labageju ûhnyûkong? Me e ame todrö, me thawâ ang me köiö; me ame ta but hau ae gan hmâ. 27 Haba tavat ödrin e lâiâ me ha, ka habe, Ehö at ang, ame löng kâu köiö me ang?

28 Ke e ame khöp dö hnyi ke keihen, hnyi hnyei iny at Gadara, me ame úkhanö mē li at a dilic ödru demoni, ödru me he ûhedru hnyi je erkemok, ödru ti hwege monu, wale, me me ha at ame vheno gethen eling. 29 Ke wâ bi ödru me kuku göranya, me ha, ka habe, Ieü gam köhmu Iesu a Nokon Khong? u je o but ang he ka oveci öhmu, ke tiga ca ûen bi? 30 Ke eling e sâkâû gadrin hna hat buaka ae se hia adre me han tot. 31 Haba je demoni adre me khöü kâu, me ha, ka habe, U je ne he ka ob' öhmun, ö u hn' öhmun dut he ka delec hna hat buaka. 32 Ke e ame ha ködrin, ka habe, He th' öbun. Ke ödrin e dit ut, me delec hna hat buaka: ke wâ bi, haba hna hat buaka hia thithö adre me wadring ut, jime thö ban hwatapkölu ka hnyi köiö, me adre me mokcu. 33 Ke ame kec dö hnyat ödrin e tuö me he ka hnyi taun, me úthumetu ge ta je únyi hia, me hna ânyâ ka li at a dilic ödru demoni. 34 Me wâ bi, ame he but aten taun hia thithö he ka iouny me Iesu: ke adre me wâ ju, me adre me khöü kâu he ka hna but je hnyigöulödra.

HNYIMAKAN 9.

KE e ame ölö ka hnyi galu me he nulâ but, ame o thö ka hnyi iny hnyei. 2 Ke wâ bi, adre me sam but kâu at ae mat ame mokut hon hnen: ke haba Iesu

ame wâ anyidrin labageju me e ame ha ka at ae mat, ka habe, Nöhuk, senyin dö; adre hia but hna degecâ ta je hulö gam. 3 Ke wâ bi, keihen hnyat sihnalimen, adre me ha eü hnyi je hnyekudra, ka habe E bi gan dut at ang ka Khong. 4 Ke haba Iesu ame wâhmakhmeto je ûnykûmenödrin me e ame ha, ka habe, Ieü gabun öbun e ûnykûme mono eü hnyi je hnyekubun? 5 Anyin a ieü ae hâhâ, he ka ha, Adre hia but thang ta je hulö gam; a me ne he ka ha ka habe, Todrö me he thö? 6 Ke so bi möbun e he ka wâ ae tren man Nokon at eang hmeledrany he ka thang ta je hulö (me e ame ha ka at ae mat, ka habe) Todrö, hom minya thö hnâm me he thö ka hnyi umâm uma. 7 Me e ame todrö me he ka hnyi umen uma. 8 Ke ame wâ e hnen tavat ae se hia, me adre me lâiâ me ogânâ Khong, wale at ame ham man a helâe ka at.

9 Ke haba Iesu ame he ûheny e, me e ame wâ at ame laba hnyi dok adre bi fat hnyin, Mataio ien: me e ame ha kâu, ka habe, He hotuk. Me e ame todrö me he hoton.

10 Ke e ame laba eiö hnyin uma, ke wâ bi, ame he but ta je telona ae se me tavat ae kong he ka tha laba me Iesu me laten. 11 Ke haba ta je Faresaio ödrin e wâ, me ödrin e ha ka laten, ka habe, Ieü ge At ûne köbun ame tha han me ta je telona me tavat ae kong? 12 Ke a löng ut Iesu, me e ame ha ködrin, ka habe, E ca únyi hnathu at ae tren bubuny ka tavat ae hwege, ke so bi ka tavat a ödra mok. 13 Ke he th' öbun ka nâ bongon ang, ka habe, Wek a ibetengiö, ke ca hut bi: anyin oge me ca o he ka hawâ tavat ae wisa ke so bi tavat ae kong.

14 Me ame o but kâu latö Ioane, ödrin e ha kâu, ka habe, Ieü ang a öhmun osehia but me ta je Faresaio labö ânyâ ca han, k' ame ca hnyi ânyâ ca han lâtam. 15 Ke haba Iesu ame ha ködrin, ka habe, Hawa, e khana lahanen at a tep faipoipo he ka tenge, e ka tiga e unyidrin at a tep faipoipo? ke ame he ka o je bong me adre me he ka hom dö gadrin at a tep faipoipo, me wale ûen ödrin e he ka ânyâ hnyin ca han. 16 E ba at ame útibetkôuâ ecmano ae hât ka hnyi úkhaü ae bobot ut; anyin a haba ecmano hnân okhötâ ame okongoâ úkhaü me ame gan hmâ but mou. 17 Ke adre me ca he minya ka hingâlâ waina a teb únyi ka hnyi je kaia a unen meno a únyi

but adrem: wâ e nye hmouca but ta je kaia, me hingölö but waina, me kong ut je kaia a unen meno: ke adre me hingälâ waina a teb ûnyi ka hnyi je unen meno ae hât, me ame tha so hia but.

18 E ame tiga ha ta je ûnyi eling ködrin, me wâ bi, ame o but ke at ae tren musi, me khudrung ju kâu, me ha, ka habe, a moku nökuk hlu walang ang: ke më aiö u he ka ip hnyamâm hon, me me mödrut.

19 Haba Iesu ame todrö me he hoton, me laten minya. 20 Me wâ bi, ke momo ame ka hingölö dra hnyi twelv ta je huna ame he hnyi hotu Jesu me kâlâ obiny úkhaüen: 21 anyin a e ame ha eü hnyi hnyekon, ka habe, Oge ne he thibi ka kâlâ úkhaüen, me oge me he ka möt. 22 Haba Iesu ame hwiö thö me wâ momo, me ha, ka habe, Nökuk lö, senyin dö, u je mödrut hnen ânyâm labageju. Ke ame modrut momo hnyi ûen eling. 23 Ke ame o but Iesu ka hnyi uma umen at musi, me wâ hnyat ödrin e túö köwi, me tavat ae se adre me mede, 24 me e ame ha ködrin, ka habe, Vese but öbun: a ca mok bi hlu, e ame mokut. Me adre me hlumä e. 25 Ke a hia but obâ tavat a ödra se hia, me e ame didrö me kât hnyamen; me ame todrö hlu. 26 Ke ame lung igigilö hnyi hneyi hia eling ûnyi e.

27 Ke haba Iesu ame he úheny e, me ame he hoton li at ae wadröu, ödrü me hongot, ka habe, Nöku Davita lö, betenge gahmu. 28 Ke e ame didrö ka hnyi uma, me ame he but kâu li wadröu: ke haba Iesu ame ha ködrü, ka habe, Hawa, öbu me ûnyküme me e khanö nya he ka ânyâ e? Ke ödrü me ha kâu, ka habe, E, Than. 29 Me e ame kâlâ li emaködrü, me ha, ka habe, Ame he ka e bi köbu helä me hnöbu hna labageju. 30 Me ame bwela but li emaködrü. Ke haba Iesu ame hûna hwegiâ ködrü, ka habe, Wâ eäu, e nye khana thö ke at. 31 Ke ödrü me didrut me ha olungâ e hnyi hneyi hia eling.

32 Ke ödrü me tiga didrut, wâ bi adre me hom kâu ke at ae hum a delec demoni. 33 Ke a hia but obâ demoni me ame fuc dö hum: haba tavat ae se hia adre me lâiâ me ha, ka habe, Adre me ca wâ balua ehac heläe hnyi Isaraela. 34 Ke haingen ta je Färesaio, ka habe, E ame obâ ta je demoni ûnyi ge tuhan ta je demoni.

35 Ke haba Iesu ame vhenö ta je taun me ta je hnyaba hia, ame ûne hnyi umödra ta je sunago, me khetâ úthumetuiny dökhu

ae so, me osoâ ta je mok hia, me ta je sēnyin hia. 36 Ke e ame wâ tavat ae se hia, me e ame betenge gadra, anyin a ödra sēnyin dut, adre me ve se but, helâ me ta je mamoe e ba at ame tuö. 37 Me e ame ha ka laten, ka habe, E gan hmâ widrany, ke wakhalet thibi tavat huliwan. 38 Anyin a wale he th' öbun ka khöü ka Thaniny widrany me me he ka kunâ tavat huliwa ka hnyi anyin widrany.

HNYIMAKAN 10.

KE e ame hawâ laten a twelv, me e ame ham ködrin musi hon ta je hanu ae kong, he ka ob' ödra, ke he ka osoâ ta je mok hia, me ta je sēnyin hia.

2 Ke walang ien ta je aposetolo a twelv, ka habe, A bö Simona, ke ien minya Peteru, ke Anederea liamekeiny më, ke Iakobo nöku Zebedaio, ke Ioane liamekeiny më; 3 ke Filipino, ke Batolomaio, ke Toma, ke Mataio a telona, ke Iakobo nöku Alefaio, ke Thadaio, 4 ke Simona at Kanana, ke Juda Isakariota, at ame alecuä e. 5 Wale hnyat a twelv a kun' ödrin Iesu me hûna ködrin, ka habe,

Ca he öbun hnyi gethen deny Aten ta je hneyi, ke ca dit bi ka hnyi ke taun anyin at Samaria: 6 ke so bi, he th' öbun ka ta je mamoe a hia hanen lap anyi Isaraela. 7 Ke haba hnyi uhebun, khetâ thö me ha, ka habe, E hakekeny jut dokhon drany. 8 Omelö thö ta je mok, ke omelö hmetu thö tavat adre me moku, ke okhabalavâ but ta je lepera, ke obâ but ta je demoni: öbun e hia but kap baüâ but. 9 Ca hok gol, me sileva, me bras hnyi tangöbun je tangen mone; 10 me ong tang hobi kâu he ka he, me úsa lo úkot, me je tangen hnyeüca, me uci: anyin ae úcü at huliwa he ka kap jeü, 11 Haba ta je taun me ta je hnyaba öbun e he ka o ka hnyin, elelâm dö at ae úcü hwakecin; ke laba ju e ke ne o but öbun e he úheny e. 12 Ke öbun ka didrö ka hnyi ke uma, italofa ju mödra. 13 Ke a ne so uma eling, e so e ame ta but hon, hnöbun hna ha hnahicä e: ke a ne ca so bi, e so he ka hmetu köbun hnöbun hna ha hnahicä. 14 Ke kaba at ame ca köp öbun, k' ame ca löng hobun ta je hofuc, awe, öbun ka didrut ûnyi hnyin uma eling ame ne taun, jijingâ but kânäiny je hnyeücabun. 15 E hnathu, inya oge me ha köbun, ka habe, Ame he ka hâhâ ka hneyi Sodoma me Gomora hnyi bong owisa hon taun eling.

16 Wá bi, inya oge me kun' öbun helá me ta je mamoe hnyi wanben ta je lukó : anyin a wale metá but öbun helá me ta je on, me menyik helá me ta je biny. 17 Ke wá eáu tavat : anyin adre me he ka hn' öbun dut ka tavat úhnei, ke adre me he ka kuc öbun hnyi umödra ta je sunago ; 18 eke, adre me he ka lili öbun ka hnyi hnyimakan tavat musí me ta je than can inya, hnán ohnathoá ködrin me Aten ta je hnyi. 19 Ke ödrin ka he ka hn' öbun dut, ca únykúme bi, ka habe, adre me he ka kámáú hna ha, ke iéú : anyin adre me he ka ham köbun únyi hnán he ka ha hnyi úen eling. 20 Anyin a ca öbun hnyat öbun e ka ha, ke so bi Hanon Kamöbun at ame fuc eú hnyi je hnyekubun. 21 Ame he keiny ka hna liamekeiny mē ka mok, ke heláe minya kamen ka nokon : k' ame he lakon ka tot ka kamödrin me hinyödrin, m' adre me he ka hling' ödrü. 22 Ke ame he tavat hia thithö ka húkötö köbun can iök : ke haba at ame he ka hokhnyok ke ne o but hnyi obiny, me ame he ka möt. 23 Ke ödra ka oveci öbun hnyi ke taun, kec dö ka hnyi ke taun : anyin ae hnathu inya oge me ha köbun, ka habe, Öbun e ca he ka vheno hia ta je taun hnyi Isaraela, ke ne o but ame o thö Nokon at.

24 E ca beönua at adre ná hon at úne, ke ca beönua athnyabainy hon tuhan. 25 E so ka at adre ná ame ne tha úcú me at ame ná e, ke e ka tha úcú hlu me tuhan. Adre ne hia but hawá at ae tren hnyaba, ka habe, Belezebuba, hawa, adre me ca he minya ka hawá ien aten hnyaban ! 26 Anyin a wale, ca ot bi gudra : anyin ae ba únyi adre me ikhálá ame ca he ka manen ; ke ba minya únyi ae iyong adre me ca he ka wá. 27 Haba únyi oge me ha köbun hnyi menekholom, ha th' öbun hnyi melam : ke haba hnöbun hna löng ge je hnyikönyöbun, khetá thö hon ban je uma. 28 Ke ca ot bi ge tavat adre me hlingá unyin, ke ca khan' ödra bi he ka hlingá hanu : ke so he ka ouden at ae khana he ka öhnaúhangöá unyin me hanu hnyi gena. 29 Hawa, adre ca úco li wahelö hwaban asari ? ke ba at gadru ame he ka kölu ka hnyi hon káná, e ka ca musí bi Kamöbun : 30 ke adre hia but aú hia je leünen böbun. 31 Anyin a wale, ca he öbun ka ot, anyin a öbun beönua hon ta je wahelö ae se hia. 32 Anyin a wale, haba at ame he ka haiö nya hnyi hnyimakan tavat, me oge me he bi nya ka háiá e

hnyi hnyimakan Kamök ethö hnyi drany. 33 Ke haba at ame he ka ivinö nya hnyi hnyimakan tavat, me oge me he bi nya ka ivinöá e hnyi hnyimakan Kamök ethö hnyi drany.

34 Ca únykúme bi öbun, ka habe, oge me o but he ka kuná úsoköu ka hnyi hmeledrany : oge me ca o but he ka kuná úsoköu, ke so bi hele vat. 35 Anyin oge me o but me me he ka imoukóu nokon me kamen, ke hlu me hinyen, ke úngon me úngon : 36 ke haba ta je iwahnaihmiony me at, me ame he ka e bi hnyi hnyaban. 37 Haba at ame betenge ka kamen me hinyen huk, me ca úcú könya ; ke haba at ame betenge ka nokon бага me nokon hlu huk, me ca úcú könya. 38 Ke haba at ame ca hou bi anyin satauro me he hotuk, me ca úcú könya. 39 Haba at ame wá anyin möt, me ame he ka ohia e ; ke haba at ame ohia anyin möt can inya, me ame he ka wá e.

40 Haba at ame köp öbun, me ame köp nya minya, ke haba at ame köp nya, me ame kap at a kunö nya. 41 Haba at ame kap perofeta hnyi ien perofeta, me ame he ka hu káu hwaban perofeta ; ke haba at ame kap at ae so hwakecin hnyi ien at ae so hwakecin, me ame he ka hu hwaban at ae so hwakecin. 42 Ke haba at ame he ka habelen at ae úhnyúkong eang ge utköö ae katebu thibi, hnyi ien at úling, e hnathu inya oge me ha köbun, ka habe, ame ca he ka hia hwaban hobi káu.

HNYIMAKAN 11.

KE a um dö Iesu húna ka laten a twelv, e ame he úheny e he ka úne me khetá hnyi anyidra je taun.

2 Ke a löng ut Ioane hnyin uma ce at ta je huliwa anyin Keriso me e ame kuná li laten, 3 he ka ha káu, ka habe, U but e At ame he ka o, hawa, öhmun e he ka lubahingen khaca ? 4 Ke haba Iesu ame thu me ha ködrü, ka habe, He th' öbu ka thumetu Ioane ge hnöbu hna löng me wá : 5 a bwele but ta je wadröu ame he thö ta je mat, a khabalaú but ta je lepera, ame löng dö ta je wejiji, a möt hmetu thö tavat adre moku, ke adre me khetá úthumetu ae so ka ta je theduoc. 6 Ke hnahic hnen' at ame ca he ka thö thö gak. 7 Ke ödrü me tiga he, me Iesu ame hwán ka ha ka tavat ae se hia ga Ioane ka habe, Öbun e he but ka hnyi hnyebuba he ka wá iéú ? hlowe, ame

jijing ge ang? 8 Ke öbun e he but he ka wâ hmâ ieu? at ame khvâ ûkhaü ae menyik? Wâ bi, ödrin dö hnyin ta je uma umen je than hnyat, ödrin e khavâ ûkhaü ae menyik. 9 Ke ieu öbun e he kâu? he ka wâ perofeta? Eke, inya oge me ha köbun, ka habe, e beönuu e hon perofeta. 10 E at eji adre sihnalimen, ka habe, Wâ bi, inya oge me kunâ anyik úthu-metu he ka bán hnyi hnyimákâm, Wale at ame he ka ányâwia dem gethen hnyi hnyimákâm.

11 E hnathu, inya oge me ha köbun, ka habe, Adre tiga ca oâ unyin tavat a hnokoâ hnen omomo ke at ae beönuu hu Ioane Bapataiso : ke so bi, haba at ae úhnyúkong hnyi dokhon drany ame beönuu hon e. 12 Ke hwân hnyi ta je bong bongu Ioane Bapataiso ke ne o but walang ang, adre me úhúgúnö dokhon drany, ke ame húgúnâ e hnyat ae hwege. 13 Anyin a haba ta je perofeta hia me ta je hnanyibu, adre perofeta ke ne o but kö Ioane. 14 Ke a ne webun he ka kap, wale Elia, at ame he ka o. 15 Haba at ae hu hnyikönyen ka löng, löng ju e. 16 Ke oge me he ka ouco me ieu dö ang? E úcú e me ta je wanakat adre me úlalabainy hnyi hna úcú, me úhnenamö me je lahanödra, 17 me ha, ka habe, Öhmun e hia but tuö köwi köbun, ke öbun e ca bibiâ bi, öhmun e hia but tenge köbun, ke öbun e ca sang betenge thö. 18 Anyin a o but Ioane me ame ca han me ic, ke haingödra, ka habe, E hu demoni gan. 19 Ke ame o but Nokon at, me ame han me ic, ke haingödra, ka habe, Wâ bi, at ae hwenhmiâ me beic waina, hanen ta je telona me tavat ae kong! Ke haba únyi hnân haisoâ metâ, me huliwainy.

20 Me e ame hwân ka haikongoâ ta je taun e ame ányâ hnyin ta je huliwa ae man ae se hia, anyin adre me ca ietra bi. 21 Ekölö gam Korazin! ekölö gam Bethesaida! anyin adre ne ányâ hnyi Turo me Sidona ta je huliwa ae man adre ányâ unyibun, adre me ne hia but ietra me ecmano ae gan nân me hnabadröu. 22 Ke so bi, inya oge me ha köbun, ame he bi ka hâhâ ka Turo me Sidona hubun hnyi bong owisa. 23 Ke haba u Kaperenauma, hawa, adre me he ka ogoranyi u ka hnyi drany? adre me he bi ka ohnyikönö u ka hnyi Hedis : anyin adre ne hia but ányâ hnyi Sodoma ta je huliwa ae man adre me ányâ unyâm, ame ne he ka tethmâ ke ne o but hnyi bong ang. 24 Ke inya oge me ha köbun, ka habe, Ame he ka

hâhâ ka hnyei Sodoma hom bi hnyi bong owisa.

25 Hnyi úen e Iesu ame thu me ha, ka habe, Inya oge me ole köu Cica, Tuhan drany me hmeledrany, anyin a u je ikhâlâ ta je únyi eang ge tavat ae metâ me tavat ae khana wia, ke u je omanenâ bi ka ta je mendreng : 26 eke, Cica lö, anyin ae úcú e hnyi hnyimákâm. 27 A hia but Cica ham könya ta je únyi hia : ke ba ke at ame wâhmakhmetoâ Nokon, ke Kamen thibi ; ke ba at ame wâhmakhmetoâ Kamen, ke Nokon thibi, me at minya ame weny Nokon he ka omanenâ kâu. 28 Ai öbun könya tavat hia thithö öbun e huliwa, me öbun tavat hije únyi ae hmak, me oge me he bi nya ka omen' öbun. 29 Kap ju anyik únyi hnân úhúkâlâkôuâ hubun, me nâ thö únyi gak ; anyin a iny menyik ke hnyikânâ hnyok, me öbun e he ka wâ hna menâ hobi kâu ta je hanubun. 30 Anyin ae ca pason anyik hna úhúkâlâkôuâ, ke hâhâ thö honök hok.

HNYIMAKAN 12.

HNYI úen e, Iesu ame he hnyi hna belökâ hwit hnyi bong sabbath ; ke mekihnânem but laten, ke ödrin e hwân ka thu wan hwit me han. 2 Haba ta je Faresio adre me wâ, me adre me ha, ka habe, Wâ bi haba látâm ödrin e ányâ únyi ae ca úcú he ka ányâ hnyi sabbath. 3 Ke haingen ködrin, ka habe, Hawa, öbun e ca hnyi aú hna ányâ hnö Davita ehac, waleji e ame mekihnânem me anyin buyen ; 4 a g' ame didrö ka hnyi uma umen Khong, me an je areto hnân omanenâ, waleji ae ca úcú kâu he ka an me anyin buyen, ke so thibi tavat bihut? 5 Ke öbun e ca munyi aú minya hnyi hnanyibu, ge hnen tavat bihut hna ca okabâ sabbath hnyi hnyin uma kap, ke ödrin e ca kong bi? 6 Ke inya oge me ha köbun, ka habe, Wale bi ang At ae gan hon uma kap. 7 Ke a ne khan' öbun bongon hna ha, ka habe, Wek a ibetengiö ke ca hut bi, m' öbun e ca he ka haikongoâ tavat ae ca monu bi. 8 Anyin a Nokon at a tuhan sabbath.

9 Ke e ame he úheny e, me e ame didrö ka hnyi umödrin sunaga : 10 ke wâ bi, eling ke at ae meleca hnyamen. Me ödrin e hnö e me ha, ka habe, Hawa, e kap he ka úhömeli hnyi sabbath? m' ödrin e he ka bifuco e. 11 Me e ame ha ködrin, ka habe, Ia gabun ae tren mamoe, a ne kölu but ka

hnyi thop hnyi bong sabath, me ame ca he ka kât, me lelô hmetu e? 12 Ke hawa, e ca beönua at hon mamoe? Waleling me me so he ka mádrâ so hnyi sabath. 13 Me e ame ha' ka at eji, ka habe, Lau but hnyamâm. Me e ame lau but; me ame so but helâ me khaca. 14 Ke ame didrut ta je Faresaio he ka ûhnenamö gan, m' adre me he ka kâmâu he ka hlingá. 15 Ke a wâhmakhmeto but Iesu, me e ame hna but dok e: ke ame he hoton tavat ae se; me e ame omeli ödra hia, 16 me thaw' ödra m' adre me ca he ka omanená e: 17 me me hwádâ hna ha hnö Isaia perofeta, ka habe, 18 Wâ bi, athnyabaik oge me úca;

A oúnykumik, wale ame senyin kâu hanuk:

Oge me he ka ip Hanuk hon, Ke e ame he ka omanená wisa ka Aten ta je hnyei.

19 E ame ca he ka ivinö, me fuc göranyai; Ke ba at ame he ka löng ifucin eú hnyi je gethen.

20 E ame ca he ka thu hlowe ame ihnyong, Ke ame ca he ka ume waamo ame hlâ úhnyúkong

Ke ne o but e ame kunâ hna owisa he ka ton.

21 Ke ame he Aten ta je Hnyei ka geju ka hnyi ien.

22 Adre me hom but kâu ke at a delec demoni, ae wadröu, ke hum: me e ame osoá e, me ame fuc dö at ae hum me bwela.

23 Haba tavat hia ae se adre me láia gan hmâ me ha, ka habe, Hawa, nöku Davita at ang? 24 Haba at Faresaio adre me löng me adre me ha, ka habe, At ang ame ca obâ ta je demoni ke so bi únyi ga Belezebuba a tuhan ta je demoni. 25 Ke e ame wâ je únykúmenödrin, me e ame ha ködrin, ka habe, Haba je dökhü hia adre imoukôu gadra, me ame he ka ba wan; ke ame ca he ka tethmâ taun ame ne hnyaba adre me imoukôu gadra: 26 ke a ne Satana ame obâ Satana me ame imoukôu but; ke ame he ka kâmâu ka tethmâ dokhon dökhü? 27 Ke a ne inya oge me obâ ta je demoni únyi ga Belezebuba, únyi ga ia ame ob' ödrin minya hnen lakubun? waleling e me úcú ködrin he ka owis' öbun. 28 Ke oge ne obâ ta je demoni únyi ge Hanon Khong, awe, a o but köbun dökhü dokhon Khong. 29 Ke ame he ka kâmâu at ka dit ka hnyi uma umen at ae hwege, he ka söh anyin ta je únyi, a ne ca bán bi he ka ca at ae hwege? me ame he bi ka

söh umen uma. 30 Haba at ame ca tha hien mönya, me wale iwahnaihmiöny mönya; ke haba at ame ca tha úkhöúnâ mönya, me ame oveséâ but. 31 Anyin a wale, inya oge me ha köbun, ka habe, Adre me he ka thang degecá ta je monu hia, ke ta je bi gan anyin at; ke haba at ame he ka bi gan ka Hanu, me adre me ca he ka thang degecá. 32 Ke haba at ame he ka haikongoá Nokon at, me adre me he ka hna degecá e; ke haba at ame he ka haikongoá Hanu Kap, me adre me ca he ka thang degecá e hnyi möt ang, ke ba minya hnyi möt ame he ka o. 33 Osoá thö úo me me so minya je wan; ke haba khaca, okongoá úo me me kong minya je wan: anyin adre me wâhmakhmetoá úo ge wan. 34 Je lakon on lö, öbun e he ka kâmâu he ka ha je hofuc ae so, k' öbun kong bi? anyin ame fuc hnyem únyi ge unöngötiny hnyok. 35 Haba at ae so ame hom but ta je únyi ae so únyi hnyi tang omjehen ae so; ke haba at ae kong ame hom but ta je únyi ae kong únyi hnyi tang omjehen ae kong. 36 Ke inya oge me ha köbun, a haba ta je hofuc baú hia ame ha hnen at, me adre me he ka ha hmetu hnyi bong owisa. 37 Anyin adre me he ka haiwisö u ge hwâm ta je hofuc, k' adre me he ka ohnaúhangöi u ge hwâm ta je hofuc.

38 Haba keihen tavat sihnalimen me ta je Faresaio adre me thu me ha, ka habe, At úne lö, e bewehmun he ka wâ ke haten gam. 39 Ke e ame thu ködrin, ka habe, Dö ae kong ke bi únyi monu, adre me elâm haten; ke adre me ca he ka ham ködra haten, ke so thibi haten ga Jona perofeta: 40 anyin a Jona ame laba hnyi hnyin wâ ae gan kun ta lany ke kun ta lit: helâe ame he Nokon at ka laba hnyi hnyin kânâ kun ta lany ke kun ta lit. 41 Ame he at Nineve ka tha tot me dö ang hnyi hna owisa, ke adre me he ka ha hnaúhangöá e: anyin adre me ietra hnyi hna khetâ hnö Jona; ke wâ bi walang at ae beönua hu Jona. 42 Ame he momo than úheny hnyi hwaiöu ka tha tot me dö ang hnyi hna owisa he ka bahnaúhangöá e: anyin a e ame o únyi hnyi can hmeledrany he ka löng metâ anyi Solomona; ke wâ bi, wale bi ang at ae beönua hu Solomona. 43 Ke haba hanu ae kong, hnyi úen e ame didrut únyi hnyi hnyin at, e ame he hnyi je dok ae hwahwacit, he ka heleú hna menâ k' ame ca wâ bi. 44 Me e ame ha, ka habe, Oge me he he ka hmetu ka hnyi umök

uma ehac oge didrut úhek hnyin; ke e ame o but me wá ae ba ónyen, ke adre hia but aba wia, me omecá. 45 Me e ame he but me tha hom mē je hanu a seven ae beónua anyidrin monu hon e, ke ódrin e didrö me laba eling: ke haba obiny ka at eling, ame he ka kong hon a bân. Ke ame he ka helâe minya ka dö ang ae kong.

46 E ame tiga fuc ka tavat ae se hia, wá bi, ame útítilen eú hnyöu hinyen me je liamekeiny mē, e bewedrin he ka úhnenamö mē. 47 Ke haba ke at ame ha kâu, ka habe, Wá bi, ame útítilen eú hinyâm me je liamekeiny möü, e bewedrin he ka úhnenamö möu. 48 Me e ame thu me ha ka at ame fuc kâu, ka habe, Ia hinyök? ke ie je liamekeiny mönya? 49 Me e ame inâ hnyamen ka je laten me ha, ka habe, Wá bi, hinyök, me je liamekeiny mönya! 50 Anyin a haba at ame ányá we Cica ethö hnyi drany, wale thibi e keik, me hanik, me hinyök.

HNYIMAKAN 13.

HNYI bong eling Iesu ame he úheny hnyi uma, me laba hnyi hobatköiö. 2 Me ame úhacaköu thö kâu tavat ae se hia, me e ame ölö thö ka hnyi hon hu me laba; ke ame utítilen tavat ae se hia hnyi baten köiö. 3 Me e ame ha ködra ta je hofuc ae se hia a deny je úhöücú, haingen, ka habe, Wá bi, ame he but at belök he ka jijingá wan; 4 ke e ame jijingá, me ame kölu but ke je wan hnyi baten gethen, me ame o but ta je meno ame gá me an dö: 5 ke ame kölu but keihen ka hnyi hon dok ae hudei, ke ca haki hnyi kânâ: me ame ie kú thö anyin ae ca haki kânâ: 6 k' ame o but seúnö, me ame le but, me me mok, anyin ae ba iwân. 7 Ke ame kölu but keihen hnyi wanben ta je úö ae údedö; ke ame kú takoú but hnen ta je úö ae údedö: 8 ke ame kölu but keihen ka hnyi kânâ ae hoso, me wa but, keihen úsa wan haded, keihen úsa sikste, keihen úsa thöte. 9 Haba at ae hu hnyikonyen, löng ju e.

10 Me ame o thö laten, me ha kâu, ka habe, Ieú can u je ha ködra ge ta je úhöücú? 11 E ame thu ködrin me ha, ka habe, Adre me ham köbun he ka wáhmakhmetoá ta je únyi ae iyong hnyi dokhon drany, k' adre me ca ham bi ködra. 12 Anyin adre me he ka ham ka at ae hu gan, me me he ka tren gan hmá: ke adre me he ka hom ge at ae ca hu gan bi, únyi e ame hu. 13 Anyin

a wale, inya oge me ha ködra ta je úhöücú; anyin adre me bwela, k' adre me ca wá bi, ke löng, k' adre me ca löngmakhmeto bi, k' adre me ca wá únykúme bi. 14 Me hwádâ but ködra hna perofeta hnö Isايا, ka habe,

Obun e he ka löng ge hnyeköny, me ca wá únykúme bi;

K' öbun e he ka wá ge ecmak, me ca he bi ka khana:

15 Anyin ame khöt ut hnyekon, tavat ang, Ke hmak je hnyikönyödra he ka löng, K' adre mook ge je emaködra; Wá adre nye wá ge je emaködra Me löng ge je hnyikönyödra, Me wá únykúme ge hnyekudra, Me hmetuhmetu but, M' oge me he ka emeli ödra.

16 Ke hnahic hnen ta je emaköbun, anyin öbun e wá, me ta je hnyikönyöbun, anyin öbun e löng. 17 Anyin ae hnathu inya oge me ha köbun, ka habe, e se hia ta je perofeta me tavat ae wisa hwakecidra adre me weny he ka wá hnöbun hna wá, k' adre me ca wá bi; me be he ka löng hnöbun hna löng, k' adre me ca löng bi. 18 Anyin a wale löng ju öbun úhöücú ge at ame belök. 19 E ka löng ut ke at hofucin dökhü, ke ame ca wá únykúme bi, me ame o but at ae kong, me húgúnâ únyi adre tá eú hnyi hnyekon. Wale thibi e hna tá hnyi baten gethen. 20 Ke haba hna tá hnyi dok ae hudei, wale at ame löng hofuc, me ie kap senyiná; 21 ke so bi e ba bi iwân eú hnyi hnyekon, k' ame ca küeny tethmä; ke ame ne o but hlöuhlöu, me úöveci, can hofuc, me e ame ie thö thö. 22 Ke haba at adre tá hnyi wanben ta je úö ae údedö, wale at ame löng hofuc, ke ame kú takoú hofuc hnen je vheliny hmele-drany, me je iyawö ge omjeú, me e ame ca wa but. 23 Ke haba hna tá hon kânâ ae hoso, wale at ame löng hofuc, me wá únykúme; at ame hing wa, me hu wan, keihen úsa wan haded, ke keihen úsa sikste, ke keihen úsa thöte.

24 E ame omanená hmetu ködra ke úhöücú, ka habe, Haba dokhon drany, me úcú me at ame tá je wan ae so hnyi iny hnyei: 25 ke ame tiga mokut tavat, me ame he but iwahnaimiöny mē, me tá takoú hwit hnen ziania, me he thö. 26 Ke ame kú thö bátân me wa, me ame manen minya but ziania. 27 Me ame o but lathnyabainy at tren uma, me ha kâu, ka habe, Than lö, hawa, u je ca tá ta je wan ae so

hnyi em hnyei? ke únyi ua bi zizania? 28 Ke e ame thu me ha ködrin ka habe, Ame ányá e hnen iwahnaihmiony. Ke haba lathnyaba ödrin e ha káu, ka habe, Hawa e wem öhmun e he ka oc úkhöúná e? 29 Ke haingen, ka habe, Ohe; wá öbun nye tha oc dö hwit me je zizania. 30 E so ödra me he ka tha kú ke ne o but hnyi úen menu: ke haba hnyi úen menu oge me he ka ha ka tavat menu, ka habe, Më úkhöúná thö je zizania, me tha ip me ca, hnân thong degecá: ke ip dö hwit hnyi anyik om hani.

31 E ame omanená hmetu ködra ke úhöúú, ka habe, Haba dokhon drany, me úcú me wan sinapi ame hom ke at me ta hnyi iny hnyei: 32 wale thibi e wan ae úhnyúkong hmelen ta je wan hia; ke hnyi úen e ame kú thö me ame gan hmá hon ta je úö ae ometu, a úö cici, me úcú ka ta je meno ame gá ethö he ka tabá ta je vheiny.

33 Ke e ame ha hmetu ködra ke úhöúú, ka habe, Haba dokhon drany me úcú me leven ame hom ke momo me ikhálá hnyi hnyin falawa a kun ta tulut, ke ne o but ame tha khibi hia thö.

34 Haba ta je hofuc hia e, ame ha Iesu ka tavat hnyi je úhöúú; k' ame ca fuc ködra ke ba úhöúú: 35 me me hwadá thö hna ha hnen perofeta, ka habe,

Oge me he ka khöng ut hnyimök hnyi ta je úhöúú;

Oge me he ka ha ta je únyi ae iyong hwán hnyi hna bi taben hmeledrany.

36 Ke haba Iesu ame hna but tavat ae se hia, me ame didrö ka hnyi uma: ke ame o but káu laten, haingödra, ka habe, Omanená thö köhmun bongon úhöúú me zizania hnyi utkáná. 37 Me e ame thu ködrin, me ha, ka habe, Haba at ame tá wan ae so, me wale Nokon at; 38 ke haba utkáná, me wale hmeledrany; ke haba wan ae so, me wale lakon dokhu; ke haba zizania, me wale lakon at ae kong; 39 ke haba iwahnaihmiony a at ame tá, me wale diabolo: ke haba menu, me wale obiny hmeledrany; ke haba tavat menu, me wale ta je angela. 40 Ke haba zizania adre úkhöúná he ka thong hnyi meic; me ame he ka heláe hnyi obiny hmeledrany. 41 Ame he Nokon at ka kuná anyin ta je angela, m' ödrin e he ka úkhöúná únyi hnyi dokhon dökhü ta je únyi hia adre me bi jöminy, ke tavat adre me ányá hulö, 42 me khú' ödrin ka hnyi thopiny meic: k' adre me he ka tenge me úgiö ganyudra eling. 43 Ke

haba tavat ae wisa, me adre me he ka hadröngöc helá me seúnö hnyi dökhü dokhon Kamödra. Haba at ae hu li hnyikönyen, löng ju.

44 Haba dokhon drany, me úcú me tang omjeú adre me ikhálá hnyi hnyei; waleji ame wá hnen ke at, me ikhálá but; me e ame senyin me he but me úcöá anyin ta je únyi hia, me úcö utkáná eling.

45 Wale hmetu ang, haba dokhon drany me úcú me at úcö omjeú at ame elám ta je penina ae so: 46 ke e ame wá ju ke penina ae gan hwaban, me e ame më úcö anyin ta je únyi hia hnân bi hwaban e.

47 Wale hmetu ang, haba dokhon drany, me úcú me ert adre me thong eú hnyi köiö, me ame hnok dö ta je wá monu hia: 48 ke ame unöngöt dö, me ödrin e lelö e ka hnyi hme; ke adre me úlalabainy me úkhöúná je wá ae so ka hnyi je tang, me degec bi ta je wá ae kong. 49 Ame he ka heláe hnyi obiny hmeledrany: ame he ka he but ta je angela me kia luá tavat ae kong me tavat ae wisa, 50 me khú' ödra ka hnyi thopiny meic: adre me he ka tenge me úgiö ganyudra eling.

51 Hawa, öbun e wá únykúme ta je únyi hia e? Haingödrin ka habe, Eke. 52 Me e ame ha ködrin, ka habe, Anyin a wale, haba tavat sihnalimen hia waleji adre ná ka hnyi dokhon drany, me helá me at ae tren uma ame sang ta je únyi ae teb únyi me ta je únyi ae kueny jut únyi hnyi tang omjehen.

53 A hia but Iesu umo ta je úhöúú e, me e ame he but úheny e. 54 Me e ame o but ka hnyi iny hnyei, me e ame n' ödra hnyin umödra sunago, me adre me láia, me ha, ka habe, Únyi ua metá eang me ta je huliwa ae man anyin at ang? 55 Hawa, ca nokon bi at tretrau? ke ca Maria bi ien hinyen? ke hawa, ca je liamekeiny më jia Iakobo, me Josefa, me Simona, me Juda? 56 Ke ca eang bi unyita je lahaniny hia? Ke únyi ua bi ta je únyi hia eang gan? 57 Ke adre me thö thö gan. Ke haba Iesu ame ha ködra, ka habe, E ca ba lung anyin perofeta, ke ka e bi hnyi iny hnyei, me anyin bi lap. 58 Ke e ame ca ányá ta je huliwa ae man ae se hia eling, can anyidra ca labageju.

HNYIMAKAN 14.

HNYI úen eling a löng ut Heroad than lung a Iesu, 2 me e ame ha

ka lathnyabainy, ka habe, Ioane Bapataiso e; a môt hmetu thö úheny hnyi hna mok; anyin a wale ame huliwa ta je únyi ang ae man anyin. 3 Anyin a hia but Heroda kôt Ioane, me ca e, me ip hnyi uma ce at, can ga Herodia, öiö Filipo, liamekeiny mē. 4 Anyin a Ioane ame ha, ka habe, E ca úcú kôu he ka hom e. 5 Me e ame weny ka hlingá e, k' ame outen tavat ae se hia, anyin adre me kap e helá me perofeta. 6 Ke haba hnyi bong adre me bijeuá bong adre hnöku Heroda hnyin, ame biá hlu nöku Herodia hnyi wanben, me osenyini Heroda. 7 Waleling me me khemanyin he ka ham káu únyi e ame he ka sumátá. 8 Ke haba hlu, me ame ha hnyekon hinyen he ka ha, ka habe, Ham but kónya bö Ioane hnyin mini. 9 Me ame hmak ut than; ke únyi bi ge hna khemanyin, ke can ge tavat adre me tha laba mē, me e ame hûna he ka ham but; 10 me e ame úkhúnöng he ka subá bö Ioane hnyin uma ce at. 11 Me adre me hom but ban hnyi mini, me ham ka hlu, ke hlu ame hom me ham ka hinyen. 12 Me ame he but laten, me hom anyin, me konám; ke ödrin e he but me thumetu Iesu.

13 Ke a löng ut Iesu, me e ame he úheny e hon hu, ka hnyi ong hnyebuba a hake e: ke a löng ut tavat ae se hia, me adre me he hoton hon káná únyi hnyi ta je taun. 14 Ke e ame o thö me wá tavat ae se hia, me e ame betenge gadra, me ohia hnödra ta je mok. 15 Ke hnyi sahac ame he but káu laten, me haingödrin, ka habe, Hnyebuba ang, k' a um do lauy; kuná thö tavat ang ae se hia, m' adre me he ka hnyi je taun he ka úcú ö 'dra bi. 16 Ke haba Iesu ame ha ködrin, ka habe, Ohe, adre me ca he ka he; ha ö 'dra bi öbun. 17 Ke haingödrin káu, ka habe, E hu thabúng thibi ta areto ke lo li wá unyihmun. 18 Me e ame ha, ka habe, Hö jem. 19 Ke ame hûna ka tavat ae se hia he ka laba hnyi hna önying; ke e ame hom je areto a thabúng ke li wá, k' ame bwele hnyi drany ai me oleá, me thuthu, me ham je areto ka laten, ke laten ka tavat ae se hia. 20 Ke ödra hia adre me han, me ame sekudra ju: ke adre me hom je kolon adre thuthu a unöngöt dö je tang a twelv. 21 Ke haba úseiny tavat adre me han me helá me faiv thauzan obaga, k' adre ca aú bi omomo me je wanakat.

22 Me e ame ie kuná laten he ka laba hon hu, me me bödrin ka kec ka hnyi ke

keihen, me e ame he ka hna but tavat ae se hia. 23 Ke a hia but kuná tavat ae se hia, e ame hake ölö thö ka hnyi bucen he ka hic: ke hauhaotreng ut ke hake e thiju ling. 24 Ke haba hu, me e but hnyi wanben köiö, ame kap hnahna hnen ta je waköiö, anyin a esang. 25 Ke hnyi hna hmak a vakiny hnyi lit e ame he ködrin, ame he hon köiö. 26 Ke a wá but e hnen laten ame he hon köiö, me ödrin e hmak me ha, ka habe, Hanu jo; ke ödrin e kuku anyin a ödrin ot. 27 Ke haba Iesu ame ie fuc ködrin, ka habe, Hwege thö; inya bi; ca ot. 28 Haba Peteru ame thu káu, ka habe, Than lö, ame ne u bi ling, bethe ha kónya he ka he but kôu ka hnyi hon köiö. 29 Haingen ame ha, ka habe, Aiö u, Haba Peteru ame utut úheny hon hu, me he hon köiö, he ka he kö Iesu. 30 Ke e ame wá ang, me e ame ot; ke e ame hwán he ka ú, me e ame kuku me ha, ka habe, Than lö, omeli nya. 31 Me Iesu ame ie hinöbeny me kât e, me ha káu, ka habe, At ame labageju úhnyúkong lö, ieú gam u me hlohlo! 32 Ke ödra me ölö thö ka hnyi hon hu, me ame ta but hau. 33 Ke haba aten hu ödrin e khudrung káu, me ha, ka habe, E hnathu u thibi Nokon Khong.

34 Ke ödrin e kec ka hnyi ke keihen, me ödrin e o thö hot, ka hnyi Genesareta. 35 Ke amé wáhmakhmeto e hnen tavat hnyi hnyei eling, me adre me úkhúnöng igigilö hnyei eling, me hom but káu ta je komok hia; 36 me khöú káu m' adre me he ka kálá thibi obiny anyin úkhaú: ke haba tavat hia adre me kálá, adre me mödrut.

HNYIMAKAN 15.

KE ame o but kö Iesu ke je Faresaio me tavat sihnalimen úhedra Jerusalema, me ha, ka habe, 2 Ieú ge latám ödrin e hanyáúá hna úne hnen wahingat? anyin ödrin e ca mē hinyem ödrin ka he ka han. 3 Me e ame thu me ha ködrin ka habe, Ieú gabun öbun e hanyáúá minya hnanyibu anyin Khong ge hnöbun hna úne? 4 Anyin a Khong ame ha, ka habe, Ogáná kámám me hinyám: ke, Haba at ame haikongoá kamen me hinyen, e hnathu e ame he ka mok. 5 Ke haingöbun, ka habe, Haba at ame he ka ha ka kamen me hinyen, ka habe, E kap bi anyik ta je únyi hnán hadru'öbu; 6 e ame ca he ka ogáná kamen. Me öbun e ohavá hofuc hwan Khong ge

anyibun je hna úne. 7 Hnyat thoi hnyok lö, e so hna perofeta gabun hnö Isaia, ka habe,

8 Haba tavat ang, adre me oganö nya ge je esongodidra;

Ke haba je hnyekudra, me úsákáúö mönya.

9 E únyi baú hnödra hna khudrung könya K' adre me ná bi ta je hna úne a húna hnen at.

10 Me e ame hawa tavat ae se hia, me ha ködra, ka habe, Löng ju, me wá únykúme ju: 11 Ca únyi bi ame dit ka hnyi hnyem ame okongoá at; ke so bi únyi ame didrut únyi hnyi hnyem, wale bi e ame okongoá at. 12 Me ame o but laten me ha káu, ka habe, E kxanö u a ta je Faresaio adre me hmönyidra ka löng hofuc e? 13 Ke e ame thu me ha, ka habe, Haba ta je úö a ca tá bi hnen Kamök ethö hnyi drany, me adre me he ka oc dö me iwán. 14 Hn' ödra but: ödra je hnyat kú gethen k' ödra wadröu. Ke a ne lelö wadröu ge ke wadröu, ödrü me he ka tha ta eú hnyi hmonop. 15 Haba Peteru ame thu me ha, ka habe, Ha thö köhmun bongon úhöúcú. 16 Ke e ame ha, ka habe, Hawa, öbun hnyat adre me tiga ca wá únykúme bala? 17 Öbun e ca wáhmakhmeto bi a haba ta je únyi ame dit ka hnyi hnyem, me ame he ka hnyi hnyin, me adre me degec ut ka hnyi hnyot? 18 Ke haba ta je únyi ame didrut únyi hnyi hnyem, me ame he but úheny hnyi hnyok; me wale ame oikikiá at. 19 Anyin ame didrut únyi hnyi hnyok ta je hna únykúme ae kong, me je úhlingö, me venöu áian ke at, me bi únyi monu, me venöu, me ohnatho thoi, me haikongo: 20 wale ta je únyi ame oikikiá at: ke haba he ka han k' adre ca hinyem, me ame ca he ka okongoá at.

21 Haba Iesu ame hna but dok e, me he ka hnyi ke keihen Turo me Sidona. 22 Me wá bi, ame o but ke momo Kanana únyi hnyi je hnyegöulen hnyeí eling, k' ame hongot tenge, ka habe, Than a Nöku Davita lö, betenge ju gak; ame vec ut nöku hlu a delec demoni. 23 Ke ba hofuc e ame thu. Me ame o thö laten me sumátá e, ka habe, Obá but momo; anyin a e ame hongot hotutin. 24 Ke e ame thu me ha, ka habe, E ba ke únyi adre kunö nya káu, ke so bi ka ta je mamoe adre he monu hnyi lap anyin at Isaraela. 25 Me ame o thö momo me khudrung ju káu me ha ka habe, Than lö, hadruö nya. 26 Ke e ame thu,

ka habe, E ca so bi he ka hom jeú an je lakon, me khúá ka ta je kuli. 27 Ke haingen momo ame ha, ka habe, Eke Than: anyin a haba je kuli adre me labö an je kolon ame kölu únyi hnyi hon laulau anyin tuhödrin. 28 Me haba Iesu ame thu me ha ka momo ka habe, Momo lö, e gan hmá ányám labageju: e so he ka e köu helá me hnám hna wem. Me ame möt ut nokon hlu cicö úen eling.

29 Ke haba Iesu ame he úheny e, me o hnyi köio hnyi Galilaia; ke e ame ölö ka hnyi bucen me laba eling. 30 Me ame o but káu tavat ae se hia, tha ödra me ta je mat, me ta je wadröu, me ta je hum, me ta je bábu, me keihen tavat ae se hia minya, me adre me khú' ödra ka hnyi hmelen li can; me e ame omeli ödra: 31 me me láia tavat ae se hia, hnyi úen adre me wá ta je hum adre me fuc, me je bábu adre me so but, me je mat adre me he: me adre me ogáná Khongon Isaraela.

32 Haba Iesu ame hawá laten me ha ka habe, Inya oge me betenge ge tavat ae se hia, anyin a ödra bong kun dut eang unyik ke ba ö'dra: ke ca wek he ka kun' ödra k' ödra mekihnánem wá adre nye he ka momonu eú hnyi gethen. 33 Ke haba laten ödrin e ha káu, ka habe, E hu gatin únyi ua je areto ae se hia eang hnyi hnyebuba, me hnán he ka osekuná tavat ae se hia heláng? 34 Ke haba Iesu ame ha ködrin ka habe, Ve ta areto unyibun? Haingödrin, Seven, me je ong wá. 35 Me e ame húna ka tavat ae se hia he ka laba hon káná; 36 ke e ame hom je areto a seven me je ong wá, me e ame oleá me thuthu, me ham ka laten, ke laten ka tavat ae se hia. 37 Haba ödra hia adre me han me ame sekudra ju: ke ödrin e hom dö je kolon adre thuthu, me ame unöngöt dö je tang a seven. 38 Ke ödra foa thauzan obaga adre me han, adre ca áú bi omomo me ta je wanakat. 39 Me e ame hna but tavat ae se hia, me e ame ölö thö hon ong hu me o ka hnyi je hnyigöulen Magadala.

HNYIMAKAN 16.

ME ame o but ta je Faresaio me Sadukaio, me adre me cubec e me sumátá he ka omanená ke haten únyi hnyi drany. 2 Me e ame thu ködra, ka habe, Hnyi sahac öbun e ha, ka habe, Ame he ka so drany: anyin ae dra drany. 3 Ke hnyi hnyomakatu, Ame he ka kong drany

hnyi bong ang : anyin ame dra drany ke khömet. E khan' öbun heka wáhmakhmetoâ bongon drany; ke ca khan' öbun bi he ka wáhmakhmetoâ ta je haten ta je ün. 4 Ame elâm haten hnen dö ae kong k' ame bi únyi monu ; k' adre me ca he bi ka ham káu haten, ke so thibi haten anyi Jona perofeta. Ke e ame hn' ödra, me he but.

5 Ke ame khöp dö laten hnyi ke keihen, k' ödrin e hnyinghe ka hok areto. 6 Haba Iesu ame ha ködrin, ka habe, O 'bun áu ge leven anyin ta je Faresaio me ta je Sadukaio. 7 Me ödrin e úhnenamököüâ, ka habe, anyin la ötin e ca hok areto. 8 Haba Iesu ame wáhmakhmeto, me e ame ha, ka habe, Öbun hnyat labageju úhnyú-kong lö, iéú gabun öbun e úhnenamököüâ anyin ae ba areto? 9 Hawa, öbun e ca wáhmakhmeto bala bi, ke öbun e ca únykúme bi je areto a thabúng anyin tavat a faiv thauzan, me useiny je tang öbun e hom? 10 Ke helâe je areto a seven anyin foa thauzan tavat me úseiny je tang öbun e hom? 11 Iéú gabun öbun e ca wáhmakhmeto a oge me ca ha köbun ge areto? Ke so bi he ka wá áu ge leven anyin ta je Faresaio me je Sadukaio? 12 Me ödrin e wá únykúme a e ame ca ha ködrin he ka wá leveniny areto, ke so bi úne anyin ta je Faresaio me je Sadukaio.

13 Ke ame o but Iesu hnyi ke keihen hnyei Kaisaria Filipi, me e ame hnö laten, ka habe, Haba ifucin tavat ge Nokon at, me ia? 14 Haingödrin, ka habe, Haingen keihen, Ioane Bapataiso; ke haingen keihen, Elia : ke haingen keihen Jeremia, ame ne ke at hnyi ta je perofeta. 15 Ke haingen ködrin, ka habe, Ke haba ifucibun gak, m' iny ia? 16 Haba Simona Peteru ame thu me ha, ka habe, U thibi Keriso a Nokon Khong ae möt. 17 Ke haba Iesu ame thu me ha káu, ka habe, Hnâm hnahic Simona Bar-Jona : anyin a ca omanená bi köu hnen at, ke hnen bi Kamök ethö hnyi drany. 18 Ke inya oge me ha köu, ka habe, U Peteru, ke hnyi hon veto ang, oge me he ka otílâ anyik ekalesia ; ke ame ca he ka hwege ta je homagöuleny hedis hon e. 19 Ke oge me he ka ham köu je kiny dokhon drany: ke haba únyi u me he ka ohmä eang hmeledrany, adre me he ka ohmä ethö hnyi drany: ke haba únyi u me he ka thang eang hmeledrany adre me he ka thang ethö hnyi drany. 20 Me e ame ha ka laten m' ödrin e ca he ka ha ka ke at a e bi Keriso.

21 Hwân ün e, Iesu ame hwân ka omanená ka laten a e ame he ka he Jerusalema ai, me vheno ta je vec ae se hia únyi ge wahingat, me ta je taben tavat bihut, me hnyat sihnalimen, k' adre me he ka hlingâ, k' ame he ka möt hmetu hnyi bong a kuniny. 22 Haba Peteru ame hom e, me hwân he ka thawâ, haingen, ka habe, Ekölö gam Than; adre me ca he bala ka ányâ helâe köu. 23 Ke e ame hwiö thö me ha kö Peteru, ka habe, Satana lö, he thö ka hnyi hotuk : u at ame bijönik : anyin u je ca únykúme ge ta je únyi anyin Khong, ke ta je únyi thibi anyin at. 24 Me Iesu ame ha ka laten, ka habe, A ne ke at ame weny he ka he hotuk, e so e ame hokhnyok, me hom anyin satauro me he hotuk. 25 Anyin e haba at ame beomelö anyin möt, me ame he ka ohia e : ke haba at ame he ka hna anyin möt can inya, ame he ka hu e. 26 Anyin a iéú troban ka at, a ne he ka hu káu hmeledrany hia, ke ame bi hwaban e ge anyin möt? ke iéú hmetu ke únyi hnân he ka bi hwaban anyin möt? 27 Anyin ame he ka o thö Nokon at hnyi hmanenanginy Kamen, tha e me anyin ta je angela, me e ame he ka ve ham ka tavat hia thithö e ficú me anyidra ta je huliwa. 28 E hnathu, inya oge me ha köbun, haba keihen gadra adre me tot eang, adre me ca he bi ka mok, ke ne o but adre me wá Nokon at ame he ka o hnyi dokhon dökhü.

HNHYIMAKAN 17.

KE hwaban ta bong a siks Iesu ame hum Peteru, me Iakobo, me Ioane a keiny, me su ödrin ka hnyi bucen a hake ödrin ke : 2 me e ame ke bongon dut hnyi hnyimaködrin : ke ame hadröngöc hnyimakan helâ me seúnö, ke hau anyin je úkhaú helâ me melâm. 3 Me wá bi, haba Mose me Elia ödrü me manen ködrin, m' ödrü úhnenamö më. 4 Ke haba Peteru ame ha kö Iesu, ka habe, Than lö, e so kötin he ka laba eang : a ne wem oge me he ka otílâ je uma menâ a kun ; hnân hobi köu khaca, ke hobi kö Mose khaca, ke hobi kö Elia khaca. 5 Ke e ame tiga ha, me wá bi úlá ae hadröngöc ame tubi ödrin : ke wá bi, hwan hofuc únyi hnyin úlá ame ha, ka habe, Walang Nökuk a oúnykúmik oge me senyin káu; löng ju öbun káu. 6 Ke a löng ut laten, me ödrin e ta ju hnyikánâi, me ot gan hmâ. 7 Ke haba Iesu ame he me kal' ödrin, me ame ha, ka habe, Todrö ke ca ot

bi. 8 Me ödrin e bwele göranyai ke ba at ödrin e wâ, ke hake Iesu thibi.

9 Ke ödrin e tiga utut ûhedrin hon bucen, me Iesu ame hûna ködrin, ka habe, Ca ha bi ka ke at ûnyi a manen, ke ne o but a möt hmetu thö Nokon at ûheny hnyi hna mok. 10 Me ame hnö e hnen laten, ka habe, Anyin a ieu ame ha tavat sihnalimen, ka habe, Ame he ka bö Elia ka o? 11 Ke e ame thu, me ha, ka habe, E hnathu ame bö Elia, k' ame he ka ohâtâ ta je ûnyi hia : 12 ke inya oge me ha köbun, ka habe, A o but Elia, ke adre me ca wâhmakhmeto, k' adre hia but ânyâ kâu wedra. Ame he minya Nokon at ka hu vec helâe ûnyi gandra. 13 Haba laten ödrin e wâhmakhmeto a e ame haiö Ioane Bapataiso ködrin.

14 Ke ödrin e o but ka tavat ae se hia, ke ame o but kâu ke at ame cibouca kâu, me ha, ka habe, 15 Than lö, betenge ju ge nökkuk : anyin a e ame ing, me gan hmâ vec : anyin a e ame osehia but ta eû hnyi meic, ke osehia minya ka hnyi köiö. 16 Ke oge hia but hom e ka lâtam, ke ca khan' ödrin he ka omelö e. 17 Ke haba Iesu ame thu me ha, ka habe, Dö ame ca labageju bi, ke hwali lö, oge me he ka tha e möbun ke ne o but kehö? oge me he ka hokhnyoki öbun ke ne o but kehö? hö jem kõnya. 18 Haba Iesu ame thawâ e, me ame didrut demoni ûnyi hnyin : me ame möt dö da hwân hnyi ûen e. 19 Me ame he duöng laten kö Iesu me ha, ka habe, Ieu ae ca khan' öhmun gan he ka obâ e? 20 Me e ame ha ködrin, ka habe, Anyin ae ûhnyûkong anyibun labageju : anyin e hnathu inya oge me ha köbun, ka habe, a ñe hu gabun labageju helâ me wan sinapi, me öbun e he ka ha ka bucen ang, ka habe, Kec dö kâe ; me ame he ka kec ; ke ba ke ûnyi ame he ka pason köbun.

22 Ke ödrin e tiga laba hnyi Galiläia, haba Iesu ame ha ködrin, ka habe, Adre me he ka alecuâ Nokon at ka hnyi ta je hnyamen at ; 23 ke adre me he ka hlingâ e, ke e ame he ka möt hmetu hnyi bong a kuniny. Me ödrin a vec gan hmâ.

24 Ke ödrin e o but hnyi Kaperenauma, me ame o but kö Peteru tavat adre me hok haf-sekel, me ha, ka habe, Hawa ame ca hnyi bi haf-sekel at ame n' öbun? 25 Haingen, Eke. Ke hnyi ûen e ame didrö hnyin uma ai, haba Iesu ame bân he ka fuc kâu, ka habe, Simona, ieu ûnykümenâm? haba ta je than eang hmeledrany adre me hom ûnyi ga ia fat me hut? hawa, unyi

ge lakudra, ame ne ûnyi ge je atkanyua? 26 Haingen ame ha, ka habe, Ûnyi ge je atkanyua : me Iesu ame ha kâu, ka habe, Awe adre hna bâûâ lakon. 27 Ke so bi wâ ötin nye osau' ödra, he thö hnyiköiöai, me khûâ but wage, me lelö thö wâ a bân ka wadring ka hnyin ; ke u ka hia but khöng hnyimen, u me he ka wâ khaca sekel : hom dö e, me ham ködrin hnân hobi köu m' önya.

HNYIMAKAN 18.

HNYI ûen eling ame o laten kö Iesu me ha, ka habe, Ia ae gan hnyi dokhon drany? 2 Me e ame hawâ wanakat ae ûhnyûkong kâu, me otillâ hnyi wanbödrin, 3 me ha, ka habe, E hnathu inya oge me ha köbun, ka habe, Öbun e ne ca wi' öbun bi, me me helâ me wanakat, e ca khan' öbun he ka didrö ka hnyi dokhon drany. 4 Anyin a wale, haba at ame he ka oûhnyûkongoâ e bi helâ me wanakat ang, wale bi e at ae gan hmâ hnyi dokhon drany. 5 Ke haba at ame he ka kap wanakat helâng hnyi iök, me ame köp nya minya : 6 ke haba at ame he ka bijoniny ke at ae ûhnyûkong eang ame labageju kõnya, me so ka at eling he ka vekiny hnyi nyin veto hnân oamâmâ, me he ka öûâ but e hnyi köiö ae dit. 7 Ekölö ge hmeledrany anyin ae hu ta je hna bi jönniny! anyin ae ûnyi hnathu he ka oâ ta je hna bijönniny : ke ekölö ge at ame he ka oâ ta je hna bijönniny! 8 A ne bi jönâm hnyamâm a metâm, subâ degecâ but gam : e so köu he ka didrö ka hnyi möt a u bâbu ke wat, hon he ka tha hu li hnyamâm ke li cam, ke adre me he ka khûö u ka hnyi meic ame ca mok balua. 9 Ke a ne bi jönâm emâkâm, ûâ degecâ thö gam : ke so köu he ka didrö ka hnyi möt a khaca biju emâkâm, hon he ka tha hu li ecmak, me adre me he ka khûö u ka hnyi meiciny gena. 10 Wâ eâu öbun nye hûkötîâ ke at ae ûhnyûkong eang ; anyin a inya oge me ha köbun, haba anyidrin ta je angela ethö hnyi drany adre me wâ bala hnyimakan Kamök ethö hnyi drany. 12 Anyin a ieu ûnykümenöbun? a ne ke at ae tren je mamoe a wan haded, ke ame he monu but khaca gadrin, hawa, e ame ca he ka hna bi nainte nain, me he ka hnyi je bucen he ka elâm at a he monu? 13 Ke a ne wâ ju e, e hnathu inya oge me ha köbun, ka habe, e ame senyinâ e hon hnen hna senyinâ

nainte nain ödrin e ca he monu. 14 Ke heläe e ca weny Kamöbun ethö hnyi drany, a g' ame he ka hia ke at eang ae úhnyúkong.

15 Ke a ne monu kôu kem, he thö ka omamenâ kâu anyin monu ke hake öbu ke : a ne ling u, öbu me he bi ka liamekeiny hmetu. 16 Ke ame ne ca ling u, bi hiâm ju minya ge at a khaca, ame ne lo, m' adre me he ka ohmâ ta je hofuc hia a tha hnthoâ hnen hnyimen li at a lo, ame ne kun. 17 Ke a ne höcö ling ödrin, ha thö ka úkhacaköu : ke a ne höcö löng úkhacaköu, hna but e me me he ka helä kôu me Aten ke je hnyei, ke ta je telona. 18 E hnathu inya oge me ha köbun, ka habe, Haba únyi öbun e he ka ohmâ eang hmeledrany adre me he ka ohmâ ethö hnyi drany : ke haba únyi öbun e he ka thang eang hmeledrany, me adre me he minya ka thang ethö hnyi drany. 19 Wale hmetu ang, inya oge me ha köbun, ka habe, ame ne he lo li at gabun ka tha ogâ ke únyi eang hmeledrany wale ödru me he ka sumâtâ, me ame he ka ham ködru hnen Kamök ethö hnyi drany. 20 Anyin a haba dok ame úkhacaköu hnyin li at a lo, ame ne kun, hnyi iök, me inya ling hnyi wanbödrin.

21 Haba Peteru ame o but kâu me ha, ka habe, Than lö, ama ove monu könja keik m' iny hna but e? hawa, ame he ka o hnyi seven? 22 Haba Iesu ame ha kâu, ka habe, Oge me ca ha kôu, ka habe, Ame he ka o hnyi seven; ke so bi, Ke ne o but ka hnyi sevente je seven. 23 Anyin a wale, haba dokhon drany me úcú me ke than ame weny he ka hnö ge ta je únyi unyin lathnyabainy. 24 Ke e ame hwân he ka wâhmakhmeto, me adre me hom but kâu at ame hia but me hom gan ten thauzan je talan. 25 Ke can anyin ae ba gan hnân bi hwaban, haba tuhan ame úkhünöng he ka úco e, me áiân, me lakon, me ta je únyi ae hu gan, me hnân bi hwaban. 26 Anyin a wale, haba athnyaba ame ta ju me nom ju kâu, me ha, ka habe, Than lö, më hokhnyoki nya ju, me oge me he ka ham hia hwaban kôu. 27 Haba tuhan athnyaba eling ame betenge gan, me thang ut e, me hna degecâ kâu hnen hna më hom. 28 Ke ame dit hnyöu ai athnyaba eling, me wâ ke athnyaba a hanen, waleji ame më hom gan je denari a wan haded : me e ame kâlâ e, me kât nyin me ha, ka habe, Hö jem hmetu hnâm hna më hom gak. 29 Me haba athnyaba a hanen

ame ta ju, me khöu kâu, me ha, ka habe, Më hokhnyoki nya ju, me oge me he ka ham hmetu kôu. 30 Ke e ame höcö : me e ame he me khüâ e hnyin uma ceat, ke ne o but e ame ham hmetu hna më hom. 31 Ke a wâ but hnen je athnyaba a hanen hnen hna ányâ, me ame hnak je hnyekudrin, me ödrin e o thö me omanenâ ka tuhödrin únyi hia ame ányâ. 32 Me haba tuhan ame hawâ e, me ha kâu, ka habe, U athnyaba ae kong lö, oge me thang hia hnâm hna më hom gak, anyin a u je khöu könja : 33 hawa, e ca úcú kôu he ka betenge minya ge athnyaba a hanâm, helâji me hnök hna betenge gam? 34 Haba tuhan ame hmönyin, me hna but ka tavat öüveci, ke ne o but e ame he ka ham ta je únyi hia e ame më hom. 35 Ke ame he ka ányâ heläe köbun hnen Kamök ethö hnyi drany, öbun ca ca he hia ka ve thöng keiny únyi hnyi je hnyekubun.

HNYIMAKAN 19.

A HIA but Iesu öumo ta je hofuc e, me e ame he úheny Galilaia, me o hnyi hnyigöulen Juda hoton Joridano; 2 ke ame he hoton tavat ae se hia; me e ame omeli ödra eling.

3 Ke ame o thö kâu ta je Faresaio he ka cubec e, haingödrin ka habe, Hawa, e úcú ka at he ka degec áiân can ta je únyi hia? 4 Me e ame thu me ha, ka habe, Hawa, öbun e ca hnyi áu, a haba at ame op tavat hnyi can a e ame up ödru бага me momo, 5 me ha, ka habe, Anyin a wale, ame he бага ka hna kaman me hinyen me kece bi ka áiân; ke ame he ka khaca thibi unyidru? 6 Waleling m' ödru me ca lo hmetu bi, ke khaca thibi unyidra. Anyin a wale, haba hnen Khong hna úhúkâlâkôuâ, me ca he bi at ka thang. 7 Haingödrin kâu, ka habe, Anyin a ieu Mose ame hûna he ka ham tusiny thang faipoipo, me ip ju momo? 8 Me e ame ha ködrin, ka habe, Haba Mose ame hn' öbun he ka degec laoiöbun can únâkiny je hnyekubun : k' adre me ca hnyi heläe hnyi can. 9 Ke inya oge me ha köbun, ka habe, Haba at ame degec áiân, k' a bi únyi monu, me ihok me ke at bi, me wale bi at ame bi únyi monu : ke haba at ame hom momo adre degec, me e at ame bi únyi mouu. 10 Ke haba laten, ödrin e ha kâu, ka habe, A ne heläe bongon at ge momo, e ca úcú bi he ka faipoipo. 11 Ke e ame ha ködrin, ka habe, E ca

khana tavat hia he ka kap hofuc e, ke so thibi tavat adre me ham ködrin. 12 Anyin ae hu je eunuka ame helâe únyi hnyi erkin ge hinyen : k' ame eunuka but keihen, a oeunuka hnen at : ke e hu je eunuka, adre me ka oeunuk' ödra hobi kâu dokhon drany. Ke haba at ae khana he ka kap e, e so e ame kap.

13 Me adre me hom but kâu ta je wanakat, me me he ka ip li hnyamen hudrin, me hic : ke haba laten ödrin e thaw' ödra. 14 Ke haingö Iesu, ka habe, Hna but ta je wanakat, ke ca thaw' ödrin bi he ka he jem kõnya : anyin a helâ ödrin dokhon drany. 15 Me e ame ip li hnyamen hudrin, me he but úhny e.

16 Me wâ bi ame o but ke at me ha kâu, ka habe, At úne lö, ieu ke únyi ae so o ge me he ka ányá me me hu thö kõnya möt ame ca ba balua? 17 Me e ame ha kâu, ka habe, Ieú gam u me hnö gak únyi ae so? Khaca thibi at ae so: ke a ne wem he ka didrö ka hnyi möt vheno thö ta je hnanyibu. 18 Haingen ame ha kâu, ka habe, Ewa? Ke Iesu ame ha kâu, ka habe, U ca he ka hlingá, U ca he ka bi. únyi monu, U ca he ka venöu, U me ca he ka ohnathoá thoi, 19 Ogáná kámám me hinyam : ke, U me he ka betenge ge at ame laba hakekenyi u helâ me u bi. 20 Haba hidröu ame ha kâu, ka habe, Oge hia but vheno ta je únyi e: ke ieu biju ae hia gak? 21 Haba Iesu ame ha kâu, ka habe, A ne wem he ka bekhöt, he thö, úco thö anyám ta je únyi, me ham ka tavat ae theduoc, ke u me he ka hu tang omjeú hnyi drany: ke aiö u bi, he hotuk. 22 Ke a löng ut hidröu hofuc eling, me e ame he but me hmak ut hnyekon : anyin a e at ae tren omjeú ae gan hmá.

23 Me haba Iesu ame ha ka laten, ka habe, E hnathu inya oge me ha köbun, ka habe, Huliwa but at ae tren omjeú he ka didrö ka hnyi dokhon drany. 24 Ke inya oge me ha hmetu köbun, ka habe, E háhá ka kamela he ka didrö hnyi hwanumen jebú, hon he ka didrö ka hnyi dökhu dokhon Khong at ae tren omjeú. 25 A löng ut laten me ödrin e láia gan hmá me ha, ka habe, Ia la ae khana he ka möt? 26 Haba Iesu ame ö' drin me ha, ka habe, E ca khana bi e hnen at ; ke ba ke únyi ae pason ka Khong. 27 Haba Peteru ame thu kâu, ka habe, Wâ bi, öhmun e hia but hna degecá ta je únyi hia, me he hotom ; ke öhmun e he ka hu ieu? 28 Haba Iesu ame ha ködrin, ka habe, E hnathu inya oge

me ha köbun, ka habe, haba hnyi hna he ka omelö hmetu, e ka he Nokon at ka laba hon theroniny anyin hmanenang, haba öbun tavat öbun e he hotuk, me öbun e he minya bi ka laba hon je theron a twelv, he ka owisa je tribu anyin at Isaraela a twelv. 29 Ke haba at ame he ka hna but uma, ke liamekeiny, ke haniny, ke kamen, ke hinyen, ke lakon, ke hnyeí, can iök, me e ame kap wan haded úsheiainy, me ame he ka hu minya möt ae ca ba balua. 30 Ke se hia tavat ame bödra, me ame he ka bilidra but, ke haba tavat ame bilidra me ame he ka bödra but.

HNYIMAKAN 20.

A NYIN ae úcú dokhon drany me tuban uma, at ame vesákong he ka hawí tavat huliwa ka hnyi anyin hna belöká vine. 2 Ke tha mou thö gan me tavat huliwa he ka kap úsa khaca denari hnyi bong, me e ame kun' ödra ka hnyi anyin hna belöká vine. 3 Ke e ame dit hmetu but hnyi awa a kuniny, k' ame wâ keihen adre me útítilen báu hnyi hna úcú ; 4 ke e ame ha ködra, ka habe, He th' öbun ka hnyi hna belöká vine, me oge me he ka bi hwaban köbun únyi ae úcú. Me ödrin e he but. 5 Ke e ame dit hmetu but, hnyi awa a siks, ke hnyi awa a nain, k' ame ányá helâe. 6 Ke haba hnyi awa a eleven. e ame dit hmetu but, me wâ keihen adre me útítilen baú ; me e ame ha ködra, ka habe, Ieú gabun öbun e útítilen baú ke obekhötá bong? 7 Haingödra kâu, ka habe, Anyin ae ba at ame haw' öhmun. Ke e ame ha ködra, ka habe, He th' öbun minya ka hnyi hna belöká vine. 8 Ke hnyi hauhaotreng, haba tuban vine ame ha ka homakan huliwa, ka habe, Hawá thö tavat huliwa me ham ködra hwaban, hwán ge tavat a bilidra ke ne o but ka tavat a bödra. 9 Me ame o but tavat adre hawí hnyi awa a eleven, me ödrin e ve kap denari. 10 Ke ame o minya but tavat a bödra, k' ödrin e únykúme he ka kap gáná ; ke ödrin e ve kap minya denari. 11 Ke adre hia but kap, me adre me ulidro tuban uma, 12 me ha, ka habe, Haba tavat a bilidra adre hia but huliwa khaca thibi áwá, ke u je mádrá ködrin e úcú möhmun, waleji tavat öhmun e hok hmakiny bong me kahwainy ae gan hmá. 13 Ke e ame thu ka ke at gadrin, ka habe, Hanök lö, iny ca hwali köu : hawa, öte ca tha thamá

hnyi denari? 14 Hom dö ányám me he thö, haba wek bi he ka ham ka at a biliny e úcú möu. 15 Hawa, e ca úcú könya he ka ányá wek ge anyik ta je únyi? hawa e kong emakám nyin a iny at betenge? 16 Ke helâe haba at a biliny aine he ka bân, ke haba at a bân, ame he ka biliny jut.

17 Haba Iesu ame he Jerusalema ai, me e ame saú thö me laten a twelv a hake ödrin ke, me ha ködrin eú hnyi gethen, ka habe, 18 Wâ bi, ötin e he Jerusalema ai; ke adre me he ka alecuá Nokon at ka je taben tavat bihut me hnyat sihnalimen; ke adre me he ka hahnaúhangoâ e, he ka hlingâ, 19 ke adre me he ka hna e ka Aten je hnyei he ka hlumâ e, me kot ge osö, me osatauroâ: ke e ame he ka möt hmetu thö hnyi bong a kuniny.

20 Meame e but kâu hinyen li laku Zebedaiio tha e me li lakon, ödrin e khudrung me sumâtâ e ge ke únyi. 21 Me e ame ha ka momo, ka habe, Ieú wem? Haba momo ame ha kâu, ka habe, Ö u ha thö me me he li lakuk ang ka laba ke at hnyi ke keihâm a metâm, ke ke at hnyi ke keihâm a mem hnyi dokhom dökhü. 22 Ke haba Iesu ame thu me ha, ka habe, E ca khan' öbu bongon hnöbu hna sumâtâ. Hawa, e khan' öbu he ka ic hnyi kaia oge me he ka ijem? Haingödrü ka habe, E khan' öhmu. 23 Ke e ame ha ködrü, ka habe, Öbu me he ka hnyi ic hnyi anyik kaia: ke haba he ka laba hnyi ke keihen metök me mek, me ca hamök bi he ka ham, ke wale hobi kâu thibi hnen Kamök hna penapena hobi kâu. 24 Ke a löng ut hnyat a ten me ame hmönyidrin ka li liamekeiny. 25 Ke haba Iesu ame haw' ödrin kâu me ha, ka habe, E khan' öbun a hwakecin tavat adre me musö Aten je hnyei he ka hwen than hudrin, ke ame musi ödrin hnen ta je tuhödrin. 26 Ame ca he ka helâe gabun: ke haba at ame began gabun ame he ka bi athnyaba köbun; 27 ke haba at ame weny he ka bân gabun, me ame he ka bi athnyaba köbun: 28 helâ me Nokon at a ca o me me he ka bi athnyaba kâu tavat, ke so bi he ka bi athnyaba me ham anyin möt hnân hwaban melen tavat ae se hia.

29 Ke ödrin e tiga dit úhedrin Jeriko me ame he tavat ae se hia hotudrin. 30 Ke wâ bi, li wadröu ödrü me laba hnyi baten gethen, k' ödrü me löng a g' ame he nul' ödrü Iesu, me ödrü me hongot, ka habe, Than a Nöku Davita lö, betenge ju

gahmu. 31 Me ame thaw' ödrü tavat ae se hia, m' ödrü me laba hnyibú: ke so bi ödrü me hongot hwege tot, me ha, ka habe, Than a Nöku Davita lö, betenge ju gahmu. 32 Me Iesu ame todru me haw' ödrü, me ha, ka habe, Ieú webu a oge me he ka ányá köbü? 33 Haingödrü, ka habe, Than lö, me me bwela but li emaköhmü. 34 Me haba Iesu ame hnyok ködrü, me kâlâ li emaködrü: me ödrü me ie bwela but me he hoton.

HNYIMAKAN 21.

KE ödrin e hakekeny Jerusalema ai, k' ödrin e o but Bethefage hnyi bucen Elaio, ke haba Iesu ame kunâ li laten, 2 haingen ködrü, ka habe, He th' öbu ka hnyi taun cici öbu, me öbu me he ka wâ asina adre me noc, me nokon unyin: thang ut, me lelö thö jem könya. 3 Ke ame ne he ke at ka fuc köbü, me ha th' öbu, ka habe, E hu hanymödrü ge Than; me e ame he ka ie kun' ödrü. 4 Ke adre me ányâ e, me me hwädâ hna ha ge perofeta, ka habe,

5 Ha thö ka hluiny Ziona, ka habe,

Wâ bi, ame o but kou Tuhâm,

At ae menyik, k' ame tabâ asina,

Ke nak asina, a nokon asina.

6 Me ame he but li laten me ányâ helâ me hna ha ködrü ga Iesu, 7 me lelö asina, me nokon, k' ödrü me ip je úkhaúdrü hon li asina; me e ame laba hon. 8 Ke haba tavat ae se hia adre me ulolo anyidra je úkhaú eú hnyi gethen; ke haba keihen adre me sö je anginy úö, me ave gethen. 9 Ke haba tavat adre me bödra me tavat a bilidra, adre me kuku me ha, ka habe, Hosana ka Nöku Davita: Hnen hnahic at ame o but hnyi ien Than; Hosana ethö beönua. 10 Ke hnyi úen e ame o but hnyi Jerusalema me ame bwebwet bi taun hia, haingödra, ka habe, Ia e? 11 Me ame ha tavat ae se hia, ka habe, Walang perofeta a Iesu úheny Nazareta hnyi Galilaia.

12 Ke haba Iesu ame didrö hnyin uma kap umen Khong, me obâ hia tavat adre me úcú hnyin uma kap, me hagutâ hnyikânâi ta je laulau anyin tavat wia mone, me je utap taben tavat adre me úcú biny; 13 me e ame ha ködra, ka habe, Adre hia but sihnalimen, ka habe, Adre me he ka hwenyi ien umök uma, me uma hnân hic: ke öbun e wia e me me op umen tavat venöu. 14 Ke ame o but kâu ta je wadröu me ta je mat hnyi uma kap; me e ame

omeli ödra. 15 Ke haba je taben tavat bihut me hnyat sibnalimen adre me wâ ta je ûnyi hnân lâiâ e ame ânyâ, ke je wanakat adre me hongot hnyin uma kap, me ha, ka habe, Hosana ka Nöku Davita, me adre me hmönyidra, 16 me ha kâu, ka habe, Hawa, u je löng hnödrin hna ha? Haingö Iesu ame ha ködra, ka habe, Eke: öbun e ca munyi aû, ka habe, Ünyi hnyi hnyimen ta je wanakat me ta je mendreng u je obekhötâ bi hna haisoâ. 17 Me e ame hn' ödra but me he but ûheny hnyi taun Bethania ai, me mokut eling.

18 Ke haba hnyi hnomakatu, e ame he hmetu ka hnyi taun ke ame mekihnânem. 19 Me e ame wâ imeta hnyi baten gethen, me e ame he kâu, ke ba wan e ame wâ, ke je lan thibi; haingen kâu ka habe, U me ca he hmetu ka wa nyiele balua. Me ame ie meleca thö imeta. 20 Ke a wâ but laten, me ödrin e lâiâ me ha, ka habe, E logot meleca thö imeta! 21 Haba Iesu ame thu me ha ködrin, ka habe, E hnathu inya oge me ha köbun, öbun e ne hu labageju, me ca lolo bi hnyok, öbun e ca he ka hake ânyâ thibi hna ânyâ ka imeta, ke öbun e ne he ka ha ka bucen ang, ka habe, Bethe ok ut me ta but eû hnyi köiö, me ame he ka hwädâ. 22 Ke haba ta je ûnyi hia thithö öbun e he ka sumâtâ hnyi hic, öbun ka labageju, me öbun e he ka hu.

23 Ke e ame o ka hnyi hnyin uma kap, me haba je taben tavat bihut me wahingating hnyei ödrin e o kâu hnyi ûen e ame tiga ûne, me haingödrin, ka habe, Hnen musi anyi ia u me ânyâ ta je ûnyi e? 24 Haba Iesu ame thu me ha ködrin, ka habe, Oge me he bi nya ka hnei öbun ge ke hofuc, ke öbun ka thu thö kõnya, me oge me he ka ha köbun musi oge me ânyâ hnyin ta je ûnyi e. 25 Haba hna bapataiso hnö Ioane me ûnyi ua? ûnyi hnyi drany, ûnyi ge at? Me adre me ûnhenamökouâ, ka habe, Ate ne ha me ûnyi hnyi drany, me e ame he ka ha köta ka habe, Ieû gabun öbun e ca geju kâu? 26 Ke ate ne ha, ka habe, Ünyi ge at; me öta outen tavat ae se hia; anyin a ödra hia adre me köp Ioane helâ me perofeta. 27 Me adre me thu kö Iesu, ka habe, E ca khan' öhmun. Me e ame ha ködra, ka habe Oge me ca he minya inya ka ha köbun musi oge me ânyâ hnyin ta je ûnyi e. 28 Ke ieû ûnykümenöbun? Wale ke at a lo lakon; me e ame o ka atö me ha, ka habe, Nökuk, he thö ka huliwa hnyi bong ang hnyi ik hnyei vine. 29 Ke

haingen, ka habe, Iny hücü: ke hwaban e, e ame ietra me he. 30 Me e ame o ka wakeiat me ha helâe minya. Ke e ame thu me ha, ka habe, Cica inya oge ma he: ke ame ca he bi. 31 Ie at gadru ame ânyâ weny kamödra? Haingödra, ka habe, Atö. Haba Iesu ame ha ködra ka habe, E hnathu inya oge me ha köbun, haba ta je telona, me ta je momo hnyi gethen, adre me khalet' öbun ka hnyi dökhu dokhon Khong. 32 Anyin a Ioane ame o but köbun hnyi deny hwakecin ae wisa, ke öbun e ca geju kâu: ke ame labageju kâu hnen ta je telona me ta je momo hnyi gethen: ke öbun e wâ thibi, öbun e ca ietra hwaban, m' öbun e he ka labageju kâu.

33 Löng ju ke ûhöücû; Wale at tuhan uma ame belökö vine, me bi hagin y igigilö, me hin thop hnân hlic vine, me otilâ tap ae beû göranyai, me hna ka tavat belök, me e ame he but ka hnyi ke hnyei bi. 34 Ke hnyi ûen ame hakekeny ka metu je wan, me e ame kunâ lathnyabainy ka tavat belök, he ka hom je wan. 35 Haba tavat belök adre me kât lathnyabainy, me osöâ khaca, me hlingâ khaca, me lûâ khaca. 36 Me e ame kunâ hmetu ke lathnyaba ae se hia hon hnyat a bödrin: me adre me ânyâ helâe minya ködrin. 37 Ke hwaban e, e ame kunâ ködra nokon, haingen, Ödrin e he la ka outen nöku. 38 Ke a wâ but nokon hnen tavat belök, me ödrin e ûhakkouâ, ka habe, Wale but ang mâtrân; ate me he ka hlingâ, me me tang omjehetin biju anyin ta je ûnyi. 39 Me ödrin e kât e me obâ ûnyi hnyi hnyei vine, me hlingâ. 40 Anyin a wale, e ka o tuhan hnyei vine, ieû ame he ka mâdrâ ka tavat belök? 41 Haingödrin kâu, ka habe, E ame he ka obia tavat eling ae kong, me hna hnyei vine ka keihen tavat belök, tavat adre me he ka ham wan kâu hnyi je ûen. 42 Haba Iesu ame ha ködrin, ka habe, Öbun e ca aû hna sibnalimen, ka habe,

Haba veto ame degec hnen tavat bi uma,

Me adre me ânyâ me hnân ban kopiny: Ünyi ge Than eling, Ke ate me wâ me lâiâ?

43 Anyin a wale, inya oge me ha köbun, ka habe, Adre me he ka hom gabun dökhu dokhon Khong, me adre me he ka ham ka hnyei adre me wa waniny. 44 Ke haba at ame he ka ta hon veto ang, me ame he ka thu amâmâ: ke e ka kölu ka hnyi hon

at, me ame he ka thu omomono e. 45 Ke a löng ut ta je taben tavat bihut ke ta je Faresaio anyin ta je úhóúú, me ödrin e wá únykúme a e ame ha gadrin. 46 Me ödrin e elám he ka kát e, k' ödrin e outen tavat ae se hia, anyin adre me kap e a perofeta.

HNYIMAKAN 22.

HABA Iesu ame ha hmetu ködra je úhóúú ame ha, ka habe, 2 Haba dokhon drany, me úú me ke than at ame ányá bijéú hnyi faipoipo a nokon, 3 k' ame kuná lathnyabainy he ka hom tavat adre hia but hawá ka hnyi bijéúiny faipoipo: k' adre me hócö. 4 Me e ame kuná hmetu ke je lathnyaba me ha, ka habe, Ha thö ka tavat adre hia but hawá, ka habe, Wá bi, oge hia but penapena anyik bijéú: k' adre hia but hlinga halek je bolok ke halek je meno ae pipikhenya, k' adre hia but penapena ta je únyi hia: ai öbun ka hnyi bijéúiny faipoipo. 5 Ke adre me oúnyibáú me ve sê but, ke at ka hnyi iny ta hnyei, ke ke at ka hnyin anyin hna úú: 6 ke haba je kolon adre me kát lathnyabainy, we okongoá, me hlingá. 7 Me ame hmönyin bi than, k' ame kuná anyin je utbavat, me ohia tavat úhlingö eling, me thong degecá anyidra taun. 8. Me e ame ha ka lathnyabainy, ka habe, Adre hia but penapena bijéúiny faipoipo ke ca úú ödra bi, a tavat adre me bödra ka hawá. 9 Anyin a wale, he th' öbun ka hnyi vheden ta je gethen, ke haba tavat hia öbun e he ka wá, haw' ödra thö ka hnyi bijéúiny faipoipo. 10 Me ame he but lathnyaba eling ka hnyi ta je gethen, me úkhacahouá hia tavat ödrin e wá, tavat ae kong ke tavat ae so: me ame unöngöt hna faipoipo ge at. 11 Ke ame didró than he ka wá tavat adre hawá, me e ame wá ke at eling ae ba úkhaúen faipoipo: 12 me e ame ha káu, ka habe, Hanök lö, iéú gam u je didró kááng, ke ba gam úkhaúen faipoipo? Me e ame laba hnyibú but. 13 Ke haba than ame ha ka lathnyaba, ka habe, Ca ju li can ke li hnyamen, me khúá but ka hnyi menekholom hnyöu, dok adre me tenge hnyin me úgiö ganyon. 14 Anyin adre me hawá tavat ae se, ke wakhalet thibi adre me úca.

15 Me ame he but ta je Faresaio me úhnenamö m' adre ma kámáu ka töuhneweny ge hnen hna ha. 16 Me adre me

kuná káu latödrin, ke je Herodiane minya, me ha, ka habe, At úne lö, e khan' öhmundut a u at ae hnathu, a at ame únö hnatho gethen deny Khong, ke u me ca outen at, anyin a u me ca únykúme bi hnyimakan at. 17 Anyin a wale, ha thö köhmund, Iéú únykúmenám? e úú he ka fat kö Kaisara, hawa, degec u? 18 Ke haba Iesu ame wá hwakecidrin ae kong, me e ame ha, ka habe, Hnyat thoi, iéú gabun öbun e cubic nya? 19 Omanená thö könya mone hnán fat. Me adre me hom káu denari. 20 Me e ame ha ködrin, ka habe, Hnyimakö ia ang me hna sihnalimen? 21 Haingödrin káu, ka habe, Kaisara. Me e ame ha ködrin ka habe, Awe, ham but kö Kaisara ta je únyi anyi Kaisara, ke ka Khong ta je únyi anyin Khong. 22 Ke adre me löng, me adre me láia, me hna but e, me he but.

23 Hnyi bong eling ame he but káu ta je Sadukaio, tavat adre me ha, ka habe, e ba möt hmetu thö: 24 ke adre me hnö e, ka habe, At úne lö, haba Mose ame ha, ka habe, A ne mokcu ke at ke ba nokon, hamen liamekeiny më he ka hom áian bi, me bi mátrán liamekeiny më. 25 E unyihmun je liamekeiny a seven: ame faipoipo thö atö, me ame mokcu, ke ba mátrán, ke ame hna but áian ka keiny; 26 ke helæ minya ge loiny, me kuniny, ke ne o but hnyi seven. 27 Ke hwabödrin hia thö, ame mok minya ju momo. 28 Waleling, me ame he ka öö ia gadrin a ödrin seven hnyi möt hmetu thö? anyin a ödrin hia ödrin e hom e. 29 Haba Iesu ame thu me ha ködrin, ka habe, Öbun e únykúme hwalö but, ke ca khan' öbun hna sihnalimen, me man maniny Khong. 30 Anyin adre me ca he ka hok áian me úhamtamomo hnyi möt hmetu, ke adre me he ka tha úú me ta je angela hnyi drany. 31 Ke haba hnyi möt hmetu únyi hnyi hna mok, hawa, öbun e ca aú hnen Khong hna ha köbun ka habe, 32 Inya ang Khongu Aberahama, me Khongu Isaaka, me Khongu Jakob? Haba Khong, me ca Khongon bi tavat adre mokcu, ke so bi tavat ae möt. 33 Ke a löng ut tavat ae se hia, me adre me láia hnen hna úne.

34 Ke a löng ut ta je Faresaio a g' ame ohnyibö ta je Sadukaio, me adre me úkhacaköu thö. 35 Ke haba ke at gadrin a at únö hnanyibu ame hnö he ka cubec e, haingen ka habe, 36 At úne lö, ewa hnanyibu ae gan hnyi ta je hnanyibu? 37 Me e

ame ha kâu, ka habe, U me he ka hnyok ka Than a Khongom ge hnyekom ae bekhöt, me hanom ae bekhöt, me oûnykûmâm ae bekhöt. 38 Wale hnanyibu ae gan a bân. 39 Ke haba loiny, helâ minya e, ka habe, U ma betenge ge at ame laba hakekenyi u helâ me u bi. 40 Hnyi li hnanyibu eling ame him je hnanyibu hia me ta je perofeta.

41 Ame tiga ûkxacaköu ta je Faresaio, ke Iesu ame hnei ödra ge ke ûnyi, ka habe, 42 Ieü ûnykûmenöbun ge Keriso? nöku ia e? Haingödrin kâu, ka habe, Nöku Davita. 43 Me e ame ha ködra, ka habe, Ieü ga Davita ame hââ e ûnyi ge Hanu, ka habe, Than, haingen.

44 Ame ha Than ka Tuhök, ka habe,

Labâ ju hnyi ke keihen a metök

Ke ne o but oge me he ka ip ta je iwahnahmiöny möu hmelen li cam?

45 Awe, ame ne hââ e hnö Davita, ka habe, Than, ama kâmâu ka nokon? 46 Ke ba at ae khana he ka thu kâu ge ke hofuc, ke ba at ae hwege hnyekon he ka hnö hmetu e, hwân hnyi bong eling.

HNHYIMAKAN 23.

HABA Jesu ame ha ka tavat ae se hia me lateu minya ka habe, 2 Haba hnyat sihnalimen me ta je Faresaio adre me laba hon je utap tabö Mose: 3 anyin a wale, haba ta je ûnyi hia thithö ödrin e he ka ha köbun he ka ânyâ, ânyâ thö, me tuö: ke ca he öbun ka úcúûbongoâ hwa-kecidrin; anyin adre me ha thibi, k' adre me ca ânyâ bi. 4 Eke, adre me hûgo ta je hok ae hmak, ke pason he ka hijen, me ip hon li bajebeniyin tavat, ke ödrin bi, ödrin e ca bwebwelâ ge ke banyödrin. 5 Ke ödrin e ânyâ hia anyidrin ta je huliwa hnân bi wânên at: anyin ödrin e olâwâ anyidrin je filateri, me ogânâ je baten je khaüdrin, 6 me wedrin ta je hna laba ae beönua hnyi ta je bijeti, ke je utap ae nua hnyi ta je sunago, 7 me he ka nom ködrin hnyi ta je hna úcú, me he ka hai' ödrin, ka habe, Rabi. 8 Ke haba öbun, ca he ka haw' öbun, ka habe, Rabi: anyin a khaca thibi at úne köbun, ke öbun ka liamekeiny hia. 9 Ke ca he ka hawâ ke at eang hmeledrany, ka habe, Kamen: anyin a khaca thibi kamöbun ethö hnyi drany. 10 Ke ca he öbun ka haw' öbun, ka habe, Je homakan: anyin a khaca thibi homakan köbun, wale Keriso. 11 Ke haba at ae

gan unyibun, me ame he ka athnyabaibun. 12 Ke adre me he ka öûhnyükongo at ame ka ogânâ e; k' adre me he ka ogânâ at ame ka öûhnyukongoâ e.

13 Ekölö gabun hnyat sihnalimen me ta je Faresaio, hnyat thoi hnyok! anyin öbun e hlöng dokhon drany ka at: anyin öbun e ca didrö ka hnyin, ke öbun e thawâ minya tavat adre me labö didrö.

15 Ekölö gabun hnyat sihnalimen me ta je Faresaio, hnyat thoi hnyok! anyin öbun e vheno köiö me hnyei he ka heleü hanöbun a khaca, ke e ka wia e, öbun e ânyâ e me me nokon gena a ibi olo nuainy hubun.

16 Ekölö gabun tavat úsú k' öbun wadröu bi, wale a tavat adre me ha, ka habe, A ne ke at ame khemanyin ûnyi ge uma kap, me ûnyi baü bi e; ke haba at ame he ka khemanyin ûnyi ge goliny uma kap, me hmâ bala but e. 17 Hnyat ae monu öbun me wadröu: anyin a ieü ae nua, a ne gol, a ne uma, wale at ame okabâ gol? 18 Ke a ne ke at ame khemanyin ûnyi ge taben hut, me ûnyi baü e; ke a ne ke at ame he ka khemanyin ûnyi ge bwihlany hon e, me e hmâ bala but e. 19 Hnyat ae wadröu: anyin a ieü ae nua, hawa a ne bwihlany, a ne taben bi hut, wale at ame okabâ bwihlany? 20 Anyin a wale, haba at ame khemanyin ûnyi ge taben hut, e ame khemanyin ûnyi ge e bi, me ta je ûnyi hia thithö minya adre ip ethö hon. 21 Ke haba at ame khemanyin ûnyi ge uma kap, me ame khemanyin ûnyi ge e bi, me ûnyi ge at minya ame laba eiö hnyin. 22 Ke haba at ame khemanyin ûnyi ge drany, e ame khemanyin minya ge theron anyin Khong, me at minya ame tabâ e.

23 Ekölö gabun hnyat sihnalimen me ta je Faresaio hnyat thoi hnyok! anyin a öbun e ham ke hanen a libenyitainy minet, me aneto, me komina, ke öbun e hia but hna biju ta je ûnyi ae gan hnyi hnanyibu, wale hna owisa, me ibetengjö, me labageju: e úcú öbun e ânyâ ta je ûnyi e, ke ca hna bi ta je ûnyi eang. 24 Hnyat úsú, k' öbun je wadröu bi, hnyat öbun e hneköien minâ, me utâ bi kamela.

25 Ekölö gabun hnyat sihnalimen me ta je Faresaio, hnyat thoi hnyok! anyin öbun e hneü hoton utkaia me mini, ke haba bi hnyin, me unöngöt ge hna hügünâ hwali me hwakecin ae kong. 26 Faresaio ae wadröu lö, hneü bânâ but hnyin utkaia me mini, me me so minya but hoton.

27 Ekölö gabun hnyat sihnalimen me ta je Faresaio, hnyat thoi hnyok! anyin a öbun úcú me ta je erkemok adre me obawá, ke so hmönyin at ka wá hoton, ke haba eú hnyin, me unöngöt ge je jeien komok, me ikiki hia. 28 Ke helâe, öbun ame manen wisa ka tavat, ke unöngöt dö eú hnyibun ge thoi hnyok me hulö.

29 Ekölö gabun hnyat sihnalimen me ta je Faresaio, hnyat thoi hnyok! anyin a öbun e up veten je erkemok hon ta je perofeta, me omecâ je erkemok hon tavat ae wisa, 30 me ha, ka habe, A ne öhmun hnyi ta je bong bongon lakamöhmun, öhmun e ca he ka hnyi hanen tavat adre me hlingâ ta je perofeta. 31 Waleling me öbun ka ohnathu öbun bi a öbun lakon tavat adre me hlingâ ta je perofeta. 32 Awe, öunöngötâ thö tulut anyin lakamöbun. 33 Öbun je on lö, ke lakon je vaipa, öbun e he ka kâmâu ka kec ge hnaúhangöiny gena? 34 Wâ bi, inya oge me kunâ köbun ta je perofeta me tavat ae metâ, me hnyat sihnalimen: ke öbun e he ka hlingâ me osatauroâ keihen gadrin, ke öbun e he ka osöâ keihen hnyi umöbun je sunago, me sed' ödrin únyi hnyi ke taun ka hnyi ke taun: 35 me ame he ka o but köbun dra ae wisa hia adre hingâlâ eang hmeledrany, hwân ge dra drö Abela at ae wisa, ke ne o but ka dra dro Zakaria nöku Barakia, waleji öbun e hlingâ hnyi wanben uma kap me taben hut. 36 E hnathu inya oge me ha köbun, ka habe, Ame he ka o ta je únyi hia eling ka dö ang.

37 Jerusalema, Jerusalema lö, at ame hlingâ ta je perofeta, me lûâ tavat adre me kunâ kâu! iny ibi osehia wek he ka úkha-caköuâ lakom helâ me hinyen denakhoto ame tube lakon ge li labenyin, m' öbun ka höcö öbun! 38 Wâ bi adre hia but hna degecâ umöbun uma ke ba önyen. 39 Anyin a inya oge me ha köbun, ka habe, Öbun e ca he hmetu ka ö nya, ke ne o but úen öbun e he ka ha hnyin, ka habe, Hnen hnahic at ame o but hnyi ien Than.

HNYIMAKAN 24.

HABA Iesu ame didrut úheny hnyi uma kap; me ame o but laten he ka omanená kâu je ke keihen hna op uma kap. 2 Haba Iesu ame ha ködrin, ka habe, Hawa, öbun e wâ but ta je únyi hia eang? e hnathu inya oge me ha köbun, ka

habe, Ame ca he bi ke veto ka mokut hon ke veto, ke adre me he ka tho degecâ hia.

3 E ame tiga laba hon bucen Elaio, me ame o duöng kâu laten, me ha, ka habe, omanená thö köhmun ame he ka o kehö ta je únyi e? ke iéú haten ge hnâm hna he ka o hmetu, me únyi minya a obiny hmeledrany! 4 Ke haba Iesu ame thu ködrin, ka habe, Wâ eâu, wâ e nye omonu öbun dut ke at. 5 Anyin ödra se hia adre me he ka o hnyi iök me ha, ka habe, Inya ang Keriso; me omonoâ tavat ae se hia. 6 Ke öbun e he ka löng ge ta je vat, me hoon ta je vat: wâ eâu, öbun nye he ka ot, anyin ame he bi ka o ta je únyi e, ke tiga hia bi obiny. 7 Anyin ame he ka tot ke hnyei ka ke hnyei, me ke dökhu ha ke dökhu; ke ame he ka hu je hmiâ, me hwiöi hnyi ke je dok. 8 Ke haba ta je únyi eling, me wale hwân ta je vec. 9 Me adre me he ka hn' öbun dut ka tavat úoveci, ke adre me he ka hling' öbun: ke adre me he ka huköti öbun ta je hnyei hia thithö can iök. 10 Me ame he ka thö thö tavat ae se hia, me úalecuödraköu ödra, me bi iwahnaihmiony. 11 Ke ame he ka o ta je perofeta thoi ae se hia me omonoâ tavat ae se hia. 12 Ke can hnödra hna osehia hulö, ame he ka katebu ibetengiö anyin tavat ae se hia. 13 Ke haba at ame he ka tethmâ ke ne o but obiny, me e ame he ka möt. 14 Ke adre me he ka khetâ úthumetuiny dökhu ang hnyi hmeledrany hia hnân ohnatho ka ta je hnyei; me ame he ka o but obiny.

15 Awe, öbun ka wâ únyi ae ikiki at ame okongo, ame tot hnyi dok ae kap, waleji a ha Daniela perofeta, (wâhmakhmeto ju hnen at ame áú), 16 haba hnyi úen e, e so ame he tavat adre me laba hnyi Juda ka kec ka hnyi bucen: 17 ke haba at hnyi hon uma, e so e me ca utut he ka hok únyi únyi hnyi hnyin umen uma: 18 ke haba at a belök, e so e me ca hmetu bi he ka hom anyin úkhaú. 19 Ke ekölö ge tavat a ödra erkin, me tavat adre me úasin hnyi je bong eling. 20 Ke hic ju öbun, m' öbun e ca he ka kec hnyi úen megic, ke sabbath: 21 anyin ame he ka o vec ae gan hmâ e ba helâe ehac hnyi hwân hmeledrany ke ne o but walang ang, k' ame ca he bi ka helâe hmetu. 22 Ke adre ne ca owakhaletâ ta je bong, me ba at ame he ka möt: ke so bi adre me he ka owakhaletâ ta je bong e ge tavat adre úca. 23 Ke a ne ha köbun ke at, ka habe, Wâ

bi, Keriso but ang, ke, Wale bi e; ca kap öbun. 24 Anyin ame he ka o je Keriso thoi, me je perofeta thoi, me adre me he ka omanená ta je haten ae gan, me ta je únyi hnân láîâ, m' adre me he ka omono tavat adre me úca a ne ca pason. 25 Wâ bi, oge hia but ha bánâ köbun. 26 Anyin a wale, ödra ka he ka ha köbun, ka habe, Wâ bi, e but hnyi hnyebuba, ca he th' öbun: ke Wâ bi, e but hnyi je hnyeüle eiö, ca kap öbun. 27 Anyin a haba hucuce ame o thö úheny jimeyö, k' ame umumelam jio; k' ame he ka helâe, e ka o hmetu Nokon at. 28 Haba hnen ta je komok, me wale dok ame úkacaköu ta je aeto hnyin.

29 Ke hwaban vec hnyi úen eling, ame he ka ie menekholom but seúnö, ke ame ca he hmetu ka melam tehi, ke ame he ka kölu but ta je okhú, ke adre me he ka jijing ta je man hnyi drany: 30 me ame he ka manen hnyi drany haten Nokon at: ke ame he ka útengiö ta je tribu hia eang hmeledrany, ke adre me he ka wâ Nokon at ame o hon ta je úláiny drany, tha e me man me hmanenang ae gan hmâ. 31 Ke e ame he ka kunâ anyin ta je angela me ifucin khoto ame mea, me adre me he ka úkacaköuâ thö hnen ta je hna úca únyi hnyi je ang a vak, hwân hnyi ke can drany ke ne o but ka hnyi ke can.

32 Ke ná th' öbun úhöúcü me imeta: e tiga but je anginy ke hlau je lan, me khan' öbun ae hakekeny jut honivakeny; 33 ke helâe minya öbun, öbun ka wâ thö ta je únyi hia thithö e, khan' öbun dö ae hakekeny jut, ke e but ang hnyi hwanuma. 34 E hnathu inya oge me ha köbun a g' ame ca he ka ie hia dö eang, me ame he ka hwádâ ta je únyi hia e. 35 Ame he ka hia drany me hmeledrany, k' ame ca he bi ka hia hok ta je hofuc. 36 Ke haba bong me awa eling, me ba at ae khana, ke ca khana minya bi ta je angela ethö hnyi drany, ke Nokon, ke hake Kamen thibi. 37 Ame he ka helâ me je bong bongu Noa ioiny Nokon at. 38 Anyin a hnyi úen ae tiga ca o thö uoú, adre me labö han me ic, me faipoipo, me úham ta momo, ke ne o but hnyi bong Noa ame didrö ka hnyi hnyin hu, 39 ke ca khan' ödra bi ke ne o but ame o thö uoú, me ame tha ohí' ödra hia but; ke ame he ka helâe, e ka o hmetu Nokon at. 40 Hnyi úen eling ame belök li at a lo; adre me he ka hom khaca, me hnen biju khaca: 41 lo li momo ame he

ka tha hnyi khenyi hwit; adre me he ka hom khaca, k' ame he ka hnen biju khaca. 42 Anyin a wale, hmákâ thö: anyin ae ca khan' öbun úen ame he ka o hnyin Tuhöbun. 43 Ke wâhmakhmeto ju öbun únyi ang, a ga ne wâ at ae tren uma hna hmak hnyi lit ame he ka o hnyin at ae venöu, me ame ne hia but hmákâ, me ca hna bi ködra he ka kia umen uma. 44 Anyin a wale laba penapena th' öbun: anyin a hnyi úen öbun e ca únykúme bi ame he ka o but Nokon at. 45 Ewa athnyaba ae hna-thu me metâ, wale hnen tuhan hna otílâ he ka musö hnyaban, he ka khenâ jeú ködrin hnyi je hing úen cici? 46 Hnen hnahic athnyaba eling, e ka o tuhan ka wâ a g' ame ányâ helâe. 47 E hnathu inya oge me ha köbun, e ame he ka otílâ e he ka musö anyin ta je únyi hia. 48 Ke a ne ha athnyaba ae kong eú hnyi hnyekon, ka habe, E tiga bec Tuhök; 49 me hwân he ka kot je athnyaba a lahanen, me he ka han me ic unyin tavat adre ic me monu; 50 me ame he ka o tuhan athnyaba eling hnyi bong e ame ca únykúme, me hnyi úen e ame ca wâhmakhmeto hnyin, 51 me ame he ka subâ luâ e, me ha jekhon unyin tavat thoi hnyok; ame he ka tenge eling me úgiö ganyon.

HNYIMAKAN 25.

ME adre me he ka oúco dokhon drany me je hing hlu a ten, ödrin e ve hom anyidrin je lamepa he ka úkhanö me at a tep faipoipo. 2 E monu ke faiv gadrin, ke metâ ke faiv. 3 Haba hnyat e ae monu ödrin e hom anyidrin je lamepa, ke ödrin e ca hok wakaco minya bi: 4 ke haba hnyat ae metâ ödrin e hok wakaco hnyi anyidra je kaia me hnyi anyidra je lamepa. 5 E tiga bec at a tep faipoipo, me ödrin hia ödrin e ta mokut me mokut. 6 Ke hnyi wanbenset adre me kuku thö me ha, ka habe, Wale but ang at a tep faipoipo! Ai öbun he ka úkhanö me. 7 Me ame todrö je hlu hia eling, me ányâwia anyidrin je lamepa. 8 Ke haba hnyat ae monu ödrin e ha ka hnyat ae metâ, ka habe, Hanyihmun ge hanen anyibun wakaco, anyin ae mok ut anyihmun je lamepa. 9 Ke haba hnyat ae metâ ödrin e thu me ha, ka habe, Ame ne ca he ka úcü öhmun bi m' öbun: ke so bi he th' öbun ka tavat úcü, me úco hobi köbun bi. 10 Ke ödrin e tiga he bi he ka úcü, me ame o but at a

tep faipoipo ; me haba hnyat ödrin e pena-pena, me ödrin e tha didrö mē ka hnyi bijeünny faipoipo, ke adre me hlöng ut hwanuma. 11 Hwaban e, ame o but ke je hlu, me ha, ka habe, Tabony than, tabony than lö, kböng ut köhmun. 12 Ke e ame thu, me ha, ka habe, E hnathu inya oge me ha, ka habe, E ca khanö nya öbun. 13 Anyin a wale, hmákâ ju öbun, anyin ae ca khan' öbun bong me awa ame he ka o but hnyin Nokon at.

14 Anyin a haba únyi e, me helâke ame he ke at ka hnyi ke hnyei, me e ame havá lathnyabainy me hna but ködrin anyin ta je únyi. 15 Ke e ame ham ka ke at je talan a faiv, ke ka ke at lo, ke ka ke at khaca ; ka ke at me ke at hoton hnödrin hna khana ; ke e ame he but ka hnyi dok ae sákâú. 16 Haba at a kap je talan a thabúng, me e ame ie he me úcú hanen, me ame hu minya hanen a thabúng hmetu ke je talan. 17 Ke helâe me at a kap lo, e ame úcú hanen ke lo hmetu. 18 Ke haba at a kap khaca, me e ame he but me hiny kánâ, me ikhálâ mone anyin tuhan. 19 Ke hwaban ta je bong ae se hia ame o but tuhan lathnyaba eling, me tuluto anyi-drin ta je únyi. 20 Me ame o but at a kap je talan a thabúng, ke e ame hom minya ke je talan a thabúng me ha, ka habe, Than lö, u je hna könya je talan a thabúng : wá bi, oge hia but úcú hanen thabúng ke ta talan minya. 21 Me hai-ngen tuhan ame ha kâu, ka habe, Ole, u athnyaba ae so me hnathu, u je hia but hnathu hnyi ta je únyi ae wakhalet, oge me he ka otilö u hon ta je únyi ae se hia, didrö ka hnyi senyin anyin tuhâm. 22 Me ame o but minya at a kap lo li talan, me ha, ka habe, Than lö, u je hna könya lo li talan : wá bi oge hia but úcú hanen a lo ke li talan minya. 23 Haingen than ame ha, ka habe, Ole, u athnyaba ae so me hnathu, u je hia but hnathu hnyi ta je únyi ae wakhalet, oge me he ka otilö u hon ta je únyi ae se hia : didrö ka hnyi senyin anyin tuhâm. 24 Me ame o but minya at a kap talan a khaca, me ha, ka habe, Than lö, inya oge me wâhmakhmetu u, a u at ae hwege monu hnyimákâm, u me meno hnyi dok u je ca tã hnyin, me úkhöúnâ hnyi dok u je ca jijingâ hnyin : 25 me oge me ot me he me konâm ányâm talan hnyi kánâ ; ke wale hmetu ang únyi a ányâm. 26 Me haba tuhan ame thu me ha kâu, ka habe, U athnyaba ae kong me

úsēnyin, e khatö u a oge me meno hnyi dok oge ca ta hnyin, me úkhöúnâ hnyi dok oge me ca jijingâ hnyin ; 27 anyin a wale, hamâm he ka ip anyik mone anyin tavat úcú hobi kâu iny ka o thö, m' oge me he ka hu hmetu anyik me hna bi hanen. 28 Anyin a wale, hügúnâ thö gan talan me ham ka at a tren talan a ten. 29 Anyin adre me he ka ham ködra hia tavat ae hu gadra, me me se hia but gadra : ke haba at ae ba adre me he ka hügúnâ gan únyi e ame hu. 30 Ke khûâ but athnyaba ae únyi baú ka hnyi menekholom hnyöu : ame he ka tenge eling me úgiö ganyon.

31 Ke e ka o but Nokon at hnyi anyin hmanenang tha e me anyin ta je angela hia thithö, me e ame he ka laba hon thero-niny anyin hmanenang : 32 ke ame he ka úkhacaköu ta je hnyei hia thithö hnyi hnyimakan : ke e ame he ka khenâ lu' ödra but, helâ me at tuö mamoe ame khenâ luâ ta je mamoe me ta je got : 33 me e ame he ka ip ta je mamoe hnyi ke keihen a metân, me ta je got hnyi ke keihen a meny. 34 Haba Than ame he ka ha ködra hnyi ke keihen a metân, ka habe, Ai öbun, öbun hia tavat a ohnahicâ hnen Kamök, hu hwajekhöúbun ju dökhü adre penapena hobi köbun hwân hnyi hna bi taben hmele-drany : 35 anyin a oge mekihnânem, m' öbun e ha ök : oge me beic, m' öbun e habelik : iny atkanyua, m' öbun e hawo nya : 36 oge me he thu, m' öbun e okhaúö nya : oge me mok, m' öbun e senö nya : ke inya hnyin uma ceat, m' öbun e o thö könya. 37 Me ame he ka thu kâu hnen tavat ae wisa, ka habe, Than lö, öhmun e ö u kehö u mekihnânem, m' öhmun e hâm, k' u beic m' öhmun e habelâm ? 38 Ke öhmun e ö u kehö a u atkanyua, m' öhmun e hawo u ? ke he thu, m' öhmun e okhaúö u ? 39 Ke öhmun e ö u kehö a u mok, ke hnyin uma ceat, me o thö köu ? 40 Me ame he Than ka thu ködrin, ka habe, E hnathu inya oge me ha köbun, habaji ge hnöbun hna ányâ ka ke at gadra ae úhnyú-kong hmönyin a je liamekeiny mönya, me öbun e ányâ ling könya. 41 Ke e ame he ka ha ködra hnyi ke keihen a meny, ka habe, Úsákâúö but mönya, öbun tavat ae hnaúhangö ka hnyi meic ame ca mok balua, waleji adre penapena hobi kö diabolö me anyin ta je angela : 42 anyin a oge me mekihnânem, k' öbun e ca ha ök : oge me beic, k' öbun e ca habelik : 43 iny atka-nyua, k' öbun e ca hawo nya ; oge me he

thu, k' öbun e ca okhaüö nya; oge me mok, ke oge me laba hnyi uma ceat, k' öbun e ca senö nya. 44 Ke ödra minya adre me he ka thu, me ha, ka habe, Than lö, öhmun e ö u kehö a u mekihñänem, ke beic, ke atkanyua, ke he thu, ke mok, ke laba hnyin uma ceat, m' öhmun e ca hadruö u? 45 Me e ame he ka thu ködra, me ha, ka habe, E hnathu inya oge me ha köbun, ka habe, Habaji ge hnöbun hna ca änyâ ka ke at gadra ae ühnyükong hmönyin, me öbun e ca änyâ minya ling könya. 46 Ke haba tavat ang, me adre me he ka he ka hnyi hna bi hwaban ame ca ba balua; ke haba tavat ae wisa hwakecidra ka hnyi möt ame ca ba balua.

HNHYIMAKAN 26.

KE a hia but Iesu umo ta je hofuc hia eling, me e ame ha ka laten, ka habe, 2 Öbun e wâ ae lo biju li bong me ame he ka o but paseka, ke adre me he ka alecuâ Nokon at me he ka osatauroâ. 3 Ke hnyi üen e, ame ükhaacaköu thö je taben tavat bihut, me hnyat sihnalimen, me wahingatiny hnyei ka hnyi uma umen taben bihut ae nua, Kaiafa ien; 4 ke adre me ühnenamokouâ he ka köt Iesu ge iyawö, m' adre me he ka hlingâ e. 5 Ke haingödrin, ka habe, Ca änyâ bi hnyi üen bijeu wâ e nyi imonumonuny tavat.

6 E but Iesu hnyi Bethania hnyi uma umö Simona a lepera, 7 me ame o but kâu ke momo ae hu kaia alabasa tangen muro ae gan hmâ hwaban, me hingâlâ hon ban, hnyi üen e ame tiga laba ju ka han. 8 Ke a wâ but laten me ame hmönyidrin me ha, ka habe, Hnân eü ame oünyibâüâ helâe? 9 Anyin adre ne üco, me gan hmâ hwaban he ka ham ka ta je theduoc. 10 Ke Iesu ame wâhmakhmeto, me e ame ha ködrin, ka habe, Ieü gabun öbun e ovhelâ momo? e ame hia but änyâ huliwa ae so könya. 11 Anyin a e bala bi unyibun ta je theduoc; ke oge me ca he bi nya ka laba bala eang unyibun. 12 Anyin a haba hnen momo hna hingâlâ muro eang ka hnyi unyik, e ame änyâ he ka penapena hna könim nya. 13 E hnathu inya oge me ha köbun, ka habe, Haba hnyi je dok hia hnyi hmeledrany adre me he ka khetâ hnyin je üthumetu ae so eang, adre me he minya ka he ga hna änyâ hnen momo eang hnân ünykâme kâu.

14 Haba ke at hnyi je twelv, Juda

Isakariota ien, ame he ka je taben tavat bihut, 15 me ha, ka habe, Ieü ke ünyi öbun e he ka ham könya m' inye he ka alecuâ e köbun? Me adre me tuluto me ham kâu ta je mone a thöte. 16 Ke hwân hnyi üen eling, e ame heleü deny he ka alecuâ e.

17 Haba hnyi bong a bâniny bijeuiny areto adre ca levenâ bi, me ame he but kö Iesu laten, me ha, ka habe, Ewa dok u me wem öhmun e he ka penapena hobi köu, me u me he ka han paseka? 18 Me e ame ha, ka habe, He th' öbun ka hnyi taun ka ke at, me ha kâu, ka habe, Haingen At üne, E hakekeny jut üök; ke oge me he ka tha han paseka me latök hnyin umâm uma. 19 Haba laten ödrin e mädrâ helâ me hna hûna hnö Iesu ködrin; me ödrin e penapena paseka. 20 Ke a sahac ut, k' ame tha laba he ka han me laten a twelv; 21 ke ödrin e tiga han me e ame ha, ka habe, E hnathu inya oge me ha köbun a g' ame he ke at gabun ka alecuo nya. 22 Me ödrin e hmak gan hmâ, me hwân he ka ve ha kâu, ka habe, Than lö, ia, inya? 23 Me e ame thu me ha, ka habe, Haba at ame tha hnû jeü mönya hnyin mini, me wale at ame he ka alecuo nya. 24 Ame he but ka he Nokon at helâ me hna sihnalimen gan: ke ekölö ge at a alecuâ Nokon at a deny! adre ne ca hnokoâ at eling, ame ne so bi kâu. 25 Haba Juda at ame alecuâ e, ame thu me ha, ka habe, Rabi, hawa inya? Haingen kâu, ka habe, U me ha e. 26 Ke ödrin e tiga han, me Iesu ame hom areto, me oleâ, me thuthu; ke e ame ham ka laten me ha ködrin, ka habe, Hom dö, an ju; walang unyik. 27 Ke e ame hom utkaia, me oleâ, me ham ködrin, me ha, ka habe, Ijem d' öbun hia; 28 anyin a walang drök ünyi hnyi ühihinyköu, adre me hingâlâ e hobi kâu tavat ae se hia, me hnân thang ta je hulö. 29 Ke inya oge me ha köbun, ka habe, oge me ca he hmetu ka hnyi ijem wan vine eang, ke ne o but hnyi bong oge me he ka tha ijem m' öbun hnyi dökhü dokhon Kamök.

30 Ke ödrin e hia but hai khumöng me ödrin e he but ka hnyi bucen Elaia.

31 Haba Iesu ame ha ködrin, ka habe, Öbun e he hia ka thö thö can inya hnyi lit ang: anyin adre hia but sihnalimen, ka habe, Oge me he ka kot at ame tuö mamoe, me ame he ka vese but ta je mamoe. 32 Ke iny ka möt hmetu thö, me oge me he ka bök Galilaia ai, ke bilibun biju. 33

Haba Peteru ame thu kâu me ha, ka habe, Ödrin e ne he ka thö hia thö gam, me oge me ca he bi nya ka munyi thö thö. 34 Haba Iesu ame ha kâu, ka habe, E hnathu inya oge me ha kôu, ka habe, haba hnyi lit ang, ke tiga ca kokok bi khoto, me u me he ka ibi okun ivinö nya. 35 Haba Peteru ame ha kâu, ka habe, Eja ke ne oge ne he ka tha mok möu, oge me ca he bi nya ka ivinö u. Heläe minya hwan laten hia.

36 Haba Iesu ame tha o mödrin ka hnyi ke dok Gethesemane ien, me e ame ha ka laten, ka habe, Laba ju öbun ang, m' inye me he ju ka hic elä. 37 Me e ame hum Peteru me li laku Zebedäo, me hwân he ka vec gan hmâ me hmak hnyekon. 38 Me e ame ha ködrin, ka habe, Ame vec gan hmâ hanuk helä me ioiny mok : laba ju ang me tha hmâkâ mönya. 39 Me e ame he ka hnyi dok ae hakekeny, me ta ju hnyikânâi, me hic, me ha, ka habe, Cica lö, a ne ca pason, ö u ohia but utköö eang gak : ke so bi e ca hamök, ke ka hamâm bi. 40 Me e ame o thö ka laten me ö 'drin ödrin e mokut, me e ame ha kö Peteru, ka habe, Hawa, e ca khan' öbun he ka tha hmâkâ mönya hnyi awa a khaca? 41 Hmâkâ ju me hic, m' öbun e ca didrö ka hnyi úcûbic : anyin ame weny hnyok, ke sényin bi anyin. 42 Ke e ame he hmetu ka hic me ha, ka habe, Cica lö, a ne ca khana he ka hia but utköö eang, iny ka ca ijem, ányá thö wem. 43 Me e ame o hmetu me ö 'drin ödrin e mokut hmetu, anyin ae hmak je emaködrin. 44 Ke e ame hn' ödrin ju me he hmetu, me okun hic, ame ha thibi hofuc a khaca. 45 Me e ame o ka laten me ha ködrin, ka habe, Mokut ju öbun, me menâ : wâ bi, e hakekeny jut awa, ke adre hia but alecuâ Nokon at ka hnyi je hnyamen tavat ae kong. 46 Todró, ötin e he thö : wâ bi, wale but ang at ame he ka alecuo nya.

47 E ame tiga fuc, me wâ bi, ame o but Juda, ke at hnyi twelv, ke tha e me tavat ae se hia, adre me vhat hele vat me ütö hmu, únyi ge je taben tavat bihut me wahingatiny hnye. 48 Ke haba at ame alecuâ e ame ha ködrin haten, ka habe, Haba at eâu oge me he ka úcimhnyimak më, wale, kât ju öbun. 49 Me e ame ie he kö Iesu me ha, ka kabe, E Rabi lö ; k' ame úcimhnyimak më. 50 Haba Iesu ame ha kâu, ka habe, Hanök, ányá thö únyi u je o kâu. Me adre me o me hinöbeny hu Iesu,

me hom e. 51 Ke wâ bi, ke at ge latö Iesu ame inâ but hnyamen, me oc dö anyin hele vat, me kot athnyabainy taben bihut, me subâ but hnyikönyen. 52 Haba Iesu ame ka kâu, ka habe, Inâ hmeto but ányâm hele vat ka hnyi tangen ; anyin a haba tavat hia adre me hom hele vat, me adre me he ka mok ge hele vat. 53 Anyin a hawa, u je únykúme e ca khanö nya he ka khöü walang ang ka Kamök, me e ame he ka ham könya ta je angela ae se hia hon twelv ta je legeona? 54 Ke ame he ka kâunâu he ka hwädâ hna sihnalimen a g' ame he ka heläe? 55 Hnyi awa eling Iesu ame ha ka tavat ae se hia, ka habe, Hawa, öbun e o but me je hele vat me je ütö hmu heläke me ka at venöu he ka hum nya? Oge me laba hnyin uma kap hnyi ta ogö bong he ka úne, ke öbun e ca köt nya. 56 Ke adre me ányá hia e me hwädâ hna sihnalimen ge ta je perofeta. Ke haba laten, me ödrin e hna but e me kec.

57 Ke haba tavat adre me köt Iesu, me adre me lelö thö e kö Kaiafa, at bihut ae nua, waleji dok ame úkhacaköu hnyin hnyat sihnalimen me wahingat. 58 Ke haba Peteru ame omise hoton ka hnyi uma umen at bihut ae nua, k' ame didrö me tha laba me lathnyaba he ka wâ obiny. 59 Ke haba je taben tavat bihut me tavat úhnenamö hia adre me elâm he ka bi fuco thoö Iesu, m' adre me he ka hlingá e ; 60 me adre me ca wâ bi, ke so bi a o thö tavat ae se hia he ka bi fuco thoä. Ke hwaban e ame o thö li at a lo, 61 me ha, ka habe, Haingen at ang, ka habe, E khanö nya he ka kia uma umen Khong me otílâ hmetu hnyi kun ta bong. 62 Me ame todrö at bihut ae nua, me ha kâu, ka habe, E ba hnân thu gam? ieu hnödrin hna ohnathoâ gam. 63 Ke baba Iesu ame laba hnyibû, Me haba at bihut ae nua ame ha kâu, ka habe, Inya oge me huna hwegiâ köu ge Khong ae möt, m' u me he ka ha köhmun, ka habe, U thibi Keriso a Nokon Khong, hawa? 64 Haingö Iesu ame ha kâu, ka habe, U me ha e : ke inya oge me ka köbun, ka habe, Nyiele öbun e he ka wâ Nokon at ame laba hnyi ke keihen maniny man a metân, k' ame he ka o hnyi úlâiny drany. 65 Me haba at bihut ae nua ame kia anyin je úkhaü, me ha, ka habe, E ame hia but fuc bigan ka Khong : ke hnân eü hmetu a g' ame he ke at ka ohnatho? wâ bi, öbun e hia but löng wa-

lang ang hofuc bigan : 66 ke ieu únykúmenöbun? Me adre me thu, ka habe, E úcú e he ka mok. 67 Me adre me hangöjá hnyimakan me kháu e : ke ha ba keihen adre me kolop e, 68 me ha, ka habe, Perofetö u thö köhmun, Keriso : ia ame khöu u?

69 Ke haba Peteru ame laba eü, me ame he but káu ke hlu me ha ka habe, Uji ke at ame tha e me Iesu at Galilaia. 70 Ke e ame ivinö hnyi hnyimaködrin hia, ka habe, E ca khanö nya hnám hna ha. 71 Me e ame didrut ka hnyi porotiko, me ame wá e ke hlu, me e ame ha ka tavat eling, ka habe, Tha at minya ang me Iesu at Nazareta. 72 Me e ame ivinö hmetu, me khemanyin ka habe, E ca khanö nya at e. 73 E tiga ca kueny me ame o but tavat adre me útililen me ha kö Peteru, ka habe, E hnathu u ke hanödrin ; anyin ame omanenö u ifucám. 74 Me e ame hwán he ka fuc hwege me khemanyin, ka habe, E ca khanö nya at e. Me ame ie kokok dö khoto. 75 Me haba Peteru ame únykúme hofuc eji ho Iesu ame ha, ka habe, U me he ka okun ivinö nya ke tiga ca kokok khoto. Me e ame didrut me tenge hlöuhlöu.

HNYIMAKAN 27.

HNYI hnyomakatu, haba je taben tavat bihut hia me wahingatiny hnyei, adre me si hnö Iesu, m' adre me he ka hlingá e : 2 ke adre me ca e, me lelö thö e me hna but e kö Pilato a gavena.

3 Ke a wáhmakhmeto but Juda at ame alecuá e, a ga mou thö gan, me e ame ietra, me hom hmetu je mone a thöte ka je taben tavat bihut me wahingat, 4 me ha, ka habe, Oge hia but ányá hulö he ka alecuá dra ae ba hnyikongon. Ke haingödra, ka habe, U me ha bi köhmun? ka u bi u. 5 Me e ame degec je mone hnyin uma kap, me he but ; me e ame he but me hnok. 6 Haba je taben tavat bihut, adre me hom je mone, me ha, ka habe, E ca úcú he ka ip hnyi tangen bwihlany, anyin a hwaban dra. 7 Ke adre me úhnenamö, me úco hwaban e ke utkáná anyin at ame up mini, me hnán khön komok a je atkanyaua. 8 Waleling, m' adre me hwenyi ien utkáná eling, ka habe, Utkánáiny dra, ke ne o but hnyi bong ang. 9 Me ame hwádá thö hna ha ga Jeremia perofeta, ka habe, Adre me hom je mone a thöte a hwaban

at adre hia but ha me hwaban, wale a ha hwaban ge keihen lakon Isaraela ; 10 me adre me ham me hwaban utkáná anyin at ame up mini helá me hnen Than hna húna könya.

11 Ke Iesu ame tot hnyi hnyimakan gavena : ke haba gavena ame hnö e, ka habe, U tuhan at Juda? Haingö Iesu ame ha káu, ka habe, U me ha e. 12 Ke ame bi fuco e hnen ta je taben tavat bihut me wahingat, me e ame ca thu bi. 13 Me haba Pilato ame ha káu, ka habe, U me ca löng a ödrin e osehia but bi fuci u? 14 Ke e ame ca thu bi káu ke hofuc a khaca : me me láia gan hmá but gavena. 15 Ke haba hwakecin gavena hnyi úen bijeü he ka labö thang ut ka tavat ke at adre ca, a at adre me weny. 16 Ke e hu gadra at ae lung adre ca, Barabasa ien. 17 Ke adre hia but úkhacaköu, me haba Pilato ame ha ködra, ka habe, Ia webun oge me he ka thang ut köbun? Hawa, Barabasa, ame ne Iesu adre me hwenyi ien me Keriso? 18 Anyin ae khana but a g' adre hna e can ihuhnyinköu. 19 Ke e ame tiga laba hon taben owisa, ke haba áian ame úkhúnöng káu he ka ha, ka habe, Ca he bi u ka ányá ke únyi ka at e ae wisa : anyin a oge hia but ibiose vec gan hnyi bong ang hnyi bwi. 20 Ke haba je taben tavat bihut me wahingat adre me cubec tavat ae se hia he ka sumätö Barabasa, m' adre me hingö Iesu. 21 Haba gavena ame thu, ka habe, Ia ae webun gadru, m' inye he ka thang ut köbun? Me adre me ha, ka habe, Barabasa. 22 Haba Pilato ame ha ködra, ka habe, Ke ieu oge me he ka ányá kö Iesu adre me hwenyi ien Keriso? Me haingödra hia, ka habe, Osatauroá thö. 23 Me e ame ha, ka habe, Anyin a ie monu e ame ányá? Me adre me ha hwegiá, ka habe, Osatauroá thö. 24 Ke a wá but Pilato a e ame ca he ka ton, k' ame kú bi thö imonumonuny, me e ame hom utköiö, me hinyem hnyi hnyimakan tavat, me ha, ka habe, Iny alai ge dren at ang ae wisa : hamöbun biju. 25 Haba tavat hia adre me thu, ka habe, E so e he dren ka takú öhmun me lakuhmun. 26 Me e ame thöng Barabasa but ködra : ke e ame osöi Iesu me hna but he ka osatauroá.

27 Haba je soja anyin gavena adre me hum Iesu ka hnyi uma umen than, me öúkhacaköuá káu je hanen deó vat hia. 28 Ke adre me ny jüt anyin je úkhaü,

me okhâvâ bi ge úkhaú ae dra. 29 Ke adre me hwâwâ je tö ae údedö hnân korona, me obicâ e, me ip hlowe hnyi hnyamen a metân; ke adre me ciboucâ hnyi hnyimakan, me hlumâ e, me ha, ka habe, E ge Tuhan at Juda! 30 Mc adre me hangöjâ e, me hom hlowe, me kot ban. 31 Ke adre hia but hlumâ e, me adre me uny hmetu but úkhaú gan me okhâvâ ge je úkhaúen bi, me lelö thö e he ka osatauroâ.

32 Ke adre me didrut me wâ ke at Kurene, Simona ien: me adre me musö e he ka tha he, me me he ka vaden anyin satauro. 33 Ke adre me o but ka ke dok, Gologotha ien, haba bongon, me, hnen ibokomok, 34 me adre me ham kâu waina adre úhaniken me khöhlöng hnân ic: ke a hia but drem cubecâ, me e ame höcö he ka ijem. 35 Ke adre hia but osatauroâ e, me adre me khenâ anyin je úkhaú ködra bi, adre me uglekôbâ: 36 ke adre me úlalabainy me tuö e eling. 37 Ke adre me ip ethö hon ban hna bi fuco e adre sihnalimen, ka habe, WALANG IESU A TUHAN AT JUDA. 38 Me adre me tha osatauroâ më li at venöu, ke at hnyi ke keihen metâ, me ke at hnyi ke keihen me. 39 Haba tavat adre me he eling adre me hiâ e, me nyinyika je bödra, 40 me ha, ka habe, E, u at ama kia uma kap, me otilâ hmetu hnyi kun ta bong, omeli u thö: u je ne Nokon Khong utut úhem hnyi satauro. 41 Ke helâe minya je taben tavat bihut, tha ödrin me hnyat sihnalimen, me wahingat adre me hiâ e, me ha, ka habe, 42 E ame omelö keihen; ke haba e bi e ca khana bi he ka omelö e. E, Tuhan at Isaraela; e so e ame utut walang ang úheny hnyi satauro, m'ate me he ka labageju kâu. 43 E ame labageju ka Khong; e so e he ka omelö e walang ang, e ka weny e: anyin a e ame ha, ka habe, Inya ang Nokon Khong. 44 Ke haba li at venöu waleji adre me tha osatauroi ödrumë, me ödrumë hnyi haikongaú helâe.

45 Ke ame menekholom but hnyei hia, hwân hnyi awa a siks ke ne o but ka hnyi awa a nain. 46 Ke helâke me hnyi awa a naininy Iesu ame hongot hwege, ka habe, Eli, Eli, lama sabakethani? walang bongon, ka habe, Khonguk, Khonguk lö, ieu gam u me hnö nya but? 47 Haba keihen adre me útutilen eling adre me löng, me adre me ha, ka habe, Haba at ang ame hao Elia. 48 Ke haba ke at gadra ame ie

wadring, me hom ohmanená, me húlúlûâ hnyi vinega, me ip hnyi obiny hlowe, me habelen e. 49 Ke haba kolon gadra, me adre me ha, ka habe, Më khanang: e so ate me wâ ame ne he Elia ka o he ka omelö e. 50 Ke a hia but Iesu hongot hmetu, me e ame hna but hanon. 51 Ke wâ bi, ame khekhe lo but mano singiny uma kap hwân ethö ke ne o but eú; ke ame jijing dö hmele-drany; me ame hmouca but ta je kic; 52 ke ame emang ut ta je erkemok; ke se hia ta je unyin tavat ae kap a tavat adre me mokut, me adre me möt hmetu thö, 53 me didrö únyi hnyi ta je erkemok hwabban hnen hna möt hmetu, k' adre me didrö ka hnyi taun ae kap, me manen dut ka tavat ae se hia. 54 Ke haba keneturio, me tavat minya unyin, wale hnyat adre me tuö Iesu, ödrin e wâ hwiöi, ke ta je únyi adre me ányâ, me ödrin e ot gan hmâ, me ha, ka habe, E hnathu Nokon Khong at ang. 55 Ke wale minya omomo ae se hia adre me wâ sákâúâ, waleji hnyat ödrin e he hotu Iesu úheny Galilaia, me bi athnyabaiuy: 56 ke wale minya unyidrin Maria Magadalena, me Maria hinyö Iakobo me Jose, me hinyen li laku Zebedaio.

57 Ke haba hnyi sahac ame o but ke at ae tren omjeú úheny Arimathea, Josefa ien, wale ke atö Iesu minya: 58 haba at ang ame he but kö Pilato me sumâtâ unyi Iesu. Haba Pilato ame húna bi he ka ham. 59 Ke Josefa ame hom unyin me lan e ge mano lino ae kalaut, 60 me ip e hnyi anyin bi erkemok ae teb únyi, waleji e ame tho hnyin kic: me hagutâ veto ae gan ka hnyi hnyimen erkemok, ke e ame he but. 61 Ke wale Maria Magadalena me ke Maria, ödrumë laba cicö erkemok.

62 Ke haba nyi, wale bong a hwaban bong hnân Penapena, ame úkhaú thö kö Pilato je taben tavat bihut, me ta je Faresaio, 63 me ha, ka habe, Tabony than lö, öhmun e únykúme a g' ame ha hnen at iyawö eling, kë tiga möt, ka habe, Hwabban kun ta bong oge me he ka möt hmetu. 64 Anyin a wale húna ju, m' adre me he ka ohmâ erkemok ke ne o but hnyi bong a kuniny, wâ e nye o but laten me venâu e, me ha ka tavat, ka habe, A möt hmetu thö e úheny hnyi hna mok: me ame he ka gan dut monu a biliny hon monu a bán. 65 Haba Pilato ame ha ködrin, ka habe, E hu bi gabun tavat tue: he th' öbun, hamöbun bi he ka ohmâ hoton hnöbun hna khana. 66 Me ödrin e he but, me ohmâ wia

MAREKO 1.

erkemok, me ödrin e okeceá hmâ veto ge haten, ke e bi unyidrin tavat tue.

HNYIMAKAN 28.

HABA hnyi obiny bong sabbath, ke tiga okubelitiny bong a bân hnyi wik, ame o but Maria Magadalena me ke Maria he ka wâ erkemok. 2 Ke wâ bi, wale hwiöi ae gan hmâ ; anyin ame utut angela anyin Than úheny hnyi drany, me o, me hagutá veto únyi hnyi hnyimen erkemok, me laba ju hon. 3 Haba hnyimakan helâ me hucuce, ke hau anyin úkhaú : 4 me ame öbubuny hnyat tue me ot, ke helâke je komok ödrin. 5 Haba angela ame thu me ha ka watamomo, ka habe, Ca ot bi : anyin ae khanö nya a öbun e elöm Iesu waleji adre osatauroá. 6 E hia but ang ; anyin a e a möt hmetu thö, helâji me hnen hna ha. Ai öbun ka wâ dok waleji a mokut hnyin Than. 7 Ke ie logot d' öbun me ha ka laten, ka habe, E a möt hmetu thö úheny hnyi hna mok ; ke wâ bi, e a bân dut Galilaia ai, ke bilibun biju ; öbun e he ka iouny mä eling : awe, oge hia but ha köbun. 8 Me ödrin e ie he logot úhedrin hnyi erkemok me ot me senyin ae gan hmâ, me wadring he ka thumeto laten. 9 Ke wâ bi Iesu ame úkhanö mödrin, me ha, ka habe, Talofa. Me ödrin e he me kât li can, me khudrung ju kâu. 10 Haba Iesu ame ha ködrin, ka habe, Ca ot bi : he

th' öbun ka thumeto je liamekeiny mönya madre me he ka he but Galilaia ai, me ödrin e he ka iouny eling mönya.

11 Ödrin e tiga he, me wâ bi, keihen hnyat tue ödrin e he ka hnyi taun, me thumeto je taben tavat bihut ge ta je únyi hia adre ányâ. 12 Me adre me úkhacaköu me wahingat, me úhnenamö, me adre me ham ka ta je soja mone ae gan, 13 me ha, ka habe, Ha th' öbun, ka habe, Haba laten ödrin e he hnyi hnyinghet me venâu e, ke öhmun tiga mokut bi. 14 Ke a ne o but hofuc e ka li hnyikönyen gavena, m' öhmun e he ka cubec e, me ohia anyibun hmak. 15 Me adre me hom je mone, me ánya helâ me hna n' ödrin : ke haba hofuc e adre me labö ha ehele unyin at Juda, ke helâe minya ke ne o but hnyi bong ang.

16 Ke haba laten a eleven ödrin e he Galilaia ai, ka hnyi bucen waleji a hia but Iesu kú ködrin. 17 Ke ödrin e wâ but e, me ödrin e khudrung ju kâu : ke haba keihen ödrin e loloá. 18 Me haba Iesu ame o but ködrin me ha hofuc ködrin, haingen, ka habe, Adre hia but ham könya musi hia hnyi drany me eang hmeledrany. 19 Anyin a wale, he th' öbun ka bi latök hnyi ta je hnyei hia thithö, me bapataisoí ödra hnyi ien Kamen, me Nokon, me Hanu Kap : 20 ke n' ödra thö he ka vheno ta je únyi hia thithö waleji oge me húna köbun : ke wâ bi, inya oge me tha e möbun hnyi ta je bong hia thithö ke ne o but ka hnyi obiny hmeledrany.

EVANGELIA A SIHNALIMEN

MAREKO.

HNYIMAKAN 1.

WALANG hwániny úthumetu ae so anyi Iesu Keriso, a Nokon Khong. 2 Helâ me hna sihnalimen ga Isaia perofeta, ka habe, Wâ bi, inya oge me kunâ anyik úthumetu hnyi hnyimákâm, At ame he ka ányáwia dem gethen ;

3 Ifucin at ame hongot hnyi hnyebuba, ka habe, Penapena ju gethen deny Than, Owisa thö deny ta je gethen ; 4 Ame o but Ioane, at ame bapataiso hnyi hnyebuba me khetâ hna bapataisoiny ietra m' adre me thang degecá but ta je hulö. 5 Me ame he but kâu hnyei Juda hia, ke at Jerusalema hia ; me e ame bapa-

taisoï ödra hnyi wagewe Joridano, k' adre me ve omanená anyidra ta je monu. 6 Ke leúnen kamela khaüö Ioane, ke e ame ka weiká hnyin ge wen unen meno, ke haba an jeú, me hamon me haneiny hnyot. 7 Ke e ame khetá, me ha, ka habe, Ame he jem ke at a biliny ae man huk, e ca úcú bi nya ka nom me thang hna hukálá tangen li hnyeúcan. 8 Inya oge me bapataisoï öbun ge köiö; ke e ame he ka bapataisoï öbun ge Hanu Kap.

9 Ke haba hnyi je bong eling ame o but Iesu úheny Nazareta hnyi Galilaia, me ame bapataisoá e Ioane hnyi Joridano. 10 Ke e ame tiga ölö thö úheny hnyi wagewe, me e ame wá drany adre me khöng ut, me Hanu ame gá hon e helá me biny: 11 me ame o but hwan hofuc únyi hnyi drany, ka habe, U thibi Nökuk a oúnykámik, inya oge me senyin köu.

12 Haba Hanu ame ie kuná e ka hnyi hnyeubaba. 13 Ke e ame laba hnyi hnyeubaba fáte je bong, ame cubec e hnen Satana; ke tha e mé omeno ae hiny; ke haba ta je angela adre me bi athnyabainy.

14 Ke hwaban hna cö Ioane, Iesu ame o hnyi Galelaia, ame khetá úthumetu ae so anyin Khong, ka habe, 15 A hwádá but ün, ke hakekeny jut dökhon dokhon Khong: ietra ju öbun, me kap úthumetu ae so.

16 Ke e ame he hnyi baten köiöiny Galilaia, me ö Simona, me Anederea liamekeiny me Simona, ödru me thong ert eú hnyi köiö: anyin a ödru li at thut. 17 Haingö Iesu ame ha ködra, ka habe, He hotuk me oge me he ka wi' öbu me hnán thelo at. 18 Me ödru me ie hna but útödra tang ert me he hoton. 19 Ke e ame tiga he me e ame ö Iakobo nöku Zebedaiö me Ioane a liamekeiny mé, ödru me laba hon hu me ena je ert. 20 Me e ame ie hau' ödru minya: ke ödru me hna but kamödru a Zebedaiö me je lathnyaba hon hu, me he hoton.

21 Ke ödrin e he thö Kaperenauma ai; me e ame ie didrö ka hnyi sunago hnyi sabath me úne. 22 Me adre me láia hnen hna úne: anyin a e ame n' ödra helá me at ae tren man, ke ca helá me hnyat sihnalimen. 23 E eling hnyi umödra sunago ke at ae hu hanu ae kong; ke e ame hongot, ka habe, 24 Iesu at Nazereta lö, ieú gam köhmun? hawa, u je o he ka ohí' öhmun? inya oge me wáhmakhmetu u, a u At ae Kap anyin Khong. 25 Haba Iesu ame thawá e me ha, ka habe, Ca mede bi, ke

didrut úhem hnyi hnyekon. 26 Ke haba hanu ae kong ame osesebilá e, me kuku hwege me didrut úheny hnyi hnyekon. 27 Ke ödra hia adre me láia, me úhnenamököuá, ka habe, Ieú ang? hna úne ae teb únyi! anyin a e ame musö ta je hanu ae kong hnen man, me ödrin e löng káu. 28 Me ame ie lung igigilö ka hnyi je ke keihen hia hnyeï Galilaia.

29 Ke adre me didrut úhedra hnyi sunago, me ödrin e ie didrö, tha ödrin me Ioane me Iakobo ka hnyi uma umö Simona me Anederea. 30 Ke haba hnyen öiö Simona ame mokulec mok a kahwa, me adre me ie omanená káu mok anyin momo: 31 me e ame he me kát hnyamen momo, me otílá; me ame ie hia but kahwa, me e ame huliwa ködrin.

32 Hnyi sahaç, ke ame he but ka dit seúnö, me adre me hom but káu ta je komok hia, me tavat a dilic ödra demoni. 33 Me ame úkhacaköu thö taun hia hnyi hwanuma. 34 Ke e ame omelö ta je mok ae ve bongon, me obá ta je demoni ae se hia; ke e ame ca hna bi ta je demoni he ka fuc, anyin adre me wáhmakhmeto but e.

35 Ke haba nyi, ke tiga bec ka o thö seúnö, me e ame höihöi thö me didrut, me he ka hnyi dok ae ba aten, me hic eling. 36 Me ame he hoton Simona me tavat a tha ödrin mé; 37 ke ödrin e wá but e, me haingödrin káu, ka habe, Ame elöm u tavat hia. 38 Ke haingen ködrin, ka habe, E so ötin e he ka hnyi ke je taun ehele, m' inya he ka khetá minya eling; anyin a oge me o but hobi káu e. 39 Me e ame dit ka hnyi umödra je sunago hnyi Galilaia hia, k' ame khetá hofuc me obá ta je demoni.

40 Me ame o but káu ke lepera, ame khöu káu me cibouçá káu, me ha káu, ka habe, U je ne wem me khanö u he ka osoi nya. 41 Me e ame hnyok káu, me hinöbeny me kálá e, me ha, ka habe, E bewek; u ma so but. 42 Me ame ie hia but lepera gan, k' ame so but. 43 Ke e ame hína hwegia e, me ie kuná e, me ha káu, ka habe, 44 Wá eáu u nye ha ka ke at: ke he thö, omanenö u thö ka at bihut, me ham hna hína hnö Mose hnán haten ködrin, ge hna okalaöti u. 45 Ke e ame didrut, me hwán he ka khetá me ölungá, me omanená únyi e, me ca khana hmetu Iesu he ka he manen ka hnyi taun, me e ame laba ju hnyije dok ae ba aten: ke adre me ve o káu úhedra hnyi je ke keihen hia.

HNYIMAKAN 2.

KE e ame dit hmetu hnyi Kaperenauma hwaban ke je bong, me ame lung, ka habe, wale thö eiö hnyin uma. 2 Me ame ükhacaköu thö tavat ae se hia, me me hnek dö ke ne o but hnyi hwanuma : me e ame ha hofuc ködra. 3 Ke adre me hom but kâu at ae mat, ame vadren hnen hnyat a vak. 4 Ke ca khan' ödrin bi he ka hakekenyâ e, anyin ae úhneki tavat, me ödrin e khöng hon uma wale hnyi dok a e cicö : ke ödrin e hia but kia, me ödrin e hnahna but hna mokut wale ame mokut at ae mat hon. 5 A wâ but Iesu anyidrin labageju, me e ame ha ka at ae mat, ka habe, Nökuk lö, adre hia but hna degecâ anyâm je hulö. 6 Ke ame laba eling keihen hnyat sihnalimen, me ödrin e únyküme eü hnyi je hnyekudrin, ka habe, 7 Ehö at ang ame fuc helâe ? e ame ha bigan ka Khong : ia ae khana he ka thang degecâ ta je hulö, a hake Khong thibi ? 8 Ke ame je manen dut kö Iesu eü hnyi hnyekon ifucidrin helâe eü hnyi je hnyekudrin, me e ame ha ködrin, ka habe, Ieü gabun öbun e fuc eü hnyi je hnyekubun ge je únyi eling ? 9 Ieü ae hâhâ he ka ha ka at ae mat, ka habe, Adre hia but thang degecâ anyâm je hulö, me he ka ha bi kâu ka habe, Tödrö, hom dö hnâm me he thö ? 10 Ke so bi m' öbun e he ka wâ ae tren man Nokon at eang hmeledrany he ka thang degecâ ta je hulö, (e ame ha ka at ae mat, ka habe,) 11 Inya oge me ha köu, Todró, hom minya thö hnâm, me he thö ka hnyi umâm uma. 12 Me e ame todrö me hom dö hnen, me didrut hnyi hnyimaködra hia ; me adre me láia me ogânâ Khong, me ha, ka habe, Ate me ca wâ bala hwakecin helâng.

13 Ke e ame he hmetu hnyi hobat köiö ; me ame o but kâu tavat ae se hia, ke e ame úne ködra. 14 Me e ame he, ke ame ö Levi nöku Alefaio ame laba hnyi uma khöp fat, me e ame ha kâu, ka habe, He hotuk. Me e ame todrö me he hoton. 15 Ke e ame laba hnyin umen uma, ame han, ke se hia minya ta je telona me tavat ae kong adre me tha laba me Iesu me laten : anyin a ödra se hia, hnyat adre me he hoton. 16 Ke a wâ but e hnen hnyat sihnalimen, hanen je Faresaio a g' ame tha han me je telona me tavat ae kong, me adre me ha ka laten, ka habe, E ame tha han me ic me ta je telona me tavat ae kong. 17 Ke a löng ut

Iesu, me e ame ha ködra, ka habe, E ca únyi hnathu at ae tren bubuny ka tavat ae hwege, ke so bi ka tavat ae mok : oge me ca o but he ka hawâ tavat ae wisa, ke tavat bi ae kong, m' adre me ietra.

18 Ke haba latö Ioane, ke laten ta je Faresaio, adre me anyâ ca han : me adre me o but kâu, me ha, ka habe, Haba latö Ioane me laten ta je Faresaio adre me anyâ ca han, ke haba látâm, me ödrin e ca munyi anyâ geü ca han ? 19 Ke Iesu ame ha ködra, ka habe, Hawa, e khana lahanen at a tep faipoipo he ka anyâ ca han ke tiga e unyidrin at a tep faipoipo ? E ca khan' ödra he ka anyâ ca han, e ka tiga laba unyidra at a tep faipoipo. 20 Ke ame he ka o úen he ka hom gadra at a tep faipoipo, me wale but e úen adre me he bi ka anyâ hnyin ca han. 21 E ba ke at ame útibetkôuâ ecmano a teb únyi ka hnyi úkhaü ae bobot ut : wâ e nye ok ut ecmano ae bobot ge ecmano ae hát adre me ip hnân okhötâ, me ame he ka gan hmâ but mou. 22 Ke ba at ame hingälâ waina a teb únyi ka hnyi je tangen a je unen meno ae bobot : wâ e nye hmouca but ta je tangen hnen waina, me ame he ka hingölö waina, me kong ut ta je unen meno : ke so bi adre me hingälâ waina ae teb únyi ka hnyi je unen meno a teb únyi.

23 Ke haba hnyi ke bong sabath e ame he hnyi wanben je hna belökâ hwit ; ke haba laten ödrin e hwân he ka thu tilâ je wan hwit. 24 Ke haingen ta je Faresaio kâu, ka habe, Wâ bi, ieü gadrin ödrin e anyâ hnyi bong sabath únyi adre hnyibo ? 25 Me e ame ha ködra, ka habe, Hawa öbun e ca munyi aü ebac hna mâdrâ hnö Davita hnyi úen ae ba han, ke e ame mekihnânem me anyin bunyen ? 26 Wale ge hnen hna didró ka hnyi uma umen Khong hnyi úen at bihut ae nua a Abiathara, me an je areto hnân omanenâ, waleji ae ca úcü ka tavat he ka an, ke hake tavat bihut thibi, ke e ame ham minya ka anyin bunyen ? 27 Me e ame ha ködra, ka habe, Adre mâdrâ sabath hobi kâu at, ke adre ca mâdrâ bi at hobi kâu sabath : 28 me me tuhan sabath minya bi Nokon at.

HNYIMAKAN 3.

KE e ame dit hmetu thö ka hnyi sunago ; ke eling at ae meleca hnyamen. 2 Me adre me tuö e, hawa, ame ne he ka osoâ e hnyi bong sabath ; m' adre me he ka bi

fuco e. 3 Ke e ame ha ka at ae meleca hnyamen, ka habe, Todró hnyi wanben. 4 Me e ame ha ködra, ka habe, Hawa, e úcú he ka mádrá so hnyi bong sabbath, hawa, he ka mádrá monu? he ka omeló, hawa, he ka omoko? Ke adre me laba hnyibú but. 5 Ke e ame mé wá igigili ódra hnyi hmönyin, ke ame vec can ae khöt ta je hnyekudra, me e ame ha ka at, ka habe, Lau but hnyamám. Ke e ame lau but: me ame so hmetu but hnyamen. 6 Me ame didrut ta je Faresaio, me ie úhnenamö me hnyat Herodiane, m' adre me he ka hlingá e.

7 Haba Iesu me laten ödrin e tha he ka hnyi hobat köiö: ke se hia hmönyin tavat adre me he hoton úhedra Galilaia: me úhedra Juda, 8 me Jerusalem, me Idumea, me ke keihen hnyei hoton Joridano, me tavat igigilö Turo me Sidona, ódra se hia hmönyin, adre löng ut ta je únyi ae gan e ame ányá, me adre me he but káu. 9 Me e ame ha ka laten, m' ödrin e he ka hok hu ae úhnyúkong he ka halubahingen, anyin ae se hia tavat, wá adre nye he ka úhneki mé: 10 anyin a e ame hia but osoá tavat ae se hia; waleling me me úhneki káu tavat a ódra tren mok he ka kálá e. 11 Ke hnyi je úen a wá but e hnen ta je hanu ae kong, me ödrin e nom ju káu me hongot, ka habe, U thibi Nokon Khong. 12 Ke e ame thawá hwegi ódra, wá adre nye he ka omanená e.

13 Ke e ame ölö thö ka hnyi bucen, k' ame hawá káu hnyat ae weny: me ödrin e he but káu. 14 Me e ame otílá hnyat a twelv, he ka tha laba mé, me me he ka kun' ödrin he ka khetá, 15 me he ka hu man he ka obá ta je demoni: 16 me e ame hwenyi iö Simona, ka habe Peteru; 17 haba Iakobo nöku Zebedaio, ke Ioane liamekeiny me Iakobo; me e ame hwenyi iödru, ka habe, Boanerege, walang bongon, Li lakon hendreng: 18 ke Anederea, ke Filipino, ke Batolomaio, ke Mataio, ke Toma, ke Iakobo nöku Alefaio, ke Thadaio, ke Simona at Kanana, 19 ke Juda Isakariota at a alecuá e.

Ke e ame dit ka hnyi ke uma. 20 Ke ame ukhacaköu hmetu tavat ae se hia, me me ca khan' ödrin bi he ka han. 21 Ke e khana but lahanen, me ödrin e he but he ka kát e, anyin a haingödrin, ka habe, E a monu but. 22 Ke haingen tavat sihna-limen tavat adre me o úhedra Jerusalem, ka habe, E unyin Belezebuba, ke, E ame obá ta je demoni únyi ge tuhan ta je

demoni. 23 Ke e ame haw' ödrin káu, me ha ködra hnyi ta je úhöúcü, ka habe, Ama kámáu Satana ka obá Satana? 24 Ke a ne imouköu ke dökhü, e ca khana dökhü eling he ka tethmä. 25 Ke a ne imouköu ke lap a je liamekeiny, me ca khana lap eling he ka tethmä. 26 Ke a në Satana ame ka tot metá káu bi, me imouköu, me ca khana bi he ka tethmä, k' ame he ka obiny káu. 27 Ke ca khana ke at he ka dit ka hnyi uma umen at ae hwege, me söh anyin ta je únyi, ame ne ca bán ka ca at ae hwege; waleling me ame he ka söh umen uma. 28 E hnathu inya oge me ha köbun, ka habe, Adre me he ka hna degecá ta je monu hia a ányá ge tavat, me je bigan a hnödra ta je hna bigan: 29 ke haba at ame he ka bigan ka Hanu Kap, me adre me ca he ka hna degecá, k' ame he bala anyin hulö ka mokut hon nyiele balua: 30 anyin a haingödra, ka habe, E unyin hanu ae kong.

31 Me ame o but hinyen me je liamekeiny mé, me útitilen eú hnyöu, me úkhúnöng he ka hawá e. 32 Ke ame laba igigilö e tavat ae se hia, me adre me ha káu, ka habe, Wá bi, hinyám me je liamekeiny möu ödrin e elöm u. 33 Ke e ame thu ködra, me ha, ka habe, Ia hinyök me je liamekeiny mönya? 34 Ke e ame hngehngele igigili ódra adre me laba igigilö e, me ha, ka habe, Wá bi hinyök me je liamekeiny mönya! 35 Anyin a haba at ame he ka mádrá weny Khong, wale thibi e liamekeiny mönya, me hanik, me hinyök.

HNYIMAKAN 4.

KE e ame hwán hmetu he ka úne hnyi hobat köiö. Ke ame úkhacaköu káu tavat ae se hia hmönyin, me e ame ölö thö ka hnyi hon hu, me laba ju hnyi köiö: ke haba tavat ae se hia adre me laba hnyi hobat köiö. 2 Ke se hia ta je hufoc e ame n' ódra a deny ta je úhöúcü, me ha ködra hnyi hnen hna úne, ka habe, 3 Löng ju: Wá bi, ame he but at belök he ka jijingá wan: 4 ke e ame jijingá me ame kölu but keihen eú hnyi baten gethen, me ame o but ta je meno ame gá, me an dö. 5 Ke ame kölu but keihen ka hnyi dok ae hudei, wale ae ca haki hnyin káná, me ame ie kú thö, anyin ae ca haki bi káná: 6 ke ame o but seúnö me ame le but; me mokcu, anyin ae ba iwán. 7 Ke ame kölu but keihen hnyi wanben ta je úö ae údedö,

me ame kú thö ta je üö ae údedö me takou but, me ba ju wan. 8 Ke ame kölu but keihen ka hnyi hon kânâ ae hoso, me kú thö me hlau but, me wa; me ame hu wan dut, úsa thöte, me sikste, me wan haded. 9 Ke e ame ha, ka habe, Haba at ae hu hnyikönyen ka löng, löng ju.

10 Ke a he but tavat ae se, me haba hnyat ödrin e tha laba mē, me hnyat minya a twelv, adre me hnö e ge bongon je úhöücú. 11 Haingen ame ha ködrin, ka habe, Adre me ham köbun he ka wáhmakhmeto ta je únyi ae iyong hnyi dökhü dokhon Khong: k' adre me ányá ta je únyi hia hnyi ta je úhöücú hobi ködra eú: 12 m' adre me he ka wá, a wá thibi, k' adre me ca wá únykúme bi; ke löng, a löng thibi, ke ca wáhmakhmeto bi; wá adre nye hwiö thö, m' adre me he ka thang degecá but anyidra ta je hulö. 13 Haingen ködra, ka habe, Hawa, e ca khan' öbun úhöücú eang? ke ama kámáú ka khan' öbun ta je úhöücú hia? 14 Haba at belök ame tá hofuc. 15 Haba je hna jijingá hnyi baten gethen, me wale adre me tá hofuc hnyin; ke adre me löng ut me ame ie o but Satana me hom dö hofuc adre me tá unyidra. 16 Ke walang je hna jijingá hnyi dok ae hudei, a tavat adre me löng hofuc me ie kap senyiná; 17 ke ba iwán eú hnyidra, waleling m' adre me ca tethmá bi; ke e ka o hlöuhlöu me úoveci can hofuc, me adre me ie thö thö. 18 Ke haba keihen wale adre jijingá hnyi wanben ta je úö ae údedö; wale tavat adre me löng hofuc, 19 me ame didró ta je hna únykúme je únyi eang hmeledrany, ke iyawöiny omjeú, ke behnyekon ka ta je thatúnyi, me kú takou but hofuc, me ame ca wa bi. 20 Ke walang je hna jijingá hon kânâ ae hoso; a tavat adre me löng hofuc, me kap, me hu wan dut, úsa thöte, me sikste, me wan haded.

21 Ke e ame ha ködra, ka habe, Hawa, adre me hom lamepa he ka ip hnyi hmelen kumete, ame ne hna mokut, k' adre me ca he bi ka ip hon taben? 22 Anyin ae ba únyi adre me ikhálá, a g' adre me ca he bi ka omanená; ke ba únyi adre me oiyongá a g' ame ca he ka he hnyi melam bi. 23 Haba at ae hu li hnyikönyen, löng ju. 24 Ke e ame ba ködra, ka habe, Wá wia eáú öbun ta je únyi öbun e löng: ke haba tulut öbun e tuluto, me adre me he bi ka tuluto köbun; me adre me he ka bi hanen köbun. 25 Anyin adre me he ka ham ka

at ae hu gan: k' adre me he ka hom ge at ae ba ta únyi, únyi e ame hu.

26 Ke e ame ha, ka' habe, E úcü dökhü dokhon Khong me at ame khúá je wan ka hnyi kânâ; 27 k' ame mokut hnyi je hnyinghet, k' ame hmak dö hnyi ta je hnyomakatu, ke ame kú thö bátán me beú but, ke ca khana bi bongon. 28 Ke haba kânâ ame ka hamen bi okúá jeú; ame bán bátán, me ame whöng ut, me biliny ka bekhöt wan hnyi hlanyin. 29 Ke e ka metu but wan e ame ie iná but hele, anyin a ünén dut menu.

30 Ke e ame ha, ka habe, Ate me he ka öuco dökhü dokhon Khong me ieú? Ke ewa úhöücú ate me he ka öuco mē? 31 E úcü me wan sinapi, ödra ka tá hnyi kânâ, wale thibi e wan ae úhnyúkong hmelen ta je wan hia eang hmeledrany, 32 ke ödra ka hia but tá, me ame kú thö me gan hmá but hon ta je úö hia ae ometu, me ame vhei but je vheiny ae gan; me me khana ta je meno ethö ka tabá hnyi hmenuiny.

33 Ke se hia ta je úhöücú heláe e ame khetá hofuc ködra hnyin, hoton hnödra hna khana he ka löng: 34 ke e ame ca fuc ködra, ke ba úhöücú: ke e ame ha bongon ka laten a hake ödrin ke.

35 Ke hnyi bong eling hnyi sahaç, e ame ha ködrin, ka habe, Ötin e he ka kec ka hnyi ke keihen. 36 Ke ödrin e hna but tavat ae se hia, me ödrin e kácá e hon hu ai. Ke tha e mē ke je hu. 37 Me ame o but bouédet ae gan, ke ame khutu ta je waköio ka hnyi hu, me ame he but ka unöngöt dö hu. 38 Ke e ame mokut hon hunöng hnyi obiny hu: me ödrin e bwebwelá e, me ha káu, ka habe, At úne lö, u me ca únykúme a ötin e he but ang ka mok? 39 Me e ame hmak dö me thawá ang, me ha ka köio, ka habe, Ca mede, ca bwebwet hmetu. Me ame hia but ang me ta but hau ae gan hmá. 40 Me e ame ha ködrin, ka habe, Ieú gabun öbun e ot? Hawa, e tiga ca hu gabun labageju? 41 Me ödrin e ot gan hmá me úhnenamökouá, ka habe, Ehö at ang, wale me me löng káu hnen ang me köio?

HNYIMAKAN 5.

ME ödrin e khöp dö hnyi ke keihen köio, hnyi hnyei iny at Gadara. 2 Ke e a hia but utut úheny hon hu, me ame ie úkhanö mē at a delec hanu ae kong, ame he úheny hnyi je erkemok, 3 at ame

labö laba hnyi ta je erkemok : ke ba at ae khana he ka ca e, e ca khan' ödra he ka ca ge tö fao ; 4 anyin a ödra osehia ca li can me li benyin ge tö fao, ke e ame thamua hna ca li benyin, me thu amamä hna ca li can : ke ba at ae hwege he ka ohnamä e. 5 E ame laba bala hnyi lit me lany hnyi je erkemok me je bucen, ame tenge, me ka hamen bi kave e ge veto. 6 Ke e ame bwele säkäü me ö Iesu, me e ame wadring me khudrung ju käu ; 7 me fuc ae gan hwan, ka habe, Ieü gam könya Iesu a Nokon Khong ae beönua ? Inya oge me khöü köu ünyi hnyi ien Khong, u ma ca oveci nya. 8 Anyin a e ame ha käu, ka habe, Hanu ae kong, didrut ühem hnyi hnyin at. 9 Ke e ame hnö e, ka habe, Ia iam ? me e ame thu käu, ka habe, Legeona iök, anyin a öhmun se hia. 10 Ke e ame khöü hwege käu, me me ca he ka obä e ünyi hnyi hnyei. 11 Ke eling hnahat buaka ae se hia ame han tot hmelen bucen. 12 Me ödrin e khöü käu, ka habe, Ö u he ka ob' öhmun ka hnyi je buaka, m' öhmun e he ka dilic ödra. 13 Me e ame hn' ödrin dut. Me ame didrut ta je hanu ae kong, me delec je buaka : me ame wadring ut hnahat buaka üheny dö hnyi dok ae hwa-tapkölu ka hnyi köiö, me ame ü but eü hnyi köiö, ödra helä me tu thauzan. 14 Me ame kec ut tavat adre me hân buaka, me thumetu e hnyi taun me hnyei. Ke adre me o thö he ka hnyi wä hna änyä. 15 Ke adre me o but kö Iesu, me adre me wä at eji a delec hnen je demoni, k' ame laba a khaü, ke metä but, waleji at a delec hnen legeona : me adre me ot bi. 16 Ke haba tavat adre hia but wä, me adre me ha ködra bongon hna mädrä ka at a delec demoni, me bongon je buaka. 17 Ke adre me hwân he ka khöü käu he ka hna but idra hnyei. 18, Ke e ame ölö thö ka hnyi hon hu, me haba at a delec demoni ame sumätä e, he ka tha laba mä. 19 Ke e ame ca ogä e, ke haingen bi käu, ka habe, He thö ka hnyi hnyabam, ka je lahanäm, me omanená ködrin ünyi ae gan a mädrä köu Than, me hnen hna betenge gam. 20 Ke e ame he me hwân he ka khetä hnyi Dekapoli ta je ünyi ae gan a mädrä käu Iesu : me adre me läiä hia.

21 Ke haba Iesu ame kec hmetu hon hu ka hnyi ke keihen, me ame ükhacaköu hia thö käu tavat ae se hia hmönyin : ke e hakekeny jut ka hnyi köiö. 22 Ke ame o but ke taben sunago Jairo ien ; ke a wä

but e, me e ame ta ju hmelen li can, 23 me khöü hwege, ka habe, Ame he but ka mok nökkuk in ae ühnyükong : ö u he thö jem he ka me ip li hnyamäm hon, me me so but, me me he ka mödrut. 24 Ke e ame tha he mä ; ke se hia hmönyin tavat adre me he hoton mä, me adre me ühneki mä.

25 Ke wale momo ame moko dra ame hingölö hnyi twelv je huna, 26 ke e gan hmä anyin vec ünyi ge tavat tren bubuny ae se hia, ke ba hia but tang omjehen anyin hna ham ködrin, ke ba troban, ke ame gan tot bi mok, 27 ke a löng ut bongu Iesu, me e ame he hnyi wanben tavat ae se hia hoton me kälä anyin ükhaü. 28 Anyin a haingen momo, ka habe, Oge ne he ka kälä thibi anyin ükhaü, oge me he ka möt. 29 Ke ame ie hme thö dra ge momo ; ke a löng ut momo anyin ae mödrut ünyi hnyi mok eling. 30 Haba Iesu ame ka ie wä-hmakhmeto eü hnyin a ga didrut man gan, me e ame hwiö thö hnyi wanben tavat ae se hia me ha, ka habe, Ia kälä anyik ükhaü ? 31 Haba laten ödrin e ha käu, ka habe, U me wä tavat ae se hia adre me ühneki köu, me u je ha, ka habe, Ia ame kalö nya ? 32 Ke e ame hngehengele he ka wä momo a mädrä ünyi eling. 33 Ke haba momo ame ot me öbubuny, anyin ae khana hna änyä käu, me ame o but me khudrung käu, me ha hia hnathu käu. 34 Me e ame ha ka momo, ka habe, Nökuk lö, u je möt ut hnen änyäm labageju ; he thö me hnabic, me u je mödrut ünyi hnyi änyäm mok.

35 Ke e ame tiga fuc, me ame o but je üthumetu ünyi hnyi hnyaban taben sunago, me ha, ka habe, A mokcu nokom in : hnän eü he ka üjengö hmetu At üne ? 36 Ke haba Iesu ame ca önyihnatho hna ha, ke ame ha ka taben sunago, ka habe, Ca ot, ke labageju ju. 37 Ke e ame thaw' ödra me me ba ju at ame he ka he hoton, ke so thibi Peteru, me Iakobo, me Ioane liamekeiny me Iakobo. 38 Me ödrin e o but ka hnyi uma umen taben sunago ; ke e ame wä tavat adre me mede, me hnyamok, me tenge thungau. 39 Ke e ame didrö me ha ködra, ka habe, Ieü gabun öbun e mede, me ütengiö ? a ca mokcu wanakat, k' ame mokut. 40 Ke adre me hlumä e. Ke a hia but ob' ödra hia, me e ame hawä kamen me hinyen wanakat, me je hnyat unyin, me didrö ka hnyi dok ame mokut hnyin wanakat. 41 E ame

hom hnyamen wanakat me ha kâu, ka habe, Talitha kumi; bongon, Hlu lö, inya oge me ha köu, ka habe, Todró. 42 Me ame ie todró hlu me he, anyin a twelv hunainy. Me adre me ie láia gan hmá. 43 Ke e ame húna ködra me me ca manen ka ke at: k' ame húna he ka hân in.

HNYIMAKAN 6.

ME e ame he but úheny e; me e ame o ka hnyi iny hnyei; ke haba laten ödrin e he hoton. 2 Ke ame o thö bong sabbath, me e ame hwán ka úne hnyin sunago: ke ame löng e tavat ae se hia, me adre me láia, me ha, ka habe, Únyi ua ta je únyi ang ge at ang? ke, Ieú metá adre ham ka at ang, ke ehö ge ta je huliwa ae man helâe a ányá ge li hnyamen? 3 Ca at tretrau at ang, wale nöku Maria, ke liamekeiny me Iakobo, me Jose, me Juda, me Simona? ke hawa, ca e bi ang unyita je lahaniny hia? Me adre me thö thö gan. 4 Haingö Iesu ködra, ka habe, E ca ba bi lung anyin perofeta, ke ka e bi hnyi iny hnyei, ke unyin je lahanen, ke hnyi hnyaban. 5 Ke ca khana bi he ka ányá eling ke huliwa ae man, ke e ame ip thibi hnyamen hon ke ta je komok me omeli ödra. 6 Ke e ame láia can anyidra ca labageju.

Ke e ame vheno igigilö je taun he ka úne.

7 Ke e ame hawá hnyat a twelv, me hwán he ka kun' ödrin, a ödrin úcú lo; ke e ame ham ködrin musi hon ta je hanu ae kong; 8 me e ame húna ködrin, ka habe, Ca hom ke únyi hobi kâu he, ke uci thibi; e ba kamec, ke ba tang, ke ba minya mone hnyi tangen; 9 ke bi taben je hnyeúcadrin, ke e ame ha minya, ka habe, Ca khává bi lo li úkot. 10 Haingen ame ha ködrin, ka habe, Haba uma öbun e he ka dit ka hnyin, laba ju e ke ne o but öbun e hmetu but úheny e. 11 Ke haba dok ame ca he ka köp öbun, k' adre me ca ling öbun, öbun ka he but úheny e jijingá but kánáiny hnyeúcabun me hnán haten ködra. 12 Me ödrin e he but, me khetá, ka habe, hamen tavat he ka ietra. 13 Ke se hia ta je demoni ödrin e obá, ke se hia tavat a ödra tren mok, ödrin e hú ge wakaco, me omeli ödra.

14 Ke a löng ut gan Heroda than; anyin ame lung ien: me e ame ha, ka habe, A möt hmetu thö Ioane bapataiso úheny hnyi hna mok, anyin a wale ame

huliwa ta je man eang únyi gan. 15 Ke haingen keihen, ka habe, Elia ling. Ke haingen keihen, ka habe, Perofeta ling, heláke at a hanen je perofeta. 16 Ke a löng ut Heroda gan, me e ame ha, ka habe, Ioane ling, waleji oge sö degecá ban, e a möt hmetu thö. 17 Anyin a hia but Heroda úkhúnöng he ka kót Ioane, me ip e hnyi uma ceat, ca Herodia öio Fili-po liamekeiny më: anyin a e ame hom e me áian. 18 Anyin a haingö Ioane kö Heroda, ka habe, E ca úcú bi köu he ka hom áian liamekeiny möu. 19 Ke ame hmönyi Herodia kâu, me behlingá e; ke ca khana bi; 20 anyin a Heroda ame outö Ioane, ame wáhmakhmeto e, a e at ae wisa me kap, me e ame tuö e. Ke hnyi úen e ame löng ifucin, me e ame hlohlo gan hmá; ke e ame löng senyiná hwan hofuc. 21 Ke ame o but bong ae úcú Heroda ame ányá bijeú hnyi sahaciny bong adre hnokó e hnyin, ka anyin je homakan, me je taben vat ae nua, me ta je taben at Galilaia; 22 me ame didró hlu nöku Herodia me biá, me e ame osenyini Heroda me tavat adre me tha laba më; me haba than ame ha ka hlu, ka habe, Ha thö könnya wem, me oge me he bi nya ka ham köu. 23 Me e ame khemanyin kâu, ka habe, Oge me he ka ham köu hnám hna he ka ha könnya ke ne o but hnyi ke keihen a hafiny dökhuk dökhuk. 24 Ke e ame didrut me ha ka hinyen ka habe, Ieú oge me he ka ha? Haba momo ame ha, ka habe, Bö Ioane bapataiso. 25 Me e ame ie dit logot hmetu thö ka than me sumat me ha, ka habe, Inya oge me wek u me he ka ham könnya walang ang bö Ioane Bapataiso hnyin mini. 26 Me ame hmak ut hnyekon than, ke únyi bi ge hna khemanyin, me ge tavat adre me tha laba më, e ame ca beháná kâu. 27 Haba than ame ie kuná ke soja hanen tavat tue, me húna he ka hom ban: me e ame he but me subá nyi Ioane hnyin uma ceat, 28 me hom ban hnyin mini, me ham ka hlu; ke haba hlu ame ham bi ka hinyen. 29 Ke e khana but laten, me ödrin e he me hom unyin, me ip hnyi erkemok.

30 Haba je aposetolo ödrin e úkhacaköu kö Iesu; me ödrin e omanená kâu ta je únyi hia ödrin e hia but ányá, me ta je únyi ödrin e hia but únö. 31 Ke haingen ködrin, ka habe, Ai öbun ka hnyi dok ae ba aten he ka më mená. Anyin ae se hai tavat adre me o me he hmetu, ke ba úen

ködrin he ka han. 32 Me ödrin e kec hon hu ka hnyi ke dok ae ba aten. 33 Ke a wâ but tavat ödrin e kec ut, ke se hia tavat adre me wâhmakhmetu ödrin, me adre me tha wadring hot únyi hnyi ta je taun, me bödra ke bilidrin bi. 34 Ke e ame o but me wâ tavat ae se hia hmönyin, me e ame betenge gadra, anyin a ödra úcú me ta je mamoe ae ba at ame tuö: me e ame hwân he ka n' ödra ge ta je únyi ae se hia. 35 Ke haba hnyi sahac ame he but kâu laten me ha kâu, ka habe, Hnyebuba ang, ka sahac ut: 36 kun' ödra thö, m' adre me he ka he ka hnyi je taun me je hnyaba igigilö he ka úcú ö'dra bi. 37 Ke e ame thu ködrin, ka habe, Ha ö'dra bi öbun. Hai-ngödrin kâu, ka habe, Hawa, öhmun e he ka he me úcú areto a tu haded je denari hwaban, me hnân ha ö'dra? 38 Ke e ame ha ködrin, ka habe, Ve ta areto gabun? he thö ka wâ. Ke ödrin e wâ but, me ödrin e ha, ka habe, Thabúng, ke lo li wâ. 39 Ke e ame hûna a g' adre me he ka laba hia hnyi je deö lap hon hnaönying ae but. 40 Ke adre me laba gaga a úsa wan haded, me úsa fifte. 41 Ke e ame hom je areto a thabúng, me li wâ, me bwele hnyi drany ai, me oleâ, me thuthu je areto; me e ame ham ka laten, m' ödrin e he ka ip hnyi hnyimaködra; ke e ame khenâ li wâ ködra hia. 42 Ke ödra hia adre me han me ame sekudra ju. 43 Ke adre me hom dö je kolon hna han me öunöngotâ je tang a twelv, me hanen je wâ minya. 44 Ke haba tavat adre me han je areto, me faiv thauzan obaga.

45 Ke e ame ie kunâ laten he ka laba hon hu, ke bödrin ka kec ka hnyi ke keihen Bethesaida ai, me e ame he ka kuna tavat ae se hia. 46 Ke a hia but úhüne mödra, me e ame he ka hnyi bucen he ka hic. 47 Hnyi sahac, ke tiga e hu hnyi wanben köiö, ke hake e biju hot. 48 Me e ame ö'drin, k' ödrin e mokhon dut galu, anyin a esang, ke haba hnyi hna hmak a vak hnyi lit, me e ame o but ködrin ame he hon köiö; helâke ame he but ka khalet' ödrin: 49 ke ödrin e wâ but e, k' ame he hon köiö, me ödrin e únykúme, ka habe, Hanu jo, me ödrin e kuku: 50 anyin a ödrin hia ödrin e wâ e, me hlohloâ. Ke e ame ie ha hofuc ködrin, ka habe, Hwege thö: inya thibi; ca ot bi. 51 Ke e ame ölö thö ködrin ka hnyi hon hu; me ame ta but hau: me ödrin e láiâ gan hmâ hnyi je hnyekudrin; 52 anyin a

ödrin e ca únykúme je areto, ke e khöt je hnyekudrin.

53 Ke ödrin e kec ka hnyi ke keihen me ödrin e khöp dö hnyi hnyei Genesareta, me un dut. 54 Ke ödrin e utut úhedrin hon hu, me ame ie wahmakhmeto e hnen tavat, 55 me adre me wadring igigilö hnyei eling hia, me hwân he ka vaden ta je komok hon ta je hna mokut ka hnyi dok waleji adre me löng a e bi hnyin. 56 Ke haba hnyi ta je dok hia e ame o ka hnyin, ame ne je hnyaba, ame ne je taun, ame ne ta hnyei, me adre me ip ta je komok hnyi je dok adre me úcú omjeü hnyin, ke adre me khöü kâu m' adre me he ka kâlâ e, ame ne obiny thibi anyin úkhaü: ke haba tavat hia thithö adre me kâlâ e, me adre me möt ut.

HNYIMAKAN 7.

KE ame úkhaçaköu thö kâu ta je Faresaio, me keihen hnyat sihnalimen, waleji adre me o úhedra Jerusalema, 2 ke adre me wâ keihen laten ödrin e han ö'dra jeü ge je hnyamödrin ae kong, wale ödrin e ca hinyem. 3 Anyin ame ca han ta je Faresaio me at Juda hia, adre ne ca bödra ka hinyem wia, k' adre me kap hofuc vejec únyi ge wahingat: 4 ke úhedra hnyi hna úcú adre me ca han, ödra ka ca bödra ka soú: ke se hia ta je únyi adre me kap me hom, wale he ka hneü ta je utkaia, me je kaia hnân tuluto, me je kaia bras. 5 Haba ta je Faresaio me hnyat sihnalimen adre me hnö e, ka habe, Ieü ge látâm adre me ca hnu hoton hwakecin wahingat, wale a ödrin e han ge je hnyamödrin ae kong? 6 Me e ame ha ködrin, ka habe, E so hna perofeta hnö Isaia gabun hnyat thoi hnyok, ka habe,

Haba tavat ang adre me oganö nya ge je esongodidra,

Ke úsâkâüö mönya je hnyekudra.

7 Ke únyi baü bi hnödra hna khudrung könya,

K' adre me nâ ta je hna úne hnen tavat.

8 Öbun e hna degeçâ hnanyibu anyin Khong, me kât hmâ je hna úne hnen at.

9 Haingen ame ha ködra, ka habe, Öbun hwege ka degeç ut hnanyibu anyin Khong, m' öbun e he ka vhenö hnöbun je hna úne.

10 Anyin a haingö Mose, ka habe, Ogânâ kâmâm me hinyâm; ke, Haba at ame he ka haikongoâ kamen me hinyen, me adre

me he ka hlingâ e: 11 ke haingöbun, ka

habe, Haba at ame he ka ha ka kamen me hinyen, ka habe, Haba anyik ta je únyi hnân hom hadruo u, me, Korabana, walang bongon, Adre me ham ka Khong; 12 ke öbun e ca hna hmetu bi e he ka ányá ke únyi hobi káu kamen me hinyen; 13 wale öbun e ohia hofuc hwan Khong ge hnöbun je hna úne, waleji öbun e ná: ke se hia ta je únyi heláe öbun e labö mádrá. 14 Ke e ame hawá hmetu tavat ae se hia, me ha ködra, ka habe, Ling nya ju öbun hia, me wáhmakhmeto: 15 e ba únyi úheny hnyi hoton at ame dit ka hnyi hnyekon, ae khana he ka okongoá e: ke haba ta je únyi ame didrut gan ame he ka okongoá at. 17 Ke e ame dit hmetu thö hnyin uma ai, úheny unyin tavat ae se hia, me haba laten adre me hnö e ge úhöúci. 18 Ke e ame ha ködrin, ka habe, Hawa, e ba minya gabun hna wáhmakhmeto? öbun e ca wá ae ba únyi úheny hnyi hoton ame dit ka hnyi hnyekon at, ae khana he ka okongoá e? 19 anyin a e ame ca dit ka hnyi öúnykúm, ke so bi ka hnyi tang tiny, me didrut ka hnyi hnyot? E ame ha heláe, me haisoá ta je jeú hia. 20 Ke haingen, ka habe, Haba únyi ame didrut úheny hnyi hnyekon at, wale ame okongoá at. 21 Anyin a úheny hnyin, wale úheny hnyi hnyekon tavat, ame didrut je hna únykúme ae kong, me bi únyi monu, 22 me venöu, me úhlingö, me venáu áian ke at, me benyekon, me hwakecin ae kong, me iyawö, me hwakecin ae ikiki, me ihuhnnyinköu, me hwege hnyem, me hop, me hwen monu: 23 haba ta je únyi hia eling ae kong ame dit úheny hnyi hnyok, me ame okongoá at. 24 Ke e ame todrö úheny e, me he ka hnyi hnyigöulen Turo me Sidona. Ke e ame dit ka hnyi ke uma, me weny adre me ca he tavat ka wá e: ke ca khana bi he ka oiyongá. 25 Ke ame löng ut ke momo ae hu nokon hlu a delec hanu ae kong, me e ame o but me ta ju hmelen li can. 26 At Heleni momo, a mátrán at Surofoinike. Me e ame sumátá e he ka obá demoni únyi ge nokon hlu. 27 Ke e ame ha ka momo, ka habe, E më sekon dö lakon: anyin ae ca so he ka hom jeú an lakon, me khúá ka ta je kuli. 28 Ke haba momo ame thu káu, ka habe, Eke, Than lö: haba je kuli adre me labö an hmelen laulau je kolon jeú an lakon. 29 Me e ame ha ka momo, ka habe, Can hofuc e, he thö, a hia but demoni únyi hnyi hnyekon nokom hlu. 30 Haba momo ame he but ka hnyi umen

uma, me wá wanakat ame mokut hon hna mokut, ke hia but demoni. 31 Me e ame he hmetu úheny hnyi je hnyegöulen Turo, me vheno Sidona ke ne o but hnyi köö Galilala, wanben je hnyigöulen Dekapoli. 32 Me adre me hom but káu at ae wejiji ke teta minya hwan; me adre me khöú káu he ka ip hnyamen hon. 33 Me e ame lelö thö e úheny unyin tavat ae se hia, me iná li banyen ka hnyi li hnyikönyen, me e ame hangöjá, me kálá bohmen; 34 ke e ame bwele thö hnyi drany ai, me mâng, me ha káu, ka habe, Efatha, haba bongon, khöng ut. 35 Me ame lany jut li hnyikönyen, me ok ut töiny bohmen, me e ame fuc wisa. 36 Ke e ame húna ködra, m' adre me ca he bi ka omanená: ke haba hoton hnen hna húna hwegiá ködra, me heláe minya adre me hwege ka omanená e. 37 Me adre me láia gan hmá, me ha, ka habe, E so hnen hna ányá hia: e ame olöngá ta je wejiji, me ofucá ta je hum.

HNYIMAKAN 8.

HABA hnyi je bong eling, me e hu hmetu tavat ae se hia hmönyin, ke ba ö'dra, me e ame hawá laten me ha ködrin, ka habe, 2 Inya oge me betenge ge tavat ae se hia, anyin a ödra bong kundut unyik, ke ba ö'dra: 3 ke oge ne he ka kun' ödra ka hnyi umödra je uma ke ödra mekihnanem, me adre me he ka momonu eú hnyi gethen; anyin a sákáu ta je dok a mwi hnyin keihen. 4 Haba laten ödrin e thu káu, ka habe, Únyi ua adre me he ka osekuná tavat ang ge areto hnyi hnyebuba eang? 5 Ke e ame hnei ödrin, ka habe, Ve ta areto gabun? Haingödrin, Seven. 6 Me e ame húna ka tavat ae se hia he ka laba ju hon káná: ke e ame hom je areto a seven, ke hwaban hna oleá e ame thuthu, me ham ka laten, he ka ip hnyi hnyimaködra; me ödrin e ip hnyi hnyimakan tavat ae se hia. 7 Ke e unyidrin minya ke je wá ae úhnyúkong: ke hwaban hna oleá, e ame úkhúnöng he ka ip minya e hnyi hnyimaködra. 8 Ke adre me han me ame sekudra thö: me adre me hom dö je kolon hna han seven ta je tang. 9 Ke helá me foa thauzan tavat, me e ame kun' ödra. 10 Ke e ame ie ölö thö ka hnyi hon hu tha e me laten, me he ka hnyi ke keihen Dalemanutha. 11 Ke ame o but ta je Faresaio me

hwân he ka hnö e, adre me elâm gan haten únyi hnyi drany he ka cubec e. 12 Ke e ame mâng hwege eû hnyi hnyekon me ha, ka habe, Ieú ge dö ang adre me elâm haten? e hnathu inya oge me ha köbun ka habe, Adre me ca he ka ham haten ka dö ang. 13 Ke e ame hn' ödra but, me ölö hmetu hon hu ai, me kec ka hnyi ke keihen.

14 Ke ödrin e hnying hok kamec; khaca thibi areto unyidrin hon hu. 15 Ke e ame húna ködrin, ka habe, E, ö 'bun aú ge leven anyin ta je Faresaio me leven anyi Heroda. 16 Me adre me úhnenamökouâ, ka habe, E ba jeú gatin. 17 Ke haba Iesu ame wâhmakhmeto, me e ame ha ködrin, ka habe, Ieú gabun öbun e úhnenamökouâ, ka habe, anyin ae ba ö 'bun? hawa öbun tiga ca wâ, me wâhmakhmeto? e khöt bala bi je hnyekubun? 18 E hu li emaköbun, k' öbun e ca wâ bi? ke hu li hnyikönyöbun, k' öbun e ca löng bi? ke öbun e ca únykúme bi? 19 Haba ji ge hnök hna thuthu je areto a thabúng ka tavat a faiv thauzan, ve ta tang a unöngöt a kolon öbun e hom? Haingödrin kâu, ka habe, Twelv. 20 Me je areto a seven ka tavat a foa thauzan, ve ta tang a kolon a unöngöt öbun e hom? Haingödrin, ka habe, Seven. 21 Me e ame ha ködrin, ka habe, Öbun e ca wâhmakhmeto bala bi?

22 Ke ödrin e o but hnyi Bethesaida. Ke adre me hom but kâu at ae wadröu, me sumâtâ he ka kâlâ e. 23 Me e ame hom hnyamen at ae wadröu, me lelö thö e ka hnyi hoton taun; ke a hia but hangöjá li emakan, me ip li hnyamen hon, me e ame hnö e, ka habe, U me wâ ke únyi? 24 Ke e ame bwele thö me ha, ka habe, Inya oge me wâ tavat; anyin oge me ö 'drin helâ me je úö, adre me he. 25 Ke e ame ip hmetu li hnyamen hon li emakan; ke e ame wâ hmâ, me ame so but, me wâ wia ta je únyi hia. 26 Me e ame kunâ e ka hnyi hnyaban, me ha, ka habe, Ca mē dit bi ka hnyi taun.

27 Haba Iesu ame tha he me laten, ka hnyi je ong taun hnyi Kaisaria Filipi: ke eû hnyi gethen e ame hnö laten, me ha ködrin, ka habe, Haba ifucin tavat gak, m' iny ia? 28 Me ödrin e thu kâu, ka habe, Ioane Bapataiso: me keihen, ka habe, Elia; me keihen, ka habe, Hanen je perofeta. 29 Ke e ame hnei ödrin, ka habe, Haba ifucibun gak, m' iny ia? Haingö Peteru ame thu kâu, ka habe, U thibi

Keriso. 30 Me e ame húna ködrin, m' ödrin e ca ha bi ka ke at. 31 Ke e ame hwân he ka n' ödrin, a g' ame he Nokon at ka vheno ta je vec ae se hia, k' ame he ka oúnyibâtâ e ge wahingat, me je taben tavat bihut, me hnyat sihualimen, ke adre me he ka hlingâ e, k' ame he bi ka möt hmetu hwaban kun ta bong. 32 E ame ha manenâ hofuc eling. Ke haba Peteru ame lelö thö e me hwân he ka thawâ e. 33 Ke e ame hwiö thö me wâ laten, me e ame thawo Peteru, me ha, ka habe, Satana lö, he thö ka hnyi hotuk: anyin a u je ca wâ únykúme ta je únyi anyin Khong, ke so thibi ta je únyi anyin at. 34 Ke e ame hawâ tavat ae se hia me laten minya, me há ködra, ka habe, A ne hu ke at ame weny he ka he hotuk, e so e he ka hamen hokhnyok, me hom anyin satauro me he hotuk. 35 Anyin a haba at ame beomelö anyin möt, me ame he ka ohia e; ke haba at ame he ka hna anyin möt can inya me evangelia, me e ame he ka omelö e. 36 Anyin a ieú troban ka at ame ne hom hmeledrany hia me me anyin bi, k' ame he bi ka hna but anyin möt? 37 Ke ieú ke únyi ae úcú ka at he ka ham hnân úco anyin möt? 38 Haba at ame he ka hmehma gak me hok ta je hofuc hnyi dö ang, a dö bi únyi monu, k' ame ányâ ta je hulö, me ame he bi Nokon at ka hmehma gan hnyi úen e ame tha o me ta je angela ae kap hnyi hmanenanginy Kamen.

HNYIMAKAN 9.

KE e ame ha ködra, ka habe, E hnathu, inya oge me ha köbun, ka habe, Haba ke je hnyat adre me tot eang, me adre me ca he ka mē mok ke ne o but adre me wâ dökhu dokhon Khong ame he ka o me man.

2 Ke hwaban ta bong a siks Iesu ame hum Peteru me Iakobo, me Ioane, me su ödrin ka hnyi bucen ae beú a hake ödrin ke: ke e ame ke bongon dut hnyi hnyimaködrin: 3 me ame hadröngöc ut anyin úkhaú, me hau hmönyin; e ca khana ke at eang hmeledrany a at kot mano he ka ohawâ but helâe. 4 Ke haba Elia me Mose ödru me manen ködrin, me tha úhnenamö me Iesu. 5 Ke haba Peteru ame ha kö Iesu, ka habe, Rabi, e so ötin e laba ang; ke öhmun e he ka otilâ ke je uma menâ a kun, hnân hobi köu khaca, ke hobi kö Mose khaca, ke hobi kö Elia khaca.

6 Anyin ae ca khana únyi he ka ha ; anyin ödrin e ot gan hmâ. 7 Ke ame o thö ke úlá me tubi ödrin : me ame o but hofuc únyi hnyi hnyin úlá, ame ha, ka habe, Walang Nökuk a oúnykúmik : löng ju öbun kâu, 8 Ke ödrin e ie bwele igigilö ke ba hmetu ke at ödrin e wâ, ke hake Iesu thiju unyidrin.

9 Ke ödrin e tiga utut úhedrin hon bucen, me e ame hûna ködrin m' ödrin e ca he ka omanená hnödrin hna wâ, e me mē möt hmetu thö Nokon at úheny hnyi hna mok. 10 Me ödrin e kât hmâ hofuc e, me úhnenamökouâ ka habe, Ieú bongon möt hmetu úheny hnyi hna mok. 11 Ke ödrin e hnö e, ka habe, Haingen hnyat sihnalimen, ka habe, Ame he ka bö Efia ka o. 12 Ke e ame ha ködrin, ka habe, E hnathu a bö Elia ka o, me ohâtâ ta je únyi hia : ke adre sihnalimen ahö ge Nokon at a e ame he ka vheno ta je vec ae se hia me adre me he ka öúnyibâúâ e? 13 Ke inya oge me ha köbun, ka habe, A hia but o Elia, ke adre hia but ányâ kâu wedra minya, helâ me hna sihnalimen gan.

14 Ke ödrin e o but ka laten, me ödrin e wâ tavat ae se hia igigili ödrin, me hnyat sihnalimen adre me úhnenamö mödrin. 15 Ke a wâ but e hnen tavat ae se hia, adre me ie láiâ, me wadring kâu he ka iouny so mē. 16 Ke e ame hnei ödra, ka habe, Ieú anyibun úhnenamö mödrin? 17 Me ame thu kâu hnen ke at ge tavat ae se hia, ka habe, At úne lö, inya oge me hom köu nökek, a delec hnen hanu ae hum ; 18 ke haba hnyi je dok e ame hom e ka hnyin e ame sa e hnyikânâi : ke e ame húlúhangöc dö, me úk ut ganyon, me aú tot : ke oge me ha ka látâm he ka obâ e ; ke ca khan' ödrin. 19 Me e ame thu ködrin, ka habe, Dö ame ca labageju lö, oge me he ka tha inya möbun ke ne o but kehö? oge me he ka hokhnyoki öbun ke ne o but kehö? hö jem kõnya. 20 Me adre me hom e kâu : ke a wâ but e, me haba hanu ame ie kia but e ; ke e ame ta hon kânâ me sesebila, k' ame húlúhangöc dö. 21 Me e ame hnö kamen, ka habe, A o kehö únyi ang kâu? Ke haingen, ka habe, Hwân ke tiga wanakat. 22 Ke e ame ibi ose khûâ e ka hnyi meic, me ka hnyi köiö minya, he ka hlingâ e : ke a ne khan' u, me ö u betenge gahmun, me hadru' öhmun. 23 Haba Iesu ame ha kâu, ka habe, A ne khan' u bi! E khana ta je únyi hia hnen at ame labageju. 24 Me

ame ie fuc kamen wanakat, me ha, ka habe, Inya oge me labageju ; ö u hadruâ anyik calabageju. 25 A wâ but Iesu tavat ae se hia adre me wadring úkhaçaköu, me e ame thawâ hanu ae kong, me ha kâu, ka habe, U hanu ae hum me wejiji lö, inya oge me hûna köu he ka didrut úhem hnyi hnyekon, ke ca delec hmetu bala bi. 26 Me e ame kuku me seset, me didrut : ke haba wanakat, me ame úciú me at a mokcu ; me ame ha tavat ae se, ka habe, A mokcu. 27 Ke haba Iesu ame lelö thö hnyamen, me otílö thö e ; me e ame tot. 28 Me e ame didrö hnyin uma ai, me ame hnö düongâ e hnen laten, ka habe, E ca khan' öhmun he ka obâ e. 29 Me e ame ha ködrin, ka habe, Ame ca dit thibut únyi a helâe, ke so bi únyi ge hic.

30 Ödrin e he but úhedrin e, me he hnyi wanben Galilaia ; ka ca weny bi he ka manen ka ke at. 31 Anyin a e ame ná laten, me ha ködrin, ka habe, Adre me he ka hna Nokon at ka hnyi je hnyamen tavat, k' adre me he ka hlingâ e ; ke hwaban hna hlingâ e, me e ame he ka möt hmetu hnyi bong a kuniny. 32 Ke ödrin e ca wâhmakhmeto bi hofuc eling, ke ödrin e ot minya he ka hnö e.

33 Ke ödrin e o but hnyi Kaperenauma : ke wale eiö hnyin uma, me e ame hnei ödrin, ka habe, Ieú öbun e iwatretra gan eú hnyi gethen? 34 Ke ödrin e laba hnyibú : anyin a ödrin e hia but iwatretra eú hnyi gethen ge at ae beónua. 35 Ke e ame laba ju me hawâ hnyat a twelv me ha ködrin, ka habe, A ne hu at ame bebân gabun, e ame he ka biliny me bi athnyaba ködrin hia. 36 Ke e ame hom ke wanakat me ip e hnyi wanbödrin : ke e ame kap e ge li benyen, me ha ködrin, ka habe, 37 Haba at ame he ka kap ke wanakat a helâng hnyi iök, me e ame köp nya : ke haba at ame köp nya, ame ca hake köp nya, ke at minya bi a kunö nya.

38 Ioane ame ha kâu, ka habe, At úne lö, öhmun e wâ but ke at ame obâ je demoni hnyi iâm, me öhmun e thawâ e : anyin a e ame ca he hotutin. 39 Ke haingö Iesu, ka habe, Ca thawâ bi e, anyin ae ba at ame ányâ ke huliwa ae man hnyi iök, me ame he ka ie haikongu nya. 40 Anyin a haba at ame ca iwahnaihmiöny mötin, me ame tha hien mötin. 41 Anyin a haba at ame he ka habelibun ge utköiö, anyin a je lahanö Keriso öbun, e hnathu, inya oge me ha köbun ame ca he ka hia hwaban e.

42 Ke haba at ame he ka othôâ thö ke at ae ûhnyükong eang ame labageju kõnya, me so kâu adre ne öhvekinýá hnyi hwage-nyin veto hnân oamamá, me khúâ but kâú ka hnyi köiö. 43 Ke a ne bi jônám hnyamám, suba degecá but : anyin ae so kôu he ka dit ka hnyi möt, ke hia hnyamám, hon he ka dit me li hnyamám hnyi gena, ka hnyi meic ame ca mok. 45 Ke a ne bi jônám hnen cam, subá degecá but : e me so but kôu he ka dit ka hnyi möt ke hia cam, hon he ka khúö u me li cam hnyi gena. 47 Ke a ne bi jônám emákám, úâ degecá thö : e me so bi kôu he ka dit ka hnyi dökhu dokhon Khong ke khaca biju emákám, hon he ka khúö u me li ecmak hnyi gena ; 48 waleji ame ca mok bi hnyin anyidra biget, ke adre ca ume meic. 49 Anyin adre me he ka sáltá tavat hia ge meic. 50 E so sált : ke a ne hia but hnân ohinyá sált, öbun e he ka kámâu ka ohinyá hmetu e? E so e hu sált eú hnyi je hnyekubun, me laba úsoköu ju öbun.

HNHYIMAKAN 10.

KE e ame todrö me he úheny ling me o hnyi je hnyigöulen Juda me hoton Joridano : me ame úkhacaköu hmetu kâu tavat ae se hia ; ke e ame n' ödra hmetu heláji me hwakecin. 2 Ke ame o but kâu ta je Faresaio, me hnö e, ka habe, Hawa e úcú ka at he ka degec áiân? adre me cubec e. 3 Ke e ame thu ködra, ka habe, Ieú hna hûna köbun hnö Mose? 4 Haingödra, ka habe, Mose ame hna he ka sihnalimen tusiny thang hna faipoipo, m' adre me degec ut. 5 Iesu ame thu ködra, ka habe, Anyin ae nâk je hnyekubun e ame sihnalimen köbun hnanyibu eling. 6 Ke haba adrem hwân dö hnyi hna op ta únyi, e ame wi' ödru бага me momo. 7 Anyin a wale, ame he бага ka hna but kamen me hinyen me kece ka áiân : 8 ke ame he ka khaca thibi unyidru : waleling m' ödru me ca lo hmetu bi, ke khaca thibi unyidru. 9 Anyin a wale, e ca hamen at bi he ka thang únyi ame hújá hnen Khong. 10 Ke haba laten, me ödrin e hnö hmeto e eiö hnyin uma ge bongon únyi eling. 11 Ke e ame ha ködrin, ka habe, Haba бага ame degec áiân k' ame hom hmetu ke at, me e ame bi únyi monu kâu : 12 ke e ka hamen momo degec áiân, me hom ke at bi, me ame bi únyi monu momo eling.

13 Ke adre me hom but kâu ta je

mendreng me me he ka kal' ödrin : k' ame thaw' ödrin laten. 14 Iesu ame wá, me ame vec hnyekon, ke haingen ködrin, ka habe, Hna but ta je mendreng m' adre me he kõnya ; ca thaw' ödra bi : anyin a helá m' ödra dökhu dokhon Khong. 15 E hnathu inya oge me ha köbun, Haba at ame ca kap dökhu dokhon Khong helá me wanakat, me e ame ca he ka dit ka hnyin. 16 Ke e ame köp ödrin me ha hnahici ödrin, me ip li hnyamen hudrin.

17 Ke e ame he eú hnyi gethen, me ame wadring ke at me cibouca kâu, me hnö e, ka habe, At úne lö, ieú hanymök oge me he ka ányá me me hu thö kõnya möt ame ca ba balua? 18 Ke haingö Iesu kâu, ka habe, Ieú gam u me ha a iny so? e ba at ae so, ke hake Khong thibi. 19 E khanö u ta je hnanyibu, ka habe, Ca he ká úhlingö, Ca he ka bi únyi monu, Ca he ka venöu, Ca he ka ohnathöá thoi, Ca iyawö, Ogáná kámám me hinyám. 20 Ke e ame thu kâu, ka habe, At úne lö, oge hia but vheno ta je únyi e k' iny tiga wanakat. 21 Ke haba Iesu ame wá hmá e, me betenge gan, me ha kâu, ka habe, Khaca thiju únyi ae hia gam : he thö ka úco ányám ta je únyi, me ham ka ta je theduoc, me ame he ka hu kôu tang omjeú hnyi drany : ke aiö u bi, he hotuk. 22 Ke e ame hmak ut ge hofuc eling, me he but me hlöuhlöu : anyin ae tren omjeú ae gan hmá.

23 Haba Iesu ame hngehgele, me e ame ha ka laten, ka habe, Huliwa but tavat tren omjeú he ka didrö ka hnyi dökhu dokhon Khong! 24 Me ame láiá laten ge hwan hofuc. Ke haba Iesu ame thu hmetu, me ha ködrin, ka habe, Lakuk lö, huliwa ae gan hmá he ka didrö ka hnyi dökhu dokhon Khong hnen tavat adre me labageju ka hnyi omjeú! 25 E háhá ka kamela he ka dit hnyi hwanumen jebú, ke hnek bi at ae tren omjeú he ka didrö ka hnyi dökhu dokhon Khong. 26 Me ödrin e láiá gan hmá me ha, ka habe, Ia la ae khana he ka möb? 27 Iesu ame ö' drin me e ame ha, ka habe, E pason hnen at, ke e khana bi Khong : anyin ae khana Khong he ka ányá ta je únyi hia thithö. 28 Haba Peteru ame hwân he ka ha kâu, ka habe, Wá bi, öhmun e hia but hna degecá ta je únyi hia me he hotom. 29 Haingö Iesu, ka habe, E hnathu, inya oge me ha köbun, E ba at ame hia but hna but uma, me je liamekeiny, me lahaneny, me kamen, me hinyen, me lakon, me ta hnyeí, can inya me evangelia,

30 k' ame ca he ka kap walang ang hmetu wan handed, a je uma, me je liamekeiny, me lahaniny, me hinyen, me lakon, me ta hnyei, tha e me je vec; ke haba hnyi ün ame he ka o thö, wale möt ame ca ba balua. 31 Ke se hia tavat adre me bödra, ame he ka bilidra but; me tavat ame bilidra ame he ka bödra but.

32 Ke ödrin eü hnyi gethen ödrin e he Jerusalema ai; ke Iesu ame hnyimakan anyidrin bunyen: ke ödrin e läiä; ke haba tavat adre me he hotudrin adre me ot. Ke e ame hom hmetu hnyat a twelv, me hwän he ka omanenä ködrin ta je ünny ame he ka o kâu, ka habe, 33 Wä bi ötin e he ang Jerusalema ai; ke adre me he ka hna Nokon at ka je taben tavat bihut, me hnyat sihnalimen; ke adre me he ka hangä e he ka mok, me hna e ka Aten ke je hnyei: 34 ke adre me he ka hlumä e, me hangöjä, me osöä, me hlingä; ke hwaban kun ta bong e ame he ka möt hmetu.

35 Ke ame hakekenyá e li laku Zebedaio jia Iakobo me Ioane, me ha kâu, ha habe, At ünne lö, E wehmu m' u me he ka mádrá ünny a wehmu. 36 Me e ame ha ködrü, ka habe, Ieü ae webu oge me he ka mádrá hobi köbu? 37 Haingödrü ödrü me ha kâu, ka habe, Hn' öhmu but m' öhmu me he ka laba, ke at hnyi ke keihâm a metâm, ke ke at hnyi ke keihâm a mem hnyi änyâm hmanenang. 38 Ke haba Iesu ame ha ködrü, ka habe, E ca khan' öbu bongon hnöbu hna sumâtä. Hawa, öbu hwege he ka ijem utköö oge me he bi ka ijem? ke he ka bapataisoi öbu ge hna bapataiso adre ma bapataisoi nya hnyin? 39 Haingödrü ödrü me ha kâu, ka habe, Öhmu me he ka hwege. Haingö Iesu ködrü, ka habe, Öbu me he ka hnyi ic hnyi utköö oge me ijem, k' adre me he ka bapataisoi öbu ge hna bapataiso adre ma bapataisoi nya hnyin: 40 ke so bi e ca hany mök he ka ham ka at he ka laba hnyi ke keihen a metök me mek: haba e, me hnân hobi kâu tavat adre me penapena e hobi kâu. 41 Ke a löng ut hnyat a ten, me ödrin e hwän he ka hmöyün kö Iakobo me Ioane. 42 Ke haba Iesu ame haw' ödrin, me ha ködrin, ka habe, Öbun e wä but hwakecin tavat adre me musö Aten ke je hnyei, a ödrin e hwen than hudrin; k' ame musi ödrin bi hnen je tuhödrin. 43 Ke ame ca he ka heläe unyibun: ke haba at unyibun ame weny he ka gan, me e ame he ka athnyaba köbun: 44 ke haba at unyibun ame weny

he ka bân, me e ame he ka athnyabaidrin hia. 45 Anyin e hnathu ame ca o Nokon at m' adre me huliwa kâu, ke so bi he ka hamen bi athnyaba, me ham anyin möt hnân hwaban möt anyin tavat ae se hia.

46 Ke ödrin e o but hnyi Jeriko: ke e ame he hmetu me laten ühedrin Jeriko me tavat ae se hia, me ame laba nöku Timaiö. Baratimao at sumat ae wadröu, eü hnyi baten gethen. 47 Ke a löng ut a Iesu but e, at Nazereta, me e ame hwän he ka hongot, ka habe, Iesu lö, a Nöku Davita, betenge ju gak. 48 Ke se hia tavat adre me thawä e, me me he ka laba hnyibu ju: ke e ame hongot tot bala, ka habe, Nöku Davita lö, betenge ju gak. 49 Ke haba Iesu ame todru me ha, ka habe, Hawä thö. Me adre me hawä wadröu, me ha kâu ka habe, Hwege thö, todrö, e ame hao u. 50 Me e ame degec ut anyin ükhaü, me todrö me he kö Iesu. 51 Ke Iesu ame thu kâu me ha, ka habe, Ieü ae wem oge me he ka mádrá köu? Haingen wadröu ame ha kâu, ka habe, Raboni, m' oge me he bi ka bwela. 52 Ke haba Iesu ame ha kâu, ka habe, He thö, u je so but hnen änyâm labageju. Me e ame ie bwele but, me he hoton eü hnyi gethen.

HNYIMAKAN 11.

KE ödrin e hakekeny jut Jerusalema ai, hnyi Bethefage me Bethania, hnyi bucen Elaio, me e ame kunä li laten me ha ködrü, ka habe, 2 He th' öbu ka hnyi taun cici öbu: ke öbu ka o but eling, öbu me he ka ie wä nokon asina adre noc, waleji a ödra tiga ca tabä bi; thang ut e, me hom dö jem. 3 Ke e ka hu at ame he ka ha köbu, ka habe, Ieü can öbu me änyä ang? me öbu ha thö, ka habe, E hu hany men e ge Than; ke e ame he ka ie kunä e jem. 4 Me ödrü me he but me wä nokon asina adre noc hakekenyá hwanuma eü hnyi gethen; me ödrü me thang ut e. 5 Me ame ha ködrü hnen keihen adre me tot eling, ka habe, Öbu me thang me hnân eü asina? 6 Ke ödrü me ha ködrin helä me hna ha ga Iesu: me ödrin e hn' ödrü but. 7 Ke ödrü me hom nokon asina kö Iesu me ip anyidrin je ükhaü hon; ke e ame tabä e. 8 Ke se hia tavat adre me ulolo je khaüödra eü hnyi gethen; ke haba keihen adre me so angin ta je üö ünny hnyi hnyot. 9 Ke haba tavat adre me bödra me tavat adre me he hoton, adre me hongot, ka habe,

Hosana ; Hnen hahic at ame o but hnyi ien Than : 10 Hnahic hnen dökhu ame o but, a dokhon kamöta a Davita : Hosana hnyi dok ae nua ethö.

11 Me e ame o but hnyi Jerusalema hnyi uma kap : ke e ame wá igigilö ta je únyi hia, ke e ame he hnyi sahac Bethania ai tha e me hnyat a twelv.

12 Ke nyi, ödrin e o but úhedrin Bethania, me e ame mekihnänem. 13 Ke e ame wá imeta hnyi dok ae sákáu ae hu lan, me e ame o but he ka wá ame ne hu wan : e ame o but ka hnyin, me ame wá a je lan thibi ; anyin a ca úen bi wa a meta. 14 Me e ame ha ka imeta, ka habe, E so ame ca he ke at ka an wan gam nyiele balua. Ke ame löng e hnen laten.

15 Ke ödrin e o but hnyi Jerusalema : me e ame dit ka hnyi uma kap, k' ame hwân he ka obâ tavat adre me úcú hnyin uma kap, k' ame hagutâ hnyikânâ ta je laulau anyin tavat adre me úcú mone, ke je taben lap anyin tavat adre me úco je biny ; 16 ke e ame ca hna ka ke at he ka he me kaia hnyin uma kap. 17 Ke e ame úne, me ha ködra, ka habe, Hawa, adre me ca sihnalimen, ka habe, Adre me he ka hwenyi ien umök uma, me Uma umen hic hobi káu ta ogo hnyei hia thithö ? ke öbun e hia but wia e me op a umen ta je venöu. 18 Ke a löng u hnen je taben tavat bihut, me hnyat sihnalimen, me adre me heleú deny he ka hlingâ e : anyin a ödrin e outen e, anyin ame láiâ tavat hia hnen hna úne.

19 Ke e ame he úheny hnyi taun hnyi je sahac.

20 Hnyi hnyomakatu ödrin e he hnyi baten imeta me ödrin e wá a ga mokcu e hwân hnyi hwecin. 21 Haba Peteru ame únykúme hmetu, me e ame ha káu, ka habe, Rabi, wá bi a melea thö imeta waleji u je hangá. 22 Ke haba Iesu ame thu me ha ködrin, ka habe, Labageju ka Khong. 23 E hnathu inya oge me ha köbun, ka habe, haba at ame he ka ha ka bucen ang, ka habe, Kec dö, me u me he ka ta but eú hnyi köiö ; k' ama ca hlohlo bi hnyi hnye-kon, k' ama labageju a ame he ka hwádâ hnen hna ha ; awe, e ame he ka hu e. 24 Anyin a wale, inya oge me ha köbun, ka habe, Haba ta je únyi hia öbun e he ka sumátâ hnyi hic, labagejon ju a öbun e he ka kap, m' öbun e he ka kap dö. 25 Ke öbun ka he ka tot me hic, öbun e ne hia but ip hnân ge ke at, hna degecâ but, me

me he Kamöbun ethö hnyi drany ka hna degecâ hnöbun hna hanyátâ.

27 Ke ödrin e o hmetu hnyi Jerusalema : ke e ame he hnyin uma kap, me ame o but káu je taben tavat bihut, me hnyat sihnalimen, me wahingat ; 28 me adre me ha káu, ka habe, Hnen musi anyi ia u me mádrâ ta je únyi e ? ke ia a ham köu musi he ka mádrâ ta je únyi e ? 29 Ke haba Iesu ame ha ködra, ka habe, Oge me he bi nya ka hnei öbun ge ke únyi, ke thu hmetu thö könya, me oge me he bi nya ka ha köbun musi oge me ányâ hnyin ta je únyi e. 30 Haba bapataiso anyi Ioane, me, únyi hnyi drany, hawa únyi ge at ? thu thö könya. 31 Me adre me úhnenamö, ka habe, Ate ne he ka ha, ka habe, Únyi hnyi drany ; me e ame he ka ha, ka habe, Ieú gabun öbun e ca kap e ? 32 Ke ate ne ha, ka habe, Únyi ge at—ödra outen tavat : anyin a ödra hia adre me köp Ioane helâ me perofeta. 33 Me adre me thu kö Iesu, ka habe, E ca khan' öhmun. Me haba Iesu ame ha ködra, ka habe, Oge me ca he minya inya ka ha köbun musi oge me ányâ hnyin ta je únyi e.

HNYIMAKAN 12.

KE e ame hwân he ka fuc ködra a deny ta je úhöfücú. Haba ke at ame ta hnyei vine, me the haginy igigilö, me hiny thop hnân hlec vine, me otílâ tap tue, me hna but ka tavat belök, me he but ka hnyi ke hnyei. 2 Ke haba hnyi úen e ame kunâ ke athnyaba ka tavat belök, me me he ka kap wan hnyei vine únyi ge tavat belök. 3 Me ödrin e kât e, me kot, me obâ ke ba únyi a hom. 4 Me e ame kunâ hmetu ke athnyaba ködra ; me adre me aat dö e hnyi ban, me ti okongoâ. 5 Ke e ame kunâ ke at bi, ke adre me hlingâ e : me keihen miny ae se hia ; adre osôâ keihen, me hlingâ keihen. 6 Ke tiga e bi unyin nokon a ónykúminy, me e ame kunâ minya but ködra hnyi obiny, haingen, Adre me he ka oganá nökkuk. 7 Ke haba tavat belök eling, me adre me úhaköuâ, ka habe, Wale but ang mátrân ; ai öbun, ate me he ka hlingâ me me tang omjehetin biju anyin ta je únyi. 8 Me adre me kât e me hlingâ, me khúâ but ka hnyi hoton hnyei vine. 9 Anyin a wale, ieú ame he ka mádrâ tuhan hnyei vine ? e ame he ka o me ohia tavat belök, me ham hnyei vine ka keihen. 10

Öbun e ca munyi aú hna sihnalimen, ka habe,

Haba veto ame degec ge tavat bi uma,
Me adre hia but ányá eling me hnán kopiny bahebet :

11 A mádrá e hnen Than,
K' ate me wá me láá?

12 Me adre me heleú deny he ka kát e ;
ke adre me ouden tavat ae se hia ; anyin
ae khan' ödra hnen hna úhöúú gadra : me
adre me hna but e me he but.

13 Ke adre me kuná káu keihen at Fare-
ssio, me hnyat Herodiane he ka tóuhneweny
e ge ta je ifucin. 14 Ke ödrin e o but, me
haingödrin káu, ka habe, At úne lö, e khan'
öhmun dut a u at ae hnathu, ke u me ca
ouden at : anyin a u me ca únykúme hnyi-
makan at, ke u at ame ná hnatho gethen
deny Khong ; hawa, e úcú he ka fat kö
Kaisara, hawa, hna ju? 15 Öhmun e he
ka ham, öhmun e ca he ka ham, hawa?
Ke e ame wáhmakhmeto anyidrin iyawö,
me e ame ha ködrin, ka habe, Ieú gabun
öbun e cubic nya? Hö jem denari m' inye
wá thö. 16 Me ödrin e ham. Ke e ame
ha ködrin, ka habe, Hnyimakö ia ang, ke
hna sihnalimen hnyin? Haingödrin káu,
ka habe, Kaisara. 17 Haingö Iesu ködrin,
ka habe, Ham dö kö Kaisara ta je únyi
anyi Kaisara, ke ka Khong ta je únyi
anyin Khong. Me ödrin e láá e gan hmá.

18 Me ame o but káu ta je Sadukaio,
wale tavat adre me ha, ka habe, e ba möt
hmetu únyi hnyi hna mok ; ke ödrin e hnö
e, ka habe, 19 At úne lö, haba Mose ame
sihnalimen kóta, ka habe, A ne mokcu ke
liamekeiny me ke at, k' ame mok degec
áíán, ke ba bi nokon, me hamen liamekeiny
mê he ka hom áíán he ka bi mátrán liame-
keiny mē. 20 E hu je liamekeiny a seven :
me ame faipoipo thö atö, me ame mokcu,
ke ba mátrán ; 21 ame ka hom dö e at a
loiny, k' ame mok minya ju, ke ba mátrán ;
ke heláe minya ge at a kuniny : 22 ke ba
mátránidrin hnyat a seven. Ke hwabödrin
hia thö ame mok minya ju momo. 23 Ame
he ka öiö ia gadrin hnyi möt hmetu? anyin
a hom hia hnen hnyat a seven me öiödrin.
24 Ke haba Iesu ame ha ködrin ka habe,
Hawa, öbun e ca monu can ang anyin a
öbun e ca wá hna sihnalimen me man ma-
niny Khong? 25 Anyin a ödra ka he ka
möt hmetu thö, me adre me ca he ka hu
öiödra, me úham ta momo ; ke adre me he
ka helá me ta je angela hnyi drany. 26
Ke haba ge tavat adre mokcu, me hnödra

hna he ka möt hmetu, hawa, öbun e ca
munyi aú bi hnyi tusi anyi Mose, waleji
hnyi hna ha hnyi uó ae údedö, ame ha káu
hnen Khong, ka habe, Inya ang Khongu
Aberahama, me Khongu Isaaka, me Khongu
Jakob? 27 Haba e, me ca Khongon tavat
adre mokcu, ke so bi tavat ae möt : e gan
hmá anyibun monu.

28 Ke ame o but ke at sihnalimen, wale
at ame löng anyidrin úhnenamö, ke a wá-
hmakhmetoá hnen hna thu soá ködrin, me
e ame hnö e, ka habe, Ewa hnanyibu a bán
hnyi ta je hnanyibu? 29 Iesu ame thu,
ka habe, Walang at a bán, ka habe, Isaraela
lö, löng ju, Haba Than a Khonguta, e thibi
Than a khaca : 30 ke hamám he ka hnyok
ka Than a Khongom ge hnyekom ae bekhöt,
me hanom ae bekhöt, me oúnykúmám ae
bekhöt, me tang hwegiám ae bekhöt. 31
Walang loiny, ka habe, Hamám he ka be-
tenge ge at ame laba hakekenyi u helá me
u bi. E ba hnanyibu ae gan hon li hna-
nyibu e. 32 Me ame ha káu hnen at
sihnalimen, ka habe, Awe, at úne lö, e so
hnám hna ha, a e khaca thibi ; ke ba ju ke
at, ke hake e : 33 ke haba he ka hnyok
káu ge hnyekon ae bekhöt, me oúnykú-
mánen ae bekhöt, me tang hwege ae bekhöt,
me he ka betenge ge at ame laba hake-
kenyá, helá me e bi, awe, e únyi hnathu e
hon ta je hut adre hudo bekhötá, me ta je
hut hia. 34 Ke a wá Iesu ae wisa hnen
hna thu, me e ame ha káu, ka habe, U ca
úsákáúö me dökhu dokhon Khong. Ke ba
hmetu at ae hwege he ka hnö e.

35 Ke Iesu ame úne hnyin uma kap me
ha, ka habe, Ieú ge hnyat sihnalimen ödrin
e ha, ka habe, haba Keriso, me Nöku Da-
vita? 36 Ke ame ha Davita únyi ge Hanu
Kap, ka habe,

Haingen Than ka Tuhök, ka habe,

Laba ju hnyi ke keihök a metök,

Ke ne o but oge me wia je iwahnai-
hmiöny möu, me hnán taben li hnye-
úcám.

37 Haba Davita ame hawá e me Than ; ke
ame he ka kámáu ka nokon bi? Me haba
tavat ae se hia adre me löng káu me adre
me senyin.

38 Ke e ame ha ködra hnyi hnen hna
úne, ka habe, Ö' bun áu ge hnyat sihnal-
limen, hnyat a wedra he ka he me je úkhaú
ae beú, k' adre me he ka nom ju ködra
hnyi ta je hna úcú, 39 ke wedra ta je tap
ae nua hnyi ta je sunago, ke ta je tap ae
beönua hnyi ta je bijeú : 40 a hnyat adre

me utá je uma umen je safac, ke hic beú hmá hnán iyawá; ame he ka hu ka hnyat eling hnaúhangó ae ti gan.

41 Ke e ame laba cicó tangen mone, k' ame wá hna khúá mone ka hnyi tang nhen tavat ae se hia: ke se hia tavat tren omjeú adre me khúá gáná. 42 Ke ame o but ke safac ae theduoc, me e ame khúá li mone ae úhnyúkong, a kodane. 43 Me e ame hawá laten me ha ködrin, ka habe, E hna-thu inya oge me ha köbun, ae gan hmá hna khúá mone nhen safac ang ae theduoc hudrin hia tavat adre me khúá ka hnyi tangen mone: 44 anyin a ödra hia adre me khúú únyi hnyi unöngöt gadra; ke haba momo, me e ame khúá únyi hnyi anyin theduoc ta je únyi hia ae hu gan, wale únyi hnán tuó anyin möt.

HNYIMAKAN 13.

E AME didrut úheny hnyi uma kap me ame ha káu ke at hnyi je laten, ka habe, At úne lö, wá bi je veto ae gan hmá me hna up veto! 2 Ke haba Iesu ame ha káu, ka habe, U je wá hna up veto eang ae gan? ame ca he ke veto ka nhen hon ke veto, ke adre me he ka tho degecá hia.

3 Ke e ame laba hon bucen Elaio cicó uma kap, haba Peteru me Iakobo me Ioane me Anederea ödrin e hnö duöngá e, me ha, ka habe, 4 Ha thö köhmun ame he ka o kehö ta je únyi e? ke ieú haten ame he but ka hwádá ta je únyi hia e? 5 Ke haba Iesu ame hwán ka ha ködrin, ka habe, Wá eáú e nye omonu öbun dut ke at. 6 Anyin a at se hia adre me he ka o hnyi iök, me ha, ka habe, Inya ang; ke adre me he ka omonó tavat ae se hia. 7 Ke öbun ka löng hwan ta je vat me hon vat, ca ot bi: anyin ae úcú he ka o ta je únyi e; ke tiga hia bi obiny. 8 Anyin ame he ka tot ke hnyei ka ke hnyei, me ke dökhü ka ke dökhü: ame he ka hu je hwiöi hnyi ke je dok; ame he ka o ta je hmiá. Wale hwán ta je vec.

9 Ke wá eáú öbun, anyin adre me he ka hn' öbun ka tavat úhnei; ke adre me he ka osöi öbun hnyin ta je sunago; ke öbun e he ka todrö hnyi hnyimakan ta je gavena me than, can inya hnán ohnathóá ködra. 10 Ke úcú he ka mē khetá evangelia ka ta je hnyei hia thithö. 11 Ke ödra ka he ka lili öbun, me hn' öbun, ca he ka ie únyküme únyi hnán he ka ha: ke haba

hofuc adre me he ka ham köbun hnyi úen eling, ha thö: anyin a ca öbun ling tavat öbun e ha, ke Hanu Kap bi. 12 Ame he ke liamekeiny ka hna liamekeiny mé ka mok, ke helá kamen ka nokon; ke ame he lakon ka tot úcon kamödrin me hinyödrin, he ka hling' ödrü. 13 Ke ame he tavat hia ka húkötí' öbun can iök, ke haba at ame he ka tethmä ke ne o but obiny, ame he ka möt.

14 Ke öbun ka wá únyi ae ikiki, at ame okongoá, ame tot hnyi dok a ca nhen bi (e so he ka wáhmakhmeto ju nhen at ame áú) wale úen ae úcú he ka kec nhen tavat Juda ka hnyi je bucen: 15 ke haba at hnyi hon uma, me so e ame ca ut bi he ka dit me hom ke únyi únyi hnyi uma: 16 ke haba at hnyi ta hnyei, me so e ame ca hmetu bi he ka hom anyin úkhaú. 17 Ekölö ge tavat a ödra erkin, me tavat adre me úasin hnyi úen eling! 18 Ke hic ju öbun me me ca he ka o únyi e hnyi úen ae megiö. 19 Anyin ame he ka hu vec hnyi je bong eling, ae ba heláe hnyi hwán hna op ta je únyi hia, waleji a op nhen Khong ke ne o but walang ang, ke ba minya ame he ka heláe. 20 K' ame ne ca owakhaletá ta je bong nhen Than, me ba at ama möt: ke so bi, can tavat adre hia but úca, waleji e ame úca, me e ame he ka owakhaletá ta je bong. 21 Ke a ne ke at ame he ka ha köbun, ka habe, Wá bi, Keriso but ang, ke wá bi, e but e; ca kap bi: 22 anyin ame he ka o ta je Keriso thoi, me ta je perofeta thoi, ke adre me he ka omanená ta je haten me ta je únyi hnán láiiá, m' adre me he ka omonó tavat adre úca, a ne ca pason. 23 Ke wá eáú öbun: wá bi, oge me omanená báná köbun.

24 Ke haba hnyi je bong eling, hwaban hna úöveci eling, me ame he ka mene-kholom but seúnö, k' ame ca he ka melam tehi, 25 k' ame he ka labö kölu ta je okhú únyi hnyi drany, ke adre me he ka jijingá ta je man ethö hnyi drany. 26 Me adre me he ka wá Nokon at ame he ka o hnyi ta je úlá tha e me man ae gan me hmanenang. 27 Me e ame he ka kuná anyin ta je angela he ka úkhacaköúá nhen ta je hna úca únyi hnyi je ang a vak, hwán hnyi can hmeledrany ke ne o but hnyi can drany.

28 Ná th' öbun úhöúcé me imeta: e tiga but bi je anginy, ke hlau je lan, me khan' öbun dut ae hakekeny hnyeaun; 29 heláe minya öbun, öbun ka wá ta je únyi eling ame o, me khan' öbun dö ae hakekeny jut,

ae but ang hnyi hwanuma. 30 E hnathu inya oge me ha köbun a g' ame ca he ka hia dö ang, ke ame he ka hwädá ta je únyi hia e. 31 Ame he bi ka hia drany me hmeledrany, k' ame ca he ka hia hok ta je hofuc. 32 Ke haba bong me awa eling me ba at ae khana, e ca khana ta je angela hnyi drany, me Nokon, ke hake Kamen thibi. 33 Wá eáú öbun, hmáká thö me hic: anyin ae ca khan' öbun úen. 34 Ame helá me ke at ame he but, me mé laba hnyi ke hnyeí, me hna but umen uma, me ham musi ka lathnyabainy, ame ve khene anyidrin huliwa, me húna ka at ame tuó hwanuma he ka hmáká. 35 Anyin a wale, hmáká thö: anyin ae ca khan' öbun úen ame he ka o tuhan uma, ame ne sahac, ame ne wanbenset, ame ne hnyi úen ame kokok khoto, ame ne hnyomakatu: 36 wá e nye ie o me ö bun öbun e mokut. 37 Ke haba hnök hna ha köbun, inya oge me ha minya ka tavat hia, ka habe, Hmáká thö.

HNYIMAKAN 14.

HWABAN lo li bong adre me he ka bi paseka, me areto adre ca levená bi: haba je taben tavat bihut me hnyat sihnalimen, adre me heleú deny he ka kát e ge hofuc iyawö, m' adre me he ka hlingá e: 2 anyin a haingödra, ka habe, Ca hnen bi hnyi bijeú, wá e nye imonumonuny tavat.

3 Ke e ame laba Bethania hnyi uma umen Simona a lepera, e ame laba ka han, me ame o but ke momo ae hu gan kaia alabasa tangen muro, hing narado ae gan hwaban; ke haba momo ame tho kaia, me hingálá hnyi hon ban. 4 Ke haba keihen ame hmönyidrin me ha, ka habe, Hnán eú he ka okongoá heláe muro? 5 Anyin a haba muro ang, adre ne úco, me úhnyúkong theri haded je denari hwaban, m' adre me he ka ham ka ta je theduoc. Me adre me ulidro momo. 6 Ke haba Iesu ame ha, ka habe, Hna ju momo; ieú gabun öbun e ovecá e? e so hnen hna mádrá könya. 7 Anyin a e bala ang unyibun ta je theduoc, ke khan' öbun he ka mádrá so ködrin hnyi úen öbun e weny: ke oge me ca he bi nya ka laba bala unyibun. 8 A hia but momo ányá hnen hna khana: e ame bán ka ösúá unyik hobi káu hnödra hna he ka könim nya. 9 Ke e hnathu inya oge me ha köbun, ka habe, haba ta je hnyeí hia thithö hnyi hmeledrany, adre me he ka khetá hnyin

uthumetu ae so, me adre me he minya ka haimemená hna ányá hnen momo ang, hnán he ka únykúme káu.

10 Ke ame he Juda Isakariota, hanen hnyat a twelv, ka je taben tavat bihut, me me he ka alecuá e ködrin. 11 Ke adre me löng ut, me adre me senyin me ha báná he ka ham káu mone. Me e ame heleú deny ae úcú he ka alecuá e.

12 Hnyi bong a bán hnyi bijeúiny areto adre ca levená bi, a úen he ka hlingá paseka, me ame ha káu laten, ka habe, Ewa dok ae wem öhmun e he ka penapena m' u me he ka han paseka? 13 Me e ame kuná li laten me ha ködrü, ka habe, He th' öbu ka hnyi taun, k' ame he ka ukhanö möbu ke at ame vadren kaia ae lup: he th' öbu hoton; 14 ke haba uma e ame he ka dit ka hnyin, ha th' öbu ka at ae tren uma, ka habe, Haingen At úne, ka habe, Ewa hnyeuleny je atkanyua, wale oge me he ka tha han paseka hnyin me latök? 15 Me e ame he ka hamen kú köbu hnyeule ae gan ethö adre me bi onyen me penapena: awe, penapena ju ling hobi kötin. 16 Me ame he but li laten, me o ka hnyi taun, me wá helá me hnen hna ha ködrü: me ödrü me penapena paseka.

17 Ke hnyi sahac e ame o but tha e me hnyat a twelv. 18 Ke ödrin e tiga laba me han, haba Iesu ame ha, ka habe, E hnathu inya oge me ha köbun, ka habe. Ame he ke at gabun ka alecuo nya, wale at ame tha han mönya. 19 Me ödrin e hwán he ka hmak, me ve ha gaga káu, ka habe, Ia, inya? 20 Me e ame ha ködrin, ka habe, Ke at hnyi twelv at ame tha hnú jeú mönya hnyi mini. 21 Anyin ame he ka he but Nokon at heláji me hna sihnalimen gan: ke ekölö ge at eling ame he ka alecuá Nokon at! E so ka at eling adre ne ca hnokoá e.

22 Ke ödrin e tiga han, ke e ame hom areto, me oleá, me thuthu me ham ködrin, me ha, ka habe, Hom d' öbun: walang unyik. 23 Ke e ame hom utköö, me oleá, me ham ködrin: ke ödrin hia ödrin e ic. 24 Ke e ame ha ködrin, ka habe, Walang drök únyi hnyi úhinhinköu, wale adre hingálá hobi káu tavat ae se hia. 25 E hnathu inya oge me ha köbun, ka habe. Oge me ca he hmetu, ka hnyi ijem wan vine, ke ne o but oge me he ka ijem a teb únyi hnyi dökhü dokhon Khong.

26 Ke ödrin e hia but hai khumöng, me ödrin e he but ka hnyi bucen Elaio.

27 Ke haba Iesu ame ha ködrin, ka habe, Öbun e he bi hia ka thö thö: anyin adre bia but sihnalimen, ka habe, Oge me he ka kot at ame tuö je mamoe, me ame he ka vese but ta je mamoe. 28 Ke iny ka möt hmetu thö, oge me he ka 'bök Galiläia ai, ke bilibun biju. 29 Ke haba Peteru ame ha kâu, ka habe, Ödrin e ne he hia thithö ka thö thö gam, o ge me ca he ka hnyi thö thö. 30 Ke haba Iesu ame ha kâu, ka 'habe, E hnathu inya oge me ha köu, a haba u, hnyi bong ang, wale eâu hnyinghet, ke tiga ca olo bi kokok khoto, me u me he ka okun ivinö nya. 31 Ke e ame fuc hwege hmönyin, ka habe, A ne hamök he ka tha mok möu, me oge me ca he ka ivinö u. Heläe minya hna ha gadrin hia.

32 Ke ödrin e o but ka hnyi ke utkânâ Gethesemane ien: me e ame ha ka laten, ka habe, Mē laba ju eang, inya mē he ju ka hic. 33 Me e ame hum Peteru me Iakobo, me Ioane, me hwân he ka gan hmâ hlohlo me ti hmak hmönyin. 34 Ke e ame ha ködrin, ka habe, Ame vec gan hmâ hanuk, helâ me mok: laba ju eang me hmâkâ. 35 Me e ame he úhnyükong, me ta ju eú hnyi kânâ me hic me sumâtâ he ka hia awa eling gan, a ne ca pason. 36 Me e ame ha, ka habe, Aba, Cica, e khandö u he ka ányâ ta je únyi hia; hom dö gak kaia eang: ke ca ányâ hoton wek, ke so bi wem. 37 Me e ame o me ö 'drin, ödrin e mokut, me haingen kö Peteru, ka habe Simona lö, hawa, u me mokut? e ca khandö u he ka hmâkâ hnyi awa a khaca? 38 Hmâkâ th' öbun me hic, m' öbun e ca dit bi ka hnyi úcúbic: e hnathu ame weny hanu, ke sēnyin bi unyin. 39 Ke e ame he hmetu ka hic, k' ame ha thibi hofuc a khaca. 40 Ke e ame o hmetu me ö 'drin ödrin e mokut, anyin ae hmak je emaködrin; ke ca khandö ödrin únyi hnân thu kâu. 41 Ke e ame okun o hmetu, ke haingen ködrin, ka habe, Mokut ju öbun walang ke menâ: soju ang; a o thö awa; wâ bi, adre hia but alecuâ Nokon at ka hnyi je hnyamen tavat ae kong. 42 Todrö, ötin e he thö: wâ bi, wale but ang at ame he ka alecuo nya.

43 E ame tiga ha hofuc me ame ie o but Juda hanen hnyat a twelv, ke tha e mē tavat ae se hia adre me vhat hele vat me utöhmu, únyi ge je taben bihut, me hnyat sihnalimen, me wahingat. 44 Haba at ame he ka alecuâ e ame hia but ha ködra haten, ka habe, Haba at eâu oge me he ka úcimhnyimak mē, me wale bi e, kât ju, me

lelö, me tuö via e. 45 Ke e ame o but, me e ame ie he kâu, me ha, ka habe, Rabi; k' ame úcimhnyimak mē. 46 Me adre me binöbeny kâu, me kât e. 47 Ke haba ke at gadrin ödrin e útitilen ame oc dö hele vat, me kot athnyabainy at bihut ae nua, me subâ but hnyikönyen. 48 Haba Iesu ame ha ködra, ka habe, Öbun e o me je hele vat me je utöhmu, heläke me úcon at ae venöu he ka hum nya? 49 Tha inya möbun hnyi je bong hnyi uma kap oge me úne, k' öbun e ca köt nya: k' adre me ányâ únyi ang me me hwädâ hna sihnalimen. 50 Ke ödrin hia ödrin e hna but e me kec ut.

51 Ke ame he hoton ke hidröu a wadrâ unyin bi ecmano lino, ke adre me kât e; 52 me e ame hna degecâ but ecmano lino, me kec gadra, ke ba úkhaú.

53 Ke adre me lili Iesu thö ka at bihut ae nua: me ame tha úkhaçaköu mē ta je taben tavat bihut, me wahingat me hnyat sihnalimen. 54 Haba Peteru ame omise he hoton ka hnyi hnyin uma umen at bihut ae nua; ke e ame tha laba me je lathnyaba; k' ame hnyi hlök hnyi hnyimakan meic. 55 Haba je taben tavat bihut, me tavat úhnei hia, me ödrin e elâm at ohnatho úcú Iesu he ka hlingâ; ke ba at adre me wâ. 56 Anyin ae se hia tavat adre me ohnathoâ thoi gan, ke ca tha deny bi hnödrin je hna ha. 57 Me ame todrö keihen me bifuco thoiâ e, ka habe, 58 Öhmun e löng e ame ha, ka habe, Oge me he ka kia uma kap eang adre me mádrâ ge je hnyam, ke hnyi kun ta bong oge me he ka otilâ khaca adre ca mádrâ ge ta je hnyam. 59 Ke ca tha deny bala bi hnödra je hna ha. 60 Me ame todrö taben bihut ae nua hnyi wanben, me hnei Iesu, ka habe, E ba hnân thu gam? ieu hnödra hna ohnatho gam? 61 Ke e ame laba hnyibú, me ca thu bi. Me ame hnö hmetu e hnen taben tavat bihut ae nua me ha kâu, ka habe, U Keriso, Nokon At adre Ogânâ? 62 Haingö Iesu ame ha, ka habe, Inya ang: ke öbun e he ka wâ Nokon at ame laba hnyi ke keihen metân man ame tha he me ta je úláiny drany. 63 Haba taben tavat bihut ae nua ame kia anyin je úkhaú me ha, ka habe, Hnân eú hmetu ka ke at he ka ohnatho? 64 Öbun e hia but löng hofuc bi gan: ieu únykúmenöbun? Me adre me thamúa hia ae úcú but kâu he ka mok. 65 Ke haba keihen adre me hwân he ka hangöjá e, me lan hnyimakan, me khaú e, me ha kâu, ka

habe, Perofeta thö: ke haba ta je athnyaba adre me hom e me khaü.

66 Ke haba Peteru ame laba eü hnyi hnyeüle, me ame he but káu ke hlu, athnyabainy taben tavat bihut ae nua; 67 ke e ame ö Peteru ame hlök, me e ame wáhmá e, me ha káu, ka habe, U minya ji unyin at Nazareta jia Iesu. 68 Ke e ame ivinö me ha, ka habe, E ca khanö nya, ke oge me ca wáhmakhmeto bi hnám hna ha: ke e ame didrut ka hnyi poretikö; me ame kokok dö khoto. 69 Me ame wá hmetu e hnen athnyaba a hlu, me e ame hwân ka ha ka tavat adre me útitilen, ka habe, Wale ke hanödrin. 70 Ke e ame ivinö hmetu. Ke ca bec bi, haba tavat adre me útitilen adre me ha hmetu kö Peteru, ka habe, E hnathu, u hanödrin; anyin a u at Galilaia. 71 Me e ame hwân he ka ha hofuc úhangö me khemanyin, ka habe, E ca khanö nya at eling öbun e ha. 72 Ke ame ie kokok khoto, a loiny. Me Peteru ame únykúme hofuc a ha Iesu káu, ka habe, U me he ka okun ivinö nya ke tiga ca olo bi kokok khoto. Me e ame únykúme, me tenge.

HNHYIMAKAN 15.

A HNYOMAKATU but, me ame ie uhnenamö je taben tavat bihut, me wahingat, me hnyat sihnalimen, me tavat úhnei hia, me adre me cö Iesu, me lelö thö e, me hna but e kö Pilato. 2 Haba Pilato ame hnö e, ka habe, U Tuhan at Juda? Me e ame thu, me ha, ka habe, U me ha e. 3 Ke se hia ta je hofuc ame bifuco gan je taben tavat bihut. 4 Haba Pilato ame hnö hmetu e, ka habe, E ba hnân thu gam? wá bi e se hia ta je hofuc adre me bifuco köu. 5 Haba Iesu ame ca thu hmetu thö ke hofuc, me haba Pilato ame láia.

6 Ke haba hnyi bijeü e ame labö thang ködra ke at adre me ca, at a wedra. 7 Ke e hu ke at Barabasa ien adre me tha ca me tavat adre me thu musi, hnyat adre me úhlingö hnyi hna thu musi. 8 Ke ame he tavat ae se, me hwân he ka sumâtá ama ányá ködra helá me hnen hna labö ányá. 9 Ke haba Pilato ame thu ködra, ka habe, Hawa, e webun oge me he ka thang ut köbun Tuhan at Juda? 10 Anyin a e ame wá but a g' adre hna e hnen je taben tavat bihut can ihuhnyinköu. 11 Ke haba je taben tavat bihut adre me cubec tavat ae se hia he ka ha, ka habe, E so he ka

thöng Barabasa bi ködra. 12 Ke haba Pilato ame ha hmetu me thu ködra, ka habe, Ie únyi oge me he ka ányá káu, waleji öbun e hwenyi ien, me Tuhan at Juda? 13 Me adre me hongot hwege hmetu, ka habe, Osatauroá thö. 14 Ke haba Pilato ame ha ködra, ka habe, Hnân eü, ie únyi ae kong e ame ányá? Ke adre me ti ha hwegiá, ka habe, Osatauroá thö e. 15 Ke haba Pilato ame weny he ka osenyinâ tavat ae se, me e ame thöng Barabasa but ködra, ke a hia but osoi Iesu, e ame hna but e m' adre me he ka osatauroá.

16 Haba ta je soja adre me lelö e ka hnyi hnyeule eü, wale a umen than; ke adre me úkhacaköuâ ta je soja hia. 17 Me adre me okhavá e ge úkhaü ae udrudrá hlit, me hwáwá je úö ae údedö hnân korona, me obicá káu; 18 me adre me hwân ka nom káu, me ha ka habe, E, Tuhan at Juda! 19 Ke adre me kot ban ge hlowe, me hangöjá e, me cibouca me nom káu. 20 Ke adre hia but hiá e, me adre me uny jut úkhaü ae udrudrá hlit, me okhavá e ge je úkhaüen bi. Ke adre me lelö but e káu he ka osatauroá.

21 Ke adre me musi Simona at Kurene at ame he unyidra úheny hnyi ta hnyei, kamö Alesanedo me Rufo, he ka vaden anyin satauro. 22 Ke adre me hom e ka hnyi dok Gologatha ien, bongon hna wia, hnen ibokomok. 23 Ke adre me ham káu waina adre úthueniken me muro: ke e ame ca kap. 24 Ke adre me osatauroá e me khenâ anyin je úkhaü, adre me uglekóbá, ame ne he ka anyi ia eáu. 25 Ke hnyi awa a kuniny adre me osatauroá e. 26 Ke walang tusi adre sihnalimen a hnödra hna bifuco e, ka habe, **TUHAN AT JUDA.** 27 Ke lo li at venöu adre me tha osatauroá më; ke at hnyi ke keihen a metá, ke ke at hnyi ke keihen a me. 29 Haba tavat adre me he eling adre me hiá e, me nyinyiká je bödra me ha, ka habe, E! u at ame he ka kia uma kap me otilá hmetu hnyi kun ta bong, 30 omeli u thö, me utut úhem hnyi satauro. 31 Heláe minya je taben tavat bihut me tavat sihnalimen adre me hiá e, me ha, ka habe, E ame omelö keihen; e ca khana bi he ka omelö e. 32 E so e utut walang ang Keriso, Tuhan at Isaraela úheny hnyi satauro, m' ate me he ka wá me labageju. Ke habe li at adre tha osatauroá më, ödru me hiá minya.

33 Ke haba hnyi awa a siksiny ame menekholom but hnyei hia ke ne o but

hnyi awa a naininy. 34 Ke haba hnyi awa a naininy, Iesu ame hongot hwege, ka habe, Eloi, Eloi, lama sabakethani? bongon adre wia, Khonguk, Khonguk lö, ieu gam u me hnö nya but? 35 Ke a löng ut keihen adre me ütiten, haingödra, ke habe, Wá bi, e ame hao Elia. 36 Me ame wadring dö ke at me húlúlúá ohmanená hnyi vinega, me ip hon obiny hlowe, me habelen e, me ha, ka habe, Mě khanang; e so ate me wá ame ne he Elia ka o he ka hom e hnyikánái. 37 Ke a hia but Iesu hongot hwege, me e ame moku. 38 Ke ame khekhe lo but mano singiny uma kap hwán ethö ke ne o but eú. 39 Ke a wá but keneturio, at ame tot cicö e, a g' ame hna but heläe hanon, me haingen, ka habe, E hnathu Nokon Khong at ang. 40 Ke waleú omomo adre me wá sákáúá; ke e unyidrin Maria Magadaleña, ke Maria hinyö Iakobo úhnyükong me Jose, ke Salome; 41 wale hnyat ödrin e he hoton me bi athnyabainy ke tiga e hnyi Galilaia; ke se hia minya omomo waleji adre me tha he mē Jerusalem aia.

42 A sahac ut, anyin a bong Penapena, wale bong hakekenyá sabath, 43 me ame he but Josefa at Arimathea, a at úhne-namö adre ogáná, at ame halubahingen dökhü dokhon Khong; me e ame hwege me didró kö Pilato, me sumátá unyi Iesu. 44 Ke ame láia Pilato anyin a logot mok: me e ame hawá keneturio me hnö e, ka habe, E kueny jut ka mok. 45 Ke ka löng e únyi ge keneturio, me e ame ham unyin kö Josefa. 46 Ke e ame úco ecmano lino, k' ame hom but e hnyikánái, me lan e ge mano lino, me ip e hnyin erkemok adre tho hnyi kic; ke e ame tetebulo veto ka hnyi hnyimen erkemok. 47 Ke haba Maria Magadaleña, ke Maria hinyö Jose, me ödrü me wá dok adre ip e hnyin.

HNYIMAKAN 16.

HWABAN dö sabath, haba Maria Magadaleña, ke Maria hinyö Iakobo, ke Salome, me ödrin e úco ta je utö ae bo so, m' ödrin e o me botro káu. 2 Me haba hnyi haolany hnyi bong a bâniny wik, me ödrin e o but ka hnyi erkemok hnyi ibioiny seúnö. 3 Ke ödrin e tiga úhaköúá, ka habe, Hamö ia he ka tetebulo veto hobi kötin únyi hnyi hnyimen erkemok? 4 ke ödrin e bwele thö me wá a g' adre hia but tetebulo veto: anyin ae gan

hmá. 5 Me ödrin e didró ka hnyi erkemok, me wá hidróu ame laba hnyi ke keihen metá, a khaú hau; me ödrin e ot. 6 Ke haingen ame ha ködrin, ka habe, Ca ot bi: öbun e elöm Iesu at Nazareta waleji adre me osatauroá: a möt hmetu thö e; e hia but ang: wá bi dok ödrin e ip e hnyin! 7 Ke he th' öbun ka ha ka laten me Peteru minya, ka habe, A bân dut Galilaia ai ke bilibun biju: öbun e he ka ionny eling mē, heláji me hnen hna ha köbun. 8 Me ödrin e didrut me kec úhedrin hnyi erkemok; anyin ame o ködrin öbubuny me ot: ke ödrin e ca fuc bi ka ke at; anyin a ödrin ot.

9 Ke a hia but todrö hnyi haolany hnyi bong a bâniny wik, me e ame bân ka manen kö Maria Magadaleña, waleji a obá je demoni a seven únyi hnyin. 10 Haba momo ame he me ha ködrin hnyat a labö tha e mē, waleji ödrin e tiga tenge hlöuhlöu. 11 Ke ödrin e löng ut a e a möt hmetu thö, ke a manen dut káu, ke ödrin e ca kap hofuc.

12 Ke hwaban ta je únyi eling e amē manen ae ke bongon bi ka li at gadrin, ödrü tiga he hnyi gethen ame he ka hnyi ta hnyei. 13 Me ödrü me he me omanená ka lahanödrü: ke ödrin e ca köp ödrü minya.

14 Ke hwaban dö e e ame manen ködrin a eleven ödrin e tiga laba ka han; me e ame ú ödrin can anyidrin ca labageju me khöt a je hnyekudrin, anyin a ödrin e ca kap bi hna ha hnen hnyat ödrin e wá e a ga möt hmetu thö. 15 Ke haingen ködrin, ka habe, He th' öbun ka hnyi hmeledrany hia thithö ka khetá evangelia ka tavat hia adre op. 16 Haba at ama labageju me adre bapataisoá, me ame he ka möt; ke haba at ama ca labageju bi, e ame he ka hnaúhangö. 17 Ke walang je haten ame he ka tha he me tavat labageju: adre me he ka obá ta je demoni ge iök; adre me he ka fuc hnyi ke je hwen; 18 adre me he ka kát je on, ke adre ne ijem ke únyi hnân mekiny, me ame ca he ka okongu ödrin; adre me he ka ip je hnyamödrin hon ta je komok, me ame he ka möt dö.

19 A hia but ha ködrin Than, me adre me kap dö e hnyi drany ai me ip e hnyi ke keihen metán Khong. 20 Me ödrin e he but me khetá hnyi ta je hnyei hia, ke Than ame tha huliwa mödrin, me ohnathö ta je hofuc ge ta je haten ame tha he. Amen.

LUKA.

HNYIMAKAN 1.

A NYIN a haba tavat ae se adre me hwân he ka sihnalimen gaga me omanená ta je únyi ame hwádá kôta, 2 helâ me hnödra hna ham kôta, waleji ate me wâ, k' ötin e bi athnyabainy hofuc únyi hnyi can, 3 anyin a wale, oge me únykúme bi nya he ka sihnalimen gaga kôu taböny than Theofila, anyin oge hia but wâ gaga ke wisa ta je únyi únyi hnyi can; 4 m' u me he ka wâ thö hnathuiny ta je hofuc adre me ná kôu.

5 Haba hnyi je bong bongu Heroda a than Juda, me wale ke at bihut Zakaria ien, únyi hnyi dö anyi Abia: haba ien áiân me Elisabeth, a mátrâni Arona. 6 Ke ödru li at ae wisa hnyi hnyimakan Khong, k' ödru me vheno ta je hnanyiibu ke ta je hna otílâ hnen Than, ke ba monu gadru. 7 Ke ba nökudru anyin ae toúnyi Elisabeth, ke ödre li hingat ut.

8 Ke e ame tiga vheno hanymen at bihut hnyi hnyimakan Khong hnyi hna khene hanymen kâu, 9 me hamen he ka dit ka hnyi Uma kap umen Than he ka le utö ae bo so, hoton hwakecin at bihut. 10 Ke hnyi awa adre me le utö ae bo so, ame laba eú tavat hia ae se adre me hic. 11 Ke wale ame manen dut kâu angela anyin Than, ame tot hnyi ke keihen a metân taben le utö ae bo so hnyin. 12 Ke a wâ but Zakaria, me e ame hmak, ke ame o but kâu ot. 13 Ke haingen angela ame ha kâu, ka habe, Zakaria lö, ca ot: anyin adre me löng hijâm hic, me ame he áiâm Elisabeth ka hnokoâ nokom, ke u me he ka hwenyi ien Ioane. 14 Ke u me he ka senyin me hobâ; k' ame he tavat ae se hia ka senyin hnyi hna hnokoâ e. 15 Anyin a e ame he ka gan hnyi hnyimakan Than, e ame ca he ka ijem waina me grâg; ke e ame he ka unöngöt ge Hanu Kap únyi hnyi hnyekon hnyen. 16 Ke se hia lakon Isaraela e ame he ka ohmeto ka

Than a Khongudrin. 17 Ke e ame he ka bán hnyi hnyimakan hnyi hanu me man mani Elia, he ka ohmeto hnyekon ta je kamen ka lakudra, me tavat adre hwen höcö ka hnyi metâ anyin tavat ae wisa: me me he ka ányáwia tavat adre penapena hobi kâu Than. 18 Ke haba Zakaria ame ha ka angela, ka habe, Ame he ka kâmâu ka khandö nya e? anyin oge hingat ut ang. ke someca but ang öiök. 19 Haba angela ame thu kâu, ka habe, Inya ang Gaberiela, at ame tot hnyi hnyimakan Khong; a khunö nya he ka ha kôu, me omanená kôu úthumetu eang ae so. 20 Ke wâ bi, u me he ka hum, ame ca he ka khandö u fuc ke ne o but hnyi bong adre me he ka ányâ hnyin ta je únyi e, anyin a u je ca kap hok hofuc, wale ame he ka hwádâ hnyi ün e. 21 Ke haba tavat adre me halubahing Zakaria k' adre láia anyin ae bec hnyi uma kap. 22 Ke e ame didrut me ca khana but fuc ködra: me adre me wâ ae hu únyi a manen kâu hnyin uma kap: ke e ame labö hmâhmâ ködra ke hum bala bi. 23 Ke ame um dö je bonginy anyin huliwa, me e ame he but ka hnyi hnyaban.

24 Hwabân ta je bong e, ame erkin dut Elisabeth a áiân; me e ame oiyongá e bi hnyi faiv ta tehi me ha, ka habe, 25 A mádrâ helâe kônya Than hnyi ta je bong e ame ö nya hnyin, he ka degec anyik hmélma hnyi hnyimakan tavat.

26 Ke haba hnyi tehi a siksiny, haba Khong ame kunâ angela Gaberiela ka hnyi taun hnyi Galilaia Nazareta ien, 27 ka ke hing hlu hanen lap anyi Davita, a úkôcö me ke at Josefa ien; haba ien hlu eling me Maria. 28 Haba angela ame didrö kâu me ha, ka habe, E, u at adre betenge gan lö, e but unyâm Than. 29 Ke haba hlu ame hmak ge hofuc eling, me únykúme iéú bongon iouny eling. 30 Ke haingen angela ame ha kâu, ka habe, Maria lö, ca ot: anyin a Khong ame betenge gam. 31 Ke wâ bi, u me he ka erkin, me hnokâ da, me u me he ka hwenyi ien Iesu. 32

E ame he ka gan, ke adre me he ka hwenyi ien e Nokon At ae Beönuu : ke ame he Than a Khong ka ham kâu theron anyi Davita a kamen : 33 ke e ame he ka musö lap anyi Jakob nyiele balua ; ke ame he ka ba obiny dokhon dökuu. 34 Haba Maria ame ha, ka habe, Ame he ka kâmâu únyi e, anyin a iny tiga ca wâ bi бага? 35 Ke haba angela ame thu me ha kâu, ka habe, Ame he ka o köu Hanu Kap, me ame he ka tungi u hnen man maniny Beönuu : anyin a wale adre me he ka hwenyi ien at adre me he ka hnokoâ, me kap ; a Nokon Khong. 36 Ke wâ bi, haba liamekeiny möu a Elisabeth e erkin dut, ka someca but : ke siksiny ju ang je tehiny, waleji adre me ha me toúnyi. 37 Anyin ae ba hofuc únyi ge Khong ame he ka ba maniny. 38 Ke haba Maria ame ha, ka habe, Wâ bi, iny hlu a athnyabainy Than ; e so e hwâdâ bi kõnya hoton hnâm hna ha. Haba angela ame hna but e.

39 Hnyi je bong eling Marie ame tot me he mweimwei ka hnyi ke keihen hnyeï ae hu bucen, ka hnyi ke taun hnyi Juda ; 40 me didrö ka hnyi uma umö Zakaria, me iouny me Elisabeth. 41 Ke a löng ut Elisabeth ibifuci Maria, me ame uthmâhmâ mendreng eü hnyi hnyekon ; ke unöngöt dö Elisabeth ge Hanu Kap ; 42 me e ame hwân ka fuc hwege, ka habe, Hnâm hnahic hon omomo, ke e hnahic ut wan hnyekom. 43 Únyi ua kõnya ang, a g' ame o but kõnya hinyen Tuhök? 44 Anyin a wâ bi, ame tiga o but ka hnyi li hnyikönyök ibifucâm, me ame uthmâhmâ thö mendreng eü hnyi hnyekuk ge senyin. 45 Hnahic hnen momo ame labageju ; anyin ame he ka hwâdâ ta je únyi hia thithö adre ha kâu únyi ge Than. 46 Ke haingö Maria, ka habe,

Haba hnyekuk ame ogânâ Than,
47 K' ame hobâ hanuk ka Khong At a omeli nya.

48 Anyin a e ame wâ athnyabainy a hlu, walönya at hnyikânâi :

Anyin a wâ bi, hwân walang ang ame he ta je dö hia ka hao nya me iny hnahic.

49 Anyin a haba at ae man ame hia but ányâ kõnya ta je únyi ae gan hmâ ; Ke e kap ien.

50 E ame omanená anyin ibetengiö ka ke dö me ke dö,

A hnyat adre me outen e.

51 E ame omanená tang hwege ge hnyamen ;

K' ame oveseâ but tavat hnyi biganiny hnyekudra.

52 E ame hagutâ je than únyi hnyi hon anyidra ta je theron,

Me ogöranyâ tavat a ödra hnyikânâ.

53 E ame osekunâ tavat a ödra mekihnâ-nem ge ta je únyi ae so,

K' ame kunâ wia tavat tren omjeü ke ba únyi.

54 E ame hom hadruâ athnyabainy a Isaraela,

K' ame únykúme ibetengiö,

55 (Helâji me hnen hna ha ka lakamöta)

Kö Aberahama me je mátrániny nyiele balua.

56 Ke Maria ame tha laba më ame ne kun ta tehi, me e ame hmetu but ka hnyi hnyaban.

57 Ke a hwâdâ úen ame he Elisabeth ka hnokoâ ; ke e ame hnokoâ da. 58 Ke a löng ut tavat adre me laba hakekenyâ me lap a je liamekeiny më a g' ame betenge gan Than ; me adre me tha senyin më.

59 Ame o but bong a eitiny, me adre me he but ka peritomonâ wanakat ; ke ödrin e behwenyi ien e me Zakaria hoton ien kamen. 60 Ke haba hinyen ame thu, ka habe, Ca e, me so bi Ioane ien. 61 Me haingödra adre me ha ka momo, ka habe,

E ba liamekeiny möu ae hu ien eling. 62 Me adre me bi hat ka kamen, ka habe, iö

ia e ame weny he ka wenyö? 63 Ke e ame sumâtâ taben sihnalimen, k' ame sihnalimen, ka habe, Ien Ioane. Haba ödra

hia adre me láiâ. 64 Me ame ie ok ut hnyimen me bohmen, me e ame fuc me ogânâ Khong. 65 Me ame o but ot ködra

hia tavat adre me laba igigilö : ke ame lung tot ta je únyi eling ka hnyi je dok

hia ae hu bucen hnyi hnyeï Juda. 66 Ke haba tavat hia thithö adre me löng, me

adre me ip hmâ hnyi je hnyekudra, haingödra, ka habe, Ame he ka ieü ge da

eang? Anyin a e but unyin hnyamen Than.

67 Ke a unöngöt dö Zakaria a kamen ge Hanu Kap, me e ame perofeta, ka habe,

68 E so adre me haisoâ Than Khongu Isaraela ;

Anyin a e ame senâ me bi hwaban möt hobi kâu lakeiny,

69 K' ame otillâ thö faoiny úhömeli hobi köta

Hnyi lap anyi Davita a athnyabainy :

70 (Helâji me hnen hna ha a deny anyin je perofeta ae kap hwân hnyi can hmeledrany),

- 71 Ame he ka omeli öta únyi hnyi je iwahnaihmiöny möta, ke únyi hnyi hnyamödra hia adre me húkoti öta ;
- 72 He ka ányá betenge ka lakamöta, Me únykúme anyin úhilihnykôu ae kap ;
- 73 Waleji hofuc e ame khemanyin kö Abe-rahama a kamöta,
- 74 A g' adre me he ka omeli öta únyi hnyi hnyamen ta je iwahnaihmiöny möta, M' ate me he ka bi athnyabainy ke ba ot,
- 75 Hnyi hwakecin ae kap me wisa hnyi hnyimakan hnyi bonguta ta je bong hia thithö.
- 76 Eke, ke haba u, da, me adre me he ka haiö u me perofeta anyi Beönuu : Anyin a u me he ka bán hnyi hnyimakan Than he ka ányáwia deny ta je gethen.
- 77 He ka owáhmakhmetoá lakeiny ge úhömeli Wale he ka thang anyidra ta je hulö,
- 78 Únyi hnyi ibetengiö ae menyik anyin Khonguta. Anyin a wale ame he haolany ka sen' öta,
- 79 He ka omelamá tavat adre me laba hnyi lit me hmenon mok ; He ka su ta je cata ka hnyi gethen ae hnahic.
- 80 K' ame gan dut wanakat, me hwege tot hanon, me e ame laba hnyi je dok ae ba aten ke ne o but hnyi bong hnân omanená e ka at Isaraela.

HNyIMAKAN 2.

HABA hnyi je bong e, ame he but hnanyibu únyi ga Kaisara Augusto he ka sihnalimen aten hmeledrany hia. 2 Wale hna sihnalimen a bán hnyi úen Kurenio ame musi hnyi Suria. 3 Me adre me he hia but he ka sihnalimidra adre ve he ka idrin bi je taun. 4 Me ame he minya but Josefa úheny hnyi taun Nazareta hnyi Galilaia, ame he Juda ai, ka hnyi taun anyi Davita, Betheleema ien, anyin a e hanen lap me mátráni Davita ; 5 me me sihnalimen e me Maria, wale a úkócö mē, k' ame erkin dut. 6 Ke tiga ödru ling, me ame o but bong ame he ka hnokoá hnyin. 7 Me e ame hnokoá nokon da a atö ; ke e ame wádrá e ge mano, me omokulec ju hnyi taben jeú an meno, anyin ae ba hnödrin hna mokut hnyi uma umen je atkanyaua.

8 E hu tavat tuö mamoe hnyi hnyeiling, ödrin e hmáká hnyi hnyinghet hale-drin ta je mamoe. 9 Ke ame tot unyidrin angela anyin Than, me ame umumelam igigili ödrin melaminy Than, me ödrin e ot gan hmá. 10 Ke haba angela ame ha ködrin, ka habe, Ca ot bi ; anyin a wá bi, inya oge me ha köbun úthumetu ae so hnân senyin gan hmá hobi káu tavat hia thithö : 11 anyin adre hnokoá hobi köbun hnyi bong ang hnyi taun anyi Davita, At úhömeli, wale Keriso a Than. 12 Ke walang haten köbun ; Öbun e he ka wá mendreng adre wádrá ge mano, ame mokut hnyi taben jeú an meno. 13 Me ame ie tha e me angela tavat ae se hia únyi hnyi drany, adre me ogáná Khong me ha, ka habe, 14 Ogáná thö Khong ae nua ethö görany ; Ke haba hnyi hmeledrany hnahic unyin tavat wale e ame betenge gadra. 15 Ke ame he but gadrin je angela hnyi dranyai, me ame úhakouá hnyat tuö mamoe, ka habe, ötin a he walang ang Bethleema ai, me wá únyi eang adre ányá, wale ame omanená köta hnen Than. 16 Me ödrin e he logot me ö Maria me Josefa, me inma minya ame mokut hnyi taben jeú an meno. 17 Ke ödrin e wá but, me ödrin e omanená hna thumetu ödrin ge wanakat e. 18 Ke haba tavat hia adre me löng me adre me láiiá ta je hofuc ame ha ködra hnen hnyat tuö mamoe. 19 Ke haba Maria ame ip hmá ta je hofuc eling hia, me únykúme eú hnyi hnyekon. 20 Me ame hmetu but hnyat tuö mamoe, ödrin e ole me ogáná Khong ge ta je únyi hia ödrin e löng me wá, heláji me hna ha ködrin. 21 Ke ame o but bong a eitiny hnân peritomóná wanakat, me ame hwenyi ien me, Iesu, wale a ha angela ke tiga ca erkin bi hinyen. 22 Ke ame um dö je bonginy obosoi ödru helá me hnanyibu anyi Mose, me adre me hom but e Jerusalem a ai, he ka ip e hnyi hnyimakan Than, 23 (heláji me hna sihnalimen hnyi hnanyibu anyin Than, ka habe, Adre me he ka ha me kap ka Than ta je atö бага hia), 24 me ham ke hut helá me hna ha hnyi hnanyibu anyin Than, ka habe, Lo li biny, ame ne li lakon mekötá. 25 Ke wá bi, wale ke at hnyi Jerusalem a Simeona ien ; e at ae wisa hwakecin me outen Khong, ame halubahingen hna otubwelá at Isaraela : ke e Hanu Kap hnyi hon. 26 Ke adre hia but omanená káu a deny Hanu Kap, a g' ame ca he ka wá mok,

k' ame he ka mē wā thō Keriso anyin Than. 27 Ke e ame didrō ka hnyi uma kap hnen. Hanu: haba kamen me hinyen ödrü me hom wanakat a Iesu he ka mädträ kâu hoton hnanyibu, 28 ke e ame kap e hnyi li benyen, me ogânâ Khong, me ha, ka habe,

29 Than lö, u ma hna but walang ang athnyabaem he ka he hnyi hnahic, Helâji me hwâm hofuc ;

30 Anyin oge me wâ ge li emakök ûhömeli ûnyi gam,

31 Wale u je penapena hnyi hnyimakan tavat hia thithö ;

32 Wale melam hnân omelamâ Aten ta je hnyei,

Ke hnân hmanenanginy lakem a Isaraela.

33 Ke haba kamen me hinyen, me ödrü me lâiâ ta je ûnyi adre me ha gan ; 34 ke haba Simeona ame hahnahici ödrü, me ha kö Maria a hinyen, ka habe, Wâ bi, adre me ip wanakat ang hnân okolo me otilâ tavat ae se hia hnyi Isaraela ; ke hnân haten minya adre me he ka haikongoâ ; 35 eke adre me he ka dâoâ minya hnyekom ge hele vat ; me me manen dut je ûnykûmen hnyok ae se hia. 36 Ke wale ko perofeta momo jia Ana, nõku Fanuela, hanen tribu Asera (ae se hia hmönyin je hunainy, k' ame tha laba me âiân ehac hnyi ta je huna a seven hwân ke tiga hlu, 37 ke e safac hnyi ta je huna a eite foa), e ame ca hnyi hia hnyin uma kap, k' ame bi athnyaba hnyi lit me lany, me ânyâ ca han, me labö kböü. 38 Ke e ame o thö hnyi awa eling, ame hnyi ole ka Khong, me e ame hâiâ e ködra hia hnyat adre me halubahingen hwaban möt hnyi Jerusalema. 39 Ke ödrü me umo ta je ûnyi hia hoton hnanyibu anyin Than, me ödrin e hmetu Galilaia ai ka hnyi anyidrin taun wale Nazareta.

40 Ke ame gan dut wanakat, me ame hwege me metâ tot : ke e unyin ibetengiö anyin Khong.

41 Ame labö he kamen me hinyen Jerusalema ai hnyi je huna ka hnyi bijeu paska. 42 Ke twelv but ta je hunainy ödrin e he Jerusalema ai helâ me hwakecin bijeu ; 43 ke a um dö je bongudrin, me ödrü me he hmetu, ke ame laba biju wanakat a Iesu hnyi Jerusalema ; ke ca khana kamen me hinyen ; 44 ke ödrü me ûnykûme a e eü hnyi wanben bunyen, ke ödrü me he khaca bong, me ödrü me elâm e unyin je liamekeiny mödrü me labanödrü :

45 ke ödrü me ca wâ bala, me ödrü me hmetu but Jerusalema ai he ka elâm. 46 Ke hwaban kun ta bong ödrü me wâ e hnyi uma kap, ame laba hnyi wanben tavat ûne, ame ling ödrin me hnei ödrin : 47 haba tavat hia adre me löng, me adre me lâiâ gan hmâ anyin metâ me hnen hna thu. 48 Ke ödrü me wâ e, me ödrü me lâiâ : ke haba hinyen ame ha kâu, ka habe, Nökuk lö, ieu gam u je helâe köhmu? wâ bi, inya me kâmâm öhmu me elöm u, k' öhmu tenge. 49 E ame ha ködrü, ka habe, Ieu gabu öbu me elöm nya, e ca khan' öbu a hamök he ka vheno ta je ûnyi anyi cica? 50 Ke ödrü me ca wâ ûnykûme hnen hna ha ködrü. 51 Ke e ame tha he mödrü, me o hnyi Nazareta ; ke e ame löng hotudru : haba hinyen ame ip hmâ hnyi hnyekon ta je ûnyi hia thithö eling.

52 Haba Iesu ame kû tot hnyi metâ me je huna, ke ame betenge gan Khong me at.

HNYIMAKAN 3.

HABA hnyi huna a fiftininy musî a Tiberio Kaisara, ke ame gavena Ponetio Pilato hnyi Juda, ke ame musî Heroda hnyi Galilaia, ke ame musî hnyi hnyei Ituraia me Terekoniti Filipino liamekeiny mē, ke ame musî Lusano hnyi Abilene, 2 ke haba li at bihut ae nua me Ana me Kaiafa, haba hnyi ûen e, me ame o but hofuc hwan Khong kö Ioane nõku Zakaria hnyi hnyebuba. 3 Ke e ame vheno ta je ke keihen hnyei hia thithö hnyi Joridano, ame khetâ bapataisoiny ietra m' adre me he ka thang degecâ but ta je hulö ; 4 helâji me hna sihnalimen hnyi tusiny hofuc ho Isaia perofeta, ka habe,

Ifucin at ame hongot hnyi hnyebuba, ka habe,

Ânyâwia th' öbun gethen deny Than, Owisa thö deny ta je gethen.

5 Ame he ka öunöngötâ ta je hnyigöulen bucen hia,

K' ame he ka ohnyikânâ ta je bucen me ta je hut ;

K' ame he ka wisa bi dok ae hwalî,

Ke okhabalaüâ but ta je gethen ae hokong ;

6 Ke ame he tavat hia thithö ka wâ ûhömeli anyin Khong.

7 Me e ame ha ka tavat ae se hia adre me o but e me he ka bapataisoî ödra, ka habe, Je lakon on lö, ia köü köbun he ka

kec ge hmönyin ame he ka o? 8 Anyin a wale wa but öbun wan ae úcú me ietra, ke ca hwán öbun he ka ha eú hnyi je hnye-kubun, ka habe, Aberahama kamöta: anyin a inya oge me ha köbun, ka habe, e khana Khong he ka bi mátráni Aberahama, únyi hnyi ta je veto ang. 9 Ke wewang ang adre hia but ip giwa hnyi hwecin ta je úö; ke haba ta je úö ame ca wa so bi, me adre me he ka sö degecá me khúá ka hnyi meic. 10 Haba tavat adre me hnö e, ka habe, Ieú hanymöhmun öhmú e he ka ányá? 11 E ame thu me ha ködra, ka habe, Haba at a lo anyin li úkot e so e ame he ka ham ka at ae ba gan; ke haba at ae hu jeú hamen he ka ányá heláe minya. 12 Ke ame o but minya ta je telona, me me he ka bapataisoi ödra me ha káu, ka habe, At úne lö, ieú hanymöhmun? 13 Me e ame ha ködra, ka habe, Ca hom újengöá hon únyi adre húna köbun. 14 Haba tavat vat adre me hnö e minya, ka habe, Haba öhmun, ieú hanymöhmun? E ame ha ködra, ka habe, Ca okongóá bi ke at, ke ca bifuco thoiá; ke sekubun ju ge hna bi hwaböbun.

15 Ke tavat adre halubahingen, ke ödra hia adre me únykúme eú hnyi je hnyekudra, ka habe, ame ne Ioane la Keriso, ame ne ca e bi; 16 me haba Ioane ame thu ködra hia thithö ka habe, Inya oge me bapataisoi öbun ge köiö; ke ame he ka o at ae nua maniny huk, iny ca úcú bi he ka thang wen li tangen hnyeúcan: e ame he ka bapataisoi öbun ge Hanu Kap me meic: 17 e hnyi hnyamen ut, ke e ame he ka tha ulec wia anyin hna huje hwit hnyin, me me ip bi hwit hnyi omhani; ke e ame he ka thong degecá hlanyin hnyi meic ame ca mok bi.

18 Ke se hia ta je hofuc e ame khetá hnyin evangelia ka tavat; 19 ke e ame hia but thawo Heroda ca Herodia áían liamekeiny mē, me can ta je monu hia ame mádrá Heroda, 20 ke e ame bi hanen únyi ang hon ta je únyi hia, a g' ame cö Ioane thö.

21 Ke a hia but bapataisoiá tavat hia thithö me e ame bapataisoi Iesu minya, ke e ame hic, me ame khöng ut drany, 22 me ame olö but káu Hanu kap hnyi unyin, helá me biny, ke ame o but hofuc únyi hnyi drany, ka habe, U thibi Nökuk a óúnykú-mik; oge me senyin köu.

23 Ke haba Iesu hnyi úen e ame hwán he ka huliwa, me heláke me thöte but hunainy, e nöku Josefa (hnödra hna ha

heláe), mátráni Heli, 24 mátráni Mathat, mátráni Levi, mátráni Meleki, mátráni Jana, mátráni Josefa, 25 mátráni Matathia, mátráni Amosa, mátráni Naumo, mátráni Eseli, mátráni Nangai, 26 mátráni Maatha, mátráni Matathia, mátráni Semei, mátráni Josefa, mátráni Juda, 27 mátráni Joana, mátráni Resia, mátráni Zerubabela, mátráni Salathia, mátráni Neri, 28 mátráni Meleki, mátráni Adi, mátráni Kosamo, mátráni Elemodamo, mátráni Era, 29 mátráni Jose, mátráni Eliezera, mátráni Joreimo, mátráni Mathat, mátráni Levi, 30 mátráni Simeona, mátráni Juda, mátráni Josefa, mátráni Jonam, mátráni Eliakima, 31 mátráni Melea, mátráni Mena, mátráni Matathia, mátráni Nathana, mátráni Davita, 32 mátráni Jese, mátráni Obed, mátráni Boaza, mátráni Salamona, mátráni Naasona, 33 mátráni Aminadaba, mátráni Aram, mátráni Eseroma, mátráni Farez, mátráni Juda, 34 mátráni Jakob, mátráni Isaaka, mátráni Aberahama, mátráni Tera, mátráni Nahora, 35 mátráni Serugo, mátráni Reu, mátráni Pelege, mátráni Heberu, mátráni Sala, 36 mátráni Kanana, mátráni Afasada, mátráni Sema, mátráni Noa, mátráni Lameka, 37 mátráni Methusela, mátráni Enoka, mátráni Jareda, mátráni Mahaleleel, mátráni Kanana, 38 mátráni Enosa, mátráni Setha, mátráni Adamu, mátrániny Khong.

HNYIMAKAN 4.

KE unöngöt dö Iesu ge Hanu Kap, ke e ame hmetu úbeny hnyi Joridano, k' ame lelö thö e hnen Hanu ka hnyi hnye-buba 2 hnyi fáte ta je bong, k' ame cubec e hnen diabolo. Ke e ame ca han hnyi je bong eling: ke ame un dö je bong eling, me e ame mekihnánem but. 3 Haba diabolo ame ha káu, ka habe, U je ne Nokon Khong, ha thö ka je veto ang e me areto but. 4 Haba Iesu ame thu káu, ka habe, Adre hia but sihnalimen, ka habe, Ame ca he ka möt at ge areto thibi. 5 Ke e ame lelö thö e, me omanená káu ta je dökhü hia thithö eang hmeledrany helá me thuthubademak. 6 Ke haba diabolo ame ha káu, ka habe, Oge me he ka ham köu ta je musi hia e, me ta je hmanenanginy: anyin adre hia but hna but e könya; m' inye he ka ham ka at oge me wek káu. 7 Anyin a wale u je ne he ka khudrung ju könya, me ányám but ta je únyi hia eling. 8 Haba Iesu ame thu káu, ka habe, Adre hia but

sihnalimen, ka habe, U me he ka khudrung ka Than a Khongom, me bi athuyabainy thibi. 9 Ke e ame hom e Jerusalema ai, me ip e hon baitoiny uma kap, me ha kâu, ka habe, U je ne Nokon Khong, utut jime thö : 10 anyin adre hia but sihnalimen, ka habe,

E ame he ka hûna ka anyin ta je angela hobi köu, he ka tuö u :

11 ke walang khaca, ka habe,

Adre me he ka kap tilö u ge je hnyamödra,

Wâ e nye thö thö cam hnyi veto.

12 Haba Iesu ame thu kâu, ka habe, Adre hia but ha, ka habe, U me ca he ka cubec Than a Khongom.

13 Ke ame um dö je ucubic hia anyin dia-bolo, me e ame hna but e ke ne o but hnyi ke ün.

14 Ke Iesu ame hmetu Galilaia ai hnyi maniny Hanu : me ame lung igigilö e hnyi je ke keihen hia. 15 Ke e ame úne hnyi umödra je sunago, ke tavat hia adre me ogáná e.

16 Ke e ame o but hnyi Nazareta, waleji adre hat e hnyin : ke e ame didrö ka hnyi sunago hnyi bong sabbath, helá me hwa-kecin, k' ame tot he ka au tusi. 17 Ke adre me ham kâu tusi anyi Isaia perofeta. Me e ame khöng tusi, me elâm dok adre me sihnalimen hnyin, ka habe,

18 E but huk Hanon Than,

Anyin a e ame hia but hû nya he ka khetá úthumetu ae so ka ta je the-duoc :

E ame hia but kunö nya he ka haimemená hna hna ka ta je hwenbá,

Ke hna bwele ka je wadröu,

Ke he ka thang hnyat adre aat dö

19 Ke he ka khetá hunainy ae úcú ka Than.

20 Ke e ame vhec tusi, me ham ka athnyaba, me e ame laba ju : me ame wâ e hnen tavat hia thithö hnyi sunago. 21 Me e ame hwân he ka ha ködra, ka habe, E hwádá but hna sihnalimen ang hnyi bong ang hnyi je hnyikönyöbun. 22 Me haba ödra hia adre me haisoá e, k' adre me láia ta je ifucin ae so ame khulu but únyi hnyi hnyimen : haingödra, ka habe, Hawa, ca nöku Josefa at ang? 23 Haingö Iesu ame ha ködra, ka habe, Öbun e he la ka ha könya úhöúcú eang, ka habe, At ae tren bubuny lö, osoi u thö : haba ta je únyi öhmun e löng a g' adre ányá hnyi Kapere-nauma, ányá minya thö eang hnyi em

hnyei. 24 Haingen minya, ka habe, E hna-thu inya oge me ha köbun, ka haba, E ba perofeta adre me kap hnyi iny hnyei. 25 Ke e hnathu inya oge me ha köbun, ka habe, E se hia ta je safac hnyi hnyei Isaraela hnyi je bong bongu Elia, waleji hnyi ün adre me hlöng drany hnyi kun ta huna ke siks ta tehi, ke ame o hmiá hnyi hnyei hia ; 26 ke adre ca kunö Elia bi ka ke at gadra, ke so bi ka ke momo a safac hnyi Sarepeta hnyi Sidona. 27 Ke se hia ta je lepera hnyi Isaraela hnyi je bong bongu Elisaia perofeta ; ke ba ke at gadra adre osoá ke jia thibi a Naamana at Suria. 28 Me ame hmönyidra hia hnyi sunago tavat adre me löng ta je únyi e ; 29 me adre me todrö me obá e ka hnyi hoton taun, me lelö e ka hnyi baten hut adre hötilö taun hnyin, m' adre me he ka khuá e kâu. 30 Ke e ame he hnyi wanbödrá me he but.

31 Ke e ame o but hnyi Kapere-nauma, ke taun hnyi Galilaia. Ke e ame n' ödra hnyi bong sabbath ; 32 me adre me láia hnen hna úne ; anyin ae man hwan hofuc. 33 Ke eiö hnyi sunago ke at ae hu hanuiny demoni ae kong ; ke e ame hongot hwege thö, ka habe, 34 E, Iesu at Nazareta lö, u me hö e köhmun ? u je o but he ka ohí' öhmun ? inya oge me wâhmakhmetu u a u At ae Kap anyin Khong. 35 Haba Iesu ame thawá e, ka habe, Ca mede, ke didrut úhem hnyi hnyekon. Ke a hia but demoni hagutá e hnyikánái hnyi wanben, me e ame didrut úheny hnyi hnyekon, ke a ca okongoá bi e. 36 Haba ödra hia adre me láia ke adre me úhaköuá, ka habe, Ie hofuc ang, anyin a e ame musö hwegiá ta je demoni ae kong ge man, me adre me kec me didrut. 37 Me ame lung igigilö e ka hnyi ta je ke keihen hia.

38 Me e ame todrö úheny hnyi sunago me didrö ka hnyi uma umö Simona. Ke haba hinyen öjö Simona ame moko kahwa ae gan hmá ; ke adre me khöü kâu hobi kâu momo. 39 Me e ame tot unyin momo, me thawá kahwa ; me ame hia but : me momo ame ie todrö me bi athnyabai-drin.

40 Ke ame he but ka dit seúnö, haba ödra hia ae hu je komok ae ve bongon, adre me hum ödra kâu ; ke e ame ip li hnyamen hudrin hia, me osoi ödra. 41 Ke ame dit minya je demoni úhedra hnyin tavat ae se hia, adre me hongot me ha, ka habe, U thibi Nokon Khong. Ke e ame thaw' ödra, m' adre me ca he ka fuc, anyin

adre me wáhmakhmeto but a e thibi Keriso.

42 Ka selany jut, me e ame didrut me he ka hnyi hnyebuba : ke haba tavat ae se hia adre me elám e, me o but káu, me be-thawá, me me ca he ka hn' ödra. 43 Me e ame ha ködra, ka habe, Hamök he ka khetá úthumetu ae so hnyi dökhu dokhon Khong hnyi ke je taun bi : anyin adre me kunö nya hobi káu e.

44 Ke e ame khetá hnyi je sunago hnyi Galiläia.

HNYIMAKAN 5.

E AME tot hnyi baten köiö Genesareta, k' ame úhneki káu tavat ae se he ka löng hofuc hwan Khong ; 2 ke e ame wá li hu hnyi baten wagewe : ke haba tavat thut, me ödrin e he but he ka ányáwia útödrin je ert. 3 Me e ame ölö thö ka hnyi ke hu, a hu hu Simona, me sumátá e he ka okhaca huká hnyiköiö ai. Ke e ame laba ju hon hu, k' ame ná tavat ae se hia. 4 Ke a hia but ha hofuc, me e ame ha kö Simona, ka habe, Kec ut ka hnyi dok ae dit, me hna but útöbun tang ert hobi káu öhan. 5 Haba Simona ame thu káu, ka habe, Taböny Than lö, öhmun e huliwa hnyi lit hia, ke ba únyi öhmun e hom : ke únyi ge hwám hofuc oge me he ka hna je ert. 6 Ke ödrin e ányá heläe, me ödrin e ginyá but wá ae se hia, me ame he bi ka hmouca but útödrin tang ert ; 7 ke ödrin e aleú je lahanödrin hon ke hu, m' ödrin e he ka hadru' ödrin. Me ödrin e o but, me öunöngötá thö li hu, me me hwân ka ú but li hu. 8 Ke a wá but ga Simona Peteru, me e ame ta ju hnyi li bouca Iesu me ha, ka habe, Than lö, he thö gak, anyin a iny at ae kong. 9 Anyin a e ame láia, me ödrin hia thithö unyin, ge öhan ödrin e sa ; 10 ke heläe minya Iakobo me Ioane, a li laku Zebedäio, li at ödru me tha thut me Simona. Haba Iesu ame ha kö Simona, ka habe, Ca ot ; hwân dö ang u me he ka kát tavat. 11 Ke ame khöp do li hu me ödrin e hna but ta je únyi hia, me he hoton.

12 E ame tiga laba hnyi ke taun ke wá bi, at ae khöt ut unyin ge lepera : k' ame ö Iesu, me ta ju hnyikánai, me sumátá e, ka habe, Than lö, a ne wem me khanö u he ka osoi nya. 13 Me e ame iná hnyamen me kálá e, me ha, ka habe, Iny be wek ; u me so but. Me ame ie hia but

lepera gan. 14 Me e ame húna káu, he ka ca ha ka ke at : ke he thö, omanenö u bi thö ka at bihut, me bi hudiny hna ceoi u, heláji me hna húna hnö Mose, hnân ohnathoá ködrin. 15 Ke e ame lung tot igigilö : ke ame úkhacaköu tavat ae se hia he ka löng, me he ka möt ut ge ta je mok gadra. 16 Mee ame he but ka hnyi hnyebuba he ka hie.

17 Ke haba hnyi ke bong eling e ame tiga úne ; ke ame úlalabainy ta je Faresäio me tavat únö hnanyibu, adre o but úhedra hnyi ta je taun hia hnyi Galiläia, me Juda, me Jerusalema : ke e bi unyin Than man he ka omelö. 18 Me wá bi, tavat adre me vaden at ae mat hon hna mokut : me adre me heleú deny he ka hom e me ip hnyi hnyimakan. 19 Ke ödrin e ca wá bi deny he ka hom e, anyin ae se hia tavat, me ödrin e ölö thö ka hnyi hon uma me hna hna but e me hna mokut minya hnyi wanben hna tubi bouma hnyi hnyimakö Iesu. 20 Ke e ame wá anyidrin labageju, me e ame ha, ka habe, Ketha lö, adre hia but thang ta je monu gam. 21 Haba tavat sihnalimen me ta je Faresäio adre me hwân he ka úhnenamö ka habe, Ia e ame fuc bigan ? Ia ae khana he ka hna degecá ta je hulö ke hake Khong thibi ? 22 Ke ame manen dut kö Iesu hnödrin hna úhnenamö, me e ame thu me ha ködrin, ka habe, Ieú gabun öbun e úhnenamö eú hnyi je hnyekubun ? 23 Ieú ae háhá he ka ha, ka habe, Adre hia but thang ta je monu gam, ke he ka ha bi. ka habe, Todró me he thö ? 24 Ke so bi, me me manen köbun ae tren man Nokon at eang hmeledrany he ka hna degecá ta je hulö (e ame ha ka at ae mat, ka habe). Inya oge me ha köu, Todró me hom minya thö hnám me he ka hnyi umám uma. 25 Me e ame ie todró hnyi hnyimaködra, me hom únyi e ame mokut hon, me he ka hnyi umen uma, k' ame ogáná Khong. 26 Haba ödra hia adre me láia me ogáná Khong ; k' adre unöngöt dö ge ot, me haingödra, ka habe, Ate hia but wá hnyi bong ang ta je únyi ae ke bongon bi.

27 Ke hwaban ta je únyi eling, e ame he me wá ke telona, Levi ien, ame laba hnyi taben khöp fat, me e ame ha káu, ka habe, He hotuk. 28 Me e ame hna but ta je únyi hia, k' ame tot me he hoton. 29 Haba Levi ame mádrá bijeu ae gan hnyi umen uma hobi káu e : ke se hia ta je telona me ke je hnyat adre me tha laba

mödrin he ka han. 30 Ke haba ta je Faresaio me tavat sihnalimen unyidrin, adre me ulidro laten, ka habe, Ieú gabun öbun e tha han me ic me ta je telona, me tavat ae kong. 31 Ke haba Iesu ame thu me ha ködrin, ka habe, E ca únyi hnathu bi at ae tren bubuny ka tavat ae hwege; ke so bi ka tavat ae mok. 32 Oge me ca o he ka hawâ tavat ae wisa, ke tavat bi ae kong, m' adre me ietra thö. 33 Me adre me ha kâu, ka habe, Haba je latö Ioane, me ödrin e osehia ányâ ca han, me khöú; ke helâe minya laten ta je Faresaio; ke haba látâm, me ödrin e han me ic. 34 Ke haba Iesu ame ha ködra, ka habe, Hawa, e khan' öbun he ka ocahanâ je lahanen at a tep faipoipo, ke tiga e bi unyidrin at a tep faipoipo? 35 Ke ame he ka o je bong, me adre me he ka hom dö at a tep faipoipo, wale but e ün ödrin e he ka ányâ hnyin ca han. 36 Ke e ame ha ködra úhöücú, ka habe, E ba at ame he ka kia ecmano únyi hnyi úkhaú ae teb únyi, me utibet-kouâ úkhaú ae bobot ut; wâ e nye kheke but úkhaú ae teb únyi, k' ame ca he bi ka tha úcú ecmano ae teb únyi me at ae bobot. 37 Ke ba at ame hingalâ waina a teb únyi ka hnyi je tangen ae bobot ut, wâ e nye hmouca but ta je tangen ge waina ae teb únyi, me ame hingölö but, me kong ut ta je tangen. 38 Ke so he ka hingalâ waina a teb únyi ka hnyi ta je tangen a teb únyi. 39 Ke ba at ame ijem waina ae kueny jut me ame he bi ka weny tebúnyi, ke haingen dö, ka habe, E so únyi ae kueny.

HNYIMAKAN 6.

HNYI ke sabbath e ame he hnyi hna belök; ke haba laten ödrin e thu je wan hwit, me tau ge je hnyamödrin, me han. 2 Ke haba keihen ta je Faresaio adre me ha ködrin, ka habe, Ieú gabun öbun e ányâ únyi ae ca wisa he ka mádrâ hnyi sabbath? 3 Me Iesu ame thu ködra, ka habe, Öbun e ca munyi aú hna mádrâ hnö Davita, waleji e ame mekihnanem me anyin bunyen; 4 a g' ame didrö ka hnyi uma umen Khong me hom, me an je areto hnân omanenâ, ke ame ham minya ka anyin bunyen; wale ae ca úcú he ka an, ke so thibi tavat bihut? 5 Ke e ame ha ködra, ka habe, Nokon at a Tuhan sabbath minya.

6 Hnyi ke sabbath e ame didrö ka hnyi sunago me úne: ke wale bi eling ke at, ke

meleca but hnyamen a metân. 7 Haba tavat sihnalimen me ta je Faresaio adre me ecmákâ e, ame ne he ka osoâ hnyi sabbath; m' adre me he ka wâ thö deny he ka bi fuco e. 8 Ke e ame wâhmakhmeto únykúmenödra, me e ame ha ka at ae meleca hnyamen, ka habe, Höhöi thö, todrö hnyi wanben. Me e ame höhöi thö me tot. 9 Haba Iesu ame ha ködra, ka habe Oge me he ka hnei öbun, Hawa, e úcú he ka mádrâ so hnyi sabbath, ame ne he ka mádrâ hulö? he ka omelö at, ame ne he ka hlingá? 10 Ke e ame hngehngele me ö'dra hia thithö, me e ame ha ka at, ka habe, Lau but hnyamâm. Me e ame ányâ, me ame so but hnyamen. 11 Ke adre me hmönyidra gan hmâ; me úhnenamökouâ únyi adre me he ka ányâ kö Iesu.

12 Hnyi ün eling, e ame he ka hnyi bucen he ka hic; ke e ame hic ka Khong hnyi lit hia. 13 Ke a lany jut, me e ame hawâ laten: ke e ame úca hnyat a twelv gadrin, me e ame hwenyi iödrin je aposetolo; 14 jia Simona, wale e ame hwenyi ien minya bi Peteru, ke Anederea a liamekeiny mē, ke Iakobo, ke Ioane, ke Filipo, ke Batolomaio, 15 ke Mataio, ke Toma, ke Iakobo noku Alefaio, ke Simona adre me hwenyi ien, Zelote, 16 ke Juda liamekeiny me Iakobo, ke Juda Isakariota wale at úalecuo; 17 ke e ame tha utut mödrin me tot hnyi dok ae tha hon, me tavat ae se hia a je laten, me tavat ae se hia úhedra Juda hia, me Jerusalem, ke únyi hnyi hobat köö hnyi Turo me Sidona, tavat adre me he but kâu he ka löng hwan, me me he ka osoâ hnödra je mok; 18 me tavat minya adre ovecâ hnen ta je hanu ae kong, me adre me so but. 19 Ke ame elâm he ka kâlâ e hnen tavat ae se hia: anyin ame he but man únyi gan me osoi ödra hia.

20 Haba e ame wâ hmâ laten k' ame ha, ka habe, Hnöbun hnahic tavat ae theduoc, anyin a hobi köbun dökhu dokhon Khong. 21 Hnöbun hnahic öbun e mekihnanem walang ang, anyin adre me he ka osekuensi öbun. Hnöbun hnahic öbun e tenge walang ang, anyin öbun e he ka hluma. 22 Hnöbun hnahic e ka he tavat ka hüköti öbun, me ob' öbun, me haikongu öbun, me degec je iöbun helâ me únyi ae kong can Nokon at. 23 Senyin d' öbun hnyi bong eling, me utsenyin: anyin a wâ bi, e gan hmâ hwa-böbun ethö hnyi drany: anyin adre me mádrâ helâe ka ta je perofeta hnen laka-

mödra. 24 Ekölö gabun tavat tren omjeü! anyin a öbun e hia but kap anyibun so. 25 Ekölö gabun tavat ae sekubun walang ang! anyin a öbun e he bi ka mekihnänem. Ekölö gabun tavat öbun e hluma walang ang! anyin a öbun e he ka tenge me hlöuhlöu. 26 Ekölö gâbun e ka he tavat hia ka haisoi öbun! anyin a heläe hnen lakamödra ka ta je perofeta thoi.

27 Ke inya oge me ha köbun tavat öbun e löng, ka habe, Betenge ju ge ta je iwahnaihmiony möhun, mädträ thö so ka tavat adre me hüköti öbun, 28 hasoi ödra thö adre me hang' öbun, hic ju hobi ködra adre me okongu öbun. 29 Ke haba at ame he ka khaü wahicâm, me wia minya thö kâu ke keihen; ke haba at ame he ka hügünâ änyâm úkot, me ca behânâ bi úkhaü. 30 Ham dö ka tavat adre me sumatö u; ke ca hnö hmetu bi änyâm ta je únyi adre hügünâ. 31 Ke haba hnöbun hna weny tavat he ka änyâ köbun, me änyâ helâ ju e ködra. 32 Ke öbun e ne betenge ge tavat adre me betenge gabun, ie at ame he ka ole köbun? anyin a tavat ae kong adre me betenge ge tavat adre me betenge ködra. 33 Ke öbun e ne mädträ so ka tavat adre me mädträ köbun so, ie at ame he ka ole köbun? anyin a tavat ae kong adre me mädträ heläe. 34 Ke öbun e ne më ham ka tavat, me únykúme he ka hu hmetu gadra, ie at ame he ka ole köbun? haba tavat ae kong adre me më ham ka tavat ae kong, me me hu hmetu únyi ae tha úcü. 35 Ke betenge ju ge je iwahnaihmiony möbun, me mädträ thö so, me më ham, ke ca únykúme bi; ke ame he ka gan hmâ hwaban köbun, ke öbun e he ka je lakon Beönua: anyin a e menyik ködra hia adre me ca ole bi, me tavat minya ae kong. 36 Ibetengiököu ju öbun, helâ me Kamöbun at ae betenge. 37 Ca únykúme hwalö bi, m' adre me ca he ka únykúme hwali öbun: ca haimono, m' adre me ca he ka haimonu öbun: thang bâüta m' adre me he ka thang bâü' öbun bi: 38 ham dö, ke adre me he bi ka ham köbun; wale tulut ae gan, adre hlec, me újjingáköuâ, me kökölö but, adre me he ka ham ka hnyi je úlaibun. Ke haba hnöbun hna tuluto, me adre me he bi ka tuluto köbun.

39 Ke e ame ha úhöücü ködra, ka habe, Hawa, e khana wadröu he ka lelö ke wadröu? ödra me ca he ka tha ta ka hnyi hmonop? 40 E ca beönua at adre nâ hon at ame úne: ke ame he ka tha úcü at adre

ometâ me at ame úne kâu. 41 Ke ieu gam u me wâ hmâ atmen hnyi emakan liamekeiny möu, ke u me ca wâ únykúme bi udâ hnyi hnyin emákâm bi? 42 Ke u me he ka kâmâu ka ha ka liamekeiny möu, ka habe, Liamekeiny lö, iny bethe he ka hom atmen hnyi hnyin emákâm, ke haba u bi u me ca wâ hmâ udâ eü hnyin emákâm bi? U at thoi hnyok, bâm ka degec udâ únyi hnyi emákâm bi, m' u me he ka wâ wia he ka degec ut atmen únyi hnyi emakan liamekeiny möu. 43 Anyin ae ba úö ae so ame wa wan bi ae kong; ke haba khaca, e ba úö ae kong ame wa wan ae so. 44 Anyin ame ve manen je úö ge wan bi. Anyin adre me ca tau je wan meta únyi hnyi úö ae udedö, ke adre me ca tau wan vine hnyi iwatetaföcö. 45 Haba at ae so ame hom but ta je únyi ae so únyi hnyi tang omjehen hnyekon ae so; ke haba at ae kong ame hom but ta je únyi ae kong únyi hnyi tang omjeü ae kong: anyin ame fuc dö hnyem únyi ge hnyok ae unöngöt dö.

46 Ke ieu e gabun a öbun e hao nya, ka habe, Taböny than, Taböny than lö, k' öbun e ca mädträ bi ta je únyi oge me ha? 47 Haba tavat hia adre me o kónya me löng hok ta je hofuc me mädträ, me oge me he ka omanená köbun at ae úcü më: 48 E úcü me at ame hötilö uma, k' ame hiny dilâ, ke a bi taben ge veto, ke ame o but di, k' ame khutukhavâ uma eling, me ame ca bwebwet bi: anyin adre me otilâ wia e. 49 Ke haba at ame löng, k' ame ca mädträ bi, me úcü me at ame hötilö uma hon kánâ ke ba taben; ke ame patrutrua bi di kâu, me logot ü but e; ke gan hmâ hnaühangö uma e.

HNYIMAKAN 7.

KE e ame umo hwan ta je hofuc hnyi hnyekeiny tavat, me e ame didrö ka hnyi Kaperenauma.

2 Ke a mok athnyaba a oúnykúminy keneturio, k' ame he but ka mokcu. 3 Ke e ame löng hwakeci Iesu, me e ame kunâ wahingatiny at Juda kâu he ka sumatâ e, me me he but he ka omelö athnyabainy. 4 Ke ödrin e o but kö Iesu, me sumatâ újengö e, ka habe, E úcü at eling m' u me he ka änyâ únyi eang kâu: 5 anyin a e ame betenge ge ita hnyei, ke a hia but otilâ umöhmun sunago. 6 Haba Iesu ame tha he mödrin. Ke e hakekeny jut ka

hnyi uma, me haba keneturio ame kunâ kâu je lahanen he ka ha kâu, ka habe, Than lö, më todru : anyin a iny ca ûcü bi, m' u me he ka didró ka hnyi umök uma : 7 wale m' oge me ûnykúme a iny ca ûcü bi he ka he but köu : ke so u me he ka ha thibi hofuc, me ame he ka mödrut athnya-baik. 8 Anyin a inya ang at ame löng musi, ke hu gak je soja : ke oge me ha ka ke at, He thö, me e ame he ; ke ka ke at, Aiö u, me e ame o kõnya ; me ka athnya-baik, Anyâ thö e, me e ame mâdrâ. 9 A löng ut Iesu ta je ûnyi e, me e ame lâiâ, me hwiö me ha ka tavat ae se hia adre me he hoton, ka habe, Oge me ca wâ bi hnyi Isaraela labageju ae gan helâe. 10 Ke haba hnyat adre kunâ me ödrin e hmetu ka hnyi uma, me wâ athnyaba a ga möt dö.

11 Ke hwaban dö e, e ame o ka hnyi taun Naina ien ; ke ame tha he më laten me tavat ae se hia hmönyin. 12 Ke e ame hakekenyâ homagöuleny taun, me wâ bi, adre me vaden dut at a mokcu, nokon hinyen a khaca thibi, ka safac ut momo : ke tha e me tavat ae se hia ûnyi hnyi taun. 13 Ke haba Than ame wâ momo, me e ame betenge gan, me ha kâu, ka habe, Ca tenge. 14 Ke e ame he hakekeny me kâlâ tap ; me ame todru tavat adre me sam. Ke e ame ha, ka habe, Hidróu lö, inya oge me ha köu, ka habe, Todró. 15 Me ame laba thö at a mokcu me hwân he ka fuc. Me e ame ham e ka hinyen. 16 Me ame o ködra hia ot ae gan hmâ : ke adre me ogânâ Khong, me ha, ka habe, A o but ang unyita perofeta ae gan hmâ : ke, Khong ame senâ lakeiny. 17 Me ame lung hnyi Juda me je ke keiben hia igigilö ûnyi eling gan.

18 Ke haba je latö Ioane ödrin e omanenâ kâu ta je ûnyi eling. 19 Me haba Ioane ame hawâ ke li at hnyi laten me kun' ödrü ka Than, he ka ha, ka habe, U at ame he ka o, ke hawa, öhmun e he ka lubahingen khaca? 20 Ame o but li at kâu, me ödrü me ha, ka habe, A kuu' öhmu köu Ioane Bapataiso he ka hnei u, ka habe, U but e at ame he ka o, ke hawa öhmun e he ka lubahingen khaca? 21 Haba hnyi awa eling e ame omelö tavat ae se hia ame taku ödra nhen mok, me mok ae cap, me ta je hanu ae kong ; ke e ame obwela ta je wadröu ae se hia. 22 Ke e ame thu ködrü, ka habe, He th' öbu ka thumetu Ioane hnöbu hna wâ me löng ; a ga bwela but ta je wadröu, k' ame he thö ta je mat, ke

khabalâu but ta je lepera, k' ame löng dö ta je wejiji, ke a möt hmetu thö tavat adre mokcu, k' adre me khetâ but úthumetu ae so ka ta je theduoc. 23 Hnabic nhen at ame ca he ka thö thö gak.

24 Ame he but li úthumetu anyi Ioane, me e ame hwân he ka ha ka tavat ae se hia hwakeci Ioane, ka habe, Öbun e he but ka hnyi hnyebuba he ka wâ ieu? hawa, hlowe ame bwebwelâ ang? 25 Ke öbun e he but he ka wâ ieu? at ame khavâ úkhaú ae menyik? Wâ bi, ödrin dö hnyi uma umen je than tavat adre me khavâ úkhaú ae so, k' adre kap sot. 26 Öbun e he but he ka wâ ieu? perofeta? Eke, oge me ha köbun, e at ae beönua hon perofeta. 27 E at eji adre sihnalimen, ka habe,

Wâ bi, inya oge me kunâ anyik úthumetu hnyi hnyimâkâm,

At ame he ka penapena dem gethen hnyi hnyimâkâm.

28 Inya oge me ha köbun, ka habe, E ba at a hnokoâ ge omomo ae beönua hu Ioane : ke so bi haba at ae úhnyükong gadra hnyi dökhü dokhon Khong, me beönua hon e. 29 Ke haba tavat hia, me ta je telona, adre me löng, me haisoâ Khong, k' adre hia but bapataiso ödrâ nhen hna bapataiso anyi Ioane. 30 Ke haba ta je Faresaio me tavat ünö hnanyibu, me adre me ka iet degecâ je ûnykümenen Khong, k' adre me ca bapataiso ödra ge anyin bapataiso. 31 Oge me he bi nya ka öücoâ me ieu tavat hnyi dö ang, k' ödra tha ücü me ieu? 32 Ödra ücü me ta je wanakat adre me laba hnyi hna ücü omjeü, k' adre me úhuenamö, ka habe, Öhmun e tüö kowi köbun, k' öbun e ca bibiâ thö ; öhmun e tenge, k' öbun e ca sang betenge thö. 33 Anyin a o but Ioane Bapataiso k' ame ca han areto, k' ame ca ic waina, me haingöbun, ka habe, E hu demoni gan. 34 K' ame o but Nokon at ame han me ic, ke haingöbun, ka habe, Wâ bi at ae hutö me hwen hmiâ waina, hanen ta je telona me tavat ae kong! 35 Anyin adre me haiwisa metâ nhen je lakon bi.

36 Ke haba ke Faresaio ame hawâ e he ka tha han më. Me e ame didró ka hnyi uma umen Faresaio, me laba ju ka han. 37 Ke wâ bi ke momo aten taun, momo ae kong ; ke e khana but a Iesu ame laba ka han hnyi uma umen Faresaio, me e ame hom kaia alabasa tangen muro, 38 k' ame tot hoton hnyi li can me tenge, me hwân he ka okhubetâ li can ge deköien li emakan,

me kot ge leúnen ban, me cem li can, me hú ge muro. 39 Ke a wá but Faresaio at a hawá e, me e ame ha eú hnyi hnyekon, ka habe, Haba at ang, a ne perofeta, me e khana but bongon momo ang me hwakecin at ame kálá e, anyin a e momo ae kong. 40 Ke haba Iesu ame thu me ha káu, ka habe, Simona lö, e hu ke hofuc gak he ka ha kóu. Ke haingen ame ha, ka habe, At úne lö, ha thö. 41 E hu li at ödru me hok gufa únyi ge at ame më ham mone: haba khaca gadru ame hok gufa wale faiv haded ta je denari, ke haba khaca ame hok fifte. 42 Ke ba hnân bi hwaban me e ame hna báú ödru. Ia ke at gadru ame he ka hnyok gáná káu? 43 Haba Simona ame thu, ka habe, Inya oge me únykúme, ame ne at la adre hna gáná káu. Me e ame ha káu, ka habe, E wisa hnâm hna únykúme. 44 Ke e ame hwiö thö ka momo me ha kó Simona, ka habe, U je wá but momo ang? oge dit ka hnyi umâm uma, ke u je ca bi utköio hobi káu li cak: ke a hia but momo okhubetá li cak ge deköien, me kot ge leúnen ban. 45 Haba u, u je ca úcimhnyimak mönya: ke haba momo, hwánji hnyi úen o ge didró káang, e ame ca mená he ka cem li cak. 46 U je ca hú bök ge wakaco: ke a hia but momo hú li cak ge muro. 47 Waleling me inye ha kóu, ka habe, Adre hia but hna degecá anyin ta je hulö ae se hia; anyin ae gan hmá ibetengiö anyin momo: ke e ka úhnyúkong hna ohia ge ke at, me ka úhnyúkong anyin ibetengiö. 48 Ke e ame ha ka momo, ka habe, Adre hia but ohia ányám ta je hulö. 49 Ke haba tavat adre me tha laba më, me adre me hwán ka ha eú hnyi je hnyekudra, ka habe, Ehö at ang ame ohia ta je hulö? 50 Ke e ame ha ka momo, ka habe, U je mödrut ge ányám labageju; he thö me hnahic.

HNYIMAKAN 8.

HWABAN e, e ame vheno ta je taun me hnyaba, k' ame khetá, me omanená úthumetu ae so anyin dökhu dokhon Khong, ke tha e më hnyat a twelv, 2 me ke je momo waleji a omeli ödrin, k' ödrin e tren hanu ae kong me je mok, wale Maria adre me wenyö Magadalena, waleji hnen je demoni a seven hna didrut únyi hnyin, 3 me Joana öio Khuza, at ame tuö hnyaban Heroda, me Susana, me keihen minya ae se hia, hnyat adre me haomjehen únyi hnyi anyidra ta je únyi.

4 Ke ame úkxacaköu tavat ae se hia káu, k' ame o but káu aten ta je taun hia, me e ame ha úhöúcü, ka habe, 5 Ame he but at belök he ka jijingá wan: me e ame jijingá, ke ame kölu but keihen eú hnyi baten gethen; me adre me uto ju, k' ame an dö ge ta je meno adre me gá ethö. 6 Ke ame kölu but keihen hon dok ae hudei, me ame kú thö me ie meleca but, anyin ae ba únyi hnân omenyiká. 7 Ke ame kölu but keihen hnyi wanben ta je úö ae údedö; me ame tha kú thö më je úö ae údedö, me takoú but e. 8 Ke ame kölu but keihen ka hnyi hon káná ae hoso, me ame kú thö, me wa, úsa wan haded je wan. E ame ba je hofuc eling ködra, k' ame hongot, ka habe, Haba at ae hu li hnyikönyen me me löng, löng ju e.

9 Ke ame hnö e hnen laten, ka habe, Ieú bongon úhöúcü e? 10 Me e ame ha, ka habe, Adre me ham köbun he ka wáhma-khmeto ta je únyi ae iyong hnyi dökhu dokhon Khong: ke adre me bi hnân úhöúcü ka keihen; m' adre me he ka bwele, me ca wá bi, me he ka löng me ca wá únykúme bi. 11 Walang úhöúcü, ka habe, Haba wan, wale hofuc hwan Khong. 12 Haba keihen hnyi baten gethen, wale tavat adre me löng; me ame o but diabolo me hom dö hofuc únyi hnyi je hnyekudra, wá adre nye labageju m' ödra mödrut. 13 Haba keihen hon dok ae hudei, me wale tavat adre me löng me kap hofuc me senyin; ke ba wán gadra, ke ca beú bi anyidra labageju ke adre me ta ju hnyi úen úcübic. 14 Haba keihen ame kölu hnyi wanben ta je úö ae údedö, wale tavat adre me löng, me he but, me ame kú takú ödra hnen ta je vhet, me omjeú, me ta je senyin ge möt ang, k' adre me ca wa wan ae metu. 15 Haba keihen hnyi káná ae hoso, wale tavat adre me löng hofuc me hnyok ae so me hnathu, me kát hmá, me wa wan a deny hok hnyok.

16 E ba at ame vác lamepa, me he ka tube e ge utkaia, me ip eú hnyi hmelen hnamoskut; k' adre ma ip ethö hon taben, me me wá melaminy hnen tavat adre me didró. 17 Anyin ae ba únyi adre me ikhálá ame ca he ka manen; ko ba únyi ae iyong ame ca he bi ka manen. 18 Anyin a wale, wá wia öbun úhebun ka löng: anyin a haba at ae hu gan, me adre me he ka ham ta je únyi káu; ke haba at ae ba gan, me adre me he ka hom gan únyi e ame únykúme ae hu.

19 Me ame o but kâu hinyen me je liamekeiny mē, ke ca kban' ödrin he ka hakekeny kâu, anyin ae se hia tavat. 20 Me adre me thumeto e, ka habe, Waleú hinyâm me je liamekeiny möu ödrin e tot, ödrin e beiouny möu. 21 Ke e ame thu ködra, ka habe, Haba at ame löng hofuc hwan Khong me mádrâ, wale je liamekeiny mönya me hinyök.

22 Ke haba hnyi ke bong e ame tha ölö thö me laten ka hnyi hon hu ; ke e ame ha ködrin, ka habe, ötin e he ka kec ka hnyi ke keihen köiö : me ödrin e kec ut. 23 Ödrin e kec ke e ame mokut : me ame o but höu hnyi köiö ; me ame he ka ünöngöt dö hudrin hu, he ödrin e he but ka ú. 24 Me ödrin e he but kâu me öhmákâ e me ha, ka habe, Taböny than, taböny than, ötin e he but ang ka mok. Me e ame hmak dö, me thawâ ang me je waköiö : me ame hia but, me ta but hau. 25 Ke e ame ha ködrin, ka habe, Ewa anyibun labageju? Ke ödrin e ot, me láiá, me úhnenamökouá, ka habe, Ehö at ang, anyin a e ame húna ka ang me köiö, me ödru me löng kâu?

26 Ke ödrin e khöp dö hnyi ke keihen Gadara, wale cicö Galílaia. 27 Ke e ame ölö thö hot ai, me ame úkhanö mē at úheny hnyi taun, a delec je demoni ; ke ame ca khaú bi, hwân ehac, ke ame ca laba bi hnyi uma, ke ame laba bi hnyi je erkemok. 28 Ke e ame ö Iesu, me e ame hongot me ta ju hnyi hnyimakan me ha hwegíá, ka habe, Ieú u me he ka ányá kõnya Iesu a Nokon Khong ae Beónua? Inya oge me khöú kôu, ca oveci nya. 29 Anyin a e ame húna ka hanu ae kong he ka didrut únyi hnyi hnyin at. Anyin a e ame osehia kât e : ke adre me labö tuö e, me ca ge tö fao, me ca li can ; ke e ame thamuá hna ca e, me ame hom e hnyeububa ai hnen demoni. 30 Ke haba Iesu ame hnö e, ka habe, Ia iâm? Me e ame ha, ka habe, Legiona ; anyin a delec e hnen je demoni ae se hia. 31 Ke ödrin e khöú kâu, me me ca he ka kun' ödrin ka hnyi dok ae dit. 32 Ke wale but e hnahat buaka ae manen ame han tot hon bucen : ke ödrin e khöú kâu, me me he ka hn' ödrin he ka dilic ödra. Me e ame hn' ödrin dut. 33 Me ame didrut je demoni úhedrin hnyi hnyin at, me delec je buaka : haba hnahat buaka adre me wadring ut jimethö hnyi hwa-tapkölu kâu ka hnyi köiö, me adre me ú but. 34 Ke a wâ but hnen tavat hân buaka hna mádrâ, me ödrin e kec, me úthu-

metu hnyi taun me ta hnyei. 35 Ke adre me he but he ka hnyi wâ hna mádrâ, me o kö Iesu, me wâ at a didrut je demoni úhedrin hnyi hnyekon, ke e ame laba hnyi hmelen li ca Iesu, a khaú, ke metu but : me adre me ot. 36 Haba tavat adre wâ adre me thumeto tavat ge hna omelö at a delec demoni. 37 Ke haba tavat aten hnyei Gadara hia igigilö, adre me khöú kâu he ka hn' ödra but, anyin adre me ot gan hmâ : me e ame ölö thö ka hnyi hu me kec hmetu. 38 Ke haba at a obâ je demoni únyi hnyi hnyekon, me e ame sumâtâ, me me he ka tha laba mē : ke Iesu ame kunâ e me ha, ka habe, 39 He thö ka hnyi umâm uma, ke omanená thö ta je únyi ae gan a ányá kôu Khong. Me e ame he me omanená hnyi taun hia ta je únyi ae gan a mádrâ kâu Iesu.

40 Ke ame o hmetu but Iesu, me ame kap soá e hnen tavat ; anyin a ödra hia adre me halubahingen e. 41 Ke wâ bi, ame o but ke at Jairo ien, at ame musö sunago : ke e ame ta ju hnyi li ca Iesu, me khöú kâu me me he ka hnyi umen uma ; 42 anyin a khaca thibi nokon hlu, ame ne twelv but hunainy, ke e ame he but ka mok. Me ame he Iesu, k' ame úhneki kâu tavat ae se hia.

43 Ke waleú ke momo k' ame hingölö dra hnyi twelv ta huná, ke ba hia but tang omjehen ge hnen hna bi hwaban tavat treu bubuny, ke ba at ae khana he ka osoá e, 44 haba momo e ame hnyi he hoton, k' ame mádrâ obiny úkhaüen : me ame ie hme thö dra gan. 45 Me haingö Iesu, ka habe, Ia kalö nya? Ke haba ödra hia adre me ivinö, me haingö Peteru me keihen unyin, ka habe, Than lö, haba tavat ae se hia adre me uhneki me setu u. 46 Ke haba Iesu ame ha, ka habe, E hu at a kalö nya : anyin oge me wáhmakhmeto a ga didrut man gak. 47 Ke a wâ but momo ae ca iyong hmetu, me e ame o öbubuny me nom ju hnyi hnyimakan me omanená kâu hnyi hnyimakan tavat ae se hia can a e ame kâlâ, k' ame ie imelen dö. 48 Me e ame ha ka momo, ka habe, Nökuk lö, u je mödrut ge ányâm labageju ; he thö me hnabic.

49 Ke e ame tiga fuc, me ame o but ke at úheny hnyi hnyaban at ame musö sunago, me ha, ka habe, A moku nokom hlu ; ca újengö bi At úne. 50 Ke a löng Iesu, me e ame thu kâu, ka habe, Ca ot bi : ke labageju ju, me e ame he ka möt. 51 Ke

e ame didrö ka hnyi uma, k' ame thaw' ödra m' adre me ca hnyi dit, ke so thibi Peteru, me Ioane, me Iakobo, me kamen me hinyen hlu. 52 Haba ödra hia adre utengiö ke tenge thungaü gan : me haingen, ka habe, Ca ütengiö ; anyin a ca mokcu, k' ame mokut. 53 Me adre me hlumä e, anyin ae kban' ödra a ga mokcu. 54 Ke e ame hom hnyamen me hongot, ka habe, Hlu lö, todrö. 55 Me ame o hmetu but hanon, me ame ie todrö hlu : ke Iesu ame hûna he ka hân. 56 Haba kamen me hinyen ödrü me lâiä : ke e ame hûna ködrü, ka habe, Ca omanenâ bi ka ke at hna mâdrâ.

HNYIMAKAN 9.

E AME hawâ ûkacakouâ hnyat a twelv, k' ame ham ködrin man, ke he ka musö ta je demoni, ke he ka ohia ta je mok. 2 Me e ame kun' ödrin he ka khetâ dökhu dokhon Khong, me he ka omelö tavat ae hu mok gadra. 3 Ke e ame ha ködrin, ka habe, Ca hom bi ke ûnyi hobi kâu bunyen, ke ca me hom je uci, me tang, me kamec, me mone ; ke ca üsa lo bi ûkot. 4 Ke haba uma öbun e he ka dit ka hnyin, laba ju e ke ne o but öbun e he but. 5 Haba at ame ca he ka köp öbun, k' öbun ka he but ûnyi hnyi taun eling, me jijingâ but kânâiny je hnyeücabun hnân ohnatho ködrin. 6 Me ödrin e he but, me he hnyi wanben je taun, me ödrin e khetâ úthumetu ae so, me omelö tavat ae hu mok gadra.

7 Ke a löng ut Heroda than ta je ûnyi adre me ânyä : me ame hlohlo, anyin ame ha keihen a ga möt hmetu thö Ioane ûnyi hnyi hna mok ; 8 ke haingen keihen a ga manen dut Elia ; ke haingen keihen a ga o hmetu thö ke perofeta kâü adrem. 9 Ke haingö Heroda, ka habe, Oge hia but subâ nyi Ioane : ke ie at ang a oge me löng gan ta je ûnyi eling? Me e ame elâm he ka iouny më.

10 Ame o hmetu but ta je aposetolo, me ödrin e thumeto e ge ta je ûnyi hia ödrin e mâdrâ. Me e ame haw' ödrin, me hum ödrin ka hnyi taun Bethesaida ien. 11 Ke e khana but tavat me adre me he hoton : me e ame kap soi ödra, me ha ködra dökhu dokhon Khong, me omelö tavat a ödra mok. 12 A sahac ut ; me ame o but kâu laten a twelv, haingödrin, ka habe, Kunâ thö tavat ae se hia, m' adre ne he ka he

hnyi je taun, ke ta hnyei igigilö, me mokut, me heleü jeü : anyin a öta ang hnyi hnye-buba. 13 Ke e ame ha ködrin, ka habe, Ha ö 'dra bi öbun. Me ödrin e ha, ka habe, E ba jeü gahmun, ke thabüng thibi ta areto, ke lo li wâ ; öhmun a më he ka ûcü jeü hobi kâu tavat ang ae se hia. 14 Anyin a helâ me faiv thauzan obaga. Ke e ame ha ka laten, ka habe, Olab' ödra ju helâ me üsa fifite. 15 Me ödrin e ânyä helâe, me olab' ödra hia ju. 16 Ke e ame hom je areto a thabüng me li wâ, me bwela hnyi dranyai, me oleâ, me thuthu, me ham ka laten he ka ip hnyi hnyimakan tavat. 17 Me adre me han, me ame sekudra hia thö : ke ödrin e hom dö je kolon hna han unyidra, twelv je tang a unöngöt.

18 Ke hake e biju ame hic, ke tha e më laten : me e ame hnei ödrin, ka habe, Haba hna ha hnen tavat gak, me iny ia? 19 Ödrin e thu, ka habe, Ioane Bapataiso ; ke haba keihen adre me ha, Elia ; ke haingen keihen a tot hmetu thö ke perofeta kâü adrem. 20 E ame ha ködrin, ka habe, Haba ifucibun gak m' iny ia? Peteru ame thu, ka habe, Keriso a Nokon Khong. 21 Ke e ame hûna ködrin me ha, ka habe, Ca ha bi ka ke at ûnyi e ; 22 e ame ha, ka habe, Hanymen Nokon at he ka hokhnyokâ ta je ûnyi hia, ke ame he ka hûkotiâ hnen wahingat, me je taben tavat bihut, me hnyat sihnalimen, ke adre me he ka hlingâ, ke ame he ka möt hmetu thö hnyi bong a kuniny. 23 Ke e ame ha ködra hia, ka habe, A ne ke at ame weny he ka he hotuk, e so e ame ka hing hokhnyok, me hom anyin satauro hnyi je bong, me he hotuk. 24 Anyin a haba at ame beomelö anyin möt, me ame he ka hia e ; ke haba at ame hna but anyin möt can inya, me adre me he ka omelö e. 25 Anyin a ieu troban ka at, ame ne hu kâu hmeledrany hia, ke ame ka degec me ohia e bi? 26 Ke haba at ame he ka hmehma gak me hok ta je hofuc, me ame he bi Nokon at ka hmehma gan, e ka tha o me anyin hing hmanenang, me hmanenanginy Kamen, me ta je angela ae kap. 27 Ke e hnathu inya oge me ha köbuu, haba keihen adre me tot ang, adre me ca he ka më mok ke ne o but adre me wa thö dökhu dokhon Khong.

28 Hwabab ta je hofuc eling, ame ne eit ut ta bong, e ame hum Peteru, me Ioane, me Iakobo, k' ame ölä hnyi bucen he ka hic. 29 Ke e ame tiga hic, me ame

ke bongon dut hnyimakan, k' ame hau me hadröngöc ûkhaüen. 30 Ke wâ bi, li at ödrü me ûhnenamö mē, wale Mose me Elia ; 31 ödrü me o hnyi hmanenang, me ûhnenamö anyin mok adre me he ka ohwâdâ hnyi Jerusalema. 32 Ke ame ti bemokut Peteru, mödrü minya unyin : ke ödrin e hmak hmetu thö, me ödrin e wâ anyin hmanenang, me li at minya ödrü me tha tot mē. 33 Ke ödrü me tiga he but ûhedru unyin, me haingö Peteru ame ha kö Iesu, ka habe, Than lö, e so ötin e laba ju ang : ke öhmun e he ka otilâ ke je uma menâ a kun ; haba khaca, me hnân hobi köu, ke hobi kö Mose khaca, ke hobi kö Elia khaca : ke ca khanö Peteru bongon hnen hna ha. 34 E ame tiga ha hofuc eling, me ame o but ûlâ me tubi ödrin : ke ödrin e ot hnyi ûen ödrin e dit ka hnyi ûlâ. 35 Me ame o but hwan hofuc ûnyi hnyin ûlâ ame ha, ka habe, Wale Nökuk a úcanök : löng ju öbun kâu. 36 Ame o thö hwan hofuc, me ödrin e hake ö Iesu thiju. Ke ödrin e hnyi bi ju me ca ha bi ka ke at hnyi je bong eling ûnyi ödrin e wâ.

37 Ke haba nyi, ödrin e hia but utut ûhedrin hon bucen, me ame ûkhane mē tavat ae se hia hmönyin. 38 Ke wâ bi, ame hongot ke at unyin tavat ae se me ha, ka habe, At Ûne lö, inya oge me khöü köu he ka mē wâ nökkuk da, anyin ae khaca thibi nökkuk : 39 ke wâ bi ame kât e hnen hanu me e ame ie hongot hwege ; k' ame osesebila e, me e ame hülûhangöc dö, k' ame ka bec ut, k' ame ca ie didrut gan, me ame ti okongoâ e. 40 Ke oge me khöüâ ka látâm, m' ödrin e he ka obâ e : ke ca khan' ödrin bi. 41 Haba Iesu ame thu, ka habe, E, dö ame ca labageju bi ke hwali, oge me he ka tha laba möbun, ke hokhnyoki öbun ke ne o but kehö ? Hom but jem nokom. 42 Ke e ame tiga he, me haba diabolö ame osesebila e me sa hmonyinâ. Me Iesu ame thawâ hanu ae kong, me osoâ da, me ham hmetu e ka kamen. 43 Ke haba ödra hia adre me láii man ae gan hmâ maniny Khong.

Ke ödre hia adre me tiga láii ta je ûnyi hia e ame ânâ me e ame ha ka laten, ka habe, 44 E so e didrut je hofuc ang ka hnyi je hnyikönyöbun : anyin adre me he ka hna Nokon at ka hnyi je hnyamen tavat. 45 Ke ödrin e ca wâünyküme bi hofuc eling, ke adre oiyongâ ködrin, wale me me ca khan' ödrin : ke ödrin ot he ka hnö e ge hofuc eling.

46 Me ame kü thö ivinö gadrin, ia la gadrin ame ho ka beönuu. 47 Ke haba Iesu ame wâhmakhmeto ûnykümenen je hnyeködrin, e ame hom dö wanakat me otilâ unyin, 48 me ha ködrin, ka habe, Haba at ame he ka kap wanakat ang hnyi iök, me e ame köp nya : ke haba at ame he ka köp nya, ame kap at a kunö nya : anyin a haba at ae ûhnyükong gabun hia thithö, wale at ae gan.

49 Ke haba Ioane ame ha, ka habe, Than lö, öhmun e wâ but ke at ame obâ je demoni hnyi iâm ; ke öhmun e thawâ e, anyin a e ame ca he hotutin. 50 Ke haba Iesu ame ha kâu, ka habe, Ca thawâ bi e : anyin a haba at ame ca iwahnaihmöny möbun, ame tha hien möbun.

51 Ke ame hwân ka o but ûen adre me he ka kap e göranyai, me e ame hwege thö he ka he Jerusalema ai, 52 me kunâ je úthumetu he ka he hnyi hnyimakan : me ödrin e he me o hnyi ke taun anyin at Samaria he ka penapena halubahingen. 53 Ke adre me ca kap e, anyin a e ame be he hwege but Jerusalema ai. 54 Ke a wâ but e hnen li laten, jia Iakobo me Ioane, me ödrü me ha, ka habe, Than lö, e wem öhmu me he ka hawâ meic he ka utut ûnyi hnyi drany he ka thong degeci ödra ? 55 Ke e ame hwiö thö me thaw' ödrü. 56 Me ödrin e he but ka hnyi ke taun.

57 Ke ödrin e tiga he eü hnyi gethen, haba ke at ame ha kâu, ka habe, Oge me he ka he hotom ka hnyi je dok hia u me he ka he ka hnyin. 58 Ke haba Iesu ame ha kâu, ka habe, Haba ta je alope, e hu umödra op hnyi kânâ, he haba ta je meno ethö e hu háüödra ; ke haba bi Nokon at, me ca hu bi hnân hunen ban. 59 Ke e ame ha ka ke at, ka habe, He hotuk. Ke haingen ka habe, Than lö, mē hnö nya thö inye mē he ka könim cica. 60 Ke e ame ha kâu, ka habe, Hna but ta je komok he ka konâm je kokidrin ; ke he bi thö u ka khetâ dökhü dokhon Khong. 61 Haingen ke at, ka habe, Than lö, oge me he ka he hotom ; ke mē hnö nya but inye mē he ka ûhüne me anyik lap. 62 Haba Iesu ame ha kâu, ka habe, E ba at ame he ka úcü ka hnyi dökhü dokhon Khong, ame inâ hnyamen ka hnyi hon ûnyi hnân wia kânâ, ke hwiö hmetu bi.

HNYIMAKAN 10.

HWABAN ta je únyi eling, haba Than ame úca keihen tavat a sevente, me kun' ödrin, a ödrin úcú lo he ka bödra ka hnyi ta je taun, me ta je dok e ame he ka he hnyin. 2 E ame ha ködrin, ka habe, E gan hmá widrany ke wakhalet thibi tavat adre me huliwan : anyin a wale hic ju öbun ka Thaniny widrany, me me he ka kunâ tavat he ka huliwan anyin widrany. 3 He th' öbun : wâ bi, inya oge me kun' öbun helâ me lakon mamoe hnyi wanben ta je luko. 4 Ca hom bi tang mone, me tang, me taben hnyeüca, ke ca italofa bi me ke at eú hnyi gethen. 5 Ke haba uma öbun e he ka dit ka hnyin, mē ha thö, ka habe, E so e hnahic ut uma ang. 6 Ke a ne e bi ling at ame he ka hnahic, me ame he ka o kâu hnahic únyi gabun : ke a ne ba, me ame he ka hmetu köbun. 7 Laba ju hnyi uma eling, ke han me ijem ta je únyi ödrin e ham : anyin a haba at huliwa me úcú me hwaban. Ca dit únyi hnyi ke uma me dit ka hnyi ke uma. 8 Ke haba taun öbun e he ka o ka hnyin, ke at ka köp öbun, me an ju ta je únyi adre me ip hnyi hnyimaköbun : 9 ke omelö tavat eling ae hu mok gadra, ke ha ködra, ka habe, E hakekeny jut köbun dökhü dokhon Khong. 10 Ke haba taun öbun e he ka o ka hnyin, ke adre me ca köp öbun, me he th' öbun ka hnyi getheniny me ha, ka habe, 11 Haba kânâiny anyibun taun wale ame kece ka hnyi je hnye-úcámun, me öhmun e kot ut köbun : ke so bi, khan' öbun dö únyi ang, ae hakekeny jut dökhü dokhon Khong. 12 Inya oge ne ha köbun, a g' ame he ka háhá ka Sodoma hnyi bong eling hon taun e. 13 Ekölö gam Korazin ! ekölö gam Bethesaida ! anyin adre ne ányâ hnyi Turo me Sidona ta je huliwa ae man adre ányâ eang anyibun, adre me ne hia but ietra me laba me ecmano ae gan nân me hnabadröu. 14 Ke so bi ame he ka háhá ka Turo me Sidona hnyi hna owisa, hubun. 15 Ke haba u Kaperenauma, hawa, adre me he ka ogöranyi u ka hnyi drany ? adre me he ka ohnyi-kânâi u ka hnyi Hedis. 16 Haba at ama ling öbun e ame ling nya ; ke haba at ama húkoti öbun, e ame húkotiö nya ; ke haba at ama húkotiö nya, e ame húkotiâ at a kunö nya.

17 Ke ame o hmetu but tavat a sevente me senyin, me ha, ka habe, Than lö, ame ling öhmun ta je demoni hnen iâm. 18 E

ame ha ködrin, ka habe, Oge me ö Satana ame utut úheny hnyi drany helâ me hucuce. 19 Wâ bi, oge hia but ham köbun man he ka uto ta je on me ta je sekopio, me maniny hia thithö iwahnaihmiony : ke ba ke únyi ame he ka okongu öbun. 20 Ke ca senyin bi ge hna ling öbun hnen ta je hanu ; ke senyin dö ge hna sihnalimea je iöbun ethö hnyi drany.

21 Haba hnyi úen eling e ame senyin hnyi Hanu Kap me ha, ka habe, Inya oge me ole köu Cica, Tuhan drany me hmele-drany, anyin a u je ikhâlâ ta je únyi eang ge tavat ae metâ ke tavat wâ bongon, me adre omanená ka ta je mendreng : eke, Cica, anyin a wale wem. 22 A ham könnya ta je únyi hia thithö hnö Cica : ke ba at ame wâhmakhmetoâ Nokon, ke Kamen thibi ; ke ba at ame wâhmakhmetoâ Kamen, ke Nokon thibi, me at minya hnen Nokon hna weny he ka omanená kâu. 23 Ke e ame hwiö ka laten me ha duöngâ, ka habe, Hnahic hnen ta je ecmak adre me wâ únyi öbun e wâ : 24 anyin a inya oge me ha köbun e se hia ta je perofeta me ta je than adre me bewâ ta je únyi öbun e wâ, k' adre me ca wâ bi ; me belöng ta je únyi öbun e löng, k' adre me ca löng bi.

25 Ke wâ bi ame todrö ke at únö hnan-yibu, me cubec e, ka habe, At Úne lö, ieü hanymök oge me he ka ányâ e me hu the könnya möt ame ca ba balua ? 26 Ke ö ame ha kâu, ka habe, Ieü hna sihnalimen hnyi hnanyibu ? hawa ge hnâm hna aú ! 27 Ke e ame thu, ka habe, U me he ka hnyok ka Than a Khongom ge hnyekom ae bekhöt, me hanom ae bekhöt, me tang hwegiâm ae bekhöt, me oúnykúmâm ae bekhöt ; ke u me he ka betenge ge at ae hakekeny köu helâ me u bi. 28 Ke e ame ha kâu, ka habe, E wisa hnâm hna thu. mádrâ thö e, ke u me he ka möt. 29 Ke e ame weny he ka hai wisa e bi, me e ame ha kö Iesu, ka habe, Ie at ae hakekeny könnya ? 30 Haba Iesu ame thu, ka habe, Ame he ke at Jeriko ai úheny Jerusalema ; me ame úkhane me tavat venöu, ke adre me anyi jut anyin je úkhaú, me kot e, me hna ju e, a g' ame he but ka mok. 31 Me ame he hnyi gethen eling ke at bihut : ke e ame wâ e, me e ame saú thö ka he hnyi ke baten gethen. 32 Ke helâe minya ke at Levi, e ame o but kâ e me wâ, me e ame he minya hnyi baten gethen. 33 Me ame he but minya ke at Samaria, me o kâu : ke e ame wâ e, me e ame betenge gan, 34 me

hakekeny kâu, me lan hnân je aat, me hû ge wakaco me waina; ke e ame ip e hon haleny meno, me hom e ka hnyi omtabaga, me ûa e. 35 Ke haba bong nyi, e ame hom li denari, me ham ka at ae tren uma me ha ka habe, U ma tuô e; ke haba hnâm hna he ka ûcû hanen hon e, oge me he ka bi hwaban kôu, iny ka o hmetu thö. 36 Ûnykûme ju, ia gadrin hnyat a kun ame hakekeny ka at eji a ûkhane me tavat venöu? 37 Ke e ame ha, ka habe, Wale at ame betenge gan. Haba Iesu ame ha kâu, ka habe, He thö ka mâdrâ helâe.

38 Ke ödrin e he but, me e ame dit ka hnyi ke taun: ke wale ke momo Maretha ien, ame kap e ka hnyi umen uma. 39 E hu keiny jia Maria, ke e ame laba hnyi hmele li ca Iesu me löng hwan hofuc. 40 Ke haba Maretha ame hmak hnyekon ge ta je huliwainy uma; me e ame he kâu me ha, ka habe, Than lö, u me ca ûnykûme bi a ga hia but keik hnö nya he ka hake huliwa? ha thö kâu me me he ka hadruö nya. 41 Ke haba Than ame thu kâu, ka habe, Maretha, Maretha lö, u me kong hnyekom me hmak ge ta je ûnyi ae se hia: 42 khaca thibi ûnyi ae ûnyi hnathu: ke haba Maria ame hia but ûca ke keihen ae so, wale a g' adre me ca he ka hom hmetu gan.

HNYIMAKAN 11.

KE e ame hic hnyi ke dok, k' ame um dö, me ame ha kâu ke laten, ka habe, Than lö, ö u n' öhmun dö he ka hic, helâji me hnö Ioane hna nâ laten. 2 Me e ame ha ködrin, ka habe, Öbun ka he ka hic, me ha thö, ka habe, Cica lö, E so e ka kap iâm. E so e o but dokhom dökhu. 3 Ham köhmun hnyi je bong jeû ae ûcû ka hnyi bong bi. 4 Thang ut ta je monu gahmun; anyin a öhmun e thang minya tavat adre me okongu öhmun. Ca hum öhmun ka hnyi ûcûbic.

5 Ke e ame ha ködrin, ka habe, Ia gabun ae hu hanen, ke ame he ka he kâu hnyi wanbenset me ha kâu, ka habe, Hanök lö, më ham dö kõnya kun ta areto; 6 anyin ame o but kõnya ke hanök hnyi anyin bunyen, ke ba jeû gak he ka hân; 7 ke e ame thu hmetu eiö hnyin uma, ka habe, Ca thaluö nya: adre hia but hlöng hwanuma, ke lakuk dö ang unyik hnyi hna mokut; e ca khanö nya he ka tot me ham kôu? 8 Haba inya, oge me ha köbun, ka habe, E ka ca he bi ka tot me ham kâu anyin a e

hanen, me e ame he bi ka tot me ham kâu ta je ûnyi hia e ame weny, can a g' ame sumâtâ ûjengöâ. 9 Ke haba inya oge me ha köbun, ka habe, Sumâtâ thö, me adre me he ka ham köbun; elâm dö, me öbun e he ka wâ; seseto thö, m' adre me he ka khöng ut köbun. 10 Anyin ame he ka hu ka tavat adre me sumâtâ; ke haba tavat adre me elâm, me adre me he ka wâ; ke adre me he ka khöng ka tavat adre me seseto. 11 Ie ke kamen gabun, k' ame sumâtâ areto ge nokon, me ame he ka ham bi kâu veto? k' ame ne sumâtâ wâ, me ame he ka ham bi kâu on? 12 Ke ame ne sumâtâ wakuniny khoto, me ame he ka ham bi kâu sekopio? 13 Anyin a wale, a ne mabun tavat ae monu he ka wâhmak-hmetoâ hna he ka ham ta je ûnyi ae so ka lakubun, awe, ame ca he bi Kamöbun ethö hnyi drany ka ham Hanu Kap ka tavat adre me sumâtâ e?

14 Ke e ame obâ demoni ae hum. Ke ame didrut demoni, me ame fuc dö hum; me ame lâiâ tavat ae se hia. 15 Ke haba keihen gadra, adre me ha, ka habe, E ame obâ ta je demoni ûnyi ga Belezebuba, tuhan ta je demoni. 16 Ke haba keihen adre me cubec e, me elâm gan ke haten ûnyi hnyi drany. 17 Ke e ame wâ ûnykûmen-ödrin, me e ame ha ködra, ka habe, Haba je dökhu ame imoukôu, ame he ka ba wan; ke ame he ka kong ut lap ame imoukôu. 18 A ne imoukôu Satana ame he ka kâmâu ka tethmâ dokhon dökhu? anyin a öbun e ha, ka habe, Inya oge me obâ ta je demoni ûnyi ga Belezebuba. 19 Ke oge ne obâ ta je demoni ûnyi ga Belezebuba, me ûnyi ga ia ame ob' ödrin minya hnen lakubun? waleling, m' adre me he ka owis' öbun. 20 Ke oge ne obâ ta je demoni ge banyen Khong, awe, a o but köbun dökhu dokhon Khong. 21 A ne tot metâ at ae hwege he ka tuö umen uma, ame he ka mokut wia anyin ta je ûnyi: 22 ke e ka o at ae hwege hon e, me ngâ e, me e ame he ka hûgûnâ gan anyin ûnyi hnân vat, waleji e ame labageju kâu, me khenâ anyin ta je ûnyi. 23 Haba at ame ca tha hien mönya, me, iwahnaihmiöny mönya; ke haba at ame ca tha ûkhöünâ mönya, me ame vese but. 24 E ka didrut hanu ae kong ûheny hnyi hnyin at, e ame he hnyi wanben je dok ae mada, ame beleû hna menâ; ke a ne ca wâ bi, haingen ame ha, ka habe, Oge me he ka hmetu ka hnyi umök uma, waleji oge didrut ûhek hnyin. 25 Ke e ame o

but, me ame wâ adre hia but aba via me ave. 26 Me e ame he but me bi hanen ge ta je hanu ae kong hon e a seven; ke ödrin e didrö me laba eling: ke haba obiny ka at eling ame he ka kong hon a bân.

27 Ke e ame tiga ha ta je hofuc ang, me ame fuc hwege ke momo unyin tavat ae se hia me ha kâu, ka habe, Hnahic hnen hnyok adre hnöku u hnyin, me li bai u je ijem. 28 Ke e ame ha, ka habe, E beönua bi hnahic hnen tavat adre me löng hofuc hwan Khong me vheno e.

29 Ke ame hwân ka úkhacaköu thö tavat ae se hia, me e ame hwân he ka ha, ka habe, Haba dö ang, me dö ae kong: k' adre me elâm haten; ke ba haten adre me he ka ham ködra, ke so thibi haten anyi Jona perofeta. 30 Anyin a haba Jona, me haten ka at Nineve, k' ame he Nokon at ka helâe ka dö ang. 31 Ame he momo than hnyi hwaiöu ka tha tot me dö ang hnyi bong owisa, me ha hnaûhang' ödra: anyin a e ame he but úheny hnyi can hmeledrany he ka löng metâ anyi Solomona; ke wâ bi, wale bi ang at ae beönua hu Solomona. 32 Ame he at Nineve ka tha tot me dö ang hnyi bong owisa, me ha hnaûhang' ödra: anyin adre me ietra hnyi hna khetâ hnö Jona; ke wâ bi, wale bi ang at ae beönua hu Jona.

33 E ba at ame vâc lamepa, me he bi ka ip e hnyi dok ae iyong, ke hmelen kumete, ke so ame ip hon taben me me wâ thö melaminy tavat adre me didrö. 34 Haba emâkâm, me lamepainy unyâm: e ka so emâkâm, me ame he ka tha melam hia unyâm; ke e ka kong, me ame he ka tha menekholom unyâm. 35 Anyin a wale wâ wia ju wâ e nye lidrut melam eû hnyi hnyekom. 36 Anyin a wale, a ne tha melam unyâm, ke a ne ba ke dok ae lit, awe, ame he ka tha melam hia thithö, helâ me lamepa ae umumelam hmönyin ame omelami u.

37 Ke e ame tiga fuc me ame hawâ e hnen ke Faresaio he ka tha han mē: me e ame didrö, me laba ju. 38 Ke haba Faresaio ame wâ, me e ame lâiâ, anyin a ca bân ka sou hnyi úen ame he ka han. 39 Haba Than ame ha kâu, ka habe, Öbun je Faresaio, öbun e ânyâwia hoton utkaia me mini; ke haba je hnyekubun, me unöngöt dö ge venöu me ta je monu. 40 Öbun je monu, haba at ame mâdrâ hoton, hawa ame ca mâdrâ minya hnyin? 41 Ke so bi

öbun e ne ham onyen hnyi betenge; awe, ame he ka so ta je únyi hia unyibun.

42 Ekölö gabun ta je Faresaio! anyin a öbun e ham je ke keihen a libenyitainy minet, me ru, me ta je úö ae ometu, ke öbun e hna biju hna owisa, ke hnyok ka Khong: e úcú öbun e ânyâ ta je únyi eling, ke ca hna but ta je únyi ang. 43 Ekölö gabun ta je Faresaio! anyin a webun je taben lap ae nua hnyi ta je sunago, ke he ka nom köbun hnyi ta je hna úcú. 44 Ekölö gabun! anyin a öbun úcú me ta je erkemok ae iyong, k' ame he tavat hon, ke ca khan' ödra bi.

45 Me ame thu kâu hnen ke at únö hnanyibu, ka habe, At Úne lö, u me ha helâe, me u me haikongu öhmun minya. 46 Ke e ame ha, ka habe, Ekölö gabun minya hnyat únö hnanyibu! anyin a öbun e ip hon tavat je hok ae hmak he ka hijen, ke haba öbun, me öbun e ca mâdrâ bi ge ke banyöbun a khaca. 47 Ekölö gabun! anyin a öbun e up veten je erkemok hon ta je perofeta, ke a hling' ödrin hnen lakamöbun. 48 Awe, öbun e ohnathoâ, me ogâ hwakecin lakamöbun: anyin adre me hling' ödrin, ke öbun e otilâ ta je hudrin. 49 Anyin a wale, ame ha hnen metâ anyin Khong, ka habe, Oge me he ka kunâ ködra ta je perofeta me ta je aposetolo; ke adre me he bi ka hlingâ me okongoâ keihen; 50 m' adre me he ka hnö dren ta je perofeta hia thithö unyin dö ang, waleji adre me hingâlâ hwân hnyi hna bi taben hmeledrany; 51 hwân ge drö Abela ke ne o but ka drö Zakaria, at adre me hlingâ hnyi wanben taben hut me dok ae kap: eke, inya oge me ha köbun, adre me he ka hnö e unyin dö ang. 52 Ekölö gabun hnyat únö hnanyibu! anyin a öbun e hia but hom kiiny metâ: k' öbun e ca dit bi ka hnyin, ke öbun e thawâ minya tavat adre me ke ka didrö.

53 E ame didrut úheny e, ke haba tavat sihnalimen ke ta je Faresaio adre me hwân he ka újengö e, me hnö hmönyinâ e ge ta je únyi ae se hia; 54 adre me tuö e, m' adre me he ka kât ge ke hofuc únyi hnyi hnyimen.

HNyimakan 12.

HNYI úen eling ame úkhacaköu tavat ae se hia je thauzan, ke adre me iutiödraköuödra, me e ame hwân ka ha bânâ ka laten, ka habe, Ö 'bun áu ge

leven anyin ta je Faresaio wale thoi. 2 Anyin ae ba únyi adre me ikhâlâ ame ca he bi ka manen : ke ba únyi ae iyong adre me ca he ka wá. 3 Anyin a wale, adre me he ka löng hnyi lany, únyi öbun e hia but ha hnyi lit ; ke adre me he ka khetâ hon je uma hnöbun hna ha ka hnyi hnyekönyen hnyin hnyeule. 4 Ke inya oge me ha köbun lahanök, ka habe, Ca ot bi gadra adre me hlingâ anyin, ke ba minya hnödra hna khana he ka ânyâ. 5 Ke oge me he ka kú köbun at öbun e he ka outen : Outen ju e at ae tren man he ka khûâ hnyi gena, at ka hia but hlingâ ; eke, inya oge me ha köbun, outen ju e. 6 Hawa, adre ca úco bi je wahelö a thabûng hwaban li asari? ke Khong ame ca hnying ke at gadra. 7 Ke adre hia but aú je leúnen böbun. Ca ot, anyin a öbun beönua hon ta je wahelö ae se hia. 8 Ke inya oge me ha köbun, ka habe, Haba at ame he ka haiö nya hnyi hnyimakan tavat, me ame he Nokon at ka háâ e hnyi hnyimakan ta je angela anyin Khong : 9 ke haba at ame he ka ivinö nya hnyi hnyimakan tavat, me adre me he ka ivinöâ e hnyi hnyimakan ta je angela anyin Khong. 10 Haba at ame he ka bifuco Nokon at, me adre me he ka hna e : ke haba at ame he ka haikongoâ Hanu Kap, me adre me ca he ka hna degecâ e. 11 At ka hum öbun ka hnyi ta je sunago, me ka tavat owisa, me ta je musi, ca únykúme bi, ka habe, ieu hnân thu, me ieu hnân he ka ha : 12 anyin ame he Hanu Kap ka n' öbun ge únyi hnân he ka ha hnyi ün eling.

13 Ke ame ha kâu hnen ke at hnyi tavat ae se hia, ka habe, At Üne lö, ha thö ka liamekeiny mönya he ka tha khenâ mönya jekhöühmu. 14 Me e ame ha kâu, ka habe, Ketha lö, ia otilö nya hnân he ka owisa me khenâ köbun? 15 Me haingen ködra, ka habe, Wá eaú, tu' öbun ju, wá öbun nye behnyekon : anyin ame ca möt at ge úganiny ta je únyi ame hu kâu. 16 E ame ha ködra úhöúci, ka habe, ame gan troban kânân ke at ae tren omjeú : 17 me e ame únykúme eú hnyi hnyekon, ka habe, Ieú oge me he ka ânyâ, anyin ae ba hnen anyik ta je únyi? 18 Ke haingen, ka habe, Walang únyi oge me he ka ânyâ, oge me he bi nya ka kia ta je omhanik, me otillâ gánâ ; ke oge me he ka ukhöúnâ eling troban ik hnyei, me anyik ta je únyi. 19 M' oge me he ka ha ka hanuk, ka habe, Hanuk lö, e se hia ta je únyi adre úkhöúnâ

hobi köu hnân ta je huna ae se ; ö u menâ, han me ic me senyin. 20 Ke haba Khong ame ha kâu, ka habe, U at ae monu, adre me he ka hom hanom hnyi lit ang ; ke hobi kö ia bi ju ta je únyi u je penapena ? 21 E úcú at ang me at ame ka ip tang omjeú hobi kâu e bi, ke ba bi tang omjehen anyin Khong.

22 Ke haingen ka laten, ka habe, Waleling me oge me ha köbun, ka habe, Ca më únykúme bi ge anyibun möt, wale ge hnöbun hna he ka han ; ke unyibun, wale ge hnöbun hna he ka khavâ. 23 Anyin ae beönua möt hon jeú, ke anyin hon úkhaú. 24 Únykúme ju öbun ta je mekôta, wale adre me ca hnyi belök me menu ; ke ba umödra uma hnân hip únyi, me omhanidra ; ke Khong ame ha ö'dra : ke hawa gabun, e ca beönua öbun hon ta je meno ame gâ ? 25 Ke ie ke at gabun ae khana he ka bi hanen hna thu beny ka hnyi ibeúen, anyin ame ka weny bi? 26 Anyin a wale, a ne ca khan' öbun he ka ânyâ únyi ae úhnyú-kong, ieu can gabun a öbun e únykúme újengöâ ka hnyi ke ta je únyi? 27 Únykúme ju öbun úkúiny ta je ibedila, adre me ca huliwa bi me amo ; ke inya oge me ha köbun, a haba Solomona hnyi anyin hmanenang hia, me ame ca khaú bi helâe. 28 Ke a ne khavâ Khong hnyot helâe, wale a e bi hnyi hnyei hnyi bong ang, ke nyi adre me he ka khûâ ka hnyi wahnainyâ ; hawâ, e ca únyi hnathu kâu he ka okhaú' öbun hnyat ame labageju úhnyú-kong? 29 Ke ca elâm öbun hnöbun hna he ka an me ic, ke ca loloâ bi. 30 Anyin a haba ta je únyi e, me ame elâm minya aten ta je hnyei : ke e khana Kamöbun ae úcú köbun ta je únyi e. 31 Ke so bi elâm bi th' öbun dokhon dökhü, ke adre me he ka ham minya köbun ta je únyi e. 32 Hnahat mamoe ae wakhalet lö, ca ot bi, anyin ae weny Kamöbun he ka ham köbun dökhü. 33 Úco thö anyibun ta je únyi me ham hnân ibetengió ; ânyâ ju je tang mone ae nâk hobi köbun, wale tang omjeú hnyi drany ame ca ba balua bi, ame ca hakekenyâ at ae venöu, k' ame ca okongoâ minya bi hnen nokon waleleba. 34 Anyin a haba hna ip tang omjehebun hnyin wale bi e minya je hnyekubun.

35 Húkâlâ ju wen je hnyekubun, ke so e umumelam anyibun je lamepa ; 36 ke so öbun e tha úcú me tavat adre me halubahingen tuhödra úheny hnyi hna faipoipo ; me adre me he ka ie khöng kâu, e ka o ka

seseto. 37 Hnähic hnen je athnyaba, wale e ka o than ka ö 'drin, ödrin e hmâkâ: e hnathu inya oge me ha köbun, e ame he ka hûkâlâ wen hnyekon, me olab' ödra ju, me he but he ka bi athnyaba ködra. 38 Ke a ne o hnyi awa a loiny, ame ne awa a kuniny, me ö 'drin, ödrin e helâe, hnödrin hnähic. 39 Ke wâtünykûme ju öbun ang, a ne khana tuhan uma üen ame he ka o hnyin at venöu, ame ne hia but hmâkâ, me e ame ca hna bi umen uma m' adre me he ka kia e. 40 E so öbun e laba metâ minya: anyin ame he ka o but Nokon at, hnyi ke üen öbun e ca ünykûme bi.

41 Haba Peteru ame ha kâu, ka habe, Than lö, u me ha ühöücü ang köhmun, hawa u me ha ka tavat hia minya? 42 Haba Than ame ha, ka habe, Ewa athnyaba ae hnathu me metâ, wale hnen tuhan hna otillâ he ka musö hnyaban, he ka khenâ jeü a jekhöüdrin hnyi üen? 43 Hnähic hnen athnyaba eling, e ka o tuhan me wâ a g' ame ânyâ helâe. 44 E hnathu oge me ha köbun, ka habe, e ame he ka otillâ e he ka musö anyin ta je ünyi hia. 45 Ke a ne ha athnyaba eling eü hnyi hnyekon, ka habe, E tiga bec tuhök; k' ame ne hwân he ka kot je athnyaba obaga me omomo, me he ka han me ic, me ic monu; 46 awe, ame he ka o tuhan athnyaba eling hnyi bong e ame ca ünykûme, ke hnyi awa e ame ca wâhmakhmeto, me ame he ka subâ luâ e, me ham kâu jekhon unyin tavat adre me ca üling. 47 Ke haba athnyaba wale ame wâhmakhmetoâ weny tuhan, k' ame ca penapena bi, k' ame ca ânyâ ünyi ae ücü me weny, me adre me he ka osehia kot; 48 ke haba at ae ca khana, k' ame ânyâ ünyi ae ücü he ka kot hnyin, me ame he ka wakhalet hna kot e. Ke haba at adre me ham gâná kâu, me adre me he bi ka elâm gâná unyin: ke haba at adre me ip gâná unyin, me adre me he bi ka hawâ gâná kâu.

49 Oge me o but he ka khûâ meic ka hnyi hmeledrany; ke ieu wek, at ka hia but väc walang ang? 50 E ka hu bapataiso hobi könya a g' adre me he ka bapataiso nya kâu; e pason anyik vec ke ne o but ame hwâdâ thö e. 51 Öbun e ünykûme la, a oge me o but he ka ham hnähic ka hnyi hmeledrany? Inya oge me ha köbun, e ba, ke so bi hna oveseâ: 52 anyin adre me he ka hwân walang ang he ka kia hnyat a thabûng, ödrin e tha laba hnyi uma a khaca, haba kun, me ama iwahnaihmiöny

me lo, ke haba lo, me ödrü me iwahnaihmiöny me kun. 53 Adre me he ka ve kia kamen me nokon, ke nokon me kamen; ama iwahnaihmiöny binyen me nokon hlu, ke nokon hlu me hinyen; ame he ka iwahnaihmiöny üngon me üngon hlu, ke üngon hlu me üngon.

54 Ke e ame ha minya ka tavat ae se hia, ka habe, Öbun ka wâ ülä ame o üheny jimeü, me öbun e ie ha, ka habe, We but ang; ke ka e bi. 55 Ke e ka si thö ang a hwaiöu, me haingöbun, ka habe, Ame he ka gan seüö; ke ka e bi. 56 Öbun hnyat thoi, e khan' öbun he ka wâhmakhmetoâ hmeledrany me drany; ke hawa bi ang öbun e ca wâhmakhmetoâ üen ang? 57 Ke ieu gabun öbun e ca wâhmakhmetoâ bi wisa? 58 Ke u ka tha he me iwahnaihmiöny möu ka at owisa, wâ wia eü hnyi gethen me me hnö u but; wâ e nye lili u thö ka at owisa, ke at owisa ame hnö u but ka at tue, ke at tue ame khüü u thö ka hnyi uma ceat. 59 Inya oge me ha köu, u me ca he ka dit ühem e, ke ne o but u me ham je ong mone hia.

HNYIMAKAN 13.

HABA keihen gadra hnyi üen eling ödrin e thumeto e ge at Galilaia, waleji a ühaniken hnö Pilato drödra me dren anyidra ta je hut. 2 Ke e ame thu me ha ködrin, ka habe, Öbun e ünykûme la, ae beönua monu anyin at Galilaia e hon at Galelaia hia, anyin ame o ködra ta je ünyi e? 3 Inya oge me ha köbun, e ba: ke so bi, öbun e ne ca ietra bi ame he ka hi' öbun minya helâe. 4 Ke hnyat minya a eitän ame kölu takü ödrin tap adre op hnyi Siloam, m' adre me mokcu, öbun e ünykûme la, ae beönua anyidrin monu hon tavat hia adre me laba hnyi Jerusalema? 5 Inya oge me ha köbun, e ba; ke öbun e ne ca ietra bi, ame he ka hi' öbun hia minya but helâe.

6 E ame ha ühöücü ang, ka habe, E hu ge ke at imeta a tä hnyi iny hnye i vine; ke e ame he but ka heleü wan hnyin, ke ba wan ame wâ. 7 Me haingen ka at ame ânyâwia iny hnye i vine, ka habe, Wâ bi, kun dut ta huna oge o hnyin ka heleü wan hnyi imeta eang, ke ba wan oge më wâ: sö but, hnân eü ame okongoâ kânâ? 8 Ke e ame thu kâu, ka habe, Than lö, më hnen ju hnyi huna bi ang, inye më seü igigilö thö, me hân kânân: 9 ke a ne wa e, e so; ke a ne ba, hwaban dö e, u me he ka sö degecâ.

10 Ke e ame úne hnyin ke sunago hnyi sabbath. 11 Ke wá bi wale ke momo, eitin dut hunainy hanu at ame osényiná; ke ame nom but momo, ke ca khana bi he ka tot wisa. 12 Ame wá e Iesu, me e ame ha káu, ka hábe, Momo lö, adre hia but thang ányám sényin. 13 Ke e ame ip li hnyamen hon momo : me e ame ie wisa but, me ogáná Khong. 14 Ke ame hmönyin at ame musö sunago, anyin a Iesu ame osoá hnyi bong sabbath, me haingen ka tavat ae se hia, ka habe, E hu siks ta bong hnân huliwa hnyin : me so öbun e he but jem hnyi je bong eling m' adre me omeli öbun, ke ca hnyi bong sabbath bi. 15 Haba Than ame thu káu, ka habe, Hnyat thoi, hawa, öbun e ca ve thang hnyi sabbath bolok me asina, me su hnyi köiö ai he ka habelen? 16 Ke haba momo ang, nöku Aberahama, waleji a ca Satana, wá bi eitin dut je huna, hawa, e ca úcú he ka thang hnyi sabbath hna ca e? 17 K' ame tiga ha je hofuc eling, me ame hmehma hia but je iwahnaihmiöny mē : ke ame senyin bi tavat ge ta je únyi hia ae hmanenang e ame mádrá.

18 Anyin a wale e ame ha, ka habe, E úcú dökhü dokhon Khong me iéú? ke oge me he ka öuco e me iéú? 19 E úcú me wan sinapi ame hom ke at me tá hnyi iny hnye; me ame kú thö me hlau, me úö ae gan hmá but; me ame laba hnyi je anginy ta je meno ame gá ethö. 20 E ame ha hmetu, ka habe, Oge me he ka öuco dökhü dokhon Khong me iéú? 21 E úcú me leven ame hom momo me ikhálá hnyi falawa a kun ta tulutiny, ke ne o but ame tha khibi hia thö.

22 Ke e ame he but me he hnyi wanben je taun me je hnyaba, k' ame úne tot, ame he Jerusalema ai. 23 Haba ke at ame ha káu, ka habe, Than lö, hawa, e wakhalet thibi tavat adre me he ka möt? Me haingen ködra, ka habe, 24 Hwege th' öbun he ka dit hnyi homagöule ae hnek : anyin a inya oge me ha köbun, ka habe, e se hia tavat adre me elám he ka didró hnyin, k' ame ca he ka khan' ödra. 25 E ka hia but tot tuhan uma, me hlöng hwanuma, ke öbun e hwán he ka tot eú me seseto hwanuma, me ha, ka habe, Than lö, khöng ut köhmun : ke e ame he ka thu me ha köbun, ka habe, E ca khanö nya öbun, öbun houat ua; 26 me öbun e he ka hwán he ka ha, ka habe, Öhmun e hia but han me ic hnyi hnyimákám, ke u je úne hnyi

dehmun je gethen; 27 ke e ame he ka ha, ka habe, Inya oge me ha köbun, e ca khanö nya öbun, öbun houat ua; úsákátö but mönya öbun hia thithö tavat öbun e mádrá hulö. 28 Adre me he ka tenge eling, me úgiö ganyudra, wale öbun ka he ka ö Aberahama, me Isaaka, me Jakob, me ta je perofeta hia thithö hnyi dökhü dokhon Khong, ke adre me he bi ka ob' öbun. 29 Ke adre me he ka ö úhedra jimeyö me jimeú, ke úhedra hnyi hwadrö me hwaiöu, he ka laba hnyi dökhü dokhon Khong. 30 Ke wá bi, e hu tavat a bilidra, ame he ka bödra, ke hu tavat a bödra, ame he ka bilidra but.

31 Ke ame he but keihen ta je Faresaio hnyi awa eling, me ha káu, ka habe, He thö, ke hna but dok ang, anyin a Heroda ame behe ka hlingö u. 32 Ke e ame ha ködrin, ka habe, He th' öbun ka ha ka alope e, ka habe, Wá bi, inya oge me obá ta je demoni, me omelö ta je mok hnyi bong ang me nyi, ke hnyi bong we oge me he ka oumo. 33 Ke so bi, hamök he ka he hnyi bong ang, me nyi, me hnyi bong we : anyin ae ca khana bi ke perofeta ka mok hnyi hoton Jerusalema. 34 Jerusalema, Jerusalema lö, at ame hlingá ta je perofeta, me lú ödrin adre kun' ödrin káu! e se hia wek he ka úkhacaköüá lakom, helá me hinyen denakhoto ame tube lakon ge li labenyin, m' öbun höcö bi öbun! 35 Wá bi, adre hia but hna degecá umöbun uma : ke inya oge me ha köbun, Öbun e ca he hmetu ka ö nya, ke ne o but öbun e he ka ha, ka habe, Hnen hnahic at ame o but hnyi ien Than.

HNYIMAKAN 14.

KE e ame didró ka hnyi uma umen ke taben ta je Faresaio hnyi sabbath he ka han, ke adre me tuö e. 2 Ke wá bi, wale ke at hnyi hnyimakan ame mekiný tháköiö. 3 Ke haba Iesu ame thu me ha ka tavat únö hnanyibu, me ta je Faresaio, ka habe, Hawa, e úcú he ka osoá at hnyi sabbath, e ca úcú? 4 Ke adre me laba hnyibú. Me e ame hom e me osoá, k' ame hna but e. 5 Haingen ködra, ka habe, Ia gabun ae hu haleny asina, a ne bolok, ame kölu ka hnyi thop, me ame ca he ka ie lelö hmetu thö e hnyi sabbath? 6 Ke ca khan' ödra hmetu bi he ka thu je hofuc eling.

7 Ke e ame wá a g' adre me úca je hna lap ae beónua, me e ame ha úhöúctú ka

tavat adre me hawá; haingen ame ha ködrin, ka habe, 8 E ka hawo u ke at ka hnyi faipoipo, ca he ka laba hnyi hna laba ae beónua, wá e nye hu at ae beónua hom adre me hawá, 9 me ame o but at a tha haw' öbu, me ha köu, ka habe, Hna thö hobi káu at ang; me u me he ka hwán hmehma me laba hnyi hna laba ae hnyikánâ. 10 Ke e ka hawo u, he thö ka laba hnyi laba ae hnyikánâ hmönyin; ke ka o at a hawo u, me e ame he ka ha köu, ka habe, Hanök lö, he thö ka laba hnyi hna laba ae beónua: me u me he ka mec hnyi hnyimakan tavat adre me tha laba möu. 11 Anyin adre me he ka öuhnyükongoá at ame ogánâ e bi; k' adre me he ka ogánâ at ame ka öuhnyükongoá e bi.

12 Haingen minya ka at a hawa e, ka habe, U ka thu han jebigö ame ne han sahac, ca hawá lahánâm, me je liamekeiny möu, me ányâm lap, me tavat tren omjeú ae hakekeny köu; wá adre nye he ka hawo u hmetu, me bi hwaban köu. 13 Ke u ka he ka ányá bijeú, hawá thö je theduoc, me ta je bábu, me ta je mat, me ta je wadröu: 14 ke adre me he ka ohnahici u; anyin ae ca hu gadra únyi he ka bi hwaban hmetu köu: anyin adre me he ka bi hwaban köu hnyi úen möt hmetu a tavat ae wisa hwa-kecidra.

15 Ame löng ta je hofuc e hnen ke at ame tha laba mē, me e ame ha káu, ka habe, Hnahic hnen at ame he ka hnyi han hnyi dökuh dokhon Khong. 16 Me e ame ha káu, ka habe, Ame ányá ke at bijeú ae gan hmâ; ke se hia tavat a hawá: 17 ke e ame kuná athnyabainy hnyi úen han he ka ha ka tavat adre me bödra ka hawá, ka habe, Ai öbun; anyin adre hia but penapena ta je únyi. 18 Ke ödrin hia thithö adre me hwán he ka ve ha vhelidra. Haingen ke at káu, ka habe, Oge hia but úco ke utkánâ, ke hamök he ka he ka wá e: ö u hnö nya ju ang. 19 Ke haingen ke at, ka habe, Oge hia but úco je bolok a faiv je úcon, ke oge me he but ka cubic ödrin: ö u hnö nya ju ang. 20 Ke haingen ke at, Oge hia but faipoipo, anyin a wale e ca khanö nya but he ka he. 21 Me ame o but athnyaba, me omanená ta je únyi eling ka tuhan. Me ame hmönyin tuhan uma, me ha ka athnyabainy, ka habe, Ie he bi thö ka hnyi je gethen me je hna ngenu hnyi taun, ke hawá thö jem ta je theduoc, me ta je bábu, me ta je wadröu, me ta je mat. 22 Ke haba athnyaba me

ha, ka habe, Than lö, adre hia but ányá helâ me hnâm hna hûna, ke tiga hu hna lap. 23 Ke haingen than ka athnyaba, ka habe, He thö ka hnyi je hna cit gethen, me hmelen je hak, me újengi ödra thö jem, me me unöngöt dö umök uma. 24 Anyin a inya oge me ha köbun, ka habe, Ame ca he tavat adre bödra ka hawá, ka hnyi drem anyik bijeú.

25 Ke ame tha he me tavat ae se hia: ke e ame hwiö thö me ha ködra, ka habe, 26 A ne hu at ame he ka o könya, ke ame ca höciâ bi kamen, me hinyen, me áiân, me lakon, me je liamekeiny, me lahaniny, me anyin minya bi möt, e ca khana he ka bi hanen ta je latök. 27 Haba at ame ca vadren anyin satauro me he hotuk, e ca khana bi he ka bi hanen latök. 28 Anyin a ie at gabun ame beup tap, k' amé ca mē laba ju he ka aú hwaban, hawa, e hu gan hnân he ka öumo? 29 Wá e nye hia but bi taben, ke ca khana bi he ka öumo, me ame he ka hlumâ e hnen tavat hia adre me wá, 30 adre me ha, ka habe, At ang ame hwân he ka op ke ca khana he ka umo. 31 Ke ie ke than ame he ka vat me ke than, ke ame ca mē laba me bán ka únykúme, hawa, e khana e me tavat a ten thauzan he ka vat me at ae hu gan twente thauzan e ka he ka o káu? 32 Ke a ne ca khana bi, e ame kuná úthumetu ke tiga sákáu bi at eji, he ka sumátâ úsoköu. 33 Ke helâe, haba at gabun ame ca hna bi ta je únyi hia thithö ae hu gan, me ca khana he ka bi hanen latök. 34 Eke, e so sált, ke a ne ba but hinyin sált, ieu hnân ohinyi e? 35 E ca úcú e hobi káu kánâ me hna belök: k' ame degec ut e hnen at. Haba at ae hu li hnyikönyen ka löng, löng ju e.

HNYIMAKAN 15.

AME hakekeny dö káu ta je telona me tavat hia ae monu, he ka löng káu. 2 Ke haba ta je Faresaio me tavat sihnalimen adre me ulidro, ka habe, Ame kap tavat ae kong hnen at ang, k' ame tha han mödra.

3 Me e ame ha úhöúcú ang ködra, ka habe, 4 Ia gabun ae tren mamoe a wan haded, k' ame hia khaca gadra, hawa, ame ca he ka hna but nainte nain hnyi hnye-buba, me elâm at a hia ke ne o but e ame wá ju e? 5 Ke ame wá ju, me e ame ip hon abenyin, k' ame senyin bi. 6 Ke e ka o ka hnyi umen uma, me e ame hawá

úk hacakouá je lahanen, me tavat adre me laba hakekenyá, me ha ködrin, ka habe, Tha senyin dö mönya, anyin oge me wá ju halek mamoe a hia. 7 Inya oge me ha köbun, Adre me he ka senyin heláe hnyi drany ge ietra hnen at a khaca ae kong, hon hnödra hna senyiná tavat ae wisa a nainte nain, waleji a ca hu gadra hnán ietra.

8 Ke ewa momo ae hu gan je mone a ten, ke a ne hia but khaca, ame ca he ka vác lamepa, me aba uma, me elám wia ke ne o but ame wá ju e? 9 Ke e ka wá, me e ame hawá úkhacakouá lahanen, me tavat adre me laba hakekenyá, me ha, ka habe, Tha senyin dö mönya anyin oge me wá ju anyik mone a hia. 10 Inya oge me ha köbun, a g' ame he ka hu senyin heláe hnyi hnyimakan ta je angela anyin Khong can ietra hnen at ae kong a khaca.

11 Ke e ame ha, ka habe, Wale at ae hu lakon li бага: 12 ke haingen wakeiat ka kamen, ka habe, Cico lö, ham dö kõnya jekhóuk. Me e ame khená ködru anyin ta je únyi. 13 Ke tiga ca se hia bong hwabane, haba wakeiat ame úkhacakouá anyin ta je únyi hia, me he ka hnyi ke hnyeí ae sákáú; me e ame dedegec eling tang omjehen ge hwakecin ae kháládren. 14 Ke a hia but kháládrená anyin ta je únyi hia, me ame o but hmiá ae gan hmá ka hnyi hnyeí eling, me ame hwán he ka theduoc. 15 Me e ame he me laba anyin ke at aten hnyeí eling, ke e ame kuná e ka hnyi iny ta hnyeí he ka hán je buaka. 16 Ke ame kú thö weny he ka an ta je unen a an buaka: ke ba at ame hán e. 17 Ke ame metu hmetu thö hnyekon, me haingen, ka habe, Ve ta hlu anyi cica ae ti hu jeú me kolon bi gadrin, ke haba inya oge me he but ang ka mok ge mekihnánem! 18 Oge ma tot me he kö cica, me ha káu, ka habe, Cica lö, oge hia but monu ka hnyi drany me hnyimákám: 19 ke ca úcú hmetu he ka hawo nya me nokom: ha thö inye he ka helá me ányám ke hlu. 20 Me e ame tot, me he ka kamen. Ke kamen ame wá, ke tiga sákáú, me e ame betenge gan, me wadring, me ta ju hon nyin, me úcim-hnyimak mé. 21 Haba nokon ame ha káu, ka habe, Cica lö, oge hia but monu ka hnyi drany me hnyimákám, ke ca úcú hmetu ka hawo nya me nokom. 22 Ke haba kamen ame ha ka lathnyabainy, ka habe, Ie hom but jem úkhaá ae ti so, ke okhavá ju káu; ke iná thö wen hnyam

káu, ke húkáláju tangen li hnyeúca: 23 ke hom but jem nokon kau ae pipikhenya, me hlingá but mate me han me senyin: 24 anyin a walang nökek úheny hnyi hna mok, ka möt hmetu thö; ke a hia, ke wale hmetu thö ang. Me ödrin e hwán he ka senyin. 25 Ke e hnyi hnyaba nokon a atö: ke e ame o me hakekeny ka hnyi uma, me ame löng khumöng me biá. 26 Me e ame hawá ke athnyaba me hnö, ka habe, Ieú thö? 27 Me e ame thu káu, ka habe, A o thö kem; ke a hia but kámám hlingá nokon kau ae pipikhenya, anyin a e ame kap ke tiga möt. 28 Me e ame ka hmönyin me hücö he ka dit: ke ame didrut kamen me újengö e. 29 Ke e ame thu me ha ka kamen, ka habe, Wá bi, e se hia ta ge huna oge bi athnyabaem hnyin, ke ba ányám ke hnanyibu a khaca oge hany-átú: ke so bi u je ca ham balua nokon got kõnya, m' inye he ka tha senyin me lahanök: 30 ke ame hap o ju nokom eang, at ame ohia ányám ta je únyi ka omomo hnyi gethen, me u je hia but hlingá hobi káu nokor kau ae pipikhenya. 31 Me e ame ha káu, ka habe, Nökuk lö, u bala unyik, ke ányám bi anyik ta je únyi hia. 32 E ka úcú kötin he ka senyin me hobá: anyin a walang kem úheny hnyi hna mok, ke a möt hmetu thö; ke hia, ke wale hmetu thö ang.

HNYIMAKAN 16.

KE haingen minya ka laten, ka habe, Wale ke at ae tren omjeú, ae hu athnyabainy a at tue; ke adre me bi fuco e ka tuhan a g' ame kháládrená anyin ta je únyi. 2 Ke e ame hawá me ha káu, ka habe, Ieú e oge me löng gam? ha thö bongon hnám hna tuö; anyin a u me ca he hmetu bi ka tuö. 3 Ke haingen at tue eú hnyi hnyekon, ka habe, Oge ma kámâu anyin ame he but tuhök ka hügúná hany-mök? E ba tang hwegiök he ka hiny káná, k' iny hmehma bi he ka sumat. 4 E mou but únyi oge me he ka ányá, m' adre me köp nya ka hnyi umödra je uma, at ka hia but obö nya únyi hnyi hanymök. 5 Me e ame ve hawá tavat waleji adre me hom gufa unyin tuhan, k' ame ha ka ke at, ka habe, Ve ta únyi anyin tuhök gam? 6 Haingen, ka habe, Wan haded je bathiny wakaco. Me e ame ha káu, ka habe, Hom dö hna sihnalimám, ke ie laba ju, me sihnalimen ju fite. 7 Ke e ame ha ka ke at,

ka habe, Ve ta gufa gam? Haingen, ka habe, Wan haded ta je koriny hwit. Me e ame ha kâu, ka habe, Hom dö hna sihnalimâm me sihnalimen ju eite. 8 Ke haba than ame haisoâ athnyabainy ae ca wisa, anyin a e ame ânyâ metâ : anyin ae metâ but aten hmeledrany unyin anyidra dö hon tavat a aten melam. 9 Ke inya oge me ha köbun, ka habe, Bi hanöbun unyin mamona ae ca wisa ; me me ka o obiny, me adre me he ka köp öbun ka hnyi umödra ta je uma a nyiele balua. 10 Haba at ame hnathu hnyi únyi ae úhnyúkong hmönyin, me e ame hnathu minya bi hnyi únyi ae gan : ke haba at ae ca wisa hnyi únyi ae úhnyúkong, me ca wisa minya bi hnyi únyi ae gan. 11 Anyin a wale, öbun e ne ca hnathu hnyi mamona anyin hwa-kecin ae ca wisa, me ie at ame he ka ip köbun hing tang omjeú? 12 Ke öbun e ne ca hnathu hnyi únyi anyin ke at bi, ie at ame he ka ham köbun anyibun ta je únyi bi? 13 E ba athnyaba ae khana he ka bi athnyabainy li at : anyin a e ame he ka hociâ khaca, me hnyok ka khaca ; ke ame ne he ka keci ka khaca me hukötiâ khaca. E ca khan' öbun he ka bi athnyabainy Khong me mamona.

14 A löng ut ta je únyi e ta je Faresaio, vat ae behnyekudra omjeú ; me adre me hiâ e. 15 Ke e ame ha ködra, ka habe, Öbun tavat öbun e owis' öbun bi hnyi hnyimakan tavat ; ke khana bi Khong je hnye-kubun : anyin a haba únyi ame oúnyihna-thoâ at, me, ikiki bi ling hnyi hnyimakan Khong. 16 Ke ne o but kö Ioane hnanyibu me ta je perofeta : hwaban úen eling adre me khetâ dökhü dokhon Khong, ke ame hwege didró ka hnyin tavat hia. 17 E háhá he ka hia drany me hmeledrany, ke hmak he ka hia ke mataitusi ae úhnyúkong hmönyin hnyi hnanyibu. 18 Haba бага at ame degec áiân me hom hmetu ke at, ame bi únyi monu e : ke haba бага at ame hom momo a degec áiân, ame bi únyi monu.

19 E hu ke at ae tren omjeú, ke e ame khavâ úkhaú ae dra me mano lino, k' ame manenang hnyi ta je bong hia : 20 ke wale ke at sumat, Lazaro ien, waleji adre me labö ip hnyi homagöuleny, e unöngöt dö unyin ge anyú, 21 ke e ame weny he ka an je kolon ame kölu únyi hnyi hon laulau anyin at ae tren omjeú ; eke, ame labö o ta je kuli he ka drem hnân ta je anyú. 22 Me ame mokcu at sumat, me ame hom dö

e ta je angela ka hnyi úlai Aberahama : ke ame mok minya ju at ae tren onjeú, me adre me konâm but. 23 Ke e ame vec hnyi Hedis, me bwele göranyai, me ame ö Aberahama hnyi dok ae sâkâú, me Lazaro minya hnyi úlainy. 24 Ke e ame hongot me ha, ka habe, Cica Aberahama lö, betenge ju gak, ö u me kunö Lazaro, me me ka hîlútlúâ ban banyen hnyi köiö, he ka oka-tebo bohök ; anyin a oge me vec gan hmâ hnyi meic ang. 25 Ke haingö Aberahama, ka habe, Nökuk, únykúme ju a g' ame hu köu ányâm ta je únyi ae so hnyi ányâm möt, ke Lazaro thibiji ae kong anyin ta je únyi : ke walang ang e ame senyin, me u me vec biju. 26 Ke ca hake wale thibi e, ke adre me ip hmâ uthankong hnyigöulöhmun m' öbun, wale me ca khana tavat adre me behe köbun úhedra ang he ka hanyâúâ, ke ca khana tavat gadra adre me behe köhmun he ka hanyâúâ. 27 Me e ame ha, ka habe, Cica lö, inya oge me khöú köu, m' u me kunâ e ka hnyi hnyaba cica ; 28 anyin ae hu je liamekeiny mönya a faiv ; me me he ka ohnathoâ ködrin, wâ ödrin nye hnyi he jem ka hnyi dok ang ae vec. 29 Ke haingö Aberahama kâu, ka habe, E hu Mose me je perofeta unyidrin ; hamödrin he ka ling ödrin. 30 Ke haingen, ka habe, Ohe, cica Aberahama ; ame ne he ke at úheny hnyi hna mok, ödrin e he ka ietra. 31 Me haingen kâu, ka habe, Ödrin e ne ca ling Mose me je perofeta, me ödrin e ca he ka hmehmela e ka möt hmetu thö ke at únyi hnyi hna mok.

HNYIMAKAN 17.

E AME ha ka laten, ka habe, E ca khana he ka ca o ta je útejöng : ke ekölö ge at ame bi deny únyi eling ! 2 E háhá kâu he ka vekiny hnyi hwagenyin veto hnân oamamá, me he ka öúâ but e eú hnyi köiö, ke e hmak kâu ame ne he ka bi joniny ke at ae úhnyúkong eang. 3 Wâ eáú öbun : A ne monu but kem, ná thö ; ke a ne ietra but, hna degecá anyin monu. 4 Ke ame ne he ka oseven monu köu hnyi bong a khaca, k' ame oseven hwiö köu me ha, ka habe, Oge me ietra ; me u me he ka hna degecá anyin monu.

5 Haba je aposetolo ödrin e ha ka Than, ka habe, Bi hanen ju anyihmun labageju. 6 Haba Than ame ha, ka habe, A ne hu gabun labageju helâ me wan sinapi, öbun e he ka ha ka tú sukamine eang, ka habe,

Ok dö me iwân, me könim u but eü hnyi köiö; me ame he ka ling öbun. 7 Ke ia gabun ae hu athnyabainy ame trohnen, ame ne tuö mamoe, ke e ame o but úheny hnyi utkânâ, me ame he ka ha kâu, ka habe, Ie aiö u, m' u me han; 8 ke ame ca bân he ka kâu, ka habe, Penapena thö hnök hna he ka han, ke húkâlâ ju wen hnyekom, me huliwa kõnya ke ne o but oge hia but han me ic; ke hwaban e, u me he ka han me ic? 9 Hawa, e ame ole ka athnyaba, anyin a e ame ányâ ta je únyi adre húna? 10 Helâe minya öbun, öbun ka hia but mádrâ ta je únyi adre húna köbun, ha th' öbun, ka habe, Öhmun ang je athnyaba ae ba troban; öhmun e hia but mádrâ thibi hanymöhmun he ka mádrâ.

11 Ke e ame he hnyi wanben Samaria, me Galilaia, ame he Jerusalema ai. 12 Ke e ame tiga dit ka hnyi ke taun, me ame úkhanö me je lepera a ten, ödrin a tot sákâû: 13 ke ödrin e fuc hwege, ka habe, Iesu a Than lö, betenge ju gahmun. 14 Ke e ame wâ, me e ame ha ködrin, ka habe, He th' öbun ka omanen' öbun ka tavat bi hut. Ke ödrin e tiga he, me ödrin e so but. 15 Ke a wâ but hnen ke at gadrin a ga so but, e ame hmetu ju me haisoâ Khong ge ifucin ae gan; 16 me ta ju hnyikânâi hnyi hmelen li can, me ole kâu: haba at Samaria e. 17 Ke haba Iesu ame thu, ka habe, Hawa, ödrin ca ten adre osoâ? ewa biju nain? 18 E ba ju ke at adre wâ ame hmetu he ka haisoâ Khong, ke hake wale thibi ang atkanyua? 19 Me e ame ha kâu, ka habe, Todrö, he thö, u je mödrut hnen ányâm labageju.

20 Ke a hia but ta je Faresaio hnö e ge úten ame he ka o hnyin dökhü dokhon Khong, me e ame thu ködrin, ka habe, A ca e bi dökhü dokhon Khong me hnân wâ: 21 ke haba khaca, adre me ca he ka ha, ka habe, Wâ bi ang! ke wâ bi e! anyin a wâ bi, e hnyi wanböbun dökhü dokhon Khong.

22 Ke e ame ha ka laten, ka habe, Ame he ka o úten, öbun e he ka weny he ka wâ ke bonginy Nokon at, ke öbun e ca he ka wâ. 23 Ke adre me he ka ha köbun, ka habe, Wâ bi e! Wâ bi ang! ca he ka hnyin me hnu hoton: 24 anyin a haba hiucee, ame hlâ hnyi ke keihen drany, me umumelam ka hnyi ke keihen drany; ame he ka helâe Nokon at hnyi anyin bong. 25 Ke hamen he ka mē vec ge ta je

únyi ae se hia, me hota degecâ hnen dö ang. 26 Ame he ka úcú úten Nokon at me je bong eji bongu Noa. 27 Adre me han, adre me ic, adre me faipoipo, ke úham ta momo, ke ne o but hnyi bong ame dit Noa ka hnyi hu, me ame o but uoü me ohi' ödra hia. 28 Helâe minya hnyi je bong bongu Lota; adre me han, adre me ic, adre me úcú, adre me belök, adre me bi uma; 29 ke haba hnyi bong ame kec Lota úheny Sodoma, me ame ta meic me teio únyi hnyi drany, me ohi' ödra hia: 30 ke ame he ka helâe minya hnyi bong ame he ka manen hnyin Nokon at. 31 Haba at hnyi hon uma hnyi bong eling, ke eiö anyin ta je únyi hnyin uma, me so e ame ca ut bi he ka hom: haba at hnyi hna belök, me so e ame ca hmetu bi. 32 Únykúme ju öiö Lota. 33 Haba at ame he ka elâm he ka tuö anyin möt, me ame he ka ohia e: ke haba at ame he ka hna anyin möt, me ame he ka tuö e. 34 Oge me ha köbun, a g' ame he ka mokut lo li at hnyi lit eling hon hnamokut a khaca; adre me he ka hom khaca, k' ame hnen biju khaca. 35 Ame he li momo ka tha oamamá, adre me he ka hom khaca, k' ame hnen biju khaca. 37 Ke ödrin e thu me ha kâu, ka habe, Than lö, ewa? Haingen ködrin, ka habe, Haba hnen komok, me wale hnen je aeto hna úkhacaköu kâu.

HNYIMAKAN 18.

E AME ha úhöúcú ködrin, me me he tavat ka labö hic bala, ke adre me ca he ka sēnyin; 2 haingen, ka habe, Wale at owisa hnyi ke taun, at ame ca outen Khong, k' ame ca ogânâ at: 3 ke wale ke safac hnyi taun eling; ke e ame ibi ose o but kâu me ha, ka habe, Owisa thü kõnya me iwahnaihmöny mönya. 4 Ke e ame höcö hnyi úten eling: ke hwaban dö e, e ame ha eü hnyi hnyekon, ka habe, Eja ke ne oge ne ca outen Khong, ke oge me ca ogânâ at; 5 ke oge me he bi nya ka owisa ka safac ang, can a g' ame labö lili nya, wâ oge nye mokhon dut gan ame labö he jem kõnya. 6 Haba Than ame ha, ka habe, Löng ju öbun hna ha hnen at owisa ae hwali hwakecin. 7 Ke hawa, ame ca he Khong ka owisa ka tavat e ame úca, a tavat adre me hongot kâu hnyi lany me lit, ke e ame hok hnyoki ödra beú hmâ ju? 8 Inya oge me ha köbun, e ame he ka ie owisa ködra. Ke e ka o Nokon

at, hawa e ame he ka wâ labageju eang hmeledrany?

9 Ke e ame ha ûhôûcû eang ka keihen adre me ka labageju kôdra bi, a ôdra wisa, ke adre me ôunyibaûâ keihen: 10 Haba lo li at ôdru me he ka hnyi uma kap he ka hic, Faresaio ke at, ke telona ke at. 11 Haba Faresaio ame tot me hijö e bi helâng, ka habe, Khong lö, inya oge me ole kôu, anyin a iny ca ûcû bi me keihen, a tavat venöu, me hwali hwakecidra, me tavat bi ûnyi monu, k' iny ca ûcû minya bi me telona ang. 12 Inya oge me olo ânyâ ca han hnyi je wik, ke oge me ham ke keihen a libenyitainy anyik ta je ûnyi hia thithö. 13 Ke haba telona ame tot sâkâû, e ame ca mê bwele bi hnyi drany ai, ke e ame khaû ûlainy me ha, ka habe, Khong lö, betenge ju gak at ae monu, 14 Inya oge me ha kôbun ame he but at ang ka hnyi umen uma, ke adre haiwisa e hon at eji: anyin adre me he ka ôûhnyûkongo at ame ogânâ e; ke adre me he ka ogânâ at ame ôûhnyûkongoâ e.

15 Ke adre me hom but minya kâu, ta je mendreng me me he ka kâl' ôdra: ke ame wâ e laten, me ôdrin e thaw' ôdra bi. 16 Ke haba Iesu ame haw' ôdra kâu, me ha, ka habe, Hna but ta je wanakat ka he jem kônya, ke ca thaw' ôdra bi: anyin a ôdra ûcû me dôkhu dokhon Khong. 17 E hnathu, inya oge me ha kôbun: haba at ame ca he ka kap dôkhu dokhon Khong helâ me wanakat, me e ame ca he balua ka didrö ka hnyin.

18 Me ame hnö e hnen ke taben, ka habe, At ûne ae so lö ieu hanymök oge me he ka mâdrâ e me hu thö kônya môt ame ca ba balua? 19 Ke haba Iesu ame ha kâu, ka habe, Ieu e gam u me ha m' iny so? e ba ke at ae so, ke khaca thibi a Khong. 20 E khanö u ta je hnanyibu, ka habe, U ca he ka bi ûnyi monu, U ca he ka ûhlingö, U ca he ka venöu, U ca he ka bi fuco thoiâ, Ogânâ ju kâmâm me hinyâm. 21 Ke e ame ha, ka habe, Oge hia but vheno ta je ûnyi e k' iny tiga wanakat. 22 Ke a löng ut Iesu ûnyi e, me e ame ha kâu, ka habe, Khaca biju ûnyi ae hia gam: ûco thö ânyâm ta je ûnyi hia, me khenâ ka ta je theduoc, ke u me he ka hu tang omjeû hnyi drany: ke aiö u bi, me he hotuk. 23 E ame löng je hofuc e, me ame hmak ut hnyekon, anyin a e tren omjeû ae gan hmâ. 24 Ke ame wâ e Iesu, me haingen, ka habe,

Huliwa but at ae tren omjeû he ka didrö ka hnyi dôkhu dokhon Khong! 25 Anyin ae hâhâ ka kamela he ka didrö ka hnyi hwanumen jebû, ke hnek bi he ka didrö ka hnyi dôkhu dokhon Khong ka at ae tren omjeû. 26 Haingen tavat adre me löng e, ka habe, Ia la ae khana he ka môt? 27 Ke e ame ha, ka habe, Haba ta je ûnyi hia thithö ae ca khana at, me khana bi Khong. 28 Haba Peteru ame ha, ka habe, Wâ bi, ôhmun e hia but hna degecâ ta je hnyabahmun, me he hotom. 29 Haingen ame ha ködrin, ka habe, E hnathu inya oge me ha kôbun; a haba at ame hna but uma, me âiân, me je liamekeiny mê, me kamen, me hinyen, me lakon hobi kâu dôkhu dokhon Khong, 30 me e ame he ka kap ta je ûnyi ae se hia hnyi ûen ang, ke hnyi ûen ame he ka o môt ae ca ba balua.

31 E ame hom kâu hnyat a twelv me ha ködrin, ka habe, Wâ bi, ôtin e he ka he Jerusalema ai, ke ame he ka hwâdâ ka Nokon at ta je ûnyi hia a sihnalimen ta je perofeta. 32 Anyin adre me he ka hna e ka aten ta je hnyei, ke adre me he ka hlumâ e, me okongoâ, me hangöjâ: 33 ke adre me he ka osöâ, me hlingâ e: ke e ame he ka môt hmetu thö hnyi bong a kuniny. 34 Ke ôdrin e ca wâ ûnykûme bi ta je ûnyi eling; e iyong ködrin hofuc e, k' ôdrin e ca wâhmakhmeto bi ta je ûnyi e ame ha.

35 E ame hakekenyâ Jeriko, ke haba ke wadröu ame laba eû hnyi baten gethen, k' ame sumâtâ ta ûnyi: 36 ke e ame löng hwan bunyen ae gan, me e ame hnei, ka habe, Ieu ang? 37 Ke adre me thumeto e a g' ame he thö Iesu at Nazareta. 38 Me e ame hongot, ka habe, Iesu lö, nôku Davita, betenge ju gak. 39 Ke haba tavat a bödrin ôdrin e thawâ e, me me laba hnyibu ju: ke e ame hongot hwege tot, ka habe, Nôku Davita lö, ö u betenge gak. 40 Haba Iesu ame todru, me ûkhûnöng he ka hawâ e kâu: me e ame o but, ke e ame hnö e, ka habe, 41 Ieu ae wem oge me he ka ânyâ kôu? Ke e ame ha, ka habe, Than lö, m' inye bwela but. 42 Ke haba Iesu ame ha kâu, ka habe, U je bwela but: u je mödrut hnen ânyâm labageju. 43 Me e ame ie bwela but, me he hoton, me haisöâ Khong: ke a wâ but e hnen tavat hia, me adre me olungâ Khong.

HNYIMAKAN 19.

KE e ame didrö me he hnyi wanben Jeriko. 2 Ke wá bi ke at Zakaio ien; ke taben je telona, ke tren minya omjetú. 3 E ame heleú deny he ka ö Iesu, ame ne ia; ke ca khana bi anyin ae se hia tavat, ke e ae okhulit. 4 Me e ame bán ka wadring, me ölö hnyi úú sukamore me me he ka wá e: anyin a e ame he ka he hmelen e. 5 Ke ame o but Iesu ká e, me e ame bwele thö, me wá e, me ha káu, ka habe, Zakaio lö, utut, mweimwei thö; anyin a hamök he ka laba hnyin umám uma hnyi bong ang. 6 Me e ame ie utut, me kap senyiná e. 7 Ke ödra hia adre me wá e, me adre me ulidra, ka habe, A he but ka tha laba me at ae kong. 8 Ke haba Zakaio ame tot me ha ka Than, ka habe, Than lö, wá ju, inya oge me ham ke keihen a hafiny anyik ta je únyi ka tavat ae theduoc; ke oge ne hia but hügúná monoá omjehen ke at, me oge me ibi ovak hmetu bi hwaban. 9 Ke haba Iesu ame ha káu, ka habe, A o but möt ka hnyi hnyaba eang hnyi bong ang, anyin a walang ke at nöku Aberahama. 10 Anyin a o but Nokon at he ka elám, me omelö wahia.

11 Ke adre me tiga löng ta je únyi eling, e ame bihanen ta je hofuc me ha ke úhöúú, anyin a e ame hakekenyá Jerusalema, ke can minya adre me únykúme ame he ka ie manen dut dökhu dokhon Khong. 12 Anyin a wale, e ame ha, ka habe, Ame he but ke than ka hnyi dok ae sákáú, he ka kap dökhu hobi káu, ke ame he ka hmetu. 13 Me e ame hawá ke je athnyabainy a ten, me ham ködrin je mina a ten, me ha ködrin, ka habe, Huliwan dö ke ne o but hnyi úen oge me o hnyin. 14 Ke ame höciá e hnen aten iny hnyei, ke adre me kuná úthumetu he ka wadring hoton he ka ha, ka habe, E ca wehmun me me musi öhmun at ang. 15 Me e ame o hmetu but, ke a hia but kap dökhu, me e ame úkhúnöng he ka hawá je athnyaba waleji a ham mone ködrin, me me wá thö hnödrin hna ve huliwan. 16 Me ame o but khaca, me ha, ka habe, Than lö, adre hia but huliwan ányám mina a khaca me ame óa ta je mina a ten. 17 Me e ame ha káu, ka habe, Ole, u athnyaba ae so: hamám he ka musó ta je taun a ten, anyin a u je hnathu hnyi únyi ae úhnyú-kong. 18 Me ame o minya but ke at me ha, ka habe, Than lö, a hia but ányám mina a khaca bi hanen thabúng minya ta je

mina. 19 Ke e ame ha minya káu, ka habe, Musö minya ju je taun a thabúng. 20 Ke ame o minya but ke at me ha, ka habe, Than lö, wá bi ányám mina, waleji oge me tuö me lan hnyi ecmano: 21 anyin a oge outö u, anyin a u at ame ú: u at ame hom únyi u je ca ip, me menö hnám hna ca tá. 22 Ke e ame ha káu, ka habe, U athnyaba ae monu lö, únyi hnyi hnyimám oge me he ka hangö u. E khañö u a iny at ú, me hom but únyi oge ca ip, me menö hnök hna ca tá; 23 anyin a wale, iéú can u me ca ham anyik mone ka hnyi uma tuö mone, hobi káu iny ka o thö, ame he ka hu kónya anyik me hna bi hanen? 24 Me e ame ha ka tavat adre me tot hakekeny, ka habe, Hügúná thö gan mina, me ham ka at ae hu je mina a ten. 25 Ke ödrin e ha káu, ka habe Than lö, e hu minya gan je mina a ten. 26 Haba inya oge me ha köbun; Adre me he ka ham ka at ae hu gan; ke adre me he ka hügúná ge at ae ba gan, únyi e ame hu. 27 Ke haba tavat eji je iwahnaihmiöny mönya, waleji ae ca wedra oge me he ka musi ödra, hum ödra but jem he ka hling' ödra hnyi hnyimakök.

28 Ke a hia but ha e, me e ame bán dut he ka he Jerusalema ai.

29 Ke e ame hakekeny jut Bethefage ai, me Bethania hnyi bucen Elaio ien, me e ame kuná ke li laten, 30 me ha, ka habe, He th' öbu ka hnyi taun cici öbu; ke öbu ka tiga dit hnyin öbu me he ka wá nokon asina adre noc, ae tiga ca tabá e hnen at: thang ut e me lelö thö jem. 31 E ka hu at ame hnei öbu ka habe, Öbu me thang hnán eú? m' öbu ha thö heláng, ka habe, E hu hanymen e ge Than. 32 Me ame he but li at a kuná, me wá helá me hnen hna ha. 33 Ke ödrü me tiga thang nokon asina, me ame ha ködrü hnyat a haleny, ka habe, Öbu me thang hnán eú nokon asina? 34 Me haingödrü, ka habe, E hu hanymen e ge Than. 35 Ke ödrü me lelö thö e kö Iesu: ke ödrin e ip je khaúdrin hon nokon asina, me ip Iesu hon. 36 Ke e ame he, k' adre me ulolo je khaúdra eú hnyi gethen. 37 E ame hakekenyá dok adre me ölö ka hnyi hon bucen Elaio, me ame hwán bunyen laten hia ka senyin me ole ka Khong ge ifucidra ae gan, can ta je huliwa ae man adre me wá; 38 haingödra, ka habe, Hnahic hnen At musi ame o but hnyi ien Than: hnahic ethö hnyi drany, ke hmanenang ethö hnyi dok ae görany hmönyin. 39 Me

ame ha kâu keihen ta je Faresaio, hanen tavat ae se hia, ka habe, At úne lö, thawâ ju látâm. 40 Me e ame thu, ka habe, Inya oge me ha köbun, a ne laba hnyibú ju tavat ang, ame he bi ta je veto ka fuc.

41 E hakekeny jut, k' ame wâ taun, me e ame tenge gan, 42 me ha, ka habe, A ne khanö u hnyi bongom bong eang ta je únyi a hanen hnahic! ke walang ang adre me ikhâlâ hnyi li emâkâm. 43 Anyin ame he ka o köu je bong, k' ame he je iwahnai-hmiöny móu ka okhibi kânâ igigili u, me tot igigili u, me hling u, 44 me othahoni u me kânâ, u me je lakom unyâm; ke ame ca he ka hnen ke veto hon ke veto hnyi wanbâm; anyin ae ca khanö u úen adre me sen' u hnyin.

45 E ame didrö ka hnyi uma kap, k' ame hwân he ka ob' ödra but adre me úcú hnyin, 46 ame ha ködra, ka habe, Adre hia but sihnalimen, ka habe, Haba umök uma, me uma hnân hic; ke öbun e wia thö e me me op a umen tavat venöu.

47 E ame úne hnyi je bong hnyi uma kap. Me adre me elâm he ka hlingâ e hnen je taben tavat bihut, me tavat sihnalimen, me je athnathuiny hnyei: 48 ke adre me ca wâ ke únyi he ka ányâ; anyin ame belöng kâu tavat hia thithö.

HNYIMAKAN 20.

HABA hnyi ke bong, e ame tiga ná tavat hnyi uma kap, k' ame khetâ úthumetu ae so, me ame o but kâu je taben tavat bihut me tavat sihnalimen, me wahingat; 2 me haingödra kâu, ka habe, Ha thö köhmun: Únyi ga ia musi u me ányâ kâu ta je únyi e? Ke ia ham köu musi e? 3 Me e ame thu ködra, ka habe, Oge me he bi nya ka hnei öbun ke únyi, ke thu thö könya: 4 Haba bapataiso anyi Ioane, hawa únyi hnyi drany, hawa únyi ge at? 5 Me adre me úhnenamö, ka habe, Ate ne ha, únyi hnyi drany, me e ame he ka ha, ka habe, Ieú e gabun öbun e ca kap e? 6 Ke ate ne ha, ka habe, Únyi ge at; me ame he tavat hia thithö ka lú' öta ge veto: anyin ae manen ködra a perofeta Ioane. 7 Me ödrin e thu, ka habe, E ca khan' öhmun dok a únyi hnyin. 8 Haba Iesu ame ha ködrin, ka habe, Oge me ca he minya inya ka ha köbun musi oge me ányâ kâu ta je únyi e.

9 E ame hwân he ka ha ka tavat úhöücú ang, ka habe, Ame tâ hnyei vine hnen ke

at, k' ame hna ka tavat ödrin e belökâ hnyei, me he but ka hnyi hnyei ae sâkâú he ka laba beú hmâ eling. 10 Ke haba hnyi huna e ame kunâ athnyabainy ka tavat belök, m' ödrin e he ka ham kâu je wan vine: ke haba tavat belok, me ödrin e kot e me obâ ke ba únyi a hom. 11 Me ame kunâ ke athnyaba bi: ke odrin e kot minya e, me okongoâ, me obâ ke ba únyi a hom. 12 Ke e ame kunâ hmetu a kuniny: ke ödrin e kot minya e, me obâ kâú. 13 Me ame ha tuhan hnyei vine, ka habe, Ieú oge me he ka ányâ? Oge me he ka kunâ nökek a oúnykúmik, ödrin e he la ka ogânâ e. 14 Ke a wâ but e hnen tavat belök, me ödrin e úsabö, ka habe, Wale but ang matrân: ötin e he ka hlingâ e me me tang omjehetin biju anyin ta je únyi. 15 Me ödrin e obâ but e kâú ka hnyi hoton hnyei vine me hlingâ. Anyin a wale, ieú ame he ka ányâ tuhan hnyei vine ködrin? 16 E ame he ka o me ohia tavat belok, me ham hnyei vine ka keihen. Ke adre me löng ut, me haingödra, ka habe, Ekölö, e so e me ca helâe. 17 Me e ame ö' drin me ha, ka habe, Ieú hna sihnalimen, ka habe,

Haba veto ame degec hnen tavat hötilö uma,

Adre hia but ányâ hnân ban hon ba-hebet?

18 Haba at ame he ka kölu takou veto ang ame he ka amam, ke e ka kölu ka hnyi hou at, me ame he ka thu omomono e.

19 Ke haba tavat sihnalimen, me ta je taben tavat bihut adre me elâm hnyi awa eling he ka kât e; ke ödra outen tavat: anyin ae khan' ödrin dut a e ame ha úhö-úcú eling gadra. 20 Ke adre me tuö e, me kunâ keihen he ka ecmâká, me iyawâ hwakecin ae wisa, k' ödrin thoi bi, m' adre me he ka kât e ge ta je ifucin, m' adre me he ka hna but e ka tavat owisa, me musi anyin gavena. 21 Ke adre me hnö e, ka habe, At úne lö, e khan' öhmun dut a u me ha me únö wisa, ke u je ca wâhmakhmeto at, ke u me ná hnatho gethen deny Khong: 22 E úcú köhmun he ka fat kö Kaisara, hawa, degec ut? 23 Ke e ame wâ but je hnyekudrin, me e ame ha ködrin, ka habe, 24 omanená thö könya denari. Hnyimakö ia ang, me hna sihnalimen? Ke ödrin e thu, ka habe, Kaisara. 25 Me e ame ha ködrin, ka habe, Awe, ham but kö Kaisara ta je únyi anyi Kaisara, ke ka Khong ta je únyi anyin Khong. 26 Ke ca khan' ödrin he ka kat e ge ifucin hnyi hnyimakan

tavat: ke adre me láia hnen hna. thu, me laba hnyibu.

27 Me ame o but káu keihen ta je Sadukaio, tavat adre me ha, ka habe, e ba möt hmetu thö; ke adre me hnö e, 28 me ha, ka habe, At úne lö, haba Mose ame sihnalimen köhmun, ka habe, E ka mokcu at ae hu áian a liamekeiny me ke at, ke e ka mokcu e ke ba nokon, me hamen liamekeiny më he ka hom momo e, me bi mátrân liamekeiny më. 29 Ke wale je liamekeiny a seven: ame faipoipo thö atö, me ame mokcu ke ba mátrân; 30 ke ame hom dö e at a loiny; me at a kuniny; 31 ke heläe gadrin hia hnyat a seven, ödrin e mokcu ke ba mátrânidrin. 32 Ke hwabödrin dö ame mok minya ju momo. 33 Ame he ka öio ia e gadrin hnyi möt hmetu? anyin a ödrin seven ödrin e hom e. 34 Ke haba Iesu ame thu ködrin, ka habe, Haba tavat eang hmelen, me adre me faipoipo, me úham ta momo: 35 ke haba tavat a ödra úcú he ka he ka hnyi möt eling, ke he ka möt hmetu úhedra hnyi hna mok, me adre me ca he bi ka faipoipo me úham ta momo: 36 ke ca khan' ödra bi he ka mok hmetu: anyin a ödra úcú me ta je angela; ödra lakon Khong, a lakon möt hmetu únyi hnyi hna mok. 37 Ke so bi, a hia but omanená ga Mose, hnyi dok eji a uhnyot, a g' ame he ka möt hmetu tavat úhedra hnyi hna mok, waleji hnyi hnen hna hawá Than a Khongu Aberahama, me Khongu Isaaka, me Khongu Jakob. 38 Haba Khong, me ca Khongon tavat adre me mok, ke so bi tavat ae möt: anyin adre me möt hia káu. 39 Me ame thu hnen keihen tavat sihnalimen, ka habe, At úne lö, e so hnám hna ha. 40 Ke hwaban e me ba hmetu at ae hwege hnyekon he ka hnö gan ke únyi.

41 E ame ha ködra, ka habe, Adre me kámáu hna ha, ka habe, Haba Keriso me nöku Davita? 42 Anyin a haingö Davita hnyi tusi Salamo, ka habe,

Ame ha Than ka Tuhök, ka habe,

Laba ju hnyi ke keihök a metök,

43 Ke ne o but oge me he ka wia je iwahnaihmiöny möu me hnân taben li cam.

44 Anyin a wale, a ne ha Davita, ka habe, Than, me ame he ka kámáu ka nokon bi?

45 Ke e ame ha ka laten hnyi hnyimakan tavat ae se hia, ka habe, 46 O 'bun áu ge tavat sihnalimen, hnyat a wedra he ka he me ta je úkhaú ae beú, me he ka

nom ködra tavat hnyi ta je hna úcú, me je hing taben lap hnyi je sunago, me je hna laba ae beónua hnyi je bijéú; 47 ödra adre me waláká je uma umen je safac, me hic beú hmâ hnân tube hwakecidra: adre me he ka hu hnaúhangö ae gan hmâ.

HNYIMAKAN 21.

KE e ame wá tavat ae tren omjeú adre me ve khúá anyidra ta je bwihlany ka hnyi tangen mone. 2 Ke e ame wá ke safac ae theduoc, ame khúá li mone ae úhnyúkong. 3 Ke e ame ha, ka habe, E hnathu inya oge me ha köbun, ka habe, E gan hmâ hnen safac eang ae theduoc hna khúá, hudrin hia: 4 anyin a ödra hia adre me ve khúá ka hnyi tangen bwihlany únyi hnyi unöngöt gadra: ke haba momo únyi hnyi anyin theduoc ame khúá hia hwaban anyin möt.

5 Ke haba keihen adre me úhnenamö uma kap, wale adre omecá ge ta je veto ae so me je bwihlany, me e ame ha, ka habe, 6 Haba ta je únyi e öbun e wá, ame he ka o úen, me ame ca he bi ka hnen ke veto hon ke veto, ke adre me he ka tho hia. 7 Ke ödrin e hnö e, ka habe, At úne lö, ame he ka hwádá kehö ta je únyi e? ke iéú haten ge úen ame he ka hwádá hnyin ta je únyi e? 8 Haingen, ame ha, ka habe, Wá eáú, adre nye omonu öbun dut: anyin a at se hia adre me he ka o hnyi iök, me ve ha, ka habe, Inya ang; ke, e hakekeny jut úen: ca he öbun ka hnu hotudrin. 9 Ke öbun ka löng hön vat, me bwebwet, ca ot bi: anyin ame he ka më o ta je únyi e; ke ca logot bi obiny.

10 Me e ame ha ködra, ka habe, Ame he ka tot metá ke hnyeí ka ke hnyeí, me ke dökhu ka ke dökhu: 11 ke ame he ka hu ta je hwiöi ae gan, me hmiá, me mok hnyi ke je dok; ke ame he ka manen únyi hnyi drany ta je únyi hnân outen, me ta je haten ae gan. 12 Ke adre me he ka köt öbun, ke tiga ca o ta je únyi eling, me okongu öbun, me hn' öbun ka hnyi je sunago, me je uma ceat, me lili öbun ka je than me gavena can iök. 13 Ke ame he ka o e köbun hnân ohnatho. 14 Anyin a wale ip ju eú hnyi je hnyekubun, a ca he öbun ka më únykúme únyi hnân he ka thu: 15 anyin oge me he ka ham köbun hnyem me metá, me me ca khana iwahnaihmiöny möbun he ka úkhin fuc möbun me ton. 16 Ke ame he ka alecu' öbun hnen je kamen,

me hinyen, me je liamekeiny, me lahan-öbun, me je lawaebun; ke adre me he ka hlingâ keihen gabun. 17 Ke ame he tavat hia thithö ka hûkoti öbun can iök. 18 Ke ame ca he ka hia ke leünen böbun. 19 Öbun ka hok hnyok, me öbun e he ka möt.

20 Ke öbun ka wâ Jerusalema adre me igigilö hnen vat, me wâhmakhmeto ju öbun ae hakekeny jut he ka ohia e. 21 Hnyi üen eling, e so e he at Juda ka kec ka hnyi je bucen; ke so e didrut tavat adre me laba hnyin taun eling; ke ca dit hmetu bi ühedra hnyiöu. 22 Anyin a üen bi hwabab eling, me me hwädâ ta je ünyi hia adre me sihnalimen. 23 Ekölö ge tavat a ödra erkin, ke tavat üasin hnyi bong e! anyin ame he ka o hlöuhlöu ae gan hnyi hnyeï, me hmönyin ka tavat ang. 24 Ke adre me ke ka ta ge homakan hele vat, me he ka hom hwenb' ödra ka aten ta je hnyeï: k' ame he ka uto Jerusalema hnen aten ta je hnyeï, ke ne o but ame bekhöt ut üen aten ta je hnyeï. 25 Ke ame he ka hu ta je haten hnyi seünö me tehi me ta je okhû; ke hlöuhlöu hnyi hmeledrany minya, ke hlohlo hnyi ta je hnyeï can imeainy köiö me ta je waköiöiny ame ü: 26 ame he ka mok tavat ge ot, ik' adre me penapena halubahingen ta je ünyi eling ame he ka o ka hnyi hmeledrany: anyin adre me he ka jijingâ ta je man ethö hnyi drany. 27 Ke hnyi üen e adre me he ka wâ Nokon at ame utut k' ame tabâ ülä tha e me man, me hmanenang ae gan. 28 E ka hwân he ka hwädâ ta je ünyi eling, bwele th' öbun me wâ; anyin ae hakekeny jut he ka omeli öbun.

29 Ke e ame ha ködra ühöücü, ka habe, Wâ bi imeta me je üö hia: 30 e ka kû thö, me öbun e wâ me wâhmakhmeto ae hakekeny jut honivakeny. 31 Ke helâe, öbun ka wâ ta je ünyi eang ame o, wâhmakhmeto ju öbun ae hakekeny jut dökhu dokhon Khong. 32 E hnathu inya oge me ha köbun, a g' ame ca he ka hia dö eang, ke ne o but ame hwädâ ta je ünyi hia. 33 Ame he ka hia drany me hmeledrany: ke ame ca he bi ka hia hok ta je hofuc.

34 O 'bun äu, wâ e nye hmak je hnye-kubun ge hna han gånâ, me hna ijem gånâ, me hna ünyküme möt ang, me ame he ka o bong eling me öuthmoki öbun helâ me hnewe: 35 anyin ame he ka o helâe ka tavat hia adre me labâ hmeledrany. 36 Ke hmákâ ju öbun hnyi je üen hia, me

labö hic, me me kxan' öbun he ka kec ge ta je ünyi hia eang ame he ka o, me he ka ütütülen hnyi hnyimakan Nokon at.

37 Ke e ame üne hnyi uma kap hnyi je lany; ke hnyinghet ut e ame didrut me laba hnyi bucen, Elaio ien. 38 Ke hnyi je hnyomakatu ame he but kâu tavat hia ka hnyi uma kap he ka löng kâu.

HNYIMAKAN 22.

KE e hakekeny jut bijeüiny areto adre ca levenâ bi, Paseka ien. 2 Haba je taben tavat bihut, me tavat sihnalimen adre me heleü deny he ka hlingâ e; anyin adre me ouden tavat.

3 Me ame didrö Satana hnyi hnyeku Juda, ke ien minya Isakariota, e ke at hnyi twelv. 4 Me e ame he me ühnenamö me je taben tavat bihut me je taben vat, ge hwakecin he ka alecuâ e ködra. 5 Me adre me senyin me ühinhinyköu më, he ka ham kâu mone. 6 Ke e ame hmehmelâ, me elâm üen he ka alecuâ e ködra ke tiga hia bi tavat ae se hia.

7 Ke ame o but bonginy areto adre ca levenâ, wale üen hlingâ paseka. 8 Me e ame kunö Peteru me Ioane, ame ha, ka habe, He th' öbu, me penapena thö paseka hobi kötin he ka han. 9 Ke ödrü me ha kâu, ka habe, Ewa dok ae wem öhmu me he ka penapena hnyin? 10 Ke e ame ha ködrü, ka habe, Wâ bi, öbu ka o ka hnyi taun, öbu me he ka ükhane me ke at ame vadren kaia ae lup; he thö hoton ka hnyi uma e ame he ka dit ka hnyin. 11 Ke öbu me he ka ha ka tuhan uma ka habe, Haingen At üne, öhmu me ha ju köu, ka habe, Ewa uma umen ta je atkanyua, me inye he me latök ka han paseka hnyin! 12 Me e ame he ka kû köbu hnyeule ae gan ethö adre ave, penapena thö ling. 13 Ke ödrü me he but me wâ helâji me hnen hna ha ködrü: me ödrü me penapena paseka.

14 Ke ame o but awa, me e ame laba ju, tha e me je aposetolo. 15 Haingen ködrin, ka habe, E gan hmâ wek he ka tha han möbun paseka eang, ke tiga hia imekik: 16 anyin a inya oge me ha köbun, ka habe, oge me ca he hmetu ka hnyi an e, ke ne o but ame hwädâ thö e hnyi dökhu dokhon Khong. 17 Ke e ame kap utkaia, k' ame oleâ, ke haingen, ka habe, Hom dö ang me ve khenâ thö unyibun: 18 anyin a inya oge me ha köbun, ka habe, Oge me ca he

hmetu ka hnyi ijem wan vine ke ne o but ame o but dökhu dokhon Khong. 19 Ke e ame hom areto, k' ame oleá, me thuthu, me ham ködrin, haingen, ka habe, Walang unyik adre me ham hobi köbun : ányá thö ang hnân únykúme kõnya. 20 Ke heláe minya kaia hwaban hna han, ame ha, ka habe, Walang kaia a úhihinýkõu ae teb únyi hnyi drök, ame hingálá hnân hobi köbun. 21 Ke wá bi, haba hnyamen at ame he ka alecuo nya, me walang unyik a hnyi hon laulau. 22 Anyin e hnathu ame he ka he but Nokon at heláji me hna ha muá : ke ekölö ge at adre me alecuá a deny ! 23 Me ödrin e hwân he ka úhnökõuá, a ia gadrin ame he ka ányá únyi e.

24 Ke ame kú minya hna ivinö unyidrin, a ia ame he ka beónua gadrin. 25 Me haingen : ködrin, ka habe, Haba je tuhan aten ta je hnyei, me ödrin e hwen than ködra ; ke adre me hwenyi iödrin, a hnyat musi ödra, ka habe, Hnyat betenge. 26 Ke öbun e ca he ka heláe : ke haba at ame he ka beónua gabun, me so e ame he ka helá me wakeiat ; ke haba taben, me ame he ka helá me athnyaba. 27 Anyin a ie at ae beónua, a at ame laba ka han, hawa athnyabainy ? hawa ca at ame han ? ke inya ang unyibun helá me athnyaba. 28 Ke haba öbun, me öbun hnyat a hia but tethmá unyik hnyi je hna cubic nya ; 29 me oge me ham bi köbun dökhu, helá me Kamök ame ham kõnya, 30 m' öbun e he ka han me ic hnyi anyik laulau hnyi dökhu dökhu ; ke öbun e he ka ve laba hon je theron he ka owisa ta je tribu anyin at Isaraela a twelv. 31 Simona, Simona lö, wá bi, a hia but Satana sumátá he ka hum öbun, me me he ka jijingi öbun helá me hwit : 32 ke oge me hic hobi köu, me me ca he bi ka hia ányám labageju : ke u ka hmetu thö, sihwegiá je liamekeiny möu. 33 Ke e ame ha káu, ka habe, Than lö, oge hia but penapena he ka tha he möu ka hnyi uma ceat me mok minya. 34 Ke e ame ha, ka habe, Peteru, inya oge me ha köu, ka habe, e tiga ca kokok bi khoto hnyi bong ang, u me he ka mä okun ivinö hnám hna khana inya.

35 Ke e ame ha ködrin, ka habe, Habaji ge hnök hna kun' öbun, ke ba tangen mone, me tang, me tangen hnyeúcabun, hawa, e hu ke únyi ae hia gabun ? Haingödrin, ka habe, E ha. 36 Me e ame ha ködrin, ka habe, Ke walang ang, haba at ae hu tangen mone, e so e ame he ka hom,

me tang minya : ke haba at ae ba hele vat, e so e ame hom anyin úkhaú he ka bi hwaban hele vat. 37 Anyin a inya oge me ha köbun, e úcú he ka hwádá kõnya hna sihnalimen ang, ka habe, Adre me tha aú e me tavat ae kong : anyin adre ohwádá únyi a únyi gak. 38 Ke ödrin e ha, ka habe, Than lö, Walang li hele vat. Ke e ame ha ködrin, ka habe, E so.

39 Ke e ame didrut me he ka hnyi bucen Elaio, heláji me hwakecin ; me ame he hoton laten. 40 Ke e ame o but ká e, me e ame ha ködrin, ka habe, Hic ju öbun, m' öbun e ca didró ka hnyi úcúbic. 41 Ke e ame úsákátüö mödrin, heláke me hobenyin at ; ke e ame cibouca, me hic, 42 ame ha, ka habe, Cica lö, a ne wem he ka hom but utköiö eang gak ; ke so bi, ca he ka ányá wek, ke so bi wem. 43 Me ame manen dut káu angela únyi hnyi drany ame owhegiá e. 44 Ke e ame vec gan hmá, me e ame hic hwege, ke haba khun gan ame hingölö ka hnyi káná, helá me khukhulainy dra ae gan. 45 Ke e ame todrö úheny hnyi hna hic, me e ame he but ka laten, me ö'drin a ödrin e mokut anyin a ödrin hlöuhlöu, 46 haingen ame ha ködrin, ka habe, Ieú gabun öbun e mokut ? todr' öbun me hic, wá öbun nye didró ka hnyi úcúbic.

47 E ame tiga ha, wá bi tavat ae se hia, me at adre hwenyi ien Juda, ke at hnyi twelv, hnyimakan anyidrin bungen ; ke e ame hakekeny kö Iesu he ka úcimhnyimak mä. 48 Ke haba Iesu ame ha káu, ka habe, Juda lö, u me he ka alecuá Nokon at ge úcimhnyimak ? 49 Ke a wá but hnen tavat adre me tot igigilo e únyi ame he ka o, me haingödrin ödrin e ha káu, ka habe, Than lö, öhmun e he ka kot ge hele vat ? 50 Haba ke at gadrin ame kot athnyabainy taben tavat bihut, me subá but hnyikönyen a metán. 51 Ke haba Iesu ame ha, ka habe, Soju. Ke e ame mádrá hnyikönyen me ometo. 52 Ke haba Iesu ame ha ka ta je taben tavat bihut, me je taben uma kap me wahingat, wale tavat adre me o káu, ka habe, Hawa, öbun e o me je hele vat me utöhmu, heláke me ka at venöu ? 53 Oge tha e möbun hnyi je bong hnyi uma kap, ke öbun e ca hinöbeny kõnya : ke úöbun eang, me man maniny lit minya.

54 Me adre me kát e, me lelo thö e ka hnyi uma umen taben tavat bihut. Ke haba Peteru ame omise hoton. 55 Ke adre hia but hú meic hnyi wanben hna laba, me ulalabainy, me Peteru ame hnyi

laba unyidra. 56 Ke a wâ but e hnen ke hlu ame laba hakekenyâ meic, me e ame wâ hmâ e, me ha, ka habe, At ang eji a tha e mē. 57 Ke e ame ivinôâ, ka habe, Ke momo lö, e ca khanö nya at e. 58 E ca beü bi, me ame wâ hmetu hnen ke at, me ha, ka habe, U minya ke hanödrin. Ke haingö Peteru, ame ha, ka habe, Ketha lö, ca inya bi. 59 Ke helâke me khaca but awa hwaban e, haba ke at ame ha hwegiâ, ka habe, E hnathu wale at a tha e mē : anyin a e at Galiläia. 60 Ke haingö Peteru ame ha, ka habe, Ketha, e ca khanö nya hnâm hna ha. E ame tiga fuc me ame ie kokot dö khoto. 61 Ke haba Than ame hwiö thö, me ö Peteru. Me haba Peteru ame únykúme hofuc hwan Than, waleji a ha kâu, ka habe, U me he ka okun ivinö nya ke tiga ca kokok bi khoto hnyi bong ang. 62 Me e ame didrut me tenge hlöu-hlöu.

63 Haba tavat adre kât e, adre me hlumâ e, me osöâ. 64 Ke adre me tube li emakan, me hnö e, ka habe, Perofeta thö, ia khöü u? 65 Kese hia ta je hofuc minya adre me ha, me hiâ e.

66 Ke e lany jut, me ame úkhacaköu thö wahingatiny hnyei, wale je taben tavat bihut me tavat sihnalimen; ke adre me lelö thö e ka hnyi anyidra úhnenamö, me ha, ka habe, 67 A ne u Keriso, ha thö köhmun. Haingen ködra, ka habe, Oge ne he ka ha köbun, öbun e ca he ka kap: 68 ke oge ne he bi nya ka hnei öbun, öbun e ca he ka thu. 69 ke hwân dö ang ke ne o but nyiele, ame he Nokon at ka laba hnyi ke keihen a metân man maniny Khong. 70 Haingödra hia, ka habe, A u e Nokon Khong? Me e ame ha ködra, ka habe, Öbun e ha e, a inya ang. 71 Me haingödra, ka habe, Hnân eü hmetu köta ke at hnân ohnatho? anyin a öta ate hia but löng únyi hnyi hnyimen.

HNYIMAKAN 23.

ME ame todrö tavat hia ae se, me lelö thö kö Pilato. 2 Ke adre me hwân he ka bi fuco e, ka habe, Öhmun e wâ but at ang ame omono ita hnyei, k'ame thawâ he ka fat kö Kaisara, k'ame ha, a e thibi Keriso a ke than bi. 3 Haba Pilato ame hnö e, ka habe, Hawa, u Tuhana at Juda? E ame thu, ka habe, U me ha e. 4 Haba Pilato ame ha ka taben tavat bihut me tavat ae se, ka habe, E ba monu anyin

at ang oge me wâ. 5 Ke adre me ha hwegiâ, ka habe, E ame obwebwelâ tavat, k'ame úne hnyi Juda hia thithö hwân hnyi Galiläia ke ne o but ka hnyi dok ang. 6 Ke a löng ut Pilato, me e ame hnei, ka habe, Hawa, at Galiläia at ang? 7 E ame wâhmakhmeto a e ke kei Heroda, me e ame kunâ e kö Heroda, anyin a e hnyi Jerusalema hnyi je bong eling.

8 Haba Heroda ame ö Iesu, me e ame senyin gan hmâ : anyin ae kueny jut weny he ka bewâ e, anyin a e ame löng ta je únyi gan; ke e ame únykúme he ka wâ ke úöman e ame he ka ányâ. 9 Ke e ame hnö e hnyi ta je hofuc ae se hia; ke e ame ca thu kâu. 10 Ke ame útitilen je taben tavat bihut, ke tavat sihnalimen, me bi fuco hwegiâ e. 11 Ke haba Heroda me anyin je soja adre me hmiödra e, me hlumâ e, me okhavâ e ge úkhaü ae hmanenang, me kunâ hmetu e kö Pilato. 12 Me ame úsoköu hmetu Heroda me Pilato hnyi bong eling : anyin a ödru imouköu ehac.

13 Haba Pilato ame úkhacaköuâ je taben tavat bihut, me hnyat musi, me tavat bi, 14 me ha ködrin, ka habe, Öbun e hom könöya at ang helâke ame omonoâ tavat : ke wâ bi, oge hia but hnö wia e hnyi hnyimaköbun, me ba monu oge me wâ ge at ang hnyi ta je únyi öbun e bi fuco gan : 15 ke haba khaca, e ba minya hna wâ hnö Heroda : anyin a hia but kunâ hmetu e köta; ke wâ bi, e ba únyi a ányâ me me úcü he ka mok. 16 Anyin a wale, oge me he ka osöâ e, me thang ut. 18 Ke ödra hia adre me tha hongot, ka habe, Hom dö at ang, ke hnö Barabasa but köhmun : 19 wale at adre me khûâ ka hnyi uma ceat, can úhúgúnö dökhü hnyi taun, me cau úhlingâ at. 20 Ke haba Pilato ame fuc hmetu ködra, anyin ae beweny he ka hnö Iesu but; 21 ke adre me fuc hwege, ka habe, Osatauroâ thö, osatauroâ thö e. 22 Me e ame okun ha ködra, ka habe, Anyin a ieu monu e ame ányâ? e ba can oge me wâ gan, me me he ka mok : anyin a wale oge me he ka osöâ e me hna but. 23 Ke adre me tha ha hwegiâ ge ifucidra ae gan hmâ, adre me sumâtâ me me he ka osatauroâ e. Me ame ton dut ifucidra ae gan. 24 Ke haba Pilato ame ha muâ a g' adre me he ka ányâ hoton wedra. 25 Me e ame thang ut at adre ca can úhúgúnö dökhü, ke úhlingâ at, a at a wedra; ke e ame ham Iesu ka hnyi wedra.

26 Adre me lelö e, ke adre me köt

Simona, at Kureſe, ame he úheny hnyi hna belök, me adre me ip hon e satauro, me me vadren hotu Iesu.

27 Haba tavat ae se hia adre me he hoton, me omomo adre me tenge thungaú me tenge gan. 28 Ke haba Iesu ame hwiö thö, me ha ködra, ka habe, Omomo Jerusalema lö, ca tengiö nya bi, ke tengi' öbun bi me lakubun. 29 Anyin a wâ bi ame he ka o but ang ta je bong adre me he ka ha hnyin, ka habe, Hnahic hnen toúnyin, me tangen hnöku ame ca hnokoâ, me li bai adre me ca ijem. 30 Me adre me he ka hwân he ka ha ka je bucen, ka habe, Kölu takú öhmun ju; me ka ta je hut, Tubi öhmun ju. 31 Anyin adre ne ányâ ta je únyi ang hnyi úö ae hát, ieú adre me he ka ányâ hnyi úö ae meleca?

32 Ke e hu minya eling ke li at ae kong adre me tha lelö me he ka hlingâ.

33 Ke adre me o but ka hnyi ke ong dok, Ibokomok ien, adre me osatauroâ thö e eling, me li at ae kong, ke at hnyi ke keihen metâ, me ke at hnyi ke keihen me. 34 Haba Iesu ame ha, ka habe, Cica lö, hn' ödra but; anyin ae ca khan' ödra hnödra hna mádrâ. Ke adre me khenâ anyin je úkhaú me uglekóbâ. 35 Ke ame utitilen dö tavat me wâ. Ke haba tavat musi adre me hiâ e, me ha, ka habe, A hia but omelö keihen; ke a ne e Keriso a oúnykúminy Khong, e so e ame he ka omelö e bi. 36 Me ame hlumâ e minya hnen tavat vat, adre me he but kâu, me habelen e ge vinega, 37 me ha, ka habe, A ne u Tuhan at Juda, omeli u thö, 38 Ke e hu tusi adre sihnalimen hon ka habe, WALANG TUHAN AT JUDA.

39 Ke haba ke at hnyin li at ae kong adre uhno ame haikongoâ e, ka habe, Hawa u ca Keriso? omeli u thö, möhmun. 40 Me ame thu hnen ke at me thawâ, ka habe, U ca ot bi ge Khong, ke u je tha hnaúhangö thö me? 41 Ke e wisa hnaúhangö a ötu, anyin adre bi hwaban kötu e me úcú me hnötu hna mádrâ: ke haba at ang, me ba bi monu gan. 42 Me e ame ha kö Iesu, ka habe, Ö u na únykúmi nya, u ka o hnyi dokhom dökhü. 43 Ke e ame ha kâu, ka habe, E hnathu inya oge me ha kâu, a hnyi bong ang u me he ka tha e mönya hnyi Paradaiso.

44 Me ame lit hia but hnyei hwân hnyi jebigö ke ne o but hnyi jebigö sahab, 45 ke ba but melaminy seúnö: ke ame khekke lo but imano singiny dok ae kap. 46 Ke

haba Iesu ame hongot hwege me ha, ka habe, Cica lö, inya oge me hna but hanuk ka hnyi li hnyamâm: ke a hia but ha hofuc e, e ame mokcu. 47 Ke a wâ but kenerurio hna mádrâ, me e ame haisoâ Khong, me ha, ka habe, E hnathu wale at ae wisa. 48 Ke haba tavat hia adre me úkhaçaköu he ka wâ únyi e, k' adre me wâ ta je únyi adre me ányâ, me adre me khaú je úlaidra me he hmetu but. 49 Ke haba lahanen, me adre me tot sâkâú, me watamomo a hnyat ödrin e he hoton úheny Galilaia, ke adre me wâ ta je únyi eling.

50 Ke wâ bi, wale ke at Josefa ien, at úhnenamö, ke at ae so me wisa, 51 (k' ame ca munyi oga anyidra si úhnenamö me hnödra hna ányâ), a at Arimathia, taun anyin at Juda, ke e at ame halubahingen dökhü dokhon Khong: 52 haba at eling ame he kö Pilato me sumâtâ unyi Iesu. 53 Ke e ame hom but hnyikânâi, me lan ge mano lino, me ip hnyi kic adre tho hnân erkemok, ke tiga ba komok adre ip hnyin. 54 Ke haba bong e, me Penapena, anyin ae hakekeny jut sabbath. 55 Ke haba watamomo hnyat he hoton úheny Galilaia, me ödrin e wâ erkemok, me hwakecin hna ip hnyin. 56 Ke ödrin e hmetuhmetu me penapena ta je únyi ae bo so me je muro.

Ke ödrin e menâ ju hnyi sabbath helâ me hnanyibu.

HNYIMAKAN 24.

KE hnyi bong a bâniny seven, hnyi haolany, me ödrin e he but ka hnyi erkemok, k' ödrin e hom ta je únyi ae bo so, wale ödrin e penapena. 2 Ke ödrin e wâ veto a g' adre hia but hagutâ únyi hnyi hnyimen erkemok. 3 Me ödrin e didró, ke ödrin e ca wâ bi unyin Than Iesu. 4 Ke ödrin e tiga loloâ, wâ bi, li at ödru me tot unyidrin, k' ödre khavâ je úkhaú ae hadróngoc: 5 me ödrin e ot, me hnyimaködrin hnyikânâi, ke ödru me ha ködrin, ka habe, Ieú gabun öbun e elâm at ae möt unyin tavat adre mokcu? 6 Ca e hmetu ang, ke a möt hmetu thö: únykúme th' öbun hofuc waleji a ha köbun ke tiga e hnyi Galilaia, 7 ame ha a g' adre me he ka hna Nokon at ka hnyi je hnyamen tavat ae kong, me osatauroâ, k' ame he ka möt hmetu hnyi bong a kuniny. 8 Me ödrin e únykúme hwan hofuc, 9 me he hmetu únyi hnyi erkemok, me thumeto hnyat a twelv ge ta je únyi eling, me je lahanödrin hia. 10

Haba iödrin me Maria Magadalena, me Joana, me Maria hinyö Iakobo : ke haba keihen omomo unyidrin, me ödrin e thumeto ta je aposetolo ge ta je únyi e. 11 Ke haba hofuc hwan omomo, me helá me hofuc baú ködrin ; m' ödrin e ca kap bi. 12 Ke haba Peteru ame todrö me wadring ka hnyi erkemok ; me e ame nom me selá-drá, me wá a je mano lino thiju ame mokut ; me e ame he hmetu hnyaban ai me láia hna mádrá.

13 Ke wá bi hnyi bong eling lo li at gadrin ödru me he ka hnyi ke taun Emao ien, e úsákátú me Jerusalema heláke me siksti je setadia. 14 Ke ödru me úhnenamö tilá ta je únyi hia a o. 15 Ke ödru me tiga úhnenamö me ihut, haba Iesu ame hakekeny me tha he mödru. 16 Ke adre kát li emaködru me ödru me ca he ka wáhmakhmeto e. 17 Ke e ame ha ködru, ka habe, Ie je únyi e öbu me úhnenamö tilá ? Ke ödru me todru me hmak. 18 Hababa ke at gadru Kaleopa ien, ame thu kán, ka habe, U me ne hake atkanyua biju la e hnyi Jerusalema, ae ca khañö u ta je únyi a o hnyi je bong eang ? 19 Ke e ame ha ködru ka habe, Ie ta je únyi ? Haingödru ödru me ha káu, ka habe, Ga Iesu at Nazareta wale perofeta ae man hnyi huliwa me hofuc, hnyi hnyimakan Khong me tavat hia thithö : 20 wale hnen je taben tavat bihut, me tavat adre me musi öhmun adre me hna e me me mok, ke adre me osatauroá e. 21 Ke öhmun e gejon a e bi at ame he ka omelö at Isaraela. Ke haba khaca minya, walang bong a kuniny hwabán hna ányá ta je únyi eling. 22 Ke wale minya, haba watamomo a je lahanöhmun ödrin e öuthmoki öhmun ge imwidrin hnyi erkemok hnyi haolany ; 23 ke ödrin e ca wá bi unyin, ke ödrin e o but me ha, a g' ame manen dut ködrin li angela, li at ödru me ha, ka habe, A möt hmetu thö e. 24 Ke a mwi ke je lahanöhmun hnyi erkemok, me wá heláji me hnen watamomo hna ha : ke ödrin e ca wá bi e. 25 Me e ame ha ködru, ka habe, Öbu li monu, me bec li hnyekubu he ka kap hia je hna ha hnen ta je perofeta ! 26 Hawa, ca hamen Keriso he ka kap ta je vec eling, me he ka dit ka hnyi anyin hmanenang ? 27 Ke e ame hwán ga Mose me ta je perofeta hia, he ka omanená ködru ta je hna sihnalimen hia gan. 28 Ke ödrin e hakekeny ka hnyi taun, ödru me he ka hnyin : ke haba e, me heláke ame he ka he balua. 29 Me ödru me thawá e, ka habe,

Laba ju unyihmu : anyin a sahac ut, ke ame he but ka hia bong. Me e ame didró he ka tha laba mödru. 30 Ke e ame tha laba mödru he ka han, me e ame hom areto, me oleá, me thuthu me ham ködru. 31 Me adre me khöng ut li emaködru, ke ödru me wáhmakhmeto e ; me e ame ie hia but gadru. 32 Ke ödru me úhaköu, ka habe, A ca kahwa bi li önykúmitu, waleji hnyi hnen hna úhnenamö mötu eú hnyi gethen, me hnen hna omanená kötu je hna sihnalimen ! 33 Ke ödru me todrö hnyi awa eling me hmetu Jerusalema ai, me wá hnyat a eleven ödrin e úkhacaköu, me tavat unyidrin, 34 ke haingödrin, ka habe, E hnathu a möt hmetu thö Than, ke a manen dut kö Simona. 35 Ke ödru minya ödru me omanená ta je únyi eú hnyi gethen, me hnen hna manen ködru hnyi hnen hna thuthu areto.

36 Ke ödrin e tiga úhnenamö ta je únyi e, me e ame tot hnyi wanbödrin, me ha ködrin, ka habe, Hnahie köbun. 37 Ke ödrin e öbubuny, me ot, ke ödrin e únykúme a hanu ödrin e wá. 38 Me e ame ha ködrin, ka habe, Ieú gabun öbun e hlohlo ? ke ieu ame kú gan lolo eú hnyi je hnyekubun ? 39 Wá bi li hnyamök me li cak, a inya ang : mádrö nya ju, me wá ; anyin ae ba hanu ae hu utioiny me je jö helá me hnöbun hna ö nya. 40 Ke a hia but ha e, e ame omanená ködrin li hnyamen, me li can. 41 Ke ödrin e tiga ca kap bi, anyin a ödrin e syenin me láia, me e ame ha ködrin, ka habe, E hu ö 'bun jeú eang ? 42 Me ödrin e ham káu ong hanen wá adre le. 43 Ke e ame hom me han hnyi hnyimaködrin.

44 Me e ame ha ködrin, ka habe, Walang je hofuc oge me ha köbun, waleji e me tiga inya ang unyibun, ae úcú he ka owháda ta je únyi hia adre sihnalimen hnyi hnanyibu anyi Mose, me ta je perofeta, me ta je salamo gak. 45 Me e ame khöng ut je hnyekudrin, me ödrin e he ka wáhmakhmeto hna sihnalimen ; 46 ke e ame ha ködrin, ka habe, Adre hia but sihnalimen helang, a g' ame he Keriso ka vec, me möt hmetu úheny hnyi hna mok hnyi bong a kuniny ; 47 me he ka khetá, hnyi ta je hnyei hia hwán hnyi Jerusalema, ietra, mo he ka thang degecá ta je hulö únyi ge ien. 48 Ke öbun bi hnyat önthoá ta je únyi e. 49 Ke wá bi, inya oge me he ka kuná köbun hna ha báná ga Cica : ke so öbun e he ka mē laba hnyi taun ke ne o but öbun e he ka hu man únyi ethö.

IOANA 1.

50 Ke e ame hum ödrin cicö Bethania : ke e ame hai li hnyamen me hahnahici ödrin. 51 Ke e ame tiga hahnahici ödrin, me e ame ie úsákâüö but mödrin, me adre me kap dö e hnyi drany ai. 52 Ke ödrin

e khudrung ju kâu, me he hmetu Jerusalema ai me senyin ae gan hmâ : 53 ke ödrin bala bi hnyin uma kap, k' ödrin e haisoâ Khong.

EVANGELIA A SIHNALIMEN IOANE.

HNYIMAKAN 1.

HABA hnyi can, me waleji Logo, e unyin Khong Logo, haba Logo, me Khong. 2 E unyin Khong hnyi can. 3 Adre me op ta je únyi hia thithö a deny e ; ke ba únyi adre hia but op, a g' adre ca op gån. 4 E hu möt unyin ; ke haba möt, me melaminy at. 5 Ke ame umumelam melam hnyi lit ; k' ame ca kap bi e hnen lit. 6 Ame o ke at, a kunâ hnen Khong, Ioane ien. 7 E ame o but hnân ohnathoâ, m' adre me he ka ohnathoâ melam, me me labageju tavat hia thithö únyi gan bi. 8 Haba at e, me ca melam bi eling, ke so bi hnân ohnathoâ melam. 9 Haba melam hnathu, me wale at ame omelamá tavat hia adre me o ka hnyi hmeledrany. 10 A mwi but e eang hmeledrany, ke e at a op hmeledrany, ke a ca wâ e hnen hmeledrany, 11 E ame o but ka hnyi hing hwajekhon, k' ame ca kap e hnen lakeiny. 12 Ke haba tavat adre me kap e, wale hnyat adre me labageju ka hnyi ien, me e ame ham ködra man, me adre me lakon dut Khong : 13 ke adre me ca hnöku ödra únyi hnyi dra, ke ca únyi minya bi ge weny unyin, ke ca únyi ge weny at, ke únyi bi ge Khong. 14 Adre me bi unyin Logo bi, k' ame laba unyita (ke öhmun e wâ but anyin hmanenang, wale helâke me hmanenanginy Nokon a khaca a hnokoâ hnen Kamen), a unöngöt do ge ibetengiö bâu me hnathu. 15 Haba Ioane ame ohnathoâ e, me hongot, ka habe, Walang at, waleji oge me ha gan, ka habe, Ame he hotuk at ke wale hnyi hnyimakök : anyin a bân, ka bilik bi. 16 Eke, ate me hia but ve kap jekhou únyi hnyi anyin unöngöt, wale betenge bâu ke betenge bâu. 17 Anyin

adre ham hnanyibu a deny Mose ; ke ibetengiö bâu me hnathu a deny Iesu Keriso. 18 E ba at ame wâ Khong ; k' ame omanená e hnen Nokon a khaca thibi, wale at hnyi úlainy Kamen.

19 Ke walang hna ohnathoâ hnö Ioane hnyi úen adre me kunâ tavat bihut me at Levi hnen at Juda úhedra Jerusalema he ka hnö e, ka habe, U ia? 20 Me e ame haimemenâ, k' ame ca ivinö bi ; e ame haimemenâ, ka habe, Iny ca Keriso bi nya. 21 Me adre me hnö e, ka habe, Ke ieü bi? U Elia? Haingen ka habe, Ohe. U perofeta? E ame thu, ka habe, E ba. 22 Anyin a wale adre me ha kâu, ka habe, K' u ia bi? m' öhmun e he ka ha ka tavat adre kun' öhmun. Ieü hwâm gam bi? 23 Haingen, ka habe, Inya ang ifucin at ame hongot hnyi hnyeububa, ka habe, Owisa thö gethen deny Than, helâji me hna ha ga Isaia perofeta. 24 Ke adre hia but kun' ödra hnen ta je Faresaio. 25 Ke adre me hnö e me ha kâu, ka habe, Ieü gam u me bapataiso, k' u ca Keriso bi, ke ca Elia bi, ke u ca perofeta minya bi eling? 26 Haba Ioane ame thu ködra, ka habe, Inya oge me bapataiso ge köiö : ke ame tot hnyi wanböbun ke at ae ca khan' öbun, 27 wale at ame biliny hotuk, iny ca ficü he ka thang hna húkâlâ taben li hnyeücan. 28 Adre ányâ ta je únyi e hnyi Bethania hoton Joridano, wale dok ame bapataiso hnyin Ioane.

29 Nyi e ame ö Iesu ame he kâu, me haingen, ka habe, Wâ bi Arenio anyin Khong at ame hijen monu anyin hmeledrany ! 30 Wale at waleji oge me ha, ka habe, Ame he ka he hotuk at, ke e hnyi hnyimakök ; anyin a bân, ka bilik bi. 31 Ke oge me ca wâhmakhmeto e, ke so bi a

e ame he ka manen ka at Isaraela, can thibi e oge me o but he ka bapataiso ge köiö. 32 Haba Ioane ame ohnathoá me ha, ka habe, Oge hia but wá Hanu ame gá but úheny hnyi drany helá me biny; me ame o hnyi hon. 33 Ke oge me ca wá-hmakhmeto e : ke haba at a kunö nya he ka bapataiso ge köiö, e ame ha kõnya, ka habe, Haba hnám hna he ka wá Hanu ame gá ka hnyi hon, me laba hon, wale at ame bapataiso ge Hanu Kap. 34 Ke oge hia but wá me ohnatho, a e thibi Nokon Khong.

35 Hmetu nyi, Ioane ame tot me ke li laten; 36 ke e ame ö Iesu ame he, me haingen, ka habe, Wá bi Arenio anyin Khong! 37 Ke a löng ut li laten hnen hna ha, me ödru me he hotu Iesu. 38 Haba Iesu ame hwiö thö me ö dru ödru me he hoton, me e ame ha ködru, ka habe, Ieú öbu me elám? Haingödru káu, ka habe, Rabi (bongon At úne), ewa dok u ma laba hnyin? 39 Haingen ködru, ka habe, Ai öbu m' öbu me he ka wá. Me ödru me he me wá hnyaban; me ödru me tha laba mē hnyi bong eling, anyin a heláke awa a teniny. 40 Haba ke at hnyi li at ödru me löng ifuci Ioane, k' ödru he hotu Iesu, me Anederea, a liamekeiny me Simona Peteru. 41 E ame bán ka elám liamekeiny mē a Simona me ha káu, ka habe, Öhmun e wá but Mesia, (bongon, Keriso). 42 Ke e ame hom e kö Iesu. Haba Iesu ame wá e, ke haingen, ka habe, U Simona a nöku Iona: adre me he ka hwenyi u, me Kefa, (bongon, Peteru).

43 Nyi e ame behe Galilaia ai, ke e ame ö Filipo: ke haingö Iesu káu, ka habe, He hotuk. 44 Haba Filipo, me at Bethesaida, wale taun ga Anederea me Peteru. 45 Filipo ame ö Nathaniela, me e ame ha káu, ka habe, Öhmun e wá but hna sihnalimen hnö Mose hnyi hnanyibu me ta je perofeta minya, wale Iesu at Nazareta, nöku Josefa. 46 Ke haba Nathaniela ame ha káu, ka habe, Hawa, e khana únyi ae so he ka o únyi hnyi Nazareta? Haingö Filipo káu, ka habe, Aiö u, u ma wá. 47 Haba Iesu ame ö Nathaniela ame he káu, me e ame ha gan, ka habe, Wá bi at Isaraela ae hnathu, e ba tang iyawá gan! 48 Haba Nathaniela ame thu káu, ka habe, U je wáhmakhmetu nya ua? Iesu ame thu, me ha káu, ka habe, Oge me ö u hnyi hmelen imeta ke tiga ca hawo u Filipo. 49 Haba Nathaniela ame thu káu, ka habe, Rabi, u thibi Nokon Khong; u

thibi Than Isaraela. 50 Haba Iesu ame thu me ha káu, ka habe, U me labageju anyin a oge me ha köu, ka habe, Oge me ö u hnyi hmelen imeta? u me he bi ka wá ta je únyi ae gan hon e. 51 Ke e ame ha káu, ka habe, E hnathu, e hnathu, inya oge me ha köbun, ka habe, Öbun e he bi ka wá drany adre khöng, me ta je angela anyin Khong adre me he ka ölö thö me utut hon Nokon at.

HNYIMAKAN 2.

HABA hnyi bong a kuniny me adre me ányá faipoipo hnyi Kana hnyi Galilaia; eling hinyö Iesu: 2 ke adre me hao Iesu me laten ka hnyi faipoipo. 3 Ke a um dö waina, me haba hinyö Iesu ame ha káu, ka habe, E ba but waina gadra. 4 Haba Iesu ame ha káu, ka habe, Bai lö, ieú gam kõnya? etiga ca o öök. 5 Haba hinyen ame ha ka je lathnyaba, ka habe, Haba únyi e ame he ka ha köbun, ányá thö. 6 Ke e hu eling je kaia veto a siks, adre me ip hnán okáláotá helá me hwakecin at Juda, úsa lo ame ne kun ta bath tulutiny. 7 Haingö Iesu ködrin, ka habe, Öunöngötá thö je kaia ge köiö. Me ödrin e öunöngötá ke ne o but hnyi hnyimen. 8 Haingen ame ha ködrin, ka habe, Sáú thö walang ang, me hom dö ka taben bijeú. Me ödrin e hom. 9 Ke a hia but taben bijeú drem cubecá köiö adre wia me me waina, ke ca khana bi dok a únyi hnyin (ke e khana bi lathnyaba tavat adre sáú) haba taben bijeú ame hawá at a tep faipoipo, 10 me ha káu, ka habe, Hwakecin tavat he ka khená báná waina ae so; ke e ka hia but ijem gáná, adre hom waina ae kong: ke haba u, u je tuö waina ae so ke ne o but ang. 11 Wale úoman a ányá Iesu a bán hnyi Kana hnyi Galilaia, me omanená anyin hmanenang; haba laten ödrin e labageju káu.

12 Hwabán e, e ame he Kaperenauma ai, e, me hinyen, me je liamekeiny mē, me je laten: ke ca se je bong adre me laba eling.

13 E hakekeny jut paseka anyin at Juda, ke haba Iesu ame he Jerusalema ai. 14 Me e ame wá hnyin uma kap tavat adre me úco je bolok, me mamoe, me biny, ke tavat adre me wia mone, adre me úlala-bainy: 15 me e ame hom je ong tö hnan osö, me ob' ödrin hia únyi hnyin uma, me ta je mamoe, me bolok; me hingálá degecá

ta je mone anyin tavat adre me via mone, me ohnyimená hnyikánái ta je laulau ; 16 me e ame ha ka tavat úco je biny, ka habe, Hom dö ta je únyi eang úheny ang ; ca wia bi uma umö Cica, me me uma úcú. 17 Haba laten adre me únykúme hna sihnalimen, ka habe, A hia but utö nya hnen weny ae gan hmá ka umám uma. 18 Me ame thu at Juda me ha káu, ka habe, Ieú haten u me he ka omanená köhmun, a u me ányá ta je únyi e? 19 Iesu ame thu me ha ködrin, ka habe, Kia but uma eang, me oge me he ka otilá hmetu e hnyi ta bong a kun. 20 Me haba at Juda adre me ha, ka habe, Fáte siks je huna adre otilá hnyin uma eang, ke u me he ka otilá e hnyi ta bong a kun? 21 Ke haba uma e ame ha, me, wale a unyin. 22 Ke hnyi úen ame möt hmetu thö e úheny hnyi hna mok, me ame únykúme laten a g' ame ha heláe ; ke ödrin e kap hna sihnalimen me hofuc a ha Iesu.

23 Tiga e bi hnyi Jerusalema hnyi bije-úiny paseka, ödra se hia adre me labageju ka hnyi ien, anyin adre me wá ta je úóman e ame ányá. 24 Ke haba Iesu ame ca ka hna e ködra, anyin a e ame wáhmakhmetoá tavat hia, 25 ke ca únyi hnathu káu a g' ame he at ka omanená hwakecin at ; anyin a e ame wáhmakhmetoá ta je únyi eú hnyi hnyin at.

HNHYIMAKAN 3.

HABA ke Faresaio, Nikodemo ien, ke taben at Juda : 2 ame he káu hnyi hnyinghet me ha káu ka habe, Rabi, e khan' öhmun dut a u at úne ame o únyi ge Khong : anyin ae ba at ae khana he ka ányá ke úóman u je ányá, a ne hia unyin Khong. 3 Iesu ame thu me ha káu, ka habe, E hnathu, e hnathu, inya oge me ha köu, Adre ne ca hnokoá hmetu bi at, e ca khana he ka wá dökhü dokhon Khong. 4 Haba Nikodemo ame ha káu, ka habe, Adre me he ka kámáu ka hnokoá at, ka hingat ut? hawa, e khana he ka olo didró ka hnyi hnyekon hinyen me me hnokoá but? 5 Ke haingö Iesu, ka habe, E hnathu, e hnathu inya oge me ha köu, Adre ne ca hnokoá bi at hnyi köiö me Hanu, e ca khana he ka didró ka hnyi dökhü dokhon Khong. 6 Haba hna hnokoá únyi hnyi unyin, me wale unyin bi, ke haba hna hnokoá únyi hnyi Hanu, me wale hanu bi. 7 Ca láia bi hnök hna ha köu, ka habe,

E únyi hnathu he ka hnöku öbun hmetu. 8 Ame si thö ang a ka hamen weny, u je löng ut a g' ame hmuhmu, ke ca khanö u úheny ua, k' ame he ká : heláe tavat hia adre me hnokoá únyi hnyi Hanu. 9 Nikodemo ame thu me ha káu, ka habe, Ama kámáu he ka heláe? 10 Haba Iesu ame thu káu, ka habe, Hawa, u at úne hnyi Isaraela, ke u me ca wá únykúme bi e? 11 E hnathu, e hnathu, öhmun e ha hnöhmun hna wáhmakhmeto, me ha hnathoá hnöhmun hna wá ; ke öbun e ca kap hnöhmun hna ohnathoá. 12 Oge hia but ha köbun ta je únyi eang hmeledrany, ke öbun e ca labageju bi, awe, öbun e he ka kámáu he ka labageju oge ne he bi ka ha köbun ta je únyi ethö hnyi drany? 13 E ba at ame hia but ölö hnyi drany ai ke so thibi at ame utut úheny hnyi drany, wale Nokon at a e hnyi drany. 14 Haba Mose ame ogöranyá on hnyi hnyebuba, ke heláe adre me he ka ogöranyá Nokon at : 15 me me he ka hu únyi gan möt ame ca ba balua ka tavat hia adre me labageju.

16 Anyin a Khong ame betenge ge hmeledrany, me e ame ham but Nokon a khaca thibi, me me ca he ka mok ke at ge tavat adre me labageju káu, ke ame he bi ka hu möt ame ca ba balua. 17 Anyin a ca kuná bi Khong Nokon ka hnyi hmeledrany he ka ohnaúhangöá hmeledrany ; ke so bi he ka omelö hmeledrany a deny e. 18 Adre me ca ohnaúhangöá at ame labageju káu : k' adre hia but ohnaúhangöá walang ang at ame ca labageju, anyin a e ame ca hia but labageju ka ien Nokon Khong a khaca. 19 Ke walang hnaúhangö, a ga o but melam ka hnyi hmeledrany, ke weny bi tavat menekholom hon melam ; anyin ae kong ut hwakecidra. 20 Anyin ame hükötiá melam hnen at ame mádrá monu, k' ame ca he bi thö ka hnyi melam, wá e nye manen dut anyin ta je huliwa. 21 Ke haba at ame mádrá hnathu, e ame he ka hnyi melam, me me manen dut anyin ta je huliwa, a g' ame mádrá únyi ge Khong.

22 Hwaban ta je únyi eling Iesu ame tha he me laten ka hnyi hnyei Juda ; ke ame tha laba eling mödrin, me bapataiso. 23 Ke Ioane minya ame bapataiso hnyi Ainon hakekenyá Salim, anyin ae gan eling köiö : ke adre me o but, me e ame bapataiso ödra. 24 Anyin adre tiga ca khüö Ioane ka hnyi uma ceat. 25 Me ame ivinö latö Ioane me ke at Juda ge hwakecin obosoá. 26 Ke ödrin e he but kö Ioane

me ha kâu, ka habe, Rabi, haba at ame tha tot môu hnyi ke keihen hoton Joridano, waleji at u me ohnatho, wâ bi, haba at eling ame bapataiso, ke ame ok ut kâu tavat hia thithö. 27 Haba Ioane ame thu kâu, ka habe, E ca khana at he ka kap ke únyi, adre ne ca ham bi kâu únyi hnyi drany. 28 Haba öbun, me öbun e ohnathu nya a oge ha, ka habe, Iny ca Keriso bi, ke adre kunö nya bi hnyi hnyimakan. 29 Haba at ae hu hlu a teb faipoipo, me wale baga a teb faipoipo mē, ke haba hanen baga a teb faipoipo, at ame tot ka löng e, me ame senyin gan hmâ ge ifucin at a teb faipoipo : anyin a wale e hwâdâ but anyik senyin ang. 30 E ame he ka gan tot, ke oge me he bi nya ka úhnyükong tot.

31 Haba at úheny thö, me e thibi hon ta je únyi hia : ke haba at úheny hmele-drany, me at hmele-drany bi e, k' ame úhnenamö hmele-drany : haba at úheny thö, me e thibi hon ta je únyi hia. 32 Ke e ame ohnathoâ únyi e ame wâ me löng ; ke ba at ame kap hnen hna ohnathoâ. 33 Ke haba at ame kap hnen hna ohnatho, me wale at ame bi haten a e hnathu Khong. 34 Anyin a haba at ame kunâ hnen Khong, me wale at ame ha je hofuc hwan Khong : anyin a e ame ca ham Hanu hoton tulut. 35 Haba Kamen ame betenge ka Nokon, k' ame hna ta je únyi hia ka hnyi li hnyamen. 36 Haba at ame labageju ka Nokon, me hu but kâu möt ame ca ba balua ; ke haba at ame ca löng hoton Nokon, me ame ca he ka wâ möt, k' ame he ka takoú e hnen hmönyin anyin Khong.

HNYIMAKAN 4.

KE a wâ but Than a g' ame löng hnen ta je Faresaio, ka habe, Iesu ame bi laten me bapataisoâ tavat ae se hia, ke wakhalet bi Ioane 2 (ke so hi ame ca bapataisoio ödra ga Iesu, ke hnen laten), 3 me e ame hna but Juda me he hmetu Galilaia ai. 4 Ke hamen he ka he hanyâúú Samaria. 5 Me e ame o but hnyi ke taun hnyi Samaria, Sikara ien, e hakekeny ka hnyi utkânâ a ham Jekob ka nökon jia Josefa : 6 eling an beli Jekob. Ke ame laba ju Iesu hon an anyin ae senyin dut anyin he. Awa a siksiny eling. 7 Me ame o but ke momo Samaria he ka se köiö : ke haingö Iesu kâu, ka habe, Habelik. 8 Haba laten, me ödrin e he but ka hnyi taun he ka úcú

jeú. 9 Ke haingen momo Samaria kâu, ka habe, Ieú gam, a u at Juda, k' u me sumatö köiö gak, k' iny momo Samaria bi nya ? (Anyin ae ca iate at Juda me at Samaria.) 10 Haba Iesu ame thu me ha ka momo, ka habe, A ne manen köu bwihlany anyin Khong, me at ame ha köu, Habelik ; me u je he ka sumâtâ gan, me e ame he ka ham köu köien möt. 11 Me haingen momo kâu, ka habe Than lö, e ba únyi gam hnân söú, ke dit an, ke únyi ua köien möt gam ? 12 Hawa, u gan hu Jekob hanen lakamöhmun, at a ham köhmun an ang, ke belen e, me lakon, me ta je haleny ? 13 Iesu ame thu me ha kâu, ka habe, Ame he ka beic hmetu tavat adre me ijem an ang : 14 ke haba at ame he ka ijem an oge me he ka ham, me ame ca he hmetu bi ka beic nyiele balua ; ke haba köiö oge me he ka ham kâu me ame he ka eú hnyi hnyekon wale an ame pupua ka hnyi möt ame ca ba balua. 15 Haba momo ame ha kâu, ka habe, Than lö, ham but könya an e, m' inye ca beic hmetu, m' inye ca hnetu jem kâäng he ka se köiö. 16 Haingö Iesu kâu, ka habe, He thö ka hawâ jem áiâm. 17 Haba momo ame thu, ka habe, E ba öiök. Haba Iesu ame ha kâu, ka habe, E hnathu hnâm hna ha, ka habe, E ba áiâm : 18 anyin a ödrin thabúng ehac láiâm, ke haba at u me tha laba mē walang, me ca áiâm bi : waleling, e me hnathu hnâm hna ha. 19 Haingen momo kâu, ka habe, Than lö, oge wâ but a u perofeta. 20 Haba lakamöhmun adre me hmi hnyi bucen ang, ke öbun e ha, ka habe, E úcú ka tavat he ka hmi hnyi Jerusalema. 21 Iesu ame ha kâu, ka habe, Momo lö, labageju nya ju, a g' ame he ka o üen öbun e ca he ka hmi ka Kamen hnyi bucen ang, ke ba minya bi hnyi Jerusalema. 22 E ca khan' öbun hnöbun hna hmi kâu ; ke e khan' öhmun hnöhmun hna hmi kâu : anyin a únyi ge at Juda úhömeli. 23 Ke ame he ka o üen, ke wale but ang, a g' ame he ka he tavat adre me hmi hnathu ka hmi ka Kamen hnyi hanu me hnathu : anyin a Kamen ame elâm tavat helâe he ka hmi kâu. 24 Khong Hanu ; ke hamen tavat adre me hmi kâu he ka hmi hnyi hanu me hnathu. 25 Haingen momo kâu, ka habe, E khanö nya a g' ame he ka o Mesia (adre hwenyi ien Keriso) : ke hnyi üen e ame o but, e ame he ka omanenâ köta ta je únyi hia. 26 Iesu ame ha kâu, ka habe, Inya ang at ame úhnenamö möu.

27 Ke ame o but laten ; ke ödrin e lâiâ anyin a e ame ûhnenamö me momo ; ke so bi, e ba at ame ha, ka habe, Ieü u me elâm ? ke, ieü e gam u me ûhnenamö me momo ? 28 Haba momo ame ip ju belen kaia me he ka hnyi taun, me ha ka tavat, ka habe, 29 Ai öbun he ka hnyi wâ at ame hia but ha kõnya ta je únyi hia oge hia but ányâ : hawa, ame ne e la Keriso ? 30 Me adre me he but úhedra hnyi taun, me o káu. 31 K' ödra tiga bec, me ame újengö e laten, ka habe, Rabi, ö u mē han dö. 32 Ke haingen ködrin, ka habe, E hu ök ae ca khan' öbun: 33 Anyin a wale, ame ûhnenamököü laten, ka habe, Ame ne hu at a hân ? 34 Haingö Iesu ködrin, ka habe, Walang ok, a oge me he ka mádrá weny at a kunö nya, me umo anyik huliwa. 35 Hawa, ca hobun ang, ka habe, Vak biju ta tehi, me adre me menu ? ke wâ bi, inya oge me ha köbun, ka habe, Bwele th' öbun, me wâ je hna belök a hmahmat ut ang he ka menu. 36 Haba at ame hiny, me e ame kap hwaban, k' ame úkhöüná troban hobi káu möt ame ca ba ; me me tha senyin at ame tä me at ame hiny. 37 Waleling me me hnathu hna ha, ka habe, Ame tä hnen ke at, k' ame hiny bi hnen ke at. 38 Oge me kun' öbun he ka hiny hnöbun hna ca huliwan : a hia but huliwa keihen, me öbun e didró ka hnyi anyidra ta je huliwa. 39 Ke ame labageju káu tavat Samaria ae se hia hnyi taun eling, can hofuc hwan momo, ka habe, E ame hia but ha kõnya ta je únyi hia thithö oge hia but ányâ. 40 Ke ame e but káu tavat Samaria, me adre me sumâtâ e he ka tha laba mödra : me e ame laba eling lo li bong. 41 Ke ame labageju tavat ae se hia hmönyin únyi ge hofuc a hwan ; 42 m' ödrin e ha bi ka momo, ka habe, Öhmun e ca hake labageju thibi únyi ge hwâm hofuc ; anyin a öhmun e hnyi löng ut me wâ a wale thibi e At omelö hmeledranj. 43 Hwaban lo li bong e ame hna but dok e, k' ame he Galilaia ai. 44 Anyin a Iesu ame ohnatho, a g' adre me ca ogânâ perofeta hnyi ka iny hnyei. 45 E ame o hnyi Galilaia, me ame kap e ge at Galilaia, anyin adre me wâ ta je únyi e ame ányâ hnyi Jerussalema hnyi bijeü : anyin adre me hnyi mwi minya hnyi bijeü. 46 E ame o hmetu hnyi Kana hnyi Galilaia, waleji e ame wia hnyin köiö me me waina. Ke wale ke taben, k' ame mok nokon hnyi Kapereanauma. 47 E ame

löng a g' ame o but Iesu hnyi Galilaia úheny Juda, me e ame he but káu, me sumâtâ e, me me he ka osoâ nokon ; anyiu ae hakekeny jut he ka mok. 48 Haingö Iesu ame ha káu, ka habe, Öbun e ne ca wâ ta je haten me úöman, öbun e ca he bi ka labageju. 49 Haingen taben káu, ka habe, Than lö, he thö jem, e me tiga ca mok bi nökek. 50 Haba Iesu ame ha káu, ka habe, He thö, a möt ut nokom. Haba at, me e ame labagejon hofuc a ha Iesu káu, me e ame he. 51 Ke e ame tiga he, me ame úkhanö mē lathnyabainy me ödrin e ha káu a g' ame mödrut nokon. 52 Me e ame hnei ödrin ge úen ioiny möt. Me ödrin e ha káu, ka habe, a hna but e et hnen kuhwa, hnyi awa a seveniny. 53 Me ame wâhmakhmeto kamen ka habe, wale awa a ha hnyin káu Iesu, ka habe, A mödrut nokom : me e ame labageju me anyin hia lap. 54 Wale úöman a loiny a ányâ Iesu, waleji ge ibi ioiny hnyi Galilaia úheny Juda.

HNYIMAKAN 5.

HWABAN ta je ányi e, e hu bijeü anyin at Juda ; me ame he but Iesu Jerussalema ai.

2 E hnyi Jerussalema hnyi homagöuleny mamoe ke an, haba ion hnyi hwen Heberu, me, Bethesda, dok ae hu hnyin je poretiko a faiv. 3 Ame mokut eling tavat ae se hia a at sēnyin, me wadröu, me kong can, me mat. 5 Eling at ae mok thöte faiv je huna. 6 Iesu ame wâ e ame mokut, ke e khana ae beü hmâ but hnen hna mok, me e ame ha káu, ka habe, E bewem he ka möt ? 7 Haba at ae mok ame thu káu, ka habe, Than lö, e ba at he ka köp nya ka hnyi an, e ka húnyúnye thö köiö : anyin a oge me tiga he ka utut, me ame ie logot ut ke at ke belik thiju. 8 Iesu ame ha káu, ka habe, Todró hom minya thö hnâm me he thö. 9 Me ame ie möt dö at, ke e ame hom dö hnen hna mokut me he.

Ke sabath bong eling. 10 Me ame ha at Juda ka at adre omelö, ka habe, Sabath ang, e ca úcú köu he ka vaden hna mokut. 11 Me e ame thu ködra, ka habe, Hnen at a omeli nya a ha kõnya, ka habe, Hom dö hnâm me he thö. 12 Me adre me hnö e, ka habe, Ie at a ha köu, ka habe, Hom dö hnâm me he thö ? 13 Ke haba at adre me omelö, me ca khana bi ia e ; anyin a Iesu ame he iyong, anyin a eling tavat ae se hia. 14 Ke hwaban e Iesu ame wâ e hnyi uma

kap, me haingen kâu, ka habe, Wâ bi, adre hia but omeli u, ca mâdrâ hmeto hulö, wâ e nye o but monu ae gan hmâ köu. 15 Ke e ame he but, k' ame thumeto at Juda, a Iesu ame omelö e. 16 Wale m' adre me oveci Iesu ge at Juda, anyin a e ame ânyâ ta je ûnyi e hnyi bong sabath. 17 Ke haingö Iesu ködra, ka habe, Ame huliwa Cica ke ne o but hnyi bong ang, ke oge me huliwa bi nya. 18 Waleling me ti hwege at Juda he ka heleú deny he ka hlingâ e, ca ûnyi thibi ge hnen hna hanyâúâ sabath, ke anyin minya bi e ame ha, ka habe, haba Khong, me hing Kamen, k' ame ôuco e me Khong.

19 Haba Iesu ame thu me ha ködra, ka habe,

E hnathu, e hnathu inya oge me ha köbun, ka habe, E ca khana Nokon he ka ânyâ huliwa a ka ûnyi gan, ke so bi e ame wâ hna mâdrâ hnen Kamen : anyin a haba ta je ûnyi e ame ânyâ, me ame ânyâ minya bi Nokon. 20 Anyin a kamen ame hnyokâ Nokon, me omanená kâu ta je ûnyi hia e ame ânyâ : ke e ame he ka omanená kâu ta je huliwa ae gan hon e, m' öbun e he ka láia. 21 Anyin a Kamen ame otílâ thö ta je komok me omeli ödra, helâe minya Nokon ame omelö tavat e ame weny. 22 Anyin a haba Kamen ame ca hnö ke at, ke e ame ham ka Nokon he ka hnö hia thö ; 23 me me he tavat hia thithö ka oganá Nokon helâ me hnödra hna oganá Kamen. Haba at ame ca oganá Nokon, me ame ca oganá Kamen at a kunö nya. 24 E hnathu, e hnathu, inya oge me ha köbun, ka habe, Haba at ame löng hok ta je hofuc, k' ame labageju ka at a kunö nya, me hu but gan möt ame ca ba balua, k' ame ca he bi ka hnaúhangö, ke e ame he but úheny hnyi mok ka hnyi möt. 25 E hnathu, e hnathu inya oge me ha köbun, ka habe, ame he jem awa, ke walang ang, me ame he ka löng ifucin Nokon Khong hnen tavat adre mokcu ; ke haba tavat adre me löng me adre me he ka möt. 26 Anyin ae ka hu bi ge Kamen anyin möt, ke helâe e ame hna ka Nokon he ka hu gan möt : 27 ke e ame ham minya kâu man he ka hnei, anyin a e Nokon at. 28 Ca láia bi e, anyin ame he jem úen a g' ame he tavat hnyi ta je erkemok ka löng ifucin, 29 me he but ; haba tavat adre me mâdrâ so, adre me he ka todrö ka hnyi möt ; ke haba tavat adre me ânyâ hulö, me adre me he ka tot ka hnyi hnaúhangö.

30 E ca khanö nya he ka hake mâdrâ thiju ke ûnyi : oge me hnö hoton hnök hna löng : ke inya oge me hnö wisa ; anyin oge me ca elâm wek, ke so bi weny at a kunö nya. 31 Oge ne ohnathu nya bi, e ca hnathu bi hnök hna ohnathu nya. 32 E so ke hu ke at ame ohnathu nya ; ke e khanö nya ae hnathu hnen hna ohnathu nya. 33 Öbun e hia but úkhúnöng kö Ioane, me e ame ohwâdâ hnathu. 34 Ke oge me ca kap hna ohnathoâ ûnyi ge at : ke inya oge me ha ta je ûnyi eling me öbun e mödrut. 35 E thibi lamepa ame ubâhlâ me umumelam : ke e webun he ka senyin ge iumumelaminy hnyi ke úen. 36 Ke hu but gak hnân ohnatho ae beönua hu Ioane : anyin a haba ta je huliwa a ham kõnya Kamen he ka ânyâ, me wale ta je huliwa oge me ânyâ hnân ohnathu nya a ga kunö nya Kamen. 37 Ke a hia but ohnathu nya hnen Kamen at a kunö nya. Öbun e ca löng bala ifucin, ke öbun e ca wâ minya bi unyin. 38 Ke ca e bi eú hnyi je hnye-kubun hwan hofuc : anyin a öbun e ca labageju bi ka hnen hna kunâ. 39 Öbun a elâm hnyi je hna sihnalimen, anyin a öbun e únykúme ae hu but gabun möt eling ame ca ba balua ; ke wale bi e at ame ohnathu nya ; 40 ke öbun höcö he ka he kõnya me me hu möt gabun. 41 Oge me ca kap hna oganá ûnyi ge at. 42 Ke oge wâhmakhmetu öbun dut ae ca hu gabun weny ka Khong. 43 Oge o but hnyi ien Kamök, ke öbun e ca köp nya : ame ne he ka o but ke at hnyi ka ien bi, öbun e he ka kap e. 44 Öhun e he ka kâmâu he ka labageju, öbun hnyat úkapkôuâ hnân oganá ûnyi gabun bi, ke ca elâm bi hnân oganá ûnyi ge Khong a khaca thibi ! 45 Ca únykúme öbun a oge me he ka hai öbun ka Kamök : e hu bi ke at ame he ka hai öbun. wale Mose, at öbun e labageju kâu. 46 Anyin öbun e ne köp Mose, me öbun e he ka köp nya minya ; anyin a e a sihnalimi nya. 47 Ke öbun e ne ca kap hnen hna sihnalimen, me öbun e he ka hawa he ka kap hok ta je hofuc.

HNYIMAKAN 6.

HWABAN ta je ûnyi e Iesu ame he hanyâúâ köiö Galilaia, wale köiö Tiberia. 2 Haba tavat ae se hia adre me he hoton, anyin adre me wâ ta je úöman e ame ânyâ ka tavat a ödra mok. 3 Ke haba Iesu ame öliâ bucen, me tha laba eling me

laten. 4 E hakekeny jut bong paseka, bijeu anyin at Juda. 5 Iesu ame bwele thö, k' ame wâ tavat ae se hia hmönyin adre me he but kâu, me e ame ha kö Filipo, ka habe, Ötin e he ka úcú areto ua, m' adre me he ka han? 6 K' ame ha e he ka cubec e : anyin ae khana únyi ame he ka ányâ. 7 Haingö Filipo kâu, ka habe, E ca úcú bi ködra je areto a hwaban lo li haded je denari, me me ve úcú ködra ong jeú ae úhnyú-kong. 8 Me ame ha kâu hnen ke aten jia Anedrea liamekeiny me Simona Peteru, ka habe, 9 Wale ke da ae hu je areto bali a faiv ke li ong wâ : ke hnân eú thö ling ke se hia tavat? 10 Ke haingö Iesu, ka habe, Olaba ju tavat. Ke gan hmâ hna önying hnyi dok eling. Me ame úlabainy ju tavat, haba úseidra, me helâ me faiv thauzan. 11 Haba Iesu ame hom je areto, ke a hia but oleâ, me e ame khenâ but ka tavat adre me ulalabainy ; helâe minya li ong wâ, hoton wedra. 12 Ke ame sekudra thö, me e ame ha ka laten, ka habe, Úkhö-únâ thö je ong kolon, me me ba únyi adre ma degec bi. 13 Me ödrin e úkhöúnâ thö, me ounöngötâ je tang a twelv wale je kolon je areto bali a faiv, a kolon hna han hnen tavat. 14 A wâ but hnen tavat úöman a ányâ, me adre me ha, ka habe, E hnathu, walang perofeta adre me ha a g' ame he ka utut ka hnyi hmeledrany.

15 Ke a wâ but Iesu, a g' adre me he ka o thö he ka hom újengö e he ka otílâ e me than, me e ame hake he hmetu ka hnyi bucen.

16 Ke a sahac ut haba laten ödrin e utut ka hnyi köiö ; 17 ke ödrin e ölö hon hu, me hwân he ka kec hanyâúâ köiö Kapere-nauma ai. Ke a lit ut, ke tiga ca o Iesu ködrin. 18 Me ame omun dö köiö ge ang ae gan. 19 Ke ödrin e hia but galu helâ me twente faiv, ame ne thöti je setadia, me ödrin e ö Iesu ame he hon köiö, me hakekeny ka hnyi hu : me ödrin e ot. 20 Ke e ame ha ködrin, ka habe, Inya bi ; ca ot. 21 Me ödrin e kap senyiná thö e ka hnyi hu : me ame ie khöp dö hu hnyi hnyeí ödrin e kec ka hnyin.

22 Haba nyi, a wâ but hnen tavat adre me útitilen hnyi ke keihen köiö, ae ba ju ke hu e, ka ca tha ölö Iesu me laten hon hu, ke hake laten thibi, 23 (ke so bi ame khöp dö ke je ong galu úheny Tiberia hakekeny ka hnyi dok adre me han hnyin hwaban hna ole hnen Than) : 24 me ame wâ hnen tavat ae se hia ae hiö Iesu eling, me

laten minya, me adre me laba but hon je ong galu, me kec Kapere-nauma ai he ka elöm Iesu. 25 Ke adre me wâ ju e hnyi ke keihen köiö, haingödra kâu, ka habe, Rabi, u je o eang kehö? 26 Haba Iesu ame thu ködra, ka habe, E hnathu, e hnathu inya oge me ha köbun, öbun e ca elöm nya anyin öbun e wâ ta je úöman, ke anyin bi öbun e han areto me ame sekubun dö. 27 Ca huliwa bi hobi kâu jeú wale únyi ame he ka bobot, ke so bi jeú ae tet hmâ ke ne o but ka hnyi möt ame ca ba balua, wale ame he Nokon at ka ham köbun : anyin a wale at Kamen ame okeceâ haten hon, wale Khong. 28 Haingödra adre me ha kâu, ka habe, Ieú hanymöhmun m' öhmun e he ka ányâ ta je huliwa anyin Khong? 29 Iesu ame thu ködra, ka habe, Walang huliwa anyin Khong, ka habe, öbun e he ka labageju ka at a kunâ. 30 Me adre me ha kâu, ka habe, Ieú haten u me he ka mádrâ, m' öhmun e wâ thö, me labageju köu? ieu ányâm huliwa? 31 Haba lakamöhmun adre me han mana hnyi hnye-buba ; helâ me hna sihnalimen, ka habe, E ame ham ködra areto únyi hnyi drany hnân han. 32 Me haba Iesu ame ha ködra, ka habe, E hnathu, e hnathu inya oge me ha köbun, ka habe, A ca ham köbun areto únyi hnyi drany ga Mose ; ke so bi Cica ame ham köbun hing areto únyi hnyi drany. 33 Anyin a areto anyin Khong, me wale at ame utut únyi hnyi drany, k' ame ham möt ka hmeledrany. 34 Hain-gödra kâu, ka habe, Than lö, ham bala ju köhmun areto e. 35 Me haingö Iesu ködra, ka habe, Inya ang aretoiny möt : haba at ame he ka o könya, me ame ca he hmetu ka mekihnânem, ke haba at ame he ka labageju könya, me ame ca he hmetu ka beic. 36 Ke oge me ha köbun, ka habe, öbun e ö nya, ke öbun e ca labageju bi. 37 Haba ödra hia a ham könya Kamen, me adre me he ka o könya ; ke haba at ame he ka o könya, me oge me ca he bi nya ka degec. 38 Anyin oge me ca utut úhek hnyi drany he ka mádrâ wek, ke so bi weny at a kunö nya. 39 Ke walang weny at a kunö nya, o oge me ca he ka hna ke at gadra a ham könya, m' oge me he bi ka otíl' ödra hnyi bong a obiny. 40 Ke walang weny Kamök, a g' ame he ka hu möt ame ca ba balua ka tavat hia adre me wâ Nokon, me labageju kâu ; me oge me he bi nya ka otíl' ödra hnyi bong a obiny.

41 Haba at Juda adre me ulidro e anyin a e ame ha, ka habe, Inya ang areto ame utut úheny hnyi drany. 42 Haingödra, ka habe, Hawa, ca Iesu e, nöku Josefa, ke khan' öta kamen me hinyen? a hawa hofuc e ame ha, ka habe, Ogo me utut úhek hnyi drany? 43 Haba Iesu ame thu ködra me ha, ka habe, Ca ulit öbun. 44 E ba at ae khana he ka he könya, a ne ca lelö bi e hnen Kamen, a at a kunö nya: ke oge me he ka otílâ thö e hnyi bong a obiny. 45 Adre me sihnalimen hnyi tusi anyin je perofeta, ka habe, Ame he Khong ka nödra hia. Ke haba tavat hia adre me löng únyi ge Kamen, k' adre me úne bi, me adre me he ka o könya. 46 E ba at ame wâ Kamen, ke so thibi at a únyi ge Khong, e ame wâ Kamen. 47 E hnathu, e hnathu, inya oge me ha köbun, ka habe, Haba at ame labageju, me hu but kâu möt ame ca ba balua. 48 Inya ang aretoiny möt. 49 Ame han mana lakamöbun hnyi hnyebuba ke adre mokcu. 50 Walang areto ame utut úheny hnyi drany, a ga ne an hnen ke at, e ame ca he ka mok. 51 Inya ang areto ae möt ame utut úheny hnyi drany: a ne an dö ke at areto eang e ame he ka möt nyiele balua: eke, ke haba areto oge me he ka ham me wale unyik, hnân malen hmeledrany.

52 Me ame iwatretra at Juda, ka habe, Ama hawa ka khana at ang ka ham köta unyin hnân han? 53 Haba Iesu ame ha ködra, ka habe, E hnathu, e hnathu, inya oge me ha köbun, ka habe, Öbun e ne ca an unyin Nokon at, me ijem dren, me ca hu möt bi eú hnyi je hnyekubun. 54 Haba at ama an unyik me ijem drök, me hu but kâu möt ame ca ba balua; ke oge me he ka otílâ thö e hnyi bong a obiny. 55 Anyin a hing jeú unyik, ke hing möt hnathu drök. 56 Haba at ame he ka an unyik me ijem drök, me ame laba eú hnyi hnyik, ke inya bi eú hnyi hnyekon. 57 Haba Kamen ae möt ame kunö nya, ke inya oge möt únyi ge Kamen; ke helâe ge at ame he ka han unyik, e ame he ka möt únyi gak. 58 Walang areto ame utut úheny hnyi drany: ca helâ me hna han hnen lakamen ke adre me mokcu: haba at ame han areto ang, me ame he ka möt nyiele balua. 59 E ame ha ta je hofuc eling hnyi sunago, hnyi hnen hna úne hnyi Kaperenauma.

60 A löng ut hnen ke je laten ae se hia, me adre me ha ka habe, E hmak hofuc e;

ke ia ae khana he ka löng? 61 Ke a wâ but Iesu eú hnyi hnyekon hnen laten hna ulidro ge únyi eling, me e ame ha ködra, ka habe, Hawa hnân jönbun hofuc e? 62 Ame ne he ka hawa öbun ka he ka wâ Nokon at ame ölö ka hnyi hnen bi ehac? 63 Haba at ame omelö, me hanu; ke ca únyi hnathu bi unyin: haba ta je hofuc oge hia but ha köbun, wale hanu me möt. 64 Ke ame ca labageju keihen gabun. Anyin ae khanö Iesu tavat adre me ca labageju, me at minya bi ame he ka alecuâ e. 65 Me e ame ha ködra, ka habe, Waleling me inye ha köbun, ka habe, E ba at ae khana he ka o könya, a ne ca ham kâu hnen Kamen.

66 Anyin a wale, e se hia laten adre me hmetuhmetu me ca tha he hmetu mē. 67 Haba Iesu ame ha ka hnyat a twelv, ka habe, E webun minya he ka hmetuhmetu? 68 Haba Simona Peteru amé thu kâu, ka habe, Than lö, öhmun e he ka he kö ia? e thibi gam je hofucin möt ame ca ba balua. 69 Ke öhmun e hia but labageju me wâ hmakhmeto a u thibi At ae Kap anyin Khong. 70 Iesu ame thu ködrin, ka habe, Hawa, oge me ca úc' öbun a twelv, ke diabolo ke at gabun? 71 E ame haiö Juda nöku Simona Isakariota, anyin a e at ame he ka alecuâ e, ke hanen hnyat a twelv.

HNYIMAKAN 7.

HWABAN e Iesu ame vheno Galilaja: anyin ae ca weny bi he ka vheno Juda, anyin a at Juda adre me heleú deny he ka hlingá e. 2 E hakekeny jut bijeú anyin at Juda, wale bijeúiny uma mená. 3 Me ame ka kâu liamekeiny mē, ka habe, Hna but dok ang, ke he thö Juda ai, me me wâ thö hnen latâm ta je huliwa u me ányá. 4 Anyin ae ba at ame ányá duóngá ke únyi, e ka weny bi he ka omanená e. U je ne ányá ta je únyi e, awe omanenö u thö ka hmeledrany. 5 Anyin ame ca labageju minya kâu je liamekeiny mē. 6 Haba Iesu ame thu ködrin, ka habe, E tiga ca o úök; ke úöbun bala bi. 7 E ca khana bi hmeledrany he ka húkötí öbun; ke so bi ame húkötíö nya, anyin a oge me ohnathó ae kong ta je huliwainy. 8 He th' öbun ka hnyi bijeú: oge me ca mē he ka hnyi bijeú; anyin ae tiga ca hwádâ bi úök. 9 E ame ha je hofuc eling ködra, me ame mē laba ju hnyi Galilaja.

10 Ke ame he but ka hnyi bijeu je liamekeiny me, me e ame ka he minya, k' ame ca he manen bi, k' ame he duong. 11 Haba at Juda adre me elam e hnyi bijeu, haingodra, ka habe, Ewa? 12 Ke gan hma hna ulidro gan ge tavat ae se hia: haingen keihen, ka habe, E at ae so; haingen keihen, Ohe, e ame omonu tavat ae se hia. 13 Ke ba at ame ha manena e anyin a odra outen at Juda.

14 Ke haba hnyi wanben bijeu, me ame he Iesu ka hnyi uma kap, k' ame une. 15 Haba at Juda adre me laia me ha, ka habe, A khana at ang tusi ga ia, ke adre ca na bi? 16 Me Iesu ame thu kodra, ka habe, Ca unyi gak hnok hna une, ke unyi ge at a kunu nya. 17 A ne weny ke at he ka madra weny, e ame he ka wahmak-hmetoa hna une, a ne unyi ge Khong, oge ne ha ka unyi bi gak. 18 Haba at ame ha hofuc ka unyi gan bi e ame elam he ka ogana e bi: ke haba at ame elam he ka ogana at a kunu e, e hnathu e, ke ba hwa-kecin ae ca wisa gan. 19 Hawa, a ca ham kobun Mose hnanyibu, ke ba ke at gabun ame vheno hnanyibu? Ieu gabun obun e elam he ka hlingo nya? 20 Haba tavat ae se hia adre me thu me ha, ka habe, E but gam demoni: ia ame elam he ka hlingo u? 21 Iesu ame thu me ha kodra, ka habe, Oge hia but anya ke huliwa, ke obun e laia hia. 22 Anyin a wale Mose ame hia but ham kobun peritom (ke so bi ca unyi ga Mose, ke unyi bi ge wahingat); ke obun e peritomonu at hnyi sabath. 23 Adre ne peritomonu ke at hnyi sabath, k' adre me ca he ka hanyauu hnanyibu anyi Mose; hawa obun e hmonyibun konya, anyin a oge me ti osou at hnyi sabath? 24 Ca ha unykume bi hoton hna wa hnen ecmak, ke so bi ha unykume ju hoton wisa.

25 Me haba keihen uhedra Jerusalema adre me ha, ka habe, Hawa, ca walang at adre me elam he ka hlinga? 26 Ke wa bi, e ame fuc manen, ke ba hodrin kau. Hawa, e khana je taben me ka e Keriso? 27 Ke haba at ang, me khan' ota dok a mwi hnyin: ke e ka o but Keriso, e ba at ame he ka wahmakhmetoa dok a mwi hnyin. 28 Me haba Iesu ame fuc hwege hnyi hnyin uma kap me no 'dra me ha, ka habe, E khan' obun dut inya, ke khan' obun minya but dok oge mwi hnyin; oge ca o ka unyi gak, ke e hnathu e at a kunu nya, wale at ae ca khan' obun. 29 E khandu

nya e, anyin a uhok unyin, ke e a kunu nya. 30 Me adre me elam he ka kat e: ke ba ke at ame hinobeny kau, anyin ae tiga ca o bi uen. 31 Ke odra se hia adre me labageju kau; me odrin e ha, ka habe, E ka o but Keriso, hawa, e ame he ka anya ta je uoman hon hna anyu hnen at ang. 32 A long ut ta je Faresaio hna iulidrokoua ge tavat ta je unyi e gan; me haba je taben tavat bihut me ta je Faresaio, me adre me kunu je taben tavat tue he ka kat e. 33 Haba Iesu ame ha, ka habe, E ca beu biju uok a ulabaik eang unyibun, ke oge me he ka he but ka at a kunu nya. 34 Obun e he ka elom nya, ke obun e ca he ka wa: ke ca khan' obun he ka he ka hnyi dok oge me he ka laba. 35 Me haba at Juda adre me uhnenamokoua, ka habe, Ewa dok ame he at ang ka he ka hnyin m' ate me ca he bi ka wa; hawa, e ame he ka he ka tavat adre vese unyin at Heleni, me na at Heleni? 36 Ieu hofuc ang e ame ha, ka habe, Obun e he ka elom nya, k' obun e ca he ka wa: ke ca khan' obun he ka he ka hnyi dok oge me he ka laba hnyin?

37 Hnyi bong a biliny bonginy bijeu, wale bong ae gan, Iesu ame todro me ha hwegia, ka habe, A ne ke at ae beic, he but jem ka ic unyik. 38 Haba at ame labageju konya me ame he ka uou unyi eu hnyi hnyekon je wageweiny mot, helaji me hna sihnalimen. 39 Ke e ame ha ge Hanu, wale ame he tavat adre me labageju kau he ka kap: anyin adre me tiga ca ham Hanu; anyin adre me tiga ca oganu Iesu. 40 Haba keihen tavat ae se hia, hnyi uen adre me long ta je hofuc e, me haingodrin, ka habe, E hnathu, perofeta at ang. 41 Haingen keihen, ka habe, Walang Keriso. Ke haingen keihen, ka habe, Hawa, ame o Keriso uheny Galilaia? 42 Hawa, adre me ca ha bi hnyi hna sihnalimen, ka habe, Ame he ka o Keriso unyi ge matrani Davita, ke haba taun anyi Davita, me Bethelma. 43 Me ame kheke lo but tavat gan. 44 Ke e weny keihen he ka kat e; ke ba bi at ame hinobeny kau.

45 Me ame he hmetu but je taben tavat tue ka je taben tavat bihut me ta je Faresaio; ke odrin e ha kodra, ka habe, Ieu gabun obun e ca hom but e? 46 Haingen je taben tavat tue, ka habe, E ba at ame fuc helae. 47 Me ame thu kodra ta je Faresaio, ka habe, Hawa, adre hia but omonu obun minya? 48 Hawa, e

hu ke taben ame ne ke at Faresaio ame labageju kâu? 49 Ke hnaûhangö but houmonu ang ae ca khan' ödra bi hnanyibu. 50 Me ame ha ködra Nikodema, (e ke at gadra, k' ame he kâu ehac), 51 ka habe, Hawa ge anyita hnanyibu, adre me he ka hangâ at ke adre me ca mē löng dö gan me me manen dut hnen hna mâdrâ? 52 Me adre me thu me ha kâu, ka habe, Ühem minya Galiläia? Elâm dö me wâ, anyin ae ba ke perofeta ame o üheny Galiläia.

53 Me adre me vese but ka hnyi umödra ta je uma :

HNYIMAKAN 8

KE Iesu ame he but ka hnyi bucen Elaio. 2 Ke hnyi hnyomakatu kong e ame o hmetu ka hnyi uma kap, me ame he but kâu tavat hia; ke e ame laba ju me n' ödra. 3 Haba tavat sihnalimen me ta je Faresaio adre me hom kâu ke momo adre lelö k' ame tiga bi ünyi monu; me adre me otilâ momo hnyi wanben, 4 me ha kâu, ka habe, At üne lö, haba momo ang öhmun e lelö k' ame tiga bi ünyi monu. 5 Ka hûna köta Mose hnyi hnanyibu he ka lûâ ge veto tavat adre me helâe; ieu hnâm hna ha gan? 6 Adre me ha e he ka cubec e, me me hu ünyi hnân bi fuco e. Ke Iesu ame nom but me set kânâ ge banyen. 7 Ke adre me hnö üjengö e kâu, me e ame höhöi me ha ködra, ka habe, ama bân at ame ca munyi mâdrâ hulö ka lûâ e. 8 Ke e ame nom hmetu ju me set kânâ. 9 Ke adre me löng ut me adre me ve dididrut, hwân ge at a bân ke ne o but ge at a biliny: ke hake Iesu thiju, ke momo ame hake tot. 10 Ke haba Iesu ame höhöi thö, me ha ka momo, ka habe, Ke momo lö, ödra but ua? e ba but at a ohnathangöi u? 11 Haba momo ame ha, ka habe, Than lö, e ba. Haba Iesu ame ha, ka habe, Oge me ca he minya inya ka ha hnaûhangöi u: he thö; ca mâdrâ hmetu monu hwân ün eang.

12 Iesu ame ha hmetu ködra, ka habe, Inya ang melaminy hmeledrany: haba at ame he ka he hotuk, e ame ca he ka he hnyi menekholom, k' ame he bi ka hu melaminy möt. 13 Me ame ha kâu ta je Faresaio, ka habe, U me ka hamâm ohnathu u; e ca hnathu thö hnâm hna ohnathu u. 14 Iesu ame thu me ha ködra, ka habe, A ne inya oge me ohnathu nya bi, e hnathu

hnök hna ohnatho; anyin ae khanö nya dok oge mwi hnyin, me dok oge me he ka hnyin. 15 Öbun e ha ünykûme hoton hnyin, ke oge me ca ha ünykûme bi nya ke at. 16 Ke so bi oge ne ha ünykûme, e hnathu hnök hna ünykûme; anyin a ca hake inya ke, ke tha inya me Kamök at a kunö nya. 17 Eke, adre me sihnalimen hnyi anyibun hnanyibu, ka habe, haba hna ohnatho hnen li at a lo, me hnathu. 18 Haba inya oge me ka ohnathu nya bi, ke ame ohnathu nya minya bi Kamen at a kunö nya. 19 Me haingödra kâu, ka habe, Ewa Kâmâm? Iesu ame thu, ka habe, E ca khan' öbun inya, me Cica: a ne khan' öbun inya, me khan' öbun minya Kamök. 20 E ame ha ta je hofuc e hnyi dok adre hip mone, e ame tiga üne hnyi uma kap: ke ba at ame kât e; anyin ae tiga ca o bi sien.

21 Iesu ame ha hmetu ködra, ka habe, Oge me he but ka he, ke öbun e he bi ju ka elöm nya, ke öbun e he ka mekinanyibun ta je hulö: haba dok oge me he ka hnyin, me ca khan' öbun e he ka he ka hnyin. 22 Me ame ha at Juda, ka habe, Hawa, ame ka he ka hamen hlingâ e bi, anyin a haingen, ka habe, Haba dok oge me he ka hnyin me ca khan' öbun he ka he ka hnyin. 23 Me e ame ha ködra, ka habe, Ükebun eang hmelen; ke ühek thö: öbun aten hmeledrany, ke iny ca at hmeledrany bi nya. 24 Anyin a wale, oge me ha köbun, ka habe, Öbun e he ka mekinanyibun ta je hulö: anyin a öbun e ne ca labageju, ka habe, Inya e, me öbun e he ka mekinanyibun ta je hulö. 25 Ke haingödra kâu, ka habe, U ia? Haba Iesu ame ha ködra, ka habe, Wale ünyi oge hia but ha köbun hwân hnyi can. 26 E hu gak ta je ünyi ae se he ka ha köbun me he ka owisa: ke so bi e hnathu e at a kunö nya; ke haba je hofuc a hwan oge me löng. me inya oge me ha e ka hmeledrany. 27 Ke adre me ca wâhmakhmeto a e ame ha ködra ge Kamen. 28 Ke haingö Iesu, ka habe, Öbun ka hia but kap göranyai Nokou at, me ame he ka khan' öbun, ka habe, Inya e, ke oge me ca mâdrâ ke ünyi ka ünyi gak bi, ke haba hnen Kamök hna nö nya, me wale can oge me ha ta je hofuc ang. 29 Ke tha e mönya at a kunö nya: e ame ca hnö nya but; anyin a inya oge me änyâ bala ta je ünyi hnân osenyinâ e. 30 E ame tiga ha ta je hofuc eling, me ame labageju kâu tavat ae se hia.

31 Haba Iesu ame ha ka at Juda, tavat adre me labageju kâu, ka habe, Öbun e ne he ka laba hmâ hnyi hok hofuc, me öbun je latök ae hnathu; 32 ke ame he ka khan' öbun hnathu, ke adre me he ka hn' öbun ge hnathu. 33 Me adre me thu kâu, ka habe, Öhmun je mâtrâni Aberahama, ke tiga ca hom hwenb' öhmun hnen ke at : a hawa, u me ha, ka kabe, Adre me he ka hn' öbun dut? 34 Iesu ame thu ködra, ka habe, E hnathu, e hnathu, inya oge me ha köbun, ka habe, haba at ame he ka mâdrâ monu e ame bi aten hulö. 35 Ke haba aten, me e ame ca laba hmâ bi hnyi hnyaba : ke so bi nokon ame laba hmâ. 36 Anyin a wale a ne he Nokon ka hn' öbun adre me he ka ti hn' öbun dut. 37 E khanö nya a öbun je mâtrâni Aberahama; ke öbun bi öbun e elâm he ka hlingö nya, anyin ae ba hnen hok hofuc eü hnyi je hnyekubun. 38 Inya oge me ha ta je únyi oge me hia but wâ unyin Kamök : ke öbun e mâdrâ minya öbun hnöbun hna wâ unyin kamöbun. 39 Ödra adre me thu, ka habe, Aberahama kamöhmun. Iesu ame ha ködra, ka habe, A ne je laku Aberahama öbun, n' öbun e he ka mâdrâ je huliwa anyi Aberahama. 40 Ke walang ang, öbun e elâm he ka hlingö nya, wale at ame ha köbun hnathu, waleji oge me löng únyi ge Khong : ke ca ányâ helâe Aberahama. 41 Öbun e ányâ ta je huliwa anyin kamöbun. Haingödra kâu, ka habe, Öhmun ca je lakon gethen; khaca thibi Kamöhmun, a wale Khong. 42 Iesu ame ha ködrin, ka habe, A ne Khong Kamöbun, öbun e he ka hnyok könya; anyin oge me o but, me oge me o únyi ge Khong; ke oge ca ka hamök o, ke e a kunö nya. 43 Ieü gabun öbun e ca wâ únykúme hok hofuc? anyin a e ca khan' öbun he ka löng hok hofuc. 44 Únyi ge kamöbun öbun, wale diabolö, ke öbun e behe ka ányâ weny ae kong anyin kamöbun. E at úhlingö hwân hnyi can, k' ame ca tethmâ hnyi hnathu, anyin ae ba hnathu gan. E ka he ka ha thoi, me ka únyi gan, anyin a e at thoi, ke kamen thoi. 45 Ke can anyin oge me ha hnathu, me öbun e ca labageju könya. 46 Ia gabun ame he ka ohnathoâ a g' ame hu monu gak? Ke oge ne ha hnathu, ieü gabun öbun e ca labageju könya? 47 Haba at a únyi ge Khong, me e ame löng hofuc hwan Khong : waleling me öbun e ca löng anyin a ca únyi ge Khong öbun. 48 Haba at Juda adre me

thu kâu, ka habe, Hawa, öhmun e ca ha hnatho, ka habe, U at Samaria, ke e gam demoni? 49 Iesu ame thu, ka habe, E ba demoni gak; ke inya oge me ogânâ Kamök, ke öbun e ohnyikönö nya bi öbun. 50 Ke oge me ca elâm hnân ogânö nya bi : e hu at ame elâm, me owisa minya. 51 E hnathu, e hnathu, inya oge me ha köbun, ka habe, a ne hu at ame he ka vhenö hok hofuc, me e ame ca he ka wâ mok nyiele balua. 52 Me ame ha kâu at Juda, ka habe, E khan' öhmun dut walang ang, a e unyâm demoni. A mokcu Aberahama, me ta je perofeta, ke u me ha, ka habe, A ne hu at ame he ka vhenö hok hofuc, me e ame ca he ka wâ mok nyiele balua. 53 Hawa, u gan hon kamöhmun a Aberahama, waleji a mokcu? ke mok minya ju ta je perofeta : ke u ia bi u? 54 Iesu ame thu, ka habe, Oge ne ogânö nya bi, me ca únyi hnathu úganik : ke hnen Kamök hna ogânö nya; wale öbun e ha, a e Khongubun; 55 e ca khan' öbun e : ke khanö nya e; oge ne ha, ka habe, E ca khanö nya e, awe, oge ma at thoi bi helâ me öbun : ke khanö nya e, ke oge me vhenö hwan hofuc. 56 Ame senyin Aberahama a kamöbun he ka wâ bonguk je bong; ke e ame wâ ju me e ame senyin. 57 Me haingen at Juda kâu, ka habe, Hawa, ca fite but ta je hunaiâm ke u je munyi ö Aberahama? 58 Haingö Iesu ködra, ka habe, E hnathu, e hnathu, inya oge me ha köbun, ka habe, Iny at kâü adrem, ke tiga hiö Aberahama. 59 Me adre me hom je veto he ka lûâ e : ke haba Iesu ame ka oiyoungâ e hi, me didrut úheny hnyi uma kap.

HNYIMAKAN 9.

E AME he, k' ame wâ ke at a wadröu hwân hnyi hna knokoâ e. 2 Ke haba laten ödrin e hnö e, ka habe, Rabi, ie at a anyin hulö m' adre me hnokoâ wadröu eang, hawa, a ka únyi gan, ame ne kamen me hinyen? 3 Iesu ame thu, ka habe, E ca monu at ang, ke ca monu minya kamen me hinyen : ke so bi me me manen dut ta je huliwa anyin Khong ge at ang. 4 E úcü köta he ka mâdrâ ta je huliwa anyin at a kunö nya e me tiga lany : ame he jem lit ke ca khana hmetu ke at he ka ányâ ke huliwa. 5 Hnyi úen a inya ang hmeledrany, inya ang melaminy hmeledrany. 6 Ke e a hia but ha e, e ame hangöc ka hnyi kânâ, me únyúnnya me botro li emakan at

ae wadröu ge kânâ, 7 me ha kâu, ka habe, He thö ka hneü hnyi an Siloama (walang bongon, Hna úkhünöng). Me e ame he but me hneü, me e ame o hmetu but a ga bwela but. 8 Haba tavat adre me laba hakekenyâ, me tavat adre me wâ ehac ame labö sumat, adre me ha, ka habe, Ca at ke la ang ame labö sumat? 9 Ke haingen keihen, ka habe, Ka e at e: ke haingen keihen, ka habe, E tha úcü mä. Ke e ame ha, ka habe, Inya ang. 10 Me adre me ha kâu, ka habe, Adre kâmâu hna obwela li emákâm? 11 E ame thu, ka habe, Hnen at adre hwenyi ien Iesu hna mádrâ kânâ, me kina hnyi li emakök, me ha kónya, ka habe, He thö Siloama ai ha hneü: me oge me he but me hneü, me oge me bwela but. 12 Ke haingödra adre me ha kâu, ka habe, Ke ne e but ua? Haingen, ka habe Kheté.

13 Ödra adre me hom but at ae wadröu ehac ka ta je Faresaio. 14 Haba bong Iesu ame mádrâ kânâ, me obwela li emakan, me, bong sabath. 15 Haba ta je Faresaio adre me hnö hmetu e, ka habe, A hawa me u me bwela but? Haingen ame ha ködra, ka habe, E ame kina kânâ hnyi li emakök, me oge me he but ka hneü, me oge me bwela but. 16 Me ame ha keihen ta je Faresaio, ka habe, Ca únyi ge Khong at ang, anyin a e ame ca okabâ sabath. Ke haingen keihen, ka habe, A hawa at ae monu ka khana ka ányâ ta je úöman helâe? Me adre me khekke lo but. 17 Me adre me ha hmetu ka at ae wadröu, ka habe, Ieü hwâm gan, anyin a e ame obwela li emákâm? Haingen, ka habe, E perofeta. 18 Ke haba at Juda, me adre me ca kap a e at eji ae wadröu, ka bwela hmetu but, ke ne o but adre me hawâ kamen me hinyen at adre obwela, 19 me hnei ödru, ka habe, Hawa nökubu at ang waleji öbu me ha a g' adre hnokoâ ke wadröu? a hawa a ga bwela but walang ang? 20 Me ame thu kamen me hinyen, ka habe, E khan' öhmu a nökuhmu at ang, ke öhme hnokoâ ke wadröu: 21 e bwela but walang, ke ca khan' öhmu a hawa; ke ca khan' öhmu minya at a obwela li emakan: bethe hnö öbun gan; e at hnathu but; hamen he ka háiâ e. 22 Ame ha kamen me hinyen helâe anyin a ödru outen at Juda; anyin ame úhaköuâ at Juda he ka obâ ányi hnyi sunago at ame he ka ha, ka habe, E Keriso. 23 Waleling me me ha kamen me hinyen, ka habe, E at hnathu but; bethe hnö öbun

gan. 24 Me adre me olo hawâ at ae wadröu, me ha kâu, ka habe, Ogánâ Khong, anyin a öhmun e wâ but ae monu at ang. 25 Haba at ae wadröu ame thu, ka habe, A ne at ae kong, me ca khanö nya: khaca thibi únyi ae khanö nya, wale a iny wadröu ehac, ke walang ang oge me bwela but. 26 Me adre me ha kâu, ka habe, Ieü hnen hna ányâ köu? a kâmâu hna obwela li emákâm? 27 E ame thu ködra, ka habe, Oge hia but ha köbun eja, ke öbun e ca löng: anyin a ieü ame bewebun hmetu ka löng? e bewebun minya he ka bi laten? 28 Me ödrin e öü e, me ha, ka habe, U at bi u a aten; k' öhmun je latö Mose bi öhmun. 29 E khan' öhmun a Khong ame fuc kö Mose, ke haba at e, me ca khan' öhmun e at ua. 30 Haba wadröu ame thu ködra, ka habe, Hap wale ju ang únyi hnân láiâ, a öbun e ca wâ dok a mwi hnyin, ke a hia but obwela li emakök. 31 E khan' öta but, a g' ame ca he Khong ka löng tavat ae monu: ke a ne ke at ame outen Khong me mádrâ weny, me e ame he bi ka löng kâu. 32 Adre me ca munyi löng adrem a g' ame obwela ke at li emakan at adre me hnokoâ ke wadröu. 33 A ne ca únyi ge Khong at e, e ca khana he ka ányâ ke únyi. 34 Ödra adre me thu kâu, ka habe, Adre me hnöku u hnyi hulö ae gan, ke u me he bi ka n' öhmun? me adre me obâ but e.

35 A löng ut Iesu a g' adre hia but obâ e; me e ame wâ e me ha kâu, ka habe, Hawa, u me labageju ka Nokon Khong? 36 E ame thu, ka habe, Taböny Than, e ia, m' inye he ka labageju kâu? 37 Iesu ame thu kâu, ka habe, U je wâ but, ke e thibi e at ame úhnenamö möu. 38 Haingen ame ha, ka habe, Taböny Than, inya oge me labageju. Me e ame khudrung ju kâu. 39 Haingö Iesu, ka habe, Oge o but eang hmeledrany he ka owisa, me me bwela but tavat adre me ca hnyi bwela; me me ca bwela bi tavat adre me bwela. 40 Ame löng ut keihen ta je Faresaio a tha ödra mä ta je hofuc eling, me adre me ha kâu, ka habe, Hawa, öhmun je wadröu minya? 41 Iesu ame thu ködra, ka habe, Öbun e ne je wadröu me ba bi anyibun monu, ke walang ang öbun e ha, ka habe, Öhmun bwelâ: waleling me me e bala bi anyibun monu.

HNYIMAKAN 10.

EHNATHU, e hnathu, inya oge me ha köbun, haba at ame ca hnyi dit hnyi homagöuleny hagny mamoe, ke ame ölö bi ka hnyi ke gethen, e thibi at ae hok ta únyi me venöu. 2 Ke haba at ame dit hnyi homagöüle e thibi at ame tuö mamoe. 3 Ame khöng ut káu hnen at ame tuö homagöüle; ke haba ta je mamoe, me adre me löng ifucin: ke e ame hawá ien haleny ta je mamoe, me hum ödra but hnyöu ai. 4 E ka hia but hna haleny je mamoe hnyöu ai, e ame bán, ke haba ta je mamoe adre me he hoton: anyin adre me löng hmakhmetoá ifucin. 5 Adre me ca he ka he hoton atkanyua ke adre me he ka kec gan: anyin adre me ca löng hmakhmetoá ifucin ta je atkanyua. 6 Iesu ame ha ködra úhoúú eling: ke adre me ca wáhmakhmetoá ta je únyi e ame ha ködra. 7 Haba Iesu ame ha hmetu ködra, ka habe, E hnathu, e hnathu, inya oge me ha köbun, ka habe, Inya ang homagöüle hobi káu ta je mamoe. 8 Haba tavat hia thithö a bödrin, ka bilik bi, ödrin hnyat hok ta únyi me venöu: k' ame ca ling ödrin but ta je mamoe. 9 Inya ang homagöüle, a ne ke at ame didrö unyik, e ame he ka möt, me didrö me didrut, k' ame he ka wá jeú. 10 Ame ca o baú at venöu, ke so bi he ka venöu, me úhlingö me ohia: oge me o but m' adre me he ka hu möt, k' adre me he ka hu gáná. 11 Inya ang at ame tuö wia ta je mamoe: haba at ame tuö wia je mamoe, me e ame ham anyin möt hnán singiny ta je mamoe. 12 Ke haba at ame hok hwaban, wale ca at ame mamoe bi, ke ca haleny minya bi ta je mamoe, haba at eling ame wá luko ame he jem, me ame hna degecá but ta je mamoe me kec, me ame úlü ödra luko, me ovesei ödra: 13 e ame kec dö anyin a e at ame hok hwaban, k' ame ca únykúme ka ta je mamoe. 14 Inya ang at ame tuö wia ta je mamoe; ke oge me wáhmakhmetoá halek ta je mamoe, k' ame wáhmakhmetu nya minya hnen halek, 15 helá me Kamök ame wáhmakhmetu nya, helá minya me inya oge me wáhmakhmeto Kamök; ke inya oge me ham anyik möt hnán singiny ta je mamoe. 16 E hu minya ke ta je mamoe a halek, a ca hanen kak ang: ke úú könya he ka hum ödra minya, ke adre me he ka löng ifucik; me me khaca thibi hnahat mamoe, ke khaca thibi at ame tuö. 17 Waleling ame hnyok könya

Cica, anyin a inya oge me ham anyik möt m' oge me he ka hom hmetu. 18 E ba at ame húgúná e gak, ke inya oge me ham ka únyi gak. E hu man gak he ka ham e, ke hu man minya gak he ka hom hmetu. Wale hnanyibu oge me kap únyi ga Cica.

19 Ke ame khekke lo hmetu but at Juda can ta je hofuc eling. 20 Ke se hia gadra adre me ha, ka habe, E but unyin at ang demoni, k' ame monu but; iéú gabun öbun e löng káu? 21 Haingen keihen, ka habe, Haba ang, me ca ifucin at ae hu demoni unyin. Hawa, e khana demoni he ka obwela li emakan at ae wadröu?

22 Adre me bijeúá bong adre me dilic uma kap hnyin hnyi Jerusalema; hnyi ke keihen huna ae megic; 23 ke haba Iesu ame vheno poretiko anyi Solomona hnyi uma kap. 24 Me ame úkhacaköu igigilö e at Juda me ha káu, ka habe, U me he bi ka ololoi öhmun ke ne o but kehö? A ne u Keriso, ha manená köhmun. 25 Iesu ame thu ködra, ka habe, Oge hia but ha köbun, ke öbun e ca kap: haba ta je huliwa oge me ányá hnyi iö Cica, wale thibi e hnán ohnathu nya. 26 Ke öbun e ca kap anyin a ca halek ta je mamoe bi öbun. 27 A löng ut halek ta je mamoe ifucik, ke oge me wáhmakhmetu ödra, ke adre me he hotuk: 28 ke oge me ham ködra möt ame ca ba balua; ke adre me ca he ka mok nyiele balua, ke ba ke at ame he ka hugun' ödra únyi hnyi hnyamök. 29 Haba Cica, wale at ame ham ödra könya, me gan hmá hon ta je únyi hia; ke ba at ae khana he ka húgún' ödra but únyi hnyi hnyamen Kamen. 30 Haba inya me Kamen, me öhmu khaca thibi. 31 Haba at Juda adre me hok veto hmetu he ka lúá e. 32 Ke Iesu ame thu ködra, ka habe, E se hia ta je huliwa ae so oge hia but omanená köbun únyi ge Kamök; can ie huliwa öbun e lúö nya gan? 33 Haba at Juda adre me thu káu, ka habe, Öhmun e ca lúú u can huliwa ae so, ke can bi bi gan; ke can minya anyin a u at, ke u me wiö u bi thö me Khong. 34 Iesu ame thu ködra, ka habe, Hawa, adre ca sihnalimen hnyi anyibun hnanyibu, ka habe, Oge ha, ka habe, Öbun ke je khong? 35 A ne hia but ha, ka habe, Ödrin je khong, wale tavat a o ködrin hofuc hwan Khong, (ke ca khana bi he ka ohavá hna sihnalimen), 36 öbun e ha gan, wale hnen Kamen hna okabá, me kuná ka hnyi hmeledrany, ka habe, U me bi gan;

anyin oge me ha, ka habe, Inya ang Nokon Khong? 37 Oge ne ca mádrá ta je huliwa anyi Cica, ca kóp nya öbun. 38 Ke o ge ne mádrá, eja ke ne öbun e ca kóp nya, kap bi th' öbun ta je huliwa: m' öbun e he ka wáhmakhmeto me wá únykúme a g' ame laba Kamen eú hnyik, ke inya eú hnyin Kamen. 39 Adre me elám hmetu he ka kát e: me e ame he but únyi hnyi hnyamödra.

40 Me e ame he hmetu hoton Joridano, ka hnyi dok a bö Ioane ka bapataiso hnyin; ke e ame laba eling. 41 Me ame he but káu tavat ae se hia, adre me ha, ka habe, A ca mádrá Ioane ke úöman: ke e hnathu ta je hofuc hia a ha Ioane ge at ang. 42 Ke se hia tavat adre me labageju elin káu.

HNYIMAKAN 11.

EHU ke at ae mok, jia Lazaro at Bethania, hnyi taun anyi Maria me liamekeiny mē jia Maretha. 2 Haba Maria, me wale at ame osúá Than ge muro, k' ame kot li can ge leúnan han, haniny e a Lazaro at ame mok. 3 Ke haba li lahaniny, me ödru me úkhúnöng he ka ha káu, ka habe, Taböny Than, mē wá bi at u me betenge gan ame mok. 4 A löng ut Iesu, me e ame ha, ka habe, Ame ca he ka mekiny mok ang, ke so bi hnán ogáná Khong, m' adre me he minya ka ogáná Nokon Khong hnen e. 5 Haba Iesu ame betenge ga Maretha me liamekeiny mē me Lazaro minya. 6 E ame löng ae mok, ke e ame laba hmetu ju a lo bongon hnyi dok eling. 7 Hwabán e, e ame ha ka laten, ka habe, Ötin a hmetu Juda ai. 8 Me ame ha káu laten, ka habe, Rabi, haba at Juda adre me elám he ka lúu u ge veto, hawa, u me he hmetu káe? 9 Iesu ame thu, ka habe, Hawa, ca twelv awa hnyi bong? A ne he ke at hnyi lany e ame ca he ka thö, anyin a e ame wá melam eang hmeledrany. 10 Ke a ne he at hnyi hnyinghet, e ame he ka thö, anyin ae ba melam gan. 11 E ame ha hofuc eling, ke hwabán e, e ame ha ködra, ka habe, A mokut ut Lazaro a hanötin; ke oge me he bi nya ka ohmáká e hnyi hna mokut. 12 Me ame ha laten, ka habe, Taböny Than lö, a ne mokut, e ame he ka möt. 13 Haba Iesu ame ha a ga mokcu: ke ödrin e únykúme a g' ame ha ge mokut me mená. 14 Me haba Iesu ame ha manená ködrin, ka habe, A mokcu Lazaro. 15 Ke inya oge me senyin gabun, anyin

ae hiö nya e, m' öbun e he bi ka labageju; ötin he thö káu. 16 Ke ame ha Toma, adre wenyö Didumo, ka hnyat a tha laten mē, ka habe, Ötin he minya m' ate me he ka tha mok mē.

17 Me ame o but Iesu, ke e ame wá a vak ut bongon hnyin erkemok. 18 Haba Bethania me Jerusalema, me úhakekeny heláke me fitin je setadia: 19 ke se hia at Juda adre me he but kö Maretha me Maria he ka otubweli ödru anyin a hanidru. 20 A löng ut Maretha a g' ame o but Iesu, me e ame he he ka úkhanö mē: ke haba Maria, me e ame laba biju eiö hnyin uma. 21 Haba Maretha ame ha kö Iesu, ka habe, Than lö, a ne hnám ang, ma ca he ka mok hanik. 22 Ke walang ang, e khanö nya a g' ame he Khong ka ham köu ta je únyi hia thithö u me he ka sumátá gan. 23 Iesu ame ha káu, ka habe, Ame he ka möt hmetu hanám. 24 Haingö Maretha káu, ka habe, E khanö nya a g' ame he ka möt hmetu hnyi úen möt hmetu hnyi bong a obiny. 25 Iesu ame ha káu, ka habe, Inya ang möt hmetu, me möt minya: haba at ame he ka labageju könya, eja ke ne a ne mokcu, e ame he ka möt: 26 ke haba at ame möt me labageju könya e ame ca he ka mok nyiele balua. Hawa, u me kap e! 27 Haingen ame ha káu, ka habe, Eke Than, inya oge hia but kap a u thibi Keriso a Nokon Khong, ame he ka o eang hmeledrany. 28 E a hia but ha e, me e ame he but, me hawá duöngi Maria, a liamekeiny mē, me ha, ka habe, A o thö ang At úne, ke e ame hawö u. 29 E a löng ut, me ame ie todrö, me he káu. 30 (Ke tiga ca o bi Iesu ka hnyi taun, ke e ame tiga laba hnyi dok e ame úkhanö me Maretha hnyin.) 31 Ke haba at Juda adre tha laba mē eiö hnyin uma, a hnyat otubwelá, adre me ö Maria ame ie tot me he hnyöu ai, me adre me he hoton, adre me únykúme a g' ame ke ka hnyi erkemok he ka tenge eling. 32 Ame o but Maria ka hnyi dok ae hnyin Iesu, me e ame ta ju ka hnyi li can, me ha káu, ka habe, Taböny Than, a ne hnám ang ma ca he ka mok hanik. 33 Iesu ame wá e ame tenge, me at Juda adre me tha he mē adre me hnyi tenge, me e ame máng eú hnyi hnyekon, me hmak hmönyin, 34 me ha, ka habe, Ewa dok öbun e ip e hnyin! Haingödra káu, ka habe, Than lö, aiö u ka wá. 35 Iesu ame tenge. 36 Me ame ha at Juda, ka habe, Wá bi, úganiny anyin ibe tengiö káu! 37 Ke haingen kaihen, ka

habe, Hawa e ca khana nt e, wale at a obwela li emakan at ae wadröu he ka thawá me me ca he ka mok bi at ang? 38 Iesu ame máng hmetu eú hnyi hnyekon, me o ka hnyi erkemok, wale op, ke adre ip veto hnyi hnyimen. 39 Iesu ame ha, ka habe, Hom but veto. Haingö Maretha a haniny e a mokcu, ka habe, Thanlö, e bon dut, anyin a vak ut bongon. 40 Iesu ame ha káu, ka habe, Oge ca ha köu, ka habe, U je ne he ka labageju, me u me he ka wá hmanenanginy Khong? 41 Me adre me hom but veto. Ke haba Iesu ame bwele thö görány ai me ha, ka habe, Cica lö, inya oge me ole köu anyin a u me ling nya. 42 Ke e khanö nya a u me ling nya bala : ke oge me ha anyin a ödra se adre me tot igigili nya, m' adre me he ka kap a u je kunö nya. 43 E ame ha hofuc e, me e ame hongot hwege thö, ka habe, Lazaro lö, didrut. 44 Me ame didrut at a mokcu a g' adre lan li can me li benyin ge manoiny erkemok ; k' adre lan hnyimakan ge ecmáno. Iesu ame ha ködra, ka habe, Thang ut e, me hna but me me he but.

45 Me ame labageju káu at Juda ae se, a hnyat adre me o kö Maria, k' adre me wá ta je únyi e ame mádrá. 46 Ke haba keihen gadra, me adre me he but ka ta je Faresaio, me ha ködra ta je únyi ame ányá Iesu.

47 Me haba je taben tavat bihut me ta je Faresaio adre me hawá úhnenamö, me haingödra, ka habe, Hawa gata? anyin ae se hia but ta je úóman ame ányá at e. 48 Ate ne he ka hna e heláe, me ame he tavat hia ka lababeju káu : me ame he ka o at Roma bi ka húgúná hnöta me ita minya hnyi. 49 Ke haba ke at gadra wale Kaiafa a taben tavat bihut hnyi huna eling, ame ha ködra, ka habe, E ba hmönyin ong únyi ae khan' öbun, 50 ke öbun e ca únykúme, ka habe, e únyi hnauth köbun a ga mok bi at a khaca hnán hwaban tavat ae se hia, me me ca mok bi hnyei hia. 51 Ke e ame ca ha e a ka únyi gan : ke so bi e taben tavat bihut hnyi huna eling, k' ame perofeta a g' ame he ka mok ; Iesu hnán hwaban hnyei eling ; 52 ke ca hake hnán hnyei eling, ke so bi m' adre me úkhacaköu lakon Khong adre vese, m' adre me khaca thibi. 53 Ke hwán hnyi bong eling adre me si hnán he ka hlingá e.

54 Waleling me me ca he manen hmetu Iesu hnyi hnyimakan at Juda, ke e ame he but ka hnyi ke keihen hnyei ae hakekeny

ka hnyi hnyebuba, ka hnyi taun Efaraima ien, k' ame tha laba eling me laten. 55 E hakekeny jut paseka anyin at Juda : ke se hia tavat adre me he Jerusalema ai úhedra he e, he ka obosoi ödra e me tiga ca úen paseka. 56 Ke adre me elöm Iesu, me úhnenamököuá hnyi úen adre me tot hnyin uma kap, ka habe, Ieú únykúmenöbun? Hawa, e ame ca he ka he jem ka hnyi bijeú? 57 Haba je taben tavat bihut me ta je Faresaio adre me otílá hnanyibu, ka habe, A ne ke at ae khana dok ame laba hnyin, hamen he ka omanená m' adre me he ka kát e.

HNYIMAKAN 12.

KE tiga siks biju ta bong adre me he ka ányá paseka, me Iesu ame he Bethania ai, wale dok a laba hnyin Lazaro waleji a omelö úheny hnyi hna mok. 2 Me ödrin e bi sahac eling hobi káu : ke haba Maretha ame bi aten ; ke Lazaro ke at gadrin ame hnyi han mē. 3 Maria ame hom litara tang muro ae hing narado ae gan hwaban, me hneú káu li ca Iesu, me kot li can ge leúnen ban : ke unöngötö uma ge bunen muro. 4 Me ame ha ke at unyin laten, jia Juda Isakariota, at ame he ka alecuá e, 5 ka habe, Ieú adre me ca úco gan muro eang me hnán hwaban je denari a theri haded, m' adre me he ka ham ka ta je theduoc? 6 Ame ca ha e anyin ame betenge ge ta je theduoc ; ke anyin bi a e at venöu, ke e unyin tang, ke e ame hom ta je únyi hnyin tang. 7 Iesu ame ha, ka habe, Ca háiá bi momo, e ame ip e hnán hobi káu bong he ka könim nya hnyin. 8 E bala unyibun ta je theduoc ; ke oge me ca he bi nya ka laba bala unyibun.

9 Me ame löng houmonu a tavat Juda a e but ling : me adre me o thö ca hake ga Iesu thibi, ke adre me he minya ka ö Lazaro, waleji a omelö úheny hnyi hna mok. 10 Ke a úhnenamö je taben tavat bihut he ka hlingö Lazaro minya ; 11 anyin ae se hia at Juda adre me he me labageju kö Iesu únyi gan.

12 Haba nyi, e se hia tavat adre me he ka hnyi bijeú, ke adre me löng a g' ame he ka o Iesu hnyi Jerusalema, 13 me adre me bi lan pama me he ka úkhanö mē, me hongot, ka habe, Hosana : hnahic hnen Than Isaraela, ame o but hnyi ien Than. 14 Ke a wá but Iesu ke asina ae tiga úhnyúkong, me e ame tabá e, helá me hna

sihnalimen, ka habe, 15 U ca he ka ot, hlu nõku Ziona ; wá bi ame o but Tuhám, ame tabá nokon asina. 16 Ame ca wáhma-khmetoá laten ta je hofuc eling únyi hnyi can : ke adre hia but oganö Iesu, me ödrin e únykúme a g' adre hia but sihnalimen ta je únyi e gan, ke adre me ányá ta je únyi e káu. 17 Me ame ohnathoá hnen tavat ae se hia a tha ödra mē waleji hnyi hnen hna hawo Lazaro únyi hnyi hnyin erkemok, me omelö e únyi hnyi hna mok. 18 Wale minya me me úkhanö mē tavat ae se hia, anyin adre löng ut hnen hna mádrá úöman eling. 19 Anyin a wale haba ta je Faresaio adre me úhnenamökouá, ka habe, Wá bi, a g' ame ca tubun : wá bi, ame he hoton hmeledrany hia.

20 Wale keihen ta je Heleni anyin tavat adre me he he ka hnyi hmi minya hnyi bijeú : 21 me adre me he but kö Filipo at Bethesaida hnyi Galilaia, me hnö e, ka habe, Taböny, öhmun me hnyi ö Iesu. 22 Filipo ame he me ha kö Anederea : haba Anederea me Filipo ödru me he me ha kö Iesu. 23 Ke haba Iesu ame thu ködrin, ka habe, A o but awa he ka ogáná Nokon at. 24 E hnathu, e hnathu, inya oge me ha köbun, A ne kölu ka hnyi káná ke wan hwit, ke ame ca bobot bi, ame he ka hake mokut ; ke a ne bobot, ame he ka wa se hia. 25 Haba at ame hnyoká anyin möt, me ame he ka ohia e ; ke haba at ame húkotiá anyin möt eang hmeledrany, e ame he ka tuó e ke ne o but ka hnyi möt ame ca ba balua. 26 A ne ke at ame he ka bi atök, e so e ame he hotuk ; ke haba dok o ge me he ka laba hnyin, me ame he minya atök ka laba eling : a ne he ke at ka bi atök ame he Cica ka ogáná e. 27 E hlohlo hnyekuk walang ang ; ke ieú oge me he ka ha ? Cica lö, bethe omeli nya hnyi úen ang. Ke so bi can e oge me o but ka hnyi úen ang. 28 Cica lö, ogáná thö iám. Me ame o but hofuc únyi hnyi drany, ka habe Oge hia but ogáná, ke oge me he hmetu ka ogáná. 29 Haba tavat adre me útilen eling adre me löng me ha, ka habe, Hendreng ang : haingen keihen, ka habe, Angela ame fuc káu. 30 Iesu ame thu, ka habe, A ca o hofuc e hnán hobi könya, ke so bi hnán hobi köbun. 31 Adre me he walang ang ka owisa hmeledrany : ke adre me he walang ang ka obá tuban hmeledrany ang. 32 Ke haba inya, adre ne ogóranyi nya únyi eang hmeledrany, me oge me he bi nya ka lelö tavat hia thithö könya. 33 E

ame ha e, k' ame omanená bongon mok e ame he ka meking. 34 Haba tavat ae se hia adre me thu káu, ka habe, Öhmun e löng ut únyi hnyi hnanyibu a g' ame he ka tethmä Keriso nyiele balua : ieú gam u me ha a ga úcü he ka ogóranyá Nokon at ? ia Nokon at eling ? 35 Haba Iesu ame ha ködra, ka habe, E okhulit biju melam unyibun. He thö e me tiga e unyibun melam, wá e nye o but köbun lit : haba at ame he hnyi lit, me ca khana dok e ame he ka hnyin. 36 Kap ju melam e me tiga e unyibun melam, m' öbun e lakon melam bi.

Iesu ame ha hofuc e, me ame he but, k' ame labö duöng gadra. 37 Ke so bi, eja ke ne a ne ányá ta je úöman ae se hia hnyi hnyimaködra, adre me ca labageju káu : 38 me me hwádá hofuc ho Isaia perofeta waleji e ame ha, ka habe,

Than lö, ia ame labageju ka hnöhmun hna thumeto ?

K' adre me omanená kö ia benyin Than ?

39 Anyin a wale e ca khan' ödra he ka labageju, anyin a haingö Isaia minya, ka habe,

40 E ame owadrúa ta je emaködra, ke e ame okhötá je hnyekudra ;

Wá adre nye wá ge je emaködra, me únykúme ge je hnyekudra,

Wá adre nye hmetu,

M' iny omeli ödra but.

41 Haba Isaia ame ha ta je únyi e, anyin a e ame wá anyin hmanenang ; k' ame háia e. 42 Ke so bi e se hia ta je taben adre me labageju káu ; k' adre me ca ha manená bi, can ta je Faresaio, wá adre nye ob' ödra but únyi hnyi sunago : 43 anyin ae nua wedra a g' ame he ka ogán' ödra hnen tavat, hon wedra a g' ame he ka ogán' ödra hnen Khong.

44 Ame ha hwegiá Iesu, ka habe, Haba at ame labageju könya, me ame ca labageju bi könya, ke káu minya bi at a kunö nya. 45 Ke haba at ame ö nya ; me ame wá minya at a kunö nya. 46 Inya oge me o m' inya melaminy hmeledrany, me me ca laba hnyi lit at ame labageju könya. 47 Ke a ne löng hok hofuc hnen ke at, k' ame ca vhenobi, oge me ca he bi nya ka owisa e, anyin oge me ca o he ka owisa hmeledrany, ke so bi he ka omelö hmeledrany. 48 Haba at ame digic nya, k' ame ca kap bi hok hofuc, me hu bi at ame owisa káu : haba hofuc, waleji oge me ha, me wale at ame he ka owisa káu hnyi bong a obiny.

49 Anyin a inya oge me ca fuc a ka únyi gak ; ke haba Kamen, wale at a kunô nya, me e ame hna kónya hnanyibu a hanymök he ka ha, me únyi minya oge me he ka únö. 50 Ke e kxanö nya a haba anyin hnanyibu, me möt ame ca ba balua : me haba ta je hofuc oge me ha, me helâ me hnen Kamen hna ha kónya, me wale hnök hna ha.

HNYIMAKAN 13.

A TIGA ca bijeûâ paseka, ke a wâ Iesu a ga o but únen he ka he but ka Kamen úheny ang hmeledrany, ke a hia but hnyokâ lahanen eang hmeledrany, me e ame hnyoki ödra ke ne o but obiny. 2 Haba hnyi únen han sahac, ke a hia but diabolö ip hnyi hnyeku Juda Isakariota nöku Simona he ka alecuâ e, 3 ke a wâ but Iesu a g' ame hia but hna ta je únyi hia ka hnyi hnyamen hnen Kamen, ke úheny unyin Khong, k' ame he ka hmetu ka Khong, 4 awe e ame todrö hnyi hna han, me uny jut anyin je úkxau, me hom ecmano me weikâ. 5 Ke e ame hingälâ köiö ka hnyi kaia, me hwân he ka hneú je li can laten, me kot ge ecmano ame weikâ. 6 Me e ame he but kö Simona Peteru. Me e ame ha, ka kabe, Than lö, u me he bi ka hneú li cak? 7 Iesu ame thu kâu, ka habe, Haba únyi oge me ányâ, me ca kxanö u walang ang, ke u me he ka wâhmakhmetoâ nyiele. 8 Haingö Peteru kâu, ka habe, U me ca he bala ka hneú li cak. Iesu ame thu kâu, ka habe, Oge ne ca osúö u, me ba jekhom unyik. 9 Haba Simona Peteru ame ha kâu, ka habe, Than lö, ca hake li cak thibi, ke so minya li hnyamök me bök minya. 10 Iesu ame ha kâu, ka habe, Haba at adre me östâ, me úcú he ka hneú li can thibi, me ame he ka tha kalaöt hia but : öbun e kalaöt ut ke ca öbun hia bi. 11 Anyin a e ame wâhmakhmetoâ at ame he ka alecuâ e ; waleling me me ha, ka habe, Öbun ca kalaöt hia bi.

12 A hia but hneú je li cadrin, e ame hom hmetu je úkxauen, me laba hmetu ju, me e ame ha ködrin ka habe, Hawa öbun e wâhmakhmetoâ hnök hna ányâ köbun? 13 Öbun e hawo nya, ka habe, At úne me Than : ke so hnöbun hna ha, anyin a eke. 14 Oge ne Than me At úne, ke oge hia but östâ je li cabun, me úcú köbun he ka úsöúákouâ je li cabun. 15 Anyin oge hia but ham köbun tulut, me öbun e he ka ányâ helâ me hnök hna ányâ köbun.

16 E hnathu, e hnathu, inya oge me ha köbun, ka habe, E ca gan aten hon tuhan ; ke ca gan minya at adre kunâ hon at a kunâ e. 17 A ne kxan' öbun ta je únyi e, hnöbun hnahic öbun e ne he ka ányâ e. 18 Oge me ca hai öbun hia : e kxanö nya hnök je hna úca : ke so bi me me hwâdâ hna sihnalimen, ka habe, Haba at ame an ök jeú me ame húki nya ge ohmäiny can. 19 Oge me ha ang köbun ke tiga ca hwâdâ bi, hobi kâu e ka hwâdâ thö, m' öbun e he ka labageju a inya e. 20 E hnathu, e hnathu, inya oge me ha köbun, ka habe, Haba at ame kap at oge kunâ, me e ame köp nya minya ; ke haba at ame köp nya, me e ame kap minya at a kunö nya.

21 Ke a hia but Iesu ha e, e ame hmak hnyekon, me thumetu me ha, ka habe, E hnathu, hnathu, oge me ha köbun ame he ke at gabun ka alecuo nya. 22 Haba laten ödrin e ibweleköu, me úcteköüâ hnen hna ha gan. 23 Ke wale ke aten ame laba hnyi úlai Iesu, ame hnyok kâu Iesu. 24 Haba Simona Peteru ame atmemákâ e, me ha kâu, ka habe, Ha thö at e ame ha. 25 Me e ame hwiö hnyi úlai Iesu me ha kâu, ka habe, Than lö, ia? 26 Me Iesu ame thu, ka habe, Haba at oge me he ka ham újeú kâu iny ka hia but hneú. Ke a hia but hneú, e ame hom me ham kö Juda nöku Simona Isakariota. 27 Ke hwaban dö ujeú, ame didrö Satana eú hnyi hnyekon. Haba Iesu ame ha kâu, ka habe, Haba únyi u me he ka ányâ, me ányâ mweimweia thö. 28 K' ame ca wâhmakhmeto ke at gadrin ödrin e laba hnyi laulau ge can e ame ha hofuc eling kâu. 29 Haba keihen ödrin e únyküme anyin a e unyi Juda tang, me ame ha kâu Iesu, ka habe, Úco thö únyi ae úcú ötin ka hnyi bijeú ; k' ame ne ha la, he ka ha omjehen ta je theduoc. 30 A hia but kap ujeú e ame ie didrut : ka lit ut.

31 E ame didrut, k' ame ha Iesu, ka habe, Adre me oganá walang ang Nokon at, ke adre me oganá Khong únyi gan ; 32 ke ame he Khong ka oganá e a ka únyi gan, k' ame he ka ie oganá e. 33 Lakuk lö, e ca beú biju úök unyibun. Öbun e he ka elöm nya : ke haba hnök hna ha ka at Juda, me oge me ha minya walang ang köbun, ka habe, E ca kxan' öbun he ka he ka hnyi dok oge me he ka hnyin. 34 Inya oge me ham köbun hnanyibu a teb únyi, a öbun e he ka ibetengiököu ; oge hia but

betenge köbun, e so öbun e he ka helâe wale he ka ibetengiökôu öbun. 35 Wale me me he tavat hia thithô ka wâhmakhmetôa a latök öbun, hnyi hnöbun hna ibetengiökôu.

36 Haba Simona Peteru ame ha kâu, ka habe, Taböny Than, u me he kâ? Iesu ame thu, ka habe, E ca, khanö u walang ang he ka he hotuk ka hnyi dok oge me he ka hnyin; ke u me he ka he hotuk nyiele. 37 Haingö Peteru kâu, ka habe, Than lö, anyin a ieu ae ca khanö nya he ka he hotom walang ang? oge me he bi ka ham anyik möt hnân hobi köu. 38 Iesu ame thu, ka habe, Hawa u me he ka ham ânyâm möt hobi könya? E hnathu, e hnathu, inya oge me ha köu, ka habe, Ame tîga ca he bi ka kokok khoto, me u me he bi ka ibi okun ivinö nya.

HNYIMAKAN 14.

CA hlohlo je hnyekubun : öbun e labageju ka Khong, labageju minya ju könya. 2 E se hia ta je hnyeule hnyi uma umö Cica; a ne ba m' oge hia but ha köbun; anyin oge me he but he ka ânyâwia hnöbun. 3 Ke oge ne he but ka ânyâwia ke dok hobi köbun, oge me he ka o hmetu, me oge me he ka köp öbun könya; me haba dok oge me laba hnyin, m' öbun e he ka laba hnyin minya. 4 Ke haba dok oge me he ka hnyin, e khan' öbun deny. 5 Haingö Toma, kâu, ka habe, Taböny Than, e ca khan' öhmun dok u me he ka hnyin; ke öhmun a kâmâu ka khân' öhmun deny? 6 Iesu ame ha kâu, ka habe, Inya ang gethen, me hnathu, me möt: e ba at ame he ka he kö Cica, e ka ca mē bân ka o könya. 7 Öbun e ne wâhmakhmetu nya, m' öbun e wâhmakhmetu Cica minya: ke hwân dö ang öbun e wâhmakhmetôa e, me öbun e hia but wâ e. 8 Haingö Filipino kâu, ka habe, Taböny Than, omanená thö köhmun Kamen, me me soju köhmun. 9 Iesu ame ha kâu, ka habe, E kuek ut unyibun, ke ca khanö u bala inya Filipino? haba at ame ö nya, me e ame wâ minya Kamen; ke a hawa, u me ha, ka habe, Omanená thö köhmun Kamen? 10 Hawa, u me ca únykúme bi a inya eü hnyi hnyin Kamen, ke Kamen eü hnyi hnyik? haba ta je hofuc wale oge me ha köbun, me o ge me ca ha thîju a ka únyi gak: ke haba Kamen at ame laba eü hnyik e ame ânyâ anyin ta je huliwa. 11 Labageju nya ju a inya eü

hnyi hnyin Kamen, ke Kamen eü hnyi hnyik: a ne ca kap e, labageju nya ju can ta je huliwa. 12 E hnathu, e hnathu, inya oge me ha köbun, Haba at ame labageju könya, me e ame he ka ânyâ minya ta je huliwa oge mâdrâ; ke ame he ka ânyâ ta je huliwa aegan hon e; anyin a inya oge me he ka Kamen. 13 Ke haba ta je únyi hia thithô öbun e he ka sumâtâ hnyi iök, me oge me he ka ânyâ me me he ka ogânâ Kamen hnen Nokon. 14 Öbun e ne he ka sumâtâ ke únyi hnyi iök, oge me he bi nya ka ânyâ. 15 Öbun e ne hnyok könya, öbun e he ka vheno anyik ta je hnanyibu. 16 Ke oge me he ka khöü ka Kamen, me me he ka ham köbun ke Úhadruo, me me he ka tha e m bun nyiele balua, 17 wale Hanu únyi gan hnathu: ae ca khana bi hmeledrany he ka kap e; anyin adre me ca wâ e, k' adre me ca wâhmakhmetôa e: ke öbun e wâhmakhmetôa e; anyin a e ame laba unyibun, k' ame he ka laba eü hnyi je hnyekubun. 18 Oge me ca he ka hn' öbun helâ me je nakahme; ke oge me he ka o köbun. 19 E okhulit biju úen me ame ca he hmeledrany ka ö nya; ke öbun e he ka ö nya: anyin a oge me möt, me öbun e he minya ka möt. 20 Öbun e he ka wâ hnyi bong eling a inya eü hnyi hnyi Cica, ke öbun eü hnyi hnyik, ke inya eü hnyi hnyibun. 21 Haba at ae hu gan anyik je hnanyibu, k' ame vheno e, me wale bi e at ame hnyok könya: haba at ame hnyok könya, me ame he Cica ka hnyok kâu, ke oge me he bi nya ka hnyok kâu, ke oge me he minya ka omanenö nya kâu. 22 Me ame ha kâu Juda (ca Isakariota) ka habe, Than lö, Ama kâmâu a u me he ka omanenö u köhmun bi ke ca ka hnyi hmeledrany minya? 23 Iesu ame thu kâu, ka habe, A ne ke at ame hnyok könya, e ame he ka vheno hok hofuc: ke ame he Cica ka hnyok kâu, ke öhmü me he ka o kâu me tha laba mē. 24 Haba at ame ca hnyok könya, me e ame ca vheno bi hok hofuc: ke haba hofuc öbun e löng, me ca únyi bi gak, ke únyi bi ge Kamen at a kunö nya.

25 Oge hia but ha ta je únyi e köbun, k' oge me tîga tha laba möbun. 26 Ke haba Úhadruo, wale Hanu Kap ame he Kamen ka kunâ hnyi iök, me e ame he ka n' öbun ge ta je únyi hia, me oúnykúmi öbun geta je únyi hia oge hia but ha köbun. 27 Oge me ip hnahic unyibun; oge me ham köbun anyik hnahic: oge me ca ham köbun helâ me hna ham hnen hmeledrany.

Ca hlohlo je hnyekubun, ke ca ot bi. 28 Öbun e hia but löng hnök hna ha köbun, ka habe, Oge me he but, ke oge me he ka hmetu köbun. Öbun e ne hnyok könya, öbun e he ka senyin anyin oge me he ka Kamen : anyin ae gan hmâ Kamen huk. 29 Ke oge me ha köbun walang ang, ke tiga ca hwädâ, me öbun e he ka labageju e ka hwädâ thö. 30 Oge me ca he hmetu ka ose hia fuc köbun, anyin ame he jem tuhan eang hmeledrany : 31 ke ba anyin ünyi ünyi gak : ke so bi me me wâ thö hmeledrany a inya oge me hnyok ka Kamen, ke oge me mâdrâ helâ me hnen Kamen hna hûna könya. Todró, ötin e he thö eang.

HNYIMAKAN 15.

INYA eang vine ae hnathu, ke Kamök at ame belökâ. 2 E ame hom but ta je vheiny gak ame ca wa : ke haba ta je vheiny ae wa, e ame änyâwia, me me wa gan dut. 3 Öbun e kalaöt ut hnyi bong ang ge hofuc oge hia but ha köbun. 4 Laba ju öbun eü hnyi hnyik, ke inya minya eü hnyi hnyibun. E ca khana vheiny he ka wa thibut, a ne ca tot hnyi vine ; ke helâe e ca khan' öbun, öbun e ne ca laba eü hnyi hnyik. 5 Inya ang vine, öbun ta je vheiny : Haba at ame he ka laba eü hnyi hnyik, inya minya eü hnyi hnyin, wale at ame wa gan dut : anyin ae ca khan' öbun ka änyâ ke ünyi öbun e ne üsâkâtü mönya. 6 A ne ca laba ke at eü hnyi hnyik, adre me he ka degec ut helâ me vheiny, me ame he ka meleca thö ; ke adre me úkhacaköuâ thö, me khúâ ka hnyi meic, me adre me thong degecâ but. 7 Öbun e ne laba eü hnyi hnyik, ke hok ta je hofuc ame laba minya hnyi je hnyekubun, öbun e he ka sumâtâ ünyi öbun e weny, me adre me he ka änyâ hobi köbun. 8 Hnân ogânö Cica, öbun ka he ka wa gan hmâ ; ke helâe öbun e he ka bi latök. 9 Inya oge me hnyok köbun helâ me Kamen ame hnyok könya : tet hmâ ju öbun hnyi anyik ibetengiö. 10 Öbun e ne vheno anyik ta je hnanyibu, öbun e he ka tet hmâ hnyi anyik ibetengiö ; helâ me inya oge me vheno hnanyibu anyi Cica me oge me tet hmâ hnyi anyin ibetengiö. 11 Oge hia but ha köbun ta je ünyi e, me me eü hnyi je hnyekubun anyik senyin, me me bekhöt dö anyibun senyin. 12 Walang anyik hnanyibu, ka habe, Öbun e he ka

ibetengiököu helâ me hnök hna betenge köbun. 13 A ne he ke at ka ham anyin möt hobi kâu lahanen, e ba betenge ae beönuâ hon e. 14 Öbun e ne he ka änyâ ta je ünyi oge hûna köbun, je lahanök öbun. 15 Oge me ca ha hmetu, ka habe, lathnyaba ; anyin ae ca khana athnyata ünyi a änyâ tuhan : ke oge me hai öbun a lahanök ; anyin a haba ta je ünyi hia oge me löng ünyi ga Cica, m' oge hia but omanená köbun. 16 Öbun e ca ücö nya, ke oge me üc' öbun, me otill' öbun, m' öbun e he ka he me wa, me tet hmâ ju wan gabun : me me he Kamen ka ham köbun ta je ünyi hia öbun e he ka sumâtâ hnyi iök. 17 Oge me hûna köbun ta je ünyi e, m' öbun e he ka ibetengiököu. 18 A ne hûkötî' öbun hmeledrany, khan' öbun ju a ga bán ka hûkötîo nya. 19 Öbun e ne je lahanen hmeledrany, ame he hmeledrany ka betenge ka lahanen : ke anyin a öbun ca lahanen hmeledrany, ke oge me üc' öbun ünyi eang hmeledrany, waleling me me hûkötî' öbun hmeledrany. 20 Ünykûme ju hofuc oge me ha köbun, ka habe, E ca gan athnyaba hon tuhan. Adre ne hia but oveci nya, adre me he bi ka oveci öbun ; ke adre ne hia but vheno hok hofuc, adre me he bi ka vheno hobun hofuc. 21 Ke adre me he ka änyâ ta je ünyi hia eling köbun can iök, anyin a ca khan' ödra at a kunö nya. 22 Oge ne ca o ehac he ka thumetu ödra, ame ne ba anyidra monu : ke walang ang e ba ünyi hnân haisoâ anyidra monu. 23 Haba at ame hûkötîo nya, me e ame hûkötîo Cica minya. 24 Oge ne ca mâdrâ anyidra ta je huliwa ae tiga ca mâdrâ ge at, ame ne ba anyidra monu : ke walang ang adre hia but wâ me hûkötîo Cica me inya minya. 25 Waleling me me hwädâ but hna sihnalimen hnyi anyidra hnanyibu, ka habe, Adre hia but hûkötîo nya ke ba can. 26 Ke e ka o Úhadruo wale oge me he ka kunâ köbun ünyi ge Kamen, wale Hanon hnathu, at ame he but ünyi ge Kamen, me e ame he ka ohnathu nya : 27 ke öbun minya öbun e ohnatho, anyin a öbun e laba anyik ünyi hnyi can.

HNYIMAKAN 16.

OGE hia but ha ta je hofuc e köbun, m' adre me ca he ka ohaü' öbun. 2 Adre me he ka ob' öbun ünyi hnyi ta je sunago : eke, ame he ka o üen, a g' ame he

at ka hling' öbun, me únykúme a e ame bi
aten Khong. 3 Ke adre me he ka ányá ta
je únyi e anyin ae ca khan' ödra inya me
Kamen. 4 Ke oge hia but ha ta je hofuc e
köbun hobi káu e ka o but úen, öbun e he
ka únykúme hnök hna ha ta je únyi e
köbun. Ke oge me ca ha köbun ta je
únyi e únyi hnyi can, anyin a tha inya
möbun. 5 Ke walang ang inya oge me
he but káu at a kunö nya; ke ba ke at
gabun a hnei nya, ka habe, U me he ká?
6 Ke unöngötö je hnyekubun ge hlöuhlöu
hnyi hnök hna ha ta je únyi e köbun. 7
Ke so bi, inya oge me ha köbun hnathu, ka
habe, E so hnân hobi köbun iny ka he but;
anyin a oge ne ca ha, me ame ca he ka o
köbun Úhadruo; ke oge ne he but me oge
me he ka kuná e köbun. 8 Ke haba e, e
ka o but, e ame he ka ohmáká hmeledrany
ge hwakecin ae kong, me hwakecin ae wisa,
me hna owisa: 9 ge hwakecin ae kong,
anyin adre me ca labageju bi könya; 10 ge
hwakecin ae wisa anyin a inya oge me he
but ka Kamen, ke öbun e ca he hmetu
ka ö nya; 11 ge hna owisa anyin adre hia
but owisa tuhan eang hmeledrany. 12 E
hu bala gak ta je hofuc ae se hia he ka ha
köbun, ke ca khan' öbun he ka kap walang
ang. 13 Ke so bi e ka o but e, wale Ha-
non hnathu, me e ame he ka su öbun ka
hnyi ta je hnathu hia: anyin a e ame ca
he ka ha únyi gan bi; ke e ame he ka ha
ta je únyi e ame löng: ke e ame he ka
omanená köbun ta je únyi ame he ka o.
14 E ame he ka oganö nya: anyin a e ame
he ka hom but únyi gak me omanená
köbun. 15 Anyik ta je únyi hia anyin
Kamen: anyin a wale oge me ha a e ame
he ka hom but gak, me omanená köbun.
16 E me okhaca, me öbun e ca he hmetu
ka ö nya; ke me okhaca hmetu, me öbun e
he ka ö nya. 17 Me ame úhaköuá keihen
laten, ka habe, Ieú ang ge hnen hna ha
kötin, ka habe, Me okhaca, me öbun e ca
he but ka ö nya; ke me okhaca hmetu, me
öbun e he ka ö nya: me, Anyin a inya oge
me he but ka Kamen? 18 Me adre me ha,
ka habe, Ieú ang a hnen hna ha, ka habe,
Me okhaca? E ca khan' ötin hnen hna ha.
19 A wá but Iesu a ödrin e behnö e, me
e ame ha ködrin, ka habe, Hawa, öbun e
úhnököuá hnök hna ha köbun, Me okhaca,
me öbun e ca he hmetu ka ö nya, ke, me
okhaca hmetu me öbun e he ka ö nya? 20
E hnathu, e hnathu, inya oge me ha köbun,
ka habe, öbun e he ka tenge me tenge

thungaú, k' ame he hmeledrany ka senyin:
öbun e he ka hlöuhlöu, k' adre me he ka
wia anyibun hlöuhlöu me me senyin bi.
21 E ka vec dö hnyekon momo a erkin,
me e ame hlöuhlöu anyin a o but úen: ke
e ka o but wanakat me e ame ca únykúme
hmetu anyin vec, anyin ame senyin a ga
hnokoá ke at ka hnyi hmeledrany. 22 E
hu gabun walang ang hlöuhlöu: ke oge me
he hmetu ka iouny m' öbun, me ame he je
hnyekubun ka senyin, ke ba at ame he ka
ohia anyibun senyin. 23 Ke ba únyi öbun
e he ka hnö gak hnyi bong eling. E
hnathu, e hnathu, inya oge me ha köbun.
Haba ta je únyi hia öbun e he ka sumátá
ge Kamen, me e ame he ka ham köbun
únyi hnyi iök. 24 E tiga ba únyi öbun e
hnyi sumátá hnyi iök: sumátá thö, m'
öbun e he ka kap bi, me me bekhöt ut
anyibun senyin.

25 Oge hia but ha ta je hofuc e hnyi
úhöúcé: ke ame he ka o úen oge me ca he
hmetu ka fuc köbun hnyi úhöúcé, ke oge
me he ka ha manená köbun ge Kamen.
26 Hnyi bong eling öbun e he ka sumátá
hnyi iök: ke oge me ca ha köbun a oge me
he ka hic ka Kamen hnân hobi köbun;
27 anyin a Kamen ame betenge gabun,
can öbun e hnyok könya, ke can öbun e
kap a oge me o únyi ge Kamen. 28 Oge
me he but úhek unyin Kamen, me o eang
hmeledrany; ke oge me he hmetu ka hna
hmeledrany me he ka Kamen. 29 Hain-
gen laten, ka habe, Wá bi, u me ha manená
walang ang, ke u me ca ha hmetu je
úhöúcé. 30 E khan' öhmun dut walang
ang a u me wá ta je únyi hia, ke ca únyi
hnathu e ka he ke at ka hnei u: anyin a
wale öhmun e únykúme a u me o únyi ge
Khong. 31 Iesu ame thu ködrin, ka habe.
Öbun e labageju but walang ang? 32 Wá
bi, e hakekeny jut úen, ke e but ang, m'
adre me he ka ovesei öbun ka hnyi je hnya-
babun, ka hake inya thiju: ke ca hake
inya bi, anyin a tha inya me Kamen. 33
Oge hia but ha köbun ta je hofuc e me me
hu gabun hnahic únyi gak. Haba hnyi
hmeledrany, adre me he ka oveci öbun:
ke hwege th' öbun anyin o ge hia but hcm
dökhu hon hmeledrany.

HNYIMAKAN 17.

IESU ame ha ta je únyi e; ke e ame
I bwele hnyi drany ai me ha, ka habe,
Cica lö, a o but úen; ogáná thö Nokom,

me me oganö u minya bi Nokom : 2 waleling u je hna e he ka musö tavat hia, me me he ka ham möt ame ca ba balua ködra hia u je ham kâu. 3 Ke walang möt ame ca ba balua, a g' adre me he ka wâhmakhmetu u Khong hnathu a khaca thibi, me at u je kunö, wale Iesu Keriso. 4 Oge me oganö u eang hmeledrany, ke oge hia but umo huliwa u je kunö nya he ka ânyâ. 5 Ke walang ang, Cica lö, oganö nya thö tha inya möu ge hmanenangitu kâu adrem ke tiga hia bi hmeledrany. 6 Oge hia but omanená iâm ka tavat u je hna kõnya únyi eang hmeledrany : ânyâm ödrin ke u je hn' ödrin kõnya ; ke ödrin e vheno but hwâm hofuc. 7 Walang ang, e khan' ödrin but a únyi gam ta je únyi hia thithö, u je ham kõnya : 8 anyin oge ham ködrin ta je hofuc u je ham kõnya ; ke ödrin e hia but kap, ke e khan' ödrin wia but a oge o but únyi gam, ke ödrin e labagejon hnâm hna kunö nya. 9 Inya oge me hic hobi ködrin : oge ca hic hobi kâu hmeledrany, ke hobi ködrin bi u je ham kõnya ; anyin a ânyâm ödrin : 10 ânyâm, anyik ta je únyi hia, ke anyik, ânyâm ta je únyi ; ke ödrin e oganö nya. 11 Ke oge me ca he hmetu ka laba eang hmeledrany, ke ödrin e he biju ka laba eang hmeledrany, ke inya oge me he but köu. Kamök ae kap lö, tu' ödrin ju hnyi iâm waleji u je ham kõnya, m' ödrin e khaca thibi helâ me ötu. 12 Oge tu' ödrin hnyi iâm, waleji ke tiga inya unyidrin, hnyat u je ham kõnya : ke oge tu' ödrin me ba ke at gadrin ae hia, ke aten thi ju hnaúhangö ; me me hwâdá hna sihalimen. 13 Ke walang ang inya oge me he ka he but köu ; ke inya oge me ha ta je únyi e eang hmeledrany, me me he ka hwâdá anyik senyin eú hnyi je hnyekudrin. 14 Oge hia hut ham ködrin hwâm hofuc ; ke ame huköti ödrin ge hmeledrany, anyin a ödrin ca aten hmeledrany, helâ me inya a ca aten bi hmeledrany. 15 Oge me ca sumató u a u me he ka hum ödrin únyi eang hmeledrany, ke so bi he ka tu' ödrin hnyi hulö. 16 Ödrin ca aten hmeledrany, ke helâ me inya ca atcn hmeledrany. 17 Okabi ödrin ju ge hnathu gam : he haba hnathu, me hwâm hofuc. 18 U je kunö nya ka hnyi hmeledrany, helâe minya oge me kun ödrin ka hnyi hmeledrany. 19 Oge me ka okabi nya hobi ködrin, m' ödrin e kap bi ödrin hnyi hnathu. 20 Ke oge me ca hic hnân hobi ködrin thibi, ke hobi ködra minya tavat

adre me labageju kõnya únyi ge hodrin ta je hofuc ; 21 m' adre me he bi hia thithö ka khaca thibi ; helâ me u Cica eú hnyi hnyik, ke inya minya bi eú hnyi hnyâm, me me tha ödra m' ötu : me me labageju hmeledrany a u je kunö nya. 22 Ke haba hmanenang u je hia but ham kõnya, oge hia but ham ködra ; m' adre me he bi ka khaca thibi, helâ me ötu a ötu khaca thibi ; 23 inya eú hnyi hnyidra, ke u eú hnyi hnyik, me adre me he ka khaca thibi hmönyin bi : me me he hmeledrany ka wâhmakhmetoâ a u je kunö nya, me u je hnyok ködra, helâji me hnâm hna hnyok kõnya. 24 Cica lö, haba wek, a g' me he ka tha ödra mõnya bi hnyi hnök, tavat u je hia but ham kõnya ; m' adre me he bi ka wâ anyik hmanenang, waleji u je hna kõnya ; anyin a u je hnyok kõnya kâu adrem k' adre tiga ca bi taben hmeledrany. 25 Kamen ae wisa lö, e ca khana hmeledrany u, ke haba inya, me khañö nya u ; ke haba hnyat ang, me khan' ödrin a u je kunö nya ; 26 ke oge me omanená ködrin iâm, k' oge me he minya bi ka omanená e ; me me laba eú hnyi je hnyekudrin ibetengiö waleji a hnâm hna betenge gak, ke inya eú hnyi je hnyekudra.

: HNYIMAKAN 18.

A HIA but Iesu ha ta je hofuc e, me e ame he hanyâúú wagewe Kederon tha e me laten, eling ke ong utkânâ, me e ame o ka hnyin me laten. 2 Ke e khañö Juda dok eling, at ame alecuâ e : anyin ame labö o eling Iesu me laten. 3 Ke haba Juda a hia but kap je soja me tavat tue únyi ge je taben tavat bihut me ta je Faresaio, adre me o eling me ta je lamepa me ta je okûnú me ta je únyi hnân vat. 4 Ke e khañö Iesu ta je únyi hia ame he ka o kâu, e ame he but, me ha ködra, ka habe, Ia öbun e elâm ? 5 Adre me thu kâu, ka habe, Iesu at Nazareta. Iesu ame ha ködra, ka habe, Inya ang. Ke haba Juda at ame alecuâ e, ame tha tot mödra. 6 Ke a hia but ha ködra, ka habe, Inya ang, me adre me kec nulötudra me ta ju eú hnyi kânâ. 7 Me e ame hnei ödra hmetu, ka habe, Ia öbun e elâm ? Ke adre me ha, ka habe, Iesu at Nazareta. 8 Iesu ame thu, ka habe, Oge hia but ha köbun, ka habe, Inya ang : öbun e ne elöm nya, hna but tavat ang, m' adre me he but : 9 me me hwâdá hofuc e ame ha, ka habe,

E ca hia ke at gadra u je ham kõnya. 10 Ke hu hele vat anyi Simona Peteru, me e ame oc dö, me kot athnyabainy taben tavat bihut, me ame subâ but hnyikõnyen a metâ. Maliko ien athnyaba. 11 Haba Iesu ame ha kö Peteru, ka habe, Inâ hmetu ju hele vat ka hnyi umen : hawa, oge me ca he ka ijem kaia a ham kõnya Cica?

12 Me adre me köt Iesu me ca thö e hnen ta je soja me taben vat, me je taben tavat tue at Juda, 13 me lelö thö e a bân kö Ana; anyin a e ûngû Kaiafa taben tavat bihut hnyi huna eling. 14 Ke Kaiafa at ame ha ka at Juda, ka habe, E ûnyi hnathu he ka mok at a khaca hnân hwaban hnyei.

15 Haba Simona Peteru ame he hotu Iesu, me ke aten minya. Ke ame wâhmak-hmetoâ aten eling hnen taben tavat bihut, me e ame dit minya me Iesu ka hnyi hnyeuleny uma umen taben tavat bihut; 16 ke haba Peteru ame tot eû hnyi hwanuma. Ke ame dit hmetu but aten eling, waleji ame wâhmak-hmeto hnen taben tavat bihut me ha ka momo at ame tuö hwanuma he ka hum Peteru ka hnyin uma. 17 Me ame ha momo, at ame tuö hwanuma kö Peteru, ka habe, Hawa, u hanen laten at ang? Haingen, ka habe, Ca munyi inya. 18 Ke ame úttilen eling lathnyaba me tavat tue, k' adre me hû ke meic alep, anyin a ödra megic, me adre me hlök : k' ame tha tot Peteru mödrin, ame munyi hlök.

19 Haba taben tavat bihut ame hnei Iesu ge laten, me hnen minya hna ûne. 20 Haba Iesu ame thu kâu, ka habe, Oge hia but ha manenâ ka hmeledrany; oge me labö ûne hnyin je sunago, me hnyin uma kap, wale ame labö ûkhacaköu hnyin at Juda; ke ba hofuc oge me ha duöngâ. 21 Ieû gam u me hnei nya? hnei ödra bi tavat adre me löng hnök hna ha ködra : wâ bi e khan' ödra but hnök hna ha. 22 Ke a hia but ha e, me ame khaû e hnen ke at tue, at ame tot hakekenyâ, haingen, ka habe, U me thu helâe ka taben tavat bihut? 23 Haingö Iesu, ka habe, A ne kong hnök hna ha, omanenâ thö monu : ke a ne so, ieû gam u me kuc nya? 24 Ke haba Ana ame ca e me kunâ kö Kaiafa taben tavat bihut.

25 Ke haba Simona Peteru ame tot, k' ame hlök. Me adre me ha kau, ka habe, U ke aten minya? E ame ivinö me ha, ka habe, Ca inya. 26 Ke ame ha ke at hanen

athnyabainy taben tavat bihut, a liame-keiny me at eji a subâ Peteru hnyikõnyen, ka habe, Oge me ca ö u mē hnyi oug utkânâ? 27 Haba Peteru ame ivinö hmetu : ke ame ie kokok dö khoto.

28 Ke ödrin e lili Iesu thö ûheny unyi Kaiafa ka hnyi uma umen than : ka hnyo-makatu but; ke adre me ca hnyi dit ka hnyi uma umen than, wâ adre nye bo kong he ka hnyi an paseka. 29 Haba Pilato ame didrut ködra, me ha, ka habe, Ieû monu anyin at ang öbun e he ka ha? 30 Me adre me thu kâu, ka habe, A ne ba monu anyin at ang, öhmun e ca he ka hna köu. 31 Haingö Pilato ame ha ködra, ka habe, Hom d' öbun me hnö helâ me anyibun hnanyibu. Haingen kâu at Juda, ka habe, E ca úcû köhmun he ka hlingâ at : 32 me me hwâdâ hofuc ho Iesu a ha, ame omanenâ bongon imekiny bi.

33 Anyin a wale Pilato ame dit hmetu thö ka hnyi uma umen than, me hawo Iesu, me ha kâu, ka habe, Hawa u Tuhan at Juda? 34 Iesu ame thu, ka habe, u me ha e ka ûnyi gam, ke hawa, e hu at a haiö nya köu. 35 Pilato ame thu, ka habe, Iny at Juda? Hnen aten em hnyei me je taben tavat bihut hna hnö u kõnya : ieû u je mädrâ? 36 Iesu ame thu, ka habe, Ca ûnyi eang hmeledrany dökhuk dökhuk : a ne ûnyi eang hmeledrany dökhuk dökhuk, ame ne he lathnyabaik ka vat, m' adre me ca he ka hnö nya ka at Juda : ke walang ang ca ûnyi ang dökhuk dökhuk. 37 Me Pilato ame ha kâu, ka habe, Hawa gam, u than? Iesu ame ha, ka habe, U me ha e, a iny than. Adre hnöku nya hobi kâu e, ke oge o but eang hmeledrany hobi kâu e, me inye he ka ohnathoâ hnathu. Haba ta je aten hnathu hia, adre me löng ifucik. 38 Pilato ame ha kâu, ka habe, Ieû hnathu?

A hia but ha e, e ame dit hmetu but ka at Juda me ha ködra, ka habe, Oge me ca wâ thö ke monu gan. 39 Ke hwakecibun, oge me thang köbun ke at hnyi paseka : hawa, e webun oge me he ka thang ut köbun Tuhan at Juda? 40 Ödra adre me ha hwegiâ hmetu, ka habe, Ca e bi, ke so bi Barabasa. Ke haba Barabasa, me at venöu.

HNYIMAKAN 19.

ME haba Pilato ame hum Iesu thö me osöâ e. 2 Haba ta je soja adre me hwâwâ je tö ae údedö me hnân korona,

me obicâ kâu, me okhaû e ge ûkhaû ae udrudrâ hlit; 3 me adre me he thö kâu me ha, ka habe, Talofa Tuhan at Juda! me adre me khaû e. 4 Haba Pilato ame dit hmetu but, me ha ködra, ka habe, Wâ bi oge ma odilâ but e köbun, me me manen köbun a oge me ca wâ thö ke monu gan. 5 Ame dit minya but Iesu ame bicâ korona ae údedö me khavâ ûkhaû ae udrudrâ lit. Haba Pilato ame ha ködra, ka habe, Wâ bi at! 6 Ke a wâ but e hnen je taben tavat bihut me tavat tue, me adre me ha hwegiâ, ka habe, Osatauroâ thö, osatauroâ thö. Haingö Pilato ködra, ka habe, Hom bi th' öbun me osatauroâ: anyin oge me ca wâ ke monu gan. 7 Ame thu kâu at Juda, ka habe, E hu anyihmun hnanyibu, ke úcú kâu he ka mok hnyi hnanyibu eling, anyin a e ame ka háiâ e me Nokon Khong. 8 Ke a löng ut Pilato hofuc e, me e ame ot gan hmâ; 9 me e ame dit hmetu thö ka hnyi uma umen than, me ha kö Iesu, ka habe, Ühem ua? Ke haba Iesu ame ca thu kâu. 10 Haba Pilato ame ha kâu, ka habe, U me ca thu thö könya? e ca khanö u ae hu anyik musi he ka hnö u, ke hu anyik musi minya he ka osatauroi u? 11 Iesu ame thu kâu, ka habe, Adre ne ca ham köu únyi ethö me ba ányâm musi huk: waling me me gan hulö anyin at a ham nya köu. 12 A hwân ang Pilato ka heleû deny he ka thang ut e: ke haba at Juda adre me hongot, ka habe, U je ne he ka thang ut at ang m' u ca hanö Kaisara but; anyin a haba at ame wia e me me than, me e ame tot úcú Kaisara. 13 A löng ut Pilato hofuc eling me e ame hum Iesu but hnyöu ai, me e ame laba hnyi taben owisa hnyi dok, ien, ka habe, Adre ave ge veto, ke haba hnyi hwen Heberu me, Gabatha. 14 Haba bong eling me bong Penapena paseka: ame ne awa a siksiny. Me e ame ha ka at Juda, ka habe, Wâ bi Tuhöbun! 15 Me adre me ha hwegiâ, ka habe, Hom dö, hom dö, osatauroâ thö. Haingö Pilato ködra, ka habe, Hawa, oge ma he ka osatauroâ Tuhöbun? Me ame thu je taben tavat bihut, ka habe, E ba minya ju ke tuhöhmun ke hake Kaisara thibi. 16 Me e ame hna but e ködra m' adre me he ka osatauroâ.

17 Me adre me hum Iesu thö: me e ame didrut ka vaden satauro hobi kâu, ka hnyi dok, ien, Iny ibokomok, ke haba hnyi hwen Heberu, me Gologotha: 18 me adre me osatauroâ e eling tha e me li at a lo hnyi

li ke keihen, ke Iesu eú hnyi wanben. 19 Ke haba Pilato ame set tusi me ip hon satauro. Ke walang hna sihnalimen, ka habe, IESU AT NAZARETA, TUHAN AT JUDA. 20 E se hia at Juda adre me aú tusi e: anyin ae hakekeny ka hnyi taun dok adre me osatauroi Iesu hnyin: k' adre me sihnalimen hnyi hwen Heberu, me Roma, me Heleni. 21 Me haingen ta je taben tavat bihut a hnyat Juda kö Pilato, ka habe, Ca sihnalimen, Tuhan at Juda; ke so bi a g' ame ha, ka habe, Inya ang Tuhan at Juda. 22 Haingö Pilato, ka habe, Haba hnök hna sihnalimen, me oge hia but sihnalimen.

23 Ke adre hia but osatauroi Iesu, me ame hom anyin je ûkhaû hnen je soja me khenâ vâkâ ka ouco je soja; helâe minya úkot: haba úkot, me adre me ca tibet, ke adre me hwâwâ bekhötâ. 24 Me adre me úhnenamököuâ, ka habe, Ate me ca he bi ka kia, ke so bi he ka uglekóbâ, a hamö ia he ka hom: me me hwädâ hna sihnalimen, ka habe,

Adre me khenâ anyik je úkhaû unyidra, Ke adre me uglekóbâ anyik úkot.

Wale ta je únyi ame ányâ ta je soja. 25 Ke ame tot hakekenyâ satauro hinyö Iesu, me liamekeiny me hinyen, jia Maria öiö Kaleopa, me Maria Magadalena. 26 Ke a wâ Iesu hinyen, me ke aten e ame betenge kâu, ödru me tot hakekenyâ, me e ame ha ka hinyen, ka habe, Bai lö, wâ bi nokom! 27 Ke e ame ha minya ka aten, ka habe, Wâ bi, hinyâm! Ke hwân hnyi awa e, haba aten eling ame hom dö momo ka hnyi hnyaban.

28 Hwaban dö e, a wâ Iesu a ga um but ta je únyi hia, me e ame ha, ka habe, Oge me beic dö; me me hwädâ hna sihnalimen. 29 Ame mokut eling kaia ae unöngöt ge vinega: me adre me hulülülâ ohmanená hnyin vinega, me ip hnyi ke hnyiban hisop, me inâ ka hnyi hnyimen. 30 A hia but Iesu kap vinega, me e ame ha, ka habe, A um dö: me e ame khudrung ju, me hna but hanon.

31 Haba at Juda ödrin e sumató Piliato he ka kot hmetro je li cadrin, me hum ödrin bi, anyin a bong Penapena, me me ca he ka hnen je unyidrin hnyi satauro hnyi sabath (bong ae gan hmâ sabath eling). 32 Me ame he but je soja me thu li can ke at, helâe minya ke at adre me osatauroâ mê: 33 ke adre me o but kö Iesu me wâ e a moku, me ödrin e ca thu li can: 34 ke

haba ke soja ame dá vhaken ge ö, me ame ie hingölö but dra me köiö. 35 Ke ame ohnathoá hnen at ame wá, ke hnathu but hnen hna ohnatho : ke a wá but ae hnathu hnen hna ha, m' öbun e he minya ka labageju. 36 Adre me ányâ ta je únyi e me me hwádá hna sihnalimen, ka habe, Ame ca he ka hmetru ke jeien. 37 Ke haingen ke hna sihnalimen, ka habe, Adre me he ka wá at adre me dá.

38 Hwabán e, haba Josefa at Arimathea, wale ke ató Iesu, ke iyong bi anyin ae outen at Juda, haba at eling ame sumató Pilato he ka hom unyi Iesu : haba Pilato ame ham. Me e ame he but me hom unyin. 39 Ame o minya Nikodemo, at eji ame senâ hnyi hnyinghet, k' ame hom muro, me aloe adre úhaniken, heláke me wan haded je litara. 40 Me adre me hom unyi Iesu, me lan ge mano lino me je únyi ae bo so, helâ me hwakecin at Juda ödra ka he ka khön komok. 41 Eling ke ong utkânâ hnyi dok adre hia but osatauroá e hnyin ; ke wale hnyi ong utkânâ thop ae teb únyi a ödra tiga ca hip komok hnyin. 42 Me adre me ip Iesu eling, anyin a bong Penapena anyin at Juda, (anyin a e hakekeny thop).

HNYIMAKAN 20.

HNYI bong a bán hnyi seven ame he but Maria Magdalena hnyi hnyomakatu kong ka hnyi erkemok, k' ame wá veto adre me hom but únyi hnyi hnyimen erkemok. 2 Me e ame wadring me he kö Simona Peteru, me ke aten wale ame betenge gan Iesu, me ha ködrü, ka habe, Adre hia but hom Than únyi hnyi hnyin erkemok, ke ca khan' öhmun dok ödrin e ip e hnyin. 3 Haba Peteru me aten eling ödrü me didrut me he ka hnyi erkemok. 4 Ke ödrü me tha wadring, me ame khaletö Peteru hnen at eling, me bán ka o hnyi erkemok ; 5 me e ame nom me selâtá, k' ame wá je mano lino ame mokut ; k' ame ca didrö. 6 Ke ame o but Simona Peteru a he hoton, k' ame didrö ka hnyi erkemok ; me e ame wá je mano lino ame mokut, 7 me ecmano minya waleji adre me lan káu ban, ame ca tha mokut me je mano lino, ame ka hake mokut adre vhec. 8 Me ame didrö minya ke aten waleji a bán ka o hnyi erkemok, me e ame munyi wá me labagejon. 9 Anyin a ödrin e tiga ca wá únykúme bala hna sihnalimen, ka habe, E úcü káu

he ka möt hmetu úheny hnyi hna mok. 10 Haba li laten ödrü me hmetu but ka hnyi hnyabadrü.

11 Ke haba Maria ame tot eú hnyi erkemok ame tenge : ke ame tiga tenge me nom but me selâtá erkemok ; 12 me e ame wá li angela ödre khaú hau, ödrü me laba ke at hnyi hnen ban, ke ke at hnyi hnen li can, wale dok a mokut hnyin unyi Iesu. 13 Ke ödrü me ha káu, ka habe, Ke momo lö, ieú u me tenge gan ? E ame ha ködrü, ka habe, Anyin adre hia but hom Tuhök, ke ca khanö nya dok adre ip e hnyin. 14 A hia but ha e, me e ame hwiö thö me ö Iesu ame tot, ke ca khana bi me Iesu ling. 15 Iesu ame ha káu, ka habe, Ke momo lö, ieú u me tenge gan ? ia u me elâm ? E ame únykúme ame ne at ame tuö utkânâ, me e ame ha káu, ka habe, Than lö, u je ne hom e, mē ha thö könyu dok u je ip e hnyin, me inye he ka hom e. 16 Iesu ame ha káu, ka habe, Maria. E ame hwiö thö me ha káu, a hwen Heberu, ka habe, Raboni ; walang bongon, At úne. 17 Iesu ame ha káu, ka habe, Ca kalö nya bi ; anyin a iny tiga ca ölö ka Kamen : ke he thö ka je liamekeiny mönya, me ha ködrin, ka habe, Inya oge me he ka ölö ka Kamök a Kamöbun, ke Khonguk a Khongubun minya. 18 Haba Maria Magdalena ame he but me thumeto laten, ka habe, Oge wá ju Than ; me e ame ha ta je únyi e ame ha káu.

19 Hnyi sahacin bong eling, wale bong a bán hnyi seven, ke adre hlöng ut je hwanuma hnyi dok a laba hnyin laten, anyin a ödrin outen at Juda, me ame o thö Iesu me tot hnyi wanben, me ha ködrin, ka habe, Hnabic köbun. 20 Ke a hia but ha e, e ame omanená ködrin li hnyamen me vhaken. Haba laten ödrin e senyin ödrin e wá Than. 21 Me Iesu ame ha hmetu ködrin, ka habe, Hnabic köbun : inya oge me kun' öbun helâ me Kamen ame kunö nya. 22 Ke a hia but ha e, e ame menâ ködrin, me ha, ka habe. Kap ju Hanu Kap : 23 haba ta je hulö anyin tavat öbun e hna, me adre me thang gadra ; ke haba hnöbun hna ca thang, me ame ka hnen ju.

24 Ke haba Toma ke at hnyi twelv, Didumo ke ien, ame ca tha e mödrin hnyi úen a o hnyin Iesu. 25 Ke ame ha káu laten, ka habe, Öhmun e hia but wá Than. Ke e ame ha ködrin, ka habe, Oge ne ca mē wá thö deny fao hnyi li hnyamen, me

iná banyök ka hnyi hwaden li fao, me iná hnyamök ka hnyi vhaken, me oge me ca he bi nya ka labageju.

26 Ke hwaban je bong a eit, e hmetu thö laten hnyin uma, ke Toma unyidrin. Adre hia but hlöng je hwanuma, me ame o Iesu me tot hnyi wanbödrin, me ha, ka habe, Hnahic köbun. 27 Ke e ame ha kö Toma, ka habe, Hö jem banyâm me wâ bi ang li hnyamök; ke hö jem hnyamâm, me inâ ju ka hnyi vhakök: me ca lolo bi, ke labageju ju. 28 Haba Toma ame thu kâu, ka habe, Tuhök me Khonguk. 29 Iesu ame ha kâu, ka habe, U me labageju anyin a u je ö nya: hnahic hnen tavat adre me labageju, k' adre me ca munyi wâ.

30 E se hia ta je haten ame ânyâ Iesu hnyi hnyimakan laten, k' adre me ca sihnalimen hnyi tusi eang: 31 ke adre hia but sihnalimen ta je ûnyi e me öbun e he bi ka labagejon a Nokon Khong Iesu Keriso: ke ûnyi ge hnöbun hna labageju me ame he ka ha möt köbun ûnyi hnyi ien bi.

HNHYIMAKAN 21.

HWABAN ta je ûnyi e haba Iesu ame ka omanená e bi hmetu ka laten hnyi köien Tiberia; ke walang hwakecin hnen hna omanená e bi. 2 Ame ûkhaca-köu thö Simona Peteru, me Toma ke ien Didumo, me Nathaniela at Kana hnyi Galilaia, me li laku Zebedaio, me ke li aten minya. 3 Haingö Simona Peteru ködrin, ka habe, Oge me he but ka thut. Haingödrin kâu, ka habe, Öhmun a hnyi he. Ödrin e he but me ölö thö ka hnyi hu; ke ba hanidrin hnyi lit eling. 4 Ke hnyi okubelit ame tot Iesu hnyi hobatköio, ke ca khana laten me Iesu ling. 5 Iesu ame ha ködrin, ka habe, Lakuk lö, e hu hanibun? Me ödrin e thu kâu, ka habe, E ba. 6 Me haingen ködrin, ka habe, Thong ut ert hnyi ke keihen metân hu, m' öbun e ka wâ. Me ödrin e thong ut, ke walang ang, e ca khan' ödrin he ka lelö ert anyin ae se hia hmönyin ta je wâ. 7 Haba aten waleji ame hnyok kâu Iesu, ame ha kö Peteru, ka habe, Than e. Ke a löng ut Simona Peteru a Than e, me e ame khavâ anyin ûkot (anyin a ga uny), me e ame utut hnyiköio ai. 8 Ke e but ang keihen laten hon hu ae ûhnyükong (e ca sâkâû gadrin hobatköio, ame ne tu

haded je kubit) adre me lelö tilâ ert me ta je wâ. 9 Ke ödrin e o thö hot, ödrin e wâ meic alep, me je wâ hnyi hon, me areto. 10 Iesu ame ha ködrin, ka habe, Hö jem ke je wâ öbun e hom walang ang. 11 Me ame ölö thö Simona Peteru, me lelö ert hot ai, ae unöngöt ge ta je wâ ae gan a wan haded me fifte theri: ke a ca khekhe bi ert ge ta je wâ ae se hia. 12 Iesu ame ha ködrin, ka habe, Ai öbun ka han. Ke ba ke at ge laten ae hwege hnyekon he ka hnö e, ka habe, U ia? anyin ae khan' ödrin a wale Than. 13 Ame o Iesu, me hom areto, me je wâ, me ham ködrin. 14 Wale hnö Iesu hna okun omanená e bi ka laten, hwaban hnen hna möt hmetu ûheny hnyi hna mok.

15 Ke ödrin e hia but han haba Iesu ame ha kö Simona Peteru, ka habe, Simona nöku Jona, u me hnyok könya hon hnyat ang? Haingen kâu, ka habe, E, Than; u me wâ a inya oge me hnyok köu, E ame ha kâu, ka habe, Hân bi ju halek je arenio. 16 E ame olo ha kâu, ka habe, Simona nöku Jona, u me hnyok könya? Haingen kâu, ka habe, E Than u me wâ inya oge me hnyok köu. E ame ha kâu, ka habe, Tuö biju halek je mamoe. 17 E ame ibi okun ha kâu, ka habe, Simona nöku Jona, u me hnyok könya? Peteru ame hmak hnyekon anyin a e okun dut ha kâu, ka habe, U me hnyok könya? Me e ame ha kâu, ka habe, Than lö. u at ame wâ ta je ûnyi hia; u je wâ but a inya oge me hnyok köu. Iesu ame ha kâu, ka habe, Hân biju halek je mamoe. 18 E hnathu, e hnathu, inya oge me ha köu, ka habe, Hnyi ânyâm hidröu, u me ka hamâm bi oweikö u, me he ka hnyi dok u me wem; ke u ka hingat ut, u me he ka inâ li hnyamâm, k' ame he ke at ka oweikö u, me hum u ka hnyi dok u me ca wem. 19 E ame ha e, ame omanená bongon mok ame he ka moko me hnân ogânâ Khong. Ke a hia but ha e, e ame ha kâu, ka habe He hotuk. 20 Peteru ame hwiö thö me wâ aten ame hnyok kâu Iesu, ame he hoton, waleji at ame laba hnyi úlainy hnyi ûen han, me ha, ka habe, Taböny Than ie at ame he ka alecuö u? 21 Peteru ame wâ e, me e ame ha kö Iesu, ka habe, Than lö, ame he ka hawa at ang? 22 Iesu ame ha kâu, ka habe, Oge ne wek e ame he ka úlubahing ke ne o but oge me o, hnân eü köu? he bi u hotuk. 23 Me ame lung igigilö hofuc e unyin je liamekeiny, a g' ame ca he ka mok aten eling: ke a ca ha

Tesu kâu, a e ame ca he ka mok ; ke so bi, Oge ne wek e ame he ka ûlubahing, ke ne o but e ame o, hnân eû kôu? 24 Walang aten at ame ohnatho ta je ûnyi e me sihnalimen : ke e khan' ôta but ae hnathu.

25 Ke se hia hmönyin minya bi ta je ûnyi a mâdrâ Iesu, ke adre ne tha sihnalimen hia, oge me ûnykûme e ca ûcû bi hmeledrany ka ta je tusi adre me he ka sihnalimen.

TA JE HULIWA ANYIN TA JE

APOSETOLO.

HNyimakan 1.

THEOFILA lö, haba tusi oge me sihnalimen a bân, me ame ha ta je ûnyi hia ame ânyâ Iesu, ke hnen hna ûne, 2 ke ne o but bong adre me kap dö e hnyi drany ai, hwaban hnen hna hûna ka je aposetolo a deny Hanu Kap, wale hnyat e ame ûca : 3 ke e ame ka omanená e ködrin ae möt, hwaban anyin mok k' ame osehia ohnathoâ me labö o ködrin hnyi fâte je bong, k' ame ha bongon dökhu dokhon Khong : 4 ke hnyi ke ûen e ame tha laba mödrin me hûna ködrin a ödrin e ca he ka vese ûhedrin Jerusalema, ke ödrin e he bi ka halubahingen ûnyi ame ha bânâ Kamen, haingen, ka habe waleji öbun e löng ûnyi gak : 5 anyin a Ioane ame bapataiso ge köiö ; ke adre me he ka bapataiso öbun ge Hanu Kap hwaban ke je beng ae wakhalet.

6 Ke ödrin e hnö e hnyi ke bong ödrin e úkhacaköu hnyin, ka habe, Than lö, ûen dut ang u me he ka odokho hmetu at Isaraela? 7 Haingen ködrin, ka habe, E ca hanymöbun he ka wâ je bong me je huna ame ip ge Kamen k' ame musö bi. 8 E ka o but köbun Hanu Kap, me öbun e he ka tren man : m' öbun e he ka ohnathu nya hnyi Jerusalema, me Juda hia me Samaria ke ne o but hnyi je can hmeledrany. 9 E ame ha e, me adre me hom dö e hnyi drany ai, k' ödrin e wâ ; me ame kap e hnyi ûlá me me ca manen bi. 10 Ke ödrin e tiga ngele hnyi drany ai, k' ame tiga ölö thö, me wâ bi, li at

ödru me tot unyidrin, ödre khaú hau : 11 haingödru, ka habe, At Galilaia lö, ieu gabun öbun e ngele drany ai? ame he ka o hmetu Iesu at adre me hom unyibun hnyi drany ai, helâ me hnen hna ölö hnyi drany ai, k' öbun e wâ.

12 Ke ödrin e hmetu but Jerusalema ai ûhedrin hnyi bucen, Elaio ien, wale ae hakekeny Jerusalema, e úcû he ka he hnyi Sabath. 13 Ke ödrin e o but, me ödrin e ölö thö ka hnyi hnyeule ethö, wale ödrin e laba hnyin ; jia Peteru, me Ioane, me Iakobo, me Anederea, me Filipino, me Toma, me Batolomaio, me Mataio, me Iakobo nöku Alefaio, me Simona a Zeloti, me Juda liamekeiny me Iakobo. 14 Ödrin hia e, ödrin e labö hic hnyi hnyok a khaca, tha ödrin me watamomo, me Maria hinyö Iesu, me je liamekeiny minya më.

15 Haba hnyi ûen eling, Peteru ame tot hnyi wanben je liamekeiny (haba úseidra eling me helâke me wan haded ke twente) ke ame ha, ka habe, 16 Hnyat me lakeiny lö, e úcû he ka ohwâdâ hna sihnalimen a hia but ha adrem Hanu Kap ge hnyimö Davita ga Juda, at ame su ödra ka köt Iesu. 17 Anyin adre tha aú e möhmun, ke adre khene hanyemen hnyi huliwa eang. 18 (Haba at e ame úco utkânâ ge hwaban hwakecin ae kong ; ke e ame ta but ame bân ban, me ame hmouca but hnyekon, me hingölö hia but tang tiny. 19 Ke e khana e tavat hia adre me laba hnyi Jerusalema ; me adre me hwenyi ien utkânâ eling hnyi ifucidra, ka habe, Akeledama, walang bongon, Iny dra.) 20 Anyin adre sihnalimen hnyi tusi Salamo, ka habe,

Ame he ka ba wan anyin lap,
Ke ba at ame he ka laba e :

ke

Ame he biju ke at ka hom hanyemen.

21 Anyin a wale haba tavat eang adre me tha hien m' öhmun hnyi ta je bong hia waleji ke tiga tha ötin me Than Iesu, 22 hwân hnyi hna bapataiso hnö Ioane, ke ne o but hnyi bong adre me hom dö e göranyai gata, e úcú he ka úca ke at gadra he ka hnyi ohnatho möta möt hmetu thö a e. 23 Me adre me otílá li at, jia Josefa ke ien Basabasa, ke haba ke ien minya Juseto, me Matathia. 24 Me adre me hic me ha, ka habe, Taböny Than lö, u at ame wâbmakheto ta je hnyok hia thithö, omanená thö köhmun at u me he ka úca ge li at ang, 25 me me he ka hnyi hanen huliwa eang, me hanyemen aposetelo, waleji a degec Juda, me he ka hnyi hnen bi. 26 Me adre me ugleköbâ gadru, me ame hwádâ thö kö Matathia; me adre me tha aú e me je aposetolo a eleven.

HNYIMAKAN 2.

KE ame o but bong Penetekos, ödrin hia adre me tha laba hnyi dok a khaca. 2 Ke ame o uthmâhmâ but lung únyi hnyi drany, helâ me ang ame hmuhmu, me öunongötâ thö uma hia wale ödrin e laba hnyin. 3 Me ame manen dut ködrin je bohnen ae vheivhei, ke helâke meic; ke ame ve laba hudrin. 4 Me ödrin e unöngöt hia thö ge Hanu Kap, me hwân he ka fuc hnyi je ve hwen hnyei bi, helâ me hnen Hanu hna ham ködrin he ka fuc.

5 Ke e hu tavat Juda adre me ouden Khong, adre me laba hnyi Jerusalema, úhedra hnyi ta je hnyei hia eang hmeledrany. 6 Ke adre me löng ut lung eling, me ame úkhacaköu thö tavat ae se hia, ke adre me láia gan hmâ, anyin adre me löng ödrin e fuc hnyi je ve hodra bi. 7 Me adre me ve uthmâhmâ me láia, me ha, ka habe, Wâ bi, ca at Galilnia hia bi hnyat ang? 8 Ke a hawa ate me ve ling ödrin hnyi ve hwen hota bi adre hnöku öta hnyin? 9 At Parathia, me Madai, me Elama, me tavat adre me laba hnyi Mesopotamia, me Juda, me Kapadokia, me Ponoto, me Asia, 10 me Ferugia, me Pamefulia, me Aigupito, me je hnyei hnyi Libua hakekeny Kurene, me je atkanyua úhedra Roma, at Juda me tavat adre me tha hmi mödra, 11 at Kerete,

me Arabic, ate me ling ödrin ödrin e fuc hnyi je ve hwen ita, k' ödrin e ha ge ta je huliwa ae man anyin Khong. 12 Ke ödra hia adre me uthmâlmâ, me loloâ, me úhnenamököuâ, ka habe, ieu bongon únyi eang? 13 Ke haba keihen adre me úhiö, ka habe, A ijem gánâ waina ae teb únyi hnyat ang.

14 Ke haba Peteru ame tha tot me hnyat a eleven, me ha göranyâ, ka habe, Öbun at Juda, me öbun hia tavat öbun e laba hnyi Jerusalema, wâhmakhmeto ju öbun únyi eang, ke löng ju öbun hok hofuc. 15 Anyin a ca monu bi hnyat ang ge waina, helâ me hnöbun hna únyküme; ke tiga awa a kuniny ang; 16 ke walang hofuc a ha perofeta Joela, ka habe,

17 Haingen Khong, ka habe, Hnyi ta je bong a biliny,

Oge me he ka hingälâ hanuk hon tavat hia thithö :

Ke ame he lakubun obaga me wahlu ka perofeta,

Ke ame he lakubun wahidröu ka wâ je hna omanená,

K' ame he wahingatibun ka bwo ta je bwi.

18 Eke, hnyi ta je bong eling oge me he ka hingälâ hon lathnyabaik obaga me omomo

Hanuk; me adre me he ka perofeta.

19 Ke oge me he ka omanená je úöman ethö hnyi drany,

Ke ta je haten eang hmeledrany;

Wale dra, me meic, me hai ame sâ göranyai;

20 Adre me he ka bödra ka wia seúnö me me lit bi,

Me tehi me me dra,

Me ame he ka o but bong bongon Than, Wale bong ae gan me lung :

21 Ke ame he ka möt tavat hia adre me he ka hawâ ien Than.

22 At Isaraela lö, löng ju öbun hofuc ang: Haba Iesu at Nazareta, at a ohnathoâ köbun hnen Khong je he huliwa ae gan me je úöman me je haten, waleji hnen Khong hna ányâ únyi gan hnyi wanböbun, ke manen e köbun; 23 wale at adre me hna but únyi hnyi musu wisa me wâ bánâ hnen Khong, k' öbun e hia but osatauroâ me hlingâ hnen hnyamen tavat adre me hanyâúâ hnanyibu: 24 k' ame omelö hmetu thö e, me thang ut ta je töiny mok; anyin ae ca khana únyi eling he ka ohmâ e. 25 Anyin a háia e Davita, ka habe,

- Oge me wâ bala Than hnyi hnyimakök; Anyin a e but hnyi ke keihen a metök, m' adre me ca he ka bwebweli nya.
- 26 Wale me me senyin hnyekuk k' ame hobâ bohök;
Ke ame he unyik ka menâ ju me gejon:
- 27 Anyin a u me ca he bi ka hna but hanuk hnyin hedis,
U me ca he ka hna but Âtâm ae Kap he ka wâ hna bobot.
- 28 U je hia but omanenâ kõnya je gethen deny möt;
Ke u me he ka ounöngöti nya ge senyin hnyi hnyimâkâm.
- 29 Hnyat me lakeiny lö, oge me behiâ wia Davita pateriaka köbun, ka habe, a mokcu, ke adre hia but konâm, ke e unyita hon ke ne o but hnyi bong ang. 30 Anyin a e perofeta, ke e ame wâhmakhmeto a ga hia but Khong khemanyin kâu a e ame he ka ip ke at hon anyin theron únyi hnyi mâtrânyin; 31 me haba Davita ame wâ bânâ e, k' ame ha ge möt hmetu anyi Keriso, a g' adre me ca he ka hna degecâ e bi ka hnyi Hedis, k' ame ca he unyin ka wâ bobot. 32 Haba Khong ame omelö hmetu Iesu, ke öhmun hia ang je hnyat ohnatho.
- 33 Ke walang ang e ame laba göranyai únyi ge hnyam a metân Khong, k' ame hia but kap únyi ge Kamen Hanu Kap waleji e ame ha bânâ, me e ame hingálâ but únyi ang öbun e wâ me löng. 34 Anyin a ca ölö ka hnyi drany Davita: ke e ame ha, ka habe
- Haingen Than ka Tuhök, ka habe, Laba ju hnyi ke keihen a metök,
- 35 Ke ne o but oge me he ka wia ta je iwahnaihmiöny möu me taben li cam.
- 36 Anyin a wale, e so e he lap anyi Isaraela hia ka wâhmakhmeto a g' ame hia but Khong wia Iesu at öbun e osatauroâ me me Than me Keriso.
- 37 Adre me löng e, me ame dâ but je hnyekudra, me adre me ha kö Peteru me ta je aposetolo, ka habe, Hnyat me lakeiny lö, ieu hany möhmun he ka anyâ? 38 Haingö Peteru ködra, ka habe, Ietra ju, m' adre me ve bapataisoï öbun hnyi iö Iesu Keriso, m' adre me thang degecâ but anyibun ta je hulö; me öbun e he bi ka kap bwihlany a Hanu Kap. 39 Anyin a haba hna ha bânâ, me hnân hobi köbun me je lakubun, me hobi kâu hnyat a ödra sâkâu, wale hnyat hia ame he Than a Khonguta ka hawâ kâu. 40 Haba Peteru ame khetâ,

k' ame khöü ködra ge ta je hofuc ae se hia, haingen, ka habe, Omeli öbun dö únyi hnyi dö eang ae hwali. 41 Ke adre me bapataisoâ tavat adre me kap hwan: me adre me bihanen ködra hnyi bong eling helâ me theri thauzan tavat. 42 Ke adre me tethmä hnyi hna úne hnen je aposetolo, me tha hnyok, me susubâ areto me hic.

43 Ke ame o but ot ka tavat hia: ke se hia ta je úöman me haten ame anyâ hnen je aposetolo. 44 Ke ame tha laba tavat hia adre me labageju, ke adre me ve ip anyidra ta je únyi, me ka tha anyidra thibi; 45 ke adre me ve úco idra ta hnyei, ke ta je omjhedra, me ve khenâ öuco ke tavat hia ae theduoc. 46 Ke adre me laba bala me hnyok a khaca hnyin uma kap hnyi je bong, me susubâ areto hnyi ke uma me ke uma, me an ö 'dra jeú me senyin me hnyok a khaca, 47 me oganá Khong, ke ame betenge gadra tavat hia. Ke haba Than ame bi hanen ködra hnyi je bong tavat adre me he ka möt.

HNYIMAKAN 3.

HABA Peteru me Ioane ödrü me tha he ka hnyin uma kap hnyi üen hic, hnyi awa a naininy. 2 Ke wale ke at ae mat hwân hnyi hna hnokö e, adre me vadrén me ip hnyi je bong hnyi homagöüeny uma kap, ien Hmanenang, he ka sumâtâ ta únyi ge tavat adre me dit ka hnyi uma kap; 3 ke e ame ö Peteru me Ioane ödrü me he ka dit ka hnyi uma kap, me e ame sumâtâ ta únyi. 4 Haba Peteru me Ioane ödrü me wâ hmâ e, me ha, ka habe, O 'hmu thö. 5 Me e ame löng ködrü, ame únykúme he ka hu ke únyi gadru. 6 Ke haba Peteru ame ha, ka habe, E ba gak sileva me gol, ke oge me he ka ham köu hnök hna hu. Hnyi iö Iesu Keriso at Nazareta, he thö u. 7 Me e ame lelö thö hnyamen a metân me otillâ thö e: me ame ie hwege thö li can me li omakhnáiny can. 8 Me e ame ut göranyai, me tot, me hwân ka he; me e ame tha didrö m' ödrü ka hnyi úma kap, ame he, me utut, me oganá Khong. 9 Ke adre me wâ e hnen tavat hia ame he me oganá Khong: 10 ke adre me wâhmakhmeto e, a e at ame labö sumat hnyi homagöüle, Hmanenang ien, hnyi uma kap: me adre me láia gan hmâ me uthmâhmâ ge únyi a o kâu.

11 Ke e ame tiga köt Peteru me Ioane, me ame wadring úkhacaköu thö tavat hia

ködrin hnyi poretiko, Solomona ien, ke adre me láiiá gan hmá. 12 Ke a wá but Peteru e ame ha ka tavat, ka habe, At Isaraela lö, ieú gabun öbun e láiiá únyi ang? ke ieú gabun öbun e wá hm' öhmu heláke me hnen manihmu man me hwakecihmu ae úcú ka Khong me me he thö at ang? 13 Haba Khongu Aberahama, me Isaaka, me Jakob, Khongon lakamöta, ame ölungá Aten a Iesu; waleji öbun e hna but, me ivinöá hnyi hnyimakö Pilato, ke mou thö gan a g' ame he ka hna e. 14 Ke öbun e ivinöá At ae Kap ke At ae Wisa, me sumátá he ka hna köbun at úhlingö, 15 ke öbun e hlingá Thaniny möt; wale hnen Khong hna omelö hmetu únyi hnyi hna mok; ke öhmun e ohnathöá únyi e. 16 Ke haba at ang öbun e wá, ke khan' öbun, me ame hwege bi únyi hnyi labageju ka hnyi ien, ke can ien bi: eke, adre me ham káu hwege eang ae bekhöt hnyi hnyimaköbun hia hnen labageju a únyi gan. 17 Hnyat me lakeiny lö, e khandö nya a öbun e ányá e ke ca khan' öbun bongon, heláe minya anyibun je taben. 18 Ke haba Khong ame ohwádá hofuc e ame bán ka ha a deny anyin ta je perofeta hia, wale a g' ame he Keriso ka hom vec. 19 Anyin a wale ietra ju öbun me hwiö thö, m' adre me he ka kot degecá but anyibun ta je hulö, me me he ka o but je úen hnân oka-hwa únyi ge Than; 20 me me he minya ka kuná Keriso, wale at adre me bödra ka ham hobi köbun, a Iesu; 21 at a kap hnen drany ethö ke ne o but hnyi je úen ame he ka hwádá hnyin ta je únyi hia waleji ame ha hnen Khong a deny anyin ta je perofeta hia thithö ae kap hwân káu adrem bala. 22 Ke haba Mose ame ha, ka haba, Ame he Than a Khong ka oá ke perofeta hobi köbun únyi ge je liamekeiny m' öbun, helá me inya; öbun e he ka löng káu hnyi ta je únyi hia e ame he ka ha köbun. 23 Ke haba at ame ca he bi ka löng perofeta eling, me adre me he ka ohia e únyi hnyi hnyei. 24 Eke, haba ta je perofeta hia hwân ga Samuela me tavat minya a bilidra, a ödra hia adre hia, but khetá, me ödrin e ha minya ge je bong ang. 25 Haba öbun, me öbun lakon ta je perofeta, a hanen hna úhinhnyköu anyin Khong me lakamöbun, waleji ame ha kö Aberahama, ka habe, Ame he ka hnabic ta je lap hia eang hmeledrany únyi ge mâtânám. 26 Ke haba Khong ame oá Aten, k' ame kuná báná köbun he ka ohnahici öbun, wale he ka ve

ohmetu öbun únyi hnyi anyibun ta je hulö.

HNYIMAKAN 4.

KE ödrü me tiga fuc ka tavat, me ame o but ködrü tavat bihut, me taben uma kap, me je Sadukaio, 2 adre me kong hnyekudra anyin ödrü me ná tavat, me khetá möt hmetu únyi hnyi mok hnyi iö Iesu. 3 Me adre me köt ödrü me ip ödrü hnyi uma ceat ke ne o but nyi: anyin a sahac ut. 4 Ke ame labageju but tavat ae se hia adre me löng hofuc; ke haba úseiny obaga, me helá me faiv thauzan.

5 Ke nyi, ame úkhacaköu thö hnyi Jerusalema tavat musi ködra, me wahingat, me hnyat sihnalimen; 6 me Ana at bihut ae nua, me Kaiafa, me Ioane, me Alesanedo, me je liamekeiny me at bihut ae nua. 7 Me adre me otíl' ödrü hnyi wanben, me hnö, ka habe, Hnen ie man, ke hnen iö ia öbu me ányá ta je únyi e? 8 Haba Peteru ame fuc ködra, ae unöngötö ge Hanu Kap, me ha, ka habe, Öbun tavat musö hnyei me wahingat lö, 9 öbun e ne hnei öhmu hnyi bong ang ge huliwa ae so öhme ányá ka at ae mat, ka habe, adre kámáu hna omelö e; 10 wáhmakhmeto ju öbun hia, me tavat Isaraela hia, a hnen iö Iesu Keriso at Nazareta waleji öbun e osatauroá, ke Khong ame omelö hmetu thö e úheny hnyi hna mok, haba únyi thibi gan, me ame tot at ang hnyi hnyimaköbun adre osoá. 11 E thibi veto öbun e degec öbun hnyat bi uma, adre hia but ányá hnân vetoiny ban kopiny. 12 Ke ba úhömeli ge ke at bi: anyin ae ba ke ien eang hmeledrany adre ham ka at, ae khana he ka omeli öta.

13 Ke ödrin e wá ihwegiö Peteru me Ioane, ke ödrin e wáhmakhmeto a ödrü li at ae ca khan' ödrü tusi, ke adre ca ná, me ödrin e láiiá; ke ödrin e wáhmakhmeto a únyi ödrü ga Iesu. 14 Ke ödrin e wá at adre osoá ame tha tot m' ödrü, ke ba hofuc gadrin hnân thu. 15 Ke ödrin e hia but kun' ödrü hnyöu ai únyi hnyi úkhacaköu, me ödrin e úhnenamö ju, 16 haingödrin ka habe, Ieú ate me he ka ányá ka li at e? anyin a manen dut ka tavat hia adre me laba hnyi Jerusalema a ödrü me hia but ányá hing úöman; ke ca khan' öta he ka ivinöá e. 17 Ke so bi me me ca lung igigiloá bi ka aten hnyei, e so ate me he ka húná wia ködrü, he ka ca fuc hmetu bi ka ke at hnyi ien e.

18 Me ödrin e haw' ödrü me hûna ködrü, ka habe, Ca ha hmetu bi me ûne hnyi iö Iesu. 19 Ke haba Peteru me Ioane ödrü me thu ködrin, ka habe, Ûnykûme ju öbun ame ne wisa hnyi hnyimakan Khong he ka ling öbun, ame ne he ka löng Khong : 20 anyin ae ca khan' öhmü he ka ca ha ta je ûnyi öhmü me wâ me löng. 21 Ke ödrin e hia but thawâ ooti ödrü, me ödrin e hn' ödrü but, anyin a ödrin e ca wâ deny he ka bi hwaban ködrü ge tavat ; anyin a tavat hia adre me ogânâ Khong can ta je ûnyi a ânyâ. 22 Anyin ae nua hon fâte ta je hunainy at ödre ânyâ kâu ûöman e me omelö.

23 Ke adre hia but hn' ödrü, me ödrü me he but ka lahanödrü, me thumetu ödrin ge ta je ûnyi hia a ha ködrü tavat bihut ae nua me wahingat. 24 Ke ödrin e hia but löng, me ödrin e ha ka Khong hnyi hnyok a khaca ke hwege ifucidrin, ka habe, Tabony Than lö, u thibi at a op drany me hmeledrany, me köiö, me ta je ûnyi hnyin : 25 u je fuc a deny Hanu Kap me hnyimen kamöhmun Davita a atâm, ka habe,

Anyin a ieu ame imonumonunykou Aten
ke je Hnyei,

Me ta je hnyei adre me ûnykûme ta je
ûnyi ae ba troban ?

26 Haba je thaniny hmeledrany, me adre me tet metâ,

Ke ame ûkhacakou thö je taben,

Ûcon Than me Hnen hna Hû :

27 E hnathu adre hia but ûkhacakou hnyi taun ang Heroda me Ponetio Pilate me Aten ke je hnyei me at Isaraela, je ûcon Atâm ae kap a Iesu at u je hû, 28 ke so bi he ka ânyâ thibi ta je ûnyi adre ip hmâ adrem ge hnyamâm me ânyâm musi he ka mâdrâ. 29 Ke walang ang, Than, ö u wâ ju anyidra ta je hna ootâ : me ham dö ka lathnyabaem he ka hwege ha hwâm hofuc, 30 ke u je lau hnyamâm he ka osoâ ; m' adre me he ka ânyâ ta je ûöman me ta je haten hnyi ien Atâm ae kap a Iesu. 31 Ke ödrin e um dö hic, me ame jijing uma ödrin e laba hnyin ; me ödrin e unöngöt hia thö ge Hanu Kap, me ödrin e ha hofuc hwan Khong hnen hwege.

32 Ke haba üseiny tavat adre me laba-geju, adre me tha hnyok me tha ûnykûme : k' ame ca ha bi ke at gadra, a ga ka anyin bi ûnyi eling e ame hu ; ke ka tha anyidra thibi. 33 Haba je aposetolo ödrin e ohna-thoâ ge man ae gan hmâ möt hmetu thö a Than Iesu ; ke e but hnyi hudrin hia ibe-

tengiö baü ae gan hmâ. 34 Ke ba ke at gadre ae ba ta ûnyi : anyin a haba tavat a ödra tren hnyei me je uma, me adre me üco e me hom hwaban ta je ûnyi adre üco, 35 me ip ju e hnyi je hnyeücan ta je aposetolo : me adre me ve khenâ öüco ka ta je theduoc.

36 Haba Josefa, adre wenyö Banaba hnen je aposetolo, (walang bongon Nokon kaukahwa,) e at Levi, ke aten hnyei Kupero, 37 e hu iny utkânâ, ame üco, me hom hwaban me ip e hnyi je hnyeücan ta je aposetolo.

HNYIMAKAN 5.

KE haba ke бага Anania ien, me Safaira a âiân, ödrü me üco ke hnyei, 2 me behânâ duöngâ ke keihen hwaban, ke e khana minya momo, me hom ke keihen, me ip e hnyi je hnyeücan je aposetolo. 3 Ke haba Peteru ame ha, ka habe, Anania lö, ieu ga Satana ame ounöngötâ hnyekom, me u me he ka thoi ka Hanu Kap, me behânâ duöngâ ke keihen hwaban hnyei. 4 Hawa, ca ânyâm ehac k' ödra tiga ca üco ? ke hwaban hnâm hna üco, hawa ca hamâm bala bi he ka musö ? ieu gam u me ûnykûme ûnyi eang hnyi hnyekom ? u me ca thoi ka at, ke ka Khong bi. 5 Ke a löng ut Anania hofuc e, me e ame ü but a ga mokcu : me ame o but ot ae gan hmâ ködra hia adre me löng. 6 Me ame todrö wahidröu ka lan e, ke adre me sam e hnyöu ai me konâm.

7 Ke hwaban e, helâ me kun ta awa, me ame didrö âiân, ke ca khana hna ânyâ. 8 Haba Peteru ame ha ka momo ka habe, Ha thö kõnya, hawa, wale thibi ang hwaban hnyei obe üco ? Ke haba momo ame ha, ka habe, E, wale thibi e. 9 Haba Peteru ame ha kâu, ka habe, Ieu gabu ae tha hnyekubu he ka cubec Hanon Than ? wâ bi, eü hnyi hwanuma tavat adre me konâm âiâm, ke adre me he minya ka sam u. 10 Me ame ie ü but momo hnyi li hnyeücan k' ame mokcu : ke ame didrö wahidröu me wâ e a mokcu, me adre me sam but hnyöu ai, me tha konâm me âiân. 11 Me ame o but ot ae gan hmâ ka ekalesia hia, m' ödra hia minya adre me löng ûnyi e.

12 Ke se hia ta je haten me ûöman adre me ânyâ unyin tavat ge je hnyamen ta je aposetolo ; ke ödrin e labö ûkhacakou hia hnyi poretiko anyi Solomona. 13 Ke ca hwege hnyekon keihen he ka tha e mödrin ;

haba tavat, me adre me ogan' ödrin ; 14 ke se hia obaga me omomo adre me labageju ka Than me hwege tot he ka tha hien mödrin ; 15 waleling m' adre me hom ta je komok ka hnyi je getheniny taun, me ip ödrin hon je hna mokut me je tap, me me na omi hnedrong keihen ge hmenu Peteru, e ka he. 16 Ke ame o but minya keihen ae se hia úhedra hnyi ta je taun igigilö Jerusalema, adre me hom ta je komok, me tavat minya ame oveci ödra hnen je hanu ae kong : ke adre me ve omeli ödra hia.

17 Me ame todrö at bihut ae nua, m' ödra hia a tha ödra mē, (wale hnyat hanen ta je Sadukaio), ke ödra unöngöt ge ihu-hnyinköu, 18 m' adre me kät je aposetolo, me ip ödrin hnyin uma ceat. 19 Ke ame khöng je hwanumen uma ceat hnen angela anyin Than hnyi hnyinghet, me hum ödrin dut hnyöu ai, me ha, ka habe, 20 He th' öbun ka tot hnyi uma kap, me khetâ ka tavat ta je hofuciny Möt eling. 21 Ke ödrin e löng ut, me ödrin e didrö ka hnyin uma kap hnyi hnyomakatu kong, me úne. Ke ame o but at bilut ae nua, me tavat a tha e mē, me hawâ úkhacaköuâ tavat úhne-namö, me tavat musî hia unyin at Isaraela, me e ame úkhünöng ka hnyi uma ceat he ka hum ödrin. 22 Me ame he but la-thnyaba, ke ba at ut hnyi uma ceat ; me ödrin e hmetu me thumetu, ka habe, 23 Öhmun e wâ but uma ceat, k' adre me hlöng wia, k' ame tot eú hnyi je hwanuma tavat tue : ke öhmun e hia but khöng, me ba at öhmun e wâ hnyin. 24 A löng ut hofuc e hnen taben uma kap me je taben tavat bihut, me ödrin e loloâ gadrin ame ne he ka hawâ bi. 25 Me ame o but ke at he ka thumetu ödrin, ka habe, Wâ bi, haba hnyat öbun e ip ödrin hnyin uma ceat, me ödrin e tot hnyin uma kap me nâ tavat. 26 Me ame tha he but taben me je lanyin, me hum ödrin, wi' ödrin, anyin a ödrin e ouden tavat, wâ adre nye lú' ödrin ge veto. 27 Ke ödrin e hia but hum ödrin dut, me adre me otîl' ödrin dö hnyi hnyimakan úhnei. Me at bihut ae nua ame hnei ödrin, ka habe, 28 Öhmun e húna wia köbun, m' öbun e ca he ka úne hnyi ien e : ke wâ bi, öbun e ounöngötâ Jerusalema ge hnöbun hna úne, ke öbun e únykúme he ka jönihmun dren at e. 29 Haba Peteru me je aposetolo ödrin e thu, ka habe, E úcú köhmun he ka löng hoton Khong hon at. 30 Haba Khongon lakamötâ e ame otîlö

Iesu, waleji öbun e hlingâ me uhno hnyi úö. 31 E thibi at Khong ame ogöranyâ hnen hnyamen a metân hnân Than me At úhömeli, me me he ka ham ka at Isaraela ietra, me hna thang ta je hulö. 32 Ke öhmun ang hnyat ohnathöâ ta je únyi e ; ke helâe minya Hanu Kap, waleji hnen Khong hna ham ködra tavat adre me löng hoton.

33 Adre hia but löng e, me adre me hmönyidra gan hmâ, me behling' ödrin. 34 Ke ame todrö ke at, at Faresaio, hnyi úhnenamö, Gamaliela ien, at ame únö hna-nyibu, ke e lung so ka tavat hia, ke e ame húna he ka bödra ka kunâ hnyat eling hnyöu ai hnyi úen ae okhulit. 35 Ke haingen ködra, ka habe, At Isaraela lö, wâ eâu öbun hna he ka ányâ ka hnyat ang. 36 Anyin a hnyi je bong ehac a o thö Theuda, me ha, a e at ae beónua ; me ame úhkacaköu kâu tavat ae se hia, helâ me foa haded ; ke adre me hlingâ e ; ke haba tavat hia adre löng hoton me adre me vese but, me hi' ödra bi. 37 Hwaban at eling ame o but Juda at Galilaia hnyi úen he ka sihnalimen tavat, me lelö kâu keihen tavat : k' ame hia minya ju ; me adre me vese hia but tavat adre me löng kâu. 38 Ke walong ang inya oge me ha köbun, ka habe, Úsákâúö but me hnyat ang, me hn' ödrin dut : anyin a ne únyi ge at hwakecin ang, me huliwa eang, ame he ka hia thiju : 39 ke a ne únyi e ge Khong, e ca khan' öbun he ka ohia ; wâ adre nye ö' bun, öbun e vat me Khong. 40 Me ame me ogâ e : ke adre hia but hawâ je aposetolo me osi ödrin, me húna ködrin he ka ca fuc hmetu hnyi iö Iesu, me adre me hn' ödrin dut. 41 Me ödrin e he but úhedrin hnyi hnyimakan tavat úhnenamö, me senyin anyin adre me hna ködrin he ka kong can ien. 42 Ke ödrin e ca menâ bi hnyi je bong hia he ka úne, me kheti Iesu Keriso hnyi uma kap me ta je hnyaba.

HNYIMAKAN 6.

AME gan tot úseiny laten hnyi je bong e, ke ame kú thö ulit ge at Helenisi ka at Heberu, anyin adre me hnying ut ta je safac gadrin hnyi hna kheuâ ta únyi hnyi je bong hia. 2 Haba hnyat a twelw, ödrin e hawâ je laten ae se hia, me ha, ka habe, E ca so köhmun he ka hna hofuc hwan Khong, me he ka khenâ je jekhöü. 3 Anyin a wale, hnyat me lakeiny, úca thö

hnyat a seven gabun, je hnyat adre me lung so, hnyat ae unöngöt ge Hanu Kap me metâ, me öhmun e he ka otill' ödrin ka hnyi huliwa eang. 4 Ke haba öhmun ang, m' öhmun e he balua ka hwege hnyi hic, me huliwa hnyi hwan hofuc. 5 Ke so hofuc e ka tavat hia : me adre me ücö Setefano, at ae unöngöt ge labageju me Hanu Kap, me Filipino, me Prokoro, me Nikanora, me Timona, me Paramena, me Nikolas at Anetioka, at ame dit ehac ka hnyi hmi Juda : 6 adre me otill' ödrin hnyi hnyimakan je apusetolo : ke ödrin e hia but hic, me ödrin e ip je hnyamödrin hudrin.

7 Ke ame khulelau hofuc hwan Khong, ke ti se hia tavat adre me löng hnyi Jerusalema ; ke se hia minya tavat bihut adre me hnyi labageju.

8 Ke haba Setefano, ae unöngöt ge ibetengio baü me man, ame änyâ je üöman me haten ae gan hmâ unyin tavat. 9 Me ame todrö keihen ühedrin hnyi sunago, haba ien, me sunago anyin at Libetino, me at Kurene, me at Alesanedria, me tavat ühedra Silikia, me Asia, me adre me ivinö me Setefano. 10 Ke ca khan' ödra thu hmetu anyin metâ me Hanu at ame ofucâ e. 11 Me adre me ha duöngâ ka keihen, mödrin e ha, ka habe, Öhmun e long ut a e ame fuc bi gan kö Mose me Khong. 12 Me adre me omonumonoâ tavat, me wahingat, me hnyat sihnalimen, me adre me o but kâu, me kât e, me hom ka tavat ühnenavot, 13 me otillâ tavat sit hofuc thoi, tavat adre me ha, ka habe, Ame ca menâ bi at ang he ka haikongoâ dok ang ae kap, me hnanyibu : 14 anyin a öhmun e löng ut, e ame ha, ka habe, Ame he Iesu at Nazareta ka ohia dok ang, me wia ta je hwakecin a ham köta Mose. 15 Ke haba tavat ühnenamö hia adre me wâ hmâ e, me wâ hnyimakan, helâ me hnyimakan angela.

HNYIMAKAN 7.

ME ame ha at bihut ae nua, ka habe, Hawa e hnathu bi ta je ünyi e? 2 Me e ame ha, ka habe,

Hnyat me lakeiny me lakamök lö, löng ju. Haba Khong ae hmanenang ame manen dut kö Aberahama a kamöta, waleji ke tiga e bi hnyi Mesopotamia, ke tiga ca laba bi hnyi Karan, 3 me ha kâu, ka habe, Hna but em hnyei, me je liamekeiny möu, ke he thö ka hnyi hnyei oge me he ka omanenâ köu. 4 Me e ame he but ünyi hnyi

hnyei iny at Kaledaia, me laba hnyi Karan : ke hwaban dö mok a kamen, Khong ame hom e ka hnyi hnyei ang öbun e labâ walong ang : 5 ke e ame ca ham kâu ke hwajekhon hnyin, e ba hmönyin ke ong dok helâ me hwadeny hnyeücan : ke e ame ha bânâ he ka ham kâu me hnân iny, me hnân iny je mâtrâniny hwaban, waleji ke tiga ba nokon. 6 Ke haba Khong ame ha helâng ka habe, ame he je mâtrâniny ka laba kanyua hnyi ke hnyei bi, ke adre me ha ka hwenb' ödra, me okongoâ hnyi foa haded je huna. 7 Haingen minya Khong, ka habe, Oge me he ka bi hwaban ka hnyei adre me he ka huliwa kâu, ke hwaban e adre me he ka he but me bi atök hnyi hnyei ang. 8 Ke e ame ham kâu ühinhinköu, wale peretom : me e ame hnöku Isaaka me peritomonâ e hnyi bong a eitiny ; ke haba Isaaka ame hnöku Jakob ; ke Jakob ame hnokoâ je pateriaka a twelv. 9 Ke haba je pateriaka ödrin e ücü Josefa hnyi Aigupito can ödrin e hunyinyâ : ke e bi unyin Khong, 10 k' ame omelö e ünyi hnyi anyin ta je vec hia, me ham kâu ibetengio me metâ hnyi hnyimakö Farao than Aigupito ; ke e ame otillâ e me me musi hnyi Aigupito me hnyaban hia. 11 Ke ame o but hmiâ me vec ae gan hmâ hnyi Aigupito hia me Kanana : me ba jeü an lakamöta. 12 Ka löng ut Jakob a ga hu hwit hnyi Aigupito, me e ame kunâ lakamöta, ühedrin a bân ling. 13 Ke ame manen dut Josefa ka je liamekeiny mē hnyi ühedrin a loiny ; k' adre omanenâ je liamekeiny me Josefa kö Farao. 14 Haba Josefa ame ükhünöng he ka hawâ kamen a Jakob, me anyin lap hia, ödrin sevente faiv tavat. 15 Me ame he Jakob Aigupito ai ; ke e ame mokcu me je lakamöta ; 16 ke adre me sam ödrin Sekema ai, m' adre me ip ödrin hnyi erkemok waleji a ücü silevai Aberahama unyin laku Hamora hnyi Sekema. 17 Ke hakokeny jut üen adre me ha bânâ, waleji a ha Khong kö Aberahama, me ame osehia me si but tavat hnyi Aigupito, 18 ke ne o but ame o ke than Aigupito, at ae ca khana Josefa. 19 Wale at bibihwakecin ka je lakamöta, k' ame okongoâ lakamöta, k' ame kun' ödra he ka dedegec lakudra je mendring, m' adre me ca möt bi. 20 Wale üen adre me hnöku Mose hnyin, e wanakat ae hmanenang ; ke adre hat e hnyi uma umen kamen kun ta tehi : 21 ke adre me mē degecâ e, me ame hom dö e hnen hlu nöku Farao, me hat e me me nokon bi.

22 Ke adre me nö Mose hnyi ta je metâ hia anyin at Aigupito; k' ame metâ but hnyi hofuc a hwan, me anyin ta je huliwa. 23 Ke hakekeny fâte but ta je hunainy, me ame kü thö weny eü hnyi hnyekon he ka senâ je liamekeiny mē, a lakon Isaraela. 24 Ke e ame wâ ke at adre me okongoâ, me e ame hadruâ, me bi hien at adre me okongoâ, me kot moko at Aigupito: 25 anyin a e ame únykúme a g' ame he je liamekeiny ka wâ únykúme a g' ame he Khong ka omeli ödra únyi ge hnyamen bi; ke adre me ca wâ únykúme. 26 Nyi e ame o ka li at ödru me úkú, me e ame thaw' ödru me me soju, haingen, ka habe, Ke lin lö, öbu liamekeiny, iéü gabu, öbu me úokongu öbu köu. 27 Ke haba at, wale ame okongoâ hanen, e ame hagutâ e me ha, ka habe, Ia otílö u he ka musí me owisa kühmün? 28 Hawa, e wem he ka hlingö nya, helâ et me hnâm hna hlingâ at Aigupito? 29 Me ame kec ut Mose can hofuc eling, me laba atkanyua hnyi hnyei Midiana, waleji e ame hnokoâ hnyin lakon li бага. 30 Ke hwaban je huna a fâte, ame manen dut kâu hnyi hnyebubainy bucen Sinai angela hnyi báhlân meic hnyi ong úö. 31 Ka a wâ but Mose, me e ame láiâ hnen hna wâ: ke e ame tiga he hakekeny he ka wâ, me ame o but hofuc hwan Than, 32 ame ha, ka habe, Inya ang Khongon lakâmâm, wale a Khongu Aberahama, me Isaaka, me Jakob. Haba Mose ame öbubuny me ot ka wâ. 33 Haba Than ame ha kâu, ka habe, Thang ut tangen li hnyeúcám, anyin ae kap ukânâ e u me tot hnyin. 34 Inya oge hia but wâhmakhme-toâ hna okongoâ lakeik hnyi Aigupito, ke oge löng ut anyidra máng, ke oge me o but ang he ka hoi ödra: ke walang ang aiü u, oge me he ka kunö u Aigupito ai. 35 Wale Mose at ame hmi' ödra me ha kâu, ka habe, Ia otílö u he ka musí me owisa? wale Khong ame kunâ hnân at musí me at úhömeli ge hnyamen angela wale a manen kâu hnyi ong úö. 36 Haba at eling ame hum ödra but, hwaban hnen hna omanená ta je úöman me haten hnyi hnyei Aigupito, me hnyi Köiö ae dra, me hnyebuba hnyi fâte je huna. 37 Wale Mose at ame ha ka lakon Isaraela, ka habe, Ame he Khong ka oâ hobi köbun a liamekeiny möbun ke perofeta helâ me inya. 38 Waleji at ae hnyi úkhacakâu hnyi hnyebuba tha e me angela at ame fuc kâu hnyi bucen Sinai, me tha e me lakamöta: at ame kap hofucin

möt he ka ham köta: 39 waleji a höcö löng kâu hnen lakamöta, ke adre me hna degecâ e, ke ame hmetu je hnyekudra Aigupito ai, 40 adre me ba kö Arona, ka habe, Ányâ thö ke je khonguta he ka he hnyi hnyimaköta: anyin a haba Mose e, at a hum öta únyi hnyi hnyei Aigupito, e ca khan' öta únyi a o kâu. 41 Me adre me ányâ nokon kau hnyi úen eling, me bi hut ka hnatheat, me senyin ka hnyi huliwa hnen je hnyamödra. 42 Haba Khong ame hwiö thö me hn' ödra but he ka bi athnyabainy ta je únyi hnyi drany; helâ me hna sihnalimen hnyi tusi anyin je perofeta, ka habe,

Hawa, öbun e hudo könya ta je meno adre me hlingâ me ta je hut

Hnyi hnyebuba hnyi je huna a fâte, lap anyi Isaraela?

43 Ke öbun e hom minya uma menâ uma Moloka,

Ke okhuiny khongubun a Refana,

A je hnatheat öbun e ányâ he ka khudrung ködrin:

Awe, oge me he bi nya ka hum öbun ka hnyi Babulona.

44 E hu uma menâ a uma ohnatho unyin lakamöta hnyi hnyebuba, helâji me hna húna kö Mose ame ha, ka habe, hamen he ka ányâ hoton tulut e ame wâ. 45 Ke haba lakamöta unyi Josua, me adre me hom únyi eling hnyi úen adre me kap hnyei iny Aten ta je hnyei, waleji hnen Khong hna obâ hnyi hnyimakan lakamöta, ke ne o but hnyi ta je bong bongu Davita; 46 wale at a wâ ibetengió únyi ge Khong, k' ame sumâtâ he ka wâ uma umen Khongu Jakob. 47 Ke haba Solomona ame otílâ uma umen Khong. 48 Ke so bi ame ca laba Beönua hnyi je uma adre me ányâ ge hnyam; helâ me hna ha hnen perofeta, ka habe,

49 Haba drany, me anyik theron,

Haba hmeledrany, me taben li cak:

Ke haingen Than, ka habe, Ie uma öbun e he ka otílâ hobi könya?

Ke ewa bi dok oge ma menâ hnyin?

50 Hawa, a ca op ta je únyi e ge hnyamök?

51 Öbun hnyat ae hwege je nyibun, k' adre ca peritomonâ je hnyekubun me je hnyikönyöbun, öbun e labö tot metâ úcon Hanu Kap: helâji me lakamöbun, me helâ minya ju e öbun. 52 Ewa perofeta a ca ovecâ hnen lakamöbun? ke ödrin e hlingâ minya tavat a bödra ka omanená a g' ame

he ka o At ae Wisa ; wale öbun e alecua me hlingâ walang ang ; 53 öbun tavat öbun e kap hnanyibu a huna hnen je angela, k' öbun e ca vheno bi.

54 Adre me löng ta je hofuc e, me ame hmönyidra gan hmâ, me adre me hoc nyu kâu. 55 Ke e a unöngötö ge Hanu Kap, k' ame wâ hmâ drany, me wâ hmanenanginy Khong, me Iesu ame tot hnyi ke keihen a metân Khong, 56 me haingen, ka habe, Wâ bi, inya oge me wâ drany adre khöng, me Nokon at ame tot hnyi ke keihen a metân Khong. 57 Me adre me fuc hwege göranyai, me hlöng je hnyikönyödra, me tha utut kâu ; 58 me adre me hagutâ e ka hnyi hoton hnyei, me lûâ ge veto : ke haba hnyat ödrin e bifuco e adre me khuâ je khatödrin hnyi li can hidröu, Saulo ien. 59 Ke adre me lûö Setefano, k' ame tiga hic me ha, ka habe, Than Iesu lö, kap ju hanuk. 60 Ke e ame cibouca, me fuc hwege göranyai, ka habe, Than lö, ca bi hwaban ködra monu eang. Ke a hia but ha e, e ame mokut ut.

HNYIMAKAN 8.

KE Saulo minya ame ogâ anyin mok. Ke haba hnyi bong eling ame kû gan hmâ but hna ovecâ ekalesia hnyi Jerusalema ; ke adre me vese hia but ka hnyi ta je ke keihen hnyei Juda me Samaria, ke hake je aposetolo thiju. 2 Ke haba tavat adre me ouden Khong adre me könim Setefano, me tengge thungau gan hmâ gan. 3 Ke haba Saulo, e ame vekia okongoâ ekalesia, me dit ka hnyi ta je uma, me lelö but obaga me omomo, me ip ödra hnyi uma ceat.

4 Anyin a wale haba tavat adre me oveseâ adre me he but ka hnyi je dok me khetâ hofuc. 5 Me ame he but Filipino ka hnyi taun ien Samaria me khetâ Keriso ködra. 6 Haba tavat adre me tha kap ta je hofuc ame ha Filipino, adre me löng me wâ ta je haten e ame ânyâ. 7 Anyin a ta je hanu ae kong adre me didrut ge tavat ae se hia ae hu gadra, adre me fuc hwege göranyai ; ke se hia tavat ae mat, me tavat ae kong je cadra, adre so but. 8 Ke e gan hmâ senyin hnyi taun eling.

9 Ke wale ke at Simona ien, at bibihwakecin e hac hnyi taun eling, me me lâiâ gan at Samaria, haingen, e thibi at ae gan : 10 ke ame kap e hnen tavat hia, hwân ge tavat ae ûhnyûkong ke ne o but ge tavat

ae gan, haingödra, ka habe, Haba at ang me, man maniny Khong adre wenyö Gan Hmâ. 11 Ke adre me kap e anyin ae beû hnen hna olai' ödra ge anyin bibihwakecin. 12 Ke adre hia but köp Filipino at khetâ ûthumetu ae so anyin dökhu dokhon Khong, me iö Iesu Keriso, me e ame bapataisoï ödra obaga me omomo. 13 Ke haba Simona ame hnyi kap, k' adre hia but bapataisoâ, k' ame tha e bala me Filipino ; ke e ame wâ je haten me je üöman ae gan hmâ adre me ânyâ, me e ame lâiâ.

14 A löng ut ta je aposetolo hnyi Jerusalema a g' adre me kap soâ hofuc hwan Khong hnen at Samaria, me ödrin e kunö Peteru me Ioane ködra : 15 ke ödrü me he but me hic hobi ködra, me me hu gadra Hanu Kap : 16 anyin ae tiga ca o ködra : ke adre hia but bapataisoï ödra thibi ka hnyi ien Than Iesu. 17 Ke ödrü me ip li hnyamödrü hudrin, me ame o thö ködra Hanu Kap. 18 Ke a wâ but Simona a g' adre me ham Hanu Kap ûnyi ge hna ip hnyamen li aposetolo, me e ame inâ ködrü mone, 19 me ha, ka habe, Ham but kõnya man e, me me he at oge me ip li hnyamök hon ka hu Hanu Kap. 20 Me baba Peteru ame ha kâu, ka habe, A hnaûhangö but ânyâm mone möu, anyin a u je ûnykûme he ka ücû moniny ûnyi a ham bâûâ hnen Khong. 21 Haba u, me, ba gam ke ûnyi me hanymâm hnyi ûnyi eang : anyin ae ca wisa hnyekom hnyi hnyimakan Khong. 22 Anyin a wale ietra ju ânyâm monu eang, me hic ka Than, ame ne he bi ka thang ut köu ûnykûmenen hnyekom. 23 Anyin a oge me wâhmakhmeto a u bala but hnyin waada ae hiny, ke u hwenbâ hnyi hulö. 24 Haba Simona ame thü, ka habe, Hic dr' öbu ka Than hobi kõnya, me me ba ûnyi ame he ka o kõnya hnyi ta je ûnyi öbe ha.

25 Ke ödre hia but thumetoâ me ha hofuc hwan Than, me ödrü me hmetu but Jerusalema ai, me khetâ ûthumetu ae so hnyi je taun ae se hia hnyi Samaria.

26 Haba angela anyin Than ame ha kö Filipino, ka habe, Todrö, he thö ka hnyi hwaiöu, ka hnyi gethen üheny Jerusalema Gaza ai : wale hnyebuba. 27 Me e ame todrö me he : ke wâ bi ke at Aithiope, wale eunuka ae nua hanymen unyi Kanadaki, momo than Aithiope, k' ame tuö tang omjehen momo eling hia, k' ame o thö Jerusalema ai he ka hnyi hmi ; 28 ke e ame he hmetu ka hnyi hwaiöu, k' ame laba

hon anyin kariota, me aú perofeta Isaia. 29 Ke haba Hanu ame ha kö Filipino, ka habe, He hakekenyá thö me tha he me kariota eling. 30 Haba Filipino ame wadring káu, me löng hnen hna aú perofeta Isaia, me e ame ha, ka habe, U me ka únykúme e hnám hna aú? 31 Haingen, ka habe, Ame he ka kámáu ka khanö nya, ke ba bi at ame owisa könya? Me e ame sumató Filipino he ka ölö, me tha laba më. 32 Walang hna sihnalimen e ame aú, ka habe, Adre me lelö e helá me mamoe he ka hlingá;

Ke helá me nokon mamoe hnyi hnyimakan at ame sö leúnen, ame tet hnyibú,

Helá minya e, ame ca khöng hnyimen: 33 Hnyi úen hna öúhnyúkongoa e adre hom gan anyin hna owisa:

Ke ie at ame he ka omanená anyin dö?

Anyin adre hom anyin möt úheny ang hmeledrany.

34 Haba eunuka ame thu kö Filipino, ka habe, Inya oge me hnei u, ia ame ha perofeta eang? hawa ka e bi, ame ne ke at bi? 35 Haba Filipino ame fuc káu, me omanená káu Iesu, hwán hnyi hna sihnalimen eling. 36 Ödru me tiga he eú hnyi gethen, me ödru me o but ka hnyi ke an; me ame ha eunuka ka habe, Walejo an; hawa, e kong he ka bapataiso nya? 38 Me e ame ha me me todru kariota: me ödru me tha utut ka hnyi an, wale Filipino me eunuka; me e ame bapataisoá e. 39 Ke ödru me ölö thö úhedru hnyi an, haba Hanon Than ame húgúnö Filipino but; ke ame ca wá hmetu e hnen eunuka, anyin a e ame he senyiná hnyi deny gethen. 40 Ke adre ö Filipino hnyi Azota: ke e ame khetá tilá úthumetu ae so hnyi ta je taun hia ke ne o but e ame o hnyi Kaisaria.

HNYIMAKAN 9.

KE Saulo bala ame kong hnyekon he ka ootá me hlingá je laten Than, me e ame he ka at bihut ae nua, 2 me sumátá je tusi gan he ka hom ka hnyi ta je sunago hnyi Damaseko, me me he ka c' ödra, me hom Jerusalema ai obaga me omo-mo, e ka hu tavat hmi ame he ka wá. 3 Ke tiga eú hnyi gethen hakekenyá Damaseko: ke ame ie unumelam igigilö e melam únyi hnyi drany: 4 me e ame ta but ka hnyi káná, me ame löng ke hofuc

ame ha káu, ka habe, Saulo, Saulo lö, iéu gam u me okongu nya? 5 Ke haingen, ka habe, U ia Than? Me e ame ha, ka habe, Inya Iesu wale u me labö okongoa: 6 todrö, he thö ka hnyi taun, ke adre me he ka: ha köu hanyám he ka ányá. 7 Ke ame tot hnyibú tavat adre me tha he më, adre me löng hofuc ke ba bi at adre me wá. 8 Me ame todrö Saulo úheny ú hnyi káná, ke e ame bwele but, ke ba únyi ame wá: me adre me lelö thö benyin, me hom e Damaseko ai. 9 Ke kun ta bongon ka wadröu but, ke ame ca han me ic.

10 Ke e hu ke aten hnyi Damaseko, Anania ien; ke haba Than ame ha káu hnyi hna omanená, ka habe, Anania lö. Me e ame ha, ka habe, Than lö, inya ang. 11 Ke haingen Than káu, ka habe, Todrö, he thö ka hnyi getheniny taun, Wisa ien, me hnö hnyi uma umö Juda ge ke at a ien Saulo, at Taraso: anyin a wá bi, e ame hic; 12 ke e a hia but wá at, Anania ien, ame didrö, me ip li hnyamen hon e, me e ame he ka bwele hmetu but. 13 Haba Anania ame thu, ka habe, Than lö, o ge löng ut únyi ge tavat ae se hia bongon at ang, a g' ame ányá gan hmá monu ka ányám tavat ae kap hnyi Jerusalema: 14 ke e hu anyin dut musi eang únyi ge je taben tavat bihut he ka c' ödra hia adre me hawá iám. 15 Haba Than ame ha káu, ka habe, He thö, anyin adre úca e hnán anyik utkaia he ka kap tilá iök ka Aten ke je hnyei, me ta je than, me lakon Isaræla: 16 anyin oge me he ka omanená káu úganiny vec e ame he ka hom can iök. 17 Me ame he but Anania, me didrö ka hnyi uma; ke e ame ip li hnyamen hon e, me ha, ka habe, Saulo lö, liamekeiny mönya, a kunö nya Than Iesu, waleji a manen köu eú hnyi gethen u je he hnyin, m' u me bwela but, me unöngöt ge Hanu Kap. 18 Me ame ie kölu but únyi hnyi li emakan, helá me je unö, me e ame bwela but; ke e ame todrö, me ame bapataisoá e; 19 ke a hia but han, me e ame hwege but.

Ke e ame tha laba me laten hnyi Damaseko hnyi ke je bong. 20 Ke e ame ie kheti Iesu hnyi je sunago, a e thibi Nokon Khong. 21 Ke haba tavat hia adre me löng hwan, k' adre me láia me ha, ka habe, Ca e at ame okongu ödra hnyi Jerusalema adre me hawá ien e? ke e ame o but eang he ka heláe, me me c' ödra me hom but ka hnyi hnyimakan je taben tavat bihut. 22 Ke ame hwege tot Saulo, k' ame ohnyi-

bö tavat Juda hnyi Damaseko, me ohnathoá a haba Iesu, me Keriso.

23 Ke hwaban ta je bong ae se hia, me ame úhnenamö at Juda he ka hlingá e : 24 ke ame manen kö Saulo hnödra hna si hnán. Ke adre me labö tue hnyi ta je homagöule hnyi lany me lit he ka hlingá e : 25 ke ame hom e hnen laten hnyi hnyinghet, me hnahna e hnyi tang únyi hnyi dok ae memang hnyi hak veto.

26 Ke e ame o hnyi Jerusalema, k' ame cubec he ka tha laba me je laten : ke ödra hia adre me outen e, ke adre me ca únykúme bi a e ke aten minya. 27 Ke haba Banaba ame hom e, me ame tha he më ka ta je aposetolo, me e ame omanená ködrin a e ame wá Than eú hnyi gethen, ke a hia but há hofuc káu, me hnen minya hna khetá hwegiá iö Iesu hnyi Damaseko. 28 Me e ame labö tha he mödrin hnyi Jerusalema, 29 k' ame khetá hwegiá hnyi ien Than : ke e ame ha hofuc me ivinö me at Helenisi ; ke adre me elám he ka hlingá e. 30 Ke e khana but je liamekeiny, me adre me hom but e Kaisaria ai, me kuná e Taraso ai.

31 Ke hnahic ut ekalesia hnyi je ke keihen Juda hia, me Galilaia, me Samaria, k' ame khulelau bi ; ke adre me labö he me ot ka Than, k' ame kahwa je hnyekudra únyi ge Hanu Kap, k' adre me osehia but.

32 Haba Peteru ame he hnyi je ke keihen hnyeí hia, me e ame o ka tavat ae kap adre me laba hnyi Lida. 33 Ke e ame wá eling ke at, Ainea ien, at ame mokut hon hnen hna mokut eit ta huna ; anyin e ame mokulec mok ae mat. 34 Haba Peteru ame ha káu, ka habe, Ainea lö, haba Iesu Keriso ame osoi u : todrö, me ányáwia hnám hna mokut. Me e ame ie todrö. 35 Ke haba tavat hia adre me laba hnyi Lida, me Saroná adre me wá únyi eling me hwiö ka Than.

36 Ke e hu hnyi Jopa ke aten, Tabitha ien, k' adre me wia bongon ien, me Doreka : haba momo e, me ünöngöt ge ta je huliwa ae so k' ame betenge ka ta je theduoc. 37 Ke hnyi je bong eling e ame mok, me e ame mokcu : ke adre hia but osúá e, me adre me ip e hnyi hnyeule ethö. 38 Ke ca sâkâú Lida me Jopa, ke a löng ut laten a e but ling Peteru, me adre me kuná káu li at he ka sumâtá, ka habe, Ca bec he ka o köhmun. 39 Haba Peteru ame todrö me tha he mödrü. E ame o but, me adre me hom e ka hnyi hnyeule ethö : ke ame tha

tot më ta je safac hia adre me útengiö, k' ödrin e omanená ta je úkot me je úkhaú ame tibet Doreka, ke tiga e bi unyidra. 40 Ke haba Peteru ame ob' ödrin dut hnyöu ai, k' ame cibouca me hic ; ke e ame hwiö thö ka komok, me ha, ka habe, Tabitha lö, todrö. Me ame bwela but li emakan momo ; ke e ame ö Peteru, me e ame laba thö. 41 Ke e ame iná hnyamen ka momo, me otilá thö e ; ke a hia but hawá tavat ae kap, me wasafac, me e ame ham e ködrin a ga mödrut. 42 Ke ame lung únyi eling hnyi Jopa hia : ke se hia tavat adre me hnyi labageju ka Than. 43 Ke se hia je bong e ame laba hnyi Jopa unyin ke at jia Simona, at ame huliwan je unen meno.

HNYIMAKAN 10.

E HNYI Kaisaria ke at, Konelio ien, e keneturio hnyi utbavat adre me hwenyi ien, vat Italia, 2 e at fáfá hnyekon, k' ame outen Khong tha e me anyin lap hia, me ham ta je betenge ae se ka tavat, me hic bala ka Khong. 3 Ke e ame wá hna omanená, ame ne hnyi awa a naininy, wale ame dit káu angela anyin Khong, me ha, ka habe, Konelio lö. 4 Ke e ame wá hmá e, me ame ot me ha, ka habe, Than lö iéú ! Me haingen ame ha káu, ka habe, A o but hijám je hic me hnám je hna betengo hnyi hnyimakan Khong hnán oúnykúmeá. 5 Ke walang ang kuná thö hnyat Jopa ai he ka hawo Simona, ke ien minya bi Peteru : 6 e ame tha laba me ke Simona at ame huliwan unen je meno, e hnyi hobat köiö umen uma. 7 Ke ame he but angela at a fuc káu, me e ame hawá li lanyin me ke soja at ame outen Khong hanen tavat adre me bi athnyabainy hnyi je bong ; 8 ke a hia but thumetu ödrin ge ta je únyi hia, e ame kun ödrin dut Jopa ai.

9 Nyi, tiga ödrin eú hnyi gethen, ödrin hakekeny jut ka hnyi taun, haba Peteru ame ölö thö ka hnyi hon uma he ka hic hnyi awa a siksiny : 10 me e ame mekih-nänem, me behan : ke adre me tiga pena-pena, me ame o but káu hna omanená ; 11 me e ame wá drany adre khöng, me tang ame utut, helá me mano ae gan adre me hnahna ka hnyi hmeledrany hnyi ta baten a vak : 12 ke ta je meno hia ae úsa vak can eú hnyin, me je meno ame iyáú eang hmeledrany, me je meno ame gá ethö. 13 Me ame o but káu hofuc, ka habe, Peteru lö, todrö, hlingá but, me an ju. 14 Ke

haba Peteru ame ha, ka habe, Than lö, ca e, anyin a oge me ca hnyi an ke únyi ae kap me ikiki. 15 Me adre me olo ha káu, ka habe, Haba hna ányâwia hnen Khong, u ma ca ha, ka habe, e kap. 16 Ódra okun ányá helâe; me adre me kap hmetu thö tang hnyi drany ai.

17 Ke haba Peteru ame tiga únykúme loloá bongon hna omanená e ame wá, wá bi, hnyat a kun' ódrin Konelio, ódrin e elám uma umö Simona, ke ódrin e tot hnyi homagöule, 18 me hongot, me hnei, ka habe, hawa, ame hnyi laba eang Simona, ke ien minya Peteru? 19 Ke Peteru ame tiga únykúme hna omanená, haba Hanu ame ha káu, ka habe, Wá bi, kun ta hnyat ódrin e elóm u. 20 Ke todrö, utut, me tha he mödrin, ke ca loloá bi: anyin oge kun ódrin. 21 Haba Peteru ame utut ka ta hnyat a kun, me ha, ka habe, Wá bi, inya ang öbun e elám: ieu öbun e vhenojem? 22 Ke haingödrin, ka habe, Haba Konelio, keneturio, at ae wisa hwakecin, me ouden Khong, me hna haisoá hnen at Juda hia, ame kú káu hnen angela ae kap he ka hawo u ka hnyi umen uma, me me he ka löng hofuc gam. 23 Me e ame haw' ódrin hnyi uma ai he ka mokut.

Ke nyi e ame tot, me tha he mödrin, ke haba ke je liamekeiny úhedrin Jopa ódrin e tha he më. 24 Hmetu nyi, ódrin e o hnyi Kaisaria. Ke haba Konelio ame lubahing' ódrin, ke e ame ukhacakouá je liamekeiny me, me je lahanen. 25 Ame didrö Peteru, me Konelio ame he he ka iouny më, me ta ju ka hnyi hmelen li can, me khudrung káu. 26 Ke haba Peteru ame otillá thö e, me ha, ka habe, Todrö; iny at minya bi nya. 27 E ame úhnenamö më, k' ame didrö, ke e ame wá tavat ae se hia adre me úkhacakou: 28 me e ame ha ködra, ka habe, E khan' öbun a g' adre hnyi boá at Juda he ka úkhacakou me úhakekenyi me aten ta je hnyei; ke so bi Khong ame hia but omanená kúnya, a oge me ca he bi ka háia at, ka habe, e kap, me ikiki: 29 waleling oge me he jem ka ba ihut hnyi úen adre me hawo nya. Ke oge me hnö walang ang can öbun e hawo nya? 30 Ke haingö Konelio, ka habe, Haba vak ta bong et ang, me oge me hic hnyi awa a naininy hnyi umök uma, ke wá bi, ame tot ke at hnyi hnyimakök a khavá úkhaú ae hadröngöc, 31 k' ame ha, ka habe, Konelio lö, adre hia but löng hijám hic, ke adre hia but únykúme hnám je hna betenge hnyi

hnyimakan Khong. 32 Anyin a wale úkhúnöng dö Jopa ai, he ka hawo Simona, ke ien Peteru, e ame laba hnyi uma umen ke Simona at ame huliwan unen je meno, wale hnyi bobat köiö. 33 Anyin a wale oge me ie úkhúnöng köu; ke so anyin a u but ang, a u je o thö. Anyin a wale öhmun hia but ang hnyi hnyimakan Khong, he ka löng ta je únyi hia ame he Than ka húna köu. 34 Haba Peteru ame ha hofuc, ka habe,

E hnathu oge me wá únykúme a haba Khong ame ca wáhmakhmeto tavat: 35 ke e ame kap at ame ouden e hnyi ta je hnyei hia, wale at ame ányá hwakecin ae wisa. 36 Haba hofuc waleji e amo kuná ka lakon Isaraela, k' ame khetá úthumetu ae so hnyi úsokou a deny Iesu Keriso, (e thibi Tuhan ae nua)—37 me manen hofuc e köbun, waleji adre me haimemená hnyi Juda hia hwán hnyi Galilaia, hwaban bapataiso ame khetá ga Ioane; 38 wale Iseu at Nazareta, ke haba Khong ame hú e hnen Hanu Kap me man; ke e ame labö vhenojem he ká betenge ge at, me osoá tavat ame oveci ódra diaboló; anyin a tha më Khong. 39 Ke öhmun ang hnyat ohnatho ta je únyi hia e ame ányá hnyi hnyei Juda, me hnyi Jerusalema; wale adre hlingá minya me uhno hnyi úö. 40 Ke haba Khong ame omelö hmetu e hnyi bong a kuniny, me ti omanená e, 41 ca ka tavat hia, ke ka tavat thibi adre ohnatho, waleji tavat a bán Khong ka uc' ódrin, a wal' öhmun ang hnyat öhmun e tha han me tha ic më hwaban hnen hna möt hmetu úheny hnyi hna mok. 42 Ke e ame húna köhmun he ka khetá ka tavat, me ohnathoá a e at a úca Khong hnán hnö tavat ae möt me tavat ae mok. 43 Ame ohnathoá gan hnen ta je perofeta hia, a adre me he ka thang degecá but ta je hulö hia anyin tavat adre me labageju káu, únyi hnyi ien.

44 Peteru ame tiga ha hofuc e, me ame ta Hanu Kap hudrin hia adre me löng hofuc. 45 Me ame uthmáhmá tavat adre me labageju a tavat adre peritomon, wale hnyat adre tha he me Peteru, anyin adre me hingálá minya bwihlany wale Hanu Kap hon Aten ta je hnyei. 46 Anyin adre me ling ódrin ódrin e fuc hnyi ta je hwen hnyei me oganá Khong. 47 Haba Peteru ame ha, ka habe Ia ae khana he ka beháná köiö m' adre me ca he ka hnyi bapataiso ódra, tavat adre me hnyi kap Hanu Kap, helá m' óta? 48 Me e ame húna he ka

bapataisoi ödra hnyi iö Iesu Keriso. Ke adre me hom behânâ e he ka tha laba mödra hnyi ke je bong.

HNYIMAKAN 11.

KE a löng ut je aposetolo me je liame-keiny hnyi Juda a ga hia but minya Aten ke je hnyei kap hofuc hwan Khong. 2 Ke ame o thö Peteru hnyi Jerusalema, me adre me iwatretra ju mē tavat adre peritomonâ, 3 me ha, ka habe, U je he ka tavat adre ca peritomonâ me tha han n' ödra. 4 Ke haba Peteru ame hwân he ka omanenâ gaga ködra, ka habe, 5 Inya bi oge me laba hnyi taun Jopa, oge me hic: me oge me wâ hna omanenâ hnyi hnök hna ta mokut, wale ke tang ame utut helâ me mano ae gan adre me hnahna únyi hnyi drany hnyi ta baten a vak; me ame o kõnya únyi eling: 6 ke oge hia but wâ hmâ e, inya oge me únykúme, me wâ ta je menoiny hmeledrany ae úsa vak can, me je meno ae hiny, me je meno ame iyâtú, me je meno ame gâ ethö. 7 Ke oge me löng minya ifucin adre me ha kõnya, ka habe, Peteru lö, todrö, hlingâ but, me an ju. 8 Ke haingök, ka habe, Than lö, ca e; anyin ae ba ke únyi ae kap me ikiki ame hnyi dit ka hnyi hnyimök. 9 Me ame olo thu hnen ifucin únyi hnyi drany, ka habe, Haba hna ányáwia hnen Khong u ma ca ha, me kap. 10 Ke adre ökun ányâ e: me adre me aú hmetu hia thö hnyi dranyai. 11 Ke wâ bi, ame je tot hnyi hoton uma öhmun e laba hnyin, hnyat a kun, adre kun' ödrin kõnya úhedrin Kaisaria. 12 Me ame ha kõnya Hanu he ka tha he m' ödrin me ba loloâ me ca wâhmakhmeto. Ke ame tha he mönya ke je liamekeiny eang a ödrin siks; me öhmun e didrö ka hnyi uma umen at eling: 13 me e ame omanenâ köhmun hnen hna wâ angela hnyi umen uma, wale ame tot me ha kâu, ka habe, Úkhúnöng dö Jopa ai he ka hawo Simona, ke ien Peteru; 14 at ame he ka ha köu ta je hofuc, hnân omeli u me ányâm lap hia. 15 Ke inya oge me tiga hwân he ka fuc, me ame o but ködrin Hanu Kap, helâ me köta ehac hnyi can. 16 Me oge me únykúme thö hofuc hwan Than ame ha, ka habe, Ioane ame bapataiso ge köiö; ke adre me he ka bapataisoi öbun ge Hanu Kap. 17 Anyin a wale haba bwihlany a huan kötin Khong hnyi úen ötin e labageju ka Than Iesu Keriso, ame ne ham minya

ködrin, iny ia, me inya he ka thawâ Khong? 18 Ke adre hia but löng hofuc e, me adre me laba hnyibú me ogânâ Khong me ha, ka kabe, E hnathu Khong ame ham ietra ka Aten ta je hnyei minya, m' adre me möt.

19 Ke haba tavat adre vese hnyi úöveci a kú kö Setefano, me adre me he ke ne o but hnyi Foinike, me Kupro, me Anetioka, adre me ha hofuc hwan Khong ka at Juda thibi. 20 Ke haba keihen gadra a je at Kupro me Kurene, adre me o but hnyi Anetioka, me ha hofuc minya ka at Heleni, me khetâ úthumetu ae so anyin Than Iseu. 21 Me ame tha e mödra hnyamen Than: ke ödra se hia adre me labageju me hwiö ka Than. 22 Ke a löng ut e huen hnyikönyen ekalesia hnyi Jerusalema: me adre me kunö Banaba Anetioka ai: 23 ke ame o but me wâ ibetengió baú anyin Khong, me e ame senyin, me khöu ködra hia he ka kece ka Than ge hnyok ae tethmâ: 24 anyin a e at ae so, ke unöngöt ge Hanu Kap me labageju: ke se hia tavat adre me bi hanen ka Than. 25 Ke e ame he Taraso ai he ka elöm Saulo: 26 k' ame wâ e me hom e Anetioka ai. Ke tha ödrü me ekalesia hnyi khaca huna, k' ödrü nâ tavat ae se hia; ke adre me ibi hwân hnyi Anetioka ka hwenyi ien laten ka habe, Je Kerisiano. 27 Haba hnyi úen eling ame o but hnyi Anetioka ta je perofeta úhedrin Jerusalema. 28 Ke ame todrö ke at gadrin, Agabo ien, me omanenâ ge Hanu a g' ame he ka hu hmiâ ae gan hmâ hnyi hmeledrany hia: wale a hwâdâ thö hnyi úö Kalaudio. 29 Haba laten adre me tha ha he ka kunâ ta je bwihlany ka je liamekeiny adre me laba hnyi Juda, e úcü me hnödra hna ve khana: 30 me adre me ányâ e, me kunâ ka wahi-ngat a deny Banaba me Saulo.

HNYIMAKAN 12.

HNYI úen eling haba Heroda than ame hai hnyamen he ka okongo keihen ekalesia. 2 Me e ame hlingö Iakobo liamekeiny me Ioane ge hele vat. 3 Ke a wâ but a g' ame senyin at Juda, me e ame hwân minya he ka köt Peteru. Wale úen adre me han areto adre me ca levenâ. 4 A hia but kât e, me e ame ip e hnyi uma ceat, k' ame hna e ka je deö soja a vak a úsa vak hnyi je deö, he ka tuö e, k' ame únykúme he ka hom e ka tavat hwaban paseka. 5 Anyin a wale adre me tuö Peteru hnyin

uma ceat : ke haba ekalesia adre me hic újông ka Khong hobi káu. 6 Ke ame o but úen ame he Heroda ka hom e hnyöu ai, k' ame mokut Peteru wanben li soja hnyi hnyinghet eling, k' adre me ca e ge li tö fao : ke ame tuö uma ceat ge hnyat tue cicö hwanuma. 7 Ke wá bi angela anyin Than ame tot unyin, ke ame melam hnyin uma ceat : me e ame khaú vhaö Peteru, me ohmáká e, me ha, ka habe, Ie todrö. Me ame ka kölu but li tö fao únyi hnyi li hnyamen. 8 Ke haba angela ame ha káu, ka habe, Khaú thö, ke ohmá tangen li hnyeécam. Me e ame ányá. Ke haingen káu, ka habe, Khavá thö ányám úkhaú me he hotuk. 9 Me e ame didrut me he hoton ; ke ame ca hamen thibut memang ködrü, me ödrü me didrut hnyöu ai, me vheno ke getheniny taun ; me ame ie hna but he hnen angela. 11 Peteru ame únykúme metoá me e ame ha, ka habe, Oge me wá-hmakhmetoá walang ang a Than ame kuná anyin angela he ka húgúnö nya únyi hnyi hnyamö Heroda, me hna únykúme hia hnen at Juda. 12 Ke a hia but únykúme wia, e ame he ka hnyi uma umö Maria hinyö Ioane, ke ien minya Mareko ; wale ame úkhaçaköu hnyin tavat ae se hia he ka hic. 13 E ame tiga seseto hlinginy hwanuma, me ame o but ke hlu he ka wá, Roda ien. 14 Ke e ame wáhmakhmetoá a ifuci Peteru e, me ame ca khöng hwanuma ge senyin, ke e ame wadring ka hnyin uma me úthumetu, ka habe, Wale but eú Peteru ame tot hnyi hwanuma. 15 Ke haingödrin káu, ka habe, U je monu but. Ke e ame hwege bala ha, ka habe, e hnathu. Me ödrin e ha, ka habe, Ame ne angela e. 16 Ke ame labö seseto bala Peteru : ke ödrin e hia but khöng me ödrin e wá e, me adre me uthmáhmá. 17 Ke e ame tutubi ödrin ge hnyamen he ka laba hnyibú, me e ame thumetu ödrin ge hnen Than hna hom e únyi hnyi hnyin uma ceat. Ke haingen, ka habe, Thumetu Iakobo me ta je liamekeiny ge ta je únyi eang. Me e ame he but, me he ka hnyi ke dok. 18 Ke a lany jut, me ame hlohlo kan hmá je soja, a hawa ang Peteru a hia thö. 19 Ke a hia but Heroda elám e, ke ame ca wá bi, me e ame hnö tavat tue, me húna he ka hling'

ödrin. Me e ame he Kaisaria ai úheny Juda ka laba eling.

20 Ke ame hmönyin hnyekon ka at Turo me Sidona : me adre me tha he káu hnyi hnyok a khaca, ke adre hia but hum Balaseto at ame tuö je hnyeuleny than, me ihumidra, ke adre me sumat úsoköu, ke e hu jeú hnyi idra hnyei únyi hnyi hnyei iny than. 21 Ke hnyi ke bong adre hia but thu, Heroda ame khavá je úkhaéien than, me tabá anyin theron, me khet ködra. 22 Haba tavat adre me hongot, ka haba, Ifucin ang khong, ke ca ifucin bi at. 23 Me ame ie kot e angela anyin Than, anyin a e ame ca ogáná Khong : me ame an e ge ahnyöng, me me moku.

24 Ke ame khulelau hofuc hwan Khong me kú gan hmá.

25 Ke haba Banaba me Saulo, ödrü me hmetu úhedru Jerusalema, k' ame um dö hanymödrü, k' ödrü tha hum Ioane, ke ien minya Mareko.

HNYIMAKAN 13.

E HU ke je perofeta me hnyat úne hnyi ekalesia Anetioka, wale Banaba, me Simeona ke ien minya Nigeru, me Lukio at Kurene, me Manaen a tha hat me Heroda than, me Saulo. 2 Ke ödrin e huliwa ka Than, ke ányá ca han, me ame ha Hanu Kap, ka habe, Ovesei Saulo thö me Banaba könya hobi káu huliwa oge me haw' ödrü káu. 3 Ke adre hia but ányá ca han me hic, me ip je hnyamödrin hudru, me ödrin e kun' ödrü but.

4 A hia but kun' ödrü hnen Hanu Kap, me ödrü me he Selukia ai ; me tabá hu úhedru e Kuperu ai. 5 Ke ödrü but hnyi Salamis, me ödrü me omanená hofuc hwan Khong hnyi ta je sunago umen at Juda : ke haba Ioane ame bi atödrü. 6 Ke ödrin e hia but vheno bomene hia ke ne o but Pafu, me ödrin e wá ke at bibihwakecin, a perofeta thoi, Bar-Iesu ien, at Juda ; 7 k' ame tha e me konesula a Segio Paulo at ae metá. Ke e ame hawo Banaba me Saulo, ame weny he ka löng hofuc hwan Khong. 8 Ke haba Eluma (adre me wia ien heláe) at bibihwakecin ame ivinö mödrü, k' ame heleú deny he ka wia konesula únyi hnyi labageju. 9 Ke haba Saulo (wale Paulo) a unöngötö ge Hanu Kap, e ame wá hmá e, 10 me ha, ka habe, At ae unöngötö ge je thoi hia, me monu, u nokon diabolö, ke iwahnai-hmiöny me hwakecin hia ae wisa, hawa, u

me ca menâ he ka ohwalö je hwakecin hia ae wisa anyin Than? 11 Ke wâ bi, walang ang e but hom hnyamen Than, me u me he ka wadröu, k' u me ca he hmetu ka wâ seünö ke ne o but hnyi ke ün. Me ame ie o but kâu hadedak helâ me lit; me e ame he monumonu k' ame khaütetâ at he ka lelö e. 12 Ke a wâ but konesula hna mâdrâ, me e ame labageju, ame lâiâ hna ûne ûnyi ge Than.

13 Ke haba Paulo me anyin bunyen ödrin e tabâ hu ûhedrin Pafö, me ödrin e khöp dö Peregä hnyi Pamafulia: ke haba Ioane ame hn' ödrü but me hmetu Jerusalem ai. 14 Ke ödre hia but he ûhedru Peraga, me ödrü me o but hnyi Pisidia; me ödrü me didrö ka hnyi sunago hnyi bong sabbath, me laba ju. 15 Ke adre hia but aú hnanyibu me je perofeta haba je taben sunago ödrin e ûkhünöng ködrü he ka ha, ka habe, Liamekeiny many lö, a ne hu hofuc hnân sihwege gabu hobi kâu tavat, ha th' öbu. 16 Haba Paulo ame todrö me hinöbeny, me ha, ka habe,

At Isaraela lö, me öbun tavat öbun e outen Khong, löng ju. 17 Haba Khongon hnyeï ang Isaraela, ame úca lakamöta, me ogöranyâ tavat waleji k' adre me tiga laba kanyua hnyi hnyeï Aigupito, ke e ame hum ödra ûheny e ge hnyamen ae hwege. 18 Ke helâ me fâte je huna e ame hok-hnyokâ hwakecidra hnyi hnyeububa. 19 Ke a hia but ohia je hnyeï a seven hnyi hnyeï Kanana, e ame khene idra m' adre me labâ helâke foa haded me fitte je huna: 20 ke hwaban e, e ame ham tavat owisa ködra ke ne o but hnyi üö Samuela perofeta. 21 Ke hwaban e, adre me sumâtâ than: me haba Khong ame ham ködra Saulo a nöku Kiso, aten tribu Beniamina hnyi je huna a fâte. 22 Ke a hia but hom e, e ame otölö Davita me me tuhödra; ke e ame ohnathöa e, ka habe, Oge ö Davita nöku Jese, at a helâ me hnyekuk, at ame he ka ânyâ hia wek. 23 Ke haba Khong ame hia but oâ ka at Isaraela ûnyi hnyi je mâtrâniny at eling At ûhömeli, a Iseu, helâ me hna ha bânâ gan; 24 ke a bân Ioane ka khetâ bapataisoiny ietra ka at Isaraela hia, ke e tiga ca o bi. 25 Ke ame tiga ohwâdâ hanymen hnö Ioane, me e ame ha, ka habe, leü ûnykúmenöbun gak? Ca inya bi. Ke wâ bi, ame he jem ke at hotuk, e ca úcú bi nya he ka thang ut taben li hnyeücan. 26 Hnyat me lakeiny lö, je lakon je mâtrâni Aberahama, me

tavat adre me outen Khong unyibun, adre kunâ köta hofucin ûhomeli ang. 27 Anyin a tavat adre me laba hnyi Jerusalem, me ta je taben, adre me ca wâhnakhmeto e me hofuc hwan je perofeta adre me labö aú hnyi je sabbath, me adre me ohwâdâ bi hofuc e hnyi hnödra hna ohnauhangoâ e. 28 Eja ke ne ba can mok adre me wâ gan, adre me sumatö Pilato he ka hlingâ e. 29 Ke adre hia but ohwâdâ hia hna sihnalimen gan, me adre me hom but e ûnyi hnyi üö, me ip hnyi erkemok. 30 Ke haba Khong ame omelö hmetu thö e ûheny hnyi hna mok: 31 ke haba hnyat waleji ödrin e tha he më ûhedrin Galilaia Jerusalem ai ödrin e wâ e hnyi je bong ae se, wale hnyat ödrin e ohnathöa e walang ang ka tavat. 32 Ke öhmu me khetâ köbun uthumetu ae so, a haba hna ha bânâ ka lakamöta, 33 me a hia but ohwâdâ hnen Khong ka lakuta hnyi hnen hna omeli Iesu hmetu thö; helâ me hna sihnalimen hnyi salamo a loiny, ka habe, U thibi Nökuk, oge me hnöku u hnyi bong ang. 34 Ke e ame omelö hmetu thö e ûheny hnyi hna mok, k' ame ca he hmetu bi ka wâ hna bobot, me walang hnen hna ha ehac, ka habe, Oge me he ka ham köbun ta je ûnyi ae kap ke ûnyi hnathu anyi Davita. 35 Anyin a e ame ha hmetu hnyi ke salamo, ka habe, U me ca he ka hna Âtâm ae Kap he ka wâ hna bobot. 36 Haba Davita ame ânyâ weny Khong hnyi anyin dö, me ame mokut bi, k' adre me ip e unyin lakamen, ke ame wâ hna bobot: 37 ke ame ca hnyi wâ hna bobot hnen at wale Khong ame omelö. 38 Anyin a wale, hnyat me lakeiny lö, e so öbun e wâ ûnykúme a g' adre me khetâ köbun degecâ hulö deny at ang: 39 ke kaba hnyat adre me labageju, me adre hai wis' ödra hnyi ta je ûnyi hia, wale ae ca khana hnanyibu anyi Mose he ka hai wis' öbun hnyin. 40 Anyin a wale, o 'bun âu, wâ e nye o but köbun hna ha hnen ta je perofeta, ka habe,

41 Öbun tavat öbun e hmiâ, wâ ju, me lâiâ, me laba iyong bi;

Anyin a oge me ânyâ huliwa hnyi bong-ubun je bong,

Wale huliwa, ame ne he ke at ka omanenâ e köbun, me öbun e ca he ka kap.

42 Ke ödrin e didrut, me ödrin e sumâtâ e he ka khetâ hofuc hmetu ködra hnyi sabbath ame he ka o. 43 Ke ame vese but ûkhacaköu, me ame he hotu Paulo me

Banaba tavat Juda ae se hia, me hnyat outen Khong adre me kap ka hnyi hmi Juda : me ödru me ha me üne ködra he ka tethmä hnyi betenge baü anyin Khong.

44 Ke ame o sabbath me ame ok minya but heläke taun hia he ka löng hofuc hwan Khong. 45 Haba at Juda adre me wä tavat ae se hia, me adre me gan hmä hmönyin, me ivinöâ ta je ünyi ame ha Paulo, k' adre me fuc bi gan. 46 Me ame hwege thö Paulo me Banaba he ka ha, ka habe, E ücü he ka bán ka omanená köbun hofuc hwan Khong. Ke can bi anyin a öbun e hna degecä me öunyibäüâ hobi köbun bi möt ame ca ba balua ; waleling me öhmu me hwiö ka Aten ta je hnyei. 47 Anyin a haba Than ame lüna köhmun, ka habe,

Oge me otillö u, me hnän melaminy Aten ta je hnyei,

Me u me he ka tot hnän ühömeli ke ne o but hnyi can hmeledrany.

48 Ame löng e hnen Aten ta je hnyei, me adre me senyin me ogänâ hofuc hwan Khong : me ame labageju hnen tavat hia adre me hawä ka hnyi möt ame ca ba balua. 49 Ke ame khulelau hofuc hwan Than hnyi hnyei hia. 50 Ke haba at Juda adre me cubec omomo ae nua a hnyat outen Khong, ke hnyat ae hnathu hnyi taun he ka oveci Paulo me Banaba, me ob' ödru ünyi hnyi je hnyigöulödra. 51 Me ödru me jijingä ködra kânäiny li hnyeüca-dru, me he but Ikonio ai. 52 Ke a unöngötö laten ge senyin me Hanu Kap.

HNYIMAKAN 14.

KE ödru e Ikonio, me ödru me tha didrö ka hnyi sunago anyin at Juda, me ha hofuc, me se hia at Juda me Heleni adre me labageju. 2 Ke haba hnyat Juda a tavat adre me ca üling, adre me cubec me ohmönyinâ hnyekon aten ta je hnyei ka je liamekeiny. 3 Anyin a wale e beü hmâ hnödrü hna laba eling me ha hwegiä ge Than, ke e ame ohnathoâ hofucin anyin ibetengiö, k' ame hna ködra he ka änyä je haten me üöman ge je hnyamödrü. 4 Ke ame khekhe lo but tavat ae se hia hnyi taun ; ame tha hien keihen me at Juda, k' ame tha hien me je aposetolo keihen. 5 Ke ame utut Aten je hnyei me at Juda tha ödra me anyidra je taben, he ka okongu ödru, me lü' ödru ge veto, 6 me e khan' ödru but, me kec ut ka hnyi li taun Lukaonia, wale Lusetera, me Derebe,

me je ke keihen igigilö : 7 ke ödru me khetä eling üthumetu ae so.

8 Wale ke at ame laba hnyi Lusetera ae mat li can, ae hwali ünyi hnyi hnyekon hinyen, ke ame ca munyi he bala. 9 E ame ling Paulo ame fuc : me e ame wä hmä e, me wälmakhmeto ae unyin labageju hnän osoâ, 10 me ame ha hwegiä, ka habe, Tot wisa thö ge li cam. Me e ame ututut me he. 11 Ke a wä but tavat ae se hia hna änyä hnö Paulo, me adre me ogöranyä ifucidra hnyi hwen Lukaonia, ka habe, Ame utut köta je khong helä me je at. 12 Ke adre me hwenyi iö Banaba, me Zeus, ke haba Paulo, me Heremes, anyin a e at ame hnyimen ühnenamö. 13 Ke haba at bihut kö Zeus, a cicö taun, e ame hom but ka hnyi homagöuleny je bolok, me je vongon üö adre hwäwä, ame tha weny me tavat he ka hudo. 14 A löng ut li aposetolo wale Banaba me Paulo, me ödru me kia but anyidru li ükhaü, me wadring ka hnyi wanben tavat ae se hia, me fuc hwege, 15 ka habe, je than lö, ieu gabun öbun e änyä je ünyi e? Öhmu li at ang helä me öbun, öhme hom köbun üthumetu ae so, m' öbun e he ka hna degecä ta je ünyi e ae ünyi baü, me hwiö ka Khong ae möt, at a op drany me hmeledrany me köiö, me ta je ünyi hia hnyin : 16 at ame hna ta je hnyei hia ehac he ka vheno dedra ta je gethen. 17 Ke e bala bi anyin hna ohnatho, anyin a e ame mädrä so, wale ame ham köbun we ünyi hnyi drany, me je üen ae widrany, me osekunä je hnyekubun ge jeü me senyin. 18 Ke ödru me ha hofuc e, ke gan hmâ anyidru huliwa he ka thawä tavat m' adre me ca bihut ködrü.

19 Ke ame o but käe, at Juda ühedra Anetioka me Ikonio, me hinö fuc ka tavat, me adre me luö Paulo ge veto, me adre me lelö thö e ka hnyi hoton taun, adre me ünyküme ma mokcu. 20 Ke haba laten ödrin e tiga tot igigilö e, me e ame todrö, me he ka hnyi taun : ke nyi e ame tha he me Banaba Derebe ai. 21 Ke ödre hia but khetä üthumetu ae so ka taun eling me ohmehmela tavat ae se hia he ka löng, me ödru me hmetu but Lusetera ai, me Ikonio, me Anetioka, 22 ödru me ohmä je hnyekon laten, me sihwegi ödra he ka tethmä hnyi labageju, me ha, ka habe, hamöta he ka dit ka hnyi dökhü dokhon Khong deny ta je vec ae se hia. 23 Ke ödre hia but otillä wahingat hobi ködra hnyi ta je ekalesia, ke ödre hic me änyä ca

han, me ödrü me hn' ödra but ka Than, at adre me labageju kâu. 24 Ke ödre vheno Pisidia me o but hnyi Pamafulia. 25 Ke ödre hia but ha hofuc hnyi Perega, me ödrü me o but Atalia ai; 26 me ödrü me tabâ hu úhedru e Anetioka ai, dok adre me hn' ödrü hnyin ehac hnyi ibetengiö báú anyin Khong hobi kâu huliwa ödrü me ohwâdá. 27 Ke ödrü me o but, me ödrü me úkhacaköüâ ekalesia, me omanená ta je únyi hia thithö ame tha ányâ mödrü Khong, waleji a g' ame khöng hwanumen labageju ka Aten ta je hnyei. Ke e beü bi hnödrü hna tha laba me laten.

HNYIMAKAN 15.

KE ame o thö keihen úhedrin Juda, me ná je liamekeiny, ka habe, Adre me ne ca peritomoni öbun helâ me hwakeci Mose, me ca khan' öbun he ka möt. 2 Haba Paulo me Banaba ödrü me ivatetra me ivinö m' ödra, me adre me thamüâ he ka kunö Paulo me Banaba me keihen gadra Jerusalema ai ka ta je aposetolo me wahingat, can hnödra hna ivinö. 3 Ke ame su ödrin ekelesia, ke ödrin e gethen hnyi Foinike me Samaria, k' ödrin e omanená ihwiöiny Aten ta je hnyei; me ödrin e oküâ senyin ka ta je liamekeiny hia. 4 Ke ödrin e o but hnyi Jerusalema, ke ame köp ödrin hnen ekalesia, me je aposetolo, me wahingat, me ödrü me omanená ta je únyi hia thithö ame ányâ Khong únyi gadru. 5 Ke ame todrö keihen je Faresaio a hnyat labageju, me ha, ka habe, E únyi hnathu he ka peritomoni ödra, me húna ködra he ka vheno hnanyibu anyi Mose.

6 Me ame úkhacaköu thö je aposetolo me wahingat he ka úhnenamö únyi eling. 7 Adre hia but ivinö gan hmâ, me ame todrö Peteru me ha ködra, ka habe,

Hnyat me lakein lö, e khan' öbun dut ehac a hnen Khong hna úca ke at gabun, me me he Aten ta je hnyei ka hnyi löng hofucin úthumetu ae so únyi hnyi hnyimök, me me labageju. 8 Ke haba Khong at ame wâhmakhmetoâ je hnyok ame ohnathoâ ködra, k' ame ham ködra Hanu Kap, helâ minya ji kötin; 9 ke e ame ca wâhmakhmetu ötin bi mödra, ame ányâwia je hnye-kudra ge labageju. 10 Anyin a wale ieu gabun öbun e cubec Khong, me ip hnân úhúkálákouâ hon nyin je laten, waleji ae ca khana lakamötin, m' ötin minya he ka vaden? 11 Ke ötin e labageju a g' adre me

he ka omeli ötin helâ me ödra ge betenge baü anyin Than Iesu.

12 Me ame laba hnyibü but úkhacaköu hia; me adre me vehling Banaba me Paulo ödrü me úthumetu ge je haten me je úöman ame ányâ Khong únyi gadru unyin Aten ta je hnyei. 13 Ke ödre hia but fuc, haba Iakobo ame ha, ka habe,

Hnyat me lakeiny lö, ling nya ju: 14 Haba Simona ame hia but omanená hnen Khong hna senâ bánâ Aten ta je hnyei, he ka hom únyi gadra hnyei hobi kâu ien. 15 Ke khaca thibi e me hofuc hwan je perofeta; helâji me hna sihnalimen, ka habe,

16 Hwabab ta je únyi e oge me he ka hmetu,

Ke oge me he ka hai uma menâ umö Davita a ü;

Me oge me he ka op hmetu je dok ae hmouca hnyin,

Me oge me he ka otilâ e:

17 Madre me he ka elâm Than hnen ta je kolon tavat,

Me Aten ke je hnyei hia wale adre hwenyi iödra únyi hnyi iök,

18 Haingen Than, at ame haimemenâ ta je únyi e hwân hnyi hna op hmele-drany.

19 Anyin a wale, haba únykúmenök, e so ötin e ca ohmakâ tavat unyin Aten ke je hnyei adre me hwiö ka Khong; 20 ke so ötin e he ka sihnalimen ködra he ka úsâ-kâü me ta je únyi ae ikiki anyin je hnathat, ke bi únyi monu, ke je meno adre me noc nyin, ke dra. 21 Anyin ae hu ga Mose tavat hwân hnyi je dö kâú adrem, adre me khetâ e hnyi ta je taun hia, k' adre me labö aü eiö hnyin je sunago hnyi je sabath hia.

22 Ke so ling ka ta je aposetolo, me wahingat, me ekalesia hia he ka úca ke li at gadra bi, me kun' ödrü Anetioka ai tha ödrü me Paulo me Banaba; jia Juda, ke ien minya Basabasa, me Sila, li at ae nua unyin je liamekeiny: 23 k' ödrü me hom adre me sihnalimen, ka habe, Haba je aposetolo, me je liamekeiny a wahingat, me adre me italofa me je liamekeiny a Aten ta je hnyei hnyi Anetioka, me Suria, me Siliakia: 24 Öhmun e löng a g' ame ohmaki öbun ge ifucin ke je hnyat úhedrin ang unyihmun, k' ödrin e omonâ je hnyekubun; waleji öhmun e ca húna ködrin; 25 ke tha hnyekuhmun dut, me so köhmun he ka kunnâ li at köbun adre me úca he ka tha he me

Banaba me Paulo, laoúnykúmi hmun, 26 wale li at ödrü me ca oúnyihnathoá anyidru möt ehac hobi káu ien Tuhöta a Iesu Keriso. 27 Anyin a wale, öhmun e kunö Juda me Sila, m' ödrü me he ka ha ta je únyi a ka e ge li hnyimödrü. 28 Anyin ae so ka Hanu Kap, keso minya köhmun, a g' adre me ca he bi ka húgo gánâ hok köbun, hon ta je únyi eang ae úcú, ka habe ; 29 ca kâlâ je meno adre me hudo ka je hnatheat, me dra, me ta je meno adre me noc nyin, ke ca bi únyi monu ; öbun e ne úsákátö me ta je únyi e, me öbun e so but. Ötin iouny dö.

30 Ke adre me kun' ödrin, me ödrin e o but hnyi Anetioka ; ke ödrin e hia but úkhacaköuâ tavat ae se hia, me ödrin e ham tusi. 31 Ke adre hia but aú, me adre me senyiná hna okahw' ödra. 32 Ke haba Juda me Sila, a li perofeta ödrü, me ödrü me okahwâ je liamekeiny me ha hwegiödra ge ta je hofuc ae se hia. 33 Ke beú hmâ hnödrü hna laba, me ame kun' ödrü soi ödrü but hnen je liamekeiny ka tavat adre me kun' ödrü. 35 Ke haba Paulo me Banaba, me ke je hnyat ae se, ödrin e laba hnyi Anetioka, k' ödrin e úne me khetâ hofuc hwan Than.

36 Hwabab ke je bong, haba Paulo ame ha kö Banaba, ka habe, Ötu he hmetu ka wâ je liamekeiny hnyi ta je taun hia waleji öte khetâ hnyin hofuc hwan Than, adre me hawa la. 37 Ke we Banaba he ka hawo loane minya, ke ien Mareko. 38 Ke haba Paulo ame únykúme e ca so bi he ka tha he mödrü a a kec ehac gadru úheny Pamafulia, ke ca tha he mödrü ka hnyi huliwa. 39 Me ödrü me iwatetra, me ödrü me úsákátö but, haba Banaba ame hawo Mareko, me tabâ hu Kuperö ai ; 40 ke Paulo ame úcö Sila me he, ame hn' ödrü but ka hnyi ibetengiö baú anyin Than ge je liamekeiny. 41 Me e ame vhenö Suria me Silikia, ame sihwegiâ ta je ekalesia.

HNYIMAKAN 16.

ME e ame o minya hnyi Derebe me Lusetara : ke wâ bi eling ke aten, Timoteo ien, nokon momo Juda at ame labageju ; ke at Heleni bi kamen. 2 Adre haisö e hnen je liamekeiny hnyi Lusetara me Ikonio. 3 E we Paulo e ame he ka tha he mē ; me e ame hom e me peritomonâ, anyin ae hu tavat Juda hnyi je ke keihen eling : anyin ae khan' ödra hia a at Heleni kamen. 4 Ke ödrin e vhenö je taun, me

ödrin e ham ködra ta je hnanyibu, waleji a otílâ je aposetolo me wahingat hnyi Jerusalema. 5 Me adre me otethmä ekalesia hnyi labageju, me bi hanen hnyi je bong.

6 Ke ödrin e vhenö Ferugia hia me hnyei Galatia, haba Hanu Kap ame thaw' ödrin he ka ca ha hofuc hnyi Asia ; 7 ke ödrin e o but cicö Musia, me ödrin e únykúme he ka he Bithunia ai ; ke ame ca hn' ödrin bi Hanu Iesu ; 8 me ödrin e nulâ Musia me o hnyi Troas. 9 Ke Paulo ame wâ hna omanenâ hnyi lit ; Ame tot at Makedonia, me sumâtâ e, ka habe, He but jem Makedonia ai he ka hadru' öhmun. 10 Ke a hia but wâ hna omanenâ, öhmun e ie penapena ka he Makedonia ai, anyin a öhmun e wâhmakhmeto a ga hia but Than kun' öhmun he ka khetâ ködra úthumetu ae so.

11 Anyin a wale öhmun e tabâ hu úheny Troas, me kec wisa Samotheraki ai, me nyi Neapoli ai ; 12 ke úhehmun e, Filipi ai, taun ae beönua hnyi ke keihen eling hnyi Makedonia, ke koloni : ke öhmun e laba hnyi taun ang hnyi ke je bong. 13 Ke hnyi bong sabath, öhmun e he ka hnyi hoton taun hnyi baten wagewe, waleji öhmun e únykúme he ka wâ ke dok hnân hic ; ke öhmun e laba ju, me ha hofuc ka watomomo adre me úkhacaköu eling. 14 Ke ame ling öhmun hnen ke momo Lidia ien, at ame úcú mano ae udrudrà hlit, aten taun a Thuataira, at ame hmi ka Khong : ke haba Than ame khöng ut hnyekon he ka löng ta je hofuc ame ha Paulo. 15 Ke adre hia but bapataisoâ e me anyin lap, me e ame haw' öhmun, ka habe, Öbun ka únykúme a inya oge me labageju ka Than, me ai öbun ka hnyi umök uma, ka laba. Me e ame thaw' öhmun.

16 Ke hnyi ke bong öhmun e he ka hnyi dok adre me hic hnyin, me ame úkhanö thö möhmun hlu a delec hanu ame bi obotkong, ke se hia omjeú ame o ka latuban, troban anyin bibihwakecin. 17 K' ame he hotu Paulo hlu eling, me öhmun, k' ame ha hwegiâ, ka habe, Lathnyabainy Khong ae beönua hnyat ang, tavat adre me haime-menâ köbun gethen deny möt. 18 Ke se hia je bong e ame ányâ e. Me ame hmak hnyekon Paulo, me e ame hwiö me ha ka hanu, ka habe, Inya oge me ha köu hnyi iö Iesu Keriso he ka didrut úhem hnyi hnyin. Me e ame didrut hnyi awa eling. 19 Ke a wâ but hnen latuhan ae ba hmetu deny omjeú ködra, me ödrin e köt

Paulo me Sila, me lili ödru ka tavat musi hnyi hna úcú, 20 me ödrin e hum ödru ka je taben, me ha, ka habe, Haba li at Juda eang, ödru me omonoá anyita taun, 21 me únö je hwakecin ae ca úcú kôta a at Roma he ka kap me mádrá. 22 Me ame tha todrö tavat ae se hia ködru : ke haba je taben, ödrin e kia but je khauödru, me úkhúnöng he ka kuc ödru ge je osö. 23 Ke ödra osehia kuc ödru, me adre me khu' ödru thö ka hnyi uma ceat, me húna ka at tuö uma ceat he ka tu' ödru wia : 24 e ame löng hofuc eling, me e ame khu' ödru ka hnyi hnyeule eiö hnyi hnyin uma, k' ame ohmá li cadru hnyi utö. 25 Ke hnyi wanbenset haba Paulo me Sila ödru me hic me khumöng ka Khong, k' ame ling ödru hnen tavat wale adre me c' ödrin minya ; 26 me ame ie o but hwiöi ae gan hmá, me jijingá je taben uma ceat : me ame ie me-mang ut hlinginy je hwanuma hia ; me ame ok ut je hna c' ödrin. 27 Ke ame hmak dö at tuö uma ceat, me wá ta je hwanumen uma ceat adre hia but khöng, me e ame oc dö anyin bele vat he ka hlingá e bi, anyin a e ame únykúme a kec ut tavat adre ca. 28 Ke haba Paulo ame ha hwegiá, ka habe, Ca mē okongu u bi, anyin a öhmun hia ang. 29 Me e ame ie hongot he ka hom je okúntü, me wadring ka hnyi uma, k' ame ta öbubuny hnyi hnyimakö Paulo me Sila, 30 me hum ödru but hnyöu ai, me ha ka habe, Li than lö, ieú hanyimök oge me he ka ányá me inye mödrut? 31 Ödru me ha, ka habe, Labageju ka Than Iesu, me u me he ka möt, me ányám bi lap. 32 Me ödru me ha hofuc hwan Than káu, me ködra hia hnyin umen uma. 33 Me e ame hum ödru hnyi awainy lit eling me hneú hwadeñy je osö ; me ödru me bapataisoá e me anyin hia lap. 34 Me e ame su ödru ka hnyi umen uma, me ip jeú hnyi hnyimaködru, ke haba e me anyin lap hia ödrin e syenin me labageju ka Kkong.

35 Ke a lany jut, haba je taben adre me kuná je athnyaba he ka ha, ka habe, Hna but li at e he ka he. 36 Me ame ha at ame tuö uma ceat hofuc eling kö Paulo, ka habe, A úkhúnöng je taben he ka hn' öbu but ; anyin a wale, didrut öbu, ke tha he th' öbu me hnahic. 37 Ke haba Paulo ame ha ködrin, ka habe, Adre hia but kuc' öhmun hnyi hnyimakan tavat, k' at tiga ca hnei öhmu, a li at Roma öhmu, ke adre hia but c' öhmu ; ke walang ang, adre me

he ka ob' 'öhmu duöngi öhmu? ohe ; e so adre me he jem he ka hum öhmu hnyöu ai. 38 Haba je athnyaba adre me ha ta je hofuc eling ka je taben : ke ödrin e löng ut a ödru li at Roma, me ödrin e ot ; 39 me ödrin e he but me bi so ködru ; ke a hia but hum ödru hnyöu ai, me ödrin e sumat ödru he ka he but únyi hnyi taun. 40 Me ödru me didrut úhedru hnyi hnyin uma ceat, me didrö ka hnyi uma umö Lidia : ke ödre hia but ionuny me je liamekeiny, me ödru me sihwegi ödra, me ödru me he but.

HNYIMAKAN 17.

KE ödru me he hnyi Amefipoli me Apolonia, me ödru me o hnyi Thesalonika, ke e hu sunago eling anyin at Juda : 2 ke haba Paulo ame didrö ködra, helá me hwakecin, ke kun ta sabath e ame úhne-namö mödra je hna sihnalimen, 3 ame lau, me ha ködra, ka habe, e úcú Keriso he ka hom vec, me möt hmetu úheny hnyi hna mok ; haingen minya, ka habe, haba Iesu eling wale oge me omanená köbun, me wale thibi e Keriso. 4 Haba keihen gadra, adre me kap, me tha laba me Paulo me Sila : heláe minya, se hia at Heleni, tavat adre me outen Khong, me ke je momo minya hnyat ae únyi hnathu. 5 Ke haba at Juda adre me hmönyidra, me hawá tavat ae kong úhedra hnyi hna úcú, me bi hanödra, me omonumonó taun hia ; me adre me utut ka hnyi uma umö Jasona, me adre me elám deny he ka hum ödru ka tavat eú hnyöu. 6 Ke adre me ca ö 'dru, me adre me lili Jasona me ke je liamekeiny ka tavat musö taun, k' adre me fuc hwege, ka habe, Haba hnyat ang a tavat adre me omonumonó hmeledrany, me ödrin e o but minya eang ; 7 ke e köp ödrin Jasona : ke odra hia hnyat hanyáúú ta je hnanyibu anyi Kaisara, haingödra, ka habe, e hu ke than bi a Iesu. 8 Ke adre me ohmaká hnyekon tavat ae se hia, me hnyat musö taun, at ka löng je hofuc e. 9 Ke ödrin e kap haten únyi ga Jasona me keihen, me adre me hn' ödrin dut.

10 Haba je liamekeiny, me adre me ie kunö Paulo me Sila hnyi lit Berea ai : ke ödru me o but me ödru me didrö ka hnyi sunago anyin at Juda. 11 Ke beönua hwakecin ae so ge tavat ang hon at Thesalonika, anyin adre me kap hofuc ge je hnyekudra ke wedra, k' adre me elám je hna sihnalimen hnyi je bong, he ka wá hna-

thuiny ta je únyi e. 12 Anyin a wale, ödra se hia adre me labageju; helâe minya ke je momo Heleni hnyat ae únyi hnathu, ke se hia minya obaga. 13 Ke ame löng at Juda hnyi Thesalonika, a ga hia but Paulo khetâ hofuc hwan Khong hnyi Berea, me adre me he kâe, me obwebwelâ me omonumonoâ tavat ae se hia. 14 Me haba je liamekeiny adre me ie kunö Paulo ka hnyi hobat köü: k' ame laba biju eling Sila me Timoteo. 15 Ke haba hnyat ödrin e ip Paulo me ödrin e tha he më ke ne o but hnyi Athenai: ke e ame húna ködra he ka ha kö Sila me Timoteo, ka habe, e so ödrü ma ie he but kâu, me ödrin e hmetu.

16 Ke haba Paulo ame tiga halubahing' ödrü hnyi Athenai k' ame hmak hnyekon anyin a e ame wâ taun ae unöngöt ge ta je hnatheat. 17 Anyin a wale, e ame ivinö me at Juda hnyi sunago, me tavat adre me outhen Khong, me tavat minya adre me iouny me hnyi je bong hnyi hna úcú. 18 Me ame ivinö me keihen hnyat bemetâ a latö Epikureo, me hnyat Setoiko. Haingen keihen ka habe, Ieú ame he ka ha hnen at ang ame fuc bebehü? Ke haingen keihen, ka habe, Haba e, me helâ me at ame omanená ta je khong kanyua: anyin a e ame kheti Iesu ke möt hmetu. 19 Me adre me kât e, me hom e Areopago ai, me adre me ha, ka habe, Hawa e so köhmun he ka hnyi khan' öhmun hna úne eang ae teb únyi u me ha? 20 Anyin a u me hom ka hnyi je hnyikönyöhmun ke ta je únyi bi: anyin a wale, e bewehmun he ka wâ únykúme bongon ta je únyi e. 21 (Ke ba ke únyi ame vhenö at Athenai hia, me ta je atkanyua adre me laba eling, ke so bi he ka omanená me löng ke únyi ae teb únyi.) 22 Haba Paulo ame todrö hnyi wanben Areopago me ha, ka habe,

At Athenai lö, oge me wâhmakhmeto a e gan hmâ anyibun ot ka ta je khong thoi hnyi ke ta je únyi. 23 Anyin a oge me ngenü me wâ ta je únyi öbun e hmi kâu, ke oge me wâ minya ke taben hut adre sihnalimen hon, ka habe, **HOBÍ KÂU KHONG ADRE CA WÂ.** Anyin a wale haba únyi öbun e hmi kâu me ca wâ, e thibi ang oge me he ka omanená köbun. 24 Haba Khong at ame op hmeledrany me ta je únyi hia eú hnyin, e thibi Tuhan drany me hmeledrany, e ame ca laba hnyin ta je uma adre ányâ ge je hnyamen; 25 ke ame ca huliwa minya kâu hnen ta je hnya-

men at, helâke adre me ányâ ka theduoc, anyin a e ame ham hia möt, me homená, me ta je únyi hia ka ta je únyi hia; 26 ke e ame op hnyi dra a khaca tavat hia he ka labâ hmeledrany, ke a hia but thu je úen adre otílâ ehac, me je hnyigöulen je idra; 27 m' adre me he ka elâm Khong, ame ne khan' ödra he ka khaúteta e, me wâ e, ke so bi e ca úsâkâkâú m' öta hia thithö: 28 anyin a öta möt me bwebwet, me e bi unyin; helâ me hna ha hnen keihen adre sit khumöng gabun, ka habe, Anyin a je mâtrâniny öta. 29 Awe ötin e ne je má-tâniny Khong, e ca so köta he ka únykúme a ga úcú Khong me gol, me sileva, me veto adre me huliwan ge metáiny at, me bibi-hwakecin anyin at. 30 Haba Khong ame hokhnyokâ ta je úen waleji adre me ca wâ únykúme hnyin; ke e ame húna ka tavat hia thithö hnyi je hnyei hia he ka ietra: 31 anyin a e ame hia but thu bong he ka úhnei me owisa hmeledrany hnen at e ame hia but otílâ; ke e ame ohnathoâ e ka tavat hia hnyi hnen hna omelö hmetu thö e únyi hnyi hna mok.

32 Adre me löng möt hmetu únyi hnyi hna mok, me haba keihen adre me hiâ; ke haingen keihen, ka habe, Öhmun e he ka ling u hmetu ge únyi e hnyi ke úen. 33 Ame he but Paulo gadra. 34 K' ame kece kâu bi keihen me labageju: e unyidrin Dionusio at Areopago, me ke momo Demari ien, me ke je hnyat mödrü.

HNYIMAKAN 18.

HWABAN ta je únyi e, e ame he úheny Athenai me o hnyi Korinito. 2 Ke e ame wâ ke at Juda, Akula ien, at adre hnokoâ hnyi Ponoto, e ame hap o thö úheny Italia tha e me áiân Perisila, anyin a Kalaudio ame obâ at Juda hia únyi hnyi Roma: e ame he but ködrü; 3 ke e ame tha laba mödrü me huliwa, ke khaca thibi anyin huliwa m' ödrü; haba anyidrin huliwa, me ödrin e tibet je uma mano. 4 Ke e ame úne hnyi sunago hnyi ta je sabath, k' ame ohmehmela at Juda, me at Heleni.

5 Ke ame o but Sila me Timoteo úhedru Makedonia, me ame hwege thö hnyeku Paulo hnyi hofuc, k' ame ohnathoâ ka at Juda, ka habe, Iesu thibi a Keriso. 6 Ke adre me hna degecâ, ke fuc bigan, me e ame jijingâ anyin je úkhaú me ha ködra, ka habe, Ame he dröbun ka tabâ je böbun bi; ke iny gufa bi nya: hwan walang ang

oge me he bi nya ka Aten ta je hnyei. 7 Me e ame he úheny e, me didrö ka hnyi uma umen ke at ame outen Khong, Tito Juseto ien, k' ame útangköu umen uma me sunago. 8 Ke haba Kerisepo, taben sunago ame labageju ka Than, me anyin lap hia ; ke se hia minya at Korinito adre me löng me labageju, me adre me bapataisoi ödra. 9 Me ame ha Than kö Paulo hnyi hna omanená hnyi lit, ka habe, Ca ot bi, ke fuc dö, ca laba hnyibú bi : 10 anyin a inya unyám ke ba at ame he ka utut he ka okongu u : anyin ae se hia ta je latök hnyi taun ang. 11 Ke khaca huna me siks ta tebi e ame laba eling, ame n' ödra ge hofuc hwan Khong.

12 Ke hnyi ün ame konesula hnyin Galiona hnyi Akaia, haba at Juda adre me tot kö Paulo hnyi hnyok a khaca, me lelö thö ka hnyi taken owisa, 13 me ha, ka habe, Haba at eang ame ohmehmela tavat he ka hmi ka Khong ae ve e me hnanyibu. 14 Ame he but Paulo ka fuc, me haba Galiona ame ha ka at Juda ka habe, At Juda lö, ame ne ke hwakecin bi ae kong, ke ame ne iyawo ae monu, me, e úcü kõnya he ka köp öbun : 15 ke adre ne ivinöa hofuc, me je ien, me anyibun hnanyibu, me hamöbun bi ; e ca wek bi nya he ka owisa ta je únyi e. 16 Me e ame ob' ödra únyi hnyi taben owisa. 17 Ke ödra hia adre me köt Sosetheni, a taben sunago, me kot e hnyi hnyimakan taben owisa. Ke haba Galiona ame ca öúnyihnathöa ta je únyi e.

18 E se hia je bong ame tiga laba bala Paulo, me e ame úhüne me je liamekeiny, me tabá hu úheny e Suria ai, ke tha e më Perisila me Akula ; ke adre me sö leünen ban hnyi Kenikerea, anyin a anyin khöbi. 19 Ödrin e o but hnyi Efeso, me e ame hn' ödrü biju eling : ke haba e ame didrö ka hnyin sunago, me khetá ka at Juda. 20 Ke adre me hom beháná e he ka laba beú, ke e ca hmehmela bi ; 21 ke e ame úhüne mödra me ha, ka habe, E ka weny Khong, me oge me he ka hmetu thö köbun, me e ame tabá hu úheny Efeso. 22 Ke amé khöp dö hnyi Kaisaria, e ame ölö thö he ka iouny me ekalesia, me e ame he but Anetioka ai. 23 Ke a hia but laba eling hnyi ke je bong, me e ame he but, me vheno hia hnyei Galatia me Ferugia, ame sihwegíá ta je laten hia.

24 Ke ame o but ka hnyi Efeso ke at Juda, Apolo ien, adre hnoköa hnyi Alesa-

nedria, at ae khana khet ; ke e ame ti metá hnyi je hna sihnalimen. 25 Adre hia but ná at eling hnyi gethen deny Than ; ke kahwa hnyekon, ke e ame fuc me ná wia ta je únyi ga Iesu, k' ame wáhmakhmetöa thibi bapataiso anyi Ioane : 26 ke e ame hwán ka ha hwegíá hnyi sunago. Ke ame löng hwan ga Perisila me Akula, me ödrü me hawa e, me omanená wia káu bongon gethen deny Khong. 27 E ame weny he ka he Akaia ai, me ame hadruá e hnen je liamekeiny, me sihnalimen ka je taben he ka kap e : me e ame he but, me hadruá gáná tavat adre me labageju únyi hnyi ibetengiö baú : 28 anyin a e ame hwege ivinö me at Juda, k' ame kú únyi hnyi je tusi a Iesu thibi Keriso.

HNYIMAKAN 19.

KE tiga e bi Apolo hnyi Korinito, haba hnyi ethö, me o hnyi Efeso, me wá ke je laten : 2 me e ame ha ködrin, ka habe, Hawa, öbun e hia but kap Hanu Kap hnyi hnöbun hna labageju ? Ke ödrin e ha káu, ka habe, Ohe, ke ca khan' öhmun a g' adre ham Hanu Kap. 3 Me haingen ködrin, ka habe, Adre me bapataisoi öbun hnyi iéú ? Ödrin e ha, ka habe, Hnyi bapataiso anyi Ioane. 4 Me haingö Paulo, ka habe, Ioane ame bapataiso ge hna bapataisoiny ietra, k' ame ha ka tavat, ka habe, hmödra he ka labageju ka at ame he ka o hwaban e, wale Iesu. 5 Ödrin e löng e, me adre me hnyi bapataisoi ödrin ka hnyi ien Than Iesu. 6 Ke Paulo ame ip li hnyamen hudrin, me ame o but ködrin Hanu Kap ; me ödrin e fuc hnyi ta je hwen hnyei, me perofeta. 7 Haba hnyat hia me heláke úsa twelv ta hnyat.

8 Me e ame didrö hnyin sunago, k' ame hwege ha hofuc hnyi kun ta tehi, ame ivinö me újengi ödra hnyi ta je únyi anyin dökhü dokhon Khong. 9 Ke e khöt hnyekon keihen, k' adre me ca úling, k' adre me haikongoá hmi eling hnyi hnyimakan tavat, me e ame he but gadra, me hom minya laten, me e ame ha hofuc hnyi je bong hnyi uma úne umö Turano. 10 Ke lo li huna e ame ányá heláe ; waleling m' adre me löng hia hnen tavat adre me laba hnyi Asia hofuc hwan Than Iesu, wale at Juda me at Heleni minya. 11 Ke haba Khong ame ányá ta je úöman ae man ge li hnyamö Paulo : 12 wale m' adre me hom but únyi

hnyi unyin ka ta je komok je bageca me ecmano, me ame hia but je mok gadra, me didrut ta je hanu ae kong únyi hnyi je hnyekudra. 13 Haba keihen at Juda, hnyat adre ngenu monu, me tren unehudua, ödrin e hwân he ka ha ien Than Iesu hon tawat ae hu hanu ae kong gadra, me ödrin e ha, ka habe, Oge me hûna köbun hnyi iö Iesu waleji ame khetâ Paulo. 14 Ame ânyâ únyi eling hnen laku Sekeva a ödrin seven, a at Juda, at bihut ae nua. 15 Me ame thu ködrin hnen hanu ae kong, ka habe, E khanö nya Iesu, ke khanö nya minya Paulo; ke öbun ie je hnyat? 16 Me ame utut ködrin at ae hu hanu ae kong, me ng' ödrin, me hwege hudrin, me ödrin e ve kec thu me aat únyi hnyi uma e. 17 Ke ame manen dut únyi eling ka tawat hia a at Juda me at Heleni adre me laba hnyi Efeso; me ame o but ot ködra hia, ke adre me ogânâ ien Than Iesu. 18 Ke se hia tawat labageju adre me o, me omanená, me ha ta je hwakecidra. 19 Ke se hia minya tawat bibihwakecin adre me úkhöünâ anyi-dra je tusi me thong degecâ hnyi hnyimakan tawat hia: ke adre me aü hwaban, ke adre me wâ ju a fifite thauzan je sileva. 20 Wale úküiny gan hmâ hofuc hwan Than, me hwege.

21 Hwaban ta je únyi e, Paulo ame ip hmâ hnyi hnyekon, e ka um dö vheno Makedonia me Akaia, he ka he Jerusalema ai, haingen, ka habe, Iny ka mwi but e, me hamök he ka wâ minya Roma. 22 Me e ame kunâ Makedonia ai ke li at a li lanyin, jia Timoteo me Eraseto, ke e biju Asia hnyi ke je bong.

23 Me ame kû thö imonumonuny ae gan can hmi hnyi úen eling. 24 Anyin a ke at, Demetio ien, at ame huliwan sileva, at ame ânyâ ta je uma sileva umö Diana, ke e gan hmâ troban ka tawat adre huliwan; 25 ke e ame úkhacaköu ödrin, me tawat huliwa helâe, haingen, ka habe, Je than lö, e khan' öbun ae hu omjehetin ge huliwa eang. 26 Ke öbun e wâ me löng, a ca hake Efeso thibi, ke helâke me Asia hia minya, hnö Paulo eang hna ohmehmela, me wia tawat ae se hia, me ha, ka habe, ca je khong bi ang adre ânyâ ge je hnyam: 27 waleling me me ca hake anyitin thibi je huliwa ame he ka únyi baü; ke adre me he minya ka öünyibâüâ uma umen khong momo a Diana, ke ame he ka hia anyin hmanenang bi, wale a hmi kâu tawat Asia hia, ke hmeledrany minya. 28 Adre me

löng e, me adre me ti hmönyin, me hongot, ka habe, E gan hmâ Diana anyin at Efeso. 29 Me ame unöngötö taun ge imonumonuny: ke adre me köt Gaio me Aritako, li at Makedonia, a li at ödre tha he me Paulo, me adre me tha wadring ka hnyi uma mat. 30 Ke bebe Paulo ka he ködra, k' ame thawâ e hnen laten. 31 Ke haba ke je thaniny Asia, a je lahanen, me ödrin e úkhünöng he ka thawâ e, me me ca he ka didrö ka hnyi uma mat. 32 Ke haba ke je hnyat ödrin e ha ke hofuc, ke keihen ke hofuc bi: anyin ae monumonu thö úkhacaköu; ke haba hnyat ae se hia gadra, me ca khan' ödra önyen úkhacaköu. 33 Ke adre me hum Alesanedro but úheny unyin tawat ae se hia, k' ame otilâ e hnen at Juda. Haba Alesanedro ame hinöbeny, k' ame weny he ka owisa ka tawat. 34 Ke adre me wâhmakhmeto a e at Juda, me adre me tha hongot göranyai ame ne lo li awa, ka habe, E gan hmâ Diana anyin at Efeso. 35 Ke ame ohnyibö tawat hnen sekere-tereiny taun, me e ame ha, ka habe, At Efeso lö, ie at ae ca khana a g' ame tuö uma umö Diana khong momo ae gan hmâ hnen taun ang a Efeso, waleji a kölu únyi ga Jupita? 36 E ca khana at he ka ivinoâ ta je únyi e, anyin a wale, laba wia ju, ke ca ânyâ mono bi ke únyi. 37 Öbun e hom jem hnyat eang, k' ödrin e ca venâu je uma kap, k' ödrin e ca bi gan ka khonguten je khong. 38 Anyin a wale, a ne hu ga Demetio me tawat huliwa unyin, ke únyi he ka bifuco ke at, awe, e hu je uma uhnei, ke hu je konesula: hamödra he ka bifuc' ödra kâu ölra bi. 39 Ke öbun e ne hnö ke hofuc bi, me adre me he ka owisa e hnyi úkhacaköu adre me thu. 40 Wâ adre nye owis' öta can mede montu hnyi bong ang; anyin ae ca khan' öta omanená ke hofuc hnân ha bongon úkhacaköu eang a anyita. 41 Ke a hia but ha e me e ame kunâ veseâ but úkhacaköu.

HNYIMAKAN 20.

KE hwaban imediököu, Paulo ame ha-wâ laten, me sihwegi ödra, me úhüne m' ödra, me e ame he but Makedonia ai. 2 Ke a hia but vheno je ke keihen hnyei eling, me sihwegi gan hmâ ködra, me e ame o but hnyi Heleni. 3 Ke kun ta tehiny ka laba eling, ke haba at Juda adre me ip hnân, hnyi úen e ame he ka tabâ hu ka kec Suria ai, me e ame únykúme he ka hmetu Makedonia ai. 4 Ke ame

tha he mē ke ne o but hnyi Asia jia Sopa-
tero at Berea; me Aretako, me Sekuno
li at Thesalonika; me Gaio, at Derebe, me
Timoteo; me Tukiko me Trofimo li at
Asia. 5 A bödrin hnyat e ka halubahing
öhmun hnyi Troas. 6 Ke hwaban ün
areto adre ca levenâ, öhmun e tabâ hu
ûhehmun Filipi, me o ködrin hnyi Troas
hnyi je bong a faiv; ke seven bonguhmun
ka laba eling.

7 Ke hnyi bong a bân hnyi seven,
öhmun e úkhacaköu he ka subâ areto,
haba Paulo ame khet ködra, anyin ame he
ka he but nyi; ke beú hnen hna khet ke
ne o but hnyi wanbenset. 8 Ke se hia je
lamepa hnyi hnyeule ethö, waleji öhmun e
úkhacaköu hnyin. 9 Ke ame laba hnyi
mamalama ke hidröu, Eutiko ien, e ame
tamokut; ke beú bala hna khet hnö Paulo,
me ame musö e hnen bemokot, me e ame
kölu but únyi hnyi hnyeule a kuniny ethö,
ke ödrin e kap e a mokcu. 10 Haba Paulo
ame utut me ta ju hon e, me delüâ, me ha,
ka habe, Ca tenge bi; anyin a e bi möt eú
hnyin. 11 Ke e ame ölo hmetu thö kâ thö,
me subâ areto me han, me úhnenamö beú
ke ne o but hnyi lany, me e ame he but.
12 Me adre me hom hidröu a mödrut, me
adre me senyin gan hmâ.

13 Ke öhmun e böhmun ka hnyi hu,
me kec Asoso ai, me öhmun e he ka haudin
Paulo eling: anyin a wale hnen hna húna,
anyin a e ame weny he ka he hot. 14 Ke
öhmun e úkhanö mē hnyi Asoso me hauden
e, me öhmun e khöp dö Mitulene. 15 Me
öhmun e kec úhehmun e, öhmun e o nyi
cicö Kios; ke nyi hmetu öhmun e khöp dö
hnyi Samo; ke nyi hmetu öhmun e khöp
dö hnyi Mileto. 16 Anyin a Paulo ame
únykúme he ka kec nulâ Efeso, wâ e nye
he ka bec hnyi Asia; anyin a e ame he
logot me me o hnyi Jerusalema hnyi ün
Penetekos, a ne ba vheliny.

17 Ke e ame úkhünöng Efeso ai úheny
Mileto he ka hawâ wahingatiny ekalesia.
18 Ke ödrin e o but kâu, me e ame ha
ködrin, ka habe,

E khan' öbun hwakecik hnyi ta je ün
oge me laba unyibun hwân hnyi bong a
bân waleji oge me o hnyi Asia, 19 a oge
me bi huliwa ka Than me hnyok ae hnyi-
kânâ, ke li deköiök, ke ta je vec a o könya,
waleji hnyi hna ip hnök ge at Juda: 20 ke
oge me ca ikhâlâ ke únyi ae únyi hnathu,
ke oge me omanenâ köbun, me n' öbun
hnyi hnyimakan tavat, me hnyi ke uma

me ke uma, 21 me ohnathöâ ka at Juda
me at Heleni minya, a e so he ka ietra ka
Khong me labageju ka Tuhöta a Iesu
Keriso. 22 Ke wâ bi, walang ang oge me
he Jerusalema ai, k' ame ka musu nya
hnyekuk, ke ca khanö nya ta je únyi ame
he ka o könya e: 23 ke so bi ame omanenâ
könya Hanu Kap hnyi ta je taun hia, ka
habe, ame halubahing' nya je hna cö nya
me ta je vec bi. 24 Ke oge me ca öünyi-
hnathöâ anyik möt, me me únyi hnathu
könya, me inye he ka umo hnök hna
úologot, me hanymök oge me kap únyi ge
Than Iesu, wale he ka ohnathöâ úthumetu
ae so hnyi betenge baú anyin Khong. 25
Ke wâ bi, walang ang e khanö nya a haba
öbun hia, a hnyat oge me labö senâ he ka
khetâ úthumetu, me öbun e ca he hmetu
ka wâ hnyimakök. 26 Anyin a wale, inya
oge me ohnathöâ köbun hnyi bong ang, ame
ca taku nya dren tavat. 27 Anyin oge
me ca höcö omanenâ köbun únykúmánen
hia Khong. 28 Anyin a wale, o 'bun äu,
ke hnath mamoe hia, wale hnen Hanu
Kap hna' otill' öbun he ka tuö, he ka hat
ekalesia anyin Khong, waleji e ame úco ge
dren. 29 E khanö nya a hwaban dö úhek,
ame he ka didrö köbun ta je luko úhülü,
k' ödrin e ca he ka ihulo hnath mamoe;
30 ke ame he ka o minya unyibun tavat
adre me he ka ha ta je únyi ae hwali, he ka
lelö ködra ta je laten. 31 Anyin a wale
hmâkâ ju, me únykúme thö, haba hnyi je
huna a kun oge me ca menâ, waleji hnyi lit
me lany he ka n' öbun hia, ke hu deköien
li emakök. 32 Ke walang ang inya oge
me hn' öbun dut ka Khong, me hofucin
anyin ibetengiö baú, at ae khana he ka up
öbun göranyai, me ham köbun jekhöü m'
ödra hia adre okabâ. 33 E ba sileva, me gol,
me úkkaú anyin ke at oge behnyekon. 34
E khan' öbun minya a oge me huliwa ge li
hnyamök ang oüco unyik me tavat a tha
ödrin mönya. 35 Hnyi ta je únyi hia oge
me tot hnân úcücübongoâ köbun, a hamö-
bun he ka huliwa helêe he ka hadruâ tavat
a ödra sēnyin, me únykúme hofuc hwan
Than Iesu, waleji e ame ha, ka habe, E
beönya hnabic hnen at ame ham, hon at
ame kap.

36 Ke a hia but ha hofuc e, me e ame
cibouca me tha hic m' ödra hia. 37 Ke
adre me tenge gan hmâ hia, me hibö nyi
Paulo me úcimhnyimak mē, 38 e beönya
anyidra hlöuhlöu hnyi ta je hofuc e ame ha,
ka habe, adre me ca he bala hmetu ka wâ

hnyimakan. Me adre me tha he mē ka hnyi hon hu.

HNYIMAKAN 21.

ÖHMUN e hia but hn' ödra, me öhmun e kec ut, me kec wisa Koso ai, ke nyi öhmun e he Rodo ai, ke ühehmun e öhmun e he Patara ai : 2 ke öhmun e wā ke hu ame he ka hnehne Foinike ai, me öhmun e tabā e, me kec ut. 3 Ke öhmun e wā thö Kuperero, me öhmun e hna but e hnyi ke keihen me, me öhmun e kec Suria ai, me khöp dö hnyi Turo : anyin adre me he ka thigā e önyen hu. 4 Ke öhmun e wā je laten, me öhmun e laba eling hnyi seven je bong : ke ödrin e ha kö Paulo ünyi hnyi Hanu, ka habe, ca he Jerusalema ai. 5 Ke ame um dö ta je bong e, me öhmun e didrut me he but ; ke ödrin hia adre me su öhmun tha ödrin me läiödrin me lakudrin, ke ne o but hnyi hoton taun : me öhmun e cibouca eü göny me hic, 6 me ühüne ; ke öhmun e ölö thö hon hu ai, ke ödra adre me hmetu ka hnyi ta je hnyabadra.

7 Ke öhmun e o but hnyi Tolemai, ühehmun Turo ; me öhmun e talofa me je liamekeiny, ke khaca bonguhmun ka tha laba m' ödra. 8 Ke nyi öhmun e he me o hnyi Kaisaria : ke ohmun e didrö ka hnyi uma umö Filipo at ame khetā üthumetu ae so, ke at hnyi hnyat a seven, me laba unyin. 9 Ke haba at eling me vak lakon ta hlu, ke ödrin je perofeta. 10 Ke se hia je bong öhmun e laba eling, me ame o but ke perofeta üheny Juda, Agabo ien. 11 Ke e ame o but köhmun, ke e ame hom weikö Paulo, me ame ka ca bi kâu li cau me li benyin, me ha, ka habe, Haingen Hanu Kap, a g' ame he at Juda hnyi Jerusalema ka heläng hna ca at a weiken ang, me he ka hna ka hnyi hnyamen Aten ta je hnye. 12 Öhmun e löng hofuc e, me öhmun me tavat adre me laba eling, öhmun e thawā e, ka habe, ca he bi Jerusalema ai. 13 Haba Paulo ame thu me ha, ka habe, Ieü gabun öbun e tenge me öhluhlúa hnye-kuk? anyin a oge hia but penapena, ca ka hnyi üceat thibi, ke so minya he ka mok hnyi Jerusalema can iö Iesu a Than. 14 Me e ame ca löng bala köhmun, me öhmun e laba hnyibü ju, me ha, ka habe, E so he ka mädrā weny Than.

15 Hwabab je bong e, öhmun e kät anyihmun je thatünyi me he but Jerusale-

ma ai. 16 Ke ame tha he möhmun ke je laten ühedrin Kaisaria, tha ödrin me ke at Nasona ien, a at Kuperero, wale aten kâu adrem, ke öhmun e he ka laba unyin.

17 Öhmun e o but hnyi Jerusalema, me haba je liamekeiny adre me kap senyini öhmun. 18 Ke nyi ame tha he möhmun Paulo kö Iakobo ; ke eling wahingat hia. 19 Ke ame italofa m' ödra, me e ame omanenā gaga ta je ünyi ame änyā Khong unyin Aten ta je hnye hnen anyin huliwa. 20 Ke adre me löng ut, me adre me ogänā Khong ; me adre me ha kâu, ka habe, Liamekeiny möhmun lö, u me wā ta je thauzan anyin at Juda adre me labageju ; ke ödra hia adre me ti hnyokä hnanyibu ; 21 ke adre me löng gam a u je nā at Juda hia, a ödra unyin Aten ta je hnye, he ka hna degeci Mose, ke u je ha ködra, ka habe, ca he bi ka peritomonā je lakubun, ke ca he minya ka vheno ta je bongon. 22 Anyin a wale, ama kāmâu? anyin adre me he ka löng a u je o thö. 23 Anyin a wale, mädrā thö hnöhmun hna he ka ha köu : Habe e unyihmun hnyat a vak, ödrin e bi khöbi ; 24 e so he ka tha u m' ödrin, ke tha oboso u m' ödrin, me tha bi hwaban m' ödrin, m' adre me he bi ka subā je leünen bödrin : me me khana thö tavat hia ae ca hnathu bi ke ünyi adre löng gam ; ke so bi a u je vheno so, me tuö hnanyibu. 25 Ke haba Aten ta je hnye adre me labageju, me öhmun e hia but sisit ködra, me owisa a adre me he ka üsākäü me je hna hudo ka je hnatheat, me dra, me je ünyi adre noc nyin, me bi ünyi monu. 26 Haba Paulo ame hawā je hnyat, ke nyi e ame tha obosoā e bi mödrin, me didrö ka hnyi uma kap, he ka omanenā, ka habe, e bekhöt ut ta je bonginy obosoā, ke ne o but adre me ve hudo ta je hut hobi ködra.

27 Ke ame he but ka um je bong a seven, me ame wā e hnyin uma kap hnen at Juda a ödrin üheny Asia, me adre me omonumonoā tavat ae se hia, me kät e, 28 me hongot, ka habe, At Isaraela lö, ühadruo : Wale bi ang at ame üne üö bi ünyi me tavat, me hnanyibu, me dok ang : ke haba khaca, e ame hom but jem at Heleni ka hnyi uma kap, me okongoā dok ang ae kap. 29 Anyin adre me ö Trofimo ehac, at Efeso unyin hnyi taun, ke adre me ünyküme a e ame hom e ka hnyi uma kap. 30 Ke ame bwebwet taun hia, ke ame tha wadring dö tavat me köt Paulo, me lelö e üheny hnyin uma kap : me adre me ie hlöng ut je

hwanuma. 31 Ke adre me tiga heleû deny he ka hlingâ e, me ame o but úthumetu ka taben ae nua anyin deö soja, ka habe, e monumonu thö Jerusalema hia. 32 Me e ame ie hom je soja me je keneturio, me wadring ködra : ke adre me wâ taben ae nua me je soja, me adre me hna ju kuc Paulo. 33 Ke ame hakekeny dö taben ae nua, me kât e, me hûna he ka ca e ge li tö fao ; me hnei, ka habe, e ia? ke ieu a ânyâ? 34 Ke haba keihen adre me hawâ ke ûnyi, ke keihen ke ûnyi bi unyin tavat ae se hia : ke ca khana bi he ka wâhmakhmeto wisa, anyin adre me imediökou, me e ame hûna he ka hom e ka hnyi hhabâ. 35 Ke e ame o but hnyi wacuat, me ame kap tilâ e hnen je soja, anyin ae hwege tavat ; 36 ke ame ûhnûhnû hotudrin tavat, me fuc hwege, ka habe, Ohia but e.

37 Ke adre me he ka hum Paulo ka hnyi hhabâ, me e ame ha ka taben ae nua, ka habe, E so la oge me he ka fuc köu? Ke e ame ha, ka habe, Ae khanö u hwen Heleni? 38 Hawa, u ca at Aigupito waleji ehac ame öküâ imonumonuny, me hom tavat a foa thauzan ka hnyi hnyeububa a tavat Úhlingö? 39 Ke haba Paulo ame ha, ka habe, Iny at Juda úhek Taraso hnyi Silikia, aten taun ae lung : ke inya oge me sumató u he ka hnö nya he ka fuc ka tavat. 40 Ke ame hna e, me ame tot Paulo hnyi wacuat me hinöbeny hon tavat ; ke adre hia but ohnyibö but, me e ame fuc hnyi hwen Heberu, ka habe,

HNYIMAKAN 22.

HNYAT me lakeiny me lakamen lö, löng ju öbun hnök hna ha wiso nya walang any köbun.

2 Adre me löng a g' ame fuc ködra hnyi hwen Heberu, me adre me tevehlöng wia ; ke e ame ha, ka habe,

3 Iny at Juda, adre hnöku nya hnyi Taraso hnyi Silikia, ke adre me hat nya hnyi taun ang, ke adre me ná wisa könya hnan-yibu anyin lakamöta hnyi li ca Gamaliela, ke oge me hnyok hwege ka Khong, helâ me öbun hnyi bong ang : 4 ke oge me okongoâ hmi ang, me hling' ödra, me c' ödra me ip ödra obaga me omomo hnyi uma ceat. 5 Wale ae khana at bihut ae nua me wahingat hia he ka ohnathu nya ; ke oge me kap je tusi gadra hnân hobi kâu je liamekeiny, me he but Damaseko ai, he ka c' ödra me hum ödra Jerusalema ai he ka

bi hwaban ködra. 6 Ke tiga inya eû hnyi gethen hakekenyâ Damaseko, ka jebigo but, me ame ie umumelam igigili nya melam ûnyi hnyi drany. 7 Ke oge me ta but hnyikânâi, me löng hofuc ame ha könya, ka habe, Saulo, Saulo lö, ieu gam u me okongu nya? 8 Me oge me thu, ka habe, Than lö, u ia? Me e ame ha könya, ka habe, Inya Iesu at Nazareta at u me labö okongoâ. 9 Haba hnyat ödrin e tha he mönya, me adre me wâ melam, k' adre me ca löng bi ifucin at ame fuc könya. 10 Ke haingök, ka habe, Than lö, ieu oge me he ka ânyâ? Haba Than ame ha könya, ka habe, Todrö, me he thö Damaseko ai ; k' adre me he ka ha köu eling ta je ûnyi hia a hanymâm he ka ânyâ. 11 Ke oge me ca bwele hmetu bi ûnyi ge úhadedakiny melam eling, k' ame lelö benyik hnen hnyat ödrin e tha he mönya, me oge me o but hnyi Damaseko. 12 Ke haba Anania, at ame outen Khong ae úcü me huanyibu, k' ame haisoâ e hnen at Juda hia adre me laba eling, 13 e ame o but könya, me tot unyik me ha, ka habe, Saulo lö, liamekeiny mönya, bwela hmetu but. Ke oge me wâ e hnyi úen eling. 14 Ke haingen ame ha, ka habe, Haba Khongon lakamöta a úcü u me u me he ka wâhmakhmetoâ weny, me wâ At ae Wisa, me löng hofuc ûnyi hnyi hnyimen. 15 Anyin a u me he ka ohnathoâ e ka tavat hia, hnyi hnâm hna wâ me löng. 16 Ke walang ang ieu gam u me bec? to-drö, me adre me bapataisoi u, me hneü degecâ ânyâm ta je hulö, me hawâ thö ien. 17 Ke oge me o hmetu but hnyi Jerusalema, me hic hnyi uma kap, me oge me wâ hna omanenâ, 18 me wâ e wale at ame ha könya, ka habe, Logotö, ie he but úhem Jerusalema : anyin adre me ca he ka kap hna ohnathu nya gam. 19 Ke haingök, ka habe, Than lö, e khan' ödra hnök hna ca, me kotu hnyi ta je sunago tavat adre me labageju köu : 20 ke adre hingälâ drö Setafano at ame ohnathu u, me oge me tot hakekenyâ, me hnyi hanen, me tuö je úkhaüödrin hnyat ödrin e hlingâ e. 21 Ke haingen ame ha könya, ka habe, He thö, anyin oge me he ka kunö u sâkâü ai ka aten ta je hnyei.

22 Ke adre me löng e ke ne o but hnyi uthofuc e : me adre me ha göranyai, ka habe, Ohia but e ûnyi eang hmeledrany ; anyin ae ca so e ame he ka möt. 23 Ke adre me tiga fuc göranyai me uny anyidra je úkhaü, me iâ sesâny kânâ göranyai, 24

haba taben ae nua ame hûna he ka hom e ka hnyi hnabâ, me ha he ka hnö me kot e, me me khana thö hwân hnödra hna hongot gan helâe. 25 Ke adre hia but ca e ge je tö, haba Paulo ame ha ka keneturio at ame tot eling, ka habe, Hawa, e ñcû hnyi hnanyibu, öbun e he ka kot at Roma, k' ödra tiga ca úhnö? 26 Ke a löng ut keneturio, me e ame he me ha ka taben ae nua, ka habe, Ieú u me he ka ányâ? anyin a at Roma at ang. 27 Me ame o but taben ae nua me ha kâu, ka habe, Bethe ha kõnya, u at Roma? E ame ha, ka habe, E. 28 Haba taben ae nua ame thu, ka habe, E gan hmâ tang mone o ge ham, m' inye he ka aten hnyeí e. Ke haingö Paulo, Adre hnöku nya at Roma. 29 Anyin a wale ame ie úsákâúö but mē tavat adre me he ka hnö e: ke ot minya but taben ae nua, anyin a e khana but a e at Roma, k' adre hia but minya ca e.

30 Ke nyi e ame behe ka wâ wia hnathu a g' ame bi fuco e ge at Juda, me e ame thang e, ke e ame úkhacaköuâ je taben tavat bihut me tavat úhnenamö hia, k' ame hum Paulo but, me otílâ e hnyi hnyimaködra.

HNyimakan 23.

HABA Paulo ame wâ hmâ úhnenamö, me ha, ka habe, Hnyat me lakeiny lö, oge hia but laba me oúnykúmik ae so hia hnyi hnyimakan Khong ke ne o but hnyi bong ang. 2 Haba at bihut ae nua ame ha ka tavat adre me tot unyin he ka khaú hnyimen. 3 Haba Paulo ame ha kâu, ka habe, Ame he Khong ka khöú u, u hak veto adre ohawâ, anyin a u me laba he ka owisö nya helâ me hnanyibu, ke u me kûna he ka khöú nya a úö bi únyi me hnanyibu? 4 Ke haingen tavat adre me útitilen eling, ka habe, U me haikongoâ at bihut ae nua anyin Khong? 5 Me haingö Paulo, ka habe, Hnyat me lakeiny lö, e ca khañö nya ae at bihut ae nua: anyin adre me sihnalimen, ka habe, U me ca he ka haikongo at ame musö em hnyeí. 6 Ke a wâhmakhmeto but Paulo a ta je Sadukaio keihen gadra, ke ta je Faresaio keihen, me e ame fuc hwege hnyi úhnenamö, ka habe, Hnyat me lakeiny lö, iny Faresaio, nokon Faresaio: k' adre me hnei nya ge geju ka hnyi möt hmetu únyi hnyi hna mok. 7 K' ame ha helâe, me ame kú thö iwatretra ge at Faresaio me ta je Sadukaio: ke

haba úkhacaköu, me ame khekhe lo but. 8 Anyin a haingen ta je Sadukaio, ka habe, E ba möt hmetu, ke ba angela, ke ba hanu: ke haba je Faresaio, me adre me tha kap li únyi e. 9 Me ame kú thö imediököu ae gan, me ame todrö tavat sihnalimen labien ta je Faresaio, me ha hwegiâ, ka habe, E ba monu ge at ang öhmun e wâ: ke ame ne ha kâu la hnen angela, k' ame ne hnen angela, ieú! 10 Ke ame kú ivinö ae gan hmâ, me ame ot taben ae nua, wâ adre nye he ka ve kiö Paulo but, me e ame kunâ je soja he ka hûgúnâ but e gadra, me hom e ka hnyi hnabâ.

11 Ke eâu hnyi lit, haba Than ame tot unyin me ha, ka habe, Hwege thö: anyin a u me he ka ohnathu nya hnyi Roma helâji me hnâm hna ohnathu nya hnyi Jerusalema.

12 Ke a lany jut haba at Juda adre me úkhacaköu me bi khöbi ka habe, Adre me ca he ka han me ic ke ne o but adre me hia but hlingö Paulo. 13 Ke haba tavat adre me si hnân eling ödra se hia hon fâte. 14 Ke adre me o but ka je taben tavat bihut, me wahingat, me ha, ka habe, Öhmun e hia but bi khöbi ae gan hmâ hwaban, a öhmun e ca he ka an ke únyi, ke ne o but öhmun e hia but hlingö Paulo. 15 Anyin a wale, hu th' öbun me tavat úhnenamö ka taben ae nua, me me he ka hom but e köbun, helâke öbun e he ka hnö wia ta je únyi gan: ke öhmun e he ka penapena ka hlingâ e, ke tiga sákâú. 16 Ke a löng ut nakaúnyi Paulo, a g' adre me he ka mokut duöng gan, me e ame he but me didrö ka hnyi hnabâ, me haimemenâ kö Paulo. 17 Haba Paulo ame hawâ ke keneturio me ha, ka habe, Hom dö hidröu ang ka taben ae nua: anyin ae hu hofuc gan he ka haimemenâ kâu. 18 Me e ame hom e, me su e ka taben ae nua, me ha, ka habe, Ame hawo nya Paulo, waleji adre ca, me sumató nya he ka hom hidröu ang köu, anyin ae hu hofuc gan he ka ha köu. 19 Haba taben ae nua ame lelö hnyamen ka hnyi dok ae ba aten me hnö, ka habe, Ie únyi u me he ka ha kõnya? 20 Haingen, ka habe, A hia but at Juda tha ha he ka sumató u he ka hum Paulo nyi ka hnyi úhnenamö, helâke u me he ka hnö wia ke únyi gan. 21 E so u ma ca he ka ogâ hodra: anyin ae se hon fâte tavat gadra adre me mokut duöng, adre hia but bi khöbi a g' adre me ca he ka han me ic ke ne o but adre hia but hlingâ e: ke walang

ang adre me laba penapena me halubahingen u me he ka ogâ hodra. 22 Haba taben ae nua ame hna but hidröu me hûna, ka habe, Ca ha bi ka ke at m' u je mwi ang ka haimemenâ könya ta je únyi ang.

23 Me e ame hawâ lo li keneturio, me ha, ka habe, Penapena thö ta je soja a tu haded, ke sevente tavat tabö hors, ke tu haded tavat hok ö, he ka he Kaisaria ai eâu hnyinghet, hnyi awa a kuniny: 24 ke e ame hûna ködrin he ka penapena je meno m' adre me he ka ip Paulo hon, me hom wia e kö Filiki a gavena. 25 Ke e ame set helâng tusi, ka habe,

26 Inya Klaudio Lusua oge me italofa möu Filiki a gavena ae beönua. 27 Haba at Juda me adre me kât at ang, ke adre me he but ka hlingâ e, ke oge me he but me deö soja me omelö e, anyin a oge me löng a e at Roma. 28 Ke oge me wek he ka wâ wia can adre me bifuco e gan, me oge me hom e ka hnyi anyidra úhnenamö: 29 me ame manen könya a g' adre bi fuco e hnyi bongon anyidra hnanyiibu, ke ba únyi adre me ha ae úcú kâu he ka mok hnyin, me ca bi. 30 Ke adre me omanenâ könya a g' adre me he ka mokut duöng kâu, me oge me ie kunâ but e köu, me oge me hûna ka tavat adre me he ka bifuco e he ka háiâ e hnyi hnyimákâm.

31 Haba ta je soja adre me hum Paulo, helâ me hna hûna ködrin, me hom e Anetipateri ai hnyi lit. 32 Ke nyi adre me hna tavat tabö hors he ka hom e, ke adre me he hmetu ka hnyi hnabâ: 33 ke adre me o but hnyi Kaisaria, me adre me ham tusi ka gavena, me hum Paulo kâu. 34 Ke a hia but aú, me e ame hnö iny hnyei; ke e khana a at Silikia, 35 me e ame ha, ka habe, Oge me he ka ling u e ka o tavat he ka bi fuci u: me e ame hûna he ka tuö e hnyi uma umö Heroda than.

HNyimakan 24.

HWABAN je bong a faiv ame o thö at bihut ae nua, jia Anania, me ke je wahingat, me at khet, Teretulo ien; me ödrin e haiö Paulo ka gavena. 2 Ke adre me hawo Teretulo, me e ame hwân he ka bi fuco e, ame ha, ka habe,

Taböny than Filiki lö, e gan hmâ anyihmun úsoköu únyi gam, ke únyi ge ányâm metâ adre me owisa hnyei ang me me so tot, 3 ke öhmun e kap e hnyi je úen ke hnyi je dok hia, me ole gan hmâ. 4 Ke

wâ oge nye öhunyinyi u, inya oge me khöü köu he ka löng menyiki öhmun hnyi ke je hofuc ae wakhalet. 5 Anyin a öhmun e wâ but at ang ame bi jönihmun, k' ame okúâ úhügúnö dökhu unyin at Juda hia eang hmeledrany, haba e me homakan at Nazareta: 6 ke e ame heleú deny minya he ka okongoâ uma kap: m' öhmun e kât e: 8 ke u me he ka wâhmakhmeto ta je hofuc hia öhmun e háiâ e gan, u ka he ka hnö e. 9 Ke haba at Juda minya adre me tha hien, mē, me ogâ ta je únyi hia eling.

10 Ke haba gavena ame atmamakö Paulo he ka fuc, me e ame ha, ka habe,

E kханö nya ae se hia ta je huna u je owisa hnyin hnyei ang anyin a wale oge me senyin he ka ha wisö nya bi: 11 anyin ae kханö u he ka wâhmakhmeto, ae tiga twelw thibi je bong waleji oge me o hnyi Jerusalema he ka hmi: 12 ke adre me ca ö nya bi hnyi hnyin uma kap, me hnyin je sunago, me hnyi taun, oge me ivinö me ke at, me omonumonoâ tavat. 13 Ke ca kхан' ödra minya bi he ka ohnathöâ ta je únyi adre me bi fuci nya hnyin. 14 Ke wale bi ang hnök hna he ka haimemenâ köu, a inya oge me hmi ka Khongon lakamöhmun hoton deny adre me ha heretikon, ke oge me kap ta je únyi hia adre sihnalimen hnyi hnanyiibu me je perofeta: 15 ke oge me geju ka Khong wale adre me kap minya, a g' ame he ka möt hmetu tavat ae wisa me tavat ae ca wisa bi. 16 Anyin a wale inya oge me hwege me me hu bala bi oúnykúmik ae so ka Khong me at. 17 Hwabán ta je huna ae se hia, inya oge me o eang he ka hom ta je betenge ka aten ik hnyei, me ta je hut, 18 ke hnyi hnök hna ányâ e, me ame ö nya hnen at Juda úheny Asia hnyi hnyin uma kap, oge hamök obosoi nya, ke ca tha inya me tavat, ke ba minya imediököu, 19 ke so ködrin bi he ka munyi o eang he ka tot hnyi hnyimákâm, me bi fuci nya a ne hu hodrin gak. 20 Ke e ka ba, hamödrin hnyat ang he ka ha, a ne hu hwakecik ae ca wisa bi adre wâ waleji hnyi hnök hna tot hnyi hnyimakan úhnenamö, 21 ke so bi hofuc ang a khaca, waleji o ge me tot me hongot hnyi wanbödra, ka habe, Öbun e hnei nya hnyi bong ang ge möt hmetu únyi hnyi hna mok.

22 Ke haba Filiki ame hn' ödra but ka hnyi ke bong, anyin a e ame wâhmakhmetoâ bongon hmi e, haingen, ka habe, E ka

o but Lusia taben ae nua, oge me he ka ha muâ únyi gabun. 23 Ke e ame hûna ka keneturio he ka tuö e, me betenge gan; ke adre me ca he ka thawâ je lahanen he ka senâ e.

24 Ke hwaban ke je bong ame o but Filiki me Drusila a âiân momo Juda, me e ame hum Paulo he ka löng gan bongon labageju ka Keriso. 25 Ke e ame tiga ha bongon hwakecin ae wisa ke hnyok, ke bong owisa hnyi obiny, me haba Filiki ame öbubuny, me ha, ka habe, Me he thö walang ang; ke e ka hu üen ae úcû me oge me he ka hawo u hmetu. 26 E ame únykûme a g' ame he Paulo ka ham kâu mone: waleling me me osehia hawâ e he ka úhnenamö mä. 27 Hwaban lo li luna, k' adre me tilö hwabö Filiki, jia Pokio Feso; ke haba Filiki ame weny he ka osenyinâ at Juda, me e ame hnö Paulo bala hnyi uma ceat.

HNYIMAKAN 25.

AME o but Feso ka hnyi hanymen, ke hwaban kun ta bong e ame he but Jerusalema ai úheny Kaisaria. 2 Ke haba je taben tavat bihut, me je taben at Juda, me adre me haiö Paulo kâu; ke adre me khöü kâu, 3 me sumâtâ e he ka betenge ködra hu Paulo, me he ka kunâ e Jerusalema ai; m' adre me he ka mokut duöng eü hnyi gethen he ka hlingâ. 4 Ke haba Feso ame thu, ka habe, Adre me tuö Paulo hnyi Kaisaria, ke ca kueny bi me oge me he ka he but kâe. 5 Ke haingen, ka habe, Anyin a wale hamen tavat ae únyi hnathu unyibun he ka tha he mönya, a ne hu konginy at e he ka háiâ.

6 Ke a hia but laba unyidra ame ne eit ame ne ten ta bong, e ame he but Kaisaria ai; ke nyi e ame laba hon taben owisa, me úkhünöng he ka hawo Paulo. 7 Ke e ame o but, k' ame tot igigilö e at Juda adre me utut úhedra Jerusalema, me bi fuci Paulo ge ta je únyi ae hmak, ke ta je únyi ae se, ke ca khan' ödra he ka ohnatho; 8 ke haba Paulo ame haiwisa e bi, ka habe, Oge me ca ányâ ke ong monu bi ka hnyi hnanyibu anyin at Juda, ka ba minya ka hnyi uma kap, ke ba minya bi kö Kaisara. 9 Ke haba Feso ame weny he ka osenyinâ at Juda, me e ame thu kö Paulo, ka habe, E wem he ka he Jerusalema ai, m' adre me he ka hnö eling ta je únyi hnyi hnyimakök! 10 Haba Paulo ame ha, ka habe,

Inya but ang oge me tot hnyi hnyimakan taben owisa anyi Kaisara, wale ae úcû he ka hnei nya hnyin: e ba monu oge me ányâ ka at Juda, e khañö u wia but e. 11 Ke a ne hu anyik monu, me ke únyi oge ányâ ae úcû könya he ka mok hnyin, iny ca höcö bi he ka mok: ke e ka ba hna-thu hnyi ta je únyi adre me bi fuci nya hnyin, e ba minya at ae khana he ka hnö nya ködra. Inya oge me hawo Kaisara. 12 Ke a hia but Feso úsabö me hnyat úhnenamö, e ame thu, ka habe, U me hawo Kaisara; awe, u me he ka he but kö Kaisara.

13 Ke hwaban ke je bong ame o but hnyi Kaisaria Ageripa than me Berenike me iouny me Feso. 14 Ke se hia je bong ödru me laba eling, haba Feso ame haimemenâ ka than únyi ame kú kö Paulo, me ha, ka habe, E hu ke at adre ca ame hna ang bala hnö Filiki: 15 ke tiga inya bi hnyi Jerusalema, haba je taben tavat bihut me wahingatiny at Juda adre me háiâ e, me sumâtâ he ka bi hwaban kâu. 16 Me oge me thu ködra, ka habe Ca hwakecin at Roma he ka hna ke at ke tiga ca um bi úhnyimakanköu at adre bi fuco, me tavat adre me bi fuco e, me me hu üen he ka haiwisa e bi ge hna bi fuco e. 17 Anyin a wale adre me o but eang me oge me ca bec, ke haba nyi oge me laba hon taben owisa, me úkhünöng he ka hawâ e jem. 18 Ke a hia but tot tavat bi fuco e, me ba thö monu ödrin e omanenâ helâ me hnök hna únykûme; 19 ke adre me háiâ e hnyi ke je únyi hnyi anyidra hmi, me ke at Iesu ien, waleji a mokcu, ke haingö Paulo bala bi, ka habe, a möt dö. 20 Ke inya oge me loloâ hna úhnö ta je únyi e, me oge me hnö e, a ne weny he ka he Jerusalema ai, m' adre me he ka hnö eling ge ta je únyi eling. 21 Ke Paulo ame ha weny he ka kap hna owisa únyi ga than tot, me oge me hûna he ka tuö e ke ne o but oge me he ka kunâ e kö Kaisara. 22 Haba Ageripa ame ha kö Feso, ka habe, Iny behe minya ka löng at e. Haingen ame ha, ka habe, nyi u me he ka löng e.

23 Haba nyi ame o but Ageripa me Berenike me hmanenang ae gan, me didrö ka hnyi döc adre me löng hnyin, me je taben ae nua, me je at hnathuiny taun, haba Feso ame úkhünöng he ka hawo Paulo. 24 Haba Feso ame ha, ka habe, Than Ageripa lö, me tavat hia eang a tha ödra m' öta, öbun e wâ at eang, hnen tavat Juda a

ödra se hia hna bi fuco e kõnya hnyi Jeru-
salema, me eang minya, adre me ha, ka
habe, e ca úcú hmetu bi he ka möt. 25
Ke oge me ca wâ ke únyi a ányâ me me
úcú he ka mok : ke so bi e ame hia but
hongot ka than tot, weleling me me mou
thö hnyekuk he ka kunâ e. 26 Ke ba
únyi ae únyi hnathu gan oge me wâ he ka
sihnalimen ka tuhök. Anyin a wale oge
me hawâ e jem ka hnyi hnyimaköbun, ke
hnyi hnyimákâm taböny than Ageripa, me
inya wâ thö ke únyi hnân sihnalimen,
hwaban hna hnö e. 27 Anyin oge me
únykúme ae ca so bi he ka kunâ at adre
me ca, k' adre me ca omanená bi can adre
me háiâ.

HNYIMAKAN 26.

HABA Ageripa ame ha kö Paulo, ka
habe, Hamâm he ka haiö u. Haba
Paulo ame lau but hnyamen me ka háiâ e
bi, ka habe,

2 Than Ageripa lö, inya oge me únykú-
me a iny hnahic, anyin a oge me he ka
haiwisö nya bi hnyi bong ang hnyi hnyi-
mákâm, ge ta je únyi hia ame bi fuci nya
hnyin at Juda : 3 anyin ae khanö u wia
ta je hwakecin hia me ta je iwatretra anyin
at Juda : anyin a wale inya oge me sumató
u he ka ling nya me ca hwenhöcö. 4 E
khana at Juda hia hwakecik k' iny tiga
wanakat, waleji ame hwân dö hnyi ik hnyei
me Jerusalema ; 5 ke khan' ödra inya únyi
hnyi can a ne wedra he ka ohnatho, a e
úcú hwakecik hnyi ta je homhnyok ae nua
hnyi ke keihen anyitin hmi, wale at Fare-
saio. 6 Ke walang ang inya oge me tot
m' adre me he ka hnei nya ge hna gejon a
ha bánâ Khong ka lakamöta ; 7 wale ame
únykúme anyita je tribu a twelv he ka o
ka hnyin, k' adre me bi athnyabainy hwege
hnyi lit me lany. Than lö, haba at Juda
adre me bi fuci nya can gejon eling ! 8
Ieú gabun öbun e únykúme, ka habe, ca
hnân bi kap a g' ame he Khong ka omelö
hmetu thö tawat adre me moku ? 9 E
hnathu, haba ehac oge me únykúme a e
úcú kõnya he ka mádrá ta je únyi ae se
he ka úö bi únyi me iö Iesu At Nazareta.
10 Waleji oge me ányâ hnyi Jerusalema :
ke se hia tawat ae kap oge me ip hnyi je
uma ceat, ke oge me kap musi únyi ge je
taben tawat bibut, ke adre me he ka hling'
ödrin, me oge me og' ödra. 11 Ke iny
osehia oveci ödra hnyi ta je sunago, me

ájengi ödra he ka fuc bi gan ; ke e gan
hmâ anyik hmönyin ködra, me oge me
okongu ödra ke ne o but ka hnyi ke je
taun kanyua bi. 12 Ke than lö, inya oge
me tiga he Damaseko ai oge me hom musi
me man únyi ge je taben tawat bibut, 13
ke hnyi jebigö inya oge me wâ eú hnyi
gethen melam únyi hnyi drany ae hadrö-
ngöc hon seúnö, ame umemelam igigili nya
me hnyat ödrin e tha he mönya. 14 Ke
öhmun e ta hia ju eú hnyi kânâ, me inya
oge me löng hofuc ame ha kõnya, me ha
hnyi hwen Heberu, ka habe, Saulo, Saulo
lö, ieú gam u me okongu nya ? u me ka
oveci u me húke je homakan ö. 15 Me
oge me ha, ka habe, Than lö, u ia ? Haba
Than ame ha, ka habe, Inya Iesu waleji u
me labö okongo. 16 Ke höhöi thö, me tot
ge li cam : anyin a walang can me inye
manen dut köu, m' adre me he ka wiö u
hnân athnyaba me at ohnatho ta je únyi u
je wâ, me ta je únyi oge me he ka manen
hnyin köu ; 17 me hügünö u unyin tawat,
me Aten ta je hnyei, wale oge me kunö u
ka hnyin walang ang, 18 me u me he ka
obwela ta je emaködra m' adre me hwiö
únyi hnyi lit ka hnyi melam, me únyi hnyi
musi anyi Satana ka Khong, m' adre me
he ka hna degécâ but anyidra hulö, me tha
hu jekhöt mödra adre okabâ hnen labageju
kõnya. 19 Anyin a wale than Ageripa lö,
oge me ca oúnyibatâ hna omanená únyi
hnyi drany : 20 ke oge me böc ka haime-
menâ ködra hnyi Damaseko me Jerusalema,
me hnyi hnyei Juda hia, me Aten minya
ta je hnyei, m' adre me he ka ietra me
hwiö ka Khong, me ányâ je hwakecin ae
úcú me ietra. 21 Wale can me me köt
nya at Juda hnyin uma kap, me heleú
deny he ka hlingö nya. 22 Ke e hu gak
úhadruo únyi ge Khong, wale me inye
tethmâ ke ne o but hnyi bong ang, oge me
ohnathoâ ka tawat ae úhnyúkong me tawat
ae gan, ke oge me ca ha ke únyi ke so bi
hnen je perofeta me Mose hna ha ame he
ka o ; 23 ka habe, Ame he Keriso ka vec,
ke ame he ka bán ka möt hmetu úheny
hnyi hna mok, me omanená melam ka
tawat, me Aten ta je hnyei.

24 Ke e ame ka tiga háiâ e bi helâe,
haba Feso ame ha hwegiâ, ka habe, Paulo,
u je monu but, hnen úne ae gan hna omonu
u. 25 Ke haingö Paulo, ka habe, Than
Feso lö, iny ca monu ; ke inya oge me ha
hofuc ae hnathu me metâ. 26 Anyin ame
wâhmakhmetoâ hnen than ta je únyi eang.

me oge me ca hlohlo he ka fuc hnyi hnyimakan: anyin ae khanö nya wia ae ca iyong bi kâu ke únyi eang; anyin adre me ca ányá únyi eang hnyi dok ae iyong. 27 Than Ageripa lö, hawa, u me kap je perofeta? e khanö nya a u me kap. 28 Haba Ageripa ame ha kö Paulo, ka habe, U me beohmehmelö nya he ka bi Kerisiano ge ong hofuc ae úhnyúkong. 29 Me haingö Paulo, ka habe, Inya oge me khöu ka Khong, me me ca hake u thibi, ke ödra hia minya adre me ling nya hnyi bong ang, ame ne únyi ge hofuc ae úhnyúkong ame ne gan, a g' adre he bi ka helá mönya, ke ca ha bi hna co nya eang.

30 Ke ame todrö than, me gavena, me Berenike me tavat adre me tha laba mödrin: 31 ke ödrin e úsákátö but mödra, me úhnenamö, ka kabe, A ca mádrá at ang ke únyi ae úcú me mok me ca. 32 Haba Ageripa ame ha kö Feso, ka habe, a ne ca hongot at ang kö Kaisara, me ame ne khan' ödra he ka thang ut e.

HNYIMAKAN 27.

KE mou thö a öhmun e he ka kec Italia ai, me adre me hnö Paulo me keihen tavat adre me c'ödra ka keneturioiny döiny vat anyi Augusto, jia Julio. 2 Me öhmun e ölö ka hnyi hon hu Adamutiu, wale ame he ka kec ka hnyi je taun hnyi hobatköiöiny Asia, me öhmun e kec ut, tha öhmun me Aritako at Makedonia, úheny Thesalonika. 3 Ke nyi öhmun e khütö un hnyi Sidona; ke so hwakeci Julio kö Paulo, me e ame hna e he ka he but ka je lahanen he ka kap ibetengiö. 4 Ke öhmun e hia but vhiik un, me öhmun e kec hmelen Kupro anyin ae kong ang. 5 Ke öhmun e hia but kácá köiö cicö Silikia me Pamafulia, me öhmun e khöp dö hnyi Mura hnyi Lukia. 6 Haba keneturio ame wá eling hu Alesanedia ame he ka kec Italia ai; me e ame ip öhmun hon. 7 Ke se hia je bong öhmun e bec kec, ke gan hmá anyihmun huliwa he ka hakekenyá Nido, anyin ae kong ang, me öhmun e kec hmelen Kerete, cicö Salamone; 8 ke gan hmá huliwa he ka hau but gan, me öhmun e o ka hnyi ke dok adre hwenyi ien Wasáú ae Hmanenang; ke e hakekeny eling taun Lasea.

9 Ke hwaban je bong ae se hia, ke a o thö walang úen ae kong he ka kec hnyin, anyin a um dö úen adre ányá ca han, haba

Paulo ame khöu ködrin, 10 haingen, ka habe, je than lö, inya oge me únykúme ame he ka gan kong hnyi kec ang me úohia, ca ka hnyi hna hauda me hu thibi, ke ka hnyi anyita minya bi möt. 11 Ke haba keneturio ame löng ka tuhan hu me at a hon hu, k' ame ca löng bi hna ha hnö Paulo. 12 Ke anyin ae kong wasáú he ka ikhölö hnyin hnyi úen weneú, me ame ha tavat ae se gadrin ae so he ka kec úhedra e, ame ne khan' ödra he ka khöp hnyi Foinike me ikhölö hnyi úen weneú; wale ke wasáú hnyi Kerete, cicö hwaiöu ke e jio, me hwadrö ke e jio. 13 Ke e so but ang a hwaiöu, me adre me únykúme he ka ohwáda únykúmenödra, me adre me vhiik un dö, me kec cicö Kerete ke hakekeny hot. 14 Ke ca bec bi hwaban e, me ame o but ang ae hwege hmönyin Eurakudo ien: 15 me ame óuang hu, ke ca khana he ka hnyimakan ka hnyi ang, me öhmun e hna but e he ka óuang. 16 Ke öhmun e kec hmelen ke ong bomene Kalauda ien, ke gan hmá anyihmun huliwa he ka ohmá bot: 17 ke adre hia but lelö thö e göranyai, me adre me hom je únyi hnán úhadruo, me wádrá; ke adre me ot, wá e nye sa thö hnyi Sertis, me adre me hnahna je omjehen, me óuang ut hu. 18 Ke ame kap hnahna hmönyini öhmun weneú, me nyi adre me hwán he ka degec ut hna hauda: 19 ke hnyi bong a kuniny adre me degec hia ge je hnyam je omjehen hu. 20 Ke se hia je bong ame ca manen hnyin seúnö me ta je ohkú, ke gan bala weneú köhmun, me ame hia but hnöhmun hna geju ka hnyi möt. 21 Ke e beú hmá úen adre ca han hnyin, haba Paulo ame tot hnyi wanbödra, me ha, ka habe, je than lö, öbun e ne löng könya ehac, me ca kec úheny Kerete, me ame ca he bi ka o kong ang me hna ohia ta je únyi. 22 Ke walang ang oge me khöu köbun, e so öbun e hwege ju, anyin ame ca he bi ka hia melen ke at gabun, ke hake hu thibi. 23 Anyin a mwi unyik eja hnyinghet angela anyin Khong wale at oge me bi athnyabainy, ke oge me huliwa kâu, 24 ame ha, ka habe, Paulo lö, ca ot bi; anyin a u me he bala ka tot hnyi hnyimakö Kaisara: ke wá bi, a hia but Khong ham ödra hia köu, tavat adre me tha kec möu. 25 Anyin a wale, je than lö, hwege th' öbun, inya oge me gejon ka Khong, a g' ame he ka e bala hnen hna ha könya. 26 Ke so bi adre me he ka digic öta ka hnyi ke bomene.

27 Ke ame o but lit a fortininy, me öhmun e ouang hnyi köiö Aderia, ke hakekeny jut wanbenset haba aten hu ödrin e únykúme a ödrin hakekeny jut ka hnyi hnyei; 28 me adre me tuluto ju, me wá a twente je hna abâ: ke adre me tuluto hmetu eáu, me wá a fiftin je hna abâ. 29 Me adre me ot wá e nye hmouca thö hu hnyi ke hme, me adre me khûá but je un a vak hnyi obiny hu, me wedra hmönyin lany. 30 Ke haba aten hu, me ödrin e hna but galu ka hnyi köiö, helâke adre me he ka khûá ke je un hnyi homakan hu, ke adre me iyawö m' adre me he ka kec úbedra hon hu, 31 ke haba Paulo ame ha ka keneturio me ta je soja, ka habe, A ne ca laba hmâ hnyat e hon hu, me öbun e ca he ka möt. 32 Me haba je soja adre me subâ töiny galu, me ame kölu but. 33 Ke ame he but ka lany, haba Paulo ame újôngi ödra hia he ka han, haingen, ka habe, Wanglang bong a fortininy öbun e lubahingen me ca han, ke ba bala únyi öbun e an. 34 Anyin a wale oge me újôngi öbun he ka han: anyin a hobi káu anyibun möt: anyin ame ca he ka hia leúnen a khaca hnyi ban ke at gabun. 35 E ame ha hofuc e, me hom areto, me oleá ka Khong hnyi hnyimaködra hia: ke e ame susubá, me hwân he ka han. 36 Me adre me senyin hia, me adre me hnyi han minya. 37 Haba úseiömun hia hon hu, me tu haded ke sevente siks. 38 Ame sekudra thö anyin han, me adre me ohâhá hu, me degec hwit hnyi köiö ai. 39 Ke a lany jut, me adre me ca wâhmakhmetoá hnyei: ke adre me wá ke hwádâ dok ae hu öny hnyin, me adre me úsabö he ka hna hu ka hnyin. 40 Me adre me subâ degecá but je un ka hnyi köiö, me thang ut je ohmâiny hna hogwi, me lau húnyú ka hnyi ang, me kec ka hnyi öny. 41 Ke adre me o but ka hnyi hna iouny hnen li wekhet, me ame laba thö hu; me ame hmâ ju homakan, ame ca ok hmetu bi, ke ame hmouca but obiny hu ge ta je waköiö ae gan. 42 Me ame ha je soja ka haba e so he ka hlingá tavat adre ca, wá e nye he ka hai me kec dö ke at. 43 Ke haba keneturio ame weny he ka omeli Paulo, waleling me me thaw' ödrin ju; me hûna ka tavat ae khan' ödra hai, he ha utut úheny hon hu, me bödra he ka hai hot ai: 44 ke haba keihen minya, ödrin hon je esö, ke keihen hon je omjehen hu. Waleling me adre me möt hia thö hot.

KE öhmun e mödrut me öhmun e wâhmakhmetoá a Melita ien bomene. 2 Ke gan hmâ hnen ta je wanaithila hna betenge gahmun: anyin adre me hú hlöghmun, me köp öhmun hia, anyin ae hu we me megic. 3 Ke haba Paulo ame thigö me ip hon meic, me ame silöu but vaipa anyin ame löng kahwa, me ame keca ka hnyi hnyamen. 4 Ke haba je wanaithila adre me wá on ame him hnyi hnyamen, me adre me úhakouá, ka habe, At úhlingö at eang, wale a möt ut úheny eü hnyi köiö, ke a ca hna e hnen Wisa he ka hnyi möt. 5 Ke e ame nyikâ degecá on ka hnyi meic, ke ba bi únyi ae kong a o káu. 6 Ke adre me halubahingen ame he ka khibi unyin, ame ne he ka ie ü but me mokcu: ke beú hnödra hna lubahingen, ke adre me wá ae ba únyi ae kong ame o káu, me adre me wia je únykúmenödra a e ke khong.

7 Ke e hakekeny eling je hnyaban tuhan bomene, Popilio ien; e ame hum öhmun ka hnyi hnyaban, me betenge gan hmâ gahmun hnyi kun ta bong. 8 Ke haba kamö Popilio ame moko kahwa me kongo dra: ke haba Paulo ame didrö káu, me hic, me ip li hnyamen hon e, me osoá e. 9 Ke ame um dö e haba keihen ame takú ödra mok hnyi bomene, adre me o but, me e ame osoi ödra: 10 ke adre me ogan' öhmun ge ta je únyi ae so ae se hia; ke hnyi úen öhmun e he but ka hnehne, adre me ham köhmun ta je únyi ae úcü.

11 Ke hwaban kun ta tehi öhmun e kec hon ke hu Alesanedria, waleji a ikhölö hnyi bomene hnyi úen weneú, haba haten hu e, me Lihúnye. 12 Ke öhmun e khöp dö hnyi Surakusa, me laba eling hnyi kun ta bong. 13 Ke úheömun e, öhmun e sisiki me khöp dö hnyi Regio: ke khaca bong eling, me ame si thö hwaiöu, ke hnyi bong a loiny öhmun e khöp dö hnyi Potioli: 14 ke öhmun e wá eling je liamekeiny, tavat adre me khöü köhmun he ka laba unyidra hnyi seven je bong: me öhmun e o but hnyi Roma. 15 Ke e khana je liamekeiny eling öhmun, me adre me he but ke ne o but hnyi hna úcü anyin Apio, me Kun ta Uma Mená, he ka úkhanö m' öhmun: ke haba Paulo ame ö'drin me e ame ole ka Khong, me hwege hnyekon.

16 Ke öhmun e o but hnyi Roma, adre me hnö Paulo he ka hake laba, ke hu soja ame tuö.

ROMA 1.

17 Ke hwaban kun ta bong, e ame úkhacakouâ je at hnathuiny at Juda: ke adre me úkhacakou thö, me e ame ha, ka habe, je liamekeiny lö, e ba monu oge anyâ ka tavat, me ka hnyi hwakecin lakamöta, ke adre me hnö nya me cö nya úhek Jerusalem ka hnyi hnyamen at Roma: 18 ke adre hia but hnei nya, adre me únykúme he ka hnö nya, anyin ae ba can gak he ka mok. 19 Ke adre me ha degecá at Juda, wale me inye hongot dö kö Kaisara; ca anyin ae hu monu oge me he ka khûâ gan ik hnyei. 20 Can e oge me haw' öbun he ka iouny me úhnenamö mönya: anyin a can gejon anyin at Isaraela adre me cö nya ge tö fao eang. 21 Me adre me ha, ka habe, Öhmun e ca kap je tusi gam únyi ge at Juda, ke ba minya ke at ge je liamekeiny ame o me haimemenâ me ha ke monu gam. 22 Ke e wehmun he ka löng gam únykúmenâm: anyin ae khan' öhmun a g' adre me haikongoâ hnyi je dok hia hmi ang.

23 Ke adre me thu bong hobi kâu, me ödrin se hia adre me o kâu hnyi hnen hna laba; ke e ame khetâ hofuc, me ohnathoâ ködra dökhu dokhon Khong, me újôngi ödra ga Iesu, únyi hnyi hnanyibu anyi Mose me ta je perofeta, hwân hnyi hnyomakatu ke ne o but sahac. 24 Haba keihen adre me kap hofuc e ame ha, k' ame

ca kap bi keihen. 25 Ke adre me ca tha hnyok bi, me adre me vese thö, hwaban hna ha ga Paulo hofuc a khaca, ka habe, E so hna ha hnen Hanu Kap a deny perofeta Isaia ka lakamöbun, haingen, ka habe, 26 He thö ka hnyi hnyei ang me ha, ka habe,

Öbun e he bala ka löng, k' öbun e ca he bala ka wâhmakhmetoâ;

Ke öbun e he bala ka wâ, k' öbun e ca he bala ka wâ únykúme:

27 Anyin ae pipikhenya but hnyekon tavat ang,

Ke hmak je hnyikönyödra he ka löng, Ke mook ji emaködra;

Wâ adre nye wâ ge je emaködra,

Me löng ge je hnyikönyödra,

Me wâ únykúme ge je hnyekudra,

Me hmetuhmetu but,

Ke wâ oge nye he ka omeli ödra.

28 Anyin a wale, wâhmakhmeto ju öbun, a g' adre hia but kunâ úhömeli eang anyin Khong ka Aten ta je hnyei: me adre me he minya ka löng.

30 Ke lo li huna ae bekhöt e ame laba hnyi umen uma a ka bi hwaban, k' ame kap tavat hia adre me didrö kâu, 31 k' ame khetâ dökhu dokhon Khong, me únö ta je únyi ga Iesu Keriso hnen tang hwege, ke ba at ame thawâ.

TUSI ANYI PAULO APOSETOLO KA

AT ROMA.

HNYIMAKAN 1.

INYA Paulo athnyabai Iesu Keriso, adre me hawâ hnân aposetolo, k' adre úca hobi kâu úthumetu ae so anyin Khong, 2 waleji e ame ha bánâ a deny anyin ta je perofeta hnyi je hna sihnalimen ae kap, 3 ge Nokon, waleji adre hnokoâ únyi hnyi mátrâni Davita hnyi unyin, 4 ke adre me haimemenâ e thibi Nokon Khong tha e me man únyi ge hanon hwakecin ae kap, hnen möt hmetu únyi hnyi hna mok; wale Iesu Keriso a Tuhöta, 5 öhmun e kap betenge baú a deny e, me hanymen aposetolo, m' adre me he ka löng hoton hna labageju

hnyi ta je hnyei hia únyi ge ien: 6 e unyidra minya bi öbun adre haw' öbun hobi kö Iesu Keriso: 7 e so e he ka e unyibun betenge baú me hnahic únyi ge Khong a Kamöta me Than Iesu Keriso; ka tavat hia e Roma, je oúnykúmen Khong, me hna hawâ hnân tavat ae kap.

8 Inya oge me böc ka oleâ ka Khonguk, a deny Iesu Keriso, gabun hia, anyin ame lung anyibun labageju hnyi hmeledrany hia. 9 K' ame ohnathu nya Khong, at oge me athnyabainy hnyi hanuk hnyi úthumetu ae so anyin Nokon, a oge me ca menâ bi hai öbun hnyi hijik je hic hia, 10 k' oge me sumâtâ he ka ie he but köbun, a ne hu

dek, ke a ne weny Khong he ka ohnabicá úhek. 11 Anyin ae gan hmá wek he ka iouny möbun, m' inye he ka ham köbun ke bwihlany únyi hnyi hanu, me hnân otethm' öbun; 12 wale me me tha kawkahwa hnyekuk m' öbun, hnyi anyitin tha labageju. 13 Hnyat me lakeiny lö, e wek e me hnyi khan' öbun, a iny osehia únykúme he ka he köbun, (ke hu hna ovheli nya ke ne o but walang ang), me me hu gak ke je wan únyi gabun, helá me hnyi ke keihen Aten ta je hnyei. 14 E hu hanymök ka at Heleni, me Aten ta je hnyei, ka tavat ae metá, me tavat ae ca metá bi. 15 Anyin a wale, inya oge me penapena a ne kbanö nya, he ka khetá minya köbun úthumetu ae so hnyi Roma. 16 Anyin a inya oge me ca hmehma ge úthumetu ae so: anyin a wale man maniny Khong hnân omelö tavat hia thithö adre me labageju; ka at Juda a bán, me ka at Heleni minya ju. 17 Anyin ame manen dut hnyin e hwakecin ae wisa anyin Khong únyi ge labageju, m' adre me he ka labageju: helá me hna sihnalimen, ka habe, Ame he ka möt tavat ae wisa hwakecidra únyi ge labageju.

18 Anyin adre me omanená únyi hnyi drany hmönyin anyin Khong ka ta je hwakecin hia ae ca úcü ka Khong, me je hwakecin ae ca wisa bi anyin tavat, adre me ovhelá hnathu ge hwakecidra ae ca wisa bi; 19 anyin ae manen dut eú hnyidra, ta je únyi ae khan' ödra he ka omanená ge Khong; anyin a Khong ame omanená ling ködra. 20 Anyin a haba anyin ta je únyi ae iyong, hwán hnyi hna op hmeledrany, me, himanen hmönyin dut, adre me wáhmakhmetóá hnen ta je únyi a op, wale maniny man ae ca ba balua, me bongon Khong; wale me me he ka ba hmetu hnân thu gadra: 21 anyin a khan' ödra but Khong, ke adre me ca ogáná bi, e me úcü me Khong, ke adre me ca oleá minya bi; ke adre me omonó je únykúmenödra, me öli-drá je hnyekudra ae kong. 22 Adre me ka ohobelú anyidra bi metá, me adre me monu but, 23 ke adre me wia thö hmanenanginy Khong ae möt balua, me úcücübo-ngoú e me at ame he ka mok, me je meno ame gá, me je meno a vak can, me je únyi ame iyafú.

24 Anyin a wale Khong ame hn' ödra ka hnyi je weny hnyekudra ae kong, me hwakecin ae ikiki, m' adre me he ka úkong-óákouá je unyidra: 25 anyin a adre me

wia thö hnathu anyin Khong me me thoi bi, me khudrung me huliwa ka ke únyi adre op, k' at hna bi At a Up ödra, wale a hnân haisóá nyiele balua. Amen.

26 Waleling me me hn' ödra Khong ka hnyi ta je wedra ae ikiki; anyin a haba je momo gadrin adre me wia hwakecin ae úcü ka hnyi hwakecin ae ca úcü: 27 ke heláe minya obaga adre me hna degécá hwakecin ae úcü omomo, k' ödrin e úókahwakouá wedra ae kong, obaga unyin obaga adre me ányá únyi ae ikiki, me ame hwadá ködra hwaban ae úcü me anyidra monu.

28 Ke ca wedra he ka wáhmakhmetóá Khong, me haba Khong ame hn' ödra but he ka hwali hnyi je hnyekudra, m' adre me he ka ányá ta je únyi ae ca úcü; 29 ke ödra unöngötö ge je hwakecin ae ca wisa bi, me hulö, me béhnyekon, me beokongo; k' ödra unöngötö ge ihunyinkou, me úhlingö, me iwatretra, me iyawö, me hnyok ae ti kong; 30 ödra hnyat úhaiö, me bi fuco, me úkotiá Khong, me hwege hnyimödra, me bi gan, me hobelöu, me bibihwakecin ae kong, me ca löng lakamödra me lahinyödra, 31 me tavat ae monu, me tavat adre me hanyáúá hna úhilihnykóu, me tavat adre me ca hnyoká je liamekeiny mödra, me tavat adre me ca betenge: 32 ke khan' ödra hna huna hnen Khong, a e úcü ködra he ka mok, ödra ka ányá ta je únyi e, ke adre me mádrá ta je únyi eling, k' adre me og' ödra minya bi tavat adre me ányá.

HNYIMAKAN 2.

A NYIN a wale, at ame únykúm lö, e ba hnân thu gam: anyin a haba hnâm hna únykúme ke at, me u me ka hamám bi ohnaúhangöi u; anyin a u me ka ányá ta je únyi e. 2 Ke e khan' öta a haba Khong ame bi hwaban hoton hnathu ködra adre me ányá ta je únyi heláe. 3 Ke tha lö, at ame únykúme tavat, a g' adre me ányá ta je únyi beláe, ke u me ka ányá minya bi, hawa, u je únykúme he ka ohauá hna bi hwaban ge Khong? 4 Hawa u je höciá omjeú wale hwakecin ae so, me hokhnyok, me lingvec, ke u me ca wáhmakhmetóá a g' ame lili u ka hnyi ietra, hnen hwakecin ae so anyin Khong? 5 ke can hnyekom ae nák ke ca ietra, me u me úkhöúná tang hmönyin hnân hobi köu bi hnyi bonginy hmönyin, ke hobi káu úen adre me omanená hwaban ae wisa ge Khong; 6 wale at ame he ka ve ham ka tavat helá me hnödra hna

ányá: 7 wale, möt ame ca ba balua ka tavat adre me tethmä hnyi huliwa ae so, me elâm hmanenang me hna ogânâ, me hna ca bobot bi: 8 ke hmönyin me wathethöt ka tavat adre me hûkötö, me tavat adre me ca löng bi hnathu, ke adre me löng hoton hwakecin ae ca wisa, 9 k' ame he ka hlöuhlöu me vec ae gan hmâ hnyekon tavat hia adre me ányâ hwakecin ae kong, a bân at Juda, me at Heleni minya ju: 10 ke hmanenang, me hna ogânâ, me hnahic ködra hia adre me mádrâ so, a bân ka at Juda, me ka at Heleni minya ju: 11 anyin a Khong ame ca bi haten tavat. 12 Anyin a haba tavat adre me ányâ monu ke ba hnanyibu, me adre me he ka mok ke ba hnanyibu: ke haba tavat adre me ányâ monu ke hu hnanyibu, me adre me he ka hnei ödra helâ me hnanyibu; 13 anyin ae ca wisa hnyi hnyimakan Khong tavat adre me löng hnanyibu ge hnyiköny, ke adre me he ka haiwisa tavat adre me löng hoton hnanyibu: 14 anyin a e ka ka ányâ baúâ bi hnen Aten ta je hnyeï ta je únyi ae úcü me hnanyibu, ke ba hnanyibu gadra, awe, haba tavat eling, wale ae ba hnanyibu gadra, me ödra bi hnân ke hnanyibu hobi ködra bi; 15 anyin adre me omanená ta je huliwainy hnanyibu adre set hnyi je hnyekudra, k' ame tha ohnathoâ hnen sah ónykúmídra, ke haba je únykúmenödra adre me ve haikongoâ ame ne ve haisoi ödra bi; 16 hnyi bong ame he Khong ka hnö ta je únyi ae iyong anyin tavat, ga Iesu Keriso, hoton anyik úthumetu ae so.

17 Ke a ne iâm bi ien at Juda, ke u me gejon hnanyibu, me hobeluâ Khong, 18 me wâ wia weny, me wâ soâ ta je únyi ae ti so, k' adre nö u únyi hnyi hnanyibu, 19 ke u me únykúme a u at ae úcü he ka su je wadröu, me omelami ödra adre me laba hnyi dok ae lit, 20 me at ame nâ at ae monu, me at úne ka ta je mendreng, at ae hu tulutiny metâ me hnathu hnyi hnanyibu; 21 u at ame nâ ke at, hawa u je ca nö u bi? u at ame khetâ, ka habe, ca he ke at ka venöu, hawa, u me venöu bi? 22 u at ame ha, ka habe, ca bi únyi monu, hawa, u me bi únyi monu bi? u at ame hûkötöia je hnatheat, hawa, u me venöu omjehen ta je uma kap? 23 u at ame hobeluâ hnanyibu; hawa, u me ónyibáúâ Khong hnyi hnâm hna hanyâúâ hnanyibu? 24 Anyin adre me haikongoâ ien Khong hnen Aten ke je hnyeï can bi öbun, helâ me hna sihnalimen. 25 Anyin ae hu troban hna peritom, u je

ne löng hoton hnanyibu: ke so bi u je ne hanyâúâ hnanyibu, awe, ca peritom hmetu but ányâm peritom. 26 Anyin a wale, a ne vheno wisainy hnanyibu tavat adre ca peritomonâ bi, hawa, adre me ca he ka háiâ tavat adre ca peritomonâ bi, ka habe, ta je peritom? 27 Ke haba tavat adre ca peritomonâ bi, ke ka e bi, ke ame löng hoton hnanyibu, hawa, adre me ca he ka haikongu u, at ae hu tusi me hna peritom, k' u at hanyâúâ bi hnanyibu? 28 Anyin a ca at Juda bi, ame ne helâe thibi hnyi hoton; ke ca peritotom minya bi ae manen hnyi unyin: 29 ke e at Juda bi a helâe eú hnyin; ke haba peritom, e bi hnyi hnyok, me hanu, ke ca e bi hnyi tusi; wale ame ca ogânâ bi hnen at, ke so bi hnen Khong.

HNYIMAKAN 3.

KE ieu ke únyi ae nua ge at Juda? ke ieu troban peritom? 2 E gan hmâ hnyi ta je hwakecin hia: walang a bân, a g' adre hna ködra ta je hofuc hwan Khong. 3 Eja ke ne adre ne ca labageju keihen, me ieu thö? e khana anyidra ca labageju he ka ónyibáúâ hwakecin ae hnathu anyin Khong? 4 Ohe; eja ke ne a ne thoi tavat hia, me so e me hnathu bala bi Khong; helâ me hna sihnalimen, ka habe,

M' u me he ka wisa hnyi hwâm ta je hofuc

Me tom, at ka he ka hnei u.

5 Ke a ne hnân omanená hwakecin Khong ae wisa hnen hwakecita ae ca wisa bi, ieu ate me he ka ha? Hawa, e ca wisa hwakecin Khong, at ame bi hwaban ge hmönyin? (Inya oge me fuc helâ me at.) 6 Ohe; a ne helâe ame he Khong ka kâmâu ka hnö hmeledrany? 7 Ke ame ne he anyik thoi ka ölungâ hnathuiny Khong me ogânâ e, hnân eú he ka hnei nya hmetu helâ me at ae kong? 8 ke geú, adre me ca he ka ha, ka habe, (helâ me hnödra hna haikongu öhmun, ke helâ me hna bi fuc öhmun ge keihen, ka habe, haingöhmun), Ötin e he ka ányâ monu me me o but so? e wisa hnaúhangö a ödra.

9 Ke hawa, e kong hnöhmun ke so bi hnödra? Ohe, e ba; anyin ate hia but owisa a tha at Juda me at Heleni hia hmenlen hulö; 10 helâ me hna sihnalimen, ka habe,

E ba at ae wisa, e ba hmönyin me khaca;

- 11 E ba at ame wâ únykúme,
E ba at ame elám Khong ;
- 12 Adre me saú hia but, adre me tha monu
but ;
E ba at ame mádrá so, e ba hmönyin
me khaca :
- 13 Helá me erkemok ae memang je jekö-
widra ;
K' adre me iyawö ge je bohmödra :
Eú hnyi hnyin je esongodidra öginyin
asip ;
- 14 E unöngötö je hnyimödra ge úhangö
me hofuc ae hiny :
- 15 E logot li candra he ka hingálá dra ;
- 16 Eú hnyi dedra je gethen úöhia, me
hnyok ae vec ;
- 17 E ca khan' ödra gethen deny hnahic :
- 18 E ba ot ka Khong hnyi hnyimaködra.
- 19 Ke e khan' öta a haba ta je únyi
adre ha hnyi hnanyibu, me adre me ha ka
tavat adre me laba hmelen hnanyibu ; me
me he ka ohnyibö ta je hnyem hia, m' adre
me he ka ohnaúhangöâ hmeledrany hia thi-
thö únyi ge Khong : 20 anyin ae ca khana
bi ke at he ka wisa hnyi hnyimakan ge ta
je huliwainy hnanyibu : anyin ae manen
dut hulö ge hnanyibu. 21 Ke manen dut
walang ang hwakecin ae wisa, ke ca únyi
ge hnanyibu bi, k' ame ohnathöâ hnen hna-
nyibu me ta je perofeta ; 22 wale hwakecin
ae wisa anyin Khong hnen labageju kö
Iesu Keriso hobi ködra hia tavat adre me
labageju ; anyin ae ve bongon bi ; 23 anyin
ae kong tavat hia, k' adre me ca o ka hnyi
hmanenanginy Khong. 24 ke adre me
haisöâ báúâ bi öta hnen anyin ibetengö
únyi ge úhömeli wale unyin Keriso Iesu :
25 a hut ame oâ hnen Khong, deny laba-
geju ka hnyi dren, m' adre me he ka oman-
enâ hwakecin ae wisa únyi hnyi hnen bna
thang ut ta je hulö adre ányâ ehac, únyi
hnyi hokhnyok beú hmâ anyin Khong ;
26 m' adre me omanenâ hnyi úen ang hwa-
kecin ae wisa : me me ka wisa bi, k' ame
he minya ka haiwisa at ame labageju kö
Iesu. 27 Anyin a wale, ewa hna ohobeluâ ?
E ba hnen bi e. Hnen ie hnanyibu ? hawa,
ge huliwa ? Ohe ; ke so bi únyi ge hna-
nyibuiny labageju. 28 Anyin a wale, ate
me únykúme, ka habe, adre me haiwisa at
ge labageju, ke ca ha bi huliwainy hnanyibu.
29 Hawa, e Khongon at Juda thibi ? ke
ca Khongon Aten minya bi ta je hnyei ?
Eke, me Aten ta je hnyei minya : 30 awe,
ame ne khaca thibi Khong, k' ame he ka
haiwisa hna peritom únyi hnyi labageju, ke

tavat adre ca peritom bi hnen labageju.
31 Hawa, ate me he ka oúnyibáúâ hnanyibu
hnen labageju ? Ohe ; ke so bi ate me
otilâ hmâ hnanyibu.

HNYIMAKAN 4.

A NYIN a wale, ate me he ka ha ieu
ame wâ hnö Aberahama a kamöta
hnyi unyin ? 2 Anyin adre ne haiwisai
Aberahama únyi hnyi huliwa, me hu but
káu hnân ohobeluâ ; ke ba bi ge Khong.
3 Anyin a ieu ame ha hna sihnalimen ?
Ka habe, Me Aberahama ame labageju ka
Khong, me adre me háîâ e káu hnân hwa-
kecin ae wisa. 4 Adre me ca ha a g' ame
he ka kap hwaban únyi ge ibetengö baú
hnen at ame ányâ huliwa, ke hnân bi bi
hwaban. 5 Ke haba at ame ca huliwa, k'
ame labageju thibi ka at ame haiwisa at ae
kong hwakecin ; haba anyin bi labageju,
me adre me he ka ha a hnân hwakecin ae
wisa. 6 Helá me Davita ame hahnahicâ
at hnen Khong hna haiwisa, ke ca ha biju
huliwa, ka habe,

7 Hnödra hnahic at ka obia anyidra ta je
hulö,
K' ame tube anyidra ta je monu.

8 Hnahic hnen at ame ca ha Than a ga
monu but.

9 Haba hnahic eang, me hnân hobi káu
peritom, k' ame ne hobi káu minya ca peri-
tom ? anyin a haingöta, ka habe, Adre me
háîâ labageju anyi Aberahama me hwakecin
ae wisa bi. 10 Ke adre ma kámáu he ka
ha e ? hawa hnyi anyin peritom, hawa hnyi
anyin ca peritom ? Ca hnyi peritom, ke so
bi hnyi ca peritom : 11 ke e ame kap haten,
wale peritom, hnân bi haten hwakecin ae
wisa, a anyin labageju k' adre tiga ca peri-
tomonâ : me me he ka kamen tavat hia
adre me labageju, k' adre ne ca peritomon
ödra, m' adre me háîâ hwakecin ae wisa
ködra ; 12 ke e kamen peritom minya ka
tavat adre peritomon ödra, ke hnyat minya
adre me he hnyi hwadeny hnyeúcan laba-
geju anyi Aberahama a kamöta, k' ödra
tiga ca peritomonâ bi. 13 Anyin adre ca
habânâ bi kö Aberahama me je mátrániny
a g' ame he ka hu hmeledrany me hwaje-
khon, únyi ge hnanyibu, ke so bi únyi ge
hwakecin ae wisa hnyi labageju. 14 Anyin
a ne hwöhwan hnen tavat a ödra hnyi
hnanyibu, awe, e únyi baú bi labageju, k'
ame ca ömanâ minya hna ha bánâ : 15
anyin a haba hnanyibu ame öküâ hmönyin ;

anyin ame ne ba hnanyibu, me ba minya hna hanyâûâ. 16 Anyin a wale me únyi hnyi labageju, me me he ka hoton ibetengió baú; me me tethmâ hna ha bánâ hobi kâu je mátrân hia; ca hake kôdra hnyi hnanyibu thibi, ke kôdra minya hnyi labageju anyi Aberahama, waleji a kamôta hia thithô, 17 (helâ me hna sihnalimen, ka habe, Oge hia but wiö u hnân kamen ta je hnyei ae se hia) hnyi hnyimakan Khong, at ame omelö hmetu thö tavat adre mokcu, me háiâ ta je únyi ae ba, helâke me e but ang. 18 Waleji ae ba hnân gejon unyin, ke e ame labageju me gejon a e ame he ka kamen ta je hnyei ae se hia, hoton hna ha, ka habe, Ame he ka helâe je mátrânâm. 19 Ke ca sēnyin bi anyin labageju, k' ame únykúme bi unyin ae meleca thö walang ang (helâke me wan haded je hunainy) me tangen hnöku ga Sara ae meleca minya but : 20 eke, e ame ca lolóa me ca labageju, k' ame wâ hmâ hna ha bánâ hnen Khong, ke e hwege bi únyi ge labageju, k' ume ogânâ Khong, 21 ame únykúme hmâ a e khana he ka ohwâdâ hnen hna ha bánâ. 22 Wale me me ha e kâu hnân hwakecin ae wisa. 23 Ke adre ca sihnalimen hobi kâu e thibi, a g' adre ha únyi e hobi kâu e thibi; 24 ke hobi kôta minya, wale adre me he ka ha únyi eling kôta, ate ne labageju kâu, waleji at a omeli Iesu a Tuhôta hmetu thö úheny hnyi hna mok, 25 waleji at adre hna but can anyita ta je hulö, ke adre omelö hmetu thö e hnân he ka haiwis' ôta.

HNHYIMAKAN 5.

A NYIN a wale, adre me haiwis' óta hnen labageju, ke so ate me úsoköu me Khong a deny Tuhôta Iesu Keriso; 2 a deny e adre hia but hn' óta únyi ge labageju ka hnyi ibetengió baú eang ate me tot hnyin; ke so ate me senyin me gejon hmananginy Khong. 3 Ke ca walang thibi, ke so ate me senyin minya hnyi anyita je vec: anyin ae khan' óta a g' ame okúâ bokhnyok únyi ge vec; 4 ke haba bokhnyok ame okúâ wâhmakhmetoâ; ke haba wâhmakhmeto ame okúâ gejon: 5 ke haba gejon ame ca ohmehma bi; anyin adre hia but hingálâ ka hnyi je hnyekuta ibetengió anyin Khong únyi ge Hanu Kap waleji adre ham kôta. 6 Ke hnyi úen a óta tiga sēnyin, me ame mokeu Keriso, hnyi úen ae úcú, hobi kâu tavat ae kong. 7 Anyin a helâke e pason ka ke at he ka mok me

hwaban at ae wisa hwakecin: ke so bi ame ne hu la ke at ae hwege he ka mok hnân hwaban at ae so. 8 Ke Khong ame omanenâ kôtâ anyin ibetengió, anyin ame mok Keriso me hnân hwab' óta ke óta tiga monu. 9 Ke walang ang adre me haiwis' óta únyi ge dreny, awe, adre me he ka ti omeli óta minya únyi gan hnyi hmönyin. 10 Anyin a ne úsoköu óta me Khong únyi ge mok anyin Nokon, waleji k' óta tiga iwahnaihmöny, me e gan hmâ hna he ka omeli óta hnen anyin möt, k' ate me úsoköu mē. 11 Ke ca hake wale thibi ang, ke ate me senyin ka Khong únyi ge Tuhôta Iesu Keriso, wale ate me kap úsoköu únyi gan.

12 Anyin a wale, ame o but hulö ka hnyi hmeledrany únyi ge at a khaca, k' ame o mok can hulö; ke ame o but mok ka tavat hia, anyin ae monu hia:—13 anyin e hu hulö hnyi hmeledrany ke ne o but ame o hnanyibu: ke adre me ca he ka ha hulö, e ka ba hnanyibu. 14 Ke so bi, ame dökhu mok hwân ga Adamu ke ne o but kö Mose, hon tavat ae ca monu helâ me hna hanyâûâ ga Adamu, waleji ame úöhúco at ame he ka o. 15 Ke ca tha úcú bi hna hanyâûâ me hna ham bâûâ. Anyin ame ne mok ut tavat ae se hia únyi ge monu anyin at a khaca, awe, ame he ka ti si ibetengió baú anyin Khong, me hna ham hnen ibetengió baú anyin at a khaca, Iesu Keriso, ka tavat ae se hia. 16 Ke ca tha úcú bi hna ham bâûâ me at a khaca ame ányâ hulö: anyin ame o but hna bi hwaban únyi ge monu a khaca ka hnyi hnaúhangö, ányin ame o but hna ham bâûâ únyi ge je monu ae se hia ka hnyi hnu haiwisa. 17 Anyin a ne únyi ge monu anyin at a khaca, ame dökhu mok únyi ge at a khaca; awe, e nua bi hnödra hna he ka dokhu hnyi möt únyi ge at a khaca, a Iesu Keriso, wale tavat ae hu gan hmâ kôdra ibetengió baú, me bwihlanyiny hwakecin ae wisa. 18 Anyin adre me obnaúhangöâ tavat ae se hia únyi ge monu a khaca; helâe minya ame o bwihlany ka tavat hia ame haiwis' ôdra m' adre me möt únyi ge hwakecin ae wisa a khaca. 19 Anyin ae kong ut tavat ae se hia únyi ge ca úling anyin at a khaca, helâe minya adre me he ka haiwisa tavat ae se hia hnen úling anyin at a khaca. 20 Ke ame o but minya hnanyibu, me ame se hia but monu; ke haba dok ame gan monu hnyin, me wale gan hmâ but ibetengió baú: 21 ke haba hulö ame musi ka hnyi mok, me helâe

ame he ibetengiö baü ka musi hnen hwakecin ae wisa ka hnyi möt ame ca ba balua, a deny Iesu Keriso a Tuhöta.

HNYIMAKAN 6.

A NYIN a wale ieu ate me he ka ha? Hawa, ate me he bala ka laba hnyi hulö, me me gan hmä but ibetengiö baü? 2 Ohe. Öta tavat a mok ka hnyi hulö, k' ate me he ka kâmâu he ka möt bala hnyin? 3 Hawa, e ca khan' öbun a haba öta hia tavat adre me bapataisoâ kö Iesu Keriso, me adre me bapataiso ka hnyi anyin mök? 4 Anyin a wale adre me tha könim öta me hnen hna bapataiso ka hnyi mok: m' ate me he ka vheno möt ae teb únyi, helä me adre me otilä Keriso únyi hnyi hna mok hnen hmanenanginy Kamen. 5 Anyin a ne tha öta me hnyi úhöcü me anyin mok, ate me he bi ka heläe minya hnyi möt hmetu; 6 ke khan' öta a g' adre me tha osatauroâ mä bonguta ehac, me me hia but unyin ae hulö, m' ate me ca he ka bá ge hulö; 7 anyin adre me ca háia at a mokcu a e at hulö. 8 Ke öta ka tha mok me Keriso, me ate me labageju a g' ate me he ka tha möt minya mä; 9 e khan' öta a ga möt hmetu thö Keriso únyi hnyi hna mok, k' ame ca he hmetu ka mok; k' ame ca he hmetu mok ka ton. 10 Anyin a haba mekin, me ame okhaca mok ka hnyi hulö: ke haba anyin möt, me ame möt bi ka Khong. 11 Heläe minya, únyküme ju öbun a öbun e mok ka hnyi hulö, k' öbun e möt bi ka Khong ga Iesu Kerisö.

12 Anyin a wale e so e ca he ka dökhü hulö hnyi je unyibun ame he ka mok, wale he ka löng hoton je weny e: 13 ke haba khaca, ca he ka hna je ong outhunyibun ka hnyi hulö hnän omjehen hwakecin ae ca wisa bi; ke ka hn' öbun dut ka Khong, helä me tavat adre me möt hmetu thö úhedra hnyi hna mok, me je outhunyibun hnän omjehen hwakecin ae wisa ka Khong. 14 Ke ame ca he hulö ka musi öbun bi; anyin a ca öbun bi hmelen hnanyibu ke hmelen bi ibetengiö baü.

15 Ama hawa? ate me he ka ányá hulö anyin a ca öta bi hnyi hmelen hnanyibu, ke hmelen bi ibetengiö baü? Ohe. 16 E ca khan' öbun, a haba at öbun e ka hn' öbun káu he ka bi athnyabainy me löng hoton me je lathnyabainy jut öbun ka at öbun e löng káu; ame ne hulö, ka hnyi mok, k' ame ne úling, ka hnyi hwakecin ae

wisa? 17 Ke oleá ju ka Khong, anyin a öbun e bi athnyabainy hulö ehac, ke walang ang öbun e löng ge hnyekubun hoton tulutiny hofuc adre me hn' öbun ka hnyin; 18 ke adre me hna baü' öbun bi únyi hnyi hulö, m' öbun e bi athnyabainy hwakecin ae wisa. 19 Inya oge me ha helä me bongon at, anyin ae sényin je unyibun: anyin a öbun e hna je outhunyibun he ka bi athnyabainy hwakecin ae ikiki ehac me hulö, he ka ányá hulö; ke walang ang e so öbun e hna but heläe je outhunyibun he ka bi athnyabainy hwakecin ae wisa me hwakecin ae kap. 20 Anyin a öbun e tiga lathnyabainy hulö ehac, me adre me hna baü' öbun hnyi hwakecin ae wisa. 21 Ke ieu wan ae hu köbun ehac hnyi ta je únyi öbun e hmehman walang ang? anyin a haba obiny ta je únyi eling, me mok. 22 Ke walang ang adre me hna baü' öbun únyi hnyi hulö, k' öbun e bi athnyabainy Khong, me hu but gabun wan ka hnyi hwakecin ae kap, ke haba obiny me möt ame ca ba balua. 23 Anyin a haba hwabhan hulö, me mok; ke haba bwihlany a ham báúá hnen Khong, me möt ame ca ba balua, únyi ga Iesu Keriso a Tuhöta.

HNYIMAKAN 7.

H NYAT me lakeiny lö, e ca khan' öbun (anyin a inya oge me ha ka tavat ae khan' ödra wia hnanyibu,) a g' ame musö at hnen hnanyibu hnyi úen anyin möt hia? 2 Anyin a haba momo ae hu áian ame ca thö hnen hnanyibu ka áian ke tiga möt áian a бага; ke e ka mokcu бага, me adre me thang ut momo únyi hnyi hnanyibu ge бага. 3 Anyin a wale a ne tha e momo me ke бага bi, ke tiga möt áian, me adre me he ka háia momo eling a e at bi únyi monu: ke e ka mokcu áian, me únyi baü but hnyi hnanyibu, waleling me me ca at bi únyi monu hmetu bi, e ka he ka ihok me ke бага. 4 Hnyat me lakeiny mönya lö, heläe minya öbun, öbun e mok ut ka hnyi hnanyibu hnen unyin Keriso; me öbun e he ka ihok me ke at, waleji adre omelö hmetu úheny hnyi hna mok, mate me he ka wa wan ka Khong. 5 Anyin a tiga öta bi hnyi unyin, haba ta je weny ae kong únyi hnyi hnanyibu ame huliwa hnyi je outhunyita he ka wa wan ka hnyi mok. 6 Ke walang ang adre hia but thöng öta únyi hnyi hnanyibu, ke ate hia but mok ka únyi waleji ame köt öta; mate me bi

athnyabainy hnen hanu a teb únyi, ke ca hnen bi tusi adrem.

7 Anyin a wale ieu ate me he ka ha? E monu hnanyibu? Ohe. Ke so bi a ne ba hnanyibu m' oge me ne ca he ka wá únykúme hulö: a ne ca ha bi hnanyibu, ka habe, U ca behnyekon, me ca khanö nya bi behnyekon: 8 ke haba hulö ame heleú ün, me ame okúâ eú hnyi hnyekuk únyi ge hnanyibu je behnyekon hia: anyin a mok ut hulö e ka ba hnanyibu. 9 Ingy möt ehac ke tiga ba hnanyibu, ke ame o but hnanyibu, me ame möt dö hulö, ke oge mok ut; 10 ke haba hnanyibu a hnân omeli, oge me wá a hnân mekiny: 11 anyin a haba hulö, ame heleú ün, me ame iyawö nya hnyi hnanyibu, me hlingö nya únyi gan. 12 Awe, e kap hnanyibu, me e kap hna húna, me wisa, me so. 13 Hawa, hnân mekiny kónya únyi ae so? Ohe, ke haba hulö, me me manen dut a e hulö bi, ame okúâ mok kónya hnen únyi ae so:—me me ti kong gan hmâ hulö hnen hnanyibu. 14 Anyin ae khan' öta a haba hnanyibu me hanen hanu: ke iny aten bi nya unyin, adre úcö nya ka hnyi hulö. 15 Anyin a haba hnök hna ányâ, me ca khanö nya: anyin oge me ca ányâ únyi oge me wek he ka ányâ; ke oge me ányâ únyi oge me húkotiâ bi. 16 Ke oge ne ányâ únyi oge me ca wek, oge me ogâ hnanyibu a e so. 17 Waleling me me ca inya hmetu bi at ame ányâ e, ke so bi hulö wale at ame laba eú hnyi hnyik. 18 Anyin ae khanö nya ae ba ke unyi ae so ame laba eú hnyi hnyik, wale hnyi unyik: anyin ae lu gak wek, ke ba manik man he ka ányâ so. 19 Anyin oge me ca ányâ únyi ae so a wek bi, ke oge me ányâ bi hulö wale oge me ca wek. 20 Ke oge ne ányâ únyi oge me ca wek, awe, ca inya hmetu bi at ame ányâ, ke so bi hulö, at ame laba eú hnyi hnyik. 21 Waleling m' inye wá hnanyibu ang, a e ka wek bi he ka mádrâ so, me tha e mönya bi monu. 22 Anyin oge me senyiná hnanyibu anyin Khong únyi ge at eú hnyi hnyik: 23 ke oge me wá ke hnanyibu minya bi hnyi je outhunyk, k' ame vat me hnanyibu eú hnyi hnyekuk, k' ame hwenbö nya ka hnyi hnanyibuiny hulö, at ame laba hnyi je outhunyk. 24 Ekölö gak, iny at ae kong ut! ie at ame he ka húgúnö nya únyi hnyi unyin eang ae mok? 25 Inya oge me ole ka Khong deny Iesu Keriso a Tuhöta. Waleling m' inye bi athnyabainy hnanyibu anyin Khong ge

hnyekuk: ke hnanyibu anyin hulö ge unyik.

HNYIMAKAN 8.

A NYIN a wale, e ba hmetu hnaúhangö ködra unyin Keriso Iesu. 2 Anyin a haba hnanyibuiny Hanu me möt unyin Keriso Iesu, me ame hnö nya únyi hnyi hnanyibuiny hulö me mok. 3 Anyin a haba únyi ae pason ka hnanyibu, can ae sēnyin únyi ge unyin, me haba Khong ame kunâ hing Nokon, helâ unyin ae kong, ke hnân hudiny hulö, me me ohnaúhangöâ hulö únyi hnyi unyin: 4 me me hwádâ but únyi gata hna húna hnyi hnanyibu, öta tavat ate me ca hnu hoton unyin ke so bi hanu. 5 Anyin a haba tavat adre me hnu hoton unyin adre me hnyokâ ta je únyi hnyi unyin; ke haba tavat adre me hnu hoton hanu adre me hnyok ka ta je únyi anyin hanu. 6 Anyin a haba behnyok ka unyin, me, wale mok; ke haba behnyok ka hanu, me, wale möt, me hnahic: 7 anyin a iwahnahmiöny me Khong he ka hnyok ka unyin; anyin ame ca löng bi hoton hnanyibu anyin Khong, anyin ae ca khana bi: 8 ke haba tavat hnyi unyin, me ca khan' ödra bi he ka osenyiná Khong. 9 Ke öbun ca aten bi unyin, ke ta je aten bi hanu, a ne eú hnyi hnyibun Hanon Khong. Ke a ne ca hu bi ge ke at Hanon Keriso, ca aten bi at eling. 10 Ke a ne eú hnyi hnyibun Keriso, a mokut unyin bi can hulö; ke möt bi hanu can hwakecin ae wisa. 11 Ke a ne laba eú hnyi hnyibun Hanon at ame omeli Iesu hmetu únyi hnyi hna mok, ame he minya at ame omeli Keriso Iesu únyi hnyi hna mok, ka omelö ta je unyibun ae bobot únyi ge Hanon, at ame laba eú hnyi hnyibun.

12 Hnyat me lakeiny lö, anyin a wale hanymöta he ka bi hwaban, ca ka hnyi unyin bi, mate me he ka möt hoton unyin: 13 anyin a öbun e ne möt hoton unyin, hamöbun he ka mok; ke öbun e ne hlingâ ta je huliwa hnyi unyin ge hanu, öbun e he ka möt. 14 Anyin a haba tavat ame su ödra Hanon Khong, me ödra thibi e je lakon Khong. 15 Anyin a öbun e ca kap hanon hwenbâ m' öbun e he ka ot; ke so bi öbun e kap hanon hna wia me me lakon, wale m' ate me ha, ka habe, Aba, Cica. 16 Haba Hanu ame ka tha ohnathöa me je hanuta, a öta je lakon Khong: 17 ke a ne lakon, me ame he ka je mátrân bi; wale

je mâtâniny Khong, ke tha je mâtân me Keriso : ate ne tha vec mē, mate me he ka tha hmanenang mē.

18 Anyin a inya oge me wâ, ae ca úcú ta je vec hnyi úen ang, he ka óucóá hnahic adre me he ka omanená kôta. 19 Anyin a haba hmeledrany ame halubahingen me ti weny gan hmâ hna omanená lakon Khong. 20 Anyin adre hwenbâ hmeledrany ka hnyi únyi ae ca únyi hnathu, ca únyi ge weny, ke hnen bi e at ame hom hwenbâ, 21 me gejon a g' adre me he ka hna hmeledrany únyi hnyi hwenbâ ae bobot, ka hnyi hna hna báúâ anyin lakon Khong. 22 Anyin ae khan' óta a g' ame mâng me vec hmeledrany hia ke ne o but hnyi bong ang. 23 Ke ca hake e, ke óta minya hnyat ae hu gata wan a bân anyin Hanu, haba óta ate me mâng minya eú hnyi je hnyekuta, me halubahingen he ka wia me me lakon, wale hna omeló ta je unyita. 24 Anyin adre me omeli óta únyi ge geju : ke haba geju ae manen me ca geju bi eling : anyin a ie at ame gejon únyi e ame wâ? 25 Ke ate ne gejon hnóta hna ca wâ, ate me halubalingen e me hokhnyok.

26 Helâe minya ame hadruâ anyita sēnyin hnen Hanu : anyin ae ca khan' óta wia bongon he ka hic ; ke hnen Hanu hna sumat hobi kôta hnyi mâng ae ca hnân ha bi ; 27 ke haba at ame elâm ta je hnyok, me e ame wâ únykúmanen Hanu, anyin a e ame sumat hobi kâu tavat ae kap hoton weny Khong. 28 Ke e khan' óta a g' ame tha huliwa ta je únyi hia me me so ka tavat adre me hnyok ka Khong wale tavat ame haw' ódra helâ me hnen hna únykúme. 29 Anyin a haba tavat waleji e ame wâhmakhmetu ódra, me e ame ip' ódra minya he ka tha bongudra me tulutiny Nokon, me me ató bi e unyin je liamekeiny ae se hia : 30 ke haba hnyat e ame okabâ adrem, me e ame haw' ódra bi : ke haba tavat e ame haw' ódra, me e ame haiwis' ódra bi ; ke haba tavat e ame haiwis' ódra, me e ame ohmanenangi ódra bi.

31 Ieú ate me he ka ha hnyi ta je únyi e? A ne tha hien m' óta Khong, ia úcúta? 32 Hawa, ame ca he ka ham báúâ kôta ta je únyi hia, hnen at ame ca behânâ Nokon, k' ame hna but e hobi kôta hia? 33 Ie at ame he ka bi fuco hna úca hnen Khong? Haba Khong thibi at ame haiwisa ; 34 ke ie at ame he ka ohnâhangóá? Hamen Keriso, at ame mok me môt hmetu úbeny hnyi hna mok, e but hnyi ke keihen metân

Khong, k' ame khóú hobi kôta. 35 Ie at ame he ka óúsákâú óta me ibetengiö anyin Keriso? hawa, vec, hlóuhlóu, hna seda, hmiâ, he thu, outen mok, hele vat? 36 Helâ me hna sihnalimen, ka habe,

Adre me hling' óhmun hnyi ta je bong can u ;

Adre me óúcú óhmun me ta je mamoe hnân hlingâ.

37 Ohe, e tuta balua hon ta je únyi hia eling únyi ge at ame betenge gata. 38 Anyin ae mou thó eú hnyi hnyekuk, ae ca khana bi mok, me môt, me ta je angela. me tavat musi, me ta je únyi walang, me ta je únyi ame he ka o, me ta je man, 39 me dok ae görany, me dok ae dit, me ke únyi adre hia but op, e ca khana ta je únyi e he ka óúsákâú óta me ibetengiö anyin Khong unyi Keriso Iesu a Tuhóta.

HNYIMAKAN 9.

INYA oge me ha hnathu únyi hnyi Keriso, oge me ca thoi bi, ame ohnathu nya hnen anyik únykúm sah únyi hnyi Hanu Kap, 2 ka habe, iny vec gan hmâ, ke hlóuhlóu bala bi hnyekuk. 3 Anyin a helâke oge me wek la, a g' adre me he ka ovesei nya me Keriso can je liamekeiny mönya, wale je lahanök hoton unyin : 4 ódra at Isaraela ; wale adre me wia me me lakon, me e hu gadra hmanenang, me ta je úhihinykóu, me hna hanu hnanyibu, me hmi, me je hna ha bânâ ; 5 ódra je mâtâniny ta je lakamóta, helâe minya Keriso hoton unyin, e nua hon ta je únyi hia thithó, Khong adre haisó nyiele balua. Amen. 6 Ke ca helâke ame únyi baú hofuc hwan Khong. Anyin a ca tavat Isaraela hia bi ódra hnyi Isaraela : 7 ke ca je lakon hia anyin a je mâtânâ Aberahamaódra : ke so bi, Adre me he ka ha je mâtânâm únyi ga Isaaka. 8 Walang bongon, a haba je lakon unyin, me ca je lakon Khong bi ódra ; ke haba je lakon hna ha bânâ, me, adre me ha wale je mâtân. 9 Anyin a walang hofuc adre ha bânâ, ka habe, Hnyi úen ang bi, oge me he ka o, ke ame he ka hu da nóku Sara. 10 Ke ca wale thibe e ; a erkin dut Rebeka hnen ke at, wale Isaaka a kamóta—11 ke tiga ca hnokoâ bi, ke ba minya so me huló ódru me ányâ, haba me me tethmâ ju hna únykúme hnen Khong hoton hnen hna úca, ca únyi. ge huliwa, ke únyi bi gan at ame hawâ, 12 me adre me ha ka momo, ka

habe, Ame he atô ka bi athnyabainy wake-
iat 13 Helâ me hna sihnalimen, ka habe,
Oge me betenge ga Jakob, k' iny hukötïö
Esau.

14 Anyin a wale, ieu ate me he ka ha?
Hawa e hu unyin Khong hwakecin ae ca
wisa bi? Ohe. 15 Anyin a e ame ha kö
Mose, ka habe, Oge me he ka betenge ge
hnök hna wek he ka betenge gan, ke
oge me he ka vec betenge ge at oge me
wek he ka vec betenge gan. 16 Waleling
me me ca únyi gan bi at ame weny,
ke ca únyi minya ge at ame wadring,
ke únyi bi ge Khong, at ae betenge. 17
Anyin a haingen hna sihnalimen kö Farao,
ka habe, Can thibi eling oge me otïlö u,
me inye he ka omanená manik man únyi
gam, me me lung iök bi hnyi hmeledrany
hia. 18 Awe, e ame betenge ge at e ame
betenge gan, ke e ame onáká at e ame
beonáká kâu.

19 Ke u me he la ka ha könya, ka habe,
Ieu gan a e ame ú? Ke ie at ame hagutá
weny bi? 20 Ohe, at lö, u ia u me ivinö
me Khong? Hawa, ame he únyi adre op
ka ha ka at ame op e, ka habe, Ieu gam u
me up nya helâng. 21 Hawa ge at ame
op kaia káná, e ame ca musi ka káná, he
ka op utkaia ae so, ame ne utkaia ae kong
bi? 22 A ne beomanená tang hmönyin
Khong, me ölungá maniny man, me ame
hokhnyoká beú hmá ta je utkaiainy hmön-
yin waleji adre penapena hobi kâu hnaú-
hangö: 23 me me he ka omanená únyi
hnathuiny anyin hmanenang ka ta je ut-
kainy ibetengïö, waleji e ame penapena
lnân hobi kâu hmanenang, 24 wale öta,
hnyat e ame haw' öta minya, a ca hake at
Juda thibi, ke Aten minya bi ta je hnyei?
25 Helâ me hnen hna ha hnyi Hosea, ka
habe,

Oge me he ka haw' ödra, me lakeik,
waleji a ca lakeik ;

Ke oúnykúmik, waleji a ca oúnykúmik
bi.

26 Ke haba hnyi dok adre me ha ködra, ka
habe, Ca latök bi öbun,

Me adre me he ka hai ödra eling, ka
habe, Je lakon Khong ae möt balua.

27 Ke haba Isaia ame háia at Isaraela, ka
habe, A ne helâ me önyin köïö úseiny at
Isaraela, me adre me he ka omelö kolon:
28 anyin a Than ame he ka ányá hnen
hna ha eang hmeledrany k' ame he ka
oumo me okhulitá e. 29 Helâ me hna ha
ehac ga Isaia, ka habe,

A ne ca hna but ke kolon gata hnen
Than tuhan sabaoth,
Me ate me ne he ka helâ me Sodoma, me
wi' öta e me úcü me Gomora.

30 Anyin a wale, ieu ate me he ka ha?
A g'ame hu hwakecin ae wisa ge Aten ta je
hnyei, waleji adre me ca hnu hoton hwake-
cin ae wisa, wale a hwakecin ae wisa hoton
labageju: 31 ke haba at Isaraela adre me
hnu hoton hnanyibuiny hwakecin ae wisa,
ke adre me ca o bi ka hnyi hnanyibu eling:
32 Anyin a ieu? Anyin adre me ca elâm
e hnyi labageju, ke helâke me hnen huliwa.
Adre me thö hnyi veto hnân othöá; 33
helâ me hna sihnalimen, ka habe,

Wâ bi, inya oge me ip hnyi Ziona veto
hnân othöá me kic hnân öü:

Ke ame ca he bi ka hmehma at ame
labageju kâu.

HNHYIMAKAN 10.

HNYAT me lakeiny lö, haba weny
hnyekuk me hijik hic ka Khong
hobi ködra, m' adre me he ka möt. 2 An-
yin a oge me ohnathöá gadra a ödra tavat
hwege huliwa ka Khong, ke ca hoton bi
metá. 3 Anyin ae ca khan' ödra hwakecin
ae wisa anyin Khong, ke adre me elâm he
ka otethmä hwakecidra bi ae wisa, me adre
me ca löng bi hoton hwakecin ae wisa anyin
Khong. 4 Anyin a Keriso obiny hnanyibu
hobi kâu hwakecin ae wisa ködra hia adre
me labageju. 5 Anyin a Mose ame sihnal-
imen a haba at ame ányá hwakecin ae wisa
únyi hnyi hnanyibu, me ame he ka möt
hnen e. 6 Ke haba hwakecin ae wisa
únyi hnyi labageju ame ha helâng, ka
habe, ca ha bi eú hnyi hnyekom, ka habe,
Ie at ame he ka ölö hnyidranyai? (wale
he ka hum Keriso but :) 7 ke, Ie at ame he
ka utut ka hnyi dok ae dit? (wale he ka
hum Keriso hmetu thö úheny hnyi hna
mok.) 8 Ke ieu ame ha? walang, E
hakekeny köu hofuc, e hnyi hnyimâm me
hnyekom; wale hofuciny labageju öhmun
e khetá: 9 anyin a u je ne he ka háia
Than Iesu ge hnyimâm, me labageju eú
hnyi hnyekom a Khong ame omelö hmetu
thö e únyi hnyi hna mok, awe, u me he
but ka möt: 10 anyin a hnyok at ame
labageju ke ne o but hnyi hwakecin ae wisa;
ke hnyem at ame ha ke ne o but hnyi möt.
11 Anyin a haingen hna sihnalimen, ka
habe, Ame ca he ka hmehma at ame laba-
geju kâu. 12 Anyin a ca ke bongon bi at

Juda me at Heleni : anyin a khaca thibi Tuhan hia, at ae tren ta je únyi hobi káu tavat hia adre me hawá e : 13 anyin adre me ha, Ame he ka môt hia tavat adre me hawá ien Than. 14 Ke adre me he ka kámáu ka hawá e, k' adre me ca labageju káu? ke adre me he ka kámáu ka labageju káu, k' adre me ca löng? ke adre me he ka kámáu ka löng, ke ba at ame khetá? 15 ke adre me he ka kámáu ka khet, k' adre me ca kun' ödra bi? helá me hna sihnalimen, ka habe, Shaiba ge soiny je li cadra adre me hom je úthumetu ae so önyen!

16 Ke adre me ca löng hia hoton úthumetu ae so. Anyin a haingö Isaia, ka habe, Than lö, ia ame kap anyihmun úthumetu? 17 Awe, adre me labageju únyi hnyi hna löng, ke adre me löng únyi hnyi hofuc hwan Keriso. 18 Ke inya oge me ha, ka habe, Adre me ca löng? Eke, e hnathu,

Ame he but ifucidra ka hnyi hmele-drany hia,

Ke hodra ta je hofuc ka hnyi je can hmele-drany.

19 Ke inya oge me ha, ka habe, Hawa e ca khana at Isaraela? A bö Mose ka ha, ka habe,

Oge me he ka oihunyinköu öbun ge tavat a ca hnyi hnathu bi,

Oge me he ka ohmönyini öbun ge hnyi ae monu bi.

20 Ke hwege Isaia me haingen, ka habe, Ame ö nya hnen tavat adre me ca elöm nya;

Ke oge me manen dut ka tavat adre me ca hnei nya bi.

21 Ke e ame háia at Isaraela, ka habe, Oge me lau li hanyamök hnyi je bong ka tavat adre me ca úling, a tavat ivinoá.

HNHYIMAKAN 11.

A NYIN a wale, inya oge me ha, ka habe, Hawa, a hia but Khong degec lakeiny? Ohe. Anyin a inya at Isaraela minya, únyi hnyi mátráni Aberahama, ke hanen tribu Beniamina. 2 A ca degec bi Khong lakeiny waleji e ame wáhmakhmeto ehac. Ke ca khan' öbun hna ha hnen tusi ga Elia? waleji e ame khöu ka Khong ge at Isaraela, ka habe, 3 Than lö, adre hia but hlingá ányám je perofeta, me tho degecá ányám je taben hut : ke bake inya thiju kolon, ke adre me elöm nya he ka

hlingö nya. 4 Ke ieú hna thu káu hnen Khong? walong, Oge me ip biju hobi könya tavat a seven thauzan, waleji adre me ca hnyi cibouca kö Baala. 5 Ke heláe minya walong ang, e hu wan hoton hna úca hnen ibetengió baú. 6 Ke a ne hnen ibetengió baú, awe, ca hnen bi huliwa : a ne ca heláe, me ca ibetengió baú hmetu bi ibetengió baú. 7 Ke ieú hmetu? E ca hu ge at Isaraela hnödra hna elám : ke e hu bi ge tavat adre úca, ke adre onáká keihen : 8 helá me hna sihnalimen, ka habe, Khong ame ham ködra hnyok ae bemokut, me je ecmak ame ca bwela bi, me je hnyiköny adre me ca löng, ke ne o but hnyi bong ang. 9 Ke haingö Davita, ka habe,

E so ame wia anyidra laulau me hnán hnewe me offic,

Me hnán othóá me hnán bi hwaban ködra :

10 E so adre me ölidrá je emaködra, madre me ca bwela bi,

Me onomá bala ju je judra.

11 Inya oge me ha, ka habe, Hawa, adre me thö me me ü but? Ohe : ke haba hnyi ta a ödra me ame o but úhömeli ka Aten ta je hnyei hnán oihunyinköu ödra. 12 Ke a ne tang omjehen dut hmele-drany ta a ödra, me tang omjehen dut Aten ta je hnyi hna otheduoci ödra; hawa, ame ca he ka ti gan hmá anyidra hnahic?

13 Ke oge me ha köbun Aten ta je hnyi. Ke anyin a inya ang aposetoloiny Aten ta je hnyi, me inya oge me ogáná hanyamök : 14 me heleú deny he ka oihunyinköu lahanök, me omelö keihen gadra a ne khana. 15 Ke a ne hu ge hmele-drany úsoköu hnyi hna digic ödra, ame he ka hu ieú hnyi hna he ka kap hmetu? ca môt bi únyi hnyi hna mok? 16 Anyin a ne kap wan a bán, ame he ka heláe hia : ke a ne kap iwán ame he ka heláe minya je anginy.

17 Ke adre ne thu degecá but ke je anginy, ke u elaioiny hnyot adre úhújáköuá unyidra, ke u me tha hu mödrin iwán me dán elaiio ; 18 u ma ca bi gan bi ka ta je vheiny : ke u je ne bi gan, me ame ca môt iwán únyi gam, ke u bu u môt únyi ge iwán. 19 U je ne ha, ka habe, Adre me subá degecá je angin m' adre me úhújáköuö nya bi. 20 Eke, adre subá degeci ödra únyi hnyi ca labageju, ke u je tethmá únyi hnyi ányám labageju. Ca bi gan, ke ot ju : 21 anyin a ne ca betenge Khong ge je hing vheiny, me ame ne ca he minya ka betenge gam. 22 Anyin a wale,

wá bi betenge me hmönyin anyin Khong : hmönyin ka tavat adre me kölu ; ke betenge anyin Khong köu, u je ne tethmä hnyi anyin ibetengiö : ke e ka ba, me adre me he ka subá degeci u minya bi. 23 Ke adre me he minya bi ka úhújaköu ödra wale adre me ca tethmä hnyi ca labageju : anyin ae khana Khong he ka úhújaköu ödra hmetu. 24 Anyin adre ne subö u únyi hnyi elaiö a kú hwege hnyi hnyot, ke adre me úhújaköuö u hnyi hing elaiö ke ca bongon bi úö : hawa, adre me ca he ka úhújaköu ödra hia ta je hing vheiny hnyi anyidra bi elaiö ?

25 Hnyat me lakeiny lö, oge me wek e me khan' öbun únyi eang ae iyong, wá öbun nye bemetá hnen je únykúmenöbun, a g' adre hia but onáká keihen tavat Isaraela, ke ne o but ame o hnabic ka Aten ta je hnyei ; 26 m' adre me he ka omelö at Isaraela hia thithö ; helá me hna sihnalimen, ka habe,

Ame he ka o At úhömeli úheny Ziona ;
Ke ame he ka ohia hwacecin ae kong unyi Jakob :

27 Ke wale hnök hna úhibinyköu mödra,
Iny ka he ka hom degecá anyidra hulö.

28 Je iwahnaihmiöny ödra me úthumetu ae so, can öbun : ke haba hnyi hna úca at, me adre me betenge ködra can lakamen.

29 Anyin ame ca ietra Khong ge hnen hna ham, me hnen hna hawá. 30 Anyin a öbun e ca löng hoton Khong ehac, ke walang ang adre me betenge gabun únyi hnyi hnödra hna ca löng hoton, 31 haba ödra, me adre me ca löng hoton walang ang, m' adre me he ka betenge gadra minya bi, helá me hna betenge köbun. 32 Anyin a tha hna Khong tavat hia thithö ka hnyi hna ca löng hoton, me me he bi ka betenge ge tavat hia thithö.

33 Shaiba ge údiliny metá ae nua me wá únykúme anyin Khong ! e iyong hmönyin anyin owisa, ke ca hnán wá bi deny ta je gethen ! 34 Anyin a ia ame wá únykúme weny Than ? ke ie at ame tha úhnenamö mä ? 35 ke ia a bán ka ham únyi káu, me e ame he ka bi hwaban hmetu káu ? 36 Anyin a haba ta je únyi hia thithö, me únyi gan, me hnen e, me hnán hobi káu, E so he ka ogáná e nyiele balua. Amen.

A NYIN a wale, hnyat me lakeiny lö, inya oge me újengi öbun únyi hnyi ibetengiö anyin Khong, möbun e he ka ham je unyibun me hnán hut ae möt, me kap, me so ka Khong, wale hanymöbun ae úcü. 2 Ke ca he ka tha hwakecibun me hmele-drany : ke so he ka wi' öbun hnen ohátá je hnyekubun, me me khan' öbun weny Khong ae so, me hnán osenyiná, me wisa.

3 Anyin a inya oge me ha köbun hia thithö, hnen betenge baú adre ham könya, ka habe, ca he ke at ka únykúme ogáná e bi hon únyi ae úcü he ka únykúme, ke únykúme úhnyúkongoá thibi, hoton hna khená ka ke at me ke at tulutiny labageju hnen Khong. 4 Anyin ae hu gata je outhunyin ae se hia hnyi unyin a khaca, ke ca tha hanymen hia bi je ong outhunyin : 5 heláe minya öta, at se hia, khaca thibi unyin unyi Keriso, ke je ong outhunyin öta ke at ka ke at. 6 E hu but gata je hna ham báúá ae ve bongon bi hoton ibetengiö baú adre ham köta, a ne hnán ope-rofeta, e so e ányá hoton kahmen labageju : 7 ame ne dikona, ányá thö hanymen dikona ; ame ne at úne, úne thö ; 8 ame ne at khet, khetá thö : ke a ne at ame ham, ham hnathoá thö ; at ame musi, musi wia ju, at ame betenge, betenge thö me senyin. 9 E so betenge ke ba thoi hnyin. Ikikiá thö únyi ae kong ; kece ju ka únyi ae so. 10 Ibetengiököu ju öbun ge ibetengiö anyin liamekeiny ; bebán he ka ogáná ke at me ke at ; 11 hnyi huliwa wia ke ca senyin bi ; hwege ju hnyi oúnykúmbun ; athnyabainy dö Than : 12 senyin hnyi gejon ; hokhnyoká ju vec ; labö hic bala ; 13 ha-omjehen ju tavat ae kap hnyi hnödra hna theduoc ; khenen ju he ka imetenyimwi me ta je atkanyua. 14 Hahnahici ödra ju waleji adre me oveci öbun ; hahnahicá, ke ca hangá bi. 15 Tha senyin dö me tavat adre me senyin ; tha tenge me tavat adre me tenge. 16 Tha hnyökköúá ju öbun. Ca únykúme bi ta je únyi ae görány, ke ca höcö he ka vhenö ta je únyi ae hnyikáná. Ca bemetá bi öbun hnyi je únykúmenöbun. 17 Ca bi hwaban bi monu anyin ke at ge monu. Penapena thö ta je únyi ae úcü hnyi hnyimakan tavat hia. 18 Laba úso-köu me tavat hia a ne khan' öbun. 19 Je oúnykúmik lö, ca he öbun ka bi hwaban monu, ke nom ju ka at ae tren hmönyin : anyin adre hia but sihnalimen, ka habe,

Haingen Than ame ha, Hamök he ka bi hwaban monu, oge me he bi nya ka bi hwaban. 20 Ke a ne mekihänem iwahnahmiöny möu, hân ju; ame ne beic, habelen: anyin a u je ne änyâ e, me u me úkhóúnâ je walep ae möt hon ban bi. 21 Ca he ka ng' öbun ge monu, ke ngâ but monu ge so.

HNYIMAKAN 13.

ESO ka tavat hia he ka löng hoton ta je musi ae gan: anyin ae ba ke musi a ca únyi ge Khong; haba Khong ame otílâ ta je musi ehele. 2 Anyin a wale haba at ame thu musi, me ame thu hna ötilâ hnen Khong: k' ame he ka kap hnaúhangö hnen hnyat adre me thu. 3 Anyin a haba tavat musi, me ca hnân ootâ bi at ame mádrâ so, ke so bi at ame mádrâ monu. Hawa, e wem u me ca he ka outen at ame musi? änyâ thö hwakecin ae so, me wale únyi ame he ka haisoi u: 4 anyin a e athnyabainy Khong unyâm hobi kâu so. Ke u je ne mádrâ hwakecin ae kong, ot ju; anyin a e ame ca vadren báúâ hele vat: anyin a e athnyabainy Khong, at ame bi hwaban ge hmönyin ka at ae kong hwakecin. 5 Anyin a wale e ti úcú köbun he ka löng hoton, ca can hmönyin thibi, ke únyi minya bi ge únykúm sah. 6 Anyin a wale öbun e bi fat minya; anyin a ödrin lathnyabainy Khong, k' ödrin e tuó bala hanymen eling. 7 Ham dö ka tavat hia anyidra ta je únyi: khúö ka at adre me khúö kâu; fat ka at adre me fat kâu, ot ka at adre me ot kâu; ogânâ at adre me ogânâ.

8 Ca hom bah únyi anyin ke at, ke so bi he ka ibetengiököu: anyin ame ohwádâ hnanyibu at ame betenge ka ke at. 9 Ke walang ka habe, U ca he ka bi únyi monu, U ca he ka úlingö, U me ca he ka venöu, U ca he ka behnyekom, ke a ne hu ke hnanyibu, wale thibi e hnyin hofuc ang, ka habe, U me he ka betenge ge at ame laba hakekeny u helâ me u bi. 10 Haba ibetengiö, ca at ame okongoâ at ae hakekeny: anyin a wale haba ibetengiö wale at ame ohwádâ hnanyibu.

11 Ke walang ang, e khan' öta ün, a ün dut ang öbun e he ka hmak úhebut hnyi hna mokut: anyin ae hakekeny jut walang ang möt, ke sákâú ehac waleji k' ate me labageju. 12 E beú hmâ but lit ke hakekeny jut lany: anyin a wale ate me he

ka hna degecâ but ta je huliwa anyin lit, ke so ate me he ka khavâ úkhaú hnân vat anyin lany. 13 E so ate me he fáfâ helâ me hnyi lany; ca hnyi walak me ic monu, ca bi únyi monu me wagelue, ca hnyi iwatretra me ihunyinköu. 14 Ke khavâ ju öbun Than Iesu Keriso, ke ca penapena bi hobi kâu unyin, he ka ohwádâ je weny e.

HNYIMAKAN 14.

KAP dö at ae sényin hnyi labageju, ca hnân he ka iwatretra hna loloâ. 2 Anyin a únykúmenen ke at me so he ka an ta je únyi hia: ke haba ke at ae sényin ame an thibi ta je únyi a kú hnyi kánâ. 3 Ca he at ame han ka hmiân at ame ca han, ke ca he at ame hnyi han ka únykúme at ame ca hnyi han: anyin a hia but Khong kap e. 4 Anyin a u ia at ame únykúme athnyabainy ke at? e ka tethmâ, ke e ka ú bi, me hamen tuhan bi. Eke, adre me he ka otethmâ e, anyin ae khana Than he ka otethmâ e. 5 Ke haba únykúmenen ke at, me beönua ke bong hon ke bong: ke haba únykúmenen ke at, me úcú hia thibut je bong. E so he ka ve thamúa wia hnyi je hnyekubun. 6 Haba at ame öünyihnthoâ bong, e ame öünyihnthoâ e ka Than: haba at ame han, ame han bi ka Than, anyin a e ame ole ka Khong; ke haba at ame ca han, e ame ca han ka Than, me oleâ ka Khong. 7 Anyin ae ba ke at gata ame ka möt bi kâu, ke ba ke at ame ka mok bi kâu. 8 Anyin ate ne möt, ate me möt ka Than: ke öta ka moku, ate me mok bi ka Than: anyin a wale ate ne möt, ke ate ne mok, je lakeiny Than bi öta. 9 Anyin a moku Keriso he möt hmetu thö, me me he ka Tuhan tavat adre moku me tavat miny: ae möt. 10 Ieú gam u me únykúme liamekeiny möu? ke haba khaca, ieú gam u me hmiân liamekeiny möu? anyin ate me he hia ka tot hnyi hnyimakan taben owisa anyin Khong. 11 Anyin adre hia but sihnalimen, ke habe,

Haingen Than, ka habe, Kia inya inya, a g' adre me he hia ka ciboucâ könya K' ame he ta je bohmen hia ka ve ogâni Khong.

12 Waleling mate me he hia ka ve ba hwakecita ka Khong.

13 Anyin a wale ca he hmetu öta ka únykúmköu: ke so bi he ka únykúme únyi thibi ang, a ca he ke at ka ip hnân othoâ, ame ne ke únyi hnân ovhelâ liame-

keiny. 14 E khanö nya ke mou thö hnyi hnyekuk ga Iesu Keriso, ae ba ke únyi ame ka kong thiju : ke haba at ame únykúme ae kong ke únyi, me ka kong bi káu. 15 Ke a ne hmak hnyekon liamekeiny möu, can ám jeú, awe, u me ca vheno hmetu ibetengiö. Ca he ka ohia hnen ám jeú at a mok Keriso hobi káu. 16 Wá eáu, wá adre nye haikongóa anyibun so : 17 Anyin a haba dokhon Khong, me ca he ka hnyi han me ic, ke so bi hwakecin ae wisa, me hnahic, me senyin hnyi Hanu Kap. 18 Anyin a Khong ame senyin ka at ame bi athnyaba kö Iesu Keriso hnyi únyi eling, ke ame haisoá minya hnen at. 19 Anyin a wale, e so ate me he ka hnu hoton ta je únyi hnán úsoköu, me ta je únyi hnán úökahwaköuá. 20 Ca hagutá huliwa anyin Khong can ta je jeú. E kalaöt ta je únyi hia ; ke so bi e kong ka at ame han me hnán öhükötö. 21 E so he ka ca hnyi han utiö, me ijem waina, me ányá ke únyi hnán öthöá liamekeiny möu. 22 Haba anyám labageju, me so e me ka hu bi gam hnyi hnyimakan Khong. Hnahic hnen at ame ca ka hangá e bi hnyi únyi e ame haisoá. 23 Ke haba at ame han me loloá, me hulö but e, anyin a e ame ca han hnyi labageju ; ka haba ta je únyi hia a ca únyi bi hnyi labageju, me wale hulö.

HNYIMAKAN 15.

HAMÖTA tavat ae hwege he ka hadruá hnyat ae sēnyin, ke ca he ka osenyini öta thibi. 2 E so ate me he hia ka osenyiná at ae hakekeny köta hnyi únyi ae so, me hnán okaukaha. 3 Anyin a haba Keriso ame ca ka osenyiná e ; ke helá me hna sihnalimen, ka habe, Haba hna ú hnen tavat adre me ú u, me ame ta but huk. 4 Anyin a haba ta je únyi adre sihnalimen adrem, me adre me sihnalimen hnán n' öta, me me hu anyita geju hnen hokhnyok me kaukaha únyi hnyi je hna sihnalimen. 5 E so e ham köbun hnen Khongon lingvec me kaukaha he ka tha hnyok hoton Keriso Iesu : 6 m' öbun e he ka tha ogáná Khong, a Kamen Tuhöta Iesu Keriso, ge hnyok a khaca me hnyem a khaca. 7 Anyin a wale úkapköuá ju öbun helá me hna köp öbun hnen Keriso, hnán ogáná Khong. 8 Anyin a inya oge me ha, ka habe, haba Keriso ame bi athnyabainy peritom hobi káu hnathu anyin Khong, me me he ka ohmä hna ha báná ka lakamöta,

9 me me he Aten ta je hnyei ka ogáná Khong can anyin ibetengiö baú, helá me hna sihnalimen, ka habe,

Wale me inye he ka oganö u hnyi waben Aten ta je hnyei,

Me khumöngö iam.

10 Ke haingen minya, ka habe, Aten ta je hnyei lö, tha senyin dö me je lakeiny.

11 Ke wale minya eang, ka habe, Ogáná thö Than, öbun hia Aten ta je hnyei ;

Ke ogáná thö e öbun ta je hnyei hia thithö.

12 Ke wale hmetu ang, haingö Isaiia, ka habe,

Ame he ka hu iwán únyi ga Jese,

Ke at ame tot he ka musö Aten ta je hnyei ;

Ame he ka labageju káu hnen Aten ta je hnyei.

13 E so e he Khongon geju ka ounöngöti öbun ge senyin me hnahic hnyi labageju, me me gan anyibun geju hnen man maniny Hanu Kap.

14 Ke mou but eú hnyi hnyekuk gabun je liamekeiny mönya, a öbun e unöngötö ge hwakecin ae so, ke unöngöt ge metá hia, ke e khan' öbun he ka úsihwegei öbun köu.

15 Ke oge me sihnalimen hwegiá köbun ge ta je únyi he ka oúnykümi öbun, únyi hnyi ibetengiö baú a ham könya Khong, 16 me inye he ka bi athnyabai Iesu Keriso ka Aten ta je hnyei, he ka ányá hanyen at bihut hnyi úthumetu ae so anyin Khong, me me he ka kap soá hut wale Aten ta je hnyei, me okabi ödra hnen Hanu Kap. 17 Anyin a wale e hu gak hnán he ka ohobelúa ge ta je únyi anyin Khong ga Iesu Keriso. 18 Anyin oge me ca he ka hwege ka ha ke únyi, wale ame ca tha mádrá mönya Keriso hnán okúá úling ka Aten ta je hnyei, hnen hofuc me huliwa, 19 hnen maniny ta je haten me úöman, me man maniny Hanu Kap ; wale a hván hnyi Jerusalema igigilö ke ne o but hnyi Iluriko oge me khetá úthumetu ae so anyin Keriso ; 20 eke, oge me elám deny he ka khetá úthumetu ae so hnyi je dok adre me tiga ca ha hnyin iö Iesu, wá oge nye he ka op hon taben anyin ke at ; 21 ke so bi, helá me hna sihnalimen, ka habe,

Adre me he ka bwela, wale tavat adre me ca háia e ködra,

Ke ame he tavat adre ca hnyi löng ka wá únykúme.

22 Ke se hia hna ovheli nya he ka he but köbun : 23 ke walang ang, me ba hmetu hanymök hnyi je ke keihen hnyei ang, ke se hia ta je huna oge me bewek gan hmâ he ka he but köbun, 24 iny ka he Sepania ai (anyin oge me únykúme he ka iouny möbun hnyi úhek, ke öbun e he ka su nya, ama bán ka sekuk hnyi iouny a öta) 25—ke walang ang, inya oge me he Jerusalem a ai, he ka bi athnyabainy wakap. 26 Anyin a weny at Makedonia me Akasia he ka úhnöhnö hnân betenge ka wakap a tavat ae theduoc hnyi Jerusalem. 27 Eke, wale wedra ae so ; ka e unyidra anyidra ta je únyi. Anyin a ne kap hnen Aten ta je hnyei ta je únyi anyin hanu únyi gadra, me e úcú minya ködra he ka kap bi ta je únyi anyin unyin. 28 Anyin a wale, iny ka hia but umo e, me ohmâ ködra wan eang, me oge me he ka he unyibun iny ka he Sepania ai. 29 Ke e khanö nya, a iny ka he ka he köbun, me oge me he ka o but hnyi unöngötiny hnahic ge Keriso.

30 Hnyat me lakeiny lö, inya oge sumat öbun únyi ge Tuhöta Iesu Keriso, me únyi ge ibetengiö anyin Hanu, möbun e he ka tha hic újông mönya ka Khong hobi könya ; 31 me me hügúnö nya but ge tavat adre me ca úling hnyi Juda, me me kap soâ hnen wakap anyik huliwa hobi ködra hnyi Jerusalem ; 32 me inye he ka o köbun hnyi senyin únyi ge weny Khong, me ötin e he ka tha kahwa. 33 E so e unyibun hia thithö Khongon hnahic. Amen.

HNIMAKAN 16.

OGE me haisoi Febi köbun, a hanita, wale a huliwa ka ekalesia hnyi Kenikerea : 2 möbun e he ka kap momo eling hnyi Than, helâ me hwakecin wakap, me öbun e he ka hadruâ e hnyi ta je únyi e ame he ka weny úhadruo gabun hnyin : anyin a e at a hia but hadruâ tavat ae se hia, ke inya ang khaca.

3 Anyik talofa kö Perisila, me Akula li at ödre tha huliwa mönya ka Keriso Iesu, 4 waleji a li at ödre ip li nyidru me hnân hwabök ; ca hake inya thibi oge me oleâ ködrü, ke so bi ta je ekalesia hia minya anyin Aten ta je hnyei : 5 anyik talofa minya ka ekalesia hnyi umödrü uma. Anyik talofa kö Epaineto a öunykúmik, waleji wan a bán ka Keriso hnyi Asia. 6 Anyik talofa kö Maria waleji at ame huliwa gan hmâ hobi köbun. 7 Anyik

talofa kö Anedroniko, me Junia, a li liamekeiny mönya, li at adre tha c' ödrü mönya, li at ae lung unyin je aposetolo, a bödrü unyin Keriso ka bilik bi. 8 Anyik talofa kö Amepelia a öunykúmik unyin Than. 9 Anyik talofa kö Urbano, waleji at ame tha huliwa möhmun ka Keriso, me Sataki a öunykúmik. 10 Anyik talofa kö Apele waleji adre haisöf unyin Keriso. Anyik talofa ködrin hnyi lap anyi Aristobulo. 11 Anyik talofa kö Herodiona a liamekeiny mönya. Anyik talofa ködrin hnyi lap anyi Nakiso, a ödrin unyin Than. 12 Anyik talofa kö Trufaina me Trufosa, li at ödrü me huliwa hnyi Than. Anyik talofa kö Peresi a öunykúmik, waleji at ame huliwa gan hmâ ka Than. 13 Anyik talofa kö Rufo at a úca Than, e me hinyen, a hinyök minya. 14 Anyik talofa kö Asungerito, me Felegona, me Herema, me Pateroba, me Hereme, me hnyat me lakeiny unyidrin. 15 Anyik talofa kö Filologo me Julia, me Nerea me hanin, me Olumepa, me wakap hia unyidrin. 16 Úitalofakö ju öbun ge úcimhnyimak ae kap. Adre me italofa möbun ta je ekalesia anyin Keriso hia.

17 Inya oge me sumat öbun hnyat me lakeiny, möbun e wâhmakhmetu ödra ju, waleji a tavat adre me okûâ imoukô me hnân öthöâ, wale ta je hwakecin ae ca úcú. bi me hnöbun hna úne : ke úsâkâü mödrae 18 Anyin a haba tavat helâe, me adre me ca bi athnyabainy Tuhöta Iesu Keriso, ke ka je hnyekudra bi, ke adre me omonö je hnyekon tavat ae ca khan' ödra ta je únyi, hnen hofuc ae menyik me útakú. 19 Anyin ame lung hnöbun hna úling unyin tavat hia thithö. Anyin a wale inya oge me senyin gabun : ke e wek bi, a e so öbun e metâ but hnyi ta je únyi ae so, me ca khan' öbun ta je únyi ae kong. 20 Ke ame ie he Khongon hnahic ka uti Satana hnyi hmelen je li cabun.

E so e unyibun ibetengiö baú anyin Tuhöta Iesu Keriso.

21 Ame italofa möbun Timoteo at ame tha huliwa mönya ; me Lukio, me Jasona, me Sosipatero je liamekeiny mönya. 22 Inya Teretio at ame sihnalimen tusi eang oge me italofa möbun hnyi Than. 23 Ame italofa möbun Gaio, wale oge me laba unyin, me ekalesia hia. Ame italofa möbun Eraseto at ame tuö omjehen taun, me Karato a ke liamekeiny.

25 Ogánâ thö at ae khana otethm' öbun hoton anyik úthumetu ae so me hna kheti

I. KORINITO 1.

Iesu Keriso, hoton hna omanená únyi ae iyong waleji adre me ikhálá adrem balua, 26 ke manen dut walang ang, ke adre hia but omanená, únyi hnyi hna sihnalimen hnen ta je perofeta, ke hoton hna hûna

hnen Khong a nyiele balua ka ta je hnyeí hia, madre me he ka löng hoton labageju; 27 e so he ka ogáná Khong, a hake e thibi at ae metá, nyiele balua, a deny Iesu Keriso. Amen.

TUSI A BÂN ANYI PAULO APOSETOLO KA

AT KORINITO.

HNYIMAKAN 1.

INYA Paulo, at adre hawá hnen weny Khong hnân aposetolo anyi Iesu Keriso, me Sosethene a liamekeiny möta, 2 öhmü me sihnalimen ka ekalesia anyin Khong hnyi Korinito, wale tavat adre me okabi ödra unyi Iesu Keriso, k' adre me haw' ödra me wakap, tha ödra me tavat hia thithö hnyi je dok hia adre me hawá ien Tuhöta a Iesu Keriso, a Tuhödra ke Tuhötin: 3 e so e e unyibun ibetengiö baü me hnahic únyi ge Khong a Kamöta me Than Iesu Keriso.

4 Inya oge me ole bala ka Khonguk gabun, can ibetengiö baü adre ham köbun ga Iesu Keriso; 5 a g' adre otreñi öbun ge omjeü únyi gan hnyi ta je únyi hia, hnyi ta je hofuc hia, me ta je metá hia: 6 helá me hnödra hna ohmä eü hnyibun hnathu ge Keriso: 7 wale me me ca hia gabun ke bwihlany; k' öbun e halubahingen he ka manen Tuhöta Iesu Keriso; 8 wale at ame he ka otethm' öbun ke ne o but obiny, me me ba hnân haikongu öbun hnyi bong bongon Tuhöta Iesu Keriso. 9 Haba Khong, me hnathu, waleji at ame hia but haw' öbun he ka tha e me Nokon a Iesu Keriso a Tuhöta.

10 Hnyat me lakeiny lö, inya oge me sumat öbun hnyi ien Tuhöta Iesu Keriso, ka habe, e so e khaca thibi ifucibun, me me ca he ka hu je imouköu unyibun; ke so öbun e tha hnyok hnathu hnyi önyüküm a khaca. 11 Anyin a haba tavat hnyi hnyaba Keloe, me ödrin e hia but hai öbun könya, a g' ame iwatretra öbun. 12 Walang hok hofuc, ka habe, ve haingöbun hia, ka

haba, iny atö Paulo inya; ke iny atö Apolo inya; ke iny atö Kefa inya; ke iny atö Kerisö inya. 13 Hawa, adre susubá Keriso? adre osatauroi Paulo hobi köbun? ke adre bapataisoi öbun ka hnyi iö Paulo? 14 Inya oge me oleá ka Khong anyin ae ba ke at gabun oge bapataisoá, ke so thibi Kerisepo me Gaio; 15 wá e nye ha ke at, ka habe, oge bapataisoá ka hnyi iök. 16 Ke oge bapataisoá minya lap anyi Setefana: ke ca khanö nya ame ne hu ke at oge bapataisoá minya. 17 Anyin a ca kunö nya Keriso he ka bapataiso, ke so bi, he ka khetá úthumetu ae so: ca hnen ifucin metá, wá e nye gufa but satauro anyi Keriso.

18 Anyin a hwen monu úthmetu ge satauro ka tavat adre me he ka hnathangö; ke man maniny Khong köta a tavat adre me he ka möt. 19 Anyin adre hia but sihnalimen, ka habe,

Oge me he ka ohia metá anyin tavat ae metá,

Ke oge me he ka önyibáüá hna wá únyüküme hnen tavat adre me wá únyüküme.

20 Ewa at ae metá? Ewa at sihnalimen? Ewa at ivinö hnyi dö eang? Hawa, Khong ame ca omono metá eang hmeledrany? 21 Anyin a únyi hnyi metá anyin Khong, e ca khana bi Khong hnen aten hmeledrany hnyi anyidra metá, haba Khong ame weny he ka omelö tavat adre me labageju, hnen hwen monu, a wale hna khetá. 22 Haba at Juda, me wedra ta je haten, ke haba at Heleni adre me elám metá: 23 ke öhmun e khetá Keriso adre osatauroá, wale hnân thö ka at Juda, ke hwen monu bi ka at Heleni; 24 ke Keriso

I. KORINITO 2, 3.

man maniny Khong, me metâ anyin Khong ka tavat adre úca, at Juda me at Helene minya. 25 Anyin a haba hwen monu anyin Khong me nua metâiny hon at, ke haba sēnyin anyin Khong me nua hwegien hon at.

26 Hnyat me lakeiny lö, wâ ju hna haw' öbun, anyin ae ca se hia bi tavat ae metâ hnyi unyin, ke ca se hia minya bi tavat ae lung, ke ca se hia minya bi ta je than: 27 ke haba Khong ame úca ta je únyi ae monu hnyi hmeledrany he ka ohmehma tavat ae metâ; ke haba Khong ame úca ta je únyi ae sēnyin hnyi hmeledrany he ka ohmehma ta je únyi ae hwege; 28 ke haba Khong ame úca ta je únyi baú hnyi hmeledrany, me ta je hna hûkötia, me ta je únyi ae ba, he ka ohia ta je únyi ae manen: 29 me me ba at ame he ka hobelöu hnyi hnyimakan Khong. 30 Ke únyi gan öbun hnyi Keriso Iesu, at adre wia köta únyi ge Khong hnân metâ, me hwakecin ae wisa, me kap, me hnân möt: 31 helâ me hnödra hna sihnalimen, ka habe, Haba at ame hobelúa, me so e ame hobelúa hnyi Than.

HNYIMAKAN 2.

HNYAT me lakeiny lö, haba ge imwik e unyibun, me oge me ca tha o me hofuc ae hmanenang me metâ, hnyi hnök hna omanená köbun únyi ae iyong anyin Khong. 2 Anyin ae mou but eú hnyi hnyekuk ehac, a g' ame ca he ka khanö nya ke únyi unyibun, ke hake Iesu thibi a g' adre osatauroá ehac. 3 Ke inya unyibun hnyi sēnyin, me ot, me öbubuny ae gan hmâ. 4 Ke haba ifucik ke hnök hna khetâ, me ca hnen bi hofuc ae senem hnyi metâ, ke ame kú hnen Hanu me man: 5 me me ca he ka e hnyi metâiny at anyibun labageju, ke so bi hnyi man maniny Khong.

6 Ke öhmun e khetâ metâ unyin tavat ae ti metâ; ke so bi ca metâ únyi eang hmeledrany ke ca únyi ge je tuhan mele-drany, wale ame he ka hia bi: 7 ke öhmun e ha metâ anyin Khong únyi ae iyong, waleji adre me ikhâlâ, ke a ip hnen Khong adrem ke tiga hia bi hmeledrany hnân ogan' öta: 8 wale ae ca khana hnen je than eang hmelen: anyin a ne khan' ödra, me adre me ne ca he ka osatauroá Thaniny hmeledrany: 9 helâ me hna sihnalimen, ka habe,

Ame ca wâ hnen ecmak, k' ame ca löng ge hnyiköny,
K' ame ca dit ka hnyi hnyin at ta je únyi

Waleji a penapena Khong hobi ködra adre me hnyok kâu.

10 Ke a hia but Khong omanená köta hnen Hanu: anyin a Hanu ame elelâm ta je únyi hia, eke, ta je únyi ae dit anyin Khong. 11 Anyin a ie ke at ae khana ta je únyi anyin ke at, ke so thibi hanon at eú hnyi hnyin? helâe, ae ca khana at ta je únyi anyin Khong, ke so thibi Hanon Khong. 12 Ke ate me ca kap bi hanon hmeledrany, ke so bi hanu únyi ge Khong; me me khan' öta thö ta je únyi a ham bâú köta Khong. 13 Ke öhmun e ha ta je únyi e, ca únyi hnyi hofuc adre ná hnen metâ anyin at, ke so bi únyi hnyi hna úne hnen Hanu; ame omanená ta je únyi anyin hanu ka tavat aten hanu. 14 Ke haba aten unyin ame ca kap ta je únyi anyin Hanon Khong: anyin a hwen monu e kâu; ke e ca khana he ka wâhmakhmetoá e, anyin adre me wâ únykúme hnen hanu. 15 Ke haba aten hanu ame wâ únykúme ta je únyi hia, ke ame ca wâ únykúme e hnen ke at. 16 Anyin a ie at ae khana únykúmenen Than, me me he ka ná e? Ke hu but gata únykúmenen Keriso.

HNYIMAKAN 3.

HNYAT me lakeiny lö, e ca khanö nya he ka fuc köbun helâ me tavat aten hanu, ke so bi helâ me tavat aten unyin, helâ me ta je mendreng unyi Keriso. 2 Oge abelibun ge debai, ke ca haöbun bi ge utiö: anyin ae ca khan' öbun ehac; ke ca khan' öbun bala walang ang; 3 anyin a öbun tiga aten unyin: anyin a e unyibun ihunyinköu me iwatretra, hawa, ca aten unyin bi öbun, k' öbun e he helâ me hwakecin at bi? 4 Anyin a haingen ke at, ka habe, Iny atö Paulo inya; ke haingen ke at, Iny atö Apolo inya; hawa, öbun ca je at? 5 Anyin a ieú Apolo? ke ieú Paulo? a li athnyaba a deny anyibun labageju; helâji me hnen Than hna ve ham köhmu. 6 Inya oge tä, k' ame hú ga Apolo; ke haba Khong ame öküá. 7 Waleling me me ca únyi hnathu at ame tä, ke ca únyi hnathu minya bi at ame hú; ke so bi Khong at ame öküá. 8 Ke khaca thibi at ame tä me at ame hú: k' ame he ka ve hu hwaban ae úcü ka hnyi anyidru huliwa. 9 Anyin

a öhmun tavat tha huliwa tot me Khong : ke öbun hna belök iny Khong, ke uma a op Khong.

10 Oge hia but ip taben helâ me homakan hnyat op uma a at ae metâ, hoton ibetengïö baú anyin Khong adre me ham kõnya ; ke haba ke at ame op göranyai hon. 11 Anyin ae ca khana bi ke at he ka ip hmetu ke taben, ke so bi hnödra hna ip, wale Iesu Keriso. 12 Ke a ne he ke at ka op gol hon taben eling, ame ne sileva, ame ne je veto omjeû, ame ne utö, ame ne ot, ame ne je thatúnyi ; 13 me ame he ka ve manen dut huliwa anyin at : anyin a hamen bong he ka omanená bi, k' adre me he ka omanená e hnen meic ; ke hamen meic he ka ve cubic huliwa anyin at me me manen dut bongon. 14 A ne tethmâ huliwa anyin ke at, waleji e ame op göranyai hon, me e ame he ka kap hwaban. 15 A ne thong ut huliwa anyin ke at, me ame he ka hia but anyin ta je únyi : ke e ame he bi ka möt, ke helâke me úheny hnyin meic.

16 Hawa, e ca kxan' öbun a haba öbun me hnân uma kap a umen Khong, k' ame laba Hanon Khong eú hnyi hnyibun. 17 A ne okongoâ uma umen Khong hnen ke at, me ame he Khong ka okongoâ e ; anyin ae kap uma umen Khong, wale thibi öbun.

18 Ca he ke at ka hamen iyawâ e bi. A ne hu ke at unyibun ame ka únykúme a e at ae metâ eang hmeledrany, me so e ame he ka monu, me me metâ but. 19 Anyin ae monu hnyi hnyimakan Khong metâiny hmeledrany. Anyin adre hia but sihnalimen, ka habe, E ame ohnokâ wametâ hnyi anyidra bibihwakecin : 20 ke wale hmetu ang, ka habe, E khana Than ae únyi baú ta je únykúmenen tavat ae metâ. 21 Anyin a wale ca he ke at ka hobeluâ at. Anyin a anyibun ta je únyi hia thithö ; 22 ame ne Paulo, ame ne Apolo, ame ne Kefa, ame ne hmeledrany, ame ne möt, ame ne mok, ame ne ta je únyi walang ang, ame ne ta je únyi ame he ka o ; anyibun hia thibut ; 23 ke haba öbun me anyin Keriso ; ke haba Keriso me anyin Khong.

HNYIMAKAN 4.

ESO e he at ka únykúme köhmun, a je athnyaba adre tuö omjeû wale ta je únyi ae iyong anyin Khong. 2 Ke haba khaca,

hamen tavat walang adre me tuö omjeû he ka ve hnathu. 3 Ke únyi ae háhâ hmönyin kõnya öbun ka he ka owisö nya bi, me hna owisa hnen at : eke, inya oge me ca ka owisö nya bi. 4 Anyin ae ca kxanö nya bi monu gak ; ke so bi e ca hnân haiwisö nya únyi e : ke Than bi at ame owisö nya. 5 Anyin a wale, ca he ka únykúme ke únyi ke tiga hia bi únen, e më o but Than, at ame he ka omelamá ta je únyi ae iyong hnyi lit, me he ka omanená ta je únykúmenen hnyok ; wale m' adre me he ka ve haisoâ únyi ge Khong.

6 Hnyat me lakeiny lö, oge hia but öico ta je únyi e kõnya me Apolo hobi köbun ; m' öbun e he ka ná únyi gahmu he ka ca onua bi ta je únyi adre sihnalimen : me me ca he ka bi gan ke at gabun ka ke at hon ke at. 7 Anyin a ia okebongoni u ? ke ewa ke únyi gam adre ca ham köu ? ke ödra ka hia but ham köu, ieú gam u me hobelöu helâke adre ca ham ? 8 E sekubun dut walang ang, öbun e tren omjeû walang ang, öbun e bi than ke hi' öhmun : e na hnathu ju bi than a öbun, möhmun e he minya ka hnyi than unyibun. 9 Anyin a oge me únykúme, a biliny Khong ka otíl' öhmun je aposetolo, helâke me hnân he ka mok : anyin adre wi' öhmun me hnân únyi mat a wânen hmeledrany, me ta je angela, me tavat. 10 Öhmun tavat ae monu can Keriso, ke öbun e metâ but unyi Keriso ; öhmun e sényin dut, ke öbun e hwege bi öbun ; e hu hnân okan' öbun, ke öhmun tavat baú. 11 Ke ne o but awa ang öhmun e mekihnânem, me beic, me he thu, me hna kxau, ke ba dok öhmun e laba hmâ hnyin ; 12 ke öhmun e labö huliwa, me ányâ huliwa ge je hing hnyamöhmun : adre me ú öhmun, ke öhmun e hahnahicâ ; adre me sed' öhmun, ke öhmun e hokhnyok ; 13 adre me haikongu öhmun, ke öhmun e khöu : adre me öcü öhmun me ta je únyi ae ikiki hnyi hmeledrany, me tiren ta je únyi hia ke ne o but hnyi bong ang.

14 Oge me ca sit ta je únyi e he ka ohmehm' öbun, ke so bi he ka n' öbun helâ me lakuk a önykúmik. 15 Anyin a eja ke ne a ne ten thauzan tavat adre me n' öbun unyi Keriso, me ca se hia lakamöbun : anyin a oge me hnöku öbun hnyi Iesu Keriso deny úthumetu ae so. 16 Anyin a wale, oge me sumat öbun he ka úcücbingi nya. 17 Can e oge hia but kunö Timotheo köbun, wale nöku, a önykúmik ke at ae hnathu ka Than, ke e ame he ka

oúnykúmi öbun ge je hwakecik hnyi huliwa anyin Keriso, helâ me oge me nâ je ekalesia hnyi je dok hia. 18 E bi gan dut keihen gabun helâke oge me ca he ka o köbun. 19 Ke oge me he ka ie o köbun e ka weny Than; ke oge me ca he bi nya ka löng ifucin tavat adre me bi gan, ke hake thibi man. 20 Anyin a ca e bi dökhu dokhon Khong hnyi hofuc, ke so bi hnyi man. 21 Ieú webun? hawa, oge me he ka o köbun me osö, hawa, hnyi ibetengio me hnyok ae menyik?

HNYIMAKAN 5.

AME lung a öbun e bi únyi monu, ke ba bi únyi monu ae kong helâe unyin Aten ta je hnyei, wale a g' ame he at ka hom áian kamen. 2 Ke öbun e bi gan, k' öbun e ca hlöuhlöu bi, m' adre me he ka obâ but únyi gabun at ame ányâ únyi eling. 3 Haba inya oge me ca laba unyibun, ke e unyibun hnyekuk, me oge hia but thamua kâu at ame ányâ únyi e, helâke me ka inya e, 4 k' öbun ka úkhacaköu, a tha öbun me hnyekuk, me man maniny Tuhöta Iesu, hnyi ien Tuhöta Iesu, 5 he ka hna but e kö Satana, me me ohia unyin, me me möt hanon bi hnyi bong bongon Than Iesu. 6 E ca so anyibun hobeluâ. Hawa e ca khan' öbun a g' adre olevenâ tap falawa ae gan hnen leven ae úhnyükong? 7 Degec ut leven adrem, m' öbun e tap falawa ae teb únyi, helâke adre me ca leveni öbun. Anyin adre hia but hlingâ anyita paseka, wale Keriso: 8 anyin a wale, e so ate me he ka tuö bijeu, ca hnen leven adrem, ke ca hnen leveniny hnyok ae kong me hwakecin ae kong, ke so bi hnen areto adre ca levenâ bi wale hnyok ae wisa me hnathu.

9 Oge hia but sit köbun hnyi anyik tusi, ka habe, ca tha he öbun me tavat bi únyi monu; 10 oge me ca ha, ge tavat bi únyi monu eang hmeledrany, me tavat behnyekon, me tavat hügünö omjeú, me tavat adre me hmi ka hnatheat; anyin a ne helâe, me hamöbun he ka he but úhebut ang hmeledrany: 11 ke walang ang inya oge me sit köbun, ka habe, öbun e ca he ka tha he me at adre háia, ka habe, liama-keiny, ke e at bi únyi monu bi, ame ne at behnyekon, ame ne at a hmi ka hnatheat, ame ne at ae hwege hnyimen, ame ne at ic monu, ame ne at hügünö omjeú; ke ca tha han me at a helâe. 12 Hnân eú könya he

ka owisa tavat eú hnyöü? Hawa öbun e ca owisa tavat adre me laba eú hnyin, 13 ke Khong ame owisa tavat adre me laba eú hnyöü? Obâ but unyibun at ae kong.

HNYIMAKAN 6.

AME hwege la ke at gabun, a ne hu gan ke únyi hnân iwatetra me ke at, he ka úhnö hnyi hnyimakan tavat ae ca wisa bi, ke ca hnyi hnyimakan bi wakap? Ke ca khan' öbun a g' ame he wakap ka owisa hmeledrany? 2 ke öbun e ne owisa hmeledrany, hawa, e ca úcú köbun he ka owisa ta je únyi ae úhnyükong? 3 Anyin ae ca khan' öbun a g' ate me he ka owisa ta je angela? awe, e ti úcú köta he ka owisa ta je únyi hnyi möt ang? 4 Waleling a ne hu gabun ta je únyi hnyi möt ang he ka owisa, hawa, öbun e kunâ wafihnyükong hnyi ekalesia he ka owisa? 5 Ogo me ha únyi e me hnân ohmehm' öbun. Hawa, e hnathu ae ba at a khaca ae metâ gabun, wale ae khana he ka owisa je liamekeiny me, 6 ke haba hamekeiny ödru me úhumödruköu ka hnyi owisa, ka hnyi hnyimakan hnyat ca labageju bi? 7 Ke wale anyibun monu a öbun e úhumöbunköu öbun. Ieú gabun öbun e ca hokhnyokâ úokonguny? Ieú öbun e ca hna gan anyibun ta je únyi adre hügünâ? 8 Ke haba öbun bi, öbun e okongoâ bi, me hwenenâu ta je únyi anyin hnyat me lakeiny. 9 Ke ca khan' öbun a haba tavat ae ca wisa hwakecidra, me adre me ca he ka hnyi hanen dökhu dokhon Khong? Ca omonu öbun bi: haba tavat adre me bi únyi monu, me tavat adre me hmi ka hnatheat, me tavat adre me venöu áian ke at, me tavat waelue, me tavat adre me hwen sodoma, 10 me tavat venöu, me tavat behnyekon, me tavat adre me ic monu, me tavat hwege hnyimen, me tavat hügünö omjeú, me adre me ca he bi ka hnyi hanen dökhu dokhon Khong. 11 Ame helâe keihen gabun ehac: ke adre hia but hú öbun, me okabi öbun, me haiwis' öbun hnyi ien Than Iesu Keriso, me hnyi Hanon Khonguta.

12 E úcú könya ta je únyi hia thithö; ke so bi e ca únyi hnathu ta je únyi hia thithö. E úcú könya ta je únyi hia thithö; ko so bi oge me ca he ka hna but ka ke únyi a khaca he ka musi nya. 13 Haba ta je jeú, me hobi kâu hnyok, ke hnyok hobi kâu ta je jeú: ke ame he Khong ka tha ohia. Haba unyin, me ca hnân hobi

kâu bi únyi monu, ke so bi hobi kâu Than, ke haba Than, me hobi kâu unyin : 14 ke haba Khong ame omelö hmetu thö Than, me e ame he ka omeli öta hmetu únyi ge maniny man. 15 Ke ca khan' öbun a haba je unyibun, me wale je outhunyn Keriso? anyin a wale, hawa oge me he ka hom je outhunyn Keriso he ka wia me hnân outhunyn momo hnyi gethen? Ohe. 16 Hawa, e ca khan' öbun a haba at ame hom momo hnyi gethen, me khaca but unyidru? anyin a haingen, ka habe, Ame he ka khaca unyidru. 17 Ke haba at ame tha he me Than, me khaca thibi hanu. 18 Kec dö únyi hnyi bi únyi monu. Ame ca he ka oaatâ ka hnyi unyin ta je monu ame ânyâ at, ke haba at ame bi únyi monu, me ame ka hamen okongoâ unyin bi. 19 Hawa, e ca khan' öbun a haba je unyibun, me uma umen Hanu Kap wale eü hnyi je hnyekubun a hu but köbun únyi ge Khong? haba öbun, me ca anyibun bi; 20 anyin adre hia but úcû öbun ge hwaban : anyin a wale ogânâ thö Khong ge ta je unyibun bi.

HNHYIMAKAN 7.

KE haba ji ge ta je hofuc öbun e sihna- limen kõnya : me, E so ka at he ka ca kâlâ momo. 2 Ke so ka obaga he ka úsa khaca laöiödra, ke so minya ka omomo he ka úsa khaca laöiödra, wâ adre nye bi únyi monu. 3 Hamen бага he ka ham únyi ae úcû ka áiân : ke helâ minya momo ka бага. 4 Ca hamen momo ka musö unyin bi, ke so bi áiân : ke ca hamen minya бага he ka musö unyin bi, ke so bi áiân. 5 Ca behânâ ke at hnen ke at, ke so bi e tha hnyekubu hnyi ke ñen, möbu me he ka hn' öbu but ka hic, me öbu me he ka tha laba hmetu bi, wâ e nye cubic öbu Satana anyin ae ca khan' öbu hokhnyok. 6 Ke oge me ka ha e únyi gak, ke ca únyi ge hna hûna bi. 7 Ke e wek e me tha úcû mõnya tavat hia. Ke so bi e ve hu ge tavat bwihlany únyi ge Khong, ke at ame helâng, ke ke at ame helâe.

8 Ke inya oge me ha ka tavat ae ba laö-iödra, me ta je safac, ka habe, E so ködra adre me ne laba bala helâ me mak ang. 9 Ke a ne ca khan' ödra hokhnyok, e so adre me faipoipo : anyin ae so he ka faipoipo hon he ka kahwa. 10 Ke oge me hûna ka tavat ae hu laöiödra, ke so bi ca inya, ke Than bi, ka habe, Ca he bi

momo ka hna degecâ áiân, 11 (ke e ka he ka hna degecâ, me so e ame hake laba ju, ame ne ca më úsoköu hmetu me áiân a бага) : ke ca he бага ka hna degecâ áiân. 12 Ke inya oge me ha ke keihen, ke ca únyi bi ge Than, ka habe, A ne hu liamekeiny ae hu áiân ame ca labageju, ke weny bi momo ke ka tha laba më, ca he bi ka hna degecâ momo. 13 He haba momo ae hu áiân ame ca labageju, ke e weny bi áiân a бага he ka tha laba më, ca he bi momo he ka hna degecâ e. 14 Anyin adre okabâ бага ame ca labageju únyi ge áiân a momo, ke adre okabâ minya momo ame ca labageju únyi ge áiân a бага : ame ne ca helâe me kong je lakubun ; ke walang ang ödrin kap but. 15 Ke a ne hna degecâ hnen at ame ca labageju, hna but e ka he but : anyin ame ca laba hwenbâ ke liamekeiny ame ne ke haniny hnyi únyi a helâe : ke haba Khong ame haw' öta ka hnyi úsoköu. 16 Anyin a ke momo lö, ama hawa ka khanö u, ame ne he bi áiâm ka möt únyi gam? ke бага lö, ama hawa ka khanö u, ame ne he ka möt áiâm únyi gam? 17 Ke so ame ve he tavat helâ me Than ame ve khenâ öuco, ke helâ me Khong ame ve haw' ödra. Ke oge me owisa helâe hnyi je ekalesia hia thithö. 18 Adre me ne hawâ at a g' adre ca peritomonâ? awe, ca he ka wia e bi me me at adre ca peritomonâ. Adre me ne hawâ at a g' adre ca peritomonâ? awe, ca he ka peritomonâ bi? 19 E ca únyi hnathu peritom, ke ca únyi hnathu bi ca peritom : ke so bi he ka vheno je hnanyibu anyin Khong. 20 E so he ka ve laba bala tavat hia hnyi hna haw' ödra hnyin. 21 Hawa, adre hawo u, ke u athnyaba? ca únykúme ka hnyin : ke e ka khanö u ka he baü, oúnyihnatho thö e. 22 Anyin a haba at adre me hawa hnyi Than, ke tiga athnyaba, me adre me wia e me at he baü anyin Than : helâe minya haba at adre hawâ, ke at he baü, me adre me wia e me athnyabainy Keriso. 23 Adre me úcû öbun ge hwaban ; ca he öbun ka athnyaba ka at. 24 Hnyat me lakeiny lö, ve laba bala bi unyin Khong hnyi hna ve haw' öbun ka hnyin.

25 E ba hnanyibu anyin Than kõnya ge wahlu : ke oge me omanená únykúmenök, helâ me at ame hnathu únyi ge ibetengio anyin Than. 26 Oge me únykúme a e so ka at he ka hnathu hnyi ñen ang a ñen vec. 27 Hawa, adre me cö u ka momo? ca elâm he ka thang ut. Hawa, adre hia

but thang öbu? ca elâm ke momo bi. 28 Ke u je ne faipoipo, me ca kong ut; ke ame ne he hlu ka faipoipo, me ca kong ut. Ke ame he ka hu vecin unyin tavat eling: ke oge me ca beohmak' öbun. 29 Ke walong, hnyat me lakeiny lö, oge me ha, ka habe, e okhulit biju üen, waleling me me so ka hnyat ae hu laöiödra ka helâ me hnyat ae ba laöiödra; 30 ke haba tavat adre me tenge, me he ka helâ me tavat adre me ca tenge: ke haba tavat adre me senyin, me he ka helâ me tavat adre me ca senyin; ke haba tavat adre me ücü, me helâ me tavat ae theduoc; 31 ke haba tavat adre me huliwan ta je ünyi eang hmeledrany, me ca he ka huliwa monu bi: anyin ame he ka hia bongon hmeledrany. 32 Oge me wek a g' ame ca he öbun ka ünykûme loloâ. Haba at ae ba äiân, me ame ünykûme loloâ ta je ünyi anyin Than, ka habe, ama hawa ka osenyinâ Than: 33 ke haba at ae hu äiân ame ünykûme loloâ ge ta je ünyi anyin hmeledrany, ka habe, ama hawa ka osenyinâ äiân. 34 E ve bongon bi minya momo ae hu äiân, me hlu. Haba at ae hu äiân ame ünykûme loloâ ge ta je ünyi anyin Than, me me he ka kap hnyi unyin me hanu: ke haba at ae hu äiân бага, ame ünykûme loloâ ge ta je ünyi anyin hmeledrany, ka habe, ama hawa ka osenyinâ äiân a бага. 35 Ke inya oge me ha e, m' öbun e so; oge me ca benuc öbun, ke so bi möbun e laba so, me me ba vhet öbun ka he ka bi athnyabainy Than. 36 Ke a ne ke at ame ünykûme, ka habe, e ca so hwakecin bi ka nokon hlu, a ne hia but hlu hanyâüâ üen he ka faipoipo, ke ücü he ka helâe, e so e ame he ka ânyâ weny bi; e ca monu bi; e so ödru me he ka faipoipo. 37 Ke haba at ame tot hwege hnyi hnyekon, ke ba vheliny, ke e khana he ka musö weny bi, ke a hia but thamüâ hnyi hnyekon he ka behânâ nokon hlu, e so hnen hna ânyâ. 38 Anyin a wale, haba at ame ham nokon hlu he ka faipoipo, e so hnen hna ânyâ; ke haba at ame ca ham bi, e beönua hnen hna ânyâ. 39 Adre ca momo hnen hnanyibu, e ka tiga möt äiân; ke e ka mokcu бага, me e khana he ka faipoipo me hnen hna weny kâü; ke ünyi ge Than thibi. 40 Ke beönua hnahic anyin momo e, e ka laba safac bala, wale hnök hna ünykûme: ke inya oge me ünykûme ae hu but gak Hanon Khong.

HNYIMAKAN 8.

KE haba ta je ünyi adre hudo ka ta je hnatheat: E khan' öta a öta hia ate me wâ ünykûme. Haba wâ ünykûme ame obigânâ, ke haba ibetengiö ame okahwâ. 2 A ne ünykûme ke at a e khana but ke ünyi, e tiga ca wâ ünykûme hnen at e helâ me ae ücü he ka wâ ünykûme; 3 a ne ke at ame hnyokâ Khong, awe, e ame wâ ünykûme at eling. 4 Haba ge hna an ta je ünyi adre hudo ka ta je hnatheat, e khan' öta ae ünyi baü eang hmeledrany hnatheat, ke ba minya ju ke Khong, ke khaca thibi. 5 Eja ke ne a ne hu ta je ünyi adre hâiâ, ka habe, je khong, ame ne ethö hnyi drany, ame ne eang hmeledrany; e se hia ta je khong, ke se hia ta je than; 6 ke so bi khaca thibi Khong köta, wale Kamen, ünyi gan ta je ünyi hia, ke haba öta me hobi kâü e; ke Than minya a khaca, a e Iesu Keriso, ünyi gan ta je ünyi hia, me öta minya a ünyi gan. 7 Ke so bi ame ca wâ ünykûme e hnen tavat hia: ke haba keihen, me adre me khenen ka ta je hnatheat ke ne o but hnyi bong ang, k' adre me an ta je ünyi adre me hudo ka ta je hnatheat; me ame kong ut ünykûmenödra anyin ae sēnyin. 8 Ke ca hnân osoi öta bi hnyi hnyimakan Khong ge hna han: anyin ae ca beönua anyita monu, at ka ca han; ke ca beönua minya bi anyita so, at ka han. 9 Ke wâ wia ju, wâ e nye ohaüâ tavat ae sēnyin hnen maniny je hnyekubun. 10 Anyin ame ne ö u hnen ke at, a u at wâhmakhmeto, ke u me laba he ka han hnyi uma umen hnatheat, hawa, ca hnân ohwegiâ oünykûminy at ae sēnyin he ka an ta je ünyi adre me hudo ka je hnatheat? 11 Anyin ame he ka ohia at ae sēnyin hnen ânyâm wâhmakhmeto, wale ke liamekeiny. waleji at ame mok Iesu Keriso hnân hobi kâü. 12 Öbun e monu helâe ka je liamekeiny, k' öbun e oaatâ ünykûmenödra ae sēnyin, k' öbun e monu bi ka Keriso. 13 Anyin a wale, e ka haü liamekeiny mönya ge jeü, awe, oge me ca he bi nya ka han utiö nyiele balua, wâ oge nye ohaüâ liamekeiny mönya.

HNYIMAKAN 9.

HAWA, adre ca hna bâüö nya? ca aposetolo bi nya? oge me ca hnyi ö Iesu Keriso a Tuhöta? ke ca anyik hu-

liwa öbun hnyi Than? 2 Eja ke ne oge ne ca aposetolo ka keihen, me iny aposetolo bi köbun : anyin a haba öbun, me haten hnân ohmä hnyi Than a iny aposetolo. 3 Walang hnök hna thu ka tavat adre me hnei nya, 4 ka habe, Hawa, e ca úcú köhmun he ka han me ic? 5 Hawa, e ca úcú köhmun he ka tha he ebe me laöiöhmun a hnyat labageju, helâ me keihen je aposetolo, me je liamekeiny me Than, me Kefa? 6 Hawa, hake inya me Banaba ae úcú köhmun thibi he ka hamöhmun degecâ huliwa hnyi unyin? 7 Ie ke at ame he ka vat me ka hamen bi he ka bi hwaban kâu? ie at ame belökâ hnye vine, k'ame ca he ka hnyi ijem wan? ke ie at ame hân hnahat meno, k'ame ca he ka hnyi ijem debai únyi hnyin? 8 Hawa, oge me ha ta je únyi e helâ me at? k'ame ca ha bi helâe hnen hnanyibu? 9 Anyin adre hia but set hnyi hnanyibu anyi Mose, ka habe, Ca he ka ca hnyimen bolok ame ututo hwit. Hawa, Khong ame únykúme thibi ge ta je bolok, 10 ke hawa, e ame ha e hobi köta thibi? Eke, adre sihnalimen hobi köta : anyin ae úcú ka at ame trohnen he ka trohnen gejon, ke haba at ame ututo hwit he ka ututo gejon hnen hna he ka hu? 11 Öhmun e ne hia but tä unyibun ta je únyi anyin hanu, hawa, e gan öhmun e ne he ka meno ta je únyi hnyi unyin gabun? 12 A ne munyi ányâ wisa eling gabun hnen keihen, hawa e ca ti úcú köhmun he ka munyi ányâ? Ke so bi öhmun e ca vheno wisa eling; ke öhmun e hokhnyokâ ta je únyi hia thithö, wâ öhmun nye ovhelâ úthumetu ae so anyin Keriso. 13 Ke ca khan' öbun a haba tavat adre me huliwan ta je únyi ae kap, me adre me an ta je únyi hnyin uma kap, ke haba tavat adre me bi athnyabainy taben hut, me adre me ve hu hwajekhöúdra me taken hut? 14 Ke helâ minya hna owisa hnen Than, a haba tavat adre me khetâ úthumetu ae so, adre me he ka möt únyi hnyi úthumetu ae so. 15 Ke oge me ca hnyi ányâ ke únyi hnyi ta je únyi e : ke oge me ca sihnalimen minya ta je únyi eang, m' adre me he ka ányâ helâe könya : anyin ae so oge me he ka mok, ke kong e he ke at ka öunyibâúâ hnök hna hobeluâ. 16 Anyin oge ne khetâ úthumetu ae so, e ba hnân ohobeluâ ; anyin adre musi nya ; anyin ekölö gak iny ka ca khetâ but úthumetu ae so. 17 Anyin oge ne ányâ únyi e ge hnyekuk, e hu but könya hwaban : ke e ka ca ányâ hnen hnyekuk, adre me hna könya

hanymök. 18 Ke ieu hwaban könya? Walang, iny ka he ka khetâ úthumetu ae so, oge me he ka ham bâúâ úthumetu ae so anyin Keriso, me oge me ca he ka musi hwege hnyi úthumetu ae so. 19 Eja ke ne oge ne he ka ba hanymök ka tavat hia thithö ehac, oge me ka hamök hnö nya bi ka athnyabaidra hia, me me se hia tavat adre me he ka hmehmelö nya. 20 Oge helâ me at Juda, ka at Juda, me me hmehmelö nya at Juda ; ke oge me helâ me at hmelen hnanyibu, ka tavat hmelen hnanyibu, ke ca hmelen hnanyibu bi nya, me me hmehmelö nya tavat hmelen hnanyibu ; 21 ke helâ me ba hnanyibu ka tavat ae ba hnanyibu, ke ca ba bi hnanyibu gak ge Khong, ke inya hmelen hnanyibu ge Keriso, me me hmehmelö nya tavat ae ba hnanyibu. 22 Inya helâ me at ae sényin ka tavat a ödra sényin, me me hmehmelö nya tavat a ödrin sényin : oge me hnyi hom ta je hwakecin hia ka tavat hia, me inye hwege thö he ka omelö keihen. 23 Ke oge me ányâ ta je únyi hia can úthumetu ae so, m' ate me he ka tha hu. 24 E ca khan' öbun a haba tavat adre me wadring hnyi úölogot, me adre me tha wadring hia, ke khaca thibi at ame he ka hok hwaban? E Wadring th' öbun helâe, m' öbun e he ka hu. 25 Ame hokhnyokâ ta je únyi hia thithö hnen tavat adre me ve bi tudra hnyi je mat. Adre me ányâ m' adre me he ka hu gadra korona ae bobot ; ke haba öta me ame he ka hu gata korona ae ca bobot. 26 Ke inya oge me wadring helâe, ca hnyi loloâ bi ; inya oge me vat helâe, ca helâ me at ame kot ang : 27 ke oge me hom úhnyúkongo unyik, me thaluâ e : wâ oge nye hia but khetâ ka keihen, ke hwaban e adre me digic nya but.

HNYIMAKAN 10.

HNYAT me lakeiny lö, e ca wek e me ca khan' öbun a ga mwi hia lakamöta hnyi hmelen úlá, ke adre me gethen hia hnyi köiö ; 2 ke adre bapataisoï ödra hia kö Mose hnyi úlá me hnyi köiö ; 3 ke ödra hia adre me tha han jeúiny hanu ; 4 ke ödra hia adre me tha ijem belen hanu : anyin adre me ic únyi hnyi kiciny hanu ame úbnúhnú : haba kic eling, me Keriso. 5 Ke ame ca senyin Khong ka tavat gadra ae se hia : anyin adre me hudrin ju hnyi hnyebuba. 6 Wale ta je únyi hnân haten köta, m' ate me ca he ka be-

hnyekuta ta je únyi ae kong, heláji me hnödra hna behnyekon. 7 Ke haba khaca, ca he öbun ka hmi ka je hnatheat, helá me keihen gadra ; helá me hna sihnalimen, ka habe, Ame laba ju tavat he ka han me ic, me adre me tödra he ka mat. 8 Ke ca he minya öta ka bi únyi monu, helá me keihen gadra ame ányá, me ame mokcu twente theri thauzan hnyi bong a khaca. 9 Ke ca he minya öta ka cubec Than, helá me keihen gadra adre me cubec, me adre me mokcu ge ta je on. 10 Ke ca he minya öbun ka ulit, helá me keihen gadra adre me ulit, me adre me mokcu ge at ame ohia. 11 Ke ame o but ta je únyi hia thithö e ködra me hnán haten ; ke adre sihnalimen hnán n' öta, wale a o köta obiny ta je dö. 12 Anyin a wale haba at ame únykúme a e ame tethmá, wá eáu, e nye ü but. 13 Ame ca o bi köbun ke úcúbic, waleji ae ca úcú ka at : ke e hnathu Khong, at ame ca he ka hn' öbun ka hnyi úcúbic hon hnöbun hna khana ; ke so bi e ame he ka bi deny kec úheny hnyi úcúbic, me me khan' öbun he ka hokhnyoká.

14 Anyin a wale hnyat a oúnykúmik lö, kec ut ge hmi ka je hnatheat. 15 Inya oge me fuc ka tavat ae metá ; únykúme ju öbun hnök hna ha. 16 Haba utkööiny ole ötin e oleá, hawa ca e bi hnyi hnötin hna tha hu hnyi dren Keriso? Haba areto ötin e susubá, hawa, ca e bi ate me tha hu hnyi unyin Keriso? 17 Anyin a öta se hia, ke khaca thibi areto me khaca unyin : anyin a öta hia ate me ve hu únyi hnyi areto a khaca. 18 Wá bi at Isaraela hoton unyin ; hawa, haba tavat adre me han hnyi taben but, e ca tha hu ködra me taben hut? 19 Ieú oge me he ka ha? Hawa, e únyi hnathu únyi adre bi hut ka hnatheat? ke únyi hnathu hnatheat? 20 Ke oge me ha, ka habe, haba ta je únyi ame hudo Ateu ta je hnyei, adre me hudo ka ta je demoni, ke ca bi ka Khong : ke ca wek e me tha öbun me ta je demoni. 21 E ca khan' öbun he ka ijem kaia belen Than me kaia belen ta je demoni : e ca khan' öbun he ka ve hu únyi hnyi laulau anyin Than, me laulau anyin ta je demoni. 22 Hawa, ate me cubic Than he ka ciá? hawa, öta hwege hon e?

23 E úcú ta je únyi hia thithö, ke ca únyi hnathu bi ta je únyi hia thithö. E úcú ta je únyi hia thithö ; ke haba ta je únyi hia thithö, me ca hnán okahwa. 24 Ca he bi ke at ka elám soiny bi, ke so bi

soiny ke at bi. 25 Haba ta je únyi hia adre uco hnyi hna úcú, an ju, ke ca hnei can bi únyi hnyi únykúm sah ; 26 anyin a anyin Than hmeledrany me unöngötiny hia. 27 A ne haw' öbun ke at ame ca labageju bi, ke webun he ka he ; an ju ta je únyi adre ip hnyi hnyimaköbun, ke ca úhnei bi, can únyi hnyi únykúm sah. 28 Ke e ka ha köbun ke at, ka habe, Adre hia but hudo únyi ang ka hnatheat, awe, ca an bi, can at a omanená, ke únyi hnyi únykúm sah : 29 oge me ha ge únykúm sah anyin ke at, ke ca ányám bi ; anyin a ieú ame he únykúm sah anyin ke at ka únykúme hnök hna he baú? 30 Ke oge ne han me ole, ieú adre me he ka haikongu nya gan hnyi únyi oge me oleá? 31 Anyin a wale, öbun ka he ka han, me ic, me ányá ke ta je únyi bi, ányá hia thö hnán oganá Khong. 32 Ca he öbun ka bi jöniny ka at Juda, me at Heleni, me ekalesia anyin Khong : 33 helá me inya oge me osenyiná tavat hia hnyi ta je únyi hia, oge me ca elám bi soik, ke so bi soiny tavat ae se hia, m' adre me möt ut.

HNYIMAKAN 11.

ÚCÚCUBINGI nya ju öbun, helá me inya ka Keriso.

2 Ke inya oge me haisoi öbun, anyin a öbun e únykúmi nya hnyi ta je únyi hia thithö, k' öbun e kát hmá ta je hna úne, heláji me hnök hna ham köbun. 3 Ke wek e me khan' öbun a haba Keriso, me ban obaga hia ; ke haba obaga, me ban omomo ; ke haba Khong, me ban Keriso. 4 Haba бага ame hic me perofeta k' ame tube ban, me e ame okongoá ban. 5 Ke haba momo ame hic me perofeta k' ame ca binybak bi, me e ame okongoá ban : anyin a haba e me heláke a giá. 6 Anyin a haba momo ame ca binybak, me so e ame subá leúnen ban ; ke ame ne hnán ohmehma momo he ka subá leúnen ban, me giá minya, e so he ka binybak. 7 Anyin ae ca úcú бага he ka binybak, anyin a e we me hmanenanginy Khong : ke haba momo, me hmanenangin бага. 8 Anyin a haba бага me ca únyi bi ge momo, ke so bi momo únyi ge бага : 9 anyin adre me ca op бага hobi káu momo, ke so bi momo hobi káu бага : 10 waleling me me úcú momo he ka hu haten musi hnyi hon ban, can ta je angela. 11 Ke so bi, e ba momo unyin Than, e ka ba бага, ke ba бага, e ka ba

I. KORINITO 12.

momo. 12 Anyin a haba momo, me únyi ge baga, ke helâe baga, a únyi ge momo, ke haba ta je únyi hia thithö, me únyi ge Khong. 13 Únykúme ju öbun: hawa, e úcú momo he ka hic ka Khong k' ame ca binybak bi? 14 Hawa, adre ca n' öbun ge hwakecin hnyi unyin a hnân okongoâ baga e ka beú leunen ban? 15 Ke hnân ohmanenangâ momo e ka beú leunen ban: anyin adre ham kâu leunen me hnân hnabinybak. 16 Ke a ne ke at ame weny he ka ivinö, me ba hwakecin helâe gahmun, me ta je ekalesia anyin Khong.

17 Ke oge me ca haisoi öbun hnyi únyi eang oge me he ka húna, a öbun e ca úkhacaköu hobi kâu so, ke hobi kâu bi monu. 18 Anyin a walang únyi a bán, ka habe, oge löng ut, öbun ka he ka úkhacaköu hnyi ekalesia me öbun e imoukôu; ke oge me únykúme me hnathu ke je hofuc. 19 Anyin ama he ka hu je imoukôu unyibun, me me manen dut tavat ae hnathu gabun. 20 Anyin a wale hnyi úen öbun e úkhacaköu, e pason he ka han jeú hnyi sahac anyin Than: 21 anyin a ödra ka han, öbun e ve böbun ka hom an jeú bi hnyi sahac; ke mekihñânem ke at, ke a ic monu ke at. 22 Hawa? e ba umöbun je uma he ka han me ic hnyin? ke hawa, öbun e öúnyibâúâ ekalesia anyin Khong, me ohmehma ta je theduoc? Ieú oge me he ka ha köbun? oge me he ka haisoi öbun hnyin e? Oge me ca haisoi öbun.

23 Anyin oge me hna köbun waleji hnök hna kap únyi ge Than, waleji hnen Than Iesu hna hom areto hnyi lit adre alecuâ e hnyin; 24 ke a hia but oleâ, e ame susubâ, me ha, ka habe, Hom dö, an ju, walang unyik hobi köbun: ányâ thö e hnân he ka únykúme könya. 25 Ke helâe minya me kaia, hwaban hna han, ame ha, ka habe, Haba kaia eang, me úhilihnykôu a teb únyi hnyi drök: ányâ thö e he ka únykúme könya hnyi ta je úen öbun e ijem hnyin. 26 Anyin a haba ta je úen öbun e an hnyin areto eang, me ijem hnyin kaia, me öbun e omanenâ mok anyin Than, ke ne o but úen e ame he ka o hnyin. 27 Anyin a wale, haba at ame he ka an areto, me ijem kaia anyin Than, ke ka ca úcú bi, me ka jöning bi unyin me dren Than. 28 E so e he at ka bán ka elâm wia e bi, ke helâe e ame he ka an areto me ijem kaia. 29 Anyin a haba at ame han me ic, ke ame ca wáhmakhmeto bi unyin Than, ame han me ijem hnaúhango hobi kâu e bi. 30

Anyin a wale, at se hia gabun ae sényin me mok, ke at se hia minya adre me mokut. 31 Ke ate ne hamöta ka wáhmakhmetu öta, me adre me ca he ka owis' öta. 32 Ke at ka owis' öta, me ame kuc öta Than, m' ate me ca tha hnauhangö bi me hmeledrany. 33 Anyin a wale, hnyat me lakeiny mönya lö, öbun ka úkhacaköu he ka han, me úlubahingköu öbun. 34 A ne mekihñânem ke at, me so e ame han hnyi hnyaban; me me ca jöning bi anyibun úkhacaköu. Ke oge me he ka owisa ke ta je únyi, iny ka o but.

HNYIMAKAN 12.

HNYAT me lakeiny lö, e ca bewek e me ca khan' öbun bongon bwihlany anyin hanu. 2 E khan' öbun, ka habe, habaji öbun tiga Aten ta je hnyei, me adre me lili öbun ka ta je hnatheat ae hum, k' adre me lili öbun monu öbun. 3 Anyin a wale, inya oge me thumetu öbun a g' ame ca fuc únyi ge Hanon Khong at ame ha, ka habe, anathema Iesu; ke ba at ae khana he ka ha, ka habe, Iesu thibi Than, ke so bi únyi ge Hanu Kap.

4 E ve bongon ta je bwihlany ke khaca thibi Hanu. 5 Ke ve bongon ta je hannyemen, ke khaca thibi Than. 6 Ke ve bongon ta je huliwa, ke khaca thibi Khong, at ame huliwan ta je únyi hia unyita hia. 7 Ke adre me ve ham ka tavat hia hna omanenâ hnen Hanu, me me hu troban bi. 8 Anyin adre ham ka ke at hofuc ae metâ a deny Hanu; ke ka ke at hofucin wâ únykúme hoton Hanu a khaca: 9 ke ka ke at labageju únyi ge Hanu a khaca; ke ka ke at man he ka omelö ta je komok únyi ge Hanu a khaca; 10 ke ka ke at he ka ányâ je úöman; ke ka ke at he ka perofeta; ke ka ke at he ka wâ únykúme ta je hanu; ke ka ke at he ka ha je hwen hnyei; ke ka ke at he ka wia hwan hnyei: 11 ke adre me ányâ hia e únyi ge Hanu a khaca, k' ame ve khenâ ka tavat helâ me weny.

12 Anyin a khaca thibi unyin, ke se hia bi ta je ong outhunyin, ke haba ta je outhunyin hia, me se hia, ke so bi khaca thibi unyin; helâe minya Keriso. 13 Anyin adre bapataisoi öta hia hnân unyin a khaca únyi ge Hanu a khaca, a ne at Juda a ne at Heleni, a ne aten hwenbâ, a ne at adre hna báúâ; ke adre kun' öta hia ka ijem únyi hnyi Hanu a khaca. 14 Anyin a ca khaca thibi outhunyin hnyi

unyin, ke se hia bi. 15 A ne ha can, ka habe, Iny ca hanen bi nya unyin, anyin a iny ca benyin bi nya; me ca hnathu bi ae ca hanen bi unyin. 16 Ke a ne ha hnyi-köny, ka habe, Iny ca hanen bi nya unyin, anyin a ca ecmak bi nya; me ca hnathu bi ae ca hanen unyin. 17 A ne ecmak hia unyin, ewa únyi hnân löng? Ke a ne hnân löng hia, ewa únyi hnân bubune? 18 Ke a hia but Khong ve ip ta je ong outhunyin hnyi unyin, helâ me weny. 19 A ne khaca thibi je outhunyin hia, ewa biju unyin? 20 Awe, e se hia je outhunyin ke khaca thibi bi unyin. 21 E ca khana bi ecmak he ka ha ka hnyam, ka habe, U ca únyi hnathu kõnya: ke haba khaca, e ca khana bi ban he ka ba ka li can, ka habe, Óbu ca únyi hnathu kõnya. 22 Ohe, ke so bi, haba je ong outhunyin, wale a helâke me sényin, me e únyi hnathu hmönyin: 23 ke haba je ong outhunyin ate me oúnyibáúú, me wale ate me ti oúnyihnathoá; ke adre ohmanenangâ únyi ae ca hmanenang bi; 24 ke haba ta je outhunyin ae hmanenang, me ba únyi ae hia hnyin: ke haba Khong ame útretraokóú unyin hia, ke e ame ogânâ outhunyin ae ba soiny; 25 me me ba imoukóu hnyi unyin; ke so bi me me útuökóúâ je ong outhunyin. 26 Ke a ne vec dô ke ong outhunyin, me ame he ka tha vec hia je ong outhunyin, ke adre ne otheibâ ke outhunyin, me ame he ka tha senyin hia je outhunyin. 27 Ke haba öbun a unyin Keriso öbun, ke ve je outhunyin bi. 28 Ke haba Khong ame otilâ keihen hnyi ekalesia, a bân ta je aposetolo, ke loiny ta je perofeta, ke kuniny tavat úne, ke hwaban e, tavat huliwa ae man, me je bwihlanyiny hna omelö tavat ae hu mok, me tavat úhadruö, me tavat ae metâ hnyi úhnenamö, me ta je hwen hnyei. 29 Hawa, ta je aposetolo hia bi? ta je perofeta hia bi? tavat úne hia bi? tavat huliwa hia bi ae man? 30 hawa, e hu gadra hia bi ta je bwihlanyiny hna omelö tavat ae hu mok? adre me ve ha hia ta je hwen hnyei? tavat wia hwen hnyei hia? 31 Ke weny hwegiâ th' öbun ta je bwihlany ae nua. Ke inya oge me omanená köbun gethen ae beónua.

HNYIMAKAN 13.

OGE ne fuc hnyi je ifucin tavat me ta je angela, ke ba gak ibetengiö, me iny úcü me fao ame cuha, me simebalo ame

kitenge. 2 Ke oge ne at perofeta; ke khanö nya ta je únyi ae iyong, me je metâ hia; ke a ne hu gak labageju hia, me me khanö nya he ka oc ta je bucen, ke ba gak ibetengiö, awe, iny ca únyi hnathu bi. 3 Ke oge ne khenâ anyik ta je únyi hnân hân tavat ae theduoc, ke oge ne ham unyik m' adre me he ka thong degecâ, ke ba gak ibetengiö, awe, e ba troban kõnya. 4 Haba ibetengiö, me at ae lingvec, me menyik; e ca at ame ihunyinkóu bi ibetengiö; e ca at ame hobelöu bi ibetengiö, k' ame ca bi gan bi, 5 k' ame ca ányâ hwakecin ae ca úcü, k' ame ca hamen bi ka elâm anyin ta je únyi, k' ame ca ie hmönyin bi, k' ame ca únykúme bi hulö; 6 ame ca senyinâ hwa-kecin ae ca wisa, ke ame senyinâ hnathu; 7 e at ame hokhnyokâ ta je únyi hia, at ame kap ta je hofuc hia, at ame gejon ta je únyi hia, at ame hombeúâ ta je únyi hia. 8 Haba ibetengiö, me ame ca he ka um dô: ke ame he ka hia ta je hna perofeta; k' ame he ka aú but ta je hwen hnyei; k' ame he ka hia metâ. 9 Anyin ae khan' öta thibi hanen, ke ate me perofeta hanen: 10 ke e ka o but únyi ae bekhöt, me adre me he bi ka ohia únyi ae ca bekhöt. 11 Habaji k' iny tiga wanakat, me oge me fuc hwen wanakat, ke oge me löng hwen wanakat, ke oge me únykúme hwen wanakat: ke oge me gan dut, me oge me degec ut hwen wanakat. 12 Anyin a walang ang ate me bwele hnyi uselat ae húkehrnuen; ke haba nyiele, me úhnyimakötakóu: walang ang e khanö nya thibi hanen; ke nyiele oge me he ka wâhmakhmeto helâ me hnödra hna hia but wâhmakhmetu nya. 13 Ke walang ang e tethmâ kun ta únyi eang, ka habe, labageju, me geju, me ibetengiö; ke haba at ae beónua hnyi kun ta únyi eling, me ibetengiö.

HNYIMAKAN 14.

HNU hoton ju ibetengiö; ke weny hwegiâ th' öbun ta je únyi anyin hanu, ke e so e webun he ha perofeta. 2 Anyin a haba at ame hwen ke hnyei, e ame ca fuc ka at, ke ka Khong bi; anyin ae ba at ame wâ únykúme; ke e ame ha hnyi hanu ta je únyi ae iyong. 3 Ke haba at ame perofeta ame fuc ka tavat hnân okahwa, me sihwege, me ötubwelâ. 4 Haba at ame hwen ke hnyei me ame okahwa e bi; ke haba at ame perofeta ame okahwa ekalesia. 5 E wek öbun e he hia ka ha ta

I. KORINTO 14.

je hwen hnyei, ke nua bi wek a öbun e he ka perofeta : anyin ae nua at ame perofeta hon at ame hwen ke hnyei, at ka ca wia bi, m' adre me he ka okahwa ekalesia. 6 Ke walang ang, hnyat me lakeiny lö, iny ka he ka o köbun, me fuc hnyi je hwen hnyei, ieü soik köbun, iny ka ca fuc köbun hnyi hna omanenâ, ame ne metâ ame ne hna perofeta, ame ne hna ünö? 7 Helâe minya ta je ünyi ae ba möt gadra ame mea hwan, a ne köwi, a ne kitara e ka ca ve hwan bi, ame he ka hawa ka khan' öta hwan köwi me kitara? 8 Ke a ne hnân loloâ hwan khoto, ie at ame he ka pena-pena ka hnyi vat? 9 Ke helâe minya öbun, öbun ka ca ha ta je hofuc ae manen hnen bohmen, me ame he ka hawa ka manen hna ha? anyin a öbun e he ka fuc ka hnyi ang. 10 E se hia ta je ifucin eang hmeledrany, ke ba la khaca ame ca öüco ke ke bongon. 11 Anyin a wale, a ne ca khanö nya bongon ifucin, oge me he ka helâ me Aten ta je hnyei ka at ame fuc, ke haba at ame fuc, me helâ me Aten ta hnyei könya. 12 Helâe minya öbun, öbun ka weny hmönyinâ ta je bwihlanyin hanu, elâm d' öbun me me beönuu he ka okahwa ekalesia. 13 Anyin a wale haba at ame ha hwen ke hnyei, sumâtâ thö me me he ka wia. 14 Anyin oge ne he ka hic hnyi hwen ke hnyei bi, ame hic hanuk, ke ba troban ge oünykümik. 15 Ke ame he ka hawa? Oge me he ka hic ge hanu, ke oge me he ka hic ge hna ünyküme minya : oge me he ka khumöng ge hanu, ke oge me he ka khumöng ge hna ünyküme minya. 16 Ke u je ne he ka ole ge hanu, ame he ka kâmâu ka ha Amen ka änyâm ole, hnen at adre ca nâ, anyin e ca khana hnâm hna ha? 17 Ke so hnâm hna ole, ke ame ca okahwa bi ke at. 18 Inya oge me ole ka Khong, anyin ae gan hnök hna fuc hnyi je hwen hnyei hubun hia : 19 ke so bi, e wek oge me he ka ha ka ekalesia ta je hofuc a thabüng hnen ünykümenök m' oge me he ka nâ keihen, hon ta je hofuc a ten thauzan hnyi hwen ke hnyei.

20 Hnyat me lakeiny lö, ca hnyok wainkong bi öbun hnyi ünyküme : ke so bi hnyok mendreng hnyi ökonguny, ke hnyok at hnathu but hnyi ünyküme. 21 Adre sihnalimen hnyi hnanyibu, ka habe, Oge me he ka fuc ka hnyei ang deny tavat a hwen ke hnyei bi, me hnen esongodiny je atkanyua ; ke so bi, adre me ca he ka ling nya bi, haingen Than. 22 Anyin a

wale hnân haten ködra adre me ca labageju bi hwen ke je hnyei, ke ca ka tavat bi adre me labageju : ke haba hna perofeta, me hobi kâu tavat adre me ca labageju ke ca hobi kâu tavat adre me labageju. 23 Anyin a wale, a ne ükhacaköu thö ekalesia hia, ke ödra hia adre me ve ha je hwen hnyei, ke ame didrö tavat adre ca nâ, me tavat adre ca labageju, hawa, adre me ca he ka ha, ka habe, öbun e monu but? 24 Ke so bi adre ne perofeta hia ; ke ame didrö ke at ame ca labageju, ame ne ke at adre ca nâ, me ödra hia adre me nâ e, me ödra hia adre me owisa e : 25 adre omanenâ ta je ünyi ae iyong hnyi hnyekon ; me e ame he ka ta ju hnyimanan hnyikânâi me khudrung ka Khong me ha, ka habe, e hnathu e unyibun Khong.

26 Hnyat me lakeiny lö, ame he ka hawa? Öbun ka ükhacaköu, öbun e ve hom ke khumöng, me hna sihwege, me hna omanenâ, me hwen ke hnyei, me hna wia. E so he ka änyâ ta je ünyi hia hnân okahwa. 27 A ne ke at ame fuc hnyi hwen ke hnyei, e so ödrü me lo, ame ne kun, he ka ha gaga ; ke hamen ke at he ka wia : 28 ke a ne ba at ame he ka wia, awe, laba hnyibü ju e hnyin ekalesia ; me ka fuc bi kâu, me ka Khong. 29 E so ame he je perofeta ka fuc, ame ne üsa lo, ame ne kun, ke ame he keihen ka löngmakhmeto. 30 Ke adre ne omanenâ ke ünyi ka ke at ame laba eling, hamen at a bán he ka laba hnyibü. 31 Anyin ae khan' öbun hia he ka ve perofeta, me me khan' ödra hia, me kahwa hia : 32 haba ta je hanon je perofeta, me adre me löng hoton ta je perofeta ; 33 anyin a ca ünyi ge Khong imonumonu, ke so bi hnabic ; helâe hnyi ta je ekalesia hia anyin wakap.

34 Hamen omomo he ka laba hnyibü hnyi ekalesia : anyin adre me ca hn' ödra he ka fuc ; ke so bi he ka löng hoton helâ me hna ha hnyi hnanyibu. 35 Ke a ne wedra he ka khan' ödra ke ünyi, me so adre me hnö laöiödra hnyi hnyabadra : anyin a hnân ohmehma, e ka he momo ka fuc hnyi ekalesia. 36 Hawa, a o but hofuc hwan Khong unyibun? hawa, ame o thibi köbun?

37 A ne ke at ame ünyküme a e perofeta, ke aten hanu, me so e ame wâhmakhmetoâ ta je ünyi oge me sihnalimen köbun, a wale hnanyibu anyin Than. 38 Ke a ne ca khana bi ke at, me so e ka ca khana bala ju.

39 Anyin a wale, hnyat me lakeiny lö, e so e webun hwegiä he ka perefota, ke ca thawâ bi he ka ha hwen ta je hnyei. 40 Ke so bi, änyâ ta je ünyi hia hnyi wisa, me hna penapena wia.

HNYIMAKAN 15.

HNYAT me lakeiny lö, inya oge me omanenâ köbun úthumetu ae so, waleji oge me omanenâ köbun, k' öbun e kap, me tetlimâ hnyin, 2 k' adre me omeli öbun kâu; oge me omanenâ ta je hofuc, waleji oge me khetâ köbun hnyin, ke öbun e ne kât hmâ, me ca labageju baü bi öbun. 3 Anyin oge me bök ka ham köbun ünyi oge me kap, a g' ame mok Keriso can anyita ta je hulö helâ me hna sihnalimen; 4 ke adre me konâm e, k' adre me omelö hmetu thö hnyi bong a kuniny, helâ me je hna sihnalimen; 5 ke e ame manen kö Kefa; ke hwaban e ka hnyat a twelv; 6 k' ame manen hwaban e ka je liamekeiny ae se hia hon faiv haded, ke möt tavat ae se hia gadrin ke ne o but hnyi bong ang, ke a mokut keihen; 7 hwaban e ame manen kö Iakobo, ke hwaban e ka je aposetolo hia; 8 ke hwaban e, e ame manen minya könya, helâke me ke at a köluhabü. 9 Anyin a inya ang at ae ti úhnyúkong hnyi ta je aposetolo, ke ca úcü he ka hawo nya me aposetolo, anyin a oge me ovecâ ekalesia anyin Khong. 10 Ke haba inye heläng, me ünyi ge ibetengiö baü anyin Khong: ke ca ünyi baü bi anyin ibetengiö baü e ame omanenâ könya: ke nua anyik huliwa hon hnyat hia: ke ca ka ünyi gak, ke so bi ünyi ge ibetengiö baü anyin Khong wale a ham könya. 11 Ke ame ne inya, k' ame ne ödrin, öhmun e khetâ helâe, ke öbun e kap minya helâe.

12 Ke adre ne khetâ, ka habe, Adre me omeli Keriso hmetu ünyi hnyi hna mok, ama hawa ka ha keihen gabun a e ba möt hmetu ünyi hnyi hna mok? 13 Ke a ne ba möt hmetu ünyi hnyi hna mok, awe, adre ca hia but omeli Keriso hmetu bi: 14 ke adre ne ca hia but omeli Keriso hmetu bi, me ünyi baü hnöhmun hna khetâ, ke ünyi baü minya bi anyihmun labageju. 15 Eke, keadre me wâ a öhmun ang hnyat öhmun e ohnathoâ thoiâ Khong; anyin a öhmun e ohnathoâ Khong a g' ame omeli Keriso hmetu; waleji e ame ca omeli hmetu, e ka hnathu a g' adre me ca omelö hmetu tavat adre mokcu. 16 Anyin adre

ne ca omelö hmetu tavat adre mokcu, awe, adre ca hia but omeli Keriso hmetu bi: 17 ke adre ne ca omeli Keriso hmetu bi, me ünyi bâu anyibun labageju; ke öbun bala hnyi anyibun ta je hulö. 18 Ke hi' ödra but minya tavat adre me mokut anyi Keriso. 19 Ate ne geju Keriso hnyi möt thibi ang, awe, öta tavat ae hmak hnyok hon tavat hia thithö.

20 Ke so bi adre hia but omeli Keriso hmetu thö úheny hnyi hua mok, ke e at a bân ka möt ge tavat adre me mokut. 21 Anyin ame o but mok ünyi ge at, k' ame o but möt hmetu ünyi hnyi hna mok ünyi ge at. 22 Anyin adre mok hia ga Adamu, helâe adre me ke ha omelö hia hmetu ge Keriso. 23 Adre me he ka ve tot gaga, a ban Keriso, hwaban e je laten Keriso, e ka o but. 24 Me ame he ka o obuny, me e ame he ka hna dokhon dökhu ka Khong, wale Kamen: e ka hia but ohia ta je dokhu hia, ke ta je musi hia, ke ta je man hia. 25 Anyin ae úcü kâu he ka musi ke ne o but a hia but ip hmelen li can ta je iwahnaihmiöny mē hia. 26 Haba iwahnaihmiöny a biliny e ame he ka ohia, me mok. 27 Anyin, E ame ip hnyi hmelen li can ta je ünyi hia thithö. Ke hnyi hnen hna ha, ka habe, Adre ip ta je ünyi hia thithö hnyi hmelen, me e manen a ca háia e minya bi, waleji at ame ip ta je ünyi hia thithö hnyi hmelen e. 28 Ke a hia but öhnyikánâ ta je ünyi hia thithö hnyi hmelen e, me adre me he ka öhnyikánâ minya bi Nokon hmelen at ame öhnyikánâ ta je ünyi hia thithö hmelen e. me me Khong thibi ae ti beönua hon hia.

29 Ke hawa gadra adre bapataisoi ödra hnân hwaban tavat adre mokcu? ödra ka ca omelö hmetu thö tavat adre mokcu. hnân eü adre bapataisoi ödra me hwaban tavat adre mokcu? 30 ke hnân eü öhmun e laba hnyi je hwakecin hna ootâ hnyi je awa hia? 31 Hnyat me lakeiny lö, inya oge me ha hwegiä hnyi hnök hna hobelua gabun ünyi ge Keriso Iesu a Tuhöta, a oge me mokcu hnyi je bong hia thibut. 32 Oge ne hia but vat me ta je meno úküc hnyi Efeso hoton hwakecin at, ieu troban könya? At ka ca omelö hmetu bi tavat adre mokcu, awe, e so ate me han me ic. anyin ate me he nyi ka mok. 33 Ca iyau' öbun bi: úhnenamö ae monu, wale at ame okongoâ hwakecin ae so. 34 Hmak dö b hwakecin ae wisa, ke ca mádrâ bi hulö.

I. KORINITO 16.

anyin ae ca khana bi keihen Khong : inya oge me ha hnân ohmehm' öbun.

35 Ke ame he ke at ka ha, ka habe, ame he ka hawa ka möt hmetu tavat adre moku? ke ie unyin adre me he ka o më? 36 At monu, ame ca he ka möt hnâm hna tä, e ka ca bobot bi: 37 ke haba hnâm hna tä, me u me ca tä bi unyin ame he ka manen, ke so bi wan thibi, ame ne hwit, ame ne ke wan bi; 38 ke haba Khong ame ham unyin, helâ me hnen hna weny, ke ve unyin bi ka ta je wan. 39 Haba ta je utiö me ca khaca bi bongon, e ke viny bi at, ke ke viny bi meno, ke ke viny bi je meno adre me gâ, ke ke viny bi wâ. 40 E hu ta je unyin drany, me ta je unyin hmeledrany : ke ke hmanenanginy bi aten drany, ke ke hmanenanginy bi aten hmeledrany. 41 E ke hmanenanginy bi seünö, ke ke hmanenanginy bi tehi, ke ke hmanenanginy bi ta je okhû; anyin ae ve bongon hmanenanginy ke okhû me ke okhû. 42 Helâe ge möt hmetu anyin tavat adre moku. Adre me tä hnyi bobot; ke adre me ötilâ hmetu hnyi ca bobot bi; 43 adre me tä hnyi ca so; adre otilâ hmetu hnyi hmanenang : adre tä e hnyi sënyin; adre otilâ hmetu e hnyi man : 44 adre me tä e hnyi unyin hmeledrany; adre me otilâ hmetu e hnyi unyin hanu. A ne hu unyin hmeledrany, awe e hu minya unyin hanu. 45 Ke helâ me hna sihnalimen, ka habe, Adre up Adamu at a bân hanu ae möt. Ke Adamu a biliny hanu at a ham möt. 46 Ke a ca bân bi únyi a hanu, ke so bi únyi a unyin; ke hwaban e únyi a hanu. 47 Únyi eang hmeledrany at a bân, aten kânâ : ke úheny hnyi drany at a loiny. 48 E úcú tavat únyi hnyi kânâ, me at únyi hnyi kânâ; ke úcú at únyi hnyi drany, me at únyi hnyi drany. 49 Ate me hia but we aten kânâ, helâe ate me he ka we aten drany.

50 Hnyat me lakeiny, oge me ha, ka habe, e ca khana viny me dren he ka hu dökhu dokhon Khong; ke ca khana minya bobot he ka hu hna ca bobot bi. 51 Wâ bi, inya oge me ha köbun únyi ae iyong, ka habe, ate me ca he hia ka mokut, ke adre me he ka wi' öta, 52 e ti logot, helâ me thuthubademak, hnyi hna tûâ khoto a biliny : anyin ame he ka fuc khoto, ke adre me he ka omelö hmetu thö tavat adre moku ka hnyi ca bobot bi; ke adre me he ka wi' öta. 53 Anyin ae úcú bi he ka khavâ hna bobot eang ge hna ca bobot

bi, me hna mok eang ge hna ca mok bala bi. 54 Ke at ka hia but khavâ hna bobot eang ge hna ca bobot bi, me hna mok eang ge hna ca mok bi, awe, ame he ka hwâdâ thö hna sihnalimen, ka habe, Ame utâ but mok hnen dökhu. 55 Mok lö, ewa dokhom dökhu? Mok lö, ewa údö gam? 56 Haba údöiny mok, me wale hulö; ke haba maniny hulö, me wale hnanyibu : 57 Ke oleâ ka Khong at ame ham köta dökhu únyi ge Tuhöta Iesu Keriso. 58 Anyin a wale, hnyat a oúnykúmik lö, tethmâ ju öbun, ca bwebwet, ke hwege bala thö hnyi huliwa anyin Than, anyin ae khan' öbun a g' ame ca únyi baú anyibun huliwa ka Than.

HNYIMAKAN 16.

KE haba ge úhnöhnö hobi kâu wakap, e so öbun e ányâ helâ me hnök hna hûna ka ta je ekalesia hnyi Galatia. 2 Hnyi bong a bâniny seven e so öbun e ve ip unyibun bi helâ me hna ve hu, me me ba úhnöhnö iny ka o thö. 3 Ke iny ka o thö, oge me he ka kunâ tavat, waleji öbun e úca ge je tusi, he ka hom anyibun je bwihlany Jerusalema ai : 4 ke ame ne úcú kónya he ka hnyi he, m' ödrin e he ka tha he mönya. 5 Ke iny ka he ka vheno Makedonia, me oge me he ka o köbun; anyin oge me he ka gethen hnyi Makedonia; 6 ke oge ne he la ka tha laba möbun, me tuö úen ae megic, me öbun e he ka su nya ka hnyi getheniny dok oge me he ka hnyin. 7 Anyin e ca wek he ka saú me ö 'bun walang ang; anyin e wek bi he ka laba beú unyibun, e ka weny Than. 8 Ke oge me he ka laba hnyi Efeso ke ne o but hnyi Penetekos; 9 anyin adre hia but khöng kónya hwanuma ae lau, ke hu huliwa hnyin, ke se hia ta je iwahnaihmöiny.

10 A ne o köbân Timoteo, wâ eâu öbun me me ca he ka laba unyibun me ot; anyin a e ame ányâ huliwa anyin Than helâ me inya : 11 anyin a wale, ca he ke at ka oúnyibâúâ e. Ke su thö jem öbun hnyi hnahic, me he he ka o kónya : anyin oge me halubahingen tha e me hnyat me lakeiny. 12 Ke gan hmâ hnök hna újôngi Apolo ke liamekeiny, me me he ka tha o köbun me je liamekeiny : k' ame ca weny he ka o hnyi úen ang; ke e ame he ka o, e ka hu úen ae úcú.

13 Hmâkâ th' öbun, tethmâ ju hnyi labageju, hnyok бага thö, hwege thö. 14

II. KORINITO 1.

Ânyâ thö hnöbun hna ânyâ hia hnyi ibetengio.

15 Hnyat me lakeiny lö, (e khan' öbun lap anyi Setefana, a waleji wan a bán hnyi Akaia, ke ödrin e ka ham ödrin bi he ka bi athnyabainy wakap), inya oge me sumat öbun, ka habe, 16 e so öbun e he ka löng hoton tavat helâe, me ödra hia minya adre me ûhadruö me huliwa. 17 Ke inya oge me senyin waleji ge ioi Setefana, me Fotunato, me Akaiko: anyin ödrin e ham ta je ûnyi ae hia gabun. 18 Anyin ödrin e okahwa hanuk, ke je hanubun minya: anyin a wale, kap soi ödra ju tavat helâe.

19 Ame italofo m' öbun ta je ekalesia hnyi Asia. Ame italofo gan hmâ m' öbun hnyi Than Akula me Perisila me ekalesia hnyi hnyabadru. 20 Ame italofo m' öbun je liamekeiny hia thithö. Úitalofaköu ju öbun ge úcimhnyimak ae kap.

21 Inya Paulo oge me italofo m' öbun ge hnyamök. 22 A ne ca hnyok bi ke at ka Than Iesu Keriso, e so he ka anathema e. Maranatha. 23 E so e unyibun ibetengio baú anyin Than Iesu Keriso. 24 E so e unyibun hia anyik ibetengio hnyi Keriso Iesu. Amen.

TUSI A LOINY ANYI PAULO APOSETOLO KA

AT KORINITO.

HNYIMAKAN 1.

INYA Paulo aposetolo anyin Keriso Iesu únyi ge weny Khong, ke Timoteo a liamekeiny m' öta, öhmü set ka ekalesia anyin Khong hnyi Korinito, tha ödrin me wakap hia thithö hnyi Akaia hia: 2 E so e unyibun ibetengio baú, me hnahic únyi ge Khong a Kamöta me Than Iesu Keriso.

3 E so he ka ogânâ Khong a Kamen Tuhöta Iesu Keriso, me Kamen ta je ibetengio, me Khongon hna okahwa hia; 4 at ame okahw' öhmun hnyi anyihmun je vec hia, me me khan' öhmun dut he ka okahw' ödra adre me vec, ge kahwa ame okahw' öhmun kâu nhen Khong. 5 E gan hmâ vec ame o köhmun únyi ge Keriso, anyin a wale e gan hmâ minya hna okahw' öhmun únyi ge Keriso. 6 Ke adre me ne oveci öhmun, me wale hnân hobi kâu anyibun kaukahwa me möt; ke adre me ne okahw' öhmun, me hnân he ka okahw' öbun, wale ame huliwa hnyi anyibun hokhnyok hnyi je vec a tha úcü me anyihmun je vec: 7 ke e tethmâ anyihmun geju gabun; anyin ae khan' öhmun a öbun e he ka hnyi kahwa helâ me hnöbun hna hnyi vec. 8 Hnyat

me lakein lö, e ca wehmun e me ca khan öbun ge vec a o köhmun hnyi Asia, waleji adre me ti ohmak' öhmun ae gan hmâ hon tang hwegiöhmun, waleling me öhmun e ca únykúme hmetu bi he ka möt: 9 eke e hu gahmun hna únykúme he ka mok, m' öhmun e ca he ka geju köhmun bi, ke so bi ka Khong at ame omelö hmetu tavat adre me mokcu: 10 wale at ame omeli öhmun únyi hnyi mok ae gan helâe, k' ame he bi ka omeli öhmun: ke öhmun e geju kâu a g' ame he bala ka omeli öhmun; 11 k' öbun e hnyi hadruâ únyi ge hic hobi köhmun; me me olé minya tavat ae se hia hobi köhmun, hnyi ibetengio köhmun a deny tavat ae se hia.

12 Anyin a walang anyihmun senyin, a g' ame ohnathoâ hnen únykúmenöhmun ae hnyi hwakecin ae wisa me hnathu únyi ge Khong, ke ca únyi bi hnyi metâiny unyin. ke únyi hnyi ibetengio baú anyin Khong. öhmun e ânyâ hwakecilmun eang hmele-drany, ke ti gan hmâ bi köbun. 13 Anyin a öhmun e ca set köbun ke ta je únyi, ke so bi únyi öbun e aú me ogâ, ke inya oge me únykúme a öbun e he ka ogâ ke ne o but obiny: 14 helâ me keihen gabun adre

II. KORINITO 2, 3.

me og' öhmun ehac, ka habe, a öbun e hobeluá gahmun, helá me hnöhmun hna hobeluá gabun, hnyi bong bongon Tuhöta a Iesu.

15 Ke hnyi labageju eling, oge me únykúme he ka o köbun ehac, me me lo anyibun li so ; 16 me he ka gethen anyibun Makedonia ai, me he ka o hmetu köbun úhek Makedonia, me öbun e he ka su nya hnyi gethen iny ka he Juda ai. 17 Anyin a wale, hawa, oge me ha monoá hnyi únykúmenök eling ? ke haba ta je únyi oge me únykúme, hawa, oge me únykúme hoton unyin, me me ka hamök bi he ka ha, ka habe, eke, eke, e ba, e ba ? 18 Ke hnathu bi Khong, me haba hohmun hofuc köbun me ca eke, me e ba. 19 Anyin a haba Nokon Khong, a Iesu Keriso, waleji öhmun e khetá köbun, a inya me Silevana, me Timoteo, me ca eke, me e ba, ke únyi gan bi, ka habe, eke. 20 Anyin a eja ke ne a ne habaná ta je únyi ae ti se hia Khong, me únyi thibi gån bi, ka habe, eke : waleling me me únyi thibi minya gån Amen, m'adre me he ka ogåná Khong únyi gahmun. 21 Ke haba Khong at ame otethm' öhmun, me öbun minya unyi Keriso, ke e at a hú öhmun ; 22 waleji at ame okeceá hmá hatöta, me ham köta haten Hanu eú hnyi je hnyekuta.

23 Ke inya oge me hawá Khong he ka ohnathoá hon hanuk, a habaji k' iny tiga ca mwi bi Korinito, me, inya oge me betenge gabun. 24 Ca ha bi a öhmun e musö anyibun labageju, ke so bi öhmun je hnyat úhadruö bi anyibun senyin, anyin a öbun e tethmä hnen anyibun labageju.

HNYIMAKAN 2.

KE oge me ohmä eú hnyi hnyekuk, ka habe, oge me ca he hmetu ka o köbun me hnyok ae hmak. 2 Anyin a oge ne he bi ka ohmaká je hnyekubun, me ewa at ame he ka osenyini nya, ke so bi at thibi oge me ohmaká ? 3 Ke oge me sihna-limen únyi eling, wá e nye hmak hnyekuk únyi ge tavat ae úcú he ka osenyini nya, iny ka o ; ke oge me geju köbun hia thithö, a haba anyik senyin, me anyibun minya senyin hia. 4 Anyin oge me set köbun hnyi vec ae gan hmá, ke hmak hnyekuk, ke gan hmá deköien li emakök ; ka hnân oveci öbun, ke so bi me me he ka manen köbun anyik betenge ae gan hmá köbun.

5 A ne ohmakö nya hnen at, me e ame

ca ohmakö nya a hake inya ke (wá oge nye ti ohmak' öbun), ke so bi öbun hia thithö minya. 6 E úcú ka at e hna bi hwaban heláe hnen tavat ae se ; 7 waleling me me so köbun he ka nuá anyin monu me okahwá e, wá e nye utá but at heláe hnen anyin hlöuhlöu ae ti gan hmá. 8 Anyin a wale, inya oge me samat öbun, he ka ohmä anyibun betenge káu. 9 Anyin oge me sihna-limen minya can e, me me khanö nya thö haten gabun, hawa la, öbun e ne úling hnyi ta je únyi hia. 10 Anyin a haba at öbun e önuá anyin monu, me oge me he bi nya ka önuá : anyin a haba únyi oge hia but önuá, a ne hu hnök hna önuá, me oge me ányá únyi gabun hnyi hnyimakan Keriso ; 11 wá e nye iyau' öta Satana, anyin ae ca iyong köta anyiu ta je bibihwakecin.

12 Haba hnyi úen eji oge me o hnyi Troas me úthumetu ae so anyin Keriso, ke adre khöng hwanuma könya únyi hnyi Than, 13 me ame ca mená bi hanuk, anyin oge me ca iouny me Tito liamekeiny mönya : ke oge me úhüne m' ödra, me he but Makedonia ai. 14 Ke ole ka Khong at ame odökhu öhmun bala únyi ge Keriso, k' ame omanená únyi gahmun bunen metá gan hnyi ta je hnyei hia. 15 Anyin a öhmun ang bunen ae hnebwia anyin Keriso ka Khong can tavat adre omelö, ke tavat adre me hnaúhangö ; 16 haba öhmun me bunen mok ka keihen tavat adre me he ka hnyi mok ; ke öhmun bunen möt ka keihen tavat adre me he ka hnyi möt. Ke ie at ae úcú ka hnyi ta je únyi eang ? 17 Anyin a öhmun ca tha úcú me tavat ae se hia adre omono hofuc hwan Khong : ke so bi hoton hnathu, me únyi ge Khong, me hnyi hnyimakan Khong, öhmun e fuc anyin Keriso.

HNYIMAKAN 3.

HAWA, öhmun e hwán hmetu he ka haisoi öhmun bi ? ke hawa, e únyi hnathu köhmun je tusi helá me keihen hnân haisoá köbun, ame ne únyi gabun bi ? 2 Öbun ang anyihmun tusi, adre set hnyi je hnyekuhmun, adre wáhmakhmetoá me aú hnen tavat hia ; 3 anyin ae manen a öbun ang tusi anyin Keriso, öhmun e huliwan, adre ca set ge köiö sisit, ke hnen bi Hanon Khong ae möt ; ke adre ca set hnyi je veto, ke so bi hnyi je viny hnyok. 4 Ke e hu gahmun únykúme a heláe ka Khong a deny Keriso : 5 ca ha bi a öhmun hake úcú he

II. KORINITO 4.

ka únykúme ke únyi, me ka únyi gahmun bi ; ke öhmun úcú a únyi ge Khong ; 6 waleji at ame öcú öhmun he ka bi athnyabainy úhinykôu a teb únyi ; ca ge tusi, ke hanu bi : anyin a haba tusi, me at úhlingö, ke at úhömeli hanu. 7 Ke a ne hmanenang he ka bi athnyabainy únyi adre me mekiny hnyin, waleji adre sihnalimen me kave hnyi veto, me me ca khana bi lakon Isaraela he ka wâ hmâ hnyimakö Mose anyin ae hmanenang hnyimakan ; waleji a hmanenang ame he ka hia : 8 hawa, ame ca he ka beönuâ hmanenanginy bi athnyabainy hanu ? 9 Anyin a ne hmanenang bi athnyabainy hnaúhangö, awe, e ti hmanenang-gan hmâ he ka bi athnyabainy ka hwakecin ae wisa. 10 Anyin a haba únyi waleji adre ohmanenangâ me helâke e ca hmaneng bi ge hmanenang ae beönuâ. 11 Anyin a ne hmanenang únyi ame he ka hia, awe, e ti hmanenang gan hmâ únyi ame he ka tethmâ.

12 Anyin a wale, öhmun e ha hwegia, anyin ae hu gahmun gejon a helâng, 13 ke ca helâ me Mose, at ame tube hnyimakan, me me ca khana bi lakon Isaraela he ka wâ hmâ ka hnyi obiny únyi ame he ka hia : 14 ke adre onâká je önykúmenödra : anyin a e bala bi ke ne o but hnyi bong ang adre ca hota but hna tube eling, hnyi úen adre me aú úhinykôu adrem ; waleji hna tube adre me ohia únyi hnyi Keriso. 15 Ke so bi ae hu hna tube je hnyekudra ke ne o but hnyi bong ang, at ka aú Mose. 16 Ke adre me hnyimaködra ka Than, me ame he ka hia but hna tube. 17 Ke haba Than, me wale Hanu : ke haba dok ame laba hnyin Hanon Than, me adre me hna bâúâ at eling. 18 Ke haba öta hia adre ca tubi hnyimaköta, k' ate me wâ hmanenanginy Than, helâke me hnyi uselat, me adre me wi' öta m' ate me we at a khaca únyi hnyi ke hmanenang ka hnyi ke hmanenang, helâke me únyi ge Than a Hanu.

HNYIMAKAN 4.

EHU but gahmun huliwa eang, ke adre me betenge gahmun, me waleling öhmun e ca sényin : 2 ke öhmun e hia but degec ta je únyi ae iyong hnân ohmehma, k' öhmun e ca he me iyawö, ke öhmun e ca othoiâ hofuc hwan Khong ; ke öhmun e omanenâ hnathu, me haisoi öhmun hnyi ta je únykúmenen tavat hia hnyi hnyimakan Khong. 3 Ke adre me ne tubi

anyihmun úthumetu ae so, me adre me tube ka tavat adre me he bi ka mok : 4 wale tavat ame öwadruâ je önykúmenödra bi, ke adre me ca labageju bi, únyi ge khongon hmeledrany eang, wâ e nye melam ködra melaminy úthumetu ae so ae hmanenang anyin Keriso, wale ae we Khong. 5 Anyin a öhmun e ca kheti öhmun, ke Keriso Iesu a Than, ke öhmun je lathnyabaibun ga Iesu. 6 Anyin a Khong, waleji at ame ha, ka habe, Ame he ka umumelam but melam únyi hnyi lit, waleji ame öumumelamâ je hnyekuta, me me melam but he ka wâhmakhmetoâ hmanenang anyin Khong hnyi hnyimakö Iesu Keriso.

7 Ke hu but gahmun tang omjeú eang hnyi je utkaia kânâ, me me únyi ge Khong úganiny man ae nua, ke ca ka únyi bi gahmun ; 8 adre uhneki igigili öhmun, k' öhmun ca gum bi ; öhmun e hlohlo, ke ca gâ bi úhmun ; 9 adre me hnu öhmun, k' adre ca digic öhmun bi ; adre me öü öhmun, ke ca hia öhmun dut ; 10 öhmun e hom tilâ hnyi je unyihmun mok anyin Than Iesu, me me manen minya but möt anyi Iesu hnyi je unyihmun. 11 Anyin a haba öhmun hnyat ae möt, adre me hn' öhmun bala ka hnyi mok ga Iesu, me me manen minya but hnyi je unyihmun ame he ka bobot möt anyi Iesu. 12 Wale me me huliwa mok eú hnyi je hnyekuhmun, ke ame huliwa bi möt eú hnyi je hnyekubun. 13 Ke e hu gahmun hanuiny labageju a khaca, helâ me hna sihnalimen, ka habe. Oge me labageju me oge me fuc dö ; ke öhmun e labageju minya, me öhmun e fuc minya thö ; 14 ke e khan' öhmun a haba at ame omelö hmetu Than Iesu, ame he ka omeli öhmun hmetu minya me Iesu, me tha omanen' öhmun m' öbun. 15 Anyin a hobi köbun ta je únyi hia, me me se hia but ole hnân ogânâ Khong, hnen ibetengjö hna osehia hnen tavat ae se hia.

16 Wale me öhmun e ca sényin bi ; eja ke ne a ne bobot tot je unyihmun hnyi hoton, adre me ohâtâ hnyi je bong hia at eú hnyin. 17 Anyin a haba anyihmun vec ae háhâ, wale ame ie hia, ame huliwan gan hmâ tot hobi köhmun hmanenang ae hmak ke nyiele balua ; 18 ke öhmun e ca wâ hmâ ta je únyi ae manen, ke so bi ta je únyi ae ca manen bi : anyin a haba ta je únyi ae manen me e hu obiny ; ke haba ta je únyi a ca manen bi, me nyiele balua.

HNYIMAKAN 5.

A NYIN ae khan' öhmun a ga ne kia but umöhmun uma menâ eang hmeledrany, me hu bi gahmun uma únyi ge Khong, wale uma adre ca mádrá bi ge hnyam, ame ca ba balua, ke ethö hnyi drany. 2 Anyin a öhmun e mâng hnyi uma eang, ke ti wehmun he ka khaú öhmun ge umöhmun uma ethö hnyi drany: 3 öhmun e ne khaú, m' adre me ca ö'hmun bi öhmun e he thu. 4 Anyin a haba öhmun hnyi uma menâ eang, öhmun e mâng, ke hmak; ca anyin ae wehmun he ka uny jut, e so bi m' adre me khaú' öhmun, me me utá but mok hnen möt. 5 Ke Khong at ame up öhmun hobi káu e, waleji at ame ham köhmun haten Hanu. 6 Anyin a wale e hwege bala hnyekuhmun, ke khan' öhmun, ka habe, e ka tiga öhmun hnyi unyin, e hi' öhmun unyin Than 7 (anyin a öhmun e he hnen labageju, ke ca hnen bi hna wá); 8 öhmun e hwege hnyok, me wehmun he ka hia but hnyi unyin, me tha öhmun unyin Than. 9 Anyin a wale öhmun e hwege ná he ka osenyinâ e bi, a ne öhmun dut eang, ame ne hi' öhmun. 10 Anyin adre me he ka omanen' öta hia hnyi hnyimakan taben owisa anyi Keriso; m' ate me he ka ve kap ta je únyi ate ányá hnyi unyin, hoton hna ve ányá, ame ne so, ame ne kong.

11 Anyin ae khan' öhmun únyi hnân ootá unyin Than, wale me öhmun e újengö tavat, ke öhmun e manen dut ka Khong; ke oge me únykúme a öhmun manen dut minya hnyi je únykúmenöbun. 12 Öhmun e ca haisoi öhmun hmetu bi köbun, ke so bi, heláke öhmun e ham köbun únyi hnân hobeluá gahmun, me me hu gabun hnân thu ködra adre me hobeluá hnyi hnyimak, ke ca bi eú hnyi hnyok. 13 Anyin a öhmun e ne monu, me hobi káu Khong; ke öhmun e ne metá, me hobi köbun. 14 Anyin ame musi öhmun ibetengiö anyi Keriso; anyin a walang ang únykúmenöhmun, a g' ame mok ke at hobi káu tavat hia, awe, a mok hia; 15 ke e ame mok hobi káu tavat hia, m' adre me ca he hmetu ka möt ködra bi tavat ae möt, ke so bi káu at a mok me möt hmetu thö hobi ködra. 16 Wale me öhmun e hwán walang ang a öhmun e ca he ka wáhmakhmeto ke at hoton unyin: eja ke ne öhmun e hia but wáhmakhmeto Keriso hoton unyin, ke

so bi walang ang öhmun e ca he ka wáhmakhmeto hmetu bi e heláe. 17 Anyin a wale a ne e but ke at unyin Keriso, e at adre teb op; e hia but ta je únyi adrem; ke wá bi, adre ohátá ta je únyi. 18 Ke únyi ge Khong ta je únyi hia thithö, at ame öúsoköu öta mä a deny Iesu Keriso, ke ame ham köhmun huliwainy úsoköu; 19 waleji, a e unyin Keriso bi Khong, ame öúsoköuá hmeledrany mä, k' ame ca ip hnödra je hna hanyáúá ködra bi, ke ame ham köhmun hofucin úsoköu.

20 Anyin a wale, öhmun je metá anyin Keriso, heláke Khong ame khöú únyi gahmun: ke öhmun e sumat' öbun, hobi káu Keriso, ka habe, úsoköu öbun ju me Khong. 21 E, at eji ae ca khana bi monu, e ame wia e me me monu hobi köta, m' adre me he ka wi' öta hnân hwakecin ae wisa anyin Khong únyi gan.

HNYIMAKAN 6.

KE öhmun ang hnyat öhmun e tha huliwa mä, me öhmun e újengi öbun, wá öbun nye kap báúá ibetengiö anyin Khong, 2 (anyin a haingen, ka habe,

Oge me ling u hnyi úen eji ae so,

Ke oge me hadruó u hnyi bonginy möt: ke wá bi, walang úen ae so; wá bi walang ang bonginy möt): 3 ke öhmun e ca othoá at hnyi ke únyi bi, m' adre me ca he ka haikongoá hnöhmun hna huliwa; 4 ke hnyi ta je únyi hia öhmun e omanen' öhmun a lathnyabainy Khong öhmun, hnyi hokhnyok ae gan hmá, me je vec, me theduoc, me hlöuhlöu, 5 me hna osöá, me hnyi uma ceat, me hnyi je imonumonu, me ta je huliwa, me hmáká me mekihnânem; 6 hnyi hwakecin ae so, me wá únykúme, me lingvec ae beú hmá, me hwakecin betenge, me Hanu Kap, me ibetengiö ae ba thoi hnyin, 7 me hnyi hofuc ae hnathu, me hnyi man maniny Khong; hnen omjehen vatiny hwakecin ae wisa hnyi ke keihen metá me me, 8 hnen oganá, me öühnyükongoá, hnen haikongoá, me haisoá; heláke me hnyat iyawá, k' öhmun hnathu bi; 9 heláke hnyat ae ca khan' ödra öhmun, ke khan' ödra öhmun bi; heláke hnyat adre me he ka moku, ke wá bi öhmun e möt; heláke hnyat adre osöá, k' adre ca hling' öhmun bi; 10 heláke hnyat ae hmak hnyok, k' öhmun e senyin bala; helá me theduoc, k' öhmun e otenâ tavat ae se; heláke me ba ta únyi, ke hu but ta je únyi hia thithö.

II. KORINITO 7, 8.

11 At Korinito lö, öhmun e khöng köbun je hnyimöhmun, ke adre me ogânâ je hnye-kuhmun. 12 Öbun ca ûhnyükong eü hnyi je hnyekuhmun, ke öbun ka ûhnyükong eü hnyi je hnyekubun. 13 Ogânâ but öbun, me hnân hwaban bi (inya oge me ha helâ me ka lakuk).

14 Ca ûhükölöbun monu köu me tavat adre me ca labageju bi: anyin ame he ka hawa hwakecin ae wisa he ka tha e me hwakecin ae ca wisa bi? ke ame he ka hawa ka tha e melam me menekholom? 15 Ke ame he ka hawa ka tha hnyok Keriso me Belial? ke ame he ka kâmâu ka tha jekhon at labageju me at ame ca labageju bi? 16 Ke ame he ka kâmâu ka tha bongon uma umen Khong me ta je hnatheat? anyin a öta ang uma umen Khong ae möt; helâ me hna ha hnen Khong, ka habe, Oge me he ka laba eü hnyidra, me tha he mödra; ke oge me he bi nya ka Khongudrin, ke adre me he bi ka lakeik. 17 Anyin a wale, haingen Than, ka habe,

Didrut öbun gadra, ke ve laba but,

Ke ca kâlâ bi ûnyi ae ikiki;

Ke oge me he ka köp öbun,

18 Ke oge me he ka Kamöbun,

K' öbun e he ka lakuk obaga me wahlu, haingen Than ae khana hia.

HNYIMAKAN 7.

HNYAT a önykûmik lö, e hu but unyita ta je hna ha bânâ eling, anyin a wale, e so ate me he ka anyawi' öta bi ûnyi hnyi ta je ûnyi ae ikiki hia hnyi unyin me hanu, he ka obekhötâ hwakecin ae kap hnyi ot ka Khong.

2 Köp öhmun d' öbun: e ba at öhmun e hwali kâu, e ba at öhmun e okongoâ, e ba at öhmun e iyawöâ. 3 Oge me ca ha e hnân hang' öbun: anyin oge hia but ha köbun ehac, ka habe, öbun eü hnyi je hnyekuhmun he ka tha mok me tha möt. 4 E gan hmâ hnök hna fuc hwege köbun, ke gan hmâ hnök hna hobeluâ gabun: inya at ae unöngöt ge kahwa, oge me ti senyin gan hmâ hnyi anyihmun ta je vec hia.

5 Anyin a waleji hnyi hnöhmun hna o but hnyi Makedonia, ame ca menâ bi je unyihmun, ke öhmun e vec hnyi ta je ke keihen hia; e hu vat hnyi hoton, ke ot eü hnyin. 6 Ke haba Khong, at ame okahwa tavat adre me ohnyikön' ödra bi, me e ame okahw' öhmun ge ioi Tito; 7 ke ca ûnyi thibi ge ioiny, ke so bi hnen kahwa öbun e

okahwa e kâu, ke a thumetu öhmun ge webun ae tethmä, me anyibun tenge, me hnyekubun ae kahwa könya; wale me me ti gan anyik senyin. 8 Anyin a eja ke ne oge ne oveci öbun ge anyik tusi, oge me ca ietra bi, ke so bi oge me ietra ehac; anyin oge me wâ, a g' ame oveci öbun tusi e, ke hnyi ün thibi a khaca. 9 Ke walang ang inya oge me senyin, ca anyin adre ohmakâ hnyekubun, ke anyin adre ohmakâ je hnyekubun ke ne o but ka hnyi ietra: anyin adre ohmakâ je hnyekubun helâ me úcú ka Khong, m' öbun e ca kong bi ûnyi gahmun hnyi ke ûnyi. 10 Anyin a haba hmak hnyok ae úcú ka Khong, me wale at ame ökütâ ietra ke ne o but ka hnyi möt, haba ietra eling, me ca hnân ietra hmetu: ke haba hmak hnyok ûnyi eang hmeledranv ame ökütâ mok. 11 Anyin a wâ ju öbun ûnyi eang waleji e hmak hnyekubun hoton ae úcú ka Khong e ame ökütâ hna wâ wia unyibun, me ivinö, eke, me haiwisai öbun, eke, me kong hnyekunâ, eke, me ot, eke, me weny ae gan hmâ, eke, me hnyok ae kahwa, eke, me bi hwaban! Haba hnyi ta je ûnyi hia öbun e hia but omanen' öbun bi ae ba anyibun hulö hnyi ûnyi eang. 12 Ke haba hnyi hnök hna sihna-limen köbun, me ca hake hobi kâu bi at ame mädrrâ monu, ke ca hobi kâu minya bi at adre me monu kâu, ke so bi me me manen dut köbun hnyi hnyimakan Khong a öbun e kong hnyekuni öhmun. 13 Anyin a wale adre ti okhaw' öhmun: ke haba hnyi kahwa a öhmun, öhmun e senyin gan hmâ hnyi senyin anyi Tito, anyin ame okahwa hnyekon ûnyi gabun hia. 14 Anyin a ne hu hnök hna ohobeluâ kâu ûnyi gabun, iny ca hmehmä bi; ke öhmun e ha ta je ûnyi hia köbun hnyi hnathu, helâe minya adre wâ ae hnathu hnöhmun hna ohobeluâ, waleji oge ânyâ hnyi hnyimakö Tito. 15 Ke e ame ti hnyok gan hmâ köbun, me unykûme anyibun úling hia, me hnöbun hna ot, me öbubuny hnyi hna kap e. 16 Inya oge me senyin anyin adre sihwegîâ hnyekuk gabun hnyi ta je ûnyi hia thithö.

HNYIMAKAN 8.

KE haba khaca, hnyat me lakeiny lö, öhmun e thumetu öbun ge ibetengio baü anyin Khong hnyi ta je ekalesia hnyi Makedonia; 2 ka habe, adre cubic ödra hnyi vec ae gan hmâ, ke ame kû gan hmâ

II. KORINITO 9.

but anyidra senyin me hna ham bâât únyi hnyi anyidra theduoc. 3 Ke inya oge me ohnatho, a g'adre me ham bâât hoton hnödra hna khana, eke, me hanyâtâ but hnödra hna khana, 4 ke adre kun' öhmun újôngi öhmun hnyi betenge eling me munyi hadruâ wakap: 5 ke ca helâji me hnöhmun hna únykúme, ke adre me mē ham ödra bi ka Than, me köhmun minya hoton weny Khong. 6 Wale me öhmun e sumató Tito thö, anyin a e ame ibi hwân, ke helâe minya e ame he ka um unyibun ibetengiö eang. 7 Ke öbun e tren gánâ ta je únyi hia, wale labageju, me ha hofuc, me metâ, me kong hnyekunâ gan hmâ, me anyibun ibetengiö köhmun, awe, e so ame he ka si minya unyibun ibetengiö ang. 8 Oge me ca ha me hnân hnanyibu, ke ame cubec anyibun ibetengiö únyi ge hna kong hnyekunâ anyin keihen. 9 Anyin ae khan' öbun ibetengiö baú anyin Tuhöta Iesu Keriso, a e at ae tren ta únyi, ke e ame otheduocâ e hobi köbun, m' öbun e he ka tren ta únyi únyi hnyi anyin theduoc. 10 Ke inya oge me omanenâ únykúmenök hnyi únyi eang: anyin ae úcú köbun tavat öbun e hwân ehac, a khaca but hunaubun, he ka ca mádrâ thibi, ke so minya bi he ka weny. 11 Ke walang ang, öumo ju hna ányâ minya; me me um minya ju únyi hnyi hna hu, helâji me hnöbun hna ie weny. 12 Anyin a ne hu hnyok ae weny, adre me he ka kap e hoton hna hu hnen at, ke ca hoton bi hna ca hu gan bi. 13 Anyin oge me ca ha únyi e me me háhâ keihen, k' öbun hmak bi öbun: 14 ke so bi me me tha úcú; haba hnöbun hna tren gánâ hnyi ün eang, me hobi kâu anyidra theduoc, me me hobi kâu anyibun theduoc hnödra hna tren gánâ; me me tha úcú thibi: 15 helâ me hna sihnalimen, ka habe, Haba at ame thithigâ gánâ me ba kolon kâu; ke haba at ame thithigâ úhnyúkongo me ba únyi ae hia gan.

16 Ke ole ka Khong at ame ip hnyi hnyeku Tito ibetengiö köbun helâe. 17 Anyin a e ame kap hnöhmun hna úne kâu; ke únyi hnyi hnen hna hnyok gan hmâ ka hnyin, me e ame ka hamen he but köbun. 18 Ke öhmun e hia but kunâ e tha e me ke liamekeiny, waleji adre ogánâ hnyi ta je ekalesia hia hnyi úthumetu ae so; 19 ke ca eang thibi, ke adre úca minya e hnen ta je ekalesia he ka tha he m' öhmun he ka hom ibetengiö eang, wale öhmun e huliwan hnân ogánâ Than, me hnân bi haten

hyekuhmun ae weny: 20 ke öhmun e outen ang, wâ e nye haikongu öhmun ke at hnyi tang omjeú eang ae gan öhmun e huliwan: 21 anyin a öhmun e únykúme he ka ányâ ta je únyi hnyi wisa, ca hnyi hnyimakan Than thibi, ke hnyi hnyimakan minya bi tavat. 22 Ke öhmun e hia but kunâ he ka tha he m' ödrü liamekeiny m' öhmun, waleji öhmun e wâhmakhmetoâ hnyekon ae kahwa hnyi ta je únyi ae se hia, ke walang ang ae nua kahwainy hnykon, únyi hnyi anyin labageju köbun. 23 A ne ke at ame hnei ga Tito, awe, e at ame tha e mönya, me at ame tha huliwa mönya köbun; ke adre ne hnei minya ge liamekeiny mötu, awe, ödrü li úthumetu anyin ekalesia ke hmanenanginy Keriso. 24 Anyin a wale omanenâ thö ködrin hnyi hnyimakan ta je ekalesia haten anyibun betenge, ke hnöhmun hna ohobeluâ únyi gabun.

HNYIMAKAN 9.

ECA únyi hnathu könya he ka sihnalimen köbun hwakecin huliwa ka wakap: 2 anyin ae khanö nya hnyekubun ae beweny, wale oge me hobeluâ gabun hnyin ka at Makedonia, ka habe, adre hia but penapena hnyi Akaia ehac a khaca but huna; ke ame huliwan hnyekon tavat ae se hia hnen hnyekubun ae kahwa. 3 Ke oge hia but kunâ je liamekeiny, wâ e nye únyi baú hnöhmun hna hobelu' öbun hnyi únyi eang; m' öbun e he ka penapena helâ me hnök hna ha: 4 wâ oge nye o me keihen at Makedonia, me wâ a ga ca penapena ju öbun, me öhmun e he bi ka hmehma (ke ti e bi gabun) hnyi hna hobeluâ eling. 5 Anyin a wale oge me únykúme ae únyi hnathu he ka khöú ka ta je liamekeiny he ka bödrin köbun me penapena ta je únyi hnyi anyibun ibetengiö, waleji öbun e ha bânâ ehac, m' öbun e he ka penapena e, helâ me únyi hnyi ibetengiö, ke ca helâ bi me hna behânâ.

6 Ke wale minya eang, haba at ame tä úhnyúkongoâ, me úhnyúkong minya hnen hna meno; ke haba at ame tä gánâ, me gan minya hnen hna he ka meno. 7 E so he ka ve ham hoton hna thamúâ eú hnyi hnyok; ca hnyi hnyok ae hmak, me hna musö minya: anyin a Khong ame hnyokâ at ame ham senyinâ. 8 Ke e khana Khong he ka ogánâ thö köbun ibetengiö baú hia; m' öbun e he ka widrany gan hmâ bala hnyi ta je únyi hia, m' öbun e he ka si

II. KORINITO 10, 11.

hnyi ta je huliwa hia ae so : 9 helâ me hna sihnalimen, ka habe,

E ame ham bâââ, me ham ka je theduoc ;
Ke tethmâ nyiele balua hwakecin ae wisa gan.

10 Ke haba at ame ham hatong ka at ame tâ, me jeû hnân han, me e ame he ka ham me osehia wan hnöbun hna tâ, me ogânâ minya wan hwakecibun ae wisa : 11 ame otreni öbun ge omjeû hnyi ta je únyi hia, m' öbun e hnyi ham gânâ but, wale hnân okûâ ole ka Khong únyi gahmun. 12 Anyin a haba hna huliwan huliwa eang, me ca walang he ka úcú ka wakap thibi, k' ame bi hanen minya ole ae gan hmâ ka Khong ; 13 anyin adre me ogânâ Khong hnyi haten huliwa eang, me hnyi hnöbun hna löng hoton úthumetu ae so anyin Keriso, wale öbun e hom, me hnyi ibetengió ae gan hmâ ködra me tavat hia ; 14 ke adre me hnyok gan hmâ köbun únyi hnyi ibetengió baû anyin Khong ae ti gan hmâ unyibun, ke adre me hic hobi köbun. 15 Ole ka Khong ge anyin bwihlany ae ca khan' öta ha hia.

HNYIMAKAN 10.

HABA inya Paulo, at ae hnyikânâ e tha inya m' öbun, ke kwege e ka hiö nya m' öbun, me oge me khöü köbun únyi hnyi hwakecin ae menyik me ilemuk anyin Keriso : 2 inya oge me sumat, m' inye ka o, m' oge me ca he ka bi hwege köbun, ge hwege waleji oge me únykúme he ka hwege ka keihen, hnyat adre me únykúmi öhmun helâke öhmun e he hoton hwakecin unyin. 3 Ke öhmun e he hnyi unyin, ke öhmun e ca vat helâ me unyin 4 (Anyin a haba omjehen anyihmun vat me ca hwen unyin bi, ke hwege maniny hnyi hnyimakan Khong hnân hagutâ je hhabâ ae hwege) ; 5 ame hagutâ ta je únykúme me ta je únyi hia ae görany ame úö bi únyi úcön wâhmakhmetoâ anyin Khong, me hom hwenbâ ta je únykúme hia, me me löng hoton Keriso ; 6 me laba penapena he ka bi hwaban ka tavat adre me ca úling, e ka bekhöt dö anyibun úling. 7 Öbun e wâ ta je únyi hnyi hnyimaköbun. A ne ke at ame únykúme a e aten Keriso, e so e ame únykúme hmetu a e ka aten Keriso, awe, öhmun je aten Keriso. 8 Eja ke ne a ne ka gan dut hnök hna hobeluâ anyihmun musi, (waleji a ham köhmun Than hnân otíl' öbun, ke ca hnân bi hagut'

öbun), oge me ca he ka hmehma : 9 anyin ae ca wek he ka ooti öbun ge anyik ta je tusi. 10 Anyin a haingödra, ka habe, E hmak, ke man bi anyin je tusi ; ke sēnyin bi unyin, ke ca únyi hnathu bi hwan hofuc. 11 E so at helâe he ka únykúme ang, ka habe, haba hohmun hofuc hnyi je tusi ke tiga hi' öhmun, me helâe hnyi huliwa e ka öhmun dut e. 12 Anyin a öhmun ca hwege bi he ka hnyi hanen me oucú öhmun me keihen, tavat adre me haisoi ödra bi : ke adre me útuluti ödra köu bi, me oucú ödra m' ödra bi, ke ba wâ únykúme gadra bi. 13 Ke öhmun e ca he ka hobeluâ hoton tulut ae ca so, ke so bi hoton tulut a tuluto köhmun Khong, hnân tulut he ka o but köbun. 14 Anyin a öhmun e ca tuluto beönuâ, helâke a ca o köbun : anyin a öhmun e o but köbun tha öhmun me úthumetu ae so anyin Keriso : 15 öhmun e ca hobeluâ ta je únyi adre ca tuluto bi. hnyi huliwa unyin keihen ; ke öhmun e labageju öbun ka he ka kú tot hnyi labageju, a öbun e he ka ogan' öhmun hoton anyihmun tulut, 16 he ka khetâ úthumetu ae so ka hnyi ta je hnyeai ae úsâkâüö m' öbun, me ca he ka hobeluâ ta je únyi adre penapena hnen tulut anyin ke at. 17 Ke haba at ame hobeluâ, e so e ame hobeluâ Than. 18 Anyin adre me ca he ka kap at ame ka haisoâ e, ke so bi hnen Than hna haisoâ.

HNYIMAKAN 11.

EWEK öbun e ha ka hokhnyoki nya okhulit thibi hnyi anyik monu : eke, hokhnyoki nya ju. 2 Anyin a inya oge me ci' öbun ge hwakecin ciâ anyin Khong : anyin a oge me koc' öbun ka бага a khaca, m' inye he ka hum öbun ka Keriso helâ me hlu cici. 3 Ke inya oge me ot, wâ e nye okongoâ je hnyekubun únyi hnyi hwakecin ae wisa me kalaöt unyi Keriso, helâ me hna iyawö Eva ge on hnen anyin tang iyawö. 4 Anyin a ne o ke at me khetâ ke Iesu bi, waleji öhmun e ca khetâ, ke öbun e ne kap ke hanu, waleji öbun e ca kap, me ke úthumetu ae so, waleji öbun e ca kap, awe, e úcú hnöbun hna hokhnyok kâu. 5 Anyin a inya oge me únykúme a ca únyükong bi nya hnyi melen je aposetolo ae nua hnyi ke únyi a khaca. 6 Eja ke ne oge ne hwen monu hnyi hofuc, me oge me ca helâe hnyi metâ ; ke öhmun e hia but omanenâ e köbun hnyi ta je únyi hia,

II. KORINITO 12.

unyin tavat hia. 7 Hawa, iny monu anyin oge me ka ohnyikönö nya m' öbun e görany dut, ke únyi hnyi hnök hna khetá köbun úthumetu ae so anyin Khong köbun ke ba hwaban? 8 Oge me söh ke je ekalesia, k' oge me kap hwaban únyi gadra me hnân bi hadru' öbun; 9 ke habaji ke tiga inya unyibun, ke ba ta únyi gak, me oge me ca ohmâkâ ke at; anyin ame o je liamekeiny úhedrin Makedonia me ham könya hnyi tulut ae úcú; ke oge me ka hokhnyoki nya hnyi ta je únyi hia, m' oge me ca hmak köbun, ke oge me he bala bi ka hokhnyoki nya helâe. 10 Hoton hnathu anyin Keriso unyik, me ba at ame he ka thawö nya hnyi hobeluâ eang hnyi je ke keihen Akaiä. 11 Anyin a ieu? hawa, anyin oge me ca betenge gabun? E khana Khong. 12 Ke haba hnök hna ânyâ, me oge me he bala ka ânyâ e, m' oge me thelöng deny tavat waleji adre me heléú can; me me manen dut a ödra úcú m' öhmun hnyi hnödra hna hobeluâ. 13 Haba hnyat eling, me je aposetolo thoi, a hnyat huliwa iyawö, a ka hamödrin wi' ödrin me hnân ta je aposetolo anyin Keriso. 14 Ke ca hnân bi láii e, anyin a Satana ame ka hamen wia e me hnân angela ae melam. 15 Anyin a wale, e ca hnân láii únyi ang, a g' ame he lathnyabainy ka hamödra bi wi' ödra me hnân lathnyabainy hwakecin ae wisa; ke haba obiny ködra me ame he ka helâ me anyidra huliwa.

16 Inya oge me ha hmetu, ka habe, Ca he bi ke at ka únykúme a iny monu but; ke a ne únykúme helâe, awe, köp nya thö helâ me monu, me inye na hnyi ohobeluö nya thö. 17 Haba hnök hna ha, me oge me ca ha bi helâ me Than, ke so bi helâ me monu, hnyi hobelöu hwege ang. 18 Anyin ae se hia tavat adre me hobeluâ hoton unyin, me oge me he bi nya ka hobelöu. 19 Öbun tavat ae metâ, me waleling öbun e hokhnyokâ tavat ae monu. 20 Öbun e hokhnyokâ at, ame ne thalú' öbun, ame ne ön öbun, ame ne hom hwenb' öbun, ame ne bi gan, ame ne khaú hnyimaköbun. 21 Inya oge me haikongo, helâke öhmun je hnyat ae sényin. E ka hu únyi ame hwege hnyin ke at (inya oge me hwen monu) inya minya oge me hwege hnyin. 22 Hawa, ödra at Heberu? helâ minya inya. Hawa, ödra at Isaraela? helâ minya inya. Hawa je mâtrâni Aberahama ödra? helâ minya inya. 23 Hawa, ödra tavat huliwa ka Keriso? (inya oge me hwen monu) iny beönua bi nya; beönua

hnyi huliwa; ke se hia hmönyin hna labö cö nya, e se hia hmönyin hna labö osöi nya, ke iny osehia he ka mokcu. 24 E othabúng osöi nya hnen at Juda, a úsa thöte nain hna hna. 25 At okun kuc nya ge je osö, ke at okhaca lüö nya ge veto, a ibi okun hmouca but hu oge me kec hnyin, khaca lidrik ke khaca lang eú hnyi köiö; 26 iny osehia he, oge ne kong ut hnyi je wagewe, oge ne kong ut hnen tavat venöu, oge ne kong ut hnen aten ik hnyei, oge ne kong ut hnen Aten ke je hnyei, oge ne khong ut hnyi taun, oge ne kong ut hnyi hnyot, oge ne kong ut eú hnyi köiö, oge ne kong ut ge hnyat me lakeiny ae thoi; 27 inya hnyi huliwa ae hmak, me vec, me osehia hmâkâ, me mekihnanem, me beic, me ibiose hokhnyok, me hnyi megic, me he thu. 28 Ke ca ta je únyi únyi hnyi hoton thibi, ke ka e bala bi anyik hmak hnyi je bong hia, wale oge me kong hnyekunâ ge ta je ekalesia hia. 29 Ewa at ae sényin, ke ca sényin bi nya? ewa at adre othöâ, ke ca vec bi nya? 30 A ne úcú könya he ka hobeluâ, me oge me he ka hobeluâ ta je únyi oge me sényinâ. 31 E khana but Khong a Kamen Tuhöta Iesu Keriso, wale a hnân he ka haisoâ nyiele balua, a oge me ca thoi. 32 Hnen gavena hnyi Damaseko a e hnyi hmeli Areta than hna tuö taun anyin at Damaseko, me me köt nya: 33 ke adre me öü nya but únyi hnyi mamalama hnyi hak veto hnyi hnyin tang, me oge me kec únyi hnyi li hnyamen.

HNYIMAKAN 12.

E ÚCÚ könya he ka hobelöu, ke ca so bi; awe, oge me he ka ha ta je hna omenená me ta je hna úthumetu únyi ge Than. 2 E khañö nya ke aten Keriso waleji fotin je huna ehac, adre kât göranyai ka hnyi drany a kuniny, (e ca khañö nya, ame ne únyi hnyi unyin; ke ca khañö nya minya ame ne ca e bi hnyi unyin; e khana thibi Khong). 3 E khañö nya at helâe (ame ne e hnyi unyin, ame ne ca e bi hnyi unyin, e ca khañö nya; e khana thibi Khong). 4 ke adre hom dö e ethö ka hnyi Paradaiso, k' ame löng ta je hofuc a ca hnân ha, wale ae ca úcú ka at he ka ha: 5 Oge me he ka hobeluâ at a helâe: ke oge me ca he ka hobeluö nya bi, ke so bi hnyi anyik ta je sényin. 6 Anyin a ne wek he ka hobeluâ, me iny ca monu bi; anyin oge me he ka ha hnathu: ke inya oge me hok-

II. KORINITO 13.

hnyok, wá e nye he ke at ka únykúmi nya hon hnen hna ò nya, me ling nya. 7 Ke wá adre nye ogóranyi nya bi hnen nuainy ta je úthumetu, me adre ham kõnya údõiny unyin, wale hna úkhúnõng hnõ Satana he ka kulup nya, me inye ca ti görany bi. 8 Ke iny okun khõú ka Than ge únyi eling, me me he ka ohia but gak. 9 Ke e ame ha kõnya, ka habe, E úcú kõu anyik ibetengiõ baú : anyin adre obekhõtá manik man hnyi sényin. Anyin a wale oge me senyin gan hmâ he ka hobelúa hnyi anyik je sényin, me me tubi nya hnen man manin Keriso. 10 Wale me inye senyinâ ta je sényin, me ta je hna okongo, me ta je hna theduoc, me ta je hna seda, me ta je vec can Keriso : anyin a iny ka sényin, wale ùen a iny hwege hnyin.

11 Iny monu but : õbun e kunõ nya ; anyin ae úcú kõbun he ka haisoi nya : ke eja ke ne oge ne ca únyi hnathu bi, ke so bi ca inya bi hmelen ta je hing aposetolo. 12 E hnathu adre ányá unibun ta je haten aposetolo hnyi hokhnyok hia, hnyi je haten, me úõman, me huliwa ae man. 13 Anyin a iefú a õbun hnyi hmelen keihen je ekalesia, a ca únyi ang a oge me ca ohmak' õbun ? betenge ju õbun gak hnyi hwali eang.

14 Wá bi, okuniny ju ang penapena a inya he ka he but kõbun ; ke oge me ca he ka ohmak' õbun : anyin oge me ca elâm anyibun ta je únyi, ke õbun bi : anyin a ca hanyemen bi je lakon he ka úkhõúnâ hobi kâu je kamen me hinyen, ke so bi je kamen me hinyen hobi kâu je lakon. 15 Ke oge me he ka senyin he ka ohia om-jehek, me ohio nya minya hobi kâu je hanubun. Ke oge ne hnyok gánâ kõbun, hawa, ame he ka úhnyúkõng hnõbun hna hnyok kõnya ? 16 Ke so minya ju, oge me ca ohmak' õbun bi ; ke so bi oge bibi-hwakecik me oge me köt õbun ge iyawõ. 17 Hawa, oge me hwen iyawõâ anyibun ta je únyi hnen tavat waleji oge kuná kõbun ? 18 Oge sihwegiõ Tito, me kunâ e me ke liamekeiny. Hawa, ame hwenenâu Tito anyibun ta je únyi ? hawa õhmu me ca he hnen Hanu a khaca ? ke hnyeúca a khaca ?

19 Õbun e únykúme ang a õhmun e ka owis' õhmun bi kõbun. Õhmun e ha unyin Keriso hnyi hnyimakan Khong. Hnyat a oúnykúmik lõ, hnân okahw' õbun ta je únyi hia. 20 Anyin a oge me ot, wá oge nye o but kõbun me õ 'bun a ca helâ me hnök hna wek, ke wá õbun nye õ nya a ca

helâ me webun ; wá e nye hu ihunyinkõu, me wathethõt, me iwatretra, me bi fuco, me úhaiõ, me imediõkõu ; 21 wá e nye he Khonguk ka ohnyikõnõ nya unyibun, iny ka o hmetu, me oge me he ka tengiâ tavat ae se hia, a tavat adre me mádrâ hulõ, k' adre ca ietra hwakecidrin ae ikiki, ke bi únyi monu, ke wagelue adre me ányâ.

HNHYIMAKAN 13.

WALANG okuniny he a inya kõbun. Adre me he ka ohmâ ta je hofue hia hnen li at a lo ame ne kun a hnyat ohnatho. 2 Oge me bõk ka ha, ke oge me ha hmetu, helâji me imwik a loiny unyibun, helâe walang ang ke hiõ nya, oge me ha kõdra adre me ányâ hulõ, me õdra hia thithõ, ka habe, oge ne he hmetu, me oge me ca he bi ka ohâhá ; 3 anyin a õbun e elâm haten Keriso eú hnyi hnyik ; at a ca sényin unyibun, ke hu man bi : 4 anyin adre me osatauroâ e hnyi sényin, k' ame môt hmetu thõ ge man maniny Khong. Ke õhmun e sényin minya unyin, k' õhmun e he ka tha môt mē ge man maniny Khong kõbun. 5 Elâm dô eú hnyibun, a ne hu labageju gabun ; cubic õbun. Hawa, e ca khan' õbun a Iesu Keriso eú hnyibun ? õbun e ne ca monu bi. 6 Ke oge me wek ame he ka khan' õbun a ca monu but õhmun. 7 Ke õhmun e hic ka Khong, m' õbun e ca he ka ányâ hulõ ; ke ca hnân bi omanenâ a õhmun hnyat ae so, ke so bi m' õbun e he ka ányâ so, ke monu bi õhmun. 8 Anyin ae ca khan' õhmun he ka ányâ ke únyi úcon hnathu, ke so bi hobi kâu hnathu. 9 Anyin õhmun e senyin ; a ne hwege õbun. k' õhmun sényin bi : õhmun e hic minya m' õbun e he ka bekhõt. 10 Wale m' inye set ta je únyi ang ke tiga hiõ nya, wá oge nye fuc hwege iny ka o kobun, he me musi ame ham kõnya Than hnân ote-thmâ, ke ca hnân bi hagutâ.

11 Hnyat me lakeiny lõ, obiny ju ang ka habe, e so õbun e hnahic. Wisa ju õbun, ke kahwa ju ; tha hnyok ju : úsokõu ju : me me e unyibun Khongon ibetengiõ me hnahic. 12 Úitalofakâu ju õbun ge úcimhnyimak ae kap.

13 Ame italofa m' õbun wakap hia thithõ.

14 E so e unyibun hia thithõ ibetengiõ baú anyin Than Iesu Keriso, me ibetengiõ anyin Khong, me tha e m' õbun Hanu Kap.

TUSI ANYI PAULO KA
AT GALATIA.

HNYIMAKAN 1.

INYA Paulo aposetolo (ca únyi ge at, ke ca hnen minya bi at, ke hnö Iesu Keriso bi, me Khong a Kamen, waleji a omelö hmetu thö úheny hnyi hna mok), 2 me hnyat me lakeiny hia eang unyik, öhmun e sihnalimen ka ekalesia hnyi Galatia : 3 E so e inyibun hia thithö ibetengiö bau me hnahic únyi ge Khong a Kamen, me Tuhöta Iesu Keriso, 4 waleji at ame ka hamen ham e hobi káu anyita ta je hulö, me me omeli öta únyi hnyi ang hmelen ae kong, hogan weny Khong a Kamöta : 5 e so he ka ogânâ bala e nyiele nyiele balua. Amen.

6 Oge me láiâ anyin a öbun logot úsákâü öbun me at a haw' öbun ka hnyi ibetengiö baü anyin Keriso ka hnyi ke evangelia ; 7 ke ca ke evangelia bi : ke haba keihen adre me ohluhlu öbun, me bewia evangelia anyin Keriso. 8 Ke öhmun e ne he, ke ame ne ke angela bi úheny hnyi drany ka khetâ ke evangelia köbun bi, waleji öhmun e ca khetâ köbun, me so he ka anathema e. 9 Inya oge me ha hmetu walang ang, helâji me hnöhmun hna labö ha, ka habe, A ne he ke at ka khetâ köbun ke evangelia bi, wale öbun e ca kap, me so he ka anethema e. 10 Anyin a walang ang, hawa, oge me huliwan at, hawa, Khong? ke hawa, inya oge me elâm he ka osenyinâ at? anyin oge ne labö osenyinâ at, m' iny ca athnyabai Keriso bi.

11 Hnyat me lakeiny lö, inya oge me omanenâ köbun, ka habe, haba evangelia oge me khetâ me ca únyi bi ge at. 12 Anyin oge ca kap e únyi ge at, ke adre me ca nö nya minya bi, ke so bi únyi ge hna omanenâ anyi Iesu Keriso. 13 Anyin öbun e hia but löng ge hwakecik ehac hnyi hmi anyin at Juda, ae gan hmâ hmönyin hnök hna okongoâ ekalesia anyin Khong,

me hna oaüâ e : 14 ke oge me nua tot ehac hnyi hmi anyin at Juda hon tavat ae se hnyi anyik dö unyin aten ik hnyei, anyin e gan hmâ hnök hna kong hnyekunâ ta je hwakecin lakamök. 15 Ke a manen dut weny Khong, waleji at ame ücö nya únyi hnyi hnyekon hinyök, me hawö nya únyi ge anyin ibetengiö baü, 16 he ka omanenâ Nokon eü hnyik m' inye he ka khetâ e ka Aten ke je hnyei ; oge ca ie úhnenamö me at : 17 ke oge ca he minya Jerusalema ai ka je aposetolo a bödrin, ka bilik bi nya : ke oge me he Arabia ai ; ke oge me hmetu minya Damaseko ai.

18 Hwaban kun ta huna, oge me he Jerusalema ai he ka iouny me Kefa, me tha laba mē fiftin je bong. 19 Ke oge me ca iouny bi me ke aposetolo, ke hake Iakobo thibi liamekeiny me Than. 20 Ke haba ta je únyi oge sihnalimen köbun, wâ bi, oge me ca thoi hnyi hnyimakan Khong. 21 Hwaban e oge me o but ka hnyi je ke keihen hnyei Suria me Silikia. 22 Ame tiga ca wâ hnyimakök ta je ekalesia hnyi Juda unyi Keriso : 23 Ke so bi adre me löng thibi, ka habe, at eji ame okongu öta ehac, ame khetâ walang ang labageju waleji e ame oaüâ ehac ; 24 ke adre me ogânâ Khong únyi gak.

HNYIMAKAN 2.

KE hwaban ta je huna a fotin oge me he hmetu Jerusalema ai tha inya me Banaba, ke oge hum Tito minya. 2 Ke oge me he hoton hna omanenâ ; me thumetu ödrin ge evangelia, oge khetâ ka Aten ke je hnyei ; ke oge me ha duöngâ ka hnyat ae lung, wâ e nye únyi baü but wadring a inya, me hnök hna wadring ehac. 3 Ke haba Tito at ame tha e mönya, adre me ca üjengö e bi he ka peritom, wale ae at Heleni : 4 ke wale thibi e can je liame-

keiny thoi ödrin e odilâ duöngâ, ödrin e dit duöng he ka tuö hna hn' öta, waleji ate me hu ge Keriso Iesu, m' ödrin e he ka thalu öta : 5 ke öhmun e ca mita bi ködrin hnyi awa a khaca ; me me tethmä unyibun hnathuiny evangelia. 6 Ke haba hnyat eji ae lung (me ca khanö nya ödrin, ke ca únyi hnathu e könya : haba Khong ame ca wáhmakhmetoâ bi at)—haba hnyat eji ae lung, me ödrin e ca bi hanen bi könya : 7 ke so bi, e khan' ödrin a g' adre me ham könya evangelia hobi káu tavat adre ca peritomonâ, helâe kö Peteru hobi káu tavat adre peritomonâ, 8 (anyin a haba at a huliwan hnyeku Peteru ka hnyi hanymen aposetolo hobi káu tavat adre peritomonâ, e minya bi at ame huliwan hnyekuk hobi káu Aten ke je hnyei) ; 9 ke haba Iakobo, me Kefa, me Ioane, je hnyat adre ha gadrin ka habe, je hmolom, ödrin e wâ ibetengjö baú adre ham könya, me adre me ham könya me Banaba je hnyam a metáiny tha hnyok, m' öhmu me he ka he ka Aten ke je hnyei, ke haba ödrin bi ka tavat adre peritomonâ ; 10 ke ame wedrin thibi m' öhmu me he ka únykúme tavat ae theduoc ; wale thibi únyi ae hmehmelâ hnyekuk he ka ányâ.

11 Ke ame o but Kefa hnyi Anetioka, me oge me hwege ivinö mē, anyin ae monu. 12 Anyin a e ame tha han me Aten ke je hnyei ke tiga hia bi keihen úhedra unyi Iakobo : ke ödrin e o but, me e ame todrö, me öúsákáúöâ e bi, anyin ame outen tavat adre peritomonâ. 13 Ke haba keihen at Juda adre me tha iyawö mē ; me ödrin e omonu Banaba minya hnen anyidra iyawö. 14 Ke oge me wâ a ödrin e ca he wisa hoton hnathuiny evangelia, inya oge me ha kö Kefa hnyi hnyimaködrin hia, ka habe, U at Juda, ke u je ne tha hwakecâm me Aten ke je hnyei, ke ca tha hwakecâm bi me at Juda, me ieu gam u me újengö Aten ke je hnyei he ka tha hwakecidra me at Juda ? 15 Ötin at Juda únyi hnyi unyin, ke ca Aten ke je hnyei bi ae monu, 16 e khan' öta a g' adre me ca haiwisa at ge ta je huliwainy hnanyibu, ke so bi hnen labageju kö Iesu Keriso, öta minya ang tavat ötin e labageju kö Keriso Iesu, m' adre me he ka haiwis' öta hnen labageju ka Keriso, ke ca hnen bi ta je huliwa hnyi hnanyibu : anyin ae ba at me khaca adre me he ka haiwisa hnen ta je huliwa hnyi hnanyibu. 17 Ke ate ne elâm, e me he Keriso ka haiwis' öta, ke ame ö 'ta bi a öta tavat ae kong, hawa,

haba Keriso me at huliwan hulö ? Ohe. 18 Anyin oge ne op hmetu ta je únyi oge hia but obia, inya oge me ka omanenö nya bi, a iny at hanyáúâ. 19 Anyin oge mok ut ka hnyi hnanyibu únyi ge hnanyibu, m' inye he ka möt bi ka Khong. 20 Adre hia but tha osatauroi nya me Keriso ; ke iny möt bi ; ke ca inya hmetu bi, ke Keriso bi at ae möt eú hnyik : ke haba möt oge me melö hnyi unyin, inya oge me melö e hnen labageju ka Nokon Khong, waleji at ame betenge gak, me ka ham e hnân hobi könya. 21 Oge me ca öúnyibáúâ ibetengjö baú anyin Khong : anyin a ne hu hwakecin ae wisa únyi ge hnanyibu, awe, e únyi baú bi mok anyin Keriso.

HNYIMAKAN 3.

AT Galatia ae monu lö, adre me sihnalimen hnyi je hnyimaköbun Iesu Keriso at adre osatauroa, ke ie at ame iyaw' öbun ? 2 Wale thibi ang únyi ame bekanö nya gabun, ka habe, Hawa, öbun e kap ju Hanu únyi hnyi ta je huliwa hnyi hnanyibu, k' ame ne hnen löng únyi hnyi labageju ? 3 Hawa, öbun e monu helâe ? öbun e hwân hnyi Hanu, ke walang ang öbun e he bi ka oumo hnyi unyin ? 4 Hawa, öbun e hia but vec baú hnyi ta je únyi ae se hia ? ame ne he ka únyi baú bi. 5 Anyin a wale, haba at ame ham köbun Hanu, me ányâ ta je huliwa ae man unyibun, hawa, ame ányâ e hnyi je huliwa hnyi hnanyibu, ke ame ne ányâ hnen löng hnyi labageju ? 6 Helâ me Aberahama ame labageju ka Khong, me adre me haiâ e káu me hwakecin ae wisa. 7 Anyin a wale, khan' öbun ju, a haba tavat adre me labageju, me ödra je mátráni Aberahama. 8 Ke manen dut ehac hnyi hna sihnalimen a g' ame he Khong ka haiwisa Aten je hnyei únyi hnyi labageju, ke a khetâ evangelia kö Aberahama, ka habe, Ame he ka hnahic ta je hnyei hia únyi gam. 9 Wale me tha hnahic tavat adre me labageju me Aberahama at ame labageju. 10 Anyin a haba tavat adre me laba hnyi ta je huliwainy hnanyibu, me ödra but hnyi hmelen hnaúhangö : anyin adre hia but sihnalimen. ka habe, E ve hnauhängö but ödra hia adre me ca tethmä hnyi ta je únyi hia thithö adre me sihnalimen hnyi tusiny hnanyibu he ka ányâ. 11 Ke e manen ae ba at adre me haiwisa hnyi hnyimakan Khong únyi ge hnanyibu : anyin, Ame he ka möt at ae

wisa hwakecin únyi hnyi labageju ; 12 ke haba hnanyibu me ca hanen bi labageju ; ke, Haba at ame he ka vheno e, me e ame he ka möt káu. 13 Haba Keriso ame úcú öta únyi hnyi hnaúhangöiny hnanyibu, anyin a e ame wia me hnaúhangö hobi köta : anyin adre hia but sihnalimen, ka habe, E hnaúhangö but tavat hia adre me uhni ödra hnyi útö : 14 me me o but hnahic anyi Aberahama ka Aten je hnyeí ga Keriso Iesu ; me me hu thö köta hnen labageju Hanu adre ha báná.

15 Hnyat me lakeiny lö, oge me ha helá me hwan at : ka habe, Eja ke ne a ne úhinyaköu anyin at, k' adre hia but ohmá, me ha at ame he ka thang, me bi hanen hmetu. 16 Ke adre ha ta je hna ha báná kö Aberahama me mátrániny. E ame ca ha, ka habe, Ka ta je mátrán, heláke me se hia ; ke heláke me khaca thibi, ka habe, Ka mátránám, wale Keriso. 17 Ke inya oge me ha, ka habe, haba úhinyaköu hnen Khong hna ohmá káu adrem, ae ca khana hnanyibu he ka thang hmetu, waleji a foa haded me thöte je huna hwaban úhinyaköu, me me öúnyibátá hna ha báná. 18 Anyin a ne únyi hnyi hnanyibu hwajekhon me ca únyi bi hnyi hna ha báná : ke Khong ame ham e kö Aberahama hnyi hna ha báná. 19 Ke hnán eú hnanyibu ? Adre bi hanen e can ta je hna hanyátá, ke ne o but ame o thö mátrán, wale adre ha báná káu ; ke hnen ta je angela hna otílá e hnyi hnyamen at ame óúsoköuá. 20 Ke haba at ame óúsoköuá me ca hnán hobi káu at a khaca ; ke haba Khong me khaca thibi. 21 Ke hawa, haba hnanyibu me úcon ta je hna ha báná ge Khong ? Ohe : anyin a ne hu hnanyibu adre ham ae khana he ka omelö, awe, adre me ne he ka haiwisa únyi hnyi hnanyibu. 22 Ke haba hnyi hna sihnalimen adre hia but thelöng ta je únyi hia hnyi hmelen hulö, m' adre me he ka ham ka tavat labageju hna ha báná únyi hnyi labageju kö Iesu Keriso.

23 Ke adre tu' öta ehac hnyi hmelen hnanyibu, waleji ke tiga ca o bi labageju, ke adre theling öta ke ne o but ame manen dut labageju ame he ka o. 24 Wale me haba hnanyibu, me hnán at úne köta he ka lili öta ka Keriso, m' adre me he ka haiwis' öta únyi hnyi labageju. 25 Ke walang ang ame o but labageju, me ame ca musi öta hmetu bi hnen at úne. 26 Anyin a je lakon Khong öbun hia a deny labageju kö Keriso Iesu. 27 Anyin a haba öbun hia

adre bapataisoá ka Keriso, me öbun e khaú öbun ge Keriso. 28 Ke ba hmetu at Juda, ke ba at Helene, ke ba at hwenbá, ke ba at he baú, ke ba бага, ke ba momo ; anyin a khaca thibi öbun hia unyin Keriso Iesu. 29 Ke öbun e ne laten Keriso, awe, öbun je mátráni Aberahama, a tavat tren hwajekhöu helá me hna ha báná.

HNYIMAKAN 4.

KE inya oge me ha, ka habe, E ka tiga wanakat bi atö, me ca ve bongon bi e me athnyabainy, ke so bi e tuhan hia ; 2 ke ame müsö e hnen tavat úne, me tavat tue, ke ne o but hnyi úen a thu hnen kamen. 3 Heláe minya öta, waleji k' öta tiga je wanakat, me adre me musi öta hnyi je hna úne a bán anyin hmeledrany : 4 ke ame o but úen adre thu, me haba Khong ame kuná Nokon, adre hnokoá hnen momo, a hnokoá hmelen hnanyibu, 5 me me he ka úco tavat adre me laba hmelen hnanyibu, m' adre me he ka köp öta helá me je hing lakon. 6 Ke can öbun je hing lakon, me Khong ame kuná Hanon Nokon ka hnyi je hnyekubun, k' ame hongot, ka habe, Aha, Cica. 7 Anyin a wale, u ca athnyaba hmetu bi, k' u nokon ; ke u nokon, awe ame he ka hu hwajekhon únyi ge Khong.

8 Ke haba ehac, waleji ae tiga ca khan' öbun Khong, me adre me hwenb' öbun hnen ta je únyi a ca je hing khong : 9 ke e khan' öbun Khong walang ang, ke khana Khong öbun, me iéú gabun öbun e hwiö hmetu ka hnyi ta je únyi á bán, ke sényin, ke ca únyi hnathu, wale ame webun hmetu he ka hwenbá káu ? 10 Öbun e tuö je bong, me je tehi, me je úen, me je huna. 11 Inya oge me ot gabun, wá e nye únyi baú anyik huliwa köbun.

12 Hnyat me lakeiny lö, inya oge me khöu köbun he ka helá mönya, anyin a haba inya, me helá möbun. Öbun e ca hia but okongu nya : 13 ke e khan' öbun a oge bök ka khetá evangelia köbun, k' ame sényin unyik : 14 ke haba úcubic köbun waleji hnyi unyik, me öbun e ca húkötía, me degec ut ; ke öbun e köp nya heláke me angela anyin Khong, heláke me Keriso Iesu. 15 Ke ewa hnöbun hna haisoá ? anyin oge me ohnathu öbun, ka habe, a ne khan' öbun, me öbun e hia but úá je li emaköbun me ham bi könya. 16 Hawa, iny iwahnaihmiöny m' öbun, anyin oge me ha hnathu köbun ? 17 E hwege wedra

öbun, ke ca so bi ; eke, e wedra he ka ovesei öbun, m' öbun e he ka ti webun ödra. 18 Ke so öbun e he bala ka weny hwegiä so, ke ca heläe thibi hnyi ün a tha inya möbun. 19 Je lakuk lö, inya hmetu oge me vec hnyekon helä me at erkini öbun, ke ne o but a e but Keriso eü hnyibun, 20 eke, e wek he ka tha inya m' öbun walang ang, me okebongonä ifucik ; anyin oge me loloä gabun.

21 Ha th' öbun könya, öbun hnyat a webun he ka laba hmelen hnanyibu, hawa, öbun e ca löng hnanyibu ? 22 Anyin adre sihnalimen, ka habe, lo' li laku Aberahama, haba khaca me nokon momo adre üco, ke nokon momo ame he baü khaca. 23 Haba nokon momo adre üco, me adre hnokoä hoton unyin ; ke haba nokon momo ame he baü, me adre me hnokoä hoton hna ha bánä. 24 Haba ta je ünyi e me hnän ühöcü : anyin a haba li momo e, me li ühihinyköu ; khaca ünyi hnyi bucen Sinai, k' ame hnokoä ka hnyi hwenbä, waleji Hagara. 25 Haba Hagara eling me wale bucen Sinai hnyi Arabia, e ücü me Jerusalema walang ang : anyin a e ame tha hwenbä me lakon. 26 Ke haba Jerusalema ethö me ame he baü, wale hinyöta. 27 Anyin adre sihnalimen, ka habe,

Senyin dö, u toünyi ame ca hnokoä ;

Kuku thö me tenge, u at ame ca vec hnyâm :

Anyin ae se hia lakon momo ame laba baü hon at ae hu äian.

28 Hnyat me lakeiny lö, öta ang lakon hna ha bánä, heläji me Isaaka. 29 Ke haba ehac me ame okongoä at adre me hnokoä ünyi hnyi Hanu nhen at adre me hnokoä ünyi hnyi unyin, ke heläe minya walang ang. 30 Ke ieu hna ha hnyi hna sihnalimen ? Tha obä but momo a athnyaba me nokon da : anyin ame ca he da nokon momo a athnyaba ka tha hwajekhon me da nokon momo ame he baü. 31 Anyin a wale, hnyat me lakeiny lö, ca lakon momo a athnyaba öta, ke lakon momo ame he baü bi öta.

HNYIMAKAN 5.

AME hia but hn' öta Keriso ka hnyi hna hna bäüä : anyin a wale, tethmä ju, ke ca ovheli öbun hmetu bi ge wen hwenbä.

2 Wä bi, inya Paulo oge me ha köbun, ka habe, öbun e ne kap hna peritom, me ba

troban köbun ünyi ge Keriso. 3 Eke, inya hmetu oge me thumeto tavat hia adre kap hna peritom a g' ame hu hanymen ködra he ka löng hoton hnanyibu hia thithö. 4 Adre hia but öüsákäü' öbun me Keriso, öbun tavat öbun e behaiwis' öbun hnyi hnanyibu ; ke öbun e ü but ünyi hnyi ibetengio baü. 5 Anyin ate me halubahingen gejon hnyi hwakecin ae wisa nhen labageju ünyi hnyi Hanu. 6 Anyin ae ca ünyi hna-thu bi ka Keriso peritom, me ca peritom ; ke so bi labageju, at ame huliwa hnyi ibetengio. 7 Öbun e hia but wadring so ; ia ovheli öbun m' öbun e ca he bi ka löng hoton hnathu ? 8 Haba ünyi eang ame övheli, me ca ünyi bi ge at ame haw' öbun. 9 Haba leven ae ühnyükong ame ölevenä bwiny falawa hia. 10 Inya oge me labageju öbun hnyi Than, a öbun e ca he ka webun ke ünyi : ke haba at ame ovheli öbun, me ame he ka o käu hwaban, k' adre me ca he ka wämhakhmetoä at. 11 Ke haba inya, hnyat me lakeiny lö, oge ne khetä bala peritom, ieu adre me okongu nya bala bi gan' a ne heläe, me ba but hnän othöä hnyi satauro. 12 Haba wek, me me he tavat adre me ovheli öbun ka hamödra subä degeci ödra bi.

13 Hnyat me lakeiny lö, adre hia but haw' öbun ka hnyi hna hna bäüä ; ke so bi ca he öbun ka wia hna hna bäü' öbun, me hnän hobi käu unyin, ke ibiathnyabaköu ju hnyi ibetengio. 14 Anyin adre ohwädä hnanyibu hia hnyi hofuc a khaca, ka habe ; U me he ka betenge ge at ame laba hakekenyi u helä me u bi. 15 Ke öbun e ne ühölü, me üönöbunköu, ö' bun äü, wä öbun nye he ka üohiöbunköu.

16 Ke inya oge me ha, ka habe, E so öbun e he bala hnyi Hanu, me öbun e ca he ka änyä weny unyin. 17 Anyin a haba unyin ame üö bi ünyi me Hanu, ke haba Hanu ame üö bi ünyi me unyin ; anyin a ödru li at üö bi ünyi köu ödru ; waleling me öbun e ca änyä bi ünyi ame webun. 18 Ke so bi a ne lili öbun Hanu, me ca öbun bi hnyi hmelen hnanyibu. 19 Ke e manen dut ta je huliwa anyin unyin, wale, bi ünyi monu, me hwakecin ae ikiki, me hnyok wagelue, 20 me hmi ka je hnatheat, me bi khong, me bi iwahnaihmiöny, me iwatretra, me ihunyinköu, me wathethöt, me imouköu, me khekhe lo, me vese, 21 me behnyok, me ic monu, me imediaköu, me ta je ünyi heläe : inya oge me haimemenä köbun ge ta je ünyi e, heläji me hnök hna haimeme-

EFESO 1.

nâ ehac, ka habe, haba tavat adre me ânyâ helâe me adre me ca he ka bi hwajekôûdra hnyi dôkhu dokhon Khong. 22 Ke haba je wan Hanu, me, ibetengîö, me senyin, me hnahic, me hokhnyok beû hmâ, me menyik, me hwakecin ae so, me hnathu, 23 me hwakecin ae ilemuk, me weny ae úcú : adre ca nyibo bi ta je únyi helâe. 24 Ke haba ta je laten Keriso, me adre me osatauroâ unyin, me ta je weny e, me ta je weny ae újông.

25 Ate ne möt hnyi Hanu, awe, e so ate me vheno hnyi Hanu. 26 Ca he öta ka weta lung baû, me úhmönyinköu, me ihunyinköu.

HNYIMAKAN 6.

HNYAT me lakeiny lö, eja ke ne a ne hom uthmâhmâ ke at hnyi hna hanyâûâ, hamöbun tavat hnyi hanu he ka kap hmetu at a helâe hnyi hnyok ae menyik ; ke wâ wiö u bi, wâ e nye cubic u minya bi. 2 Úkhûkhûö th ö honöbun je hok, me ohwâdâ helâe hnanyibu anyin Keriso. 3 Ke a ne únykúme ke at a ka e at ae únyi hnathu, ke ca e bi, e ame ka iyawâ e bi. 4 Ke so ka tavat he ka ve cubec anyidra ta je huliwa bi, me adre me he ka hu hnân hobelöu a únyi gadra bi, ke ca únyi bi ge ke at. 5 Anyin ame he tavat hia ka ve hijen honödra ta je hok.

6 Ke hamen at adre nâ hnyi hofuc he ka ham ta je únyi ae so ka at ame nâ. 7 Ca omonu öbun bi ; e pason he ka iyawâ Khong : anyin a haba hna tâ hnen ke at, me e ame he bi ka meno minya helâe. 8 Ke haba at

ame tâ ka hnyi hing unyin bi, me e ame he ka meno hna bobot únyi hnyi unyin ; ke haba at ame tâ ka hnyi Hanu, me e ame he ka meno möt ame ca ba balua únyi hnyi Hanu. 9 E so ate me ca sênyin hnyi huliwa ae so : anyin ate me he ka meno hnyi úen cici, at ka ca sênyin bi. 10 Anyin a wale, e ka hu úen köta, e so ate me he ka mâdrâ huliwa ae so ka tavat hia thithö, ke ti ânyâ bi ka tavat a ödra hnyi lap anyin tavat labageju.

11 Wâ ju úganiny je mataitusi oge hia but sihnalimen köbun ge hing hnyamök. 12 Haba tavat adre me wedra he ka haiso, ödra hnen at, me adre me újôngi öbun he ka peritom ; ke adre me ânyâ helâe wâ adre nye okongu ödra can satauro anyin Keriso. 13 Anyin a haba tavat adre hia but peritomona, me adre me ca löng bi hoton hnanyibu ; ke wedra bi he ka peritomoni öbun, m' adre me he ka hobeluâ je unyibun. 14 Ke haba inya, me oge me ca he bala ka hobelöu ke so thibi hnyi satauro anyin Tuhöta Iesu Keriso, k' adre me osatauroâ hmeledrany könya a deny e, ke ka inya minya ka hmeledrany. 15 Anyin ae ca únyi hnathu peritom me ca peritom, ke so bi at ae teb únyi. 16 Ke haba ödra hia adre me he hoton tulut eang, me so e unyidra me Isaraela anyin Khong hnahic me ibetengîö.

17 Ke hwân dö walang ang, ca he hmetu bi ke at ka ovheli nya : anyin ae hu bi hnyi unyik je hwadeny a je haten Iesu.

18 Hnyat me lakeiny lö, e na e ju hnyi je hanubun ibetengîö bau anyin Tuhöta Iesu Keriso. Amen.

TUSI ANYI PAULO APOSETOLO KA

AT EFESO.

HNYIMAKAN 1.

INYA Paulo, aposetolo anyin Keriso Iesu únyi ge weny Khong, oge me sihnalimen ka wakap hnyi Efeso, me tavat adre me labageju ka Keriso Iesu : 2 E so e unyibun ibetengîö baû me hnahic únyi ge Khong a Kamöta, me Than Iesu Keriso.

3 Haisoâ Khong me Kamen Tuhöta Iesu Keriso, at ame hia but ohnahici öta ge ta je hnahicin hanu hia hnyi ta je dok hnyi drany únyi ge Keriso : 4 helâ me hnen hna úc' öta kâu, k' adre me tiga ca bi taben hmeledrany, m' ate me he bi ka kap me ba hnyikonguta hnyi hnyimakan hnyi ibetengîö : 5 ke e ame ip öta adrem hnân

wi' öta me lakon a deny Iesu Keriso, hoton weny ae so, 6 hnân ogânâ hmanenginy anyin ibetengiö baü, waleji a betenge baü köta únyi ge Oúnykúminy: 7 ke hu but gata deny e, hna úco möt únyi ge dren, wale he ka thang ta je hulö, helâ me úganiny anyin ibetengiö baü, 8 waleji e ame ham gâná köta hnyi metâ hia, me wâ wia hia, 9 ke e ame omanená köta únyi ae iyong hnyi weny, hoton weny ae so, waleji e ame bân ka únykúme únyi gan 10 hnyi hna penapena bekhötâ ta je úen, me me khaca thibi ta je únyi hia ka Keriso, wale ta je únyi ethö hnyi drany, me ta je únyi eang hmeledrany; hnân hobi kâu, 11 ke hu minya jekhötâ anyin, ke adre ip öta adrem helâ me weny, wale at ame huliwan ta je únyi hia hoton únykúmenen weny; 12 m' adre me he ka wi' öta hnân ogânâ anyin hmanenang, a öta hnyat a böta ka gejon ka Keriso: 13 waleji öbun minya, öbun e löng hofuc ae hnathu, wale úthu-metu ae so hnân hobi kâu anyibun möt,— waleji öbun e labageju kâu, k' adre me otethm' öbun hnen Hanu Kap waleji adre me ha bânâ, 14 waleji haten hnân ohnathoâ jekhötâ, ke ne o but adre me he ka omelö tavat adre úco, hnân ogânâ anyin hmanenang.

15 Waleling, inya oge me löng anyibun labageju ka Than Iesu, ke manen e ka wakap hia, 16 me oge me ca menâ ole gabun, oge me hai öbun hnyi hijik je hic: 17 me me he Khongon Tuhöta Iesu Keriso, Kamen ae hmanenang, ka ham köbun hanuiny metâ me hna omanená, m' öbun e he ka wâhmakhmeto e: 18 me obwela li emakan je hnyekubun, me me khan' öbun dö gejon hnyi hnen hna hawâ, me únyi hnathuiny hmanenginy jekhon unyin wakap, 19 me maniny man ae ti gan hmâ hobi köta tavat adre me labageju, hoton ihuliwainy maniny man ae gan hmâ, 20 waleji a huliwa hnyi Keriso, hnyi hnen hna omelö hmetu thö únyi hnyi hna mok, me olaba e hnyi ke keihen a metân ethö hnyi drany, 21 e beönua bala hon je than hia thithö, me musi, me man, me dökhü, me je ien hia adre me ha, ca hake thibi eang hmeledrany, ke minya bi hnyi úen ame he ka o: 22 ke e ame ip ta je únyi hia hnyi hmelen li can, me hna but kâu he ka bi ban ta je únyi hia thithö hobi kâu ekalesia, 23 wale unyin, a anyin unöngöt, at ame öunöngötâ hia ge ta je únyi hia.

HNYIMAKAN 2.

KE e ame omeli öbun, hnyi úen öbun e mok can hnöbun hna hanyâúâ me hulö, 2 waleji öbun e vheno adrem hoton hwakecin eang hmeledrany, hoton taben at ame musö hnyi dok ae bwang, wale hanu at ame huliwa hnyi hnyekon tavat adre me ca úling; 3 ke öta hia thithö minya ate tha hwakecita m' ödrahac hnyi ta je weny unyita, me ányâ ta je weny unyin me hnyok, ke öta ta je aten hmönyin, wale adre hnöku öta hnyin, e úcú me keihen:— 4 ke haba Khong at ae tren ibetengiö ae gan hmâ, ke únyi hnyi úganiny anyin ibetengiö köta, 5 waleji öta tiga mok can hnöta hna hanyâúâ, me e ame tha omeli öta me Keriso (adre omeli öbun únyi ge ibetengiö), 6 ke ame tha otíl' öta hmetu thö mē, me tha olab' öta hnyi ta je dok ethö hnyi drany únyi ge Keriso Iesu: 7 me me he ka omanená hnyi ta je dö ame he ka o únyi hnathuiny anyin ibetengiö baü hnyi hwakecin ae so köta, únyi ge Keriso Iesu: 8 anyin adre hia but omeli öbun hnen ibetengiö baü a deny labageju; ke habe e, me ca únyi gabun: ke bwihlany anyin Khong: 9 ca únyi ge huliwa, wâ e nye he ke at ka hobelöú. 10 Anyin a haba öta, me anyin huliwa, k' adre up öta unyin Keriso Iesu he ka ányâ ta je huliwa ae so, waleji a penapena Khong adrem n' ate me he ka vheno.

11 Anyin a wale únykúme ju a öbun Aten ke je hnyeji adrem únyi hnyi unyin, k' adre wenyi öbun, ka habe, Wacaperitom, hnen tavat adre me wenyö, ka habe, Waperitomonâ hnyi unyin, k' adre ányâ ge hnyam; 12 ke ca e unyibun Keriso hnyi ta je bong eling, ke ta je atkanyua öbun hnyi bongon at Isaraela, ke ta je atkanyua öbun hnyi je úhinhinykôu waleji adre me ha bânâ, ke ba geju unyibun ke ba minya Khong eang hmeledrany. 13 Ke walang ang, haba öbun hnyat ae sâkâú ehac, me unyi Keriso Iesu adre me ouhakekenyi öbun únyi ge dren Keriso. 14 Anyin a e thibi anyita úsoköu, waleji at ame khacâ li at a lo, k' ame kia hak hnyi wanben, wale singiny uma, 15 k' ame ohia hnen hing unyin iwahnaihmiony, wale hnanyibu adre me húna, a ta je hwakecin adre otílâ; me me he ka op únyi ge li at a lo ke at a teb únyi, me me hu úsoköu bi; 16 me me he ka ou soköu ödru me Khong únyi ge

unyin a khaca, deny satauro, k' ame ohia iwahnaihmöny nhen e: 17 waleling me me o me khetá úsoköu köbun a öbun sákâú, ke úsoköu ka tavat minya a ödra hakekeny: 18 ke hu but gata hia únyi gan gethen ka Kamen únyi ge Hanu a khaca. 19 Anyin a wale ca je atkanyua hmetu bi öbun, ke aten ke ta je hnyei bi, ke so bi ta je aten hnyei tha öbun me wakap, ke aten lap bi anyin Khong, 20 ke adre me up öbun hon taben ta je aposetolo me ta je perofeta, ke haba vetoiny ban kopiny, me Iesu Keriso; 21 k' adre me ve thaúhújköuá ta je uma hia únyi gan, me ogörányá hnân uma kap unyin Than; 22 ke adre tha up öbun minya më hnân umen Khong únyi ge Hanu.

HNYIMAKAN 3.

A NYIN a wale inya Paulo, a cö nya Keriso Iesu hobi köbun Aten ta je hnyei,—2 öbun e ne hia but löng hanymök, wale ibetengio baú anyin Khong adre ham könya hobi köbun: 3 waleji ge hnödra hna omanená könya únyi ae iyong nhen hna omanená, helá me hnök hna bök ka set okhulitá, 4 ke öbun e ne aú, öbun e he ka wá anyik metá hnyi únyi ae iyong anyin Keriso; 5 waleji adre ca omanená ka tavat hnyi ta je dö adrem, helá me hnödra hna omanená köhmun walang ang a je aposetolo ae kap, me ta je perofeta únyi ge Hanu; 6 a g' ame he Aten ke je hnyei ka hnyi hu minya, me hnyi hanen unyin, me hnyi kap ta je únyi adre ha báná ge Keriso únyi ge úthumetu ae so, 7 waleji adre wiö nya hnân athnyabainy hoton bwihlany wale ibetengio baú anyin Khong a ham könya hoton huliwainy maniny man. 8 Ke haba ibetengio baú eang adre ham könya, wale at ae úhnyúkong hmönyin hmelen tavat ae úhnyúkong hnyi wakap hia, me inye he ka khetá ka Aten ta je hnyei tang omjehen Keriso, ae ca hnân ha bi úganiny; 9 me he ka omelamá tavat hia, m' adre me he ka wá hna penapena ae iyong adre ikhálá adrem unyin Khong wale at ame op ta je únyi hia thithö; 10 m' adre me he ka omanená walang ang ka ta je than me ta je musi hnyi je dok ethö hnyi drany, metáiny Khong ae ve bongon, a deny ekalesia, 11 hoton nhen hna únykúme báná, kâú adrem balua, he ka ányá únyi ge Keriso Iesu a Tuhöta: 12 e hu but gata únyi gan tang hwege me gethen he ka didró, me gejon únyi ge labageju kâu. 13 Anyin a

wale inya oge me sumat m' öbun e ca he ka sényin hnyi anyik ta je vec hobi köbun, wale hnân hobelöú köbun.

14 Anyin a wale inya oge me cibouca ka Kamen, 15 ke únyi gan adre wenyö ien ta je lap hia ethö hnyi drany, me eang hmele-drany, 16 me me he ka ham köbun, hoton úganiny anyin hmanenang, he ka ohwegi öbun ge man únyi hnyi Hanu hnyin at eú hnyi hnyibun; 17 me me he Keriso ka laba eú hnyi je hnyekubun nhen labageju; me me he ka hu iwánibun me taben hnyi ibetengio, 18 me me kham' öbun he ka tha wá wia me wakap hia bongon úlaun, ke ibeúen, ke úgöraniny, ke údiliny, 19 me he ka kham' öbun ibetengio anyin Keriso ae beönua eling hon metá, me me he ka ounöngöti öbun nhen Khong.

20 Haba at ae khana ányá ta je únyi hia ae beönua hon hnöta hna sumátá me únykúme ka hnyin, hoton man at ame huliwa eú hnyi je hnyekuta, 21 me so adre oganá e hnyi ekalesia me hnyi Keriso Iesu hnyi ta je dö hia nyiele nyiele balua. Amen.

HNYIMAKAN 4.

A NYIN a wale inya at adre cö nya can Than, inya oge me khöu köbun he ka he hoton hna haw' öbun ka hnyin, 2 me hnyok ae hnyikáná ke menyik, me hokhnyok ae beú hmá, me ve hokhnyok bi hnyi ibetengio; 3 ke hwege ju öbun he ka tha hnyok tot hnyi Hanu hnyi wen úsoköu. 4 Khaca thibi unyin, ke khaca thibi Hanu, helá me hnödra hna haw' öbun hnyi geju a khaca waleji adre haw' öbun ka hnyin; 5 khaca thibi Than, ke khaca thibi labageju, ke khaca thibi bapataiso, 6 khaca thibi Khong, ke e Kamen hia, ke hon hia, ke unyin hia, ke eú hnyin hia. 7 Ke adre me ve ham köta ibetengio baú hoton tulutiny bwihlany anyin Keriso. 8 Anyin a wale, e ame ha, ka habe,

Hnyi ün e ame ölö thö göranyai, me e ame lelö aten hwenbá ka hnyi bá,

K' ame ham ta je bwihlany ka tavat.

9 (Ke ieú bongon ang, ka habe, E ame ölö thö? ca walang ang a ga utut minya ka hnyi ta je dok ae hnyikáná eang hmele-drany? 10 Ke haba at ame utut, me wale thibi e at ame ölö ethö hon ta je drany hia, me me he ka ounöngötá hia.) 11 Ke e ame wia keihen he ka bi hanyemen aposetolo; keihen he ka perofeta; keihen he ka omanená úthumetu ae so; keihen hnân je

pasteur me at úne; 12 hnân he ka owisa wakap, me he ka hom hadruâ huliwa, me he ka op tavat göranyai unyin Keriso: 13 ke ne o but ate me o hia ka hnyi tha hnyok hnyi labageju, me wâhmakhmetoâ Nokon Khong, ka hnyi at hnathu but, ka hnyi tulutiny úganiny unöngötiny Keriso: 14 m' ate me ca ta je wanakat hmetu bi, adre me óuang dö me hom monoâ hnen je ang hia, wale je hna úne, me bibihwakecin anyin tavat, me iyawö, hoton je hna únykúme he ka omono; 15 ke so bi kôta he ka ha hofuc ae hnathu hnyi ibetengiö, me me he ka kú thö kâu hnyi ta je únyi hia, wale thibi ban, a Keriso; 16 únyi gan unyin hia adre tetraco wia, me úhújâkôuâ wia, hnen önyen ta je hna hújö hia, hoton huliwa hnyi tulutiny je ke keihen unyin, me ame gan tot unyin, m' adre me op e göranyai hnyi ibetengiö.

17 Anyin a wale inya oge me ha me ohnatho ge Than, a öbun e ca he hmetu ka he helâ me Aten ke je hnyei, tavat adre me he hoton je hnyekudra ae ba önyen, 18 adre me olidrá je únykúmenödra, me atkanyua but ge úhömeli anyin Khong anyin ae ca khan' ödra, anyin adre ohnâkâ je hnyekudra; 19 ke adre me ca hmehma hmetu bi, me adre me hn' ödra but ka hnyi weny ae monu, he ka ânyâ ta je únyi hia ae ikiki me hwen hmiâ. 20 Ke öbun e ca úne unyi Keriso he ka helâe; 21 öbun e ne löng kâu, me úne unyin helâ me hnathu unyi Iesu: 22 m' öbun e he ka úny dö at ehac ae kong tot, hoton ta je weny ae iya-wö, waleji hwakecibun ehac; 23 me ohât' öbun hmetu hnyi únykúmenen je hnyekubun, 24 me khaú' öbun ge úkhaú wale at ae teb únyi, waleji adre op helâ me Khong hnyi hwakecin ae wisa, me kwakecin ae kap me hnathu.

25 Anyin a wale, degec ut öbun thoi, ke ve ha ju öbun hnathu ka at ae hakekeny köbun: anyin a öta ang je ong outhunyin ke at me ke at. 26 Hmönynin dö, ke ca monu bi: ke so e ca he bi seúnö ka dit, k' öbun tiga hmönynin: 27 ke ca bi hnen minya ka diabolö. 28 Haba at ame venöu, ca he hmetu bi ka venöu: ke so bi e ame he ka huliwa, me ânyâ ge li hnyamen únyi ae so, me me hu kâu hnân he ka ham ka at ae theduoc. 29 Ca he bi ka o únyi hnyi je hnyimöbun hofuc ae ikiki, ke so bi hofuc ae so hobi kâu úen ae úcü, me me okúâ so ka tavat adre me löng. 30 Ke ca he öbun ka ovecâ Hanon Khong ae Kap,

wale at a bi hatöbun ke ne o but hnyi bonginy úhömeli. 31 Úsâkâüö but öbun me hofuc hia ae hiny, me ú, me hmönynin, me hwan ae hwege, me haikongoâ, me hnyok ae kong hia: 32 ke so öbun e ibetengiököu, ke úhnyökköu, ke úhnasoâkôu, helâ me hnen Khong hna hna soi öbun ge Keriso.

HNYIMAKAN 5.

A NYIN a wale hnu ju öbun hoton Khong, helâ me je wanakat a öünü-kúminy; 2 ke he bala hnyi ibetengiö, helâ me Keriso ame betenge köbun, ame ka ham e hobi kôta, hnân hut, ke hut adre hlingâ, wale únyi ae bo so ka Khong. 3 Ke haba bi únyi monu, ke ta je hwakecin hia ae ikiki, ke behnyekon, me ca he hmetu bi ka ha unyibun, anyin ae ca úcü ka wakap; 4 helâe minya újao, ke úhnenamöiny monu, ke úhiö, wale ke ta je únyi ae ca úcü, ke so bi ole. 5 Anyin ae ti khan' öbun ang, a haba at ame bi únyi monu, ke ikiki hwakecin, ke behnyekon, a at khudrang ka je hnatheat, me ame ca he ka hu hwajekhon hnyi dökhü dokhon Keriso me Khong. 6 Ca he ke at ka omonu öbun ge ta je hofuc adre hlo: anyin a únyi hnyi ta je únyi helâe ame o but tang hmönynin anyin Khong ka tavat adre me ca úling. 7 Anyin a wale ca he öbun ka hanen hwakecindra; 8 anyin a öbun menekholom ehac, ke walang ang öbun e melam but hnyi Than: vhenö bala ju helâ me ta je lakon melam, 9 (anyin a haba wan melam, hwakecin ae so hia, ke hwakecin ae wisa me hnathu), 10 ke elâm d' öbun únyi hnân osenyinâ Than; 11 ke ca hnyi hanen öbun ta je huliwa hnyi menekholom ae ba wan, ke so bi he ka thawâ; 12 anyin a haba ta je únyi adre me ânyâ duöngâ, me hnân ohmehma he ka úsabö. 13 Ke haba melam, me wale at ame omanenâ ta je únyi hia adre thawâ: anyin ae manen hia hnen e. 14 Anyin a wale, e ame ha, ka habe, Hmak dö, u at ame mokut, ke tot hmetu thö úhem hnyi hna mok, me ame he Keriso ka omelami u.

15 Anyin a wale, wâ wia úhebun, ca he bi ka helâ me tavat ae monu, ke so bi helâ me tavat ae metâ; 16 ke öünüyhnathoâ ta je úen, anyin ae kong ta je bong. 17 Anyin a wale, ca hwen monu bi öbun, ke wâ únykúme weny Than. 18 Ke ca monu bi öbun ge waina wale ame okúâ hulö, ke so he ka ounöngöti öbun ge Hanu; 19 ke

ûhnenamö th' öbun hnyin ta je salamo, me ta je khumöng, me ta je fehuainy hanu, ke khumöng dö me senyin hnyi je hnyekubun ka Than; 20 ke ole bala ju ta je únyi hia ka Khong hnyi ien Tuhöta Iesu Keriso; 21 ke úlingkôu öbun ju hnyi ot ka Keriso.

22 Omoko lö, löng ju hoton laöiöbun, helâ me ka Than. 23 Anyin a ban momo бага, helâ me Keriso a ban ekalesia, ke e thibi omelen unyin. 24 Ke haba hwa-kecin hna löng hoton Keriso hnen ekalesia, me so e helâe minya omoko ka laöiödra hnyi ta je únyi hia. 25 Obaga lö, betenge ju ka laöiöbun, helâ me hnen Keriso hna betenge ge ekalesia, ame ka ham e bi hobi kâu e; 26 me me he ka okâbâ, me ânyâwia ge hna hneû hnyi köiö hnen hofuc, 27 me me he ka hom kâu bi ekalesia ae hmanenang, ae ba hnyikongon me ca hwehweti me ke únyi helâe: ke ame he ka kap me ba hnyikongon. 28 Helâe hamen obaga he ka betenge ge laöiödra helâ me ka je unyidra bi. Haba бага at ame betenge ge âiân, e ame ka betenge bi kâu; 29 anyin ae ba bala bi at ame höciâ unyin bi; ke ame hân me tuö e, ke helâe Keriso ka ekalesia; 30 anyin a öta ang je ong outhunyin Keriso. 31 Anyin a wale, ame he бага ka hna but kamen me hinyen, me kece ka âiân, me me khaca thibi unyidru. 32 Únyi e ae iyong hmönyin: ke oge me ha ge Keriso me ekalesia. 33 Ke so bi e so öbun e ve betenge ge laöiöbun helâ me öbun bi; ke haba momo e so e ame he minya ka ogânâ бага.

HNHYIMAKAN 6.

JE wanakat lö, löng ju hoton lakamöbun me lahinyöbun hnyi Than: anyin a wale wisa. 2 Ogânâ kâmâm me hinyâm (wale hnanyibu a bân ae hu hna ha bânâ hnyin), 3 me u me hnahic, me laba beûhmâ eang hmeledrany. 4 Ke haba öbun je kamen, ca ökûâ bi hmönyin ka je lakubun: ke so bi he ka hat ödra hnyi hna n' ödra, me hna úne ködra hnen Than.

5 Haba öbun je athnyaba, löng ju hoton tavat adre me musi öbun hnyi unyin, ge ot me öbubuny hnyi hnyekubun ae hnathu, helâ me ka Keriso; 6 ca huliwa bi hnyi hwenenöu, helâ me tavat adre me osenyinâ at; ke so bi helâ me je athnyabainy Keriso, tavat adre me ânyâ weny Khong únyi eû hnyi hnyok; 7 me bi athnyaba me hnyok

ae weny helâ me ka Than, ke ca ka at bi: 8 ke e khan' öta a haba únyi ae so ame ânyâ ke at, wale e ame he ka hu únyi ge Than, a ne athnyaba ke a ne at he baû. 9 Ke haba öbun je than, ânyâ helâe minya ju öbun ködra, ca ooti ödra: anyin ae khan' öbun a ethö hnyi drany tha Tuhöbun m' ödra, ke e ame ca wâhmakhmetoâ bi tavat.

10 Ke walang obiny, hwege th' öbun hnyi Than, ge tang hwegien maniny man. 11 Khavâ ju öbun úkhaüen vat anyin Khong, me me khan' öbun he ka tot metâ ka ta je bibihwakecin anyin diabolö. 12 Anyin ate me ca úsöu bi me at, ke ta je musi bi, me ta je man, me ta je tuhan hmeledrany eang ae menekholom, me ta je hanu ae kong hnyi ta je dok ethö hnyi drany. 13 Anyin a wale hom d' öbun je omjehen hia vat únyi ge Khong me me khan' öbun he ka tethmâ hnyi bonginy monu, ke at ka ânyâ ta je únyi hia thithö, tethmâ ju öbun. 14 Awe, tethmâ ju öbun, k' adre oweik' öbun ge hnathu, me tube úlaibun ge úkhaüen vat, wale hwakecin ae wisa, 15 ke adre bi taben tangen je hnyeûcabun ge hna penapena úthumetu ae so hnyi úsoköu; 16 ke tha e me ta je únyi hia e, hom minya th' öbun singiny labageju, m' öbun e hwege he ka omoko ta je údöiny meic anyin hulö. 17 Ke hom minya th' öbun hnabiceen vat anyin úhömeli, me hele vat anyin Hanu, wale hofuc hwan Khong: 18 ke labö hic bala ju öbun ge hic me sumat hia hnyi Hanu hnyi ta je úen hia, me hmâkâ kâe hnen újöng hia, me sumat hnân hobi kâu wakap hia, 19 me hobi könya minya, m' adre me he ka ham könya he ka fuc, m' inye hwege thö he ka omanenâ únyi ae iyong hnyi úthumetu ae so, 20 inya metâ k' adre cö nya can e; me inye hwege thö he ka ha e, wale ae úcú könya he ka ha.

21 Ame he Tukiko, ke liamekeiny a oûnykûmik me at huliwa ae hnathu unyin Than ka thumetu öbun ge ta je únyi hia, me me khan' öbun dö bonguk me anyik huliwa: 22 wale at oge me kunâ köbun hnân hobi kâu e, m' öbun e he ka wâhmakhmetoâ bonguhmun, me me he ka okahwa je hnyekubun.

23 E so e unyin je liamekeiny úsoköu me ibetengiö, me labageju, únyi ge Khong a Kamen me Than Iesu Keriso. 24 E so e unyibun hia ibetengiö baû, wale a tavat a wedra hnathoâ ka Tuhöta Iesu Keriso.

AT FILIPI.

HNYIMAKAN 1.

INYA Paulo me Timoteo a li athnya-
bainy Keriso Iesu, öhmü me set ka
wakap hia unyin Keriso Iesu hnyi Filipi,
me ta je pisop, me je dikona: 2 E so e
unyibun ibetengiö baü, me hnahic ünyi ge
Khong a Kamöta, me Than Iesu Keriso.

3 Inya oge me ole ka Khonguk hnyi
hnök ta je hna ünykümi öbun hia, 4 k' oge
me labö sumat me senyin hnyi hijik je hic
hia hobi köbun hia, 5 anyin a öbun e tha
hnyok hnyi üthumetu ae so, hwân hnyi
bong a bán ke ne o but walang ang; 6 ke
oge me wâ cicöâ ünyi eang, a haba at ame
ibi hwân huliwa eü hnyi je hnyekubun, me
ame he at eling ka obekhötâ e ke ne o but
hnyi bong bongi Iesu Keriso: 7 ke e wisa
könya he ka ünyküme köbun hia, anyin a
öbun dut eü hnyi hnyik, ke öbun hia öbun
e tha hu mönya ibetengiö' baü, hnyi hna cö
nya, me hnyi hna otilâ me ohmä üthumetu
ae so. 8 Anyin a Khong ame ohnathu
nya ae gan hmâ hnök hna hnyok köbun hia
ünyi hnyi ibetengiö ae gan anyin Keriso
Iesu. 9 Ke walang hijic hic, a g' ame he
ka kü gan hmâ bala anyibun ibetengiö hnyi
metâ me wâhmahmeto hia; 10 m' öbun
e he ka haisoâ ta je ünyi ae so; m' öbun e
he ka hnyok hnathu, ke ba hnyikongon
gabun ke ne o but hnyi bong bongon
Keriso; 11 m' öbun e unöngöt ge je wan
hwakecin ae wisa ünyi ga Iesu Keriso, hnân
ogânâ me haisoâ Khong.

12 Hnyat me lakeiny lö, e wek öbun e
he ka khana, a haba ta je ünyi a o könya
me adre hia but wia me hnân oküâ üthu-
metu ae so; 13 me me manen dut a g'
adre cö nya can Keriso, ka tavat tue hia
unyin than tot, me kolon tavat hia; 14 ke
haba hna cö nya, me ame ha hwegiâ je
hnyat me lakeiny ae se hia unyin Than, m'
adre me hwege hmönyin he ka ha hofuc

hwan Khong me ca ot. 15 Ke haba keihen
me adre me khetâ Keriso ünyi hnyi ihunyi
nköu me iwatretra; ke haba keihen, me
ünyi hnyi hnyok ae so: 16 haba ke keihen,
me adre me änyâ e hnyi ibetengiö, anyin
ae khan' ödra a g' adre ip nya hnân otilâ
üthumetu ae so: 17 ke haba keihen, me
adre me khetâ Keriso ünyi hnyi iwatretra,
ke ca ünyi hnyi hnyok ae hnathu, k' adre
me ünyküme bi he ka bi hanen könya vec
hnyi hna cö nya. 18 Ke ieü? adre me
khetâ Keriso hnyi ta je deny hia, ame ne
ünyi hnyi bibihwakecin, k' ame ne ünyi
hnyi hnathu; waleling m' oge me senyin,
eke, me oge me he ka senyin bala. 19
Anyin ae khanö nya, a haba ünyi eang, me
ame he ka obiny ka hnyi anyik möt, hnen
hijibun hic, me hna ham Hanu Iesu Keriso,
20 hoton hnök hna wek gan hmâ, me gejon,
a oge ca he ka hmehma bi hnyi ke ünyi,
ke so bi m' adre me he ka ogânâ Keriso
walang ang hnen unyin, helâ me ehac, me
ti hwege, a ne ünyi ge möt, a ne ünyi ge
mok. 21 Anyin haba anyik möt me hobi
kö Keriso; ke haba iny ka mok, me wale
hnahicik. 22 Ke ame ne wan thibi anyik
huliwa, ka habe, he ka möt hnyi unyin-
awe, e ca khanö nya hnök hna he ka üca.
23 Anyin oge me loloâ hnyi li ünyi eang,
ke haba wek bi, me he ka he but, e me tha
inya me Keriso; wale so ae nua: 24 ke so
bi e ünyi hnathu köbun m' oge me he ka
laba hnyi unyin. 25 Wale hnök hna labe-
geju kâu, me khanö nya a oge me he ka
laba, eke, me tha laba m' öbun hia, he ka
bihanen üne köbun me osenyini öbun hnyi
labageju; 26 me me gan hmâ but hnöbun
hna hobelöü hnyi Keriso Iesu ünyi gak,
iny ka o but hmetu köbun. 27 E so e he
ka ücü hwakecibun me üthumetu ae so
anyin Keriso: me iny ka o he ka iony m'
öbun, ke a ne hiö nya minya bi, oge me he
ka löng gabun, ka habe, öbun e tethmä

hnyi hanu a khaca, me únykúme a khaca, me tha hwege ka hnyi labageju, wale úthumetu ae so; 28 ke ca outen bi ta je iwahnaihmiony: wale a ke únyi hnân haten hnaúhangö, ke haten bi möt köbun, a únyi ge Khong e; 29 anyin adre hia but ham köbun ge Keriso, ca he ka hake labageju thibi káu, ke so minya he ka vec can e: 30 ke hu gabun vat waleji öbun e wá gak, ke öbun e löng walang ang a e unyik.

HNYIMAKAN 2.

A NYIN a wale a ne e unyin Keriso úökahwa, me otubwelâ hnyi betenge, me tha hnyok unyin Hanu, ame ne ta je ibetengjö ae menyik, me vec betenge, 2 awe, öunöngötâ th' öbun anyik senyin, me me khaca ju únykúmenöbun, me me tha hu ibetengjö, me hnyok a khaca, me únykúme a khaca deny; 3 ca ányâ ke únyi hoton ihunyinköu, me bi gan, ke so he ka ve hu hnyok ae hnyikánâ, me ve ogânâ ke at me ke at; 4 ca he ka ve wâ anyibun ta je únyi, ke so he ka ve wâ minya bi ta je únyi anyin keihen. 5 E so eú hnyi je hnyekubun únykúme eang, wale ame únykúme Keriso Iesu: 6 ka habe, khaca thibi bongon me Khong, ke ame ca únykúme a g' ame venöu, wale he ka öúco me Khong, 7 ke e ame ka obnyikánâ e bi, me hom bongon athnyaba; ke e ame wia me me at; 8 ke adre wâ e helâ me bongon at, ke e ame ka obnyikánâ e bi, me löng hoton ke ne o but ka hnyi mok, eke, wale mok hon satauro. 9 Anyin a wale Khong ame ti ogânâ e göranyai, me ham káu ien ae beönua hon ta je ien hia thithö; 10 m' adre me he ka cibouca hia thithö ka hnyi iö Iesu, ödra ethö hnyi drany, me hmeledrany, me hmelen hmeledrany, 11 me me he ka ha manená ta je bohmen hia thithö a Iesu Keriso thibi Than, hnân ogânâ Khong a Kamen.

12 Anyin a wale, je önykúmik lö, helâji me hnöbun hna labö löng gak, ca hake e thibi waleji ke inya unyibun, ke ti gan hmâ walang ang ke hiö nya, awe, huliwan dö hna omeli öbun ke ot me öbubuny; 13 anyin a Khong ame huliwan je hnyekubun he ka weny me ányâ, hoton weny ae so. 14 Ányâ th' öbun ta je únyi hia ke ca ulit me ca iwatretra; 15 me me ba hnyikongubun me hna okongoâ, m' öbun lakon Khong bi, ke ba kongon hnyi hnyimakan dö ae hwali ke úkhin fuc, ke so öbun e umumelam ködra hwakecibun, helâ me je

melaminy hmeledrany, 16 me ogöranyâ hofucin möt; me me hu gak hnân hobelöu hnyi bongongon Keriso, waleji ge hnök hna ca wadring baú, me huliwa baú. 17 Eke, ke adre me ne hudi nya hnyi hut a huliwainy anyibun labageju, me oge me hobâ, me tha senyin m' öbun hia thithö: 18 helâe minya, e so öbun e hobâ minya, me tha senyin mönya.

19 Ke oge me geju ka Than Iesu, a oge me he ka ie kunö Timoteo köbun, me me kahwa thö hnyekuk e ka manen könya bongubun. 20 Anyin ae ba ke at unyik ae tha hwakecin më, a at ame he ka kic hnathoâ bongubun. 21 Anyin a ödra hia adre me ka elâm anyidra bi ta je únyi, ke ca ta je únyi anyi Iesu Keriso. 22 Ke e khan' öbun hnathuiny, a e ame tha huliwa mönya hnyi úthumetu ae so, helâ me nokon ka kamen. 23 Anyin a wale oge me gejon he ka ie kunâ e köbun, e ka khanö nya thö obiny könya: 24 ke inya oge me labageju ka Than a oge me he ka ie o minya. 25 Ke inya oge me únykúme me únyi hnathu he ka kunö Epaferodito köbun, ke liamekeiny mönya, at ame tha huliwa me tha wat mönya, ke anyibun bi metâ, k' ame hadruo nya hnyi anyik theduoc; 26 ke e ame ti weny köbun hia, k' ame hmak ge hnöbun hna löng a ga hu mok gan: 27 e hnathu a ga mok ke ne a ne mokcu: ke Khong ame betenge gan; ke ca hake e thibi, ke inya minya bi, wâ oge nye he ka bi hanen hlöuhlöu ka hnyi anyik hlöuhlöu. 28 Anyin a wale oge me hia but ie kunâ e m' öbun e senyin dö, öbun ka iony hmetu më, me me únykúkong thibi anyik hlöuhlöu. 29 Anyin a wale, kap dö e hnyi Than me senyin hia; ke önyihnathoâ ju tavat a helâ më: 30 anyin a ne moko ju huliwa anyin Keriso, ke e ame ca önyihnathoâ anyin möt, me me he ka hwaböbun hnyi tien ae hi' öbun he ka hadruo nya.

HNYIMAKAN 3.

H NYAT me lakeiny lö, walang obiny, ka habe, senyin dö hnyi Than. E ca gan huliwa könya he ka sihnalimen köbun ta je únyi a khaca bongon, ke so bi hnân otethm' öbun. 2 Wâ eâu ta je kuli, wâ eâu tavat adre me ányâ monu, wâ eâu katatom: 3 anyin a öta ang waperitom, tavat adre me khudrung únyi ge Hanon Khong, me hobeluâ Keriso Iesu, me ca labageju bi ka hnyi unyin: 4 ke so bi e hu

but gak hnân labageju ka hnyi unyin : ame ne he ke at ka únykúme a g' ame hu but gan hnân labageju ka hnyi unyin, me hu gan hmâ bi kõnya : 5 adre peritomoni nya hnyi bong a eitiny, mátrân Isaraela, ke hanen tribu Beniamina, ke hing at Heberu ; ke Faresaio hoton hnanyibu ; 6 ke at ovecâ ekalesia hoton wek ae hwege ; ke ba kongik hoton hwakecin ae wisa hnyi hnanyibu. 7 Ke haba ta je únyi ae únyi hnathu kõnya, wale oge me öünyibâúâ can Keriso. 8 Eke, e hnathu, inya oge me öünyibâúâ ta je únyi hia thithö únyi hnyi únuainy hna wâhmakhmetoâ Keriso Iesu a Tuhök : ke can thibi e oge me hna degecâ ta je únyi hia thithö, ke oge me únykúme me tiren bi ta je únyi eling, me inye he ka hu Keriso, 9 m' adre me he ka ö nya unyin, ke ca ka únyi gak bi hwakecik ae wisa, waleji únyi hnyi hnanyibu, ke so bi a deny labageju ka Keriso, wale hwakecin ae wisa únyi ge Khong hnen labageju : 10 m' oge me he ka wâhmakhmetoâ e, me maniny möt hmetu a e, me he ka tha hnyok mē hnyi vec, me tha úcû mē hnyi imekiny ; 11 ame ne khanö nya he ka o ka hnyi möt hmetu únyi hnyi hna mok. 12 Ca únyi bi hnyi hnök hna hu walang ang, ke ca únyi minya bi hnyi bekhöt a soik walang ang : ke so bi inya bala oge me hnu hoton, me inye he ka kât únyi ame köt nya ka hnyin Keriso. 13 Hnyat me lakeiny lö, oge me ca únykúme bi a oge hia but kât : ke khaca thibi únyi oge me ányâ, wale oge me hnying ta je únyi waleji eú hnyi hotuk, me hnyimakök hwege ka hnyi ta je únyi hnyi hnyimakök, 14 me wadring hwege ka hnyi haten he ka hu hwaban hna hawo nya únyi ethö ge Khong, únyi ge Keriso Iesu. 15 Anyin a wale hamöta hia tawat ae wisa he ka únykúme helâe : ke a ne hu ke je únykúmenöbun hnyi ke únyi, me ame he Khong ka omanená únyi eling köbun : 16 ke haba hnöta hna o ka hnyin, me so ate me he bala bi hnyi únyi eling.

17 Hnyat me lakeiny lö, e so öbun e tha hnu hotuk, ke wâhmakhmetu ödra adre me he helâe, ke öhmun ang hnân tulut köbun. 18 Anyin ae se hia tawat adre me he, k' oge me ibi ose hai odra köbun, k' oge me ha tengiâ walang ang, a ödra je iwahnai-hmiony me satauro anyin Keriso : 19 haba obiny ködra, me hnaúhangö, haba khongudrin me hnyekudra, k' adre me hobeluâ únyi hnân hmehma ködra, k' adre me hnyok ka ta je únyi hnyi hmeledrany ang. 20

Ke öta aten drany ethö ; k' ate me halubahingen At úhomeli úheny thö, wale Than Iesu Keriso ; 21 at ame he ka ohâtá hmetoâ ta je unyita ae kong, m' adre me úci me unyin ae hmanenang, hoton man at ae khana he ka hom úhnyúkongoâ ta je únyi hia thithö kâu bi.

HNYIMAKAN 4.

A NYIN a wale hnyat me lakeiny mönya lö, laöúnykúmik me wek, hnök hna senyiná, ke anyik minya korona, tethmä ju öbun helâe hnyi Than, laöúnykúmik.

2 Inya oge me khöü kö Euodia, ke oge me khöü kö Sunetuke minya, m' ödrum he ka tha hnyok hnyi Than. 3 Eke, oge me sumató u minya at ame hadruo nya hnathu nya, ka habe, hom hadruâ thö omomo tawat adre me tha huliwa mönya hnyi úthumetu ae so, me jia Kelemene minya, me keihen tawat adre me tha huliwa mönya, a eú hnyi tusiny möt je iödra.

4 Senyin bala thö ka Than : ke inya hmetu oge me ha, ka habe, Senyin dö. 5 E so e he tawat hia thithö ka wâ anyibun menyik. Wale but ang Than. 6 Ca kong hnyekunâ ge ta je únyi ; ke so bi hnyi ta je únyi hia thithö, omanená je webun ka Khong hnyi hic me sumat me ole. 7 Ke haba úsoköu únyi ge Khong únyi ae nua hon ta je únykúme hia, ame he ka tuö je hnyekubun me je únykúmenöbun hnyi Keriso Iesu.

8 Hnyat me lakeiny lö, walang obiny, ka habe, haba ta je únyi ae hnathu, me ta je únyi adre me haisoâ, me ta je únyi ae wisa, me ta je únyi ae kalaöt, me ta je únyi ae hmanenang, me ta je únyi ae lung so ; ke a ne ke hwakecin ae so, me ke únyi hnân ogânâ, únykúme ju öbun ta je únyi e. 9 Ke ányâ th' öbun ta je únyi adre n' öbun kâu, wale öbun e kap, me löng, me wâ únyi gak : ke ame he ka e unyibun Khongon úsoköu.

10 Ke inya oge me senyin gan hmâ ka Than, anyin ame kú hmetu thö únykúmenöbun walang ang kõnya ; waleji öbun e únykúme minya, ke ba bi ün köbun. 11 Ke oge me ca ha ge anyik theduoc : anyin adre hia but nö nya he ka sekuk hnyi ta je hwakecin hia. 12 E khanö nya he ka theduoc, ke khanö nya he ka tren ta únyi : haba hnyi ve je únyi, me hnyi ta je únyi hia adre hia but nö nya he ka sekuk me mekihnanem, me he ka tren ta únyi.

KOLOSE 1.

me theduoc minya. 13 E khanö nya he ka ányá ta je únyi hia thithö hnen at ame ohwegiö nya. 14 Ke e so but hwakecibun, waleji öbun e betenge gak hnyi anyik vec. 15 At Filipi lö, e khan' öbun a hnyi hna hwân dö úthumetu ae so, waleji oge he úhek Makedonia, me ba ekalesia ame betenge gak, wale he ka ham me kap ta je únyi, ke hake öbun thibi; 16 ke tiga inya bi hnyi Thesalonika, öbun e okhaca me olo kuná kõnya hnyi anyik theduoc. 17 Ke oge me ca elám bwihlany; ke oge me heleú wan bi, me me se hia but troban köbun. 18 Ke hu but gak ta je únyi hia ke se hia: ke iny unöngöt dö, anyin oge hia but

kap únyi ga Epaferodito ta je únyi únyi gabun, wale bunen ae bo so, wale hut hnân kap, ame osenyinâ Khong. 19 Ke ame he Khonguk he ka ham ta je únyi ae úcú köbun, hoton hna úkhöúnâ anyin hmanenang unyin Keriso Iesu. 20 E so e unyin Khonguta me Kamöta hna ogánâ nyiele nyiele balua. Amen.

21 Oge me italofa me wakap hia thithö unyin Keriso Iesu. Ke ame italofa möbun hnyat me lakeiny eang anyik. 22 Ame italofa möbun wakap hia thithö, ae nua bi ödrin hnyi hnyaba Kaisara.

23 E so e eú hnyi hanubun ibetengiö baú anyin Than Iesu Keriso.

TUSI ANYI PAULO APOSETOLO KA AT KOLOSE.

HNYIMAKAN 1.

INYA Paulo aposetolo anyin Keriso Iesu únyi ge weny Khong, me Timoteo ke liamekeiny m' öta, 2 öhmu me set ka wakap me je hnyat me lakeiny adre me labageju unyin Keriso hnyi Kolose: E so e unyibun ibetengiö baú, me úsoköu únyi ge Khong a Kamöta.

3 Öhmu me ole ka Khong a Kamen Tuhöta Iesu Keriso, me labö hic bala hobi köbun, 4 anyin a öhmu me löng anyibun labageju ka Keriso Iesu, me anyibun ibetengiö ka wakap hia, 5 únyi hnyi gejon adre ip ethö hnyi drany hobi köbun, waleji öbun e löng ehac hnyi hofuc ae hnathu hnyi úthumetu ae so, 6 wale a o köbun; helá minya ka hmeledrany hia thithö, k' ame wa wan me kú tot, heláe minya unyibun, hwân hnyi bong öbun e löng me wáhmakhmeto ibetengiö baú anyin Khong hnyi hnathu; 7 helá minya me hna n' öbun hnö Epafera at ame tha bi athnyaba m' öhmun a oúnykúmihmu, at ame huliwa hnathu ka Keriso hobi köhmu, 8 ke e ame omanená köhmu anyibun ibetengiö hnyi Hanu.

9 Anyin a wale öhmu me ca mená hic, me sumat hobi köbun hwân hnyi bong öhme

löng hnyin, m' adre me he ka unöngöt ge hna wáhmakhmetoá weny, hnyi metá me wá únykúme hia hnyi Hanu, 10 m' öbun e he bala ka úcú ka Than, he ka osenyinâ bala e, me wa hnyi ta je huliwa ae so hia, me kú tot hnyi metá anyin Khong; 11 k' adre me ohwegi öbun ge hwege hia, hoton mau maniny anyin hmanenang, he ka tha hnyok me hokhnyok beú hmá, me senyin; 12 ate me ole ka Kamen, waleji at a öcú öta he ka hnyi hu jekhöú unyin wakap hnyi melam: 13 waleji at ame hügún' öta únyi hnyi maniny menekholom, me wi' öta ka hnyi dökhü dokhon Nokon a oúnykúminy; 14 únyi gan bi e hu hwaban anyita möt, wale he ka hna degecá ta je hulö: 15 e thibi a we Khong ae ca manen bi, atöiny ta je únyi hia adre op; 16 anyin adre op ta je únyi hia thithö únyi gan, ta je únyi ethö hnyi drany me eang hmeledrany, ta je únyi ae manen, me ta je únyi ae ca manen, me ta je theron, me ta je dökhü, me ta je musi, me ta je man; adre hia but op ta je únyi hia thithö únyi gan, me hobi káu; 17 ke e a bán ke biliny bi ta je únyi hia thithö, ke ame tethmä ta je únyi hia thithö únyi gan. 18 Ke e thibi ban unyin, wale ekalesia: e thibi can, atöiny tawat úhedra hnyi hna mok;

me me he ka beónua hon ta je únyi hia thithö. 19 Anyin ae weny Kamen he ka hnen eú hnyi hnyin unöngöt hia thithö; 20 me he ka öúsoköuá ta je únyi hia thithö a deny e, e ka hia but öúsoköuá ge dren anyin satauro; wale a deny thibi e, ame ne ta je únyi eang hmeledrany me ethö hnyi drany. 21 Ke öbun ta je atkanyua ehac me iwahnaihmony hnyi hnyekubun hnyi anyibun ta je huliwa ae kong, ke e ame hia but öúsoköuá walang ang 22 hnyi unyin wale viny únyi ge mok, me me he ka omanen' öbun hnyi hnyimakan, a tavat ae kap, me ba okongon, me ba hnân haikongoá: 23 öbun e ne tethmä hnyi labageju, adre bi taben, me ohm' öbun, ke ca bwebwet únyi hnyi gejon úthumetu ae so öbun e löng waleji adre khetá ka tavat hia thithö eang hmeledrany; ke inya Paulo adre wiö nya me me at huliwan.

24 Ke walang ang inya oge me senyiná anyik je vec hobi köbun, ke oge me obekhötá hnyi anyik hounyin je vec anyin Keriso hobi káu unyin e, wale a ekalesia; 25 ke adre wiö nya he ka huliwan ka hnyi hoton hna penapena hnen Khong, wale adre ham nya hobi köbun, he ka ohwádá hofuc hwan Khong, 26 wale únyi ae iyong adre ikhálá ehac hnyi ta je únen adrem, me ta je dö hia thithö; ke walang ang, adre hia but omanená e ka anyin wakap, 27 ke e weny Khong he ka omanená ködra úganiny hmanenanginy únyi eling ae iyong unyin Aten ke je hnyeji, wale Keriso eú hnyi je hnyekubun, a gejuiny hnahic: 28 wale at öhmun e khetá, me sihwegiá ka tavat hia thithö, me n' odra hia hnyi metá hia, m' öhmun e he ka omanená tavat hia thithö ae bekhöt soidra unyin Keriso; 29 ke wale hnök minya hna huliwa ka hnyin, k' oge me újöng hmönyin hoton anyin huliwa, wale ame hwege huliwa eú hnyi hnyik.

HNYIMAKAN 2.

A NYIN ae wek e me khan' öbun úganiny hnök hna újöng hwege hobi köbun, m' ödra minya hnyi Laodikea, m' ödra hia adre me ca hnyi wá hnyimakök hnyi unyin; 2 m' adre me he ka okahwa je hnyekudra, k' adre úhújâkôuá hnyi betenge, ke hnyi tang omjeú hia wale hna tha kap me wá únykúme, m' adre me he ka wáhmakhmeto únyi ae iyong anyin Khong, wale Keriso, 3 at adre ikhálá unyin ta je omjeúiny hia metá me wá

únykúme. 4 Wale thibi hnök hna ha, wá e nye he ke at ka iyau' öbun ge je hofuc úhahnyok. 5 Eja ke ne a ne hiö nya hnyi unyin, inya unyibun hnyi hanu, k' oge me senyiná me wá hna laba wia a öbun, me ihwegien anyibun labageju ka Keriso.

6 Anyin a wale, he bala ju öbun unyin Keriso Iesu a Than, helâ me hnöbun hna kap e, 7 ke bi wân dut me up öbun göranyai unyin, ke ohmä ju anyibun labageju, helâ me hna n' öbun, ke ti ole gan hmâ.

8 Wá eáú, wá e nye he ke at ka sei öbun hnen anyin bemetá, me tang iyawö hnân omono, hoton hofuc vejec anyin at, me je hna úne anyin hmeledrany a bán, ke ca hoton bi Keriso: 9 k' ame laba eú hnyin at eling önyen Khong hia thithö hnyi unyin, 10 k' adre me öunöngöti öbun únyi gan, k' ame ban at eling hon ta je musi me ta je man hia thithö; 11 wale at adre me peritomoní öbun unyin, hnen peritom adre me ca ányá ge hanyam, wale he ka uny degecá önyen unyin, hnen peritom únyi ge Keriso; 12 ke adre me tha konâm më hnyi hna bapataiso, wale adre tha omeli öbun hmetu më ge labageju ka hnyi huliwa anyin Khong, waleji at ame omelö hmetu e únyi hnyi hna mok. 13 Ke haba öbun waleji öbun e mok hnyi hwakecin ae kong, me ca peritomoná je unyibun, e ame omeli öbun tha öbun më, ke e ame ohia anyita ta je hulö hia; 14 ke e ame kot degecá hna sihnalimen ta je hna hûna ae iwahnaihmiöny m' öta, me úcú öta, ke e ame hia but hom degecá e únyi hnyi wanben, k' ame thu faoiny hnyi anyin satauro; 15 ke e ame ka uny degecá ta je musi me ta je man, e ame omanen' ödra bi hnyi dok ae manen, ke ame dökhuhudrin hnyin e.

16 Anyin a wale, ca he ke at ka únykúmi öbun can ta je jeú, me hnân ic, me bonginy bijeu, me tehi ae teb únyi, me bong sabath: 17 wale hmenon ta je únyi ame he ka o; ke haba önyen, me, wale Keriso. 18 Ca he ke at ka ovhelâ hwaböbun hnen beöúhnyúkongi öbun, me hic ka ta je angela, ame ná ta je hna omanená káu bi, ame ohobá báúú hnen únykúmenen unyin, 19 k' ame ca kât hmâ bi Ban, wale at a únyi gan unyin hia thithö, adre úhújâkôuá hnen ta je outhunyin me töiny, ame húhúö, a öhúhúö hnen Khong.

20 Öbun e ne tha mokcu me Keriso únyi hnyi hna úne a bán anyin hmeledrany, anyin a ieú, öbun e löng hmetu hoton je

hna hûna, helâke öbun e möt ka hnyi hmeledrany, ka habe, 21 Ca mádrá bi, ca drem bi, ca kálá bi, 22 (ame he ka hia ta je únyi e, at ka mádrá), helâ me je hna hûna me je hna únö hnen at? 23 Haba ta je únyi e, ame beometá thoiá hnyi hmi baú, me he ka hnyikáná, me ovecá unyin bi; ke ca únyi hnathu bi hnân hom úhnyúkongoá unyin.

HNYIMAKAN 3.

A NYIN a wale, adre ne hia but tha omeli öbun hmetu me Keriso, elám d' öbun ta je únyi ethö, wale dok ame laba hnyin Keriso hnyi ke keihen a metân Khong. 2 Hnyok d' öbun ka ta je únyi ethö, ke ca ka ta je únyi eang hmeledrany. 3 Anyin a öbun e mokcu, ke adre tha ikhálá anyibun möt me Keriso unyin Khong. 4 E ka he ka manen dut Keriso a melita, m' ate me he ka tha manan më hnyi hmanenang.

5 Anyin a wale hlingá ju öbun je ong outhunyibun eang hmeledrany; wale a bi únyi monu, me hwakecin ae ikiki, me hnyok wagelue, me weny ae kong, me behnyekon, a wale hmi ka hnathat; 6 can ta je únyi e ame o but tang hmönyin anyin Khong ka tavat adre me ca úling; 7 k' öbun minya öbun e vheno ehac, waleji k' öbun e tiga laba hnyin. 8 Ke walang ang degec ut gabun ta je únyi eang, wale hmönyin, me wathethöt, me hnyok ae kong, me ú, me hofuc újao únyi hnyi je hnyimöbun; 9 ca uthoiköu bi, anyin a öbun e hia but uny degecá at adrem me ta je hwakecin, 10 me khaú öbun ge at ae teb únyi, adre me labö ohátá hnyi metá hoton we at a op e: 11 ke ba bi unyin at Heleni me at Juda, me tavat adre me peritomoná me ca peritomoná, me aten je hnyei, me at Sekuthia, me athnyaba, me at he baú: ke haba Keriso, me ta je únyi hia, ke unyin hia.

12 Anyin a wale, haba öbun je hna úca hnen Khong, a wakap me laónykúminy, me so öbun e khavá ibetengiö vec, me hwakecin ae so, me hnyok ae hnyikáná, me hwakecin ae menyik, me hokhnyok beú hmá; 13 úhokhnyokáköuá, me úhnaköuá a ne hu veciny ke at ge ke at; haba Keriso ame hn' öbun, me so öbun ányá helâe: 14 ke haba únyi ae nua hon ta je únyi e, me ibetengiö, wale weny ae ti so. 15 Ke so ame he úsoköu anyin Keriso ka

musö je hnyekubun, waleji adre haw' öbun ka hnyin hnyi unyin a khaca: ke oleá bala ju öbun. 16 E so e he hofuc hwan Keriso ka laba hmá hnyi je hnyekubun me metá hia; únöbunköu öbun ju ge ta je salamo, me ta je khumöng, me ta je fehuá únyi hnyi hanu, khumöng dö ka Than me ibetengiö eú hnyi je hnyekubun. 17 Ke haba ta je únyi hia öbun e ányá hnyi hofuc me huliwa, me ányá hia thö hnyi ien Than Iesu, ke oleá ka Khong a Kamen deny e.

18 Omomo lö, ve löng ju hoton laöiöbun, helâ me úcü ka Than. 19 Obaga lö, ve betenge ju ge laöiöbun, ke ca oveci ödra. 20 Je wanakat lö, ve löng ju hoton je lakamöbun me lahinyöbun hnyi ta je únyi hia, anyin a wale hnân osenyiná Than. 21 Lakamen lö, ca ohmönyiná je lakubun, wá adre nye hmak. 22 Lathnyaba lö, löng ju hoton tavat a je latuhöbun hnyi unyin; ca huliwa bi wánen at, helâ me tavat adre me osenyiná at, ke so bi hnyi hnyok ae hnathu, me outhen Than: 23 ke haba ta je únyi öbun e ányá, mádrá hnyoká ju helâ me ka Than, ke ca ka at bi: 24 anyin ae khan' öbun a öbun e he ka hu hwaban únyi ge Than, wale jekhóu: ke öbun e bi athnyabainy Than Keriso. 25 Anyin a haba at ae ca wisa, ame he ka hu hwaban hwakecin ae ca wisa: ke ba hna wáhmakhmetoá bi tavat.

HNYIMAKAN 4.

JE than lö, ham dö ka je athnyabaibun únyi ae wisa me úcü; anyin ae khan' öbun ae hu Tuhöbun ethö hnyi drany.

2 E so öbun e hic újöng, me hmáká e, me ole; 3 ke hic minya hobi köhmun me me he Khong ka khöng köhmun deny hwan hofuc, he ka ha únyi ae iyong anyin Keriso, wale adre cö nya can; 4 m' oge me he ka omanená e, hnyi deny ae úcü. 5 E so öbun e he hnyi metá unyidra eú hnyöu, me öúnyihnthoá ta je úen, 6 E so öbun e he bala ka fuc me ibetengiö, ame osoá ge sált, me me khan' öbun dö hwakecin he ka thu ka tavat.

7 Ame he Tukiko ka omanená köbun ta je bonguk hia, e liamekeiny a oúnykúmik, me at huliwa hnathu, a tha huliwa mönya ka Than: 8 oge hia but kuná e köbun hobi káu únyi eang, me me khan' öbun dö bonguhmun, me me he ka okahwa je

hnyekubun; 9 tha e me Onesimo, ke liamekeiny ae hnathu a oúnykúmik, a hanöbun. Ödrü me he ka omanená köbun ta je únyi hia thithö adre ányá eang.

10 Ame italofa m' öbun Aritako at adre tha ca mönya, me Mareko liamekeiny me Banaba (oge me húna köbun gan, e ka o köbun m' öbun kap ju), 11 me Jesu, ke ien minya Juseto, únyi hnyi peritom: hake ödrin thibi ödrin e tha huliwa mönya hnyi dökhu dokhon Khong, hnyat ödrin e hia but okahwö nya. 12 Ame italofa m' öbun Epafera a hanöbun athnyabainy Keriso Iesu, at ae hwege hic hobi köbun, m' öbun e he ka tot wisa, me kap wia hia weny Khong. 13 Anyin a inya oge ohnathöa e

ae gan anyin huliwa köbun, m' ödra minya hnyi Laodikea, me tavat hnyi Hierapoli. 14 Ame italofa m' öbun Luka, at tren bubuny a oúnykúmik, me Dema minya. 15 Italofa me hnyat me lakeiny hnyi Laodikea, me Numefa, me ekalesia hnyi je hnyabadrin. 16 Ke öbun ka hia but aú tusi ang, me úkhúnöng dö he ka aú ka ekalesia anyin at Laodikea; ke he th' öbun minya ka aú tusi úheny Laodikea. 17 Ke ha thö kö Arekipa, ka habe, Wá eáu hanymám u je kap únyi ge Than, m' u me he ka umo thö.

18 Anyik italofa hnen hing hnyamök. Únykúme ju hnödra hna cö nya. E so e unyibun ibetengiö baú.

TUSI A BÂN ANYI PAULO APOSETOLO KA AT THESALONIKA.

HNYIMAKAN 1.

INYA Paulo, me Silevana, me Timoteo, öhmun e sihnalimen ka ekalesia anyin at Thesalonika unyin Khong a Kamen me Than Iesu Keriso: E so e unyibun ibetengiö baú me úsokóú.

2 Öhmun e labö oleá ka Khong gabun hia, ke ökmun e hai öbun hnyi hijihmun ta je hic; 3 me ca mená únykúme anyibun huliwa hnyi labageju, me huliwa hnyi ibetengiö, me hokhnyok hnyi gejon ka Tuhöta Iesu Keriso hnyi hnyimakan Khong a Kamöta; 4 ke khan' öhmun hnyat me lakeiny a oúnykúminy Khong, hna úc' öbun, 5 a ga ca o köbun anyihmun úthumetu hnyi hofuc thibi, ke so bi hnyi man minya, me Hanu Kap, me ti kap wia; anyin ae khan' öbun hwakecihmun unyibun hobi köbun. 6 Ke öbun e úcúcbingi öhmun, me Than minya, me kap hwan hofuc hnyi vec ae gan hmá, me senyin únyi ge Hanu Kap; 7 wale, m' adre me wi' öbun hnán tulut ka tavat labageju hnyi Makedonia hia me Akaia. 8 Anyin ame hia but lung únyi gabun hofuc hwan Than,

ca ka at Makedonia me Akaia thibi, ke so bi hnyi ta je dok hia ame lung minya bi anyibun labageju ka Khong; wale me me ca únyi hnathu bi öhmun e he ka ha ke hofuc. 9 Anyin a ödra bi adre me haimemen' öhmun je bongon ioihmun köbun; me hnöbun hna hwiö ka Khong únyi ge ta je hnatheat, he ka bi athnyaba ka Khong ae möt me hnathu, 10 me he ka halubahingen Nokon úheny hnyi drany, waleji e ame omelö hmetu thö úheny hnyi hna mok, a Iesu at ame omeli öta únyi hnyi hmönyin ame he ka o.

HNYIMAKAN 2.

ANYIN ae khan' öbun hnyat me lakeiny ioihmun köbun, ae ca únyi baú bi: 2 ke adre bödra ka oveci öhmun me okongu öhmun hnyi Filipi, wale ae khan' öbun, ke öhmun e hnyok hwege únyi ge Khong he ka ha köbun úthumetu ae so anyin Khong me vec ae gan hmá. 3 Anyin a haba hnöhmun hna n' öbun, me ca únyi hnyi monu bi, ke ca únyi hnyi hwakecin ae ikiki, ke ca únyi hnyi iyáwo:

I. THESALONIKA 3.

4 ke so bi öhmun e fuc helâ me hnen Khong hna ûc' öhmun me hna but köhmun úthumetu ae so ; ca hnân bi osenyinâ at, ke so bi Khong at ame cnbec je hnyekuhmun. 5 Ke adre me ca ò 'hmun bala a öhmun e ha hofuc útakû, e khan' öbun e, ke öhmun e ca huliwa hnyi behu, Khong ame ohnathoâ ; 6 ke öhmun e ca elâm hnân ogânâ únyi ge at, ke ca únyi gabun, ke ca únyi ge keihen, ke so bi e khan' öhmun he ka ohmaki öbun, anyin a öhmun je aposetolo anyin Keriso. 7 Ke öhmun e menyik hnyi wanböbun, helâ me at ame úasin ame hat lakon : 8 helâe minya öhmun e betenge gan hmâ gabun, me me so köhmun he ka ham köbun ca úthumetu ae so thibi anyin Khong, ke anyihmun minya bi möt, anyin a öhmun e ti hnyoki öbun. 9 Ke öbun hnyat me lakeiny öbun e únykúme anyihmun huliwa ae mak me vec ; öhmun e huliwa hnyi lany me lit, m' öhmun e ca he ka ohmâkâ ke at gabun, öhmun e khetâ úthumetu ae so anyin Khong köbun. 10 Öbun hnyat ohnatho, me Khong minya, a öhmun e ânyâ hwakecin ae kap, me wisa, me ba hnyikongon köbun tavat labageju : 11 e khan' öbun hnöhmun hna ve n' öbun, me sihwegi öbun, me unö, helâ me kamen ka lakon, 12 m' öbun e he bala ka úcû ka Khong, at a haw' öbun ka hnyi dokhon dökhu me anyin hmanenang.

13 Waleling m' öhmun e ca menâ ole ka Khong, anyin a öbun e kap hofuc hwan úthumetu únyi gahmun, waleji hofuc hwan Khong, me öbun e ca kap helâ me hofuc hwan at, ke hofuc hwan Khong wale ae hnathu, k' ame huliwan minya je hnye-kubun tavat labageju. 14 Anyin a öbun hnyat me lakeiny, öbun e úcûcûbongoâ ta je ekalesia anyin Khong hnyi Juda unyin Keriso Iesu : anyin a öbun e hnyi vec minya hnyi ta je únyi e únyi ge je lahanöbun, helâ me tavat únyi ge at Juda ; 15 waleji a tavat adre me hlingâ Than Iesu, me ta je perofeta, me ob' öhmun, k' adre me ca osenyinâ Khong, ke ödra je iwahnaihmiöny me tavat hia thithö ; 16 k' adre me thaw' öhmun he ka fuc ka Aten ta je hnyei, wale me me ca he ka hu möt gadra ; k' adre me obekhötâ bala anyidra hulö : ke ame o but ködra hmönyin he ka oulo.

17 Hnyat me lakeiny lö, a hi' öhmun unyibun hnyi úen ae okhulit, hnyi unyin, ke ca hnyi hnyok, öhmun e ti weny gan hmâ he ka iouny m' öbun : 18 anyin

öhmun e behe köbun, inya Paulo, a okhaca me olo ; ke ame ovheli öhmun Satana. 19 Anyin a ieu' anyihmun geju, me senyin, me koronainy hobelöü ? Ca öbun bi hnyi hnyimakan Tuhöta Iesu hnyi úen e ame he ka manen hmetu ? 20 Anyin a öbun ang hnöhmun hna hobelöü, me hnöhmun hna senyin.

HNYIMAKAN 3.

A NYIN a wale, öhmun e únykúme, me so adre me hn' öhmun hnyi Athenai, waleji ke ca khan' öhmun hmetu he ka hok hnyok ; 2 me öhmun e kunö Timoteo liame-keiny m' öhmun, a athnyabainy Khong hnyi úthumetu ae so anyin Keriso, me me he ka ohmâ me okahw' öbun hnyi anyibun labageju ; 3 me me ca he ka bwewelâ ke at hnen je vec eling ; anyin ae khan' öbun a g' adre kun' öhmun hobi kâu e. 4 Anyin a tiga öhmun unyibun, öhmun e böhmun ka ha, ka habe, ate me he ka hu vec ; ke a hwâdâ but e, ae khan' öbun e. 5 Can thibi e, ke ca khanö nya hmetu bi he ka hok hnyok, me oge úkhúnöng he ka wâ anyibun labageju, wâ e nye cubic öbun hnen at úcûbic, me ame he ka únyi baú but anyihmun huliwa. 6 Ke walang ang ame o but köhmun Timoteo úheny unyibun, me thumetu öhmun ge hofuc ae so ge anyibun labageju me anyibun ibetengiö, me hnöbun hna únykúmi öhmun bala, me webun gan hmâ he ka ò 'hmun, ke helâ öhmun köbun ; 7 anyin a wale, hnyat me lakeiny lö, öhmun e kahwa gabun hnyi anyihmun theduoc me vec hia, hnen anyibun labageju : 8 anyin a öhmun e möt ut walang ang, öbun e ne tethmâ unyin Than. 9 Ke ieu' ole e khan' öhmun he ka ham ka Khong gabun, únyi hnyi ta je senyin hia thithö öhmun e senyin gabun hnyi hnyimakan Khong ; 10 öhmun e hic hwege hnyi lit me lany, m' öhmun e he ka wâ je hnyimaköbun, he ka obekhötâ únyi ae ca bekhöt bi hnyi anyibun labageju ?

11 E so ame he Khong a Kamöta me Tuhöta Iesu he ka kû dehmun gethen köbun : 12 ke so Than ame he ka wi' öbun, m' öbun e he ka húhúö me si but ibetengiö ke at ka ke at, me ka tavat hia thithö, ke helâe minya öhmun köbun ; 13 me me he ka otethmâ je hnye-kubun ae ba hnyikongon hnyi hwakecin ae kap hnyi hnyimakan Khong a Kamöta, e ka o hmetu but Tuhöta Iesu, tha e me anyin wakap hia thithö.

HNYIMAKAN 4.

KE walang obiny, hnyat me lakeiny lö, öhmun e sumat me újengi öbun ge Than Iesu, ka habe, haba hnöbun hna kap gahmun ge bongon he a öbun, me me osenyinâ Khong, ke öbun e he helâe,—m' öbun e he ka hwege tot hnyin bala. 2 Anyin ae khan' öbun dut je hna hûna, öhmun e ha köbun únyi ge Than Iesu. 3 Ke walang weny Khong, a öbun e he ka kap, ka habe, e so öbun e ka úsâkâüö but me bi únyi monu; 4 me me ve khan' öbun dö hwa-kecin hna tuö anyibun je kaia me me kap me so, 5 ke ca únyi bi hnyi hnyok ae ikiki, helâ me Aten ta je hnyei ae ca khan' ödra Khong; 6 me me ca he ke at ka hanyâúâ, me okongoâ liamekeiny mē hnyi ke únyi: anyin a Than at ame bi hwaban hnyi ta je únyi eling, helâji me hnöhmun hna ha ehac, me hna sihwegi öbun wia. 7 Anyin a ca haw' öta Khong ka hnyi hwakecin ae ikiki, ke hnyi hwakecin bi ae kap. 8 Anyin a wale, haba at ame hota degecâ, me e ame ca hota degecâ at, ke Khong bi, wale at ame ham köbun Hanon ae Kap.

9 Ke ca únyi hnathu bi a oge me he ka sihnalimen köbun ge bongon ibetengiö anyin hnyat me lakeiny: anyin a n' öbun Khong he ka ibetengiökou; 10 e hnathu öbun e ányâ e ka hnyat me lakeiny hia hnyi Makedonia hia. Ke öhmun e khöü köbun, hnyat me lakeiny he ka osehia bala; 11 k' so öbun e elâm he ka laba wia, me ve bi hanymen, me huliwa ge je hnyamöbun, helâ me hnöhmun hna hûna köbun; 12 m' öbun e he ka vheno soâ ködra eü hnyöu, m' öbun e ca he ka theduoc.

13 Hnyat me lakeiny lö, e bewehmun e me khan' öbun bongon tavat adre me mokut ut; m' öbun e ca he ka tenge helâ me keihen ae ba geju gadra. 14 Anyin ate ne únykúme a ga mokcu Iesu k' ame möt hmetu thö, awe, helâe minya ame he Khong ka tha hom mē tavat adre me mokut ut unyi Iesu. 15 Ke öhmun e ha únyi ang köbun ge hofuc hwan Than, ka habe, haba öta a öta möt a je kolon e ka o Than, me ate me ca he ka khaletâ tavat adre me mokut. 16 Anyin ame he ka utut Than úheny hnyi drany, me hwakuku, me ifucin angela ae beönuu, me hwan trutru anyin Khong: ke ame he ka bán tavat adre mok unyin Keriso ka höhöi: 17 ke

haba öta tavat a öta möt, a je kolon, me adre me he ka tha köp öta thö m' ödra ka hnyi je úlá, he ka úkhanö me Than ethö hnyi wanben: me ame he ka tha öta me Than nyiele balua. 18 Anyin a wale úsihwegiöbunkou thö ge ta je hofuc ang.

HNYIMAKAN 5.

HNYAT me lakeiny lö, e ca únyi hnathu he ka sihnalimen köbun bongon ta je úen me ta je huna. 2 Anyin ae khan' öbun wia a g' ame he ka o bong bonginy Than helâ me at venöu hnyi lit. 3 Ödra ka ha, ka habe, Hnahic ut me laba khötkic, me ame he ka ie o but ködra úhöhö, helâ me momo ae erkin ame vec hnyin; ke ca khan' ödra he ka kec ut. 4 Ke haba öbun, hnyat me lakeiny, ca öbun bi hnyi menekholom, me me he ka o köbun bong eling helâ me at venöu: 5 anyin a öbun hia thithö je lakon melam, me lakon lany: ca öta bi hanen lit me menekholom; 6 anyin a wale, ca he öta ka mokut helâ me keihen, ke ate me he ka hmâkâ me metâ but. 7 Anyin a haba tavat adre me mokut, me adre me mokut hnyi lit; ke haba tavat adre me ic monu, me adre me ic monu hnyi lit. 8 Ke haba öta aten melam, me so ate me metâ, me khavâ úkhaüen úlainy labageju me ibetengiö; me gejon möt hnân hnabicen vat. 9 Anyin a haba Khong ame ca ip öta hobi kâu hmönyin, ke so bi he ka hu möt köta únyi ge Tuhöta Iesu Keriso, 10 waleji a mok hobi köta, m' ate me he ka tha möt mē, at ka hmak, ke at ka mokut bi. 11 Anyin a wale úsihwegiöbunkou thö, me útilöbunkou, helâ minya me hnöbun hna ányâ.

12 Hnyat me lakeiny lö, öhmun e khöü köbun he ka ö' drin ju tavat ödrin e huliwa unyibun, me musi öbun hnyi Than, me sihwegi öbun; 13 me oúnyihnathu ödrin hmönyin hnyi ibetengiö can anyidrin huliwa. E so öbun e laba úsökou. 14 Ke öhmun e újöngi öbun hnyat me lakeiny, he ka sihwegi ödra adre me ca he wisa, n' ödra ju ae mat hnyekudra, hadruâ thö tavat ae sēnyin, hokhnyokâ beüâ ju tavat hia thithö. 15 Ca he ke at ka bi hwaban monu ge monu ka ke at; ke hnu bala hoton so unyibun bi, me tavat hia. 16 Senyin bala thö; 17 hic dö me ca menâ bi; 18 oleâ ju ta je únyi hia thithö, anyin a wale weny Khong köbun ge Keriso Iesu. 19 Ca ume ju Hanu; 20 ca oúnyibâüâ bi je hna pero-

II. THESALONIKA 1, 2.

feta; 21 cubec ju ta je únyi hia thithö; kât hmâ ju únyi ae so; 22 úsákâú but me je únyi hia a helâ me monu.

23 Ke so ame he Khongon hnahic ka tha okabi öbun; e na tuö ju je hanubun hia thithö, me je hnyekubun, me je unyibun, me me ba hnyikongon, e ka o hmetu Tuhöta Iesu Keriso. 24 E hnathu e at ame haw' öbun, wale at ame he ka ányâ.

25 Hnyat me lakeiny lö, hic d' öbun hobi köhmun.

26 Italofa me je liamekeiny hia ge úcim-hnyimak ae kap. 27 Inya oge me húna wia köbun hnyi Than, a g' adre me he ka áú tusi ang ka je liamekeiny hia thithö.

28 E so e unyibun ibetengiö baú anyin Tuhöta Iesu Keriso.

TUSI A LOINY ANYI PAULO APOSETOLO KA AT THESALONIKA.

HNHYIMAKAN 1.

INYA Paulo, me Silevana, me Timoteo, öhmun e set ka ekalesia anyin at Thesalonika unyin Khong a Kamöta, me Than Iesu Keriso; 2 E so e unyibun ibetengiö baú me hnahic únyi ge Khong a Kamen me Than Iesu Keriso.

3 Hamöhmun he ka ole bala ka Khong gabun, hnyat me lakeiny, anyin ae úcú e, anyin ame ti kú hmönyin anyibun labageju, k' ame si but anyibun ibetengiököu hia thithö; 4 wale me öhmun e hobelu' öbun hnyi ta je ekalesia anyin Khong únyi hnyi hnöbun hna hokhnyok me labageju hnyi hnödra hna sed' öbun, ke hnyi ta je vec öbun e vheno; 5 wale haten úhnei ae wisa anyin Khong; m' adre me haöúcú öbun ka hnyi dökhü dokhon Khong, wale öbun e vec minya can: 6 ame ne únyi ae wisa ka Khong he ka bi hwaban vec ka tavat adre me oveci öbun, 7 ke öbun tavat adre ovecâ, öbun e he ka tha menâ möhmun, e ka manen dut Than Iesu úhény hnyi drany tha e me ta je angelainy maniny man 8 hnyi meic ame ubâhlâ, he ka bi hwaban ka tavat ae ca khan' ödra Khong, me ka tavat adre me ca long hoton úthumetu ae so anyin Tuhöta Iesu Keriso: 9 tavat adre me he ka kap hwaban, wale hnaúhangö ame ca ba balua únyi hnyi hnyimakan Than me hmanenanginy maniny man, 10 e ka o me me ogânâ e hnen anyin wapak, me he ka láiâ gan hnyi bong eling

hnen tavat hia adre me labageju (anyin a öbun e kap hnöhmun hna thumetu öbun). 11 Waleling m' öhmun e hic bala hobi köbun, me me he Khonguta ka haöúcú öbun ka hnyi hna haw' öbun kâu, me obekhötä hnen man ta je weny ae so, me ta je huliwainy labageju; 12 m' adre me he ka ogânâ unyibun ien Tuhöta Iesu, ke öbun minya unyin, hoton ibetengiö baú anyin Khonguta me Than Iesu Keriso.

HNHYIMAKAN 2.

ÖHMMUN e újongi öbun hnyat me lakeiny, wale ge ioiny hmetu Tuhöta Iesu Keriso, me hna úkhacaköu öta kâu; 2 ka habe, ca ie bwewet bi je hnyekubun, ke ca loloâ minya bi, wale hnen hanu, me hofuc, ke ca hnen minya bi tusi, helâke únyi gahmun, ke helâke me hakekeny jut bong bonginy Than; 3 ca he ke at ka iyaw' öbun bi ge ke únyi: anyin ame ca he ka o bong eling, e ka ca bán ka o kolu but a tavat, me adre me he ka omanená but aten hulö, wale aten hnaúhangö, 4 wale at ame bi iwahnaihmiony, me ka hamen ogö-ranyâ e hon ta je únyi hia thithö adre me ha me Khong, me hna khudrung kâu; waleling me me laba hnyi uma umen Khong, me ka omanená e bi, ka habe, e Khong. 5 Hawa öbun e ca únykúme, a oge hia but ha ta je únyi eang köbun, waleji ke tiga inya bi unyibun? 6 Ke walang ange khan' öbun únyi at ame ovhelâ, me me he ka

II. THESALONIKA 3.

manen dut e hnyi anyin bi ùen. 7 Anyin ame huliwa walang ang ùnyi ae iyong hnyi hulö: ke e hu at ame ovhelâ walang ang, ke ne o but adre me hom e. 8 Ke hnyi ùen eling ame he ka manen dut at ame ânyâ hulö, wale hnen Than Iesu hna he ka hlingâ ge homenâiny hnyimen, me he ka ohia ge unyin ae manen dut e ka o but; 9 haba ioiny me hoton huliwa anyi Satana, me man hia thithö, me ta je haten, me ta je ùöman ae thoi, 10 me tang iyawö hia thithö hnyi hwakecin ae ca wisa bi unyin tavat adre me he ka hnaûhangö; anyin adre me ca kap hnyok ka hnyi hnathu, m' adre me he ka möt. 11 Ke can thibi e, Khong ame kunâ ködra he ka huliwan monu, m' adre me he ka kap thoi: 12 m' adre me he ka bi hwaban ködra hia thithö, tavat adre me ca hnyi kap hnathu, ke adre me senyin bala bi ka hnyi hwakecin ae ca wisa.

13 Ke hamöhmun he ka oleâ bala bi gabun, hnyat me lakeiny a laoûnykuminy Than, anyin a Khong ame ùc' öbun ùnyi hnyi can he ka möt, hnyi hna okabâ hnen Hanu, me he ka kap hnathu. 14 Waleji e ame haw' öbun ka hnyin hnen anyihmun ùthumetu ae so, me öbun e he ka hu hmanenanginy Tuhöta Iesu Keriso.

15 Anyin a wale, hnyat me lakeiny lö, tethmä ju, ke kât hmâ ju hna hûna waleji adre n' öbun kâu, ame ne hofuc, ame ne anyihmun tusi.

16 Ke hanymen Tuhöta Iesu Keriso, me Khong a Kamöta at ame betenge gata me ham köta hnahic ame ca ba balua me geju ae so hnyi ibetengiö baü, 17 hamen he ka okahwa je hnyekubun me otethmä hnyi ta je huliwa ae so me hofuc ae so hia thithö.

HNYIMAKAN 3.

KE walang obiny hnyat me lakeiny lö, hic d' öbun hobi köhmun, e me mweimwei thö hofuc hwan Than, m' adre me ogânâ e, helâ minya e unyibun; 2 me me he ka hûgûn' öhmun ge tavat ae ba hnyekudra, me monu: anyin ae ba labageju ge keihen. 3 Ke e hnathu Than, at ame

otethm' öbun, me tu' öbun ge hulö. 4 Ke öhmun e labageju ka Than gabun, a öbun e ânyâ walang, ke öbun e he bala bi ka ânyâ ta je ùnyi öhmun e hûna köbun. 5 Ke so ame he Than ka owisa je hnyekubun ka hnyi ibetengiö anyin Khong, me hokhnyok ùnyi ge Keriso.

6 Ke öhmun e hûna köbun hnyat me lakeiny, hnyi ien Tuhöta Iesu Keriso, ka habe, úsákâú' öbun dut me je hnyat me lakeiny hia thithö ae hwali hwakecidra, ke adre me ca hnu hoton hna ùne waleji adre me kap ùnyi gahmun. 7 Anyin ae khan' öbun hwakecin ae ùcú wale he ka ùcú-cú-bingi öhmun: anyin ame ca hwali hwakecihmun unyibun; 8 ke haba khaca, öhmun e ca an báúâ jeú an ke at, ke öhmun e ânyâ huliwa ae hmak me vec hnyi lit me lany, m' öhmun e ca he ka ohmákâ ke at bi gabun: 9 ca anyin bi ae ba anyihmun musi, ke so bi m' öhmun e he ka wi öhmun hnân tulut köbun, m' öbun e he ka ùcú-cú-bingi öhmun. 10 Anyin a tiga öhmun bi unyibun, walang hnöhmun hna ha, ka habe, A ne höcö ke at he ka hnyi huliwa, awe, e ame ca he ka hnyi han. 11 Anyin a öhmun e löng e hwakecin keihen unyibun adre me he monoâ, k' adre me ca hnyi ânyâ je ve hanymödra, ke adre me huliwa monu thibut. 12 Ke öhmun e hûna ka tavat a helâe, me ùnö ge Tuhöta Iesu Keriso, ka habe, hamödra he ka huliwa hnyibú, me ve an ö'dra bi jeú. 13 Ke haba öbun, hnyat me lakeiny, ca senyin bi he ka mádrâ hwakecin ae so. 14 Ke a ne ke at ame ca löng bi hoton hohmun hofuc hnyi tusi ang, me so öbun e bi haten at eling, ke ca tha öbun mē, me me he ka hmehma but. 15 Ke so bi, ca ùnykúme bi kâu helâ me iwahnai-hmiöny, ke nâ ju helâ me ke liamekeiny.

16 Ke so ame he Than, a at ame tren úsoköu ka ham köbun úsoköu a e bala bi hnyi ta je hwakecin hia thithö. E so e unyibun hia thithö Than.

17 Anyik italofa, inya Paulo, oge me set ge hnyamök, wale haten hnyi ta je tusi hia thithö: inya oge me sihnalimen helâe. 18 E so e unyibun hia thithö ibetengiö baü anyin Tuhöta Iesu Keriso.

TIMOTEO.

HNYIMAKAN 1.

INYA Paulo aposestolo anyi Iesu Keriso, hoton musi anyin Khong, At a omeli öta, me Keriso Iesu, hnöta hna geju kâu; 2 oge me sihnalimen kö Timoteo, a hing nökkuk hnyi labageju: E so e unyâm ibetengiö baü, me tang ibetengiö, me hnahic, únyi ge Khong a Kamen, me Keriso Iesu a Tuhöta.

3 Oge me sumató u he ka laba hnyi Efeso ehac, ke helâe minya walang ang, waleji m' iny he Makedonia ai, m' u me he ka hûna ka keihen, a g' adre me ca he bi ka únö hofuc ae ke bongon, 4 me ca he ka oúnyihnthoâ bi ta je vekhet, k' adre me ca aú bi ta je döiny tavat, wale ae ba obiny, k' ame okúâ iwatretra, k' ame ca okúâ huliwa ka Khong hnyi labageju. 5 Ke haba obiny hna hûna, me ibetengiö, únyi hnyi hnyok ae kalaöt, me oúnykúm ae so, me labageju ae ba thoi hnyin: 6 ke a hia but keihen haúhaú hnyi ta je únyi e, k' adre saú ka hnyi hofuc ae ba önyen; 7 ke wedra he ka únö hnanyibu, k' adre me ca wâ únykúme hnödra hna ha, me bongon ta je únyi adre me ha hwegiâ. 8 Ke e khandöta ae so hnanyibu, at ka huliwan hnyi visa, 9 wale he ka wâhmakhmeto a g' adre ca otílâ hnanyibu hobi kâu at ae wisa, ke hobi ködra bi adre me hanyâúâ hnanyibu me ca úling, me ca ot, k' adre ányâ monu, ke kong hwakecidra, ke thothom бага, ödra tavat hlingâ lakamödra, ke tavat adre me hlingâ lahinyödra, ke tavat úhlingö, 10 ke tavat bi únyi monu, ke tavat adre me hwen Sódoma, ke tavat venöu at, ke tavat thoi, ke tavat khemanyin thoi, ke ame ne hu ke hwakecin ae ca úcü me hna úne ae wisa; 11 hoton evangelia ae hmanenang anyin Khong ae tren hnahic, waleji adre me hna könya.

12 Ke inya oge me ole ka Keriso Iesu a Tuhöta, at ame ömani nya, anyin a e ame únykúme a iny hnathu, me ame ham könya anyin huliwa; 13 ke haba bi ehac, me, iny

at bi gan, me úöveci, me at ame okongôa: ke e ame betenge gak, anyin a oge me ányâ hnyi ca khandö nya, me hnyi hnök hna ca labageju; 14 ke ame ti si but ibetengiö baü anyin Tuhöta, me labageju, me ibetengiö wale ae anyin Keriso Iesu. 15 Walang uthofuc ae hnathu, me ti úcü he ka kap, ka habe, A o Keriso Iesu eang hmeledrany he ka omelö tavat ae monu; ke iny beönuu bi hudrin: 16 ke wale thibi e can adre betenge baü könya, me me he Iesu Keriso ka omanená a únyi gak, wale at ae nuâ monu-iny, anyin hokhnyok ae beú hmâ hia thithö hnân tulut ködra adre me he ka labageju kâu nyiele, m' adre me hu gadra möt ame ca ba balua. 17 E so e unyin Than a e balua bi, me möt balua bi, me iyong bi, Khong a khaca thibi, e so e anyin bi, hna ogânâ me hna ölungâ nyiele nyiele balua. Amen.

18 Nökkuk lö, Timoteo, inya oge me ham köu hna hûna eang, hoton hna perofetö u a bán, me u me he ka vatâ vat ae so hnyin e; 19 he ka kât labageju me oúnykúm ae so; waleji ame hna degécâ keihen adre öüâ but anyidra labageju: 20 jia Humaño, me Alesanedro a li lahanödra; waleji oge me hn' ödru kö Satana, m' adre me he ka n' ödru he ka ca fuc bi gan.

HNYIMAKAN 2.

ANYIN a wale, inya oge me n' öbun a bán, ka habe, adre me he ka sumâtâ, me hijö, me khöü, me ole, hobi kâu tavat hia thithö; 2 hobi kâu je than, me tavat musi hia; m' ate me he ka laba wia me úsoköu hnyi ta je hwakecin hia thithö ae úcü ka Khong, me hwakecin ae wisa. 3 Wale únyi ae so me hnân osenyinâ hnyi hnyimakan Khong At a omeli öta; 4 wale at ame weny tavat hia thithö he ka möt, me he ka o ka hnyi hna wâhmakhmetoâ hnathu. 5 Anyin a khaca thibi Khong, ke khaca thibi at ame khöüâ tavat ka Khong, a ka at bi, wale Keriso Iesu, 6

waleji at ame ka hamen ham e bi hnân úcú melen tavat hia thithö ; m' adre me he ka ohnathoâ hnyi je úen ae úcú ; 7 k' adre me úcö nya he ka khetâ e, ke hnân aposetolo (inya oge me ha hnathu oge me ca thoi), ke inya at úne ka Aten ta je hnyei ka hnyi labageju me hnathu.

8 Anyin a wale inya oge me wek e me he obaga ka hic hnyi ta je dok hia, me ogö-ranyâ je hnyam ae ba hnyikongon, me ca ú, me ca iwatretra. 9 Ke helâe minya ju omomo, e so adre me khavâ úkhaú ae úcú, tha e me bongon ot, me hnyok ae wisa ; ca he ka úla hobâ leúnne bödra, me gol, me penina, me úkhaú ae gan hwaban ; 10 ke so bi hnyi ta je huliwa ae so (wale ae úcú ka omomo adre me haimemenâ a ödra tavat ouden Khong. 11 Hamen momo he ka tevehlög wia, me löng hoton. 12 Ke oge me ca hna bi momo he ka únö, me musö бага, ke so bi he ka laba hnyibú. 13 Anyin adre bödra ka up Adamu ke bili Eva bi ; 14 ke adre me ca iyawö Adamu, k' adre iyawâ momo, ke momo at eji ame hanyâúâ : 15 ke ame he ka möt momo hnyi hna hno-koâ, ödra ka tethmâ hnyi labageju me ibetengü, me hwakecin ae kap me hnyok ae wisa.

HNyimakan 3.

WALANG uthofuc ae hnathu, ka habe : A ne weny ke at hanymen pisop e ame weny huliwa ae so. 2 E úcú ka pisop he ka ba hnyikongon, me khaca áiân, me at hokhnyok, me at hnyokâ wisa, me at ame ányâ hwakecin ae so, me at ame betenge ge atkanyua, me at ae khana úne ; 3 ca at ame beijem gánâ waina, ke at ame ca úkúc ; e so e menyik, me ca at bi ame iwatretra, ke ca at hnyokâ mone : 4 at ame musö soâ anyin lap, ke haba lakon, me ödrin e löng hoton me hnyokâ wisa hia ; 5 (anyin a ne ca khana at he ka musö anyin lap, me ame he ka hawa ka tuö ekalesia anyin Khong ?) 6 ca at ame ibi hni, wâ e nye began me ame kölu but ka hnyi hnaúhangö anyin diabolö. 7 E so minya e lung so ködra eú hnyöu ; wâ adre nye haikongoâ e, me e ame ta but ka hnyi hnewe anyin diabolö. 8 Ke helâe minya ta je dikona, hamödra he ka hnyokâ wisa, ca tavat lo ifucidra, ca tavat ijem gánâ waina, ca tavat behu omjeú ; 9 k' adre me kât hmâ únyi ae iyong hnyi labageju, me önyüküm ae kalaöt. 10 Ke so ka më cubic

ödra ; ke e ka ba hnyikongudrin, awe, adre me he ka ányâ hanymen dikona. 11 Helâe minya omomo he ka hnyokâ wisa, ca tavat úhaiö, ke so he ka hok hnyok, me hnathu hnyi ta je únyi hia thithö. 12 E so ka ta je dikona he ka úsa khaca laöiödra, me musö soâ lakudra, me anyidra je lap. 13 Anyin a haba tavat adre me hia but ányâ soâ hanymen dikona, ame he ka hu ködra lung so, me hwege ae gan hnyi labageju unyin Keriso Iesu.

14 Inya oge me sihnalimen ta je únyi e köu, ke inya oge me únyüküme he ka ie o köu ; 15 ke iny ka bec, m' u me he ka wâ-hmakhmetoâ hwakecin ae úcú ka tavat hnyi uma umen Khong, wale ekalesia anyin Khong ae möt, me hmolom me taben hnathu. 16 Ke ca hnân ivinoâ, ka habe, e gan hmâ úiyonginy hwakecin ae úcú me Khong, ka habe, E ame manen dut hnyi unyin, ame haiwisa hnyi hanu, ame wâ hnen ta je angela, adre me khetâ hnyi ta je hnyei, adre me labageju kâu hnyi hmeledrany, adre me kap göranyai ka hnyi hmanenang.

HNyimakan 4.

KE ame ha manenâ hnen Hanu, ka habe, ame he keihen ka hna degéc labageju, hnyi je úen a biliny, adre me he ka löng ta je hanu adre me omono me ta je hna únö anyin je demoni, 2 hnen iyawö anyin tavat thoi, tavat ame le önyükümidra ge fao ae öü ; 3 adre me thawâ he ka faipoipo, me ca han ke je jeú, wale a op Khong, he ka kap oleâ hnen tavat adre me labageju me wâhmakhmetoâ hnathu. 4 Anyin a haba ta je únyi hia thithö a op Khong, me ba ke únyi hnân degéc, adre me ne kap e me ole : 5 anyin ame osoâ hnen hofuc hwan Khong, me hic.

6 U je ne he ka önyükümeâ je liamekeiny ge ta je hofuc, me u me he ka at huliwa ae so anyin Keriso Iesu, adre hat hnyi hofucin labageju, me úne ae so, waleji u je hia but hnu hoton ; 7 e so u ma ca kap ta je vekhet ae monu anyin wasomaca. Ke u ma khenen he ka helâ me hwakecin Khong : 8 anyin ae úhnyükong troban huliwa hnyi unyin ; ke so bi, haba hwakecin helâ me Khong, me hu troban hnyi ta je únyi hia thithö, e hu hna ha bánâ hobi kâu möt walang ang, me möt minya bi nyiele. 9 Wale hofuc ae hnathu, ke úcú he ka ti kap. 10 Anyin a wale ate me huliwa me hwege, anyin ate me geju ka

Khong ae möt, wale At ame omelö tavat hia thithö, ke beönua ka tavat labageju. 11 E so u me he ka hûna me ünö ta je ûnyi e. 12 E so ame ca he ke at ka hmiân ânyâm hidröu; ke u me he ka bi tulut ka tavat labageju, ge hwam hofuc, me hwa-kecâm, me ibetengiö, me labageju, me hwa-kecin ae kalaöt. 13 E so u ma hwege aû tusi, me khetâ hofuc, me ûne, ke ne o but oge me o. 14 Ca he ka öünyibâû hnödra hna ham köu, waleji adre ham köu ge hna perofeta me hna ip hnyam hnen wahingat. 15 Ünüküme wia ta je ûnyi eang; khenen dö ka hnyin; me me manen dut troban ânyâm huliwa ka tavat hia. 16 Ö u eâu bi, me hnâm hna ûne. Tethmä ju hnyi ta je ûnyi e; anyin a u je ne ânyâ e, me u me he ka omeli u bi, m' ödra minya adre me ling u.

HNYIMAKAN 5.

CA he ka ou je hingat, ke so bi nâ e helâ me kamen; me ta je hidröu helâ me je liamekeiny: 2 ke haba wasohmaca helâ me je hinyen, me wahlu helâ me je lahaniny, hnyi hwakecin ae kalaöt hia. 3 Ogânâ ju wasafac a ta je hing wasafac. 4 Ke a ne ke safac ae hu lakon, ke ame ne laöbiny, me so ödrin e mō nâ he ka ânyâ hwakecin ae so hnyi hnyabadrin bi, me bi troban ka lakamödrin me lahinyödra: anyin a wale ûnyi ae so hnyi hnyimakan Khong. 5 Ke haba momo a hing safac k' ame hake laba, me ame geju ka Khong, me tethmä hnyi hic me khöu hnyi lit me lany. 6 Ke haba momo ame elâm senyin hnyi unyin, me a mokcu bi, ke tiga möt unyin. 7 U ma hûna ta je ûnyi e minya, m' adre me ca he ka haikongu ödra. 8 Ke a ne ke at ame ca tuö wia lahanen, k' ame ne ti helâe ka anyin lap, me e ame ivinöa labageju, ke gan anyin hulö hon at ame ca labageju. 9 Ca he ka sihnalimen ien safac e ka tiga ca sikste je hunainy, ke khaca thibi âiân ehac, 10 ke momo adre me hai-soâ hnyi ta je huliwa ae so; ka habe, ame hia but hat lakon, me betenge ge ta je atkanyua, me ösüâ je li can wakap, me hadruâ tavat adre me vec, me ânyâ bala ta je huliwa hia ae so. 11 Ke ca kap bi wasafac hmai, anyin a ödrin e ka hwân bekec ge Keriso adre me befaipoipo; 12 me adre me hnaûhangö but, ûnyi hnyi hnödra hna hna degecâ anyidra labageju a bân. 13 Ke haba khaca adre me nâ he ka hōcö huliwa,

me he monu ka hnyi ta je uma, he ca hake hōcö thibi huliwa, ke adre me úsabú baü minya, me hngele ka wâ huliwa anyin keihen, me ha ta je hofuc ae ca úcú ködra. 14 Anyin a wale inya oge me wek e me he wasafac hmai ka faipaipo, me hnokoâ lakudrin, me tuö hnyabadrin, me me ba can he ka haikongoa hnen iwahnaihmiony: 15 anyin a hia but keihen saü ka he hotu Satana. 16 A ne ke momo ame labageju k' ame hu je safac unyin, me so e me he ka hadru' ödra, ke ca he ka ohmâkâ ekalesia; me me he ka hadruâ ta je hing safac.

17 E so he ka ti ogânâ wahingat tavat adre me musu so, ke e nua ka tavat adre me huliwa hnyi hofuc me ûne. 18 Anyin a haingen hna sihnalimen, ka habe, Ca he ka ca hnyimen bolok ame ututo hwit. Ke, E úcú hwaban ka at ame huliwa. 19 Ca kap bi hna hâiâ ke hingat e ka ba li at a lo, ame ne kun he ka ohnatho. 20 E so he ka nâ hnyi hnyimakan tavat hia thithö adre me ânyâ hulö, me me ot ju keihen. 21 Inya oge me hûna wia köu hnyi hnyimakan Khong, me Keriso Iesu, me ta je angela adre úca, ka habe, u me he ka tuö ta je ûnyi eang, ke ca he ka wâhmakhmeto, me bi hien ke at bi. 22 Ca he ka ie ip li hnyamâm hnyi hon ke at, ke ca hnyi hanen monu anyin keihen: tuö wia hwakecâm me me alai. 23 Ca he hmetu ka ijem köjö ke bi waina thibi ae ûhnyükong hobi kâu hnyekom, me ânyâm ta je mok waleji ame ibi ose o but köu. 24 Ame manen dut hulö anyin keihen, me ame bödra ka hnyi hna owisa; ke ame hnu hotudrin ta je hulö anyin keihen. 25 Ke helâe minya e hu ke ta je huliwa ae so ke manen dut; ke haba keihen ta je huliwa ae ke bongon bi, e pason he ka ikhâlâ.

HNYIMAKAN 6.

EÛCÛ ka ta je athnyaba hia, tavat adre me hije hok he ka ve ogânâ latuhödra, m' adre me ca he ka haikongoa ien Khong me hnen hna ûne. 2 Ke haba tavat ae hu latuhödra adre me labageju, ca he ödra ka öünyibâû' ödra, anyin a ödra je liamekeiny; ke so bi he ka ti bi athnyaba so ködra, anyin a tavat labageju me tavat ibetengiö adre me kap huliwa ae so. Hamâm he ka nâ me ünö ta je ûnyi e.

3 A ne ke at ame ünö ke ûnyi bi, me ca hmehmela hofucin möt wale hofuc hwan Tuhöta Iesu Keriso, me hna ûne ae úcú

II. TIMOTEO 1.

hoton hwakecin ot ka Khong; 4 awe, e ame bi gan, ke ca khana bi ke únyi, ke e ame moko hna ivinö me iwatretra ge ta je hofuc, wale at ame öktû ihunyinkou, me iwatretra, me újao, me únykúme monoâ, 5 me ta je úö hwege anyin tavat adre me hnyokâ hulö ke ca hu bi hnathu gadra, ke adre me únykúme, ka habe, haba hwakecin outen Khong me wale deny he ka hu ködra tang omjeú. 6 Ke haba hwakecin outen Khong tha e me hnahic, me wale thibi e omjeú ae gan hwaban: 7 anyin ate ca hom ke únyi ka hnyi hmeledrany, ke ca khan' öta bi he ka hom ke únyi únyi hnyin; 8 ke e ka hu köta jeú me úkhaú, me ate me he ka oseuni öta ju e. 9 Ke haba tavat adre me wedra he ka tren omjeú adre me ta but ka hnyi úcúbic me hnewe me ta je weny ae monu me hnân okongo, wale hnân ödilâ tavat hnyi úöhia me hnaúhangö. 10 Haba hnyok ka mone, me wale iwân ta je monu hia thithö ae ve bongon: waleji ame hnu hoton hnen keihen m' adre me osaú' ödra but únyi hnyi labageju, ke adre me ka hamödra bi dá fineci ödra bi hnen ta je vec ae se hia.

11 Ke haba u, aten Khong lö, kec dö ge ta je únyi e; me hnu hoton hwakecin ae wisa, me hwakecin ae úcú me Khong, me labageju, me ibetengiö, me hok hnyok, me hwakecin ae menyik. 12 Vâtá thö vat ae so anyin labageju, kât hmâ ju möt ame ca ba balua, waleji adre me haw' u káu, me hnâm hna haimemenâ so hnyi hnyimakan tavat ohna-

tho ae se. 13 Inya oge me húna köu hnyi hnyimakan Khong at ame tuö möt anyin ta je únyi hia thithö, me Keriso Iesu, at ame haimemenâ so hnyi hnyimakö Ponetio Pilato; 14 ka habe, u me he ka tuö hna-nyibu, me me ba hnyikongon, me ba hnân haikongoâ, ke ne o but ame manen dut Tuhöta Iesu Keriso: 15 ke e ame he ka omanenâ e hnyi anyin bi ta je ün, a e thibi Than a khaca ae tren hnahic, a Tuhan ta je than, ke Taben ta je taben; 16 e thibi ame tren möt balua, at ame laba hnyi melam ae ca hnân úhakokeny káu; waleji ame ca wâ hnen at, ke ca khana minya wâ: e so he ka e anyin bi hna ogânâ me man nyiele balua. Amen.

17 Húna thö ka tavat tren omjeú eang hmeledrany ka habe, Ca he ödra bi ka bi gan, me ca he ka gejon ta je omjeú wale ame ca tethmâ, ke so bi ka Khong ae möt. at ame ham köta hia ta je únyi hnân osenyini öta; 18 m' adre me he ka ányâ so, me tren omjeúiny ta je huliwa ae so, me kenen he ka kuia, me weny he ka betenge: 19 me he ka ip hobi ködra bi tang omjeú ae so hnân hobi káu nyiele, m' adre me he ka kât möt wale möt ae hnathu.

20 Timoteo lö, tuö wia ju ta je únyi adre me hna but köu, me úsákátö me ta je hofuc ae bi gan, me ta je ivinö, wale adre me ba thoiâ, ka habe, bemetâ; 21 waleji ame kap keihen, m' adre me monu but únyi hnyi labageju.

E so e unyibun ibetengiö baú.

TUSI A LOINY ANYI PAULO APOSETOLO KÖ

TIMOTEO.

HNYIMAKAN 1.

INYA Paulo, aposetolo anyi Iesu Keriso únyi ge weny Khong, hoton hna ha bánâ möt unyin Keriso Iesu, 2 oge me sibnalimen kö Timoteo, nökek a oúnykú-mik: E so e unyâm ibetengiö baú, me betenge me hnahic únyi ge Khong a Kamen me Keriso Iesu a Tuhöta.

3 Inya oge me ole ka Khong, waleji oge me huliwa káu hwân ge je lakibik hnyi oúnykúm sâ ae wisa, a oge me ca menâ únykúmi u hnyi hijik je hic hnyi lit me lany 4 ke bewek hmönyin he ka iouny möu. m' inye unöngötö ge senyin, anyin oge me únykúme li deköiâm; 5 ke inya oge me únykúme minya labageju unyâm ae ba thoi hnyin; waleji a bán unyin kibâm somaca

Lois, ke hinyâm a Eunike; ke oge me wâ únykúme a e minya bi unyâm. 6 Anyin a wale inya oge me oúnykúmi u he ka óubáhlá bwihlanya anyin Khong a e hnyi hnyekom, ge hna ip li hnyamök. 7 Anyin a Khong ame ca ham kôta hanon ot; ke so bi ae man, me betenge, me metâ. 8 Anyin a wale u me ca he ka hmehma he ka ohnatho Tuhöta, ke gak bi inya at adre cö nya: ke so bi, u me he ka hnyi hanen ta je vecin úthumetu ae so hoton man maniny Khong; 9 at ame omeli öta, me haw' öta ge hwahongot ae kap, ca hoton bi anyita ta je huliwa, ke so bi hoton weny me anyin ibetengiö baú, waleji adre ham kôta unyin Keriso Iesu adrem balua, 10 ke manen walang ang ge ioiny At omeli öta a Keriso Iesu, waleji at a ohia mok, me omanená möt, me ca mok hmetu bi hnen úthumetu ae so, 11 ke adre me úcö nya hnân at khetâ e, me hnân aposetolo me at úne. 12 Can e oge me vecâ ta je únyi e; ke inya oge me ca hmehma bi; anyin oge me wáhmakhmeto but e, waleji at oge me labageju kâu, ke mou thö hnyi hnyekuk a e khana he ka tuö hnök hna hna kâu, ke ne o but hnyi bong e. 13 Kât hmâ ju tulutiny hofucin möt u je löng únyi gak, hnyi labageju me ibetengiö wale unyin Keriso Iesu. 14 Haba únyi ae so adre hna but köu, tuö ju hnen Hanu Kap at ame laba hnyi je hnyekuta.

15 E khanö u a g' adre kec khotö nya ödra hia hnyi Asia; haba Fugelo me Hume-naio unyidra. 16 E so ame he Than ka betenge ka lap anyi Onesiforo: anyin a e osehia okahwö nya, ke e ame ca hmehma gak me tö fao adre cö nya kâu; 17 ke tiga e Roma, me e ame hwege elöm nya, me ö nya 18 (e na he ju ka wâ ibetengiö baú unyin Than hnyi bong eling); ke e khanö u wia ae se hia ta je únyi e ame hadruo hnyin hnyi Efeso.

HNYIMAKAN 2.

ANYIN a wale, nökkuk lö, hwege thö hnyi ibetengiö baú a e unyin Keriso Iesu. 2 Ke haba ta je únyi u je hia but löng únyi gak unyin tavat ohnatho ae se hia, ham but ka tavat ae hnathu, ae khan' ödra he ka úne ka keihen minya. 3 Munyi hokhnyokâ ju vec mönya, helâ me at vat ae so anyin Keriso Iesu. 4 E ba at vat ame bi ovheliny ge ta je únyi anyin möt eang; me me he ka osenyinâ e waleji at ame úca me hnân at vat. 5 Ke a ne ke at ame bi

bi ton hnyi ta je mat, adre me ca obicâ e, e ka ca mat hoton hnanyibu. 6 Haba at ame belök me hamen he ka bân ka hom je wan. 7 Únykúme ju hnök hna ha; anyin ame he Than ka ham köu wâ únykúme ta je únyi hia. 8 Únykúmi Iesu Keriso, únyi hnyi mátrâni Davita, a omelö únyi hnyi hna mok, hoton anyik úthumetu ae so: 9 can e oge me hom vec ke ne o but adre me cö nya, helâ me at ae kong; ke adre ca ca bi hofuc hwan Khong. 10 Anyin a wale, inya oge me hokhnyokâ ta je únyi hia hobi kâu tavat adre úca, me me hu minya thö ködra möt a e unyin Keriso Iesu, tha e me hmanenang ame ca ba balua. 11 Walang uthofuc ae hnathu, ka habe, Öta ka tha nok mē, ate me he ka tha möt minya mē: 12 ke ate ne hok hnyok, me ate me he ka tha than mē: ke ate ne ivinöâ, me e ame he bi ka ivin' öta: 13 ke ate ne ca hnathu. me hnathu bala bi e; anyin e ca khana he ka hamen ivinoâ e bi.

14 Oúnykúmi ödra ju ge ta je únyi eang. me húna ködra hnyi hnyimakan Than he ka ca ivinöâ ge ta je hofuc, ae ba troban, ke hnân omonoâ tavat adre me löng. 15 Hwege thö, me u me ka omanenö u bi a g' ame kap soi u Khong, m' u at huliwa ae ba hnân ohmehma, at ame huliwa wia hofuc ae hnathu. 16 Ke úsâkâüö u but me ta je hofuc ae monu me ca únyi hnathu: anyin adre me he ka bi hanen gâná hwakecin ae úcú me Khong, 17 ke ame he hodra hofuc ka han helâ me anyú: e unyidrin Hume-naio me Fileto; 18 tavat ödrin e he monu úhedra hnyi hnathu, haingödrin, ka habe, a um dö möt hmetu, m' ödrin e hagutâ degecâ labageju anyin keihen. 19 Ke ame tethmâ taben ae hwege anyin Khong, ae hu hna ohmâ haten eang, ka habe, A wáhmakhmetoâ but Than ta je aten: ke, Hamödra hia adre me hawâ ien Than he ka úsâkâüö me hwakecin ae kong. 20 Ca je gol me sileva thibi eiö hnyin uma ae gan, ke je kaia utö minya me je kaia kânâ; haba keihen me hnân haisoâ, ke haba keihen me hnân haikongoâ. 21 Anyin a wale, a ne ke at ame ka ányâwia e bi únyi hnyi ta je únyi eang, me e ame he ka kaia hnân haisoâ adre okabâ, me úcú he ka huliwan hnen at ae tren uma, me hna penapena ka hnyi ta je huliwa ae so. 22 Kec dö ge ta je weny wahidröu, ke hnu hoton hwakecin ae wisa, me labageju, me ibetengiö, me úsoköu, tha e m' ödra hia adre me hawâ ien Than, únyi hnyi hnyok ae kalaöt. 23 Ke hota ju ta

je ivinö ae monu me ca metâ, anyin ae khan' öbun a wale at ame okûâ iwatretra. 24 Ke ca úcû bi athnyabainy Than he ka iwatretra, ke so e menyik hwakecin ka tavat hia thithö, me at ae khana úne, me hokhnyok, 25 me nâ menyikâ ta je iwahnai-hmiöny; ame ne he Khong ka ham ködra ietra he ka wâhmakhmetoâ hnathu, 26 m' adre me he ka möt únyi hnyi hnewe anyin diabolö, me omelö ge at huliwa ka Than ka hnyi weny Khong.

HNYIMAKAN 3.

KE wâhmakhmetoâ ju ang, ka habe, ame he ka o ta je úen ae kong hnyi je bong nyiele. 2 Anyin ame he tavat ka hamödra hnyok ködra bi, me behnyekudra mone, me hobelöu, me bi gan, me fuc monu, me ca löng kamen me hinyen, me ca ole bi, me ca okabâ bi, 3 adre me ca betenge ge lahanödra, adre me höcö úsoköu, tavat úhaiö, me ca khan' ödra kât weny unyidra, me hwege hnyimaködra, me ca hnyok únyi ae so, 4 tavat úalecuo, me huliwa wathethöt, me bemusö, adre me weny únyi hnân ose-nyinâ, ke ca wedra bi ka Khong; 5 tavat a helâke me úcû hwakecidra ka Khong, k' ödra ivinöâ bi maniny: úsákûü u but me tavat a helâe. 6 Anyin a keihen tavat helâe, adre me dit ka hnyi ta je uma, me hom hwenbâ omomo ae monu me hmak ge hulö, adre lili ödra hnen ta je wedra bi ae ke bongon bi, 7 adre me labö úne, ke ca khan' ödra bala bi wâ únykúme hnathu. 8 Ke helâ me Jane me Jamebere ödru me tot úcû Mose, helâe minya tavat e adre me tot úcon hnathu; tavat ae kong hnyekudra, kadre me ca hnathu ka hnyi labageju. 9 Ke so bi, adre me ca he ka vhenö bala hwakecin e, anyin ame he ka manen dut hwakecidra ae monu ka tavat hia thithö, helâ me imaneniny hwakecidru könya. 10 Ke u je hia but hnu hoton hnök hna úne, me hwakecik, me únykúmenök, me hnök hna labageju, me hokhnyok beü hmâ, me betenge, me hokhnyok, 11 me hna seda, me ta je vec; ta je únyi ame o könya hnyi Anetioka me Íkonio, me Lusetara; me ta je vec adre oveci nya kâu: ke haba Than ame hügünö nya únyi hnyi ta je vec hia. 12 Eke, ke adre me he ka oveci ödra hia tavat adre me weny he ka laba me hwakecin ae úcû me Khong unyin Keriso Iesu. 13 Ke haba tavat adre me ányâ hwakecin ae kong, me tavat iyawö, adre me he ka kong

tot bala, adre me omonöâ, me adre me ka omonu ödra bi. 14 Ke u ma tethmä ju hnyi ta je únyi adre hia but nö u kâu me hnâm hna hia but kap wia, anyin ae khanö u hnyat ödrin e nö u; 15 ke e khanö u ta je hna sihnalimen ae kap, k' u tiga mendreng, wale ae khana he ka ometö u ka hnyi möt a deny labageju ka Keriso Iesu. 16 Haba ta je hna sihnalimen hia únyi ge hanon Khong, me úcû minya hnân he ka úne, me hnân owisa, me hnân nâ, me hnân sihwege hnyi hwakecin ae wisa: 17 me me bekhöt ut soiny aten Khong, wale at adre hia but penapena hobi kâu ta je huliwa hia thithö ae so.

HNYIMAKAN 4.

INYA oge me húna wia köu hnyi hnyimakan Khong, me Keriso Iesu, at ame he ka owisa wamöt me wamok, me he ka manen dut e, me dokhon dödkhu; 2 ka habe, Khetâ thö hofuc; ke hwege thö hnyi úen ae úcû, me úen ae ca úcû; owisa thö, nâ thö, sihwege thö me hokhnyok beü hmâ me úne. 3 Anyin ame he ka o but úen adre me ca he ka kap hna úne hnân melen; ke so bi, adre me he ka úkhöünâ tavat he ka úne ködra hoton ta je wedra ae monu, anyin ae hölök ta je hnyikönyödra; 4 ke adre me he ka wia ta je hnyikönyödra únyi hnyi hnathu, me saü but ka hnyi ta je vekhet. 5 Ke u me he ka hnyokâ wisa hnyi ta je únyi hia, hokhnyok ju hnyi ta je vec, ányâ thö hanymen at ame huliwan úthumetu ae so, obekhötä hanymâm hia thithö. 6 Anyin adre me hwân walang ang he ka hudi nya, ke ame o thö ang úen oge me he ka he but hnyin. 7 Oge hia but vatâ vat ae so, oge hia but umo hna üö logot, oge hia but kât hmâ bala labageju: 8 ke wale bi ang adre ip hobi könya koronainy hwakecin ae wisa, wale ame he ka ham könya hnyi bong eling Than ae wisa, at ame owisa: ke ca hake könya thibi, ke ködra hia thithö minya adre me senyin hnyi hna omanená e.

9 Hwege thö he ka ie o könya: 10 anyin a hia but Dema hna degeci nya, k' ame hnyokâ hmeledrany, ke ame he but Thesalonika ai; ke Kerese ame he but Galatia ai, k' ame he but Tito Dalamatia ai. 11 Ke hake Luka thiju ang unyik. Hum Mareko thö, me tha he thö jem öbu könya: anyin ae únyi hnathu e könya hobi kâu huliwa. 12 Ke haba Tukiko, me oge hia

TITO 1.

but kunâ e Efeso ai. 13 U ka he jem m' u hom minya thö anyik ûkhaû ae beû waleji oge me ip Troas, únyi Karepo, me ta je tusi minya, ke ca hnying bi je unen hnân sihnalimen hon. 14 E gan monu ame ányâ kõnya Alesanedro, at ame leû faö kapa : k' ame he Than ka bi hwaban kâu e úcú me anyin huliwa : 15 õ u eâu gan ; anyin a e ame hwege ka tot, me úcon hohmun hofuc. 16 Haba hnyi hnök hna ivinö a bán, me ba at ame bi hiök, k' ame digic nya tavat hia thithö : e na ca ip ködra hwaban. 17 Ke so bi ame tha tot mõnya Than, me ham kõnya man ; me me he ka ti manen dut gak hna khetâ hofuc, me me löng hia Aten ta je hnyei : ke iny möt bi

únyi hnyi hnyimen liona. 18 Ke ame he Than ka omeli nya únyi hnyi ta je huliwa hia thithö ae kong, ke e ame he ka omeli nya ke ne o but ka hnyi dokhon dökhu ethö hnyi drany : e so adre me ogânâ e nyiele nyiele balua. Amen.

19 Anyik talofa kö Perisila me Akula, me lap anyi Onesiforo. 20 A laba biju Erato hnyi Korinito ; ke oge me hnö Trofimo e Mileto, ke a mok. 21 Hwege thö he ka o kõnya e me tiga ca o hunâ ae megic. Ame itolafa möu Eubulo, me Pudens, me Lino, me Kelaudia me je liamekeiny hia thithö.

22 E so e unyin hanom Than. E so e unyibun ibetengjö baû.

TUSI ANYI PAULO KÖ

TITO.

HNyimakan 1.

INYA Paulo athnyabainy Khong, me aposetolo anyi Iesu Keriso, hoton labageju anyin tavat a úc' ödra Khong, me hna wâhmakhmetoâ hnathu hoton hwakecin ae úcú me Khong, 2 hnyi hna gejon möt ame ca ba balua, waleji hna ha bánâ adrem balua hnen Khong at ae ca khana he ka thoi ; 3 ke ame omanená hwan hofuc hnyi anyin je úen, ge hna khetâ, waleji adre me hna kõnya hoton hna húna ge Khong At a omeli ötä ; 4 oge me sihnalimen kö Tito, a hing nõkuk hnyi labageju a khaca bongon : E so e unyâm ibetengjö baû me hnabic únyi ge Khong a Kamen, me Keriso Iesu At omeli öta.

5 Oge me hnö u hnyi Kerete can ang, a u me he bi ha oumo ta je huliwa adre me tiga ca ányâ, me otílâ wahingat hnyi ta je taun, helâ me hnök hna húna köu ; 6 e ka hu ke at ae ba hnyikongon, a khaca thibi áiân, ke hu lakon ödrin e labageju, k' ödrin e ca lung kong hnyi hwakecin khâlânden me ca úling. 7 Anyin ae úcú ka pisop he ka ba hnyikongon, helâ me at huliwa ka Khong ; at ame ca újong, k' ame ca ie hmönyin, k' ame ca ijem gánâ waina, k'

ame ca úkúc, k' ame ca hwenhmiâ mone ; 8 ke so bi at ame betenge ka ta je atkanyua, at ame hnyokâ únyi ae so, at ame hnyokâ wisa, k' ame owisa wisa, at ae kap, k' ame ka hom úhnyúkongo e bi ; 9 at ame kât hmâ hofuc ae hnathu, helâ me hna ná, me me khana he ka únö hna úne hnân melen, me ohmehmelâ tavat adre me ivinö.

10 Anyin e hu tavat ae se hia adre me ca úling, tavat fuc baû me iyawö, ke ti nua bi ge tavat adre peritomonâ, 11 e úcú he ka hlöng je hnyimödra ; tavat adre me wia monoâ ta je hnyaba hia, me únö ta je únyi ae ca úcú bi, me me hu gadra ta únyi. 12 Haba ke at gadra, a anyidra ke perofeta, ame ha ka habe, Haba at Kerete, me ödra tavat thoi bala, me ta je meno úkúc ae kong, me tavat hwenhmiâ ae höcö huliwa. 13 E hnathu hna ha e. Anyin a wale u ma hwege n' ödra, m' adre me he ka so but hnyi labageju, 14 me ca he bi ka kap ta je vekhet anyin at Juda, me ta je hna húna hnen tavat adre hia but saú únyi hnyi hnathu. 15 E kalaöt ta je únyi hia ka tavat ae kalaöt hnyok : ke haba tavat ae ikiki je hnyekudra me ca labageju, me ba ke únyi ae kalaöt ködra ; anyin ae ikiki but je oúnykúmidra me anyidra minya

únykúm sa. 16 Adre me labö ha, ka habe, e khan' ödra but Khong; ke adre me ivinöä e bi ge anyidra ta je huliwa, ke ödra tavat ikiki, me ca úling, ke ba ke huliwa a khaca ae so a ödra úcu ka hnyin.

HNYIMAKAN 2.

KE hamâm he ka ha ta je únyi ae úcú me hna úne hnân melen: 2 ka habe, hamen wahingat he ka hmákâ, me hnyokâ wisa, me wâ wia, me hwege hnyi labageju, me ibetengiö, me hokhnyok. 3 Ke helâe minya wasohmeca, he ka hwakecin ae úcú me Khong, ca tavat úhaiö, ca tavat adre hom hwenbâ ge waina ae gan, ke so bi tavat únö ta je únyi ae so; 4 m' adre me he ka ná wia omomo hmai he ka ve hnyokâ laöïödra, me hnyokâ lakudra, 5 me hnyokâ wisa, me kalaöt hnyekudra, me tavat huliwa hnyi hnyaba, me hwakecin ae betenge, me löng hoton laöïödra, e me ca he ke at ka haikongo bi hofuc hwan Khong; 6 helâe minya ge wahidróu sihwegi ödra he ka únykúme wia: 7 omanenö u thö hnân tulutiny ta je huliwa ae so, hnyi ta je únyi hia; e so e manen bi hwakecin ae fáfâ hnyi hnâm hna úne, me únykúme wia, 8 me hofuc ae metâ, ke ca khan' ödra he ka haikongu ödra; me me hmehma but at ame úö bi únyi, anyin ae ba ke únyi ae monu hnân he ka hai öta. 9 Sihwegiä thö ta je athnyaba he ka löng hoton latuhödra, me he ka osenyini ödra hnyi ta je únyi hia thithö; me ca thu hwan bi; 10 ke ca hwenenöu bi, ke so adre me omanenâ but hwakecin ae hnathu me so; m' adre me he ka ohmanenangâ hnyi ta je únyi hia thithö hna úne anyin Khong At omeli öta. 11 Anyin a manen dut ibetengiö baú anyin Khong, wale ame hom möt ka tavat hia thithö, 12 ame n' öta, m' ate me he ha höciâ hwakecin ae ca úcú me Khong, me ta je weny hmeledrany ae monu, ke ate me he bi ka labö únykúme wia, me ányâ hwakecin ae wisa, me hwakecin ae úcú me Khong hnyi möt ang; 13 me halubahingen geju ae hnahic, me he ka manen dut hmanenanginy Khonguta ae beónua me At omeli öta Iesu Keriso; 14 waleji at a hamen ham e hnân hobi köta, me me he ka úcú öta únyi hnyi ta je hulö hia thithö, me ányâwia hnân hobi kâu tavat hnân athnyabainy bi, hnyat ae hwege ka hnyi ta je huliwa ae so.

15 Ha thö ta je únyi eang me sihwege

me ná hnyi musi hia thithö. E so ame ca he ke at ka hâkoti u.

HNYIMAKAN 3.

OÚNYKÚMI ödra a g' adre me he ka löng hoton ta je than, me tavat musi, me he ka úling, me laba penapena ka hnyi ta je huliwa hia ae so, 2 me ca he ka haikongoâ bi ke at, ke ca iwatretra bi, ke so bi he ka ilimuk, me omanenâ hia hwakecin ae menyik ka tavat hia. 3 Anyin a öta ta je monu ehac, me tavat ca úling, me tavat adre iyawâ, me bi athnyabainy ta je weny ae kong, me ta je únyi hnân osenyinâ unyin a ve bongon bi, ate me laba hnyi hnyok ae kong me ihunyinköu, tavat hnân ikikiâ, me tavat adre me úikikiköu. 4 Ke ame manen dut hwakecin ae betenge anyin Khong At ame omeli öta, me anyin ibetengiö ka tavat, 5 e ame omeli öta ca únyi hnyi ta je huliwa hnyi hwakecin ae wisa ate me ka ányâ, ke únyi bi hnyi anyin ibetengiö baú, únyi ge hna hneü wale he ka hnokoâ hmetu me hna ohâtâ ge Hanu Kap, 6 waleji e ame hingâlâ gánâ köta ga Iesu Keriso At a omeli öta; 7 me me hwajekhöüta hoton gejon ka hnyi möt ame ca ba balua, anyin adre me haiwis' öta únyi ge anyin ibetengiö baú. 8 E hnathu hofuc e, ke e bewek u me he ka ha hwegiä bala hofuc e, m' adre me hwege thö he ka ányâ ta je huliwa ae so hnen tavat adre me labageju ka Khong. Wale ta je únyi ae so me hu troban ka tavat: 9 ke úsâkâtüö u but me ta je ivinö ae monu, me hna áu ta je dö, me iwatretra, me ivinö ge hnanyibu; anyin ae ba troban, me únyi baú bi e. 10 Obâ but at ame imouköu, hwaban hna okaca me olo ná e; 11 anyin ae khandö u a ga saü but at helâe, me ányâ hulö, ke e ame ka hangâ e bi.

12 Iny ka he ka kunö Aretama köu, ame ne Tukiko, hwege thö he ka ie o könya hnyi Nikopoli: anyin ae mou but hnyi hnyekuk a oge me he ka laba e hnyi huna ae megic. 13 E so u me he ka hadruâ he anyi Zena at ame únö hnanyibu, me Apolo. me me ca he ka hia gadru ke únyi. 14 E so e he minya tavat unyita he ka ná ka ányâ ta je huliwa ae so, me me hu ta je únyi ae únyi hnathu, wâ adre nye ca wa but.

15 Adre me italofa möu ödra hia a tha ödra mönya. Anyik talofa ködra adre me betenge gahmun hnyi labageju.

E so e unyibun hia thithö ibetengiö baú.

TUSI ANYI PAULO KÖ
FILEMONA.

INYA Paulo adre me cö nya can Keriso Iesu, me Timoteo ke liamekeiny möta, öhmü me sit kö Filemona a önykumihmu, ke at ame tha huliwa möhmü, 2 me kö Afia a ke hanihmu, me kö Arekipo at a tha hien möhmü, me ka ekalesia hnyi hnyabam: 3 E so e unyibun ibetengiö baü, me hnabic ünyi ge Khong a Kamöta me Than Iesu Keriso.

4 Inya oge me ole bala ka Khonguk, me haiö u hnyi hijik ta je hic, 5 anyin oge me löng ut änyâm ibetengiö, me änyâm labageju ka Than Iesu, me ka wakap hia thithö; 6 me me hu troban ge tha hnyok hnyi änyâm labageju, hnyi hna wâhmakhmeto ta je ünyi hia ae so eü hnyi hnyibun ka hnyi Keriso Iesu. 7 Anyin ae hu gak senyin me kaukaha ae gan hmâ ünyi ge änyâm ibetengiö, anyin a ünyi gam liamekeiny mönya, a g' adre hia but okahwa je hnyekon wakap.

8 Anyin a wale, eja ke ne a ne hu gak hwege hnyi Keriso he ka hûna köu ta je ünyi ae ücü, 9 oge me he ka sumatö u hnyi ibetengiö, inya Paulo a hingat, adre cö nya walang ang can Keriso Iesu: 10 inya oge me khöüö Onesimo köu a nökek, waleji oge hnokoâ ke inya hnyi uma ce at, 11 waleji ae ca ünyi hnathu köu ehac, ke walang ang e ünyi hnathu but köu mönya minya: 12 ke oge me kunâ hmetu e köu, ke wale bi e, a hing hnyekuk bi: 13 waleji oge me bewek he ka hom behânâ me me tha e mönya, hnân hwabâm he ka bi athnyabaik hnyi hna cö

nya can üthumetu ae so; 14 ke oge me ca bemâdrâ ke ünyi, e ka tiga ca khatö nya hnyekom; me me ka hamen bi kû änyâm so, ke ca hnyi musi bi. 15 Anyin adre ohia e unyâm la, hnyi ke ong ün, me me he e unyâm bi nyiele balua; 16 ca helâ hmetu me athnyaba, ke beönuâ hon athnyaba, ke liamekeiny bi a önykümita, ae ünyi hnathu könya, ke ti ünyi hnathu köu, hnyi unyin me Than minya. 17 Anyin a wale u ka ünyküme me ihumâm inya, më kap ju e helâ me inya. 18 Ke ame ne hia but okongu u hnyi ke ünyi, ke hu änyâm ünyi gan, hna but ünyi e könya; 19 inya Paulo oge me sihnalimen e ge hnyamök, a oge me he ka bi hwaban: ke oge me ca he bi ka ha köu, ka habe, e ücü köu he ka hnö u bi könya. 20 Eke, liamekeiny lö, osenyini nya thö ge Than: okahwa thö hnyekuk unyin Keriso. 21 Oge me set köu, anyin oge me labageju u me he ka ling nya, ke e khanö nya a u me he ka änyâ nua hon hnök hna ha. 22 Ke wale minya eang penapena thö ke dok m' oge me he ka laba hnyin: anyin a inya oge me gejon adre me he ka hnö nya köbun ünyi ge maniny hijibun hic.

23 Ame italofa möu Epafera, wale adre tha cö nya më, can Keriso Iesu; 24 ke ame italofa möu Mareko, me Aretako, me Dema, me Luka, hnyat ödrin e tha huliwa mönya.

25 E so e hnyi hanubun ibetengiö baü anyin Tuhöta Iesu Keriso. Amen.

TUSI ANYI PAULO APOSETOLO KA
AT HEBERU.

HNYIMAKAN 1.

HABA Khong, at ame ha adrem ka lakamöta a deny ta je perofeta hnyi je hofuc ae ve bongon, ke je deny ae ve

bongon, 2 me ame ha köta hnyi je bongang a biliny a deny Nokon, at e ame wia me atö, me me he ka hu gan ta je unyi hia thithö, k' ame op ta je dö hia ünyi gan; 3 ke e thibi hadröngöcin anyin hmanenang

ke at a ti we e, k' ame otílâ hmâ ta je únyi hia thithô ge hwan hofuc ae man, ke a hia but hneú degecâ ta je hulö, me e ame laba ju hnyi ke keihen a metân Beönua ethö; 4 ke adre me önua e hon ta je angela, anyin ae hu gan ien ae nua hudrin. 5 Anyin a ie ke angela e ame ha kâu, ka habe,

U thibi Nökuk

Oge me hnöku u hnyi bong ang ?

Wale hmetu ang, ka habe,

Oge me he bi ka Kamen,

Ke e ame he bi ka Nökuk ?

6 Ke wale hmetu ang hnyi úen e ame oâ nokon a bân ka hnyi hmeledrany, me e ame ha, ka habe, E so ame he ka khudrung kâu ta je angela hia anyin Khong. 7 Ke e ame ha ge ta je angela, ka habe,

E ame wia anyin ta je angela helâ me ta je hanu,

Ke lathnyabainy helâ me bâhlân meic :

8 ke e ame háâi Nokon, ka habe,

Haba ányâm theron, Khong lö, me nyiele nyiele balua ;

Ke haba uciny hwakecin ae hnathu, me wale thibi e uciny dokhom dökhu.

9 U je hia but hnyokâ hwakecin ae wisa, me höciâ hwakecin ae kong ;

Anyin a wale a hia but hú u hnen Khong, a Khongom,

Ge wakacoiny senyin hon ta je labanâm.

10 Ke haba khaca,

Than lö, u je hia but bi taben hmeledrany hnyi can,

Ke haba je drany, me huliwa ling anyin li hnyamâm :

11 Ame he ka hia bi ; ke u me he bala bi u ka tethmâ :

K' ame he ta je únyi hia e ka bobot helâ me úkhaú ;

12 Ke u me he ka vhec ta je únyi e helâ me úkhaú beú,

Ke helâ me úkhaú, me me ke bongon bi :

Ke ka u bala bi u,

Ke ba obiny ta je hunaiâm.

13 Ke ie angela e ame ha gan hnyi je úen hia, ka habe,

Labu ju hnyi ke keihen a metök,

Ke ne o but oge me he ka wia ta je iwahnaihmiony möu me hnân taben li cam ?

14 Hawa, ca je hanu adre bi athnyaba ödra hia, k' adre kun' ödra he ka bi athnyaba hobi ködra adre me he ka hu möt bi ?

HNYIMAKAN 2.

A NYIN a wale, e úcú köta he ka öunyi-hnatho hmönyinâ ta je únyi waleji adre löng, wâ e nye haúhaú but gata. 2 Anyin a ne hmâ but hofuc adre ha a deny ta je angela, ke adre bi hwaban, e me úcú ka tavat adre me hanyáúâ hnanyibu, me ca úling ; 3 ate me he ka kâmâu ka kec möt ut, öta ka ca öunyihnatho möt ae nua helâe ? waleji a bân Than ka ha, me ame ohnatho köta hnen tavat adre hnyi löng : 4 ke ame munyi ohnatho m' ödra Khong ge ta je haten, me ta je úöman, me ta je huliwa ae man ae ve bongon, me ta je bwihlany anyin Hanu Kap, helâ me weny.

5 Anyin a e ame ca ham ka ta je angela he ka müsö hmeledrany ame he ka o nyiele, wale öhmun e ha gan. 6 Ke ame hia but ohnatho hnyi ke hofuc hnen ke at, ka habe,

Ehö at, me u me he ka únykúme kâu !

Ke nokon at, m' u me he ka senâ e ?

7 U je wia e me omi úhnyúkong hmelen ta je angela ;

U je obicâ e ge hmanenang me hna ogânâ,

Ke u je otílâ e hon ta je huliwa anyin li hnyamâm :

8 U je ip ta je únyi hia thithô hnyi hmelen li can.

Anyin a haba hnyi hnen hna ip eú hnyi hmelen ta je únyi hia, me ba biju ke únyi adre me ca ip hnyi hmelen. Ke walang ang, öta tiga ca wâ ta je únyi hia eú hnyi hmelen. 9 Ke ate me ö Iesu, at adre hia but wia e me omi úhnyúkong hmelen ta je angela, k' adre me obicâ ge hmanenang me hna ogânâ, anyin a e ame hom vecin mok, me me vheno mok hobi kâu tavat hia thithô hnen ibetengö bâu anyin Khong. 10 Anyin ae úcú kâu, wale at a hobi kâu ta je únyi hia, ke únyi gan ta je únyi hia, hnyi hnen hna hom lakon a ödra se hia ka hnyi hmanenang, e úcú kâu he ka obekhotâ tuhan anyidra möt hnen ta je vec. 11 Anyin a haba at ame okabâ, m' ödra hia minya adre okabi ödra, me únyi ge at a khaca, anyin a wale, e ca hmehma he ka hai ödra, me liamekein, 12 ame ha, ka, habe,

Oge me he ka omanená iâm ka je liamekeiny mönya,

Oge me he ka khumöng olungi u hnyi wanben ekalesia.

13 Wale hmetu ang, ka habe, Oge me he

ka labageju kâu. Ke walang khaca, ka habe, Ô nya bi ang me lakon a ham kõnya Khong. 14 Ke haba lakon, me adre me khau' ödra ge viny me dren, awe, helâe minya e ame munyi helâe; me me he ka obia hnen mok at ae tren maniny mok, wale diabolö; 15 me thong ödra but a tavat adre me hom úhnyûkongu ödra hnen outen mok hnyi bongudra ta je bong hia thithö. 16 Anyin ae hnathu e ame ca hadruâ ta je angela, k' ame hadruâ ta je mâtrâni Aberahama. 17 Wale me ka hamen e he ka wia e helâ me je liamekeiny mē hnyi ta je únyi hia thithö, me me he ka at bihut ae nua ae betenge me hnathu hnyi ta je únyi anyin Khong, me me he ka hut bi, hnân ohia ta je hulö anyin tavat. 18 E úcú kâu he ka hadru ödra adre cubic ödra, anyin a e ame hom vec hnyi hna cubec.

HNYIMAKAN 3.

A NYIN a wale hnyat me lakeiny ae kap lö, hanen tavat adre me hawâ únyi hnyi drany, únykúme ju Aposetolo me At bihut ae nua hnyi anyita hmi, a Iesu; 2 waleji ame hnathu ka at a otilâ e, helâ me Mose minya hnyi hnyaban hia thithö. 3 Anyin adre haiâ e, a e úcú he ka ogânâ e hu Mose, helâ me at ame otilâ uma, ae hu hna haisoâ at e, hon uma. 4 Anyin ae hu tavat adre me otilâ ta je uma nia; ke Khong at ame op ta je únyi hia thithö. 5 Ke e hnathu hmönyin Mose hnyi hnyaban hia, helâ me athnyaba, hnân ohnathoâ ta je únyi adre me he ka ha nyiele; 6 ke so bi Keriso ame musu hnyi hnyaban, helâ me nokon; ke haba öta bi hnyaban eling, öta ka he ka kât hmâ ke ne o but obiny tang hwege me senyin hnyi geju. 7 Anyin a wale helâ me hna ha hnen Hanu Kap, ka habe,

Hnyi bong ang, öbun ka he ka löng ifucin,

8 Ca onâkâ bi je hnyekubun, helâji me hnyi hna ohmönyinâ,

Waleji hnyi bonginy úcúbic hnyi hnyebuba,

9 Adre cubic nya lakamöbun hnyin, me elâm bonguk,

Me wâ anyik ta je huliwa hnyi ta je huna a fâte.

10 Anyin a wale e hmak hnyekuk ge dö eling,

Haingök, ka habe, Ödra monu bala eü hnyi hnyok :

Ke ca khan' ödra dek ta je gethen ;

11 Me oge me khemanyik waleji hnyi anyik hmönyin, ka habe,

Adre me ca he ka dit ka hnyi hnök hna menâ.

12 Öbun áu hnyat me lakeiny lö, wâ e nye hu eü hnyin ke at gabun hnyok ae kong me ca labageju, ame óusakâú' öbun me Khong ae möt : 13 ke úsihwegi öbun köu ju hnyi ke bong me ke bong, k' adre tiga ba bi, ka habe, Hnyi bong ang; wâ e nye okhötâ hnyekon keihen gabun ge tang iya-wöiny hulö : 14 anyin adre me wi' öta m' ate me lahanen Keriso, öta ka he ka kât hmâ hwakecin anyita labageju hnyi can ke ne o but hnyi obiny : 15 k' adre tiga ha, ka habe,

Hnyi bong ang, öbun ka he ka löng ifucin,

Me ca onâkâ je hnyekubun, helâji me hnyi hna ohmönyinâ.

16 Anyin a ia ödra, waleji adre me hnyi löng, me ohmönyinâ e? hawa, ca ödra hia waleji Mose ame hom úhedra Aigupito?

17 Ke ie tavat ame hmak hnyekon ködra hnyi je huna a fâte? hawa, ca ödra tavat adre me ânâ hulö, waleji a kölu but je unyidra eü hnyi hnyebuba? 18 K' ame khemanyin kö ia, a g' adre me ca he ka dit ka hnyi hnen hna menâ, hawa, ca ködra a hnyat adre me ca úling? 19 Me ate me wâ but a ga ca khan' ödra he ka dit ka hnyin, anyin adre me ca labageju.

HNYIMAKAN 4.

A NYIN a wale e hu but gata hna ha bánâ he ka dit ka hnyi hnen hna menâ, me so ate me he ka ot, wâ e nye ca úcú bi keihen gabun. 2 Anyin adre hia but khetâ köta je úthumetu ae so helâ m' ödra : ke ba troban ködra hofuc adre me löng, anyin adre me ca úhújâkôu ödra hnen labageju me tavat adre me löng. 3 Ke haba öta tavat ate me labageju, me ate me dit ka hnyi hna menâ; helâ me hnen hna ha, ka habe,

Helâji me hnök hna khemanyik hnyi anyik hmönyin,

Me adre me ca he ka dit ka hnyi hnök hna menâ :

ke so bi a um dö ta je huliwa hwân hnyi hna bi taben hmeledrany. 4 Anyin a e ame ha hnyi ke hofuc, ame ha ge bong a seveniny, ka habe, Ame menâ Khong hnyi

bong a seveniny hwaban anyin ta je huliwa; 5 ke wale hmetu ang, ka habe,

Adre me ca he ka dit ka hnyi hnök hna menâ.

6 Anyin a wale, adre ip bala bi a g' ame he keihen ka dit ka hnyin, ke haba hnyat adre bödra ka khetâ úthumetu ae so ködra adre me ca dit can anyidra ca labageju, 7 me e ame thu ke bong, k' ame ha a deny Davita, hwaban ta je huna ae se, ka habe, Hnyi bong ang, helâ me hna ha ehac, ka habe,

Hnyi bong ang, öbun ka he ka löng ifucin,

Ca onâkâ bi je hnyekubun.

8 Anyin a ne hia but omen' ödra Josua, me, ame ne ca he hmetu bi Khong ka ha ke bong. 9 Anyin a wale adre ip bala bi hna menâ helâ me sabbath hobi kâu laten Khong. 10 Anyin a haba at ame hia but dit ka hnyi anyin hna menâ, me e ame hia but menâ minya hwaban anyin ta je huliwa, helâ me Khong hwaban anyin ta je huliwa. 11 Anyin a wale e so ate me hwege he ka dit ka hnyi hna menâ eling, wâ e nye ü but ke at e ka he ka úcúcubongo ca úling eling. 12 Anyin ae möt hofuc hwan Khong, me hwege huliwa, me so hwan hon hele vat a lo homakan, ame dâ me subâ luâ but hnyok me hanu, me hna hújö je jeien unyin me önyen jeien, ke ame ie wâ cicöâ ta je únykúme me ta je weny hnyok. 13 Ke ca iyong bi ke únyi adre op hnyi hnyimakan: ke ame ve he thu me manen wia but ta je únyi hia thithö ka hnyi li emakan at, wale ate me he ka ve omanenâ kâu hwakecita.

14 Ke hu but gata hing at bihut ae nua, at ame hia but vheno drany ethö, wale Iesu a Nokon Khong, anyin a wale e so ate me kât hmâ anyita hmi. 15 Anyin ae ca hu bi gata at bihut ae nua at ame ca hnyi vec hnyi anyita ta je sēnyin; ke so bi at adre hia but cubec ge ta je únyi hia thithö helâ möta, ke ba bi anyin hulö. 16 Anyin a wale e so ate me he ka hwege úhakekenyâ theroniny ibetengiö baú, m' ate me he ka kap ibetengiö, me wâ ibetengiö baú hnân he ka hadru' öta hnyi üen ae úcú.

HNyimakan 5.

A NYIN a haba tavat bihut hia ae nua adre úca unyin tavat, me adre otílâ hobi kâu tavat hnyi ta je únyi anyin Khong, me me he ka hudo ta je bwihlany

me ta je hut can ta je hulö: 2 at ae khana he ka huliwa menyik ka tavat ae ba metâ gadra, me tavat ae monu, anyin ame igigilöa e minya hnen ta je sēnyin; 3 ke can e, me úcú kâu he ka hudo can ta je hulö anyin tavat, mē minya bi. 4 Ke ba at ame hom bâúâ hanymen eling ae meic, ke so thibi at ame hawâ hnen Khong helâ me hna hawo Arona. 5 Waleling me ca hamen Keriso he ka ogânâ e me ka wia e me me at bihut ae nua, ke so bi hnen at eji ame ha kâu, ka habe,

U thibi Nökuk

Oge me hnöku u hnyi bong ang:

6 helâ me hnen hna ha hnyi ke hofuc, ka habe,

U thibi at bihut nyiele balua,

Helâ me bongu Melekisedek.

7 Ke haba hnyi ta je bong a e tiga at hnyin, me e ame hic me khöü me tenge hwege, ke hu deköien, ka at ae khana he ka omelö e únyi hnyi mok, me adre me löng kâu, anyin a e outen Khong, 8 eja ke ne a ne Nokon e, me adre me ná e he ka úling hnyi ta je únyi e ame hokhnyokâ; 9 ke adre me obekhötâ e, me adre me wia e hnân hwecin möt ame ca ba balua ködra hia adre me löng kâu; 10 a otílâ e hnen Khong me me at bihut ae nua helâ me bongu Melekisedek.

11 E hu but gahmun ta je hofuc ae se hia he ka haiâ e, ke hmak bi he ka ha bongon, anyin a öbun bec ka löng. 12 E úcú köbun he ka úne ka tavat anyin ae kuebun dut, ke so bi e únyi hnathu a g' ame he hmetu ke at ka n' öbun ge ta je taben hna úne a bân hnyi hofuc hwan Khong; k' öbun úcú hmetu he ka ic debai, ke ca he ka han jeú bi. 13 Anyin a haba at ame ic debai, me ca metâ bi hnyi hofucin hwakecin ae wisa; anyin a e mendreng. 14 Haba jeú, me hobi kâu tavat ae gan, wale tavat a ödra, khenen huliwan hnyok he ka wâ cicöâ so me kong.

HNyimakan 6.

A NYIN a wale, e so ate me umo háia hna úne a bân ge bongon Keriso, m' ate me he bi ka hnyi bongon ae bekhöt; ke ca he hmetu bi ka ip taben ietra hnyi ta je huliwa ae mok, ke labageju ka Khong, 2 ke bongon bapataiso, ke hna ip hnyam, me möt hmetu únyi hnyi hna mok, me hna owisa nyiele balua. 3 Ke ate me he ka ányâ e, e ka weny Khong. 4 Ke haba

tavat adre bân ka omelamá, waleji adre me drem cubecá bwihlany únyi hnyi drany, me hnyi kap Hanu Kap, 5 me drem cubecá hofuc ae so anyin Khong, me je maniny dö ame he ka o, 6 ke adre me kölu hmetu, me pason hmetu he ka ohâti ödra ka hnyi ietra; anyin adre me osatauroâ hmetu bi ködra Nokon Khong, me ohmehma manená e. 7 Anyin a haba kânâ, me ame ijem we ame laba ta ka hnyin, k' ame öküâ jeû ae úcú ködra adre me belökâ e, me hu but gan hnahicé únyi ge Khong: 8 ke ame ne öküâ úö ae údedö, me watetaföcö, me adre me degec; ke hakekeny jut ka hnyi hnaúhangö; ke haba hnyi obiny, adre me he ka thong degecâ e.

9 Ke hnyat a oúnykúmik lö, öhmun e únykúme gabun ta je únyi ae so hon e, me ta je únyi ae hu möt hnyin, ke so bi öhmun e fuc helâe: 10 anyin a ca hwakecin ae ca wisa Khong, me me he ka hnying anyibun huliwa, me ibetengió öbun e omanená ka hnyi ien, wale hnyi hnöbun hna bi athnyabainy wakap, me labö bi athnyabaidra. 11 Ke e wehmun m' öbun e he ka ve omanená tang hwege eling ka hnyi gejon ae gan hmâ ke ne o but obiny: 12 m' öbun e ca he ka tavat laba baú, ke so bi he ka huu hotudra ae hu gadra ta je hna ha bânâ.

13 Ke hnyi úen Khong ame ha bânâ kö Aberahama, me e ame ka khemanyin gan bi, anyin ae ca khana he ka khemanyin ge ke at ae nua hon e bi, 14 haingon, ka habe, E hnathu oge me he ka ti ohnahici u, me ti osehia je mátrânâm. 15 Ke hwaban hnen hna hok hnyok me ame hu gan hna ha bânâ. 16 Anyin a hwakecin tavat he ka khemanyin ge at ae gan: ke haba úhihi-nyköu me wale obiny hnân ohnatho hnyi anyidra ta je iwatretra hia thithö. 17 Waleling me me weny Khong he ka ti omanená ka ta je mátrániny hna ha bânâ, anyin musi a g' ame ca wia, me e ame bi hanen ju ge khemanyin: 18 m' ate me he ka hu hnân sihwegi öta, ge lo li únyi ae ca khana he ka wia, ke ca khana Khong he ka thoi hnyin, wale öta ate me kec ut he ka kât hmâ gejon adre ip hnyi hnyimaköta; 19 wale gejon ate me hu, helâ me iuniny hanu, ame hnathu me hmâ ke ame dit eiö hnyin hnyeule adre bi singiny; 20 waleji ame didrö kâu Iesu at a bân hobi köta, anyin adre me wia e me me at bihut ae nua nyiele balua helâ me bongu Melekisedek.

HNHYIMAKAN 7.

A NYIN a haba Melekisedek eang, tuhan Salema, at bihut ka Khong ae Beö-nua, at ame úkhanö me Aberahama úheny hnyi hna kot je than, me ame ha hnahicâ e, 2 ke haba Aberahama ame ham kâu ke keihen a libenyitainy hia (haba bongon ien a bân adre wia, me, Thaniny hwakecin ae wisa, ke hwaban dö e, Thaniny Salema, walang bongon, Tuhan úsoköu; 3 ae ba kamen me hinyen, ke ba minya deö lakiben, ke ba minya hwân ta je bonginy, ke ba minya obiny möt, ke adre oúco me Nokon Khong), me, e at bihut bala bi.

4 Ke únykúme ju öbun úganiny at e, waleji a ham kâu Aberahama, a pateriaka, ke keihen a libenyitainy hna söh. 5 Ke haba je mátráni Levi, tavat adre me kap hanymen at bihut, me e hu hnanyibu ködra he ka kap je ke keihen a libenyitainy únyi ge tavat hoton hnanyibu, wale únyi ge je liamekeiny m' ödra, ke úhedra únyi hnyin unyi Aberahama: 6 ke haba at a ca tha deö lakiben m' ödra, me e ame kap únyi ga Aberahama ke keihen a libenyitainy ta je únyi, ke e ame hahnahicâ e at ae hu ta je hna ha bânâ. 7 Ke ca hnân ivinöâ bi a g' ame hahnahicâ at ae úhnyú-kong hnen at ae beönuâ. 8 Ke haba walang, ame kap je ke keihen a libenyitainy hnen tavat adre me he ka mok; ke waleji ke at adre ohnathoâ a e möt bi. 9 K' ame ne úcú la ka ha, ka habe, Haba Levi, at ame kap je ke keihen a libenyitainy, me wale at ame ham ke keihen a libenyitainy a deny Aberahama; 10 anyin a tiga e hnyin unyin kamen, hnyi úen eji e ame úkhanö me Melekisedek.

11 Anyin a wale a ne bekhöt so bongon at bihut a at Levi a hia but kap hnanyibu hnen tavat hmelen e), me hnân eú he ka o ke at bihut helâ me bongu Melekisedek, k' adre me ca háia e hoton bongu Arona? 12 Adre me wia hanymen at bihut, anyin a wale e ti úcú minya he ka wia hnanyibu. 13 Anyin a haba at adre me ha gan ta je únyi eang, me hanen ke tribu, ke ba at únyi hnyin ehac ame tot hnyi taben hut. 14 Anyin ae manen a ga o but Tuhöta únyi hnyi Juda; ke ba hofuc a ha Mose ge hanymen at bihut hnyi tribu eling. 15 Ke ti manen gan hmâ but, anyin ame o ke at bihut helâ me bongu Melekisedek, 16 wale at adre me wia hoton

maniny môt ame ca ba balua, ke ca hoton hwakecin hnanyibuiny unyin: 17 anyin adre me ohnathôa gan, ka habe,

U thibi at bihut nyiele balua

Helâ me bongu Melekisedek.

18 Ke adre me ohia hnanyibu a bân anyin a e sēnyin ke ca ūnyi hnathu, 19 (anyin ae ba ke ūnyi ame obekhotâ hnen hnanyibu), m' adre me oâ gejon ae beōnua, wale deny m' ate me hakekeny ka Khong. 20 Ke adre me ânyâ e ke adre me khemanyinâ, 21 (anyin adre hia but wi' ödra hnân at bihut, ke ba khemanyinâ; ke adre me wia e ge hna khemanyin hnen at ame ha gan, ka habe,

Haba Than ame khemanyin k' ame ca he bi ka ietra,

A u thibi at bihut nyiele balua):

22 ke helâe minya adre me wiö Iesu hnân haten hnathuiny ūhihinykôu ae beōnua.

23 Ke adre me osehia tavat bihut, anyin adre me ca tethmâ bi can mok a ödra: 24 ke hu gan hanymen at bihut ame ca he ka wia, anyin a e at ae tethmâ nyiele balua. 25 Anyin a wale e khana balua he ka omeli ödra tavat adre me he but ka Khong a deny e, anyin a e at ae môt balua he ka khôû hobi ködra.

26 Anyin ae ūcû köta at bihut eling ae nua, ae kap, ae ba hulö gan, me ba hnyikongon, me ūsâkâtö me tavat adre me anyâ hulö, ke adre öbeōnua hon drany; 27 ke ca ūnyi hnathu bi kâu hnyi je bong he ka helâ me tavat bihut eling ae nua he ka bân ka hudo can anyidra ta je hulö bi, ke biliny bi hobi kâu hulö anyin tavat; anyin e ame okhaca ânyâ eling, hnyi hnen hna hudo e bi. 28 Anyin a hnanyibu ame otilâ tavat ae sēnyin hnân tavat bihut ae nua; ke haba hofucin hna khemanyin, waleji hwaban hnanyibu, me ame otilâ Nokon adre obekhōta nyiele balua.

HNHYIMAKAN 8.

KE walang hing önyen ta je hofuc öhmun e ha, ka habe, E hu but gata at bihut ae nua helâe, waleji at ame laba hnyi ke keihen metân theron anyin Beōnua hnyi drany, at huliwa hnyi dok ae kap, 2 me hnyi hing uma menâ a otilâ hnen Than, ke ca hnen bi at. 3 Anyin adre otilâ tavat bihut hia ae nua, m' adre me he ka hudo ta je bwihlany me ta je hut: anyin a wale, e ūcû kâu he ka hu ke ūnyi minya hnân he ka hudo. 4 Ke ame ne laba eang

hmeledrany, ame ne ca he ka at bihut, anyin ae hu tavat he ka hudo ta je bwihlany hoton hnanyibu; 5 tavat adre me bi athnyabainy haten me hmenon ta je ūnyi ethö, helâji me hna nö Mose ge Khong hnyi ūen e ame he ka oumo but uma menâ: anyin a haingen, ka habe, O u âu me ânyâ ta je ūnyi hia thithö hoton tulut adre omanenâ köu hon bucen. 6 Ke walang ang e hu but gan ke huliwa ae nua, helâe minya e at ame öusoköu hnyi ke ūhihinykôu ae ūnyi hnathu, waleji adre hia but bi taben hon ta je hna ha bânâ ae nua. 7 Anyin a ne ba kongon ūhihinykôu a bân, me adre me ca he ka heleû hnen loiny. 8 Anyin a e ame haikongu ödra me ha, ka habe

Haingen Than, ka habe, Wâ bi ame he ka o ta je bong,

Me oge me he ka ânyâ ūhihinykôu ae teb ūnyi me lap anyin Isaraela me lap anyin Juda;

9 Ca helâ me ūhihinykôu oge hia but ânyâ me je lakamödra

Hnyi bong oge me kât hnyamödra me lili ödra ūnyi hnyi hnye Aigupito; Anyin adre me ca tethmâ hnyi anyik ūhihinykôu,

Me oge me hna degeci ödra, haingen Than.

10 Anyin a walang ūhihinykôu oge me he ka ânyâ me lap anyin Isaraela

Hwabani je bong eling, haingen Than; Oge me he ka ip anyik je hnanyibu hnyi ūnykūmenödra,

Ke sihnalimen minya hnyi je hnye-kudra:

Ke oge me he ka Khong bi ködra,

Ke adre me he bi ka lakeik:

11 K' adre me ca he bi ka ve nâ tavat ae hakekeny ködra,

Ke je liamekeiny m' ödra, me ha, ka habe, Khanö u thö Than:

Anyin ame he bi tavat hia thithö ka khan' ödra inya,

Hwân ge tavat ae ūhnyükong ke ne o but ge tavat ae gan gadra.

12 Anyin oge me he ka betenge baú ge hwakecidra ae kong,

Ke oge me ca he hmetu bi nya ka ūnykūme anyidra ta je hulö.

13 Ke haba hnyi hnen hna ha, ka habe, Ūhihinykôu ae teb ūnyi, me waleling e ame wia at a bân me me at adrem. Ke haba ūnyi ame hwân ka kueny me bobot ut, me wale ame logot he ka hia but.

HNYIMAKAN 9.

EHNATHU, haba úhinhinköu a bán, me e hu hnyin ta je hanyemen hmi, me dok ae kap, a wale hnyi hmeledrany. 2 Anyin adre me penapena ke uma mená, wale at a bán, ke e hu eiö hnyin, taben lamepa, me laulau, me areto hnán omanená; adre hwenyi ien e, ka habe, Dok ae Kap. 3 Ke hnyi hoton singiny a loiny hnyeule adre hwenyi ien, ka habe, E ti Kap; 4 ke eling taben meic gol, me tangen úhinhinköu adre tube ge gol, ke eú hnyin e kaia gol ae hu mana hnyin, me uci anyi Arona ame vhong, me li taben úhinhinköu; 5 ke e hon e li kerubi ae hmanenang ödru me tot ethö ciö taben ibetengiö; e ca khan' öhmun he ka ha wia ta je únyi e walang ang. 6 Ke a hia but penapena heláe ta je únyi e, me ame dit bala thö tavat bihut ka hnyi uma mená a bán, he ka mádrá je huliwa; 7 ke haba hnyi uma mená a loiny, ame hake dit at bihut ae beónua, a okhaca hnyi huna, ame ca he baú bi ke ame hom dra minya, wale e ame hudo hobi káu bi, me ta je monu minya anyin tavat: 8 ke haba Hanu Kap ame omanená únyi eang a ödra tiga ca omanená gethen ka hnyi dok ae kap waleji k' ame tiga tot uma mená a bán; 9 wale úhóucú hnyi úen eang; waleji hnyi hnódra hna labö hudo ta je bwihlany me ta je hut, ae ca khana he ka obekhotá at ame hmi, ge anyin únykúm sa, 10 anyin a hake e thibi (ta je jeú me hnán ic me hna ósúá ae ve bongon), ta je hwakecin unyin, adre otilé ke ne o but hnyi úen he ka ohátá hmetoá.

11 Ke ame o but Keriso hnán at bihut ae nua hnyi ta je únyi ae so ame he ka o, únyi hnyi uma mano ae beónua me bekhöt, adre ca mádrá ge je hnyam, wale, a ca únyi bi eang hmeledrany, 12 ke ca únyi minya bi ge dren ta je got, me nokon kau, ke únyi ge hing dren bi, e ame okhaca dit ka hnyi dok ae kap, anyin a hia but úce möt ame ca ba balua. 13 Anyin a ne khana dren ta je got me ta je bolok, me dren nokon káu a momo adre jijingá hon tavat ae kong, a ne khana únyi eling he ka okabá ke ne o but ame obosoá unyin, 14 awe, e ca beónua bi dren Keriso, waleji a hamen hudo e bi, ae ba hnyikongon, ka Khong, únyi ge Hanu a e balua bi, he ka obosoá anyibun únykúm sa hnyi ta je huliwa ae mekiny m' öbun e he ka huliwa ka Khong ae möt? 15 Ke anyin a wale, e thibi at

úsoköu hnyi úhinhinköu ae teb únyi me me he tavat adre hawá ka kap hna ha báná wale jekhóú ame ca ba balua, anyin ae hu mok hnán bi hwaban ta je hna hanyátá hmelen úhinhinköu a bán. 16 Anyin a ne hu úhinhinköu, me ame he ka hu minya mok at ame ha úhinhinköu, me me hwádá bi. 17 Anyin ame he ka hwádá úhinhinköu hwaban mok: hawa, e únyi hnathu e ka tiga möt at ame ányá? 18 Anyin a wale adre me ca ohmá úhinhinköu a bán, e ka ba dra hnyin. 19 Anyin a hia but Mose ha ka tavat hia ta je únyi hia adre me húna hoton hnanyibu, me e ame hom dren je nokon kau, me got, tha e me köiö, me leünen mamoe ae dra, me hisop, me e ame dukáíá tusi me tavat hia thithö, 20 me ha, ka habe, Walang dren úhinhinköu, waleji a húna köbun hnen Khong. 21 Ke e ame dukáíá ge dra uma mená me ta je omjehen huliwa hia. 22 Ke wakhalet thiju ta je únyi adre me ca obosoá ge dra hnyi hnanyibu, ke ba minya hna thang ut hulö e ka ca hingölö dra.

23 Anyin a wale e úcú he ka obosoá je tulutiny ta je únyi hnyi drany hnen ta je únyi e; ke úcú he ka obosoá ta je únyi hnyi drany hnen ta je hut ae beónua hon e. 24 Anyin ame ca dit Keriso ka hnyi dok ae kap adre me ányá ge je hnyam, wale tulutiny únyi ae hnathu; ke so bi ka hnyi hing drany he ka manen walang ang hnyi hnyimakan Khong hnán hobi kóta: 25 ke ca hamen he ka osehia hudo e; helá me at bihut ae nua ame dit ka hnyi dok ae kap hnyi ke huna me ke huna, me ke dra a ca dren; 26 anyin a ne heláe me úcú káu he ka osehia vec hwán hnyi hna bi taben hmeledrany: ke walang ang hnyi obiny ta je dö adre hia but omanená e me me he ka ohia hulö ge hnen hna hamen hudo e bi. 27 Adre me ip ka tavat he ka okhaca mok, ke hwaban e úhnei; 28 heláe minya Keriso, adre me okhaca hudo e he ka vaden ta je hulö anyin tavat ae se hia, me e ame he ka olo manen ka tavat adre me halubahingen e, ke ca ha bi ge hulö, ke hnán omelö.

HNYIMAKAN 10.

ANYIN a haba hnanyibu, a hmenon ta je únyi ae so ame he ka o, ke ca tha úcú me ta je únyi eling, me pason bala he ka obekhotá tavat adre me úhakekenyi hnen ta je hut adre me hudo huyi je huna,

wale adre me labö hudo. 2 Anyin a ne helâe, hawa, adre me ca he bi ka oumo ka hudo, anyin a adre ne okhaca obosoâ tavat adre me hmi, me adre me ca he hmetu bi ka hmak hnyok can hulö? 3 Ke haba hnyi je hut eling me adre me labö ha hmetoâ ta je hulö hnyi ke huna me ke huna. 4 Anyin e pason he ka ohia ta je hulö ge dren ta je bolok me got. 5 Anyin a wale, e ame ha hnyi ün e ame o eang hmeledrany, ka habe,

E ca wem bi hut adre me hlingâ me hut, Ke u je penapena unyin hobi kõnya ;

6 U me ca senyina je hut adre le ae bekhöt me ta je hut can hulö :

7 Me oge me ha, ka habe, Khong lö, wâ bi oge o but (adre me sihnalimi' nya hnyi tusi adre vhec)

He ka ânyâ wem.

8 Haingen ethö, ka habe, Ta je hut adre hlingâ, me ta je hut, me ta je hut adre me le ae bekhöt, me ta je hut can hulö, u me ca wem, ke u me ca senyin ka hnyin (wale adre me hudo hoton hnanyibu), 9 k' ame ha minya, ka habe, Wâ ju, inya oge me o but he ka ânyâ wem. E ame ohia at a bân, me me he ka otethmâ at a loiny. 10 Ke adre me okabi öta hnen weny eling, hnyi hna okhaca hudo unyi Iesu Keriso. 11 Ke haba tavat bihut hia, me adre me tot hnyi je bong balua me bi athnyaba, me hudo bala je hut a khaca ien, wale a ca khana he ka ohia hulö : 12 ke haba e, hwaban hnen hna hudo hut a khaca can ta je hulö nyiele balua, me e ame laba ju hnyi ke keihen metân Khong ; 13 ke hwân eling e ame lubahingen bala ke ne o but adre me wia ta je iwahnaihmiöny mē me taben li hnyeücan. 14 Anyin a hnen hut a khaca e ame hia but obekhöta nyiele balua tavat adre okabi ödra. 15 Ke ame ohnathoâ minya köta Hanu Kap : anyin a hwaban hnen hna ha, ka habe,

16 Walang úhinhinykôn oge me he ka ânyâ m' ödra
Hwaban ta je bong e, haingen Than ;
Ka habe, Oge me he ka ip anyik ta je hnanyibu hnyi je hnyekudra,
Ke oge me he ka sihnalimen e minya hnyi je únykúmenödra ;
waleling me me ha, ka habe

17 Ke haba anyidra je hulö me hnödra hna hanyâúâ, me oge me ca he hmetu ka únykúme.

18 Ke a ne ohia e, me ba hmetu but hut can hulö.

19 Anyin a wale, hnyat me lakeiny lö, e hu but gata hnyok ae hwege he ka dit ka hnyi dok ae kap únyi ge drö Iesu, 20 hnyi gethen e ame okabâ hobi köta, a gethen ae teb únyi me möt, a deny singiny, a wale unyin ; 21 ke hu at bihut ae beönua ame musö hnyaban Khong ; 22 e so ate me hakekenyâ ge hnyok ae hnathu ame kât hmâ labageju, ke je hnyekuta adre dukâiâ únyi hnyi únykúm sa ae kong, ke adre hneü je unyita hnyi köio ae alai : 23 e so ate me kât hmâ hmi ate me gejon me ca loloâ bi ; anyin ae hnathu bi at ame ha bâná : 24 ke so ate me únykúmekouâ, me me he ka kú ibetengö me ta je huliwa ae so ; 25 me ca he ka degec anyita úhacaköu, helâ me hwakecin keihen, ke so he ka úsihwegeköu ; ke hwege ju helâe, öbun ka wâ bong ae hakekeny jut.

26 Anyin ate ne ânyâ hulö ge weta, öta ka hia but wâ únykúme hnathu, me ba hmetu bihut can ta je hulö. 27 ke so bi he ka halubahingen me ot ae gan hmâ, ge hna he ka únö, me wathethot ame ubâhlâ, wale ame he ka an ohia je iwahnaihmiöny. 28 Haba at ame húkötia hnanyibu anyi Mose, me a mok ut hnyi hna ohnathoâ hnen li at a lo ame ne kun, k' adre ca betenge gan : 29 hawa, öbun e únykúme ae ca úcü bi hwaban ae gan hmâ hon e ka at ame uto hnyikânai Nokon Khong, me únykúme a únyi ae ca kap dren úhinhinykôn hnân okabâ e, me okongoâ Hanon ibetengö baú? 30 Anyin ae khan' öta but at ame ha, ka habe, Hamök he ka bi hwaban, ke oge me he ka öuco. Ke wale hmetu ang, Ame he Than ka huö lakeiny. 31 Hnân outen hmönyin he ka ta ka hnyi li hnyamen Khong ae möt.

32 Ke únykúme th' öbun je bong eji a bân, wale hwaban hna omelami öbun, m' öbun e hokhnyokâ ju vat ae gan hmâ a ta je vec ; 33 walang khaca, ka habe, Adre me wi' öbun m' öbun e hnân hamâ, can je haikongoâ me ta je vec ; ke walang khaca, a öbun e tha e m' ödra waleji adre me okongoâ helâe. 34 Anyin a öbun e vec betenge ka tavat adre me ca, ke öbun e hokhnyok senyina hnödra hna söh anyibun ta je únyi, ke khan' öbun a g' ame hu gabun tang omjeü ae únyi hnathu, k' ame tethmâ bi. 35 Anyin a wale, ca degec bi tang hwegi öbun, wale ae hu hwaban ae gan hmâ hnyin. 36 Anyin ae únyi hnathu köbun he ka hokhnyok, me me hu gabun

hna ha bânâ, öbun ka hia but ânyâ weny Khong.

37 Anyin ae okhulit biju ün

Me ame he ka o but at, wale at ame he ka o, k' ame ca he ka bec.

38 Ke ame he ka möt atök ae wisa hnen labageju :

Ke ame ne hmetuhmetu but, me ame ca he bi hnyekuk ka senyin kâu.

39 Ke haba öta, me ca lahanödra hnyat adre me hmetuhmetu ka hnyi hnaühangö ; ke lahanödra bi hnyat adre me labageju ke ne o but hnyi melen hanu.

HNYIMAKAN 11.

HABA labageju, me wale ciny ta je ünyi adre me gejon, me hnân ohwâdâ ta je ünyi adre me ca wâ bi. 2 Ke ame lung so wahingat ehac can e. 3 Ate me wâ hnen labageju a g' adre me ânyâ ta je ünyi hia thithö hnen hofuc hwan Khong, me adre me ca op ta je ünyi adre me wâ ünyi hnyi ta je ünyi ae manen. 4 Hnen labageju Abela ame hudo ka Khong hut ae nua hon hut anyi Kaina, me adre me ohnathöâ e hnen e a e wisa, ke Khong ame ohnathöâ ge anyin je bwihlany : a mok ut e, k' ame fuc bala bi hnen e. 5 Hnen labageju adre me hum Enoka thö me me ca he ka wâ mok ; me adre me ca wâ e, anyin a Khong ame hom e : anyin adre ohnathöâ e waleji k' ödra tiga ca hom e, a e at ame osenyinâ Khong : 6 ke a ne ba labageju, me pason he ka osenyinâ e : anyin a haba at ame hakekenyâ Khong, me hamen he ka labageju, ka habe, ka e bi, ke e ame he ka bi hwaban ka tawat adre me elâm hwegiâ e. 7 Hnen labageju Noa ame tibet hu, me omelö anyin lap ; anyin a Khong ame kou kâu ge ta je ünyi adre tiga ca wâ hnyi ün eling, ke e ame ot ; e ame ohnaühangöâ hmeledrany hnen e, me adre me wia e me atö hnyi hwakecin ae wisa hoton labageju. 8 Hnen labageju Aberahama ame löng hoton, waleji adre hawâ he ka he ka hnyi ke hnyi e ame he ka hu me hnân hwajekhon ; me e ame he thö ke ca khana dok e ame he ka hnyi. 9 Hnen labageju e ame laba kanyua hnyi hnyi adre ha bânâ, waleji a ca iny bi, me laba hnyi je uma mano, tha e me Isaaka me Jakob, ae tha hu hwajekhödru më hnyi hna ha bânâ : 10 anyin a e ame halubahingen taun ae hu taben, ke haba at a otilâ me huliwan, me,

Khong. 11 Hnen labageju adre ham mar kö Sara he ka erkin me ame hnokoâ wanakat ka someca but, anyin a e ame ünykûme ae hnathu e at a ha bânâ : 12 anyin a wale ame o but ünyi ge at a khaca, ke helâke me e at ae mok, ödra se hia helâ me ta je okhöüny drany, ke helâ me önyin köiö, a ca hnân aü.

13 Adre mok hia ju tawat e hnyi labageju, ke tiga ca hwâdâ je hna ha bânâ, ke adre me wâ me senyinâ ta je ünyi e ke tiga sâkâu bi, ke adre haimemenâ, ka habe, ödra ta je atkanyaua me tawat vhevhe eang hmelen. 14 Anyin a haba tawat adre me ha helâe adre me omanenâ a g' adre me heleü idra. 15 Ke adre ne ünykûme hnyi adre he ühedra hnyin, me ame ne khan' ödra la he ka hmetu ka hnyin. 16 Ke walang ang adre me weny ke hnyi ae beönua hnyin so, a wale thö drany : waleling me me ca hmehma bi Khong, e ka he ka hâiâ e, ka habe, e Khongudrin ; anyin a e ame penapena taun hobi ködra.

17 Hnen labageju Aberahama ame hudi Isaaka, hnyi hna cubec e : eke, waleji at ame hia but kap senyinâ ta je hna ha bânâ, e ame hudo nokon a khaca ; 18 waleji adre ha kâu, ka habe, Adre me he ka hâiâ ta je mâtranâm ünyi ge Isaaka : 19 ke e ame ünykûme, ka habe, e khana Khong he ka omelö hmetu, ame ne mok ut at ; ke e ame kap hmetu e üheny e hnyi ühöücü. 20 Hnen labageju Isaaka ame hahnahici Jakob me Esau, hnyi ta je ünyi ame he ka o. 21 Hnen abageju Jeko ame ve hahnahicâ li laku Josefa, hnyi ün e ame he ka mok ; ke e ame khudrung hon ban ciny uci. 22 Hnen labageju Josefa ame ha ge üheny lakon Isaraela hnyi ün e ame he but ka mok ; me hûna ge jeien bi. 23 Hnen labageju haba kamö Mose me hinyen, ödru me ikhâlâ e hnyi kun ta tehi hwaban hna hnokoâ e, anyin a ödru me wâ a e wanakat ae so ; ke ödru me ca outen hnanyibu anyin than. 24 Hnen labageju Mose ame gan dut me höcö m' adre me hâiâ hmetu e, ka habe, nokon nöku Farao a hlu ; 25 ke ame weny he ka tha hom okongon me lakeiny Khong, hon he ka senyinâ monu ame he ka ie hia ; 26 ke e ame ünykûme a hing omjeü hnödra hna haikongoâ e can Keriso, hon ta je omjeüny Aigupito : anyin a e ame wâ hmâ hing hwaban. 27 Hnen labageju e ame hna but Aigupito, e ame ca outen hmönyin anyin than : anyin a e ame hokhnyok, helâke at ka wâ at ae ca

manen bi. 28 Hnen labageju e ame ânyâ paseka me hna jijingâ dra, wâ e nye kâl' ödra hnen at ame ohia je atö. 29 Hnen labageju adre me hanyâûâ Wagewe ae dra helâ me kânâ ae mada : ke haba at Aigupito adre me nâ cubecâ me adre me û but. 30 Hnen labageju ame ü but hak veto hnyi Jeriko, hwaban hna he igigilö hnyi je bong a seven. 31 Hnen labageju ame ca tha mok Rahaba, a momo hnyi gethen, me tavat adre me ca ûling, anyin a e ame kap soâ li at adre kunâ he ka ecmak. 32 Ke iet hmetu oge me he ka ha? anyin ae ca ûcû bi ün kënya he ka haiö Gideona, me Baraka, me Samasona, me Jefetha, me Davita, me Samuela me ta je perofeta : 33 waleji tavat adre me hom hwenbâ je dôkhu ge labageju, me mâdrâ hwakecin ae wisa, me hu ta je hna ha bânâ, me hlöng ta je hnyimen liona, 34 me omoko maniny meic, me kec möt ûnyi hnyi hele vat, me hna ohwegi ödra a ödra sēnyin, me hwege hnyi vat, me ovesâ je utbavat. 35 Haba omomo, me adre me kap je kokidra adre omelö hmetu thö : ke haba keihen adre me oveci ödra, ke adre me ca kap bi hna omelö ; m' adre me he ka lu möt hmetu ae beönuu : 36 k' adre me cubec keihen ge ûhiö me ûkûc, eke, adre me cö 'dra me ip ödra hnyi uma ceat : 37 adre me lûâ keihen ge veto, k' adre me gilö lu ödra, k' adre me cubic ödra, k' adre hling' ödra ge hele vat : k' adre me he baû me je ûkhaû a unen mamoe me got ; ödra theduoc, me vec, k' adre okongu 'dra 38 (hnyat a ca ûcû hmeledrany ködra), k' adre me he baû hnyi ta je hnyebuba, me ta je bucen, me ta je op, me ta je dok ae hokong hnyi hmeledrany. 39 Haba hnyat eling hia adre me lung so hnen anyidra labageju, ke ca hu gadra je hna ha bânâ, 40 ke haba Khong ame penapena ûnyi ae beönuu hnân hobi köta, m' adre me ca he bi ka bekhöt e ka hi' öta.

HNYIMAKAN 12.

ANYIN a wale ame tet igigili öta tavat ohnatho a ödra se hia, me so ate me he minya ka hna degecâ ta je hmak hia, me hulö, wale at ame ohveli öta, ke ate me he ka wadring me hokhnyokâ ûölogot a e hnyi hnyimaköta, 2 me ö Iesu at ame hwân me obekhötâ labageju ; waleji at ame hokhnyokâ satauro, k' ame ca oünyihnathoâ hmehma, ûnyi hnyi senyin adre me ip hnyi hnyimakan, ke e ame laba ju hnyi ke

keihen metân theron anyin Khong. 3 Anyin ae so öbun e ûnykûme e, at ame hokhnyokâ hnödra hna ivinö hwege m' ödra hnen tavat ae kong, wâ e nye sēnyin me monumonu je hnyekubun. 4 Öbun tiga ca hia but hagutâ ke ne o but ame hingölö dröbun hnyi hnöbun hna hagutâ hulö : 5 ke öbun e hnying ut hna ünne wale ame üsabö m' öbun helâ me je lakon, ka habe,

Nökuk lö, ca oünyibâûâ hna ná hnen Than,

Ke ca monumonu bi, e ka thawö u ;

6 Anyin a haba at ame hnyokâ hnen Than, me e ame ná,

Ke e ame osöâ lakon e ame kap.

7 Öbun e hok hnyok hobi kâu hna ná ; haba Khong, me ame ânyâ köbun helâ me lakon ; anyin a ie nokon ame ca ná e hnen kamen? 8 Ke adre ne ca kun' öbun ka hnyi hna ná, waleji a vheno hnen je lakon hia, awe, öbun je lakon gethen, ke ca je hing lakon bi. 9 Ke wale minya eang, e hu köta ehac lakamen unyita, he ka n' öta, ke ate me ogan' ödra : hawa, ate me ca he ka löng hoton beönuainy Kamen ta je hanu, m' ate me möt? 10 Anyin adre me n' öta hnyi je bong ae wakhalet helâ me wedra ; ke e ame n' öta m' ate me so, m' ate me he ka tha kap mē. 11 Ke haba ta je hna ná hna, me, adre me ca ûnykûme bi a hnân osenyinâ, ke hnân bi hlöuhlöu, ke hwaban e, ame kü thö wan hnahic wale hwakecin ae wisa ködra adre n' ödra hnen e. 12 Anyin a wale hai thö je hnyam ame him, me je bouca ae mat ; 13 me owisa but ta je gethen hobi kâu je cabun, me me ca he ka khikhin can ae mat, ke so bi he ka hwege hmetu bi.

14 Hnu hoton d' öbun úsoköu unyin tavat hia, me hwakecin ae kap, e ba at ame he ka wâ Than e ka hia e : 15 ke wâ wia ju, wâ e nye hu ke at ame ca o ka hnyi ibetengiö baû anyin Khong ; wâ e nye kü thö iwân ae hiny he ka oveci öbun, me ame he ka kong ut tavat ae se hia hnen e ; 16 wâ e nye hu ke at bi ûnyi monu, me at thothom бага helâ me Esau, waleji at ame ham hwajekhon atö he ka úco újeú. 17 Anyin ae khan' öbun a hwaban e, e ame weny hmetu he ka hu hna hahnahicâ, ke adre höciâ e (anyin a e ame okhodrut wâ gethen deny ietra), ke so bi e ame elâm wia e me li deköien.

18 Anyin a öbun e ca o but ka hnyi bucen ae ûcû he ka kâlâ waleji ame hlâ ge meic ke ne o but ame hlit, me menekholom.

me weneú, 19 me hwan khoto, me meainy hofuc ; waleji a löng ut tavat me adre me khöú a ga me ca ha hmetu hofuc ködra : 20 anyin ae ca khan' ödra he ka hokhnyoká hna húná, ka habe, Ke a ne kálá bucen hnen ke meno bi, adre me he ka lúá e ge veto ; 21 hnán outen gan hmá únyi ame manen, me me haingö Mose, ka habe, Inya oge me ot gan hmá me gá uk : 22 ke so bi, öbun e o but ka hnyi bucen Ziona, ke ka hnyi taun anyin Khong ae möt, wale Jerusalemiany drany, ke ka ta je angela a ca hnán aú, 23 ke ka hnyi úkhacaköu ae bekhöt, ke ekalesiainy watö wale adre me sihnalimi'dra hnyi drany, ke ka Khong At owisa tavat hia, me ka ta je hanon tavat ae wisa hwakecidra adre obekhötá, 24 ke kö Iesu at ame úsoköúá hnyi úhinhnyköu ae teb únyi, ke ka hnyi dra hnán dukáíá, k' ame ha ta je únyi ae nuu hon drö Abela. 25 Wá ju eáú öbun, ke ca he ka hna degecá at ame ha hofuc. Anyin a ne ca kec möt tavat eji adre me hna degecá at ame köú ödra eang hmeledrany, awe, e ca khan' öta hmönyin he ka kec möt, öta ka he ka hotuta ka at ame köú únyi hnyi drany : 26 waleji at ame obwebwelá hmeledrany ge ifucin ehac : ke e ame hia but ha báná walang ang, ka habe, Oge me he ka okhaca hmejijingá, ca hake hmeledrany thibi, ke drany minya bi. 27 Ke haba bongon hofuc ang, ka habe, Okhaca biju, me ame ha a g' adre me he ka hom dö ta je únyi adre me hmejijingá, helá me ta je únyi adre hia but op, me me he bi ka tethmá ta je únyi adre ca hia but hmejijingá. 28 Anyin a wale, ate me kap dökhü ae ca khan' ödra he ka obwebwelá, me so ate me he ka hu ibetengió baú, m' ate me he ka ányá huliwa ame he Khong ka senyiná, me ogáná e me ot : 29 anyin a haba Khonguta, me meic ame han hmönyin.

HNYIMAKAN 13.

E SO e tethmá ibetengióköu unyin hnyat me lakeiny. 2 Ca hnying bi he ka betenge ge ta je atkanyua : anyin a haba keihen, me adre me kap ta je angela helae, k' adre me ca únykúme bi. 3 Únykúme ju öbun tavat adre me c' ödra, heláke adre tha c' öbun m' ödra ; únykúme ju tavat adre me ovecá, anyin a tiga öbun minya hnyi unyin. 4 E so e he tavat hia he ka öúnyihnthoá hna faipoipo, me hna mokut ae ba hnyikongon : anyin ame he

Khong ka öhnaúhang' ödra adre me bi únyi monu, me tavat adre me venöu áíán ke at. 5 Ca he öbun ka munyi hnyoká mone ; sekubun ju ge ta je unyi öbun e hu : anyin a e ame hia but ha, ka habe, Oge me ca he bala he ka hnö u, ke oge me ca he balua ka hna degeci u. 6 Anyin a wale e khan' öta he ka ha hwegiá, ka habe,

Haba Than, me wale thibi e at ame hadruo nya, oge me ca he ka ot, Ieú ke únyi ae kbana at he ka ányá könya ?

7 Únykúme ju tavat adre me tu' öbun, waleji tavat adre me ha köbun hofuc hwan Khong ; únykúme ju obiny hwakecidra, me úcúcbongo ju anyidra labageju. 8 Haba Iesu Keriso, me, ame ca wia bala, et, me hnyi bong ang, me nyiele balua. 9 E so adre me ca hom monu öbun hnen ta je hna úne ae se hia me ve bongon : anyin ae so adre me he ka otethmá hnyok hnyi ibetengió baú ; ca hnen ta je jeú waleji ae ba troban ka tavat adre me vheno ta je únyi e. 10 E hu but gata taben hut, waleji ae ca úcú ka tavat adre me huliwa hnyin uma mená he ka hnyi han únyi hnyin. 11 Anyin adre me thong hnyi hoton hnyaba unyin ta je meno, wale adre me hom drödra ka hnyi dok ae kap me hnán hudiny hulö, hnen at bihut ae beönuu. 12 Anyin a wale haba Iesu minya ame hom vec hnyi hoton homagöule me me he ka okábá tavat únyi ge dren bi. 13 Anyin a wale e so ate me didró káu ka hnyi hoton hnyaba, me hokhnyok hnyi hna baikongó e. 14 Anyin ae ba anyita taun ae tet hmá eang, ke ate me elám ke taun ame he ka manen dut nyiele. 15 Anyin a wale e so ate me hudo bala hudiny ogáná Khong a deny e, wale wan ta je esongodita ame háíá ien. 16 Ke ca he öbun ka hnying he ka mádrá so me betenge : anyin a wale je hut Khong ame senyiná. 17 Löng ju öbun hoton tavat adre me tu' öbun, me nom ju ködra ; anyin adre me hmáká hobi káu ta je hanubun, heláke hanymödra he ka thu hmetu ge ta je monu ; m' adre me he bi ka ányá e me senyin, ke ca bi me vec : anyin ae ba troban eling hobi köbun.

18 Hic d' öbun hobi köhmun : anyin a öhmun e únykúme ae hu but gahmun únykúm sa ae so, ke wehmun he ka so hwakecihmun hnyi ta je únyi hia thithö. 19 Ke inya oge me újóngi öbun hwege he ka ányá e, m' adre me logot he ka hnö nya but köbun.

IAKOBO 1.

20 Ke haba Khongon úsoköu, waleji at ame hom hmetu but Tuhöta Iesu úheny hnyi hna mok, wale at ae nua ame tuö ta je mamoe, hnen dren úhinhinyköu a nyiele balua, 21 e so e ame he ka wia wisai öbun hnyi ta je huliwa ae so he ka ányá weny, me huliwa eú hnyita, únyi hnán kú senyin hnyi hnyimakan, a deny Iesu Keriso ; e so e unyin hmanenang nyiele nyiele balua. Amen.

22 Ke inya oge me újöngi öbun lnyat

me lakeiny, ka habe, më löng ju hofuc hnán ná : anyin oge hia but sit okhulitá köbun. 23 Khan' öbun dö a g'adre thöng Timoteo liamekeiny möta ; e ka ie o, me öhmu me he ka iouny m' öbun.

24 Anyik italofa ka tavat adre me tu' öbun, me ta je wakap hia. Haba tavat Itali, me adre me italofa m' öbun.

25 E so e unyibun hia thithö ibetengjö baú. Amen.

TUSI ANYI

IAKOBO.

HNYIMAKAN 1.

INYA Iakobo athnyabainy Khong me Than Iesu Keriso, anyik italofa ka ta je tribu a twelv adre vese ehee.

2 Hnyat me lakeiny mönya lö, e so öbun e he ka únykúme a hnán senyin gan hmá e ka o köbun ta je úcúbic ae ve bongon ; 3 anyin ae khan' öbun a g' ame okúá hokhnyok he ka cubec anyibun labageju. 4 Ke so ame he hokhnyok ka huliwa bekhöta, m' öbun e he ka bekhöt me wisa, ke ba únyi ae hia.

5 A ne ke at gabun ae ba metá gan, me so e ame sumatá unyin Khong, at ame ham gáná ka tavat hia thithö, k' ame ca ú bi ; me adre me he ka ham káu. 6 Ke so e ame sumat hnyi labageju, ke ba loloá : anyin a haba at ame lolo, me úcú me waköiöiny köiö ame ou ang dö me húnyúnye but. 7 Ke ca he at eling ka únykúme a e ame he ka hu ke únyi únyi ge Than ; 8 e at ame lolo hnyok, k' ame okokok hnyi deny ta je gethen hia thithö.

9 E so ame senyin liamekeiny ae theduoc hnyi hna ogórányá e : 10 ke so ka at tren omjeú he ka senyin hnyi hna ohnyikáná e : anyin a e ame he ka hia helá me vongon hnaönying. 11 Anyin ame utö seúnó me ang ae kahwa hömnyin ; me ame ie meleca thö önying, me ame kölu but vongon, ke ame hia but hmananginy ; ke heláe ame he ka hia at tren omjeú hnyi deny ta je gethen.

12 Hnabic hnen at ame hokhnyoká úcúbic : anyin a at ka hia but cubecá, me e ame he ka lu koranainy möt, wale a ha báná Than ka tavat adre me hnyok káu. 13 Ca he ke at ka ha, at ka cubecá e, ka habe, adre cubic nya únyi ge Khong : anyin e pason he ka cubec Khong ge únyi ae kong, ke e ame ca cubec minya ke at : 14 ke adre me ve cubec tavat, a g' adre lili ödra hnen je wedra bi ae kong, me iyawá. 15 Ke e ka erkin dut weny ae kong me ame hnokoá but hulö : ke e ka at hnathu but hulö me e ame hnokoá but mok. 16 Ca monu öbun hnyat me lakeiny mönya a oúnykúmik. 17 Haba ta je bwihlany hia ae so me ta je hna ham báúá ae hmanenang, me únyi ethö ge Kamen melam, waleji ame ca ok, ke ba ong haten hwiö gan. 18 E ame hnöku öta ge hwan hofuc ae hnathu hoton weny, m' ate me he ka heláke je wan a bán ge ta je únyi e ame op.

19 Hnyat me lakeiny mönya a oúnykúmik lö, e khan' öbun dut e. Ke so e he tavat hia ka ie löng, me bec he ka fuc, me bec he ka hmönyin : 20 anyin a ca hnán he ka öküá hwakecin ae wisa anyin Khong, hmönyin anyin at. 21 Anyin a wale, degec ut ikiki hia me monu ame si but, ke kap ju ge hnyok ae menyik hofuc adre tá, wale ae khana he ka omelö je hanubun. 22 Ke ányá th' öbun hoton hofuc ke ca löng thibi, a heláe öbun e ka omonu öbun bi. 23 Anyin a ne ke at ame löng hofuc me ame ca mádrá bi, e úcú e me at ame

selâdrá hnyimakan hnyi uselat : 24 anyin a e ame ka wá e, me ame hmetu but ke ame ie hnying ut bongon e bi. 25 Ke haba at ame selâdrá hnyi hnanyibu ae wisa waleji ame hn' óta, me tet hmâ hnyin, ca at ame löng me hnying bi, ke at bi ame ânyâ me huliwa, ame he ka hnahic at ang hnyi anyin huliwa. 26 A ne hu ke at ame únykúme a e ame hmi, ke e ame ca noc bi bohmen ke e ame omonoá hnyekon bi, awe, haba hmi anyin at e, me únyi baú bi. 27 Walang hwakecin hmi ae kalaót me ba hnyikongon hnyi hnyimakan Khong a Kamen, ka habe, he ka senâ je nakahme me je safac hnyi anyidra vec, me hamen he ka tnö e, me me ca hu hnyikongon hnen hmeledrany.

HNYIMAKAN 2.

HNYAT me lakeiny mönya lö, ca he öbun ka wáhmakhmeto at hnyi hna hom labageju anyin Tuhöta Iesu Keriso, a Tuhan hmanenang. 2 Anyin a ne didró ke at ka hnyi anyibun úkhacaköu, ae hu wen banyen a gol, ke úkhaú ae mec, ke ame dit minya ke at ae theduoc me úkhaú ae kong ; 3 me öbun e wáhmakhmeto at ame k'baú so, me ha káu, ka habe, Laba ju eang hnyi dok ae so ; ke haingöbun ka at ae theduoc, Tot ju u e, ame ne, Laba ju eang hmelen taben li cak ; 4 hawa, öbun e ca oúnyihnatho ke at hon ke at, m' öbun hnyat owisa ae kong je únykúmenödra ? 5 Hnyat me lakeiny a oúnykúmik lö, löng ju öbun ; hawa, ame ca úca hnen Khong watheduoc eang hmeledrany he ka tren omjeú hnyi labageju, m' adre me he ka hu dökhü waleji e ame ha bánâ ka tavat adre me hnyok káu. 6 Ke öbun e oúnyúkongo ta je theduoc. Hawa, ame ca okongu öbun hnen tavat tren omjeú, k' adre me lili öbun ka hnyi taben owisa ? 7 Hawa, adre me ca haikongoá ien ae so waleji adre wenyö iöbun hnyin ? 8 Ke so bi öbun e ne löng hoton hnanyibu ae beónua, helâ me hna sihnalimen, ka habe, U me he ka betenge ge at ame laba hakekenyi u helâ me u bi, m' öbun e ânyâ ling so : 9 ke öbun e ne wáhmakhmetö tavat, me öbun e ânyâ ling monu, ke hwâdá thö ge hnanyibu, a öbun hnyat hanyâúá hnanyibu. 10 Anyin a haba at ame he ka löng hoton je hnanyibu hia, k' ame hanyâúá thibut khaca, me helâke a hanyâúá hia but. 11 Anyin a haba at, waleji ame ha, ka habe, Ca he ka

bi únyi monu, me ame ha minya, ka habe, U ca he ka úblingö. Ke u je ne ca bi únyi monu, ke u at úhlingö bi, me u at ame hanyâúá hnanyibu. 12 E so öbun e ha hofuc, ke so öbun e huliwa, helâ me hnyat adre me he ka owis' ödra bi ge hnanyibu ame hna báúá. 13 Anyin a haba at ame ca betenge, me adre me ca he bi ka betenge gan hnyi hna úhnei : anyin ame hobeluâ ibetengiö hnyi úhnei.

14 Hnyat me lakeiny mönya lö, ieú troban a ne ha ke at, a ga hu gan labageju, k' ame ca hu bi ta je huliwa ? hawa, e khana labageju eling he ka omelö e ? 15 A ne he thu ke liamekeiny a бага ame ne momo, ke ba jeú gadrin hnyi ke bong me ke bong, 16 ke ke at gabun ame ha ködrin, ka habe, He thö me hnahic, kahwa ju, me sekom dö ; ke öbun e ca ham bi ködra ta je únyi ae úcú ka unyin ; ieú troban e ? 17 Ke helâe labageju, e ka ca tha e me huliwa me a ka mok ut. 18 Eke, ame he ke at ka ha, ka habe, E hu but gam labageju, ke hu but inya gak ta je huliwa : omanená thö kõnya ânyâm labageju ae ba huliwa hnyin, ke oge me he inya ka omanená hnen anyik je huliwa. 19 U me kap, ka habe, Khaca thibi Khong ; e so e : je demoni minya adre me kap me öbubuny. 20 At ae monu lö ca bekhanö u ae únyi baú bi labageju e ka ba huliwa ? 21 Hawa, adre ca haiwisai Aberahama a kamöta ge ta je huliwa, hnyi hnen hna hudi Isaaka a nokon hnyi hon tap ? 22 U me wá a g' ame tha huliwa labageju me anyin ta je huliwa, ke ame obekhotá labageju hnen ta je huliwa ; 23 me ame hwâdá thö hofuc adre sit, ka habe, Aberahama ame labageju ka Khong, me adre me haiâ e káu hnân hwakecin ae wisa ; me adre me hwenyi ien e, ka habe, Ihuminy Khong. 24 Awe, öbun e wá but a g' adre me haiwisa at hnen ta je huliwa, ke ca hnen thibi labageju. 25 He helâe minya, adre ca haiwisai Rahaba momo hnyi gethen ge ta je huliwa hnyi hnen hna kap soâ li at cemak me kun' ödrü hnyi ke gethen bi ? 26 Anyin a helâke mok ut unyin, e ka ba hanu, me helâe minya labageju, a mok ut e ka ba huliwa.

HNYIMAKAN 3.

HNYAT me lakeiny mönya lö, ca he ka se hia tavat úne gabun, anyin ae khan' óta a g' ate me he ka hu hnaúhangö ae gan. 2 Anyin ate thö hia thö

hnyi ta je únyi ae se hia. A ne ca thö at hnyi hofuc, awe, e wisa at e, ke e khana he ka tha hom úhnyúkongo unyin. 3 Wá bi, ate me ip fao hnyi hnyimen ta je hors, m' adre me he ka löng hotuta, me ate me tha wia hia je unyidra. 4 Wá bi minya ta je hu, eja ke ne a ne gan dut, ke ame oú ang ge ang ae hwege, adre wia but hnen wi ae úhnyúkong helâ me weny tuhan hu. 5 Ke helâe minya bohmen únyi ae úhnyúkong hmönyin, ke e ame hobelúa ta je únyi ae gan. Wá bi úganiny hnyot ame hlâ ge wahlêúhleüiny meic ae úhnyúkong! 6 Meic bohmen: haba bohmen me at ae nua ka ányâ hulö unyin je outhunyita, k' ame okongoá unyin hia, me thong hia möt ang, ke haba meiciny gena, me ame thong bi e. 7 Anyin adre me ohnamâ ta je meno ae ve bougon me ta je meno ame gâ, me ta je únyi ame iyâú, me ta je únyi ae möt eú hnyin köiö, adre hia but ohnamâ ta je únyi e ge metâ anyin at: 8 ke ca khana bi ke at he ka ohnamâ bohmen; haba monu e, me ame ca menâ, ke unöngötö ge únyi hnân mekiny. 9 Ate me haisoâ Khong a Kamen hnen e; ke hnen e minya ate me hangâ at, wale adre me op e me we Khong: 10 k' ame didrut únyi hnyi hnyimen a khaca hna haisoâ, me hnaúhangö. Hnyat me lakeiny mönya lö, e ca úcú he ka ányâ ta je únyi helâe. 11 Hawa, ame pupua köiö hnam, me köihiny únyi hnyi hna pupua a khaca? 12 Hnyat me lakeiny mönya lö, hawa, e khana imeta he ka wa wan elaiö, me vine he ka wa wan imeta? ke helâe ame ca o köiö hnam me köihiny únyi hnyi hna pupua a khaca.

13 Ewa at unyibun ae metâ k' ame wâ únykúme? e so e ame he ka omanená anyin ta je huliwa ge hwakecin bi ae so, me hwakecin ae menyik me metâ. 14 Ke a ne hu gabun eú hnyi je hnyekubun ihuhnyinköu ae hiny me imoukôu, me ca he bi ka hobelöu, ke ca thoi bi ka hofuc ae hnathu. 15 Haba metâ eang me ame ca o únyi ethö, ke hwen hmeledrany, me unyin, me demoni. 16 Anyin a haba dok ae hu ihuhnyinköu me imoukôu, wale dok ae hu hnyin imonunony me ta je huliwa hia thithö ae kong. 17 Ke haba metâ únyi ethö wale a bán me ba hnyikongon, k' ame úsoköu, me menyik, me ie löng, k' ame unöngöt ge ibetengiö me je wan ae so, ke ba lolo, ke ba iyawâ. 18 Ke haba wan hwakecin ae wisa, me adre me tâ hnyi úsoköu hnen tavat adre me okúâ úsoköu.

HNYIMAKAN 4.

Ú NYI ua ta je vat, ke únyi ua ta je úkúc anyibun? hawa, ca únyi ge ta je webun ae kong ame vat hnyi ta je ong outhunyibun? 2 Öbun e weny ke ca hu bi: öbun e hlingö, me behnyekon, ke ca khan' öbun he ka hu: öbun e úkúc me vat; e ca hu bi gabun anyin öbun e ca sumâtâ. 3 Öbun e sumâtâ ke ca hu bi anyin öbun e sumâtâ monoâ, möbun e he ka oumo ta je únyi e hnyi ta je webun ae kong. 4 Öbun tavat bi únyi monu, hawa, e ca khan' öbun a iwahnaihmiöny me Khong he ka hanen hmeledrany? Anyin a wale haba at ame behe ka hanen hmeledrany me wale iwahnaihmiöny me Khong. 5 Hawa, öbun e únykúme a g' adre ha báúâ hna sihualimen? Hawa, ame weny me ihuhnyinköu hanu, a ame ip eú hnyi je hnyekuta? 6 Ke e ame bi hanen ibetengiö baú. Anyin a wale hna ha, ka habe, Khong ame hagutâ tavat bi gan, me ham ibetengiö baú ka tavat a ödra hnyikânâ. 7 Anyin a wale löng ju öbun hoton Khong; ke hagutâ but diabolo, me e ame he ka kec únyi gabun. 8 Hakekeny dö ka Khong ke e ame he ka hakekeny köbun. Hinyem but öbun tavat hulö; ke obosoâ but je hnyekubun tavat lolo hnyok. 9 E so öbun e he ka vec, me tenge thungaú, me tenge: e so he ka wia anyibun hluma ka hnyi tenge thungaú, me anyibun senyin ka hnyi hnyok ae hmak. 10 Ohnyikön' öbun ju hnyi hnyimakan Than, ke e ame he ka ogörany öbun.

11 Hnyat me lakeiny lö, ca úbaiöbunköu. Haba at ame háiâ liamekeiny, me únykúme liamekeiny mē, e ame háiâ hnanyibu, me únykúme hnanyibu: ke u je ne únykúme hnanyibu m' u ca at bi ame löng hoton hnanyibu, ke at bi ame únykúme. 12 Khaca thibi at ame ham hnanyibu, wale at ae khana he ka omelö me omoko; ke u ia at ame únykúme ke at?

13 E, öbun tavat öbun e ha, ka habe, Haba bong ang me nyi ate me he ka he ka hnyi taun eling, me laba eling hnyi khaca huna, he ka úcú me heleú omjeú; 14 ke so bi e ca khan' öbun únyi ame he ka o nyi. Ieú anyibun möt. Öbun hainy meic, ame manen hnyi úen ae okhulit, me ame hia but. 15 Ke walang únyi ae so he ka ha, ka habe, A ne weny Than, ate me he ka möt; me ányâ únyi eang, me únyi e. 16 Ke walang ang öbun e senyiná anyibun je hobelöu: e monu hia ta je senyin helâe.

I. PETERU 1.

17 Anyin a wale, haba at ae khana he ka ányá so, k' ame ca ányá bi, wale hulö bi káu.

HNYIMAKAN 5.

E, ÖBUN watren omjeú, tenge thö me kuku can ta je vec ame he ka o köbun. 2 E amam but tang omjehebun, ke ame an je khaúöbun hnen önyí. 3 A vi but anyibun gol me sileva, ke adre me he ka bi ohnathoá köbun hnen viiny, k' ame he ka an vibun helá me meic. Öbun e hia but úkhöüná anyibun tang omjeú hnyi je bong a biliny. 4 Wá bi, ame hongot göranyai hwaban ae úcú ka tavat adre me huliwa waleji adre me meno ibun je hnyei, ke öbun e behaná ge iyawá: ke ame aat dö hnyi li hnyikönyen Than tuhan sabaoth hwahongot hwan tavat meno. 5 Öbun e hia but laba sot eang hmeledrany me ányá webun; öbun e hia but hat je hnyekubun hnyi bong úhlingö. 6 Öbun e hia but hangá, öbun e hia but hlingá at ae wisa; ke e ame ca hagut' öbun.

7 Anyin a wale hnyat me lakeiny lö, hokhnyok ju ke ne o but ame o thö Than. Wá bi, haba at belök ame halubahingen okoman hna belök únyi eú hnyi káná, me hokhnyok ke ne o but ame hu we a bán me we a biliny. 8 E so öbun e hok hnyok minya ju; ke otethmá ju je hnyekubun: anyin ae hakekeny jut he ka o Than. 9 Hnyat me lakeiny lö, ca iulitköuá ju, m' adre me ca he ka hang' öbun bi; wá bi at ame owisa ame tot eú hnyi je hwanuma. 10 Hnyat me lakeiny lö, hom dö je perofeta hnân tulut köbun hnyi vec me hok hnyok, waleji tavat adre me ha hofuc hnyi

ien Than. 11 Wá bi, ate me únykúme hnödra hnahic adre me hokhnyok: öbun e hia but löng ge hokhnyok anyi Jobu, ke öbun e hia but wá hna bi obiny Than, a g' ame seön Than, k' ame betenge gan hmá.

12 Hnyat me lakeiny mönya lö, walang únyi ae únyi hnathu hon ta je nyi hia, ka habe, ca khemanyin bi, ca háiá drany, ke hmeledrany, ke ke únyi bi: ke so he ka hake ha eke me eke, ke hobun e ba, me e ba; wá öbun nye ú but ka hnyi hnaúhangö.

13 Hawa e hu at ame vec unyibun? e so e ame hic. E hu at ame senyin? e so e ame khumöng oganá Khong. 14 E hu at ae mok unyibun? e so e ame hawá wahingatiny ekalesia me adre me he ka hic hobi káu, me hú e ge wakaco hnyi ien Than: 15 ke haba hic hnyi labageju, me ame he bi ka omelö komok, k' ame he Than ka otilá thö e; ke a ne hia but ányá ta je monu, me ame he ka thang ut gan. 16 Anyin a wale, uomanenáköuá anyibun ta je hulö, ke hic dö ke at hobi káu ke at, m' öbun e he ka möt. E hu troban ae gan hmá únyi hnyi hic hijin at ae wisa hwa-kecin. 17 At helá m' öta Elia, ke e ame hic újöng me me ca he ka ta we; me ame ca ta we ka hnyi hon káná hnyi kun ta huna ke siks ta tehi. 18 Ke e ame hic hmetu, me ame ta but we únyi hnyi drany, me ame kú thö ta je jeú únyi hnyi káná.

19 Hnyat me lakeiny mönya lö, a ne monu ke at únyi hnyi hnathu, k' ame ohmetuhmetoá e hnen ke at; 20 me so e ame wáhmakhmeto, a haba at ame ohmetuhmetoá at ae kong únyi hnyi anyin monu me e ame omelö hanon únyi hnyi mok, k' ame he ka tube ta je hulö ae se hia.

TUSI A BÂN ANYI

PETERU.

HNYIMAKAN 1.

INYA Peteru aposetolo anyi Iesu Keriso, oge me sibnalimen ka ta je atkanyua adre me ve se ka hnyi Poneto, me Galatia, me Kapadokia, me Asia, me Bithunia, 2

tavat adre me úca hoton hna wábâná hnen Khong a Kamen adrem, únyi ge hna okabá ge Hanu, he ka löng hoton e, me dukáiá hnen drö Iesu Keriso: E so e unyibun ibetengjö baú, me úsoköu ae gan hmá.

3 E so he ka haisoá Khong me Kamen

I. PETERU 2.

Tuhöta Iesu Keriso, at a hnöku öta hmetu, hoton anyin ibetengiö ae gan, ka hnyi geju ae möt, hnen möt hmetu thö a Iesu Keriso únyi hnyi hna mok, 4 ka hnyi weúhúneny ame ca he bi ka bobot ke ba hnyikongon, k' ame ca aú but, wale adre me ip hnyi drany hnân hobi köbun, 5 k' adre me tu' öbun hnen man maniny Khong deny labageju ka hnyi möt adre me penapena he ka omanená hnyi úen a biliny. 6 Wale öbun e senyin gan hmâ hnyin, ke so bi öbun e ne hmak hnyi je úcúbic ae ve bongon hnyi ong úen walang ang, a ne úcú, 7 m' adre me he ka wâ hna ohnathoâ anyibun labageju ae únyi hnathu hon gol, ke so bi adre cubec e ge meic, m' adre me he ka haisoâ me oganá me olungâ e ka manen dut Iesu Keriso: 8 waleji öbun e ca wâ, ke öbun e hnyok kâu, eja ke ne öbun e ca wâ walang ang, öbun e labageju kâu, ke öbun e senyin gan hmâ hmönyin ae ca hnân ha, ke ti hmanenang: 9 ke öbun e kap obiny anyibun labageju, wale melen je hanubun. 10 Ame elâm me hnö möt eling hnen ta je perofeta, tavat adre perofeta ibetengiö baú ame he ka o köbun: 11 adre me elâm úen me bongon e waleji a hnen Hanon Keriso eú hnyi je hnyekudrin hna kú, waleji hnyi hnen hua haimemenâ bánâ ta je vec anyin Keriso, me je hmanenang ame he ka hnu hoton. 12 Adre me omanená ködra a g' adre ca huliwan ta je únyi eling ködra, ke so bi köbun, waleji adre haimemenâ köbun walang ang hnen tavat adre me khetâ köbun úthumetu ae so únyi ge Hanu Kap adre kunâ únyi hnyi drany; waleji a ta je únyi ame weny ta je angela he ka selâdrâ.

13 Anyin a wale, húkâlâ ju wen je hnyekubun, me hmâkâ thö, me ti geju ke ne o but ka hnyi ibetengiö baú wale adre me he ka oâ köbun e ka manen dut Iesu Keriso; 14 e so öbun e tha úcú me tavat úling, ke ca he öbun ka tha úcú me webun kâú adrem, waleji k' öbun tiga menekholom: 15 öbun e he ka kap hnyi ta je hwakecibun hia helâ me úkapiny e at a haw' öbun; 16 anyin adre hia but sihnalimen, ka habe, Okabi öbun ju, anyin a iny kap. 17 Ke öbun e ne hawâ Kamen, wale at ame ca wâhmakhmetoâ tavat, me at ame ve hnö tavat helâ me huliwa anyin ke at me ke at, awe, ot ju hnyi úen öbun e tiga laba atkanyaua: 18 anyin ae khan' öbun a g' adre ca úco anyibun möt hwaban ta je únyi ame he ka bobot, wale sileva me gol, únyi

hnyi hwakecibun ae monu a n' öbun hnen lakamöbun; 19 ke so bi únyi ge dren Keriso ae gan hwaban, helâ me noken mamoe ae ba hnyikongon me ba monuiny: 20 waleji adre wâ bánâ adrem, k' at tiga ca bi taben hmeledrany, ke adre omanená but hobi köbun hnyi je bong a biliny walang ang, 21 tavat öbun e labageju ka Khong a deny e, waleji at ame omelö thö e únyi hnyi hna mok, me hãm kâu hmanenang; me me he ka e unyin Khong anyibun labageju me geju. 22 Öbun e hia but okalaöta je hnyekubun hnyi hnöbun hna löng hoton hnathu ke ne o but ka hnyi ibetengiö ae ba thoi hnyin ka hnyat me lakeiny, anyin a wale ibetengiököu ju öbun ge hnyok ae ba hnyikongon: 23 anyin adre hnöku öbun hmetu ca únyi bi hnyi wan ame he ka bobot, ke so bi ge wan ame ca he ka bobot hnen hofuc hwan Khong ae möt me tethmâ nyiele balua. 24 Anyin

A helâ me hna önying tavat hia thithö, Ke haba hmanenanginy at, me helâ me vongon hna önying.

Ame meleca önying, k' ame kölu but vongon:

25 Ke haba hofuc hwan Than, me ame tethmâ nyiele balua. Ke wale hofucin úthumetu ae so adre me khetâ köbun.

HNyimakan 2.

A NYIN a wale degec ut öbun hwakecibun hia ae kong, me iyawö hia, me ta je thoi, me ihuhnyinköu, me úhaiö hia, 2 beweny d' öbun debai a cökiny hanu ae ba thoi hnyin, helâ me ta je mendring a teb o, m' öbun e he ka hühüö thö gan ka hnyi möt; 3 öbun e ne hia but drem cubecâ a ga betenge bi Than: 4 k' öbun e he kâu wale veto ae möt, ke a degec hnen tavat, ke a úca hnen Khong, ke gan hmâ hwaban, 5 ke adre me up öbun minya göranyai a je veto ae möt hnân umen hanu, m' öbun e tavat bihut ae kap, he ka hudo ta je hudiny hanu, wale ae so ka Khong únyi ga Iesu Keriso. 6 Anyin adre me ha hnyi hna sihnalimen, ka habe,

Wâ bi, inya oge me ip hnyi Ziona veto hnân kopiny adre úca, ke gan hmâ hwaban:

Ke ame ca he ka hmehma at ame labageju kâu.

7 Anyin a wale, haba únyihnathuiny, me hobi köbun a hnyat labageju: ke haba

I. PETERU 3.

hnyat adre me ca labageju, me wale bi ang,

Haba veto ame degec hnen tavat up uma,

Me adre hia but ânyâ hnân ban kopiny. 8 me

Veto hnân othôâ, me kic hnân ööo ; anyin adre me thö thö hnyi hofuc, anyin adre me ca labageju : ke adre me ip ödra hnân ûnyi eling. 9 Ke öbun thibi dö adre me úca, ke hnyat bihut anyin Khong, ke hnyei ae kap, ke tavat a je hing lakeiny Khong, m' öbun e he ka omanená je hwakecin ae ti so anyin at ame haw' öbun ûnyi hnyi lit ka hnyi anyin melam hnân láia : 10 waleji a ca aten dökhü ehac, ke aten bi dökhü dokhon Khong walang ang : waleji a .tavat adre ca betenge gadra, ke adre betenge bi gadra walang ang.

11 Hnyat a oúnykúmik lö, inya oge me újôngi öbun a ta je atkanyua me tavat menâ tot, ka habe, úsâkâüö but öbun me ta je weny anyin ae kong, je ûnyi ame vat me hanu ; 12 e so e úcü hwakecibun hnyi hnyimakan Aten ta je hnyei ; m' adre me ca he ka haikongu öbun helâ me tavat ae kong hwakecidra, e so adre me he ka ogânâ Khong hnyi bonginy senâ, at ka he ka wâ anyibun ta je huliwa ae so.

13 Löng hoton ju öbun ta je hnanyibu hia anyin at, cin Than : ame ne ka than tot ae nua ; 14 ame ne ka ta je gavena, tavat e ame kunâ he ka bi hwaban ka tavat adre me ânyâ monu, me hnân ogânâ tavat adre me ânyâ so. 15 Anyin a wale weny Khong, m' öbun e he ka ohnyiböâ hwen monu anyin tavat ae ca metâ ge anyibun huliwa ae so : 16 helâ me tavat, adre hna bâüâ but, ke ca wia hnöbun hna he baü me hnân tube úokonguny, ke so bi he ka bi athnyabainy Khong. 17 Ogânâ thö tavat hia thithö. Betenge ju ge hnyat me lakeiny. Ot ju ka Khong. Ogânâ thö than tot.

18 Lathnyaba lö, löng ju hoton latuhöbun me ot ; ca hake ka tavat ae so me menyik, ke ka tavat minya ae hwahwacit. 19 Anyin a walang ûnyi ae so, a ne ke at ame hokhnyokâ vec, hnyi ûnykúm sa ka Khong, ke adre me ovecâ ke ba can. 20 Anyin a ewa ûnyi hnân hobelöu, öbun ka he ka hokhnyokâ hna kulup öbun can anyibun ta je monu? ke öbun e ne hokhnyokâ vec can hwakecibun ae so, wale ûnyi ae so ka Khong. 21 Anyin adre haw' öbun kâ e : anyin a Keriso ame hom vec minya hobi köbun, me ham köbun tulut, m' öbun

e he ka cet hwadeny li hnyetican : 22 waleji a at ame ca hnyi ânyâ hulö, ke ba minya thoi adre wâ hnyi hnyimen : 23 waleji adre otü, ke ame ca hnyi fuc bi ; k' adre ovecâ, ke e ame ca ha ooti ödra hmetu ; ke e ame ka hna e bi ka at owisa hnathöâ : 24 waleji at a hake vadren anyita ta je hulö ge unyin hon üö, m' ate me he ka möt ka hwakecin ae wisa, anyin ate me mok ut ûnyi hnyi hulö ; anyin adre me omeli öbun ge hwadeny hnân ta je osö. 25 Anyin a öbun e he monu ehac helâ me ta je mamoe adre monon gethen ; ke walang ang öbun e hmetuhmetu ka At tuö mamoe, me Pispiny ta je hanubun.

HNYIMAKAN 3.

HELÂE minya öbun omomo löng ju hoton laöiöbun ; m' adre me he ka hmehmelâ ge hwakecin laöiödra ae so, ke ca hnen bi hofuc, a ne hu tavat gadra adre me ca löng hoton hofuc ; 2 at ka wâ hwakecibun ae ba hnyikongon, me ot. 3 Haba theibibun, me so e me ca theibâ unyin, wale he ka hûle bät me theibâ gol, me khavâ je úkhaü ; 4 ke so bi he ka omecâ at ae iyong eü hnyi hnyok, wale úkhaü ame ca he ka bobot, wale hnyok ae menyik me ilemuk, wale ûnyi ae ûnyi hnathu hmönyin hnyi hnyimakan Khong. 5 Anyin ame ka omeci ödra helâe hnen omomo ae kap ehac, hnyat adre me labageju ka Khong, ke adre me löng hoton laöiödra : 6 ke helâe Sara ame löng hotu Aberahama, k' ame hawâ e, me than : ke öbun je lakon, öbun ka he ka mádrâ so, me ca outen bi ke ûnyi hnân outen.

7 Obaga lö, e so öbun e helâe, tha laba me laöiöbun hoton metâ, ke ogânâ momo, anyin a e kaia ae sényin, ke öbu me he ka tha hu ibetengiö baúny möt ; waleling me me ca he ka ohvelâ hijibun je hic.

8 Walang obiny, e so öbun e he hia ka tha hnyok, me vec betenge, me tha hnyok helâ me je liamekeiny, me sang betenge, me hnyok ae hnyikânâ : 9 ca bi hwaban monu ge monu, me újao ge újao ; ke so bi hahnahicâ ; anyin adre haw' öbun kâe, m' öbun e he ka hnahic. 10 Anyin a

Haba at ame weny möt,

K' ame bewâ je bong ae so,

Me so e ame noc bohmen hnyi monu,

Ke li esongodiny wâ e nye fuc thoi :

11 E so e ame saü but ûnyi hnyi hulö, me madrá so ;

I. PETERU 4.

E so e ame elâm úsoköu, me hnu hoton e.
 12 Anyin a e li emakan Than hon tavat ae wisa,
 Ke li hnyikönyen ame löng hijidra je hic :
 Ke e bi hnyimakan Than hon tavat adre me ányá hulö.
 13 Ke ie at ame he ka okongu öbun, öbun e ne hwege ka hnyi so ? 14 Ke öbun e ne vec can hwakecin ae wisa, hnöbun hnahic : ke ca ot bi ge hnödra hna ootá, ke ca hlohlo bi ; 15 ke okabá ju Keriso eü hnyi je hnyekubun me me Than bi : ke laba penapena bala öbun he ka thu ködra hia tavat adre me hnei öbun ge bongon labageju wale eü hnyibun, ke so bi hnyi menyik me ot ; 16 ke e hu gabun únykúm sa ae so ; waleling me me hmehma ju tavat adre me haikongo hwakecibun ae so unyin Keriso : anyin adre me haikongu öbun. 17 Anyin ae so but, a ne weny Khong, m' öbun e he ka vec can so öbun e ányá, ke kong bi e can hulö öbun e ányá. 18 Anyin ae okhaca hom vec Keriso can hulö, wale ae wisa me hwaban tavat ae ca wisa hwakecidra, me me he ka lili öta ka Khong : adre hlingá e hnyi unyin, ke adre omelö e hnyi hanu ; 19 ke únyi hnyi e, e ame he but me khetá ka ta je hanu hnyi hnyin uma ceat, 20 waleji a tavat adre me ca úling ehac, hnyi úen lingvec ae beü hmá anyin Khong ame halubahingen hnyi úö Noa, ke e ame penapena hu, waleji adre omelö hnyat ae wakhalet hnyin, a ödrin eit hnyi köjö : 21 wale thibi e hnyi úhöúú ae bnathu at ame omeli öbun minya walang ang, a bapataiso, ca únyi bi ge hna hneü degecá ikikiny unyin, ke so bi he ka hnö ge únykum sa ae so ka Khong hnen möt hmetu a Iesu Keriso ; 22 wale hnyi ke keihen a metân Khong, ke a ölö hnyi drany ai : ke ame löng hoton hnen ta je angela, me tavat musi, me ta je man.

HNYIMAKAN 4.

ANYIN a wale haba Keriso ame hom vec hnyi unyin, e so öbun e tet metá me hnyok heláe ; anyin a hia but mok degec hulö hnen at ame hom vec hnyi unyin ; 2 m' öbun e ca he hmetu ka möt ka hnyi ta je weny at, hnyi úen a tiga öbun hnyi unyin, ke so bi ka hnyi weny Khong. 3 Ame ne soju hna ányá weny Aten ke je hnyei, hnyi je úen a hia but, waleji adre me vheno waelue, me je weny ae kong, me

hwen hmiá wainá, me mede, me ta je bijeü ae kong, me hmi ka ta je hnatheat ae ikiki : 4 ke adre me láia ge ca tha wadring a öbun m' ödra ka hnyi imedioköu ae ti kong, ke adre me haikongu öbun : 5 ke adre me he ka ve ha hwakecidra bi káu at ame he ka hnö tavat ae möt me tavat ae mok. 6 Ke can e adre me khetá fithumetu ae so ka tavat ae mök, m' adre me he ka hnei ödra hnyi unyin helá me at, k' adre möt hnyi hanu helá me Khong.

7 Ke e hakekeny jut obiny ta je únyi hia thithö : anyin a wale metá th' öbun ke hmáká thö me hic : 8 ke hon ta je únyi hia, e so öbun e ibetengiókôu ; anyin ame he ibetengió ka tube ta je hulö ae se hia. 9 Imetenyimwi ju ke at ka ke at, ke ca ulidro bi ; 10 helá me hna ve kap bwihlany, e so he ka úhuliwaköu, helá me tavat tuö soá ibetengió baü anyin Khong ae se hia bongon ; 11 a ne fuc ke at, fuc dö helá me hofuc hwan Khong ; a ne huliwa ke at, huliwa helá me man ame ham ge Khong : m' adre me he ka oganá Khong hnyi ta je únyi hia thithö ga Iesu Keriso, e unyin hna oganá, me musi nyiele nyiele balua. Amen.

12 Je öúnykúmíny lö, ca he öbun ka láia ge úcúbic helá me meic unyibun ame o he ka cubic öbun, heláke me únyi ae teb únyi ame o köbun : 13 ke so bi senyin d' öbun anyin öbun e tha hom vec me Keriso ; m' öbun e he ka senyin gan hmá e ka manen dut anyin hmanenang. 14 Adre ne haikongu öbun can ien Keriso, hnöbun hnahic ; anyin ame laba unyibun Hanon hmanenang me Hanon Khong. 15 Ke ca he ke at gabun ka vec anyin a e at úblingö bi, me at venöu, me at ame ányá monu, me at ame hngele baü ka ta je únyi anyin keihen : 16 ke a ne vec ke at anyin a e Kerisiano ca he ka hmehma ; ke so e he ka oganá Khong hnyi ien e. 17 Anyin a walang úen dut he ka úhnei hwân hnyi uma umen Khong : ke ame ne hwân unyita, ieu obiny ka tavat adre öunyibáüá úthumetu ae so anyin Khong ? 18 Ke a ne huliwa but he ka omelö tavat ae wisa, ame he ka manen ua at ame ca ot me at ae kong ? 19 Anyin a wale e so ka tavat adre me vec hoton weny Khong he ka ányá hwakecin ae so me hna je hanudrin káu at ae hnathu, a At ame op.

II. PETERU 1.

HNHYIMAKAN 5.

INYA oge me sihwégiá wahingat unyibun, inya minya ang ke hingat, me at ohnatho je vec anyin Keriso, me at ame he ka hnyi hu hmanenang ame he ka manen : 2 Tuö ju hna hat mamoe e unyibun, me bi homakan, ca ge musi, ke so bi ge weny, hoton Khong ; ke ca únyi ge behu omjeú, ke so bi ge hnyok ame weny ; 3 ke ca he ka hwen thaná je hanymöbun, ke so bi hamöbun he ka bi tulut ka hnahat mamoe. 4 Ke e ka manen dut Taben tavat tuö mamoe, me öbun e he ka hu korona ae hmanenang ame ca he ka hia but. 5 Heláe minya öbun hnyat ae teb únyi, löng ju hoton wahingat. Eke, öbun hia thithö lö, weiká ju hwakecin ae hnyikáná he ka uhuliwaköu : anyin a Khong ame hagutá tavat bi gan, me ham ibetengió baú ka tavat ae hnyikáná ónyükúmidra. 6 Anyin a wale, ohnyikön' öbun ju hnyi hmelen hnyamen Khong ae man, me me he ka ogöranyi öbun hnyi úen ae úcú ; 7 hna but káu anyibun ta je hmak hia thithö, anyin a e ame únykúmi öbun. 8 Metá

but öbun, ke hmáká thö : haba iwahnai-hmiöny möbun, wale diabolo ame ngenu helá me liona ame kuku, k' ame heleú hauiny : 9 hwege bala ju öbun ka hagutá e hnyi anyibun labageju, anyin ae khan' öbun a g' ame aat dö unyin je liamekeiny möbun eang hmeledrany ta je vec heláe. 10 Ke haba Khong hwecin ibetengió baú hia, wale ame haw' öbun ka hnyi anyin hmanenang ame ca ba balua unyin Keriso, öbun ka um dö vec hnyi úen ae okhulit, me wale at ame he ka obekhöti öbun, me otethm' öbun, me ohwegi öbun. 11 E unyin musi nyiele nyiele balua. Amen.

12 Oge hia but sihnalimen ökhulitá köbun únyi ge Silevana, ke oge me únykúme ae liamekeiny ae hnathu, hnân he ka sihwegi öbun me ohnatho, ka habe, wale ibetengió baú ae hnathu anyin Khong ; tethmä ju öbun hnyin e. 13 Haba ekalesia hnyi Babulona, wale adre me tha úca möbun, me ame italofa m' öbun ; ke heláe minya Mareko a nökek. 14 Italofaköu ju öbun ge úcimhnyimakiny ibetengió.

E so e unyibun hia thithö úsoköu, öbun tavat unyin Keriso.

TUSI A LOINY ANYI

PETERU.

HNHYIMAKAN 1.

INYA Simona Peteru athnyaba me apo-setolo anyi Iesu Keriso, oge me sihnalimen ka tavat ae hu gadra labageju ae únyi hnathu helá m' öhmun hnyi hwakecin ae wisa unyin Khonguta me At úhömeli a Iesu Keriso : 2 e so adre osehia unyibun ibetengió baú me úsoköu hnyi hna wáhmakhmetoá Khong me Iesu Keriso a Tuhöta ; 3 anyin a e ame hia but ham köta ta je únyi hia hnyi möt me hwakecin ae úcú me Khong, hnen maniny man, únyi ge hna wáhmakhmetoá e, at ame ha öta ge anyin hmanenang me hnyok so ; 4 ke can thibi e, e ame ham köta ta je hna ha báná ae únyi hnathu me gan hmá hmönyin ; m' öbun e he ka hnyi vhenö hwakecin Khong, hnen e, öbun tavat kec ge hwakecin ae kong eang hmeledrany únyi ge weny

Khong. 5 Eke, can thibi e, e so öbun e he ka ti hwege hnyi je huliwa hia, me bi hanen hnyok ae so ka hnyi anyibun labageju ; me bi hanen metá ka hnyi hnyok ae so ; 6 me bi hanen hom úhnyúkongo ka hnyi metá ; me bi hanen hokhnyok ka hnyi hom úhnyúkongo ; me bi hanen hwakecin ae úcú ka Khong ka hnyi hokhnyok ; 7 me bi hanen hnyoká hnyat me lakeiny ka hnyi hwakecin ae úcú me Khong ; me bi hanen ibetengió ka hnyi hnyoká hnyat me lakeiny. 8 Anyin a ne e unyibun ta je únyi e, k' ame ne se, me wale ame he ka wi' öbun m' öbun e ca hnyat baú bi, ke ca hnyat bi adre me ca wá, hnyi hna wáhmakhmetoá Tuhöta Iesu Keriso. 9 Anyin a wadröu but at ae ca tren ta je únyi e, ke hadedak, k' ame hnying hna obosoá únyi hnyi anyin ta je hulö ehac. 10 Anyin a wale, hnyat me lakeiny lö, hwege th' öbun he ka ohwáá

hna haw' öbun, ke hna úc' öbun : anyin a öbun e ne ányá balua ta je únyi e me öbun e ca he balua ka thö : 11 anyin a heláe adre me he ka ti hn' öbun he ka dit ka hnyi dökhú ame ca ba balua a dokhon Tuhöta At a omeli öta, a Iesu Keriso.

12 Anyin a wale oge me he ka laba penapena he ka öúnykúmi öbun ge ta je únyi e, ke so bi e kxan' öbun, me tethmá hnyi hnathu e unyibun. 13 Ke inya oge me öúnykúme ae so könya he ka sihwegi öbun ge hnök hna öúnykúmi öbun, e me tiga inya hnyi ama mená eang; 14 e kxanö nya ae logot oge me he ka uny degecá but umök uma mená, helá me hnen Tuhöta Iesu Keriso hna omanená könya. 15 Eke oge me he ka hwege huliwa me me kxan' öbun öúnykúme bala ta je únyi eang, iny ka mokcu. 16 Anyin a öhmun e ca hnu hoton ta je vekhet thoi anyin tavat ae metá, waleji hnyi úen öhmun e omanená köbun man me ioiny Tuhöta Iesu Keriso, ke öhmun e hnyi wá anyin hmanenang. 17 Anyin ae hu but gan únyi ge Khong a Kamen hna ogáná me hmanenang, waleji ame o káu hwan hofuc únyi hnyi hmanenang ae nua, ame ha, ka habe, Walang Nökuk a öúnykúmik oge me senyin káu : 18 ke öhmun e hnyi löng hofuc e únyi hnyi drany, waleji ke tiga öhmun unyin hnyi hon bucen ae kap. 19 Ke e hu but gahmun hofuc adre perofeta adre ti ohnathoá ; ke so öbun e öúnykúme wia ka hnyin, helá me ka lamepa ame umumelam hnyi dok ae lit, ke ne o but hnyi haolany, ke ame o thö okhú lany eú hnyi je hnyekubun : 20 ke öbun e wáhmakhmetoá a bán, ka habe, haba je hna perofeta hia thithö hnyi hna sihnalimen, me, ame ca manen baú bi. 21 Anyin ame ca o ke hna perofeta ehac únyi hnyi weny at, ke ame ha tavat únyi ge Khong, ke a huliwan je hnyekudrin hnen Hanu Kap.

HNYIMAKAN 2.

KE ame o thö minya ta je perofeta thoi ehac unyin tavat, ke heláe ame he ka hu tavat úne thoi unyibun, tavat adre me he ka okúá duöngá ta je imoukóu ae hnaúhangö, me he ka ivinöá Than at ame úcú ödra, adre me okúá ködra bi hnaúhangö ae logot. 2 Ke se hia tavat adre me he ka hnu hoton anyidra hwen iwadedök ; me adre me he ka haikongoá hnathu únyi gadra. 3 Ke adre me he ka úcú öbun ge hwaban hofuc ae thoi, anyin adre me beh-

nyekudra omjeú : ke haba hna he ka bi hwaban ködra ehac, me, ca bec bi, ke haba hnaúhangö adre ip hobi ködra ame ca ta mokut bi. 4 Anyin ame ne ca betenge Khong ge ta je angela hnyi úen adre me ányá hulö, ke e ame khú ödra ju hnyi gena, k' ame hn' ödra but ka hnyi je thop ae menekholom, he ka tu' ödra ke ne o but hnyi úhnei ; 5 ke ame ca betenge bi ge hmeledrany ehac, ke ame omeli Noa me hnyat minya a seven, at ame khetá hwakecin ae wisa, hnyi úen e ame oá uoú ka hnyi hmeledrany ae kong ; 6 ke ame ohnaúhangöá li taun Sodoma me Gomora, me ohia, me wia me hnabadröu, me e ame ip hnán haten ka tavat adre me he hmetu ka ányá hwakecin ae kong ; 7 ke ame omeli Lota at ae wisa hwakecin, ame vec hnyekon ge hwakecin tavat ae kong ae ikiki 8 (anyin a haba at e ae wisa hwakecin, me ame tha laba m'ödra, me wá, me löng, me ohmáká hnyekon ae wisa hnyi je bong ge anyidra ta je huliwa ame hanyáúá hnanyibu) : 9 e khana Than hwakecin hna omelö tavat ae wisa hwakecidra ae úcú me Khong únyi hnyi ta je úcúbic, me he ka ip me hnán hwaban tavat ae ca wisa hwakecidra ke ne o but hnyi bong owisa ; 10 ke nua bi tavat adre me hnu hoton weny unyin ae kong, me öúnyibáúá musí. Tavat adre me ca ot, ke tavat hwege ányá wedra, adre me ca ot he ka haikongoá ta je musí : 11 ke haba ta je angela ae nua hnyi hwege me man, me adre me ca ha hnaúhang' ödra bi hnyi hnyimakan Than. 12 Ke haba tavat ang, me helá me ta je meno ae ba hnyekudra, k' adre hnöku ödra helá me omeno hnán noc me hlingá, adre me haikongoá ta je únyi ae ca kxan' ödra, ke adre me he ka hamödra hia hnyi hnödra hna ohia, 13 k' adre me he ka vec hnán bi hwaban hnödra hna ovecá ; tavat adre me öúnykúme ae so he ka mede monu hnyi selany, ödra je thatúnyi, ke hnyat ae hu hnyikongon, adre me senyiná anyidra je thoi k' adre me tiga tha han m'öbun hnyi bijeú ; 14 a unöngötö je emaködra ge bi únyi monu, ke ca kxan' ödra bi he ka mená mádrá hulö ; ke adre me iyawá tavat adre me ca tethmá bi ; ke haba je hnyekudra, me kxenen hnyi hwakecin behnyekon ; ödra je hnyat ha hnaúhangöá ; 15 ödra hnyat adre me hna degecá gethen ae wisa, k' adre me he monu, k' adre me hnu hoton gethen de Balaama nöku Beora, waleji at ame hnyoká hwaban hwakecin ae ca wisa ; 16 ke adre me oú e can anyin monu : ke ame fuc asina ae hum

II. PETERU 3.

ge ifucin at, me thawâ hnen monu anyin perofeta. 17 Ödra je hna pupua köiö ae hme, ke ta je hai ame ofang dö; adre hia but ip hobi ködra lit ae menekholom. 18 Anyin adre me fuc bi gan me hobelöu monu, adre me iyawâ tavat adre me hap kec dö ge tavat adre me laba hnyi monu, ge ta je weny anyin, me bi únyi monu; 19 adre me ha bánâ ködra bi a g' adre me he ka hn' ödra bâûâ, ke so bi haba ödra, me lathnyabainy hwakecin ae ikiki; anyin a haba at ame hom úhnyúkongoâ ke at, me wale at eling ame bâ bi kâu. 20 Anyin adre ne hia but kec únyi hnyi ta je únyi ae kong hnyi hmeledrany únyi ge hnödra hna wâhmakhmetoâ Than At úhömeli a Iesu Keriso, ke adre me vhet hmetu hnyi me hom úhnyúkongo, awe, e kong obiny hynat eling hon can. 21 Anyin ae so ködra adre ne ca hia but wâhmakhmetoâ getheniy hwakecin ae wisa, hon hnödra hna wâhmakhmeto, me hmetuhmetu únyi hnyi hnanyibu ae kap adre me ham ködra. 22 Ke ame aat dö ködra helâ me ong vejec ae hnathu, ka habe, Ame hmetu thö kuli ka hnyi hnen hna hmita, k' ame hmetu thö buaka a ka hia but söu ka hnyi hmudra he ka seset hnyin.

HNYIMAKAN 3.

HNYAT a oúnykúmik lö, walang tusi a loiny inya oge me sihnalimen köbun; ke haba hnyi li tusi a lo hia, me oge me sihwegîa je hnyekubun ae hnathu me oúnykúmi öbun; 2 m' öbun e he ka únykúme thö ta je hofuc a bán hwan ta je perofeta ae kap, me hnanyibu anyin Than At úhömeli a deny anyibun ta je aposetolo: 3 a böbun he ka wâhmakhmeto únyi eang a haba hnyi ta je bong a biliny, me ame he ka o tavat úhiö me úhlumöny, k' adre me he ka he hoton ta je wedra bi ae kong, 4 me ha, ka habe, Ewa hna ha bánâ a g' ame he ka o? anyin a hwân dö hnyi úen mokut a lakamöta adrem, me ame tethmä bala ta je únyi hia thithö, waleji hwân hnyi hna op ta je únyi hia. 5 Anyin ae wedra bi he ka hnying únyi eang, ka habe, walethö drany kâu adrem, me hmeledrany minya, waleji adre tretraoâ ge köiö ke únyi hnyi köiö hnen hofuc hwan Khong; 6 ke can e haba uof ame ohia hmeledrany waleji adrem: 7 ke haba drany me hmeledrany walang ang, me adre hia but ip únyi ge hofuc eling hnân hobi kâu meic, k' adre

me ip bi ke ne o but hnyi bong owisa me lnaúhangö anyin tavat ae ca úcú hwakecidra me Khong.

8 Hnyat a oúnykúmik lö, ca he öbun ka hnying hofuc ang a khaca, ka habe, haba hnyi hnyimakan Than, me bong a khaca helâ me wan thauzan ta je huna, ke haba ta je huna a wan thauzan, me úcú thibi me bong a khaca. 9 E ca bec bi Than hnyi hnen hna ha bánâ, helâ me únykúmenen keihen, ka habe, e bec; ke e ame hok hnyoki öbun beú hmâ, e ca weny bi ame he ke at ka hnaúhangö, ke so bi adre me he hia thithö ka ietra. 10 Ke ame he ka o bong bonginy Than helâ me at venöu; ke ame he ka hia drany me hmuhmu ae gan hmâ hnyi bong eling, ke ame he ka köiö but ge kahwa ae gan hmâ ta je únyi hia thithö, ke adre me he ka thong degecâ minya hmeledrany me ta je únyi adre huliwan hnyin e. 11 Ke can ame he ka hia ta je únyi e, me ieú hwakecin ae úcú köbun? hawa e ca so öbun e he ka tavat ae hnathu hnyi hwakecin ae kap me hwakecin ae úcú me Khong, 12 me tavat halubahingen me webun he ka o but bong bongon Khong, wale ame he ka thong drany me me he ka oköiâ e, ke ame he ka köiö but ge kahwa ae gan hmâ ta je únyi hia thithö? 13 Ke hoton hnen hna ha bánâ, ate me halubahingen drany a teb únyi me hmeledrany a tebúnyi, wale ame he ka laba hnyin hwakecin ae wisa.

14 Anyin a wale, hnyat a oúnykúmik lö, haba öbun tavat öbun e halubahingen ta je únyi e, hwege thö, m' adre me ö 'bun dö hnyi úsoköu ae ba hnyikongan me hnân haikongu öbun hnyi hnyimakan. 15 Ke únykúme ju öbun a haba hok hnyok beú hmâ anyin Tuhöta me wale möt, helâ me hna sihnalimen köbun ga Paulo liamekeiny m' öta a oúnykúmita, hoton metâ adre ham kâu; 16 ke helâe hnyi anyin ta je tusi ame ha hnyin ta je únyi e; ke wale thibi e ke je hofuc ae hmak he ka wâ tremângâ, adre wia hnen tavat adre ca nâ me tavat loloâ, helâe minya ke je hna sihnalimen, m' adre me ka ohnaúhang' ödra bi. 17 Anyin a wale hnyat a oúnykúmik lö, ö 'bun áu, anyin ae khan' öbun dut ehac wâ öbun nye ta hnyi hnöbun hna tet hmâ e, e ka lili öbun ge monu anyin tavat ae monu. 18 Ke húhûö th' öbun hnyi ibetengö baú me wâhmakhmetoâ Tuhöta At úhömeli, a Iesu Keriso. E unyin hmanenang walang ang me nyiele balua. Amen.

IOANE.

HNYIMAKAN 1.

HABA únyi ae únyi hnyi can waleji öhmun e löng me wâ ge je emaköhmun, me wâ hmâ, me kâlâ ge je hnyamöhmun, hnyi Hofucin Möt 2 (ke a manen dut möt, k' öhmun e hia but wâ me ohnathoâ, me thumetu öbun ge möt a nyiele balua bi, waleji ae unyin Kamen, k' adre me omanenâ köhmun): 3 ke öhmun e omanenâ köbun únyi öhmun e wâ me löng, m' öbun e he ka tha laba m' öhmun: eke, ke öhmun e tha laba me Kamen me Nokon a Iesu Keriso: 4 ke öhmun e sihnalimen ta je únyi ang, me me hwádâ but anyita senyin.

5 Ke walang úthumetu öhmun e hia but löng únyi gan, me haimemenâ köbun, ka habe, Khong thibi melam, ke ba ju ke ong lit unyin. 6 Ate ne ha, ka habe, ötin e tha laba mē, k' ate me vheno bi hnyi lit, awe, ate me thoi, k' ate me ca ânyâ hnathu: 7 ke ate me ne he hnyi melam, helâ me e hnyi melam, awe, ate me tha laba ke at me ke at, k' ame hneú degecâ anyita ta je hulö hia thithö hnen drö Iesu a Nokon. 8 Ate me ne ha, ka habe, e ba anyita hulö, awe, ate me ka iyaw' öta, ke ba hnathu unyita. 9 Ate me ne omanenâ anyita ta je hulö, me e at ae hnathu ke wisa he ka hna degecâ bi anyita ta je hulö, me hneú degecâ ta je hwakecita hia thithö ae ca wisa. 10 Ate me ne ha, ka habe, ate me ca hia but hnyi ânyâ hulö, awe, ate me wia e me at thoi bi, ke haba hwan hofuc, me ca eú hnyi je hnyekuta.

HNYIMAKAN 2.

JE lakuk lö, inya oge me set köbun ta je únyi e, m' öbun e ca he ka ânyâ hulö. Ke a ne ânyâ hulö ke at, me hu but gata Úhadruö unyin Kamen a Iesu Keriso at ae wisa: 2 ke e thibi hut can anyita ta je hulö; ke ca hake öta thibi, ke can minya

bi hmeledrany hia thithö. 3 Ke walang haten a ga khan' öta e, ka habe, ate ne löng hoton anyin hnanyibu. 4 Haba at ame ha, ka habe, e khanö nya but e, k' ame ca löng bi hoton anyin ta je hnanyibu, awe, e ame thoi, ke ca e bi eú hnyi hnyekon hnathu: 5 ke haba at ame löng hoton hwan hofuc, me hnathu adre hia but obekhötâ eú hnyin at e hnyok ka Khong. Waleling me me khan' öta a öta but eú hnyi hnyekon: 6 haba at ame ha, ka habe, e ame laba eú hnyi hnyekon, me úcú kâu he ka he helâ me úheny.

7 Hnyat a oúnykúmik lö, oge me ca sihnalimen köbun hnanyibu a teb únyi, ke so bi hnanyibu adrem, waleji öbun e hu únyi hnyi can: haba hnanyibu adrem, me waleji hofuc öbun e löng. 8 Wale hmetu ang, inya oge me set köbun hnanyibu a teb únyi, wale ae hnathu gan me gabun; anyin ame hia tot menekholom, ke ame umu-melam walang ang melam ae hnathu. 9 Haba at ame ha, ka habe, e but hnyi melam, ke ame húkötîâ bi liamekeiny mē, awe, e bala bi hnyi lit ke ne o but walang ang. 10 Haba at ame betenge ka liamekeiny mē, e but hnyi melam, ke ba únyi hnân othoâ gan. 11 Ke haba at ame húkötîâ liamekeiny mē, e bala hnyi lit, k' ame he hnyi lit, ke ca khana hnen hna he ka hnyin, anyin ame öwadruâ li emakan hnen lit.

12 Inya oge me set köbun je wanakat, anyin adre hna degecâ anyibun ta je hulö únyi hnyi ien. 13 Inya oge me set köbun je kamen anyin ae khan' öbun e, waleji únyi hnyi can. Inya oge me set köbun wahidróu, anyin a öbun e hwege hon at ae kong. Oge hia but set köbun je wanakat, anyin ae khan' öbun Kamen. 14 Oge hia but set köbun je kamen, anyin ae khan' öbun at, waleji únyi hnyi can. Oge hia but set köbun wahidróu, anyin a öbun hwege, k' ame tethmâ eú hnyibun hofuc hwan Khong, ke öbun e tubun hon at ae

kong. 15 Ca he öbun ka hnyokâ hmeledrany, me ta je únyi eang hmeledrany. A ne ke at ame hnyokâ hmeledrany, me ba bi hnyok ka Kamen eú hnyi hnyekon. 16 Anyin a haba ta je únyi hia thithö eang hmeledrany, wale behnyekon ta je únyi hnyi unyin, ke behnyekon hnen li ecmak, ke hobelua monoâ möt ang, me ca únyi ge Kamen, ke únyi eang hmeledrany. 17 Ke haba hmeledrany, me ame he bi ka hia, me ta ge weny ka hnyin: ke ame he ka tethmâ nyiele balua at ame mádrâ weny Khong.

18 Je wanakat lö, haba awa ang, me obiny: ke helâ me hnöbun hna löng a g' ame he ka o iwahnaihmiöny me Keriso, ke se hia je iwahnaihmiöny me Keriso walang ang; waleling me manen köta a haba awa ang, me obiny. 19 Adre me he but unyita, ke so bi ca lahanöta ödra; anyin adre ne je lahanöta, me adre me ne hia but tethmâ unyita: ke adre me he but, me me manen dut a ca je lahanöta ödra hia. 20 Ke so bi adre me hú öbun únyi ge At ae Kap, ke manen köbun ta je únyi hia thithö. 21 Oge me ca sihnalimen köbun anyin ae ca khan' öbun únyi ae hnathu, ke so bi, anyin ae khan' öbun e, ke anyin ame ca o thoi únyi hnyi hnathu. 22 Ewa at thoi, ca e at ame ha, ka habe, ca Keriso bi Iesu? Haba at ame ivinöâ Kamen me Nokon, me wale iwahnaihmiöny me Keriso. 23 Haba at ame ivinöâ Nokon, me hia but Kamen unyin: ke haba at ame haimemenâ Nokon, me e but unyin minya Kamen. 24 Ke haba öbun, me so ame laba bala eú hnyi je hnyekubun hofuc öbun e löng hnyi can. Ame ne he ka e bala eú hnyi je hnyekubun hofuc öbun e löng únyi hnyi can, me öbun e he ka laba balua bi unyin Nokon me unyin Kamen. 25 Ke walang hna ha bánâ waleji e ame ha bánâ köta, möt ame ca ba balua. 26 Oge hia but sihnalimen ta je únyi e köbun ge tavat adre beomonu öbun. 27 Ke haba öbun, me ame tethmâ unyibun hna osúâ waleji öbun e kap únyi gan, ke ca únyi hnathu köbun ame he ke at ka n' öbun; ke haba hnen hna osúâ ame n' öbun hnyi ta je únyi hia, ke e hnathu e, k' ame ca thoi bi, ke helâe, e ame n' öbun, ke so öbun e tethmâ hnyin. 28 Ke walang ang je wanakat lö, laba ju eú hnyi hnyin; me me hu gata hnyok ae hwege, e ka manen dut, m' ate me ca he ka hmehma hnyi hnyimakan e ka o but. 29 A ne khan' öbun a e at ae wisa, awe, e khan' öbun minya a g'

adre hnoko únyi gan tavat hia adre me ányâ hwakecin ae wisa.

HNYIMAKAN 3.

WÂ bi úganiny ibetengiö waleji a ham köta Kamen, m' adre me he ka ha' öta me je lakon Khong: ke öta e. Waleling me me ca khan' öta hnen hmeledrany, anyin ae ca khan' ödra e bi. 2 Hnyat a oúnykúmik lö, öta je lakon Khong walang ang, ke tiga ca manen bi bonguta nyiele. Ke e khan' öta, ka habe, e ka maneu dut, me ate me he ka helâ mē; anyin ate me he ka wâ cicöâ e. 3 Ke haba ödra hia ae hu gadra geju eang, me, adre me okabi ödra bi, helâ mē ae kap. 4 Haba ödra hia adre me ányâ hulö, me adre me hanyâúâ hnanyibu: ke haba hna hanyâúâ hnanyibu, me wale hulö. 5 Ke e khan' öbun a g' ame manen dut me me he ka hom degecâ hulö; ke ba anyin hulö. 6 Haba at ame laba eú hnyin e ame ca mádrâ hulö: haba at ame ányâ hulö, me ame ca hia but wâ e, ke ame ca wâhmakhmetoâ e: 7 Je wanakat lö, ca he ka omonu öbun hnen ke at: e wisa at ame ányâ hwakecin ae wisa, helâ mē ae wisa: 8 únyi ge diabolo at ame ányâ hulö; anyin ame ányâ hulö diabolo únyi hnyi can. K' a manen dut Nokon Khong, me me he ka ohia ta je huliwa anyin diabolo. 9 Ame ca ányâ hulö at adre hnokoâ únyi ge Khong, anyin ame laba eú hnyi hnyekon wan gan; ke e ca khana he ka ányâ hulö, anyin adre hnokoâ únyi ge Khong. 10 Únyi hnyi e, me manen dut lakon Khong me lakon diabolo: anyin a ca únyi ge Khong at ame ca ányâ hwakecin ae wisa, me at minya ame ca betenge me liamekeiny mē. 11 Anyin a walang úthumetu öbun e löng únyi hnyi can, ka habe, hamöta he ka ibetengiököu: 12 ca helâ me Kaina, a únyi ge at ae kong, k' ame hlingâ keiny. Ke can iéu e ame hlingâ e? Can ae kong anyin bi ta je huliwa, ke wisa bi ta je huliwa anyin keiny.

13 Hnyat me lakeiny lö, ca he bi ka hlohlo e ka húkötí öbun hnen aten hmeledrany. 14 E khan' öta, a ate me hia but didrö únyi hnyi mok ka hnyi möt, anyin ate me betenge ge je liamekeiny. Haba at ame ca betenge, me e bala bi hnyi mok. 15 Haba at ame húkötíâ liamekeiny mē, me e thibi at úhlingö; ke e khan' öbun dut a haba at úhlingö, me ba bi möt ame ca ba

balua eú hnyi hnyekon. 16 Ke manen kôta ibetengiö anyin a e ame hamen ham anyin möt hnân hobi kôta: me úcú minya kôta he ka ham anyita möt hnân hobi kâu je liamekeiny. 17 Haba at ae hu ta únyi eang hmeledrany, k' ame wâ liamekeiny më ae theduoc, k' ame thelöng oúnykúminy gan, me ame he ka kâmâu hnyok ka Khong ka laba eú hnyin at e? 18 Je wanakat lö, ca he öta ka betenge thibi ge hofuc, me bohmen; ke so bi hnyi huliwa me hnathu. 19 Hnen e ate me he ka wâhmakhmeto a úheta hnyi hnathu, k' ate me he ka cubec je hnyekuta hnyi hnyimakan, 20 hnyi únyi ame haikongu öta hnen hnyekuta: anyin ae beönuu bi Khong hon ta je hnyekuta, me khana ta je únyi hia thithö. 21 Hnyat a oúnykúmik lö, a ne ca haikongu öta hnen je hnyekuta, me hu but gata hnyok ae hwege ka Khong; 22 ke haba únyi ate me sumâtâ me ate me hu but gan, anyin ate me löng hoton anyin hnanyibu, me anyâ ta je únyi ae so hnyi hnyimakan. 23 Ke walang ang anyin hnanyibu, ka habe, hamöta he ka labageju ka hnyi ien Nokon a Iesu Keriso, me ibetengiököu, helâ me hnanyibu a ham kôta. 24 Ke haba at ame löng hoton anyin ta je hnanyibu, me ame laba eú hnyi hnyekon, ke e minya eú hnyi hnyekon. Ke hnen bi e, me ate me wâhmakhmeto a e ame laba eú hnyi hnyekuta, únyi ge Hanu e ame ham kôta.

HNYIMAKAN 4.

HNYAT a oúnykúmik lö, ca kap bi ta je hanu hia, ke cubec ju ta je hanu, hawa, únyi ge Khong ödra: anyin ae se hia ta je perofeta thoi ame o ehe hnyi hmeledrany. 2 Hnen únyi ang öbun e wâhmakhmetoâ Hanon Khong: haba ta je hanu hia adre me ha, ka habe, a o but Iesu Keriso hnyi unyin, me wale hanu únyi ge Khong: 3 ke haba ta je hanu adre me ca haiö Iesu, me ca únyi bi ge Khong ödra: ke walé hanon iwahnaihmöny me Keriso, waleji öbun e löng a g' ame he ka o; ke e bi walang ang hnyi hmeledrany. 4 Je wanakat lö, únyi ge Khong öbun, ke öbun hwege hudrin: anyin ae beönuu at eú hnyi je hnyekubun, hon at eú hnyi hmeledrany. 5 Ödra lahanen hmeledrany, anyin a wale adre me hwen hmeledrany, ke ame ling ödra hnen hmeledrany: 6 Öhmun tavat únyi ge Khong: ke ame ling öhmun hnen at ame

wâhmakhmeto Khong; ke ame ca ling öhmun hnen at a ca únyi ge Khong. Hnen únyi e ate me wâhmakhmeto hanu ae hnathu, me hanu ae monu.

7 Hnyat a oúnykúmik lö, e so ate me he ka ibetengiököu: anyin a únyi ge Khong ibetengiö; ke adre hnoko únyi ge Khong ödra hia adre me hnyi betenge, ke adre me wâhmakhmeto Khong. 8 Haba at ame ca hnyi betenge bi, me ca khana bi e hnen Khong; anyin a Khong ibetengiö. 9 Adre hia but omanená kôta ibetengiö anyin Khong, waleji hnyi hnen Khong hna kunâ ka hnyi hmeledrany Nokon a khaca, m' ate me he ka möt únyi gan. 10 Wale thibi ang ibetengiö, ca hnöta hna hnyok ka Khong, ke so bi hnen hna hnyok kôta, me hna kunâ Nokon hnân hut can anyita je hulö. 11 Hnyat a oúnykúmik lö, a ne betenge gata Khong helâe, hamöta he ka ibetengiököu. 12 E ba bala at ame wâ Khong: ate ne ibetengiököu, me Khong ame laba eú hnyi je hnyekuta, ke adre obekhötâ anyita ibetengiö kâu eú hnyita: 13 ke e khañ' öta a ate me laba eú hnyin hnyekon, ke e bi eú hnyi je hnyekuta, anyin a e ame ham köla Hanon. 14 Ke öhmun e hia but wâ me ohnatho, a ga kunâ Nokon hnen Kamen he ka omelö hmeledrany. 15 Haba at ame he ka ha, ka habe, Iesu Nokon Khong, me Khong ame laba eú hnyin, ke e bi eú hnyi hnyekon. 16 Ke ate me wâ me labagejoâ ibetengiö anyin Kong kôta. Haba Khong, me ibetengiö; ke haba at ame laba hnyi ibetengiö, me ame laba hnyi hnyekon Khong, ke Khong eú hnyi hnyin. 17 Hnen thibi ang adre me obekhötâ ibetengiö unyita, m' ate me he ka hu hnyok ae hwege hnyi bong owisa; anyin a öta tha úcú më eang hmeledrany. 18 E ba ot hnyi ibetengiö: k' ame obâ degecâ ot hnen ibetengiö ae bekhöt, anyin ae tren vec ot; k' adre ca obekhötâ at ame ot, hnyi ibetengiö. 19 Ate me betenge, anyin a e ame bán ka betenge gata. 20 E ka ha hnen ke at, ka habe, Oge me hnyokâ Khong, k' ame húkötîâ liamekeiny më, me at thoi bi: anyin a haba at ame ca betenge ka liamekeiny më, ame wâ, me ca khana he ka hnyokâ Khong, ame ca wâ. 21 Ke walang hnanyibu ae hu gata únyi gan, a haba at ame hnyokâ Khong, me ame he ka betenge minya ge liamekeiny më.

HNYIMAKAN 5.

ADRE hnokoá únyi gë Khong hnyat adre me kap, ka habe, Iesu thibi Keriso : ke haba at ame hnyoká at a hnokoá, me ame he ka hnyoká minya at e ame hnokoá. 2 Hnen thibi ang e manen kôta a g' ate me betenge ka lakon Khong, anyin ate me hnyoká Khong k' ate me löng hoton anyin ta je hnanyibu. 3 Haba hnyok ka Khong, me wale thibi ang, a g' ate me löng hoton anyin ta je hnanyibu : e ca hmak anyin ta je hnanyibu. 4 Anyin ame hwege hon hmeledrany únyi a hnokoá ge Khong: ke walang hwege ae hwege hon hmeledrany, wale anyita labageju. 5 Anyin a ie at ae hwege hon hmeledrany, hawa ca at bi ame kap a Nokon Khong thibi Iesu Keriso? 6 E thibi at eji ame o hnyi köiö me dra, Iesu Keriso ; ca hake hnyi köiö, ke köiö me dra. 7 Ke Hanu at ame ohnatho, anyin ae hnathu Hanu. 8 Anyin a ödrin kun hnyat ödrin e ohnatho, wale Hanu, me köiö, me dra : ke khaca thibi, kun eling. 9 Ate ne kap hna ohnathoá únyi ge at, e beönua hon e hna ohnathoá únyi ge Khong: anyin a walang hna ohnathoá únyi ge Khong, a e ame ohnathoá Nokon. 10 Haba at ame labageju ka Nokon Khong, me e hu but eú hnyi hnyekon hna ohnatho: haba at ame ca labageju ka Khong, me ame hai thoiá e ; anyin a e ame ca hia but kap hnen Khong hna ohnathoá Nokon. 11 Ke walang hna ohnatho, a Khong ame ham kôta möt ae ca ba balua, ke únyi ge Nokon möt eling. 12 Haba at

ae hu but gan Nokon, me hu but gan möt ; ke haba at ae ca hu gan Nokon Khong me ca hu bi káu möt.

13 Oge hia but sihnalimen ta je únyi e köbun tavat öbun e labageju ka ien Nokon Khong, me me khan' öbun ae hu but gabun möt ae ca ba balua. 14 Ke walang hnyok ae hwege ate me hu káu, a öta ka he ka sumâtá ke únyi helâ me weny, me ame ling öta : 15 ke a ne khan' öta a e ame ling öta hnyi hnöta hna sumâtá, me e klan' öta ae hu but gata minya ta je únyi ate me sumâtá gan. 16 A ne ke at ame wâ liamekeiny mē ame ányâ hulö adre me ca mekiny, me e ame he ka sumâtá, ke Khong ame he ka ham káu möt hobi káu at ame ányâ hulö a ca hnân mekiny. E hu hulö hnân mekiny: oge me ca ha a e ame he ka khöúá e. 17 Haba ta je hwakecin hia ae ca wisa bi, wale hulö : ke e hu hulö bi a ca hnân mekiny.

18 E khan' öta bi a g' ame ca ányâ hulö hnen at adre hnokoá únyi ge Khong ; ke ame tuö e hnen at eji a hnokoá únyi ge Khong, ke ame ca kâlâ e hnen at ae kong. 19 E khan' öta a úheta unyin Khong, ke hmeledrany hia thithö ame mokut unyin at ae kong. 20 Ke e khan' öta a g' ame hia but o Nokon Khong, ke a hia but ham kôta hna wâhmakhmeto, me me khan' öta e at ae hnathu, ke öta but eú hnyi hnyekon at ae hnathu, wale eú hnyi hnyekon Nokon a Iesu Keriso. Wale Khong ae hnathu, me möt ame ca ba balua. 21 Je wanakat lö tu' öbun ju ge ta je hnatheat.

TUSI A LOINY ANYI

IOANE.

INYA hingat oge me sihnalimen ka ishola adre úca me lakon, hnyat oge me hnyok ködra hnyi hnathu ; ke ca hake inya bi, ke ödra hia minya ae hnyi khan' ödra hnathu ; 2 únyi hnyi hnathu ame laba eú hnyita, k' ame he ka e unyita nyiele balua : 3 ame he ka e unyita, ibetengio baú, me ibetengio, me úsoköu únyi ge Khong a Kamen, ke únyi ga Iesu Keriso

a Nokon Kamen, hnyi hnathu me ibetengio.

4 Inya oge me senyin gan hmâ, anyin oge me wâ a ga vheno hnathu ke je lakom, helâ me hnanyibu ate me kap únyi ge Kamen. 5 Ke walang ang oge me újöngi u ishola, ca helâke oge me set köu hnanyibu a teb únyi, ke so bi hnöta hna hu únyi hnyi can, a g' ate me ibetengioökou. 6 Ke

III. IOANE.

walang ibetengiö, ka habe, ate me he ka hnu hoton anyin ta je hnanyibu. Walang hnanyibu öbun e löng únyi hnyi can, m' öbun e he ka vheno e. 7 Anyin ae se hia tavat iyawö eang hmeledrany, hnyat adre me ca hmehmelâ a ga o Iesu hnyi unyin. Haba at eling ame omono, ke iwahnai-hmiöny me Keriso. 8 Ö 'bun aú, wâ e nye hia but gabun ta je únyi öhmun e hia but huliwan, ke so öbun e kap hwaban ae unöngöt. 9 Haba at ame úne k' ame ca tethmä hnyi hna úne anyin Keriso, me Khong ame ca laba unyin : ke haba at ame tethmä hnyi hna úne anyin Keriso, me hu

but gan Kamen me Nokon minya. 10 E ka o ke at köbun, k' ame ca hom bi hna úne eang, me cã he ka kap e ka hnyi um-öbun je uma, ke ca italofo bi mē: 11 anyin a haba at ame italofo mē, me ame hnyi hanen Anyin je huliwa ae kong.

12 E hu but gak ta je hofuc ae se hia he ka sihnalimen köbun, ke ca bewek he ka set hnyi peipa me köiö sisit, ke so bi oge me gejon he ka o but köbun, me úhne-namö iohnyimak, me me hwâdâ anyibun senyin. 13 Ame italofo köu hnen lakon ke momo adre úca.

TUSI A KUNINY ANYI

IOANE.

INÝA hingat oge me set kö Gaio a oúnykúmik, at oge me hnyok kãu hnyi hnathu.

2 Oúnykúmik lö, oge me khöüâ me u me sot, me hwege unyãm helâ me ihwegien hanom. 3 Anyin oge senyin gan hmâ waleji ge ioiny hnyat me lakeiny me ohnathoâ hnathu gam, helâ me hnãm hna vheno hnathu. 4 E ba anyik senyin ae nua hon iny ka he ka löng a ga vheno hnathu hnen lakuk.

5 Oúnykúmik lö, u me ányâ huliwa ae hnathu hnyi hnãm hna ányâ hia ka je hnyat me lakeiny, me ta je atkanyua minya: 6 a tavat adre me ohnatho hnyi hnyimakan ekalesia ányãm ibetengiö: ke u me he ka ányâ so, u ka he ka su ödra hoton hwakecin ae úcú ka Khong hnyi hnödra hna he. 7 Anyin adre he can Ien, ke ba únyi adre me hom ge Aten ke je hnyei. 8 Anyin a wale e úcú köta he ka kap soâ tavat helâe, m' ate me he ka tha huliwan hnathu.

9 Oge me set ka ekalesia: ke haba

Dioterefe, at ame benua hudrin, me ame ca köp öhmun. 10 Anyin a wale, oge ne o, oge me he ka únykúme ta je únyi e ame ányâ, ame bifuci öhmun ge ta ge hofuc ae kong: ke ca soju ta je únyi eling, ke e ame ca kap minya bi hnyat me lakeiny, ke e ame thawâ tavat adre me wedra he ka kap, me ob' ödra ge ekalesia. 11 Oúnykúmik lö, ca hnu hoton únyi ae kong, ke so bi únyi ae so. Únyi ge Khong at ame ányâ so: haba at ame mãdrâ monu, me e ame ca wâ Khong. 12 Haba Demetio, me adre me ohnathoâ hnen tavat hia, ke hnen minya hnathu bi: eke, öhmun minya öhmun e ohnatho; ke e khanö u a e hnathu hnöhmun hna ohnatho.

13 E hu gak ta je únyi ae se hia he ka sihnalimen köu, ke ca wek he ka set köu ge köiö sisit me pen: 14 ke inya oge me gejon he ka ie iouny möu, ke ötu me he ka úhnenamö úhnyimaköu. E so e unyãm úsoköu. Je lahanöta ödrin e italofo möu. Inya oge me ve italofo ka je lahanöta.

TUSI ANYI
J U D A.

INYA Juda athnyabai Iesu Keriso, liamekeiny me Iakobo, oge me set ka tavat adre haw' ödra, me laoúnykúminy Khong a Kamen, tavat adre tu' ödra hobi kö Iesu Keriso: 2 e so e si but unyibun ibetengiö baú, me úsoköu, me ibetengiö.

3 Hnyat a oúnykúmik lö, oge me wek hmönyin he ka set köbun ge möt adre ham gáná köta, k' ame újóngi nya hnyekuk he ka set köbun me sihwegi öbun, m' öbun e he ka hwege úsabö úöhwege hobi káu labageju, waleji adre tha ham ka tavat ae kap. 4 Anyin ame dit duóng keihen, a hnyat adre ip ehac hnân hobi káu hnaúhangö eang, hnyat adre me ca outen Khong, k' adre me wia ibetengiö baú anyin Khong ka hnyi hwakecin ae ikiki, k' adre me ivinöa Tuhöta a khaca a Than Iesu Keriso.

5 Inya oge me wek he ka oúnykúmi öbun, ke so bi e khan' öbun wia but ehac, ka habe, haba Than ame omelö tavat únyi hnyi hnyeí Aigupito, ke hwaban e, e ame ohia tavat adre me ca labageju. 6 Ke haba ta je angela waleji adre me ca tethmä hnyi hanymödra ae gan hmá, ke adre me hna degecá hing hnyabadra, me e ame hia but c' ödra hnyi menekholom a nyiele balua ke ne o but bong owisa a bong ae gan. 7 Helá me Sodoma me Gomora me je taun igigilö adre me tha hwakecidra me bi únyi monu, k' adre me hnu hoton ke je unyin bi, me adre me ip ödra hnân haten, k' adre me hang' ödra ka hnyi meic ame ca he bi ka mok. 8 Ke heláe minya tavat ang, adre me bwi me oikikiá unyidra, k' adre höciá tavat musi, k' adre haikongoá wahmanenang. 9 Ke haba Mikaela angela ae nua ame úöhwege me diabolö k' ame iwatretra ge unyi Mose, me ca hwege he ka haikongoá e, ke e ame ha, ka habe, Hamen bi Than he ka thawö u. 10 Ke haba ödra ang, me adre me haikongoá ta je únyi ae ca khan' ödra: ke haba ta je únyi ae khan' ödra hoton unyin, helá me ta je

meno ae ba hnyekudra, me adre me hang' ödra hnyi ta je únyi e. 11 E kölö gadra! anyin adre me vhenö gethen de Kaina, me patrutrua ka hnyi monu anyi Balaama hnân hwaban, me mok hnyi ivinö anyi Kora. 12 Haba ödra ta je okongon hnyi anyibun bijeúiny ibetengiö, ödra ka tha hnyi bijeú m' öbun, ödra tavat tuö mamoe adre ha ödra bi, me ca ot; ödra je úlá ae ba köien, ame oú ang dö; ödra je úö ae ba wan hnyi úen he ka wa, a olo mok, adre oc dö me iwán; 13 ödra je waköiöiny köiö ame khutu, a húlúlú hangöc dö je únyi hnân ohmehm' ödra; ödra ta je okhú adre me he monu, ke adre hia but ip hobi ködra bi litiny menekholom ame ca ba balua. 14 Ke haba Enoka, waleji a seveniny hwân ga Adamu, ame perofeta minya ka tavat ang, ka habe, Wá ju ame he ka o Than tha e me anyin wapak a je ten thauzan, 15 he ka bi hwaban ka tavat hia thithö, me he ka ohwádá ka tavat adre ca outen Khong, anyidra ta je huliwa ae ca úcú ka Khong, waleji adre ányá me ca ot ka Khong, me ta je hofuc ae hwahwacit waleji a ha gan tavat ae kong adre me ca outen Khong. 16 Ödra tavat ulit, me tavat fuc, adre me he hoton ta je wedra ae kong (ke ame fufuc je hnyimödra) k' adre me ogáná at me me hu troban bi ködra.

17 Ke haba öbun, laoúnykúmik lö, únykúme ju öbun je hofuc waleji ame ha ehac je aposetolo anyin Tuhöta Iesu Keriso; 18 adre ha köbun, ka habe, Ame he ka o hnyi úen a biliny tavat úhiö, adre me hnu hoton ta je wedra ae ca úcú me Khong. 19 Ödra e tavat adre me okúá imoukóu, adre me hwen unyin, ke ca hu bi Hanu. 20 Ke haba öbun, laoúnykúmik, up öbun dö göranyai hnyi anyibun labageju ae ti kap, me hic hnyi Hanu Kap, 21 ke tu' öbun ju hnyi ibetengiö anyin Khong, ke halubahingen ju öbun ibetengiö baú anyin Tuhöta Iesu Keriso, ke ne o but ka hnyi möt ame ca ba balua. 22 Ke betenge ju

öbun ka keihen tavat adre me loloá ; 23 ke omelö thö keihen, me lili ödra ju únyi hnyi meic ; ke betenge ju ka keihen me ot, ke ikikiá thö úkhaú ame okongoá hnen unyin.

24 Ke so e unyin at ae khana he ka tu' öbun, wá öbun nye ü but, me omanen' öbun ae ba hnyikongon hnyi hnyimakan

anyin hmanenang me senyin ae gan, 25 e so e unyin Khong a khaca, At a omeli' öta a deny Iesu Keriso a Tuhöta, hmanenang, me mec, me musi, me man, hwan adrem balua, me walang ang, me nyiele balua. Amen.

HNA OMANENÂ KÖ IOANE.

HNHYIMAKAN 1.

WALANG hna omanená anyi Iesu Keriso, waleji hnen Khong hna ham káu he ka omanená ka lathnyabainy, wale ta je únyi ame he ka ie o : ke e ame kuná me omanená e deny anyin angela ka athnyabainy a Ioane ; 2 waleji at ame ohnathoá hofuc hwan Khong, ke hna ohnatho hnö Iesu Keriso, a ta je únyi hia e ame wá. 3 Hnabic hnen at ame afú, me tavat adre me löng hofuc adre perofeta, me löng hoton ta je únyi adre sihnalimen hnyin : anyin ae hakekeny jut ün.

4 Inya Ioane oge me set ka ta je ekalesia a seven hnyi Asia : E so e unyibun ibetengiö báu, me úsökü únyi gan, at a e walang ang, ke káu adrem, ke ame he ka o ; me únyi ge ta je Hanu a seven hnyi hnyimakan anyin theron ; 5 me únyi ga Iesu Keriso at ohnatho ke hnathu, wale atöiny tavat úhedra hnyi hna mok, ka tuhan ta je than hnyi hmeledrany. E so e unyin at ame betenge gata, k' ame thang degecá anyita ta je hulö únyi ge dren ; 6 k' ame wi' öta me me dökhü me hnyat bihut ka Khong a Kamen ; e so e unyin hmanenang me dökhü nyiele nyiele balua. Amen. 7 Wábie ame he ka o hnyi ta je úlá ; k' ame he bi ka wá e hnen ta je ecmak hia, me tavat waleji adre me dá e ; ke ame he ta je tribu hia eang hmeledrany ka tenge thungaú gan. Eke, Amen.

8 Inya ang Alefa me Omega, haingen Than a Khong, a inya ang, ke inya káu adrem, ke inya at ame he ka o, At ae khana hia.

9 Inya Ioane, liamekeiny m' öbun me tha inya m' öbun hnyi vec, me dokhu,

me hok hnyok únyi Iesu, oge mwi but hnyi bomene Patamo ien, can hofuc hwan Khong me hna ohnathu Iesu. 10 Inya but hnyi Hanu hnyi bong bonginy Than, ke oge me löng hnyi hotuk hofuc ae gan helá me hwan khoto, ame ha, ka habe, 11 Haba ta je únyi u je wá, sihnalimen ju hnyi ke tusi, me kuná ka ta je ekalesia : wale Efeso, me Semurina, me Peregamo, me Thuataira, me Saradi, me Filadelefa, me Laodikea. 12 Ke oge me hwiö he ka wá hofuc ame fuc könya. Ke oge me hwiö thö, me oge me wá je taben lamépa gol a seven ; 13 ke e hnyi wanben je taben lamépa a seven ke at helá me Nokon at, a khavá úkhaú ame beú ke ne o but hnyi hnyeúcan, ke ame weiká úlainy ge wen a gol. 14 Ke haba ban me leúnen ban, me hau helá me leúnen mamoe, ke helá me kiona ; ke helá me báhlán meic li emakan ; 15 ke helá me bras ae hadröngöc li can, heláke adre le hnyi meic ae gan ; ke haba ifucin, me helá me hwan köiö ae se hia. 16 Ke e hu hnyi hnyamen a metán, je okhú a seven : ke ame o hnyi hnyimen hele vat a lo homakan ae so hwan : ke haba hnyimakan, me helá me seúnö ae hadröngöc hmönyin. 17 Ke oge me wá e, me oge me ta-hnyi hmelen li can helá me at a mokcu. Me e ame ip hnyamen a metán huk, me ha, ka habe, ca ot ; Inya ang a bán me biliny, 18 ke at ae Möt ; ke oge hia but mok, ke wá bi inyi möt nyiele nyiele balua, ke e hu gak je kiiny mok me Hedis. 19 Anyin a wale sihnalimen ju ta je únyi eji u me wá, me ta je únyi walang ang, me ta je únyi ame he ka o nyiele ; 20 walang bongon ae iyong a ta je okhú a seven waleji u je wá hnyi hnyamök a metök, me je taben lamépa gol a seven.

Haba je okhú a seven, me wale ta je angela anyin ekalesia a seven: ke haba je taben lamepa a seven u je wá, me wale ta je ekalesia a seven.

HNYIMAKAN 2.

SIHNALIMEN ju ka angela anyin ekalesia hnyi Efeso, ka habe,

Walang ta je únyi ame ha hnen at ame kát ta je okhú a seven hnyi hnyamen a metán, wale at ame he hnyi wanben je taben lamepa gol a seven: 2 E kxanö nya ányám ta je huliwa, me ányám vec, me hnám hna hok hnyok, me hnám hna húkotiá tavat adre me bi únyi monu, ke u je cubec hnyat adre me ha, a ödrin ta je aposetolo, ke ba bi, ke u me wá a ödra tavat thoi; 3 ke u je hok hnyok me lingvec can iök, ke u me ca sényin bi. 4 Ke so bi e hu gak únyi ang gam, a u me hna degecá wem a bán. 5 Anyin a wale únykúme ju hnám hna ta hnyin, me ietra ju, me ányá thó ta je huliwa a bán; ke a ne ba, oge me he ka o köu he ka hom taben ányám lamepa únyi hnyi hnen, u ka ca ietra. 6 Ke hu gam únyi ang a u me húkotiá ta je huliwa anyin at Nikolao, waleji oge me hnyi húkotiá. 7 Haba at ae hu hnyikönyen löng ju hna ha hnen Hanu ka ta je ekalesia. Haba at ame ton, me oge me he ka ham köu he ka han únyi hnyi úöiny möt, walethö hnyi Paradaiso anyin Khong.

8 Ke sihnalimen ju ka angela anyin ekalesia hnyi Semurina, ka habe,

Walang je hofuc ame ha hnen at a bán ke a biliny, waleji a mokcu ke a möt hmetu thö. 9 E kxanö nya ányám ta je huliwa, me ányám theduoc (ke u me tren ta únyi), me bi gan anyin tavat adre me ha, a ödra tavat Juda, ke ba bi, ke sunago ödra a umö Satana. 10 U ma ca outen ta je únyi ame he ka oveci u: wá bi, ame he diabolo ka khúá keihen gabun ka hnyi uma ceat, m' adre me he ka cubic öbun: ke ame he ka libenyita je bonginy vec a öbun. U ma hnathu ju ke ne o but ka hnyi mok, me oge me he ka ham köu koronainy möt. 11 Haba at ae hu hnyikönyen, löng ju hna ha hnen Hanu ka ta je ekalesia. Haba at ae hwege, me ame ca he ka vec hnen mok a loiny.

12 Ke sihnalimen ju ka angela anyin ekalesia hnyi Peregamo, ka habe,

Walang ta je hofuc ame ha hnen at ae

hu gan hele vat a lo homakan ae so hwan: 13 E kxanö nya dok u me laba hnyin, wale hnyi theron anyi Satana: ke u je kát hmá iök, me ca ivinöá labageju könya, waleji hnyi je bongongu Anetipa ae hnathu, at ame ohnathu nya, waleji adre hlingá unyibun, hnyi dok ame laba hnyin Satana. 14 Ke e hu gak ke ta je únyi gam, anyin ae hu but unyám keihen tavat adre me kát hna úne anyi Balaama, waleji at ame ná kö Balaka he ka ip únyi hnán othöá hnyi hnyimakan Isaraela, waleji he ka an ta je únyi adre hudo ka ta je hnatheat, me he ka bi únyi monu. 15 Ke e hu minya unyám keihen tavat adre me kát heláe ta je hna úne anyin tavat Nikolao. 16 Anyin a wale ietra ju; e ka ba, oge me he ka ie o köu, me vat m' ödra ge hele vatiny hnyimök. 17 Haba at ae hu hnyikönyen, löng ju hna ha hnen Hanu ka ta je ekalesia. Haba at ame ton, me oge me he ka hán ge mana ae iyong, ke oge me he ka ham káu ke veto ae hau, ke e hnyi veto ien a teb únyi adre set, ae ca khana at, ke so bi at ame kap.

18 Ke sihnalimen ju ka angela anyin ekalesia hnyi Thuataira, ka habe,

Walang ta je únyi ame ha hnen Nokon Khong, at ae hu li ecmak helá me báhlán meic, ke helá me bras ae hadröngöc li can: 19 E kxanö nya but ányám ta je huliwa me ibetengió me labageju, me hnám hna bi atök, me ányám hok hnyok, ke beónua ányám ta je huliwa a biliny hon a bán. 20 Ke so bi e hu but gak únyi eang gam, a u je hna ka momo jia Jezebelá, at ame ha ka habe, e perofeta momo; ke e ame úne me cubec je atök he ka bi únyi monu, me hnyi an je hna hudo ka ta je hnatheat. 21 Ke oge me ham káu úen he ka ietra; ke e ame höcö he ka ietra anyin je bi únyi monu. 22 Wá bi oge me khúá ka hnyi hna mokut walang ang me tavat adre me bi únyi monu mē, me me vec gan hmá thö, at ka ca ietra anyin ta je huliwa. 23 Ke oge me he ka hlingá lakon ge mok; ke ame he ta je ekalesia ka kxan' ödra, ka habe, inya ang at ame elám ta je únykúme me ta je hnyok: ke oge me he ka ve ham köbun hoton anyibun ta je huliwa. 24 Ke inya oge me ha köbun je ke keihen hnyi Thuataira, wale tavat ae ca hu gadrin hna úne eling, ke ca kxan' ödra hwakecin ae dit anyi Satana, helá me hnödra hna hat oge me ca ip hubun ke hok. 25 Ke ká hmá ju öbun ta je únyi öbun e hu, ke ne

o but oge me o. 26 Ke haba at ame ton, k' ame vheno anyik ta je huliwa ke ne o but obiny, me oge me he ka ham kâu musi hon ta je hnyei: 27 ke e ame he ka musi ödra ge osö fao, helä me hnödra hna sa omomono je kaia kânâ; heläji me hnök hna kap únyi ge Kamök; 28 ke oge me he ka ham kâu okhú lany. 29 Haba at ae hu hnyikönyen, löng ju hna ha hnen Hanu ka ta je ekalesia.

HNYIMAKAN 3.

KE sihnalimen ju ka angela anyin ekalesia hnyi Saradi, ka habe,

Walang ta je únyi ame ha hnen at ae hu je Hanu a seven anyin Khong, me je okhú a seven: E khanö nya but ányâm ta je huliwa, wale ae hu iâm a u möt, k' u mok bi. 2 Hmákâ thö, ke ohwegiä thö ta je kolon a ta je únyi ame he but ka mok: anyin oge me ca wâ ányâm ta je huliwa a g' adre ohwädâ hnyi hnyimakan Khonguk. 3 Anyin a wale únykúme ju hwakecin hnâm hna kap me löng; ke kât hmâ ju e me ietra. Ke u je ne ca hmákâ, me oge me he ka o helä me at venöu, k' ame ca he ka khanö u ün oge me he ka o hnyin köu. 4 Ke e hu but gam tavat ae wakhalet hnyi Saradi, k' adre me ca hia but okânâ anyidra je úkhaú: me adre me he ka tha he mönya k' adre khaú hau; anyin a ödra úcü. 5 Haba at ame ton, me adre me he bi ka okhaúâ heläe ge je úkhaú ae hau; ke oge me ca he ka kot degecä ien hnyi tusiny möt, ke oge me he ka ha ien hnyi hnyimakö Cica, ke hnyi hnyimakan anyin ta je angela. 6 Haba at ae hu hnyikönyen löng ju hna ha hnen Hanu ka ta je ekalesia.

7 Ke sihnalimen ju ka angela anyin ekalesia hnyi Filadelefa, ka habe,

Walang ta je únyi ame ha hnen at ae kap, ke hnathu, at ae hu gan ki anyi Davita, at ame khöng, ke ba at ame he bi ka hlöng, k' ame hlöng, ke ba bi at ame he ka khöng: 8 E khanö nya but ányâm ta je huliwa (wâ bi oge hia but ip hnyi hnyimákâm hwanuma adre hia but khöng, ke ba at ae khana he ka hlöng), a g' ame hu gam man ae úhnyükong, ke u je löng hoton hok hofuc, me ca ivinöâ bi iök. 9 Wâ bi, oge me he ka ham keihen hanen sunago anyi Satana, wale a tavat adre me ha, ka habe, Ödra tavat Juda, ke ba bi, k' adre me thoi; wâ bi, oge me he

ka wi' ödra, m' adre me he but jem he ka khudrung hnyi hmelen li cam, ke adre me he ka khana a oge me hia but betenge gam. 10 U je tuö hofucin hnök hna hok hnyok, anyin a wale, oge me he bi nya ka tuö u hnyi ün úcúbic, wale ame he ka o ka hnyi hmeledrany hia thithö, he ka cubec tavat adre me laba eang hmeledrany. 11 Oge me he ka ie o: kât hmâ ju hnâm hna hu, wâ e nye he ke at ka hügánâ ányâm korona. 12 Haba at ame ton, oge me he ka wia me hnân hmolominy uma kap umen Khonguk, ke e ame ca he hmetu ka didrut: ke oge me he ka sihnalimen hnyi hon at eling ien Khonguk, me ien taun anyin Khonguk, wale Jerusalem a teb únyi, ame utut únyi hnyi drany únyi ge Khonguk, me iök minya a teb únyi. 13 Haba at ae hu hnyikönyen, löng ju hna ha hnen Hanu ka ta je ekalesia.

14 Ke sihnalimen ju ka angela anyin ekalesia hnyi Laodikea, ka habe,

Walang ta je únyi ame ha hnen Amen, at ohnatho ae hnathu me wisa, waleji a at a hwân ta je únyi hia thithö a op hnen Khong: 15 E khanö nya ányâm ta je huliwa, a u ca katebu bi me ca kahwa minya bi: u na katebu ju, a ne kahwa minya bi. 16 Wale me inye he ka hmitö u únyi hnyi hnyimök, anyin a u mage, ke ca kahwa bi me ca katebu minya. 17 Haingâm, Iny tren ta únyi, ke hu omjehek ut, ke ba ke únyi ae hia gak; ke ca khanö u bi nakaem, me kong, me theduoc, me wadröu, me he thu: 18 anyin a wale oge me ha köu he ka úco gak gol adre degec tiren hnyi meic, me u me tren ta únyi; me je úkhaú ae hau, m' u me he ka khavâ, me me ca manen bi hmehma wale he thu a u: me bubunin ecmak hnân botro kâu li emákâm, me u me bwela but. 19 Oge me nâ me kot tavat oge me betenge gadra: anyin a wale, hwege th' öbun me ietra ju. 20 Wâ bi, inya oge me tot hnyi hwanuma me seseto: e ka hu at ame löng ifucik me khöng ut hwanuma, me oge me he ka didrö kâu, me tha han mē, ke tha e mönya. 21 Haba at ame ton, me oge me he ka ham kâu he ka tha laba mönya hon anyik theron heläji me inya oge me tuk, me oge me tha laba me Cica hon anyin theron. 22 Haba at ae hu hnyikönyen löng ju hna ha hnen Hanu ka ta je ekalesia.

HNYIMAKAN 4.

HWABAN ta je únyi e, oge me wá, ke wá bi adre hia but khöng hwanumen drany, ke haba hofuc a bân oge me löng helâ me hwan khoto ame fuc kõnya, me ha, ka habe, Ölö thö kâang, me oge me he ka omanenâ kôu ta je únyi ame he ka o nyiele. 2 Ke oge me ie dit ka hnyi Hanu: ke wá bi, e hu theron adre ip hnyi drany, ke ke at ame laba hon theron; 3 ke helâ me veto jasepi me sadio at ame tabâ; ke haba wajileufat ame wâdrâ igigilö theron, ke ame manen dut helâ me semerado. 4 Ke twente foa je theron igigilö theron: ke oge me wá hon ta je theron wahingat a twente foa ödrin e ve tabâ, k' ödrin e khavâ je úkhaü ae hau, k' ödrin e bicâ je korona gol. 5 Ke ame he but úheny hnyi theron je hucuce, me je hofuc, me hendreng. Ke seven ta je lamepa ame hlâ hnyi hnyimakan theron, wale je Hanon Khong a seven; 6 ke e hnyi hnyimakan theron köiö ae alai helâ me uselat; ke e hnyi wanben theron k' ödrin e igigilö theron vak ta únyi ae möt, k' ödrin e unöngöt ge je ecmak hnyi hnyimakan me hoton. 7 Ke haba únyi ae möt a bân, me helâ me liona, ke haba únyi ae möt a loiny, me helâ me nokon kau, ke haba únyi ae möt a kuniny, me hu hnyimakan helâ me at, ke haba únyi ae möt a vakiny, me helâ me aeto ame gâ. 8 Ke haba je únyi ae möt a vak, me ve hu gadrin je labenyidrin a siks, ke ödrin unöngöt hnyi je ke keihen ke eü hnyin ge je ecmak; ke ödrin e ca menâ hnyi lany me lit he ka ha, ka habe, E kap, e kap, e kap Than a Khong, At ae khana hia, waleji adrem, ke walang ang, ke ame he ka o. 9 Ke e ka he je únyi ae möt ka ogânâ, me ogöranyâ, me ole ka at ame tabâ theron, wale ae möt nyiele nyiele balua, 10 me ame he wahingat a twente foa ka ta but hnyi hnyimakan at ame tabâ theron, me khudrung kâu, waleji at ae möt nyiele nyiele balua, me khûâ anyidrin je korona hnyi hnyimakan theron me ha, ka habe, 11 U thibi ae úcû, Than a Khong-uhmun, he ka kap hna ogânâ, me hna ogöranyâ, me man: anyin a u je op ta je únyi hia thithö, ke haba ta je únyi e me hobi kâu wem, ke u je op minya.

HNYIMAKAN 5.

KE oge me wá hnyi hnyam a metân at ame laba hon theron, tusi adre set hnyin me hoton, adre ohmâ haten ge je hna ohmâ a seven. 2 Ke oge me wá angela ae hwege ame khetâ ge ifucin ae gan, ka habe, Ie at ae úcû he ka lau tusi, me khöng je hna ohmâ haten? 3 Ke ba at hnyi drany, ke ba minya hnyi hmeledrany, ke ba minya eü hnyi hmelen hmeledrany ae khana he ka lau tusi me wá e. 4 Ke oge me tenge gan hmâ, anyin ae ba at adre wá ae úcû he ka lau tusi, me wá e: 5 ke haba ke at hnyi wahingat ame ha kõnya, ka habe, Ca tenge: wá bi, e hwege Lionainy tribu Juda, Khüen anyi Davita, he ka lau tusi, me khöng je hna ohmâ haten e a seven. 6 Ke oge me wá hnyi wanben theron, me vak ta únyi ae möt, me hnyi wanben wahingat, ame tot ke Arenio, helâke adre hia but hlingâ, seven je faoiny, ke seven je emakan, wale je Hanon Khong a seven, adre kunâ ka hnyi hmeledrany hia thithö. 7 Ke e ame o but me hom e únyi hnyi hnyamen a metân at ame tabâ theron. 8 Ke e a hia but hom tusi, haba je únyi ae möt a vak, me wahingat a twente foa adre me tha ta ju hnyi hnyimakan Arenio, e ve hu gadra je kitara, me je kaia gol ae unöngöt ge je utö ae bo so, wale je hic hijin wakap. 9 Ke adre me khumöngö khumöng a teb únyi, ka habe, U thibi a u úcû he ka hom tusi, me khöng je hna ohmâ haten: anyin adre hlingö u, ke u je úco hobi kâu Khong ge drâm tavat únyi hnyi ta je tribu hia thithö, me je hwen hnyei, me je hnyei me tavat, 10 me wi' ödra hnân dökhmu me tavat bihut hobi kâu Khonguhmun; ke adre me musi eang hmeledrany. 11 Ke oge me wá, me löng ifucin ta je angela ae se hia igigilö theron, me ta je únyi ae möt me wahingat; ke haba úshehidra me helâ me ten thauzan ta je ten thauzan, ke je thauzan ta je thauzan; 12 ke adre me ha hnen ifucin ae gan, ka habe, E úcû ka Arenio waleji adre hlingâ he ka kap man, me tang omjeú, me metâ, me tang hwege, me hna ogöranyâ, me hna ogânâ, me hna haisoâ. 13 Ke oge me löng ta je únyi hia adre op ethö hnyi drany, me hnyi hmeledrany, me eü hmelen hmeledrany, me eü hnyi köiö, me ta je únyi hia thithö hnyi je dok eling, adre me ha, ka habe, E so

e unyin at ame taba theron, me Arenio minya, hna haisoa, me hna ogöranyâ, me hna ogânâ, me man nyiele nyiele balua. 14 Ke haingen vak ta únyi ae möt, ka habe, Amen. Me ame ta ju wahingat me khudrung.

HNYIMAKAN 6.

KE oge me wâ Arenio ame khöng khaca hnyi je hna ohmä haten a seven, ke oge me löng ke at hnyi je únyi ae möt a vak ame ha helâ me úlunginy hendreng, ha habe, Aiö u. 2 Ke inya oge me wâ, ke wâ bi, hors ae hau, ke hu cafana unyin at ame tabâ; ke adre me ham kâu korona: me e ame he but, k' ame ton, k' ame he bi ka ton.

3 Ke e a hia but khöng hna ohmä haten a loiny, me oge me löng únyi ae möt a loiny, ame ha, ka habe, Aiö u. 4 Me ame o but ke hors ae dra: ke adre me ham ka at ame tabâ he ka hom úsaköu únyi eang hmeledrany, m' adre me he ka úhlingödra köu ödra: k' adre me ham kâu hele vat ae gan.

5 Ke a hia but khöng hna ohmä haten a kuniny, me oge me löng únyi ae möt a kuniny ame ha, ka habe, Aiö u. Ke inya oge me wâ, ke wâ bi hors ae hlit; ke hu tulut adre únö hnyi hnyamen at a tabâ. 6 Ke oge me löng hnyi wanben ta je únyi ae möt a vak helâke ifucin at, ame ha, ka habe, Ama okhaca unöngöt tulut ge hwit hwaban denari a khaca, ke okun unöngöt tulut ge bali hwaban denari a khaca; ke ca okongo bi wakaco me waina.

7 Ke a hia but khöng hna ohmä haten a vakiny, me oge me löng ifucin únyi ae möt a vakiny ame ha, ka habe, Aiö u. 8 Ke inya oge me wâ, ke wâ bi hors ae löhau: ke Mok ien at a tabâ: ke Hedis ame tha he hoton. Ke adre ham ködru musî he ka hlingâ ke keihen hmeledrany a vakiny, ge hele vat, me hmiâ, me mok, me je meno ae úhúlú hnyi hmeledrany.

9 Ke a hia but khöng hna ohmä haten a thabúnginy, me oge me wâ hnyi hmlen taben hut je hanon tavat adre hlingâ can hofuc hwan Khong, me can hnödra hna ohnatho: 10 ke adre me ha hwegiâ, ka habe, Taböny Than lö, at ae kap me hnathu, ke ne o but kehö u me ca he ka hnö me bi hwaban dröhmun hon tavat adre me laba eang hmeledrany? 11 Me adre me ve ham ködra ke úkhaü ae hau; ke adre me ha

ködra, ka habe, adre me he ka halubahingen úen ae okhulit, ke ne o but ame bekhöt dö je aten huliwa a hanödra, me ta je liamekeiny m' ödra, wale a tavat adre me he ka hlingâ helâ me ödra.

12 Ke oge me wâ e ame khöng hna ohmä haten a siksiny, me ame gan hmâ but hwiöi; me ame hlit ut seúnö helâ me mano a leünen meno, ke haba tehi hia, me helâ me dra; 13 ke haba ta je okhúiny drany, me ame kökölu but ka hnyi hmeledrany, helâ me úö meta ame khúâ degecâ wan ae tiga but, a jijingâ hnen ang ae hwege. 14 Ke adre me vhec dö drany helâ me tusi adre vhec; ke adre oc hia ta je bucen me je bomene únyi hnyi hnen bi. 15 Ke haba ta je thaniny hmeledrany, me ta je tuhan, me je taben vat ae nua, me tavat tren omjeü, me tavat ae hwege, me ta je athnyaba hia, me tavat he baü hia, adre me ve ikhölö hnyi je hmonop me je khúth hnyi ta je bucen; 16 me adre me ha ka ta je bucen me je kic, ka habe, Öbun na kölu takú öhmun ju, me öiyongi öhmun dut ge hnyimakan at ame laba hon theron, me únyi minya ge tang hmönyin anyin Areniö: 17 anyin a o but bongudra bong ae gan hmâ hmönyin hnyin; ke ie at ae khana he ka tot.

HNYIMAKAN 7.

KE hwaban e oge me wâ je angela a vak ödrin e tot hnyi vak ta ke keihen hmeledrany, k' ödrin e kât vak ta ang hnyi hmeledrany, me me ca he ka hwege ang ka hnyi hmeledrany, me köiö, me ke úö a khaca. 2 Ke inya oge me wâ ke angela ame o jimeyö, ke e unyin hna ohmä haten anyin Khong ae möt: ke e ame hongot ge ifucin ae gan ka je angela a vak waleji adre ham ködrin he ka okongo hmeledrany me köiö, 3 ame ha, ka habe, Ca okongo bi hmeledrany, me köiö, me ta je úö, ke ne o but öhmun e ohmä haten lathnyabainy Khonguta hon je baridra. 4 Ke oge me löng úseidra tavat adre ohmä haten, me ödrin wan haded ke fâte foa thauzan tavat adre me ohmä haten, únyi hnyi ta je tribu hia anyin lakon Isaraela.

5 Twelv thauzan tavat adre ohmä haten únyi hnyi tribu anyi Juda:
Ke twelv thauzan únyi hnyi tribu anyi Reubena:
Ke twelv thauzan únyi hnyi tribu anyi Gada:

6 Ke twelw thauzan únyi hnyi tribu anyi Asera :
 Ke twelw thauzan únyi hnyi tribu anyi Nafatali :
 Ke twelw thauzan únyi hnyi tribu anyi Manase :
 7 Ke twelw thauzan únyi hnyi tribu anyi Simeona :
 Ke twelw thauzan únyi hnyi tribu anyi Levi :
 Ke twelw thauzan únyi hnyi tribu anyi Isakara :
 8 Ke twelw thauzan únyi hnyi tribu anyi Zebulona :
 Ke twelw thauzan únyi hnyi tribu anyi Josefa :
 Ke twelw thauzan adre ohmâ haten únyi hnyi tribu anyi Beniamina.
 9 Hwaban ta je únyi e inya oge me wá, ke wá bi, tawat ae se hia hmönyin, wale ae ca khana ke at he ka áú, a ödra únyi hnyi ta je hnyei hia, me ta je tribu, me tawat, me je hwen hnyei, adre me tot hnyi hnyimakan theron, ke hnyimakan Arenio, k' adre khavâ je úkhaú ae hau, ke e hnyi je hnyamödra je lan pama ; 10 ke adre me ha hwegiâ, ka habe, Haba möt me únyi ge Khonguta at ame laba hon theron, me únyi ge Arenio. 11 Ke haba ta je angela, me adre me útitilen igigilö theron, me igigilö wahingat ke ta je únyi ae möt a vak ; me adre me ta ju hnyi hnyimakan theron me khudrung ka Khong, 12 me ha, ka habe, Amen : Hobi kâu Khonguta hna haisoâ, me hmanenang, me metâ, me ole, me hna ogânâ, me man, me hwege nyiele nyiele balua. Amen. 13 Me ame ha ke at hnyin wahingat, ame ha kõnya, ka habe, Ie tawat eang adre me khavâ je úkhaú ae hau, ke úhedra ua ? 14 Ke haingök kâu, ka habe, Than lö, e khañö u. Me e ame ha kõnya, ka habe, Ödra ang adre me he but únyi hnyi vec ae gan hmâ, ke adre me hneú anyidra je úkhaú, me ohauâ hnyi dren Arenio. 15 Anyin a wale ödra but hnyi hnyimakan theron anyin Khong ; ke adre me bi athnyabainy hnyi lany me lit hnyi umen uma : ke haba e at ame tabâ theron, me e ame he ka tubi ödra ge umen uma menâ. 16 Adre me ca he hmetu ka mekihnânem, ke adre me ca he minya ka beic ; ke ame ca he ka li ödra hnen seúnö me kahwa : 17 anyin ame he Arenio ka hat ödra, waleji a e hnyi wanben theron, ke e ame he ka lili ödra ka hnyi kõioiny möt ame pupua : ke ame he Khong ka

kot degecâ ta je dekõiö hia únyi hnyi ta je emaködra.

HNYIMAKAN 8.

KE a hia but khöng hna ohmâ haten a seveniny, me ame ba ju hwan hnyi drany hnyi haf awa. 2 Ke oge me wá je angela a seven waleji ödrin e tot hnyi hnyimakan Khong ; ke adre me ham ködrin ta je trutru a seven.

3 Me ame o but ke angela me tot hnyi taben hut, e unyin taben meic a gol ; me adre me ham gâná kâu je utö ae bo so, me me he ka tha ip e me je hic hijin wakap hia thithö hnyi taben hut gol hnyi hnyimakan theron. 4 Me ame ölö thö hainy utö ae bo so tha e me je hic hijin wakap hnyi hnyimakan Khong únyi hnyi hnyamen angela. 5 Haba angela ame hom taben meic ; ke e ame öunöngötâ ge meic únyi hnyi taben hut, me khúa ka hnyi hmeledrany : me ame o but je hendreng, me je hofuc, me je hucuce, me hwiöi.

6 Me haba je angela a seven ödrin e penapena he ka tuö trutru, wale hnyat ae hu je trutru a seven gadrin.

7 Ke ame túâ thö trutru hnen angela a bân, me ame ta but we ae wahma me meic adre úhaniken me dra, me adre me khúa ka hnyi hmeledrany : me adre me thong degecâ ke keihen a kuniny hmeledrany, k' adre thong minya ke keihen a kuniny je úö, k' adre thong hna önying hia ae hát.

8 Ke ame túâ thö trutru hnen angela a loiny, ke helâke adre khúa but bucen ae gan ame hlâ ge meic ka hnyi kõioö : me ame dra but ke keihen kõioö a kuniny ; 9 me ame mokcu ke keihen a kuniny ta je únyi ae möt eú hnyin kõioö ; ke adre me ohia minya ke keihen a kuniny ta je hu.

10 Ke ame túâ thö trutru hnen angela a kuniny, me ame kölu but ke okhú ae gan hmâ únyi hnyi drany, ame hlâ helâ me okúnú, ke ame kölu but ka hnyi ke keihen a kuniny ta je wagewe, me je an ame pupua ; 11 ke haba ien okhú, me Únyi ae hiny : me ame hiny jut ke keihen a kuniny ta je kõioö ; ke se hia tawat a mok ge je kõioö únyi hnyi úhinyin.

12 Ke ame túâ thö trutru hnen angela a vakiny, me adre me kot ke keihen a kuniny seúnö, me ke keihen a kuniny tehi, me ke keihen a kuniny ta je okhú ; waleling me me menekholom but je ke keihen a kuniny,

ke ame ca melam hmetu ke keihen a kuniny bong, ke heläe minya ge lit.

13 Ke oge me wâ me löng ke aeto ame gâ hnyi wanben drany, k' ame ha ge hwan ae hwege, ka habe, Êkölö, ekölö, ekölö ge tavat adre me laba hnyi hmeledrany únyi hnyi ifucin ke ta je trutru ame he ka tûâ biju hnen ta angela a kun.

HNYIMAKAN 9.

KE ame tûâ thö trutru hnen angela a thabúnginy, me oge me wâ ke okhú ame kölu únyi hnyi drany ka hnyi hmeledrany: ke adre me ham kâu kiiny hmonop ae dit hmönyin; 2 me ame o thö hai únyi hnyi hmonop, helâ me hainy meic ae gun hmâ; me ame hlit ut seúnö me ethö hnyi wanben ge hainy hmonop. 3 Me ame o but ta je wahamon ka hnyi hmeledrany únyi hnyi hai; ke adre hom ködra man, helâji me maniny ta je sekopioiny hmeledrany. 4 Ke adre ha ködra m' adre me ca he ka okongoâ önyinginy hmeledrany, me ke únyi ae hát, me ke tûö a khaca, ke so thibi tavat ae ca hu gadra hna bi haten anyin Khong hon ta je baridra. 5 Ke adre hna ködra a adre me ca he ka hling' ödra, ke so bi he ka oveci ödra hnyi thabúng ta tehi: ke haba anyidra vec, me helâ me vecin at ame dâ sekopio. 6 Ke ame he tavat ka elâm mok hnyi ta je bong eling, ke adre me ca he ka wâ; ke adre me he ka bemok, ke ame he mok ka kec gadra. 7 Ke haba je unyin ta je wahamon me helâ me hors adre penapena hnân vat; ke haba hon je bödra me helâ me je korona gol, ke haba je hnyimaködra me helâ me je hnyimakan at. 8 Ke hu gadra leúnen bödra helâ me leúnen ban omomo, he haba je nyudra me helâ me nyon ta je liona. 9 Ke e hu gadra ta je úkhaúen úlainy helâ me úkhaúen úlainy a fao; ke haba úhmu-hmuiny je labenyidra me helâ me úhmu-hmuiny je kariota me je hors ae se hia adre me wadring ka hnyi vat. 10 Ke hu je hmokunödra helâ me je sekopio, me je údöiny; ke e hnyi je hmokunödra man he ka okongo tavat hnyi thabúng ta tehi. 11 Ke tuhödra angelainy hmonop ae dit hmönyin: haba ien hnyi hwen Heberu Abadon, ke hnyi hwen Heleni, me Apoluon.

12 A um dö ke Ekölö: wâ bi lo biju li Ekölö ame he ka o.

13 Ke ame tûâ trutru hnen angela a siksiny me oge me löng ke hofuc únyi hnyi

je baitoiny taben hut gol hnyi hnyimakan Khong, 14 ame ha ka angela a siksiny ae hu trutru, ka habe, Thang ut ta je angela a vak adre ca hnyi wagewe ae gan a Euferrati. 15 Me adre me thang ut ta angela a vak, waleji adre penapena hobi kâu awa, me bong, me tehi, me huna, m' odrin e he ka hlingâ ge keihen a kuniny tavat. 16 Ke haba úseiny tavat vat a tavat tabö hors, me lo li ten thauzan ta je thauzan: oge me löng úseidra. 17 Ke heläe oge me wâ je hors hnyi hna omanenâ, me tavat adre me tabâ ae hu úkhaúen úlainy meic, me uakini, me teio; ke haba ban ta je hors me helâ me ban ta je liona; ke ame o únyi hnyi je hnyimödra meic, me hai, me teio. 18 Ke adre me hlingâ ke keihen a kuniny tavat ge kun ta únyi eling ae mekiny, wale meic, me hai, me teio ame o únyi hnyi je hnyimödra. 19 Anyin a haba maniny ta je hors me e hnyi je hnyimödra me je hmo-kunödra: anyin a helâ me je on je h moku-nödra ke hu ban; ke adre me okongoâ hnen je únyi e. 20 Ke haba kolon tavat adre ca hlingâ bi ge ta je mok eling, me adre me ca ietra bi ta je huliwa anyin je hnyamödra, a g' adre me khudrung ka ta je demoni, ke je hnatheat gol, me sileva, me bras, me veto, me utö; a ta je únyi ae ca khan' ödra bwele, me löng, me he: 21 ke adre me ca ietra ge hnödra hna úblingö, me bi khong, me bi únyi monu, me venöu.

HNYIMAKAN 10.

KE oge me wâ ke angela ae man ame utut úheny hnyi drany, ame khavâ úlá; ke e wajileufat hnyi hon ban, ke helâ me seúnö hnyimakan, ke haba li can me helâ me li hmolom a meic; 2 ke e hnyi hnyamen ong tusi adre lau: ke e ame uto köiö ge can a metân, me hot ge can a meny; 3 ke e ame ha hwegiâ helâ me ifucin liona: ke e ame fuc, me ame lung je hendreng a seven. 4 Ke hnyi úen ame lung je hendreng a seven, me oge me he bi ka sihnalimen: me oge me löng hofuc únyi hnyi drany, ka habe, Okeceá ju haten ta je únyi a ha je hendreng a seven, ke ca sihnalimen bi. 5 Ke haba angela wale oge me wâ ame tot hon köiö me hot, me ame ogöranyâ hnyamen a metân hnyi drany ai, 6 me khemanyin ge at ae möt nyiele nyiele balua, waleji a at ame op drany me ta je únyi a e hnyin, me hmeledrany me ta je únyi a e hnyin, me

köiö me ta je únyi a e hnyin, ka habe, E ba hmetu úen : 7 ke hnyi ta je bonginy ifucin angela a seveniny, e ka he bi ka tûâ trutru, me ame he ka umo ju únyi ae iyong anyin Khong, hoton úthumetu ae so e ame haimemenâ ka lathnyabainy a ta je perofeta. 8 Ke haba hofuc oge me löng únyi hnyi drany, me ame ha hmetu kõnya, ka habe, He thö ka hom tusi adre lau waleji hnyi hnyamen angela ame tot hon köiö me hot. 9 Me oge me he thö ka angela me ha kâu, a e ame he ka ham kõnya ong tusi. Me e ame ka kõnya ka habe, Hom dö, me an ju ; ke ame he ka hiny hnyi hnyekom, ke so bi ame he ka hnebwia hnyi hnyimâm helâ me hani. 10 Me oge me hom ong tusi únyi hnyi hnyamen angela, me an dut ; me ame hnebwia hnyi hnyimök helâ me hani : ke oge me hia but an me ame hiny jut hnyi hnyekuk. 11 Me adre me ha kõnya, ka habe, E úcú köu he ka perofeta hmetu ge tavat me ta je hnyei me ta je hwen hnyei me ta je than ae se hia.

HNYIMAKAN 11.

KE adre me ham kõnya hlowe helâ me uci : ke ke at ame ha kõnya, ka habe, Todrö, tuluto ju uma kap umen Khong, me taben hut, me tavat adre me khudrung eú hnyin. 2 Ke haba hnyeule hoton uma kap, hnen ju, ca ke ka tuluto ; anyin adre hia but ham e ka ta je hnyei : ke adre me he ka uto taun ae kap hnyi ta je tehi a fâte tu. 3 Ke oge me he ka hna ka li at ohnathu nya he ka perofeta hnyi ta je bong a wan thauzan tu haded ke sikste, adre khaú ödru ge mano ae gan nân. 4 Walang li elaio, me li taben lamepa ame tot hnyi hnyimakan Khongon hmeledrany. 5 Ke a ne he ke at ka beokongu ödru, me ame o but meic únyi hnyi li hnyimödrü he ka thong je iwahnaihmiony m' ödru : ke a ne beokongu ödru hnen ke at, e úcú he ka hlingâ helâe minya at e. 6 E unyidru man he ka hlöng drany me me ca he ka ta we hnyi ta je bonginy perofeta a ödru ; ke e hu gadru man hon ta je wagewe he ka wia me me dra, me he ka kot hmeledrany ge ta je mok hia helâ me wedru. 7 K' ödru ka hia but umo hnödrü hna ohnatho, me ame he meno at ame o but únyi hnyin hmonop ae dit hmönyin ka vat m' ödru, me ton hudru, me hling' ödru. 8 Ke haba li unyidru ame mokut hnyi getheniny taun ae gan, haba

ien hoton hanu, me Sodoma, me Aigupito, waleji adre osatauroâ hnyin Tuhödrü. 9 Ke haba keihen úheny hnyi ta je hnyei me ta je tribu me ta je hwen hnyei, me tavat adre me wâ li unyidru hnyi kun ta bong me haf, ke adre ca hna but he ka konâm li unyidru hnyi erkemok. 10 Ke haba tavat adre me laba eang hmeledrany, me adre me senyin gadru me hobâ ; ke adre me he ka úhamköuâ ta je bwihlany ; anyin a li perofeta eling ödru me oveçâ tavat adre me laba eang hmeledrany. 11 Ke hwaban kun ta bong ke haf, me ame dilic ödru hnen hanuiny möt, ke ödru me todrö ; me ame o but ot ae gan hmâ ködra adre me ö'dru. 12 Me ödru me löng hofuc ae gan hmâ únyi hnyi drany ame ha ködrü, ka habe, Ölö thö kââng. Me ödru me ölö thö hnyi dranyai hnyi úlá ; k' ame ö'dru hnen je iwahnaihmiony m' ödru. 13 Ke hu hwiöi ae gan hnyi awa eling, me ame ü but ke keihen a libenyitainy taun ; ke haba hwiöi, me ame hlingâ tavat a seven thauzan : me ame ot je kolon, m' adre me ogânâ Khongon drany.

14 A um dö Ekölö a loiny, wâ bi, ame he ka ie o Ekölö a kuniny.

15 Ke adre tûâ trutru anyin angela a seveniny ; me ame o je hwan hofuc ae gan hnyi drany, ame ha, ka habe, Haba dökhü dokhon hmeledrany, me adre hia but wia hnân hobi kâu Tuhöta me Keriso a anyin : me e ame he bi ka musi nyiele nyiele balua. 16 Haba wahingat a twente foa, hnyat ödrin e tabâ anyidrin je theron hnyi hnyimakan Khong, me ödrin e ta ju hnyikânâi, me khudrung ka Khong, 17 me ha, ka habe, Öhmun e ole köu Than a Khong, Ataekhanahia, a u walang me kâú adrem ; anyin a u je hia but hom manâm man ae gan hmâ, ke u je musö. 18 Ke ame hmönyin ta je hnyei ke ame o but ányâm hmönyin, ke úen he ka úhnö tavat adre mokcu, me he ka ham hwaban ka lathnyabaem a ta je perofeta, me wakap, me tavat adre me okabâ iâm, tavat ae úhnyükong me tavat ae gan ; me he ka ohnaúhangöi ödra adre me ohnaúhangöâ hmeledrany.

19 Ke adre me khöng uma kap umen Khong walethö hnyi drany ; me ame manen dut hnyi umen uma tangen anyin úhinyüköu ; me ame o but je hucuce, me je ifucin, me je hendreng, me hwiöi, me we wahma ae gan.

HNYIMAKAN 12.

ME ame manen dut hnyi drany ke haten ae gan ; wale momo at ame khavá seúnö, ke hnyi hmelen li can tehi, ke e hnyi hon ban korona a je okhú a twelv ; 2 ke ame erkin dut me ame vec hnyekon, ke ame tenge ge vec me me he ka hnokoá but. 3 Me ame manen dut ke haten minya hnyi drany ; ke wá bi, wale drakona ae gan ae dra, seven je ban, ke ten je faoiny, ke seven je korona hon je ban. 4 Ke e ame lelö tilá hnen hmokunen ke keihen a kuniny ta je okhúiny drany, me ame khúá ka hnyi hmeledrany : ke haba drakona ame tot hnyi hnyimakan momo, waleji ame he but ka hnokoá, me me he ka an nokon e ka o. 5 Haba momo ame hnokoá but da, at ame he ka musó ta je hnyei hia thithö ge osó fao : ke adre ie kap nokon ka Khong, hnyi anyin theron. 6 Me ame kec ut momo hnyebuba ai, ke e hu gan eling dok a penapena Khong, m' adre me he ka hat eling hnyi ta je bong a wan thauzan tu haded ke sikste.

7 Ke e hu vat hnyi drany : haba Mikaela me anyin je angela ame vat me drakona ; ke drakona me anyin je angela adre me vat m' ödra ; 8 ke ödra ca hwege bi, ke ba hmetu bi hnödra hnyi drany. 9 Me adre me obá but drakona ae gan, wale on adrem, adre hwenyi ien Diabolo, me Satana, at ame omonoá hmeledrany hia thithö ; adre obá but ka hnyi hmeledrany, ke adre tha obá e me anyin ta je angela. 10 Ke oge me löng hofuc ae gan hmá hnyi drany ame ha, ka habe, A o but walang ang möt, me man, me dökhü dokhon Khonguta, me musi minya anyin Keriso a anyin : anyin adre hia but obá at ame haikongoá je liamekeiny m' öta, wale at ame haikongu ödra hnyi hnyimakan Khonguta hnyi lany me lit. 11 Ke adre me hwege hon únyi ge dren Arenio, me hofuc adre me ohnatho ; ke adre me ca hnyoká anyidra möt ke ne o but mok. 12 Anyin a wale senyin dö ta je drany, me tavat adre me laba hnyin. Ekölö ge káná me köiö : anyin ame utut köbun diabolo, ke gan hmá anyin wathethöt, anyin ae khana but ae okhulit biju úen.

13 Ke a wá but drakona a g' adre hia but obá e ka hnyi hmeledrany, me e ame ovecá momo at ame hnokoá da. 14 Ke adre me ham ka momo li labenyin aeto ae gan, me me gá únyi hnyi hnyimakan on ka

hnyi hnyebuba a hnen, ke adre hat eling, hnyi úen a khaca, me je úen, me haf úen. 15 Haba on ame hmita hoton momo köiö únyi hnyi hnyimen helá me wagewe, me me he ka wekhet ut momo hnyi wagewe. 16 K' ame hadrua momo hnen káná, k' ame memang ut káná me utá wagewe a walá drakona únyi hnyi hnyimen. 17 K' ame hmönyin drakona ka momo, me he but he ka vat me je kolon a je mátrániny momo, tavat adre me löng hoton hnanyibu anyin Khong, k' adre kát hmá hna ohnathu Iesu :

HNYIMAKAN 13.

KE e ame tot hon öny hnyi köiö. Ke inya oge me wá meno ame o únyi hnyi köiö ae hu je faoiny a ten, ke je ban a seven, ke e hnyi hon je fao je korona a ten, ke je ien bi gan ka Khong, hon je ban. 2 Ke haba meno oge me wá, me helá me lepad, ke haba je can me helá me je can bea, ke haba hnyimen me helá me hnyimen liona : ke drakona ame ham káu maniny man, me anyin theron, me musi ae gan. 3 Ke oge me wá ke ban adre hia but kot heláke ame he but ka mok ; ke haba hnán khú ame moko, me a metu but : k' ame láiá hmeledrany hia hoton meno ; 4 ke adre me khudrung ka drakona anyin e ame ham maniny man ka meno ; ke adre me khudrung minya ju ka meno, haingödra, ka habe, Ie at ae úcü me meno ? ke ie at ae khana he ka vat mä ? 5 ke adre me ham káu hnyem, me ame ha ta je únyi ae gan, me je bi gan ka Khong ; k' adre me ham káu man he ka huliwa hnyi fáte tu je tehi. 6 Me e ame memang ut he ka bi gan ka Khong, he ka haikongoá ien me umen uma mená, wale tavat adre me laba ethö hnyi drany. 7 Ke adre me hna káu he ka vat me wakap, me he ka hwege hudra : ke adre me ham káu musi hon ta je tribu hia, me tavat, me hwen hnyei, me ta je hnyei. 8 Ke ame he ka khudrung ju káu ödra hia adre me laba eang hmeledrany, waleji tavat adre ca set je iödra hnyi tusiny möt anyin Arenio waleji adre hlingá hwán hnyi hna bi taben hmeledrany. 9 A ne hu hnyikönyen ke at löng ju. 10 A ne ke at ame he ka hom bá, me adre me he ka hom hwenbá e : a ne ke at ame hlingá ge hele vat, me adre me he ka hlingá e ge hele vat. Wale hok hnyok me labageju anyin wakap.

11 Ke oge me wâ ke meno minya ame o ûnyi eû hnyi kânâ ; e hu li fao helâ me arenio, ke e ame fuc helâ me drakona. 12 Ke e hu gan man hia maniny meno a bân hnyi hnyimakan. Ke e ame kunâ hmeledrany me tavat adre me laba hnyin he ka khudrung ka meno a bân, waleji a ga metu but hnân khû ehac ame moko. 13 Ke e ame ânyâ ta je haten ae gan hmâ, wale me me kunâ meic ûnyi hnyi drany ka hnyi hmeledrany hnyi hnyimakan tavat. 14 Ke e ame iyawâ tavat adre me labâ hmeledrany ge ta je haten adre hna kâu he ka ânyâ hnyi hnyimakan meno ; ame ha ka tavat hnyi hmeledrany, a adre me he ka theatâ me me we meno, waleji ae hu aat ge hele vat, k' ame môt. 15 Ke adre hna kâu man he ka ha melen hnatheat me me we meno, me me he hnatheat a we meno ka fuc, me kunâ he ka hlingâ tavat hia adre me ca hnyi khudrung ka hnatheat a we meno. 16 Ke e ame kunâ tavat hia thithö, tavat ae ûhnyûkong me tavat ae gan, tavat tren omjeû, me ta je theduoc, tavat adre hna bâûâ, me ta je athnyaba, m' adre me he ka bi hatödra hnyi hnyam a metödra ame ne je baridra ; 17 me me ca he ka khana ke at he ka bihwaban omjeû me úcû hmetu, ke so bi at ae hu haten, wale ien meno, ame ne numerainy ien bi. 18 Walang metâ. Hamen at ame wâ ûnykûme he ka aû numerainy meno ; anyin a wale numerainy at : ke haba numerainy, me, Siks haded ke sikste siks.

HNYIMAKAN 14.

KE oge me wâ, ke wâ bi Arenio ame tot hon bucen Ziona ke e unyin tavat a wan haded ke fâte foa thauzan, ke adre hia but sihnalimen ien, ke ien Kamen hnyi hon je baridra. 2 Ke oge me löng hofuc ûnyi hnyi drany, helâ me hwan je wagewe ae se hia, ke helâ me hwan hendreng ae gan : ke haba hwan oge me löng, me helâ me hwan tavat adre me khumöngö anyidra ta je kitara : 3 ke adre me khumöngö helâke khumöng a teb ûnyi hnyi hnyimakan theron, ke hnyi hnyimakan je ûnyi ae môt a vak ke wahingat : ke ba at ae khana he ka nâ khumöng e, ke so thibi tavat eling a wan haded ke fâte foa thauzan, tavat adre me úco ûnyi hnyi hmeledrany. 4 Ödrin je hnyat a ca hamödrin okongu ödrin unyin omomo ; anyin a ödrin so. Ödrin je hnyat adre me hnu hoton Arenio

ka hnyi je dok ame he hnyin. Ödrin je hnyat adre úco unyin tavat, me hnân wan a bân hobi kâu Khong me Arenio. 5 Ke ba thoi adre me wâ hnyi je hnyimödra, anyin ae ba hnyikongudrin.

6 Ke oge me wâ ke angela minya ame gâ ethö hnyi wanben drany, ke unyin e úthumetu ae so ame ca ba balua he ka khetâ ka tavat adre me laba hnyi hmeledrany, ke ta je tribu, ke ta je hwen hnyei, ke tavat ; 7 ke e ame ha ge ifucin ae gan, ka habe, Outen ju Khong, me ham kâu hna ogânâ ; anyin a o but ûen ûhnei gan : ke khudrung ju kâu at a op drany, me hmeledrany, me köiö me je an ame pupua.

8 Ke ame he hoton e ke angela, at a loiny, k' ame ha, ka habe, A ü but, A ü but Babulona ae gan, waleji at ame kunâ ta je hnyei hia he ka ijem wainainy tang hmönyin hnyi bi ûnyi monu a e.

9 Ke ame he hotudru ke angela a kuniny, k' ame ha ge ifucin ae gan, ka habe, A ne hu at ame khudrung ka meno, ke we e, k' ame kap haten e hnyi hon bariny, a ne hnyi hnyamen, 10 wale at ame he minya ka ijem wainainy tang hmönyin anyin Khong, wale adre penapena ke adre me ca úhaniken, hnyi kaiainy anyin tang hmönyin ; ke adre me he ka ovecâ e hneu meic me teio hnyi hnyimakan ta je angela ae kap, ke hnyi hnyimakan Arenio : 11 ke ame sâ göranyai nyiele balua hainy hna oveci ödra ; ke adre me ca menâ bi hnyi lany me lit tavat adre me khudrung ka meno ke we e, me tavat hia adre me kap haten ien e. 12 Wale hok hnyok anyin wakap, tavat adre me löng hoton hnanyibu anyin Khong, me labageju kö Iesu.

13 Ke oge me löng hofuc ûnyi hnyi drany ame ha könya, ka habe, Sihnalimen ju, ka habe, Hnahic hnen wamok, tavat adre me mok unyin Than hwân walang ang : eke, ame ha Hanu, m' adre me menâ thö ûnyi hnyi anyidra ta je huliwa ; anyin ame tha hnu hotudra anyidra ta je huliwa.

14 Ke oge me wâ, ke wâ bi, úlá ae hau ; me ke at ame laba hon úlá helâ me ke nokon at, ame bicâ korona gol, ke e hnyi hnyamen hele hnân subö hwit ae so hwan. 15 Ke haba ke angela ame didrut ûnyi hnyi hnyin uma kap, ame ha ge hwan ae gan ka at ame laba hon úlá, ka habe, Inâ but ânyâm hele hnân subö hwit, me subâ but ; anyin a o but ûen he ka subâ ; anyin ae ti hmahmat ut hmeledrany. 16 Haba at ame laba hon úlá ame inâ but ka hnyi

hmeledrany anyin hele hnân subö hwit ; me a meno but hmeledrany.

17 Ke haba ke angela ame didrut únyi hnyi uma kap ethö hnyi drany, ke hu minya gan hele hnân subö hwit ae so hwan. 18 Ke haba ke angela ame didrut únyi hnyi taben hut, ae hu man gan hon meic : ke e ame ha ge hwan ae gan ka at ae hu hele hnân subö hwit ae so hwan, me ha, ka habe, Inâ ju ányâm hele hnân subö hwit ae so hwan, me meno je de vine hnyi hmeledrany ; anyin ae mat hmönyin je wan vineiny. 19 Haba angela ame ina but anyin hele hnân subö hwit ka hnyi hmeledrany, me meno vineiny hmeledrany, me khûâ but ka hnyi hna hlic vine wale únyi hnân hlic vine ae gan hmâ anyin tang hmönyin anyin Khong. 20 Ke adre me uto ju hnyi hna hlic vine hnyi hoton taun, me ame hingölö but dra únyi hnyi hna hlic vine ke ne o but hnyi töiny hnyimen hors, ke haba úlauen me khaca thauzan ke siks haded je satadia.

HNYIMAKAN 15.

KE oge me wâ ke haten hnyi drany ae gan me hnân láia, a seven je angela ae hu je mok a biliny a seven, anyin adre umo hnyi hmönyin anyin Khong.

2 Ke oge me wâ köiö helâ me uselat adre úhaniken me meic ; ke ödra minya tavat adre me hwege hon meno, ke hon we e, ke hon numerainy ien e, ke adre me tot hnyi köiö uselat, ke ve hu gadra je kitara anyin Khong. 3 Ke adre me khumöngö khumöng anyi Mose athnyabainy Khong, ke khumöng minya anyin Arenio, ka habe, E gan hmâ ke hnân láia ányâm ta je huliwa, Than a Khong Ataekhanahia ; e wisa me hnathu dem je gethen, u Tuhan ta je dö. 4 Than lö, ie at ame ca he ka ot me oganá iâm? anyin a hake u ke thibi at ae kap ; anyin ame he ka o ta je hnyeí hia thithö he ka khudrung hnyi hnyimákâm ; anyin adre hia but omanená ányâm ta je huliwa ae wisa.

5 Ke hwaban e inya oge me wâ, ke wâ bi adre me khöng ut hnyi drany uma kapiny uma menâ at ame ohnatko : 6 me ame didrut únyi hnyi hnyin uma kap je angela a seven, ke hu gadrin je mok a seven, ödrin e theibâ veto ae alai me hadröngöc, ke ödrin e oweikâ je úlaidrin ge wen a gol. 7 Ke haba ke at hnyi je únyi a vak a möt ame ham ka je angela a seven

je kaia a seven ae unöngöt ge tang hmönyin anyin Khong ae möt nyiele nyiele balua. 8 Me ame unöngötö uma kap ge hai únyi hnyi hmanenang anyin Khong, me únyi hnyi maniny man ; ke ba at ae khana he ka didrö ka hnyi uma kap, ke ne o but ame hwâdâ thö je mok a seven anyin je angela a seven.

HNYIMAKAN 16.

KE oge me löng ifucin ae gan hnyin uma kap ame ha ka je angela a seven, ka habe, He th' öbun ka hingälâ je kalainy tang hmönyin anyin Khong ka hnyi hmeledrany.

2 Me ame he but at a bán me hingälâ anyin kaia ka hnyi hmeledrany ; me ame o but anyú ae kong me ikiki ka hnyi hon tavat ae hu gadra haten meno, ke hon tavat minya adre me khudrung ka at ae we e.

3 Haba at a loiny ame hingälâ anyin kaia ka hnyi köiö ; me me wia e me helâ me dren komok ; me ame mokcu ta je únyi hia ae möt eú hnyi köiö.

4 Ke haba at a kuniny ame hingälâ anyin kaia ka hnyi je wagewe, me je an ame pupua ; me ame dra but. 5 Ke oge me löng angelainy je köiö ame ha, ka habe, U thibi Wisa, a u walang ang me adrem, u At ae Kap, anyin a u je bi hwaban lielâe : 6 anyin a adre me hingälâ dra dren wakap me ta je perofeta, ke u je habelidra ge dra : ae úcú ködra. 7 Ke oge me löng taben lut ame fuc, ka habe, Eke, Than a Khong Ataekhanahia lö, e hnathu me wisa hnâm je hna bi hwaban.

8 Ke haba at a vakiny ame hingälâ anyin kaia ka seúnö ; me adre hna kâu he ka le tavat ge meic. 9 Me ame hlâ tavat hnen kahwa ae gan : me adre me haikongoá ien Khong wale at ae hu man hon ta je mok e ; ke adre me ca ietra bi me he ka oganá e.

10 Ke haba at a thabunginy ame hingälâ anyin kaia hon theron anyin meno ; me ame menekholom but dokhon dökhü ; ke adre me hohoc je bohmödra ge vec, 11 ke adre me haikongoá Khongon drany can anyidra ta je vec me hnödra je anyú ; ke adre me ca ietra bi ta je hwakecidra.

12 Ke haba at a siksiny ame hingälâ anyin kaia ka hnyi wagewe ae gan Euferate ; me ame hme thö köiö, m' adre me he ka penapena ke gethen deny je than

úhedra e jimeyo. 13 Ke oge me wâ je hanu ae kong a ödrin kun helâ me je rana ödrin e he but únyi hnyi hnyimen drakona, me únyi hnyi hnyimen meno, me únyi hnyi hnyimen perofeta thoi: 14 anyin a ödrin je hanu anyin je demoni, ödrin a ânyâ je haten; wale ödrin e he ka ta je than hia hÿin hmeledrany he ka úkhacakôu ödra ka hnyi vat hnyi bong ae gan bonginy Khong Atae-khanahia. 15 (Wâ bi, oge me he ka o helâ me at venöu. Hnahic hnen at ame hmâkâ, me tuö anyin je úkhaú, wâ e nye he ka he thu, m' ödra wâ thö anyin hmehma.) 16 Ke ödrin e úkhacakôu ödra hnyi dok adre hwenyi ien hwen Heberu, ka habe, Amagedo.

17 Ke haba at a seveniny ame hingälâ anyin kaia ethö hnyi wanben; me ame o but hwan ae gan únyi hnyi uma kap, únyi hnyi theron ame ha, ka habe, Adre hia but ânyâ: 18 me ame manen dut je hucuce, me je hofuc, me je hendreng; ke e hu hwiöi ae gan hmâ, e ba khaca a helâe hwân ehac ge ibi hu at hnyi hmeledrany, e ba hwiöi ae gan me hwege helâe. 19 Me ame subâ kunâ but taun ae gan, k' ame ü but je taun hnyi je hnyei: ke adre me únykúme Babulona taun ae gan hnyi hnyi makan Khong he ka ham kâu kaiainy wainainy anyin tang hmönyin. 20 K' ame kec dö je bomene hia, k' adre me ca wâ hmetu je bucen. 21 Ke ame ta but únyi anyi drany ka hnyi hon tavat we wahma he gan hmâ, haba ihmakiny je owe, me helâ me khaca talan: k' ame haikongoâ Khong hnen tavat can mok eling a we wahma; anyin ae gan hmâ hmönyin mok e.

HNYIMAKAN 17.

KE ame o thö ke at hnyin je angela a seven hnyat ae hu gadrin je kaia a seven, k' ame ha kõnya, ka habe, Aiö u, oge me he ka omanenâ köu hna bi hwaban ka momo hnyi gethen, at ae nua, k' ame laba hon je köiö ae se hia; 2 ke ta je thaniny hmeledrany adre me bi únyi monu mē, k' ame monu aten hmeledrany hnen wainainy anyin bi únyi monu. 3 Ke e ame hum nya hnyi Hanu ka hnyi hnye-buba: me oge me wâ momo ame laba hon meno ae dra, e unöngöt ge je ien bi gan, ke hu je ban a seven, ke je fao a ten. 4 Haba momo, me ame khavâ úkhaú ae udrudrâ hlit ke dra, ke a theibâ ge gol me je

veto ae gan hwaban me je penina, ke e hu hnyi hnyamen kaia gol, ke unöngöt ge je únyi ae ikiki, a ta je únyi ae kong únyi hnyi anyin bi únyi monu, 5 ke e hnyi hon bariny ien adre sihnalimen, ka habe, E IYONG, BABULONA AE GAN, HNYEN OMOMO HNYI GETHEN, KE TA JE ÚNYI AE IKIKI HNYI HMELEDRANY. 6 Ke oge me wâ momo ame monu a ijem dren wakap, ke dren tavat adre me ohnathu Iesu. Ke oge me wâ me oge me láiâ gan hmâ. 7 Haba angela ame ha kõnyâ ka habe, Anyin a ieu u me láiâ? Oge me he ka ha köu bongon ae iyong anyin momo, me meno a taben, ae hu je ban a seven me je faoiny a ten. 8 Haba meno u me wâ, me, ka e bi ehac, ke ba bi walang ang; ke e ame he ka ölö úheny eü hnyi hmonop ae dit hmönyin me he but ka hnyi hnaúhangö. Ke ame he ka láiâ hnen tavat adre me laba hnyi hmeledrany, tavat adre me ca hia but set je iödra hnyi tusiny möt hwân hnyi hna bi taben hmeledrany, ödra ka wâ meno, a e bi ehac, ke ba bi walang ang, k' ame he ka o. 9 Ke walang hnyok ae hu metâ hnyin. Haba je ban a seven, me wale je bucen a seven, wale momo ame laba hon: 10 ke wale je than a seven, a ü but thabüng, ke ka e bi khaca, ke tiga hia bi khaca; ke e ka o but, me úcú kâu he ka mē laba. 11 Ke haba meno a ka e bi ehac, ke ba bi walang, wale at a ka eitiny ke hanen hnyat a seven; ke e ame he ka he ka hnyi hnaúhangö. 12 Ke haba ta je faoiny a ten u je wâ, me, wale je than a ten, hnyat ae tiga ca hu gadrin dökhü; ke adre hnz ködrin musi helâke me je than, tha ödrin me meno, hnyi awa a khaca. 13 Khaca thibi je hnyekudrin, ke ödrin e ham mandrin man me anyidrin musi ka meno. 14 Ame he hnyat eling ka vat me Arenio, ke ame he Arenio ka hwege hudrin, anyin e Tuhan ta je tuhan, me Thaniny ta je than; ke ame he tavat a tha ödra mē ka hwege, tavat adre hawâ, me tavat adre úca, me tavat ae hnathu. 15 Me e ame ha kõnya, ka habe, Haba je köiö u je wâ, waleji ame laba hon momo hnyi gethen, wale je tavat, me tavat ae se, me je hnyei, me je hwen hnyei. 16 Ke haba je faoiny a ten u je wâ, ke meno, me wale hnyat ödrin e he ka hûkotiâ momo hnyi gethen, me söh e, me ohethuâ, me an viny, me thong degecâ hnyi meic. 17 Anyin a Khong ame ip eü hnyi je hnyekudrin he ka ohwâdâ weny,

me he ka tha hnyok, me ham dökhdurin dökhu ka meno, ke ne o but ame hwadá je hofuc hwan Khong. 18 Ke haba momo u je wá, me wale taun ae gan, wale at ame musö je thaniny hmeledrany.

HNYIMAKAN 18.

KE hwaban ta je únyi e, inya oge me wá ke angela minya ame utut úheny hnyi drany, ae hu musi ae gan; ke ame melam hmeledrany ge anyin hmanenang. 2 Ke e ame ha ge hwan ae hwege, ka habe, A ü but, a ü but Babulona ae gan, k' adre wia e hnân hnyaban ta je demoni, me uma umen ta je hanu hia ae kong, me uma umen ta je meno hia ame gâ ae ikiki k' adre húkotiá. 3 Anyin a ü but ta je hneyi hia ge wainainy tang hmönyininy bi únyi monu anyin momo; ke ame bi únyi monu mē je than eang hmeledrany, k' ame tren omjeü tavat úcü eang hmelen ge maniny hna osenyinâ anyin momo.

4 Ke oge me löng ke hofuc minya hnyi drany ame ha, ka habe, Lakeik lö, he but ge momo, m' öbun e ca hnyi hanen anyin je hulö, me me ca o köbun anyin je mok: 5 anyin a o but hnyi drany anyin ta je hulö, ke Khong ame únykúme anyin ta je monu. 6 Bi hwaban ju káu helä me hnen hna ham, ke olo ju bi hwaban káu hoton anyin huliwa: ke olo ju úhaniken káu hnyi utkaia e ame úhaniken. 7 E gan hmä hnen hna hamen ogânä e bi, me ka osenyinâ anyin, awe, ânây thö káu heläe ge vec me hlöuhlöu: anyin a haingen eü hnyi hnyekon, ka habe, Inya oge me laba a momo than, k' iny ca safac bi, ke oge me ca he ka wá hlöuhlöu. 8 Anyin a wale ame he ka o káu anyin je mok hnyi bong a khaca, wale mok, me hlöuhlöu, me hmiä; ke adre me he ka thong degecâ e hnen meic; anyin ae hwege Than a Khong at ame bi hwaban káu. 9 Ke ame he je thaniny hmeledrany tavat adre me bi únyi monu me tha senyin mē ka tenge thungaü can ödrin ka wá hainy hna thong e, 10 ke ödrin e tot sákâü anyin a ödrin e outen anyin vec, me ha, ka habe, Ekölö, ekölö ge taun ae gan a Babulona, taun ae hwege! anyin ame o but hwaban köu hnyi awa a khaca. 11 Ke ame tenge thungaü gan hnen tavat úcü hnyi hmeledrany, anyin ae ba hmetu at ae khana he ka úco je omjedra; 12 wale omjeü gol, me sileva, me je veto ae gan hwaban, me je penina, me

mano lino ae úhnyükong nân, me mano ae udrudrá hlit, me silek, me mano ae dra; me je utö ae bo so hia, me je kaia hia a nyon elefan, me je kaia utö hia ae gan hwaban, me bras, me fao, me veto out; 13. me kinamo, me anomo, me je únyi ae bo so, me muro, me libanu, me waina, me wakaco, me falawa ae so, me hwit, me je meno, me je mamoe; me je hors, me je kariota, me je unyin; me je hanon at. 14 Ke a he but gam bi je wan ame weny hnyekom, ke hia but gam ta je únyi hia ae senem me meic, k' ame ca he hmetu tavat ka wá bala. 15 Ke ame he tavat úco ta je únyi e, waleji hnen momo hna otreñi ödra ka tot sákâü, anyin a ödra outen anyin vec, adre me tenge thungaü; 16 me ha, ka habe, Ekölö, ekölö ge taun ae gan, waleji ame khavá mano lino ae úhnyükong nân, me mano ae udrudrá hlit, me dra, me otheibâ ge gol, me je veto ae gan hwaban, me je penina! 17 anyin adre ohia but hnyi awa a khaca tang omjeü ae gan hmä heläe. Ke ame tot sákâü ta je tuhan hu, me tavat adre me kec ehe hnyi köiö, me je aten hu, me tavat adre me huliwa hnyi köiö, 18 me ha, ödra ka wá thö hainy hna thong e, ka habe, Ewa taun ae úcü me taun eang ae gan! 19 Me adre me khaü drüu ka hnyi je bödra, me hongot, me tenge thungaü, ka habe, Ekölö, ekölö ge taun ae gan, at ame otreñi ödra hia ge omjeü tavat ae hu hudrin hu eü hnyi köiö únyi ge únyi hnathuiny! ke adre otheduocâ e hnyi awa a khaca. 20 U ma otreñi dö gan drany lö, me öbun wakap, me ta je aposetolo, me ta je perofeta; anyin a Khong ame hia but bi hwaban káu cabun bi.

21 Ke haba ke angela ae hwege ame hom veto heläke me veto adre omomono ae gan me khüa ka hnyi köiö, me ha, ka habe, Heläe minya adre me he ka hagutâ Babulona taun ae gan, ge hna khüa ae hwege, ke adre me ca he hmetu ka wá e bala. 22 Ke adre me ca he hmetu ka löng unyâm hwan tavat khumöngö kitara, me ta je únyi khumöng, me tavat adre me túö köwi, me tavat adre me túö khoto; ke adre me ca he hmetu ka wá unyâm at ame huliwan je huliwa; ke adre me ca he hmetu ka löng unyâm hwan veto hnân oamamä; 23 ke ame ca he hmetu ka umumelam hnyi wanbâm báhlân lamepa; ke adre me ca he hmetu ka löng hnyi wanbâm ifucin li at ödre tep faipoipo: anyin a haba tavat úcü unyâm, me ödrin e beönua hnyi hmele-

drany : ke adre me omonoâ ta je hnyei hia ge ânyâm je bibihwakecin. 24 Ke adre me wâ gan dren ta je perofeta me wakap, me tavat hia adre hia but hlingâ hnyi hmeledrany.

HNYIMAKAN 19.

KE hwaban ta je ûnyi e inya oge me löng helâke hwan tavat ae se hia ethö hnyi drany adre me ha, ka habe, Haleluya ; E unyin Khonguta möt, me hmanenang, me man : 2 anyin ae hnathu me wisa hnen hna bi hwaban ; anyin a hia but bi hwaban ka momo hnyi gethen ae nua, at ame okongoâ hmeledrany ge anyin bi ûnyi monu, ke a hia but bi hwaban kâu can dren lathnyabainy. 3 Ke adre me ha hnathu, ka habe, Haleluya. Ke ame hai göranyai nyiele nyiele balua hainy momo. 4 Ke haba wahingat a twente foa, ke ta ûnyi a vak ae möt, me ödrin e ta ju me khudrung ka Khong at ame tabâ theron, me ha, ka habe, Amen ; Haleluya. 5 Me ame o but hofuc ûnyi hnyi theron, ka habe, Ogânâ thö Khonguta öbun je lathnyabainy, me tavat adre me outen e, tavat ae ûhnyükong me tavat ae gan. 6 Ke oge me löng helâke hwan tavat ae se hia, ke helâke hwan ta je köjö ae se hia, ke helâke hwan hendreng ae gan hmâ ame ha, ka habe, Haleluya : anyin a Than a Khonguta Atækhanahia ame musi. 7 E so ate me senyin me hobâ, ke so ate me ham kâu hna ogânâ : anyin ame o but Arenio he ka faipoipo, ke a hia but âiân hamen penapena e. 8 Ke adre me hna kâu he ka khavâ mano lino ae ûhnyükong nân ae hadröngöc ke ba hnyikongon : anyin a haba mano lino, me wale hwakecin ae wisa anyin wakap. 9 Ke haingen könya, ka habe, Sihalimen ju, ka habe, Hnödra hnahic adre me hawâ ka hnyi bijeûiny faipoipo anyin Arenio. Ke haingen könya, ka habe, Wale hofuc ae hnathu hwan Khong. 10 Me oge me ta ju hnyi hmelen li can he ka khudrung kâu. Ke haingen könya, ka habe, Ohe, u ma ca ânyâ : anyin a iny athnyaba möu me je liamekeiny möu, tavat adre hom hna ohnathu Iesu : khudrung ka Khong : anyin a haba hna ohnathu Iesu me wale hanon hna operofeta.

11 Ke oge me wâ drany adre khöng ; ke wâ bi hors ae hau, ke haba li ien at ame tabâ e me Wisa me Hnathu ; ke e ame lnei me vat hnyi hwakecin ae wisa. 12

Haba li emakan, me bâhlân meic, ke se hia je korona hon ban ; ke hu ien adre set wale ae ca khana hnen at, ke ka hake e thibi. 13 Ke adre okhaûâ e ge ûkhaû adre osisidra ge dra : ke adre me ha ien, ka habe, Logo anyin Khong. 14 Me ame he hoton, je utbavat hnyi drany, adre me tabâ je hors ae hau, adre khavâ mano lino ae ûhnyükong nân, ae hau me ba hnyikongon. 15 Ke ame o but ûnyi hnyi hnyimen hele vat ae so hwan, me me he ka kot kâu ta je hnyei : ke e ame he ka musi ödra ge osö fao : ke e ame ututo hnyi hna hlic vineiny tang hmönyin ae gan anyin Khong Atækhanahia. 16 Ke e ame khavâ khaûen, ke adre set ke ien hnyi jevan, ka habe, **TUHAN TA JE TUHAN ME THAN-INY TA JE THAN.**

17 Ke oge me wâ ke angela ame tot hnyi seûnö ; ke e ame ha ge hwan ae gan, ame ha ka ta je meno ame gâ ethö, ka habe, Ai öbun ka ûkhacaköu ka hnyi bijeû ae nua anyin Khong ; 18 m' öbun e he ka an viny ta je than, me viny ta je taben vat, me viny tavat ae hwege, me viny ta je hors me tavat adre me tabâ, me viny tavat hia thithö, tavat adre hna bâûâ me ta je athnyaba, me tavat ae ûhnyükong me gan.

19 Ke oge me wâ meno me ta je thaniny hmeledrany, me anyidra je utbavat adre me ûkhacaköu he ka vat me at ame tabö hors me anyin utbavat. 20 Me adre me kât meno ae hiny ; me perofeta thoi minya waleji at ame ânyâ ta je haten hnyi hnyimakan, hnân omono tavat adre me kap haten meno, m' ödra minya adre me khudrung ka at ae we e : ke adre me khû' ödru meli ödru ka hnyi nem a meic ame hlâ ge teio : 21 ke adre me hlingâ je kolon ge hele vat anyin at a tabö hors, wale hele vat ame o but ûnyi hnyi hnyimen : k' ame sekon dö je meno ame gâ hia ge je unyidrin.

HNYIMAKAN 20.

KE oge me wâ ke angela ame utut ûheny hnyi drany, ke e unyin kiiny hmonop ae dit hmönyin, ke e hnyi hnyamen tö fao ae gan. 2 Ke e ame kât drakona, wale on ehac, a wale Diabolo me Satana, me ame ca e ke ne o but hnyi wan thauzan je huna, 3 me khûâ e ka hnyi hmonop ae dit hmönyin, k' ame hlöng e, k' ame ohmâ haten hon, me me ca he hmetu ka omonoâ ta je hnyei, ke ne o but ame bekhöt je huna a wan thauzan : ke hwaban e, e ûcû

he ka thang hmetu but e hnyi ûen ae okhulit.

4 Ke oge me wâ je theron, me hnyat ödrin e laba hon, ke adre me hna ködrin he ka hnei : ke oge me wâ minya je hanon tavat adre subâ je nyidra can hna ohnathu Iesu, ke can hofuc hwan Khong, ke tavat adre me ca hnyi khudrung ka meno, me at a we e, ke adre me ca hnyi kap haten hon je baridra ke hon je hnyamödra ; ke adre me möt, k' adre me tha musî me Keriso ke ne o but hnyi je huna a wan thauzan. 5 Ke haba je kolon tavat adre me mokcu, me adre me ca möt hmetu bi ke ne o but ame bekhöt je huna a wan thauzan. Wale möt hmetu a bân. 6 E hnahic ut me kap tavat adre me hnyi hanen möt hmetu a bân : e ba maniny mok a loiny ködrin ; ke adre me he bi ka tavat bihut ka Khong me Keriso, ke adre me he ka tha musî mē ke ne o but hnyi je huna a wan thauzan.

7 Ke e ka bekhöt dö je huna a wan thauzan, me adre me he ka thöng Satan hmetu but úheny hnyi uma ceat, 8 me ame he ka o but ka omonoâ ta je hnyei wale hnyi vak ta ke keihen hmeledrany, wale Gog me Magog, he ka úkhacaköu ödra ka hnyi vat : ke helâ me önyin köiö úseidra. 9 Ke adre me ölö thö me dedo hmeledrany, me igigilö hunuma anyin wakap, me taun ae önykúminy : ke ame o but meic únyi hnyi drany me thong degeci ödra. 10 Ke adre me khúö diabolo at ame omonu ödra ka hnyi nem a meic me teio, waleji a hnen minya meno me perofeta thoi ; ke adre me he ka oveci ödra hnyi lany me lit nyiele nyiele balua.

11 Ke oge me wâ theron ae gan ae hau, me at ame tabâ, ke ame kec hnyi hnyimakan hmeledrany me drany ; ke ca manen bi ke dok hobi ködru. 12 Ke oge me wâ wamok, tavat ae gan me tavat ae úhnyükong adre me útilen hnyi hnyimakan theron ; me adre me khöng ut je tusi, ke adre khöng ke tusi bi a wale tusiny möt : me adre me hnö wamok ge ta je únyi adre sihnalimen hnyi je tusi, hoton anyidra ta je huliwa. 13 Ke haba köiö, me ame ham hmetu tavat adre mok hnyin ; ke mok minya, me Hedis, ödru me ham hmetu tavat adre mok unyidru : me adre me ve hnei ödra hoton anyidra ta je huliwa. 14 Me adre me khúö mok me Hedis ka hnyi nem a meic. Wale mok a loiny, a nem a meic. 15 Ke e ka manen dut khaca waleji adre ca sihnalimen hnyi tusiny möt

me adre me khúâ but e ka hnyi nem a meic.

HNYIMAKAN 21.

KE oge me wâ drany a teb únyi me hmeledrany a teb únyi : anyin a hia but drany a bân me hmeledrany a bân ; ke ba hmetu bi köiö. 2 Ke inya oge me wâ taun ae kap, Jerusalema a teb únyi, ame utut úheny hnyi drany únyi ge Khong, adre penapena helâ me hlu ame he ka faipoipo, adre theibâ e hobi kâu áiân. 3 Ke oge me löng hofuc ae gan únyi hnyi theron ame ha, ka habe, Wâ bi, e unyin tavat uma menâ umen Khong, ke e ame he ka laba unyidra, ke adre me he ka lakeiny, ke ame he Khong ka tha e m' ödra, k' ame he ka Khongudrin : 4 ke e ame he ka kot degecâ ta je deköiö hia únyi hnyi ta je emaködra ; ke ba hmetu bi mok ; ke ba hmetu bi hnyok ae hmak, me tenge, me vec : a hia but ta je únyi a bân. 5 Ke ame ha at ame laba hon theron, ka habe, Wâ bi, oge me he ka ohâtâ ta je únyi hia thithö. Ke e ame ha, ka habe, Sihnalimen ju : anyin ae hnathu me wisa ta je hofuc e. 6 Ke haingen könya, ka habe, Adre hia but ányâ. Inya Alefa me Omega, wale hwân me obiny. Oge me he ka ham báúâ köien möt ame pupua ka at ame beic. 7 Ame he ka hu ta je únyi e hnen at ame ton ; me oge me he ka Khongon, ke e ame he ka nöku. 8 Ke haba tavat adre me ot, ke tavat adre me ca labageju, ke tavat ae ikiki, ke tavat úhlingö, ke tavat bi únyi monu, ke tavat tren khong, ke tavat adre me hmi ka je hnatheat, ke tavat hia adre me thoi, me ame he ka hu hwajekhöüdra hnyi nem ame hlâ ge meic me teio ; wale mok a loiny.

9 Ke ame o but könya ke at hnyi je angela a seven hnyat ae hu je kaia a seven ae unöngöt ge je mok a seven a biliny ; me e ame úhnenamö mönya, me ha, ka habe, Aiö u, oge me he ka omanená köu hlu áiân Arenio. 10 Me e ame hum nya hnyi Hanu ka hnyi bucen ae gan me beû göranyai, me omanená könya taun ae kap wale Jerusalema ame utut únyi hnyi drany únyi ge Khong, 11 ke hu hmanenanginy Khong hnyin : ke haba melaminy me helâ me veto ae gan hmâ hunönyin hwaban, ke helâ me veto jasepi ae alai : 12 ke hu hak veto ae gan me beû göranyai ; ke hu je homagöüle a twelw, ke twelw ta angela hnyi je homa-

göule ; k' adre me sihnalimen je ien hnyin, wale je ien je tribu a twelv anyin lakon Isaraela : 13 kun ta homagöule jimeyö ; ke kun ta homagöule hnyi hwadrö ; ke kun ta homagöule hnyi hwaiöu ; ke kun ta homagöule jimeü. 14 Ke twelv ta taben hak veto hnyi taun, ke haba hnyi je taben eling e hu je ien je aposetolo a twelv anyin Arenio. 15 Ke haba at ame ûhnenamö mönya, me hu gan hlowe gol hnân tuluto taun, me je homagöuleiny, me je haginyy veto. 16 Ke tha úcú vak ta baten taun, ke tha úcú ibeüen me úlauen : ke e ame tuluto taun ge hlowe, twelv thauzan je setadia : ke tha úcú thibi ibeüen, me úlauen, me ibeüen göranyai. 17 Ke e ame tuluto haginyy veto, me wan haded ke fâte foa je kubit, hoton tulutiny at, wale angela. 18 Ke haba hna up haginyy, me je veto jasepi : ke haba taun, me gol ae so, helâ me uselat ae alai. 19 Ke adre ohmanenangâ ge je veto ae gan hwaban hia taben haginyy taun. Jasepi taben a bân ; safairo a loiny ; kalekedoni a kuniny ; semerado a vakiny ; 20 sadonuki a thabúnginy ; sadio a siksiny ; kerusolite a seveniny ; berulo a eitiny ; topazio a naininy ; kerusopala a teniny ; uakini a eleveniny ; amethusa a twelviny. 21 Ke haba je homagöule a twelv, me je penina ling a twelv ; úsa khaca penina je homagöule : ke haba getheniny taun, me gol ae so helâ me uselat ae alai. 22 Ke ba uma kap oge me wâ e : anyin a Than a Khong Aekhanahia me Arenio uma kapiny. 23 Ke ca únyi hnathu bi seüñö me tehi he ka omelamá taun ; anyin ame omelamá e henen hmanenanginy Khong, ke lamepainy Arenio. 24 Ke ame he ta je hnyei ka he hnyi melaminy : ke haba je thaniny hmeledrany, me adre me sukhöünâ anyidra hmanenang ka hnyin. 25 Ke adre me ca he ka hlöng je homagöuleiny hnyi lany (ke ba lit e) : 26 ke adre me he ka sukhöünâ ka hnyin hmanenanginy ta je hnyei me hna ogânâ : 27 ke ame ca he ka hnyi dit kâe ke únyi ae kong, me at ame ányâ ikiki me thoi : ke hake ödra thibi tavat adre sihnalimidrin hnyi tusi anyin Arenio a tusiny möt.

HNYIMAKAN 22.

KE e ame omanenâ könya wagewiny köiö möt ae alai helâ me uselat, ame di hnyi theron anyin Khong me Arenio, 2 hnyi wanben getheniny. Ke e hnyi li

baten wagewe úöiny möt, at ame wa wan a twelv je bongon, ke ame wa hnyi je tehi hia : ke haba ta je lan úö me hnân omelö ta je hnyei. 3 Ke ba hmetu bi hnaúhangö : ke ame he ka e bi hnyi wanben theron anyin Khong me Arenio ; 4 ke ame he je lathnyabainy ka huliwa kâu ; ke adre me he ka wâ hnyimakan ; ke e hon baridra ien. 5 Ke ame ca he hmetu ka lit ; ke ca únyi hnathu bi ködra lamepa, memelaminy seüñö ; anyin a he Than a Khong ka melamidra : ke adre me he ka musi nyiele nyiele balua.

6 Ke haingen könya ka habe, Wale hofuc ae wisa me hnathu : ke haba Than a Khongon ta je hanon je perofeta ame kunâ anyin angela he ka omanenâ ka lathnyabainy ta je únyi ame he ka ie o. 7 Hnahic hnen at ame löng hoton ta je hofuc adre perofeta hnyin tusi ang.

8 Ke inya Ioane at ame löng me wâ ta je únyi e. Ke hnyi úen oge me löng me wâ, me oge me ta ju hnyi hmelen li can angela, at ame omanenâ könya ta je únyi e. 9 Me e ame ha könya, ka habe, Ohe, ca ányâ, iny athnyaba möu me je perofeta a je liamekeiny möu, me tavat adre me löng hoton hofuc hnyi tusi ang : khudrung ju ka Khong.

10 Ke haingen könya, ka habe, Ca ohmâ haten ta je hofuc adre perofeta hnyin tusi ang ; anyin ae hakekeny jut úen. 11 Haba at ae ca wisa, me ame he bala bi ka ca wisa : ke haba at ae ikiki, me ame he bala bi ka ikiki : ke haba at ae wisa, me ame he bala bi ka ányâ wisa : ke haba at ae kap, me adre me he bala bi ka okabâ. 12 Wâ bi, oge me he ka ie o ; ke e unyik hwaban, he ka ve ham ka tavat e úcú me anyidra ta je huliwa. 13 Inya Alefa me Omega, wale bân me biliny, a can me obiny. 14 Hnahic hnen tavat adre me hneü anyidra ta je úkhaú, me me úcú ködra he ka he ka hnyi úöiny möt, me he ka dit ka hnyi je homagöuleiny taun. 15 Eü hnyi hoton ta je kuli, me tavat tren khong, me tavat bi únyi monu, me tavat úhlingö, me tavat adre me hmi ka je hnatheat, me tavat hia adre me weny me mádrâ thoi.

16 Inya Iesu oge hia but kunâ anyik angela he ka thumetu öbun ge ta je únyi e hobi kâu ta je ekalesia. Inya khüen me Nöku Davita, ke okhú lany ae hadröngöc.

17 Ke haingen Hanu me hlu a teb fai-poipo, ka habe, Aiö u. Ke so ame ha minya at ame löng, ka habe, Aiö u. Ke

HNA OMANENÂ 22.

haba at ae beic, me he but jem : ke haba at e weny, me hom báúá ju kôïöiny möt.

18 Inya oge me ha wia ka tawat hia adre me löng ta je hofuc adre me perofeta hnyi tusi ang, ka habe, A ne he bi ke at ka bi hanen ta je hofuc e, me ame he minya Khong ka bi hanen kâu ta je mok adre sihnalimen hnyi tusi ang: 19 ke a ne ke at ame ohia, ke ong hofuc adre perofeta

hnyi tusi ang, me ame he Khong ka ohia jekhon hnyi úöiny möt, me únyi hnyi taun ae kap, wale adre me sihnalimen hnyi tusi ang.

20 Haba at ame ha wia ta je únyi eang, me e ame ha, ka habe, Eke : oge me he ka ie o. Amen : Than lö, Iesu, aiö u.

21 E so e unyin wakap ibetengiö báú anyin Than Iesu. Amen.



